


Tĩrtũm kapẽr ã kagà
nyw



New Testament in Apinayé (BR:apn:Apinayé)

Tĩrtũm kapēr ã kagà nyw**New Testament in Apinayé (BR:apn:Apinayé)**

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files dated 29 Jan 2022

383a4e22-34cd-505f-9cc2-2f9921e7aa9f

Contents

Matêwre	1
Makre	133
Rukre	208
Juãw	345
Atre	442
Rômãn	558
Wam Korĩt	626
Sikũn Korĩt	686
Karatas	724
Epes	747
Piripos	769
Korosẽ	783
Wam Tesarõn	797
Sikũn Tesarõn	809
Wam Ximotre	816
Sikũn Ximotre	833
Xitre	845
Piremõ	852
Eprêw	855
Xiakre	902
Wam Pêtre	918
Sikũn Pêtre	935
Wam Juãw	945
Sikũn Juãw	958
Hapuhã Juãw	960
Jutre	962
Apokarip	968

Matêwre
Matêwre kot tanhmã
Jejus kot amnhĩ
nhĩpêx to ho pa hã
kagà

Matêwre na pre kagàja nhĩpêx. Kêp Jejus nhỹ hã hkrajê jahkre xwÿnh na pre. Nê kêp Ijaew. Hixi hõ pê na Rewi. Tã na pre mẽ pamã kagàja nhĩpêx nê kamã Jejus kot pika hwÿr wrÿk nê kator nê tanhmã ri amnhĩ nhĩpêx to ho pa hã harê nê hã kagà. Nê kêp mẽ panhõ pahшти mex o mex ã harê nê hã kagà. ã na pre Matêwre mẽ pamã Jejus jarê nê hã kagà anê.

Apraãw kanrêhã hkra nê htãmnhwÿjê nhĩxi

Rukre 3.23-38

1 Amnepêm Jejus Kris kormã pika hwÿr wrÿk kêt ri hkukamã higêtjê nhĩxi na jaja.

Wÿj ri higêtjê hõ nhĩxi na pre kêp Tawi.

Nê Tawi xwÿj ri higêt nhĩxi pê na pre Apraãw.

2 Nê Apraãw kra na pre kêp Ijak.

Nê Ijak kra na pre kêp Jako.

Nê Jako hkra na pre kêp Juta mẽ htõjaja.

3 Nê Juta hkra na pre wa kêp Pere nê Jera.

Nê Pere mẽ Jera wa katorxà na pre kêp Tama.

Nê Pere hkra na pre kêp Erõ.

Nê Erõ hkra na pre kêp Ari.

4 Nê Ari hkra na pre kêp Amĩnatap.

Nê Amĩnatap kra na pre kêp Nasõ.

Nê Nasõ hkra na pre kêp Samõ.

5 Nê Samõ hkra na pre kêp Poas.

Nê Poas katorxà na pre kêp Raap.

Nê Poas kra na pre kêp Opex.

Nê Opex katorxà na pre kêp Rutre.

Nê Opex kra na pre kêp Jese.

6 Nê Jese hkra na pre kêp Pahihti Tawija.

Nê Tawi hkra na pre kêp Sarumãw.

Sarumãw katorxàja Uristi hprõ na pre.

Tã nhũm pre Uristi ty nhũm Tawija hãmri

mÿrpê Uristi hprõ ho hprõ nê kamã hkra.

Nhũm wa hkraja kêp Sarumãw.

7 Nê Sarumãw kra na pre kêp Ropã.

Nê Ropã hkra na pre kêp Apiasti.

Nê Apiasti kra na pre kêp Asti.

8 Nê Asti hkra na pre kêp Josapa.

Nê Josapa hkra na pre kêp Jorã.

Nê Jorã hkra na pre kêp Ojis.

9 Nê Ojis kra na pre kêp Jotã.

Nê Jotã hkra na pre kêp Akaj.

Nê Akaj kra na pre kêp Ejekis.

10 Nê Ejekis kra na pre kêp Manase.

Nê Manase hkra na pre kêp Amõ.

Nê Amõ hkra na pre kêp Josis.

11-12 Nê Josis kra na pre kêp Jekonîs mē htōjaja.

Kormã mē htîr ri na pre Papirõn nhõ xwýnhjaja kot mē hkurê kaxâr kaxyw mē hwýr hprõt nê mē unê. Ijaew piitã unênh pa nê ma akupÿm mē õ pyka hwýr mē ho hapêx nhûm mē hpãnhã Papirõn kamã pa ho pa. Jakamã nhûm Josis mē hkra Jekonîs mē htōjaja mē hipêêxà pyrà nê Papirõn kamã pa ho pa.

Nê Jekonîs kra na pre kêp Saraxi.

Nê Saraxi hkra na pre kêp Joropape.

13 Nê Joropape hkra na pre kêp Apiux.

Nê Apiux kra na pre kêp Eriakî.

Nê Eriakî hkra na pre kêp Ajo.

14 Nê Ajo hkra na pre kêp Satok.

Nê Satok kra na pre kêp Akî.

Nê Akî hkra na pre kêp Eriux.

15 Nê Eriux kra na pre kêp Eresa.

Nê Eresa hkra na pre kêp Matã.

Nê Matã hkra na pre kêp Jako.

16 Nê Jako hkra na pre kêp Juje.

Nê Juje hprõ na pre kêp Marir.

Nê Marir Kra na pre kêp Jejus.

Mê kot kãm: “Tîrtûm kot mē pakaxyw âm xwýnh” anhÿr xwýnhhta na pre.

17 Nhûm Apraãw kanrêhã axte axpên kanrêhã mē àptâr nywjaja Tawija wýr kêp 14. Nê Tawi nhîrõ pê Papirõn hwýr mē hapêx kêt ri axpên kanrêhã mē àptâr nywjaja mãânên kêp 14. Nê ra Papirõn kamã mē pa nhîrõ pê axpên kanrêhã Jejus pê Tîrtûm kot mē pakaxyw âm xwýnhhta wýr mãânên kêp 14. ã na pre Jejus Kris xwýj ri higêtjê nhîxi anê.

Jejus Kris kator

Rukre 1.26-38, 2.1-7

18 Tã ã mē hixi jarênh kot anhÿr kanrêhã na pre ã Jejus Kris kator anê. Nhûm pre kormã Jujeja Marir o hprõ kaxyw. Nom kormã ho hprõ hkêt ri nhûm htujarõ. Kormã hkukrit tã nhûm Tîrtûm Karõ tanhmã ho nhûm htujarõ.

19 Hãmri nhûm Jujeja harênh ma nê tee ri hamaxpêr nê htÿx nhãm mēhõ kot kêp htu hã hkamnhîx. Juje kot tãm amnhî nhîpêx nê tãm hamaxpêr jakamã tee ri kot ho hprõ hkukamã hamaxpêr. Nê hamaxpêr o:

—Nà pa mãn ixte hturê hã. Nhãm mēhõ ra kot ã hipêx anhÿr kênã. Nà kot paj ho ixprõ hkêt nê. Nom kot paj ixkwýjê mã ã kot amnhî nhîpêx anhÿr o amnhîrit kêt nê. Kot paj anê nhûm mē kuma nê ho kapêr punuj nhûm amnhî kamã

hpijaàm tỳx nē. Ja pymaj kot paj ixkatāt kōt hkaga kurē kumrēx. Nom ixkwỳjē hkàx ã hkaga. Anē.

²⁰ Nē ã hamaxpēr anhỹrja o ra gōr nē nō. Nhũm Tĩrtũm kapēr o mẽ wrỳk xwỳnhjē hō hwỳr wrỳ nē hwỳr axàn kuri xa. Hãmri nē kãm:

—Pa Juje? E ot pa awỳr tē. Kwa tee ri Marir o aprō hkukamã ajamaxpēr punuj kêt nē. Mãmri ho aprō. Mēhō kot apê tanhmã ho hkêt. Tĩrtũm Karō na pre ã hipêx anē. Jakamã kwa tee ri ajamaxpēr kêt nē mãmri ho aprō nē war apa.

²¹ Koja hkrare kato nē myre nē hprêk. Hãmri nē mẽ kot hkôt amnhĩ xunhwỳr xwỳnhjaja mẽ kot amnhĩ tomnuj piitã pê mẽ utàr pa. Jakamã koja kato ka wa hã hixi mẽ nhũm kêp Jejus. Anē.

Nhũm pre ã Tĩrtũm kapēr o mẽ wrỳk xwỳnhja kãm kapēr anē. Ijaew kapēr kãm Jejus jarēnhja te kêp “Tĩrtũm kêp mẽ papytār xwỳnh” anhỹr pyrāk. Jakamã nhũm Tĩrtũm kapēr o mẽ wrỳk xwỳnhja Juje ôt kãm ã kãm Marir jarēnh anē.

²²⁻²³ Nom kormã ã kãm kapēr anhỹr xwỳj ri na pre ra Tĩrtũm nhỹ hã kapēr xwỳnhjē hōja kukamã tanhmã harēnh to nē hã kagà. Nē hã kagà ho:

E mẽ inhma nē inhmar tỳx nē ho apa. Koja nhỹrmã pykã já kamã mēhō kormã hkukrit tã htujarō. Nē hkra kato nē myre. Nhũm mẽ omu nē hã hixi mẽ

nhũm kêp Emanuew. Anē.

Ijaew kapēr kãm “Emanuew” jarēnhja te kêp “Ota ra Tĩrtũm mẽ pahkôt pa ho pa” anhỹr jarēnhja pyrāk. Jakamã nhũm pre Tĩrtũm nhỹ hã kapēr xwỳnhja Jejus kukamã ã harēnh anē nē hã kagà.

²⁴ Jakamã nhũm Tĩrtũm kapēr o mẽ wrỳk xwỳnhja Juje mã kapēr par mẽ nhũm hkrākato. Hãmri nē kot kãm ujarēnh xá hkôt Marir o hprō.

²⁵ Nom kormã tanhmã ho hkêt nē ri o pa rãhã nhũm hkrareja kato. Hãmri nhũm wa hã hixi mẽ nhũm kêp Jejus nē mãänēn kêp Emanuew.

2

Kanhêti ho studa xwỳnhjē jarēnh

¹ Nhũm pre Jejus Perēj kamã kato. Pika pê Jutej kamã. Pahi Erox kormã kot Jutej nhō xwỳnhjē ho amnhĩptār o pa ri nhũm õ pika kamã kato. Hãmri nhũm Tĩrtũmja kaxkwa kamã Kra kator jarēnh xà hã kanhêti raxta õ nhō nhũm pika hō kamã kanhêti ho studa xwỳnhjaja omu. Kanhêtiija pumu nē hkĩnh nē axpēn mã:

—Kwa ga mẽ kanhêti raxti mũj pumu. Mãn ra Ijaew nhō pahi nywta kato nhũm kanhêti mũj kêp ho amnhĩrit xà hã ajêt. Kwa pu mẽ ma hapēr o mō nē nhỹri tokyx omu nà.

Anē hãmri nē amnhĩ to pikuprōnh pa nē ma hapēr o pa. Ma myt gjêx xà hwỳr hapēr o pa hã apkati xohtō

ně. Hāmri ně ra Ijaew nhõ pika hwÿr pøj ně krĩ pē Jerujarē hwÿr hapêr o mō. Pahi Eroxa nhõ krĩja wÿr nhũm mẽ hapêr o mō hāmri ně kamā pøj ně mẽ hkrare nywta ã krĩ nhõ xwÿnhjê kukjêr o mō

² ně mẽ kām:

—Pa? Ot pa mẽ apê Ijaew nhõ pahi nywreta pumunh kaxyw mō. Ham kator xwÿnhta. Mě inhõ pika kamā na pa prem kaxkwa hkrax rũm kot ho amnhĩrĩt xà hã kanhêti raxta pumu. Hāmri ně nhÿri pahi nywre pumunh ně kutã mẽ ixkõn krã ho ixtêm ně ixkrĩ ně kãm mex o mex ã harênh kaxyw nêtãnh mẽ inhõ krĩ rũm hapêr o mō. Kwa mẽ inhmã harê. Nhÿri na? Na pa mẽ inhmã omunh prãm tÿx kumrêx.

Anhÿr o hã mẽ hkukjêr o mōr jakamã nhũm mẽ piitã pahi nywja jarênh ma ně axpên mã harênh o hprõt.

³ Nhũm pahi Eroxa harênh ma ně tee ri amnhĩ kukamã hamaxpêr. Pahi nyw kot mẽ ho amnhĩptâr ã hkamnhĩx nhũm já kêp omnuj tÿx ně. Nhũm krĩ nhõ xwÿnhjaja ã hamaxpêr anhÿr ã omu ně tee ri amnhĩ kukamã hamaxpêr o ra kãm ma ně.

⁴ Hāmri nhũm pahi Eroxa amnhĩ wÿr hkwyjê hã karõ. Mě õ patre krãhtũmjaja ně Tĩrtũm kapêr tũm o mẽ ahkre ho mẽ pa xwÿnhjaja nhũm amnhĩ wÿr mẽ hã karõ ně Tĩrtũm kot nhÿrmã mẽ hwÿr mēnh mã xwÿnhta ã mẽ hkukjêr kaxyw. Ně mẽ kãm:

—E Tĩrtũm kot nhÿrmã mẽ pahwÿr mēnh mã xwÿnhta ã na pa mẽ akukjêr kaxyw mẽ ato akuprõ. Kwa mẽ atõ inhmã harê. Koja nhÿrmã kator kaxyw ně nhÿri koja we kato? Xà jar mẽ panhõ krĩ kamā nà? Xà nhÿri krĩ hõ kamā? Anê.

⁵ Hāmri nhũm mẽ kuma ně kãm:

—Nà mẽ panhõ pika pē Jutej kamã koja xep kato. Krĩ pē Perěj kamãã. Na pre Tĩrtũm nhÿ hã kapêr o mẽ pa xwÿnhja ra hkukamã mẽ panhĩgêjtjê mã tanhmã harênh to ně hã kagà. Ně hã kagà ho:

⁶ Pa Perěj nhõ xwÿnhjaja? E mẽ anhõ krĩ grire htã kamã koja nhÿrmã mẽ panhõ Pahi Maatija kato. Koja mẽ pahpê Ijaewjê piitã mẽ pahto amnhĩptâr mex o pa. Jakamã mẽ anhõ krĩ grire htã koja Ijaew piitã axpên mã mex ã harênh o pa.

Ã na pre Tĩrtũm kot mẽ pahwÿr mēnh mã xwÿnhta kukamã mẽ kãm harê ně hã kagà anê. Anê.

⁷ Hāmri nhũm pahi Eroxa tee ri ã harênh anhÿrja ma hāmri ně amnhĩ wÿr mẽ kot hã àhkukjêr o mōr xwÿnhjê hã karõ. Nom nhÿri Ijaew kàx ã. Hāmri nhũm mẽ ma hwÿr mra ně agjê nhũm mẽ omu ně pahi nywta ã mẽ hkukja ně mẽ kãm:

—E mẽ aprĩ hã inhmã pahi kator nywta jarê. Tanhmã na pre ra mẽ ate kanhêti

pumunh ã mytwrÿ kute? Xà ham na ka prem omu nà amnepê mã? E mẽ aprĩ hã tanhmã inhmã harênh to. Anê.

Hãmri nhũm mẽ ihõja kãm:

—Nà na ra hã amgrà axkrut kaxyw. Na pa prem omu hãmri nê inhnojarê nê man ixpa ho ixpa ry rax nê mẽ awÿr pøj. Anê.

⁸ Nhũm mẽ kuma nê mẽ kãm:

—Tÿ. Nom jar amrakati. Perěj kamã na xep kato. E mẽ mãmri ma hwÿr mõi nê kamã hapêr. Hãmri nê nhÿri omu nê akupÿn ixwÿr mõi nê inhmã harê. Pa ijaxwÿja ma hwÿr mõi nê omu nê mẽ apyrà nê kãm mex o mex ã harê. Ijaxwÿja inhmã omunh prãm tÿx kumrêx. Anê.

Nom hêx rom ã ri mẽ kãm kapêr anê. Kot nhÿri harênh mar nê hã àmnênh nhũm mẽ kot hpĩr kaxyw nhũm hêx rom ã kãm omunh prãm tÿx ã amnhĩ jarênh anê.

⁹⁻¹⁰ Jakamã nhũm mẽ kuma hãmri nê kato nê ma Perěj wÿr mõi kurê kumrêx. Hãmri nê kormã mẽ õ pika kamã mẽ pa ri kanhêti ho studa xwÿnhhta nhũm mẽ axte amnhĩ kukamã omu nê hkĩnh nê. Nhũm ma Perěj wÿr mẽ hkukamã mõi nhũm mẽ omunh pê ma hkôt pa rãhã hwÿr pøj. Nhũm kanhêtiya pahĩ nywre nhõrkwÿ mÿri ajêt.

¹¹ Jakamã nhũm mẽ ma hkôt mra nê ixkreja wÿr pøj nê kapem xa. Hãmri nê mẽ kãm kapêr nê mẽ hwÿr agjê nê Jesus mẽ katorxãja wa

omu. Hãmri nê Jesus kutã hkõn krã ho hkrĩ hpa nê kãm kapêr nê kãm:

—Pa Xugitre. Hêxta waa nê. Nà amex o amex. Kot kaj nhÿrmã axàptàr hãmri nê apê mẽ inhõ Pahi Maati. Nà ãm hãmri na pa mẽ apumu nê ixkĩnh nê. Anê.

Hãmri nê ahpÿnhã kãm hkĩnh xà gõi. Kãm ôr kwÿ gõi nê kãm mẽhkuxwa xà hkwÿ gõi nê kãm te kot ràmre kuxware pyræk pê mĩraja nhũm mẽ kãm hkwÿ gõi. Mẽ hkĩnh xà hã kàxpore xohtõ nhũm prem kãm ôr pa.

¹² Hãmri nê ra akupÿm Jeru-jarê kamã pahĩ Eroxo wÿr no-jarê. Nhũm kamàt nhũm mẽ gõi nê hikwÿ hãmri nê ra amÿti. Nhũm Tĩrtũm mẽ hpimtir kãm mẽ kãm kapêr nê mẽ kãm:

—Pa? E mẽ inhma. Kêr ka mẽ akupÿm pahĩ Eroxo wÿr amrar nê kãm mẽ hkrata jarênh kêt nê. ãm kwarĩ ho kwarĩ. Nê kêr ka mẽ pry hõ hã mãn ma mẽ anhõ pika hwÿr akupÿm apa ho apa.

Anhÿr o mẽ kãm kapêr jakamã nhũm apkati nhũm mẽ kãnhmã hkrĩ hãmri nê Tĩrtũm kot mẽ kãm hã karõ xà hkôt ma akupÿm mẽ õ pika hwÿr pa kurê kumrêx nê akupÿm pahĩ Eroxo wÿr mrrar kêt nê.

Juje mẽ hprõ wa kot Eroxo pymaj ma Jesus o mõi

Apokarip 12.1-6, 12.13-18

¹³ Tã nhũm kanhêti ho studa xwÿnhhaja ma akupÿm hapêx hãmri nhũm Tĩrtũm axte Marir mjên Juje hwÿr kapêr o mẽ wrÿk xwÿnhjê hõ

mê. Nhũm kê axte hpimtir kãm hwÿr wrÿ nê kãm kapêr nê kãm:

—Pa Jue. E kwa kànhmã nhÿ. Na ra pahi Eroxa aprô pê hkrata ã amÿnê. Koja tokyx pôristi hkwyjaja mê anhô krÿ hwÿr pôj nê war apê hpÿr kaxyw ri hapêr. Jakamã kwa wa tokyx akato nê ma pika pê Ejit wÿr amôr kurê kumrêx. Nê Ejit kamã apa rãhã pa nhÿrmã akupÿn amnê war amê. E kwa tokyx. Anê.

¹⁴ Hãmri nhũm kuma nê kànhmã nhÿ nê Marir mra nê war amnhÿ to akuprô nê ra nojarêr. Hãmri nê krÿja pê Jesus o kato nê ma o môr kurê kumrêx. Wa môr ryy nê hãmri nê Ejit wÿr pôj nê kamã pa ho pa.

¹⁵⁻²⁰ Rôm nhũm pahi Erox tee ri amnhÿ wÿr kanhêti ho studa xwÿnhjê kamã hamak o pa nom nhũm mê akupÿm hwÿr mrar kêr nê. Jakamã nhũm mê kamã gryk nê hamaxpêr o:

—Tk. Kwa nã. Na mê ãm inhmã hêx nê akupÿn ixwÿr mrar nê nhÿri inhmã pahi nywta jarênh kêr nê. Nã kwãr mê mãmri ã inhÿpêx anê. Mê kot ixpê ho hpimxuure kaxyw ã. Nã kot paj mê kêp kupÿ nhũm mê rÿ amnhÿ pumu. Na xep prem kanhêti kot harênh xãja pumunh ã ra hã amgrà pyxi nê hkôt mytwrÿ kêp 6. Jakamã mãn mê hkrata ra hã amgrà axkrut kaxyw. Nã na pa ra ijamaxpêr. Kot paj Perêj kamã mê hkra myjaja ra mê hã amgrà axkrut xwÿnhjaja

nê kormã mê hã amgrà axkrut kêr xwÿnh piitã mê himex pa. Jao ra mê kamã pahi nywta pÿ. Nã ixte hpÿr mã kênã. Koja hprêk nê ixpãnhã Ijaew o amnhÿptãr kêr nê.

Anhÿr o hamaxpêr hãmri nê amnhÿ wÿr ô pôristi hkwyjê hã karô nê mê kãm mê hkrajê hã amÿnê nê mê kãm:

—E kêr ka mê ma Perêj wÿr mra nê kamã mê kêp mê hkra myrejaja ra mê hã amgrà axkrut xwÿnhjê nhÿmex pa. Nê kormã mê hã amgrà axkrut kêr xwÿnhjaja mãânêr nê himex par kumrêx. Nê Perêj pu hã ri krÿ hkryre hkôt mãânêr ri ajapôj nê ã mê himex par anê. Anê.

Hãmri nhũm mê kuma nê ma mê hwÿr mrar kurê kumrêx. Hãmri nê Perêj wÿr pôj nê mê kêp mê hkra myre piitã mê himex pa. Jakamã nhũm mê katorxã nê mê hipêxajaja tee ri mê hkra htyk xwÿnhjê pumu nê hkaprÿ htÿx nê mÿr rÿnh nê. Nom na pre Tÿrtũm nhÿ hã kapêr jarênh o mê pa xwÿnh finat Jeremÿstija ra amnepêr ã mê kot amnhÿ nhÿpêx anhÿrja kukamã mê panhÿgêjtjê mã mê harê nê hã kagã. Na pre mê kãm Ijaew kurê xwÿnhjê pynênh nê ma mê ô pika hwÿr mê ho hapêx par kaxyw. Hãmri nhũm mê panã Rrakewja te ra kot tee ri ja hã mê omunh nê tanhmã amnhÿ nhÿpêx to pyrãk nhũm Jeremÿstija tanhmã Ijaewjê

jarênh to nê hã kagà. Nê hã kagà ho:

Amnepê m Perêj kamã na pre mê panã Rrakewja hpijagri ho nôrja ã ra htyk kaxyw nê tee ri hkra kator mã xwÿnhhta kukamã hamaxpêr nê mÿr o nô. Nhũm hkwÿjaja tee ri akupÿm tam hamaxpêr kaxyw kãm kapêr. Tã jarãhã Rrakew kanrêhã hkra nê htãmnhwÿ nijaja ra uràk nê tee ri mê hkrare ho hamak xàj mÿr o pa. Mê kot mê kêp utâr nê mê himex par jakamã nhũm mê tee ri mê ho hamak xàj mÿr o pa. Anê.

Nhũm pre finat Jeremÿsja mê hkukamã ã mê harê nê mê hã kagà anê. Tã ra jarãhã mêni piitã Rrakew pyrà nê hkrajê o hamak xàj mÿr o pa.

*Wa kot akupÿm wa ò pika hwÿr Jesus o môr
Juãw 7.41-42*

Tã nhũm mytwrÿ grêre nê hapêx nhũm pahi Eroxo ty. Jakamã nhũm kamàt nhũm Jujeja gôr nê nô. Nê kê ôt kãm axte amÿti. Nhũm Tirtũm kapêr o mê wrÿk xwÿnhja axte hwÿr wrÿ nê kãm:

—Pa Juje? E na ra Marir pê hkra pÿr mã xwÿnhhta ty. Jakamã kwa wa mãmrÿ ma akupÿm mô. Ma akupÿm mê apê Ijaewjê nhõ pika hwÿr axãmnhÿx aprõ mê hkrata wa o mô.

Anhÿr o kãm kapêr. Na pre ra amnepê m Tirtũm nhÿ hã kapêr o mê pa xwÿnhjê hõja

ja kukamã mê panhÿgêjtê mã ja jarê nê hã kagà. Nê hã kagà kot: “Ixpê Tirtũm kot paj nhÿrmã Ejit rũm ma akupÿm ò pika hwÿr ixkrata wa mê kumê.” Anhÿr o kot hkukamã harênh nê hã kagà.

21 Jakamã nhũm Tirtũm kapêr o mê wrÿk xwÿnhja ã Juje mã karõ anê hãmri nhũm kuma nê ma akupÿm wa o mô. Ma akupÿm mê ò pika hwÿr wa o mô.

22 Tã ra akupÿm hpôx kaxyw htêp o mô. Hãmri nê pahi Eroxo kra Akêrawja ra hipêêxà mÿr pê kot Jutej kamã mê ho amnhÿptâr hã harênh ma. Hãmri nê tee ri mê amnhÿ kukamã hamaxpêr nê kãm mê hwÿr wa o môr pima nê.

Tã nhũm kamàt nhũm Juje ra gôr nê nô nê kê axte amÿti. Nhũm kê axte Tirtũm kapêr o mê wrÿk xwÿnhja hwÿr wrÿ nê akupÿm ò pika hkwÿ pê Jutej wÿr môr nê wa mê hkurê nê kãm:

—Pa Juje? E kêr ka Jutej wÿr wa mê amôr kêt nê. Pãnhã nhãm mê anhõ pika hõ hwÿr mãn mô nê kamã ri apa.

Anê nhũm kuma nê hpãnhã wa mê ma mê ò pika hkwÿ pê Garirej wÿr wa mê juk nê ma mô.

23 Nê kamã pøj nê krÿ pê Najare hwÿr mô nê kamã amnhÿm ôrkwÿ nhÿpêx nê kamã wa mê pa ho pa. Nhũm pre ra amnepê m Tirtũm nhÿ hã kapêr o mê pa xwÿnhjê hõja ra ã mê kot amnhÿ nhÿpêx anhÿrja kukamã mê

panhîgêtjê mã mẽ harê nê hã kagà. Nê hã kagà kot:

Tĩrtũm kot mẽ pahwỳr mẽnh mã xwỳnhhta koja kêp Najare nhõ xwỳnh. Anê.

3

Juãw Paxis kot Tĩrtũm kapêr jarênh o pa

Makre 1.1-6; Rukre 3.1-14; Juãw 1.19-23

¹ Nhũm pre Juãw Paxisja ã amnhĩ nhĩpêx anê. Nê pika pê Jutej kamã mẽ kãm Tĩrtũm kapêr jarênh o pa. No ãm krĩm pa hkêt nê. ãm mẽ hpu hã krĩ pê amỳm ri kapôt ã ri mẽ kãm Tĩrtũm kapêr jarênh o pa.

²⁻³ Tĩrtũm nhỹ hã kapêr o pa xwỳnh finat Ijais ra kot Juãw kukamã mẽ panhîgêtjê mã tanhmã harênh to nê hã kagà xá hkôt. Na pre hkukamã hã kagà ho:

Koja nhỹrmã mẽhõ mõn pøj. Kapôt ã mõn pøj nê mẽ kãm tanhmã mẽmoj tã karõ hto ho ri pa. Nê mẽ kãm: “Koja Tĩrtũm tokyx mẽ pahwỳr mẽ panhõ Pahihtija mẽ nhũm wrỳ nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o ri apa. Te mẽ kot mẽhõ kutêp pry ho mexta pyrà nê amnhĩ nhĩ ho tãm amnhĩ nhĩpêx nê tãm ajamaxpêr mex o ri apa. Kêr ka mẽ Pahihti kutêp ã amnhĩ nhĩpêx anhỳr o ri apa.”

Anhỳr o koja mẽ kãm ujarênh o pa. Anê.

Na pre finat Ijaisja Juãw Paxis kukamã ã mẽ kãm harênh anê nê hã kagà. Tã nhũm hã kagà xàja kôt nhũm Juãw Paxisja mõn pøj. Hãmri nê Ijais kot hkukamã harênh xà hkôt kapôt ã ri mẽ kãm ujarênh o pa nhũm mẽ kãm mar prãm xwỳnhhaja ma hwỳr mra. Nhũm mẽ kãm kapêr nê mẽ kãm:

—E koja Tĩrtũm tokyx kot mẽ pakaxyw ãm xwỳnhja o amnhĩrit. Jakamã kwa mẽ tokyx kutêp amã amnhĩ tomnuj kaga hprãm xàj tãm amnhĩ nhĩpêx o apa.

Anhỳr o Jejus kutêp mẽ kãm kapêr o pa.

⁴ Juãw Paxisja hikàxpore hkêt jakamã na pre ê mex kêt nê pa. ãm mẽmo mry pê kamer kĩ ho amnhĩm ê nhĩpêx nê haggê nê hã pa. Nê mẽmo mry hkà ho amnhĩ pre nê ri pa. Nê mẽõ mex kur kêt nê ãm krit ku nê menh ôr o ri pa.

⁵ Jakamã nhũm kapôt ã ri mẽ kãm Tĩrtũm kapêr jarênh o pa nhũm mẽ kot mar kaxyw ma hwỳr mra. Pika pê Jutej kamã ri mẽ pa xwỳnhhaja. Nê Jutej kamã krĩ pê Jerujarê nhõ xwỳnhhaja. Nê pyhti pê Jotãw mỳri mẽ pa xwỳnhhaja. Nhũm prem piitã harênh ma nê kot mar kaxyw ma hwỳr mra.

⁶ Hãmri nê kapêr ma nê Tĩrtũm noo mã mẽ kot amnhĩ tomnuj xwỳnh ã kãm amnhĩ jarê. Mẽ kot amnhĩ tomnuj kaga nê tam amnhĩ nhĩpêx o pa hprãm xàj ã kãm amnhĩ

jarênh anê. Nhùm Tirtùm kaxkwa kamã hkrĩ htã mẽ kuma nê amnhĩ katut kôt mẽ kot amnhĩ tomnuj rênh pa nê axte kãm hamaxpêr kêt nê. Jakamã nhùm pre Juãw Paxisja Tirtùm mã gôx kãm mẽ hkrã kumrãr pa. Pyhti pê Jotãw kamã mẽ hkrã kumrã.

7 Tã nhùm Parijew mẽ Satusew nhõ xwýnhjaja mãânên mẽ hkôt ma Juãw Paxis wýr mra. Mẽ uràk nê mẽ kêp Ijaew jakamã haxwýja Juãw Paxis kot mẽ hkrã kumrãr kaxyw ma hwýr mra. No ãm hkwýjê hkĩnhã mẽ kot amnhĩ tomnuj kaga hprãm xàj kãm amnhĩ jarênh kêt nê. ãm amnhĩ krã hkôt hkwýjê hkôt hwýr mra nê amnhĩ to kuma. Nom nhùm Juãw Paxisja ra hprĩ hã ã mẽ hamaxpêr anhýrja kôt mẽ omunh mex nê. Jakamã mẽ kãm:

—Tk kwa nà. Kormã mẽ ate amnhĩ tomnuj pix o ri apa kênã. Xà kot paj mẽ ate amnhĩ tomnuj o apa rãhã mẽ akrã kumrã nhùm Tirtùm ja hã mẽ apumu nhùm ja kãm mex nê? Nà koja já kãm mex kêt nê. Koja ja mýrapê nhýrmã tanhmã mẽ atomnuj týx to ka mẽ tee ri umaj apimxur prãm kaprý.

8 Na htem amnhĩ tomnuj kaga nê tãm amnhĩ nhĩpêx nê tam axpên nhĩpêx. Jakamã e kwa mẽ ã amnhĩ nhĩpêx o apa anê pa rĩ kormã mẽ akrã kumrã.

9 Na ka htem atýx ri ajamaxpêr o: “Mẽ ixpê finat Apraãw kanrêhã htãmnhwý hkwý na pa mẽ. Jakamã

koja Tirtùm ja hã mẽ ixpumu hãmri nê mẽ ixte amnhĩ tomnuj o ixpa tã nhùm ja hã tanhmã mẽ ixto hkêt nê. Koja mẽ ixto mex nê.” Anhýr o atýx ri amnhĩ kukamã ajamaxpêr. Nom ja kot anhýr kêt. Mẽ apê Apraãw kanrêhã htãmnhwý htã mẽ ate uràk nê tãm amnhĩ nhĩpêxre hã. Kot kaj mẽ apê htãmnhwý htã amnhĩ tomnuj o ri apa hãmri nê Tirtùm noo mã te mẽ apê pikap kênre nhĩkwý pix pyràk.

10 Na ra Tirtùm mẽ ate amnhĩ tomnuj mýrapê tanhmã mẽ ato kaxyw. Te ho mēhõ nhõ mẽmo hpàr ô hkêt nhùm kot tee ri omunh nê krãhyr nê kuwy kamã mẽnh nê ho kaxàr par pyràk o koja mẽ anhĩpêx. Jao amnhĩ nê kuwy hwýr mẽ arê ka mẽ kamã amnhĩ xà htýx kamã ajamak rãhã ho ri apa. Anê.

Nhùm pre ã Juãw Paxisja Parijew mẽ Satusew nhõ xwýnhjê mã kapêr anê.

11 Hãmri nê hpãnhã axte mẽ kot mar kaxyw hwýr mẽ mrar xwýnhjê mã kapêr nê mẽ kãm:

—E ra mẽ ate amnhĩ tomnuj kaga xwýnhjaja. Na pa Tirtùm mã mẽ akrã kumrãr kaxyw gô pix o mẽ akrã kumrã. Nom koja tokyx ixpãnhã Tirtùm kot mẽ pakaxyw ãm mã xwýnhta tãm mẽ pahwýr pôj. àhpumunh týx o kot ijakrenh par jakamã na pa hte ãm kukwak ri ixpa nê amnhĩ tã hã ixpijaãm o ri ixpa. Koja mẽ awýr Tirtùm Karõ rē nhùm mẽ akarõ mã agjê. Ka mẽ ý hã tam amnhĩ nhĩpêx o ri

apa. Nom kormã mẽ kot tãm amnhĩ nhĩpêx kêt xwÿnhjaja koja Tĩrtũm kot mẽ pahwÿr mẽnh xwÿnhjaja ja hã mẽ omu nẽ mẽ hipêx o te kuwy kot mẽmoj to kaxàr par pyràk o mẽ hipêx.

¹² —Na htem pur kãm harôj nhĩkê nẽ ho grã nẽ hpãnhã kahtwÿ. Nẽ kahuk pa hãmri nẽ hkapĩ nhũm kôk apê nẽ prÿhkã ho htor pa. Nhũm mẽ hpãnhã hy ho pa nẽ ixkre kamã gôj kãm unhwÿ. Ja pyrã nẽ koja tokyx Tĩrtũmja mẽ piitã mẽ kot tanhmã amnhĩ nhĩpêx to ho pa hã mẽ omunh xà hkôt mẽ ho axkjê. Jakamã mẽ kot tãm amnhĩ nhĩpêx o mẽ pa xwÿnhjaja koja ma amnhĩ wÿr mẽ ho api nhũm mẽ kuri mex rãhã nẽ pa ho pa. No mẽ kot amnhĩ tomnuj rãhã ho mẽ pa xwÿnhjaja koja jajê hkĩnhã tanhmã mẽ homnuj to. Nhũm mẽ ma kuwy raxja wÿr pa nẽ kamã amnhĩ xà htÿx kamã hamak rãhã nẽ pa ho pa.

Anhÿr o mẽ kãm kapêr.

Juãw Paxis kot Jejus krã kumrãr

Makre 1.9-11; Rukre 3.21-22; Juãw 1.32-34

¹³ Tã nhũm Jejus pika pê Garirej rũm kato nẽ ma Juãw Paxis wÿr mō. Juãw kot pyhti pê Jotãw kamã hkrã kumrãr kaxyw ma hwÿr mō. Hãmri nẽ omu nẽ kãm:

—Pa. E ot pa awÿr amnhĩ to tẽ. Ate mẽ kuxwar ixkrã kumrãr kaxyw. Anẽ.

¹⁴ Hãmri nhũm tee ri kuma nẽ kãm:

—Kwa nã. Aa ate amnhĩ tomnure hã kot pa kêt ri akrã kumrã. Nã ka kot kaj ixkrã kumrã. Anẽ.

¹⁵ Hãmri nhũm kãm:

—Kwa nã. Mãmri ixkrã kumrã Juãw Paxis. Tĩrtũm kãm ja prãm kênã kot ka kêt ri axtem nẽ ixkaga. Kot puj mẽ Tĩrtũm kãm hprãm xà hkôt tanhmã amnhĩ nhĩpêx to ho ri papa. Anẽ.

Hãmri nhũm kuma nẽ kãm:

—Tõe. Nã kot paj akrã kumrã. Anẽ.

¹⁶ Hãmri nẽ pyhti hwÿr o wÿr nẽ kamã hkrã kumrã. Hãmri nẽ wa akupÿm api nẽ gô mÿ ri ãm rãhã nhũm kaxkwa axkjê. Hãmri nhũm kurũm Tĩrtũm Karōja Jejus wÿr te tuuti pyrã nẽ ahtar mã hwÿr wrÿk o tẽ nẽ ïkre hã xa. Nhũm Jejus arĩ amnhĩ wÿr wrÿk o htẽm kãm omunh o xa.

¹⁷ Hãmri nhũm Tĩrtũm kaxkwa rũm kãm kapêr nẽ kãm:

Pa? E apê ixkra mex na ka. ãm hãmri na ka hte ixkanrêhã ã amnhĩ nhĩpêx mex anẽ. Inhmã ajapê kamã na ka ri apa ho apa. Anẽ.

4

Satanasti tee kot amnhĩ tã Jejus kamã hamak

Makre 1.12-13; Rukre 4.1-13; mããnên Eprêw 2.18, 4.15

¹ Tã nhũm Jejus Tĩrtũm Karō nhÿ hã ma kapôt ã ri pa. Satanasti kot amnhĩ tã kamã hamak kaxyw nhũm ma kapôt ã ri pa.

² Ri pa hã apkati xohtô nê. Ra hã arĩgro pê 40. Nê kormã apkur kêt jakamã ra kãm prãm tỳx kumrêx nê ri pa.

³ Hãmri nhũm Satanastija nhỹhỹnh hwỳr tẽ nê hêx rom kãm kapêr nê kãm:

—Pa. E kwa mãn ka ra amã prãm tỳx nê nã? Nom xep apê Tirtũm Kra jakamã apê mêmoj hihtỳx kêt. Tirtũm pyrã nê axàhpumunh o axàhpumunh kênã. Jakamã kwa kên nhĩkwỹ mũj mã anê kê amã pãwti hã amnhĩ jahkre ka aku nê tokyx ho amnhĩ xihtỳx. E kwa tokyx kãm akapêr. Anê.

⁴ Hãmri nhũm kuma nê kãm:

—Tk. Nà kot paj amar xà hkôt ã ri amnhĩ nhĩpêx anhỹr kêt nê. Koja Tirtũm kãm inhmã mêmoj nhõr prãm nê inhmã mêmoj gõ pa rĩ kormã kukrê. Kapêr ã kagã htũm kot ja jarênh kot:

Na htem mẽ apkur xà pix kukwak ri htĩr nê pa hkêt nê. Na htem mãânên Tirtũm kapêr ma nê hkôt amnhĩ nhĩpêx nê htĩr nê pa. Anê.

—Ã kapêr ã kagã kamã kot harênh kot anhỹr jakamã kot paj akapêr kôt ri ã amnhĩ nhĩpêx anhỹr kêt nê. ãm kwarĩ ho kwarĩ. Anê.

⁵ Hãmri nhũm Satanastija tee ri kuma hãmri nê hpãnhã ma Jerujarê hwỳr o mō. Nê Tirtũm mã amnhĩ jarênh xà hã ixkre hprêk nhĩmōk wỳr ho api nê kỳxpê hatur xà hã ãm nhũm xa. Hãmri nê amnhĩ parpê kên rũnh

nhĩkwỹ xwỳnhja pumunh o xa nhũm Satanasti kãm:

⁶—E apê Tirtũm Kra jakamã kwa ja rũm ahpar mã ajarĩ nê ma tẽ nê pikap tẽm. Koja Anhĩpêêxaja apumunh mex nê ka tanhmã amnhĩ to hkêt nê. Kapêr ã kagã htũm kot harênh kot:

Tirtũm koja kapêr o wryk xwỳnh kwỳjê mã ajarẽ ka ajarĩ nê ahpar mã tẽ nhũm mẽ kỳx pê amỳ nhũm mêmoj akã hyr kêt nê. Anê.

—Ã kapêr ã kagã htũm kot ajarênh anhỹr jakamã e tokyx ajarĩ. Anê.

⁷ Hãmri nhũm Jejus kuma nê kãm:

—Tk kot paj ri ate inhmã karõ xàja kôt ã amnhĩ nhĩpêx anhỹr kêt nê. Koja Tirtũm tãm inhmã ijarĩ hã karõ pa rĩ mar xà hkôt ijarĩ. No kot pa ri amar xà hkôt ijarĩ hkêt nê. Tirtũm kapêr ã kagã htũm kot ja jarênh kot:

Kêr ka mẽ amnhĩ krã hkôt amnhĩ tã ixkamã ajamak kaxyw inhĩxi jarênh kôt tanhmã amnhĩ nhĩpêx to hkêt nê. Anê.

—Ã kot ja nê kapêr kot anhỹr jakamã kwarĩ ho kwarĩ. Kot paj ri amar xà hkôt ijarĩ hkêt kumrêx. Tirtũm tãm kot inhmã ã ixte amnhĩ nhĩpêx anhỹr ã karõre hã. Anê.

⁸ Hãmri nhũm Satanasti tee ri kuma nê hpãnhã ma nhỹri kên prêeti hwỳr o tẽ nê himōk ã axte o xa. Hãmri nê kãm pika piitã ahkre hpa. Nê mẽ hikukrêx piitã nhũm

kãm ahkre ho xa. Kàxpore nê mēmoj mex piitã nhũm kãm ahkre nhũm Jejus piitã omunh o xa.

⁹ Hãmri nhũm kê Satanasti axte kãm:

—E mãn ka kam ri mēmoj mex mũj piitã omunh pa. Piitã inhõ na. Nom kot kaj ixkutã tēm nē inhmã inhmex o inhmex ã ijarē pa ama nē amã piitã õr pa. Ka kam mēmoj piitã ho anhõ nē ho amnhĩptãr o apa. Jakamã e kwa tokyx. Anē.

¹⁰ Hãmri nhũm kuma nē axte kãm kapēr nē kãm:

—Tk kwa ma nhỹhỹm tē Satanasti. Kot paj ri amã amex o amex ã ajarēnh kêt kumrēx. Tĩrtũm kapēr ã kagã htũm kot ja nē kapēr kãm hihtỹx kēnã. Kapēr kot:

Kēr ka mē ixkapēr pix ma nē ixkutã pix mã akõnkrã ho akrĩ nē inhmã inhmex o inhmex ã ijarē. Kēr ka mē ã amnhĩ nhĩpēx anhỹr o ri apa.

—Anhỹr o kot hã karõ jakamã kot paj amã amex o amex ã ajarēnh kêt kumrēx. Anē.

¹¹ Hãmri nhũm tee ri amnhĩ tã kuma hãmri nē ma tē. Tee ri kãm kapēr kapryja ã amnhĩ pumu hãmri nē hkaga nē ma tē. Hãmri nhũm Tĩrtũm kapēr o mē wrỹk xwỹnhjaja Jejus wỹr wrỹ nē tanhmã ho mex to nē kãm õ nhũm kukrē nē akupỹm hihtỹx.

Jejus kot Garirej kamã kapēr o pa

Makre 1.14-15; Rukre 4.14-15

¹² Tã nhũm Juãw Paxisja mēmoj tã pahĩ Eroxo mã akir nhũm amnhĩ tã kuma nē gryk xà haxà nhũm hkrĩ ho hkrĩ. Hãmri nhũm Jejusja harēnh ma nē ma akupỹm Garirej kamã krĩ pē Najare hwỹr ma akupỹm tē.

¹³ Hãmri nē ra pøj nom kamã ri pa hkêt nē. Nē hpãnhã kurũm kato nē ma krĩ pē Kapanaũ hwỹr tē. Gõ rax pē Garirej mỹri na pre. Pika hkwy pē Jepurõ mē Natari wa mē kamã na pre nhũm Jejus ma hwỹr tē. Hãmri nē kamã pa.

¹⁴ Nhũm ra amnepēm Tĩrtũm nhỹ hã kapēr jarēnh o mē pa xwỹnh finat Ijaisja Jejus kukamã ra mē panhĩgētjē mã ã kot amnhĩ nhĩpēx anhỹr ã harē nē hã kagã. Jejus kot ã mē hwỹr mõr anhỹrja kukamã nhũm pre harē nē hã kagã.

¹⁵ Pika hkwy kamã mē pa xwỹnhjaja nhũm pre mē hkukamã mē harēnh mex nē. Nē pika pē Garirej kamã mē pa xwỹnhjaja nhũm pre mããnēn mē hkukamã mē harē. Nē pyhti pē Jotãw mē gõ xujanãr wa hkaēx kãm pika piitã kamã mē pa xwỹnhjaja. Nē krĩ pē Garirej kamã mē kēp Ijaew kêt xwỹnhjaja nhũm pre mããnēn mē harē. ã na pre finat Ijaisja mē hkukamã Tĩrtũm nhỹ hã mē piitã mē harē nē hã kagã anē. Jejus kot ma mē hwỹr mõrja kukamã nhũm ra hprĩ hã harē nē hã kagã. Nē hã kagãja o:

¹⁶ E. Kot paj mē amã mēmoj mex jarē ka mē inhma.

Mê ate Tirtûm pumunh kêt jakamã te mê ate kamàt kô kamã ri apa pyrâk. Tã koja Tirtûm mê amã amnhĩ to amnhĩrit ka mê hpãnhã te mê ate hirã kamã ri apa pyrâk o amnhĩ nhĩpêx nê ra hkôt amnhĩ xunhwý.

Anhÿr o mê hkukamã mê harê nê hã kagã.

¹⁷ Tã nhũm ra kot hkukamã mê kãm ujarênh xà hkôt nhũm Jesusja mê hwýr mō nê mê kãm Tirtûm kapêr jarênh o ri mê hkôt pa. Nê mê kãm tanhmã amnhĩ jarênh to ho pa. Nom kormã hprĩ hã mê kãm amnhĩ jarênh kêt nê. Te ho nhãm mēhō jarênh pyrâk o mê kãm amnhĩ jarê nê mê kãm:

—E na ra Tirtûmja kot mê akaxyw ãm xwýnhhta mê nhũm mê awýr wrý. Jakamã kwa mê tokyx tee ri ate amnhĩ tomnuj ã amnhĩ pumu nê ã ate amnhĩ nhĩpêx anhÿr kaga nê hpãnhã Tirtûm kôt mãn amnhĩ nhĩpêx o ri apa.

Anhÿr o mê kãm kapêr o pa pê mê ahkre ho ri mê hkôt pa.

Jesus kot amnhĩ wýr tep pynênh xwýnhjê hwýr

Makre 1.16-20; Rukre 5.1-11

¹⁸ Tã nhũm Jesus ma gô rax pê Garirej mý ri pa nê gôx kãm ja wa omu. Simãw Pêtre mê htō Andreja nhũm wa gôx kãm kryhti rēnh o wa xa. Hãmri nhũm Jesus wa hwýr tē nê wa omu nê amnhĩ kôt wa kuwý nê wa kãm:

¹⁹ —Pa. E kwa ma ixkôt mãn war apa. Kot paj tanhmã

war ajahkre hto ka wa ma mê kãm ijarênh o ri apa. Mê kot war amar nê ra ixkôt amnhĩ xunhwýr kaxyw. Anê.

²⁰ Hãmri nhũm wa kuma nê kryhti re nê wa ma hkôt htēm kurê kumrêx.

²¹ Hãmri nhũm mê ma nhãm axte mō nê ra jajê hwýr kato. Jepetew mê hkra Xiakre mê Juãwja nhũm wa mê hwýr kato. Nhũm mê õ pàr kãm kryhti ho mex o wa mê nhý. Hãmri nhũm mê hwýr mra nhũm Jesus amnhĩ kôt ja wa kuwý nê wa kãm:

—Pa Xiakre mê Juãw. E wa ma ixkôt mãn wa apa. Anê.

²² Hãmri nhũm wa kuma nê hipêêxã mã amnhĩ jarê nê ma hkôt pa ho pa kurê kumrêx.

Jesus kot tanhmã amnhĩ nhĩpêx to

Rukre 6.17-19

²³ Tã nhũm Jesus Garirej kamã Ijaew mã Tirtûm kapêr jarênh o pa. Na pre hte Tirtûm kapêr o mê ahkre xà hã ixkre hwýr agjê nê kamã mê kãm Tirtûm kapêr jarênh o hkrĩ nê mê kãm:

—E mê tee ri ate amnhĩ tomnuj ã amnhĩ pumu nê hpãnhã Tirtûm kôt mãn amnhĩ nhĩpêx o ri apa. Kot kaj mê ã amnhĩ nhĩpêx anê nhũm ja hã mê apumu nê mê ato hkra kurê kumrêx. Anê.

Hãmri nê akupým mê kãm mê à xwýnhjê ho mex. Ahpýnhã tanhmã mê à kute xwýnhjaja nhũm akupým mê ho mex o pa.

²⁴ Jakamã nhũm mê piitã pikaja kamã ri axpēn mã harēnh o hprōt. Nê pika pê Sir kôt mãânēn ma ri axpēn

mã harênh o hprôt. Nhùm mẽ piitã harênh ma nê ma hwÿr mẽ à xwÿnhjê ho mra. Ahpÿnhã ri tanhmã mẽ à kute xwÿnhjaja. Mẽ à htÿx xwÿnhjaja. Nê mẽ ĩ kamã mẽ htyk xwÿnhjaja. Nê mẽ hkrã pipãnh xwÿnhjaja. Nê mẽkarômnuti kot Satanasti nhÿ hã tanhmã ri mẽ ho xwÿnhjaja. Nhùm prem mẽ hamÿ nê ma Jejus wÿr mẽ o mra nhùm mẽ omu nê akupÿm mẽ ho mex pa.

²⁵ Jakamã nhùm mẽ ohtô nê ma hkôt pa. Krĩ pê Garirej rùm nê Tekap rùm nê Jerujarê rùm nê pika pê Jutej rùm. Nê pyhti pê Jotãw nhĩkjê rùm mẽ pa xwÿnhjaja. Nhùm mẽ ã ohtô nê ma Jejus kôt omunh o pa anê.

5

Jejus kot tanhmã mẽ ahkre hto

Rukre 6.20-23

¹ Nhùm Jejus amnhĩ kôt ri mẽ kot omunh o mẽ pa xwÿnhjê pumu hãmri nê mẽ ahkre kaxyw ma tẽ nê hixêt ã api nê himôk ã nhÿ. Hãmri nhùm mẽ ma hkôt mra nê pu hã hkrĩ pa.

² Hãmri nhùm mẽ ahkre nê mẽ kãm:

³ E mẽ inhma. Kot kaj mẽ atõ amnhĩ kaxyw tanhmã Tirtùm mẽ wa inhmã ajamexpêr to nê ajamexpêr o: “Koja Tirtùm inhĩhkô hã pa hkêt pa ixtÿx ri tanhmã amnhĩ tomnuj to ho ri ixpa rãhã ho ri ixpa.” Anhÿr o ajamexpêr. Hãmri nhùm Tirtùm

ã ajamexpêr anhÿr ã apumu nhùm ja kãm mex nê. Hãmri nhùm apê hkra hã ato mex nê atãnopxar o akôt pa ho pa ka ajamakêtkati nê axãmnhĩx akĩnh nê ri apa.

⁴ Nê kot ka mẽ atõ tanhmã amnhĩ tomnuj to. Hãmri nê tee ri ja hã amnhĩ pumu nê apijaam nê akaprĩ nê. Nê akaprĩ xaj amÿr o nhÿ. Amÿr rax nê. Hãmri nhùm Tirtùm ja hã apumu nhùm ja kãm mex nê. Jakamã nhùm anê akaprĩ hta nê ato mex nê ka ajamakêtkati nê axãmnhĩx akĩnh nê ri apa.

⁵ Nê kot ka mẽ atõ agryk tokyx anhÿr kêt nê. Nê kritpêm amnhĩ tã amã mẽ hkaprĩ ho ri apa. Hãmri nhùm Tirtùm ja hã apumu nhùm ja kãm mex nê. Hãmri nhùm ato mex nê ka ajamakêtkati nê axãmnhĩx akĩnh nê ri apa.

⁶ Nê kot ka mẽ atõ amã Tirtùm kãm hprãm xà hkôt amnhĩ nhĩpêx o ri apa hprãm nê. Nhùm amnhĩ tã apumu nhùm ja kãm mex nê. Hãmri nhùm ato mex nê tanhmã akrã hto ka hkôt pix mã amnhĩ nhĩpêx o ri apa. Jao ajamakêtkati nê axãmnhĩx akĩnh nê ri apa.

⁷ Nê mẽ kamã mẽ axukaprĩ

ho ri apa xwÿnhjaja na hte Tirtûm ja hã mẽ apumu nhûm ja kãm mex nê. Jakamã na hte mẽ hã mẽ apyrã nê mẽ akamã ukaprĩ ho pa. Jao mẽ ato mex nê ka mẽ ajamakêtkati nê axàmnhix akĩnh nê ri apa.

8 Nê kot ka mẽ atõ ã ajamaxpêr anê nê ajamaxpêr o: “Nà kot paj ãm Tirtûm kapêr kôt pix mã ri amnhĩ nhĩpêx o ri ixpa. ãm ja pix na inhmã hprãm.” Anhÿr o ajamaxpêr. Hãmri nhûm Tirtûm amnhĩ tã mẽ apumu nê mẽ ato mex nê. Ka mẽ ajamakêtkati nê axàmnhix akĩnh nê ri apa. Nê nhÿrmã Tirtûm wÿr api nê kuri amex rãhã apa ho apa.

9 Nê kot ka mẽ atõ mẽhõ wa kot xepên kutã amnhĩ xãm xwÿnhhta xepên tã wa omu nê wa kot tanhmã xepên nhĩpêx tota nê tanhmã wa kãm akapêr to nê akupÿm tãm wa ãm. Hãmri nhûm Tirtûm ja hã apumu nhûm ja kãm mex nê. Nê apê hkra hã ajarê ka ajamakêtkati nê axàmnhix akĩnh nê ri apa.

10 Nê koja mẽhõ mẽ ate Tirtûm kapêr mar xà hkôt amnhĩ nhĩpêx o apa hã mẽ apumu nê hã tanhmã mẽ anhĩpêx kati hto. Tã nom

koja Tirtûm arĩ mẽ ato mex nê. Mẽ apê hkra jakamã mẽ kot tanhmã mẽ anhĩpêx hto htã ka mẽ ajamakêtkati nê axàmnhix akĩnh nê ri apa.

11-12 —Kwãr mẽ mãmri ixtã mẽ ato kapêr rÿ mẽ ato hêx rÿ tanhmã ri mẽ atomnuj to. Kwãr mẽ mãmri ã mẽ anhĩpêx anê. Nom kêr ka mẽ arĩ amnhĩ kaxyw inhmã ajamaxpêr tÿx rãhã pê ajamakêtkati nê axàmnhix akĩnh nê ri apa. Kwãr mẽ mãmri ixtã ã mẽ anhĩpêx anê nê mẽ amex kêt ã mẽ ajarê. Amnepêm na prem ã Tirtûm nhÿ hã kapêr jarênh xwÿnhjê nhĩpêx anê. Jakamã koja mẽ urak nê ã mẽ anhĩpêx anê. Hãmri nhûm Tirtûm ja hã mẽ apumu nê amnhim mẽ amex ã mẽ ajarê. Hãmri nê nhÿrmã kaxkwa kamã wa inhõ krĩ kamã mẽ ato mex nê. Jakamã kêr ka mẽ ã amnhĩ kukamã ajamaxpêr anhÿr pê mãmri akĩnh nê ajamakêtkati nê axàmnhix ri apa. Kwãr mẽ mãmri ã wa ixtã mẽ anhĩpêx anê. Anê.

Jejus krajaja te kot kaxwa mẽ kanê hpók wa urak

Makre 9.49-50; Rukre 13.34-35

13 Nhûm Jejus arĩ mẽ kãm kapêr nê mẽ kãm:

—Nê mẽ ate ixkôt amnhĩ xunhwÿr xwÿnhjaja te mẽ ate kaxwa pyrak. Kaxwaja mẽ apkur xà ho ành mã mex. No koja mẽhõ tẽn kamã pika hkwy mẽ nê ho ahkà. Hãmri tanhmã kot wem ho nê akupÿm ho mex? Nà koja

akupÿm mex kêt nê. Æm mē kot hkapīr pix kaxyw koja mex. Ja pyrā nē kot ka mē atō ate inhmā tanhmā amnhī nhīpêx to ho apa hā amnhī jarēnh tā gaa nē rī amā ixkôt amnhī nhīpêx prām kêt nê. Hāmri nē ra te apê kaxwa mē pika pihkarta pyrāk. Kwa mē ixujarēnh ma nē kām ajamaxpēr tÿx rāhā ho ri apa.

14-16 —Nē te mē ate kanê hpôk pyrāk. Nē te mē ate hixêt prêk nhīmōk ā krī xām pyrāk. Koja krīja hixêt prēeti nhīmōk ā xa nhūm mē pi-itā omu. Nē kanēja. Xà na htem kanê hpôk nē poti ho hpro? Nà na htem hpôk nē kÿx pê mēmoj nhīmōk ā unhwÿ nhūm mē piitā mē kām hirā nhūm mē hirā kamā mēmoj pumunh mex nē. Ja pyrā nē kot kaj mē tām amnhī nhīpêx o ri apa nhūm mē pi-itā ja hā mē apumunh kôt ra kaxkwa kamā Tirtūm mex ā harēnh o pa. Anē.

Jejus kot tanhmā Mojes kapēr jarēnh to

Rukre 16.16-17

17 Nhūm Jejus arī mē kām kapēr nē mē kām:

—Nē amnepēm Mojes kot Tirtūm nhÿ hā Ijaewjê mā tanhmā mē kot amnhī nhīpêx to hā mē kām karōja. Nē amnepēm Tirtūm nhÿ hā kapēr jarēnh o mē pa xwÿnhjê kapērja. Ixte mē kapēr o ijapêx kaxyw na pa pre mē awÿr ixwrÿk kêt nê. Jakamā kwa mē ri ā axpēn mā ijarēnh anhÿr kêt nê. Kêt ixprī hā ixte mē amā mē kapēr jarēnh nhūm mē ate mar mex kaxyw

na pa pre kaxkwa rūm mē awÿr wrÿ.

18 —Tirtūm kapēr ā kagà htūm kot mēmoj jarēnhja. Koja ujarēnh xà hkôt mēmoj tanhmā amnhī to hpar mē nhūm rī kormā kaxkwa mē pika wa hapêx pa nhūm kapēr ā kagàja määnēn hapêx. Nom nhūm Tirtūm kapēr koja mēmojja pyrā nē aa hapêx kêt nē. Koja rāhā ho rāhā nē aa ihkjê ho tanhmā mēnh to hkêt nē. Æm hāmri na pa ā mē amā harēnh anē.

19 —Nē kot ka mē atō Tirtūm kapēr o pixire nē hirôp xa. Hāmri nē ra amnhī pyrā nē anhîō mā ja hā amÿnê. Apyrā nē kot hirôp ām kaxyw ka kām hā amÿnê. Kot kaj ā amnhī nhīpêx anē hāmri nē apê Tirtūm kra hkêt ā amnhī to amnhīrit. Nom kot ka kêt mē tām amnhī nhīpêx o ri apa. Nē amnhī pyrā nē tām mē kot amnhī nhīpêx kaxyw mē kām akapēr o ri apa hāmri nhūm Tirtūm ja hā apumu nē ato hkra nē ato mex nē.

20 —No Parijew nhō xwÿnhjaja nē Tirtūm kapēr tūm o mē ahkre ho mē pa xwÿnhjaja. Mē kot Tirtūm kapēr kôt amnhī nhīpêx mex ā amnhī jarēnh tā no ām hkôt ā amnhī nhīpêx anhÿr kêt nē. Jakamā kot kaj mē hkôt amnhī nhīpêx o ri apa hāmri nē mē urāk nē nhÿrmā Tirtūm mē wa inhō krī kamā apa hkêt nē. Anē.

Mē gryk o mē pa xwÿnhjê jarēnh

Rukre 12.58-59; määnēn Rômān 12.19; Epes 4.26; Wam

Ximotre 2.8; Xiakre 1.19-20

²¹ Nhùm Jejus arĩ mẽ kãm kapêr nê mẽ kãm:

—Nê amnepêm na prem mẽ panhîgêjtjê mã Tĩrtũm kapêr kwỳ jarênh o pa nê mẽ kãm:

Kêr ka mẽ axpên par kêt nê.

Kot kaj mẽ mẽhõx pĩ nhùm mẽ ja mỳrapê atomnuj nê. Nê ma mẽ anhõ pahĩti hwỳr ato tẽ nhùm mỳrapê tanhmã ato rỳ hkôt apĩ. Anê.

Ăm hãmri na prem mẽ kãm ja jarê.

²² Tã kot paj ixprĩ hã mẽ amã tanhmã harênh to ka mẽ inhma. Kot kaj mẽ mẽmoj tã anhĩõ kamã agryk. Hãmri nhùm Tĩrtũm tee ri ja hã apumu nhùm ja kãm mex kêt nê. Jakamã koja mẽ anhõ pahĩti tanhmã ja hã mẽ ato japêr hã koja ja mex nê. Rỳ kot kaj mẽ tanhmã mẽhõ japrỳ hto. Ho hagrô rỳ ho rop. Mỳrapê kop apu akwỳ kot apynênh nê anhõ pahĩti hwỳr ato htêm nê ìhkram ajaxàr ronhỹx ja inhmã mex nê. Rỳ kot kaj mẽ tanhmã anhĩõ mã akapêr punuj to nê kãm: “Tk. Ate ho warêhti hã. Te apê hagrô pyræk kênã.” Anhỹr o kãm akapêr. Tã kop apu Tĩrtũm ra ã akapêr anhỹrja mỳrapê mẽ kot amnhĩ xà htỹx kamã hamak tũm xàta wỳr amênh ronhỹx ja inhmã mex nê. Ja pumaj kwa kêr ka mẽ ã axpên mã akapêr anhỹr kêt nê. Kêt mẽ axpên mã tãm akapêr pix o ri axpên kôt apa.

²³ —Nê kêr ka mẽ tanhmã ate anhĩõ nhĩpêx hto kamã

Tĩrtũm mã mex o mex ã harênh kêt nê. Kêr ka mẽ kãm amnhĩ jarênh o akrĩ hãmri nê ra mẽhõ kot mẽmoj tã akamã gryk xwỳnh mã ajamaxpêr japêr.

²⁴ Hãmri nê akato nê ma hwỳr atêm kurê kumrêx nê wa tãm axpên mã akapêr nê tãm akupỹm axpên xãm. Hãmri nê rĩ kormã ma akupỹm tẽ nê Tĩrtũm mã amnhĩ jarênh jatur xàm amê nê kãm mex o mex ã harê. Kêr ka mẽ ã amnhĩ nhĩpêx anhỹr o ri apa.

²⁵⁻²⁶ —Na htem tanhmã axpên nhĩpêx to hãmri nê kot tanhmã war axpên to xwỳnhjê hõja ma õ pahi hwỳr tẽ nê kãm tanhmã kot ho xwỳnhta jarênh kaxyw nojarê. Hãmri nhùm ra kamã gryk xwỳnhta kot pahi mã harênh kaxyw nojarê ã harênh ma nê tee ri amnhĩ kukamã hamaxpêr nê ma hwỳr tẽ nê wa akupỹm tãm axpên xãm. Na htem ã amnhĩ nhĩpêx anê. Pahi kot wa harênh mar nê tanhmã axpên tã wa ho pymaj na htem ã amnhĩ nhĩpêx anê nê tokyx tãm akupỹm axpên xunhwỳ. No koja mẽ anhỹr kêt nhùm pahija wa harênh ma nê wa kot tanhmã axpên to xwỳnhta õ jaxà nhùm tee ri kãm kator prãm. Hãmri nê tanhmã amnhĩ to nê ra amnhĩ pãnhã kãm amnhĩrer pa nhùm pahĩtija rĩ kormã pôristi mã anê nhùm kãm ure nhùm kato. Ja pyrà nê kêr ka mẽ Tĩrtũm tanhmã kot mẽ anhĩpêx to pymaj tokyx mẽ ate amnhĩ tomnuj kaga nê

hkôt amnhĩ nhĩpêx rãhã ho ri apa. Anê.

Tanhmã mẽ pahte mẽ pah-prõjê nhĩpêx to

Matêwre 19.3-9; Makre 9.43-47, 10.2-9; mãânên Rukre 16.18

²⁷ Nhũm Jejus arĩ mẽ kãm kapêr nê mẽ kãm:

—Nê na pre finat Mojesja mẽ panhĩgêjtê mã Tĩrtũm kapêr tũm kwý jarê nê mẽ kãm: “Kêr ka mẽ amnhĩ prõ pix tãnopxar o ri apa. No mẽ kuhpa hã nhãm mēhõ ho amnhĩkati ho ri apa hkêt nê.” Anê. ãm hãmri na pre mẽ kãm ja hã karõ.

²⁸ Tã kot paj ixprĩ hã mẽ amã tanhmã harênh to ka mẽ inhma. Kot kaj mẽ nhãm mēhõ pumu nê amã ho amnhĩkati hprãm mã ajamaxpêr. Jao te ra ate ho amnhĩkati pyrãk o amnhĩ nhĩpêx. Kormã ate ho amnhĩkati hkêt tã ra hkukamã ajamaxpêr jakamã te ra ate ho amnhĩkati pyrãk o amnhĩ nhĩpêx.

²⁹ ã mẽ hamaxpêr punuj anhÿr xwýnhjaja koja mẽ nhÿrmã ma mẽ kot amnhĩ xà htýx kamã hamak tũm xàta wÿr ma mra nê kamã pa rãhã ho pa. Jakamã kêr ka mẽ nhãm mēhõ pumu nê amã hkĩnh japêr hãmri nê te ate ano kaxãr nê mēnh nê axte ate omunh kêt pyrãk o amnhĩ nhĩpêx. Jao hkãx ã rĩt nê ma nhÿhÿm atēm kurê kumrêx.

³⁰ —Nê kot kaj mẽ anhĩkra ho tanhmã amnhĩ tomnuj to kaxyw. Hãmri nê tee ri ja hã amnhĩ pumu nê te ate amnhĩ

nhĩkra krãhyr nê mēnh pyrãk o amnhĩ nhĩpêx nê tanhmã amnhĩ tomnuj to hkêt nê. Mẽ ãhkra ho mẽ kot tanhmã amnhĩ tomnuj to ho mẽ pa xwýnhjaja koja mẽ nhÿrmã ma mẽ kot amnhĩ xà htýx kamã hamak tũm xàta wÿr ma mra nê kamã pa rãhã ho pa. Anê.

Mẽ pahte axpên kaga hkêt

³¹ Nhũm Jejus arĩ mẽ kãm kapêr nê mẽ kãm:

—Nê na pre finat Mojes mẽ panhĩgêjtê mã Tĩrtũm kapêr tũm kwý jarê nê mẽ kãm: “Kot kaj mẽ atõ aprõ kaga kaxyw hãmri nê ate hkaga hã amnhĩ jarênh ã kagã nhĩpêx nê kãm agõ nê rĩ kormã hkaga.” Anê. ãm hãmri na pre ã mẽ kãm Tĩrtũm kapêr tũm jarênh anê.

³² Tã kot paj ixprĩ hã mẽ amã tanhmã harênh to ka mẽ inhma. Kêr ka mẽ atýx ri amã hprãm xà hkôt aprõ kaga hkêt nê. Nom koja aprõ akuhpa hã nhãm mēhõ ho amnhĩkati ka harênh ma hãmri nê amã ja hã hkaga hprãm nê mãmrĩ kam nê hkaga. Ja tanhmã kute hkêt. Nom koja ã amnhĩ nhĩpêx anhÿr kêt tã ka amnhĩ krã hkôt hkaga. Hãmri nhũm mēhõ apãnhã ho hprõ nê o pa. Hãmri nê ra kot apê aprõ ho amnhĩkati ho pa pyrãk o hipêx. Nê nija haxwýja. Te arĩ kêp aprõ htã akuhpa hã nhãm myja o amnhĩkati o pa pyrãk o amnhĩ nhĩpêx. Anê.

Tãm mẽ pakapêr ã Jejus kot mẽ pamã karõ
Xiakre 5.12

33 Nhũm Jejus arĩ mẽ kãm kapêr nê mẽ kãm:

—Nê na pre finat Mojes mẽ panhĩgêt nê pahpãmjê mã Tĩrtũm kapêr tũm jarênh o: “Kêr ka mẽ Tĩrtũm mã mẽmoj to anhỹr ã amnhĩ jarê hãmri nê amnhĩ jarênh xà hkôt kãm tanhmã amnhĩ nhĩpêx to. Nom kêr ka mẽ atỳx ri kãm tanhmã amnhĩ jarênh to ho amnhĩ to axêx kêt nê. ãm akatàt kôt mẽ ate amnhĩ jarênh to xà hkôt kãm tanhmã mẽmoj to.” Anê. ãm hãmri na pre mẽ kãm ja jarê.

34 Tã kot paj ixprĩ hã mẽ amã tanhmã harênh to ka mẽ inhma. Kêr ka mẽhõ mã tanhmã amnhĩ jarênh to. Tĩrtũm mã pix mã amnhĩ jarênh kêt nhãm mẽhõ mã mãânên tanhmã amnhĩ jarênh to. Nê akatàt kôt kãm amnhĩ jarê. Na ka htem mẽ kot mẽ axêx kêt kôt mẽ apumunh kaxyw mẽmoj nhĩxi jarênh kôt amnhĩ jarê. Nom kêr ka mẽ axte ã mẽmo nhĩxi hã amnhĩ jarênh anhỹr kêt nê. Mẽmoj tã amnhĩ jarê nê akatàt kôt amnhĩ jarênh kurê kumrêx. No mẽ kot axêx kêt kôt apumunh kaxyw mẽmoj nhĩxi hkôt amnhĩ jarênh kêt nê. Tanhmãn kaxkwa nhĩxi jarênh kôt mẽmoj tã amnhĩ jarênh kêt nê. Kaxkwa kêp Tĩrtũm krĩ xà maati kênã kot ka kêt mẽ axtem nê atỳx ri amnhĩ kaxyw hixi jarê.

35 Rỳ mẽ kot axêx kêt kôt apumunh kaxyw pika nhĩxi jarênh kêt nê. Pika kêp Tĩrtũm par xãm xà kênã kot ka kêt mẽ atỳx ri amnhĩ kaxyw

tanhmã hixi jarênh to. Nê krĩ pê Jerujarêja mãânên kêr ka mẽ ri amnhĩ kaxyw tanhmã hixi jarênh to hkêt nê. Kojã nhỹrmã Tĩrtũm mẽ awỳr Jerujarê hwỳr ixpê pahĩ maati hã inhmê pa kamã mẽ ato amnhĩptàr o ixkrĩ. Jakamã kêr ka mẽ ri atỳx amnhĩ kaxyw tanhmã hixi jarênh to ho ri apa hkêt nê.

36 —Nê kêr ka mẽ kot axêx kêt kôt apumunh kaxyw mẽ ri tanhmã amnhĩ krã hkĩ jarênh to hkêt nê. Kot kaj mẽ anê nê ãm tanhmã hã harênh to kaprỳ. Xà kot kaj mẽ ajamaxpêr pix o tanhmã amnhĩ krã hkĩ hto? Nà kot kaj mẽ ho anhỹr kêt nê. Jakamã mẽ ri atỳx tanhmã harênh to hkêt nê.

Nê mẽ atỳx ri mẽmo nhĩxi jarênh kôt mẽmoj tã amnhĩ jarênh o apa hkêt nê.

37 ãm akatàt kôt tãm amnhĩ jarênh kurê kumrêx. Jao mẽ kãm: “Tỳ. Nà kot paj ho anê.” Anhỹr o mẽmoj tanhmã ho. Rỳ mẽ kãm: “Nà kot paj ho anhỹr kêt nê.” Anhỹr o mẽmoj tanhmã ho hkêt nê. ãm akatàt kôt tanhmã mẽmoj tã amnhĩ jarênh to xà hkôt ho anhỹr kurê kumrêx. Mẽ kot Satanasti hkôt amnhĩ nhĩpêx o mẽ pa xwỳnh pixjaja na htem hêx rom mẽmoj nhĩxi jarênh kôt tanhmã amnhĩ jarênh to ho pa. Anê.

Mẽ pahte tanhmã axpên nhĩpêx to hã Jejus kot mẽ pamã karô

Rukre 6.27-30, 23.34; mãânên Atre 7.60; Rômãn 12.14

³⁸ Nhũm Jejusja arĩ mẽ kãm kapêr nê mẽ kãm:

—Na prem amnepêm mẽ panhĩgêjtjê mã Tĩrtũm kapêr tũm jarênh o: “Koja mẽhõ apê ano katõk nê hkapa hã koja mẽ anhõ pahija atã mã ho anê nê kêp no kapa. Rỳ koja mẽhõ apê axwa hõ hkwỳr hã koja atã mã ho anê nê atã kêp wa hõ hkwỳr.” Anhỳr o mẽ kãm hã karõ. ãm hãmri na prem ã ja jarênh anê.

³⁹ Tã kot paj ixprĩ hã mẽ amã tanhmã ja jarênh to ka mẽ inhma. Koja mẽhõ tanhmã mẽ anhĩpêx to ka mẽ ãm amnhĩ tã omu nê tanhmã amnhĩ tã ho hkêr nê. Koja anhĩnep akura ka ãm omu nê tanhmã amnhĩ tã ho hkêr nê. Te ate kãm ihkjê hpêr nhũm kot ihkjê kamã hkuranh pyrãk o amnhĩ nhĩpêx nhũm ja amã mex nê. No amnhĩ tã tanhmã ho hkêr nê.

⁴⁰ —Nê koja mẽhõ anhĩnõhkã hã awỳ nhũm mẽ anhõ pahija amã anê ka mãmrĩ kãm agõ nê tanhmã hã kãm nê hkêr nê. Te ate hkõt kry pê kãm anhĩnõhkã hpakã ry jagjênh xwỳnhhta nhõr pyrãk o amnhĩ nhĩpêx. Nom kêr ka mẽ kamã agryk kamã kãm õr kêr nê.

⁴¹ —Nê koja mẽhõ ate kãm jênh tur nê hkõt ho amõr ryy kaxyw amã kapêr ka mãmrĩ kãm ho anê. Nê kot amã nhỹri hã karõ xàja wỳr o pøj nom kamã kãm õr kêr nê. Kãm ho hakrenh ryy nê rĩ kormã akupỹm kãm agõ.

⁴² —Nê koja mẽhõ õ mẽmoj kêt nê awỳr tẽ nê mẽmoj tã awỳ ka mãmrĩ kãm agõ. Rỳ

nhũm awỳr tẽ nê apê mẽmoj to ĩpresta kaxyw ka mãmrĩ kãm ho ĩpresta. Kêr ka mẽ ã axpênh nhĩpêx anhỳr o ri apa. Anê.

Mẽ pamã axpênh kĩnh ã Jejus kot mẽ pamã karõ

Rukre 6.32-36; mããnênh Rõmãn 12.14

⁴³ Nhũm Jejus arĩ mẽ kãm kapêr nê mẽ kãm:

—Nê na prem amnhĩ krã hkõt axtem nê tanhmã mẽ panhĩgêjtjê mã mẽmoj jarênh to nê mẽ kãm: “Kêr ka mẽ amã mẽ akrãmnhwỳjê pix kĩnh nê tanhmã mẽ ho mex to. No kêt mẽ kot tanhmã mẽ ato xwỳnhjaja kêr ka mẽ mãmrĩ mẽ kamã axàhkurê ho ri apa.” Anhỳr o mẽ kãm karõ.

⁴⁴ Nom pa kot paj mẽ amã Tĩrtũm kot tanhmã ja hã karõ hto hã harê ka mẽ inhma. Kêr ka mẽ kot tanhmã ri mẽ atomnuj to xwỳnhjaja amnhĩ tã tanhmã mẽ ho hkêr nê. ãm tanhmã mẽ ho mex to pix hkukamã mãn ajamexpêr. Nê mẽ ho Tĩrtũm wỳr pix kukamã mãn ajamexpêr.

⁴⁵ Na hte ã kaxkwa kamã Mẽpahpãm Tĩrtũmja amnhĩ nhĩpêx anhỳr o pa. Mẽ kot amnhĩ tomnuj xwỳnhjaja nê mẽ kot amnhĩ to mex xwỳnhjaja nhũm hte mẽ ho hpimràatã mẽ ho mex o axpênh pyrãk. Jao hamê wa hwỳr na rê nê hamê wa hwỳr myyti rê nhũm hamê wa kãm hirã ho pa. Jakamã kêr ka mẽ urãk nê mẽ piitã tãm mẽ hipêx o axpênh pyrãk. Mẽ kot amnhĩ tomnuj xwỳnhjê mẽ mẽ kot amnhĩ to mex xwỳnhjê mẽ

ho apimràatã mē ho mex o
axpēn pyrāk.

46 —Nē xat kaj mē amã mē
piitã mē ho mex prãm kêt nē
ãm mē kot mē ato mex xwÿnh
pixjaja ka mē amã mē ho mex
prãm nhũm Tirtũm ja hã mē
apumu nhũm ja kãm mex nē
nã? Nã koja kãm mex kêt nē.
Koja mēhõ ato mex kêt tã kêt
ka ãm amnhĩ rom ho mex nē.
Nhũm Tirtũm ja hã apumu nē
amnhĩm amex ã ajarē. Mē
kot amnhĩ tomnuj xwÿnhjaja
na htem ãm mē kot mē ho
mex xwÿnh pixjaja nhũm mē
amnhĩ xwar mē ho mex. No
tãm mē kot amnhĩ nhĩpêx
xwÿnhjaja na htem mē piitã
mē ho mex o axpēn pyrāk.
Mē kot tãm amnhĩ nhĩpêx
xwÿnhjaja nē mē kot amnhĩ
tomnuj xwÿnhjaja nhũm mē
ho hpimràatã mē ho mex o
axpēn pyrāk.

47 —Nē na hte mē hkwÿjaja
ãm amnhĩ kwÿjê pix mã
kapēr mex o pa. Nom mē
piitã tãm mē hipêx kêt nē.
Nom kêt ka mē ã amnhĩ
nhĩpêx anhÿr kêt nē. Kêt ka
mē kurom mē piitã tãm mē
hipêx o axpēn pyrāk. Mē
akwÿjê mē mē akwÿ hkwÿ
xwÿnhjaja ka mē hipêx o
axpēn pyrāk. Nē tãm mē kãm
akapēr o axpēn pyrāk.

48 Kaxkwa kamã Mēpahpãm
Tirtũm pyrã nē mē kot amnhĩ
tomnuj xwÿnhjê mē mē kot
amnhĩ to mex xwÿnhjaja mē
ho apimràatã mē ho mex
o axpēn pyrāk. Na hte ã
Tirtũmja mē panhĩpêx anē.
Anē.

6

*Mē pahte mē kēp amrakati
xwÿnhjê ho mex rãhã hã mē
pamã karõ*

1-2 Nhũm Jejus arĩ mē kãm
kapēr nē mē kãm:

—Nē na htem mē piitã
hkwÿjê noo mã tanhmã mē
kēp amrakati xwÿnhjê ho
mex to. Nom kãm mē hkaprĩ
kamã tanhmã mē ho mex to
hkêt nē. ãm hkwÿjaja kot ja hã
mē omunh nē mē mex ã mē
harēnh pix kaxyw na htem
krĩ hkôt ri mē kēp amrakati
xwÿnh piitã mē ho mex o pa.
Nē mē pikuprõnh xà hã ixkre
kamã kuhê nē tanhmã mē ho
mex to. Mē hkwÿjaja kot ja
hã mē omunh nē amnhĩm mē
mex ã mē ho jarkrar kaxyw.
Jakamã koja nhÿrmã Tirtũmja
axte ja hã mē kãm mēmoj
mex nhõr kêt nē. Ra jar mē
hkwÿjaja kot ja hã mē omunh
nē amnhĩm mē mex ã mē
harēnh kēnã. Jakamã kwa
kêt ka mē ho mē urak kêt nē.
Nē tanhmã mēhõ ho mex to
kaxyw nē akwÿjê no kuhpa
hã mē hkàx ã tanhmã mē ho
mex to. No kot kaj mē noo
mã tanhmã mē ho mex to.
Mē kot hã apumunh nē ato
jarkrar kaxyw tanhmã mē ho
mex to nhũm kaxkwa kamã
Mēpahpãmja ja hã apumu nē
mē hã tanhmã ato mex to
hkêt nē. Koja ãm hã apumu.

3 —Ja pymaj kêt ka mē mē
kēp amrakati xwÿnhjê mã
mēmoj nhõr kaxyw hãmri
nē mē piitã mē no hkàx
ã tanhmã mē ho mex to.
Hãmri nē nhãm ri ja hã mē
kãm amnhĩ to jarkrar kêt
nē. Aprõ mã rÿ akrajê mã

rỳ akràmnhwỳ mã hã amnhĩ jarênh kêt nê.

⁴ Kot kaj mẽ no hkàx ã tanhmã ho mex to no nhũm Tĩrtũm tapxipix apumunh o nhỹ. Hãmri nê ja hã ato mex rax nê ka amex nê apa. Anê.

Tanhmã mẽ pahte Tĩrtũm mã amnhĩ jarênh to hã mẽ pamã karõ

Rukre 11.1-13, 18.9-14

⁵ Nhũm Jejus arĩ mẽ kãm kapêr nê mẽ kãm:

—Nê mãânên ja. Na htem hakwa pix o amnhĩ mẽ ã amnhĩ jarênh xwỳnhjaja Tĩrtũm mã amnhĩ jarênh kaxyw nê mẽ kot Tĩrtũm kapêr o mẽ ahkre xà hã ixkreja wỳr agjê. Nê mẽ piitã mẽ noo mã kãm tanhmã amnhĩ jarênh to. Rỳ gáp kuhê nê mẽ piitã mẽ noo mã kãm amnhĩ jarê. Tã mẽmo kaxyw na htem mẽ noo mã Tĩrtũm mã amnhĩ jarê? Nà ãm mẽ kot ja hã mẽ omunh nê mẽ mex ã mẽ ho jarkrar pix kaxyw. Nê mẽ harênh o: “E mũjti pumu. Na hte apkati mẽ ã Tĩrtũm mã amnhĩ jarênh anê. Kot amnhĩ to mex xwỳnh mãn.” Anhỹr ã harênh kaxyw. Tã ra mẽ piitã mẽ kot ja hã omunh nê amnhĩm mẽ ã ho jarkrar jakamã koja Tĩrtũm axte ja hã tanhmã ho mex to hkêt nê. Ra pika ja kamã mẽ kot mẽ omunh nê mẽ mex ã mẽ harênh kênã.

⁶ No mẽ kajaja. Kêr ka mẽ uràk nê ã amnhĩ nhĩpêx anhỹr kêt nê. ãm Tĩrtũm mã amnhĩ jarênh kaxyw nê akwỳjê no hkàx ã hitom wỳr agjê nê hitom kãm ahte kãm

amnhĩ jarê. Hãmri nhũm Tĩrtũm tapxipix ja hã mẽ apumu. Mẽ amã amnhĩ to amnhĩrĩt kêt tã mẽ apumu. Hãmri nê mẽ ato mex nê.

⁷ —Nê mẽ kêp Tĩrtũm kra hkêt xwỳnhjaja na htem sãnti mã amnhĩ jarênh kaxyw nê xatã kãm amnhĩ jarê. Nê xatã kàx pêê kãm amnhĩ jarê. Nê hamaxpêr o: “Kot paj xatã sãnti mã amnhĩ jarê nhũm inhmar japêr.” Anhỹr o hamaxpêr jakamã xatã kãm amnhĩ jarê. No ãm htỳx ã hamaxpêr anhỹr kaprỳ.

⁸ Jakamã kwa kêr ka mẽ ho mẽ uràk kêt nê. Tĩrtũm ra kot mẽ ate mẽmoj tã hwỳr xàta ra ja kukamã kot omunh mẽ kênã kot ka kêt mẽ xatã hã hwỳr o akuhê.

⁹ —Nê kêr ka mẽ kãm amnhĩ jarênh kaxyw nê amnhĩ krã hkôt tanhmã kãm amnhĩ jarênh to rỳ kãm amnhĩ jarênh o:

Pa Měinhĩpêêxà maati pê kaxkwa kamã ri apa xwỳnh? Amex o amex Tĩrtũm.

¹⁰ Apê mẽ ijamâr mẽ xwỳnh maati na ka.

Na hte kaxkwa kamã mẽ kot ri amã tanhmã amnhĩ nhĩpêx to ho mẽ pa xwỳnhjaja akôt pix mã amnhĩ nhĩpêx o ri pa. Tã ijaxwỳja inhmã mẽ uràk nê akôt pix mã amnhĩ nhĩpêx o ri ixpa hprãm.

¹¹ Nê kwa jarãhã mẽ inhmã mẽmoj gõ pa mẽ akukwak ri ho apku.

¹² Na pa hte tōhã amnhĩ tomnuj nê Tĩrtũm.

Nom mẽ kot tanhmã ixtomnuj to xwÿnhjaja na pa hte ãm mẽ omu nê amnhĩ tã tanhmã mẽ ho hkêt nê. Nê ja ho ijamakêtkati nê axte kãm ijamaxpêr kêt nê. ã ixe amnhĩ nhĩpêx anhÿr jakamã kwa ja hã ixpumu nê ixpyrà nê ixe tanhmã amnhĩ tomnuj to hã ixpumu nê hã tanhmã ixto hkêt nê. ãm ho ajamakêtkati kurê kumrêx nê axte kãm ajamaxpêr kêt nê.

13 Nê kot paj nhÿrmã tanhmã amnhĩ tomnuj to kaxyw ka ja hã ixpumu nê ixe ã amnhĩ nhĩpêx anhÿrja nê ixto htÿx nê pa tanhmã amnhĩ tomnuj to hkêt nê. ãm mẽmoj punuj pê ixpytãr rãhã ho apa Tirtũm. Tã ãm ja pix na hapêx. Anê.

—E kêr ka mẽ ã Tirtũm mã amnhĩ jarênh anê. Anê.

14 —Nê koja mẽhõ tanhmã anhĩpêx to htã ka ho ajamakêtkati nê axte kãm ajamaxpêr pix o ri apa hkêt nê. Hã koja kaxkwa kamã Mẽpahpãm maatija ja hã apumu nê apyrà nê tanhmã ate amnhĩ tomnuj to ho hamakêtkati nê axte kãm hamaxpêr kêt nê.

15 Nom kot kaj mẽ ã amnhĩ nhĩpêx anhÿr kêt nê. Nê tanhmã mẽ kot mẽ atota ã anohtÿx rãhã ho apa hãmri nhũm Mẽpahpãm maatija mẽ apyrà nê mẽ ate tanhmã amnhĩ tomnuj to ho

hamakêtkati hkêt nê. ãm hã nohtÿx rãhã ho pa ho pa. Anê.

Tanhmã mẽ pahte Tirtũm mã mex o mex ã harênh to

Rukre 18.11-12

16 Nhũm Jejus arĩ mẽ kãm kapêr nê mẽ kãm:

—Nê mẽ kot amnhĩ to jarkrar xwÿnhjaja na htem Tirtũm mã amnhĩ jarênh kaxyw hãmri nê tõhã ho apkur kêt rãhã kãm amnhĩ jarênh jakamã hkuk kaprĩ nê hkwÿjê hkôt pa. Tã mo kaxyw na htem ã mẽ noo mã amnhĩ nhĩpêx anê? ãm mẽ apkur kêt rãhã Tirtũm mã amnhĩ jarênh ã mẽ omunh pix kaxyw. Tã ra jar pika ja kamã mẽ kot ja hã mẽ omunh jakamã koja Tirtũm nhÿrmã ja hã tanhmã mẽ ho mex to hkêt nê. Jakamã kwa kêr ka mẽ ho mẽ urak kêt nê.

17 Kêr ka mẽ tõhã Tirtũm mã amnhĩ jarênh ryy kaxyw axàpkur kaga hãmri nê amnhĩ krã kahõ nê amnhĩ jaxwÿr mux nê akuk kĩnh nê ri akwÿjê hkôt apa.

18 Hãmri nê nhÿri mẽ hkàx ã ahte kãm amnhĩ jarê nê kãm mex o mex ã harê. Kot kaj mẽ ã mẽ hkàx ã amnhĩ nhĩpêx anê nhũm mẽ akwÿjaja mẽ axàpkur kaga hã mẽ apumunh kêt nê. Nhũm Tirtũm pix ja hã mẽ apumu. Hãmri nê nhÿrmã ja hã mẽ ato mex nê. Anê.

Kaxkwa kamã mẽmoj mex Rukre 12.33-34; mããnêh Sikũn Ximotre 4.8; Wam Pêtre 1.4; Eprêw 10.34

19 Nhũm Jejus arĩ mẽ kãm kapêr nê mẽ kãm:

—Nê mãânên ja. Kêr ka mẽ jar pika ja kamã akukrêx rûnh o apa hkêt nê. Kêt jar mẽ hikukrêx koja kritpêm mex kêt nê. Kot kaj mẽ ho akuprô nhûm amnhôre apê homnu rý paratre apê homnu. Nê kàx o mẽ akukrêx nhûm haxwýja apê omnu rý nhûm mēhō apê hkwý ho ahkĩ.

²⁰ Jakamã kêr ka mẽ akukrêx rûnh o apa hkêt nê. Kaxkwa kamã Tirtûm kot mẽ akutêp mẽ akukrêx o pikuprônhja na kêt mex kumrêx o jar mẽ hikukrêx jakrenh par. Jakamã kêr ka mẽ amã nhÿrmã kaxkwa kamã akukrêx mex prãm xàj tãm mẽ piitã tãm mẽ hipêx nê mẽ ho mex o ri apa. Nê mẽ kamã axukapri nê. Nê Tirtûm kôt ri amnhĩ nhĩpêx mex nê. Hãmri nhûm ã mẽ ate amnhĩ nhĩpêx anhÿr ã mẽ apumu nê mẽ akutêp mẽ amã mẽmoj mex kwý jaxwý. Kaxkwa kamã mo amnhôre nê mo paratre? Nê kamã mo mẽ ahkĩnh xwýnh? ãm kamã amrakati kumrêx.

²¹ Kot kaj mẽ jar akukrêx rûnh hãmri nê ãm tanhmã apê homnu hto pix kukamã ajamaxpêr. Nom kot kaj mẽ apê Tirtûm kra hã kaxkwa kamã akukrêx mã ajamaxpêr rãhã ho ra akĩnh nê ri apa.

²² —Nê kot kaj mẽ ixkapêr ma nê ixkôt amnhĩ nhĩpêx hãmri nê tãm amnhĩ nhĩpêx. Nê tãm axpên hipêx. Jao te hirã kamã arit mex pyrãk o amnhĩ nhĩpêx.

²³ No koja mēhō ixkapêr ma nê ãm kuma nê ixkwým ri

amnhĩ nhĩpêx o pa. Hãmri nê te kamãt kô kamã mēhō rīt mex kêt kot amnhĩ nhĩpêx pyrãk o amnhĩ nhĩpêx. E kêr ka mẽ ã amnhĩ nhĩpêx anhÿr pymajixkapêr ma nê kãm ajamaxpêr tÿx rãhã ho ri apa.

²⁴ —Nê kot kaj apyxi nê anhō patrãw hamêxkrut hãmri nê arĩgro pyxi hã hamê wa kãm axápênh o amÿkry hkêt nê. Kot kaj anê nê hō gryk ã ihō kaga. Ja pyrã nê kot kaj mẽ jar akàxpore nê akukrêx pix mã ajamaxpêr nê amã hapê ho akwýjê pê ho anhōxÿ ho ri apa. Nê gryk ã Tirtûm kãm hprãm xà hkôt tanhmã ho mẽ ho mex to hkêt nê. Jakamã kwa kêr ka mẽ Tirtûm pix mã mãn ajamaxpêr rãhã nê. Jao akàxpore nê akukrêx pix kukamã ajamaxpêr o ri apa hkêt nê. Anê.

Mê pahte tee ri amnhĩ kukamã pajamaxpêr kêt ã mẽ pamã karō

Rukre 12.22-31; mãânên Piripos 4.6; Wam Pêtre 5.7

²⁵ Nhûm Jesus arĩ mẽ kãm kapêr nê mẽ kãm:

—E. Kwa kêr ka mẽ tee ri mẽmoj tã amnhĩ kukamã ajamaxpêr kêt nê. Tanhmãn axàpkur xà rý axê ka mẽ tee ri hkukamã ajamaxpêr kêt nê. Mẽmoj piitã hkukamã tee ri ajamaxpêr o ri apa hkêt nê. Tirtûmja àhpumunh tÿx o àhpumunh tÿx xwýnh na. Na pre àhpumunh tÿx o mẽ anhĩpêx ka mẽ kukwak ri atir nê apa. Jakamã xà kot mẽ amã mẽ anhō ho pa kaxyw àhpumunh kêt? Nà ja kaxyw

àhpumunh tỳx kênã. Kêp mē anhîpêx xwỳnh jakamã mãânên kêp mē amã mē anhõ xwỳnh. Nê kêp mē amã mē axê nhõr xwỳnh.

26 —Mãn ka htem kuwênhre pumu. Na hte tee ri amnhĩ xàpkur xà hkukamã hamaxpêr o hkaprĩ nê ri pa hkêt nê. Mē anhîpêxà maati tãm na hte kãm ô ho pa. Tã kãm mē ajapê htỳx o kot kuwênhre jakrenh jakamã koja uràk nê mē amã mē anhõ rãhã ho pa.

27 —Nê xà kot kaj mē kritpê m atĩr prãm xà ja pix kukamã ajamaxpêr rãhã nê ra ajamaxpêr kôt kritpê m atĩr nê apa? Nà kot kaj mē anhỹr kêt nê.

28 —Mãn ka htem akunĩ kamã pixôrã pumu. Na hte tee ri tanhmã kute hkukamã hamaxpêr o ra hkaprĩ nê harir kêt nê.

29 Tã nom muxre nê harir ka mē omu. Te ho amnepê m pahihtĩ Sarumãw xê mex pyràk nom mex o hakre.

30 Pixôrãreja koja mêmo arĩgro hã htĩr nê mux nê harir tã mêmo arĩgro hã ra grà pa nê hapêx. Kêp pixôrã pix nê hapêx tokyx anhỹr tã nhũm Tĩrtũm ho mex nê nhũm mux nê harir. No mē kajaja na hte mē ato mex o pixôrã ho mexta jakre. Jakamã kwa mêmo kaxyw kot ka kêt mē tee ri amnhĩ xê hkukamã ajamaxpêr o ri akaprĩ nê apa? Kot kaj mē ã ajamaxpêr anhỹr jao kormã amnhĩ kaxyw Tĩrtũm mã ajamaxpêr tỳx kêt nê.

31 —Kwa mē tee ri axàpkur xà hkukamã ajamaxpêr o ri akaprĩ hkêt nê. Nê tee ri amnhĩ kukamã tanhmã ajamaxpêr to ho ri akaprĩ hkêt nê.

32 Mē kot Tĩrtũm kôt amnhĩ xunhwỹr kêt xwỳnhjaja na htem ã ri hamaxpêr anhỹr o pa. Tã nom kêr ka mē ho mē uràk kêt nê. Tĩrtũm ra kot mē panhõ mêmoj kêt kôt mē pahpumunh mex kênã.

33 Jakamã kêr ka mē hkôt ri tanhmã amnhĩ nhîpêx to rãhã ho ri apa. Nê amã ja pix tãnopxar prãm. Hãmri nhũm Tĩrtũm amnhĩ tã mē apumu nê apkati mē mē amã mêmoj nhõr o pa.

34 —Jakamã kwa kêr ka mē tee ri amnhĩ kukamã ajamaxpêr o akaprĩ nê apa hkêt nê. Tĩrtũm kot apkati mē mē pajamãr mex jakamã kêr ka mē jarãhã amnhĩ kukamã apkati mē ajamaxpêr kêt nê. Kê apkati mãn. ãm jarãhã pix mã mãn mē ate tanhmã amnhĩ nhîpêx tota kukamã ajamaxpêr. Tĩrtũm kot mē pahpumunh mex o pa rãhã kênã. Anê.

7

Mê pahte axpên to pakapêr punuj kêt ã kot mē pamã karõ Rukre 6.37-38, 6.41-42; mãânên Rômãn 2.1-3; Wam Korũt 4.5; Xiakre 4.11-12

1 Nhũm Jejus arĩ mē kãm kapêr nê mē kãm:

—Nê kêr ka mē atỳx ri amnhĩ krã hkôt tanhmã akwỳjê hõ kot amnhĩ tomnuj to hã harênh kêt nê. Kot kaj

mê ã harênh anê nhũm Tĩrtũm ja hã mê apumu nê mê kajaja ã mê ajarênh anê.

² Na hte tanhmã mê pahte xepên nhĩpêx to hã mê pahpumunh kôt tanhmã mê panhĩpêx to.

³⁻⁵ Jakamã kwa kêr ka mê mēhō kot tanhmã amnhĩ tomnuj to hã omu hãmri nê hã kãm kapêr tokyx anhỹr kêt nê. Akumrêx ate tanhmã amnhĩ tomnuj to hã amnhĩ pumu nê hkaga hãmri nê rĩ kormã ate mēmoj tã omunh xwỳnhhta wỳr tẽ nê hã tanhmã kãm akapêr to. Kêr ka mê ã amnhĩ nhĩpêx anhỹr o ri apa.

—Nê xà koja mê akwỳjê hō tanhmã amnhĩ tomnuj to grire. Ka ate amnhĩ tomnuj tỳx o hakrenh tã ã kot amnhĩ nhĩpêx anhỹr ã omu nê hã kãm akir nhũm amã ja mex nê nà? Nà koja amã ja mex kêt nê. Kot ka akumrêx ate tanhmã amnhĩ tomnuj tota kaga hãmri nê rĩ kormã anhĩō tanhmã kot amnhĩ tomnuj to grireta nê kãm akapêr nhũm ja amã mex nê.

⁶ —Nê xà na htem mê apkur xà mex jamỳ nê rop mã kurê? Nà na htem anhỹr kêt nê. Ja pyrã nê kêr ka mê kot Tĩrtũm kaga xwỳnhjê mã kapêr jarênh o ri apa hkêt nê. Anê.

Mê pahte mēmoj to presija hã amnhĩ to Tĩrtũm wỳr

Makre 11.24; Rukre 11.5-13; Juãw 14.13-14; määnên Wam Tesarôn 5.17; Xiakre 1.5-8, 4.1-3

⁷⁻¹¹ Nhũm Jejus arĩ mê kãm kapêr nê mê kãm:

—Nê xà kot we akraja kãm prãm nê tep ã awỳ ka axtem nê kagã hō py nê kãm agō? Rỳ nhũm krãhyre gre hã awỳ ka axtem nê makre hō py nê kãm agō? Nà na ka htem ã mê hipêx anhỹr kêt. Na ka htem kot mēmoj tã mê awỳr xà hkôt kãm mēmoj gō. Mê ate amnhĩ tomnuj tã na ka htem akrajê ho mex o ri apa. Tã kaxkwa kamã Tĩrtũmja na hte mê ato mex o mê ate mê akrajê ho mex jakrenh. Kãm mê ajapê htỳx kôt na hte mê amã mēmoj mex nhõr o pa. Jakamã kot ka mê mēmoj tã awỳ nhũm mê ama nê mê ate mēmoj tã hwỳr xàta kôt amã kugō. ãm xatã mê ate hã axàhwỳr o ri apaja nhũm mê amã hprãm xwỳnhhta gō. ãm mēmoj tã hwỳr rãhã ho ri apa nhũm mê ama nê mê amã mēmoj tanhmã hipêx to. Te ho mēhō kãm tep xành nê teprênhxã hpyr nê xatã gōx kãm rênh o ãm pyrã nê xatã mēmoj tã awỳ. Hãmri nhũm mê ama nê mê amã hprãm xwỳnhhta gō. Te tep kanhêr xwỳnhhta jatã kot tep kanhêr pyrãk. Jao mê amã mēmoj prãm xwỳnhhta gō.

¹² —Nê mê piitã mê kot tãm mê anhĩpêxja na mê amã hprãm. Tã kêr ka mê amnhĩ pyrã nê tãm mê piitã mê hipêx o ri apa. Mê kot tãm mê anhĩpêx kêt tã kêr ka mê axãmnhĩx mê kêp anhõxỳ hkêt nê tãm mê hipêx. Kot kaj mê ã xepên nhĩpêx anê nê finat Mojes mê Tĩrtũm nhỹ hã mê kapêr o mê pa

xwÿnhjê xujarênh xà hkôt
axpên nhîpêx mex o ri apa.
Anê.

Pry pijakrut jarênh

*Rukre 13.24; mãânên Piri-
pos 3.19-21*

13-14 Nhũm Jejus arĩ mẽ kãm
kapêr nê mẽ kãm:

—Tĩrtũm kapêrja mẽ kêp
hihtÿx jakamã na htem ohtô
nê hkôt amnhĩ xunhwÿr kêt
nê. Na htem ãm hpÿnhre
nê hkôt amnhĩ xunhwÿ nê
hkôt amnhĩ nhîpêx. Jakamã
te Tĩrtũm nhõ krĩ hwÿr pry
grireta ã hpÿnhre nê pa
pyràk. No nhũm Satanasti
hkôt mẽ kot amnhĩ xunhwÿr
xwÿnhjaja na htem Satanasti
kôt pix mã tanhmã amnhĩ
tomnuj to hprãm. Mẽ kãm
mex jakamã nhũm mẽ amnhĩ
nhîpêx o te pry krepak rax
ã axpên kôt mẽ ohtô nê pa
pyràk o amnhĩ nhîpêx. Axtem
kuwy hwÿr pry krepakja nõr
tã nhũm mẽ htÿx kuwyja wÿr
amnhĩ to pa. Jakamã Tĩrtũm
kapêrja mẽ apê hihtÿx tã kêt
ka mẽ mãmrĩ hkôt amnhĩ
xunhwÿ. Jao Tĩrtũm nhõ krĩ
hwÿr pry grireta ã mãn apa.
Anê.

*Mẽ kot amnhĩ to hêx
xwÿnhjê jarênh*

*Rukre 6.43-44; mãânên Xi-
akre 3.9-12; Wam Juãw 3.10,
4.4-6*

15 Nhũm Jejus arĩ mẽ kãm
kapêr nê mẽ kãm:

—E kwa mẽ o kora. Mẽ
akwÿjaja kot kêp Tĩrtũm nhÿ
hã kapêr jarênh xwÿnh ã
amnhĩ jarênh tã na htem ja
hã amnhĩ to hêx. Nhũm htem
kãm mẽ kapêr mar prãm nê.

Te mẽ kapêr mex pyràk tã
no nhũm htem ãm mẽ kãm
amnhĩ to hêx pix o ri mẽ hkôt
pa. Mẽ kot mar nê axtem nê
Tĩrtũm kapêr kwÿm tanhmã
amnhĩ nhîpêx to kaxyw nhũm
htem hêx rom tanhmã mẽ
kãm kapêr to. Jakamã kwa
mẽ o kora. Mẽ axkãm ajamak
rom nê amnhĩ nê mẽ omunh
mex nê.

¹⁶ Kêr ka aprĩ hã mẽ piitã
mẽ kot tanhmã amnhĩ nhîpêx
to hã mẽ omu nê rĩ kormã
tanhmã mẽ harênh to. Mẽ
hamaxpêr punuj xwÿnhjaja
kêp Tĩrtũm nhÿ hã kapêr
jarênh xwÿnh kêt. No koja mẽ
tãm hamaxpêr nê tãm amnhĩ
nhîpêx ka ja hã mẽ omu nê
mẽ kêp Tĩrtũm nhÿ hã kapêr
jarênh xwÿnh ã mẽ omunh
kurê kumrêx. Na htem hprĩ
hã mẽ kot tanhmã amnhĩ
nhîpêx to ho pa hã mẽ omu nê
rĩ kormã tanhmã mẽ harênh
to.

¹⁷ Na htem hamaxpêr
punuj hãmri nê hkôt tanhmã
amnhĩ tomnuj to. Nom koja
mêhõ hamaxpêr mex nê
hãmri nê hkôt tãm amnhĩ
nhîpêx mex o pa.

¹⁸ Na htem tanhmã
hamaxpêr to xà hkôt tanhmã
amnhĩ nhîpêx to ho pa.

¹⁹ —Nê koja mêhõ õ pĩ hpàr
ô hkêt japêr nhũm tee ri omu
hãmri nê krãhta nê kuwym
kumê. Ja pyrà nê koja mêhõ
tanhmã amnhĩ tomnuj to ho
pa nhũm Tĩrtũm tee ri ja hã
omu hãmri nê ã kot amnhĩ
nhîpêx anhÿr o paja mÿrapê
kuwy hwÿr kumê.

²⁰ Jakamã kot kaj mẽ
tanhmã mẽ kot amnhĩ nhîpêx
to ho pa hã akwÿjê pumu nê

ra aprĩ hã tanhmã mẽ kute hã mẽ omunh kurê kumrêx. Mẽ kêp Tĩrtũm nhỹ hã kapêr xwýnh ã mẽ omu rý mẽ kêp hkwỹm ri kapêr xwýnh ã mẽ omu. Anê.

Mẽ kot Tĩrtũm nhõ krĩ hwýr gjêx mã xwýnhjê jarênh

Rukre 13.25-27; mãânêñ Sikũn Korĩt 13.5; Wam Juãw 2.3-6

²¹⁻²³ Nhũm Jejus arĩ mẽ kãm kapêr nê mẽ kãm:

—Nê Inhĩpêêxà Tĩrtũm mẽ wa inhõ krĩja wýr koja mẽ piitã gjêx kêt nê. ãm mẽ kot kapêr kôt amnhĩ nhĩpêx o mẽ pa xwýnh pixjaja koja mẽ nhỹrmã ma hwýr agjê. Na hte mẽ hkwỹjaja ixto “Pahihti” anhỹr ã ijarênh tã no ãm ixkôt ri amnhĩ nhĩpêx kêt nê. Jakamã koja mẽ nhỹrmã wa inhõ krĩ hwýr àpir kêt nê. Kot paj nhỹrmã mẽ piitã mẽ htĩr ri tanhmã mẽ kot amnhĩ nhĩpêx to ho pa hã mẽ omunh xà hkôt tanhmã mẽ harênh to. Mẽ mex ã mẽ hkwỹjê jarê nê mẽ kot amnhĩ tomnuj ã mẽ hkwỹjê jarê. Hãmri nhũm mẽ hkwỹ kot ixkôt amnhĩ nhĩpêx o pa hkêt xwýnhjaja kuwyta wýr ma pa pymaj tee ri amnhĩ kukamã hamaxpêr hãmri nê tanhmã inhmã amnhĩ jarênh to nê inhmã: “Kwa Jejus. Xà ate ixpumunh kêt? Na pa pre amnepêm ixtĩr ri pikap ixpare ri anhỹ hã aa mẽ kot mẽmoj pumunh kêt kwý ho anhỹr rax nê. Nê ixkwýjê nê mẽkarõmnuti jano nê mẽ kãm akapêr jarênh o ri xpa. Kwa

xà ate ja hã ixpumunh kêt?” Anhỹr o inhmã amnhĩ jarê.

—Nom mẽ htĩr ri ã mẽ kot amnhĩ nhĩpêx anhỹr o pa htã ixkapêr kôt amnhĩ nhĩpêx kêt jakamã kot paj mẽ kuma nê ãm mẽ kuma nê amnhĩ nê mẽ hano nê mẽ kãm: “Tk kwa mẽ ma mra. Mẽ apê ixkwý hkêt. Mẽ ate ixkôt amnhĩ nhĩpêx o apare hã. ãm mẽ ate amnhĩ tomnuj xwýnh na ka mẽ. E mẽ ma kuwy hwýr amrar kurê kumrêx.” Anhỹr o kot paj amnhĩ nê mẽ hano. Hãmri nhũm mẽ kot ixkôt amnhĩ nhĩpêx o mẽ pa xwýnh pixjaja ma Tĩrtũm mẽ wa inhõ krĩ hwýr gjêx pa. Anê.

Ixkre pijakrut jarênh

Rukre 6.46-49; mãânêñ Xiakre 1.22-25; Wam Juãw 2.3-6

²⁴ Nhũm Jejus arĩ mẽ kãm kapêr nê mẽ kãm:

—E kot paj mẽ amã awjarê ka mẽ ixujarênh ma. Nà mẽ kot ixkapêr mar nê hkôt amnhĩ nhĩpêx o mẽ pa xwýnhjaja te mẽ kot ixujarênh ja pyræk. Mẽ kot amnhĩ nhĩpêx o te mẽhõ kot amnhĩ kukamã hamaxpêr mex nê aptýx kãm amnhĩm òrkwý nhĩpêxja pyræk.

²⁵ Koja mẽhõ aptýx kãm amnhĩm hipêx nhũm mẽmo arĩgro hã na wrýk rax nê gô htãm rax nê hanhi no nhũm arĩ ãm týx nê xa. Tã kot kaj mẽ ixkôt amnhĩ nhĩpêx o ri apa hã kot kaj mẽ te ixkre ja pyræk. Jao amex nê ajamakêtkati nê ri apa. Te ho gô htãm kot ixkre janhir nhũm arĩ ãm týxta pyræk.

26-27 —No mẽ kot ixkapêr mar nê ãm mar xwÿnhjaja. Te mẽ kot mēhō kot amnhĩ kukamã hamaxpêr mex kêt nê htÿx mōr nê gō mÿri gyw rerek kãm amnhĩm ōrkwÿ nhĩpêx pyrāk. Koja mẽmo arĩgro hã ōrkwÿ hã kōk xàpêr tÿx nê na wrÿk rax nê. Nê gō htàm nê hanhi nê kêp grành pa. Jakamã koja mēhō ixkōt amnhĩ nhĩpêx kêt nê te kot ã kot amnhĩ nhĩpêx anhÿr xwÿnhnta pyrāk. Jakamã kwa mẽ ixkapêr mar tÿx nê hkōt amnhĩ nhĩpêx rãhã ho ri apa. Te mẽhō aptÿx kãm ōrkwÿ xãm xwÿnhnta pyrāk. Anê.

28 Nhũm pre Jejusja ã mẽ kãm ujarēnh ry anê nhũm mẽ amnhĩ jaêr pē kot tanhmã mẽ ahkre htoja mar o hkri.

29 Hãmri nê axpēn mã harēnh o:

—Hêxta waa nê. ãm hãmri na ã mẽ pamã kapêr anê. àhpumunh tÿx kōt na hte ãm hãmri tanhmã mẽ pamã ujarēnh to. Pêr ãm Tirtũm kapêr tũm o mẽ ahkre xwÿnhjê kurom àhpumunh tÿx kumrêx. Anê.

8

Kà nhy hkro xàpêr o pa xwÿnh jarēnh

Makre 1.40-45; Rukre 5.12-16

1 Tã nhũm Jejus mẽ kãm kapêr pa hãmri nê hixêt prêeta rũm akupÿn wrÿ nê ma tē nhũm mẽ ohtō nê ma hkōt mra.

2 Hãmri nhũm mẽhō my hkà nhy hkro xàpêr o pa xwÿnhja omu nê hwÿr tē. Hãmri nê kutã hkōnkrã ho tēm nê hipō

nê nhÿ nê amnhĩ to kuwÿ nê kãm:

—Pa Pahihti. E ot pa awÿr amnhĩ to tē. Akupÿm ate mẽ ixto mex kaxyw axàhpumunh tÿx jakamã kot ka amã akupÿm ixto mex prãm nê mãmrĩ ixto mex. Anê.

3 Hãmri nhũm Jejus kuma nê hkà punuti hã ìhkra xi. Amnhĩ kamã kahak kêt nê hã ìhkra xi nê kãm:

—Nà kot paj ato mex. E akupÿm akà mex. Anê.

Hãmri nhũm hkà akupÿm mex kurê kumrêx.

4 Hãmri nhũm Jejus kãm:

—E kêr ka amnhĩ tã mẽ kãm tanhmã ijarēnh to hkêt rãhã ma patre hwÿr tē kê akupÿm akà mex ã apumu. Hãmri ka hpãnhã amnepēm finat Mojes kot mẽ ate akupÿm amex ã Tirtũm mã tanhmã amnhĩ nhĩpêx to hã karōta ka kãm ho anê. Kê mẽ piitã akupÿm akà mex ã apumu. Anê.

Pōristi krãhtũm mã àpēnh xwÿnh jarēnh

Rukre 7.1-10

5 Tã nhũm Jejus ma krĩ pē Kapanaũ hwÿr mō. Hãmri nê hwÿr pōj nhũm Rōm nhō xwÿnh pē pōristi krãhtũmja omu nê hwÿr tē. Kêp Ijaew kêt tã hwÿr tē. Na pre kãm àpēnh xwÿnh kêp à htÿx nê nō nhũm omu nê tee ri hkukamã hamaxpêr. Hãmri nê Jejus ra ō krĩ hwÿr hpōx ã omu nê hwÿr tē nê kãm harē nê kãm:

6—Pa Jejus? E ot pa awÿr tē. Inhmã àpēnh xwÿnhja na ixpē à htÿx nê. Ra ì kamã htyk pa nê nō. O mũj inhōrkwÿ kamã nō. Anê.

7 Nhũm Jejus kuma nê kãm:

—Tỳ? Tôe. Nà pa ma akôt tē nē akupỹm amã ho mex. Anē.

8-9 Hãmri nhũm tee ri kuma nē kãm:

—Kwa akĩnhã ixpê Ijaew kêt jakamã ixte amnhĩ kuk ã ixpijaàm. ãm ja rũm mãn akapēr pix o akupỹm inhmã ho mex nà? Ixpê mē hkrãhtũm na pa hte inhõ pôristi mã mēmoj tã karõ nhũm mē inhmar xà hkôt inhmã mēmoj tanhmã ho. Na pa hte mē kãm: “E mē ma mra nē ã amnhĩ nhĩpêx anē.” Anē nhũm htem inhma nē ma mrar kurê kumrêx. Rỳ pa mē kãm: “E mē amnē ixwỳr mra nē ã amnhĩ nhĩpêx anē.” Anē nhũm mē inhma nē ixwỳr mra. No kêt ixrom axàhpumunh tỳx kôt na ka hte mē àja mã akapēr nhũm ama nē mē kêp hapôx nē ma mrar kurê kumrêx. Jakamã kwa ãm ja rũm akapēr pix o akupỹm inhmã ho mex nà? Anē.

10 Hãmri nhũm Jejus amnhĩ jaer pē kot kãm ã kapēr anhỹrta ma nē hkĩnh nē. Hãmri nē hã hkôt ri mē mõr xwỳnhjê mã kãm:

—Kwa xà na ka mēmyja kapēr ma? Mē pahkĩnh ã kêp Ijaew kêt tã mē arom amnhĩ kaxyw inhmã hamaxpēr tỳx nē. Aa mē atõ urãk nē ã amnhĩ kaxyw inhmã ajamaxpēr tỳx anhỹr kêt tã nhũm mē arom kãm àpēnh xwỳnh kaxyw ã inhmã hamaxpēr tỳx anē.

11 Nà koja nhỹrmã mē hkwỳjaja kêp Ijaew kêt tã ohtõ nē pika piitã kurũm ma Tĩrtũm mē wa inhõ krĩ

hwỳr api nē hwỳr agjê. Nē wa ixkuri wa inhõ krĩ kamã Ijaew pàr krax pē Apraãw nē Ijak nē Jako mē pimràatã pa ho pa. Mē kêp Ijaew kêt tã mē ãhkõ hã apkur mex o hkrĩ nhũm Tĩrtũm mē ho mex rax o pa.

12 No pēr mē apê Ijaew kwỳjaja kot kaj mē hkôt hwỳr agjêx kêt nē. Tĩrtũm kãm hwỳr mē agjêx prãm tã ka mē axtem nē hkaga. Jakamã kot kaj mē ma kamàt kô xihitỳx rax wỳr ajapêx nē mē kêp awry rax nē mē kot amnhĩ xà htỳx kamã hamak tũm xàta kamã apa ho apa. Hãmri nē tee ri mē ixwỳr agjêx prãm kaprỳ nē akaprĩ xaj mur nē amnhĩ kamã agryk tỳx nē. No ãm tee ri amnhĩ kamã agryk kaprỳ. Mē ate Tĩrtũm kapēr kaga nē hkôt amnhĩ xunhwỳr kêt jakamã kot kaj mē nhỹrmã ã amnhĩ nhĩpêx anē. Anē.

13 Nhũm pre ã Jejusja mē kãm kapēr anē. Hãmri nē pôristi krãhtũmta mã kãm:

—E mãmri ma akupỹm tē nē amã àpēnh xwỳnhhta pumu. Ra ate kaxyw inhmã ajamaxpēr tỳx jakamã na pa ra akupỹm amã ho mex. E akupỹm tē nē omu.

Anhỹr o kãm kapēr rôm nhũm ra akupỹm kãm mex kurê kumrêx.

Jejus kot ahpỹnhã mē à xwỳnhjê ho mex

Makre 1.29-31; Rukre 4.38-41

14 Tã nhũm Jejus ma Simãw Pêtre nhõrkwỳ hwỳr tē nē hwỳr axà. Nhũm Simãw Pêtre

xupânghêx ra à nê hkà kagro htýx nê nõ.

15 Hãmri nhũm Jejus hwýr axà nê omu nê ìhkra hã kupy nhũm hkà hakry nê akupým hihtýx kurê kumrêx. Jakamã kànhmã nhý nê mẽ kãm mẽõ hã àpênh o ri mra.

16 Tã nhũm ra awjakry. Ra kamàtre ho mõ nhũm mẽ piitã Jejus wýr mẽ à xwýnhjê ho mra. Nê mẽkarõmnuti kot mẽ hwýr gjêx xwýnhjaja nhũm mẽ hwýr mẽ o mra. Hãmri nhũm mẽ omu nê akupým mẽ piitã mẽ ho mex. Mẽ à xwýnhjê ho mex nê mẽ hkwyjê nê mẽkarõmnuti jano. ãm kapêr pix o mẽ nê mẽ hano nhũm mẽ kêp hapôj nê ma hapêx.

17 Na pre ra Tirtũm nhý hã kapêr xwýnh finat Ijaisja ã amnhĩ nhĩpêx anhýrja kukamã amnepêm mẽ kãm harênh o:

Tirtũm kot mẽ pahwýr mênh mã xwýnhja koja nhýrmã wrý nê mẽ panê mẽ paxà piitã rênh pa nê akupým mẽ pahto mex pa. Anê.

Na pre ã finat Ijaisja Jejus kukamã harênh anê. Tã nhũm wrý nê kot harênh xà hkôt ã amnhĩ nhĩpêx anhýr o pa.

Wa kãm Jejus kôt amnhĩ xãm prãm xwýnh wa harênh Rukre 9.57-62

18 Tã nhũm Jejus amnhĩ pu hã rít nê tee ri hwýr mẽ mrar xwýnhjê pumu hãmri nê hkôt mẽ pa ho mẽ pa xwýnhjê mã kãm:

—E ma pu mẽ pàr mã agjê nê ma xarmã mõ. Anê.

19 Hãmri nhũm mẽ nojarêt rôm nhũm Tirtũm kapêr tũm o mẽ ahkre xwýnhjê hõ Jejus wýr tẽ nê kãm:

—Pa mẽ ijahkre xwýnh? E pa ma akôt ri ixpa ho ixpa nà. Anê.

20 Hãmri nhũm kuma nê kãm:

—Ko ka mã. Kam nê rĩ ma ixkôt ri apa. Nom kêr ka inhmar kumrêx. Xore na hte pika hkre kamã hikwý. Nê kuwênhre pĩ nhĩmõk ã hikwý. No pa ixpê Tirtũm kot mẽ awýr inhmênh xwýnh tã mry hkĩnhã inhõrkwyê hkêt. Na pa hte amarĩ nhãm krĩ hwýr ixpa nê nhãm hõ hwýr ixpa. Tã xà kot ka ixpyrà nê ã amnhĩ nhĩpêx anhýr o ri apa nà? Anê.

21 Hãmri nhũm pãnhã hõja hwýr tẽ. Ra mẽ kot hkôt amnhĩ xunhwýr xwýnhjê hõja hwýr tẽ nê kãm:

—Pa Pahihti. E pa amã amnhĩ jarê ka inhma. Kot paj ma akôt ixpa ho ixpa no ãm kormã. Koja nhýrmã inhĩpêxà tanhmã amnhĩ to nê ty mãn. Pa haxà hãmri nê rĩ kormã ma akôt ixpa ho ixpa. Anê.

22 Hãmri nhũm kuma nê kãm:

—Kwa nà ri ã ajamexpêr anhýr kêt nê. Ma ixkôt apa ho apa kurê kumrêx. Kê mẽmoj inhnê ano kupyr rý apê àmnàr kêt nê. Kwâr mẽ htĩr tũm nê mẽ pa hkêt mã xwýnhjaja mãn axwakre kamã amã anhĩpêxà jamãr o pa nê haxà. Anê.

Jejus kot kôk o pinhkrênh jarênh

Makre 4.35-41; Rukre 8.22-25

²³ Tã nhũm mẽ ra xarmã nojarêť nhũm Jejus mẽ hkôt mẽ pa ho mẽ pa xwýnhjaja pàr wýr agjê hãmri nê himô raxja ã ma xarmã mō.

²⁴ Hãmri nhũm Jejus ra ôtxwa nê ra gôr nê nō. Puh nhũm naja hkoko ho mō nê kôk xâpêť tỳx kumrêx. Nhũm gô kànhmã harĩ nê axpêť tak tỳx nê. Xatã axpêť tak nê pàr kre kamã axkapĩ nhũm ra àr o mō. Hãmri nhũm mẽ tee ri omu nê kãm ma htỳx kumrêx. Nê tee ri amnhĩ nhĩpêx. No nhũm Jejusja htỳx gôr nê nō.

²⁵ Hãmri nhũm mẽ hwýr hprôt nê kumra nê kãm:

—Kwa Pahihti. Kot puj mẽ jarãhã pahtyk pa. Kwa tokyx kànhmã nhỹ nê ri tanhmã amnhĩ nhĩpêx to wehe. Anê.

²⁶ Hãmri nhũm hkrãkato nê kànhmã nhỹ nê kôk mã kapêť nê kãm:

—E kwa hãmri anhĩkrê. Anê.

Puh nhũm hpinhkrênh pa nhũm gôja tãm nōr kurê kumrêx. Hãmri nhũm Jejusja hkôt mẽ pa ho mẽ pa xwýnhjê hwýr apkjê nê mẽ kãm:

—Hêxta waa nê. Kwa pêť ãm kormã te mẽ ate amnhĩ kaxyw Tĩrtũm mẽ wa inhmã ajamaxpêť tỳx kêt pyrãk. Hã na ka mẽ amã ma xãj tee ri amnhĩ kukamã ajamaxpêť. Anê.

²⁷ Hãmri nhũm mẽ amnhĩ jaêť pê ã kot amnhĩ nhĩpêx anhýrja ã omu nê tee ri hamaxpêť nê axpêť pumunh

pê omunh o kuhê. Hãmri nê axpêť mã:

—Kokýỹ. Pêť Jejus kêť mẽ panhĩo hkêť. Mẽ pahtô kot pu we te kot amnhĩ nhĩpêx pyrã nê kôk mã pakapêť nhũm hpinhkrênh kurê kumrêx? Nã Jejusja mẽ pakurom àhpumunh tỳx o àhpumunh tỳx. Anê.

Jejus kot wa nê mẽkarõmnuti janor

Makre 5.1-20; Rukre 8.26-39

²⁸ Tã nhũm mẽ ra himô rax pê Garirejja ã rê nê pika pê Geras wýr pøj nê kamã mō. Hãmri nhũm ra mẽhō myja wa hamêxkrut nê mẽ kutã tê. Ra mẽkarõmnuti kot hamê wa hwýr gjêx xwýnhja wa. Mẽkarõmnuti xohtô kot tanhmã wa ho jakamã nhũm wa oprê htỳx nê hihtỳx rax nê wa pa. Jakamã nhũm mẽ piitã kãm wa uma nê amnhĩ nê mẽ htykjê jagjênh xã hã kên kre kaêx kãm wa kumê nhũm wa kamã pa ho pa. Jakamã nhũm wa Jejus kutã tê nê amnhĩ wýr omu hãmri nê amnhĩ nê tanhmã kãm kapêť to. Nom mẽkarõmnuti nhỹ hã ãmra kamã kãm kapêť nê kãm:

²⁹ —Pa Tĩrtũm Kra Jejus? Mo kaxyw na ka mẽ ixwýr tê? Kwa tanhmã mẽ ixto hkêť nê. Ate tanhmã mẽ ixtomnu hto hã arĩgrotã kormã katoore hã. Anê.

³⁰ Nhũm ra krĩ nhō xwýnhjê hkrit hagrô ohtô nê ri mẽ hpum pa.

³¹ Nhũm mẽkarõmnuti mẽ omu hãmri nê amnhĩ to Jejus wý nê kãm:

—Kwa kot ka jahti wa nê mē ijapôx japêr nê mē kot amnhî xà htỳx kamã hamak tũm xàta wỳr mē ixrênh kêt nê. Hagrô hkwỳ mũj wỳr mãn mē ixrê pa mē hpãnhã hwỳr mãn hagdê nà? Anê.

³² Hãmri nhũm mē kuma nê mē kãm:

—Tõe mē tãm mē hwỳr mãn mra. Anê.

Hãmri nhũm mē kuma nê myta wa kêp hapôj nê hagrô hwỳr mrrar kurê kumrêx nê hpãnhã kãm gjêx pa. Hãmri nhũm hagrôta mēkarõmnuti pymaj amýra nê ma hprôt nê himô hã hixêt prêk ã axpum rôrôk nê gôx kãm mrô nê pikaprâr pa.

³³ Hãmri nhũm hagrô jamâr o ri mē pa xwỳnhjaja tee ri omu hãmri nê ma akupỹm krĩm hprôt nê mē kãm awjarê. Nê myta wa akupỹm tãm hkrã hã harênh o hprôt.

³⁴ Hãmri nhũm krĩ nhô xwỳnhjaja tee ri mē hkrit jarênh ma nê ma piitã Jejus wỳr mra nê hkaxpa. Hãmri nê amnhî nê kãm:

—E kwa mē ma amrar kurê kumrêx. Anê.

Hãmri nhũm mē kuma nê awjanã nê ma akupỹm pan rê.

9

*ĩ kamã htyk xwỳnh jarênh
Makre 2.1-12; Rukre 5.17-
26; Juãw 10.37-38*

¹ Nhũm Jejus mē hkôt mē pa ho mē pa xwỳnhjaja awjanã nê ma akupỹm pâr wỳr mra nê gjêx pa nê akupỹm xarmã rê nê akupỹm Jejus nhô krĩ hwỳr mō.

² Hãmri nê hwỳr pôj nhũm krĩ nhô xwỳnh kwỳjaja mē omu nê ĩ kamã htyk xwỳnhja mỳ nê Jejus wỳr o tẽ. Nôr xà kamã nôr rãhã nhũm mē hã hije nê kumỳ nê hwỳr o tẽ. Hãmri nhũm amnhî tã mē omu. Ra mē kot hkrãmnhwỳta kaxyw kãm hamaxpêr tỳx ã mē omu nê ĩ kamã htyk xwỳnhnta mã kapêr nê kãm:

—Pa? Kwa tee ri amnhî kukamã ajamaxpêr kêt nê. Na pa ra apê tanhmã ate amnhî tomnuj to ho ijapêx pa. Kot paj axte kãm ijamaxpêr kêt nê. Anê.

³ Hãmri nhũm Tĩrtũm kapêr tũm o mē ahkre xwỳnhjaja tee ri ã kot kãm kapêr anhýrja ã kuma nê axpên mã:

—Tk. Kwa mēhõ myti mũj kêp Tĩrtũm kêt tã te ri kot amnhî nhĩpêx pyrãk ã amnhî nhĩpêx. Tĩrtũm pix na kot mē nê mē kot amnhî tomnuj o hapêx xwỳnh. Anê.

⁴ Hãmri nhũm Jejus amnhî tã mē kuma nê mē kãm:

—Kwa mē ã ajamaxpêr anhýr kêt nê.

⁵ Ixte mē nê mē kot amnhî tomnuj o ijapêx par ã amnhî jarênh tã mē ate ja kôt ixpumunh kêt jakamã na ka mē ja kaxyw ixkôt ajamaxpêr kêt nê. Nom kot paj mē anoo mã akupỹm ĩ kamã htyk xwỳnhnta o mex ka mē apiitã hã ixpumu hãmri nê ixkôt ajamaxpêr kurê kumrêx. Ixpê Tĩrtũm kot mē awỳr inhmênh xwỳnhnta na pa. Ixte mē anê mē ate amnhî tomnuj rênh kaxyw na pre mē awỳr inhmê pa mē awỳr wrỳ.

⁶ Tã mẽ ate ja hã ixpumunh kaxyw kot paj mẽ anoo mã ja ho mex.

Anhÿr o mẽ kãm amnhĩ jarẽ hãmri nẽ ì kamã htyk xwÿnhhta mã kãm:

—E kànhmã xa nẽ anõr xàta py nẽ ma akupÿm anhõrkwÿ hwÿr tẽ. Anẽ.

⁷ Puh nhũm kànhmã ãm kurê kumrêx nẽ nõr xà py nẽ mẽ noo mã kato nẽ ma akupÿm õrkwÿ hwÿr tẽ.

⁸ Hãmri nhũm mẽ piitã no hapõx rũnh nẽ omunh o kuhê nẽ kamã no pyma htÿx nẽ. Nẽ tee ri omu nẽ axpên mã:

—Kokÿÿ. Kwa aa mẽ pahte ã mẽhõ kot amnhĩ nhĩpêx anhÿr ã omunh kêt tã jarãhã ja pumu.

Anhÿr o Jejus jarẽ hãmri nẽ ÿ hã Tirtũm mã mex o mex ã harẽ.

*Jejus kot amnhĩ kõt
Matêwre hwÿr*

Makre 2.13-17; Rukre 5.27-32

⁹ Tã nhũm Jejus mẽ kêp kato nẽ hkõt mẽ pa xwÿnhjê mẽ nhũm mẽ ma mõ. Hãmri nẽ pa ixpê Matêwre ixpumu. Ixte Rõm kãm mẽ hõ amnhĩptàr xwÿnh mã krĩ nhõ xwÿnhjê pẽ kàxpore hkwÿ jamÿnh xwÿnh na pa pre. Nom mẽ kot ho tewên kryre htã ixte amnhĩm hkwÿ ho ixàrik prãm xà na pa pre hte mẽ kãm ho rũnh nẽ harẽ. Jakamã nhũm mẽ piitã kãm ixkĩnh kêt nẽ. Tã pa pre mẽ kêp kàxpore jamÿnh xà hã ixkre kamã mẽ kêp hamÿnh o nhÿ nhũm Jejus

mẽ hkwÿjaja ijãnh mra nẽ ixpumu nẽ amnhĩ kõt ixwÿ nẽ inhmã:

—Pa? E axàpênhta kaga nẽ hpãnhã amnẽ mẽ ixkõt mãn tẽ nẽ ixkõt mãn ri apa ho apa. Anẽ.

Hãmri pa kuma nẽ ixàpênh kaga nẽ ma hkõt tẽ. Nẽ hpãnhã hkõt ixpa ho ixpa.

¹⁰ Hãmri nẽ mẽmo arĩgro hã amnhĩ nhõrkwÿ hwÿr Jejus nẽ hkõt mẽ pa ho pa xwÿnhjaja mẽ ixkràmnhwÿ hkwÿjê hwÿ. Nhũm mẽ piitã mra nẽ inhõrkwÿ hwÿr agjê nẽ ixkutã apkur o hkrĩ. Nẽ ixpyrà nẽ Rõm nhõ pahi mã mẽ kêp kàxpore hkwÿ jamÿnh xwÿnh kwÿ haxwÿja ixwÿr mra nẽ mẽ ixkutã apkur o hkrĩ.

¹¹ Hãmri nhũm Parijew nhõ xwÿnhjaja mra nẽ inhõrkwÿ kapem mẽ ixàpkur ã mẽ ixpumu. Nẽ tee ri mẽ ixkaêx ã Jejus pumu hãmri nẽ hkõt mẽ pa ho mẽ pa xwÿnhjê hwÿr agjê nẽ mẽ ixtã mẽ kãm akir nẽ mẽ kãm:

—Kwa mẽ kot jajê kutã apkur kêt tã mẽ akrãhtũmja axtem nẽ mẽ kutã apkur o nhÿ. Kwa nà mẽ kot amnhĩ tomnuj xwÿnh kênã. Jejus kot amnhĩ to mex ronhÿx mẽ kutã apkur kêt nẽ. Anẽ.

¹² Hãmri nhũm Jejus amnhĩ tã ã mẽ kapêr anhÿrja ma nẽ mẽ kãm:

—Tk. Nà ixte tãm mẽ unhwÿr kaxyw na pa mẽ kutã ixàpkur o nhÿ. Xà na hte tõtõja mẽ mex xwÿnhjê hwÿr mra nẽ mẽ hkane? Nà ãm mẽ à xwÿnhjê pix wÿr na hte mra nẽ tanhmã mẽ hkane hto. Ra

mê ate ja pumunh mex. Tã ja pyrã nê na pa pre mê kot amnhĩ to mex xwÿnhjê hwÿr ixwÿrk kêt nê. Mê kot amnhĩ tomnuj xwÿnhjê pix wÿr na pa pre wÿr. Ixte tãm mê unhwÿr kaxyw mê hwÿr wÿr nê ã jajê kutã ixàpkur o inhÿr anê.

¹³ Ga mê ma mra nê Tĩrtũm kapêr ã kagã htũm kot ja jarênhja kamã harê nê ama. Harênh kot:

Na ka htem inhmã tanhmã amnhĩ jarênh to kaxyw hãmri nê inhmã mêmoj gõ nê tanhmã ixto mex to. Nom kêr ka mê ãm ja pix ho anhÿr kêt nê. Mê mãânên mê pitã tanhmã mê ho mex to ho ri pa. Anê.

—Ã Tĩrtũm kapêr ã kagã htũm kot ja jarênh kot anhÿr. Tã ja pyrã nê na pa pre mê kot amnhĩ tomnuj xwÿnhjê hwÿr wÿr nê mê kamã ixukapĩ ho ixpa. Mê kot amnhĩ tomnuj kaga nê hpãnhã tãm amnhĩ nhĩpêx kaxyw na pa pre ã mê hwÿr ixwÿrk anê. Tã ka mê ri atÿx amnhĩ krã hkôt ã ixto akapêr anê. Anê.

Mê kot mêmoj tã Jejus kukjêr

Makre 2.18-20; Rukre 5.33-35

¹⁴ Tã nhũm Juãw Paxis kôt mê pa xwÿnhjaja Jejus wÿr mra nê mêmoj tã hkukja nê kãm:

—Pa? E ot pa mê awÿr mra. Kwa mê inhmã mêmoj jarê. Na pa htem tãhã Parijew nhõ xwÿnhjê pyrã nê ixàpkur kêt kãm Tĩrtũm mã amnhĩ jarê. Tã nom akôt mê pa ho mê

pa xwÿnhjaja na htem àmnhĩx apkur o pa kamã kãm amnhĩ jarênh o pa. Kwa mo na htem mê ixpyrã nê tãhã apkur kêt kamã kãm amnhĩ jarênh kêt nê? Anê.

¹⁵ Hãmri nhũm mê kuma nê mê kãm:

—Nã mo kaxyw kot kêt mê apkur kêt rãhã kãm amnhĩ jarê? Mê hkapĩre hã. Mê kot ixkôt pa ho pa hã amnhĩ pumunh jakamã na htem hkĩnh nê ixkôt pa. Kormã ixte mê kamã ixpa kênã kot kêt mê apkur kêt rãhã Tĩrtũm mã tanhmã amnhĩ jarênh to. Xã na htem hkrãmnhwÿ hã hkĩnh kaxyw hã akuprõ nê hkapĩ nê apkur kêt o kamãt nê mÿr o hkrĩ? Nã na htem anhÿr kêt nê. Na htem hã akuprõ nê hkĩnh nê hã apkur rũnh nê. Ja pyrã nê na hte ixkôt mê pa ho mê pa xwÿnhjaja ixkôt kormã àmnhĩx hkĩnh nê apkati mê apkur o pa. Nom koja mê kãm ixkurê xwÿnhjaja nhÿrmã tanhmã ixto hãmri nhũm mê hkapĩrĩ htÿx nê rĩ kormã tãhã apkur kêt rãhã Tĩrtũm mã amnhĩ jarê. Anê.

Mê pahte Jejus kôt amnhĩ nhĩpêx

Makre 2.21-22; Rukre 5.36-39

¹⁶ Nhũm Jejus mê piitã mê kãm kapêr nê mê kãm:

—Mê kot amnhĩ tomnuj xwÿnhjaja ra mê kot amnhĩ nhĩpêx tũm o amnhĩ pyrãk jakamã na htem tanhmã mê kot amnhĩ nhĩpêx nyw tota kaga.

¹⁷ Tã ixte amnhĩ nhĩpêx nywja te kot mê ate amnhĩ

nhîpêx tûm pyrâk kêt jakamã na ka htem ixkapêr ma nê ãm ama. Kwa mẽ inhma nê mẽ ate amnhî nhîpêx tûmja gryk ã ixkaga hkêt nê. Anê.

Mê hkra htyk nê mēhō ni kamrô wa harēnh

Makre 5.21-43; Rukre 8.40-56

¹⁸ Nhũm pre ã Jejus mẽ kãm kapêr anhÿr o xa. Rôm nhũm mẽo pahihtija tē nē mar o xa. Hãmri nē hamaxpêr o:

—Kokÿÿ. Jejusja ãm hãmri kêt pahî maati kumrêx. Hã na ri ã kapêr mex anê. E pa hwÿr tē nē ixkrare ho kuwÿ. Anê.

Hãmri nē hwÿr tē nē kutã hkônkrã ho nhÿ nē kãm:

—Pa akupÿm mẽ ixto mex xwÿnh? E ot pa awÿr tē. Kwa ma ixkôt tē nē inhmã ixkra nire pumu nē tanhmã inhmã ho kê akupÿm inhmã htîr. Na ham ixpê ty pa kaxyw amã ijamaxpêr nē man awÿr tē. Anê.

¹⁹ Hãmri nhũm kuma nē kãm:

—Tôe. Nà kot paj ma akôt tē. Anê.

Hãmri nē ma hkôt tē. Mẽ ixpê hkôt ixpa ho ixpa xwÿnhjê mẽ pa mẽ ma hkôt mō.

²⁰⁻²¹ Nhũm mēhō ni kamrô rãhã ho pa xwÿnhja ma mẽ ixkôt tē. Na pre hte hkamrô hkryre rãhã ho pa hã amgrà pê 12 nē tee ri kãm amnhî mex prãm o pa. Jakamã Jejus jarēnh ma nē amnhî kaxyw kãm hamaxpêr kurê kumrêx nē hamaxpêr o:

—Ma pa kop ma hwÿr tē nē kêt ê nhîrê pix kupênh tã akupÿm inhmex japêr. Anê.

Hãmri nē ma mẽ ohtôjê kaêx kôt hwÿr tē. Nê katut kôt tē nē kêt ê nhîrê kupê.

²² Hãmri nhũm Jejus ho hakêx nē amnhî tã omu nē kãm:

—Pa? Kwa tee ri amnhî kukamã ajamaxpêr kêt nē. Ate amnhî kaxyw inhmã ajamaxpêr tÿx jakamã na ka ra akupÿm amex. E mãmri ajamakêtkati nē ri apa. Anê.

Hãmri nhũm akupÿm mex nē hkînh tÿx nē ma akupÿm tē.

²³ Hãmri pa mẽ ma htyk xwÿnh nhîpêêxã hkôt mra nē ôrkwÿ hwÿr agjê nē mẽ pikuprôn h xwÿnhjê pumu. Nhũm mẽ ra mẽ hã htu rax nê. Nê omÿj ri kaprî xaj pifti kakôr o hkrî nê omÿj ri mur. Kax pê mur nê amnhî tak o hkrî.

²⁴ Hãmri nhũm Jejus mẽ hwÿr axã nē mẽ omu. Nê ra kot my hkrata htyk ã omunh tã kuri mẽ mÿr o mẽ hkrî xwÿnhjê mã kapêr nē mẽ kãm ãm ôt nē nôr ã harê nē mẽ kãm:

—Pa? Kwa mon ka mẽ ri akaprî nē amÿr o akrî? E mẽ ma mra. Na wa hkrata wa kêt htyk kêt nê. Na ãm gôr nē nō. Anê.

Hãmri nhũm mẽ kot ra htyk ã omunh mex jakamã kuma nē ãm kuma. Nhũm mẽ hkwyja axtem nē ri axpên mã hã hpêr o pikênh o hkrî.

²⁵ Hãmri nhũm kapôt mã mẽ hano nhũm mẽ hapôj nê kapôt ã kuhê. Hãmri nhũm Jejusja htyk xwÿnhhta wÿr axã

nê hpa hã kupy nê kànhmã ãm nhũm akupỹm htĩr nê kànhmã ãm kurê kumrêx.

²⁶ Hãmri nhũm mẽ piitã akupỹm htĩr kãm omu nê ma ri krĩ piitã hkôt ri mẽ kãm harênh o hprôt.

Wa nohkre xwỳnh wa harênh

Matêwre 20.29-34

²⁷ Tã nhũm Jejus kato nê ma tẽ. Pa mẽ hkôt ixpa ho ixpa xwỳnhjaja ma hkôt mỗ. Hãmri nhũm wa myja wa hamẽxkrut. Hamẽ wa nohkre xwỳnh wa Jejus jarênh ma nê hã ajêt nê hkôt rôrôk o mỗ. Nê xatã amnhĩ to hwỳr o hkôt rôrôk o mỗ nê kãm:

—Pa Jejus? E Tĩrtũm kot mẽ ixkaxyw axãm jakamã kwa wa ixpumu nê wa ixkamã axukapĩrĩ kêt wehe. Anẽ.

²⁸ Hãmri nhũm wa kuma nê wa hkukamã nhỹri ixkrem axà nhũm wa hkôt axà nê xa nhũm wa omu nê wa kãm:

—Pa? E xàn ka wa ra amnhĩ kaxyw inhmã ajamaxpêr tỳx nê nà? Anẽ.

Hãmri nhũm wa kãm:

—Tỳ. Wa ixte amnhĩ kaxyw amã ijamaxpêr tỳx kênã. Anẽ.

²⁹ Hãmri nhũm wa kuma nê hamẽ wa no hã ãhkra xi nê wa kãm:

—Tôe. Nà war ate tanhmã amnhĩ kaxyw inhmã ajamaxpêr to xà hkôt kot paj war anhĩpêx. Anẽ.

³⁰ Hãmri nhũm wa akupỹm rĩt mex kurê kumrêx. Hãmri nê akupỹm kato nê ma htẽm kaxyw nhũm wa kãm:

—E kêr ka wa nhãm mẽ kãm ixte war ato mex ã ijarênh kêt nê. ãm kwarĩ ho kwarĩ.

³¹ Anhỹr tã no nhũm wa kuma nê ãm kuma nê wa ma tẽ nê krĩ pu hã mẽ piitã mẽ kãm ri war amnhĩ tã harênh o mra.

Kapêr kêt xwỳnh jarênh

³² Tã nhũm Jejus ma axte nhỹhỹm mẽ ixto mỗ. Hãmri nhũm mễhỗ my mẽkarõmnuti kot hwỳr àr nê tanhmã ho nhũm kapêr kêt nê pa xwỳnhja nhũm mẽ Jejus wỳr o tẽ.

³³ Hãmri nhũm omu nê nê mẽkarõmnuti jano nê kãm:

—E kêp akato nê ma tẽ. Anẽ.

Hãmri nhũm kuma nê kurũm kato nhũm akupỹm kapêr mex kurê kumrêx. Hãmri nhũm mẽ kot hã omunh xwỳnhjaja tee ri kot mẽkarõmnuti janor ã omu nê kamã no puma nê. Nê axpẽn mã:

—Kokỹỹ. Aa mẽ pahte ã mễhỗ kot anhỹr pumunh kêt kumrêx tã na pu mẽ jarãhã ja pumu. Anẽ.

³⁴ Nom nhũm mẽ hkwy pê Parijew nhỗ xwỳnhjaja axtem nê hã mẽ kãm kapêr o:

—Tk. Kot amnhĩ krã hkôt mẽ hanor kêt kênã. Mẽkarõmnuti nhỗ pahi nhỹ hã kot mẽ nê mẽ hanor kênã. Anẽ.

Jejus kêp mẽ pakamã ukapĩrĩ xwỳnh

Makre 6.34; Rukre 10.2-3; Juãw 4.35

³⁵ Tã nhũm Jejusja krĩ ho ohtô nê hkôt ri mẽ kãm Tĩrtũm kapêr jarênh o pa. Pa mẽ hkôt ixpa. Na pre hte nhỹri krĩ hwỳr pỏj nê mẽ kot Tĩrtũm kapêr o mẽ ahkre xà hã ixkre hwỳr mra nê hwỳr agjê nê mẽ

pikuprõnh xwýnhjê jahkre.
Nê mẽ kãm:

—E mẽ inhma. Tĩrtũm kãm mẽ apiitã mẽ ato hkra hprãm. Jakamã kwa mẽ ate amnhĩ tomnuj kaga hprãm xaj hkõt amnhĩ xunhwý nê kapêr kõt amnhĩ nhĩpêx. Jao amnhĩ nhĩpêx nyw o amnhĩ nhĩpêx o ri apa.

Anhỹr o mẽ kãm kapêr. Hãmri nê ahpýnhã ri tanhmã mẽ à kute xwýnhjê ho mex. Nhũm mẽ ohtô nê hkõt mar o pa.

³⁶ Hãmri nhũm mẽ omu nê kãm mẽ hkaprĩ nê. Na prem tee ri amnhĩ kukamã hamaxpêr o pa jao ra hkaprĩ nê. Nhũm Jejus ja hã mẽ omu nê hamaxpêr o:

—Hêxta waa nê. Na mẽ mex kêt nê pa. Te mẽ kêp ôwêhti jamãr xwýnh kêt kot amnhĩ nhĩpêx pyrãk o htýx ri pa. Mêhõ koja kãm mẽ hkaprĩ nê tanhmã mẽ ho mex to ho pa? Anê.

Hãmri nê mẽ kamã ukaprĩ nê.

³⁷ Hãmri nê mẽ hã mẽ ixpê hkõt ixpa ho ixpa xwýnhjê mã kapêr nê mẽ inhmã:

—Nà na mẽ kormã ohtô rax nê Tĩrtũm kapêr mar kêt nê. No ãm kormã mẽ ate mẽ kãm kapêr jarênh o apa kaxyw mẽ agrêre. Te pur rax kãm ra harôj kamrêk par nê ãm tã no ãm kaxyw hikênh xwýnhjaja grêre pyrãk.

³⁸ Jakamã kwa mẽ ho Tĩrtũm wý kê axte mẽ kaxyw mẽ akwýjê rê kê mẽ apyrã nê ma mẽ hkõt ri mẽ kãm kapêr jarênh o pa. Anê.

10

Jejus kot mẽ ho 12 nê mẽ rênh
Makre 3.13-19; Rukre 6.12-16

¹⁻⁴ Tã nhũm Jejusja hkõt mẽ ixpa ho mẽ ixpa xwýnhjê ho 12 nê mẽ ixrê. Mẽ ixte ma krĩ piitã hwýr inhmarr nê ý hã mẽ ahkre nê tanhmã mẽ à kute xwýnhjê ho mex o ixpa kaxyw. Nê ý hã mẽ nê mẽkarõmnuti janor o ixpa kaxyw nhũm mẽ ixrê. Na pre mẽ ixto 12 nê mẽ ixrê. ã mẽ inhĩxi kot anhỹr.

Pêtre kumrêx na pre kuta.

Hixi hõ pê Simãw.

Nê hkõt htõ Andreja ta.

Nê hkõt Jepetew kra Xiakreja ta.

Nê hkõt Xiakre htõ Juãwja ta.

Nê hkõt Firiptija ta.

Nê hkõt Patoromewja ta.

Nê hkõt Tomasja ta.

Nê hkõt pa ixpê Matêwre nhũm pre mẽ hkõt ixta.

Ixpê pahĩ nhỹ hã kãm mẽ kêp ixujamýnh xwýnh tã nhũm pre jajê hkõt ixta.

Nê ixkõt Apew kra Xiakre hõja ta.

Nê hkõt Tatewja ta.

Nê hkõt Simãw Jeroxja ta.

Nê hkõt Jut Kariotja ta.

Kormã kot mẽ kãm Jejus kurê xwýnhjê nhĩhkram õr mã nhũm Jejus kot amnhĩ kukamã omunh mex tã mẽ hkõt amnhĩ kaxyw kuta.

ã mẽ ixte ý hã mẽ ahkre o ixpa kaxyw mẽ ixrênh xwýnhjê nhĩxi kot anhỹr.

*Jejus kot mẽ kêp 12jê mã mẽ
àpênh ã karõ*

Makre 6.7-13; Rukre 9.1-6, 10.1-12, 10.14; mããñen Atre 13.50-51, 18.6

5 Hãmri nhũm Jejus mẽ ixrênh pa nê ma mẽ hwỳr mẽ ixrênh kaxyw tanhmã mẽ inhmã kapêr to nê mẽ inhmã:

—E. Kêr ka mẽ ma mẽ piitã mẽ kãm ri ijarênh o apa. No ãm kormã mẽ kêp Ijaew kêt xwỳnhjê nhõ pika hwỳr apa hkêt nê. Rỳ mẽ kêp Samar nhõ krĩ hwỳr ka mẽ apa hkêt nê.

6 ãm mẽ pahpê Ijaew nhõ krĩ kôt pix mã mãn ri apa. Mẽ kot tee ri amnhĩ kukamã hamaxpêr o pa jakamã te mẽ kêp ôwêhti pikunor nê htỳx ri mex kêt nê pa pyrak.

7 Jakamã kêr ka mẽ ma mẽ hwỳr apa nê ã mẽ hkôt ri mẽ kãm akapêr o apa anê nê mẽ kãm: “E kot kaj mẽ ate amnhĩ tomnuj kaga nê Tirtũm kôt amnhĩ xunhwỳ hãmri nhũm amnhĩ tã mẽ apumu nê mẽ ato hkra. Jakamã e kwa mẽ tokyx hkôt amnhĩ xunhwỳ.” Anê. Kêr ka mẽ ã mẽ kãm akapêr anhỳr o ri mẽ hkôt apa.

8 Hãmri nê akupỹm mẽ à xwỳnhjê ho mex o ri apa. Nê mẽ htyk xwỳnhjaja ka mẽ akupỹm mẽ ho htĩr o ri apa. Nê mẽ hkànhy rũnh xwỳnhjaja ka mẽ akupỹm mẽ ho mex o ri apa. Nê mẽ kamã mẽkarõmnuti xwỳnhjaja ka mẽ nê mẽ hano. E kêr ka mẽ ã inhỹ hã mẽ ho mex o ri apa anê. Na pa amarĩ tanhmã mẽ ato ka mẽ inhmã amnhĩrer kêt tã ra mẽ ate tanhmã mẽ

ho mex to mã tãm. Tã kêr ka mẽ amnhĩ xwar amarĩ ri mẽ ho mex o ri mẽ hkôt apa. No ri mẽ ho mex pãnhã kàxpore hã axàhwỳr kêt nê.

9-10 —Nê kêr ka mẽ ma mẽ hwỳr apa kaxyw anojarêt hãmri nê amnhĩ kôt akukrêx rũnh o apa hkêt nê. ãm anhỹ kamã mẽ hwỳr apa. Nê akàxpore ho rax nê ho apa hkêt nê. Rỳ akawà kamã axê hkwy rỳ aparkà hõ xàr nê ho amõr kêt nê. Rỳ kô hõ py nê ri ho apa hkêt nê. ãm anhõ mrykà pix jamỳ nê ma ho apa. Kêr kê mẽ ate Tirtũm kapêr o mẽ ahkre nê mẽ ho mex xwỳnhjaja mãn amnhĩ pãnhã mẽ amã mẽ axàpkur xà gõ ka mẽ kutã axàpkur o ri mẽ hkôt apa.

11 —Nê kêr ka mẽ nhỹri krĩ hwỳr ajapôj nê kamã mẽhõ kot amnhĩ to mex xwỳnh japêr. Nê ra omu hãmri nê kuri mãn pøj nê hkôt apikamênh tãmtã kurũm akupỹm ajapôj nê ma nhãm krĩ hõ hwỳr mra.

12 —Nê kêr ka mẽ mẽhõ nhõrkwỳ hwỳr pøj nê mẽ kãm: “E ot pa mẽ awỳr mõ. Nà koja Tirtũmja mẽ ato mex nê.” Anhỳr o mẽ kãm akapêr.

13 Koja mẽ ama nê amnhĩ wỳr awỳ ka mẽ amnhĩ tã mẽ omu nê mẽ kãm: “E koja Tirtũm mẽ ato mex nê ka mẽ ajamakêtkati nê ri axàmnhĩx apa.” Anhỳr o mẽ kãm akapêr. No koja mẽ amnhĩ nhõrkwỳ nê mẽ akurê nhũm Tirtũm ja hã mẽ omu nê mẽ ho mex kêt nê.

14 —Nê koja nhỹri krĩ hõ kamã mẽ akaga nê akapêr

mar kêt japêr. Ka mẽ tee ri amnhĩ tã mẽ kamã ama hãmri nê tokyx mẽ kurũm ajapôj nê ma akupỹm apa. Nê akupỹm anojarêr nê mẽ noo mã akuhê nê amnhĩ par ã awjagrô kapĩ nê ma apa. Mẽ kot Tĩrtũm kaga hã amnhĩ pumunh kaxyw ka mẽ ã mẽ noo mã amnhĩ nhĩpêx anê. Hãmri nê ma nhỹhỹm hpãnhã apa.

¹⁵ Koja nhỹrmã Tĩrtũm mẽ kot amnhĩ tomnuj mýrapê tanhmã mẽ ho. Na pre ã Sotõ mẽ Komo nhõ xwýnhjê nhĩpêx anê. Na prem amnhĩ tomnuj tỳx nê nhũm Tĩrtũm tee ri ja hã mẽ omu nê tanhmã hã mẽ homnuj tỳx to. Tã jar mẽ kãm ixkapêr mar prãm kêt nê mẽ kot ixkaga xwýnhjaja koja ja hã mẽ omu nê kot Sotõ mẽ Komo nhõ xwýnhjê nhĩpêx o mẽ hipêx. No ãm tanhmã mẽ ho htỳx o mẽ hakre. Anê.

Nhũm pre Jejus ã mẽ inhmã mẽ ixápênh ã karõ anê.

Jejus kot mẽ kêp 12jê hkukamã mẽ harênh Makre 13.9-13; Rukre 12.11-12, mããnênh Rukre 21.12-17; Wam Pêtre 3.13-17, 4.12-19; Rukre 6.40; Juãw 15.20; Rukre 12.2-9

¹⁶ Nhũm Jejus arĩ kot mẽ ixrênh xwýnhjê mã kapêr nê mẽ inhmã:

—E kot paj ma mẽ hwýr mẽ arê. Ma mẽ ate Tĩrtũm kapêr o mẽ ahkre ho ri mẽ hkôt apa kaxyw. Jakamã kot kaj mẽ te ôwêhti kot mry xoprê hwýr amnhĩ to mrrar nhũm kot hkwy hpar pyràk o amnhĩ nhĩpêx. Koja mẽ hkwyjaja mẽ

ate mẽ ahkre ma nhũm ja mẽ kêp omnuj nê nhũm mẽ hã tanhmã mẽ anhĩpêx to. Tã nom kêt ka mẽ tee ri amnhĩ kukamã ajamaxpêr nê amã mẽ uma hkêt nê.

¹⁷ —E kwa mẽ o kora. Kêr ka mẽ ma mẽ hwýr mra nê amnhĩ nê mẽ htãnopxar o ri apa. Koja mẽ hkwyjaja mẽ akapêr ma nê kêp mẽ aprãm nõkati. Nê mẽ apynê nê ma mẽ utàr xwýnhjê hwýr mẽ ato mra nê mẽ kãm tanhmã mẽ ato hêx to. Hãmri nhũm mẽ mar xà hkôt mẽ atak. Tĩrtũm kapêr o mẽ ahkre xà hã ixkre kamã koja mẽ ã mẽ anhĩpêx anê.

¹⁸ —Nê koja mẽ ixtã tanhmã mẽ ato kaxyw mẽ apynê nê ma mẽ õ pahi hwýr mẽ ato mra nê tanhmã kãm mẽ ato hêx to. Nom kwãr mẽ mamrĩ ã mẽ anhĩpêx anê. Koja mẽ ato anê ka mẽ kutã akrĩ nê mẽ kãm Tĩrtũm kapêr jarê. Ijaewjê mã nê mẽ kêp Ijaew kêt xwýnhjê mã.

¹⁹ —Nê koja mẽ ma mẽ õ pahi hwýr mẽ ato mra nê ã mẽ anhĩpêx anê nom kêt ka mẽ tee ri tanhmã mẽ kãm amnhĩ jarênh to hkukamã ajamaxpêr kêt nê. Koja Tĩrtũm Karõ tãm tanhmã mẽ akrã hto ka mẽ ô ri mẽ kãm akapêr mex nê.

²⁰ Nê kot kaj mẽ amnhĩ krã hkôt ri mẽ kãm akapêr kêt nê. Tĩrtũm Karõ nhỹ hã kot kaj mẽ ô ri mẽ kãm tanhmã axujarênh to.

²¹⁻²² —Nê koja mẽ hkwyjaja ixtã mẽ akamã gryk nê. Nê mẽ atã àmnênh pix o pa. Nê mẽ kot mẽ apar kaxyw mẽ akwýjê hã amýnê. Koja mẽ

anhîpêxà hkwyjaja mẽ apê mẽ hkra hã amÿnê. Nhũm mẽ akra hkwyjaja mẽ apê mẽ hipêxà hã amÿnê. Nhũm mẽ atõ hkwyjaja mẽ apê mẽ htõ hã amÿnê. Nhũm mẽ akatorxàjaja mẽ atã amÿnê. Hãmri nhũm mẽ apa. No ãm kwâr mẽ mãmri ã mẽ anhîpêx anê. Æ mẽ kot mẽ anhîpêx anhÿr tã kêr ka mẽ tee ri amnhî kukamã ajamxpêr pê ixkaga hkêt nê. Mẽ ãm amnhî to htÿx rãhã ty. Hãmri nê akaxwÿnhja ma Tirtũm mẽ wa inhõ krî hwÿr axàpir kurê kumrêx nê wa ixkuri akupÿm amex nê atÿr tũm nê apa ho apa.

23 —Nê koja mẽ nhÿri krî hkwy kamã ixtã tanhmã mẽ anhîpêx hto ka mẽ mãmri mẽ kurũm ajapõj nê ma nhÿhÿm krî hõ hwÿr apa. Nê hpãnhã kamã mẽ kãm ri ijarênh o mẽ hkôt apa. Kot kaj mẽ kormã Ijaewjê nhõ krî piitã hwÿr apa hkêt ri pa akupÿn mẽ awÿr wrÿ. Kwa kêr ka mẽ ixkapêr mã ajamxpêr tÿx rãhã ri apa.

24-25 —Mẽ ate ixkôt apa ho apa xwÿnh na ka mẽ. No pa na ixpê mẽ ajahkre xwÿnh. Jakamã koja mẽ kot tanhmã inhîpêx to ho mãânên mẽ anhîpêx. Koja mẽ nhÿrmã tanhmã inhîpêx to nê mã ixkôt mẽ ato anê nê. Mẽ pahte amnhî nhîpêxja kot axpên pyræk. Jakamã koja mẽ ixpê Satanasti hã ijarê nê mãânên tanhmã mẽ ajarênh punuj to ho pa. Mẽ pahte amnhî nhîpêxja kot

axpên pyræk jakamã koja mẽ panhîpêx o axpên pyræk.

26 —Tã nom kêr ka mẽ tee ri amnhî kukamã ajamxpêr pê amã mẽ uma ho apa hkêt nê. Na htem piitã axpên pê tanhmã hamxpêr punuj to ho hpimxur o pa nom tee ri ho pimxur prãm kaprÿ. Koja nhÿrmã mẽ hamxpêr piitã amnhîrît pa. Nê mẽmoj piitã ra hpimxur mex tã koja nhÿrmã amnhîrît par kumrêx.

27 —Nê koja nhÿrmã mẽ piitã ixte amnhî nhîpêx kôt ixpumu. Na pa ra mẽ hkàx ã mẽ amã ixujarênh rax nê. Tã kêr ka mẽ ma mẽ piitã mẽ kãm harênh o ri apa. Nê ra ixte mẽ hkàx ã ahte ixte mẽ amã mẽmoj jarênh ta ka mẽ hpãnhã ma mẽ kãm harênh o ri apa kê mẽ apyrã nê harênh ma.

28 —E kêr ka mẽ amã mẽ kot tanhmã mẽ ato mã xwÿnhjê puma ho apa hkêt nê. Mẽ kot mẽ apar mã tã koja mẽ ãm mẽ akrãhkà pix pa nom tanhmã mẽ akaxwÿnh to hkêt nê. Tirtũmja tapxipix na hte mẽ hkrãhkà nê mẽ hkaxwÿnh mẽ ho pimràatã kot amnhî xà htÿx kamã hamak tũm xàta wÿr mẽ rênh pumunh. Tã kot hwÿr mẽ arênh pymaj kêr ka mẽ amã kapêr kwÿm ri tanhmã amnhî nhîpêx to puma ho ri apa.

29-31 —Nê Tirtũm kot mẽ pahto hapêx par pumunh tã mãânên kot mẽ pajamãr mex. Mãn ka htem kuwênhre pumu. Na hte Tirtũm kuwênhre jamãr mex o pa. Mẽ piitã mẽ kot ãm omunh tã

nom nhũm Tĩrtũm mē kurom hamār mex pē mē htānopxar rāhā ho pa. Tā kām mē pajapē htỳx o kot kuwēnhre jakrenh jakamā kwa mē tee ri amnhĩ kukamā ajamexpēr o ri akaprĩ nē apa hkēt nē. Koja Tĩrtũm mē pahtānopxar rāhā ho pa. Kot mē panhĩ piitā omunh par. Nē ahpỳnhā tanhmā mē pahkrā hkĩ kute hkôt mē pahpumunh par. Tā kot mē pahtānopxar rāhā jakamā mo kaxyw kot kaj kēt mē ri amā mē uma ho apa? Anē.

Mē pahte Jejus kôt amnhĩ xunhwỳr rỳ mē pahte hkaga jarēnh

³² Nhũm Jejus arĩ kot mē hwỳr mē ixrēnh xwỳnhjē mā kapēr nē mē inhmā:

—E kwa mē māmri akwỳjē mā mē apē ixkwỳ hā amnhĩ jarēnh o ri apa nē amā mē uma xàj tee ri amnhĩ nhĩpēx kēt nē. Kot kaj mē kām ra ate ixkôt amnhĩ xunhwỳr ā amnhĩ jarē. Pa ja hā mē apumu hāmri nē mē apyrà nē kaxkwa kamā Inhĩpēêxà mā ra ate ixkôt amnhĩ xunhwỳr ā mē ajarē.

³³ Nom kot kaj mē kot ixtā tanhmā mē ato pymaj apē ixkwỳ hā amnhĩ jarēnh kēt nē. Pa ja hā mē apumu hāmri nē nhỹrmā amnhĩ xwar Inhĩpēêxà mā mē apē ixkwỳ hkēt ā mē ajarē. Jakamā kwa mē māmri mē kām apē ixkwỳ hā amnhĩ jarēnh o ri mē hkôt apa kē mē ama nē amnhĩ kaxyw inhmā hamaxpēr japēr. Anē.

Mē kām Jejus ā hkwỳjē kurē xwỳnhjaja

Makre 8.34-35; Rukre 9.24, mǎānēn Rukre 12.51-53, 14.26-27; Apokarip 12.11

³⁴ Nhũm Jejus arĩ kot mē hwỳr mē ixrēnh xwỳnhjē mā kapēr nē mē inhmā:

—Ra mē awỳr ixwrỳk tā koja mē piitā ixkukwak ri hamakētkati nē àmnhĩx ri pa hkēt nē. Kormā. Koja mē akwỳjaja ixkapēr ma nē mē apyrà nē amnhĩ kaxyw ixkôt hamaxpēr. Nhũm mē akwỳjaja axtem nē kuma nē ām kuma. Hāmri nē ixtā tanhmā mē atomnuj to ho pa ka mē amnhĩ xà htỳx kamā ajamak o ri apa.

³⁵ —Koja mē akrajaja ixtā mē apē mē hipēêxà nē mē katorxà kutā amnhĩ xunhwỳ. Nhũm mē wỳjjaja ixtā mē umregêxjē kutā amnhĩ xunhwỳ.

³⁶ —Koja mē ā mē akwỳjaja ixtā mē akutā amnhĩ xunhwỳr anē. Mē anhōrkwỳ kamā mē akukwak ri pa htā ixtā mē akutā amnhĩ xunhwỳ.

³⁷ —Nē mē amā mē anhĩpēêxà nē mē akatorxà japêê. Nē mē amā mē akrajē japêê. Tā nom kot kaj mē gryk ā ixkôt amnhĩ nhĩpēx mex o ri apa hkēt hāmri nē apē ixkwỳ mā tām kēt.

³⁸ Rỳ nhũm mē nhỹrmā ixtā mē apar kaxyw ka mē tee ri amnhĩ kukamā ajamaxpēr nē mē kot mē apar pymaj ixkaga hā kot kaj apē ixkwỳ mā tām kēt nē.

³⁹ Koja mē nhỹrmā ixpĩ pa mē anē ty. Tā mē ate ixkôt amnhĩ nhĩpēx o apa

xwÿnhjaja. Koja mẽ ixpyrà nê ixtã mẽ apar mã tã kwa kêr ka mẽ amã atyk pymaj ixkaga hkêt nê. Kwâr mẽ mãmri tanhmã ixtã mẽ ato. Kot kaj mẽ nhÿrmã Tirtũm mẽ wa ixri axte amnhĩ xà kamã ajamak kêr nê atĩr tũm nê amex rãhã apa ho apa. Nom kot kaj mẽ jar amã amex nê apa hprãm xà ixkaga hãmri nê nhÿrmã wa ixri atĩr tũm nê apa ho apa hkêt nê. Anê.

Mẽ kot Jejus krajê ho mex xwÿnhjê jarênh

Matêwre 25.34-40; Makre 9.41; Juãw 13.20

⁴⁰ Nhũm Jejus arĩ kot mẽ hwÿr mẽ ixrênh xwÿnhjê mã kapêr nê mẽ inhmã:

—E koja mẽhõ nhÿri mẽ apumu nê mẽ apê ixkra hã tanhmã mẽ ato mex to nê te pa kot ixto mex pyrãk. Nê kot kaj mẽ tanhmã pa ixto mex to nê te Tirtũm o mex pyrãk.

⁴¹ —Nê kot ka mẽ nhÿri Tirtũm nhÿ hã mẽ kãm kapêr jarênh xwÿnhjê hõ tanhmã ho mex to nhũm Tirtũm hã apumu nê nhÿrmã hã ato mex nê. Rÿ ka mẽ mẽhõ kot Tirtũm kôt amnhĩ nhÿpêx xwÿnhjê hõ pumu nê tanhmã ho mex to. Nhũm Tirtũm hã apumu nê mãânênh hã ato mex nê. Te ate mẽhõ ho mexta pyrã nê mãânênh ato mex nê.

⁴² Nhũm mẽhõ nhÿri mẽ kot ixkôt kormã amnhĩ xãm nyw nê kormã àhpumunh tohtuj anhÿr xwÿnhjê hõ pumu. Nê kãm kôr ã omu nê hamaxpêr o: “Kwa Jejus kôt ri pa xwÿnh mũj kãm kôr. Kormã kot Jejus kôt amnhĩ xãm tÿx kêr tã

kêp hkwyÿ. E kot paj kãm gô hkwyê kê ho ixkô.” Anê hãmri nê kãm hkwyê nhũm ho ixkô. Hãmri nhũm Tirtũm hã omu nhũm kot kãm gô pix nhõr nhũm kot ho hkôm tã nhũm ja hã ho mex rax nê. Anê.

Nhũm pre ã Jejus kot mẽ hwÿr mẽ ixrênh xwÿnhjê mã kapêr ry rax anê. Mẽ ixpê 12jê mã ã kapêr anê.

11

Juãw Paxis kot Jejus jarênh mar

Rukre 7.18-23, 7.5, mãânênh Rukre 4.16-21

¹ Tã nhũm Jejus ra kot mẽ hwÿr mẽ ixrênh xwÿnhjê mã kapêr pa hãmri nê kato nê ma krĩ pu hã krĩ hkwyêjê hkôt ri pa. Nê mẽ kãm Tirtũm kapêr jarênh o ri mẽ hkôt pa.

² Nhũm Juãw Paxisja arĩ kêp prês nê mẽ hagjênh xà kamã hkrĩ. Nhũm pre hte hkôt mẽ pa ho mẽ pa xwÿnhjaja hwÿr mra nê kãm Jejus kot tanhmã amnhĩ nhÿpêx to ho pa hã harê. Hãmri nhũm harênh ma nê tee ri hkukamã hamaxpêr. Hãmri nê hkôt mẽ pa xwÿnh wa ho axkrut nê wa kuta

³ nê hwÿr wa kumê nê wa kãm:

—Kwa wa ma Jejus wÿr tẽ nê hkukja nê kãm: “Xà ka na pre Tirtũm mẽ ixwÿr amê nà? Xà kormã axtem mẽhõ na pa mẽ ri hamãr o ri ixpa?” Anhÿr o hkukja hãmri nê tanhmã kot amnhĩ jarênh to hã ama nê man akupÿn ixwÿr tẽ nê inhmã harê. Anê.

⁴ Hãmri nhũm wa kuma nê ma hwÿr tẽ. Nhũm Jejus kormã tanhmã mẽ ã

kute xwÿnhjê ho mex o xa. Mě nohkre xwÿnhjaja nhÿm akupÿm mẽ ho mex. Ně mẽkarõmnuti kot mẽ hwÿr gjêx xwÿnhjaja nhÿm mẽ nê mẽ hanor o âm rãhã nhÿm Juãw kôt wa pa xwÿnhhta wa hwÿr tẽn pøj. Ně kormã mẽ hã omunh o wa xa. Hãmri nẽ kãm Juãw Paxis kapêr jarẽ nhÿm wa kuma nẽ wa kãm:

—Tÿ. Nã âm hãmri na ja hã ijarẽ. Ixpê mẽ ate ixkamã ajamak o apa xwÿnhhta na pa. Na ka wa kam ã ixte amnhĩ nhĩpêx anhÿr ã ixpumu. Jakamã wa ma akupÿm tẽn nẽ aprĩ hã kãm ijarẽ.

⁵ Na pa hte akupÿm mẽ nohkre xwÿnhjê ho mex. Ně mẽ hkànhy xwÿnhjaja pa akupÿm mẽ hkà ho mex. Ně mẽ hyk o mẽ pa xwÿnhjaja pa akupÿm mẽ hte ho mex. Ně mẽ htyk xwÿnhjaja pa akupÿm mẽ ho mẽ htĩr. Ně mẽ kêp amrakati nẽ ri mẽ pa xwÿnhjaja pa mẽ kãm mẽmoj mex jarẽnh o ri mẽ hkôt ixpa. ã na pa hte mẽ hipêx anhÿr o ri ixpa. Jakamã e wa ma akupÿm Juãw wÿr tẽn ã kãm ijarẽnh anẽ.

⁶ Kê ijarẽnh ma nẽ ixkôt hamaxpêr tÿx nẽ tee ri ixkukamã hamaxpêr kêt nẽ. Kojã ã amnhĩ nhĩpêx anẽ nẽ hamakêtkati nẽ ri pa. E wa tokyx ma akupÿm tẽn nẽ kãm ã ijarẽnh anẽ. Anẽ.

Jejus kot tanhmã Juãw Paxis jarẽnh to

Rukre 7.24-35

⁷⁻⁹ Nhÿm pre ã Jejus Juãw Paxis kôt wa pa ho wa pa xwÿnhja wa kãm amnhĩ

jarẽnh anẽ nẽ akupÿm hwÿr wa kumẽ nhÿm wa ma akupÿm hwÿr tẽn. Hãmri nhÿm Jejus mẽ kot mar o kuhê xwÿnhjê mã tanhmã Juãw Paxisja jarẽnh to nẽ mẽ kãm:

—Na ka pre htem kapôt ã Juãw Paxis mar kaxyw ma hwÿr mra. Nom ê mex ã omunh kaxyw rÿ hpijaãm kãm tanhmã kapêr to hã mar kaxyw na ka prem hwÿr amrar kêt nẽ. Tĩrtÿm nhÿ hã kapêr o pa jakamã na ka prem ate mar kaxyw ma hwÿr mra. Tĩrtÿm nhÿ hã ixkukamã ijarẽnh o pa xwÿnh na. Ixpê Tĩrtÿm kot mẽ akaxyw ixãm xwÿnh ã na hte ijarẽnh o pa. Nẽ hprĩ hã tanhmã mẽ amã ijarẽnh to. Jakamã kapêrja mex o kot wam Tĩrtÿm nhÿ hã kapêr jarẽnh xwÿnhjê kapêr piitã hakrenh par.

¹⁰ Tĩrtÿm kapêr ã kagã htÿm kot Juãw kukamã tanhmã harẽnh to nẽ harẽnh kot:

Kot paj Ixkra hkukamã ma mẽ hwÿr harẽnh xwÿnhja mẽ nhÿm ma ri kutêp mẽ kãm harẽnh o pa. Mẽ kot mar nẽ kutêp tãm amnhĩ nhĩpêx o pa kaxyw.

—Anhÿr o Tĩrtÿm Juãw Paxis kukamã harẽ nhÿm prem hã kagã. Tã nhÿm ixkukamã mẽ awÿr kumẽ.

¹¹ Juãw Paxisja na mex kumrêx. Na pre hprĩ hã ixkukamã tanhmã ijarẽnh to ho pa. Tã nom ixkôt mẽ pa ho mẽ pa xwÿnhjê hkĩnhã na pre ixkôt pa ho pa hkêt nẽ.

Jakamã ixkôt mẽ pa ho mẽ pa xwýnhjaja kot ixkôt hprĩ hã ixkapêr mar o pa jakamã na mẽ mex o mẽ kot Juãw Paxisja jakrenh. Anê.

12-13 —Na pre finat Mojes kumrêx mẽ kãm Tĩrtũm kapêr kwỳ hã kagà. Tã nhũm hpãnhã Tĩrtũm nhỹ hã kapêr jarênh xwýnhjaja Mojes mỳr pê hkwy hã kagà. Nhũm prem kamã harê nê kuma nê hkôt amnhĩ nhĩpêx o pa. Hãmri nhũm Juãw Paxisja mẽ mỳrpê kato nê tãm Tĩrtũm kapêr o mẽ ahkre ho ri pa. Tã pa hpãnhã ho mẽ ajahkre ho ri mẽ akôt ixpa nhũm mẽ ohtô nê inhma nê ixkôt amnhĩ xunhwỳ nê kãm ixkapêr kôt pix mã amnhĩ nhĩpêx o ri pa hprãm nê.

14 —Amnepêm na pre Tĩrtũm nhỹ hã kapêr jarênh xwýnhjaja mēhōja kukamã tanhmã harênh to ho pa. Nê mẽ kãm harênh o: “Koja nhỹrmã mēhō te Eris kot amnhĩ nhĩpêx pyræk o amnhĩ nhĩpêx nê mẽ awỳr mō. Nê mẽ amã Tĩrtũm kot mẽ awỳr mēnh mã xwýnhja jarênh o pa ka mẽ ama.” Anhỹr o mẽ kãm mēhō jarê. Tã kot paj mẽ amã kot hkukamã harênh xwýnhhta nhĩxi jarê ka mẽ inhma. Nà Juãw Paxisja kukamã na prem ã harênh anhỹr o pa.

15 —E kot pa mẽ amã mẽ piitã htỳx ri tanhmã mẽ hamaxpêr to ho mẽ pa hã mẽ amã mẽ harê ka mẽ harênh ma.

16 Te mēhprĩre kot amnhĩ nhĩpêx pyræk o na htem

amnhĩ nhĩpêx. Mēhprĩrejaja na htem mẽ òrkwy kapem mẽmoj to amnhĩkati nê tee ri hkwyjê kot amnhĩ nhĩpêx pumu nê mẽ kãm:

17 Kwa na pa mẽ amã gre htã ka mẽ ixkutã anhōkrepôx kêt nê. Pa mẽ ja hã mẽ apumu nê hpãnhã mẽ amã mẽ htyk jarê htã ka mẽ akaprĩ nê amỳr kêt nê. Kwa mẽ ri ã amnhĩ nhĩpêx anhỹr kêt nê. Anê.

—Mēhprĩjaja na htem ã axpên mã kapêr anê. Tã te mẽ ate mẽ uræk. Tĩrtũm kot mẽ awỳr ý hã kapêr jarênh xwýnhjê rēnh tã ka mẽ te mēhprĩre kot amnhĩ nhĩpêx pyrã nê mẽ ama nê ãm mẽ ama nê mẽ hkôt amnhĩ nhĩpêx kêt nê.

18 —Juãw Paxis na pre mẽ awỳr mō nê ixkĩnhã apkur mex o ri pa hkêt nê. Nê ixkĩnh ã wĩhti ho hkôm kêt nê. Ka mẽ ja hã omu nê hk-aga nê atỳx ri Satanasti nhỹ hã tanhmã kot amnhĩ nhĩpêx to hã hkamnhĩx. Hãmri nê mēhprĩre kot amnhĩ nhĩpêxta pyrã nê hkôt amnhĩ nhĩpêx kêt nê.

19 Tã hãmri pa hpãnhã mẽ awỳr mō nê Juãw Paxis rom apkati mẽ ixàpkur mex o ri mẽ akôt ixpa. Nê kurom mẽ akutã wĩhti hkwy ho ixkôm o ri ixpa. Tã ka mẽ ja hã ixpumu nê atỳx ri ixàpkur rũnh nê ixpipãnh o ri ixpa hã ixkamnhĩx nê ã axpên mã ixto akapêr anê. Nê mẽ kot amnhĩ tomnuj xwýnhjê hkôt ri ixpa xwýnh

ã axpên mã ijarê. Æ na ka htem axpên mã ijarênh anê. Jao te mẽ ate Juãw Paxis nhîpêx pyrà nê ixkaga nê ixkôt amnhî nhîpêx kêt nê. Na hte ã htýx ri tanhmã mẽ hamaxpêr to ho mẽ pa xwýnhjaja amnhî nhîpêx anê. No tãm ri mẽ hamaxpêr xwýnhjaja na htem ahpýnhã wa ixte amnhî nhîpêx ã wa ixpumu nê axpên mã wa ijarênh o: “Nà ahpýnhã wa kot amnhî nhîpêx tã no ãm hamê Tirtüm nhý hã kapêr mex o pa. E pu mẽ wa uràk nê Tirtüm kôt amnhî xunhwý.” Anhýr o axpên mã wa ijarê. Anê.

Mẽ kot Tirtüm kôt mẽ hamaxpêr kêt xwýnhjê jarênh Rukre 10.13-15

²⁰ Na pre hte Jejus krî piitã hkôt pa nê krî nhõ xwýnhjê mã kapêr nê mẽ kot amnhî tomnuj ã mẽ kãm kapêr. Korajî mẽ Pese nhõ xwýnhjê kumrêx mã kapêr nê mẽ kãm:

²¹⁻²² —E mẽ inhma. Amnepêm krî pê Sitõ mẽ Xir wa kamã mẽ pa xwýnhjaja na prem tanhmã amnhî tomnuj týt to ho pa nhũm Tirtüm tee ri ja hã mẽ omu nê mẽ kot amnhî tomnujta ã tanhmã mẽ ho. Tã kwa mẽ o kora Korajî mẽ Pesêj nhõ xwýnhjaja. Ra ixte mẽ amã aa mẽ ate mẽmoj pumunh kêt kwý ho anhýr rax tã ka mẽ omu nê ãm omu nê amnhî tomnuj kaga hkêt nê. Arî tanhmã amnhî tomnuj to ho ri apa. Mýrapê kot kaj mẽ amex kêt nê. Kop apu Sitõ rý Xir kamã mãn ixte mẽ kãm aa mẽ

kot mẽmoj pumunh kêt kwý ho anhýr o ri ixpa ronhýt mẽ omu nê mẽ arom amnhî kaxyw ixkôt hamaxpêr týt kurê kumrêx. Nê tee ri kot tanhmã kot amnhî tomnuj to hã amnhî pumu nê hkaprî nê hkaga hpa. No mẽ kajaja na pa hte tee ri mẽ amã aa mẽ ate mẽmoj punuj kêt kwý ho anhýr o ixpa kaprý. Ka mẽ ja hã ixpumu nê ãm ixpumu nê amnhî tomnuj kaga hkêt nê. Jakamã koja nhýrmã Tirtüm tanhmã mẽ atomnuj týt to. Nê tanhmã Sitõ mẽ Xir wa kamã mẽ pa xwýnhjê jarênh to nhũm mẽ kot amnhî tomnuj mýrapê amnhî xà htýt kamã hamak rãhã ho pa. No mẽ kajaja mẽ ate amnhî tomnuj týt o mẽ hakrenh jakamã koja Tirtüm mẽ hkínhã mẽ atomnuj týt kumrêx. Ka mẽ amnhî xà htýt kamã ajamak rãhã ho ri apa kãm ga. Anê.

²³⁻²⁴ Nhũm pre ã Jejus mẽ kãm kapêr anê. Nê hpãnhã Kapanaũ nhõ xwýnhjê mã kapêr nê mẽ kãm:

—No mẽ apê Kapanaũ nhõ xwýnhjaja. Kot kaj mẽ ajaxwýtja mẽ uràk nê amex kêt nê. Ra ixte mẽ amã aa mẽ ate mẽmoj pumunh kêt kwý ho anhýr rax nhũm mẽ ate hã ixpumunh tã amnhî tomnuj kaga hkêt tã Tirtüm mẽ wa inhõ krî hwýr akrà. No ãm hwýr akrà kaprý. Kot kaj mẽ atõ hwýr axàpir kêt nê. Kop apu Sotõ nhõ xwýnhjaja mãn kot ã ixte amnhî nhîpêx anhýr ã ixpumunh ronhýt mẽ ra kot amnhî tomnuj kaga nê ixkôt amnhî xunhwýt kurê

kumrêx. No mẽ kajaja na ka mẽ ã amnhĩ nhĩpêx anhÿr kêt nê. Jakamã kot kaj mẽ nhÿrmã ma kuwy maatita wÿr ajapêx pa kãm ga. Anê.

Jejus kot ô Papaj mã amnhĩ jarênh

Rukre 10.21-22

25-26 Tã nhũm Jejus Tĩrtũm mã amnhĩ jarê nê kãm:

—Pa Papaj? Nà apê mẽ inhõ Pahi Maati na ka. Pikap ri mẽ pa xwÿnhjaja nê kaxkwa kamã mẽ pa xwÿnhjaja apê mẽ ixpiitã mẽ inhõ Pahi Maati na ka. ãm hãmri na ka hte amnhĩ nhĩpêx mex o ri apa. Na ka hte mẽ àhpumunh tÿx ã mẽ kot amnhĩ to jarkrar xwÿnhjê mã axàhpumunh tÿx o amnhĩrĩt kêt nê. ãm mẽ àhpumunh kêt ã mẽ kot amnhĩ jarênh xwÿnhjê pix mã na ka hte axàhpumunh tÿx o amnhĩrĩt nhũm mẽ tapxipixjaja ja hã apumu. Nà ãm hãmri. ãm hãmri na ka hte amã hprãm xà hkôt ã mẽ piitã mẽ hipêx anhÿr o ri apa Papaj. Jakamã mẽ kot amnhĩ to hkryre xwÿnh pixjaja na htem hprĩ hã ate amnhĩ nhĩpêx kôt apumunh o pa. Anê.

Nhũm pre ã Jejus Tĩrtũm mã amnhĩ jarênh anê.

27 Hãmri nê hpãnhã mẽ kot mar o kuhê xwÿnhjê mã kapêr nê mẽ kãm:

—Nà na pre ra Inhipeêxàja inhĩhkra kamã mẽmoj piitã hagjênh pa. Ixte kãm ho amnhĩptâr o ixpa kaxyw. Jakamã tapxipix na kot ixpê Kra hã ixpumunh par. No jar

pika ja kamã mẽ pa xwÿnhjaja na mẽ kot ja hã ixpumunh kêt. Nê papxipix na ixte Inhipeêxà kot tanhmã amnhĩ nhĩpêx to hã omunh par. Jakamã na pa hte ã amnhĩ nhĩpêx o ri ixpa anê nê inhmã hprãm xà hkôt mẽ hkwyjê mã ho amnhĩrĩt o ri ixpa. Jakamã nhũm mẽ ixpyrà nê Inhipeêxà kot tanhmã amnhĩ nhĩpêx to ho pa hkôt omu.

28-30 —Nê tee ri amnhĩ kukamã mẽ ajamaxpêr o ri apa xwÿnhjaja te mẽ ate mẽmoj pytĩ rax tur nê ahte ho apa pyràk. Kwa mẽ ixkôt amnhĩ xunhwÿ nê ixte amnhĩ nhĩpêx ã ixpumu. Ixte mẽ akamã ixukapri xwÿnh na pa. Na pa hte mẽ akutã inhnojarêt rãhã ho ixpa. Jakamã kot kaj mẽ ixkôt amnhĩ xunhwÿ pa te ixte mẽ anê mẽmoj pytĩ ho ixwryk pyràk o mẽ anhĩpêx nê tãm mẽ axunhwÿ ka mẽ tãm ajamaxpêr nê tãm amnhĩ nhĩpêx o ri apa. Mo kaxyw koja ixkôt mẽ kot amnhĩ nhĩpêx o pa xwÿnhjaja tee ri amnhĩ kukamã hamaxpêr o pa? Nà na htem ixkamnàrom hamakêtkati nê àmnhĩx ri pa ho pa. Anê.

12

Jejus kêp arĩgromnu hpãm

Makre 2.23-28; Rukre 6.1-5

1 Tã nhũm Ijaew nhõ arĩgromnu pê sapja kato. Hãmri nhũm Jejus mẽ hkôt ri mẽ ixpa ho mẽ ixpa xwÿnhjê mẽ pa mẽ ma mẽ hpur kôt ri nhÿhÿm ri ixpa. Hãmri nê ra mẽ inhmã prãm nê mẽmo

hy te kot harôj pyrâk xwÿnhja kwÿ rê nê kugrà nê ma Jesus kôt hkanhar o mō. Mē ixpê Ijaew na pa htem axpên pur kām ā amnhī nhīpêx anhÿr o ixpa.

² Hāmri nhūm mē ixkwÿ pê Parijew nhō xwÿnhjaja kām mēmoj tā Jesus o kapêr prām jakamā ā mē ixte amnhī nhīpêx anhÿr ā mē ixpumu nê mē ixtā Jesus kukjêr kurê kumrêx nê kām:

—Kwa Tirtūm kapêr tūm kot mē panhō arīgromnu hā mē pahte mē hpur kām mēmoj nhīkênh nê mē pahkurê htā nhūm ri akôt mē pa ho mē pa xwÿnhjaja axtem nê ā amnhī nhīpêx anhÿr o ri akôt pa. Mēmo hyta rê nê akôt hkanhar o pa. Kwa mē kām anê kê mē ā amnhī nhīpêx anhÿr kêt nê. Na htem arīgromnu hā mēmoj tā àpênh kêt kênā. Anê.

³⁻⁴ Hāmri nhūm mē kuma nê hprī hā mē kām Tirtūm kapêr jarê nê mē kām:

—Tk. Xàn ka htem Tirtūm kapêr ā kagà htūm kot pahī Tawi kot tanhmā amnhī nhīpêx tota kamā harênh nê mar kêt nê? Na pre hkôt ri mē pa xwÿnhjê mē nhūm mē prām xàj Tirtūm mā amnhī jarênh xà hā ixkre hwÿr agjê. Hāmri nhūm mē ō patre maatija mē kām prām tÿx ā mē omu nê kām mē hkaprī nê mē kām mēmoj gō. Mē kot Tirtūm noo mā pāwti jaxwÿr xwÿnhta gō nhūm mē kuku. Tirtūm kapêr ā kagà htūm kot ja nê mē hkurê htā nhūm mē kām prām tÿx ā mē omu nê mē kamā ukaprī xàj mē kām

kugō. Ām mē ō patre pix kot ja hkur kaxyw tā nhūm mē kām kugō nhūm mē kuku. Tā nom nhūm Tirtūm ja hā mē omu nhūm ja kêp omnuj kêt nê. Kot mē kamā ukaprī nê mē kām ōr ā omu nhūm ja kām mex nê.

⁵—Mē panhō arīgromnu htā na hte patrejaja arī hā Tirtūm mā amnhī jarênh xà hā ixkre kamā àpênh o pa. Tirtūm kapêr ā kagà htūm kôt na htem arīgromnu htā nhūm mē arī hā apê nhūm Tirtūm pê jamnuj kêt nê. Kumā mē àpênh xwÿnh kênā.

⁶ ām hāmri na pa mē amā ja jarê. Tirtūm mā amnhī jarênh xà hā ixkreta mex tā nom ixpê Tirtūm Kra jakamā inhmex o ixte ixkreta jakrenh.

⁷ Tirtūm kapêr ā kagà htūm kot ja harênh kot:

Kêr ka mē inhmā amnhī jarênh kaxyw nê ām inhmā mēmoj nhōr pix pê inhmā amnhī jarênh kêt nê. Mē määnēn mē kamā axukaprī o ri apa pê inhmā amnhī jarê. Ja na kêt inhmā hprām.

—Ā harênh kot anhÿr. Tā mē ate aprī hā ja mar ronhÿx ka mē ixkôt mē pa xwÿnhjê kot mēmo hy rênh nê hkanhar o mōr ā mē omu nê ri tanhmā mē ho akapêr to hkêt nê. Ām mē kām prām ā mē omu nê mē kamā axukaprī nê.

⁸ —Kêt pa na pre Tirtūm mē akaxyw ixām nê mē awÿr inhmē. Jakamā papxipix na pa hte arīgromnu hā tanhmā

mê kot amnhî nhîpêx to hã
mê kãm karõ. Kwa mê jajê
pumu nê mê kamã axukapři
kêt wehe. Kwãr mê mãmri
mêmo hyta rê nê hkanhar o
ixkõt mõ. Anê.

ihkra grã xwýnh jarênh
Makre 3.1-6; Rukre 6.6-11

⁹ Nhũm pre ã Jejus Parijew
nhõ xwýnhjê mã kapêr anê
hãmri nê Tirtũm kapêr o mê
ahkre xã hã ixkre hwýr tẽ nê
axã.

¹⁰ Nhũm Parijew nhõ
xwýnhjaja tanhmã ho kapêr
to kaxyw htãnopxar o kuhê.
Jakamã nhũm ixkre kamã
mêhõ my ihkra grã xwýnhja
mê pikuprõnh xwýnhjê
nhĩhkõ hã nhỹ nhũm Parijew
nhõ xwýnhjaja omu nê axpên
mã:

—Kwa pu mê jar pakuhê
nê Jejus kot tanhmã amnhî
nhîpêx to hã omu. Xã koja
arĩgromnu hã mũjti ho mex
nã? Koja ho anê nê Tirtũm
kapêr tũm kuhpa hã amnhî
nhîpêx. E pu mê kop xa nê hã
omu. Anê.

Hãmri nê hã Jejus kukja nê
kãm:

—E mê inhmã mêmoj jarê.
Xã na htem arĩgromnu hã
akupým mê ho mex nhũm
Tirtũm kãm ja mex nê nã?
Anê.

¹¹ Hãmri nhũm mê
hamaxpêr kõt mê omunh
mex nê mê kãm:

—Kwa tanhmã na htem
arĩgromnu hã amnhî nhîpêx to
ho pa wehe? Xã koja we mê
akrit ôwêhti ahkrehti kamã
têm ka omu nê ãm omu nê
arĩgro mex jamãr pẽ ho axãpir
kêt nê? Nã kot kaj mê tee

ri omu nê ho axãpir kurê
kumrêx.

¹² Arĩgromnu hã mê ho
mexja ja mex kênã. Tirtũm
mã mê pahpê panhija na
mê pamex o mê hkrit
jakrenh jakamã kêr pu mê
tee arĩgromnu htã pu mê hã
tanhmã axpên to mex to
ho papa. Ja na Tirtũm kãm
hprãm.

Anhýr o mê kãm kapêr.

¹³ Hãmri nê hpãnhã myta
mã:

—E anhĩhkra katãt. Anê.

Hãmri nhũm ihkra katãt nê
mex kurê kumrêx.

¹⁴ Hãmri nhũm Parijew
nhõ xwýnhjaja tee ri ja hã
omu nê Jejus kamã gryk nê.
Arĩgromnu pẽ sap ã kot ho
mex jakamã nhũm mê kamã
gryk týt nê. Hãmri nê ma mra
nê hapõj nê hã axpên kukjêr
o kuhê nê axpên mã:

—Kwa ã kot amnhî nhîpêx
anhýrja mýrapê tanhmã kot
puj wem ho? ã kapêr anhýrja
o te mê papamjaja mê pahte
hkĩnhã mê kamã paxukapři
kêt pyrãk ã mê pajarê. Koja
mê pahkwýjaja kuma hãmri
nê mê pahte amnhî nhîpêx
kaga nê amnhî kaxyw hkõt
pix mã hamaxpêr. Kwa
tanhmã kot puj wem ja nê
ho?

Anhýr o axpên kukjêr o
kuhê.

Jejus kêp Tirtũm kot mê
pahwýr mênh xwýnh ã harênh
Makre 3.7-12

¹⁵ Hãmri nhũm Jejus amnhî
tã Parijew nhõ xwýnhjê ja
maxpêr kõt mê omu hãmri nê
mê kêp kato nê hpãnhã ma

nhÿhÿm krî hõ hwÿr ma tẽ. Nhÿm mẽ ohtõ nẽ omu nẽ ma hkõt mra nhÿm mẽ omu nẽ akupÿm mẽ kãm mẽ à xwÿnh piitã ho mex.

¹⁶ Hãmri nẽ mẽ kãm:

—E na pa akupÿm mẽ ato mex. Nom kêr ka mẽ amnhĩ tã ixto axãmra ho ri apa hkêt nẽ. Ixpê Tirtÿm Kra hã mẽ kãm ijarênh kêt nẽ. Âm kwarĩ kumrêx.

Anhÿr o mẽ kãm kapêr.

¹⁷ Na pre ra amnepêm Tirtÿm nhÿ hã kapêr xwÿnh finat Ijaisja Jejus kukamã mẽ kãm tanhmã harênh to nẽ hã kagã. Te Tirtÿm tãm kapêr pyrãk o harê nẽ hã kagã. Nẽ hã kagã ho:

¹⁸ Ota ixkõt amnhĩ nhĩpêx o pa xwÿnh ta xa. Pa na pa amnhĩ kaxyw âm. Inhmã hapêê. Na pa hte tanhmã kot amnhĩ nhĩpêx to ho pa hã omu nẽ ixkĩnh tÿx nẽ. Kot paj hwÿr amnhĩ karõ mẽ nhÿm hwÿr axà nhÿm ma ÿ hã pika piitã hkõt mẽ piitã mẽ kãm ijarênh o ri mẽ hkõt pa. Mẽ kot hprĩ hã ixte tanhmã amnhĩ nhĩpêx to nẽ tanhmã ijamaxpêr to hã ixpumunh kaxyw.

¹⁹ Nom koja ri amnhĩ to âmra o pa hkêt nẽ. Rÿ kãm amnhĩ to rax prãm o mẽ kãm tanhmã amnhĩ nhĩpêx to ho pa hkêt nẽ.

²⁰ Âm kapêr xukaprĩ pix o koja mẽ hirerek xwÿnhjê mã kapêr o pa. Nẽ mẽ kot tee ri amnhĩ nhĩpêx

ã amnhĩ pumunh xwÿnhjê kamã ukaprĩ o pa. Nẽ mẽ kot htÿx ri amnhĩ nhĩpêx o mẽ pa xwÿnhjê kutã nojarêt rãhã ho pa jakamã nhÿm mẽ hpãnhã tãm amnhĩ nhĩpêx o pa. Koja ã amnhĩ nhĩpêx anhÿr o ri mẽ hkõt pa rãhã ra akupÿm mẽmoj piitã tãm haxwÿr pa.

²¹ ã kot amnhĩ nhĩpêx anhÿr o pa jakamã koja pika piitã hkõt mẽ pa xwÿnh kwÿjaja kukwak ri amnhĩ kaxyw Tirtÿm kõt hamaxpêr nẽ hkõt amnhĩ xunhwÿ. Anê.

Na pre ã finat Ijaisja Tirtÿm nhÿ hã kormã Jejus wrÿk nẽ kator kêt ri tanhmã kot amnhĩ nhĩpêx to ho pa hkukamã harênh nẽ hã kagã anê. Tã nhÿm mẽ hwÿr wrÿ nẽ ã mẽ hkõt amnhĩ nhĩpêx anhÿr o pa.

Jejus mẽ mẽkarõmnuti wa harênh

Makre 3.20-30; Rukre 11.14-23, 11.31-32, 12.10

²² Tã nhÿm prem Jejus wÿr mẽhõ myja o mõ. Mẽkarõmnuti kot hwÿr àr nẽ ho nohkre nẽ ho kapêr kêt xwÿnh ta nhÿm mẽ hwÿr o mõ. Hãmri nhÿm omu nẽ nẽ mẽkarõmnuti jano nẽ akupÿm ho mex kurê kumrêx nhÿm akupÿm rît mex nẽ akupÿm kapêr mex nẽ.

²³ Hãmri nhÿm mẽ amnhĩ jaêr pê omu nẽ kamã no pyma nẽ hã axpên kukjêr o:

—Kokÿÿ. Jejus na hte âm mẽ ho mex o mẽ ho mex o

pa. Mãn kêp Tirtûm kot mẽ pahwÿr mẽnh mã xwÿnhnta na nà? ã na hte ã amnhĩ nhĩpêx anhÿr o pa. Mãn kêp pahi finat Tawĩ kanrêhã tàmnhwÿta na nà? Anê.

²⁴ Nom nhũm Parijew nhõ xwÿnhjaja ã Jesus kot amnhĩ nhĩpêx anhÿr ã omu nê kêp mẽkarõmnuti hkwȳ hã hkamnhĩx. Jakamã mẽ kot hã axpêr kukjêr ã mẽ kuma nê mẽ kãm:

—Tk pêr hinhu nhĩkôoti nhÿ hã na hte mẽ nê amnhĩ kwÿjê japôx o pa. Anê.

Hinhu nhĩkôoti nhĩxi hõ pê Satanasti nhũm prem ã Satanasti nhÿ hã Jesus kot amnhĩ nhĩpêx ã hkamnhĩx anê.

²⁵ Nhũm ra mẽ hamaxpêr kôt mẽ omunh mex jakamã mẽ kãm:

—Kwa mẽ inhma mẽ ate ixpê Satanasti hkwȳ hã ixkamnhĩx xwÿnhjaja. Koja pika nhõ xwÿnhjaja axpên kutã amnhĩ xunhwÿ nê axpu hãmri nê anhgrã nê ma ahpÿnhã ri pa. Hãmri nê amnhĩ krã hkôt ri tanhmã amnhĩ nhĩpêx to ho pa. Jakamã nhũm mẽ õ pahija mẽ hamãr kêt nê. Nê koja krĩ nhõ xwÿnhjaja. Rÿ mẽ kot axpên to hkwȳ xwÿnhjaja mẽmoj tã axpên kãm gryk nê axpên kutã amnhĩ xunhwÿ. Hãmri nê ahpÿnhã awry hã pa nhũm mẽ õ pahija tee ri kãm mẽ hamãr prãm kaprÿ. Mo mẽ hkwȳjaja kot ri mẽ hamãr o pa? No koja pahija tãm amnhĩ nê amnhĩ kwÿjê janor kêt nê.

²⁶ Tã ja pyrã nê ixte Satanasti nhÿ hã tanhmã amnhĩ

nhĩpêx to ho ri ixpa ronhÿx pa ri mẽ nê amnhĩ kwÿjê janor kêt nê.

²⁷ —No mẽ akwÿjaja? Xà Satanasti nhÿ hã na htem mẽ nê mẽkarõmnuti japôx o pa? Kêp apu pa ixte ÿ hã mẽ nê amnhĩ kwÿjê japôx ronhÿx mẽ akwÿjaja ixpyrà nê ÿ hã mẽ nê amnhĩ kwÿjê japôx o pa. Nà Tirtûm nhÿ hã mẽ ixte mẽ nê mẽ hapôx o ixpa kênã. Jakamã mẽ ate ã ijarênh anhÿrja mex kêt.

²⁸ Tirtûm Karõ nhÿ hã ixte mẽ nê mẽ hapôx jakamã kwa mẽ ja hã ixpumu nê ixte mẽ ato amnhĩptàr kaxyw Tirtûm kot mẽ awÿr inhmênh kôt ixpumu kêt wehe. Pa na ka htem ijamãr o apa.

²⁹ —Satanastija àhpumunh tÿx jakamã na htem tee ri kêp hkôt mẽ kot amnhĩ xunhwÿr xwÿnhjê pytãr kaxyw nhũm mẽ nê mẽ omunh mex nê. Tã nom ixàhpumunh tÿx o ixte Satanasti jakrenh par jakamã na pa hte kêp mẽ utã nhũm mẽ hpãnhã ixkôt ri amnhĩ nhĩpêx.

³⁰ —Ra mẽ amã ixkapêr mar prãm tã nom kormã ixkôt amnhĩ xunhwÿr kêt nê. Kwa wem ma amnhĩ to amõr gri nê tokyx ixkôt amnhĩ xunhwÿ kêt wehe. Kot kaj mẽ anhÿr kêt hãmri nê mẽ apê ixkutã amnhĩ xunhwÿr xwÿnh pyrãk o amnhĩ nhĩpêx.

³¹⁻³² —Nê koja mẽhõ ixkapêr ma nê kãm ixprãm kêt nhũm Tirtûm ixtã omu nom tokyx tanhmã ixtã ho hkêt nê. Koja kormã amnhĩ tã hamã. Karõ kot axte kãm

ijarēnh o amnhīrīt nhūm jatā kot mar nē kām ixprām nē ixkôt amnhī xām prām xāj nhūm kormā amnhī tā hamā. Nom koja Karō xatā mē kām tanhmā ixto amnhīrīt to htā nhūm mē kuma nē ām kuma nē te mē kēp amnhī jamak pro pyrāk. Jao ra Karō hā ħpijaām kēt o amnhī nhīpēx. Mýrapē koja Tirtūm nhýrmā amnhī xwar te kēp amnhī jamak pro pyrāk o mē hipēx nhūm mē tee kām amnhī kaprī kaprý. Hāmri nē amnhī xà htýx kamā hamak o pa xàta wýr ma pa nē kamā pa rāhā nē pa ho pa. Anē.

Mē pajamaxpēr xà hkôt tanhmā ri mē pakapēr to

Rukre 6.43-45

³³ Nhūm Jejus arī Parijew nhō xwýnhjē mā kapēr nē mē kām:

—Nē kot kaj mē atō anhō mēmo pàr nhūm amā ô mex nē. Ô rax nē. Ka omu nē akīnh nē amnhīm mex ā harē. No koja apē ô hkēt ka tee ri omu nē mex kēt ā harē. Na htem ā amnhīm mēmo xō ħpàr pumunh kôt tanhmā kute hā harēnh anē. Ja pyrā nē na htem tanhmā mē kot amnhī nhīpēx to hā mē omunh kôt tanhmā mē harēnh to. Mē kot amnhī tomnuj xwýnh ā mē harē rý mē kot amnhī to mex xwýnh ā mē harē.

³⁴⁻³⁵ —Nē koja mēhō hamaxpēr mex nē hāmri nē kapēr mex o pa. Nom koja hamaxpēr punuj nē kapēr punuj pix o pa. Nē htýx ri tanhmā amnhī tomnuj to ho pa. Na htem ahpýnhā amnhī

jamaxpēr xà hkôt tanhmā kapēr to ho pa. No mē kajaja na ka htem kagā xoprē jamaxpēr pyrāk o ajamaxpēr punuj pix o ri apa. Jao akapēr punuj nē. No tām ajamaxpēr o tām akapēr o ri apa hkēt nē. Na htem tanhmā hamaxpēr to xà hkôt tanhmā ri kapēr to ho pa.

³⁶⁻³⁷ Koja nhýrmā Tirtūm mē piitā tanhmā mē kapēr to hā mē mar xà hkôt tanhmā mē harēnh to. Jakamā mē akapēr mex o mē apa xwýnhjaja koja mē amex ā mē ajarē. Nom mē atýx ri akapēr punuj o mē apa xwýnhjaja koja mē amex kēt ā mē ajarē. Hāmri nē mē akapēr punuj o apaja mýrapē mē atomnuj týx nē. Anē.

Jejus kot Jōhti jarēnh

Makre 8.11-12; Rukre 11.29-32

³⁸ Hāmri nhūm Tirtūm kapēr tūm o mē ahkre xwýnh mē Parijew nhō xwýnh kwýjjaja mēmoj tā Jejus wý nē kām:

—Kwa Pahihtī. Mē inhmā aa mē ixte mēmoj pumunh kēt õ ho anē. Kot paj mē omu hāmri nē Tirtūm kot mē ixwýr amēnh ā apumunh kuré kumrēx. Jakamā e mē inhmā mēmoj to anē nà. Anē.

³⁹ Hāmri nhūm mē kuma nē mē kām:

—Tk. Pēr ām mē ajamaxpēr punuj pix o na ka htem apa. Ixpē Tirtūm kot mē awýr inhmēnh xwýnh tā mē ate ja hā ixpumunh kēt. Nē mē ate ja hā axpēn mā ijarēnh kēt tā ixte mē amā aa mēmoj pumunh kēt õ ho

anhÿr kaxyw hã ixwÿ. Nã pa mẽ amã ho anhÿr kêt nẽ. Kormã. ãm amnepêm Jõhti kot tanhmã amnhĩ nhĩpêx toja pix kot paj mẽ amã harẽ.

40 —Tĩrtũm nhÿ hã kapêr xwÿnh Jõhtija amnepêm na pre tep rax kumrêxa hĩr rãhã kukrẽ. Nhũm õxãhkre kamã hĩr nẽ hkrĩ hã apkati axkrunêpxi hãmri nẽ hĩr rãhã õxãhkre rũm kato. Tã ixpê Tĩrtũm kot mẽ awÿr inhmẽnh xwÿnh kot paj nhÿrmã kên kre kamã ixtyk nẽ inhnõr ã apkati axkrunêpxi. Jõhti hkĩnhã ixtyk kumrêx nẽ inhnõr ã apkati axkrunêpxi hãmri nhũm Tĩrtũm akupÿm ixtõ ixtĩr.

41 —Nẽ koja nhÿrmã Tĩrtũm akupÿm mẽ htyk nẽ mẽ hikwÿ xwÿnh piitã akupÿm mẽ ho hĩr hãmri nhũm mẽ piitã Inhĩpêxã mẽ wa ixkutã hkrĩ pa wa tanhmã mẽ harẽnh to. Tĩrtũm mẽ wa ixkuri mẽ hĩr tũm nẽ mẽ pa ho mẽ pa mã xwÿnhjê hã mẽ hkwyjê jarẽ nẽ wa ixkuri mẽ pa ho mẽ pa hkêt xwÿnhjê jarẽ. Mẽ piitã ã ahpÿnhã mẽ harẽnh anẽ. Amarĩ mẽ pa xwÿnhjaja nẽ mẽ õ pahijaja. Jakamã nhũm Nĩnĩwe nhõ xwÿnhjaja tanhmã wa inhmã mẽ ajarẽnh to. Jõhti kot mẽ hwÿr mõr nẽ mẽ kãm Tĩrtũm kapêr jarẽnh o pa xwÿnhjaja nhũm mẽ tanhmã wa inhmã mẽ ajarẽnh to nẽ wa inhmã: “Na pre Jõhtija man mẽ inhõ krĩ hwÿr mõ nẽ mẽ inhmã akapêr jarẽnh o ri mẽ ixkõt pa. Pa prem kuma nẽ mẽ ixtõ amnhĩ tomnuj kaga nẽ

akõt amnhĩ xunhwÿr kurê kumrêx Tĩrtũm. No or war akutã mẽ hkrĩ xwÿnh kwÿ ata mẽ na pre Akra Jejus tãm mẽ hwÿr mõ nẽ mẽ kãm kapêr o ri mẽ hkõt pa nhũm prem mar tã mẽ ixkĩnhã mẽ kot amnhĩ tomnuj kaga nẽ hkõt amnhĩ xunhwÿr kêt nẽ. Mẽ ixkurom mẽ kot Akra mar tã amnhĩ kaxyw kãm hamaxpêr kêt nẽ.” Anhÿr o koja mẽ wa inhmã mẽ ajarẽ ka mẽ tee ri mẽ ama nẽ ra mẽ amã ma nẽ. Nom ãm mẽ amã ma kaprÿ.

42 —Nẽ sur kãm mẽ õ pahi nitita koja mẽ hpãnhã tanhmã wa inhmã mẽ ajarẽnh to nẽ wa inhmã: “Na pa pre inhmã pahi Sarumãw kot war anhÿ hã àhpumunh tÿx ã harẽnh ma hãmri nẽ inhmã mar prãm xaj ma awry hã õ pika hwÿr mõ nẽ omu nẽ kapêr ma. Hãmri nẽ ma akupÿm inhõ pika hwÿr mõ nẽ ixkwÿjê mã àhpumunh tÿx ã harẽnh o ri ixpa. Tã Akra Jejus na kot àhpumunh tÿx o pahi Sarumãw jakrenh tã or war akutã mẽ hkrĩ xwÿnh kwÿ ata mẽ. Mẽ kot kapêr mar tã ixkĩnhã kãm mar prãm kêt. Na prem kuma nẽ ãm kuma.” Anhÿr o koja wa inhmã mẽ ajarẽ. Hãmri nẽ ja hã mẽ amã akir ka mẽ tee ri mar o akrĩ nẽ amnhĩ kamã agryk o akrĩ. Nom ãm amnhĩ kamã agryk kaprÿ. Anẽ.

Mêkarõmnuti kot tanhmã mēhō hto hã harēnh
Rukre 11.24-26

43 Nhũm Jejus arĩ Parijew nhõ xwÿnhjê mẽ Tĩrtũm kapêr tũm o mẽ ahkre xwÿnhjê mã kapêr nẽ mẽ kãm:

—Te mẽ ate ixte mēhõ nê mẽkarõmnuti japôx xwÿnhta pyræk. Nhũm te kêp kator nê ma htēm pyræk. Nê nhÿri am-grà kamã ri pa pyræk. Koja ja kêp omnuj nhũm tee ri kamã nhÿri hkôt xà japêr o pa. Nom tee ri hapêr o pa kaprÿ.

⁴⁴ Hãmri nê tanhmã amnhĩ kukamã hamaxpêr to nê hamaxpêr o: “E kot paj ma akupÿm mẽ kot nê ixkator xwÿnhta wÿr tē nê axà nê kamã măn ri ixpa.”

⁴⁵ Anhÿr o hamaxpêr hãmri nê ma akupÿm hwÿr tē. Nom kormã akupÿm hwÿr àr kêt ri nhũm kamã amrakati nê ri pa. Jakamã nhũm akupÿm hwÿr axà. Nom ahte hwÿr àr kêt nê. Amnhĩ kôt hkwyjê ho 7 nê hwÿr mẽ ho gjêx pa. Mẽ kêp 7jaja nê wamta mẽ nhũm mẽ piitã hwÿr gjêx pa. No mẽ kêp 7jaja na omnuj tÿx o kot wamta jakrenh jakamã nhũm mẽ kot hwÿr gjêx xwÿnhta mẽ ÿ hã ra amnhĩ tomnuj tÿx nê oprê htÿx o pa. Wam pyxire kot hwÿr àrta nhÿ hã nhũm amnhĩ tomnuj o ri pa nom kawax pē oprê. Tã nhũm ra axte hwÿr mẽ ohtô nê gjêxta nhÿ hã hãmri oprê htÿx kumrêx. Ja pyrà nê kot kaj mẽ tokyx ixkôt amnhĩ xunhwÿr kêt nê hãmri nê amnhĩ tomnuj tÿx pix o ri apa. Anê.

Jejus kot tanhmã hkwyjê jarênh to hã harênh

⁴⁶ Nhũm Jejus arĩ mẽ ahkre ho nhÿ. Rôm nhũm katorxà nê htôjaja nhÿhÿnh hwÿr mōn pōj. Nom kormã hwÿr gjêx

kêt nê. Mẽ kot hã htu rax jakamã nhũm mẽ tee ri hwÿr gjêx kaxyw kormã kapôt ã hã mẽ omunh o kuhê.

⁴⁷ Hãmri nhũm mēhõja kapôt ã mẽ omu nê Jejus mã mẽ harê nê kãm:

—Kwa Pahihti. Ota akatorxà mẽ atôjaja awÿr mōn pōj nê tee àr kaxyw. O mÿj mẽ kapôt ã kuhê. Anê.

⁴⁸⁻⁵⁰ Hãmri nhũm kuma nê kãm:

—Tôe. Nà kot pa ixkato nê mẽ omu. Inhmã mẽ hapêe. Nom kot kaj mẽ atō Tirtũm kapêr ma nê hkôt amnhĩ xãm nê hkôt amnhĩ nhÿpêx. Hã kot kaj te apê ixtō rÿ ixkatorxà pyræk o pu mẽ axpên nhÿpêx o ri papa. Pa inhmã ixkatorxà nê ixtôjê japê pyrà nê mãânēn inhmã mẽ ajapê nê. Anê.

13

Mêmo hy hkre xwÿnh jarênh Matêwre 13.18-23; Makre 4.1-9; Rukre 8.4-8

¹ Hãmri nhũm Jejus mẽ kãm kapêr pa nê ixkre rũm kato nê ma himô rax wÿr tē nê gô mÿri mẽ kãm ujarênh kaxyw nhÿ. Pa mẽ ixpê hkôt mẽ ixpa ho ixpa xwÿnhjaja ma hkôt mra.

²⁻³ Hãmri nê gôta wÿr pōj nê mÿri ixkrĩ. Nhũm mẽ Jejus ã htu rax nê nhũm tee ri mẽ omunh o nhÿ. Hãmri nê hamaxpêr nê kãnhmã xa nê tē nê pàr krem axà nê pàr kre kamã mütũm awry rũm mẽ ahkre ho nhÿ nhũm mẽ piitã omunh nê mar mex o hkrĩ. Nhũm mẽ kãm ujarênh o mẽ ahkre ho nhÿ. Nom mẽ kãm tãm ujarênh kêt nê.

Mê kot Tirtûm kapêr mar nê tanhmã hkôt amnhî nhîpêx to ho paja nhûm hã kuxi nê mê kãm harênh o nhÿ nhûm mê amgrã kamã kÿx pê mar o hkrî. Nhûm mê kãm:

4 —E mê inhma. Koja mēhō ma pur mã mō nê pur kãm mēmo hy ho ukapêr o ri pa. Nom nhûm hy piitã amex kãm rôrôk kêt nê. Koja hkwyja ahpÿnhã nhÿri rôrôk. Kwÿ aptÿx kãm rôrôk nhûm kuwênhre omu nê hwÿr mra nê hkrêr pa.

5 —Nê koja kên kãm hkwy rôrôk nê ra higrôt kutã no-jarêt nê higrôt pa. Nom nhûm kamã aptÿx nê kêp pika hkryre.

6 Jakamã nhûm higrôt nhûm hã myt apha nê arîgro htÿx mê nhûm grã pa. Harê hkryre jakamã grã pa.

7 —Nê koja mrônhî kamã hkwy rôrôk nê higrôt tã no nhûm utÿja kêp amÿtã nhûm ô hkêt nê.

8 —No kêt hirã kamã pika mex kãm rôrôk xwÿnhja hirã kamã rôrôk jakamã higrôt mex nê piitã ô rûnh nê. Kamã ô hkwy kêp 30 nê kamã hkwy kêp 60 nê kamã hkwy kêp 100. ã mê ujarênh kot anhÿr.

9 Kwa kêr ka mê ixujarênhja ma nê kãm ajamaxpêr tÿx rãhã ho apa. Anê.

Mêmo kaxyw Jejus kot mê ujarênh o mê ahkre

Makre 4.10-25; Rukre 8.9-15

10 Hãmri pa mê ixpê Jejus kôt mê ixpa ho ixpa xwÿnhja Jejus kot mê kãm ã ujarênh

anhÿrja ã kuma nê tee ri hkukamã ijamaxpêr. Hãmri nê hã hkukja nê kãm:

—Kwa axujarênhja na pa mê ixprî hã hkôt mēmoj pumunh kêt nê. Mon ka hte ãm mê ujarênh pix o mê ahkre? Anê.

11 Hãmri nhûm mê inhmã:

—Tôe. Nã kot paj mê amã harê. Tirtûm kãm mê ate aprî hã mar prãm jakamã kot paj ixprî hã mê amã harê. Mê kot amnhî tomnuj kaga nhûm Tirtûm kot ja hã mê omunh nê mê ho hkra. Ja na pa harê. No mÿjjaja mê akînhã kãm ja mar prãm kêt jakamã na htem ixujarênhja ma nê ãm kuma nê htÿx ri pa.

12 —No kêt mê kajaja na ka mê ixkôt ri apa ho apa. Nê xatã ixkapêr mar o apa jakamã na ka mê aprî hã ixkapêr ma. Tã mê ate ixkôt amnhî nhîpêx o apa jakamã na pa tanhmã mê akrã hto ka mê aprî hã mar mex o mō. No mê kot ixkapêr mar nê ãm mar xwÿnhja na mê akînhã inhmar tÿx kêt nê. Jakamã nhûm Tirtûm tanhmã mê hkrã hto nhûm mê hã no hkêt tokyx anê htÿx ri pa.

13 “Ixte mê kãm aa mê kot mēmoj pumunh kêt kwÿ ho anhÿr rax tã nhûm mê omu nê ãm omu. Nê ixte amnhî nhîpêxja nhûm mê kãm hkînh kêt nê. Nê mê kot ixkapêr mar tã ãm inhma nê kãm hprî hã inhmar prãm kêt nê.”

—Jakamã na pa hte ã mê kãm mēmoj te ho tãm pyrà nê

harê no âm hã haxwỳ nê mẽ kãm ixujarênh anê.

14-15 —Na pre ra Tĩrtũm nhỹ hã kapêr o pa xwỳnh Ijaisja amnepê mễ hkukamã tanhmã mẽ harênh to nê hã kagà. Mễ kot inhmar nê âm inhmar xwỳnhjê jarê nê tanhmã mẽ hkukamã mẽ harênh to nê mẽ harênh o:

Koja mẽ ujarênh mex mar pymaj amnhĩ jamak pro nê amnhĩ no hpro nê hkôt hamaxpêr kêt nê. Jakamã koja mẽ kãm mẽ kot amnhĩ nhĩpêx mex prãm kêt nê harênhja ma nê âm kuma. Nê omu nê âm omu. Mễ kãm hprãm kêt jakamã koja mẽ ã amnhĩ nhĩpêx anê. ã mẽ kot amnhĩ nhĩpêx anhỹr kêt ronhỹx mẽ ra Tĩrtũm kapêr ma nê hkôt amnhĩ xunhwỳ. Hãmri nhũm amnhĩ tâ mẽ omu nê mẽ nê mẽ kot amnhĩ tomnuj rênh pa. Hãmri nhũm mẽ hkôt amnhĩ nhĩpêx mex nê kapêr mar mex o pa. Tã no nhũm mẽ ã amnhĩ nhĩpêx anhỹr kêt nê. Anê.

—ã Ijaisja mẽ hkukamã mẽ harê nê mẽ hã kagà anê.

16 —No kêt mẽ kajaja na ka htem ano ho ixte tanhmã amnhĩ nhĩpêx to ho ixpa hã ixpumunh o ixkôt apa. Nê mẽ ajamak o ixkapêr mar o ri ixkôt apa.

17 Amnepê mễ akukamã pahijaja nê Tĩrtũm nhỹ hã mẽ kãm kapêr o ri mẽ pa

xwỳnhjaja na prem kãm ixpumunh prãm tỳx o pa. Nê mẽ kãm ixkapêr mar prãm tỳx o pa. No âm mẽ akĩnhã ixpumunh nê ixkapêr mar kêt rãhã htyk pa. Kormã ixwrỳk nê jar ixkator kêt jakamã na prem arĩ htĩr nê pa ri ixpumunh kêt rãhã ra htyk pa. Âm mẽ kapxipixjaja na ka mẽ mỳr pê ixte amnhĩ nhĩpêx ã ixpumunh nê ixkapêr mar o ixkôt apa. Tã mẽ kurom mẽ ate ano ho ixpumunh nê ajamak o ixkapêr mar o ixkôt apa jakamã kwa mẽ ja hã amnhĩ pumu nê tãm amnhĩ nhĩpêx o ri apa pê akĩnh nê ri apa. Anê.

Nhũm pre ã Jejus mẽ ixpê hkôt ixpa ho ixpa xwỳnhjê mã kapêr anê.

Jejus kot hprĩ hã mẽmo hy jarênh

Makre 4.13-20; Rukre 8.11-15

18 Hãmri nhũm Jejus mẽ ixpê hkôt ixpa ho ixpa xwỳnhjê mã hprĩ hã mẽ ujarênh ta jarê nê mẽ inhmã:

—E kot paj ixprĩ hã mẽ amã mẽmo hy ho ukapêr xwỳnh ã ixujarênh ta jarê ka mẽ inhma. Nà mẽmo hy ta te kêp Tĩrtũm kapêr pyrãk. Nê ahpỹnhã mẽmo hy rôrôk ã pikata te kêp mẽ apê panhĩ ahpỹnhã mẽ ate Tĩrtũm kapêr mar nê ahpỹnhã hkôt tanhmã amnhĩ nhĩpêx tota pyrãk.

19 Jakamã mẽ kot mar xwỳnh kwỳjaja te mẽ kot aptỳx kãm hy rôrôk nhũm kuwênh kot hwỳr mrar nê hkrêr par xwỳnh ta pyrãk. Jao

Tirtûm kapêr ma no nhûm Satanasti te kuwênh kot hy krêr parta pyrâ nê mê kot mar nê amnhî kaxyw hkôt hamaxpêr nê hkôt amnhî xunhwÿr pymaj hāmri ra tanhmā kapêrja nê mê hkrā hto. Jakamā nhûm mê kuma nom ho hamakêtkati tokyx anê nê axte kām hamaxpêr kêt nê pa.

20 —Nê mê kot mar xwÿnh kwÿjaja te mê kot kênre kamā hy hkwÿ rôrôk nê higrôt nê grà par tokyx anhÿr xwÿnhhta pyrâk. Jao Tirtûm kapêr ma nê hkînh nê. Nê kām mar prām nê.

21 Tā nhûm mēhō Tirtûm nê tanhmā mê kām kapêr to nhûm mê kuma nê Tirtûm kaga. Te mēmo hy higrôt nom ra grà par tokyx anhÿrta pyrâk.

22 —Nê mê kot mar xwÿnh kwÿjaja te mrônhi kamā hy hkwÿ rôrôk nê higrôt nhûm mrônhi kot kêp àmnar xwÿnhhta pyrâk. Jao mê kām Tirtûm kapêr mar prām tā määnēn kām mê hikukrêx rûnh nê mê hikàxpore rûnh prām. Hāmri nê âm ja pix kukamā hamaxpêr o pa. Nê ja gryk ā axte Tirtûm kapêr mā hamaxpêr nê hkôt amnhî nhîpêx kêt nê.

23 —Nê mê kot mar xwÿnh kwÿjaja te hirā kamā pika mex kām hy hkwÿ rôrôk nê higrôt nê ô rûnhhta pyrâk. Jao ixkapêr ma nê amnhî krā him hagjênh tÿx nê. Nê ixkôt ri amnhî nhîpêx mex rāhā ho pa. Jakamā te mēmo hy ô rûnh nê ô mex pyrâk o amnhî

nhîpêx. E ā ixujarênhja kot anhÿr. Anê.

Harôj kaàkre jarênh

Matêwre 13.36-43; Makre 4.26-29

24 Nhûm Jejus axte mê kot mar o hkrî xwÿnhjê mā awjarê nom hprî hā mê kām ujarênh kêt nê. Axte mê kām mēmoj tā kuxi nê awjarê nê mê kām:

—Nà nhÿrmā Tirtûm mê kot kormā htîr ri tanhmā amnhî nhîpêx to ho pa hā mê omunh xà hkôt ahpÿnhā tanhmā mê harênh toja te mê ujarênh ja pyrâk. Kojā mēhō harôj y mex o ukapêr kaxyw ma hpur mā mō. Hāmri nê hkre hpa nê ma akupÿm mō.

25 Tā nhûm kamàt nhûm ra gôr nê nô. Hāmri nhûm kām hkurê xwÿnhja ma kêp ihpur wÿr tē nê harôj mexta nhîpy axtem nê kêp harôj kaàkre hkre. Harôj kaàkreja te kot harôj mex pyrâk nom mê kot hkur kêt. Tā nhûm kêp harôj y mex nhîpy hkre hpa hāmri nê ma akupÿm tē.

26 —Tā nhûm hamē higrôt nê anhîpê ô.

27 Nhûm kām mê àpênh xwÿnhjaja tee ri harôj mex kaêx ā harôj kaàkreta pumu nê hpur nhō dôn wÿr tē nê kām harē nê kām: “Kwa ate harôj mex pix kre htā pêr hkaêx ā harôj kaàkre määnēn kato. Kwa tanhmā na pre amnhî to nê hkaêx ā kato?” Anê.

28 Hāmri nhûm tee ri mê kuma nê mê kām: “Nà mēhō kām ixkurê xwÿnh na pre ā inhîpêx anê.” Anê hāmri nhûm kām mê àpênh xwÿnhhta

kãm: “Kwa xà kot paj mẽ tokyx ma hwÿr mra nê nê harênh pa nê kurê nà?” Anê.

²⁹ Nhũm mẽ kãm: “Nà kot kaj mẽ anê nê harôj mexta mẽ ho apimràatã ixpê harênh pa.

³⁰ Kwār māmri harôj mex mẽ hpimràatã ô hpa mãn. Ka mẽ rĩ ma hwÿr mra nê harôj kaàkre kumrêx jarênh pa nê axpên tã harê ho ê nê ma o mra nê hpôk. Hãmri nê rĩ kormã hpãnhã harôj mex jakà nê ho akuprô nê ô ho mra nê ixkre kamã haxwÿ.” Anê. Æ mẽ ujarênh kot anhÿr.

Anhÿr o mẽ kãm kapêr.

Jejus te kot mẽmo hy hkryre pyrãk ã harênh

Makre 4.30-32; Rukre 13.18-19

³¹⁻³² Hãmri nhũm Jejus arĩ mẽ kãm amnhĩ tã kuxi nê ujarênh o nhÿ. Nê tanhmã mẽ kãm amnhĩ tã ujarênh to nê mẽ kãm:

—Nà Tirtũm kot mẽ awÿr ixte mẽ ato amnhĩptar kaxyw inhmênã ã ijarênhja. Te ixte mẽmo hy pixire nhũm mẽ kot hkre nhũm higrôt pyrãk. Koja gaa nê hprêk. Hãmri nê hpa angrã nhũm kuwênhre hwÿr mra nê hôptĩ kamã amnhĩm haê nhĩpêx nê kamã hikwÿ. Tã kot paj nhÿrmã mẽmo hy jarênhhta pyrã nê ixpyxi htã pika piitã hkôt mẽ ho amnhĩptã nê mẽ omunh mex rãhã ho ixpa. Anê.

Jejus te kot pãwti kaxkrit xà pyrãk ã harênh

Rukre 13.20-21

³³ Nhũm Jejus arĩ mẽ kãm amnhĩ tã kuxi nê ujarênh o nhÿ nê mẽ kãm:

—E kot pa hpãnhã mẽ amã tanhmã pãwti kaxkrit xà jarênh to ka mẽ inhma. Na hte mênijaja pãwti nhĩpêx kaxyw hãmri nê kaxkrit xà hkwy ho grire nê kupy nê trik xôm mẽ ho ahkã. Hãmri nê ho pãwti nhĩpêx. Kaxkrit xàja grire htã pãwti piitã ho kaxkrit mex nê. Tã ja pyrã nê ixpyxi htã koja mẽ nhÿrmã pika piitã hkôt ixkôt amnhĩ nhĩpêx mex o pa.

Anhÿr o mẽ kãm amnhĩ jarê.

Jejus kot mẽ ujarênh pix kãm mẽ ahkre hã harênh

Makre 4.33-34

³⁴ Na pre ã Jejusja mẽ ujarênh o mẽ ahkre ho pa anê. Æm mẽ ujarênh pix o mẽ ahkre ho pa. Te tãm ujarênh pyrãk no Æm mẽmoj tã haxwÿ rÿ amnhĩ tã haxwÿ nê mẽ kãm tanhmã amnhĩ jarênh to.

³⁵ ã kot mẽ ahkre ho pa anhÿr kukamã na pre ra amnepêm Tirtũm nhÿ hã kapêr o mẽ pa xwÿnhjê hõja harê nê hã kagà. Te Jejus tãm tanhmã amnhĩ jarênh to pyrãk o hkukamã harê nê hã kagà nê hã hkagà ho:

Kot paj mẽ kãm ixujarênh pix kãm mẽ ahkre ho ri ixpa. Mẽmoj te ho tãm pyrã nê harê nom mẽmoj tã haxwÿ nê tanhmã mẽ kãm ixujarênh to. Nê aa mẽ kot mẽmoj mar kêt xwÿnh kwÿ kot paj mẽ

kãm harê kê mẽ kuma.
Anê.

*Jejus kot hprĩ hã harôj
kaàkre jarênh*

Matêwre 13.24-30, 13.47-50

³⁶ Tã nhũm Jejus mẽ kãm ujarênh pa nê mẽ kure nê ma tẽn ixkrem axà. Hãmri pa mẽ ixpê hkôt ixpa ho ixpa xwỳnhjaja ma hkôt mra nê ixkrem agjê. Hãmri nê harôj kaàkre hã ujarênhta ã hkukja nê kãm:

—Kwa aprĩ hã mẽ inhmã harôj kaàkre jarênhta jarê nà. Na pa mẽ kormã ixprĩ hã mar mex kêt nê. Anê.

³⁷ Hãmri nhũm mẽ inhmã:

—Tõe pa ixprĩ hã mẽ amã harê. ãm paa.

Ixpê Tĩrtũm kot mẽ awỳr inhmẽn xwỳnh te ixte mẽmo hy mex o ukapêr xwỳnhhta pyræk.

³⁸ Nê purta te kêp pika piitã pyræk.

Nê harôj mexta te ra mẽ ate ixkôt amnhĩ xunhwỳr nê ixkôt amnhĩ nhĩpêx o apa xwỳnhjê pyræk.

Nê harôj kaàkreta te mẽ kot Satanasti hkôt amnhĩ nhĩpêx o mẽ pa xwỳnhjê pyræk.

³⁹ Nê kot harôj kaàkre hkre xwỳnhhta te Satanasti pyræk.

Nê harôj jakàr xà hã arĩgrota te Tĩrtũm kot ahpỳnhã tanhmã mẽ harênh to xà hã arĩgrota pyræk.

Nê mẽ kot harôj jakàr xwỳnhjaja te Tĩrtũm kapêr o wrỳk xwỳnhjê pyræk.

⁴⁰ Mẽ ujarênhja kamã na prem harôj kaàkre kumrêx jarê nê hã hpòk jarê. Ja pyrà nê koja nhỹrmã Tĩrtũm kot ahpỳnhã tanhmã mẽ harênh to xà hã arĩgrota ã hãmri ã mẽ kot amnhĩ tomnuj o mẽ pa xwỳnhjê nhĩpêx anê.

⁴¹ —Kot paj nhỹrmã kãm mẽ piitã mẽ ho amnhĩptàr kaxyw hãmri nê kapêr o mẽ wrỳk xwỳnhjê mã anê nhũm mẽ ma mran wrỳ nê mẽ kot amnhĩ tomnuj xwỳnhjê pix o akuprõ. Nê mẽ kot nhãm mẽ hkwyjê kot mẽ uræk nê tanhmã amnhĩ tomnuj to ho pa kaxyw mẽ kãm anhỹr xwỳnhjaja nhũm mẽ mãânên mẽ ho akuprõ.

⁴² Hãmri nê mẽ ho pikuprõnh pa nê te mẽ kot harôj kaàkreta nhĩpêx pyrà nê kuwy kamã mẽ rênh pa. Hãmri nhũm mẽ kamã amnhĩ xà htỳx kamã hamak rãhã nê pa ho pa. Nê amnhĩ xà htỳx ã maj tee ri mỳr rãhã ho pa. Nê tee ri amnhĩ xà hã maj amnhĩ nham o axpẽn kamnhar tỳx kaprỳ.

⁴³ —No ixkôt mẽ kot amnhĩ nhĩpêx xwỳnhjaja koja mẽ mẽ kurom mex kumrêx nê pa. Kot paj mẽ ho mex rax nê nhũm mẽ mex rãhã nê pa ho pa. Tĩrtũm kot kormã pika nyw nhĩpêx mã xwỳnhhta kamã nhũm mẽ mex kumrêx nê pa ho pa. E kêr ka mẽ ixujarênhja ma nê kãm aja-maxpêr tỳx rãhã ho apa. Anê.

*Mẽ hikukrêx mex o
hpimxur jarênh
Piripos 3.7*

44 Nhũm Jejus arĩ mẽ ixpiitã mẽ inhmã tanhmã ujarênh to. Nom hprĩ hã ujarênh kêt nê. Kê axte mẽmoj tã kuxi nê mẽ inhmã tanhmã ujarênh to nê mẽ inhmã:

—Mẽ ate ixkôt amnhĩ xunhwÿr xwÿnhjaja te mẽ apê mẽ hikukrêx mex ã pika japrôr xwÿnhnta pyræk. Kojã mẽhõ mẽ hikukrêx mex jamÿ nê o tẽ nê nhÿri amnhĩm ho amũxu. Kaxyw kakwÿ nê kamã hagjê nê hity hpa nê ma akupÿm tẽ. Hãmri nhũm jãã nhũm mẽhõ tẽn kãm kato. Hã pikata kakwÿ nê kãm kato nê omu nê hkĩnh nê. Nê hamaxpêr o: “E pa ma tẽ nê inhôrkwÿ kamã ixkukrêx piitã ho wẽnê hpa nê hpãnhã kàxpore jamÿ nê ho amnhĩm mẽ hikukrêx mex ã pika japrô nê amnhĩm mẽmoj mexta o ixarĩk pa.” Anhÿr o hamaxpêr nê akupÿm hity hpa nê ma akupÿm tẽ. Hãmri nê mẽmoj mexta gryk ã õ mẽmoj piitã ho wẽnê hpa. Hikukrêx nê ôrkwÿ nhũm piitã ho wẽnê hpa. Hãmri nê hpãnhã kàxpore jamÿ nê ma o tẽ nê amnhĩm pikata japrô. Hãmri nê ma akupÿm hwÿr tẽ nê kamã mẽ hikukrêx mexta kwÿrÿnh pa nê ho õ kumrêx.

—Tã te mẽ ate mẽhõ kot ã amnhĩ nhĩpêx anhÿr xwÿnhnta pyræk. Na ka mẽ uræk nê inhgryk ã amnhĩ tomnuj kaga hpa nê hpãnhã ixkôt amnhĩ nhĩpêx. Te mẽhõ kot mẽmo mẽ hikukrêx mex gryk ã hikukrêx tũm piitã kaga hpar nê mẽ hikukrêx mex o hpimxur xà hã pikata japrôr

pyræk. Anê.

Mêhõ kot kên jaxênh japrôr jarênh

45 Nhũm Jejus arĩ mẽ inhmã awjarê nê mẽ inhmã:

—Nê ja. Na htem kãm hkĩnh nê hamakêtkati nê ri hpa hprãm xaj Tirtũm kôt amnhĩ xunhwÿ nê hkôt ri amnhĩ nhĩpêx rãhã ho pa. Te mẽhõ my kãm kên jaxênh mex prãm nê ma ri hapêr o pa xwÿnhnta pyræk.

46 Nê ra nhÿri omu nê ma tẽ nê prês ã mẽ hkukja. Nhũm mẽ kãm hã ho ohtô nê harê nhũm ma akupÿm tẽ nê kãm ho õ hprãm xaj hikukrêx piitã ho wẽnê hpa. Hãmri nê kàxpore jamÿ nê o tẽ nê amnhĩm ho haprô. Kên jaxênh mexta pix gryk ã hikukrêx piitã ho wẽnê hpa nê hpãnhã ho amnhĩm haprô.

—Tã ja pyrã nê na ka htem amex nê ajamakêtkati nê axamnhĩx ri apa hprãm xaj ixkôt amnhĩ xunhwÿ nê ixkôt pix mã amnhĩ nhĩpêx o apa. Anê.

Kryhti jarênh

Matêwre 13.24-30, 13.36-43

47-48 Nhũm Jejus arĩ mẽ inhmã awjarê nê mẽ inhmã:

—E Tirtũm kot nhÿrmã tanhmã mẽ harênh to xà hã arĩgro kot paj ixprĩ hã tanhmã mẽ amã harênh to. Te ho mẽmyjaja kot himô kamã kryhti rênh pyræk. Kojã mẽ gôx kãm kumê nê akupÿm ho api nhũm kamã tep ohtô nê. Nhũm omu nê kÿx pê amgrã kamã hkapĩ nê ahpÿnhã ri tanhmã kamã kute kawrà.

Nê kamã mex kawrà nê kawà kamã kugjê nê mẽ kot hkur kêtja nhũm nhãm kurê.

⁴⁹ Ja pyrà nê Tirtũm kot ahpÿnhã ri tanhmã mẽ kot amnhĩ nhĩpêx to hã mẽ omunh xà hkôt tanhmã mẽ hipêx to kaxyw arĩgrota ã ã mẽ hipêx anê. Koja kapêr o mẽ wrÿk xwÿnhjaja mẽ kot hkôt amnhĩ xunhwÿr xwÿnhjê nê mẽ kot amnhĩ tomnuj o mẽ pa xwÿnhjê kawrà hpa.

⁵⁰ Nê te mẽ kot tep mex nê tep punu kawrà nê nhãm rênhta pyrãk o mẽ hipêx nê ma kuwy hwÿr mẽ o mra nê kamã mẽ kurê. Nhũm mẽ tee ri amnhĩ xà htÿx ã maj amÿra nê tee ri amnhĩ nhĩpêx kaprÿ. Anê.

Nhũm pre ã Jesusja axte mẽ ixpê hkôt mẽ ixpa ho mẽ ixpa xwÿnhjê mã ujarênh anê.

⁵¹ Hãmri nê mẽ inhmã:

—E xàn ka mẽ atã aprĩ hã ixujarênhta ma nà?

Anê pa mẽ kãm:

—Tÿ. Nà na pa mẽ atã ixprĩ hã mar mex nê. Anê.

⁵² Hãmri nhũm mẽ inhmã:

—Tôe. Nà ãm hãmri. Na ka xep mẽ ra ixte mẽ ahkre nywta mar mex nê. Nê mẽ akwÿjaja mãânên Tirtũm kapêr tũm mar mex nê. Te mẽ apê mēhō apkur xà rax pyrà nê ma ho mẽ piitã mẽ hipêx o ri mẽ hkôt paja pyrãk. Ja pyrà nê kêr ka mẽ ma mẽ piitã mẽ hkôt Tirtũm mẽ wa ixkapêr o mẽ ahkre ho ri mẽ hkôt apa. Anê.

Najare nhō xwÿnhjaja kot Jejus kaga hã mẽ harênh

Makre 6.1-6; Rukre 4.16-30; Juãw 1.11

⁵³ ã Jejus mẽ inhmã ujarênh par anê.

⁵⁴ Hãmri nê ma akupÿm Najare hwÿr mō nê Tirtũm kapêr o mẽ ahkre xà hã ixkre hwÿr tē nê axà nê mẽ ahkre ho nhÿ. Nhũm mẽ amnhĩ jaêr pē tanhmã kot mẽ ahkre hto hã kuma nê tee ri hkukamã hamaxpêr nê axpên mã:

—Tk. Kwa kêp mẽ panhĩō htã tanhmã kot we amnhĩ to nê ã ahpumunh tÿx kôt mẽ pamã kapêr anê nê ri mẽ kãm aa mẽ kot mẽmoj pumunh kêt kwÿ ho anhÿr o pa?

⁵⁵⁻⁵⁶ Na pre mẽ panoo mã hprêk nhũm mẽ pahte pahprĩ hã hkwÿjê pumunh. Kêp pĩ kuprãr xwÿnh Juje mẽ hprō Marir wa hkraa. Nê kêp Xiakre nê Juje nê Simãw nê Jut mẽ htōō. Nê htōxjaja jar mẽ pakamã pa nhũm mẽ pahte mẽ piitã mẽ omunh mex kēnã kot kêt we mẽ kurom ã ahpumunh tÿx anê. Anê.

⁵⁷ Hãmri nê kamã gryk nê hkaga. Hãmri nhũm tee ri amnhĩ tã mẽ omu nê mẽ kãm:

—Nà Tirtũm nhÿ hã kapêr jarênh o mẽ pa xwÿnhjaja na htem krĩ hkwÿ kamã kãm mẽ mar prãm nê. Nom ò krĩ kamã mẽ kot karàre rũm hprêk kãm omunh xwÿnhjaja na htem kuma nê ãm kuma. Anê.

⁵⁸ Tã mẽ kot amnhĩ kaxyw hkôt hamaxpêr kêt jakamã nhũm tee ri mẽ kãm aa mẽ kot mẽmoj pumunh kêt kwÿ

ho anhÿr rax prãm. No ãm mẽ
kãm mẽmoj to grêre nê ho anê.

14

*Mẽ kot Juãw Paxis pÿr ã mẽ
harênh*

Makre 6.14-29; Rukre 9.7-9

¹ Tã nhũm pika pê Garirej
kamã mẽõ pahihiti Erox Jejus
jarênh ma

² nê tee ri hkukamã
hamaxpêr nê hã õ pôristi mã
kapêr nê mẽ kãm:

—Kwa pêr Juãw Paxis na
nã? Ra ixte hã ixàmnhênh
nhũm mẽ kot hpÿr tã mãn
tanhmã amnhĩ to nê akupÿm
htÿr. Nã pêr tãm kênã. Jakamã
na hte aa mẽ kot mẽmoj
pumunh kêt kwÿ ho anhÿr o
pa. Anê.

³⁻⁵ Na pre ra Erox htõ pê
hprõptàn ho hprõ. Tõ arĩ htÿr
tã nhũm axtem nê kêp utã nê
ho hprõ. Hãmri nhũm Juãw
Paxisja harênh ma nê hã kãm
akir nê kãm:

—Kwa Eroxis kêp atõ hprõ
kênã na ka kêt axtem nê kêp
utã nê ho aprõ. Kwa ja omnuj
tÿx o omnuj tÿx. Anê.

Hãmri nhũm amnhĩ tã
kuma nê kamã gryk nê kot
hpÿr kaxyw. Tã nom nhũm
Ijaew kot axpên mã kêp
Tirtũm nhÿ hã kapêr jarênh
xwÿnh ã harênh jakamã
nhũm mẽ umaj hpÿr kêt nê.
Ãm ho prês nê haxà nhũm
hkrĩ ho hkrĩ.

⁶ Tã nhũm jãã nhũm Erox
kator ã arĩgro kato nhũm mẽ
hã akuprõ nê hã hkÿnh. Hãmri
nhũm hprõ nyw kra niti mẽ
hwÿr axà nê ahte mẽ hipôk ri
mẽ kãm gre. Mẽ kot omunh

nê kamã hkurê kaxyw nhũm
mẽ noo mã hpÿjaàm kêt nê mẽ
kãm grer o xa. Hãmri nhũm
pahi Erox omu nhũm ja kãm
mex nê nhũm hkÿnh nê kamã
nopyma nê.

⁷ Hãmri nê kãm:

—Nã ãm hãmri na ka ã mẽ
inhmã amnhĩ nhÿpêx anê.
Jakamã kwa mãmri mẽmoj
tã ixwÿ. Amã mẽmoj prãm
xà hkôt hã ixwÿ kot paj amã
kugõ. Ãm hãmri na pa amã
anê. E mẽmoj na amã hprãm?
Anê.

⁸ Hãmri nhũm kuma nê
kãm:

—Ma Juãw Paxis krã na pa
inhmã hprãm. Inhmã hkrã
krãhta nê pasiiti kamã axà nê
ixwÿr o tẽ nê inhmã agõ. Anê.

Ra katorxà kot kaxyw kãm
karõ jakamã nhũm ã hã hwÿr
anê.

⁹ Hãmri nhũm Eroxja tee
ri kuma nhũm ja kêp omnuj
nê. Nom ra mẽ pikuprõnh
rax xwÿnhjê nhÿpôk ri mẽ noo
mã kot kãm: “E mãmri amã
mẽmoj prãm xà hkôt hã ixwÿ
pa amã kugõ.” Anhÿr jakamã
kãm kot kêp nê hprãm kêt nê.
Hãmri nê Juãw Paxis wÿr õ
pôristi hkwy rê

¹⁰ nhũm mẽ ma mẽ hãgjênh
xàta wÿr mra nê unê nê mut
krãhta.

¹¹ Hãmri nê hkrã mÿ nê
pasiiti kamã kuxà nê ma
akupÿm nita wÿr o tẽ nê
kãm kugõ nhũm kumÿ nê ma
katorxà hwÿr o tẽ nê kãm
kugõ.

¹² Hãmri nhũm Juãw Paxis
kôt mẽ pa xwÿnhjaja tee ri mẽ
kot hpÿr ã harênh ma nê ma
hwÿr mra nê kumÿ nê ma o

mõn haxà. Hāmri nē ma Jejus wýr mra nē kām harē.

Jejus kot mē ho ohtô nē mē kām mē õ hā harēnh

Makre 6.30-44; Rukre 9.10-17; Juāw 6.1-14

¹³ Hāmri nhūm Jejus Juāw Paxis jarēnh ma nē hkaprī nē. Nē ma himô nhīkjê hwýr kapôt ā mōr kaxyw pàr krem axà nē ma mō. Pa mē hkôt ixpa ho ixpa xwýnhjaja ma hkôt mra. Hāmri nhūm krī hkwy kamā mē pa xwýnhjaja harēnh ma nē ohtô nē ma mē inhīkrep pikap mra. Nē ra amnhī to wa nē mē inhmōr xāja wýr pōj nē mē ixkutēp hkrī.

¹⁴ Jakamā pa mē mō nē mē hwýr pōj nē mē omu. Hāmri nhūm Jejus mē omu nē kām mē hkaprī nē mē kām mē à xwýnhjê ho mex pa.

¹⁵ Tā nhūm ra myt àr kaxyw pa mē hkôt ixpa ho ixpa xwýnhjaja tee ri mē omu nē Jejus wýr mra nē kām:

—Kwa na ra amýkry htýx nē. Amnhī nē mē hano kê mē ma nhýri krī hkwy hwýr mra nē tokyx amnhīm mēmoj japrô nē kuku. Mo jar mē apkur xà hā mēõ? Jar akunī pix kēnā. Anē.

¹⁶ Hāmri nhūm mē inhma nē mē inhmā:

—Nà kot paj mē hanor kêt nē. Mē kajaja kot kaj mē kām õ nhūm mē apku. Anē.

¹⁷⁻²¹ No nhūm mē ohtô rax kumrēx. Mēmyjaja kēp 5.000. Nē kaxyw mē hprô nē mē hkrajaja. Jakamā nhūm Jejus ā mē inhmā kapēr anē pa mē tee ri mē hkukamā ijamaxpēr nē kām:

—Kwa nà mē panhōja raxti hā. Mē panhō pāwti kēp sīk pix. Nē kaxyw tep grāja pijakrutre kēnā kot kêt mē piitā mē hipēx. Nà xà kot paj mē ma mra nē nhýri mē kām mē mēmoj japrô nhūm mē kuku? Anē.

Hāmri nhūm mē inhmā:

—Nà pu mē kām mēmoj japrôr kêt nē. Kot puj mē kām mē panhōta o anhgrà. E mē kām anē kê mē ahpýnhā ri hije nē hkrī hpa. Anē.

Hāmri pa mē kuma nē mē kām anē nhūm mē piitā hkrī hpa. Hāmri nhūm Jejus pāwti mē tejja jamý nē kaxkwa hwýr rīt nē ho Tirtūm wý nē kām:

—Pa Papaj? Nà apê mē inhmā mē inhō ho apa xwýnh jakamā amex o amex. Anē.

Hāmri nē mē kām ho hkry hpa nē hkôt mē ixpa ho mē ixpa xwýnhjê mā kugō pa mē ô ri ho mē hipēx pa. Nhūm mē piitā apkur o hkrī. Mēõja grire htā nhūm Jejus tanhmā mē kām ho rax to nhūm mē ohtô rax kumrēx tā piitā kuku nē ho õhy htu hpa nhūm arī mēõ jakrēx prā. Hāmri pa mē akupým hakrēx o akuprô nē ho kawà ho 12 nē ho nýt pa.

Jejus kot gô krāhkà hā ām nē htēm ā harēnh

Makre 6.45-52; Juāw 6.15-21

²²⁻²³ Tā nhūm Jejus mē ixpē hkôt ixpa ho ixpa xwýnhjê mā anē pa mē akupým pàr mā agjê nē ma xarmā hkukamā mō. Hāmri nhūm mē kot mar o kuhē xwýnhjê jano nhūm mē ma akupým hapēx. Hāmri

nhũm Jejus kot Tirtũm mã amnhĩ jarēnh kaxyw ahte tē nē hixēt ā api nē himōk ā kām amnhĩ jarēnh o nhỹ.

Gaa nhũm ra kamāt nhũm arĩ ahte hixēt nhĩmōk ā nhỹ.

24 Rôm pa mẽ pàr kām mẽ inhmōr xwỳnhjaja kormã himô nhĩpōk ri mō. Pu nhũm kōk xàpēr tỳx mẽ ixkaxpa. Nē gō axpēn tak tỳx nē pa mẽ tee ri rrēm̄ti ho gō rēnh nhĩpēx nē tee ri axpēn pumu.

25 Tã nhũm krāhyre kà nhũm Jejus man mẽ ixkōt gō krāhkà hã xan tē

26 pa mẽ amnhĩ wỳr omu. No nhũm kormã hirã mex kēt jakamã pa mẽ ixprĩ hã omunh mex kēt nē. Hãmri nē tee ri omu nē mẽkarō hã hkamnhĩx nē umaj ixàmra rax nē.

27 Hãmri nhũm mẽ inhmã kapēr nē mẽ inhmã:

—Tk. Kwa mẽ amã ma hkēt nē. Pa na pa mẽ akōt tē. Anē.

28 Hãmri nhũm Simãw Pêtre kuma nē kām:

—Kwa xà ka na ka tē? Tôe apē mẽ inhō Pahihti jakamã kwa amnhĩ wỳr ixwỳ pa apyrà nē gō krāhkà hã xa nē awỳr tē nà? Anē.

29 Hãmri nhũm kām:

—Tôe mamrĩ amnē ixwỳr tē. Anē.

Hãmri nhũm kuma nē pàr rũm kato nē hwỳr tē. Uràk nē gō krāhkà hã hwỳr tē.

30 Hãmri nē kormã htēp o htēm mẽ kōk xàpēta kamã ama nē tee ri amnhĩ kukamã hamaxpēr pē ra àr o mō. Hãmri nē àmra kamã Jejus mã amnhĩ to akir nē kām:

—Kwa tokyx ixto api Pahihti. Anē.

31 Hãmri nhũm hpa hã kupy nē ho àpir kurê kumrēx nē kām:

—Kwa pēr ãm kormã ate amnhĩ kaxyw inhmã aja-maxpēr tỳx kēt. Mon ka we ixkamnàr rom mãmrĩ man ixwỳr atēmre hkēt nē? Anē.

32 Hãmri nhũm wa akupỹn mẽ ixwỳr tē nē wa axà. Hãmri nhũm kōk katāt kōt pinhkrēnh pa nhũm gō tãm nōr kurê kumrēx.

33 Hãmri pa mẽ Jejus kot ā amnhĩ nhĩpēx anhỹrja ā omu hãmri nē kām mex o mex ā harē nē kām:

—Kwa ãm hãmri na hte amnhĩ pē Tirtũm Kra hã amnhĩ jarē. Nà apē Kra kēnã. Anē.

Jenějare kamã Jejus kot akupỹm mẽ ho mex ā harēnh

Makre 6.53-56

34 Tã pa mẽ ra himô hã rē nē Jenějare hwỳr pōj.

35 Hãmri nē ma kapē hã ri ixpa. Hãmri nhũm pika nhō xwỳnh kwỳjaja Jejus pumu nē mẽ piitã mẽ kām harēnh o hprōt nē ahpỹnhã hwỳr nhỹhỹnh mẽ à xwỳnhjē hã karō. Nhũm mẽ man mẽ ixwỳr mẽ o mra

36 nē mẽ ho Jejus wỳ nē kām:

—Pa? Kwa kê mẽ à xwỳnhjaja akupỹm mex kaxyw apē axē kupē nà? Anē.

Hãmri nhũm mẽ kām:

—Tôe. Kwār mẽ mãmrĩ mran hkupē. Anē.

Hãmri nhũm mẽ kuma nē axpēn pãnhã hwỳr mra nē kēp ê pix kupēnh tã ra akupỹm mex nē ma akupỹm mra.

15

*Parijew nhõ xwỳnh mẽ
Tĩrtũm kapěr tũm o mẽ ahkre
xwỳnhjê jarēnh*

Makre 7.1-13

¹ Tã nhũm Parijew nhõ xwỳnh mẽ Tĩrtũm kapěr tũm o mẽ ahkre ho mẽ pa xwỳnhjaja Jerujarē rũm ma Jejus wỳr mra. Na htem mẽ ixkukamã mẽ inhĩgêtjê pyrà nê apkur kaxyw nê amnhĩ nhĩkra kuhõnh ryy nê. Amnhĩ nhĩkra htyk pix kuhõnh nê hkrĩ hkêt nê ãm amnhĩ nhĩkra kuhõnh japjêe nê. Nê õ prat kuhõnh japjêe nê kormã apkur kaxyw hkrĩ. Tĩrtũm kot ja hã mẽ omunh nê mẽ mex ã mẽ harēnh ã amnhĩ kamnhĩx jakamã na pre ã amnhĩ nhĩpêx anhỹr o pa. Jakamã nhũm mẽ ma Jejus wỳr mra.

² Hãmri nê omu nê kãm:

—Pa Jejus? E kwa mẽ inhmã mẽmoj jarē. Amnepēm mẽ panhĩgêtjaja na prem apkur kaxyw nê amnhĩ nhĩkra kuhõnh japjê nê rĩ kormã apku. Tã pa htem arĩ ijaxwỳja ã amnhĩ nhĩpêx anê. No akõt mẽ pa ho mẽ pa xwỳnhjaja na htem mẽ ixpyrà nê ã amnhĩ nhĩpêx anhỹr kêt nê. Kwa mo na htem amnhĩ nhĩkra tyk kuhõnh tokyx anê nê hkrĩ nê apku? Anê.

³ Hãmri nhũm mẽ kuma nê mẽ kãm:

—Tk. Na ka htem ãm mẽ panhĩgêtjê hkõt pix mã amnhĩ nhĩpêx o apa no Tĩrtũm kapěr kõt amnhĩ nhĩpêx kêt nê.

⁴ Tĩrtũm na pre mẽmoj tã mẽ pamã karõ ho:

Kêr ka mẽ anhĩpêêxà nê mẽ akatorxà wa hã api-jaàm nê mẽ ho ajuta rãhã ho ri apa. Kot kaj mẽ ã amnhĩ nhĩpêx anhỹr kêt nê tanhmã mẽ kãm akapěr punuj to ho ri apa. Hã koja mẽ akwỳjaja ja mỳrapê mẽ apa. Anê.

—Na pre ã Tĩrtũmja mẽ pamã karõ anê.

⁵ No mẽ kajaja na ka htem ã akwỳjê mã karõ anhỹr kêt nê. ãm kapěrja kwỳm na ka htem mẽ kãm karõ nê mẽ kãm:

Kot kaj mẽ mẽmo arĩgro hã akàxpore japêr nom kêr ka mẽ ho tanhmã akatorxà rỳ anhĩpêêxà ho ajuta hto kaxyw wa kãm hkwy nhõr kêt nê. ãm ho ate wa ho ajuta hkêt ã wa kãm amnhĩ jarē hãmri nê Tĩrtũm mã amnhĩ jarēnh xà hã ixkre hwỳr o tē nê mẽ ixte tanhmã ixkreta ho mex to kaxyw mẽ inhmã agõ. Kot kaj mẽ ã amnhĩ nhĩpêx anê nhũm Tĩrtũm ja hã mẽ apumu nhũm ja kãm mex nê. Kêr ka mẽ ã amnhĩ nhĩpêx anhỹr o ri apa.

—Anhỹr o na ka htem mẽ kãm karõ ho ri apa.

⁶ Nom Tĩrtũm kapěr tũm kot ã ja jarēnh anhỹr kêt. ãm amnhĩ krã hkõt na ka htem ã mẽ kãm karõ punuj o ri apa anê. Te mẽ akapêrja mex o kot Tĩrtũm kapěr jakrenh pyrãk.

⁷ Mẽ ate Tĩrtũm kõt amnhĩ nhĩpêx ã amnhĩ jarēnh tã

ãm amnhĩ to axêx nê hkôt amnhĩ nhĩpêx kêt nê. Na pre Tĩrtũm amnepêm mē akukamã tanhmã mē ajarênh to. Nhũm ỹ hã mē kãm kapêr jarênh xwýnh Ijaisja ô ri mē kãm mē ajarê nê hã kagà. Te Tĩrtũm tãm kot mē ajarênh pyræk.

⁸ Na pre mē akukamã mē ajarênh o:

Mē kãm ixkĩnh ã mē kot amnhĩ jarênh tã mē kãm ixkĩnh kêt. Na htem kãm ixprãm ã amnhĩ jarênh kaprý.

⁹ Mē kot ixkuhpa hã amnhĩ krã hkôt mēmoj tã hkwyjê mã karô ho pa jakamã na htem kot ixkôt amnhĩ nhĩpêx o pa hã amnhĩ jarênh kaprý. Anê.

—Na pre ã Ijaisja Tĩrtũm nhỹ hã mē akukamã mē ajarê nê mē atã kagà anê. Anê.

Nhũm pre ã Jejus Parijew nhõ xwýnhjê mē Tĩrtũm kapêr tũm o mē ahkre xwýnhjê mã kapêr anê.

Mēmoj kot mē pahtomnu hã harênh

Makre 7.14-23

¹⁰ Tã nhũm Jejus amnhĩ wýr mē kot mar o kuhê xwýnhjê hwý nê axte mē kãm kapêr nê mē kãm:

—E mē inhma nê inhmar týt nê.

¹¹ Na hte Tĩrtũm kapêr tũm o mē ahkre xwýnhjaja amnhĩ krã hkôt mē ate amnhĩ nhĩhkra kuhõnh japjê hã mē amã karô ho pa. Nê amnhĩ krã hkôt mē axàpkur xà hã tanhmã mē amã karô hto ho pa. Tĩrtũm kot ja hã mē

apumunh kôt mē amex ã mē ajarênh kaxyw ã mēmoj tã mē amã karô anê. Nom na hte Tĩrtũm tanhmã mē kot amnhĩ nhĩhkra kuhõnh to hã mē omunh xà hkôt tanhmã mē harênh to hkêt nê. Rý mē axàpkur xà pumunh kôt mē mex ã mē ajarênh kêt nê. Ja tanhmã kãm kute hkêt. Na hte ã mē kot amnhĩ nhĩpêx anhýr ã mē omunh xà hkôt mē mex ã mē harênh rý mē mex kêt ã mē harênh kêt nê. Na hte mēmoj kur ã mē omu nê ãm mē omu nê hã tanhmã mē harênh to hkêt nê. Æm mē kapêr punuj rý mē kapêr mex ã mē mar kôt pix mã na hte tanhmã mē harênh to. Anê.

¹² Nhũm pre ã Jejus mē kãm kapêr anê pa mē hkôt mē ixpa ho mē ixpa xwýnhjaja kuma hãmri nê hwýr mra nê kãm:

—Kwa na ka ã mē kãm akapêr anê nhũm Parijew nhõ xwýnhjaja tee ri ama nhũm ja mē kêp omnuj nê. Anê.

¹³⁻¹⁴ Hãmri nhũm mē inhma nê tanhmã mē inhma Parijew nhõ xwýnhjê jarênh to nê hprĩ hã mē hkukamã mē harênh o:

—Tk. Kwãr mãmrĩ mē kêp omnuj. Mē kot Tĩrtũm kapêr tũm o mē ahkre ho pa htã na htem hkôt amnhĩ nhĩpêx kêt. Jakamã te mē nohkre xwýnh kot amnhĩ nhĩpêx pyræk. Koja mēhõ nohkre htã amnhĩ kôt nhỹhým nohkre hõ ho mō hãmri nê wa hamê pry pumunh kêt nê htýt mō hãmri nê nhýri ahkrehti kamã tēm. Tã Parijew nhõ xwýnhjaja te kot wam htēm xwýnhhta pyræk nhũm mē

kot mẽ mar xwỳnhjaja te kot wam htēm xwỳnh kôt hõ htēmta pyràk. Jakamã Parijew nhõ xwỳnhjaja mẽ kot mẽ mar o pa xwỳnhjê mẽ koja mẽ hpimràatã nhỹrmã te ahkrehti kamã rôròk par pyràk o amnhĩ nhĩpêx nê mex kêt nê pa ho pa. Koja kaxkwa kamã inhõ Papaj nhỹrmã amnhĩ nê mẽ hanor pa.

—Inhõ Papaj te kêp mẽmo hy hkre ho pa xwỳnhhta pyràk. Na htem mẽmo hy hkre nhũm higrõt hapôj nê higrõt mex nê. Hãmri nhũm mẽ hwỳr mra nê omu nê nê mẽmoj nhĩgrõt punuj jarê nê kurê. Ja pyrã nê koja nhỹrmã inhõ Papaj amnhĩ nê Parijew nhõ xwỳnhjê janor pa nhũm mẽ mex kêt nê pa ho pa. Jakamã kwa kêr ka mẽ hkôt ri amnhĩ nhĩpêx kêt nê. Anê.

Nhũm pre ã Jejus mẽ ixte hkôt ixpa ho ixpa xwỳnhjê mã hprĩ hã Parijew nhõ xwỳnhjê hkukamã ã mẽ harênh anê pa mẽ mar o ixkrĩ.

¹⁵ Hãmri nhũm Simãw Pêtre tee ri Tirtũm kot mẽ apkur xà hã mẽ omunh xà hkôt tanhmã mẽ harênh to hkêt ã harênh ma. Nê ãm tanhmã mẽ kapêr to pix ã mẽ mar kôt tanhmã mẽ harênh toja ma hãmri nê hã Jejus kukja nê kãm:

—Kwa mon ka ri ã ja jarênh anê Pahihti? Anê.

¹⁶ Hãmri nhũm kuma nê hprĩ hã mẽ inhmã awjarê nê mẽ inhmã:

—Kwa xàn ka mẽ kormã aprĩ hã ja mar kêt nê?

¹⁷ E pa ixprĩ hã mẽ amã harê ka mẽ inhma. Nà na htem mẽmoj ku nhũm hte mẽ

hkrã hi hwỳr gjêx kêt nê. Na hte mẽ õhy pix wỳr agjê nê gaa nê nhãm hapôj nê hapêx. Na htem mẽ apkur xàja ku nê y hã tanhmã amnhĩ tomnu hto hkêt nê. Jakamã na hte Tirtũm ja hã mẽ omunh xà hkôt tanhmã mẽ harênh to hkêt nê.

¹⁸ ãm mẽ hkrã kamã mẽ hamaxpêr punuj pix nhỹ hã mẽ kot tanhmã amnhĩ tomnuj to jakamã na hte Tirtũm mẽ hamaxpêr ã mẽ omunh xà hkôt tanhmã mẽ harênh to.

¹⁹ Koja mẽhõ tanhmã hamaxpêr punuj to nê ra hkôt amnhĩ tomnuj pix o pa. Na htem nhãm mẽ hpar o pa nê mẽ kêp ahkĩ nê amnhĩ to hêx nê mẽ hakwa kamã nhãm axpên mã mẽ hixi jarênh o pa. Nê nhãm mẽ kêp mẽ hprõ ho amnhĩkati nê mẽ hkuprỳ hwỳr mra nê mẽ ho amnhĩkati. Nê tanhmã ri axpên tomnuj to ho pa.

²⁰ Mẽ hamaxpêr punuj nhỹ hã na htem ã amnhĩ nhĩpêx anhỹr o pa. No na hte Tirtũm mẽ kot amnhĩ nhĩhkra kuhõnh japjê hkêt ã mẽ omunh xà hkôt mẽ kot amnhĩ to mex xwỳnh ã mẽ harênh kêt nê. Ja tanhmã kãm kute hkêt. Anê.

Jejus kot Ijaew kêt xwỳnh ni kamã ukapri hã harênh

Makre 7.24-30

²¹ Tã nhũm Jejus mẽ inhmã kapêr pa hãmri nê mẽ inhmã anê pa mẽ ma hkôt mō. Ma Xir mẽ Sitōja wa pu hã ri ixpa.

²² Nhũm mẽhõ nija omu nê hwỳr tē. Mẽ ixkĩnhã kêp Ijaew kêt tã hwỳr tē. Kanaã nhõ

xwÿnh na pre. Tã Jejus wÿr tẽ nẽ kãm:

—Ka Pahihti Jejus? Apê Tirtũm kot mẽ ixwÿr amẽn xwÿnh jakamã xê ixujarẽn ma nẽ ixkamã axukaprĩ hkêt wehe. Na mẽkarõmnutija tanhmã ixpê ixkra ho nhũm ixpê omnuj tÿx kumrẽx. Anẽ.

²³ Hãmri nhũm Jejus kuma nẽ ãm kuma nẽ kãm tanhmã nẽ hkêt nẽ. Jakamã pa mẽ ixpê hkõt ixpa ho ixpa xwÿnhjaja kãm:

—Kwa hano kê ma akupÿm tẽ ri. Na ãm ri mẽ pahkõt xatã hkrata jarẽn pix o ri pa. Anẽ.

²⁴ Nom nhũm kot amnhĩ tã kamã hamak kaxyw tanhmã mẽ inhmã hã kapêr to nẽ mẽ inhmã:

—Nã ãm Ijaewjê pix wÿr na pre Tirtũm inhmẽ. Te mẽ kêp ôwêhti pikunor pyrãk o na htem htÿx ri amnhĩ nhĩpêx o pa. Jakamã ãm mẽ hwÿr pix mã na pre inhmẽ. Na kormã inhmã tanhmã nhãm mẽ hkwyjê jarẽn to hkêt nẽ. Anẽ.

²⁵ Hãmri nhũm nitita tee ri amnhĩ tã kuma nẽ hwÿr tẽ nẽ kutã hkõnkrã ho htẽm nẽ nhÿ nẽ kãm:

—Xê ma we ixkamã axukaprĩ hkêt wehe. Anẽ.

²⁶ Hãmri nhũm kãm:

—Nã kormã. Na pre Tirtũm mẽ kêp Ijaewjê pix wÿr inhmẽ. Jakamã na pa kormã nhãm tanhmã mẽ akwyjê ho mex to hkêt nẽ. Anẽ.

²⁷ Hãmri nhũm kãm:

—Ma ãm hãmri na ka akapêr. Nom ixpê Ijaew kêt tã mẽ kuxwar ãm ixto mex grire kêt wehe. Anẽ.

²⁸ Hãmri nhũm kuma nẽ kãm:

—Nã ãm hãmri na ka ã akra kaxyw inhmã ajamaxpêr tÿx anẽ. Jakamã kot paj nẽ mẽkarõmnutita jano. Kojaxte tanhmã apê ho hkêt kumrẽx.

Anhÿr o kãm kapêrja rôm nhũm hkraja akupÿm mex kurê kumrẽx.

*Jejus kot mẽ à xwÿnhjê ho ohtô nẽ mẽ ho mex ã harẽn
Makre 7.31-37*

²⁹ Tã nhũm Jejus mẽ inhmã anẽ pa mẽ ixrohã krĩa pẽ ixkato nẽ ma himô rax pẽ Garirej wÿr mō. Nẽ nhÿri gō mÿri hixêt wÿr mō nẽ hã api nẽ ixkrĩ.

³⁰ Hãmri nhũm mẽ ohtô nẽ ma mẽ ixkõt mra. Nẽ mẽ à xwÿnhjaja nhũm mẽ hamÿ nẽ Jejus wÿr mẽ o mra. Na prem ohtô rax kumrẽx. Ra ri mẽ pa hkêt xwÿnhjaja nẽ mẽ nohkre xwÿnhjaja nẽ mẽ hyk o mẽ pa xwÿnhjaja. Nẽ mẽ kapêr kêt xwÿnhjaja nẽ ahpÿnhã ri tanhmã mẽ à kute xwÿnhjaja nhũm mẽ hamÿ nẽ ma Jejus wÿr mẽ o mra nẽ kutã mẽ haxwÿ. Hãmri nhũm mẽ omu nẽ ahpÿnhã akupÿm mẽ ho mex pa.

³¹ Jakamã na pre mẽ kapêr kêt xwÿnhjaja akupÿm kapêr mex nẽ. Nẽ ri mẽ pa hkêt xwÿnhjaja akupÿm mrrar mex nẽ. Nẽ mẽ hyk o mẽ pa xwÿnhjaja akupÿm tãm ri mra. Nẽ mẽ nohkre xwÿnhjaja akupÿm rĩt mex nẽ. ã ahpÿnhã akupÿm mex par anẽ. Hãmri nhũm mẽ kot hwÿr mẽ hamÿnh nẽ Jejus wÿr mẽ o mrrar xwÿnhjaja

amnhĩ jaêr pê akupÿm mẽ mex ã mẽ omu nê mẽ kamã no puma nê hkĩnh nê. Hãmri nê Tĩrtũm mã mex o mex ã harê nê axpên mã harênh o:

—Nà ãm hãmri mẽ panhõ Tĩrtũmja ãm mex o mex. Anê.

*Jejus kot mẽ ho 4.000 nê mẽ kãm mẽ õ hã harênh
Makre 8.1-10*

³² Tã nhũm Jejus mẽ ixte hkôt ixpa ho ixpa xwÿnhjaja amnhĩ wÿr mẽ ixwÿ nê mẽ ixkôt mẽ mrrar xwÿnhjê jahkre nê mẽ inhmã:

—E. Ka mẽ rĩ kam jajê pumu. Na pa ra inhmã mẽ hkaprĩ nê. Na mẽ pahkôt ri pa hã apkati axkrunêpxi nhũm ra mẽ kêp mẽõja hapêx pa. Kojã mẽ apkur kêt rãhã ma akupÿm mẽ õ krĩ hwÿr pa hãmri nê pry hã hirot nê rôrôk o pa. Mẽ õ krĩ hwÿr awryy. Anê.

³³ Nhũm pre ã mẽ inhmã mẽ harênh anê pa mẽ tee ri kuma hãmri nê kãm:

—Kwa nom nhÿri kot pu mẽ kãm mẽmoj japrô nhũm mẽ tokyx kuku? Ja kapôt pix kênã. Nê mẽ ohtô griiã. Anê.

³⁴ Hãmri nhũm mẽ inhmã:

—No mẽ panhõ pãwtita? Tanhmã na arĩ kute nê hikwÿ? Anê.

Hãmri pa mẽ kãm:

—Nà ãm kêp 7 pix. Nê kaxyw tep kwÿ no ãm grêre. Kot mẽ ho dare kaxyw ã. Anê.

³⁵ Hãmri nhũm mẽ inhma nê mẽ ixkôt mẽ mrrar xwÿnhjê mã anê nhũm mẽ hkrĩ pa.

³⁶ Hãmri nhũm pãwti mẽ tep grêreta jamÿ nê ho Tĩrtũm wÿ nê kãm:

—Pa Papaj. Nà apê mẽ inhmã mẽ inhõ ho apa xwÿnh jakamã amex o amex. ãm amex kumrêx. Anê.

Hãmri nê mẽ kãm mẽmojta o hkry hpa nê mẽ inhmã kugõ pa mẽ ô ri ho xa nê ho mẽ hipêx pa.

³⁷⁻³⁸ Hãmri nhũm mẽ piitã apku nê õhy htu hpa. Nhũm prem mẽmyjaja kêp 4.000 nê kaxyw mênijaja nê mẽhprĩjaja. Mẽ ohtô rax kumrêx tã nhũm Jejus mẽõ ho mẽ hipêx pa. Hãmri pa mẽ hakrêx o akuprõ nê ho kawà ho 7 nê ho nyt.

³⁹ Hãmri nhũm Jejus ma akupÿm mẽ õ krĩ hwÿr mẽ hano pa mẽ pàr krem agjê hãmri nê ma ijaxwÿja mõ. Ma pika pê Makatã hwÿr mõ.

16

Parijew nhõ xwÿnh kwÿ kot aa mẽ kot mẽmoj pumunh kêt õ ho anhÿr ã Jejus wÿr ã mẽ harênh

¹ Tã pa mẽ ra hwÿr pøj nhũm Parijew mẽ Satusew nhõ xwÿnhjaja Jejus pumu nê hwÿr mra. Nê hêx rom kot kamã hamak kaxyw hwÿr mra nê kãm:

—Pa Jejus? E kwa mẽ inhmã aa mẽ ixte mẽmoj pumunh kêt õ ho anê nà? Pa mẽ ate ho anhÿr ã apumu nê Tĩrtũm kot mẽ ixwÿr amênh ã akôt ijamaxpêr kurê kumrêx. E kwa tokyx. Anê.

²⁻³ Hãmri nhũm mẽ kuma nê mẽ kãm:

—Tk. Nà kot paj mẽ amã ho anhÿr kêt nê. Mẽ ate hã ixpumunh nê ixkôt ajamaxpêre kaxyw ã. Na ka htem

kaxkwa kamã kakrã pumu nê axpên mã na wryk ã harê. Nê kaxkwa mex pumu nê axpên mã amgrã hã harê. Tã ixte tanhmã mẽ amã mẽmoj nhîpêx to hã ixpumu nom Tirtûm kot mẽ awÿr inhmênh xwÿnh ã ixkôt ajamexpêr kêt nê.

⁴ ãm mẽ ajamexpêr punuj pix o na ka htem ri ajamexpêr o apa. Ixpê Tirtûm kot mẽ awÿr inhmênh xwÿnh tã ka mẽ ja hã ixkôt ajamexpêr kêt nê. Tã mẽ ate aa mẽmoj pumunh kêt kwÿ ixte mẽ amã ho anhÿr kaxyw ka mẽ inhmã hã karõ. Nà kot paj mẽ amã ho anhÿr kêt nê. Kormã. Kot paj ãm nhÿrmã te amnepêm Jõhti kot amnhî nhîpêx pyrãk o amnhî nhîpêx. E ja pix kot paj mẽ amã harê. Nom kot paj mẽ amã aa mẽ ate mẽmoj pumunh kêt õ ho anhÿr kêt nê. Anê.

Nhùm pre ã Jejus mẽ kãm kapêr anê hãmri pa mẽ ixrohã mẽ kêp ixkato nê ma ixpa.

Jejus kot hkôt mẽ pa xwÿnhjê jahkre hã harênh

Makre 8.14-21

⁵ Tã pa mẽ Jejus mẽ ixrohã ma mõ nê pãr mã agjê nê ma xarmã akupÿm rê nê hikjê hã mõ. Hãmri nê tee ri mẽ ixãpkur xà japêr nê axpên mã:

—Kwa na pu mẽ panhõ pãwti ho pajamakêtkati nê kure. Anê.

⁶ Hãmri nhùm Jejus mẽ inhma nê tanhmã mẽ inhmã Parijew mẽ Satusew nhõ xwÿnhjê jarênh to. Nom pãwti hã kuxi nê mẽ inhmã mẽ harê nê mẽ inhmã:

—Kwa mẽ o kora. Kêr ka mẽ Parijew mẽ Satusew nhõ xwÿnhjê mẽ kêp pãw kaxkrit xà hkwy hpyr kêt nê. Anê.

⁷ Hãmri pa mẽ tee ri kuma nê ixprî hã mar mex kêt nê. Nê arî kapêrta ã axpên kujjêr o hkôt mõ nê axpên mã:

—Kwa mẽ pahte mẽ panhõ pãwti rer jakamã mãn mẽ pahte mẽ õ pãw kaxkrit xà kwÿ hpyr nê mẽ pahkurê nã? Anê.

⁸ Hãmri nhùm mẽ inhma nê mẽ inhmã:

—Hêxta waa nê. Mon ka mẽ ãm axpên mã mẽ panhõ pãwti hkêt pix jarênh o mõ? Pêr kormã mẽ ate amnhî kaxyw inhmã ajamexpêr tÿx kêt.

⁹ Jãã ixte mẽ anoo mã pãwti kêp 5 pix tã nhùm ixte ho mẽ kêp 5.000tajê nhîpêx par. Nhùm mẽ kot hkur nê ho õhy htu hpar nhùm mẽ ate mẽõ jakrêx o apikuprõnh par nê ho kawà ho 12 nê ho hipu.

¹⁰ Nê ham pãwti kêp 7 o mẽ kêp 4.000 nhîpêx par nhùm mẽ kot hkur nê ho õhy htu hpar nhùm mẽ ate mẽõ jakrêx o apikuprõnh raxja.

¹¹ Ra ixte mẽ anoo mã ja ho anhÿr o axkrut tã ka mẽ ra hã ano hkêt nê arî axpên mã mẽ paxãpkur xà pix jarênh o ixkôt mõ. Nà mẽ paxãpkur xàja na pa harênh kêt nê. Parijew mẽ Satusew nhõ xwÿnhjê nhõ pãwti kaxkrit xà pix na pa hã kuxi nê mẽ amã tanhmã harênh to. Anê.

¹² Nhùm pre ã mẽ inhmã kapêr anê hãmri pa mẽ atã kuma nê kãm:

—Nà na pa xep mẽ hãmri tã ama. Xep mẽ ixte Parijew mẽ

Satusew nhõ xwÿnhjê kapêr kôt amnhĩ nhĩpêx nê na ka mẽ ixkurê nê ã mẽ harênh anê. Anê.

Jejus kot amnhĩ tâ hkôt mẽ pa xwÿnhjê kujêr ã harênh

Makre 8.27-30; Rukre 9.18-21

¹³ Tã pa mẽ axte Jejus kôt mõi nê pika pê Sejarej Piripos kamã kormã mõi nhũm Jejus amnhĩ tâ mẽ ixkukja nê mẽ inhmã:

—E mẽ inhmã mẽmoj jarê. Tanhmã na hte mẽ akwÿjaja axpên mã ijarênh to wehe? Anê.

¹⁴ Hãmri pa mẽ kãm:

—Nà na htem ahpÿnhã tanhmã ajarênh to. Na hte kamã mẽ hkwyjaja ajarênh o finat Juãw Paxis ã ajarê. Nhũm kamã mẽ hkwyjaja ato finat Eris ã ajarê nhũm mẽ hkwyjaja tõiã apê Tirtũm nhĩ hã akapêr o apa xwÿnhjê hõ akupÿm atĩr ã ajarê. Nê tõiã finat Jeremĩstija rÿ axtem hõ hã ajarê. ã na htem ahpÿnhã axpên mã ajarênh anê. Anê.

¹⁵ Hãmri nhũm mẽ inhma nê mẽ inhmã:

—No mẽ kajaja? Ixpê mẽhõ hã na ka htem axpên mã ijarê? Anê.

¹⁶ Hãmri nhũm Simãw Pêtre kãm:

—Nà apê Tirtũm kot mẽ ixkaxyw axãm nê mẽ ixwÿr amênh xwÿnh na ka. Nê apê mẽ ixpiitã mẽ inhõ Pahi Maati na ka. ã na pa htem axpên mã ajarênh anê. Anê.

¹⁷ Hãmri nhũm kuma nê kãm:

—Nà ãm hãmri na ka ã ijarênh anê Simãw Pêtre.

Nom amnhĩ krã hkôt na ka ã ijarênh anhÿr kêt nê. Tirtũm tãm kot amã ixto amnhĩrit xã hkôt na ka ã ijarênh anê.

¹⁸ Nà akumrêx na ka ã ijarênh anê. Tã koja mẽ apyrã nê nhÿrmã mẽ kot ixkôt amnhĩ xunhwÿr xwÿnhjaja ma hkwyjê mã ja hã ijarênh o ri krĩ piitã hkôt pa. Hãmri nhũm mẽ hkwyjaja mẽ kuma nê mẽ apyrã nê ixkôt amnhĩ xunhwÿ. Hãmri nhũm mẽ kêp ixprãm nõkati xwÿnhjaja tee ri tanhmã mẽ kot ijarênh toja ma nê ã ijarênh anhÿrja nê mẽ kãm kapêr tâ nom ho hkapyrÿ. ã koja ixkôt mẽ kot amnhĩ xunhwÿr xwÿnhjaja mẽ kãm ijarênh o pa anê. Jao te mẽ apê kên nhũm ixte mẽ ato amnhĩm inhõrkwy nhĩpêx pyràk. Tã akumrêx ate ã ijarênh kot anhÿr jakamã kot paj te ixte akumrêx amÿnh nê ato ixtêm nê inhõrkwy nhĩpêx kaxyw amnhĩm akumrêx axãm pyràk o anhĩpêx Simãw Pêtre.

¹⁹ —E kêr ka ma inhÿ hã tanhmã mẽ piitã mẽ kãm ijarênh to ho ri apa. Mẽ kot hprĩ hã amar kaxyw. Kojã mẽ hkwyjaja ama nê amnhĩ kaxyw ixkôt hamaxpêr nê ixkôt amnhĩ xunhwÿ. Ka ja hã mẽ omu nê mẽ kãm: “E ra mẽ ate Jejus kôt amnhĩ xunhwÿr jakamã kot ka mẽ nhÿrmã ty nê ma kaxkwa hwÿr api nê Tirtũm mẽ wa kuri amex kumrêx nê atĩr tũm nê apa ho apa.” Anhÿr o mẽ kãm ijarênh o apa. No mẽ kot akapêr mar nê ãm mar nê ixkôt amnhĩ xunhwÿr kêt

xwÿnhjaja ka mẽ kãm: “No mẽ kajaja mẽ ate Jejus kôt amnhĩ xunhwÿr kêt jakamã kot kaj mẽ nhÿrmã Tĩrtũm mẽ Krata wa kuri atĩr tũm mẽ apa ho apa hkêt nẽ.” Anhÿr o ã inhÿ hã mẽ kãm akapẽr anhÿr o ri mẽ hkôt apa. Jao te ate kaxkwa hwÿr saf pyr nẽ Tĩrtũm krajê mã kahê xà rẽnh nẽ Tĩrtũm kra hkêt xwÿnhjê pê kahê pyrãk o amnhĩ nhĩpêx o apa. Anẽ.

Nhũm pre ã Jejus Simãw Pêtre mã kapẽr anẽ.

²⁰ Hãmri nẽ hpãnhã mẽ ixpiitã mẽ inhmã kapẽr nẽ mẽ inhmã:

—E. Kwa kêr ka mẽ kormã mẽ piitã mẽ kãm Tĩrtũm kot mẽ awÿr inhmẽnh ã mẽ kãm ijarẽnh o ri apa hkêt nẽ. Kormã. Anẽ.

Jejus kot amnhĩ kukamã amnhĩ jarẽnh ã harẽnh

Makre 8.31-33; Rukre 9.22

²¹ Hãmri nhũm Jejus hprĩ hã amnhĩ kukamã tanhmã mẽ inhmã amnhĩ jarẽnh to nẽ mẽ inhmã:

—Nà mẽ kajaja mẽ ate aprĩ hã ixpumunh mex. No mẽ pahkwÿjaja kãm hprĩ hã ijarẽnh mar nẽ ixpumunh prãm kêt. Ijaew krãhtũmjaja nẽ Tĩrtũm kapẽr tũm o mẽ ahkre xwÿnhjaja nẽ patre krãhtũmjaja. Mẽ kãm hprĩ hã ixpumunh nẽ kãm ixkapẽr mar prãm kêt jakamã kot paj tokyx ma Jerujarẽ hwÿr mỗ nhũm mẽ kamã xpynê nẽ ixtak rax nẽ ixpĩ. Nom kot paj ixtyk ã apkati axkrunêpxi nhũm Tĩrtũm akupÿm ixto ixtĩr. Anẽ.

²² Hãmri nhũm Simãw Pêtre tee ri kot ã mẽ kãm amnhĩ jarẽnh anhÿrja ã kuma nẽ hwÿr tẽ nẽ hpa hã kupy nẽ mẽ ixpê ho kato nẽ mẽ ixkãx ã o xa. Nẽ ã kot amnhĩ jarẽnh anhÿrja nẽ kãm kapẽr nẽ kãm:

—Kwa nà Pahihti. Ri ã amnhĩ jarẽnh anhÿr kêt nẽ. Mo kot kêt mẽ ri axtem nẽ ã anhĩpêx anẽ? Anẽ.

²³ Hãmri nhũm kuma nẽ hwÿr apkjê nẽ omu nẽ kãm:

—Tk. Te apê Satanasti kapẽr pyrãk o na ka ã inhmã akapẽr anẽ. Kot kaj ã akapẽr anẽ hãmri nẽ ixkôt apa hkêt nẽ. Tĩrtũm kãm hprãm xà hkôt na ã mẽ kot inhĩpêx anhÿr kaxyw kênã. Tã ka Tĩrtũm jamaxpẽr o ajamaxpẽr kêt nẽ amnhĩ jamaxpẽr o ã inhmã akapẽr anẽ. Te apê ixpê axãmnr xwÿnh pyrãk o amnhĩ nhĩpêx. Anẽ.

Jejus krajaja kot tanhmã amnhĩ nhĩpêx to hã mẽ harẽnh

Makre 8.34-9.1; Rukre 9.23-27; Juãw 12.24-26; mããnẽn Rõmãn 15.1; Wam Korĩt 10.23-24; Karatas 5.24; Piripos 2.4; Wam Pêtre 4.1; Apokarip 2.10, 12.11

²⁴ Nhũm pre ã Jejus Simãw Pêtre mã kapẽr anẽ hãmri nẽ hpãnhã mẽ ixpê hkôt ixpa ho ixpa xwÿnh piitã mẽ inhmã kapẽr nẽ mẽ inhmã:

—E kot kaj mẽ ixkôt amnhĩ xunhwÿr ã amnhĩ jarẽ hãmri nẽ mããnẽn amnhĩ jarẽnh o: “Jejus kêp inhõ Pahihti jakamã kot paj kapẽr kôt pix mã amnhĩ nhĩpêx rãhã ho ri ixpa. Kwãr ixkwÿjaja tanhmã

hã inhîpêx hto.” Anhÿr o amnhî jarê.

25 —Koja mē ixtã mē atõx pî rÿ tanhmã mē atõ hto ka ty. Tã nom koja akaxwÿnh ma ixwÿr àpir kurê kumrêx. Hãmri ka ixkuri atîr tûm nê amex rãhã nê apa ho apa. Nom kot kaj mē jar atîr prãm xàj ixkaga hãmri nê inhõ krî hwÿr axàpir kêt nê.

26 —Nê koja mēhõ hikukrêx rax gryk ã Tîrtûm kaga. Tã nhÿrmã ty hãmri nê amnhî kôt hikukrêx õ hpyr nê o mör kêt nê. Koja tee ri kuwy hwÿr mör pymaj amnhî nê hikukrêx rax o amnhî pãnhã amnhîrer prãm kaprÿ. Tanhmã koja amnhî to nê Tîrtûm mã amnhîre nê ma õ krî hwÿr api? Koja ã amnhî nhîpêx anhÿr kêt nê.

27 —Nê ixpê Tîrtûm kot mē awÿr inhmênh xwÿnh kot paj nhÿrmã kaxkwa rûm akupÿn mē awÿr wrÿ nhûm Tîrtûm kapêr o mē wrÿk xwÿnhjaja man ixkôt wrÿ. Hãmri pa inhõ Papaj nhÿ hã ixte mē piitã tanhmã mē kot amnhî nhîpêx to hã mē omunh xà hkôt ahpÿnhã tanhmã mē harênh to.

28 ãm hãmri na pa ã mē amã amnhî jarênh anê. Kot paj nhÿrmã akupÿn ixte mē ato amnhîptâr kaxyw man mē awÿr wrÿ. Tã kot kaj mē akwÿjaja akupÿn ixwrÿÿta kukamã tokyx ixte tanhmã ixte amnhî nhîpêx to hã ixpumu. Anê.

17

Jejus kot hixêt prêk nhîmõk

ã hirã kamã ãm ã harênh

Makre 9.2-13; Rukre 9.28-36; mãânên Sikûn Pêtre 1.16-18

1 Tã nhûm semãnja hapêx nhûm Jejus ma nhÿri hixêt prêk wÿr mō. Nê kaxyw Simãw Pêtre nê Xiakre nê Xiakre htõ Juãwja nhûm ma amnhî kôt wa mē o mō. Nhûm wa mē mō nê hixêt prêk ã api nê himõk ã kuhê.

2 Hãmri nhûm Jejus xep ra axtem nê xa. Axtem hkuk nhîrã htÿx nê xa. Te myyti nhîrã htÿx pyrãk. Nê é haka htÿx kumrêx.

3 Hãmri nhûm xep ja wa kaxkwa rûm hwÿr wrÿ nê kuri kãm kapêr o xa. Mojes mē Erisja wa nhûm hwÿr wrÿ nê kuri xa. Tîrtûm anepêm amnhî wÿr wa ho àpir tã wa akupÿn wrÿ nê Jejus mã kapêr o xa.

4 Hãmri nhûm Jejus kôt mē mör xwÿnhjaja wa mē omu nhûm Simãw Pêtre tanhmã hamaxpêr to nê Jejus wÿr tē nê kãm:

—Kwa Pahihti. Nã ãm hãmri na pu mē amnê mō. Kwa pu mē kritpêm jar axkamê nê tokyx panojarêt kêt nê. Pa mē amã pô nhîrõnh o axkrunêpxi nê hipêx. Amã hõ nhîpêx nê Mojes mã hõ nhîpêx nê Eris mã hõ nhîpêx ka mē kamã akrî. E kwa pa mē amã ho anê nã?

Anhÿr o kãm kapêr. Nom amnhî krã hkôt ã kapêr anê.

5 Hãmri nê kormã ã kãm kapêr anhÿr rôm nhûm ra kakrã jaka htÿxja wrÿ nê wa mē hkunor pa nhûm wa mē kamã kuhê. Nhûm kakrã

kamã Tirtũm mẽ kãm kapêr nê mẽ kãm:

—E ota Ixkra xa. Inhmã hapê ho inhmã hapê. E kêr ka mẽ kapêr mar tỳx rãhã ho ri apa. Anê.

⁶ Hãmri nhũm mẽ tee ri kuma nê kãm ma htỳx nê umaj pikap rôrôk nê htu myrpe hikwỳ.

⁷ Hãmri nhũm Jejus mẽ hwỳr tẽ nê mẽ hã ìhkra jaxwỳ nê mẽ kãm:

—E mẽ kãnhmã akuhê nê amã ma hkêt nê. Anê.

⁸ Hãmri nhũm mẽ kuma nê kãnhmã rít nê Jejus pix pumu nhũm ahte xa nhũm kuri wa ãm xwỳnhta wa ra ma akupỳm api.

⁹ Hãmri nhũm mẽ kormã akupỳm hixêt nhĩmòk rũm mẽ ixwỳr wrỳk o mỗ nhũm Jejus mẽ kãm:

—E kêr ka mẽ ham ate mẽmoj pumunh xwỳnhta kormã nhãm mẽ kãm harênh kêt nê. Kot paj nhỹrmã ty nê akupỳm ixtĩr ka mẽ rĩ kormã mẽ kãm ja hã ijarênh o ri apa. Anê.

¹⁰ Hãmri nhũm mẽ kormã akupỳn mẽ ixwỳr wrỳk o mỗ nhũm mẽ Jejus mã:

—Kwa mẽ inhmã mẽmoj jarê. Na htem Tirtũm kapêr tũm o mẽ ijahkre xwỳnhjaja mẽ inhmã: “Eris kumrêx koja Tirtũm mẽ pahwỳr kumẽ nhũm Krisja kormã hapu hã wrỳ.” Anê. Na htem ã mẽ inhmã war ajarênh anê. Tã ka ra wrỳ nom kormã akukamã Erisja wrỳk kêt. Anê.

¹¹ Hãmri nhũm mẽ kãm:

—Nã ãm hãmri na prem ã wa ijarênh anê. Na pre ra ixkukamã te Eris kot amnhĩ

nhĩpêx pyræk xwỳnhta tẽ nê ixkutêp mẽ kãm ijarênh o pa.

¹² Tã nom nhũm mẽ ja hã omunh kêt nê. Na prem axtem nê kãm hprãm xà hkôt tanhmã hipêx to nê kupĩ. Tã koja mẽ nhỹrmã ã hipêx anhỹr pyræk o inhĩpêx. Anê.

¹³ Hãmri nhũm mẽ ra hprĩ hã kuma nê axpên mã:

—Kwa Juãw Paxis pimràata na ã mẽ pamã harênh anê. Tapxipix na pre te Eris kot amnhĩ nhĩpêx pyræk o amnhĩ nhĩpêx o pa. Tã tãm na mẽ pamã harê. Anê.

Jejus kot mễhỗ hkra nê mẽkarõmnuti kator ã harênh

Makre 9.14-29; Rukre 9.37-43

¹⁴ Tã nhũm mẽ ra akupỳm ahpar mã man mẽ ixwỳr hpôx o mỗ nhũm mẽ ohtô rax nê Jejus kutêp kuhê. Hãmri nhũm mẽhỗ myja mẽ omu nê mẽ kutã tẽ nê mẽ hkaxpa nê Jejus kutã hkõn krã ho tẽm nê nhỹ nê hkra ho kuwỳ nê kãm:

¹⁵ —Pa Jejus. Kwa inhmã ixkra kamã axukaprĩ nê. Na hte mẽkarõmnutija xatã tanhmã ixpê ho nhũm hte y hã mra nê rôrôk nê tỡhã kuwy kamã rôrôk nê tỡhã gôx kãm mran mrõ nê ixpê homnuj tỳx nê.

¹⁶ Tã pa akôt mẽ pa ho mẽ pa xwỳnhjê hwỳr o tẽ nom nhũm mẽ kot inhmã ho mex kaxyw tee ri tanhmã ho hkaprỳ. Kwa xà kot kaj akupỳm inhmã ho mex nà? Anê.

¹⁷ Hãmri nhũm kuma nê mẽ ixte hkôt ixpa ho ixpa

xwÿnhjê mã kapêr nê mẽ inhmã:

—Hêxta waa nê. Ra mẽ ate ixte Tirtûm nhÿ hã mẽ ho mex ã ixpumunh o ixkôt apa ryy htã kormã ixpyrà nê ã mẽ hipêx anhÿr kêt nê. Nà kormã mẽ kaxyw Tirtûm kôt mẽ ajamaxpêr tÿx kêt jakamã na ka mẽ tee mẽ ho mex kaxyw. Anê.

Hãmri nê myta mã kãm:

—E amnê ixwÿr akrata o tẽ pa omu. Anê.

¹⁸ Hãmri nhÿm kuma nê hwÿr o tẽ nhÿm omu nê nê mẽkarômnutija kator nhÿm akupÿm mex kurê kumrêx.

¹⁹ Hãmri pa mẽ ixte Jejus kôt ixpa ho ixpa xwÿnhjaja ja hã omu mẽ hkàx ã amnhÿ tã hkukja nê kãm:

—Kwa na pa mẽ axwakre kamã tee ri nê hanor prãm kaprÿ. Kwa mon pa mẽ apyrà nê nê hanor nhÿm kator nê ma htêm kêt nê? Anê.

²⁰⁻²¹ Hãmri nhÿm mẽ inhmã:

—Nà kormã mẽ ate mẽ kaxyw Tirtûm kôt ajamaxpêr tÿx kêt. Nom kot ka mẽ kaxyw hkôt ajamaxpêr tÿx hãmri nê hkôt amnhÿ nhÿpêx kukwak ri mẽmoj tã awÿ nhÿm mẽ ama nê mẽ ate mẽmoj tã axàhwÿr xà hkôt mẽ amã tanhmã mẽmoj nhÿpêx to. Te mẽ ate pÿ hpàr mÿj mã akapêr nê kãm: “Kwa amnhÿ jarê nê ma tẽ nê gô xujanâr kãm mãn mrô.” Anhÿr nhÿm kot amar nê amar xà hkôt ã amnhÿ nhÿpêx anhÿr kurê kumrêx pyræk. Ja pyrà nê kot kaj mẽ amnhÿ kaxyw Tirtûm kôt ajamaxpêr tÿx kukwak ri mẽmoj tã awÿ

nhÿm mẽ ama nê mẽ amã mẽmoj tanhmã ho rÿ mẽ amã mẽmoj gô. Anê.

Jejus kot htyk kukamã amnhÿ jarênh ã harênh

Makre 9.30-32; Rukre 9.43-45

²²⁻²³ Tã hãmri pa mẽ Jejus kôt ma mō nê nhÿri pika pê Garirej kamã kormã ixpa. Hãmri nhÿm Jejus axte amnhÿ kukamã mẽ inhmã tanhmã htyk ã amnhÿ jarênh to nê mẽ inhmã:

—Nà koja mẽ tokyx mẽ kãm ixtã amÿnê nhÿm mẽ ixpÿ. Mẽ kot ixpÿr tã kot paj ixtyk ã apkati axkrunêpxi nhÿm Tirtûm akupÿm ixto ixtÿr. Anê.

Hãmri pa mẽ tee ri ã kot amnhÿ jarênh anhÿrja ã kuma nê ixkaprÿ htÿx kumrêx.

Jejus kot Tirtûm nhôrkwÿ hwÿr àr

Rômân 13.5-7; Wam Korÿt 10.32-11.1

²⁴ Tã pa mẽ Jejus kôt ma mō nê ra Kapanau hwÿr pôj. Hãmri nhÿm mẽ kot Tirtûm mã amnhÿ jarênh xà hã ixkre ho mex kaxyw mẽ kêp kàxpore hkwy jamÿnh xwÿnhjaja mẽ ixpumu nê mẽ ixwÿr mra nê Simaw Pêtre mã kãm:

—Pa. Kwa xà na hte mẽ ajahkre xwÿnhja mẽ pahpê hkwyjê pyrà nê Tirtûm mã amnhÿ jarênh xà hã ixkre ho mex kaxyw kàxpore hkwy nhôr kêt nê nà? Anê.

²⁵ Hãmri nhÿm mẽ kuma nê mẽ kãm:

—Tÿ kot mẽ kãm ôr o pa kênã. Anê.

Hãmri nê ma mẽ ixkôt tẽ nê mẽ ixkôt mēhō nhôrkwÿ

hwÿr axà. Hāmri nē kot Jejus mā mẽ harēnh mā tã nhũm ra hamaxpēr ã omu nē kumrēx kām kapēr nē kām:

—Kwa inhmã mẽmoj jarē Simāw Pêtre. Xà na hte pahi hkrajaja õ papaj mã kàxpore hkwÿ nhõr o pa na? Xà na hte ãm hkra hkēt xwÿnh pixjaja kām hkwÿ nhõr o pa? Anē.

²⁶ Hāmri nhũm kuma nē kām:

—Nà mẽ kēp hkra hkēt xwÿnh pixjaja na hte kām õr o pa. Anē.

Hāmri nhũm Jejus kām:

—Tÿ. Nà ãm hāmri na ka ja jarē. Na hte pahi hkrajaja õ papaj mã kàxpore nhõr kēt nē. Mē kēp hkra kēnã. Tã ixpê Tirtũm Kra jakamã mo kaxyw kot pa kēt õrkwÿ hwÿr inhgjēx kaxyw kām kàxpore hkwÿ gõ?

²⁷ Tã nom kot paj õr kēt nhũm kàxpore hkwÿ jamÿnh xwÿnhjaja tee ri ja hã ixpumu nē axpēn mã ixte amnhĩ tomnuj xwÿnh ã ijarē. Jakamã e ma gõnhmã tē nē tep õ kanhê. Hāmri nē ho apĩ nē apy nē hakwa jakjê nē kamã kàxpore htÿxre pumu. Nē apy nē man o tē nē pahpãnhã kàxpore jamÿnh xwÿnhhta mã agõ. Anē.

Nhũm pre ã Jejus Simāw Pêtre mã karõ anē nhũm kuma nē ma hwÿr tē nē kot kām karõ xà hkõt ã amnhĩ nhĩpēx anē.

18

Mē kot amnhĩ to rũnh xwÿnhjē jarēnh

Makre 9.33-37; Rukre 9.46-48; mãânēn Piripos 2.3-7;

Wam Pêtre 3.4, 5.5-6

¹ Tã mẽ ixte Jejus kõt ixpa ho ixpa xwÿnhjaja amnhĩ kukamã ijamaxpēr nē amnhĩ tã Jejus kukja nē kām:

—Kwa mẽ inhmã mẽmoj jarē Pahihti. Nhÿrmã mẽ ixpê pahi nē anhĩkõ hã mẽ ho amnhĩptàr o ri ixpata ã mẽ ixtõ kot paj we mẽ ho amnhĩptàr rax o ixkwÿjē jakre? Anē.

² Hāmri nhũm mẽ inhma nē amnhĩ wÿr mẽhprĩre hõ mã hpa ho apē nhũm hwÿr tē nē mẽ ixkuri xa.

³ Hāmri nhũm Jejus omu nē hã mẽ inhmã:

—E mẽ inhma. Kêr ka mẽ apē pahi pyræk o tanhmã amnhĩ jarēnh to ho ri apa hkēt nē. ãm te amarĩ ri mẽ apa pyræk o amnhĩ nhĩpēx. Te mẽhprĩre kot amnhĩ nhĩpēx pyræk. Kot kaj mẽ ã amnhĩ nhĩpēx anhÿr o apa hkēt hāmri nē nhÿrmã inhĩkõ hã mẽ ho amnhĩptàr kēt nē.

⁴ Jakamã kot kaj mẽ amã nhÿrmã inhĩkõ hã mẽ ho amnhĩptàr o apa hprãm. Hã kot kaj mẽ te mẽhprĩre kot amnhĩ nhĩpēx pyræk nē amã amnhĩ to rũnh prãm kēt nē apa.

⁵ —Nē kêr ka mẽ apē pahi kot amnhĩ nhĩpēx pyræk o tanhmã amnhĩ jarēnh to ho apa hkēt nē. ãm te amarĩ ri mẽ apa pyræk o amnhĩ nhĩpēx. Jao nhÿri mẽhprĩjē hõ pumu nē kamã axukapri nē kām mẽmoj tanhmã ho rÿ kām mẽmoj gõ. Hāmri nē te pa ate tanhmã ixto mex to pyræk o amnhĩ nhĩpēx. Kot kaj mẽ

ã amnhĩ nhĩpêx anhÿr o apa hãmri nhũm Tĩrtũm ja hã mẽ apumu nẽ mẽ ate amnhĩ to rũnh kêt tã mẽ ate amnhĩ to rũnh xwÿnh ã mẽ ajarẽ. E kot kaj mẽ amã amnhĩ to rũnh prãm hã kot kaj mẽ ã amnhĩ nhĩpêx anhÿr o ri apa. Anẽ.

Mẽ kot amnhĩ tomnuj xwÿnhjê hkukamã mẽ harẽnh

⁶ Nhũm Jejus arĩ mẽ inhmã mẽhprĩ jarẽ nẽ mẽ inhmã:

—Nẽ mẽhprĩre na htem amnhĩ kaxyw ixkôt hamaxpêr o pa. Tã koja mẽhõ inhnẽ tanhmã mẽ kãm kapêr to. Mẽ kot tanhmã amnhĩ tomnuj to hprãm xà tanhmã mẽ kãm kapêr to ho pa. Hãmri nhũm mẽ kuma nẽ mẽ kapêr xà hkôt tanhmã amnhĩ tomnuj to. Hã koja Tĩrtũm ja hã omu hãmri nẽ kot inhnẽ tanhmã kãm kapêr to xwÿnhhta pumu nẽ homnuj tÿx nẽ. Te mẽ kot mẽhõ pynênh nẽ mut ã kên pytĩ hõ nhôr nẽ ma o htêm nẽ gô xupÿm kãm mênh pyræk o hipêx. Te ho ja pyræk no ãm homnuj tÿx o hakre.

⁷ —Nẽ koja mẽhõ inhnẽ tanhmã mẽ kot ixkôt amnhĩ xunhwÿr xwÿnhjê hõ mã kapêr to. Kot tanhmã amnhĩ tomnuj to hprãm xà tanhmã kãm kapêr to. Rÿ kot ixkaga hprãm xà tanhmã kãm kapêr to. Hãmri nhũm kuma nẽ mar xà hkôt ixkapêr kwÿm tanhmã amnhĩ tomnuj to. Tã koja Tĩrtũmja ja hã omu nẽ mãânẽn kot inhnẽ kêp àmnàr xwÿnhhta pumu nẽ ã inhnẽ kãm kapêr anhÿrja mÿrapê homnuj tÿx kumrêx.

⁸⁻⁹ —E kwa mẽ okora. Kot kaj mẽ anhĩhkra ho tanhmã amnhĩ tomnuj to rÿ apar o tanhmã amnhĩ tomnuj to. Hã kêt ka mẽ axte ã amnhĩ nhĩpêx anhÿr pymaj te mẽ ate amnhĩ pê kráhyr nẽ mênh pyræk o amnhĩ nhĩpêx nẽ axte ã amnhĩ tomnuj anhÿr kêt nẽ. Rÿ ka mẽ ano ho mẽmoj punuj pumu. Hã kêt ka kãm ajamaxpêr pix o apa pymaj te mẽ ate amnhĩ pê ano katøk nẽ kaxàr nẽ mênh pyræk o amnhĩ nhĩpêx nẽ nhãm arĩt kurê kumrêx. Kêt ka mẽ ã amnhĩ nhĩpêx anhÿr o ri apa. Hãmri nẽ nhÿrmã ty nẽ ma Tĩrtũm nhõ krĩ hwÿr api. No kot ka mẽ arĩ akutã ano nẽ arĩ akutã apar nẽ arĩ akutã anhĩhkra rãhã ri apa htã ho amnhĩ tomnuj o apa. Hãmri nẽ nhÿrmã ty nẽ ate amnhĩ tomnuj mÿrapê ma mẽ kot amnhĩ xà htÿx kamã hamak tũm xà hwÿr ma mō.

¹⁰⁻¹¹ —Nẽ kêt ka mẽ mẽhprĩrejê kamã axukapri rãhã ho apa. Na hte kaxkwa kamã Tĩrtũm kapêr o mẽ wrÿk xwÿnh kwÿjaja Tĩrtũm mã mẽ hamãr mex o pa. Tã koja mẽhõ tanhmã kêp hõ hto nhũm mẽ hã omu nẽ ma tẽ nẽ Tĩrtũm mã harẽnh kurê kumrêx. Anẽ.

ôwêhti pikunor jarẽnh

Rukre 15.3-7

¹² Nhũm Jejus arĩ mẽ inhmã kapêr nẽ mẽ inhmã:

—E pa mẽ amã awjarẽ ka mẽ ixujarẽnh ma. Nà koja mẽhõ my hkrit ôwêhti xohtô nẽ. Nẽ apkati mẽ ma hamãr o pa. Hãmri nhũm pyxire nẽ tanhmã amnhĩ to

nê kêp akunok. Kwỳ kaga nê ma nhỹhỹm ahte tẽ nê kêp akunok. Hãmri nhũm mytita ma akupỹm o mõi kaxyw hkwy ho pikuprõnh pa hãmri nê tee ri hkwy kaẽx ã pikunor xwỹnhta japêr nom nhỹri omunh kêt nê. Hãmri nê tee ri hkukamã hamaxpêr nê ma hkwy ho mõi nê nhỹri kure. Kutêp apkur kaxyw nhỹri kure hãmri nê ma akupỹm pikunor xwỹnhta japêr o tẽ.

13 Hãmri nê hapêr ryy nê nhỹri hwỳr kato nê omu nê hkĩnh nê. Hãmri nê kutu nê ma akupỹm o tẽ. Na hte pikunor kêt xwỹnhjê nhỹ hã hkĩnh tã pikunor xwỹnhta mã kato nê hkĩnh tỳx nê. Krit xohô htã nom ãm kãm ho pixi nê ho hpikunor prãm kêt. ã mẽ ujarênh kot anhỳr.

14 Ja pyrã nê Tĩrtũm kãm mẽhõ pyxi nê nhỹrmã ma kuwy wỳr mõi prãm kêt kumrêx. Mẽ piitã mẽ kot hkõt amnhĩ xunhwỳrja na kãm hprãm. Anê.

Jejus kõt mẽ pahtõjê hõ kot mẽ pahtomnuj jarênh

15 Nhũm Jesus arĩ mẽ inhmã kapêr nê mẽ inhmã:

—Nê ja. Kojã ixkõt mẽ atõ rỳ mẽ atõx tanhmã atomnuj to. Hã kêr ka ma hwỳr tẽ nê kot tanhmã anhĩpêx to hã amnhĩ tã kãm akapêr. Nom kêr ka mẽ nhãm mẽhõ mã harênh kêt nê. ãm tanhmã kot ato xwỹnhta pix wỳr tẽ nê kumẽ war axpên mã akapêr nê war axpên ma. Nhũm ama nê akupỹm tãm anhĩpêx hã kêr ka akupỹm te ixkõt kêp

atõ rỳ atõx pyrãk o ka wa axpên nhĩpêx nê axte jam aja-maxpêr kêt nê.

16 Nom kojã ama nê ãm ama rỳ tanhmã ato hkêt ã amnhĩ jarênh japêr. Hã kêr ka ma akupỹm tẽ nê akupỹm amnhĩ kõt Kris kõt atõ rỳ atõx o axkrut rỳ mẽ ho axkrunêpxi nê amnhĩ kõt hwỳr mẽ o mra kê mẽ axpên tã war ama. Amnepêr Tĩrtũm kapêr ã kaga htũm kot ja jarênh o:

Kêr ka mẽ atõ tanhmã axpên nhĩpêx to. Hãmri nê hã axpên mã akapêr kaxyw nê amnhĩ kõt akwỳjê ho axkrut rỳ ho axkrunêpxi nê akupỹm hwỳr mẽ o mra kê mẽ axpên tã war ama. Anê.

—ã Tĩrtũm kapêr ã kaga htũm kot ja jarênh kot anhỳr.

17 Jakamã kêr ka mẽ amnhĩ kõt akupỹm kot tanhmã ato xwỹnhta wỳr mẽ o mra kê mẽ atã kuma. Hãmri nhũm arĩ mẽ kãm kot tanhmã ato hkêt ã amnhĩ jarê ka tee ri amnhĩ tã omu nê ikrêsti hwỳr tẽ nê Kris kwỳ hã mẽ pikuprõnh xwỹnhjê mã harê. Kê mẽ ama hãmri nê ja hã axte kot tanhmã ato xwỹnhta mã kapêr. Nhũm mẽ mar kêt nê arĩ kot tanhmã ato hkêt ã amnhĩ jarê ka mẽ amnhĩ nê hanor kurê kumrêx. Hãmri nê te kêp Kris kõt mẽ atõ rỳ mẽ atõx kêt pyrãk o hipêx.

18 —Nê kojã mẽhõ ixkõt amnhĩ xãm nê Inhĩpêxã Tĩrtũm kõt ri amnhĩ nhĩpêx o pa. Ka mẽ ja hã omu nê inhỹ hã tanhmã kãm akapêr

to nê kãm: “E ra ate Jejus kôt amnhĩ xãm jakamã kot kaj nhÿrmã Tĩrtũm mẽ wa kuri amex kumrẽx nê atĩr tũm nê apa ho apa.” Anhÿr o kãm akapẽr. Nom mẽ kot ixkôt amnhĩ xunhwÿr kêt xwÿnhjaja ka mẽ ã mẽ kãm akapẽr anhÿr kêt nê. ãm inhÿ hã mẽ kãm: “No mẽ kajaja mẽ ate Jejus kôt amnhĩ xunhwÿr kêt jakamã kot kaj mẽ Tĩrtũm mẽ Krata wa kuri atĩr tũm nê amex nê apa hkêt nê.” Anê. Kêr ka mẽ inhÿ hã ã ahpÿnhã tanhmã mẽ kãm akapẽr to ho apa anê.

19-20 —Nê kot kaj mẽ Tĩrtũm mã amnhĩ jarẽnh kaxyw te axkrutre rÿ axkrunẽpxire htã axpẽn wÿr akuprõ nom mẽ kapxipixjaja apikuprõnh kêt nê. Kot paj mẽ akaẽx ã mẽ anhĩhkõ hã mẽ amar o xa. Mẽ ate ano ho ixpumunh kêt tã pa wa mẽ anhĩhkõ hã mẽ amar o xa. Jakamã kot kaj mẽ axpẽn wÿr akuprõ nê mẽmoj tã Tĩrtũm wÿ nhũm kaxkwa kamã ja hã mẽ ama. Nê mẽ ate hã axàhwÿr xwÿnhhta nhũm mẽ amã tanhmã ho. Kêr ka mẽ ã ixkamnàr rom axãmnhĩx amnhĩ to Inhĩpêẽxà hwÿr anê. Anê.

Nhũm pre ã Jejus mẽ inhmã kapẽr anê.

Mẽ pahte tanhmã axpẽn nhĩpêx to hã mẽ pamã karõ

Matêwre 6.14-15; Rukre 17.3-4; mããnẽn Epes 4.32; Korosẽ 3.13

²¹ Tã nhũm Simãw Pêtre Jejus wÿr tẽ nê mẽmoj tã hkukja nê kãm:

—Kwa inhmã mẽmoj jarẽ Pahihtĩ. Xà koja akôt ixtõ rÿ ixtõx tanhmã inhĩpêx to pa amnhĩ tã omu nê ãm omu nê amnhĩ tã tanhmã ho hkêt nê. Nhũm axte tanhmã ixto nê axte tanhmã ixto ho 6 tã pa ãm amnhĩ tã omu nê amnhĩ tã tanhmã ho hkêt nê. ãm ho ijamakêtkati nê axte kãm ijamaxpẽr kêt nê. ã amnhĩ tã hipêx anhÿr o 7 nhũm ja amã mex nê nà? Anê.

²² Hãmri nhũm kãm:

—Nà kot kaj ã amnhĩ tã hipêx anhÿr o 7 pix kêt nê. Koja mẽhõ xatã tanhmã ato rãhã nê ka amnhĩ tã omu nê ajaxwÿja amnhĩ tã xatã tanhmã ho hkêt nê. ãm amnhĩ tã omu nê ãm omu nê tãm hipêx rãhã ho ri apa. Mãmri ho anhÿr o apa rãhã nê aa jam anhÿrer kêt nê.

²³ —E kot paj ixprĩ hã mẽ amã tanhmã ja jarẽnh to ka mẽ inhma. Tĩrtũm na hte xatã mẽ ate tanhmã amnhĩ tomnuj to hã mẽ apumu nê mẽ anê rênh o pa. Te kot pahi kot ã hkwyjê nhĩpêx anhÿr pyræk. Koja mẽ õ pahija kãm mẽ àpênh xwÿnhjaja kot kêt kàxpore ho ìpresta hã mẽ omunh kaxyw nhÿ.

²⁴ Hãmri nhũm mẽ hwÿr ja ho tẽ nê kutã ãm. Ra kot kêt hikàxpore ho ìpresta rax xwÿnhja.

²⁵ Tã no ãm aa akupÿm kãm õr kêt nê ra kêt ho hapêx pa. Hãmri nhũm pahija tee ri amnhĩ tã omu nê hkwyjê mã hã amÿnê nê mẽ kãm: “E. Mẽ ma o tẽ nê hprõ nê hkrajaja nê òrkwÿ nê hikukrêx mẽrohã ho wênê hpa nê hpãnhã

kàxpore py nê man inhmã o tẽ. Kot ixpê ixkàxpore ho ïpresta nê akupÿm inhmã òr kêt mÿrapê.” Anê.

26 —Hãmri nhũm kot ho ïpresta xwÿnh̄ta tee ri amnhĩ tã kuma nê kutã hkõnkrã ho nhÿ nê amnhĩ to hwÿr kãm hihtÿx nê kãm: “Kwa nà ri ixto anhÿr kêt nê pahiti. Ixkamã axukapri nê hkêt wehe. Nà kot paj akupÿm amã kugõ kãm ga.” Anê.

27 —Hãmri nhũm amnhĩ tã kuma nê kãm hkapri nê. Hãmri nê kãm: “Tõe. Nà kot paj ã anhĩpêx anhÿr kêt nê. Kot paj anhõ kõt kaxõnh pa nê kumê ka mãmri ma ajamakêtkati nê axãmnhix apa.” Anê.

28 Nhũm ã kãm kapêr anê nhũm kuma nê hkĩnh nê. Hãmri nê ma tẽ nê kato nê ixkre kapem pôristi hõ pumu. Na pre ra kêp kàxpore hkwy ho grire nê ho ïpresta nhũm kato nê omu. Hãmri nê hwÿr tẽ nê amnhĩ kĩnhã òkre hã kumÿ nê kãm: “Kwa tokyx akupÿm ate ixpê kàxpore ho ïpresta pãnhã inhmã agõ.” Anê.

29 Hãmri nhũm tee ri amnhĩ tã omu nê ra ham kot pahi kutã amnhĩ nhĩpêxta pyrã nê kutã hkõnkrã ho nhÿ nê kãm: “Kwa nà. Kwa ri ixto anhÿr kêt nê. Nà kot paj hpãnhã amã kugõ. Kwa ixkamã axukapri nê hkêt wehe.”

30 Anhÿr tã nom nhũm kuma nê ãm kuma nê hã amÿnê. Hã hkwyjê mã amÿnê nê mē kãm: “E mē ma jahti ho tẽ nê haxà. Koja kot ixpê kàxpore ho ïpresta pãnhã

inhmã kugõ nê rĩ kormã kato nê rĩ amnhĩ pumu.” Anê. Hãmri nhũm mē kuma nê ma o tẽ nê haxà.

31 —Hãmri nhũm hkwyjaja tee ri mar o kuhê nhũm mē kêp ja omnuj nê nhũm mē pahi hwÿr agjê nê kãm harê.

32 Hãmri nhũm tee ri harênh ma nê kamã gryk tÿx nê akupÿm amnhĩ wÿr hã karõ nhũm akupÿm hwÿr axà nhũm kãm: “Tk. Kwa na ka pre amnhĩ tomnuj tÿx nê. Ate amnhĩ to ixwÿr nhũm inhmã akapri nê ixte anhõ kõt kaxõnh nê mēnh tã

33 ka amnhĩ kĩnhã anhĩõta kamã axukapri hkêt nê ri ã hipêx anê.” Anê.

34 Hãmri nê kamã gryk nê hã ò pôristi mã amÿnê nhũm mē ma o tẽ nê haxà. Mē kot mē hagiênh xà hã ixkre kamã apkati mē tanhmã mē kot hipêx to kaxyw nhũm mē kãm hã amÿnê. Tanhmã mē kot hipêx to rãhã nhũm kot akupÿm kàxpore raxta nhõr par nê rĩ kormã kator kaxyw nhũm mē ma o tẽnh haxà. ã mē ujarênh kot anhÿr. Anê.

35 Nhũm pre ã Jejus mē ixte hkõt ixpa ho ixpa xwÿnhjê mã kapêr anê. Hãmri nê mē inhmã:

—Ja pyrã nê koja ixkõt mē atõ rÿ mē atõx tanhmã mē atomnuj to ka mē amnhĩ tã omu nê ãm omu nê ho ajamakêtkati kurê kumrêx nê axte kãm ajamaxpêr kêt nê. Te pahi kot mēhõ nhõ kõt kaxõnh par nê axte kãm hamaxpêr kêeta pyrãk. No kot kaj mē ã amnhĩ nhĩpêx anhÿr kêt nhũm kaxkwa

kamã inhõ Papaj ja hã mẽ apumu nẽ te ho pahĩ tee ri kot amnhĩ tomnuj xwỳnhĩa kot amnhĩ nhĩpêx ã omunh nẽ hã àmnênh nhũm mẽ kot apkati mẽ tanhmã omnuj tota pyrãk o mẽ anhĩpêx. Anẽ.

19

Jejus kot mẽ pahte axpẽn kaga nẽ mẽ pahkurê

Matêwre 5.31-32; Makre 10.1-12; Rukre 16.18; mãănẽn Wam Korõt 7.10-16

¹ Tã nhũm Jejus mẽ inhmã kapêr pa nẽ mẽ inhmã anẽ pa mẽ ixrohã Garirej rùm ixkato nẽ pyhti pê Jotãw hã rê nẽ hpãnhã ihkjê hã ri ixpa. Pika pê Jutej kamã.

² Hãmri nhũm mẽ ohtô nẽ Jejus pumu nẽ man mẽ ixwỳr mra nhũm mẽ omu nẽ mẽ kãm akupỳm mẽ ã xwỳnhjê ho mex.

³ Hãmri nhũm Parijew nhõ xwỳnh kwỳjaja hwỳr mra. Hêx rom kot kamã hamak nẽ tanhmã ho kapêr punuj to kaxyw hwỳr mra nẽ kãm:

—Pa? Kwa mẽ inhmã mẽmoj jarẽ. Tanhmã na pre amnepêm finat Mojesja mẽ pahte mẽ pahprõ kaga hã mẽ panhĩgêjtjê mã karõ hto? Xà kot mẽ pahprõ pahkwỳm ri tanhmã amnhĩ nhĩpêx to pu mẽ hkaga nhũm ja Tirtũm mã mex nẽ nà? Anẽ.

⁴ Hãmri nhũm mẽ kãm:

—Nà na ka mẽ aprĩ hã Mojes kot tanhmã ja jarênh to mar mex kêt nẽ. Ja kot anhỹr kêt. Amnepêm mẽmoj piitã hkrax kãm na pre Tirtũm my nẽ nija wa hipêx. Axpẽn kaxyw wa hipêx.

⁵ Hãmri nẽ wa hkukamã tanhmã wa kot amnhĩ nhĩpêx to hã wa harẽ nẽ wa harênh o: Koja mẽmyjaja hprõ kaxyw hãmri nẽ gryk ã ka-torxã mẽ hipêêxã wa hkaga nẽ ãm hprõ kôt pix mã pa ho pa. Te wa tipxi nẽ ri wa pa pyrãk o amnhĩ nhĩpêx. Anẽ.

—Na pre ã Mojes Tirtũm nhỹ hã mẽ kãm ja jarênh anẽ.

⁶ Jakamã koja te wa tipxi nẽ ri wa pa pyrãk o axpẽn nhĩpêx o pa. Tirtũm tãm kot axpẽn mã wa õr kênã kot kêt wa axtem nẽ ri htỳx ri hamaxpêr nẽ axpẽn kaga. Anẽ.

⁷ Hãmri nhũm mẽ kuma nẽ kãm:

—Tỳ. Nom finat Mojes na pre mẽ pakukamã mẽ panhĩgêjtjê mã ã ja hã karõ anẽ nẽ mẽ kãm:

Kot kaj mẽ aprõ kaga kaxyw hãmri nẽ ra kêp aprõ hkêt ã hã kagã nhĩpêx nẽ kãm agõ nẽ amnhĩ nẽ hano kê ma tẽ.

—Anhỹr o na pre mẽ kãm hã karõ. Tã ka na ka mẽ ixte axpẽn kaga hkêt ã mẽ inhmã karõ. Anẽ.

⁸ Hãmri nhũm mẽ kuma nẽ mẽ kãm:

—Tỳ no ãm mẽ kãm Tirtũm kapêr kôt amnhĩ nhĩpêx prãm kêt jakamã na pre ã mẽ kãm ja jarênh anẽ. No amnepêm mẽmoj piitã hkrax kãm na prem ã amnhĩ nhĩpêx anhỹr o pa hkêt nẽ.

⁹ Jakamã kër ka mẽ aprõ kaga hkêt nẽ apa. Kot kaj mẽ hkaga nẽ hpãnhã nhãm mẽhõ ho aprõ nhũm Tirtũm noo mã te ate wam aprõ kamã nhãm

aprô nyw o amnhîkati pyrâk. Tîrtûm pê ja omnuj tÿx nê. Rÿ koja mēhō hprō kaga ka hpānhā ho aprō nhūm Tîrtûm noo mā te ate wam mjên pê ho amnhîkati pyrâk. Ja mǎānēn Tîrtûm pê omnuj tÿx nê. Anê.

Nhūm pre ā Parijew nhō xwÿnhjê mā kapēr anê.

¹⁰ Hāmri pa mē ixte hkôt ixpa ho ixpa xwÿnhjaja ā kapēr anhyrja ā kuma nê kām:

—Xà na hte mē mjên ra kām mē hprō hkīnh kêt tā hkaga hkêt nê arī hkôt pa ho pa nhūm hte Tîrtûm mā ja mex nê nà? Jakamā kwa xà kot paj mē nhÿrmā ixprō kaga pymaj ixprō hkêt kumrēx nê ixpa ho ixpa nhūm ja mē inhmā mex nê nà? Anê.

¹¹ Hāmri nhūm mē inhmā:

—Nà ām hāmri na ka mē ja jarê. No mē ate harēnhja na mē piitā mē kām mex kêt. Koja Tîrtûm tām amā aprō hkêt ā ajarē ka rī aprō hkêt nê ahte ajamakêtkati nê ri apa.

¹² Na htem piitā hprō nê pa hkêt nê.

Na hte kamā tanhmā mē kute xwÿnhjaja kormā hprīre ri tanhmā kute mÿrapê kām hprō hprām kêt nê pa.

Nê kamā tanhmā mē ho mÿrapê nhūm mē hkurê hkêt nê hprō hkêt nê pa.

Nê kamā mē kām Tîrtûm mā tanhmā amnhī to ho pa pix prām xàj kām hprō hprām kêt nê pa.

Tā kot kaj mē jajê pyrā nê ā amnhī nhīpēx anhyr prām nê

rī kam nê aprō hkêt nê apa. Anê.

Jejus kot amnhī nê mēhprjê janor kêt ā harēnh

Makre 10.13-16; Rukre 18.15-17

¹³ Tā nhūm Ijaew kwÿjaja Jejus pumu nê hwÿr mē hkrarejê jamÿ nê mē o mra. Kot mē hā ĩhkra jaxwÿr nê mē ho Tîrtûm wÿr kaxyw hwÿr mē o mra. Hāmri pa mē ixte hkôt ixpa ho ixpa xwÿnhjaja tee ri mē omu nê tanhmā nê mē kām ixkapēr to nê mē kām:

—Tk. Mo kaxyw na ka mē Jejus wÿr mē o mra? Kormā mē raxre kēnā. Kwa mē ma akupÿm mē o mra nà? Anê.

¹⁴ Hāmri nhūm Jejus mē inhma nê mē inhmā:

—Kwa nà mē ri inhnē mēhprjê kurê hkêt nê. Kwār mē māmri ixwÿr mē o mra. Anê.

Hāmri nê amnhī wÿr mē mē kām hpa ho apē nhūm mē hwÿr mē o mra nhūm mē kuri kuhē nhūm mē omu nê mē hā mē inhmā:

—E mē jarejê pumu. Na htem hamakêtkati nê hkīnh nê ri pa. Nê mē kām amnhī to rūnh prām kêt nê. Tā Tîrtûm kôt mē kot amnhī nhīpēx o mē pa xwÿnhjaja te mē kot jajê pyrāà nê kām amnhī to rūnh prām kêt nê pa. Anê.

¹⁵ Hāmri nê mē hā ĩhkra jaxwÿ nê mē ho Tîrtûm wÿ hāmri nê mē inhmā anê pa mē ma axte mē kurūm mō.

Kāxpore rūnh xwÿnh jarēnh
Makre 10.17-22; Rukre 18.18-23; mǎānēn Rōmān 3.19-20; Wam Ximotre 6.6; Xiakre 2.10

16 Tã nhũm Ijaew òja Jejus wÿr tẽ nẽ kãm:

—Pa mẽ ijahkre xwÿnh? Kwa inhmã mẽmoj jarẽ. Tanhmã kot pa nhÿrmã Tirtũm ri ixtĩr tũm nẽ ixpa ho ixpa kaxyw amnhĩ nhĩpêx to wehe? Anẽ.

17 Hãmri nhũm kãm:

—Tk. Ra Tirtũm kot nhÿrmã mẽ atĩr tũm nẽ apa kaxyw mẽmoj tã mẽ amã karõ nhũm ate mar mex kênã kot ka kêt ri axte ja hã ixkukja. Nã Tirtũmja mex o mex jakamã kot kaj amã kuri atĩr tũm nẽ apa hprãm hã kot kaj kapêr kôt amnhĩ nhĩpêx no ri apa. Anẽ.

18 Hãmri nhũm kãm:

—No nhÿ kapêr kôt kot paj amnhĩ nhĩpêx o ri ixpa wehe? Anẽ.

Hãmri nhũm kãm:

—Na pre mẽ amã mẽmoj tã karõ ho:

Kêr ka mẽ axpên par kêt nẽ. Nẽ nhãm mẽ hprõ ho amnhĩkati hkêt nẽ. Nẽ mẽ kêp axàhkĩnh kêt nẽ. Nẽ tanhmã mẽ ho axêx to hkêt nẽ.

19 Nẽ anhĩpêxà mẽ akatorxà wa hã apijaam nẽ wa ho mex pẽ wa kutã anojarêt o ri apa.

Nẽ amã akwÿjê hã ma ho te ka amã amnhĩ tã ma pyrãk o mẽ hipêx. Jao tãm mẽ hipêx o ri apa.

E kot kaj amã nhÿrmã Tirtũm kuri atĩr tũm nẽ apa hprãm hã kêr ka ã amnhĩ nhĩpêx anhÿr o ri apa. Anẽ.

20 Hãmri nhũm kuma nẽ kãm:

—Ku nhũm. Ra ã ixte amnhĩ nhĩpêx anhÿr o ri ixpa

kênã. Nom te kormã ixtĩr tũm nẽ ixpa kaxyw ixte tãm kêt pyrãk. Kwa axte inhmã mẽmoj jarẽ nà? Anẽ.

21 Hãmri nhũm kãm:

—Nã kormã mẽmoj pyxi nẽ arĩk. Na ka amã akukrêx rax prãm tÿx o amã Tirtũm prãm jakre. Jakamã ma akupÿm tẽ nẽ akukrêx rax o wênê hpa nẽ hpãnhã kàxpore jamÿ nẽ ma mẽ kêp amrakati xwÿnhjê mã òr pa. Hãmri nẽ rĩ akupÿn ixwÿr tẽ nẽ rĩ ixkôt apa ho apa. Anẽ.

22 Hãmri nhũm kuma nẽ tee ri amnhĩ kukamã hamaxpêr. Kãm hikukrêx rax japê nẽ kãm kamã ìhkra karo hprãm kêt nẽ. Hãmri nẽ tee ri Jejus kot ã kãm hã karõ anhÿrja ma nhũm ja kêp omnuj nẽ nhũm ma akupÿm htêm kurê kumrêx.

23 Hãmri nhũm Jejus tee ri omu nẽ mẽ inhmã:

—Hêxta waa nẽ. Kojã mẽ hikukrêx rũnh xwÿnhjaja ohtõ nẽ kãm mẽ hikukrêx japê xàj Tirtũm mẽ wa ixri htĩr tũm nẽ pa ho pa hkêt nẽ. Wa ixte amnhĩ nhĩpêxja mẽ kêp hihtÿx.

24 Mẽ kãm hikukrêx rũnh mã ìhkra karo hprãm kêt rãhã tee ri kãm Tirtũm kôt amnhĩ nhĩpêx prãm kaprÿ. Te ho mēhõ kot menh kagõ hã hkre nẽ kãm kagõ katõk prãm kêt rãhã kãm guhkrax kãm àr prãm kaprÿta pyrãk. Anẽ.

Nhũm pre ã Jejus mẽ inhmã kapêr anẽ.

25 Hãmri pa mẽ kuma nẽ tee ri amnhĩ kukamã ijamaxpêr nẽ kãm:

—Kwa mẽ ixpiitã mẽ inhmã mẽ ixkukrêx japê kênã. Jakamã xà kot paj mẽ ixpiitã nhỹrmã war ari ixtĩr tũm mẽ ixpa ho ixpa hkêt mẽ nà? Anê.

²⁶ Hãmri nhũm mẽ inhmã:

—Nà kot kaj mẽ amnhĩ krã hkôt mẽ amã mẽ akukrêx japêja mã anhũrer kêt mẽ. ãm Tĩrtũm pix na hte ja kaxyw tanhmã mẽ akrã hto ka mẽ amã akukrêx japê hkêt mẽ. Jao ra mẽ apê Tĩrtũm mẽ wa ixri atĩr tũm mẽ mẽ apa ho mẽ apa mã xwỹnh. Anê.

²⁷ Hãmri nhũm Simãw Pêtre kãm:

—Kwa no we mẽ pajaja Pahihti? Na pa prem agryk ã mẽmoj piitã hkaga hpa mẽ akôt ixpa ho ixpa. Jakamã kot paj mẽ nhỹrmã war ari ixtĩr tũm mẽ ixpa ho ixpa nà? Anê.

²⁸ Hãmri nhũm kuma mẽ mẽ ixpiitã mẽ inhmã:

—Tỳ. Kot paj nhỹrmã mẽmoj piitã ho nyw pa hãmri mẽ ixte mẽ ho amnhĩptar o ixkrĩ xà maati kamã nhỹ mẽ mẽ piitã mẽ kot tanhmã amnhĩ nhĩpêx to hã mẽ omunh xà hkôt tanhmã mẽ harênh to. Tã mẽ kajaja mẽ ate ixkôt apa ho apa xwỹnhjaja kot kaj mẽ inhmã Ijaew kot amnhĩ nhĩpêx ã mẽ omunh xà hkôt ahpỹnhã tanhmã inhmã mẽ harênh to. Mẽ mex ã mẽ harê rỳ mẽ mex kêt ã mẽ harê. Kot kaj mẽ ã inhmã mẽ harênh anê. ãm hãmri na pa mẽ amã ixkapêr anê.

²⁹ —Nê ka mẽ atõ inhmã tanhmã amnhĩ nhĩpêx to ho apa kaxyw akwỹjê re mẽ ma inhmã mẽmoj to anhỹr o ri

apa. Tanhmãn anhõrkwỹ rỳ atõ rỳ atõx re. Rỳ aprõ mẽ akrajê re. Rỳ akatorxã mẽ anhĩpêxã war are. Rỳ akukrêx piitã rer pa hãmri mẽ ma mẽ piitã mẽ kãm ixkapêr o mẽ ahkre ho ri mẽ hkôt apa. Hã kot paj mẽ apumu mẽ mẽ ato mex rax mẽ. Hãmri ka mẽ ma mẽ hkôt apa mẽ mẽ kãm ixkapêr jarênh o apa nhũm mẽ kot mẽ amar xwỹnh kwỹjaja mẽ ama mẽ kãm mẽ akĩnh mẽ. Nê ra mẽ ate akwỹjê rer par tã mẽ tãmjaja te mẽ apê mẽ hkra rỳ mẽ htõ rỳ mẽ htõx pyrãk o mẽ anhĩpêx mẽ mẽ ato mex o pa. Hãmri ka mẽ nhỹrmã ty mẽ ma Tĩrtũm mẽ wa inhõ krĩ hwỹr api mẽ wa ixkuri amex kumrêx mẽ atĩr tũm mẽ apa ho apa.

³⁰ Nom kwa kêr ka mẽ amnhĩ tã ja ma mẽ amnhĩ to rũnh xwỹnh ã amnhĩ kamnhĩx kêt mẽ. Jar mẽ kot amnhĩ to rũnh ã amnhĩ to jarkrar xwỹnhjaja koja mẽ nhỹrmã amnhĩ to hkryre hã amnhĩ pumu. No jar mẽ kot amnhĩ to hkryre xwỹnh ã amnhĩ jarênh xwỹnhjaja koja mẽ nhỹrmã amnhĩ to rũnh ã amnhĩ pumu. Anê.

20

Jejus kot nhỹrmã hkrajê ho mex ã harênh

Rômãn 9.14-16

¹ Nhũm Jejus arĩ mẽ ixte hkôt ixpa ho ixpa xwỹnhjê mã awjarê mẽ mẽ inhmã:

—Nê kot paj nhỹrmã tanhmã mẽ ato mex to. Te ixpê hpur nhõ dõn kot amnhĩ nhĩpêx pyrãk o mẽ anhĩpêx. Koja pur nhõ dõnja ihpur kãm

mêmo xô ra hkà hpa nhũm omu hãmri nê kaxyw mẽ àpênh xwỳnhjê japêr kaxyw ma gàm tẽ. Nê gáp xa nê mẽ kãm akir nhũm mẽ hã akuprô.

² Hãmri nhũm mẽ kãm: “E. Kot kaj mẽ jarãhã inhmã ixpur kãm apê. Kot kaj mẽ inhmã axàpênh o amỹkry pa hpãnhã mẽ kot apkati pixi hã mẽ àpênh pãnhã mẽ kãm amnhĩrer xàja kôt mẽ amã amnhĩre.” Anê hãmri nhũm mẽ kuma nê kãm: “Tôe. Nà kot paj mẽ amã apê.” Anê nhũm pur wỳr mẽ kurẽ nhũm mẽ ma kãm àpênh mã mra.

³ –Tã nhũm arĩ kỳx mã myt tẽ nhũm pur nhõ dôn akupỹm gàm tẽ nhũm mẽ hkwỳja arĩ kuhê.

⁴ Nhũm tee ri mẽ omu nê mẽ kãm: “Kwa mon ka mẽ axàpênh kêt nê arĩ akuhê? E. Mẽ ma wamtajê hkôt mra nê inhmã apê pa hpãnhã mẽ amã amnhĩrer mex nê.” Anê.

⁵ Hãmri nhũm mẽ kuma nê ma mẽ hkôt mra. Tã nhũm ra myt kaxkwa nhĩpòk ri ajêt nhũm hpur nhõ dônja mã hkwỳjê ho anê nê. Kê axte mẽ hkôt jajê jano nhũm mẽ ma mẽ hkôt mra. Tã nhũm ra myt ahpanh grire nhũm ma akupỹm kêwe gàm tẽ nê mã mẽ ho anê nê axte mẽ hkôt jajê rê.

⁶ –Tã nhũm ra myt grire nhũm ma akupỹm kêwe gàm tẽ nê jajê pumu nhũm kê wem arĩ gáp kuhê. Hãmri nhũm tee ri mẽ omu nê mẽ kãm: “Kwa mon ka mẽ axàpênh kêt nê atỳx gáp akuhê ho akuhê?” Anê.

⁷ Hãmri nhũm mẽ kãm: “Nà mēhō kot mẽ inhmã mẽ ixàpênh ã karōre hã.” Anê. Hãmri nhũm mẽ kãm: “Tôe. Mẽ ma mẽ hkôt ixpur wỳr mra nê inhmã mãn apê.” Anê hãmri nhũm mẽ kuma nê ma hkwỳjê hkôt mra.

⁸ –Tã nhũm ra kamàt. Hãmri nhũm hpur nhõ dônja kãm àpênh xwỳnhjê krãhtũm wỳr tẽ nê kãm: “E. Ma mẽ hwỳr tẽ nê mẽ kãm anê kê mẽ àpênh kaga nê man akôt mra ka inhmã mẽ kãm amnhĩre. Nom kêr ka hapu hã mẽ mōr xwỳnhjê kumrẽx mã amnhĩre nê wam mẽ mōr xwỳnhjê ho hapu nê mẽ kãm amnhĩre.” Anê. Hãmri nhũm kãm: “Tôe. Nà kot paj mẽ ho anê.” Anê.

⁹ Hãmri nê ã mẽ kãm amnhĩrer anê. Hapu hã mẽ mrar xwỳnhjê kumrẽx mã amnhĩre. Te mẽ kot kwỳhtã àpênh o amỹkry pyrãk o nhũm hpãnhã mẽ kãm amnhĩre.

¹⁰ Hãmri nhũm wam mẽ mrar xwỳnhjaja ja hã mẽ omu nê hkĩnh nê. Hãmri nê htỳx hamaxpêr o: “Nà kot paj xep kàxpore jamỳnh rax o mẽ hakre. Ixàpênh rax o ixte mẽ hakrenh kênã.” Anhỳr tã no nhũm mẽ piitã mẽ kãm amnhĩrer o axpên pyrãk. Ra pur nhõ dôn kot kãm hã karõ xà hkôt.

¹¹ Hãmri nhũm mẽ hamỳ nê tee ri hkre kamã omu nê we ra hpur nhõ dônja kamã gryk nê.

¹² Hãmri nê hwỳr mra nê kãm: “Kwa jajaja na mẽ amã àpênh o ore pyxi nê. No kêt mẽ pajaja na pa mẽ kwỳhtã ixàpênh rax o kamàt. Arĩgro htỳx kãm ixàpênh o

ixãm o ixtã kamàt tã ka pěr
ãm mẽ inhmã amnhĩrer o
axpẽn pyrãk. Kwa na ka mẽ
ixtomnuj nẽ.” Anẽ.

¹³ Hãmri nhũm mẽ kuma
nẽ mẽ kãm: “Tk. Nà na
pa mẽ atomnuj kêt nẽ. Na
pa kwýtã tanhmã mẽ amã
amnhĩrer to xà jarẽ ka mẽ
inhma nhũm ja mẽ amã mex
nẽ ka mẽ ma hwỳr axàpênh
mã mra.

¹⁴ Kwa mẽ akàxpore jamý
nẽ ma mra. ãm pa inhmã
hprãm xà hkôt na pa ã mẽ
amã amnhĩrer anẽ.

¹⁵ Ixkàxpore jakamã kot paj
nhãm inhmã mēhõ mã òr
prãm xà hkôt kãm kugõ. Tã
ka mẽ ã mẽ hã ixkamã agryk
anẽ. E mẽ akàxporeja mý nẽ
ma mra.” Anẽ. Nhũm ã hpur
nhõ dõn mẽ kãm kapěr anẽ. ã
mẽ ujarênh kot anhỳr. Anẽ.

¹⁶ Nhũm pre ã Jejus mẽ
inhmã ujarênh anẽ nẽ mẽ
inhmã:

—Ja pyrã nẽ wam mẽ
ate ixkôt amnhĩ xunhwỳr
xwỳnhjaja nẽ hapu hã mẽ kot
kormã ixkôt amnhĩ xunhwỳr
mã xwỳnhjaja kot paj nhỹrmã
mẽ apiitã mẽ ato mex kumrẽx
o axpẽn pyrãk. Anẽ.

*Jejus kot htyk kukamã
amnhĩ jarênh*

*Makre 10.32-34; Rukre
18.31-34*

¹⁷ Tã nhũm Jejus mẽ inhmã
anẽ pa mẽ ixrohã ma Jeru-
jarẽ hwỳr mõ. Mẽ ohtôjê
hkôt mõ. Hãmri nhũm Je-
jus mẽ ixpê 12jê mã anẽ nẽ
mẽ ixkwýjê hkãx ã mẽ inhmã
kapěr kaxyw ahte hapu hã
mẽ ixto mõ.

¹⁸ Hãmri nẽ mẽ inhmã
amnhĩ kukamã tanhmã
amnhĩ jarênh to nẽ mẽ
inhmã:

—E na pu mẽ ra Jerujarẽ
hwỳr mõ. Kamã koja mẽ
pahkwýjaja inhĩpêx kati nẽ.
Koja mẽ patre krãhtũmjê
mẽ Mojes kapěr o mẽ ahkre
xwỳnhjê nhĩhkram ijaxã
nhũm mẽ kot ixpĩr kaxyw ixtã
amýnê.

¹⁹ Koja mẽ kãm ixkurê
xwỳnhjaja ixpynê nẽ Rõm nhõ
xwỳnhjê nhõ pòristijê hwỳr
ixto tẽ nẽ mẽ kãm tanhmã
ixto hêx to. Hãmri nhũm mẽ
kuma nẽ mẽ mar xà hkôt
tanhmã inhĩpêx to. Nhũm
mẽ hkwýjaja ixtã hpěr o axkê
nẽ ixtã akunha nhũm mẽ
hkwýjaja ixto kapěr punuj nẽ
tanhmã ijapry hto nẽ ixtak.
Hãmri nẽ ma ixto tẽ nẽ pĩ
kahpa hã inhô nẽ ixpĩ. ã koja
mẽ inhĩpêx anẽ. Nom kot paj
ixtyk ã ixtã apkati axkrunêpxi
nhũm Tĩrtũm akupým ixto
ixtĩr. Anẽ.

*Xiakre mẽ Juãw wa ka-
torxã kot wa ho Jejus wỳr ã
harênh*

*Makre 10.35-45; mããnên
Rõmãn 12.3, 12.10, 12.16; Epes
4.2; Piripos 2.3-8; Xiakre 4.6;
Wam Pêtre 5.3*

²⁰ Tã nhũm Jepetew prõja
amnhĩ kôt Jejus wỳr hkra Xi-
akre mẽ Juãwja wa o tẽ. Kot
wa ho Jejus wỳr kaxyw hwỳr
wa o tẽ. Mẽ ixpyrà nẽ wa kot
Jejus kôt pa ho pa xwỳnhjê hõ
na pre wa nhũm wa katorxãja
Jejus wỳr wa o tẽ. Hãmri nẽ
kutã hkõnkrã ho tẽm nẽ nhỹ

²¹ nhũm kãm:

—Pa mo na? Anẽ.

Hāmri nhūm kām:

—Ma ixkrata na pa ixte wa ho awÿr kaxyw awÿr wa o tē. Xê kot kaj nhÿrmã ate mē piitã mē ho amnhÿptàr kaxyw nhÿ nhūm ixkrata wa akutã anhÿjê nē wa kêp anhō kōwenatō nē akutã anhÿjê nē wa ato nhÿ. Ja prãm xàj na pa ã wa ho awÿr anē. Anē.

²² Hāmri nhūm kuma nē Xiakre mē Juãw wa omu nē wa kām:

—Nà na war akatorxàja htÿx ã war ato ixwÿr anē. Koja mē tokyx expi kot paj amnhÿ xà htÿx kām ijamak kām ty. Tã xà koja mē ixpyrà nē ã war anhÿpêx anē ka wa ixpyrà nē amnhÿ xà htÿx kamã ajamak rax kām ty nà? Anē.

Hāmri nhūm wa kām:

—Tÿ. Nà kot pa wa ijaxwÿja anē nē apyrà nē amnhÿ xà htÿx kām ijamak kām ty. Anē.

²³ Hāmri nhūm wa kām:

—Nà ãm hāmri na ka wa amnhÿ jarē. War ate ixpyrà nē ixkôt amnhÿ xà htÿx kām ajamak kām atyk mã kênã. Tã nom war akatorxà kot war ato ixwÿrta ã kot paj tanhmã war amã nē hkêt nē. Kêt inhō Papaj tãm koja ixkaxyw mēhō japêr nhūm inhÿhkô hã nhÿ. No pa kot paj amnhÿ kaxyw mēhō jarēnh kêt nē.

Anhÿr o wa kām kapêr.

²⁴ Hāmri pa mē ixte wa uràk nē Jejus kôt ixpa ho ixpa xwÿnhjaja wa katorxà kot ã wa ho Jejus wÿr anhÿrja ã kuma nē wa kamã inhgryk nē. Hāmri nē axpên mã ixkapêr o:

—Tk. Nà koja Juãw mē Xiakre wa nhÿrmã kêp ò kōwenatō nē mē pahto amnhÿptàr kêt kumrêx. Anē.

²⁵ Nhūm Jejus mē inhma nē amnhÿ wÿr mē xpiitã mē inhmã hpa ho apê nē mē inhmã:

—E mē amnē ixwÿr axkamē pa mē amã awjarē mãn. Anē.

Hāmri pa mē hwÿr axkamē nhūm mē inhmã:

—E mē inhma. Na hte Ijaew kêt xwÿnhjê nhō pahijaja ã amnhÿ nhÿpêx anhÿr o ri pa nē amarÿ hkrÿ xà kamã hkrÿ ho hkrÿ. àhpumunh tÿx jakamã amarÿ ixkre hkre jakry kamã hkrÿ ho hkrÿ nē kām mē àpênh xwÿnhjê pix mã mēmo mē àpênh ã karō. Na htem ã amnhÿ nhÿpêx anhÿr o hkrÿ. Nē mē kot mex ã harēnh kaxyw tanhmã mē ho mex to ho pa.

²⁶⁻²⁷ Tã no mē kajaja. Kêr ka mē ho mē uràk kêt nē. ãm te amarÿ ri mē apa pyràk o axpên nhÿpêx o ri apa. Nē te mē apê mē kām axàpênh xwÿnh pyràk o amnhÿ nhÿpêx o ri mē hkôt apa. No kêr ka mē ho amnhÿptàr mã ajamaxpêr o ri apa hkêt nē.

²⁸ Mē ate mēmoj tã pa ixkutã anojarêt ho apa kaxyw na pa pre mē awÿr ixwÿrk kêt nē. Ixte amarÿ mēmoj to mē kamjaja mē akutã inhnojarêt o ixpa kaxyw na pa pre mē awÿr wrÿ. Nē mē ate ixkôt amnhÿ xunhwÿr xwÿnhjê nē ixtyk kaxyw na pa pre wrÿ. Anē.

Jejus kot no hkre xwÿnh wa ho mex ã harênh

Matêwre 9.27-31; Makre 10.46-52; Rukre 18.35-43

²⁹ Tã pa mẽ Jejus kôt kormã Jerujarê hwÿr ra Jeriko htêp o mō. Hãmri nê kurũm ixkaton mō nhũm mẽ ohtô nê mẽ ixkôt mra.

³⁰ Nhũm pry nhĩhkjê hã no hkre xwÿnh wa àhwÿr o hkrĩ xwÿnhja wa amnhĩ wÿr mẽ inhmrrar mar o nhÿ. Mẽ ohtô nê Jejus kôt mẽ mrar xwÿnhjê mrar ma nê mẽ kãm:

—Kwa mo na? Mẽmoj wÿr na ka mẽ axohtô nê mra? Anê.

Hãmri nhũm mẽ wa kãm:

—Nã Jejus pê Najare nhõ xwÿnhja kôt na pa mẽ mra. Anê.

Hãmri nhũm wa mẽ kuma hãmri nê kax pê Jejus mã kapêr nê kãm:

—Pa Pahihti? E apê mẽ inhõ Pahihti mex na ka. Te apê amnepê m anhĩgê t pahihti Tawita pyrãk. Jakamã kwa wa ixkamã axukapri nê akupÿm wa ixto mex. Anê.

³¹ Hãmri nhũm Jejus kôt mẽ mōr xwÿnhja wa kuma nê wa kãm:

—Tk. Kwa war akapêr kêt nê nhÿ nã. Anê.

Tã no nhũm wa ãm mẽ kuma nê xatã amnhĩ to kuwÿ. Kax pê amnhĩ to kuwÿ.

³² Hãmri nhũm Jejus wa kuma nê xa nê wa omu nê wa kãm:

—Pa mo na? Tanhmã kot pa wa ato? Anê.

³³ Hãmri nhũm wa kãm:

—Nã akupÿm wa inhmã wa ixrit mex prãm. Anê.

³⁴ Hãmri nhũm kãm wa hkapri nê wa no htok nhũm

wa akupÿm rit mex kurê kumrêx. Hãmri nê rit mex ã amnhĩ pumu nê hkĩnh tÿx nê ma Jejus kôt hkwÿjê hkôt mō.

21

Jejus kot Jerujarê hwÿr àr ã harênh

Makre 11.1-11; Rukre 19.28-40; Juãw 12.12-19

¹ Tã nhũm Jejus kormã Jerujarê hwÿr kormã mō. Pa mẽ hkôt mō nê ra Petake hwÿr ixãhtêp o mō. Hixê t pê Oriwêhti kahti ri na pre krĩja xa. Jakamã pa mẽ wa hwÿr ixãhtêp o mō nhũm Jejus mẽ ixte hkôt ixpa ho ixpa xwÿnhjê wa ho axkrut nê amnhĩ kukamã wa kumê.

² Nê wa kãm:

—E wa ma krĩ mÿj wÿr mẽ ixkukamã wa tẽ. Nê wa hwÿr axà nê nhÿri jumênre mẽ hkra wa kãm ê nê wa ãm xwÿnh wa omu hãmri nê kãm ê xã hpôt nê man akupÿm amnê hamê wa o tẽ.

³ Koja mēhō ja hã war apumu nê hã tanhmã war amã kapêr to ka wa kãm ã ijarênh anê nê kãm: “Nã mẽ panhõ Pahihti na hã karõ pa wa hwÿr tẽ.” Anhÿr o wa kãm ijarê. Hãmri nhũm war ama nê war amã òr kurê kumrêx. E wa ma hwÿr tẽ. Anê.

⁴ Tirtũm kapêr ã kagã htũm ra kot ja kukamã harênh. Na pre ra Tirtũm nhÿ hã kapêr xwÿnhjê hõ ja jarê nê hã kagã ho:

⁵ Pa Jerujarê nhõ xwÿnhja. Kwa mẽ tee ri amnhĩ kukamã ajamaxpêr ho amã ma hkê t nê. Ota mẽ anhõ pahi nywta ra

jumênre hã nhỹ nẽ mẽ awÿr hpôx o tẽ. Te kot amnhĩ to grire xwÿnh pyrak o amnhĩ nhĩpêx nẽ tẽ.

6 Anhÿr o kot hkukamã harênh jakamã nhũm Jejus amnhĩ kukamã ja wa kumẽ hãmri nhũm wa ma hwÿr htêm kurê kumrêx.

7 Nẽ krĩta wÿr pøj nhũm Jejus kot wa kãm harênh xà hkôt nhũm wa jumênreta pumu. Hãmri nẽ hamẽ wa kãm ê xà hpôt nẽ ma Jejus wÿr wa o tẽ. Hãmri nẽ kaxyw amnhĩ xê hkwy hkwrÿ nẽ kãm ho jumênre nywta kô kahty. Nẽ kãm ho htÿx nẽ o xa nhũm Jejus hã nhỹ nẽ hã mō.

8 Kormã Jerujarê hwÿr hixêt ã àpir o mō. Nhũm mẽ kot omunh o kuhê xwÿnhjaja hkĩnh nẽ ma hkukamã pry ho mex kaxyw amnhĩ xê hkwyptyr ho mō. Nẽ pô hkwy jakà nẽ utyr o mō.

9 Nhũm mẽ hkwyjaja Jejus kukamã mra nhũm mẽ hkwyjaja hapu hã hkôt mra. Nẽ piitã kàx pê Tirtũm mex o mex ã harênh o hkôt mō nẽ harênh o:

Ota Tirtũm kot mẽ pahwÿr mênh xwÿnhnta ra pøj. ãm hãmri na mẽ pahwÿr wrÿ. Ja na mex kumrêx. Kêp mẽ panhō Pahihty mex na. ãm hãmri na pre Tirtũm mẽ pahwÿr kumẽ. Tirtũm mex kumrêx. ãm mex o mex.

Anhÿr o Jejus kôt Jerujarê hwÿr harênh o mō. Kot mẽ ho amnhĩptâr kurê kumrêx ã

hkamnhĩx jakamã hkĩnh nẽ hkôt ã harênh anhÿr o mō.

10 Hãmri nhũm krĩ nhō xwÿnhjaja tee ri mẽ kuma nẽ expên mã:

—Kwa mēhō na we hpôx o mō nhũm mẽ ã hkôt harênh anhÿr o mō? Anẽ.

11 Hãmri nhũm Jejus kôt mẽ mrar xwÿnhjaja mẽ kuma nẽ mẽ kãm:

—Nà Tirtũm nhỹ hã kapêr jarênh xwÿnh pê Jejus na. Kêp Garirej kamã krĩ pê Najare nhō xwÿnhnta na. Anẽ.

Jejus kot Tirtũm nhōrkwÿ hwÿr àr ã harênh

Makre 11.15-19; Rukre 19.45-48; Juãw 2.13-22

12-13 Tã hãmri nhũm Jejus Jerujarê wÿr axà nẽ jumênre rũm wrÿ nẽ ma Tirtũm mã amnhĩ jarênh xà hã ixkre hwÿr tẽ nẽ axà. Hãmri nẽ tee ri mẽ kot tanhmã ixkre kamã amnhĩ nhĩpêx to hã mẽ omunh o xa. Nhũm mẽ axtem nẽ môx nẽ ôwêhti nẽ tuuti ho wênê ho kuhê. Mẽ kot haprôr nẽ Tirtũm mã amnhĩ jarênh kaxyw kãm hpar nẽ ôr kaxyw mẽ kãm ho wênê ho kuhê. Nom axtem nẽ mẽ kãm hã ohtô rax kãm mẽ kãm ho wênê. Hãmri nhũm Jejus mẽ hwÿr axà nẽ tee ri mẽ omu nhũm ja kêp omnuj tÿx kumrêx. Hãmri nhũm mẽ hwÿr tẽ nẽ mẽ kot kàxpore ho pinhpanh xwÿnhjê pê mẽ ô mêsti rênh pa. Nẽ mẽ kot tuuti ho wênê xwÿnhjê pê hkrĩ xà hkujate nẽ rênh pa. Hãmri nẽ mẽ kãm:

—Tk. Kwa Tirtũm kapêr ã kagà htũm kot ixkreja jarênh kot:

Inhõrkwỹja ãm mẽ ate inhmã
amnhĩ jarẽnh xà hã
ixkre pix kaxyw na.

Anhỹr o kot harẽnh tã ka
mẽ axtem nẽ kamã ã amnhĩ
nhĩpêx anẽ. E kwa mẽ ajapõx
tokyx anẽ. Anẽ.

Hãmri nẽ mẽ kator pa nhũm
mẽ ma hapêx.

¹⁴ Hãmri nhũm mẽ no hkre
xwỹnhjaja nẽ mẽ hyk o mẽ pa
xwỹnhjaja mra nẽ agjê nẽ Je-
jus kutã kuhê nhũm mẽ omu
nẽ akupỹm mẽ ho mex.

¹⁵⁻¹⁶ Hãmri nhũm mẽhprĩ
hkwỹjaja hwỹr mra nẽ kuri
kãm mex o mex ã gre nẽ kãm
grer o:

Amex kumrêx Pahihti.

Tĩrtũm na pre mẽ ixwỹr amẽ.

Kot kaj te anhĩgêt Tawi pyrà
nẽ mẽ ixto amnhĩptar o
apa.

Anhỹr o kãm grer o kuhê.
Hãmri nhũm patre krãhtũm
mẽ Tĩrtũm kapêr tũm o mẽ
ahkre ho mẽ pa xwỹnhjaja
tee ri ã mẽ grer anhỹr ã mẽ
kuma. Nẽ tee ri Jesus kot mẽ
no hkre xwỹnhjê mẽ mẽ hyk
o mẽ pa xwỹnhjê ho mex ã
omunh o kuhê nẽ gryk nẽ Je-
jus wỹr tẽ nẽ kãm:

—Kwa na mẽhprĩjaja mẽ
grer kãm ã ajarẽnh anẽ ka mẽ
mar kêt nẽ? Mẽ grerja mexti
hã. Anẽ.

Hãmri nhũm mẽ kãm:

—Tỳ ixte mẽ mar kênã.
Tĩrtũm kãm hprãm xà hkõt
na mẽ ã inhmã inhmex o
inhmex ã ixtã grer anẽ.
Tĩrtũm kapêr ã kagã htũm kot
ã mẽ hkukamã harẽnh kot
anhỹr. Mẽ harẽnh kot:

Koja mẽhprĩjaja Pahihti mã
mex o mex ã grer o
kuhê.

Anhỹr o kot mẽ hkukamã
harẽnh kênã. Tã mãn ka
mẽ kormã kamã harẽnh kêt
jakamã na ka mẽ ja jarẽnh
mar kêt nẽ. Kwãr mẽ mãmrĩ
ã inhmex ã grer anẽ.

¹⁷ Anhỹr o mẽ kãm kapêr
hãmri nẽ mẽ inhmã anẽ pa
mẽ ixkreta rũm ijapõj nẽ ma
akupỹm Petãn wỹr mra nẽ
kamã amnhĩm hikra.

*Jejus kot mẽmo hpàr mã
kapêr ã harẽnh*

*Makre 11.12-14; mããnẽn
Xiakre 1.6*

¹⁸ Tã nhũm kwỹhtã nhũm
Jejus kãnhmã nhỹ nẽ mẽ
inhmã anẽ pa mẽ ixrohã ma
akupỹm Jerujarê hwỹr mra.
Hãmri nẽ kormã mõi nhũm
Jejus pry kahti ri ra kãm prãm
nẽ.

¹⁹ Hãmri nẽ mẽmo pĩ pê
fikêhti jarẽnhja pumu nẽ kot
ô hkwy rênh nẽ hkrêr kaxyw
hwỹr mât. Hãmri nẽ tee ri ô
japêr nhũm ô hkêt nẽ ãm hô
hpix harir. Hãmri nhũm tee ri
omu nẽ kãm:

—E kot kaj axte axô hkêt
kumrêx.

Anhỹrja o nhũm grã par
kurê kumrêx.

²⁰ Hãmri pa mẽ ixte hkõt
ixpa ho ixpa xwỹnhjaja omu
nẽ Jesus mã:

—Kokỹỹ. Kwa tanhmã na
we amnhĩ nhĩpêx to nẽ grã
kurê kumrêx? Anẽ.

²¹ Nhũm mẽ inhmã:

—Nã kot kaj mẽ ixpyrà nẽ
fikêhti kot tanhmã amnhĩ
nhĩpêx to kaxyw Tĩrtũm mã
ajamxpêr tỳx nẽ nhũm amã
hprãm xà hkõt amã tanhmã

hipêx to. Nom kêr ka mē ajamaxpēr kati ho tee ri hkukamā ajamaxpēr kêt nē. Ām kaxyw Tirtūm kôt ajamaxpēr t̄yx nē nhūm mē amā tanhmā mēmoj nhīpêx to. Ām hāmri na pa mē amā ja jarē. No ām ja pix kêt. Kot kaj mē mǎānēn hixêt m̄j mǎ akapēr nē kām: “E anh̄r xàta rūm akato nē ma tē nē gô rax kām mrō.” Anē nhūm amar xà hkôt ā amnhī nhīpêx anē.

22 —Nē kot kaj mē mēmoj tā Tirtūm w̄y nē kaxyw kām ajamaxpēr t̄yx kām hā aw̄y nhūm amā mēmoj prām xw̄ynhta gō. Anē.

Mēhō nh̄y hā Jejus kot mē ahkre hā harēnh

Makre 11.27-33; Rukre 20.1-8

23 Nhūm arīgro hō hā nhūm Jejus kêwe axte Tirtūm mǎ amnhī jarēnh xà hā ixkreja w̄yr axà nē kamā mē ahkre ho nh̄y. Mē kām tanhmā mē kot amnhī nhīpêx to nē nh̄ymā Tirtūm mē wa kuri ht̄ir tūm nē pa kaxyw tanhmā mē kām kapēr to ho nh̄y. Hāmri nhūm Ijaew krāhtūmjē mē mē ō patre krāhtūmjaja hāmri hw̄yr mra nē hēx rom mēmoj tā hkukja nē kām:

—Kwa mē inhmā amnhī jarē. Mēhō nh̄y hā na ka hte ā amnhī nhīpêx anh̄r o apa? Na ka hte akup̄ym mē ho mex o apa nē tanhmā mē ahkre hto ho apa. Xà amnhī krā hkôt na ka hte ā amnhī nhīpêx anē nà? Anē.

24 Hāmri nhūm mē kām:

—Nà kot pa ixkumrēx mēmoj tā mē akukja. Ka mē

inhma nē tanhmā inhmā harēnh to pa rī kormā mē amā amnhī jarē.

25-26 Finat Juāw Paxis ā kot paj mē akukja. Mēhō nh̄y hā na pre hte mē hkrā kumrār o pa? Xà amnhī krā hkôt nà? Xà Tirtūm nh̄y hā? E mē atō inhmā ja jarē. Anē.

Hāmri nhūm mē kuma nē tee ri kot tanhmā kutā kām harēnh to hkukamā hamaxpēr pē axpēn pumunh o kuhē nē axpēn mǎ:

—Kwa tanhmā kot puj wem kām ja jarēnh to? Or mē kot mar o kuhē xw̄ynhjaja na htem kêp Tirtūm nh̄y hā kapēr jarēnh xw̄ynh ā harē. Tā kot puj mē kām kot amnhī krā hkôt kot mē hkrā kumrār ā harē nhūm mē tee ri mē pama nē mē pakamā gryk t̄yx nē. Nē mē paxêx rom ā mē pahte kām pakapēr anh̄r ā mē pahpumu nē kēn o mē pahtak o mē panh̄imex. No kot puj mē kām Tirtūm nh̄y hā kot mē hkrā kumrār ā harē hāmri nhūm mē pamā: “Kwa ā kot anh̄r kēnā na ka prem kapēr ma nē hkôt ajamaxpēr kêt nē?” Anē. Jakamā kot puj mē ja pymaj tanhmā kām harēnh to hkêt nē. Kot puj mē ām kām aa te mē pahte ja jarēnh mar kêt pyrāk o harē. Anē.

Mē kot tanhmā Jejus mǎ nē nhūm kot ta pānhā tanhmā mē kām nē pymaj nhūm mē tee ri kām tanhmā nē hprām kapr̄y o kuhē.

27 Hāmri nē kām:

—Konēn. Mē ixte mēhō nh̄y hā kapēr o pa hā omunhre hā. Anē.

Hāmri nhūm mẽ kuma nẽ mẽ kām:

—Tk. Tõe kot pa xep ijaxwýja mẽ amã tanhmã amnhĩ jarēnh to hkēt nẽ. Ijaxwýja ixte mēhō nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anẽ.

Mēhō my mẽ hkra wa pi-jakrut ã wa harēnh

Matêwre 7.21-23; Rukre 7.29-30

²⁸ Hāmri nhūm Jejus axte Ijaew krãhtũmjẽ mẽ mẽ õ patre krãhtũmjẽ mã kapēr nẽ mẽmoj tã kuxi nẽ tanhmã mẽ kãm ujarēnh to nẽ mẽ kãm:

—E pa mẽ amã awjarẽ ka mẽ inhma. Koja mēhō hkra my hamẽxkrut. Hāmri nẽ hkra kot waja mã tanhmã kapēr to nẽ kãm: “E kēr ka jarãhã ma tẽ nẽ inhmã pur kãm apê.” Anẽ.

²⁹ Hāmri nhūm kuma nẽ pur mã htēm kaga nẽ hitõt nẽ. Tãã no ãm hã ahtũmre nẽ tanhmã hamaxpēr to hāmri nẽ ma hwýr tẽ nẽ kamã àpēnh o xa.

³⁰ Hāmri nhūm wa hipêêxàja hpãnhã hkra kot hapu hwýr tẽ nẽ mã kãm kapēr anẽ nẽ kãm: “E kēr ka ajaxwýja atõ hkõt tẽ nẽ wa inhmã apê.” Anẽ nhūm kuma nẽ kãm: “Tõe. Nà kot paj ma tẽ.” Anhỹr tã no ãm hõta kĩnhã htēm kēt nẽ.

³¹ —Jakamã e. Nhỹ hkra na pre hipêêxà kapēr ma nẽ hkõt amnhĩ nhĩpêx nẽ kapēr nhĩrõp ãm kēt nẽ? Xà kot waja nã? Xà kot haputa? E mẽ atõ tanhmã inhmã wa harēnh to. Anẽ.

Hāmri nhūm mẽ kuma nẽ kãm:

—Nà kot wata. Kot wata na hitõt tã tanhmã hamaxpēr to nẽ ma tẽ nẽ kãm apê. Anẽ.

Hāmri nhūm mẽ kãm:

—Tý ãm hāmri na ka harẽ. No mẽ kajaja te mẽ ate hkra kot haputa kot amnhĩ nhĩpêx pyræk. Mẽ ate Tĩrtũm kapēr kõt amnhĩ nhĩpêx o apa hã amnhĩ jarēnh tã hkwým ri amnhĩ nhĩpêx o apa. Te mẽ ate kot hapu kot hipêêxà mã àpēnh ã amnhĩ jarēnh tã kãm àpēnh kêeta pyræk. No kēt mẽ kot amnhĩ tomnuj o mẽ pa xwýnh kwýjaja na mẽ arom Tĩrtũm kapēr ma nẽ hkõt amnhĩ nhĩpêx. Jao ra tãm amnhĩ nhĩpêx o pa. Jakamã mẽ arom ma kaxkwa hwýr pa kaxyw ra tãm nẽ. ãm hāmri na pa mẽ amã ixkapēr.

³² Na ka mẽ finat Juãw Paxis ã ixkukja. Juãw Paxisja na pre hte mẽ ate tãm amnhĩ nhĩpêx ã mẽ amã karõ ho pa. Tã no ka mẽ ãm ama nẽ ãm ama nẽ aa kapēr kõt amnhĩ nhĩpêx kēt nẽ. Nom mẽ kot amnhĩ tomnuj o mẽ pa xwýnh kwýjaja mẽ arom kuma nẽ Tĩrtũm kõt amnhĩ nhĩpêx. Ka mẽ ja hã mẽ omu nẽ ãm mẽ omu nẽ mẽ uræk nẽ ã amnhĩ nhĩpêx anhỹr kēt nẽ. Anẽ.

Mẽ àpēnh punu xwýnhjẽ jarēnh

Makre 12.1-12; Rukre 20.9-18

³³ Nhūm Jejus arĩ Ijaew krãhtũmjẽ mẽ mẽ õ patre krãhtũmjẽ mã kapēr. Nẽ mẽ kot tanhmã hipêx to hkukamã mẽ kãm tanhmã amnhĩ jarēnh to. No ãm

amnhĩ tã kuxi nê mẽ kãm awjarê nê mẽ kãm:

—Koja mēhō mẽ kot kãm pur kãm àpēnh kaxyw hkwýjê mã karō nhũm mẽ ma hwýr mra nê kamã mēmo hy hkre nê hkre pa. Hãmri nhũm hpur nhō dōn nhỹhỹm nojarêť nê kãm mẽ àpēnh xwýnhjê mã tanhmã hpur jarēnh to nê mẽ kãm: “E or ixpur nō. Kê kamã mẽmoj kã hpa ka mẽ mãmri kamã axujamýnh pa nê ho axkjê. Nê ixkutêp inhmã inhō jaxwý nê mãmri anhō tanhmã ho hprãm xà hkôt tanhmã ho.”

—Anhỹr o mẽ kãm kapêr hãmri nê ma nhỹhỹm mō.

³⁴ Tã nhũm ra pur kãm mẽmoj hkà pa nom nhũm hpur nhō dōn arĩ krĩ hō kamã hã ujahkre ho ri pa htã kuri kãm àpēnh xwýnhjê ho axkrunêpxi nê akupỹm mẽ hwýr mẽ kurê. Mẽ kot mẽ kãm hkwý nhōr nhũm mẽ ma kot kãm o mōr kaxyw nhũm ma mẽ hwýr mẽ kurê.

³⁵ Nhũm mẽ ma hwýr mō. Mōo nê ra hwýr pōj nhũm mẽ amnhĩ wýr mẽ omu nê axtem nê mẽ homnuj nê. Nê mẽ unê nê ja tak nê ja pĩ nê hōja nhũm mẽ kēn o htak hãmri nê amnhĩ nê wa hano nhũm wa ma akupỹm ý kamã mō.

³⁶ Hãmri nhũm mẽ õ pa-trãwja tee ri wa omu nê hamaxpêr o: “Kwa nà na mẽ ixpê inhmã mẽ àpēnh xwýnhjê homnuj týx nê. Nà kot paj axte mẽ hwýr mẽ hkwýjê rē. Nom hpãnhã mẽ ho ohtô nê mẽ kurê. Kê mẽ ohtô nê mẽ hwýr mō nê tã

inhmã inhō hkwý jamý nê man ixwýr o mō.”

—Anhỹr o hamaxpêr hãmri nê mẽ hwýr jajê rē nhũm mẽ ma akupỹm mẽ hwýr mō. Nhũm mẽ amnhĩ wýr mẽ ohtô hã nê mã mẽ ho anê nê mẽ hipêx kati nê nhũm mẽ ý kamã ma õ patrãwja wýr akupỹm mō.

³⁷ Hãmri nhũm tee ri mẽ omu nê hamaxpêr o: “Hêxta waa nê. Tanhmã kot paj amnhĩ nhĩpêx to? Nà kot paj pêr mẽ hwýr ixkraja mãn mẽ. Inhmã hapê htýx tã kot paj mẽ hwýr kumê kê ma mẽ hwýr mō. Hãmri nhũm mẽ kêp ixkra hã omu nê tanhmã ixpê ho hkêt nê. Nê tã inhmã kãm inhōja kwý gō.” Anê.

—Hãmri nê mẽ hwýr kumê nhũm ma mō.

³⁸ Tã hãmri ra mẽ hwýr hpôx o mō nhũm mẽ amým amnhĩ wýr omu nê kêp hkra hã omu nê axtem nê hã axpēn mã amýnê nê axpēn mã: “E oněj hpur nhō dōn krata tē. Koja nhỹrmã õ papaj mýr pé amnhĩm hpur ã pykata pytà nê ho õ. Jakamã kwa pu mẽ hpĩr kurê kumrêx nê kêp hpur ho arĩk nê ho panhō. E tokyj pu mẽ kupĩ ri.” Anê.

³⁹ —Hãmri nhũm ra tē nê mẽ hwýr pōj nhũm mẽ unê nê hpur nê ho kato nê mã ho anê nê kupĩ. ã mẽ ujarēnh kot anhỹr. Anê.

⁴⁰ Nhũm pre ã Jesus mẽ kãm ujarēnh anê. Hãmri nê hã mẽ hkukja nê mẽ kãm:

—E koja pur nhō dōnja hkra jarēnh ma hãmri nê tãm mẽ

hwÿr mō hāmri nē tanhmā mē hipêx to wehe? Anē.

⁴¹ Hāmri nhūm mē kām:

—Nà koja ma akupÿm mē hwÿr mō hāmri nē mē homnuj tÿx nē mē himex pa. Hāmri nē hpānhā nhām hpur ā mēmōjjê rē nhūm mē tā katāt kōt kām āpēnh o pa. Anē.

⁴² Hāmri nhūm Jesus mē kām:

—Tÿ ām hāmri na ka ā mē harēnh anē. Kot mē ho anhÿr mā tām kēnā. Mān ka prem ra Tirtūm kapēr ā kagā htūm kot tanhmā ja jarēnh toja ma? Harēnh kot:

Mē kot kēn o amnhūm ōrkwÿ nhīpêx kaxyw nē kēn maati pumu nē htÿx omnuj ā hkamnhīx nē hkagata. Mē kot hkaga htā nhūm Tirtūm mē kurom mex o kot kēn piitā hakrenh par ā omunh kurê kumrēx. Tirtūm kot kēn maati mex ā harēnh xwÿnhhta mē pamā mex o mex.

Ā Tirtūm kapēr ā kagā htūm kot ja jarēnh kot anhÿr.

⁴³ Ja pyrā nē na pre ra Tirtūm amnhī kaxyw mē apē Ijaew xunhwÿ. Mē apē hkra nē hkōt mē ate amnhī nhīpêx kaxyw amnhī kaxyw mē axunhwÿ. Tā ka mē axtem nē hkaga. Te mē kot kēn maati pumunh nē mex kēt ā hkamnhīx nē hkagata pyrāk. Jakamā koja mē apānhā Ijaew kēt xwÿnh kwÿjê xunhwÿ nhūm mē arom hkōt amnhī nhīpêx mex o pa. Jao ra mē kēp hkra nē. Anē.

⁴⁴ Nhūm pre ā Jesus mē kām te kēp kēn maati pyrāk o mē kām amnhī jarēnh anē. Hāmri nē axte amnhī tā kuxi nē mē kām axte kēn jarēnh pyrāk ā amnhī jarē nē mē kām:

—Nà kot kaj mē atō ixkaga hāmri nē te mēhō htÿx htēm nē kēn pumunh kēt nē hāhtēk nē tēm pyrāk o amnhī nhīpêx. Jao ixkutā amnhī xām. Rÿ ka tanhmā ajamexpēr to nē ixkaga nhūm te kēn maati kot anhīpy tēm nē axōm par pyrāk o anhīpêx ka mē amex kēt kumrēx. Anē.

⁴⁵ Nhūm pre ā mē kām ujarēnh kām mē harēnh anē. Hāmri nhūm patre krāhtūmjē mē Parijew nhō xwÿnhjaja tee ri amnhī tā kuma

⁴⁶ nhūm ja mē kēp omnuj tÿx jakamā nhūm mē kām unēnh nē haxār prām nē. No mē ām amnhī tā kām mē kot mar o kuhē xwÿnhjē puma nē. Mē kurom Jesus kēp Tirtūm nhÿ hā kapēr xwÿnh ā hkamnhīx jakamā nhūm mē kām mē uma nē. Hāmri nē kormā tanhmā ho hkēt nē.

22

Pahi kot hkra hprō kaxyw hkwyjê hwÿr ā harēnh

Rukre 14.15-24; mǎānēn Wam Korīt 6.9-11; Epes 5.5-6; Apokarip 19.7-8

¹⁻² Tā nhūm Jesus axte mē kām awjarē. Ijaew kot Tirtūm kaga hā mē kām hā kuxi nē awjarē nē mē kām:

—E pa mē amā ahpÿnhā mē kot Tirtūm kapēr mar nē tanhmā amnhī nhīpêx to xwÿnhjē jarē ka mē inhma. Te mē kot pahihti kot hkra

hprō kaxyw nhūm kot amnhī wŷr hkwyjê hwŷr nhūm mē kot harēnh mar nē ahpŷnhā tanhmā amnhī nhīpēx to xwŷnhjaja kot amnhī nhīpēx pyrāk. Koja pahihtija hkra hā hkīnh nē hā apkur mex kaxyw amnhī wŷr hkwyjê hā karō.

³ Hāmri nhūm kām mē àpēnh xwŷnhjaja ra kot amnhī wŷr mē hā karō xwŷnhjê hwŷr mra nē mē kām nojarēt nhūm mē kuma nē ām mē kuma nē axtem nē mē kēp hitōt nē. Hāmri nhūm mē tee ri mē kuma nē akupŷm tē nē pahihtija mā mē harē.

⁴ –Hāmri nhūm tee ri amnhī tā mē harēnh ma nē hpānhā mē hwŷr axtem kām àpēnh xwŷnh kwŷjê rē nhūm mē ma mē hwŷr mra nē mē kām: “Pa. E kwa mē tokyx. Na ra pahihtija mē akutēp mēō nhīpēx pa. Na mē mōx kwŷ hpa nē ho àr mex nē. Nē mē akutēp mēmoj nhīpēx par jakamā e kwa mē tokyx nà.” Anē.

⁵ ā mē kām kapēr anhŷr tā nhūm mē kuma nē ām mē kuma nē ma ahpŷnhā nhŷhŷm mra. Nhūm ja ma àpēnh mā mra nhūm ja ma ihpur kām àpēnh mā ma tē nhūm ja ma nhŷhŷm mēmo to wēnē ho tē.

⁶ Nhūm mē hkwyjaja mē kām ujarēnh xwŷnhjê pynē nē mē htak o mē kupa.

⁷ –Hāmri nhūm pahihtija mē harēnh ma nē àhkurē nē. Hāmri nē mē hwŷr pōristi hkwyjê rē nhūm mē ma mē hwŷr mra nē mē unē nē mē kupa nē mē ō krī hā hpōk pa.

⁸ Hāmri nhūm pahihtija kām mē àpēnh xwŷnh kwŷjê mā kām: “Kwa ra ixte mē kutēp mēō mex kwŷ xunhwŷr tā nhūm mē ixwŷr mrar kēt nē. Ixtŷx ho mē mex ā mē hkamnhīx nē amnhī wŷr mē hā karō no mē mex kēt. Mē kot mē ixkutā apkur mā tām kēt.

⁹ E kwa mē ma krī hkōt axtem mē hkwyjê japēr o mra. Nē nhŷri mēhō pumu nē kām awjarē kē man ixwŷr tē nē ixkra hā hkīnh nē mē ixkutā apku. Mē ā mē kām axujarēnh o amrar anē.” Anē.

¹⁰ –Hāmri nhūm mē kuma nē ma mē hapēr o mra nē mē piitā mē kām anhŷr o mra. Nhūm mē kuma nē wam tajē rom ma mē hkōt mrar kurē kumrēx. Mē kot amnhī to mex xwŷnhjaja nē mē kot amnhī tomnuj xwŷnhjaja hāmri piitā ma mē hkōt mra. Hāmri nē ixkreja wŷr mra nē hwŷr gjēx kaxyw nhūm mē kām mē ê mex gō nhūm mē hagjê hāmri nē kormā mē apkur xà hā ixkre hwŷr agjē nē ho nŷt pa.

¹¹ Hāmri nhūm pahihtija mē hwŷr axà nē mē piitā mē omu. Nhūm ja pixi nē axtem nē hkwyjê hkīnhā mē kot kām ê mex nhōrja jaxàr kēt rāhā axà nē apkur o nhŷ.

¹² Hāmri nhūm tee ri ja hā omu nē hwŷr tē nē kām: “Pa. Tk. Kwa na htem ixkrem gjēx kaxyw nē mē kot mē kām mē ê mex nhōr jagjê nē rī kormā hwŷr agjē nē apku. Tā mon ka akwyjê hkīnhā haxàr kaga? Kwa na htem ā amnhī nhīpēx anhŷr kēt nē.” Anhŷr

o kãm kapêr nom nhũm kuma nê ãm kuma nê tanhmã kutã kãm nê hkêt nê. ãm htýx apkur o nhý.

¹³ Jakamã nhũm tee ri omu hãmri nê hã mẽ kot kãm àpênh xwýnhjê mã amýnê nê mẽ kãm: “E mẽ hwýr tẽ nê unê nê hpa nê hte hpre nê ma o tẽ nê kamãt kô kamã amê. Kê tee ri mur nê amnhĩ xà htýx kamã hamak o amnhĩ nham o axpênh kamnhar týx kapry ho nõ nê rĩ amnhĩ pumu.” Anê. Hãmri nhũm mẽ kuma nê kãm ho anê. ã mẽ ujarênh kot anhýr. Anê.

¹⁴ Nhũm pre Jejus ã mẽ kãm ujarênh anê hãmri nê mẽ kãm:

–Nà Tirtũm kot pahihtita pyrã nê amnhĩ wýr mẽ ho ohtô nê mẽ hwýr tã na hte mẽ piitã hkôt amnhĩ xunhwýr kêt nê. Jakamã na hte ãm mẽ ho grêre nê amnhĩ wýr mẽ ho api. Anê.

Parijew nhõ xwýnh kot Jejus kamã hamak ã mẽ harênh Makre 12.13-17; Rukre 20.20-26; mããnênh Rõmã 12.1, 13.7

¹⁵⁻¹⁶ Tã nhũm Parijew nhõ xwýnhjaja ã Jejus kot mẽ kãm ujarênh anhýrja ma hãmri nê kurũm kato nê tanhmã hkukamã axpênh mã hã ãmnênh to. Hãmri nê hwýr mẽ hkwyjê mẽ Erox kôt mẽ pa xwýnh kwýjê rê. Hêx rom mẽ kot mẽmoj tã hkukjêr kaxyw hwýr mẽ kurê nhũm mẽ ma hwýr mra nê omu nê kãm:

–Kwa Jejus. Nà ãm hãmri na ka hte Tirtũm kapêr o mẽ ahkre mex o ri apa nê mẽ kamã akahak o apa hkêt

nê. Mẽ kot tanhmã ato kapêr punuj to htã ka aprĩ hã mẽ ahkre mex o ri apa.

¹⁷ E kwa mẽ inhmã mẽmoj jarê. Rõm nhõ pahihtiti kot mẽ pahpê Ijaew mẽ pahte kãm kãxpore hkwy nhõr ã mẽ pamã karõta. Kwa xà ja amã mex nà? Xà kot pu mẽ kãm hkwy gõ? Nà xà kot pu mẽ kãm õr kêt nê? E kwa mẽ inhmã tanhmã ja jarênh to. Anê.

¹⁸ Nhũm prem ã hêx rom àhkukjêr anhýr tã no nhũm ra mẽ hamaxpêr ã mẽ omu nê mẽ kãm:

–Tk. Kwa mon ka mẽ ã axêx rom ja hã ixkukjêr anê?

¹⁹⁻²⁰ E mẽ atõ inhmã kãxpore htýxre hõ gõ pa omu. Anê.

Hãmri nhũm mẽ kãm ja gõ nhũm kupy nê kãnhmã mẽ kãm kupê nê mẽ kãm:

–E mẽhõ nhĩxi nê mẽhõ karõ na ja hã? Anê.

²¹ Hãmri nhũm mẽ kãm:

–Pahi Sesti karõ nê hixi na hã. Anê.

Hãmri nhũm mẽ kuma nê mẽ kãm:

–Tý. Tô kêr ka mẽ mãmrĩ kãm hkwy nhõr o apa. Hã hkarõ nê hã hixi. Tãm kot hipêx xwýnh jakamã õ na. No mẽ kajaja na pre Tirtũm mẽ anhĩpêx nhũm mẽ apê õ jakamã kwa kêr ka mẽ kapêr kôt pix mã ri amnhĩ nhĩpêx o ri apa. Anê.

²² Hãmri nhũm mẽ amnhĩ jaêr pẽ ã kot kãxpore jarênh anhýrja ma nê axte kãm tanhmã nê hkêt nê. Hãmri nê akryk omu hãmri nê ma akupým mra.

Akupÿm mē htīr ā mē harēnh

Makre 12.18-27; Rukre 20.27-40; Juāw 5.21, 6.39-40; māānēn Wam Korīt 6.14, 15.12-28; Wam Tesarōn 4.13-18

²³ Tā nhūm Satusew nhō xwÿnh kwÿjaja mē kot akupÿm mē htīr kēt ā mē hkamnhīx kēt xwÿnhjaja na pre mē. Na pre htem mē htyk nē mē hapēx kumrēx ā mē hkamnhīx jakamā axpēn mā tanhmā Jejus jarēnh to nē axpēn mā:

—E kwa pu mē hwÿr mra nē mēmoj xih̄tÿx ā hkukja. Kē mē pama nē tee ri tanhmā mē pamā kapēr to hkukamā hamaxpēr kaprÿ. Kē mē piitā ja hā omu nē àhpumunh kēt ā omunh kurē kumrēx. E tokyx pu mē hwÿr.

Anhÿr jakamā Parijew nhō xwÿnhjē pyrā nē hēx rom ma hwÿr mra nē hkukja nē kām:

²⁴ —Pa Jejus? Kwa mē inhmā mēmoj jarē. Na pre finat Mojesja Tīrtūm nhÿ hā ā mē panhīgētjē mā karō anē. Mē hkra hkēt rāhā mē pa nē mē htyk xwÿnhjaja nhūm mē harēnh o:

Koja mēhō hprō nē kamā hkra hkēt rāhā pan ty. Hā koja hkōt htōja hpānhā hprō ho hprō nē kamā hkra. Hāmri nhūm kato nē te kēp htō htyk xwÿnhhta hkra pyrāk. Anē.

Ā na pre Mojesja Tīrtūm nhÿ hā mē kām karō anē.

²⁵ Jakamā kwa ga mē ixu-jarēnh ma. Koja mē kot axpēn to htō xwÿnhjaja kēp 7. Nhūm

kot waja hāmri hprō nē wa pa nhūm kamā hkra hkēt rāhā ty. Nhūm hkōt htōja hpānhā ho hprō

²⁶ nē wa axpēn to pa. Nhūm māānēn kamā hkra hkēt rāhā ty. Nhūm htō hōta haxwÿja hpānhā tām o hprō nē we wa axpēn to pa grire nhūm haxwÿja kamā hkra hkēt rāhā ty. Hāmri nhūm htō hkwyjaja ni pyxi nē axpēn pānhā ho hprō hpa no mēhō kamā hkra hkēt rāhā htyk pa.

²⁷ Hāmri nhūm mē hprōta mē hkōt amnhī to hitep nē ty.

²⁸ Tā Tīrtūm kot akupÿm nhÿrmā mē ho htīr ronhÿx nhÿ nhÿx kēp nija mjēn kumrēx? Ra piitā kot ho hprō kēnā. E mē inhmā ja jarē. Anē.

²⁹⁻³⁰ Hāmri nhūm Jejus mē kuma nē mē kām:

—Nà kaxkwa kamā mē kot amnhī nhīpēxja axtem na. Mē htīr ri mē kot Tīrtūm kōt amnhī xunhwÿr xwÿnhjaja na htem ty hāmri nē Tīrtūm nhō krī kamā axte kām hprō hprām kēt nē pa. Jakamā hprō hkēt nē pa. Rÿ ni japēr nē mjēn kēt nē pa. Nom ri kām mjēn rÿ hprō hprām kēt nē pa. Hāmri nē Tīrtūm kapēr o mē wrÿk xwÿnhjē pyrā nē axte htyk kēt nē. Ām htīr tūm rāhā nē pa ho pa. Pēr mē ate Tīrtūm kapēr ā kagà htūm mar mex kēt jakamā na ka mē ā ja hā ixkukjēr anē. Tīrtūm àhpumunh tÿx o àhpumunh tÿx jakamā kumā mē ate mēmoj tā ixkukjēr xwÿnhhta na tanhmā kēp kute hkēt. Ra ja kukamā àhpumunh

tỳx kênã.

³¹⁻³² —Nom mẽ ate akupỹm mẽ htĩr kêt ã mẽ hkamnhĩxja kot paj ixprĩ hã mẽ amã harẽ. Amnepêm na pre Tĩrtũm pĩ hpõkja kamã tanhmã Mojes mã kapër to. Mãn ra mẽ ate mar. Na pre kãm:

Ixpê Apraãw nhõ Tĩrtũm na pa. Nẽ mãânẽn ixpê Apraãw kra Ijak mẽ htãmnhwỳ Jako wa õ Tĩrtũm na pa.

Anhỹr o Mojes mã amnhĩ jarẽ nhũm kuma nẽ hã kagã. Kêp apu arĩ mẽ htyk rãhã nhỹx pre ã mẽ harẽnh anhỹr kêt nẽ. Nhỹx pre mẽ harẽnh o: “Amnepêm Apraãw nẽ hkra nẽ htãmnhwỳ mẽ htĩr ri ixpê mẽ õ Tĩrtũm na pa pre.” Anhỹr o nhỹx pre mẽ harẽ. Nom na pre ã amnhĩ jarẽnh anhỹr kêt nẽ. Mẽ pamã te Apraãwja mẽ htyk nẽ mẽ hapêx pyrãk. Nom nhũm prem ra Tĩrtũm ri ra akupỹm htĩr nẽ mex nẽ pa ho pa. Tã ka htem Tĩrtũm kapër kwỳm ri akupỹm mẽ htĩr kêt ã mẽ harẽnh o apa.

Anhỹr o Satusew nhõ xwỳnhjê mã kapër.

³³ Hãmri nhũm mẽ kot mar o kuhê xwỳnhjaja amnhĩ jaêr pê kot mẽ ahkreja ma.

*Tĩrtũm kapër maati jarẽnh
Matêwre 10.37; Makre
12.28-34; Rukre 10.25-28;
mãânẽn Wam Juãw 5.3*

³⁴ Tã nhũm Parijew nhõ xwỳnhjaja Satusew nhõ xwỳnhjê jarẽnh ma. Mẽ kot tee ri kãm hamaxpër o Jejus jakrenh prãm kaprỳ hã mẽ harẽnhja ma hãmri nẽ xpẽn

wỳr akuprõ nẽ Jejus wỳr mra. Kot mẽ urãk nẽ hêx rom àhkukjêr nẽ hamaxpër o hakrenh kaxyw hwỳr mra.

³⁵ Hõja kêp Tĩrtũm kapër tũm o mẽ ahkre o mẽ pa xwỳnh jakamã hêx rom kamã hamak kaxyw kãm kapër nẽ kãm:

³⁶ —Kwa Jejus. Ot pa mẽ awỳr mra. Kwa mẽ inhmã mẽmoj jarẽ. Na pre Tĩrtũm ahpỹnhã mẽmoj to 10 nẽ hã mẽ pamã karõ. Mẽ pahte hkõt amnhĩ nhĩpêx kaxyw hã mẽ pamã karõ. Tã nhỹ kapër na mex o kot hkwy jakrenh wehe? Anê.

³⁷ Hãmri nhũm kuma nẽ mẽ kãm:

—Nà kot mẽ pamã hã karõ kot:

Kêr ka mẽ anhĩ piitã ho amã Tĩrtũm kĩnh tỳx o apa. Mẽ amã hkĩnh tỳx o mẽmoj piitã hakrenh par o apa.

³⁸ E Tĩrtũm kot mẽ pamã hã karõ ja na mex o piitã hakrenh par.

³⁹ Nẽ hkõt ja:

Kêr ka mẽ amã akwỳjê hã ma ho te ka amã amnhĩ tã ma pyrãk. Jao ra tãm mẽ hipêx.

⁴⁰ ã Tĩrtũm kapër ã kagã htũm kot mẽ pamã hã karõ kot anhỹr. ã mẽ pahte amnhĩ nhĩpêx anhỹr o papaja na Tĩrtũm kãm hprãm tỳx kumrêx. Kot kaj mẽ ja wa hkõt amnhĩ nhĩpêx rãhã ho ri apa nẽ mãânẽn ra Tĩrtũm kot mẽ pamã mẽmoj tã karõ xwỳnh piitã hkõt amnhĩ nhĩpêx. Ja na pre Mojes mẽ Tĩrtũm nhỹ hã kapër

xwÿnhjaja amnepê m Tîrtûm nhÿ hã mē panhîgêjtê mã hã karô ho pa. Anê.

Jejus kot amnhî tâ mē hkukjêr ã harênh

Makre 12.35-37; Rukre 20.41-44; mãânên Rômân 1.3-4

⁴¹ Nhûm Parijew nhô xwÿnhjaja arî Jejus mar o kuhê nhûm amnhî tâ tanhmã mē hkukjêr to. Nom te nhâm mēhō hã mē hkukjêr pyrāk o mē hkukja nē mē kãm:

⁴²—E mē inhmã mēmoj jarê. Tanhmã na ka htem axpên mã Tîrtûm kot mē akaxyw âm mã xwÿnhta jarênh to? Kêp mēhō kanrêhã htâmnhwÿ koja wehe? Anê.

Hâmri nhûm mē kãm:

—Nà koja kato nē kêp pahi finat Tawi kanrêhã htâmnhwÿ koja.

⁴³ Anê nhûm Jejus mē kuma nē mē kãm:

—Tÿ. Âm hãmri na ka mē harê. No mo na htem axpên mã kêp pahi Tawi hkanrêhã htâmnhwÿ pix ã harê nē mãânên kêp ô pahihti hã harênh kêt nê? Tawi na pre Tîrtûm Karô nhÿ hã tanhmã harênh to nē harênh o:

⁴⁴ Na pre Tîrtûm inhô Pahihti mã ã kapêr anê nē kãm: “E amnê ixwÿr tē nē inhîhkô hã nhÿ nē inhmã mē ho amnhîptâr o akrî. Kot paj mē kot kãm akurê xwÿnh piitã mē unênh pa nē awÿr mē o mra nē anhîhkram mē haxâr pa.” Anhÿr o pre kãm kapêr.

⁴⁵ ã Tawija Tîrtûm kot Kris mã kapêr jarênh nē kêp ô pahi hã kagà anê. Mē kajaja na ka htem âm kêp Tawi tàmnhwÿ pix ã axpên mã harênh o ri apa. No kêt Tawija na pre kêp ô Pahihti hã harênh o pa. Anê.

⁴⁶ Hâmri nhûm mē kuma nē tee ri kot tanhmã kutã kãm kapêr to hkukamã hamaxpêr nē axte mēmoj tâ hkukjêr kêt nê. Tanhmã kot mē amnhî to nē hamaxpêr o hakre? Na prem tee ri kãm hamaxpêr o hakrenh prâm kaprÿ. Jejus mēmoj piitã hkukamã àhpumunh tÿx o àhpumunh tÿx.

23

Jejus kot tanhmã Parijew nhô xwÿnhjê jarênh to

Makre 12.38-40; Rukre 11.43-46, 20.45-47

¹ Tã nhûm Jejus mē ixte hkôt ixpa ho ixpa xwÿnhjê mē mē kot mar o kuhê xwÿnhjê mã kapêr nē mē inhmã tanhmã Parijew nhô xwÿnh mē Mojes kapêr o mē ahkre xwÿnhjê jarênh to nē mē inhmã:

²—Nà Parijew nhô xwÿnh mē Tîrtûm kapêr tûm o mē ahkre xwÿnhjaja na htem hprî hã Tîrtûm kapêr ã kagà htûm mar mex nê.

³ Jakamã kêr ka mē mar tÿx nē mē kot ho mē ajahkre kôt amnhî nhîpêx. No mē kot amnhî nhîpêxja kêr ka mē hkôt amnhî nhîpêx kêt nê. Mē kot Tîrtûm kapêr tûm o mē ajahkre htã hkôt amnhî nhîpêx kêt nê.

⁴ Te mē kot mēhō kot mē katut ã mē kãm mē jênh

pytĩ janhôr tâ no âm mẽ kuxwar hkwy htur kêt kot amnhĩ nhĩpêx pyrâk o na htem amnhĩ nhĩpêx o pa. Jao mẽ amã mẽmoj tâ karõ nẽ mẽ amã: “E kêt ka mẽ ã amnhĩ nhĩpêx anẽ nẽ ã amnhĩ nhĩpêx anẽ.” Anhÿr pix o mẽ amã kapêr o pa. Nom mẽ tãmjaja amnhĩ kapêr kôt amnhĩ nhĩpêx kêt nẽ.

5 —Na htem hkwyjê kot mẽ omunh nẽ mẽ kot amnhĩ to mex ã mẽ harênh kaxyw mẽ noo mã tanhmã amnhĩ nhĩpêx to. Nẽ mẽ mẽ noo mã mẽ ê mex pix kãm pa. Nẽ amnhĩm Tĩrtũm kapêr ã kagà htũm kwý hã kagà nẽ amnhĩ nhõkrã hã hanhõ nẽ amnhĩ pa hã hanhõ nẽ hã pa. Mẽ kot hã nohtÿx rãhã hã mẽ hkamnhĩx kaxyw nhũm htem ã amnhĩ nhĩpêx anhÿr o pa. Nẽ mẽ kãm mẽ piitã mẽ kot amnhĩm mẽ rũnh ã mẽ harênh o paja nhũm htem kãm hprãm.

6 —Nẽ mẽ pahpê Ijaewjê nhõ Tĩrtũm kapêr o mẽ ahkre xà hã ixkre kamã mẽ kot amnhĩ to rũnh xwÿnhjê hkrĩ xà mex pix kamã kãm hkrĩ hprãm. Nẽ mẽmoj tâ mẽ apkur xà mex ã arĩgro hã nhũm htem ma mẽ apkur xà hã ixkre hwÿr akuprõ nhũm mẽ kot amnhĩ to rũnh xwÿnhjê hkrĩ xà mex pix kamã kãm hkrĩ hprãm.

7 Nẽ nhÿri pry hã mra nhũm mẽ kot mẽ omunh nẽ mẽ kêp mẽ ahkre xwÿnh maati hã mẽ hã hpijaàm kãm tanhmã mẽ kãm kapêr mex toja nhũm htem kãm hprãm.

Ã na hte Parijew nhõ xwÿnh mẽ Tĩrtũm kapêr tũm o mẽ ajahkre xwÿnhjaja hêx rom mẽ anoo mã amnhĩ nhĩpêx anhÿr o pa.

8-10 —No mẽ kajaja. Kêr ka mẽ ho mẽ urâk kêt nẽ. Kê mẽ axpên mã mẽ ajarênh o: “Pahi Maati” anhÿr o mẽ ajarênh kêt nẽ. Rÿ mẽ ajarênh o: “mẽ ijahkre xwÿnh maati” anhÿr o axpên mã mẽ ajarênh hkêt nẽ. Kêt paxipix na pre Tĩrtũm mẽ akaxyw ixãm jakamã paxipix na ixpê mẽ anhõ Pahi Maati. Nẽ paxipix na ixpê mẽ ajahkre xwÿnh maati. No mẽ kajaja ixkôt mẽ apê axpên to atõx nẽ atõ na ka mẽ.

—Nẽ kêr ka mẽ ri axpên jarênh o: “Mêpahpãm” anhÿr kêt nẽ. Kêt kaxkwa kamã na Mêpahpãmja.

11-12 —Nẽ kot ka mẽ amnhĩ to rax prãm xaj tanhmã amnhĩ to jarkrar to ho apa htã no nhũm akwÿjaja ama nẽ âm ama nẽ akôt hamaxpêr kêt nẽ. No kot kaj mẽ piitã mẽ kutã tanhmã anojarêt to ho apa nhũm mẽ amnhĩ tâ mẽ apumu nẽ axpên mã mẽ amex ã mẽ ajarê. Jakamã kot kaj mẽ amã mẽ piitã mẽ kot mẽ amex ã mẽ ajarênh prãm hãmri nẽ ri mẽ piitã mẽ kãm tanhmã amnhĩ nhĩpêx to pẽ mẽ kutã anojarêt rãhã ho ri apa. Anẽ.

Jejus kot mẽ hkwyjê mã kapêr tÿx ã harênh

Makre 12.40; Rukre 11.39-52, 20.45-47

13-14 Tã nhũm Jejus hpãnhã Parijew nhõ xwÿnh mẽ Tĩrtũm kapêr tũm o mẽ ahkre

ho mẽ pa xwỳnhjê mã kapêr. Nê mẽ kãm kapêr kãm hihtỳx nê mẽ kãm:

—E mẽ apê Parijew nhõ xwỳnh mẽ Tirtũm kapêr tũm o mẽ ahkre xwỳnhjaja. E mẽ inhma. Kot kaj mẽ amex kêt nê. Mẽ apê mẽ no kupyw xwỳnh na ka mẽ. Nê mẽ amã Tirtũm kôt amnhĩ nhĩpêx prãm kêt. Nê nhỹrmã atyk nê mẽ amã õ krĩ hwỳr axàpir prãm kêt. Nê akwỳjaja kot hwỳr àpir pymaj na ka htem akwỳjê nê tanhmã mẽ kãm axêx to ho apa. Mẽ kot mẽ apyrà nê Tirtũm kapêr kwỳm amnhĩ nhĩpêx prãm xàj na ka htem amnhĩ mẽ tanhmã mẽ kãm axêx to ho ri apa. Jao te mẽ ate mẽ kêp Tirtũm nhõ krĩ hwỳr kahêxà kahê htỳx pyràk o apa.

15 —Nê mẽ akwỳjaja kot mẽ akôt amnhĩ xunhwỳr nê mẽ akôt amnhĩ nhĩpêx prãm xàj na ka htem ma awry hã nhỹhỹm tanhmã mẽ kãm ri axujarênh to ho ri apa. Jakamã nhũm mễhõ mẽ ama nê mẽ akôt amnhĩ xãm hãmri nê ra amnhĩ tomnuj tỳx o mẽ ajakre. Jakamã koja mẽ nhỹrmã mẽ apyrà nê ma mẽ kot amnhĩ xà htỳx kamã hamak tũm xàta wỳr pa. Jakamã kwa mẽ o kora. Kot kaj mẽ amex kêt nê.

16 —Hêxta waa nê. Mẽ apê Parijew nhõ xwỳnhjê mẽ mẽ apê Tirtũm kapêr tũm o mẽ ahkre xwỳnhjaja kot kaj mẽ amex kêt kumrêx. Na ka htem mẽ kêp mẽ hikàxpore jamỳnh prãm xàj atỳx ri tanhmã mẽ ahkre hto ho apa

nê mẽ kãm: “Kot kaj mẽ ãm hãmri mẽmoj tã amnhĩ jarênh kaxyw hãmri nê Tirtũm mã amnhĩ jarênh xà hã ixkre nhĩxi jarênh kôt mễhõ mã amnhĩ jarê nhũm ama nê hamaxpêr o: ‘Ko. Apu ãm hãmri na inhmã amnhĩ jarê rỳ ko na apu ãm amnhĩ to hêx.’ Anhỹr o hamaxpêr. Nom kot kaj mẽ ixkreta ho mex kaxyw mẽ kãm kàxpore hkwy gõ hãmri nê ate mẽ kãm õr xàta jarênh kôt ãm hãmri mẽmoj tã mễhõ mã amnhĩ jarê. Hãmri nhũm ama nê hamaxpêr o: ‘Nà ãm hãmri na ã inhmã amnhĩ jarênh anê. Kot ixkre ho mex kaxyw kàxpore hkwy nhõr kôt ã amnhĩ jarênh anê. Jakamã na amnhĩ to hêx kêt nê.’” Anhỹr o hamaxpêr. Na ka htem ã mẽ ahkre ho apa anê.

17 Nom mẽ ate mẽ ahkreta mex kêt. Pêr mẽ ajamaxpêr mexti hã. Tirtũm mã amnhĩ jarênh xà hã ixkreta mex o ixkre ho mex kaxyw kàxpore nhõrta jakrenh. Tã ka htem axtem nê mẽ kot kãm kàxpore nhõrta mex o ixkre jakrenh ã harê. No mẽ pahte ãm hãmri mẽmoj tã amnhĩ jarênh nê aa paxêx kêt rãhã ho papaja na Tirtũm kãm hprãm.

18 —Nê na ka htem mẽ kêp mẽ hikukrêx jamỳnh prãm xàj ã atỳx ri mẽ ahkre anê nê mẽ kãm: “Kot kaj mẽ ãm hãmri mẽmoj tã amnhĩ jarênh kaxyw nê Tirtũm mã mẽmoj nhõr xà hã mễstija jarênh kôt mễhõ mã tanhmã amnhĩ jarênh to. Hãmri nhũm mẽ ama nê hamaxpêr o: ‘Nà ãm hãmri na inhmã amnhĩ jarê

rỳko na apu ãm inhmã amnhĩ to hêx.' Anhÿr o hamaxpêr. Nom kot kaj mẽ Tirtũm mã mẽmoj nhõr xà hã mêtija ã kãm mẽmoj xi. Hãmri nê ra mẽ ate kãm õr xàta jarênh kõt ãm hãmri mẽmoj tã mēhõ mã amnhĩ jarê. Hãmri nhũm ama nê hamaxpêr o: 'Nà ãm hãmri na ã inhmã amnhĩ jarênh anê. Kot Tirtũm mã mẽmoj nhõr ã amnhĩ jarênh kõt kot amnhĩ jarênh anhÿr jakamã na amnhĩ to hêx kêt nê.' Anhÿr o hamaxpêr." Anê. Na ka htem ã mẽ ahkre anê.

¹⁹ Mẽ ajamaxpêr kêt xwÿnh na ka mẽ. Tirtũm mã mẽmoj nhõr xà hã mêtija na mex o mẽ kot hã kãm mẽmoj nhõrta jakrenh. Tã na ka htem axtem nê mẽ kot hã kãm mẽmoj nhõrta mex o mēsti jakrenh ã harê.

²⁰ Nom Tirtũm mã mēsti mẽ mẽ kot hã kãm mẽmoj nhõrta te kot axpên pyræk jakamã kot kaj mẽ mêtija jarênh kõt mẽmoj tã amnhĩ jarê nê mãânên mẽ ate hã Tirtũm mã mẽmoj xirja jarênh kõt amnhĩ jarê. Hamẽ wa kot axpên pyræk jakamã hamẽ wa harênh pê amnhĩ to axêx kêt nê. Jakamã kêr ka mẽ mẽmoj tã amnhĩ jarênh kaxyw nê hamẽ wa harênh kõt ãm hãmri mẽmoj tã amnhĩ jarê nê ho axêx kêt nê.

²¹ Tã kot kaj mẽ ãm hãmri amnhĩ jarênh ã mẽmoj tã amnhĩ jarênh kaxyw nê Tirtũm mã amnhĩ jarênh xà hã ixkre hkõt hã amnhĩ jarê nê mãânên Tirtũm kêp ixkre hpãm kõt hã amnhĩ jarê.

Jakamã kêr ka mẽ hamẽ wa harênh pê amnhĩ to axêx kêt nê.

²² —Nê kot kaj mẽ ãm hãmri amnhĩ jarênh ã mẽmoj tã amnhĩ jarênh kaxyw nê kaxkwa jarênh kõt amnhĩ jarênhja o mãânên kaxyw kaxkwa kamã Tirtũm krĩ xà maati hkõt amnhĩ jarê. Nê mãânên Tirtũm kõt amnhĩ jarê. Jakamã kwa hamẽ wa harênh pê amnhĩ to axêx kêt nê.

²³ —Hêxta waa nê. Mẽ apê Parijew nhõ xwÿnh mẽ mẽ apê Tirtũm kapêr tũm o mẽ ahkre xwÿnhjaja kot kaj mẽ amex kêt nê. Mẽ ate mẽ no kupyr xwÿnh na ka mẽ. Na ka htem Tirtũm kapêr piitã hkõt amnhĩ nhĩpêx kêt nê ãm hkwy kõt pix mã amnhĩ nhĩpêx o ri apa. Na ka htem ãm kapêr o hpÿnhre nê hkõt amnhĩ nhĩpêx ã amnhĩ pumu nê ate amnhĩ to mex xwÿnh ã amnhĩ jarênh o apa. No Tirtũm kãm hprãm xà piitã hkõt amnhĩ nhĩpêx kêt nê. Mẽ ate tãm mẽ hipêx nê mẽ ho mex nê mẽ kamã axukaprĩ hã kot mẽ amã karõja. Nê mẽ amã Tirtũm kĩnh ã kapêr kõt amnhĩ nhĩpêx hã karõja ra mẽ ate mar tã hkõt amnhĩ nhĩpêx kêt nê. Mẽ ate kapêr piitã hkõt amnhĩ nhĩpêx ronhÿx ja mẽ amã mex o mex.

²⁴ Mẽ ate ãm kapêr o hpÿnh nê hkõt amnhĩ nhĩpêx jakamã te mẽ ate atÿx ri tanhmã axàpkur to ho mẽ akrĩ pyræk. Jao te mẽ axàpkur xà hã mẽõ kamã pure pumunh nê nê hanhir nê rênh tã mãânên kamã kên

rax pumunh tâ nê hanhir nê rênh kêt rãhã hkur pyrãk. Jao Tirtũm kapêr o hpÿnhre nê hkôt amnhĩ nhĩpêx no piitã hkôt amnhĩ nhĩpêx kêt nê. Pêr mē ajamaxpêr kêt tâ na ka htem atÿx mē ahkre ho ri apa.

25 —Hêxta waa nê. Mē apê Parijew nhõ xwÿnh mē mē apê Tirtũm kapêr tũm o mē ahkre xwÿnhjaja kot kaj mē amex kêt nê. Mē ate mē no kupyx xwÿnh na ka mē. Nã mē apê Parijew nhõ xwÿnhjaja te mē ate mē kot apkur kaxyw prat kre kuhõnh punuj tâ mex ã harênh nê kamã apkur pyrãk o na ka mē. Jao ãm mē akrãhkã rũm pix mã mē amex. Nê mē noo mã te mē amex pyrãk no mē anhõxãhkre kaxwÿnh kãm mē ajamaxpêrja mex kêt. Mē akapêr prãm nê mē axãhkurê nê mē anhõxyÿ.

26 Mē ajamaxpêr mex kêt kênã. Kwa kêr ka mē tãm ajamaxpêr o tãm akwÿjê nhĩpêx o ri apa. Nê axãmnhĩx ri mē kêp amrakati xwÿnhjê mã mēmoj nhõr o ri apa. Kot kaj mē ã amnhĩ nhĩpêx anê nhũm Tirtũm ja hã mē apumu nê amnhĩm mē amex ã mē ajarê. No na ka htem amã mē amnhĩ to mex prãm xaj ãm tee ri amnhĩ kuhõnh japjê kaprÿ.

27 —Hêxta waa nê. Mē apê Parijew nhõ xwÿnhjê mē mē apê Tirtũm kapêr tũm o mē ahkre ho mē apa xwÿnhjaja kot kaj mē amex kêt nê. Te mē ate mē htykjê jagjênh xã pyrãk. Na htem mē hagjênh

xã ho mex o pa nom kamã mē hi nê ahpunuj pix.

28 Ja pyrã nê ã mē ate amnhĩ nhĩpêx anhÿr. Kapôt rũm mē anhĩja na mex. Te mē ate mē ho mex o apa pyrãk o na ka htem amnhĩ nhĩpêx nhũm mē ãm akrãhkã pix pumu nom ãm mē akrã hi kaxwÿnh kãm mē ajamaxpêr punuj rãhã hã mē apumunh kêt nê. Mē ate tanhmã mē no kupyx to pix kukamã ajamaxpêr jakamã te mē ate mē htykjê jagjênh xã pyrãk.

29-30 —Hêxta waa nê. Mē apê Parijew nhõ xwÿnh mē mē apê Tirtũm kapêr tũm o mē ahkre xwÿnhjaja kot kaj mē amex kêt nê. Mē ate mē no kupyx xwÿnh na ka mē. Na ka htem ma mē hã pika hwÿr apa nê Tirtũm nhÿ hã kapêr o mē pa xwÿnhjê hã pika ho mex. Nê mē kot amnhĩ to mex xwÿnhjê hã pika ho mex. Nê axpên mã mē harênh o: “Hêxta waa nê. Na pre amnepê mē pakukamã mē panhĩgêjtjaja Tirtũm nhÿ hã mē kãm kapêr xwÿnhjê homnuj nê mē kupa. No kêt mē papajaja mē kamã ri papa ronhÿx pu prem mē urãk nê ã mē hipêx anhÿr kêt nê.” Anhÿr o axpên mã mē hkaprĩ ho ri apa.

31-32 Nom ãm amnhĩ to axêx. Mē ate ã amnhĩ nhĩpêx anhÿr o apa kênã. ã mē ate amnhĩ nhĩpêx anhÿr jao ra apê mē hkanrêhã mē hkra kumrêx ã amnhĩ to amnhĩrit mex o apa.

33 Te mē ate kagã xoprê kot mē hkamnhar nê mē hom-

nuj tỳx pyrək jakamã koja Tirtũm nhỹrmã ma mẽ kot amnhĩ xà htỳx kamã hamak tũm xàta wỳr mẽ ajano ka mẽ ma hwỳr ajapêx. Hãmri nẽ tee ri amã ajapôx prãm kaprỳ nẽ rĩ amnhĩ pumu.

34 –Kot paj nhỹrmã ma mẽ awỳr inhỹ hã ixkapêr jarênh o mẽ pa xwỳnh kwỳr rẽ. Nẽ inhỹ hã mẽ àhpumunh xwỳnh kwỳr rẽ. Nẽ ixkapêr o mẽ ahkre xwỳnh kwỳr rẽ. Nom kot kaj mẽ âm mẽ kapêr ma nẽ apê mẽ hprãm nõkati nẽ tanhmã mẽ homnuj tỳx to ho apa. Nẽ ixpê mẽ hkwỳjê hpar o apa. Jao pĩ kahpa hã mẽ hanhôt o mẽ hkwỳjê hpa. Nhũm mẽ hkwỳjaja Tirtũm kapêr o mẽ ahkre xà hã ixkre kamã mẽ ahkre ho hkrĩ ka mẽ omu nẽ mẽ unê nẽ ixkreja kamã mẽ htak. Hãmri nhũm mẽ apymaj nhãm ahpỹnhã krĩ hkwỳ hwỳr hprôt nẽ mra. ã kot kaj mẽ inhỹ hã ixkapêr jarênh xwỳnhjê nhĩpêx anhỹr o apa.

35-36 Na prem ra mẽ himex rax nẽ. Amnepêm panhĩ kator krax rũm Atãw kra Apewta na pre Tirtũm nhỹ hã kapêr o pa nhũm htõja kãm mar prãm kêt nẽ kupĩ. Tã nhũm Tirtũm axte mẽ hwỳr ỹ hã kapêr o mẽ pa xwỳnh kwỳjê rẽ nhũm prem mã mẽ ho anẽ nẽ mẽ hkwỳjê nhĩmex. Nhũm pre xatã mẽ hwỳr mẽ hkwỳjê rẽ nhũm mẽ xatã mẽ kupa. Apew rũm Parakis kra Jakaris wỳr na prem mẽ himex rũnh nẽ. Hãmri nhũm prem Tirtũm mã amnhĩ jarênh xà hã ixkre kamã Jakarisja pĩ. Tã mẽ

kajaja mẽ ate mẽ urək nẽ mẽ amã Tirtũm kapêr mar prãm kêt nẽ mẽ urək nẽ amã Tirtũm nhỹ hã kapêr xwỳnhjê nhĩmex prãm nẽ. ã mẽ ate mẽ anhĩgêjtjê pyrà nẽ mẽ hipêx anhỹr mỳrapê koja Tirtũm mẽ apê mẽ hkanrêhã mẽ hkra nẽ mẽ htãmnhwỳjaja mẽ ato hpimràatã tanhmã mẽ ato htỳx to ka mẽ amnhĩ xà htỳx kamã ajamak rãhã ho ri apa. Anẽ.

Jejus kãm Jerujarẽ nhõ xwỳnhjê japê htỳx ã harênh

Rukre 13.34-35; mããnẽn Rõmãn 11.25-27

37 Hãmri nhũm Jejus te ra kot Jerujarẽ nhõ xwỳnhjê pumunh nẽ mẽ kãm kapêr pyrək o tanhmã kapêr to ho xa. Nẽ mẽ kãm:

—Hêxta waa nẽ Jerujarẽ nhõ xwỳnhjaja. Tirtũm kot xatã mẽ awỳr ỹ hã kapêr jarênh xwỳnhjê rênh nhũm mẽ kot mẽ akôt mẽ amã kapêr jarênh o pa htã ka mẽ kapêr mar kêt kumrêx. Nẽ axtem nẽ kên o mẽ htak o mẽ himex o apa. ã na ka htem amnhĩ tomnuj o apa anẽ. Tã nom arĩ inhmã mẽ ajamãr o ri ixpa hprãm. Te ho krãhyre kot nore hpro nẽ ho hikwỳ pyrək o na pa inhmã mẽ anhĩpêx prãm nẽ. Nom mẽ amã ixprãm nõkati nẽ mẽ ate ixkaga kumrêx.

38 Mỳrapê koja Tirtũm mẽ anhõ krĩ jamãr kêt nẽ.

39 Kot paj tokyx ty nẽ mẽ apiitã mẽ are nẽ ma akupỹm api ka mẽ axte ixpumunh kêt nẽ. ãm akupỹn ixwrỳk xà hã arĩgrota pix ã koja

mê akwỳjaja mê amỳrpê krī ja kamā ixpôx ã ixpumu. Hāmri nê mê akurom ixpumu nê hkīnh tỳx nê. Nê tã ixkôt amnhī xunhwỳr kurê kumrêx. Hāmri nê axpên mã ijarênh o:

Ota Tirtûm kot mê pahwỳr mēnh xwỳnhhta wrỳ. Nà ãm hāmri na mê pahwỳr wrỳ. Ja mex o mex.

Koja mê ã axpên mã ijarênh anê. Anê.

24

Jejus kot mê pakukamã mēmojarênh

Makre 13.1-13; Rukre 21.5-19; mãânên Wam Ximotre 4.1-3; Sikûn Ximotre 3.1-9; Apokarip 6.1-17

¹ Tã nhũm Jejus Tirtûm mã amnhī jarênh xà hã ixkre rũm kato nê ma tē. Pa mê ixte hkôt ixpa ho ixpa xwỳnhjaja kormã ixkreja pumunh o ixkuhê nê kãm harê nê kãm:

—Kwa Pahihti. Hêxta waa nê. Ixkreja ãm mex kumrêx. Anê.

Hāmri nhũm mê inhmã:

² —Tỳ mex nom koja nhỹrmã mê kãm Tirtûm kurê xwỳnhjaja grành pa. Koja arī kên õ axkrutre nê axpên mỳnh nê nōr kêt nê. Koja piitã anhgrà nê ahpỳnhã ri hikwỳ. Anê.

³ Hāmri pa mê kuma nê tee ri hkukamã ijamaxpêr. Hāmri nhũm Jejus ma tē nê hixêt pê Oriwêhti hã api nê hã nhỹ pa mê ma hkôt mra nê mê kot ã ixkre nhĩpêx anhỹrta ã hkukja nê kãm:

—Kwa xà ãm hāmri koja mê ã ixkreta nhĩpêx anê? Kwa mê inhmã aprī hã harê. Xà koja mê nhỹrmã ho anê nà? Xà koja mê tokyx ho anê? Nê akupỳn mê ixwỳr awrỳk nhũm mēmojarênh piitã hapêxja. Kwa mēmojarênh koja we wỳj ri tanhmã amnhī nhĩpêx to wehe? Anê.

⁴ Hāmri nhũm mê inhmã hprī hã tanhmã mēmojarênh kot amnhī nhĩpêx to hkukamã ujarênh o nhỹ nê mê inhmã:

—Nà nhỹrmã mēmojarênh piitã hapêx kaxyw tanhmã amnhī nhĩpêx toja kumrêx kot paj mê amã harê ka mê inhma. Nà koja mê ohtō nê mê awỳr mra nê hêx rom te pa ixte amnhī nhĩpêx pyrãk o amnhī nhĩpêx o mê akôt pa.

⁵ Nê mê amã amnhī jarênh o: “E Tirtûm na pre mê awỳr inhmê. Ixpê kaxkwa rũm ixwrỳk xwỳnhhta na pa.” Anhỹr o mê akôt mê amã amnhī to hêx o pa. Jao ohtō nê mê nokupyr o pa.

⁶ —Nê koja mê nhỹri awry hã axpên par o pa nê mê atã axpên par o pa. Nom kêr ka mê harênh ma nê ri tokyx mēmojarênh piitã hapêx ã hkamnhĩx kêt nê. Kormã mēmojarênh piitã hapêx xà hã arĩgroja kormã.

⁷ Koja mēmojarênh piitã hapêx kaxyw nhũm ahpỳnhã ri pika piitã hkôt mê pa xwỳnhjaja pika hō nhõ xwỳnhjê kutã kuhê nê pijapu ho kuhê. Jao ra axpên par o pa. Hāmri nhũm nhỹri pika hkwỳ htertet tỳx kumrêx. Nê mê hpur kãm mēōja hapêx nhũm

mê kām prām tỳx nē pa. Jakamā nhūm mê ohtō nē prām xàj axkaprā.

8 Nom ja kormā mēmoj hapêx kaxyw krax pix na. Te ho mēnijē hō hpijagri kaxyw nē kormā kawax pê ôhy xà pyràk.

9 —Nē koja mê piitā ixkôt mê akamā gryk nē kām mê akuré htỳx o pa. Nē mê awỳr mra nē ixtā mê apynē nē mê atomnuj tỳx nē mê apa.

10 Jakamā koja mê kot ixkôt amnhī xunhwỳr xwỳnh kwỳjaja mê umaj tee ri amnhī kukamā hamaxpēr hāmri nē ixkaga. Nē ixkôt mê kām axpēn tā amỳnē nē axpēn kām gryk o pa.

11 Nhūm nhỹri mê hkwỳjaja Tirtūm nhỹ hā kapēr jarēnh xwỳnh ā amnhī to hēx o pa. Jao mê ohtō nē mê nokupyr o pa.

12 Koja mê ā amnhī nhīpêx anhỹrja o ra piitā kām axpēn kamā ukapri hkēt o pa.

13 Koja mê ā ixtā mê atomnuj o pa anē. Tā nom kēr ka mê amnhī to htỳx nē ixkaga hkēt nē. Mē kot mê apar tā ka mê kaxkwa kamā akupỳm atir kurē kumrēx.

14 —Nē kot kaj mê apē ixkwỳjaja ma krī piitā hkôt Tirtūm kapēr o mê ahkre ho apa. Mē kot amnhī tomnuj kaga nē ixkôt amnhī xunhwỳr nhūm Tirtūm kot ja hā mê omunh nē mê ho hkra hā mê kām harēnh o ri mê piitā mê hkôt apa. Kot kaj mê piitā mê kām ijarēnh pa pa rī kormā akupỳn mê awỳr wrỳ. Anē.

Mē pahtomnuj tỳx xwỳnh maati hā harēnh

Makre 13.14-23; Rukre 21.20-24; määnēn Sikūn Tesarōn 2.3-4

15 Nhūm Jejus arī mēmoj kukamā mê inhmā kapēr nē mê inhmā:

—Amnepēm Tirtūm nhỹ hā kapēr xwỳnh finat Tāniewja na pre tanhmā mê atomnuj tỳx xwỳnh maati ja jarēnh to. Tā koja nhỹrmā ra kot harēnh xà hkôt axtem nē Tirtūm mā amnhī jarēnh xà hā ixkre hwỳr axà nē Tirtūm xām xà kamā xa. Ka mê ja hā omu hāmri nē mê kot krī grānh par ā hkamnhīx kurē kumrēx.

16 Koja ā amnhī nhīpêx anē ka mê amỳm amnhī wỳr mê omu hāmri nē ajapōj nē ma aprōt nē amrar kurē kumrēx. Mē apē jar pika pê Jutej kamā mê apa xwỳnhjaja kaj mê omu hāmri nē mê kot mê apar pymaj aprōt nē ma amrar kurē kumrēx.

17 Rỳ ka mê anhōrkwỹ hkrāmnēnh o akrī japēr nē amỳm amnhī wỳr mê omu nē akukrēx wỳr axār nē hō hpyr mā ajamaxpēr kēt nē. Ām wrỳ nē aprōt nē ma atēm kurē kumrēx.

18 Rỳ ka mê apur kām axapēnh o apa japēr nē amỳm mê omu hāmri nē akupỳm anhōrkwỹ hwỳr axē jamỳnh kaxyw atēm kēt nē. Ām mê umaj aprōt nē ma atēm kurē kumrēx.

19 —No mê htujarō nē mê hkra karāre xwỳnhjaja koja mê kēp mēmoj omnuj tỳx nē. Tanhmā kot mê amnhī to nē mê umaj hprōt tỳx? Nà pika

ja kamã koja mẽ mex kêt o mex kêt. Mẽ kot amnhĩ tomnuj mÿrapê koja Tĩrtũm tanhmã mẽ homnuj tÿx to.

20 —Nẽ kwa kêr ka mẽ amnhĩ to Tĩrtũm wÿ kê ã mẽ kot amnhĩ nhĩpêx anhÿr xã hã arĩgroja na wrÿk pê ã amnhĩ nhĩpêx anhÿr kêt nẽ. Rÿ mẽ hkôt xã hã arĩgro pê sap ã ã amnhĩ nhĩpêx anhÿr kêt nẽ.

21 —Nẽ ã mẽ kot amnhĩ nhĩpêx anhÿr ã arĩgroja ã koja mẽ piitã amnhĩ xã htÿx kãm hamak tÿx kumrêx. Amnepêm Tĩrtũm kot pika ho kator krax rũm amnẽ mẽ pa xwÿnhjaja kormã aa kot ã amnhĩ xã htÿx kamã hamak anhÿr kêt tã arĩgroja ã koja mẽ amnhĩ xã htÿx kumrêx kamã ama. Hãmri nẽ axte pika ja kamã ã amnhĩ xã htÿx kumrêx kamã hamak anhÿr kêt nẽ.

22 Kop apu Tĩrtũm kot mẽ kot amnhĩ xã htÿx kamã hamak xã hã arĩgro hkwy ho gri hkêt ronhÿx ka mẽ apiitã apikaprãr pa. Ja pymaj koja mẽ amã ho gri. Kot ra amnhĩ kaxyw mẽ arênh xwÿnhjê japê xaj mẽ amã ho gri.

23-24 —Tã ã mẽmoj kot amnhĩ nhĩpêx anhÿr jakamã koja mẽmojaja tanhmã mẽ amã ixto hêx to nẽ mẽ amã: “Ota ra Kris akupÿn wrÿ. Kwa mẽ hwÿr mra nẽ omu.” Anẽ. Rÿ mẽ amã: “Krisja krĩ mũj kamã na raa. Kwa mẽ ma hwÿr mra nẽ omu.” Anhÿr o mẽ amã ixto hêx o pa. Rÿ mẽ awÿr mra nẽ mẽ amã amnhĩ to hêx nẽ mẽ amã: “E. Ot pa ixpê Kris ã mẽ awÿr wrÿ. Tĩrtũm na

mẽ awÿr inhmẽ pa wrÿ.” Anẽ. Rÿ mẽ amã: “E ixpê Tĩrtũm nhÿ hã ixkapêr xwÿnh na pa mẽ awÿr mõn pøj.” Anhÿr o mẽ amã amnhĩ to hêx. Hãmri nẽ mẽ anokupyr kaxyw mẽ amã aa mẽ kot mẽmoj pumunh kêt kwÿ ho anhÿr o pa. Tĩrtũm kot amnhĩ kôt mẽ arênh xwÿnhjaja kãm mẽ ate ja hã mẽ omunh nẽ mẽ gryk ã ixkaga hprãm xaj koja mẽ ã mẽ anoo mã amnhĩ nhĩpêx anhÿr o pa. Nom ãm ã amnhĩ nhĩpêx anhÿr kaprÿ ka mẽ ixkaga hkêt nẽ.

25 —E kwa mẽ inhmar tÿx nẽ. Na pa ra ixprĩ hã ã mẽ kot amnhĩ nhĩpêx anhÿrja kukamã ã mẽ amã mẽmoj jarênh anẽ. Tã kêr ka mẽ amnhĩ nẽ ã mẽ kot amnhĩ to hêx anhÿr o mẽ pa xwÿnhjê pumunh mex o apa nẽ axkãm ajamak rom.

26 Rÿ koja mẽ tanhmã mẽ amã ixto hêx to nẽ mẽ amã: “Ota Tĩrtũm kot mẽ pahwÿr mẽnh xwÿnhnta kapôt ã mõn pøj. E mẽ tokyx ma hwÿr mra nẽ omu.” Anhÿr o mẽ amã ijarê ka mẽ ama nẽ ãm mẽ ama nẽ hwÿr amrar kêt nẽ. Rÿ nhũm mẽ amã: “Ota hitom kãm xa. E mẽ mamrĩ hwÿr agjê nẽ omu.” Anẽ no ka mẽ ãm mẽ ama nẽ ãm mẽ ama nẽ hwÿr agjêx kêt nẽ.

27 Kot paj nhÿrmã akupÿn mẽ awÿr ixwrÿk kaxyw hãmri nẽ ixpimxur kãm ixwrÿk kêt nẽ. Koja pika piitã hkôt mẽ pa xwÿnhjaja anhĩpê ixwrÿk kãm ixpumu. Te mẽ piitã anhĩpê mẽ kot na haxênh pumunh pyrãk o kot kaj mẽ anhĩpê api-

itã ixpumu.

²⁸ Te nhÿri mēmoj kro nē nōr nhūm nhōnhti kot omunh nē hã htor nē hpinhpanh nhūm mē piitã hã omunh pyrãk o kot paj amnhĩ nhĩpêx. Anē.

Jejus akupÿn wrÿk xwÿj ri mēmoj kukamã harēnh

Makre 13.24-31; Rukre 21.25-33; määnēn Wam Tesarōn 4.16-17

²⁹ Nhūm Jejus arĩ mē ixte hkôt ixpa ho ixpa xwÿnhjê mã kapêr nē mē inhmã:

—Nē kot paj akupÿn mē awÿr inhnojarêt nhūm rĩ Tirtūm kaxkwa kamã tanhmã mēmoj nhĩpêx to. Kapêr ã kagã htūm kot tanhmã ja kukamã harēnh to nē harēnh kot:

Koja Tirtūm kaxkwa ho àk nhūm kanhêti piitã rôrôk pa nhūm myyti ahtyk nhūm mytwrÿre urãk nē axte hpôk kêt nē. Anē.

³⁰ Koja ã mēmoj amnhĩ nhĩpêx anhÿr pa hãmri pa kaxkwa hã mē amã mēmoj nhô. Hãmri nhūm pika piitã hkôt ri mē pa xwÿnhjaja piitã omu nē tee ri amnhĩ kukamã hamaxpêr o hkaprĩ nē mÿr rax kumrêx. No mē kajaja kot kaj mē omu hãmri nē akupÿn mē awÿr ixwrÿk nē mē ato amnhĩptâr mã ajamaxpêr kurê kumrêx. Kot paj kakrã kamã hirã htÿx kãm akupÿn ixihÿtÿx kãm mē awÿr wrÿ.

³¹ Hãmri nē Tirtūm kapêr o mē wrÿk xwÿnh maati mã anē nhūm pifti kakô hãmri nhūm hkwyjaja kuma nē ma mē awÿr pika piitã hkôt anhrã

nē ma mra nē inhmã mē ato akuprô. Ixte amnhĩ kaxyw mē axunhwÿr xwÿnhjê o akuprô nē man akupÿn ixwÿr mē ato hapêx. Anē.

Jejus kot mēmo pâr o ejêp jarēnh

Makre 13.28-31; Rukre 21.29-33

³² Nhūm Jejus arĩ mē inhmã kapêr nē mē inhmã:

—E ka mē pĩ hpâr mÿj pumu. Na hte mēmo mytwrÿ hã rã nhūm mē omu nē ô hkukamã hamaxpêr kurê kumrêx.

³³ Ja pyrã nē koja ã ixte mēmoj jarēnh anhÿr xwÿnhja amnhĩ nhĩpêx par mē ka mē omu nē akupÿn mē awÿr ixwrÿk mã ajamaxpêr kurê kumrêx. Kot paj te ra mē anhôrkwÿ kapem ixãm pyrãk o amnhĩ nhĩpêx.

³⁴ Nom akupÿn ixwrÿk kêt ri koja ã mē kot mēmoj kot amnhĩ nhĩpêx anhÿr pumunh xwÿnhjaja kormã piitã htyk kêt ri pa akupÿn wrÿ.

³⁵ —Nē koja nhÿrmã pika nē kaxkwa wa hapêx pa. Tã no ãm ixkapêrja koja wa urãk nē aa hapêx kêt nē. Koja ãm rãhã ho rãhã. Kot paj aa ihkjê ho tanhmã mēnh to hkêt nē. Anē.

Mē pahte akupÿn Jejus wrÿk xã hã arÿgro pumunh kêt ã mē pajarēnh

Makre 13.32-37; Rukre 12.37, 17.26-30, 17.34-36; määnēn Wam Tesarōn 5.2

³⁶ Nhūm Jejus arĩ mē inhmã kapêr nē mē inhmã:

—Nē ixte akupÿn mē awÿr ixwrÿk xã hã arÿgroja mē ate omunh kêt. Nē kaxkwa

kamã Tirtũm kapêr o mẽ wryk xwýnhjaja haxwýja kot ja pumunh kêt. Nê ijaxwýja ixpê Tirtũm Kra htã ixte ja hã amnhĩ pumunh kêt. ãm inhõ Papaj pix na kot ja pumunh.

37 —Nê kot paj nhýrmã man akupýn mẽ awýr wry. Akupýn mẽ awýr ixwryk xà hã arĩgrota ã koja mẽ htýx ri amnhĩ tomnuj o pa. Te amnepêm Noehti kormã htĩr ri mẽ pa xwýnhjaja kot htýx ri amnhĩ tomnuj o pata pyrãk.

38 Na pre htem amnhĩ kaxyw Tirtũm mã hamaxpêr kêt nê. ãm jar mẽ kot amnhĩ nhĩpêx pix kukamã hamaxpêr kêt pix mã amnhĩ nhĩpêx o pa. Rôm nhũm Noehtija gô htãm pymaj pãr rax nhĩpêxta mã axà.

39 Nhũm mẽ ja hã omu nê ãm omu nê tanhmã ri amnhĩ kukamã hamaxpêr to hkêt nê. Hãmri nhũm naja mẽ haêr pê wry nê wryk rax o mẽ hanhir pa. Tã akupýn ixwryk xà hã arĩgroja ã koja mẽ htýx ri ã amnhĩ nhĩpêx anhýr o paja o pa mẽ haêr pê naja pyrã nê akupýn wry.

40 —E kot paj mẽ amã nhýrmã akupýn ixwryk nê tanhmã mẽ anhĩpêx to hã amnhĩ jarê. Te kot ja pyrãk. Koja mẽmyjê hõ wa hamẽxkrut nê hpur kãm àpênh o xa. Nhũm hõja ra ixkôt amnhĩ xãm nhũm hõja ixkôt amnhĩ xãm kêt japêr. Hãmri pa amnhĩ wýr ra kot ixkôt amnhĩ xãm xwýnhnta o api nhũm kot ixkôt amnhĩ xãm kêt xwýnhnta hpur kãm

ahte arĩ xa. Hãmri nê tee ri hkrãmnhwý japêr rĩt o xa.

41 Rý nhũm mênijê wa hamẽxkrut nê harôj kahuk o xa. Nhũm hõja ra ixkôt amnhĩ xãm nhũm hõja ixkôt amnhĩ xãm kêt japêr. Hãmri pa amnhĩ wýr kot ixkôt amnhĩ xãm xwýnhnta ho api nhũm kot ixkôt amnhĩ xãm kêt xwýnhnta tee ri hkrãmnhwý japêr rĩt o xa hãmri nê hamaxpêr rax kumrêx. Kot paj nhýrmã akupýn wry nê ã mẽ anhĩpêx anê.

42 Tã mẽ ate akupýn ixpôx xà hã arĩgro pumunh kêt jakamã kwa kêr ka mẽ ijamãr rãhã ho ri apa.

43 Na htem htýx ri nhýri tanhmã amnhĩ nhĩpêx to ho pa nhũm mẽ kêp àhkĩnh xwýnh mẽ ôrkwý hwýr agjê nê mẽ kêp ahkĩ.

44 Tã mẽ ate akupýn ixwryk xà hã arĩgro pumunh kêt jakamã kwa kêr ka mẽ ixwakre kamã te mẽ apê mẽ ôrkwý nhõ dõn kot amnhĩ nhĩpêx pyrã nê atýx ri tanhmã amnhĩ tomnuj to ho apa hkêt nê. Ixkutêp axkãm ajamak rom nê ri apa. Jao tãm ixkutêp amnhĩ nhĩpêx rãhã ho ri apa. Anê.

Mẽ kãm mẽ àpênh mex xwýnhjê jarênh

Rukre 12.41-48

45 Nhũm Jejus arĩ mẽ inhmã kapêr nê mẽ inhmã:

—E koja mẽ kãm àpênh xwýnhjê hõ àpênh mex o pa hãmri nhũm ô patrãw àpênh ã omu hãmri nê ma nhýhým mõi kaxyw nê ìhkram mẽmoj

piitã haxàr pa nê kãm: “E kêr ka ixwakre kamã inhmã inhôrkwy tãnopxar mex nê. Nê inhmã mẽ àpênh xwýnhjê mã mẽ apkur xà nhôr o apa.” Anhÿr o kãm mẽmoj tã karõ hãmri nê kato nê ma nhÿhÿm mẽ.

⁴⁶ Hãmri nhũm kot kãm àpênh mex xwýnhja wakre kamã kãm àpênh mex o pa. Jakamã nhũm õ patrãw akupÿn hpôx o mẽ nhũm amnhĩ wÿr harênh ma nê hkĩnh nê. Nê tee ri amnhĩ kukamã hamaxpêr o kãm uma hkêt nê. Kot wakre kamã kutêp kãm àpênh mex jakamã tee ri tanhmã amnhĩ kukamã hamaxpêr to hkêt nê.

⁴⁷ Jakamã nhũm õ patrãwja akupÿn pøj nê kot kãm àpênh mex ã omu nê hkĩnh nê. Hãmri nê kot kãm õ mẽmoj piitã hamãr o pa kaxyw ìhkram haxàr pa.

⁴⁸ No koja axtem nê wakre kamã kãm àpênh mex kêt japêr. Nê hamaxpêr o: “Tk. Nã koja tokyx akupÿn môr kêt nê.” Anhÿr o hkamnhĩx.

⁴⁹ Hãmri nê wakre kamã kãm mẽ àpênh xwýnhjê htak nê pipãnh pix o pa. Nê kãm kagôxyhti xành xwýnhjê kôt pix mã pa.

⁵⁰ Hãmri nhũm õ patrãwja haêr pê akupÿn pøj nê tee ri ja hã omu.

⁵¹ Hãmri nê kamã gryk tÿx nê tanhmã homnuj htÿx to nê kãm mẽ àpênh punuj xwýnhjê mẽ mẽ ho hpimràatã amnhĩ nê mẽ kator pa. Hãmri nê mẽ kot kapêr kwÿm amnhĩ nhĩpêx xwýnhjê mẽ mẽ ho

hpimràatã tanhmã mẽ homnuj to nê amnhĩ nê mẽ kator. Hãmri nhũm mẽ tee ri amnhĩ kukamã hamaxpêr nê mur nê tee ri amnhĩ nhĩpêx. Tã kêr ka mẽ ixwakre kamã ho mẽ urak kêt nê. Mẽ kurom ixwakre kamã ixkapêr kôt amnhĩ nhĩpêx mex rãhã ho ri apa. Anê.

25

Kormã mẽ mjên kêt xwýnhjê ho 10 nê mẽ harênh

Wam Tesarôn 5.1-3

¹ Nhũm Jejus arĩ mẽ inhmã kapêr nê mẽ inhmã:

—Nê mẽ ate Tĩrtũm kôt amnhĩ nhĩpêx o mẽ apa xwýnhjaja kêr ka mẽ akupÿn amnhĩ wÿr ixkãm ajamak rom nê ri apa. Nom mẽ kêp Tĩrtũm prãm nõkati xwýnhjaja koja mẽ akĩnhã ãm htÿx tanhmã amnhĩ to pix kukamã hamaxpêr o pa. Te kormã mẽ mjên kêt xwýnhjaja kot amnhĩ nhĩpêxta pyrak. E pa mẽ amã tanhmã mẽ harênh to ka mẽ inhma. Koja kormã mẽ mjên kêt xwýnhjêp 10jaja ma hkrãmnhwÿ mjên mã xwýnhjê kutã pry hã mra. Amnhĩ kôt kanê jamÿ nê o mra nê kutêp pry nhĩkrep hkrĩ.

²⁻⁴ Nhũm mẽ kêp 5jaja hkwyjê rom amnhĩ kukamã hamaxpêr mex nê kanê kaxyw amnhĩ kôt orti hkwy ho mẽ. No nhũm mẽ kêp 5 nê mẽ hkĩnhã ãm htÿx kanê pix jamÿ nê o mra.

⁵ Hãmri nê mẽ mjên mã xwýnhjaja kutêp axpên mã kapêr o hkrĩ. Nhũm tokyx

htêm kêt nhũm mẽ kutêp hkrĩ nê gaa nê ra ôt xwa nê gaa nê hikwỹ nê ra ôt pa.

6 –Tã nhũm kôt ã kamàt hãmri nhũm mjên mã xwỹnhta hpôx o tẽ. Hãmri nhũm kot hkukamã harênh xwỹnhja mẽ ôt o mẽ hikwỹ xwỹnhjê mã amỹra nê mẽ kãm: “Kwa mẽ hãmri. Ota mjên mã xwỹnhta tẽ. Mẽ tokyx kãnhmã akrĩ pu mẽ kutã mra.” Anẽ.

7 Hãmri nhũm mẽ hkrã hapôj nê kanê hpôk.

8 Nom nhũm mẽ hkwyjê hkĩnhã õ kanê kaxyw orti ho pa hkêt xwỹnhjaja ra mẽ kêp mẽ kanêja hkaprỹ hpa nhũm mẽ tee ri kot hpôk kaxyw. Hãmri nê orti hkwy hã hkwyjê hwỹ nê mẽ kãm: “Xê mẽ inhmã orti ho inhõ kanê go.” Anẽ.

9 Nom nhũm mẽ kêp nê nê mẽ kãm: “Ma mẽ inhõ kanê kamã orti grire kênã kot pa kêt mẽ amã ho go. Xê mẽ tokyx ma mra nê nhỹri amnhĩm hkwy japrô mẽ.” Anẽ.

10 Hãmri nhũm mẽ tee ri mẽ kuma nê ma amnhĩm hkwy japrô mã ma mra.

–Rôm nhũm mjên mã xwỹnhta mẽ hãnh tẽ nhũm kanê kamã arĩ mẽ orti xwỹnhjaja omu nê hã jêt kurê kumrêx. Hãmri nê ma hkôt môn mẽ pikuprõnh xà hã ixkreja wỹr wa hã hkĩnh nê apkur kaxyw gjêx pa nhũm mẽ hã kahê. Mẽ gjêx xà hã oreja ra hwỹr hpôx jakamã nhũm mẽ hã kahê.

11 –Tã nhũm ma mẽ kot orti japrô mã mrar xwỹnhjaja hãmri amnhĩ to hapu nê mra

nê tee ri mẽ hã hakwakre kupê nê htatak nê tee ri mẽ kãm akir nê mẽ kãm: “Xê mẽ inhmã kahê xà mẽ pa mẽ awỹr agjê.” Anẽ.

12 Hãmri nhũm hprô mã xwỹnhta mẽ kuma nê mẽ kãm: “Tk. Nà ixte mẽ apumunhre hã kot pa kêt mẽ amã kahê xà mẽ. Kwa mẽ ma akupỹm mra.” Anẽ. ã mẽ ujarênh kot anhỹr. Anẽ.

13 Nhũm pre ã Jejus mẽ inhmã ujarênh anẽ. Hãmri nê mẽ inhmã:

–E kêr ka mẽ te kot amnhĩ kôt orti hkwy ho mör xwỹnhjaja kot amnhĩ nhĩpêx pyrãk. Mẽ ate akupỹn ixwryk xà hã arĩgro pumunh kêt jakamã kêr ka mẽ apkati mẽ ixkamã ajamak rãhã ho apa. Anẽ.

Mẽ kãm mẽ àpênh xwỹnhjê jarênh

Rukre 19.11-27

14 Nhũm Jejus arĩ mẽ inhmã kapêr nê mẽ inhmã:

–E kêr ka mẽ ixwakre kamã inhmã tanhmã amnhĩ nhĩpêx mex to ho ri apa pa hpãnhã mẽ amã amnhĩrer mex nê. Mẽ ate tanhmã inhmã amnhĩ nhĩpêx to ho apa xà hkôt kot paj mẽ amã amnhĩre. Te mēhõ my kot kãm mẽ àpênh xwỹnhjê nhĩpêx pyrãk. Koja nhỹhỹm nojarêt nê kãm mẽ àpênh xwỹnhjê mã hikukrêx piitã hkaga hpa. Ôrkwỹ nê hpur nê hkrit. ãm mẽmoj piitã mẽ kot wakre kamã kãm hamãr o pa kaxyw mẽ kãm hkaga hpa.

15 Hãmri nê ahpỹnhã mẽ kãm kãxpore hkwy gõ. Mẽ kot kutêp kãm tanhmã ho rũnh

to kaxyw ahpÿnhã mẽ kãm òr pa. Kot kàxpore pumunh mex xwÿnhja mã nhũm ho 5.000 nẽ kugõ. Nẽ kot hkõt kax pê omunh xwÿnhja mã nhũm ho 2.000 nẽ kugõ. Nẽ kormã kot omunh tÿx kêt xwÿnhja mã nhũm ãm ho 1.000 pix nẽ kugõ. Hãmri nẽ mẽ kãm amnhĩ jarẽ nẽ ma nhÿhÿm mõ.

¹⁶ Hãmri nhũm kot ho 5.000 nẽ hamÿnh xwÿnhja kàxporeta py nẽ ma o mõi kurê kumrêx nẽ tanhmã ho àpênh to ho mõi kãm ra hipy axte ho 5.000 nẽ kumẽ.

¹⁷ Nhũm kot ho 2.000 nẽ hamÿnh xwÿnhja mããnh tanhmã ho àpênh to ho mõi kamã ra hipy axte ho 2.000 nẽ kumẽ.

¹⁸ Nom nhũm kot ho 1.000 pix nẽ hpyr xwÿnhja wa hkĩnh ã axtem nẽ ma o tẽ nẽ kãm kakwÿ nẽ kamã haxà nẽ hity hpa nẽ ma akupÿm tẽ.

¹⁹ –Tã nhũm mẽ ò patrãwja akupÿn mõi pøj nẽ mẽ kãm: “E mẽ amnẽ ixwÿr mra nẽ ixte mẽ amã kàxpore ho ixpi-gràn h xwÿnhhta jarẽ. Tanhmã na ka prem ixkutêp inhmã hipêx to?” Anẽ.

²⁰ Hãmri nhũm kot ho 5.000 nẽ hpyr xwÿnhhta kumrêx hwÿr tẽ nẽ kãm: “E ota akàxporeta. Ate inhmã ho 5.000 pix nẽ òr tã pa amã ho rax nẽ amã hipy axte ho 5.000 nẽ kumẽ nhũm ho axkamur nẽ ra ho 10.000. Tã ota.” Anhÿr o kãm kapêr hãmri nẽ kãm kugõ

²¹ nhũm amnhĩm hamÿ nẽ omu nẽ hkĩnh nẽ. Hãmri nẽ kãm: “Nà ãm hãmri na ka inhmã ho anẽ. Ixte amã

ho 5.000 pix nẽ òr tã ka ra inhmã ho rax jakamã kot kaj apê inhmã mẽ àpênh xwÿnhjê hkrãhtũm. E amnẽ ixwÿr axà pu mẽ apku nẽ pahkĩnh.” Anẽ.

²² –Hãmri nhũm hpãnhã kot ho 2.000 nẽ hpyr xwÿnhhta hwÿr tẽ nẽ ò patrãwta mã kãm: “E ota akàxporeta. Ate inhmã ho 2.000 pix nẽ òr tã pa amã ho rax nẽ amã hipy axte ho 2.000 nẽ kumẽ. Tã ota.” Anẽ.

²³ Hãmri nhũm kuma nẽ amnhĩm hamÿ nẽ omu nẽ hkĩnh nẽ. Hãmri nẽ kãm: “Nà ãm hãmri na ka ã inhmã ho rax anẽ. Ixte amã ho 2.000 pix nẽ òr tã ka inhmã ho rax jakamã kot kaj apê inhmã mẽ àpênh xwÿnhjê hkrãhtũm. E amnẽ ajaxwÿja ixwÿr axà pu mẽ apku nẽ pahkĩnh.” Anẽ.

²⁴ –Tã nhũm kot ho 1.000 pix nẽ hpyr xwÿnhhta hapu hã wa hkõt tẽ. Hãmri nẽ ò patrãw mã tanhmã kapêr to nẽ kãm: “Nà ra ixte apumunh tũm. Pêr axàhkurê pix kãm na ka hte apa. Nẽ amã akàxpore ho rax nẽ anhõ ho rax pix kukamã ajamaxpêr o ri apa. Nom mẽ pajaja mẽ ixàpênh rax pix kukwak ri na ka hte akàxpore rax nẽ apa.

²⁵ Jakamã na pa inhmã apyma nẽ. Nẽ akàxporeta py nẽ ma o tẽ nẽ kaxyw kre nẽ kamã haxà. Tã ka akupÿn mõi pøj pa ajarênh ma hãmri nẽ hkapa nẽ man akupÿn amã o tẽ. Tã ota anhõ 1.000ta.” Anẽ.

²⁶⁻²⁷ Hãmri nhũm tee ri kuma nẽ kãm: “Tk. Kwa amã ixpyma nẽ ate ixpumunh mex anhÿr tã na ka ixte amã

kàxpore nhōrta pyr nē ma ho atēm. Nē mē kot mē kēp kàxpore jamÿnh o kuhê xà kamã mē kãm òr nhũm mē ixkutēp tanhmã inhmã ho rax to hkêt nē? Pēr ãm amã kaga nē ate amnhĩ tomnu pix o ri apa xwÿnh.” Anē.

²⁸⁻³⁰ Hāmri nē kēp kàxporeta py nē nhām jam kugō nē kãm: “E amÿ nē o tē nē kot inhmã ho 10.000 nē òr xwÿnh ta mã agō. Hāmri nē jahti pynē nē ma o tē nē kamãt kō kamã amē. Apēnh mexti hã. Koja tee amÿra nē amnhĩ xà htÿx kamã hamak xàj tee ri amnhĩ nham o axpēn kamnhar tÿx kaprÿ nē rĩ amnhĩ pumu.” Anhÿr o kãm kapēr nhũm kuma nē hpa hã kupy nē ma o tē. Hāmri nhũm mē ò patrãwja mē àpēnh xwÿnhjê mã kãm: “E mē ate ixwakre kamã mē axàpēnh mex xwÿnhjaja kot paj ã mē ato mex rax anē ka mē akĩnh nē. Nom mē kot inhmã mē àpēnh mex kêt xwÿnhjaja kot paj mē kēp mēō mēmojta jamÿ nē nhām mēhōm kugō nhũm hkaprĩ nē.” Anē. ã mē ujarēnh kot anhÿr. Anē.

Jejus kot nhÿrmã mē pi-itã tanhmã mē harēnh to hã harēnh

Matêwre 13.35-43, 13.47-50; mãânēn Apokarip 20.11-15

³¹ Nhũm Jejus arĩ mē inhmã kapēr nē mē inhmã:

—Nē kot paj nhÿrmã akupÿn mē awÿr wrÿ nhũm Tirtũm kapēr o mē wrÿk xwÿnh piitã man ixkôt wrÿ. Kot paj wrÿ nē ixpē pahi

maati hã ixkrĩ xà maati kamã inhmex nē nhÿ.

³²⁻³³ Hāmri nē Tirtũm kapēr o mē wrÿk xwÿnhjê mã anē nhũm mē ma krĩ piitã hkôt mē apiitã mē ato pikuprōnh pa nē akupÿn ixwÿr mē ato hapêx. Pa mē apumu nē tanhmã mē axunhwÿr to. Te ôwēhti jamār o pa xwÿnh kot ôwēhti kaēx ã motre pumunh nē nhām nē motre xunhwÿr parta pyrãk.

³⁴ Hāmri nē ixupōk rũm mē ate ixkôt amnhĩ xunhwÿr xwÿnhjê mã ixkapēr nē mē amã: “E mē kajaja kot kaj mē amex kumrēx nē ri apa ho apa. Amnepēm kormã mēmoj piitã hkêt ri na pa pre Inhÿpêēxã mē wa mē akukamã tanhmã ijamaxpēr to nē mē amã mēmoj mex xunhwÿr rũnh nē.

³⁵ Tã ka prem ajapōj hāmri nē ixkôt amnhĩ xunhwÿ nē tanhmã ixto mex to ho ri apa. Na pa pre inhmã prãm nē ixpa ka prem ixpumu nē ixkamã axukaprĩ nē inhmã mēmoj gō pa kuku.

Nē na pa pre inhmã kōr nē ixpa ka prem ja hã ixpumu nē inhmã gō pa ho ixkō nē akupÿm ixihtÿx.

Nē aa mē ate ixpumunh kêt tã ka prem nhÿri ixpumu nē amnhĩ nhōrkwy hwÿr ixwÿ.

³⁶ Nē na pa pre ixê pynajti nē ri ixpa ka prem ja hã ixpumu nē inhmã axê gō pa haxà nē ri hã ixpa.

Ně na pa pre ixà ně inhīkwỹ
ka prem ixwỳr mra
ně ixkane ně tanhmã
ixto mex to pa akupỹm
inhmex.

Nhũm prem ijaxà pa mẽ
hagjênh xà kamã ixkrĩ
ka prem ixwỳr mra ně
tanhmã ixto mex to.

Ã mẽ ate ixto mex anhỹr o ri
apa jakamã nhũm inhõ Papa-
jja ixtã mẽ apumu. Tã koja
ixtã mẽ ato mex rax ně.” Aně.

37 —Kot paj ã mẽ ate tãm
amnhĩ nhĩpêx xwỳnhjê mã
ixkapêr aně. Hãmri ka mẽ tee
ri inhma ně amnhĩ tã ixkukja
ně inhmã: “Kwa xà mẽ pajaja
na pa prem ã ato mex aně?
Nà mẽ ixte ã anhĩpêx anhỹr
kãm amnhĩ pumunh kêt tã na
ka ã mẽ ijarênh aně. Kwa
nhỹri na ka pre amã prãm ně
apa pa prem apumu ně amã
měmoj gõ ka aku? Ně nhỹri
na ka pre amã kôr ně apa
pa prem amã gô hkwỳ ka ho
ixkõ?

38 Ně nhỹri na pa prem
apumu ně amnhĩ nhõrkwỹ
hwỳr awỳ? Rỳ ka pre axê
pynajti ně apa pa prem amã
inhĩnhkã gõ ka hagjê?

39 Ně nhỹri na ka pre axà
ně anhīkwỹ pa prem apumu
ně akane? Ně nhỹri na prem
ajaxà pa mẽ hagjênh xàja wỳr
mra ně kamã tanhmã ato
mex to? Nà mẽ pa hkêt.”
Anhỹr o amnhĩ tã ixkukja.

40 Hãmri pa mẽ amã: “Nà
mẽ kêp amrakati xwỳnhjaja
na pre htem pa pyræk. Tã ka
prem mẽ kamã axukaprĩ hã
tanhmã mẽ kutã anojarêt to
ho ri apa jao te pa tanhmã

ixto mex to ho apa pyræk. ãm
hãmri na ka prem ã mẽ ho
mex anhỹr o ri apa.” Aně. Kot
paj ã mẽ ate amnhĩ to mex
xwỳnhjê mã ixkapêr aně.

41 —Hãmri ně hpãnhã apke
rũm mẽ kot ixkõt amnhĩ
xunhwỳr kêt xwỳnhjê mã
tanhmã ixkapêr to ně mẽ
kãm: “No mẽ kajaja kot
paj ixupøk rũm mẽ unhwỳr
xwỳnhjtajê hkĩnhã mẽ ato mex
kêt ně. Amnepêm na pre
Tĩrtũmja Satanasti mẽ mẽ kot
tanhmã kãm amnhĩ nhĩpêx to
ho mẽ pa xwỳnhjê mẽ mẽ ho
hpimràatã mẽ kaxyw kuwy
rax kumrêxja nhĩpêx. Mẽ kot
amnhĩ tomnuj tỳx mỳrapê
nhỹrmã kamã amnhĩ xà htỳx
kamã hamak rãhã ně pa ho
pa kaxyw. Tã kot kaj mẽ
ajaxwỳja ma mẽ hkõt hwỳr
ajapêx. Mẽ apê Satanasti hkõt
mẽ ate amnhĩ nhĩpêx o apa
xwỳnh jakamã kot kaj mẽ
uràn ma hwỳr ajapêx pa.

42 Aa mẽ ate tanhmã ixto
mex to hkêt. Na ka pre
htem inhmã prãm ně ixpa hã
ixpumu nom inhmã mẽmoj
nhõr kêt ně. Ně inhmã kôr ně
ixpa hã ixpumu nom inhmã
gõ hkwỳ hkêt ně.

43 Ně nhỹri ahte ixpa hã ix-
pumu nom amnhĩ nhõrkwỹ
hwỳr ixwỳr kêt ně. Ně ixê
pynajre ně ixpa hã ixpumu
nom inhmã axê nhõr kêt ně.
Ně ixà ně inhīkwỹ hã ixpumu
nom ixkane hkêt ně. Ně mẽ
kot ijaxàr nhũm arĩ ixkrĩ hã
ixpumu nom ixwỳr amrar ně
tanhmã ixto mex to hkêt ně.
Ã mẽ ate inhĩpêx anhỹr o apa
jakamã e mẽ ma kuwy hwỳr

apa kurê kumrêx.” Anê. Kot paj ã mẽ kãm ixkapêr anê.

⁴⁴ Hãmri nhũm mẽ tee ri inhma nê amnhĩ tã ixkukja nê inhmã: “Kwa nà ã mẽ ijarênh anhÿr kêt nê. Aa mẽ ixte ã anhĩpêx anhÿÿre hã. Nhÿri na pa prem tanhmã akute hã apumu? Nà aa mẽ ixte nhÿri ã ate amnhĩ nhĩpêx anhÿr ã apumunhre hã.” Anê.

⁴⁵ —Koja mẽ ã inhmã amnhĩ tã aprâr anhÿr kaprÿ. Kot paj mẽ kãm: “Nà na ka pre htem mẽ kêp amrakati xwÿnhjê pumu nê ãm mẽ omunh o ri apa nê mẽ kamã axukaprĩ hkêt nê. ã mẽ hipêx anhÿr jao te pa ã inhĩpêx anhÿr pyrãk. Jakamã kwa mẽ tokyx ma kuwy hwÿr ajapêx kurê kumrêx.” Anê. Kot paj ã kuwy hwÿr mẽ hanor anê.

⁴⁶ Hãmri nê hwÿr mẽ rênh pa nhũm mẽ ma hwÿr hapêx nê kamã amnhĩ xà htÿx kãm hamak rãhã nê pa ho pa nê aa kator kêt kumrêx. No kêt mẽ ate tãm amnhĩ nhĩpêx o mẽ apa xwÿnhjaja kot kaj mẽ kurom ma Tĩrtũm mẽ wa inhõ krĩ hwÿr api nê kamã amex nê atĩr tũm nê apa ho pa. Kot paj ã ahpÿnhã mẽ apiitã mẽ anhĩpêx anê. Anê.

Nhũm pre ã Jejus akupÿn wrÿk ã amnhĩ kukamã mẽ inhmã ujarênh anê. Hãmri nê mẽ inhmã ujarênh pa.

26

Mẽ kot Jejus ã àmnênh ã amnhĩ jarênh

Makre 14.1-2; Rukre 22.1-2; Juãw 11.45-53

¹ Tã nhũm Jejus mẽ ixte hkôt ixpa ho ixpa xwÿnhjê mẽ ujarênh pa nê mẽ inhmã:

² —E kot puj mẽ axte pahtã apkati axkrut hãmri nhũm arĩgro pê Pas kato. Jakamã koja mẽ piitã amnepêm Tĩrtũm kot Ejit nhõ xwÿnhjê pê mẽ pakukamã mẽ panhĩgêjtê kator mẽ hamaxpêr nê hã hkĩnh kaxyw Jerujarê hwÿr akuprõ. Kamã koja mẽ ixpynê nê pĩ kahpa hã inhõ nê ixpĩ. Koja mẽ tokyx ã inhĩpêx anê. Anê.

Nhũm pre ã amnhĩ kukamã mẽ inhmã amnhĩ jarênh anê.

³ Rõm nhũm Jerujarê kamã patre krãhtũmjê mẽ Ijaew pigêjtaja patre maati Kajpasja nhõrkwÿ kamã axpên wÿr akuprõ.

⁴⁻⁵ Ra mẽ kãm Jejus pĩr prãm tã mẽ kãm mẽ kot hkôt kapêr mar o pa xwÿnhjê puma nê. Hãmri nê tee ri hamaxpêr nê axpên mã:

—Hêxta waa nê. Tanhmã kot puj wem ho nê kupĩ? Kot puj mẽ pahkĩnh kãm tanhmã ho nhũm mẽ hkĩnh xwÿnhjaja hã mẽ pakamã gryk tÿx nê. Pu mẽ hã axpu nê hã tanhmã axpên to. Jakamã kwa pu mẽ kormã tanhmã ho hkêt nê.

Anhÿr o axpên ma.

Mêhõ ni kot Jejus krã gregrer ã harênh

Makre 14.3-9; Rukre 7.36-50; Juãw 12.1-8

⁶ Tã nhũm Jejus kormã krĩ pê Petãn kamã Simãw nhõrkwÿ kamã apkur o nhÿ. Simãwja na pre hkà kro xapêr tÿx o pa nhũm Jejus ra arĩgro

hõ hã akupÿm hkà ho mex. Hãmri nê akupÿm õ krî hwÿr pøj nê òrkwÿ hwÿr tẽ nê kuri apkur o nhÿ.

⁷ Hãmri nhũm mēhõ nija hpõx ã omu nê hamaxpēr o:

—Ma koja pēr Jejusja pa hã apkati grēre hãmri nê ty. An pa ma hwÿr tẽ nê mēhkuxwa xà ho hkuxwa.

Anê hãmri nê kēn jaka ho kàx kām mēhkuxwa xàja nhũm kumÿ nê ma hwÿr o tẽ. Hãmri nê ho hkrā gregrer nê hã hkapīr pa nê ho hkuxwa hpa. Mēhkuxwa xà hã kàxpore xoh-tô rax tã nhũm ã hã hkapīr par anê.

⁸ Hãmri pa mē ixte Jejus kôt ixpa ho ixpa xwÿnhjaja tee ri ã kot hipêx anhÿr ã omu nê axpēn mã:

—Tk. Kwa na hã mēhkuxwa xàta kapīr pa.

⁹ Kop apu ma kot o htēm nê ho wēnê nê hpānhã kàxpore ho rax kumrēx nê hamÿnh nê ho mē kēp amrakati xwÿnhjê nhīpêx par o nhÿx ja kām mex nê. Kwa mo na we ã amnhī nhīpêx anhÿr kêt nê? Anê.

¹⁰ Hãmri nhũm Jejus amnhī tã mē inhma nê mē inhmã:

—Kwa kot ixto mex kaxyw kēnã na ka mē axtem nê ixtã kām akir.

¹¹ Mē kēp amrakati xwÿnhjaja koja mē arī mē akôt pa rāhã nê. Ka mē amã mēmo arīgro hã tanhmã mē ho ajuta hto hprām nê tanhmã mē ho ajuta hto nê mē kām mēmoj gō. No pa kot paj ri mē akôt ixpa ka mē ixto mex ry ho apa hkêt nê. Kot paj tokyx mē apiitã mē are.

¹² Ixtyk nhũm mē kot ijaxàr kukamã na ã ixkuxwa anê. Am hãmri na ã inhīpêx anê.

¹³ Am hãmri na pa mē amã kot ã inhīpêx anhÿrja jarē. Koja mē krī piitã hkôt axpēn mã ijarēnh ã kagà kamã ijarēnh o pa nê kamã nija kot ã inhīpêx anhÿr kamã harē nê kuma. Anê.

Jut Kariot kot mē kām Jejus ã amnēnh

Makre 14.10-11; Rukre 22.3-6

¹⁴ Tã nhũm Jut Kariotja. Kēp mē ixpê Jejus kôt ixpa ho ixpa xwÿnh pē 12 hõ htã ra tanhmã hamaxpēr to nê axtem nê Satanasti nhÿ hã ma patre krāhtūmjê hwÿr tẽ nê tanhmã Jejus o mē mar to nê mē kām:

¹⁵ —E ot pa mē amã Jejus jarēnh o tẽ. Xà kot paj mē amã hã amÿnê ka mē hpānhã inhmã amnhīre nà? Anê.

Hãmri nhũm mē kuma nê hkīnh nê. Hãmri nê kām:

—Nà kot paj mē amã amnhīre.

Anê hãmri nê kām kàxpore ho 30 nê òr kurê kumrēx nhũm hamÿ nê hkīnh nê kato nê ma tẽ.

¹⁶ Hãmri nê mē kām Jejus pynēnh kaxyw tãnopxar o ri hkôt ri pa. Mē kot mar o ri pa xwÿnhjê hkàx ã unēnh nê ma mē hwÿr o htēm kaxyw.

Jejus kot hkôt mē pa xwÿnhjê kutã apkur

Makre 14.12-21; Rukre 22.7-13; Juãw 13.21-30

¹⁷ Tã nhũm mē hkīnh pē Pasja kato. Amnepēm kormã Ejit kām mē pa ri na pre mē inhīgētjaja ôwēhti hkrare

hkwÿ hpa nê ho anê nê kuku. Tirtûm kot ja hã mē omunh nê Ejit nhõ xwÿnhjê nê mē kator kaxyw nhûm prem ã amnhĩ nhĩpêx anê. Tã mē ixpê mē hkanrêhã mē htàmnhwÿjaja na pa htem arĩ amgrà mē arĩgro pê Pasja ã axpên wÿr akuprõ nê jam ijamaxpêr pê mē uràk nê ôwêhti hkrare hkwÿ pa nê pãwti kaxkrit kêt kãm kuku. Jakamã pa mē ixte Jesus kôt ixpa ho ixpa xwÿnhja wa axkrut nê Jesus wÿr tē nê amnhĩ tã hkukja nê kãm:

—Kwa nhÿri kot paj we wa tē nê mē akutêp Pas ã mē panhõ hã apê? Anê.

18 Hãmri nhûm wa kãm:

—Nà wa mãmri ma Jeru-jarêja wÿr wa tē. Nê krĩm axà nê mēhõ myti pumunh kurê kumrêx nê kãm: “E Jesus na wa inhmē pa wa awÿr tē. Na awÿr hpêr mēnh o: ‘E na pa ra inhnojarêt. Jakamã nhÿri kot paj we ixkôt ri mē pa ho mē pa xwÿnhjê mē Pas ã axpên kutã apku?’ Anhÿr o awÿr hpêr mē.” Anê. E wa ã kãm akapêr anê kê war ama nê war amã ôrkwÿ nhĩmõk ã ixkre rax õ jahkre. Kamã ra kaxyw mē paxàpkur xà hã mēmoj piitãã. Ka wa omu hãmri nê mãmri mē ixkutêp kamã mēmoj tã apê. Anê.

19 Hãmri nhûm wa kuma nê ma Jerujarê hwÿr tē. Nê hwÿr axà hãmri nê ra kot wa kãm mēmoj jarênh xà hkôt mēmoj piitã omu hãmri nê mē ixkutêp mēõ hã àpênh o wa xa.

20 Tã nhûm kamàt pa mē Jesusja kôt ixkreta wÿr ixpôx pa nê hwÿr agjê nê ixàpkur kaxyw ixkrĩ. Mē ixte Jesus kôt ixpa ho ixpa xwÿnhjê pê 12jaja pa mē ixpiitã Jesus kutã ixàpkur o ixkrĩ.

21 Hãmri nhûm Jesus tanhmã mē inhiõ jarênh to nê mē inhmã:

—E pa mē amã mēmoj jarê ka mē inhma. Kot kaj mē atõ mē kãm ixkurê xwÿnhjê nhĩhkram ijaxà. Anê.

22 Hãmri pa mē tee ri kuma nê ixkaprĩ htÿx nê. Hãmri nê axpên pãnhã amnhĩ tã hkukja nê kãm:

—Kwa xà pa? Nà pa hkêt. Kot paj ã anhĩpêx anhÿr kêt kumrêx Pahihti.

Anhÿr o axpên pãnhã kãm amnhĩ tã aprã.

23 Hãmri nhûm mē inhmã:

—Nà ãm hãmri na pa mē amã ixkapêr. Mē ate ixkutã guhkrax kãm anhõ pãwti ho mry kagõ nhek o akrĩ xwÿnhjê hõ kot kaj mē kãm ixtã amÿnê.

24 Tirtûm kapêr ã kagà htûm ra kot ixkukamã harênh xà hkôt koja mē tanhmã ixto rax nê ixpĩ. Nom kot mē kãm ixtã àmnênh mã xwÿnhnta hêxta waa nê. ã kot amnhĩ nhĩpêx anhÿrja mÿrapê koja amnhĩ xà htÿx kãm hamak rax kumrêx. Kop apu aa õ mãmãj nhõxà hkre rûm kator kêt ronhÿx ja kãm mex nê. Anê.

25 Hãmri nhûm Jut Kariot kot mē kãm hã àmnênh mã xwÿnhnta hãmri amnhĩ tã kuma nê kãm:

—Kwa xà we pa Jejus? Xà pa kot paj ã anhîpêx anê? Kwa nà pa hkêt. Anê.

Hāmri nhūm kām:

—Tÿ. Ka ã ate inhîpêx anhÿr mã kênã. Anê.

Jejus kot amnhî kamrô pikapîr kukamã harênh

Makre 14.22-26; Rukre 22.14-23; mãânên Wam Korî 11.23-26

²⁶ Tã nhūm Jejus pãwti hō py nê Tirtūm mã harê nê mẽ inhmã ho hkry nê ho mẽ inhîpêx pa nê mẽ inhmã:

—E na pa ã mẽ amã pãwti ho hkry nê mẽ amã ōr anê. Ja pyrã nê koja mẽ ã inhîpêx anê nê te ixto hkry hpar pyrãk o inhîpêx pa amnhî xà htÿx kamã ijamak kām ty. Nom mẽ anê kot paj ty. E mẽ mãmrî aku.

Anhÿr o mẽ inhmã amnhî jarê pa mẽ kuma nê kot mẽ inhmã ho hkry xwÿnhja ku.

²⁷⁻²⁸ Hāmri nhūm hpãnhã kop py nê mã ho anê nê Tirtūm mã harê nê mẽ inhmã kugō nê mẽ inhmã:

—Mê kot ixpîr xà hã arîgroja ã koja ixkamrô axkapî. Nom koja mẽ amarî ixpîr nhūm amarî ixkamrô hpikapîr kêt nê. ãm paa. Pa kot paj mẽ anê mẽ ïhkram amnhî jaxã nhūm mẽ ã inhîpêx anê nê ixpî. Koja ixkamrô axkapî nhūm Tirtūm omu nê ixkukwak ri mẽ ate ixkôt amnhî xunhwÿr xwÿnhjê nê mẽ ate amnhî tomnuj piitã te amnhî katut kôt rênh par pyrãk o hipêx nê mẽ ato hkra. Ra amnepêm kot ã amnhî jarênh anhÿr xà hkôt. Jakamã e

mê ixkamrô pikapîr mã aja-maxpêr pê wîhti ho akôm o xpênh nhîpêx.

²⁹ ãm hāmri na pa ã mẽ amã amnhî jarênh anê. Kot paj axte wîhti ho ixkôm kêt rãhã nhūm nhÿrmã inhō Papaj akupÿn mẽ awÿr inhmê. Hāmri pu mẽ akupÿn ixwrÿk xà hã arîgrota ã pahkînh rax kumrêx. No ãm axtem tanhmã hã pahkînh to. Anê.

Nhūm pre ã Jejus mẽ inhmã amnhî jarênh anê. Pa mẽ xpênh pãnhã kopta py nê wîta kwÿ ho ixkō.

³⁰ Hāmri nê mẽ ixpiitã ho ixkôm pa nê Tirtūm mã mex ã gre. Hāmri nê ijapôj nê hixêt prêk pê Oriwêhti hwÿr ma mra.

Jejus kot Simãw Pêtre mã kapêr ã harênh

Makre 14.27-31; Rukre 22.31-34; Juãw 13.36-38

³¹ Tã nhūm Jejus tanhmã mẽ ixte hkôt ixpa ho ixpa xwÿnhjê jarênh to nê mẽ inhmã:

—E Tirtūm kapêr ã kagã htūmta kot tanhmã mẽ akukamã mẽ ajarênh to nê mẽ ajarênh kot:

Kot paj ôwêhti jamãr o pa xwÿnhja pî hāmri nhūm ôwêhti hpigrãnh pa nê ma anhrã nê ri mra.

Anhÿr o kot mẽ ajarênh. Te ho mẽ apê ôwêhti pyrã nê ã mẽ ajarênh anê. Tã kamãt ja kamã koja mẽ tanhmã inhîpêx to ka mẽ ixtã mẽ omu nê mẽ umaj ôwêhti pyrã nê apiitã ixkaga hpa nê ma aprôt nê mra.

32 Nê mẽ kot ixpîr tâ kot paj akupÿm ixtîr. Hâmri nê ma akupÿm mẽ akukamã pika pê Garirej wÿr mō. Kamã kot puj mẽ axte axpên pumu. Anê.

33 Hâmri nhũm Simãw Pêtre tee ri tanhmã mẽ kot amnhĩ nhĩpêx to hkukamã amnhĩ jarênhja ma nê hkaprĩ nê kãm:

—Tk. Nà kot paj ã amnhĩ nhĩpêx anhÿr kêt nê Pahihti. Koja pahkwÿja akaga japêr no pa kot paj aa akaga hkêt nê. Kot paj akôt ixpa rãhã nê. Anê.

34 Hâmri nhũm Jejus kãm:

—Nà ra ixte akukamã ixàhpumunh mex. Koja apkati hkôt krãhyre hkàr kêt ri ka ra mẽ umaj ate ixkôt apa hkêt ã mẽ kãm amnhĩ tâ axaprãr o axkrunêpxi kãm ga. Kwa jam ajamexpêr tÿx nê. Anê.

35 Hâmri nhũm tee ri kuma nê axte kãm:

—Kwa nà. Mẽ kot ajaxàr nê apîr tâ kot paj arĩ akôt ri ixpa nhũm mẽ pahto amÿrà nê tanhmã panhĩpêx to. Nà kot paj aa akaga hkêt nê.

Anhÿr o kãm amnhĩ jarê. Pa mẽ ijaxwÿja ã kãm amnhĩ jarênh anê.

Jejus kot Tirtũm mã amnhĩ jarênh

Makre 14.32-42; Rukre 22.39-46

36 Tã nhũm Jejus mẽ inhmã anê pa mẽ ma nhÿri mẽ kot kãm “Gesêm” anhÿr xwÿnhja wÿr mra. Hâmri nhũm mẽ inhmã:

—E mẽ jar ixkutêp akrĩ. Pa ma mûtũm tẽ nê Tirtũm mã amnhĩ jarê mân. Anê.

37 Hâmri nê mẽ ixkwÿjê ho axkrunêpxi nê amnhĩ

kôt mẽ kuwÿ. Simãw Pêtre nê Jepetew kra pijakrut pê Xiakre nê Juãwja wa nhũm amnhĩ kôt mẽ kuwÿ nhũm mẽ ma hkôt mra. Hâmri nhũm Jejus tee ri mẽ kot tanhmã hipêx tota kukamã hamaxpêr o hkaprĩ nê amnhĩ kamã kahak tÿx nê.

38 Hâmri nê mẽ kãm:

—Hêxta waa nê. Na pa tee ri amnhĩ xà htÿx kamã ijamakja kukamã ijamexpêr nê amnhĩ kamã ixkahak tÿx o ra ixkaprĩ nê. Te ixkaprĩ kot ixpîr o mōr pyrãk. Jakamã e mẽ jar anohtÿx nê ixto Tirtũm wÿr o akrĩ kê tanhmã ixto pa mẽ kot tanhmã ixtoja kutã ixihtÿx nê. Anê.

39 Hâmri nê mẽ kurũm htêm grire nê Tirtũm mã amnhĩ jarênh kaxyw htu mÿr pê tẽm nê pikap nõ nê kãm:

—Kwa Papaj. Hêxta waa nê. Inhmã amnhĩ xà htÿx kãm ijamak prãm kêt kumrêx. Na pa tee ri amnhĩ kukamã ijamexpêr nê amnhĩ kamã ixkahak tÿx nê. Jakamã kot kaj amã inhnê ja ho ajapêx prãm nê mãmri inhnê ho ajapêx nhũm mẽ kãm ixkurê xwÿnhjaja tanhmã ixto hkêt nê. Rÿ ko. Kot kaj amã mẽ kot tanhmã ixto hprãm kê mẽ mãmri tanhmã inhĩpêx to. Nom pam inhmã hprãm xà hkôt kêt. Anê.

40 Hâmri nê kãnhmã xa nê akupÿm Simãw Pêtreja mẽ hwÿr tẽ nê tee ri mẽ omu nhũm mẽ ra ôt pa nê hikwÿ. Nhũm mẽ omu nê Simãw Pêtre mã kãm:

—Kwa Simāw Pêtre. E mẽ hāmri akrā hapôj. Kwa wem anohtỳx grire

⁴¹ nẽ ixkutêp amnhĩ to Inhõ Papaj wỳr o akrĩ kê mẽ ixkõt tanhmã mẽ ato htã ka mẽ amã mẽ uma xàj ixkaga hkêt nẽ arĩ mẽ kutã amnhĩ to htỳx nẽ akuhê. ã mẽ amã mẽ ate amnhĩ nhĩpêx anhỳr prãm nom kormã mẽ amã maa.

⁴² Anhỳr o mẽ kãm kapêr hāmri nẽ akupỳm tẽ nẽ axte Tĩrtũm mã amnhĩ jarẽ nẽ kãm:

—Kwa Papaj. Nà inhmã amnhĩ xà htỳx kãm ijamak prãm kêt. Na pa amnhĩ kukamã ijamaxpêr nẽ amnhĩ kamã ixkahak tỳx kumrêx. Jakamã kot kaj amã inhnê ja ho ajapêx prãm nẽ mãmri inhnê ho ajapêx kê mẽ kãm ixkurê xwỳnhjaja tanhmã ixto hkêt nẽ. Nom ko. Kot kaj amã mẽ kot tanhmã ixto hprãm kê mẽ mãmri tanhmã inhi pêx to. Nom pam inhmã ja prãm xà hkõt kêt. Anẽ.

⁴³ Hāmri nẽ kànhmã xa nẽ Simāw Pêtreja mẽ hwỳr akupỳm tẽ. Nẽ mẽ omu nhũm kê mẽ axte gõr nẽ hikwỳ. Ra mẽ õtxwa htỳx nẽ axte gõr nẽ hikwỳ. Nhũm Jejus tẽ nẽ tee ri mẽ omunh o xa

⁴⁴ nom axte tanhmã mẽ kãm nẽ hkêt nẽ. ãm awjanã nẽ akupỳm tẽ nẽ kê wam kot Tĩrtũm mã amnhĩ jarênh xà hkõt axte kãm amnhĩ jarẽ.

⁴⁵⁻⁴⁶ Hāmri nẽ akupỳm mẽ hwỳr tẽ nẽ mẽ kãm:

—Kwa xàn ka mẽ arĩ gõr nẽ anhĩkwỳ? E mẽ tokyx akrā hapôj. Na mẽ ra mẽ kot ixwỳr mrar nẽ ixpynênh mã.

Koja mẽ tokyx ixkutã mẽ kot amnhĩ xunhwỳr xwỳnhjaja mẽ kãm ixtã amỳnê. Ota ra kot ixtã mẽ kãm àmnênh xwỳnhta tẽ. E mẽ tokyx kànhmã akrĩ pu mẽ kutã mra. Anẽ.

Mẽ kot Jejus pynênh ã harênh

Makre 14.43-50; Rukre 22.47-53; Juãw 18.2-11

⁴⁷ Nhũm Jejus mẽ kãm kapêr o ãm rãhã nhũm Jut Kariot pẽ mẽ inhĩõja hwỳr tẽ. Nẽ amnhĩ kõt mẽ ohtõ nẽ hwỳr mẽ o tẽ nhũm mẽ wapohti nẽ kô jamỳ nẽ hkõt o mra. Patre krãhtũm mẽ Ijaew krãhtũmjaja kot Jejus wỳr mẽ rênh xwỳnhjaja nhũm mẽ man hkõt Jejus wỳr mra.

⁴⁸ Na pre ra Jut Kariot amnhĩ kukamã mẽ kãm amnhĩ jarênh o:

—Kot paj ixkumrêx hwỳr tẽ ka mẽ ixkõt hapu hã mra. Kot paj hwỳr tẽ nẽ kãm ixkapêr nẽ kahti hkõt kumỳ. Ka mẽ hã ixpumu nẽ hwỳr mra nẽ unênh kurê kumrêx. Ixte kahti hkõt mỳnh xwỳnhta kot kaj mẽ unê. Anẽ.

⁴⁹ Hāmri nẽ Jejus wỳr tẽ nẽ kãm:

—Pa Jejus? Xàn ka kormã anhõt kêt nẽ xa?

Anẽ nẽ kahti hkõt kumỳ.

⁵⁰ Hāmri nhũm amnhĩ tã omu nẽ kãm:

—Kwa Jut. Ate tanhmã ixto kaxyw mã xwỳnh jakamã e kam nẽ mãmri tanhmã ixto. Anẽ.

Hāmri nhũm Jut kõt mẽ mrar xwỳnhjaja Jut kot kahti hkõt mỳnh ã omu nẽ hwỳr mra nẽ unênh kurê kumrêx.

⁵¹ Hāmri nhũm mẽ inhĩõja tee ri ja hã mẽ omu nẽ õ wapo kapa nẽ patre maati mã àpênh xwýnh kot mẽ hkôt htêm xwýnhhta mã ho apê. Nẽ kot ho hkrã nhĩpônã mã tã kuhpaw nẽ upòk rũm hamak nhĩkjê pix krãhta.

⁵² Hāmri nhũm Jejus omu nẽ nẽ kãm kapêr nẽ kãm:

—Kwa akupým awapota hkãm haxà nẽ amarĩ xa. Na htem wapo ho mẽ oprê ho pa nhũm mẽ amnhĩ xwar wapo ho mẽ kupa.

⁵³ Xà kot paj amnhĩ to Tĩrtũm wýnhũm ãm inhma nẽ tanhmã jajê pẽ ixpytãr to hkêt nẽ? Nà kot paj amnhĩ to kuwý nhũm ixwýr kapêr o mẽ wrýk xwýnhjê rênã kurê kumrêx nhũm mẽ ohtô rax kumrêx nẽ wrý nẽ mẽ kêp ixpytã.

⁵⁴ Nom kot paj ã amnhĩ to hwýr anhýr kêt nẽ. Tĩrtũm kapêr ã kagà htũm kot amnepêm ixkukamã ã mẽ kot inhĩpêx anhýr ã mẽ harênh jakamã kwãr mẽ mãmrĩ Tĩrtũm kãm hprãm xà hkôt ã inhĩpêx anê. Anê.

⁵⁵ Hāmri nẽ hpãnhã mẽ kot unênh xwýnhjê mã kapêr nẽ mẽ kãm:

—Kwa na pa pre apkati mẽ Tĩrtũm mã amnhĩ jarênh xà hã ixkre kamã mẽ kãm ixu-jarênh o ixpa. Ka prem tokyx ixpynênh kêt tã jarãhã te ixte amnhĩ tomnuj xwýnh pyrãk o inhĩpêx nẽ ixwýr wapohti nẽ kô hã akapên nẽ ixwýr tẽ.

⁵⁶ Tã nom ra Tĩrtũm kapêr ã kagà htũm kamã Tĩrtũm nhý hã mẽ kapêr xwýnh kot mẽ akukamã mẽ ajarênh nẽ mẽ

atã kagà xà hkôt na ka mẽ ri ã inhĩpêx anê. Anê.

Nhũm pre ã Jejusja amnhĩ tã mẽ kãm kapêr anê. Hāmri pa mẽ ixte hkôt ixpa ho ixpa xwýnhjaja mẽ omu nẽ tee ri amnhĩ kukamã ijamaxpêr nẽ mẽ umaj ixprôt nẽ anhrã nẽ ma inhmrar kurê kumrêx.

Mẽ kot patre maati hwýr Jejus o mõi ã harênh

Makre 14.53-65; Rukre 22.54-55, 22.63-71; Juãw 18.12-14, 18.19-24

⁵⁷ Nhũm pre Ijaew krãhtũmjê mẽ Tĩrtũm kapêr tũm o mẽ ahkre xwýnhjaja ra patre maati Kajpas nhõrkwý hwýr akuprõ nẽ Jejus kutêp hkrĩ. Hāmri nhũm mẽ kot unênh xwýnhjaja ma mẽ hwýr o tẽ.

⁵⁸ Hāmri nẽ mẽ hwýr ho axà nẽ hkôt gjêx pa. Nhũm Simãw Pêtre mẽ hkôt hapu hã mẽ htãnopxar o tẽ nẽ kítare hwýr axà nẽ pôristi nhĩhkô hã nhý. Hāmri nẽ tee ri Jejus kukamã hamaxpêr o nhý nẽ hamaxpêr o:

—Kwa tanhmã koja mẽ ixpê mẽ inhõ Pahihti nhĩpêx to? E pa jar amým tanhmã mẽ kot hipêx to hã mẽ omunã o nhý. Anê.

⁵⁹ Hāmri nhũm patre krãhtũmjê mẽ juistijaja kãm Jejus pĩr prãm týx nẽ. Jakamã na prem Ijaew wa ho hamêxkrut nẽ axpên kôt tanhmã mẽ kãm ho hêx to nhũm mẽ kot hã wa mar nẽ ra hpĩr kaxyw mẽ pikuprõnh xwýnhjê kapi.

⁶⁰ Jakamã nhũm prem axpên pãnhã mẽ hwýr mra

nê tanhmã ho hêx to. Nom axpên kôt harênh kêt nê. Âm ahpÿnhã tanhmã ri harênh to nom wahõ wa axkrut nê axpên kôt harênh kêt nê. Jakamã nhũm mẽ tee ri hã mẽ kuma.

Tã nhũm ja wa mẽ hwÿr tẽ nê axpên kôt harê nê mẽ kãm:

61 —Nà na pre tanhmã Tirtũm mã amnhĩ jarênh xà hã ixkre jarênh to nê harênh o: “Kot paj nhÿrmã inhmã ixkreja grành par prãm nê kugrà hãmri nê âm ixtã apkati axkrunêpxi pix nê akupÿm hipêx pa. Ja kaxyw ixàhpumunh tÿx.” Anhÿr o na amnhĩ jarê pa wa kuma.

62 Anhÿr o mẽ kãm ho hêx. Hãmri nhũm patre maatija wa kuma nê kànhmã xa nê Jejus mã kapêr nê kãm:

—Kwa xà âm hãmri na wa ã ajarênh anê nà? Xàn ka pre ã amnhĩ jarênh anê? E mẽ inhmã tanhmã amnhĩ jarênh to. Anê.

63 Nom nhũm amarĩ mẽ kãm xa nê mẽ kãm tanhmã nê hkêt nê. Hãmri nhũm patre maatija tee ri omu nê axte kãm kapêr nê kãm:

—Kwa aprĩ hã mẽ inhmã tanhmã amnhĩ jarênh to. Tirtũm noo mã amã ixkapêr jakamã kêr ka akatàt kôt mẽ inhmã amnhĩ jarê nê amnhĩ to axêx kêt nê. Xà apê Tirtũm Kra? Xà ka na pre Tirtũm mẽ ixkaxyw axãm? Kwa akatàt kôt mẽ inhmã amnhĩ jarê. Anê.

64 Hãmri nhũm tã hprĩ hã mẽ kãm amnhĩ jarê nê mẽ kãm:

—Tÿ. Nà âm hãmri na ka ã ijarênh anê. Ixpê Tirtũm kot mẽ akaxyw ixãm xwÿnhta na pa. Na pre mẽ awÿr inhmê pa mẽ awÿr wrÿ. Tã kot paj nhÿrmã axte kaxkwa rũm amnê akupÿn kakrà kamã mẽ awÿr wrÿ. Hãmri nê Tirtũm xàhpumunh o àhpumunh xwÿnhta nhĩhkô hã nhÿ hãmri nê pam tanhmã mẽ ajarênh to ka mẽ amnhĩ tã ixpumu nê inhma. Anê.

65 Hãmri nhũm patre maatija tee ri ã kot amnhĩ jarênh anhÿr ã kuma nê kamã gryk tÿx nê. Hãmri nê gryk xà kêp patre maati hã ê kapa nê hkaxôn pa nê kumê nê hkwyjê mã kãm:

—Tk. Kwa mo kaxyw kot puj mẽ axte ri tanhmã kot amnhĩ tomnuj to hã harênh xwÿnh õ japêr? Tãm kot amnhĩ pê Tirtũm Kra hã amnhĩ jarênh ã amnhĩ to hêx nhũm mẽ pahte mar kênã.

66 Jakamã e kwa tanhmã kot puj mẽ hipêx to? Anê.

Hãmri nhũm mẽ kãm:

—Nà ã kot amnhĩ jarênh anhÿr mÿrapê koja ty. Ra htyk mã tãm kênã. Anê.

67 Hãmri nê tanhmã hipêx kati hto. Mẽ hkwyjaja hkuk kuhtô nê ìhkra ho htak nhũm mẽ hkwyjaja ìhkra hpo ho htak nê hã hpêr o axkê nê kãm:

68 —E apê Tirtũm Kra hã ate amnhĩ jarênh jakamã mãn uràk nê axàhpumunh tÿx. Jakamã e mẽ kot atak xwÿnhta nhĩxi jarê pa mẽ ama. Anê.

Simãw Pêtre kot Jejus kôt pa hkêt ã amnhĩ jarênh

Makre 14.66-72; Rukre 22.56-62; Juãw 18.15-18, 18.25-27

⁶⁹ Rôm nhũm Simãw Pêtre arĩ kítare kamã nhỹ. Hãmri nhũm mẽ kãm àpênh xwýnh nitita omu nê hprĩ hã omunh kurê kumrêx. Hãmri nê kãm:

—Xê pêr apê Jejus kôt mẽ pa xwýnhjê hõ na ka. Anê.

⁷⁰ Hãmri nhũm tee ri amnhĩ tã kuma nê kãm mẽ uma xàj mẽ kãm amnhĩ tã aprã nê kãm:

—Tk. Kokỹ. Ixte mēhõ my ata pumunhre hã. Anê.

⁷¹ Hãmri nê mẽ umaj kànhmã xa nê tẽ nê kítare hwýr hakwakrem ahte mẽ hkàx ã xa. Tã nhũm hpãnhã hõja omu nê hã mẽ kãm:

—Xê ma pêr ãm hãmri na mẽ harê. Kêp Jejus kôt ri mẽ pa xwýnhjê hõ na pêr. Anê.

⁷² Hãmri nhũm amnhĩ tã kuma nê kãm:

—Tk. Nà mẽ ri ã amnhĩ krã hkôt ri ixto axêx anhỹr kêt nê. Ixte aa mēhõta pumunh kêt kumrêx. Anê.

⁷³ Tã nhũm mẽ hkwýjaja hwýr mra nê kãm kapêr nhũm tanhmã mẽ kãm kapêr to nhũm mẽ kuma nê kãm:

—Kwa pêr ãm hãmri na mẽ ajarê. Apê Jejus kwý na ka. War akapêr kot axpên pyràk kênã. Anê.

⁷⁴ Hãmri nhũm tee ri mẽ kuma mẽ kãm amnhĩ tã aprãr kãm hihtýx nê mẽ kãm:

—Kwa nã. Na pa Tirtũm noo mã mẽ amã amnhĩ jarê. Kot paj amnhĩ to ixêx japêr nhũm inhma nê hã tanhmã ixto. Nà uràk ixpê Garirej

nhõ xwýnhre hã. Ixte mēhõ mũj pumunh kêt kumrêx tã ka mẽ xatã axpên kôt ixte hkôt ixpa ho ixpa xwýnh ã ixkamnhĩx o xa.

Anhỹrja o ra mẽ kãm amnhĩ tã aprãr o axkrunêpxi nhũm krãhyre hkàr kurê kumrêx.

⁷⁵ Hãmri nhũm Simãw Pêtre kuma nê ra Jejus kot hkukamã krãhyre hkàr kêt ri kot hã amnhĩ aprãr o axkrunêpxi hã harênhhta mã hamaxpêr kurê kumrêx. Hãmri nê kànhmã hakry hpar o tẽ nê hkaprĩ htýx kumrêx nê kítare pê kato nê tẽ nê awry hã xa nê mýr rax nê.

27

Mê kot pahшти Pirat wýr Jejus o htêm ã mẽ harênh

Makre 15.1; Rukre 23.1-2; Juãw 18.28-32

¹ Tã nhũm ra myt kator o mõi mẽ nhũm mẽ hkrãhtũmjê mẽ patre krãhtũmjaja axpên wýr pikuprõnh pa. Hãmri nê Jejus ã axpên mar o hkrĩ nê axpên mã:

—Nà kot puj mẽ hã amýnê kê mẽ kupĩ. Kêp Tirtũm Kra hã kot amnhĩ jarênh o amnhĩ to hêx kênã. Anê.

² Hãmri nê mẽõ pôristijê mã anê nhũm mẽ hpa hpre hpa nê ma pahшти Pirat wýr o tẽ. Pirat kêp Rôm nhõ pahшти nhỹ hã mẽ ixpê Ijaewjê ho amnhĩptar jakamã nhũm mẽ ma hwýr o tẽ nê ihkram haxà.

Jut Kariot kot amnhĩ pĩr ã harênh

Atre 1.15-19

³ Rôm nhũm Jut Kariot tee ri mẽ kot Jejus pĩr kaxyw mẽ

harênh ma nê hkaprî nê. Ra kot mê kãm hã àmnênh tâ mê kot hpîr kaxyw ã mê harênh ma nê tee ri amnhî kukamã hamaxpêr o hkaprî htÿx nê. Hâmri nê hamaxpêr o:

—Hêxta waa nê. Mo na pa pre ri axtem nê ã amnhî nhîpêx anê? Nà na pa pre amnhî tomnuj tÿx kumrêx. Anê.

Hâmri nê ra mê kot kãm kàxpore ho 30 nê ôrta jamÿ nê ma akupÿm patre krãhtÿmjê mê Ijaew pigêjtê hwÿr o tẽ. Hâmri nê mê kot Tirtÿm mã amnhî jarênh xà hã ixkreja wÿr mê hwÿr axà

⁴ nê nhÿri mê omu nê mê hwÿr tẽ nê mê kãm:

—E ota mê akàxporeta. Na pa ã mê amã Jejus ã ixàmnhênh anhÿrja o amnhî tomnuj tÿx nê. Kot tãm amnhî nhîpêx o pa htã pa axtem nê ã mê amã hã ixàmnhênh anê. Jakamã e mî. Mê akupÿm akàxporeta jamÿ. Kot paj amnhîm hamÿnh kêt nê. Anê.

Hâmri nhÿm mê tee ri kuma nê kãm:

—Kokÿ. Nom ka na ka pre mê ixwÿr tẽ nê ho mê inhmar kênã. Anê.

⁵⁻⁷ Hâmri nhÿm tee ri mê kuma hãmri nê pikap kàxpore rên pa nê ma tẽ nê kato. Hâmri nê hkaprî htÿx kumrêx nê hamaxpêr o:

—Kwa tanhmã kot pa we amnhî to? Nà kot paj amnhî pî. Anê.

Hâmri nê krî pê kato nê ma mê kot pika kakwÿnh nê ho amnhîm poti nhîpêx xà hã pika hwÿr tẽ hãmri nê amnhî mut mã ê nê ho amnhî pî. Hâmri nhÿm patre

krãhtÿmjaja harênh ma nê tee ri kot kàxpore rênhta kawra nê hã axpên kukja nê axpên mã:

—Kwa tanhmã kot puj wem ja ho? Jut kot mê pamã Jejus ã àmnênh nhÿm mê pahte hpîr xà hã kàxpore na. Jakamã kot puj mê ho Tirtÿm mã amnhî jarênh xà hã ixkre ho mex kêt nê. Finat Mojes kot ja nê mê panhigêjtê kurê jakamã na htem mê hpar xà hã kàxpore ho ixkreta ho mex kêt nê. Jakamã kwa tanhmã kot puj mê ho? Anê.

Hâmri nhÿm ja mê kãm:

—E na pa ra ijamaxpêr. Pu mê ho Jut kot amnhî pîr xà hã pikata japrô hãmri nê kamã jar mê kêp mê pahkwÿ hkêt htyk xwÿnhjê jagjênh o papa. Anê.

Hâmri nhÿm mê kuma nhÿm ja mê kãm mex nê. Jakamã nhÿm arïgro hõ hã nhÿm mê ma hwÿr mra nê haprô.

⁸ Hâmri nê hã hixi mê nhÿm kêp “mê hkamrô pikapîr xà kamã pika”. Mê kot Jejus pîr xà hã kàxpore ho haprô jakamã nhÿm prem ã hã hixi mên anê. Nhÿm htem arï axpên mã ã hixi jarênh anhÿr o pa.

⁹⁻¹⁰ Nhÿm pre ra amnepêm Tirtÿm nhÿ hã kapêr o pa xwÿnh finat Jeremïsti mê hkukamã hpîr hã ja jarê nê hã kagà. Nê hã kagà o:

Koja Ijaew nhõ patrejaja mēhō kot mê kãm mēhō my hã àmnênh pãnhã kãm kàxpore ho 30 nê ôr xwÿnhja jamÿ. Hâmri nê ma o tẽ nê

nhÿri mẽ kot amnhÿm pika kakwÿnh nê ho poti nhÿpêx o pa xà hã pika hkwy japrô. Ra Tÿrtÿm kot inhmã mẽ harênh xà hkôt koja mẽ ã amnhÿ nhÿpêx anê. Anê.

ã finat Jeremÿsti kot Tÿrtÿm nhÿ hã mẽ hkukamã mẽ harênh nê hã kagà anhÿr xàja kôt nhÿm prem ã amnhÿ nhÿpêx anê.

Pahihti Pirat kot Jejus kukjêr ã harênh

Makre 15.2-5; Rukre 23.3-5; Juãw 18.33-38

¹¹ Rôm nhÿm mẽ pahihti Pirat wÿr Jejus o tẽ nê hwÿr ho axà nê kutã ãm nhÿm xa nhÿm Piratja omu nê kãm:

—E. Kwa inhmã amnhÿ jarê. Xà apê Ijaew nhõ pahi na ka nà? Xà ka na htem amnhÿ wÿr ajamãr o pa? Anê.

Hãmri nhÿm kãm:

—Tÿ. Nà ãm hãmri na ka ijarê. Anê.

¹² Hãmri nhÿm mẽ hkrãhtÿmjê mẽ patre krãhtÿmjaja pahihti Pirat mã tanhmã ho kapêr punuj to. Nhÿm amnhÿ tã mẽ kuma nom tanhmã kãm amnhÿ tã àprãr to hkêt nê.

¹³ Jakamã nhÿm pahihti Pirat tee ri ja hã omu nê kãm:

—Kwa xà na ka ã mẽ kot ato kapêr anhÿrja mar kêt nê nà?

¹⁴ Anhÿr tã nom nhÿm Jejus akryk xa nê axte tanhmã kãm nê hkêt nê. Hãmri nhÿm Pirat tee ri kot ã amnhÿ nhÿpêx anhÿr ã omu nê hamaxpêr o:

—Kokÿÿ. Mẽ kot ho kapêr punuj tã nhÿm ãm mẽ kuma nê te kãm mẽ uma hkêt pyrà

nê tanhmã inhmã amnhÿ tã àprãr to hkêt nê. Anê.

Pirat kot Jejus pÿr kaxyw hã ãmnênh ã harênh

Makre 15.6-15; Rukre 23.13-26; Juãw 18.39-19.16

¹⁵⁻²¹ Tã nhÿm Pirat kormã mẽ kot axpên mar xà hã ixkre kamã ÿr rãhã nhÿm hprõja hwÿr hpêr mẽ nê kãm:

—Xê tanhmã mẽ kãm Jejusja ã axãmnênh to hkêt nê. Na pa kamãt ja kamã hkôt amÿti nê tee ri hkukamã ijamaxpêr. Kot amnhÿ to mex xwÿnh na. Aa tanhmã kot amnhÿ tomnuj to hkêt jakamã xê tanhmã mẽ kãm hã axãmnênh to hkêt nê. Kwarÿ. Anê.

Hãmri nhÿm Piratja kuma nê hamaxpêr o:

—Nà ixte Ijaew krãhtÿmjê pumunh tÿm. Ijaew kwÿjaja kãm Jejus kÿnh nhÿm mẽ hkrãhtÿmjaja kot mẽ hã Jejus kamã gryk nê. Jakamã ixte tanhmã mẽ kãm hã ixãmnênh to kaxyw na mẽ ã ixwÿr o htêm anê. Anê.

Na htem Pas nhõ arÿgrota hapôx mẽ nhÿm pre htem Ijaew o amnhÿptãr xwÿnhja mẽ kãm mẽ hagjênh xà kamã hkrÿ xwÿnhjê ho hpÿnh nê mẽ hapôj. Mẽ kãm hprãm xà hkôt nhÿm mẽ kãm mẽ hapôj nhÿm mẽ akupÿm kapôt ã hamakêtkati nê amnhÿx pa. Jakamã nhÿm ra mẽ hagjênh xà kamã mēhõ my pê Parapasja hkrÿ. Na pre tanhmã amnhÿ tomnuj to nhÿm mẽ mÿrapê unê nê haxà. Jakamã nhÿm Ijaewjaja mẽ ho amnhÿptãr

xwÿnh Pirat wÿr akuprô nê kuhê nhÿm mễ kãm:

—E kot paj jarãhã mễ amã mễ hagjênh xà kamã mễ hkrĩ xwÿnhjê hõ mã inhÿre kê àmnhĩx kato nê ri pa. Nhÿ kot paj mễ amã kãm inhÿre? Xà Parapas nà? Xà mễ akwÿ kot amnhĩm ho mễ anhô pahihtĩ Jejus pê Tĩrtũm kot mễ akaxyw ãm xwÿnhhta kot paj mễ amã kãm inhÿre? Nhÿ wehe? E mễ inhmã nhÿ jarê. Anê.

Pirat na pre mễ inhô patre krãhtũmjê pumunh mex nê. Ijaew kãm Jejus kapêr mar prãm tÿx ã nhÿm mễ hã kamã gryk tÿx nê hwÿr o mrarja kôt nhÿm mễ omunh mex nê. Jakamã ã hã mễ hkukjêr anê. Hãmri nhÿm mễhpigêt mễ patre krãhtũmjaja kuma hãmri nê mễ pikuprônh nê mễ kuhê xwÿnhjê mã kãm:

—Kwa mễ kãm anê kê mễ pamã Parapas mã mãn ure nê mãmri Jejus Kris pĩ. E kwa mễ tokyx kãm anê kê Parapas mã ure. Anê.

Hãmri nhÿm mễ mễ kuma nê pahihtĩ Pirat mã kãm:

—Nà mễ inhmã Parapas mã mãn anhÿre. Anê.

²² Hãmri nhÿm tee ri mễ kuma nê mễ kãm:

—Kwa no mễ ate Jejus pê Tĩrtũm kot mễ akaxyw ãm xwÿnh ã harênh xwÿnhhta? Tanhmã kot paj hipêx to? Anê.

Hãmri nhÿm mễ kãm:

—Apĩ ri. Tokyx pĩ kahpa hã anhô kê ty. Anê.

²³ Hãmri nhÿm tee ri mễ kuma nê mễ kãm:

—Tk. Kwa nà. Tanhmã kot amnhĩ tomnuj tore hã kot pa

kêt ri pĩ kahpa kunhô nhÿm ty. Anê.

Hãmri nhÿm mễ xatã àmra kamã kãm:

—Kwa pĩ kahpa hã mãn anhô kê ty. Kwa tokyx ã mễ inhmã hipêx anê. Anê.

²⁴ Hãmri nhÿm tee ri ja nê tanhmã mễ kãm kapêr to no nhÿm mễ mar kêt nê. Nhÿm tee ri mễ àmra mar o xa. Hãmri nê kãm Jejus pĩr prãm kêt jakamã amnhĩm gô hkwy janhi nê mễ piitã mễ noo mã amnhĩ nhĩhkra kuhôn h o xa. Mễ kot hã omunh xà hkôt kãm hpĩr prãm kêt ã omunh kaxyw. Hãmri nê mễ kãm:

—E na pa mễ anoo mã ã amnhĩ nhĩhkra kuhôn anê ka mễ ja hã ixpumu. Nà inhmã hpĩr prãm kêt. Tanhmã kot amnhĩ tomnuj tore hã. Mễ kaxipixjaja mễ amã hpĩr hprãm jakamã mễ kam nê tanhmã ho. No pa kot paj tanhmã ho hkêt nê. ãm kwarĩ ho kwarĩ. Anê.

²⁵ Hãmri nhÿm mễ kuma nê kãm:

—Tôe. Nà ãm hãmri. Kot paj mễ pamjaja amnhĩ tã htykja nhô. Nê mễ ixkra nê mễ ixtãmnhwÿjê mễ amnhĩ to ixpimràatã amnhĩ tã kunhô. Kê Tĩrtũm kãm tanhmã hã mễ ixtô hto hprãm nê mamri tanhmã hã mễ ixtô hto. Anê.

²⁶ Hãmri nhÿm mễ kuma nê mễ kãm hprãm xà hkôt mễ kãm Jejus ã amÿnê nê mễ kãm Parapas mã ure. Ra Parapas kot pahi Pirat pê ô pôristi kutã amnhĩ xãm nê kêp hõxpĩrja mÿrapê nhÿm mễ kot unênh nê haxàr tã Ijaew kãm hprãm xà hkôt akupÿm kãm ure. Hãmri nê ô pôristijê mã

anê nhùm mē Jejus tak. Nê htak rax nê hāmri nhùm Pirat mē kām hã amÿnê nhùm mē kot pĩ kahpa hã nhôr o hpĩr kaxyw ma o tē.

Pôristi kot Jejus ã hpēr o pikēnh ã harēnh

Makre 15.16-20; Juãw 19.2-3

²⁷ Tã nhùm pôristijaja mē kot pĩ kahpa hã Jejus nhôr kaxyw ma o tē nê pahihtĩ Pirat nhôrkwÿ kamã ixkre hõ hwÿr ho axà. Nhùm pôristi ohtô nê hwÿr akuprô nê hã pēr o pikēnh kaxyw axpēn mã:

—E kwa tokyj pu mē kām pahĩ xê jaxà ri. Kêp pahĩ hã kot amnhĩ jarēnh kēnã. Anê.

²⁸ Hāmri nê kêp ê kapa nê hpãnhã kêp pahĩ hã mē ê kamrêk mexja py nê kām haxà.

²⁹ Nê kām pahĩ hã mē ahkã nhĩpêx nê hkrãm haxà. Nom axtem akunĩ kamã mēmo mrô nhĩ te kot ronh kanêre pyrãk xwÿnhja nhùm mē hikãx nê hkrãm haxà. Nê kām pahĩ hã kô gô nhùm kupy nê o xa. Hāmri nhùm mē ho anhÿr pa nê kutã hkôn krã ho rôrôk nê hkrĩ hpa nê hã pēr o pikēnh kamã kām:

—E âm hāmri. Apê Ijaew nhõ pahĩ punuti na ka. Anê.

³⁰ Hāmri nê kãnhmã kuhê nê hkuk kuhtô nê kêp kô pytà nê xatã ho hkrãx pê htak. Nhùm prem ã pēr o pikēnh kãm hipêx anê.

³¹ Hāmri nê kêp pahĩ hã ê kapa nê akupÿm kãm ê jaxà nê mē kot pĩ kahpa hã nhôr kaxyw ho kato nê ma o tē.

Pôristi kot pĩ kahpa hã Jejus nhôr ã harēnh

Makre 15.22-32; Rukre 23.27-43; Juãw 19.17-25

³² Nhùm pôristijaja Jejus o kato nê ma kapôt mã o tē. Nê kām pĩ kahpa pytĩja gô nhùm kumÿ nê mē hkôt o hkwy. Nom ra hirot tÿx nê nhùm mē tee ri ja hã omu nê mēhõ kot ho ajuta kaxyw mē kot omunh xwÿnhjê kapi ho xa. Hāmri nê Sirēn nhõ xwÿnh Simãw kã htyk pumu nê unê nê kām kot Jejus o ajuta kaxyw hã karõ nhùm hwÿr tē nê kêp pĩ kahpata mÿ nê hkôt kãm kumÿ nê o tē.

³³ Hāmri nhùm mē kēn nhĩxêt te kot mē hkrã hi pyrãk xwÿnhta wÿr mē o pøj. Mē kapēr kãm na prem hixêtja jarēnh o: “Korkot.” No mē pakapēr kãm Korkot jarēnhja kêp “mē hkrã hi xà” nhùm mē ma hwÿr Jejus o pøj.

³⁴ Hāmri nê mē kot pĩ kahpa hã nhôr kaxyw nhùm à htÿx kumrêx kamã hamak pymaj kãm mēmo mē hkanexãja gô. Wĩhti mē mēmo mry ma xà ho pihkãr nhùm mē kãm hkwy gô. Nom nhùm hkaki nê mē kot amnhĩ xà htÿx kamã hamak kêt xà hã omunh kurê kumrêx nê hkaga. Nhùm mē tee ri ja hã omu hāmri nê kêp ê kapa nê kumê nê pĩ kahpa hã kuxi nê prek o ìhkra nê hpar o htÿx pa. Hāmri nê kãnhmã pĩ jarĩ nê ahkre kamã âm nê ho htÿx nhùm kÿxpê ajêt.

³⁵ Hāmri nhùm pôristi hkwyjaja axpēn mã ê hkwy ho pigrãnh kaxyw hã kēnre ho jôka.

³⁶ Hāmri nē ho anhÿr pa nē pikap Jejus jamār o hkrī.

³⁷ Na htem mē hpar kaxyw nē tanhmā mē kot amnhī tomnuj to hā kagà nē mē mÿri pī kahpa hā hanhō. Jakamā na prem tapti hō py nē tanhmā Jejus ā kagà hto nē hā kagà ho:

IJA EW NHŌ PAHI NA JA

HIXI PĒ JEJUS

Hāmri nē hwÿr ho api nē mÿri kunhō. Ā Jejus kot amnhī jarēnh anhÿrja mÿrapē na prem kupī.

³⁸ Hāmri nhūm mē hpānhā wa àhkīnh xwÿnh wa ho axkrut nē määnēn pī kahpa hā wa kunhō. Nē akutā ho Jejus nhÿjē nhūm war ajēt.

³⁹ Tā nhūm pry hā mē mrar xwÿnhjaja Jejus pumu nē hā hpēr o pikēnh o mra nē kām:

⁴⁰ —Kwa ka na ka pre ate Tirtūm mā amnhī jarēnh xà hā ixkre grānh par nē atā apkati axkrunēpxi nē akupÿm hipêx par ā amnhī jarē. Nē apē Tirtūm Kra hā amnhī jarē. Nē axāhpumunh o axāhpumunh jakamā e kwa amnhī kapa nē wrÿ pa mē ja hā apumu. Kwa tokyx. Anē.

⁴¹ Nē patre krāhtūmjē mē Tirtūm kapēr tūm o mē ahkre o mē pa xwÿnh mē mē hkrāhtūmjaja piitā hwÿr mra nē hā hpēr o axkē.

⁴² Nē axpēn mā harēnh o:

—E jahti na xep pre mē kamā ukaprī ho pa nē tanhmā mē ho ajuta hto ho pa. Tā nom tām tanhmā amnhī to nē wrÿk kēt nē. Kwa pu mē arī pakuhē nē

kot amnhī kaxàr nē wrÿk kām omu. Koja wrÿ pu mē omu nē kēp mē panhō pahшти hā hkôt pajamaxpēr kurē kumrēx. E tokyx wrÿ Jejus. Pa mē awrÿk kām apumu. Nà kot kaj awrÿk rax nē.

⁴³ Na hte amnhī kaxyw Tirtūm mā hamaxpēr o pa. Nē kēp Kra hā amnhī jarēnh o pa. Jakamā e. Kē Tirtūm tām hwÿr tē nē kēp Kra hā akupÿm mē pahpē utà. Anē.

⁴⁴ Hāmri nhūm wa kot akutā hijē nē jēt xwÿnhhta wa haxwÿja mē mar xà hkôt mā ho kapēr anē.

Jejus tyk ā harēnh

Makre 15.33-41; Rukre 23.44-49; Juāw 19.28-30; määnēn Eprēw 10.19-20

⁴⁵ Tā nhūm kaxkwa nhÿpōk ri myt ÿr mē nhūm te kamàt pyrāk nhūm kamàt kō rax kumrēx. Jao hā awry mē nhūm ra akupÿm myt katēr o mō.

⁴⁶ Hāmri nhūm Jejus kapēr kām hihtÿx nē àmra htÿx kām Tirtūm mā kapēr nē kām:

—Inhō Tirtūm inhō Tirtūm. Kwa mon ka ixkaga? Anē.

Nom kapēr kamā kām kapēr o:

—Eri Eri. Rāmā sapatani. Anē.

⁴⁷ Hāmri nhūm mē kot mar xwÿnhjaja kot Eri jarēnh ā kuma nē htÿx ho finat Eris mā kapēr ā hkamnhÿx.

⁴⁸ Nhūm Jejus par pé guhkrax kām wÿhti punure xa. Jakamā nhūm mē ā kapēr anhÿr ā kuma nhūm mēhō kām hkaprī nē. Hāmri nē mēmo rerek py nē o tē nē

kaxyw pĩ rytija py nê ho hkanhwÿ. Nê akupÿn o tẽ nê ho wĩhti nhek nê Jejus kot hkaôr kaxyw kãm kupê.

49 Hãmri nhũm hkwyjaja tee ri ja hã omu nê nê kãm kapêr nê kãm:

—Tk. Kwa nhãm xa. Pu mẽ kop Eris jamã mân. Koja hwÿr tẽ nê ho wrÿk japêr. Anê.

50 Hãmri nhũm kamàt kô mẽ nhũm Jejus ra htyk kaxyw nê axte àmra htÿx nê hãmri nê ty.

51 Tykja kôt nhũm Tirtũm mã amnhĩ jarênh xà hã ixkre kamã hakwakre hã kupêxêja kÿj rũm ahpar mã axkjê nê amnhĩ kahê xà mẽnh kurê kumrêx. Utĩ rax tã axkjê nê amnhĩ kahê xà mẽ. Te Jejus htyk o te kot mẽ pahte hkôt amnhĩ xunhwÿr xwÿnhjê mã Tirtũm wÿr pry jakwa kre kahê xà mẽnh pyrak o ã amnhĩ nhĩpêx anê. Nhũm pika htertet tÿx kumrêx o kên rũnh kwÿ ohtô nê hkrakrak pa.

52 Hãmri nhũm mẽ htyk ã pika kamã mẽ htykjê nhõrkwÿ ho ohtô nê mẽ hã axkjê nhũm mẽ hikwÿ xwÿnhjaja akupÿm htĩr nê hapôj nê kuhê. Na prem kormã htyk kêt ri amnhĩ kaxyw Tirtũm kôt hamaxpêr. Tã nhũm Jejus ty nhũm mẽ ohtô nê akupÿm htĩr nê hapôj nê kuhê.

53 Nom kormã nhÿhÿm mrar kêt nê. Arĩ mẽ hã pika nhĩpy Jejus akupÿm htĩr ã hamãr o kuhê. Tã nhũm Jejus apkati hõ hã akupÿm htĩr ã arĩgrota ã nhũm mẽ rĩ kormã

ma Jerujarê hwÿr mra nê hwÿr agjê nhũm mẽ ohtô nê akupÿm mẽ htĩr ã mẽ omu.

54 Nhũm kormã Jejus htyk o mõrta ã nhũm põristi krãhtũm mẽ põristi hkwyjaja hãmri hparpê hamãr o kuhê nê htyk kãm omu. Nê pika htertet kamã ama nê mẽmoj kot tanhmã amnhĩ nhĩpêx toja pumu nê tee ri hamaxpêr nê kãm ma htÿx kumrêx. Hãmri nê axpên mã:

—Hêxta waa nê. Pêr ãm hãmri na pre htyk xwÿnhnta amnhĩ jarê. Kêp Tirtũm Kra kênã. Tã pu mẽ amarĩ pahtÿx kupĩ. Anê.

55-56 Nhũm pre mênijaja ohtô nê amÿm Jejus tyk kãm omunh o kuhê. Marir Matarên nê Xiakre mẽ Juje wa katorxà Marir nê Xiakre hõ mẽ Juãw wa katorxàja nhũm mẽ kormã htyk kãm omunh o kuhê. Na prem Garirej rũm hkôt tanhmã ho ajuta hto ho hkôt Jerujarê wÿr mõ.

Mẽ kot Jejus jaxàr ã harênh Makre 15.42-47; Rukre 23.50-56; Juãw 19.38-42

57 Tã nhũm ra myt grire nhũm krĩ pê Arimatej rũm hikàxpore rax xwÿnh pê Jujeja tẽ. Nom axtem Juje hõ na pre. Ra kot Jejus kôt amnhĩ xãm jakamã kãm ho wrÿk nê haxàr prãm nê.

58 Hãmri nê ma pahi Pirat wÿr tẽ nê ã hã kuwÿ nê kãm:

—E ot pa awÿr tẽ. Kwa inhmã htyk xwÿnhnta gõ pa ma o tẽ nê haxà nà? Anê.

Hãmri nhũm kuma nê kãm harê nhũm ma o tẽ nê haxà.

⁵⁹ Kaxyw kupêxê mex ò py nê ho hkupu pa

⁶⁰ nê ma o tẽ nê ò kên kre kamã haxà. Na pre htyk kukamã kên kre kakwý nhùm mẽ kot kormã kamã mẽhõ jaxàr kêt tã kamã na pre Jesus jaxà. Hãmri nê hã kên rax ò xãm nê ho hitom nê ma akupým tẽ.

⁶¹ Nhùm Marir Matarên mẽ Marir òja wa kên kreta kapem omunh o wa nhỹ.

Pôristi kot kên kre jamãr o kuhê ã harênh

⁶² Tã nhùm apkati nhùm mẽ inhõ arĩgromnu pẽ sap kato. Hãmri nhùm Parijew nhõ xwýnhjê mẽ patre krãhtùmjaja ma pahi Pirat wýr mra nê kãm:

⁶³ —Kwa pahihti. Nà amnhĩ to hêx o pa xwýnhta na pre kormã htĩr nê pa ri tanhmã amnhĩ jarênh to ho pa. Nê nhỹrmã ty nê htyk ã apkati axkrunêpxi pix nê akupým htĩr ã amnhĩ jarê.

⁶⁴ Jakamã kwa hwýr anhõ pôristi hkwy rê kê mẽ ma hwýr mra nê hamãr mex o apkati axkrunêpxi. Kot ka anhýr kêt nhùm hkôt mẽ pa ho mẽ pa xwýnhjaja ma hwýr mra nê ho ahkĩ nê ma o mra nê nhỹri haxà nê mẽ piitã mẽ kãm ra akupým htĩr ã harênh o hêx o pa. Te tãm kot amnhĩ kukamã amnhĩ jarênh pyrãk. Nom mẽ kot axte ã harênh anhýrja koja omnuj týt o tãm kot ã amnhĩ jarênh anhýrja jakre. Anê.

⁶⁵ Hãmri nhùm mẽ kuma nê mẽ kãm:

—Tõe. Nà koja mẽ ho anê. E mẽ ma hwýr amnhĩ kôt

pôristi hkwy ho mra kê mẽ hakwakre kahê xà jamãr mex o kuhê. Anê.

⁶⁶ Hãmri nhùm mẽ kuma nê ma hwýr mra nê hakwakre hã kên raxta o htýt pa. Nê mẽhõ kot omunh nê kahê mênh pymaj menh ê ho hkukõ. Hãmri nê ho anhýr pa nê pôristi mã kãm:

—E Kêr ka mẽ jar kuri hamãr mex o akuhê. Kê mẽhõ tẽ nê tanhmã ho hkêt nê. Anê.

28

Jesus akupým htĩr ã harênh Makre 16.1-8; Rukre 24.1-12; Juãw 20.1-10

¹ Tã nhùm apkati nhùm tòmĩk. Hãmri nhùm Marir Matarên mẽ Marir òja kwýhtã kãnhmã nhỹ nê ma akupým kên kreta wýr wa tẽ.

² Puh nhùm pika htertet týt nê nhùm Tirtùm kapêr o mẽ wrýt xwýnhja kên kre wýr wrý nê nhãm hakwakre nê kên raxta mẽ nê hã nhỹ.

³ Hirã htýt kãm nhỹ. Te na jaxênh pyrãk. Nê ê haka htýt kumrêx.

⁴ Nhùm pôristijaja tee ri omu nê kãm ma htýt nê htertet nê umaj pikap rôrøk pa nê te htyk pyrã nê hikwý.

⁵ Hãmri nhùm wa nita kên kre hwýr pøj nê tee ri Tirtùm kapêr o mẽ wrýt xwýnhta pumu. Nhùm wa kãm:

—Kwa wa amã ma hkêt nê. War ate Jesus pumunh kaxyw na ka wa tẽ. Mẽ kot pĩ kahpa hã nhôr xwýnhta.

⁶ Nom jar amrakati. Na ra akupým htĩr nê kato nê ma tẽ. E wa kam nê amnê axà nê nõr xà kaprýt pumu. Anê.

Hâmri nhûm wa kuma nê tee ri kên kre kamâ Jejus japêr nhûm kamâ amrakati.

⁷ Hâmri nhûm Tirtûm kapêr o wryk xwÿnh wa kâm:

—E wa tokyx ma akupÿm tẽ nê hkôt mẽ pa ho mẽ pa xwÿnhjê mã harê. Koja ma Jejus mẽ akukamâ akupÿm Garirej wÿr mō. Garirej kamâ kot kaj mẽ axte axpên pumu. Ra kot mẽ amã amnhĩ jarênh xà hkôt. E kwa wa tokyx ma akupÿm mẽ hwÿr tẽ. Anê.

⁸ Hâmri nhûm wa kuma nê ma akupÿm hprôt nê htêm kurê kumrêx. Kâm ma htã hkĩnh nê. Nê ma Jejus kôt mẽ pa ho mẽ pa xwÿnhjê mã ujarênh kaxyw ma mẽ hwÿr hprôt nê wa tẽ.

⁹ Pu nhûm ra Jejus tãm wa kutã tẽ nê wa hkaxpa. Hâmri nê wa haêr pê wa kãm kapêr nê wa kãm:

—Pa? Nhÿhÿm na ka wa tẽ? Anê.

Hâmri nhûm wa omu nê hkĩnh tÿx kumrêx nê hwÿr hprôt nê hpar pê hkõn krã ho tẽm nê akutã hpar ã kumÿ nê kãm mex o mex ã harê nê kãm:

—Hêxta gâa nê. Ma amex kumrêx. Amex o amex. Anê.

¹⁰ Hâmri nhûm wa kãm:

—E war amã ma hkêt nê. Mamrĩ ma tẽ nê ixkôt mẽ pa ho mẽ pa xwÿnhjê mã ijarê kê mẽ ma Garirej wÿr mra. Kamã kot paj mẽ axte axpên pumu. Anê.

Pôristi kot kàxpore hprãm xà Jejus o hêx ã harênh

¹¹ Rôm nhûm pôristi hkwyjaja akupÿm tãm hkrã

hâmri nê ma kên kreta rûm akupÿm krĩm mra. Hâmri nê patre krãhtÿmjê hwÿr mra nê mẽ kãm ujarênh pa.

¹² Hâmri nhûm mẽ tee ri mẽ kuma nê mẽhpigêtjê ho akuprô nê mẽ mã axpên mar o hkrĩ. Hâmri nê axpên mar pa nê pôristi mã amnhĩrer rax nê mẽ kãm:

¹³ —E mẽ amnhĩm kàxpore jamÿ nê ma ri ã mẽ kãm amnhĩ jarênh anhÿr o apa. Nom kêr ka mẽ kãm amnhĩ to axêx nê mẽ kãm: “Na pa prem kên kre kapem ixtÿx gõr nê inhĩkwÿ nhûm Jejus kôt mẽ pa ho mẽ pa xwÿnhjaja mra nê mẽ ixpê ï ho ahkĩ nê ma o mra.” Anhÿr o mẽ kãm amnhĩ to axêx o apa. Mẽ ixte kàxpore ho mẽ amã amnhĩrerta pãnhã.

¹⁴ Koja pahшти Piratja mẽ anhôt ã mẽ ajarênh ma nê mã tanhmã mẽ ato kaxyw mã kot paj mẽ axy pê tanhmã kãm ixkapêr to nhûm tanhmã mẽ ato hkêt nê. Jakamã e. Mẽ tee ri amnhĩ kukamã ajamaxpêr kêt nê. Mẽ mãmri ma mra nê ã mẽ kãm axujarênh anhÿr o ri apa. Anê.

¹⁵ Hâmri nhûm mẽ kuma nê mẽ kot amnhĩ to hêxta pãnhã kàxpore jamÿ nê ma mẽ mar xà hkôt mẽ piitã mẽ kãm Jejus kôt mẽ pa xwÿnhjê ho hêx o pa. Tã na htem arĩ jarãhã Ijaewjaja ã axpên mã mẽ harênh anhÿr rãhã ho pa.

Jejus kot hkôt mẽ pa ho mẽ pa xwÿnhjê mã mẽ ãpênh ã karõ

Makre 16.14-18; Rukre 24.36-49; Juãw 20.19-23; Atre 1.6-8

16 Tã pa mẽ ixte Jejus kôt ixpa ho ixpa xwýnh pé 11jaja hãmri akupým Jejus htír ã harênh ma hãmri nê ma Garirej wýr mra. Nhýri Jejus kot mẽ inhmã mẽmo hixêť prêk jarênhja wýr.

17 Nê ra hwýr ixpôx o mrar mẽ Jejus pumu. Tã nom nhũm mẽ ixkwýjaja tee ri omu nê htýx ho nhãm mẽhõ hã hkamnhĩx. No kêt mẽ pajaja na pa prem ixprĩ hã omunh kurê kumrêx nê ixkĩnh týt nê. Nê ixkĩnh nê hwýr ixprôt nê kãm:

—Pa Jejus? Hêxta waa nê. Amex o amex. Anê.

18 Hãmri nhũm mẽ inhmã:
—E na pre Tĩrtũm ã inhmã kapêr anê nê inhmã: “E kêr ka amnhĩ nhỹ hã mẽmoj piitã tanhmã ho ho apa. Kaxkwa kamã nê pika kamã. Mamrĩ nhỹhỹm amnhĩ krã hkôt amã tanhmã amnhĩ to hprãm xà hkôt tanhmã amnhĩ nhĩpêx to ho ri apa.” Anê. Na pre mẽ akaxyw ã inhmã kapêr anê.

19 —Jakamã e. Kêr ka mẽ ma pika piitã hkôt ri mẽ kãm ijarênh o ri apa. Kê mẽ ixte mẽ nê tanhmã amnhĩ nhĩpêx to hã ijarênh ma hãmri nê ixkôt amnhĩ xunhwý nê ixkôt ri amnhĩ nhĩpêx o pa. Nê kêr ka mẽ ja hã mẽ omu nê Tĩrtũm mẽ wa inhmã mẽ hkrã kumrã. Wa ixkarõ nhỹ hã mẽ hkrã kumrã. Mẽ kot wa inhỹ hã pix mã tanhmã amnhĩ nhĩpêx to ho pa kaxyw.

20 —Nê mẽ kãm anê kê mẽ ixkapêr piitã hkôt amnhĩ nhĩpêx rãhã ho pa. E kêr ka mẽ ma mẽ kãm ã ijarênh anhýr o ri mẽ hkôt apa. Kot

paj mẽ anhĩhkô hã ri ixpa rãhã nhũm nhỹrmã pikaja hapêx o hapêx. Anê.

Na pre ã Jejus mẽ inhmã mẽ ixápênh ã karõ anê.

Matêwre kot Jejus jarênh nê hã kagàja ja kôt na hapêx.

Makre Makre kot tanhmã Jejus kot amnhĩ nhĩpêx to ho pa hã kagà

Juãw Makre na pre kagàja nhĩpêx. Na pre hte ma hkwýjê hkôt mẽ kãm Jejus kot tanhmã amnhĩ nhĩpêx to hã harênh o ri pa. Na pre ra Simãw Pêtreja hprĩ hã Tĩrtũm kapêr o ahkre nhũm kuma nê mar tỳx nê. Hãmri nê mẽ pamã tanhmã Jejus ã kagà hto. Simãw Pêtre xô ri tanhmã kot amnhĩ nhĩpêx to hã kagà. Jejus kêp Tĩrtũm Kra hã hihtỳx o hihtỳx nê àhpumunh o àhpumunh ã nhũm pre harê nê hã kagà. Nê kêp mẽ pakutã nojarêt xwýnh ã harê nê hã kagà. ã Juãw Makreja mẽ pamã Jejus jarê nê hã kagà anê.

Matêwre 3.1-10; Rukre 3.1-9; Juãw 1.6-8, 1.19-23

¹ Pa Kris kôt ixkràmnhwýjaja. E kot paj mẽ amã tanhmã Jejus kot amnhĩ nhĩpêx to ho pa hã kagà ka mẽ kamã harê nê ama. Kêp Tĩrtũm Kra na. Tãm na pre mẽ pakaxyw ãm nê mẽ pahwýr kumê. Tã tãm kot mẽ pahwýr wrỳk nê tanhmã amnhĩ nhĩpêx to ho paja kot paj mẽ amã ixprĩ hã harê nê hã kagà ka mẽ kamã harê nê ama.

Juãw Paxis kot Jejus kukamã harênh

² Kormã Jejus mẽ pahwýr wrỳk xwýj ri na pre Tĩrtũm

nhỹ hã kapêr o pa xwýnhjê hõ pê Ijaisja kukamã tanhmã harênh to nê hã kagà. Nê Jejus kukamã harênh o mõi xwýnh Juãw Paxisja nhũm pre mãânênh hkukamã tanhmã harênh to nê hã kagà. Te Tĩrtũm tãm hamaxpêr pyræk o harê nê harênh o:

E kot paj Ixkra hkukamã ma mẽ hwýr kot harênh xwýnhjê hõmê kê ma kutêp mẽ kãm harênh o ri pa. Kê mẽ kuma nê kutêp tãm amnhĩ nhĩpêx mex o pa.

³ Koja kukamã harênh xwýnhja ma kapôt ã ri hwýr mẽ mrar xwýnhjê mã harênh o ri pa. Nê kỳx pê mẽ kãm kapêr nê mẽ kãm: “E mẽ inhma. Koja Tĩrtũm tokyx mẽ pahwýr mẽ panhõ Pahihti mẽ nhũm wrỳ pu mẽ pahpiitã omu. Jakamã kwa mẽ tokyx kutêp tãm amnhĩ nhĩpêx. Te ho mẽ kot mêhõ kutêp pry ho mex pyræk o amnhĩ nhĩpêx. Nom pry kumrêx o mex kêt nê. ãm amnhĩ nhĩ ho tãm amnhĩ nhĩpêx nê tãm axpên nhĩpêx. Pahihtita kutêp. Mẽ pahte amnhĩ nhĩpêx tũmja te kot pry nhĩnur nê krã hakỳx nê pry juk nhũm mẽ tee ri kot kãm hã mrar mex prãm kaprỳ pyræk. Jakamã kot kaj mẽ Pahihti nyw kutêp ate amnhĩ tomnuj kaga nê tãm

amnhĩ nhĩpêx nê tãm
axpên nhĩpêx. Hãmri
nê te mẽ kot pry nhĩnur
o mex nê ho katàt
nhũm ra katàt mux
nê nôr pyrāk o amnhĩ
nhĩpêx. E kwa kêr
ka mẽ ã kutêp amnhĩ
nhĩpêx anê.” Anhÿr o
koja mẽ kãm harênh o
pa. Anê.

Na pre ã Tĩrtũm Juãw Paxis
kukamã harênh anê nhũm ÿ
hã kapêr xwÿnh pê Ijaisja mẽ
pamã hã kagã.

⁴ Tã ra kot harênh xà hkôt
nhũm Juãw Paxisja tẽ. Hãmri
nê kapôt ã ri mẽ kãm Tĩrtũm
kapêr jarênh o pa nê mẽ kãm:

—Kwa mẽ tokyx amnhĩ
tomnuj kaga nê tãm ri amnhĩ
nhĩpêx. Kê Tĩrtũm ja hã mẽ
apumu nê mẽ anê mẽ ate
amnhĩ tomnuj rênh pa nê
mẽ ato hkra. Pa mẽ piitã
mẽ kot ra mẽ apê hkra hã
mẽ apumunh kaxyw mẽ akrã
kumrã. Anê.

⁵ Hãmri nhũm mẽ ohtô nê
kot kapêr mar kaxyw ma
nhÿhÿnh hwÿr kapôt mã mra.
Pyka pê Jutej rũm nê Jutej
kamã krĩ pê Jerujarẽ rũm
nhũm mẽ ohtô nê hwÿr mra.
Hãmri nê nhÿri omu nê kãm:

—E ixte amnhĩ tomnuj kaga
hprãm xàj na pa awÿr amnhĩ
to tẽ. Na pa hte amnhĩ tom-
nuj pix o ri ixpa. Tã tee ri
ja hã amnhĩ pumu nê ixkaprĩ
nê. Hãmri nê ra inhmã amnhĩ
tomnuj kaga nê tãm amnhĩ
nhĩpêx prãm nê.

Anhÿr ã amnhĩ jarẽ. Hãmri
nhũm Tĩrtũmja kaxkwa kamã
hkrĩ htã mẽ kuma nê amnhĩ

katut kôt mẽ kot amnhĩ tom-
nuj piitã rênh pa nê axte kãm
hamaxpêr kêt nê. Jakamã
nhũm Juãw Paxis gôx kãm mẽ
hkrã kumrã. Pyhti pê Jotãw
kamã.

⁶ Juãw Paxisja hikàxpore
hkêt jakamã na pre ê mex
kêt nê pa. ãm mẽmo mry pê
kamer kĩ ho amnhĩm ê nhĩpêx
nê hagjê nê hã pa. Nê mẽmo
mry hkà ho amnhĩ pre nê ri
pa. Nê mẽo mex kur kêt nê
ãm krit ku nê menh ôr o ri pa.

⁷ Hãmri nê mẽ kãm tanhmã
Jejus jarênh to ho pa nê mẽ
kãm:

—E mẽ inhma. Koja tokyx
Tĩrtũm kot mẽ pakaxyw ãm
xwÿnhhta mẽ pahwÿr wrÿ. Ah-
pumunh tÿx o kot ijakrenh
jakamã na pa hte ãm kukwak
ri ixpa nê amnhĩ tã hã ix-
pijaàm rãhã ho ri ixpa. Te
ixkràm ã ixpijaàm o amnhĩ
nhĩpêx pyrāk.

⁸ Na pa hte gô pix o Tĩrtũm
mã mẽ akrã kumrãr o ri ixpa.
Nom mẽ pahwÿr wrÿk mã
xwÿnhja koja mẽ awÿr Tĩrtũm
Karô rẽ nhũm mẽ akaxwÿnh
mã agjê. Ka mẽ ÿ hã tãm ri
amnhĩ nhĩpêx rãhã ho ri apa.
Anê.

*Juãw Paxis kot Jejus krã
kumrãr ã harênh*

*Matêwre 3.13-17; Rukre
3.21-22; Juãw 1.32-34*

⁹ Tã nhũm Jejusja tãm Juãw
Paxis wÿr tẽ. Garirej kamã
krĩ pê Najare rũm ma hwÿr
tên pøj. Hãmri nhũm Juãwja
hkrã hkumrã. Pyhti pê Jotãw
kamã hkrã kumrã.

¹⁰ Hãmri nê wa gôj rũm api
nê mÿr ri kaxkwa pumunh

o xa. Nhũm kaxkwa axkjê nhũm kurũm Tĩrtũm Karõ te tuuti pyrã nê Jejus wỳr wrỳk o tẽ nê ìkre hã xa nhũm amnhĩ tã omunh o xa.

¹¹ Hãmri nhũm Tĩrtũm kaxkwa rũm kãm kapêr nê kãm:

E apê Ixkra mex na ka.

 Ãm hãmri na ka hte
 ixkanrêhã amnhĩ
 nhĩpêx mex o apa.

Inhmã ajapê kamã na
ka ri apa ho apa. Anê.

Jejus kot Satanasti kaga hã harênh

Matêwre 4.1-11; Rukre 4.1-13; mãânên Eprêw 2.18, 4.15

¹² Tã nhũm Tĩrtũm Karõja ma kapôt mã Jejus o mỗ

¹³ nhũm kapôt ã mry xoprê kaêx ã ri mrar o hã arĩgro pê 40. Hãmri nhũm Satanasti omu nê ma hwỳr tẽ nê ri hkôt pa. Kapôt ã ri hkôt hêx rom tanhmã kãm kapêr to nhũm kot mar nê hkôt amnhĩ xãm prãm xaj ma hkôt pa. Nom nhũm Jejus hk-aga kumrêx nhũm tee ri ho anhỳr kaprỳ nê ma akupỳm tẽ. Hãmri nhũm Tĩrtũm kapêr o mẽ wrỳk xwỳnhjaja Jejus wỳr wrỳ nê tanhmã ho mex to.

Jejus kot Tĩrtũm mã àpênh krax ã harênh

Matêwre 4.12-17; Rukre 4.14-15

¹⁴ Nhũm pre ra mẽ ixpê Ijaew o amnhĩptar xwỳnh pê Eroxja Juãw Paxis kot mẽmoj tã kãm àkjêr mỳrapê nhũm pre ra unê nê haxà. Tã kot haxàr jakành pê nhũm Jejus ma akupỳm pyka pê Garirej wỳr mỗ nê kamã mẽ kãm

Tĩrtũm kapêr jarênh o pa. Nê Tĩrtũm kot mẽ hwỳr mẽnh ã amnhĩ jarênh o pa. Nom te nhãm mẽhõ jarênh pyrãk o amnhĩ jarê

¹⁵ nê mẽ kãm:

—E na Tĩrtũm kãm mẽ ato hkra hprãm nê. Jakamã na ra kot mẽ awỳr ãm xwỳnhhta mẽ nhũm mẽ awỳr wrỳ. Kwa mẽ tokyx kapêrja ma nê amnhĩ kaxyw hkôt ajamxpêr. Hãmri nê ate amnhĩ tomnuj kaga nê Tĩrtũm kôt mãn amnhĩ nhĩpêx o ri apa. Kot kaj mẽ ã amnhĩ nhĩpêx anê nhũm Tĩrtũm amnhĩ tã mẽ apumu nê mẽ ato hkra. Anê.

Jejus kot amnhĩ kôt tep pynênh xwỳnh wa hwỳr ã harênh

Matêwre 4.18-22; Rukre 5.1-11

¹⁶ Tã nhũm Jejus ma Garirej kamã gô rax pê Garirej mỳri mỗ. Hãmri nê Simãw mẽ htõ Andreja wa hwỳr kato nê wa omu. Wa kot tep pynênh xwỳnh jakamã na pre wa gôx kãm kryhti rênh o xa nhũm Jejus wa hãnh tẽ nê wa omu.

¹⁷ Hãmri nê amnhĩ kôt wa kuwỳ nê wa kãm:

—E war amnê ixkôt tẽ nê ixkôt mãn apa. War apê tep kanhêr rax o ri apa xwỳnh tã kêr ka war axàpênhta kaga nê hpãnhã ixkôt apa ho apa. Kot paj tanhmã war akrã hto ka wa tep pynênh pãnhã ma ri mẽ hkôt mẽ kãm ixkapêr jarênh o ri apa. Mẽ ohtõ nê mẽ kot war amar nê Tĩrtũm kôt amnhĩ xunhwỳr kaxyw. Jao kot kaj te war ate tep kanhêr rax nê Tĩrtũm mã õr pyrãk o amnhĩ nhĩpêx.

Anhÿr o wa kãm kapër.

¹⁸ Hãmri nhùm wa kuma nê kryhti kaga nê ma hkôt pa ho pa kurê kumrêx.

¹⁹ Hãmri nê mẽ gô mÿri mỗ nê Jepetew kra Xiakre mẽ htõ Juãw wa hwÿr kato nê wa omu. Nhùm wa kormã hipêêxà nhĩhkô hã pàr kãm kryhti ho mex o wa nhÿ nhùm Jejus wa mẽ hwÿr kato nê wa omu nê amnhĩ kôt wa kuwÿ.

²⁰ Hãmri nhùm wa kuma nê ma hkôt pa ho pa. Pàr kre kamã mẽ kãm àpênh xwÿnhjê ri hipêêxà re nê ma Jejus kôt pa ho pa.

Jejus kot mēhō nē mẽkarōmnuti janor ã harēnh

Rukre 4.31-37

²¹ Hãmri nhùm Jejus mẽ hkôt mẽ pa ho mẽ pa xwÿnhjaja ma krĩ pê Kapanau hwÿr mỗ hãmri nê hwÿr pøj. Hãmri nhùm mẽ ixpê Ijaewjê nhõ arĩgromnu pê sap kato nhùm Jejus ma Tirtùm kapër o mẽ ahkre xà hã ixkre hwÿr tẽ nê hwÿr axà. Hãmri nê kamã mẽ kot Tirtùm kapër mar kaxyw axpên wÿr mẽ pikuprõnh xwÿnhjê jahkre ho nhÿ.

²² Nê mẽ ahkre mex nhùm mẽ kuma nê tee ri hamaxpêr nê axpên mã:

—Hêxta waa nê. Pêr ãm hãmri na ã mẽ pamã mẽmoj jarênh anê. Tirtùm kapêr tùm o mẽ ahkre xwÿnhjê rom àhpumunh tÿx kôt na hprĩ hã mẽ pajahkre mex nê. Anê.

²³ Hãmri nhùm mẽhõ myja mẽ hwÿr axà. Na pre ra mẽkarōmnuti hwÿr axà nhùm ÿ hã amnhĩ tomnuj

o pa. Hãmri nê mẽ hwÿr axà nê Jejus pumu nê kãm kapër. Nom tãm kapêr kêt nê. Mêkarōmnuti nhÿ hã kãm kapêr. Kàx pê kãm kapêr nê kãm:

²⁴ —Pa Jejus? Kwa tanhmã mẽ ixto hkêt nê. Ixte apumunh mex. Apê Najare nhõ xwÿnh tã mãânên apê Tirtùm kot mẽ ixwÿr amênh xwÿnh maati na ka. Tirtùm rùm na ka pre mẽ ixwÿr wry. Kwa xà kot kaj mẽ ixto ajapêx nà? Anê.

²⁵ Hãmri nhùm kãm:

—Tk. Kwa anhĩkrê nê myta kurùm akator kurê kumrêx. Anê.

²⁶ Hãmri nhùm kuma nê àmra htÿx kãm myja o àk tÿx nê kêp kato nê ma tẽ nhùm akupÿm mex.

²⁷ Hãmri nhùm mẽ piitã omu nê kamã no puma nê. Hãmri nê xatã axpên mã harênh o pa nê axpên mã:

—Kokÿÿ. Jejus na pre àhpumunh tÿx kôt mẽkarōmnuti jano nhùm kuma nê mẽ kurùm hapôx kurê kumrêx. Anê.

²⁸ Hãmri nhùm Garirej kamã mẽ piitã ri axpên mã harênh o pa.

Jejus kot akupÿm Simãw xupãnhgêx o mex ã harēnh

Matêwre 8.14-15; Rukre 4.38-39

²⁹ Tã nhùm Jejus Xiakre mẽ Juãw mẽrohã Tirtùm kapêr o mẽ ahkre xà hã ixkre rùm kato nê ma Simãw mẽ Andre wa òrkwÿ hwÿr mỗ.

³⁰ Hãmri nê mẽ hwÿr agjê. Nhùm Simãw xupãnhgêxja ra à nê hkà kagro htÿx nê

nõ nhũm Jesus mẽ hwỳr axà nhũm mẽ kãm harẽ.

³¹ Hãmri nhũm mẽ kuma nẽ hwỳr axà nẽ omu nẽ hpa hã kupy nẽ kànhmã ỳr nhũm hkà hakry nẽ akupỹm mex kurẽ kumrẽx. Hãmri nẽ kànhmã xa nẽ tẽ nẽ mẽ kãm mẽmoj nhĩpẽx nhũm mẽ hkur o hkrĩ.

Jesus kot akupỹm mẽ hkwỳjẽ ho mex ã harẽnh

Matêwre 8.16-17; Rukre 4.40-41

³²⁻³³ Tã nhũm myt axà nhũm mẽ ohtô nẽ Simãw mẽ Andre wa ờkwỹ hwỳr mra nẽ hakwakrem Jesus ã akuprô. Nẽ amnhĩ kôt mẽ à xwỳnhjẽ ho mra. Nẽ mẽkarômnuti kot mẽ hwỳr gjẽx xwỳnhjaja nhũm mẽ hwỳr mẽ o mra.

³⁴ Hãmri nhũm Jesus mẽ omu nẽ akupỹm ahpỳnhã mẽ piitã mẽ ho mex pa. Nẽ mẽkarômnutija nhũm mẽ kurũm mẽ hapôj. Mẽkarômnuti kot kęp Tĩrtũm Kra hã omunh tã no nhũm kapẽr nẽ mẽ hkurẽ nẽ mẽ hano nhũm mẽ kapẽr kêt rãhã mẽ kurũm hapôj nẽ ma mra.

Jesus kot Tĩrtũm mã amnhĩ jarẽnh ã harẽnh

Rukre 4.42-44

³⁵ Tã nhũm apkati nhũm ko-rmã myt kator kêt ri nhũm Jesus kànhmã nhỹ nẽ tẽ nẽ kato. Hãmri nẽ ma kapôt ã ahte nhỹhỹm tẽ nẽ nhỹri Tĩrtũm mã amnhĩ jarẽnh o nhỹ.

³⁶ Hãmri nhũm Simãw Pêtre mẽ hkwỳjaja hkrã hapôj nẽ tee ri ixkre kamã hapêr. Hãmri nẽ hapôj nẽ ma hpri jakop o mỗ.

³⁷ Hãmri nẽ hwỳr kato nẽ omu nẽ kãm:

—Pa. Kwa na mẽ piitã tee ri ajapêr. Anẽ.

³⁸ Hãmri nhũm mẽ kãm:

—Tô ma pu mẽ mỗ. Nom kot puj mẽ akupỹm mẽ hwỳr pamôr kêt nẽ. Kot puj mẽ hpãnhã nhãm krĩ hkwỳ hkôt mãn ri pajapôj. Pa kamã mẽ kãm Tĩrtũm kapêr jarẽ mãn. Ja kaxyw na pre mẽ awỳr inhmẽ. Krĩ piitã hkôt mẽ pa xwỳnhjaja kot kapêr mar kaxyw. Anẽ.

³⁹ Hãmri nẽ mẽ ma axte Garirej kamã krĩ hkwỳ hkôt pa. Nẽ krĩ piitã hkôt Tĩrtũm kapêr o mẽ ahkre xà hã ixkre kamã mẽ kãm Tĩrtũm kapêr jarẽnh o pa. Nẽ mẽ kurũm mẽkarômnuti japôx o pa.

Jesus kot akupỹm mẽhõ hkãmnu ho mex ã harẽnh

Matêwre 8.1-4; Rukre 5.12-16

⁴⁰ Tã nhũm mẽhõ hkà hkro xàpêr tỳx xwỳnhja Jesus wỳr tẽ. Hãmri nẽ hã hpijaam kaxyw kutã hkônkrã ho tẽm nẽ nhỹ nẽ kãm:

—Pa Pahiti. E ot pa awỳr amnhĩ to tẽ. Akupỹm ate mẽ ixto mex kaxyw axàhpumunh tỳx jakamã kot ka akupỹm amã ixto mex prãm nẽ mãmri akupỹm ixto mex. Anẽ.

⁴¹ Hãmri nhũm kuma nẽ kamã ukapri nẽ hã ìhkra xi nẽ kãm:

—Nà kot paj ato mex. E akupỹm akà mex.

⁴² Anhỹrja kôt nhũm akupỹm hkà mex kurẽ kumrẽx.

43-44 Hāmri nhūm Jejus kām kapēr kām hihtýx nē hano nē kām:

—E kêr ka amnhĩ tã akwýjê mã tanhmã ijarēnh to hkêt rãhã ma patre hwýr tē kê akupým akà mex ã apumu. Hāmri ka amnepēm Mojes kot mē ate akupým mē amex ã Tirtūm mã tanhmã amnhĩ nhĩpêx to hã karō xwýnhhta ka kām ho anē. Kê mē piitã akupým akà mex ã apumu. Anē.

45 Hāmri nhūm kuma nē ma tē. Nom axtem nē ma mē piitã mē kām amnhĩ jarēnh o ri mra. Jejus kot kām karō xà kuhpa hã ma mē kām amnhĩ jarēnh o ri mra. Jakamã nhūm mē kuma nē piitã nhỹhỹnh Jejus wýr mra. Mē ohtō rax kumrêx nē hwýr mra nhūm tee ri mē noo mã nhỹri krĩm pa mã. Hāmri nē ãm krĩ pu hã ri pa htã nom nhūm mē arĩ ohtō nē hwýr mra.

2

Jejus kot akupým ĩ kamã htyk xwýnh o mex ã harēnh

Matêwre 9.1-8; Rukre 5.17-26; Juãw 10.37-38

1 Tã nhūm Jejus hã apkati grêre nē hkôt mē pa ho mē pa xwýnhjê mērohã ma akupým Kapanau wýr mō. Hāmri nē hwýr pōj nhūm mē piitã nhỹri mēhō nhōrkwyĩ kamã hpôx kôt harēnh ma nē hã akuprō.

2 Ra hã pikuprōnh rax nē ixkre nhĩtom pa. Nhūm mē hkwyjaja kapôt ã kuhê nhūm Jejus Tirtūm kapēr o mē ahkre ho nhỹ.

3 Hāmri nhūm mēmyjaja kêp kwat nē ĩ kamã htyk xwýnhja mý nē Jejus kot ho mex kaxyw hwýr o tē.

4 Hāmri nē tee ri hã mē pikuprōnh rax xwýnhjê pumu nē nhỹhỹnh kot hwýr o àr kaxyw tee ri amnhĩ kukamã ho ukapi ho pa. Hāmri nē hamaxpēr nē ixkre nhĩmōk po hwýr ho api nē himōk kwý grã nē hkôt ĩ kamã htyk xwýnhhta nōr xà mērohã hkôt Jejus wýr haxã.

5 Hāmri nhūm mē kot kaxyw kām hamaxpēr týx ã mē omu nē ĩ kamã htyk xwýnhhta mã kapēr nē kām:

—Pa? Kwa tee ri amnhĩ kukamã ajamaxpēr kêt nē. Na pa ra anē ate amnhĩ tomnuj piitã ho ijapêx. Kot paj axte kām ijamaxpēr kêt nē. Anē.

6 Hāmri nhūm Tirtūm kapēr tūm o mē ahkre xwýnhjaja tee ri ã kapēr anhỹrja ã kuma nē hamaxpēr o:

7 —Tk. Kwa pēr mēhō myti mũj kêp Tirtūm kêt tã te kapēr pyrãk o amnhĩ nhĩpêx nē mē nē mē kot amnhĩ tomnuj o hapêx ã amnhĩ jarē. Tirtūm pix kot mē nē mē kot amnhĩ tomnuj o hapêx kênã. Anē.

8 Nom nhūm Jejus mē hamaxpēr kôt mē omunh mex nē. Mē kot Tirtūm pix kot mē nē mē kot amnhĩ tomnuj rēnh nē akupým mē à xwýnhjê ho mex kôt mē hamaxpērja nhūm mē omunh mex nē mē kām:

—Kwa mē ã ajamaxpēr anhỹr kêt nē.

9 Ixte mē nē mē kot amnhĩ tomnuj o ijapêx par ã amnhĩ

jarënh tã mẽ ate mẽ ano ho ja kôt ixpumunh kêt jakamã na ka htem ja hã ixkôt ajamaxpër kêt nẽ. Nom kot paj mẽ anoo mã akupÿm myja o mex. Ka mẽ ja hã ixpumu hãmri nẽ ixkôt ajamaxpër kurê kumrêx.

¹⁰ Ixpê Tirtũm kot mẽ awÿr inhmënh xwÿnh na pa. Ixte mẽ anê mẽ ate amnhĩ tomnuj rënh kaxyw na pre mẽ awÿr inhmẽ pa wrÿ. Tã mẽ ate ja kôt ixpumunh kaxyw kot paj mẽ anoo mã mytija ho mex.

¹¹ Anhÿr o mẽ kãm kapër hãmri nẽ ì kamã htyk xwÿnhhta mã kapër nẽ kãm:

—E kãnhmã xa nẽ anõr xà mÿ nẽ ma akupÿm anhõrkwÿ hwÿr tẽ. Anẽ.

¹² Hãmri nhũm kuma nẽ kãnhmã ãm kurê kumrêx. Hãmri nẽ akupÿm mex ã amnhĩ pumu nẽ hkĩnh tÿx nẽ nõr xà mÿ nẽ mẽ noo mã kato nẽ ma akupÿm õrkwÿ hwÿr tẽ. Hãmri nhũm mẽ kot omunh xwÿnhjaja amnhĩ jaêr pẽ omu nẽ no hapõx kaxyw nẽ hkôt omunh o kuhê nẽ kamã no pyma htÿx nẽ. Nẽ tee ri omu nẽ axpën mã:

—Hêxta waa nẽ. Aa mẽ pahte ã mēhõ kot amnhĩ nhĩpêx anhÿr ã omunh kêt kumrêx tã jarãhã ja pumu. Nã Tirtũmja ãm mex o mex. Anẽ.

Jejus kot amnhĩ wÿr Rewi hwÿr ã harënh

Matêwre 9.9-13; Rukre 5.27-32

¹³ Hãmri nhũm Jejus mẽ ma mra nẽ akupÿm gõ rax pẽ Garirej wÿr mra nẽ gõ mÿ

ri pa. Hãmri nhũm mẽ pitã omu nẽ hwÿr mra nẽ hã akuprõ nhũm Tirtũm kapër o mẽ ahkre ho nhÿ.

¹⁴ Hãmri nẽ mẽ kure nẽ axte hkôt mẽ pa ho mẽ pa xwÿnhjê mẽrohã ma axte mra nẽ nhÿri Apew kra Rewija pumu. Rõm kãm mẽ õ pahihiti mã amnhĩ kwÿjê pẽ kãxpore hkwy jamÿnh xwÿnh na pre. Jakamã nhũm àpënh o nhÿ nhũm Jejus hãnh tẽ nẽ omu nẽ amnhĩ kôt kuwÿ nẽ kãm:

—Pa? E kwa axapënhhta kaga nẽ hpãnhã amnẽ mẽ ixkôt mãn ri apa ho apa. Anẽ.

Hãmri nhũm kuma nẽ àpënh kaga nẽ ma hkôt mõ nẽ hkôt pa ho pa.

¹⁵ Hãmri nhũm mẽmo arĩgro hã nhũm Rewi nhõ mẽ apkur xà hã mẽõ rax nẽ. Jakamã nhũm amnhĩ nhõrkwÿ hwÿr hkrãmnhwÿjaja nẽ Jejus mẽ hkôt mẽ pa ho mẽ pa xwÿnhjê hwÿ. Hãmri nhũm mẽ ma hkôt mra nẽ õrkwÿ hwÿr agjê nẽ kuri apkur o hkrĩ. Nẽ mãânën mẽ kêp Rõm nhõ pahi mã mẽ kêp kãxpore hkwy jamÿnh xwÿnh kwÿ nẽ mẽ ohtõ nẽ mẽ kutã apkur o hkrĩ.

¹⁶ Hãmri nhũm Tirtũm kapër tũm o mẽ ahkre xwÿnh kwÿ pẽ Parijew nhõ xwÿnhjaja mra nẽ mẽ apkur ã mẽ omu. Nẽ tee ri mẽ hkaêx ã Jejus pumu nẽ hkôt mẽ pa ho mẽ pa xwÿnhjê hwÿr agjê nẽ hã mẽ kãm akir nẽ mẽ kãm:

—Kwa na htem mẽ kot amnhĩ tomnuj xwÿnhjê kutã apkur kêt tã ka mẽ Jejus mẽ apimràatã axtem nẽ mẽ kutã axàpkur o akrĩ. Mẽ ate amnhĩ

to mex ronhÿx ka mẽ kutã axàpkur kêt nê. Anê.

¹⁷ Hãmri nhũm Jejus amnhĩ tã mẽ kapêr ma nê mẽ kãm:

—Tk. Ixte tãm mẽ unhwÿr kaxyw ixte mẽ kutã ixàpkur o inhÿr kênã. Xà na hte tôtô mẽ mex xwÿnhjê hwÿr mra nê mẽ hkane? Nà na hte âm mẽ à xwÿnhjê pix kane ho pa. Ra mẽ ate ja pumunh mex. Ja pyrã nê na pa pre mẽ kot amnhĩ to mex xwÿnhjê hwÿr ixwrÿk kêt nê. Âm mẽ kot amnhĩ tomnuj xwÿnhjê pix wÿr na pa pre wrÿ. Ixte tãm mẽ unhwÿr kaxyw mẽ hwÿr wrÿ nê jajê kutã ixàpkur o nhÿ. Mẽ ate amnhĩ tomnuj mã anhũrer nê hpãnhã tãm amnhĩ nhĩpêx o apa kaxyw na pa pre mẽ awÿr wrÿ nê mẽ akamã ixukaprĩ ho ri mẽ akôt ixpa. Tã ka mẽ atÿx ã ixte mẽ kutã ixàpkur anhÿrja ã ixto akapêr anê. Anê.

Mẽ kot Tirtũm mã amnhĩ jarênh kaxyw mẽõ kaga hã mẽ harênh

Matêwre 9.14-17; Rukre 5.33-39

¹⁸ Juãw Paxis kôt mẽ pa xwÿnhjê mẽ Parijew nhõ xwÿnhjaja na prem tõiã Tirtũm mã amnhĩ jarênh kaxyw nê apkur kêt rãhã kamã kãm amnhĩ jarê. Nom nhũm Jejus kôt mẽ pa ho mẽ pa xwÿnhjaja na prem kãm amnhĩ jarênh prãm nê apkur kãm amnhĩx kãm amnhĩ jarênh o pa. Jakamã nhũm Ijaew kwÿjaja tee ri ja hã mẽ omu nê Jejus wÿr mra nê mẽ hã hkukja nê kãm:

—Pa? Kwa aprĩ hã mẽ inhmã mẽmoj jarê. Na hte Parijew nhõ xwÿnhjê mẽ Juãw Paxis kôt mẽ pa xwÿnhjaja tõiã Tirtũm mã amnhĩ jarênh kaxyw nê apkur kêt rãhã kãm amnhĩ jarê. No akôt mẽ pa ho mẽ pa xwÿnhjaja na htem àmnhĩx apkur o pa kamã kãm amnhĩ jarênh o pa. Kwa mo na htem mẽ urak nê tõiã apkur kêt rãhã kãm amnhĩ jarênh kêt nê? Anê.

¹⁹ Hãmri nhũm Jejus mẽ kãm:

—Tk. Mo kaxyw kot mẽ ã amnhĩ nhĩpêx anê? Mẽ hkaprĩ hkêt kênã. Mẽ kot ixkôt pa ho pa hã amnhĩ pumunh jakamã na htem hkĩnh nê pa. Kormã ixte mẽ hkôt ixpa kênã kot kêt mẽ Tirtũm mã kapêr kaxyw nê ho apkur kêt kamã kãm amnhĩ jarê. Xà na htem hkrãmnhwÿ hã hkĩnh kaxyw hã akuprõ nê hkaprĩ nê apkur kêt nê mÿr o hkrĩ? Nà na htem hã akuprõ nê hkĩnh nê apkur rũnh nê. Ja pyrã nê na hte ixkôt mẽ pa ho mẽ pa xwÿnhjaja ixkôt kormã àmnhĩx hkĩnh nê apkati mẽ apkur kãm kãm amnhĩ jarênh o pa.

²⁰ Nom koja mẽ kãm ixkurê xwÿnhjaja nhÿrmã tanhmã ixto hãmri nhũm mẽ rĩ kormã hkaprĩ htÿx kãm ho apkur kêt rãhã Tirtũm mã amnhĩ jarê. Anê.

Nhũm pre ã Jejus mẽ kãm hkôt ri mẽ pa ho mẽ pa xwÿnhjê jarênh anê hãmri nê axte mẽ kãm kapêr nê mẽ kãm:

21-22 —Mê kot amnhĩ tomnuj xwÿnhjaja mê kot amnhĩ nhĩpêx tũm o amnhĩ pyræk jakamã na htem mê kot amnhĩ nhĩpêx nyw kaga. Tã ixte amnhĩ nhĩpêx nywja te kot mê ate amnhĩ nhĩpêx tũm pyræk kêt jakamã na ka htem inhma nê ãm inhma. Kwa mê inhma nê mê ate amnhĩ nhĩpêx tũm gryk ã ixkaga hkêt nê. Anê.

Jejus kêp arĩgromnu hpãm ã kot amnhĩ jarênh

Matêwre 12.1-8; Rukre 6.1-5

23 Tã nhũm mê ixpê Ijaew nhõ arĩgromnu pê sap kato nhũm Jesus mê hkôt mê pa ho mê pa xwÿnhjaja ma nhÿhÿm mō. Ma mê hpur kahti hkôt nhÿhÿm mō nhũm hkôt mê pa ho mê pa xwÿnhjaja ra kãm prãm nê. Hãmri nê prãm xàj purta kamã amnhĩm mẽmo hy te kot harôj pyræk xwÿnhhta kwÿ rê nê ma Jesus kôt hkanhar o mō. Mê ixpê Ijaewjaja na pa htem axpên pur kãm ixpa nê ã amnhĩ nhĩpêx anê.

24 Hãmri nhũm Parijew nhõ xwÿnhjaja mê hkôt mra nê tee ri ja hã mê omu nê Jesus wÿr mra nê mê hã kãm akir nê kãm:

—Kwa jarãhã sap tã akôt mê pa ho mê pa xwÿnhjaja mẽmo hy hkwÿ rê nê akôt hkanhar o pa. Tĩrtũm kapêr ã kaga htũm kot mê panhõ arĩgromnu hã mê pahte mẽmoj nhĩkênh nê mê pahkurê kênã. Kwa mê kãm anê kê mê ã amnhĩ nhĩpêx anhÿr kêt nê. Anê.

25-26 Hãmri nhũm Jesus mê kuma nê hprĩ hã mê kãm

Tĩrtũm kapêr tũm jarê nê mê kãm:

—Kwa xàn ka mê kormã Tĩrtũm kapêr ã kaga htũm kamã pahĩ Tawi kot tanhmã amnhĩ nhĩpêx to kamã harênh nê mar kêt nê? Kormã Apiatar kêp patre maati ri na pre Tawi hkôt ri mê pa xwÿnhjê mê prãm xàj Tĩrtũm mã amnhĩ jarênh xà hã ixkre hwÿr agjê. Hãmri nhũm Apiatar mê kãm prãm tÿx ã mê omu nê mê kamã ukapri nê mê kãm mẽmoj gō. Mê kot Tĩrtũm noo mã pãwti jaxwÿr xwÿnhhta nhũm mê kãm kugō nhũm mê kuku. Tĩrtũm kapêr ã kaga htũm kot ja nê mê kurê htã nhũm mê kãm prãm tÿx ã mê omu nê mê kamã ukapri xàj mê kãm kugō. Patre pix kot ja hkur kaxyw tã nhũm mê kãm kugō nhũm mê kuku. Tã nom nhũm Tĩrtũm ja hã mê omu nhũm ja kêp omnuj kêt nê. Patre kot mê kamã ukapri nê mê kãm ôr nhũm ja hã omu nhũm ja kãm mex nê. Anê.

Hãmri nê mê kãm:

27 —Na pre Tĩrtũm panhĩ kumrêx o kato nê kormã mê hkôkôt nê Tĩrtũm mã hamaxpêr o hkrĩ kaxyw arĩgromnu ho kato. No na pre arĩgromnu kumrêx o kato nê hpãnhã kaxyw panhĩ ho kator kêt nê.

28 Tã pa na pre Tĩrtũm mê akaxyw ixãm nê mê awÿr inhmê. Jakamã papxipix na pa hte arĩgromnu hã tanhmã mê kot amnhĩ nhĩpêx to hã mê kãm karō ho ri ixpa. Jakamã kwār mê mãmri mẽmojta rê nê ixkôt hkanhar o mō. Anê.

3

*Jejus kot akupÿm ïhkra grà
xwÿnh o mex ã harënh*

*Matêwre 12.9-14; Rukre
6.6-11*

¹ Tã nhÿm mē ixpê Ijaewjê
nhô arïgromnu pē sapja axte
kato. Hãmri nhÿm Jejus
Tirtÿm kapêr o mē ahkre
xà hã ixkreja wÿr tē nē axà
nē kamã Tirtÿm kapêr o mē
ahkre ho nhÿ. Nhÿm mēhō
my ïhkra grà xwÿnhja mē ïhkō
hã mar o nhÿ.

² Nhÿm Parijew nhō
xwÿnhjaja kãm mē hkrãhtÿmjê
mã Jejus o kapêr prãm
jakamã htãnopxar o kuhê nē
axpën mã:

—E kwa pu mē jar pakuhê
nē kot tanhmã amnhÿ nhÿpêx
to hã omu. Xà koja jarãhã
ïhkra grà xwÿnh mÿj o mex
nã? Jarãhã arïgromnu kênã
kot kêt kãm ïhkra ho mex.
Koja ho anê nē ra Tirtÿm
kapêr tÿm nhÿrōp xa. E pu mē
xa nē hã omu. Anê.

³ Hãmri nhÿm Jejus ïhkra
grà xwÿnhhta pumu nē kãm:

—Pa? E kãnhmã xa nē amnê
ixwÿr tē. Anê.

Hãmri nhÿm kãnhmã xa nē
hwÿr tē nē mē piitã mē noo
mã xa.

⁴ Hãmri nhÿm Jejus mē kot
omunh o hkrÿ xwÿnhjê hwÿr
rÿt nē arïgromnu hã tanhmã
mē kot amnhÿ nhÿpêx to hã
mē hkukja nē mē kãm:

—E mē inhma. Tanhmã
na htem arïgromnu hã axpën
nhÿpêx to wehe? Xà kot ka
mē arïgromnu hã axà htÿx
nē amex prãm xàj ma mēhō
hwÿr amnhÿ to tē nhÿm
apumu nē apkatim arïgro

mex jamãr pē akane hkêt
ka ty nhÿm ja amã mex nê?
Rÿ nhÿm apumu nē tanhmã
atomnuj to nē akupÿm amnhÿ
nê ajano nhÿm ja amã mex
nê? Nã koja ã anhÿpêx anê
nhÿm ja amã mex kêt nê.
E mē inhmã mēmoj jarê.
Tanhmã na pre finat Mojesja
Tirtÿm nhÿ hã arïgromnu hã
mē pahte axpën nhÿpêx ã mē
pamã karō hto? Xà kot puj
mē hã axpën kãm paxukapri
rÿ hã mē pamã axpën kurê
ho papa? Xà kot puj mē hã
mēmoj punuj pē mē utà rÿ
kot puj mē ãm arïgro mex pix
ã mē utàr kaxyw arïgro mex
jamã? E mē atō inhmã ja jarê.
Anê.

Ra kot hprÿ hã mē
hamaxpêr ã mē omunh mex
nê ã hêx rom mē hkukjêr anê.
Nom nhÿm mēhō tanhmã
kutã kãm nē hkêt nê. Mē ãm
piitã akryk mar pē omunh o
hkrÿ. Mē kot tanhmã kãm nē
nhÿm ta pãnhã tanhmã mē
kãm nē pymaj nhÿm mē tee ri
kãm tanhmã nē hprãm nom
akryk mar o hkrÿ.

⁵ Hãmri nhÿm Jejus tee ri
mē ukapri hkêt ã mē omu nē
hkapri nē mē kamã gryk nê.
Hãmri nê ïhkra grà xwÿnhja
mã kãm:

—Tk. Mē kot tanhmã
inhmã ujarënh tore hã. E
anhÿhkra katàt. Anê.

Hãmri nhÿm ïhkra katàt nē
akupÿm mex kurê kumrêx.

⁶ Hãmri nhÿm Parijew nhō
xwÿnhjaja tee ri ã Jejus kapêr
anhÿrja ã kuma nē kot sap ã
akupÿm myta o mex ã omu
nē kamã gryk tÿx nê. Nē
hapōj nē ma pahi Erox kôt

mě pa xwýnhjê hwýr mra ně
mě kām harē ně tanhmā hā
axpēn kukjêr to ně taxpēn mā:

—Kwa tanhmā kot puj mẽ
ho? Na ā kapēr anhýrja o
mě pahto kapēr punuj ně.
Te hkīnhā mẽ papamjaja
mě kamā paxukapri hket
pyrak ā mẽ pajarē. Kojā mẽ
pahkwýjaja kuma hāmri ně
mě pahte amnhī nhípêx kaga
ně amnhī kaxyw hkôt pix mā
ham taxpēr o pa. Ja pymaj kwa
tanhmā kot puj mẽ ho? Anē.

*Mě ohtô ně kot Jejus kapēr
mar kaxyw hwýr mra ā mẽ
harēnh*

*Matêwre 4.23-25; Rukre
6.17-19*

⁷⁻⁸ Tā nhūm Jejus mẽ hkôt
mě pa ho mẽ pa xwýnhjê
mērohā ma akupým gô rax
wýr mō nhūm mẽ ohtô ně
omu ně ma hkôt mra. Pyka pē
Garirej mẽ Jutej wa kurūm ně
kri pē Jerujarē rūm ně pyka
pē Ituměj rūm ně pyhti pē
Jotāw nhīkjê hā kri hkwý rūm
ně kri hkwý pē Xir mẽ Sitō wa
pu hā kri hkwý rūm ohtô ně
ma hwýr mra. Na prem ra
harēnh ma ně nhýhým mōr ā
omu ně taxpēn mā harēnh o:

—E kwa tokyj pu mẽ ma
hwýr mẽ à xwýnhjê o mō kē
akupým mẽ ho mex. Anē.

Hāmri ně hwýr mẽ o mra ně
hā pikuprōnh rax ně.

⁹⁻¹⁰ Hāmri nhūm Jejus
akupým mẽ à xwýnhjê ho
mex. Gô mýri xa ně tanhmā
mě ho mex to. Jakamā nhūm
mě axte ohtô ně hwýr mra ně
piitā kot htok ně akupým mex
kaxyw hwýr taxpēn nhīgā.
Hāmri nhūm tee ri amnhī wýr

mě omu ně hkôt mẽ pa ho mẽ
pa xwýnhjê mā:

—Kwa mẽ ma mra ně amnē
kanôre jêt mūj kjênh o tē ně
jar inhmā anhô. Kê mẽ ixtā
 taxpēn nhīgānh o ijanēnh japēr
pa hwýr axà ně amým mẽ ho
hpýnh ně akupým mẽ ho mex.
Anē.

Hāmri nhūm mẽ kuma ně
ma mra ně kām ja o tē ně
kunhō.

¹¹ Na pre mẽkarōmnuti
hkwýja mẽ hkwýjê hwýr agjê.
Jakamā nhūm mẽ Jejus pumu
ně mẽkarōmnuti nhý hā kēp
Tirtūm Kra hā omunh kurē
kumrêx. Hāmri ně hā hpijaām
kaxyw kutā hkōnkrā ho hkrī
ně mẽkarōmnuti nhý hā kām
kapēr ně kām:

—Kwa apê Tirtūm Kra na
ka. Anē.

¹² Hāmri nhūm tee ri
amnhī tā mẽ kuma. Kām
 mẽkarōmnuti ā kot harēnh
anhýr prām kêt ně. Ām mẽ
piitā mẽ kot kapēr mar ně kot
amnhī nhípêx ā omunh pē
kēp Tirtūm Kra hā omunhja
na kām hprām. Jakamā nhūm
 mẽkarōmnuti ā harēnh anē
nhūm ja ně mẽ kām kapēr ně
mě kām:

—Tk kwa nà kêr ka mẽ
tanhmā ijarēnh to hket ně.
Anē.

*Jejus kot amnhī kaxyw mẽ
kēp 12 rēnh ā harēnh*

*Matêwre 10.1-4; Rukre
6.12-16*

¹³ Tā nhūm Jejus hkôt mẽ
pa ho mẽ pa xwýnhjê kwýjê mā
kām:

—E pu mẽ ma mō ně
krāhakýx mūj ā api. Anē.

Hāmri ně mẽ ma hwýr mō
ně hā api

¹⁴nhũm Jejus amnhĩ kaxyw mẽ ho 12 nẽ mẽ kurê. Mẽ kot ma ÿ hã Tirtũm kapêr o mẽ ahkre

¹⁵nẽ ÿ hã mẽ nê mẽkarõmnuti janor o pa kaxyw.

¹⁶ã mẽ hixi kot anhỹr.

Na pre ja kêp Simãw no nhũm Jejus hpãnhã hã hixi hõ mẽ nhũm hpãnhã mãânên kêp Pêtre.

¹⁷Nẽ hkõt Jepetew kra Xiakre mẽ htõ Juãwja wa kuta.

Hãmri nẽ kot Simãw nhĩpêx pyrã nẽ wa hã hixi hõ mẽ nhũm wa hpãnhã mãânên kêp Poanes. Wa kot amnhĩ prêprêk jakamã nhũm ã wa hã hixi mênh anê.

¹⁸Nẽ hõ pẽ Andreja ta.

Nẽ hkõt Andre htõ Firiptija ta.

Nẽ hkõt Patoromewja ta.

Nẽ hkõt Matêwreja ta.

Nẽ hkõt Tomasja ta.

Nẽ hkõt Arpêw kra Xiakreja ta.

Nẽ hkõt Tatewja ta.

Nẽ hkõt Simãw õja ta.

Simãwja na pre kãm mẽ ixpê Ijaewjê nhõ pika pẽ Ijaew kĩnh tỳx nẽ. Jakamã na pre kãm nhãm pika hõ nhõ pahi kot mẽ ho amnhĩptar prãm kêt nẽ pa.

¹⁹Nẽ hkõt Jut Kariotja ta.

Kormã kot mẽ kãm Jejus kurê xwỳnhjê nhĩhkram õr mã nhũm Jejus kot amnhĩ kukamã omunh mex tã mẽ hkõt amnhĩ kaxyw kuta.

Ã mẽ kot ÿ hã mẽ ahkre o pa kaxyw mẽ rênh xwỳnhjê nhĩxi kot anhỹr.

Jejus mẽ mẽkarõmnuti wa harênh

Matêwre 12.22-32; Rukre 11.14-23, 12.10; Juãw 10.19-21

²⁰Hãmri nhũm Jejus hkõt mẽ pa ho mẽ pa xwỳnh kwỳjê rênh pa nẽ ma amnhĩ kõt mẽhõ nhõrkwỹ hwỳr mẽ o mõ. Na prem apkur kêt ry rax nẽ ra kãm prãm tỳx nẽ nhũm ma mẽ apkur kaxyw amnhĩ kõt mẽ o mõ. Hãmri nhũm axte mẽ à xwỳnhjaja mẽ omu nẽ Jejus wỳr pikuprõnh rax nhũm mẽ tokyx apkur kêt nẽ.

²¹Hãmri nhũm Jejus katorxã nẽ htõjaja tee ri mẽ apkur kêt ã mẽ harênh ma nẽ axpên mã:

—Kwa mãn ãm ra tanhmã hkrã amnhĩ to nà? Hã na mẽ kot omunh kaxyw hã hpikuprõnh rax jakamã nhũm kormã apkur kêt nẽ. E tokyx pu mẽ ma hwỳr mra nẽ omu nẽ mẽ kêp utã nẽ akupỹn amnhĩ kõt o mõ. Anê.

²²Rôm nhũm Tirtũm kapêr tũm o mẽ ahkre xwỳnhjaja Jerujarẽ rũm Jejus wỳr mõn põj. Hãmri nẽ tanhmã ho kapêr punuj to. Kêp mẽkarõmnuti hkwy hã hkamnhĩx jakamã harênh o:

—Tk pêr hinhu nhĩkõõti nhỹ hã na hte mẽ nẽ amnhĩ kwỳjê japõx o pa. Anê.

Hinhu nhĩkõõti nhĩxi hõ pẽ Satanasti nhũm prem ÿ hã Jejus kot amnhĩ nhĩpêx o pa hã hkamnhĩx.

²³Hãmri nhũm amnhĩ tã mẽ omu nẽ amnhĩ wỳr mẽ kãm hpa ho apê nẽ mẽ kãm amnhĩ

jarë. Nom amnhĩ tã kuxi nẽ mẽ kãm mẽmoj jarë nẽ mẽ kãm:

—Kwa mẽ inhma mẽ ate ixpê Satanasti hkwý hã ixkamnhĩx xwýnhjaja. Xà na hte Satanasti mẽ nê amnhĩ kwýjê janor o pa? Nà na hte ã amnhĩ nhĩpêx anhÿr kêt nê.

²⁴ Na hte pika nhõ xwýnhjaja axpên kutã amnhĩ xunhwý nẽ axpu hãmri nẽ anhrà nẽ ma ahpÿnhã ri pa nẽ amnhĩ krã hkôt ri tanhmã amnhĩ to ho ri pa. Jakamã nhũm mẽ õ pahija mẽ hamãr o pa hkêt nê.

²⁵ Nê krĩ nhõ xwýnhjaja haxwýja. Mẽ kot axpên to hkwý xwýnhjaja koja mẽmoj tã axpên kãm gryk nẽ axpên kutã amnhĩ xunhwý hãmri nẽ anhrà nẽ ahpÿnhã pa hãmri nhũm mẽ õ pahi tee ri kãm mẽ hamãr o pa hprãm. Mo hkwýjaja kot kêt ri mẽ hamãr o pa? Nom tãm kot amnhĩ nê mẽ hanoore hã. Mẽ tãmjaja na prem axpên kãm gryk nẽ anhrà nẽ ahpÿnhã pa.

²⁶ Tã ja pyrã nẽ ixte Satanasti nhÿ hã tanhmã amnhĩ nhĩpêx to ho ixpa ronhÿx pa ri mẽ kurũm amnhĩ kwýjê japôx o ri ixpa hkêt nê. Mẽkarõmnutijaja kêp Satanasti hkwý kênã. Koja Satanasti ixte mẽ kurũm mẽ hapôx kaxyw tanhmã inhmã nẽ hkêt nê.

²⁷ ãhpumunh tÿx jakamã na hte mẽ kot hkôt amnhĩ xunhwÿr xwýnhjê pumunh tÿx o pa nhũm mẽhõ tee ri kêp mẽ utàr kaxyw. Tã ixãhpumunh tÿx o ixte hakrenh jakamã

ixte kêp mẽ utàrja inhmã tanhmã kute hkêt. Na pa hte kêp mẽ utà nhũm mẽ hpãnhã ixkôt amnhĩ nhĩpêx o pa nhũm Satanasti tee ri mẽ hã ixpumunh o pa kaprÿ.

²⁸ —Ãm hãmri na pa mẽ amã ixkapêr. Kot kaj mẽ tanhmã amnhĩ tomnuj to ho apa. Nê amnhĩ tomnuj tÿx kumrêx rãhã ho apa. Rÿ tanhmã akapêr punuj to ho apa. Rÿ tanhmã Tirtũm o akapêr punuj to ho apa. Tã tee ri ja hã amnhĩ pumu nẽ akaprĩ nẽ ã ate amnhĩ nhĩpêx anhÿrja kaga nẽ Tirtũm kôt amnhĩ xunhwý. Hãmri nhũm amnhĩ tã mẽ apumu nẽ amnhĩ katut kôt mẽ ate amnhĩ tomnuj nẽ mẽ akapêr punuj rênh pa nẽ axte kãm hamaxpêr kêt nê. Koja ho hapêx par kumrêx.

²⁹ Nom koja Tirtũm Karõ xatã mẽ amã ixto amnhĩrit tã ka mẽ ama nẽ ãm ama nẽ te kêp amnhĩ jamak pro pyrãk o amnhĩ nhĩpêx. Jao Tirtũm Karõ hã apijaam kêt ã amnhĩ to amnhĩrit. Ja mÿrapê koja Tirtũm nhÿrmã amnhĩ xwar te mẽ apê amnhĩ jamak pro pyrãk o mẽ anhĩpêx ka mẽ tee ri kãm amnhĩ kaprĩ kaprÿ. Hãmri nẽ mẽ kot amnhĩ xã htÿx kamã hamak o pa htũm xã wÿr ma apa nẽ kamã apa rãhã apa ho apa. Anê.

³⁰ Mẽ kot Satanasti nhÿ hã mẽ nê mẽkarõmnuti janor o pa hã hkamnhĩx jakamã nhũm pre Jejus ã mẽ kãm kapêr anê.

Jejus katorxà mẽ htõjê jarênh

Matêwre 12.46-50; Rukre

8.19-21; *mãänēn Eprêw 2.11-12*

³¹ Rôm nhũm Jejus katorxà mẽ htôjaja hwÿr mra no ãm kormã hwÿr gjêx kêt nê. Mẽ kot hã htu rax jakamã nhũm mẽ tee ri hwÿr gjêx kaxyw kormã kapôt ã kuhê. Hãmri nê mẽ kot mar o kuhê xwÿnhjê hõ mã kapêr nê kãm:

—Kwa ma tēn Jejus mã mẽ ijarē kē mẽ ixwÿr kato. Anê.

³² Rôm nhũm ixkre kamã mẽ hkrī xwÿnhjaja mẽ omu nê Jejus mã mẽ harē nê kãm:

—Kwa Pahihti. Ota akatorxà mẽ atôjaja awÿr mra nê pôj nê tee ri awÿr gjêx mã nê kormã kapôt ã kuhê nê atã karõ. Anê.

³³⁻³⁵ Hãmri nhũm mẽ kuma nê mẽ kãm:

—Tõe pa ixkato nê mẽ omu. Inhmã mẽ hapêê. Nom kot kaj mẽ atô Tirtũm kapêr ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixtõ rÿ ixkatorxà kot amnhĩ nhĩpêx pyrãk o pu mẽ axpēn nhĩpêx. Pa te inhmã mẽ hapê pyrã nê inhmã mẽ ajapê nê. Anê.

4

Mẽmo hy hkre xwÿnh jarēnh Matêwre 13.1-9; Rukre 8.4-

8

¹ Tã nhũm Jejus axte gô jakàx ã mẽ ahkre ho nhÿ. Hãmri nhũm mẽ axte hã htu rax jakamã nhũm tee ri mẽ omu hãmri nê pàr krem axà nê gôx kãm amÿm mẽ ahkre ho nhÿ. Nhũm mẽ piitã kÿxpê omunh nê mar mex o kuhê.

² Hãmri nhũm mẽ ahkre ho nhÿ. Nom mẽ ujarēnh

pix kãm mẽ ahkre. Mẽ kot Tirtũm kapêr mar nê tanhmã hkôt amnhĩ nhĩpêx to ho paja nhũm hã kuxi nê mẽ kãm hã ujarēnh o nhÿ nê mẽ kãm:

³—E mẽ inhma. Koja mēhõ ma pur mã mõ nê pur kãm mẽmo hy ho ukapêr o pa nom nhũm hy piitã amex kãm rôrôk kêt nê. Koja ahpÿnhã rôrôk.

⁴ Koja hkwy aptÿx kãm rôrôk nhũm kuwēnhre omu nê hwÿr mra nê hkrēr pa.

⁵⁻⁶ Nê koja kēn kãm hkwy rôrôk hãmri nê higrôt kutã nojarēt nê higrôt pa. Nom nhũm kamã aptÿx nê kamã kēp pika hkryre jakamã nhũm higrôt nhũm hã myt apha nê arīgro htÿx mẽ nhũm grã pa. Harē hkryre jakamã grã pa.

⁷ Nê koja hkwy mrônhi kamã rôrôk nê higrôt tã no nhũm utija kēp amÿtã nhũm ô hkêt nê.

⁸—No koja hirã kamã pika mex kãm hkwy rôrôk. Hãmri nê hirã kamã rôrôk jakamã higrôt mex nê piitã ô rax nê. Kamã ô hkwy kēp 30 nê kamã hkwy kēp 60 nê kamã hkwy kēp 100. ã mẽ ujarēnh kot anhÿr.

⁹ Kwa mẽ ama nê kãm ajamaxpêr tÿx rãhã ho ri apa. Anê.

Jejus kot hprī hã mẽmo hy jarēnh

Matêwre 13.10-23; Rukre 8.9-15

¹⁰ Hãmri nhũm mẽ Jejus xujarēnh mar pa nê anhrã nê ma akupÿm mra nhũm hkôt mẽ pa ho pa xwÿnh pē 12 mẽ hkwyjaja pix Jejus ri arīk.

Hāmri nē ujarēnh̄ta ā hkukja nē kām:

—Kwa mon ka hte ā mē kām axujarēnh̄ anē Pahihti? Na pa mē ixprī hā amar mex kēt nē. Anē.

11-12 Hāmri nhūm mē kām:

—Nà kot paj ixprī hā mē amā harē. Tirtūm kām mē ate aprī hā mar prām jakamā kot paj ixprī hā tanhmā mē amā harēnh̄ to. Nà mē kot amnhī tomnu kaga nhūm Tirtūm kot ja hā mē omunh xà hkôt mē ho hkra hā harēnh̄ja na pa hte mē kām harē. No mūjjaja mē akīnhā mē kām mar prām kēt jakamā na pa hte mē kām mēmoj tā haxwỳ nē awjarē nhūm mē ām ixujarēnh̄ pix ma.

Na htem kuma nē ām kuma nē htỳx ri hā pa. No kēp apu mē kām hprī hā mar prām ronhỳx mē ra hprī hā kuma nē Tirtūm kôt amnhī xunhwỳ nhūm amnhī tā mē omu nē mē kot amnhī tomnuj o hapēx. Nom mē kām mar prām kēt. Anē.

13 Tā mē ate aprī hā ixujarēnh̄ja mar mex kēt jakamā tanhmā kot kaj mē amnhī to nē ixujarēnh̄ piitā ama? E kot paj ixprī hā mē amā mēmo hyta jarē ka mē inh̄ma.

14 —Nà mēmo hyta te kēp Tirtūm kapēr pyrāk. Nē ahpỳnhā rôrôk xà hā pikata te kēp ahpỳnhā mē kot Tirtūm kapēr mar xwỳnh̄jê kot mar nē ahpỳnhā tanhmā amnhī nhīpēx to pyrāk.

15 Jakamā mē kot mar xwỳnh̄ kwỳjaja hte kot aptỳx kām hkwy rôrôk nhūm

kuwēnh̄ kot hwỳr mrar nē hkrēr par xwỳnh̄ta pyrāk. Jakamā na htem Tirtūm kapēr ma nom nhūm Satanasti te kuwēnh̄ kot hy hkrēr parta pyrāk o mē hipēx. Nē mē kot amnhī kaxyw hkôt hamaxpēr nē hkôt amnhī xunhwỳr pymaj tanhmā nē mē hkrā hto. Jakamā nhūm mē Tirtūm kapēr ma nom ho hamakētkati tokyx anē nē axte kām hamaxpēr kēt nē.

16 —Nē mē kot mar xwỳnh̄ kwỳjaja te kot kēnre kamā hkwy rôrôk nē higrôt nhūm te hā myt apha nhūm grà par tokyx anhỳr xwỳnh̄ta pyrāk. Na htem Tirtūm kapēr ma nē hkīnh̄ nē. Nē kām mar prām nē. Te hy higrôt tokyx anhỳrta pyrāk.

17 Tā nhūm mēhō tē nē Tirtūm nē tanhmā mē kām kapēr to nhūm mē kuma nē hkaga. Rỳ nhūm mē Tirtūm ā tanhmā mē homnuj to nhūm mē tee ri amnhī tā mē omu nē hkaga. Te mēmo hy higrôt nē grà par tokyx anhỳrta pyrāk.

18 —Nē mē kot mar xwỳnh̄ kwỳjaja te kot mrônhi kamā hkwy rôrôk nē higrôt nhūm mrônhi kot kēp àmnàr xwỳnh̄ta pyrāk. Nē mē kām Tirtūm kapēr mar prām nē.

19 Nom määnēn kām hikukrēx rax nē hikàxpore rax prām jakamā ām ja pix kukamā hamaxpēr o ri pa. Jao ra gryk ā axte Tirtūm kapēr mā hamaxpēr nē hkôt amnhī nhīpēx kēt nē. Te mrônhi kot higrôt pē àmnàr nhūm ô hkēeta pyrāk.

20 —No mē kot mar xwỳnh̄

kwỳjaja te hirã kamã pika mex kãm hy hkwỳ rôrôk nê higrôt nê ô raxta pyrãk. Na htem ixkapêr ma nê amnhĩ krã him hagjênh tỳx nê. Nê ixkôt ri amnhĩ nhĩpêx mex rãhã ho ri pa. Te mêmô hy hkre kamã ô hkwỳja kêp 30 nê kamã kêp 60 nê kamã kêp 100ta pyrã nê Tirtũm kapêr kôt amnhĩ nhĩpêx mex rãhã ho pa. E ã ixujarênhja kot anhÿr. Anê.

Kanê hpimxur ã harênh

Rukre 8.16-18, 8.24-25; Matêwre 13.10-15, 25.14-30

²¹ Nhũm Jejus arĩ hkôt mē pa ho pa xwỳnhjê jahkre nē mē kãm:

—Xà na htem kanê hpôk nê poti ho hpro rỳ hitom kãm par krak ri unhwỳ? Nà na htem hpôk hãmri nê kỳx pē mēmoj nhĩmôk ã unhwỳ.

²² Ja pyrã nê mē piitã kot hkwỳjê pē tanhmã hamaxpêr punuj to ho hpimxur prãm tã tee ri kot ho hpimxur prãm kaprỳ. Koja nhÿrmã mē hamaxpêr piitã amnhĩ to amnhĩrĩt pa. Nê mēmoj piitã ra hpimxur mex tã koja nhÿrmã amnhĩ to amnhĩrĩt pa. Te mē kot kanê hpôk nê kỳx pē unhwỳr nhũm amnhĩrĩt mex pyrãk. Ja pyrã nê na pa hte Tirtũm kapêr o ri ixpimxur o ixpa hkêt nê. Na pa hte ixprĩ hã mē amã harênh mex o ixpa.

²³ Kwa mē ixujarênhja ma nê kãm ajamaxpêr tỳx rãhã ho ri apa. Anê.

Nhũm pre ã Jejus mē kãm kapêr anê.

²⁴ Hãmri nê mē kãm:

—Nê kêr ka mē axpên kãm axukaprĩ ho ri tanhmã axpên to mex to ho ri apa. Kêr kê Tirtũm ja hã mē apumu nê mē apyrã nê mē akamã ukaprĩ pē mē ato mex o pa.

²⁵ Koja mēhõ inhmã tanhmã amnhĩ nhĩpêx mex to pa ja hã omu nê kot inhmã àpênh mexta pãnhã ho mex nê. No koja inhmã àpênh mex kêt pa ja hã omu nê hã ho mex kêt nê.

—Nê koja mēhõ kãm ixkapêr mar prãm nom kormã hprĩ hã mar mex kêt tã arĩ mar o pa nê gaa nê mar tỳx o mō. No koja kuma nê ãm kuma hãmri nê gaa nê hã no hkêt. Anê.

Pur kãm mēmo hy hkre xwỳnhjarênh

Matêwre 13.24-30

²⁶ Nhũm Jejus arĩ hkôt mē pa ho mē pa xwỳnhjê jahkre ho nhÿ nê mē kãm:

—E pa mē amã tanhmã mē kot ixkapêr mar tỳx xwỳnhjê jarênh to ka mē inhma. Koja mēhõ ixkapêr mar tỳx nê ra hkôt ri amnhĩ nhĩpêx o pa. Hãmri nê hamaxpêr nyw o hamaxpêr o pa nê amnhĩ nhĩpêx nyw o amnhĩ nhĩpêx o pa. Te mē hpur kãm mēhõ kot mēmo hy hkre xwỳnh kot amnhĩ nhĩpêx pyrãk. Na hte hyja kre ho pa.

²⁷ Hãmri nê hkre hpa nê kamãt mē ôt o hikwỳ nê arĩgro mē mēmoj tã àpênh o pa. Rãhã nhũm mēmo hyja arĩ hikwỳ ho hikwỳ hkêt nê. Koja amnhĩ nhĩpêx ô ho amnhĩ nhĩpêx nê higrôt kato

ně hprêk. Kre xwýnh kot tanhmã kot amnhĩ nhĩpêx to hã omunh kêt tâ nhũm kãm hprêk.

²⁸ —Na hte hpõm hapôx o pa ně higrõt o pyka kahte. Hãmri ně hprêk ně hô xypõt ně gaa ně hpãnhã ô. Hãmri ně hkamrêk pa ně xa.

²⁹ Hãmri ně mẽ kot hikênh mã mex ně nhũm kot hkre xwýnhhta omu ně amnhĩm hamýnh pa. Tã mẽ kot ixkapêr mar mex xwýnhjaja te mẽmo hy ra higrõt kator ně hprêk ně hô pipõt ně ô xwýnhhta pyrãk. Ně urãk ně amnhĩ nhĩpêx ô ho amnhĩ nhĩpêx o pa. Anê.

Jejus te kot mẽmo hy pyrãk ã kot amnhĩ jarênh

Matêwre 13.31-32; Rukre 13.18-19

³⁰⁻³² Nhũm Jejus arĩ mẽ ahkre ho nhỹ ně mẽ kãm:

—Tirtũm kot mẽ awýr ixte mẽ ato amnhĩptãr kaxyw inhmênh ã ijarênhja. Te ixte mẽmo hy pixire pyrãk. Koja mēhõ mẽmo hy hõ pixire ně hkre nhũm ra higrõt. Ně gaa ně hprêk. Hãmri ně hpa anhrã nhũm kuwênhre hwýr mra ně hõptĩ kamã amnhĩm haê nhĩpêx. Mẽmo hyta grire htã nhũm hkre nhũm higrõt ně ã amnhĩ nhĩpêx anê. Tã kot paj nhỹrmã urã ně ixpyxi htã kot paj pika piitã hkôt mẽ ho amnhĩptã ně mẽ omunh mex rãhã ho ri ixpa. Anê.

Ã na pre Jejusja hkôt mẽ pa ho mẽ pa xwýnhjê mã amnhĩ tã kuxi ně ujarênh anê.

³³ Mẽ kãm ujarênh kãm mẽ ahkre ho pa. Te nhãm

mẽmoj jarênh pyrã ně amnhĩ tã haxwý ně harê. Mẽ kot tanhmã mar to hã mẽ omunh xã hkôt tanhmã mẽ kãm ujarênh to.

³⁴ Na pre ãm ujarênh pix kãm mẽ kãm kapêr mar prãm kêt xwýnhjê mã amnhĩ jarênh rãhã ho pa. No mẽ kot hkôt pa ho pa xwýnhjê mã nhũm hprĩ hã ujarênh jarê nhũm mēhprĩ hã mar mex ně.

Jejus kot kôk o pinhkrênh ã harênh

Matêwre 8.23-27; Rukre 8.22-25

³⁵ Tã nhũm amýkry nhũm Jejus arĩ pãr kre kamã nhỹ. Hãmri ně hkôt mẽ pa ho mẽ pa xwýnhjê mã kãm: “E pu mẽ ma xarmã mõ.”

³⁶ Anê hãmri ně mẽ kot mar o hkrĩ xwýnhjê re ně pãr mã agjê ně ma xarmã mõ. Garirej rũm kato ně ma xarmã pika hõ hwýr mõ. Nhũm pãr kwýja ma mẽ hkôt mõ.

³⁷⁻³⁸ Nhũm Jejus ra õtxwa ně tẽ ně pãr kre kamã hkrã japar xã hã hkrã xi ně ra õt týx ně nõ. Nhũm kôk àpêr týx ně nhũm gô kãnhmã harĩ ně xypên tak. Ra ri xatã xypên tak ně pãr kre kamã axkapĩ nhũm ra mẽ kêp àr o mõ. Hãmri nhũm mẽ tee ri amnhĩ nhĩpêx ně tee ri amnhĩ kukamã hamaxpêr ně Jejus wýr hprõt ně kumra ně kãm:

—Kwa kãnhmã nhỹ Pahihti. Kot puj mẽ jarãhã pahtyk pa. Anê.

³⁹ Hãmri nhũm hkrãkato ně kãnhmã nhỹ ně kôk mẽ gôta pumu ně wa kãm kapêr o:

—E kwa wa anhĩkrê. Anê.

Hāmri nhũm gô mẽ kôk hpinhkrênh kurê kumrêx.

⁴⁰ Hāmri nhũm Jejus hkôt mẽ pa ho mẽ pa xwýnhjê mã kãm:

—Hêxta waa nê. Kormã mẽ ate amnhĩ kaxyw Tirtũm mẽ wa inhmã ajamaxpêr tỳx kêt. Hã na ka mẽ ri amã ma nê tee ri amnhĩ kukamã ajamaxpêr. Anê.

⁴¹ Hāmri nhũm mẽ amnhĩ jaer pê ã kot amnhĩ nhĩpêx anhỹr ã omu nê tee ri axpên pumunh pê omunh o kuhê. Hāmri nê axpên mã:

—Kokỹỹ. Jejus kêp mẽ panhĩo hkêt. Mẽ pahtô kot pu te kot amnhĩ nhĩpêx pyrã nê kôk mã pakapêr nhũm anhĩkrê? Nã mẽ pakurom àhpumunh tỳx o àhpumunh tỳx. Anê.

5

Jejus kot mēhō nē mēkarōmnuti janor ã jarēnh

Matêwre 8.28-33; Rukre 8.26-34

¹ Tã nhũm Jejus mẽ hkôt mẽ pa ho mẽ pa xwýnhjê mẽrohã mō nê xarmã Geras wỳr pôj.

²⁻⁴ Hāmri nê pàr rũm hapôj nhũm mẽhō myja Jejus pumu nê hwỳr tẽ. Mēkarōmnuti kot hwỳr àr nhũm ÿ hã oprê htỳx kumrêx. Hāmri nê hkwỳjê hkàx ã kapôt ã mẽ hã pika kamã ri hkênh nê pa ho pa. Nhũm mẽ xatã kàx o hte hpre nê hpa hpre htã no nhũm kurê.

⁵ Nê kamàt kãm nê arĩgro hã àmra htỳx o mrar pê kên o amnhĩ tak o mra. Mẽ hã pyka kamã nê kapôt ã hixêt ã amnhĩ tak tỳx rãhã ho mra.

⁶ Tã amỳm Jejus pumu nê hwỳr hprôt nê hã hpijaàm kaxyw kutã hkôn krã ho tẽm nê hparpê nhỹ.

⁷⁻⁸ Hāmri nhũm omu nê nê mēkarōmnuti mã kapêr nê kãm:

—Kwa kurũm akato nê ma tẽ. Anê.

Hāmri nhũm kuma nê tanhmã myta o nhũm tãm mēkarōmnuti nhỹ hã Jejus mã kapêr nê àmra kamã kãm:

—Pa Tirtũm Kra Jejus? Mo kaxyw na ka ixwỳr tẽ? Kwa tanhmã ixto hkêt nê nà?

⁹⁻¹⁰ Anê nhũm kãm:

—Tanhmã na anhĩxi te? Anê.

Nhũm kãm:

—Nã ixpê Mēohtôhti. Mēkarōmnuti ohtô nê kot ixwỳr gjêx jakamã na htem ã inhĩxi jarênh anê. Kwa nê mẽ ijanor kêt nê nà? Anê.

¹¹⁻¹² Hāmri nhũm mēkarōmnuti tãm amnhĩ to kuwỳ nê kãm:

—Kwa kêr ka jahti nê mẽ ijapôx japêr nê mẽ kot amnhĩ xà htỳx kamã hamak o mẽ pa htũm xàta wỳr mẽ ixrênh kêt nê. Hagrô hkwy mũj wỳr mãn mẽ ixrê pa mẽ hpãnhã hwỳr mãn hagiê? Anê.

¹³ Hāmri nhũm mẽ kãm:

—Tôe. Mẽ tãm hwỳr mra. Anê.

Hāmri nhũm mẽmyta pê hapôx pa nê ma hagrô hwỳr mrar kurê kumrêx nê mẽ kãm gjêx pa nhũm myja akupỹm tãm hkrã. No nhũm hagrôja mēkarōmnuti pymaj amỹra nê axkakhũm nê hprôt nê himô hã krã hixêt ã axpum rôrôk nê gôx kãm mrô nê hpikaprãr pa. Ohtô rax kumrêx. Kêp 2.000 tã hpikaprãr pa.

14 Hāmri nhūm hagrô jamār o ri mē pa xwýnhjaja tee ri ja hā omu nē ma mē õ patrāw wýr akupým mē piitā mē kām harēnh o hprôt nē mra. Hāmri nē mē kām ujarēnh pa.

15-16 Nhūm mē tee ri mē kuma nē ma Jesus wýr mra nē hkaxpa nē kuri myta pumu. Nhūm ra akupým tām hkrā nē ê kamā tām amnhī nhípêx nē nhỹ. Nhūm mē kot hā omunh xwýnhjaja mē kām ujarēnh pa nhūm mē kuma nē myta pumu hāmri nē tee ri amnhī kukamā hamaxpēr o kām Jesus puma nē.

17 Hāmri nē amnhī nē kām kapēr nē kām:

—Kwa mēmo kaxyw na ka mē ixwýr rê? Mē ma akupým amrar tokyx anē. Anē.

18 Hāmri nhūm mē kuma nē akupým pâr wýr agjê nhūm akupým mex xwýnhhta tee ri ja hā mē omu nē mē hkôt hkrā.

19 No nhūm Jesus kām:

—Nà kot kaj mē ixkôt amõr kêt nē. Ma akupým anhõ krī hwýr mǎn tē nē mē kām Tirtūm kot akupým ato mex ã amnhī jarēnh o ri mē hkôt apa. Anē.

20 Hāmri nhūm kuma nē ma akupým tē. Hāmri nē õ pyka pē Tekap kām mē kām Jesus kot tanhmā ho mex to hā harēnh ri mē hkôt pa nhūm mē amnhī jaēr pē kuma nē tee ri hkukamā hamaxpēr.

Jesus kot akupým mēhõ ho mex nē akupým mēhõ ho htīr ã harēnh

Matêwre 9.18-26; Rukre 8.40-56

21 Tā nhūm Jesus mē hkôt mē pa ho pa xwýnhjê mērohā

akupým xarmā mō nē rê. Hāmri nē pâr nhõ nē api nē gô mýri kuhê nhūm pika nhõ xwýnhjaja Jesus pumu nē hā pikuprõnh rax nē.

22-23 Hāmri nhūm mēhõ my pē Jajtija hwýr tē nē kutā hkõnkrā ho htēm nē nhỹ. Kêp Tirtūm kapēr o mē ahkre xā hā ixkre jamār xwýnh maati na pre. Nhūm hkra nija kêp à htýx nē htyk kaxyw nē nõ. Kormā nyw. Kormā hā amgrà pē 12 pix tā ra kêp htyk kaxyw. Hāmri nhūm Jajtija tee ri hkukamā hamaxpēr nē ma Jesus wýr tē nē hpar pē hkõn krā ho tēm nē ho hwýr kām hihtýx nē kām:

—Pa akupým mē ixto mex xwýnh maati. E awýr na pa tē. Na ra ixkra ixpê htyk kaxyw. Pa tee ri omu nē kaxyw amā ijamaxpēr nē awýr tē. Jakamā kwa ma ixkôt inhõrkwỹ hwýr tē nē inhmā omu nē hā anhīhkra xi nē akupým inhmā ho mex. Anē.

24 Hāmri nhūm kuma nē ma hkôt tē. Nhūm mē ohtõ nē axpēn nhīgānh nē axpēn kujahêk o wa hkôt mra.

25 Nhūm mēhõ nija haxwýja wa hkôt tē. Na pre hte hkamrõ hkryre rāhā ho pa hā ra hā amgrà kêp 12.

26 Nē tõtõ mǎ amnhīrer rax nē nhūm mē tee ri kot ho mex kaxyw nom xatā hkane kapry. Hāmri nhūm ra hikàxpore kêp hapêx nhūm arī ãm rāhā nē pa.

27-28 Hāmri nē tee ri amnhī kukamā hamaxpēr nē Jesus jarēnh ma nē hamaxpēr o:

—Ma kot paj ma hwÿr tē nē kēp ê pix kupênh tã akupÿm inhmex japêr. Ma kot paj ho anê.

Anhÿr o hamaxpêr hãmri nē ma mē hkôt hwÿr htēm kurê kumrêx. Nhũm mē ohtô raxja kaêx ã mē hkôt hwÿr tē. Hãmri nē katut kôt kēp ê nhĩrê kupê.

²⁹ ãm ê pix kupênh tã akupÿm mex ã amnhĩ pumunh kurê kumrêx.

³⁰ Hãmri nhũm Jejus kot kēp ê kupênh ã amnhĩ tã omu nē hêx rom xa nē mē ho hakêx nē amnhĩ tã mē kãm kapêr nē mē kãm:

—Kwa mē atō na ka ri amnhĩ kaxyw inhmã ajamaxpêr tÿx pē ixpê ixê kupê? Anê.

Hãmri nhũm mē piitã kuma nē tee ri axpên pumu nē kãm amnhĩ tã aprã.

³¹ Hãmri nhũm hkôt mē pa ho pa xwÿnhjaja kãm:

—Mē kot apê amnàr griã kot ka kêt ri mēhō kot apê hkupênh xwÿnh ã ri mē hkukja. Kwa mãn ãm mēhō amarĩ apê hkupê. Anê.

³² Hãmri nhũm mē kãm:

—Nà na amarĩ ixpê hkupênh kêt nē. Na amnhĩ kaxyw inhmã hamaxpêr tÿx pē ixpê hkupê. Tã na ixàhpumunh tÿx xà ho akupÿm mex. Nom ra ixte mēhō kot ixpê hkupênh xwÿnhhta pumunh jakamã na pa ixêx rom ã amnhĩ tã ri mē hkukjêr anê. E kwa mē atō inhmã amnhĩ jarê. Anê.

³³ Hãmri nhũm nija kuma nē tee ri kēp kot amnhĩ to

hpimxur prãm. Hãmri nē hpijaàm nē hwÿr httertet o tē nē kutã hkôn krã ho tēm nē nhÿ nē kãm amnhĩ jarê nē kãm:

—Ma pa na pa inhmã inhmex prãm xaj apê axê kupê. Tã na pa akupÿm inhmex. Anê.

³⁴ Hãmri nhũm kuma nē kãm:

—Tÿ. Nà ate amnhĩ kaxyw inhmã ajamaxpêr tÿx kôt ã ate amnhĩ nhĩpêx anhÿr jakamã na ka akupÿm amex. Kot kaj axte akamrô rãhã ho ri apa hkêt nē. E mãmri ajamakêtkati nē ma akupÿm anhōrkwÿ hwÿr tē. Anê.

Hãmri nhũm kuma nē hkĩnh nē ma akupÿm tē.

³⁵ Rôm nhũm Jajti mã mē àpênh xwÿnhjaja òrkwÿ rùm ma ò patrãw kutã mra nē wa hkaxpa nē Jajti mã kãm:

—Kwa na ra akra apê ty. Mo kaxyw kot ka kêt amnhĩ kôt Jejus o mō? Kwãr mãmri ma akupÿm awjanã nē tē. Anê.

³⁶ Hãmri nhũm Jejus mē kuma nē Jajti mã kãm:

—Kwa tee ri akra hkukamã ajamaxpêr kêt nē. ãm kaxyw inhmã mãn ajamaxpêr tÿx rãhã nē. Anê.

³⁷⁻⁴⁰ Hãmri nhũm mē axte mō nē mē òrkwÿ hwÿr pøj nē mē omu. Nhũm mē ra hã hturax nē mÿr o hkrĩ. Hãmri nhũm Jejus mē hwÿr axà nē mē omu nē kot mē hkra htyk kumrêx ã omunh tã mē kãm:

—Kwa mē hãmri amÿr kêt nē. Na nireta htyk kêt nē. Na ãm gōr nē nō. Anê.

Hãmri nhũm mē kot ra htyk ã omunh mex jakamã kuma nē ãm kuma nē axtem

ně ri axpěn mã hã hpěr o axkê. Hãmri nhũm Jejus mẽ hanor pa nẽ hitom kãm htyk xwỳnh wỳr àr kaxyw nẽ amnhĩ kôt Juãw nẽ Xiakre nẽ Simãw Pêtre nẽ kaxyw htyk xwỳnh katorxà nẽ hipêêxà pix amnhĩ kôt mẽ ho axà.

⁴¹ Hãmri nẽ htyk xwỳnhhta wỳr tẽ nẽ hpa hã kupy nẽ kãm kapěr nẽ kãm:

—Pa? E kwa kànhmã nhỹ. Anẽ.

Nom amnhĩ kapěr kãm harẽ nẽ kãm:

—Tarit kũm. Anẽ.

⁴² Hãmri nhũm kànhmã ỹr kurê kumrêx nẽ kànhmã xa nẽ ri mra. Na pre ra hprêk nẽ ty. Na ra hã amgrà kệp 12 tã ty nhũm Jejus akupỹm ho htĩr nẽ kànhmã ỹr nhũm kànhmã xa nẽ ri mra.

⁴³ Hãmri nhũm kuri omunh xwỳnhjaja amnhĩ jaêr pê omu nẽ kamã no pyma nẽ hkĩnh tỳx kumrêx. Hãmri nhũm Jejus katorxà mẽ hipêêxàja wa kãm:

—E mãn ra kãm prãm nẽ. Wa tokyx kãm mẽmoj japêr kê kukrê. Nom kêr ka wa inhmar kumrêx. Kêr ka wa akupỹm ixte ho htĩr ã ri mẽ kãm ijarênh o ri apa hkêt nẽ. ãm kwarĩ ho kwarĩ. Anẽ.

6

Najare nhõ xwỳnhjaja kot Jejus kaga hã mẽ harênh

Matêwre 13.53-58; Rukre 4.16-30; Juãw 1.11

¹ Tã nhũm Jejus ma ò krĩ pê Najare hwỳr ma akupỹm mỗ nhũm hkôt mẽ pa ho mẽ pa xwỳnhjaja ma hkôt mỗ.

² Hãmri nẽ hwỳr pøj. Nhũm mẽ ò arĩgromnu pê sap kator jakamã nhũm Jejus ma Tĩrtũm kapěr o mẽ ahkre xà hã ixkre hwỳr tẽ. Hãmri nẽ kamã mẽ ahkre ho nhỹ nhũm mẽ amnhĩ jaêr pê kapěr mex ã kuma nẽ tee ri axpěn pumunh pê hamaxpěr o hkrĩ. Jejus kêp mẽ hkwy hã hkamnhĩx nom nhũm mẽ kurom ãhpumunh tỳx nẽ kapěr mex jakamã nhũm mẽ kuma nẽ tee ri hamaxpěr o hkrĩ. Hãmri nẽ axpěn mã:

³ —Kwa kêp mẽ panhĩõ htã tanhmã kot we amnhĩ to nẽ ã ãhpumunh tỳx kôt mẽ pamã kapěr anẽ nẽ ri mẽ kãm aa mẽ kot mẽmoj pumunh kêt kwỳ ho anhỹr o pa? Mẽ panoo mã na pre hprêk. Kêp pĩ kuprãr xwỳnh Juje mẽ hprõ Marir wa hkra na. Nẽ htõ Xiakre nẽ Juje nẽ Simãw nẽ Jutja ra mẽ pahte mẽ kêp htõ hã omunh mex. Nẽ htõxjaja jar mẽ pakamã pa nhũm mẽ pahte mẽ omunh mex kênã kot kêt we mẽ kurom ã ãhpumunh tỳx anẽ. Anẽ.

Anhỹr o axpěn mã harẽ. Hãmri nẽ kamã gryk nẽ hkaga

⁴⁻⁶ nhũm tee ri amnhĩ tã mẽ omu nẽ hamaxpěr o:

—Hêxta waa nẽ. Mẽ kãm amnhĩ kaxyw ixkôt hamaxpěr prãm kêt kumrêx. Anẽ.

Hãmri nẽ mẽ kãm:

—Nà Tĩrtũm nhỹ hã kapěr jarênh o mẽ pa xwỳnhjaja na htem krĩ hkwy kamã kãm mẽ mar prãm nẽ. Nom ò krĩ kamã mẽ kot karàre rũm hprêk o mỗr kãm omunh

xwýnhjaja na htem kuma nẽ
ãm kuma. Anẽ.

Hãmri nhũm mẽ kot amnhĩ
kaxyw hkõt hamaxpër kêt
jakamã nhũm tee ri mẽ kãm
aa mẽ kot mẽmoj pumunh
kêt kwỳ ho anhyr rax prãm
kaprỳ. Nẽ ãm mẽ à xwýnhjê
ho grêre nẽ mẽ hã ìhkra jaxwỳ
nẽ akupỹm mẽ ho mex. Hãmri
nẽ mẽ kurũm kato nẽ ma krĩ
hkwỳ hkõt ri Tĩrtũm kapër o
mẽ ahkre ho pa.

*Jejus kot mẽmoj tã mẽ kệp
12jê mã karõ hã harênh*

*Matêwre 10.5-15; Rukre
9.1-6, 10.1-12; mãânên Atre
13.50-51, 18.6*

⁷Tã nhũm Jejus amnhĩ wỳr
mẽ kot ỹ hã mẽ ahkre ho
pa xwýnh pê 12jê hwỳ. Ra
kot amnhĩ kaxyw mẽ rênh
xwýnhhtaja nhũm amnhĩ wỳr
mẽ kuwỳ. Hãmri nẽ axpên
kaxyw mẽ ho axkrut nẽ mẽ
kurê nẽ mẽ kãm mẽ àpênh ã
karõ nẽ ma mẽ hkwyjê hwỳr
mẽ kurê. Nẽ mẽ kãm:

—E kêr ka mẽ ma mẽ
pahkwỳjê hwỳr mra nẽ inhỹ
hã Tĩrtũm kapër jarênh o ri
mẽ hkõt apa. Nẽ mẽ kurũm
mẽkarõmnuti japôx o ri mẽ
hkõt apa.

⁸⁻⁹Nom kêr ka mẽ amnhĩ
kõt akukrêx rax nẽ ri apa hkêt
nẽ. Nẽ kawà htu nẽ ho ri
apa hkêt nẽ. Nẽ amnhĩ kõt
axàpkur xà ho ri apa hkêt nẽ.
Rỳ akàxpore rax nẽ ri ho apa
hkêt nẽ. ãm mẽ anhõ kamis
nẽ mẽ apar kã ho pixire nẽ
agjê nẽ ri hã apa. Nẽ mẽ
amnhĩ kaxpar xà hã mẽ anhõ
kô pix o apa. Mẽ ã anhỹ kamã
mẽ hkõt ri apa anẽ.

¹⁰—Nẽ kêr ka mẽ nhỹri krĩ
hõ hwỳr pøj. Nẽ apôx xà
kamã mẽhõ nhõrkwỹ kamã
hkõt ri apikamênh tãmtã
kurũm akupỹm ajapôj nẽ ma
hpãnhã nhãm krĩ hõ hwỳr
apa. Nom atỳx ri nhãm mẽ
hwỳr amrar nẽ nhãm mẽ
hwỳr amrar kêt nẽ.

¹¹—Nẽ koja mẽ nhỹri mẽ
akapër kaga ka mẽ tee ri
amnhĩ tã mẽ kamã ama hãmri
nẽ tokyx mẽ kurũm ajapôj
nẽ ma apa. Nẽ anojarêt nẽ
mẽ noo mã akuhê nẽ amnhĩ
par ã awjagrô kapĩ. Mẽ
kot Tĩrtũm kaga hã amnhĩ
pumunh nhũm kot amnhĩ
pyrà nẽ mẽ hkaga hã omunh
kaxyw ka mẽ ã mẽ noo mã
amnhĩ nhĩpêx anẽ. Hãmri nẽ
hpãnhã ma nhỹhỹm apa.

¹²Anhyr o mẽ kãm mẽ
àpênh ã karõ. Nhũm mẽ kuma
nẽ hapôj nẽ ma mẽ hkwyjê
hkõt pa. Ma krĩ piitã hkõt
Tĩrtũm kapër o mẽ ahkre ho
ri mẽ hkõt pa nẽ mẽ kãm:

—E kwa mẽ tokyx amã ate
amnhĩ tomnuj kaga hprãm
xàj Tĩrtũm kõt mãn amnhĩ
xunhwỳ. Anẽ.

¹³Hãmri nẽ mẽ nẽ
mẽkarõmnuti jano. Nẽ
akupỹm mẽ à xwýnhjê ho
mex kaxyw mẽmo htwỹm o
mẽ hkrã gregrer nẽ Jejus nhỹ
hã akupỹm mẽ ho mex.

*Mẽ kot Juãw Paxis pĩr ã mẽ
harênh*

*Matêwre 14.1-12; Rukre
9.7-9*

¹⁴Tã nhũm mẽ piitã Je-
jus jarênh ma nẽ axpên
mã tanhmã harênh to ho
pa. Nom ahpynhã tanhmã

harēnh to. Na prem kamã harēnh o:

—Nà Juãw Paxis pimrààta na. Pēr akupÿm htír jakamã na hte ã mẽ kot aa mẽmoj pumunh kêt kwÿ ho anhÿr o pa. Anē.

15 Nē kamã axtem harēnh o:

—Nà tãm kêt. Pēr finat Eris na. Anē.

Nē kamã axtem harēnh o:

—Nà tãm kêt. Pēr Tirtũm nhÿ hã kapēr jarēnh xwÿnhjê hõ na. Te kot amnepê mã mẽ kot Tirtũm nhÿ hã tanhmã amnhĩ nhĩpêx to xwÿnhjê kot amnhĩ nhĩpêx pyrãk o kot amnhĩ nhĩpêx kênã.

Anhÿr o ahpÿnhã harē.

16 Hãmri nhũm Ijaew o amnhĩptâr xwÿnh pê Erox ãxipasja mẽ kot ã harēnh anhÿr ã mẽ kuma nē Juãw Paxis mã hamaxpēr kuré kumrêx. Hãmri nē mẽ kãm:

—Nà pēr Juãw Paxista na. Ixte mẽ kãm hã ixàmnēnh nhũm mẽ kot inhmã mut krãhyr xwÿnhhta mãn ra tanhmã amnhĩ to nē akupÿm htír. Anē.

17-20 Na pre ra pahi Erox ãxipasja htõ Pirip pê hprõ Eroxis pytã nē ho hprõ nhũm hkra niti mẽ wa hwÿr apha. Hãmri nhũm Juãw Paxisja tee ri ja hã pahihiti Erox ãxipasja pumu nē hã kãm akir nē kãm:

—Tk. Kwa Tirtũm kêp ja omnuj. Ra kot ja nē mẽ pahkurê htã ka axtem nē ã amnhĩ nhĩpêx anē.

Anhÿr jakamã nhũm hprõ Eroxisja amnhĩ tã kuma nē kamã gryk tÿx nē. Nē kãm hpír prãm nē. No nhũm pahi Erox ãxipas kãm hpír prãm kêt

nē. Juãw Paxis kot Tirtũm kôt amnhĩ nhĩpêx nhũm kot hã omunh mex jakamã kãm hpír prãm kêt nē. Juãw na pre hte xatã kãm Tirtũm kapēr jarēnh o pa. Nhũm pahihiti Erox ãxipasja kormã hprĩ hã mar mex kêt tã hã hpijaàm nē kãm mar prãm nē. Nom nhũm hprõ kãm hpír prãm jakamã nhũm kêp mẽ kãm hã amÿnē nhũm mẽ ma o tē nē haxã nhũm mex nē mẽ hagiēnh xã kamã hkrĩ ho krĩ.

21-24 Tã nhũm jãã nhũm pahi Erox ãxipas kator ã arĩgro kato nhũm mẽ piitã hwÿr mra nē hã akuprõ nē hã hkĩnh nē hã apkur o hkrĩ. Õ kôwenatôjaja nē hkrãmnhwÿjaja nē krĩ hkwy kamã mẽõ pahijaja nhũm mẽ ohtõ nē hã akuprõ nē hã hkĩnh. Hãmri nhũm hprõ Eroxis kra nitija mẽ hwÿr axã nē mẽ kãm gre. Mẽ kot omunh nē kamã hkurē pix kaxyw mẽ noo mã hpijaàm kêt nē ã mẽ kãm gre anē. Hãmri nhũm pahi Erox omu nhũm ja kãm mex nē nhũm mẽ piitã hkĩnh nē kamã nopyma nē. Nē gre kãm hpijaàm kêt nē tanhmã mẽ kãm gre to nhũm mẽ omu nē kamã no pyma nē. Hãmri nhũm pahi Erox ãxipasja kãm:

—Nà ãm hãmri. Na ka mẽ inhmã agrer mex nē. Jakamã kwa mãmrĩ mẽmoj tã ixwÿ. Amã mẽmoj prãm xã hkôt inhmã mẽmoj jarē pa amã kugõ. ãm hãmri na pa amã amnhĩ jarē. Na pa Tirtũm noo mã ã amã amnhĩ jarēnh anē. Ka mamrĩ ixkukrêx mex

kwỳ hã ixwỳ pu axpën mã ho axkjê. E mẽmo na amã hprãm? Anê.

Hãmri nhũm kuma nê ma katorxà hwỳr tẽ nê kãm harê nê kãm:

—Xê mẽmoj tã kot paj we kuwỳ? Anê.

Hãmri nhũm kuma nê hamaxpêr o:

—Ma ãm hãmri koja mẽ tã jarãhã inhmã Juãw Paxis pĩ. Anê.

Hãmri nê hkrata mã kãm:

—Ma Juãw Paxis krã hã kot kaj awỳ kê mẽ amã kugõ ka man ixwỳr o tẽ. Anê.

²⁵ Hãmri nhũm kuma nê akupỳm pahi hwỳr axà nê kãm:

—Ma Juãw Paxis krã kot kaj inhmã agõ. Pasiiti kamã axà nê inhmã agõ pa ma amnhĩm o ixtêm kurê kumrêx. ãm ja pix na inhmã hprãm. Anê.

²⁶ Hãmri nhũm tee ri kuma nê hkaprĩ nê. Nê hamaxpêr o:

—Hêxta waa nê. Inhmã hpĩr prãm kêt. Nom ra ixte ixkutã mẽ hkrĩ xwỳnhjê noo mã inhmã kãm mẽmoj prãm xwỳnh nhõr ã amnhĩ jarênh nhũm ixte kãm õr ã amnhĩ jarênh nhũm mẽ piitã mẽ kot inhmar jakamã tanhmã kot pa we amnhĩ to nê kêt nê? Nà pa nê hkêt nê. Anê.

²⁷ Hãmri nê õ pòristijê mã kãm:

—E mẽ ma Juãw Paxis wỳr mra nê mut krãhta nê pasiiti kamã hkrã xà nê akupỳn o tẽ nê kãm agõ. Anê.

Hãmri nhũm mẽ kuma nê ma mẽ hagjênh xà hwỳr mra nê Juãw wỳr axà hãmri nê mut krãhta.

²⁸ Hãmri nê pasiiti kamã hkrã xà nê akupỳm o tẽ nê kot hã hwỳr xwỳnh mã kugõ nhũm kumỳ nê ma katorxà hwỳr o tẽ nê kãm kugõ.

²⁹ Hãmri nhũm Juãw Paxis kôt mẽ pa ho mẽ pa xwỳnhjaja tee ri harênh ma nê hkaprĩ htỳx nê. Hãmri nê pahi Erox ãxipas wỳr mra nê ã hã kuwỳ nhũm mẽ kãm kugõ nhũm mẽ kumỳ nê ma o mra nê kên kre kamã haxà.

Jejus kot mẽ ho 5.000 nê mẽ kãm õ hã harênh

Matêwre 14.13-21; Rukre 9.10-17; Juãw 6.1-14

³⁰ Tã hãmri nhũm mẽ kot Jesus nhỹ hã mẽ ahkre ho mẽ pa xwỳnhjaja akupỳn Jesus wỳr mõn pøj nê kãm amnhĩ jarê. Tanhmã mẽ kot mẽ ahkre hto ho pa nê tanhmã mẽ ho mex to ho pa hã kãm amnhĩ jarênh pa.

³¹ Tã nhũm mẽ piitã axpën pãnhã kot Jesus mar kaxyw mẽ hwỳr mra nhũm mẽ kormã apkur kêt nê. Jakamã nhũm Jesus hkôt mẽ pa ho mẽ pa xwỳnhjê mã:

—E ma pu mẽ awrã kaprỳ hwỳr mõ nê nhỹri pahkrĩ nê pakõkõt nê apku.

³² Anê hãmri nhũm mẽ gõx kãm kanõre wỳr agjê nê ma ahte xarmã awrã kaprỳ hwỳr mõ.

³³ Nhũm krĩ hkwỳ nhõ xwỳnhjaja mẽ omu hãmri nê nhỹhỹm mẽ mõi xà hã mẽ omunh kurê kumrêx. Hãmri nê krĩ hkwỳ rùm ma mẽ ãhkrep mra nê mẽ kãm amnhĩ to wa nê pøj nê mẽ kutêp hkrĩ.

³⁴ Hāmri nhūm mē mō nē mē hwÿr pōj nē kre kura nē kanôre nhô. Hāmri nhūm Jejus mē hwÿr api nē mē omu nē hamaxpēr o:

—Hêxta waa nē. Na mē omnu nē pa. Te mē kēp ôwêhti jamār xwÿnh kêt nē htÿx ri pa xwÿnh kot amnhî nhîpêx pyrāk. Mēhō kot mē kamā ukapri nē tanhmā mē ho mex to ho pa? Anē.

Hāmri nē mē kamā ukapri nē xa nē Tirtūm kapēr o mē ahkre rax nē.

³⁵⁻³⁶ Tā nhūm myt àr kaxyw nhūm hkôt mē kot pa ho pa xwÿnhjaja hwÿr mra nē kām:

—Kwa hāmri na ra amÿkry htÿx nē. Mē hano kê mē ma nhÿri krī hkwy hwÿr mra nē tokyx amnhīm mēmoj japrô nē kuku nē hikwÿ nē gôr. Mo jar kapôt ā mē apkur xā? Anē.

³⁷ Hāmri nhūm mē kuma nē mē kām:

—Kwa na mē kamjaja mē kām mēmoj gō kê mē kuku. Anē.

Hāmri nhūm mē kuma nē tee ri hamaxpēr nē kām:

—Kwa mo mē kaxyw mē pakàxpore rax? Kot pu mē pakàxpore ho 200 nē ho mē kām mēmoj japrôr tā nom nhūm mē âm ho hkryre nē kuku nē ho ôhy htu hkêt nē. Mē ohtô rax kumrêx kênā. Anē.

³⁸ Hāmri nhūm mē kām:

—Nà kot puj mē kām mēmoj japrôr kêt nē. No mē panhō pāwtita? Tanhmā na arī kute? E mē atô tē nē omu nē akupÿn tē nē inhmā harē. Anē.

Hāmri nhūm ja ma tē nē omu nē akupÿn tē nē kām:

—Nà pāwti âm kēp 5 pix. Nē kaxyw tep âm pijakrutre. Anē.

³⁹ Hāmri nhūm Jejus kuma nē mē kām:

—Tôe. Mē kām anē kê mē ahpÿnhā ri hije nē hkrī. Anē.

⁴⁰ Hāmri nhūm mē piitā ahpÿnhā kēp 50 nē hije nē hkrī hpa.

⁴¹ Nhūm Jejus pāwti mē tepta jamÿ nē kànhmā kaxkwa hwÿr rīt nē Tirtūm mā kupē nē kām harē nē kām:

—Pa Papaj? Nà ka na apē mē inhmā mē inhō ho apa xwÿnh jakamā amex o amex. Anē.

Hāmri nē mē kām ho hkry hpa nē hkôt mē pa ho mē pa xwÿnhjê mā kugô nhūm mē ô ri ho mra nē ho mē hipêx pa. Pāwti mē tepta nhūm mē ho mē hipêx pa.

⁴²⁻⁴⁴ Nhūm mē piitā apkur mex nē. Mēôja mē kēp grire htā nhūm Jejus tanhmā mē kām ho rax to nhūm mē ohtô rax tā piitā kuku nē ho ôhy htu hpa. Mēmyjaja kēp 5.000 nē kaxyw mē hprô nē mē hkrajaja nhūm mēôja ho mē hipêx pa nhūm arī hakrêx prā. Jakamā nhūm Jejus kôt mē pa ho mē pa xwÿnhjaja akupÿm hakrêx o pikuprôn h pa nē ho kawà o 12 nē ho nyt.

Jejus kot gô krāhkà hā htēm ā harēnh

Matêwre 14.22-33; Juāw 6.15-21

⁴⁵⁻⁴⁶ Tā nhūm Jejus hkôt mē pa ho mē pa xwÿnhjê mā kām:

—E mē kanôre mā axà nē ma akupÿm ixkukamā krī pē Petsěj wÿr rē. Pa jajē

jano hāmri nē ma tē nē nhÿri
Tirtūm mā amnhĩ jarē nē rĩ
ma mē akôt tē. Anē.

Hāmri nhūm mē kuma nē
kanôre mā gjêx pa nē ma
mō nhūm Jejus mē kot mar
xwÿnhjê janor pa nē ma hixêt
prêk ã api nē Tirtūm mā
amnhĩ jarēnh o nhÿ.

47 Tã nhūm kamàt nhūm arĩ
ahte kÿxpê nhÿ. Nhūm hkôt
mē pa ho mē pa xwÿnhjaja ko-
rmã kanôre kamã mō.

48 Hāmri nhūm Jejus amÿm
mē omu nhūm kôk ra mē kutã
àpêr tÿx kumrêx nhūm mē
tee ri amnhĩ nhĩpêx nē tee
ri rrēmti ho gô rēnh nhĩpêx o
hkrĩ.

Tã nhūm ra krãhyre kà
nhūm Jejus Tirtūm mā amnhĩ
jarēnh pa nē kànhmã xa nē
ma mē hkôt tē. Nom kanôre
kamã htēm kêt nē gô krãhkà
hã xa nē mē hwÿr hpar o tē.

49-50 Hāmri nē mē hwÿr kato
nē mē kamã hamak kaxyw
hêx rom kot mē hakrenh mã.
Nhūm mē amnhĩ wÿr omu nē
mēkarō hã hkamnhĩx nē tee ri
amnhĩ kukamã hamaxpêr nē
umaj httertet nē àmra rax nē.
Hāmri nhūm mē kãm:

—Tk. Kwa mē amã ma hkêt
nē. Pa na pa mē akôt tē. Anē.

51 Hāmri nē mē hwÿr
kanôre hkrem axà nhūm kôk
xàpêr tÿxta hapêx. Hāmri
nhūm mē Jejus kamã no
pyma nē tee ri hamaxpêr nē
axpên mã:

—Kokÿÿ. Tanhmã na we
amnhĩ to nē gô krãhkà hã
hpar o man mē pahkôt tē
mē pahwÿr àr mē nhūm kôk
hapêx par kurê kumrêx. Anē.

Hāmri nē tee ri kot ã amnhĩ
nhĩpêx anhÿrja kukamã
hamaxpêr o hkrĩ.

52 Kormã mē kot hprĩ hã
Jejus tanhmã kute hã omunh
kêt jakamã. Tirtūm pyrã
nē àhpumunh o àhpumunh ã
omunh mex kêt jakamã tee ri
pãwti grêre ho mē hipêx par
nē gô krãhkà hã htēm nē kôk
o pinhkrēnh ã omu nē tee ri
ã kot amnhĩ nhĩpêx anhÿrja
kukamã hamaxpêr.

*Kenêjare kamã Jejus kot
akupÿm mē ho mex ã harēnh*

Matêwre 14.34-36

53 Tã nhūm mē xarmã rê
nē krĩ pē Jenêjare hwÿr pøj.
Hāmri nē kanôre nhô

54 nē api nē kuhê nhūm krĩ
nhô xwÿnhjaja Jejus pumunh
kurê kumrêx nē axpên mã:

—Kwa pêr Jejusta na mō.
Nã tãm kênã. Anē.

55 Hāmri nē hkĩnh nē ma
kape hã mē à xwÿnhjê hkôt
mrar kurê kumrêx nē mē
harir xà rãhã mē hamÿ nē
akupÿm Jejus wÿr mē o mra.
Nhÿri hpôx xà kamã omu nē
hwÿr mē o mra.

56 Na pre htem ã Jejus
nhĩpêx anê. Jakamã nhūm hte
ma nhÿhÿm mra. Krĩ rũnh kôt
mra nē krĩ hkryre hkôt mra
nhūm mē omu nē hwÿr mē
à xwÿnhjê ho mra nē mē ho
kuwÿ nē kãm:

—Pa? Kwa kê jajaja akupÿm
mex kaxyw apê axê pix kupê
nà? Anê.

Hāmri nhūm mē kãm:
—Tôe. Nã kwãr mē mãmrĩ
hkupê. Anê.

Hāmri nē mē kot kêp ê
kupênh xwÿnh piitã akupÿm
mex pa.

7

*Mē higêt hkôt mē kot
amnhĩ nhĩpêx xwÿnhjê jarênh
Matêwre 5.21-48, 15.1-20*

¹⁻⁴ Tã nhũm Mojes kapêr o mē ahkre o mē pa xwÿnh kwÿjaja Jerujarê rũm Jejus wÿr mō. Hãmri nê hã akuprō nê hkôt mē pa ho mē pa xwÿnhjê kot amnhĩ nhĩpêx ã mē omunh o kuhê. Ijaew na prem mē hkukamã mē higêtjê kapêr kôt ri tanhmã amnhĩ nhĩpêx to ho pa. Jakamã mē uràk nê apkur kaxyw nê xatã amnhĩ nhĩhkra kuhōnh japjê nê rĩ kormã apku. No mē amnhĩ nhĩhkra grã pix kuhōnh nê hkrĩ nê apkur kêt nê. Kuhōnh japjê nê kormã hkrĩ nê apku. Tĩrtũm kot ja hã mē omunh nê amnhĩm mē mex ã mē harênh ã amnhĩ kamnhĩx jakamã na prem ã amnhĩ nhĩpêx anhÿr o pa. Nê nhÿri amnhĩm mēō hkwy japrō nê akupÿm ōrkwÿ hwÿr o mra nê haxwÿ nê mē higêt pyrã nê wÿr japjê rũnh kumrêx nê rĩ kormã apku. Nê mē uràk nê poti nê gōj nê papêre hkre kahōnh japjê rũnh nê rĩ kormã kamã ō nhĩpêx. Mē higêt pyrã nê ã amnhĩ nhĩpêx anhÿr o pa. Tĩrtũm kot ja hã mē omunh nê amnhĩm mē mex ã mē harênh prãm xàj. Nom nhũm Jejus kôt mē pa xwÿnhjaja na prem ã amnhĩ nhĩpêx anhÿr kêt nê. Na prem apkur kaxyw nê katat kôt amnhĩ nhĩhkra kuhō nê ãmnhĩx apkur o hkrĩ. Jakamã nhũm Parijew nhō xwÿnh mē Tĩrtũm kapêr tũm o mē ahkre xwÿnhjaja tee ri ã

mē kot amnhĩ nhĩpêx anhÿr ã mē omu nê mē hã Jejus kukja nê kãm:

⁵—Pa Jejus? Kwa mē inhmã mēmoj jarê. Amnepê mē panhĩgêtjaja na pre htem apkur kaxyw nê amnhĩ nhĩhkra kuhōnh japjê rũnh kumrêx nê arĩ kormã hkrĩn apku. Jakamã na pa htem mē uràk nê ã amnhĩ nhĩpêx anê. No akôt mē pa ho mē pa xwÿnhjaja na htem ho mē ixpyrà kêt nê. Kwa mo na htem ã amnhĩ nhĩpêx anhÿr kêt nê? Anê.

⁶ Hãmri nhũm mē kuma nê mē kãm amnepê mē Tĩrtũm nhÿ hã kapêr xwÿnh pê Ijais kapêr jarê nê mē kãm:

—Nà ãm hãmri na pre finat Ijaisja amnepê mē tanhmã mē ajarênh to. Te Tĩrtũm tãm kapêr pyrãk o mē ajarê nê mē ajarênh o:

Mē kãm ixkĩnh ã amnhĩ jarênh tã mē kãm ixkĩnh kêt. Na htem ãm kãm ixprãm ã amnhĩ jarênh kaprÿ.

⁷ Mē kot ixkapêr kuhpa hã amnhĩ krã hkôt mēmoj tã hkwyjê mã karō ho pa jakamã na htem ãm kot ixkôt amnhĩ nhĩpêx ã amnhĩ jarênh kaprÿ. Anê.

Ã na pre mē ajarênh anê.

⁸⁻⁹ ãm hãmri na pre mē ajarê. Na ka htem mē panhĩgêt kapêr kôt pix mã amnhĩ nhĩpêx o apaja gryk ã ra Tĩrtũm kapêr kaga hpa. Te mē akapêr mex o kot Tĩrtũm kapêr jakrenh pyrãk.

10 Na pre finat Mojes Tirtũm nhỹ hã mẽmoj tã mẽ pamã karõ ho:

Ker ka mẽ anhĩpêêxà nẽ mẽ akatorxà wa hã apijaam o ri apa. Jao wa kutã anojarêt rãhã nẽ. Nom kot kaj mẽ ho mex hkêt nẽ tanhmã mẽ kãm akapêr punuj to hãmri nhũm mẽ akwýjaja ja myrapê mẽ apa. Anẽ.

Na pre ã finat Mojesja Tirtũm nhỹ hã mẽ pamã karõ anẽ.

11 No mẽ kajaja na ka mẽ axtem nẽ tanhmã akwýjê mã ja hã karõ hto nẽ mẽ kãm: “Kot kaj mẽ mẽmo arĩgro hã akãxpore hkwy nom anhĩpêêxà ho ajuta kaxyw kãm hkwy nhõr kêt nẽ. ãm wa kãm ate ho ajuta kêt ã amnhĩ jarẽ hãmri nẽ Tirtũm mã amnhĩ jarẽnh xà hã ixkre hwýr mãn o tẽ nẽ mẽ ixte ixkre ho mex kaxyw mẽ inhãmã agõ. Kot kaj mẽ ã amnhĩ nhĩpêx anẽ nhũm Tirtũm ja hã mẽ apumu nhũm ja kãm mex nẽ. E kêr ka mẽ ã amnhĩ nhĩpêx anhỹr o ri apa.” Anhỹr o na ka htem akwýjê mã karõ.

12 Jao mẽ kot mẽ hipêêxà nẽ mẽ katorxà ho ajuta nẽ mẽ hkurê.

13 Te mẽ amã mẽ panhĩgêt kapêr mex o kot Tirtũm kapêr jakrenh pyrãk o na ka htem amnhĩ nhĩpêx. Jao te Tirtũm kapêr mex kêt pyrãk o hipêx nẽ mar kêt nẽ apa. ã na ka htem Tirtũm kapêr kuhpa hã amnhĩ nhĩpêx anhỹr o ri apa. Anẽ.

Mẽ pajamaxpêr punuj kôt mẽ pahptomnu hã harẽnh

Matêwre 15.10-20

14 Tã nhũm Jejus Parijew nhõ xwýnhjê mẽ hkwyjê mã kapêr pa hãmri nẽ amnhĩ wýr ra mẽ kot mar o kuhê xwýnhjê mã hpa ho apê nẽ mẽ kãm:

—E pa mẽ amã mẽmoj jarẽ ka mẽ inhma nẽ inhmar mex nẽ.

15-16 Na hte Tirtũm kapêr tũm o mẽ ahkre xwýnhjaja amnhĩ krã hkôt mẽ ate amnhĩ nhĩhkra kuhõnh japjê hã mẽ amã karõ ho pa. Nẽ amnhĩ krã hkôt mẽ axãpkur xà hã tanhmã mẽ amã karõ hto ho pa. Mẽ ate ã amnhĩ nhĩpêx anhỹr nhũm Tirtũm kot ja hã mẽ apumunh kôt amnhĩm mẽ amex ã mẽ ajarẽnh kaxyw nhũm htem ã mẽmoj tã mẽ amã karõ anẽ. Nom na hte Tirtũm tanhmã mẽ panhĩhkra kuhõnh to hã mẽ pahpumu nẽ ãm hã mẽ pa hpumu. Nẽ mẽmo mẽ paxãpkur xà hã mẽ pahpumu nẽ ãm hã mẽ pahpumu. Ja kãm tanhmã kute hkêt. Na hte ja hã mẽ omunh xà hkôt amnhĩm mẽ mex ã mẽ harẽnh rý mẽ mex kêt ã mẽ harẽnh kêt nẽ. Rý mẽ hakwa ho mẽmoj kur ã mẽ omunh xà hkôt tanhmã mẽ harẽnh to hkêt nẽ. ãm mẽ hakwa ho tanhmã kapêr to pix ã mẽ mar kôt na hte tanhmã mẽ harẽnh to.

Anhỹr o mẽ kãm kapêr.

17 Hãmri nẽ mẽ kot mar o kuhê xwýnhjê re nẽ hkôt mẽ pa ho mẽ pa xwýnhjê mẽ mẽ amnhĩm hikranh xà hã ixkre hwýr agjê. Hãmri nhũm hkôt mẽ pa ho mẽ pa xwýnhjaja

tee ri Jejus kot tanhmã mẽ hakwa jarēnh to hã kuma nẽ hã hkukja nẽ kãm:

—Kwa mon ka ri mẽ inhmã ã ja jarēnh anẽ? Anẽ.

18 Hãmri nhũm mẽ kãm:

—Kwa xan ka mẽ kormã aprĩ hã ja mar mex kêt nẽ? E pa ixprĩ hã mẽ amã harẽ ka mẽ inhma. Nã mẽ apkur xã na hte mẽ hkrã hi kamã mẽ hamaxpēr wỳr gjêx kêt nẽ.

19 Na hte ãm mẽ õhy pix wỳr agjê nẽ gaa nẽ nhãm hapôj nẽ hapêx. Na htem mẽ apkur xã nhỹ hã tanhmã amnhĩ tomnu to hkêt nẽ. Jakamã na hte Tĩrtũm mẽ apkur xã hã mẽ omunh xã hkôt tanhmã mẽ harēnh to hkêt nẽ. Anẽ.

Nhũm pre ã mẽ kãm kapēr anhỹr o mẽ paxapkur xã piitã mex ã harẽ. Jakamã na hte Tĩrtũm krajaja àmnhĩx mẽmoj piitã hkur o pa nẽ kãm mẽmoj kur pyma hkêt nẽ. Jakamã nhũm Jejus ã mẽ kãm kapēr anẽ nẽ mẽ kãm:

20 —Mẽ hkrã hi kamã mẽ hamaxpēr punuj pix nhỹ hã na htem tanhmã amnhĩ tomnuj to. Jakamã na hte Tĩrtũm tanhmã mẽ hamaxpēr to ho pa hã mẽ omunh xã hkôt tanhmã mẽ harēnh to. Nom mẽ kot mẽmoj kur ã mẽ omunh xã hkôt rỳ mẽ ìhkra kuhõnh japjê hã mẽ omunh xã hkôt tanhmã mẽ harēnh to hkêt nẽ. Ja tanhmã kệp kute hkêt.

21-22 Nom koja mẽhõ hamaxpēr punuj nẽ ra hkôt tanhmã amnhĩ tomnuj to.

Ja axpēn kamã hpijaam kêt nẽ.

Rỳ mẽhõx pĩ rỳ mẽ kệp ahkĩ.

Rỳ mẽ kệp mẽ hprõ rỳ mẽhkuprỳ ho amnhĩkati.

Rỳ ri axpēn pê õxỳ.

Rỳ tanhmã hkwyjê homnuj to.

Rỳ tanhmã mẽ ho kapēr punuj to.

Rỳ hêx rom mẽ no kupy r o ri pa.

Rỳ mẽmoj tã amnhĩ to jarkrar o pa.

Rỳ axpēn kukrêx pumu nẽ kãm ho õ hprãm xaj hã õ xwỳnhta kamã gryk.

Rỳ htỳx ri tanhmã amnhĩ nhĩpêx to.

Mẽ hamaxpēr punuj jakamã na htem ã ri amnhĩ nhĩpêx anhỹr o pa.

23 Tã ã mẽ kot amnhĩ nhĩpêx anhỹr ã mẽ omunh xã hkôt na hte Tĩrtũm mẽ kot amnhĩ tomnuj xwỳnh hã mẽ harẽ. Anẽ.

Mẽhõ kot hkra kaxyw Jejus mã hamaxpēr ã harēnh

Matêwre 5.21-28

24 Tã nhũm Jejus mẽ hkôt mẽ pa ho mẽ pa xwỳnhjaja nhỹhỹm nojarêt hãmri nẽ krĩ rũm hapôj nẽ ma krĩ pê Xir pu hã ri pa. Hãmri nhũm Jejus hkwyjê mã:

—E kwa pu mẽ tokyx ixkre mũj wỳr mō mẽ kuri pōj nẽ kamã amnhĩm hikra. Pu mẽ pahpôx tokyx anẽ kè krĩ nhõ xwỳnhjaja mẽ pahpôx ã mẽ pahpumunh kêt nẽ.

Anhỹr tã nom nhũm mẽ piitã mẽ harēnh ma nẽ mẽ hã akuprõ.

25-26 Nhũm mẽhõ ni haxwỳja Jejus hpôx ã harēnh ma nẽ ma hwỳr tẽ. Nom kệp Ijaew kêt axtem Gres nhõ

xwÿnh na pre. Pika pê Sir kamã krĩ mẽ kot kãm “Wẽnĩs” anhÿr xwÿnh kamã na pre kato. Nhũm pre mẽkarõmnuti kệp hkra ni mã axà. Hãmri nhũm õ mãmãj tee ri omu nê ra Jejus hpõx ã harênh ma nê ma hwÿr tẽ. Hãmri nê hwÿr axà nê hparpê hkõnkrã ho htẽm nê nhÿ nê kãm:

—Xê Pahihti. Inhmã ixkra nê mẽkarõmnuti jano kê ma tẽ kê akupÿm inhmã mex. Anẽ.

²⁷ Hãmri nhũm kãm:

—Nà kormã. Na pre Tirtũm taxy kormã Ijaewjê pix wÿr inhmẽ. Jakamã na pa kormã nhãm mẽ akwÿjê hõ tanhmã mẽ ato mex to hkêt nê. Anẽ.

²⁸ Hãmri nhũm tee ri amnhĩ tã kuma nê kãm:

—Ma ãm hãmri na ka ja jarẽ. Ixpê Ijaew kêt tã nom mẽ kuxwar we ixto mex grire kêt wehe. Anẽ.

²⁹ Hãmri nhũm kãm:

—Nà ãm hãmri na ka ã akra kaxyw inhmã ajamaxpêr tÿx anẽ. Jakamã kot paj nê mẽkarõmnutita jano. Kojaxte tanhmã apê ho hkêt nê. E ma akupÿm hwÿr tẽ nê omu. Anẽ.

³⁰ Hãmri nhũm kuma nê ma akupÿm õrkwÿ hwÿr tẽ nê omu. Nhũm ra mẽkarõmnutitija kệp kato nê ma tẽ nhũm akupÿm tãm hkrã nê hkĩnh nê par kãm hkõkõt o nũ.

Hamak kro nê kapêr krok xwÿnh jarênh

Matêwre 15.29-31

³¹ Tã nhũm Jejus mẽ hkõt mẽ pa ho mẽ pa xwÿnhjaja krĩ pê Xir rũm hapõj nê akupÿm gô rax pê Garirej wÿr ma mra.

Pyka pê Sitõ jakre nê mõ nê pyka pê Tekap jakre.

³² Hãmri nê kormã hpõx o mõr rôm nhũm mẽ amnhĩ wÿr Jejus pumu nê hwÿr mẽhõ myja o tẽ. Kapêr krok nê umar kêt xwÿnhhta nhũm mẽ wÿr o tẽ nê kãm:

—Pa? Ot pa mẽ awÿr ixkrãmnhwÿta o tẽ. Kwa hã anhĩhkra xi kê akupÿm mẽ inhmã mex. Anẽ.

³³ Hãmri nhũm omu nê hpa hã kupy nê mẽ kệp o kato nê nhÿri mẽ hkàx ã o xa. Nê akutã hamak kre kupê nê argõx mẽ nê ho õhto htok.

³⁴ Hãmri nê kaxkwa hwÿr rĩt nê htyk xà mẽnh tÿx nê kãm kapêr. Mẽ pakapêr kãm kãm: “E ajamak katêr nê anhõhto kaxkrit.” Anẽ. Nom kapêr kãm kãm: “Epata.” Anẽ.

³⁵ Hãmri nhũm hamak katêr nê õhto kaxkrit kurê kumrêx nê tãm kapêr nê tãm ama.

³⁶⁻³⁷ Hãmri nhũm mẽ kot omunh xwÿnhjaja amnhĩ jaêr pê Jejus kot ho mex ã omu nê kamã no puma nê. Hãmri nhũm mẽ kãm:

—Kwa kêr ka mẽ akwÿjê mã ja hã ijarênh kêt nê.

Anhÿr tã no nhũm mẽ kuma nê ãm kuma nê ma mẽ piitã mẽ kãm harênh o ri hprõt nê mẽ kãm:

—Kwa Jejus na mex o mex. Na hte mẽ ho mex o pa nhũm mẽ umar kêt xwÿnhjaja akupÿm tãm ama nhũm mẽ kapêr kêt xwÿnhjaja akupÿm tãm kapêr. ãm hãmri na hte ã mẽ hipêx anhÿr o pa. Nà ãm mex o mex. Anẽ.

8

*Jejus kot mẽ ho 4.000 mẽ mẽ
kãm mẽ õ hã harẽnh
Matêwre 15.32-39*

¹⁻² Tã nhũm arĩgro hõ hã nhũm mẽ ohtô nẽ nhỹri kapôt ã Jejus ã htu rax nẽ kot mẽ ahkre mar o kuhê hã apkati axkrunẽpxi. Nhũm mẽ apkur xà hã mẽõja ra mẽ kệp hapêx. Hãmri nhũm Jejus ja hã mẽ omu hãmri nẽ hkôt mẽ pa ho mẽ pa xwỳnhjê mã akir nẽ mẽ kãm hpa ho apê nẽ mẽ kãm:

—E mẽ amnẽ ixwỳr mra nẽ ixkapêr ma. Anẽ.

Nhũm mẽ hwỳr mra nẽ kuhê nhũm mẽ kãm:

—Kwa na pa inhmã mẽ kot inhmar o kuhê xwỳnhjê kaprĩ nẽ. Na mẽ ra mẽ pahkôt ri pa hã apkati axkrunẽpxi nhũm mẽ apkur xà hã mẽõja mẽ kệp hapêx.

³ Mẽ õ krĩ hwỳr awry jakamã koja mẽ mẽmoj kur kêt rãhã ma akupỹm pa hãmri nẽ pry hã hirot nẽ rôrôk o pa. Hãmri pa inhmã mẽ hkaprĩ nẽ. Anẽ

⁴ Hãmri nhũm mẽ kuma nẽ axte tee ri hamaxpêr nẽ kãm:

—Kwa nà nhỹhỹnh kot puj kêt mẽ kãm mẽmoj to mra? Jar ãm kapôt pix kênã. Anẽ.

Hãmri nhũm mẽ kãm:

⁵ —Nà tanhmã na mẽ anhõ pãwtija kute? Anẽ.

Nhũm mẽ kãm:

—Ãm kệp 7 pix. Nẽ kaxyw tep kwỳ no ãm grêre. Anẽ.

⁶ Hãmri nhũm mẽ kuma nẽ mẽ kot mar o kuhê xwỳnhjê mã anẽ nhũm mẽ kuma nẽ hkrĩ pa. Hãmri nhũm pãwti jamỳ nẽ ho Tĩrtũm wỳ nẽ kãm:

—Pa Papaj. Nà ka na apê mẽ inhmã mẽ inhõ ho apa xwỳnh. Jakamã amex o amex. ãm amex kumrêx. Anẽ.

Hãmri nẽ mẽ kãm ho hkry pa nẽ hkôt mẽ pa ho mẽ pa xwỳnhjê mã kugõ nhũm mẽ ho mẽ hipêx pa.

⁷ Nhũm hpãnhã tepta py nẽ mã ho anẽ nẽ ho Tĩrtũm wỳ. Hãmri nẽ hkôt mẽ pa ho mẽ pa xwỳnhjê mã kugõ nhũm mẽ mã ho anẽ nẽ hamỳ nẽ ho mẽ hipêx pa.

⁸⁻⁹ Hãmri nhũm mẽ ohtô rax kumrêx tã piitã apku nẽ õhy htu pa. Mẽmyjaja kệp 4.000 nẽ kaxyw mẽ hprõjaja nẽ mẽ hkrajaja. Tã nhũm Jejus mẽ apkur xàja o mẽ hipêx pa. Nhũm hkôt mẽ pa ho mẽ pa xwỳnhjaja hakrêx o akuprõ nẽ ho kawà ho 7 nẽ ho nýt. Hãmri nhũm Jejus ma akupỹm mẽ õ krĩ hwỳr mẽ kot mar xwỳnhjê jano nhũm mẽ ma akupỹm hapêx.

¹⁰ Hãmri nhũm Jejus hkôt mẽ pa ho mẽ pa xwỳnhjê mẽ ro hã kanõre hkrem agjê nẽ mẽ hkwỳm ma Tamanut wỳr mõ.

Parijew nhõ xwỳnh kwỳ kot mẽmoj tã Jejus kamã hamak ã mẽ harẽnh

Matêwre 12.38-42, 16.1-4; Rukre 12.54-59

¹¹ Tã nhũm mẽ Tamanut wỳr pøj nhũm Parijew nhõ xwỳnh kwỳjaja Jejus pumu nẽ ma hwỳr mra nẽ mẽmoj tã kuwỳ nẽ kãm:

—Pa. Ot pa mẽ awỳr mra. Kwa mẽ inhmã aa mẽ ixte mẽmoj pumunh kêt õ ho anẽ.

Pa mẽ ja hã apumu nẽ Tĩrtũm kot mẽ ixwỳr amẽnh ã akõt ijamaxpěr kurê kumrẽx. E tokyx. Anẽ.

Kot tee ri mẽ kãm mẽmoj to anhỳr kaxyw nẽ ho anhỳr kêt nhũm mẽ kot hã omunh nẽ ma hkwyjê mã ho kapěr punuj kaxyw nhũm mẽ ã hêx rom kãm kapěr anẽ.

¹² Nhũm ra kãm mẽ kot amnhĩ kaxyw hkõt hamaxpěr kêt kãm ã kapěr anhỳr mar kaga nẽ. Hãmri nẽ tee ri amnhĩ tã mẽ hamaxpěr ã mẽ omu nẽ htyk xà mẽnh tỳx nẽ mẽ kãm:

—Hêxta waa nẽ. Mẽ ajamaxpěr punuj pix o na ka htem ri ajamaxpěr o apa. Ixpê Tĩrtũm kot mẽ awỳr inhmẽnh xwỳnh tã ka mẽ ja hã ixkõt ajamaxpěr kêt nẽ. Nà mo kaxyw kot pa kêt mẽ amã mẽmoj to anẽ? Kot paj ho anẽ ka mẽ omu nẽ ãm omu nẽ ixkõt ajamaxpěr kêt nẽ. Nà kot paj mẽ amã mẽmoj to anhỳr kêt nẽ. Anẽ.

¹³ Hãmri nẽ mẽ kure nẽ hkõt mẽ pa ho mẽ pa xwỳnhjê mẽrohã ma mra nẽ akupỳm kanôre hkrem agjê nẽ ma xarmã mỗ.

Jejus kõt mẽ pa xwỳnhjaja kot hprĩ hã omunh kêt ã mẽ harẽnh

Matêwre 16.5-12; mããnẽn Makre 6.52

¹⁴ Tã nhũm mẽ kormã kanôre kamã xarmã mỗr rôm nhũm Jejus kõt mẽ pa ho mẽ pa xwỳnhjaja tee ri mẽ apkur xà japêr nẽ axpẽn mã:

—Kwa hêxta waa nẽ. Na pu mẽ panhõ pãwti re nẽ amnhĩ

kõt o pamõr kêt nẽ. Nẽ ãm pixire nẽ o mỗ. Anẽ.

¹⁵ Hãmri nhũm Jejus tee ri mẽ kuma nẽ tanhmã hã mẽ kãm kapěr to. Nom mẽmoj tã kuxi nẽ mẽ kãm awjarẽ nẽ mẽ kãm:

—Kwa oko kêr ka mẽ amnhĩ nẽ Parijew nhõ xwỳnh mẽ Pahi Erox nhõ pãw kaxkrit xà pumunh mex nẽ. Anẽ.

¹⁶ Hãmri nhũm mẽ kuma nẽ tee ri kapêrja kukamã hamaxpěr pê hã axpẽn kukjêr o hkrĩ nẽ axpẽn mã:

—Kwa mo na ri ã mẽ pamã pãw kaxkrit xà jarẽnh anẽ? Mãn mẽ panhõ pãwti hkêt ã mẽ pahpumu hã na ri ã harẽnh anẽ nà? Anẽ.

¹⁷ Hãmri nhũm Jejus mẽ kapêr ã mẽ kuma nẽ mẽ kãm:

—Kwa mon ka wem ãm xatã axpẽn mã mẽ panhõ pãwti hkêt jarẽnh pix o mỗ? Xàn pa hte mẽ apyrã nẽ tee ri mẽ paxàpkur xà hkêt kukamã ijamaxpěr o ixpa? Nà inhmã ja tanhmã kute hkêt.

¹⁸ Ra mẽ ano ho mẽ ate ixpumunh mex tã kormã aprĩ hã tanhmã ixkute hã ixpumunh mex kêt. Nẽ mẽ ajamak o ixkapêr mar mex tã aprĩ hã mar tỳx kêt. Kwa wem ixte amnhĩ nhĩpêx mã ajamaxpěr tỳx nẽ. E mẽ inhmã mẽmoj jarê.

¹⁹ Jãã ixte mẽ kêp 5.000 mã pãwti kêp 5 nhĩrênhta. Tanhmã na ka prem hakrêx o akuprõ nẽ ho kawà ho nỳt to? E mẽ atõ inhmã harê. Anẽ Hãmri nhũm ja kãm: “Na pa prem ho kawà ho 12 nẽ ho nỳt.” Anẽ.

²⁰ Nhũm kuma nẽ mẽ kãm:

—Tỳ na pre hakrêx ã kawà kêp 12. Tã ham ixte mẽ kêp 4.000 mã pãwti kêp 7 nhîrênhta. Tanhmã na ka prem hakrêx ho akuprô nê ho kawà ho nýt to? Anê.

Nhũm ja kãm: “Na pa prem ho 7.” Anê.

²¹ Hãmri nhũm kuma nê mẽ kãm:

—Tỳ ra ixte mẽ anoo mã ã ja ho anhÿr o axkrut tã ka mẽ ra hã ano hkêt nê arĩ axpên mã mẽ panhõ pãwti hkêt pix jarênh o ixkôt mõ. Kormã mẽ ate ixãhpumunh tÿx ã ix-pumunh kêt. Anê.

Jejus kot akupÿm nohkre xwÿnh o mex ã harênh

Juãw 9.1-7

²² Tã nhũm mẽ ma krĩ pê Pesêj wÿr mõ nê ra hwÿr pøj. Hãmri nhũm krĩ nhõ xwÿnh kwÿjaja mẽ omu nê Jejus wÿr mẽhõ myja o tẽ. Ra nohkre nê rĩt kêt nê pa xwÿnhja nhũm mẽ hpa hã kupyn hwÿr o tẽ. Hãmri nê ho kuwÿ nê kãm:

—Pa Pahihti? Ot pa mẽ awÿr ja ho tẽ. Kwa hã anhĩhkra xi nê akupÿm mẽ inhmã no ho mex. Anê.

²³ Hãmri nhũm mẽ kuma nê nohkre xwÿnhhta pumu nê hpa hã kupy nê o tẽ nê krĩ pê ho kato nê nhÿri mẽ hkàx ã o xa. Hãmri nê no hã argõx mẽ nê hã ìhkra xi nê kãm:

—E mãn ka mẽmoj pumu nà? Anê.

²⁴ Hãmri nhũm kuma nê hkrãkato nê ri rĩt hãmri nê kãm:

—Tỳ na pa mẽmoj pumu. Nom ixprĩ hã omunh mex kêt nê. Te mẽmo pĩ hpàr kwÿ ri mrar pyràk. Anê.

²⁵ Hãmri nhũm axte no hã ìhkra xi nhũm tã rĩt mex nê. Ri hprĩ hã mẽmoj piitã omunh mex nê.

²⁶ Hãmri nhũm Jejus akupÿm òrkwÿ hwÿr kumẽ nê kãm:

—E kêr ka kape hã ri amrar kêt nê. ãm ma ma akupÿm anhõrkwÿ hwÿr atêm kurê kumrêx. Anê.

Jejus kot amnhĩ tã hkôt mẽ pa xwÿnhjê kukjêr ã harênh

Matêwre 16.13-20; Rukre 9.18-21

²⁷ Tã hãmri nhũm Jejus ma hkôt mẽ pa ho mẽ pa xwÿnhjê mẽ mẽ ma mõ. Ma krĩ pê Se-jarej Piripos pu hã krĩ hkwy hkôt mõ. Nê kormã pry hã mõ nhũm Jejus amnhĩ tã hkôt mẽ pa ho mẽ pa xwÿnhjê kukja nê mẽ kãm:

—Kwa mẽ inhmã mẽmoj jarê. Tanhmã na htem ahpÿnhã ri axpên mã ijarênh to wehe? Anê.

²⁸ Hãmri nhũm mẽ kãm:

—Nà na htem ahpÿnhã tanhmã ajarênh to. Na hte kamã mẽ hkwyjaja axpên mã ato finat Juãw Paxis ã ajarê. Nê kamã mẽ hkwyjaja ato finat Eris ã ajarê nê mẽ hkwyjaja apê Tĩrtũm nhÿ hã kapêr o pa xwÿnh ra htyk xwÿnhjê hõ hã ajarê. ã na htem ahpÿnhã axpên mã ajarênh anhÿr o pa. Anê.

²⁹ Hãmri nhũm mẽ kuma nê mẽ kãm:

—No we mẽ kajaja? Ixpê mẽhõ hã na ka htem axpên mã ijarê? Anê.

Hãmri nhũm Simãw Pêtre kãm:

—Nà mẽ pajaja na pa htem apê Tirtüm kot mẽ ixkaxyw axãm nẽ mẽ ixwÿr amẽnh xwÿnh ã ajarẽ. Nẽ apê mẽ ixpiitã mẽ inhõ Pahi Maati hã ajarẽ. Æ na pa htem axpẽn mã ajarẽnh anẽ. Anẽ.

³⁰ Hãmri nhũm kuma nẽ mẽ kãm:

—Nà ãm hãmri na ka htem ã ijarẽnh anẽ. Æ ixte anhÿr. Kwa nom kwa kær ka mẽ inhma. Kær ka mẽ kormã ã akwÿjẽ mã ijarẽnh anhÿr kêt nẽ. Anẽ.

Jejus kot amnhĩ kukamã amnhĩ jarẽnh ã harẽnh

Matêwre 16.21-23; Rukre 9.22

³¹ Tã nhũm Jejus amnhĩ kukamã hkõt mẽ pa ho mẽ pa xwÿnhjẽ mã tanhmã amnhĩ jarẽnh to nẽ mẽ kãm:

—Nà ra mẽ ate Tirtüm kot mẽ akaxyw ixãm ã ixpumunh mex. No mẽ pahkwÿjaja kãm ja hã ijarẽnh mar nẽ ixpumunh prãm kêt. Ijaew krãhtümjẽ mẽ Tirtüm kapër tũm o mẽ ahkre o mẽ pa xwÿnhjẽ mẽ patre krãhtümjaja na mẽ kãm ja hã ixpumunh prãm kêt. Jakamã koja mẽ nhÿrmã ixpynẽ nẽ ixtak rax nẽ ixpĩ. Nom kot paj ixtyk ã ixtã apkati axkrunẽpxi hãmri nhũm Tirtüm akupÿm ixto ixtĩr. Anẽ.

³² Hãmri nhũm mẽ kot hpĩr ã amnhĩ jarẽnh ma nẽ tee ri hkukamã hamaxpër. Hãmri nhũm Simãw Pêtreja hwÿr tẽ nẽ hkwÿjẽ pẽ ho kato nẽ mẽ hkàx ã o xa nẽ kãm:

—Kwa nà Pahihti. Koja Tirtüm anẽ mẽ omunh mex nẽ nhũm mẽ ã anhĩpêx anhÿr

kêt nẽ. Kwa ri ã kapër anhÿr kêt nẽ. Anẽ.

³³ Hãmri nhũm kuma nẽ hwÿr apkjẽ nẽ pu hã hkõt mẽ pa ho mẽ pa xwÿnh piitã omu. Hãmri nẽ mẽ hamak mã Simãw Pêtre mã kapër nẽ kãm:

—Tk. Kwa na ka ã inhmã akapër anhÿrja o te Satanasti nhÿ hã akapër pyræk. Tirtüm nhÿ hã na ka ã inhmã akapër anhÿr kêt nẽ. Æm jar mẽ kãm Tirtüm kapër mar prãm kêt xwÿnhjẽ jamaxpër o na ka ajamaxpër nẽ ã inhmã akapër anẽ. No Tirtüm jamaxpër o ajamaxpër kêt nẽ. Anẽ.

Jejus krajaja tanhmã kot amnhĩ nhĩpêx hto hã mẽ harẽnh

Matêwre 6.24-28; Rukre 9.23-27; Juãw 12.24-26; mããnẽn Apokarip 2.10, 12.11

³⁴ Tã nhũm Jejus amnhĩ wÿr mẽ kot mar o kuhẽ xwÿnhjẽ mẽ hkõt mẽ pa ho mẽ pa xwÿnhjẽ mã anẽ nhũm mẽ hwÿr axkamẽ nẽ kuhẽ. Hãmri nhũm tanhmã mẽ ahkre hto nẽ mẽ kãm:

—E mẽ inhma. Kot kaj mẽ ixkõt amnhĩ xunhwÿr ã amnhĩ jarẽ hã kot kaj mẽ mããnẽn amnhĩ jarẽnh o: “Jejus kęp inhõ Pahihti jakamã kot paj ãm kapër kôt pix mã amnhĩ nhĩpêx rãhã ho ri ixpa. Kwãr ixkwÿjaja tanhmã hã inhĩpêx to pa arĩ hkõt amnhĩ nhĩpêx rãhã ho ixpa.” Anhÿr o amnhĩ jarẽ.

³⁵ —Koja mẽ ixtã mẽ atõx pĩ rÿ ixtã tanhmã mẽ ato ka ty. Ate tanhmã ijarẽnh to ho apa hã nhũm mẽ apĩ. Tã nom koja

akaxwÿnh ma inhõ krī hwÿr àpir kurê kumrêx nê kamã atÿr tũm nê amex rãhã nê apa ho apa. Nom kot kaj mẽ jar atÿr prãm xaj ixkaga hãmri nê hwÿr axàpir kêt nê.

36-37 —Nê koja mẽhõ hikukrêx gryk ã Tirtũm kaga. Hãmri nê nhÿrmã ty nê ÿ kamã kuwy hwÿr ma mõi nê amnhĩ kôt kukrêx õ hpyr nê o mõi kêt nê. Koja tee ri kuwy hwÿr mõi pymaj amnhĩ nê hikukrêx rax o amnhĩ pãnhã amnhĩrer prãm kaprÿ. Tanhmã koja amnhĩ to nê Tirtũm mã amnhĩre nê ma õ krī hwÿr api? Koja ã amnhĩ nhĩpêx anhÿr kêt nê.

38 —Nê koja mẽhõ ixte mẽ ahkre hã inhma nhũm ja kêp omnuj japêr. Nhũm kot mẽ kãm ixprãm nõkati xwÿnhjê hkõt pa gryk ã ixkaga. Hã kot paj nhÿrmã mẽ ato amnhĩptâr kaxyw akupÿn wrÿ nê amnhĩ xwar kot ixkaga xwÿnhhta kaga. ãm hãmri na pa mẽ amã ja hã amnhĩ jarê. Kot paj nhÿrmã inhõ Papaj nhÿ hã ixte mẽ ho amnhĩptâr kaxyw akupÿn wrÿ nhũm kapêr o mẽ wrÿk xwÿnhjaja man ixkõt wrÿ. Pa mẽ wrÿ hãmri nê ra mẽ kot ixkaga xwÿnhjaja pa amnhĩ pyrã nê amnhĩ xwar mẽ hkaga hpa. Anê.

9

1 Nhũm Jejus arĩ mẽ kãm kapêr nê mẽ kãm:

—ãm hãmri na pa mẽ amã amnhĩ jarê. Kot paj nhÿrmã akupÿn ixte mẽ ato amnhĩptâr kaxyw mẽ awÿr wrÿ kãm ga. Tã kot kaj mẽ

akwÿjaja kormã atÿr ri ja kukamã tanhmã ixte amnhĩ nhĩpêx to hã ixpumu. Anê.

Jejus hirã htÿx kãm ãm ã harênh

Matêwre 17.1-9; Rukre 9.28-36; mããnên Sikũn Pêtre 1.16-18

² Tã nhũm arĩgro kêp 6 nê hapêx nhũm Jejus ma nhÿri hixêt prêk wÿr tẽ. Nê Simãw Pêtre nê Xiakre nê Juãwja nhũm ma amnhĩ kôt wa mẽ o mõi. Nhũm wa mẽ ahte mõi nê hixêt prêk ã api nê himök ã kuhê. Hãmri nhũm Jejus axtem nê xa.

³ Ra ê haka htÿx kumrêx nê xa.

⁴ Hãmri nhũm ja wa kaxkwa rũm hwÿr wrÿ nê kuri kãm kapêr. Finat Mojes mẽ finat Erisja wa wrÿ nê kuri kãm kapêr o xa. Tirtũm amnepêm amnhĩ wÿr wa ho àpir tã nhũm wa akupÿn wrÿ nê kãm kapêr.

⁵⁻⁶ Nhũm wa mẽ mex kumrêx nê hirã htÿx kãm kuhê nhũm Jejus kôt mẽ mõi xwÿnhjaja wa mẽ omu nê mẽ kamã no puma nê. Nê tee ri mẽ kãm tanhmã kapêr to hkukamã hamaxpêr. Hãmri nhũm Simãw Pêtre hamaxpêr nê Jejus mã kãm:

—Kwa Pahihti. Nã ãm hãmri na pu mẽ amnê mõi. Kwa pu mẽ kritpêm jar axkamê nê tokyx panojarêt kêt nê. Pa mẽ amã pô nhĩrõnh o axkrunêpxi nê hipêx. Amã nê Mojes mã nê Eris mã hõ nhĩpêx ka mẽ kamã akrĩ. Kwa xat pa mẽ amã ho anê nã? Anê.

⁷ Hãmri nhũm kakrã jaka htÿx wrÿ nê wa mẽ hkunor

pa nhũm wa mẽ kamã kuhê. Hãmri nhũm kakrã kamã Tĩrtũm mẽ kãm kapêr nê mẽ kãm:

—Ota Ixkra xa. Inhmã hapê ho inhmã hapê. Kêr ka mẽ kapêr mar tỳx rãhã ho ri apa. Anê.

⁸ Hãmri nhũm mẽ kuma nê amnhĩ pu hã rĩt nhũm ãm Jejus pix mẽ kuri xa nhũm Mojes mẽ Erisja wa ra ma akupỹm api nhũm mẽ ãm Jejus pix pumu.

⁹ Hãmri nhũm mẽ ma akupỹm hkwyjê hwyr wryk o mō nhũm Jejus mẽ kãm:

—Kwa kêr ka mẽ ham mẽ ate mẽmoj pumunh xwỳnhhta kormã nhãm mẽ kãm harênh kêt nê. Koja mẽ mẽmo arĩgro hã ixpĩ hãmri nhũm Tĩrtũm akupỹm ixto ixtĩr ka mẽ rĩ kormã mẽ kãm ja hã ijarênh o ri apa.

¹⁰ Anê hãmri nhũm mẽ kuma nê mẽ kãm harênh kêt nê. ãm axpên mã pix mã harê nê kot akupỹm htĩr ã amnhĩ jarênhja ã axpên kukjêr o pa nê axpên mã:

—Kwa mo na ri ã akupỹm htĩr ã amnhĩ jarênh anê? Tanhmã kot we amnhĩ to nê htyk tã akupỹm htĩr? Anê.

Hãmri nê tee ri hkukamã hamaxpêr o hkôt pa.

Juãw Paxis te kot Eris pyrãk ã harênh

Matêwre 11.13-15, 17.10-13

¹¹ Hãmri nhũm mẽ kormã ahpar mã wryk o mōr mẽ nhũm Jejus kôt mẽ mōr xwỳnhjaja mẽmoj tã hkukja nê kãm:

—Kwa mẽ inhmã mẽmoj jarê. Na hte Tĩrtũm kapêr tũm o mẽ ahkre xwỳnhjaja

mẽ inhmã: “Eris kumrêx koja Tĩrtũm mẽ pahwyr kumê nhũm Krisja hapu hã wry.” Anê. Na htem ã mẽ inhmã war ajarênh anê. Tã ka na ka ra wry nom nhũm kormã Erisja akukamã wryk kêt nê. Anê.

¹²⁻¹³ Hãmri nhũm mẽ kãm:

—Nà ãm hãmri na htem mẽ amã ã ja jarênh anê. Na pre ra ixkukamã te kot Eris kot amnhĩ nhĩpêx pyrãk xwỳnhhta tẽ nê ixkutêp mẽ kãm ijarênh o pa. Nom mẽ kot ixkukamã ijarênh xwỳnh ã omunh kêt jakamã na prem axtem nê kãm tanhmã hipêx to hprãm xà hkôt tanhmã hipêx kati hton kupĩ. Tã koja mẽ ã hipêx anhyr pyrã nê mã ixto anê nê inhĩpêx kati nê tokyx mẽ kãm ixprãm kêt xwỳnhjaja ixpynê nê ixpĩ pa amnhĩ xà htỳx kamã ijamak kãm ty. Tĩrtũm kapêr ã kagã htũm kot wa ijamê wa ixkukamã wa ijarênh xà hkôt. Anê.

Jejus kot mēhō hkra nē mẽkarōmnuti janor ã harênh

Matêwre 17.14-21; Rukre 9.37-43

¹⁴ Hãmri nhũm Jejus nê Simãw Pêtre nê Xiakre nê Juãwja mẽ akupỹm hkwyjê hwyr hpôx o mra nê amnhĩ kukamã hkwyjê pumu nhũm mẽ ohtô nê mẽ hã akuprô nê mẽ kãm kapêr. Nhũm Tĩrtũm kapêr tũm o mẽ ahkre ho mẽ pa xwỳnhjaja mẽmoj tã mẽ hkukjêr o kuhê.

¹⁵ Jakamã nhũm Jejus mẽ hwyr hpôx o tẽ nhũm mẽ pikuprônh xwỳnhjaja amnhĩ wyr omu nê hkĩnh nê. Hãmri nê kutã hprôt nê kãm:

—Pa. Nà ãm hãmri na ka akupÿn mẽ ixwÿr tẽ. Anẽ.

¹⁶ Hãmri nhũm mẽ kãm:

—Kwa mẽmoj tã na ka mẽ axpẽn mã axàkjêr o akuhê? Anẽ.

¹⁷⁻¹⁸ Hãmri nhũm mẽhõ myja kãm:

—Nà ixkra hã na pa mẽ axpẽn mã ixkapêr. Na pre mẽkarõmnuti ixpê hwÿr axà nẽ tanhmã ixpê ho nhũm kapêr kêt nẽ pa. Nhũm hte xatã tanhmã ixpê ho nhũm pykap amnhĩ rẽ nẽ hakwa jamrô ho hikwÿ. Hãmri nẽ à htÿx kamã ama nẽ amnhĩ nham o axpẽn kamnhar tÿx kumrêx pê htÿx pa nẽ hikwÿ nẽ ixpê omnuj tÿx nẽ. Na hte ã mẽkarõmnuti nhÿ hã amnhĩ nhĩpêx anhÿr o pa. Jakamã na pa ate inhmã ho mex kaxyw man o tẽ nẽ tee ri ajapêr. Hãmri nẽ ho akôt mẽ pa ho mẽ pa xwÿnhjê hwÿ nhũm mẽ kot inhmã ho mex kaxyw tee ri tanhmã ho hkaprÿ. Anẽ.

¹⁹ Hãmri nhũm Jejus kuma nẽ hkôt mẽ pa ho mẽ pa xwÿnhjê mã kãm:

—Hêxta waa nẽ. Ra mẽ ate Tirtũm nhÿ hã ixte mẽ ho mex ã ixpumunh ryy htã ixpyrà nẽ ã amnhĩ nhĩpêx anhÿr kêt nẽ. Mãn ka mẽ kormã kaxyw Tirtũm kôt ajamaxpêr tÿx kêt nẽ. E amnẽ ixwÿr akra ho tẽ pa omu. Anẽ.

²⁰ Hãmri nhũm mẽ hwÿr o tẽ nhũm mẽkarõmnuti Jejus pumu nẽ tanhmã hkrata o htÿx to nhũm pykap tẽm nẽ hakwa jamrô nẽ amnhĩ rênh o nõ.

²¹ Nhũm Jejus omu nẽ hipêêxã mã:

—Kwa tanhmã na ra kot amnhĩ nhĩpêx ã mytwrÿ kute? Anẽ.

Nhũm kãm:

—Nà hprĩre rũm na hte ã amnhĩ nhĩpêx anhÿr o pa.

²² Na hte mẽkarõmnuti xatã ixpê hpĩr kaxyw kuwy kamã kurê nẽ gôx kãm kurê. Kwa kot ka ate ho mex kukamã axàhpumunh japêr nẽ wa ixkamã axukaprĩ nẽ akupÿm inhmã ho mex. Anẽ.

²³ Hãmri nhũm Jejus kãm:

—Xàn ka tee ri ixte ho mex kaxyw ixkukamã ajamaxpêr? Nà ixte mẽmoj piitã ho anhÿr kaxyw ixàhpumunh tÿx kênã. Kot ka mẽ atõ mẽmoj tã amnhĩ kaxyw ixkôt ajamaxpêr tÿx hã kot paj amã ho anẽ. Anẽ.

²⁴ Hãmri nhũm kuma nẽ kãm hkra mex prãm tÿx xaj kapêr tÿx nẽ kãm:

—Nà na pa amnhĩ kaxyw akôt ijamaxpêr. Nom kot kaj tanhmã ixkrã hto pa akôt ijamaxpêr tÿx rãhã ho ri ixpa Pahihti. Anẽ.

²⁵ Rôm nhũm mẽ ohtô rax nẽ hwÿr kormã mra nhũm Jejus amnhĩ wÿr mẽ omu hãmri nẽ mẽkarõmnutija mã kapêr kurê kumrêx. Nẽ kãm kapêr kãm hihtÿx nẽ kãm:

—Pa mẽkarõmnuti. E apê mẽ ho mẽ kapêr kêt nẽ mẽ umar kêt o apa xwÿnh ã pa amã ixkapêr ka inhma. Kêr ka mẽ hkrata pê akato nẽ ma amõr o mõi nẽ axte tanhmã ho hkêt nẽ. Anẽ.

²⁶ Hãmri nhũm tee ri kot kãm karõja ma nẽ gryk xaj xatã amÿra nẽ mẽ hkrata o

htỳx kumrẽx nhũm htertet tỳx o nõ. Hãmri nhũm kęp kato nẽ ma tẽ nhũm te htyk pyrà nẽ nõ nhũm mẽ tee ri omu nẽ ra htyk ã hkamnhĩx.

²⁷ Hãmri nhũm Jejus hpa hã kupy nẽ kànhmã ãm nhũm akupỳm mex nẽ kànhmã xa nẽ ri mra. Nẽ tãm kapër o mra nẽ umar mex nẽ.

²⁸ Tã nhũm Jejus hkõt mẽ pa ho mẽ pa xwỳnhjê mērohã ma akupỳm amnhĩm hikranh xà hã ixkreja wỳr mra nẽ hwỳr agjê nẽ hkrĩ. Hãmri nhũm Jejus kõt mẽ pa ho mẽ pa xwỳnhjaja amnhĩ tã hkukja nẽ kãm:

—Kwa mẽ inhmã mẽmoj jarẽ Pahihti. Na pa mẽ tee ri axwakre kamã mẽ hkrata nẽ mẽkarõmnuti janor kaprỳ. Kwa mon pa mẽ apyrà nẽ ja ho anhỳr mex kêt nẽ? Anẽ.

²⁹ Hãmri nhũm mẽ kãm:

—Nà axtem na mẽkarõmnuti ja. Na htem mẽ nẽ hanor tokyx anhỳr kêt nẽ. Na htem ho Tĩrtũm wỳr tỳx nẽ rĩ kormã hano. Anẽ.

Jejus kot htyk kukamã amnhĩ jarẽnh

Matêwre 17.22-23; Rukre 9.44-45

³⁰⁻³¹ Tã nhũm Jejus mẽ hkõt ri mẽ pa ho pa xwỳnhjê mẽ krĩa rũm hapõj nẽ ma nhãm mõ. Nẽ ma pyka pẽ Garirej kahti hkõt mõ. Nom mẽ piitã mẽ hkàx ã mõ. Jejus kormã kot amnhĩ tã tanhmã hkõt mẽ pa ho mẽ pa xwỳnhjê jahkre hto ho pa jakamã kãm mẽ hkàx ã mẽ o pa hprãm nẽ. Hãmri nẽ amnhĩ kukamã mẽ kãm tanhmã amnhĩ jarẽnh to nẽ mẽ kãm:

—E kot paj mẽ amã tanhmã amnhĩ jarẽnh to ka mẽ inhma nẽ inhmar tỳx nẽ. Kojã mẽ kãm ixprãm kêt xwỳnhjaja tokyx mẽ kãm ixtã amỳnẽ nhũm mẽ ixpĩ. Kot paj ixtyk ã ixtã apkati axkrunẽpxi hãmri nhũm Tĩrtũm akupỳm ixto ixtĩr. Kwa kêt ka mẽ ja ma nẽ hã anohtỳx nẽ ho apa. Anẽ.

³² Hãmri nhũm mẽ tee ri ã kot amnhĩ jarẽnh anhỳrja ma nẽ axpẽn mã:

—Kwa mo na ri ã mẽ pamã amnhĩ jarẽnh anẽ? Nà kęp mẽ panhõ Pahi Maati hã kot amnhĩ jarẽnh kẽnã kot kêt mẽhõ kupĩ.

Anhỳr o axpẽn mã harẽnh o hkõt mõ. Hãmri nẽ ã kot amnhĩ jarẽnh anhỳr mar prãm kêt jakamã hprĩ hã tanhmã hkukjêr to hkêt nẽ. ãm akryk hkõt mar o mõ.

Mẽ kot amnhĩ to rũnh xwỳnh jarẽnh

Matêwre 18.1-5; Rukre 9.46-48

³³⁻³⁴ Tã nhũm Jejus mẽ hkõt mẽ pa ho pa xwỳnhjaja kormã ma krĩ pẽ Kapanau hwỳr mõ nhũm hkõt mẽ pa ho mẽ pa xwỳnh pẽ 12jaja tanhmã amnhĩ kukamã hamaxpër to hãmri nẽ axpẽn mã:

—Kwa mẽ pahtõ kot puj we nhỹrmã pahpê pahi nẽ mẽ ho amnhĩptar rax o ri pahkwỳjê jakre?

Anhỳr o axpẽn kukjêr o Jejus kõt mõ. Nẽ axpẽn mã: “Nà pa.” Nhũm mẽ hkwỳjaja: “Nà kêt pa.” Anhỳr o hkõt mõ. Hãmri nhũm Jejus mẽ mar o mõ. Hãmri nhũm mẽ mõ nẽ nhỹri amnhĩm hikranh xà hã

ixkre hwÿr pøj nē hwÿr agjê nhũm mē kām:

—Kwa mēmoj tã na ka mē pry hã amnhĩ jarēnh o mō? Anē.

Hāmri nhũm mē tee ri kuma nē hpijaam nē. Nē kām tanhmã amnhĩ jarēnh to hkêt nē.

³⁵ Jakamã nhũm Jejus nhÿ nē mē kām anē nhũm mē kuri hkrĩ pa nhũm mē kot mē kām mē ho amnhĩptār rax prãmta ã mē kām kapēr nē mē kām:

—E mē inhma. Ka mē atō amã mē ho amnhĩptār rax prãm. Hã kēr ka te apē mē piitã mē kām amarĩ axápēnh xwÿnh pyrãk o amnhĩ nhĩpêx o mē hkôt apa. Jao mēmoj to mē kutã anojarêt rãhã nē. Anē.

³⁶ Hāmri nē amnhĩ wÿr mēhprĩre hō mã hpa ho apē nhũm hwÿr tē nhũm kumÿ nē o nhÿ nē hã mē kām kapēr nē mē kām:

³⁷ —E mē inhma. Kēr ka mē apē pahi pyrãk o tanhmã amnhĩ jarēnh to ho ri apa hkêt nē. ãm te amarĩ ri mē apa pyrãk o amnhĩ nhĩpêx o ri apa. Jao nhÿri mēhprĩre hō pumu nē kamã axukapri nē kām mēmoj tanhmã ho rÿ kām mēmoj gō. Hāmri nē ã amnhĩ nhĩpêx anhÿr o te pa ate tanhmã ixto mex to pyrãk o amnhĩ nhĩpêx. Nē kot ka mē atō pa tanhmã ixto mex to nē te ate Tirtũm o mex pyrãk o amnhĩ nhĩpêx. E kēr ka mē amã amnhĩ to rũnh prãm nē ã amnhĩ nhĩpêx anhÿr o ri apa. Anē.

³⁸ Hāmri nhũm Juãw nhÿhÿnh tēn mē hwÿr axà nē Jejus mã:

—Kwa Pahihti. O mÿj mēhō kēp mē pahkwÿ hkêt tã anhÿ hã mē nē mēkarõmnuti janor o pa. Pa mē tee ri ja hã omu nē kēp mē pahkwÿ hkêt jakamã pa mē ã kot amnhĩ nhĩpêx anhÿrja nē kām ixkapēr. Anē.

³⁹⁻⁴⁰ Hāmri nhũm kuma nē kām:

—Kwa nà nē tanhmã kām nē hkêt nē. Koja mēhō inhÿ hã aa mē kot mēmoj pumunh kêt kwÿ ho anē hāmri nē kēp mē panhiõ nē ri mē pahkwÿm tanhmã mē ahkre hto ho pa hkêt nē. Ra mē pahkôt kot amnhĩ nhĩpêx mã kēnã. Jakamã kwa mē ja nē tanhmã kām nē hkêt nē. Kwār mãmri ã amnhĩ nhĩpêx anē. Ja mex kēnã.

⁴¹ —Koja mēhō nhÿri mē atō amã kôr ã apumu nē hamaxpēr o: “Kwa Jejus kôt ri pa xwÿnh mÿj kām kôr. E pa kām gō hkwy kē ho ixkō.” Anhÿr o hamaxpēr nē apē ixkwÿ hã amã gō hkwy ka ho ixkō. Nhũm ãm kot amã gō pix nhõr nhũm ate ho akõm tã nhũm Tirtũm atã omu nē ho mex rax nē. Anē.

Mē pahte amnhĩ tomnuj pymaj tanhmã amnhĩ nhĩpêx to hã mē pajarēnh

Matêwre 18.6-9; Rukre 17.1-2

⁴² Nhũm Jejus arĩ hkôt mē pa ho mē pa xwÿnhjê mã kapēr nē mē kām:

—Nē mē kot ixkôt amnhĩ xunhwÿr tohtuj anhÿr xwÿnhjaja. Koja mēhō ma mē hwÿr tē nē inhnē mē kām

kapēr. Mē kot mē mar nē tanhmā amnhī tomnuj to hprām xà hêx rom mē kām kapēr nhūm mē mar xà hkôt tanhmā amnhī tomnuj to. Hā koja Tirtūm ja hā omu nē kot inhnê tanhmā kām nē xwýnh̄ta pumu nē homnuj tỳx nē. Te mē kot mēhō pynēnh nē mut ā kēn pytī hō nhôr nē ma o htēm nē gō xupým rax kām mēnh pyrāk o hipêx. Te ho ja pyrāk no âm homnuj tỳx o hakre.

43-47 —E kwa mē o kora. Kot kaj mē anhīhkra rỳ apar o tanhmā amnhī tomnuj to. Hā kêt ka mē axte ā amnhī nhīpêx anhỳr pymaj te ate amnhī pē anhīhkra rỳ apar krāhyr nē mēnh pyrāk o amnhī nhīpêx nē axte ā amnhī tomnuj anhỳr kêt nē. Rỳ ka mē ano ho mēmoj punuj pumu. Hāmri nē kām ajamaxpēr pix o apa pymaj te ate amnhī pē ano katōk nē mēnh pyrāk o amnhī nhīpêx nē nhām arīt kurê kumrêx. Kêt ka mē ā amnhī nhīpêx o apa rāhā nē. Hāmri nē nhỹrmā ty nē ma Tirtūm mē wa inhō krī hwỳr api. No kot ka mē arī akutā ano nē arī akutā apar nē arī akutā anhīhkra rāhā ri mrar tã tōhā tanhmā ho amnhī tomnuj to. Hāmri nē nhỹrmā ty nē ma mē kot amnhī xà htỳx kamā hamak tũm xà pē kuwy maatita wỳr ma apa.

48 Kuwyja kamā na htem mē kot amnhī tomnuj mỳrapê amnhī xà htỳx kamā hamak rāhā ho pa ho pa hāmri nē aa hapōx kêt nē.

49 ā koja mē kot amnhī tomnuj o mē pa xwýnh̄ piitā amnhī nhīpêx anhỳr rāhā nē pa ho pa.

50 Jakamā kwa kêt ka mē axpēn to mex rāhā ho ri apa. Nom axpēn kām agryk nē tanhmā axpēn nhīpêx to ho ri apa hkêt nē. Anē.

Nhūm pre ā Jejus hkôt ri mē pa ho mē pa xwýnh̄jê jahkre anē.

10

Mē pahte axpēn kaga nē Jejus kot mē pahkurê

Matêwre 5.31-32, 19.1-12; Rukre 16.18; mǎānēn Wam Korīt 7.10-16

1 Tã nhūm Jejus mē hkôt mē pa ho pa xwýnh̄ mērohā ma pyka pē Jutej wỳr mō. Hāmri nē pyhti pē Jotāw ā rē nē hpānhā ma xarmā mō. Nhūm mē axte mē hā akuprō nhūm kē Jejus axte mē ahkre ho xa.

2 Hāmri nhūm Parijew nhō xwýnh̄ kwỳjaja hwỳr mra. Mē kot hêx rom kamā hamak nē mar nē tanhmā ho kapēr punuj to kaxyw hwỳr mra nē kām:

—Pa. Ot pa mē mēmoj tã akukjêr kaxyw awỳr mra. Kwa tanhmā na pre amnepēm finat Mojesja mē pahte mē pahprō kaga hā mē panhīgêtjê mǎ karō hto? Xà koja mē pahprō mē pakapēr hkwym tanhmā amnhī nhīpêx to pu mē mỳrapê hkaga nhūm Tirtūm ja hā mē pahpumu nhūm ja kām mex nē nà? Anē.

3 Hāmri nhūm mē kām:

—Tanhmã na pre Mojes Tirtũm nhỹ hã ja hã mẽ amã karõ hto? Anẽ.

⁴Nhũm mẽ kãm:

—Nà na pre harẽnh o:

Ker ka mẽ aprõ kaga kaxyw hãmri nẽ ate hkaga hã amnhĩ jarẽnh ã kagà nẽ kãm agõ nẽ rĩ kormã hkaga. Anẽ.

Na pre ã mẽ inhmã ja hã karõ anẽ. Anẽ.

⁵Hãmri nhũm mẽ kãm:

—Tỹ nom mẽ kãm Tirtũm kapẽr kõt amnhĩ nhĩpêx prãm kêt jakamã na pre ã mẽ kãm ja jarẽnh anẽ.

⁶Amnepêm mẽmoj piitã hkrax kãm na prem axpẽn kaga hkêt nẽ. Na pre Tirtũm wam myja nhĩpêx nẽ hpãnhã kãm hprõ nhĩpêx. Axpẽn kaxyw wa hipêx.

⁷Jakamã na hte mẽmyjaja hprõ kaxyw nẽ gryk ã katorxà nẽ hipêxà wa hkaga nẽ ãm hprõ kõt pix mã pa ho pa.

⁸Te wa tipxi nẽ ri wa pa pyræk o axpẽn nhĩpêx o pa.

⁹Tirtũm tãm kot axpẽn mã wa õr kênã kot kêt mẽhõ wa kot axpẽn kaga kaxyw tanhmã wa hipêx to rỹ tanhmã wa kãm kapẽr to. Anẽ.

Nhũm pre ã Jejus mẽ kãm kapẽr anẽ.

¹⁰Hãmri nẽ hkõt mẽ pa ho mẽ pa xwỹnhjẽ mẽ akupỹm ixkrem agjẽ nhũm mẽ kãm:

—Kwa aprĩ hã mẽ inhmã mẽ kot axpẽn kaga hã mẽ harẽnhata jarẽ pa mẽ ixprĩ hã kuma nà. Anẽ.

Hãmri nhũm mẽ kãm:

¹¹—Nà kot kaj mẽ aprõ kaga nẽ hpãnhã nhãm mẽhõ

ho aprõ nhũm Tirtũm noo mã te ate wam aprõ kamã nhãm aprõ nyw o amnhĩkati pyræk. Tirtũm pê ja omnuj tỹx nẽ. Rỹ koja mẽhõ hprõ kaga ka hpãnhã ho aprõ nhũm Tirtũm noo mã te ate wam mjẽn pê ho amnhĩkati pyræk. Ja mããnẽn Tirtũm pê omnuj tỹx nẽ.

¹²—Nẽ mẽnijaja. Koja mẽhõ ni ra mjẽn kaga nẽ hpãnhã nhãm mẽhõ ho mjẽn. Ja mex kêt. Mjẽn krax kęp mjẽn kumrêx kênã kot kêt hkaga nẽ hpãnhã nhãm hõ ho mjẽn. Koja anẽ nhũm Tirtũm noo mã te kot wam mjẽn kamã nhãm hõ ho amnhĩkati pyræk nhũm Tirtũm pê ja omnuj tỹx nẽ. Anẽ.

Jejus kot amnhĩ nẽ mẽhprjẽ janor kêt ã harẽnh

Matêwre 19.13-15; Rukre 18.15-17

¹³Tã nhũm Ijaew kwỹjaja Jejus wỹr mẽ hkrarejẽ jamỹ nẽ mẽ o mra. Kot mẽ hã ãhkra jaxwỹr nẽ mẽ ho Tirtũm wỹr kaxyw hwỹr mẽ o mra. Hãmri nhũm hkõt mẽ pa ho pa xwỹnhjaja tee ri ja hã mẽ omu nẽ mẽ kãm:

—Kwa mo kaxyw na ka mẽ Jejus wỹr mẽ o mra? Kormã mẽ raxre kênã. Mẽ ma akupỹm mẽ o mra nà? Anẽ.

¹⁴Hãmri nhũm Jejus ja hã mẽ kuma nẽ mẽ kãm:

—Kwa nà kwãr mẽ mãmrĩ ixwỹr mẽ o mra. Mẽ ri inhnẽ mẽhprjẽ kurẽ hkêt nẽ. Anẽ.

Hãmri nẽ mẽ kãm hpa ho apẽ nhũm mẽ hwỹr mẽ o mra nhũm mẽ kuri kuhê. Hãmri nhũm mẽ hã hkõt mẽ pa ho mẽ pa xwỹnhjẽ mã kãm:

—E mẽ jarejê pumu. Na htem hamakêtkati nê hkĩnh nê ri pare. Mẽ kãm amnhĩ to rũnh prãm kêt nê ri pare. Tã Tĩrtũm kôt mẽ kot amnhĩ nhĩpêx o ri mẽ pa xwýnhjaja na htem mẽ uràk nê kãm amnhĩ to rũnh prãm kêt nê ri pa.

15 —Na hte jarejaja hipêêxà nê katorxà wa kapêr ma nê wa hkôt ri amnhĩ nhĩpêx o ri pare. Tã ixpê Tĩrtũm kot mẽ awýr inhmênh xwýnh na pa. Kot ka mẽ amã ixkôt amnhĩ xunhwýr prãm hã kot kaj mẽ jarejê kot amnhĩ nhĩpêx pyràk o amnhĩ nhĩpêx. Jao ixkapêr ma nê ixkôt ri amnhĩ nhĩpêx mex o ri apa. Anê.

16 Hãmri nê mẽhprĩrejê jamý nê mẽ hã ìhkra jaxwý nê mẽ ho Tĩrtũm wý nê kãm:

—Pa Papaj. E kêr ka jarejê ho mex rãhã nê kê mẽ mex nê pa. Anê.

Hikàxpore rax xwýnh jarênh Matêwre 19.16-22; Rukre 18.18-23; mãânên Wam Ximotre 6.6-10; Xiakre 5.1-6

17 Tã nhũm Jejus mẽ hkôt mẽ pa ho pa xwýnhjaja nhýri pry hã mō nhũm Ijaew krãhtũmja omu nê hwýr tē nê mẽmoj tã hkukja nê kãm:

—Pa mẽ ijahkre xwýnh maati? E kwa inhmã mẽmoj jarê. Nhýrmã Tĩrtũm ri ixtĩr tũm nê ixpa hprãm xaj mẽmo kot pa we ho anhýr o ri ixpa? Ate amnhĩ to mex pix o ri apa xwýnh jakamã kwa inhmã tanhmã ja jarênh to. Anê.

18 Hãmri nhũm kãm:

—Xà ate ixpê Tĩrtũm kwý hã ixpumunh kôt na ka ixte

uràk nê amnhĩ to mex xwýnh ã ijarê? Tĩrtũm pix na kot amnhĩ to mex rãhã xwýnh jakamã kot kaj ã ijarênh anê nê ixpê Tĩrtũm Kra hã ijarê. Jao uràk nê ixte amnhĩ to mex xwýnh ã ijarê. Nà xàn ka ãm atýx ri amnhĩ krã hkôt ã ijarênh anê?

19 —Tĩrtũm mex o mex jakamã kot kaj amã nhýrmã kuri atĩr tũm nê apa hprãm hãmri nê ra kot mẽmoj tã mẽ amã karō xà hkôt amnhĩ nhĩpêx o ri apa. Ra ate mar mex kênã. Na pre mẽ amã:

Kêr ka mẽ axàhkĩnh o ri apa hkêt nê.

Nê mẽ hpar kêt nê.

Nê tanhmã axêx kêt nê.

Nê axêx rom tanhmã mẽ nokupyr to hkêt nê.

Nê mẽ kêp mẽ hprō ho amnhĩkati hkêt nê.

Nê anhĩpêêxà mẽ akatorxà wa hã apijaam nê wa ho mex pê wa kutã anojarêt rãhã ho ri apa.

E kot kaj amã nhýrmã Tĩrtũm kuri atĩr tũm nê apa hprãm hã kot kaj ã amnhĩ nhĩpêx anhýr o ri apa. Anê.

20 Hãmri nhũm kuma nê kãm:

—Kwa ixprĩre ri ra ã ixte amnhĩ nhĩpêx anhýr o ri ixpa kênã. Nom te ixtĩr tũm nê ixpa kaxyw ixte kormã tãm kêt pyràk. Anê.

21 Hãmri nhũm kuma nê hprĩ hã omu nê kãm hapê nê. Hãmri nê kãm:

—Nà kormã mẽmoj pyxire nê arĩk. Na ka amã akukrêx rax kĩnh týx o Tĩrtũm jakre. Jakamã kêr ka ma akupým anhōrkwý hwýr tē nê akukrêx rax o wênê hpa. Nê kàxpore

jamÿ hāmri nē ma mē kēp am-rakati xwÿnhjē mā ōr o ri apa. Hāmri nē akupÿn tē nē arī ri ixkōt apa ho apa. Anē.

²² Hāmri nhūm kuma nē tee ri hikukrēx rax kukamā hamaxpēr. Kām hapē jakamā kām kām ĩhkra karo hprām kēt nē. Hāmri nē tee ri Je-jus kot ā kām hā karō anhÿrja ma nhūm ja kām mex kēt nhūm awjanā nē hkaprī nē ma akupÿm tē.

²³ Hāmri nhūm Jejus tee ri omu nē hkōt mē pa ho mē pa xwÿnhjē mā kām:

—Hēxta waa nē. Koja mē hikukrēx rūnh xwÿnhjaja ohtō nē kām mē hikukrēx japē xàj Tirtūm mē wa ixri htīr tūm nē pa ho pa hkēt nē. Wa ixte amnhī nhīpēxja mē kēp hihtÿx. Anē.

²⁴ Hāmri nhūm mē tee ri kapērja ma nhūm Jejus mē hamaxpēr kōt mē omunh mex jakamā axte tanhmā mē kām harēnh to nē mē kām:

—Nà Tirtūm mē wa ixte amnhī nhīpēxja na mē hikàxpore rūnh xwÿnhjaja pē ja hihtÿx.

²⁵ Mē kām hikukrēx rax mā ĩhkra karo hprām kēt rāhā tee kām Tirtūm kōt amnhī nhīpēx prām kaprÿ. Te ho mēhō kot menh kagō hā hkre nē kām kagō katōk prām kēt rāhā kām guhkrax kām àr prām kaprÿta pyrāk. Anē.

²⁶ Hāmri nhūm mē kuma nē tee ri amnhī kukamā hamaxpēr nē kām:

—Kwa no mē ixpiitā mē inhmā mē ixkukrēx japē kēnā. Jakamā xà kot paj mē ixpiitā nhÿrmā war ari ixtīr

tūm nē ixpa ho ixpa hkēt nē? Anē.

²⁷ Hāmri nhūm mē kām:

—Nà kot kaj mē amnhī krā hkōt mē amā mē akukrēx japē mā anhūrer kēt nē. Ām Tirtūm pix na hte ja kaxyw tanhmā mē akrā hto ka mē amā akukrēx japē hkēt nē. Jao ra mē apē Tirtūm mē wa ixri atīr tūm nē mē apa ho mē apa mā xwÿnh. Anē.

²⁸ Hāmri nhūm Simāw Pētre kām:

—Kwa Pahihtī na pa prem agryk ā mēmoj piitā hkaga hpa nē akōt ixpa ho ixpa. Jakamā xà kot paj mē nhÿrmā war ari ixtīr tūm nē ixpa ho ixpa kēt nē nà? Anē.

²⁹ Hāmri nhūm kuma nē hkōt mē pa ho pa xwÿnh piitā mē kām:

—Nà ka mē atō inhmā tanhmā amnhī to ho apa kaxyw akwÿjē re nē ma inhmā tanhmā amnhī nhīpēx to ho ri apa. Anhōrkwȳ re rÿ atō rÿ atōx rÿ aprō nē akrajē re. Rÿ akatorxà nē anhīpēxà wa are. Rÿ akukrēx piitā rer pa hāmri nē ma ixkapēr o mē piitā mē ahkre ho ri mē hkōt apa.

³⁰ Hā kot paj amnhī tā mē apumu nē mē ato mex rax nē. Hāmri ka mē ma mē kām ixkapēr jarēnh o mē hkōt apa nhūm mē kot mē amar xwÿnh kwÿjaja mē ama nē kām mē akīnh nē. Nē ra mē ate akwÿjē rer par tā mē tāmjaja te mē apē mē hkra rÿ mē htō rÿ mē htōx pyrāk o mē anhīpēx. Jao tanhmā mē ato mex to ho pa.

—Nē koja mē kām ixprām kēt xwÿnhjaja ixtā tanhmā mē

atomnuj to hã ka mẽ nhỹrmã ma Tirtũm mẽ wa inhõ krĩ hwỳr api nẽ wa ixkuri amex nẽ atĩr tũm nẽ apa ho apa.

³¹ Nom kêt ka mẽ ja hã amnhĩ pumunh kôt amnhĩ to rax xwỳnh ã amnhĩ to jarkrar kêt nẽ. Mẽ kot amnhĩ to rũnh xwỳnh ã amnhĩ jarẽnh xwỳnhjaja koja mẽ nhỹrmã amnhĩ to rũnh kêt ã amnhĩ pumu. Nẽ mẽ kot amnhĩ to hkryre xwỳnhjaja koja mẽ nhỹrmã amnhĩ to rũnh ã amnhĩ pumu. Anẽ.

Jejus kot amnhĩ kukamã axte amnhĩ jarẽnh

Matêwre 20.17-19; Rukre 18.31-34

³² Tã nhũm Jejus hkôt ri mẽ pa ho mẽ pa xwỳnhjê mã kapêr pa hãmri nẽ ma Jerujarẽ hwỳr mẽ o mỗ. Ra kamã kãm hkurê xwỳnhjaja kot hpĩr ã amnhĩ jarẽnh tã ma hwỳr mẽ o mỗ. Jakamã nhũm mẽ tee ri hkukamã hamaxpêr o hkôt mỗ. Nhũm mẽ amarĩ mẽ hkôt mrar xwỳnhjaja haxwỳja kãm ma nẽ. Hãmri nhũm Jejus mẽ kêp 12ta o mỗ nẽ hkwỳjê hkàx ã amnhĩ kukamã tanhmã mẽ kãm amnhĩ jarẽnh to ho mỗ nẽ mẽ kãm:

³³ —E na pu mẽ ra Jerujarẽ hwỳr mỗ. Kot puj mẽ hwỳr pôj nhũm mẽ kãm ixkurê xwỳnhjaja patre krãhtũmjê mẽ Tirtũm kapêr tũm o mẽ ahkre xwỳnhjê nhĩhkram ijaxà. Hãmri nhũm mẽ kãm Tirtũm kapêr kôt amnhĩ nhĩpêx prãm kêt xwỳnhjaja ixpĩr kaxyw mẽ kãm ixtã amỳnê

³⁴ nhũm mẽ mar xà hkôt tanhmã inhĩpêx kati hto. Nẽ mẽ hkwỳjaja ixtã hpêr o axkê nẽ ixtã akunha. Nẽ mẽ hkwỳjaja tanhmã ijapry hto nẽ ixtã argôx rẽ nẽ ixtak hãmri nẽ ixpĩ. Koja mẽ ã inhĩpêx anẽ. Nom kot paj ixtyk ã ixtã apkati axkrunêpxi nhũm Tirtũm akupỳm ixtô ixtĩr. Anẽ.

Xiakre mẽ Juãw wa kot amnhĩ to Jejus wỳr ã wa harẽnh

Matêwre 20.20-28; Rukre 22.24-30; mããnên Piripos 2.3-8; Wam Pêtre 5.3

³⁵ Tã nhũm Jepetew kra Xiakre mẽ Juãw wa tanhmã hamaxpêr to nẽ Jejus mã kãm: —Kwa mẽ ijahkre xwỳnh. Pa wa amã mẽmoj jarẽ ka wa inhmã “ỳ” anẽ nà? Anẽ.

Hãmri nhũm wa kãm:

³⁶ —Ko wa mamrĩ inhmã mẽmoj jarẽ pa wa ama mãn. Anẽ.

³⁷ Hãmri nhũm wa kãm:

—Nà kot kaj nhỹrmã ate mẽ piitã mẽ ho amnhĩptar kaxyw nhỹ pa wa akutã anhĩjê. Nẽ wa papxipix ixpê anhõ kôwenatô nẽ akutã anhĩjê nẽ ato nhỹ. Ja na pa wa inhmã hprãm. Anẽ.

³⁸ Hãmri nhũm wa kãm:

—Nà na ka wa ãm atỳx ri ã amnhĩ to ixwỳr anẽ. Koja mẽ tokyx ixpĩ pa amnhĩ xà htỳx kamã ijamak rax nẽ ty. Tã xà koja mẽ ixpyrà nẽ ã war anhĩpêx anẽ ka wa ixpyrà nẽ amnhĩ xà htỳx kamã ajamak rax kãm ty nà? Anẽ.

³⁹ Hãmri nhũm wa kãm:

—Tỳ. Nà kot pa wa ijaxwỳja anẽ nẽ apyà nẽ amnhĩ xà

htỳx kamã ijamak kãm ty.
Anê.

Hãmri nhũm wa kãm:

—Nà ãm hãmri na ka wa ja
hã amnhĩ jarê. War ate ix-
pyrà nê ixkôt amnhĩ xà htỳx
kãm ajamak kãm atyk mã
kênã.

⁴⁰Tã nom war ate amnhĩ to
ixwỳrta ã kot paj tanhmã war
amã nê hkêt nê. Inhõ Papaj
tãm koja ja kaxyw mễhõ japêr
nhũm inhĩhkô hã nhỹ. No pa
kot paj ri ja kaxyw mẽ atõ
rênh kêt nê. Anê.

⁴¹Hãmri nhũm wa uràk
nê Jesus kôt mẽ pa ho mẽ
pa xwỳnh kwỳjaja ã wa kot
amnhĩ to hwỳr anhỹr ã wa
kuma nê wa kamã gryk nê.

⁴²Jakamã nhũm Jesus mẽ
piitã mẽ ho akuprõ nê mẽ
kãm:

—E mẽ inhma. Na hte Ijaew
kêt xwỳnhjê nhõ pahihtijaja ã
amnhĩ nhĩpêx anhỹr o ri pa
nê amarĩ hkrĩ xà kamã hkrĩ
ho hkrĩ. àhpumunh jakamã
amarĩ ixkre kre jakry kamã
hkrĩ ho hkrĩ nê kãm mẽ àpênh
xwỳnhjê pix mã mẽmo mẽ
àpênh ã karõ ho hkrĩ. Na
htem ã amnhĩ nhĩpêx anê. Nê
mễ kot amnhĩm mex ã harênh
prãm xàj tanhmã mẽ ho mex
to ho pa.

⁴³⁻⁴⁵Tã no mẽ kajaja kêr
ka mẽ atõ amã amnhĩ to
rax prãm hãmri nê ho mẽ
kot amnhĩ nhĩpêx pyràk kêt
nê. Mễ piitã mẽ kutã ano-
jarêr rãhã ho ri apa. Kêt
paa. Mễ ate inhmã axàpênh
o apa kaxyw na pa pre mẽ
awỳr ixwỳr kêt nê. ãm pa
ixte tanhmã mẽ amã amnhĩ
nhĩpêx to ho ixpa kaxyw na

pa pre mẽ awỳr wrỳ. Mễ ate
nhỹrmã kuwy wỳr apa pymaj
mễ anê ixtyk kaxyw na pa
pre mẽ awỳr wrỳ. Jakamã
kot kaj mẽ atõ amã amnhĩ to
rax prãm hã kêr ka ixpyrà nê
akwỳjê kutã anojarêr rãhã ho
ri apa. Hãmri nê inhmã te ate
amnhĩ to rax o amnhĩ nhĩpêx
pyràk o amnhĩ nhĩpêx. Anê.

*Jejus kot akupỳm Paximew
o mex ã harênh*

*Matêwre 20.29-34; Rukre
18.35*

⁴⁶Tã nhũm Jesus mẽ hkôt
mễ pa ho mẽ pa xwỳnhjaja
kormã Jerujarê hwỳr mõi ri
ra krĩ pê Jeriko hkôt mõi.
Hãmri nhũm mẽ ohtõ nê mẽ
hã ajêt nê mẽ hkôt mõi. Nhũm
mễhõ myja pry nhĩhkrep nhỹ.
Ximew kra Paximew nohkre
xwỳnhja pry kamã ahwỳr o
hkrĩ.

⁴⁷Hãmri nhũm Jesus mẽ
hkwỳjaja hwỳr htêp o mõi
nhũm amnhĩ wỳr mẽ kuma
nê mẽ kot Jesus nhĩxi jarênh o
mõi ã kuma hãmri nê kàx pê
kãm kapêr nê amnhĩ to kuwy
nê kãm:

—Pa Jesus? Nà apê mẽ
inhõ Pahihti mex kumrêx
na ka. Te apê amnepêr
anhĩgêt pahihti Tawi kot
amnhĩ nhĩpêx pyràk. Jakamã
kwa we ixkamã axukapĩ
nê akupỳm ixto mex kêt
wehe. Ixte amnhĩ kaxyw akôt
ijamaxpêr xwỳnh na pa. Anê.

⁴⁸Hãmri nhũm Jesus
kukamã mẽ mrar xwỳnhjaja
kuma nê kãm:

—Tk. Kwa akapêr kêt nê
nhỹ nà. Anê.

Tã nom nhũm ãm mẽ kuma
nê xatã amnhĩ to kuwy. Kỳx

pê amnhĩ to kuwỳ nē axte kām:

—Kwa ixkamã axukapři nē akupỹm ixto mex Pahihti. Anē.

⁴⁹ Hāmri nhũm Jejus kuma nē xa nē hkôt mē pa ho mē pa xwỳnhjê mã kām:

—E mē atō hwỳr tē nē hpa hã apy nē amnē ixwỳr o tē. Anē.

Hāmri nhũm mē kuma nē nohkre xwỳnhhta mã kapēr nē kām:

—E tee ri amnhĩ kukamã ajamaxpēr kêt nē. Na atã karõ. E tokyx kãnhmã xa. Anē.

⁵⁰ Hāmri nhũm mē kuma nē hkĩnh tỳx nē. Nē kãnhmã harĩ nē amnhĩ nē õ kajaati mē nē hwỳr htēm kurê kumrêx.

⁵¹ Hāmri nhũm Jejus kām:

—Pa mo na? Tanhmã kot pa ato? Anē.

Hāmri nhũm kām:

—Nà akupỹm inhmã ixrĩt mex prãm Pahihti.

⁵² Anē nhũm kām:

—Tõe. Nà ra ate amnhĩ kaxyw inhmã ajamaxpēr tỳx jakamã kot kaj akupỹm arĩt mex kurê kumrêx. E mãmrĩ ma akupỹm tē. Anē.

Nhũm akupỹm rĩt mex ã amnhĩ pumu nē hkĩnh o hkĩnh. Hāmri nē Jejus ã ajêt nē ma hkôt hkĩnh nē tē.

11

Jejus kot Jerujarê hwỳr àr ã harênh

Matêwre 21.1-11; Rukre 10.28-40; Juãw 12.12-19

¹ Tã nhũm Jejus mē hkôt mē pa ho mē pa xwỳnhjê mē kormã Jerujarê hwỳr mō. Hāmri nē krĩ pê Petake mē hõ pê

Petãn wỳr ahtêp o mō. Hixêt pê Oriwêhti kahti ri na pre krĩja wa xa. Jakamã nhũm Jejus hkôt mē pa ho mē pa xwỳnh wa ho axkrut nē mē amnhĩ kukamã wa kumê

² nē wa kām:

—E wa ma krĩ mũj wỳr mē ixkukamã wa tē. Hāmri nē hwỳr pøj nē nhỹri jumênre nyw mã ê nē ãm xwỳnhhta pumu. Kormã mē kot hã hkrĩ hkêt kumrêx xwỳnhhta.

³ Ka wa omu nē kām ê xà hpôt nē man akupỹn ixwỳr o tē. Koja mēhõ war apumu nē hã tanhmã war amã kapēr to ka wa ã kãm ijarênh anē nē kām: “Nà mē panhõ Pahihti na hã karõ pa wa hwỳr tē.” Anhỹr o kãm ijarê. E wa ma hwỳr tē. Anē.

⁴ Hāmri nhũm wa kuma nē ma hwỳr htēm kurê kumrêx nē hwỳr pøj. Nhũm Jejus kot wa kãm hã karõ xà hkôt jumênre nywreta pumu.

⁵ Hāmri nē kãm ê xà hpôt o xa nhũm kuri mē kuhê xwỳnhjaja tee ri hã wa omu nē wa kām:

—Kwa mo kaxyw na ka wa kãm ê xà hpôt o xa? Kwa kot ka wa mē ixpê ho ahkĩ nà? Anē.

⁶ Hāmri nhũm wa mē kām:

—Nà mē panhõ Pahihti na wa inhmã hã karõ pa wa hwỳr tē. Wa ixte ma hwỳr o ixtēm kaxyw. Anē.

Hāmri nhũm mē wa kām:

—Tỳ? Tõe wa mãmrĩ ma kãm o tē. Anē.

⁷ Hāmri nhũm wa ma akupỹm Jejus wỳr o tē. Hāmri nē kaxyw amnhĩ xê hkwyê hkwrỳ nē kãm ho hkô kahty

hpa nē kām ho htỳx nē o xa nhũm Jejus hã nhỹ nē mō.

⁸ Nē kormã Jerujarē hwỳr hixêt ã àpir o mō. Nhũm mē kot omunh o kuhê xwỳnhjaja hkĩnh nē ma hkukamã pry ho mex kaxyw amnhĩ xê hkwȳ hkwrỳ nē ho kām uty. Nhũm mē hkwȳjaja nhỹri pō hkwȳ jakà nē o mra nē hkukamã kām uty.

⁹⁻¹⁰ Nhũm mē hixêt ã api nē ahpār mã wrỳk o mō nhũm mē piitã kàx pē Tirtũm mex o mex ã harēnh o hkôt mō. Nhũm mē hkwȳjaja kukamã mra nhũm mē hkwȳjaja hapu hã mra nhũm prem piitã hkôt Tirtũm mex o mex ã harēnh o mō. Nē harēnh o:

E ota Tirtũm kot mē pahwỳr mēnh xwỳnhhta ra pōj. Nà ãm hãmri na mē pahwỳr wrỳ. Ja mex kumrēx.

Kêp mē panhõ Pahihti mex na. Kojã mē panhĩgêt pahi Tawi pyrà nē mē pahto amnhĩptà nē mē pahto mex o pa.

Ãm hãmri na Tirtũm mē pahwỳr kumē.

Tirtũm mex kumrēx. ãm mex o mex. Kukwak ri pix mã na pu htem pajamakêtkati nē paxàmnhĩx papa rãhã ho papa.

Anhỹr o Jejus kôt harēnh o mō. Kot mē ho amnhĩptàr kurē kumrēx ã hkamnhĩx nē hkĩnh nē ã hkôt kapēr anhỹr o mō.

¹¹ Jao ra Jerujarē hwỳr pōj nhũm Jejus Tirtũm mã amnhĩ jarēnh xà hã ixkre hwỳr tēn axà. Nom nhũm ra amỹkry

htỳx jakamã nhũm hwỳr axà nē ãm hkre pumunh o xa hãmri nē akupỹm kato nē hkôt mē pa ho mē pa xwỳnh pē 12jê mē nhũm mē ma akupỹm Petãn wỳr mra.

Jejus kot pĩ hpàr pē fikêhti mã kapēr ã harēnh

Matêwre 21.18-22

¹² Tã nhũm apkati nhũm Jejus mē hkôt mē pa ho pa xwỳnhjê mērohã Petãn rũm hapôj nē ma akupỹm Jerujarē hwỳr mra. Nhũm Jejus ra kām prãm nē mō.

¹³ Hãmri nē amỹm mēmo pĩ hpàr hoptĩ rax pē fikêhti pumu nē hamaxpēr o:

—E pa hwỳr tē nē ô hkwȳ rē nē kuwô mãn. Anē.

Hãmri nē hwỳr tē. Nhũm kormã ô kaxyw õ mytwrỳ kator kêt jakamã nhũm ô hkêt nē ãm hô pix nē xa.

¹⁴ Hãmri nhũm hwỳr tē nē tee ri ô japêr nē ãm hô pix pumu. Hãmri nē tee ri omu nē kãm:

—E kot kaj axte axô hkêt kumrēx.

Anhỹr o kãm kapēr nhũm hkôt mē pa ho mē pa xwỳnhjaja hã kuma.

Jejus kot Tirtũm nhõrkwȳ hwỳr àr ã harēnh

Matêwre 21.12-17; Rukre 19.45-46; Juãw 3.13-22

¹⁵⁻¹⁷ Tã nhũm Jejus mē hkôt mē pa ho mē pa xwỳnhjaja Jerujarē hwỳr agjê nē Tirtũm mã amnhĩ jarēnh xà hã ixkre hwỳr agjê. Nhũm Jejus tee ri kamã mē kuhê xwỳnhjê pumu. Nhũm mē ra ixkre kamã axtem nē môx nē ôwêhti nē tuuti ho

wênê ho kuhê. Ixkre hwÿr mrar xwÿnhjaja kot haprôr nê Tirtûm mã amnhî jarênh kaxyw kãm hpar nê ôr kaxyw mẽ kãm ho wênê. Nom axtem nê hã ohtô rax kãm mẽ kãm ho wênê nhũm mẽ hkwyjaja mẽ kãm mẽ hikàxpore ho anhîpa. Hãmri nhũm Jejus mẽ hwÿr axà nê tee ri mẽ kot ã amnhî nhîpêx anhÿr ã mẽ omu nê mẽ kãm akir nê mẽ kãm:

—Tk. Kwa Tirtûm kapêr ã kagà htũm kot ôrkwy jarênh kot:

Inhôrkwÿja ãm pika piitã hkôt mẽ piitã kot inhmã amnhî jarênh xà hã ixkre pix kaxyw na.

Anhÿr o kot harênh tã ka mẽ axtem nê kamã ã amnhî nhîpêx anhÿr o akuhê. E kwa mẽ ma mra nê ajapôx tokyx anê. Anê.

Nhũm pre ã mẽ kãm kapêr anhÿr pê mẽ ahkre hãmri nê ixkreja nê mẽ kator pa.

¹⁸ Hãmri nhũm patre krãhtũmjê mẽ Tirtûm kapêr tũm o mẽ ahkre xwÿnhjaja tee ri ã mẽ hipêx anhÿr ã omu nê kapêr ma nê kamã gryk tÿx nê. Hãmri nê mẽ kot hã àmnênh kaxyw tanhmã axpên mar to nê axpên mã:

—Tk. Kwa na mẽ ohtô nê kãm mar prãm nê. Kojã mẽ anê nê gryk ã mẽ pahkaga nê axte mẽ pakapêr mar kêt nê. Kwa pu mẽ kupi ri. E tanhmã kot puj mẽ ho nê kupi? Anê.

¹⁹ Tã nhũm myt axà nhũm Jejus mẽ hkôt mẽ pa ho pa xwÿnhjaja Jerujarê rùm hapôj nê ma nhÿri amnhim hikranh kaxyw mra.

Mẽ pahte tanhmã mẽmoj tã Tirtûm wÿr to hã mẽ pamã karô

Matêwre 6.14-15, 17.20; Makre 11.13; Juãw 14.13; mãânên Xiakre 1.6; Wam Juãw 3.22

²⁰ Tã nhũm apkati nhũm Jejus mẽ hkôt mẽ pa ho mẽ pa xwÿnhjaja Jerujarê hwÿr akupÿm mra. Hãmri nê axte pî hpàr pê fikêhtita pumu. Jejus ra kot kãm kapêr xwÿnhta pumu nhũm ra grà pa nê xa.

²¹ Hãmri nhũm Simãw Pêtre Jejus kot tanhmã pî mã kapêr toja mã hamaxpêr nê hã kãm:

—Kwa mẽ ijahkre xwÿnh. Ga mẽmoj mũj pumu. Jãã ate fikêhti mã akapêr xwÿnhta na grà par kumrêx nê xa. Anê.

²²⁻²³ Hãmri nhũm kuma nê mẽ piitã mẽ kãm:

—Tÿ nà ãm hãmri na pa mẽ amã ixkapêr. Kot kaj mẽ mẽmo kaxyw Tirtûm mã ajamaxpêr tÿx pê mẽmoj tã awÿ nhũm ama nê amã hprãm xà hkôt tanhmã amã hipêx to. Ka mẽ amnhî kaxyw Tirtûm mã ajamaxpêr tÿx pê hixêt mũj mã akapêr nê kãm: “E xa nê ma tẽ nê gô xujanãr kãm mrô.” Anhÿr o kãm akapêr nhũm amar xà hkôt ã amnhî nhîpêx anê nê tẽn kamã mrô.

²⁴ Kot kaj mẽ mẽmoj tã Tirtûm wÿ nê kaxyw ãm pix mã ajamaxpêr tÿx nê nhũm amã ho anê.

²⁵⁻²⁶ —Nê kot kaj mẽ Tirtûm mã amnhî jarênh kaxyw nê ra mẽhõ kot tanhmã ato mã ajamaxpêr. Hãmri nê ja ho ajamakêtkati kurê kumrêx nê axte kãm ajamaxpêr kêt nê.

Ăm mẽmoj nyw pix mã aja-maxpěr o tãm amnhĩ nhĩpêx o apa. Hãmri nhũm Tĩrtũm kaxkwa rũm ja hã apumu nẽ apyrà nẽ ate tanhmã amnhĩ tomnuj to ho hamakêtkati nẽ axte kãm hamaxpěr kêt nẽ. Anẽ.

Mêhõ kapěr kôt Jejus kot mẽ ahkre hã mẽ kot hkukjêr

Matêwre 21.23-27; Rukre 20.1-8

²⁷ Nhũm mẽ akupỹm Jeru-jarẽ hwỳr agjê nhũm Jejus kê axte Tĩrtũm mã amnhĩ jarẽnh xà hã ixkre hwỳr axà. Nhũm hkôt mẽ pa ho mẽ pa xwỳnhjaja hkôt hwỳr mra nẽ hkôt agjê nẽ kormã kamã kuhê. Hãmri nhũm Ijaew krãhtũmjê mẽ mẽ kot Tĩrtũm kapěr tũm o mẽ ahkre xwỳnh mẽ mẽ õ patre krãhtũmjaja Jejus pumu nẽ hwỳr mra nẽ hêx rom tanhmã kãm kapěr to. Na pre ra Jejus ixkreja nẽ mẽmoj to wẽnê xwỳnh mẽ kàxpore o mẽ hpinhpanh xwỳnhjê jano nhũm mẽ tee ri ja hã omu nẽ kamã gryk tỳx nẽ. Jakamã nhũm akupỹn mẽ hwỳr axà nhũm mẽ axte omu nẽ hwỳr mrar kurê kumrêx

²⁸ nẽ kãm:

—Kwa mẽ inhmã amnhĩ jarẽ. Mêhõ nhỹ hã na ka hte ã amnhĩ nhĩpêx anhỹr o ri apa? Mêhõ na pre mẽ ixwỳr amẽ ka pre mõi? Nà xà amnhĩ krã hkôt na ka hte ã amnhĩ nhĩpêx anhỹr o ri apahti? E kwa mẽ inhmã amnhĩ jarẽ. Anẽ.

²⁹ Nhũm Jejus kot tanhmã mẽ hamaxpěr to hkôt mẽ omunh mex jakamã mẽ kãm:

—Nà kot pa ixkumrêx mẽmoj tã mẽ akukja. Ka mẽ inhmã harẽ pa rĩ kormã mẽ amã tanhmã amnhĩ jarẽnh to.

³⁰ Finat Juãw Paxisja ã kot paj mẽ akukja. Mêhõ nhỹ hã na pre hte mẽ hkrã kumrãr o pa? Xà amnhĩ krã hkôt nà xà Tĩrtũm nhỹ hã? E mẽ atõ inhmã harẽ. Anẽ.

³¹⁻³² Hãmri nhũm mẽ kuma nẽ tee ri kot tanhmã kutã kãm harẽnh to hkukamã hamaxpěr nẽ axpẽn mã:

—Kwa tanhmã kot puj mẽ kãm ja jarẽnh to? Mẽ kot mar o kuhê xwỳnhjaja na htem Juãw Paxis kêp Tĩrtũm nhỹ hã kapěr jarẽnh xwỳnh ã axpẽn mã harẽnh o pa. Jakamã kot puj mẽ kãm kot amnhĩ krã hkôt mẽ hkrã kumrãr o pa hã harẽ nhũm mẽ tee ri mẽ pama nẽ mẽ pakamã gryk nẽ. Nẽ mẽ paxêx rom ã kãm mẽ pakapěr anhỹr ã mẽ pah-pumu nẽ kẽn o mẽ pahtak o mẽ panhĩmex. No kot puj mẽ kãm Tĩrtũm nhỹ hã mẽ hkrã kumrãr ã harẽ nhũm mẽ pama nẽ mẽ pamã: “Kwa ã kot anhỹr kẽnã na ka prem kapěr mar tã ixkôt amnhĩ xunhwỳr kêt nẽ?” Anẽ. Nà kot puj pěr mẽ kãm tanhmã harẽnh to hkêt nẽ. Kot puj mẽ ãm kãm aa te mẽ pahte ja jarẽnh mar kêt pyrãk o harẽ. Anẽ.

Mẽ kot tanhmã kãm nẽ nhũm kot ta pãnhã tanhmã mẽ kãm nẽ pymaj nhũm mẽ tee ri tanhmã kãm nẽ hprãm kaprý ho kuhê.

³³ Hãmri nẽ Jejus mã kãm:

—Konēn. Mē ixte mēhō nhỹ hã kapēr o pa hã omunhre hã. Anē.

Hāmri nhũm mē kuma nē mē kām:

—Tk. Tôe kot pa xep ijaxwýja mē amã tanhmã amnhĩ jarēnh to hkêt nē. Ijaxwýja ixte mēhō nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anē.

12

Mē àpēnh punuj xwýnhjê jarēnh

Matêwre 21.33-46; Rukre 20.9-18

¹ Nhũm Jejus arĩ Ijaew krãhtũm mē mēõ patre krãhtũm mē Tirtũm kapēr tũm o mē ahkre xwýnhjê mã kapēr o xa. Nē mē kãm mē kot tanhmã hipêx to hkukamã mē kãm tanhmã amnhĩ jarēnh to. No ãm hã kuxi nē mē kãm awjarē nē mē kãm:

—Koja mēhō hpur ã hkwýjê mã karõ. Mē kot kamã kãm àpēnh kaxyw mē kãm karõ. Hāmri nhũm mē ma hwýr mra nē kamã mēmo hy hkre nē hkre pa. Hāmri nē pu hã kahê hpa nē pur kaêx kãm ixkre hprêk nhĩpêx. Mē kot himõk ã mē kot kêp àhkĩnh py-maj mē hapêr o hkrĩ kaxyw. Hāmri nē hipêx pa nhũm mēõ patrãwja awry hã krĩ hõ hwýr nojarêt nē mē kãm tanhmã hpur jarēnh to nē mē kãm: “E or ixpurta nõ. Kê kamã mēmoj kã hpa ka mē mãmrĩ kamã awjamý nē ho axkjê. Hāmri nē ixkutêp inhõ jaxwý

nē mãmrĩ anhõ tanhmã ho hprãm xà hkõt tanhmã ho.”

—Anhỹr o mē kãm kapēr hāmri nē ma mō.

² Tã nhũm ra pur kãm mēmoj hkà pa. Nhũm hpur nhõ dõn arĩ krĩ hõ kamã hã ujahkre ho pa htã kuri kãm àpēnh xwýnhjê hõja nhũm akupým mē hwýr kumê. Mē kot kãm õ hkwý nhõr nhũm ma kot kãm o mõr kaxyw ma mē hwýr kumê nhũm ma akupým mē hwýr mō. Mõõ nē ra mē hwýr pøj.

³ Hāmri nhũm mē omu nē axtem nē homnuj nē. Nē unê nē htak nē akupým hano nhũm ý kamã ma akupým mō.

⁴ Hāmri nhũm õ patrãwja tee ri omu nē hpãnhãja mē nhũm ma mē hwýr mō. Mõõ nē mē hwýr pøj. Hāmri nhũm kê wem omu nē mã ho anē nē. Unê nē htak nē hkrãx pè htak nē akupým hano nhũm wamta pyrã nē ma akupým ý kamã mō.

⁵ Hāmri nhũm axpēn pãnhã kãm mē àpēnh xwýnh kwýjê rē nhũm mē axpēn pãnhã ma mē hwýr pa. Ma mē hwýr pa nē pøj nhũm mē te ho wamtajê mē hipêx pyrã nē mē hkwýjê pyné nē htak rax nē mē hano nē mē hkwýjê pa.

⁶ Nhũm mē õ patrãw mē harēnh ma nē tee ri amnhĩ kukamã hamaxpēr nē hamaxpēr o: “Hêxta waa nē. Tanhmã kot paj we amnhĩ nhĩpêx to nē inhõta kwý jamý? Nà kot paj mē hwýr ixkraja mē. Inhmã hapê htã kot paj mē hwýr kumê kê ma mē hwýr mō. Hāmri nhũm mē

kêp ixkra hã omu nê tanhmã
ixpê ho hkêt nê. Nê jatã
inhmã kãm inhõja kwÿ gã
nhũm man ixwÿr o tẽ. Nà kot
paj anê.”

—Anhÿr o hamaxpêr hãmri
nê ma mẽ hwÿr hkraja mẽ
nhũm ma mẽ hwÿr mō.

7 —Tã mẽ hwÿr hpōx o mō
nhũm mẽ amÿm amnhĩ wÿr
omu nê kêp hkra hã omunh
kurê kumrêx nê hã axpên mã
amÿnê nê axpên mã: “E. Nà
onêj hpur nhõ dõn krata tẽ.
Koja nhÿrmã õ papaj mÿrpê
amnhĩm pur ã pyka pytã nê
ho õ. Jakamã e pu mẽ kupĩ nê
kêp hpur ho arĩk nê ho panhõ.
E kwa tokyj pu mẽ kupĩ ri.”
Anê.

8 —Rôm nhũm ra mẽ hwÿr
hpōx o tẽ nê ra pōj nhũm
mẽ unê nê pur nê ho kato
nê ahkã kamã kupĩ. ã mẽ
ujarênh kot anhÿr. Anê.

9 Nhũm pre ã Jejus Ijaew
krãhtũmjê mã ujarênh anê.
Hãmri nê hã tanhmã mẽ
hkukjêr to nê mẽ kãm:

—E mẽ inhmã mẽmoj jarê.
Koja pur nhõ dõnja tee ri mẽ
kot hkra hpĩr ã harênh ma
hãmri nê tãm mẽ hwÿr mō
hãmri nê tanhmã mẽ hipêx to
wehe? Nà koja ma mẽ hwÿr
mō nê mẽ himex pa hãmri
nê hpãnhã nhãm hpurta ã
mẽmojê rê.

10 Mãn ka prem ra Tĩrtũm
kapêr ã kagã htũm kot ja
jarênh ma nã? Harênh kot:

Na prem kên o amnhĩm
õrkwÿ nhĩpêx kaxyw
hãmri nê kên maati
pumu nê htÿx omnuj
ã hkamnhĩx nê hkaga.

Mẽ kot hkaga htã
nom nhũm Tĩrtũm mẽ
kurom mex o kot kên
piitã hakrenh par ã
omunh kurê kumrêx.

11 ãm hãmri na pre ã mex ã
omunh anê. Anê.

ã Tĩrtũm kapêr ã kagã htũm
kot harênh kot anhÿr. Anê.

12 Nhũm pre ã Jejus mẽ
kãm ujarênh kãm mẽ harênh
anê nhũm mẽ amnhĩ tã
kuma. Tĩrtũm kapêr tũm
o mẽ ahkre xwÿnh mẽ mẽ
õ patre krãhtũm mẽ Ijaew
krãhtũmjaja nhũm mẽ kot mẽ
kãm kên maati kaga xwÿnhjê
jarênh o te mẽ tãm harênh
pyrãkja ma nhũm ja mẽ kêp
omnuj nê. Jakamã nhũm mẽ
kãm unênh nê haxàr prãm nê.
Nom amnhĩ tã kãm mẽ kot
mar o kuhê xwÿnhjê puma
nê.

13 Jakamã na prem ma mra
nê hapõj hãmri nê Jejus wÿr
Parijew nhõ xwÿnh mẽ pahi
Erox kôt mẽ pa xwÿnh kwÿjê
rê. Mẽ kot hêx rom mẽmoj
tã hkukjêr nhũm kot mẽ mar
nê tanhmã Rôm nhõ xwÿnhjê
nhõ pahi Sesti kapêr kuhpa
hã ri tanhmã mẽ kãm nê
nhũm mẽ kot mar kaxyw.

14 Jakamã nhũm mẽ ma
hwÿr mra nê hêx rom kãm
kapêr nê kãm:

—Kwa Jejus? Nã ãm hãmri
na ka hte Tĩrtũm kapêr o mẽ
ahkre mex nê. Na ka hte
mẽ kamã akahak o apa hkêt
nê. Nê mẽ kot tee ri mẽ
kot tanhmã ato kapêr punuj
to htã ka hte arĩ aprĩ hã mẽ
ahkre mex o ri apa. E kwa mẽ
inhmã mẽmoj jarê. Rôm nhõ
pahihti kot mẽ pahpê Ijaew

mê pahte kãm kàxpore hkwȳ nhõr ã mê pamã karõta. Kwa xà ja amã mex nà? Xà kot pu mê kãm kugõ? Xà kot pu mê kãm õr kêt nê? E kwa mê inhmã harê. Anê.

¹⁵ Nhũm prem ã hêx rom ja hã hkukjêr anhÿr tã no nhũm Jejus mê hamaxpêr ã mê omunh mex mê mê kãm:

—Tk. Kwa mon ka mê axêx rom ja hã ixkukja? E mê atõ inhmã kàxpore htÿxre hõ gõ pa omu. Anê.

¹⁶ Hãmri nhũm ja kãm ja gõ nhũm kupy nê kànhmã kupê nê mê kãm:

—E mēhõ nhĩxi nē mēhõ karõ na hã? Anê.

Anê nhũm mê kãm:

—Pahi Sesti karõ nê hixi na hã.

¹⁷ Anê nhũm mê kãm:

—Tÿ. Tô kër ka mê mãmri kãm hkwȳ nhõr o apa. Hã hkarõ nê hã hixi. Tãm kot hipêx xwÿnh jakamã õ na. No mê kajaja na pre Tirtũm mê anhÿpêx nhũm mê apê õ jakamã kwa kër ka mê kapêr kôt pix mã ri amnhĩ nhÿpêx o ri apa. Anê.

Nhũm pre ã mê kãm kapêr anê nhũm mê piitã mar o kuhê. Nhũm mê kot hêx rom hkukjêr xwÿnhjaja amnhĩ jaêr pê ã kàxpore jarênh anhÿrja ã kuma nê axpên mã:

—Kwa mê paxêx rom mê pahte hã hkukjêr tã nhũm ãm hãmri mê pakutã mê pamã harê. Kwa tanhmã kot puj wem hkukjêr to nhũm pahi Sesti kapêr kwÿm ri mê pamã mēmoj jarê? Anê.

Hãmri nê tee ri tanhmã hkukjêr to hkukamã hamaxpêr o kuhê.

Akupÿm mê htÿr xwÿnhjê jarênh

Matêwre 22.23-33; Rukre 20.27-40; Juãw 6.21, 6.38-40; mãânên Wam Korit 6.14, 15.12-28; Wam Tesarõn 4.13-18

¹⁸ Tã nhũm Satusew nhõ xwÿnh kwÿjaja. Mê kot akupÿm mê htÿr mã hamaxpêr kêt xwÿnhjaja na pre mê. Tã mê kot mê htyk nê mê hapêx ã mê hkamnhÿx jakamã na prem axpên mã Jejus jarênh o:

—E kwa pu mê ma hwÿr mra nê mēmoj xihtÿx ã hkukja kê mê pama nê tee ri tanhmã mê pamã kapêr to hkukamã hamaxpêr. Hãmri nhũm mê piitã ja hã omu nê àhpumunh kêt ã omunh kurê kumrêx. E tokyx ma pu mê hwÿr. Anê.

Hãmri nê ma hwÿr mra nê Parijew nhõ xwÿnhjê pyrã nê hêx rom kãm:

¹⁹ —Pa Jejus? Kwa mê inhmã mēmoj jarê. Na pre finat Mojesja Tirtũm nhÿ hã ã mê panhÿgêjtjê mã karõ anê. Mê hkra hkêt rãhã mê pa nê mê htyk xwÿnhjaja nhũm mê harênh o:

Koja mēhõ hprõ hãmri nê kamã hkra hkêt rãhã pa nê ty. Hã koja hkôt htõja hpãnhã hprõ o hprõ nê kamã hkra. Hãmri nhũm kato nê te kêp htõ htyk xwÿnhhta hkra pyrãk. Anê.

Na pre ã Mojes Tirtũm nhÿ hã ja hã mê kãm karõ anê.

²⁰ Jakamã kwa ga mê ixu-jarênh ma. Koja mēmojjaja mê kot axpên to htõ xwÿnhjaja

kêp 7. Nhũm kot waja hprõ. Nê wa pa nhũm myja kormã hprõ kamã hkra hkêt rãhã ty. ²¹ Nhũm hkõt htõ hõta hpãnhã hprõ ho hprõ nê wa axpên to pa. Nhũm haxwýja kamã hkra hkêt rãhã ty. Nhũm hkõt htõ hõta haxwýja ho hprõ nê wa axpên to pa grire nhũm wamta wa urak nê kamã hkra hkêt rãhã ty.

²² Hãmri nhũm htõ hkwýjaja piitã nija pyxi nê axpên pãnhã ho hprõ nom mēhõ kamã hkra hkêt rãhã htyk pa. Hãmri nhũm mē hprõta mē hkõt amnhĩ to hitep nê ty.

²³ Tã Tirtũm kot akupým nhýrmã mē ho htĩr ronhýx nhý nhýx kêp nija mjên kumrêx? Ra piitã kot ho hprõ kênã. E kwa mē inhmã ja jarê. Anê.

²⁴ Hãmri nhũm Jejus ã mē ujarênh anhýrja ma nê mē kãm:

—Tk. Nà mē ate Tirtũm kapêr ã kagã htũm mar mex kêt. Nê mē aprĩ hã tanhmã Tirtũm kute hã omunh kêt jakamã na ka mē ã atýx ja hã ixkukjêr anê.

²⁵ Kormã mē htĩr ri mē kot Tirtũm kõt amnhĩ xunhwýr xwýnhjaja na htem ty hãmri nê Tirtũm nhõ krĩ kamã axte kãm hprõ hprãm kêt pa. Rý ni japêr nê kãm mjên prãm kêt nê pa. Hãmri nê Tirtũm kapêr o mē wrýk xwýnhjê pyrã nê axte htyk kêt nê. Am htĩr tũm rãhã nê pa ho pa.

²⁶ —Nom mē ate akupým mē htĩr kêt ã mē hkamnhĩxja kot paj ixprĩ hã mē amã harê. Amnepêm na pre Tirtũm pĩ

hpõk kamã tanhmã Mojes mã kapêr to. Mãn ra mē ate mar. Na pre kãm:

Ixpê Apraãw nhõ Tirtũm na pa. Nê mãânên ixpê Apraãw kra Ijak mē htãmnhwý Jako wa õ Tirtũm na pa.

Anhýr o Mojes mã amnhĩ jarê nhũm kuma nê hã kagã.

²⁷ Kêp apu arĩ mē htyk rãhã nhýx pre ã mē harênh anhýr kêt nê. Nhýx pre mē harênh o: “Amnepêm Apraãw nê hkra nê htãmnhwý mē htĩr ri ixpê mē õ Tirtũm na pa pre.” Anhýr o nhýx pre mē harê. Nom na pre ã amnhĩ jarênh anhýr kêt nê. Mē pamã te Apraãwja mē htyk nê mē hapêx pyrãk. Nom nhũm prem ra Tirtũm ri akupým htĩr nê mex nê pa ho pa. Tã ka htem Tirtũm kapêr kwým ri akupým mē htĩr kêt ã mē harênh o apa. Anê.

Tirtũm kapêr maati jarênh Matêwre 10.37, 22.34-40; Rukre 10.25-27; mãânên Wam Juãw 2.15, 5.3; Apokarip 2.4

²⁸ Tã nhũm Tirtũm kapêr tũm o mē ahkre xwýnhjê hõ mē hwýr tê nê mē kot axpên mã kapêr ã mē omunh o xa. Hãmri nê Jejus kot tanhmã Satusew nhõ xwýnhjê mã kapêr mex toja ma nê kãm:

—Nà am hãmri na ka ã mē kãm ja jarênh anê Pahihti. Kwa inhmã mēmoj jarê. Na pre Tirtũm ahpýnhã mēmoj to 10 nê mē pamã hã karõ. Mē pahte hkõt amnhĩ nhĩpêx o ri papa kaxyw hã mē pamã karõ. Tã nhý kapêr na mex

o kot hkwyjê jahkrenh wehe?
Anê.

²⁹ Hāmri nhūm kām:

—Nà Tirtūm kapēr xohtôô.
Kapēr piitā hkôt mẽ pahte
amnhĩ nhĩpêx o papaja na
kām hprām. No pixi na mẽ
pahte hkôt amnhĩ nhĩpêx o
papaja nhūm kām hprām tỳx
o kot hkwy jakrenh. Kapēr
mex maati na ja. Na pre
kapēr o:

E mẽ apê Ijaew nhō
xwỳnhjaja. Ixpê mẽ
anhō Tirtūm ā ixpigi
mex na pa.

³⁰ Jakamā kēr ka mẽ amā
ixkĩnh tỳx o mẽmoj pi-
itā hakrenh pa. Jao
mẽ anhĩ piitā ho amā
ixkĩnh tỳx kumrêx o ri
apa.

³¹ Anhỹr o na pre mẽ pamā
karō. Nê hkôt ja:

Kēr ka mẽ nhām mẽ hipêx o
te ka amā amnhĩ tã ma
pyrāk o mẽ hipêx o ri
apa. Jao tãm mẽ hipêx
rāhā ho ri apa. Anê.

E ja wa kumrêx na Tirtūm
kām mẽ pahte hkôt amnhĩ
nhĩpêx o ri papa hprām tỳx nê.
Anê.

³² Hāmri nhūm kuma nê
kām:

—Nà âm hāmri na ka ja jarê
Mëijahkre xwỳnh. Tirtūm pyxi
mex kênā.

³³ Amnepêm na pre htem
kām amnhĩ jarênh kaxyw nê
kām mẽmoj gō nê rĩ kormā
tanhmā kām amnhĩ jarênh to.
Tã nom kot puj mẽ ā ate
harênhhta kôt amnhĩ nhĩpêx
anhỹr o papa jao mẽ panhĩ
piitā pamā Tirtūm kĩnh. Nê

mẽ pamā hkĩnh o mẽmoj pi-
itā hakrenh pa. Nê nhām
mẽ hipêx o te mẽ papamjaja
pamā amnhĩ tã ma pyrāk o
mẽ hipêx. Jao tãm mẽ hipêx
rāhā ho ri papa. Kot puj
mẽ ā amnhĩ nhĩpêx anê nhūm
Tirtūm kām ja mex o mẽ pahte
kām mẽmoj nhōrta jakre.

Anhỹr o kām kapēr.

³⁴ Hamaxpêr mex pê ā Jejus
mã kapēr anê nhūm kuma nê
kām:

—Nà âm hāmri na ka ja
jarê. Na ka ra mẽ kot Tirtūm
kôt amnhĩ nhĩpêx o amnhĩ
nhĩpêx nyw pumunh mex
o mō. Nà te ate tokyx hkôt
amnhĩ xām kaxyw pyrāk.
Anê.

Hāmri nhūm mẽ kām hkurê
xwỳnhjaja tee ri wa kot axpên
mã kapêr mar o kuhê nê axte
kām mẽmoj tã hkukjêr pyma
nê. Ra tee ri mẽ kot hêx
rom mẽmoj tã hkukjêr kaprý
jakamā axte tanhmā hkukjêr
to hkêt nê.

*Jejus kêp pahi finat Tawi
nhō Pahihti hã harênh*

*Matêwre 22.41-46; Rukre
20.41-44; määnên Rômân 1.3-4*

³⁵ Hāmri nhūm Jejus arĩ
Tirtūm mã amnhĩ jarênh xà
hã ixkre kamā amnhĩ tã mẽ
ahkre. Nom te nhām mẽhō
hã mẽ hkukjêr pyrāk amnhĩ
tã mẽ hkukja nê mẽ kām:

—E mẽ inhmā mẽmoj jarê.
Tirtūm kapêr tūm o mẽ ajakre
xwỳnhjaja na htem tanhmā
mẽ amā Tirtūm kot mẽ
akaxyw âm mã xwỳnh jarênh
to nê mẽ amā harênh o: “Koja
kêp pahi finat Tawi kanrêhã
htãmnhwỳ koja.” Anhỹr o
kot mẽ amā harê. Âm kêp

kanrêhã htàmnhwý pix ã mẽ amã harênh o pa. No na pre pahi Tawija kêp kanrêhã htàmnhwý hã harê nê mãânên kêp õ pahihti hã harê. Tã nom nhũm Tirtũm kapêr tũm o mẽ ajahkre xwýnhjaja na htem urà nê kêp pahihti hã mẽ amã harênh kêt nê. ãm kêp kanrêhã htàmnhwý pix ã harê. Kwa mo na htem Tawi pyrà nê kêp õ pahi hã harênh kêt nê?

³⁶ Na pre Tawi tãm Tirtũm kapêr tũm kwý hã kagà nê tanhmã Tirtũm kot mẽ akaxyw ãm mã xwýnhhta jarênh to. Tirtũm Karõ nhỹ hã tanhmã harênh to. Tirtũm mex ã mẽ grer xàja kwý hã kagà nê hã kagà ho:

Tirtũm na pre inhõ Pahihti mã ã kapêr anê nê kãm: “E amnê ixwýr tẽ nê inhĩhkõ hã nhỹ nê inhmã mẽ ho amnhĩptàr o akrĩ. Kot paj mẽ kot kãm akurê xwýnh piitã mẽ unênh pa nê awýr mẽ o mra nê anhĩhkram mẽ haxàr pa.” Anhỹr o pre kãm kapêr. Anê.

³⁷ —Na pre ã Tawi Tirtũm kot Kris mã kapêr jarênh nê kêp õ pahi hã kagà anê. Tã nom Tirtũm kapêr tũm o mẽ ajahkre xwýnhjaja na htem kêp Tawi htàmnhwý pix ã ri axpên mã harênh o ri pa. No kêt Tawija na pre kêp õ Pahihti hã harênh o pa. Anê.

Nhũm pre ã Jejus mẽ kãm amnhĩ jarênh anê nhũm mẽ mar o kuhê xwýnhjaja kuma nê hkĩnh nê. Nê kãm axte mar prãm nê.

³⁸ Hãmri nhũm arĩ mẽ ahkre ho nhỹ nê mẽ kãm:

—Kwa mẽ o kora. Kêr ka mẽ Tirtũm kapêr tũm o mẽ ahkre ho mẽ pa xwýnhjê kot amnhĩ nhĩpêx o amnhĩ nhĩpêx kêt nê. Mẽ omu nê ãm mẽ omu nê mẽ kot amnhĩ nhĩpêx kêt amnhĩ nhĩpêx kêt nê. Na htem pitã mẽ hã hpijaam kaxyw ê mex pix kãm ri pa. Nê mẽ kot amnhĩm mẽ rũnh ã mẽ harênh nhũm mẽ kot amnhĩ jarênh marja na htem kãm hprãm.

³⁹ Nê Tirtũm kapêr o mẽ ahkre xà hã ixkre kamã mẽ kãm amnhĩ to rũnh xwýnhjê hkrĩ xà mex pix kamã na mẽ kãm hkrĩ hprãm. Nê mẽmoj tã mẽ apkur xà hã arĩgro hã ma hkwyjê hkõt mẽ apkur xà hã ixkre hwýr akuprõ nê kãm mẽ kot amnhĩ to rũnh xwýnhjê hkrĩ xà mex pix kamã hkrĩ hprãm.

⁴⁰ —Nê mẽ kot mẽ mjên htyk xwýnhjê ho mex o pa hã amnhĩ jarênh tã amnhĩ to hêx. Nê na htem axtem nê mẽ nokupyr kaxyw mẽ hwýr mra nê mẽ kãm: “E ot pa awýr ato ajuta kaxyw tẽ. Ra amjên apê htyk jakamã kot paj pam amã akukrêx jamãr o ixpa.” Anê hãmri nê mẽ kêp mẽ òrkwy pytà nê amnhĩm mẽ kêp mẽ hikukrêx piitã ho hapêx. Te tãm kot mẽ hipêx o pa pyræk nom tãm mẽ hipêx kêt nê. Nê te tãm amnhĩ nhĩpêx pyrà nê Tirtũm mã amnhĩ jarênh japjêê ho kuhê. Te mẽ kot Tirtũm mã ãm hãmri amnhĩ jarênh pyræk tã hkwyjaja kot ja hã mẽ omunh pix kaxyw

nhũm mẽ ã kãm amnhĩ jarēnh anē. Mýrapê koja mẽ mex kêt nē. Koja Tirtũm tanhmã mẽ hipêx kati hto. Jakamã kwa kêr ka mẽ ã mẽ kot amnhĩ nhĩpêx anhỹr o mẽ pa xwýnhjê kôt amnhĩ nhĩpêx o ri apa hkêt nē. ãm kwarĩ ho kwarĩ. Anē.

*Kêp mjên htyk xwýnh jarēnh
Rukre 21.1-4*

⁴¹ Nhũm Jejus arĩ Tirtũm mã amnhĩ jarēnh xà hã ixkre kamã mẽ omunh o xa. Na pre hte Ijaew ixkreja o mex kaxyw ixkre jamãr xwýnhjê mã hikàxpore hkwý nhõr o pa. Nhũm mẽ hikàxpore rũnh xwýnhjaja hwýr agjê nē kàxpore gjênh xà kamã hkwý ho rax nē hagjê nē ma akupým mra.

⁴² Tã nhũm mēhõ ni pē mjên htyk xwýnhja haxwýja hwýr axà. Kêp amrakati kumrêx. Nē hikàxpore týxre ãm pijakrutre htã kàxpore rũnh xwýnhjê hpãnhã ixkreta wýr tē. Nē kãm Tirtũm kĩnh xàj kàxpore gjênh xà kamã hamē kumē hãmri nē kato nē ma akupým tē.

⁴³ Hãmri nhũm Jejus amým ã kot amnhĩ nhĩpêx anhỹr ã omunh o xa nhũm ja kãm mex nē. Hãmri nē hkôt mẽ pa ho mẽ pa xwýnhjê mã harē nē mẽ kãm:

—E mãn ka mēnire htēm mũj pumu. Na pre mjên kêp ty nhũm kêp amrakati nē hikàxpore grire htã amnhĩ pē õr pa. Kwýjê rom kãm Tirtũm kĩnh xàj amnhĩ pē õr pa. Apkur xà hã hikàxpore na.

⁴⁴ Kêt mẽ hkwýjaja na hte hikàxpore hkwý pix o mra nē gjênh xà kamã hagjê nom arĩ mẽ hikàxpore rũnh. No nija na mẽ urak nē kãm hikàxpore japê hkêt nē. Nē ho õxy hkêt nē ãmnhĩx piitã o tē nē õr pa. Anē.

13

Jejus kot nhỹrmã mẽmoj piitã ho hapêx ã harēnh

Matêwre 24.1-14; Rukre 21.5-9, 21.17-19; määnēn Wam Ximotre 4.1; Sikũn Ximotre 3.1

¹ Tã hãmri nhũm Jejus kôt mẽ pa ho mẽ pa xwýnhjaja arĩ Tirtũm mã amnhĩ jarēnh xà hã ixkre kaxwýnh pumunh o kuhê nē hã Jejus mã:

—Hêxta waa nē. Ixkreja mex kumrêx Pahihti. Kēn rũnh o mẽ kot hipêx jakamã mex o mex. Nē mẽ kot ri Tirtũm mã hkĩnh xà nhõr nēj haxwýja piitã mex kumrêx. Anē.

² Hãmri nhũm mẽ kãm:

—Nà mex tã koja nhỹrmã mẽ kãm Tirtũm kurê xwýnhjaja grãnh pa. Koja arĩ kēn axkrutre axpēn mýnh nē nõr kêt kumrêx. Koja piitã anhgrà nē ahpýnhã ri hikwý.

Anhỹr o mẽ kãm kapêr.

³ Hãmri nē ixkreja rũm kato nē ma tē nē hixêt pē Oriwēhti hã api nē hã nhỹ. Tirtũm nhõrkwy kutã hixêtja nhũm hã api nē hã nhỹ. Hãmri nhũm Simãw Pêtre mẽ Xiakre mẽ Juãw mẽ Andreja ma hkôt mra. Ahte hkôt mra nē mẽ kot Tirtũm mã amnhĩ jarēnh xà hã ixkre grãnh par ã hkukja nē kãm:

4 —Kwa xà ãm hãmri koja mẽ ã ixkreja nhĩpêx anê? E aprĩ hã mẽ inhmã harê. Xà koja mẽ nhỹrmã kugrà nà xà koja mẽ tokyx ho anê? Kwa mẽmo koja we wỳj ri tanhmã amnhĩ nhĩpêx to? Anê.

5-6 Hãmri nhũm mẽ kãm:

—Nà kot paj mẽ amã harê. Nom nhỹrmã mẽmoj piitã hapêx kaxyw tanhmã amnhĩ nhĩpêx to kumrêx kot paj mẽ amã harê ka mẽ inhma. Koja mẽ ohtô nê mẽ apê ixkwỳjê hwỳr mra nê hêx rom te pa ixte amnhĩ nhĩpêx pyrãk o amnhĩ nhĩpêx o pa. Nê tanhmã mẽ amã amnhĩ jarênh to nê mẽ amã: “E pa na pre Tĩrtũm mẽ awỳr inhmê. Ixpê kaxkwa rũm ixwryk xwỳnhta na pa.” Anhỹr o mẽ akôt mẽ amã amnhĩ to hêx o pa. Nê mẽ amã: “E na pa mẽ ato amnhĩptãr kaxyw mẽ awỳr wrỳ.” Anhỹr o mẽ amã amnhĩ jarê. Nom kêr ka mẽ ama nê ãm mẽ ama. Mẽ kot amnhĩ to hêx xwỳnh na mẽ. Kormã akupỹn ixpôx xà hã arĩgroja kormã.

7 —Nê koja mẽ nhỹri awry hã axpên par o pa. Nê mẽ atãã axpên par o pa. Nom kêr ka mẽ harênh ma nê ri tee ri tokyx mẽmoj piitã hapêx ã hkamnhĩx kêt nê. Mẽmoj piitã hapêx xà hã arĩgroja kormã.

8 —Nê koja mẽmoj piitã hapêx kaxyw nhũm ahpỹnhã ri pika piitã hkôt mẽ pa xwỳnh piitã pika hõ nhõ xwỳnhjê kutã amnhĩ xunhwỳ nê axpu nê axpên pa.

—Nê koja pika piitã hkôt tanhmã mẽ à kuteja mẽ hamỳ

nhũm mẽ amnhĩ xà htỳx kãm hamak o pa. Nhũm nhỹri pika htertet tỳx nê. Nê nhỹhỹnh pika hkwy kamã mẽ pa xwỳnhjaja prãm xàj pikaprãr pa. Tã nom kormã mẽ kot amnhĩ xà htỳx kãm hamak xà hkrax pix na ja. Te mênijaja pijagri kaxyw nê kormã õhy xà hpỹnh pyrãk. Koja mẽmoj piitã hapêx kaxyw nê ã amnhĩ nhĩpêx anê.

9 —E pa hpãnhã mẽ kot Tĩrtũm mã amnhĩ jarênh xà hã ixkre grãnh par xwỳj ri mẽmoj tanhmã kot hkukamã amnhĩ nhĩpêx to hã hã harê. Mẽ ate hã ixkukjêr xwỳnhta kot paj mẽ amã harê. Nà koja mẽ kãm ixkurê xwỳnhjaja mẽ awỳr mra nê ixtã mẽ apynê nê mẽ atomnuj nê. Nê ma mẽ pikuprõnh xà hã ixkre hwỳr mẽ ato mra nê kamã mẽ kãm mẽ ato kapêr punuj nê nhũm mẽ kuma nê ma mẽ ato mra nê mẽ ajagjê. Mẽ ate ixkôt apa ho apa xwỳnh ã ã mẽ anhĩpêx anê. Nê mẽ õ pahihiti hwỳr mẽ ato mra nê mẽ kãm tanhmã mẽ ato kapêr punuj to.

10 Tã nom kwa kêr ka mẽ kutã akuhê nê mãmri tãm mẽ kãm ijarênh o akuhê.

11 Nom kêr ka mẽ kãm amnhĩ jarênh kukamã tee ri ajamaxpêr o ri amã mẽ uma hkêt nê akuhê. Rỳ mẽ ajamaxpêr o: “Hêxta waa nê. Mẽ kot ixkukjêr ã arĩgrota ã tanhmã kot pa we ri mẽ kãm amnhĩ jarênh to?” Anhỹr o tee ri amnhĩ kukamã ajamaxpêr kêt nê. Koja Tĩrtũm Karõ tanhmã mẽ akrã hto ka mẽ y hã akatãt

kôt tanhmã mẽ kãm amnhĩ jarênh to.

¹² —Ně mẽ atõ nẽ mẽ anhĩpêêxã nẽ mẽ akrajaja koja mẽ ixtã mẽ atã amÿnẽ nẽ ma pahi hwÿr mẽ ato mra nẽ kãm mẽ ajarẽ nhũm mẽ kuma nẽ mẽ ajagjê nẽ mẽ akwÿjê pa.

¹³ Koja mẽ piitã ixkôt mẽ akamã gryk nẽ ã kãm mẽ akurê ho pa anẽ. Nom mẽ kot ã mẽ anhĩpêx anhÿr mã tã kêr ka mẽ amnhĩ to htÿx nẽ ixkaga hkêt nẽ. Mẽ kot mẽ apar tã ka mẽ kaxkwa kamã akupÿm atĩr kurê kumrêx. Hãmri nẽ mẽ kurom Tĩrtũm mẽ wa ixri atĩr tũm nẽ amex rãhã nẽ apa ho apa. Mẽ kot tanhmã mẽ ato htã mẽ apê akupÿm kaxkwa kamã atĩr tũm nẽ apa mã xwÿnh jakamã kwa tee ri amnhĩ kukamã ajamaxpêr o ri apa hkêt nẽ. Anẽ.

Mẽ pahomnuj tÿx xwÿnh maati hã harênh

Matêwre 24.15-28; Rukre 21.20-24; mããnẽn Sikũn Tesarõn 2.3-4; Apokarip 13.11-17

¹⁴⁻¹⁶ Nhũm Jejus arĩ mẽ kãm kapêr nẽ mẽ kãm:

—Ně koja nhÿrmã kot mẽ atomnuj tÿx kumrêx xwÿnh maati ja axtem nẽ Tĩrtũm mã amnhĩ jarênh xã hã ixkreja kamã amnhĩ xãm. Hãmri ka mẽ ja hã omu nẽ mẽ kot krĩ grãnh par mã ajamaxpêr kurê kumrêx. Koja ã amnhĩ nhĩpêx anẽ ka mẽ amÿm amnhĩ wÿr mẽ omu hãmri nẽ ajapôj nẽ ma aprôt nẽ amrar kurê kumrêx. Mẽ apê jar pika pê Jutej kamã

mẽ apa xwÿnhjaja mẽ omu hãmri nẽ mẽ kot mẽ apar pymaj ma aprôt nẽ amrar kurê kumrêx. Hixêt prêk wÿr ajapôj nẽ aprôt nẽ ma mra. Nẽ jar Jerujarẽ nhõ xwÿnhjaja kê mẽ umaj haxwÿja hapôj nẽ ma hprôt nẽ ma mrrar o mra. Nẽ kapôt ã ri mẽ pa xwÿnhjaja kê mẽ ê jamÿnh kaxyw akupÿm krĩ hwÿr gjêx kêt nẽ. ãm ma mẽ umaj hprôt nẽ mrrar o mrrar kurê kumrêx.

¹⁷ —Ně mẽ htujarô xwÿnhjaja nẽ mẽ hkra karàre xwÿnhjaja. Jajê pê koja mẽmoj omnuj tÿx nẽ. Tanhmã kot wem amnhĩ to nẽ hprôt tÿx? Nã pika ja kamã koja mẽ mex kêt nẽ. Mẽ kot amnhĩ tomnuj mÿrapê koja Tĩrtũm tanhmã mẽ homnuj tÿx to.

¹⁸⁻¹⁹ —Koja ã mẽmoj amnhĩ nhĩpêx anẽ hãmri nhũm mẽ piitã amnhĩ xã htÿx kãm hamak rũnh o pa. Tĩrtũm kot mẽ piitã mẽ ho kator krax rũm amnẽ mẽ pa xwÿnhjaja na mẽ kormã à htÿx kamã hamak rũnh kêt nẽ. Kormã amnhĩ xã kamã hamak kryre. No nhÿrmã mẽ hprôt xã hã arĩgrota ã koja mẽ amnhĩ xã htÿx kamã hamak rax kumrêx.

—Tã akupÿn ixte mẽ awÿr ixwrÿk xã hã arĩgrota ã kot pa mẽmoj punuj o ijapêx pa ka mẽ axte ã mẽmoj kot anhÿr pumunh kêt nẽ. Nom kormã akupÿn ixwrÿk xwÿj ri kot kaj mẽ amnhĩ xã htÿx kamã ajamak o apa. Jakamã kêr ka mẽ ã amnhĩ nhĩpêx anhÿrja kukamã amnhĩ to Tĩrtũm wÿ nẽ kãm: “Pa Tĩrtũm. Kwa kê

měmoj ā amnhĩ nhĩpêx anhÿr kaxyw hāmri kê amgrà pê ā amnhĩ nhĩpêx anê. Koja na pê ā amnhĩ nhĩpêx anê nhũm omnuj tÿx nê.” Anhÿr o amnhĩ to awÿ.

20 –Mě hprôt xà hã arĩgrota ā koja Tĩrtũm kãm mẽ apê hkrajaja mẽ atyk par pymaj mẽ anê mẽmo punuta ā arĩgro hkwỳ grà nê mẽ akukamã mẽ amã ho grêre. Koja mẽ akamã ukapřĩ xàj ā mẽ anê hipêx anê.

21 –Ně koja ā mẽmoj amnhĩ nhĩpêx anhÿr kaxyw hāmri nhũm mẽ hêx o mẽ pa xwÿnhjaja ma mẽ awÿr mra nê hêx rom tanhmã mẽ amã kapêr to nê mẽ amã: “E ota ra Tĩrtũm kot mẽ pakaxyw âm xwÿnhta pôj. Kwa mẽ tokyx hwÿr mra nê omu nê hkôt ri apa.” Anhÿr o mẽ amã hêx. Hāmri nhũm mẽ hkwỳjaja tee ri mẽ kuma nê mẽ amã: “Nà tãm kêt. Jar mẽ ixkamã na. E mẽ tokyx amnê hwÿr măn mra nê omu.” Anhÿr o mẽ amã hêx o pa. Nom kêr ka mẽ ama nê âm mẽ ama nê mẽ hkôt amrar kêt nê.

22-23 –E kwa mẽ inhma. Na pa ra ixprĩ hã mẽmoj kot ā amnhĩ nhĩpêx anhÿrja kukamã mẽ amã tanhmã harênh to. Tã kêr ka mẽ axkãm ajamak rom nê ri apa. Koja mẽ kot amnhĩ to hêx xwÿnhjaja axpên pãnhã mẽ awÿr mra nê mẽ amã kêp Tĩrtũm kot mẽ akaxyw âm xwÿnh ā amnhĩ to hêx. Nê mẽ hkwỳjaja kêp Tĩrtũm nhÿ hã kapêr jarênh xwÿnh ā amnhĩ to hêx. Hāmri nê aa mẽ kot mẽmoj pumunh kêt kwÿ ho

anhÿr o pa. Te Tĩrtũm nhÿ hã kot ho anhÿr pyræk nom hêx rom mẽ apê Tĩrtũm kot amnhĩm mẽ arênh xwÿnhjê nokupyr kaxyw ā amnhĩ nhĩpêx anhÿr o pa. Anê.

Akupÿn Jejus wrÿk xà hã arĩgro jarênh

Matêwre 24.29-31; Rukre 21.25-28; määnên Sikũn Pêtre 3.10; Apokarip 1.7, 19.11-16

24-25 Nhũm Jejus arĩ mẽ kãm kapêr nê mẽ kãm:

–Tã koja mẽ kot amnhĩ xà htÿx kamã hamak xà hã arĩgrota hapêx nhũm Tĩrtũm ā mẽmoj nhĩpêx anê.

Koja kaxkwa ho àk tÿx nê nhũm myyti ahtyk.

Nhũm mytwrÿre axte hirã hkêt nê.

Nhũm kanhêti piitã axrê nê rôrøk pa.

26 Hāmri pa man akupÿn pika hwÿr wrÿ nhũm mẽ piitã ixwrÿk kãm ixpumu. Kakrã kamã kot paj ixihtÿx o inhĩrã rax kãm akupÿn mẽ awÿr wrÿ.

27 Hāmri nê ma krĩ piitã hwÿr Tĩrtũm kapêr o mẽ wrÿk xwÿnhjê rê nhũm mẽ ma mra nê amnepêm ixte amnhĩ kaxyw mẽ axunhwÿr xwÿnh piitã ho akuprô nê akupÿn ixwrÿ mẽ ho mra. Anê.

Jejus kot mẽmo pĩ hpàr ā ejêp jarênh

28 Nhũm Jejus arĩ mẽ kãm kapêr nê mẽ kãm:

–E ka mẽ pĩ hpàr mũj pumu. Na hte mẽmo mytwrÿ hã rã nhũm mẽ omu nê ô hkukamã hamaxpêr kurê kumrêx.

29 Ja pyrà nê koja mēmoj ã amnhĩ nhĩpêx anhÿr mē ka mē akupÿn mē awÿr ixwrÿk mã ajamaxpêr kurê kumrêx.

30 Koja akupÿn ixpôx kêt ri ã mē kot mēmoj kot amnhĩ nhĩpêx anhÿr pumunh xwÿnhjaja kormã piitã htyk par kêt ri pa akupÿn mē awÿr wrÿ.

31 —Nê koja nhÿrmã pika nê kaxkwa wa hapêx pa. Tã no ãm ixkapêr koja wa uràk nê aa hapêx kêt nê. Koja ãm rãhã ho rãhã. Kot paj aa ihkjê ho tanhmã mēnh to hkêt nê. Anê.

Mē pahte akupÿn Jejus wrÿk xà hã arĩgro pumunh kêt ã mē pajarênh

Matêwre 24.36-44; Rukre 12.37-40; mãânên Atre 1.9-11; Wam Tesarôn 5.2; Sikûn Pêtre 3

32 Nhũm Jejus arĩ mē kãm kapêr nê mē kãm:

—Nom akupÿn ixwrÿk xà hã arĩgroja mē ate omunh kêt. Nê kaxkwa kamã Tirtũm kapêr o mē wrÿk xwÿnhjaja kot ja pumunh kêt. Nê pa ixpê Tirtũm Kra htã ijaxwÿja ixte ja hã amnhĩ pumunh kêt. ãm Mēpahpãm maatija tapxipix kot ja pumunh.

33 —Tã mē ate akupÿn ixwrÿk xà hã arĩgro pumunh kêt jakamã kwa kêt ka mē axkãm ajamak rom nê ri apa. Nê apkati mē amnhĩ wÿr ijapêr arĩt rãhã ho ri apa.

34-35 —E pa tanhmã mē amã akupÿn ixwrÿk xà hã arĩgro jarênh to ka mē inhma. Koja mēhõ nhÿhÿm nojarêt hãmri nê kãm mē àpênh xwÿnhjê mã mē àpênh ã karõ nê òrkwÿ

jamãr xwÿnh mã tanhmã kãm karõ hto. Hãmri nê òrkwÿ kahê xà jamãr xwÿnh mã kãm: “E kêt ka ixwakre kamã ijapêr arĩt rãhã ho ri apa.” Anê hãmri nê ma nhÿhÿm mō. Tã mē kot ijapêr rĩt rãhã ho mē pa xwÿnhjaja te kot ixkre kahê xà jamãr xwÿnh kot amnhĩ nhĩpêx pyrãk. Ò patrãwja akupÿn hpôx xà hã arĩgro hã omunh kêt jakamã na hte kahê xà jamãr rãhã ho pa. Koja apu axpêr kamàt nhũm akupÿn hpôx japêr. Rÿ kôt ã kamàt rÿ krãhyre kà nhũm akupÿn hpôx japêr. Rÿ kwÿhtyk nhũm akupÿn hpôx japêr. Tã uràk nê mē ate akupÿn ixwrÿk xà hã arĩgro pumunh kêt jakamã kêt ka mē ijamãr rãhã ho ri apa. Jao ixkutêp inhmã tanhmã amnhĩ nhĩpêx to rãhã nê. Ra ixte mē amã hã karõ xà hkôt.

36 Kop ixkre kahê xà jamãr xwÿnhja tee ri ò patrãw kamã ama hãmri nê ra òtxwa nê htyx òt o ÿr rôm nhũm haêr pé hwÿr hpôx ronhÿx ja kêt mex kêt nê. Ja pyrà nê kêt ka mē ixkutêp ixkôt amnhĩ nhĩpêx rãhã ho ri apa. Nom tee ri amnhĩ wÿr ixkãm ama hãmri nê axte inhmã ajamaxpêr kêt pé atÿx ri tanhmã amnhĩ tomnuj to ho apa hkêt nê.

37 —E ixte mē amã mēmoj jarênhja na pa hte ixkwÿjê piitã mē kãm harê. Jakamã kwa kêt ka mē akupÿn ixwrÿk ã ijapêr arĩt rãhã ho ri apa. Anê.

Nhũm pre ã Jejus amnhĩ kukamã mē kãm ujarênh anê.

14

Mě kot Jejus p̄r kukamã hamaxp̄r ã mẽ harēnh

Matêwre 26.1-5; Rukre 22.1-2; Juãw 11.45-53

¹ Tã nhũm Ijaew hkĩnhã ã arĩgro p̄e Pas w̄yr apkati axkrut. Pas ã na hte mẽ ixp̄e Ijaewjaja amnep̄em Tĩrtũm kot pika p̄e Ejit p̄e mẽ inhĩḡet n̄e mẽ ixp̄amj̄e kator mã ijamaxp̄er kaxyw axp̄en w̄yr akupr̄o n̄e hã ixkĩnh. Na pa htem arĩgroja mã: “Pas” an̄e. N̄e harēnh o: “Mẽ pahte p̄aw kaxkrit k̄et kur ã arĩgro” an̄e.

² Jakamã nhũm mẽ inhõ patre krãhtũmj̄e mẽ Tĩrtũm kap̄er tũm o mẽ ahkre xw̄ynhjaja kã Jejus p̄r prãm n̄e. Nom mẽ kãmhk̄ot kap̄er mar o mẽ pa xw̄ynhj̄e p̄yma n̄e. N̄e tee ri hã amnhĩ jahkre n̄e axp̄en mã:

—H̄exta waa n̄e. Tanhmã kot puj wem ho n̄e kupĩi? Kot puj mẽ pahkĩnh kãmh tanhmã ho nhũm mẽ hkĩnh xw̄ynhjaja hã mẽ pahpumu n̄e mẽ pakamã gryk t̄yx n̄e. Pu mẽ hã axpu n̄e hã tanhmã axp̄en to. Jakamã kwa pu mẽ kormã tanhmã ho hk̄et n̄e. An̄e.

Mẽhõ ni kot Jejus krã gregrer ã harēnh

Matêwre 26.6-13; Rukre 7.36-50; Juãw 12.1-8

³ Rõm nhũm Jejus Simãw nhõrkw̄y kamã kormã apkur o nh̄y. Krĩ p̄e Petãn kamã. Simãwja na pre hk̄a kro xap̄er t̄yx o pa nhũm Jejus akup̄yn ho mex. Jakamã akup̄ym õ krĩ hw̄yr p̄oj n̄e kutã apkur o nh̄y. Hãmri nhũm mẽhõ nija

harēnh ma n̄e mẽ hkuxwa xà hã kàx õ py n̄e ma hw̄yr o t̄e. N̄e mẽ hw̄yr axà n̄e nh̄yh̄ynh kàx kahte n̄e mẽ hkuxwa xà ho hkrã gregrer pa.

⁴ Hãmri nhũm mẽ apkur o hkrĩ xw̄ynhjaja tee ri ã kot amnhĩ nhĩp̄ex anh̄yr ã omu n̄e kamã gryk n̄e. N̄e axp̄en mã:

—Tk. Kwa nà na hã mẽ hkuxwa xàta kap̄ir par kumr̄ex.

⁵ Kop apu ma o ht̄em n̄e ho w̄en̄e n̄e hpãnhã kàxpore ho rax kumr̄ex n̄e ham̄ynh n̄e ho mẽ k̄ep amrakati xw̄ynhj̄e nhĩp̄ex par nh̄yx ja kãmh mex n̄e. Mo na ri ã amnhĩ nhĩp̄ex anh̄yr k̄et n̄e?

An̄e n̄e hã kãmh akir.

⁶ Hãmri nhũm Jejus mẽ kuma n̄e mẽ kãmh:

—Tk. Kwa mẽ kãmh axàkj̄er k̄et n̄e. ãmhãmri na ã inhĩp̄ex an̄e.

⁷ Mẽ k̄ep amrakati xw̄ynhjaja koja mẽ arĩ mẽ ak̄ot pa rãhã n̄e. Ka mẽ amã mẽmo arĩgro hã mẽ ho ajuta hprãm n̄e tanhmã mẽ ho ajuta hto n̄e mẽ kãmh mẽmoj ḡo. No pa kot paj ri mẽ ak̄ot ixpa ka mẽ ixto mex ry ho apa hk̄et n̄e. Kot paj tokyx mẽ are.

⁸ Ixtyk nhũm mẽ kot ijaxàr kukamã na ã ixkrã gregrer an̄e. ãmhãmri na ã inhĩp̄ex an̄e.

⁹ ãmhãmri na pa mẽ amã ja jar̄e. Koja mẽ krĩ piitã hk̄ot axp̄en mã ixte tanhmã mẽ an̄e amnhĩ nhĩp̄ex to hã ijarēnh o pa n̄e mããn̄en kot ã inhĩp̄ex anh̄yrja mããn̄en harēnh o pa. Nhũm mẽ piitã

kot tanhmã ixto mex to hã harênh ma. Anê.

*Jut Kariot kot mẽ kãm Jejus
ã àmnênh kaxyw ã harênh*

*Matêwre 26.14-16; Rukre
22.3-6; Juãw 13.21-30*

¹⁰ Tã nhũm Jut Kariotja. Jejus kôt mẽ pa ho mẽ pa xwýnh pê 12 hõ na pre. Tã axtem nê Satanasti nhỹ hã ma patre krãhtũmjê hwýr tẽ nê axtem nê tanhmã Jejus o mẽ mar to nê mẽ kãm:

—E ot pa mẽ amã Jejus jarênh o tẽ. Xà kot paj mẽ amã hã amýnê ka mẽ hpãnhã inhãmã amnhĩre nã? Anê.

¹¹ Hãmri nhũm mẽ kuma nê hkĩnh nê. Hãmri nê kãm:

—Nã kot paj mẽ amã amnhĩre. Anê.

Hãmri nhũm mẽ kuma nê kato nê ma tẽ nê Jejus pynênh kaxyw htãnopxar o hkôt ri pa.

*Jejus kot ý hã kapêr o mẽ pa
xwýnhjê kutã apkur ã harênh*

*Matêwre 26.17-19; Rukre
22.7-13*

¹² Tã nhũm arĩgro pê Pas kato. Amnepêm mẽ inhĩgêjtaja na prem ôwêhti hkrare hkwy pa. Tĩrtũm kot ja hã mẽ omunh nê Ejit kãm mẽ kãm mẽ hkurê xwýnhjê nhĩhkra nê mẽ kator kaxyw na prem ã amnhĩ nhĩpêx anê. Jakamã na pa htem arĩ mẽ ixpê mẽ hkanrêhã mẽ htãmnhwýjaja Pas ã axpên wýr akuprõ nê jam ijamaxpêr pê mẽ urak nê ôwêhti hkrare hkwy hpa nê pãwti kaxkrit kêt kãm kuku.

Jakamã nhũm Jejus kôt mẽ pa ho pa xwýnh pê 12jaja Pas ã mẽ apkur xà hã Jejus kukja nê kãm:

—Kwa nhỹri kot paj mẽ akutêp Pas ã mẽ panhõ hã apê? Anê.

¹³ Hãmri nhũm mẽ kuma nê ja wa ho axkrut nê mẽ amnhĩ kukamã wa kumẽ nê wa kãm:

—E wa ma Jerujarê hwýr wa tẽ. Nê hwýr axà nê mēhõ myja pumunh kurê kumrêx. Nhũm amnhĩm gô ru nê amnhĩ kre hã poti xãm nê o tẽ ka wa omu nê hã ajêt nê ma òrkwý hwýr hkôt tẽ.

¹⁴ Hãmri nê ixkre nhõ dõn pumu nê kãm: “E Jejus na wa inhãmẽ pa wa awýr tẽ. Na awýr pêr mēnh o: ‘Nhỹri kot paj we ixkôt ri mẽ pa ho pa xwýnhjê mẽ Pas ã axpên kutã apku?’ Anhýr o na awýr pêr mẽ.”

¹⁵ —Wa ã kãm akapêr anê kê war ama nê war amã òrkwý nhĩmök ã ixkre rax õ jahkre. Ra kamã kaxyw mẽ paxàpkur xà hã mẽmoj piitãã. Ka wa omu nê mãmrĩ kamã mẽ ixkutêp mẽ panhõ hã apê. Anê.

¹⁶ Hãmri nhũm wa kuma nê ma hwýr tẽ. Nê krĩm axà nê ra kot wa kãm mẽmoj jarênh xà hkôt mẽmoj piitã omu nê mẽ kutêp mẽ kãm mẽõ hã àpênh o wa xa.

*Jejus kot mēhõ kot mẽ kãm
hã àmnênh ã harênh*

*Matêwre 26.20-25; Rukre
22.21-23; Juãw 13.21-30*

¹⁷ Tã nhũm kamãtre nhũm Jejus mẽ hkôt mẽ pa ho pa xwýnhjaja wa hkôt mõ.

¹⁸ Hãmri nê kýxpê ixkreja wýr api nê hwýr agjê nê apkur kaxyw hkrĩ hpa nê korãmã apkur o hkrĩ nhũm Jejus mẽ kãm:

—E pa mẽ amã mẽmoj jarẽ ka mẽ inhma nẽ amnhĩ krãm haxàr tỳx nẽ. Kot kaj mẽ ixkutã axàpkur o akrĩ xwỳnhjê hõ mẽ kãm ixkurê xwỳnhjê mã ixtã amỳnê. Anê.

¹⁹ Hãmri nhũm mẽ tee ri kuma nẽ hkaprĩ htỳx nẽ. Nẽ axpẽn pãnhã amnhĩ tã hkukja nẽ kãm:

—Kwa xà pa kot paj ã anhĩpêx anê? Nà pa hkêt. Anê.

²⁰ Hãmri nhũm mẽ kãm:

—Nà mẽ apê 12jê hõ kot kaj ã inhĩpêx anê. Mẽ ate ixkutã guhkrax kãm anhõ pãwti ho mry kagô nhek o akrĩ xwỳnhjê hõ kot kaj ixtã amỳnê.

²¹ Tĩrtũm kapêr ã kagã htũm kot ixkukamã harênh xà hkôt koja mẽ tanhmã ixto rax nẽ ixpĩ. Nom kot mẽ kãm ixtã àmnênh mã xwỳnhta hêxta waa nẽ. Æ kot amnhĩ nhĩpêx anhỹrja mỳrapê koja amnhĩ xà htỳx kãm hamak rax kumrêx. Kop apu aa õ mãmãj nhõxà hkre rũm kator kêt ronhỹx ja kãm mex nẽ.

²² Anê nẽ kormã mẽ apkur o hkrĩ rôm nhũm pãwti hõ py nẽ ho Tĩrtũm wỳ. Hãmri nẽ mẽ kãm ho hkry nẽ mẽ piitã mẽ kãm òr pa nẽ mẽ kãm:

—E na pa mẽ amã pãwti ho hkry nẽ mẽ amã kugõ. Ja pyrã nẽ koja mẽ ã inhĩpêx anê nẽ te ixto hkry hpar pyrãk o inhĩpêx pa amnhĩ xà htỳx kamã ijamak kãm ty. Nom mẽ anê kot paj ty. E mẽ mãmrĩ aku. Anê.

²³⁻²⁴ Nẽ hpãnhã wĩhti hã kot py nẽ mã ho anê nẽ

Tĩrtũm mã harê. Hãmri nẽ mẽ kãm kugõ nẽ mẽ kãm:

—E mẽ kot ixpĩr xà hã arĩgrota ã koja ixkamrô axkapĩ. Nom koja mẽ amarĩ ixpĩr nhũm amarĩ hpikapĩr kêt nẽ. Æm paa. Pa kot paj mẽ anê mẽ ìhkram amnhĩ jaxà nhũm mẽ ã inhĩpêx anê. Koja ixkamrô axkapĩ nhũm Tĩrtũm omu nẽ ixkukwak ri mẽ anê mẽ ate amnhĩ tomnuj piitã amnhĩ katut kôt rênh pa nẽ mẽ ato hkra. Ra amnepêm kot ja hã amnhĩ jarênh xà hkôt. Jakamã e. Mẽ axpẽn pãnhã ixkamrô pikapĩr mã ajamaxpêr pê ixte mẽ amã kop kãm wĩhti nhõrta o akõm o axpẽn nhĩpêx. Anê.

Nhũm pre ã mẽ kãm amnhĩ jarênh anê nhũm mẽ piitã ho hkõm o axpẽn nhĩpêx.

²⁵ Hãmri nhũm mẽ kãm:

—Æm hãmri na pa mẽ amã amnhĩ jarê. Kot paj axte wĩhti ho ixkõm kêt rãhã nhỹrmã Inhõ Papaj akupỹn mẽ awỳr inhmê. Hãmri pu mẽ rĩ kormã akupỹn ixpõx xà hã arĩgrota ã pahkĩnh nẽ. Nom axtem tanhmã hã pahkĩnh to. Anê.

²⁶ Nhũm pre ã mẽ kãm kapêr anê hãmri nhũm mẽ Tĩrtũm mã mex o mex ã gre hãmri nẽ hapõx pa nẽ ma hixêt pê Oriwêhti hwỳr mra.

Jejus kot Simãw Pêtre hkukamã tanhmã harênh to Matêwre 26.31-35; Rukre 22.31-34; Juãw 13.36-38

²⁷ Tã nhũm Jejus hkôt mẽ pa ho pa xwỳnhjê hkukamã tanhmã mẽ kãm ujarênh to nẽ mẽ kãm:

—E mẽ inhmã. Tĩrtũm kapēr ã kagà htũm kot ã mẽ pajarēnh kot anhỹr.

Kot paj ôwēhti jamār o pa xwýnhja pĩhãmri nhũm ôwēhti hpigranh pa nē ma anhrà nē ri mra.

Anhỹr o te ixpē ôwēhti jamār xwýnh nhũm mẽ apē ôwēhti pyræk ã mẽ pajarēnh. Tã kot puj mẽ ã amnhĩ nhĩpēx anē.

²⁸ Mē kot ixpĩr tã koja Tĩrtũm akupỹm ixto ixtĩr. Pa akupỹm ixtĩr nē ma mẽ akukamã pika pē Garirej wýr mō. Kamã kot puj mẽ axte axpēn pumu. Anē.

²⁹ Hãmri nhũm Simãw Pētre tee ri mẽ amnhĩ tã kuma nē kãm:

—Kwa nà. Ri ã mẽ ijarēnh anhỹr kēt nē Pahihti. Kot paj akaga hkēt nē. Jajaja koja anhrà nē hprõt nē ma mrar japēr no pa kot paj anhỹr kēt nē. Anē.

³⁰ Hãmri nhũm kãm:

—Nà kot kaj anē Simãw Pētre. Koja apkati hkôt krãhyre hkār kēt ri ka ra mẽ umaj ate ixkôt apa hkēt ã mẽ kãm amnhĩ tã axaprār o axkrunēpxi kãm ga. Kwa jam ajamaxpēr tỳx nē. Anē.

³¹ Hãmri nhũm tee ri amnhĩ tã kuma kãm amnhĩ tã aprār kãm hihtỳx nē kãm:

—Tk. Kwa nà. Kot paj ã amnhĩ nhĩpēx anhỹr kēt nē. Koja mẽ tee akôt ixpĩr mã tã no pa ãm aa akaga hkēt kumrēx. Kot paj akôt ixpa ho ixpa rãhã nē. Anē.

Hãmri nhũm hkôt mẽ pa ho mẽ pa xwýnh kwýjē piitã ã kãm amnhĩ jarēnh anē.

Jejus kot Tĩrtũm mã amnhĩ jarēnh

Matēwre 26.36-46; Rukre 22.39-46

³² Tã nhũm Jejus ma nhỹri mẽ kot kãm “Gesēm” anhỹr xwýnhja wýr hkôt mẽ pa ho pa xwýnhjē ho mō. Hãmri nē mẽ kãm:

—E mẽ jar ixkutēp akrĩ. Pa ma mũtũm tē nē Tĩrtũm mã amnhĩ jarē mãn. Anē.

³³ Hãmri nē amnhĩ kôt mẽ ho axkrunēpxi nē mẽ o mō. Simãw Pētre mẽ Jepetew kra pijakrut pē Xiakre nē Juãwja nhũm amnhĩ kôt mẽ o mō.

³⁴ Hãmri nē amnhĩ kukamã mẽ kãm hkurē xwýnhjaja kot tanhmã hipēx tota kukamã hamaxpēr o ra amnhĩ kamã kahak tỳx o ra hkaprĩ nē. Hãmri nē hkôt mẽ mrar xwýnhjē mã kãm:

—Hēxta waa nē. Na pa tee ri amnhĩ xà htỳx kamã ijamakja kukamã ijamaxpēr nē amnhĩ kamã ixkahak tỳx o ixkaprĩ nē. Te ra ixkaprĩja kot ixpĩr o mōr pyræk. Jakamã e mẽ jar anohtỳx nē ixto Tĩrtũm wýr o akrĩ kē tanhmã ixto pa mẽ kot tanhmã ixtoja kutã ixihtỳx nē. Anē.

³⁵ Hãmri nē mẽ kurũm htēm grire nē amnhĩ kamã kahak o Tĩrtũm mã amnhĩ jarēnh kaxyw htu mýr pē htēm nē pikap nō nē kãm:

³⁶ —Kwa Papaj. Hēxta waa nē. Inhmã amnhĩ xà htỳx kãm ijamak prãm kēt kumrēx. Na pa tee ri amnhĩ kukamã ijamaxpēr nē amnhĩ kamã ixkahak tỳx nē. Jakamã kot kaj amã inhnē ja ho ajapēx prãm nē mãmrĩ ho

ajapêx nhũm mẽ kãm ixkurê
xwýnhjaja tanhmã ixto hkêt
nê. Rý ko. Kot kaj amã mẽ
kot tanhmã ixto hprãm kê
mẽ mãmri tanhmã inhĩpêx to.
Nom pam inhmã hprãm xà
hkôt kêt.

³⁷ Anhỹr o Tirtũm mã
amnhĩ jarẽ hãmri nê kãnhmã
xa nê akupỹm Simãw Pêtreja
mẽ hwýr tẽ nê mẽ omu nhũm
mẽ ra htýx gõr nê hikwỹ.
Hãmri nhũm tee ri mẽ omu
nê Simãw Pêtre mã kãm:

—Kwa Simãw Pêtre. E mẽ
hãmri akrã hapôj. Kwa wem
anohtýx grire nê ixkutêp
amnhĩ to Inhõ Papaj wýr o
akrĩ

³⁸ kê mẽ ixkôt tanhmã mẽ
ato htã ka mẽ amã mẽ uma
xàj ixkaga hkêt nê arĩ mẽ kutã
amnhĩ to htýx nê akuhê. ã
mẽ amã mẽ ate amnhĩ nhĩpêx
anhỹr prãm nom kormã mẽ
amã maa. Anê.

³⁹ Hãmri nê akupỹm tẽ
nê axte Tirtũm mã tanhmã
amnhĩ jarênh to.

⁴⁰ Nê akupỹm mẽ hwýr tẽ
nê mẽ omu nhũm mẽ axte ôt
pa nê hikwỹ. Nhũm tẽ nê tee
ri mẽ omu hãmri nê tanhmã
mẽ kãm nê hkêt nê. ãm aw-
janã nê ma akupỹm tẽ nê axte
Tirtũm mã amnhĩ jarê.

⁴¹⁻⁴² Hãmri nê akupỹm mẽ
hwýr tẽ nê mẽ kãm:

—Kwa xàn ka mẽ arĩ gõr nê
anhĩkwỹ? E mẽ tokyx akrã
hapôj. Na mẽ ra ixwýr mrar
nê kot ixpynênh mã. Koja mẽ
tokyx ixkutã mẽ kot amnhĩ
xunhwýr xwýnhjaja mẽ kãm
ixtã amýnê. Ota ra kot ixtã
mẽ kãm àmnênh xwýnhhta tẽ. E

mẽ tokyx kãnhmã akrĩ pu mẽ
kutã mra. Anê.

*Mẽ kot Jejus pynênh ã mẽ
harênh*

*Matêwre 26.47-56; Rukre
22.47-53; Juãw 18.1-11*

⁴³ Nhũm Jejus kormã mẽ
kãm kapêr o ãm rãhã nhũm
Jut Kariotja tẽ. Mẽ hkôt mẽ
pa ho mẽ pa xwýnhjê hõ htã
nhũm ra amnhĩ kôt mẽ ohtô
nê Jejus wýr mẽ o tẽ nhũm mẽ
wapohti nê kô jamý nê hkôt o
mra. Patre krãhtũm mẽ Ijaew
krãhtũmjê mẽ Tirtũm kapêr
tũm o mẽ ahkre xwýnhjaja ra
Jut kôt mẽ kurê nhũm mẽ
man hkôt Jejusja wýr mra.

⁴⁴ Na pre ra Jut Kariotja mẽ
kãm tanhmã amnhĩ jarênh to
nê mẽ kãm:

—E kot paj nhỹri mẽ pahte
unênh mã xwýnhhta pumu nê
hwýr tẽ nê kahti hkôt kumý
nê tanhmã kãm ixkapêr to.
Ka mẽ ixpumu nê hwýr tẽ nê
unê nê ma akupỹm o tẽ.

Anê hãmri nê ma hwýr mẽ
o tẽ.

⁴⁵ Nê Jejusja pumu nê hwýr
tẽ nê kãm: “Pa mẽ ijahkre
xwýnh.” Anê hãmri nê kahti
hkôt kumý.

⁴⁶ Hãmri nhũm hkôt mẽ
mrar xwýnhjaja omu nê Jejus
wýr mra nê unênh kurê
kumrêx.

⁴⁷ Hãmri nhũm Jejus kôt mẽ
pa ho mẽ pa xwýnhjaja tee
ri ja hã mẽ omu nhũm hõja
õ wapo kapa nê patre maati
mã àpênh xwýnh kot mẽ hkôt
htẽm xwýnhhta mã wapo ho
apê. Nê kot ho hkrã nhĩpôn-
h mã tã kuhpaw nê upôk rũm
hamak nhĩkjê krãhta.

48-49 Hāmri nhũm Jejus amnhĩ tã mẽ kot unênh xwÿnhjê mã kãm:

—Kwa na pa pre apkati mẽ Tĩrtũm mã amnhĩ jarênh xà hã ixkre kamã mẽ kãm ixujarênh o ixpa ka prem tokyx ixpynênh kêt nê. Tã jarãhã te ixte amnhĩ tomnuj xwÿnh pyrã nê ixwÿr wapohiti nê kô hã akapêñ nê ixwÿr atêm rax nê. Nom ra mẽ ate tanhmã ixto kaxyw arĩgro kator jakamã mẽ mãmri tanhmã amã ixto hprãm xà hkôt tanhmã ixto. Tĩrtũm kapêr ã kagã htũm kot mẽ akukamã ã mẽ ate inhĩpêx anhÿr ã mẽ ajarênh xà hkôt. Anê.

⁵⁰ Hāmri nhũm hkôt mẽ pa ho mẽ pa xwÿnhjaja tee ri mẽ kot unênh ã mẽ omu hãmri nê mẽ umaj Jejus kaga nê ma hprôt pa nhũm ahte mẽ kuri xa.

⁵¹⁻⁵² Hāmri nhũm mẽ ma o tẽ. Nhũm kormã mēhõ nyw xwÿnhja tee ri ja hã mẽ omu nê ma Jejus kôt tẽ. Nhũm mẽ amnhĩ kôt omu nê kot unênh kaxyw kahty xà hã kupy nhũm mẽ umaj mẽ ĩhkra kamã kahty xàja re nê ma hkênh nê hprôt nê tẽn akunok.

Ijaew nhõ patre maati kot Jejus kukjêr ã harênh

Matêwre 26.57-68; Rukre 22.63-71; Juãw 18.12-14, 18.19-24

⁵³ Tã nhũm mẽ ma mẽ õ patre maati nhõrkwÿ hwÿr Jejus o tẽ. Hāmri nhũm patre krãhtũmjê mẽ Ijaew krãhtũmjê mẽ Tĩrtũm kapêr tũm o mẽ ahkre xwÿnhjaja õrkwÿ hwÿr Jejus ã akuprõ.

⁵⁴ Hāmri nhũm Simãw Pêtre mẽ hkôt tẽ nê mẽ hkôt patre maati nhõ kĩtare hwÿr axã nê amÿm hã mẽ omunh o xa. Nhũm ra pōristijaja kĩtare kamã amnhĩm kuto nê hã ànhunh o hkrĩ nhũm mẽ hwÿr tẽ nê mẽ ĩhkô hã ànhunh o nhÿ.

⁵⁵⁻⁵⁶ Rôm nhũm ixkre kamã mẽ pikuprõnh xwÿnhjaja tee ri Jejus ã krĩ nhõ xwÿnhjê kukja nê mẽ kãm:

—E mẽ atõ na ka pre Jejus kot tanhmã amnhĩ tomnuj to hã omu? Mẽ atõ mẽ inhmã harê pa mẽ ama nê Rôm nhõ xwÿnhjê nhĩhkram haxã kê mẽ pamã kupĩ. Anê.

Hāmri nhũm mẽ axpên pãnhã tanhmã harênh to. Tanhmã kot amnhĩ tomnuj to hã harênh to htã nom ri ho hêx jakamã axpên kwÿm ri tanhmã ri harênh to nhũm mẽ tee ri mẽ kuma nê mẽ kãm:

—Tk. Kwa mẽ axpên kwÿm ri tanhmã harênh to hkêt nê. Axpên kôt mãn ri tanhmã mẽ inhmã harênh to. Anê.

⁵⁷ Hāmri nhũm mẽ hkwyjaja kãnhmã kuhê nê axpên kôt tanhmã ho hêx to nê mẽ kãm:

⁵⁸ —Nã kot paj mẽ amã tanhmã kot amnhĩ nhĩpêx to hã harê. Na pa prem ã kapêr anhÿr ã kuma. Na pre tanhmã Tĩrtũm mã amnhĩ jarênh xà hã ixkreta jarênh to nê harênh o: “Kot paj ixkreja grãnh pa hãmri nê ixtã apkati axkrunêpxi nê akupÿm hipêx. Nom kot paj amnhĩ nhĩhkra ho hipêx kêt nê.” Anhÿr ã ã amnhĩ jarênh anê pa mẽ kuma.

59 Anhÿr o harënh tã nom xpën kôt harënh kêt nê. Arĩ xpën kwÿm ri harë.

60 Hãmri nhÿm mẽõ patre maati tee ri mẽ kot tanhmã ho kapër toja ma nê mẽ aptàr tÿmjê noo mã kànhmã xa nê Jejus mã kãm:

—E na ka ra mẽ kot ã ajarënh anhÿrja ma. Xà kot kaj tanhmã mẽ inhmã amnhĩ tã axaprãr to hkêt nê? Xà ãm hãmri na mẽ ajarë? E kwa mẽ inhmã tanhmã amnhĩ jarënh to. Anê.

61 No nhÿm akryk xa nê tanhmã kãm nê hkêt nê. Hãmri nhÿm tee ri ã kot amnhĩ nhĩpêx anhÿr ã omu nê axte kãm:

—Kwa mẽ inhmã amnhĩ jarë. Xà apê Tĩrtÿm Kra na ka? Xà ka na apê Tĩrtÿm kot mẽ ixwÿr amënh xwÿnh na ka? Anê.

62 Hãmri nhÿm tã kãm amnhĩ jarë nê kãm:

—Tÿ. Ixpê tãmta na pa. Ra mẽ ate jarãhã tanhmã ijarënh to kaxyw apikuprõnh tã nom kot paj nhÿrmã mẽ kamjaja tanhmã mẽ ajarënh to ka mẽ amnhĩ tã ixpumu. Kot kaj mẽ Tĩrtÿm kot mẽ ato amnhĩptàr xà kutã akrĩ hãmri pa hwÿr tẽ nê ìhkô hã nhÿ. Kakra kamã kot paj hwÿr tẽ nê ìhkô hã nhÿ hãmri nê ÿ hã tanhmã mẽ ajarënh to ka mẽ amnhĩ tã ixpumu. Anê.

63-64 Hãmri nhÿm tee ri ã kot amnhĩ jarënh anhÿrja ã kuma nê gryk xàj amnhĩ xê kaxô nê mẽ aptàr tÿmjê mã kãm:

—Kwa mo kaxyw kot puj mẽ axte ri ho tanhmã kot amnhĩ tomnuj to hã harënh

xwÿnhjê hõ japêr? Ra tãm kot amnhĩ pê Tĩrtÿm Kra hã amnhĩ to hêx nhÿm mẽ pahte pajamak o mar kênã. E tanhmã kot puj mẽ ho? Anê.

Hãmri nhÿm mẽ kãm:
—Nà kot puj mẽ kupĩ. Ra htyk mã tãm kênã. E kwa tokyx pu mẽ ma Rõm nhõ pahihtĩ hwÿr o tẽ kê mẽ pamã hã amÿnê kê mẽ kupĩ. Anê.

65 Hãmri nhÿm mẽ hipêx kati rax nê. Nê hkuk kuhtô nê hpãnhã no hpro nê htak nê kãm:

—E mẽ kot atak xwÿnhjê nhĩxi jarë. Apê Tĩrtÿm Kra hã ate amnhĩ jarënh jakamã mãn uràk nê axàhpumunh tÿx. Jakamã e mẽ hixi jarë. Anê.

Nhÿm prem ã hipêx anê hãmri nê pòristijê nhĩhkram haxà nhÿm mẽ htak rax o kuhê.

Simãw Pêtre kot Jejus kôt pa hkêt ã kot amnhĩ jarënh

Matêwre 26.60-75; Rukre 22.54-62; Juãw 18.15-18, 18.25-27

66-67 Rõm nhÿm Simãw Pêtre arĩ kítare kamã mẽ ìhkô hã ànhunh o nhÿ. Hãmri nhÿm mẽõ patre maati mã àpênh xwÿnh nitita mẽ hwÿr kato nê xa. Hãmri nê hirã kamã hprĩ hã Simãw Pêtre pumu nê omunh mex kurê kumrêx nê kãm:

—Xê pěr apê Najare nhõ xwÿnh Jejus kôt mẽ pa ho mẽ pa xwÿnhjê hõ na ka. Anê.

68 Hãmri nhÿm tee ri kuma nê ra kãm ma nê. Nê kãm amnhĩ tã aprã nê kãm:

—Tk. Kokÿ. Ixte mēhõ my ata pumunhre hã. Anê.

Hãmri nê kànhmã xa nê ma tẽ nê kítare hwÿr kahê hkôt

ã mẽ hkàx ã ahte xa nhũm krāhyre kà.

⁶⁹ Nẽ gaa nhũm hpānhã mẽ kām àpēnh xwýnhjê hõja omu mẽ hã mẽ kām:

—Xẽ ma ãm hāmri na harẽ. Kõt ri mẽ pa xwýnhjê hõ na pēr. Anẽ.

⁷⁰ Hāmri nhũm amnhĩ tã kuma mẽ kām:

—Tk. Kwa nà. Mẽ ri ã amnhĩ krã hkõt ri ixto axêx anhỹr kêt mẽ. Aa ixte mẽhõ ata pumunh kêt kumrêx. Anẽ.

Hāmri nhũm mẽ hkwýja gaa mẽ kê axte hprĩ hã omu mẽ kām:

—Kwa ãm hāmri na mẽ ajarẽ. Apê Jejus hkwý na ka. Ajaxwýja apê Garirej nhõ xwýnh kênã. Anẽ.

⁷¹ Hāmri nhũm tee ri mẽ kuma mẽ kām ma htýx mẽ. Hāmri mẽ mẽ kām:

—Kwa nà. Na pa Tirtũm noo mã mẽ amã amnhĩ jarẽ. Kot paj amnhĩ to ixêx japêr nhũm inhma mẽ hã tanhmã ixto. Nà uràn ixpê Garirej nhõ xwýnhre hã. Ixte mẽhõ mũj pumunh kêt kumrêx tã ka mẽ xatã axpẽn kõt ixte hkõt ixpa ho ixpa xwýnh ã ixkamnhĩx o xa.

Anhỹr o ra mẽ kām amnhĩ tã aprār o axkrunẽpxi.

⁷² Hāmri nhũm axte krāhyre kà. Jao ra hkār o axkrut. Hāmri nhũm Simāw Pêtre kuma mẽ Jejus kot ra hkukamã ã amnhĩ nhĩpêx anhỹr ã harēnhja mã hamaxpēr kurê kumrêx. Krāhyre kormã hkār o axkrut kêt ri kot mẽ kām amnhĩ tã aprār o axkrunẽpxi hã harēnhja mã hamaxpēr. Hāmri mẽ ra kànhmã hakry

hpar o tẽ nõ hkaprĩ htýx kumrêx. Hāmri mẽ tee ri amnhĩ kukamã hamaxpēr mẽ amnhĩ mã:

—Hêxta waa mẽ. ãm hāmri na pre Jejus ijarẽ. Tã pa kot ijarēnh xà hkõt ã amnhĩ nhĩpêx anẽ. Kwa mo na pa axtem mẽ ã mẽ kām amnhĩ to ixêx anẽ?

Anẽ hāmri mẽ hkaprĩ xaj mýr rax mẽ.

15

Pirat kot Jejus kujjêr ã harēnh

Matêwre 27.1-2, 27.11-14; Rukre 23.1-5; Juãw 18.28-38

¹ Tã nhũm myt kato nhũm mẽ axte Jejus ã axpẽn wýr akuprõ. Patre krāhtũmjê mẽ Ijaew krāhtũmjê mẽ Tirtũm kapêr tũm o mẽ ahkre xwýnhjê mẽ Ijaew nhõ juistijaja nhũm mẽ piitã hã akuprõ. Hāmri mẽ pôristi mã anẽ nhũm mẽ Jejus pa hpre nhũm mẽ ma Rõm nhõ xwýnhjê nhõ pahi Pirat wýr o tẽ. Piratja na pre hte Rõm nhõ xwýnhjê nhõ pahi Sesti nhỹ hã Ijaew o amnhĩptār o pa nhũm prem ma hwýr o tẽ.

² Hāmri mẽ kutã ãm mẽ tanhmã kām harēnh to mẽ kām:

—E ot pa mẽ awýr jahti ho tẽ. Na hte mẽ inhmã hêx rũnh o pa. Mẽ ixte Pahihti Sesti kapêr kwým ri amnhĩ nhĩpêx prãm xaj tanhmã mẽ inhmã hêx to. Nẽ axtem mẽ mẽ ixte Sesti mã kàxpore hkwý nhõr kêt ã mẽ inhmã karõ. Nẽ Tirtũm kot mẽ ixkaxyw kêp mẽ inhõ pahi hã ãm ã amnhĩ jarēnh o pa. Na hte ã mẽ

inhmã amnhĩ to hêx anhÿr o pa. Anê.

Hãmri nhũm Pirat mẽ kuma nê Jejus pumu nê tanhmã hkukjêr to nê kãm:

—E inhmã amnhĩ jarê. Xà ãm hãmri na mẽ ã ajarênh anê nà? Xà apê Ijaew nhõ pahi na ka? Xà ka na htem amnhĩ wÿr akãm hamak o pa? Anê.

Hãmri nhũm kãm:

—Tÿ. Nà ãm hãmri na ka ã ijarênh anê. Anê.

³ Hãmri nhũm patre krähtũmjaja tanhmã kãm ho kapêr to.

⁴ Nhũm mẽ kuma nê axte hkukja nê kãm:

—Kwa na mẽ ã ajarênh anê ka mẽ ama nê ãm mẽ ama nê inhmã tanhmã amnhĩ tã axaprâr to hkêt nê. Anê.

⁵ Nom nhũm Jejus ãm akryk xa nê tanhmã axte kãm nê hkêt nê. Jakamã nhũm Pirat tee ri omunh pê hamaxpêr o nhÿ.

Pirat kot Jejus pÿr ã àmnênh ã harênh

Matêwre 27.15-26; Rukre 23.13-25; Juãw 18.39-19.16

⁶ Na pre hte pahi Pirat arĩgro pê Pasja ã Ijaewjaja kãm hprãm xà hkôt mẽ hãgênh xwÿnhjê ho hpÿnh nê mẽ kãm ure.

⁷⁻¹⁰ Jakamã nhũm Ijaew kwÿjaja hwÿr mra nê kãm:

—Pa. Kwa xà kot kaj jarãhã mẽ inhmã mẽ hãgênh xwÿnhjê hõ mã anhÿre nà? Anê.

Hãmri nhũm mẽ kuma nê hamaxpêr o:

—E paj Jejus ã mẽ kuma nê kãm inhÿre. Mẽ piitã mẽ kãm kapêr mar prãm nhũm mẽõ

patre krähtũmjaja pix kot mẽ hkôt kamã gryk nê ã ixwÿr o mrrar anhÿr kênã. Anê.

Hãmri nê mẽ kãm:

—Tÿ. Nà kot paj mẽ amã hõm inhÿre. Kwa xà kot pa mẽ amã mẽ anhõ “pahihti” jarênhja mã inhÿre nà? Anê.

¹¹ Hãmri nhũm patre krähtũmjaja tee ri kuma nê mẽ kãm:

—Kwa mẽ kãm anê kê Parapas mã mãn ure. Anê.

Hãmri nhũm mẽ kuma nê Pirat mã kãm:

—Nà Jejus mã anhÿrer kêt nê. Parapas mã mãn anhÿre. Anê.

¹² Hãmri nhũm mẽ kãm:

—No mẽ ate mẽ anhõ pahi hã harênh xwÿnhnta? Tanhmã kot paj ho? Anê.

¹³ Hãmri nhũm mẽ àmra kamã kãm hã amÿnê nê kãm:

—Kwa pĩ kahpa hã anhõ kê ty. Anê.

¹⁴ Hãmri nhũm tee ri mẽ kuma nê mẽ kãm:

—Tk. Kwa nà. Tanhmã kot amnhĩ tomnuj tore hã kot pa ã hipêx anê.

Anhÿr tã nhũm mẽ xatã anhĩpê kãm kapêr kãm hihtÿx nê kãm:

—Kwa pĩ kahpa hã mãn anhõ kê ty. Tokyx ã mẽ inhmã hipêx anê.

Anhÿr o kuhê. Kàx pê kãm anhÿr o kuhê.

¹⁵ Nhũm tee ri mẽ kuma hãmri nê mẽ kãm hprãm xà hkôt mẽ kãm Parapas mã ure. Nê pôristi hkwyjê mã Jejus ã amÿnê nê mẽ kãm:

—Tõe. Mẽ mamrĩ hwÿr tẽ nê htak hãmri nê kapôt ã mẽ hpar xà hã pika hwÿr o tẽ nê pĩ kahpa hã anhõ. Anê.

Mě kot Jejus tak ã mě harēnh

Matêwre 27.27-32; Juãw 19.2-3

16 Tã nhũm pôristijaja akupým ixkreja wýr Jejus o axà nē amnhĩ wýr hkwyjê hã karō nhũm mẽ hwýr agjê nē Jejus ã akuprō.

17 Hãmri nē kêp pahi hã hpēr o pikēnh kaxyw kãm pahi hã mẽ ahkà nhĩpêx nē hkrãm haxà. Nom axtem nē akunĩ kamã mẽmo mrō nhĩ te kot ronh kanêre pyrāk xwýnhja nhũm mẽ kãm hikãx nē hkrãm haxà. Hãmri nē kêp ê kapa nē pahi hã mẽ ê kamrêk õ py nē kãm haxà.

18 Hãmri nē kãm:

—E apê Ijaewjê nhõ pahi na ka. Anê.

19 Hãmri nē xatã axpēn pãnhã hwýr mra nē pĩ ho hkrãx pê htak nē hkuk kuhtō nē hã hpēr o pikēnh pê hã hpijaãm pyrã nē kutã hkõn krã ho hkrĩ.

20 Hãmri nē kêp pahi xê kapa nē akupým kãm ê jaxà nē pĩ kahpa hã nhôr kaxyw ma o kato nē o tẽ.

21 Nom nhũm ra hiro tỳx nē nhũm mẽ tee ri omu hãmri nē mẽhõ kot ho ajuta kaxyw mẽ kot hkôt omunh o mör xwýnhjê kapi ho xa. Hãmri nē Sirēn nhõ xwýnh Simãw hkà htykreja pumu. Aresãn mẽ Rupti wa hipêêxà na pre. Nhũm htỳx hamakêtkati nē mẽ kutã krĩm tẽ. Hãmri nhũm mẽ haê nē unê nē kãm Jejus o ajuta kaxyw hã karō nhũm kãm pĩ kahpaja mý nē mẽ hkôt o tẽ.

Mě kot pĩ kahpa hã Jejus nhôr ã mẽ harēnh

Matêwre 27.33-44; Rukre 23.33-43; Juãw 19.17-27

22 Nhũm mẽ ra kēn nhĩxêt te kot mẽ hkrã hi pyrāk xwýnhja wýr Jejus o pøj. Mě kot kãm “Korkot” anhýr xwýnhja wýr. Mě pakapēr kãm na htem Korkotja jarēnh o: “Mě hkrã hi xà” anê. Jakamã nhũm mẽ ra hwýr o pøj.

23 Hãmri nē kot pĩ kahpa hã nhôr kaxyw wĩhti hkwy ho mẽ mẽmo mẽhkanexà pé mĩra ho ahkà. Kot ho kôm nē amnhĩ xà htỳx kãm hamak kêt kaxyw hipêx nē kãm kugõ nom nhũm hkaga nē ho hkõm kêt nē.

24-26 Hãmri nhũm myt kaxkwa nhĩpök wýr tẽ nhũm mẽ pĩ kahpata ã Jejus xi nē prek o ìhkra ho htỳx nē hpar o htỳx. Nē hpãnhã kaxyw kakwý nē kãnhmã pĩ kahpa jarĩ nē kre kamã ãm nē hity hpa. Nhũm Jejus kỳx pé amnhĩ xà htỳx kumrêx kamã hamak o ajêt. Nhũm pôristi hõja tẽ nē tapti hõ py nē hã kagà ho:

IJAEWJÊ NHÕ PAHI NA JA

Hãmri nē Jejus wýr ho api nē mý ri kunhõ. Hãmri nhũm hparpê pôristi hkwyja axpēn mã ê hkwy ho hpigrãnh kaxyw hã kēnre ho jõka ho hkrĩ.

27-28 Tã nhũm mẽ wa kot amnhĩ tomnuj xwýnh wa ho axkrut nē mã wa ho anê nē. Nē pĩ kahpa hã prek o wa ìhkra ho htỳx nē wa hpar o htỳx hãmri nē akutã ho Jejus nhĩjê nhũm wa ajêt.

29 Hāmri nhūm mē kot omunh mā mrrar xwŷnhjaja Jejus pumu nē hā hpēr o pikēnh punuj nē hkrā ho apē nē kām:

—Kwa na ka pre ate Tirtūm mā amnhī jarēnh xà hā ixkre grānh par nē atā apkati axkrunēpxi nē akupŷm hipēx par ā amnhī jarēnh o apa. Nē axāhpumunh o axāhpumunh ā amnhī jarēnh o apa.

30 Jakamā e kwa amnhī kapa nē wrŷ pa mē ja hā apumu. E kwa tokyx. Anē.

31 Nē patre krāhtūmjē mē Tirtūm kapēr tūm o mē ahkre xwŷnhjaja piitā hwŷr mra nē hā hpēr o pikēnh o kuhē. Nē axpēn mā kapēr o:

—E jahti na xep pre mē kamā ukapri ho pa nē tanhmā mē ho ajuta hto ho pa. Tā tām tanhmā amnhī to nē wrŷk kēt nē.

32 Kwa pu mē arī pakuhē nē kot amnhī kaxār nē wrŷk kām omu. Koja wrŷ pu mē omu nē kēp mē panhō pahiti hā hkôt pajamaxpēr kurē kumrēx. E tokyx wrŷ Jejus pa mē awrŷk kām apumu. Nā kot kaj awrŷk rax nē. Anē.

Hāmri nhūm akutā wa kot hijē nē jēt xwŷnh wa haxwŷja kām kapēr punuj o ajēt.

Jejus htyk ā harēnh

Matēwre 27.45-46; Rukre 23.44-49; Juāw 19.28-30

33 Tā nhūm ra kaxkwa nhīpōk ri myt nhŷr mē nhūm te kamāt pyrāk. Nhūm kamāt kō rax kumrēx o ra hā awry mē nhūm akupŷm myt katēr o mō.

34 Hāmri nhūm Jejus àmra kamā Tirtūm mā kapēr nē kām:

—Inhō Tirtūm inhō Tirtūm. Kwa mon ka ixkaga? Anē.

Nom kapēr kām kapēr o:

—Eri Eri rāmā sapatani. Anē.

35 Hāmri nhūm mē kot mar o kuhē xwŷnhjaja kot Eri hā harēnh ma nē htŷx ho finat Eris mā kapēr ā hkamnhīx.

36 Hāmri nhūm ja hprōt nē mēmo rereeti py nē pī ho hkanhwŷ nē o tē nē ho wīhti nhek nē Jejus wŷr o tē nē kot hkaōr kaxyw kām kupē. Hāmri nē hkwyjē mā kām:

—E hāmri pu mē jar hkàx ā pakuhē nē Eris jamā mǎn. Koja kuma nē hwŷr tē nē o wrŷ nà? Anē.

37 Nom nhūm Jejus ra htyk kaxyw nē àmra htŷx nē ty.

38 Hāmri nhūm Tirtūm mā amnhī jarēnh xà hā ixkre kamā hakwakre hā kupēxēja axkjē nē amnhī kahē xà mēnh kurē kumrēx. Utī rax tā kŷj rūm ahpar mā axkjē nē amnhī kahē xà mē. Te Jejus htyk o mē pahte hkôt amnhī xunhwŷr xwŷnhjē mā Tirtūm wŷr pry jakwa kre kahē xà mēnh pyrāk o ā amnhī kaxōnh anē.

39 Nhūm pōristi krāhtūmjē hōja Jejus parpē kutā htyk kām omunh o xa. Hāmri nē tee ri omu nē hamaxpēr o:

—Hēxta waa nē. Ām hāmri na pre hte kēp Tirtūm Kra hā amnhī jarēnh o pa. Tā pa mē amarī kupī. Anē.

40-41 Rōm nhūm mēni kwŷjaja amŷm htyk kām omunh o kuhē. Na pre htem

Garirej kamã Jejus mẽ hkõt mẽ pa ho mẽ pa xwÿnhjê mã mẽ apkur xà hã àpênh o mẽ hkõt pa nê mẽ hkõt Jerujarê hwÿr mõi. Marir Matarên nê Xiakre mẽ Jojes wa katorxà Marirja. Nê Sarome. Nê mãânên mẽni hkwÿjaja nhũm mẽ amÿm Jejus htyk kãm omunh o kuhê.

Mẽ kot Jejus jaxàr ã harênh Matêwre 27.57-61; Rukre 23.50-56; Juãw 19.38-42

⁴² Nhũm prem arĩgro pê sêsta hã Jejus pĩ nhũm ra amÿkry htÿx nê. Sap kukamã na pre htem Ijaewjaja amnhĩm apkur xà hã mẽõ nhĩpêx pa nhũm sap kato nhũm mẽmoj to anhÿr kêt nê.

⁴³ Jakamã nhũm Juje hõ pê Arimatej nhõ xwÿnhja. Kêp Ijaewjê nhõ juisti hõ na pre. Nhũm mẽ piitã kãm hkĩnh nê axpên mã mex o mex ã harênh o pa. Na pre Tĩrtũm kot mẽ pahwÿr Jejus mẽnh kõt hamaxpêr o pa. Tã Jejus htyk ã omu hãmri nê hamaxpêr o:

—E pa ma pahi Pirat wÿr tẽ nê Jejus nhĩ hã kuwÿ. Inhmã uma htã kot paj ma hwÿr tẽ nê hã kuwÿ kẽ inhmã kugõ pa ma o tẽ nê tokyx haxà. Kot paj ho anhÿr tokyx anhÿr kêt nhũm mẽ panhõ arĩgromnu pê sapja wÿr ra myt axà hãmri pa haxàr kêt nê.

Anhÿr o hamaxpêr nê ma Pirat wÿr tẽ nê hã kuwÿ.

⁴⁴ Hãmri nhũm amnhĩ jaêr pê ra htyk ã harênh ma nê amnhĩ wÿr pòristi krãhtũmjê

hõ hã karõ nê hã hkukja nê kãm:

—Kwa xà na ra Jejus ty? Anê.

Hãmri nhũm kãm:

—Tÿ na ra ty. Anê.

⁴⁵ Hãmri nhũm kuma nê Juje mã kãm:

—Tõe. Mamrĩ ma o tẽ nê haxà. Anê.

⁴⁶ Hãmri nhũm kuma nê akupÿm Jejus wÿr tẽ nê pòristi mã anê nhũm mẽ kãm ho wÿr. Nhũm kumÿ nê kupêxê ho hkupu hpa nê o tẽ nê kên kre kakwÿnh kãm haxà. Hãmri nê kên rax o hitom mex nê ma akupÿm krĩm tẽ.

⁴⁷ Nhũm Marir Matarên mẽ Juje katorxà Marir õja wa ma hkõt tẽ nê kot haxàr kãm omunh o xa. Kot mẽ hkuxwa xà ho gregrer kêt rãhã haxàr kãm omu.

16

Jejus akupÿm htĩr ã harênh Matêwre 28.1-10; Rukre 24.1-12; Juãw 20.1-10

¹⁻² Tã nhũm apkati. Nom nhũm ra mẽ inhõ arĩgromnu pê sap kator jakamã nhũm mẽ kormã akupÿm kênkreta wÿr mmar kêt nê. Hãmri arĩgro mex jamãr pê kòkõt o hkrĩ. Hãmri nhũm axte apkati nhũm tòmĩk nhũm ra mẽ inhõ arĩgromnu hapêx nhũm Marir Matarên mẽ Sarome mẽ Xiakre katorxà Marirja mẽ ma akupÿm kênkreta wÿr mra. Kormã kwÿhtãã. Kormã myt kator o mõi mẽ nhũm mẽ kãnhmã hkrĩ hãmri nê mẽ kot Jejus gregrer kaxyw mẽ hkuxwa xà hkwÿ jamÿ nê ma hwÿr o mra.

³ Hāmri nē kormā mōr ri tee ri amnhī kukamā hamaxpēr nē xepēn mā:

—Xê gàà nē. Mēhō koja mē pamā nhām kēnkre nē hitom raxta xām pu mē Jejus wỳr agjê nē gregrer? Utī rax kumrēx kēnā. Anē.

⁴ Hāmri nē hwỳr pōj nē omu nhūm ra hitom xàja kàx ã nō nhūm mē tee ri omu. Utī rax tã ra kàx ã nō.

⁵ Hāmri nhūm mē kēnkre hwỳr agjê nē upók rùm mēhō nyw pumu. Nhūm ê jakajre kamā nhỹ nhūm mē amnhī jaêr pê omu nē tee ri hamaxpēr.

⁶ Hāmri nhūm mē kām:

—Kwa mē amā ma hkêt nē. Mē ate Najare nhō xwỳnh pê Jejus pumunh kaxyw na ka mē mra. Mē kot pī kahpa hã nhōr xwỳnhnta. Nom jar amrakati. Na ra Tirtūm akupỹm ho htĩr. E mē kam nē amnē agjê nē ano ho nōr xà kaprỹ pumu

⁷ nē tokyx ma akupỹm mra nē hkôt mē pa ho pa xwỳnhjê mã harê. Koja ma Jejus mē akukamā akupỹm Garirej wỳr mō. Garirej kamā kot kaj mē axte xepēn pumu. Ra kot mē amā amnhī jarēnh xà hkôt. Kwa mē tokyx ma akupỹm mē hwỳr mra. Nē kwa kê Simāw Pêtreja harēnh mar mex nē. Anē.

⁸ Hāmri nhūm mē kuma nē awjanā nē ma akupỹm hprôt. Nē tee ri hamaxpēr nē kām ma xàj htertet tỳx jakamā kormã nhām mēhō mã harēnh kêt nē.

Jejus kot Marir Matarēn wỳr kator ã harēnh

Juãw 20.11-18

⁹ Nhūm semãn nyw mã àr xà hã arĩgro pê tòmĩkja ã nhūm Jejus akupỹm htĩr. Hāmri nē Marir Matarēn kumrēx wỳr kato. Kot nē mēkarōmnuti ho 7 nē nē hanor xwỳnhnta kumrēx wỳr kato.

¹⁰ Hāmri nhūm akupỹm htĩr kām omu nē hkĩnh tỳx kumrēx. Nē ma akupỹm tē nē Jejus kràmnhwỳjê mã harê. Nhūm mē hkaprĩ nē mỳr o hkrĩ nhūm mē hwỳr axà nē mē omu nē mē kām:

¹¹ —Xê mē amỳr kêt nē. Na ra Jejus akupỹm htĩr nē ham ixwỳr kato pa inhno ho omu. Xê mē hāmri axte amỳr kêt nē.

Anhỹr tã nom nhūm mē htỳx ho amnhī krã hkôt kot ri ã harēnh anhỹr ã hkamnhĩx jakamã kuma nē ãm kuma.

Jejus kot hkwỳjê hwỳr kator ã harēnh

Rukre 24.13-35

¹² Tã nhūm Jejus axte ja wa hwỳr kato. Kôt mē pa ho pa xwỳnh wa ho axkrut nē wa hwỳr kato. Na pre wa Jerujarē rùm kato nē akupỹm wa ô krĩ hwỳr mōr mē nhūm wa hwỳr kato. Nom axtem tanhmã amnhī nhĩpêx to nē wa hwỳr kator jakamã nhūm wa tokyx hprĩ hã kêp Jejus ã omunh kêt nē.

¹³ Tã kêp Jejus ã omu hāmri nē akupỹm Jerujarē hwỳr mō nē hkwỳjê mã harēnh kurê kumrēx. Nom nhūm mē wa kuma nē ãm wa kuma nē akupỹm htĩr kôt hamaxpēr kêt nē.

*Jejus kot hkwỳjê mã mẽmoj
tã karõ hã harênh*

*Matêwre 28.18-20; Rukre
24.44-49; Juãw 20.19-23;
mããnên Atre 1.6-8*

¹⁴ Tã nhũm Jejus tã hkôt mẽ pa ho mẽ pa xwỳnh pê 11 wỳr kato nhũm mẽ kamã no pyma nê hkĩnh tỳx nê omunh o kuhê. Hãmri nhũm mẽ kãm:

—Kwa hêxta waa nê. Marir Matarênh mẽ akwỳta mẽ kot akupỳm ixtĩr kãm ixpumunh nê mẽ amã ijarênh tã ka mẽ ama nê ãm mẽ ama. Pêr ãm mẽ akrã hihtỳx jakamã na ka mẽ ama nê mẽ hkôt aja-maxpêr kêt nê. Anê.

¹⁵ Hãmri nê mẽ kot tanhmã kãm amnhĩ nhĩpêx to ho pa hã mẽ kãm karõ nê mẽ kãm:

—E kêr ka mẽ ma krĩ piitã hkôt mẽ kãm ijarênh o ri mẽ hkôt apa. Ixte tanhmã mẽ nê amnhĩ nhĩpêx toja ka mẽ aprĩ hã mẽ kãm ijarênh o ri mẽ hkôt apa.

¹⁶ Nê mẽ kot mẽ akapêr mar nê amnhĩ kaxyw ixkôt hamaxpêr xwỳnhjaja kêr ka mẽ hkrã kumrã nhũm mẽ nhỹrmã Tĩrtũm mẽ wa ixri htĩr tũm nê mex rãhã nê pa ho pa. No mẽ kot amnhĩ kaxyw ixkôt hamaxpêr kêt xwỳnhjaja koja Tĩrtũm nhỹrmã amnhĩ nê mẽ hano nhũm mẽ ma kuwy hwỳr pa.

¹⁷ —Nê amnhĩ kaxyw ixkôt mẽ ajamaxpêr xwỳnhjaja kot kaj mẽ inhỹ hã tanhmã amnhĩ nhĩpêx to ho ri apa. Aa mẽ kot mẽmoj pumunh kêt kwỳ ho anê nê inhỹ hã inhĩxi jarênh kôt mẽ nê mẽkarõmnuti janor o ri mẽ hkôt apa. Nê mẽ ate nhãm mẽ kapêr mar

kêt tã inhỹ hã ho akapêr mex o apa. Mẽ ate mar kêt tã ra ho akapêr nhũm mẽ kot mẽ kapêrta mar xwỳnhjaja hprĩ hã mẽ amar mex nê.

¹⁸ Nê kot kaj mẽ nhỹri atỳx kagã xoprê hõ hpyr tã no nhũm tanhmã mẽ ato hkêt nê. Rỳ atỳx mẽmoj to mẽ hpar xà hkwỳ ho akõm tã no nhũm tanhmã mẽ ato hkêt nê. Nê inhỹ hã mẽ à xwỳnhjê hã mẽ anhĩhkra jaxwỳ nhũm mẽ akupỳm mex. Kot kaj mẽ amnhĩ kaxyw ixkôt mẽ aja-maxpêr xwỳnhjaja ã inhỹ hã amnhĩ nhĩpêx anhỹr o ri apa. Anê.

*Jejus kot akupỳm kaxkwa
hwỳr àpir ã harênh*

*Rukre 24.50-53; mããnên
Atre 1.6-11*

¹⁹ Tã nhũm mẽ panhõ Pahihti Jejusja hkôt mẽ pa ho mẽ pa xwỳnhjê mã kapêr pa hãmri nhũm Tĩrtũm ma akupỳm amnhĩ wỳr kaxkwa hwỳr ho api. Hãmri nhũm kaxkwa kamã Tĩrtũm nhĩhkô hã upòk rũm nhỹ. Kot ãhkô hã mẽmoj piitã ho amnhĩptar kaxyw hkrĩ ho hkrĩ.

²⁰ Hãmri nhũm hkôt mẽ pa ho pa xwỳnhjaja ma akupỳm àpir kãm omu hãmri nê angrã nê ma krĩ piitã hkôt mẽ kãm Tĩrtũm kapêr jarênh o pa nhũm Pahihti Jejus mẽ ãhkô hã pa ho pa. Nhũm mẽ ma ã hã hkwỳjê mã aa mẽ kot mẽmoj pumunh kêt kwỳ ho anhỹr o ri mẽ hkôt pa nhũm mẽ ja hã mẽ omu nê axpên mã mẽ harênh o:

—Nà ãm hãmri na mẽ pamã Tĩrtũm kapêr jarênh o pa nê

ho hêx kêt nê. ÿ hã mẽ kot aa
mẽ pahte mẽmoj pumunh kêt
kwý ho anhÿr o pa kênã. Nà
ãm hãmri na ã mẽ pamã kapêr
jarênh anhÿr o pa. Anê.

Ja kôt na Makre kot Jejus
jarênhja hapêx.

Rukre Rukre tanhmã Jejus kot amnhĩ nhĩpêx to ho pa hã kagà

Rukre na pre kagàja nhĩpêx. Kêp Ijaew kêt xwýnh na pre. Tã amnhĩ kaxyw Jejus kôt hamaxpêr. Na pre kêp tôtô nê mẽ hkane ho pa. Nê Jejus nhỹ hã kapêr o pa xwýnhjê hõ pê Pawreja kôt pa ho pa. Tã tanhmã hamaxpêr to nê hkràmnhwý Teopre mã kagàja nhĩpêx nê kamã tanhmã Jejus kot amnhĩ nhĩpêx to ho pa hã harê nê hã kagà.

Nê Jejus kêp Tirtũm nhỹ hã kapêr o pa xwýnh ã harê. Nê mẽ pahpyrà nê ĩ ho ĩ hã harê. Nê kêp mẽ pakamã ukaprĩ xwýnh ã harê. Nê kêp mẽ pahte amnhĩ tomnuj o hapêx xwýnh ã harê. ã na pre Rukreja hkràmnhwý Teopre mã Jejus jarê nê hã kagà anê. Nê mãânên mẽ pahpiitã mẽ pakaxyw harê nê hã kagà.

Rukre kot Teopre mã amnhĩ jarênh

Atre 1.1-2

¹ Pa pahi Teopre. Xà amex? E ot pa awýr kagà nhĩpêx nê awýr kumê. Ixte amã Jejus jarênh kaxyw. Na prem ra ohtô nê jar mẽ pahkôt Jejus kot amnhĩ nhĩpêx o pa hã kagà rax nê.

² Jejus nhỹ hã Tirtũm kapêr jahkre ho mẽ pa xwýnhjaja na prem Jejus kot tanhmã amnhĩ nhĩpêx to hkrax kãm kot amnhĩ nhĩpêx o pa hã

omunh o hkôt pa. Hãmri nê hprĩ hã mẽ inhmã harê nê hã kagà nhũm mẽ ohtô nê mẽ mar xà hkôt mẽ urà nê kot tanhmã amnhĩ nhĩpêx to ho pa hã kagà.

³ Tã pa mẽ harênh ma nê ijamaxpêr o:

—E kot paj ijaxwýja Jejus kot amnhĩ nhĩpêx kwý hã kagà. Nà kot paj ho anê.

Anhỹr o ijamaxpêr jakamã ot pa ra ixte amã hã kagà kaxyw.

⁴ Tã kêr ka kamã harê nê ixpyrà nê ama nê aprĩ hã harênh mar tỳx nê mẽ kot amã harênh xwýnhjê hkôt ajamaxpêr tỳx o apa. ãm hãmri na prem mẽ amã harê. E kot paj amã hkwy hã kagà. Ixpê akràmnhwý Rukre kot paj ixprĩ hã amã harê nê hã kagà.

Tirtũm kapêr o wryk xwýnh kot Juãw Paxis jarênh

⁵ Juãw Paxis nhĩpêxà finat Jakarisja kumrêx kot paj amã harê. Kêp finat Apiasti kanrêhã htàmnhwý jakamã urak nê kêp mẽ apê Ijaew nhõ patre na pre. Pahihti Eroxxja kormã kot mẽ anhõ pika kamã mẽ ho amnhĩptâr ri nhũm Jakaris kêp patre nê pa. Nê hprõ Ijapew mẽ wa kêp Parãw kanrêhã htàmnhwý.

⁶ Nê wa hamê na pre Tirtũm kôt tãm amnhĩ nhĩpêx o wa pa. ãm Tirtũm kapêr kôt pix mã ri amnhĩ nhĩpêx rãhã ho wa pa.

⁷ Nom Ijapewja tanhmã hkra xà kute jakamã nhũm

wa hkra hkêt nê wa pa rãhã
wa ra hpigêx tÿx nê.

⁸ Jakamã nhũm Jakaris ma
mê kot Tirtũm mã amnhĩ
jarênh xà hã ixkre hwÿr tẽ.
Kwÿjê pyrã nê kot Tirtũm
mã tanhmã amnhĩ nhĩpêx to
kaxyw ma mê hpãnhã hwÿr
tẽ nê axã.

⁹⁻¹⁰ Hãmri nê kamã Tirtũm
mã amnhĩ jarênh pê kãm
mê hkuxwaxã ho xêt o xa.
Nhũm Ijaew kwÿjaja ixkreta
wÿr akuprõ nê kapem kutêp
Tirtũm mã amnhĩ jarênh o
kuhê.

¹¹ Pu nhũm kaxkwa rũm
Tirtũm kapêr o mê wrÿk
xwÿnhja wrÿ nê Jakaris kutã
xa. Mê hkuxwa xà ho xêt xà
hã mês kunĩhti xupòk rũm xa.

¹² Hãmri nhũm amnhĩ jaêr
pê amnhĩ kutã omu nê akryk
omunh o xa.

¹³ Hãmri nhũm kãm:

—Pa Jakaris? Kwa tee ri
ajamaxpêr o amã ma hkêt nê.
Na pre Tirtũm ate akra hã
hwÿr o apa hã ama nê hã
apumu. Jakamã koja tanhmã
aprõ hkra xà ho ka kamã
akra. Nhũm nõ nê rax nê kato
nê myre. Ka wa hã hixi mê
nhũm kêp Juãw.

¹⁴ Koja kato ka wa omu
nê akĩnh tÿx kumrêx. Nhũm
akwÿjaja haxwÿja ohtô nê
war akra jarênh ma nê war
anhÿ hã hkĩnh nê.

¹⁵ Koja kormã akra kator
kêt ri nhũm Tirtũm Karõja
hkarõ hwÿr axã. Hãmri nhũm
kato nê gaa nê hprêk nê
Tirtũm mã tanhmã amnhĩ
nhĩpêx to ho pa. Tirtũm
kãm hprãm xà hkôt pix mã
tanhmã amnhĩ nhĩpêx to

ho pa. Nom kêr ka inhmar
kumrêx. Kê mẽmoj to wĩhti ho
hkôm kêt nê pa. Nê kagôxyhti
ho hkôm kêt nê pa. ãm kwarĩ
ho kwarĩ.

¹⁶ Koja hprêk hãmri nê
mê apê Ijaew mã Tirtũm
kapêr jarênh o mê hkôt pa.
Nhũm mê ohtô nê kuma nê
kot amnhĩ tomnuj kaga nê
Tirtũm kôt amnhĩ xunhwÿ nê
hkôt amnhĩ nhĩpêx mex o pa.

¹⁷ —Tirtũm kot mê awÿr mê
apytãr xwÿnh maati mẽnh mã
xwÿnh kukamã koja mê kãm
harênh o pa. Te Tirtũm nhÿ
hã kapêr jarênh xwÿnh finat
Eris kot amnhĩ nhĩpêx pyrãk
o koja amnhĩ nhĩpêx. Nê urãk
nê Tirtũm Karõ nhÿ hã mê
amã Tirtũm kapêr jarênh o
mê akôt pa. Jakamã nhũm
mê akwÿjaja kuma hãmri nê
amnhĩ tomnuj kaga hpa nê
Tirtũm kôt pix mã amnhĩ
nhĩpêx o pa. Nê tãm mê
hkrajê nhĩpêx o pa. Koja mê ã
akra Juãwja kôt amnhĩ nhĩpêx
anê. Jao Tirtũm kot mê awÿr
mẽnh mã xwÿnhhta kutêp tãm
amnhĩ nhĩpêx o pa. Anê.

¹⁸ Nhũm pre ã Tirtũm kapêr
o wrÿk xwÿnh Jakaris mã
hkrata jarênh anê. Hãmri
nhũm tee ri kuma nê kãm:

—Kwa xà we ãm hãmri na
ka ã inhãmã ixkra jarênh anê
nã? Ra ixprõ mê wa ijamê wa
ixpigêx tÿx kênã kot pa kêt wa
ixkra. Anê.

¹⁹ Hãmri nhũm kãm:

—Nã ãm hãmri na pa ã amã
harênh anê. Ixpê Gapriew na
pa ã awÿr ixwrÿk nê Tirtũm
nhÿ hã amã harênh anê. Ixte
Tirtũm nhĩhkô hã ixkuhê

xwÿnhjê hõ na pa. Tãm na awÿr inhmê pa awÿr wrÿ nê ã amã akra jarênh anê.

²⁰ Tã ate ixkôt ajamxpêr kêt jakamã kot kaj axte axumar kêt nê akapêr kêt rãhã nhũm akra kato. Koja kato ka rĩ kormã akupÿm akapêr nê akupÿm ama. Ate ixkôt ajamxpêr kêt jakamã kot kaj ã amnhĩ nhĩpêx anê nê rĩ amnhĩ pumu. ãm hãmri na pa ã amã ixkapêr anê. Anê.

Nhũm pre ã Tĩrtũm kapêr o wrÿk xwÿnhja Jakaris mã kapêr anê. Jakamã nhũm tokyx ixkre rũm kator kêt nê.

²¹ Hãmri nhũm ixkre kapem mẽ kuhê xwÿnhjaja tee ri kamã ama nê axpên mã:

—Tk. Kwa mo na we ri hitom kãm ho anhÿr kãm unê nê tokyx kator kêt? Anê.

²² Tã nhũm akupÿn mẽ hwÿr kato. Nê tee ri kot mẽ kãm kapêr kaxyw no ãm ìhkra pix o ri mẽ kãm tanhmã ujahkre hto. Hãmri nhũm mẽ amnhĩ jaêr pê kot ã amnhĩ nhĩpêx anhÿr ã omu nê tee ri hkukamã hamaxpêr nê axpên mã:

—Kwa tanhmã na we amnhĩ to? Mãn hitom kãm mẽmoj tanhmã kute hã omu hã na ri ã amnhĩ nhĩpêx anê nã? Anê.

²³ Hãmri nhũm Jakaris ixkre kamã mẽmoj tã àpênh pa hãmri nê ma akupÿm òrkwÿ hwÿr tẽ.

²⁴⁻²⁵ Tã nhũm hprõ Ijapewja htujarô. Hãmri nê amnhĩ tujarô hã amnhĩ pumu nê hkĩnh tÿx nê. Nê hamaxpêr o:

—Hêxta gàu nê. Ma ãm hãmri na pa pre ixkra hkêt nê amnhĩ kamã ixpijaàm o ri ixpa. Tã ra ixtujarô. Kot paj wa axte ri amnhĩ kamã ixpijaàm kêt nê. Ma ãm hãmri na Tĩrtũm ã wa inhĩpêx anê. Na pa wa ixkĩnh tÿx kumrêx. Anê.

Nhũm pre ã hamaxpêr anê hãmri nê arĩ òrkwÿ kamã hkrĩ ho hkrĩ. Aa nhÿhÿm kator nê mör kêt rãhã hã mytwrÿ kêp 5.

Tĩrtũm kapêr o wrÿk xwÿnh kot Marir mã hkra jarênh

Matêwre 1.18-21

²⁶ Tã nhũm Ijapew ra htujarô hã mytwrÿ kêp 6 nhũm Tĩrtũm axte kapêr o wrÿk xwÿnh pê Gapriewja mẽ. Nhÿri Garirej kamã krĩ pê Najare hwÿr kumê nhũm ma hwÿr wrÿ.

²⁷ Mêhõ pê Marir wÿr wrÿ. Nhũm ra Juje ho mjên kaxyw. No ãm kormã hkukrit rãhã ho mjên kaxyw. Jujeja Marir pyrã nê kêp pahi finat Tawi kanrêhã htãmnhwÿ na pre.

²⁸ Jakamã nhũm Gapriew Marir wÿr wrÿ nê kãm:

—Pa Marir? E ot pa amã Tĩrtũm kapêr jarênh kaxyw awÿr wrÿ. Kot akôt pa ho pa jakamã koja ato mex rax kumrêx. Anê.

²⁹ Hãmri nhũm amnhĩ tã kuma nê tee ri hamaxpêr nê hamaxpêr o:

—Xê mẽmo na we ri ã inhmã kapêr anê? Tanhmã koja we Tĩrtũmja ixto mex rax to? Anê.

³⁰ Hãmri nhũm Gapriew kãm:

—Kwa tee ri amnhĩ kukamã ajamaxpêr kêt nê. Tĩrtũm kãm ajapêê.

³¹ Kot kaj atujarô nhũm akra kato nê myre. Ka hã hixi mẽ nhũm kêp Jejus.

³²⁻³³ Koja Tĩrtũm amã ho mex rax nê. Nê koja mẽ piitã mẽ kãm kêp amnhĩ Kra hã ho amnhĩrit. Nê mẽ apê Ijaew o amnhĩptâr kaxyw koja mẽ akaxyw ãm nhũm higêt pahi Tawi pyrã nê mẽ ato amnhĩptâr o pa. Mẽ ate amnhĩ wỳr kamã ajamak o apa xwỳnhta koja. Tĩrtũm kãm hprãm xà hkôt koja mẽ ato amnhĩptâr rãhã ho pa. Anê.

³⁴ Nhũm pre ã kãm kapêr anê nhũm amnhĩ tã kuma nê tee ri amnhĩ kukamã hamaxpêr hãmri nê kãm:

—Xê gàà nê. Tanhmã kot pa kêt we amnhĩ to nê ixtujarô? Kormã ixkukrit nê mo kormã inhmjên? Mê. Xà Juje kot ixkamã hkra hkukamã na ka ã ri inhmã axujarênh anê? Anê.

³⁵ Hãmri nhũm kãm:

—Nà koja Tĩrtũm Karô tãm tanhmã ato ka ý hã tanhmã amnhĩ to hkêt tã atujarô. Jakamã koja akra kêp Tĩrtũm Kraa.

³⁶⁻³⁷ Na ra haxwỳja anã Ijapewja htujarô. Ra hpigêx tỳx nê aa hkra hkêt nhũm hkwyjaja kot axpên mã ôhy kamã hkra hkêt kumrêx ã harênh o pa htã ra htujarô. Tĩrtũm kot tanhmã mẽ ho nhũm mẽ htujarô tanhmã kêp kute hkêt. Jakamã nhũm tanhmã ho nhũm mjên tãm htu nhũm ra htujarô hã

mytwrỳ kêp 6. Tĩrtũm tãm kot mẽmoj piitã tanhmã ho kaxyw ãhpumunh xihtỳx. Jakamã koja urak nê mã ato anê nê ka kormã akukrit tã atujarô. Anê.

³⁸ Nhũm pre ã Gapriew Marir mã kapêr anê nhũm amnhĩ tã kuma nê kãm:

—Ko. Kê mãmrĩ kãm tanhmã ixto hprãm xà hkôt mãmrĩ tanhmã inhĩpêx to. Inhmã Tĩrtũm kapêr kôt amnhĩ nhĩpêx prãm. Kê mãmrĩ kãm tanhmã ixto hprãm xà hkôt tanhmã inhĩpêx to.

Anê nhũm kuma nê ma akupỳm api.

Marir kot Ijapew wỳr mōr ã harênh

Rukre 11.27

³⁹⁻⁴⁰ Tã nhũm Marir amnhĩ tujarô hã amnhĩ pumu nê nã Ijapew wỳr hkrã kurê kumrêx. Hãmri nê nojarêt nê ô krĩ rũm kato nê ma hwỳr mō. Ma Ijapew papxà hwỳr mō. Ijapew nhõ krĩa pika pê Jutej kamã nhỹri hixêt kamã na pre. Nhũm ma hwỳr mō hãmri nê hwỳr pōj nê Ijapew wỳr axà nê omu nê kãm:

—Ka? Xà wa amex? Anê.

⁴¹ Hãmri nhũm kuma nê kãm:

—Ý ma wa inhmex na pa wa ixpa.

Anhỹrja kôt nhũm ôhy kamã hkraja haxwỳja te kot Marir kapêr mar nê amnhĩ nhĩpêx pyrãk o htu kamã ãxônh tỳx o nō. Hãmri nhũm Ijapew Tĩrtũm Karô nhỹ hã tanhmã Marir mã kapêr to.

⁴² Kàx pê kãm kapêr nê kãm:

—Xê gàà nê. Ra Tĩrtũm kot ato mex jakamã na ka akĩnh rax o mẽ inhni hkwỳjê jakrenh pa. Anhõhy kamã akraja koja Tĩrtũm amã ho mex rax nê.

⁴³ Xê mon ka ã ixto mex nê ixwỳr amõr anê? Apê inhõ Pahihti katorxà htã ixto mex nê ã ixwỳr amõr anê. Hêxta gàà nê. ãm hãmri na ka ixwỳr mõ Marir.

⁴⁴ Na ka ixwỳr mõn pøj nê inhmã akapêr hãmri nhũm ixtu kamã ixkrare akapêr ma nê hkĩnh xàj ixtu kamã ixkamnãr tỳx o nõ.

⁴⁵ Na ka pre Tĩrtũm kapêr o wrỳk xwỳnh kot amã kapêrja ma nê hkõt ajamexpêr tỳx nê. Jakamã kot kaj Tĩrtũm nhỹ hã akĩnh nê ajamakêtkati nê amex nê ri apa. Anê.

Marir kot Tĩrtũm mã mex o mex ã grer ã harênh

Rukre 6.20-26

⁴⁶ Hãmri nhũm Marir Ijapew kot ã kãm kapêr anhỹrja ma nê kãm Tĩrtũm mex o mex ã gre nê grer o:

Tĩrtũm na mex o mex.

⁴⁷ Kêp ixkaprĩ xwỳnh na.

Kêp ixkaprĩ xwỳnh jakamã na pa inhmex nê ixkĩnh nê ri ixpa.

⁴⁸⁻⁴⁹ Ixte amnhĩ to grire nhũm ja hã ixpumu nê ixkamã ukaprĩ nê ixto mex rax kumrêx.

Jakamã koja mẽ piitã axpên kanrêhã axpên mã ijarênh rãhã ho pa. Tĩrtũm kot tanhmã ixto mex to hã ijarênh rãhã ho pa.

Tĩrtũm na mex o mex nê hihtỳx o hihtỳx. Tã na ã inhĩpêx anê.

⁵⁰ Ma na hte ã amnhĩ nhĩpêx anê nê axpên kanrêhã mẽ kot hã hpijaãm xwỳnhjê pumu nê mẽ kutã nojarêt rãhã ho pa.

Nê mẽ kamã ukaprĩ rãhã ho pa.

ã na hte mẽ hipêx mex anhỹr o pa.

⁵¹ Nê hihtỳx o hihtỳx jakamã na hte mẽ kot amnhĩ to jarkrar o ri mẽ pa xwỳnhjaja tanhmã mẽ ho nhũm mẽ axkaprã.

⁵² Nê pahihti hkwỳ kot kapêr mar nê ãm mar xwỳnhjaja.

Na hte amnhĩ tã mẽ omu nê mẽ ãpênh nê mẽ hapøj nê mẽ hpãnhã mẽ kot amnhĩ to hkryre xwỳnh kwỳ jagjê.

⁵³ Na hte mẽ kãm kapêr kõt amnhĩ nhĩpêx prãm xwỳnhjê ho mex o pa nhũm mẽ mex nê pa.

No mẽ kãm hprãm kêt xwỳnhjaja nhũm tanhmã mẽ ho mex to hkêt nê.

⁵⁴⁻⁵⁵ ãm hãmri na pre amnepê mã mẽ panhĩgêt mã amnhĩ jarênh xà hkõt mẽ pahpê Apraãw rũm axpên kanrêhã hkrajaja mẽ pahto mex o pa.

Mê pahpê Ijaew mẽ pahte kãm tanhmã amnhĩ nhĩpêx to ho papa nhũm kãm mẽ pajapê

xàj mẽ pahto mex rãhã
ho pa.

Nẽ mẽ pakamã ukaprĩ rãhã
ho pa. Anẽ.

Nhũm pre ã Marir Ijapew mã
Tĩrtũm mex o mex ã grer anẽ.
56 Hãmri nẽ ri hkõt pa hã
mytwrý axkrunẽpxi nẽ ma
akupým õ krĩ hwýr mō.

Juãw Paxis kator ã harẽnh

57 Tã nhũm Ijapew hpjijagri
kaxyw õhy xà nhũm hkrare
kato nẽ myre.

58 Hãmri nhũm omu nẽ
hkĩnh týx nẽ. Hãmri nhũm
hkwýjaja Tĩrtũm kot wa kamã
ukaprĩ hã wa kãm wa hkra
myre nhõr ã harẽnh ma nẽ
wa ý hã hkĩnh nẽ.

59 Tã nhũm wa hkraja ra
hã arĩgro pẽ 8 nhũm mẽ
hkwýjaja kot my kwýrýt kà
krãhyr kaxyw hwýr akuprõ.
Tĩrtũm kot mẽ kãm hã karõ xà
hkõt nhũm mẽ kot kãm õr ã
amnhĩ to amnhĩrit kaxyw ã
hipêx anhýr kaxyw. Na htem
ã mẽ kęp Ijaew krajê piitã
mẽ hipêx anẽ. Jakamã nhũm
prem ã hipêx anẽ hãmri nẽ
hpãnhã tanhmã kot hã hixi
mẽn h to kaxyw ri hã axpẽn
kukja. Hãmri nẽ hipêêxà hkõt
kot hã Jakaris mẽn h kaxyw.

60 Hãmri nhũm katorxà tee
ri axpẽn tã mẽ kuma nẽ mẽ
kãm:

—Ma koja kęp Jakaris kêt
nẽ. Koja kęp Juãw. Anẽ.

61 Hãmri nhũm mẽ tee ri
kuma nẽ kãm:

—Koký. Mo jar mẽ pahtõ pẽ
Juãw kot kêt ri kęp Juãw? Jar
amrakati kẽnã kot ka kêt wa
ri ã hã hixi rẽn h anẽ. Anẽ.

62 Hãmri nẽ hixi hã hipêêxà
kukja. Nom nhũm arĩ umar

kêt nẽ kapër kêt jakamã
nhũm mẽ tanhmã ri kãm mẽ
ĩhkra nhĩpêx to.

63 Hãmri nhũm ĩhkra ho
kagà hã ahwý nhũm mẽ kãm
ja gõ nhũm kupy nẽ hã mẽ
kãm hixi nhĩpêx. Nhũm mẽ
kupy nẽ omu hãmri nẽ hixi pẽ
Juãw kõt omu. Hãmri nẽ tee ri
hixija kukamã hamaxpër.

64 Rôm nhũm Jakaris
akupým ama nẽ kapër mex
kurê kumrêx nẽ Tĩrtũm mã
mex o mex ã harẽnh o xa.

65-66 Hãmri nhũm mẽ omu
nẽ ma mẽ piitã mẽ kãm wa
hkra jarẽnh o ri axpẽn kõt
hprõt. Pika pẽ Jutej kamã
hixêt kape hã krĩ hkõt nhũm
mẽ ri mẽ piitã mẽ kãm harẽnh
o hprõt. Tĩrtũm kot wa hkra
kõt tãnopxar o pa nẽ ho mex ã
harẽnh o hprõt. Hãmri nhũm
mẽ kuma nẽ tee ri hkukamã
hamaxpër nẽ axpẽn mã:

—Hêxta waa nẽ. Tĩrtũm tãm
na xep hte jare hkõt ri pa
ho pa. Jakamã koja nhýrmã
hprêk hãmri nẽ tanhmã koja
we amnhĩ nhĩpêx to ho pa we-
hee? Anẽ.

*Jakaris kot Tĩrtũm nhý hã
kapër ã harẽnh*

67 Hãmri nhũm Jakaris
Tĩrtũm Karõ nhý hã Tĩrtũm
mex o mex ã harẽnh o xa.
Tĩrtũm kot mẽ kęp Ijaew o
mex ã harẽ nẽ mẽ kãm:

68 Hêxta waa nẽ. Nà Tĩrtũmja
mex o mex. Na pre hte
mẽ pahpãmjaja ãm hkõt
pix mã amnhĩ nhĩpêx
o pa. Jakamã nhũm
hte Tĩrtũm mẽ pahpê
hkrajê kamã ukaprĩ nẽ
mẽ pahto mex o pa.

E kwa pu mẽ kãm mex o mex
ã harënh rãhã nê.

69 Ra kot mẽ pahwÿr mẽ
pahkaprĩ xwÿnh pê
mẽ panhõ pahihti
mënh mã. Ja kaxyw
àhpumunh xihtÿx o
hihtÿx jakamã na pre
ra mẽ pahwÿr mënh ã
amnhĩ jarê.

Koja kêp amnepêm Tĩrtũm mã
tanhmã amnhĩ nhĩpêx
to ho pa xwÿnh Tawija
hkanrêhã htãmnhwÿ.

70 Amnepêm Tĩrtũm nhÿ hã
kapêr xwÿnhjaja na
prem mẽ kãm Tĩrtũm
kapêr jarênh o pa nê
mẽ kãm:

71 “Koja Tĩrtũm mẽ panê
mẽ kãm mẽ pahkurê
xwÿnhjê pumunh mex
o pa.” Anê.

72 Tĩrtũm ra kot mẽ pahpãmjê
mã amnhĩ jarênh xà
hkôt kãm mẽ pakamã
ukaprĩ rãhã ho pa
hprãm.

Koja aa ja ho anhÿr o
hamakêtkati hkêt nê.

73-75 Na pre ra mẽ pahpãm
Apraãw mã mẽ
pakukamã ã mẽ pahtã
amnhĩ jarênh anê nê
kãm: “Kot paj mẽ anê
mẽ kãm mẽ akurê
xwÿnhjê pumunh mex
nê mẽ ìhkra nê mẽ
ato ixkato. Jakamã
kot kaj mẽ amnhĩ
kamã amã mẽ uma
hkêt nê axãmnhĩx ri
ajamakêtkati nê mẽ
kamã apa. Nê kot kaj
mẽ mãmri axãmnhĩx ri
inhmã tanhmã amnhĩ
nhĩpêx to ho ri apa

rãhã nê. Nê ixkôt
amnhĩ nhĩpêx o ri
apa rãhã ty.” Anhÿr
o na pre Tĩrtũm mẽ
pakukamã mẽ pahtã
amnhĩ jarê. Anê.

Nhũm pre ã Jakaris mẽ kãm
Tĩrtũm kapêr jarênh anê.
Hãmri nê hkrareja my nê o
xa nê kãm:

76 —No ka Xugitre. Kot kaj
aprêk hãmri nê apê Tĩrtũm
maati nhÿ hã kapêr jarênh o
apa xwÿnh. Jakamã kot kaj
Pahihti hkukamã mẽ piitã mẽ
kãm harênh o ri mẽ hkôt apa.
Mẽ kot amar nê kutêp tãm
amnhĩ nhĩpêx kaxyw.

77 —Tĩrtũm kot mẽ nê mẽ
kot amnhĩ tomnuj rênh nê mẽ
ho hkra hã harênhja kot kaj
mẽ hkôt mẽ kãm harênh o ri
apa.

78 —Na hte Tĩrtũm mẽ
pakamã ukaprĩ ho pa nê mẽ
pakamã gryk tokyx anhÿr kêt
nê. Jakamã koja mẽ pahwÿr
mẽ pahkaprĩ xwÿnhja mẽ.
Kormã mẽ pahwÿr wrÿk kêt
jakamã te mẽ pahte kamàt kô
kamã tee ri mẽ paxàhkupênh
o ri papa xwÿnh pyræk.

—Nom koja mẽ pahwÿr
wrÿkja o te ra myt kator
nê mẽ pamã hirã nê mëmoj
to amnhĩrit mex pyræk o
mẽ panhĩpêx. Ja kaxyw
koja Tĩrtũm mẽ pahwÿr mẽ
pahkaprĩ xwÿnhhta mẽ nhũm
man mẽ pahwÿr wrÿ nê
mẽ pamã mẽ pahtyk puma
xwÿnhjê mã Tĩrtũm kapêr
o amnhĩrit o pa. Mẽ pahte
mar nê ra pajamakêtkati nê
paxãmnhĩx ri papa nê pahtyk
kaxyw.

79 —Mê kām mẽ htyk pyma xwỳnhjaja te kamàt kô kamā ri pa pyrāk. Tā koja mẽ pahkaprī xwỳnhja wrỳ hāmri nễ tanhmā mẽ hkrā hto nhũm mẽ te arĩgro hā ri mẽ pa xwỳnh kot amnhĩ nhĩpêx pyrāk o amnhĩ nhĩpêx. Jao hamakêtkati nễ axte kām htyk pyma hkêt nễ ri pa. Anễ.

Nhũm pre ã Jakaris Tĩrtũm Karō nhỹ hā hkrare mǎ kapêr anễ.

80 Tā nhũm Juāwja gaa nễ aptàr. Nễ Tĩrtũm kôt amnhĩ nhĩpêx o pa. Nom kormā kot ljaew jahkre ho pa hkêt ri kapôt ã ri mẽ puhā pa.

Ã na pre Juāw kator nễ amnhĩ nhĩpêx anhỹr o pa anễ. Na pre kato nễ hā mytwrỳ grêre hāmri nhũm Jėjusja hkôt kato.

2

Jejus kator ã harēnh

Matêwre 1.18-25

1-2 Na pre ã Jėjus kator anễ. Nhũm pre Rôm nhõ xwỳnhjê nhõ pahi Sesti Akusja õ pika piitā hkôt mẽ ho kôta kaxyw. Aa kot mẽ ho kôta hkêt tǎ ra kot mẽ ho kôta kaxyw. Kormā pahi Sirēn haxwỳja kot pika pê Sir kamā mẽ ho amnhĩptàr ri nhũm pahi Sesti Akus kot mẽ ho kôta kaxyw. Jakamā kām àpênh xwỳnhjê mǎ kapêr nễ mẽ kām:

—E kêr ka mẽ ho kôta kaxyw nễ mẽ piitā mẽ hixi hā kagà hpa. Anễ.

3 Hāmri nhũm mẽ piitā ã kot mẽ hipêx anhỹr ã amnhĩ tǎ harēnh ma hāmri nễ mẽ kot

mễ hixi hā kagà kaxyw piitā akupỹm papxà hwỳr ma hapêx.

4 Nhũm pre Marir mjên Juje haxwỳja ma krī pê Perěj wỳr mō. Garirej kamā õ krī pê Najare rũm kato nễ ma hwỳr mō. Pika pê Jutej kamā na Perějja. Kamā na pre Juje nhĩgêt Tawija kato.

5 Nhũm Juje kêp kanrêhā htàmnhwỳ jakamā na pre ma akupỹm hwỳr mẽ hkwyjê hkôt mō. Nễ ma amnhĩ kôt kot ho hprõ mǎ xwỳnh Marir o mō. Arĩ htujarô rax rāhā nhũm ma amnhĩ kôt o mō.

6 Nhũm wa mōõ hāmri nễ hwỳr pøj. Nhũm Marir hpi-jagri xà hā mytwrỳ mǎ àr jakamā nhũm kamàt nhũm õhy xà.

7 Nom nhũm Perěj wỳr mẽ hpôx nyw xwỳnhjaja ra ixkre piitā ho nýt pa nhũm wa tee ri hpijagri kaxyw amnhĩ to ukapi ho pa. Hāmri nễ nhỹri mōx nhõrkwỹ punajre hwỳr axà nhũm Marir kamā hpi-jagri. Nhũm hkra kato nễ myre. Kra kot wa na pre. Hāmri nhũm kumỳ nễ kupêxê ho hkupu hpa nễ mōx xàpkur xà hā kôsti kaprỳ kamā kuxi nhũm hamakêtkati nễ gōr nễ nō.

ôwêhti jamār xwỳnhjê jarēnh

8 Rôm nhũm ôwêhti jamār o mẽ pa xwỳnhjaja kapôt ã ri hkrit ôwêhti jamār o pa. Nhũm ra kamàt nhũm mẽ hamār o hkrī.

9 Pu nhũm kaxkwa rũm Tĩrtũm kapêr o wrỳk xwỳnhja wrỳ nễ mẽ mỳri ajêt. Hāmri

ně tanhmã amnhĩ to ně mẽ hpuhã ho hirã rax kumrêx. Nom nhũm Tĩrtũm tãm ã mẽ hipêx anê. Hãmri nhũm mẽ tee ri jawỳ Tĩrtũm kapêr o wrỳk xwỳnhja pumu ně kãm ma htỳx ně akryk omunh o hkri.

¹⁰ Hãmri nhũm mẽ kãm:

—Pa? Kwa mẽ amã ixpyma hkêt ně. Ixte mẽ amã mẽmoj mex jarênh kaxyw na pa mẽ awỳr wrỳ. Kot kaj mẽ harênh ma ně akĩnh ně. Nom mẽ kapxipixjaja kaj mẽ akĩnh kêt ně. Koja mẽ piitã ja jarênh ma ně mẽ apyrã ně hkĩnh ně pa.

¹¹ Na ra ham mẽ akamã ukapri xwỳnhhta kato. Pahi Tawi nhõ kri mẽ mẽ anhõ kri pê Perêj kamã. Kêp mẽ apiitã mẽ anhõ pahihti na. Mẽ ate amnhĩ wỳr kamã ajamak o apa xwỳnh pê Kris na. Tãm na ham kato.

¹² E pa ixpri hã mẽ amã tanhmã harênh to ka mẽ inhma. Na kato nhũm katorxã kupêxê ho kupu hpa ně kôsti kamã kuxi nhũm nõ. Kwa mẽ tokyx ma hwỳr mra ně kêp mẽ anhõ pahihti hã omu. Anê.

¹³ Nhũm pre ã mẽ kãm ujarênh anê. Hãmri nhũm hkwyjaja wamta kôt ohtôo ně mẽ hwỳr wrỳ ně puhã harir. Hãmri ně Tĩrtũm mã mex o mex ã grer o harir.

¹⁴ Nẽ hã grer o:

Tĩrtũm maati na mex o mex. Jakamã mẽ kãm hprãm xã kôt pix mã amnhĩ nhĩpêx o mẽ pa xwỳnhjaja koja amnhĩ tã mẽ omu ně tanhmã mẽ ho nhũm mẽ hamakêtkati ně àmnhĩx hkĩnh ně pa ho pa.

¹⁵ Anhỳr o grer o harir hãmri ně ma akupỳm kaxkwa hwỳr àpir pa ně akunok. Hãmri nhũm ôwêhti jamãr xwỳnhjaja mẽ kapêr ma ně ma akupỳm àpir ã mẽ omu ně axpên mã:

—E tokyx pu mẽ krĩm ně Tĩrtũm kot mẽ pamã ho amnhĩrit xwỳnhhta japêr ně tokyx nhỹri omu. Kwa ma pu mẽ tokyx hwỳr ně omu. Anê.

¹⁶ Hãmri nhũm mẽ ma hwỳr mra. Hãmri ně krĩm agjê ně môx nhõrkwỹ wỳr agjê ně mẽ hkrareta pumu. Nhũm kôsti kamã nõ nhũm mẽ omu ně kuri Marir mẽ Juje wa omu.

¹⁷ Hãmri ně akupỳm hapôj ně ma mẽ piitã mẽ hkôt ri mẽ kãm harênh o pa. Ra Tĩrtũm kapêr o wrỳk xwỳnh kot mẽ kãm harênh xãja kôt nhũm mẽ ma mẽ kãm harênh o ri mẽ hkôt pa.

¹⁸ Nhũm mẽ amnhĩ jaêr pê mẽ kot harênh ma ně tee ri hkukamã hamaxpêr.

¹⁹ Nom nhũm Marir mẽ kot kãm hkrax rùm tanhmã hkra jarênh to xãta kukamã pix mã hamaxpêr rãhã ho pa.

²⁰ Jakamã nhũm ôwêhti jamãr xwỳnhjaja ma akupỳm hkrit wỳr mra. Tĩrtũm kapêr o wrỳk xwỳnh ra kot mẽ kãm ujarênh xã hkôt nhũm mẽ kot Jejus pumunh jakamã ma akupỳm hkĩnh ně Tĩrtũm mã mex o mex ã harênh pê hã grer o akupỳm mra.

Mẽ kot Jejus ã hixi mẽnh ã harênh

Matêwre 1.21; Rukre 1.31

²¹ Tã nhũm wa hkrareta ra hã arĩgro pê 8 nhũm mẽ hwỳr akuprô ně kãm my kwryt kã

krähta. Na hte Ijaew mẽ hkra myre piitä ã mẽ hipêx anê. Mẽ piitä mẽ kot Tirtũm mã õr ã mẽ omunh kaxyw. Jakamã nhũm mẽ kãm ho anê nê hpãnhã hã hixi mẽ. Marir kormã kot ho htujarõ hkêt ri Tirtũm kapêr o wrÿk xwÿnh kot hkukamã kãm hixi jarênh xàja kõt nhũm mẽ hã hixi mẽ nhũm hixi kêp Jejus.

Mẽ kot Tirtũm mã Jejus nhõr pyræk o hipêx

22-24 Tã nhũm Marir hpijagri ho hapêx. Jakamã nhũm Juje ma krĩ pê Jerujarê hwÿr mẽ kot Tirtũm mã amnhĩ jarênh xà hã ixkre hwÿr amnhĩ kõt o mõ. Na pre ra finat Mojes amnepêm Tirtũm nhÿ hã mẽ hkukamã mẽ hpãmje mã ja hã karõ. Nê mẽ kãm hã karõ ho:

Koja mẽ aprõ hpijagri. Hãmri nê hpijagri ho hapêx ka mẽ ma Tirtũm mã amnhĩ jarênh xà hã ixkre hwÿr o mra nê hpãnhã Tirtũm mã mẽmoj gõ. Kãm tutre ho gõ rÿ kãm tuuti hõ ho axkrut nê agõ kê patre hamÿ nê kãm kupa. Kot ja hã omunh nê hpijagri xwÿnhhta akupÿm mex ã harênh kaxyw.

Anhÿr o kot mẽ kãm ja hã karõ jakamã nhũm wa ma ã amnhĩ nhĩpêx anhÿr kaxyw hwÿr mõ. Nê amnhĩ kõt Jejus mÿ nê o mõ. Tirtũm kot mẽ kãm ja hã karõ nhũm mẽ kot hã kagà xà hkõt. Na pre ra finat Mojes mẽ kãm ja jarê nê mẽ kãm:

Kot kaj mẽ akra my kot wa hãmri nê te mẽ ate Tirtũm mã õr kaxyw hipêx pyræk o hipêx. Kê tãm amnhĩ nhĩpêx o pa nê ÿ hã tanhmã kãm amnhĩ nhĩpêx to ho pa.

Anhÿr jakamã nhũm wa ra Jerujarê hwÿr nojarê nê amnhĩ kõt Jejus mÿ nê ma amnhĩ kõt o mõ.

Simeãw kot Jejus kukamã harênh

25-26 Rõm nhũm Jerujarê kamã Simeãwja. Tirtũm Karõ nhÿ hã kot tanhmã amnhĩ to mex to ho pa xwÿnh na pre. Na pre hte Tirtũm kapêr kõt pix mã tãm amnhĩ nhĩpêx o pa. Jakamã nhũm pre ra Tirtũm Karõ ã kãm kapêr anê nê kãm:

—E inhma Simeãw. Kot kaj atĩr rãhã nhÿrmã Tirtũm kot mẽ akaxyw ãm mã xwÿnhja ka ano ho omu nê rĩ kormã ty.

Anhÿr o kãm kapêr jakamã nhũm kuma nê hkĩnh nê ãm pix kamã hamak o pa. Mẽ kêp Ijaew wÿr wrÿk nê mẽ ho mex mã xwÿnhhta pix kamã hamak rãhã ho pa.

27 Jakamã nhũm Jejus katorxà mẽ hipêxà purota wa Tirtũm mã amnhĩ jarênh xà hã ixkreja wÿr Jejus o axà nê kormã o xa. Finat Mojes kot mẽ kãm hã karõ xà hkõt. Hãmri nhũm Tirtũm Karõ mẽ hwÿr Simeãwja mẽ nhũm ma mẽ hwÿr tẽ nê axà.

28 Hãmri nê wa hkrata pumu nê hkĩnh tÿx nê. Hãmri nê wa kêp kumÿ nê o xa nê hã Tirtũm mã mex o mex ã harê nê kãm:

29-32 Pa Pahi Maati. E ot pa ixte amā tanhmā amnhī nhīpêx to ho ixpa xwÿnh ã amnhī jarē.

Nà ãm hāmri na ka pre ã inhmā jare hkukamā harēnh anē. Tã ate inhmā harēnh xà hkôt pa ra inhno ho omu. Kêp mẽ ixkamā ukapři xwÿnh ã omu. Nē kêp ate mẽ ixwÿr mẽnh xwÿnh ã omu.

Nà koja te arĩgro hã myt hirã nē mẽmoj piitã ho amnhĩrit mex pyræk o koja mẽ inhīpêx o pa. Jakamã koja hprêk hāmri nē ma Ijaew kêt xwÿnhjê mã apê Tĩrtũm ã akapêr o amnhĩrit o pa nhũm mẽhprĩ hã ajarēnh ma. Nē mẽ ixpê Ijaew kot paj mẽ ijaxwÿja kuma nē hã ixpijaam o ri ixpa.

Jakamã kot paj ixãmnhĩx ri tanhmā amnhī nhīpêx to ho ri ixpa nē ixãmnhĩx ty. Ra ixte inhno ho ate inhmā harēnh xwÿnhhta pumunh kênã. Anē.

33 Nhũm pre ã Simeãw Jejus jarēnh anē. Nhũm katorxà mẽ hipêxà purota wa amnhī jaêr pê kot ã harēnh anhÿrja mar o xa.

34-35 Hāmri nhũm Simeãw wa ho Tĩrtũm wÿ nē kãm:

—E Tĩrtũm. Kêr ka ja wa ho mex nē. Wa ho mex o wa ho mex rãhã ho apa. Anē.

Hāmri nē Marir mã kapêr nē kãm:

—Nà ãm hāmri na pre Tĩrtũm mẽ pakaxyw akrata xãm. Mẽ pahpê Ijaew kaxyw ãm. Jakamã koja hprêk nē ma Tĩrtũm kapêr o mẽ piitã mẽ ahkre ho ri mẽ hkôt pa. Nhũm mẽ kuma hāmri nē ahpÿnhã tanhmā hamaxpêr to xà hkôt tanhmā hipêx to. Jakamã nhũm mẽ hkwÿjaja kuma nē hkôt amnhī xunhwÿ nē hkôt amnhī nhīpêx o pa. Jao tãm hipêx o pa. No nhũm mẽ hkwÿjaja kuma nē axtem nē kãm hkĩnh kêt nē. Hāmri nē tanhmā hipêx to. Jakamã kot kaj tee ri ja hã mẽ omu nē akapři htÿx nē. Te mẽ kot wapo ho akanhwÿr nē akamã ho kaxkep nhũm apê omnuj tÿx pyræk o kot kaj amnhī kamã ama nē mẽ omu. Anē.

ãnti kot Jejus pumunh ã harēnh

Wam Ximotre 5.5

36-38 Rôm nhũm mẽhõ ni pê ãntija mẽ hwÿr axà nē Jejus pumu. ãntija Panuew kra na pre. Nē Ase hkwÿ na pre. Ni htã kêp Tĩrtũm nhÿ hã kapêr jarēnh o pa xwÿnh. Na pre ra mjên no ãm kormã mjên nē pa hã amgrà pê 7 pix nhũm pre kêp ty. Hāmri nhũm axte mjên kêt nē pa rãhã ra hpigêx tÿx nē. Ra hã amgrà pê 84. Na pre hte Tĩrtũm mã amnhī jarēnh xà hã ixkre hwÿr pa nē kãm amnhī jarēnh rãhã ho pa. Nē kot kãm amnhī jarēnh kaxyw nē apkur kêt rãhã kãm amnhī jarē. Nē arĩgro hã hwÿr pa nē kamàt kãm hwÿr pa. Á na pre hte amnhī nhīpêx anhÿr rãhã ho pa anē. Jakamã mẽ hwÿr axà nē Jejus pumu nē hkĩnh

ně. Hāmri ně hã Tirtũm mã mex o mex ã harě ně kãm:

—Hêxta gàu ně Tirtũm. Ām hāmri na ka mẽ ixwỳr Jejus mẽ. Ma amex o amex. Aně.

Hāmri ně Ijaew kot amnhĩ wỳr mẽ kamã ukapřĩ xwỳnh kamã hamak xwỳnhjě mã ra Jejus kator ã harěnh o ri mẽ hkôt pa.

Marir mẽ Juje wa kot akupỳm Najare hwỳr mōr ã wa harěnh

Matêwre 2.19-23

³⁹ Tã nhũm Marir mẽ Juje wa Tirtũm kapěr ã kagà htũm kôt Tirtũm mã amnhĩ jarěnh xà hã ixkre kamã tanhmã amnhĩ nhĩpêx to hpa hāmri ně kato ně ma akupỳm mō. Ma Garirej kamã õ krĩ pê Najare hwỳr wa ma akupỳm mō.

⁴⁰ Tã nhũm wa hkrata ra wa kãm hprêkre ho mō. Ně mex ně àhpumunh tỳx ně. Tirtũm kot tânopxar ně mẽmoj to kutã nojarêt rãhã ho pa jakamã nhũm mex ně hkĩnh ně pa.

Marir mẽ Juje wa kot tee ri Jejus japêr ã wa harěnh

Rukre 4.22

⁴¹ Nhũm pre hte Marir mẽ Juje wa amgrà mẽ hkwỳjê hkôt ma Jerujarě hwỳr pa. Mě kot arĩgro pê Pas ã hkĩnh kaxyw. Pas ã na hte mẽ kêp Ijaew amnepêm Tirtũm kot pika pê Ejit rũm mẽ hpãmjê katorja mã hamaxpêr kaxyw axpên wỳr akuprõ ně hã hkĩnh. Jakamã nhũm wa ma mẽ hkôt hã hkĩnh kaxyw Jerujarě hwỳr hkwỳjê hkôt mō.

⁴² Nhũm ra Jejus hprêk o mō. Ra hã amgrà pê 12

jakamã nhũm wa ma amnhĩ kôt o mō.

⁴³⁻⁴⁴ Tã nhũm mẽ hkĩnh pa hāmri ně akupỳm nojarêt nhũm Marir mẽ Juje wa ma hkwỳjê hkôt akupỳm mō. Nhũm Jejus Jerujarě kamã ahte arĩk ně akupỳm wa hkôt mōr kêt ně. Nhũm wa htỳx wam ma hkwỳjê hkôt htêm ã hkamnhĩx jakamã wa hapêr kêt ně. Hāmri ně wa hapu hã hamakêtkati ně mẽ hkôt mōr o mōr ã ra hã kamát. Hāmri ně mẽ kot amnhĩm hikranh xàja wỳr mẽ hkôt pōj ně tee ri mẽ hkaêx ã hkra japêr o ri mra nom omunh kêt ně.

⁴⁵ Jakamã nhũm apkati nhũm wa awjanã ně ma akupỳm Jerujarě hwỳr mō ně kamã hapêr o ri pa.

⁴⁶ Nom tokyx kãm kator kêt ně. Mě hkaêx ã tee ri hapêr o pa hã apkati axkrut. Ně nõ nhũm apkati nhũm wa tã Tirtũm mã amnhĩ jarěnh xà hã ixkreja wỳr hapêr o mō ně hwỳr axà. Hāmri ně omunh kurê kumrêx. Nhũm arĩ mẽ kot Tirtũm kapêr tũm o mẽ ahkre xwỳnhjê mar o mẽ kutã nhỹ. Ně mẽmoj tã ri mẽ hkukja ně tanhmã mẽ kãm ujarěnh to.

⁴⁷ Nhũm mẽ kot mar xwỳnhjaja tee ri kapêr ã kuma ně àhpumunh tỳx ã omu hāmri ně akryk mar o hkrĩ.

⁴⁸ Hāmri nhũm Marir mẽ Juje mẽ hwỳr axà ně mẽ kuri wa hkraja pumunh kurê kumrêx. Hāmri nhũm katorxàja hwỳr tẽ ně kãm:

—Xê Jejus. Mon ka axtem ně ã ri amnhĩ nhĩpêx aně ně akupỳm wa ixkôt amōr kêt

ně? Na pa wa mō ně mě pahkwýjê hkôt pôj ně tee ri mẽ hkaêx ã ajapêr ně tee ri akukamã ijampêr. Anê.

⁴⁹ Hāmri nhũm amnhĩ tã wa kuma ně wa kãm:

—Tý. Nom Inhĩpêêxà nhõrkwý kamã ixàrik kênã na ka wa tee ri ixkukamã ajampêr ně ijapêr o ri apa. Anê.

⁵⁰ Hāmri nhũm wa kuma ně ã kot amnhĩ jarênh anhyrja kukamã tee ri hamaxpêr.

⁵¹ Hāmri ně mẽ ma akupým mō ně Najare hwýr pôj ně kamã pa. Nhũm pre Jejus wa kapêr kôt ri amnhĩ nhĩpêx rãhã ho pa. Hāmri nhũm katorxàja hkrax rùm mẽ kot kãm tanhmã hkra kot amnhĩ nhĩpêx to hkukamã harênhja pix kukamã hamaxpêr rãhã ho pa.

⁵² Gaa nhũm Jejus ra àptàr o mō. Nê àhpumunh týx ně. Nhũm mẽ piitã ã kot amnhĩ nhĩpêx anhyr ã omu ně kãm hkĩnh ně. Nhũm Tirtũm haxwýja kãm hapê ně.

3

Juãw Paxis kot Tirtũm kapêr jarênh o pa hã harênh

Matêwre 3.1-10; Makre 1.1-8; Juãw 1.19-28

¹⁻² Tã nhũm kormã pahihtu Tipeja mẽ ho amnhĩptàr o pa. Na pre ra mẽ ho amnhĩptàr ã amgrà pê 15. Nhũm Põn Piratja pahihtu Xipe mã pika pê Ijaew nhõ xwýnhjê ho amnhĩptà. Nhũm Eroxxa kãm pika pê Garirej nhõ xwýnhjê ho amnhĩptà. Nhũm Eroxxo Firipja kãm pika pê Iturej ně hõ pê Takonít wa kamã mẽ pa

xwýnhjê ho amnhĩptà. Nhũm Risãnja kãm pika pê Apirênh kamã mẽ ho amnhĩptà. Nhũm Anas mẽ Kajpasja wa kêp Ijaew nhõ patre maati.

Rôm nhũm Jejus mẽ Jakaris kra Juãwja wa ra hamê anhĩpê àptàr. Jakamã nhũm Tirtũm tanhmã Juãw mã kapêr to. Kormã kapôt ã ri pa ri nhũm kãm kapêr ně kãm tanhmã kot amnhĩ nhĩpêx to ho pa hã kãm karõ ně kãm:

—Pa Juãw. E inhma. Kêr ka ma mẽ kãm ixkapêr jarênh rãhã ho ri apa. Anê.

³ Hāmri nhũm kuma ně ma ri mẽ kãm kapêr jarênh o pa. Pyhti pê Jotãw mýri mẽ pitã mẽ kãm harênh o ri pa ně hpãnhã ihkjê hã ri mẽ pa xwýnhjê mã harênh o ri pa. Nê mẽ kãm:

—E kwa mẽ tokyx amã amnhĩ tomnuj kaga hprãm xàj tãm ri amnhĩ nhĩpêx. Kê Tirtũm ja hã mẽ apumu ně mẽ anê mẽ ate amnhĩ tomnuj o hapêx pa. Pa mẽ piitã mẽ kot mẽ apê Tirtũm kra hã mẽ apumunh kaxyw mẽ akrã kumrã.

Anhyr o mẽ kãm kapêr o ri pa.

⁴⁻⁵ Na pre ra amnepêm mẽ hkukamã Tirtũm nhý hã kapêr o pa xwýnh Ijais ra Juãw kukamã kot tanhmã amnhĩ nhĩpêx to hã harê ně hã kagà. Nê hã kagà ho:

Koja nhýrmã mēhõ mõn pôj. Kapôt ã mõn pôj ně mẽ kãm ujarênh o ri pa. Nê mẽ kãm ujarênh o: “E mẽ inhma. Koja Tirtũm tokyx mẽ pahwýr mẽ

panhō pahihiti mẽ
nhũm wrý nhũm mẽ pi-
itã omu. Jakamã kwa
mẽ tokyx kutêp tãm
amnhĩ nhĩpêx o apa. Te
ho mẽ kot mēhō kutêp
pry ho mex pyræk o
amnhĩ nhĩpêx. Jao
tãm amnhĩ nhĩpêx.
Ně tãm axpên nhĩpêx.
Pahihitita kutêp. Mě
pahte amnhĩ nhĩpêx te
kot pry nhĩnur pyræk
nhũm mẽ tee ri kot
kãm hã mrar mex prãm
kaprý pyræk. Hinur
ně krã hakýx ně pry
juk pyræk o na mẽ
pahte amnhĩ nhĩpêxja.
Jakamã kot kaj mẽ ate
amnhĩ tomnuj kaga
ně tãm amnhĩ nhĩpêx.
Ně tãm axpên nhĩpêx.
Hãmri ně te mẽ kot
pry nhĩnur o mex ně
ho katàt nhũm katàt
muux ně nōr pyræk
o kot kaj mẽ amnhĩ
nhĩpêx. Pahihiti nywta
kutêp. Kwa kêr ka mẽ
ã amnhĩ nhĩpêx aně.

⁶ Kot kaj mẽ aně nhũm mẽ
ohtô ně ja hã mẽ
apumu hãmri ně mẽ
apyrà Tĩrtũm kot mẽ
ho hkra kaxyw amnhĩ
to kuwý.” Anhýr o mẽ
kãm ujarěnh o pa. Aně.

Nhũm pre ã finat Ijaisja
Juãw Paxis kukamã mẽ kãm
ujarěnh anhýr o pa.

⁷ Jakamã nhũm aptàr ně Ijais
kot ra hkukamã harěnh xà
hkôt ma Tĩrtũm kapêr o mẽ
ahkre ho pa. Nhũm prem
kuma hãmri ně kot mẽ hkrã

kumrãr kaxyw hwýr amnhĩ
to mra. Nhũm mẽ omu ně
tanhmã mẽ ahkre hto. Ně mẽ
kãm kapêr kãm hihtýx ně mẽ
kãm:

—Tk. Kwa kormã. Mě ate
amnhĩ tomnuj pix o ri apa
xwýnh kênã. Xà kot paj mẽ
ate amnhĩ tomnuj rãhã mẽ
akrã kumrã nhũm Tĩrtũm ja
hã mẽ apumu nhũm ja kãm
mex nà? Nà koja ja kãm
mex kêt ně. Koja ja mýrapê
nhýrmã tanhmã mẽ anhĩpêx
to ka mẽ tee ri umaj apimxur
prãm kaprý.

⁸ —Na htem amnhĩ tomnuj
kaga ně hpãnhã tãm amnhĩ
nhĩpêx. Ně tãm ri axpên
nhĩpêx. Jakamã e kwa mẽ
ã amnhĩ nhĩpêx anhýr o
apa. No na ka htem atýx ri
ajamxpêr o: “Mě ixpê finat
Apraãw kanrêhã htãmnhwý
jakamã koja Tĩrtũm ja hã
mě ixpumu hãmri ně mẽ
ixte amnhĩ tomnuj mýrapê
tanhmã mẽ ixto hkêt ně.
Koja ãm mẽ ixto mex rãhã
ně.” Anhýr o atýx ri amnhĩ
kukamã ajamxpêr o apa.
Nom ja kot anhýr kêt. Mě apê
Apraãw kanrêhã htãmnhwý
htã uræk ně tãm amnhĩ nhĩpêx
o apare hã. Kot ka mẽ
apê kanrêhã htãmnhwý htã
amnhĩ tomnuj o ri apa hãmri
ně Tĩrtũm noo mã te mẽ apê
pikap kênre nhĩkwý pix pyræk.

⁹ —Na ra Tĩrtũm kot mẽ
ate amnhĩ tomnuj mýrapê
tanhmã mẽ ato kaxyw. Koja
mě anhĩpêx o te mēhō nhō
měmoj pãr ô hkêt nhũm kot
tee ri omunh hãmri ně krãhyr
ně kuwy kamã mēnh ně ho

xêt par pyrâk o mẽ anhîpêx. Jao amnhî nê kuwy hwÿr mẽ arênh pa ka mẽ kamã amnhî xà htÿx kamã ajamak rãhã ho ri apa. Anê.

Nhũm pre ã Juãw Paxisja mẽ kãm kapêr anê.

¹⁰ Hãmri nhũm mẽ kuma nê tee ri amnhî kukamã hamaxpêr nê kãm:

—Kwa xô wehe? Xà koja ã mẽ inhîpêx anê? Kwa tanhmã kot paj mẽ kot ã mẽ inhîpêx anhÿr pymaj amnhî nhîpêx to wehe? Anê.

¹¹ Hãmri nhũm mẽ kãm:

—Nà kêr ka mẽ axpên kãm axukapri ho ri apa. Nê mẽ kêp amrakati xwÿnhjê mã amnhî kutã mẽmoj nhôr o ri apa. Nê mẽ anhînhôkkà axkrut nê mẽhõ hinôkà hkêt xwÿnhjê mã ho pyxi nê agõ nê pyxi nê ho arîk. Nê mẽ axâpkur xà ho anhõxÿ ho apa hkêt nê. Âm axâmnhîx ri mẽ kêp amrakati xwÿnhjê mã amnhî kutã mẽ kãm mẽmoj to hkryre nê agõ. E kêr ka mẽ ã axpên nhîpêx anhÿr o ri apa. Anê.

¹² Hãmri nhũm Rõm kãm mẽ ô pahihtî mã mẽ piitã mẽ kêp kâxpore hkwy jamÿnh xwÿnhjaja mẽ urâk nê hwÿr mra. Kot mẽ urâk nê mẽ hkrã kumrâr kaxyw hwÿr mra nê kãm:

—No we mẽ pajaja? Tanhmã kot paj wem amnhî nhîpêx to? Anê.

¹³ Hãmri nhũm mẽ kãm:

—Nà mẽ kajaja kêr ka mẽ Rõm nhõ pahi kot mẽ amã mẽ ate mẽ kêp kâxpore hkwy jamÿnh jarênh xà hkôt pix mã hamÿnh o ri apa. No mẽ atÿx ri amnhî krã hkôt amnhîm

hkwy jamÿnh prãm xàj mẽ kãm hkre kamã ho rÿnh nê mẽ kãm harênh o ri apa hkêt nê. Anê.

¹⁴ Hãmri nhũm hpãnhã pôristi hkwyjaja hwÿr mra nê kãm:

—Kwa no we mẽ pajaja? Tanhmã kot paj wem ri amnhî nhîpêx to ho ixpa? Anê.

Hãmri nhũm mẽ kãm:

—Nà kêr ka mẽ anhõ pahihtî kot mẽ axâpênh pãnhã mẽ amã kâxpore nhôrta pix jamÿ nê ajamakêtkati nê axâmnhîx ri ho amnhîm axujaprôr o ri apa. No mẽ akwyjaja kãm apyma nê mẽ amã kâxpore nhôr prãm xàj ri mẽ kãm tanhmã amnhî puma hto ho ri apa hkêt nê. E kêr ka mẽ ã amnhî nhîpêx anhÿr o ri apa. Anê.

Juãw Paxis kot tanhmã Jesus jarênh to hã harênh

Matêwre 3.11-12; Makre 1.7-8; Juãw 1.19-28; mãânên Atre 19.4

¹⁵ Nhũm pre ã Juãw Paxisja mẽ kãm kapêr anê. Nhũm mẽ kuma nê htÿx kêp Tirtũm kot mẽ pakaxyw âm mã xwÿnhhta ã hkamnhîx.

¹⁶ Hãmri nhũm amnhî tã ã mẽ hamaxpêr anhÿr ã mẽ omu hãmri nê mẽ kãm amnhî tã aprã nê mẽ kãm:

—Nà pa hkêt. Na pa hte âm Tirtũm mã gô pix o mẽ hkrã kumrâr o ri ixpa. No koja tokyx ixpãnhã Tirtũm kot mẽ pakaxyw âm xwÿnhhta tãm mẽ pahwÿr pøj. àhpumunh tÿx o kot ijakrenh jakamã na pa hte âm kukwak ri ixpa nê hã ixpijaàm o ri ixpa. Tirtũm

kot mē pakaxyw âm xwÿnhhta koja mē awÿr Karō rē nhūm mē akaxwÿnh mā agjē ka mē ŷhā tām ri amnhī nhīpēx rāhā ho ri apa. Nom kormā mē kot tām amnhī nhīpēx hkēt xwÿnhjaja koja ja hā mē omu hāmri nē mē hipēx o te kuwy kot mēmoj to kaxār par pyrāk o mē hipēx.

17 —Na htem pur kām harôj nhīkē nē ho grā nē hpānhā kahtwÿ. Nē kahuk pa hāmri nē hkapī nhūm kōk apē nē prÿhkā ho htor nē ho hapēx pa. Nhūm mē hy ho pa nē ixkre kamā gōj kām unhwÿ. Ja pyrā nē koja tokyx Tirtūm mē piitā mē kot tanhmā amnhī nhīpēx to ho pa hā mē omunh xā hkōt mē ho axkjē. Mē kot tām amnhī nhīpēx o mē pa xwÿnhjaja koja ma amnhī wÿr mē ho api nhūm mē kuri mex nē hkīnh rāhā nē pa ho pa. No mē kot amnhī tomnuj xwÿnhjaja koja mē hkīnhā tanhmā mē hipēx to nhūm mē ma kuwy raxja wÿr pa nē kamā amnhī xā htÿx kamā hamak rāhā nē pa ho pa. Anē.

18 Nhūm pre ā Juāw Paxis Tirtūm kapēr o mē ahkre anhÿr o pa.

Juāw Paxis kot Jejus krā kumrār ā harēnh

Matêwre 3.13-17; Makre 1.9-11

19 Tā nhūm Ijaew nhō pahi Eroxo ra htō hprō pē Eroxis pytà nē ho hprō nhūm Juāw Paxisja harēnh ma nē ma hwÿr tē nē hā kām akir. No âm ja pix ā kām ākjēr kēt nē. Māānēn tanhmā kot amnhī

tomnuj tÿx to ho pa hā kām akir.

20 Nhūm amnhī tā kuma nē kamā gryk tÿx nē amnhī tā mē kām hā amÿnē nhūm prem unē nē haxā. Jao amnhī tomnuj tÿx nē.

21 Nom kormā mē kot haxār kēt ri nhūm Juāw Paxis Ijaew kwÿjē krā kumrār o xa. Rôm nhūm Jejusja hāmri tām nhÿhÿnh hwÿr tē nē kot hkrā kumrār kaxyw kām anē nhūm kuma nē hkrā kumrā. Hāmri nhūm Jejus gōj rūm api nē kormā gō mÿ ri Tirtūm mā amnhī jarēnh o xa.

22 Pu nhūm kaxkwa axkjē nhūm kurūm Tirtūm Karō te tuuti pyrā nē hwÿr wrÿk o tē nē ĩkre hā xa. Hāmri nhūm kaxkwa rūm Tirtūm kām kapēr nē kām:

Pa? E apē Ixkra mex na ka. Âm hāmri na ka hte ixkanrēhā amnhī nhīpēx o apa. Inhmā ajapē kamā na ka ri apa ho apa. Anē.

Jejus kukamā higēt nē hpāmÿjē nhīxi hā harēnh

Matêwre 1.1-17

23 Tā nhūm Jejus Tirtūm mā kapēr o mē ahkre ho pa hkrax. Na pre ra hā amgrā pē 30 hāmri nē kām ho hkrax.

E kot paj hpānhā amā Jejus kukamā hpāmÿjē nhīxi jarē Teopre. Ijaewjaja na prem htÿx ho Juje kēp Jejus nhīpēêxā kumrēx ā hkamnhīx nom kēp hipēêxā kumrēx kēt âm kēp hipēêxā puro na pre.

Jejus kēp Eri htāmnhwÿ na pre.

24 Nē Eri kēp Matat kra na pre.

Nē Matat kēp Rewi hkra na pre.

Nē Rewi kēp Mewki hkra na pre.

Nē Mewki kēp Jānaj kra na pre.

Nē Jānaj kēp axtem Juje hō hkra na pre.

25 Nē Juje kēp Matatis kra na pre.

Nē Matatis kēp Amōs kra na pre.

Nē Amōs kēp Naū hkra na pre.

Nē Naū kēp Eri hkra na pre.

Nē Eri kēp Nakai hkra na pre.

26 Nē Nakai kēp Mate hkra na pre.

Nē Mate kēp axtem Matatis ō hkra na pre.

Nē Matatis kēp Semeī hkra na pre.

Nē Semeī kēp Juje hō hkra na pre.

Nē Juje kēp Jotre hkra na pre.

27 Nē Jotre kēp Joanān kra na pre.

Nē Joanān kēp Rej kra na pre.

Nē Rej kēp Joropape hkra na pre.

Nē Joropape kēp Saraxi kra na pre.

Nē Saraxi kēp Neri hkra na pre.

28 Nē Neri kēp axtem Mewki hō hkra na pre.

Nē Mewki kēp Axi hkra na pre.

Nē Axi kēp Kojā hkra na pre.

Nē Kojā kēp Ematā hkra na pre.

Nē Ematā kēp Erti hkra na pre.

29 Nē Erti kēp Jojue hkra na pre.

Nē Jojue kēp Eries kra na pre.

Nē Eries kēp Jorī hkra na pre.

Nē Jorī kēp Matat hkra na pre.

Nē Matat kēp axtem Rewi hō hkra na pre.

30 Nē Rewi kēp Simeāw kra na pre.

Nē Simeāw kēp Juta hkra na pre.

Nē Juta kēp axtem Juje hō hkra na pre.

Nē Juje kēp Janā hkra na pre.

Nē Janā kēp Eriakī hkra na pre.

31 Nē Eriakī kēp Merea hkra na pre.

Nē Merea kēp Mena hkra na pre.

Nē Mena kēp Matata hkra na pre.

Nē Matata kēp Natā hkra na pre.

Nē Natā kēp Tawi hkra na pre.

32 Nē Tawi kēp Jese hkra na pre.

Nē Jese kēp Opex kra na pre.

Nē Opex kēp Poas kra na pre.

Nē Poas kēp Sarā hkra na pre.

Nē Sarā kēp Nasō hkra na pre.

33 Nē Nasō kēp Amīnatap kra na pre.

Nē Amīnatap kēp Amī hkra na pre.

Nē Amī kēp Ari hkra na pre.

Nē Ari kēp Erō hkra na pre.

Nē Erō kēp Pere hkra na pre.

Nē Pere kēp Juta hkra na pre.

³⁴ Nē Juta kēp Jako hkra na pre.

Nē Jako kēp Ijak kra na pre.

Nē Ijak kēp Apraāw kra na pre.

Nē Apraāw kēp Tera hkra na pre.

Nē Tera kēp Nako hkra na pre.

³⁵ Nē Nako kēp Jeruk kra na pre.

Nē Jeruk kēp Rakau hkra na pre.

Nē Rakau kēp Parek kra na pre.

Nē Parek kēp Epti hkra na pre.

Nē Epti kēp axtem Sara hō hkra na pre.

³⁶ Nē Sara kēp Kajnā hkra na pre.

Nē Kajnā kēp Apaxat kra na pre.

Nē Apaxat kēp Sēre hkra na pre.

Nē Sēre kēp Noehti hkra na pre.

Nē Noehti kēp Ramek kra na pre.

³⁷ Nē Ramek kēp Metujarē hkra na pre.

Nē Metujarē kēp Enok kra na pre.

Nē Enok kēp Jarate hkra na pre.

Nē Jarate kēp Marerer kra na pre.

Nē Marerer kēp axtem Kajnā hō hkra na pre.

Nē Kajnā kēp Enos kra na pre.

³⁸ Nē Enos kēp Set kra na pre.

Nē Set kēp Atāw kra na pre.

Nē Atāw kēp Tirtūm kra na pre. Tirtūm kot wam my pē Atāwja pika ho

hipêx jakamā te kēp hkra pyrāk.

Ā Jejus kukamā hpāmjê nhīxi kot anhÿr.

4

Satanasti kot amnhī tā Jejus kamā hamak ā harēnh

Matēwre 4.1-11, 16.23; Makre 1.12-13, 8.33; määnēn Eprēw 2.18, 4.15

¹ Tā nhūm Jejus pyhti pē Jotāw rūm akupÿm ma mō. Hāmri nē Tirtūm Karō nhÿ hā mēmoj kutā amnhī to htÿx nē. Jakamā nhūm nhÿhÿm ma kapôt wÿr o mō

² nhūm Satanasti omu nē ma hwÿr tē nē ri hkôt pa. Kapôt ā ri hkôt hēx rom tanhmā kām nē ho pa. Kot mar nē Tirtūm kapēr nhīrôp ām prām xāj ma hkôt tanhmā kām kapēr to ho pa. Hāmri nē hkôt pa o hā arīgro pē 40 nhūm Jejus kormā apkur kēt o hā arīgro pē 40 nē hapêx nhūm ra kām prām tÿx nē.

³ Hāmri nhūm Satanasti kām:

—Kwa mǎn ka ra amā prām tÿx kumrēx nà? Nom xep apē Tirtūm Kra jakamā mēmoj tanhmā apē kute hkêt. Kwa kēn nhīkwÿ mÿj mā anē kē amā pāwti hā amnhī jahkre ka aku nē tokyx ho amnhī xihtÿx. E kwa tokyx kām anē. Anē.

⁴ Hāmri nhūm kuma nē kām:

—Tk. Nà kot paj akapēr mar xà hkôt tanhmā amnhī nhīpêx to hkêt nē. Koja Tirtūm kām inhmā mēmoj nhōr prām nē inhmā mēmoj gō pa arī

kormã kukrê. Kapêr ã kagà htùm kot ja jarênh kot:

Na htem mẽ apkur xà pix kukwak ri htîr nê pa hkêt nê. Na htem mãânên Tîrtùm kapêr mar xà hkôt tanhmã ri amnhî nhîpêx to ho pa ho htîr nê mex nê pa. Anê.

Ã kapêr ã kagà kot ja jarênh kot anhÿr jakamã kot paj amar xà hkôt ã ri amnhî nhîpêx anhÿr kêt nê. Âm kwarî ho kwarî. Anê.

⁵ Nhùm pre ã Jejus Satanasti mã kapêr anê nhùm tee ri kuma hãmri nê hpãnhã ma nhÿhÿm o mõ nê nhÿri kÿx pê mẽmoj prêeti nhîmök ã o xa. Hãmri nê kãm pika piitã ahkre ho xa. Nê kãm mẽ hikukrêx piitã ahkre. Kàxpore nê mẽmoj piitã nhùm kãm ahkre hpa nhùm anhîpê omunh o xa.

⁶ Hãmri nhùm Satanasti kãm:

—E mãn ka kam ri mẽmoj mÿj piitã omu. Piitã inhõ na. Inhmã na pre Tîrtùm piitã õr pa. Kot paj inhmã mẽhõ mã õr prãm nê kãm kugõ.

⁷ Tã amã kot paj kugõ. Jakamã e. Kwa tokyx ixkutã tẽm nê inhmã inhmex o inhmex ã ijarê pa ama nê rî amã piitã õr pa. E tokyx. Anê.

⁸ Hãmri nhùm kuma nê kãm:

—Tk. Kot paj amã amex o amex ã ajarênh kêt kumrêx. Âm kwarî ho kwarî. Amexti hã. Tîrtùm kapêr ã kagà htùm kot ja nê kapêr kãm hihtÿx kênã. Kapêr kot:

Kêr ka mẽ ixkapêr pix ma. Nê ixkutã pix mã mãn akõnkrã ho akrî nê inhmã inhmex o inhmex ã ijarênh o ri apa. Kêr ka mẽ ã amnhî nhîpêx anhÿr o ri apa.

Anhÿr o kot harênh jakamã kot paj ri amã amex o amex ã ajarênh kêt nê Satanasti. Anê.

⁹ Nhùm pre ã Jejus amnhî nê kãm kapêr anê. Hãmri nhùm tee ri kuma nê hpãnhã ma krî pê Jerujarê hwÿr o mõ. Nê mẽ kot Tîrtùm mã amnhî jarênh xà hã ixkre hprêk nhîmök wÿr ho api nê kÿxpê hatur xà hã âm nhùm xa. Nhùm amnhî parpê kên rÿnh nhîkwÿ pumunh o xa. Hãmri nhùm Satanasti kãm:

—E apê Tîrtùm Kra jakamã kwa ja rÿm ahpar mã ajarî nê ma tẽ nê pikap tẽm. Koja Anhîpêêxã apumunh mex nê ka tanhmã amnhî to hkêt nê.

¹⁰⁻¹¹ Kapêr ã kagà htùm kot ja jarênh kot:

Tîrtùm koja kapêr o wryk xwÿnh mã ajarê ka ajarî nê ahpar mã tẽ nhùm mẽ kÿx pê amÿ nhùm mẽmoj akà hyr kêt nê.

Ã kapêr ã kagà kamã ajarênh kot anhÿr jakamã e tokyx ajarî nê ma tẽn pikap ahto. Anê.

¹² Hãmri nhùm kuma nê kê axte amnhî tã kãm kapêr nê kãm:

—Tk. Kwa nà. Kot pa ri amar xà hkôt ã amnhî nhîpêx anhÿr kêt nê. Koja Tîrtùm tãm inhmã ijarî hã karõ pa rî mar xà hkôt ijarî no kot pa

ri amar xà hkôt ijarĩ hkêt nê.
Tĩrtũm kapêr ã kagà htũm kot
ja jarênh kot:

Kêr ka mẽ amnhĩ krã hkôt
amnhĩ tã ixkamã
ajamak kaxyw inhĩxi
jarênh kôt tanhmã
amnhĩ nhĩpêx to hkêt
nê.

Ã ja nê kapêr kot anhÿr
jakamã ãm kwarĩ ho kwarĩ.
Kot paj ri amar xà hkôt ã
amnhĩ nhĩpêx anhÿr kêt nê.
Tãm kot inhmã ijarĩ hã karõre
hã. Anê.

¹³ Nhũm pre ã Jejus Sa-
tanasti mã kapêr anê hãmri
nhũm tee ri mẽmoj piitã ho
mar kaprÿ hãmri nê hkaga
nê ma nhÿhÿm tẽ. Hãmri
nê kot nhÿrmã axte hwÿr
htẽm nê kot mẽmoj punuj o
mar kaxyw kormã amnhĩm
hamãr o ri pa.

*Jejus kot Tĩrtũm kapêr o mẽ
ahkre ho hkrax ã harênh*

*Matêwre 4.12-17; Makre
4.14-15*

¹⁴ Tã nhũm Jejus ma
akupÿm Garirej wÿr mõi. Nê
Tĩrtũm Karõ nhÿ hã àhpumunh
tÿx nê hkwyjê mã kapêr
jarênh o ri pa. Nhũm mẽ
kuma nê piitã pikaja kamã
axpẽn mã tanhmã harênh to.

¹⁵ Na pre hte mẽ kot Tĩrtũm
kapêr o mẽ ahkre xà hã ixkre
hwÿr agjê nê kamã mẽ ahkre
ho hkrĩ. Nhũm mẽ piitã kuma
nê kãm mar prãm nê. Hãmri
nê axpẽn mã mex ã harênh o
ri pa.

*Najare kamã mẽ kot Jejus
kaga hã mẽ harênh*

*Matêwre 13.53-58; Makre
6.1-6; Juãw 1.11*

¹⁶ Tã nhũm Jejus ma
akupÿm krĩ kamã àptàr xàja
wÿr ma mõi. Najare hwÿr.
Hãmri nê kamã pøj.

Nhũm Ijaew nhõ arĩgromnu
pê sap kato nhũm Jejus ma
mẽ hkôt Tĩrtũm kapêr o mẽ
ahkre xà hã ixkre hwÿr tẽ.
Hãmri nê hwÿr axà nê mẽ
kuri nhÿ. Hãmri nê kamã
mẽ kãm Tĩrtũm kapêr ã kagà
htũm kamã harênh kaxyw
kãnhmã xa

¹⁷ nhũm mẽ omu nê kãm ja
gõi. Finat Ijais pê Tĩrtũm nhÿ
hã kapêr xwÿnh kot Tĩrtũm
kapêr kwÿ hã kagàja nhũm
mẽ kãm kugõi. Hãmri nhũm
kupy nê kamã kormã Tĩrtũm
kot tanhmã mẽmoj jarênh to
hõ japêr o xa. Nê kãm kato
hãmri nê mẽ kãm kamã harê.
Nom amnhĩ tã kamã mẽ kãm
harênh o xa nê mẽ kãm:

¹⁸ Na pre ra Tĩrtũm Karõja ixto
ixàhpumunh tÿx nê mẽ
kêp amrakati xwÿnhjê
hwÿr inhmẽ pa ra mõi.
Ixte mẽ kãm mẽmoj
mex jarênh o ixpa
kaxyw. Nê Satanasti
kot amnhĩ kôt mẽ
unhwÿr xwÿnhjê hwÿr
nhũm pre mããnẽn
inhmẽ. Ixte mẽ nê
Satanasti japõx o ixpa
kaxyw. Nê mẽ kot
hprĩ hã Tĩrtũm kapêr
mar kêt xwÿnhjê hwÿr
nhũm pre mããnẽn
inhmẽ. Ixprĩ hã ixte
mẽ kãm kapêr jarênh
o ri mẽ hkôt ixpa
kaxyw. Nê mẽ kot
amnhĩ tomnuj o mẽ pa
xwÿnhjê hwÿr nhũm

pre mãänēn inhmē.
Ixte mē nē mē kot
amnhī tomnuj rēnh pa
nhūm mē hamakētkati
nē amnhīx ri pa kaxyw.
Ā na pre Tīrtūm jajē
piitā hwȳr inhmēnh
anē pa ra man mōn pōj.

19 Nē amgrà ja kēp Tīrtūm
kot mē ato mex xà
hā amgràja nhūm ixte
mē amā harēnh o ixpa
kaxyw na pre inhmē
pa mōn pōj. Anē.

20 Nhūm pre ā Jejus Tīrtūm
kapēr ā kagā htūm kamā mē
kām amnhī jarēnh anē. Hāmri
nē akupȳm mē kām kagàja
gō nē ho mē ahkre kaxyw
akupȳm nhỹ nhūm mē piitā
omunh pē mar o hkrī.

21 Hāmri nhūm mē kām
tanhmā amnhī jarēnh to nē
mē kām:

—E ra Ijais kot ā ixkukamā
ijarēnh anhȳr xà hkôt na pa
mē awȳr wrȳ nē mē anoo
mā ā amnhī nhīpēx anhȳr o
hkra. Anē.

22 Hāmri nhūm mē amnhī
jaēr pē ā kot amnhī jarēnh
anhȳr ā kuma. Nē tee ri
kuma nē axpēn pumunh
pē hamaxpēr o hkrī. Jejus
mē kurom àhpumunh tȳx
nē kapēr mex tā nhūm mē
ām kēp amnhī kwȳ pix ā
hkamnhīx kām hihtȳx nē.
Hāmri nē axpēn mā:

—Tk. Kwa kēp Juje hkra
pix kēnā koja we ri ā amnhī
jarēnh anē. Anē.

23 Hāmri nhūm amnhī tā mē
kuma nē mē kām:

—Nà na ka mē ixte amnhī
jarēnh ma nom ixkôt aja-
maxpēr kēt nē. Jakamā axpēn

mā ijarēnh o: “Tk. Kēp mē
pahkaprī xwȳnh ro nhỹx jar
mē panhō krī kamā aa mē
pahte mēmoj pumunh kēt
kwȳ tanhmā mē pamā hipēx
to pu mē hā omu. Te ra kot
krī pē Kapanaū kamā mē
kām mēmoj kwȳ ho anhȳrta
pyrāk. Pu mē omu nē hkôt
pajamaxpēr kurē kumrēx.”
Anhȳr o ri axpēn mā ijarē.

24 Koja nhām krī hō kamā
mēhō kēp Tīrtūm kapēr jarēnh
xwȳnh ā amnhī jarē ka mē
harēnh ma nē amā ma hwȳr
amrar nē mar prām nē.
No kēt jar mē panhō krī
kamā ixpē mē anhīō hā ā
amnhī jarēnh anē ka mē amā
inhmar prām kēt nē.

25 —Kwa mē inhma. Am-
nepēm kormā finat Eris htūr
ri na pre mē hā na wrȳk kēt
ry rax nē. Jao hā amgrà
axkrunēpxi nē hkôt mytwrȳ
pē 6. Nhūm mē ō hkēt nē pa.
Ra mē kēp mēmoj grà pa nē
hapēx nhūm mē kām prām tȳx
kumrēx nē pa. Nhūm mē kēp
mē mjēn tyk xwȳnhjaja kām
prām xàj hirot o pa.

26 Tā nom Tīrtūm mē ho
mex kaxyw mē hwȳr Eris
mēnh kēt nē. Erisja mē urāk
nē kēp Ijaew tā nhūm Tīrtūm
kot mē ho ajuta kaxyw mē
hwȳr mēnh kēt nē. Mē kot
amnhī kaxyw Tīrtūm kôt
hamaxpēr kēt jakamā nhūm
mē hwȳr mēnh kēt nē. Axtem
Ijaew kēt xwȳnhjē hō hwȳr
na pre kumē. Nhām Sitō
kamā krī pē Sarep kamā mjēn
htyk xwȳnhhta wȳr. Tokyx kot
tanhmā ho mex to kaxyw.
Jakamā nhūm ma hwȳr mō

ně tanhmã kãm kapêr to nhũm kuma nẽ amnhĩ kaxyw Tĩrtũm kôt hamaxpêr kurê kumrêx.

27 —Ně finat Eriasti haxwýja. Eris pyrã nẽ kêp Tĩrtũm nhỹ hã kapêr o pa xwýnh tã amnhĩ kwý pê Ijaew tanhmã mẽ ho ajuta hto hkêr nẽ. Na prem ohtô nẽ hkà nhy nẽ hkro xápêr o pa. Jao ra omnuj tỳx nẽ. Tã nhũm Tĩrtũm kot akupỹm mẽ ho mex kaxyw mẽ hwýr Eriasti mênh kêt nẽ. Amnhĩ kaxyw mẽ kot hkôt hamaxpêre hã. ãm Sir nhõ xwýnh Namãja pix na pre Tĩrtũm Eriasti mã anẽ nhũm akupỹm ho mex. Kêp Ijaew kêt tã nhũm akupỹm ho mex. Tã ja pyrã nẽ na pa ãm mẽ kot amnhĩ kaxyw ixkôt hamaxpêr pix xwýnhjê mã tanhmã amnhĩ nhĩpêx to ho ri ixpa. No mẽ ate amnhĩ kaxyw ixkôt ajamaxpêr kêt xwýnhjê mã tanhmã ri amnhĩ nhĩpêx to hkêr nẽ. Anẽ.

Nhũm pre ã Jejus mẽ kãm amnhĩ jarênh anẽ.

28 Hãmri nhũm mẽ kuma nẽ kamã gryk tỳx nẽ axpên mã hã amýnê nẽ axpên mã:

—Tk. Kwa pu mẽ ixkre nê kator nẽ ma o tẽ nẽ kupĩ ri. Anẽ.

29 Hãmri nẽ kaxyw kànhmã kuhê hpa nẽ hwýr hprôt nẽ unẽ. Mẽ kot ma o htêm nẽ hixêt prêk jatur xà hã hkujaêk nhũm ahpar mã tẽn htêm nẽ htyk kaxyw. Mẽ õ krĩja hixêt prêk nhĩmõk ã na pre. Jakamã nhũm prem unẽ nẽ hatur xàta wýr o tẽ.

30 Tã nom nhũm tanhmã amnhĩ nhĩpêx to nẽ mẽ kêp akunok nẽ hpãnhã nhãm ma tẽ nhũm mẽ tee ri hapêr nom nhỹri omunh kêt nẽ.

Jejus kot mēhō nē mēkarōmnuti kator ã harēnh Makre 1.21-28

31 Tã nhũm Jejus ma akupỹm Garirej kamã krĩ pê Kapanaũ hwýr mō. Nhũm mẽ õ arĩgromnu pê sap kato nhũm ma mẽ kot Tĩrtũm kapêr o mẽ ahkre xà hã ixkre hwýr tẽ nẽ mẽ ahkre ho nhỹ.

32 Hãmri nhũm mẽ kot mar o hkrĩ xwýnhjaja kuma nẽ kãm mar prãm nẽ. Nẽ axpên mã:

—Hêxta waa nẽ. ãm hãmri na ã mẽ pamã kapêr anẽ. Àhpumunh tỳx xà hkôt na hte ãm hãmri mẽ pamã awjarê. Anẽ.

33 Nhũm mēhō myja mẽ ĩhkô hã haxwýja mar o nhỹ. Mēkarōmnuti na pre ra hwýr axà nhũm ý hã tanhmã amnhĩ tomnuj to ho pa. Hãmri nẽ mẽ ĩhkô hã Jejus mar o nhỹ nẽ ra àmra kamã tanhmã kãm kapêr to. Nom nhũm tãm kãm kapêr kêt ãm kamã mēkarōmnutija kãm kapêr.

34 Nẽ kãm:

—Pa? Jejus pê Najare nhõ xwýnh? Nà ate mẽ ixto ajapêx par kaxyw na ka mẽ ixwýr mō. Ra ixte apumunh mex kênã. Apê Tĩrtũm kot mẽ ixwýr amênh xwýnh maatita na ka. Jakamã kwa tanhmã kot kaj mẽ ixto? Mo kaxyw na ka pre mẽ ixwýr mō? Anẽ.

³⁵ Hāmri nhũm kuma nẽ mēkarōmnuti kot kām ā kapēr anhỹr ā omunh kurê kumrêx. Jakamā kutā kām kapēr nẽ kām:

—Tk. Kwa anhĩkrê nẽ kêp akato. Anẽ.

Hāmri nhũm kuma nẽ myta o pika kura nẽ kêp kato nẽ ma tẽ. Ām ho pika kuranh pix nhũm nõ. Hāmri nẽ akupỹm kànhmã nhỹ nẽ akupỹm mex.

³⁶ Hāmri nhũm mẽ piitã omu nẽ kamã no pyma nẽ. Hāmri nẽ axpẽn mã:

—Kokỹỹ. Na hte Jejus amnhĩ krā hkôt àhpumunh tỳx xà hkôt mēkarōmnuti mã kapēr nẽ mẽ hano nhũm htem kuma nẽ mẽ kêp hapôx kurê kumrêx. Anẽ.

³⁷ Hāmri nhũm mẽ mẽõ pika kamã piitã ri axpẽn mã harênh o pa.

Jejus kot Simãw Pêtre xupãnhgêx o mex ã harênh

Matêwre 8.14-15; Makre 1.29-31

³⁸ Tã nhũm Jejus Tĩrtũm kapēr o mẽ ahkre xàja rũm kato nẽ ma Simãw Pêtre nhõrkwỹ hwỳr tẽ. Nẽ mẽ hwỳr axà nhũm Simãw Pêtre omu nẽ kām upãnhgêx tanhmã kute hã harê nẽ kām:

—Kwa Pahihti. Tẽ nẽ inhmã ixupãnhgêx pumu. Na hkà kagro htỳx nẽ amnhĩ to àpêr o nõ. Kwa tẽn inhmã omu. Anẽ.

Hāmri nhũm kām:

—Tõe. Nà kot paj amã omu. Anẽ.

³⁹ Hāmri nẽ hwỳr tẽn kuri xa nẽ kām:

—Pa? E kwa akà hakry. Anẽ.

Hāmri nhũm kuma nẽ hkà hakry nẽ akupỹm hihtỳx kurê

kumrêx. Hāmri nẽ kànhmã nhỹ nẽ mẽ kām mẽõ hã àpênh o ri mra.

Jejus kot mẽ ho ohtô nẽ mẽ ho mex ã harênh

Matêwre 8.16-17; Makre 1.32-34

⁴⁰ Tã nhũm ra amỹkry htỳx mẽ nhũm mẽ Jejus wỳr ahpỹnhã ri mẽ à xwỹnhjê ho mra. Nhũm amnhĩ wỳr mẽ omu hāmri nẽ mẽ piitã ri mẽ hã ìhkra jaxwỳ nẽ akupỹm mẽ ho mex pa.

⁴¹ Nhũm ra mēkarōmnuti mẽ hkwyjê hwỳr agjê nhũm mẽ kurũm mẽ hano nhũm mẽ tee ri amnhĩ tã omu nẽ mẽ kêp hapôx kurê kumrêx. Hāmri nẽ mẽ kêp hapôx kaxyw nẽ àmra kamã kām kapēr nẽ kām:

—Kwa tanhmã kot pa wem amnhĩ nê ato? Hêxta waa nẽ. Apê Tĩrtũm Kra hã axàhpumunh tỳx kênã.

Anhỹr o kām kapēr. Ām hāmri na prem ã harênh anẽ. Kêp Tĩrtũm kot mẽ pakaxyw ãm xwỹnh kênã. No nhũm Ijaew nhõ pahijaja kot mẽ kapēr mar nẽ kêp mēkarōmnuti hkwy hã hkamnhĩx pymaj nhũm Jejus amnhĩ nê mẽ kām kapēr nẽ mẽ kām:

—Kwa mẽ ri ã ijarênh anhỹr kêt nẽ.

Anhỹr o mẽ kām kapēr hāmri nẽ mẽ hano nhũm mẽ hapôj nẽ ma mra.

Mẽmo kaxyw Tĩrtũm kot mẽ pahwỳr Jejus mẽnh ã harênh

Makre 1.35-39

⁴² Tã nhũm apkati nẽ myt kator grire nhũm Jejus kot Tĩrtũm mã amnhĩ jarênh kaxyw kànhmã nhỹ nẽ kato

ně ma nhỹhỹm kapôt mã tẽ. Hãmri nhũm krĩ nhõ xwỹnhjaja hkrã hapôj nẽ tee ri hapêr nẽ ma hkôt hpri jakop o mõi. Nẽ nhỹri hwỳr kato nẽ omu hãmri nẽ ma nhỹhỹm mõi nê kurê nẽ kãm:

—Kwa Jejus. Kêr ka tokyx ma nhỹhỹm amõi kêt nẽ. Kritpêm mẽ ixkôt axkamẽ mãn. Anẽ.

⁴³ Hãmri nhũm mẽ kuma nẽ amnhĩ tã mẽ kãm:

—Nà kot paj kritpêm mẽ akôt ixpikamênh kêt nẽ. Kot paj ma krĩ piitã hkôt ri Tĩrtũm kapêr o mẽ ahkre ho ri mẽ hkôt ixpa. Tĩrtũm kot tanhmã mẽ ho hkra hto hã harênhja kot paj mẽ hkôt ri mẽ kãm harênh o ri ixpa. Ja kaxyw na pre Tĩrtũm mẽ awỳr inhmẽ. Anẽ.

⁴⁴ Nhũm pre ã mẽ kãm amnhĩ jarênh anẽ. Hãmri nẽ mẽ kêp kato nẽ ma Ijaew nhõ pika piitã hkôt Tĩrtũm kapêr o mẽ ahkre ho ri pa. Ijaew nhõ Tĩrtũm kapêr o mẽ ahkre xà hã ixkre kamã mẽ piitã ho mẽ ahkre ho ri pa.

5

Jejus kot amnhĩ kôt mẽ hkwỹjê hwỳr ã harênh

Matêwre 4.18-22; Makre 1.16-20

¹ Tã nhũm Jejus ma gô rax pê Jenêjare hwỳr mõi. Hãmri nẽ hwỳr pøj nẽ gô mỳri Tĩrtũm kapêr o mẽ ahkre ho xa nhũm mẽ ohtô nẽ pu hã mar o kuhê. Nẽ kot hprĩ hã mar nẽ hkôt omunh kaxyw hã xypên nhĩgãnh o kuhê.

² Hãmri nhũm tee ri amnhĩ tã mẽ omu nẽ amnhĩ pu hã

hakêx nẽ rĩt nẽ gôx kãm pàr kaprỹ hamêxkrut nẽ jêtja wa omu. Nhũm õ dõn wa gôx kãm kryhti kuhõnh o xa. Nhũm pàr hamẽ hkaprỹ nẽ ajêt nhũm Jejus omu.

³ Hãmri nẽ hwỳr tẽ nẽ hõm axà nẽ õ dõn pê Simãwja mã anẽ nhũm hkôt axà nẽ kii mẽ kêp pàrja amỹm kunhõ nhũm ajêt. Hãmri nhũm pàr kre rũm amỹm mẽ ahkre ho nhỹ nhũm mẽ piitã omu nẽ mar mex o kuhê.

⁴ Tã nhũm mẽ ahkre hpa nẽ Simãw mã kãm:

—E gô xupỹm wỳr anhõ pàr o axkamẽ nẽ axte anhõ kryhti mẽ nẽ ho amnhĩm tep kwỹmnê. Anẽ.

⁵ Hãmri nhũm tee ri kuma nẽ kãm:

—Kwa na pa mẽ ra kamàt kãm tee rênh o apkati nẽ ho hõmnênh kêt tã ka ri inhmã anẽ. Nom kot paj amar xà hkôt kop kumẽ. Anẽ.

⁶ Hãmri nẽ upỹm wỳr pàr o axkamẽ nẽ htõ Andre mẽ wa axte kryhti mẽ. Nẽ ãm mênh tipxi htã ho tep pynênh rax kumrêx. Jakamã nhũm kryhtija ra pikaxõnh kaxyw.

⁷ Hãmri nhũm wa tee ri ho anẽ nẽ amnhĩ wỳr pàr õ ho mrrar xwỹnhhta wa kãm akir. Jepetew kra Juãw mẽ Xiakreja wa nhũm wa amnhĩ wỳr wa kãm akir nhũm wa hwỳr pàr õ ho tẽ hãmri nẽ mẽ kryhti hã hije nẽ pàr wỳr ho api. Hãmri nẽ pàrta hamẽ tep o ho nýt pa nẽ hamẽ ho hipu mex nẽ. Jao nhỹx gõnh mã wa axà.

⁸⁻¹⁰ Hãmri nhũm mẽ amnhĩ jaêr pê tep xohtõ raxta pumu

ně kamã no pyrna ně. Hãmri nhũm Simãwja Jejus kutã hkõn krã ho tẽm ně hipõ ně nhỹ ně hã hpijaãm kamã kãm kapẽr ně kãm:

—Kwa Pahihti. Kii tamũ axkamẽ. Akĩnhã ixte amnhĩ tomnuj tỳx xwỳnh na pa. Anẽ.

Hãmri nhũm kuma ně ãm kuma ně kãm:

—Kwa nã tee ri amnhĩ kukamã ajamaxpẽr kêt ně. Kot kaj jarãhã hpãnhã tãm amnhĩ nhĩpẽx o apa. Na ka ra tep pynẽnh rũnh o apa. Tã kot kaj ja kaga ně hpãnhã ma ri mẽ hkõt Tĩrtũm kapẽr o mẽ ahkre ho ri apa. Koja mẽ ohtõ ně ama ně Tĩrtũm kõt amnhĩ xunhwỳ ně hkõt amnhĩ nhĩpẽx o pa. Jakamã kot kaj te ate tep pynẽnh rũnh ně Tĩrtũm mã õr pyrãk o amnhĩ nhĩpẽx o apa. Anẽ.

Nhũm pre ã Jejus Simãw mã kapẽr anẽ.

¹¹ Hãmri nhũm mẽ gõ jakàx ã pãr janhõr tỳx ně kamã hikukrẽx piitã hkaga hpa ně ma Jejus kõt pa ho pa.

Jejus kot hkà nhy kro tỳx xwỳnh o mex ã harẽnh

Matẽwre 8.1-4; Makre 1.40-45

¹² Tã nhũm Jejus ma krĩ hõ hwỳr mõ. Hãmri nhũm mẽhõ my hkà nhy hkro htỳx xwỳnhja omu ně hwỳr tẽ ně hã hpijaãm kaxyw kutã hkõnkrã ho nhỹ ně kãm:

—Pa Pahihti. E ot pa awỳr amnhĩ to tẽ. Kwa akupỹm ate mẽ ixto mex kaxyw axãhpumunh tỳx jakamã kot ka akupỹm amã ixto mex

prãm ně mãmrĩ akupỹm ixto mex. Anẽ.

¹³ Hãmri nhũm kuma ně hkà punuti hã ìhkra xi. Amnhĩ kamã kahak kêt ně hã ìhkra xi ně kãm:

—Nã kot paj ato mex. E akupỹm akà mex kurẽ kumrẽx.

Anhỹrja kõt hãmri nhũm hkãja akupỹm mex pa.

¹⁴ Hãmri nhũm Jejus kãm: —E kêr ka amnhĩ tã akwỳjẽ mã tanhmã ijarẽnh to hkêt rãhã ma patre hwỳr tẽ kê akupỹm akà mex ã apumu. Hãmri ka amnepẽm Mojes kot mẽ ate akupỹm amex ã Tĩrtũm mã tanhmã amnhĩ nhĩpẽx to hã karõta ka kãm ho anẽ. Kê mẽ mẽ piitã akupỹm akà mex ã apumu. Anẽ.

Hãmri nhũm kuma ně kãm: —Tõe. Nã kot paj anẽ. Anẽ.

Hãmri ně ma hwỳr htẽm kurẽ kumrẽx.

¹⁵ Hãmri nhũm mẽ piitã axpẽn mã Jejus jarẽnh o ri hprõt nhũm mẽ kot kapẽr mar kaxyw ma hwỳr mra. Nẽ mẽ ã xwỳnhjaja nhũm kot mẽ ho mex kaxyw nhũm mẽ hwỳr amnhĩ to mra.

¹⁶ Jakamã nhũm pre hte Jejus tõhã mẽ kêp hapõj ně ahte ma kapõt ã Tĩrtũm mã amnhĩ jarẽnh kaxyw mra. Nẽ kãm amnhĩ jarẽnh pa hãmri ně ma akupỹm mẽ hwỳr mra.

Jejus kot ì kamã htyk xwỳnh o mex ã harẽnh

Matẽwre 9.1-8; Makre 2.1-12; Juãw 10.37-38

¹⁷ Tã nhũm Jejus ma Tĩrtũm kapẽr o Ijaew jahkre ho pa. Jakamã nhỹri mẽhõ nhõrkwỹ kamã ho mẽ ahkre ho xa

nhũm Parijew nhõ xwỳnhjê mē Tirtũm kapēr tũm o mē ahkre ho mē pa xwỳnhjaja kot mar kaxyw ma hwỳr mra. Na pre ra Garirej rũm mē hkwỳjaja ma hwỳr mra. Nē pika pē Jutej rũm mē hkwỳ haxwỳja ma hwỳr mra. Nē krĩ pē Jerujarē rũm. Ā na prem ohtõ nē krĩ piitã kurũm kot mar kaxyw hwỳr akuprõ nhũm mē ahkre anē. Nē Tirtũm kot ho ãhpumunh tỳx jakamã nhũm ỹ hã akupỹm mē à xwỳnhjê ho mex.

¹⁸ Hãmri nhũm hkwỳjaja ĩ kamã htyk xwỳnh mỳ nē Jesus wỳr o tē. Nõr xà kamã nõr rãhã nhũm mē hã hije nē hwỳr o tē. Hãmri nē tee ri kot hwỳr ho àr kaxyw ri mē hkupu ho pa.

¹⁹ Nom nhũm mē ra ixkre ho nỳt rax jakamã nhũm mē tee ri amnhĩ kukamã ho ukapi ho ri pa. Hãmri nē ra hamaxpēr nē ixkre nhĩmõk po hwỳr ho api nē ixkre nhĩmõk kwỳ grã nē hkõt ĩ kamã htyk xwỳnhhta jaxã. Nõr xà kamã nõr rãhã Jesus wỳr haxã nē mē hipõk ri ho wrỳ nē kutã kuxi nhũm nõ.

²⁰ Hãmri nhũm Jesus amnhĩ tã mē kot kaxyw kãm hamaxpēr tỳx ã mē omunh mex nē. Hãmri nē ĩ kamã htyk xwỳnhhta mã kapēr nē kãm:

—Pa? E na pa ra anē tanhmã ate amnhĩ tomnuj to ho apaja o ijapêx pa. Kot paj axte kãm ijamaxpēr kêt nē. Anē.

²¹ Hãmri nhũm Parijew nhõ xwỳnhjê mē Tirtũm kapēr tũm o mē ahkre ho mē pa

xwỳnhjaja tee ri kot ã kãm kapēr anhỳrja ã kuma nē axpên mã:

—Tk. Kwa kêp Tirtũm kêt tã te ri kot amnhĩ nhĩpêx pyrãk o ri mē nē mē kot amnhĩ tomnuj o hapêx ã amnhĩ jarênh o kuhê. Tirtũm pix na kot mē nē mē kot amnhĩ tomnuj o hapêx xwỳnh kênã. Anē.

²² Nhũm mē ã axpên mã Jesus jarênh anē nhũm amnhĩ tã mē kuma nē mē hamaxpēr kõt mē omunh mex nē. Jakamã mē kãm:

—Kwa mē ã ajamaxpēr anhỳr kêt nē.

²³ Ixte mē nē mē kot amnhĩ tomnuj o ijapêx par ã amnhĩ jarênh tã mē ate ja kõt ixpumunh kêt jakamã na ka mē ixkõt ajamaxpēr kêt nē. Nom kot paj mē anoo mã akupỹm ĩ kamã htyk xwỳnhhta o mex ka mē apiitã ja hã ixpumu hãmri nē ixkõt ajamaxpēr kurê kumrêx.

²⁴ Ixpê Tirtũm kot mē awỳr inhmênh xwỳnhhta na pa. Ixte mē anē mē ate amnhĩ tomnuj rênh kaxyw na pre mē awỳr inhmê pa mē awỳr wrỳ. Tã mē ate ja kõt ixpumunh kaxyw kot paj mē anoo mã myja o mex. Anē.

Hãmri nē hpãnhã ĩ kamã htyk xwỳnhja mã kapēr nē kãm:

—E kãnhmã xa nē anõr xà py nē ma akupỹm anhõrkwỳ hwỳr tē. Anē.

²⁵ Nhũm kãnhmã ãm kurê kumrêx. Hãmri nē amnhĩ pumu nē hkĩnh tỳx nē nõr xà py nē mē noo mã kato nē akupỹm õrkwỳ hwỳr ma

Tirtũm mã mex o mex ã harẽnh o tẽ.

²⁶ Hãmri nhũm mẽ amnhĩ jaer pê omu. Nẽ no hapôx kaxyw hkôt omunh o kuhê nõ kamã no pyma nõ. Nẽ tee ri omu hãmri nõ axpẽn mã:

—Kokỹỹ. Aa mẽ pahte ã mẽhõ kot amnhĩ nhĩpêx anhỹr ã omunh kêt tã na pu mẽ jarãhã ja pumu. Anẽ.

Hãmri nõ Tirtũm mã mex o mex ã harẽnh o kuhê.

Jejus kot amnhĩ kôt Rewi hwỹr ã harẽnh

Matêwre 9.9-13; Makre 2.15-17; Rukre 15.1-2

²⁷ Tã nhũm Jejus ma hkôt mẽ pa ho mẽ pa xwỹnhjê mẽrohã ma nhỹhỹm mõ. Hãmri nõ nhỹri Rewi pumu. Rewi nhĩxi hõ pê na Matêwre. Rõm kãm mẽ õ pahikti mã amnhĩ kwỹjê pê kãxpore hkwy jamỹnh xwỹnh na pre. Jakamã nhũm ujamỹnh xã hã ixkre kamã mẽ kêp hkwy jamỹnh o nhỹ nhũm Jejus mẽ hkôt mẽ pa o mẽ pa xwỹnhjaja hãnh mra. Hãmri nhũm Jejus àpẽn ã omu nõ amnhĩ kôt kuwỹ nõ kãm:

—Pa? Ekwa axàpẽnhta kaga nõ hpãnhã amnẽ mẽ ixkôt mãn tẽ. Nẽ ixkôt mãn ri apa ho apa. Anẽ.

²⁸ Hãmri nhũm kuma nõ àpẽn kaga hpa nõ ma hkôt mõ nõ hkôt pa ho pa.

²⁹ Hãmri nhũm mẽmo arĩgro hã nhũm Rewi nhõ mẽ apkur xã hã mẽõ rax nõ. Jakamã nhũm amnhĩ nhõrkwy hwỹr hkrãmnhwỹjaja nõ Jejus mẽ hkôt mẽ pa ho mẽ pa xwỹnhjê hwỹ. Mẽ kot kutã apkur

kaxyw nhũm amnhĩ kôt mẽ kuwỹ nhũm mẽ ma hkôt mra nõ òrkwy hwỹr agjê nõ apkur o hkrĩ. Nẽ mẽ kêp Rõm nhõ pahi mã mẽ kêp kãxpore hkwy jamỹnh xwỹnh kwỹjaja nõ mẽ ohtõ nõ hwỹr akuprõ nõ axpẽn kutã apkur o hkrĩ.

³⁰ Hãmri nhũm Parijew nhõ xwỹnhjê mẽ Tirtũm kapër tũm o mẽ ahkre ho mẽ pa xwỹnh kwỹjaja mra nõ mẽ apkur ã mẽ omu nõ tee ri mẽ hkaêx ã Jejus pumu hãmri nõ Jejus kôt mẽ pa ho mẽ pa xwỹnhjê hwỹr agjê nõ hã mẽ kãm akir nõ mẽ kãm:

—Kwa mẽ kot amnhĩ tomnuj ho mẽ pa xwỹnhjê kutã mẽ apkur kêt tã ka mẽ apytãr xwỹnhja mẽ apimràatã axtem nõ mẽ kutã axàpkur o akrĩ. Kwa mẽ ate amnhĩ to mex ronhỹx ka mẽ kutã axàpkur kêt nõ. Anẽ.

³¹ Hãmri nhũm Jejus amnhĩ tã mẽ kapër ã mẽ kuma nõ mẽ kãm:

—Tk. Nà ixte tãm mẽ unhwỹr kaxyw na pa mẽ kutã ixàpkur o nhỹ. Xã na hte tõtõja mẽ mex xwỹnhjê hwỹr mra nõ mẽ hkane? Nà ãm mẽ à xwỹnhjê pix wỹr na htem mra. Ra mẽ ate ja pumunh mex kẽnã. Ja pyrã nõ na pa pre mẽ kot amnhĩ to mex xwỹnhjê hwỹr ixwryk kêt nõ. Mẽ kot amnhĩ tomnuj xwỹnhjê pix wỹr na pa pre wry. Ixte tãm mẽ unhwỹr kaxyw na pa pre mẽ hwỹr wry nõ ã jajê kutã ixàpkur o inhỹr anẽ.

³² ãm mẽ kot amnhĩ tomnuj xwỹnhjê hwỹr na pa pre wry nõ mẽ kamã ixukapri ho

ri ixpa. Mě kot amnhĩ tomnuj mã urer nẽ hpãnhã tãm amnhĩ nhĩpêx o pa kaxyw na pa pre mẽ hwÿr wrÿ. Tã ka mẽ atÿx ã ri mẽ ixto akapêr anẽ. Anẽ.

Mě hpãmjaja kot amnhĩ nhĩpêx gryk ã Jejus kaga hã mẽ harênh

Matêwre 9.14-17; Makre 2.18-22

³³ Tã nhũm Ijaew kwÿjaja Jejus wÿr mra nẽ kãm:

—Pa? E ot pa mẽ awÿr mra. Kwa aprĩ hã mẽ inhmã mẽmoj jarẽ. Na hte Parijew nhõ xwÿnhjê mẽ Juãw kôt mẽ pa xwÿnhjaja tõtã Tirtũm mã amnhĩ jarênh kaxyw nẽ apkur kêt rãhã kãm amnhĩ jarẽ. No akôt mẽ pa ho mẽ pa xwÿnhjaja na htem ãmnhĩx apkur o pa kamã kãm amnhĩ jarẽ. Kwa mo na htem mẽ urak nẽ tõtã apkur kêt ri kãm amnhĩ jarênh hkêt nẽ? Anẽ.

³⁴ Hãmri nhũm mẽ kuma nẽ mẽ kãm:

—Tk. Nà mo kaxyw koja mẽ apkur kêt rãhã kãm amnhĩ jarẽ? Mě hkaprĩ hkêt kênã. Mě kot ixkôt pa ho pa hã amnhĩ pumunh jakamã hkĩnh nẽ pa. Kormã ixte mẽ kamã ixpa kênã kot kêt mẽ Tirtũm mã amnhĩ jarênh kaxyw nẽ apkur kêt rãhã kãm amnhĩ jarẽ. Xà na htem hkrãmnhwÿ hã hkĩnh kaxyw hã akuprõ nẽ hkaprĩ nẽ apkur kêt nẽ mÿr o hkrĩ? Na htem hã akuprõ nẽ hkĩnh nẽ hã apkur rũnh nẽ. Ja pyrã nẽ na hte ixkôt mẽ pa ho mẽ pa xwÿnhjaja ixkôt kormã

ãmnhĩx ri hkĩnh nẽ apkati mẽ apkur o pa.

³⁵ Nom koja mẽ kãm ixkurê xwÿnhjaja nhÿrmã tanhmã ixto hãmri nhũm mẽ rĩ kormã ixtã hkaprĩ htÿx kãm apkur kêt ri tanhmã amnhĩ nhĩpêx to. Anẽ.

³⁶ Nhũm pre ã Jejus mẽ kãm hkôt ri mẽ pa ho mẽ pa xwÿnhjê jarênh anẽ hãmri nẽ mẽ kãm:

—Nà mẽ kot amnhĩ tomnuj xwÿnhjaja mẽ kot amnhĩ nhĩpêx tũm o amnhĩ pyrak jakamã na htem mẽ kot amnhĩ nhĩpêx nyw kaga.

³⁷⁻³⁹ Ixte amnhĩ nhĩpêx nywja te kot mẽ ate amnhĩ nhĩpêx tũm pyrak kêt jakamã ka htem inhma nẽ ãm inhma. Kwa mẽ ixkapêr ma nẽ mẽ ate amnhĩ nhĩpêx tũm gryk ã ixkaga hkêt nẽ. Anẽ.

6

Jejus kêp arĩgromnu hpãm ã harênh

Matêwre 12.1-8; Makre 2.23-28

¹ Tã nhũm Ijaew nhõ arĩgromnu pê sapja axte kato. Hãmri nhũm Jejus mẽ hkôt ri mẽ pa ho mẽ pa xwÿnhjê mẽ ma mẽ hpur kôt ri nhÿhÿm ri pa. Hãmri nhũm hkôt mẽ pa ho mẽ pa xwÿnhjaja ra kãm prãm nẽ mra hãmri nẽ prãm xàj mẽmo hy te kot harôj pyrak xwÿnhhta kwÿ rê nẽ kugrà nẽ ma Jejus kôt hkanhar o mō. Ijaew kot amnhĩ nhĩpêx xà hkôt.

² Hãmri nhũm Parijew nhõ xwÿnhjaja kãm mẽmoj tã Jejus o kapêr prãm jakamã ã mẽ

kot amnhĩ nhĩpêx anhÿr ã mẽ omu nê mẽ hã Jejus kukjêr kurê kumrêx nê kãm:

—Kwa Tĩrtũm kapêr tũm kot mẽ panhõ arĩgromnu hã mẽ pahte mẽ pahpur kãm mẽmoj nhĩkênh nê mẽ pahkurê htã nhũm ri akôt mẽ pa ho mẽ pa xwÿnhjaja axtem nê mẽmo hyta kwÿ rê nê akôt hkanhar o mō. Kwa mẽ kãm anê kê mẽ ã amnhĩ nhĩpêx anhÿr kêt nê. Na htem arĩgromnu hã ã amnhĩ nhĩpêx anhÿr kêt nê. Anê.

³⁻⁴ Hãmri nhũm Jejus mẽ kuma nê hprĩ hã mẽ kãm Tĩrtũm kapêr tũm jarê nê mẽ kãm:

—Kwa xà na ka mẽ Tĩrtũm kapêr ã kagã htũm kamã pahĩ Tawi kot tanhmã amnhĩ nhĩpêx tota kamã harênh nê mar kêt nê? Na pre Tawija hkôt ri mẽ pa xwÿnhjê mẽ nhũm mẽ prãm xaj Tĩrtũm mã amnhĩ jarênh xà hã ixkre wÿr agjê nhũm patre maatija mẽ kãm prãm tÿx ã mẽ omu nê mẽ kãm mẽmoj gō. Mẽ kot Tĩrtũm noo mã pãwti jaxwÿr xwÿnhta nhũm mẽ kãm kugō nhũm mẽ kuku. Tĩrtũm kapêr ã kagã htũm kot ja nê mẽ kurê htã nhũm mẽ kãm prãm tÿx ã mẽ omu nê mẽ kamã ukapri xaj mẽ kãm kugō. Patre pix kot ja kur kaxyw tã nhũm mẽ kãm kugō nhũm mẽ kuku. Tã nhũm Tĩrtũm ja hã mẽ omu nhũm ja kêp omnuj kêt nê. Kot mẽ kamã ukapri nê mẽ kãm òr nhũm mẽ hã omu nhũm ja kãm mex nê.

⁵ Tã pa na pre Tĩrtũm mẽ akaxyw ixãm nê mẽ awÿr

inhmênh jakamã papxpix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karō ho ri ixpa. Ixpê arĩgromnu hpãm na pa. Anê.

Jejus kot ìhkra grã xwÿnh o mex ã harênh

Matêwre 12.9-14; Makre 3.1-6

⁶ Tã nhũm Ijaew nhõ arĩgromnu pê sapja axte kato. Hãmri nhũm Jejus Tĩrtũm kapêr o mẽ ahkre xà hã ixkre hwÿr tẽ nê axà nê Tĩrtũm kapêr o mẽ ahkre ho nhÿ. Nhũm mēhō myja upōk rūm ìhkra grã xwÿnhja mẽ ìhkō hã mar o nhÿ.

⁷ Nhũm Parijew nhõ xwÿnhjê mẽ Tĩrtũm kapêr tũm o mẽ ahkre ho mẽ pa xwÿnhjaja mẽ kãm mẽ hkrãhtũmjê mã Jejus o kapêr prãm xaj htãnopxar o kuhê. Nê ìhkra grã xwÿnhta pumu nê hã axpên mã:

—Kwa pu mẽ jar pakuhê nê Jejus tanhmã kot amnhĩ nhĩpêx to hã omu. Xà koja jarãhã mũjti ho mex nã? Jarãhã arĩgromnu kênã kot kêt kãm ìhkra ho mex. Koja anê nê Tĩrtũm kapêr kwÿm ri amnhĩ nhĩpêx. E pu mẽ kop pakuhê nê hã omu. Anê.

⁸ Nhũm Jejus ra kot mẽ hamaxpêr kôt mẽ omunh mex jakamã amnhĩ wÿr myta mã hpa ho apê nê kãm:

—Pa? E kãnhmã xa nê amnê ixwÿr tẽ. Anê.

Hãmri nhũm kuma nê kãnhmã xa nê hwÿr tẽ.

⁹ Hãmri nhũm Jejus amnhĩ pu hã ri mẽ ho hakêx nê mẽ

kot mar o hkrī xwỳnhjê pumu nê mẽ kām:

—E mẽ inhmã mẽmoj jarê. Tanhmã na htem arĩgromnu hã axpên nhĩpêx to ho pa wehe? Xà kot ka arĩgromnu hã axà htỳx nê nõ hãmri nê amnhĩ mex prãm xàj ma mẽhõ hwỳr amnhĩ to tẽ. Hãmri nhũm ãm apumu nê apkatim arĩgro mex jamār pê akane hkêt ka ty nhũm ja amã mex nê nà? Rỳ nhũm tanhmã atomnuj to nê akupỹm amnhĩ nê ajano nhũm ja amã mex nê nà? Nà koja ã anhĩpêx anê nhũm ja amã mex kêt nê. Na ka htem ã amnhĩ nhĩpêx anhỳr o apa hkêt nê. E mẽ inhmã mẽmoj jarê. Tanhmã na pre finat Mojesja Tĩrtũm nhỹ hã mẽ pamã arĩgromnu hã mẽ pahte axpên nhĩpêx ã karõ hto? Xà kot puj mẽ axpên kãm paxukapřĩ ho papa nà? Kot puj mẽ pamã axpên kurê ho papa? Xà kot puj mẽ hã mẽmoj punuj pê axpên pytà nà? Xà kot puj mẽ hã axpên pytàr pymaj arĩgro mex jamã? E mẽ atõ inhmã ja jarê. Anê.

Nhũm pre ã mẽ hkukjêr anê.

¹⁰ Mẽ hamaxpêr ã mẽ omunh mex pê ã mẽ hkukjêr anhỳr o xa. Nom nhũm arĩ mẽhõ tanhmã kutã kãm nê hkêt nê. ãm akryk mar pê omunh o hkrī. Mẽ kot tanhmã kãm nê nhũm ta pãnhã tanhmã kot mẽ kãm nê pymaj nhũm mẽ tee ri kãm tanhmã nê hprãm nom akryk mar o hkrī. Hãmri nhũm Jesus tee ri mẽ omu hãmri nê myta

mã kãm:

—Tk. Mẽ kot tanhmã inhmã kapêr tore hã. E anhĩhkra katàt. Anê.

Hãmri nhũm ãhkra katàt nê akupỹm mex kurê kumrêx.

¹¹ Hãmri nhũm mẽ kãm Jesus kurê xwỳnhjaja tee ri ja hã omu nê kamã gryk tỳx nê. Arĩgromnu hã kot ho mex jakamã nhũm mẽ kamã gryk tỳx nê. Nê hã axpên kukjêr o kuhê nê axpên mã:

—Kwa ã kot amnhĩ nhĩpêx anhỳr mỳrapê tanhmã kot puj wem ho? Na ã kapêr anhỳrja o tanhmã mẽ pahto kapêr punuj to. Te mẽ papamjaja mẽ pahte hkĩnhã pahkwỳjê kamã paxukapřĩ hkêt pyræk ã mẽ pajarê. Koja mẽ pahkwỳjaja kuma hãmri nê mẽ pahte amnhĩ nhĩpêx kaga nê amnhĩ kaxyw ãm hkôt pix mã hamaxpêr o pa. Jakamã kwa tanhmã kot puj mẽ ja nê ho? Anê.

Jesus kot amnhĩ kaxyw mẽ ho 12 nê mẽ rênh ã harênh

Matêwre 10.1-4; Makre 3.13-19

¹² Tã nhũm arĩgro hõ hã nhũm Jesus ma kot Tĩrtũm mã amnhĩ jarênh kaxyw ma hixêt prêk wỳr tẽ nê hã apĩ. Hãmri nê kãm amnhĩ jarênh o apkati.

¹³ Tã nhũm kwỳhtã nhũm amnhĩ kôt kot ri mẽ o pa xwỳnhjê hwỳ nê amnhĩ kaxyw mẽ ho 12 nê mẽ kurê. Nê mẽ kãm:

—E mẽ kajaja kot paj ma mẽ pahkwỳjê hwỳr mẽ arê ka mẽ ma inhỹ hã Tĩrtũm kapêr o mẽ ahkre ho ri mẽ hkôt apa. Kot

kaj mẽ apê inhỹ hã mẽ ahkre
ho apa xwỳnh. Anẽ.

14 Kot amnhĩ kaxyw mẽ
rênh xwỳnhjê nhĩxi na jajaja:

Simãw kumrêx na pre kuta
nẽ axte hã hixi mẽ nhũm
kêp Pêtre.

Nẽ Simãw Pêtre hkôt htõ
Andreja ta.

Nẽ hkôt Xiakre hta.

Nẽ hkôt Juãw ta.

Nẽ hkôt Firiptija ta.

Nẽ hkôt Patoromew ta.

15 Nẽ hkôt Matêwreja ta.

Nẽ hkôt Tomasja ta.

Nẽ hkôt Apew kra axtem
Xiakre hõja ta.

Nẽ hkôt Simãw Jeroxja ta.

16 Nẽ hkôt Xiakre hõ hkra
Jutja ta.

Nẽ hkôt Jut Kariot ta.

Jut Kariotja na pre
kormã kot mẽ kãm
Jejus kurê xwỳnhjê
nhĩhkram òr mã. Nhũm
kot amnhĩ kukamã
omunh mex tã mẽ hkôt
amnhĩ kaxyw kuta.

Ã mẽ kot Jejus nhỹ hã mẽ
ahkre o pa kaxyw mẽ rênh
xwỳnhjê nhĩxi kot anhỹr.

Jejus xàpênh ã harênh

Matêwre 4.23-25

17 Tã nhũm Jejus akupỹm ã
hã mẽ ahkre ho pa xwỳnhjê
mẽ hãmri hixêt prêêta kurũm
wrỹ nẽ nhỹri hinur kãm kuhê.
Hãmri nhũm nhỹhỹnh mẽ kot
mar mã xwỳnhjaja hã akuprõ.
Kôt mẽ pa ho mẽ pa xwỳnh
kwỳjaja nẽ nhỹhỹnh krĩ hkwỳ
rũm mẽ hkwỳjaja. Pika pê
Jutej kurũm mẽ hkwỳjaja. Nẽ
krĩ pê Jerujarê kurũm mẽ
hkwỳjaja. Nẽ gô mỳ ri Xir
mẽ Sitõja wa kamã mẽ pa

xwỳnh kwỳjaja. ãm ahpỹnhã
ri nhỹhỹnh krĩ hkwỳ rũm
mẽ kot mar mã xwỳnhjaja hã
pikuprõnh rax nẽ.

18-19 Mẽ kot kapêr mar
nhũm kot akupỹm mẽ ho mex
kaxyw nhũm prem ma hwỳr
amnhĩ to pa. Mẽ hkwỳjaja
tanhmã ri à kute. Nhũm mẽ
hkwỳjaja mẽkarõmnuti kot mẽ
hwỳr gjêx xwỳnhjaja nhũm
mẽ piitã ma hwỳr amnhĩ to
pa. Na prem ra amnhĩ kaxyw
kãm hamaxpêr o:

—E pa ma hwỳr tẽ nẽ
ãm hkupênh pix tã akupỹm
inhmex japêr. Anẽ.

Hãmri nẽ ma hwỳr mra
nhũm mẽ omu nẽ Tirtũm
xàhpumunh tỳx o akupỹm mẽ
ho mex pa.

*Jejus kot hkôt mẽ pa ho mẽ
pa xwỳnhjê jahkre hã harênh*

Matêwre 5.1-12

20 Tã nhũm Jejus hkôt mẽ pa
ho mẽ pa xwỳnhjê jahkre nẽ
mẽ kãm:

E kot kaj mẽ atõ amnhĩ
kaxyw tanhmã inhmã
ajamaxpêr to nẽ
ajamaxpêr o: “Nà
ixkukrêx rax kêt tã
na hte Tirtũm ixkôt
pa ho pa. Kojã ixkôt
pa hkêt pa ixtỳx ri
tanhmã amnhĩ nhĩpêx
to ho ri ixpa rãhã nẽ.
Tirtũmja mex kumrêx
o kot mẽ hikukrêx
raxta jakrenh par.”
Anhỹr o ajamaxpêr.
Hãmri nhũm Tirtũm
ã ajamaxpêr anhỹr ã
apumu nhũm ja kãm
mex nẽ. Hãmri nhũm
apê hkra hã ato mex nẽ
atãnopxar o akôt pa ka

ajamakêtkati nê akĩnh
nê axàmnhĩx ri apa.

21 Nê kot kaj mẽ atõ amã
Tĩrtũm kãm hprãm xà
hkôt tanhmã amnhĩ
nhĩpêx to ho ri apa
hprãm tỳx nê. Nhũm
amnhĩ tã apumu nhũm
ja kãm mex nê nhũm
ato mex nê. Nê tanhmã
ato ka hkôt pix mã
amnhĩ to mex o ri
apa nê ajamakêtkati nê
akĩnh nê axàmnhĩx ri
apa.

Nê kot kaj mẽ tanhmã amnhĩ
tomnuj to. Hãmri nê
tee ri ja hã amnhĩ
pumu nê ajamxpêr.
Nê apijaàm nê akaprĩ
xà amỳr o nhỹ. Amỳr
rax nê. Hãmri nhũm
Tĩrtũm ja hã apumu
nhũm ja kãm mex
nê. Jakamã nhũm anê
akaprĩ hta nê ato mex
nê. Ka ajamakêtkati nê
akĩnh nê axàmnhĩx ri
apa.

22-23 Nê kwār mẽ māmri
ixtã tanhmã mẽ ato
kapêr punuj to nê
tanhmã mẽ ato hêx
to nê tanhmã ri mẽ
atomnuj to ho pa.
Kwār mẽ māmri ã mẽ
anhĩpêx anhỹr o pa.
Ka mẽ ãm inhmã pix
mã ajamxpêr rãhã ho
apa pê ajamakêtkati
nê axàmnhĩx ri apa.
Kwār mẽ māmri ã mẽ
anhĩpêx anê nê mẽ
amex kêt ã mẽ ajarênh
o pa. Amnepêm na
pre Tĩrtũm nhỹ hã
kapêr xwỳnhjaja nhũm
prem ã mẽ hipêx anê.

Jakamã koja mẽ uràk
nê ã mẽ anhĩpêx anhỹr
o pa. Nhũm Tĩrtũm
ja hã mẽ apumu nê
amnhĩm mẽ amex ã
mẽ ajarê. Hãmri nê
nhỹrmã kaxkwa kamã
wa inhõ krĩ kamã mẽ
ato mex rax nê. Ka mẽ
akĩnh nê ajamakêtkati
nê axàmnhĩx ri apa.
Jakamã kwār mẽ
māmri pika jakamã ã
ixtã mẽ anhĩpêx anê.
Anê.

*Jejus kot arĩ mẽ kot mar
xwỳnhjê jahkre hã harênh
Xiakre 5.1-5*

24 Nhũm Jejus nhãm hkôt
mẽ pa ho mẽ pa xwỳnhjê
nhĩhkô hã mẽ kot Tĩrtũm
kôt amnhĩ nhĩpêx o pa hkêt
xwỳnhjê hwỳr apkjê. Nê
mẽ omu nê tanhmã mẽ kãm
kapêr to. Mẽ hikukrêx rũnh
xwỳnhjê kumrêx mã kapêr nê
mẽ kãm:

E kwa mẽ o kora mẽ akukrêx
rũnh xwỳnhjaja. Na ka
htem ãm akukrêx rũnh
pix mã ajamxpêr o ri
apa nê gryk ã Tĩrtũm
mã ajamxpêr o apa
hkêt nê. Jao mẽ amã
kapêr mar prãm kêt
nê. Nê ãm akukrêx
rũnh mã ajamxpêr pê
akĩnh nê ri apikunhar
o ri apa. Tã kot ka mẽ
nhỹrmã ty hãmri nhũm
akĩnh xàja apê hapêx.

25 Nê mẽ amã Tĩrtũm kôt ri
amnhĩ nhĩpêx prãm kêt
xwỳnhjaja. Kot kaj mẽ
nhỹrmã akaprĩ htỳx
kãm tee ri amnhĩ to

hwÿr kaprÿ kãm ga.
Koja mẽ amar kêt nê.

Nê mẽ atÿx ri mẽ ate tanhmã amnhĩ tomnuj to hkukamã ajamexpêr nê apikunhar pê amnhĩ tomnuj o apa xwÿnhjaja. Kot kaj mẽ nhÿrmã ã mẽ ate amnhĩ nhĩpêx anhÿrja mÿrapê mẽ kot amnhĩ xà htÿx kamã hamak o pa htÿm xà hwÿr ma apa. Hãmri nê kamã akaprĩ xàj amÿr rãhã ho ri apa. Jakamã kwa mẽ o kora mẽ amã Tirtÿm prãm kêt xwÿnhjaja. Kêr ka mẽ ixkapêr ma nê axkãm ajamak rom nê ri apa.

²⁶ Amnepêm mẽ pakukamã mẽ pa xwÿnhjaja na prem Tirtÿm kapêr o hkwyjê jahkre ho pa. Nom axtem nê hkwyÿm ri tanhmã mẽ kãm ho hêx to nhÿm mẽ kuma nhÿm ja mẽ kãm mex nê nhÿm mẽ amnhĩm mẽ mex ã mẽ harê. No ãm mẽ mex kêt. Tã mẽ kajaja. Mê kot mẽ urak nê axpên mã mẽ amex ã mẽ ajarênh tã Tirtÿm mã mẽ amex kêt. Jakamã kot kaj mẽ amex kêt nê. Anê.

*Mê kãm mẽ pahkurê
xwÿnhjê jarênh*

Matêwre 5.38-48; Rukre 23.34; mãânên Atre 7.60; Rômân 12.14

²⁷ Hãmri nhÿm Jejus hpãnhã mẽ piitã mẽ ahkre nê mẽ kãm:

—E mẽ ate inhmar xwÿnhjaja. Kêr ka mẽ kot mẽ atomnuj xwÿnhjaja amnhĩ tã tanhmã mẽ ho hkêt nê. ãm mẽ ho mex pix o ri apa hkukamã mãn ajamexpêr.

²⁸ —Nê mẽ kot mẽ ato kapêr punuj xwÿnhjaja. Kêr ka mẽ amnhĩ xwar amnhĩ tã tanhmã mẽ ho akapêr punuj to hkêt nê. ãm tãm mẽ kãm akapêr pê mẽ kãm akapêr mex o ri apa. Nê mẽ kot tanhmã ri mẽ ato ho pa xwÿnhjaja ka mẽ ho mex pix o ri apa. Nê mẽ ho Tirtÿm wÿr pix kukamã mãn ajamexpêr.

²⁹ —Nê koja mẽhõ anhĩnep akura ka ãm omu nê tanhmã amnhĩ tã ho hkêt nê. Te ate kãm ihkjê pêr nhÿm kot ihkjê kamã akuranh pyrak o amnhĩ nhĩpêx nhÿm ja amã mex nê. No kêr ka mẽ amnhĩ tã tanhmã mẽ ho hkêt nê.

—Nê koja mẽhõ apê anhĩnôhkã py ka tanhmã hã kãm nê hkêt nê. Kwãr mãmrĩ apê kupy. Ka mãânên te ate kry pê anhĩnôhkã hpakã ry jagjênh xwÿnhta anhĩnôhkã hkôt kãm òr pyrak o hipêx. Nom kamã agryk kãm kãm òr kêt nê.

³⁰ —Nê koja mẽhõ kêp anrakati kumrêx nê awÿr tẽ nê mẽmoj tã awÿ. Ka anhõ mẽmoj japêr nê mãmrĩ kãm mẽmoj gõ. Kêp anhõxÿ hkêt kamã kãm mẽmoj gõ. Rÿ koja mẽhõ apê mẽmoj to ahkĩ ka axàhkurê hkêt nê. Nê tanhmã hã ho hkêt nê.

³¹ Mẽ piitã mẽ kot tãm mẽ anhĩpêxja na mẽ amã hprãm. Tã kêr ka mẽ amnhĩ pyrã nê tãm mẽ piitã mẽ hipêx o ri

apa. Mě kot tām mẽ anhĩpêx kêt tã kêt ka mẽ axàmnhĩx ri anhõxý hkêt nê tām mẽ hipêx o ri apa.

32 —Nom kot kaj mẽ amã mẽ piitã mẽ ho mex o apa hprãm kêt japêr. Nê ãm mẽ kot mẽ ato mex xwýnhjê pix ka mẽ amã mẽ ho mex prãm. Xà koja Tirtũm ja hã mẽ apumu nhũm ja kãm mex nê? Nà koja kãm mex kêt nê. Koja mēhõ mẽ ato mex kêt tã ka mẽ amnhĩ rom ho mex nê nhũm Tirtũm ja hã mẽ apumu hãmri nê mẽ amex ã mẽ ajarê. Mě kot amnhĩ tomnuj o mẽ pa xwýnhjaja na htem ãm mẽ kot mẽ ho mex xwýnhjê pixjaja nhũm htem amnhĩ xwar mẽ ho mex o pa. No tām mẽ kot amnhĩ nhĩpêx o mẽ pa xwýnhjaja na htem mẽ piitã mẽ ho mex o pa. Mě kot tām amnhĩ nhĩpêx xwýnhjaja nê mẽ kot amnhĩ tomnuj xwýnhjaja nhũm mẽ ho hpimràatã mẽ ho mex o axpên pyrãk o pa.

33-36 —Nê mẽ kot amnhĩ tomnuj xwýnhjaja na htem ãm mẽ kot mẽ ho mex xwýnh pixjaja nhũm htem amnhĩ xwar mẽ ho mex o pa. No mẽ kajaja. Kêr ka mẽ mãmri mẽ piitã mẽ kamã axukaprĩ pix nê. Jao axàmnhĩx ri mẽ piitã mẽ kãm mẽmoj nhõr o ri apa. Nhũm Tirtũm ja hã mẽ apumu nê ja hã mẽ ato mex nê.

—Jakamã kêr ka mẽ amarĩ mẽ kãm akurê xwýnhjê ho mex nê. Nê mẽ kamã axukaprĩ nê. Nê mẽ piitã mẽ kãm mẽmoj nhõr o ri apa. Kê nhỹrmã Tirtũm maati mẽ hã

mẽ amã mẽmoj nhõr rax nê. Nê mẽ ate kot amnhĩ nhĩpêx kôt amnhĩ nhĩpêx xwýnh ã mẽ ajarê. Tirtũm na hte mẽ kot amnhĩ tomnuj xwýnhjê kamã ukaprĩ ho pa. Jakamã kêr ka mẽ urãk nê ã mẽ hipêx anhỹr o ri apa. E kêr ka mẽ ã axpên nhĩpêx anhỹr rãhã nê. Anê.

Mě pahte axpên to pakapêr punuj kêt ã mẽ pamã karõ

Matêwre 7.1-5; määnēn Rõmãn 2.1-3, 14.1; Wam Korĩt 4.5; Xiakre 4.11-12

³⁷ Nhũm Jejus arĩ mẽ ahkre nê mẽ kãm:

—Nê kêr ka mẽ atýx ri amnhĩ krã hkôt tanhmã mẽ kot amnhĩ tomnuj to hã tanhmã axpên jarênh to ho ri apa hkêt nê. Kêr kê Tirtũm mẽ apyrã nê ã mẽ ajarênh anhỹr kêt nê.

—Nê kêr ka mẽ tanhmã mēhõ kot ra atomnuj tota mã ajamaxpêr rãhã hkêt nê. ãm ho ajamakêtkati tokyx anê nê axte kãm ajamaxpêr kêt nê. Kêr kê Tirtũm ja hã mẽ apumu nê mẽ apyrã nê axte tanhmã mẽ ate amnhĩ tomnuj to mã hamaxpêr kêt nê.

³⁸ —Nê kêr ka mẽ axpên kamã axukaprĩ pê tanhmã axpên to mex to ho ri apa. Kêr kê Tirtũm ja hã mẽ apumu nê mẽ apyrã nê mẽ akamã ukaprĩ pê tanhmã mẽ ato mex to ho pa. Na hte mẽ pahte axpên kamã paxukaprĩ hã mẽ pahpumunh xà hkôt tanhmã mẽ pakamã ukaprĩ to.

³⁹ —Nom kêr ka mẽ atýx ri tanhmã axpên to akapêr to hkêt nê. Mě ate aprĩ hã

axpën jamaxpër kôt axpën pumunhre hã. Jakamã kot kaj mẽ atỳx ri mẽhõ ho akapër punuj hãmri nẽ te mẽ nohkre xwỳnhjê hõ kot mẽmoj pumunh kêt tãã te kot no ho omunh nẽ tanhmã harẽnh to pyrãk o amnhĩ nhĩpêx.

⁴⁰ Tĩrtũmja tapxipix na kot mẽ pajamaxpër kôt mẽ pahpumunh par. Mẽ axàhpumunh tỳx o mẽ pahte hakrenh kêt jakamã kwa kêr ka mẽ ãm hkôt pix mã amnhĩ nhĩpêx o ri apa. Kot kaj mẽ ã amnhĩ nhĩpêx anẽ hãmri nẽ gaa nẽ urak nẽ mẽ piitã mẽ kamã axukaprĩ pix o ri apa.

⁴¹⁻⁴² Jao mẽhõ kot tanhmã amnhĩ tomnuj to hã omu hãmri nẽ tanhmã hã kãm nẽ tokyx anhỳr kêt nẽ. Akumrêx ate tanhmã amnhĩ tomnuj to hã amnhĩ pumu nẽ hkaga hãmri nẽ rĩ kormã mẽhõta hwỳr tẽ nẽ kot tanhmã amnhĩ tomnuj to hã kãm akapër to. Anẽ.

Mẽ pajamaxpër xà hkôt mẽ pakapër ã mẽ pajarẽnh

Matêwre 7.16-20, 12.33-37

⁴³⁻⁴⁵ Nhũm Jejus arĩ mẽ ahkre nẽ mẽ kãm:

—Nẽ koja mẽmo pĩ hpàr mex nẽ ô mex nẽ. Nom koja pàr punuj hãmri nẽ ômnuj nẽ.

—Nẽ na htem mẽmo xô pumu nẽ hkôt tanhmã pàr kute hã omu. No na htem rãrãj pumu nẽ kêp akunĩ kamã mrõnhĩ xô hã hkamnhĩx kêt nẽ. Na htem mẽmo xỳ hpàr pumu nẽ ô xànhre hã hkamnhĩx kêt nẽ. Ja pyrã nẽ koja mẽhõ hamaxpër punuj nẽ mããnẽn

hakwa ho kapër punuj pix nẽ. Nẽ htỳx tanhmã amnhĩ tomnuj to ho ri pa. Nom koja hamaxpër mex nẽ hãmri nẽ mããnẽn hakwa ho kapër mex o pa. Na htem ahpỳnhã amnhĩ jamaxpër xà hkôt tanhmã hakwa ho kapër to ho ri pa. Anẽ.

Ixkre pijakrut jarẽnh

Matêwre 7.24-27; mããnẽn Xiakre 1.22-25; Wam Juãw 2.3-6

⁴⁶ Nhũm Jejus arĩ mẽ hkôt mẽ pa ho pa xwỳnhjê jahkre ho nhỹ nẽ mẽ kãm:

—Nẽ kot kaj mẽ ixpê mẽ anhõ pahihtĩ hã ijarẽ hã kot kaj mẽ ixkapër kôt amnhĩ nhĩpêx rãhã ho ri apa.

⁴⁷ —E pa mẽ amã ixprĩ hã mẽ kot ixkôt amnhĩ nhĩpêx xwỳnhjê kot amnhĩ nhĩpêx jarẽ ka mẽ aprĩ hã inhma.

⁴⁸ Mẽ kot amnhĩ nhĩpêxja te mẽhõ hamaxpër mex pẽ aptỳx kãm amnhĩm òrkwỹ nhĩpêx pyrãk. Koja aptỳx kãm òrkwỹ nhĩpêx nhũm mẽmo arĩgro hã na wrỳk rax nẽ. Nẽ gô htàm rax nẽ hanhi nom nhũm arĩ ãm tỳx nẽ xa. Tã kot kaj mẽ ixkôt amnhĩ nhĩpêx ã kot kaj mẽ te ixkre jarẽnhja pyrãk. Jao amex nẽ ajamakêtkati nẽ ri apa. Te gô htàm kot ixkre janhir tã nhũm ãm tỳxta pyrãk.

⁴⁹ Nom koja mẽhõ hamaxpër mex kêt nẽ htỳx mõ nẽ gô mỳri gyw rerek kãm amnhĩm òrkwỹ nhĩpêx. Hãmri nhũm mẽmo arĩgro hã na wrỳk rax nẽ. Nẽ hã gô htàm rax nẽ òrkwỹ janhi nẽ kêp

grành pa. Tã koja mēhō ixkôt amnhĩ nhĩpêx kêt nē te ho mēhō kot gō mÿri gyw rerek kãm ixkre nhĩpêxta pyrāk. Jao mex kêt nē pa. Jakamã kwa mẽ ixkapêr mar tÿx nē te gō htàm kot ixkre janhir nē grành parta pyrāk o amnhĩ nhĩpêx o apa hkêt nē. Anē.

7

Jejus kot mēhō mã àpênh xwÿnh o mex ã harênh

Matêwre 8.5-13

¹ Tã nhũm Jejus mẽ kãm ujarênh pa hãmri nē ma akupÿm Kapanaũ hwÿr mō.

² Nē mōō nē ra hwÿr pôj. Nhũm krĩ kamã pôristi krãhtũm mã àpênh xwÿnhja à htÿx nē nō. Ra htyk kaxyw nē nō nhũm ò patrãw tee ri omu nē kãm hapê jakamã tee ri hkukamã hamaxpêr o hkaprĩ nē.

³ Hãmri nē Jejus pôx ã harênh ma nē hwÿr Ijaew pigêt kwÿjê rē nē mẽ kãm:

—Kwa mẽ ma Jejus wÿr mra nē kãm ijarê kê tokyx man ixwÿr tē nē inhmã àpênh xwÿnhnta o mex. Anē.

⁴⁻⁵ Hãmri nhũm mẽ kuma nē ma hwÿr mra nē omu nē kãm:

—Pa. Na pôristi krãhtũm na awÿr mẽ inhmē pa mẽ mra. Mē pahkĩnhã kêp Ijaew kêt tã kãm mẽ pahkĩnh nē. Tãm na pre mẽ inhō krĩ kamã mẽ inhmã Tĩrtũm kapêr o mẽ ahkre xà hã ixkreja nhĩpêx. Tã na kãm àpênh xwÿnhnta kêp à htÿx nē nō nhũm apôx hã ajarênh ma nē man awÿr mẽ

inhmē. Kwa ma hwÿr tē nē kãm ho mex nà? Anē.

⁶ Hãmri nhũm mẽ kuma nē mẽ kãm:

—Tõe. Ma pu mẽ hwÿr. Anē.

Hãmri nē ma mẽ hkôt tē. Hãmri nē kormã òrkwÿ htêp o htēm mẽ nhũm axte kutã hkràmnhwÿ hkwy rē nhũm mẽ ma kutã mra. Hãmri nē mra nē mẽ hkaxpa nē Jejus pumu nē kãm:

—Pa? Kwa na pôristi krãhtũmta ã awÿr karō anē. Na mẽ inhmã: “E kêr ka mẽ mra nē nhÿri Jejus kaxpa nē kãm awjarê kê ãm ata rũm kapêr pix o inhmã à xwÿnhnta o mex. Kĩnh ã ixpê Ijaew kêt jakamã ixte amnhĩ kuk ã ixpijaàm tÿx. Jakamã kot paj pam hwÿr ixtēm kêt nē. Kwa kãm anē kê ata rũm kapêr pix o inhmã akupÿm ho mex.

⁷⁻⁸ Ixpê mẽ hkrãhtũm jakamã na pa hte inhō pôristi mã mẽmoj tã karō nhũm mẽ inhmar xà hkôt inhmã mẽmoj tanhmã hipêx to. Na pa hte mẽ kãm: ‘E mẽ ma mra nē ã amnhĩ nhĩpêx anē.’ Anē nhũm mẽ inhma nē ma mrar kurê kumrêx. Rÿ pa mẽ kãm: ‘E mẽ amnē ixwÿr mra nē ã amnhĩ nhĩpêx anē.’ Anē nhũm mẽ inhma nē ixwÿr mra. No kêt Jejus na hte ixrom tanhmã mẽ à kuteja mã kapêr nhũm kuma nē mẽ kêp hapôj nē ma mrar kurê kumrêx. Jakamã koja ata rũm kapêr pix o inhmã ho mex.” Anhÿr o awÿr karō. Jakamã na pa mẽ akutã mra nē akaxpa nē ã amã kapêr jarênh anē. Anē.

9 Hāmri nhũm Jejus amnhĩ jaêr pê mẽ kapêr ma nê hkĩnh nê. Hāmri nê hkôt mẽ kot mar o pa xwýnhjê mã kãm:

—Kwa xà na ka mẽ ã kot ixwýr karô xwýnh ja-maxpêr anhýrta ã ama? Mẽ pahkĩnhã kêp Ijaew kêt tâ mẽ arom amnhĩ kaxyw inhmã hamaxpêr týx nê. Aa mẽ atô uràk nê ate amnhĩ kaxyw ã inhmã ajamaxpêr týx anhýr kêt tâ nhũm mẽ arom kãm àpênh xwýnh kaxyw inhmã hamaxpêr týx nê. Anê.

10 Nhũm pre ã mẽ kãm kapêr anê hāmri nhũm pôristi krãhtũm krãmnhwýjaja kuma nê awjanã nê ma akupým hkrãhtũm nhõrkwýja wýr mra. Nhũm ra Jejus kãm àpênh xwýnhhta akupým ho mex nhũm mex nê ri mra. Hāmri nhũm mẽ akupým pøj nê akupým mex ã omu.

*Jejus kot akupým mēhō
hkra ho htīr ã harēnh
Juāw 11.1-46*

11 Tã nhũm Jejus ma krĩ pê Naĩ hwýr hkôt mẽ pa ho mẽ pa xwýnhjê mẽrohã mō nhũm mẽ ohtô nê mẽ hkôt mra.

12 Nhũm mẽ ra Naĩ hwýr hpôx o mō. Nê hwýr agjê. Axpêr kãm agjê nê mō nhũm kêp mjên htyk xwýnhja mẽ kutã tẽ. Nhũm hkra myja ham kêp ty. Kra pyxi htã kêp ty nhũm mẽ kasãw kamã kuxã nê kumý nê kot haxàr kaxyw o mō nhũm katorxã mẽ hkôt mýr o mō. Nhũm krĩ nhõ xwýnh kwýjaja ma hkôt mō. Piitã hkaprĩ nê hkôt mýr o mō.

13 Tã nhũm Jejus mẽ hkwýja mẽ mō nê mẽ hkaxpa nê katorxã mýr ã omu nhũm Jejus kãm hkaprĩ nê. Hāmri nê xa nê kãm:

—Pa? Kwa amýr kêt nê. Anê.

14 Hāmri nê kasãwta wýr tẽ nê hã ìhkra xi nhũm mẽ kot mýnh xwýnhjaja omu nê amarĩ kãm o xa. Hāmri nhũm htyk xwýnhhta mã kapêr nê kãm:

—E kwa kãnhmã nhỹ. Anê.

15 Pu nhũm kãnhmã ýr kurê kumrêx. Nê kapêr o nhỹ. Hāmri nhũm Jejus nita mã kãm:

—E ota akrata. Na akupým amã htīr. Anê.

Hāmri nhũm akupým htīr ã omu nê hkĩnh týx kumrêx.

16 Hāmri nhũm mẽ kot omunh xwýnhjaja amnhĩ jaêr pê akupým hkra htīr kãm omu nê ý hã haxwýja hkĩnh nê. Nê Tĩrtũm mã mex o mex ã harê nê axpên mã:

—Kwa ãm hāmri na Tĩrtũm ã mẽ panhĩpêx anê nê mẽ pahwýr ý hã kapêr jarênh xwýnhhta mẽ nhũm mẽ pahwýr mō. Tĩrtũm mẽ pakamã ukaprĩ jakamã na ã mẽ panhĩpêx anê. Nà ãm hāmri na ã mẽ panhĩpêx anê. Anê.

17 Hāmri nê piitã ma pikaja rũm mẽ kãm harênh o hprôt nhũm mẽ piitã harênh ma.

*Juāw Paxis tee ri Jejus
kukamã hamaxpêr ã harēnh
Matêwre 11.2-6, 11.22;
Rukre 4.16-21*

18 Rõm nhũm Juāw Paxisja kêp prês nê hkrĩ nhũm hte hkôt mẽ pa xwýnhjaja hwýr

mra nê kãm Jejus kot tanhmã amnhĩ nhĩpêx to ho pa hã harê. Hãmri nhũm harênh ma nê tee ri hkukamã hamaxpêr. Hãmri nê hkôt mẽ pa xwỳnh wa ho axkrut nê wa kuta

¹⁹ nê Jejus wỳr wa kumê nê wa kãm:

—Kwa wa ma hwỳr tẽ nê hkukja. Nê kãm: “Xà ka na pre Tĩrtũm mẽ ixwỳr amẽ nà? Nà xà kormã axtem hõ na pa mẽ kormã amnhĩ wỳr hamãr o ri ixpa?” Anê. E wa ma hwỳr tẽ nê ã hkukjêr anê nê tanhmã kot amnhĩ jarênh to hã ama hãmri nê man akupỳn tẽ nê inhmã harê. Anê.

²⁰⁻²¹ Hãmri nhũm wa kuma nê ma hwỳr tẽ. Nhũm Jejus kormã mẽ ho mex o xa. Mẽ nohkre xwỳnhjaja nhũm akupỳm mẽ no ho mex. Nê mẽkarõmnuti kot mẽ hwỳr gjêx xwỳnhjaja nhũm mẽ nê mẽ hapõx o ãm rãhã nhũm wa ra hwỳr tẽ nê kormã hã mẽ omunh o xa. Hãmri nê kãm Juãw Paxis kapêr jarê.

²² Hãmri nhũm wa kuma nê wa kãm:

—Tỳ. Nà ãm hãmri na ja hã ijarê. Ixpê mẽ ate ixkamã ajamak o apa xwỳnh ta na pa. Jakamã e. Wa kam nê tanhmã ixte amnhĩ nhĩpêx to hã ixpumu hãmri nê ma akupỳm hwỳr tẽ nê aprĩ hã kãm ijarê. Mẽ nohkre xwỳnhjaja na pa akupỳm mẽ no ho mex. Nê mẽ hkànhy xwỳnhjaja pa akupỳm mẽ hkà ho mex. Nê mẽ hyk o mẽ pa xwỳnhjaja pa akupỳm mẽ ho mex. Nê mẽ htyk xwỳnhjaja pa akupỳm mẽ ho htĩr. Nê mẽ kêp amrakati nê ri mẽ

pa xwỳnhjê mã mẽmoj mex jarênh o ri ixpa. Na pa hte ã mẽ ho mex o ri mẽ hkôt ixpa anê. Jakamã e kwa wa ma akupỳm hwỳr tẽ nê ã kãm ijarênh anê.

²³ Kê ijarênh ma nê arĩ amnhĩ kaxyw ixkôt hamaxpêr tỳx rãhã nê. Koja ã amnhĩ nhĩpêx anê nê hamakêtkati nê ri pa. Nê tee ri ijarênh kukamã hamaxpêr kêt nê. E wa tokyx ma akupỳm hwỳr tẽ nê ã kãm ijarênh anê. Anê.

Jejus kot Juãw Paxis mex ã harênh

Matêwre 11.7-19

²⁴⁻²⁵ Nhũm pre ã Jejus wa kãm amnhĩ jarênh anê nhũm wa kuma nê ma akupỳm Juãw Paxis wỳr tẽ. Hãmri nhũm Jejus mẽ kot mar o kuhê xwỳnhjê mã tanhmã Juãw Paxis jarênh to nê mẽ kãm:

—Na ka prem kapôt ã mar kaxyw ma hwỳr mra. Nom ê mex ã omunh kaxyw rỳ hpi-jaãm kãm tanhmã kapêr to hã mar kaxyw hwỳr amrar kêt nê.

²⁶ Kêp Tĩrtũm nhỹ hã kapêr xwỳnh jakamã na ka prem mar kaxyw ma hwỳr mra. Tĩrtũm nhỹ hã kot ixkukamã ijarênh o pa xwỳnh na. Ixpê Tĩrtũm kot mẽ akaxyw ixãm xwỳnh ã na pre mẽ amã ijarênh o pa. Nê hprĩ hã tanhmã mẽ amã ijarênh to. Jakamã na kapêr mex o kot wam Tĩrtũm nhỹ hã kapêr jarênh o mẽ pa xwỳnhjê kapêr jakrenh.

27 Tirtũm kapēr ā kagà htũm kot Juāw kukamā tanhmā harēnh to nē harēnh kot: Kot paj Ixkra hkukamā ma mẽ hwỳr harēnh o pa xwỳnh mẽ kê ma ri hkukamā mẽ kām harēnh o ri pa. Kê mẽ kuma nē kutêp tām amnhĩ nhĩpêx.

Anhỳr o Tirtũm Juāw Paxis kukamā harē nhũm mẽ hã kagà. Tã nhũm mẽ awỳr kumẽ.

28 Juāwja mex kumrêx. Na pre hprĩ hã ixkukamā tanhmā ijarēnh to ho pa. Nom ixkôt mẽ pa ho mẽ pa xwỳnhjê hkĩnhã ixkôt pa ho pa hkêt âm ixkukamā ijarēnh o pa. Jakamā ixkôt mẽ pa ho mẽ pa xwỳnhjaja na mex o kot Juāw Paxisja jakrenh. Mẽ kot ixkôt hprĩ hã inhmar o pa jakamā mẽ mex o kot hakrenh. Anẽ.

29 Nhũm pre ā Jejus mẽ kām Juāw Paxis jarēnh anẽ. Mẽ kot Juāw mar o kuhê xwỳnh kwỳjaja na pre htem tanhmā amnhĩ tomnuj to ho pa. Tã Juāw kot mẽ kām Tirtũm kapēr jarēnh ma nē axpẽn mã Tirtũm mex ā harẽ. Nẽ axpẽn mã:

—Nã âm hãmri. Tirtũm kapēr na mex kumrêx. Anẽ.

Hãmri nẽ amnhĩ tomnuj kaga nẽ Tirtũm kôt amnhĩ xunhwỳ. Jakamā nhũm Juāw Paxis Tirtũm mã mẽ hkrã kumrã.

30 No nhũm Parijew nhõ xwỳnhjê mẽ Tirtũm kapēr tũm o mẽ ahkre ho mẽ pa xwỳnhjaja jajê hkĩnhã Juāw Paxis kaga kumrêx. Jakamā nhũm mẽ hkrã kumrãr kêt

nẽ. Mẽ kot Tirtũm kapēr kaga jakamā na pre htem Jejus kapēr ma nẽ âm kuma.

31 Hãmri nhũm Jejus mẽ kām:

—E pa mẽ amã mẽ piitã htỳx ri hamaxpēr ā tanhmā mẽ harēnh to ka mẽ kot amnhĩ nhĩpêx ā mẽ harēnh ma.

32 Te mẽ kot mẽhprĩre kot amnhĩ nhĩpêx pyrãk. Mẽhprĩrejaja na htem òrkwỳ kapem hije nẽ mẽmoj to amnhĩkati ho hkrĩ. Nẽ tee ri hkwỳjê kot amnhĩ nhĩpêx pumu nẽ mẽ kām:

Kwa na pa mẽ amã gre htã ka mẽ ixkutã anhõkrepõx kêt nẽ. Pa mẽ ja hã mẽ apumu nẽ hpãnhã mẽ amã mẽ htyk jarẽ htã ka mẽ akaprĩ nẽ amỳr kêt nẽ. Kwa mẽ ri ā amnhĩ nhĩpêx anhỳr kêt nẽ.

Anhỳr o axpẽn mã kapēr. Tã te mẽ ate mẽ urãk. Tirtũm kot mẽ awỳr ý hã kapēr xwỳnhjê rēnh tã ka mẽ te mẽhprĩre kot amnhĩ nhĩpêxta pyrã nẽ mẽ ama âm mẽ ama nẽ mẽ hkôt amnhĩ nhĩpêx kêt nẽ.

33 —Juāw Paxis na pre mẽ awỳr mỗ nẽ ixpyrã nẽ apkur mex o ri pa hkêt nẽ. Nẽ ixpyrã nẽ wĩhti ho hkõm kêt nẽ pa. Tã ka mẽ ja hã omu nẽ hkaga nẽ atỳx ri Satanasti nhỹ hã kot tanhmā amnhĩ nhĩpêx to ho pa hã hkamnhĩx nẽ ri harēnh o ri apa. Hãmri nẽ mẽhprĩre kot amnhĩ nhĩpêx pyrã nẽ hkôt amnhĩ nhĩpêx kêt nẽ.

34 Tã pa Juāw pãnhã mẽ awỳr mỗ. Nẽ kurom apkati

mê ixàpkur mex o ri ixpa. Nê kurom wĩhti hkwỹ ho ixkôm o ri ixpa. Ka mê ja hã ixpumu nê atỹx ri ixàpkur rũnh nê ixpipãnh o ri ixpa hã ixkamnhĩx nê ã axpên mã ixto akapêr anhỹr o ri apa. Nê mê kot amnhĩ tomnuj xwýnhjê hkôt ri ixpa hã axpên mã ijarênh o ri apa. ã na ka htem axpên mã ijarênh anê. Jao te mê ate Juãw Paxis nhĩpêx pyrã nê ixkaga nê ixkôt amnhĩ nhĩpêx kêt nê. Na hte ã htỹx ri tanhmã mê hamaxpêr to ho mê pa xwýnhjaja amnhĩ nhĩpêx anhỹr o ri pa.

³⁵ —No tãm ri mê hamaxpêr o mê pa xwýnhjaja na htem ahpýnhã Juãw mê wa ixte amnhĩ nhĩpêx ã wa ixpumu nê axpên mã wa ijarênh o: “Nà ahpýnhã wa kot amnhĩ nhĩpêx tã wa hamê ãm hãmri Tĩrtũm nhỹ hã kapêr jarênh mex o pa. E pu mê wa urãk nê Tĩrtũm kôt amnhĩ xunhwý.” Anhỹr o axpên mã wa ijarênh o pa. Anê.

Parijew nhõ xwýnh pê Simãwre jarênh

Matêwre 26.6-13; Makre 14.3-9; Juãw 12.1-8

³⁶ Tã nhũm Parijew nhõ xwýnh pê Simãwreja amnhĩ nhõrkwỹ hwýr Jejus mê hkôt mê pa ho pa xwýnhjê mê kuwý. Mê kot kutã apkur kaxyw amnhĩ wýr mê kuwý nhũm mê õrkwỹ hwýr mra nê mê hwýr agjê nê apkur kaxyw hkrĩ.

³⁷ Hãmri nhũm mēhõ nija mê hwýr axà. Na pre hte

amnhĩ tomnuj pix o pa. Hãmri nê Jejus õ krĩ hwýr hpôx nê Simãwre nhõrkwỹ kamã apkur ã harênh ma nê ma hwýr tē. Mê hkuxwaxà hã à py nê ma hwýr o tē.

³⁸ Hãmri nê hwýr axà nê Jejus pumu nê hwýr tē nê pum xa. Nê tee ri tanhmã kot amnhĩ tomnuj to ho paja mã hamaxpêr nê hpijaàm nê hkaprĩ nê mýr o xa. Hãmri nê Jejus kutã hkõn krã ho tēm nê nhỹ nê no kagô ho hpar go. Hãmri nê amnhĩ krã kĩ ho hpar grã nê kupã hãmri nê hpãnhã mê hkuxwa xà ho kuxwa. Kãm hkĩnh xaj ã hipêx anê.

³⁹ Hãmri nhũm Simãwre tee ri ja hã omu nê hamaxpêr o:

—Tk. Kwa jahti kot amnhĩ tomnuj pix o pa xwýnh tã mê ixwýr axà nê ã Jejus nhĩpêx anê nhũm amnhĩ nê hanor kêt nê. Kêp ãm hãmri Tĩrtũm nhỹ hã kapêr jarênh o pa xwýnh ronhỹx ja hã omu nê amnhĩ nê hanor kurê kumrêx. Anê.

⁴⁰ Hãmri nhũm Jejus amnhĩ tã hamaxpêr ã omu nê hêx rom kãm kapêr nê kãm:

—E Simãwre. Pa amã awjarê ka inhma. Anê.

Hãmri nhũm kãm:

—Tôe. Mex. Mãmri inhmã awjarê pa ama. Anê.

⁴¹ Hãmri nhũm kãm:

—Nà koja mēhõ my wa hamêxkrut. Nhũm hõja mēhõ pê kàxpore ho rax kumrêx nê ho ìpresta. Nhũm hõja ãm kêp ho grire nê ho ìpresta. Hãmri nê wa hamê kàxpore ho hapêx pa.

42 Hāmri nē akupỹm kot kēp ho ĩpresta xwỹnhhta mǎ hpānhǎ ōr kaxyw tee ri amnhĩ kukamǎ hamaxpēr. Ra kot ho hapēx par jakamǎ tee ri amnhĩ kukamǎ hamaxpēr. Tǎ nhũm kot wa kām ho ĩpresta xwỹnhhta wa hwỳr tē nē wa kām: “Kwa wa tee ri amnhĩ kukamǎ ajamaxpēr kēt nē. Na pa ra war ate ixto tewēn ǎ kagàta kaxōnh pa nhũm ja hapēx. Kot paj axte kām ijamaxpēr kēt nē. Jakamǎ wa māmri ajamakētkati nē axāmnhĩx ri apa.” Anhỳr o wa kām kapēr. ǎ mē ujarēnh kot anhỳr. Anē.

Nhũm pre ǎ Jejus Simǎwre mǎ ujarēnh anē. Hāmri nē hǎ hkukja nē kām:

—E nhỹ myja koja we kām ho tewēn xwỹnhhta kĩnh tỳx nē wehe? Anē.

43 Hāmri nhũm kām:

—Nà kot kēp ho rax nē ho ĩpresta xwỹnhhta koja kām hkĩnh tỳx o hōta jakre. Anē.

Hāmri nhũm kām:

—Tỳ. Nǎ ǎm hāmri na ka ǎ harēnh anē.

44 Tǎ mǎn ka ni kot ǎ inhĩpēx anhỳr xwỹnhhta pumu. Na ka amnhĩ nhōrkwỹ hwỳr ixwỳ pa axà nom ka inhmǎ gō hkwy pa ho amnhĩ par kuhōnh kēt nē. Tǎ nhũm nija arom ǎ inhĩpēx anē nē no kagō ho ixpar kuhō nē amnhĩ krǎ kĩ ho grà ho nhỹ.

45 —Nē anhōrkwỹ hwỳr ixarta ǎ ka ixkahti hkōt inhmỹnh nē ixpār kēt nē. Tǎ kēt nija arom xatǎ ixpar pār o nhỹ.

46 Nē ate orti ho ixkrǎ gregrer kēt tǎ nhũm arom mē

hkuxwaxà ho ixpar kuxwa ho nhỹ. Mēhkukwaxà hǎ kàxpore xohtō htǎ nhũm àmnhĩx ho ixpar kuxwa ho nhỹ.

47 ǎm hāmri na pa amǎ ja jarē. Nija kot amnhĩ tomnuj tỳx tǎ pa ra nē kot amnhĩ tomnuj o ijapēx pa. Ra kot amnhĩ tomnuj tỳx xwỹnh ǎ amnhĩ pumunh jakamǎ na amnhĩ kaxyw inhmǎ hamaxpēr pē kām ixkĩnh nē ǎ inhĩpēx anē. No ka na ka hte uràk nē amnhĩ tomnuj tỳx o apa htǎ uràk nē tee ri ja hǎ amnhĩ pumunh kēt nē. Tǎ nita kĩnhǎ ate amnhĩ tomnuj kaga hkēt jakamǎ na ka ǎm amǎ ixkĩnh grire. Anē.

Nhũm pre ǎ Jejus Simǎwre mǎ kapēr anē.

48-50 Hāmri nē nija mǎ kapēr nē kām:

—E kànhmǎ xa. Ra ate amnhĩ kaxyw inhmǎ ajamaxpēr jakamǎ na pa ra ate amnhĩ tomnuj piitǎ amnhĩ katut kōt rēnh pa. Kot paj axte kām ijamaxpēr kēt nē. Jakamǎ māmri ma ajamakētkati nē axāmnhĩx anhōrkwỹ hwỳr tē. Anē.

Hāmri nhũm mē kot axpēn kutǎ apkur xwỹnhjaja tee ri kot kām kapēr anhỳrja ǎ kuma nhũm ja mē kām mex kēt nē. Jakamǎ nhũm mē ri axpēn mǎ harēnh o:

—Tk. Kwa mēhō na hte ri kot Tirtũm kot amnhĩ nhĩpēx pyràk o amnhĩ nhĩpēx nē mē kot amnhĩ tomnuj o hapēx ǎ amnhĩ jarēnh o we ri pahti? Anē.

8

Mënijë hkwý kot Jejus kôt pa hã mẽ harênh

Makre 15.40-41, 16.9

¹ Tã nhũm Jejus ma mẽ pi-itã mẽ kãm Tĩrtũm kapêr o mẽ ahkre ho ri mẽ hkôt pa. Krĩ rũnh kamã nẽ krĩ hkryre kamã. Mẽ kot amnhĩ tom-nuj kaga nẽ Tĩrtũm kôt amnhĩ xunhwýr nhũm kot amnhĩ tã mẽ omunh nẽ mẽ ho hkra kaxyw nhũm ri mẽ hkôt mẽ kãm harênh o pa. Nhũm ý hã mẽ ahkre ho mẽ pa xwýnh pê 12jaja ma hkôt ri pa.

² Nẽ mẽni hkwýjaja. Na pre ra Jejus mẽ hkwýjê nẽ mẽkarõmnuti japôj. Nẽ mẽ hkwýjaja tanhmã mẽ à kute xwýnhjaja nhũm akupým mẽ ho mex. Xwýnhjaja nhũm prem haxwýja ma hkôt ri pa. Hõ pê na pre Marir Matarênh nhũm pre ra Jejus nẽ mẽkarõmnuti ho 7 nẽ hapôj.

³ Nẽ Joanã. Joanã mjên Kujahiti na pre kêp pahihiti Erox mã mẽ àpênh xwýnhjê krãhtũm. Nẽ Sujãnre. Nẽ kaxyw mẽnijë ohtô nẽ Jejus kôt tanhmã mẽ ho ajuta hto ho mẽ hkôt pa. Jao mẽ hikãxpore ho mẽmoj japrô nẽ ho mẽ kãm mẽ õ nhĩpêx o ri mẽ hkôt pa.

Mẽmo hy hkre xwýnh

Matêwre 13.1-9; Makre 4.1-9

⁴ Tã nhũm mẽ ra krĩ pi-itã rũm Jejus wýr akuprõ. Jakamã nhũm mẽ ohtô rax kumrêx nhũm Jejus mẽ kãm ujarênh o nhỹ. No âm hprĩ hã ujarênh kêt nẽ. Mẽ kot

Tĩrtũm kapêr mar nẽ tanhmã hkôt amnhĩ nhĩpêx to nhũm hã kuxi nẽ mẽ kãm hã ujarênh o nhỹ.

⁵ Nẽ mẽ kãm:

—E mẽ inhma. Kojã mẽhõ ma pur mã mõ nẽ pur kãm mẽmo hy ho ukapêr o ri pa. Nom nhũm piitã amex kãm rôrôk kêt nẽ. Kwý ahpýnhã nhỹri rôrôk. Hãmri nhũm hkwý aptýx kãm rôrôk nhũm kuwênhre omu nẽ hwýr mra nẽ hkrêr pa.

⁶ —Nẽ kên kãm hy hkwý rôrôk nẽ higrôt kutã nojarênt nẽ higrôt pa. No nhũm kamã aptýx nẽ kamã kêp pika hkryre jakamã nhũm higrôt nhũm hã myt apha nẽ arĩgro htýx mẽ nhũm grã pa. Kamã kên nhũm amgo mex kêt jakamã nhũm grã pa.

⁷ —Nẽ mrõnhĩ kamã rôrôk xwýnhja haxwýja higrôt tã no nhũm utĩ kêp amýtã nhũm ô hkêt nẽ.

⁸ —No hirã kamã pika mex kãm rôrôk xwýnhja. Hãmri hirã kamã rôrôk nẽ higrôt mex nẽ piitã ô rax nẽ. Piitã kamã ô kêp 100. ã mẽ ujarênh kot anhýr. E kwa mẽ ixu-jarênh ma nẽ kãm ajamãxpêr týx rãhã ho ri apa. Anẽ.

⁹ Nhũm pre ã Jejus mẽ kãm ujarênh anẽ. Hãmri nhũm hkôt mẽ pa ho mẽ pa xwýnhjaja kuma nẽ tee ri hkukamã hamãxpêr nẽ kãm:

—Kwa na pa mẽ ixprĩ hã ax-ujarênh kôt mẽmoj pumunh kêt nẽ. Aprĩ hã mẽ inhã tanhmã harênh to pa mẽ ixprĩ hã kuma nã? Anẽ.

¹⁰ Hãmri nhũm mẽ kãm:

—Tôe. Nà kot paj mẽ amã harẽ. Tĩrtũm kãm mẽ ate aprĩ hã mar prãm jakamã kot paj ixprĩ hã mẽ amã harẽ. Mẽ kot amnhĩ tomnuj kaga nhũm Tĩrtũm kot ja hã mẽ omunh nẽ mẽ ho hkra. Ja na pa harẽ.

—No mũjjaja na mẽ akĩnhã kãm mar prãm nõkati. Jakamã na htem ixujarẽnh ma nẽ ãm kuma nẽ htỳx ri pa. Anẽ.

Jejus kot prĩ hã mẽmo hy jarẽnh

Matêwre 13.18-23; Makre 4.13-20

¹¹ Hãmri nhũm Jejus hkõt mẽ pa ho mẽ pa xwỳnhjê mã:

—E kot paj ixprĩ hã mẽ amã mẽmo hy ho ukapêr ã mẽ ujarẽnh ta jarẽ ka mẽ inhma.

—Nà mẽmo hyta te kêp Tĩrtũm kapêr pyræk. Nẽ ahpỹnhã hy rôrøk ã pikata te kêp ahpỹnhã mẽ kot Tĩrtũm kapêr mar xwỳnhjê kot amnhĩ nhĩpêx pyræk.

¹² Mẽ kot mar xwỳnh kwỳjaja te kot aptỳx kãm hy rôrøk nhũm kuwênh kot hwỳr mrar nẽ hkrêr par xwỳnh ta pyræk. Jao Tĩrtũm kapêr ma nhũm Satanasti te kuwênh kot hy hkrêr parta pyrà nẽ mẽ kot amnhĩ kaxyw Tĩrtũm kapêr kôt hamaxpêr nẽ hkõt amnhĩ xunhwỳr pymaj tanhmã nê mẽ hkrã hto. Jakamã nhũm mẽ kapêr ma nom ho hamakêtkati tokyx anẽ nẽ axte kãm hamaxpêr nẽ hkõt amnhĩ nhĩpêx kêt nẽ.

¹³ —Nẽ mẽ kot mar xwỳnh kwỳjaja te kot kênre kamã hkwy rôrøk nẽ higrôt nẽ grà par tokyx anhỹr xwỳnh ta pyræk. Jao Tĩrtũm kapêr ma

nẽ hkĩnh nẽ. Nẽ kãm mar prãm nẽ. Tã nhũm mēhō tē nẽ Tĩrtũm nê tanhmã kãm kapêr to nhũm mẽ kuma nẽ Tĩrtũm kaga. Te mẽmo hy higrôt nẽ grà par tokyx anhỹr ta pyræk.

¹⁴ —Nẽ mẽ kot mar xwỳnh kwỳjaja te kot mrônhi kamã hkwy rôrøk nẽ higrôt nhũm mrônhi kot kêp ãmnar xwỳnh ta pyræk. Jao kãm Tĩrtũm kapêr mar prãm nẽ. No ãm mãânên kãm hikukrêx rax nẽ hikàxpore rax prãm xà ãm ja pix mã hamaxpêr o pa. Nẽ gaa nẽ ra gryk ã axte Tĩrtũm kapêr mã hamaxpêr nẽ hkõt amnhĩ nhĩpêx kêt nẽ.

¹⁵ —Nẽ mẽ kot mar xwỳnh kwỳjaja te hirã kamã pika mex kãm hy hkwy rôrøk nẽ higrôt nẽ ô raxta pyræk. Nẽ ixkapêr ma nẽ amnhĩ krã him hagjênh tỳx nẽ ixkôt ri amnhĩ nhĩpêx mex rãhã ho ri pa. Jakamã te ra mẽmo hy hkreta ô rax mex pyræk. E. ã ixujarẽnh kot anhỹr. Anẽ.

Kanê mẽ guhkrax wa harẽnh

Makre 4.21-25

¹⁶ Nhũm Jejus arĩ mẽ kãm ujarẽnh o nhỹ nẽ mẽ kãm:

—E mẽ inhma. Xà na htem kanê hpôk hãmri nẽ guhkrax o hpro rỳ par krak ri unhwỳ? Nà na htem ã hipêx anhỹr kêt nẽ. Na htem hpôk nẽ kỳxpê kuhê xà kamã unhwỳ nhũm hirã mex o kuhê. Nhũm htem ixkrem agjê nẽ hirã kamã mẽmoj pumunh mex nẽ. Ja pyrà nẽ na pa hte mẽ ate inhmar tỳx kaxyw ixprĩ hã mẽ amã awjarê.

17 Kormã mẽ ate mẽmoj pumunh nẽ aprĩ hã mar kêt tã kot kaj mẽ tokyx aprĩ hã omu nẽ ama. Te mẽmoj kot mẽ apê hpimxur pyrãk tã koja tokyx mẽ amã amnhĩ to amnhĩrit ka mẽ aprĩ hã omunh pa. Te mẽ ate kanê hpôk kãm aprĩ hã mẽmoj pumunh mexta pyrãk.

18 Jakamã kêr ka mẽ ixkapêr mar tỳx nẽ hkôt ajamaxpêr rãhã ho ri apa. Jao ixkapêr piitã mar tỳx nẽ. Nom kot ka mẽ mar tỳx kêt nẽ hã ano hkêt pa nẽ axte kãm ajamaxpêr o apa hkêt nẽ. Anẽ.

Jejus kot tanhmã katorxã mẽ htôjê jarênh to hã harênh

Matêwre 12.46-50; Makre 3.31-35; mãânên Eprêw 2.11-12

19 Nhũm Jejus arĩ mẽ ahkre ho nhỹ. Rôm nhũm katorxã nẽ htôjaja nhỹhỹnh hwỳr môn pôj. No nhũm mẽ kot mẽ hã htu rax jakamã nhũm mẽ tee ri hwỳr gjêx kaxyw nẽ kormã kapôt ã kuhê.

20 Hãmri nhũm mẽhõja mẽ omu nẽ Jejus mã mẽ harê nẽ kãm:

—Kwa Pahihti. Ota ra akatorxã mẽ atôjaja awỳr pôj nẽ tee ri awỳr gjêx mã. O mũj mẽ kormã kapôt ã kuhê. Anẽ.

21 Hãmri nhũm mẽ kuma nẽ mẽ kãm:

—Tõe pa ixkato nẽ mẽ omu. Inhmã mẽ hapêê. Nom kot kaj mẽ atô Tirtũm kapêr ma nẽ hkôt amnhĩ xãm nẽ hkôt amnhĩ nhĩpêx. Hã kot kaj te apê ixtô rỳ ixkatorxã kot amnhĩ nhĩpêx pyrãk o pu mẽ axpên nhĩpêx. Pa te inhmã

mẽ hapê pyrã nẽ inhmã mẽ ajapê nẽ. Anẽ.

Jejus kot kôk mã kapêr ã harênh

Matêwre 8.23-27; Makre 4.35-41

22 Tã nhũm apkati hõ hã nhũm Jejus himô rax ã rêr kaxyw nojarêt nẽ hkôt mẽ pa ho mẽ pa xwỳnhjê mã kãm:

—E kot puj mẽ jarãhã ma xarmã mỗ. Anẽ.

Hãmri nẽ mẽ pàr mã gjêx pa nẽ ma xarmã mỗ. Garirej rũm kato nẽ ma xarmã pika hõ hwỳr kormã mỗ.

23 Nhũm ra Jejus ôtxwa nẽ pàr kre kamã gôr nẽ nõ. Pu nhũm kôk àpêr tỳx nẽ nhũm gô axpên tak tỳx nẽ kãnhmã harĩ. Nẽ pàr kre kamã pikapĩr rax nhũm pãrta mẽ kãm àr o mỗ nhũm mẽ tee ri amnhĩ nhĩpêx. No nhũm Jejus arĩ htỳx gôr nẽ nõ.

24 Hãmri nhũm mẽ tee ri amnhĩ kukamã hamaxpêr nẽ kumra nẽ kãm:

—Kwa Pahihti kãnhmã nhỹ. Kot puj mẽ jarãhã pahtyk pa. Anẽ.

Hãmri nhũm kãnhmã nhỹ nẽ kôk mã kapêr nẽ kãm:

—E. Kwa hãmri anhĩkrê. Anẽ.

Hãmri nhũm hpinhkrênh par mẽ nhũm gô tãm nõr kurê kumrêx.

25 Hãmri nhũm Jejus hkwyjê hwỳr apkjê nẽ mẽ kãm:

—Kwa kormã te mẽ ate amnhĩ kaxyw Tirtũm mẽ wa inhmã ajamaxpêr tỳx kêt pyrãk. Anẽ.

Hãmri nhũm mẽ amnhĩ jaêr pê kot ã amnhĩ nhĩpêx anhỹr ã omu nẽ no hawênh rũnh

ně tee ri axpën pumunh pê hamaxpër o kuhê nê axpën mã:

—Kokÿÿ. Jejus kêp mē panhĩo hkêt. Mē pahtõ kot pu we te kot amnhĩ nhĩpêx pyrã nê we kôk mã pakapër nhũm we pama anhĩkrê? Nã Jejus mē parom ãhpumunh tÿx o ãhpumunh tÿx. Jakamã na ã anê. Anê.

Jejus kot mēhõ nê mēkarõmnuti kator ã harēnh Matêwre 8.28-34; Makre 5.1-20

²⁶ Tã nhũm mē ra himõ nhĩhkjê hã krĩ pê Geras wÿr rê. Himõ nhĩkjê hã na pre pika pê Garirej. Nê Garirej nhĩkjê hã na Gerasja. Jakamã nhũm mē ra hwÿr rê.

²⁷⁻²⁹ Hãmri nê pãr kre rũm hapõj nê api nê mra nhũm mēhõ myja mē kutã tē. Na pre ra hwÿr mēkarõmnuti hkwÿ agjê nhũm mē ÿ hã oprê htÿx nê hkēnh nê ri mra. Nê õrkwÿ kamã hkrĩ hkêt nê. ãm ri kapõt ã pa ho pa. Mē htykjê hã pika kamã kēn kre kaêx kôt ri pa. Na pre ra krĩ nhõ xwÿnhjaja xatã tee ri unê nê hkaxpre. Tee ri kàx o ri hkaxpre htã no nhũm amnhĩ nê rēnh pa. Nhũm mēkarõmnutija tanhmã hkrã hto nhũm kapõt pix ã ri mra. Jakamã nhũm Jejus mē pãr rũm hapõj nê api nhũm mē omu nê mē kutã tē nê Jejus kaxpa. Nhũm amnhĩ wÿr omu nê nê tanhmã mēkarõmnuti mã kapër to. Hãmri nhũm my xoprēja hwÿr tē nê kutã hkõn krã ho tēm nê nhÿ. Hãmri nê kàxpêê amnhĩ

tã kãm kapër. Nom tãm kapër kêt nê. Mēkarõmnuti nhÿ hã kãm kapër nê kãm:

—Pa Tĩrtũm Kra Jejus? Kwa mo kaxyw na ka mē ixwÿr tē? Kwa tanhmã mē ixto hkêt nê. Anê.

³⁰ Hãmri nhũm mē kãm:

—Kwa tanhmã na mē anhixi kute? Anê.

Nhũm mē kãm:

—Nã mē ixpê Mēohtõhti. Anê.

Mēkarõmnuti ra kot hwÿr ohtõ nê gjêx jakamã na prem ã kãm amnhĩ nhĩxi jarēnh anê.

³¹⁻³² Hãmri nê Jejus mã:

—Kwa jahti nê mē ijapõj nê mē kot amnhĩ xã htÿx kamã hamak tũm xã hwÿr mē ixrēnh kêt nê. Hagrõ hkwÿ mÿj wÿr mãn mē ixrē pa mē hpãnhã hwÿr mãn hagjê nã? Anê.

Hagrõja kii mē kêp amÿm hixêt ã ri apkur o pa nhũm mē ã Jejus mã mē hwÿr amnhĩ to hwÿr anê. Hãmri nhũm mē kãm:

—Tõe. Tô mē tãm hwÿr mãn mra. Anê.

³³ Hãmri nhũm mē kuma nê myta pê hapõj nê ma hagrõja wÿr mrar kurê kumrêx nê mē kãm gjêx pa. Hãmri nhũm myja akupÿm tãm hkrã. No nhũm hagrõja mēkarõmnuti pymaj amÿra nê axkahkũm nê hprõt nê himõ hã krã hixêt ã axpum rôrõk nê gõx kãm mrõ nê pikaprãr pa.

³⁴ Hãmri nhũm hagrõ jamãr xwÿnhjaja tee ri omu hãmri nê ma mē õ patrãw wÿr akupÿm mē piitã mē kãm harēnh o hprõt nê mra.

35-36 Nhũm mẽ tee ri mẽ kuma hãmri nê ma kot Jesus pumunh mã hwỳr mra nê hkaxpa. Nê kuri myta pumu nhũm ra akupỹm tãm hkrã nê tãm amnhĩ nhĩpêx nê ê kamã mex nê nhỹ. Nhũm mẽ kot hã omunh xwỳnhjaja mẽ kãm ujarênh pa. Nhũm mẽ kuma nê tee ri amnhĩ kukamã hamaxpêr o ra kãm ma nê.

37-39 Hãmri nê amnhĩ nê Jesus mã kapêr nê kãm:

—E kwa mẽ tokyj ma akupỹm amrar kurê kumrêx. Anê.

Hãmri nhũm mẽ kuma nê awjanã nê ma akupỹm pàr wỳr mra nê agjê. Nhũm akupỹm mex xwỳnhhta mẽ hkôt hkrà nom nhũm Jesus kãm:

—Nà kot kaj mẽ ixkôt amõr kêt nê. Ma akupỹm anhõ krĩ hwỳr mãn tẽ nê Tĩrtũm kot tanhmã akupỹm ato mex to hã mẽ kãm amnhĩ jarênh o ri mẽ hkôt apa. Anê.

Hãmri nhũm kuma nê ma akupỹm krĩm tẽ nê ri mẽ kãm Jesus kot tanhmã ho mex to hã harênh ri mẽ hkôt pa.

Jesus kot wa ho axkrut nê wa ho mex ã harênh

Matêwre 9.18-26; Makre 5.21-43

40 Tã nhũm Jesus mẽ ma akupỹm xarmã mỗ nê rê nê mẽ kutêp mẽ pikuprõnh xwỳnhjê pumu. Nhũm mẽ ra amnhĩ wỳr mẽ omu nê mẽ kutêp gô jakàx ã pikuprõnh rax nê. Jakamã nhũm mẽ mẽ hwỳr pøj nhũm mẽ amnhĩ wỳr Jesus pumu nê hkĩnh nê.

41-42 Hãmri nhũm Jajti ma hwỳr tẽ. Ijaew nhõ Tĩrtũm kapêr o mẽ ahkre xà hã ixkre jamãr xwỳnh na pre. Nhũm pre hkra ni pyxire. Hã amgrà pê 12. Tã ra kêp à htỳx nê htyk kaxyw nê nõ. Hãmri nhũm hipêêxàja tee ri omu hãmri nê Jesus wỳr tẽ nê kutã hkõnkrã ho tẽm nê nhỹ nê ho kuwỳ nê kãm:

—Pa akupỹm mẽ ixto mex xwỳnh maati. E awỳr na pa tẽ. Na ra ixkra ixpê htyk kaxyw. Pa tee ri omu nê kaxyw amã ijamaxpêr nê awỳr tẽ. Kwa ma ixkôt inhõrkwỹ hwỳr tẽ nê inhmã omu nê tokyx inhmã ho mex nà? Anê.

Hãmri nhũm kuma nê ma hkôt tẽ. Nhũm mẽ ohtô nê wa hkôt pry hã mra nê axpên nhĩgã nê axpên kujahêk o hkôt mra.

43 Hãmri nhũm mễhõ nija haxwỳja wa hkôt tẽ. Na pre hte hkamrô hkryre rãhã ho pa hã ra amgrà kêp 12. Nhũm tồtồ tee ri kot ho mex kaxyw hkane kaprỳ ho pa.

44 Jakamã nhũm tee ri amnhĩ kukamã hamaxpêr hãmri nê Jesus jarênh ma nê ma mẽ hkôt hwỳr htẽm kurê kumrêx. Nom nhũm mẽ ohtô rax nê hkôt mõr jakamã nhũm mẽ hkaêx kôt hwỳr tẽ nê hkatut kôt kêp ê nhĩrê kupê. Hãmri nê ãm kêp ê pix kupênh tã akupỹm mex.

45 Hãmri nhũm Jesus kot kêp ê kupênh ã amnhĩ tã omunh tã hêx rom mẽ ho hakêx nê mẽ omu nê mẽ kãm:

—Kwa mẽ atõ na ka ri amnhĩ kaxyw inhmã ajamaxpêr tỳx pê ixpê ixê kupê?

Anê.

Hāmri nhũm mẽ piitã tee ri axpên pumu nê kãm amnhĩ tã aprã. Hāmri nhũm Simãw Pêtre kãm:

—Mẽ kot apê amnàr griã kot ka kêt ri mēhõ kot apê hkupênh xwýnh ã ri mẽ hkukja. Kwa mãn ãm mēhõ amarĩ apê hkupê. Anê.

⁴⁶ Hāmri nhũm kãm:

—Nà mēhõja amarĩ hkupênh kêt nê. Na amnhĩ kaxyw inhmã hamaxpêr tỳx pê ixpê hkupê. Tã ixàhpumunh tỳx xàja kôt na akupỹm mex. Nom ixte mēhõ kot ixpê hkupênh xwýnhja pumunh jakamã na pa ixéx rom ã amnhĩ tã ri mẽ hkukjêr anê. Kwa mẽ atõ inhmã amnhĩ jarê. Anê.

⁴⁷ Hāmri nhũm mēhõ nita kuma nê tee ri kêp kot amnhĩ to hpimxur prãm kaprỹ. Hāmri nê hpijaãm kãm hwýr htertet o tẽ nê kutã hkõn krã ho tẽm nê nhỹ nê kãm amnhĩ jarê nê kãm:

—Ma pa na pa inhmã inhmex prãm xàj apê axê kupê. Tã na pa akupỹm inhmex. Anê.

⁴⁸ Hāmri nhũm Jejus kuma nê kãm:

—Tõe. Nà ra ate amnhĩ kaxyw inhmã ajamaxpêr tỳx kôt ate ã amnhĩ nhĩpêx anhỹr jakamã na ka akupỹm amex. E mãmri ajamakêtkati nê ma akupỹm tẽ. Anê.

Hāmri nhũm kuma nê hkĩnh nê ma akupỹm tẽ.

⁴⁹ Rôm nhũm Jajti mã àpênh xwýnhjê hõ òrkwỹ rùm ma ò patrãw kutã tẽ nê wa hkaxpa nê Jajti mã kãm:

—Kwa na ra apê akra ty. Jakamã mo kaxyw kot ka kêt amnhĩ kôt hwýr Jejus o mõi? Kwãr mãmri ma akupỹm tẽ. Anê.

⁵⁰ Hāmri nhũm Jejus kuma nê Jajti mã kãm:

—Kwa tee ri akra hkukamã ajamaxpêr kêt nê. Kaxyw inhmã mãn ajamaxpêr tỳx nê. Koja te ra apê htyk tã koja akupỹm amã htĩr. Anê.

⁵¹⁻⁵³ Hāmri nhũm mẽ mõi nê òrkwỹ hwýr pøj nê hwýr axà nê mẽ omu nhũm mẽ ra htyk xwýnhnta ã htu rax nê. Nê omũj ri mur. Hāmri nhũm Jejus mẽ hwýr axà nê mẽ mýr ã mẽ omu nê mẽ kãm:

—Kwa mẽ hāmri amýr kêt nê. Na nireta mẽ apê htyk kêt na ãm gõr nê nõ. Anê.

Hāmri nhũm ra mẽ kot htyk ã omunh mex jakamã kuma nê ãm kuma nê axtem nê ri axpên mã hã hpêr o axkê. Hāmri nhũm Jejus htyk xwýnhnta wýr hitom wýr àr kaxyw nê amnhĩ kôt Juãw nê Xiakre nê Pêtre nê kaxyw htyk xwýnhnta katorxà nê hipêêxàja. Jajê pix na pre amnhĩ kôt mẽ ho agjê.

⁵⁴ Hāmri nê htyk xwýnhnta wýr tẽ nê hpa hã kupy nê kãm:

—Pa? Kwa tokyx kànhmã nhỹ. Anê.

⁵⁵ Hāmri nhũm akupỹm htĩr nê kànhmã ýr kurê kumrêx. Hāmri nhũm Jejus mẽ kãm:

—E kwa mẽ tokyx kãm mẽmoj japêr kê kukrê. Mãn ra kãm prãm nê. Anê.

⁵⁶ Hāmri nhũm katorxà mẽ hipêêxà wa amnhĩ jaêr pê akupỹm htĩr kãm omu nê kamã no pyma ho hkĩnh tỳx

ně. Hāmri nhũm Jejus wa kām:

—E wa inhma. Kêr ka wa akupÿm ixte war amã ho htĩr ã ri mẽ kãm ijarẽnh o ri apa hkêt nẽ. ãm kwarĩ ho kwarĩ. Anẽ.

9

Jejus kot mẽ ho 12 nẽ ahpÿnhã mẽ rẽnh ã harẽnh

Matêwre 10.1, 10.5-15; Makre 6.7-13; Rukre 10.1-12; mããnẽn Atre 13.49-50, 18.6

¹⁻² Tã nhũm Jejus hkôt mẽ pa ho mẽ pa xwÿnh pê 12jê mã kapêr nẽ mẽ kãm:

—E mẽ amnẽ ixwÿr mra nẽ ixkapêr ma. Na pa ra mẽ amã ixàhpumunh tÿx xà hkwy gö. Jakamã kêr ka mẽ inhÿ hã ma ri akwÿjê hkôt tanhmã mẽ ho mex to ho ri mẽ hkôt apa. Mẽ ã xwÿnhjê ho mex o ri mẽ hkôt apa. Nẽ mẽ hkwyjê nẽ mẽkarõmnuti japôj. Nẽ mẽ piitã mẽ kãm anẽ kê mẽ tokyx Tĩrtũm kôt amnhĩ xunhwÿ kê mẽ ho hkra.

³ Nom kêr ka mẽ amnhĩ kôt akukrêx ho ohtô nẽ ri ho apa hkêt nẽ. Nẽ amnhĩ kaxpar xà hã kô ho apa hkêt nẽ. Nẽ kawà htur nẽ ho apa hkêt nẽ. Nẽ amnhĩ kôt axàpkur xà hã anhõ ho apa hkêt nẽ. Rÿ akàxpore rax nẽ ho apa hkêt nẽ. ãm mẽ anhõ kamĩs ho pixi nẽ haxà nẽ ri hã apa. Nẽ anhÿ kamã ã ri mẽ hkôt apa anẽ. Kê mẽ kot mẽ akapêr mar xwÿnhjaja tãm mãn mẽ amã mẽ anhõ ho pa.

⁴ —Nẽ kêr ka mẽ nhÿri krĩ hõ hwÿr pøj nẽ apôx xà kamã mẽhõ nhõrkwÿ kamã hkôt ri apikamẽnh tãmtã kurũm

akupÿm ajapôj nẽ ma hpãnhã nhãm krĩ hõ hwÿr apa. Nom atÿx ri nhãm mẽ hwÿr amrar nẽ nhãm mẽ hwÿr amrar kêt nẽ.

⁵ —Nẽ koja mẽ nhÿri mẽ akapêr kaga ka mẽ amnhĩ tã mẽ kamã ama nẽ tokyx mẽ kurũm ajapôj nẽ ma nhãm apa. Nẽ anojarêt nẽ mẽ noo mã akuhê nẽ amnhĩ par ã awjagrô kapĩ. Mẽ kot Tĩrtũm kaga hã amnhĩ pumunh nhũm Tĩrtũm kot amnhĩ pyrã nẽ mẽ hkaga hã mẽ kot omunh kaxyw ka mẽ ã mẽ noo mã amnhĩ nhĩpêx anẽ. Hāmri nẽ ma hpãnhã krĩ hõ hwÿr apa. Anẽ.

⁶ Nhũm pre ã Jejus mẽ kãm mẽ àpênh ã karõ anẽ. Nhũm mẽ kuma hāmri nẽ hapôj nẽ ma mẽ hkôt pa. Ma krĩ piitã hkôt akupÿm mẽ ã xwÿnhjê ho mex nẽ Tĩrtũm kapêr o tanhmã mẽ ahkre hto ho ri mẽ hkôt pa.

Pahi Erox tee ri kot Jejus kukamã hamaxpêr ã harẽnh

Matêwre 14.1-12; Makre 6.14-29

⁷⁻⁸ Hāmri nhũm pika pê Garirej kamã mẽ piitã Jejus jarẽnh ma nẽ ahpÿnhã ri tanhmã axpên mã harẽnh to. Mẽ hkwyjaja kêp finat Juãw Paxis akupÿm htĩr ã ri harẽ. Nhũm mẽ hkwyjaja amnepêm mẽ hkukamã Tĩrtũm nhÿ hã kapêr jarẽnh xwÿnhjê hõ ra akupÿm htĩr ã harẽ. Nhũm mẽ hkwyjaja kêp finat Eris ã axpên mã harẽ. Jakamã nhũm pahihti Eroxa mẽ kot ahpÿnhã tanhmã ri harẽnh

toja ma nê tee ri hkukamã hamaxpêr.

⁹ Nê hamaxpêr o:

—Kwa mēhō na hte we ri ã amnhĩ nhĩpêx anhỹr o pa wehe? Nà finat Juãw Paxis kêt. Ra ixte amnepê m hã ixamnênh nhũm mē kot inhmã mut krãhyr nê hpĩr kênã. Kwa mēhō na hte we ri ã amnhĩ nhĩpêx anê?

Anhỹr o hamaxpêr hãmri nê kãm omunh prãm nê.

Jejus kot mē ho ohtô nê mē kãm mē õ hã harênh

Matêwre 14.13-21; Makre 6.30-44; Juãw 6.1-14

¹⁰ Tã nhũm Jejus nhỹ hã kapêr o mē pa xwýnhjaja akupỹn hwýr mran pøj nê mē kot ri tanhmã amnhĩ nhĩpêx to ho pa hã kãm amnhĩ jarê. Hãmri nhũm mē kuma nê ma krĩ pê Pesêj wýr kormã mē o mō.

¹¹ Hãmri nhũm krĩ hkwy nhō xwýnhjaja ra ma mē mōr ã mē harênh ma nê ohtô nê ma mē hkôt mra nê nhỹri mē hkôt pøj. Nhũm Jejus amnhĩ kôt mē omu hãmri nê tanhmã mē ho mex to họ xa. Kôt mē à nê mē pa xwýnhjaja nhũm akupỹm mē ho mex. Hãmri nê Tĩrtũm kapêr o mē ahkre nê mē kãm:

—E kot kaj mē atō amã amnhĩ tomnuj kaga hprãm xàj Tĩrtũm kôt amnhĩ xãm nhũm amnhĩ tã apumu nê ato hkra. Hãmri ka ajamakêtkati nê amex nê axãmnhĩx ri apa.

Anhỹr o mē kãm kapêr pê mē ahkre ho xa.

¹² Tã nhũm myt àr kaxyw nhũm Jejus nhỹ hã mē ahkre

ho mē pa xwýnh pê 12jaja hwýr mra nê kãm:

—Kwa na ra kamàt o mō. Mē hano kê mē amnhĩ to krĩ hō japêr nê tokyx amnhĩm mēmoj japrô nê kuku nê hikwỹ nê gōr. Mo mē panhō? ãm jar kapôt pix kênã. Anê.

¹³⁻¹⁴ Hãmri nhũm mē kuma nê mē kãm:

—Kwa ka mē kamjaja mē kãm mēmoj gō kê mē kuku. Anê.

Nhũm mē ohtô rax nê mē hkôt mra. Mēmyjaja kêp 5.000 nê kaxyw mē hprô nê mē hkrajaja. Jakamã nhũm mē kêp 12jaja Jejus kot ã mē kãm kapêr anhỹrja ma nê tee ri mē hkukamã hamaxpêr nê kãm:

—Kwa nà mo mē panhō rax? Mē panhō pãwti kêp sĩk nê kaxyw tep grà axkrutre kênã kot kêt we mē piitã mē hipêx pa. Xà kot paj mē ma mra nê nhỹri mē kãm mē apkur xà japrô nhũm mē kuku? Anê.

Hãmri nhũm mē kãm:

—Nà pu mē kãm mēmoj japrôr kêt nê. Mē panhōta kot puj mē kãm ho angrã. E mē kãm anê kê mē ahpỹnhã ri hije nê hkrĩ nê apku. Anê.

¹⁵ Hãmri nhũm mē kuma nê mē kãm anê nhũm mē piitã hkrĩ pa.

¹⁶ Hãmri nhũm Jejus pãwti mē tepta jamý nê kãnhmã kaxkwa hwýr rĩt nê kãnhmã kupê nê Tĩrtũm mã harê nê kãm:

—Pa Papaj? Apê mē inhmã mē inhō xwýnh jakamã amex o amex. Anê.

Hãmri nê mē kãm ho hkry hpa nê hkôt mē pa ho mē pa

xwÿnhjê mã kugõ nhũm mẽ ô ri ho xa nê ho mẽ hipêx par kumrêx.

¹⁷ Nhũm mẽ piitã apkur mex o hkrĩ. Mẽõja mẽ kêp grire htã nhũm Jejus tanhmã mẽ kãm ho rax to nhũm mẽ ohtõ rax tã piitã kuku nê ho õhy htũ hpa. Nhũm arĩ mẽõ jakrêx prã nhũm Jejus kõt mẽ pa ho mẽ pa xwÿnhjaja akupÿm hakrêx o pikuprõnh pa nê ho kawà ho 12 nê ho nÿt pa.

Jejus kot amnhĩ tã hkõt mẽ pa xwÿnhjê kukjêr ã harênh

Matêwre 16.13-19; Makre 8.27-29

¹⁸ Tã nhũm arĩgro hõ hã nhũm Jejus nhÿri ahte Tĩrtũm mã amnhĩ jarênh o nhÿ nhũm hkõt ri mẽ pa ho mẽ pa xwÿnhjaja ma hwÿr mra. Hãmri nhũm amnhĩ wÿr mẽ omu nê amnhĩ tã tanhmã mẽ hkukjêr to nê mẽ kãm:

—Kwa mẽ inhmã mẽmoj jarê. Tanhmã na htem ahpÿnhã axpên mã ijarênh to wehe? Anê.

¹⁹ Hãmri nhũm mẽ kãm:

—Nà na htem ahpÿnhã tanhmã ajarênh to. Na hte kamã mẽ hkwyjaja ato finat Juãw Paxis ã ajarê. Nhũm kamã mẽ hkwyjaja ato finat Eris ã ajarê nhũm mẽ hkwyjaja tõhã apê Tĩrtũm nhÿ hã kapêr jarênh xwÿnhjê hõ ra akupÿm htĩr ã ajarê. ã na htem ahpÿnhã ajarênh anê. Anê.

²⁰ Hãmri nhũm mẽ kuma nê mẽ kãm:

—No mẽ kajaja? Ixpê mẽhõ hã na ka htem ixkamnhĩx? Anê.

Hãmri nhũm Simãw Pêtre kãm:

—Nà mẽ pajaja na pa htem apê Tĩrtũm kot mẽ ixkaxyw axãm nê mẽ ixwÿr amênh xwÿnh ã ajarê. Nê apê mẽ ixpiitã mẽ inhõ Pahi Maati hã ajarê. ã na pa htem ajarênh anê. Anê.

²¹ Hãmri nhũm kuma nê mẽ kãm:

—Tÿ. Nà ãm hãmri na ka htem ã ijarênh anê. ã ixte anhÿr kênã. Nom kêr ka mẽ inhmar kumrêx. Kêr ka mẽ kormã ã akwÿjê mã ijarênh anhÿr o ri apa hkêt nê. Anê.

Jejus kot amnhĩ kukamã amnhĩ jarênh

Matêwre 16.21; Makre 8.31-33

²² Nhũm Jejus arĩ hkõt mẽ pa ho pa xwÿnhjê mã kapêr nê hprĩ hã tanhmã mẽ kãm amnhĩ jarênh to nê mẽ kãm:

—Nà ãm hãmri na Simãw Pêtre ijarê. Mẽ kajaja ra mẽ ate ja hã ixpumunh mex. No mẽ pahkwÿjaja na mẽ akĩnhã mẽ kãm ja hã ijarênh mar nê ja hã ixpumunh prãm kêt. Ijaew pigêtjaja nê Tĩrtũm kapêr tũm o mẽ ahkre o mẽ pa xwÿnhjaja nê patre krãhtũmjaja mẽ kãm ja hã ixpumunh prãm kêt. Jakamã koja mẽ nhÿrmã ixpynê nê ixtak rax nê. Hãmri nê ixpĩ. Nom kot paj ixtyk ã apkati axkrunêpxi nhũm Tĩrtũm akupÿm ixto ixtĩr. Anê.

Jejus krajaja tanhmã kot amnhĩ nhĩpêx to hã mẽ harênh

Matêwre 10.31, 16.24-28; Makre 8.34-9.1; Rukre 14.25-33; Juãw 12.24-26; mããnênh

Karatas 5.24; Piripos 2.4; Wam Pêtre 4.1-2; Apokarip 2.10-12

²³ Nhũm pre ã Jejus amnhĩ kukamã hkõt mẽ pa ho mẽ pa xwỳnhjê mã amnhĩ jarēnh anē hãmri nē hpãnhã mẽ kot mar o kuhê xwỳnh piitã mẽ kãm kapēr nē mẽ kãm:

—E kot ka mẽ atõ ate ixkõt amnhĩ xãm ã amnhĩ jarē hãmri nē mãănēn ã amnhĩ jarēnh anē nē amnhĩ jarēnh o: “Jesús kēp inhõ Pahihti jakamã kot paj kapēr kõt pix mã amnhĩ nhĩpêx rãhã ho ri ixpa. Kwãr ixkwỳjaja tanhmã hã inhĩpêx to.” Anhỹr o apkati mẽ ã amnhĩ jarēnh anē.

²⁴ —Koja mẽ ixtã mẽ atõx pĩ rỳ tanhmã mẽ atõ hto ka ty. Tã koja akaxwỳnh ma inhõ krĩ mex wỳr àpir kurê kumrêx. Hãmri nē kamã atĩr tũm nē amex rãhã apa ho apa. Nom kot kaj mẽ jar atĩr prãm xàj ixkaga hãmri nē hwỳr axàpir kêt nē.

²⁵ —Nē koja mēhõ hikukrêx rax gryk ã Tĩrtũm kaga. Hã koja nhỹrmã ty nē ỹ kamã kuwy hwỳr ma mõi nē amnhĩ kõt hikukrêx õ hpyr nē o mõi kêt nē. Koja tee ri kuwy hwỳr mõi pymaj amnhĩ nē hikukrêx rax o amnhĩ pãnhã amnhĩrer prãm kaprỳ.

²⁶ —Nē koja mēhõ ixte mẽ ahkre hã inhma nhũm ja kēp omnuj nhũm ixkaga japēr. Hã kot paj nhỹrmã akupỹn mẽ ato amnhĩptàr kaxyw akupỹn wrỳ nē amnhĩ xwar kot ixkaga xwỳnhta kaga. ãm hãmri na pa ã mẽ amã amnhĩ jarēnh anē. Kot paj nhỹrmã man

akupỹn inhõ Papaj nhỹ hã ixte mẽ ho amnhĩptàr kaxyw akupỹn wrỳ. Nhũm kapēr o mẽ wrỳk xwỳnhjaja man ixkõt wrỳ. Pa mẽ wrỳ hãmri nē mẽ kot ixkaga xwỳnhjaja pa amnhĩ pyrã nē mẽ hkaga.

²⁷ ãm hãmri na pa ã mẽ amã amnhĩ jarēnh anē. Kot paj nhỹrmã akupỹn ixte mẽ ato amnhĩptàr kaxyw mẽ awỳr wrỳ. Tã kot kaj mẽ akwỳjaja kormã atĩr ri ja kukamã tanhmã ixte amnhĩ nhĩpêx to hã ixpumu. Anē.

Jejus kot kēn prêk nhũmõk ã hirã kamã ãm ã harēnh

Matêwre 17.1-8; Makre 9.2-8; mãănēn Sikũn Pêtre 1.16-18

²⁸ Tã nhũm semãnja hapêx nhũm Jejus Simãw Pêtre nē Xiakre nē Juãw wa mẽ kãm kapēr nē mẽ kãm:

—E pu mẽ ma hixêt prêk mũj wỳr mõi nē hwỳr api nē himõk ã Tĩrtũm mã amnhĩ jarē. Anē.

Hãmri nē ma amnhĩ kõt hwỳr mẽ o mõi nē hwỳr mẽ ho api.

²⁹⁻³² Hãmri nhũm Jejus Tĩrtũm mã amnhĩ jarēnh o xa. Nom nhũm hkõt hixêt wỳr mẽ mõi xwỳnhjaja õtxwa htỳx nē ra gõi nē hikwỹ. Pu nhũm Jejus axtem hkuk nē xa. Nē ê haka htỳx nē xa. Hãmri nhũm ja wa kaxkwa rũm wrỳ nē kuri kãm kapēr o xa. Finat Mojes mẽ finat Erisja wa kuri kãm kapēr o xa. Na pre ra amnepēm Tĩrtũm amnhĩ wỳr wa ho api. Tã nhũm wa ra akupỹn wrỳ nē Jejus mã kapēr o xa. Mē hpimràatã hirã htỳx kãm

axpën mã kapër o kuhê. Jejus kormã krî pê Jerujarê kapem mẽ kot hpîr kêt ri nhũm wa mẽ axpën mã htyk kukamã harênh o kuhê. Nhũm wa kãm:

—Nà Tirtũm jamaxpër xà hkôt kot kaj ã amnhĩ nhĩpêx anê.

Anhÿr o Jejus tyk kukamã kãm hamaxpër o hihtÿx o wa xa.

Rôm nhũm mẽ ôt xwÿnhjaja hkrã hapôj nê tee ri Jejus pumu. Nhũm mex kumrêx nê hirã htyx kãm xa nhũm mẽ omu nê kuri wa ãm xwÿnhhta wa omu.

³³ Hãmri nhũm Mojes mẽ Eris wa ra akupÿm nojarêt nhũm Simãw Pêtre tee ri ja hã wa omu nê Jejus mã kãm:

—Kwa Pahihtĩ. Nà ãm hãmri na pu mẽ amnê mō. Kwa pu mẽ kritpêm jar axkamê nê tokyx panojarêt kêt nê. Pa mẽ amã pô nhĩrõnh o axkrunêpxi nê hĩpêx. Amã hõ nhĩpêx nê Mojes mã hõ nhĩpêx nê Eris mã hõ nhĩpêx ka mẽ kamã akrĩ. E kwa pa mẽ amã ho anê nà? Anê.

Nhũm amnhĩ krã hkôt ã kãm kapër anê.

³⁴ Hãmri nê kormã kãm kapër rôm nhũm kakrã jaka tÿxja wrÿ nê mẽ hkunor nhũm wa mẽ kamã kuhê. Hãmri nhũm Simãw Pêtre mẽ Juãw mẽ Xiakreja mẽ tee ri kakrã kot amnhĩ nhĩpêx ã omu nê kãm ma nê.

³⁵ Hãmri nhũm kakrã kamã Tirtũm mẽ kãm kapër nê mẽ kãm:

—E ota Ixkra xa. Mẽ ate kamã ajamak o apa xwÿnhhta na. Inhmã hapêê. Kêr ka mẽ

ãm tapxipix kapër mar tÿx o ri apa. Anê.

³⁶ Hãmri nhũm mẽ kuma nê kãnhmã rĩt nê ãm Jejus pix pumu nhũm ahte xa. Nhũm kuri wa ãm xwÿnhhta wa ra ma akupÿm api nhũm mẽ Jejus pix pumu.

Mẽ tapxipixjaja na prem ã Jejus kot amnhĩ nhĩpêx anhÿr ã omu nom taxy kormã nhãm hkwyjê mã harênh kêt nê. ãm axpën pix mã harênh pê hkukamã hamaxpër o ri Jejus kôt pa.

Jejus kot mēhō nē mēkarōmnuti janor ã harēnh

Matêwre 17.14-21; Makre 9.14-29

³⁷ Tã nhũm apkati nhũm mẽ ma akupÿm ahparmã hkwyjê hwÿr wrÿk o mō. Nê mẽ hwÿr hpôx o mō nhũm mẽ ra mẽ kutêp pikuprõnh rax nê kuhê.

³⁸ Hãmri nhũm mēhō myja amnhĩ wÿr mẽ omu nê mẽ kutã tē nē mẽ hkaxpa nē Jejus pumu nē kãm:

—Pa Jejus. Kwa ixkamã axukapri nê inhmã ixkra ho mex. ãm ixpê pyxire.

³⁹ Na hte mēkarōmnuti xatã ixpê tanhmã ho nhũm ÿ hã amÿra nê mra nê rôrôk nê hakwa jamrô ho hikwÿ nhũm tokyx kãm urer kêt nê. Nhũm ra ixpê homnuj tÿx nê.

⁴⁰ Hãmri pa akôt mẽ pa ho mẽ pa xwÿnhjê hwÿr o tē nhũm mẽ kot inhmã ho mex kaxyw tee ri tanhmã ho hkapyrÿ. Anê.

⁴¹ Hãmri nhũm kuma nê hkôt mẽ pa ho pa xwÿnhjê mã kãm:

—Hêxta waa nê. Na ka mē ra ixte Tirtūm nhỹ hã mē ho mex ã ixpumunh o ixkôt apa ryy tã kormã ixpyrà nê ã mē hipêx anhỹr kêt nê. Mãn ka mē kormã mē kaxyw Tirtūm kôt ajamaxpēr tỳx kêt nê. Anê.

Hãmri nê myta mã kãm:

—E amnê ixwỳr akra ho tē pa inhno ho omu. Anê.

⁴² Hãmri nhũm hwỳr o tē nhũm mēkarōmnuti axte kēp ho pika kura nhũm amỹra nê tēm nê nō. Hãmri nhũm Jejus omu nê nê mēkarōmnuti kator nhũm akupỹm mex nê kànhmã nhỹ. Hãmri nhũm akupỹm hipêêxà mã kugō.

⁴³ Hãmri nhũm mē amnhĩ jaēr pē Jejus kot ã hipêx anhỹrja ã omu nê ri axpēn mã harēnh o:

—Kokỹỹ. Hêxta waa nê. Pēr ãm Tirtūmja ãm àhpumunh o àhpumunh. Anê.

Jejus kot htyk kukamã amnhĩ jarēnh

Matêwre 17.22-23; Makre 9.30-32

⁴⁴ Hãmri nhũm Jejus hkôt mē pa ho mē pa xwỳnhjê mã kãm:

—E kot paj mē amã tanhmã amnhĩ jarēnh to ka mē inhmar tỳx nê. Na pa pre mē ate aa mēmoj pumunh kêt kwỳ ho anhỹr o ixpa pix kaxyw mē awỳr ixwryk kêt nê. Koja mē tokyx mē kãm ixtã amỹnê nhũm mē ixpĩ. E kwa kēr ka mē ja ma nê hã anohtỳx nê ho apa. Anê.

⁴⁵ Hãmri nhũm mē tee ri kot ã amnhĩ jarēnh anhỹrja ma nê axpēn mã:

—Kwa mo na pēr ri ã amnhĩ jarēnh anê? Kēp mē panhō Pahi Maati hã kot amnhĩ jarēnh kênã kot kêt mēhō kupĩ.

Anhỹr o axpēn mã ri harēnh o kuhê. Hãmri nê mē kãm ã kot amnhĩ jarēnh anhỹrja mar prãm kêt jakamã hprĩ hã tanhmã hã hkukjēr to hkêt nê. ãm akryk mar o kuhê.

Mē kot amnhĩ to rũnh xwỳnhjê jarēnh

Matêwre 18.1-5; Makre 9.33-37; Rukre 22.24-27; mããnēn Piripos 2.3-9; Wam Pêtre 5.5

⁴⁶ Tã nhũm Jejus kôt mē pa ho mē pa xwỳnhjaja tanhmã amnhĩ kukamã hamaxpēr to hãmri nê axpēn mã:

—Kwa mē pahtō kot puj we nhỹrmã pahpê pahi nê mē ho amnhĩptàr rax o pahkwỳ jakre? Anê.

Hãmri nê ja hã axpēn kukjēr o Jejus kôt mō nê axpēn mã: “Nà pa.” Nhũm mē hkwyja: “Nà kêt pa.” Anhỹr o hkôt mō.

⁴⁷ Hãmri nhũm Jejus mē kuma nê mē hamaxpēr kôt mē omu. Hãmri nê xa nê amnhĩ wỳr mēhprĩjê mã hpa ho apê nhũm hwỳr tē nê kuri xa.

⁴⁸ Hãmri nhũm Jejus hkôt mē pa ho pa xwỳnhjê mã tanhmã harēnh to nê mē kãm:

—E mē inhma. Kēr ka mē apê pahi pyràk o tanhmã amnhĩ jarēnh to ho ri apa hkêt nê. ãm te amarĩ ri mē apa pyràk o amnhĩ nhĩpêx o ri apa. Jao nhỹri mēhprĩre hō pumu nê kamã axukapri ho

kãm mēmōj tanhmã ho rỳ kãm mēmōj gō. Hãmri nē te pa ate tanhmã ixto mex to pyrāk o amnhĩ nhĩpêx. Nē kot ka mẽ atō pa tanhmã ixto mex to nē te ate Tĩrtũm tanhmã ho mex to pyrāk o amnhĩ nhĩpêx. Kot kaj mẽ ã amnhĩ nhĩpêx anhỹr o ri apa nhũm Tĩrtũm ja hã mẽ apumu nē mẽ ate amnhĩ to rũnh kêt tã nhũm tãm mẽ ate amnhĩ to rũnh xwỳnh ã mẽ ajarē. E kot kaj mẽ amã amnhĩ to rũnh prãm nē ã amnhĩ nhĩpêx anhỹr o ri apa. Anē.

Mēhō kot Jejus nhỹ hã tanhmã amnhĩ nhĩpêx to hã harēnh

Makre 9.38-41

⁴⁹ Hãmri nhũm Jejus kôt mẽ pa ho pa xwỳnhjê hō pē Juãwja nhỹhỹnh hwỳr hpòx o tē nē kãm:

—Kwa Pahihti. O mũj mēhō kēp mẽ pahkwỳ hkêt tã anhĩxi jarēnh kôt mẽ nē mẽkarõmnuti janor o pa. Pa mẽ tee ri kot ã amnhĩ nhĩpêx anhỹr ã omu nē nē kãm ixkapēr. Kēp mẽ pahkwỳ hkêt kēnã kot kêt ã mẽ hanor anhỹr o pa. Anē.

⁵⁰ Hãmri nhũm kuma nē kãm:

—Kwa nà ja nē tanhmã kãm nē hkêt nē. Koja mēhō mẽ pahkwỳm ri tanhmã mẽ ahkre hto hkêt nē hãmri nē kēp mẽ panhĩõõ. Ra mẽ pahkôt kot amnhĩ nhĩpêx o pa mã kēnã. Jakamã kwa mẽ ja nē tanhmã kãm akapēr to hkêt nē. Kwār mãmri ã amnhĩ nhĩpêx anhỹr o ri pa. Ja mex kēnã. Anē.

Samar nhõ xwỳnhjaja kot Jejus kaga hã mẽ harēnh

Atre 8.14-15

⁵¹ Hãmri nhũm Jejus akupỳm kaxkwa hwỳr àpir kaxyw ra hwỳr apkati grēre ho mōr jakamã nhũm hamaxpēr o:

—E pa ma akupỳm Jerujarē hwỳr mō. Nà kot paj anē. Mē kot kamã tanhmã ixto mã tã kot paj ma akupỳm mẽ hwỳr mō. Anē.

⁵² Hãmri nē amnhĩ kukamã mẽ hkwyjê rē nhũm mẽ ma mẽ hkukamã Samar nhõ krĩ kamã nhỹri mẽ kot amnhĩm hikranh xà japēr o mō.

⁵³ Nom nhũm Samar nhõ xwỳnhjaja kēp Jerujarē nhõ xwỳnhjê hprãm nõkati jakamã Jerujarē hwỳr mōr ã mẽ harēnh ma nē amnhĩ nē mẽ hkurê.

⁵⁴ Hãmri nhũm mẽ tee ri amnhĩ tã mẽ kuma nē awjanã nē akupỳm Jejus wỳr mra nē kãm mẽ harē. Hãmri nhũm Juãw mẽ Xiakre wa mẽ harēnh ma nē mẽ kamã gryk nē nē Jejus mã:

—Kwa Pahihti. Nà na mẽ axtem nē amnhĩ nē mẽ pahkurê. Jakamã e kwa pu mẽ kaxkwa rũm mẽ hipy kuwy hpòk kwỳ rē kê mẽ hkaxàr pa nà? Anē.

⁵⁵ Hãmri nhũm wa kuma nē wa kãm:

—Tk. Kwa nà wa aja-maxpērja mex kêt. Pu mẽ ã ri mẽ hipêx anhỹr kêt nē. Koja Tĩrtũm kãm ja ho anhỹr prãm nē rĩ tãm tanhmã mẽ ho. No mẽ papajaja pu mẽ ri mẽ kamã pagryk xàj tanhmã mẽ hipêx to hkêt nē. Pu mẽ ã mẽ hipêx anē nē ra amnhĩ

tomnuj tÿx nē. Kwa wa ri ã ajamaxpēr anhÿr kêt nē. Anē.

⁵⁶ Hāmri nē mẽ ma Samar rūm hapôj nē hpānhã nhām krī hō hwÿr pa.

Mē hkwyjaja kām Jejus kôt pa hprãm ã mẽ harēnh

Matêwre 8.18-22

⁵⁷ Tã nhũm Jejus mẽ kormã mōr ri nhũm mẽhōja hwÿr tē nē kām:

—Pa Jejus? E kot paj ma akôt ixpa ho ixpa. Anē.

⁵⁸ Hāmri nhũm kuma nē kām:

—Ko ka mã. Kam nē rī ma ixkôt ri apa ho apa. Nom kēr ka inhmar kumrēx nē rī kormã ixkôt apa. Na hte xore pika hkre kamã hikwÿ xà. Nē kuwēnhre pī nhĩmōk ã hikwÿ xà. No pa na Tirtũm kot mẽ awÿr inhmēnh xwÿnh tã jajē hkĩnhã inhōrkwÿ hkêt. Na pa hte ãm nhām krī hō hwÿr ixpa nē nhām ixpa. Tã xà kot kaj ixpyrà nē ã amnhĩ nhĩpēx anhÿr o ri apa nà? Anē.

⁵⁹ Nhũm pre ã kām kapēr anē hāmri nē nhām mẽhōja wÿr apkjē nē kām:

—Pa? No ka? Xà kot ka ma ixkôt apa ho apa nà? Anē.

Hāmri nhũm kām:

—Tÿ no ãm kormã. Kojã nhÿrmã inhĩpēêxàja tanhmã amnhĩ to nē ty mãn. Pa haxà hāmri nē rī kormã ma akôt ixpa ho ixpa. Anē.

⁶⁰ Hāmri nhũm Jejus kuma nē kām:

—Kwa nà ri ã ajamaxpēr anhÿr kêt nē. Ma ixkôt apa ho apa kurê kumrēx. Kê mẽmoj ano kupyr rÿ inhnē apē amnār kêt nē. Kwār mẽ htĩr tũm nē mẽ pa hkêt

mã xwÿnhjaja mãn axwakre kamã amã anhĩpēêxà jamār o pa nhũm nhÿrmã ty kê mẽ amã haxà. Ka mãmri ma Tirtũm kapēr o mẽ ahkre ho ri mẽ hkôt apa. Kê mẽ ama nē mẽ hkwyjaja hkôt amnhĩ xunhwÿ nhũm mẽ ho hkra. Anē.

⁶¹ Nhũm pre ã kām kapēr anē hāmri nhũm nhām mẽhō myja haxwÿja hwÿr tē nē kām:

—E. Pa kot pa ma akôt ri ixpa ho ixpa. Nom kormã. Pa ma akupÿm tē nē ixkwÿjē mã amnhĩ jarē nē tanhmã amnhĩ to hpa mãn. Hāmri nē mẽmo arĩgro hã rī kormã ma akôt ixpa ho ixpa. Anē.

⁶² Hāmri nhũm tee ri kuma nē kām:

—Kwa nà. Kot kaj ã ajamaxpēr anē hāmri nē ixkôt apa htã te amnhĩ katut kôt arĩt rãhã ho ri apa pyræk o amnhĩ nhĩpēx. Kwa ã ajamaxpēr anhÿr kêt nē ma ixkôt apa kurê kumrēx. Anē.

10

Jejus kot mẽ hwÿr mẽ kēp 72 rēnh ã harēnh

Matêwre 10.1, 10.5-15; Makre 6.7-13; Rukre 9.1-6, 9.10-11; mãânēn Atre 13.50-51, 18.6

¹ Tã nhũm Jejus axte amnhĩ kaxyw mẽ ho 72 nē mẽ kurê. Hāmri nē mẽ ho axkrut kapēn nē ma nhÿhÿm krī hkwy hkôt amnhĩ kukamã mẽ kurê. Mē kot mẽ hkôt ri Tirtũm kapēr o mẽ ahkre ho pa kaxyw.

² Hāmri nē mẽ kām:

—Na mẽ ohtô rax nē kormã Tirtũm kapēr mar kêt nē. No ãm kormã mẽ ate

mě kām harēnh o apa kaxyw
mē agrēre. Te pur kām harôj
kamrêk pa nē ãm tã no ãm
kaxyw hikēnh xwýnh grēre
pyràk. Jakamã kwa mē ho
Tirtũm wý kê axte mē kaxyw
mē hkwýjê rê.

3 —E kot paj ma mē hwýr
mē arē. Ma mē hkôt mē ate
Tirtũm kapēr o mē ahkre ho
ri apa kaxyw. Jakamã kot
kaj mē te ate ôwēhti kot mry
xoprê hwýr amnhĩ to mrrar
nhũm kot hkwý hpar pyràk
o amnhĩ nhĩpêx. Koja mē
hkwýjaja mē ate mē ahkre
ma nhũm ja mē kêp omnuj
nē nhũm mē hã tanhmã mē
anhĩpêx to. Tã kêr ka mē tee
ri amnhĩ kukamã ajamaxpēr
nē amã mē uma hkêt nē.

4 —Nē kêr ka mē hwýr ano-
jarêt nē amnhĩ kôt amrykã rý
akawã rý aparkã hõ ho apa
hkêt nē. ãm anhỹ kamã ma
mē hwýr apa. Nē mē hwýr
mra nhũm mē nhỹri pry hã
mē atõ kaxpa nē amã kapēr
o xa ka wa axpēn mã akapēr
ry hkêt nē. Anojarêt kãm kãm
akapēr krãnre nē mē hakre nē
ma krĩm apa.

5 —Nē kêr ka mē hwýr pøj
nē nhỹri mē õrkwỹ hwýr agjê
nē mē kãm: “Xà kot paj mē
ato Tirtũm wý kê mē ato mex
nē ka mē ajamakêtkati nē ri
apa?” Anē.

6 Hãmri nhũm mē ama
nhũm ja mē kãm mex japēr
nhũm mē hkĩnh nē amã: “ý
kam nē mãmrĩ mē ixto awý.”
Anē. Hãmri ka mē ama nē
tanhmã mē ho Tirtũm wýr to.
No koja mē apê ja gaga ka mē
ho hwýr kêt nē.

7 —Nē kêr ka mē nhỹri
mē õrkwỹ kamã mē hwýr
pøj hãmri nē mē hkôt ri
apikamēnh tãmtã nē akupým
mē kurũm ajapøj nē ma
hpãnhã krĩ hõ hwýr apa. Nē
mē axãmnhĩx mē kuri axàpkur
o ri apa. Mēmoj to akõm o ri
apa. Ra mē ate mē ho mex
pê mē kãm Tirtũm kapēr o mē
ahkre ho apa kênã. Jakamã
kwãr mē mãmrĩ amnhĩ pãnhã
mē amã mē axàpkur xà gõ ka
mē kuri mē apku.

8 —Nē kêr ka mē nhỹri mē
hwýr pøj nhũm mē ato mex
nē. Nē mē amã mēmo mē
apkur xà gõ ka mē mãmrĩ
axãmnhĩx aku. Aa kormã mē
ate mēmojta kur kêt tã mãmrĩ
ajamakêtkati nē aku. No tee ri
amnhĩ kukamã tanhmã aja-
maxpēr to hkêt nē.

9 —Nē kêr ka mē ã mē
kãm akapēr anē nē mē kãm:
“Tirtũm kãm mē ato hkra
hprãm. Na hte amnhĩ wýr mē
awý.” Anē hãmri nē akupým
mē kãm mē à xwýnhjê ho
mex. ã kot kaj mē mē kãm
amnhĩ nhĩpêx anhỹr o ri mē
hkôt apa.

10 —Nē kêr ka mē nhỹri mē
hwýr pøj nhũm mē ãm mē
apumu nē amnhĩ nhõrkwỹ
hwýr mē awýr kêt japēr.
Hãmri ka mē tee ri amnhĩ tã
mē omu hãmri nē ra ma nhãm
apa kaxyw.

11 Hãmri nē anojarêt nē mē
kãm: “E mē inhma. Tirtũm kot
mē pahwýr mēnh xwýnhhta
na mē awýr wa inhmê pa
wa mē awýr mõ. Wa ixte
Tirtũm kapēr o mē ajahkre
kaxyw. Kãm mē ato hkra

hprām nhūm wa ixte mẽ amā harēnh kaxyw na pa pre wa ã mẽ awyr inhmōr anē. Tã ka mẽ harēnh ma nē wa ixkaga. Jakamã kot paj wa jar mẽ anhō krī kamã amnhī par kà hã awjagrō kapī. Mẽ ate Tirtūm kaga hã amnhī pumunh nhūm Tirtūm kot amnhī pyrã nē mẽ akaga hã mẽ ate omunh kaxyw kot paj wa mẽ anoo mã ã amnhī par kà hã awjagrō kapīr anē. Kot kaj mẽ nhỹrmã tee ri ã amnhī nhīpēx anhỹrja mã ajamxpēr nē akaprī htỳx kumrēx kãm ga. ãm hãmri na pa wa mẽ amã ja jarē.” Anhỹr o mẽ kãm akapēr nē mẽ kēp ajapōj nē ma hpãnhã nhãm krī hō hwyr apa kurē kumrēx.

12 —Koja nhỹrmã Tirtūm mẽ kot amnhī tomnuj mỳrapē tanhmã mẽ ho. Na pre ra ã krī pē Sotō nhō xwỳnhjē nhīpēx anē. Na prem amnhī tomnuj tỳx o pa nhūm Tirtūm tanhmã mẽ kot amnhī tomnuj tỳx ã tanhmã mẽ ho. Tã jar mẽ kot kãm ixkapēr mar prãm kêt nē mẽ kot ixkaga xwỳnhjaja. Koja Tirtūm ixtã mẽ omu nē kot Sotō nhō xwỳnhjē nhīpēx pyrãk o mẽ hipēx nom tanhmã mẽ ho htỳx o mẽ hakre.

—E kēr ka mẽ ma krī hkwy hkôt apa nē ã mẽ kãm akapēr anhỹr o ri apa. Anē.

Mẽ kot Tirtūm kôt hamaxpēr kêt xwỳnhjē jarēnh

Matêwre 11.20-24

13-14 Tã nhūm Jejus krī hkwy nhō xwỳnhjē mã kapēr o xa nē mẽ kot amnhī tomnuj ã mẽ kãm akir. Krī pē

Korajī mẽ Pesēj nhō xwỳnhjē kumrēx mã kapēr nē mẽ kãm:

—E mẽ inhma. Amnepēm krī pē Sitō mẽ Xir wa kamã mẽ pa xwỳnhjaja na prem tanhmã amnhī tomnuj tỳx to ho pa nhūm Tirtūm mẽ omu nē hã mẽ homnuj tỳx nē. Tã kwa mẽ o kora Korajī mẽ Pesēj wa kamã mẽ apa xwỳnhjaja. Ra ixte mẽ amã mẽ ate mẽmoj pumunh kêt o anhỹr rax o ixpa htã ka mẽ omu nē arī amnhī tomnuj o ri apa nē tokyx amnhī tomnuj kaga hkêt nē. Jakamã kot kaj mẽ amex kêt nē. Kop apu Sitō rỳ Xir kamã mãn ixte mẽ kãm aa mẽ kot mẽmoj pumunh kêt kwỳ ho anhỹr o ri ixpa ronhỹx mẽ omu nē mẽ arom amnhī kaxyw ixkôt hamaxpēr kurē kumrēx. Nē tee ri tanhmã amnhī tomnuj to ho pa hã amnhī pumu nē hkaprī nē ã amnhī nhīpēx anhỹr kaga hpa. No mẽ kajaja na pa tee ri mẽ amã tanhmã amnhī nhīpēx to ho ri ixpa kaprỳ. Ka mẽ ja hã ixpumu nē ãm ixpumu nē amnhī tomnuj kaga hkêt nē. Tã koja nhỹrmã Tirtūm mẽ piitã mẽ kot amnhī tomnuj mỳrapē tanhmã mẽ hipēx to. Hãmri nē tanhmã Sitō mẽ Xir wa kamã mẽ pa xwỳnhjē jarēnh to nhūm mẽ kot amnhī tomnuj mỳrapē amnhī xà htỳx kamã hamak o ri pa. No mẽ kajaja mẽ ate amnhī tomnuj tỳx o mẽ hakrenh jakamã koja Tirtūm mẽ hkĩnhã mẽ atomnuj tỳx o mẽ atomnuj tỳx. Ka mẽ amnhī xà htỳx kamã ajamak rãhã ho ri apa ho apa. Anē.

15 Nhũm pre ã Jejus mẽ kãm kapêr anê. Hãmri nê hpãnhã Kapanaũ nhõ xwýnhjê mã kapêr nê mẽ kãm:

—No mẽ apê Kapanaũ nhõ xwýnhjaja. Kot kaj mẽ ajaxwýja mẽ amex kêt nê. Mẽ ate amnhĩ tomnuj kagare pyrã nê Tirtũm nhõ krĩ hwýr akrã ho apa. Nom kot kaj mẽ atõ hwýr axàpir kêt nê. Kot kaj mẽ ma kuwy maati hwýr ajapêx pa kãm ga.

16 Anhýr o mẽ kãm kapêr hãmri nê hpãnhã hkõt mẽ pa ho mẽ pa xwýnhjê mã kapêr nê mẽ kãm:

—Kot kaj mẽ Tirtũm kapêr o mẽ ahkre ho ri apa nhũm mēhõ ama nê akapêr kõt amnhĩ nhĩpêx. Hã koja te pa kot ixkõt amnhĩ nhĩpêx pyrãk o amnhĩ nhĩpêx. No koja amar kêt nê akaga hãmri nê te pa kot inhmar kêt nê ixkaga pyrãk o amnhĩ nhĩpêx. Jao mããnēn Tirtũm kaga.

Anê hãmri nhũm mẽ kuma hãmri nê anhgrã nê axkrut kapēn nê ma ahpýnhã krĩ hkõt anhgrã.

Mẽ hkĩnh nê ri mẽ pa xwýnhjê jarēnh

Apokarip 3.5

17 Tã nhũm mẽ kêp 72jaja krĩ hkwý rũm akupýn Jejus wýr pøj. Piitã hkĩnh nê hpõx pa. Hãmri nê kãm:

—Kwa Pahiiti. Na pa prem anhý hã mẽ nê mẽkarõmnuti japõx rax nê. Na pa prem mẽ nê mẽ hano nhũm mẽ ãm mẽ kurũm hapõx kurê kumrêx. Anê.

18 Hãmri nhũm mẽ kuma nê mẽ kãm:

—Tõe. Ixàhpumunh tỳx o ixte Satanasti jakrenh jakamã na ka htem inhý hã mẽ hano nhũm mẽ tee ri mẽ akutã hihtỳx prãm. Hãmri nê te na haxênh prêprêk pyrãk o amnhĩ nhĩpêx nê mẽ kurũm hapõx kurê kumrêx pa ja hã mẽ omu.

19-20 Mẽkarõmnuti te kot kagã xoprê rý te kot makre pyrãk. Tã ra ixte mẽ amã ixàhpumunh tỳx xà hkwý nhõr jakamã na ka prem mẽ kãm akapêr nhũm mẽ tee ri akutã tanhmã amnhĩ tỳx to hprãm. Tã koja Satanasti tee ri mẽ ate nhýrmã Tirtũm mẽ wa ixri atĩr tũm nê apa pymaj tanhmã mẽ ano kupyw to kaprý. Ra Tirtũm kot õ kagã kamã mẽ atĩr tũm nê mẽ apa kaxyw mẽ anhixi hã kagã kênã. Jakamã kwa mẽ jam ajamaxpêr o akĩnh nê ajamakêtkati nê ri apa. No kêt mẽkarõmnuti kot mẽ akapêr mar nê mẽ kurũm hapõxta ã mẽ omunh xà hkõt pix mã akĩnh nê ri apa hkêt nê. Anê.

Jejus kĩnh kãm kot Hipêêxã mã amnhĩ jarēnh

Matêwre 11.25-27

21 Tã nhũm Tirtũm Karõ tanhmã Jejus to nhũm ý hã hkĩnh nê xa. Hãmri nê Tirtũm mã kapêr nê kãm:

—Pa Papaj? Nà apê mẽ ixpiitã mẽ inhõ Pahi Maati na ka. Pikap ri mẽ pa xwýnhjaja nê kaxkwa kamã mẽ pa xwýnhjaja apê mẽ ixpiitã mẽ inhõ Pahi Maati na ka. ãm hãmri na ka hte amnhĩ nhĩpêx mex o ri apa. Na ka hte mẽ àhpumunh tỳx ã mẽ kot

amnhĩ jarēnh xw̄ȳnhjê mã axàhpumunh t̄yx o amnhĩrīt kêt nê. Ām mẽ àhpumunh kêt ã mẽ kot amnhĩ jarēnh xw̄ȳnhjê pix mã na ka hte ja ho amnhĩrīt nhũm mẽ tapxipixjaja ja hã apumu. Ām hãmri na ka hte amã hprãm xà hkôt ã mẽ piitã mẽ hipêx anhỹr o ri apa. Jakamã mẽ kot amnhĩ to hkryre xw̄ȳnh pixjaja na htem ate amnhĩ nhĩpêx ã apumunh o pa.

²² —Na ka pre inhĩkra kamã mẽmoj piitã hazàr pa. Ixte ho amnhĩptàr o ri ixpa kaxyw. Jakamã kapxipix na ka hte ixpê akra hã ixpumunh par. No jar ri mẽ pa xw̄ȳnhjaja na mẽ kot ja hã ixpumunh kêt. Nê mãânēn papxipix na ixte ate tanhmã amnhĩnhĩpêx to hã apumunh par. Jakamã na pa hte ã amnhĩ nhĩpêx anê nê inhmã hprãm xà hkôt mẽ hkwȳjê mã ato amnhĩrīt o ri ixpa nhũm mẽ ixpyrà nê ate tanhmã amnhĩnhĩpêx to ho apa hkôt apumu. Anê.

Jejus kôt mẽ pa xw̄ȳnhjaja kot hkôt omunh o pa hã mẽ harēnh

Matêwre 13.16-17

²³⁻²⁴ Nhũm pre Jejus ã Tĩrtũm mã amnhĩ jarēnh anê hãmri nê hpãnhã hkôt mẽ pa ho mẽ pa xw̄ȳnhjê mã kapēr nê mẽ kãm:

—E na ka htem ixkôt mẽ ano ho ixte tanhmã amnhĩ nhĩpêx to hã ixpumunh o ri apa. Nê mẽ ajamak o ixkapēr mar o ri ixkôt apa. No amnepēm mẽ akukamã pahijaja nê Tĩrtũm nhỹ hã

kapēr jarēnh o ri mẽ pa xw̄ȳnhjaja kãm ixpumunh prãm t̄yx o pa htã mẽ akĩnhã ixpumunh kêt rãhã htyk pa. Kormã ixwryk nê jar ixkator kêt jakamã na prem ixpumunh kêt rãhã ty. Nê mẽ kãm ixkapēr mar prãm tã mẽ akĩnhã ixkapēr mar kêt nê. Ām mẽ kapxipixjaja na ka mẽ mỳr pê ixte amnhĩ nhĩpêx ã ixpumunh nê ixkapēr mar o ixkôt apa. Tã mẽ kurom mẽ ate ano ho ixpumunh nê ajamak o ixkapēr mar jakamã kwa mẽ ja hã amnhĩ pumu nê tãm amnhĩ nhĩpêx o akĩnh nê ri apa. Anê.

Samar nhõ xw̄ȳnh jarēnh

Matêwre 22.34-40; Makre 12.28-34; mãânēn Wam Juãw 3.17-18

²⁵ Tã nhũm Tĩrtũm kapēr tũm o mẽ ahkre o mẽ pa xw̄ȳnhja Jejus w̄yr tē nê hêx rom kot kamã hamak kaxyw kãm:

—Pa? E kwa inhmã mẽmoj jarē. Tanhmã kot paj we nhỹrmã Tĩrtũm ri ixtĩr tũm nê ixpa kaxyw amnhĩ nhĩpêx to wehe? Anê.

²⁶ Hãmri nhũm kãm:

—Tanhmã na ka hte Tĩrtũm kapēr ã kagà htũm kot mẽ htĩr tũm nê pa hã kagà kamã harēnh nê mar to? Anê.

²⁷ Hãmri nhũm kãm:

—Nã harēnh kot:
Kêr ka mẽ anhĩ piitã ho amã Tĩrtũm kĩnh o ri apa. Mẽ amã hkĩnh t̄yx o mẽmoj piitã hakrenh par o ri apa.

Nê kêr ka mẽ amã mẽ piitã hã ma ho te ka amã amnhĩ tã ma pyràk o mẽ hipêx

o ri apa. Jao tã̃m mẽ
hipêx o ri apa. Anê.

Ã Tirtũm kapêr ã kagà htũm
kamã ja jarênh kot anhÿr.
Anê.

28 Hãmri nhũm Jejus kuma
nê kãm:

—Tÿ. Nà ãm hãmri na ka
harê. Kot kaj ã mẽ hipêx
anhÿr o ri apa nê nhÿrmã
Tirtũm mẽ wa ixri atĩr tũm nê
apa ho apa. Anê.

29 Hãmri nhũm kuma nom
kãm mẽ piitã mẽ ho mex prãm
kêt nê. ãm amnhĩ kwÿ pixjaja
nhũm kãm mẽ ho mex o pa
hprãm. Jakamã hêx rom kãm:

—Kwa no mẽmojaja kot pa
we ri ã mẽ hipêx anhÿr o
ri ixpa? Xà mẽ pahkwÿ pê
Ijaew pixjaja nà? Anê.

30 Hãmri nhũm kuma nê
tanhmã kãm ujarênh to. Nom
hã kuxi nê kãm awjarê nê
kãm:

—E pa amã awjarê ka
inhma. Kojã Ijaew nhõ
xwÿnhja ma Jerujarê rũm
Jeriko hwÿr ahpar mã ma
mõ. Mõõ nhũm ra mẽ ahkĩnh
xwÿnhjaja kutã mra. Hãmri
nê pry kahti ri hwÿr kato nê
unê nê htak rax nê. Nê kêp
ê hkwrÿnh pa nê ma kurũm
hprõt nê mra nê akunok
nhũm mẽ kot htak o hkã rênh
ràhã ra htyk kaxyw nê nõ.

31 Hãmri nhũm patreja tẽ nê
omu. No ãm omunh o hãnh
tẽ nê hkupu nê ma tẽ. Uràk
nê kêp Ijaew tã ãm omu nê
tanhmã ho ajuta hto hkêt nê
hãnh omunh o tẽ nê hkupu nê
ma tẽ.

32 Hãmri nhũm patre ho
ajuta xwÿnhja mãânên tẽ. Nê
patre pyrà nê omu nê ãm omu

nê hkupu nê ma tẽ. Uràk nê
kêp Ijaew tã omu nê ãm omu
nê hkupu nê ma tẽ.

33 —Tã nhũm Samar nhõ
xwÿnhja mãânên mõ. Samar
nhõ xwÿnhjê mẽ Ijaew na
prem kãm axpên kĩnh kêt tã
nhũm mõ nê omu nê kamã
ukaprĩ nê. Kêp Ijaew ã
omunh tã tee ri omu nê kamã
ukaprĩ nê.

34 Hãmri nê hwÿr tẽ nê omu
nê kãm mẽ kot htak o hkã
rênh xà kane nê kãm hkupu
pa. Hãmri nê kànhmã ãm
nê hkrit jumênre hã kumê
nê ma nhÿri mẽ kot amnhĩm
hikranh xà hã ixkre hwÿr o
mõ nê hwÿr o pøj. Hãmri nê
omunh mex o apkati.

35 Hãmri nê akupÿm nojarêt
nê kàxpore hkwy jamÿ nê o tẽ
nê kot mẽ kãm õ xwÿnhja mã
kugõ nê kãm: “E kot paj hãmri
ma mõ. Ota ixkàxporeta. Kêr
ka inhmã à xwÿnhhta tãnopxar
mex nê. Nê inhmã omunh
mex kê akupÿm mex. Kojã
kàxporeja apê grire hã kot paj
nhÿrmã akupÿn mõ nê axte
hkôt amã hkwy gõ.” Anhÿr o
kãm kapêr nê ma akupÿm mõ.
Ã mẽ ujarênh kot anhÿr. Anê.

36 Nhũm pre ã Jejus kãm
ujarênh anê. Hãmri nê kãm:

—E nhÿ na pre kãm mẽ
kot htak xwÿnhhta kaprĩ ho te
tãm kãm amnhĩ tã ma pyràk
wehe? Anê.

Hãmri nhũm Tirtũm kapêr
tũm o mẽ ahkre xwÿnhhta kãm:

—Nà kot kamã ukaprĩ
xwÿnhhta na pre omu nê kamã
ukaprĩ nê ho mex o te tãm
kãm amnhĩ tã ma pyràk o
hipêx. Anê.

³⁷ Hāmri nhūm Jejus kām:

—Tỳ. Nà ãm hāmri na ka harẽ. Uràk nẽ kêp Ijaew kêt tâ kamã ukapřĩ nẽ ho mex nẽ. Tã kêt ka uràk nẽ ã mẽ piitã mẽ hipêx anhỹr o ri apa. Uràk nẽ mẽ kêp akwỳ hkêt tâ mẽ kamã axukapřĩ ho ri apa. Anẽ.

Jejus kot Matre mẽ Marir wa hwỳr mōr ã harẽnh

Rukre 12.29-31

³⁸ Tã nhūm Jejus krĩ rūm kato hāmri nẽ hkôt mẽ pa ho mẽ pa xwỳnhjê mẽ mẽ ma nhām krĩ hō hwỳr mō. Mōo nẽ hwỳr pōj. Hāmri nhūm Matre mẽ omu nẽ amnhĩ nhōrkwỹ hwỳr mẽ kuwỳ nhūm mẽ ma hwỳr mō nẽ òrkwỹ hwỳr pōj.

³⁹ Hāmri nhūm Jejus mẽ ahkre ho nhỹ nhūm Matre htōx Marirja arĩ hpar pẽ mar o nhỹ.

⁴⁰ Hāmri nhūm Matre mẽ hwỳr axà nẽ omu. Nẽ tee ri àpênh rax kukamã hamaxpêr nẽ Jejus wỳr tẽ nẽ kām:

—Xê ma Pahihti. Kormã ixàpênh rax tâ nhūm Marir ixto ajuta hkêt nẽ. ãm akapêr pix mar gryk ã ixkôt htêm nẽ ixto ajuta hkêt nẽ. Pa ahte mẽ panhō hã ixàpênh o xa. Xà amã ja mex? Xê kām anẽ kê tokyx ixkôt tẽ pa wa hã axkrut nẽ mẽ panhō hã ixàpênh tokyx anẽ. Anẽ.

⁴¹ Hāmri nhūm tee ri kuma nẽ kām:

—Kwa Matre. Na ka ãm mẽ panhō pix kukamã ri ajamxpêr nẽ gryk ã tee ri amnhĩ nhĩpêx.

⁴² ãm hāmri na Marir kām ixkapêr mar prãm nẽ.

Jakamã kot paj ri amnhĩ nẽ akôt hanor kêt nẽ. Anẽ.

11

Mẽ pahte tanhmã Tĩrtũm mã amnhĩ jarênh to hã mẽ pamã karō

Matêwre 6.9-13, 7.7-11

¹ Tã nhūm apkati hō hã nhūm Jejus nhỹri Tĩrtũm mã amnhĩ jarênh o nhỹ. Nẽ kām amnhĩ jarênh pa nhūm hkôt mẽ pa ho mẽ pa xwỳnhjaja kot kām amnhĩ jarênh ã omu nẽ hwỳr mra nẽ kām:

—Kwa Pahihti. Amnhĩ pyrà nẽ mẽ ixte Tĩrtũm mã amnhĩ jarênh kaxyw tanhmã mẽ ijahkre hto. Kêr pa mẽ apyrà nẽ tanhmã kām amnhĩ jarênh to ho ri ixpa. Na pre finat Juãw Paxisja hkôt mẽ pa ho mẽ pa xwỳnhjê mã ja jahkre nhūm mẽ kuma nẽ tãm kām amnhĩ jarẽ. E kwa mẽ inhmã tanhmã ja jahkre hto nà? Anẽ.

² Hāmri nhūm mẽ kām:

—Tõe. Nà kêt ka mẽ kām amnhĩ jarênh kaxyw nẽ mãmri amnhĩ krã hkôt tanhmã kām amnhĩ jarênh to. Rỳ kām amnhĩ jarênh o: Pa Mẽinhĩpêêxà maati? Nà amex o amex Tĩrtũm. Apê mẽ ijamãr mex xwỳnh maati na ka.

³ Nẽ kwa kêt ka apkati mẽ mẽ inhmã mẽmo gō pa mẽ akukwak ri ho ixàpkur o ri ixpa.

⁴ Nẽ na pa hte tōhã amnhĩ tomnuj nẽ Tĩrtũm. Nom mẽ kot tanhmã ixtomnuj to xwỳnhjaja na pa hte ãm mẽ omu nẽ amnhĩ tâ tanhmã

mê ho hkêt nê. Nê ja ho ijamakêtkati kurê kumrêx. ã na pa hte amnhî nhîpêx anhÿr o ri ixpa.

Jakamã kwa kêr ka ja hã ixpumu nê ixpyrà nê ixte tanhmã amnhî tomnuj to hã ixpumu nê hã tanhmã ixto hkêt nê. ãm ho ajamakêtkati kurê kumrêx nê axte kãm ajamaxpêr kêt nê.

Nê kot paj tanhmã amnhî tomnuj to kaxyw japêr ka ja hã ixpumu nê ixte ã amnhî nhîpêx anhÿrja nê ixto htÿx nê pa ja ho anhÿr kêt nê.

E ãm ja pix na hapêx. Anê.

E kêr ka mê ã Tÿrtÿm mã amnhî jarênh anhÿr o ri apa. Anê.

Mê pahte amnhî to Tÿrtÿm wÿr rãhã hã mê pamã karõ

Matêwre 7,7, 15.21-28; Makre 11.24; Rukre 18.1-8; Juãw 14.13-14; mããñên Rõmãn 12.12; Epes 6.18; Wam Tesarõn 5.17-18

⁵⁻⁶ Nhÿm Jejus arÿ hkôt mê pa ho pa xwÿnhjê jahkre ho nhÿ nê mê kãm:

—Nê ja. Koja mê akràmnhwÿjê hõ. Nhÿm kôt ã kamãt nhÿm nhÿhÿnh awÿr mõn pøj. Ka anhõ mêmoj kêt hãmri nê anhÿjuk ri akràmnhwÿ hwÿr tẽ. Hãmri nhÿm ra amnhî tã kahê nê nõ. Ka tee ri omu hãmri nê hakwa krem xa nê kãm akapêr nê kãm: “Pa ixkràmnhwÿ. Na ka mê ra gõr? Kwa kànhmã nhÿ nê inhmã anhõ mêmoj japêr. Na ra ham ixkràmnhwÿta mõn pøj. Nê kãm prãm tÿx nê mõ

nom kaxyw inhõ hkêt. Kwa kànhmã nhÿ nê inhmã anhõ mêmoj japêr nê inhmã hkwy pa ma o tẽ kê kukrê. ãm inhõ hkêt kumrêx. ãm hãmri na pa amã amnhî jarê. Kwa tokyj kànhmã nhÿ nê inhmã mêmoj japêr nã?” Anhÿr o kãm akapêr.

⁷ Hãmri nhÿm ama nom kãm kànhmã ÿr prãm kêt nê. Nê amã: “Tk. Nã ra mê ixte amnhî tã kahê hpar nê inhÿkwÿ kênã kot pa kêt kànhmã nhÿ nê amã mêmoj japêr.” Anê.

⁸ Ka tee ri ama nê xatã kãm: “Kwa ã inhÿpêx anhÿr kêt nê ixkràmnhwÿ. Kwa tokyx.” Anhÿr o xa. Nê xatã kãm anojarêr o xa. Hãmri nhÿm ra kãm amar kaga hãmri nê tã kànhmã nhÿ nê amã ate ho presija xwÿnhnta gõ. No ãm kêp akràmnhwÿ hã ate hã axãhwÿr tipxi hã amã õr kêt nê. ãm xatã ate ho presija htÿx xwÿnhja mã hamaxpêr nê tã kànhmã nhÿ nê amã kugõ. ãmê ujarênh kot anhÿr.

⁹⁻¹⁰ —Tã kêr ka mê ja pyrà nê amnhî to Tÿrtÿm wÿr rãhã ho ri apa nhÿm ama nê ate mêmoj tã hwÿrta amã kugõ. ãm xatã ate hã axãhwÿr o ri apa nhÿm amã kugõ. ãm mêmoj to hwÿr rãhã ho ri apa nhÿm ama hãmri nê amã mêmoj tanhmã hipêx to. Te ho mêmõ kãm tep xành nê gõx kãm xatã tep rênh xà rênh o ãm pyrà nê xatã mêmoj tã hwÿr o ri apa. Hãmri nhÿm ama nê amã hprãm xwÿnhnta gõ. Te ho tep kanhêr xwÿnhnta

tã kot tep õ kanhêr pyræk o anhîpêx nê amã mẽmoj prãm xwÿnhta gõ. Anê.

Tĩrtũm kot hkrajê mã mẽmoj mex nhõr ã harênh

Makre 7.9-11

¹¹ Nhũm Jejus arĩ hkõt mẽ pa ho mẽ pa xwÿnhjê jahkre nê mẽ kãm:

–Nê xà koja akra kãm tep xành nê hã awÿ ka ama nê axtem nê kãm kagã xoprê hõ py nê agõ?

¹² Rÿ nhũm krãhyre gre hã awÿ ka axtem nê kãm makre hõ py nê agõ? Nà na ka htem ã akrajê nhîpêx anhÿr kêt nê. Na ka htem mẽ kot mẽmoj tã àhwÿr xà hkõt kãm mẽmoj gõ.

¹³ Mẽ kamjaja mẽ ate amnhĩ tomnuj o ri apa htã ka htem akrajê ho mex o ri apa. Tã kaxkwa kamã Tĩrtũmja na hte mẽ pahto mex o mẽ ate mẽ akrajê ho mexta jakrenh. Kãm mẽ pajapê htÿx kõt na hte mẽ pamã mẽmoj mex nhõr o pa. Nê mãânên amnhĩ Karõja na hte mẽ pamã kugõ. Jakamã kot kaj mẽ atõ Karõ hã awÿ nhũm ama nê awÿr kumẽ nhũm wrÿ nê akarõ mã axà. ã na hte Tĩrtũm kãm mẽ pajapê xàj mẽ pamã mẽmoj mex nhõr o pa anê. Anê.

Jejus mẽ Satanasti wa harênh

Matêwre 12.22-32; Makre 3.20-30

¹⁴ Tã nhũm Jejus nhÿri axte mẽhõ nê mẽkarõmnuti kator. Na pre ra mẽkarõmnuti tanhmã ho nhũm kapêr kêt nê pa. Hãmri nhũm Jejus omu nê nê kator nhũm akupÿm kapêr mex nê. Nhũm mẽ

piitã amnhĩ jaêr pê omu nê no hawênh rũnh nê omunh o kuhê.

¹⁵ Nom nhũm mẽ hkwyjaja Jejus kot ã hipêx anhÿr ã omu nê htÿx ho kêp mẽkarõmnuti hkwy hã hkamnhĩx nê axpên mã harênh o:

–Tk pêr hinhu nhĩkõoti nhÿ hã na hte mẽ nê amnhĩ kwÿjê japõx o pa. Anê.

Hinhu nhĩkõoti nhĩxi hõ pê Satanasti nhũm prem Satanasti nhÿ hã Jejus kot ã amnhĩ nhîpêx anhÿr o pa hã hkamnhĩx.

¹⁶ Jakamã nhũm mẽ hkwyjaja hwÿr mra nê kãm:

–Kwa mẽ inhmã aa mẽ ixte mẽmoj pumunh kêt õ ho anê. Pa mẽ omu nê ate Tĩrtũm nhÿ hã tanhmã amnhĩ nhîpêx to ho apa hã apumunh kurê kumrêx. Anê.

Nom hêx rom mẽ kot kamã hamak kaxyw ã kãm kapêr anê.

¹⁷ Nhũm ra Jejus mẽ hamaxpêr kõt mẽ omunh mex jakamã mẽ kapêr ma nê mẽ kãm:

–Kwa mẽ inhma mẽ ate ixpê Satanasti hkwy hã ixkamnhĩx xwÿnhjaja. Koja pika nhõ xwÿnhjaja axpên kutã amnhĩ xunhwÿ nê axpu hãmri nê anhgrà nê ma ahpÿnhã ri pa. Hãmri nê amnhĩ krã hkõt ri tanhmã amnhĩ to ho ri pa. Jakamã nhũm mẽ õ pahi mẽ hamãr o pa hkêt nê. Rÿ koja krĩ nhõ xwÿnhjaja. Mẽ kot axpên to hkwy xwÿnhjaja mẽmoj tã axpên kãm gryk nê axpên kutã amnhĩ xunhwÿ hãmri nê axpên pê anhgrà nê ahpÿnhã pa hãmri nhũm mẽ õ pahi tee

ri kãm mẽ hamãr o pa hprãm. Mo õ krĩ kamã mẽ hkwỳ kot ri mẽ hamãr o pa? No na pre mẽ õ pahi tãm amnhĩ nê mẽ hanor kêt nê.

18 —Tã ja pyrã nê ixte Satanasti nhỹ hã tanhmã amnhĩ nhĩpêx to ho ixpa ronhỹx pa mẽ nê amnhĩ kwỳjê janor o ri ixpa hkêt nê. Nhỹx Satanasti ixte mẽ nê mẽ hanor kaxyw tanhmã inhmã nê hkêt nê.

19 —No kêt mẽ akwỳjaja? Xà Satanasti nhỹ hã na htem mẽ nê mẽ hapôx o pa nà? Kêp apu pa ixte y hã mẽ nê mẽ hapôx ronhỹx mẽ akwỳjaja ixpyrà nê y hã mẽ nê mẽ hapôx o pa. Nà Tĩrtũm nhỹ hã mẽ ixte mẽ nê mẽ hapôx o mẽ ixpa kênã. Jakamã ã mẽ ate ijarênh anhỹr o apaja mex kêt.

20 Tĩrtũm Karõ nhỹ hã ixte mẽ nê mẽ hapôx o ri ixpa kênã. Jakamã kwa mẽ ja hã ixpumu nê Tĩrtũm kot ixte mẽ ato amnhĩptàr kaxyw mẽ awỳr inhmênh kôt ixpumunh kurê kumrêx kêt wehe. Pa na ka htem ixkamã ajamak o apa.

21-22 —Satanastija àhpumunh tỳx jakamã na htem tee ri kêp mẽ kot hkôt amnhĩ xunhwỳr xwỳnhjê pytãr kaxyw nhũm mẽ nê mẽ omunh mex nê. Nom ixàhpumunh tỳx o ixte Satanasti jakrenh jakamã pa na pa hte kêp mẽ utà nhũm mẽ hpãnhã ixkôt ri amnhĩ nhĩpêx.

23 —Mẽ amã ixkapêr mar prãm tã na ka mẽ kormã ixkôt amnhĩ xunhwỳr kêt nê. Kwa wem ma amnhĩ to amôr gri

nê tokyx ixkôt amnhĩ xunhwỳ kêt wehe. Kot kaj mẽ anhỹr kêt nê hãmri nê te mẽ ate ixkutã amnhĩ xunhwỳr xwỳnh pyrãk o amnhĩ nhĩpêx.

24 Mẽ ate ixkôt amnhĩ xunhwỳr kêt xwỳnhjaja te mẽ ate mēhõ nê mẽkarõmnuti japôx xwỳnh pyrãk. Nhũm te kêp kator nê ma mō nê nhỹri amgrã kamã ri pa. Nhũm ja kêp omnuj nhũm tee ri kamã nhỹri hkôkôt xà japêr o pa. Nom tee ri hapêr o pa nê hamaxpêr o: “È kot paj ma akupỹm mẽ kot nê ixkator xwỳnhnta wỳr tẽ nê hwỳr axà nê hkôt mãn ixpa.” Anê.

25 Hãmri nê ma akupỹm hwỳr tẽ. Nom kormã akupỹm hwỳr àr kêt ri nhũm kamã amrakati nê pa.

26 Jakamã nhũm ma akupỹm hwỳr tẽn axà. Nom ahte àr kêt nê. Ra amnhĩ kôt amnhĩ kwỳjê ho 7 nê hwỳr mẽ ho agjê. Nê hwỳr gjêx pa. Mẽ kêp 7jaja nê wamta mẽ nhũm mẽ piitã hwỳr gjêx pa. No mẽ kêp 7jaja omnuj tỳx o kot wamta jakrenh jakamã nhũm mẽ kot hwỳr gjêx xwỳnhnta mẽ y hã amnhĩ tomnuj tỳx o pa. Oprê htỳx nê. Wam pyxire nê kot hwỳr àr nhỹ hã amnhĩ tomnuj o ri pa nom ãm kawax pê oprê. Tã axte hwỳr mẽ ohtô nê gjêxta nhỹ hã oprê htỳx kumrêx. Ja pyrã nê kot kaj mẽ tokyx ixkôt amnhĩ xunhwỳr kêt nê hãmri nê ãm amnhĩ tomnuj tỳx pix o ri apa. Anê.

Mẽ hkĩnh nê mẽ pa xwỳnhjê gri

jarēnh

Rukre 8.19-21

²⁷ Nhūm pre ā Jejus mē ahkre anē nhūm mēhō nija kuma nē kām:

—Hēxta gāà nē. Mān akatorxā ā ate amnhī nhīpēx anhūr o apa hā apumu nē hkīnh nē. Anē.

²⁸ Hāmri nhūm kām:

—Tỳ. Nà kot anhūr kēnā. Nom kot ka mē atō Tīrtūm kapēr ma nē hkôt amnhī nhīpēx hāmri nē akīnh rax o ixkatorxā kot ixpumunh nē hkīnh ta jakre. Anē.

Jejus kot tanhmā Jōhti jarēnh to

Matêwre 12.38-42; Makre 8.12

²⁹ Tā nhūm mē ohtō nē Jejus ā akuprō nē mēmoj tā kuwỳ nē kām:

—Pa. Kwa mē inhmā aa mē ixte mēmoj pumunh kêt ô ho anē pa mē omu. Anē.

Hāmri nhūm mē kuma nē mē kām:

—Tk. Kwa mē ajamaxpēr punuj pix o na ka htem ri ajamaxpēr o apa. Ixpē Tīrtūm kot mē awūr inhmēnh xwỳnh tã ka mē ja hā ixkôt ajamaxpēr kêt nē. Tã mē ate aa mēmoj pumunh kêt kwỳ ixte mē amā ho anhūr kaxyw hā inhmā karō. Nà kot paj kormā mē amā ho anhūr kêt nē. Kot paj nhūr mā te amnepēm finat Jōhti kot amnhī nhīpēx pyrāk o amnhī nhīpēx ka mē hā ijarēnh ma nē kormā ja hā ixpumu.

³⁰ Tīrtūm nhỹ hā kapēr xwỳnh pē Jōhtija amnepēm na pre tep rax kukrē. Tã nom nhūm htūr rāhā ôxàhkre rūm

kato nhūm mē omu nē Tīrtūm kot mē hwūr mēnh ā omu. Tã kot paj nhūr mā Jōhti pyrā nē tanhmā amnhī nhīpēx to nhūm mē ja hā ixpumu nē Tīrtūm kot mē awūr inhmēnh xwỳnh ā ixpumunh kurē kumrēx.

³¹ —Nē koja nhūr mā Tīrtūm akupỹm mē htyk nē mē hikwỳ xwỳnh piitā akupỹm mē ho htūr hāmri nhūm mē piitā Inhīpēxā mē wa ixkutā hkrī. Pa wa mē piitā tanhmā mē harēnh to. Tīrtūm mē wa ixkuri mē htūr tūm nē mē pa ho mē pa mā xwỳnh ā mē hkwyjē jarē. Nē wa ixkuri mē pa ho mē pa hkêt xwỳnhjē jarē. Mē piitā ā mē harēnh anē. Amarī mē pa xwỳnhjaja nē mē ô pahijaja. Hāmri nhūm sur kām mē ô pahi niti Tīrtūm mā tanhmā amnhī jarēnh to hāmri nē hpānhā tanhmā mē ajarēnh to nē kām mē ajarēnh o: “Na pa pre inhmā pahi Sarumāw kot anhỹ hā àhpumunh tỳx ā harēnh ma hāmri nē inhmā mar prām xāj ma awry hā ô pika hwūr ixpa nē omu nē kapēr ma. Hāmri nē ma akupỹm inhō pika hwūr ixpa nē ixkwỳjē mā àhpumunh tỳx ā harēnh o ixpa. Tã Akra Jejus na àhpumunh tỳx o pahi Sarumāw jakrenh tã or war akutā mē hkrī xwỳnh kwỳ mīj na prem kapēr ma no am ixkīnhā kām mar prām kêt nē. Na prem kuma nē am kuma.” Anhūr o wa inhmā mē ajarē. Hāmri nē ja hā mē amā akir ka mē tee ri mar o akrī nē amnhī kamā agryk o akrī.

³² —Hāmri nhūm hpānhā

Nĩnĩwe nhõ xwỳnhjaja wa inhmã tanhmã amnhĩ jarēnh to. Jõhti kot mẽ hwỳr mõi mẽ mẽ kãm Tĩrtũm kapēr jarēnh o pa xwỳnhjaja nhũm mẽ tanhmã wa inhmã amnhĩ jarēnh to. Hãmri mẽ pahĩ nita pyrã mẽ wa inhmã tanhmã mẽ ajarēnh to mẽ wa inhmã: “Na pre Jõhti man mẽ inhõ krĩ hwỳr mõi mẽ mẽ inhmã akapēr jarēnh o ri mẽ ixkõt pa. Pa prem kuma mẽ mẽ ixte amnhĩ tomnuj kaga mẽ akõt amnhĩ xunhwỳr kurê kumrēx Tĩrtũm. Nom or war akutã mẽ hkrĩ xwỳnh kwỳ mũj na pre Akra Jejus tãm mẽ hwỳr mõi mẽ mẽ kãm kapēr o ri mẽ hkõt pa nhũm prem kuma no ãm mẽ ixkĩnhã amnhĩ tomnuj kaga mẽ hkõt amnhĩ xunhwỳr kêt mẽ. Mẽ kot Akra mar tã amnhĩ kaxyw kãm hamaxpēr kêt mẽ.” Anhỹr o koja mẽ wa inhmã mẽ ajarē ka mẽ tee ri mẽ ama mẽ amnhĩ kamã agryk tỳx mẽ. Jakamã e kwa ixte mẽ amã ã ixkapēr anhỹrja ma mẽ kãm ajamaxpēr tỳx rãhã ho ri apa. Anẽ.

Mẽ pajamaxpēr mex te kot kanê hpõk mex pyrãk ã harēnh Matêwre 5.15, 6.22-23

³³ Nhũm Jejus arĩ mẽ ahkre ho nhỹ mẽ mẽ kãm:

—Xã na htem kanê hpõk mẽ poti ho hpro? Nã na htem ho anhỹr kêt mẽ. Na htem hpõk mẽ kỳx pẽ mẽmoj nhĩmõk ã unhwỳ nhũm mẽ piitã mẽ kãm hirã mex nhũm htem ixkrem agjẽ mẽ hirã kamã mẽmoj pumunh mex o mra.

³⁴ Ja pyrã mẽ kot ka mẽ atõ ixkapēr ma mẽ ixkõt amnhĩ nhĩpêx mẽ tãm amnhĩ nhĩpêx o ri apa. Nẽ tãm mẽ hipêx o ri apa. Jao te hirã kamã mẽ rĩt mex xwỳnhjaja kot amnhĩ nhĩpêx pyrãk. Nom koja mẽhõ inhma mẽ ãm inhma mẽ ixkwỳm ri tanhmã amnhĩ nhĩpêx to ho pa. Jao te kamãt kõ kamã mẽ rĩt mex kêt xwỳnhjaja kot htỳx amnhĩ nhĩpêx o pa pyrãk o amnhĩ nhĩpêx.

³⁵ —E kêt ka mẽ ã amnhĩ nhĩpêx anhỹr pymaj ixkapēr ma mẽ kãm ajamaxpēr tỳx rãhã ho ri apa.

³⁶ Kot kaj mẽ ixkapēr ma mẽ ixkõt amnhĩ nhĩpêx. Hãmri mẽ te mẽ ate kanê hpõk mex nhĩrã kamã ri apa pyrãk o amnhĩ nhĩpêx. Jao aprĩ hã ixkapēr ma mẽ aprĩ hã ixte tanhmã amnhĩ nhĩpêx to hã ixpumunh mex mẽ. Anẽ.

Jejus kot tanhmã Parijew nhõ xwỳnhjê jarēnh to

Matêwre 23.25-26

³⁷ Tã nhũm Jejus ra mẽ ahkre pa. Hãmri nhũm Parijew nhõ xwỳnhja hwỳr tẽ mẽ kãm:

—Pa. E kwa ma ixkõt tẽ mẽ mẽ ixkutã apku. Anẽ.

Hãmri nhũm kuma mẽ kãm:
—Tõe. Nã kot paj ma akõt tẽ. Anẽ

Hãmri mẽ ma hkõt tẽ mẽ õrkwỹ hwỳr axã mẽ apkur kaxyw mẽ ãhkõ hã nhỹ.

³⁸ No ãm mẽ hkukamã mẽ hpãmjê pyrã mẽ amnhĩ nhĩhkra kuhõnh ryy hkêt mẽ. ãm amnhĩ nhĩhkra htyk pix kuhõnh tokyx anẽ mẽ nhỹ. Nẽ

ō prat kuhõnh ryy hkêt rãhã apkur kaxyw nhỹ. Jakamã nhũm kot amnhĩ kôt hwỳr xwỳnhnta tee ri ja hã omu nẽ hamaxpẽr o:

—Tk. Kwa na hte mẽ ixte amnhĩ nhĩpêx kôt amnhĩ nhĩpêx mex kêt nẽ.

³⁹ Anẽ nhũm Jejus amnhĩ tã hamaxpẽr ã omu nẽ kãm:

—Nà mẽ apê Parijew nhõ xwỳnhjaja te mẽ ate mẽ kot apkur kaxyw prat kre kuhõnh punuj tã mex ã harẽnh pyrãk o amnhĩ nhĩpêx. Nẽ ãm mẽ akrã hkà rũm pix mã na mẽ amex. Nẽ mẽ noo mã te mẽ amex pyrãk no ãm mẽ anhõxàhkre kaxwỳnh kãm mẽ ajamaxpẽr mex kêt. ãm mẽ akapẽr prãm. Nẽ mẽ axàhkurêê. Nẽ mẽ anhõxyỹ.

⁴⁰ Mẽ ate atỳx ri amnhĩ nhĩpêx o ri mẽ apa xwỳnh kênã. Kwa kêr ka mẽ ãm akrãhkà pix rũm amex nẽ ri apa hkêt nẽ. Mẽ mããnẽn anhõxàhkre kaxwỳnh kãm ajamaxpẽr mex o ri apa. Nẽ tãm mẽ piitã mẽ hipêx o ri apa.

⁴¹ Kêr ka mẽ tãm ajamaxpẽr o tãm mẽ hipêx o ri apa. Nẽ axàmnhĩx ri mẽ kêp amrakati xwỳnhjê mã mẽmoj nhõr o ri apa. Kot kaj mẽ ã amnhĩ nhĩpêx anẽ hãmri nhũm Tĩrtũm ja hã mẽ apumu nẽ amnhĩm mẽ amex ã mẽ ajarẽ. No na ka htem mẽ amã mẽ amnhĩ to mex prãm xàj tee ri amnhĩ kuhõnh japjê kaprỳ. Anẽ.

Jejus kot Parijew nhõ xwỳnhjaja mex kêt kukamã mẽ

harẽnh

Matêwre 23.4, 23.7, 23.13-24, 23.27-38; Makre 12.38-39

⁴² Nhũm Jejus arĩ Parijew nhõ xwỳnhjê jahkre nẽ mẽ kãm:

—Kwa mẽ okora Parijew nhõ xwỳnhjaja. Kot kaj mẽ amex kêt nẽ. Na ka htem Tĩrtũm kapẽr piitã hkôt amnhĩ nhĩpêx o apa hkêt nẽ ãm hkwy kôt pix mã amnhĩ nhĩpêx o ri apa. Nẽ ãm kapẽr o hpỳnhre nẽ hkôt amnhĩ nhĩpêx hãmri nẽ hã amnhĩ pumu nẽ ate amnhĩ to mex xwỳnh ã amnhĩ to jarkrar o ri apa. Nom Tĩrtũm kãm hprãm xà piitã hkôt amnhĩ nhĩpêx hkêt nẽ. Mẽ ate tãm mẽ piitã mẽ hipêx o ri apa hã kot mẽ amã karõja. Nẽ mẽ amã Tĩrtũm kĩnh ã kapẽr kôt amnhĩ nhĩpêx o ri apa hã karõja mẽ ate mar mex tã hkôt amnhĩ nhĩpêx kêt nẽ. Mẽ ate kapẽr piitã hkôt amnhĩ nhĩpêx ronhỹx ja mẽ amã mex kumrêx.

⁴³ —Kwa mẽ o kora. Mẽ piitã mẽ kot amnhĩm mẽ ate amnhĩ to rũnh xwỳnh ã amnhĩm mẽ ajarẽnhja na mẽ amã hprãm. Nẽ mẽ piitã mẽ kot amnhĩm mẽ apê mẽ ahkre mex xwỳnh maati hã mẽ ajarẽnhja na mẽ amã hprãm.

⁴⁴ —Kwa mẽ o kora. Kot ka mẽ amex kêt nẽ. Mẽ kot mẽ akapẽr mar nẽ mẽ akôt amnhĩ nhĩpêx xwỳnhjaja te mẽ kot htỳx ri mẽ hã pika nhĩmõk ã ri mẽ pa xwỳnh kot amnhĩ nhĩpêx pyrãk. Jao mẽ ate amnhĩ to mex ã amnhĩ kamnhĩx nom mẽ ate amnhĩ to mex kêt. Te mẽ kot pika

mex ã hkamnhĩx nẽ htỳx ri mẽ hã pika nhĩmõk ã ri mẽ pata pyrãk o na htem amnhĩ nhĩpêx. Anẽ.

Nhũm pre ã Jejus Parijew nhõ xwỳnhjê mã mẽ kot amnhĩ nhĩpêx jarẽnh anẽ.

Jejus kot Tĩrtũm kapêr tũm o mẽ ahkre xwỳnhjê mã kapêr

Matêwre 23.1-4, 23.13, 23.29-36

⁴⁵ Hãmri nhũm Tĩrtũm kapêr tũm o mẽ ahkre ho pa xwỳnhja kuma nẽ kànhmã xa nẽ kãm:

—Kwa na ka ã Parijew nhõ xwỳnhjê jarẽnh punuj anhỹr jao mããnẽn ã mẽ paja jarẽnh anẽ nà? Mẽ ixte amnhĩ nhĩpêxja ãm tipxi kẽnã. Anẽ.

⁴⁶ Hãmri nhũm kãm:

—Tỳ. Mããnẽn mẽ kajaja. Kwa o kora mẽ apê Tĩrtũm kapêr tũm o mẽ ahkre xwỳnhjaja. Kot kaj mẽ uràk nẽ amex kêt nẽ. Na ka htem mẽ kãm mẽmoj tã karõ ho ri apa nẽ mẽ kãm: “E kêt ka mẽ ã amnhĩ nhĩpêx anẽ nẽ ã amnhĩ nhĩpêx anẽ.” Anhỹr tã no ãm mẽ kajaja amnhĩ kapêrja kôt amnhĩ nhĩpêx kêt nẽ. Te mẽ ate mẽhõ kot mẽ katut ã mẽ kãm mẽ jênh pytĩ janhõr tã mẽ ho ajuta nẽ hkwy htur kêeta pyrãk o na ka htem amnhĩ nhĩpêx o ri apa.

⁴⁷⁻⁴⁹ —Na pre Tĩrtũm amnepêm mẽ pahpãmjê hkukamã tanhmã mẽ harẽnh to. ãhpumunh tỳx xà hkôt tanhmã mẽ hkukamã mẽ harẽnh to nẽ mẽ harẽnh o: “Kot paj ma mẽ hwỳr inhỹ hã ixkapêr jarẽnh xwỳnhjê rẽ. Nom koja mẽ omu nẽ ãm mẽ omu nẽ kêp mẽ hprãm nõkati

nẽ tanhmã mẽ hipêx to ho pa. Nẽ ixpê mẽ hkwyjê hpar o pa. ã koja mẽ inhỹ hã ixkapêr jarẽnh xwỳnhjê nhĩpêx anẽ.” Anhỹr o mẽ hkukamã mẽ harẽ. Tã ã mẽ harẽnh anhỹr xà hkôt nhũm prem ã mẽ hipêx anẽ nẽ mẽ hkwyjê hpa nẽ mẽ hkwyjê pynê nẽ mẽ hagjê.

—Amnepêm mẽ akukamã mẽ kot ã mẽ hipêx anhỹr nhũm mẽ ate mẽ ano ho ja hã mẽ omunh kêt tã ka htem arĩ mẽ hã pika ho mex o ri apa. Te mẽ amã mẽ hapê nẽ mẽ ho ajamak pyrã nẽ mẽ hã pika ho mex o ri apa. Nom mẽ amã mẽ hapê hã ho mex hkêt nẽ. ãm ra mẽ htyk nẽ hapêx nẽ mẽ amã Tĩrtũm kapêr jarẽnh o pa hkêtja ã na ka htem akĩnh nẽ ã axêx rom mẽ hã pika ho mex anhỹr o ri apa.

⁵⁰⁻⁵¹ —Na prem Tĩrtũm nhỹ hã kapêr jarẽnh o mẽ pa xwỳnhjê nhĩmex rax nẽ. Amnepêm panhĩ kator krax rũm finat Atãw kra finat Apewja na pre Tĩrtũm nhỹ hã kapêr o pa nhũm htõ kãm mar prãm kêt nẽ kupĩ. Tã nhũm Tĩrtũm axte mẽ hwỳr y hã kapêr jarẽnh o mẽ pa xwỳnh kwỳjê rẽ nhũm prem mã mẽ ho anẽ nẽ mẽ hkwyjê nhĩmex. Nhũm pre xatã mẽ hwỳr mẽ hkwyjê rẽ nhũm mẽ xatã mẽ kupa. ã Apew rũm finat Jakaris wỳr na prem mẽ himex rax anẽ. Nẽ hpãnhã Jakarisja nhũm prem Tĩrtũm mã amnhĩ jarẽnh xà hã ixkre kamã kupĩ. Tã ka mẽ ajaxwỳja amã Tĩrtũm kapêr

mar prām kêt nē mẽ uràk nē amā y hã kapēr jarēnh o mẽ pa xwỳnhjê nhĩmex prām. Tã ã mẽ pahpãmjê mẽ ato hpimrààtã mẽ ate mẽ hipêx anhỹrja mỳrapê koja Tĩrtũm ja hã mẽ apê mẽ hkanrêhã mẽ htãmnhwỳjaja tanhmã mẽ ato htỳx to ka mẽ amnhĩ xà htỳx kamã ajamak o ri apa rãhã nē kãm ga.

52 —Jakamã kwa mẽ o kora mẽ apê Tĩrtũm kapēr tũm o mẽ ahkre xwỳnhjaja. Mẽ ajaxwỳja na ka htem Parijew nhõ xwỳnhjê pyrà nē Tĩrtũm kapēr o mẽ ahkre ho apa. Nē aprĩ hã mar mex tã no ãm amnhĩ kaxyw hkôt ajamaxpēr nē hkôt amnhĩ nhĩpêx kêt nē. Hãmri nē mẽ kot mẽ amar o pa xwỳnhjê mã atỳx ri tanhmã mẽ ahkre hto nhũm htem mẽ ama nē mẽ apyrà nē amnhĩ kaxyw Tĩrtũm kôt hamaxpēr nē hkôt amnhĩ nhĩpêx kêt nē. Mẽ kãm hprĩ hã kapēr mar mex prãm tã mẽ amar xà hkôt mẽ ate amnhĩ nhĩpêx pyràk o amnhĩ nhĩpêx o pa. Nom mẽ kajaja na ka htem mẽ kãm mẽ hamaxpēr mex nhõr kêtja mỳrapê nhũm htem ã amnhĩ nhĩpêx anhỹr o pa. Jakamã kwa mẽ o kora kot kaj mẽ amex kêt nē. Anē.

Nhũm pre ã Jejus mẽ kãm kapēr anē.

53-54 Hãmri nē kato nē ma tẽ. Nhũm Tĩrtũm kapēr tũm o mẽ ahkre ho mẽ pa xwỳnhjê mẽ Parijew nhõ xwỳnhjaja hãmri kot tanhmã mẽ kãm kapēr toja ma nē kamã gryk tỳx nē. Jakamã ma hkôt mra. Hêx

rom mẽmoj tã hkukjêr o hkôt mra. Nē hã hkukjêr kãm hitỳx o hkôt mra. Kot tanhmã mẽ kãm ujarēnh to nhũm mẽ kot mar nē ra hã àmnênh kaxyw ma hkôt àhkukjêr o mra.

12

Mẽ pahte Tĩrtũm pẽ mẽ pajamaxpēr punuj o pahpimxur kêt

Matêwre 10.26-33

1-3 Tã nhũm mẽ Jejus ã htu rax kumrêx nē hã axpên nhĩgãnh o kuhê. No nhũm kormã mẽ kãm tanhmã kapēr to hkêt nē. ãm kormã hkôt mẽ pa ho mẽ pa xwỳnhjê kumrêx mã kapēr nē mẽ kãm:

—Mẽ piitã kãm amnhĩ kwỳjê pẽ hamaxpēr punuj o hpimxur hprãm tã koja nhỹrmã mẽ hamaxpēr piitã amnhĩrit pa. Nē mẽmoj piitã ra hpimxur mex tã koja nhỹrmã piitã amnhĩrit pa. Nē mẽ kot kamàt kô kamã hpimxur pẽ mẽmoj jarēnh tã koja mẽ piitã nhỹrmã kot mẽmoj jarēnhnta ma. Nē mẽ kot hitom kãm kawax pẽ axpên mã mẽmoj punuj jarēnh tã koja nhỹrmã mẽ piitã mẽmoj jarēnhnta ma. Jakamã kwa kêr ka mẽ tanhmã Parijew nhõ xwỳnhjaja kot amnhĩ nhĩpêx to ho pa hã mẽ omu nē ãm mẽ omu nē mẽ hkôt amnhĩ nhĩpêx kêt nē. Te mẽ kot tãm amnhĩ nhĩpêx pyràk o amnhĩ nhĩpêx tã no ãm tãm amnhĩ nhĩpêx o pa hkêt. Na htem ãm htỳx ri tanhmã amnhĩ to hêx to ho pa. Tã kêr ka mẽ uràk nē

ã amnhĩ nhĩpêx anhÿr kêt nê.
Anê.

*Mê pahte pahkwÿjê pumaj
Tĩrtũm kaga hkêt ã mê pamã
karõ*

Matêwre 10.28-31

⁴Nhũm Jejus arĩ hkõt mê pa
ho mê pa xwÿnhjê mã kapêr
nê mê kãm:

—E ixkràmnhwÿjaja. Kêr
ka mê amã akwÿjê puma rÿ
nhãm mê hkwÿjê puma ho ri
apa hkêt nê. Koja mê apar
tã ãm mê anhĩ pix pa nom
tanhmã mê akarõ hto hkêt
nê.

⁵Tĩrtũmja tapxipix na hte
mê ï nê mê hkarõ ho hpim-
ràatã mê kot amnhĩ xà htÿx
kamã hamak tũm xà hwÿr mê
kurê. Tã kêr ka mê ja pumaj
Tĩrtũm kapêr kwÿm tanhmã
ri amnhĩ nhĩpêx to ho apa
hkêt nê.

⁶⁻⁷—Nê Tĩrtũm kot mê
pahto hapêx par pumunh
tã mãânên kot mê pajamãr
pumunh mex. Mãn ka htem
kuwênhre pumu. Na hte
Tĩrtũm hamãr mex o pa. Mê
piitã mê kot ãm kuwênhre
pumunh o pa htã nhũm
Tĩrtũm mê kurom hamãr mex
o pa. Nê htãnopxar rãhã ho
pa. Nom kãm mê pajapê
htÿx o kuwênhre jakrenh
jakamã kwa mê tee ri amnhĩ
kukamã ajamaxpêr o ri
akaprĩ nê apa hkêt nê. Koja
Tĩrtũm mê pahtãnopxar rãhã
ho pa. Ra kot tanhmã mê
pakute hã mê pahpumunh
par. Nê ahpÿnhã tanhmã
mê pahkrã hkĩ kute hkõt mê
pahpumunh par. Tã kot mê
pahtãnopxar rãhã jakamã mo

kaxyw kot kaj kêt mê ri amã
mêhõ puma ho ri apa?

⁸—Jakamã kwa mê mãmrĩ
mê kãm mê apê ixkra hã
amnhĩ jarênh o ri apa nê
amã mê uma xàj tee ri
amnhĩ nhĩpêx o ri apa hkêt
nê. Kot ka mê kãm ra mê
ate ixkõt amnhĩ xunhwÿr
ã amnhĩ jarê. Pa ja hã mê
apumu hãmri nê mê apyrã nê
kaxkwa kamã Tĩrtũm kapêr o
mê wrÿk xwÿnhjê mã ra mê
ate ixkõt amnhĩ xunhwÿr ã
mê ajarê.

⁹Nom kot ka mê kot ixtã
tanhmã mê ato pymaj apê
ixkwÿ hã amnhĩ jarênh kêt
japêr. Pa ja hã mê apumu
hãmri nê nhÿrmã amnhĩ xwar
mê kãm mê apê ixkwÿ hkêt
ã mê ajarê. Jakamã kwa mê
mãmrĩ mê kãm apê ixkwÿ hã
amnhĩ jarênh o ri mê hkõt apa
kê mê ama nê tanhmã inhmã
hamaxpêr to.

¹⁰Koja mê ama nê ãm ama
nê kãm ixprãm kêt japêr.
Hãmri nhũm Tĩrtũm ixtã mê
omu nom tokyx ixtã tanhmã
mê ho hkêt nê. Koja kormã
amnhĩ tã mê hamãr o pa.
Karõ kot axte mê kãm ijarênh
o amnhĩrĩt nhũm mê hkwÿjaja
kot mar nê kãm ixprãm nê
ixkõt amnhĩ xunhwÿr kaxyw
nhũm kormã amnhĩ tã mê
hamãr o pa. Nom koja Karõ
xatã mê kãm ixto amnhĩrĩt tã
nhũm mê kuma nê ãm kuma
nê te mê kot kêp amnhĩ jamak
pro pyrãk o amnhĩ nhĩpêx o
pa. Jao Karõ hã hpijaãm kêt
mÿrapê koja Tĩrtũm nhÿrmã
amnhĩ xwar te kot mê kêp
amnhĩ jamak pro pyrãk o
mê hipêx nhũm mê tee kãm

amnhĩ kaprĩ kaprȳ. Hāmri nē amnhĩ xà htỳx kamā hamak tũm xàta wỳr ma pa nē kamā pa ho pa. Jakamā kwa mẽ māmri mẽ kām mẽ apê ixkra hã amnhĩ jarēnh o ri mẽ hkôt apa nē tanhmã mẽ kām ijarēnh to ho ri apa.

¹¹ Koja mẽ ama nē kām mẽ amar prām kêt japêr hāmri nē ixtã mẽ apynê nē tanhmã mẽ anhĩpêx to kaxyw. Nē Ijaew nhõ Tĩrtũm kapêr o mẽ ahkre xà hã ixkre hwỳr mẽ ato mrrar japêr. Rỳ mẽ õ pahi hwỳr mẽ ato mrrar nē tanhmã kām mẽ ato hêx to. Nom kêr ka mẽ mẽ kām amnhĩ jarēnh kaxyw nē tee ri amnhĩ kukamã ajamaxpêr o amã mẽ uma kêt nē.

¹² Koja Tĩrtũm Karõ ja kaxyw mẽ amã mẽ ajamaxpêr mex gõ hāmri ka mẽ õ ri mẽ kām amnhĩ jarê. Jakamã kwa mẽ tee ri mẽ kām amnhĩ jarēnh kukamã ajamaxpêr o ri mẽ amã mẽ uma ho apa hkêt nē. Anê.

Mẽ hikukrêx rũnh pix kukamã hamaxpêr xwỳnhjê jarēnh

Wam Ximotre 6.9-10; Xiakre 4.13-17, 5.1-6

¹³ Nhũm Jejus arĩ mẽ ahkre o xa nhũm mẽ mar o kuhê. Rôm nhũm mēhõ myja hwỳr tē nē kām kapêr nē kām:

—Pa? Kwa ot pa awỳr amã mẽmoj jarēnh mã tē. Na pre inhĩpêxà ty nhũm ixtõ ixrom amnhĩm õ mẽmoj piitã ho àrĩk pa. Õ pika nē hkrit nē hikukrêx nē ãm mẽmoj piitã ho àrĩk par kumrêx. Kwa ma ixkôt tē nē kām anê pa wa amnhĩm ho axkjê nà? Anê.

¹⁴ Hāmri nhũm kuma nē kām:

—Tk. Kokỹ. Na pa pre mẽ amã mẽ mẽmoj to ixpikjêr kaxyw mẽ awỳr ixwrȳk kêt nē. Anê.

¹⁵ Hāmri nē mẽ kot mar o kuhê xwỳnh piitã mẽ kām kapêr nē mẽ kām:

—Kwa kêr ka mẽ amã anhõ mẽmoj rũnh prām o ri apa hkêt nē. Na htem mẽmoj rũnh kukwak ri Tĩrtũm wỳr apir kêt nē. Mẽmojta kêp pika pix nhõ xwỳnh na.

¹⁶ Anhỹr o mẽ kām kapêr hāmri nē mẽ kām awjarê. Mẽ hkukrêx rax ã kuxi nē mẽ kām awjarê nē mẽ kām:

—Nà koja mēhõ õ mẽmoj rax nē. Nē hpur kām õ rax nē. No ãm õ jaxwỳr xà hã ixkre kêp grire.

¹⁷ Hāmri nhũm tee ri hpur kām õ rax kukamã hamaxpêr nē hamaxpêr o: “Kwa tanhmã kot pa amnhĩ to nē ja piitã nhỹri haxwỳr wehe? Inhmã amarĩ mẽ kêp amrakati xwỳnhjê mã hkwȳ nhõr prām kêt. Kot paj ãm amnhĩm piitã ir pa nē kritpêm hkur o ixpa. Nom ixpê haxwỳr xà hã ixkreja ixpê grire.” Anê.

¹⁸ —Hāmri nē hamaxpêr o: “Nà na pa ra ijamaxpêr. Kot paj ixkre grireta grà nē hpãnhã rax õ nhĩpêx. Hāmri nē ixpur kām inhõta jamỳ nē kamã ir pa. Nē ixàpênh xà hã ixkukrêx piitã kamã haxwỳr pa. Nà kot paj ho anê.” Anê.

¹⁹ —Hāmri nē ra ixkreja grành pa nē hpãnhã rax õ nhĩpêx. Nē hipêx pa hāmri nē kamã hpur kām òta xir pa.

Ně àpênh xà hã hikukrêx piitã kamã unhwý. Hãmri nẽ omu nẽ hkĩnh nẽ. Nẽ hamaxpêr o: “Nà hãmri. Kot paj tokyx axte mẽmoj tã ixàpênh kêt nẽ. Ra inhõ rax kumrêx kênã. Kot paj kritpêm ho ixàpkur mex o ixpa. Nà ãm hãmri na pa amnhĩ kukamã ijamaxpêr mex pê ixkre rax nhĩpêx.” Anẽ.

²⁰ Tã nhũm Tĩrtũm tee ri ã kot amnhĩ nhĩpêx anhỹr ã omu nhũm ja kãm mex kêt nẽ. Hãmri nhũm hã kãm kapêr nẽ kãm: “Nà na ka atýx ri anhõ rax mẽ akukrêx rax o apikuprõnh kaprý. Na ka ãm amnhĩ pix kukamã ajamaxpêr o apa pê ã amnhĩ nhĩpêx anẽ. Nom kot kaj kamát ja kamã ty nẽ anhỹ kamã ma mõi nẽ amnhĩ kôt anhõ mẽmoj rax õ ho amõr kêt nẽ. Koja hpãnhã mẽhõ amýr pê ho amnhĩptâr pa ka rĩ amnhĩ pumu.” Anẽ. Nhũm ã Tĩrtũm kãm kapêr anẽ. ã mẽ ujarênh kot anhỹr.

²¹ —Mẽ kot amnhĩ nhõ nẽ amnhĩ kukamã pix mã hamaxpêr o mẽ pa xwýnhjaja na htem myja pyrã nẽ Tĩrtũm mã hamaxpêr o pa hkêt nẽ. Jakamã koja mẽ nhỹrmã ty hãmri nẽ hkukrêx pix kukamã hamaxpêr nẽ amnhĩ mã pix mã hamaxpêr o paja mýrapê Tĩrtũm mẽ wa ixri htĩr tũm nẽ mex nẽ pa ho pa hkêt nẽ. Mẽ kot amnhĩ nhõ pix kukamã hamaxpêr xwýnhjaja nẽ amnhĩ kukamã pix mã mẽ hamaxpêr xwýnhjaja nẽ mẽ kamã ukapĩrĩ hkêt xwýnhjaja mẽ õ mẽmoj rũnh tã koja mẽ

nhỹrmã ty hãmri nẽ amnhĩ kôt hõ ho pixi nẽ o mõi kêt nẽ. Koja mẽ mẽmoj piitã rer pa nẽ ma ý kamã ma mõi. Jakamã kwa kêr ka mẽ jajê pyrã nẽ anhõ mẽmoj to anhõxy ho ri apa hkêt nẽ. Anẽ.

Mẽ pahte tee ri amnhĩ kukamã pajamaxpêr kêt ã mẽ pamã karõ

Matêwre 6.25-34; mããnẽn Wam Pêtre 1.3-9

²² Tã nhũm Jejus hpãnhã tanhmã hkôt mẽ pa ho mẽ pa xwýnhjê jahkre hto nẽ mẽ kãm:

—Kwa kêr ka mẽ tee ri amnhĩ kukamã ajamaxpêr o ri apa hkêt nẽ. Amnhĩ xàpkur xà rý axê ka mẽ tee ri hkukamã ajamaxpêr kêt nẽ. Nẽ mẽ ãm mẽmoj piitã hkukamã tee ri ajamaxpêr kêt nẽ.

²³ Tĩrtũm àhpumunh týx o àhpumunh týx xwýnh na. Na pre àhpumunh týx o mẽ anhĩpêx ka mẽ kukwak ri atĩr nẽ apa. Tã xà kot mẽ amã mẽ anhõ ho pa hkukamã àhpumunh kêt? Nà ja kukamã àhpumunh xihtýx kênã. Kêp mẽ anhĩpêx xwýnh jakamã mããnẽn kêp mẽ amã mẽ anhõ ho pa xwýnh. Nẽ kêp mẽ amã mẽ axê nhõr o pa xwýnh.

²⁴ —Mãn ka htem kuwênhre pumu. Na hte tee ri amnhĩ xàpkur xà hkukamã hamaxpêr o hkapĩrĩ nẽ ri pa hkêt nẽ. Na hte Tĩrtũm tãm kot kãm õ ho pa. Tã kãm mẽ pajapê htýx o kuwênhre jakrenh jakamã koja uràk nẽ mẽ pamã mẽ panhõ mex o pa rãhã nẽ.

25-26 Jakamã kwa kêr ka mẽ mẽmo arĩgro hã axàpkur xà hkryre pumu nê ate amnhĩ pê hkrêr par nê amã prãm o akaprĩ nê apa hkukamã tee ri ajamxpêr kêt nê. ãm Tĩrtũm kamnàr rom axàmnhĩx anhõ hkryreta ku nê akĩnh kãm tanhmã amnhĩ nhĩpêx to ho ri apa. Xà kot ka anhõ mry grire pumu nê akaprĩre nhũm ra tanhmã amã amnhĩ to rax to? Na htem ãm tee ri mẽmo hkukamã hamaxpêr o hkaprĩ nê pa kaprý. Jakamã kêr ka mẽ ã ri ajamxpêr anhỹr o akaprĩ nê apa hkêt nê.

27 —Mãn ka htem akunĩ kamã pixôràre pumu. Na hte tee ri tanhmã amnhĩ kute hkukamã hamaxpêr o hkaprĩ nê harir kêt tã muxre nê harir ka mẽ omu. Te ho amnepêm finat pahihiti Sarumãw xê mex pyrãk nom ãm mex o kot hakrenh.

28 —Pixôràreja arĩgro ja hã htĩr nê muxre nê harir tã koja mẽmo arĩgro hã grã pa nê hapêx. Kêp pixôrà pix nê hapêx tokyx anhỹr tã na hte Tĩrtũm ho mex nê nhũm mux nê harir. Nom mẽ pajaja na hte mẽ pahto mex o pixôràre ho mexja jakrenh. Jakamã kwa mẽmo kaxyw kot ka mẽ tee ri amnhĩ xê hkukamã ajamaxpêr o akaprĩ nê apa? Nà kot kaj mẽ anê nê amnhĩ kaxyw Tĩrtũm mã ajamaxpêr tĩx kêt nê.

29 —Kwa mẽ tee ri amnhĩ xàpkur xà hkukamã ajamaxpêr rãhã o ri akaprĩ nê apa hkêt nê. Nê mẽ tee ri amnhĩ kukamã tanhmã

ajamxpêr to ho ri akaprĩ nê apa hkêt nê.

30 Mẽ kot Tĩrtũm kôt amnhĩ xunhwýr kêt xwýnhjaja na htem ã ri hamaxpêr anhỹr o hkaprĩ nê pa. Tã kêr ka mẽ ho mẽ urãk kêt nê. Tĩrtũm kot mẽ panhõ mẽmoj kêt kôt mẽ pahpumunh mex kênã.

31 Jakamã kêr ka mẽ ãm hkôt ri amnhĩ nhĩpêx rãhã nê. Nê amã ja pix kukamã ajamxpêr o ri apa hprãm. Hãmri nhũm amnhĩ tã mẽ apumu hãmri nê apkati mẽ tãm mẽ amã mẽmoj nhõr o pa. Anê.

Kaxkwa kamã mẽ pakukrêx rax jarênh

Matêwre 6.19-21; mããnêñ Sikũn Ximotre 4.8; Eprêw 10.34; Wam Pêtre 1.4

32 Nhũm Jejus arĩ mẽ kãm kapêr nê mẽ kãm:

—E mẽ ate ixkôt amnhĩ xunhwýr xwýnhjaja. Ra Tĩrtũm kot mẽ ato hkra jakamã kwa mẽ axàmnhĩx hkamnàr rom ri tanhmã amnhĩ nhĩpêx to ho ri apa. Na hte mẽ apê hkra hã mẽ apumu nê hkĩnh nê. Koja nhỹrmã kaxkwa kamã õ krĩ hwýr mẽ ato api ka mẽ kamã wa ixkuri amex nê atĩr tũm nê apa ho apa. Ja na mex o kot jar pika ja kôt mẽ õ mẽmoj rũnh nê pa xwýnhnta jakrenh.

33 Jakamã kêr ka mẽ axàmnhĩx ri akukrêx kwý ho wênê nê hpãnhã kãxpore jamý nê mẽ kêp amrakati xwýnhjê mã ho apigrãnh o ri mẽ hkôt apa. Kot kaj mẽ ã amnhĩ nhĩpêx anê hãmri nê kaxkwa kamã akukrêx rax nê. Mo kaxkwa kamã mẽ

àhkĩnh xwỳnh koja mẽ apê ho ahkĩ? Nê kamã mo amnhôre kot mẽ apê homnu? Kaxkwa kamã ja amrakati kumrêx. Jakamã Tĩrtũm kot mẽ amã mẽ akukrêx nhôr mã xwỳnhhta koja aa apê omnuj nê hapêx kêt kumrêx.

³⁴ Kot kaj mẽ jar pika ja kamã akukrêx rax hãmri nê tanhmã apê omnu hto pix kukamã ajamxpêr rãhã ho ri apa. Nom kot kaj mẽ apê Tĩrtũm kra hã kot kaj mẽ jar akukrêx rax kêt tã kaxkwa kamã akukrêx pix kukamã ajamxpêr rãhã ho ra akĩnh nê ri apa. Anê.

Mẽ pahte Jejus kutêp tanhmã amnhĩ nhĩpêx to hã mẽ pamã karô

Matêwre 24.42-43; Makre 13.32-37; Rukre 21.34-36; mããnên Wam Tesarôn 5.4-8

³⁵ Nhũm pre Jejus arĩ mẽ ahkre nê mẽ kãm:

—E na pa pre ra mẽ apê ixkôt mẽ apa ho apa xwỳnhjê mã tanhmã amnhĩ kukamã amnhĩ jarênh to. Ixtyk nê akupỹm ixtĩr nê ma akupỹm ixãpir hãmri nê mẽmo arĩgro hã akupỹn mẽ awỳr ixwrỹkja na pa pre ra mẽ amã ja hã amnhĩ jarê. Tã kwa kêt ka mẽ ixwakre kamã ixte mẽ amã ã amnhĩ jarênh anhỹrja mã ajamaxpêr tỳx pê ixkôt amnhĩ nhĩpêx rãhã ho ri apa.

³⁶⁻³⁸ —Te mẽ õ patrãw mã mẽ àpênh mex xwỳnhjaja kot amnhĩ nhĩpêx pyrãk o amnhĩ nhĩpêx o ri apa. Koja mẽ õ patrãw ma mẽ kot axpên mã wa rer mã xwỳnh pumunh mã ma nhỹhỹm tẽ. Hãmri nhũm kãm mẽ àpênh

xwỳnhjaja arĩ kutêp òrkwỹ kamã hkrĩ. Axxãm hamak rom nê kutêp hkrĩ. Akupỹn htêm nhũm mẽ kot amnhĩ wỳr mar nê kãm kahê xà mẽnh tokyx anhỹr kaxyw arĩ kutêp òt kêt nê hkrĩ. Kôt ã kamãt nhũm akupỹn hpôx o htêm rỳ arĩgro hwỳr hpôx o htêm nhũm mẽ kot amnhĩ wỳr mar nê kãm kahê xà mẽnh tokyx anhỹr kaxyw kutêp òt kêt nê hkrĩ. Akupỹn hpôx ã omunh hãmri nê tokyx apkur kaxyw kãm õ nhĩpêx kaxyw. Kêr kê akupỹn pøj nê ã mẽ kot amnhĩ nhĩpêx anhỹr ã mẽ omu nê hkĩnh nê. Tã kêt ka mẽ àpênh xwỳnhhtajê pyrã nê ixwakre kamã inhmã ajamxpêr rãhã ho ri apa. Jao ixkamã ajamak o apa ho ixkôt amnhĩ nhĩpêx mex rãhã nê. No kot paj akupỹn mẽ awỳr wrỹ hãmri ka mẽ àpênh xwỳnhjê pyrã nê inhmã mẽmoj nhôr kêt nê. Kêt pa kot paj mẽ õ patrãwta kurom mẽ amã mẽmoj mex gõ.

³⁹ —Na htem mẽ kêt àhkĩnh pymaj amnhĩ nhòrkwỹ jamãr rãhã ho pa.

⁴⁰ Ja pyrã nê mẽ ate akupỹn ixwrỹk xà hã arĩgro pumunh kêt jakamã kêt ka mẽ òrkwỹ nhò dõnta pyrã nê ixkutêp axkãm ajamak rom rãhã nê ri apa. Jao tãm amnhĩ nhĩpêx rãhã nê. Anê.

Mẽ õ patrãw mã mẽ àpênh mex xwỳnhjê jarênh

Matêwre 24.45

⁴¹ Nhũm pre ã Jejus hkôt mẽ pa ho pa xwỳnhjê jahkre

anê. Hāmri nhũm Simāw Pêtre kuma nê kām:

—Kwa Pahihti. Xàn ka mẽ piitã mẽ kãm ã akapêr anê nà? Xà ãm mẽ papxipixjê mã? Anê.

⁴² Hāmri nhũm kãm:

—Nà ãm ixwakre kamã mẽ ate ixkôt tanhmã inhmã amnhĩ nhĩpêx to ho mẽ apa xwýnh piitã mẽ amã na pa ã ixkapêr anê. Koja mẽ àpênh xwýnhjê hõ õ patrãw mã àpênh mex o pa nhũm amnhĩ tã omu nê ma nhỹhỹm mõi kaxyw nê ìhkram mẽmoj piitã haxàr pa. Hāmri nê kãm: “E kër ka ixwakre kamã inhmã inhörkwỹ htãnopxa. Nê mẽ àpênh xwýnhjê mã õ mex kê mẽ apkur mex o pa.” Anê. Koja ã kãm mẽmoj tã karõ anê hāmri nê kato nê ma nhỹhỹm mõi.

⁴³ Hāmri nhũm kãm àpênh mex xwýnhnta wakre kamã kãm àpênh mex o pa. Jakamã nhũm õ patrãw akupýn hpõx o mõi nhũm amnhĩ wýr harênh ma nê hkĩnh nê. Nê mẽmoj tã amnhĩ tã kamã kahak kêt nê. Rý tee ri wakre kamã kãm àpênh punuj ã amnhĩ pumu nê tee amnhĩ kukamã hamaxpêr kêt nê. Kot wakre kamã kutêp àpênh mex jakamã akupýn hpõx ã harênh ma nê hkĩnh nê.

⁴⁴ —Jakamã nhũm õ patrãwja akupýn pøj nê kot kãm àpênh mex ã omu nê haxwýja hkĩnh nê. Hāmri nê kot kãm hamãr o pa kaxyw kãm mẽmoj piitã ìhkram haxàr pa.

⁴⁵ Nom koja kãm àpênh xwýnhnta axtem nê wakre kamã kãm àpênh mex kêt nê.

Nê tokyx akupýn mõi kêt ã hkamnhĩx nê wakre kamã kãm mẽ àpênh xwýnhjê htak nê pipãnh pix nê mẽ kãm gõ xành xwýnhjê kôt pix mã pa japêr.

⁴⁶ Hāmri nhũm õ patrãw haêr pê akupýn pøj nê tee ri ã amnhĩ nhĩpêx anhỹr ã omu. Hāmri nê gryk týt nê tanhmã homnuj to. Hāmri nê kãm mẽ àpênh punuj xwýnhjê mẽ mẽ ho pimràatã amnhĩ nê mẽ hanor pa. Tã kër ka mẽ ixwakre kamã ho mẽ uràk kêt nê. Mẽ kurom ixkapêr kôt tãm amnhĩ nhĩpêx mex rãhã ho ri apa.

⁴⁷⁻⁴⁸ —Nê koja mẽhõ kormã Tirtũm kapêr mar kêt nê htýt ri tanhmã amnhĩ tomnuj to ho pa. Hã koja Tirtũm ja hã omu nê nhỹrmã kot amnhĩ tomnuj o pata mýrapê tanhmã ho nhũm amnhĩ xà htýt kamã hamak tũm xà kamã pa. Nom akrãnhmã amnhĩ xà kamã hamak o pa. Aa kot Tirtũm kapêr mar kêt jakamã koja ãm akrãnhmã amnhĩ xà kamã hamak o pa. Nom koja mẽhõ kapêr mar mex tã ãm kuma nê hkôt amnhĩ nhĩpêx kêt nê. Nê xatã hirõp kuhê nê tanhmã amnhĩ tomnuj to. Hã koja Tirtũm tee ri ja hã omu nê nhỹrmã tanhmã homnuj týt to. Hāmri nhũm wamtajê pyrã nê amnhĩ xà htýt kamã hamak tũm xàta kamã pa ho pa nom mẽ kĩnhã amnhĩ xà htýt kamã hamak rãhã ho pa. Anê.

Jejus kot nhỹrmã mẽ kot amnhĩ tomnuj xà ho hapêx ã

harēnh

Matēwre 10.34-36

⁴⁹ Nhūm Jejus arī hkôt mē pa ho mē pa xwýnhjê jahkre nē mē kām:

—Nà ixte mē omnu xà pi-itā ho ijapêx par nē mē kot tanhmā amnhī tomnuj to pi-itā ho ijapêx par kaxyw na pa pre wrý. Tā ra ixte piitā ho ijapêx par o inhmōr ronhỹx ja inhmā mex kumrēx. Nom kormā.

⁵⁰ Kot paj amnhī xà htýx kām ijamak rax o mē kot amnhī tomnuj o ijapêx o hkrax. Hāmri nē nhỹrmā ho ijapêx pa. Na pa ra ixyk kaxyw ixte amnhī kà xà kamā ijamak kukamā ijamaxpēr o ra amnhī kamā ixkahak nē ri ixpa. Tā kot paj ja ho ijapêx pa nē ixkīnh týx kumrēx. Anē.

Mē kot Jejus ā axpēn kutā amnhī xunhwýr ā mē harēnh

Matēwre 10.21, 10.34-35

⁵¹ Nhūm Jejus arī mē ahkre nē mē kām:

—Nē ra mē awýr ixwrýk tā koja mē piitā ixkukwak ri hamakêtkati nē àmnhīx ri pa hkêt nē. Kormā. Koja mē akwýjaja ixkapēr ma nē mē apyrà nē amnhī kaxyw ixkôt hamaxpēr. No nhūm mē akwýjaja mē akīnhā kuma nē ām kuma. Hāmri nē ixtā tanhmā mē anhīpêx to ka mē ixpyrà nē amnhī xà htýx kamā ajamak o ri apa.

⁵² —Nē koja tanhmān ixkre pyxi kamā mēmojaja ohtōn pa. Nhūm war axkrutre nē ixkôt amnhī xunhwý nhūm mē axkrunēpxi nē ixkwým

ri amnhī nhīpêx nē ixkutā amnhī xunhwý.

⁵³ Nhūm mē hipêêxà hkra my mē wa ixtā axpēn kutā amnhī xunhwý. Nhūm mē katorxà hkra ni mē wa ixtā axpēn kutā amnhī xunhwý. Nhūm mē wýj umregêx mē wa haxwýja ixtā axpēn kutā amnhī xunhwý. Koja mē ā ixtā axpēn nhīpêx anhýr o pa. Anē.

Mē pahte amnhī tomnuj kaga nē Tirtūm kôt amnhī nhīpêx ā mē pamā karō

Matēwre 5.25-26, 16.2-4

⁵⁴ Nhūm Jejus hpānhā mē kot hkôt amnhī xunhwýr kêt xwýnhjê mā kapēr nē mē kām:

—Kwa mē inhma mē ate ixkôt amnhī xunhwýr kêt xwýnhjaja. Na htem kaxkwa kamā na htyk rax pumu nē na wrýk mā hamaxpēr kurê kumrēx. Hāmri nhūm na wrý.

⁵⁵ Nē amgrà pē kôk krihkritja nhūm htem kuma nē arīgro htýx mā hamaxpēr kurê kumrēx. Hāmri nhūm arīgro htýx nē.

⁵⁶⁻⁵⁷ ā na ka htem aprī hā mēmoj pumunh kôt mēmoj kukamā ajamaxpēr mex o ri apa anē. Nom nhūm Tirtūmja mē ate tanhmā amnhī tomnuj to mýrapê tanhmā mē ato kaxyw nhūm mē ate ja hā amnhī pumunh tā tokyx amnhī tomnuj kaga hkêt nē.

⁵⁸⁻⁵⁹ —Na htem tanhmā axpēn tomnuj to. Hāmri nhūm kot tanhmā war axpēn to xwýnhta pahi hwýr htēm nē kām tanhmā kot ho xwýnhta jarēnh kaxyw. Hāmri nhūm

kamã gryk xwÿnhhta kot pahi mã harênh kaxyw ã harênh ma nê hãmri tokyx hwÿr tẽ nê wa tãm akupÿm axpên xãm. Na htem ã amnhĩ nhĩpêx anê. Pahi kot ja mar nê tanhmã mẽ ho pymaj na htem ã amnhĩ nhĩpêx anê nê tokyx akupÿm tãm axpên xunhwÿ. No koja mẽ ã amnhĩ nhĩpêx anhÿr kêt nê nhũm pahija mẽ harênh ma hãmri nê tanhmã kot hõ ho xwÿnhhta pynê nê haxà nhũm tee kãm kator prãm o hkrĩ kaprÿ. Hãmri nê tanhmã amnhĩ to nê amnhĩ pãnhã kãm amnhĩ rer pa nhũm pahitija kormã mẽ kãm anê nhũm mẽ kãm ure nhũm kato. Ja pyrà nê kêr ka mẽ Tĩrtũm tanhmã kot mẽ anhĩpêx to pymaj tokyx mẽ ate amnhĩ tomnuj kaga nê hkõt amnhĩ nhĩpêx rãhã ho ri apa. Anê.

13

¹ Tã nhũm axtem mẽ hkwÿjaja Jejus wÿr mra nê kãm:

—Pa? Kwa xàn ka ra Garirej nhõ xwÿnh kwÿjê jarênh ma nà? Na xep prem Jerujarê hwÿr mra nê ham mẽ kot Tĩrtũm mã amnhĩ jarênh xà hã ixkre kamã kãm amnhĩ jarênh kaxyw kormã kãm mry hpar o kuhê nhũm xep pahitija Piratja mẽ harênh ma nê mẽ hã amÿnê nhũm mẽ ma mẽ hwÿr mra nê mẽ himex pa. Kwa mãn mẽ kot amnhĩ tomnuj tÿx o mẽ pajakrenh ã na prem mẽ himex nà? Anê.

²⁻³ Hãmri nhũm mẽ kãm:

—Nà mẽ kot amnhĩ tomnuj tÿx mÿrapê mẽ kot mẽ himex

kêt. Mẽ apiitã mẽ ate amnhĩ tomnuj o axpên pyræk kênã. Tã kot ka mẽ amnhĩ tomnuj kaga nê Tĩrtũm kõt amnhĩ xunhwÿr kêt hã kot ka mẽ nhÿrmã ty hãmri nê õ krĩ hwÿr axapir kêt nê.

⁴ No Jerujarê kamã ixkre prækja mẽ kot kãm “Siroe” anhÿr xwÿnhhta mẽ ho 18 nê mẽ hipy htem nê mẽ himex par xwÿnhjaja. Xà mẽ kot amnhĩ tomnuj tÿx mÿrapê na prem ty? Xà mẽ kot amnhĩ tomnuj tÿx o Jerujarê kamã arĩ mẽ htĩr xwÿnhjê jakrenh?

⁵ Nà kot anhÿr kêt. Mẽ apiitã mẽ ate amnhĩ tomnuj o axpên pyræk. Jakamã kot kaj mẽ ã amnhĩ nhĩpêx anhÿr kaga nê Tĩrtũm kõt amnhĩ nhĩpêx kêt nê hãmri nê mẽ uræk nê nhÿrmã ty hãmri nê Tĩrtũm nhõ krĩ hwÿr axapir kêt nê. Jakamã kwa mẽ ixkapêr ma nê kãm ajamaxpêr tÿx rãhã ho ri apa. Anê.

Tĩrtũm kot mẽ pakamã gryk tokyx anhÿr kêt ã harênh

Rõmãn 2.4; Sikũn Pêtre 3.8-9

⁶ Tã nhũm Jejus kê axte tanhmã mẽ ahkre hto. Nê Tĩrtũm kot tanhmã mẽ panhĩpêx to hã kuxi nê mẽ kãm awjarê nê mẽ kãm:

—Koja hpur nhõ dõn mẽmo pàr kre nhũm ra hprêk mex nê õ mã tãm nê. Tã aa õ hkêt ã ra hã amgrã axkrunêpxi.

⁷ Hãmri nhũm kot hkre xwÿnhja tee ri omu nê kãm àpênh xwÿnh wÿr tẽ nê kãm: “E kwa ma tẽ nê mẽmo pàr mũj krãhta nê amê. Mexiti hã. Ra õ hkêt ã amgrã axkrunêpxi

kênã. Koja pēr aa ô hkêt nê. Mo kaxyw kot kêt ô hkêt tâ ô mex xwÿnh kaêx ã mẽ kêp àmnàr o kuhê? E hwÿr tẽ nê krãhta nê amê.” Anê.

⁸⁻⁹ Hãmri nhũm tee ri kot kãm hã karõja ma nê kãm: “Kwa nà kormã. Pa kop ixàmnhĩx pàr krax ã mẽmo japòk kwÿ kapĩ nê kop hamã mãn. Kê axte hã amgrà pyxi nê hapêx nê ô hkêt pa kormã krãhta nê kumê. Koja amgrà ja kamã amã ô japêr ka omu nê akĩnh nê.” Anê. ã mẽ ujarênh kot anhÿr. Anê.

Nhũm Jejus ã mẽ kãm ujarênh anê. Mẽ kot amnhĩ tomnuj tÿx o pa htã nhũm Tĩrtũm kot pur nhõ dõn mã àpênh xwÿnhhta pyrã nê mẽ kamã gryk tokyx anhÿr kêt ã nhũm ã hã kuxi nê mẽ kãm ujarênh anê.

Jejus kot arĩgromnu hã mẽhõ ho mex ã harênh

Rukre 14.1-6; Juãw 5.16-17

¹⁰ Tã nhũm mẽ õ arĩgromnu pẽ sap kato nhũm Jejus Ijaew pikuprõnh xà hã ixkre hwÿr axà nê kamã Tĩrtũm kapêr o mẽ ahkre ho nhÿ.

¹¹ Nhũm kamã mẽhõ ni hikõt rãhã nê pa xwÿnhja nhÿ. Na pre ra amnepêm mẽkarõmnuti tanhmã ho nhũm katàt nê ri mrrar kêt kumrêx. ãm hikõt rãhã nê ri pa hã ra hã amgrà pẽ 18.

¹²⁻¹³ Hãmri nhũm Jejus omu nê amnhĩ wÿr kãm hpa ho apê nhũm hwÿr tẽ nhũm hã ìhkra xi nê kãm:

—E na ka ra akupÿm amex.

Anê nhũm akupÿm katàt nê mex kurê kumrêx. Hãmri nê amnhĩ pumu nê hkĩnh tÿx

nê Tĩrtũm mã mex o mex ã harênh o xa.

¹⁴ Nom nhũm mẽ pikuprõnh xà hã ixkre jamãr xwÿnh maatija tee ri ja hã omu hãmri nê Jejus kamã gryk tÿx nê. Mẽ õ arĩgromnu hã akupÿm kot ho mex jakamã nhũm kamã gryk tÿx nê. Hãmri nê mẽ pikuprõnh xwÿnhjẽ mã kãm:

—Tk. Kwa semãn ã mẽ àpênh xà hã arĩgro xohtõ. Kêp 6. Kot kaj mẽ mãmrĩ tòmĩk nê sikũn nê tês nê kwata nê kĩa nê sêsta ja ã ka mẽ apê rÿ mãmrĩ Jejus wÿr amnhĩ to mra kê akupÿm tanhmã mẽ ato mex to. No sap ã kwarĩ. Sap kêp mẽ pahpê Ijaew nhõ arĩgromnu kênã. Na pu htem hã paxàpênh kêt nê. Jakamã arĩgro ja hã kot akupÿm mẽ ato mexja mex kêt. Anê.

¹⁵ Hãmri nhũm Jejus kuma nê kãm:

—Kwa xà mẽ kajaja na ka htem sap ã axàpênh kêt nê apa? Nà mẽ ate hã axàpênh kênã. Xàn ka htem sap ã akrit kawar nê akrit môx ma mẽ ho apa nê mẽ hkõm kêt nê? Nà na ka htem ma mẽ ho apa nhũm htem ixkõ. Mot ka kêt mẽ ri axtem nê mẽ kot sap ã tanhmã amnhĩ toja nê mẽ kãm akapêr?

¹⁶ Ixte ni ho mex xwÿnhhta mẽ pahpyrà nê kêp finat Apraãw kagrõt nyw õ na. Nhũm pre Satanasti te kot kãm ê nê ri o pa pyrãk o hipêx jakamã nhũm ÿ hã hikõt nê ri paja ã ra hã amgrà kêp 18. Tã pa nê te ixte Satanasti ho ixkrihkrit nê ixte kêp utàr pyrãk o hipêx nê akupÿm ho

mex. Mo kot pa kêt ri omu nê ãm omu nê arĩgromnu hã ho mex kêt nê? Nà ixte arĩgro piitã hã akupÿm mẽ ho mex o ixpa xwÿnh kênã. Anê.

17 Hãmri nhũm mẽ kot kãm kapêr mar prãm kêt xwÿnhjaja kuma nê kamã gryk nê. Te ho mēhprĩjê mã mẽ hamaxpêr nhôr pyrãk o mẽ hipêx pyrãk jakamã nhũm mẽ amnhĩ tã kuma nê kamã gryk nê. No nhũm mẽ kot ra ã amnhĩ nhĩpêx anhÿr o pa hã omunh xwÿnhjaja ja hã omu nê kãm hkĩnh nê.

Jejus te kot mẽmo hy pyrãk ã harênh

Matêwre 13.31-33; Makre 4.30-32

18-19 Nhũm Jejus arĩ mẽ ahkre nê tanhmã mẽ kãm amnhĩ tã ujarênh to nê mẽ kãm:

—Nê Tĩrtũm kot mẽ awÿr ixte mẽ ato amnhĩptar kaxyw inhmênh ã ijarênhja. Te ixte mẽmo hy pixire pyrãk. Na htem hkre nhũm higrôt. Nê gaa nê rĩ hprêk. Hãmri nê pa angrã nhũm kuwênhre hwÿr mra nê hô pytĩ kamã amnhĩm haê nhĩpêx. Tã kot paj nhÿrmã mẽmo hy jarênhhta pyrã nê ixpaxi htã kot paj pika piitã hkôt mẽ ho amnhĩptã nê mẽ omunh mex rãhã ho ri ixpa. Anê.

Jejus te kot pãwti kaxkrit xà pyrãk ã harênh

Matêwre 13.33-35

20-21 Nhũm Jejus arĩ mẽ ahkre ho xa. Nom hprĩ hã amnhĩ jarênh kêt nê. ãm amnhĩ tã kuxi nê mẽ kãm awjarê nê mẽ kãm:

—E kot pa hpãnhã tanhmã mẽ amã pãwti kaxkrit xà jarênh to. Koja mēniê hõ ãm hkwy ho grire nê kupy nê kaxyw mẽmo xôm kãm kumẽ nê ho pihkàr pa nê ho pãwti nhĩpêx. Nhũm kaxkrit xàja grire htã pãwti piitã ho kaxkrit mex nê. Ja pyrã nê kot paj ixpyxi htã koja mẽ nhÿrmã pika piitã hkôt ixkôt amnhĩ nhĩpêx mex o pa. Anê.

Nhũm pre ã Jejus mẽ kãm amnhĩ tã pãw kaxkrit xàja xi nê harênh anê.

Kaxkwa hwÿr hakwa kre kahê xà jarênh

Matêwre 7.13-14, 7.21-23; Juãw 10.7-10

22 Tã nhũm Jejus arĩ krĩ pẽ Jerujarê hwÿr krĩ hkôt ri mẽ ahkre ho mẽ hkôt ri pa.

23 Hãmri nhũm mēhõ myja hwÿr tẽ nê mẽmoj tã hkukja nê kãm:

—Pa. Kwa inhmã mẽmoj jarê. Xà koja mẽ ohtô nê nhÿrmã Tĩrtũm ri htĩr tũm nê papa ho nà koja mẽ grêre? Anê.

24 Hãmri nhũm kuma nê mẽ kot mar o kuhê xwÿnh piitã kãm:

—Nà mẽ kot Tĩrtũm kôt amnhĩ xunhwÿr xwÿnhjê pix koja mẽ õ krĩ hwÿr agjê. Wÿr mẽ gjêx xàja ãm pixii nom koja mẽ ohtô nê kãm hkôt wÿr gjêx prãm kêt nê. Na htem te hwÿr mẽ gjêx xà hõ japêr o pa pyrãk. Nom pa na te ixpê hwÿr mẽ gjêx xà pixita pyrãk. Jakamã kwa kêr ka mẽ tokyx ixkôt amnhĩ xunhwÿr tÿx nê ixkôt ri amnhĩ nhĩpêx o ri apa. Na htem ohtô nê kãm

ixkôt amnhĩ xunhwÿr prãm kêt nê. Ixte amnhĩ nhĩpêxa mẽ kêp hihtÿx jakamã nhũm htem ixkaga.

25 –Tã koja mẽ nhÿrmã ty nê tee ri kãm Tĩrtũm wÿr gjêx prãm kaprÿ. Kot paj te mẽ kêp kahê pyræk o mẽ hipêx nhũm mẽ kapôt ã kuhê nê tee ri amnhĩ tã ixpumu nê inhmã: “Kwa mẽ inhmã kahê xà mẽ pa mẽ awÿr agjê Pahihti.” Anê. Hãmri pa mẽ kãm: “Nà ixte mẽ apumunhre hã kot pa kêt ri mẽ amã kurê.” Anê.

26 –Hãmri nhũm mẽ tee ri inhma nê inhmã: “Kwa nà ra ate mẽ ixpumunh mex kênã. Na ka pre mẽ inhõ krĩ kamã mẽ ijahkre ho ri apa nê mẽ ixkutã axàpkur o ri apa.” Anê.

27 Hãmri pa mẽ kãm: “Tk. Ixte mẽ akutã ixàpkur tã mẽ ate ixkôt amnhĩ xunhwÿre hã. Jakamã e mẽ ma mra. Mẽ ate amnhĩ tomnuj pix o mẽ apa xwÿnh jakamã kot kaj mẽ ixwÿr agjêx kêt nê.” Anê. Kot paj ã mẽ kãm ixkapêr anê.

28 –Hãmri nhũm mẽ amÿm ri mẽ inhmex ã mẽ ixpumunh o kuhê. Kaxkwa kamã mẽ ixkĩnh nê ri mẽ inhmex nê ixpa hã amÿm mẽ ixpumunh o kuhê. Apraãw nê Ijak nê Jako nê Tĩrtũm kapêr jarênh o mẽ pa xwÿnh piitã nhũm mẽ amÿm mẽ ixkĩnh nê mẽ ixàpkur mex ã mẽ ixpumunh o kuhê. Hãmri nê tee ri mẽ ixwÿr kãm gjêx prãm kaprÿ nê hkaprĩ nê mur nê amnhĩ krã hkĩ jarê nê amnhĩ kà nhê nê amnhĩ kamã gryk tÿx nê. No ãm tee

ri amnhĩ kamã gryk kaprÿ. Æ koja mẽ amnhĩ nhĩpêx anê.

29 Nom Tĩrtũm kôt mẽ kot amnhĩ xunhwÿr xwÿnhjaja koja mẽ kurom pika piitã kurũm axpên wÿr akuprõ nê Tĩrtũm wÿr agjê nê kuri hkĩnh nê apkur mex o hkrĩ. Mẽ akwÿjjaja nê pika piitã kurũm hohtô rax nê axpên wÿr akuprõ nê hwÿr agjê nê kuri apkur mex nê hkĩnh nê pa ho pa.

30 –Mẽ apê Ijaewjaja mẽ amã Ijaew kêt xwÿnhjê hprãm nõkati htã koja mẽ hkwÿjjaja mẽ akwÿjê rom Tĩrtũm ri axpên wÿr akuprõ nê hkĩnh nê axpên kutã apkur mex o hkrĩ. Jakamã kwa kot kaj mẽ uræk nê amã Tĩrtũm mẽ wa ixwÿr agjêx prãm hã kot kaj mẽ ixkôt amnhĩ xunhwÿ nê ixkapêr kôt amnhĩ nhĩpêx mex o ri apa. Anê.

Jejus kãm Jerujarê nhõ xwÿnhjê japê hã harênh

Matêwre 23.37-39

31 Hãmri nhũm Parijew nhõ xwÿnh kwÿjjaja Jejus wÿr mra nê kãm:

–Pa. E ot pa mẽ awÿr mra. Kwa kêr ka ma Jerujarê hwÿr amõr kêt nê. Na ra mẽ hkĩnh wÿr pahi Eroxa pøj nê kot tanhmã ato kaxyw atã amnhĩ jarê pa mẽ kuma. Jakamã kwa mẽ hwÿr amõr kêt nê. Nhãm krĩ hõ hwÿr mãn mõ. Anê.

32 Hãmri nhũm mẽ kuma nê mẽ kãm:

–Tk. Nà kot pa umaj nhãm krĩ hõ hwÿr inhmõr kêt nê. Kot paj ma mẽ hkwÿjê nê

mëkarõmnuti japõx pë më hwýjê ho mex o ma hwýr mõ. Pahi Erox kãm më hpar pix prãm. E më mãmrĩ ma akupým hwýr mra nê ã kãm ixkapër jarënh anê. No kot paj umaj nhýhým ixprõt nê ixtëm nê kêp ixpimxur kêt nê. Ra ixte õ krĩ hwýr inhnojarêt kênã. Anê.

³³ Hãmri nê më kot mar xwýnhjê mã amnhĩ jarë nê më kãm:

–Kot paj tanhmã amnhĩ nhĩpêx to ho ri ixpa rãhã Jeru-jarë hwýr mõn pøj nê kamã ty. Kamã na htem më kot Tirtüm nhý hã kapër jarënh xwýnhjê nhĩmex. Tã hwýr kot paj mõ. Anê.

Nhũm pre ã Jejus më kãm amnhĩ jarënh anê.

³⁴ Hãmri nê te ra kot Jeru-jarë nhõ xwýnhjê pumunh o ãm nê më kãm kapër pyrãk o kapër nê më kãm:

–Hêxta waa nê më apê Jerujarë nhõ xwýnhjaja. Tirtümja xatã më awýr ý hã kapër jarënh o mẽ pa xwýnhjê rënh tã ka mẽ kapër mar kêt nê. Nê axtem nê kên o mẽ htak o mẽ himex o apa. Na ka htem ã amnhĩ tomnuj o apa anê. Tã arĩ inhmã mẽ ajamãr o ri ixpa hprãm. Te ho krãhyre kot nore hpro nê ho hikwý pyrãk o na pa inhmã mẽ anhĩpêx prãm tã ka mẽ apê ixprãm nõkati nê ixkaga.

³⁵ Mýrapê koja Tirtüm mẽ anhõ krĩ jamãr kêt nê. Kot paj tokyx ty nê mẽ apiitã mẽ are nê ma akupým api ka mẽ axte ixpumunh kêt nê. ãm akupým ixwrýk xã hã arĩgrotã

pix ã koja mẽ akwýjaja mẽ amýr pë krĩ ja hwýr ixwrýk kãm ixpumu. Hãmri nê mẽ akurom ixpumu nê hkĩnh týx nê. Nê tã ixkõt amnhĩ xun-hwý nê axpên mã ijarënh o:

E ota Tirtüm kot mẽ pahwýr mẽnh xwýnhnta pøj. Nã ãm hãmri na mẽ pahwýr wrý. Na mex kumrêx. Anê.

14

Jejus kot axte arĩgromnu hã mēhõ ho mex ã harēnh

Rukre 13.10-17

¹ Tã nhũm sap nhũm Jejus ma Parijew nhõ xwýnhjê krãhtüm kutã apkur kaxyw õrkwý hwýr tē. Hãmri nhũm mẽ wa hã htu rax nê Jejus apkur ã tãnopxar o kuhê. Mẽ kot amnhĩ nhĩpêx kwým ri tanhmã amnhĩ nhĩpêx to nhũm mẽ kot hã omunh nê ra hã ãmnênh kaxyw nhũm mẽ kuri htãnopxar o kuhê.

² Nhũm ixkreja kamã mēhõ my hte hikot xwýnh mẽ kuri xa.

³ Hãmri nhũm Jejus omu nê hã Parijew nhõ xwýnhjê mẽ Tirtüm kapër tùm o mẽ ahkre xwýnhjê kukja nê mẽ kãm:

–Kwa mẽ inhmã mẽmoj jarë. Jarãhã na mẽ panhõ arĩgromnu pë sap. Tanhmã na pre finat Mojesja Tirtüm nhý hã mẽ pahte sap ã tanhmã amnhĩ nhĩpêx to hã mẽ pamã karõ hto? Xã kot puj mẽ akupým mẽ ho mex nã? Kot puj mẽ ãm mẽ omu nê akupým mẽ ho mex kêt nê? E mẽ atõ inhmã ja jarë. Anê.

⁴ Hãmri nhũm mẽ kuma nê tanhmã kutã kãm nê hkêt nê.

Ăm akryk mar o kuhê. Mě kot tanhmã kãm nẽ nhũm kot ta pãnhã mẽ kãm tanhmã nẽ pymaj nhũm mẽ akryk mar o kuhê nẽ tanhmã kutã kãm nẽ hkêt nẽ. Hãmri nhũm tee ri mẽ omu hãmri nẽ myja ã ihkra xi nẽ akupỹm ho mex. Hãmri nẽ hano nhũm ma akupỹm mex nẽ hkĩnh nẽ ma tẽ.

⁵ Hãmri nhũm Jejus mẽ kãm:

—E mẽ inhma. Xà koja mẽ akra sap ã mẽ apê ahkrehti xupỹm kãm tẽm ka mẽ ãm omu nẽ arĩgro mex jamãr pẽ tokyx ho axàpir kêt nẽ? Nà kot kaj mẽ ho axàpir kurê kumrẽx. Rỳ koja akrit môx gyw mã axà xat ka mẽ omu nẽ ãm omu nẽ arĩgro mex jamãr pẽ tokyx hkaxàr kêt nẽ? Nà kot kaj mẽ hkaxàr kurê kumrẽx. Na htem sap ã tanhmã mẽ ho mex to ho pa. Mẽ panhõ arĩgromnu htã pu htem hã tanhmã mẽ ho mex to. Jakamã na pa ã hã myta ho mex kurê kumrẽx anẽ nẽ ri arĩgro mex jamãr kêt nẽ. Anẽ.

⁶ Nhũm pre ã Jejus mẽ kãm amnhĩ jarẽnh anẽ nhũm mẽ kuma nom kutã kãm mẽmoj jarẽnh kêt nẽ. Ra kot akupỹm ho mex jakamã nhũm mẽ tanhmã hã kãm nẽ hkêt nẽ kuhê.

Mě pahte amnhĩ to hkryre hã mẽ pajarẽnh

Matêwre 23.6-14; Rukre 6.32-36; mããnẽn Xiakre 4.10; Wam Pêtre 5.5-6

⁷ Hãmri nhũm mẽ apkur kaxyw mẽ hkrĩ xà hã hkrĩ hpa. Nhũm mẽ hkwỳjaja hkwỳjê pẽ amnhĩ to wa nẽ mẽ hkrĩ xà mex kãm hkrĩ hpa. Hãmri nhũm Jejus ja hã mẽ

omunh o xa nẽ axte mẽ kãm mẽmoj jarẽ. No ãm mẽmoj tã kuxi nẽ mẽ kãm awjarẽ nẽ mẽ kãm:

⁸ —Nà koja mẽ axpẽn mã mẽhõ rer kaxyw nẽ amnhĩ wỳr mẽ atã karõ. Mẽ ate kutã axàpkur kaxyw. Hãmri kër ka mẽ hwỳr mra nẽ axàpkur kaxyw nẽ kupĩp kãm akrĩ kurê kumrẽx. No kot kaj mẽ kęp amnhĩ to wa nẽ mẽ hkrĩ xà mex pytã nẽ hã akrĩ nhũm ra kot amnhĩ to rax xwỳnhjê hõja hapu hã mẽ akõt tẽn axà.

⁹ Hãmri nhũm ixkre nhõ dõn kot amnhĩ wỳr mẽ awỳr xwỳnhnta mẽ hkrĩ xà mexta ã mẽ awỳ nẽ mẽ amã: “Kwa mẽ atõ kànhmã xa nẽ kãm mẽ hkrĩ xà kaprã.” Anẽ. Hãmri ka nhãm xa nẽ kãm anhỹr xata gõ. Hãmri nẽ apijaàm kãm hpãnhã kupĩp kãm nhỹ.

¹⁰ Ja pymaj kër ka mẽ kupĩp kãm akrĩ kurê kumrẽx. Kẽ ixkre nhõ dõnja tee ri ja hã mẽ apumu nẽ mẽ amã: “Tk. Kwa ixkrãmnhwỳjaja. Mẽ kupĩp kãm akrĩ hkêt nẽ. Kwa mẽ mra nẽ jar mẽ hkrĩ xà mex ã mãn akrĩ.” Anẽ hãmri nhũm ja mẽ amã mex nẽ. Nhũm mẽ piitã kot mẽ ato mex ã mẽ atã omu ka mẽ ajaxwỳja amnhĩ tã omu nẽ akĩnh nẽ ajamakêtkati nẽ akrĩ.

¹¹ —Nẽ koja mẽhõ te amnhĩ to rax o hkwỳjê jakrenh pyrãk o amnhĩ nhĩpêx o ri pa hãmri nhũm Tĩrtũm ja hã omu nẽ tanhmã hã ho. Hãmri nhũm ra amnhĩ to grire hã amnhĩ pumunh o ri pa nẽ rĩ amnhĩ pumu. Nom koja mẽhõ amnhĩ to rax o hkwỳjê jakrenh pyrãk

o amnhĩ nhĩpêx o ri pa hkêt nhũm Tĩrtũm ja hã omu hãmri nẽ tãm amnhĩm kot amnhĩ to rax xwỳnh ã harê. Anẽ.

Mẽ pahte mẽ kêp amrakati xwỳnhjê ho mex ã mẽ pamã karõ

¹² Nhũm pre ã Jejus mẽ ahkre anẽ hãmri nẽ hpãnhã mẽ apkur xà hã ixkre nhõ dõnja mã kapêr nẽ kãm:

—Nà na ka hte amnhĩ wỳr akwỳjê pix wỳ. Atõjê hwỳ nẽ akràmnhwỳjê hwỳ. Nẽ mẽ hikàxpore rũnh xwỳnhjê hwỳ. Nom nhỹrmã mẽ kot amnhĩ xwar amnhĩ nhõrkwỹ hwỳr awỳr pix kaxyw na ka hte ã amnhĩ wỳr mẽ hwỳr anẽ.

¹³ No kêt amnhĩ wỳr mẽ no kre xwỳnhjê mãn wỳ. Nẽ mẽ hyk o mẽ pa xwỳnhjê mãn wỳ. Nẽ mẽ hkrã pipãnh puro xwỳnhjê mãn wỳ. Nẽ mẽ hpigêx tỳx xwỳnhjê mãn wỳ. Nẽ mẽ hiroto nẽ àpênh kêt xwỳnhjê mãn wỳ. Kêr ka amnhĩ wỳr jajê mãn wỳ kê mẽ awỳr mra nẽ akutã apku.

¹⁴ Mo mẽ kot amnhĩ xwar awỳr kaxyw mẽ õ mẽmoj? Mẽ kêp amrakati. Tã kot kaj mãmri amnhĩ wỳr mẽ awỳ nhũm Tĩrtũm mẽ hã apumu hãmri nẽ nhỹrmã kot akupỹm mẽ ho htĩr xà hã arĩgrota ã mẽ hã amã mẽmoj mex gõ nẽ ato mex nẽ. Hãmri ka akĩnh nẽ. Anẽ.

Tĩrtũm kutã mẽ paxàpkur xà maati jarênh

Matêwre 8.11, 25.1-10, 26.29; mããnênh Apokarip 19.9

¹⁵ Hãmri nhũm mẽ apkur kaxyw hkrĩ pa nhũm Jejus

nhĩhkô hã mẽ apkur o mẽ krĩ xwỳnhjê hõja tanhmã Jejus mã kapêr to nẽ kãm:

—Hêxta waa nẽ. Kot puj mẽ nhỹrmã Tĩrtũm nhõ krĩ hwỳr api nẽ kutã paxàpkur o pahkrĩ nẽ pahkĩnh tỳx kumrêx. Anẽ.

¹⁶ Hãmri nhũm kuma nẽ kê axte mẽ ahkre. Mẽ kot Tĩrtũm kutã apkur kaxyw kot amnhĩ wỳr mẽ hwỳrta ã nhũm mẽ ahkre. No ãm hã kuxi nẽ tanhmã mẽ kãm ujarênh to nẽ mẽ kãm:

—Koja mẽhõ amnhĩ wỳr mẽ ho ohtõ nẽ mẽ kot kutã mẽ apkur mex kaxyw mẽ kuwỳ.

¹⁷ Hãmri nẽ mẽ hwỳr kãm àpênh xwỳnh mẽ nẽ kãm: “E ma tẽ nẽ mẽ kãm awjarê kê mẽ tokyx mra pa mẽ apku.” Anẽ.

¹⁸ Hãmri nhũm kuma nẽ ma mẽ hwỳr mẽ kãm ujarênh o tẽ. Hãmri nẽ wamta mã anẽ nhũm kuma hãmri nẽ hitõt nẽ kãm: “Nà kot paj hwỳr ixtêm kêt nẽ. Na pa ham amnhĩm pika hkwy japrõ. Jakamã kot paj ma hwỳr tẽ nẽ ixprĩ hã omu mãn. Kwa kêr ka kãm ijarê kê ixte tanhmã hã nẽ xà hkõt ã ixte amnhĩ nhĩpêx anhỹrja mã hamaxpêr kêt nẽ.” Anẽ.

¹⁹ —Hãmri nhũm kuma nẽ hpãnhã nhãm ja wỳr tẽ nẽ kãm awjarê nhũm kuma nẽ haxwỳja hitõt nẽ kãm: “Nà kot paj hwỳr ixtêm kêt nẽ. Na pa ham amnhĩm moux o 10 nẽ haprõ. Jakamã kot paj ma hwỳr tẽ nẽ ixprĩ hã ri omu mãn. Kwa kêr ka kãm ijarê kê tee ri tanhmã hamaxpêr to hkêt nẽ. Ixte tanhmã hã nẽ xà hkõt ã ixte amnhĩ nhĩpêx anhỹr kêt.” Anẽ.

²⁰ —Hāmri nhūm kuma nē hpānhā ma ihōta wūr tē nē kām awjarē nhūm kuma nē haxwýja hitōt nē kām: “Nà kot pa hwūr ixtēm kêt nē. Na pa kormā ham ixprō. Kormā ixprō nyw nē inhmā rer prām kêt jakamā kot paj ma hwūr ixtēm kêt nē.” Anē.

²¹ —Hāmri nhūm kām àpēnh xwýnhhta tee ri mē kuma nē awjanā nē ma akupým tē. Kot ma mē hwūr mēnh xwýnhhta wūr ma akupým tē nē kām mē harē. Hāmri nhūm tee ri mē harēnh ma nē mē kamā gryk nē. Hāmri nē hpānhā mē kēp amrakati xwýnhjē hwūr kām àpēnh xwýnhhta mē. Mē hkrā pipānh puro xwýnhjē hwūr kumē. Nē mē hpigēx tỳx xwýnhjē hwūr kumē. Nē mē hirot nē àpēnh hkêt xwýnhjē hwūr kumē nhūm ma mē kām ujarēnh o tē. Hāmri nē amnhī kôt mē kuwý nhūm mē kuma nē wantajē rom hkôt mra kurē kumrēx. Hāmri nē agjē nē apkur kaxyw mē hkrī xà kamā hkrī hpa.

²² Hāmri nhūm kām àpēnh xwýnhja ō patrāw wūr tē nē kām mē harē nē kām: “E ate mē hā karō xàta kôt na mē ra hkrī hpa htā arī mē hkrī xà hkwȳ hkapyr̄.” Anē.

²³ —Hāmri nhūm kuma nē kām: “Hēxta waa nē. Kêt àm mē hkrī xàta hipu mex ronhýx pa omu nē ixkīnh nē. No àm kormā piitā hipu hkêt. Kwa ma krī pu hā ri mē hapēr o mra. Nē nhýri mē hkwȳjē pumu nē mē haprō nē man amnhī kôt mē o mra kē mē hkrīxà ho hipu hpa.

²⁴ No kêt wam ixte amnhī

wūr mē hwūr xwýnhhta. Mē hitōt xwýnhjaja kot paj axte amnhī wūr mē hwūr kêt nē.” Anē. Ā mē ujarēnh kot anhūr. Na hte ā Tirtūm amnhī wūr mē piitā mē hwūr anē. Anē.

Mē pamā Jejus kīnh tỳx ā mē pamā karō

Matêwre 10.37-38; Makre 8.34; Rukre 9.23-25; Juāw 12.26

²⁵ Tā nhūm Jejus mē ōrkwý rūm kato nē kormā Jerujarē hwūr mō nhūm mē hohtō rax nē hkôt mō. Hāmri nhūm Jejus xa nē mē ho hakēx nē mē omu nē mē kām:

²⁶ —E kot ka mē atō amā ixkôt amnhī xām prām nē ā amnhī nhīpēx anē. Nē amā atō nē atōx nē anhīpēxà nē akatorxà japē htỳx tā kēr ka amā ixkīnh tỳx o wa mē hakrenh pa. Nē amā aprō nē akrajē japē htỳx tā kēr ka amā ixkīnh tỳx o wa mē piitā mē hakrenh pa. Nē amā ixkīnh tỳx o amā amnhī japē jakre. Kēr ka mē atō ixkôt amnhī xām kaxyw nē ā amnhī nhīpēx anē.

²⁷ —Koja mē ixpī pa mē anē ty. Tā mē ate ixkôt amnhī nhīpēx o mē apa xwýnhjaja. Koja mē ixtā mē apar mā tā kēr ka mē amā ixkīnh tỳx o mē umaj ixkaga hkêt nē. Kwār mē māmri tanhmā ixtā mē ato. Kot kaj mē nhýrmā Tirtūm mē wa ixri axte amnhī xà kamā ajamak kêt nē atīr tūm nē amex rāhā apa ho apa. Nom kot kaj mē ixkīnhā jar pika ja kamā amā amex nē apa hprām xāj ixkaga hāmri

ně nhỹrmã wa ixri atĩr tũm ně
apa hkêt ně. Aně.

*Mě pahte amnhĩ kukamã
pajamaxpěr mex ã mẽ pamã
karõ*

²⁸ Nhũm Jejus arĩ mẽ kãm
kapěr ně mẽ kãm:

—Kwa kêr ka mẽ ixkôt
amnhĩ xunhwỳr kaxyw ně
amnhĩ kukamã ajamaxpěr
mex ně. Na htem amnhĩm
õrkwỹ rũnh nhĩpêx kaxyw
hãmri ně hkukamã hamaxpěr
mex ně. Ně kaxyw krax
mã kuhê xà hkukamã
hamaxpěr. Ně kaxyw kỳx
pê kãm hikwỹ xàja kukamã
hamaxpěr. Ně õkwaêja
kukamã hamaxpěr. Ně hã
põja kukamã hamaxpěr. ã
na htem amnhĩm õrkwỹ rũnh
nhĩpêx kaxyw hkukamã
hamaxpěr mex aně.

²⁹ Nom kot kaj mẽ
hkukamã ajamaxpěr mex kêt
ně ãm kaxyw pĩ ho grêre ně
hakà. Rỳ ra hã axàpênh rax
kurê ra amã ho anhỹr kaga
ně hkaga hpa ně hatur xãm
mênh kêt ně. Hãmri nhũm mẽ
hkwỳjaja hãnh mra ně omu ně
atã hpěr o axkě.

³⁰ Ně axpẽn mã ri ajarênh
o: “E ga mẽ ixkre mũj pumu.
Na pre hipêx xwỳnhja hkurê
kãm kaga ně hipêx par kêt
ně.” Anhỹr o axpẽn mã ajarê.
Ja pyrà ně kêr ka mẽ ixkôt
amnhĩ xunhwỳr kaxyw ně
amnhĩ kukamã ajamaxpěr
mex ně. Ně ajamaxpěr o: “Nà
mẽ kot Jejus ã tanhmã ixto
htỳx tã kot paj hkaga hkêt ně.
Kot paj hkôt amnhĩ nhĩpêx
rãhã ho ri ixpa.” Anhỹr o
amnhĩ kukamã ajamaxpěr.

Hãmri ně rĩ kormã ixkôt
amnhĩ xãm. No kot ka
mẽ umaj ixkaga hkukamã
ajamaxpěr hãmri ně ixkôt
amnhĩ xãm kêt kurê kumrêx.

³¹ —Ně koja krĩ hõ kamã
pahihti nhõ pòristi xohtõ ně.
Ně kutã nhãm krĩ hõ kamã
pahihti nhõ pòristija grêre.
Tã nhũm wa hpijapu kaxyw
nhũm krĩ hõ rũm pahihti nhõ
pòristi xohtõja mẽ grêreta wỳr
mra. Hãmri nhũm kutã krĩ
hõ kamã mẽ õ pòristi grêre
nhõ pahi nhỹ ně tee ri mẽ
amnhĩ kukamã hamaxpěr ně
hamaxpěr o: “Kwa koja apu
krĩ hõ rũm pòristi xohtõ raxja
nhũm inhõ pòristi grêreja mẽ
axpẽn kutã kuhê ně axpu
nhũm mẽ inhnê mẽ himex.
Nà inhõ pòristi grêre kênã.”
Anhỹr o hamaxpěr.

³² —Hãmri ně pahi hõta wỳr
õ kòwenatõ mẽ. Kormã krĩ hõ
rũm mẽ hohtõtaja mẽ htêp kêt
nhũm mẽ kutã kumê nhũm
ma mẽ kutã tẽ. Hãmri ně
awry hã mẽ hkaxpa ně mẽ
õ pahihti mã kãm: “E na mẽ
inhõ pahihti akutã inhmẽ pa
tẽ. Na inhmã: ‘Ma tẽ ně
mẽ kãm awjarê. Kot puj pěr
mẽ papijapu hkêt ně. Kwarĩ.
Kot puj mẽ tãm axpẽn xun-
hwỳ.’ Anhỹr o kapěr ně mẽ
akutã inhmẽ pa tẽ.” ã mẽ
ujarênh kot anhỹr. Ja pyrà
ně na htem mẽmoj kukamã
hamaxpěr mex ně rĩ kormã
tanhmã amnhĩ nhĩpêx to.

³³ —Tã kêr ka mẽ atõ amã
ixkôt amnhĩ xãm prãm hãmri
ně pahita pyrà ně amnhĩ
kukamã ajamaxpěr tỳx ně
rĩ kormã tanhmã amnhĩ
nhĩpêx to. Kêr ka ate inhmã
tanhmã amnhĩ nhĩpêx to ho

apa kaxyw hāmri nē inhgryk
 ā te ate amā amnhī japē
 hkēt pyrāk o mēmoj piitā mā
 anhīhkra karo pyrāk o amnhī
 nhīpêx. Hāmri nē rī kormā
 ixkôt amnhī xām.

³⁴⁻³⁵ No kot kaj mē amnhī
 kukamā ajamexpēr kêt nē
 atỳx ri ixkôt amnhī xunhwỳr
 japêr. Hāmri nē mēmo arīgro
 hā mē kot ixtā tanhmā mē
 ato xwỳnhjê pymaj ra ixkaga
 mā. Hā kot kaj mē te mē ate
 kaxwa punu pyrāk o amnhī
 nhīpêx. Kaxwaja mē apkur
 xà kamā mex. Na htem
 amnhīm ho õ xành nē kuku.
 Nom koja mēhõ kamā pika
 hkwy mē nē ho ahkà hāmri
 tanhmā kot mē ho nē akupỳm
 ho mex? ām mē kot hkapīr
 pix kaxyw koja mex. Ja pyrā
 nē kot ka mē atõ ate inhmā
 tanhmā amnhī nhīpêx to ho
 apa hā amnhī jarēnh tã gaa
 nē amā ixkôt amnhī nhīpêx
 prām nõkati. Hāmri nē ra te
 ate kaxwa punu kapīr mā
 tãmta pyrāk. E kwa mē mēmoj
 tã ixujarēnhja ma nē mē urāk
 nē amnhī kukamā ajamexpēr
 mex nē. Anē.

15

ôwêhti pikunor jarēnh

Matêwre 18.12-14

¹ Tã nhūm mē kot pahihiti
 mā hkwyjê pē kàxpore hkwy
 jamỳnh xwỳnhjê mē mē kot
 amnhī tomnuj xwỳnhjaja Je-
 jus kapēr mar kaxyw hwỳr
 mra.

² Hāmri nhūm Parijew
 nhõ xwỳnhjê mē mē kot
 Tirtūm kapēr tūm o mē ahkre
 xwỳnhjaja mē hā Jesus pumu.
 Hāmri nē kê wem axte axpên

mā tanhmā ho kapēr punuj
 to nē axpên mā:

—Tk. Kwa na hte mūjti ax-
 tem nē mē kot amnhī tom-
 nuj xwỳnhjaja amnhī wỳr mē
 kuwỳ nē tōhā mē kutā apku.
 Kwa mē kot amnhī tomnuj
 xwỳnh kênā kot kêt mē kutā
 apkur o pa. Anē.

³ Hāmri nhūm Jejus amnhī
 tã mē kuma nē tanhmā mē
 kām kapēr to. Nom hprī hā
 mē kām kapēr kêt nē. Kê
 ām amnhī tã kuxi nē mē kām
 ôwêhti pikunor jarē nē mē
 kām:

⁴ —Koja mēhõ õ ôwêhti
 xohtõ nē. Nē ma nhỳri hamār
 o pa. Hāmri nhūm pyxire nē
 hkwy kaga nē ma nhỳhỳm
 ahte tē nē akunok. Hāmri
 nhūm õ dõnja ma kot akupỳm
 piitā o mōr kaxyw hkwy
 ho pikuprõnh pa hāmri nē
 tee ri hkwy kaêx ā pikunor
 xwỳnhta japêr. Hāmri nē ma
 hkwy ho mō nē nhỳri kure.
 Kot nhỳri kutêp apkur o ri
 pa kaxyw kure hāmri nē ma
 akupỳm pikunor xwỳnhta
 japêr o tē. Hāmri nē hapêr ryy
 nē nhỳri hwỳr kato.

⁵ Nē omu nē hkīnh tỳx nē.
 Hāmri nē amnhī kre hā kumē
 nē ma akupỳm hkwy hwỳr o
 tē.

⁶ Hāmri nē mē ĩhkõ hā kumē
 nē hkīnh nē hkrãmnhwỳjê
 ho akuprõ nē õrkwỳ htã mē
 õrkwỳ xwỳnhjê ho akuprõ nē
 mē kām: “Kwa na pre ixpê
 ixkriita õ akunok. Pa pre
 hapêr kām ixihitỳx nē kām
 ixkato nē omu nē ixkīnh nē.
 Jakamā kwa wem määnēn
 inhỳ hā akīnh.” Anē.

—Ā mē ujarēnh kot anhỳr.

⁷ Ja pyrà nê koja mẽ kot amnhĩ tomnuj tỳx xwỳnhjê hõ tee ri amnhĩ pumu nê kot amnhĩ tomnuj kaga nê Tĩrtũm kõt amnhĩ xãm. Hãmri nhũm kaxkwa kamã mẽ piitã ja hã omu nê hkĩnh tỳx nê. Te ho my kot ôwêhti hpikunor xwỳnh mã kator nê hkĩnh tỳxta pyræk. Na hte Tĩrtũm tãm mẽ kot amnhĩ nhĩpêx o mẽ pa xwỳnhjê pumu nê hkĩnh nê. Tã koja mêhõ kot amnhĩ tomnuj tỳx tã ã amnhĩ nhĩpêx anhỹrja kaga nê Tĩrtũm kõt amnhĩ xãm hãmri nhũm amnhĩ tã omu nê hkĩnh tỳx nê. Jakamã na pa hte mẽ akurom ã mẽ kot amnhĩ tomnuj xwỳnhjê hkõt Tĩrtũm kapêr o mẽ ahkre rãhã ho ri ixpa. Anê.

Nhũm pre ã Jejus mẽ kot tanhmã ho kapêr punuj to xwỳnhjê mã amnhĩ jarênh anê.

Kàxpore pikunor jarênh

⁸ Nhũm Jejus arĩ mẽ kãm awjarê nê mẽ kãm:

—Nê ja. Koja mêhõ ni hikàxpore kêp 10. àpênh o arĩgro pê 10 pãnhã kàxpore kêp 10. Tã ho pyxi nê ho akunok. Hãmri nê tee ri hapêr nê hkaprĩ nê. Hãmri nê kanê hpôk nê hitom kapõnh pê hprĩ hã hapêr o ri pa nê kãm kato.

⁹ Hãmri nê kupy nê hkĩnh nê hkràmnhwỳjê ho akuprõ nê òrkwỹ htã mẽ òrkwỹ xwỳnhjê ho akuprõ nê mẽ kãm amnhĩ jarê nê mẽ kãm: “Xê na pre ixpê ixkàxpore hõta akunok pa tee ri hapêr tã akupỹm kãm ixkato nê kupy nê ixkĩnh

nê. Jakamã xê wem inhỹ hã mãânênh akĩnh.” ã mẽ ujarênh kot anhỹr.

¹⁰ —Ja pyrà nê koja mẽ kot amnhĩ tomnuj xwỳnhjê hõ pyxire nê amnhĩ tomnuj kaga nê ixkõt amnhĩ xãm. Hãmri nhũm kaxkwa kamã mẽ piitã ja hã omu nê hkĩnh nê. Te mêhõ ni kot kàxpore pikunor xwỳnh mã kator nê hkĩnhhta pyræk. Anê.

Mê hkra pikunor jarênh

¹¹ Nhũm Jejus arĩ mẽ ahkre ho xa. Tĩrtũm kãm mẽ piitã mẽ hapê htỳx ã mẽ ahkre ho xa. No kê ãm hã kuxi nê kê we tanhmã mẽ kãm ujarênh to nê mẽ kãm:

—Nê koja mêhõ hkra my wa axkrut.

¹² Hãmri nhũm kot hapu ò papaj wỳr tẽ nê kãm: “È papaj. Ot pa awỳr tẽ. Kot kaj nhỹrmã ty pa wa amỳr pê akukrêx o ixàrik. Jakamã e kwa tokyx atĩr ri amnhĩ kamã wa inhmã ho axkjê pa inhõ ho amnhĩptàr kurê kumrêx nã?” Anê. Hãmri nhũm kuma nê wa kãm hikukrêx o axkjê. Kot wa mã hkwy gõ nê kot hapu mã hkwy gõ.

¹³ Hãmri nhũm kot haputa ãm ri hipêxà hkõt pa hkrãnre hãmri nê kot kãm hikukrêx nhõr jamỳnh pa nê ma nhỹhỹm o mỗ nê ho wênê hpa. Hãmri nê hpãnhã kàxpore jamỳ nê ma nhỹhỹm mỗ. Nhỹhỹm awry hã pika hõ hwỳr ma mỗ. Mỗõ hãmri nê krĩ hõ kamã htỳx ri tanhmã amnhĩ tomnuj to ho ri pa. Hãmri nê gaa nê ra mẽ hkuprỳjê hã kàxpore ho hapêx

pa. Nē kagôxyhti hã ho hapêx pa. Nē gaa hãmri nē hikàxpore hkêt nē ri pa.

14 —Rôm nhũm pikaja kamã mẽ hã na wryk kêt ry rax nē. Nē gaa nhũm mẽ hpur kãm mẽ kêp mẽ apkur xà hã mẽõja hapêx pa. Jakamã nhũm mẽ hkra kot haputa kêp amrakati nē kãm prãm tỳx nē ri pa. Hãmri nē tee ri amnhĩ kukamã hamaxpêr.

15 Hãmri nē amnhĩ to krĩ nhõ xwýnhjê mar o ri pa. Kot mẽ kãm tanhmã àpênh to nē hpãnhã apkur kaxyw. Hãmri nhũm mẽhõ kot kãm hkrit hagrô jamãr kaxyw hã kumê nhũm ma hwýr tē nē kãm hamãr o pa. Nom kot kãm hamãr o pata pãnhã ãm kãm mẽmoj nhõr kryre nhũm arĩ kãm prãm tỳx kumrêx.

16 Nē tee ri kot hagrô kutã õta kur prãm nē tee ri omunh o pa.

17 —Nē gaa hãmri nē tanhmã hamaxpêr to. Nē tee ri kot tanhmã amnhĩ tomnuj toja ã amnhĩ pumu nē hamaxpêr o: “Hêxta waa nē. Mãn mũtar inhõ krĩ kamã inhõ papaj mã mẽ àpênh xwýnhjaja ixrom apkur mex o pa. àpkur mex nē nhũm mẽõ jakrêx prãr rũnh tã pa jar mẽ hkĩnhã prãm xàja ra ixtyk o mō.

18 Nã kot paj ma akupým mō. Hãmri nē inhõ papaj pumu nē ã kãm amnhĩ jarênh anē nē kãm: ‘Kwa Papaj. Na pa pre ixpê akra hã amnhĩ tomnuj tỳx kumrêx nhũm ja apê omnuj nē. Nhũm Tĩrtũm pē ja omnuj nē.

19 Jakamã na pa ixpê akra

hã amã amnhĩ jarênh ã ixpijaàm nē. Ixte tãm kêt kumrêx. Jakamã kwa xà kot pa amã mẽmoj tã ixàpênh o ri ixpa ka hpãnhã inhmã inhõ pa apku nã?” Anhýr o kot pa kãm amnhĩ jarê. Nã kot paj anē.”

20 —Anhýr o amnhĩ kukamã hamaxpêr hãmri nē ma akupým mō. Mōõ nē ra hpôx o mō. Nē kormã amým mōr ri nhũm õ papaj hwýr rĩt nē omu nē amnhĩ kra hã omunh kurê kumrêx nē hkĩnh nē ma kutã hprõt nē tē. Omu nē kãm hkaprĩ nē. Nē hwýr hprõt nē hkaxpa nē kahti hkõt kumý.

21 Hãmri nhũm kãm amnhĩ jarê nē kãm: “Kwa papaj. Na pa pre amnhĩ tomnuj nē nhũm ja apê omnuj nē. Nē Tĩrtũm pē ja omnuj nē. Jakamã ixte ixpê akra hã amã amnhĩ jarênh ã ixpijaàm. Ixte tãm kêt kumrêx.” Anē.

22 Nom kormã kãm amnhĩ jarênh par kêt ri nhũm hipêêxà kãm mẽ àpênh xwýnhjê mã akir nē mẽ kãm: “E kwa mẽ atõ ma tē nē kãm ê mex õ py nē akupýn ixkrata wýr ho aprõt nē kãm haxà. Nē hpar kà nē ãhkra kamã kàx nē amnē kãm hamý nē ho aprõt.

23 Nē akupým aprõt nē mōx kra htwým mexta õ pumu nē unē nē apĩ. Nē mẽ ho anē pu mẽ ixkra hã pahkĩnh nē apku. E mẽ amnhĩ prêprêk nē tokyx ã amnhĩ nhĩpêx anē.

24 Na pre ma ixpê mōr o te ixpê htyk pyrãk. Tã akupýn mō nē ixwýr pōj nē te akupým inhmã htĩr pyrãk. Jakamã e mẽ tokyj.” Anhýr jakamã nhũm mẽ hã mōx kra pĩ nē ho

anē nē hkīnh nē hã apkur o hkrī.

²⁵ —Rôm nhũm hkra kot wata kormã pur kãm htỳx àpênh o xa. àpênh o ãm tã akupỳn hpôx o tẽ. Hãmri nē amnhĩ kukamã mẽ kot ri mẽmoj tatak nē mẽ grer ma.

²⁶ Hãmri nē tee ri hamaxpêr o tẽ nē òrkwỳ hwỳr pôj nē kormã kapem xa nē mẽ hã mẽ àpênh xwỳnhjê hõ kukja nē kãm: “Kwa mẽmoj tã na ka wem ã akīnh rax anē?”

²⁷ Anē nhũm kãm: “Nà mẽhõ hkêt. Atõ na akupỳn pôj nhũm anhĩpêêxà omu nē hkīnh tỳx nē. Nē mẽ inhmã anē pa mẽ hã môx kra htwỳm mexja pĩ nē hã ho anē nē hã ixkīnh nē hkur o ixkrī.” Anē.

²⁸ Hãmri nhũm tee ri htõ jarênh ma nē gryk tỳx nē. Hãmri nē gryk xàj kapem hkuk punuj o mẽ omunh o xa nē mẽ hwỳr àr kêt nē. Hãmri nhũm hipêêxàja tee ri omu nē hwỳr kato nē tee ri kot mẽ hwỳr ho àr kaxyw ho anhỳr kaprỳ.

²⁹ Hãmri nhũm kãm: “Tk. Kwa na pa hte amã ixàpênh rũnh rãhã ho ri ixpa hã ra ixtã amgrà xohtô nē. Nē aa akapêr nhĩrôp tanhmã ixãm to hkêt. Tã ka hte ixpumunh nē akīnh nē ixtã mẽmoj tõx pĩr kêt nē.

³⁰ Tã nhũm akra kot haputa apê akukrêx kwỳ jamỳnh pa nē ma o mõi nē axtem nē mẽ hkuprỳjê mã òr par tã akupỳn mõi nē pôj. Ka omu nē akīnh nē hã môx kra twỳmta pĩ. Nà kot paj mẽ awỳr ixàr kêt nē.” Anē.

—Hãmri nē gryk tỳx nē xa.

³¹ Hãmri nhũm ò papaj tee ri kuma nē kãm: “Kwa nà ri ã akapêr anhỳr kêt nē. Inhmã ajapê kênã. Na ka hte ixkôt apa ho apa rãhã nē. Nē ixkukrêx piitã kêp anhõõ.

³² No atõja na pre te ixpê htyk pyræk tã arĩ htĩr. Nē te pikunor pyræk tã te ra akupỳm kator pyræk jakamã na pa omu nē ixkīnh nē. Nē inhmã hapê ho te mãânênh inhmã ajapê pyræk.” Anē.

—Ã mẽ ujarênh kot anhỳr. Ja pyrà nē koja mẽhõ te kot amnhĩ tomnuj tỳx o ri pa htã amnhĩ kaxyw Tĩrtũm mã hamaxpêr nē amnhĩ to kuwỳ nē hkôt amnhĩ xãm. Hãmri nhũm amnhĩ tã omu nē hkīnh nē. Nē kãm hprãm nē. No mẽ kajaja. Mẽ apê Parijew nhõ xwỳnhjê mẽ Tĩrtũm kapêr tũm o mẽ ahkre xwỳnhjaja. Na ka htem mẽ kot amnhĩ tomnuj xwỳnhjaja kot Tĩrtũm kapêr mar o kuhê hã mẽ omu nē Tĩrtũm kīnhã akīnh kêt nē. Nē te hkra kot wata jamaxpêr pyræk o ajamaxpêr nē tee ri ja hã mẽ omu nē mẽ kamã agryk nē. Nē mẽ amã mẽ hprãm nõkati. Anē.

16

Mẽ panhõxỳ nê Jejus kot mẽ pamã karõ

¹ Tã nhũm kê Jejus axte hkôt ri mẽ pa ho mẽ pa xwỳnhjê jahkre. No ãm mẽmoj tã kuxi nē mẽ kãm tanhmã ujarênh to nē mẽ kãm:

—Nà koja mẽhõ hikàxpore rax xwỳnhja kãm àpênh xwỳnh mã mẽmoj to wẽnê ho pa kaxyw ãm. No nhũm kãm

ho mex kêt nê. Axtem nê kêp amarî mê kâm mêmôj to fiat par o mō. Hāmri nhũm ra mēhō kot ã amnhĩ nhĩpêx anhÿr ã omu nê ma ã patrāw wÿr tē nê kām harē.

² Hāmri nhũm tee ri harēnh ma nê amnhĩ wÿr hā karō. Hāmri nhũm hwÿr tē nê axà nhũm kām: “Pa. Kwa xà ãm hāmri na mē inhmā ajarē? Kwa nà mon ka ri axtem nê ã ixpê inhō mêmôj nhĩpêx anē? E inhmā ate mē kām ho fiat par xwÿnhjê nhĩxi hā kagà nê inhmā agō hāmri nê ma tē. Kot ka axte inhmā axàpēnh kêt nê rĩ amnhĩ pumu.” Anē.

³ —Hāmri nhũm kuma nê tee ri amnhĩ kukamā hamaxpêr nê hamaxpêr o: “Hêxta waa nê. Tanhmā kot paj amnhĩ to? Ixihtÿxre hā kot pa mēhō mã pur ã apê. Nom inhmā amarî ri ixàhwÿr o ri ixpa hprām kêt. Ixte amnhĩ kuk ã ixpijãm.” Anē.

⁴ Hāmri nê tanhmā amnhĩ kukamā hamaxpêr to nê hamaxpêr o: “Nà kot paj amnhĩ wÿr ixte mē kām ho fiat xwÿnhjê hā karō. Nê mē kām mē ã kōōta ahpār mã hkamē kê mē ãm inhō patrāw mã hkwȳ pix gō. Kêr kê mē amnhĩ tã ixpumu nê kām ixkĩnh nê. Hāmri nê inhō patrāw kot ixkaga hā ixtã harēnh ma nê ixkamā ukapĩ japêr. Hāmri nê amnhĩ wÿr ixwÿ pa ahpÿnhã mē kutã ixàpkur o ri ixpa nhũm prām ixpĩr kêt nê. Nà kot paj anē.” Anē.

⁵ Hāmri nê amnhĩ wÿr mē hā karō nhũm mē hwÿr mra. Nhũm mē omu nê ja mã kām:

“E tanhmā na ka pre inhō patrāw pē mêmôj to fiat to? E inhmā harē.” Anē.

⁶ Hāmri nhũm kām: “Na pa pre kêp orti hā à ho 100 nê ho fiat. Ota hā kagàta. Tã pa kormã kām amnhĩrer kêt nê.” Anē nhũm kuma nê kām: “Tōe ka inhma. Kot paj amã anhō kôt o gri ka ãm kām ho 50 pix nê agō pa ixte anhō kôt ho ijapêx par pyrāk o anhĩpêx.” Anē.

⁷ Hāmri nê hpānhã nhām ja mã kām: “No ka. Tanhmā na ka pre kêp mêmôj to fiat to?” Anē nhũm kām: “Na pa pre kêp pây hā xak o 1.000 nê ho fiat. Tã pa kormã hpānhã kām amnhĩrer kêt nê.” Anē nhũm kām: “Tōe. Kot paj hāmri amã anhō kôt o gri ka ãm kām ho 800 pix nê agō pa ixte anhō kôt ho ijapêx par pyrāk o anhĩpêx.” Anē. Nhũm ã mē hipêx anē. Hāmri nê hamaxpêr o: “E. Na pa mē kām mē ã kôt o hkry pa. Koja mē amnhĩ tã kām ixkĩnh japêr.” Anē.

⁸ —Hāmri nhũm ã patrāwja ã kot mē hipêx anhÿr ã harēnh ma nê kām: “Tk. Kwa ate pa ixkukamã ajamaxpêr nê inhmā mêmôj to anhÿr mex kêt tã ka amnhĩ kukamã ajamaxpêr mex pē ã mē hipêx mex anē.” Anē. ã mē ujarēnh kot anhÿr. Anē.

Nhũm pre ã Jejus mē kām ujarēnh anē. Hāmri nê mē kām:

—Tã ja pyrã nê na hte mē kot Tĩrtũm kôt amnhĩ xunhwÿr kêt xwÿnhjaja ãm amnhĩ pix kukamã hamaxpêr mex o pa. Jao amnhĩ kaxyw pix

mã mẽ piitã tanhmã mẽ ho mex to ho pa. Mẽ kot amnhĩ tã mẽ omunh nẽ mẽ kãm mẽ hkĩnh nẽ amnhĩ xwar tanhmã mẽ ho mex to kaxyw nhũm htem ã amnhĩ nhĩpêx anhỹr o pa. Tã mẽ ate ixkôt amnhĩ xunhwỳr xwỳnhjaja. Tĩrtũm kot tanhmã mẽ ate amnhĩ kwỳjê ho mex to hã amnhĩm mẽ ajarênh kaxyw kêr ka mẽ amnhĩ mẽ mẽ piitã mẽ hkukamã ajamaxpêr mex nẽ. Pê tanhmã mẽ ho mex to ho ri apa. ã mẽ ate amnhĩ nhĩpêx anhỹrja na mex. Nom kormã mẽ ate ã amnhĩ nhĩpêx anhỹr kêt.

9 —Hêxta waa nẽ. Mon ka htem mẽ urak nẽ ã axpên to mex anhỹr kêt nẽ? Kwa mẽ àpênh xwỳnhhta kot amnhĩ nhĩpêx pyrã nẽ tanhmã axpên to mex to o ri apa hkêt wehe. Jao akukrêx nẽ akàxpore ho anhõxỳ hkêt nẽ. Kêr ka nhỹrmã ty nẽ Tĩrtũm wỳr api nhũm ja hã mẽ ato mex rax nẽ. Te ho kot õ patrãw mã àpênh xwỳnhhta kot tanhmã mẽ ho mex to xwỳnhjê hwỳr mrar nhũm mẽ kot amnhĩ xwar tanhmã ho mex tota pyrãk.

10-11 —Na hte Tĩrtũm tanhmã mẽ pakute hã mẽ pahpumunh mex nẽ. Koja mẽ amã mẽmoj gõ ka mẽ kãm hprãm xà hkôt ho anhõxỳ hkêt nhũm ja hã mẽ apumu nẽ axte mẽ amã mẽmoj gõ. Nom hpãnhã mẽ amã õr rax o wanta jakre nẽ kugõ. Nom kot ka mẽ ri mẽmojta o anhõxỳ ho ri apa nhũm tee ri ja hã mẽ apumu nẽ axte mẽ amã mẽmoj nhõr kêt nẽ. Koja

mẽ amã mẽmoj gõ ka mẽ ho anhõxỳ ho ri apa nhũm ja kêp homnuj nẽ.

12 —Nẽ kot kaj mẽ jar Tĩrtũm kot mẽ amã mẽmoj nhõr xwỳnhja ho anhõxỳ ho ri apa. Hã koja nhỹrmã kaxkwa kamã mẽ amã mẽmoj mex nhõr kêt nẽ.

13 —Nẽ kot kaj apyxi nẽ anhõ patrãw hamêxkrut nẽ arĩgro pyxi hã hamê wa kãm axàpênh o amỹkry hkêt nẽ. Kot kaj anê nẽ hõ gryk ã hõ kaga. Ja pyrã nẽ kot kaj mẽ jar pika ja kamã akàxpore nẽ akukrêx pix kukamã ajamaxpêr o ri apa hã kot kaj mẽ amã hapê htỳx nẽ mẽ kêp ho anhõxỳ ho ri apa. Nẽ akukrêx rax gryk ã Tĩrtũm kãm hprãm xà hkôt akukrêx o tanhmã axpên to ajuta hto ho ri apa hkêt nẽ. Ja pymaj kwa kêr ka mẽ ãm Tĩrtũm pix mã mãn ajamaxpêr rãhã ho ri apa. Jao te akukrêx nẽ akàxpore mã axàmnhĩx ri anhĩhkra karo ho ri apa pyrãk. Anê.

Nhũm pre ã Jejus mẽ ahkre anê.

14 Hãmri nhũm Parijew nhõ xwỳnhjaja mar o kuhê. Na prem ra mẽ hikàxpore rax gryk ã Jejus kaga. Jakamã ã kot mẽ kãm kàxpore jarênh anhỹrja ma nhũm ja mẽ kêp omnuj nẽ nhũm mẽ hã hpêr o pikênh o kuhê.

15 Hãmri nhũm amnhĩ tã mẽ kuma nẽ mẽ kãm:

—Nà na ka htem te mẽ ate tãm mẽ kot amnhĩ nhĩpêx xwỳnh pyrãk o amnhĩ nhĩpêx nom ri mẽ kãm amnhĩ to axêx o ri apa. No nhũm Tĩrtũmja kot tanhmã mẽ ate amnhĩ

nhîpêx to nê tanhmã mẽ aja-maxpêr to hkôt mẽ apumunh par. Nê hprî hã mẽ anhôxý hã mẽ apumu. Te mẽ ate tãm amnhî nhîpêx pyrâk nom mẽ anhôxý kamã na ka htem apa. Mẽmoj te mex pyrâk nhũm htem omu nê mex ã hkamnhîx. No nhũm Tirtũm àhpumunh tỳx xà hkôt hprî hã mẽmojta pumu nhũm kêp omnuj nê. Mẽ akurom omnuj ã omunh kurê kumrêx. Na hte hprî hã mẽ ate amnhî nhîpêx ã mẽ apumu. Anê.

Tirtũm kapêr aa hapêx kêt ã harênh

Matêwre 5.17-18

¹⁶ Nhũm Jejus arî mẽ ahkre nê mẽ kãm:

—Nê na pre finat Mojesja kumrêx mẽ kãm Tirtũm kapêr kwý hã kagà. Tã nhũm hpãnhã Tirtũm nhý hã kapêr jarênh xwýnh kwýjaja mãânên mẽ kãm hkwý hã kagà. Nhũm prem kuma nê mẽ hkôt amnhî nhîpêx o ri pa. Tã nhũm finat Juãw Paxisja mẽ hpãnhã kato nê Tirtũm kapêr o mẽ ahkre ho ri pa. Tã pa hpãnhã ho mẽ ajahkre ho ri ixpa nhũm mẽ ohtô nê ixkôt amnhî xunhwý nê kãm ixkapêr kôt pix mã amnhî nhîpêx o ri pa hprãm nê.

¹⁷ —Tirtũm kapêr tũmja mex o mex. Koja aa hapêx kêt nê. Koja nhýrmã kaxkwa nê pika wa hapêx pa no nhũm Tirtũm kapêr tũmja aa hapêx kêt nê. Koja rãhã ho rãhã nê aa ihkjê ho mẽnh kêt nê. Anê.

Mẽ pahte axpên kaga hkêt ã mẽ pamã karõ

Matêwre 5.31-32, 19.9-12; Makre 10.2-12

¹⁸ Nhũm Jejus arî mẽ ahkre nê mẽ kãm:

—Nê kêr ka mẽ aprõ kaga hkêt nê apa. Kot kaj mẽ hkaga nê hpãnhã nhãm hõ ho aprõ nhũm Tirtũm noo mã te ate wam aprõ kamã nhãm ho amnhîkati pyrâk. Nhũm ja kêp omnuj nê. Rý ka ra mẽhõ kot hprõ kaga xwýnhka ka hpãnhã ho aprõ. Nhũm Tirtũm noo mã te ate wam mjên pê ho amnhîkati pyrâk. Nhũm Tirtũm pê ja omnuj nê. Anê.

Hikàxpore rax xwýnh mẽ kêp amrakati xwýnh wa harênh

Rukre 6.20-26

¹⁹ Nhũm Jejus arî mẽ ahkre kamã mẽ kãm awjarê nê mẽ kãm:

—Koja mẽhõ kàxpore rax xwýnh ê mex pix kãm ri pa. Nê apkati mẽ apkur mex o pa.

²⁰ Nhũm amrakati xwýnh pê Rajareja hkà nhyre nê arî pry kamã àhwýr o hkrî. Nhũm htem hamý nê ma o pa nê hikàxpore rax xwýnh nhõrkwý jakwakrem haxwý.

²¹ Nhũm õ jakrêx kwý hkrêr prãm xàj hakwa krem àhwýr o hkrî. Nhũm rop hwýr mra nê hkà nhy kunhnwýnh o kuhê.

²² —Tã nhũm Rajare ty nhũm Tirtũm kapêr o mẽ wrýk xwýnhjaja hwýr wrý nê ma akupým kaxkwa hwýr hkarõ ho mõ nê ho api. Hãmri nhũm kaxkwa kamã mẽ pahpãm Apraãw nhîhkõ hã hkînh nê apkur mex o hkrî.

—Tã nhũm hikàxpore rax xwỳnhta mãănēn hkôt ty. Nhũm hkwỳjaja hã akuprõ nē hã mur nē ma o tē nē haxà.

²³ Hãmri nhũm hkarõ ma mẽ kot amnhĩ xà htỳx kamã hamak tũm xà pē kuwy maatita wỳr ma mō. Nē kamã amnhĩ xà htỳx kãm hamak rãhã ho pa. Hãmri nē amnhĩ xà hã maj kànhmã rīt nē kaxkwa kamã Apraãw pumu. Nhũm Rajare ra kuri mex nē nhỹ.

²⁴ Hãmri nhũm tee ri wa omu nē Apraãw mã akapēr nē kãm: “Kwa Apraãw. Kwa we ixkamã axukaprĩ nē ixwỳr Rajare mẽ kê ixwỳr tē nē ìhkrakrã ho gô htok nē ho inhõhto jakry. Na pa kuwy kamã amnhĩ xà htỳx kãm ijamak tỳx kumrēx.” Anē.

²⁵ Hãmri nhũm kuma nē kãm: “Tk. Nà kot pa awỳr mẽnh kêt nē. Na ka pre atĩr ri amex nē akĩnh nē ri apa. No nhũm Rajare akĩnhã hkà nhy rax nē amnhĩ xà htỳx kãm hamak rãhã ho ri pa. Tã ra jar inhĩhkô hã hkĩnh nē pa. Ka pre kurom amex nē apa htã kot kaj hpãnhã amnhĩ xà htỳx kãm ajamak rãhã ho ri apa.

²⁶ Nē pahkaêx kãm ahkaprỳ griã. Jakamã nhỹhỹnh kot kêt awỳr rê? Ka ajaxwỳja nhỹhỹnh kot ka kêt mẽ ixwỳr rê?” Anē.

²⁷ —Nhũm ã kãm kapēr anē nhũm tee ri kuma nē kãm: “Kwa tô ma inhõ krĩ hwỳr mãn amē kê ma ixkwỳjê hwỳr wrỳ.

²⁸ O mũj arĩ inhõ krĩ kamã ixtõ kēp 5 nē arĩ htĩr nē pa.

Kê wa mẽ kãm awjarē kê mẽ amnē kuwy hwỳr pa pymaj tokyx amnhĩ tomnuj kaga nē Tĩrtũm kôt mãn amnhĩ xunhwỳ nē hkôt ri amnhĩ nhĩpêx o pa.” Anē.

²⁹ —Hãmri nhũm Apraãw kãm: “Nà pa mẽ hwỳr mẽnh kêt nē. Ra mẽ kuri Tĩrtũm kapēr jarēnh xwỳnhjê mẽ Mojes kot Tĩrtũm kapēr ã kagà kēnã. Kê mẽ kamã harē nē ja ma nē rĩ tãm tanhmã amnhĩ nhĩpêx to.” Anē.

³⁰ Hãmri nhũm tee ri kuma nē kãm: “Kwa nã. Koja mẽ kagàja mar kêt nē. No kêt Rajare na pre ra htyk tã akupỳm htĩr jakamã koja mẽ hwỳr wrỳ nē mẽ kãm awjarē nhũm mẽ akupỳm htĩr ã omu nē kapēr ma hãmri nē amnhĩ tomnuj kaga kurê kumrēx. Kwa nã ã ri anhỹr kêt nē mẽ hwỳr amē hēxta waa nē.” Anē.

³¹ —No nhũm kãm: “Nà koja mẽ Tĩrtũm kapēr ã kagà mar kêt ã koja mẽ mãănēn Rajare tyk nē akupỳm htĩr nē mẽ hwỳr wrỳk nē kot mẽ kãm tanhmã ujarēnh to hã mar kêt nē. Jakamã kwarĩ pa mẽ hwỳr mẽnh kêt nē. Kot paj ho anē nē ãm ixte mẽ hwỳr mẽnh kaprỳ pyrak o amnhĩ nhĩpêx.” Anē. ã mẽ ujarēnh kot anhỹr. Anē.

17

Mẽ kot Jejus nê mẽ no kupyř ã mẽ harēnh

Matêwre 18.6; Makre 9.42; mãănēn Rõmãn 1.32; Sikũn Pêtre 2.1, 2.18

1-2 Tã nhũm Jejus hkôt mẽ pa ho mẽ pa xwýnhjê jahkre ho nhỹ nẽ mẽ kãm:

—E kot paj mẽ kot ixkôt amnhĩ xunhwýr tohtuj anhýr xwýnhjê jarê ka mẽ inhma. Nà koja mēhō mẽ hwýr tẽ nẽ inhnẽ mẽ kãm kapēr. Mẽ kot mẽ mar nẽ amnhĩ tomnuj prãm xaj tanhmã mẽ kãm kapēr to. Hãmri nhũm mẽ mar xà hkôt tanhmã amnhĩ tomnuj to. Hã koja Tirtũm ja hã omu nẽ kot inhnẽ tanhmã kãm nẽ xwýnhta pumu nẽ ja hã homnuj tỳx nẽ. Te mẽ kot mēhō pynénh nẽ mut ã kẽn pytĩ hō nhôr nẽ ma o htēm nẽ gô rax kãm mēnh pyræk o koja hipêx. Te ho ja pyræk no ãm homnuj tỳx o ja jakre. Jakamã kwa mẽ ixkapēr ma nẽ kãm ajamaxpēr tỳx rãhã ho ri apa. Anẽ.

Mẽ pahte amnhĩ tã tanhmã mēhō hto hkêt ã mẽ pamã karō Matêwre 18.21; Makre 11.25-26; mãânên Epes 4.32; Korosê 3.13

³ Nhũm Jejus arĩ mẽ ahkre nẽ mẽ kãm:

—Nẽ koja ixkôt atõjê hō tanhmã atomnuj to. Ka amnhĩ tã omu hãmri nẽ ma hwýr tẽ nẽ ja hã kãm akapēr nẽ kãm: “Kwa mon ka axtem nẽ ri ã inhĩpêx anẽ ixtõ? Kwa nã ri ã inhĩpêx anhýr kêt nẽ.” Anẽ hãmri nhũm amnhĩ tã ama nẽ amã: “Nã na pa tee ri ixte tanhmã atoťa ã amnhĩ pumu nẽ ixkaprĩ nẽ. Nã kot paj axte ã ri anhĩpêx anhýr kêt nẽ. Kwa kêt ka axte tanhmã ja mã ajamaxpēr to hkêt nẽ. Te ate amnhĩ katut kôt mēnh pyræk o hipêx pu

akupým tãm axpên nhĩpêx o papa.” Anẽ. Koja ã amã kapēr anẽ ka amnhĩ tã ama hãmri nẽ axte tanhmã kot atoťa mã ajamaxpēr kêt nẽ.

⁴—Koja arĩgro pyxi hã xatã tanhmã atomnuj to japêr. Hãmri nẽ xatã tee ri ja hã amnhĩ pumu nẽ awýr mra nẽ xatã amnhĩ tã amã kapēr nẽ amã: “Pa ot pa awýr tẽ. Na pa ra ixkaprĩ nẽ. Kwa ixte ã anhĩpêx anhýrja pumu nẽ ãm omu. Kot paj axte hkêt nẽ.” Anhýr o xatã amã kapēr. Nẽ ra axte tanhmã atomnuj to nẽ kê axte awýr tẽ nẽ ã amnhĩ tã amã kapēr anẽ. Nom kêt ka ama nẽ kamã agryk kêt nẽ. ãm xatã kãm: “Nã kot puj anẽ nẽ akupým tãm axpên nhĩpêx. Kot paj axte tanhmã ate ixtota mã ijamaxpēr kêt nẽ. Kot puj ja ho pajapêx nẽ tãm axpên nhĩpêx o akupým papa.” Anhýr o kêt ka mẽ xatã axpên nhĩpêx anhýr rãhã ho ri apa nẽ aa jam anhũrer kêt nẽ. Anẽ.

Mẽ pahte mẽmoj tã Tirtũm wýr hã mẽ pajarēnh Matêwre 17.20-21, 21.21-22; Makre 11.23

⁵ Tã nhũm Jejus nhỹ hã mẽ ahkre ho mẽ pa xwýnhjaja hãmri kãm:

—Kwa Pahihti. Tanhmã mẽ ixto pa mẽ amnhĩ kaxyw Tirtũm kôt ijamaxpēr tỳx rãhã ho ri ixpa. Anẽ.

⁶ Hãmri nhũm mẽ kãm:

—Nã ra mẽ ate amnhĩ kaxyw hkôt ajamaxpēr jakamã na ra amnhĩ tã mẽ apumu. Jakamã mẽ ate hkôt amnhĩ nhĩpêx kukwak ri na

ka htem mẽmoj tã awỳ nhũm mẽ ate mẽmoj tã hwỳr xà hkôt mẽ amã tanhmã mẽmoj nhĩpêx to. Te mẽ ate pĩ hpàr mũj mã akapêr nê kãm: “E amnhĩ jarê nê ma tẽ nê gô xujanâr kãm mãn mrô.” Anê nhũm kot amar nê amar xà hkôt ã kot amnhĩ nhĩpêx anhỹrta pyrãk. Ja pyrã nê kot kaj mẽ ate Tĩrtũm kôt amnhĩ nhĩpêx o apa kukwak ri mẽmoj tã awỳ nhũm mẽ ama nê mẽ amã mẽmoj tanhmã ho. Rỳ mẽ amã mẽmoj gô. Anê.

Te mẽ pahpê Tĩrtũm mã paxãpênh xwỳnh pyrãk

⁷ Nhũm Jejus arĩ mẽ ahkre nê mẽ kãm:

—Nê ja. Kot kaj mẽ amã mẽ àpênh xwỳnh kwỳjaja nhũm hõ amã mẽmoj tã àpênh o pa ê ho anhỹr pa. Hãmri tanhmã kot kaj kãm akapêr to wehe? Xà kot kaj kãm: “E hãmri axãpênh ta kaga nê tẽ nê nhỹ nê apku.” Anhỹr o kãm akapêr?

⁸ Nà kot kaj kãm anhỹr kêt nê. Kot kaj kãm: “E kwa tokyx tẽ nê hpãnhã inhmã inhõ hã apê. Kot pa ixãpkur pa ka ixpãnhã nhỹ nê apku.” Anhỹr kãm akapêr. Kêp amã àpênh xwỳnh jakamã ka ã kãm akapêr anê.

⁹ Ja pyrã nê kot puj mẽ Tĩrtũm kot mẽ pamã mẽmoj tã karõ xà hkôt tanhmã kãm amnhĩ nhĩpêx to ho ri papa. Mẽ õ patrãwta pyrã nê kot tanhmã mẽ pamã karõ hto xà hkôt pu mẽ amnhĩ nhĩpêx.

—Xà na htem mẽ õ pa-trãw mã mẽmoj tã àpênh pa

hãmri nê hkwỳjê mã amnhĩ to jarkrar o ri pa nê mẽ kãm: “E ka mẽ ixpumu. Na pa hte inhõ patrãw mã ixãpênh mex o mẽ hakre ka mẽ ja hã ixpumu. Hêxta waa nê. Mon pa hte ri axtem ã amnhĩ nhĩpêx anê?” Anhỹr o xà kot kaj mẽ kãm amnhĩ to jarkrar o ri apa? Nà na ka htem ã amnhĩ nhĩpêx anhỹr kêt nê.

¹⁰ —Tã pa hte mẽ õ patrãwta pyrã nê tanhmã mẽ amã mẽmoj tã karõ hto ho ixpa. Jakamã kêr ka mẽ inhma nê ixte mẽ amã mẽmoj tã karõ xà hkôt tanhmã inhmã amnhĩ nhĩpêx to ho ri apa. Hãmri nê hã amnhĩ to jarkrar pê amnhĩ jarênh o: “Ám hãmri na pa ã Jejus mã amnhĩ nhĩpêx anê. Hêxta waa nê. Ixpê Jejus mã tanhmã ixte amnhĩ nhĩpêx to mex xwỳnh na pa.” Anhỹr o amnhĩ to jarkrar kêt nê. Kêt ãm amnhĩ jarênh o: “Nà ixte kãm tanhmã amnhĩ nhĩpêx to ho ixpa xwỳnh pix na pa. Na hte mẽmoj tã inhmã karõ pa kuma nê ý hã tanhmã kãm amnhĩ nhĩpêx to.” Anhỹr o amnhĩ jarênh o ri apa. No ri amnhĩ krã hkôt atỳx tanhmã amnhĩ to jarkrar to ho ri apa hkêt nê. Anê.

Jejus kot mẽ ho 10 nê akupỳm mẽ ho mex ã harênh

Matêwre 8.1-4

¹¹ Tã nhũm Jejus arĩ Garirej rũm pika pê Samar hkàx ã Jerujarê hwỳr kormã mõ.

¹² Nê nhỹri krĩ hõ htêp o mõi mẽ nhũm krĩ pu hã ri mẽ pa xwỳnhjaja kêp 10 nê kutã mra. Mẽ hkãnhy hkro

htÿx xwÿnhjaja kutã mra nẽ hkaxpa nẽ amÿm kuhê nẽ omu.

¹³ Hãmri nẽ kãm:

—Pa Pahihti. Kwa mẽ ixpumu nẽ mẽ ixkamã axukapĩ nẽ tanhmã mẽ ixto mex to. Anẽ.

¹⁴ Hãmri nhũm mẽ kãm:

—Tõe. Nà kot paj mẽ ato mex. E mẽ mãmri awjanã nẽ ma akupÿm mẽ anhõ patrejê hwÿr mra kê mẽ akupÿm mẽ akà mex ã mẽ apumu. Anẽ.

Hãmri nhũm mẽ kuma nẽ kapêr mar xà hkôt awjanã. Kà nhy rãhã awjanã nẽ ma akupÿm patre hwÿr mra. Nẽ kormã akupÿm hwÿr pry hã mram rãhã piitã hkà mex pa.

¹⁵ Hãmri nhũm ãm pyxi nẽ hkwÿjê rom awjanã nẽ akupÿm Jesus wÿr Tirtũm mã mex o mex ã harênh o hwÿr tẽ.

¹⁶ Hãmri nẽ Jesus kaxpa nẽ kutã hkõnkrã ho tẽm nẽ nhÿ nẽ amnhĩ tã kãm kot ho mex ã kãm amnhĩ jarê. Kwÿjê hkĩnhã kêp Ijaew kêt axtem kêp Samar nhõ xwÿnh tã mẽ kurom akupÿn hwÿr tẽ nẽ kãm mex o mex ã harê.

¹⁷⁻¹⁹ Hãmri nhũm amnhĩ tã kuma nẽ kãm:

—No mẽ akwÿjaja? Ixte mẽ ato 10 nẽ mẽ ato mex tã ka ãm kapxipix awjanã nẽ akupÿn ixwÿr tẽ. Akwÿjê hkĩnhã apê Ijaew kêt tã akupÿm amnhĩ mex ã amnhĩ pumu hãmri nẽ mẽ kurom awjanã nẽ Tirtũm mã mex o mex ã harênh o ixwÿr tẽ. Hêxta waa nẽ. Mo na hte ixkwÿjaja apyrã nẽ amnhĩ kaxyw ixkôt hamaxpêr kêt nẽ? E kãnhmã xa nẽ mãmri ma ajamakêtkati

nẽ akĩnh nẽ ma akupÿm tẽ. Anẽ.

Jesus akupÿn wrÿk xà hã arigro jarênh

Matêwre 24.23-24, 24.37-44; Makre 13.32-37; mãânênh Wam Tesarôn 5.2-8; Sikũn Pêtre 3.3-10

²⁰⁻²¹ Tã nhũm Parijew nhõ xwÿnh kwÿjaja Jesus wÿr mra nẽ omu nẽ kãm:

—Kwa mẽ inhmã mẽmoj jarê. Xà koja apu Tirtũm tokyx kot mẽ pahwÿr mẽnh mã xwÿnhnta mẽ nhũm mẽ pahwÿr wrÿ nẽ mẽ pahto amnhĩptâr kurê kumrêx nã kormã? Anẽ.

Hãmri nhũm mẽ kuma nẽ mẽ kãm amnhĩ jarê. Te ho nhãm mẽhõ jarênh pyrã nẽ mẽ kãm:

—Nà ra kot mẽ ho amnhĩptâr o pa kênã. Nom nhÿri hkrĩ xà kamã mẽ ho amnhĩptâr o hkrĩ hkêt nẽ. Na htem amnhĩ kaxyw hkôt hamaxpêr nẽ hkôt amnhĩ xunhwÿ hãmri nhũm kêp mẽ õ pahihti hã mẽ ho amnhĩptâr o pa. Nẽ mẽ kãm mẽ hamaxpêr mex gõ nhũm htem hkôt ri hamaxpêr mex o pa. Anẽ.

²² Hãmri nẽ hpãnhã hkôt mẽ pa ho mẽ pa xwÿnhjê mã kapêr. Mẽ kot nhÿrmã tee ri kamã hamak o pa hã mẽ kãm kapêr nẽ mẽ kãm:

—Kot kaj mẽ nhÿrmã tee ri amã tokyx akupÿn ixwrÿk nẽ ixte mẽ ato amnhĩptâr prãm xà tee ri inhmã anojarêt kaprÿ ho ri apa. Nẽ axpên mã ri ijarênh o: “Hêxta waa nẽ. Mo na we Pahihti tokyx akupÿn mẽ pahwÿr wrÿk kêt

ně?" Anhÿr o inhmã anojarêt o ri apa pê ixkamã ajamak rãhã ho apa.

23 —Ně koja mẽ ra akupÿn ixwrÿk ã tanhmã mẽ amã ixto hêx to ho pa. Nhÿri ixkuhê nhÿm mẽ kot ixpumnh ã mẽ amã ixto hêx o pa. Nom kêr ka mẽ ama ně ãm mẽ ama.

24 Kot paj nhÿrmã akupÿn mẽ awÿr ixwrÿk kaxyw nhÿm mẽ pika piitã hkôt akupÿn ixwrÿk kãm anhîpê ixpumu. Te mẽ piitã mẽ kot anhîpê na jaxênh pumnh pyrãk o kot kaj mẽ apiitã ixpumu.

25 Nom kormã jar pika ja kamã ixpa ri koja mẽ ohtô ně ixkaga pa amnhî xà htÿx kamã ijamak kãm ty. Hãmri ně mẽmo arÿgro hã ma akupÿm kaxkwa hwÿr api. Hãmri ně nhÿrmã akupÿn mẽ awÿr wrÿ.

26 —Nã kot paj nhÿrmã man akupÿn mẽ awÿr wrÿ. Akupÿn ixwrÿk xà hã arÿgrota ã koja jar pika ja kamã mẽ pa xwÿnhjaja htÿx ri tanhmã amnhî tomnuj to ho pa. Te amnepêm finat Noehti htÿr ri mẽ kot htÿx ri tanhmã amnhî tomnuj to ho pa pyrãk o koja mẽ amnhî nhîpêx o pa.

27 Na prem amnhî kaxyw Tÿrtÿm mã hamaxpêr o pa hkêt ně. Ně ãm jar pika ja kamã mẽ kot amnhî nhîpêx pix kukamã hamaxpêr o ri paja o ãm kôt pix mã tanhmã ri amnhî nhîpêx to ho pa. Rôm nhÿm Noehti gô htãm py-maj pãr raxja nhîpêx ně kãm axã. Nhÿm prem hã omu ně ãm omunh o pa ně tanhmã

ri amnhî kukamã hamaxpêr to hkêt ně. Tã nhÿm nata mẽ haêr pê wrÿ. Hãmri ně wrÿk rax o ra pika piitã hanhi nhÿm mẽ piitã pikaprãr pa.

28 —Akupÿn ixwrÿk xà hã arÿgrota ã koja mẽ mãânên te amnepêm Sotô nhô xwÿnhjaja kot htÿx ri tanhmã amnhî tomnuj to pyrãk o amnhî nhîpêx. Finat Rohti kormã htÿr ri mẽ kot htÿx ri tanhmã amnhî tomnuj to ho pata pyrãk o koja mẽ amnhî nhîpêx. Na pre hte Sotô nhô xwÿnhjaja ãm pika ja kamã mẽ kot amnhî nhîpêx pix kukamã hamaxpêr o ri pa. Ně ãm kôt pix mã ri amnhî nhîpêx o pa. Ně htÿx ri amnhî xãpkur xà pix kukamã hamaxpêr. Ně mẽ hpur kãm ri àpênh pix kukamã hamaxpêr. Ně ri amnhî xujaprôr pix kukamã hamaxpêr ně xapên mã mẽmoj to wênê pix kukamã hamaxpêr. Ně amnhîm ôrkwÿ nhîpêx pix kukamã hamaxpêr. ã na prem pika ja kamã mẽ kot amnhî nhîpêx pix kukamã hamaxpêr o ri pa anhÿrja o amnhî kaxyw Tÿrtÿm mã hamaxpêr o pa hkêt ně.

29 —Tã nhÿm Rohti mẽ ô krÿ rÿm kator mẽ nhÿm Tÿrtÿm krÿ nhô xwÿnhjaja kot amnhî tomnuj tÿx o paja mÿrapê mẽ himex pa. Jao kaxkwa rÿm mẽ hipy mẽmo hpôk kwÿ rē nhÿm mẽ hkaxàr pa.

30 Tã akupÿn mẽ awÿr ixwrÿkja mẽ koja mẽ te Rohti nhô krÿ kamã mẽ kot amnhî nhîpêx pyrã ně htÿx ri amnhî tomnuj pix o pa.

31 —Nē akupÿn ixwrÿÿta ã ka mẽ anhõrkwÿ nhĩmõk ã hkrãmnênh o akrĩ japêr nē akupÿn ixwrÿk kãm ixpumu. Hãmri nē akukrêx wÿr axàr nē hõ hpyr mã ajamexpêr kêt nē. Rÿ ka mẽ apur kãm axapênh o akuhê japêr nē akupÿn ixwrÿk kãm ixpumu. Hãmri nē akupÿm anhõrkwÿ hwÿr atêm mã ajamexpêr kêt nē. Mo kaxyw kot ka kêt hwÿr têt? Kêt ãm inhmã mẽ ajapê mã akupÿn mẽ awÿr ixwrÿk mã ajamexpêr o akĩnh nē ixpumunh o akuhê.

32 —Nē kêr ka mẽ Rohti prõ kot tanhmã amnhĩ nhĩpêx toja mã ajamexpêr rãhã ho ri apa. Na pre Tĩrtũm kapêr nhĩrõp xa nē amnhĩ katut kõt Sotõta wÿr rĩt hãmri nē ã amnhĩ nhĩpêx anhÿrja mÿrapê htyk kurê kumrêx. Tã kêr ka mẽ ho uràk nē amã akukrêx rax japê xàj ixkõt amõr kaxyw anhĩtõt kêt nē.

33 —Nē kwa kêr ka mẽ jar pika ja kamã tanhmã mẽ ate amnhĩ nhĩpêx to pix kukamã ajamexpêr o ri apa hkêt nē. Nē mẽ akukrêx rax pix kukamã ajamexpêr kêt nē. Koja nhÿrmã ja piitã mẽ apê hapêx pa. Mẽ ate kãm anhĩhkra karo hpar pyràk o piitã hipêx hãmri nhũm Tĩrtũm ja mã mẽ apumu nē hpãnhã nhÿrmã mẽ amã mẽmoj mex nhõr rax nē.

34 —Nē kot paj kamàt kãm akupÿn ixwrÿk japêr nhũm nhÿri mẽhõ ra ixkõt amnhĩ xãm xwÿnh mẽ mẽhõ kot ixkõt amnhĩ xãm kêt xwÿnh wa par kãm nõr japêr. Hãmri

pa amnhĩ wÿr ra ixkõt kot amnhĩ xãm xwÿnhhta o api nhũm kot ixkõt amnhĩ xãm kêt xwÿnhhta arĩ gõr nē nõ.

35 Rÿ pa arĩgro mã akupÿn ixwrÿk japêr nhũm mẽnijê hõ wa hamêxkrut nē harõj kahuk o ãm japêr. Hãmri pa ra kot ixkõt amnhĩ xãm xwÿnhja ho api nhũm kot ixkõt amnhĩ xãm kêt xwÿnhja ahte arĩ harõj kahuk o xa. Hãmri nē hamexpêr mex kêt kumrêx o xa.

36 Rÿ koja mẽmyjê hõ wa axkrut nē hpur kãm apênh o ãm japêr. Pu pa amnhĩ wÿr kot ixkõt amnhĩ xãm xwÿnhhta o api nhũm kot ixkõt amnhĩ xãm kêt xwÿnhhta pur kãm ahte arĩ apênh o xa. Hãmri nē tee ri hkrãmnhwÿ hkukamã hamexpêr o xa. Anê.

Nhũm pre ã Jejus hkõt mẽ pa ho mẽ pa xwÿnhjê mã amnhĩ jarênh anê.

37 Hãmri nhũm mẽ kuma nē kãm:

—Kwa nhÿri koja mẽmoj ã amnhĩ nhĩpêx anê? Anê.

Hãmri nhũm mẽ kãm:

—Nà koja nhÿri mẽmojja ã amnhĩ nhĩpêx anê ka mẽ omunh kurê kumrêx. Te nhÿri mẽmoj kro nē nõr nhũm nhõnhti kot omunh nē mã htor nē hpinhĩpanh nhũm mẽ kot mã omunh kurê kumrêxta pyràk. Anê.

18

Mẽ pahte Tĩrtũm mã amnhĩ jarênh rãhã ho papa mã mẽ pamã karõ

Rukre 11.5-8; mããnên Wam Tesarõn 5.17

¹ Tã nhũm Jejus hkôt mẽ pa ho mẽ pa xwỳnhjê mã mẽmoj tã karõ. Mẽ kot tanhmã Tĩrtũm mã amnhĩ jarẽnh to hã mẽ kãm karõ. Mẽ kot xatã kãm amnhĩ jarẽnh o pa nẽ amnhĩ kaxyw kãm hamaxpěr rãhã ho pa kaxyw. No ãm hã kuxi nẽ tanhmã mẽ kãm hã ujarẽnh to nẽ mẽ kãm:

² —Koja nhỹri krĩ hõ kamã juistija kãm Tĩrtũm prãm nõkati. Nẽ mããnẽn kãm amnhĩ kwỳjê hprãm nõkati htã kệp juisti nẽ tanhmã mẽ kãm kapěr to ho hkrĩ.

³ Jakamã nhũm mẽhõ ni pẽ mjên htyk xwỳnh. Nhũm hte mẽhõ xatã tanhmã kệp õ mẽmoj to ho pa. Hãmri nhũm tee ri amnhĩ tã omu nẽ xatã juistita wỳr mra nẽ kãm harẽ nẽ kãm: “Xê gàa nẽ. Na hte pahkwỳjê hõja ix-tomnuj rãhã ho pa. Xê ixtã tanhmã kãm akapěr to kê tãm inhĩpêx.” Anẽ. Nẽ xatã hwỳr mra nẽ amnhĩ to kuwỳ nẽ xatã hwỳr mra nẽ amnhĩ to kuwỳ.

⁴⁻⁵ No nhũm kuma nẽ ãm kuma. Kãm hkwỳjê ho ajuta hprãm kêt jakamã ãm kuma. Tã nhũm xatã hwỳr mra. Gaa nhũm rĩ kãm mar kaga nẽ. Hãmri nẽ hamaxpěr o: “Tk. Hêxta waa nẽ. Jahti na hte xatã ixwỳr mra nẽ tanhmã inhmã amnhĩ jarẽnh to. Nẽ ãm xatã ixwỳr mra. Nà na pa ra inhmã mar kagyk nẽ. E pa tokyx tanhmã nẽ kot tanhmã ho xwỳnhhta mã ixkapěr to. Inhmã Tĩrtũm pyma kamã rỳ inhmã ixkwỳjê kaprĩ kamã pa tanhmã nẽ kãm nẽ hkêt tã

kot pa anhỹr kêt nhũm amnhĩ tã inhmã harẽnh pix nẽ pa ra mar kurê ixkrã tãtãk nẽ.” Anhỹr o hamaxpěr. ã mẽ ujarẽnh kot anhỹr.

⁶ —Juisti tãm hamaxpěr kêt tã nhũm nija xatã hwỳr mra nẽ amnhĩ to hwỳr jakamã nhũm jatã tanhmã ho ajuta hto.

⁷⁻⁸ No kêt Tĩrtũmja. Xàn ka htem mẽmoj tã awỳ nhũm juisti punutita pyrã nẽ mẽ ama nẽ ãm mẽ ama? Nà koja ã amnhĩ nhĩpêx anhỹr kêt nẽ. Kot ka mẽmoj tã kãm amnhĩ jarẽ nhũm ama nẽ tanhmã amã mẽmoj to rỳ tanhmã amã amnhĩ nhĩpêx to. Juistita rom mẽ pakamã ukaprĩ xwỳnh na. Tã kot paj nhỹrmã akupỹn wry nẽ mẽ apumu ka mẽ arĩ amnhĩ kaxyw hkôt ajamaxpěr mex pẽ kãm amnhĩ jarẽnh rãhã ho ri apa pa ja hã mẽ apumu nẽ ixkĩnh tỳx nẽ. Ja na inhmã hprãm. Anẽ.

Tanhmã mẽ kot Tĩrtũm mã amnhĩ jarẽnh to hã mẽ harẽnh

Matêwre 6.5-8; mããnẽn Wam Pêtre 5.5-6

⁹ Tã nhũm Jejus mẽ kot amnhĩ to mex o hkwỳjê jakrenh ã amnhĩ to jarkrar o ri mẽ pa xwỳnhjê pumu nẽ tanhmã mẽ kãm kapěr to. Nom mẽ kot amnhĩ to jarkrarta ã kuxi nẽ mẽ kãm awjarẽ nẽ mẽ kãm:

¹⁰ —Koja mẽhõ wa hamẽxkrut nẽ Tĩrtũm mã amnhĩ jarẽnh kaxyw wa tẽ. Ja kệp Parijew nhõ xwỳnh nhũm hõja kệp mẽ õ pahi mã hkwỳjê pẽ kãxpore hkwỳ jamỹnh xwỳnh. Nhũm wa

Tirtūm mā amnhĩ jarēnh xà hã ixkre hwÿr wa tēn axà.

11-12 Hāmri nhūm Parijew nhõ xwÿnhhta kumrēx tē nē nhÿri mē piitā mē noo mā Tirtūm mā amnhĩ jarē. Nē amnhĩ to jarkrar pē kām amnhĩ jarēnh o: “Pa Tirtūm. E ra ate ixpumunh mex. Na pa hte amnhĩ to mex pix o ri ixpa. Ra ate ja hã ixpumunh mex. Na pa hte kàxpore hkwy jamÿnh xwÿnh nēj rom tām amnhĩ nhĩpēx. Nē semān piitā hã ixàpkur kēt rāhā amā amnhĩ jarēnh rāhā ho ixtā apkati axkrut. Nom ja pix kēt. Na pa hte määnēn ixàpēnh pānhā kàxpore jamÿ nē mē kot amā tanhmā amnhĩ nhĩpēx to ho pa xwÿnhjē mā hkwy nhõr o ixpa. Nē na pa hte ri ixàhkīnh o ri ixpa hkēt nē. Nē nhām mē kēp mē hprõ ho amnhĩkati ho ri ixpa hkēt nē. Na pa hte mē piitā mē kurom tām amnhĩ nhĩpēx ã amnhĩ pumu nē ixkīnh tÿx kumrēx. Hēxta waa nē. Mon pa hte ri ã amnhĩ to mex o ixpa anē?” Anhÿr o Tirtūm mā amnhĩ to jarkrar pē kām amnhĩ jarēnh o xa.

13 —Hāmri nhūm hpānhā mē kēp kàxpore hkwy jamÿnh xwÿnhhta haxwÿja Tirtūm mā amnhĩ jarē. No ãm Parijew nhõ xwÿnhhta rom ki hkwyjē pē awry nē ahte hipô nē kām amnhĩ jarē. Nē kām amnhĩ jarēnh pē amnhĩ tak nē mur nē kām: “Kwa Tirtūm. Na pa hte amnhĩ tomnuj tÿx o ri ixpa. Nē ixtÿx ri amā prām xà kuhpa hã tanhmā amnhĩ nhĩpēx to. Na pa tee ri ja hã

amnhĩ pumu nē ixkaprĩ htÿx nē. ã inhmā amnhĩ nhĩpēx anhÿr o ri ixpa hprām kēt tā pa hte ã amnhĩ nhĩpēx anhÿr o ri ixpa. Kwa xà kot ka ixkamā axukaprĩ nē amnhĩ katut kôt ixte amnhĩ tomnuj rēnh pa Tirtūm?” Anhÿr o kām amnhĩ jarē.

14 —Hāmri nhūm Tirtūm hamē wa kot kām amnhĩ jarēnh ma no ãm wamta ma nē ãm kuma. No kēt hkôt hōja ma hāmri nē kot kām amnhĩ tā àhwÿr xà hkôt amnhĩ katut kôt kot amnhĩ tomnuj rēnh pa nē ho hkra. Jakamā nhūm mex nē hkīnh nē pa. Ra tām hkrā hāmri nē hkīnh nē ma htēm kurē kumrēx. ã mē ujarēnh kot anhÿr. ãm hāmri na pa mē amā ja jarē. Koja mēhõ Parijew nhõ xwÿnhhta pyrā nē kot amnhĩ to mex xwÿnh ã amnhĩ kamnhix hāmri nē Tirtūm kot amnhĩ katut kôt kot amnhĩ tomnuj rēnh kaxyw amnhĩ to hwÿr kēt nē. Koja ãm kām amnhĩ to jarkrar pix nē. Jakamā koja Tirtūm te kot mar nē ãm mar pyrāk o hipēx. No koja mēhõ kot kàxpore hkwy jamÿnh xwÿnhhta pyrā nē tee ri tanhmā amnhĩ tomnuj to hã amnhĩ pumu nē hkaprĩ nē. Hāmri nē amnhĩ to Tirtūm wÿ nhūm kuma nē tanhmā ho mex to. Anē.

Jejus kot amnhĩ wÿr mēhprĩrējē hwÿr ã harēnh

Matēwre 19.13-15; Makre 10.13-16

15 Tā nhūm Jejus mē hkôt mē pa ho mē pa xwÿnhjaja arĩ pry hã Jerujarē hwÿr mō

nhũm Ijaew kwỳjaja mẽ omu nẽ mẽ hkrare jamỳ nẽ Jesus wỳr mẽ o mra. Kot mẽ hã ìhkra jaxwỳr nẽ mẽ ho Tìrtũm wỳr kaxyw. Hãmri nhũm hkõt mẽ pa ho mẽ pa xwỳnhjaja tee ri ja hã mẽ omu nẽ nẽ mẽ kãm kapēr nẽ mẽ kãm:

—Tk. Kwa mẽ ma akupỹm mẽ akrata o mra nà? Mo kaxyw na ka mẽ Jesus wỳr mẽ o mra? Kormã mẽ ràxre kênã. Anẽ.

16 Hãmri nhũm amnhĩ tã mẽ kuma nẽ mẽ kãm:

—Tk. Kwa nà mẽ ri inhnẽ mēhprĩjẽ kurẽ hkêt nẽ. Kwār mẽ māmri ixwỳr mẽ o mra. Anẽ.

Hãmri nẽ amnhĩ wỳr mẽ kãm hpa ho apê nhũm mẽ hwỳr mẽ o mra nhũm mẽ kuri kuhê. Hãmri nhũm hkõt mẽ pa ho mẽ pa xwỳnhjẽ mã kãm:

—E mẽ jareja mẽ omu. Na htem hamakêtkati nẽ hkĩnh nẽ ri pare. Nẽ kãm amnhĩ to rũnh prãm kêt nẽ ri pa. Tã Tìrtũm kõt mẽ kot amnhĩ nhĩpêx xwỳnhjaja na htem mẽ uràk nẽ kãm amnhĩ to rũnh prãm kêt nẽ ri pa.

17 —Jarejaja na htem hipêêxà nẽ katorxà wa kapēr ma nẽ wa hkõt ri amnhĩ nhĩpêx mex o ri pa. Tã ixpê Tìrtũm kot mẽ awỳr inhmēnh xwỳnh kot ka mẽ amã ixkõt amnhĩ xunhwỳr prãm. Hã kot kaj mẽ te ho jarejẽ kot amnhĩ nhĩpêx pyràk o amnhĩ nhĩpêx. Jao ixkapēr ma nẽ ixkõt ri tanhmã amnhĩ nhĩpêx mex to ho ri apa. Anẽ.

*Kàxpore rax xwỳnh jarēnh
Matêwre 19.16-30; Makre*

10.17-31; mãănēn Wam Ximotre 6.6

18 Tã nhũm Ijaew nhõ pahiti hõja Jesus wỳr tẽ nẽ kãm kapēr nẽ kãm:

—Pa? Mẽ ijahkre xwỳnh maati? Kwa inhmã mẽmoj jarẽ. Tanhmã kot pa we nhỹrmã Tìrtũm ri ixtĩr tũm nẽ ixpa kaxyw amnhĩ nhĩpêx mex to ho ri ixpa wehe? Anẽ.

19 Hãmri nhũm kãm:

—Xà ate ixpê Tìrtũm kwỳ hã ixpumunh kõt na ka ixte uràk nẽ amnhĩ to mex xwỳnh ã ijarẽ? Tìrtũm pix na kot amnhĩ to mex rãhã xwỳnh jakamã kot kaj ã ijarēnh anhỹr jao ixpê Kra hã ijarẽ. Nẽ uràk nẽ ixte amnhĩ to mex xwỳnh ã ijarẽ. Nà xàn ka ãm atỳx ri amnhĩ krã hkõt ã ijarēnh anẽ?

20 —Tìrtũmja mex o mex xwỳnh jakamã kot kaj amã nhỹrmã kuri atĩr tũm nẽ apa hprãm hãmri nẽ ra kot mẽmoj tã mẽ amã karõ xà hkõt amnhĩ nhĩpêx o ri apa. Ra ate mar mex kênã. Na pre mẽ amã:

Kêr ka mẽ axpēn pē axàhkĩnh hkêt nẽ.

Nẽ mẽ axpēn par kêt nẽ.

Nẽ mẽ axpēn to axêx o ri apa hkêt nẽ.

Nẽ mẽ axpēn pē aprõ ho amnhĩkati hkêt nẽ.

Nẽ mẽ anhĩpêêxà mẽ akatorxà wa hã apijaam pē wa kutã anojarêt pix o ri apa.

E kot kaj amã nhỹrmã Tìrtũm kuri atĩr tũm nẽ apa hprãm hã kêr ka ã amnhĩ nhĩpêx anhỹr o ri apa. Anẽ.

21 Nhũm pre ã Jejus kãm kapêr anê nhũm kuma nê kãm:

—Kwa ixprĩre ri ra ã ixte amnhĩ nhĩpêx anhÿr o ri ixpa kênã. Nom ixte ixtĩr tũm nê ixpa kaxyw kormã ixte tãm kêt pyræk. Anê.

22 Hãmri nhũm Jejus kãm:

—Nà kormã mẽmoj pyxire nê arĩk. Na ka amã akukrêx rax japê htÿx o Tĩrtũm jakre. Jakamã kêt ka ma akupÿm tẽ nê akukrêx o wênê hpa nê hpãnhã kàxpore jamÿ hãmri nê ma mẽ kêp amrakati xwÿnhjê mã òr pa. Hãmri nê rĩ akupÿn ixwÿr tẽ nê ixkôt apa ho apa. Anê.

23 Hãmri nhũm kuma nê tee ri amnhĩ kukamã hamaxpêr. Kãm kukrêx rax japê nê kãm ìhkra karo hprãm kêt nê. Jakamã tee ri Jejus kot ã kãm hã karõ anhÿrja ma nê awjanã nê ma akupÿm tẽ.

24 Hãmri nhũm tee ri ja hã omu nê hã mẽ kot mar xwÿnhjê mã kapêr nê mẽ kãm:

—Hêxta waa nê. Koja mẽ hikukrêx rũnh xwÿnhjaja ohtô nê kãm mẽ hikukrêx japê xàj Tĩrtũm mẽ wa ixri htĩr tũm nê pa ho papa hkêt nê. Wa ixte amnhĩ nhĩpêxja mẽ kêp hihtÿx.

25 Na htem kãm hikukrêx rax mã ìhkra karo hprãm kêt rãhã tee ri kãm Tĩrtũm kôt amnhĩ nhĩpêx prãm kaprÿ. Te ho mẽhõ kot menh kagô hã hkre nê kãm kagô katõk prãm kêt rãhã kãm guhkrax kãm àr prãm kaprÿta pyræk. Anê.

Nhũm pre ã Jejus mẽ kãm kapêr anê.

26 Hãmri nhũm mẽ kuma nê tee ri amnhĩ kukamã hamaxpêr nê kãm:

—Kwa nom mẽ ixpiitã mẽ inhmã mẽ ixkukrêx japê kênã. Jakamã xà kot paj mẽ ixpiitã nhÿrmã war ari ixtĩr tũm nê ixpa ho ixpa hkêt nê nà? Anê.

27 Hãmri nhũm mẽ kãm:

—Nà kot kaj mẽ amnhĩ krã hkôt mẽ amã mẽ akukrêx japêja mã anhũrer kêt nê. Tĩrtũm pix na hte ã mẽ kot amnhĩ nhĩpêx anhÿr kaxyw tanhmã mẽ hkrã hto nhũm mẽ kãm mẽ hikukrêx japê htÿx kêt nê. Jao mẽ kêp Tĩrtũm mẽ wa ixri htĩr tũm nê mẽ pa ho pa mã xwÿnh. Anê.

28 Hãmri nhũm Simãw Pêtre kãm:

—Kwa Pahihti no mẽ pajaja? Na pa prem agryk ã mẽmoj piitã hkaga hpa nê akôt ixpa ho ixpa. Jakamã kot paj mẽ nhÿrmã war ari ixtĩr tũm nê ixpa ho ixpa nà? Anê.

29 Hãmri nhũm kãm:

—Tÿ. Nà ka mẽ atõ inhmã tanhmã amnhĩ nhĩpêx to ho apa kaxyw akwÿjê re nê ma inhmã tanhmã amnhĩ nhĩpêx to ho ri apa. Anhõrkwÿ re rÿ atõ rÿ atõx rÿ aprõ nê akrajê re. Rÿ akatorxà nê anhĩpêxà war are. Rÿ akukrêx piitã rer pa hãmri nê ma ixkapêr o mẽ piitã mẽ ahkre ho ri mẽ hkôt apa.

30 Hã kot paj ja hã mẽ apumu nê mẽ ato mex rax nê. Hãmri ka mẽ ma nhÿhÿm apa nê nhÿri mẽ kãm ixkapêr jarênh o ri mẽ hkôt apa nhũm mẽ kot mẽ amar xwÿnh kwÿjaja mẽ ama nê ra kãm mẽ

akĩnh nē. Nē ra mē ate akwỳjê rer par tā nhũm mē tãmjaja te mē apê mē hkra rỳ mē htõ rỳ mē htõx pyræk o mē anhĩpêx nē tanhmã mē ato mex to ho pa. Hãmri ka mē nhỹmã ty nē ma Tĩrtũm mē wa inhõ krĩ hwỳr api hãmri nē wa ixkuri amex kumrêx nē atĩr tũm nē apa ho apa. Anē.

Nhũm pre ã Jejus Simãw Pêtre mē hkwỳjê mã kapêr anē.

Jejus kot axte htyk kukamã amnhĩ jarênh

Matêwre 20.17-19; Makre 10.32-34

³¹ Tã nhũm Jejus mē kot ÿ hã kapêr jarênh o mē pa xwỳnh pê 12jaja mē hkwỳjê pê mē ho kato. Nē nhỹri mē hkàx ã mē o xa nē tanhmã mē kãm amnhĩ jarênh to nē mē kãm:

—Amnepê m Tĩrtũm nhỹ hã kapêr jarênh xwỳnhjaja na prem ixkukamã tanhmã mē kot inhĩpêx to hã ijarê nē ixtã kagà. Tã pu mē ra Jerujarê hwỳr mō. Kamã koja mē tanhmã ixto rax nē. Ra mē kot ixkukamã ijarênh nē ixtã kagà xà hkôt koja mē ixto anē.

³²⁻³³ Koja mē kãm ixkurê xwỳnhjaja ixpynê nē Rõm nhõ xwỳnhjê nhõ pôristi hwỳr ixto tẽ nē mē kãm ixto hêx nhũm mē kuma nē mē mar xà hkôt tanhmã inhĩpêx to. Nē mē hkwỳjaja ixtã hpêr o axkê nē akunha. Nē mē hkwỳjaja ixto kapêr punuj nē ijapry nē ixtã argõx rē nē ixtak. Hãmri nē ixpĩ. ã koja mē inhĩpêx anē. Nom kot paj ãm ixtyk ã apkati axkrunêpxi

nhũm Tĩrtũmja akupỹm ixto ixtĩr. Anē.

³⁴ Hãmri nhũm mē kuma nē tee ri htyk nē akupỹm htĩrja kukamã hamaxpêr no ãm hprĩ hã hkôt hamaxpêr kêt nē.

Jejus kot no hkre xwỳnh o mex ã harênh

Matêwre 20.29-34; Makre 10.46-52

³⁵ Tã nhũm Jejus mē kormã Jerujarê hwỳr Jerikoja têp o mō. Hãmri nhũm pry nhĩhkjê hã no hkre xwỳnhja àhwỳr o nhỹ.

³⁶ Hãmri nē amnhĩ wỳr mē mrar ma. Mē ohtô nē Jejus kôt mē mrar xwỳnhjê mrar ma nē mē kãm:

—Kwa mēmo ri? Mēmoj wỳr na ka mē axohtô nē mra? Anē.

³⁷ Hãmri nhũm mē kãm:

—Nà Jejus pê Najare nhõ xwỳnh kôt na pa mē mō. Anē.

³⁸ Hãmri nhũm mē kuma nē kàx pê Jejus mã kapêr nē kãm:

—Pa Jejus? Apê mē inhõ Pahihti mex na ka. Te apê amnepê m anhĩgêt pahihti Tawi kot amnhĩ nhĩpêx pyræk. Jakamã kwa ixkamã axukapry nē akupỹm ixto mex kêt wehe. Ixte amnhĩ kaxyw akôt ijamaxpêr xwỳnhjê hõ na pa. Anē.

³⁹ Hãmri nhũm Jejus kukamã mē mrar xwỳnhjaja tee ri kuma nē kãm:

—Tk. Kwa akapêr kêt nē nhỹ nà. Anē.

Tã no nhũm ãm mē kuma nē xatã amnhĩ to hwỳr o nhỹ. Kàx pê kãm kapêr o nhỹ.

⁴⁰ Hãmri nhũm Jejus kuma nē xa nē amnhĩ wỳr hã karõ

nhũm mẽ hpa hã kupy nẽ hwỳr o tẽ nhũm kãm:

⁴¹ —Pa mo na? Tanhmã kot pa ato? Anẽ.

Nhũm kãm:

—Nà akupỹm inhmã ixrĩt mex prãm. Anẽ.

⁴² Hãmri nhũm kãm:

—Tõe. Nà ra ate amnhĩ kaxyw inhmã ajamexpër tỳx jakamã kot kaj akupỹm ri rĩt. Anẽ.

⁴³ Hãmri nhũm akupỹm rĩt mex kurê kumrẽx nẽ ja hã amnhĩ pumu nẽ hkĩnh tỳx nẽ. Hãmri nẽ ma Jejus kôt Tĩrtũm mã mex o mex ã harẽnh o mẽ hkôt tẽ. Hãmri nhũm mẽ kot hã omunh xwỳnhjaja haxwỳja Tĩrtũm mã mex o mex ã harẽnh o Jejus kôt mỗ.

19

Jakew kãm Jejus pumunh prãm ã harẽnh

Rukre 3.8, 3.12-13

¹ Tã nhũm Jejus arĩ Jerujarẽ hwỳr mỗ nẽ Jeriko hwỳr pøj. Hãmri nẽ krĩ kahti hkôt pry hã mỗ.

² Nhũm mẽ ra hkôt htu rax nẽ hkôt omunh o mỗ. Jakamã nhũm Jakew pê Rõm nhõ pahi mã kwỳjê pê kàxpore hkwy jamỳnh xwỳnhjê krãhtũm xwỳnhja. Na pre hikàxpore rax nẽ.

³ Tã haxwỳja kãm Jejus pumunh prãm nẽ. Nom ãm hakooti nẽ hprĩhti jakamã tee ri kot omunh kaxyw amnhĩ nhĩpêx nhũm mẽ kệp ãmnàr rax nẽ.

⁴ Hãmri nhũm ra hamexpër nẽ ma kukamã hprõt nẽ tẽ nẽ nhỹri pry mỳri pĩ xãm pumu

nẽ hã api nẽ kutêp ajêt. Hãmri nhũm Jejus mỗ nẽ hapa.

⁵ Nẽ kànhmã rĩt nẽ omu nẽ kãm:

—Pa Jakew. E kwa tokyx tẽn wrỳ pa ma akôt anhõrkwỹ hwỳr tẽ nẽ ari amnhĩm hikra. Anẽ.

⁶ Hãmri nhũm kuma nẽ hkĩnh nẽ. Nẽ wrỳk kurê kumrẽx nẽ ma amnhĩ kôt nẽ o tẽ.

⁷ Hãmri nhũm mẽ kot omunh o kuhê xwỳnhjaja tee ri ja hã omu nhũm ja mẽ kệp omnuj nẽ nhũm mẽ axpẽn mã harẽnh o:

—Tk. Kwa nà. Jakew kot amnhĩ tomnuj xwỳnh tã nhũm Jejus ma hkôt tẽ nẽ kuri pøj. Anẽ.

⁸ Hãmri nhũm wa õrkwỹ hwỳr axà nẽ nhỹ nhũm Jakew Jejus mã amnhĩ jarẽnh o:

—E. Nà ra ixte pahihti mã kàxpore jamỳnh xwỳnhhta na pa pre hte ho prês jakre nẽ amnhĩm hamỳnh rax nẽ. Tã kot paj akupỹm mẽ kãm õr pa. Na pa pre hte mẽ hkwyjê pê ho 10 nẽ hamỳ. Tã kot paj hipy ho 40 nẽ kurẽ nẽ akupỹm mẽ kãm ho ixpigrành pa. Á kot paj mẽ hipêx anẽ. Nẽ ixkàxpore jakrẽx kot paj ho axkjê nẽ mẽ kệp amrakati xwỳnhjê mã ho ixpigrành pa. Anẽ.

⁹ Hãmri nhũm kuma nhũm ja kãm mex nẽ. Jakamã nhũm kãm:

—Nà ãm hãmri. Ate pahkukamã panhĩgêt Apraãw pyrà nẽ jarãhã ate amnhĩ tomnuj kaga jakamã na ra jarãhã anhõrkwỹ hwỳr mẽ mex xà axà. Kojã Tĩrtũm

jarāhā amnhī katut kôt ate amnhī tomnuj rēnh pa nē axte kām hamaxpēr kêt nē.

¹⁰⁻¹¹ Mē ate amnhī tomnuj xwýnhjê hwýr na pre Tirtūm inhmē pa wrý. Te nhýri mē apikunor nhūm ixte mē ajapêr o ixpa kaxyw Tirtūm kot mē awýr inhmēnh nhūm ixwryk nē nhýri ixte mē ajapêr o ixpa nē mē amā ixkator nē ixkīnh nē ma akupým hwýr mē ato inhmōrta pyrāk. Anē.

Mē pahte Tirtūm mǎ tanhmǎ amnhī nhīpêx to

Matêwre 25.14-30

Hāmri nhūm mē ohtô nē Jejus mar o hkôt Jerujarē hwýr mra. Na prem htýx tanhmǎ kot amnhī nhīpêx to hǎ hkamnhīx o hkôt mō nē axpēn mā:

—E ma pu mē hkôt. Koja Jerujarē hwýr pōj hāmri nē kēp mē pahpê Ijaew nhō pahi nē mē pahto amnhīptār kurê kumrêx. E kwa ma pu mē hkôt. Anē.

¹² Nhūm Jejus mē hamaxpēr kôt mē omunh mex nē. Jakamǎ kot mē piitǎ mē ho amnhīptār xǎ hǎ arīgro hǎ mē kām amnhī jarēnh kaxyw. Kormǎ Jerujarē hwýr ahtêp kêt ri mē kām amnhī jarēnh kaxyw. Nom hprī hǎ mē kām hǎ amnhī jarēnh kêt nē. Ām amnhī tǎ kuxi nē mē kām awjarē nē mē kām:

—Koja nhýri krī hō kamǎ mēhō myja. Kot amnhī to rax o hkwyjê jakrenh xwýnhja. Nē krī hō kamǎ krī piitǎ hkôt pahi nhō pahihtija hāmri harēnh ma nē amnhī wýr

kuwý. Kot ma hwýr mōr nhūm ō krī kamǎ nē mǎānēn krī hkwy kamǎ kēp mē ō pahi kaxyw kot ām kaxyw nhūm hwýr nojarêt.

¹³ Hāmri nē amnhī wýr kām mē àpēnh xwýnhjê ho 10 nē tanhmǎ mē hǎ karō hto. Nhūm mē hwýr mra nhūm mē kām amnhī jarē nē mē piitǎ mē kām kǎxpore hkwy gō. Ahpýnhǎ mē kām hpýnh nē kugō nē mē kām: “E ota ixkǎxpore hkwyta. Kot kaj mē ixkutêp tanhmǎ ri inhmǎ ho rax to. Kêr pa mēmo arīgro hǎ akupýn mō kê ra ixahǎ inhmǎ ho ohtô nē pa hamý.” Anhýr o mē kām kapêr hāmri nē ma mō.

¹⁴ Hāmri nhūm ō krī nhō xwýnhjaja ra kēp mē ō pahi kaxyw harēnh ma nhūm ja mē kēp omnuj nē. Nē mē kām hkīnh kêt jakamǎ ma krī hō kamǎ kot mē kaxyw ām xwýnhta wýr hkwy rē nhūm mē ma hwýr mra nē hwýr pōj. Hāmri nē kot mē kaxyw ām mā xwýnhta pumu nē kām: “Pa. E ot pa mē awýr mra. Kwa na ka xep ra mē ixkaxyw mē inhīōja xām kaxyw. Kwa nǎ mē inhmǎ jahti hkīnhhti hǎ. Kwa mē ixkaxyw ām kêt nē nǎ?” Anhýr o kām kapêr.

¹⁵ —Tǎ no nhūm ām mē kuma nē ām mē kuma nhūm mē awjanǎ nē mā akupým mra. Hāmri nhūm pahija mē kaxyw mē kām hkīnh kêt xwýnhta xām nhūm ma akupým ō krī hwýr mō. Mōō nē ra pōj hāmri nē amnhī wýr kām mē àpēnh xwýnhjê hǎ karō nē mē kām: “E no ixte mē amǎ kǎxpore nhōr

xwỳnhnta? Tanhmã na ka prem ixkutêp inhmã ho rax to? E mẽ inhmã agõ pa omu.” Anê.

¹⁶ —Hãmri nhũm wamta kãm: “Ota akàxpore ate inhmã òr xwỳnhnta. Na ka pre inhmã ho pyxi nê agõ pa kupy nê ho mẽmo hy hkwỳ japrõ nê hkre. Nhũm ô pa mẽ kãm ho wênê ho ri ixpa nê hpãnhã kàxpore jamỳ nê hipy amã kurê nhũm ra kêp 10. Ota. E amỳ.” Anê.

¹⁷ —Hãmri nhũm kuma nê hkĩnh nê. Hãmri nê kãm: “Nà ãm hãmri na ka ã inhmã ho rax anê. Ixte amã ho pyxi nê òr tã ka pre inhmã hamãr mex nê nhũm kànhmã axkamê nê ra kêp 10. Tã ra ixpê krĩ hkwỳ kamã mẽ ò pahi jakamã kot ka inhmã krĩ ho 10 nê inhmã hamãr o ri apa. Jakamã kwa mãmri amnhĩm kàxporeta o arĩk.” Anê.

¹⁸ —Hãmri nhũm hpãnhã hõja hwỳr tẽ nê kãm: “E ota akàxporeta. Na pa pre ho mẽmo hy hkwỳ japrõ nê hkre nhũm ô pa mẽ kãm ho wênê nê hpãnhã kàxpore jamỳ nê hipy amã kurê nhũm ra kêp 5. Tã ota. E amỳ.” Anê.

¹⁹ Hãmri nhũm kuma nê kãm: “Nà ãm hãmri. Hãmri na ka ã inhmã ho rax anê. Jakamã kot kaj hpãnhã inhmã krĩ ho 5 nê ho amnhĩptàr o apa. E mãmri amnhĩm kàxporeta o arĩk.” Anê.

²⁰⁻²¹ —Hãmri nhũm hpãnhã hkõt hõta tẽ. Nom hkwỳjê hkĩnhã ò patrãw mã tanhmã kàxpore ho rax to hkêt nê. ãm tanhmã hamaxpêr punuj to nê htỳx ri kot kêp ho õxỳ nê

amnhĩm piitã hamỳnh par nê akupỳm kãm hkwỳ nhõr kêt ã hkamnhĩx. Jakamã tanhmã kãm ho rax to hkêt nê. ãm hkupu nê o tẽ nê nhỹri kutêp kuxi. Hãmri nhũm ò patrãw amnhĩ wỳr hã karõ nhũm hwỳr tẽ nê amnhĩ nê kãm kapêr punuj nê kãm: “Tk. Ota akàxporeta. Ixte amã tanhmã ho rax tore hã. Ixte amã ho rax ronhỹx ka amnhĩm piitã hamỳnh pa nê akupỳn inhmã hkwỳ nhõr kêt nê. Rỳ ixte tanhmã apê homnuj to ronhỹx ka hã inhmã akir. Jakamã na pa tanhmã amã ho rax to hkêt nê. ãm hkupu nê o tẽ nê ho amũxu nhũm arĩ akutêp hikwỳ. Tã ota.” Anhỳr o amnhĩ nê ò patrãw mã kapêr punuj nê.

²²⁻²³ Hãmri nhũm tee ri amnhĩ tã kuma. Kot amnhĩ to mex xwỳnh nê kãm mẽ àpênh xwỳnhjê ho mex o pa xwỳnh tã ã kãm àpênh xwỳnh kot kãm kapêr anhỳrja ma nê amnhĩ tã kamã gryk nê. Hãmri nê kãm: “Tk. Kwa xà ã ixte amnhĩ nhĩpêx anhỳr? Nà ixte ã amnhĩ nhĩpêx anhỳr kêt. ã ixte amnhĩ nhĩpêx anhỳr nhũm amã ixpuma ronhỹx ka pre amã ixpuma xàj ixkàxporeta py nê ixwakre kamã amnhĩ krã hkõt tanhmã inhmã ho rax to. Tã nhỹx pa pre ra akupỳn awỳr tẽ nê hamỳ. Nà na ka ã ijarênh anhỳr o axêx nê amnhĩ krã hkõt tanhmã inhmã ho rax to hkêt nê. Mỳrapê kot paj atomnuj tỳx nê ka rĩ amnhĩ pumu. Pêr ãm ajamaxpêr punuj.”

²⁴ —Nhũm pre ã kãm kapêr

anē hāmri nē mē kot mar o kuhē xwýnhjē mā kām: “E mē atō kēp kàxpore py nē wam kot ho 10 nē hamýnh xwýnhhta mā agō.” Anē.

²⁵ Hāmri nhūm mē tee ri kuma nhūm ja mē kēp omnuj nhūm mē kām: “Kwa nà ra hikàxpore rax kēnā. Ra ate kām ho 10 nē ōr kēnā.” Anē.

²⁶ Hāmri nhūm mē kām: “ýy nom tãā. Māmri kām agō. Koja mēhō inhmā àpēnh mex pa amnhī tā omu nē kot inhmā àpēnh mexta pānhā ho mex nē. No koja inhmā àpēnh mex kēt nē pa tee ri ja hā omu nē ho mex kēt nē. E māmri kām agō.” Anē.

²⁷ Hāmri nē hpānhā mē kām: “E hpānhā mē kām ixprām nōkati xwýnhjaja. Ixte mē ho amnhīptār mā tā mē kām ixprām nōkati xwýnhjaja. Mē ma mē hwýr mra nē mē ho akuprō nē akupýn amnē ixwýr mē o mra nē inhnoo mā mē himex pa.” Anē. Ā mē ujarēnh kot anhýr. Anē.

Nhūm pre Jejus ā mē kām ujarēnh anē. Te tām kēp pa-trāwta pyrā nē ā amnhī jarēnh anē. Mē kot tanhmā amnhī nhīpēx to ho pa hā mē omunh xà hkôt tanhmā mē hipēx to hā amnhī jarē.

Jejus kot Jerujarē hwýr àr ā harēnh

Matêwre 12.1-11; Makre 11.1-11; Juāw 12.12-19

²⁸ Nhūm Jejus kormā Jerujarē hwýr mō.

²⁹ Hāmri nē ra Petake mē Petān wa htēp o mō. Hixēt pē Oriwēhti kahti ri na krī wa xa. Jakamā nhūm Jejus hkôt mē pa ho mē pa xwýnh wa ho

axkrut nē amnhī kukamā wa kumē.

³⁰ Nē wa kām:

—E. Wa ma krī mūj wýr mē ixkukamā wa tē. Nē wa hwýr pōj nē nhýri jumēnre nyw mā ē nē am ata pumu. Kormā mē kot hā hkrī hkēt xwýnhhta. Ka wa omu nē kām ē xà hpôt nē man akupýn ixwýr o tē.

³¹ Nhūm mēhō ja hā war apumu nē hā tanhmā war amā kapēr to ka wa kām ā ijarēnh anē nē kām: “Mē panhō Pahihti na hā karō pa wa hwýr tē.” Anhýr o wa kām ijarē. E wa ma hwýr tē. Anē.

³² Hāmri nhūm wa kuma nē ma hwýr htēm kurē kumrēx. Nē wa krīm pōj nhūm Jejus kot wa kām harēnh xà hkôt jumēnreta pumu.

³³ Hāmri nē kām ē xà hpôt o xa nhūm ō dōnjaja mra nē hā wa omu nē wa kām:

—Tk. Kwa mo kaxyw na ka wa ri mē ixpē mē ixkrit mā ē xà pôt o wa xa? Kwa xà kot kaj wa mē ixpē ho ahkī nà? Anē.

³⁴ Hāmri nhūm wa mē kām:

—Nà mē panhō Pahihti na wa inhmā anē pa wa tē. Wa ixte ma akupým kutā ho inhmōr kaxyw. Anē.

Hāmri nhūm mē wa kuma nē wa kām:

—Tōe. Nà wa māmri ma kām o tē. Anē.

³⁵ Hāmri nhūm wa ma akupým Jejus wýr o tē. Hāmri nē kaxyw amnhī xē hkwy hopōj nē kām ho hkô kahty nē kām ho htýx nē o xa nhūm hā nhý nē mō.

³⁶ Kormā Jerujarē hwýr hixēt ā àpir o mō. Nhūm mē kot omunh o mrar xwýnhjaja

hkĩnh nē ma hkukamã kot pry ho mex kaxyw amnhĩ xē hkwyptyr o mō.

³⁷ Hāmri nhũm mē hixēt ã api nē kormã aħpar mã wrýk o mō. Hāmri nhũm Jejus kôt mē pa ho pa xwýnhjaja kàx pê Tĩrtũm mex o mex ã harēnh o hkôt mō. Ra mē kot hkôt pikamēnh ry nē kot mē kãm aa mēmoj pumunh kêt kwý ho anhýr rax ã omunh jakamã hkĩnh nē nē Tĩrtũm mex o mex ã harēnh o hkôt mō.

³⁸ Nē harēnh o:

E ota Tĩrtũm kot mē pahwýr mēnh xwýnhhta na ra pøj.

ãm hāmri na mē pahwýr wrý. Na mex kumrēx.

Kēp mē panhō Pahĩhti mex na. Æm hāmri na pre Tĩrtũm mē pahwýr kumē.

Tĩrtũmja mex kumrēx. Mex o mex. Kukwak ri pix mã na pu htem pajamakētkati nē paxãmnhĩx ri papa rãhã ho papa.

Anhýr o Jejus kôt harēnh o mō. Ra kot mē ho amnhĩptàr kuré kumrēx ã hkamnhĩx jakamã hkĩnh nē hkôt ã kapēr o mōr anē.

³⁹ Hāmri nhũm Parijew nhō xwýnh kwýjaja mē hkôt mra nē tee ri mē kuma hāmri nē Jejus mã kãm:

—Kwa Jejus. Mē kãm anē kē mē anhĩkrē nà? Anē.

⁴⁰ Hāmri nhũm mē kãm:

—Tk. Nà kot paj mē kãm anhýr kêt nē. Æ mē kapēr anhýrja na inhmã mar hprãm. Kwār mē māmri Tĩrtũm mã mex o mex ã

harēnh o ixkôt mō. Kot mē anhýr kêt nhũm ra pikap kēn nhĩkwý xwýnhja tee ri ja hã mē omu hāmri nē tãm tanhmã amnhĩ nhĩpēx to nē mē hpãnhã tãm Tĩrtũm mã mex o mex ã harēnh o hikwý. Jakamã kwār mē māmri kapēr anē. Anē.

Jejus tee ri kot Jerujarē hkukamã hamaxpēr ã harēnh

Rukre 23.27-31

⁴¹ Nhũm mē kormã Jerujarē hwýr hpôx o mō. Kormã hixēt rũm aħpar mã hwýr wrýk o mō. Hāmri nhũm Jejus amým amnhĩ hkukamã Jerujarē nhō xwýnhjē pumunh o mō nē mē hkukamã hamaxpēr o hkaprĩ nē. Hāmri nē hkaprĩ xàj mýr o mō.

⁴² Hāmri nē te kot mē kuri mē omunh o ri pa pê mē kãm kapēr pyræk o mē kãm kapēr nē mē kãm:

—Hēxta waa nē Jerujarē nhō xwýnhjaja. Kot kaj mē amex kêt nē. Mē ate amnhĩ kukamã axãhpumunh mex ronhýx ka mē ra mē kãm mē akurē xwýnhjē pumaj ixkôt amnhĩ xunhwýr kuré kumrēx nhũm mē tee ri tanhmã mē ato mã. Ka mē ra ixkukwak ri amex nē ajamakētkati nē akĩnh nē ri apa ho apa.

⁴³⁻⁴⁴ Tĩrtũm tãm kot mē awýr inhmēnh tã ka mē amã ixprãm kêt nē. Jakamã koja nhýrmã mē kãm mē akurē xwýnhjaja mē awýr mra nē mē anhō krĩm hipôk pa. Hāmri ka mē amnhĩ wýr mē omu nē tee ri ajapôx kaxyw nhũm mē awýr agjē nē mē anhĩmex pa nē mē anhō krĩja

grành pa. Nê ahpÿnhã ri mẽ anhõrkwÿ grành pa. ã koja mẽ mẽmoj piitã grành par anê. Anê.

Jejus kot Tirtũm nhõrkwÿ hwÿr àr ã harênh

Matêwre 21.12-17; Makre 11.15-19; Juãw 2.13-22

⁴⁵⁻⁴⁶ Tã nhũm Jejus Jerujarê hwÿr axà nê jumênre rũm wrÿ hãmri nê ma Tirtũm mã amnhĩ jarênh xà hã ixkreja wÿr tẽ. Hãmri nê hwÿr axà nê tee ri kamã mẽ pa xwÿnhjê pumunh o xa. Nhũm mẽ ra axtem nê môx nê ôwêhti nê tuuti ho wênê ho kuhê. Mẽ kot haprôr nê Tirtũm mã hpar nê kãm ôr pê kãm amnhĩ jarênh kaxyw mẽ kãm ho wênê ho kuhê. Nê axtem nê mẽ kãm hã ohtô rax kãm mẽ kãm ho wênê. Hãmri nhũm Jejus mẽ hwÿr axà nê tee ri mẽ omu mẽ kãm akir nê mẽ kãm:

—Tk. Kwa nà. Tirtũm kapêr ã kagà htũm kot ôrkwÿ jarênh kot:

Inhõrkwÿja ãm mẽ ate inhmã amnhĩ jarênh xà hã ixkre pix kaxyw na.

Anhÿr o kot harênh tã ka mẽ axtem nê kamã ã amnhĩ nhĩpêx anhÿr o apa. E mẽ ajapôj nê ma ajapêx tokyx anê.

Anhÿr o mẽ kãm kapêr hãmri nê ixkre nê mẽ kator nhũm mẽ ma hapêx pa.

⁴⁷ Tã nhũm Jejus apkati mẽ Tirtũm mã amnhĩ jarênh xà hã ixkreja wÿr mra nê kamã mẽ ahkre ho hkrĩ. Hãmri nhũm mẽ ô patre krãhtũm mẽ Tirtũm kapêr tũm o mẽ ahkre xwÿnhjê mẽ mẽ kot amnhĩ to

rũnh xwÿnhjaja kot mẽ ahkre ma nhũm ja mẽ kêp omnuj nê nhũm mẽ kãm hpĩr prãm nê.

⁴⁸ Nom nhũm amarĩ mẽ pa xwÿnhjaja mẽ kurom kãm mar prãm nê akryk mar o kuhê. Jakamã nhũm mẽ tee ri ja hã mẽ omu nê tanhmã mẽ kot hpĩr to hkukamã hã axpên ma.

20

Mêhõ nhÿ hã Jejus kot mẽ ahkre hã harênh

Matêwre 21.23-27; Makre 11.27-33

¹ Nhũm arĩgro hõ hã nhũm Jejus kê axte Tirtũm mã amnhĩ jarênh xà hã ixkreja wÿr axà nê mẽ ahkre ho nhÿ. Tanhmã mẽ kot amnhĩ nhĩpêx to nê nhÿrmã Tirtũm mẽ wa kuri htĩr tũm nê pa hã mẽ kãm kapêr o nhÿ. Hãmri nhũm Ijaew nhõ pahijê mẽ mẽ kot Tirtũm kapêr tũm o mẽ ahkre xwÿnhjê mẽ mẽ ô patre krãhtũmjaja hêx rom mar o kuhê.

² Hãmri nê kãm:
—Kwa mẽ inhmã amnhĩ jarê. Mêhõ nhÿ hã na ka hte ã amnhĩ nhĩpêx anhÿr o ri apa? Na ka hte akupÿm mẽ ho mex o apa nê tanhmã mẽ ahkre hto ho apa. Xà amnhĩ krã hkôt na ka hte ã amnhĩ nhĩpêx anê nà? Anê.

³ Hãmri nhũm mẽ kãm:
—Nà ixkumrêx kot paj mẽmoj tã mẽ akukja. Ka mẽ inhma nê inhmã harê pa rĩ kormã tanhmã mẽ amã amnhĩ jarênh to.

⁴ Finat Juãw Paxisja ã kot paj mẽ akukja. Mêhõ nhÿ hã na pre mẽ hkrã kumrãr o

pa? Xà amnhĩ krã hkôt nà xà Tirtũm nhỹ hã? E mẽ atõ inhmã harẽ. Anẽ.

⁵⁻⁶ Hãmri nhũm mẽ kuma nẽ tee ri kot tanhmã kutã kãm harẽnh to hkukamã hamaxpêr nẽ axpên mã:

—Kwa tanhmã kot puj mẽ kãm harẽnh to? Jar mẽ kot mar xwỳnhjaja na htem kêp Tirtũm nhỹ hã kapêr jarẽnh o pa xwỳnh ã harẽnh o pa. Tã kot puj mẽ kãm kot amnhĩ krã hkôt mẽ hkrã kumrãr o pa hã harẽ nhũm mẽ tee ri mẽ pama nẽ mẽ pakamã gryk tỳx nẽ. Nẽ mẽ paxêx rom mẽ pahte kãm pakapêr ã mẽ pahpumunh kurê kumrêx nẽ kên o mẽ pahtak o mẽ panhĩmex. Nom kot puj mẽ kãm Tirtũm nhỹ hã mẽ hkrã kumrãr ã harẽ nhũm mẽ pamã kapêr o: “ã kot anhỹr kênã na ka prem kapêr ma nẽ ra ixkôt amnhĩ xunhwỳr kêt nẽ?” Anẽ. Nà kot puj mẽ kãm tanhmã harẽnh to hkêt nẽ. Kot puj mẽ ãm kãm aa te mẽ pahte ja jarẽnh mar kêt pyrak o harẽ. Anẽ.

Mẽ kot tanhmã kãm nẽ nhũm kot ta pãnhã tanhmã mẽ kãm nẽ pymaj nhũm mẽ ãm tee ri kãm tanhmã nẽ hprãm kaprỹ o kuhẽ.

⁷ Hãmri nẽ kãm:

—Konẽn. Mẽ ixte mẽhõ nhỹ hã kapêr o pa hã omunhre hã. Anẽ.

⁸ Hãmri nhũm mẽ kuma nẽ mẽ kãm:

—Tk. Tõe kot pa xep ijaxwỳja mẽ amã tanhmã amnhĩ jarẽnh to hkêt nẽ. Ijaxwỳja ixte mẽhõ nhỹ hã ã ixte amnhĩ nhĩpêx anhỹr o ri

ixpa hã amnhĩ pumunhre hã. Anẽ.

Mẽ àpênh punuj xwỳnhjê jarẽnh

Matêwre 21.33-46; Makre 12.1-12

⁹ Nhũm Jejus arĩ Ijaew nhõ pahijê mã kapêr. Nẽ mẽ kot tanhmã hipêx to hkukamã mẽ kãm tanhmã amnhĩ jarẽnh to. No ãm amnhĩ tã kuxi nẽ mẽ kãm awjarẽ nẽ mẽ kãm:

—Koja mẽhõ hpur ã hkwỳjê kot kamã kãm àpênh kaxyw mẽ kãm karõ. Hãmri nhũm mẽ ma hwỳr mra nẽ kamã mẽmo hy hkre nẽ hkre pa. Hãmri nhũm ra hpur nhõ dõnja nhỹhỹm nojarêt nẽ kãm mẽ àpênh xwỳnhjê mã tanhmã hpur jarẽnh to nẽ mẽ kãm: “E or ixpur nõ. Kê kamã mẽmoj hkà hpa ka mẽ mãmri kamã axujamỳnh pa nẽ ho axkjê. Nẽ ixkutêp inhõ jaxwỳ nẽ mãmri mẽ anhõ tanhmã ho hprãm xà hkôt tanhmã ho.” Anẽ.

—Nhũm ã mẽ kãm kapêr anẽ hãmri nẽ ma nhỹhỹm mẽ.

¹⁰ —Tã nhũm ra hkà hpa. Nom nhũm hpur nhõ dõnja kormã krĩ hõ kamã ri hã ujahkre ho ri pa. Tã kuri kãm àpênh xwỳnhjê hõja nhũm akupỹm mẽ hwỳr kumẽ. Mẽ kot kãm kwỳ nhõr nhũm ma kot kãm o mõi kaxyw ma mẽ hwỳr kumẽ nhũm ma mẽ hwỳr mẽ. Mõi nẽ mẽ hwỳr pøj nhũm mẽ omu nẽ axtem nẽ unẽ nẽ htak nẽ akupỹm hano nhũm ma akupỹm y kamã mẽ.

¹¹ Hãmri nẽ pøj nhũm ò pa-trãwja tee ri omu nẽ hpãnhã

ja mẽ nhũm ma mẽ hwỳr mō. Mōō nē mẽ hwỳr pōj nhũm kê wem mã ho anē nē unē nē htak nē akupỹm hano nhũm wamta pyrà nē ma akupỹm ỹ kamã mō.

12 —Hãmri nhũm kê axte hkôt ja mẽ nhũm ma mẽ hwỳr mãânēn mō. Ma mẽ hwỳr mō nē pōj nhũm mẽ te ho wamta wa hipêx pyrāk o hipêx nē unē nē htak rax nē amnhĩ nē hano nē pur nē kapôt ã kumê. Hãmri nhũm ma akupỹm mãânēn ỹ kamã mō.

13 Nhũm mẽ õ patrãw tee ri mẽ omu nē hamaxpêr o: “Hêxta waa nē. Tanhmã kot paj amnhĩ nhĩpêx to? Nà kot paj mẽ hwỳr ixkra mãn mẽ. Inhmã hapê htã kot paj mẽ hwỳr kumê kê ma mẽ hwỳr mō. Hãmri nhũm mẽ kêp ixkra hã omu nē tanhmã ixpê ho hkêt nē. Nē tã inhmã kãm inhõja kwỳ gō.” Anhỹr o hamaxpêr hãmri nē ma mẽ hwỳr kumê nhũm ma mẽ hwỳr mō.

14 —Tã ra mẽ hwỳr hpôx o mō nhũm mẽ amỹm amnhĩ wỳr omu nē kêp hkra hã omu nē hã axpên mã amỹnê nē axpên mã: “E oněj hpur nhõ dõn krata tẽ. Koja nhỹrmã õ papaj mỳr pê amnhĩm pur ã pyka pytà nē ho õ. Kwa pu mẽ hpĩr kurê kumrêx nē kêp hpurja o panhõ. E tokyj pu mẽ kupĩ ri.” Anê.

15 —Hãmri nhũm tẽ nē mẽ hwỳr pōj nhũm mẽ unē nē pur nē ho kato nē ma o tẽ nē kupĩ. ã mẽ ujarēnh kot anhỹr. Anê.

Nhũm pre ã Jejus mẽ kãm ujarēnh anē nē hã tanhmã mẽ

hkukjêr to nē mẽ kãm:

—E koja hpur nhõ dõnja hkra jarēnh ma hãmri nē tãm mẽ hwỳr mō nē tanhmã mẽ hipêx to wehe?

16 Koja ma mẽ hwỳr mō hãmri nē mẽ himex pa. Hãmri nē hpãnhã hpur ã nhãm mēmojê rē nhũm mẽ tã kãm hamãr mex o pa. Anê.

Nhũm pre ã Jejus mẽ kãm ujarēnh anē hãmri nhũm mẽ kot mar xwỳnhtaja ujarēnh kamã amnhĩ jarēnh mar kurê kumrêx. Mẽ kot Tĩrtũm kot mẽ hwỳr rēnh xwỳnhjê kapêr mar kêt nhũm mỳrapê mẽ kãm mẽ hkurê xwỳnhjaja kot mẽ kêp mẽ õ pika pytàr nē mẽ himex par ã amnhĩ jarēnh ma nhũm ja mẽ kêp omnuj tỳx nē. Hãmri nē hêx rom Jejus mã kãm:

—Tk. Kwa nà nhỹx pre kêt pur nhõ dõnja ã mẽ hipêx anhỹr kêt nē. Anê.

17 Hãmri nhũm mẽ kuma nē mẽ omunh o xa. Nē mẽ omunh pê mẽ no kagà mã mẽ kãm kapêr nē mẽ kãm:

—Nà ã mẽ hipêx anhỹr mã mẽ tãm kēnã. Mãn ka prem ra Tĩrtũm kapêr ã kagà htũm kot ja jarēnh ma. Harēnh kot:

Mẽ kot kēn o amnhĩm òrkwỹ nhĩpêx kaxyw nē kēn maati pumu nē htỳx omnuj ã hkamnhĩx nē hkaga.

Mẽ kot hkaga htã Tĩrtũm mẽ kurom mex o kot kēn piitã hakrenh par ã omunh kurê kumrêx. Anê.

ã Tĩrtũm kapêr ã kagà htũm kot mẽ ajarēnh te mẽ kot kēn maati punuj ã hkamnhĩx nē

hkaga xwÿnhjê jarênh pyrâk o ã mẽ ajarênh kot anhÿr. Anê.

¹⁸ Nhũm pre ã Jesus mẽ kãm te kêp kên maati pyrâk o mẽ kãm amnhĩ jarênh anê. Hãmri nê axte amnhĩ tâ kuxi nê mẽ kãm axte kên jarênhhta pyrâ nê mẽ kãm:

—Nà kot kaj mẽ atõ ixkaga hãmri nê te mēhõ htÿx htēm nê kên pumunh kêt nê hã htêk nê tēm pyrâk o amnhĩ nhĩpêx. Jao ixkutã amnhĩ xãm. Rÿ ka tanhmã amnhĩ to nê ixkaga nhũm te kên maati hõ htēm nê kot anhĩpy htēm nê axôm par pyrâk o anhĩpêx ka amex kêt nê. Anê.

¹⁹ Nhũm pre ã Jesus mẽ kãm ujarênh kãm mẽ harênh anê. Hãmri nhũm Tĩrtũm kapêr tũm o mẽ ahkre xwÿnhjê mẽ mẽ õ patre krãhtũmjaja kot mẽ kãm kên jarênh o te mẽ tãm harênh pyrâkja ma nhũm ja mẽ kêp omnuj tÿx nê. Jakamã nhũm mẽ kãm Jesus pynênh nê haxàr prãm nê. Nom amnhĩ tâ kãm mẽ kot mar o kuhê xwÿnhjê puma nê.

Mẽ kot hêx rom Jesus kukjêr ã mẽ harênh

Matêwre 22.15-22; Makre 12.13-17; mããnênh Rõmãn 12.1, 13.6-7

²⁰ Hãmri nhũm Tĩrtũm kapêr tũm o mẽ ahkre xwÿnhjê mẽ mẽ õ patre krãhtũmjaja Jesus tãnopxar o kuhê. Hãmri nê ra amnhĩ wÿr mẽmy hkwÿ hã karõ nê mẽ kãm:

—E. Mẽ ma Jesus wÿr mra nê te mẽ ate hkôt amnhĩ xunhwÿr kaxyw pyrâk o amnhĩ nhĩpêx nê mẽmoj tâ ri hkukja. Mẽmoj tâ hkukjêr

rax nê. Kêr kê Rõm nhõ pahi Sesti kapêr kwÿm ri tanhmã mẽ amã kapêr to ka mẽ ama nê man akupÿn mra nê mẽ inhmã harênh kurê kumrêx. Pa mẽ ama nê ma hwÿr mra nê hã unê nê ma Sesti nhÿ hã mẽ pahto amnhĩptâr xwÿnhhta wÿr o tẽ nê ìhkram haxà. Anê.

²¹ Hãmri nhũm mẽ kuma nê mẽ kãm:

—Tõe. Nà kot paj mẽ anê. Anê.

Hãmri nê ma hwÿr mra nê hêx rom kãm kapêr nê kãm:

—Pa Jesus? Nà ãm hãmri na ka hte Tĩrtũm kapêr o mẽ ahkre mex o ri apa. Na ka hte mẽ kamã akahak kêt nê. Nê mẽ kot tee ri tanhmã ato kapêr punuj to htã ka aprĩ hã mẽ ahkre mex o ri apa.

²² Kwa mẽ inhmã mẽmoj jarê. Rõm nhõ pahihti kot mẽ pahte kãm kãxpore hkwÿnhõr ã mẽ pahpê Ijaew mã karõta. Kwa xà we ja amã mex nà? Xà kot pu mẽ kãm kugõ nà xà kot pu mẽ kãm òr kêt nê? E kwa mẽ inhmã tanhmã harênh to. Anê.

²³ Nhũm prem ã hêx rom kãm kapêr anhÿr tâ nhũm ra mẽ hamaxpêr ã mẽ omu nê mẽ kãm:

²⁴ —E mẽ atõ anhõ kãxpore htÿxre japêr nê inhmã hõ gõ pa omu. Anê.

Hãmri nhũm mẽ kãm ja gõ nhũm kupy nê omu nê kãnhmã mẽ kãm kupê nê mẽ kãm:

—E mẽhõ nhĩxi nê mẽhõ karõ na ja hã? Anê.

Hãmri nhũm mẽ kãm:

—Pahi Sesti karõ nê hixi na hã kênã. Anê.

²⁵ Hāmri nhūm mẽ kuma nẽ mẽ kām:

—Tỳ. Tô kêr ka mẽ māmri kām hkwy nhõr o apa. Hã hkarõ nẽ hã hixi. Tãm kot hipêx xwýnh jakamã õ na. Nõ mẽ kajaja na pre Tirtũm mẽ anhîpêx nhūm mẽ apê õ jakamã kwa kêr ka mẽ kapêr kôt pix mã ri amnhĩ nhîpêx o ri apa. Anẽ.

²⁶ Nhūm pre ã Jesus mẽ kām kapêr anẽ nhūm mẽ piitã mar o kuhê. Nhūm mẽ kot hêx rom kām kapêr mã xwýnhjaja amnhĩ jaêr pê ã kot kãxpore jarênh anhÿrja ma. Hāmri nẽ tee ri axte mẽmoj tã hkukjêr nhūm kot pahi Sesti kwým ri kot tanhmã harênh to kaxyw ãm tee ri tanhmã hkukjêr to kaprÿ. Hāmri nẽ axte tanhmã kãm nẽ hkêt nẽ ãm akryk omunh pê mar o kuhê.

Akupÿm mẽ htîr jarênh

Matêwre 22.23-33; Makre 12.18-27; Juãw 5.21, 6.39; mããnẽn Wam Korît 6.14, 15.12-28; Wam Tesarõn 4.13-18; Apokarip 20.4

²⁷ Tã nhūm Satusew nhõ xwýnh kwÿjaja. Mẽ kot akupÿm mẽ htîr mã hamaxpêr kêt jakamã mẽ htyk nẽ mẽ hapêx ã mẽ hkamnhix. Jakamã na prem tanhmã axpên mã Jesus jarênh to nẽ axpên mã:

—E kwa pu mẽ ma hwÿr mra nẽ mẽmoj xihtÿx ã hkukja kê mẽ pama nẽ tee ri tanhmã mẽ pamã harênh to hkukamã hamaxpêr. Hāmri nhūm mẽ piitã ja hã omu nẽ ãhpumunh tÿx kêt ã omunh

kurê kumrêx. E ma pu mẽ hwÿr.

Anẽ nẽ ma hwÿr mra nẽ Parijew nhõ xwýnhjê pyrã nẽ hêx rom ahkukja nẽ kām:

²⁸ —Pa Jesus? Kwa mẽ inhmã mẽmoj jarê. Na pre finat Mojesja Tirtũm nhÿ hã mẽ panhîgêt mã ã karõ anẽ. Mẽ hkra hkêt rãhã mẽ pa nẽ mẽ htyk xwýnhjaja nhūm mẽ harênh o:

Koja mẽhõ hprõ nẽ kormã kamã hkra hkêt rãhã pa nẽ ty. Hã koja hkôt htõja hpãnhã hprõta o hprõ nẽ kamã hkra. Hāmri nhūm kato nẽ te kêp htõ htyk xwýnhhta hkra pyrãk. Anẽ.

Na pre ã Mojes mẽ kãm karõ anẽ.

²⁹ Jakamã kwa ga mẽ ixu-jarênh ma. Koja mẽ kot axpên to htõ xwýnhjaja kêp 7. Nhūm kot waja mẽhõ ho hprõ nẽ wa pa nhūm kamã hkra hkêt rãhã ty. Nhūm hkôt htõ hõta hpãnhã hprõ ho hprõ

³⁰ nẽ wa axpên to pa. Nhūm mããnẽn ty. Kamã hkra hkêt rãhã ty.

³¹ —Nhūm htõ hõta. Haxwÿja hpãnhã tãm o hprõ nẽ wa axpên to pa grire nhūm haxwÿja kamã hkra hkêt rãhã ty. Hāmri nhūm htõ hkwyjaja piitã nija pyxi nẽ axpên pãnhã ho hprõ hpa. No ãm mẽhõ kamã hkra hkêt rãhã ra htyk pa.

³² Hāmri nhūm mẽ hprõta mẽ hkôt amnhĩ to hapu nẽ ty.

³³ Tã Tirtũm kot akupÿm nhÿrmã mẽ ho htîr ronhÿx nhÿ nhÿx kêp nija mjên

kumrêx? Ra piitã kot ho hprõ kênã. E mẽ inhmã ja jarê. Anê.

³⁴ Hãmri nhũm Jejus mẽ kãm:

—Nà kaxkwa kamã mẽ kot amnhĩ nhĩpêxja axtem na. Pika ja kamã na htem pa nê àptàr nhũm mẽ axpên mã mẽ kure. Ja mex.

³⁵ No mẽ kot Tĩrtũm kôt amnhĩ xunhwýr xwýnhjaja na htem ty hãmri nê Tĩrtũm nhõ krĩ kamã kuri axte kãm hprõ hprãm kêt nê ri pa. Rỳ ni japêr nê kãm mjên prãm kêt nê ri pa.

³⁶ Hãmri nê Tĩrtũm kapêr o mẽ wrýk xwýnhjê pyrã nê axte htyk kêt nê. Âm htĩr tũm rãhã nê pa ho pa. Tĩrtũm ra akupým kot mẽ ho htĩr jakamã koja mẽ kêp hkra nê kuri htĩr tũm nê mex nê pa ho pa nê axte kãm hprõ rỳ mjên prãm kêt nê ri pa.

³⁷ —Nom mẽ ate akupým mẽ htĩr mã ajamaxpêr kêt ã harênhja kot paj mẽ amã harê. Amnepêm na pre Tĩrtũmja pĩ hpòk kamã Mojes mã kapêr nê kãm:

Ixpê Apraãw nhõ Tĩrtũm na pa. Nê mãânên ixpê Apraãw kra Ijak mẽ htãmnhwý Jako wa õ Tĩrtũm na pa.

Anhýr o Mojes mã amnhĩ jarê nhũm kuma nê hã kagã.

³⁸ Kêp apu arĩ mẽ htyk rãhã nhýx pre ã mẽ harênh anhýr kêt nê. Nhýx pre mẽ harênh o: “Amnepêm Apraãw nê hkra nê htãmnhwý mẽ htĩr ri ixpê mẽ õ Tĩrtũm na pa pre.” Anhýr o nhýx pre mẽ

harê. Nom na pre ã amnhĩ jarênh anhýr kêt nê. Mẽ pamã te Apraãwja mẽ htyk nê mẽ hapêx pyrãk. Nom nhũm prem ra Tĩrtũm ri akupým htĩr nê mex nê pa ho pa. Tã ka htem Tĩrtũm kapêr kwým ri akupým mẽ htĩr kêt ã mẽ harênh o apa. Anê.

³⁹ Nhũm pre ã Jejus mẽ kãm kapêr anê. Hãmri nhũm Tĩrtũm kapêr tũm o mẽ ahkre ho mẽ pa xwýnh kwýjaja kuma nê tee ri axte tanhmã kãm nê hprãm kaprý nê kãm:

—Tỳ. Nã âm hãmri na ka ã ja jarênh anê. Anê.

⁴⁰ Hãmri nhũm mẽ axte mẽmoj tã hkukjêr kêt nê. Tanhmã kot wem amnhĩ to nê hamaxpêr o hakre? Na prem âm tee ri kãm hamaxpêr o hakrenh prãm kaprý ho kuhê. Jejus kot mẽmoj piitã hkukamã àhpumunh týx o àhpumunh týx.

Jejus kêp pahi finat Tawi nhõ Pahihti hã kot amnhĩ jarênh

Matêwre 22.41-46; Makre 12.35-37; mãânên Rômãn 1.3-4

⁴¹ Tã nhũm Jejus kãnhmã xa nê amnhĩ tã tanhmã mẽ kot mar o kuhê xwýnhjê hkukjêr to. Nom te nhãm mẽhõ hã mẽ hkukjêr pyrã nê mẽ kãm:

—E kwa mẽ inhmã mẽmoj jarê. Tĩrtũm kot mẽ akaxyw âm mã xwýnhhta ã na pa mẽ akukja. Mo na htem axpên mã kêp finat pahi Tawi kanrêhã htãmnhwý pix ã harê nê mãânên kêp õ pahihti hã harênh kêt nê?

⁴² Na pre Tawi Tĩrtũm kapêr kwý hã kagã nê tanhmã

harēnh to. Tirtūm mex ã mẽ grer xàja kwý kamã harē nē hã kagã nē hã kagã ho:

Na pre Tirtūm inhõ Pahihti mã ã kapēr anē nē kãm: “E amnē ixwýr tē nē inhĩhkô hã nhỹ nē inhmã mẽ ho amnhĩptàr o akrĩ.

⁴³ Kot paj mẽ kot kãm akurē xwýnh piitã mẽ unēnh pa nē awýr mẽ o mra nē anhĩhkram mẽ haxàr pa.” Anhỹr o pre kãm kapēr. Anē.

⁴⁴ Na pre ã Tawija Tirtūm kot Kris mã kapēr jarēnh anē. Mē kajaja na ka htem ãm kēp Tawi kanrēhã tàmnhwý pix ã ri axpēn mã harēnh o ri apa. No kêt Tawi na pre kēp õ Pahihti hã harēnh o pa. Anē.

Jejus kot tanhmã Tirtūm kapēr tūm o mẽ ahkre xwýnhjê jarēnh to

Matêwre 23.1-12; Makre 12.38-40

⁴⁵ Nhũm pre ã Jejus mẽ kãm kapēr anē nhũm mẽ piitã mar o kuhê. Hãmri nhũm hpãnhã hkôt mẽ pa ho mẽ pa xwýnhjê mã kapēr nē mẽ kãm:

—Kwa mẽ o kora. Kêr ka mẽ Tirtūm kapēr tūm o mẽ ahkre xwýnhjê kot amnhĩ nhĩpêx o amnhĩ nhĩpêx kêt nē. ãm mẽ omu nē ãm mẽ omu nē mẽ kot amnhĩ nhĩpêx kôt amnhĩ nhĩpêx o ri apa hkêt nē.

⁴⁶ Na htem mẽ piitã mẽ kot mẽ hã hpijaàm kaxyw mẽ ê mex pix kãm ri pa. Nē mẽ kãm mẽ piitã mẽ kot amnhĩm mẽ rũnh xwýnh ã mẽ harēnh o mẽ paja na mẽ kãm hprãm. Nē mẽ panhõ Tirtūm kapēr o mẽ

ahkre xà hã ixkre kamã mẽ kãm amnhĩ to rũnh xwýnhjê hkrĩ xà mex pix ã na mẽ kãm mẽ hkrĩ hprãm. Nē mẽmoj tã mẽ hkĩnh ã arĩgro hã nhũm htem mẽ apkur xà hã ixkre hwýr akuprõ nē mẽ kãm mẽ kot amnhĩ to rũnh xwýnhjê hkrĩ xà mex pix ã mẽ kãm mẽ hkrĩ hprãm. ã na htem amnhĩ nhĩpêx anhỹr o pa.

⁴⁷ —Nē mẽ kēp mẽ mjên htyk xwýnhjê ho ajuta ho pa hã amnhĩ jarēnh tã ãm amnhĩ to hêx nē axtem nē mẽ nokupyr pē mẽ kēp mẽ hikukrêx piitã ho hapêx par o pa. Nē mẽ kēp mẽ òrkwý pytà. Nē mẽ hêx rom te tãm mẽ kot amnhĩ nhĩpêx pyrã nē Tirtūm mã amnhĩ jarēnh japjêê ho kuhê. Mýrapê koja mẽ mex kêt nē. Koja Tirtūm tanhmã ja hã mẽ hipêx to rax nē. Jakamã kwa kêr ka mẽ ã mẽ kot amnhĩ nhĩpêx anhỹr xwýnhjê hkôt amnhĩ nhĩpêx o apa hkêt nē. ãm kwarĩ ho kwarĩ. Anē.

21

Kēp mjên htyk xwýnh jarēnh Makre 12.41-44

¹ Nhũm Jejus kormã Tirtūm mã amnhĩ jarēnh xà hã ixkre kamã mẽ omunh o xa. Na pre hte Ijaew piitã ixkreta ho mex kaxyw kãm mẽ hikàxpore hkwy nhõr o pa. Jakamã nhũm mẽ hikàxpore rũnh xwýnhjaja hwýr agjê nē kamã kàxpore gjênh xà kamã hkwy gjê nē ma akupým mra.

² Jakamã nhũm mēhõ ni pē mjên htyk xwýnh haxwýja hwýr axà. Kēp amrakati

kumrêx nê hikàxpore tỳxre ãm axkrut্রে htã mẽ hpãnhã hwỳr axà. Nê kãm Tĩrtũm kĩnh xàj hamẽ kamã kuxà hãmri nê kato nê ma akupỳm tẽ.

³⁻⁴ Hãmri nhũm Jejus arĩ omunh o xa. Kot ã amnhĩ nhĩpêx anhỳr ã omunh o xa nhũm ja kãm mex nê. Hãmri nê hkôt mẽ pa ho pa xwỳnhjê mã harê nê mẽ kãm:

—E mãn ka mênire htẽm mũj pumu. Kêp amrakati nê hikàxpore ãm kêp grire htã amnhĩ pê õr pa. Kwỳjê rom kãm Tĩrtũm kĩnh xàj amnhĩ pê õr par kumrêx. Apkur xà hã hikàxpore na. Mẽ hkwỳjaja na htem hikàxpore hkwỳ ho mra nê kugjê nom arĩ mẽ hikàxpore rax. No nhũm nire nêj mẽ kurom kãm hikàxpore japê hkêt nê. Nê ho õxỳ hkêt nê ãmnhĩx piitã Tĩrtũm mã õr pa. Anê.

Mẽ kot amnhĩ tomnuj xwỳnhjê hkukamã mẽ harênh Matêwre 24.1-2; Makre 13.1-2

⁵ Tã hãmri nhũm Jejus kôt mẽ pa ho mẽ pa xwỳnhjaja kormã Tĩrtũm mã amnhĩ jarênh xà hã ixkre kaxwỳnh pumunh o kuhê nê axpẽn mã harê nê axpẽn mã harênh o:

—Hêxta waa nê. Ixkreja mex kumrêx. Kên rũnh o mẽ kot hipêx jakamã mex o mex. Nê mẽ kot ri Tĩrtũm mã hkĩnh xà nhõr nêj haxwỳja piitã mex. Anê.

Hãmri nhũm Jejus mẽ kuma nê mẽ kãm:

⁶ —Nà mex tã koja nhỹrmã mẽ kãm Tĩrtũm kurê xwỳnhjaja grãnh pa. Koja arĩ kên õ axkrut্রে nê axpẽn

mỳnh nê nõr kêt nê. Koja piitã anhgrã nê ahpỳnhã ri hikwỳ. Anê.

⁷ Nhũm pre ã mẽ kot hipêx anhỳrja kukamã mẽ kãm mẽ harênh anê nhũm mẽ tee ri hkukamã hamaxpêr nê kãm:

—Kwa xà koja mẽ ã hipêx anê? Kwa mẽ inhmã aprĩ hã mẽ kot ixkre grãnh parta jarê. Xà koja mẽ tokyx ho anê nà xà kormã? Kwa mẽmo koja wỳj ri tanhmã amnhĩ nhĩpêx to? Anê.

⁸ Hãmri nhũm mẽ kãm:

—Nà nhỹrmã mẽmoj piitã hapêx kaxyw tanhmã amnhĩ nhĩpêx to kumrêx kot paj mẽ amã harê ka mẽ inhma. Koja mẽ ohtô nê mẽ apê ixkrajê hwỳr mra nê hêx rom te pa ixte amnhĩ nhĩpêx pyrãk o amnhĩ nhĩpêx o pa. Nê tanhmã mẽ amã amnhĩ jarênh to nê amnhĩ jarênh o: “E mẽ ixpumu. Pa na pre Tĩrtũm mẽ awỳr inhmẽ. Ixpê kaxkwa rũm ixwryk xwỳnh na pa.” Anhỳr o mẽ akôt mẽ amã amnhĩ to hêx o pa. Hãmri nê mẽ amã: “E ot pa ra mẽ ato amnhĩptãr kaxyw mẽ awỳr wrỳ.” Anhỳr o amnhĩ jarênh o mẽ akôt pa. Nom kêr ka mẽ ãm mẽ ama nê ãm mẽ ama. ãm mẽ kot mẽ amã amnhĩ to hêx o pa kênã. Kormã akupỳn ixpôx xà hã arĩgrota kormã.

⁹ —Nê koja mẽ nhỹri awry hã axpẽn par o pa. Nê mẽ atãã axpẽn par o pa. Nom kêr ka mẽ harênh ma nê ri tee ri tokyx mẽmoj piitã hapêx kukamã ajamaxpêr kêt nê. Mẽmoj piitã hapêx xà hã arĩgrota kormã.

10 Kojã mēmõj piitã hapêx kaxyw nhũm ahpÿnhã ri pika piitã hkôt mẽ pa xwÿnhjaja axpên kutã amnhĩ xunhwÿ mẽ pijapu mẽ axpên pa.

11 Nẽ koja pika piitã hkôt tanhmã ahpÿnhã mẽ à kute mẽ hamÿ nhũm mẽ amnhĩ xà htÿx kamã hamak o pa.

Nẽ koja pikaja tertet tÿx mẽ.

Nẽ koja mẽ nhÿri pika hkwy kamã prãm xàj hpikaprar pa.

Nẽ koja kaxkwa kamã mēmõj tanhmã amnhĩ anhĩpêx to nhũm pika nhõ xwÿnhjaja tee ri omu mẽ kãm ma htÿx kumrêx mẽ htertet o kuhê.

Koja mēmõj ã amnhĩ nhĩpêx anê pa rĩ kormã akupÿn mẽ awÿr wrÿ nhũm mēmõj piitã hapêx pa. Kojã mēmõj ã amnhĩ nhĩpêx anê.

12 —E Tirtũm mã amnhĩ jarênh xà hã ixkre grãnh par xwÿj ri mēmõj tanhmã hkukamã kot amnhĩ nhĩpêx to hã mẽ ate ixkukjêr xwÿnhhta kot paj hpãnhã mẽ amã harê ka mẽ inhma. Kojã mẽ kãm ixkurê xwÿnhjaja mẽ awÿr mra mẽ ixtã mẽ apynê mẽ tanhmã ixtã mẽ anhĩpêx to. Nẽ ma mẽ pikuprõnh xà hã ixkreja wÿr mẽ ato mra mẽ kamã mẽ kãm tanhmã mẽ ato kapêr punuj to. Nhũm mẽ kuma hãmri mẽ ma mẽ ato mra mẽ mẽ ajagjê. Mẽ ate ixkôt apa ho apa jakamã koja mẽ ã mẽ anhĩpêx anê. Nẽ mẽ õ pahihtu hwÿr mẽ ato mra mẽ

mẽ kãm tanhmã mẽ ato kapêr punuj to.

13 Tã kêr ka mẽ kutã akrĩ mẽ axãmnhix mãmrĩ tanhmã mẽ kãm ijarênh to ho akrĩ.

14 —Nom kwa kêr ka mẽ kãm tanhmã amnhĩ jarênh to hkukamã tee ri ajamaxpêr o ri mẽ amã mẽ uma hkêt mẽ. Rÿ mẽ ajamaxpêr o: “Hêxta waa mẽ. Tanhmã koja we mẽ kot ixkukjêr ã arĩgrota ã pa we ri mẽ kãm ixkapêr to?” Anhÿr o tee ri amnhĩ kukamã ajamaxpêr kêt mẽ. ãm amnhĩ kaxyw inhmã pix mã ajamaxpêr tÿx rãhã mẽ.

15 Tanhmã mẽ kot mẽ anhĩpêx to hã arĩgrota ã kot paj tanhmã mẽ akrã hto ka mẽ inhÿ hã tanhmã mẽ kãm amnhĩ jarênh to. Hãmri nhũm mẽ amnhĩ tã mẽ ama mẽ axte tanhmã mẽ ato kapêr to hkukamã tee ri hamaxpêr o kuhê.

16 —Nẽ koja mẽ anhĩpêxã mẽ mẽ akatorxà mẽ mẽ atõ mẽ mẽ akrãmnhwÿjaja. Nẽ kaxyw krĩ hkôt mẽ akwÿjaja ixtã mẽ atã amÿnê mẽ ma mẽ õ pahi hwÿr mẽ ato mra nhũm mẽ ajagjê mẽ mẽ akwÿjê pa.

17 Kojã mẽ piitã ixtã mẽ akamã gryk mẽ kãm mẽ akurê mẽ.

18-19 Nom mẽ kot ã mẽ anhĩpêx anhÿr mã tã kêr ka mẽ amnhĩ to htÿx mẽ ixkaga hkêt mẽ. Mẽ kot mẽ apar tã ka mẽ kaxkwa kamã akupÿm atĩr kurê kumrêx. Hãmri mẽ ã mẽ kot mẽ anhĩpêx anhÿr xwÿnhjê rom Tirtũm mẽ wa ixri atĩr tũm mẽ amex rãhã apa ho apa. Mẽ kot tanhmã mẽ ato htã mẽ ate kaxkwa kamã

atîr tûm nê apa mã xwÿnh jakamã kwa kêr ka mẽ tee ri amnhĩ kukamã ajamexpêr o ri apa hkêt nê.

20 —Koja nhÿrmã nhÿhÿnh pôristi ohtô nê mra nê Jerujarê hwÿr pôj hãmri nê mẽ kãm hipôk pa nê kuhê. Ka mẽ ja hã mẽ omu nê mẽ kot krÿja grành par mã ajamexpêr kurê kumrêx.

21 Koja mẽ ã amnhĩ nhÿpêx anê ka mẽ amÿm amnhĩ wÿr mẽ omu hãmri nê ajapôj nê ma aprôt nê amrar kurê kumrêx. Mẽ apê jar pika pê Jutej kamã mẽ apa xwÿnhjaja ka mẽ omu nê mẽ kot mẽ apar pymaj ma aprôt nê amrar kurê kumrêx. Hixêt prêk wÿr ajapôj nê aprôt nê ma mra.

—Nê kê Jerujarê nhô xwÿnhjaja mẽ umaj haxwÿja hapôj nê ma hprôt nê ma mrar o mra.

—Nê jar kapôt ã ri mẽ pa xwÿnhjaja kê mẽ akupÿm krÿ hwÿr gjêx kêt nê. ãm ma mẽ umaj hprôt nê mrar kurê kumrêx.

22 —Mẽ kot amnhĩ tomnuj mÿrapê koja Tirtûm ã mẽ hwÿr mẽ kãm mẽ hkurê xwÿnhjê rênh anê. Kapêr ã kagà htûm ra kot mẽ hkukamã ja jarênh kot anhÿr. Jakamã koja mẽ nhÿrmã mẽ hkukamã mẽ harênh xàja kôt ã mẽ hipêx anê.

23 —No mẽ htujarô xwÿnhjaja nê mẽ hkra karàre xwÿnhjaja koja mẽ kêp mẽmoj omnuj tÿx nê. Tanhmã kot mẽ amnhĩ to nê hprôt tÿx? Nà pika ja kamã koja mẽ piitã mex kêt nê. Mẽ kot amnhĩ

tomnuj mÿrapê koja Tirtûm ã mẽ hipêx anê.

24 Koja mẽ nhÿhÿnh krÿ hõ rûm mẽ hwÿr mra nê mẽ unê nê mẽ hkamnhwÿr o mẽ kupa. Nê mẽ hkwyjê pynê nê ma nhÿhÿm ahpÿnhã mẽ ô pika hwÿr amnhĩ kôt mẽ o pa nhûm mẽ kamã mẽ hkôt pa ho pa. Koja mẽ kêp Ijaew kêt xwÿnhjaja Jerujarê o amnhÿpta nê ã mẽ hipêx anê. Nê kamã pa ho pa rãhã nhûm Tirtûm nhÿrmã akupÿm nê mẽ kator pa. Tã koja mẽ nê mẽ kator parja o pa ra akupÿn mẽ awÿr inhnojarêt. Anê.

Nhûm pre ã Jejus mẽ kãm mẽ kot Jerujarê grành par xwÿnhjê hkukamã harênh anê.

Akupÿn Jejus wrÿk xwÿj ri mẽmoj kot tanhmã amnhĩ nhÿpêx to

Matêwre 24.29-35; Makre 13.24-31; mãänên Sikûn Pêtre 3.10; Apokarip 1.7

25 Nhûm Jejus arÿ hkôt mẽ pa ho pa xwÿnhjê mã kapêr nê mẽ kãm:

—Nê kot paj nhÿrmã akupÿn mẽ awÿr inhnojarêt nhûm kaxkwa kamã kanhêti nê myyti nê mytwÿre axtem tanhmã ri amnhĩ nhÿpêx to. Nhûm gô xujanâr haxwÿja hkoko htÿx jao axpên tak tÿx nê. Hãmri nhûm pika piitã hkôt mẽ pa xwÿnhjaja kuma nê omu nê nê kãm ma htÿx nê mur nê htertet nê tee ri amnhĩ kukamã hamaxpêr.

26 —Nê koja Tirtûm tanhmã kaxkwa ho àk to nhûm kanhêti piitã pikarêr pa.

Hāmri nhūm pika hkôt ri mẽ pa xwýnhjaja omu nẽ tee ri amnhĩ kukamã hamaxpēr o amnhĩ japrār pa nẽ hikwỹ.

27-28 Koja ã mẽmoj amnhĩ nhĩpêx anẽ ka mẽ ja hã omu nẽ akupỹn mẽ awýr inhnojarêt mã ajamxpēr kurê kumrêx. Hāmri nẽ mẽ kot ixkôt amnhĩ xunhwýr kêt xwýnhjê rom akĩnh kãm ijapêr arĩt o akuhê.

—Nà kot paj akupỹn mẽ awýr wrý. Kakrã kamã hirã htýx kãm akupỹn ixihýtýx kãm mẽ awýr wrý. Hāmri ka mẽ apiitã pika piitã hkôt ano ho ixpumu. Kot paj ã ixwrýk anẽ hāmri nẽ mẽmoj punuj piitã pê mẽ apytār pa. Jakamã ka mẽ ã mẽmoj kot amnhĩ nhĩpêx anhýrja ã omu hāmri nẽ tokyx ixkôt axàpirta mã ajamxpēr nẽ akĩnh týx nẽ. Anẽ.

29 —E ga mẽ pĩ hpār mũj pumu.

30 Na hte mẽmo mytwrý hã rã nhūm mẽ omu nẽ ô hkukamã hamaxpēr.

31 Ja pyrã nẽ koja ã mẽmoj amnhĩ nhĩpêx par anhýr mẽ ka mẽ omu nẽ akupỹn mẽ awýr ixwrýkja mã ajamxpēr kurê kumrêx.

32 Koja akupỹn ixpôx kêt ri mẽ kot ã mẽmoj kot amnhĩ nhĩpêx anhýr pumunh xwýnhjaja kormã piitã htyk kêt ri pa ra akupỹn wrý.

33 —Nẽ koja nhýrmã pika nẽ kaxkwa wa hapêx pa. Tã no ãm ixkapêr koja wa uràk nẽ aa hapêx kêt nẽ. Koja ãm rãhã ho rãhã. Kot paj aa ihkjê ho tanhmã mẽnh to hkêt nẽ.

34-35 —Nẽ kwa mẽ o kora. Mẽ axkãm ajamak rom. Mẽ kot ixkôt amnhĩ xunhwýr kêt xwýnhjaja na htem kãm tanhmã amnhĩ nhĩpêx to hprãm xà hkôt pix mã tanhmã amnhĩ nhĩpêx to ho ri pa. Jao ãm amnhĩ xàpkur xà nẽ amnhĩ to mex xà nẽ kàxpore pix kukamã hamaxpēr o pa. Nẽ htýx ri tanhmã amnhĩ tomnuj to ho pa. Nẽ pipãnh kãm tanhmã amnhĩ to ho pa. Tã koja mẽ ã amnhĩ nhĩpêx anhýr o pa rãhã pa ra mẽ haêr pê akupỹn wrý nhūm mẽ tee ri ixpumu nẽ kãm ma htýx kumrêx. Te tutre htýx ri harôj kajyr o pa nẽ rapuuti hwýr àr nhūm kot haê nẽ unênh nhūm tee kãm kator prãm pyræk. Koja mẽ ã amnhĩ nhĩpêx anẽ. Nom kêr ka mẽ ho mẽ uràk kêt nẽ. Æm pa inhmã hprãm xà hkôt pix mã tanhmã inhmã amnhĩ nhĩpêx to rãhã ho ri apa.

36 —Tã kêr ka mẽ ã mẽ kot amnhĩ tomnuj o pa anhýrja kôt amnhĩ nhĩpêx o apa py-maj amnhĩ to Tĩrtũm wýr rãhã ho apa. Kê tanhmã mẽ ato hihtýx to ka mẽ ý hã ho mẽ uràk kêt nẽ. Kêr pa nhýrmã akupỹn wrý ka mẽ ixpumu nẽ mẽ kurom amnhĩ kamã akahak kêt nẽ akĩnh týx nẽ man ixwýr mra. Anẽ.

Nhūm pre ã Jejus hkôt mẽ pa ho mẽ pa xwýnhjê jahkre anẽ.

37 Hāmri nẽ apkati mẽ Tĩrtũm mã amnhĩ jarênh xà hã ixkre kamã mẽ pikuprõnh xwýnhjê jahkre ho hkrĩ. Nhūm kamàt nhūm hkôt mẽ pa ho mẽ pa xwýnhjê mẽ mẽ

krī rūm hapôj nē ma hixêt prêk pê Oriwêhti hwÿr mra nē kamã amnhîm hikra nē hikwÿ.

³⁸ Nhûm kwÿhtã nhûm mē kànhmã hkrī nē ma akupÿm krīm mra nē ixkreja wÿr agjê. Hãmri nhûm mē piitã hã akuprô nē kot mē ahkre hã mar o hkrī.

22

Mē kot Jejus ã àmnênh ã mē harênh

Matêwre 26.14-16; Makre 14.1-2; Juãw 11.47-57

¹ Tã nhûm Ijaew kīnhã arīgro pê Pasja àhtêp o mō. Pas ã na htem amnepêm Tirtûm kot pika pê Ejit pê mē hpãmjê kator mã hamaxpêr kaxyw axpên wÿr akuprô nē hã hkīnh. Na htem arīgroja jarênh o: “Pas” anhÿr ã harê. Nē mãânên harênh o: “Mē pahte pãw kaxkrit kêt kur ã arīgro.” Anhÿr o harê.

² Jakamã nhûm mē ò patre krãhtûmjê mē Tirtûm kapêr tûm o mē ahkre xwÿnhjaja ra kãm Jejus pīr prãm nē. No mē kãm hkôt mē kot kapêr mar xwÿnhjê pyma nē. Nē tee ri kot tanhmã ho hkukamã hamaxpêr nē axpên mã:

—Hêxta waa nē. Kwa tanhmã kot puj wem ho nē mē kêp kupī? Kot puj mē noo mã tanhmã ho nhûm mē hã mē pakamã gryk tÿx kumrêx. Anê.

Jut Kariot kot Jejus ã àmnênh ã harênh

Matêwre 26.14-16; Makre 14.10-11; Juãw 13.21-30

³⁻⁴ Tã nhûm Jut Kariotja. Jejus nhÿ hã mē ahkre ho pa

xwÿnh pê 12 hō na pre. Tã axtem nē tanhmã hamaxpêr to nē Satanasti nhÿ hã ma mē ò patre krãhtûm mē Tirtûm mã amnhî jarênh xà hã ixkre jamãr xwÿnh krãhtûmjê hwÿr tē. Hãmri nē tanhmã Jejus o mē mar to nē mē kãm:

—E ot pa mē amã Jejus jarênh o tē. Xà kot paj mē amã hã amÿnê ka mē hpãnhã inhmã amnhîre nã? Anê.

⁵ Hãmri nhûm mē kuma nē hkīnh nē. Hãmri nē kãm:

—Nà kot paj mē amã amnhîre.

⁶ Hãmri nhûm mē kot kãm amnhîrer ã harênh ma nē hkīnh nē mē kãm:

—Tôe. Nà kot paj mē amã ho anê. Anê.

Hãmri nē ma tē nē kato. Nē Jejus pynênh kaxyw htãnopxar o ri hkôt pa. Mē kot mar o pa xwÿnhjê hkãx ã nhÿri unênh nē ma mē hwÿr o htêm kaxyw.

Jejus kot ÿ hã mē ahkre xwÿnhjê kutã apkur ã harênh

Matêwre 26.17-25; Makre 14.12-21; Juãw 13.21-30

⁷ Tã nhûm Pasja kato. Amnepêm Ijaewjê nhīgêjtjaja na prem ôwêhti hkrare hkwy hpar o pa. Tirtûm kot ja hã mē omunh nē Ejit kãm mē kãm mē hkurê xwÿnhjê nhîhkra nê mē kator kaxyw nhûm prem ã amnhî nhîpêx anê. Jakamã na htem arī mē kêp mē hkanrêhã mē htãmnhwÿjaja arīgro pê Pas ã axpên wÿr akuprô nē mē kãm hamaxpêr pê mē uràk nē ôwêhti hkrare hkwy hpa. Hãmri nē pãwti kaxkrit kêt kãm kuku.

⁸ Jakamã nhũm Jejus ÿ hã mẽ ahkre ho mẽ pa xwýnhjê wa ho axkrut nê mẽ amnhĩ kukamã wa kumê. Simãw Pêtre mẽ Juãwja nhũm wa mẽ amnhĩ kukamã wa kumê nê wa kãm:

—E wa ma mẽ ixkukamã tẽ nê mẽ ixkutêp Pas ã mẽ panhõ hã apê. Anê.

⁹ Hãmri nhũm wa kuma hãmri nê kãm:

—Tõe. Nhỹri kot paj we wa tẽ nê mẽ akutêp hã apê? Anê.

¹⁰ Hãmri nhũm wa kãm:

—Nà wa mãmri ma Jerujarẽ hwýr wa tẽ. Nê hwýr axà nê mẽhõ mytita pumunh kurê kumrêx. Nhũm amnhĩm gô ru nê amnhĩ kre hã poti xãm nê o tẽ. Ka wa omu nê hã ajêt nê ma hkôt ôrkwý hwýr tẽ.

¹¹ Hãmri nê ixkre nhõ dõn pumu nê kãm: “E jar na pa wa awýr tẽ. Jejus na wa inhmẽ pa wa awýr tẽ. Na awýr pẽr mẽn h o: ‘Nhỹri kot paj ixkôt ri mẽ pa ho mẽ pa xwýnhjê mẽ axpẽn kutã Pas ã apku?’ Anê. Na ã awýr hpẽr mẽn h anê.” Anê.

¹² —E ã kãm akapẽr anê kê war ama nê ra war amã ôrkwý nhĩmõk ã ixkre rax ô jahkre. Kamã ra kaxyw mẽ paxàpkur xà hã mẽmoj piitãã. Ka wa omu hãmri nê mãmri mẽ ixkutêp kamã mẽmoj tã apê. Anê.

¹³ Hãmri nhũm wa kuma nê ma krĩm tẽ. Ma tẽ nê hwýr axà hãmri nê ra kot wa kãm mẽmoj jarẽnh xà hkôt mẽmoj piitã omu hãmri nê mẽ kutêp mẽõ hã àpẽn h o wa xa.

¹⁴ Tã nhũm myt axà nhũm mẽ wa hkôt mõ nê ixkreta wýr àpir pa. Hãmri nê apkur

kaxyw hkrĩ hpa nhũm Jejus mẽ ìhkô hã nhỹ.

¹⁵ Hãmri nê mẽ kãm tanhmã amnhĩ jarẽnh to nê mẽ kãm:

—E na pa inhmã Pas ã mẽ anhĩhkô hã ixàpkur prãm nê. Kormã ixte amnhĩ xà htýx kãm ijamak xwýj ri.

¹⁶ Kwa mẽ inhma. Kot paj axte mẽ akutã Pas ã ixàpkur kêt ry rax nê. Nom koja nhỹrmã Tirtũm akupýn ixte mẽ ato amnhĩptàr kaxyw inhmẽ hãmri pu mẽ rĩ kormã axte arĩgro mex maatija ã pahkĩnh kãm axpẽn kutã paxàpkur rax nê. Anê.

¹⁷ Nhũm ã mẽ kãm amnhĩ jarẽnh anê nê hpãnhã wĩhti py nê o xa nê Tirtũm mã harẽ nê kãm:

—Pa Papaj. Nà ãm hãmri na ka hte mẽ inhnê mẽ kãm mẽ ixkurê xwýnhjê pumunh mex nê mẽ ìhkra pẽ mẽ ijapõj. Amex o amex. Anê.

Hãmri nê hpãnhã hkôt mẽ pa ho mẽ pa xwýnhjê hõ mã kugõ nê kãm:

—E mĩ. Apy nê mẽ axpẽn pãnhã hkwy ho ixkõ.

¹⁸ ãm hãmri na pa mẽ amã amnhĩ jarẽ. Kot paj axte wĩhti ho ixkõm kêt rãhã nhũm nhỹrmã Inhõ Papaj akupýn mẽ awýr inhmẽ. Hãmri pu mẽ rĩ kormã akupýn ixpõx xà hã arĩgrota ã pahkĩnh rax nê. No ãm ra axtem tanhmã hã mẽ pahkĩnh to. Anê.

¹⁹ Hãmri nê hpãnhã pãwti py nê mã ho anê nê Tirtũm mã harẽ. Hãmri nê ho hkry hpa nê mẽ piitã mẽ kãm ôr pa nê mẽ kãm:

—E na pa ã pãwti ho hkry nê mẽ amã ôr anê. Koja mẽ ã

inhîpêx anê nê te mẽ kot ixto hkry hpar pyræk o inhîpêx pa amnhî xà htýx kamã ijamak kãm ty. Nom mẽ anê kot paj ty. Jakamã kêr ka mẽ ixwakre kamã tōhã axpên wýr akuprō nê ixte mẽ ate amnhî tomnuj pãnhã amnhîrer kaxyw mẽ anê ixtykja mã ajamxpêr pê akînh nê pãwti hkur o akrî. E mẽ mãmri axãmnhîx aku. Anê.

Nhũm pre ã mẽ kãm amnhî jarênh anê nhũm mẽ mar pê pãwtita hkur o hkrî.

²⁰ Hãmri nê ra hkur pa. Hãmri nhũm Jejus axte kopta py nê mẽ kãm:

—Mẽ kot ixpîr xà hã arîgro hã koja ixkamrô axkapî. Nom koja mẽ amarî ixpîr nhũm ixkamrô amarî hpikapîr kêt nê. ãm paa. Pa kot paj mẽ anê mẽ ìhkram amnhî jaxà nhũm mẽ ã inhîpêx anê. Koja ixkamrô axkapî nhũm Tîrtũm omu nê ixkukwak ri mẽ anê mẽ ate amnhî tomnuj piitã te amnhî katut kôt rênh par pyræk o hipêx nê mẽ ato hkra. Amnepêm kot ja hã amnhî jarênh xà hkôt. Jakamã e mẽ ixkamrô pikapîrta mã ajamxpêr pê wîhti hkwy ho ixkô. Anê.

Jejus ã mẽ kãm àmnênh xwýnh jarênh

Matêwre 26.21-25; Makre 14.18-21; Juãw 13.18-19

²¹ Nhũm Jejus arî mẽ kãm kapêr nê mẽ kãm:

—Nê kot mẽ mẽ kãm ixtã àmnênh mã xwýnhhta na jar mẽ pahkaêx ã mẽ pakutã apkur o nhỹ.

²² Tîrtũm kãm hprãm xà hkôt koja mẽ tanhmã ixto rax nê ixpî. Nom kot mẽ kãm ixtã àmnênh mã xwýnhhta hêxta waa nê. ã kot inhîpêx anhýrja mýrapê koja amnhî xà htýx kãm hamak rax kumrêx. Anê.

²³ Nhũm pre ã Jejus mẽ kãm amnhî jarênh anê. Nhũm mẽ kuma nê tee ri axpên pumunh o hkrî. Hãmri nê ri axpên kukja nê axpên mã:

—Kwa nà mẽ pahtō kot pu we ã ri hipêx anê? Nà pa hkêt.

Anhýr o tee ri axpên kukjêr o hkrî.

Mẽ pamã amnhî to rũnh prãm kêt ã mẽ pamã karō

Matêwre 20.20-28; Makre 10.35-45; mããnhên Rômãn 12.3-5, 12.10, 12.16; Epes 4.2-4; Piripos 2.3-8; Xiakre 4.1-10; Wam Pêtre 5.3

²⁴ Tã nhũm Jejus nhỹ hã mẽ ahkre ho mẽ pa xwýnhjaja axpên mã tanhmã kapêr to ho hkrî nê axpên mã:

—Kwa mẽ pahtō kot puj wem nhýrmã pahpê pahi nê mẽ ho amnhîptâr rax o ri papa? Anê.

Hãmri nê mẽ axpên mã: “Nà pa.” Anê nê nhãnh axpên mã: “Nà kêt paa.” Anê. Hãmri nhũm mẽ nêtãnh axpên mã: “Nà kêt pa kênã.”

²⁵ Anhýr o axpên mã kapêr o hkrî. Hãmri nhũm Jejus tee ri axpên tã mẽ kuma nhũm mẽ ã hamaxpêr anhýrja kêp omnuj nê nhũm mẽ kãm tanhmã hã kapêr to nê mẽ kãm:

—E mẽ inhma. Na hte Ijaew kêt xwýnhjê nhō pahijaja ã amnhî nhîpêx anhýr o ri pa nê

amarĩ hkrĩ xà kamã hkrĩ ho hkrĩ. àhpumunh tỳx jakamã na htem amarĩ ixkre hkre jakry kamã kãm mẽ àpênh xwỳnhjê mã mẽmo mẽ àpênh ã karõ ho hkrĩ. Na htem ã amnhĩ nhĩpêx anhỹr o pa. Nê mẽ kot amnhĩm mex ã harênh kaxyw tanhmã mẽ ho mex to ho pa.

²⁶⁻²⁷ Tã kêr ka mẽ ho mẽ uràk kêt nê. Kêt ãm te amarĩ ri mẽ apa xwỳnh pyràk o axpênh nhĩpêx. Ixpyrà nê amarĩ mẽmoj to mẽ kutã anojarêt rãhã ho ri apa. No mẽ ate mẽ ho amnhĩptàr rax kukamã ajamxpêr kêt nê.

²⁸ Na prem axpênh mã ixto hêx nê tanhmã ixto kapêr punuj to htã ka mẽ ama nê ãm mẽ ama nê arĩ ixkôt ri apa rãhã nê. ãm hãmri na ka htem arĩ ixkôt ri apa anê.

²⁹⁻³⁰ Kot paj amnhĩ tã mẽ ato mex rax nê. Na pre ra Tirtũm nhỹrmã ixte mẽ ato amnhĩptàr o ixkrĩ kaxyw ixãm. Tã ot pa amnhĩ pyrã nê mẽ pahkwỳ Ijaew kaxyw mẽ axunhwỳ ka mẽ nhỹrmã mẽ piitã mẽ ho amnhĩptàr o apa. Nê mẽ apê ixkrãmnhwỳ hã nhỹrmã ixkutã axàpkur o apa. Anê.

Jejus kot Simãw Pêtre mã kapêr ã harênh

Matêwre 26.31-35; Makre 14.27-31; Juãw 13.36-38

³¹ Tã nhũm Jejus Simãw Pêtre mã kapêr nê kãm:

—Kwa Simãw. Na Satanasti kãm hprĩ hã ixtã mẽ api-itã mẽ kamã hamak prãm nê. Tanhmã kot mẽ akrã hto nhũm mẽ ate mẽ kãm

ixkurê xwỳnhjê pumaj ixk-aga hã kãm mẽ akamã hamak prãm tỳx nê. Jakamã ã kot mẽ anhĩpêx anhỹr kaxyw na pre ra amnhĩ to Inhõ Papaj ma nhũm kãm: “Tõe. Kam nê mãmri tanhmã mẽ kamã ajamak to.” Anê.

³² —Tã ate mẽ umaj ixk-aga nê axte ate amnhĩ kaxyw inhmã ajamxpêr kêt pymaj na pa ra ato Inhõ Papaj wỳr kãm ixihitỳx nê Simãw Pêtre. Jakamã kêr ka mẽmo arĩgro hã tee ri ixkaga hã amnhĩ pumu hãmri nê tokyx tãm akupỳm ixkôt amnhĩ xãm tỳx nê. Kêr kê nhỹrmã akwỳjê hõ tanhmã amnhĩ tomnuj to nê tee ri amnhĩ kukamã hamaxpêr ka ja hã omu hãmri nê kãm ate tanhmã amnhĩ tomnuj tota jarê. Kê mẽ ã ate amnhĩ nhĩpêx anhỹr ã ajarênh ma nê apyrã nê tokyx akupỳm tãm ixkôt amnhĩ xãm tỳx kurê kumrêx. E kêr ka ã akupỳm ixkôt mẽ piitã mẽ hipêx anhỹr o ri apa Simãw Pêtre. Anê.

Nhũm pre ã Simãw Pêtre kot tanhmã amnhĩ nhĩpêx to hkukamã kãm ujarênh anê.

³³ Hãmri nhũm tee ri amnhĩ tã kuma nê kãm:

—Kwa nà Pahihti. Kot paj ri akwỳm tanhmã amnhĩ tomnuj to hkêt nê. Koja mẽ te ajaxà nê apĩ htã kot paj arĩ akôt ri ixpa ho ixpa nhũm mẽ pahto amỹrà nê tanhmã pahto. Anê.

³⁴ Hãmri nhũm kuma nê kãm:

—Nà koja apkati hkôt krãhyre hkàr kêt ri ka ra mẽ umaj ate ixkôt apa hkêt ã

mě kām amnhĩ tã axàprār o axkruněpxi kām ga. Aně.

Jejus kot hkwyjé mã mẽmoj tã karō

Matěwre 10.5-15; Rukre 9.1-3

³⁵ Hāmri nhũm Jejus arĩ hkôt mẽ pa ho pa xwýnhjê mã kapěr ně mẽ kām:

—E wam ixte mẽ hwýr mẽ arēnh̄ta ã na ka prem amnhĩ kôt aparkà hkwȳ ho apa hkêt nē. Nē kawà jamàn̄h nē ho apa hkêt nē. Nē mrykà jamàn̄h nē amnhĩ kôt ho apa hkêt nē. Ām mẽ anh̄y kamã mẽ hwýr apa hã na pa pre mẽ amã karō. Tã xàn ka prem ã mẽ hwýr apa aně nhũm mẽ amnhĩ wýr awýr kêt nē? Nà xà na prem amnhĩ wýr mẽ awý? Aně.

Hāmri nhũm mẽ kām:

—Tý na prem amnhĩ wýr mẽ ixwý. Mě ixte amnhĩ kôt mẽmoj to ixpa hkêt tã na pa prem amarĩ mẽ kutã ixàpkur mex o ri mẽ hkôt ixpa. Aně.

³⁶⁻³⁷ Hāmri nhũm mẽ kām:

—Tõe. Nà mẽ kot mẽ ato mex tã nom koja mẽ hpānhã axtem hō ho mẽ anh̄pêx. Jakamã kêr ka mẽ akupým mẽ kām ijarēnh o apa kaxyw anojarêt hāmri nē anhō mrykà rý akawà htu nē ma amnhĩ kôt ho apa. Nē awapo. Kot kaj mẽ awapo hkêt japêr hāmri nē apipro xà ho wēnē nē amnhĩm hō japrō nē ma amnhĩ kôt ho apa. E kêr ka mẽ ã amnhĩ nh̄pêx aně.

—Nē Tĩrtũm kapěr ã kagà htũm kot ra ixkukamã tanhmã ijarēnh to nē kot ijarēnh kot:

Koja mẽ hipêx o te mẽ kot amnhĩ tomnuj týx xwýnh nh̄pêx pyrāk. Aně.

Ā mẽ kot inh̄pêx anh̄r kukamã ijarēnh kot anh̄r. Tã na mẽ ra ã inh̄pêx anh̄r kaxyw. Aně.

³⁸ Nhũm pre ã Jejus mẽ kām kapěr aně nhũm mẽ kuma nē kām:

—Ota mẽ panhō wapohti haměxkrut Pahihti. Aně.

Hāmri nhũm mẽ kām:

—Tõe. Nà hāmri. Mě amnhĩm axi nē ho amnhĩm mẽmoj to aně. Aně.

Jejus kot Tĩrtũm mã amnhĩ jarēnh

Matěwre 26.36-46; Makre 14.32-42

³⁹ Tã nhũm Jejus kê axte krĩja rũm kato nē hixêt pé Oriwēhti hwýr tē nē api nhũm hkôt mẽ pa ho mẽ pa xwýnhjaja ma hkôt mra.

⁴⁰ Hāmri nē nh̄ri hixêt kahti ri hkrĩ nhũm Jejus mẽ kām:

—E kwa kêr ka mẽ ixkutêp amnhĩ to Inhō Papaj wýr o akrĩ. Kê mẽ ixkôt tanhmã mẽ ato htã ka mẽ amã mẽ uma xàj ixkaga hkêt nē. Arĩ mẽ kutã amnhĩ to htýx nē akuhê. Aně.

⁴¹ Hāmri nē mẽ kurũm htēm grire nē Tĩrtũm mã amnhĩ jarēnh kaxyw hkõn krã ho tēm nē nh̄y.

⁴² Hāmri nē kām:

—Kwa Papaj. Nà na pa ra amnhĩ xà htýx kukamã ijamaxpěr nē amnhĩ kamã ixkahak týx kumrêx. Inhmã amnhĩ xà kamã ijamak prãm kêt o ijamak prãm kêt.

Jakamã kot kaj amã inhnê ho ajapêx prãm nê mãmrĩ inhnê ho ajapêx nhũm mẽ kãm ixkurê xwýnhjaja tanhmã ixto hkêt nê. Rỳ ko. Kot kaj amã mẽ kot tanhmã ixto hprãm hã kê mẽ mãmrĩ tanhmã inhĩpêx to. Nom pam inhmã hprãm xà hkôt kêt. Anê.

Nhũm pre ã Jejus amnhĩ to Hipêêxà Tĩrtũm wýr anê.

⁴³ Hãmri nhũm kuma nê hwýr kapêr o wrỳk xwýnhja mẽ nhũm hwýr wrỳ nê kuri xa. Hãmri nê õxàhkre kaxwýnh kãm tanhmã ho hihtỳx to.

⁴⁴ Nhũm kê axte amnhĩ to Hipêêxà hwýr kãm hihtỳx nê. Tee ri amnhĩ kukamã hamaxpêr pê amnhĩ kamã kahak tỳx kumrêx. Jao hã gô rax nê te hkamrô xàhàr pyràk o pikap ahà.

⁴⁵ Hãmri nê kànhmã xa nê akupỳm hkôt mẽ pa ho mẽ pa xwýnhjê hwýr tẽ nê mẽ omu nhũm mẽ ra õt pa nê hikwỳ. Mẽ kot tee ri Jejus kot mẽ kãm amnhĩ jarênhja kukamã hamaxpêr o hkaprĩ nê õt pa nê hikwỳ.

⁴⁶ Hãmri nhũm Jejus tẽ nê tee ri mẽ omu nê mẽ kumra nê mẽ kãm:

—Kwa nà. Mẽ ri ã amnhĩ nhĩpêx anhỹr kêt nê. Kwa mẽ kànhmã akrĩ nê amnhĩ to Inhõ Papaj wý kê mẽ ato mẽ axihtỳx. Hãmri nhũm mẽ tanhmã ixkôt mẽ ato ka mẽ inhỹ hã mẽ kutã amnhĩ to htỳx nê akuhê. Anê.

Mẽ kot Jejus pynênh ã mẽ harênh

Matêwre 26.47-56; Makre 14.43-50; Juãw 18.1-11

⁴⁷ Nhũm pre ã Jejus mẽ kãm kapêr anhỹr rôm nhũm hkôt pa ho pa xwýnh pê Jut Kariotja amnhĩ kôt mẽ kot Jejus pynênh xwýnhjê ho tẽ. Mẽ ho htêm rax nê. Hãmri nê kot Jejus kahti hkôt mýnh kaxyw hwýr tẽ

⁴⁸ nhũm amnhĩ tã omu nê kãm:

—Kwa Jut. Xà mẽ kahti hkôt mẽ hamýnh nê mẽ hpãr o na htem mẽ kãm mẽ hã amýnê? Anê.

⁴⁹ Hãmri nhũm hkôt mẽ pa ho mẽ pa xwýnhjê hõja tee ri mẽ kot amnhĩ nhĩpêx ã mẽ omu hãmri mẽ õ wapota mã hamaxpêr kurê kumrêx nê Jejus mã:

—Kwa Pahihti. Xà kot paj mẽ panhõ wapohti py nê ho mẽ panê mẽ hkwy hpa? Anê.

⁵⁰ Hãmri nhũm hõta kuma nê mẽ kaxyw ja kapa. Nhũm mẽ õ patre maati mã àpênh xwýnhja mẽ hkôt tẽ nhũm omu nê kãm wapo ho apê. Nê kot ho hkrã nhĩpônã mã tã kuhpaw nê ho upòk rũm hamak nhĩkjê pix krãhta.

⁵¹ Hãmri nhũm Jejus omu nê nê kãm kapêr nê kãm:

—Kwa nà ri ã amnhĩ nhĩpêx anhỹr kêt nê. Amarĩ xa. Anê.

Hãmri nê hamakja py nê akupỳm kãm hamak ã kuxi nê ho mex.

⁵²⁻⁵³ Hãmri nê mẽ kot unênh mã xwýnhjê mã tanhmã kapêr to. Mẽ õ patre krãhtũmjê mẽ Tĩrtũm mã amnhĩ jarênh xà hã ixkre jamãr xwýnhjê krãhtũm mẽ Ijaew nhõ pahijê mẽ nhũm mẽ ho pimràatã mẽ kãm kapêr nê mẽ kãm:

—Kwa na pa pre apkati mẽ Tĩrtũm nhõrkwỹ kamã mẽ kãm ixkapēr o ixpa ka prem tokyx ixpynênh kêt tâ jarãhã te ixte amnhĩ tomnuj xwỳnh pyræk o inhĩpêx nê ixwỳr wapo nê kô hã akapên nê ixwỳr ã atêm rax anê. No ãm ra mẽ ate tanhmã ixto kaxyw arĩgro kator kênã. Jakamã kot kaj mẽ mãmri tanhmã amã ixto hprãm xà hkôt mãmri tanhmã ixto. Satanasti nhỹ hã ã mẽ ate inhĩpêx anhỹr mã kênã. Anê.

Simãw Pêtre kot Jejus kôt pa hkêt ã kot amnhĩ jarênh

Matêwre 26.69-75; Makre 14.66-72; Juãw 18.15-18, 18.25-27

⁵⁴ Tã nhũm mẽ Jejus pynê nê ma o tẽ. Ma mẽ õ patre maati nhõrkwỹ hwỳr o tẽ. Nhũm Simãw Pêtre ma hapu hã mẽ hkôt hã mẽ omunh o tẽ.

⁵⁵ Nhũm mẽ patre maati nhõrkwỹ hwỳr Jejus o axà nê hkôt giêx pa hãmri nhũm Simãw Pêtre kĩtare hwỳr axà nê mẽ kuri xa. Nhũm mẽ kĩtare kamã amnhĩm kuto nê hã ãnhunh o hkrĩ nhũm

⁵⁶ mẽ ãhkô hã ãnhunh o nhỹ. Hãmri nhũm mẽ kãm ãpênh xwỳnh niti hirã kamã hprĩ hã omunh kurê kumrêx nê mẽ kãm:

—Xê pěr myti ja kêp Jejus kôt mẽ pa ho mẽ pa xwỳnhjê hõ na. Anê.

⁵⁷ Hãmri nhũm tee ri amnhĩ tâ kuma nê kãm mẽ uma nê mẽ kãm amnhĩ tâ aprã nê kãm:

—Tk. Kokỹ. Ixte mẽhõ my ata pumunhre hã. Anê.

⁵⁸ Tã nhũm hpãnhã mẽhõ myja kãm:

—Kwa nã. ãm hãmri na ajarê. Apê Jejus kôt ri mẽ pa xwỳnhjê hõ na ka.

Anê nhũm kuma nê kê axte kãm:

—Kwa mẽ ri ã amnhĩ krã hkôt ri ixto axêx anhỹr kêt nê. ãm ixte aa mẽhõta pumunh kêt kumrêx. Anê.

⁵⁹ Tã nhũm ja haxwỳja axte omu nê kãm:

—Kwa ãm hãmri na mẽ ajarê. Apê Jejus kwỳ hõ na ka. Uræk nê te apê Garirej nhõ xwỳnh pyræk kênã. Anê.

⁶⁰ Hãmri nhũm tee ri kuma nê mẽ kãm amnhĩ tâ ãprãr kãm hihtỳx nê mẽ kãm:

—Tk. Ixpê Garirej nhõ xwỳnh kêt. ãm ixte mẽhõ mũj pumunh kêt kumrêx tâ ka mẽ ãm xatã hkôt ixpa ho ixpa xwỳnh ã ixkamnhĩx o akuhê.

Anhỹrja o ra mẽ kãm amnhĩ tâ ãprãr o axkrunêpxi mẽ nhũm krãhyre kà.

⁶¹ Hãmri nhũm Jejus arĩ ixkre kamã ãm tâ Simãw Pêtre ho hakêx nê omu. Hãmri nhũm amnhĩ tâ no pumu nê kot hkukamã kãm ã amnhĩ nhĩpêx anhỹr jarênhja mã hamaxpêr kurê kumrêx. Krãhyre hkàr kêt ri kot mẽ kãm amnhĩ tâ ãprãr o axkrunêpxi hã harênhja mã hamaxpêr nê kãnhmã hakry hpar o tẽ nê hkaprĩ htỳx nê.

⁶² Hãmri nê hkaprĩ xàj kĩtare pê kato nê tẽ nê awry hã xa nê mỳr rax kumrêx.

Mẽ kot Jejus tak ã mẽ harênh

Matêwre 26.67-68; Makre 14.65

⁶³ Hāmri nhūm mẽ kot Jejus pumunh o kuhê xwýnhjaja hã hpēr o axkê nẽ htak o kuhê.

⁶⁴ Nẽ no hpro nẽ htak nẽ kãm:

—E atak xwýnh nhĩxi jarê. Apê Tirtũm Kra hã ate amnhĩ jarēnh jakamã mãn urak nẽ axàhpumunh týx. Jakamã e hixi jarê. Anẽ.

⁶⁵ Hāmri nẽ xatã haprý nẽ kãm kapēr punuj nẽ.

Mẽ kot mẽ hkrãhtũm wýr Jejus o htēm ã mẽ harēnh

Matêwre 26.57-68; Makre 14.53-65; Juãw 18.19-24

⁶⁶ Tã nhūm myt kator o mōr mẽ nhūm Ijaew nhõ pahijê mẽ patre krãhtũmjê mẽ Tirtũm kapēr tũm o mẽ ahkre xwýnhjaja axpẽn wýr pikuprõnh pa. Hāmri nhūm mẽ ma mẽ hwýr Jejus o tẽ.

⁶⁷⁻⁶⁸ Nhūm mẽ omu nẽ tanhmã kot amnhĩ jarēnh to hã hkukja nẽ kãm:

—Kwa mẽ inhmã amnhĩ jarê. Xà ka na apê Tirtũm kot mẽ ixkaxyw axãm xwýnhnta? Xà ka kot kaj Rõm nhõ xwýnhjê pẽ mẽ ixpytã nẽ mẽ ixto amnhĩptår o apa? Anẽ.

Hāmri nhūm mẽ kãm:

—Nà kot paj tanhmã mẽ amã amnhĩ jarēnh to ka mẽ ixkõt ajamaxpēr kêt nẽ. Ixte ãm hāmri mẽ amã amnhĩ jarēnh tã ka mẽ inhma nẽ ãm inhma. Nẽ kot pa amnhĩ xwar mẽmoj tã mẽ akukja ka mẽ amnhĩ xwar inhmã tanhmã harēnh to hkêt nẽ. ãm mẽ axêx rom mẽ ate ã ixkukjêr anhýr kênã.

⁶⁹ Tã nom kot paj tokyx ma akupým Inhpêêxã Tirtũm

wýr api. Hihtýx o hihtýx rãhã nẽ pa ho pa xwýnh na. Jakamã kot paj hwýr api nhūm amnhĩ nhĩhkô hã inhýr pa upôk rũm mẽ apiitã mẽ ato amnhĩptår o ixkrĩ. Hāmri nẽ nhýrmã paa tanhmã mẽ ajarēnh to. Anẽ.

⁷⁰ Hāmri nhūm mẽ tee ri kot ã amnhĩ jarēnh anhýrja ma nẽ kãm:

—Tk. Kwa akatåt kôt mẽ inhmã amnhĩ jarê nã. Xà apê Tirtũm Kra na ka? Anẽ.

Hāmri nhūm mẽ kãm:

—Tý ixpê Kra na pa. Anẽ.

⁷¹ Hāmri nhūm mẽ tee ri ã amnhĩ jarēnh anhýrja ã kuma nẽ axpẽn mã:

—Kwa mo kaxyw kot puj mẽ axte mẽ hkwyjê japêr nhūm mẽ tanhmã kot amnhĩ tomnuj to hã harê? Tãm kêp Tirtũm Kra hã amnhĩ to hêx nhūm mẽ pahte pahpiitã mar kênã. E kwa tokyx pu mẽ ma Rõm nhõ pahihty hwýr o tẽ kê mẽ pamã hã amýnẽ nẽ mẽ pamã kupĩ. Anẽ.

23

Mẽ kot pahi Pirat wýr Jejus o htēm ã mẽ harēnh

Matêwre 27.1-2, 27.11-26; Makre 15.1-5; Juãw 18.28-38

¹ Tã nhūm mẽ Jejus o kato nẽ nhãm Pahihti Pirat wýr o tẽ.

² Hāmri nẽ kutã ãm nẽ tanhmã kãm ho hêx to nẽ kãm:

—E ot pa mẽ awýr jahti ho tẽ. Na hte mẽ inhmã hêx rũnh o pa. Mẽ ixte Pahihti Sesti kapêr kwým ri amnhĩ nhĩpêx prãm xaj tanhmã mẽ inhmã mẽmoj tã karõ hto ho pa. Nẽ axtem nẽ mẽ ixte Sesti mã

kàxpore hkwỳ nhõr kêt ã mẽ inhmã karõ. Nê Tirtùm kot mẽ pakaxyw kêp mẽ panhõ pahi hã ãm xwỳnh ã amnhĩ jarê. ã na hte mẽ inhmã amnhĩ to hêx anhỹr o pa. Anê.

³ Hãmri nhũm Pirat mẽ kuma nê Jesus pumu nê kãm:

—E kwa inhmã amnhĩ jarê. Xà apê Ijaew nhõ pahi na ka? Xà ka na htem amnhĩ wỳr akãm hamak o pa? Anê.

Hãmri nhũm kãm:

—Nà ãm hãmri na ka ã ijarênh anê. Anê.

⁴ Hãmri nhũm Pirat tanhmã hkukjêr to nê tee ri kot amnhĩ jarênh ã kuma hãmri nê patre krãhtũmjê mã kãm:

—Kwa mẽmo mỳrapê kot pa tanhmã mẽ amã hã ixàmnhên to? Kot tanhmã amnhĩ tomnuj tore hã. Nà kot pa kãm inhũre. Anê.

⁵ Hãmri nhũm mẽ tee ri kuma nê kot mẽ kãm hã àmnênh prãm xàj hã kãm kapêr kãm hihtỳx nê. Nê kãm:

—Kwa nà. Na pre hte pika pê Jutej kamã tanhmã mẽ kãm hêx to ho pa. Hãmri nhũm mẽ ra hã axpên kutã amnhĩ xunhwỳ nê hã pijapu rũnh o pa. Tã mãânên Garirej kamã ã amnhĩ nhĩpêx anhỹr o hkrax nê hpãnhã amnê mẽ pahwỳr ã amnhĩ nhĩpêx anhỹr kaxyw mõi anê. Anê.

Mẽ kot Erox wỳr Jesus o htêm ã mẽ harênh

Rukre 9.7-9

⁶ Hãmri nhũm Pahi Pirat mẽ kuma nê mẽ kãm:

—Kwa xà kêp Garirej nhõ xwỳnh na? Anê.

Hãmri nhũm mẽ kãm:

—Tỳ. Kêp Garirej nhõ xwỳnh kênã.

⁷ Anê nhũm mẽ kãm:

—Tô mẽ ma pahiti Erox ãxipas wỳr mãn o tẽ. Kêp Garirej nhõ xwỳnhjê nhõ pahi na. Tã ra jar Jerujarê kamã ham pøj. No axtem ixpê Jutej kamã mẽ pa xwỳnhjê nhõ pahi jakamã kwa mẽ ma õ pahita wỳr mãn o tẽ kê tãm tanhmã mẽ amã ho. Anê.

⁸ Hãmri nhũm mẽ kuma nê ma pahi Erox ãxipas wỳr o tẽ. Na pre ra Erox ãxipasja xatã Jesus jarênh ma nê kãm omunh prãm nê. Kãm aa kot mẽmoj pumunh kêt õ ho anhỹr ã omunh prãm tỳx jakamã nhũm mẽ ma hwỳr o tẽ nhũm omu nê hkĩnh nê.

⁹ Hãmri nê tee ri mẽmoj tã hkukja no nhũm akryk xa nê tanhmã kãm nê hkêt nê.

¹⁰ Hãmri nhũm mẽ õ patre krãhtũmjê mẽ Tirtùm kapêr tũm o mẽ ahkre xwỳnhjaja kãm ho kapêr punuj nê ho hêx kãm hihtỳx nê.

¹¹ Hãmri nhũm pahi Erox ãxipas mẽ kuma hãmri nê õ põiisti mẽ wa kãm kapêr punuj nê hã hpêr o axkê nê tanhmã ri haprỳ to. Hãmri nê hã hpêr o pikênh kãm kêp pahi hã mẽ ê mexja py nê kãm haxà nê akupỹm pahi Pirat wỳr kumê.

¹² Na pre Pahi Pirat mẽ Pahi Erox ãxipasja wa kãm axpên kĩnh kêt nê. Tã hãmri nhũm Erox ãxipasja tee ri Jesus kot kãm tanhmã amnhĩ jarênh to hã mar prãm xàj tee ri hkukamã hamaxpêr hãmri nê Pirat ã hpijaàm kaxyw akupỹm hwỳr kumê. Hãmri

nhũm amnhĩ tã omu hãmri nẽ wa ra akupỹm kãm axpẽn kĩnh nẽ. Nẽ akupỹm axpẽn mã hpër o axkẽ nẽ pikunhar o pa pẽ akupỹm axpẽn to hkràmnhwỳ.

Pirat kot Jejus pĩr ã àmnênh Matêwre 27.15-26; Makre 15.6-15; Juãw 18.39-19.16; mããnẽn Atre 3.13-14

¹³ Tã nhũm Pirat akupỹm amnhĩ wỳr mẽ hã karõ. Ijaew kwỳjaja nẽ mẽ õ pahijaja nẽ mẽ õ patre krãhtũmjaja nhũm akupỹm amnhĩ wỳr mẽ piitã mẽ hã karõ.

¹⁴ Hãmri nhũm mẽ akupỹm hwỳr gjêx pa nẽ kuhê nhũm mẽ kãm:

—E na ka mẽ ixwỳr mytita o tẽ nẽ tanhmã inhmã harênh to. Kot mẽ akwỳjê mã tanhmã hêx to ho pa hã harẽ. Tã pa ra jar mẽ anoo mã tanhmã hkukjêr to nẽ tee ri kot inhmã tanhmã amnhĩ jarênh to hã kuma. Te kot amnhĩ to mex xwỳnh pyrãk. Mẽ ate tanhmã ho akapër to htã nom kot anhỹr kêt. Kot amnhĩ to mex xwỳnh na.

¹⁵ Pahi Eroxa ra ixpyrà nẽ tee ri tanhmã hkukjêr to nom nhũm tanhmã kãm nẽ hkêt nẽ. Nhũm tee ri ja hã omu nẽ akupỹn ixwỳr kumẽ. Jakamã kwa mẽmo mỳrapê kot paj mẽ amã hã amỹnê nhũm mẽ amã kupĩ? Tanhmã kot amnhĩ tomnuj tore hã.

¹⁶ Kot paj ãm mẽ kãm anẽ kê mẽ htak nẽ kãm ure kê mãmrĩ ma tẽ. Anẽ.

¹⁷ Arĩgro pẽ Pas ã na pre hte mẽ õ pahi mẽ kot mẽ ho prês nhũm mẽ hkrĩ xwỳnhjaja nhũm pre htem mẽ ho hpỹnh

nẽ mẽ kãm ure. Jakamã na pre ã mẽ kãm kapër anẽ nẽ kot Jejus tak nẽ kãm urer mã.

¹⁸⁻¹⁹ Nom nhũm mẽ kuma nhũm ja mẽ kêt omnuj nẽ nhũm mẽ kãm:

—Kwa nà. Apĩ ri. Apĩ nẽ mẽ inhmã Parapas mã mãn anhũre. Anẽ.

Parapas na pre mẽ õ krĩ kamã õ pòristi mẽ pahi Piratja mẽ kutã amnhĩ xãm nẽ kêt õ pòristi hõxpĩ. Mỳrapê na prem ra haxà nhũm hkrĩ ho hkrĩ. Jakamã nhũm mẽ Pirat kot kãm urer kaxyw ã kãm kapër anẽ.

²⁰ Nom nhũm kãm Jejus mã urer prãm jakamã axte hã mẽ hkukja nẽ mẽ kãm:

—Kwa nom mẽmoj mỳrapê kot paj mẽ kãm hã amỹnê nhũm mẽ amã kupĩ?

²¹ Anhỹr tã nhũm mẽ kuma nẽ ãm kuma. Nẽ xatã kãm:

—Kwa tokyx pĩ kahpa hã anhô kê ty. Anẽ.

²² Hãmri nhũm tee ri mẽ kuma nẽ mẽ kãm:

—Tk. Kwa nà. Tanhmã kot amnhĩ tomnuj tore hã kot pa kêt hã kunhõ nhũm ty. Nà kot paj ãm mẽ kãm anẽ kê mẽ htak nẽ kãm ure kê ma tẽ. Anẽ.

²³ Hãmri nhũm mẽ xatã hã kãm kapër kãm hihtỳx nẽ kãm:

—Kwa nà. Pĩ kahpa hã mãn anhô kê ty.

Anhỹr o ãm xatã kàx pẽ àmra kamã kãm hã amỹnê.

²⁴ Hãmri nhũm Pirat tee ri mẽ kuma hãmri nẽ tã mẽ kãm hprãm xà hkôt mẽ kãm ã amỹnê.

²⁵ Hãmri nẽ mẽ kãm Parapas mã ure. Ra kot pahi Pirat

pê õ pôristi kutã amnhĩ xãm
nê kêp hõx pĩr tã nhũm mẽ
kãm hprãm xà hkôt akupỹm
kãm ure. Hãmri nê mẽ ìhkram
Jejus jaxà. Mẽ kãm hprãm xà
hkôt ri mẽ kot tanhmã hipêx
to kaxyw.

*Mẽ kot pĩ kahpa hã Jejus
nhôr ã mẽ harênh*

*Matêwre 27.31-43; Makre
15.21-32; Juãw 19.17-20,
19.27-31; mããnên Atre 7.59-
8.1*

²⁶ Tã nhũm pôristijaja Jejus
o kato nê ma kapôt mã o tẽ.
Nê kãm õ pĩ kahpa gõ nhũm
amnhĩ kaxyw kumỳ nê o tẽ.
Nom mẽ kot htak rax kurê
nhũm hirot týx nê nhũm mẽ ja
hã omu nê mēhõ kot ho ajuta
kaxyw mẽ hkapi ho xa. Hãmri
nê Sirên nhõ xwýnh Simãw
hkã htyk pumu. Nhũm pre
htýx hamakêtkati nê mẽ kutã
krĩm tẽ. Hãmri nhũm mẽ haêp
pê unê nê kãm Jejus o ajuta
kaxyw hã karõ nhũm kãm õ pĩ
kahpaja mỳ nê mẽ hkôt o tẽ.

²⁷ Hãmri nhũm mẽ ohtõ nê
Jerujarê rũm Jejus kôt mõ.
Nhũm mẽni hkwyjaja omu nê
kãm hkaprĩ xà mỳr o hkôt
mõ.

²⁸ Hãmri nhũm mẽ mỳr ã mẽ
kuma nê mẽ ho hakêx nê mẽ
omu nê mẽ kãm:

—Kwa nà Jerujarê nhõ
xwýnhjaja. Mẽ amã ixkaprĩ
xà mỳr kêt nê. Kêt mẽ
kamjaja amã amnhĩ kaprĩ xà
mãn mur. Nê mẽ akrajê kamã
axukaprĩ xà mãn mur.

²⁹ Koja mẽ nhỹrmã mẽ apê
mẽ anhõ krĩ grành pa ka
mẽ apunuj nê amnhĩ xà htýx
kamã ajamak o ri apa. Nê
tee ri mẽ akrajê hkukamã

tanhmã ajamaxpêr to nê aja-
maxpêr o: “Hêxta gàà nê. Na
ixkrajaja ixpê amnhĩ xà htýx
kãm hamak o pa. Kêp apu
mẽ hkra hkêt xwýnhjê pyrã
nê ixkra hkêt nê ixpa ro nhỹx
inhmã mex nê. Nhỹx pa
ixkĩnh nê.” Anhỹr o kot kaj
mẽ nhỹrmã ajamaxpêr nom ã
ajamaxpêr anhỹr kaprỳ.

³⁰ —Nê kot kaj mẽ apiitã
mẽmo punujta pymaj tee ri
amã tokyx atyk nê ajapêx
par prãm kaprỳ nê axpên
mã akapêr o: “Hêxta gàà nê.
Kot kên prêk mỳj mẽ panhĩpy
rôrôk nê tokyx mẽ panhĩmex
par ronhỹx mẽ pamã ja mex.”
Anhỹr tã no ãm tee ri ã aja-
maxpêr anhỹr kaprỳ.

³¹ Nom kêt pa. Aa ixte
tanhmã amnhĩ tomnuj to
hkêt tã nhũm mẽ ã inhĩpêx
anê. Nom mẽ ate amnhĩ
tomnuj mỳrapê koja mẽ
nhỹrmã tanhmã mẽ ato rax
o ã mẽ kot inhĩpêx anhỹrja
jakrenh pa. Hêxta waa nê. Na
pa mẽ akukamã ijamaxpêr
nê ixkaprĩ htýx nê. Anê.

³² Tã nhũm mẽ ja wa ho
hamêxkrut nê tanhmã wa kot
amnhĩ tomnuj toja mỳrapê Je-
jus kôt wa hpĩr kaxyw hkôt
mããnên wa o tẽ.

³³ Jakamã nhũm mẽ ra kên
nhĩxêt te kot mẽ hkrã hi pyrãk
xwýnhta wỳr mẽ o pøj. Mẽ kot
kãm “mẽ hkrã hi xà” anhỹr
jarênhja wỳr mẽ o pøj. Hãmri
nê Jejus pê ê kapa nê pĩ kahpa
hã kuxi nê prek o ìhkra nê
hpar o htýx pa. Hãmri nê
kãnhmã pĩ kahpa xãm nê ho
htýx nhũm xa. Hãmri nhũm
mẽ hpãnhã wa kot amnhĩ

tomnuj xwÿnh̄ta mã wa ho anê nê. Nê prek o wa ìhkra nê wa hpar o htÿx pa hãmri nê akutã ho Jejus nhÿjê nê wa ãm nhÿm wa ajêť.

³⁴ Hãmri nhÿm Jejus kÿx pê amnhÿ xã htÿx kumrêx kamã hamak o jêť rãhã mē ho Tirtÿm wÿ nê kãm:

—Kwa Papaj. ãm ixtã jajê pumu. Mē kot mēmoj mex pumunh kêt jakamã na mē ã inhÿpêx anê. Jakamã ãm ixtã mē omu nê mē kamã axukaprÿ nê. Anê.

Hãmri nhÿm hparpê pôristi hkwyjaja axpên mã é hkwy ho pigrãnh kaxyw hã kênre ho jôka ho hkrÿ.

³⁵ Nhÿm mē ohtô rax nê Jejus parpê omunh o kuhê. Nhÿm mē ô pahijaja mē noo mã hã hpêť o axkê nê mē kãm:

—E jahti na pre te kêp mē pakaprÿ xwÿnh̄ ã amnhÿ jarênh o ri pa. Nê Tirtÿm kot mē pakaxyw ãm xwÿnh̄ ã amnhÿ jarênh o ri pa. Jakamã e kwa pu mē xa nê kot amnhÿ kaxãr nê wrÿk kãm omu. Anê.

³⁶ Nhÿm pôristi mããnên tanhmã hã hpêť o pikênh to. Nê hparpê kãm wÿhti punuti jahkre nê kãm:

—Kwa wrÿ nê mē ixkutã ja hkwy ho ixkô nã. Anê.

³⁷ Hãmri nê kãm:

—E apê Ijaew nhô pahi hã kot kaj amnhÿ kapa nê akupÿn wrÿ. Kwa tokyx pa mē ja hã apumu. Anê.

³⁸ Nhÿm pôristija tapti hō py nê tanhmã hã kagã hto. Nê hã kagã ho:

IJA EW NHŌ PAHI NA JA

Anhÿr o hã kagã hãmri nê Jejus wrÿ api nê mÿ ri kunhō.

Wa kot Jejus nhÿjê nê wa jêť xwÿnh̄ wa harênh

Matêwre 27.44; Makre 15.32

³⁹ Hãmri nhÿm wa kot ìhkô hã jêť xwÿnh̄ta ô haxwÿja kãm kapêť punuj nê kãm:

—Kwa kot kaj apê Tirtÿm kot mē ixkaxyw axãm xwÿnh̄ hã kot kaj amnhÿ kapa nê wrÿ. Nê mããnên amnhÿ kôt wa ixto wrÿ. Anê.

⁴⁰⁻⁴¹ Hãmri nhÿm ihôta kuma nê hã kãm akir nê kãm:

—Tk. Kwa amarÿ ajêť. Xã amã Tirtÿm puma hkêt ã na ka ã kêp Krata mã akapêť anê? Nã koja kãm wrÿk prãm nê kot wrÿ. No pajamê pahte amnhÿ tomnuj mÿrapê koja mē pahpÿ. No tãm kot tanhmã amnhÿ tomnuj to hkêt tã nhÿm mē amarÿ ã hipêx anê.

⁴² Anhÿr o kãm kapêť hãmri nê Jejus mã kãm:

—Kwa Jejus. Kêť ka nhÿrmã mē ixto amnhÿptã hãmri nê inhmã ajamxpêť nê ixkamã axukaprÿ nê ixto mex nê. Anê.

⁴³ Hãmri nhÿm kãm:

—Nã kot kaj jarãhã ma ixkôt kaxkwa hwÿr api nê hpãnhã ixkuri amex nê atÿr tÿm nê apa ho apa. ãm hãmri na pa ã amã ixkapêť anê. Anê.

Jejus tyk ã harênh

Matêwre 27.45-56; Makre 15.33-41; Juãw 19.28-30

⁴⁴ Tã nhÿm kaxkwa nhÿpôk ri myt nhÿr mē nhÿm te ra kamãť pyrãk nhÿm kamãť kô rax kumrêx. Nê kamãť kô ho

ra hã awry nê. Ja mẽ nhũm akupÿm myt katêr o mõ.

⁴⁵⁻⁴⁶ Nom nhũm kormã kamàt kôta ã nhũm Jejus ra htyk kaxyw nê àmra kamã Tirtũm mã kapêr nê kãm:

—E Papaj. Mãmrĩ ixkarõ ho amnhĩptã.

Anhÿrja kôt hãmri ty. Pu nhũm Tirtũm mã amnhĩ jarênh xà hã ixkre kamã hakwakre hã kupêxêja axkjê nê amnhĩ kahê xà mẽnh kurê kumrêx. Utĩ rax tã kôt ã axkjê nê amnhĩ kahê xà mẽ. Te Jejus htyk o kot mẽ pahte hkôt amnhĩ xunhwÿr xwÿnhjê mã Tirtũm wÿr pry jakwa kre kahê xà mẽnh pyrãk o ã amnhĩ nhĩpêx anê.

⁴⁷⁻⁴⁹ Hãmri nhũm mẽ piitã mẽmoj ã kot amnhĩ nhĩpêx anhÿr ã omunh o kuhê xwÿnhjaja. Nê kaxyw Jejus krãmnhwÿjaja nhũm mẽ amÿm omunh o kuhê. Nê Garirej rũm mẽni kot Jejus kôt mẽ pa ho mẽ pa xwÿnhjaja mãânên mẽ kuri amÿm hkaprĩ nê omunh o kuhê. Nhũm pôristi krãhtũmjê hõja ã mẽmoj kot amnhĩ nhĩpêx anhÿr ã omu nê tee ri hamaxpêr o:

—Hêxta waa nê. Pêr ãm hãmri na pre hte tãm amnhĩ nhĩpêx o pa. Tã pa mẽ amarĩ mẽ mar xà hkôt ixtÿx kupĩ. Anê.

Nhũm ã hamaxpêr anhÿrja kôt Tirtũm mã mex o mex ã harênh o xa. Nhũm amarĩ mẽ kuhê xwÿnhjaja mãânên mẽmoj ã kot amnhĩ nhĩpêx anhÿrta pumu nê tee ri hkukamã hamaxpêr o ra kãm ma htÿx nê. Hãmri nê awjanã

nê ma akupÿm krĩm mrar kurê kumrêx.

Mẽ kot Jejus jaxàr ã mẽ harênh

Matêwre 27.57-61; Makre 15.42-47; Juãw 19.38-42

⁵⁰⁻⁵¹ Tã nhũm axtem Juje pê Arimatej nhõ xwÿnhja. Arimatejja pika pê Ijaew kamã na. Nhũm Jujeja kot amnhĩ to mex jakamã Tirtũm kôt amnhĩ nhĩpêx o pa. Jakamã na pre hkwyjê rom Tirtũm kot mẽ pahwÿr Jejus mẽnh xwÿnh ã omu nê hkôt hamaxpêr. Kêp Ijaew nhõ pahi hõ htã hkwyjê hkôt hamaxpêr kêt nê. Jakamã nhũm prem kot Jejus pĩr ã amÿnê nhũm tee ri harênh ma nhũm ja kêp omnuj nê.

⁵² Jakamã nhũm Jejus ty nhũm Juje ma pahi Pirat wÿr tẽ nê ã hã kuwÿ nê kãm:

—Pa? E ot pa awÿr tẽ. Kwa inhmã htyk xwÿnhhta gõ pa ma o tẽ nê haxà. Anê.

⁵³ Hãmri nhũm kuma nê kãm kugõ nhũm ma o tẽ nê haxà. Kaxyw kupêxê hõ py nê ho hkupu nê ma o tẽ nê kên kre kaprÿ kamã haxà. Mẽ kot kormã kamã mẽhõ jaxàr kêt nhũm mẽ kamã Jejus jaxà.

⁵⁴ Arĩgro pê sêsta hã nhũm prem kupĩ nhũm myt xàr o mõr mẽ nhũm Juje ma o tẽ nê haxà. Ijaew kôt xà hã arĩgromnuja wÿr haxà.

⁵⁵ Nhũm Garirej rũm mẽni hkwy kot Jejus kôt pa xwÿnhjaja ma hkôt mra nê kot haxàr kãm omu. Mẽ hkuxwaxà ho gregrer kêt rãhã haxàr kãm omu.

⁵⁶ Hāmri nē ma akupỹm krĩm mra nē kaxyw mē hkuxwaxà hkwỳ ho anē.

Tā nhũm apkati nhũm mē õ arĩgromnu pē sap kator jakamā nhũm mē kormā akupỹm hwỳr mrar kēt nē. Hāmri arĩgro mex jamār pē arĩ hkòkòt o hkrĩ.

24

Jejus akupỹm htĩr jarēnh

Matêwre 28.1-10; Makre 16.1-8; Juãw 20.1-10

¹ Tā nhũm apkati nhũm tòmĩk. Hāmri nhũm mēnijaja kwỳhtã kànhmā hkrĩ nē ma akupỹm kēn kreta wỳr mē hkuxwaxà ho mra.

² Hāmri nē hwỳr àhtêp o mra nhũm ra hakwakre kahê xà raxta kahê xà hkàx ã xa nhũm mē tee ri omu.

³ Hāmri nē kēn kre wỳr agjê nē kamā tee ri Jejus japêr no nhũm kamā amrakati.

⁴ Nhũm mē tee ri axpēn pumunh pē hkukamā hamaxpêr.

Hāmri nhũm Tĩrtũm kapêr o wrỳk xwỳnh wa axkrut nē mē haêr pē mē hwỳr kato nē wa xa. Wa ê jaka nē hirã htỳx kãm wa xa.

⁵ Nhũm mē tee ri wa omu nē kãm wa uma htỳx nē. Nē wa umaj hkõn krã ho rôòk nē hkrĩ hpa. Nhũm wa mē omu nē mē kãm:

—Kwa mon ka mē ri mē htykjê kamā ra akupỹm htĩr xwỳnhta japêr o ri apa?

⁶ Jar amrakati. Na ra akupỹm htĩr. Kormā Garirej kamā pa ri kot mē amã amnhĩ jarēnh xà hkòt na ra akupỹm htĩr. Mãn ka mē arĩ kot ã mē

amã amnhĩ jarēnh anhỳrja ã anohtỳx japêr.

⁷ Mē kot unēnh nē pĩ kahpa hã nhôr nhũm htyk nē htyk ã apkati axkrunêpxi hāmri nē akupỹm htĩr ã kot mē amã amnhĩ jarēnhta mãn ka mē arĩ hã anohtỳx japêr.

⁸ Anhỳr o mē kãm kapêr nhũm mē kuma hāmri nē ra Jejus kot mē kãm ã amnhĩ jarēnh anhỳrja mã hamaxpêr kurê kumrêx.

⁹ Hāmri nē awjanã nē ma akupỹm krĩm hkĩnh nē mra. Nē hwỳr pòj nē mē kot Jejus nhỹ hã mē ahkre ho mē pa xwỳnhjê mã awjarê. Mē kêp 11 xwỳnhhtajê mē kaxyw hkwỳjê mã awjarê.

¹⁰ Mēni kot mē kãm ujarēnh xwỳnhhtajê nhĩxi na pre Marir Matarēn nhũm ja kêp Joanã. Nē Xiakre katorxà Marir õta. Nē kaxyw mēni hõja. Jakamã nhũm mē ma akupỹm Jejus nhỹ hã mē ahkre ho mē pa xwỳnhjê hwỳr mra nē mē kãm awjarê.

¹¹ Nom nhũm mē kuma nē ãm mē kuma nē htỳx ho amnhĩ krã hkòt mē kot ri ã harēnh anhỳr ã mē hkamnhĩx nē ãm mē kuma.

¹² Nhũm Simãw Pêtre hamaxpêr hāmri nē kànhmã xa nē ma kēn kreta wỳr hpròt nē htēm kurê kumrêx. Hāmri nē tee ri kēn kre kaprỳ kamunh o xa nē kamã Jejus kupu xà pix pumu nē tee ri hkukamã hamaxpêr hāmri nē ma akupỹm tē.

Jejus kot Emau hwỳr wa mõi xwỳnh wa hwỳr kator ã

harēnh

Makre 16.12-13

13 Tã nhũm ra amỹkry ho mō nhũm Jejus kwỳjê hō wa hamēxkrut nē Jerujarē rũm kato nē ma akupỹm wa õ krĩ pē Emau hwỳr wa mō. Jerujarē rũm Emau hwỳr ahkrānre.

14 Jakamã nhũm wa hwỳr pry hã axpēn mã tanhmã Jejus jarēnh to ho mō. Kēn kre kamã mē kot haxàr nhũm ra ì pikunorja nhũm wa axpēn mã harēnh o wa mō. Nē tee ri hkukamã hamaxpēr o wa mō.

15 Hãmri nhũm Jejus tãm tē nē wa hã ajēt nē wa hkôt tē.

16 Nom nhũm wa hprĩ hã omunh kêt nē. Tỳx ho nhãm mēhō hã hkamnhĩx nē wa arĩ axpēn mã harēnh o wa mō.

17 Hãmri nhũm Jejus hēx rom wa kãm:

—Kwa mēmon ka wa axpēn mã harēnh o wa mō? Anē.

Hãmri nhũm wa hkaprĩ kamã kãm harē.

18 Ihō pē Kroptija kãm:

—Kwa xà na ka Jerujarē kamã ri apa htã kamã mē kot tanhmã amnhĩ nhĩpêx toja jarēnh mar kêt nē? Kurũm amōr kēnã na ka ri mēmoj mar kêt nē ri apa. Anē.

19 Hãmri nhũm wa kãm:

—Nà amrakati ixte mēmoj maare hã. Kwa mo na wehe? Kwa war aprĩ hã inhmã harē pa kuma. Anē.

Hãmri nhũm wa kãm:

—Nà mē kot mē ixpē tanhmã Jejus pē Najare nhō xwỳnhata to kēnã. Kêp Tĩrtũm nhỹ hã kapēr jarēnh o pa xwỳnh na pre. Nē Tĩrtũm nhỹ hã tanhmã amnhĩ nhĩpêx

to ho pa nhũm prem piitã amnhĩm mex ã harē.

20 Tã nhũm mē panhō pa-tre krãhtũmjê mē mē panhō pahijaja axtem nē mē kãm hã amỳnê. Mē kot pĩ kahpa hã nhôr nhũm htyk kaxyw mē kãm hã amỳnê.

21 Pa prem ixtỳx ho kêp Tĩrtũm kot mē pahwỳr mēnh xwỳnh ã hkamnhĩx nē kot Rôm nhō xwỳnhjê pē mē ixpytār ã hkamnhĩx tã nhũm prem mē ixpē kupĩ. Jãã na prem ã hipêx anē nē kupĩ. Na ra htyk ã apkati axkrunēpxi.

22-23 —Nē jarãhã kwỳhtã mēni hkwỳjaja ma haxàr xà hã kēn kre hwỳr mra nē xep tee kamã hapēr nē omunh kêt nē. Xep ãm Tĩrtũm kapēr o wrỳk xwỳnhja wa ho axkrut nē wa omu nhũm wa xa. Nhũm mē kãm ra akupỹm htĩr ã harē nhũm mē akupỹn mē ixwỳr mra nē mē ijaêr pē mē inhmã harē.

24 Hãmri nhũm mē ixkwỳjaja ma mē hpãnhã kēn kreta wỳr mra nhũm ra mē kot harēnh xà hkôt tee ri kamã hapēr nom nhũm kamã amrakati kumrêx. Anē.

25 Hãmri nhũm Jejus amnhĩ tã wa kuma nē wa kãm tanhmã amnhĩ jarēnh to nē wa kãm:

—Hêxta waa nē. Pēr ãm mē ate mēmoj mã ajamaxpēr tỳx mex kêt kumrêx. Na pre ra Tĩrtũm nhỹ hã kapēr jarēnh xwỳnhjaja Tĩrtũm kapēr ã kagà htũm kamã ã kot amnhĩ nhĩpêx anhỹrja kukamã hprĩ hã harē nē hã kagà. Mē akukamã mē anhĩgêtjê mã

harē nē hā kagà. Tā ka mē kormā aprī hā mar tỳx kêt nē.

²⁶ Kêt mē anē na Tirtūm kot ām xwýnh̄ta ty. Tā ra akupým htír nē akupým kaxkwa hwýr àpir kaxyw. Kot mē ato amnhĩptār kaxyw ra akupým hwýr àpir mǎ.

²⁷ Amnepēm na pre finat Mojesja tanhmā hkukamā mē anhīgētjê mǎ harēnh to nē hā kagà. Nē hprī hā harēnh o pa. Nhūm hpānhā Tirtūm nhỹ hā kapēr jarēnh o mē pa xwýnh̄jaja ma anē nē mē kām harēnh o pa. Anē.

Nhūm pre ã Jejus wa hkôt hprī hā wa kām amnhĩ jarēnh anhỹr o tē. Te ho nhām mēhō jarēnh pyrāk nom tām wa kām amnhĩ jarēnh o wa hkôt tē. No nhūm kormā wa hprī hā kēp Jejus ã omunh kêt nē.

²⁸⁻²⁹ Nhūm ã wa kām amnhĩ jarēnh anhỹr o mōr rāhā nhūm mē ra wa ō krī hwýr hpōx o mō. Nhūm ra kamātre nhūm Jejus te kot wa rer nē nhỹhým ma htēm kaxyw pyrāk o amnhĩ nhĩpēx nhūm wa tee ri omu nē kām:

—Kwa xà kot kaj wa ixre nē ma tē? Ra kamāt o mōr kēnā. Kwa ma wa ixkôt tē nē wa inhōrkwỹ kamā mǎn wa ixri pōj. Anē.

Hāmri nhūm wa kuma nē ma wa hkôt tē.

³⁰ Nē mē wa ōrkwỹ hwýr pōj nē hwýr agjê. Hāmri nē apkur kaxyw hkrī nhūm Jejus tām pāwti py nē Tirtūm mǎ harē nē hpānhā ho axkjê nē wa kām kugō.

³¹ Hāmri nhūm wa atā kēp Jejus ã omunh kurê kumrēx. Jao nhūm wa kēp akunok

nhūm wa tee ýr xà kamā hapēr nhūm hkaprý mex nē xa.

³² Hāmri nhūm wa tee ri axpēn pumu nē ri hkukamā hamaxpēr nē axpēn mǎ:

—Hēxta waa nē. Xep tām na. Tām na pahkôt mō nē pry hā hprī hā pamā Tirtūm kapēr ã kagà jarē pu hkôt pahkīnh nē mar o mō. Hēxta waa nē. Xep tām na. Anē.

³³⁻³⁵ Hāmri nē wa kànhmā xa nē kato nē ujanār kurê kumrēx. Hāmri nē ma akupým Jerujarē hwýr wa hkwyjê hwýr tē. Nē mē hwýr pōj nē axà. Nhūm Jejus nhỹ hā mē ahkre ho mē pa xwýnh̄ pē 11jaja ra axpēn wýr akuprō nē hkrī. Mē hkwyjê mē axpēn wýr akuprō nē axpēn mǎ tanhmā Jejus jarēnh to ho hkrī. Hāmri nhūm wa mē hwýr axà nhūm mē wa omu nē wa kām:

—Kwa na xep ra Jejus akupým htír nē Simāw Pētre hwýr kato. Anē.

Hāmri nhūm wa mē kuma nē mē kām:

—Tý na akupým htír kēnā. Na pa wa ijaxwýja ham omu. Na pry hā wa ixtā ajēt nē ma wa ixkôt mō nē wa inhōrkwỹ kamā pōj. Hāmri pa mē ixàpkur kaxyw ixkrī nhūm pāwti py nē Tirtūm mǎ harē nē ho axkjê nē wa inhmā kugō pa wa ixprī hā kēp Jejus ã omunh kurê kumrēx. Ixprī hā omunh jao nhūm wa ixpē hapēx. Anē.

Jejus kot hkwyjê piitā hwýr kator ã harēnh

Matēwre 28.16-17; Makre 16.14; Juāw 20.19-23

³⁶ Nhũm mẽ kormã axpẽn mã Jejus jarênh o hkrĩ rôm nhũm tãm nhỹhỹnh mẽ hwỳr axà nẽ xa. Mẽ haêr pê mẽ hwỳr nhỹhỹnh axà nẽ mẽ kãm:

—Pa? Xàn ka mẽ arĩ akrĩ? Anẽ.

³⁷ Hãmri nhũm mẽ amnhĩ jaêr pê omunh jao kànhmã hakry hpar o mra. Jao hakryk kãm ma htỳx kãm omunh o hkrĩ.

³⁸ Hãmri nhũm mẽ kãm:

—Kwa mon ka mẽ amã ixpyma kamã tee ri ixpumunh o akrĩ? Kwa mẽ ixkarõ hã ixkamnhĩx nẽ amã ixpyma hkêt nẽ.

³⁹ Na pa akupỹn inhĩ ho mẽ awỳr ixkato nẽ xa. Ga mẽ inhĩhkra kamã prek tatak xàja pumu. Nẽ ixpar kãm omu. Kwa mẽ amã ixpyma hkêt nẽ. E mẽ mãmri mra nẽ anhĩhkra ho ixkupê. Kêp apu ixkarõ hpix ronhỹx ka mẽ inhĩ kupênh kêt nẽ. Mo mẽhkarõja ì? Nà na pa akupỹm ixtĩr nẽ inhĩ ho mẽ awỳr ixkato. Anẽ.

⁴⁰ Hãmri nẽ mẽ kãm amnhĩ nhĩhkra hpê nẽ mẽ kãm amnhĩ par pê.

⁴¹ Tã nom nhũm mẽ arĩ akryk omunh o hkrĩ. Mẽ kot omunh nẽ hkĩnh tã tee ri omunh o hkrĩ. Hãmri nhũm tee ri ja hã mẽ omu nẽ mẽ kãm:

—E kwa mẽ inhmã mẽmoj japêr pa kukrê. Anẽ.

⁴² Hãmri nhũm mẽ kãm tep gôj kãm ãmta gô

⁴³ nhũm kupy nẽ hkur o nhỹ nhũm mẽ arĩ hã omunh o hkrĩ. Jao ra akupỹm htĩr ã omunh kurê kumrêx.

Jejus akupỹm nojarêt nẽ hwỳjê mã mẽmoj tã karõ

Matêwre 28.18-20; Makre 16.15-18; mãânên Atre 1.6-8

⁴⁴⁻⁴⁵ Hãmri nhũm Jejus hprĩ hã mẽ kãm Tĩrtũm kapêr ã kagà htũm kot hkukamã harênh ã amnhĩ jarê nẽ mẽ kãm:

—Nà kormã ixtyk kêt ri na pa pre ixprĩ hã mẽ amã amnhĩ kukamã amnhĩ jarê. Tĩrtũm kapêr ã kagà htũm kot tanhmã mẽ kot inhĩpêx to hkukamã ijarênhja. Na pre finat Mojes Tĩrtũm nhỹ hã ixkukamã tanhmã ijarênh to. Nẽ Tĩrtũm nhỹ hã kapêr jarênh o mẽ pa xwỳnhjaja Mojes mỳr pê haxwỳja ixkukamã tanhmã ijarênh to. Nẽ Tĩrtũm mex o mex ã mẽ grer ã kagà xwỳnhjaja haxwỳja ixkukamã tanhmã ijarênh to. Jajê piitã na prem Tĩrtũm kapêr ã kagà htũm kamã ixkukamã ijarê.

⁴⁶ Nẽ ijarênh o:

Tĩrtũm kot mẽ pakaxyw ãm xwỳnh pê Krisja koja nhỹrmã ty. Nẽ htyk o apkati axkrunêpxi nẽ akupỹm htĩr.

Anhỹr o mẽ kot ijarênh. Tã pa ra mẽ kot ixkukamã ijarênh xà hkôt ã mẽ anê amnhĩ nhĩpêx anê.

⁴⁷ —No ãm Tĩrtũm kapêr ã kagà htũm kot papxipix ixkukamã ijarênh kêt. Kamã mãânên mẽ kajaja tanhmã mẽ akukamã mẽ ajarênh kute. Mẽ apê ixkôt amnhĩ xunhwỳr xwỳnhjaja ixwakre kamã tanhmã mẽ ate inhmã amnhĩ nhĩpêx to ho apa

hkukamã tanhmã mẽ ajarẽnh kute. Nẽ mẽ ajarẽnh kot:

E mẽ ate ixkõt amnhĩ xunhwÿr xwÿnhjaja. Kêr ka mẽ ma pika piitã hkõt mẽ kãm Tĩrtũm kot mẽ awÿr mẽn̄h xwÿnh̄ta jarẽnh o ri mẽ hkõt apa. Mẽ kot mẽ amar nẽ amnhĩ tomnuj kaga nẽ Tĩrtũm kõt amnhĩ xunhwÿr kaxyw. Kêr kê Tĩrtũm ja hã mẽ omu nẽ amnhĩ katut kõt mẽ kot amnhĩ tomnuj rẽn̄h pa. E kêr ka mẽ ma krĩ piitã hkõt mẽ kãm ã ja jarẽnh anhÿr o ri mẽ hkõt apa. Krĩ pê Jerujarẽ kumrẽx kãm hãmri nẽ rĩ kormã pu hã krĩ kuhê xwÿnh̄ piitã hkõt ajapõj nẽ mẽ kãm harẽn̄h o ri apa. Anẽ.

Ã Tĩrtũm kapẽr ã kagã htũm kot mẽ akukamã mẽ ajarẽnh kot anhÿr.

⁴⁸ Tã kêr ka mẽ ã mẽ kãm tanhmã ijarẽn̄h to ho ri apa anẽ.

⁴⁹ No ãm kormã. Kêr paj ma akupÿm kaxkwa hwÿr api hãmri nẽ amnhĩ pãnhã mẽ awÿr Tĩrtũm Karõ rẽ mãn. Tĩrtũm kot ixte amnhĩ nhĩpêx ã ijarẽn̄h xà hkõt kot paj amnhĩ pãnhã mẽ awÿr kurẽ. Tã kêr ka mẽ kormã krĩ ja kamã kutêp apa. Kêr kê mẽ awÿr wrÿ nẽ mẽ amã agjê ka mẽ rĩ kormã anhgrã nẽ ma ÿ hã mẽ kãm ijarẽn̄h o ri mẽ hkõt apa. Anẽ.

hwÿr àpir ã harẽn̄h

Makre 16.19-20; mããnẽn̄h Atre 1.9-11

⁵⁰ Tã nhũm Jejus Jerujarẽ rũm hkõt mẽ pa ho pa xwÿnhjê kator nẽ ma krĩ pê Petãn wÿr mẽ o mõi. Nẽ kormã hwÿr mẽ o mõi ri nhÿri mẽ o xa nẽ kàn̄hmã ìhkra pẽ nẽ mẽ ho Tĩrtũm wÿ.

⁵¹ ã mẽ ho hwÿr anhÿrja rôm nhũm Tĩrtũm amnhĩ wÿr ho àpir o mõi nhũm mẽ noo mã ma akupÿm tẽn̄h api.

⁵² Hãmri nhũm mẽ kãm mex o mex ã harẽn̄h pê ma akupÿm àpir kãm omunh o kuhê. Nhũm ma tẽn̄h nẽ mẽ kêp kakrãm axà nẽ mẽ kêp akunok. Hãmri nhũm mẽ awjanã nẽ ma akupÿm Jerujarẽ hwÿr hkĩnh nẽ pa.

⁵³ Hãmri nẽ apkati mẽ Tĩrtũm mã amnhĩ jarẽn̄h xà hã ixkre hwÿr agjê nẽ kamã Tĩrtũm mã mex o mex ã harẽn̄h o hkrĩ rãhã nẽ.

Tã ãm ja pix ixkrãmnhwÿ Teopre. Ixpê Rukre na pa awÿr kagãja nhĩpêx nẽ kamã Jejus kot tanhmã amnhĩ nhĩpêx to hã harẽ nẽ hã kagã nẽ awÿr kumẽ.

Jejus kot akupÿm kaxkwa

Juãw Juãw kot tanhmã Jejus kot amnhĩ nhĩpêx to ho pa hã kagà

Juãw na pre kagàja nhĩpêx. Na pre mãânên Wam Juãw nê Sikũn Juãw nê Hapuhã Juãw nê Apokarip nhĩpêx. Juãw Paxis kêt axtem Juãw õ. Nê Jejus kôt mẽ pa ho mẽ pa xwýnhjê hõ na pre. Nê ý hã mẽ ahkre ho pa xwýnhjê hõ na pre. Nom kormã ã amnhĩ nhĩpêx anhÿr o pa hkêt ri na pre kêp tep kanhêr xwýnh. Nê kêp Jejus kràmnhwý mex na pre. Jakamã na pre kagàja nhĩpêx nê kamã Jejus kot tanhmã amnhĩ nhĩpêx hã harê nê hã kagà. Nê tanhmã kapêr to hã kagà.

Na pre Jejus kêp Tĩrtũm Kra hã harê nê hã kagà. Nê ãm pix kukwak ri Tĩrtũm wa kuri mẽ pahĩr tũm nê mẽ papa ho mẽ papa hã harê nê hã kagà. ã na pre Juãwja mẽ pamã Jejus jarê nê hã kagà anê.

Jejus te kot Tĩrtũm pyrãk ã harênh

Matêwre 1.23; Juãw 8.12, 8.58, 10.30, 20.28; mãânên Atre 10.36; Sikũn Korĩt 4.4; Piripos 2.6-11; Korosê 1.13-17, 2.9; Xitre 2.13; Eprêw 1.1-4; Wam Juãw 1.1-4, 5.20; Apokarip 1.17-18

¹ Amnepê mã kormã mẽmoj kêt ri nhũm kot Tĩrtũm kapêr o amnhĩrĩt xwýnhja Tĩrtũm

kôt pa ho pa. Te kêp urãk nê pa. Wa kot amnhĩ nhĩpêxja ãm tipxi. Nê wa àhpumunh ãm tipxi. Nê wa hkarõ mãânên ãm tipxi. ãm wa tipxi rãhã nê pa ho pa.

² Kormã mẽmoj kêt ri na pre Tĩrtũm kapêr o amnhĩrĩt xwýnhta Tĩrtũm kôt ri pa ho pa.

³ Nê Tĩrtũm nhỹ hã na pre mẽmoj piitã hã apê nê ho kato. Jao pyka ho kato nê kaxkwa ho kato nê gô xujanãr o kato. Nê kamã mẽmoj piitã Tĩrtũm nhỹ hã ho kator pa. Kop apu mẽmoj to kator kêt ronhỹx mẽmoj amrakati kumrêx.

⁴ Nê Tĩrtũm o amnhĩrĩt xwýnhta pix kukwak ri na hte mẽmoj piitã htĩr nê pa. Nê ãm pix kukwak ri na htem Tĩrtũm ri htĩr tũm nê pa ho pa. Nê te myyti kot mẽ pamã mẽmoj piitã hirã ho pa pu mẽ kukwak ri mẽmoj piitã omunh mexja pyrã nê na pre hte mẽ pahpiitã mẽ pamã mẽ pahte amnhĩ nhĩpêx nyw nê mẽ pajamaxpêr nyw o amnhĩrĩt pu mẽ pahprĩ hã mar mex nê.

⁵ Ja kaxyw na pre wrý nê ri mẽ kãm Tĩrtũm kapêr jarênh o ri mẽ hkôt pa. Jao mẽ kot amnhĩ nhĩpêx nyw jarê nhũm mẽ kot amnhĩ tomnuj xwýnhjaja tee ri kuma nê kãm mar prãm kêt nê. Nê tee ri kãm kapêr o hapêx prãm kaprý.

Juãw Paxis kumrêx kot tanhmã Jejus jarênh to hã

harënh

Matêwre 3.1-3; Makre 1.1-4; Rukre 3.2-6

⁶ Tã nhũm kormã Jejus mẽ kãm kapër o pa hkêt ri nhũm Juãw Paxis kumrëx mō mẽ hkukamã Tĩrtũm nhỹ hã mẽ kãm tanhmã harënh to ho pa.

⁷ Mẽ kãm mẽ kot amnhĩ nhĩpêx nyw nhõr xwýnh pê Jejus Kris kukamã mẽ kãm harënh o ri mẽ hkôt pa. Mẽ kot mar mẽ amnhĩ kaxyw Jejus kôt hamaxpër kaxyw.

⁸ No Juãw Paxisja na pre hte mẽ kãm mẽ kot amnhĩ nhĩpêx nyw nhõr o pa hkêt nê. Na pre âm kot mẽ kãm òr xwýnhhta kukamã mẽ kãm harënh o pa.

⁹ Jakamã na pre hte mẽ kãm harënh o ri pa mẽ mẽ kãm harënh o:

—E ot pa mẽ amã mẽhõ jarënh o ri ixpa. Kot mẽ pamã mẽ pahte amnhĩ nhĩpêx nyw nhõr xwýnhhta. Kojã tokyx mẽ pakamã pøj pu mẽ omu. Kojã pøj mẽ mẽ piitã mẽ kãm Tĩrtũm kapër jarënh o ri pa. Mẽ pahte pahprĩ hã mar mex kaxyw. Anê.

Tĩrtũm kot mẽ ho hkra hprãm xwýnhjê jarënh

Rõmãn 8.14; Karatas 3.26; Epes 1.5

¹⁰ Tã nhũm Jejus man kot mẽmoj piitã ho kator xwýnhhta wýr wrý mẽ mẽ hkôt ri pa. No nhũm mẽ kot kêp mẽmoj piitã ho kator xwýnh ã omunh kêt jakamã na prem kapër ma mẽ âm kuma mẽ amnhĩ kaxyw hkôt hamaxpër kêt nê.

¹¹ Na pre wrý mẽ mẽ pakamã ì ho kato. Kêp mẽ pahpiitã mẽ pahto kator

xwýnh tã nhũm mẽ ohtô mẽ omu mẽ âm omu mẽ hkôt amnhĩ nhĩpêx kêt nê.

¹² Na prem âm grêre mẽ kuma mẽ amnhĩ kaxyw hkôt hamaxpër mẽ hkôt amnhĩ xunhwý. Hãmri nhũm amnhĩ tã mẽ omu mẽ mẽ kãm:

—E nã âm hãmri. Ra mẽ ate amnhĩ kaxyw ixkôt ajamaxpër mẽ ixkôt amnhĩ xunhwýr jakamã na ka mẽ ixkukwak ri apê Tĩrtũm kraa. Anê.

¹³ Na htem ã kêp Tĩrtũm kra hprãm xàj Jejus kôt amnhĩ xunhwýr anê. No na htem mẽ katorxã nhõxã hkre rũm hapõx kôt kêp Tĩrtũm kra hkêt nê. Rý amnhĩ krã hkôt tanhmã amnhĩ nhĩpêx to kukwak ri kêp hkra hkêt nê. Âm Tĩrtũm tãm kot mẽ ho hkra pix kukwak ri na htem kêp hkra.

Jejus wrýk mẽ ì ho kator ã harënh

Matêwre 1.20; mããnãn Rõmãn 1.2-4; Piriapos 2.6-7; Eprêw 2.9, 4.15; Wam Juãw 4.2

¹⁴ Jakamã na pre Tĩrtũm o amnhĩrit xwýnhhta mẽ pahwýr wrý mẽ mẽ pakamã ì ho kato mẽ mẽ pakamã pa. Kêp Tĩrtũm Kra hã pixi mex na pre. Nê kot amnhĩ nhĩpêxja te Tĩrtũm kot amnhĩ nhĩpêx pyrãk. Uràk mẽ mex o mex. Nê uràk mẽ mẽ pakutã nojarêt xwýnh. Na pre hte katàt kôt Tĩrtũm kapër jarënh o ri mẽ hkôt pa. Pa prem kuma mẽ mex o mex ã omu.

¹⁵ Nhũm Juãw Paxis na pre hkukamã mẽ kãm harënh o ri pa mẽ mẽ kãm:

—E ra ixte mẽ amã harënh o ri ixpa xwýnhhta na ra pøj. Te

pa ixte wa nē ixkator pyrāk nom amnepē mā kormā ixkēt ri nhūm hūr rāhā nē pa ho pa. Ham ī ho kator tā kēp Tirtūm Kra jakamā urāk nē rāhā ho rāhā hā pa xwýnh na. Jakamā kot amnhī to rax o kot ijakrenh par. Anē.

¹⁶ Nē kēp mē pakutā no-jarēt rāhā nē pa ho pa xwýnh jakamā na hte mē pahto mex rāhā pu mē kukwak ri pamex nē ri papa ho papa.

¹⁷ Na pre finat Mojesja mē panhīgētjē mā Tirtūm kapēr jarēnh o ri mē hkôt pa nē mē kām:

—Na pre Tirtūm mē pahte tām amnhī nhīpēx o papa hā mē pamā karō. Jakamā kot puj mē kot mē pamā mēmoj tā karō xà hkôt ā amnhī nhīpēx anhūr o papa nē ra tām amnhī nhīpēx o papa. Anē.

Nhūm pre Mojesja ā mē kām kapēr o pa anē. Hāmri nhūm mē kuma no ām tee ri kām Tirtūm kôt tām amnhī nhīpēx o pa hprām kaprý. Jakamā nhūm hpānhā Jesus Krisja wrý nē mē pamā kapēr ō ho kapēr o pa nē mē pamā:

—E mē ate Tirtūm kôt amnhī nhīpēx o apa hkēt tā nhūm arī kām mē ajapē nē. Nē kām mē ato mex prām. Jakamā kot kaj mē amnhī to awý nhūm tanhmā mē akrā hto ka mē ra tām ri amnhī nhīpēx o apa. Ām hāmri na pa ā mē amā ja jarēnh anē.

Anhūr o mē pamā Tirtūm kapēr jarēnh o pa. Tirtūm kapēr na mex o mex.

¹⁸ Nē aa mē pahtō mē pahte pano ho Tirtūm pumunh

kēt. Ām Kraja pix na kot no ho omunh. Kaxkwa kamā kuri ri pa ho pa jakamā kot omunh mex. Nē te kot Hipēēxāja pyrāk jakamā na pre wrý nē hprī hā tanhmā kute hā mē pamā harēnh o pa. Jakamā na pu mē ra pahpiitā Tirtūm kot amnhī nhīpēx ā omu nē mar mex nē.

Juāw Paxis kot mē kām Jesus jarēnh o pa hā harēnh

Matēwre 3.1-12; Makre 1.1-8; Rukre 3.15-17; määnēn Atre 19.4

¹⁹⁻²⁸ Na pre Juāw Paxis ma hkwýjē hkôt mē kām Jesus jarēnh o pa nhūm mē hkwýjaja kuma nē amnhī kaxyw Jesus kôt hamaxpēr nē hkôt amnhī xunhwý. Hāmri nhūm Juāw Paxis ja hā mē omu nē Tirtūm mā mē hkrā kumrā. Pyhti pē Jotāw nhīkjē hā krī pē Petān tā ri mē hkrā kumrār o pa. Hāmri nhūm krī pē Jerujarē kamā Ijaew krāhtūmjaja harēnh ma nē ma hwýr hkwýjē rē. Mē kot tanhmā hkukjēr to nhūm kot mē kām tanhmā amnhī jarēnh to kaxyw. Jakamā nhūm mēō patre hkwýjē mē Tirtūm mā amnhī jarēnh xà hā ixkre kamā mē ho ajuta xwýnh kwýjē mē Parijew nhō xwýnh kwýjē mē nhūm mē ma hwýr mra. Juāw Paxis wýr mra nē omu nē kām:

—Pa. E ot pa mē awýr mra. Kwa mē inhmā amnhī jarē. Apē mē atō na ka we? Xà ka na apē Tirtūm kot mē ixkaxyw axām mā xwýnhhta na ka nà? Xà ka na pa htem amnhī wýr akamā ijamak o ixpa? Anē.

Hãmri nhũm mẽ kuma nẽ mẽ kãm: “Nà pa hkêt.” Anẽ hãmri nhũm mẽ kãm:

—Tõ mãn xep apê amnepê mã Tĩrtũm nhỹ hã kapêr jarênh xwỳnh pê finat Erisja. Hã na ka tanhmã amnhĩ to nẽ akupỹm atĩr nẽ mẽ ixkõt apa nà? Anẽ.

Hãmri nhũm mẽ kãm:

—Nà ixpê Eris kêt. Anẽ.

Hãmri nhũm mẽ kãm:

—Tõ mãn xep apê finat Mojes kot mẽ kãm harênh o pa xwỳnhhta na ka nà? Anẽ.

Hãmri nhũm mẽ kuma nẽ mẽ axte mẽ kãm:

—Nà ixpê tãm kêt. Anẽ.

Hãmri nhũm mẽ tee ri kot ã amnhĩ tã aprãr anhỹrja ma nẽ kãm:

—Kwa apê jajê hõ hkêt tã na ka hte mẽ hkrã kumrãr o ri apa. Kwa nà akatãt kõt mẽ inhmã amnhĩ jarê. Pa mẽ ama nẽ ma akupỹm mra nẽ mẽ kot awỳr mẽ ixrênh xwỳnhjê mã tanhmã ajarênh to. Tanhmã na ka hte mẽ kãm amnhĩ jarênh to ho ri apa? E kwa mẽ inhmã amnhĩ jarê pa mẽ ama. Anẽ.

Hãmri nhũm tã hprĩ hã mẽ kãm amnhĩ jarê. Amnepê mã mẽ hkukamã Tĩrtũm nhỹ hã kapêr jarênh xwỳnh pê finat Ijais kot hkukamã tanhmã harênh to nẽ hã kagà xà hkõt nhũm mẽ kãm amnhĩ jarê nẽ mẽ kãm:

—Tõe. Nà kot paj ixprĩ hã mẽ amã amnhĩ jarê ka mẽ inhma. Amnepê m Tĩrtũm kapêr jarênh xwỳnhjê hõ pê finat Ijaisja na pre hte mẽ kãm mẽhõ hkukamã harênh o ri pa. Mẽhõ kot mẽ panhõ Pahihti hkukamã htẽm nẽ kapõt

ã kutêp mẽ kãm harênh o pa xwỳnhhta nhũm pre hkukamã harênh o ri pa. Nẽ mẽ kãm harênh o:

Koja nhỹrmã mẽhõja kapõt ã mõn pøj nẽ mẽ kãm tanhmã ujarênh to ho ri pa. Nẽ mẽ kãm ujarênh o: “E mẽ inhma. Koja Tĩrtũm tokyx mẽ pahwỳr mẽ panhõ Pahihti mẽ nhũm wrỳ nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o ri apa. Te ho mẽ kot mẽhõ kutêp pry ho mex pyrãk o amnhĩ nhĩpêx o ri pa. Jao amnhĩ nhĩ ho tãm amnhĩ nhĩpêx nẽ tãm axpẽn nhĩpêx o ri apa. Pahihtita kutêp.”

—Anhỹr o na pre hte finat Ijaisja kot Pahihti hkukamã harênh o ri pa xwỳnhhta kukamã harênh anẽ. Tã paa. Pa na pre Ijaisja ã ixkukamã ijarênh anhỹr o pa. Pa na pa hte ã Pahihti kutêp mẽ kãm harênh o ri ixpa anẽ. Tã ã ixte harênh anhỹr xwỳnhhta na ra mẽ pakamã pa ka mẽ kormã ja hã omunh kêt nẽ. Kukamã na pa hte mẽ piitã mẽ kot hkõt amnhĩ xunhwỳr ã mẽ omunh kaxyw gô pix o mẽ hkrã kumrãr o ri mẽ hkõt ixpa. Nom na pre ra mẽ pahwỳr Tĩrtũm kot mẽ pakaxyw ãm xwỳnhhta tãm mẽ pahwỳr wrỳ. Ahpumunh tỳx o kot ijakrenh jakamã na pa hte ãm kukwak ri ixpa nẽ amnhĩ tã hã ixpijaam o ri

ixpa. Anê.

*Juãw Paxis kot mē kām Je-
jus jahkre hã harênh*

*Matêwre 3.11; Makre 1.10;
Rukre 3.22*

²⁹ Tã nhũm apkati nhũm Juãw Paxis amnhĩ wỳr Jejus pumu nê mē kot mar o kuhê xwỳnhjê mã ìhkra ho ahkre nê mē kãm:

—E. Oněj Tĩrtũm kot mē pakaxyw ãm xwỳnhnta tẽ. Mẽ pahpê Ijaew na pu htem xatã pahte amnhĩ tomnuj pãnhã amnhĩrer kaxyw Tĩrtũm mã pahkrit ôwêhti hkra nyw kwỳ hpa nê ho amnhĩ pãnhã kãm amnhĩrer o papa. No kêt htẽm něj koja nhỹrmã kãm mē pahpiitã mē pahte amnhĩ tomnuj pãnhã amnhĩrer pa.

³⁰ Na pa pre ra mē amã harênh o: “Te pa ixte wa nê ixkator nê ixtĩr nê ixpa pyrãk. Nom amnepêm kormã ixkêt ri na pre htĩr rãhã nê pa ho pa. Nê ì ho wrỳk nê jar kator tã kêp Tĩrtũm Kra jakamã uràk nê rãhã nê pa ho pa xwỳnh na. Jakamã kot amnhĩ to rax o kot ijakrenh par.” Anhỹr o pa pre mē amã harênh o ri ixpa ka prem inhma.

³¹ —Ixte mē amã ã harênh anhỹr tã ijaxwỳja kormã ixte kêp Tĩrtũm Kra hã omunh kêt nê ãm hkukamã Tĩrtũm nhỹ hã mē amã ã harênh anhỹr o ri ixpa. Nê hkukamã Tĩrtũm mã mē akrã kumrãr o ri ixpa. Tã na pa kêp Tĩrtũm Kra hã omu nê ã mē amã ahkre anê ka mē omu. Anê.

³²⁻³³ Nhũm pre ã Juãw Paxis mē kãm Jejus jahkre anê nê mē kãm:

—Nà Tĩrtũm na pre ixte mē akrã kumrãr o ixpa kaxyw inhmã hã karô. Tã na inhmã kot mē pakaxyw ãm xwỳnhnta o amnhĩrit nê inhmã harênh o: “Koja nhỹrmã Ixkarôja mēhõ hwỳr wrỳ nê kuri arĩk. Ka ja hã omu nê kêp Ixkra hã omunh kurê kumrẽx. Kojã amnhĩ xô ri amnhĩ pyrã nê mē kãm Ixkarô nhõr o pa nhũm mē hkarô mã agjê.” Anhỹr o inhmã harê. Tã na pa ra omu. Na pre Tĩrtũm Karô kaxkwa rũm te tuuti pyrã nê hwỳr wrỳk o tẽ nê ìkre hã xa.

³⁴ Pa ã kot hipêx anhỹr ã omu nê kêp Tĩrtũm Kra hã omunh kurê kumrẽx. Jakamã na pa ã mē amã ahkre nê mē amã harênh anê. Anê.

*Juãw Paxis kôt pa xwỳnh
wa kot Jejus kôt pa hã wa
harênh*

Atre 19.4

³⁵ Tã nhũm apkati nhũm Juãw Paxis axte Jejus pumu. Kot hkôt ri pa ho pa xwỳnh mē wa nhỹri xa nê omunh o xa.

³⁶ Nhũm ra mē hãnh tẽ nhũm Juãw Paxis omu nê hkôt ri pa xwỳnh wa kãm:

—E oněj Tĩrtũm kot mē pakaxyw ãm xwỳnhnta tẽ. Něj koja mē pahte amnhĩ tomnuj pãnhã amnhĩre. Anê.

³⁷ Hãmri nhũm wa kuma nê omu nê ma hkôt tẽ nê hã ajêt.

³⁸ Nhũm wa omu nê wa kãm: “Pa mo na?” Anê nhũm wa kot kêp mē ahkre xwỳnh ã omunh jakamã kãm:

—Nà wa ixte ma akôt ixtẽm nê nhỹri anhõrkwỳ pumunh mã na pa wa akôt tẽ. Anê.

39 Hāmri nhūm wa kām:

—Tôe. Nà wa kam nē rī ma ixkôt tē. Anē.

Hāmri nhūm wa kuma nē ma hkôt wa tē nē ōrkwÿ hwÿr pōj nhūm ra amÿkry nhūm wa hkôt axà nē kuri ÿr o kamàt hāmri nē kato nē ma akupÿm tē.

40 Kôt htēm xwÿnhjê hōta na pre kēp Andre. Simāw Pêtre htō na pre. Nē kaxyw hōja. Wa kumā na pre Juāw Paxis Jejus jahkre nē harē nhūm wa ma hkôt tē. Tā wa ra akupÿm wa tē.

41 Hāmri nhūm Andreja htō Simāw wÿr tē nē kām:

—Kwa na pa wa jarāhā Tirtūm kot mē pakaxyw ām xwÿnhhta pumu. Ma pu hwÿr ka wa ixwar ano ho omu nā. Anē.

Ijaew kapēr kām “Tirtūm kot mē pakaxyw ām xwÿnh” anhÿrja te kot Gres kapēr kām “Kris” anhÿr jarēnh pyrāk. Ijaew na prem ā Jejus jarēnh anē nē harēnh o: “Tirtūm kot mē pakaxyw ām xwÿnh.” Anhÿr o harē.

42 Jakamā nhūm ā Andreja htō mā harēnh anē nē ma akupÿm hwÿr o tē. Nē wa hwÿr pōj nhūm wa omu. Wa kēp Juāw kra hā wa omu hāmri nē Simāw mā kapēr nē kām:

—Pa Simāw. Nà apê Simāw tā kot paj axte atā anhÿxi hō mē. Kot kaj mǎānēn apê Septi. Anē.

Mē pakapēr kām Septija te kēp “kēn” jarēnh pyrāk. No Gres kapēr kām te kēp “Pêtre” jarēnh pyrāk. No Ijaew kapēr kām kēp “Septi.” Jakamā

nhūm pre Jejus ā Simāw Pêtre hā hixi mēnh anē.

Jejus kot amnhÿ kôt Firipti mē Natānaew wa hwÿr ā harēnh

43-44 Tā nhūm apkati nhūm ra Jejus pyka pē Garirej wÿr nojarēt nē nhÿri Firipti pumu. Firiptija Andre mē Simāw Pêtre wa urāk nē krÿ pē Pesēj nhō xwÿnh na pre. Jakamā nhūm Jejus nhÿri omu nē amnhÿ kôt kuwÿ nē kām:

—E kwa ma ri ixkôt apa ho apa. Anē.

45 Hāmri nhūm kuma nē ma tē nē nhÿri Natānaew pumu nhūm nhÿri pÿ hpār parpē nhÿ nhūm omu nē kām:

—Kwa na pa jarāhā finat Mojes kot amnepēm mēhō hā kagā xwÿnhhta pumu. Tirtūm kot mē pakaxyw ām xwÿnhhta na. Tirtūm nhÿ hā kapēr jarēnh o mē pa xwÿnhjaja kot hkukamā harēnh nē hā kagā xwÿnhhta. Kēp Najare nhō xwÿnh nē mǎānēn kēp finat Juje hkra. E kwa tokyx pu hwÿr ka ixkuxwar ano ho omu. Anē.

46 Hāmri nhūm tee ri kot tanhmā harēnh toja ma nē kām:

—Tk. Kokÿ. Najare nhō xwÿnh piitā kot amnhÿ to mexti hā kot kêt we hō kēp Tirtūm kot mē pakaxyw ām xwÿnh. Anē.

Hāmri nhūm kām:

—Kwa nā ā akapēr anhÿr kêt nē. Ma ixkôt tē nē ixpyrà nē ano ho omu mǎn. Nē rī ā ri akapēr anē. Anē.

Hāmri nhūm kuma nē ma hkôt tē.

47 Hãmri nhũm Jejus amnhĩ wÿr wa omu nẽ kuri mẽ kuhê xwÿnhjê mã Natãnaew jarênh kurê kumrêx nẽ harênh o:

—E oněj Ijaew ôja mẽ pahwÿr hpôx o tẽ. ãm hãmri na hte tãm amnhĩ nhĩpêx o pa. Na hte higêt finat Jako kurom hêx rom ri tanhmã mẽ kãm amnhĩ to hêx to ho pa hkêt nẽ. Na hte ãm kapêr mex pix o ri kapêr o pa. Anẽ.

48 Hãmri nhũm tee ri amnhĩ tã kuma nẽ kãm:

—Kwa mẽhõ na pre ã amã ijarênh anẽ? Aa ixte nhÿri apumunh kêt kumrêx tã ka ri ãm hãmri ã ijarênh anẽ. Anẽ.

Hãmri nhũm kãm:

—Nà mẽhõ kot tanhmã inhmã ajarênh to hkêt. ãm pa na pa hte inhno ho apumunh o ixpa. Kormã Firipti kot awÿr htêm nẽ amã ijarênh kêt ri pa ra ixprĩ hã inhno ho apumu. Na ka kormã pĩta parpê nhÿ pa apumu. Anẽ.

49 Hãmri nhũm tee ri kot hprĩ hã harênh ã amnhĩ tã kuma nẽ kãm:

—Kwa mẽ ijahkre xwÿnh. Pêr ãm hãmri apê Tĩrtũm Kra kumrêx jakamã na ka ã ijarênh anẽ. Xep ka na mẽ ixte amnhĩ wÿr akãm ijamak o ixpa xwÿnhnta na ka. Nà ka na apê mẽ ixpê Ijaew nhõ Pahihti. Anẽ.

50 Hãmri nhũm Jejus kuma nẽ kãm:

—Nà ãm hãmri na ka ixte pĩ hpar pê apumunh ã ajarênhja ma nẽ hkôt pix mã ixpê Tĩrtũm Kra hã ixpumu. Tã kot kaj ja nhĩrô pê axte mẽmoj mex o kot ja jakrenh pumu.

51 Koja nhÿrmã kaxkwa axkjê nhũm Tĩrtũm kapêr o mẽ wryk xwÿnhjaja kurũm axpên japa ka mẽ omu. Finat Jako pyrã nẽ mẽ omu. Ixte Tĩrtũm kot mẽ akaxyw ixãm xwÿnh wÿr koja mẽ ã wryk nẽ amnhĩ nhĩpêx anê ka ja hã mẽ omu. Kwa jam ajamaxpêr tÿx rãhã ho apa. Anẽ.

2

Jejus kot gô ho mẽ kãm wĩhti nhĩpêx ã harênh

1 Tã nhũm apkati axkrut nẽ hapêx nhũm Jejus arĩ Garirej kamã pa. Nhũm krĩ pê Kanã kamã axpên mã wahõj wa rer kaxyw nhũm Jejus katorxã ma mẽ hwÿr mõ.

2 Hãmri nhũm mẽ amnhĩ wÿr Jejus mẽ hkôt ri mẽ ixpa xwÿnhjê wÿ pa mẽ ijaxwÿja ma mẽ hwÿr mõ nẽ ra mẽ hwÿr pôj.

3 Hãmri nẽ mẽ hkôt wa hã ixkĩnh nẽ apku nẽ wĩhti hkwÿ ho ixkôm o ixkrĩ. Tã nhũm ra wĩhti mẽ kêp hapêx nhũm Jejus katorxãja harênh ma nẽ Jejus mã harê nẽ kãm:

—Xê Jejus. Na xep ra mẽ kêp wĩhti hapêx pa. Xát ka tanhmã mẽ ho ajuta hto mẽ? Anẽ.

4 Hãmri nhũm kãm:

—Tõe. Kwa tee ri ajamaxpêr kêt nẽ. Kot paj tanhmã mẽ kãm ho. Nom kot paj kormã ixpê Tĩrtũm kot mẽ akaxyw ixãm xwÿnh ã pa kormã amnhĩ to amnhĩrĩt kêt nẽ. Anẽ.

5 Hãmri nhũm katorxã kuma nẽ mẽ kãm mẽ ãpênh xwÿnhjê hwÿr tẽ nẽ mẽ kãm:

—An koja Jejus mẽ awỳr tẽ nẽ tanhmã mẽ amã mẽmoj tã karõ hto ka mẽ ama nẽ kãm ho anhỳr kurê kumrẽx. Anẽ.

⁶ Nhũm mẽ kuri kẽn o poti kệp 6 nẽ kuhê. Piitã umpỳm rũnh kumrẽx. Kojã hõ pyxi nẽ nỳt nẽ kamã gô kệp 80 rit nẽ hkwy kamã kệp 100 rit. Ijaew na htem apkur kaxyw nẽ amnhĩ nhĩhkra kuhõnh japjê rũnh nẽ kormã apku. Nẽ apkur pa nẽ axte amnhĩ nhĩhkra kuhõ. ã mẽ kot xatã amnhĩ nhĩhkra kuhõnh jakamã nhũm pre htem amnhĩ ri ã poti rũnh kwỳ xunhwỳr anẽ. No nhũm ra hkapyr nẽ kuhê.

⁷ Hãmri nhũm Jejus tẽ nẽ omu mẽ àpênh xwỳnhjê mã kãm:

—E mẽ ma mra nẽ gô ru nẽ ho poti kuhê mũj piitã ho nỳt pa. Anẽ.

Nhũm mẽ kuma nẽ ma mra nẽ ho nỳt pa.

⁸ Hãmri nhũm mẽ kãm:

—Nà hãmri. Pãnhã hõ kamã gô hkwy janhi nẽ o tẽ nẽ mẽ anhõ patrãw mã agõ kê hkwy ho ixkõ nẽ kamã ama. Anẽ.

Hãmri nhũm mẽ mar xà hkõt kãm hkwy janhi nẽ hwỳr o tẽ nẽ kãm kugõ.

⁹⁻¹⁰ Nom nhũm gôja arĩ kệp gô kumrẽx kêt nẽ. Jejus kot tanhmã ho jakamã nhũm ra hpãnhã kệp wĩhti. Jakamã nhũm mẽõ patrãw wỳr hkwy ho tẽ nẽ kãm kugõ nhũm hkaki nẽ kamã ama. Nom Jejus kot gô ho hipêx ã omunh kêt nẽ. ãm htỳx ho wĩhti kumrẽx ã hkamnhĩx nẽ mex kumrẽx ã hkaki. Hãmri nẽ amnhĩ wỳr mjên nyw xwỳnh

mã hpa ho apê nhũm hwỳr tẽ nhũm kãm:

—Kwa na htem wĩhti mex o wa nẽ mẽ kãm kugõ hãmri nhũm mẽ hpenh pa nhũm mẽ rĩ kormã hkõt omnu ho hapu nẽ mẽ kãm kugõ. Tã ka pẽr mẽ axtem nẽ wam mẽ kãm omnu nhõr pa hãmri nẽ kormã mex kumrẽxja o hapu nẽ mẽ kãm agõ. Kêt wĩhti ja na mex kumrẽx. ãm mex o mex. Anẽ.

Jejus kot gô ho hipêx ã omunh kêt jakamã nhũm ã kãm kapêr anẽ. ãm mẽ àpênh xwỳnh pixjaja na prem ja hã omu.

¹¹ Nhũm Jejus kormã mẽ kãm aa mẽ kot mẽmoj pumunh kêt õ ho anhỳr kêt tã krĩ pẽ Kanã kamã ã mẽ kãm amnhĩ nhĩpêx anhỳr o hkra. Jao amnhĩ to rax o amnhĩ to rax ã mẽ inhmã amnhĩ to amnhĩrit. Pa mẽ ixpê hkõt ri ixpa xwỳnhjaja ã kot amnhĩ nhĩpêx anhỳr ã omu hãmri nẽ kệp Tĩrtũm kot mẽ pakaxyw ãm xwỳnh ã omunh kurê kumrẽx.

¹² Tã nhũm Jejus hpãnhã ma krĩ pẽ Kapanau hwỳr mõ. Pa mẽ hkõt ri ixpa xwỳnhjaja nẽ katorxà nẽ htõjaja pa mẽ ma ixpiitã hkõt mõ. Hãmri nẽ hwỳr pøj nẽ kamã mẽ hkõt ixpa hã ixtã apkati grêre nẽ ma hpãnhã krĩ hõ hwỳr ixpa.

Jejus kot Tĩrtũm nhõrkwỳ hwỳr àr ã harênh

Matêwre 21.12-13; Makre 11.15-19; Rukre 19.45-46

¹³ Tã nhũm ra arĩgro pẽ Pas ahtêp o mõ. Pasja ã mẽ ixpê Ijaew na pa htem amnepêm Tĩrtũm kot pika pẽ

Ejit rûm mẽ inhîgêjtê kator mã ijamaxpêr kaxyw axpên wÿr akuprô nê hã ixkînh. Jakamã nhûm Jejus ma hkwyjê hkôt krî pê Jerujarê hwÿr mō. Pa mẽ ixpê hkôt ri ixpa xwÿnhjaja pa mẽ ma hkôt ixpa. Hãmri nê hwÿr pōj

¹⁴ nê Tirtûm mã amnhî jarênh xà hã ixkre hwÿr mra nê ixkre puhã kahêja wÿr agjê. Nhûm mẽ kamã axtem nê mẽmoj to wênê ho kuhê. Mōx o wênê nê ôwêhti ho wênê nê tutre ho wênê ho kuhê. Mẽ kot haprôr nê ho Tirtûm mã hkînh xà kaxyw mẽ kãm ho wênê. Nê kàxpore ho pinhpanh xwÿnhjaja haxwÿja mẽ kuri hkrî.

¹⁵ Hãmri pa mẽ Jejus kôt mẽ hwÿr agjê nê ja hã mẽ omu hãmri nhûm Jejus pê ja omnuj tÿx nê. Jakamã nhûm tee ri mẽ omu hãmri nê amnhîm mry hkà ho mẽ htak xà nhîpêx nê ho ixkreja nê mẽ piitã mẽ kator pa. Nê mōx nê ôwêhti nê mẽmoj piitã kator pa. Nê kàxpore ho pinhîpanh xwÿnhjaja nhûm mẽ kêp mẽ ô mêsti rênh pa nhûm mẽ hikàxpore pykap rôrôk pa nê anhrà nê hikwÿ.

¹⁶ Hãmri nhûm Jejus tutre ho wênê xwÿnhjê mã kãm:

—Kwa mẽ anhō tutre jamÿ nê tokyx ma mra. Na htem Inhîpêxà nhôrkwÿ kamã mẽmoj to wênê hkêt nê. Kêp mẽ ujaarôr xà hã ixkre hkêt. E kwa mẽ tokyx ma mra. Anê.

Nhûm pre ã mẽ kãm kapêr anê nhûm mẽ tee ri kuma hãmri nê ma mrrar kurê kumrêx.

¹⁷ Pa mẽ hkôt mẽ ixpa ho ixpa xwÿnhjaja ã kot mẽ hipêx anhÿr ã omu hãmri nê ra Tirtûm kapêr ã kagà htûm kot ã amnhî nhîpêx anhÿrja kukamã hã kagàta mã ijamaxpêr kurê kumrêx. Kagà kot amnepêm Jejus kukamã te ra ã kapêr anhÿr pyrâk o harênh. Nê harênh kot:

Na pa hte Tirtûm nhôrkwÿ ho mex rãhã ho ixpa. Nhûm mẽmoj punuj hwÿr axà pa omu nhûm ja inhmã mex kêt nê.

Anhÿr o kot hkukamã harênh jakamã na pa mẽ ã Jejus kot mẽ hipêx anhÿrja ã omu hãmri nê ra hkukamã hã kagàta mã ijamaxpêr kurê kumrêx.

Ijaew krãhtûmjaja kot Jejus kujêr ã mẽ harênh

¹⁸ Tã nhûm Ijaew krãhtûmjaja tee ri Jejus kot ixkreja nê mẽ kator ã omu hãmri nê hwÿr mra nê kãm:

—Pa. Kwa mon ka ri ã Tirtûm mã amnhî jarênh xà hã ixkreja nê mẽ kator anê? Mêhō na we mẽ ixwÿr amê ka ÿ hã ã mẽ hipêx anêhti? Nà xà Tirtûm na mẽ ixwÿr amê? E mẽ inhmã aa mẽ ixte mẽmoj pumunh kêt ô ho anê. Pa mẽ ja hã apumu hãmri nê Tirtûm kot mẽ ixwÿr amênh xwÿnh ã apumunh kurê kumrêx. E kwa tokyx mẽ inhmã ho anê. Anê.

¹⁹ Hãmri nhûm mẽ kuma nê mẽ kãm amnhî jarê. Nom amnhî tã kuxi nê mẽ kãm awjarê nê mẽ kãm:

—Nà kot paj aa mẽ ate mẽmoj pumunh kêt õ ho pixi nẽ mẽ amã ho anẽ ka mẽ omu. Tĩrtũm nhõrkwỹ jaa. Kot kaj mẽ agrà pa ixtã apkati axkrunẽpxi nẽ akupỹm hipêx ka mẽ ja hã ixpumu.

20-22 Anhỹr o mẽ kãm kapër. No ãm ixkreja jarẽnh kêt nẽ. Na pre ãm amnhĩ tã kuxi nẽ ã mẽ kãm kapër anẽ. Mẽ kot hpĩr nhũm htyk ã apkati axkrunẽpxi nẽ akupỹm htĩr ã mẽ kãm ã amnhĩ jarẽnh anẽ. Te mẽ kot Tĩrtũm mã amnhĩ jarẽnh xà hã ixkreta grãnh nhũm hã apkati axkrunẽpxi nẽ akupỹm kot hipêx parta pyrãk ã hã kuxi nẽ ã mẽ kãm amnhĩ jarẽnh anẽ. Jakamã nhũm mẽhprĩ hã mar mex kêt nẽ. ãm tee ri kuma nẽ kãm:

—Tk. Kwa ixkre ja na prem hipêx kaxyw nẽ hã amgrà xoh tõ rax nẽ hipêx. Hã amgrà pẽ 46 nẽ hipêx par kẽnã kot ka kêt atã apkati axkrunẽpxi pix nẽ akupỹm hipêx. Anẽ.

Mẽ kot hprĩ hã mar kêt jakamã na prem ã kãm kapër anẽ. Pa mẽ hkõt mẽ ixpa ho ixpa xwỹnhjaja ã mẽ kãm kapër anhỹrja ã kuma nẽ hã inhnohtỹx rãhã ho ri ixpa. Tã nhũm mẽ kot Jejus pĩr nhũm hã apkati axkrunẽpxi nẽ akupỹm htĩr nhõ arĩgrota ã pa mẽ kot ã amnhĩ jarẽnh anhỹrja mã ijamaxpër kurẽ kumrẽx. Nẽ axpẽn mã:

—Hẽxta waa nẽ. Xep ãm hãmri na pre Pahihti amnhĩ kukamã ã amnhĩ jarẽnh anẽ. Mẽ kot hpĩr nhũm htyk ã apkati axkrunẽpxi nẽ akupỹm htĩr ã amnhĩ kukamã

amnhĩ jarẽnh mex nẽ. Te mẽ kot Tĩrtũm nhõrkwỹ grãnh par nhũm hã apkati axkrunẽpxi nẽ akupỹm hipêx ã amnhĩ jarẽnh pyrãk. ãm hãmri na pre amnhĩ kukamã ã amnhĩ jarẽnh anẽ. Anẽ.

Jejus kot mẽ pajamaxpër kõt mẽ pahpumunh ã harẽnh

23 Tã nhũm Jejus mẽ hkõt mẽ ixpa ho ixpa xwỹnhjaja arĩ Jerujarẽ kamã ri ixpa ho ixpa. Nhũm ra arĩgro pẽ Pasja kato nhũm mẽ piitã hkĩnh kaxyw axpẽn wỹr akuprõ. Nhũm Jejus mẽ kãm aa mẽ kot mẽmoj pumunh kêt kwỹ ho anhỹr o ri mẽ hkõt pa. Nhũm mẽ omu nhũm mẽ hkwyjaja Tĩrtũm kot mẽ pakaxyw ãm xwỹnh ã hkõt hamaxpër tã no ãm hkõt hamaxpër tỹx kêt nẽ.

24 Jakamã nhũm Jejus amnhĩ tã mẽ hamaxpër ã mẽ omu nẽ hamaxpër o:

—Nà mẽ kot ixkõt hamaxpër kryre xwỹnhjaja koja mẽ hã apkati grẽre nẽ ixto hamakẽtkati nẽ htỹx ri pa. Anẽ.

25 Jejus kot mẽ pahte pahtỹx ri amnhĩ tomnuj o papa hã mẽ pahpumunh par. Nẽ pahtỹx ri pajamaxpër punuj o papa hã mẽ pahpumunh par. Jakamã na pre ã mẽ harẽnh anẽ.

3

Jejus mẽ Nĩkotẽ wa kot axpẽn mã kapër ã wa harẽnh
Juãw 1.12-13; mããnẽn
Wam Pẽtre 1.23

1 Tã nhũm Parijew nhõ xwỳnhjê õ pê Nìkotê. Mãänēn kēp Ijaew krãhtũmjê hõ.

2 Jakamã na pre Jejus jarēnh ma nē kãm omunh prãm nē. Hãmri nē hkwȳ pymaj kamàt kãm hwỳr tē nē omu nē kãm:

—Pa mẽ ijahkre xwỳnh. E ot pa awỳr tē. Ra mẽ ixte apumunh mex. Tĩrtũm na pre ate mẽ ijahkre ho apa kaxyw mẽ ixwỳr amē ka mẽ ixwỳr wrỳ. Mēhõ koja apyrã nē aa mẽ inhmã mẽ kot mẽmoj pumunh kēt kwỳ ho anhỳr o pa? Nà amrakati kumrēx. Kop apu Tĩrtũm kot mẽ ixwỳr amēnh kēt ronhỹx ka ã amnhĩ nhĩpēx anhỳr kēt nē. Anē.

3 Hãmri nhũm kuma nē tanhmã kãm kapēr to. No ãm amnhĩ tã kuxi nē kãm awjarē nē kãm:

—Na htem piitã mẽ katorxã nhõxã hkre rũm hapõj. Tã Tĩrtũm kãm mẽ piitã axte mẽ hapõx prãm. Jakamã kot kaj mẽ akator o axkrut kēt nē hãmri nē nhỹrmã Tĩrtũm ri atĩr tũm nē apa ho apa hkēt nē. ãm hkrajê pix na htem kuri htĩr tũm nē pa ho pa. Jakamã kwa jam ajamaxpēr tỳx nē ri ho apa. Anē.

4 Hãmri nhũm Nìkotēja kuma nē tee ri ã kot kãm kapēr anhỹrja kukamã hamaxpēr nē kãm:

—Kwa ra ixãptàr kēnã kot pa kēt tanhmã amnhĩ to nē akupỹm ixkatorxã nhõxã hkre hwỳr axã nē axte kurũm ixkato. Anē.

5-7 Hãmri nhũm Jejus kãm:

—Nà na hte mẽ hkrarejaja mẽ katorxã nhõxã hkre rũm kagõ hkõt hapõj hãmri nē kēp katorxã mẽ hipēexã wa hkwȳy. Jao wa kot amnhĩ nhĩpēx kõt amnhĩ nhĩpēx o pa. Ja pyrã nē ka mẽ atõ amã apē Tĩrtũm kra hprãm hã kot kaj amnhĩ to awỳ nhũm wa Ixkarõja akarõ mã axã hãmri ka ra apē hkraa. Te ra axte akator pyrãk o amnhĩ nhĩpēx. Nē te mẽ hkra kot katorxã nē hipēexã wa kot amnhĩ nhĩpēx kõt amnhĩ nhĩpēx o pata pyrã nē apãm Tĩrtũm kot amnhĩ nhĩpēx kõt amnhĩ nhĩpēx o ri apa. Nom koja Tĩrtũm mẽ wa Ixkarõja akarõ mã àr kēt nē ka apē hkra hkēt nē. Jao te axte akator kēt pyrãk o amnhĩ nhĩpēx. Jakamã na pa amã te ate akator pijakrut o amnhĩ nhĩpēx pyrãk o amã ã ja jarēnh anē. Kwa jam ajamaxpēr tỳx rãhã ho ri apa. No ama nē tee ri amnhĩ kukamã ajamaxpēr kēt nē.

8 —E pa ixprĩ hã amã ja jarē ka inhma. Na hte kõt kãm nhỹhỹm àpēr prãm xã hkõt àpēr o pa. Pu mẽ kamã ama no ãm pano ho nhỹhỹnh mõi xã hkõt omunh kēt nē. Nē nhỹhỹm ma mõi xã hkõt omunh kēt nē. Ja pyrã nē na hte Tĩrtũm mẽ wa Ixkarõja mẽ hkaxwỳnh mã agjê nē mẽ ho Tĩrtũm kra nom nhũm mẽhprĩ hã kot tanhmã mẽ ho hã amnhĩ tã omunh kēt nē. Anē.

9 Hãmri nhũm Nìkotê ã Jejus kot kãm kapēr anhỹr ã kuma nē tee ri hamaxpēr nē kãm:

—Kwa na pa ixprĩ hã amar

kêt nê. Anê.

¹⁰ Hāmri nhūm kām:

—Kwa mon ka hte Tirtūm kapêr tūm o Ijaew jahkre ho apa tā aprī hā ixkapêr mar kêt nê?

¹¹ Ixte mēmoj pumunh xà hkôt ixte mē amā harēnh o ixpa htā ka mē apê Ijaew krāhtūmjaja mē amā ixkapêr mar prām kêt nê. Ā mē ate anhÿr kumrêx. Kwa jam ajamaxpêr tÿx nê.

¹² Na pa ra Tirtūm kot jar tanhmā amnhī nhīpêx to hā harēnh o ixpa htā ka mē amā nê ixkôt ajamaxpêr kêt nê. Jakamā xà kot pa hpānhā mē amā kaxkwa kamā tanhmā kot amnhī nhīpêx to hā harē ka mē ama nê mar tÿx nê? Nà kot ka mē ama nê amā nê hkôt ajamaxpêr kêt nê.

¹³ Mēhō na we ra ma kaxkwa hwÿr api nê kamā mēmoj mex pumu nê man akupÿn mē awÿr wrÿ nê mē amā tanhmā harēnh to? Nà amrakati kumrêx. Ām paxipix ixpê Tirtūm kot mē akaxyw ixām xwÿnh na pa pre amnê kurūm mē awÿr wrÿ hāmri nê ixprī hā mē amā tanhmā harēnh to ho ri ixpa.

¹⁴ —Amnepê m finat Mojesja kormā kapôt ā mē o pa ri na pre mē kām kàx o kagā karōja nhīpêx nê kÿxpê mē kām kunhō. Kagā kot mē hkamnar xwÿnhjaja kot hwÿr rīt nê omunh nê akupÿm mex kaxyw mē kām kunhō. Tā ixpê Tirtūm kot mē akaxyw ixām xwÿnh kot paj

nhÿrmā kagā karōta pyrā nê kÿx pē pī kahpa hā ajêt.

¹⁵ Ka mē te mē kot kagā karō pumunh nê akupÿm mexta pyrā nê amnhī kaxyw inhmā ajamaxpêr nê ixkôt amnhī xunhwÿ hāmri nê nhÿrmā Tirtūm mē wa ixri atir tūm nê amex rāhā nê apa ho apa.

¹⁶ —Tirtūm kām pika piitā hkôt mē apiitā mē ajapê htÿx. Nê mē ajapê xàj na pre ixpê Kra hā ixpyxi hā mē awÿr inhmē. Ka mē atō amnhī kaxyw ixkôt ajamaxpêr nê ixkôt amnhī xām. Hāmri nê nhÿrmā atyk tā nhūm Tirtūm akupÿm ato atir ka wa ixkuri atir tūm nê amex rāhā nê apa ho apa. Hāmri nhūm Tirtūm aa amnhī nê nhÿhÿm amēnh kêt kumrêx.

¹⁷ No mē ate amnhī tomnuj mÿrapê tanhmā ixte mē anhīpêx to kaxyw na pre mē awÿr inhmēnh kêt nê. Ām ixkukwak ri mē atir tūm nê mē amex rāhā apa ho apa hprām xàj na pre mē awÿr inhmē pa mē awÿr wrÿ.

¹⁸ Jakamā kot ka mē atō amnhī kaxyw ixpê Tirtūm Kra hā ixkôt ajamaxpêr nê ixkôt amnhī xām nhūm Tirtūm ixtā apumu nê ate amnhī tomnuj mÿrapê tanhmā anhīpêx to hkêt nê. No kêt mē kot ixkôt amnhī xunhwÿr kêt xwÿnhjaja na Tirtūm ma mē kot amnhī xà htÿx kamā hamak tūm xà hwÿr mē pa mā xwÿnhjê hā mē harē. Mē kot ixkôt amnhī xunhwÿr kêt mÿrapê. Anê.

Mē kot amnhī tomnuj o hpimxur prām kaprÿ ā mē

harēnh

¹⁹ Nhūm Jejus arī Nīkotē mā kapēr nē kām:

—Na pre Tīrtūm amnē pika hwȳr mē awȳr inhmē. Mē ate amnhī tomnuj xwȳnh ā amnhī pumunh kaxyw mē awȳr inhmē. Tā nhūm mē ohtō nē amnhī tomnuj gryk ā kām kapēr mar prām kêt nē. Jao ixkaga nē kām ixkapēr mar prām kêt nē.

²⁰ Ra ixprī hā ixte mē kot tanhmā amnhī tomnuj to ho pa hā mē omunh mex jakamā mē kām ixkapēr mar prām kêt. Nē ixte mē kot tanhmā amnhī tomnuj to ho pa hā mē harēnh pymaj ixkôt kām pa hprām hkêt nē.

²¹ No kêt mē kot ixkôt amnhī xunhwȳr xwȳnhjaja na mē kot amnhī nhīpêx o pa hā hpijaàm kêt. Na htem àmnhīx ixkôt amnhī nhīpêx o pa. Jakamā koja mē piitā ja hā mē omu nē Tīrtūm kot tanhmā mē hkrā hto nhūm mē ra kām hkôt pix mā amnhī nhīpêx ho pa hprām ā mē omunh kurē kumrêx. Anē.

Nhūm pre ā Jejus Nīkotēja mā kapēr anē.

Juāw Paxis kot Jejus jarēnh o pa hā harēnh

Juāw 1.19-28

²² Tā pa mē ixpê Jejus kôt ri ixpa ho ixpa xwȳnhjaja Jejus kôt Jerujarē rūm ijapôj nē pika pē Jutej kwȳ kamā ixpa. Jejus nhȳ hā Tīrtūm mā mē hkrā kumrār o ri mē hkôt ixpa.

²³ Nhūm finat Juāw Paxis haxwȳja mē ixpyrà nē mē hkrā kumrār o pa. Krī pē

Sarī htā krī pē Enō mȳri pyhti rax jakamā nhūm pre htem hwȳr mra nhūm kamā mē hkrā kumrā.

²⁴ Kormā mē kot haxàr kêt ri nhūm kamā mē hkrā kumrār o pa.

²⁵ Rôm nhūm Ijaew hōja Juāw Paxis kôt mē pa ho mē pa xwȳnhjê hwȳr tē nē Juāw Paxis kot mē hkrā kumrār ā tanhmā mē hkukjêr to nhūm mē kuma nē tee ri hā axpên kujêr o kuhê.

²⁶ Hāmri nē akupȳm Juāw Paxis wȳr tē nē kām:

—Kwa mē ijahkre xwȳnh. Pyhti pē Jotāw nhīkjê hā ate mēhō pumunh nē tanhmā mē inhmā harēnh to xwȳnhhta kôt mē pa ho mē pa xwȳnhjaja na xep htem apyrà nē mē hkrā kumrār o pa nhūm xep mē ra ohtō nē mē pahkaga nē mē hkôt pa. Kwa xà ja amā mex nà? Anē.

²⁷ Hāmri nhūm mē kuma nē mē kām:

—Tȳ ja mex kênā. Tīrtūm kām hprām xà hkôt na htem mē hwȳr mra nhūm mē ixpānhā mē hkrā kumrā. Nà ja mex.

²⁸ Ixpê Tīrtūm kot mē pakaxyw ām xwȳnh kêt. Na pa pre ra mē amā ja hā amnhī jarē ka prem inhma. Ām hkukamā na pre Tīrtūm amnē inhmē pa mō nē ā jar ri ixpa anē.

²⁹ —Te ixte mē umre kot amnhī nhīpêx pyràk. Na htem axpên mā mē rer kaxyw nhūm mē umreja myta wȳr tē nē hpa hā kupy nē ma ni hwȳr o tē nē axpên mā wa kure. Hāmri nhūm hpānhā

mêhõja axpên tâ wa hakre. Nhũm umreja wa kuri hkĩnh nê mar o xa. Tã te ixte mê umre kot amnhĩ nhĩpêx pyrãk jakamã koja mê ma Tĩrtũm kot mê pakaxyw ãm xwỳnhhta wỳr mra nê kapêr ma pa mê harênh ma nê ixkĩnh nê.

³⁰ Na htem mê umre hã hkĩnh kêt nê. Mjên nyw xwỳnhja ã na htem hkĩnh. Tã ja pyrã nê koja mê axte ixte mê kãm Jejus jarênh mar kaxyw ixwỳr mrar kêt nê. ãm hwỳr koja mê hpãnhã mra nê tãm mar o kuhê. Ja mex kumrêx.

³¹ Jejus kêp kaxkwa rũm amnê mê pahwỳr wrỳk xwỳnh jakamã kot amnhĩ to rax o kot mê pahpiitã mê pajakrenh par. Mê papajaja mê pahpê pika nhõ xwỳnh jakamã Jejus kĩnhã mê pahte mêmoj piitã omunh tohtuj anhỹr. Nê pika nhõ xwỳnhjê jamaxpêr pix o pajamaxpêr o ri papa.

³² —Na hte Jejus mê kãm kaxkwa kamã kot mêmoj pumunh xwỳnh kwỳjê jarênh o pa. Nê kamã kot mêmoj mar xwỳnh kwỳ jarênh tâ nhũm mê ohtô nê kuma nê ãm kuma.

³³ No mê kot mar nê amnhĩ kaxyw hkôt hamaxpêr xwỳnhjaja na htem kuma nê axpên mã harênh o: “Nà ãm hãmri na ã Tĩrtũm kapêr jarênh anê. Nà Tĩrtũm kapêr mex kumrêx.” Anhỹr o axpên mã harê.

³⁴ —Tĩrtũm na pre mê pahwỳr Jejus mê nhũm amnê mê pahwỳr wrỳ nê Tĩrtũm

Karõ nhỹ hã mê pamã kapêr jarênh o ri mê pahkôt pa.

³⁵ Tĩrtũm kãm Krata japê htỳx kumrêx jakamã na pre ãhkram mêmoj piitã haxàr pa nhũm uràk nê hihtỳx o hihtỳx nê mêmoj piitã ho amnhĩptàr o pa.

³⁶ Jakamã mê kot amnhĩ kaxyw hkôt hamaxpêr nê hkôt amnhĩ xunhwỳr xwỳnhjaja koja mê nhỹrmã wa kuri htĩr tũm nê mex rãhã nê pa ho pa. No mê kot hkaga xwỳnhjaja koja mê ã amnhĩ nhĩpêx anhỹr kêt nê. Koja Tĩrtũm mê kot amnhĩ xà htỳx kamã hamak tũm xàta wỳr mê rênh pa. Anê.

4

¹ Tã nhũm Parijew nhõ xwỳnhjaja Jejus jarênh ma. Nê hkôt mê pa xwỳnhjaja ohtô rax o Juãw Paxis kôt mê pa xwỳnhjê jakrenh ã mê harênh ma. Nê Jejus kot mê hkrã kumrãr rax o Juãw Paxis jakrenh ã harênh ma.

² Nom Jejus na pre mê hkrã kumrãr kêt nê. ãm mê ixte hkôt ri mê ixpa ho mê ixpa xwỳnhjaja na pa prem kãm mê hkrã kumrãr o ri ixpa.

³ Jakamã nhũm Jejus amnhĩ tâ Parijew nhõ xwỳnhjê jarênh ma hãmri nê mê kêp kato nê hpãnhã ma akupỹm Garirej wỳr mō pa mê ma hkôt ixpa.

*Mêhõ ni kot amnhĩ nhĩpêx nyw o amnhĩ nhĩpêx ã harênh
Juãw 7.37-39; mããnêh
Apokarip 22.1, 22.17*

4 Tã pa mẽ mỗ nẽ kormã pyka pẽ Samar mã axà nẽ hkôt ixpa.

5 Hãmri nẽ krĩ pẽ Sika hwỳr ixpôx o mỗ. Amnepêm finat Jako kot hkra Juje mã pyka nhõr xwỳnh tã krĩa xa pa mẽ ra hwỳr ixpôx o mỗ.

6 Nẽ amnepêm Jako kot gôm kakwỳnhnta wỳr pôj. Nhũm ra kaxkwa nhĩpôk ri myt nhỹr mẽ nhũm Jejus ra mrar ryy kurê hkẽngrà nẽ. Hãmri nẽ gôm kakwỳnh mỳ ri tẽm nẽ hkôkôt o nhỹ.

7-8 Hãmri pa mẽ kure nẽ mẽ ixàpkur xà japrôr kaxyw ma krĩm ijapêx.

Rôm nhũm Samar nhõ xwỳnh nija amnhĩm gô runh mã tẽ nhũm Jejus omu nẽ kãm:

—Kwa inhmã anhõ gôta kwỳ pa ho ixkõ. Anẽ.

9 Nhũm amnhĩ jaêr pẽ amnhĩ tã kuma. Ijaew na pre htem Samar nhõ xwỳnhjê kutã apkur rỳ mẽ hkôt ri pa rỳ mẽ ho mjên kêt nẽ. Rỳ mẽ kutã hkôm kêt nẽ. Tã nhũm Jejus ã gô hã nija wỳr anẽ nhũm tee ri amnhĩ tã kuma nẽ kãm:

—Xê pẽr apê Ijaew tã axtem nẽ ri gô hã ixwỳ. Xà ate ixpê Samar nhõ xwỳnh ã ixpumunh kêt? Hãn ka ri hã ixwỳ. Anẽ.

10 Hãmri nhũm kuma nẽ kãm amnhĩ jarẽ. No ãm amnhĩ tã kuxi nẽ kãm kapẽr nẽ kãm:

—Nà aprĩ hã ate ixpumunh ro nhỹx ka kam gô hã ixwỳ pa amã hkwỳ. Inhõ gô na axte mã. Tĩrtũm kãm amari mẽ amã òr prãm. Na htem ho

ixkõ hãmri nẽ mex nẽ htĩr tũm nẽ pa ho pa. Anẽ.

11 Hãmri nhũm tee ri kot ã ò gô jarẽnh anhỹrja ã kuma nẽ htỹx ho gôm kakwỳnh kamã gô hã hkamnhĩx nẽ tee ri hkukamã hamaxpẽr nẽ kãm:

—Xê tanhmã kot ka kêt amnhĩ to nẽ inhmã gôta kwỳ janhi? Mo kaxyw anhõ gô janhir xà? Gôm kakwỳnhnta upỳm rax kênã kot ka kêt tanhmã amnhĩ to nẽ hkwỳ janhi. Nhỹhỹnh kot ka anhõ gô jarẽnh xwỳnhnta kwỳ janhi pa ho ixkõ hãmri nẽ ixtĩr tũm nẽ ixpa ho ixpa?

12 Mẽ inhõ gôm kakwỳnhja amnepê mã mẽ panhĩgêt finat Jako nhõ gôm kakwỳnh na pre. Jako hkwỳjaja na prem hkakwỳ nhũm kamã gô kato nhũm pre htem hanhi nẽ ho hkôm o pa. Nẽ hkra-jaja nẽ hkrit piitã ho hkôm o pa. Jakamã na pre mẽ ixpê hkanrêhã htàmnhwỳjê mã hkaga. Tã xep axtem anhõ gô. Mẽ kot ho hkôm nẽ htĩr tũm kaxyw na xep. Jakamã xê xà ate amnhĩ to rax o mẽ panhĩgêt Jako jakrenh mẽ? Anẽ.

13 Hãmri nhũm Jejus kãm:

—Nà mẽ anhõ gôta na htem ho ixkõ nẽ arĩ kãm kôr o pa.

14 No ixte amã gô jarẽnh xwỳnhnta kot ka hkwỳ ho ixkõ hãmri nẽ axte amã kôr kêt kumrêx nẽ apa. Nhũm te akaxwỳnh kãm hinore hprôt pyrak o ka amnhĩ nhĩpêx. Hãmri nẽ te hinore kamã gôja aa grà hkêt pyrã nẽ aa ajapêx kêt kumrêx. Nhỹrmã atyk tã akupỳm atĩr nẽ atĩr tũm nẽ amex rãhã apa ho apa. Anẽ.

15 Nhũm nija kuma hãmri nẽ kãm:

—Xôwehe? Xê tô tokyx inhmã anhõ gôta kwý. Pa ho ixkõ nẽ axte inhmã kôr kêt nẽ ixpa. Nẽ axte amnẽ amnhũm gô janhir mã inhmarr kêt nẽ. Xê tokyx inhmã hkwy mê? Anẽ.

Týx gô kumrẽx ã hkamnhĩx nẽ ã hã àhwýr anẽ.

16 Hãmri nhũm kãm:

—Tô ma akupým krĩm tẽ nẽ amjên japrô nẽ man akupýn ixwýr wa tẽ. Anẽ.

17 Hãmri nhũm tee ri kuma nẽ kãm:

—Ma mo inhmjên? Inhmjên kêt na pa hte ri ixpa. Anẽ.

Hãmri nhũm kãm:

—Tý. Nã ãm hãmri na ka ã amnhĩ jarẽnh anẽ.

18 Na ka pre ra amjên kęp 5. Nẽ my mẽ ri war apa xwýnh ata te kęp amjên pyræk nom kęp amjên kumrẽx kêt. Anẽ.

19 Hãmri nhũm amnhĩ jaêr pê kot ã kãm kapêr anhýrja ma hãmri nẽ kãm:

—Xê pêr aprĩ hã ate ixpumunh par pyræk. Mãn apê Tĩrtũm nhý hã kapêr jarẽnh o mẽ pa xwýnhjê hõ mãn ka mẽ?

20 Xê inhmã mẽmoj jarẽ. Nhýhým kot paj wem axpên kôt mra nẽ Tĩrtũm mã mex o mex ã harê? Amnepê mã mẽ panhĩgêjtaja na prem hixêt mũj nhĩmøk ã api nẽ hã kãm amnhĩ jarẽ nẽ kãm mex o mex ã harê. No mẽ apê Ijaew na ka htem krĩ pê Jerujarẽ pix kãm mẽ ixte axpên kôt mrrar nẽ ã amnhĩ nhĩpêx anhýr ã mẽ inhmã karõ. Xà hixêt nhĩmøk ã mẽ ixte kãm amnhĩ

jarẽnhja xà apê omnuj mê? Ma xà apê omnuj kêt? Anẽ.

21 Hãmri nhũm Jejus kãm:

—Nà kot kaj mẽ nhýrmã ãm Jerujarẽ pix kãm rý hixêt mũj nhĩmøk pix ã axpên wýr akuprõ nẽ Tĩrtũm mã amnhĩ jarẽnh kêt nẽ.

22 Mẽ apê Samar nhõ xwýnhjaja mẽ ate Tĩrtũm mã mex o mex ã harẽnh o apa htã aprĩ hã kot amnhĩ nhĩpêx ã omunh kêt. Nẽ tanhmã hamaxpêr to ho pa hã omunh kêt. No mẽ ixpê Ijaew na pa mẽ arom kot tanhmã amnhĩ nhĩpêx to nẽ tanhmã hamaxpêr to hã omunh mex. Mẽ inhõ kukwak ri koja Tĩrtũm mẽ kot hkôt amnhĩ xunhwýr xwýnh piitã nẽ mẽ kot amnhĩ tomnuj rênh pa.

23 Tã koja mẽ piitã Mẽpahpãm Tĩrtũm mã mex o mex ã harẽnh kaxyw nhýhým pa hkêt nẽ. Koja mẽ nhýri pa xà kamã mẽ ôpinh xà kaxwýnh kãm ã kãm amnhĩ jarẽnh anhýr o pa. Ja na Tĩrtũm kãm hprãm. No nhýhým mrrar nẽ nhýri kuhê xà pix kamã kãm amnhĩ jarẽnhja nhũm kãm hprãm kêt nẽ.

24 —Nẽ Tĩrtũmja mẽ pahpyrà nẽ ã hkêt jakamã na te kaxkwa nẽ pika piitã hkôt pa ho pa. Jakamã na htem nhýri pa nẽ ôpinh xà kaxwýnh kãm amnhĩ kaxyw kãm hamaxpêr nẽ kãm mex o mex ã harê nhũm ra amnhĩ tã mẽ kuma. ã mẽ kot amnhĩ nhĩpêx anhýrja na kãm hprãm. Anẽ.

25 Nhũm pre ã Jejus nija mã kapêr anẽ nhũm kuma nẽ

kām:

—Ma koja xep nhỹrmã Tĩrtũm kot mẽ pakaxyw ãm mã xwỹnh pê Krisja mẽ pahwỳr wrỳ hãmri nẽ hprĩ hã mẽ pamã mẽmoj piitã ho amnhĩrit pu mẽ kuma. Anẽ.

26 Hãmri nhũm kãm:

—Kwa nhũm paa. Ixte amã ixkapẽr xwỹnhja ixpẽ Kris na pa. Jakamã na pa ixprĩ hã amã ã ixkapẽr anẽ. Anẽ.

27 Nhũm pre ã kãm amnhĩ jarẽnh anhỹrja rôm pa mẽ ixte hkôt ri mẽ ixpa ho ixpa xwỹnhjaja ra ixujaprôr pa nẽ akupỹn hwỳr ixpôx o mra. Hãmri nẽ amnhĩ jaẽr pê kot Samar nhõ xwỹnh nita mã kapẽr ã omu nẽ tee ri hkukamã ijamaxpẽr nom tanhmã hã hkukjêr to hkêt nẽ. Nija kêp Samar nhõ xwỹnh tã nhũm àmnhĩx kãm kapẽr o nhỹ. Pa mẽ omu nẽ ãm omu nẽ tanhmã hã kãm nẽ hkêt nẽ.

28 Hãmri nhũm nita gôm kakwỹnh mỳr ri õ poti re nẽ ma akupỹm krĩm tẽ nẽ hkwỳjê mã awjarẽ.

29 Nẽ mẽ kãm:

—Xê mẽ tokyx ma ixkôt gôm kakwỹnh wỳr mra nẽ mỳ ri mẽhõ my mũj pumu. Tĩrtũm kot mẽ pahwỳr mẽnh mã xwỹnhnta na. Aa kot nhỹri ixpumunh kêt tã kot hprĩ hã ixpumunh par. Ixte tanhmã amnhĩ nhĩpêx to hã ixpumunh par. Xê mẽ ma ixkôt mra nẽ ixpyrà nẽ kapẽr ã ama. Anẽ.

30 Hãmri nhũm mẽ kuma nẽ ma hkôt Jejus wỳr mrar kurê kumrêx.

31 Rôm pa mẽ ixte Jejus kôt ri ixpa ho ixpa xwỹnhjaja tee ri mẽ ixàpkur xà ho Jejus ma nẽ kãm:

—E ota mẽ panhõta. Kwa mẽmoj py nẽ aku mãn.

32 Anhỹr tã nhũm mẽ inhma nẽ tanhmã mẽ inhmã amnhĩ jarẽnh to. Nom amnhĩ tã kuxi nẽ amnhĩ jarẽ nẽ mẽ inhmã:

—Nà kormã. Inhõja axtem na. Mẽ ate inhõja pumunh kêt. Anẽ.

33 Hãmri pa mẽ kuma nẽ tee ri hã axpẽn kukja nẽ axpẽn mã:

—Kwa mãn ra mẽhõ mẽ paxwakre kamã kãm mẽmoj to tẽ nhũm kukrê nà? Anẽ.

34 Hãmri nhũm mẽ inhma nẽ mẽ inhmã:

—Nà mẽhõ kot kêt ri inhmã mẽmoj to mra pa kuku? Kot paj kot mẽ awỳr inhmẽnh xwỹnhnta mã tanhmã amnhĩ nhĩpêx to hãmri nẽ te ra ixàpkur mex nẽ hã ixihtỳx mex pyræk o amnhĩ nhĩpêx. Tã kot paj ã kãm amnhĩ nhĩpêx anhỹr o ri ixpa rãhã ho ijapêx pa. Jao te ixàpkur rax pyræk.

35 Anhỹr o mẽ inhmã amnhĩ jarẽ. Hãmri nẽ ra Samar nhõ xwỹnhjaja mẽ ixwỳr mrar ã mẽ omu nẽ mẽ inhmã tanhmã mẽ harẽnh to nom mẽ hã kuxi nẽ mẽ harẽ nẽ mẽ harẽnh o:

—Kot kaj mẽ axte mẽ atã mytwrỳ kêp 4 hãmri nhũm ra mẽ apur kãm mẽ anhõja hamỹnh mã tãm nẽ. Nom kormã. E ka mẽ pahwỳr mẽ mrar xwỹnh nẽj pumu. Ra mẽ kot amnhĩ kaxyw ixkôt hamaxpẽr nẽ ixkôt

amnhĩ xunhwỳr mǎ tǎm jakamǎ te mē apur kām ra mē anhō jamỳnh mǎ tǎm pyrǎk. Jakamǎ ka mē atō ma mē hwỳr mō nē mē kot amnhĩ kaxyw ixkôt hamaxpēr nē ixkôt amnhĩ xunhwỳr kaxyw mē kām ijarē. Hāmri nē te ate ixpur kām inhmǎ inhō jamỳnh xwỳnh pyrǎk o amnhĩ nhĩpēx.

³⁶ —Jakamǎ koja mēhō kumrēx mē hwỳr tē nē mē kām Tirtūm kapēr jarē hāmri nē te kēp ō pahĩ mǎ hpur kām ahkre ho pa pyrǎk. Nhūm mē kot mar xwỳnhjaja kuma nom kormǎ hprĩ hǎ mar tỳx kēt nē. Tǎ kot kaj mē atō wamta kôt mē hwỳr tē nē mē kot ixkôt amnhĩ xunhwỳr kaxyw aprĩ hǎ mē kām ijarēnh o mē hkôt apa hāmri nē te apē mē anhō pahĩ mǎ hpur kām axujamỳnh xwỳnh pyrǎk. Hāmri nhūm mē hkwỳjaja mē ama nē ixkôt amnhĩ xunhwỳ nē ixkôt ri amnhĩ nhĩpēx o pa. Hǎ koja nhỹrmǎ mē apyrà nē Tirtūm mē wa ixri mex rǎhǎ nē htĩr tūm nē pa ho pa. Ka mē amnhĩ tǎ mē omu nē akĩnh nē apa. Te mē kot mē hpur kām ahkre xwỳnhjaja nē mē kot hamỳnh xwỳnhjaja mēō rũnh pumunh nē hkĩnhhta pyrǎk.

³⁷ —Na htem tōhǎ ã mē pur kām mē àpēnh xwỳnhjē jarēnh anē nē mē harēnh o: “Axtem mē ahkre xwỳnhjaja nē axtem mē kot hamỳnh xwỳnhjaja.” Anē. Tǎ te mē ate mē ujarēnh ja pyrǎk.

³⁸ Na pa pre ra ma mē hwỳr mē arē. Mē ate aprĩ hǎ mē

kām ijarēnh nhūm mē kot mē amar nē amnhĩ kaxyw ixkôt hamaxpēr nē ixkôt amnhĩ xunhwỳr kaxyw. Nom mē kajaja na ka prem akumrēx mē hwỳr amrar nē mē kām ijarēnh kēt nē. Tirtūm kapēr jarēnh o mē pa xwỳnhjaja na prem kumrēx mē hwỳr mra nē ixkukamǎ mē kām ijarēnh o ri mē hkôt pa. Te mē kot hpur kām ahkre ho pata pyrǎk. Tǎ kot kaj mē hpānhǎ mē kot amnhĩ kaxyw ixkôt amnhĩ xunhwỳr kaxyw aprĩ hǎ mē kām ijarēnh o apa. Jakamǎ te mē ate mē hpur kām mēō jamỳnh xwỳnh kot amnhĩ nhĩpēxta pyrǎk. Anē.

Mē hkwỳ kot amnhĩ nhĩpēx nyw o amnhĩ nhĩpēx ã mē harēnh

Sikūn Korīt 5.17; Wam Juāw 4.14

³⁹ Rôm nhūm Samar nhō xwỳnh kwỳjaja nija kot mē kām amnhĩ jarēnh ma hāmri nē urǎk nē amnhĩ kaxyw Jesus kôt hamaxpēr. Na pre ra amnhĩ tǎ tanhmǎ mē kām Jesus jarēnh to nē mē kām harēnh o:

—Ma aa kot nhỹri ixpumunh kēt tǎ ra kot hprĩ hǎ ixpumunh par. Ixte tanhmǎ amnhĩ nhĩpēx to hǎ ixpumunh par.

Anhỹr jakamǎ nhūm mē kuma nē urǎk nē amnhĩ kaxyw hkôt hamaxpēr kurē kumrēx.

⁴⁰ Hāmri nē man mē ixwỳr mra nē Jesus pumu nē amnhĩ wỳr kuwỳ nē kām:

—Pa. E kwa mē tokyx anojarēt kēt nē. Mē ma mē ixkôt

mẽ inhõ krĩ hwÿr mō nẽ mẽ
ixkõt ri apa grire nẽ arĩ ma
mõ. Anẽ.

Hãmri nhũm mẽ kuma nẽ
mẽ kãm:

—Tõe. Nà kot paj mẽ anẽ.
Anẽ.

Hãmri pa mẽ ma mẽ hkõt
mõ nẽ mẽ õ krĩ kamã mẽ hkõt
ri ixpa hã apkati axkrut.

⁴¹ Nhũm Jejus mẽ kãm
Tĩrtũm kapër jarënh o ri mẽ
hkõt pa nhũm mẽ axte ohtõ
nẽ kuma nẽ nita pyrã nẽ hkõt
amnhĩ xunhwÿ.

⁴² Hãmri nẽ nita wÿr mra nẽ
kãm:

—E nã ãm hãmri. Akumrëx
na ka mẽ inhmã Jejus o
amnhĩrĩt. Pa mẽ akõt ma
hwÿr mra nẽ mẽ pam omu nẽ
kapër ã kuma. Jao apyrã nẽ
amnhĩ kaxyw hkõt ijamaxpër
nẽ hkõt amnhĩ xunhwÿ. Për
ãm hãmri kęp pyka piitã hkõt
mẽ pahte amnhĩ tomnuj
pãnhã amnhĩrer mã xwÿnhhta
na. Anẽ.

*Garirej nhõ xwÿnhjaja kot
Jejus pumunh ã mẽ harënh*

Matêwre 13.57

⁴³ Tã pa mẽ Jejus kõt Samar
rũm ixkato nẽ ma pika pẽ
Garirej wÿr mō. Kamã Jejus
nhõ krĩ pẽ Najare htã pa mẽ
hwÿr inhmõr kêt nẽ.

⁴⁴ Na pre ra Jejus mẽ inhmã
tanhmã õ krĩ nhõ xwÿnhjê
jarënh to nẽ mẽ harënh o:

—Tĩrtũm nhÿ hã kapër
jarënh o mẽ pa xwÿnhjaja na
htem amnhĩ nhõ krĩ kamã
mẽ kãm Tĩrtũm kapër jarënh
o pa nhũm mẽ kuma nẽ ãm
kuma. Jakamã kot paj Najare
hwÿr inhmõr kêt nẽ. Mẽ kãm
ixkapër mar prãmre hã.

⁴⁵ Anhÿr jakamã na pa
prem hwÿr inhmõr kêt nẽ.
Pãnhã nhãm krĩ hõ hwÿr mō
nẽ hwÿr pøj hãmri nhũm mẽ
amnhĩ wÿr Jejus pumu nẽ
hkĩnh nẽ. Na prem ra krĩ
pẽ Jerujarë kamã arĩgro pẽ
Pas ã mẽ hkĩnh kãm tanhmã
kot amnhĩ nhĩpêx to ho pa
hã omu. Jakamã amnhĩ wÿr
omu nẽ hkĩnh nẽ.

*Jejus kot mēhõ hkra ho mex
ã harënh*

⁴⁶ Tã pa mẽ kormã Garirej
kamã ixpa nẽ akupÿm krĩ
pẽ Kanã hwÿr mō. Kamã
na pre Jejus mẽ kãm gō ho
wĩhti nhĩpêx. Jakamã pa mẽ
akupÿm mẽ hwÿr mō. Nhũm
mẽõ pahĩ nhõ kōwenatôjê hõ
hkra myja kęp à htÿx nẽ nõ.
Nom Kanã kamã hkêt axtem
krĩ hõ pẽ Kapanau kamã.

⁴⁷ Jakamã nhũm hipêêxàja
tee ri hkra pumu hãmri nẽ ra
Jejus kot Jutej rũm Kanã hwÿr
hpõx ã harënh ma nẽ hkra
kaxyw kãm hamaxpër nẽ
ma hwÿr mõr kurê kumrëx.
Hãmri nẽ nhÿri omu nẽ hwÿr
tẽ nẽ kãm kapër kãm hihtÿx
nẽ kãm:

—Pa. E ot pa awÿr tẽ. Na
ra ixkra ixpẽ htyk kaxyw.
Kwa ixkamã axukapri nẽ ma
ixkõt mō nẽ akupÿm inhmã
ho mex. Anẽ.

⁴⁸ Hãmri nhũm kuma nẽ
kãm:

—Kwa për ãm ixte mẽ amã
aa mẽ ate mẽmoj pumunh kêt
kwÿ ho anhÿr ã ixpumunh
kõt pix mã na ka htem amnhĩ
kaxyw ixkõt ajamaxpër. Nom
amarĩ amnhĩ kaxyw ixkõt
ajamaxpër kêt nẽ. Anẽ.

⁴⁹ Hāmri nhūm tee ri kuma nē kām:

—Kwa tokyx. Kot kaj tokyx ixkôt amōr kêt koja ixpê ty. Anê.

⁵⁰ Hāmri nhūm kām:

—Nà koja apê htyk kêt nē. Ra ixte akupỹm amã ho mex kênã. Māmri ma akupỹm mō nē tokyx omu. Na ra akupỹm amã mex. Anê.

Hāmri nhūm kuma nē kaxyw hkôt hamaxpēr kurê kumrêx nē ma akupỹm hwÿr mō. Nē mōr o apkati.

⁵¹ Nē kormã õ krī hwÿr hpôx o mōr ri nhūm ra kām mē àpênh xwÿnhjaja kutã mra nē nhÿri pry hã hkaxpa nē kām:

—Pa. Kwa na ra akra hkà hakry nē akupỹm amã mex. Anê.

⁵² Hāmri nhūm mē kuma nē hkīnh tÿx nē. Nē mē kām:

—Kwa xô wehe? Mēmo ore hã na pre we ra hkà hakry? Anê.

Nhūm mē kām:

—Nà jãã na pre kaxkwa nhīpók ri myt nhÿ nhūm hkà hakry nē akupỹm amã mex kurê kumrêx. Anê.

⁵³ Hāmri nhūm mē kuma nē mē kām:

—Hêxta waa nē. Kwa pēr ãm hāmri Jejus kot inhmã akupỹm mex ã harênh xà hã ore kamã na pre akupỹm inhmã mex. Nà ãm hāmri. Anê.

Hāmri nē amnhī kaxyw Jejus kôt hamaxpēr kurê kumrêx. Nhūm òrkwÿ kamã ri mē pa xwÿnhjaja uràk nē amnhī kaxyw hkôt hamaxpēr.

⁵⁴ Nhūm Jejus ã kām hkra ho mex anê. Na pre ra pika pē

Garirej kamã mē kot mēmoj pumunh kêt õ ho anhÿr o tipxi nē mē kām gô pix o wĩhti nhīpêx. Tã ra pyka pē Jutej rūm akupỹm mē hwÿr mō nē ã akupỹm mē hkrata o mex anê.

5

Jejus kot himô mÿ ri akupỹm mēhõ ho mex ã harênh Juāw 7.23, 10.30-33

¹ Tã mē ixpê Ijaew mē ixte Tĩrtūm ã ixkīnh kaxyw Jerujarē hwÿr akuprõ nhūm Jejus haxwÿja ma hwÿr mō. Pa mē hkôt mē ixpa ho mē ixpa xwÿnhjaja ma hkôt mō.

² Jerujarē kamã na himôja hikwÿ. Nhÿhÿnh mē kot krī hwÿr ôwêhti ho gjêx xà htã hikwÿ. Himôja nhīxi pē na Petes. Nē pu hã mē à xwÿnhjê nhīkwÿ xà hã ixkre kēp 5.

³ Piitã kamã na pre hte tanhmã mē à kute xwÿnhjaja hikwÿ. Mē nohkre xwÿnhjaja nē mē hyk o mē pa xwÿnhjaja nē mē ì kamã mē htyk xwÿnhjaja. ãm ahpÿnhã tanhmã mē à kute xwÿnhjaja ixkre hkwyja kamã akupỹm mex prãm xaj hikwÿ.

⁴ Na pre hte Tĩrtūm kapēr o mē wrÿk xwÿnhja tōhã himô hwÿr wrÿ nē gô xok. Hāmri nhūm mē à xwÿnhjê hõ kot amnhī to wa nē kumrêx hwÿr wrÿk nē kamã mrōr xwÿnhja akupỹm mex. Kwÿjê rom akupỹm mex kurê kumrêx. Jakamã nhūm pre hte mē à xwÿnhjaja akupỹm mex prãm xaj gô xok jamãr o hikwÿ.

⁵ Jakamã nhũm mēhō myja ixkre hō kamã hikwỹ. Te omnuj nē arī hikwỹ hã amgrà xohtō rax nē. Ra hã amgrà kēp 38.

⁶ Jakamã nhũm Jejus mē hwỳr tē nē omu. Nē hprī hã omu nē hamaxpēr o:

—Kwa mũj na hte omnuj nē ri pa hkêt ã amgrà xohtō rax nē. E pa akupỹm ho mex.

Anhỹr o hamaxpēr hãmri nē kãm:

—Pa. E kwa inhmã amnhĩ jarē. Xà amã akupỹm amex prãm? Anē.

⁷ Hãmri nhũm kuma nē kãm:

—Ku nhũm. Inhmã tokyx akupỹm inhmex prãm tỳx kumrēx kēnã. No mēhō kot tokyx inhmỹ nē mē kēp ixto wa nē ixkumrēx gō xok kamã inhm̄rōr? Na pa tee ri ixkumrēx hwỳr ixtēm nē inhmã inhm̄rōr prãm nhũm mē xatã ixpē amnhĩ to wa nē mra nē kamã mrō. Anē.

⁸ Hãmri nhũm Jejus kãm:

—Tỳ? Tōe. E na ka akupỹm amex. E kãnhmã xa nē akupĩp py nē ma akupỹm anhōrkwỹ hwỳr tē. Anē.

⁹ Hãmri nhũm kuma nē ra akupỹm mex nē kãnhmã xa nē ri mra. Nē hkĩnh tỳx nē hikupĩp py nē ma akupỹm ōrkwỹ hwỳr tē. Ijaew nhō arīgromnu pē sap ã nhũm Jejus kot akupỹm ho mex

¹⁰ nhũm ma akupỹm pry hã hikupĩp py nē o tē. Nhũm Ijaew nhō pahi hkwyja nhỹhỹnh mra nē tee ri kot sap ã hpyr nē o htēm ã omu nē kãm:

—Tk. Kwa mē pahpē Ijaew na pu htem mē panhō arīgromnu hã paxapēnh kêt nē. Finat Mojes kot ja nē mē pahkurē htã ka axtem nē akupĩpta py nē nhỹhỹm o tē. Anē.

¹¹ Hãmri nhũm mē kuma nē mē kãm:

—Tỳ. Kot anhỹr tã kot ixto mex xwỳnhnta na ã inhmã kapēr anē pa mar xà hkôt kupy nē akupỹm inhōrkwỹ hwỳr tē. Anē.

¹² Hãmri nhũm mē tee ri kuma nē kãm:

—Kwa mēhō na we ã ri amã karō anē? Anē.

¹³ Nhũm kormã kot Jejus nhĩxi mar kêt jakamã kot mē kãm ahkre kaxyw hakēx nē tee ri hkwyjē kaēx ã hapēr rīt o xa. Nom nhũm mē ohtō nē pry hã mrrar jakamã nhũm tee ri hapēr nhũm Jejus ra ma nhỹhỹm tē.

¹⁴ Tã nhũm hã ahtũmre nhũm Jejus Tĩrtũm mã amnhĩ jarēnh xà hã ixkre hwỳr tē nē axà nē kot ho mex xwỳnhnta pumu nē kãm:

—Pa. E na ka ra akupỹm amex. Nom kwa kēr ka axte tanhmã amnhĩ tomnuj to ho ri apa hkêt nē. Kot kaj axte ã amnhĩ nhĩpēx anē hãmri nē apunu j tỳx o wam ate apunujta jakre kãm ga. Anē.

¹⁵ Hãmri nhũm kuma nē ma tē nē kato. Nē ma mē ō pahijē hwỳr tē nē mē kãm:

—E na pa ra kot ixto mex xwỳnhnta nhĩxi ma. Xep kēp Jejus. Anē.

¹⁶ Hãmri nhũm mē hixi ma nē hã tanhmã axpēn mã ho kapēr punuj to. Mē ō arīgromnu hã kot mē ho mex

o pa jakamã nhũm mẽ axpẽn jakwa kamã ri hixi ho rê nẽ nhỹri omu nẽ tanhmã hã kãm àkjêr to.

¹⁷ Hãmri nhũm amnhĩ tã mẽ kuma nẽ mẽ kãm:

—Ku nhũm. Inhĩpêêxà Tĩrtũm na hte apkati mẽ tanhmã mẽ pahto mex to ho pa. Jakamã pa hte uràk nẽ ã mẽ ho mex rãhã ho ri ixpa anẽ nẽ aa mẽmo arĩgro hã ja ho anhỹr kaga hkêt nẽ.

¹⁸ Anhỹr o mẽ kãm amnhĩ jarẽ nhũm mẽ kuma nẽ kamã gryk tỳx nẽ. Nom mẽ õ arĩgromnu hã kot mẽ ho mexja pix mỳrapê kamã gryk kêt. Mãânẽn Tĩrtũm kêp hipêêxà hã harẽnha mỳrapê nhũm prem kamã gryk tỳx kumrêx nẽ axpẽn mã:

—Tk. Kwa na ã amnhĩ jarẽnh anhỹr jao te kêp Tĩrtũm pyràk ã amnhĩ jarẽ. E kwa pu mẽ kupĩ ri. Anẽ.

Tĩrtũm Kra kot Hipêêxà nhỹ hã amnhĩ nhĩpêx ã harẽnh

Juāw 14.10-13

¹⁹ Hãmri nhũm Jejus axte mẽ kêp Ijaew nhõ pahijê mã kapêr nẽ mẽ kãm:

—Na pa hte amnhĩ krã hkôt tanhmã amnhĩ nhĩpêx to ho ri ixpa hkêt nẽ. Na pa hte Inhĩpêêxà kot tanhmã amnhĩ nhĩpêx to hã omunh xà hkôt uràk nẽ mẽ ho mex o ri ixpa. Kwa mẽ amnhĩ krã him ja jaxà nẽ kãm ajamaxpêr tỳx nẽ ho apa.

²⁰ —Inhĩpêêxàja kãm ijapêê. Na hte inhmã kot tanhmã mẽ ho mex to piitã ho amnhĩrĩt. Ixte omunh nẽ uràk nẽ ý hã tanhmã mẽ ho mex to ho ri

ixpa kaxyw. Jakamã kot paj ãm akupỹm mẽ à xwỹnhjê ho mex pix o ri ixpa hkêt nẽ. Kot paj mãânẽn mẽ kãm mẽmoj mex o ja jakrenh o anhỹr o ri ixpa ka mẽ hã ixpumu nẽ ixkamã ano puma ho apa.

²¹ —Nẽ Inhĩpêêxà kot akupỹm mẽ htyk xwỹnhjê ho htĩr jakamã kot paj uràk nẽ akupỹm mẽ htyk xwỹnhjê ho htĩr o ri ixpa. Anẽ.

Mẽ htĩr tũm nẽ mẽ pa mã xwỹnhjê jarẽnh

Juāw 3.16-17, 3.36, 6.27, 6.40, 6.60, 10.28, 17.2-3; Rõmãn 6.23; Karatas 6.8; Xitre 1.2; Wam Juāw 2.25, 5.11-13

²² Nhũm Jejus arĩ mẽ kêp Ijaew nhõ pahijê mã kapêr nẽ mẽ kãm:

—Koja nhỹrmã Inhĩpêêxàja mẽ htĩr tũm nẽ mẽ pa ho mẽ pa mã xwỹnhjê jarẽnh kêt nẽ. Ja kaxyw na pre pa ixãm.

²³ Tã mẽ piitã mẽ kot ja hã ixpumunh nẽ ixtã hpijaàm o ri pa kaxyw na pre mẽ kaxyw ixãm. Te mẽ kot Inhĩpêêxà hã hpijaàmta pyrà nẽ pa ixtã hpijaàm o pa kaxyw. Jakamã koja mẽhõ ixtã hpijaàm kêt nẽ hãmri nẽ mãânẽn Inhĩpêêxà hã hpijaàm kêt ã amnhĩ to amnhĩrĩt. Tãm kot mẽ awỳr inhmẽnh kênã.

²⁴ Jakamã koja mẽhõ ixkapêr ma nẽ amnhĩ kaxyw kot mẽ awỳr inhmẽnh xwỹnhta kôt hamaxpêr nẽ ixkôt amnhĩ xãm. Hã koja nhỹrmã htyk tã ma mẽ kot amnhĩ xà htỳx kamã hamak o pa htũm xàta wỳr mõi kêt nẽ. Kojã Inhĩpêêxà akupỹm ho htĩr nhũm wa ixri htĩr

tūm nē mex kumrēx nē pa ho pa. Jakamā koja mēhō ixkōt amnhī xām hāmri nē ra kēp wa ixri htīr tūm nē pa ho pa mā xwýnh. Kwa mē jam ajamaxpēr tỳx rāhā ho apa.

²⁵ —No mē kām ixkapēr mar prām kēt xwýnhjaja kēp Inhīpēêxà mē wa ixri mē htīr tūm nē mē pa mā xwýnh kēt. Tā ixpē Tīrtūm Kra jakamā koja mē ixkapēr ma nē ixkōt amnhī xunhwỳ. Hā kot paj amnhī tā mē omu nē mē htīr tūm nē mē pa mā xwýnh ā mē harē nhūm mē àmnhīx ri hkīnh nē pa ho pa. Kwa mē jam ajamaxpēr tỳx rāhā ho apa.

²⁶ —Nē Inhīpēêxà tām kēp mē ho mē htīr xwýnh. Tā ixpē Kra jakamā na pre amnhī pyrà nē ja kaxyw ixām.

²⁷ —Ra kot mē akaxyw ixām jakamā na pre mǎānēn ixte tanhmā mē ajarēnh to kaxyw ixām. Wa ixri mē atīr tūm nē apa ho apa mā xwýnhjê hā mē ajarēnh rỳ wa ixri mē atīr tūm nē apa hkēt mā xwýnhjê hā mē ajarēnh kaxyw.

²⁸⁻³⁰ Jakamā kot paj nhỹrma ra mē htyk nē mē hikwỳ xwýnh piitā mē kām ixkapēr nhūm mē inhma. Koja mē ixkapēr ma hāmri nē akupỹm htīr nē pika rūm hapōx pa. Hāmri nhūm mē kot kormā htīr ri Tīrtūm kapēr kōt amnhī nhīpēx hkēt xwýnhjaja mē kot amnhī tomnuj mýrapē ma mē kot amnhī xà htỳx kamā hamak tūm xàta wỳr ma hapēx pa. Nom nhūm mē kot amnhī to mex xwýnhjaja. Ra mē kot Tīrtūm kōt amnhī nhīpēx jakamā koja mē ma

Tīrtūm mē wa ixwỳr api nē wa ixri mex nē hkīnh rāhā htīr tūm nē pa ho pa.

—Kot paj ja kaxyw tanhmā mē apiitā mē ajarēnh to. Nom kot paj amnhī krā hkōt inhma hprām xà hkōt tanhmā mē ajarēnh to hkēt nē. Kot paj Inhīpēêxà kot mē awỳr inhmēnh xwýnhnta nhỹ hā àhpumunh tỳx xà hkōt tanhmā mē ajarēnh to. Jao ām hāmri mē ajarē. Kwa mē jam ajamaxpēr tỳx nē. No ā ixte mē amā amnhī jarēnh anhỹrja ma nē tee ri ajamaxpēr kēt nē. Anē.

Mē kot Jejus kēp Tīrtūm Kra hā harēnh xwýnhjê jarēnh

Juāw 8.18; Wam Juāw 5.6-8

³¹ Nhūm Jejus arī mē kēp Ijaew nhō pahijē mā kapēr nē mē kām:

—E na pa ra tanhmā mē amā amnhī jarēnh to. Nom kop ām papxipix ixte ā amnhī jarēnh anhỹr ronhỹx ka mē inhma nē ajamaxpēr o: “Ko. Na apu ām hāmri ā mē inhma amnhī jarēnh anē rỳ apu ām amnhī to hēx.” Anhỹr o aja-maxpēr.

³² Nom papxipix na pa hte ā amnhī jarēnh anhỹr kēt nē. Inhīpēêxà haxwỳja na hte ā ijarēnh anē. Nē ām hāmri na hte tanhmā ijarēnh to ho pa. Tīrtūmja hēx kēt.

³³ No mē amā pika nhō xwýnhjê pix kapēr mar prām jakamā na ka prem finat Juāw Paxisja wỳr akwỳjê rē nhūm mē ma hwỳr mra nē ixtā hkukja nhūm mē kām tanhmā ijarēnh to. Nē hprī hā mē kām ijarē.

34 No mẽ apê pika nhõ xwýnhjaja mẽ ate xxpên mã tanhmã ijarênh toja na ixpê tanhmã kute hkêt. Koja mẽhõ tanhmã ixto kapêr punuj to rý tanhmã ijarênh mex to pa amnhĩ jarênh ma nê tee ri amnhĩ kukamã ijamaxpêr o ixkaprĩ hkêt nê. Tã nom Juāw Paxis kapêrja mẽ amã mex jakamã na pa ã mẽ amã harênh anê. Ka mẽ ra kot tanhmã ijarênh toja ma nê amnhĩ kaxyw ixkôt ajamaxpêr nê ixkôt amnhĩ xunhwý nê nhỹrmã ty nê ma mẽ kot amnhĩ xà htýx kamã hamak tũm xàta wýr apa hkêt nê.

35 —Juāw Paxis na pre te kanê hpòk mex nê mẽmoj to amnhĩrĩt mex pyrã nê mẽ amã Tĩrtũm kapêr o amnhĩrĩt mex o pa. Ka prem te maripòtre kot kanê hã htu pyrã nê hwýr akuprõ nê mar o akuhê. Nom hkôt ajamaxpêr týx kêt nê.

36 Na pre hprĩ hã mẽ amã ijarênh o ri pa.

—Tã pa pam mẽ awýr wrý nê Inhĩpêêxà nhỹ hã mẽ akamã aa mẽ ate mẽmoj pumunh kêt kwý ho anhỹr o ri ixpa. Mẽ ate ja hã ixpumunh nê Inhĩpêêxà tãm kot mẽ awýr inhmênh kôt ixpumunh kaxyw.

37 —Nê Inhĩpêêxàja mãânên ixpê Kra hã mẽ amã ixto amnhĩrĩt. Ra mẽ anhõpinh xà kaxwýnh kãm kot mẽ amã ixto amnhĩrĩt tã ka mẽ ama nê ãm ama nê ixkôt ajamaxpêr kêt nê.

38 Mẽ amã mẽ ate hkôt amnhĩ nhĩpêx o apa hprãm kêt. Mẽ ate kapêr mar týx ronhỹx ka mẽ ixkapêr ma nê amnhĩ kaxyw ixkôt ajamaxpêr kurê kumrêx. Ixpê Tĩrtũm kot mẽ awýr inhmênh xwýnh kênã.

39 —Nê Tĩrtũm kapêr ã kaga htũm haxwýja kot tanhmã ijarênh to. Ka htem wa ixri atĩr tũm nê apa ho apa hprãm xàj kamã harênh rãhã ho ri apa. Nê kot tanhmã pa ijarênh to htã ka mẽ ixkapêr ma nê amnhĩ kaxyw ixkôt ajamaxpêr kêt nê. Anê.

Ijaew nhõ pahijaja kot Jesus kaga hã mẽ harênh

40 Nhũm Jesus arĩ mẽ kêp Ijaew nhõ pahijê mã kapêr nê mẽ kãm:

—Nê pa na ixte Inhĩpêêxà mẽ wa ixri ixte mẽ ho mẽ htĩr tũm nê mẽ pa mã xwýnh ã mẽ harênh tã ka mẽ amnhĩ kaxyw ixkôt ajamaxpêr kêt nê.

41 Nom mẽ ate inhmex ã ijarênh kêt tã ja ixpê tanhmã kute hkêt. ãm Inhĩpêêxà pix kot inhmex ã ijarênhja na inhmã hprãm.

42 Ra ixte mẽ apumunh mex. Mẽ amã Tĩrtũm kĩnh kêt.

43 Tãm kot mẽ awýr inhmênh tã ka mẽ ixpumu nê ixkaga nê ixkôt amnhĩ nhĩpêx kêt nê. Nom koja mẽhõ amnhĩ krã hkôt mẽ awýr tẽ nê tanhmã mẽ ajahkre hto ka mẽ ama nê hkôt amnhĩ nhĩpêx kurê kumrêx.

44 —ãm pika nhõ xwýnh pixjaja kot mẽ amex ã mẽ ajarênhja na mẽ amã hprãm.

No Tirtūm kot amnhīm mē amex ā mē ajarēnhja mē amā hprām ā mē ate amnhī jarēnh tā mē amā ja prām kêt. Jakamā na ka htem ixkaga kumrēx.

⁴⁵⁻⁴⁶ Tā nom kot paj pam nhÿrmā Tirtūm mā mē apē ixkwÿ hkêt ā mē ajarēnh kêt nē. Mo kaxyw kot pa kêt ri ā kām mē ajarēnh anē? Finat Mojes tām koja ja hā kām mē ajarē. Na ka htem tanhmā ajamexpēr to nē ajamexpēr o: “Kot paj finat Mojes kot mē inhmā tanhmā kapēr to hkôt amnhī nhīpēx o ri ixpa hāmri nē nhÿrmā Tirtūm ri ixtīr tūm nē inhmex nē ixpa ho ixpa.” Anhÿr o ajamexpēr nom hkôt amnhī nhīpēx kêt nē. Mojes na pre hte pa ijarēnh o pa. Tā mē ate kapēr kôt amnhī nhīpēx ronhÿx ka mē amnhī kaxyw ixkôt ajamexpēr nē ixkôt amnhī xunhwÿ. No mē ate ixkaga jakamā koja Mojes tām Tirtūm mā mē apē ixkwÿ hkêt ā mē ajarē.

⁴⁷ Mē ate Mojes kapēr kôt amnhī nhīpēx kêt jakamā kot kaj mē mǎānēn ixkôt amnhī nhīpēx hkêt nē. Anē.

Nhūm pre ā Jejus Ijaew nhō pahijē mā kapēr anē.

6

Jejus kot mē ho 5.000 nē mē kām mē ō hā harēnh

Matēwre 14.13-21; Makre 6.30-44; Rukre 9.10-17

¹⁻⁴ Tā nhūm ra arīgro pē Pas ahtēp o mō. Pasja ā mē ixpē Ijaewjaja na pa htem axpēn wÿr akuprō nē hā ōwēhti hkra nyw kwÿ pa nē ī hkur o ixkrī.

Amnepēm Tirtūm kot pika pē Ejit rūm mē inhīgētjē kator kaxyw nhūm prem nojarēt nē ā hkwy hpar nē ī hkur anē. Tā arī mē ixpē mē hkanrēhā mē htāmnhwÿjaja jam ijamexpēr pē ixkīnh kaxyw ā amnhī nhīpēx anē. Jakamā nhūm Jejus pār krem axà nē ma himō pē Garirej ā rēr kaxyw ma xarmā mō nē rē. Himōja nhīxi hō pē na Tipe nhūm hā xarmā mō nē rē. Pa mē hkôt ixpa ho ixpa xwÿnhjaja ma hkôt ixpa.

Hāmri nhūm pika nhō xwÿnh kwÿjaja Jejus ma mōr kām omu hāmri nē ma gō kape hā pikap mē inhīhkrep mra. Na pre ra Jejus mē kamā mē à xwÿnhjē ohtō nē akupÿm mē ho mex nhūm mē axte omu hāmri nē ma mē inhīhkrep gō mÿ ri hpar o pa.

Tā pa mē xarmā rē nē pār rūm ijapōj nē gō mÿ ri kÿxpē ixkrī hpa.

⁵ Hāmri nhūm mē inhīhkrep mē mrrar xwÿnhjaja mē ixwÿr hpōx o mra nhūm Jejus amnhī wÿr mē omu nē mē inhīō pē Firipti mā kapēr nē kām:

—Kwa Firip. Mēmoj kot puj mē pahwÿr mē mōr nējjē mā ho anē nhūm mē kuku? Tanhmā kot puj mē amnhī to nē nhÿri mē kām mēmoj japrō nhūm mē kuku? Anē.

⁶ Ra tām kot tanhmā mē kām ō hto hā amnhī pumunh mex tā ā mē hā Firipti kamā hamak kaxyw mē hā hkukjēr anē.

⁷ Hāmri nhūm kuma nē tee ri mē hkukamā hamexpēr nē kām:

—Konēn. Mē ohtô rax kumrêx kênã. Mo mē kaxyw mē pakâxpore rax? Kot pu mē pakâxpore ho 200 nē ho mē kām mēmoj japrôr tâ nhūm mē âm ho hkryre nē kuku nē ho ôhy htu hkêt nē. Mē ohtô rax o mē ohtô rax kênã. Anē.

⁸⁻⁹ Hāmri nhūm mē inhîōja kuma nē Jesus wÿr tē nē kām kapēr. Simāw Pêtre htō Andreja hwÿr tē nē kām:

—E ota mēhō hkrata amnhî kôt ô hkwÿ ho mô. No âm grire. Na pāwti kēp 5 nē kaxyw ô tep axkrutre. No mē ohtô gri ã kot kêt mē hipêx pa. Anē.

¹⁰ Hāmri nhūm kuma nē hkôt mē ixpa ho mē ixpa xwÿnhjê mã kapēr nē mē inhmã:

—Tôe. Nà hāmri. E mē kām anē kê mē hkrî pa. Anē.

Hāmri pa mē kām anē nhūm mē pō kamã hkrî hpa. Na prem ohtô kumrêx. Mēmyjê pixjaja kēp 5.000. Nē kaxyw mē hprō nē mē hkrajaja. Na prem ohtô ho ohtô. Tã piitã hkrî pa.

¹¹⁻¹² Hāmri nhūm Jesus mēhō hkrata pê ô pāwti jamÿ nē o xa nē Tirtūm mã harē nē kām:

—Pa Papaj. Na ka hte mē inhmã mē inhō ho apa. Âm kapxipix amex o amex. Anē.

Hāmri nē mē inhmã pāwtija gō pa mē ô ri mē hkrî xwÿnhjê mã ôr o mra nē ho mē pitã mē hipêx pa. Pāwtija âm hkryre htã nhūm Jesus tanhmã ho nhūm ra ohtô rax kumrêx. Jakamã pa mē ô ri mē kām ôr o mra nē ho mē piitã mē hipêx pa. Nhūm

Jejus hpānhã tep axkrutreta py nē mã ho anē nē Tirtūm mã harē hāmri nē amnhî xō ri mē inhmã kugō pa mē mã ho anē nē. Te ho pāwti nhîpêx pyrã nē ho mē pitã mē hipêx. Hāmri pa mē ixpiitã apku nē inhōhy htu nhūm arî mēō jakrêx kwÿ hprã. Hāmri nhūm Jesus mē inhmã:

—E kwa mē hkôt mra nē mēō jakrêx o akuprō kê omnu hkêt nē. Anē.

¹³ Hāmri pa mē kuma nē ho akuprō nē kawà o 12 nē ho nÿt. Pāwti hkryreja âm kēp 5 pix tâ nhūm Jesus tanhmã ho nhūm rŭnh kumrêx. Jakamã pa mē hakrêx prār o kawà ho 12 nē ho nÿt pa.

¹⁴ Hāmri nhūm mē inhîhkrep mē mōr xwÿnhjaja amnhî jaer pê Jesus kot mē kām mēō ho rax ã omu nē ri axpēn mã harēnh o:

—Kokÿÿ. Tãm mãn pre finat Mojesja amnepēm mē panhîgêtjê mã harēnh o ri pa. Tã ra mē pahwÿr wrÿ nà?

¹⁵ Kwa pu mē kām pakapēr kām paxihtÿx nē ma akupÿm amnhî kôt o mô nē amnhî kaxyw âm kê mē pahto amnhîptar o pa. Anē.

Hāmri nhūm Jesus amnhî tâ mē kapēr ma nhūm ja kēp omnuj nē. Jakamã nhūm mē kēp kato nē ma hpānhã ahte nhÿri hixêt ô hwÿr tē.

Jejus kot gô krāhkã hã htēm ã harēnh
Matêwre 14.22-27; Makre 6.45-52

¹⁶ Tã nhūm ra kamàtre pa mē Jesus kôt ri ixpa ho ixpa

xwýnhjaja ma akupým himô hwýr mra.

17 Nhũm kormã Jejus mẽ ixwýr akupýn htêm kêt jakamã pa mẽ tee ri kamã ama hãmri nê akupým pàr mã axà nê ma akupým Kapanaũ hwýr xarmã ixrêr o mỗ.

18 Pu nhũm ra kôk àpêr tỳx nhũm gô xatã kànhmã harĩ nê axpên wýr mra nê axpên tak tỳx nê.

19 Pa mẽ kormã gô nhĩpôk ri mỗ. Nê tee ri rrêmti ho gô rênh nhĩpêx kaprý nom kormã ixrêr kêt nê. Nê kormã inhmôr o ixtã 5 kirôm pix nê. Hãmri nhũm ra Jejus gô krãhkã hã hpar o mẽ ixkôt tẽ. Pa mẽ ixprĩ hã amnhĩ wýr omunh mex kêt nê ixtỳx mẽkarõ hã hkamnhĩx nê mẽ inhmã uma htỳx kumrêx.

20 Tã nhũm mẽ inhmã ixkapêr nê mẽ inhmã:

—Tk. Kwa mẽ amã ma hkêt nê. Pa na pa mẽ akôt tẽ. Anê.

21 Hãmri pa mẽ kapêr ma nê ixkĩnh nê. Nê amnhĩ wýr pàr kre hwýr ho api nhũm axà pa mẽ xarmã ixrêr kurê kumrêx nê pàr kre rũm ijapôx pa.

Mẽ kot Jejus japêr mrar ã mẽ harênh

22 Tã nhũm apkati nhũm xarpê mẽ kot Jejus wýr mrar nhũm kot mẽ kãm ô xwýnhjaja tee ri hapêr o pa nê axpên mã:

—Kwa nhỹhỹm mãn pre we tẽẽ? Na pre hkôt ri mẽ pa xwýnhjaja pix mẽ ô pàr kãm ma akupým xarmã mỗ nom nhũm Jejusja mẽ hkôt htêm kêt nê. Nà mãn kormã jar nhỹhỹm ri mrar jakamã pu

mẽ kormã omunh kêt nê. Anê.

23 Rôm nhũm Tipe rũm pàr kwýja mẽ hwýr pôj. Jejus kot mẽ apkur xà ho Tĩrtũm wýr nê mẽ kãm ho rax xà hã pikata wýr nhũm mỗn pôj.

24 Hãmri nhũm mẽ amnhĩ wýr omu nê tee ri pàr kãm Jejus mẽ hkôt mẽ ixpa ho mẽ ixpa xwýnhjê japêr hãmri nê axpên mã:

—E kwa pu mẽ ma mẽ hkôt xarmã mỗ nê Kapanaũ kamã mẽ hapêr. Anê.

Hãmri nê mẽ kãm amnhĩ jarê nê mẽ ô pàr kwý hwýr agjê nê ma mẽ hkôt xarmã mỗn rê.

25 Hãmri nê ra mẽ ixwýr rê nê mẽ ixkôt pôj nê mẽ ixkaêx ã Jejus pumu nê hwýr mra nê kãm:

—Pa mẽ ijahkre xwýnh. Kwa na pa prem tee ri xarpê ajapêr hãmri nê man akôt mỗn rê. Kwa tanhmã na ka pre we amnhĩ to nê man tẽn rê? Anê.

26 Hãmri nhũm mẽ kãm:

—Nà mẽmo kaxyw na ka wem ri ijapêr o ri ixkôt apa? ãm jãã mẽ ate ixkutã axàpkur nê anhõhy htu jakamã na ka mẽ axte ixkutã axàpkur pix kaxyw ijapêr o ri apa. No ixte ã mẽ amã amnhĩ nhĩpêx anhỹr ã ixpumu nê ixpê Tĩrtũm Kra hã ixkôt ajamaxpêr kêt nê. Kwa mẽ ixpê Kra hã inhmã ajamaxpêr tỳx nê kêt wehe. Anê.

Jejus te kêp kaxkwa rũm mẽ paxàpkur xà maati pyrãk ã kot amnhĩ jarênh

²⁷ Nhũm Jejus arĩ hwỳr mẽ mrrar xwỳnhjê mã kapêr nê mẽ kãm:

—Kwa kêr ka mẽ ri axàpkur xà pix kukamã ajamaxpêr o ri apa hkêt nê. Na htem mẽ apkur xà kukwak ri Tĩrtũm mẽ wa ixri htĩr tũm nê pa ho pa hkêt nê. No kot kaj mẽ amnhĩ kaxyw pa ixkôt ajamaxpêr nê ixkôt amnhĩ xunhwỳ. Hã kot kaj mẽ ixkukwak ri nhỹrmã atĩr tũm nê wa ixri amex nê apa ho apa. Te ixpê mẽ kot mẽ apkur xà hkur nê ỹ hã htĩr tũm nê pa ho pa xwỳnh pyræk. Ja kaxyw na pre Inhĩpêêxà Tĩrtũm mẽ awỳr papxipix inhmẽ pa mẽ awỳr wrỳ. Anê.

²⁸ Hãmri nhũm mẽ kuma nê kãm:

—Kwa tanhmã kot paj wem amnhĩ nhĩpêx to nhũm Tĩrtũm hã mẽ ixpumu nê mẽ ixto mex nê? Anê.

²⁹ Hãmri nhũm mẽ kuma nê axte mẽ kãm amnhĩ jarê nê mẽ kãm:

—Nà kot kaj mẽ amnhĩ kaxyw pa Tĩrtũm kot mẽ awỳr inhmẽnh xwỳnh kôt ajamaxpêr hãmri nhũm ixtã mẽ apumu nê tanhmã mẽ akrã hto ka mẽ ajamakêtkati nê axàmnhĩx akĩnh nê tanhmã amnhĩ nhĩpêx to ho ri apa. Anê.

³⁰ Hãmri nhũm mẽ kuma nê kãm:

—Tôe. Kwa axte mẽ inhmã aa mẽ ixte mẽmoj pumunh kêt ô ho anê. Pa mẽ ja hã apumu nê amnhĩ kaxyw akôt ijamaxpêr kurê kumrêx. E mẽmo kot ka mẽ inhmã ho anê? Kwa tokyx mẽ inhmã

axte mẽmoj tanhmã ho pa mẽ omu.

³¹ Amnepê m finat Mojes pyræk kot kapôt ã mẽ panhĩgêjtjê ho pa ri na pre hte apkati mẽ mẽ kãm mẽo mẽ kot kãm “manã” anhỹr xwỳnhhta gô nhũm pre htem hkur o pa. Tĩrtũm kapêr ã kagà htũm kot ja jarênh kot:

Na pre kaxkwa rũm mẽ hwỳr mẽ apkur xà rê nhũm mẽ hkur o pa.

Anhỹr o kot harênh. Tã kot kaj Mojes nê apkati mẽ mẽ inhmã mẽ inhõ ho ri apa pa mẽ ja hã apumu nê rĩ kormã amnhĩ kaxyw akôt ijamaxpêr japêr. Anê.

³² Hãmri nhũm mẽ kãm:

—Xà Mojes na pre hte mẽ kãm kaxkwa rũm mẽ apkur xà rênh o pa? Nà tãm kêt. Inhĩpêêxà na pre hte mẽ hwỳr kurê nhũm mẽ hkawrà nê kuku nê kukwak ri hihtỳx nê htĩr nê pa. Tã nhũm ra mẽ awỳr hpãnhã pa ixpê Kra hã inhmẽ. Kwa mẽ ixkapêr ma nê amnhĩ krãm haxàr tỳx nê.

³³ Na pre Tĩrtũm inhĩpêx o te amnepê m kot mẽ hwỳr kaxkwa rũm mẽ apkur xà rênhta pyræk nê amnê pika hwỳr inhmẽ. Jakamã te ixpê kaxkwa rũm mẽ apkur xà maati wrỳk xwỳnhhta pyræk. Mẽ ate amnhĩ kaxyw ixkôt ajamaxpêr nê ixkôt amnhĩ xunhwỳr hãmri nê ixkukwak ri wa ixri atĩr tũm nê apa ho apa kaxyw. Anê.

³⁴ Nhũm pre ã Jejus mẽ kãm amnhĩ jarênh anê nhũm mẽ kuma nom hprĩ hã mar mex kêt nê. ãm htỳx ho axtem mẽ

apkur xà mex pix ã harēnh ã hkamnhīx nē kām:

—Kwa tō mē inhmā mē apkur xà maatita kwý gō pa mē apkati mē hkur o ri ixpa. Anē.

³⁵ Hāmri nhūm mē kuma nē amnhī tā mē kām:

—Nà mē apkur xà kumrēxja ãm paa. Te ixpē mē apkur xà maati pyrāk. Jakamā kot kaj mē atō amnhī kaxyw ixkôt ajamaxpēr nē ixkôt amnhī nhīpēx o apa hã kot kaj mē akīnh nē apa. Te ra axàpkur nē anhōhy htu nē akīnh o ri apa pyrāk. Jao amnhī tā ixpumu nē akīnh nē ajamakētkati nē ri apa.

³⁶ —Ra mē ate ixpumunh mex tā kormā amnhī kaxyw ixkôt ajamaxpēr kēt nē. Kwa mē ixkapēr ma nē amnhī krām haxār tỳx nē.

³⁷ Tirtūm kot inhmā mē ōr mā xwýnhjaja koja mē ixpumu nē amnhī kaxyw ixkôt hamaxpēr mex kurē kumrēx. ã mē kot amnhī nhīpēx anhýr xwýnhjaja kot paj aa amnhī nē mē hanor kēt nē.

³⁸ —Nē ixte amnhī krā hkôt kaxkwa rūm ixwryk nē inhmā hprām xà hkôt tanhmā amnhī nhīpēx to ho ixpa kaxyw na pa pre ixwryk kēt nē. Inhīpēêxà kot mē awýr inhmēnh jakamā kām hprām xà hkôt pix mā na pa hte tanhmā amnhī nhīpēx to ho ri ixpa.

³⁹ —Tā mo na hte Inhīpēêxà kām hprām? Nà kot inhmā mē ōr mā xwýnh piitā nhýrmā wa ixkuri htír tūm nē mex nē pa ho paja na kām hprām. Jakamā nhýrmā akupým mē

htír ã arīgrotā ã ixte akupým mē ho htír nhūm ixte ãm pixire nē ho ixpikunor kētja na kām hprām.

⁴⁰ —Tā kot ka mē atō ixpē Tirtūm Kra hã ixpumu nē amnhī kaxyw ixkôt ajamaxpēr nē ixkôt amnhī xām. Hã kot kaj nhýrmā atyk tā pa akupým mē atír xà hã arīgrotā ã akupým ato atír ka wa ixkuri atír tūm nē amex nē apa ho apa. Ja na Inhīpēêxàja kām hprām. Anē.

Nhūm pre ã Jejus mē kām amnhī jarēnh anē.

⁴¹ Hāmri nhūm Ijaew nhō pahijaja mē kuri mar o kuhē nē tee ri kēp kaxkwa rūm mē apkur xà maati pyrāk ã amnhī jarēnh ma nhūm ja mē kām mex kēt nhūm mē kamā gryk nē.

⁴² Jakamā axpēn mā ri harēnh o:

—Tk. Kwa mo na ri ã amnhī jarēnh anē? Kēp mē panhiō kēnā kot kēt ri kēp kaxkwa nhō xwýnh ã amnhī jarē. Kēp Juje mē Marir wa hkra na. Mē pahte katorxà mē hipēêxà wa omunh mex kēnā kot kēt axtem nē kēp kaxkwa nhō xwýnh ã amnhī jarē. Anē.

⁴³ Hāmri nhūm amnhī tā mē kuma nē mē kām:

—Kwa mē ã ijarēnh anhýr kēt nē.

⁴⁴ Koja Inhīpēêxà kot mē awýr inhmēnh xwýnhhta tanhmā mē hkrā hto nhūm mē rī kormā amnhī tā ja hã ixpumu nē amnhī kaxyw ixkôt hamaxpēr. Tā ã mē kot amnhī nhīpēx anhýr xwýnhjaja koja mē nhýrmā htyk tā pa akupým mē ho mē

htír nhũm mẽ wa ixri htír tũm
nẽ mex kumrẽx nõ pa ho pa.

⁴⁵ —Amnepẽm Tĩrtũm kapẽr
jarẽnh o mẽ pa xwỳnhjaja na
prem ã ja jarẽnh anhỹr o:

Koja Tĩrtũm mẽ hkrã
kaxwỳnh kãm tanhmã
mẽ kãm kapẽr o
amnhĩrit to ho pa.

Anhỹr o harẽnh. Jakamã mẽ
kot Tĩrtũm kapẽr mar nõ hkõt
amnhĩ nhĩpẽx xwỳnhjaja koja
mẽ mããnẽn amnhĩ kaxyw pa
ixkõt hamaxpẽr nõ ixkõt ri
amnhĩ nhĩpẽx o pa.

⁴⁶ —Nẽ mẽ apê pika nõ
xwỳnhjê hõ aa mẽ ate ixkĩnhã
ano ho Inhiẽpẽxã pumunh
kêt. ãm papxipix na ixte
omunh. Kurũm na pa pre mẽ
awỳr wrỳ.

⁴⁷ Tã kot ka mẽ atõ amnhĩ
kaxyw ixkõt ajamaxpẽr. Hã
kot kaj nhỹrmã wa ixkuri atĩr
tũm nõ amex nõ apa ho apa.
Kwa mẽ jam ajamaxpẽr tỳx
nẽ.

⁴⁸ —Nẽ ixpê mẽ axàpkurxã
maati jakamã pa na ixpê
akupỹm mẽ ho mẽ htír
xwỳnh.

⁴⁹ Amnepẽm mẽ panhiẽgêtjaja
kormã kapõt ã mẽ pa ri mẽ
kot “manã” anhỹr xwỳnhhta
kur o ri pata ã na prem
kukwak ri htír tũm nõ pa ho
pa hkêt nõ. Na prem ri pa nõ
gaa nõ rĩ hpigêt nõ htyk pa.

⁵⁰ Axtem kaxkwa rũm
mẽ apkur xà maati jarẽnh
xwỳnhhta pix kukwak ri na
htem nhỹrmã htyk tã akupỹm
htír nõ wa ixri htír tũm nõ
mex nõ pa ho pa.

⁵¹ ãm paa. Pa na htem inhĩ
hkwỳ hkrẽ hãmri nõ wa ixri

htír tũm nõ mex nõ pa ho pa.
Na pa pre ra amnhĩ grõnh kõt
mẽ awỳr wrỳ. Jakamã ka mẽ
atõ inhĩ hkwỳ hkrẽ hãmri nõ
nhỹrmã atyk tã pa akupỹm
ato atĩr ka Tĩrtũm mẽ wa ixri
atĩr tũm nõ amex nõ apa ho
apa. Anẽ.

⁵² Nhũm pre ã Jejus Ijaew
mã amnhĩ jarẽnh anẽ. No
ãm mẽ kãm amnhĩ tã kuxi nõ
amnhĩ jarẽ. Jakamã nhũm
mẽ tee ri kuma hãmri nõ
tanhmã hã axpẽn mã kapẽr
to. Mẽ kot hprĩ hã mar kêt
nẽ ãm mẽ kot ĩ hkwỳ hkrẽrja
pix jarẽnh mar jakamã tee ri
hamaxpẽr nõ axpẽn mã:

—Kwa tanhmã kot kêt we
amnhĩ to nõ mẽ pamã amnhĩ
nhĩ hkwỳ gõ pu mẽ kuku?
Anẽ.

⁵³⁻⁵⁴ Hãmri nhũm amnhĩ tã
mẽ kuma nõ mẽ kãm:

—Nà mẽ kot inhĩ hkwỳ
hkrẽr nõ ixkamrõ hkwỳ ho
hkõm xwỳnh pixjaja koja mẽ
nhỹrmã Tĩrtũm mẽ wa ixri
htír tũm nõ pa ho pa. Ixte
akupỹm mẽ ho mẽ htír xà hã
arĩgrota ã kot paj mẽ ho mẽ
htír nhũm mẽ wa ixri htír tũm
nõ mex nõ pa ho pa. No kot
kaj mẽ inhĩ hkwỳ hkrẽr kêt
nõ ixkamrõ hkwỳ ho akõm
kêt hãmri nõ wa ixri atĩr tũm
nõ amex nõ apa ho apa hkêt
nẽ. Kwa mẽ jam ajamaxpẽr
tỳx rãhã nõ.

⁵⁵ Kêt inhĩja kệp mẽ apkur
xà maati na. Nẽ ixkamrõja
kệp mẽ hkõm xà maati na.
Jakamã na htem inhĩ hkwỳ
hkrẽ nõ ixkamrõ hkwỳ ho
ixkõ nõ ra kệp wa ixri mẽ htír
tũm nõ mẽ pa ho mẽ pa mã
xwỳnh.

56 Jakamã kot ka mẽ atõ inhĩ hkwỳ hkrẽ nõ ixkamrõ hkwỳ ho ixkõ. Hãmri pa amnhĩ tã apumu nõ akarõ mã axà ka te apê pa pyrãk o amnhĩ nhĩpêx o apa.

57 Inhĩpêêxà kot mẽ awỳr inhmẽnh xwỳnhhta kukwak ri na pa hte ixtĩr tũm nõ ixpa ho ixpa. Tã ja pyrã nõ kot kaj mẽ inhĩ hkwỳ hkrẽ hãmri nõ ixkukwak ri wa ixri atĩr tũm nõ apa ho apa mã xwỳnh.

58 –Jakamã na pa ã mẽ amã ixpê kaxkwa rũm mẽ axàpkur xà maati hã amnhĩ jarẽnh anẽ. Amnepêem mẽ panhĩgêtjaja na pre htem kapõt ã mẽõta kur o pa hãmri nõ gaa nõ hpigêt nõ htyk pa. No kêt pa koja mẽ inhĩ hkwỳ hkrẽ hãmri nõ mẽ kurom wa ixri htĩr tũm nõ mex nõ pa ho pa. Anẽ.

59 Nhũm pre ã Jejus mẽ kãm amnhĩ jarẽnh anẽ. Kormã Kapanau kamã Tĩrtũm kapêr o mẽ ahkre xà hã ixkre kamã ã mẽ ahkre anhỳr o xa.

Mẽ ohtõ nõ mẽ kot Jejus kaga hã mẽ harẽnh

Sikũn Korĩt 3.6; Sikũn Pêtre 3.16

60 Hãmri nhũm mẽ kot Jejus kõt mar o mẽ pa xwỳnhjaja ohtõ nõ ã kapêr anhỳrja ma nõ tee ri amnhĩ kukamã hamaxpêr nõ hã axpên mã:

–Tk. Kwa pêr kapêrja ãm ri katii. Mẽhõ koja we kuma nõ hkõt hamaxpêr nõ hkamrõ nõ ĩ kur o ri hkõt pa? Nà mẽ piitã mẽ kãm ja mexti hã. Anẽ.

61 Hãmri nhũm amnhĩ tã mẽ kuma nõ mẽ kãm:

–Kwa xà ixkapêrja mẽ apê omnuj?

62 Nà kot paj nhỹrmã ma akupỳm kaxkwa hwỳr api. Ixpê Tĩrtũm kot mẽ akaxyw ixãm xwỳnh ã ma akupỳm hwỳr api. Hãmri ka mẽ ã ixte amnhĩ nhĩpêx anhỳr ã ixpumu nõ rĩ kormã ixkõt amnhĩ xunhwỳr japêr.

63 Na htem mẽmoj kur kukwak ri kêt Tĩrtũm mẽ wa ixri htĩr tũm nõ pa ho pa xwỳnh kêt nõ. Rỳ amnhĩ krã hkõt tanhmã amnhĩ nhĩpêx to ho kêt wa ixri htĩr tũm nõ pa ho pa mã xwỳnh kêt nõ. Tĩrtũm mẽ wa Ixkarõ tãm na hte mẽ hkarõ mã agjê nõ mẽ ho Tĩrtũm wa ixkuri mẽ htĩr tũm nõ mẽ pa ho mẽ pa mã xwỳnh. Tã ÿ hã na pa ã mẽ amã ixkapêr anẽ. Nom mẽ amã amnhĩ tã kuxi nõ amnhĩ jarẽ. Tã kot kaj mẽ ixkapêr ma nõ ixkõt amnhĩ nhĩpêx. Hã kot kaj mẽ nhỹrmã wa ixri atĩr tũm nõ amex nõ apa ho apa.

64-65 No mẽ akwỳjaja na ka mẽ ixkapêr ma nõ ãm ama nõ ixkõt ajamaxpêr kêt nõ. Jakamã na pa ã mẽ amã ixkapêr anẽ nõ mẽ amã: “Koja Inhĩpêêxàja tanhmã mẽ akrã hto ka mẽ rĩ kormã amnhĩ tã ixpumu nõ amnhĩ kaxyw ixkõt ajamaxpêr.” Anhỳr o mẽ amã ixkapêr. Anẽ.

Nhũm ã Jejus mẽ kãm kapêr anẽ. Ra kot mẽ hkukamã mẽ omunh mex. Ra kot amnhĩ kaxyw mẽ kot hkõt hamaxpêr mã xwỳnhjê pumunh nõ mããnẽn mẽ kamã kot mẽõ pahĩ nhĩhkram haxãr mã xwỳnhja nhũm mããnẽn ra

kot amnhĩ kukamã omunh mex. Jakamã nhũm ã mẽ kãm kapër anë.

⁶⁶ Hãmri nhũm mẽ kot hkõt kapër mar o mẽ pa xwýnh kwýjaja tee ri kuma hãmri nẽ hkaga nẽ axte hkõt pa hkêt nẽ.

⁶⁷ Hãmri nhũm tee ri mẽ kot hkaga nẽ ma mẽ mrar ã mẽ omu nẽ mẽ ixpê hkõt ixpa ho ixpa xwýnh pẽ 12jê mã kapër nẽ mẽ inhmã:

—Pa? No mẽ kajaja. Xà kot kaj mẽ uràk nẽ ixkaga nẽ ma akupým mra nà? Anë.

⁶⁸ Hãmri nhũm Simãw Pêtre kãm:

—Nà kot paj mẽ akaga hkêt nẽ. Kapxipix na htem amnhĩ kaxyw akõt hamaxpër jao kệp Tirtũm mẽ war akuri htĩr tũm nẽ pa ho pa mã xwýnh.

⁶⁹ Ka na pre Tirtũm mẽ ixwýr amẽ. Jakamã na pa mẽ amnhĩ kaxyw akõt ijamaxpër o ri ixpa. Nà kot paj mẽ aa akaga hkêt nẽ. Anë.

⁷⁰ Hãmri nhũm kuma nẽ kãm:

—Nà ixte amnhĩ kaxyw mẽ apê 12jê rênh tã na ka mẽ atõ akwýjê hkĩnhã axtem nẽ Satanasti hkõt amnhĩ xãm. Anë.

⁷¹ Nhũm pre ã finat Jut Kariot kot mẽ inhõ pahijê nhĩhkram haxàrja kukamã mẽ inhmã harênh anë. Mẽ inhĩ õ na pre. Nẽ kệp Simãw Kariot kra na pre. Tã ra kot mẽ ìhkram haxàr kaxyw nhũm Jejus kot amnhĩ kukamã omunh jakamã ã mẽ inhmã harênh anë.

7

Jejus tøjaja kot mẽ hkĩnh

wýr amnhĩ kõt hwýr ã mẽ harênh

Matêwre 10.36, 13.57-58

¹ Tã nhũm Jejus arĩ Garirej kamã ri pa nẽ kormã akupým Jutej wýr mõi kêt nẽ. Jutej kamã Ijaew nhõ pahijaja ra kot hã àmnênh nhũm mẽ kot hpĩr ã harênh jakamã nhũm mẽ umaj kormã hwýr mõi kêt nẽ.

² Tã mẽ ixpê Ijaew mẽ ixte ixkre hkryre nhĩpêx nẽ hã ixkĩnh ã arĩgroja ra ahtêp o mõi. Mẽ ixkĩnh ta ã na pa pre htem ixpiitã Jutej wýr axpên wýr akuprõ nẽ ahpýnhã ri amnhĩm ixkre hkryre nhĩpêx nẽ kamã ixkrĩ.

³ Jakamã nhũm Jejus tøjaja hwýr mra nẽ kãm nojarêt nẽ amnhĩ kõt kuwý nẽ kãm:

—E kwa tokyx pu mẽ pahkwýjê hkõt. Ka mẽ kãm aa mẽ kot mẽmoj pumunh kêt kwý ho anhýr o ri mẽ hkõt apa kê mẽ kãm akapër mar prãm xwýnhjaja ja hã apumu.

⁴ Na ka hte jar te apimxur pyræk o amnhĩ nhĩpêx. E kwa tokyx ma pu mẽ hkõt. Anë.

⁵ Katorxà hkõt mẽ kệp Jejus tõi htã kormã amnhĩ kaxyw hkõt hamaxpër kêt jakamã na prem ã kãm kapër anë.

⁶ Hãmri nhũm mẽ kãm:

—Nà kormã. Kormã ixte mẽ kãm amnhĩ to amnhĩrit xà hã arĩgro kormã kator kêt. Jakamã kot ka mẽ amã mẽ hkõt amrar prãm nẽ mãmrĩ ma mẽ hkõt mra.

⁷ Koja mẽ apumu nẽ kãm mẽ akurê hkêt nẽ. Nẽ mẽ akamã gryk kêt ka mẽ ri tanhmã amnhĩ nhĩpêx to ho mẽ hkõt apa. No pa kot

paj mẽ hwÿr mō nē mẽ kãm mẽ kot amnhĩ tomnuj o pa hã mẽ harēnh o ri mẽ hkôt ixpa nhũm mẽ tee ri amnhĩ tã inhma nē ixkamã gryk nē.

⁸ Jakamã mẽ mãmri ma mẽ hkôt mō. Kot paj kormã. Kormã ixte mẽ kãm amnhĩ to amnhĩrit xà hã arĩgroja kormã kator kêt.

⁹ Anē nhũm mẽ tee ri kuma hãmri nē kure nē ma mẽ hkwÿjê hkôt Jutej wÿr mō. Nhũm Jejus kormã Garirej kamã ri pa hã apkati grêre.

¹⁰ Hãmri nē kormã ma hapu hã mẽ hkôt mō. Pa mẽ hkôt ri ixpa ho ixpa xwÿnhjaja ma hkôt ixpa.

Mẽ kot ahpÿnhã tanhmã Jejus jarēnh to hã mẽ harēnh

Juãw 7.37-44, 9.22, 10.19-21, 12.42-43

¹¹ Rôm nhũm ra mẽ ixpê Ijaew nhõ pahijaja mẽ hkĩnhja kamã mẽ pikuprõnh xwÿnhjê kaêx ã Jejus japêr o ri mra. Nē hã axpēn kukjêr o mra nē axpēn mã:

—Kwa nok? Nhÿri mãn we? Anē.

¹² Nhũm Ijaew piitã tanhmã axpēn mã Jejus jarēnh to ho pa. Nē kamã mẽ hkwÿjaja harēnh o:

—Nà kot amnhĩ to mex o pa xwÿnh na.

Anhÿr o harēnh o pa. Nē kamã mẽ hkwÿjaja axtem nē harē nē harēnh o:

—Tk. Kot mẽ no kupyri o pa xwÿnh kēnã. Anē.

¹³ Nom mẽ õ pahi pymaj mẽ piitã mẽ nom tanhmã harēnh to hkêt nē. ãm axpēn mã pix mã tanhmã harēnh to ho pa.

Jejus kot mẽ hkĩnh xwÿnhjê jahkre hã harēnh

Makre 3.22; Juãw 5.16

¹⁴ Tã pa mẽ mẽ hwÿr pøj. Jejus mẽ pa mẽ hkôt ixpa ho ixpa xwÿnhjaja mẽ hwÿr pøj. Kormã mẽ hkĩnhja hapêx kêt ri. Hãmri pa mẽ Jejus kôt Tĩrtũm mã amnhĩ jarēnh xà hã ixkreja wÿr mra nē agjê nhũm Jejus mẽ ahkre ho nhÿ.

¹⁵ Hãmri nhũm mẽ inhõ pahijaja tee ri kot tanhmã mẽ ahkre hto hã kuma nē hã axpēn kukja nē axpēn mã:

—Kwa mẽ pahkĩnhã kot Tĩrtũm kapêr o istuda hkêt tã ã mẽ ahkre anē. Anē.

¹⁶ Hãmri nhũm amnhĩ tã mẽ kuma nē mẽ kãm:

—Nà na pa hte amnhĩ krã hkôt tanhmã ri mẽ ajahkre hto hkêt nē. ãm kot mẽ awÿr inhmēnh xwÿnhhta nhÿ hã na pa hte ã mẽ ajahkre anhÿr o ri mẽ akôt ixpa.

¹⁷ Tã kot kaj mẽ amã Tĩrtũm kãm hprãm xà hkôt amnhĩ nhĩpêx prãm hã kot kaj mẽ ixte ÿ hã ixkapêr ã ixpumunh kurê kumrêx.

¹⁸ Amnhĩ krã hkôt mẽ kãm kapêr o ri mẽ pa xwÿnhjaja na htem mẽ kot mẽ mar nē mẽ hã hpijaam pix kaxyw tanhmã mẽ kãm kapêr to ho ri pa. No kêt pa na mẽ ate ixkapêr mar nē kot mẽ awÿr inhmēnh xwÿnhhta ã apijaam pix kaxyw na pa hte tanhmã mẽ amã ixkapêr to ho ri ixpa. Jakamã ãm hãmri na pa hte mẽ amã ixkapêr o ri ixpa.

¹⁹ —Finat Mojes na pre mẽ panhĩgêtjaja kot tanhmã amnhĩ nhĩpêx to ho pa nhũm Tĩrtũm kot mẽ kãm hã karõ

jarënh o ri mẽ hkôt pa htã ka mẽ hkôt amnhĩ nhĩpêx kêt nê. Tã ixte hkôt amnhĩ nhĩpêx kêt ã ixto axêx nê mẽ ate ixpĩr kaxyw ixtã amnhĩ jarënh ri apa. Anê.

20 Hãmri nhũm mẽ ã Jejus kot mẽ kãm kapêr anhỹrja ma nê hêx rom kãm:

—Kwa mẽ ixtõ na pa apĩr mã ka ri ã mẽ ijarënh anê? Amrakati kênã. Kwa mãn ka akrã axpã nà? Hã na ka ã ri akapêr anê. Anê.

21 Hãmri nhũm mẽ kãm:

—Nà ixte mẽ pahkôt xà hã arĩgro hã akupỹm mẽhõ myta ho mex jakamã na ka prem ja hã ixpumu nhũm ja mẽ apê omnuj nê. Nê te ixte mẽ pahkôt xà hã arĩgro hã xpi-jaãm kêt xwỹnh pyrãk ã ijarê.

22 Nom na ka htem ixpyrà nê mẽ panhõ arĩgromnu hã mẽmoj tã axápênh o ri apa. E pa mẽ amã mẽmoj jarê ka mẽ inhma. Na pre finat Mojes mẽ pamã mẽ pahte mẽ pahkra myre pê my kwrýt kã jakàr ã mẽ pamã karõ. Kukamã higêtjaja kot kãm ja hã karõ xà hkôt. Jakamã na htem mẽ hkra myre hapôj nê hã semãn pyxi nê hapêx nhũm mẽ kêp mẽmy hkwrýt kã jakà.

23 Mẽ pahkôt xà hã arĩgro hã hõ kator tãã nhũm mẽ hã semãn pyxi nê mẽ panhõ arĩgromnu hõ hã kêp my kwrýt kã hkwy krãhta. Mojes kot Tĩrtũm nhỹ hã ja hã mẽ pamã karõ xà hkôt. Jao mẽ panhõ arĩgromnu hã apê. Tã pa pre mẽ apyrã nê arĩgromnu hã ixápênh pê akupỹm mẽhõ myta ho mex ka mẽ ja hã

ixpumu nê axtem nê ixtỳx ri ixte amnhĩ nhĩpêx o ixpa xwỹnh ã ijarê nê mẽ ate ixpĩr kaxyw ã amnhĩ jarê.

24 Kwa mẽ amnhĩ krã hkôt tanhmã mẽ harënh to ho ri apa hkêt nê. Âm mẽ kot tanhmã amnhĩ nhĩpêx to ho pa hã mẽ omu nê ajamxpêr o: “Kwa xà we Tĩrtũm kãm ja mex nà?” Anhỹr o mãn kêt mẽ ajamxpêr nê rĩ kormã tanhmã mẽ harënh to. Anê.

25 Hãmri nhũm Jerujarê nhõ xwỹnh kwỳjaja ja hã kuma nê tee ri hkukamã hamaxpêr. Hãmri nê hã axpên kukja nê axpên mã:

—Kwa xà tãm na mẽ panhõ pahijaja mẽ kot hpĩr kaxyw hã amỹnê?

26 Ota jar mẽ pakamã ri pa htã nhũm mẽ âm omu nê kãm tanhmã nê hkêt nê. Mãn mẽ âm hãmri kêp Kris ã hkamnhĩx jakamã kapêr ma nê âm kuma nê kêp Kris ã tanhmã ho hkêt nê. Anê.

27 Hãmri nhũm mẽhõja kuma nê kãm:

—Tk. Nà kêp Tĩrtũm kot mẽ pahwỳr mẽnh xwỹnhre hã. Kêp Najare nhõ xwỹnh kênã. Mẽ pahte hipêêxà mẽ katorxà wa omunh mex. No kêt Tĩrtũm kot mẽ pahwỳr mẽnh mã xwỹnhhta koja xep mẽ pahwỳr kato pu mẽ nhỹhỹnh htêm xà hkôt omunh kêt nê. Anê.

28 Rôm nhũm Jejus arĩ Tĩrtũm mã amnhĩ jarënh xà hã ixkreja kamã mẽ ahkre ho nhỹ. Jakamã mẽ kot axpên mã harënh ã amnhĩ tã mẽ kuma nê mẽ kãm:

—Xà mẽ ate aprĩ hã ixpumunh nẽ nhỹhỹnh ixtẽm xà hkõt ixpumunh? Nà mẽ ate ja hã ixpumunh kêt. Na pa pre amnhĩ hkrã hkõt mẽ awỳr inhmõr kêt nẽ. Na pre mẽhõ mẽ awỳr inhmẽ. Nom kot mẽ awỳr inhmẽnh xwỳnhja kormã mẽ ate omunh kêt.

²⁹ Am papxipix na ixte omunh. Kurũm ixwryk xwỳnh na pa. Kot mẽ awỳr inhmẽnh nhũm kurũm ixwryk jakamã ixte ixprĩ hã omunh par. Anẽ.

³⁰ Hãmri nhũm mẽ hkwỳjaja tee ri ã kot amnhĩ jarẽnh anhỳrja ma nẽ ri axpẽn mã harẽnh o:

—Kwa Tĩrtũm kot mẽ pahwỳr mẽnh ã kot amnhĩ to hẽx kẽnã. E kwa pu mẽ ã kot amnhĩ to hẽx anhỳr ja ã unẽ nẽ haxà nà?

Anhỳr o axpẽn mã hã amỹnẽ. Nom kormã mẽ kot unẽnh nẽ haxàr xà hã arĩgroja kormã kator kêt jakamã nhũm Tĩrtũmja nẽ mẽ omunh mex nẽ nhũm mẽ ãm kãm unẽnh prãm kaprỳ.

³¹ No nhũm mẽ hkwỳjaja mẽ kurom kuma nẽ kęp Tĩrtũm kot mẽ pakaxyw ãm xwỳnh ã omunh kurê kumrẽx nẽ amnhĩ kaxyw hkõt hamaxpẽr. Hãmri nẽ axpẽn mã harẽnh o:

—Kwa mãn kęp Tĩrtũm kot mẽ pahwỳr mẽnh mã xwỳnhhta mãn nà? Mẽ pahtõ kot pu uràk nẽ aa mẽ kãm mẽ kot mẽmoj pumunh kêt o anhỳr rax o ri papa? Amrakati kumrẽx. Nà pẽr tãm kẽnã. Anẽ.

Pôristi hkwỳ kot Jejus pynênh kaxyw ã mẽ harẽnh

³² Nhũm prem ã axpẽn mã Jejus jarẽnh anhỳr o kuhê hãmri nhũm Parijew nhõ xwỳnhjaja hã mẽ kuma. Hãmri nẽ patre krãhtũmjẽ mẽ mẽ ma Jejus wỳr mẽõ pôristi hkwỳ rẽ nẽ mẽ kãm:

—E mẽ ma Jejus wỳr mra nẽ unẽ nẽ man akupỹn o tẽ. Anẽ.

³³ Hãmri nhũm mẽ kuma nẽ ma hwỳr mra nẽ omu nom tokyx unẽnh kêt nẽ. Kormã kapẽr ã mar o kuhê. Nhũm Jejus arĩ mẽ kãm kapẽr o xa nẽ mẽ kãm:

—Nà kot paj jar mẽ akõt ri ixpa hã mytwrỳ grẽre hãmri nẽ ma akupỹm kot mẽ awỳr inhmẽnh xwỳnhhta wỳr api.

³⁴ Ka mẽ tee ri jar ijapẽr o ri apa nom nhỹri ixpumunh kêt nẽ. Nẽ ma inhmõr xàta wỳr kot kaj mẽ atõ ma ixkõt amõr kêt nẽ. Anẽ.

³⁵ Hãmri nhũm mẽ tee ri ã kot amnhĩ jarẽnh anhỳrja ma nẽ axpẽn mã:

—Kwa nhỹhỹm koja we ma mõ pu mẽ hkõt papa hkêt nẽ? Mãn mẽ pahkwỳjaja kot Gresjê kamã mẽ pa xwỳnhjê hwỳr koja ma mõ nẽ hpãnhã mẽ hkõt mẽ ahkre ho pa nà? Hã na ã mẽ pamã amnhĩ jarẽnh anẽ?

³⁶ Mo na ri mẽ pahte tee ri hapẽr o papa hã mẽ pajarẽ nẽ mẽ pahte hkõt pamrar kêt ã mẽ pajarẽ? Anẽ.

Tĩrtũm Karõ te kęp gõ nyw pyràk ã harẽnh

Juāw 4.13-14; Apokarip 22.1, 22.17

37 Tā nhūm ra mẽ hkīnhja hapêx kaxyw hitep xà hã arīgro maatija kato. Jakamã nhūm Jejus kànhmã xa nẽ kỳxpê mẽ hpikuprōnh xwỳnhjê mã kapêr nẽ mẽ kãm:

—E te mẽ amã kôr o apa pyrāk xwỳnhjaja. Mẽ amnẽ ixwỳr akuprō. Kot kaj mẽ amnhĩ kaxyw ixkôt ajamaxpêr pa tanhmã mẽ ato ka mẽ apê Tĩrtũm mẽ wa ixri atĩr tũm nẽ apa ho apa mã xwỳnh.

38 —Kot kaj mẽ ja hã amnhĩ pumu hãmri nẽ ma mẽ kãm ixkapêr jarēnh o ri mẽ hkôt apa. Te mẽ kãm kôr nhūm mẽ ate mẽ kãm gô hkwy nhūm mẽ kot ho hkôm pyrāk o mẽ hipêx o ri mẽ hkôt apa. Hãmri nhūm mẽ ama nẽ mẽ apyrã nẽ amnhĩ kaxyw ixkôt hamaxpêr. Pa ixte tanhmã mẽ atoja pyrã nẽ tanhmã mẽ ho nhūm mẽ apyrã nẽ kêp wa ixri htĩr tũm nẽ pa ho pa mã xwỳnh. Anẽ.

39 Nhūm pre ã Jejus mẽ kãm kapêr anẽ. No ãm hã kuxi nẽ mẽ kãm kapêr nẽ hprĩ hã harēnh kêt nẽ. Tĩrtũm Karō kot nhỹrmã mẽ kot amnhĩ kaxyw Jejus mã hamaxpêr xwỳnhjê karō mã gjêxja nhūm ã mẽ kãm hã kuxi nẽ harēnh anẽ. No kormã akupỹm kaxkwa hwỳr àpir nẽ mex o mex nẽ hkrĩ hkêt jakamã kormã mẽ hwỳr Karō rēnh kêt nẽ.

*Mẽ kot ahpỳnhã tanhmã Je-
jus jarēnh to hã mẽ harēnh*
Juāw 7.11-13, 7.25, 10.19-
21

40 Hãmri nhūm mẽ kot Jejus mar o hkrĩ xwỳnhjaja ã kapêr anhỹrja ã kuma nẽ ahpỳnhã tanhmã harēnh to nẽ harēnh o:

—Kwa finat Mojes pyrã nẽ kêp Tĩrtũm nhỹ hã kapêr jarēnh o pa xwỳnh na nã? Anẽ.

41 Nhūm kamã mẽ hkwyjaja mẽ kãm:

—Nà Tĩrtũm kot mẽ pakaxyw ãm xwỳnhhta na. Anẽ.

Nhūm kamã mẽ hkwyjaja ja hã mẽ kuma nẽ mẽ kãm:

—Tk. Nà kêp Garirej nhō xwỳnh kênã kot kêt Tĩrtũm mẽ pakaxyw ãm.

42 Tĩrtũm kapêr ã kagà htũm kot kêp Garirej nhō xwỳnh ã harēnh kêt. Kêp Pahi Tawi hkanrêhã hkagrôt nyw jakamã koja urāk nẽ Jutej kamã krĩ pê Perěj kamã kato. Jao koja urāk nẽ kêp Jutej nhō xwỳnh.

Anhỹr o ri axpẽn mã harẽ. Mẽ kot htỳx Jejus pika pê Garirej kamã kator ã hkamnhĩx jakamã ã axpẽn mã harēnh anẽ. Nom pika pê Jutej kamã na pre kato. Krĩ pê Perěj kamã. Tã no nhūm mẽ hkwyjaja ja hã mar kêt jakamã kêp Tĩrtũm kot mẽ pahwỳr mẽnh xwỳnh kêt ã hkamnhĩx.

43 Jakamã nhūm mẽ ã ahpỳnhã axpẽn mã harēnh anẽ.

44 Nhūm mẽ hkwyjaja ra kot unēnh kaxyw tã tokyx unēnh kêt nẽ.

*Pôristi kot Jejus pynēnh kêt ã
mẽ harēnh*
Matêwre 7.28-29

45 Tã nhũm patre nhõ pôristijaja. Mẽ kot Jejus pynênh mã hwÿr mrar tã hãmri ã kapêr anhÿrja ã kuma nê tee ri hamaxpêr nê unênh kêt nê. Nê awjanã nê ahte ÿ kamã ma akupÿm patre krãhtũmjê mẽ Parijew nhõ xwÿnhjê hwÿr mra. Hãmri nhũm mẽ omu nê mẽ kãm:

—Pa nok? Tanhmã na ka mẽ amnhĩ to nê unênh nê ho amõr kêt nê? Anê.

46 Hãmri nhũm mẽ kãm:

—Nã na pa mẽ unênh kêt nê. Kapêr mex kênã. Te kot mẽ pakapêr pyrãk kêt jakamã pa mẽ tee ri kapêr ã kuma nê unênh kêt nê. Anê.

47 Hãmri nhũm Parijew nhõ xwÿnhjaja mẽ kuma nê mẽ kãm:

—Tk. Kwa mãn ka mẽ ra mẽ uràk nê tanhmã kot amnhĩ to hêx toja ma nê hkõt aja-maxpêr nà?

48 Mẽ ixpê Parijew nhõ xwÿnhjaja nê mẽ panhõ pahijaja na pa htem hkõt ijamaxpêr kêt nê.

49 No kêt mẽ kot mar nê hkõt hamaxpêr xwÿnhijaja na htem mẽ ixkĩnhã finat Mojes kapêr mar kêt nê. ãm Jejus kapêr pix na htem kuma nê hkõt hamaxpêr. Mÿrapê koja Tĩrtũm tanhmã mẽ homnuj tÿx to nhũm mẽ rĩ amnhĩ pumu. Anê.

Nĩkotê kot Jejus xyr pê kapêr ã harênh

Juãw 3.1-21

50 Hãmri nhũm Nĩkotêja mẽ mar o xa. Mẽ uràk nê kêp Parijew nhõ xwÿnh tã na pre ra kamàt õ hã Jejus wÿr tẽ nê kãm kapêr. Jakamã tee ri hã

mẽ kapêr ma hãmri nê yr pê mẽ kãm kapêr nê mẽ kãm:

51 —Tk. Kwa kormã mẽ pahte pahprĩ hã kapêr mar nê tanhmã kot amnhĩ nhĩpêx to hã omunhre hã. Na pre finat Mojesja Tĩrtũm nhÿ hã mẽ panhĩgêjtê mã ja jarênh o: Kêr ka mẽ aprĩ hã mẽ kapêr ã mẽ ama nê mẽ kot amnhĩ nhĩpêx ã mẽ omu nê rĩ kormã tanhmã mẽ harênh to.

Anhÿr tã ka mẽ kormã aprĩ hã Jejus kot amnhĩ nhĩpêx ã omunh kêt tã ra kot amnhĩ tomnuj xwÿnh ã harê. Anê.

52 Hãmri nhũm mẽ tee ri kuma nê kãm:

—Tk. Kwa xa wê uràk nê apê Garirej nhõ xwÿnh hã na ka ã yr pê akapêr anê? Xà Tĩrtũm kapêr ã kaga htũm kot Garirej nhõ xwÿnhjê hõ kêp ÿ hã kapêr jarênh o pa xwÿnh ã harênh? Nã ã kot harênh anhÿr kêt. Anê.

53 Nhũm mẽ ã Nĩkotê mã kapêr anê hãmri nê angrã nê Tĩrtũm nhõrkwÿ rũm hapõj nê ma akupÿm õrkwÿ hwÿr àhkurê ho mra.

8

Mêhõ ni kot nhãm mẽ mjên o amnhĩkati hã harênh

Xiakre 2.10-13

1 Tã nhũm Jejus Tĩrtũm nhõrkwÿ kamã mẽ ahkre hpa hãmri nê kato nê ma hixêr prêk pê Oriwêhti hwÿr tẽ. Hãmri nê hã api nê nhÿri nõ nê ra gõr.

2 Tã nhũm apkati nê myt kator o mõr mẽ nhũm kãnhmã nhÿ nê akupÿm wrÿ nê Tĩrtũm mã amnhĩ jarênh xà hã ixkre hwÿr tẽ. No ãm kormã ixkre

pu hã kahê hkre kamã nhỹ. Nhũm krĩ nhõ xwýnhjaja omu nê hã htu rax nê nhũm tanhmã mẽ ahkre hto ho nhỹ.

³ Hãmri nhũm Parijew nhõ xwýnhjê mẽ Tĩrtũm kapêr tũm o mẽ ahkre ho mẽ pa xwýnhjaja hwýr mēhõ nija o tẽ. Na ra ham mēhõ pē mjên o amnhĩkati ho nõ nhũm mẽ ja hã omu nê unê nê hpa hã kupy nê ma Jejus wýr hkjênh o mō. Hãmri nê mẽ kot mar o kuhê xwýnhjê kutã ãm nhũm xa.

⁴ Hãmri nhũm mẽ Jejus mã:

—E ot pa mẽ awýr jahti ho tẽ ka omu. Na ham mēhõ pē mjên o amnhĩkati ho nõ. Pa mẽ ja hã omu nê unê nê man awýr o tẽ.

⁵ E tanhmã kot puj mẽ hipêx to? Na pre finat Mojes Tĩrtũm nhỹ hã mẽ panhĩgêjtjẽ mã ja jarênh o:

Koja mēnijê hõ axtem nê nhãm mēhõ pē mjên o amnhĩkati ho nõ ka mẽ ja hã omu nê apiitã ahpýnhã kēn rũnh jamý nê ho htak o apĩ.

Anhỹr o kot harênh. No ka? Tanhmã kot kaj mẽ inhmã ja jarênh to? Tanhmã kot paj mẽ hipêx to nhũm amã mex nê? E mẽ inhmã tanhmã mẽ ixte hipêx to jarê. Anê.

⁶ Nhũm mẽ ã hêx rom nija ã Jejus kukjêr anê. Kot mẽ kot hpĩr nê mẽ kãm kapêr nhũm mẽ kot hã mar nê mẽ hkrãhtũmjê hwýr mōr nê kãm kot Mojes kapêr kwým ri mẽ ahkre hã harênh kaxyw nhũm mẽ hêx rom ã hkukjêr anê. Hãmri nhũm mẽ kuma

nê tanhmã hã mẽ kãm nê hkêt nê. ãm htýx hikôt nê ĩhkrakrã ho pyka kagà ho nhỹ.

⁷ Nhũm mẽ tee ri omu nê axte hã hkukja nhũm kãnhmã xa nê mẽ kãm:

—Tôe. Nà kot ka mẽ atō aa tanhmã amnhĩ tomnuj to hkêt kumrêx ã amnhĩ pumu hãmri nê kam nê rĩ kaxyw kēn õ py nê akumrêx ho hkura. Kê akwýjaja rĩ kormã akôt hkwy jamý nê ho htak. Anê.

⁸ Hãmri nê akupým hikôt nê pyka kagà ho nhỹ.

⁹ Hãmri nhũm mẽ tee ri kapêrja kôt kuma hãmri nê mẽ kot mar o kuhê xwýnhjê rũm angrã nê ma mra. Mẽ piitã mẽ kot amnhĩ tomnuj xwýnh ã amnhĩ pumunh mex jakamã tee ri ã kot mẽ kãm kapêr anhỹrja ma nê angrã nê ma akupým hpýnh nê axpēn kôt mrar o xa. Mēhpigêt kumrêx nê hpãnhã mẽ nywjaja nhũm mẽ hpýnh nê ma axpēn kôt mrar o ãm kãm hapêx. Nhũm Jejus mēnija pix wa ahte mẽ kot mar xwýnhjê kutã wa arĩk.

¹⁰ Hãmri nhũm Jejus kãnhmã xa nê nita mã kapêr nê kãm:

—Pa? No mẽ kot ato kapêr xwýnhnta mẽ? Xà na mēhõ kēn o akuranh kêt nê? Anê.

¹¹ Nhũm kãm: “Ma amrakati.” Anê nhũm kãm:

—Tôe. Nà kot paj ijaxwýja tanhmã ato hkêt nê. E mamrĩ ma akupým anhōrkwy hwýr tẽ. No ãm kêr ka axte ã amnhĩ nhĩpêx anhỹr kêt nê. ãm kwarĩ ho kwarĩ. Anê.

Jejus kot hprĩ hã amnhĩ jarẽnh

Juãw 1.4; Rõmãn 13.12-14; Epes 5.8-14; Wam Tesarõn 5.5-8

12 Tã nhũm arĩgro hõ hã nhũm Jejus axte Tĩrtũm nhõrkwỹ hwỳr tẽ nẽ kamã mẽ ahkre ho nhỹ nẽ mẽ kãm:

—Nà te ixpê mẽ piitã mẽ õ kanê pyræk. Na hte kanêja mẽ kãm hirã mex nẽ nhũm mẽ kamã rĩt mex o pa. Jao kamàt kô kamã ri pa hkêt nẽ. Ja pyrà nẽ na pa hte Tĩrtũm kot amnhĩ nhĩpêx o amnhĩrĩt mex o ri ixpa. Kot ka mẽ atõ amnhĩ kaxyw inhmã aja-maxpêr nẽ ixkõt amnhĩ xãm hãmri nẽ tanhmã amnhĩ tomnuj to ho apa hkêt nẽ. Âm Tĩrtũm kãm hprãm xà kõt pix mã tanhmã ri amnhĩ nhĩpêx to ho ri apa. Jao te ate kanê hpòk nhĩrã kamã arĩt mex pyrà nẽ apê wa ixri atĩr tũm nẽ apa ho apa mã xwỳnh. Anẽ.

13 Hãmri nhũm Parijew nhõ xwỳnhjaja tee ri ã kapêr anhỹr ã kuma nẽ kãm:

—Tk. Kapxipix na ka ã amnhĩ jarẽnh anẽ. Mẽhõ kot ã ate amnhĩ jarẽnh anhỹrja kõt kot mẽ inhmã ajarẽnhre hã. Jakamã kot paj mẽ ama nẽ ãm ama. Anẽ.

14 Hãmri nhũm mẽ kãm:

—Nà mẽhõ kot ã ijarẽnh anhỹr kêt tã no ãm hãmri na pa mẽ amã amnhĩ jarẽ. Ixêx kêt. Mẽ arom ixte nhỹhỹnh ixwrỹk xà hã amnhĩ pumunh mex. Nẽ mẽ arom ma akupỹm nhỹhỹm ixãpir xà hã amnhĩ pumunh mex.

Jakamã ãm hãmri na pa ã mẽ amã amnhĩ jarẽnh anẽ.

15 Na ka htem amnhĩ krã hkõt tanhmã ri ijarẽnh to. No pa na pa kormã amnhĩ xwar tanhmã mẽ ajarẽnh to hkêt nẽ.

16 Ixte tanhmã mẽ ajarẽnh to ronhỹx pa ãm hãmri mẽ ajarẽ. Nhỹx pa ãm papxipix amnhĩ krã hkõt tanhmã mẽ ajarẽnh to hkêt nẽ. Nhỹx mããnẽn Inhĩpêêxà pẽ kot mẽ awỳr inhmẽn xwỳnhnta inhĩhkõ hã pa wa ãm hãmri axpẽn kõt tanhmã mẽ ajarẽnh to. Mẽ ate amnhĩ to mex ã mẽ ajarẽ rỳ mẽ ate amnhĩ tomnuj ã mẽ ajarẽ.

17 Tĩrtũm kapêr ã kagà htũm kot ja jarẽnh kot:

Koja mẽhõ wa hamẽxkrut nẽ tanhmã mẽmoj jarẽnh to nẽ ãm axpẽn kõt harẽnh o htipxi. Hã kot kaj mẽ wa ama nẽ ãm hãmri wa kot harẽnh kõt ajamaxpêr kurẽ kumrêx.

18 Anhỹr o kot harẽnh. Tã pa ã amnhĩ jarẽnh anẽ nhũm Inhĩpêêxà kot mẽ awỳr inhmẽn xwỳnhnta mããnẽn ã ijarẽnh anẽ. Wa ixpijakrut tã ã wa ixte axpẽn kõt amnhĩ jarẽnh anhỹr jakamã kwa mẽ ixte tanhmã amnhĩ jarẽnh toja ma nẽ ixkõt ajamaxpêr kêt wehe. Anẽ.

19 Nhũm pre ã Jejus mẽ kãm kapêr anẽ. Hãmri nhũm mẽ kuma nẽ kãm:

—No nhỹri na we anhĩpêêxà ja? Anẽ.

Hãmri nhũm mẽ kãm:

—Nà mẽ ate Inhĩpêêxà pumunhre hã. Mẽ ate aprĩ

hã ixpumunh ronhỹx ka mẽ mãânên aprĩ hã Inhĩpêêxà pumunh mex kurê kumrêx. Nom mẽ ate ixpumunh mex kêt jakamã na ka mẽ mãânên omunh mex kêt nê. Anê.

²⁰ Nhũm pre ã Jesus mẽ kãm kapêr anê. Arĩ Tĩrtũm mã amnhĩ jarênh xà hã ixkreja kamã mẽ ahkre ho xa. Mẽ kot kàxpore gjênh xà kuri mẽ ahkre ho xa. Nhũm mẽ kãm hkurê xwỹnhjaja tee ri kot tanhmã mẽ ahkre htoja ma nê kãm unênh nê haxàr prãm nê. Nom kormã mẽ kot ã hipêx anhỹr ã arĩgro kormã kator kêt jakamã nhũm Tĩrtũmja nê mẽ omunh mex nê nhũm mẽ ãm kãm unênh prãm kaprỹ.

²¹ Hãmri nhũm Jesus arĩ mẽ kãm kapêr o xa nê mẽ kãm:

—Nà kot paj nhỹrmã mẽ arũm ixkato nê ma akupỹm api. Ka mẽ tee ri ijapêr nom nhỹri ixpumunh kêt nê. Hãmri nê mẽ ate amnhĩ tomnuj o apa rãhã ty nê mẽ atõ ixwỹr axàpir kêt nê. Anê.

²² Hãmri nhũm Ijaew nhõ pahijaja tee ri ã kapêr anhỹrja ã kuma nê axpên mã hã hpêr o pikênh o kuhê nê axpên mã:

—Kwa mãn ra kot amnhĩ pĩr kaxyw ã na ri hkôt mẽ paxàpir kêt ã mẽ pajarênh anê nà? Anê.

²³ Hãmri nhũm amnhĩ tã mẽ kuma nê mẽ kãm:

—Nà mẽ kajaja mẽ apê pyka nhõ xwỹnh na ka mẽ. No pa na mẽ arom ixpê kaxkwa nhõ xwỹnh jakamã mẽ pajamaxpêr kot axpên pyràk kêt.

²⁴ Kot kaj mẽ ixpê kaxkwa rũm ixwỹr kxwỹnh ã ixpumu nê amnhĩ kaxyw inhmã ajamaxpêr nê ixkôt amnhĩ xunhwỹr kêt hã kot kaj mẽ ate amnhĩ tomnuj o apa rãhã nhỹrmã atyk o mẽ kamjaja Tĩrtũm mã amnhĩ pãnhã amnhĩre. Anê.

²⁵ Nhũm Jesus ã mẽ inhõ pahijê hkukamã mẽ kot amnhĩ nhĩpêx jarênh anê nhũm mẽ tee ri amnhĩ tã kuma nê kãm:

—Kwa mẽ atõ na ka we ri ã mẽ inhmã akapêr anê? Anê.

Hãmri nhũm mẽ kãm:

—Nà ra ixte mẽ amã amnhĩ jarênh kênã. Xàn ka mẽ kormã aprĩ hã inhmar kêt nê?

²⁶ Kot paj nhỹrmã mẽ amã mẽ ate amnhĩ tomnuj piitã ho amnhĩrit pa. Na pa kot mẽ awỹr inhmênh xwỹnhhta pix xõ ri tanhmã mẽ amã ixkapêr to ho ri ixpa. ãm hãmri na hte tanhmã mẽmoj jarênh to. Na hte hêx kêt nê. Anê.

²⁷ Nhũm pre ã Jesus mẽ kãm Hipêêxà kot mẽ hwỹr mẽnh ã harênh anhỹr tã no nhũm mẽ Hipêêxà kêp Tĩrtũm ã hkôt hamaxpêr kêt nê.

²⁸ Jakamã nhũm mẽ kãm:

—Nà koja mẽ nhỹrmã pĩ kahpa hã inhõ ka mẽ rĩ kormã aprĩ hã ixpê Tĩrtũm rũm mẽ awỹr ixwỹr kxwỹnh ã ixpumu. Nê ixte amnhĩ krã hkôt ixkapêr o ri ixpa hkêt ã ixpumu. Nê ãm Inhĩpêêxà xõ ri ixprĩ hã ixkapêr o ri ixpa hã ixpumu.

²⁹ Ixte kãm hprãm xà hkôt pix mã tanhmã ri amnhĩ nhĩpêx to ho ri ixpa jakamã

na hte ixtānopxar mex o ixkôt pa ho pa. Kojā aa ixkaga hkêt nê. Anê.

³⁰ Hāmri nhūm mẽ hkwyja kuma nê hkwyjê rom kapêr kôt hamaxpêr

³¹ nhūm amnhĩ tã mẽ omu nê mẽ kãm:

—Nà ãm hāmri na ka mẽ tã ixkôt ajamaxpêr. Tã kêt ka mẽ ixkôt amnhĩ xunhwý nê ixkapêr kôt pix mã ri amnhĩ nhĩpêx mex o ri apa. Hāmri pa ja hã mẽ apumu nê mẽ apê ixkwý kumrêx ã mẽ ajarê.

³² ãm hāmri na pa hte ã ixkapêr anhÿr o ri ixa. Tã kot kaj mẽ ixkôt ri amnhĩ nhĩpêx o ri apa hāmri nê aprĩ hã inhmar tÿx nê. Nom na hte kormã mẽmoj kot amnhĩ tã mẽ ato htÿx pyræk o mẽ anhĩpêx ka mẽ tee ri amnhĩ krã hkôt kãm anhũrer prãm kaprÿ. Tã kot kaj mẽ ixkôt amnhĩ xunhwý nê ixkôt ri amnhĩ nhĩpêx hāmri nê Tĩrtũm nhÿ hã tãm amnhĩ nhĩpêx. Jao ÿ hã ate amnhĩ tomnuj mã anhũre. Anê.

³³ Nhūm pre ã Jejus mẽ kãm kapêr anê hāmri nhūm mẽ tee ri kuma nê kãm:

—Kwa mẽ ixpê mẽ pahpàr krax finat Apraãw kanrêhã htàmnhwý kênã. Na pre mẽmoj te kot amnhĩ tã ho htÿx pyræk o hipêx kêt nê. Jakamã mẽmo kot we mẽ ixpê hkanrêhã htàmnhwýjê ho htÿx ka we ri ã mẽ ijarênh anê? Nà amrakati kênã. Tã kwa mon ka ã mẽ ijarênh anê? Anê.

³⁴ Hāmri nhūm Jejus hprĩ hã mẽ kãm awjarê nê mẽ kãm:

—Kwa mẽ ixkapêr ma nê amnhĩ krãm haxàr tÿx nê. Nà mẽ kot amnhĩ tomnuj o mẽ pa xwÿnhjaja te mẽ kot amnhĩ tomnuj tãm ri kot amnhĩ tã mẽ ho htÿx pyræk o mẽ hipêx. Jakamã nhūm mẽ urer kêt rãhã nê pa ho pa. Nê ã amnhĩ nhĩpêx anhÿr rãhã ho pa.

³⁵ Jakamã ixkĩnhã mẽ kêp Tĩrtũm kwý hkêt. No pa na ixpê Tĩrtũm Kra jakamã mããnhên ixpê hkwy na pa.

³⁶ Tã mẽ kajaja. Kot kaj mẽ ixpê Tĩrtũm Kra hã ixkôt amnhĩ xunhwý hã kot pa tanhmã mẽ ato ka mẽ ixpyrà nê apê wa ixkwýy. Hāmri nhūm mẽ ate amnhĩ tomnuj te kot mẽ amã urer pyræk o mẽ anhĩpêx ka mẽ ra wa ixkôt amnhĩ nhĩpêx o ri apa. Anê.

Mẽ kêp Tĩrtũm kra hkêt xwÿnhjê jarênh

³⁷ Nhūm Jejus arĩ mẽ kãm kapêr nê mẽ kãm:

—Nà ãm hāmri na ka mẽ apê finat Apraãw kanrêhã htàmnhwý hã amnhĩ jarê. Nom mẽ apê hkanrêhã htàmnhwý htã uræk nê amnhĩ kaxyw Tĩrtũm kôt ajamaxpêr kêt nê. Jakamã na ka htem ixkapêr ma nê ãm ama nê ixkaga. Nê axtem nê ixpĩr mã. Kop apu Apraãw arĩ mẽ akamã pa ronhÿx ã inhĩpêx anhÿr kêt nê.

³⁸ Na pa hte Inhĩpêxà hkôt pix mã ri amnhĩ nhĩpêx o ri ixa. No mẽ kajaja axtem nê mẽ ate nhãm mẽ kapêr kôt amnhĩ nhĩpêx jakamã na ka htem ixkĩnhã Inhĩpêxà hkôt amnhĩ nhĩpêx kêt nê. Anê.

³⁹ Hāmri nhūm mẽ tee ri amnhĩ tã kuma nẽ kãm:

—Tk. Kwa mon ka ã mẽ ijarēnh anē? Mẽ ixte Apraāw kôt amnhĩ nhĩpêx o ri ixpa kênã. Anē.

Hāmri nhūm mẽ kãm:

—Nà. Mẽ ate hkôt ri amnhĩ nhĩpêx o apa ronhỹx ka mẽ uràk nẽ Inhĩpêêxà kapêr kôt amnhĩ nhĩpêx.

⁴⁰ No na ka mẽ ra axtem nẽ ixpĩr mã. Ām hāmri na pre Tĩrtūm inhmã awjarē pa ô ri tanhmã mẽ amã mẽmoj jarēnh to ho ri ixpa htã ka mẽ ra axtem nẽ ixpĩr mã. Kwa xà na pre Apraāwja ã mẽ hipêx anhỹr o pa? Nà na pre ã mẽ hipêx anhỹr kêt nẽ.

⁴¹ Mẽ ate hkôt amnhĩ nhĩpêx xwýnhhta axtem na. Kêp Apraāw kêt. Nẽ mãânēn kêp Tĩrtūm kêt. Anē.

Hāmri nhūm mẽ tee ri kuma nẽ kãm:

—Tk. Kwa nà ã mẽ ijarēnh anhỹr kêt nẽ. Mẽ ixte Apraāw kôt amnhĩ nhĩpêx xwýnh kênã. Tã ka ri axtem nẽ ã mẽ ijarēnh anē. Mẽhõ hkôt kot pa kêt wem ri axtem amnhĩ nhĩpêx o ri ixpa? Anē.

⁴² Hāmri nhūm mẽ kãm:

—Nà mẽ ate Apraāw kôt amnhĩ nhĩpêx ronhỹx ka mẽ ixpumu nẽ uràk nẽ amã ixprãm nẽ. Apraāw kot hkôt amnhĩ nhĩpêx o pa xwýnhhta tãm kot mẽ awýr inhmēnh nhūm mẽ awýr ixwrýk kênã. Na pa pre amnhĩ krã hkôt man mẽ awýr ixwrýk kêt nẽ. Tãm na pre mẽ awýr inhmē pa wrý.

⁴³ Kwa mon ka mẽ aprĩ hã ixkapêr mar mex kêt nẽ? Nà

mẽ amã ixkôt amnhĩ nhĩpêx prãm kêt jakamã na ka mẽ tee ri ixkapêr ma nẽ aprĩ hã mar mex kêt nẽ.

⁴⁴ Mẽ ate hkôt amnhĩ nhĩpêx xwýnhhta Satanasti na. Aa tãm kot amnhĩ nhĩpêx kêt kumrêx. Kêp mẽ hpar o pa xwýnhjê hpãm maati na. Nẽ kêp mẽ kãm hêx o pa xwýnhjê pãm maati na. Ā kot amnhĩ nhĩpêx kot anhỹr. Nẽ kãm mẽ kapêr mex mar prãm kêt o pa. Nẽ ãm hêx pix o pa jakamã kêp mẽ hêx xwýnhjê pãm. Ā kot amnhĩ nhĩpêx anhỹr xwýnh tã ka htem hkôt amnhĩ nhĩpêx o ri apa.

⁴⁵ —Na pa hte kurom ãm hāmri ixkapêr o ri ixpa. No mẽ kajaja mẽ apê hêx nhi xwýnh maati ja hkra jakamã mẽ amã ixkapêr mar prãm kêt.

⁴⁶ Xà na ka pre mẽ atõ ixte tanhmã amnhĩ tomnuj to hã ixpumu? Nà amrakati. Ixte amnhĩ to mex o ri ixpa xwýnh na pa. Nẽ tãm ixkapêr o ri ixpa xwýnh tã ka mẽ inhma nẽ ãm inhma nẽ ixkôt ajamaxpêr kêt nẽ. Kwa mon ka mẽ ja hã ixpumunh nẽ ixkôt ajamaxpêr nẽ ixkôt amnhĩ xunhwýr kêt nẽ?

⁴⁷ Tĩrtūm krajaja na htem kapêr mar týx nẽ hkôt amnhĩ nhĩpêx o pa. No mẽ apê hkra hkêt jakamã mẽ amã kapêr mar prãm kêt. Anē.

Mẽ kot Jejus kêp Satanasti hkwy hã harēnh

⁴⁸ Hāmri nhūm mẽ ã Jejus kot mẽ harēnh anhỹrja ma nẽ

kamã gryk tỳx kumrêx. Hãmri nê kãm:

—Tk. Kwa ate amnhĩ tomnuj o apa xwỳnhiti kênã. Ra Satanasti hkwỳ pê mēkarōmnuti tanhmã kot akrã hto jakamã na ka ã mē inhmã akapēr anē. Anē.

⁴⁹ Hãmri nhũm mē kãm:

—Nà mēkarōmnuti kot tanhmã ixto hkêt. Na pa hte Inhĩpêêxà hã xpijaàm pix o ri ixpa. Tã mē ate ixkĩnhã hã apijaàm kêt jakamã mãânên pa ixtã apijaàm kêt nê.

⁵⁰ Na pa hte amnhĩ krã hkôt mē piitã mē kot ixtã hpijaàm prãm xàj tanhmã mē kãm ixkapēr to hkêt nê. No mē piitã mē kot ixtã hpijaàm o paja na Inhĩpêêxà kãm hprãm. Tã koja nhỹrmã amnhĩ nê ixtã mē hpijaàm kêt xwỳnhjaja mē kot amnhĩ xà htỳx kamã hamak tũm xàta wỳr mē rênh pa.

⁵¹ —Nê kot ka mē atõ wa ixkapēr ma nê ixkôt amnhĩ nhĩpêx. Hã kot kaj wa ixri atĩr tũm nê apa ho apa. Kwa mē ixkapēr ma nê amnhĩ krãm haxàr tỳx nê. Anē.

Nhũm pre ã Jesus Ijaew nhõ pahijê mã kapēr anē.

⁵² Nhũm mē kuma nê kãm:

—Kwa pēr ãm hãmri na ka hte Satanasti nhỹ hã ã mē htĩr tũm nê mē pa ho pa hã mē harênh anhỹr o ri axêx o ri apa. Finat Apraãw na pre ri paa nê ty. Tã mē kot Tĩrtũm nhỹ hã kapēr jarênh o mē pa xwỳnhjaja na prem uràk nê ri paa nê mãânên htyk pa. Tã ka axtem nê mē kot akapēr kôt amnhĩ nhĩpêx o mē pa

xwỳnhjaja ari htĩr tũm nê pa ho pa hã mē harê. Nà na ka ãm mē inhmã mē ho axêx o xa.

⁵³ Na pre mē pahpãm Apraãwja kot amnhĩ to rax tã ty nê hapêx. Nhũm mē kot Tĩrtũm nhỹ hã kapēr jarênh xwỳnhjaja mãânên mē kot amnhĩ to rũnh tã htyk pa nê hapêx. Mē kot amnhĩ to rũnh tã htyk pa nê hapêx kênã kot kêt mē tanhmã amnhĩ to nê ari htĩr tũm nê pa. ãm mē ixte akapēr mar nê atã xpijaàm pix prãm xàj na ka ã mē inhmã mē htĩr tũm nê pa hã mē harênh anē. Nom na ka ã mē harênh anhỹr kaprỳ. Kot paj mē ri akapēr mar kêt nê. Anē.

⁵⁴ Hãmri nhũm mē kuma nê mē kãm:

—Nà na pa hte amnhĩ krã hkôt mē ate ixtã apijaàm hprãm xàj tanhmã mē amã ixkapēr to hkêt nê. Kot paj anê nê ãm ixtỳx ã amnhĩ nhĩpêx anhỹr kaprỳ. No Inhĩpêêxà tãm kãm mē apiitã mē ate ixtã apijaàm o apaja nhũm kãm hprãm. Mē ate Tĩrtũm kôt amnhĩ nhĩpêx o apa hã amnhĩ to axêx xwỳnhita tãm na kãm mē ate ixtã apijaàmja nhũm kãm hprãm. Tã ka htem ã amnhĩ nhĩpêx anhỹr kêt nê. Na ka htem ixkuk pumu nê axtem nê ixte Satanasti nhỹ hã mē amã ixêx o ri ixpa hã ijarê.

⁵⁵ Mē ate Inhĩpêêxà hkôt amnhĩ nhĩpêx ã amnhĩ jarênh tã ãm amnhĩ to axêx o ri apa. No pa na pa hte mē arom ãm hãmri hkôt amnhĩ nhĩpêx mex o ri ixpa.

56 Amnepê mē pahpàr krax Apraãwja na pre mē awȳr ixwrȳk kukamã ijarēnh ma nē mē arom inhỹ hã hkĩnh tỳx nē pa. Anē.

Nhũm pre ã Jejus mē kãm amnhĩ jarēnh anē.

57 Hãmri nhũm mē kuma nē tee ri kot mē kãm tanhmã Apraãw jarēnh toja ma nē kãm:

—Tk. Xà na ka pre finat Apraãwja ano ho omu? Nà kormã anyw kēnã. Apraãw amnepê mē htyk nē hapêx kēnã kot ka kêt kot akukamã ajarēnh mar nē hkĩnh tỳx ã harē. Xàn ka pre ano ho omu? Kormã akator kêt ri na pre amnepê mē htyk nhũm mē haxàr kēnã. Nà na ka ãm mē inhmã amnhĩ to axêx. Te amnepê mē hkukamã apa nē ate mē omunh nē mē harēnh pyrãk. Kwa akatãt kôt mē inhmã awjarē. Anē.

Jejus kêp rãhã ho rãhã xwỹnh ã harēnh

58 Hãmri nhũm Jejus mē kãm:

—Nà ixêx kêt. ãm hãmri na pa ã mē amã amnhĩ jarēnh anē. Amnepê mē kormã Apraãw kator kêt ri na pa pre ixrãhã ho ixrãhã ixpa na pa. Ixrãhã ho ixrãhã ixpa xwỹnh jakamã na pa pre hte inhno ho Apraãw pumunh mex o ri ixpa. Kwa mē ixkapêr ma nē amnhĩ krã him haxàr tỳx nē. Anē.

59 Hãmri nhũm mē tee ri kot ã amnhĩ jarēnh anhỹrja ã kuma nē kamã gryk tỳx nē. Nē axpên mã:

—Kwa tanhmã kot we amnhĩ to nē amnepê mē rãhã

nē pa ho pa xwỹnh ã amnhĩ jarē? Tĩrtũm pix na rãhã ho rãhã pa xwỹnh. Anē.

Hãmri nē kamã gryk xaj kēn rũnh kwỹ kawrà ho ri hprôt nē kot ho htak o hpĩr kaxyw. Nom nhũm ra amnhĩ tã mē omu nē mē kêp akunok nē Tĩrtũm mã amnhĩ jarēnh xà hã ixkreja rũm kato nē ma tē.

9

Jejus kot no hkre xwỹnh o mex ã harēnh

Make 8.22-26

1 Hãmri nhũm Jejus ma tē pa mē hkôt ri mē ixpa ho mē ixpa xwỹnhjaja ma hkôt mra. Hãmri nē nhỹri no hkre xwỹnh pumu. Katorxà nhõxà hkre rũm na pre no hkre nē kato. Hãmri nē ra hprêk nē hpriy kamã àhwyr o hkrĩ.

2 Tã hãmri pa mē mra nē omu nē hã Jejus kukja nē kãm:

—Kwa mēmoj mýrapê na pre we myti nēj no hkre nē kato? Xà tãm kot tanhmã amnhĩ tomnuj to mýrapê nã? Xà katorxà rý hipêêxà kot amnhĩ tomnuj mýrapê na pre ã no hkre nē kator anē? Anē.

3 Hãmri nhũm mē inhmã:

—Nà mēhõ kot tanhmã amnhĩ tomnuj to mýrapê no hkre nē kator kêt. ãm Tĩrtũm kot ho mex nhũm mē kot ja hã omunh kaxyw na pre ã no hkren kator anē. Tã kot paj Tĩrtũm nhỹ hã no ho mex ka mē ja hã ixpumu. Na pa hte kormã jar pikap ri ixpa ri Tĩrtũm mã tanhmã amnhĩ nhĩpêx mex to ho ri ixpa.

4 Na htem arĩgro hã mēmoj tã apê nhũm kamãt nhũm mē

kām ure nē àpênh kêt nē. Ja pyrà nē na pu htem kormã pahtîr ri jar pikap ri papa ri Tirtûm mã tanhmã amnhĩ nhĩpêx to ho ri papa. Tã kot puj mẽ nhỹrmã ty hãmri nē axte jar ã amnhĩ nhĩpêx anhỹr kêt nē. Jakamã kwa kêr pu mẽ ri jar pikap ri papa ri kãm tanhmã amnhĩ nhĩpêx mex to ho ri papa.

⁵ Na pa hte ã kãm amnhĩ nhĩpêx anhỹr jao te kanê hirã mex pyrà nē ixprĩ hã mẽ kãm Tirtûm kot amnhĩ nhĩpêx o amnhĩrît mex o ri ixpa. Anê.

⁶ Nhũm pre ã Jejus mẽ inhmã amnhĩ jarênh anê. Hãmri nē kot nohkre xwỳnhhta no o mex kaxyw hikôt nē argôx mẽ nē ho gyw kwỳ nhĩpêx nē kànhmã xa nē ho no kukô.

⁷ Hãmri nē kãm:

—E ma gô gjênh xà pê Siroe hwỳr tẽ nē kamã amnhĩ no kuhô. Anê.

Mẽ pakapêr kãm Siroeja mẽ kot kãm: “Nhỹhỹm mênh xwỳnh” anhỹr jarênh pyrãk. Tã nhũm Jejus hwỳr kumẽ nhũm ma hwỳr tẽ. Hãmri nē kamã amnhĩ no hã gyw kuhôn h pa jao rît mex kurê kumrêx. Hãmri nē rît mex ã amnhĩ pumu nē hkĩnh tỳx nē ma akupỹm ôrkwỹ hwỳr tẽ.

⁸ Hãmri nhũm ôrkwỹ kuri mẽ ôrkwỹ xwỳnhjaja nē mẽ kot pry kamã ahwỳr o hkrĩ hã omunh xwỳnhjaja amnhĩ jaêr pê ra rît mex ã omu nē tee ri hã axpên kukja nē axpên mã:

—Kwa pêr pry kamã àhwỳr o hkrĩ xwỳnhhta na nà? Anê.

⁹ Hãmri nhũm kamã mẽ hkwỳjaja mẽ kãm:

—Tỳ. Tãm na. Anê.

Nhũm kamã mẽ hkwỳjaja mẽ kãm:

—Nà tãm kêt. Axtem mẽhõ na. Te kot uràk nom tãm kêt. Anê.

Anhỹr o ri axpên mã harê. Tã nhũm tãm mẽ kãm amnhĩ jarê nē mẽ kãm:

—Tỳ pa kênã. Pa na pa pre hte inhno hkre nē ri ixpa htã ra ixrît mex. Anê.

¹⁰ Hãmri nhũm mẽ tee ri kuma nē kãm:

—Kwa no tanhmã na ka we amnhĩ to nē ra arît mex?

¹¹ Anê nhũm mẽ kãm:

—Nà mẽ kot kãm “Jejus” anhỹr xwỳnhhta na ixwỳr tẽ nē ixkaxyw gyw kwỳ kagô nē ho inhno kukô. Hãmri nē mẽ kot gô mã: “Siroe” anhỹr xwỳnhhta kamã ixte amnhĩ no kuhôn h kaxyw hwỳr inhmã anê pa ma hwỳr tẽ nē kamã amnhĩ no kuhô nē ixrît mex kurê kumrêx. Anê.

¹² Hãmri nhũm mẽ kuma nē kãm:

—No nhỹhỹm na ato mex xwỳnhja ma tẽ? Anê.

Hãmri nhũm mẽ kãm:

—Konên. Ixte nhỹhỹm htêm xà hkôt omunhre hã. Anê.

¹³ Hãmri nhũm mẽ kuma nē ma Parijew nhô xwỳnhjê hwỳr o mỗ nē mẽ kãm harê.

¹⁴ Nê mẽ kãm:

—E ot pa mẽ awỳr jahti ho tẽ. Na xep Jejusja jarãhã akupỹm kãm no ho mex. Mẽ panhõ arìgromnu htã nhũm hã no ho mex. Anê.

¹⁵ Hãmri nhũm mẽ tee ri mẽ kuma nē myta pumu nē kãm:

—E mẽ inhmã amnhĩ jarê. Tanhmã na ka pre we amnhĩ

to nē anohkre nē akrī htā ra ano mex nē? Anē.

Hāmri nhūm mē kām:

—Nà na pre Jejus gyw o inhno kukō nē inhmā anē pa gō ho amnhī no kuhō nē ixrīt kurē kumrēx. Anē.

¹⁶ Hāmri nhūm mē kuma nē tee ri Jejus ā axpēn kukjēr o kuhē nē axpēn mā harēnh o:

—Kwa mē panhō arīgromnu hā kot ho mex jakamā kēp Tīrtūm rūm mē pahwūr wrūk xwūnh kēt. Ām kot amnhī tomnuj xwūnh kēnā. Anē.

Nhūm mē hkwūyaja harēnh o:

—Kwa nà. Kot amnhī tomnuj xwūnh ronhūx āhpumunh tūx kōt no ho mex kēt nē. Anē.

¹⁷ Hāmri nē hpānhā no mex xwūnhhta mā kām:

—No ka? Ate kot ano ho mex xwūnh ā amnhī tā harēnh jakamā mēhō hā na ka hkamnhīx? Mēhō na wehe? Anē.

Hāmri nhūm mē kām:

—Konēn. Mān kēp Tīrtūm kapēr jarēnh o ri mē pa xwūnh mān. Hā na ā inhno ho mex anē. Anē.

¹⁸ Hāmri nhūm mē tee ri kuma nē axpēn mā:

—Kwa pēr aa nohkre hkēt kēnā. Na pre ām amnhī to hēx o pa. E kwa pu mē amnhī wūr katorxā nē hipēxā wa hā karō kē wa man tē nē tanhmā mē pamā harēnh to. Anē.

Hāmri nē wa hā karō

¹⁹ nhūm wa mē hwūr tēn axā nhūm mē wa kām:

—Pa. E mē inhmā mēmoj jarē. Xà we wa akrata na ām ja nà? Xà tām na ka hte wa nohkre nē kator ā harē? Kwa

tanhmā na we amnhī to nē ra rīt mex? Anē.

²⁰ Hāmri nhūm wa mē kām:

—Ŷy wa ixkra kēnā. Na pre wa ixpē nohkre nē kato.

²¹ Tā ra tanhmā amnhī to nē ra rīt mex. No wa ixte kot ho mex xwūnhhta pumunh kēt. Kwa mē tām mān hkukja nē ama. Ra āptār kēnā. Kē tām mān mē amā tanhmā amnhī jarēnh to ka mē ama.

²² Anhūr o mē kām wa hkrata jarē. No ām wa kām mē uma nē ā mē kām kapēr anē nē mē kām Jejus nhīxi jarēnh kēt nē. Na pre Parijew nhō xwūnhjaja ra Jejus nē mē kām kapēr nē mē kām:

—Ka mē atō Tīrtūm kot mē pakaxyw Jejus xām ā harē hāmri nē axte Tīrtūm kapēr o mē ahkre xā hā ixkreja wūr agjēx kēt kumrēx nē rī amnhī pumu.

²³ Anhūr o nē mē hkurē jakamā nhūm wa mē umaj ā mē kām hkra jarēnh anē nē kot ho mex xwūnh nhīxi jarēnh kēt nē.

²⁴ Hāmri nhūm mē axte amnhī wūr no mex xwūnhhta ā karō nē kām:

—Kwa akatāt kōt mē inhmā amnhī jarē. Ate kot ano ho mex ā harēnh xwūnhhta na kot amnhī tomnuj pix o pa xwūnh kēnā kot kēt ano ho mex. Jakamā kwa Tīrtūm noo mā akatāt kōt mē inhmā amnhī jarē nē axēx kēt nē. Anē.

²⁵ Hāmri nhūm mē kām:

—Ko ixte ja hā omunh kēt. Ām ja pix na ixte omunh. Na pa pre inhno hkre nē ri ixpa htā ra ixrīt mex nē. Anē.

²⁶ Hāmri nhūm mẽ tee ri kot amnhĩ jarēnhja ā kuma nē kām:

—No tanhmā na we mytita amnhĩ to nē amā ano ho mex? Anē.

²⁷ Hāmri nhūm tee ri axte mẽ kot hā hkukjêr ā mẽ kuma nē mẽ kām:

—Kwa ra ixte mẽ amā ām hāmri amnhĩ jarēnh griā. Tā ka mẽ inhma nē ām inhma nē arĩ hā ixkukja. Mān ka mẽ amā hkôt amnhĩ xunhwÿr prām hā na ka mẽ aprĩ hā ixkukja nà? Mẽ ate kot amnhĩ nhĩpêx ā aprĩ hā harēnh mar nē hkôt amnhĩ xunhwÿr prām xāj na ka mẽ aprĩ hā amā harēnh prām nē. Anē.

²⁸ Hāmri nhūm mẽ tee ri kuma nē kamā gryk nē. Nē hā kām akir nē kām:

—Tk. Ka na ka hte kapêr kôt amnhĩ nhĩpêx. No kêt mẽ pajaja na pa htem finat Mojes kapêr kôt pix mā amnhĩ nhĩpêx.

²⁹ Mojes mā na pre hte Tirtūm kapêr o pa. Jakamā pa htem ām hkôt pix mā amnhĩ nhĩpêx o ri ixpa. No ate kot ano ho mex ā harēnh xwÿnhhta mẽ ixte omunh kêt. Nē mēhō nhỹ hā kot tanhmā amnhĩ nhĩpêx to ho pa xwÿnhja mẽ ixte omunh kêt. Anē.

³⁰ Hāmri nhūm tee ri mẽ kuma nē mẽ kām:

—Kwa kot inhmā inhno ho mex nhūm ra ixrit mex tā ka mẽ tee ri hkukamā ajamaxpêr nē mēhō nhỹ hā kot ā amnhĩ nhĩpêx anhÿr o pa hā omunh kêt ā amnhĩ jarē.

³¹ Mẽ pahte Tirtūm kot amnhĩ nhĩpêx ā omunh mex. Koja mēhō kot amnhĩ tomnuj

xwÿnh mẽmoj tā kuwÿ nhūm kuma nē ām kuma. No kêt mẽ kot hkôt ri amnhĩ nhĩpêx xwÿnhjaja. Nē mẽ kot kām mex o mex ā harēnh xwÿnhjaja na htem mẽmoj tā kuwÿ nhūm mẽ kuma nē mẽ kām tanhmā mẽmoj nhĩpêx to rÿ mẽ kām mẽmoj gō.

³² Tā aa mẽ pahte mēhō kot mẽ no ho mex ā harēnh mar kêt tā nhūm ā Jejus inhmā inhno ho mex anē.

³³ Kêp Tirtūm kwÿ hkêt ronhÿx pre inhno ho mex kêt nē. Anē.

³⁴ Hāmri nhūm mẽ kuma hāmri nē kām:

—Tk. Kwa pêr ām akator kôt ate amnhĩ tomnuj o ri apa htā na ka ā mẽ inhmā akapêr anē. Kwa ixkreja rūm akato nē ma atēm kurê kumrêx.

Anhÿr o kām kapêr hāmri nē mẽ amnhĩ nē hano nhūm kato nē ma tē.

³⁵ Tā nhūm Jejus ra mẽ kot amnhĩ nē hanor ā harēnh ma nē ma hapêr o tē nē nhÿri omu. Hāmri nē amnhĩ tā hkukja nom te nhām mēhō hā hkukjêr pyrā nē kām:

—Pa? Xàn ka ra Tirtūm kot mẽ awÿr mēnh xwÿnhhta amnhĩ kaxyw hkôt ajamaxpêr nà? Anē.

³⁶ Hāmri nhūm kormā kot no ho omunh kêt jakamā kêp Jejus ā omunh kêt nē. Na pre kormā no hkre nē ām kapêr pix ma. Tā ra akupÿm rit mex nom kormā no ho omunh kêt nē. Jakamā nhūm Jejus hwÿr tē nē ā kām kapêr anē nhūm omu nē kormā kêp Jejus ā omunh kêt nē kām:

—Tỳ kot kaj inhmã ahkre pa omu nẽ hkôt amnhĩ xãm kurê kumrêx. Anẽ.

³⁷ Hãmri nhũm kãm:

—Kwa paa. Ixte amã ixkapêr xwýnhta pa na pa. Anẽ.

³⁸ Hãmri nhũm kãm:

—Kwa xôwehe Pahihti? Nà kot paj amnhĩ kaxyw akôt pix mã ijamaxpêr nẽ akôt pix mã amnhĩ nhĩpêx o ri ixpa. Anẽ.

Hãmri nẽ kutã hkôn krã ho tẽm nẽ nhỹ nẽ kãm mex o mex ã harênh o nhỹ.

³⁹ Hãmri nhũm Jejus kãm:

—Nà ixte mẽ apiitã tanhmã mẽ ajarênh to kaxyw na pa pre kaxkwa rùm man mẽ awýr wrý. Ahpýnhã mẽ amã ixprãm xwýnhjê jarênh nẽ ahpýnhã mẽ kãm ixprãm kêt xwýnhjê jarênh kaxyw. Mẽ kãm ixprãm kêt xwýnhjaja kot hprĩ hã Tirtũm kapêr mar mex kêt tã na htem htýx ri kot mar mex ã amnhĩ jarênh o pa. Jakamã te mẽ nohkre xwýnhjaja kot amnhĩ nhĩpêx pyrãk. Nom koja mẽ Tirtũm kapêr ma nẽ ixkôt amnhĩ xunhwýr japêr. Hãmri nẽ te ra rít mex pyrãk o amnhĩ nhĩpêx. Jao ra hprĩ hã Tirtũm kapêr mar mex o pa. Anẽ.

⁴⁰ Nhũm pre ã Jejus kãm kapêr anẽ. Nhũm Parijew nhõ xwýnh kwýjaja kot kuri mar o kuhê xwýnhjaja ã kapêr anhýr ã kuma nẽ amnhĩ tã kãm:

—Kwa nà. Xà we mẽ pajaja na ka ã mẽ inhnokre hã mẽ ijarênh anẽ? Xà mẽ ixte ixprĩ hã Tirtũm kapêr mar mex kêt ã na ka mẽ ijarê nà? Anẽ.

⁴¹ Hãmri nhũm mẽ kãm:

—Ýý kop apu mẽ ate aprĩ hã kapêr mar mex kêt ã amnhĩ jarênh ronhýx ja mẽ amã mex nẽ. Tã mẽ ate aprĩ hã mar mex ã amnhĩ to axêx o apa jakamã na ka mẽ ra amnhĩ tomnuj týx nẽ. Na hte Tirtũm ja hã mẽ apumu nẽ amnhĩm mẽ ate amnhĩ tomnuj xwýnh ã mẽ ajarê. Anẽ.

10

ôwêhti jarênh

Matêwre 9.36, 12.11-12; Rukre 15.3-7

¹ Nhũm Jejus arĩ Ijaew mã kapêr nẽ mẽ kãm:

—E pa mẽ amã awjarê ka mẽ inhma nẽ amnhĩ krã him haxãr týx nẽ ho apa. Mẽ hkrit ôwêhti kot paj mẽ amã harê ka mẽ inhma. Na hte ôwêhti jamãr o pa xwýnhjaja ôwêhti apkur kaxyw mẽ o pa hãmri nhũm kamãt nhũm akupým kahê hwýr mẽ o pa. Kahê jakwakreja ãm pixii. Tã koja mẽhõ kahê xà hkôt hwýr àr kêt nẽ axtem nẽ tẽ nẽ nhỹhýnh kahê hã api nẽ ôwêhti hwýr àr japêr nhũm mẽ omu nẽ kot hkwy ho àhkĩnh ã omunh kurê kumrêx.

² —No ôwêhti jamãr o pa xwýnhja na hte mẽ kurom katãt kôt kahê jakwakre rùm ôwêhti hwýr agjê.

³ Nhũm kahê xà jamãr xwýnhja amnhĩ wýr omu nẽ kãm kahê xà rênh kurê kumrêx nhũm axà. Na hte apkati mẽ ma nhỹhým apkur kaxyw mẽ o pa. Nẽ nojarêt nẽ mẽ kãm akir. Ahpýnhã tanhmã mẽ hixi kute hã mẽ omunh xà hkôt mẽ kãm àkjêr

o pa. Hãmri nhũm mẽ kuma nẽ hwỳr mra nẽ hã pikuprõnh pa nhũm mẽ ho hapôj nẽ ma nhỹhỹm ri mẽ apkur kaxyw mẽ o pa.

4 Ma mẽ apkur kaxyw nhỹhỹm mẽ o pa. Nhũm ôwêhti ra kot kapêr mar mex jakamã ma àmnhĩx ri hkôt apkur o pa.

5 —Na hte hamãr o pa xwỳnh pix kapêr ma nẽ hkôt pa nẽ nhãm mẽhõ hkôt ri pa hkêt nẽ. Kot kapêr mar kêt jakamã tee ri kuma nẽ umaj axkakhũm nẽ hprõt nẽ ma mra. Na hte ôwêhti ã amnhĩ nhĩpêx anẽ. Anẽ.

Jejus te kêp ôwêhti gjênh xà hã hakwakre pyræk

6 Nhũm pre ã Jejus mẽ kãm ujarênh anẽ. Nẽ ujarênhja kamã amnhĩ kwỳjê jarẽ nẽ mãânên tãm amnhĩ jarẽ. Nom mẽ amnhĩ tã kuxi nẽ mẽ kãm amnhĩ jarênh o te ho ôwêhti jarênh pyræk nhũm mẽ tee ri kuma nẽ mar mex kêt nẽ.

7 Jakamã nhũm axte mẽ kãm awjarẽ nẽ mẽ kãm:

—E pa ixprĩ hã mẽ amã ix-ujarênhhta jarẽ ka mẽ inhma. Te ixpê ôwêhti jagjênh xà hã hakwakre pyræk. Kwa mẽ ja ma nẽ amnhĩ krã him haxàr tỳx nẽ.

8 Na pre ra ixkukamã mẽ ohtô nẽ te ãm hãmri mẽ amã Tĩrtũm kapêr jarênh pyræk o mẽ akôt ri pa. Nom mẽ amã hêx o pa. Te mẽ kot ôwêhti o àhkĩnh xwỳnhhta kot amnhĩ nhĩpêx pyræk. Nom na hte ôwêhtija ãm hamãr xwỳnh pix kapêr ma nẽ nhãm mẽhõ kapêr mar kêt nẽ. Ja

pyrà nẽ mẽ kot ixkôt amnhĩ xunhwỳr xwỳnhjaja na htem Tĩrtũm kapêr o hêx o mẽ pa xwỳnhjê ma nẽ ãm mẽ kuma nẽ mẽ hkôt amnhĩ nhĩpêx kêt nẽ. Na htem ãm ixkapêr pix ma nẽ ixkôt pix mã amnhĩ nhĩpêx o pa.

9-10 —Te ixpê ôwêhti gjênh xà hã hakwakre pyræk. Na hte ôwêhti mẽmoj punuj py-maj kahê hwỳr agjê nẽ kamã mex nẽ kuhê. Nẽ kurũm hapôj nẽ ma apkur o pa. Ja pyrà nẽ mẽ kot ixkôt amnhĩ xunhwỳr xwỳnhjaja koja mẽ ixkukwak ri hkĩnh nẽ mex nẽ hamakêtkati nẽ pa ho pa. Nẽ nhỹrmã Tĩrtũm mẽ wa ixri htĩr tũm nẽ pa ho pa. Ja kaxyw na pa pre man mẽ awỳr pika hwỳr wrỳ.

—No ôwêhti ho àhkĩnh xwỳnhjaja na htem amnhĩm ho ahkĩ nẽ kupa nẽ ma amnhĩm o pa. Tã mẽ kot Tĩrtũm kapêr o hêx o mẽ pa xwỳnhjaja te mẽ kot jajaja kot amnhĩ nhĩpêx pyræk. Anẽ.

Jejus te kêp ôwêhti jamãr xwỳnh pyræk

Eprêw 13.20; Apokarip 7.17

11 —Nẽ ôwêhti jamãr mex xwỳnhja koja nhỹri mẽhõ kêp ôwêhti hõxpĩr kaxyw hwỳr htêm ã omu nẽ wa hã axpu. Nhũm ho àhkĩnh mã xwỳnhhta ôwêhti jamãr xwỳnh pĩ nhũm ôwêhti nê ty. Tã ixkwỳjaja hamakêtkati nẽ mex nẽ pa kaxyw na pa pre amnhĩ grõnh kôt mẽ hwỳr wrỳ. Jakamã kot paj te ôwêhti jamãr xwỳnh kot

amnhĩ nhĩpêx pyràk o amnhĩ nhĩpêx.

12-13 —Ně na htem tōhã ôwêhti jamãr xwýnh nhỹhỹm pa kaxyw ně mēhō mã amnhĩre nhũm wakre kamã kãm hkrit jamãr o pa. Kãxpore pix prãm xaj kãm hamãr o pa. Jakamã koja nhỹhỹnh mry xoprê ra hwýr kato nhũm amnhĩ wýr omu ně umaj ôwêhti re ně ma hprôt ně tē. Kãm ôwêhti japê hkêt ãm kãm htír pix prãm xaj ôwêhti mã hamaxpêr kêt ně rer pa ně ma tē. Nhũm mry xoprêta ôwêhti hwýr hprôt ně hkwý pyné nhũm hkwý umaj axkahkũm ně hprôt ně ma mra. No kêt pa na te ixte ôwêhti mã hamaxpêr kêt ně kot rer ně ma hprôt ně htēm xwýnhta pyràk kêt. Kot paj aa ixkwýjê rer kêt ně. Kot paj mẽ hkôt ixpa ho ixpa rãhã ně.

14-15 —Te ixte ôwêhti jamãr xwýnh mex pyràk jakamã na pa hte uràk ně ahpýnhã mẽ kot ixkôt amnhĩ xunhwýr xwýnhjê pumunh mex o ri mẽ hkôt ixpa. Te mẽ kêp ixkrit ôwêhti pyràk nhũm te ixpê mẽ hamãr mex o ri mẽ hkôt ixpa ně aa mẽ rer kêt xwýnhta pyràk.

—Ně mẽ kot ixkôt amnhĩ xunhwýr xwýnhjaja ra mẽ ixte amnhĩ nhĩpêx kôt axpên pumunh mex. Ně mẽ inhmã axpên japêê. Te Inhĩpêêxà mẽ wa inhmã axpên japê pyràk. Tã kot paj nhỹrmã mẽ né tanhmã amnhĩ nhĩpêx to.

16 —Mě kot ixkôt amnhĩ xunhwýr xwýnhjaja piitã kêp Ijaew pix kêt. Koja Ijaew

kêt xwýnh kwýjaja mããnēn ixkapêr ma ně ixkôt amnhĩ xunhwýr ně ixkôt amnhĩ nhĩpêx. Jao ra te kêp ixkrit ôwêhti pyràk. Tã kot paj mẽ ho ixpimràa tã mẽ ho típxi ně mẽ hamãr o ri mẽ hkôt ixpa.

17 —Ně mẽ kot ixkôt amnhĩ nhĩpêx o mẽ pa xwýnhjaja mẽ mex kaxyw na pa pre amnhĩ grônh kôt mẽ hwýr wrý. Jakamã kot paj nhỹrmã mẽ né ty. Tã inhmã mẽ né ixtyk puma hkêt jakamã na Inhĩpêêxà kãm ijapêê. Koja akupým ixto ixtír.

18 Kop apu inhmã mẽ né ixtyk prãm kêt ronhỹx mẽ kãm ixkurê xwýnhjaja tee ri kãm ixpír prãm kaprý. Nom ixte mẽ kot ixkôt amnhĩ nhĩpêx xwýnhjê ně amnhĩ grônh kôt mẽ hwýr ixwrýk kênã. Jakamã kot paj arĩ mẽ kãm amnhĩ grônh kôt amnhĩ gō ně arĩ mẽ kãm xa nhũm mẽ ixpĩ. Nom kot paj akupým ixtír. Mēhō koja tanhmã ixto ně ixpír o ixpír? Nà koja mēhō ixpír o ixpír kêt ně. Inhĩpêêxà nhỹ hã kot paj nhỹrmã ã amnhĩ nhĩpêx anē ně akupým ixtír. Anē.

Nhũm pre ã Jejus mẽ kãm amnhĩ jarēnh anē.

19 Hãmri nhũm Ijaew tee ri ã kot amnhĩ jarēnh anhỹr ã kuma ně kê axte axpên kwým ri tanhmã harēnh to ho kuhê.

20 Ně kamã mẽ hkwýjaja harēnh o:

—Tk. Kwa mẽ mar kêt ně. Satanasti nhỹ hã na hte htýx ri ã mẽ pamã amnhĩ jarēnh anhỹr o pa. Anē.

21 Hãmri nhũm mẽ hkwyjaja mẽ kuma nẽ mẽ kãm:

—Nà kot anhÿr kêt. Xà na htem Satanasti nhÿ hã ã kapêr mex anẽ nẽ ã mẽ no hkre xwÿnhjê ho mex anẽ? Nà kot anhÿr kêt. Satanastija ukapÿre hã. Anẽ.

Ijaew nhõ pahijaja kot Jesus kaga hã mẽ harênh

Juãw 5.18, 8.59

22 Tã nhũm ra amgrà hapêx pa mẽ ixpê Ijaew akupÿm krĩ pê Jerujarê kamã axpên wÿr akuprõ. Axte mẽ ixte mẽ ixkĩnh kaxyw axpên wÿr akuprõ. Amnepêm mẽ inhÿgêjtjaja kot akupÿm Tĩrtũm mã amnhĩ jarênh xà hã ixkre ho mex pa nẽ ho Tĩrtũm wÿr mã hamaxpêr nẽ hã ixkĩnh ã arĩgroja ã pa mẽ hwÿr akuprõ.

23 Hãmri nhũm Jesus ma mẽ ixkôt Tĩrtũm mã amnhĩ jarênh xà hã ixkreta wÿr tẽ no ãm hwÿr àr kêt nẽ. ãm ixkre hpu hã kahê xà kape hã ri pa. Mẽ kot kãm: “Pahi finat Sarumãw pa xã” anhÿr xwÿnhnta kamã ri pa.

24 Hãmri nhũm kê ra mẽ inhõ pahijaja omu nẽ hã akuprõ nẽ hêx rom kãm kapêr nẽ kãm:

—Kwa tokyx aprĩ hã mẽ inhmã amnhĩ jarê. Xà apê Tĩrtũm Kra na ka nà? Xà ka na pre Tĩrtũm mẽ ixkaxyw axãm? Kwa aprĩ hã mẽ inhmã amnhĩ jarê pa mẽ ama. Mon ka hte aprĩ hã mẽ inhmã amnhĩ jarênh kêt nẽ? Na pa mẽ tee ri ate amnhĩ nhĩpêx ã apumu nẽ akukamã ijamaxpêr rũnh kumrêx o ri ixpa. Xà ãm hãmri apê

Tĩrtũm kot mẽ ixkaxyw axãm xwÿnhnta na ka? Anẽ.

25 Hãmri nhũm mẽ kãm:

—Tk. Ra ixte mẽ amã amnhĩ jarênh xohtô htã ka mẽ inhma nẽ ãm inhma. Na pa hte xatã Inhĩpêêxà nhÿ hã mẽ amã mẽ ate aa mẽmoj pumunh kêt kwÿ ho anhÿr o ri ixpa ka mẽ ja hã ixpumu nẽ ãm ixpumu nẽ ixkôt ajamaxpêr kêt nẽ.

26 Mẽ apê ixkwÿ hkêt jakamã na ka mẽ ixkôt ajamaxpêr kêt nẽ. Te mẽ apê ixkrit ôwêhti pyrãk kêt.

27 Ixkwÿjaja na te ho ôwêhti kot hamãr xwÿnh kapêr mar nẽ hkôt ri pata pyrã nẽ ixkapêr ma nẽ ixkôt amnhĩ nhĩpêx o pa. Ixpê mẽ õ pahihti hã mẽ kot ixpumunh mex jakamã na htem ixkôt amnhĩ nhĩpêx mex o pa. Ixte ja hã mẽ omunh mex nẽ.

28 Koja mẽ nhÿrmã htyk tã no ãm ixkukwak ri akupÿm htĩr hãmri nẽ Tĩrtũm mẽ wa ixri htĩr tũm nẽ pa ho pa nẽ aa hapêx kêt nhũm mẽhõ ixpê mẽ utàr kêt nẽ. Te inhĩhkra hpo nhĩpòk ri mẽ hkrĩ nhũm te mẽ hã inhĩhkra pikamÿr pyrãk nhũm mẽmoj tee ri ixpê tanhmã mẽ ho hprãm kaprÿ.

29-30 Inhĩpêêxà tãm kot inhmã mẽ ôr kênã. Hihtÿx o kot mẽ piitã mẽ hakrenh par jakamã koja mẽ inhĩhkra po nhĩpòk ri hkrĩ nẽ määnên Inhĩpêêxà nhĩhkra hpo nhĩpòk ri hkrĩ. Te ixpê Inhĩpêêxà Tĩrtũm pyrãk jakamã mẽhõ kot wa ixpê wa inhĩhkra rũm mẽ utã? Nà amrakati kumrêx.

Anhÿr o mẽ kām amnhĩ jarẽ.

³¹ Hāmri nhũm mẽ te kêp Tĩrtũm pyræk ã amnhĩ jarẽnh ã kuma nẽ kamã gryk tÿx nẽ. Hāmri nẽ kot kên o htak kaxyw ra kaxyw hkwy kawrà ho ri hprõt.

³² Hāmri nhũm amnhĩ tã mẽ omu nẽ mẽ kām:

—Kwa ra ixte Inhĩpêêxà nhÿ hã mẽ amã aa mẽ ate mẽmoj pumunh kêt kwÿ ho anhÿr rax o ixpa. Jao tanhmã mẽ ho mex to pix o ri ixpa. Tã ka mẽ axtem nẽ ã inhĩpêx anhÿr kaxyw. Anẽ.

³³ Hāmri nhũm mẽ kām:

—Nà ã ate amnhĩ nhĩpêx anhÿr ja mÿrapê hkêt. Kêt apê mẽ inhĩõ htã ri axtem nẽ te apê Tĩrtũm pyræk ã amnhĩ jarẽnhja mÿrapê na pa mẽ kên o atak kaxyw. Na pu htem ã amnhĩ jarẽnh anhÿr o papa hkêt nẽ. Anẽ

³⁴ Hāmri nhũm mẽ kām:

—No ãm hāmri ixte ã amnhĩ jarẽnh anhÿr kênã. Tanhmã na Tĩrtũm kapêr ã kagã htũm kot ja jarẽnh to wehe? Na pre Tĩrtũm Ijaew nhõ pahijê mã kapêr nẽ mẽ kām:

E mẽ ate inhÿ hã mẽ ho amnhĩptår jakamã te mẽ apê pa ixpê Tĩrtũm pyræk.

Anhÿr o kot mẽ harẽnh.

³⁵ ãm hāmri na Tĩrtũm kapêrja. Tãm kot ã mẽ harẽnh kot anhÿr. Mẽ kot ÿ hã mẽ kām kapêr jakamã te mẽ kêp uræk ã mẽ harẽnh anhÿr kênã.

³⁶ Tã tãm kot ã mẽ harẽnh anhÿr tã hpãnhã mẽ akaxyw pa ixpê Kra hã ixãm nẽ mẽ awÿr inhmẽnh nhũm ixwrÿk

nẽ ixpê Kra hã amnhĩ jarẽnh tã ka mẽ ja hã inhma nẽ ãm inhma nẽ ixkõt ajamaxpêr kêt nẽ. Kwa mon ka mẽ ja hã ixpumunh nẽ ixkõt ajamaxpêr kêt nẽ?

³⁷ Kot paj Inhĩpêêxà mẽ wa ixàhpumunh kêt mẽ amã aa mẽ ate mẽmoj pumunh kêt kwÿ ho anhÿr kêt ka mẽ ja hã ixpumu nẽ mẽ rĩ kam nẽ mãmri ixkõt ajamaxpêr kêt nẽ.

³⁸ Mẽ amã ixkapêr mar prãm kêt tã kwa ixte Tĩrtũm pyrã nẽ aa mẽ ate mẽmoj pumunh kêt kwÿ ho anhÿr ã ixpumu nẽ Inhĩpêêxà mẽ wa ixte amnhĩ nhĩpêx tipxi hkõt ajamaxpêr. Anẽ.

³⁹ Hāmri nhũm mẽ kuma nhũm ja mẽ kêp omnuj tÿx nẽ. Te kot Tĩrtũm pyræk ã amnhĩ jarẽnhja nhũm mẽ kêp omnuj nẽ. Jakamã nhũm mẽ ra kot unênh nẽ ixkre rũm ho kator nẽ kapôt ã mênh nẽ kên ho htak kaxyw nhũm kê axte mẽ kêp akunok nẽ ma nhÿhÿm tẽ.

Jejus kot Jotãw nhĩhkjê hã ri pa hã harẽnh

⁴⁰ Tã nhũm Jejus ma tẽ nẽ pyhti pê Jotãw ã rê. Pa mẽ hkõt ri ixpa ho ixpa xwÿnhjaja ma hkõt mō. Finat Juāw Paxis kot Tĩrtũm mã wam mẽ hkrã kumrår o pa xata wÿr.

⁴¹ Hāmri nhũm mẽ ohtõ nẽ mẽ ixwÿr mra nẽ Jejus kapêr ma nẽ kot tanhmã amnhĩ nhĩpêx to hã omunh o kuhê. Hāmri nẽ hã tanhmã axpên mã kapêr to nẽ axpên mã:

—Kwa ãm hāmri na pre finat Juāw Paxisja mẽ pamã Jejus jarẽnh o pa. Aa kot

mẽ pamã mẽ pahte mẽmoj pumunh kêt kwỳ ho anhỹr kêt tã ãm xatã hkukamã mẽ pamã harẽnh o pa. Kêp Tĩrtũm Kra hã Juãw rom hihtỳx o hihtỳx ã harẽnh o pa. Nẽ Tĩrtũm kot mẽ pakaxyw ãm xwỳnh ã nhũm mẽ pamã harẽnh o pa. Nà ãm hãmri na pre ã mẽ pamã harẽnh anẽ. Anẽ.

⁴² Hãmri nhũm mẽ ohtõ nẽ amnhĩ kaxyw Jesus kõt hamaxpêr nẽ hkõt amnhĩ xunhwỳ.

11

*Rajare htykjarẽnh
Juãw 5.21-29, 6.40*

¹ Rôm nhũm krĩ pê Petãn kamã mẽhõ my pê Rajareja ra à htỳx nẽ nõ. Na pre htõx wa hamẽxkrut. Hõ kêp Matre nhũm hõ kêp Marir.

² Marir na pre kormã arĩgro hõ hã kot Jesus o mex kaxyw mẽ hkuxwaxà ho hkuxwa nẽ amnhĩ kĩ ho hpar põnh kaxyw. Nom kormã. Jakamã nhũm wa hkamyja wa kêp à htỳx nẽ nõ.

³ Hãmri nhũm wa tee ri hkukamã hamaxpêr nẽ ma krĩ hõ hwỳr Jesus wỳr mẽhõ mẽ nhũm ma hwỳr tẽ. Nẽ hwỳr pỏj nẽ omu nẽ kãm:

—Pa Pahihti. E ot pa awỳr tẽ. Na ra amã akràmnhwỳ japê htỳx xwỳnhta à htỳx nẽ nõ nhũm htõx wa tee ri hkukamã hamaxpêr nẽ awỳr inhmẽ pa tẽ. Kwa tokyx pu ma hwỳr tẽ ka akupỳm wa kãm ho mex nà? Anẽ.

⁴ Hãmri nhũm kuma nẽ kãm:

—Nà à htỳx nẽ nõr tã koja akupỳm mex. Mẽ kot akupỳm mex ã harẽnh mar hãmri nẽ Tĩrtũm mẽ wa ixtã hpijaam nẽ wa ixihtỳx o wa ixihtỳx ã wa ixpumunh kaxyw na ã à htỳx nẽ nõr anẽ. Nẽ pa ixpê Tĩrtũm Kra hã akupỳm ho mex ã ixpumunh nẽ ixkõt hamaxpêr kaxyw na ã à htỳx nẽ nõr anẽ. Anẽ.

⁵ Na pre Jesus kãm Rajare mẽ htõx wa mẽ hapê nẽ.

⁶ Tã à htỳx ã harẽnh ma nẽ hwỳr mỏr tokyx anhỹr kêt nẽ. Pa mẽ arĩ amnhĩm hikranh xà kamã ri ixpaja o ixtã axte apkati axkrut.

⁷ Hãmri nhũm rĩ kormã hwỳr nojarêt nẽ mẽ inhmã:

—E ma pu mẽ jarãhã akupỳm Jutej kamã Rajare hwỳr mỏ nẽ omu. Anẽ.

⁸ Hãmri pa mẽ tee ri ja hã kuma nẽ kãm:

—Kwa ham mẽ panhõ pahijaja kot kên o atak o apĩr mã tã ka ra akupỳm mẽ hwỳr akrà. Kwa pu mẽ hwỳr pamỏr kêt nẽ nà? Anẽ.

⁹ Hãmri nhũm mẽ inhmã:

—Nà koja mẽ kormã tanhmã ixto hkêt nẽ. Kormã ixte Tĩrtũm mã tanhmã amnhĩ nhĩpêx to jatur xàm mẽnhre hã. Te ixte kormã arĩgro hã ixrĩt mex nẽ ixpa pyrà nẽ kormã Tĩrtũm kot mẽmoj tã inhmã karõ xà hkõt pix mã tanhmã amnhĩ nhĩpêx to ho ri ixpa.

¹⁰ Tã kot paj hatur xàm kumẽ nhũm te myt àr nhũm ra kamàt kỏ pyràk nhũm mẽ rĩ kormã tanhmã ixto nẽ ixpĩ. Jakamã e ma pu mẽ hwỳr.

Koja mẽ tokyx tanhmã ixto hkêt nê. Anê.

¹¹ Hãmri nê mẽ inhmã Rajare jarênh o:

—Na mẽ pahkràmnhwỳ Rajareta ra gõr nê nõ. Tã kot puj mẽ ma hwỳr mō pa kumra. Anê.

¹²⁻¹³ Ra htyk ã omunh tã ã mẽ inhmã harênh anê. Pa mẽ kuma nê ixtỳx ho ãm òt nê nõr ã hkamnhĩx nê kãm:

—Kwa măn ra akupỹm amnhĩ kãm hamak o mōr jakamã na ra amnhĩ kriet nê gõr nê nõ. Kwa pu mẽ awjanã nê hwỳr pamōr kêt nê nà? Anê.

¹⁴ Hãmri nhũm mẽ inhma nê hprĩ hã mẽ inhmã harê nê mẽ inhmã:

—Nà na pre ty.

¹⁵ Nom kormã à nê hikwỹta ã na pa hwỳr inhmōr kêt nê. Tã kot paj ma hwỳr mō nê hã mẽ amã ixàhpumunh tỳx ã amnhĩ to amnhĩrĩt. Ka mẽ ja hã ixpumu nê amnhĩ kaxyw ixkôt ajamaxpêr tỳx o ri apa. ã mẽ ate amnhĩ nhĩpêx anhỹr kaxyw na pa kormã à nê nõr ã hwỳr inhmōr kêt nê. E ma pu mẽ hwỳr. Anê.

¹⁶ Hãmri nhũm mẽ inhĩõ pê Tomas pihpohti tee ri ã kapêr anhỹrja ã kuma nê mẽ inhmã:

—Tõe ma pu mẽ hkôt. Kê mẽ mamrĩ hkôt mẽ pahto hpimràatã mẽ panhĩmex pa ri. Anê.

¹⁷ Tã pa mẽ ma hkôt mẽ hwỳr mō nê ra Rajare nhõ krĩ hwỳr ixpōx o mō hãmri nê harênh ma. Ra htyk nhũm mẽ kot haxàr ã arĩgro pê kwat ã harênh ma.

¹⁸⁻¹⁹ Nhũm Matre mẽ Marir wa hkamy ho hamak xàj arĩ mỳr o hkrĩ. Jakamã nhũm Ijaew kwỳjaja Jerujarê rùm ma wa hwỳr mra. Mẽ kot wa kãm kapêr nhũm tokyx akupỹm tãm wa hkrã kaxyw nhũm mẽ wa hwỳr mra. Wa ò krĩ pê Petãnja Jerujarê hwỳr ãm 3 kirōm pix jakamã nhũm mẽ ma wa hwỳr mra nê wa kuri wa kãm kapêr o hkrĩ.

²⁰ Rôm nhũm Matre Jejus hpōx o mōr ã harênh ma nê kànhmã xa nê man mẽ ixkutã tẽ. No nhũm Marir arĩ mỳr o nhỹ nê hkôt htêm kêt nê.

²¹ Hãmri nhũm Matre mẽ ixkutã tẽ nê mẽ ixkaxpa nê Jejus pumu nê mỳr kamã kãm kapêr nê kãm:

—Hêxta gàà nê Pahihti. Na pre ra wa ixkamy wa ixpê ty. Kop apu jar mẽ ixkôt ri apa ronhỹx pre htyk kêt nê. Xê mon ka pre we tokyx mẽ ixwỳr atêmre hkêt nê?

²² Tã na pa arĩ akôt ijamaxpêr tỳx nê. Kot kaj mẽmoj tã tanhmã Tĩrtũm wỳr to nhũm ama nê tanhmã amã mẽmoj to. Ra ixte ja hã apumunh mex kênã. Anê.

²³ Hãmri nhũm Jejus kuma nê kãm:

—Kwa tee ri ajamaxpêr nê akaprĩ hkêt nê. Koja akamy akupỹm war amã htĩr kãm ga. Anê.

²⁴ Hãmri nhũm kuma nê kãm:

—Ma koja anê. Nhỹrmã Tĩrtũm kot mẽ piitã akupỹm mẽ ho htĩr xà hã arĩgrota ã koja akupỹm htĩr. Anê.

Kamy akupỹm htĩr ã harênh mar tã Jejus kot akupỹm ho

htîr tokyx anhÿr ã hkamnhîx kêt nê ã kãm kapêr anê.

25-26 Jakamã nhũm kãm:

—Nà pa na ixpê akupÿm mẽ ho mẽ htîr xwÿnh. Jakamã mẽ kot amnhî kaxyw ixkôt hamaxpêr nê ixkôt amnhî xunhwÿr xwÿnhjaja koja mẽ htyk tâ koja mẽ hkarõ Tirtũm mẽ wa ixri htîr tũm nê mex nê pa ho pa. Xà ate ja kaxyw ixkôt ajamaxpêr tÿx nà? Anê.

27 Hãmri nhũm Matre kuma nê kãm:

—Xê nhũm. Apê Tirtũm Kra hã na pre mẽ ixkaxyw axãm. Ka na pa htem amnhî wÿr akãm ijamak o ixpa. Anê.

Hãmri nhũm Jejus kãm:

—Nà ãm hãmri na ka ã ijarênh anê. E ma akupÿm tẽ nê atõx mã anê kê tokyx man ixwÿr tẽ pa omu. Anê.

28 Hãmri nhũm kuma nê ma akupÿm tẽ. Hãmri nê Marir wÿr axà nê kãm Jejus jarê. Kôt mẽ hkrî xwÿnhjê hkàx ã kãm harê nê kãm:

—An xê hãmri amÿr kêt nê. Na ra mẽ pajahkre xwÿnhta hpõx o mõ nê mũtar nhÿ nê atã karõ. Anê.

29 Hãmri nhũm kuma nê kànhmã xa nê ma mẽ ixwÿr htêm kurê kumrêx.

30 Hãmri pa mẽ kormã krîm ixpõx kêt nê. Arî Matreja Jejus wÿr htêm xà kamã arî ixkrî.

31 Jakamã nhũm Matre ma tẽ nê Marir mã Jejus jarê nhũm kato nê man mẽ ixwÿr tẽ. Hãmri nhũm Jerujarê rũm wa hwÿr mẽ mrar xwÿnhjaja omu nê htÿx kot hkamy hã pika pumunh nê mÿr kaxyw

htêm ã hkamnhîx nê man hkôt mra.

32 Hãmri nhũm Marir mẽ hkukamã mẽ ixwÿr tẽ nê Jejus pumu nê hpar pê tẽm nê kãm kapêr pê hipô nê mÿr o nhÿ. Nê kãm:

—Hêxta gàà nê Pahшти. Na pre ra wa ixkamy wa ixpê ty. Kop apu jar mẽ ixkôt ri apa ronhÿx pre htyk kêt nê. Hô mon ka pre we tokyx man mẽ ixwÿr atêmre hkêt nê? Anê.

33 Hãmri nhũm Jejus kuma nê mÿr ã omu. Nê hkôt mẽ mrar xwÿnhjaja mẽ mÿr ã mẽ omu nê kãm mẽ hkaprî nê.

34 Hãmri nê mẽ kãm:

—Nhÿri na ka prem haxà? E mẽ hwÿr ixto tẽ pa omu. Anê.

Hãmri nhũm mẽ kuma nê ma hã pyka hwÿr mẽ ixto mõ

35 nhũm Jejus mẽ uràk nê hwÿr mÿr o tẽ

36 nhũm mẽ ja hã omu nê axpênh mã:

—Kwa mãn kãm hapê htÿx. Hã na ho ama nê hwÿr mÿr o tẽ. Anê.

37 Nom nhũm mẽ hkwÿjaja axtem nê mẽ kãm:

—Tk. Ra kot no hkre xwÿnhta o mex tâ mo na we tokyx man kormã htîr ri hwÿr htêm nê omunh nê akupÿm ho mex kêt nê? Anê.

Jejus kot akupÿm Rajare ho htîr ã harênh

38 Tã pa mẽ ra kên kre kamã mẽ kot Rajare jaxàr xàta wÿr ixpõx o mõ nhũm Jejus hkaprî nê hwÿr tẽ nê omu. Nhũm prem ra kên rax o hitom

39 nhũm omu nê mẽ kãm:

—E mẽ akwÿjaja nhãm inhmã nê kahê xà mẽ. Anê.

Hāmri nhūm Matre kuma nē tee ri hamaxpēr nē kām:

—Xê ma Jejus. Mē ri ā anhÿr kêt nē. Ra htyk ā arġgro kêp 4 kênã. Mãn ra hkatōk nē hkro htÿx kumrêx. Anê.

⁴⁰ Hāmri nhūm kuma nē kām:

—Kwa ri ā ajamaxpēr anhÿr kêt nē Matre. Na pa ra amã ixkapēr nē amã ixkapēr o: “Kot kaj amnhĩ kaxyw ixkôt ajamaxpēr tÿx nē. Hã kot kaj Tirtūm mē wa ixihÿtÿx o wa ixihÿtÿx xàja pumu.” Anhÿr o amã ixkapēr. Jakamã kwa ja kaxyw Tirtūm mē wa ixkôt mãn ajamaxpēr tÿx nē hkêt wehe. Anê.

Hāmri nhūm kuma nē kām:

—Ma âm hāmri na ka inhmã akapēr. Ma kot paj kaxyw war amã ijamaxpēr tÿx nē. Anê.

⁴¹ Rôm nhūm mē kām nhãm kên jakwa kre kahê xà mē. Hāmri nhūm Jejus Tirtūm mã amnhĩ jarênh kaxyw kànhmã kaxkwa hwÿr rġt nē kām:

—Pa Papaj. Nà na pa hte tanhmã mēmoj tã awÿr to ka inhma nē tanhmã inhmã mēmoj nhġpêx to. Amex o amex Papaj.

⁴² Na ka hte ā inhmã amnhĩ nhġpêx anê. Tã pa jajê noo mã ā amã ixkapēr anê. Ate inhmar nē tanhmã Rajare hto nhūm mē kot ja hã ixpumunh nē ixte anhÿ hã pix mã tanhmã amnhĩ nhġpêx to ho ri ixpa hã ixpumunh kaxyw. Nē ka ate mē hwÿr inhmênh ā apumunh kaxyw. Anê.

⁴³ Nhūm pre ā Tirtūm mã kapēr anê. Hāmri nē kÿx pē Rajare mã kapēr nē kām:

—Pa Rajare. Kwa tokyx kànhmã nhÿ nē amnē mē ixwÿr tē nē akato. Anê.

⁴⁴ Puh nhūm akupÿm htġr nē hkupu xà rãhã tē nē mē ixwÿr kato nē xa. Arġ hkuk nē ĩhkra nē hpar kupu rãhã mē ixwÿr kato nē xa. Hāmri nhūm Jejus mē kām:

—Kwa mē atō nē kupu xà hpôt kê ma akupÿm ōrkwÿ hwÿr tē. Anê.

⁴⁵ Hāmri nhūm mē kot Marir mē Matre wa hwÿr mrrar xwÿnh kwÿjaja ā Jejus kot Rajare nhġpêx anhÿr ā omu nē amnhĩ kaxyw hkôt hamaxpēr nē hkôt amnhĩ xunhwÿr kurê kumrêx.

⁴⁶ Nom nhūm mē hkwÿjaja axtem nē omu nhūm ja mē kêp omnuj nē. Jakamã nhūm mē ma Parijew nhō xwÿnhjê hwÿr mra nē mē kām harê.

Mē kot Jejus pġr ā amnhĩ grōnh

Matêwre 26.1-5; Makre 14.1-2; Rukre 22.1-2

⁴⁷ Hāmri nhūm Parijew nhō xwÿnhjaja tee ri Jejus kot akupÿm Rajare ho htġr ā harênh ma hāmri nē patre krãhtūmjê mē amnhĩ wÿr mē inhō juisti ho akuprō nē axpên mã Jejus o kapēr punuj pē hã axpên mar o hkrġ. Hāmri nhūm mēhō mē kām:

—Kwa tanhmã kot puj mē ho? Na ra mē kām mēmoj pumunh kêt kwÿ ho anhÿr rax o pa.

⁴⁸ Kot puj mē âm omu nē tanhmã ho hkêt nhūm mē pahkwÿjaja kot ā amnhĩ nhġpêx anhÿr ā omu nē htÿx

ãm hãmri ã kot amnhĩ nhĩpêx anhÿr ã hkamnhĩx. Hãmri nê amnhĩ kaxyw hkôt hamaxpêr nê hkôt amnhĩ xunhwÿ. Jao ra amnhĩ kaxyw kêp mē õ pahihiti hã ãm. Koja mē ã amnhĩ nhĩpêx anê nhũm Rõm kamã pahihitija mē kot kator nê hpãnhã Jejus xãm ã harênh ma. Hãmri nê gryk xàj mē pahwÿr õ pôristi hkwÿ rē nhũm mē pahwÿr mra nê mē panhĩmex pa nê Tĩrtũm nhõrkwÿ grành pa. Kwa tanhmã kot puj wem tokyx amnhĩ nê ho? Anê.

⁴⁹ Hãmri nhũm Kajpas mē kãm kapêr. Kajpasja na pre amgrãja kamã kêp mēõ patre nhõ pahi maati. Jakamã mē kãm:

—Nà na pa ra ijamaxpêr. Kwa mē inhma.

⁵⁰ Nà kot puj mē hpĩr tokyx anê kê tapxipix ty pu mē arĩ mÿrpê pahpiitã pajamakêtkati nê ri papa. Anê.

⁵¹ Nhũm pre ã mē kãm kapêr anê. Nom amnhĩ krã hkôt ã mē kãm kapêr anhÿr kêt nê. Arĩ kêp mēõ patre krãhtũmjê nhõ pahi maati jakamã Tĩrtũm nhÿ hã Jejus kot Ijaew nê tykja kukamã ã harênh anê. Nom ja hã amnhĩ pumunh kêt nê.

⁵² Na pre Jejus mē ixpê Ijaew pix nê htyk kêt nê. Krĩ piitã hkôt Tĩrtũm krajê nê na pre ty. Mē piitã mē kot axpên to hkwÿ nê ri axpên to pa kaxyw na pre mē nê ty.

⁵³ Hãmri nhũm ã Kajpas mē kãm kapêr anê nhũm mē inhõ pahijaja kuma nhũm ja

mē kãm mex nê. Jakamã nhũm mē kot tanhmã Jejus ã àmnênh to nhũm mē kot mē kãm tanhmã hpĩr to kaxyw ã axpên mar anhÿr o pa.

⁵⁴ Jakamã nhũm Jejus axte mē noo mã ri pa hkêt nê. Hãmri ma krĩ pê Epraĩ hwÿr ma mō. Pa mē hkôt ixpa ho ixpa xwÿnhjaja ma hkôt ixpa. Epraĩja kapôt ã krĩ na pre. Jakamã pa mē ma hwÿr mō hãmri nê kamã ri ixpa.

⁵⁵ Tã nhũm arĩgro pê Pasja ra ahtêp o mō. Amnepêm finat Mojes kot Ejit rũm mē panhĩgêjtê kator mã hamaxpêr kaxyw na pa pre htem hã ixkĩnh kaxyw Pas ã Jerujarê hwÿr akuprō. Na pa pre htem hwÿr pōj nê kamã Tĩrtũm noo mã mē inhmex kaxyw tanhmã amnhĩ nhĩpêx to.

⁵⁶⁻⁵⁷ Jakamã nhũm ra Ijaew ohtō nê ma Jerujarê hwÿr pa. Nê kãm Jejus pumunh prãm xàj Tĩrtũm mã amnhĩ jarênh xà hã ixkre wÿr mra nê hwÿr agjê nê kamã hapêr nê axpên mã:

—Kwa nok? Xà koja mē hpakĩnh wÿr mōr kêt nê nà? Anê.

Nhũm Parijew nhõ xwÿnhjê mē mē inhõ patre krãhtũmjaja haxwÿja hapêr o kuhê. Nom mē kot axtem nê unê nê haxàr kaxyw. Jakamã mē kãm hã karō nê mē kãm:

—E kêr ka mē nhÿri Jejus pumu nê man mē ixwÿr mra nê mē inhmã harênh kurê kumrêx. Anê.

12

Marir kot Jejus kuxwa hã harênh

Matêwre 26.6-13; Makre 14.3-9; Rukre 7.36-50

¹ Tã nhũm ra Pas wÿr apkati grêre. Ra hwÿr apkati kêp 6. Jakamã pa mẽ ma akupÿm krĩ pê Petãn wÿr Jejus kôt mỗ. Jejus kot akupÿm Rajare ho hÿr xwÿnhnta mẽ õ krĩ hwÿr pa mẽ akupÿm mỗ mẽ Rajare nhõrkwÿ hwÿr pỏj mẽ mẽ hwÿr agjê.

² Hãmri nhũm mẽ Jejus pumu mẽ hkĩnh mẽ. Nẽ mẽ inhmã mẽmoj mex nhĩpêx pa mẽ ixàpkur o ixkrĩ. Nhũm Rajare haxwÿja mẽ ixkutã apkur o nhÿ. Nhũm htõx Matre mẽ inhmã mẽõ ho pa mẽ mẽsti hã unhwÿr o xa.

³ Hãmri nhũm wa htõx Marir Jejus kukamã tanhmã hamaxpêr to mẽ hamaxpêr o:

—Ma kot paj tokyx mẽ kot mẽ ixpê hpĩr kukamã mẽ hkuxwaxà ho hkuxwa. Anê.

Hãmri mẽ kàx rax kãm mẽ hkuxwaxàja py mẽ o tẽ. Ra rit kahti hkôt hitep xà nhũm kupy mẽ hwÿr o tẽ. Mẽ kot mẽmo htwÿm o mẽ hkuxwaxà mex nhĩpêxja na pre hã kàxpore xohtỏ rax kumrêx. Jakamã nhũm kupy mẽ Jejus wÿr o tẽ mẽ hpar ã hkapĩr pa mẽ amnhĩ krã hkĩ ho hpar grà ho nhÿ nhũm ra ixkre kuxwa htÿx kumrêx.

⁴ Hãmri nhũm mẽ inhĩõ pê Jut Kariotja. Kot kormã mẽ ìhkram Jejus nhõr mã xwÿnhnta tee ri ã kot amnhĩ nhĩpêx anhÿr ã omu nhũm ja kêp omuj mẽ

⁵ nhũm mẽ inhmã:

—Tk. Kwa pêr mẽ hkuxwaxà hã kàxpore xohtỏ rax kumrêx tã nhũm ri axtem mẽ Jejus par ã hkapĩr pa. Mo na ma o htẽm mẽ ho wẽnẽ mẽ hpãnhã kàxpore ho rax mẽ hpyr mẽ ho mẽ kêp amrakati xwÿnhjê nhĩpêx kêt mẽ? Kot ho wẽnẽ ronhÿx hpãnhã kàxpore ho rax kumrêx mẽ kupy mẽ ho mẽmoj japrỏr rax o rax. Tã axtem mẽ amari Jejus par ã hkapĩr pa. Anê.

⁶ Te kãm mẽ kêp amrakati xwÿnhjê japê pyrak tã kãm mẽ hapê hkêt. ãm hêx rom ã kapêr anê. Na pre hte mẽ inhmã mẽ ixkàxpore jamÿ mẽ mẽ ixkôt mẽ inhmã hamãr o pa. Nom tởhã axtem mẽ mẽ ixpê hkwy ho ahkĩ mẽ ho amnhĩm mẽmoj japrỏ. Jakamã Marir kot mẽ hkuxwaxà ho hapêx par ã omu mẽ tee ri hpãnhã kàxpore rax mã hamaxpêr mẽ kamã gryk mẽ ã mẽ inhmã kapêr anê.

⁷ Hãmri nhũm Jejus amnhĩ tã hamaxpêr ã omu mẽ kãm:

—Tk. Kwa tanhmã kãm akapêr to hkêt mẽ. Ixtyk nhũm mẽ kot ixkuxwa hkukamã na ã inhĩpêx anê.

⁸ Na hte mẽ kêp amrakati xwÿnhjaja mẽ akôt pa rãhã mẽ. Ka mẽ amã mẽmo arĩgro hã tanhmã mẽ ho ajuta hto hprãm mẽ rĩ mẽ ho ajuta mẽ mẽ kãm mẽmoj gỏ. No kêt pa kot paj ri mẽ akôt ixpa ka mẽ ixto mex ry ho apa hkêt mẽ. Kot paj tokyx mẽ apiitã mẽ are. Jakamã ãm hãmri na ã inhĩpêx anê. Anê.

Patre krãhtũmjaja kot Rajare hã àmnênh ã harênh

⁹ Rôm nhũm Jerujarê nhõ xwýnhjaja ra Jejus Petãn wýr hpõx ã harênh ma nê kot omunh mã ma hwýr mra. No ãm tapxipix pumunh mã hwýr mrrar kêt nê. Mãânên kot akupým ho htír xwýnhhta pumunh mã nhũm mẽ ma hwýr mra.

¹⁰⁻¹¹ Na pre ra Ijaew ohtõ nê Jejus kot akupým Rajare ho htír ã harênh ma hãmri nê mẽ inhõ patre kaga nê Jejus kôt amnhĩ xunhwý. Jakamã nhũm patre krãhtũmjaja tee ri ja hã mẽ omu nê axpên mã:

—Nà kot puj mẽ Jejus pix pír kêt nê. Kot puj mẽ mãânên hkôt Rajare pí hãmri nhũm wa hixi hamẽ mẽ kêp hapêx japêr. Anê.

Jejus kot Jerujarê hwýr àr ã harênh

Matêwre 21.1-11; Makre 11.1-11; Rukre 19.28-40

¹² Tã nhũm apkati nhũm Ijaew Jerujarê kamã mẽ hkínhja kryx nê Jejus ra mẽ hwýr àhtêp o mör ã harênh ma.

¹³ Hãmri nê axpên mã:

—Kwa ma pu mẽ mõi nê pô hkwý jakà nê kutã ho mra. Anê.

Hãmri nê hkwý jakà nê hamý nê ma kutã ho mra. Hãmri nê ra hkaxpa nê omu nê hkính nê. Nê kãm:

Pa. Nà ãm hãmri na ka mẽ ixwýr mõi. Tirtũm na pre mẽ ixwýr amẽ ka ã amör anê.

Tirtũmja mex o mex. ãm hãmri na pre mẽ ixwýr amẽ.

Kot kaj mẽ inhõ pahi hpãnhã mẽ ixto amnhĩptàr o ri apa. Anê.

¹⁴ Hãmri nhũm Jejus nhýri jumênre pumu nê hwýr tẽ nê hã nhý nhũm mẽ pimràatã ma akupým Jerujarê hwýr mõi. Tirtũm kapêr ã kagà htũm ra kot ja jarênh kot:

¹⁵ Pa Jerujarê nhõ xwýnhjaja. Kwa mẽ tee ri amnhĩ kukamã ajamaxpêr ho amã ma hkêt nê.

Ota mẽ anhõ pahi nyw ra mẽ awýr jumênre hã nhý nê hpõx o tẽ. Anê.

¹⁶ No Jejus kôt mẽ ixpa ho mẽ ixpa xwýnhjaja pa mẽ ã kot amnhĩ nhípêx anhýrja ã omu nê tee ri hkukamã ijamaxpêr nê axpên mã:

—Kwa mo na ri ã amnhĩ nhípêx anê nê jumênre hã nhý nê mẽ hkôt mõi? Anê.

Tã nhũm arĩgro hõ hã ty nê akupým kaxkwa hwýr api pa prem hã omu hãmri nê kormã Tirtũm kapêr ã kagà htũm kot hkukamã ã harênh kot anhýrja mã ijamaxpêr kurê kumrêx. Hãmri nê axpên mã harênh o:

—Kwa ãm hãmri na Tirtũm kapêr ã kagà htũm kot ra ã Kraja jumênre hã ýr nê mẽ hkôt mör ã hkukamã kot harênh anhýrta. Anê.

¹⁷ Hãmri nhũm Jejus kot Rajare mã kapêr pẽ akupým ho htír ã omunh xwýnhjaja arĩ nhãm mẽ hkwýjê mã ujarênh o pa.

¹⁸ Nhũm mẽ kuma nê ma Jejus wýr omunh mã mra.

19 Hāmri nhūm Parijew nhō xwỳnhjaja tee ri ja hā mẽ omu nē axpēn mǎ:

—Kwa na pu mẽ tee ri Jesus nē mẽ kām pakapēr kaprỳ nhūm mẽ pamar kêt nē ra pitā hkôt amnhĩ nhĩpêx o pa. Kwa nà. Anē.

Ijaew kêt xwỳnhjê jarēnh

20 Tā nhūm ra Gres kwỳjaja Ijaew kôt hkĩnh kaxyw ma Jerujarē hwỳr mẽ hkôt mra nē mẽ ĩhkô hā Tĩrtũm mǎ mex o mex ā harēnh o hkôt mra.

21 Jakamā nhūm mẽ nhỹri mẽ inhĩo pê Firipti pumu nē hwỳr mra. Firipti kēp pyka pê Garirej kamā krĩ pê Pesêj nhō xwỳnh nhūm Gres nhō xwỳnhjaja omu nē hwỳr mra nē kām:

—Pa. Kwa na pa mẽ inhmǎ Jesus pumunh prām nē. Tanhmǎ kot pa wem amnhĩ to nē omu nē kām ixkapēr? Anē.

22 Hāmri nhūm mẽ kuma nē ma Andre hwỳr mẽ o mra nē kām mẽ harē. Hāmri nē wa ma Jesus wỳr mẽ o mra nē kām mẽ harē nē kām:

—Pa Pahihti. Ota Gres nhō xwỳnhjaja kām apumunh prām nē awỳr mō. Mẽ pahkĩnhǎ mẽ kēp Ijaew kêt tā mẽ kām apumunh prām nē. Anē.

Jesus kot amnhĩ kukamǎ amnhĩ jarēnh

Matêwre 16.24-28; mǎānēn Apokarip 2.10, 12.11

23 Hāmri nhūm Jesus mẽ omu nē mẽ kām tanhmǎ amnhĩ jarēnh to. Kot mẽ ohtô nē mẽ nē htyk nhūm mẽ kukwak ri Tĩrtũm wa kuri htĩr

tũm nē pa ho pa hā mẽ kām amnhĩ jarē nē mẽ kām:

—Nà na ra ixyk ā arĩgro hwỳr apkati grêre. Ixpē Tĩrtũm kot mẽ akaxyw ixâm xwỳnh jakamǎ kot paj mẽ apiitā mẽ anē ty hāmri nē akupỹm ixtĩr nē ma kaxkwa hwỳr akupỹm api.

24 Mẽ axohtô nē nhỹrmǎ Tĩrtũm mẽ wa ixri atĩr tũm nē apa ho apa kaxyw kot paj ā amnhĩ nhĩpêx anē. Kwa mẽ ā ixte amnhĩ jarēnh anhỹrja ma nē mẽ amnhĩ krām haxàr tỳx nē ri hā apa. Te ixte mẽmo hy kot amnhĩ nhĩpêx pyrək. Na htem pikap hagjê nhūm te htyk pyrà nē pika kaxwỳnh kām hikwỳ. Tā gaa nē higrôt nē hprêk nē ô. Nē ô rax kumrêx. Hyja pyxire nē hikwỳ htǎ kamā ô rax kumrêx. Nom koja mẽ hkre hkêt nē nhūm ô hkêt nē. Na hte ā mẽmo hyja amnhĩ nhĩpêx anē. Ja pyrà nē kot paj mẽ anē ixyk kêt nē te mẽ kot mẽmo hy hkre hkêt nhūm hprêk nē ô hkêeta pyrək ka mẽ ixkukwak ri Tĩrtũm mẽ wa ixri atĩr tũm nē apa hkêt nē. Jakamǎ kot paj mẽ anē ty nhūm mẽ ijaxà. Hāmri pa akupỹm ixtĩr ka mẽ axohtô nē ixkukwak ri wa ixri atĩr tũm nē apa ho apa.

25 —Nē koja mẽ ixpĩ pa mẽ anē ty. Tā mẽ ate ixkôt amnhĩ nhĩpêx o apa xwỳnhjaja. Koja mẽ ixtā mẽ apar mǎ tā kwa kêt ka mẽ atyk pymaj ixk-aga hkêt nē. Kwār mẽ mǎmĩ tanhmǎ ixtā mẽ ato ka mẽ nhỹrmǎ Tĩrtũm mẽ wa ixri axte amnhĩ xà kamā ajamak

kêt kumrêx nê atîr tûm nê amex nê apa ho apa. No kot kaj mē ixkĩnhã jar amã amex pix prãm hãmri nê nhÿrmã wa ixri atîr tûm nê apa hkêt nê.

26 Kot kaj mē ã ixkôt amnhĩ nhĩpêx anhÿr o ri apa hãmri nhũm mē kot inhĩpêx pyræk o mē anhĩpêx. Hãmri ka mē nhÿrmã ma ixkôt kaxkwa hwÿr api nê kamã ixri atîr tûm nê apa ho apa. Hãmri nhũm Inhĩpêxã ixtã mē apumu nê mē ato mex kumrêx. Anê.

Tirtũm kot Jejus mã kapêr ã harênh

Matêwre 3.17, 17.5

27 Tã nhũm Jejus tee ri amnhĩ kukamã htyk mã hamaxpêr nê hkaprĩ htÿx nê. Nê hkôt mē ixpa ho mē ixpa xwÿnhjê mã amnhĩ jarê nê mē inhmã:

—Hêxta waa nê. Na pa tee ri amnhĩ kukamã ijamaxpêr. Nê tee ri amnhĩ xà htÿx kamã ijamak kukamã ijamaxpêr pê ra amnhĩ kamã ixkahak nê. Nom ixte pika piitã hkôt mē kot ixkôt amnhĩ xunhwÿr xwÿnhjê nê ixtyk kaxyw ixwrÿk kênã. Jakamã kot paj Inhĩpêxã kot mē kêp ixpytãr kaxyw tanhmã amnhĩ to hwÿr to hkêt nê. Anê.

28 Hãmri nê hpãnhã Hipêxã mã kapêr nê kãm:

—Pa Papaj. ãm mēmoj pixi na inhmã hprãm. Kê mē piitã ixkukwak ri amex o amex ã apumu. Ja na kêt inhmã hprãm tÿx kumrêx.

Anhÿr o Tirtũm mã amnhĩ jarê. Hãmri nhũm kuma

nê kaxkwa rûm kãm kapêr. Kÿxpê kãm kapêr nê kãm:

—Nà na pa pre ra ã mē kãm amnhĩ to amnhĩrit anê nhũm mē ja hã ixpumu. Tã kot paj axte akukwak ri amnhĩ to amnhĩrit nhũm mē piitã axte inhmex o inhmex ã ixpumu. Anê.

29 Nhũm pre ã Tirtũm Jejus mã kapêr anê. Hãmri nhũm mē kot mē ixkuri mar o kuhê xwÿnhjaja kuma no ãm hprĩ hã kot kãm tanhmã kapêr toja mar mex kêt nê. Nê htÿx ho ãm mēmoj tã hkamnhĩ. Jakamã nhũm mē hkwÿjaja xypên mã:

—Kwa mo na wehe? Na mãn katõtök nã? Anê.

Nhũm mē hkwÿjaja mē kãm:

—Nà na katõtök kêt. Tirtũm kapêr o wrÿk xwÿnh mãn tanhmã kãm kapêr to. Anê.

30 Hãmri nhũm Jejus mē kãm:

—Nà Tirtũm tãm na inhmã kapêr. Nom pa ixte mar kaxyw inhmã kapêr kêt nê. Mē kajaja mē ate ixtã mar kaxyw na kÿx pê ã inhmã kapêr anê. Anê.

Hãmri nê mē kãm:

31 —E hãmri. Kot paj tokyx mē apiitã mē ate amnhĩ tomnuj pãnhã amnhĩrer kaxyw tanhmã amnhĩ nhĩpêx to. Jao mããnên Satanasti pê hihtÿx xà ho ijapêx.

32 Koja mē pĩ kahpa hã inhô pa kÿxpê ajêt. Tirtũm kot mē awÿr inhmênh tã nhũm mē ã inhĩpêx anê pa ty. Jakamã koja pika piitã hkôt mē ohtô nê ixkôt amnhĩ xunhwÿ nê amnhĩ kaxyw

inhmã hamaxpêr rãhã ho pa. Anê.

³³ Mê ixte tanhmã htyk to hã harênh mar kaxyw nhũm pre ã mê inhmã amnhĩ jarênh anê.

³⁴ Hãmri nhũm mê kot mê ixkuri mar o kuhê xwýnhjaja tee ri kot htyk ã amnhĩ jarênhja ma nê kãm:

—Kwa mê ixte amnhĩ wýr kamã ijamak o ixpa xwýnhja htír tũm nê pa ho pa xwýnh na. Tirtũm kapêr ã kagà htũm kot ã harênh kot anhýr tã ka ã ri mê kot apír nhũm atyk ã amnhĩ jarênh anê. Ate Tirtũm kot mê ixwýr amênh xwýnh ã amnhĩ jarênh tã ã ri atyk ã amnhĩ jarênh anê. Kwa xà apê mê ixte amnhĩ wýr kamã ijamak o ixpa xwýnh kêt? Anê.

³⁵ Hãmri nhũm mê kuma nê amnhĩ tã mê kãm:

—Tý ixpê tãm kênã. Tã kot paj tokyx mê are. Jakamã kêr ka mê ixte arĩ mê akamã ixpa ri ixkôt amnhĩ xunhwý nê amnhĩ kaxyw ixkôt ajamaxpêr o ri apa. Te ixpê kanê hpôk pyrãk jakamã na pa hte mê kãm Tirtũm kapêr o mê ahkre o ri ixpa. Nom kot paj kritpêm mê akôt ixpa ry hkêt nê. Jakamã kwa kêr ka mê tokyx te mê kot kanê hpôk nhĩrã kamã ri mê pa xwýnh kot amnhĩ nhĩpêx pyrã nê Tirtũm kôt amnhĩ nhĩpêx o ri apa. Kormã mê akôt ixpa ri. Kot paj tokyx ma mō nhũm te ra kamàt kô pyrãk. Na hte kamàt kô kamã mê pa xwýnhjaja tee ri rĩt mex mã nom rĩt mex kêt nê. Nê mēmoj pumunh mex kêt nê.

³⁶ Jakamã kwa mê tokyx ixte arĩ mê akamã ixpa ri amnhĩ kaxyw inhmã ajamaxpêr nê ixkôt amnhĩ xunhwý. Te ixpê kanê hpôk nhũm kamã mê arĩt mex pyrãk. Jao ixpyrà nê te mê apê kanê hpôk nhĩrã mex pyrãk o amnhĩ nhĩpêx. Nê ixpyrà nê tãm ri amnhĩ nhĩpêx o apa. Anê.

Nhũm pre ã mê kãm kapêr anê hãmri pa mê kêp ixkato nê ma nhãm mō.

Mê hkwyjaja kot Jejus kôt hamaxpêr kêt ã mê harênh

³⁷ Na pre hte Jejus mê noo mã mê kot aa mēmoj pumunh kêt kwý ho anhýr rax o pa. Tã nom nhũm mê ohtô nê hã omu nê ãm hã omu nê kêp Tirtũm kot mê pahwýr mēnh xwýnh ã hkôt hamaxpêr kêt nê.

³⁸ Nom ra mê hkukamã Tirtũm nhý hã kapêr jarênh o pa xwýnh pê finat Ijaisja mê hkukamã ja hã mê harê nê hã kagà. Nê hã kagàja o:

Pa Pahi Maati. Nà ra ixte mê kãm ajarênh o ixpa ryy htã no nhũm mê inhma nê ãm inhma.

Nê mê kot axihtýx o axihtýx ã ajarênh mar tã no ãm ajarênh ma nê amnhĩ kaxyw akôt hamaxpêr kêt nê. Anê.

³⁹ Mê kãm Tirtũm kapêr mar prãm kêt jakamã na prem mãânēn Jejus kêp Tirtũm kot mê pahwýr mēnh xwýnh hkôt hamaxpêr kêt nê. Nhũm pre finat Ijaisja axte mê hkukamã ja hã mê harê nê mê hã kagà. Nê hã kagà ho:

40 Na pre Tirtūmjā tanhmā amnhī nē mē hkrā hto nhūm mē hkôt hamaxpēr kêt nē.

Ra mē kot hihtỳx o hihtỳx ã omunh tā omu nē ãm omu.

Nē mē kot kapēr mar tā amnhī tomnuj kaga hkêt nē.

Nē Tirtūm kot mē nē mē kot amnhī tomnuj o hapêx prām xàj hkôt amnhī xunhwỳr kêt nē. Anē.

41 Kormā Jejus mē hwỳr wrỳk kêt ri nhūm finat Ijaisja hpimtir kām kot amnhī to rax kumrêx ã omu nē hkukamā ã harênh nē hã kagà anē.

42 Hāmri nhūm Ijaew krāhtūm kwỳjaja hkwỳjê rom amnhī kaxyw Jejus kôt hamaxpēr nē hkôt amnhī xunhwỳ. Tã Parijew nhō xwỳnhjaja kot ã mē kot amnhī nhĩpêx anhỳr ã mē harênh mar pymaj ja hã amnhī to amnhĩrīt kêt nē. Mē kot Tirtūm kapēr o mē ahkre xà hã ixkreja nē mē kator pymaj nhūm mē kām amnhī to amnhĩrīt kêt nē.

43 Na prem hamaxpēr o:

—Nà kot paj ja hã amnhī to amnhĩrīt nhūm mē amnhī nē ixtomnuj nē. Hāmri nē amnhī pyrà nē axpên mã inhmex ã ijarênh kêt nē.

Anhỳr o mē umaj amnhī kukamā hamaxpēr o pa. Nom Tirtūm tãm kot amnhĩm mē mex ã mē harênhja nhūm mē hkukamā hamaxpēr kêt nē.

Jejus kot Hipêêxà nhỹ hã kapēr ã harênh

44 Nhūm Jejus axte mē kām kapēr nē kỳx pê kapēr nē mē kām:

—Nà koja mēhō amnhī kaxyw ixkôt hamaxpēr hāmri nē ixkôt pix mã hamaxpēr kêt nē. Mãânên amnhī kaxyw kot mē awỳr inhmênh xwỳnhja kôt hamaxpēr.

45 Wa ixte amnhī nhĩpêxja te tipxi pyrāk jakamā koja mē tanhmā ixte amnhī nhĩpêx to hã ixpumu nē te kot Tirtūm kot amnhī nhĩpêx ã omunh pyrāk.

46 —Nē te ixpê kanê hpôk nhūm inhĩrā kamā mē apa pyrāk kaxyw na pre Inhĩpêêxà mē awỳr inhmê pa mē awỳr wrỳ. Ixte kapēr o mē ajahkre ho ri mē akôt ixpa kaxyw. Jakamā koja mēhō amnhī kaxyw ixkôt hamaxpēr nē ixkôt amnhī xãm hāmri nē te kanê hpôk nhĩrā kamā rīt mex o pa pyrāk o amnhī nhĩpêx. Jao amnhī nhĩpêx nyw o amnhī nhĩpêx o pa.

47-48 No mē kot ixkapēr mar nē ãm mar xwỳnhjaja te mãânên Inhĩpêêxà kapēr mar nē ãm mar pyrāk. Mỳrapê koja mē nhỹrmā ma kuwy hwỳr pa nē mē kot amnhī tomnuj mỳrapê kamā pa ho pa. Tã no ã mē ate amnhī nhĩpêx anhỳr o ri mē apa kaxyw na pa pre mē awỳr ixwrỳk kêt nē. Ixte mē ate amnhī tomnuj pãnhã amnhĩrer par kaxyw na pa pre mē awỳr wrỳ.

49 —Nē na pa hte amnhī krā hkôt tanhmā ri mē mã ixkapēr to ho ri ixpa hkêt

ně. Ām kot mẽ awỳr inhměnh xwỳnhja nhỹ hã na pa hte tanhmã mẽ amã ixkapěr to ho ri mẽ akôt ixpa.

⁵⁰ Tã mẽ kot Tĩrtũm kapěr mar nẽ amnhĩ kaxyw hkôt hamaxpěr xwỳnhjaja koja mẽ nhỹrmã wa ixri htĩr tũm nẽ mex nẽ pa ho pa. Jakamã na pa hte tanhmã kot inhmã karõ hto xà hkôt pix mã tanhmã mẽ amã ixkapěr to ho ri ixpa. Anẽ.

13

Jejus kot hkwyjê hpar kuhõnh ã harěnh

Rukre 22.24-27

¹ Tã nhũm ra Pas ã mẽ ixkĩnhhta ahtěp. Pas ã na hte mẽ ixpě Ijaewjaja axpěnh wỳr akuprõ nẽ hã ôwěhti hkra nyw pa nẽ ho aně nẽ hkur o ixkrĩ. Amnepěm Tĩrtũm kot pika pẽ Ejit rũm mẽ inhĩgěxjê kator kaxyw nhũm mẽ nojarět nẽ ã hkwy hpar nẽ ho anhỳr nẽ hkwy hkurta pyræk. Na prem nojarět nẽ mẽ hkra my kot wa mẽ kęp htyk pumaj ôwěhti hkra nyw kwỳ hpa nẽ ho aně nẽ ĩ hku. Jakamã nhũm arĩ mẽ ixpě mẽ hkanrěhã mẽ htãmnhwỳjaja ã mẽ kot amnhĩ nhĩpěx anhỳrja mã ijamaxpěr nẽ hã ixkĩnh kaxyw mẽ uræk nẽ hkwy hpa nẽ kuku. Jakamã nhũm ra Pas ahtěp nhũm Jejus amnhĩ kukamã tanhmã hamaxpěr to kurê kumrěx. Ra ma akupỹm Hipěxà hwỳr àpir xà hã arĩgro hwỳr apkati grěre. Jakamã nhũm akupỹm nojarět ã amnhĩ pumu nẽ kãm mẽ pahte hkôt

amnhĩ xunhwỳr xwỳnhjê japê jakamã kãm mẽ pajapê rãhã mẽ panê htyk mã.

² Tã nhũm myt axà pa mẽ Pas ã ixàpkur o ixkrĩ. Nhũm Simãw Kariot kra Jut Kariotja mãăněnh mẽ ixkutã apkur o nhỹ. Kęp mẽ ixkwỳ htã nhũm pre Satanasti tanhmã hkrã hto nhũm ra axtem nẽ kot mẽ kãm Jejus kurê xwỳnhjê nhĩhkram haxàr kaxyw.

³⁻⁴ Tã pa mẽ kormã axpěnh kutã ixàpkur kaxyw ixkrĩ hpa nhũm Jejus kãnhmã xa nẽ hinòkà kapa nẽ toajti py nẽ ho amnhĩ krax pre. Kot amnhĩ to rax ã amnhĩ pumunh tã ja hã amnhĩ to jarkrar pẽ tanhmã ri mẽ inhnoo mã amnhĩ nhĩpěx to ho pa hkět. Kęp mẽ inhõ pahi htã te kęp mẽ inhmã àpěnh xwỳnh pyræk o amnhĩ nhĩpěx o pa.

⁵ Jakamã toajti py nẽ ho amnhĩ krax pre nẽ pasiiti hõ py nẽ kamã gò hkwy ru nẽ ho mẽ ixpar kuhõ nẽ toajti o mẽ ixpar grà ho mō.

⁶ Ā mẽ inhĩpěx anhỳr o mō. Pẽ ra hpãnhã Simãw Pětre hpar kuhõnh kaxyw nhũm tee ri amnhĩ tã omu nẽ kãm:

—Tk. Kwa apẽ inhmã axàpěnh xwỳnh kět kěna kot ka kět ri axtem nẽ ixpar kuhõ Pahihti. Apẽ mẽ inhõ Pahi kěna kot ka kět ã mẽ inhĩpěx aně. Anẽ.

⁷ Hãmri nhũm kãm:

—Kwa nà. Kormã ate ja hã amnhĩ tã ixpumunh mex kět. Nom kot kaj nhỹrmã aprĩ hã amnhĩ tã ixpumu. Anẽ.

⁸ Hãmri nhũm kãm:

—Nà nom kot kaj ãm ixpar kuhõnh kêt nê. Kwarĩ. Anê.

Hãmri nhũm Jejus kãm:

—Tõe. Kot paj apar kuhõnh kêt nê ka te apê ixkwỳ hkêt pyræk. Anê.

⁹ Hãmri nhũm tee ri kuma nê kãm:

—Tõe mamrĩ ixpar kuhõ. Nom ixpar pix kuhõnh kêt nê. Mããnên inhĩhkra kuhõ nê ixkuk kuhõ. Inhmã ixte apyræk prãm tỳx kumrêx kênã. Anê.

¹⁰ Hãmri nhũm Jejus kãm:

—Nà amỹkry hkõt mẽ wỳr xwỳnhjaja na htem mex nê axte wỳr kêt rãhã hikwỳ. Na htem ãm amnhĩ par pix kuhõ nê hikwỳ. Ja pyrà nê Tĩrtũm kot mẽ anê mẽ ate amnhĩ tomnuj ho hapêx par xwỳnhjaja te amỹkry hwỳr mẽ axwỳr nê amex pyræk. Ka mẽ te mẽ kot amnhĩ par pix kuhõnh ta pyrà nê axte tanhmã amnhĩ tomnuj to hãmri nê Tĩrtũm mã amnhĩ jarênh kurê kumrêx kê anê amnhĩ katut kõt ate amnhĩ tomnuj ta mẽ nê ho hapêx. Na pre ra mẽ anê mẽ ate amnhĩ tomnuj o hapêx. No ãm mẽ apiitã hkêt. Ota arĩ mẽ anhĩõja pyxire nê arĩ amnhĩ tomnuj rãhã ri pa. Jakamã te wỳr kêt nê arĩ grã htyk rax kãm ri pa pyræk. Anê.

¹¹ Nhũm pre ã Jejus mẽ inhmã kapêr anê. Ra kot hprĩ hã mẽ kot kãm hkurê xwỳnhjê mã õr mã xwỳnhja pumunh jakamã te wỳr kêt nê arĩ grã htyk rax kãm ri pa pyræk ã ã harênh anê.

¹² Tã mẽ ixpar kuhõnh pa nê akupỹm hinõkà py nê haxà nê nhỹ hãmri nê mẽ inhmã:

—E mẽmo kaxyw na pa we ã mẽ apar kuhõnh anê? Kot paj ixprĩ hã mẽ amã amnhĩ jarê ka mẽ inhma.

¹³⁻¹⁴ Na ka htem ixto “mê ijahkre xwỳnh” nê ixto “pahĩhti” anhỹr o ijarênh o ri apa. ãm hãmri na ka htem ã axpên mã ijarênh anê. Ixpê mẽ ajahkre xwỳnh nê mããnên ixpê mẽ anhõ pahĩhti htã inhmã mẽ ate tanhmã axpên nhĩpêx to ho apa hprãm xàj na pa ã mẽ apar kuhõnh anê. Tã kêr ka mẽ ixpyrà nê tanhmã axpên to mex to ho ri apa.

¹⁵ Jao amnhĩ kuxwar axpên to mex pê mẽmoj to axpên kutã anojarêt rãhã ho ri apa.

¹⁶ Kwa mẽ ixkapêr ma nê kãm amnhĩ krãm haxàr tỳx rãhã ho ri apa. Mẽ ate amnhĩ to rax o ijakrenh kêt. Te ixpê mẽ anhõ patrãw nhũm mẽ ate inhmã tanhmã amnhĩ nhĩpêx to ho apa xwỳnh pyræk. Nê te ixte mẽmoj tã mẽ amã karõ nhũm mẽ ate inhmar nê inhmã tanhmã mẽmoj nhĩpêx to pyræk. Tã te ixpê mẽ anhõ patrãw pyræk tã pa ã mẽ apar kuhõnh anê. Ka mẽ amnhĩ tã ixpumu hãmri nê amnhĩ xwar tanhmã axpên to ajuta hto ho ri apa. No ri axpên pumu nê ajamaxpêr o: “Tk. Nà ixte amnhĩ to rax o hakrenh kênã kot pa kêt ri tanhmã ho ajuta hto. Kê tãm mãn pa ixto ajuta.” Anhỹr o ajamaxpêr o ri apa hkêt nê.

¹⁷ —E na pa ã mẽ amã ixujarênh anê. Kot kaj mẽ

inhma nē ixujarēnh kôt ã
axpēn nhīpēx anhỹr o ri apa.
Hã kot kaj mẽ akīnh nē ri apa.
Anē.

*Jejus kot amnhĩ tã hã
ànēnh xwýnh o amnhĩrĩt ã
harēnh*

*Matēwre 26.20-25; Makre
14.17-21; Rukre 22.21-23*

¹⁸Nhũm Jejus arĩ mẽ inhmã
kapēr nē mẽ inhmã:

—Kot kaj mẽ apiitã mẽ
akīnh nē apa hkêt nē. Ixte mẽ
arēnh xwýnhjaja mẽ apiitã mẽ
apumunh mex. Jakamã na pa
Tĩrtũm kot mẽ apiitã mẽ ate
amnhĩ tomnuj o hapēx par
kêt ã mẽ anhĩõja jarē. Tĩrtũm
kapēr ã kagã htũm kot harēnh
kot:

Ixkutã apkur o ýr xwýnhjê hõ
koja axtem nē mẽ kot
kãm ixkurê xwýnhjê
nhĩhkram ijaxã. Kêp
ixkõt pa ho pa xwýnh
tã koja axtem nē ã
inhĩpēx anē.

Anhỹr o kot harēnh. Tã koja
tokyx ã inhĩpēx anē.

¹⁹Nom kormã kot ã inhĩpēx
anhỹr kêt ri na pa hkukamã
mẽ amã harē. Jakamã koja
ã inhĩpēx anē ka mẽ ja hã
ixpumu nē ra ixte amnhĩ
kukamã mẽ amã amnhĩ
jarēnhhta mã ajamaxpēr nē
ixpê Tĩrtũm rũm mẽ awýr
ixwryk xwýnh kôt ajamaxpēr
týx kurê kumrēx.

²⁰—Kwa mẽ ixkapēr ma
nē amnhĩ krã kamã kãm
ajamaxpēr týx o ri apa. Koja
mẽhõ ixte mẽ hwýr mẽ arēnh
xwýnhjê hã tanhmã mẽ ato
mex to. Hãmri nē te pa kot
tanhmã ixto mex to pyrãk.

Nē koja mẽhõ tanhmã pa
ixto mex to nē mãânēn te kot
mẽ awýr inhmēnh xwýnhhta
tanhmã ho mex to pyrãk.
Anē.

²¹Nhũm pre ã Jejus mẽ
inhmã kapēr anē. Hãmri
nē tee ri amnhĩ kukamã
hamaxpēr nē hkaprĩ nē mẽ
inhmã:

—Hêxta waa nē. Nà kot kaj
mẽ atõ mẽ kot kãm ixkurê
xwýnhjê nhĩhkram ijaxã.
Kwa mẽ amnhĩ krã kamã
ixkapērja mã ajamaxpēr týx
nē. Anē.

²²Hãmri pa mẽ amnhĩ
tã kuma nē tee ri axpēn
pumunh o ixkrĩ.

²³Ixpê Juāw na pa pre ixpê
Jejus krãmnhwý mex ã ãhkõ hã
ixãpkur o inhỹr

²⁴nhũm Simãw Pêtreja ix-
pumu nē inhmã nomgõr nē
kawax pê inhmã:

—Kwa mẽ pahõtõ nhĩxi hã
hkukja nã? Anē.

²⁵Hãmri pa kuma nē Jejus
mã kãm:

—Kwa Pahihti. Mẽ ixtõ koja
we ã inhĩpēx anē? Anē.

²⁶Hãmri nhũm mẽ inhmã:
—Nà kot paj pãwti hõ py
nē guhkrax kãm ho mry kagõ
nhek nē kot mẽ ãhkram ijaxãr
mã xwýnhhta mã kugõ ka mẽ
hkõt omu. Anē.

Hãmri nē kupy nē ho mry
kagõ nhek nē Simãw Kar-
iot kra Jut Kariotja mã kugõ
nhũm kupy.

²⁷Pyrãk kôt nhũm Satanasti
tanhmã hkrã hto. Hãmri
nhũm Jejus te kot kãm amnhĩ
to nojarêt pyrãk o amnhĩ tã
kãm kapēr nē kãm:

—E kwa tokyx nã. Anē.

28-30 Hāmri nhūm kuma nē kato nē ma kamāt kô kamā htēm kurê kumrêx. Hāmri pa mẽ ixàpkur o ixkrī xwýnhjaja Jejus kot ã kãm kapêr anhÿrja ã kuma nē tee ri hkukamã ijamaxpêr. Hāmri nē kot ma mẽ hkĩnh ã mẽõ hkwy japrôr kaxyw ma htēm ã hkamnhĩx. Nhūm mẽ ixkwýjaja axtem Jejus kot mẽ kêp amrakati xwýnhjê mã mẽmoj nhôr ã kãm karõ nhūm ma mẽ hwÿr htēm ã hkamnhĩx. Kêp mẽ inhmã mẽ ixkàxpore jamãr o pa xwýnh jakamã pa mẽ ã ixtÿx mẽmoj tã hkamnhĩx anê.

Jejus akupÿm nojarêt nē mẽ kãm mẽmoj tã karõ hã harênh
Matêwre 22.39-40; mããnênh
Wam Juāw 3.11-24

31-32 Hāmri nhūm Jejus mẽ inhmã:

—Nà kot kaj mẽ tokyx mẽmoj pumu nē Tirtūm mã mex o mex ã harê nē ijaxwýja inhmã inhmex o inhmex ã ijarê. Kot kaj mẽ tokyx mẽmojta pumu kãm ga.

33 —Te mẽ apê ixkra pyràk tã kot paj arĩ ri mẽ akôt ixpa grire hāmri nē ma akupÿm api. Kot kaj mẽ tee ri jar ijapêr o ri apa nom nhÿri ixpumunh kêt nê. Nê kormã tokyx ma ixkôt apa hkêt nê.

34 —E kot paj axte mẽ amã mẽmoj tã karõ. Kormã ixte mẽ amã ja hã karõ hkêt. Kêr ka mẽ amã axpên kĩnh o ri apa. Te pa inhmã mẽ ajapê pyràk o axpên nhĩpêx rãhã ho ri apa.

35 Kot kaj mẽ ã amnhĩ nhĩpêx anê nhūm mẽ akwýjaja ja hã mẽ apumu

nē mẽ apê ixkwý hã mẽ apumunh kurê kumrêx. Anê.

Simāw Pêtre kot Jejus ã amnhĩ to hêx kukamã harênh
Matêwre 26.31-35; Makre
14.27-31; Rukre 22.31-34

36 Nhūm Jejus ã kot mẽ ixrer nē ma nhÿhÿm môr ã amnhĩ jarênh anê hāmri nhūm Simāw Pêtre tee ri kot amnhĩ jarênh ma nê kãm:

—Kwa Pahihti. Nhÿhÿm kot kaj kêt mō pa mẽ akôt ixpa hkêt nê? Anê.

Hāmri nhūm kãm:

—Nà ma inhmôr xàta wÿr kot kaj mẽ kormã ma ixkôt apa hkêt nê. Nom kot kaj mẽ nhÿrmã ma ixkôt apa. Anê.

37 Hāmri nhūm Simāw Pêtre kãm:

—Kwa mo kot pa mẽ omu nê tokyx ma akôt inhmrar kêt nê? Inhmã akôt ixtyk puma hkêt kênã. Kwār mẽ mãmrĩ atã xpi. Inhmã ajapê htÿx kumrêx kênã. Anê.

38 Hāmri nhūm Jejus kãm:

—Xà ãm hāmri na ka ã inhmã amnhĩ jarênh anê Simāw Pêtre? Xà amã ixkôt atyk puma hkêt? Kwa o kora. Koja apkati hkôt krãhyre hkàr kêt ri ka ra mẽ umaj ate ixkôt apa hkêt ã amnhĩ tã axàprãr o axkrunêpxi kãm ga. Kwa amnhĩ krã kamã ixkapêrja mã ajamaxpêr tÿx nê. Anê.

14

Jejus kot Tirtūm nhõ krĩ jarênh

Eprêw 11.16

1 Nhūm Jejus arĩ mẽ inhmã kapêr nē mẽ inhmã:

—Kwa ã ixte mẽ amã amnhĩ jarênh anhÿrja ma nê tee ri

amnhĩ kukamã ajamaxpêr nê akaprĩ hkêt nê. Arĩ amnhĩ kaxyw Tĩrtũm mẽ wa inhmã ajamaxpêr tỳx rãhã ho ri apa.

² Inhĩpêêxà nhõ krĩ kamã ixkre xohtôô. Âm hãmri na pa ã mẽ amã harênh anê. Tã kot paj ma akupỹm hwỳr api nê mẽ akutêp mã amã mẽ anhõrkwỹ ho mex.

³ Hãmri nê ho mex pa nê rĩ man akupỹn mẽ awỳr wrỳ. Hãmri nê ma akupỹm amnhĩ kôt mẽ ato ixàpir pa ka mẽ Tĩrtũm mẽ wa ixkôt apa rãhã apa ho apa. Jakamã kwa mẽ ri akaprĩ nê apa hkêt nê. Anê.

Jejus te kêp Tĩrtũm wỳr pry pyrãk

Epes 2.18

⁴ –Nê ma nhỹhỹm inhmõr xàta ra mẽ ate harênh mar mex. Nê hwỳr pryja mãânênh mẽ ate harênh mar mex. Anê.

⁵ Hãmri nhũm Tomas tee ri kuma nê kãm:

–Kwa mẽ ixte nhỹhỹm amõr xàta pumunhre hã kot pa kêt mẽ hwỳr pryja pumu. Anê.

⁶ Hãmri nhũm kãm:

–Kwa paa. Te ixpê Inhĩpêêxà hwỳr pry pyrãk. Na htem amnhĩ kaxyw inhmã hamaxpêr nê ixkôt amnhĩ xunhwỳ hãmri nê nhỹrmã ixkukwak ri pix mã ma Inhĩpêêxà mẽ wa inhõ krĩ hwỳr api. Ixkukwak ri pix mã na htem hprĩ hã Tĩrtũm kapêr ma. Nê ixkukwak ri pix mã na htem wa ixri htĩr tũm nê pa ho pa.

⁷ Kot kaj mẽ aprĩ hã ixpumu nê mãânênh te aprĩ hã Inhĩpêêxà pumunh pyrãk. Tã

ra mẽ ate tanhmã ixte amnhĩ nhĩpêx to hã ixpumunh mex jakamã mãânênh te ra mẽ ate Inhĩpêêxà kot amnhĩ nhĩpêx ã omunh mex pyrãk. Anê.

Jejus mẽ Tĩrtũm wa kot amnhĩ nhĩpêx tipxi hã wa harênh

Juãw 1.1, 10.30; Piripos 2.6; Korosê 2.9

⁸ Nhũm Jejus ã mẽ inhmã kapêr anê nhũm Firipti kuma nê kãm:

–Kwa nom mẽ inhmã inhno ho Anhĩpêêxà pumunh prãm. Kot pa mẽ omu nê ixkĩnh tỳx kumrêx. Anê.

⁹ Hãmri nhũm Jejus kãm:

–Kwa na pa pre ra mẽ akõt ri ixpa ryy nê. Ka mẽ aprĩ hã ixpumunh mex nê. Kêt ra mẽ kot ixpumunh mex xwỳnhjaja te mẽ kot mãânênh Inhĩpêêxàja no ho omunh mex pyrãk.

¹⁰ Wa ixte amnhĩ nhĩpêxja ãm tipxi. Xà ate kormã amnhĩ krã hi mã ixkapêr jaxàr tỳx kêt? Inhĩpêêxà mẽ wa ixte amnhĩ nhĩpêxja ãm tipxi. Nê kot axpên pyrãk. Jakamã na pa hte amnhĩ krã hkôt ri tanhmã amnhĩ nhĩpêx to ho ri ixpa hkêt nê. Âm Inhĩpêêxà nhỹ hã na pa hte ri tanhmã mẽ amã ixkapêr to ho ri ixpa. Nê hihtỳx xà ho tanhmã amnhĩ nhĩpêx to ho ri ixpa. Ka mẽ ja hã ixpumu nê te ano ho Inhĩpêêxà pumunh pyrãk.

¹¹ Kwa mẽ ixkapêr ma nê hkôt ajamaxpêr tỳx nê. Inhĩpêêxà mẽ wa ixte amnhĩ nhĩpêxja ãm tipxi. Nê kot axpên pyrãk. Rỳ ka mẽ tee ri ja kukamã ajamaxpêr japêr hãmri nê ixte aa mẽ ate mẽmoj

pumunh kêt kwỳ ho anhỹr ã mãn ixpumu nẽ ja hã wa ixte amnhĩ nhĩpêx tipxi kôt ajamaxpêr.

12 —Kwa mẽ ixkapêr ma nẽ amnhĩ krã kamã amnhĩ krãm haxàr tỳx nẽ. Mẽ ate amnhĩ kaxyw ixkôt ajamaxpêr xwỳnhjaja kot kaj mẽ ixte tanhmã amnhĩ nhĩpêx to ho ixpa hã ixpumu nẽ ixkôt ã amnhĩ nhĩpêx anhỹr o ri apa. Kot paj akupỹm Inhĩpêêxà hwỳr api nẽ kuri ixpa ho ixpa. Ka mẽ ixwakre kamã ixihitỳx xà ho tanhmã mẽ akwỳjê mã amnhĩ nhĩpêx to ho ri apa.

13 —Nẽ kot kaj mẽ apê ixkwỳ hã tanhmã mẽmoj tã ixwỳr to pa mẽ ama nẽ mẽ amã tanhmã mẽmoj nhĩpêx to. Mẽ kot omunh nẽ Inhĩpêêxà mex o mex ã omunh kurê kumrêx kaxyw.

14 Nà kot kaj mẽ apê ixkwỳ hã mẽmoj tã ixwỳ pa mẽ ama nẽ mẽ amã tanhmã mẽmoj to. Anẽ.

Jejus kot mẽ pahwỳr Tĩrtũm mẽ wa Karõ rẽn h ã kot amnhĩ jarẽn h

Juãw 7.37-39, 16.7-17; Atre 2.1-4; mããnẽn Rõmãn 5.5; Wam Korõt 12.7-11; Epes 3.16; Wam Juãw 2.27

15 Nhũm Jejus arĩ mẽ inhmã kapêr nẽ mẽ inhmã:

—Nà kot kaj mẽ amã ixkĩnh hã kot kaj mẽ ixkapêr kôt pix mã ri amnhĩ nhĩpêx rãhã ho ri apa.

16 —Kot paj akupỹm kaxkwa hwỳr api hãmri nẽ mẽ ato Inhĩpêêxà wỳ nhũm inhma nẽ mẽ awỳr kot mẽ ato ajuta xwỳnh maatita rẽ

nhũm man mẽ awỳr wrỳ nẽ mẽ akaxwỳnh mã agjê. Hãmri nẽ mẽ akôt tanhmã mẽ ato ajuta hto ho pa rãhã ho pa.

17 Wa Ixkarõ koja mẽ awỳr kurê nhũm mẽ amã agjê. Hãmri nẽ hprĩ hã mẽ amã Tĩrtũm kapêr o amnhĩrĩt o mẽ akôt pa ka mẽ aprĩ hã mar mex nẽ. No mẽ kêp Tĩrtũm kra hkêt xwỳnhjaja koja hprĩ hã wa Ixkarõ jarẽn h mar kêt nẽ. Mẽ kot wa ixkôt amnhĩ xunhwỳr kêt jakamã koja mẽ hkarõ mã gjêx kêt nẽ. ãm mẽ ate ixkôt amnhĩ nhĩpêx o apa xwỳnhjê pix wỳr koja wrỳ nẽ mẽ awỳr agjê nẽ mẽ akamã pa ho pa.

18 —Nẽ ixte mẽ arer nẽ ma inhmõr mã tã kot kaj mẽ te mẽ hã awrãre pyrã nẽ ahte atỳx ri apa pyrãk kêt nẽ. Kot paj te pa akupỹn mẽ awỳr ixwryk pyrã nẽ mẽ awỳr wa Ixkarõ rẽn nhũm mẽ akãm agjê nẽ mẽ akamã pa ho pa.

19 —Nẽ koja tokyx mẽ kot amnhĩ kaxyw Tĩrtũm mã hamaxpêr kêt xwỳnhjaja axte ixpumunh kêt nẽ. No mẽ papajaja kot puj mẽ tokyx axte nhỹri axpẽn pumu.

—Nẽ kot paj akupỹm ixtĩr hãmri nẽ ixtĩr tũm nẽ ixpa ho ixpa ka mẽ ixkukwak ri ajaxwỳja nhỹrmã Tĩrtũm mẽ wa ixri atĩr tũm nẽ apa ho apa.

20 —Tã koja wa Ixkarõ mẽ awỳr wrỳ nẽ mẽ akarõ mã agjê ka mẽ aprĩ hã Tĩrtũm mẽ wa ixte amnhĩ nhĩpêx ã wa ixpumunh mex kurê kumrêx. Te wa ixte amnhĩ nhĩpêx tipxi

pyràk o ka mẽ hã wa ixpumu. Nẽ mãânẽn mẽ papa-jaja te ra mẽ pahtipxi nẽ ri mẽ papa pyràk ka mẽ hã amnhĩ pumunh mex kurê kumrêx.

21 —Nẽ mẽ kãm ixkĩnh xwỳnhjaja na htem ixkapêr ma nẽ hkôt amnhĩ nhĩpêx o pa. Jakamã nhũm Tĩrtũm ixtã mẽ omu nẽ kãm mẽ hapê htỳx nẽ. Pa mãânẽn amnhĩ tã mẽ omu nẽ inhmã mẽ hapê htỳx nẽ. Jakamã kot paj mẽ kãm amnhĩ to amnhĩrĩt nhũm te mẽ kot no ho ixpumunh pyràk. Anẽ.

Nhũm pre ã Jejus hkôt mẽ ixpa ho mẽ ixpa xwỳnhjê mã amnhĩ jarênh anẽ.

22 Hãmri nhũm Jutre hõja. Jut Kariot kêt axtem Jutre hõja Jejus axte kot mẽ inhmã pix mã kot amnhĩ to amnhĩrĩt ã harênhja ma nẽ kãm:

—Kwa aprĩ hã mẽ inhmã mẽmoj jarê mẽ ijahkre xwỳnh. Mon ka mẽ kêp akwỳ hkêt xwỳnhjê mã axte amnhĩ to amnhĩrĩt kêt ã amnhĩ jarê? Nẽ ãm mẽ papxipix mã amnhĩ to amnhĩrĩt ã amnhĩ jarê? Anẽ.

23 Hãmri nhũm kãm:

—Nà mẽ amã ixkĩnh xwỳnhjaja na ka htem ixkapêr ma nẽ hkôt amnhĩ nhĩpêx. Nhũm Inhĩpêêxà ja hã mẽ apumu nẽ ixtã kãm mẽ ajapê htỳx nẽ. Hãmri pa wa mẽ akôt ixpa ho ixpa. Jao mẽ amã amnhĩ to amnhĩrĩt mex o ixpa.

24 Na pa hte amnhĩ krã hkôt ri mẽ kãm ixkapêr o ixpa hkêt nẽ. ãm Inhĩpêêxà nhỹ hã na pa hte mẽ kãm ixkapêr o ri

ixpa. Kot mẽ awỳr inhmẽn xwỳnhnta nhỹ hã. Tã nhũm mẽ kãm inhmar prãm kêt jakamã na pa hte wa mẽ kãm mẽ apyrà nẽ amnhĩ to amnhĩrĩt o ixpa hkêt nẽ.

25 —E na pa kormã ixte mẽ akôt ri ixpa ri ã mẽ amã amnhĩ jarênh anẽ.

26 Tã koja Inhĩpêêxà ixpãnhã mẽ awỳr wa Ixkarõ rẽ. Ixte hã mẽ amã ixàhwỳr xà hkôt. Hãmri nhũm man mẽ awỳr wrỳ nẽ mẽ akaxwỳnh mã agjê nẽ mẽ akôt ri tanhmã mẽ ato ajuta hto ho pa. Nẽ ra ixte ã mẽ amã ixkapêr anhỹrja koja hprĩ hã mẽ amã ho amnhĩrĩt mex nẽ. Ka mẽ amnhĩ krã kamã kãm ajamaxpêr nẽ hã ano htỳx nẽ ho apa. Anẽ.

Jejus kêp mẽ pajamakêtkati nhõr xwỳnh

Rõmãn 5.1; Karatas 5.22; Piripos 4.7; Korosẽ 3.15

27 Nhũm Jejus arĩ mẽ inhmã kapêr nẽ mẽ inhmã:

—Nẽ mẽ kêp ixkwỳ hkêt xwỳnhjaja na htem tee ri amnhĩ kukamã hamaxpêr o ri pa. Jao hkaprĩ nẽ pa. No pa na pa hte mẽ kurom ijamakêtkati nẽ ixkĩnh nẽ ri ixpa ho ixpa. Tã kot paj tanhmã mẽ ato ka mẽ ixpyrà nẽ ajamakêtkati nẽ axãmnhĩx akĩnh nẽ ri apa. Jakamã kwa mẽ ixte amnhĩ jarênh ma nẽ tee ri amnhĩ kukamã ajamaxpêr o amã ma ho ri apa hkêt nẽ.

28 —Na pa pre ra mẽ amã ma ixàpir nẽ nhỹrmã man akupỳn mẽ awỳr ixwrỳk ã mẽ amã amnhĩ jarê. Tã na

pa ra ma akupỹm Inhĩpêêxà hwỳr ixàpir mǎ. Kot amnhĩ to rax o kot ijakrenh. Kot paj akupỹm hwỳr api nē kuri inhmex nē ixpa ho ixpa. Tǎ ka mē amǎ ixkĩnh hǎ kot kaj mē ma akupỹm hwỳr ixàpir ǎ ijarēnh ma nē inhỹ hǎ akĩnh nē.

²⁹ —Kormǎ ma akupỹm ixàpir kêt ri na pa ǎ mē amǎ amnhĩ kukamǎ amnhĩ jarēnh anē. Kêr pa mēmo arĩgro hǎ ma akupỹm api ka mē ja hǎ ixpumu nē ajamaxpêr o: “Nà ǎm hāmri na pre mē inhmǎ amnhĩ kukamǎ akupỹm Hipêêxà hwỳr àpir ǎ amnhĩ jarê.” Anhỹr o ajamaxpêr. Jao ixkôt ajamaxpêr tỳx rǎhǎ ho ri apa.

³⁰ —Kot paj tokyx axte tanhmǎ mē amǎ ixkapêr to hkêt nē. Mē kêp ixkwỳ hkêt xwỳnhjê nhô pahihiti Satanastija na ra kot tanhmǎ ixto kaxyw. Nom koja tee ri tanhmǎ kǎm ixto hprǎm kaprỳ. Kurom ixihtỳx o ixihtỳx o ixte hakrenh par jakamǎ koja tanhmǎ ixto hkêt nē.

³¹ Kwǎr kǎm tanhmǎ ixto hprǎm xǎ hkôt tanhmǎ ixto pa omu. Inhmǎ Inhĩpêêxà hkôt ixte amnhĩ nhĩpêx prǎm jakamǎ kot paj jahti mǎ arĩ xa nhũm te tanhmǎ kot ixto pyrǎk o inhĩpêx nom tanhmǎ ixto hkêt nē. Mē ate inhmǎ Inhĩpêêxà japê htỳx ǎ ixpumunh kaxyw kot paj ǎ mē anoo mǎ amnhĩ nhĩpêx anē. Nē mē ate ixte kǎm tanhmǎ amnhĩ nhĩpêx to ho ri ixpa rǎhǎ mē kot ixpĩr ǎ ixpumunh kaxyw. E hāmri.

Ma pu mē mō nē amnhĩ to Tĩrtũm wỳ. Anē.

Nhũm pre ǎ Jejus hkôt mē ixpa ho mē ixpa xwỳnhjê mǎ kapêr anē. Pa mē kuma nē kǎnhmǎ ixkuhê nē inhnojarêt nhũm axte mē inhmǎ awjarê.

15

Jejus te kêp mēmo krô pyrǎk Karatas 2.20; Wam Juāw 2.28

¹ Nhũm Jejus arĩ mē inhmǎ kapêr nē mē inhmǎ:

—Nà te ixpê mēmo pĩ pê “uwa” anhỹr xwỳnhhta kahkô maati pyrǎk. Nē Inhĩpêêxàja te kot uwa hkre nē hamǎr o pa xwỳnhhta pyrǎk.

² Nē mē kot ixkôt amnhĩ xunhwỳr xwỳnhjaja te mē kot uwa kahkô rũm krô pyrǎk. Na hte mē hkwỳjaja htỳx ri kêp ixkwỳ hǎ amnhĩ jarēnh ǎ amnhĩ to hêx. Jao te kot krôja rǎ htǎ ô hkêt pyrǎk. Koja rǎ htǎ ô hkêt nē nhũm kot hamǎr xwỳnhja tee ri omu nē kahkô nê krǎhta nē kumê. No koja ô mex nē nhũm omu nē hkĩnh nē. Hāmri nē rǎ nē ô rax kaxyw tanhmǎ ho mex to. Tǎ na hte Tĩrtũm uwa krô jamǎr xwỳnhhta pyrǎ nē ǎ mē ate ixkôt amnhĩ xunhwỳr xwỳnhjê nhĩpêx anē.

³ No mē kajaja na ka prem mē kot ixkwỳ hǎ amnhĩ to hêx xwỳnhjê rom ixkapêr mar tỳx nē. Nē amnhĩ kaxyw inhmǎ ajamaxpêr nē ixkôt amnhĩ nhĩpêx mex o apa. Jao te mē ate krô rǎ nē ô rũnh pyrǎk o amnhĩ nhĩpêx.

⁴ —Na hte krôja amnhĩ krǎ hkôt ô hkêt nē. ǎm kahkô pix

kukwak ri na hte rã nê ô. Ja pyrã nê kot kaj mẽ ixkukwak ri pix mã inhmã hprãm xà hkôt ri tanhmã amnhĩ nhĩpêx to ho apa. Jakamã kwa kêr ka mẽ ixkapêr pix mãn mar o apa pa mẽ akôt ixpa ho ixpa.

⁵ Te ixpê kahkô nhũm te mẽ apê krô pyrãk jakamã kot kaj mẽ inhmã hprãm xà hkôt tanhmã amnhĩ nhĩpêx to ho ri apa nê te krô rã nê ô rũnh pyrãk o amnhĩ nhĩpêx. No kot kaj mẽ amnhĩ krã hkôt ri amnhĩ nhĩpêx o ri apa nê te krô grã nê ô hkêt pyrãk o amnhĩ nhĩpêx.

⁶ Na hte uwa krô nhõ dõnja nhỹri hã krô grã pumu hãmri nê kahkô nê hakà nê ma o mra nê kuwy kamã kurẽ nê ho hxêt pa. Ja pyrã nê mẽ kot htỳx ri ixkôt amnhĩ xunhwỳr ã amnhĩ jarênh xwỳnhjaja koja mẽ nhỹrmã amnhĩ xà htỳx kamã hamak rãhã ho pa.

⁷ —Tã no mẽ kajaja. Kêr ka mẽ ixkapêr kôt pix mã amnhĩ nhĩpêx rãhã ho ri apa. Te mẽ pahtixi nê ri papa pyrãk o amnhĩ nhĩpêx. Hãmri nê mãmri amã hprãm xà hkôt mẽmoj tã Tĩrtũm wỳ nhũm ama nê amã mẽmoj tã ate hwỳr xàta kôt kugõ.

⁸ Kot kaj mẽ Inhĩpêêxà mẽ wa ixkapêr kôt amnhĩ nhĩpêx o ri apa nhũm mẽ piitã ja hã mẽ apumu nê hamaxpêr o: “Hêxta waa nê. Jajaja na htem Tĩrtũm kot amnhĩ nhĩpêx o amnhĩ nhĩpêx o pa. Mãn Tĩrtũmja mex o mex.” Anhỹr o hamaxpêr.

⁹ —Nê na pa hte Inhĩpêêxà

kãm ijapê pyrãk o inhmã mẽ ajapê nê. Tã kêr ka mẽ amarĩ inhmã mẽ ajapê hã ri ixkôt amnhĩ nhĩpêx mex o apa.

¹⁰ Na pa hte ãm Inhĩpêêxà kapêr kôt pix mã ri amnhĩ nhĩpêx o ri ixpa. Jakamã na pa hte kãm ijapê hã ixkĩnh nê ri ixpa. Tã kêr ka mẽ ixpyrã nê ixkapêr kôt pix mã tanhmã amnhĩ nhĩpêx to ho ri apa. Nê ixpyrã nê inhmã mẽ ajapê hã amnhĩ pumu nê akĩnh nê ri apa.

¹¹ —E na pa ã mẽ amã ixkapêr anê. Mẽ ate inhmar nê ixpyrã nê axãmnhĩx ajamakêtkati nê akĩnh nê ri apa kaxyw. Tã kêr ka mẽ ã amnhĩ nhĩpêx anê nê te pa ixte ã amnhĩ nhĩpêx anhỹr pyrãk. Anê.

Jejus kot mẽ pamã axpên kĩnh tỳx ã mẽ pamã karõ

¹² Nhũm Jejus arĩ mẽ inhmã kapêr nê mẽ inhmã:

—E kêr ka mẽ te inhmã mẽ ajapê pyrãk o mẽ amã axpên japê ho mẽ amã axpên kĩnh o ri apa. Jao axpên to mex o ri axpên kôt apa.

¹³ Koja mẽhõ kãm hkrãmnhwỳ japê htỳx nê nhũm ra mẽhõ mẽmo mỳrapê kot kêp hpĩr mã nhũm tee ri hã omu nê nê kãm amnhĩ mẽ nhũm kupĩ. Hãmri nhũm mẽ ja hã omu nê kãm hkrãmnhwỳ japê htỳx ã nê htyk ã axpên mã harê.

¹⁴⁻¹⁵ —E kot paj axte mẽ apê inhmã mẽ axapênh xwỳnh ã mẽ ajarênh kêt nê. Na hte mẽ ô patrãwjaja hprĩ hã kãm mẽ apênh xwỳnhjê mã amnhĩ jarênh kêt nê. Na htem ãm mẽ

apênh pix ã mẽ kurê. Nom mẽ kajaja mẽ ate ixkapêr mar nê hkôt pix mã amnhĩ nhĩpêx jakamã kot paj hpãnhã mẽ apê ixkràmnhwý hã mẽ ajarê. Na htem axpên to hkràmnhwý nê ma nhỹhým pa kaxyw nê tanhmã amnhĩ kukamã hkràmnhwý mã amnhĩ jarênh to. Tã mẽ apê ixkràmnhwý jakamã na pa hte ã amnhĩ kukamã mẽ amã amnhĩ jarênh anê. Nom ja pix jarênh kêt nê. Na pa hte mãânên Inhĩpêêxà xô ri mẽ amã mẽmoj piitã ho amnhĩrît o mẽ akôt ixpa.

16 –Nê mẽ kajaja na ka prem ixpê mẽ akràmnhwý kaxyw ixãm kêt nê. Pa na pa pre amnhĩ kaxyw inhmã mẽ aprãm. Ixkapêr kôt pix mã ri mẽ ate tanhmã amnhĩ nhĩpêx to ho apa kaxyw. Te uwa krô ô rûnh nê aa grà hkêêta pyrãk. Jakamã kot kaj mẽ mẽmoj tã Inhĩpêêxà wý nhũm mẽ ama nê mẽ ate mẽmoj tã hwýr xà hkôt amã kugõ.

17 –E. Kwa kêr ka mẽ amã axpên kĩnh nê tanhmã axpên to ajuta hto ho axpên mã mẽmoj kutã anojarêt pix o mãn kêt ri apa. Nà ja na kêt inhmã hprãm. Anê.

Mẽ kot Jejus kwýjê kamã gryk xwýnhjê jarênh

Matêwre 10.22; mãânên Juãw 7.7, 17.14; Wam Juãw 3.13

18 –Nê koja ixkwý hkêt xwýnhjaja kãm mẽ aprãm nõkati. Tã kêr ka mẽ amnhĩ tã mẽ omu nê tee ri amnhĩ kukamã ajamxpêr kêt nê. Ixkumrêx na prem kãm

ixprãm nõkati. Tã koja mẽ mã ixtã mẽ ato anê nê kãm mẽ aprãm kêt nê.

19 Mẽ apê mẽ hkwý ronhỹx mẽ amnhĩ tã mẽ apumu nê kãm mẽ ajapê nê. Nom apê mẽ hkwý hkêt. Ra ixte amnhĩ kaxyw mẽ arênh jakamã na htem tee ixtã mẽ apumu nê kãm mẽ akĩnh kêt o kãm mẽ akurê nê.

20 Koja mẽ ixtã hpijaàm kêt nê nê mãânên mẽ atã hpijaàm kêt nê. Nê mẽ anhĩpêx o te mẽ kot pa ixpê mẽ anhõ patrãw nhĩpêx pyrãk. Ka mẽ ixpyrà nê amnhĩ xà htýx kãm ajamak o ri apa. Na pa pre ra mẽ amã ja jarê. Nom koja mẽ akwýjaja jajê rom te ra mẽ kot ixkapêr mar nê hkôt amnhĩ nhĩpêxta pyrã nê mãânên mẽ akapêr ma nê hkôt amnhĩ nhĩpêx o pa. Kwa kêr ka mẽ ixkapêrja mã mãn ajamxpêr týx rãhã ho ri apa.

21 –Koja mẽ ixtã tanhmã mẽ anhĩpêx to. Mẽ kot Tirtũm kapêr kôt amnhĩ nhĩpêx kêt jakamã koja mẽ ã ixtã mẽ anhĩpêx anê. Tirtũm kot mẽ awýr inhmênh kôt hamaxpêr kêt nê ã mẽ anhĩpêx anê.

22 Ixwryk nê mẽ kãm Tirtũm kapêr jarênh o ri ixpa htã nhũm mẽ inhma nê ãm inhma nê ixkôt amnhĩ nhĩpêx kêt nê. Jakamã koja mẽ kot amnhĩ tomnuj xwýnh ã amnhĩ to hpimxur kêt nê.

23 –Nê koja mẽhõ kêp ixprãm nõkati nê mãânên te kêp Inhĩpêêxà prãm nõkati pyrãk.

24 Na pa pre mẽ piitã mẽ hkôt aa mẽ kot mẽmoj pumunh kêt kwý ho anhýr

o ri mẽ hkôt ixpa nhũm mẽ hã ixpumu. Ām papxpix na pa pre ã amnhĩ nhĩpêx anhỹr o ri mẽ hkôt ixpa nhũm mẽ hã ixpumu. Kêp ãm mẽ kot ja hã ixpumunh kêt ronhỹx prem axpẽn mã ijarẽnh o: “Tk. Mẽ pahte mẽhõja nhỹhỹnh mẽ pahwỳr hpôx ã omunhre hã kot puj kêt mẽ ri hã pahpijaam o ri papa.” Anhỹr o nhỹx prem axpẽn mã ijarẽ. Tã ra mẽ kot ja hã ixpumunh mex tã axtem nẽ Inhĩpêêxà mẽ wa mẽ kãm wa ixkurê nẽ. Jao mẽ kot amnhĩ tomnuj xwỳnh ã amnhĩ to hpimxur kêt nẽ.

²⁵ No Tĩrtũm kapêr ã kagà htũm kot mẽ hkukamã mẽ harẽnh nẽ mẽ hã kagà nẽ kot mẽ hã kagà kot:

Mẽmo tanhmã kute mỳrapê
na htem kãm ixkurê?
Nà ãm amarĩ na htem
kãm ixkurê ho pa. Anẽ.

Tã ã ixtã kagà kot anhỹr xà hkôt na htem ã kãm ixkurê anẽ. Jakamã koja mẽ mãânẽn ixtã kãm mẽ akurê nẽ. Nom kêr ka mẽ arĩ mẽ kãm ixkapêr jarẽnh o ri mẽ hkôt apa nẽ tee ri amnhĩ kukamã ajamxpêr kêt nẽ.

²⁶ –Nẽ tokyx ma akupỹm Inhĩpêêxà hwỳr ixàpir mã tã kot paj hwỳr pøj nẽ aa mẽ ato ijamakêtkati hkêt nẽ. Kot paj amnhĩ pãnhã mẽ awỳr wa Ixkarō rẽ. Mẽ kot kãm: “Mẽ kutã nojarêt xwỳnh maati” anhỹr xwỳnhhta kot paj mẽ awỳr kurê nhũm ixpãnhã mẽ awỳr wrỳ nẽ mẽ amã agjê nẽ hprĩ hã mẽ amã Tĩrtũm mẽ wa ixto amnhĩrit o ri mẽ akôt pa.

²⁷ Kot kaj mẽ ama hãmri nẽ ma mẽ piitã mẽ hkôt ri mẽ kãm ixkapêr jarẽnh o ri apa. Na pa pre ra mẽ kãm Tĩrtũm kapêr jarẽnh ryy ho mẽ hkôt ri ixpa ka mẽ ixkôt ri inhmar o apa ry nẽ. Jakamã kêr ka mẽ ixwakre kamã arĩ mẽ kãm ixkapêr jarẽnh o ri mẽ hkôt ri apa. Anẽ.

16

¹ Nhũm Jejus arĩ mẽ inhmã kapêr nẽ mẽ inhmã:

–Nẽ mẽ kot nhỹrmã ixtã tanhmã mẽ anhĩpêx to nhũm mẽ ate tee ri amnhĩ kukamã ajamxpêr nẽ mẽ umaj ixkaga pymaj na pa hte ã mẽ amã ixprĩ hã mẽmoj jarẽnh ry anẽ.

² Kot kaj mẽ kãm ixkapêr jarẽnh o ri apa nhũm mẽ hkwyjaja tee ri mẽ ama nhũm ja mẽ kêp omnuj nẽ. Nhũm mẽ Tĩrtũm kapêr o mẽ ahkre xà hã ixkreja rũm amnhĩ nẽ mẽ ajano nẽ mẽ akwỳjê hpar o pa. Hãmri nẽ hamxpêr o: “E pu mẽ axte mẽ hkwyjê pynê nẽ mẽ kupa. Tĩrtũm kãm ja mex kênã.” Anhỹr o htỳx hamxpêr o pa.

³ Mẽ kot hprĩ hã Inhĩpêêxà mẽ wa ixkapêr mar mex kêt nẽ ã htỳx wa inhmã ja mex ã wa ijarẽnh anẽ.

⁴ Nom mẽ ate ixkôt amnhĩ xunhwỳrta krax kãm na pa pre ã mẽ amã mẽ harẽnh anhỹr kêt nẽ. Arĩ mẽ akôt ixpa kênã. Kot ka mẽ ixkôt apa rãhã amã mẽ uma hkêt nẽ. Tã pa ra akupỹm inhnojarêt nẽ ã mẽ amã mẽ harẽnh anẽ. Jakamã koja mẽ nhỹrmã

ã mẽ anhipêx anê ka mẽ amnhĩ tã mẽ omu nê ra ixte mẽ akukamã ã mẽ harênh anhÿrja mã ajamexpêr kurê kumrêx nê tee ri amnhĩ kukamã ajamexpêr kêt nê. E kwa ixkapêrja mãn mẽ amnhĩ krã him haxàr tÿx nê ri hã apa. Anê.

Jejus mẽ Tirtũm wa hkarõ jarênh

⁵⁻⁶ Nhũm Jejus arĩ mẽ inhmã kapêr nê mẽ inhmã:

—E na pa ra kot mẽ awÿr inhmênh xwÿnhhta wÿr ra akupÿm inhnojarêr ka mẽ ixte amnhĩ jarênh ã inhma nê akaprĩ nê. Nê tee ri amnhĩ kukamã ajamexpêr tã mẽ atõ aprĩ hã ma inhmõr xà ã ixkukjêr kêt nê. Rÿ inhmã: “Kwa mo kaxyw kot kaj kêt mẽ ixre nê ma akupÿm mõi? Xà we ja amã mex?” Anhÿr o mẽ atõ ixkukjêr kêt nê.

⁷ Kêt ma akupÿm ixàpirja mẽ amã mex kumrêx. Kop ãm akupÿm ixàpir kêt ronhÿx mẽ amã mẽmoj kutã nojarêr xwÿnhhta ixpãnhã mẽ awÿr wrÿk kêt nê. Tã kot paj ma akupÿm api nê amnhĩ pãnhã mẽ awÿr kurê. Jakamã kwa mẽ ja ma nê tãm ajamexpêr o ri apa.

⁸ Koja ixpãnhã mẽ awÿr wrÿ hãmri nê mẽ kêp ixkwÿ hkêt xwÿnhjê mã mẽmoj to axkrunêpxi nê ho amnhĩrît. Koja mẽ kãm mẽ kot tanhmã amnhĩ tomnuj to xà ho amnhĩrît. Nê mãânên mẽ kãm tanhmã mẽ kot amnhĩ to mex to xà ho amnhĩrît. Nê mãânên Tirtũm kot nhÿrmã mẽ kot amnhĩ tomnuj mÿrapê

tanhmã mẽ homnuj to xàta nhũm mãânên mẽ kãm ho amnhĩrît. Koja mẽ kãm ja piitã ho amnhĩrît.

⁹ —Jakamã koja mẽ ja kukamã tanhmã hamexpêr to nê hamexpêr o: “Kwa kot paj xep amnhĩ tomnuj kaga nê amnhĩ kaxyw Tirtũm Kra Jejus mã ijamexpêr nê hkôt amnhĩ xãm kêt nhũm Tirtũm nhÿrmã ixte amnhĩ tomnuj mÿrapê tanhmã ixto.

¹⁰ Nà kot paj hkôt amnhĩ xãm hãmri nê ra uràk nê Tirtũm kapêr kôt tãm ri amnhĩ nhípêx o ixpa. Na pre Jejus tãm ri amnhĩ nhípêx o pa nhũm Tirtũm amnhĩ wÿr ho api pa mẽ axte jar nhÿri omunh kêt nê.

¹¹ Na xep Tirtũm nhÿrmã kot ma kuwy hwÿr mẽ kêp Jejus kwÿ hkêt xwÿnhjê nhõ pahi maatija mênh ã ra amnhĩ kukamã hã amnhĩ jarê. Jakamã kwa arĩ ixpê hkwy jakamã kot paj tokyx Jejus kôt amnhĩ xãm kêt nhũm hkôt kuwy hwÿr inhmê.” Anhÿr o hamexpêr. Koja ã wa Ixkarõja mẽ kêp ixkwÿ hkêt xwÿnhjê mã mẽmoj to amnhĩrît mex anê.

¹² —Nê na pa kormã mẽ amã mẽmoj piitã ho amnhĩrît kêt nê. Kormã mẽ ate aprĩ hã mẽmoj pumunh nê mar mã tãm kêt.

¹³ Tã koja ixpãnhã wa Ixkarõ mẽ awÿr wrÿ nê mẽ akarõ mã agjê hãmri nê hprĩ hã mẽ amã Tirtũm kot amnhĩ nhípêx o amnhĩrît o mẽ akôt pa ho pa. Nom koja amnhĩ krã hkôt tanhmã mẽ amã ho amnhĩrît to hkêt nê. Koja ãm

Tirtūm pix xō ri mē amā ho amnhīrit o mē akōt pa. Jao hprī hā mē amā ixkōt mē ate amnhī nhīpêx nyw o mē amā amnhīrit o mē akōt pa. Ā koja hprī hā ra ixte mē amā ixujarēnh xā hkōt axte mē amā mēmoj to amnhīrit mex o pa anē.

14—Nē koja hprī hā mē amā pa ixto amnhīrit o pa. Jao mē amā inhmex o inhmex ā ixto amnhīrit o mē akōt pa.

15 Inhīpêxā mē wa ixkapērja ām htipxi. Tā koja wa Ixkarō ixkapēr xō ri ā mē amā mēmoj to amnhīrit anē. Jao ra wa ijamē wa ixkapēr o amnhīrit mex o pa. Koja ā wa mē apē ixkwý hā mē ato mex o pa anē. Anē.

Mē kot akupým Jesus tīr ā omunh ā mē harēnh

16 Nhūm Jesus arī mē inhmā kapēr nē mē inhmā:

—Nē kot paj tokyx mē ano pē akunok ka mē axte amnhī kaēx ā ixpumunh kēt nē. Nom kwa kēr ka mē tee ri ixkapērja kukamā ajamaxpēr kēt nē. Kot paj ixtā apkati grēre ka mē axte ixpumu. Anē.

17-18 Nhūm pre ā Jesus hkōt mē ixpa ho mē ixpa xwýnhjē mā kapēr anē. Pa mē tee ri ā kapēr anhýr ā kuma nē xpēn mā:

—Kwa mo na ri ā amnhī jarēnh anē? Nē tokyx mē pano pē pikunor tā hā apkati grēre nhūm axte mē pahte omunh ā amnhī jarē nē akupým Hipêxā hwýr àpir ā amnhī jarē. Pēr kapērja ām ri katii. Anē.

19 Nhūm amnhī tā mē inhma nē mē inhmā:

—Kwa xā na ka mē kormā aprī hā ixkapēr ā inhmar kēt nē?

20 Kot paj ty nhūm mē kēp ixkwý hkēt xwýnhjaja ijarēnh ma nē hkīnh nē. No mē kajaja kot kaj mē akapri nē amýr o apa. Nē gaa nē akupým akīnh nē. Kwa mē ixkapērja ma nē kām ajamaxpēr týx o apa.

21 Te mē ate mē hpijagri xwýnh kot amnhī nhīpêx pyrāk. Na htem ōhy xā nē gaa nē ra ōhy xā htýx nē. Nē hkīnh kēt nē tee ri amnhī nhīpêx o hikwý. Tā gaa nē hpijagri nhūm hkrare kato nhūm omu nē akupým hkīnh nē axte ōhy xā htýx mā hamaxpēr kēt nē.

22 Tā ā mē ate amnhī nhīpêx anhýr kaxyw. Kot kaj mē akīnh kēt nē ri apa. Tā kot paj akupým tokyx ixtīr nē axte mē awýr ixkato ka mē ixpumu nē akīnh nē. Hāmri nē akīnh rāhā ri apa ho apa. Nhūm mēhō mē apumu nē tee ri tanhmā mē akīnh nē mē ato kapry ka mē arī akīnh rāhā ri apa ho apa.

23 —Nē ixte akupým kaxkwa hwýr ixàpir nē amnhī pānhā mē awýr wa Ixkarō rēnh nhūm mē awýr wryk nē hprī hā mē amā mēmoj piitā ho amnhīrit jakamā kot kaj mē axte amā mēmoj tā ixkukjēr prām kēt nē. Anē.

Jesus kwýjaja kot àmnhix mēmoj tā Tirtūm wýr

Matēwre 18.19-20; Juāw 14.13-14

Nhũm Jejus arĩ mẽ inhmã kapêr nê mẽ inhmã:

—E kwa mẽ ã ixkapêr anhÿrja ma nê amnhĩ krã kamã kãm ajamxpêr tÿx nê ho apa. Kot kaj mẽ apê ixkwÿ hã mẽmoj tã Inhĩpêêxà wÿ nhũm mẽ ama nê mẽ ate hã axàhwÿr xà hkôt mẽ amã mẽmoj tanhmã ho rÿ mẽ amã mẽmoj gõ.

²⁴ Na ka mẽ kormã apê ixkwÿ hã mẽmoj tã axàhwÿr kêt nê. Tã kêt ka mẽ amã mẽmoj tã hwÿr prãm nê mãmri mẽmoj tã hwÿr o apa. Kê mẽ ama hãmri nê tanhmã mẽ amã mẽmoj nhĩpêx to ka mẽ amnhĩ tã omu nê akĩnh nê.

²⁵ —Nê na pa pre mẽ amã mẽmoj jarênh kaxyw nê mẽmoj tã haxwÿ nê mẽ amã ixujarênh rax nê. Nom kot paj axte ã mẽ amã ri ixujarênh anhÿr kêt nê. Kot paj tã ixprĩ hã mẽ amã tanhmã Inhĩpêêxà jarênh to ka mẽ aprĩ hã mar mex kurê kumrêx.

²⁶ Hãmri nê mẽ kamjaja mẽ apê ixkwÿ hã tanhmã amnhĩ to hwÿr to ho apa. Jakamã mo kaxyw kot pa kêt axte tanhmã mẽ ato hwÿr to? Kot kaj mẽ kamjaja amnhĩ to hwÿr jakamã arĩ ixte mẽ ato hwÿr kaxyw ixto presija hkêt nê.

²⁷ —Na ka mẽ ra amã ijapê nê. Nê ixte Inhĩpêêxà rũm mẽ awÿr ixwrÿk ã ixpumu. Jakamã nhũm Inhĩpêêxàja ixtã mãânên kãm mẽ ajapê nê. Tã kot kaj mẽ kamjaja mẽmoj tã amnhĩ to hwÿr o apa nhũm mẽ ama nê kãm mẽ ajapê htÿx kãm mẽ amã mẽmoj gõ.

²⁸ —Na pa pre Inhĩpêêxà rũm amnê mẽ awÿr wrÿ. Hãmri nê kãm hprãm xà hkôt tanhmã amnhĩ nhĩpêx to hpar o mō nê ra akupÿm hwÿr inhnojarêt kaxyw. Anê.

Nhũm pre ã Jejus mẽ inhmã amnhĩ jarênh anê.

²⁹ Pa mẽ tã ixprĩ hã mar mex nê. Hãmri nê kãm:

—Tÿ. Nà na pa mẽ tã ixprĩ hã ate amnhĩ jarênh ma. Ka amnhĩ tã haxwÿr nê axujarênh kêt jakamã pa mẽ tã ixprĩ hã amar mex nê.

³⁰ Pêr ãm ate mẽmoj piitã omunh par xwÿnh na ka. Jakamã ate mẽ ijamxpêr piitã hkôt aprĩ hã mẽ ixpumunh par kumrêx kênã kot ka tanhmã mẽ ijamxpêr to hã mẽ ixkukja. ãm hãmri na ka Tirtũm rũm awrÿk ã amnhĩ jarê. Anê.

³¹ Hãmri nhũm mẽ inhma nê mẽ inhmã:

—Xà ãm hãmri na ka mẽ ixkôt ajamxpêr tÿx nê?

³² Kwa mẽ o kora. Kot kaj mẽ tokyx mẽ umaj ixre nê angrà nê ma ahpÿnhã mẽ anhõ krĩ hwÿr mra. Mẽ kot ixkôt tanhmã mẽ anhĩmex to pymaj kot kaj mẽ ã amnhĩ nhĩpêx anê kãm ga. Kot paj ahte mẽ kãm ixãm pyræk o amnhĩ nhĩpêx nom ahte ixãm kêt nê. Inhĩpêêxà aa kot ixrere hã.

³³ —E ixkukwak ri mẽ ajamakêtkati nê axàmnhĩx mẽ apa kaxyw na pa ã mẽ amã ixkapêr anê. Nom mẽ kêp ixkwÿ hkêt xwÿnhjaja koja nhÿrmã ixtã mẽ atomnuj tÿx o pa. Tã kêt ka mẽ amã mẽ uma nê tee ri amnhĩ kukamã

ajamaxpêr o ri apa hkêt nê. Nhÿrmã ixte mêmôj punuj piitã ho ijapêx par ã arÿgrota ã kot paj mē atã mē ho ijapêx par kumrêx. Anê.

17

Jejus kot amnhĩ to Tirtũm wÿr ã harênh

Rômãn 8.34; Eprêw 7.25

¹ Tã nhũm Jejus mē inhmã kapêr pa nê hpãnhã kaxkwa hwÿr rît nê Tirtũm mã amnhĩ jarê nê kãm:

“Pa Papaj. E na pa ra amã hprãm xà hkôt tanhmã amã amnhĩ nhÿpêx to hpar o mō nê akupÿm awÿr inhnojarêt kaxyw. Jakamã kot kaj ixpê Akra hã ma akupÿm amnhĩ wÿr ixto api. Mē kot ja hã ixpumunh nê amã amex o amex ã ajarênh o pa kaxyw.

² Na ra pyka piitã hkôt ri mē pa xwÿnh kwÿjaja amnhĩ kaxyw ixkôt hamaxpêr nê ixkôt amnhĩ xunhwÿ nom ka na ka pre inhmã mē agō. Ixte mē htĩr tũm nê mē pa mã xwÿnh ã mē harênh kaxyw. Jakamã koja mē nhÿrmã ixkukwak ri pakuri htĩr tũm nê pa ho pa.

³ Na mē ra ixkapêr mar mex nê. Nê ixpê Jejus Kris pê ate mē hwÿr inhmēnh xwÿnhja kôt hamaxpêr mex nê. Nê apê Tirtũm ã ãm apyxi mex ã mãânên akôt hamaxpêr mex nê. Nê amex o amex ã akôt hamaxpêr nê kãm akĩnh nê. Jakamã koja mē nhÿrmã pakuri htĩr tũm nê pa ho pa. Nã koja mē anê.

⁴ Amnepêm amnê pyka ja hwÿr inhnojarêt nhũm ate tanhmã ixte amnhĩ nhÿpêx to hã inhmã karōta na pa ra hatur xàm mēnh kaxyw. Na pa xatã mē kãm akapêr jarênh o ri mē hkôt ixpa. Jao ra mē kãm apê Pahi Maati hã apixi mex ã ajarê nê amex o amex nê axàhpumunh o axàhpumunh ã mē kãm ajarênh o ri ixpa.

⁵ Jakamã e Papaj. Kêr ka tokyx ixpê akra hã ma akupÿm amnhĩ wÿr ixto api. Pa akupÿm awÿr pōj nê te amnepêm akuri ixpaja pyrã nê axte akuri ixpa ho ixpa.” Anê.

Jejus kot hkwÿjê ho Tirtũm wÿr ã harênh

Nhũm Jejus arĩ Tirtũm mã kapêr nê kãm:

⁶ “E Papaj. Nã ra ate pyka hkôt inhmã mē òr xwÿnhjaja na pa ra mē kãm akapêr jarênh ryy ho ri mē hkôt ixpa nhũm mē akapêr kôt pix mã amnhĩ nhÿpêx o pa.

⁷ Tã ixte anhÿ hã tanhmã amnhĩ nhÿpêx to ho ri ixpaja ra mē kot ja hã ixpumunh mex.

⁸ Na pa pre hte axô ri mē ahkre ho ri ixpa nhũm mē amnhĩ kaxyw ixkôt hamaxpêr mex nê. Nê ate mē hwÿr inhmēnh nhũm mē hwÿr ixwrÿkja ã mē kot ixpumunh mex.

⁹⁻¹⁰ Tã ot pa mē ho awÿr o xa. Nom na pa mē kēp ixkwÿ hkêt xwÿnhjê ho awÿr kêt nê. ãm ate inhmã mē òr xwÿnhjê pix o na pa

awỳ. Mě kêp akra jakamã mãânên mẽ kêp ixkraa. Jakamã na htem pamã pamex o pamex ã pajarênh o ri pa.

11 Axihtỳx o axihtỳx jakamã na ka pre amnhĩ xwar inhmã axihtỳx xà hkwỳ gō pa te ixte axihtỳx pyràk. Tã na pa ra akupỳm awỳr inhnojarêr kaxyw. Kot paj jar pyka hkôt ri ixpa ry hkêt nê. Nom ixkwỳjaja koja mẽ arĩ kamã pa jakamã kwa Papaj. Kêr ka inhmã mẽ omunh mex nê kê mẽ inhỹ hã tãm ri amnhĩ nhĩpêx o pa. Nê pahpyrà nê te ixkre tipxi kamã mẽ htipxi nê mẽ pa pyràk o axpênh kôt pa.

12 Kormã mẽ kamã ixpata ã ate inhmã axihtỳx xà hkwỳ nhōrta o pa mẽ htãnopxar mex o ri mẽ hkôt ixpa. Jakamã nhũm mẽ ri ixkôt amnhĩ nhĩpêx o pa. ãm Jut Kariot pix koja mẽ hkĩnhã tanhmã amnhĩ tomnuj to nê hapêx. No ãm ra akapêr ã kagà kot hkukamã ã kot amnhĩ nhĩpêx anhỹr ã harênh xàja kôt koja ã amnhĩ nhĩpêx anê nê hapêx.

13 Tã na pa ra akupỳm awỳr inhnojarêr kaxyw jakamã na pa ixte tokyx mẽ rer mã xwỳnhjê ho awỳr o xa. Kormã mẽ hkôt ri ixpa ri. Mẽ kot inhmar nê ixpyrà nê hkĩnh nê hamakêtkati nê ri pa kaxyw.

14 Na pa pre ra mẽ kãm akapêr jarênh ry nê nhũm

mẽ ixpyrà nê akôt pix mã amnhĩ nhĩpêx o ri pa. Jakamã nhũm hte mẽ kêp ixkwỳ hkêt xwỳnhjaja tee ri ja hã mẽ omu nê axtem nê kãm mẽ hkurê nê. Nom mẽ kêp mẽ hkwỳ hkêt jakamã na htem ã mẽ kamã gryk anê.

15 Tã na pa ã mẽ ho awỳr anhỹr o xa. Nom mẽ kot amnhĩ tomnuj xwỳnhjê hkàx ã mẽ pa kaxyw na pa mẽ ho awỳr kêt nê. Koja mẽ arĩ mẽ hkôt ri pa. Nom mẽ uràk nê amnhĩ tomnuj o pa pumaj na pa ã mẽ ho awỳr anê.

16 Mẽ kêp mẽ hkwỳ hkêt. Axtem mẽ kot amnhĩ nhĩpêx. Te mẽ kot mẽ pahte amnhĩ nhĩpêx pyràk jakamã kê mẽ amarĩ mẽ hkôt pa htã mẽ kot amnhĩ nhĩpêx kôt amnhĩ nhĩpêx o pa hkêt nê. ãm pahkôt pix mã amnhĩ nhĩpêx o pa.

17 Akapêr pix na mex o mex jakamã koja mẽ hkôt amnhĩ nhĩpêx o pa nê gaa nê te pahte amnhĩ nhĩpêx pyràk o amnhĩ nhĩpêx.

18 Na ka pre amnê mẽ hwỳr inhmê pa pre ixte mẽ kãm akapêr jarênh o ri ixpa kaxyw mẽ hwỳr wrỳ. Nê amnhĩ pyrà nê mẽ kot akapêr jarênh o mẽ hkôt pa kaxyw pa mẽ kurê nê ma mẽ hwỳr mẽ kurê.

19 Inhmã mẽ hapê jakamã kot paj amnhĩ grônh kôt nhãm mẽ kot axpênh mã ri inhgrônh o pa xwỳnhjê mã amnhĩ gō. Amã hprãm xà hkôt. Ixkwỳjaja kot ja hã ixpumunh nê ixpyrà nê

amã hprãm xà hkôt pix mã tanhmã amnhĩ nhĩpêx to ho pa kaxyw.” Anê.

Jejus kot hkrajê piitã ho Tirtũm wÿr

²⁰ Nhũm Jejus arĩ Tirtũm mã amnhĩ jarê nê kãm:

“Tã na pa ã jajê ho awÿr anê Papaj. Nom ixkôt mẽ pa ho mẽ pa xwÿnhjê pix o na pa awÿr kêt nê. Mãânên mẽ ô ri nhÿrmã mẽ kot ixkôt amnhĩ xunhwÿr mã xwÿnhjaja na pa mẽ ho ixpimràã tã mẽ ho awÿr.

²¹ Kê mẽ pahpyrà nê te hamaxpêr tipxi pyrà nê ri axpên to pa. Nê pahte amnhĩ nhĩpêx kôt pix mã amnhĩ nhĩpêx o pa. Kojã mẽ ã amnhĩ nhĩpêx anhÿr o pa nhũm mẽ kêp pahkwÿ hkêt xwÿnhjaja pahtã mẽ omu nê ate mẽ hwÿr inhmênh ã apumunh kurê kumrêx.

²² Nê kojã mẽ ixkukwak ri panhÿ hã te pahpyrà nê hamaxpêr tipxi nê ri pa pyràk o amnhĩ nhĩpêx o pa.

²³ Na pa htem te ixkre tipxi kamã mẽ ixtipxi pyràk o axpên nhĩpêx o ri ixpa. Te pahte axpên nhĩpêxta pyràk. Tã kojã mẽ ixwakre kamã ã axpên nhĩpêx anhÿr o pa nhũm mẽ kêp pahkwÿ hkêt xwÿnhjaja ja hã mẽ omu nê hamaxpêr o: ‘Nà pêr ãm hãmri na pre Tirtũm tãm mẽ pahwÿr Jejus mẽ. Kãm hapê htÿx tã mẽ pahwÿr kumê nhũm wrÿ nê amnhĩ xwar kãm hkwÿjê japê nê.’ Anhÿr o kojã axpên mã pajarênh o pa.

²⁴ Amnepêem amrakati ri pa pre amã ijapê hã ri ixpa. Tã ot pa jajê ho awÿr. Ka na ka pre inhmã mẽ agô. Tã ma awÿr inhmôr mã xàta wÿr na pa inhmã mẽ àpir prãm nê. Kojã mẽ nhÿrmã ma pahwÿr api pu mẽ pahpiitã pahpimràãtã pamã axpên japê hã ri papa ho papa.

²⁵ E Papaj. Amex o amex tã mẽ kêp ixkwÿ hkêt xwÿnhjaja na kormã ate mẽ hwÿr inhmênh xwÿnh ã ixkôt hamaxpêr kêt nê. Nom mẽ kot ixkôt amnhĩ xunhwÿr xwÿnhjaja na mẽ kurom ja hã ixkôt hamaxpêr mex nê.

²⁶ Na pa ra ixprĩ hã mẽ kãm akapêr o amnhĩrit o ri ixpa. Tã kot paj axte mẽ kãm akapêr kwÿ jarê. Amã ijapêta pyrà nê mẽ kãm axpên kĩnh ã axpên to pa kaxyw na pa mẽ kãm hã karô. Kot paj inhĩ hã mẽ hkôt ixpa hkêt tã kojã Pahkarôja mẽ hwÿr wrÿ nê mẽ hkarô mã agjê nê te pa mẽ hkôt ixpa pyràk o mẽ hipêx. Ja na pa inhmã hprãm. Tã kojã anê. Jakamã na pa ã mẽ ho awÿr anê. Tã ãm ja pix Papaj.” Anê.

Nhũm pre ã Jejus ô Papaj mã mẽ inhnoo mã amnhĩ jarênh anê pa mẽ ixpiitã hã kuma.

18

Mê kot Jejus pynênh ã mẽ harênh

Matêwre 26.47-56; Makre 14.43-50; Rukre 22.47-53

1 Tã nhũm Jejus mẽ ixto Hipêêxà hwỳr pa. Hãmri nê ixkreja rũm ma tẽ nê Jerujarẽ rũm kato nê ma gô pê Kirõ hwỳr tẽ pa mẽ hkõt ixpa ho ixpa xwỳnhjaja ma hkõt mra. Nê gô hã rê nê hikjê hã mẽ kot mêmemo pĩ hkô hkre xwỳnhja wỳr mra nê parpê ixkrĩ hpa.

2 Na pre hte Jejus xatã hwỳr amnhĩ kõt mẽ ixto pa ho kuhê. Jakamã nhũm Jut Kariot kot mẽ kãm òr mã xwỳnhnta ra kot hwỳr mẽ ixpa ho ixkuhê xàta pumunh mex.

3 Jakamã pa mẽ hwỳr pøj nê ixkrĩ hpa nhũm mẽ mẽ ixwỳr mra. Jut Kariot mẽ pòristijaja. Rõm nhõ xwỳnhjê nhõ pòristijê mẽ patre nhõ pòristijaja nhũm mẽ mẽ ixwỳr Jut Kariot kõt mra. Ijaew nhõ pahijê nhỹ hã mẽ ixwỳr mra. Piitã wapohti jamỳ nê pô hpòk nê kanê jamỳ nê mẽ ixwỳr hpòk o kato.

4⁵ Hãmri nhũm Jejus amnhĩ wỳr mẽ omu nê kànhmã xa nê ma mẽ kutã tẽ. Jut Kariot kot mẽ kãm òr kaxyw nhũm amnhĩ tã omunh mex jakamã amnhĩ wỳr mẽ omu nê ma mẽ kutã tẽ. Hãmri nê mẽ hkaxpa nê mẽ omunh o xa nhũm Jut Kariot mẽ kuri xa nhũm Jejus mẽ omu nê mẽ kãm:

—Pa. Mêmemoj japêr na ka mẽ pô hpòk o ri apa? Anê.

Hãmri nhũm mẽ kãm:

—Nà Jejus pê Najare nhõ xwỳnh japêr o na pa mẽ ri ixpa. Anê.

Hãmri nhũm mẽ kãm:

—Tỳ ot pa xa. Pa na ixpê Jejus. Anê.

6 Hãmri nhũm mẽ kuma nê tee ri axpên pumu nê umaj katê ho axkamê nê kuhê. Nom katê ho pikamênh o ra rôròk pa nê hikwỳ.

7 Hãmri nê kànhmã kuhê hpa nhũm Jejus axte mẽ kãm:
—Kwa mẽ inhmã amnhĩ jarê. Mêhõ japêr o na ka mẽ apa? Anê.

Hãmri nhũm mẽ kãm:
—Jesús pê Najare nhõ xwỳnhnta japêr o na mẽ ri ixpa kênã. Anê.

8 Hãmri nhũm mẽ kãm:
—Kwa ra ixte mẽ amã amnhĩ jarênh kênã. Paa. Ijapêr o na ka mẽ ri apa. Jakamã kwa kêr ka mẽ ixkõt ri mẽ pa xwỳnhntaja tanhmã mẽ ho hkêt nê. Kê mẽ mãmri anhgrã nê ma mra.

9 Anhỳr o mẽ inhnê mẽ kãm kapêr. Na pre ra ham Hipêêxà mã mẽ ixtã kãm amnhĩ jarê nê kãm:

—Kormã mẽ kamã ixpa ri ate inhmã ixihitỳx xà nhõrta o na pa mẽ htãnopxar mex o ri mẽ hkõt ixpa.

Anhỳr o mẽ ixtã kãm amnhĩ jarênh jakamã nhũm ã mẽ inhnê mẽ kot unênh mã xwỳnhjê mã kapêr anê.

Simãw Pêtre kot mêhõ pê hamak krãhyr ã harênh

Matêwre 26.51-54; Makre 14.47; Rukre 22.49-51

10 Hãmri nhũm Simãw Pêtre tee ri Jejus ã mẽ omu hãmri nê ò wapo kapa nê jam ho apê nê ho hamak nhĩkjê krãhta. Mawti jamak krãhta. Mawtija mẽõ patre mã apênh xwỳnhjê hõ na pre nhũm Simãw Pêtre hamak krãhta.

11 Hãmri nhùm Jejus ja hã omu nê nê kãm kapêr nê kãm:

—Tk. Kwa nà amarĩ xa nê akupÿm awapota hkãm haxà. Ixte mẽ anê amnhĩ xà htÿx kamã ijamak kaxyw na pa pre Inhĩpêxà rÿm amnê mẽ awÿr pika hwÿr wrÿ. Kê inhmã kãm hprãm xà hkôt pix mã na inhmã tanhmã amnhĩ nhĩpêx to ho ixpa hprãm. Jakamã kwär mẽ mãmrĩ tanhmã kãm ixto hprãm xà hkôt mãmrĩ tanhmã ixto. Anê.

Mẽ kot Anas wÿr Jejus o htêm ã mẽ harênh

Matêwre 26.57-58; Makre 14.53-54; Rukre 22.54

12 Tã nhùm pôristi mẽ mẽ hkrãhtÿm nê mẽõ patre nhõ pôristijaja Jejus pynê nê hpa hpre hpa

13 nê ma Anas wÿr o tẽ. Anasja Kajpas piinhõ na pre. Nhùm Kajpas kormã amgràja ã Anas pyrã nê kêp mẽõ patre maati.

14 Jakamã na pre ra Ijaew nhõ pahijê mã Jejus jarênh o:

—Nà kot puj mẽ Jejus pĩr tokyx anê. Kê tapxipix ty pu mẽ arĩ mÿrpê pahpiitã pajamakêtkati nê ri papa. Anê.

Jakamã nhùm mẽ Jejus pynê nê kormã ma patre maati hwÿr o tẽ.

Simãw Pêtre kot Jejus kôt pa hkêt ã kot amnhĩ jarênh

Matêwre 26.69-75; Makre 14.66-72; Rukre 22.54-62

15 Hãmri pa ixpê Juãw mẽ ixkrãmnhwÿ Simãw Pêtre mẽ pa wa ma mẽ hkôt wa tẽ.

Nhùm mẽ ra mẽ inhõ patre maati nhõrkwÿ hwÿr Jejus o axà. Nhùm patre maati kot ixpumunh jakamã nhùm kãm ãpênh xwÿnhja ixpumu nê inhmã anê pa mẽ hkôt axà.

16 Nom nhùm Simãw Pêtre arĩ kapôt ã hakwa krem xa. Hãmri pa omu nê akupÿm hwÿr tẽ nê mẽhõ niti kot hakwa kre jamär o ãm xwÿnhja mã anê nhùm kãm kahê xà mẽ nhùm mẽ ixkôt axà.

17 Hãmri nhùm nita hprĩ hã omu nê kãm:

—Xêê. Pêr apê mẽ kot unênh nê o mör mÿj kôt ri mẽ pa xwÿnhjê hõ na ka mẽ? Anê.

Hãmri nhùm kuma nê kãm: —Tk. Nà ixte mẽhõ myti ata pumunhre hã. Anê.

18 Hãmri nhùm ra kôt ã kamãt nê ra kryy nê nhùm mẽ ãpênh xwÿnh kwÿ mẽ mẽõ patre nhõ pôristi hkwÿjaja amnhĩm kuto nê hã ànhunh o kuhê. Nhùm Simãw Pêtre mẽ omu nê mẽ hwÿr tẽ nê mẽ ãhkô hã ànhunh o xa.

Patre maati kot Jejus kujêr ã harênh

Matêwre 26.59-66; Makre 14.55-64; Rukre 22.66-71

19 Rôm nhùm Anasja hêx rom tanhmã Jejus kujêr to nê kãm:

—E kwa inhmã amnhĩ jarê. Tanhmã na ka hte we akôt mẽ pa ho mẽ pa xwÿnhjê jahkre hto ho apa wehe? Anê.

20 Hãmri nhùm amnhĩ tã kãm:

—Nà na pa hte mẽ piitã mẽ noo mã ri mẽ kãm ixkapêr o ixpa. Tirtÿm kapêr o mẽ ahkre xà hã ixkre kamã nê

Tĩrtũm mã amnhĩ jarẽnh xà hã ixkre kamã pa hte mẽ piitã mẽ noo mã ri mẽ kãm tanhmã ixkapẽr to ho ri ixpa. Na pa hte nhỹri ixpimxur pẽ ri mẽ kãm tanhmã ixkapẽr to ho ri ixpa hkêt nẽ.

²¹ Tã ka ixtã mẽ kot inhmar o kuhẽ xwỹnhjaja tanhmã ixtã mẽ hkukjẽr to hkêt nẽ. ãm papxipix ri ixkukja. Kwa ixtã mẽ hkukja kê mẽ kot tanhmã ixkapẽr mar to xà hkõt tanhmã amã ijarẽnh to na? Anẽ.

²² Hãmri nhũm patre nhõ põristi hõja kuma nẽ hwỳr tẽ nẽ kãm:

—Tk. Kwa na htem ã patre maati mã kapẽr anhỹr kêt nẽ. Na htem hã hpijaãm o kãm kapẽr. Tã na ka axtem nẽ ri ã kãm akapẽr anẽ. Anẽ.

Hãmri nẽ hinep hkura.

²³ Hãmri nhũm Jejus amnhĩ tã omu nẽ kãm:

—Kwa kot pa tanhmã mẽ amã amnhĩ to ixẽx to ka mẽ hã inhma nẽ rĩ kormã tanhmã axpẽn mã ixto akapẽr to rỹ hã ixtak. Nom ãm hãmri ixte mẽ amã amnhĩ jarẽnh tã ka axtem nẽ ri inhĩnep ixtak. Anẽ.

²⁴ Hãmri nhũm Anas tanhmã mar to hpa hãmri nẽ umre Kajpas wỳr kumẽ. Na pre Kajpasja kormã hitom kãm ri tanhmã amnhĩ nhĩpẽx to ho nhỹ nhũm Anas mẽ kãm anẽ nhũm mẽ kuma nẽ hwỳr Jejus o tẽ nẽ ho axà. Arĩ hpa hpre rãhã hwỳr o tẽ nẽ ho axà nhũm xa nẽ kãm amnhĩ jarẽ.

Simãw Pẽtre kot axte Jejus kõt pa hkêt ã amnhĩ tã aprãr ã harẽnh

Matẽwre 26.71-75; Makre 14.69-72; Rukre 22.58-62

²⁵ Nhũm Simãw Pẽtre arĩ mẽ ãhkõ hã ãnhunh o xa nhũm mẽhõja kãm kapẽr nẽ kãm:

—Kwa pẽr apẽ Jejus kõt ri mẽ pa xwỹnhjẽ hõ na ka. Anẽ.

Hãmri nhũm kuma nẽ kãm:

—Tk. Kokỹ ixte mẽhõ nẽj pumunhre hã. Anẽ.

²⁶ Hãmri nhũm hpãnhã mẽõ patre maati mã ãpẽn xwỹnhja mããnẽn omu. Simãw Pẽtre kot kẽp hamak krãhyr xwỹnhnta kwỳ na pre. Jakamã nhũm hprĩ hã omunh mex kurẽ kumrẽx nẽ kãm:

—Kwa na ka na ka mũtar pĩ hkõtã kamã mẽ ãhkõ hã xa pa apumu. Anẽ.

²⁷ Hãmri nhũm tee ri kuma nẽ axte mẽ kãm amnhĩ tã aprãr kãm hihtỹx nẽ. Jao ra mẽ kãm amnhĩ tã aprãr o axkrunẽpxija mẽ nhũm krãhyre hkàr kurẽ kumrẽx. Ra Jejus kot hkukamã harẽnh xà hkõt kẽp hkwy hket ã amnhĩ tã aprãr o axkrunẽpxi.

Jejus kot Pirat mã amnhĩ jarẽnh

Matẽwre 27.1-2, 27.11-31; Makre 15.1-20; Rukre 23.1-5, 23.13-25

²⁸ Hãmri nhũm mẽ ixpẽ Ijaew hkrãhtũmjaja ra Kajpas rũm Jejus o kato nẽ ma Pirat wỳr o tẽ. Piratja na pre te Rõmjẽ nhõ pahĩ pẽ Sesti mã mẽ ixpẽ Ijaew jamãr o pa nhũm mẽ ma hwỳr o tẽ. Nhũm ra myt kator grire nhũm mẽ hwỳr o tẽ nẽ õrkwỹ kapem o xa. Pirat kẽp Ijaew

kêt jakamã nhũm mẽ òrkwỹ hwỳr gjêx kêt nê kapôt ã kuhê. Na hte Ijaew kormã Pas ã hkĩnh hãmri nê nhãm mẽ kêp Ijaew kêt xwỳnhjê nhõrkwỹ hwỳr gjêx kêt nê. Kojã mẽ hwỳr agjê nê amnhĩ tomnu nê Pas ã apkur kêt nê. Jakamã nhũm mẽ Pirat wỳr Jejus o tẽ no ãm hwỳr o àr kêt nê. Æm ixkre kapem o xa.

²⁹ Hãmri nhũm Pirat mẽ hwỳr kato nê omu nê hã mẽ hkukja nê mẽ kãm:

—Kwa tanhmã na we amnhĩ tomnuj to ka mẽ ixwỳr o tẽ? Anê.

³⁰ Hãmri nhũm mẽ kãm:

—Nà kot amnhĩ tomnuj o pa xwỳnh kênã. Jakamã na pa mẽ awỳr o tẽ. Ate tanhmã kot amnhĩ tomnuj to hã harênh mar nê mỳrapê tanhmã ho kaxyw. Anê.

³¹ Hãmri nhũm mẽ kuma nê mẽ kãm:

—Tk. Kwa mẽ kamjaja ma amnhĩ kôt o tẽ nê amnhĩ krã hkôt tanhmã ho. Mẽ ate tanhmã kot amnhĩ nhĩpêx to hã omunh xà hkôt. Anê.

Hãmri nhũm mẽ tee ri kuma nê kãm:

—Kwa amnepêm mẽ ixpê Ijaewjaja na pa pre htem kên o mẽ kot amnhĩ tomnuj xwỳnhjê tak o mẽ kupa. Tã na ra Rõm nhõ pahihtija mẽ pamjaja mẽ ixte mẽ hpar nê mẽ ixkurê. Tapxipix kãm mẽ hpar ã àmnênh prãm. Jakamã kot kaj ý hã mẽ inhmã tanhmã hã axàmnênh to kê mẽ kupĩ. Ra ja kaxyw mẽ kot mẽ ixkaxyw axãm kênã. Anê.

³² Rõm nhõ xwỳnhjaja na htem mẽ kot amnhĩ tomnuj

xwỳnhjê hpar kaxyw nê pĩ kahpa hã mẽ hanhò nê mẽ kupa. Nhũm Jejus amnhĩ kukamã tanhmã mẽ kot hpĩr to hã mẽ omunh mex jakamã ra hprĩ hã mẽ inhmã mẽ kot tanhmã hipêx to hã mẽ harê. Jakamã nhũm pre ã Ijaew Pirat kot mẽ kãm hpĩr prãm xài ã kãm kapêr kãm xihtỳx anê.

³³ Hãmri nhũm mẽ kuma nê akupỳm òrkwỹ hwỳr axà nê amnhĩ wỳr Jejus ã karõ nhũm hwỳr axà nhũm kãm:

—E kwa inhmã amnhĩ jarê. Xà apê Ijaew nhõ pahi na ka? Xà ka na htem amnhĩ wỳr akãm hamak o pa? Anê.

³⁴⁻³⁶ Hãmri nhũm kãm:

—Tỳ ãm hãmri na ka ã ijarênh anê. Nom jar pika ja kamã ixpê mẽõ pahi hkêt. Axtem ixpê mẽõ pahi na pa. Mo kaxyw na ka ã ixkukjêr anê? Xà na pre mẽhõ ixte mẽ anhõ pahi Sesti kutã ixãm ã amã ijarê ka ama nê tee ri ixkukamã ajamaxpêr? Nà xà ãm hãmri amã Tĩrtũm kot Ijaew wỳr inhmênh ã ixpumunh prãm? Mo kaxyw na ka ã ixkukjêr anê? Anê.

Hãmri nhũm tee ri kuma nê kãm:

—Tk. Mo kot pa kêt ri axtem nê Tĩrtũm kot Ijaew wỳr amênh ã akukja? Mẽ apyrà nê ixpê Ijaew kêt kênã. Mẽ kot ixwỳr ato htêm xwỳnhjaja na mẽ ã ate amnhĩ jarênh anhỹr ã ajarênh anê. Nà mẽ akwỳjê mẽ mẽ anhõ patre krãhtũmjaja na mẽ ã inhmã ajarênh anê. Jakamã e aprĩ hã inhmã amnhĩ jarê. Tanhmã

na ka we amnhĩ tomnuj to nhũm mẽ ixwỳr ato tẽ? Anẽ.

Hãmri nhũm kuma nẽ kê axte kãm:

—Nà ixpê pyka ja kamã mẽ õ pahi hkêt. Kop ãm ixpê pyka ja kôt mẽ õ pahi ronhỹx ra ixkôt ri mẽ pa xwỳnhjaja tanhmã ixtã mẽ ato. Nom jar ixpê mẽ õ pahi hkêt. ãm axtem ixpê mẽ õ pahi na pa. ãm hãmri na pa ã amã amnhĩ jarẽnh anẽ. Anẽ.

³⁷ Nhũm ã kãm amnhĩ jarẽnh anẽ hãmri nhũm tee ri kuma nẽ kãm:

—Xà apê mẽ õ pahi hõ na ka? Anẽ.

Hãmri nhũm kãm:

—Tỳ. Nà ãm hãmri na ka ã ijarẽnh anẽ. Na pa pre amnẽ pikaja wỳr wrỳ nẽ jar mẽ akamã ixkato nẽ mẽ akamã ixãptãr. Ixte tanhmã mẽ kãm ixkapêr to ho ri ixpa kaxyw na pa pre wrỳ nẽ mẽ akamã ixpa nẽ ãm hãmri mẽ kãm ixkapêr o ri ixpa. Na pa hte tãm ixkapêr o ri ixpa. Tã mẽ kot ixkapêr mar nẽ ixkôt ri amnhĩ nhĩpêx o mẽ pa xwỳnhjaja na htem ixpê mẽ õ pahihiti hã ijarẽnh o pa. Anẽ.

³⁸ Hãmri nhũm Pirat kot tãm kãm kapêr ã amnhĩ jarẽnhja ã kuma nẽ kãm:

—Tk. Aa ixte pika ja kamã mẽhõ pumunh nhũm tãm kapêr o pare hã. Anẽ.

Hãmri nẽ kapêr ã kuma nẽ tee ri hkukamã hamaxpêr. Hãmri nẽ akupỹm Ijaew wỳr ho kato nẽ mẽ kutã o xa nẽ mẽ kãm:

—Kwa tanhmã kot amnhĩ tomnuj tore hã.

³⁹ E mẽ inhma. Na pa hte amgrã mẽ arĩgro pẽ Pas kãm

mẽ amã mẽ hagjênh xà rũm mẽ akwỳjê ho hpỹnh nẽ mẽ hapôj nhũm mẽ hamakêtkati nẽ amnhĩx ri pa. Ka mẽ ja hã omu nẽ Pas ã akĩnh nẽ. Jakamã e. Pa mẽ amã mẽ anhõ “pahihiti” jarẽnhja mã inhũre. E na pa ra kãm inhũre. Anẽ.

⁴⁰ Hãmri nhũm mẽ tee ri ã kapêr anhỹr ã kuma nhũm ja mẽ kêp omnuj tỳx nẽ. Nhũm mẽ hã kax pẽ gryk kamã kãm kapêr kãm hihtỳx nẽ kãm:

—Tk. Kwa nà kãm anhũrer kêt nẽ. Kêt Parapas mã mãn anhũre. Anẽ.

Parapasja na pre hte tanhmã amnhĩ tomnuj tỳx to ho ri pa nhũm prem mỳrapê unê nẽ haxà. Tã nhũm mẽ axtem nẽ Pirat kot kãm urer prãm xàj Jejus kaga.

19

Mẽ kot Jejus tak ã mẽ harẽnh

Matêwre 27.27-31; Makre 15.16-21; Rukre 23.20-25

¹ Tã nhũm Pirat akupỹm òrkwỹ hwỳr Jejus o axà nẽ õ pòristijê mã hã amỹnê nhũm mẽ hwỳr mra nẽ htak o kuhê.

² Hãmri nẽ kêp pahi hã hpêr o pikênh kaxyw kãm pahi hã mẽ ahkà nhĩpêx nẽ hkrãm haxà. Nom axtem mẽmo mrõnhĩ te kot ronh kanêre pyrãk xwỳnhja nhũm mẽ hikãx nẽ hkrãm haxà. Nẽ kêp pahi hã mẽ ê kamrêk py nẽ kãm haxà.

³ Hãmri nẽ xatã hwỳr mra nẽ hinep htak nẽ hã hpêr o pikênh o xa nẽ kãm:

—E apê Ijaew nhõ pahi punuti na ka. Anẽ.

4 Hãmri nhũm Piratja akupÿm Ijaew wÿr kato nẽ mẽ kãm:

—E koja inhõ pòristi akupÿm mẽ awÿr ho kato ka mẽ omu. Na pa tee ri kot tanhmã amnhĩ tomnuj to hã hkukja. Për tanhmã kot amnhĩ tomnuj to hkêt kênã. Anẽ.

5 Hãmri nhũm Jesus kato nẽ arĩ pahi hã àhkà tu nẽ ê kamrêk jaxà nẽ o xa nhũm Pirat mẽ kãm:

—E kwa mẽ omu nẽ kamã axukapri hkêt wehe. Anẽ.

6 Hãmri nhũm patre krãhtũmjê mẽ mẽo pòristijaja tee ri ja hã kuma nhũm ja mẽ kêp omnuj nẽ. Hãmri nẽ hã kãm kapër kãm hihtÿx nẽ kãm:

—Tk. Kwa nà pĩ kahpa hã mãn anhô. Kê pĩ kahpa hã mãn ajêt nẽ ty. Anẽ.

Hãmri nhũm tee ri hã mẽ kuma nẽ mẽ kãm:

—Nà mẽ kam nẽ ma amnhĩm o tẽ nẽ mẽ kam amnhĩm ho anẽ. No pa kot paj ho anhÿr kêt nẽ. Mo mÿrapê kot pa kêt hã amÿnê nhũm mẽ kupĩ? Nà kwarĩ kot pa ho anhÿr kêt nẽ. Anẽ.

7 Hãmri nhũm mẽ tee ri kuma nẽ kãm:

—Kwa kêp Tirtũm Kra hã amnhĩ jarênh kênã. Mẽ inhĩgêtjaja na prem ã mẽ ixte amnhĩ jarênh anhÿrja nẽ mẽ inhmã kapër pa htem ã amnhĩ jarênh anhÿr kêt nẽ. Kojã mẽhõ ã ri amnhĩ jarênh anê nhũm mẽ ja mÿrapê kupĩ. Anẽ.

8 Hãmri nhũm Pirat tee ri Jesus kêp Tirtũm Kra hã amnhĩ

jarênhja ma nẽ kãm uma nẽ kãm tanhmã ho hprãm kêt nẽ.

9 Hãmri nẽ akupÿm òrkwÿ hwÿr ho axà nẽ axte hkukja nẽ kãm:

—Kwa aprĩ hã inhmã amnhĩ jarê. Nhÿhÿnh na ka pre mẽ ixwÿr mõ? Anẽ.

Nom nhũm axte tanhmã kãm nẽ hkêt nẽ. Âm arĩ akryk mar o xa.

10 Nhũm tee ri omu hãmri nẽ kãm:

—Kwa xà ate ixpumunh kêt? Inhÿ hã na htem mẽ kupa nẽ inhÿ hã akupÿm mẽ hapôj. Tã ka për aprĩ hã inhmã tanhmã amnhĩ jarênh to hkêt nẽ ri akryk akuhê. Anẽ.

11 Hãmri nhũm Jesus kãm:

—Nom Tirtũm nhÿ hã pix mã na ka hte ã amnhĩ nhĩpêx anê. Kêp âm Tirtũm kãm ja prãm kêt ronhÿx ka tee ri tanhmã amã ixto hprãm hkapyrÿ. Tãm kot mẽ ixkaxyw axãm kênã. Tã mẽ kot awÿr inhmênh nẽ ri ixtyk ã ijarênh xwÿnh pé Ijaew nhõ pahijaja. Ra mẽ kot ixkaga jakamã na mẽ ã amã ijarênh anê. Jakamã mẽ kot amnhĩ tomnuj tÿx o ajakrenh. Anẽ.

12 Hãmri nhũm Piratja tee ri ã kapër anhÿr ã kuma nẽ kot kãm urer prãm nẽ. Hãmri nẽ akupÿm Ijaew wÿr kato nẽ hã mẽ kãm kapër nhũm mẽ tee ri kot kãm urer kaxyw ã amnhĩ jarênhja ma nẽ kãm ja prãm kêt kumrêx. Jakamã kàxpê nê kãm kapër nẽ kãm:

—Kwa nà ra kêp mẽ inhõ pahi hã kot amnhĩ to hêx kênã. Kot mẽhõ ã ri amnhĩ jarênh anê nhũm Rôm kamã

mẽ panhõ pahi Sestija ja hã harênh ma nẽ kamã gryk tỳx nẽ. Tã kot kaj kãm anhũre nhũm ajarênh ma nẽ akamã gryk nẽ. Anẽ.

¹³ Hãmri nhũm tee ri mẽ kuma hãmri nẽ ma pahi kot tanhmã mẽ harênh to xà hã kên pota wỳr ma tẽ nẽ hã nhỹ. Mẽ ixpê Ijaew kapêr kãm mẽ ixte kãm: “Kapata” jarênh xwỳnhta wỳr kot tanhmã Jesus jarênh to kaxyw ma hwỳr tẽ nẽ hã nhỹ nhũm mẽ hwỳr o tẽ.

¹⁴ Hãmri nhũm ra arĩgro pẽ sêsta. Mẽ ixpê Ijaewjaja mẽ ixte Pas ã amnhĩ tomnuj mỳrapê mry hkwy hpar nẽ Tirtũm kôt pix mã amnhĩ nhĩpêx ã amnhĩ jarênh xà hã arĩgroja kato. Jakamã nhũm kaxkwa nhĩpôk ri myt nhỹ nhũm Piratja mẽ kot Jesus kator ã harênh prãm xàj arĩ mẽ kãm ho mẽ õ pahi hã harẽ nẽ mẽ kãm:

—E ota mẽ anhõ Pahihtita. Anẽ.

¹⁵ Hãmri nhũm mẽ tee ri ã harênh anhỹrja ã kuma nẽ kãm:

—Kwa apĩ ri. Ma o tẽ nẽ pĩ kahpa hã anhõ kê tokyx ty.

Anẽ nhũm tee ri mẽ kuma nẽ mẽ kãm:

—Kwa nà. Kêp mẽ anhõ pahi kênã kot paj kêt ri axtem nẽ mẽ apê kupĩ. Anẽ.

Hãmri nhũm mẽ kãm:

—Nà kêp mẽ inhõ pahi hkêt. Pahi Sesti pix na kêp mẽ inhõ pahi. Anẽ.

Mẽ kãm Sesti hkĩnh kêt tã ã kãm Jesus htyk prãm xàj ri harênh anẽ.

¹⁶ Hãmri nhũm Pirat tee ri ja hã mẽ kuma nẽ tã Jesus ã pôristi mã karõ nẽ mẽ kãm:

—E mẽ mãmri ma o tẽ nẽ pĩ kahpa hã anhõ kê ty. Anẽ.

Hãmri nhũm mẽ kuma nẽ ma o tẽ.

Mẽ kot pĩ kahpa hã Jesus nhõr ã mẽ harênh

Matêwre 27.32-44; Makre 15.21-32; Rukre 23.26-43

¹⁷ Hãmri nhũm pôristija Jesus mã õ pĩ kahpa gõ nhũm kutu nẽ ma mẽ hkôt hkjênh o mỗ. Nhũm mẽ krĩ rũm ho kato nẽ ma hixêt prêk wỳr o tẽ. Hixêt prêkja mẽ kot harênh o: “Korkot” anẽ. No mẽ ixpê Ijaewjê kapêr kãm na pa pre htem harênh o “Mẽ hkrã hi xà” anhỹr xwỳnhta wỳr nhũm mẽ ma o tẽ nẽ hã ho api.

¹⁸ Hãmri nẽ pikap pĩ kahpa xi nẽ hã Jesus xi nhũm hã nõ nhũm mẽ prek o ãhkra ho htỳx nẽ hpar o htỳx. Hãmri nẽ kaxyw hkakwỳ nẽ hkakwỳnh pa nẽ kamã pĩ kahpata xãm nẽ hity hpa nhũm Jesus kỳx pẽ ajêt. Hãmri nhũm mẽ mããnên wa ho hamêxkrut nẽ pĩ kahpa hã wa kunhõ nhũm wa kuri ajêt. Wa kot tanhmã amnhĩ tomnuj to xwỳnhja wa ho akutã Jesus nhĩjê nhũm wa urak nẽ kỳxpê ajêt.

¹⁹ Hãmri nhũm Piratja õ pôristi mã anẽ nhũm mẽ tap õ py nẽ hã tanhmã kagà hto nẽ kagà ho:

IJAEW NHÕ PAHI JEJUS NA
JA

KÊP NAJARE NHÕ XWỠNH

²⁰ Nom mẽ ixpê Ijaew kapêr pix kãm hã kagà hkêt nẽ. Mããnên Gresjê kapêr kãm

nē Raxījē kapēr kām nhūm mē mǎānēn hā kagà nē Jejus mýri kunhō. Hāmri nhūm Ijaew kwýjaja Jerujarē rūm hwýr mra nē mē kot ā hā kagà nhīpēx anhýrta pumu nē kamā harē. Jerujarēja hixēt prēēta wýr jawý jakamā nhūm mē kurūm ohtō nē hwýr mra nē omunh o kuhē.

21 Hāmri nhūm patre hkrāhtūmjaja tee ri ā Jejus jarēnh anhýr ā kagàta pumu nhūm ja mē kēp omnuj nē. Jakamā nhūm mē ma Pirat wýr mra nē kām:

—Kwa mon ka ri hā mē kām anē nhūm mē axtem nē ā ri kagà nhīpēx anē? Kwa nà kēp mē inhō pahi hkēt. Ām htýx ri kot ā kot amnhī jarēnh anhýr o pa kēnā. Kwa hā kagàja o anhīpa nē hpānhā hā kagà ho: “Kēp Ijaew nhō pahi hā kot amnhī to hēx xwýnh.” Anhýr o hpānhā hā hipēx nē anhō nā? Anē.

22 Hāmri nhūm mē kuma nē mē kām:

—Tk. Nà pa ho ixpinhpanh kēt nē. Ra ixte hā kagà hpar kēnā. Anē.

Pôristijaja kot axpēn mǎ Jejus xē ho pigrānh

Matêwre 27.35-36, 27.55-56; Makre 15.24; Rukre 23.34

23 Hāmri nhūm pôristijaja kot axpēn mǎ Jejus xē o pigrānh kaxyw amnhī tā haxwýr o tē. Mē kēp 4 no nhūm Jejus xē kēp 5 jakamā nhūm mē amnhī kôt ho 4 nē haxwýr nhūm pyxi nē hprā. ē rytita. Na pre hipēx muxre. Nhýhýnh hkayr xà pumunh kēt kumrēx.

24 Jakamā nhūm mē omu nē kām hkīnh nē. Hāmri nhūm hō kot amnhīm hpyr nē ho arīk kaxyw nhūm mē hā kēnre ho jōka. Na pre ra Tirtūm kapēr ā kagà htūm kot mē hkukamā ja hā mē harēnh nē mē harēnh kot:

Na prem axpēn mǎ ixē o angrà nē hā kēnre ho jōka ho hkrī.

Anhýr o kot mē hkukamā mē harēnh. Tā nhūm mē ra hkôt ā amnhī nhīpēx anhýr o hkrī.

Jejus kot Juāw nhīhkram katorxà jaxàr ā harēnh

25 Nhūm Jejus par pē katorxà xa. Nē htōx nē Kropti hprō Marir nē Marir Matarēn mē nhūm mē Jejus katorxà nhīhkō hā Jejus pumunh o kuhē. Nhūm amnhī tā mē omu

26 nē mē kuri pa ixpē Juāw pumu. Hāmri nē kēp ixkrāmnhwý mex ā ixtā katorxà mǎ kapēr nē kām:

—E ota Juāwta. Koja ixpānhā te kēp akra pyrāk o anhīpēx nē tanhmā ato ajuta hto ho pa. Anē.

27 Hāmri nē hpānhā pa inhmā kapēr nē inhmā:

—E Juāw. Kēr ka te kēp akatorxà pyrāk o inhmā hipēx mex o ri apa.

Anhýr jakamā pa kuma nē kot inhmā hā karō xà hkôt inhōrkwy hwýr haxà nē amnhī kôt ri ho ixpa.

Jejus htyk ā harēnh

Matêwre 27.45-56; Makre 15.33-41; Rukre 23.44-49

28 Tā nhūm Jejus ra amnhī pumu hāmri nē hamaxpēr o:

—Nà Inhĩpêêxà kot mẽmoj tã inhmã karõta na pa ra kãm ho anhÿr o hitep xà xir kaxyw. Anê.

Hãmri nê kãm kôr ã amnhĩ jarê. Nom ra hkukamã Tĩrtũm kapêr ã kagà htũm kot htyk kaxyw nê kãm kôr kukamã harênh jakamã nhũm ã amnhĩ jarênh anê nê kapêr o:

Nà na pa ra inhmã kôr nê. Anê.

29 Nhũm hpar pê guhkrax kãm wĩhti punureta ãm jakamã nhũm mẽ ã kot amnhĩ jarênh anhÿrja ma nê kaxyw mẽmo rerek py nê o tẽ nê kaxyw pĩ ryti hõ py nê ho hkanhwÿ. Nê akupÿn o tẽ nê ho wĩhti mã haxà nê kãm kupê.

30 Nhũm hkaô nê hkaôr pa hãmri nê kapêr o:

E nà hãmri na pa ra mẽ piitã mẽ kot amnhĩ tomnuj pãnhã amnhĩrer pa. Jao ra Inhĩpêêxà kãm hprãm xà hkôt kãm tanhmã amnhĩ nhĩpêx to jatur xàm kumê.

Anhÿr o amnhĩ jarênhja kôt ahpap mã hkrã nê ty.

Mẽ kot kô xwa ho Jejus kamnhwÿr ã harênh

Wam Juãw 5.6-8

31 Nhũm ra sêsta nhũm apkati nhũm mẽ inhõ arĩgromnu pê sap kaxyw. Sapja ã na hte mẽ ixpê Ijaew mẽ ixkĩnh pê Pas ã ixkĩnh rũnh o ixpa. Nhũm mẽ kãm sap ã arĩ mẽ htyk nê mẽ harir xwÿnhjê pumunh prãm kêt jakamã nhũm Ijaew krãhtũmjaja ma Pirat wÿr mra nê kãm:

—Kwa pôristi mã anê kê mẽ tokyx mẽ hte hi kukê kê mẽ htyk tokyx anê. Kê mẽ tokyx mẽ o wrÿ nê ma mẽ o mra nê mẽ hagjê. Kormã sap kêt ri. Anê.

32 Hãmri nhũm mẽ kuma nê õ pôristijê mã anê nhũm mẽ ma mẽ hwÿr mra nê akutã wa kot Jejus nhĩjê nê jêt xwÿnhnta wa kumrêx wa hte hi hkwÿr.

33 Hãmri nê hpãnhã Jejus wÿr tẽ nê omu nhũm ra htyk mex nê ajêt nhũm mẽ ja hã omu nê kêp hte hi hkwÿnh kêt nê.

34 Nhũm pôristi hõja kô xwa py nê ho ihkjê rũm hkanhwÿ nhũm hkamrô mẽ ĩkagô ahkã nê hprôt nhũm mẽ hkwÿja omunh o kuhê.

35 Nê ixpê Juãw na pa pre ijaxwÿja mẽ ĩhkô hã xa nê ja hã omunh jakamã pa ã mẽ amã hã kagà anê. ãm hãmri na pa mẽ amã harê nê hã kagà. Mẽ ate kamã harênh nê harênh mar nê hkôt aja-maxpêr kaxyw.

36 Na pre ra Tĩrtũm kapêr ã kagà htũm kamã ra hkukamã tanhmã kot mẽ pahwÿr mẽnh xwÿnhnta jarênh to nê hã kagà. Nê hã kagà kot:

Koja mẽ nhÿhÿnh hi hkwÿnh kêt nê. Anê.

Tã nhũm mẽ ra hã kagàja kôt ã hipêx anê nê kêp hi hkwÿnh kêt nê.

37 Nê Tĩrtũm kapêr ã kagà htũmja mããnên ja hã harênh kot:

Mẽ kot hpĩr nê hkanhwÿr xwÿnhja koja mẽ hpar pê omunh o kuhê. Anê.

Tĩrtũm kapēr ã kagà htũm kamã ã Jejus tyk kukamã harēnh kot anhỹr.

Mẽ kot Jejus jaxàr ã mẽ harēnh

Matêwre 27.57-61; Makre 15.42-47; Rukre 23.50-56

³⁸Tã nhũm Juje pē Arimatej nhõ xwýnhja Jejus ra htyk ã omu nē ma Pirat wýr tē nē hã kãm kapēr. Kot ma o mōr nē tokyx haxàr kaxyw. Na pre ra Jejus kôt amnhĩ xãm nom Ijaew krãhtũmjē pymaj mẽ kãm amnhĩ to amnhĩrit kêt nē. Jakamã nhũm ma Pirat wýr tē nē hã kãm kapēr nē kãm:

—Pa e ot pa awýr tē. Ixte mẽmoj tã amã ixkapēr kaxyw. Kot kaj apu inhmã “ý” anhỹr japēr. Kwa xà kot pa ma Jejus o mō nē haxà? Anē.

Hãmri nhũm kuma nē kãm: “Nã mãmri ho anē.” Anē hãmri nhũm ma hwýr tē nē ho wrý nē kumý nē ma haxàr mã o mō.

³⁹Nhũm Nĩkotēja ma hkôt tē. Amnepē mã kot kamàt kãm Jejus wýr htēm nē wa axpēn mã kapēr o ýr xwýnhta. Jakamã ma Juje hkôt tē. Nē amnhĩ kôt mẽ hkuxwa xà hkwy ho mō. ãm ho mōr rax kumrēx. Ho 34 kir nē kutu nē o mō. Mẽ hkuxwa xàja na pre mẽ kot mẽmo kuxwa xà mã “mĩra” nē “aroe” anhỹr jarēnhja nhũm kaxyw hkwy jakà nē ho ahkà nē ho mẽ hkuxwa xà nhĩpēx. Hãmri nē kutu nē ma Juje kot Jejus jaxàr nhũm kot ho hkuxwa kaxyw hkôt o mō.

⁴⁰Hãmri nhũm wa ho kupēxē kukõnh pa nē ho Jejus

kupu. Mẽ ixpē Ijaew mẽ ixte mẽ htykjē jagjēnh kaxyw ã mẽ hipēx anhỹr xà hkôt nhũm wa ã hipēx anē nē haxà.

⁴¹Nhũm ra mẽ kot pĩ kahpa hã nhõr xà tã mẽ kot mẽmo pĩ ho pa nē hkre xwýnh kwý kuhê. Nē kamã kēn kre nyw. Kormã mẽ kot kamã mẽ htykjē hõ jaxàr kêt xwýnhnta.

⁴²Jakamã nhũm wa omu nē axpēn mã:

—E kwa pu hwýr Jejus o tē nē kamã mãn tokyx haxà. Kēr pu kormã sap kêt ri ra tanhmã amnhĩ to hpa. Anē.

Hãmri nē hwýr kumý nē o tē nē kamã haxà nē hã hitom pa hãmri nē ma akupým krĩm wa tē.

20

Jejus akupým htĩr ã harēnh
Matêwre 28.1-10; Makre 16.1-8; Rukre 24.1-12

¹Tã nhũm sap tē nē hapēx nē hpãnhã semãn nyw krax xà pē tòmĩk. Hãmri nhũm Marir Matarēn kwýhtã kãnhmã nhỹ. Kormã myt kator kêt ri kãnhmã nhỹ nē ma kēn kreta wýr tē. Nē hwýr pōj nē tee ri hitom xà hã kēn rax pumu. Nhũm ra nhãm hakwa kre kuhpa hã ri hikwý nhũm omu nē tee ri hkukamã hamaxpēr pē omunh o xa.

²Hãmri nē awjanã nē ma akupým hprõt nē nhỹri Simãw Pētre nē pa ixpē Jejus krãmnhwý mex ã wa ixpumu nē hkaprĩ kamã wa inhmã harē nē wa inhmã:

—Xē na pēr mẽ pahpē mẽ panhõ Pahihti kapa nē nhỹhým ma o tē. Xē nhỹhým mãn pre wem o tē? Anē.

3 Hãmri pa wa kuma nẽ hwÿr ixprõt kurê kumrẽx.

4 Hãmri pa Simãw Pêtre mã wa nẽ ixkumrẽx hwÿr pøj.

5 Nom kormã kën kre hwÿr ixâr kêt ri kormã hakwa krem inhîkôt nẽ kaxwÿnh kãm nõr xà kamã Jejus japêr ixrît o xa. Nhũm kupêxê nhîrê pix nõ pa omu.

6 Hãmri nhũm Simãw Pêtre ixkôt tẽ nẽ ixrom krem àr kurê kumrẽx nẽ kupêxê nhîrêta pumu.

7 Nẽ hkrã kupu xà pumu nhũm axtem hkrã muxre nẽ ahte nõ.

8 Hãmri pa hkôt axà nẽ nõr xà kaprÿ pumu nẽ ijamaxpêr o:

—Hêxta waa nẽ. Nà mãn akupÿm htîr. Hã na nõr xà hkaprÿ mex nẽ. Nà mãn akupÿm htîr kãm ga. Anẽ.

9 Ra Tîrtũm kapêr ã kagà htũm kot ja kukamã akupÿm htîr ã harênh tã pa wa kormã ixprî hã ja hã omunh kêt nẽ. Tã kën kre kaprÿ pumu nẽ kãm ijamaxpêr kurê kumrẽx.

10 Hãmri nẽ wa ixkato nẽ awjanã nẽ ma akupÿm wa ixkwÿjê hwÿr wa tẽ.

Jejus kot Marir Matarên wÿr kator ã harênh

Makre 16.9-11

11 No nhũm Marir Matarênja arî kën kre kapem hkaprî nẽ mÿr o xa. Nẽ mÿr pê hikôt nẽ kën kre kamu

12 nẽ kamã Tîrtũm kapêr o wrÿk xwÿnh wa ho axkrut nẽ wa omu. Nhũm wa ê jakajre kamã wa nhÿ. Nhũm hõja hkrãm nhÿ nhũm hõja htem nhÿ.

13 Hãmri nẽ wa Marir Matarên mã kapêr nẽ kãm:

—Kwa mon ka ri omu nẽ amÿr o xa? Anẽ.

Nhũm kãm:

—Xê nhũm. Na prem ma nhÿhÿm mẽ ixpê mẽ inhõ Pahihtija mÿ nẽ ma o tẽ nẽ hpãnhã nhÿri kuxi. Anẽ.

14 Rôm nhũm Jejus tãm tẽ nẽ hkatut kôt xa nhũm Marir Matarên ho hakêx nẽ omu nom hprî hã omunh kêt nẽ. Omu nẽ htÿx ho axtem mẽhõ hã hkamnhÿx.

15 Hãmri nhũm kãm:

—Kwa mon ka ri amÿr o xa? Mẽhõ na ka ri hapêr arît pê amÿr o xa? Anẽ.

Hãmri nhũm kuma nẽ htÿx ho pî hkre jamãr xwÿnh ã hkamnhÿx nẽ kãm:

—Xê xà ka na ka mẽ ixpê mẽ inhõ Pahihtija ho ahkî nẽ ma o tẽ nẽ nhÿri axi mê? Xê ka japêr nẽ akatàt kôt inhmã harê. Nhÿri inhmã nõr xà jarê pa ma hwÿr tẽ nẽ kumÿ nẽ man akupÿn o tẽ nẽ akupÿm kën kre kamã kuxi. Anẽ.

16 Hãmri nhũm Jejus kãm hixi jarê nẽ kãm:

—Kwa Marir Matarên. Amnẽ ixpumu nẽ arî ã akapêr anẽ nà. Anẽ.

Hãmri nhũm jatã hprî hã kuma nẽ ho hakêx nẽ amnhî jaêr pê hprî hã omu nẽ kãm:

—Xê Pahihtija. Xep ka na ka. Hêxta gaa nẽ. Anẽ.

Nom mẽ ixpê Ijaew kapêr kãm Pahita jarênh o: “Raponî” anẽ. Nhũm ã kãm kapêr anẽ hãmri nẽ axte ma nhÿhÿm kêp htêm pymaj hpa hã kupy.

17 Hãmri nhũm kãm:

—Kwa inhmã anhũre. Na pa kormã ma akupỹm Inhĩpêêxà hwỳr ixàpir kêt nê. E tokyx ma akupỹm tẽ nê ixtõ nê ixtõxjê mã ijarê. Na ka prem apê ixkràmnhwỳ pix tã ra mẽ apê ixtõ nê ixtõx na ka mẽ. Jakamã ma akupỹm mẽ hwỳr tẽ nê mẽ kãm ijarê. Nê mẽ kãm: “Na Jejus mẽ awỳr pẽr mẽn̄h o: ‘Kot paj tokyx ma akupỹm Inhĩpêêxà Tĩrtũm wỳr api. Nom kêp pa Inhĩpêêxà pix kêt mãânên kêp mẽ Anhĩpêêxà na. Nê mãânên kêp mẽ anhõ Tĩrtũm na.’ Anhỹr o mẽ awỳr pẽr mẽ.” Anê. E ma akupỹm mẽ hwỳr tẽ nê tokyx ã mẽ kãm ijarênh anê. Anê.

¹⁸ Hãmri nhũm kuma nê ma akupỹm mẽ ixwỳr tẽ nê mẽ inhmã awjarê nê mẽ inhmã:

—Xê na pa ham mẽ panhõ Pahih̄tita pumu. Na akupỹm mẽ pamã htĩr. Anê.

Hãmri nê mẽ inhmã kot tanhmã kãm kapêr to hã harê pa mẽ kuma nê tee ri hkukamã ijamaxpêr.

Jejus kot hkwỳjê hwỳr ka-tor ã harênh

Rukre 24.36-43

¹⁹ Tã nhũm tòmĩk nê kamàt pa mẽ Jejus kôt ixpa ho ixpa xwỳnhjaja axpên wỳr akuprõ hãmri nê Ijaew krãhtũmjê pymaj hakwakre kahê hpa nê axpên mã ixkapêr o ixkrĩ. Nhũm Jejus mẽ ijaêr pê nhỹhỹnh mẽ ixwỳr axà nê mẽ ixkuri xa nê mẽ inhmã:

—Pa. Xà kormã mẽ anhõt kêt? Anê.

²⁰ Hãmri nê mẽ inhmã amnhĩ nhĩhkra kamã prek tatak xà jahkre nê hakỳx kôt

mẽ kot hkanhwỳr xàja nhũm mẽ inhmã hahkre. Pa mẽ akupỹm htĩr kãm omu nê ixkĩnh tỳx kumrêx.

²¹ Hãmri nhũm mẽ inhmã:

—E kwa kêr ka mẽ tee ri amnhĩ kukamã ajamaxpêr o amã ma ho ri apa hkêt nê. Na pre Inhĩpêêxàja mẽ awỳr inhmẽ pa pre wỳr. Tã kot paj amnhĩ pyrà nê mẽ piitã mẽ hwỳr mẽ arê. Anê.

²² Hãmri nê mẽ ixkaxyw htyyxà mẽ nê mẽ inhmã Tĩrtũm mẽ wa Karõ jarê nê mẽ inhmã:

—E koja Tĩrtũm mẽ wa Ixkarõja wry nê mẽ akarõ mã gjêx pa.

²³ Ka mẽ ÿ hã ma mẽ piitã mẽ hwỳr apa nê mẽ kãm Tĩrtũm kapêr jarênh o ri mẽ hkôt apa. Nê nhỹri mēhõ pumu nê inhỹ hã kãm: “Kot kaj Tĩrtũm kôt amnhĩ xãm nhũm amnhĩ tã apumu nê anê ate amnhĩ tomnuj rên̄h pa.” Anê. Ka mẽ ã kãm akapêr anê nhũm mẽ ama nê hkôt amnhĩ xãm nhũm Tĩrtũm amnhĩ tã omu nê nê kot amnhĩ tomnuj rên̄h pa. Nom koja mẽ ama nê ãm mẽ ama nê hkôt amnhĩ xãm kêt japêr ka mẽ inhỹ hã kãm: “Nà kot kaj Tĩrtũm kôt amnhĩ xãm kêt nê nhũm anê ate amnhĩ tomnuj rên̄h kêt nê.” Anhỹr o kãm akapêr nhũm Tĩrtũm ho anê nê nê rên̄h kêt nê. E kêr ka mẽ ã inhỹ hã amnhĩ nhĩpêx anhỹr o ri apa. Anê.

Nhũm pre ã Jejus mẽ inhmã kapêr anê hãmri nê kato nê ma nhỹhỹm tẽ.

Jejus kot Tomas mã kapêr ã harênh

Matêwre 28.17

²⁴ No nhùm mẽ inhĩõ pê Tomas pihpohtita kormã mẽ ixkĩnhã akupỹm Jejus htĩr kãm omunh kêt nê. Na pre ma kape hã tẽ nhùm wakre kamã mẽ ixwỳr axà nê mẽ inhmã kapêr hãmri nê ma nhỹhỹm tẽ. Jakamã nhùm Tomas akupỹn mẽ ixwỳr tẽ nê axà pa mẽ kãm harê nhùm tee ri mẽ inhma nê mẽ ixkõt hamaxpêr kêt nê.

²⁵ Nê mẽ inhmã:

—Nà kot pa ìhkra kamã prek tatak xà pumu nê kamã inhĩhkra hkrã jaxà. Nê hakỳx kõt hkanhwỳr xàta pa mã ho anê nê omu nê kamã inhĩhkra hkrã jaxà nê rĩ kormã akupỹm htĩr kõt ijamaxpêr. Anê.

²⁶ Tã nhùm semãn pyxi nê hapêx pa mẽ axte axpên wỳr akuprõ nê axte Ijaew krãhtũmjê pymaj amnhĩ tã kahê htỳx nê ixkrĩ. Nhùm Tomas tã mẽ ixkuri nhỹ. Hãmri nhùm Jejus axte nhỹhỹnh mẽ ixwỳr axà nê mẽ inhmã:

—Pa. Na ka mẽ rĩ akrĩ. Anê.

²⁷ Hãmri nê Tomas pumu nê hwỳr tẽ nê kãm ìhkra pẽ nê kãm:

—E ota inhĩhkra kamã prek tatak xàta. Mãmrĩ kamã anhĩhkra hkrã jaxà. Nê hpãnhã ijakỳx kõt mẽ kot ixkanhwỳr xà kamã mã ho anê nê haxà nê akupỹm ixtĩr kõt ixpumunh kurê kumrêx. Anê.

²⁸ Hãmri nhùm kuma nê kãm:

—Nà pêr ãm hãmri apê inhõ Pahĩhti Tĩrtũm na ka. Anê.

²⁹ Hãmri nhùm kãm:

—Tỳ. ãm ano ho ixpumunh kõt pix mã na ka ixkõt aja-maxpêr. Tã no ãm koja mẽ nhỹrmã mẽ amỳr pê mẽ pa xwỳnhjaja mẽ akĩnhã mẽ no ho ixpumunh kêt tã akupỹm ixtĩr ã ijarênh mar pix tã ixkõt hamaxpêr. Ja na mex kumrêx. Anê.

Juãw kot tanhmã amnhĩ jarênh to hã harênh

Rõmãn 15.4; Wam Juãw 5.13

³⁰ Na pre Jejus kormã mẽ ixto pa ri mẽ inhnoo mã mẽmoj tanhmã hipêx to rax nê nom kot paj kagàja kamã piitã hã kagà hpar kêt nê.

³¹ ãm hkwy PIX na pa mẽ amã hã kagà. Mẽ ate mẽ ixpyrà nê omunh nê kêp Tĩrtũm Kra hã kot mẽ pakaxyw ãm xwỳnh ã omunh nê hkõt amnhĩ xunhwỳr kaxyw na pa ã mẽ amã harênh nê hã kagà anê. Tã kot kaj mẽ amnhĩ kaxyw hkõt ajamaxpêr nê hkõt amnhĩ xunhwỳ hãmri nê nhỹrmã atyk tã nhùm akupỹm mẽ ato mẽ atĩr ka mẽ ixpyrà nê kuri amex nê atĩr tũm nê apa ho apa. Tã pa ã mẽ amã mẽmoj piitã harênh nê hã kagà anê.

21

Jejus kot hkwyjê hwỳr kator ã harênh

Matêwre 26.32, 28.7, 28.10

¹ Tã nhùm Jejus axte hkõt mẽ ixpa ho mẽ ixpa xwỳnh kwỳjê hwỳr kato. Himô pê Tipeja mỳri.

2 Pa mẽ ixpê 7 nê axpên wÿr akuprô. Na pre Simãw Pêtre nê Tomas pihpohti nê Natãnaew. Natãnaewja Garirej kamã krĩ pê Kanã nhô xwÿnh na pre. Nê wa pa wa ixpê Jepetew krata wa nê wa inhĩô wa pijakruuta wa. Pa prem wa mẽ nhÿri axpên wÿr akuprô.

3 Hãmri nhũm Simãw Pêtre mẽ inhmã:

—E pa jarãhã ma tep wÿr tẽ nê hkwỹmnê. Anê.

Pa mẽ kuma nê kãm:

—Tôe. Nà pa mẽ ijaxwÿja ma akôt mō. Anê.

Hãmri nê mẽ ma himô rax pê Tipeja wÿr mō nê kanôre mã agjê nê gôx kãm kryhti rênh o ixkuhê. Nom tee ri ho tep ômnênh kaxyw rênh o ixkuhê nê hōmnênh kêt nê ixtã apkati nhũm tep amrakati kumrêx.

4 Tã nhũm myt kato nhũm Jejus gô mÿri xa. Pa mẽ ixpiitã omu no ãm ixprĩ hã kêp Jejus ã omunh kêt nê. Tã no nhũm tãm xa.

5 Hãmri nê mẽ inhmã kapêr nê mẽ inhmã:

—Pa. E mãn ka mẽ ra tep kwÿmnênh rax nê nà? Anê.

Hãmri pa mẽ kãm:

—Tk. Nà mo tep? Amrakati kumrêx kênã. Anê.

6 Hãmri nhũm mẽ inhmã;

—Xô wehe? Tôe. Axte mẽ axupôk rũm kryhti mẽ nê omu. Anê.

Hãmri pa mẽ mar xà hkôt ho anê nê kumê. Hãmri nhũm kamã tep hipu rax kumrêx nhũm utĩ rax nê. Pa mẽ tee ri ixte ho ixãpir kaxyw ri hkukjê.

7 Hãmri pa kêp Jejus ã omunh kurê kumrêx nê Simãw Pêtre mã kãm:

—Kwa pêr mẽ panhō Pahihtita na. Anê.

Hãmri nhũm inhma nê hkĩnh tÿx nê akupÿm hinôkã jaxà nê gôx kãm mrô nê ma hwÿr ho nana ho tẽ.

8 Hãmri pa mẽ hkôt kanôre kamã kryhti kjênh o mō. Ra amgrà hwÿr amgrire. Wÿr 100 met pix jakamã pa mẽ hwÿr ixpôx tokyx anê.

9 Nê pàr o hkre kura nê kuxi nê ijapôx pa nê Jejus wÿr ixprôt nê mra. Nhũm ra mẽ ixkutêp kuto nê par nhĩpêx nê nhÿhÿnh tep kwÿ par kãm haxwÿ nê ho àr o nhÿ. Nê kaxyw pãwti nê amnhĩ ri haxwÿ nê o nhÿ.

10 Hãmri nê mẽ ixpumu nê mẽ inhmã:

—E mẽ amnê anhō tep o mra pu mẽ hkuxôt nê kuku. Anê.

11 Hãmri nhũm Simãw Pêtre akupÿm pàr wÿr tẽ nê kryhti ho htÿx xà hpôt nê amgrà hwÿr hkjênh o mō. Kamã tep rũnh pix. Nê ohtô nê. Kamã kêp 153 nê hikwÿ htã nhũm nhÿhÿnh kryhti hkwỹ pikaxôn h kêt nê.

12 Hãmri nhũm Jejus mẽ inhmã:

—E kwa mẽ tokyx mra pu mẽ apku. Anê.

Hãmri pa mẽ kuma nê hwÿr mra nê ixkrĩ pa. Hãmri nê tee ri omunh o ixkrĩ. Mẽ ixprĩ hã omunh mex kêt tã kot ã mẽ inhmã amnhĩ nhĩpêx anhÿr ã omu nê kêp mẽ inhō Pahihti hkôt omunh kurê kumrêx

jakamã hixi hã hkukjêr kêt nê. ãm akryk omunh o ixkrĩ.

¹³ Hãmri nhũm mẽ inhmã pãwti ho hkry pa. Nê hpãnhã tep jamý nê mã ho anê nê ho hkry pa nê ho mẽ inhĩpêx pa pa mẽ ixàpkur o ixkrĩ.

¹⁴ Nhũm Jejus akupým htír kãm ra ahpýnhã mẽ ixwýr hapôx o axkrunêpxi.

Jejus kot akupým tãm Simãw Pêtre xãm

Atre 20.28-31; Wam Pêtre 5.1-4

¹⁵ Tã pa mẽ ra ixàpkur pa nê kànhmã ixkuhê nê gô mý ri mra. Hãmri nhũm Jejus Juãw hkra Simãw Pêtre mã tanhmã kapêr to. Nom ixpê Juãw nhũm kêp ixkra hkêt axtem Juãw õ hkra na pre. Jakamã nhũm Jejus kãm kapêr nê kãm:

—Kwa Simãw. Xà we amã ijapê ho ate pika hkôt mẽmoj piitã hakrenh par nà? Anê.

Hãmri nhũm kuma nê kãm:
—Tý inhmã ajapê htýx kênã Pahihti. Ra ate ja hã amnhĩ tã ixpumunh mex. Inhmã ajapêê. Anê.

Hãmri nhũm kuma nê kãm:
—Tôe. Nà kênã ka inhmã mẽ kot ixkôt amnhĩ xunhwýr xwýnhjê jahkre mex o ri mẽ hkôt apa. Te ho ôwêhti hkrare jamãr xwýnh kot hamãr mex o ri hkôt pata pyrãk. Anê.

Hãmri nhũm kãm:
—Tôe. Nà kot paj amã mẽ ho anê. Anê.

¹⁶ Tã nhũm hã ahtũmre nhũm kê axte kãm:

—Kwa Simãw. Xà we ãm hãmri na ka inhmã amnhĩ jarê. Xà we amã ijapêê nà? Anê.

Hãmri nhũm kãm:

—Tý. Ra ate inhmã ajapê hã ixpumunh kênã. Anê.

Hãmri nhũm kê axte kãm:

—Tôe. Kênã ka inhmã mẽ kot ixkôt amnhĩ xunhwýr mã xwýnhjê jahkre mex o ri mẽ hkôt apa. Te ho ôwêhti jamãr xwýnh kot ôwêhti jamãr mex o hkôt pa xwýnh kot amnhĩ nhĩpêx pyrãk. Anê.

Hãmri nhũm kãm:

—Nà kot paj amã mẽ ahkre mex o ri mẽ hkôt ixpa. Anê.

¹⁷ Tã hãmri nhũm hã ahtũmre nhũm kê axte kãm:

—Kwa Simãw. Xà we ãm hãmri na ka inhmã amnhĩ jarê? Xà we amã ijapê htýx kumrêx nà? Anê.

Hãmri nhũm tee ri amnhĩ tã kuma nê hkaprĩ nê. Ra kot amnhĩ tã hkukjêr o axkrunêpxi jakamã nhũm hkaprĩ nê tee ri hamaxpêr. Hãmri nê kãm:

—Kwa Pahihti. Ate mẽmoj piitã omunh par. Nê ate inhmã ajapê htýx ã ixpumunh par kênã. Anê.

Hãmri nhũm kê axte kãm:

—Tôe. Kênã ka inhmã mẽ kot ixkôt amnhĩ xunhwýr mã xwýnhjê jahkre mex o ri mẽ hkôt apa. Te ho ôwêhti jamãr xwýnh kot hamãr mex o ri pata pyrãk. Anê.

Hãmri nhũm kãm:

—Nà kot paj amã mẽ ho anê Pahihti. Anê.

Simãw Pêtre tanhmã htyk to hkukamã harênh

¹⁸ Nhũm Jejus arĩ Simãw Pêtre mã kapêr nê kãm tanhmã htyk to hkukamã harênh to nê kãm:

—Kwa ixkapêr ma nê amnhĩ krã him haxàr týx nê hã apa Simãw Pêtre. Nà

kormã anyw ri na ka pre hte ma nhÿhÿm apa kaxyw nê anojarêt hãmri nê anhînôhkà mex jagjê nê ma nhÿhÿm amã apa hprãm xà hkôt ri apa. Tã kot kaj apigêt nhÿm mẽ apynê nê akahti hpre nê apa hpre nê ma nhÿhÿm ato mō ka mẽ kãm amnhĩ gō nê amnhĩ nê tanhmã mẽ kãm nê hkêt nê. Amã mẽ hkôt amōr prãm kêt tã mãmri mẽ kãm amnhĩ gō kê mẽ ma nhÿhÿm ato mō.

¹⁹ Tã kêr ka arĩ ixkôt amnhĩ xãm tÿx nê atĩr prãm xaj mẽ umaj axte ixkaga hkêt nê. Hãmri nhÿm mẽ apĩ nê tanhmã atyk to hã apumu nê amã Tĩrtũm kĩnh ã apumunh mex kurê kumrêx. Hãmri nê atã Pahi Maati Tĩrtũm mex o mex ã harê. Anê.

Nhÿm pre ã Jejus Simãw Pêtre tyk kukamã kãm ujarênh anê. Hãmri nê kãm:

—E kêr ka ixte amnhĩ to htÿx nê amarĩ mẽ kãm ixãm nhÿm mẽ kot ixpĩrja pyrã nê ã amnhĩ nhĩpêx anê. Anê.

Hãmri nhÿm kuma nê kãm:

—Tõe. Nà kot paj hãmri tã ã amnhĩ nhĩpêx anê Pahihti. Anê.

Juãw tyk kukamã tanhmã harênh to hkêt ã harênh

²⁰ Nhÿm pre ã Jejus Simãw Pêtre mã tanhmã htyk to hkukamã harênh anê. Hãmri nhÿm kuma nê ixpê Juãw ã ixto hakêx nê ixpê Jejus kràmnhwÿ mex ã ixpumu. Kormã Jejus htyk kêt ri kamàt kãm mẽ ixàpkur o ixkrĩta ã na pa pre ãhkô hã ixàpkur o nhÿ nê kot mẽ kãm òr mã xwÿnhhta nhĩxi hã hkukja.

²¹ Jakamã nhÿm Simãw Pêtre ixto hakêx nê ixpumu nê ixtã Jejus kukja nê kãm:

—Kwa no pêr pahkôt mōr mÿj? Tanhmã koja we htyk to? Anê.

Hãmri nhÿm kãm:

²² —Nà kot paj amã tanhmã htyk to hkukamã harênh hkêt nê. Kot pa inhmã arĩ kritpêm pa rãhã pa akupÿn ixwrÿk prãm nhÿm arĩ pa nê htyk kêt rãhã pa akupÿn wrÿ. Kêr ka ri htyk kukamã tee ri tanhmã ajamaxpêr to hkêt nê. ãm ixkôt pix mã ate amnhĩ nhĩpêx tÿx pix kukamã mãn ajamaxpêr o ri apa.

²³ Anhÿr o kãm ijarênh jakamã nhÿm mẽ ixkwÿjaja kot ã ijarênh anhÿrja ã kuma ma nê htÿx nhÿrmã ixtyk kêt ã ixkamnhix. Nê gaa nê rĩ piitã axpên mã ã ijarênh anhÿr o pa. Nom na pre ã ijarênh anhÿr kêt nê. Na kêt pre ijarênh o:

—Kot pa inhmã arĩ ri kritpêm pa rãhã pa akupÿn ixwrÿk prãm nhÿm arĩ pa nê htyk kêt rãhã pa akupÿn wrÿ.

Anhÿr o ijarê. Nom ãm hãmri ixtyk kêt rãhã nhÿm akupÿn wrÿk ã ijarênh kêt nê.

Juãw kot Jejus kot tanhmã amnhĩ to hã kagã hpar kêt ã kot amnhĩ jarênh

Juãw 20.30-31

²⁴ E na pa mẽ amã Jejus kot tanhmã amnhĩ nhĩpêx to ho pa hã harê nê hã kagã. Ixpê hkôt ri ixpa ho ixpa xwÿnhjê hō na pa ãm hãmri ã hã kagã anê. Ka mẽ kamã harê nê ama nê ãm hãmri ixte kagã

nhĩpêx kôt ixpumunh mex
kurê kumrêx.

²⁵ No na pre Jejus âm ja pix
o anhỹr o pa hkêr nê. Na pa
âm mẽ amã hkwỳ pix jarê nê
hã kagà. Na pre tanhmã ri
mẽmoj to rax kumrêx o ri pa.
Nom kêp âm ixte kot tanhmã
ri amnhĩ nhĩpêx to piitã hã
kagà hpar ronhỹx hã kagàja
katutxô rax kumrêx. Jao te ra
kaxkwa htêp o môr pyràk.

Tã âm ja pix. Na hapêx.

Atre
Jejus nhỹ hã mẽ
ahkre ho mẽ pa
xwỳnhjaja kot
tanhmã amnhĩ
nhĩpêx to ho pa hã
mẽ harênh

Rukre na pre kagàja nhĩpêx. Na pre kêp tôtô nê hkwỳjê kane ho pa. Nê Jejus nhỹ hã mẽ ahkre ho pa xwỳnh pê Pawre kôt pa ho pa. Hãmri nê hamaxpêr nê hkràmnhwỳ Teopre mã kagàja nhĩpêx nê hwỳr kumê. Nê kagàja kamã Jejus nhỹ hã mẽ ahkre ho mẽ pa xwỳnh maatijaja kot Jejus mỳr pê tanhmã amnhĩ nhĩpêx to ho pa hã mẽ harê.

Nê Ijaew nhõ patrejaja nê mẽ hkwỳ pê Parijew nhõ xwỳnhjaja nê mẽ hkwỳ pê Satusew nhõ xwỳnhjaja kot Tĩrtũm kapêr ã kagà htũm kamã harênh nê mar nê hkôt amnhĩ nhĩpêx tã Tĩrtũm Kra Jejus kôt amnhĩ nhĩpêx kêt ã mẽ harê. Mẽ kot kêp Tĩrtũm Kra hkêt ã hkamnhĩx jakamã na prem kãm mẽ kot hkôt amnhĩ xunhwỳr xwỳnhjê kurê nê. Tã nhũm Simãw Pêtre mẽ Pawre mẽ Jejus nhỹ hã mẽ ahkre ho mẽ pa xwỳnh kwỳjaja mẽ uràk nê kêp Ijaew tã mẽ kurom Jejus hkôt amnhĩ xunhwỳ nhũm mẽ tee ri ja hã mẽ omu mẽ kamã gryk tỳx nê tanhmã mẽ hipêx to ho pa. Tã nom nhũm mẽ tee ri amnhĩ kukamã hamaxpêr nê Jejus kaga hkêt nê. Mẽ kot mẽ hipêx kati htã

na prem arĩ Tĩrtũm Karõ nhỹ hã mẽ piitã mẽ kãm tanhmã Jejus kot mẽ panê amnhĩ nhĩpêx to hã harênh o pa. Kam nê kapit 1 kamã wesik 8 japêr nê kamã harê. Hãmri nhũm Rukre ã mẽ kot amnhĩ nhĩpêx anhỹrja piitã hã kagà nê Teopre hwỳr kumê. Nê kãm mẽ harênh o:

Tĩrtũm Karõ jarênh

Matêwre 28.16; Makre 16.14; Rukre 24.36; Juãw 20.19

¹ Pa Teopre? Xà amex? E ot pa axte awỳr kagà nhĩpêx nê kumê. Nà wam ixte awỳr kagà nhĩpêx nê mênhta kamã na pa pre amã Jejus kot tanhmã amnhĩ nhĩpêx to hã harê nê hã kagà. Kot tanhmã amnhĩ nhĩpêx to ho pa nê tanhmã mẽ ahkre hto ho paja krax rũm pa pre piitã hã kagà hpa nê awỳr kumê.

²⁻⁴ Kormã akupỳm kaxkwa hwỳr àpir xwỳj ri na pre ÿ hã mẽ ahkre ho pa kaxyw hkôt mẽ pa xwỳnh kwỳjê rê. Tã nhũm mẽ kãm hkurê xwỳnhjaja kupĩ nhũm amnhĩ xà htỳx kãm hamak rax kãm ty. Hãmri nhũm Tĩrtũm akupỳm ho htĩr. Nom nhũm ma akupỳm kaxkwa hwỳr àpir kurê kumrêx kêt nê. Na pre xatã mẽ kot ÿ hã mẽ ahkre ho mẽ pa xwỳnh maatijê hwỳr hapôj nhũm mẽ akupỳm htĩr kãm omu. Na pre hte nhỹri mẽ hwỳr hapôj nê tanhmã mẽ ahkre hto nê mẽ kãm:

—Na pre Tĩrtũm mẽ ato hkra nê tãm mẽ ate amnhĩ

nhîpêx o apa kaxyw mẽ axunhwý.

Anhÿr o mẽ ahkre hã arïgro ho 40. Hãmri nê kormã mẽ kamã pa ri axte tanhmã mẽ kãm kapêr to. Tirtũm Karõ nhÿ hã mẽ kãm kapêr nê mẽ kãm:

—E kêr ka mẽ krï ja kamã ri apa nê tokyx ma nhÿhÿm apa hkêt nê. Kê Inhîpêêxà Tirtũm mẽ awÿr amnhî Karõ rê mân. Ra ixte mẽ amã harênh xà hkôt koja mẽ awÿr kurê nhũm mẽ awÿr wrÿ nê mẽ akarõ mã agjê ka mẽ rï kormã angrà nê ma nhÿhÿm krï hkôt ri mẽ kãm kapêr jarênh o ri mẽ hkôt apa.

⁵ —Juãw Paxis na pre hte Tirtũm mã gôx kãm mẽ hkrã kumrãr o pa. Tã koja Tirtũm tokyx mẽ awÿr amnhî Karõ rê. Kot ixpãnhã amnhî kaxyw mẽ ato mẽ amã ma hkêt kaxyw mẽ awÿr kurê. Koja hã apkati grêre nhũm mẽ awÿr kurê nhũm ixpãnhã mẽ awÿr wrÿ nê mẽ amã agjê nê mẽ akamã mẽ akôt pa ho pa. Ka mẽ rï kormã Jerujarê rũm ajapôj nê ma mẽ kãm Tirtũm kapêr jarênh o ri mẽ hkôt apa. Anê.

Jejus akupÿm kaxkwa hwÿr àpir ã harênh

Makre 16.19; Rukre 24.50

⁶ Tã nhũm mẽ axte akuprõ. Jejus nê ÿ hã mẽ ahkre ho mẽ pa xwÿnh maatijaja nhũm mẽ hixêt pê Oriwêhti nhĩmõk ã axte axpên wÿr akuprõ. Hãmri nhũm mẽ amnhî tã Jejus kukja nê kãm:

—Kwa Pahihti mẽ inhmã mẽmoj jarê. Xà kot kaj tokyx

apê Tirtũm kot mẽ ixwÿr amênh xwÿnh ã amnhî jarê nê Rõm nhõ xwÿnhjê nê mẽ pahpê Ijaew kator nà? Hãmri pa mẽ pamjaja amnhî to amnhĩptâr o ri ixpa. Anê.

⁷ Hãmri nhũm mẽ kãm:

—Nà Inhîpêêxà pix na ã mẽmoj kot anhÿrja kukamã àhpumunh. Tapxipix na kot mẽmoj tanhmã ho hã arïgro nê mẽmoj tanhmã ho hã mytwrÿ pumunh mex. No mẽ kajaja mo kaxyw kot ka mẽ amnhî katorta kukamã amnhî jarênh ma?

⁸ Nà kot paj ãm mẽ amã mẽmoj to pyxire nê hkukamã harê. Koja Tirtũm tokyx mẽ awÿr amnhî Karõ rê nhũm ixpãnhã kot mẽ ato amnhĩptâr kaxyw mẽ akarõ mã agjê. Hãmri ka mẽ ma pyka piitã hkôt angrà nê ma mẽ kãm ixkapêr jarênh o ri mẽ hkôt apa. Jar Jerujarê kamã nê pika pê Jutej kôt nê nhãm pika pê Samar kamã nê pika piitã hkôt mẽ kãm ijarênh o ri mẽ hkôt apa. ã mẽ ate amnhî nhîpêx anhÿr pix kukamã kot paj mẽ amã harê. Anê.

⁹ Nhũm pre ã Jejus mẽ kãm kapêr anê hãmri nê mẽ kêp kãnhmã àpir o tẽ nê mẽ noo mã ma kaxkwa hwÿr àpir o tẽ nê kakrãm axà nê mẽ kêp akunok.

¹⁰ Hãmri nhũm mẽ tee ri hapêr o kuhê rãhã nhũm mẽhõ myja wa axkrut nê mẽ hwÿr wrÿ nê mẽ kutã wa xa. Wa ê hakaj nê wa xa.

¹¹ Hãmri nê mẽ kãm:

—Pa Garirej nhõ xwýnhjaja? Kwa mo kaxyw na ka mẽ tee ri kaxkwa pumunh o akuhê? Tirtũm na akupỹm amnhĩ wýr Kra Jejus o api ka mẽ àpir kãm omu. E mẽ tee ri hkukamã ajamaxpēr kêt nẽ. Koja nhỹrmã man akupỹn mẽ awýr wrý. Te mẽ arũm kaxkwa hwýr àpirja pyrã nẽ akupỹn mẽ awýr wrý ka mẽ omu. Anẽ.

Akupỹm Jerujarẽ hwýr mẽ mrrar ã mẽ harẽnh

Rukre 24.52

12 Tã nhũm Jejus nhỹ hã mẽ ahkre ho mẽ pa xwýnh maati-jaja wa kuma nẽ awjanã nẽ ma akupỹm krĩm mra. Hixêt pê Oriwêhti rũm ma akupỹm Jerujarẽ hwýr mra. Wýr jawý nhũm mẽ akupỹm hpõx tokyx anẽ.

13 Hãmri nẽ akupỹm kýt pê ixkreja wýr api nẽ agjẽ. Na pre

Simãw Pêtre nẽ

Juãw nẽ

Xiakre nẽ

Andrehti nẽ

Firipti nẽ

Tomas nẽ

Patoromew nẽ

Matêwre nẽ

Xiakre hõ pê Apew kraja nẽ

Simãw Jerox nẽ

Jut pê Xiakre hkraja.

Mẽ piitã Jejus nhỹ hã mẽ ahkre ho mẽ pa xwýnh maati-jaja na pre mẽ.

14 Nẽ mãñnẽn mẽ hkõt mẽ hkwýjaja. Jejus katorxã Marir nẽ Jejus tøjaja nẽ Jejus kot tanhmã mẽni ho mex to xwýnh kwýjaja nhũm prem kýt pê ixkreja wýr Jejus nhỹ hã mẽ ahkre ho mẽ pa xwýnh

maatijê hkõt gjêx pa. Hãmri nẽ xatã axpẽn wýr akuprõ nẽ Tirtũm mã amnhĩ jarẽnh o hkrĩ.

Tirtũm kot Jut Kariot pãnhã mẽhõ xãm ã harẽnh

Matêwre 27.3-10; Juãw 15.27

15-19 Tã nhũm mẽ kot Jejus kõt amnhĩ xunhwýr xwýnhjaja ra kêp 120. Jakamã nhũm mẽmo arĩgro hã axpẽn wýr akuprõ nẽ hkrĩ. Nhũm Simãw Pêtre kãnhmã xa nẽ tanhmã mẽ kãm Jut Kariot jarẽnh to nẽ mẽ kãm:

—E Jejus kõt ixtõ nẽ ixtõxjaja. Pa mẽ amã tanhmã finat Jut Kariot jarẽnh to ka mẽ inhma. Na pre axtem nẽ mẽ pahkwýjẽ mã Jejus ã amýnẽ nẽ hpãnhã kãxpore hkwý jamý nẽ o tẽ nẽ ho amnhĩm pyka hkwý japrõ. Tã tanhmã amnhĩ to nẽ nhỹri õ pyka kamã tẽm nẽ amnhĩ tu katõk nẽ hkrêx kato nẽ ty nẽ hkamrõ ho õ pyka xy hpa. Jakamã nhũm Jerujarẽ nhõ xwýnhjaja harẽnh ma nẽ pykaja ã hixi mẽ nhũm kêp “pyka kamrõhti.” No mẽ pahpẽ Ijaew kapër kãm kêp “Ajetãm.” Amnepêm na pre Tirtũm Karõ finat Tawi mã Jut Kariot kukamã tanhmã harẽnh to. Kormã kator nẽ kot tanhmã amnhĩ to hkêt tã nhũm ra hkukamã omu nẽ Tawi mã harẽ. Kot axtem nẽ mẽ kãm Jejus ã àmnênha nhũm hkukamã omu nẽ Tawi mã harẽ nhũm kuma nẽ õ ri hã kagã. Tã nhũm kot hkukamã hã kagã hkõt nhũm ã Jejus nhĩpêx anẽ. Jut Kariotja mẽ panhĩõ na pre.

Na pre Jejus mẽ pahpyrà nẽ amnhĩm kuta. Mẽ pahpyrà nẽ ÿ hã kapër jarẽnh o pa kaxyw. Tã nhũm axtem nẽ ã hipêx anẽ.

²⁰ Nom na pre Tawi kot Tĩrtũm mex ã grer ã kagà kot ra hkukamã tanhmã harẽnh to. Kagà hkwỳ pẽ Sam kamã kot harẽnh kot:

Kot amnhĩ tomnuj xwỳnh̄ta nhõrkwỳ koja hkaprỳn kuhẽ ho kuhẽ nhũm mẽhõj mỳr pẽ kamã pa hkêt kumrẽx. Koja ãm arĩ hkaprỳn kuhẽ ho kuhẽ.

Nom kot Jejus mã tanhmã amnhĩ nhĩpêx to ho paja kê mẽhõ mỳr pẽ ho amnhĩptà nẽ hpãnhã Jejus nhỹ hã mẽ ahkre ho pa. Anẽ.

Ã Tĩrtũm kapër ã kagà htũm kot Jut Kariot kukamã harẽnh kot anhỹr.

²¹ Jakamã e ixkwỳjaja. Kot puj mẽ hpãnhã mẽ atõ xãm ka Jut mỳr pẽ mẽ pahpẽ Jejus nhỹ hã mẽ ahkre ho ixpa xwỳnh̄jẽ hkõt Jejus akupỳm htĩr ã harẽnh o apa.

²² E mẽ atõ na ka pre mẽ ixpyràn finat Juãw Paxis kot Jejus hkrã kumrãr ã omu? Nẽ Jejus kot ri tanhmã amnhĩ nhĩpêx to ho pa xà hkrax rũm ka mẽ ixkõt ri omunh o ri apa? Nẽ htyk kãm omu nẽ akupỳm htĩr kãm omu nẽ ma akupỳm kaxkwa hwỳr àpir kãm omu? E mẽ atõ na ka pre mẽ ixpyràn ã kot amnhĩ nhĩpêx anhỹr ã omunh par o ri hkõt apa? ã mẽ ate kot amnhĩ nhĩpêx anhỹr ã omunh o apa xwỳnh̄jẽ hõ kot paj

mẽ ata ka Jut Kariot mỳr pẽ mẽ ixpyràn ma mẽ kãm Jejus akupỳm htĩr ã harẽnh o ri apa. Anẽ.

²³ Nhũm pre ã Simãw Pêtre mẽ kãm kapër anẽ. Hãmri nhũm mẽ kuma nẽ axpẽn pumunh o hkrĩ hãmri nẽ Maxitre mẽ Jujere wa kãm hamaxpër. Jujere na pre hixi axkrunẽpxi. Na pre kệp Jujere nẽ kệp Pasapas nẽ kệp Justi.

²⁴⁻²⁵ Hãmri nhũm mẽ wa hã Tĩrtũm kukja nẽ kãm:

—Pa Tĩrtũm? Nà na pre finat Jut Kariotja Jejus kaga nẽ ty nẽ kot amnhĩ tomnuj mỳrapẽ ma mẽ kot amnhĩ xà htỳx kamã hamak tũm xàta wỳr ma mõ. Tã ot pa mẽ ixte mẽhõ kot mỳr pẽ mẽ ixpyrà nẽ Jejus nhỹ hã mẽ ahkre ho pa kaxyw mẽhõ hã akukjêr kaxyw akuprõ. Ate mẽ ixpiitã tanhmã mẽ ixte amnhĩ nhĩpêx to ho ixpa hã mẽ ixpumunh par Tĩrtũm. Ate mẽ ijamaxpër kõt mẽ ixpumunh par nẽ mẽ ixte tanhmã amnhĩ nhĩpêx to hã mẽ ixpumunh par. Jakamã e. Ota Maxitre mẽ Jujereja wa nhỹ. Nhỹ kot kaj amnhĩm ata? Kot paj mẽ kẽn pijakrutja ã wa hixi xi nẽ ho àk nẽ hõ py. Hãmri ka amã hprãm xwỳnh̄ta ta. Kêr pa mẽ kẽn pumunh kêt rãhã hõ py nẽ hã hixi pumu nẽ amã hprãm xwỳnh̄ kõt omunh kurẽ kumrẽx. Anẽ.

²⁶ Nhũm prem ã Tĩrtũm mã kapër anẽ hãmri nẽ kẽnja o axkamur nẽ ho àk nẽ omunh kêt rãhã ja py nẽ omu nhũm hã Maxitre nhĩxi nõ. Jakamã nhũm Jejus nhỹ hã mẽ ahkre

ho mẽ pa xwỳnh maati jaja amnhĩ kôt kumẽ nhũm mẽ akupỹm kêp 12.

2

Tĩrtũm Karõ kot mẽ hwỳr wrỳk ã harẽnh

Rukre 24.49; Atre 4.31, 8.15, 10.44, 19.2

¹ Tã nhũm mẽ hkĩnh pẽ Pẽtekos kato nhũm mẽ kot Jejus kôt amnhĩ xunhwỳr xwỳnhjaja nhỹri axpẽn wỳr akuprõ nẽ hã hkĩnh. Pẽtekosja ã na pre hte Ijaew mẽ hpur kãm mẽõ rũnh ã hkĩnh kaxyw axpẽn wỳr akuprõ nẽ hã hkĩnh. Jakamã nhũm mẽ kot Jejus kôt amnhĩ xunhwỳr xwỳnhjaja haxwỳja axpẽn wỳr akuprõ.

² Hãmri nẽ kaxkwa kamã mẽmoj ma. Nhũm mẽmoj te kôk xápêr tỳx krihkrit pyrãk o mẽ hwỳr wrỳk o mỗ nẽ mẽ pikuprõnh xà hã ixkreja wỳr axà nhũm mẽ piitã kuma.

³ Hãmri nhũm mẽmoj te kuwy jakrax pyrãkja ahpỹnhã mẽ hwỳr anhrã nẽ mẽ hkrã nhĩmõk ã hikwỹ.

⁴⁻¹³ Tĩrtũm Karõ na pre. Tãm mẽ hwỳr wrỳk jakamã ã ri mẽ hipêx anẽ. Hãmri nẽ kot mẽ ho amnhĩptâr kaxyw mẽ hkarõm gjêx pa nhũm mẽ ỹ hã tanhmã kapêr to ho kuhê. Nom mẽ kapêr o kapêr kêt nẽ. Axtem mẽ kapêr kwỳ ho kapêr. Tĩrtũm Karõ kot tanhmã mẽ ho jakamã nhũm mẽ axtem mẽ kapêr kwỳ ho kapêr. Jao ahpỹnhã mẽ kapêr kwỳ ho Tĩrtũm mã mex o mex ã harẽ. Na pre Ijaew kwỳjaja ahpỹnhã pyka

hõ kamã ri mẽ hkôt pa nẽ mẽ kapêr ma nẽ ho kapêr o pa. Tã akupỹm Jerujarẽ hwỳr pan pôj nẽ kamã ri pa ho pa. Hãmri nẽ mẽmojta ma nẽ ma Jejus kwỳjê hwỳr hprôt nẽ ahpỹnhã mẽ kapêr ã mẽ kuma nẽ tee ri mẽ omunh o kuhê. Amnhĩ jaêr pẽ mẽ kuma nẽ tanhmã axpẽn mã mẽ harẽnh to ho:

—Kokỹỹ. Garirej nhõ xwỳnhjaja kot mẽ pakapêr mar kêt tã ra tanhmã amnhĩ to nẽ ahpỹnhã ri mẽ pakapêr o kapêr. Ahpỹnhã mẽ pakapêr nẽ ahpỹnhã mẽ panhõ pyka htã nhũm mẽ ã ri mẽ pakapêr o kapêr anẽ.

Na pika pẽ Pat

nẽ Met

nẽ Erãw

nẽ Mẽsopotãm

nẽ Jutej

nẽ Kapatos

nẽ Põt

nẽ As

nẽ Prik

nẽ Pãpir

nẽ Ejit

nẽ Sirẽn wỳr Ripja

nẽ krĩ pẽ Rõm

nẽ gô hipôk pẽ Kret

nẽ Arap.

Nẽ mẽ pahkwỳjaja mẽ pahpẽ Ijaew kumrêx

nẽ mẽ pahkwỳjaja amarĩ ri amnhĩ to Ijaew.

Ãm ahpỹnhã mẽ panhõ pyka nẽ ahpỹnhã ri mẽ pakapêr.

—Tã pu mẽ ahpỹnhã mẽ pakapêr kãm mẽ kapêr ma. Tĩrtũm mex ã mẽ kot axpẽn mã harẽnhja pu mẽ hã mẽ mar mex nẽ. Anẽ.

Nhũm prem ã axpẽn mã mẽ harẽnh anẽ nẽ tee ri mẽ

omunh o kuhê. Amnhĩ jaêr pê amnhĩ kapêr kãm mẽ kapêr ma nê tee ri hamaxpêr nê axpên mã:

—Kokỹỹ. Tanhmã mãn pre wem amnhĩ to nê ra mẽ pakapêr ma nê mẽ pakapêr o kapêr? Anê.

Nhũm mẽ hkwỳjaja axtem nê ri mẽ hã hpêr o axkê nê axpên mã:

—Tk. ãm mẽ pipãnh ã ã ri mẽ kot amnhĩ nhĩpêx anhỹr kênã. Anê.

Simãw Pêtre kot mẽ kãm ujarênh

Atre 3.12-26

¹⁴ Hãmri nhũm Simãw Pêtre ã mẽ kapêr anhỹrja ma hãmri nê kỳx pê mẽ kãm kapêr nê mẽ kãm:

—E Jerujarê nhõ xwỳnhjaja nê mẽ apê ixkwỳ Ijaew. Pa mẽ amã mẽmoj jarê ka mẽ inhma nê inhmar tỳx nê.

¹⁵ Na ka mẽ atỳx ri mẽ ix-pipãnh ã mẽ ixkamnhĩx. Mẽ ixkrã pipãnh kêt. Kormã myt kaxkwa nhĩpôk wỳr htêm kênã. Na hte Ijaew kwỳhtã kagôxỳhti ho hkôm kêt nê.

¹⁶ Ja na pre Tĩrtũm amnepê mã ã mẽ ixte amnhĩ nhĩpêx anhỹrja kukamã mẽ ijarê nhũm ỹ hã kapêr o pa xwỳnh finat Joew mẽ ixkukamã hã kagà. Nê hã kagà ho:

¹⁷ Koja nhỹrmã mẽmoj piitã hapêx kaxyw pa mẽ piitã mẽ hwỳr Ixkarõ rê nhũm ma mẽ hwỳr wrỳ nê mẽ hkarõ mã agjê. Hãmri nhũm mẽ hkanrêhã mẽ hkra xãptâr nywjaja ma mẽ kãm ixkapêr

jarênh o ri mẽ hkôt pa. Koja mẽ hpimtir kãm amnhĩ kukamã mẽmoj pumu. Nê mẽhpigêtjaja haxwỳja. Kot paj mẽ hpimtir kãm tanhmã mẽ kãm ixkapêr to.

¹⁸ Nê kot paj mẽ kot ixkôt ri tanhmã amnhĩ nhĩpêx to ho mẽ pa xwỳnhjê hwỳr Ixkarõ rê nhũm mẽ ỹ hã ma mẽ kãm tanhmã ixkapêr jarênh to ho ri mẽ hkôt pa.

¹⁹ Kot paj kaxkwa kamã nê pyka kamã aa mẽ kot mẽmoj pumunh kêt kwỳ ho anê nhũm mẽ amnhĩ jaêr pê omu. Jao nhỹri mẽ hkamrô pumu nê kuwy pumu nê kuwy hkũm pumu hãmri nê tee ri amnhĩ kukamã hamaxpêr.

²⁰ Nê koja myyti ahtyk nhũm mytwrỳre haxwỳja te mry kamrô pyrãk. Pahihti Jejus akupỹn hpôx xà hã arĩgro xwỳj ri koja mẽmoj ã amnhĩ nhĩpêx anê. Akupỹn hpôx xà hã arĩgro koja mex kumrêx.

²¹ Tã koja mẽhõ mẽmoj kot ã amnhĩ nhĩpêx anhỹr ã omu nê amnhĩ kaxyw inhmã hamaxpêr nê amnhĩ to ixwỳ pa kuma nê ho ixkra nê mẽmoj punujta pê utã. Anê.

Na pre ã Tĩrtũm kapêr anê nhũm finat Joewja mẽ pamã hã kagà.

²² E pa mẽ amã tanhmã Jejus jarênh to ka mẽ inhma. Nà

Najare nhõ xwỳnh na pre. Mẽ pahte Tĩrtũm nhỹ hã kot tanhmã amnhĩ nhĩpêx to ho pa hã omunh kaxyw na pre Tĩrtũm mẽ pahwỳr kumẽ nhũm ỹ hã mẽ panoo mã tanhmã amnhĩ nhĩpêx to ho pa. Nẽ aa mẽ pahte mẽmoj pumunh kêt kwỳ ho anhỹr o pa pu prem hã omu.

23 –Tã ka prem tanhmã kaxyw ajamaxpêr punuj to nẽ apĩ. Tĩrtũm ra kot anepê mã ja kukamã ja hã mẽ apumunh mex tã mẽ pahwỳr kumẽ ka mẽ axtem nẽ apĩ. Jao mẽ kot htỳx ri amnhĩ nhĩpêx o mẽ pa xwỳnhjê mã agõ nhũm mẽ kupĩ. Pĩ kahpa hã kunhõ nhũm ty. No ãm mẽ kajaja na ka prem mẽ kãm hã amỹnê nhũm mẽ ã mẽ amã hprãm xà hkõt hipêx anẽ nẽ mẽ amã kupĩ.

24 –Tã nhũm Tĩrtũm akupỹm ho htĩr nhũm akupỹm htĩr o htĩr nhũm mẽ htykja tee ri kot amnhĩ kõt mẽnh prãm kaprỳ.

25 Amnepêm na pre finat Tawija Jejus akupỹm htĩr kukamã harê. Te Jejus tãm kapêr pyræk o kapêr nẽ kapêr o:

Na hte Pahi Maati ixkõt pa ho pa rãhã nẽ. Kot inhĩhkõ hã ixtãnopxar o pa jakamã kot paj inhmã ma hkêt nẽ ri ixãmnhĩx ijamakêtkati nẽ ri ixpa.

26-27 Pa Tĩrtũm? Nà kot paj nhỹrmã ixytk tã arĩ amnhĩ wỳr akãm ama. Kot kaj mẽ htykjê kamã ixkarõ rer kêt

nẽ. Ixte akapêr kõt amnhĩ nhĩpêx mex o ri ixpa jakamã koja inhĩ kormã omnu nẽ hkro hkêt ri ka akupỹm ixto ixtĩr. Jakamã na pa inhmã ixytk pyma hkêt nẽ ixkĩnh nẽ ijamakêtkati nẽ ri ixpa. Nẽ amnhĩ kĩnh jarênh rãhã ho ri ixpa.

28 Na ka pre akupỹm ixto ixtĩr ã amnhĩ jarê pa ixtĩr tũm nẽ ixpa ho ixpa kaxyw. Tã ate ixkõt ri apa rãhã jakamã pa ixkĩnh nẽ ri ixpa. Anẽ.

29 ã na pre mẽ panhĩgêt finat Pahi Tawija Jejus htyk nẽ akupỹm htĩr kukamã harênh anẽ. No tãm amnhĩ jarênh kêt nẽ. Tawija na pre ty nhũm mẽ haxà nhũm htem arĩ haxà xà hã pika ho mex o pa. Tã tãm ã kot amnhĩ jarênh anhỹr ro nhỹx akupỹm htĩr nhũm mẽ arĩ haxà xà kaprỳ ho mex o pa hkêt nẽ.

30 Pahi Tawi kêp Tĩrtũm nhỹ hã kapêr jarênh o pa xwỳnh jakamã nhũm Tĩrtũm kãm hkanrêhã htãmnhwỳ Jejusja kukamã harê nẽ kãm:

Koja nhỹrmã akanrêhã atãmnhwỳjê hõ amỳr pê apyrã nẽ mẽ ho amnhĩptar o pa. ãm hãmri na pa amã ja jarê. Anẽ.

31 Nhũm pre ã Tĩrtũm Tawi mã mẽ pakaxyw ãm mã xwỳnhhta jarênh anẽ nhũm kuma. Nẽ mar tỳx jakamã hkukamã htyk nẽ akupỹm htĩr ã harê nẽ hã kagà. Nẽ hã kagà ho:

Koja Tirtüm mẽ htykjê kamã
hkarõ rer kêt nê nhũm
aa ĩ omnu nê hkro kêt.
Anê.

Ã na pre finat Tawija Jejus
Kris kukamã harê nê hã kagã
anê.

³² Kot harênh xwýnh Jejusja
tãm na pre Tirtüm akupým ho
htír pa mẽ pamjaja akupým
htír kãm omu. Hãmri nê mẽ
ixte omunh xã hkõt ã mẽ amã
harênh anê. Anê.

Nhũm pre ã Simãw Pêtre mẽ
kãm Jejus jarênh anê. Hãmri
nê mẽ kãm:

³³ —Na pre Tirtüm akupým
amnhĩ wýr Kra Jejus o api.
Hãmri nê kãm anê nhũm ĩhkõ
hã mẽmoj piitã ho amnhĩptãr
o hkrĩ. Hãmri nhũm Tirtüm
kot kãm amnhĩ jarênh xã hkõt
kãm amnhĩ Karõ gõ. Tã nhũm
ra amnhĩ pyrã nê mẽ ixwýr
kurê nhũm jarãhã mẽ ixwýr
te kuwy jakrax pyrã nê mẽ
ixwýr wrý nê mẽ ixkarõ hwýr
gjêx pa. Hãmri pa mẽ ý hã
ahpýnhã mẽ akapêr o ixkapêr
ka mẽ inhma. Tã mẽ akwýjaja
axtem nê mẽ xpipãnh ã mẽ
ixkamnhĩx.

³⁴ No finat Tawija na pre
tãm kaxkwa hwýr àpir ã
amnhĩ jarênh kêt nê. Jejus
kot ĩ ho kaxkwa hwýr àpirja
na pre harê nê harênh o:

Na pre Tirtüm inhõ Pahihti
mã kapêr nê kãm:

³⁵ “E jar inhĩhkõ hã nhý.

Pa amã mẽ kãm akurê
xwýnhjê gõ ka mẽ
ho amnhĩptãr o akrĩ.”
Anê.

Ã na pre finat Tawija Tirtüm
kapêr jarênh anê. Nom tãm
ĩ rãhã kaxkwa hwýr àpir ã

amnhĩ jarênh kêt nê. Pahihti
Jejus na pre ã hã harênh anê.
³⁶ Jakamã kwa ixkwý Ijaew.
Mẽ inhma nê inhmar týt
nê. Mẽ ate Jejus ã axãmnhênh
nhũm mẽ kot mẽ amã pĩ
kahpa hã hpír xwýnhhta. Tãm
na pre Tirtümja kêp mẽ panhõ
Pahihti kaxyw ãm. Nê kêp
mẽ papytãr xwýnh kaxyw mẽ
pakaxyw ãm. Anê.

³⁷ Nhũm pre ã Simãw Pêtre
mẽ kãm ujarênh anhýr o
xa. Hãmri nhũm mẽ tee ri
ujarênhja ma nê hkaprĩ nê.
Nê tee ri amnhĩ kukamã
hamaxpêr nê hamaxpêr o:

—Hêxta waa nê. Pêr
ãm hãmri na pre Jejus mẽ
pamã amnhĩ jarênh tã pu
prem amnhĩ kaxyw hkõt
pajamaxpêr kêt nê axtem nê
kupĩ. Anê.

Hãmri nê amnhĩ tã mẽ
hkukja nê Simãw Pêtre mã:

—Kwa ã kot anhýr jakamã
tanhmã kot paj mẽ amnhĩ
nhĩpêx to? Anê.

³⁸ Hãmri nhũm mẽ kãm:

—Nã kêr ka mẽ tee ri ate
amnhĩ tomnuj mã ajamaxpêr
nê akaprĩ nê. Hãmri nê Jejus
Kris kõt amnhĩ xunhwý. Pa
mẽ ja hã mẽ apumu nê Je-
jus nhý hã mẽ akrã kumrã.
Hãmri nhũm Tirtüm ja hã mẽ
apumu nê te amnhĩ katut kõt
mẽ ate amnhĩ tomnuj piitã
rênh par pyrã nê axte kãm
hamaxpêr kêt nê. Hãmri nê
mẽ ixkuxwar mẽ awýr amnhĩ
Karõ rê.

³⁹ Kãm mẽ awýr rênh prãm.
Mẽ amã nê mẽ akanrêhã
mẽ akra nê mẽ atãmnhwýjê
mã nê mẽ kot kormã Tirtüm
kapêr mar kêt xwýnhjê mã.

Ăm mẽ kot amnhĩ to hwỳr xwỳnh piitã nhũm kãm mẽ hwỳr rẽn h prãm. Anẽ.

40 Nhũm pre ã Simãw Pêtre mẽ kãm ujarẽn anẽ. Mẽ kãm kapêr xihtỳx o kapêr ry nẽ. Hãmri nẽ mẽ kãm:

—Koja nhỹrmã Tĩrtũm mẽ kot tanhmã amnhĩ tomnuj to ho mẽ pa xwỳnhjaja tanhmã mẽ homnuj tỳx to. Jakamã kwa mẽ tokyx mẽ ate amnhĩ tomnuj kaga kê tanhmã mẽ ato hkết nẽ. Anẽ.

41 Hãmri nhũm mẽ hkwỳjaja kapêr mar tỳx nẽ amnhĩ kaxyw Jesus kôt hamaxpêr nẽ hkôt amnhĩ xunhwỳ. Mẽ ohtô rax nẽ hkôt amnhĩ xunhwỳ. Mẽ kêp 3.000 nẽ hkôt amnhĩ xunhwỳ. Hãmri nhũm mẽ kot Jejus nhỹ hã kapêr jarẽn o mẽ pa xwỳnhjaja mẽ hkrã kumrãr pa. Mẽ kêp Jejus kwỳ hã amnhĩ to amnhĩrĩt kaxyw mẽ hkrã kumrãr pa.

42 Hãmri nhũm mẽ ra mẽ kot Jejus kôt amnhĩ nhĩpêx xwỳnhjê hkôt amnhĩ nhĩpêx o pa nhũm Jejus nhỹ hã mẽ ahkre xwỳnh maatijaja apkati mẽ Jejus kapêr o mẽ ahkre nhũm mẽ mar tỳx nẽ ra Jejus kôt amnhĩ nhĩpêx mex o mỗ. Nẽ gaa nẽ hkôt amnhĩ nhĩpêx mex o pa. Mẽ kãm kapêr mar prãm tỳx jakamã na pre htem axpên wỳr akuprỗ nẽ axpên kutã apku nẽ Tĩrtũm mã amnhĩ jarẽn o hkrĩ. Nẽ mẽ kãm axpên to mex pix prãm o axpên kôt pa ho pa.

Jejus kwỳ kot tanhmã

amnhĩ nhĩpêx to hã mẽ harẽn h
Atre 4.32-35

43 Tã nhũm Jejus nhỹ hã mẽ ahkre ho mẽ pa xwỳnh maati-jaja xatã Tĩrtũm nhỹ hã aa mẽ kot mẽmoj pumunh kêt kwỳ ho anhỹr o ri krĩ nhõ xwỳnhjê hkôt pa nhũm mẽ piitã ja hã mẽ omu. Amnhĩ jaêr pê mẽ omu nẽ mẽ kamã no pyma ho tee ri tanhmã Tĩrtũm mã hamaxpêr to.

44 Nhũm mẽ kot Jejus kôt amnhĩ xunhwỳr xwỳnh piitã mẽmoj to axpên kutã nojarêt o pa. Jao axpên pê ri mẽmoj to õxỳ hkết nẽ pa.

45 Jakamã nhũm mẽhõ kêp amrakati nhũm mẽ ja hã omu hãmri nẽ õ pyka hkwỳ ho wẽnê rỳ mẽ hikukrêx kwỳ ho wẽnê nẽ kàxpore jamỳ nẽ ma o mra nẽ mẽ kãm kugõ. Na pre hte ã mẽ kot Jejus kôt amnhĩ xunhwỳr xwỳnhjaja axpên nhĩpêx anhỹr o pa.

46 Hãmri nẽ apkati mẽ Tĩrtũm mã amnhĩ jarẽn xà hã ixkre hwỳr mra nẽ kãm mex o mex ã harẽ. Nẽ hamakêtkati nẽ amnhĩx ri hkĩnh kãm axpên nhõrkwỹ hkôt ri apkur o pa.

47 Pê Tĩrtũm mã mex o mex ã harẽn o ri axpên kôt pa. Ắ mẽ kot amnhĩ nhĩpêx anhỹr o pa jakamã nhũm krĩ nhõ xwỳnh piitã kãm mẽ hkĩnh nẽ. Nẽ mẽ hkwỳjaja apkati mẽ mẽ hwỳr mra nẽ mẽ hkôt axkamẽ nẽ mẽ uràk nẽ Jejus kôt amnhĩ xunhwỳ nhũm Tĩrtũm ja hã mẽ omu nẽ mẽ ho hkra. Jakamã nhũm mẽ ra ohtô rax kumrêx o mỗ.

3

Te grà xwỳnh jarēnh

Juāw 14.12-14; Atre 14.8-10

¹ Tā nhūm apkati hō hā nhūm Simāw Pētre mē Juāw wa ma Tirtūm mā amnhī jarēnh xà hā ixkre hwỳr wa tē. Na pre hte myt àhpanh grire nhūm mē piitā kot Tirtūm mā amnhī jarēnh kaxyw hwỳr mra. Jakamā nhūm Simāw Pētre mē Juāw wa haxwỳja ma hwỳr wa mra.

² Nhūm mēhōja hakwakrem hkrī. Katorxà nhōxà hkre rūm hte grà nē kator xwỳnhnta. Nē arī hkrī ho hkrī nē aa kànhmā ãm nē ri pa hkēt nē. Nhūm hte hkràmnhwỳjaja apkati mē hamỳ nē ma o pa nē Tirtūm mā amnhī jarēnh xà hā ixkre jakwakrem hkrī nhūm mē hwỳr o hkrī. Hakwakreja mē kot kām: “Mē gjēx xà mex” anhỳr xwỳnhnta kapem hwỳr mē mrar xwỳnhjē hwỳr o hkrī.

³ Tā nhūm Simāw Pētre mē Juāw wa tē nē ixkreja wỳr wa àr o tē nhūm hte grà xwỳnhnta wa omu nē kàxpore hā wa kuwỳ

⁴ nhūm Simāw Pētre omu nē kām:

—E amnē wa ixpumu. Anē.

⁵ Hāmri nhūm kuma nē htỳx ho wa kot kām kàxpore hkwỳ nhōr ã wa hkamnhīx nē wa omu

⁶ nhūm Simāw Pētre kām:

—Nà ixkàxpore hkēt. Nom kot paj Jejus Kris xàhpumunh xà ho tanhmā anhīpēx to. E pa Jejus Kris pē Najare nhō xwỳnhnta nhỳ hā amā ixkapēr

jakamā tokyx kànhmā xa nē ri mra. Anē.

⁷ Hāmri nē upòk rūm hpa hā kupy nē kànhmā ãm nhūm hte mex nē kànhmā xa nē amnhī te karo ho ri mra.

⁸ Hāmri nē hte mex ã amnhī pumu nē hkīnh tỳx nē. Nē hkīnh xàj ma wa hkôt harī ho tē nē wa hkôt ixkrem axà. Tirtūm mā mex o mex ã harēnh pē harī ho wa hkôt tēn axà.

⁹ Hāmri nhūm mē piitā amnhī jaēr pē akupỳm mex ã omu nē kamā no pyma nē.

¹⁰ Nē axpēn mā:

—Kokỳy mỳjti na pre hte mē gjēx xà mex kamā mē hwỳr rāhā ho hkrī htā nhūm Tirtūm tanhmā ho nhūm kànhmā xa nē ri mrar mex kurē kumrēx. Hēxta waa nē. Anē.

Simāw Pētre kot mē kām ujarēnh

Rukre 24.46-47; Atre 2.14-36

¹¹ Hāmri nhūm hte mex xwỳnhja Simāw Pētre mē Juāw wa hkôt ixkre hwỳr axà nē wa kuri xa. Nhūm mē piitā amnhī jaēr pē harēnh ma nē hwỳr hpròt nē agjē nē omu. Mē kot ixkre nhīkjē jarēnh o: “Pahi Sarumāw nhō” anhỳr xwỳnh jarēnhja wỳr nhūm mē hpròt nē hte mex xwỳnhnta kamā no pyma ho kuhé. Nē kuri Simāw Pētre mē Juāw wa omu nē axpēn mā wa harēnh o:

—Hēxta waa nē. Tanhmā na we wa amnhī to nē akupỳm kām hte ho mex nhūm ri mra? Anē nē wa kamā no pyma nē.

¹² Hāmri nhūm Simāw Pētre mē kuma nē mē kām:

—Pa ixkwỳjaja. Kwa mẽmo na ka mẽ ri mẽ ixkamã ano pyma ho akuhê? Xà wa ixàhpumunh tỳx xà ho na pa wa ho mex? Nà ja kot anhỳr kêt. Rỳ xà wa ixte Tirtũm kôt amnhĩ nhĩpêx mex o ixpaja o na pa wa ho mex? Nà mãnên ja kot anhỳr kêt.

13-17 Mẽ ate omunh xwỳnhnta Jejus tãm kot ho mex kênã. Kot amnhĩ kaxyw kãm hamaxpêr tỳx jakamã nhũm akupỹm ho mex ka mẽ omu.

—Finat Apraãw nê Ijak nê Jako mẽ hkwỳjaja kot hkôt amnhĩ nhĩpêx o pa xwỳnh pê Tirtũmja. Tãm na pre akupỹm Kra Jejus o htĩr nê mex o mex ã harê. Mẽ ate hã axàmnênh nhũm mẽ kot hpĩr xwỳnhnta. Pahihti Pirat kot kãm urer kaxyw tã ka mẽ nê kãm akapêr kãm axihtỳx nê. Nom Jejus tãm kot amnhĩ nhĩpêx o pa xwỳnh na pre. Na pre hte amnhĩ nhĩpêx mex rãhã ho pa htã ka mẽ axtem nê hkaga. Nhũm pahihti Pirat mẽ ate kot kãm urer kêt ã axihtỳx nhũm kãm urer kêt nê õ pòristi mã kugõ nhũm mẽ amã kupĩ. Mẽ kajaja mẽ amã hprãm xà hkôt mẽ amã kupĩ. Tirtũm kot mẽ pahwỳr mẽnh tã ka mẽ axtem nê apĩ.

—Nom mẽ ate kêp Tirtũm Kra hã omunh kêt jakamã na ka prem ã hipêx anê. Mẽ kot mẽ ato amnhĩptàr xwỳnhjê mẽ na ka prem amarĩ apĩ. Na prem mẽ axàmnênh xà hkôt mẽ amã pĩ kahpa hã kunhõ nê ã hpĩr anê. Kêp akupỹm mẽ pahto mẽ pahtĩr xwỳnh tã ka prem axtem nê apĩ. No

nhũm Tirtũm akupỹm ho htĩr pa prem akupỹm htĩr kãm omu.

18 —Amnepêm Tirtũm nhỹ hã kapêr jarênh o mẽ pa xwỳnhjaja na prem Tirtũm kot mẽ pakaxyw ãm xwỳnhja kukamã tanhmã harênh to nê hã kagã nê mẽ kãm harênh o pa. Kot amnhĩ xà htỳx kãm hamak kãm htykja kukamã nhũm pre htem harênh o pa. Tã ã Tirtũm kot kukamã harênh anhỳr xàja kôt ka mẽ ã hipêx anê nê apĩ.

19 —Jakamã kwa mẽ tee ri mẽ ate amnhĩ tomnuj ã amnhĩ pumu nê tokyx hkaga. Hãmri nê amnhĩ to Tirtũm wỳ kê mẽ anê mẽ ate amnhĩ tomnuj piitã amnhĩ katut kôt rênh pa.

20 Hãmri nê mẽ ato mex nê ka mẽ kukwak ri akĩnh nê ajamakêtkati nê axàmnhĩx ri apa. Kojã nhỹrmã akupỹn mẽ pahwỳr Jejus mẽ. Ra kot mẽ pakaxyw ãm kênã.

21 —Nom koja tokyx akupỹn wrỳk kêt nê. Kojã kormã kaxkwa kamã pa rãhã nhũm Tirtũm akupỹm kot mẽmoj piitã ho mex par mẽ nhũm rĩ kormã akupỹn mẽ pahwỳr wrỳ. Amnepêm Tirtũm nhỹ hã kapêr jarênh o pa xwỳnhjaja kot ja kukamã harênh nê hã kagã xà hkôt.

22 —Na pre finat Mojes haxwỳja Tirtũm nhỹ hã mẽ pahpãmjê mã tanhmã ja jarênh to nê harênh o:

Kojã nhỹrmã mẽ panhõ Pahi Maati Tirtũmja te kot ra mẽ akaxyw pa ixãmja pyrã nê axte mẽ panhĩõ xãm. Mẽ

panhĩõ koja. Koja nhỹrmã inhmÿr pê mõn pøj nẽ mẽ amã Tĩrtũm kapěr jarėnh o pa. Ka mẽ kapěr ma nẽ mar tÿx nẽ kapěr kõt amnhĩ nhĩpėx o ri apa.

23 Koja mẽhõ kuma nẽ ãm kuma nẽ hkõt amnhĩ nhĩpėx kėt nẽ nhũm Tĩrtũm tee ri ja hã omu nẽ kęp hkra hkėt ã harėnh kurê kumrėx. Anẽ.

24 ã na pre finat Mojesja mẽ kãm Jejus kukamã ujarėnh anẽ. No ãm tapxipix na pre ã harėnh anhỹr kėt nẽ. Tĩrtũm nhỹ hã mẽ kapěr o mẽ pa xwÿnh piitã na prem ã mẽ kãm harėnh anhỹr o pa. Kot harėnh o pa xwÿnh kot wa finat Sãmuewja nẽ hkõt mẽ hkwyjė piitã ã Jejus kukamã hkwyjė mã harėnh anhỹr o pa.

25 —Tã mẽ pahpė mẽ hkamrõ hkwy na pu mẽ. Mẽ pahpė mẽ hkanrėhã mẽ htãmnhwÿy. Mẽ pakaxyw na pre Tĩrtũm ã mẽ kãm kapěr anẽ. Nẽ Kraja kukamã finat Apraãw mã kãm:

Koja nhỹrmã akanrėhã atãmnhwÿjė hõ pyka piitã hkõt mẽ piitã mẽ ho mex o pa nhũm mẽ kukwak ri mex kumrėx nẽ ri pa. Anẽ.

26 ã kot Kra hkukamã harėnh anhỹr tã mẽ pakumrėxjė hwÿr na pre kumẽ. Kot mẽ pahto mex nhũm mẽ pahte amnhĩ tomnuj kaga kaxyw nhũm mẽ pahpė Ijaew kumrėxjė hwÿr kumẽ. Anẽ.

Nhũm pre ã Simãw Pėtreja hte grã xwÿnh pumunh o mẽ kuhė xwÿnhjė mã ujarėnh anẽ.

4

Simãw Pėtre mẽ Juãw wa kot mẽ aptar tũmjė mã kapěr ã wa harėnh

Rukre 21.12-13

1-4 Nhũm Simãw Pėtre mẽ Juãw wa arĩ mẽ kãm Tĩrtũm kapěr jarėnh o wa xa nẽ mẽ kãm:

—Nà na pre Jejus ty nhũm Tĩrtũm akupÿm ho htĩr. Tã kot akupÿm ho htĩr jakamã koja nhỹrmã urak nẽ akupÿm mẽ htyk xwÿnh piitã mẽ ho htĩr pa. Anẽ.

Hãmri nhũm mẽ kot wa mar o kuhė xwÿnh kwÿjaja wa kuma nẽ wa hkõt hamaxpěr nẽ wa ura nẽ Jejus kõt amnhĩ xunhwÿ. Jakamã nhũm ra mẽ kot Jejus kõt amnhĩ xunhwÿr xwÿnhjaja ohtõ rax kumrėx. Ra mẽ kęp 5.000.

Hãmri nhũm axtem mẽ hkwyjaja wa hwÿr mra nẽ wa mar o kuhė. Mẽ õ patre nhõ pōristi krãhtũm mẽ Satusew nhõ xwÿnh kwÿjė mẽ nhũm mẽ ma Simãw Pėtre mẽ Juãw wa hwÿr mra nẽ tee ri wa kot mẽ ahkre hã wa mar o kuhė. Nẽ mẽ kãm akupÿm mẽ htĩr jarėnhja ma nẽ wa kamã gryk nẽ. Satusew nhõ xwÿnhjaja na pre htem akupÿm mẽ htĩr kõt hamaxpěr kėt jakamã nhũm wa akupÿm mẽ htĩr jarė nhũm mẽ tee ri wa kuma nẽ hamaxpěr punuj nẽ wa kamã gryk kato. Hãmri nẽ wa hã amÿnė nhũm mẽ wa unė nẽ ma wa o tẽ nẽ mẽ hagjėnh

xà kamã wa haxà. Ra myt grire nhùm mẽ wa haxà. Wa kot mẽ haghênh xà kamã hã apkati nhùm rĩ kormã mẽ kot ujarênh ã tanhmã wa ho kaxyw.

5-6 Tã nhùm apkati nhùm mẽ ohtô nê wa ujarênh ã wa mar kaxyw Jerujarê kamã axpên wÿr akuprô. Ijaew pigêtjaja nê mẽ àptâr tùm kwÿjaja. Nê mẽ kot finat Mojes kapêr o mẽ ahkre ho mẽ pa xwÿnhjaja. Nê mẽ ô patre maati Anas mẽ hkwyja. Nê Ijaew nhô juisti Kajpas mẽ Juãw ô mẽ Aresãnja. Nhùm mẽ kot Simãw Pêtre mẽ Juãw wa mar kaxyw axpên wÿr akuprô.

7 Hãmri nê wa hã karô nhùm pôristi wa hwÿr tẽ nê wa haprô nê ma mẽ hwÿr wa o tẽ nê wa ho axà nê mẽ kutã wa ÿr nhùm wa nhÿ. Hãmri nhùm mẽ wa omu nê wa kãm:

—E mẽ inhmã amnhĩ jarê. Mêhõ xàhpumunh xà ho na ka pre wa hte grà xwÿnhhta ho mex? Mêhõ na pre hwÿr war amê ka wa ho mex? Anê.

8 Hãmri nhùm Simãw Pêtre mẽ kãm awjarê. Tirtùm Karô kot kãm hamaxpêr o hihtÿx jakamã nhùm ÿ hã Ijaew pigêtjê mẽ mẽ àptâr tùmjê mã awjarê nê mẽ kãm:

9 —Tôe mêhõ kot ho mex xwÿnhja ã mẽ ate wa ixkukjêr

10 jakamã kot paj mẽ amã harê ka mẽ ixte harênhja ma. Wa ixpyrà nê mẽ apê Ijaew kêr ka mẽ wa ixkapêr mar tÿx nê. Jejus Kris pê Najare nhô xwÿnhhta. Mẽ ate hpĩr nhùm Tirtùm kot akupÿm

ho htĩr xwÿnhhta. Tãm na pre àhpumunh tÿx o akupÿm hte grà xwÿnhhta o mex. ÿ hã ixte kaxyw kãm ixkapêr nhùm tãm akupÿm ho mex.

11 Tirtùm kot mex o mex ã harênh nê mẽ pakaxyw ãm tã ka prem axtem nê hk-aga. Nom Tirtùm kapêr ã kagà htùm kot ra mẽ akukamã ã mẽ ate amnhĩ nhĩpêx anhÿr ã mẽ ajarênh nê mẽ ajarênh kot:

Mẽ kot kên o amnhĩm ôrkwÿ nhĩpêx kaxyw nê nhÿri kên maati pumu nê htÿx omnuj ã hkamnhix nê hk-aga. Mẽ kot hkaga htã nhùm Tirtùm mẽ kurom mex o kot kên piitã hakrenh par ã omunh kurê kumrêx.

Anhÿr o kot mẽ ajarênh. Te mẽ ate kên maati kaga xwÿnh ã mẽ ajarênh pyrãk. Tã ka mẽ ã mẽ kot mẽ akukamã mẽ ajarênh anhÿrja kôt te mẽ ate kên maati kaga pyrã nê Jejus kaga nê apĩ. Tirtùm kot amnhĩm mex o mex ã omunh nê harênh tã ka prem axtem nê hkaga.

12 Tapxipix na hte mẽ panê mẽ pahte amnhĩ tomnuj rê. Mêhõ koja uràk nê àhpumunh tÿx o mẽ panê kurê? Mêhõ koja ahpÿnhã pyka piitã hkôt uràk nê ã mẽ panhĩpêx mex anê? Nã ãm amrakati kumrêx. ãm Jejus pix. Tapxipix na pre Tirtùm ja kaxyw ãm jakamã tapxipix na kêp mẽ pahkaprĩ xwÿnh maati. Anê.

13 Nhùm pre ã Simãw Pêtreja mẽ kãm kapêr anê.

Hāmri nhũm mẽ amnhĩ jaēr
pê kuma nê axpẽn mã:

—Kwa wa kãm mẽ pah-
pyma wa hã hkwỳ jêt kêt
kumrêx. Te ri wa htỳx ri wa
pa pyræk tâ wa hamaxpêr tỳx
kumrêx. Mãn wa kêp Jejus kôt
mẽ pa ho mẽ pa xwỳnh kwỳ
jakamã na wa ã kapêr anê nà?
Anê.

¹⁴ Hāmri nê tee ri kot
tanhmã mẽmoj tâ wa kãm
àkjêr to hkukamã hamaxpêr.
No nhũm hte grà xwỳnh ra kot
mẽ hwỳr àr nê Simãw Pêtre
wa kuri mex nê ãm nhũm mẽ
kot no ho omunh jakamã wa
kãm àkjêr kêt nê.

¹⁵ Hāmri nê wa kãm anê
nhũm wa mẽ kêp kato nê
kapôt ã xa nhũm mẽ tanhmã
wa kãm nê kaxyw wa hã
axpẽn ma nê axpẽn mã:

¹⁶ —Kwa tanhmã kot puj
mẽ wa ho? Ra jar Jeru-
jarê kamã mẽ piitã mẽ kot
akupỳm hte grà xwỳnhhta mex
ã wa omunh kênã kot puj kêt
mẽ kãm wa kot ho mex hkêt ã
wa harê.

¹⁷ Tã mẽ kot harênh o hprôt
pymaj kot puj mẽ axte Jejus
jarênh o pa nê wa hkurê. Kê
hte grà xwỳnh jarênhja ãm jar
mẽ pakamã hapêx. Nà kot puj
mẽ ã wa kãm karõ anê. Anê.

¹⁸ Nhũm mẽ wa hã axpẽn
mar pa hāmri nê akupỳn wa
hã karõ nhũm wa akupỳn mẽ
hwỳr axà nhũm mẽ wa kãm:

—E Simãw Pêtre mẽ Juãw
wa. Wa māmri ma tẽ. Nom
kêr ka wa mẽ ixkapêr mar
kumrêx. Kêr ka wa axte ri
tanhmã mẽ kãm Jejus jarênh
to ho ri apa hkêt nê. ãm kwarĩ
ho kwarĩ. Anê.

¹⁹ Hāmri nhũm wa tee ri mẽ
kuma nê mẽ kãm:

—Nà Tĩrtũm tãm kot ja hã
wa inhmã karõ kênã kot pa
kêt wa mẽ akapêr ma nê
harênh o ixpa hkêt nê.

²⁰ Na pa pre wa Jejus kôt
ri ixpa nê xatã kot tanhmã
amnhĩ nhĩpêx to hã omunh o
hkôt ixpa. Nê xatã tanhmã
mẽ ahkre hto hã mar o hkôt
ixpa. Nê akupỳm htĩr kãm
omu. Jakamã tanhmã kot
pa wa amnhĩ to nê mẽ kãm
ja jarênh kêt nê? Nà kot pa
wa mẽ akapêr mar xà hkôt ã
amnhĩ nhĩpêx anhỳr hkêt nê.
Anê.

²¹⁻²² Hāmri nhũm mẽ kuma
nê tee ri mẽ kot tanhmã wa
ho kaxyw. Te grà xwỳnhhta hte
grà nê hkrĩ ho hã amgrà pê
40 tâ ra akupỳm mex nhũm
mẽ piitã ja hã omu nê hã
axpẽn mã Tĩrtũm mex o mex ã
harênh o ri pa. Jakamã nhũm
mẽ utâr xwỳnhjaja mẽ kuma
nê kãm mẽ uma nê. Hāmri nê
mẽ umaj tanhmã Simãw Pêtre
mẽ Juãw wa ho hkêt nê. ãm
axte wa kot Jejus jarênh o pa
nê wa kãm kapêr kãm hihtỳx
nê wa hano nhũm wa ma tẽ.

*Mẽ kot amnhĩ to Tĩrtũm wỳr
ã mẽ harênh*

Matêwre 18.19-20

²³ Tã nhũm Simãw Pêtre mẽ
Juãw wa ma akupỳm Jejus kôt
htõ nê htõxjê hwỳr wa tẽ nê
mẽ kãm amnhĩ jarê. Nê pa-
tre krãhtũmjê mẽ mẽ ãptâr
tũmjaja kot Jejus kapêr jarênh
nê wa hkurê kamã hihtỳxja
nhũm amnhĩ tâ mẽ kãm mẽ
harê.

24 Hāmri nhūm mẽ wa kuma nē amnhĩ to Tĩrtũm wỳr kurē kumrēx nē kām:

—Pa Pahi Maati? Nà mẽmoj piitã ho akator xwỳnhta na ka. Na ka pre kaxkwa ho akato nē pyka ho akato nē gō xujanār o akato. Hāmri nē kamã mẽmoj piitã ho akator pa.

25-26 Amnepēm na pre mẽ inhĩgēt Tawija amã tanhmã amnhĩ nhĩpêx to ho pa. Nē Akarō nhỹ hã akapêr kwỳ jarē nē hã kagà. Nē kagàja kamã mẽ kot Pahihti Jejus kutã amnhĩ xunhwỳr xwỳnhjê jarē nē mẽ hã kagà. Mẽ hkukamã mẽ hã kagà nē mẽ hã kagà ho:

Mẽmo mỳrapê na prem Ijaew kêt xwỳnhjaja Tĩrtũm kutã amnhĩ xunhwỳ?

Nē Ijaew haxwỳja. Mẽmo mỳrapê na prem htỳx ri hamaxpêr o ri pa?

Nē pyka piitã hkôt pahijaja na prem Pahi Maati kutã amnhĩ xunhwỳr pa.

Nē kot mẽ pakaxyw ãm xwỳnh Jejus Krisja nhūm mẽ mãânēn kutã amnhĩ xunhwỳr pa.

Nē mẽ kot hpĩr kaxyw mẽ kãm hã amỳnê.

Kwa mẽmo mỳrapê na prem axtem nē ã amnhĩ nhĩpêx anê? Anê.

Ã na pre finat Tawija Akarō nhỹ hã mẽ harē nē hã kagà anê Tĩrtũm.

27 ãm hāmri na pre mẽ hkukamã mẽ hã kagà. Ra mẽ kot ã amnhĩ nhĩpêx anhỹr kênã. Krĩ ja kamã na prem ã

amnhĩ nhĩpêx anhỹr kaxyw axpên wỳr akuprô. Pahi Erox nē pahi Põn Pirat nē mẽ ixkwỳjaja nē mẽ kêp Ijaew kêt xwỳnhjaja axpên wỳr akuprô nē Akra Jejus kutã amnhĩ xunhwỳ nē mẽ kot hpĩr kaxyw hã amỳnê. Kot tãm amnhĩ nhĩpêx o pa nhūm ate mẽ ixkaxyw ãm xwỳnhja nhūm mẽ axtem nē kutã amnhĩ xunhwỳ.

28 —Nom amnepēm kormã mẽ ixkêt ri na ka pre mẽ hkukamã ã mẽ kot amnhĩ nhĩpêx anhỹr ã mẽ omu. Mẽ kot tanhmã apê Akra Jejus to nē hpĩrta kukamã ka pre hã mẽ omu. Tã mẽ ixwỳr amē nhūm prem kupĩ. No ãm aja-maxpêr xà hkôt.

29 —Tã ka mẽ omu. Na mẽ Jejus ã mẽ ixkamã gryk tỳx nē tanhmã hã mẽ ixto kaxyw. Jakamã kot kaj mẽ ixpê amã tanhmã amnhĩ nhĩpêx to ho ixpa xwỳnhjaja ka tanhmã mẽ ixkrã hto pa mẽ inhmã mẽ uma hkêt nē mẽ hkôt ixpa ho ixpa. Mẽ kot tanhmã mẽ ixto hã mẽ ixkagrônh tã pa mẽ inhmã mẽ uma hkêt nē ixãmnhĩx ri ixkĩnh nē ri ixpa. Nē anhỹ hã mẽ kutã amnhĩ to htỳx nē arĩ mẽ kãm akapêr jarēnh o ri mẽ hkôt ixpa. Mẽ kot Jejus ã tanhmã mẽ ixto htãã.

30 —Akra Jejus mex o mex jakamã kot paj mẽ àhpumunh tỳx xà ho tanhmã mẽ piitã mẽ ho mex to ho ri mẽ hkôt ixpa. Mẽ à xwỳnhjaja akupỳm mẽ o mex. Nē mẽ kot aa mẽmoj pumunh kêt kwỳ ho anê. Kê mẽ omu nē axàhpumunh o

axàhpumunh ã apumunh mex kurê kumrêx. E ãm ja pix na ra hapêx. Anê.

³¹ Nhũm prem ã amnhĩ to Tirtũm wÿr anê. Puh nhũm ixkreja mẽ kãm htertet tÿx nê nhũm Tirtũm Karõ axte tanhmã mẽ hkrã hto nhũm mẽ ÿ hã kãm mẽ uma hkêt nê. ãm amnhĩ to htÿx nê mẽ kãm Tirtũm kapêr jarênh rãhã ho ri mẽ hkôt pa.

Jejus kwÿjaja tanhmã kot axpên nhĩpêx to hã mẽ harênh

Atre 2.42-47

³²⁻³³ Nhũm Jejus nhÿ hã mẽ ahkre ho mẽ pa xwÿnh maati-jaja. Na pre Tirtũmja mẽ ho mẽ kãm ma hkêt jakamã nhũm pre htem akupÿm Jejus htĩr kôt mẽ kãm harênh o ri mẽ hkôt pa. Nhũm Tirtũm mẽ kot Jejus kôt amnhĩ xunhwÿr xwÿnh piitã mẽ kutã nojarêr rãhã ho pa nhũm mẽ ra ohtô rax nê. Nê mẽ kãm axpên to mex pix prãm o ri axpên kôt pa. Mẽ ohtô htã te mẽ tipxi pyrãk. Nê axpên pê mẽmoj to õxÿ hkêt nê. Na pre htem axpên mã mẽ hikukrêx nê mẽ apkur xà jarênh o: “Inhõ pix kêt mẽ pahpiitã mẽ panhõ na.” Anhÿr o ri mẽmoj tã axpên kutã nojarêr o ri pa. No kêt axpên mã mẽmoj jarênh o: “Tk. Nà ãm inhõ pix na.” Anhÿr o harênh kêt nê.

³⁴⁻³⁵ Na pre htem tõiã õ ixkre hõ ho wênê. Rÿ õ pyka hkwy ho wênê nê kàxpore jamÿ nê ma o mra nê Jejus nhÿ hã mẽ ahkre ho mẽ pa xwÿnhjê mã kugõ nhũm mẽ hamÿ nê mẽ kêp amrakati xwÿnhjê mã ho

anhgrã. Hãmri nhũm mẽ amnhĩm hamÿ nê ho amnhĩm awjaprõ. Jakamã na pre hte mẽ hkwyjaja kãm prãm nê ri pa rÿ ê hkêt nê ri pa hkêt nê.

³⁶⁻³⁷ Jujere na pre ã amnhĩ nhĩpêx anê nê mẽ kaxyw õ pika hkwy ho wênê. Hãmri nê kàxpore py nê o tẽ nê Jejus nhÿ hã mẽ ahkre xwÿnh maati-jê mã kugõ. Jujereja Ijaew nhõ patre ho ajuta xwÿnh na pre. Gõ hipõk pê Sipre kamã na pre kato. Kêp Jujere htã no nhũm Jejus nhÿ hã mẽ ahkre ho mẽ pa xwÿnhjaja na prem kãm: “Panãpe” Anê. Mẽ kapêr kãm Panãpeja te kêp “mẽ hamaxpêr o mẽ hihtÿx o pa xwÿnh” anhÿr pyrãk. Jakamã nhũm õ pika hkwy ho wênê nê kàxpore py nê o tẽ nê Jejus nhÿ hã mẽ ahkre xwÿnhjê mã kugõ nhũm mẽ kupy nê mẽ kêp amrakati xwÿnhjê mã ho anhgrã.

5

Ananıs mẽ Sapire wa kot amnhĩ to hêx ã wa harênh

Karatas 6.7; Eprêw 10.26-31

¹ Tã nhũm Ananıs mẽ hprõ Sapire wa Jujere jarênh ma nê urãk nê õ pyka hkwy ho wênê.

² Hãmri nê kàxpore py. Nom na pre wa ra hã axpên ma. Jakamã nhũm Ananıs Jujere kĩnhã kàxpore hkwy pix py nê o tẽ nê Jejus nhÿ hã mẽ ahkre xwÿnh maati-jê mã kugõ. Nom katat kôt mẽ kãm õr ã amnhĩ jarênh kêt nê. Kot kàxpore ho pikjêr nê amnhĩm hkwy ho àrĩk ã amnhĩ jarênh

kêť nê. Ām mẽ kām amnhĩ jarênh o hêx. Te piitã õr par pyræk o amnhĩ nhĩpêx nê mẽ kām:

—E ota ixkàxporeta. Na pa wa inhõ pika hkwỳ ho wênê nê kàxpore hpy nê hpãnhã Ju-jere pyrã nê man mẽ awỳr piitã o tẽ. Anê.

³ Hãmri nhũm Simãw Pêtre ra ã kot amnhĩ nhĩpêx anhỳr ã omu hãmri nê kām:

—Tk. Kwa mon ka axtem nê Satanasti kapêr ma nê hkôt amnhĩ nhĩpêx nê te akàxpore piitã õr pyræk ã amnhĩ to axêx anê? Te ate piitã õr pyræk tã no ãm hkwỳ pix gõ. Hêxta waa nê. Na ka axtem nê Tĩrtũm Karõ mã akàxpore nhõr par o axêx.

⁴ Anhõ pyka kênã. Nê hpãnhã kàxporeja anhõ kênã. Kot kaj amã tanhmã ho hprãm xà hkôt mãmrĩ tanhmã ho. Amã piitã ho axàrik prãm nê mãmrĩ piitã ho arĩk. Rỳ amã hkwỳ hpix nhõr prãm nê mãmrĩ hkwỳ pix gõ. No ri ate õr par pyræk o amnhĩ to axêx kêť nê. Te ate mẽ inhmã pix mã axêx pyræk nom mẽ inhmã pix mã hkêť. Na ka mããnên te Tĩrtũm mã axêx pyræk. Anê.

⁵⁻⁶ Nhũm pre ã Simãw Pêtre Ananĩs mã kapêr anê nhũm kuma nê pykap tẽm nê htyk kurê kumrêx. Hãmri nhũm mẽ ãptàr nywjaja hwỳr tẽ nê kupêxê ho hkupu nê kumỳ nê ma o tẽ nê haxà. Hãmri nhũm mẽ kot ã kot amnhĩ nhĩpêx anhỳr ã harênh mar xwỳnhjaja tee ri harênh ma nê kām ma htỳx nê.

⁷ Tã nhũm ra hã ahtũm nê. Ra hã 3 ore nê hapêx nhũm Ananĩs prõ Sapireja htỳx hamakêtkati nê mẽ hwỳr tẽ nê axà. Kormã mjên htyk ã harênh mar kêť nê hamakêtkati nê hkĩnh nê mẽ hwỳr tẽ nê axà.

⁸ Hãmri nhũm Simãw Pêtre omu nê hêx rom hkukja nê kām:

—Pa? E kwa inhmã mẽmoj jarê. Tanhmã na prem war anhõ pykaja pãnhã war amã amnhĩrer to? Xà ãm hãmri na amjên mẽ inhmã harê nà? Anê.

Hãmri nhũm kuma nê mjên pyrã nê kām ho hêx nê kām:

—ỖỖ. Ām hãmri kot amã harênh kênã. Anê.

⁹ Hãmri nhũm Simãw Pêtre tee ri kuma nê kām:

—Tk. Hêxta waa nê. Kwa mon ka war ajamê war akàxpore ho te Tĩrtũm mã axêx pyræk? Mãn ka wa ajamaxpêr o: “Koja Tĩrtũm ja hã wa ixpumu nê ãm hã wa ixpumu nê tanhmã hã wa ixto hkêť nê.” Anhỳr o mãn ka wa ajamaxpêr nà? Nom na ka wa ãm kām axêx kaprỳ. Onêj ra mẽ kot amjên jaxàr xwỳnhjaja akupỳn hpôx o mra. Koja mẽ anhĩpêx o te hipêx pyrã nê mããnên ato tẽ nê ajaxà ka rĩ amnhĩ pumu.

¹⁰ Anê nhũm kuma nê mjên pyrã nê pykap tẽm nê htyk kurê kumrêx. Hãmri nhũm mẽ kot mjên jaxàr xwỳnhjaja mra nê mẽ hwỳr agjê nê omu nhũm ra htyk mex nê nõ nhũm mẽ kumỳ nê ma o tẽ nê mjên nhĩhkô hã haxà.

¹¹ Hāmri nhũm mẽ piitã wa harēnh ma nē kãm ma htỳx nē. Mẽ kot Jejus kôt amnhĩ xunhwỳr xwỳnhjê mẽ amari ri mẽ pa xwỳnhjaja nhũm mẽ tee ri wa hkukamã hamaxpēr o kãm ma htỳx kumrēx.

Mẽ kot aa mẽmoj pumunh kêt kwỳ ho anhỳr ã mẽ harēnh Makre 16.17-20; Atre 19.11-12

¹²⁻¹⁴ Na pre hte Jejus kôt mẽ kot amnhĩ xunhwỳr xwỳnhjaja xatã Tirtũm mã amnhĩ jarēnh xà hã ixkre hwỳr akuprõ. Mẽ kot ixkre nhĩkjê mã: “Pahi Sarumãw nhõ” anhỳr xwỳnh jarēnhja wỳr nhũm pre htem akuprõ. Nhũm mẽ piitã kãm mẽ hkĩnh nē mẽ ohtõ nē mẽ hkôt akuprõ nē mẽ uràk nē Jejus kôt amnhĩ xunhwỳ. Mēnijaja nē mẽmyjaja. No nhũm mẽ hkwyja Ananĩs mẽ Sapire wa kot amnhĩ nhĩpēxja mã hamaxpēr nē kãm mẽ hkôt mrar pyma nē. Kãm mẽ hkĩnh tã kãm mẽ hkôt mrar pyma nē.

Nhũm pre hte Jejus nhỹ hã mẽ ahkre ho mẽ pa xwỳnhjaja aa mẽ kot mẽmoj pumunh kêt kwỳ ho anhỳr o ri mẽ piitã mẽ hkôt pa.

¹⁵ Jakamã nhũm pre htem mẽ à xwỳnhjê jamỳ nē ma mẽ hwỳr mẽ o mra nē Simãw Pêtre kutêp pry kamã mẽ haxwỳ nē mẽ kãm:

—E mẽ jar anhĩkwỹ. Kê Simãw Pêtre ja kôt mẽ ajãnh tē nē mẽ akupēnh o akupỹm mẽ ato mex rỳ nhũm hkarõ pix mẽ atã harir ka mẽ akupỹm amex japēr.

Anhỳr o mẽ kãm kapēr hāmri nhũm mẽ kupĩp kãm kutêp hikwỹ.

¹⁶ Nē Jerujarē pu hã krĩ hkwy kamã. Mẽ à xwỳnhjaja nē mẽkarõmnuti kot tanhmã mẽ ho xwỳnhjaja nhũm pre htem mẽ hamỳ nē ma mẽ ìhkrep mẽ o mra nhũm mẽ piitã akupỹm mex pa.

Mẽ kot Jejus kwỳjê jagjēnh ã mẽ harēnh Rukre 21.12-15; Juãw 15.26-27; Atre 4.1-22

¹⁷ Tã nhũm mẽ õ patre maati mẽ hkrãmnhwỳ Sat-usew nhõ xwỳnhjaja tee ri akupỹm mẽ mex ã mẽ harēnh ma nē axpēn mã:

—Tk. Kwa na mẽ ra ohtõ nē Jejus gryk ã mẽ pahte mẽ ahkre kaga nē ãm hkôt pix mã ri amnhĩ nhĩpēx o pa. Anē.

Hāmri nē Jejus nhỹ hã mẽ ahkre maati xwỳnhjê kamã gryk nē ra tanhmã mẽ ho kaxyw.

¹⁸ Hāmri mẽ unē nē mẽ hagjê nhũm mẽ hagjēnh xà kamã hkrĩ hpa.

¹⁹ Tã nhũm kamàt nhũm Tirtũm kapēr o mẽ wrỳk xwỳnhja ma mẽ hagjēnh xà hwỳr mẽ hwỳr wrỳ nē mẽ hwỳr axà nē mẽ kãm hakwakre kahê xà mẽ nē mẽ kator pa. Hāmri nē mẽ kãm:

²⁰ —E mẽ ma akupỹm Tirtũm mã amnhĩ jarēnh xà hã ixkre hwỳr mra nē axte mẽ kãm awjarē. Tanhmã mẽ kot amnhĩ nhĩpēx to nē Jejus kôt amnhĩ nhĩpēx nyw o amnhĩ nhĩpēx ã mẽ kãm hã karõ kê mẽ ama. Anē.

21 Hāmri nhūm mẽ kuma nē ma akupỹm hwỳr hapêx kurê kumrêx. Nhūm myt kator o mōr mẽ nhūm mẽ hwỳr agjê nē mẽ kām Tĩrtũm kapêr jarênh o kuhê.

Tã nhūm mẽõ patre maati mẽ hkôt ri mẽ pa xwỳnhjaja amnhĩ wỳr mẽ àptàr tũm xwỳnhjê hwỳ nhūm mẽ piitã axpên wỳr pikuprõnh pa. Hāmri nē htỳx arĩ Jejus kwỳjaja mẽ hagjênh xà kamã mẽ hkrĩ hã mẽ hkamnhĩx nē amnhĩ wỳr mẽ hã karõ.

22 Nhūm pōristijaja ma kot mẽ haprõr kaxyw mẽ hagjênh xà hã ixkre hwỳr mra nē tee ri kamã mẽ hapêr nhūm mẽ kamã amrakati. Hāmri nhūm mẽ akupỹm mẽ pikuprõnh xwỳnhjê hwỳr hprõt nē mẽ kām:

23 —Nà na pōristi hkwyjaja arĩ hakwakrem ixkre jamãr mex nhūm hakwakre arĩ kahê htỳx nē xa. Tã pa mẽ hwỳr agjê nē tee ri hkre kamã mẽ hapêr nhūm mẽ kamã amrakati kumrêx. Anê.

24 Hāmri nhūm mẽ kuma nē tee ri hamaxpêr.

25 Rôm nhūm ja mẽ hwỳr tẽn axàn mẽ kām:

—Kwa jãã mẽ ate mẽ hagjênh xwỳnhjaja na mẽ axte Tĩrtũm mã amnhĩ jarênh xà hã ixkre kamã mẽ ahkre ho kuhê pa ham mẽ omu nē mẽ kurũm tẽ. Anê.

26 Hāmri nhūm patre nhõ pōristi krãhtũmja kuma nē mẽ hwỳr pōristi hkwy rē nhūm mẽ ma mẽ hwỳr mra nē mẽ hwỳr agjê nē kê axte mẽ unê nē akupỹm mẽ o mra. Nom tanhmã mẽ ho hkêt nē.

Mẽ kot hkôt ri mẽ pikamênh xwỳnhjê pymaj mẽ ho mex nē mẽ o mō. Nē mẽ hã axpên mã:

—Nà kot puj mẽ tanhmã mẽ ho nhūm mẽ ja hã mẽ pahpumu nē kên o mẽ pahkapê nē tanhmã amnhĩ to nē hã mẽ panhĩmex. Anê.

27 Hāmri nē mẽ ho mex nē akupỹm mẽ o mōn mẽ hwỳr mẽ ho agjê nē mẽ pikuprõnh xwỳnhjê kutã mẽ hkrĩ. Hāmri nhūm mẽõ patre maati ja mẽ kām:

28 —Kwa ra mẽ ixte Jejus kapêr jarênh nê mẽ akurê htã ka xep mẽ ãm mẽ inhma nē arĩ mẽ kām harênh o ri apa. Nê jar Jerujarê kamã mẽ piitã mẽ kām harê. Nê mẽ pajaja mẽ ixte Jejus pĩr ã ka mẽ ri mẽ kām mẽ ijarênh o apa. Anê.

29 Hāmri nhūm Simãw Pêtre mẽ kuma nē mẽ amnhĩ tã mẽ kām kapêr nē mẽ kām:

—Tỳ kot kaj mẽ Tĩrtũm kapêr kuhpa hã mẽ inhmã mẽmoj tã karõ pa mẽ ama nē ãm mẽ ama nē ãm Tĩrtũm kapêr pix ma nē hkôt ri amnhĩ nhĩpêx.

30 Amnepêm mẽ panhĩgêttjaja na prem Tĩrtũm kôt pix mã amnhĩ nhĩpêx o pa. Tã ka prem axtem nê kêp mẽ kām Kra Jejus ã amỹnê nhūm mẽ pĩ kahpa hã kunhõ nē kupĩ. Nom nhūm Tĩrtũm akupỹm ho htĩr

31 nê kêp mẽ panhõ Pahihti hã harê. Nê kêp mẽ pahkaprĩ xwỳnh mex ã harê. Hāmri nē ra amnhĩ ri ỳr nhūm ìhkõ hã mẽmoj piitã ho amnhĩptàr o hkrĩ. Nhūm kām: “Koja Ijaew mẽ kot amnhĩ tomnuj kaga nê akôt amnhĩ xunhwỳ

pa ja hã mẽ omu nẽ amnhĩ katut kôt mẽ kot amnhĩ tom-nuj rênh pa nẽ mẽ ho ixkra." Anẽ.

³² Tã mẽ pajaja mẽ ixte Je-jus htyk nẽ akupÿm htĩr ã omunh mex jakamã na pa hte Tĩrtũm Karõ nhỹ hã ã mẽ amã harênh anẽ. Karõja na pre Tĩrtũm mẽ ixte hkôt amnhĩ nhĩpêx xwÿnhjê hwÿr kurê nhũm mẽ ixwÿr wrÿ nẽ mẽ ixkarõ mã agjê. Tã ÿ hã na pa htem ri ã harênh anhÿr o ri mẽ akôt ixpa. Anẽ.

³³ Hãmri nhũm mẽ kuma nẽ mẽ kamã gryk tÿx nẽ. Nẽ mẽ kãm mẽ himex prãm nẽ mẽ kãm mẽ hã amÿnê.

³⁴ Hãmri nhũm Kamariewtija tee ri ja hã mẽ omu hãmri nẽ kãnhmã xa nẽ Jejus nhỹ hã mẽ ahkre xwÿnh maatijê xyr pê hkwÿjê mã kapêr. Parijew nhõ xwÿnh na pre. Nẽ kêp Tĩrtũm kapêr ã kagà htũm o mẽ ahkre ho pa xwÿnhjê hõ na pre. Nhũm mẽ piitã kãm hkĩnh nẽ. Jakamã nhũm kãnhmã xa nẽ pôristi mã anẽ nhũm mẽ amnhĩ nê Jejus nhỹ hã mẽ ahkre ho mẽ pa xwÿnhjê kator nhũm mẽ kapôt ã kuhê.

³⁵ Hãmri nhũm Kamariewtija mẽ nê tanhmã mẽ kãm kapêr to nẽ mẽ kãm:

—E ixkwÿjaja. Kwa kêr pu mẽ tanhmã mẽ ho hkukamã pajamaxpêr mex nẽ.

³⁶ Mãn arĩ mẽ ate finat Tetastija jarênh ã anohtÿx nẽ ho apa japêr. Mytwrÿ hõ hã na pre mẽ kãm amnhĩ to rax ã amnhĩ jarênh o pa. Hãmri nhũm hkôt ri mẽ pa xwÿnhjaja ohtô nẽ. Mẽ kêp

400. Tã nhũm prem mẽ kêp Tetasti pĩ nhũm hkôt ri mẽ pa xwÿnhjaja axpên pê anhrã nẽ ma hapêx.

³⁷ —Tã nhũm mẽ kot mẽ pi-itã mẽ ho kôta xa hã arĩgroja ã nhũm Garirej nhõ xwÿnh pê finat Jut haxwÿja hkôt mẽ pa xwÿnhjaja ohtô nẽ. Tã nhũm mẽ mãânên mẽ kêp kupĩ nhũm hkôt ri mẽ pa xwÿnhjaja haxwÿja axpên pê anhrã nẽ ma hapêx.

³⁸ —Jakamã kwa pu mẽ tanhmã jajê ho hkêt nẽ. Pu mẽ ãm mẽ omu. Koja mẽ amnhĩ krã hkôt ã ujarênh anhÿr o pa japêr hã koja Tetasti mẽ Jut wa hkôt pa xwÿnhjê pyrã nẽ tokyx axpên pê anhrã nhũm Jejus jarênh o paja hapêx o hapêx.

³⁹ Nom koja mẽ ãm hãmri Tĩrtũm nhỹ hã ã mẽ ahkre ho pa anhÿr japêr hã kot puj mẽ tee ri ja ho pajapêx mã. Jakamã kwarĩ. Kot puj mẽ tanhmã mẽ ho nẽ te mẽ pahte Tĩrtũm kutã amnhĩ xunhwÿr pyrãk. Anẽ.

Nhũm pre ã Kamariewti Je-jus nhỹ hã mẽ ahkre ho mẽ pa xwÿnh maatijê xyr pê hkwÿjê mã kapêr anẽ.

⁴⁰ Hãmri nhũm mẽ kuma nẽ kãm:

—Tÿ nà ãm hãmri na ka ã akapêr anẽ. Kot puj xep mẽ tanhmã mẽ ho hkêt nẽ. Anẽ.

Hãmri nẽ akupÿn mẽ hã karõ nhũm mẽ akupÿn mẽ hwÿr agjê. Hãmri nhũm mẽ pôristi mã mẽ hã amÿnê nhũm mẽ htak. Hãmri nhũm mẽ aptâr tũmrejaja mẽ kãm:

—E mẽ māmri ma akupým mra. Nom kêr ka mẽ axte mẽ kām Jejus kapêr jarênh o ri apa hkêt kumrêx. Anê.

⁴¹ Hāmri nhũm mẽ kām ure nhũm mẽ ma mra. Kĩnh nê ma mra nê axpên mã:

—Nà kwār mẽ Jejus ã mẽ pahtak nê tanhmã hã mẽ pahto. Kwār mẽ māmri ã hã mẽ pahto anê. Kot pu mẽ hkaga hkêt nê. Ra Tĩrtũm kot ja hã mẽ pahpumunh mex kênã.

Anhỹr o axpên mã kapêr o axpên jamaxpêr o hihtýx mex o pa.

⁴² Hāmri nê arĩ apkati mẽ hkwyjê mã Jejus kapêr jarênh o mẽ ahkre ho mẽ hkôt pa. Tĩrtũm mã amnhĩ jarênh xà hã ixkre kamã nê nhãm mẽ òrkwy kamã ri mẽ ahkre ho pa. Tĩrtũm kot mẽ pakaxyw Jejus xãm ã mẽ kām harênh o ri mẽ hkôt pa.

6

Mẽ kêp mẽ mjên htyk xwýnhjê jarênh

Wam Ximotre 3.8-9

¹ Tã nhũm mẽ kot Jejus kôt amnhĩ xunhwýr xwýnhjaja ohtô rax kumrêx o mõ. Mẽ piitã kêp Ijaew no nhũm mẽ hkwyjaja axtem Gres kapêr o kapêr nhũm mẽ hkwyjaja Ijaew kapêr o kapêr. Na pre hte Ijaew kapêr o kapêr xwýnhjaja apkati mẽ mẽ kêp mẽ mjên htyk xwýnhjê mã mẽõ ho pa. No ãm mẽ piitã mẽ hipêx o axpên pyræk kêt jakamã nhũm Gres kapêr o mẽ kapêr xwýnhjaja tee ri ã mẽ kot amnhĩ nhĩpêx anhỹr ã

mẽ omu nê mẽ kamã gryk nê. Hāmri nê mẽ kām:

—Kwa na ka htem amnhĩ kamã mẽ kêp mẽ mjên htyk xwýnhjê mã mẽõ ho rũnh nê agõ. No mẽ ixkamã jajê mã na ka htem ãm ho hkryre nê agõ. Kwa mẽ ri ã mẽ hipêx anhỹr kêt nê. Mẽ hipêx o axpên pyræk nã. Anê.

² Hāmri nhũm Jejus nhỹ hã mẽ ahkre xwýnh maatijaja mẽ hã mẽ kapêr ma hāmri nê mẽ piitã mẽ ho akuprõ nê mẽ kām:

—Kwa kêr ka mẽ ja hã axpên mã axækjêr kêt nê. E pu mẽ kot mẽ kêp mẽ mjên htyk xwýnhjê mã õ ho pa kaxyw mẽ akwyjê rê. No mẽ pajaja kot paj ja ho anhỹr o ri ixpa hkêt nê. Kot pa mẽ anê nê Jejus kapêr o ri mẽ ajahkre hkêt nê nhũm ja mex kêt nê. Jakamã mẽ atõ kot kaj mẽ akatàt kôt mẽ kām mẽ õ ho apa?

³ E mẽ amnhĩ kamã mẽ ho 7 nê mẽ arê pu mẽ kêp mẽ mjên tyk xwýnhjê mã õ ho pa kaxyw mẽ unhwý.

Tãm mẽ hamaxpêr xwýnhjaja. Nê mẽ ate axpên mã mẽ mex ã mẽ harênh xwýnhjaja. Nê Tĩrtũm Karõ nhỹ hã mẽ kot amnhĩ nhĩpêx o mẽ pa xwýnhjaja.

Ã mẽ kot amnhĩ nhĩpêx anhỹr xwýnhjaja ka mẽ ho 7 nê arê pu mẽ kaxyw mẽ unhwý.

⁴ Nom mẽ pajaja kot paj mẽ akôt arĩ mẽ amã Tĩrtũm kapêr jarênh o ri mẽ ajahkre pix tânopxar o ri ixpa. Anê.

⁵ Hāmri nhũm mẽ kuma nhũm ja mẽ kām mex nê.

Nhũm mẽ ma mra nẽ axpẽn mã hkwyjê nhĩxi jarẽ hãmri nẽ mẽ ho 7 nẽ mẽ kurê. ã mẽ hixi kot anhỹr.

Estewãw. Estewãwja na pre Jejus kôt amnhĩ nhĩpêx mex o pa. Tĩrtũm Karõ kaxwỹnh mã àr nẽ ho amnhĩptàr jakamã nhũm pre hte tãm ri amnhĩ nhĩpêx o pa.

Nẽ kaxyw Firipti

nẽ Prokot

nẽ Nĩkanõ

nẽ Timã

nẽ Parmẽnti

nẽ Nĩkoraw. Nĩkorawja krĩ pẽ ãxiok nhõ xwỹnh na pre. Kêp Ijaew kêt tã kãm Tĩrtũm kĩnh o pa. Tã ra mããnẽn Kra Jejus kôt amnhĩ xãm.

⁶ Jakamã nhũm mẽ mẽ kêp 7tajê rê nẽ Jejus nhỹ hã mẽ ahkre xwỹnh maati jê hwỳr mẽ o mra. Hãmri nhũm mẽ omu nẽ mẽ àpênh ã mẽ unhwỳr kaxyw mẽ hã ãkra jaxwỳ nẽ mẽ ho Tĩrtũm wỳ. Hãmri nhũm mẽ kêp mẽ mjên htyk xwỹnhjê mã mẽ õ ho pa nẽ mẽ piitã mẽ hipêx o axpẽn pyræk.

⁷ Tã nhũm mẽ ra ohtõ rax nẽ Tĩrtũm kapêr ma nẽ hkôt amnhĩ nhĩpêx o pa. Jakamã nhũm Jerujarẽ kamã mẽ kot Jejus kôt amnhĩ xunhwỳr xwỹnhjaja ra ohtõ rax kumrêx. Nẽ mẽ õ patre hkwy haxwỳja ohtõ nẽ mẽ uræk nẽ amnhĩ kaxyw hkôt hamaxpêr nẽ hkôt amnhĩ xunhwỳ.

Mẽ kot Estewãw pynênh ã mẽ harênh

Rukre 21.14-15

⁸ Tã nhũm Estewãwja. Kot mẽ kêp mẽ mjên htyk xwỹnhjê mã mẽ õ ho pa xwỹnhjê hõja. Tĩrtũm kot kutã nojarêt mex jakamã na pre hte y hã àhpumunh tỳx o aa mẽmoj pumunh kêt kwỳ ho anhỹr o ri mẽ hkôt pa.

⁹ Hãmri nhũm Ijaew kwỳjaja tee ri ja hã omu nhũm ja mẽ kêp omnuj tỳx nẽ nhũm mẽ hã kãm akir. Uræk nẽ mẽ kêp Ijaew nẽ Jerujarẽ kamã ri mẽ hkôt pa htã ahpỹnhã mẽ õ pyka. Mẽ kot kãm "Ripetat" xwỹnh kwỳ na pre mẽ. Nẽ ahpỹnhã mẽ õ krĩ.

Mẽ hkwyjaja kêp Sirên nhõ xwỹnh.

Nẽ mẽ hkwyjaja kêp Aresãn nhõ xwỹnh.

Nẽ mẽ hkwyjaja kêp Siris nhõ xwỹnh.

Nẽ mẽ hkwyjaja kêp As nhõ xwỹnh.

Ahpỹnhã mẽõ pika nẽ mẽ õ krĩ htã na prem Jerujarẽ kamã ri axpẽn kôt pa ho pa. Tã Estewãw kot ã amnhĩ nhĩpêx anhỹr o pa hã omu nhũm ja mẽ kêp omnuj tỳx nẽ nhũm mẽ hã kãm akir.

¹⁰ No nhũm Tĩrtũm Karõ nhỹ hã hamaxpêr tỳx o mẽ kãm kapêr nhũm mẽ kuma nẽ tee ri kutã tanhmã kãm nẽ hprãm kaprỳ.

¹¹ Hãmri nẽ ma mra nẽ tanhmã ho hêx to kaxyw amnhĩ kwỳjê rê nẽ mẽ kãm hã amỹnê nẽ mẽ kãm:

—E kêr ka mẽ krĩ nhõ xwỹnhjê mã Estewãw o axêx nẽ tanhmã mẽ kãm ho akapêr punuj to ho ri mẽ hkôt apa. Kê mẽ ama nẽ kamã gryk

kato. Kot kaj mẽ ã amnhĩ nhĩpêx anê pa mẽ hpãnhã mẽ amã amnhĩre. Anê.

Hãmri nhũm mẽ kuma nê ma mra nê hapôj nê ma krĩ nhõ xwýnhjê mã tanhmã ho hêx to ho ri mẽ hkôt pa nê mẽ kãm:

—E mẽ amnê akuprõ nê mẽ inhma. Kwa kêr ka mẽ Estewãwti kapêr mar kêt nê. Na hte finat Mojes mẽ Tĩrtũm wa ho kapêr punuj pix o ri pa. Pa mẽ ra kot wa ho kapêr punuj ã kuma. Anê.

¹² Hãmri nhũm mẽ kuma. Krĩ nhõ xwýnhjê mẽ nê mẽ àptàr tũmrejê mẽ Tĩrtũm kapêr tũm o mẽ ahkre ho mẽ pa xwýnhjaja nhũm mẽ tee ri mẽ kot Estewãw o hêxja ma nê kamã gryk nê. Hãmri nê ma hwýr mra nê unê nê ma mẽ õ juisti hwýr o tẽ.

¹³ Hãmri nhũm mẽ kãm ho hêx xwýnhjaja mẽ hkôt mra nê juisti mã tanhmã ho hêx to nê mẽ kãm:

—E jahti na hte finat Mojes kot Tĩrtũm nhỹ hã mẽ pahte tanhmã amnhĩ nhĩpêx to hã karõ ho hêx rãhã ho pa. Nê Tĩrtũm mã amnhĩ jarênh xà hã ixkreja nhũm tanhmã ho hêx to pa mẽ kuma.

¹⁴ Na hte mẽ kãm: “Koja nhỹrmã Jejus pê Najare nhõ xwýnh Tĩrtũm mã amnhĩ jarênh xà hã ixkreja grãnh pa kãm ga.” Anhỹr o mẽ kãm hêx o pa. Nê Mojes kot mẽ pahte amnhĩ nhĩpêx ã karõ nê mẽ pahkurê pa prem kuma. Anê.

¹⁵ Nhũm prem ã mẽõ juisti mã Estewãw o hêx anê. Hãmri nhũm mẽ kuma nê Estewãw wýr rĩt nê hkuk pumu nhũm

te kot Tĩrtũm kapêr o mẽ wryk xwýnhjê kuk nhĩrã rax pyrà nê xa nhũm mẽ tee ri omu nê kamã no pyma nê.

7

Estewãw kot juistijê mã ujarênh

¹ Hãmri nhũm mẽ õ patre maatija Estewãw mã kapêr nê kãm:

—E mẽ inhma amnhĩ jarê. Xà ãm hãmri na mẽ ri ã ajarênh anê nà? Anê.

² Hãmri nhũm kuma nê mẽ piitã mẽ kãm kapêr. Mẽ kãm kapêr ryy nê mẽ kãm:

—Tõe kot paj mẽ amã mẽ panhigêt finat Apraãw tanhmã harênh to ka mẽ inhma. Annepêm na pre Tĩrtũm maatija Apraãw wýr kato. Kormã pyka pê Mêsopotãm kamã pa ri. Kormã kot ma krĩ pê Arã hwýr mõi kêt ri nhũm hwýr kato nê kãm:

³ “E kêr ka mẽ anhõ krĩ pê akato nê akwýjê re nê ma mõi. Kot paj ma nhỹhỹm hpãnhã pyka hõ hwýr mẽ ato mõi.” Anê.

⁴ —Hãmri nhũm kuma nê amnhĩ to akuprõ nê ma mõi. Õ pyka pê Katej pê kato nê ma krĩ pê Arã hwýr mõi nê hpãnhã kamã pa. Tã nhũm hipêêxà Terahti kêp ty nhũm Tĩrtũm amnê jar mẽ panhõ pyka hwýr kumê. Jar mẽ papaxà hwýr kumê.

⁵ —Nom nhũm kormã kãm pykaja nhõi kêt nê. Kormã kãm hkwy ho grire nê õr kêt nê. Na pre ãm kãm:

E kot paj nhỹrmã amã pykaja gõ. Amã nê akanrêhã

akra nē atāmnhwýjê
mã kugõ ka mẽ kamã
ri apa ho apa.

Anhÿr o kãm mẽ panhõ pika
pê Kanaãja jarê. Apraãw ko-
rmã hkra hkêt ri nhũm ã kãm
kapêr anê.

⁶ Hãmri nê kãm:

Koja akanrêhã atāmnhwýjaja
nhÿrmã ma nhÿhÿm
pyka hõ hwÿr pa nê
hpãnhã kamã pa. Mẽ
õ pyka kamã pa hkêt
tã nhãm pyka hõ kamã
pa hãmri nê pika nhõ
xwÿnhjê mã àpênh
rũnh o pa nhũm pyka
nhõ xwÿnhjaja mẽ
hipêx kati rũnh o pa.
Nê mẽ àpênh ã mẽ
kãm amnhÿrer kêt nê.
Am mẽ homnuj o pa
hã amgrà xohtô rax
kumrêx. Nhũm mẽ hã
amgrà pê 400.

⁷ Nom kot paj mẽ hã mẽ hom-
nuj tÿx nê. Akanrêhã
atāmnhwýjê hã mẽ
homnuj tÿx nê nhũm
mẽ rĩ kormã mẽ kurũm
kato nê man akupÿn
pa nê jar pøj. Hãmri
nê jar inhmã inhmex o
inhmex ã ijarênh rãhã
ho pa. Anê.

⁸ Hãmri nê kãm:

E pu axpên ma. Koja ka
nê akanrêhã akra nê
atāmnhwýjaja ka mẽ
ixkôt ri amnhÿ nhÿpêx
o apa hã kot paj mẽ ato
ixkra. Tã koja ja amã
mex japêr hã kêr ka
mẽ amnhÿ my kwrÿt kã
hkwÿ jakà. Nê koja mẽ
akrajaja hapøj nê my
ka mẽ mã mẽ ho anê

nê mẽ kêp mẽmy kwrÿt
kã hkwÿ jakà. Mẽ piitã
mẽ kot mẽ apê ixkra hã
mẽ apumunh kaxyw
kot kaj mẽ ã amnhÿ
nhÿpêx anê.

Anhÿr o Apraãw mã kapêr
nhũm kuma nê mar xà hkôt
hkra Ijak my kwrÿt kã hkwÿ
krãhta. Kormã hkaràre ri. Ko-
rmã hã arĩgropê 8 pix ri nhũm
kêp hkwÿ krãhta.

—Tã nhũm Ijak hprêk nê
hprõ nê hkra. Hãmri nê mã
hkra Jako ho anê nê. Nhũm
Jako hprêk nê mã hkra pê
12jê ho anê nê mẽ piitã mẽmy
kwrÿt kã hkwÿ jakàr pa. ã
na pre mẽ pahpàr kraxjaja
amnhÿ nhÿpêx anhÿr o pa.

⁹ —Jako hkrajê hõ na pre
kêp Juje. Nhũm Juje htõjaja
hipêêxã hkôt kamã gryk nê
axtem nê mẽ urojê mã ho
wênê nhũm mẽ kêp haprõ
nê ma pyka pê Ejit wÿr o
mõ. Amarĩ Ejit nhõ xwÿnhjê
mã àpênh o pa kaxyw. Tã
no nhũm Tirtũm arĩ tânopxar
rãhã ho hkôt pa.

¹⁰ Hãmri nê Ejit kãm mẽ
kot homnuj xwÿnhjê nhÿhkra
rũm hkapa nê tanhmã hkrã
hto nhũm àhpumunh tÿx nê
hamaxpêr mex nê. Jakamã
nhũm Ejit nhõ xwÿnhjê nhõ
pahi Parahtija omu nê kãm
hkĩnh nê. Kot tãm amnhÿ
nhÿpêx nê àhpumunh tÿx kôt
omu nê kãm hkĩnh nê. Hãmri
nê amnhÿ ri kumê nhũm ìhkô
hã àpênh o pa. Kãm òrkwÿ
pumu nê Ejit nhõ xwÿnhjê ho
amnhÿtãr o pa.

¹¹ —Rôm nhũm mẽ hpur
kãm mẽmoj nhÿgrõt mex kêt

ně nhům mẽ kệp mẽ apkur xà hã mẽ òja ra ri mẽ kệp kryre. Ejit kamã nẽ jar Kanaã kamã nhům mẽ apkur xà hã mẽ òja mẽ kệp hapêx par o mỗ. Nhům mẽ piitã prãm xàj ra hiire nẽ kãm prãm tỳx o pa nhům mẽ panhĩgêjtjaja hãmri prãm xàj tee ri amnhĩ xàpkur xà hã mẽmoj japêr.

12 —Tã nhům Jakoja Ejit kãm arĩ mẽ apkur xà hã mẽ ò rax ã harênh ma nẽ ma hwỳr hkra hkwỳjê rẽ. Mẽ panhĩgêjtjaja nhům ma mẽ hwỳr mẽ kurẽ nhům mẽ ma mẽ hwỳr mra. Hãmri nẽ mẽ hwỳr pỏj nẽ mẽ kệp mẽmo hy hkwỳ japrỏ nẽ ma akupỳm o mra. Wam mẽ mỗrta ã mẽ kệp mẽmoj japrỏ nẽ ma akupỳm o mra.

13 —Tã nhům mẽ kệp mẽmo hy japrỏr xwỳnhja hapêx nhům mẽ axte akupỳm mẽ hwỳr mra. Hãmri nhům mẽ htỏ Juje mẽ kãm amnhĩ to amnhĩrit nẽ kệp mẽ htỏ hã mẽ kãm amnhĩ jarẽ. Mẽ kot ra htyk ã hkamnhĩx tã nhům mẽ kãm amnhĩ jarẽ. Hãmri nhům Paraohti mẽ kệp Juje htỏ hã mẽ harênh ma.

14 —Tã nhům Juje amnhĩ wỳr hipêêxà Jako mẽ htàmnhwỳjaja mẽ hã karỏ nhům mẽ piitã ma Ejit wỳr hapêx. Mẽ kệp 75 nẽ ma Ejit kamã Juje hwỳr hapêx hãmri nẽ kamã pa ho pa.

15 —Ã kot anhỳr jakamã nhům Jakoja ma Ejit wỳr mỗ nẽ hpãnhã kamã pa ho pa. Tã hãmri kamã ty. Nhům hkrajê piitã Ejit kãm pa hãmri nẽ gaa nẽ htyk pa.

16 Hãmri nhům mẽ hkanrêhã mẽ hkrajaja mẽ hamỳ nẽ ma akupỳm Kanaã hwỳr krĩ pê Sikê hwỳr mẽ o pa nẽ kamã mẽ hagjê. Na pre mẽ hkukamã finat Apraãw kot Amỏr krajê pê kênkre japrỏ nẽ kamã hprỏ jaxà. Jakamã nhům prem mỳr pê ma hwỳr mẽ o pa nẽ kamã mẽ hagjê hãmri nẽ ma akupỳm Ejit wỳr pa.

17 —Tã gaa nẽ rĩ ohtỏ rax kumrêx o mỗ. Mẽ panhĩgêjtjaja ohtỏ rax kumrêx o mỗ. Hãmri nhům Tỉrtũm kot Apraãw mã mẽ ò pyka jarênh xwỳnhja nhům kot mẽ kãm òr kaxyw.

18 No nhům Ejit nhỏ pahi kot Juje ho mex xwỳnhta na pre ra ty nhům axtem hpãnhã hỏja mẽ ho amnhĩptàr o pa. Nẽ aa Juje jarênh mar kêt nẽ. Kormã pahi xàr nyw kêt ri htyk jakamã nhům mỳr pê harênh mar kêt nẽ.

19 Hãmri nẽ hkwỳjê homnuj o pa. Tanhmã mẽ panhĩgêjtjê nhĩpêx to ho pa. Nẽ mẽ kãm mẽ hkra my hapỏx xwỳnhjê hã amỳnê. Mẽ hapỏx nhům mẽ kot pikap mẽ rênh nhům mẽ htyk kaxyw nhům mẽ kãm mẽ hã amỳnê.

20 —Rỏm nhům finat Mojesja kato. Nẽ mexre. Hãmri nhům katorxà Ejit nhỏ xwỳnhjê kot kệp hpĩr pymaj òrkwỳ kamã ri mẽ kệp ho hpimxur o pa hã mytwrỳ axkrunêpxi.

21 —Tã nhům ra htỳxre nhům katorxà mẽ hipêêxà wa tee ri hkukamã hamaxpêr hãmri nẽ mẽ kot wa kệp hpĩr

pymaj kumỳ nē ma o tē nē kaxyw à nhīpēx nē nhỹri gō nhīpōk ri pō kamā ho amūxu. Tā nhūm Paraohiti hkra nija ra gōx mā wỳr mā tē nē ra omu hāmri nē amnhīm kumỳ nē ma o tē nē ho hkra.

²² Jakamā nhūm Mojes Ejit nhō xwỳnhjē kamā hprēk. Hāmri nē mē àhpumunh xà hā kagà pumunh pa. Nē hihtỳx nē mē kām kapēr kām hihtỳx mex o pa.

²³ —Tā hāmri ra hā amgrà pē 40 nē hapēx nhūm Mojes hamaxpēr nē ra kām amnhī kwỳ pē Ijaewjē pumunh prām nē ma mē hwỳr tē.

²⁴⁻²⁵ Hāmri nē htēm kōt ja wa omu. Nhūm Ejit nhō xwỳnhja Ijaewja homnuj o xa nhūm Mojes tēn tee ri hā omu nē hamaxpēr o: “E pa ma wa hwỳr tē nē ixkwỳ mỳj ā Ejit nhō xwỳnhta pī kē ixkwỳjaja ja hā ixpumu nē Tirtūm kot mē hwỳr inhmēnh ā ixpumu. Ixte Ejit nhō xwỳnhjē nē mē kator kaxyw mē ja hā ixpumunh kurē kumrēx.”

—Anhỹr o hamaxpēr hāmri nē wa hwỳr tē nē amnhīōja nē Ejit nhō xwỳnh pī. Tā no nhūm hkwỳjaja kot hpīr ā harēnh mar tā tanhmā amnhī kaxyw kām hamaxpēr to hkēt nē.

²⁶ Nhūm apkati nhūm mēhōja war axkrut nē axte pijapu ho wa xa. Hamē wa kēp Ijaew. Jakamā nhūm Mojes akupỹm mē hwỳr tē nē tee ri axpēn tā wa omu nhūm ja kēp omnuj nē. Hāmri nhūm wa hwỳr tē nē axpēn nē wa kām kapēr nē wa kām:

“Pa? Kwa war ajamē war apē Ijaew kēnā na ka wa ri axtem nē ā axpēn nhīpēx anē.” Anē.

²⁷ Hāmri nhūm kot amnhī kaxyw hkryx xwỳnhja kuma nē nhām amnhī nē hkujate nē kām: “Tk. Kwa xà apē mē inhō pahi hā na ka ā wa inhmā akapēr anē? Nà apē mē inhō pahi hkēt kēnā.

²⁸ Kot kaj inhīpēx o te ate Ejit nhō xwỳnhta nhīpēx pyra nē wa ixtō hpīr kēt nē.” Anē.

²⁹ —Hāmri nhūm tee ri kuma nē ra kām ma nē Ejit rūm kator kurē kumrēx nē ma pyka pē Mijiā hwỳr mō nē kamā hpānhā pa. Kamā hprō nē hkra. Nhūm hkra myja wa hamēxkrut.

³⁰ —Tā nhūm Mijiā kamā pa hā axte hā amgrà pē 40. Hāmri nē mēmo arīgro hā kapōt ā krā hakỳx pē Sinai kape hā ri pa nhūm Tirtūm kām kapēr. Nom nhūm Mojes omunh kēt nē. Ām utī kaōk kamā kuwy hpōk pix pumu.

³¹ Amnhī jaēr pē ā kot amnhī nhīpēx anhỹr ā omu hāmri nē amnhī tā hprī hā omunh kaxyw hwỳr tē nhūm Tirtūm kām:

³² Pa Mojes? E ixpē Tirtūm na pa. Ixpē akukamā anhīgēt Apraāw nhō Tirtūm na pa. Nē ixpē Apraāw kra Ijak mē htāmnhwỳ Jako wa ō Tirtūm na pa. Anē.

Hāmri nhūm tee ri kuma nē kām ma xàj httertēt tỳx nē. Hāmri nē umaj axte pī hpōkja wỳr rīt kēt nē. Ām nhām hkrā nē rīt o xa.

³³ Hāmri nhūm Tirtūm kām:

E kwa ixpê Tirtüm maati hã
ixtã apijaam ã aparkà
kapa nê apar kênh nê
xa.

³⁴ Na pa ra ixkra Ijaewjaja Ejit
kãm mẽ omu. Na ra Ejit
nhõ xwýnhjaja ixpê mẽ
homnuj týx kumrêx
rãhã ho pa nhũm mẽ
amnhĩ xã hã maj tee
ri amnhĩ nhĩpêx. Pa
ja hã mẽ omu nê
inhmã mẽ hkaprĩ nê.
Jakamã kot paj Ejit nhõ
xwýnhjê nhĩhkra rũm
mẽ kator pa. E ka kot
paj mẽ hwýr amẽ ka
ma akupým mẽ hwýr
mõ nê mẽ kurũm mẽ
kator.

Anhýr o kãm mẽ kaxyw karõ.

³⁵ Ra Ijaew kot Mojes hkaga
tã nhũm mẽ kaxyw ãm nê ma
akupým kot mẽ hwýr mênh
kaxyw. Na prem ra omu nê
hkaga. Te mẽ ate Jejus ka-
gaja pyrã nê hkaga. Jakamã
nhũm pijapu xwýnhta tee ri
amnhĩ tã omu nê kamã gryk
nê amnhĩ nê kãm kapêr nê
kãm: “Tk. Kwa xã apê mẽ
inhõ pahi hã na ka ã wa
inhmã akapêr anê? Nà apê
mẽ inhõ pahi kêt.” Anhýr tã
nhũm Tirtüm mẽ kaxyw tãm
xãm. Kot mẽ ho amnhĩptar
nê Ejit nhõ xwýnhjê rũm mẽ
kator kaxyw. Ja kaxyw na
pre pĩ hpòk kamã kãm kapêr
nê mẽ kaxyw ãm.

³⁶ —Jakamã nhũm Mojes
ma akupým Ejit wýr mõ nê
mẽ kurũm hkwyjê kator nê
ma mẽ o pa. Na pre mẽ
ho mex nê Tirtüm nhỹ hã
mẽ kãm aa mẽ kot mẽmoj

pumunh kêt kwý ho anhýr
o ri mẽ o pa. Ejit kamã nê
mãânên mẽ kot gô xujanãr
mã: “Gô kamrêk” anhýr
xwýnhta kamã. Nê kapôt
ã mẽ kãm ã amnhĩ nhĩpêx
anhýr o mẽ o pa. Nê kapôt
ã ri mẽ o pa ho ra hã amgrã
pê 40.

³⁷ —Tã tãm na pre
mẽ panhĩgêjtê mã mēhõ
hkukamã mẽ kãm tanhmã
harênh to nê mẽ kãm harênh
o: “Koja Tirtüm nhỹrmã te ra
mẽ akaxyw pa ixãm pyrã nê
inhmýr pê mẽ panhĩõ xãm.
ỹ hã mẽ amã kapêr jarênh o
pa kaxyw nhũm nhỹrmã mẽ
akaxyw ãm ka mẽ omu.”

—Anhýr o ã Jejus kukamã
harênh anê.

³⁸ Na pre Mojes kapôt ã
mẽ panhĩgêjtê ho pa nhũm
mẽ krã hakýx pê Sinaija wýr
pa. Mẽ panhĩgêjtaja hãmri
hwýr pa nhũm Tirtüm kapêr o
mẽ wrýk xwýnhja mẽ kaxyw
Mojes mã kapêr nhũm ô ri
mẽ kãm awjarê nê hã kagã.
Mẽ kot mar nê hkôt amnhĩ
nhĩpêx nyw o amnhĩ nhĩpêx
o pa kaxyw nhũm mẽ kãm
Tirtüm kapêr jarênh o pa. Nê
mẽ pajaxwýja. Mẽ pahte hkôt
amnhĩ nhĩpêx nyw o amnhĩ
nhĩpêx o papa kaxyw na pre
mẽ pamã hã kagã.

³⁹ Tã no nhũm mẽ
panhĩgêjtaja Mojes ma nê ãm
kuma nê hkaga kumrêx nê
akupým Ejit wýr hkrã.

⁴⁰ Jakamã nhũm Mojes ko-
rmã nhỹri mẽ kaxyw Tirtüm
mã kapêr o ãm rôm nhũm
mẽ wakre kamã htõ Arãw
wýr mra nê kãm: “Kwa Mo-

jes ra kot tanhmã amnhĩ to kênã. Kot Ejit rŭm mẽ pakator nẽ mẽ pahto mŏr tã ra nhỹri arĩk nẽ tanhmã amnhĩ to. Jakamã e. Kwa hpãnhã mẽ inhmã mẽmo karŏ nhĩpêx pu mẽ ho panhŏ sãnti kê tãm ma akupỹm Ejit wỹr mẽ pahto pa.” Anẽ.

⁴¹ —Hãmri nhũm mẽ kuma nẽ mẽ kãm kãx o mŏx krare karŏ ho sãnti nhĩpêx nẽ mẽ kãm ãm. Hãmri nhũm mẽ axtem nẽ te ho Tĩrtũm nhĩpêx pyrãk o hipêx nẽ kãm ôwêhti hkwy pa nẽ kãm haxwỹ nẽ hã apku. Hãmri nẽ ã amnhĩ nhĩpêx anhỹr ã amnhĩ pumu nẽ hkĩnh nẽ.

⁴² Hãmri nhũm Tĩrtũm tee ri ja hã mẽ omu nhũm ja kêp omnuj tỹx nẽ nhũm mẽ hkaga hpa. Jakamã nhũm prem amnhĩ krã hkôt ri myyti nẽ mytwrỹre nẽ kanhêti karŏ nhĩpêx nẽ te mẽ kot Tĩrtũm nhĩpêx pyrãk o hipêx o pa. Hãmri nẽ amnhĩ kaxyw kumã pix mã hamaxpêr o pa hã amgrã xohtô nẽ. Tã nhũm Tĩrtũm nhỹ hã kapêr jarênh o mẽ pa xwỹnhjaja tanhmã mẽ kãm kapêr to nẽ mẽ hã kagã. Te Tĩrtũm tãm mẽ kãm kapêr pyrãk o mẽ kãm kapêr nẽ hã kagã kot:

Pa mẽ apê Ijaewjaja? E mẽ inhma. Amnepêm mẽ ate kapôt ã ri mẽ apa hã amgrã pê 40ta ã. Xà we inhmã na ka prem akrit kwỹ hpar o apa?

⁴³ Nã inhmã hkêt. Na ka prem axtem nẽ ri amnhĩ krã hkôt amnhĩm mẽmo karŏ nhĩpêx nẽ hipêx o te mẽ ate pa inhĩpêx

pyrãk. Pê kãm akrit kwỹ hpar nẽ ōr o ri apa.

Mẽ anhŏ mẽmo karŏ nhĩpêxta mẽ ate amnhĩm hã hixi pê Mŏrok mẽnh xwỹnhja ka pre htem à kamã amnhĩ kôt ho apa.

Nẽ amnhĩm kanhêti karŏ nhĩpêx nẽ hã hixi mẽ nhũm kêp Repã. Ka mẽ ixkuhpa hã wa kêp mẽ apãm ã harênh o ri apa.

Tã ã mẽ ate amnhĩ nhĩpêx anhỹrja myrapê kot paj pãnhã nhỹhỹm mẽ arê.

Koja mẽ akutã amnhĩ xunhwỹr xwỹnhjaja mẽ apynê nẽ ma pyka pê Papirŏn rŭm hamũ mẽ ato hapêx ka mẽ amarĩ mẽ kãm axapênh rŭnh o ri apa kãm ga. Anẽ.

Ã na pre Tĩrtũm mẽ panhĩgêjtê mã kapêr anẽ nhũm y hã kapêr jarênh o pa xwỹnhja mẽ kãm hã kagã.

⁴⁴ —Tã nhũm mẽ panhĩgêjtjaja kormã kapôt ã ri pa ri amnhĩ kôt mry kà ho ixkre ho pa. Tĩrtũm mã kapêr xà hã ixkreja nhũm prem amnhĩ kôt ri o pa. Mẽ kot kãm “Tĩrtũm nhŏrkwỹ kaàkre” anhỹr xwỹnhja. Tĩrtũm kot mẽ kãm hã karŏ xà hkôt nhũm mẽ hipêx nẽ amnhĩ kôt ri o pa. Na pre Tĩrtũm hprĩ hã Mojes mã tanhmã kot hipêx to hã karŏ nhũm mẽ hkôt hipêx nẽ amnhĩ kôt ri o pa.

⁴⁵ —Tã nhũm Mojes ty nhũm hpãnhã Jojueja amnhĩ kôt mẽ o pa. Ma Tĩrtũm kot mẽ kãm pyka mex nhŏrta wỹr Mojes

mÿr pê mẽ o pa. Hãmri nẽ hwÿr mẽ o pøj nhũm Tĩrtũm mẽ nẽ mẽ kot ra kamã mẽ pa ho mẽ pa xwÿnhjẽ japøj nhũm mẽ pãnhã kamã pa ho pa. Nẽ amnhĩ kôt Tĩrtũm nhõrkwÿ kaàkreta o pa. Rãhã nhũm finat Tawija mẽ hpãnhã mẽ ho amnhĩptã.

46 Na pre Tĩrtũm Tawi kot tanhmã amnhĩ nhĩpêx to ho pa hã omu nẽ kãm hapẽ nẽ. Jakamã nhũm Tawi kãm kapêr nẽ kãm: “Pa Tĩrtũm? Kwa xà kot paj amã ixkre mex õ nhĩpêx nà? Mẽ ixpẽ Ijaewjaja mẽ ixte kamã amã amex o amex ã ajarẽnh o ixkrĩ kaxyw pa hipêx. Xà kot paj amã hipêx?” Anhÿr tã no nhũm Tĩrtũm kormã kãm ja prãm kêt nẽ.

47 Jakamã nhũm Tawi hkra Sarumãwja hipêêxà mÿr pê hpãnhã kêp mẽ õ pahi nẽ kãm hipêx.

48 Nom xà na hte Tĩrtũm maatija mẽ pahte kãm panhĩhkra ho ixkre nhĩpêx xwÿnh kamã hkrĩ? Nà kaxkwa kamã na hkrĩ xà. Na pre ra Tĩrtũm nhÿ hã kapêr jarẽnh o pa xwÿnhja Tĩrtũm kot tanhmã mẽ pajamãr to ho pa hã kagã nẽ hã kagã ho:

49 Na pa hte kaxkwa rũm pyka hkôt mẽ piitã mẽ hamãr mex o ixkrĩ.

Tã tanhmã kot paj amnhĩ to nẽ mẽ ìhkra ho mẽ kot inhmã ixkre nhĩpêxta wÿr axà nẽ kamã ixpa ho ixpa?

50 Nà ixte mẽmoj piitã ho ixkator xwÿnh kênã

kot pa kêt ã amnhĩ nhĩpêx anẽ. Anẽ.

Nhũm pre ã Tĩrtũm amnhĩ tã mẽ kãm kapêr anẽ nhũm ÿ hã kapêr jarẽnh xwÿnhja õ ri mẽ pamã hã kagã.

51 —E kwa mẽ inhma ixkwÿjaja. Mẽ akrã hihtÿx kumrêx jakamã mẽ amã Tĩrtũm kapêr mar prãm kêt. Na ka htem mẽ panhĩgêjtê pyrã nẽ amnhĩ nẽ Tĩrtũm Karõ kaga nẽ kapêr mar kêt nẽ.

52 Na pre hte Tĩrtũm nhÿ hã kapêr o mẽ pa xwÿnhjaja mẽ panhĩgêjtê hwÿr mra nẽ mẽ kãm kapêr jarẽnh o ri mẽ hkôt pa. Tã nhũm mẽ hkaga nẽ mẽ hipêx kati ho pa. Na pre htem Jejus wrÿk kukamã mẽ kãm: “E koja nhÿrmã kot Tĩrtũm kapêr mar nẽ hkôt amnhĩ nhĩpêx mex rãhã xwÿnh maatija mẽ pahwÿr wrÿ.” Anhÿr o mẽ kãm harẽnh o pa. Tã no nhũm mẽ kãm ja mar prãm kêt jakamã axtem nẽ hã mẽ hpar o pa. Mẽ kot mẽ kãm Jejus jarẽnh o mẽ pa xwÿnhjẽ hpar o pa. Tã nhũm tãm mẽ pahwÿr wrÿ ka mẽ omu nẽ mẽ kot amnhĩ nhĩpêxta pyrã nẽ hã amÿnẽ nhũm prem mẽ amã kupĩ.

53 —Tĩrtũm kapêr o mẽ wrÿk xwÿnhjaja kot Tĩrtũm nhÿ hã tanhmã mẽ pahte amnhĩ nhĩpêx to ho papa hã mẽ pamã karõ nhũm mẽ ate mar tã mẽ apê hprãm nõkati. Nẽ ama nẽ ãm ama nẽ hkôt amnhĩ nhĩpêx o ri apa hkêt nẽ. Anẽ.

Mẽ kot Estewãw pĩr ã mẽ

harēnh

Rukre 21.16-19, 23.34; Atre 22.20

⁵⁴Hāmri nhũm juistijaja tee ri Estewāw xujarēnh ma nē kamā gryk tỳx nē kām kapēr punuj nē.

⁵⁵Nom nhũm Tĩrtũm Karōja tanhmā hkrā hto nhũm kām mē uma hkēt nē. Hāmri nē kànhmā rīt nē kaxkwa pumunh o xa nē kamā Tĩrtũm rũm hirā rax pumu. Nhũm Jejus Tĩrtũm nhĩkhô hã xa nhũm omu nē hkĩnh nē mē kām:

⁵⁶—Kokỹỹ. Na kaxkwa axkê nhũm kamā Tĩrtũm nhỹ pa omu. Nhũm kuri kot mē pahwỳr mēnh xwỳnh Jejusja xa. Hêxta waa nē. Nà na pa jarāhã wa omu nē ixkĩnh tỳx kumrēx. Anē.

⁵⁷Hāmri nhũm mē kuma nē kamā gryk tỳx nē. Hāmri nē kām mar prām kêt nē kêp amnhĩ jamak pro. Hāmri nē gryk xàj àmra htỳx nē hwỳr hprôt

⁵⁸nē unê nē krĩ pê ho kato nē ma o tē nē nhỹri o xa. Hāmri nē kên o htak o hpĩr kaxyw amnhĩ nhĩnôkà hkwrỳ nē mēhõ my pê Sawti mã kugõ nhũm mē kām hamỳ. Hāmri nhũm mē kên rũnh kwỳ jamỳ nē o mra nē Estewāw wỳr rēnh prēprêk o kuhê. Nē ho ĩ kamā htak nē hkrāx pê htak.

⁵⁹Hāmri nhũm ra htyk kaxyw nē Jejus mã amnhĩ jarē nē kām:

—Pa Pahihti Jejus? E koja ixkarõ awỳr api ka ixto amnhĩptà. Anē.

⁶⁰Hāmri nē hkõn krã ho tēm nē nhỹ nē axte kām amnhĩ

jarē nē mē kot hpĩr xwỳnhjê nē kām kapēr nē kām:

—Kwa Pahihti. Mē kot ixpĩr tã kwa tanhmā ixtã mē ho hkēt nē.

Anhỹr o mē nē Jejus mã kapērja kôt ra ty.

8

Mē kot Estewāw jaxàr ã mē harēnh

Atre 22.4, 26.9-11

¹⁻²Hāmri nhũm mē kot Jejus kôt amnhĩ nhĩpêx xwỳnhjaja Estewāw wỳr mra nē htyk kām omu nē hkaprĩ nē. Nē mur nē kumỳ nē ma o mō nē haxà. Nom nhũm Sawtija mē kot hpĩr ã omu nhũm ja kām mex nē.

Sawti kot Jejus kwỳjê nhĩpêx kati ho pa hã harēnh

Atre 1.8

Tã nhũm Jerujarē kamā Ijaewjaja mē kot Jejus kôt amnhĩ xunhwỳr xwỳnhjê homnuj tỳx o pa. Hāmri nhũm mē tee ri amnhĩ kukamā hamaxpêr nē mē hkwyjaja mē umaj hapôj nē ma pika hkwy hkôt hpigrành pa. Mē hkwyjaja Jutej wỳr ma pa nhũm mē hkwyjaja Samar hwỳr ma pa. ã na prem mē umaj nhỹhỹm hpigrành par anē. ãm Jejus nhỹ hã mē ahkre xwỳnh maati pixjaja na prem Jerujarē kamā arĩk nē nhỹhỹm mōr kêt nē. Simāw Pêtre nē Juāw nē Xiakre nē Andre nē Firipti nē Patoromew nē Matêwre nē Makre nē Tomas nē Xiakre hōja nē Simāw ô nē Maxitreja. ãm jajaja pix na prem arĩk.

³Nhũm Sawti haxwỳja Jejus kôt mẽ kot amnhĩ xunhwỳr xwỳnhjê homnuj o pa. Mẽ kot Jejus kaga hprãm xàj tanhmã mẽ hipêx to ho pa. Na pre hte mẽ òrkwỳ hwỳr agjê nê mẽ unê. Mẽmyjê pynê nê mẽnijê pynê nê ma mẽ o mra nê mẽ hagjênh xà kamã mẽ hagjê. Mẽ uràk nê kêp Ijaew tã ã mẽ hipêx anhỳr o pa.

⁴Tã nhũm mẽ umaj Jeru-jarê rũm pika hõ hwỳr mẽ hpigrành xwỳnhhtaja amarĩ pika hkwỳ hkôt ri pa hkêt nê. Na prem ma mẽ piitã mẽ kãm Jejus kapêr jarênh o ri mẽ hkôt pa. Kêp Tĩrtũm kot mẽ pakaxyw ãm xwỳnh ã harênh rãhã ho ri mẽ hkôt pa.

Wajaga kot amnhĩ tã Firipti mar ã harênh Juãw 2.23-24

⁵⁻¹²Tã nhũm Firipti haxwỳja ma mõi. Ma krĩ pê Samar hwỳr mõi nê kamã mẽ kãm Tĩrtũm kot mẽ pakaxyw ãm xwỳnhhta jarênh o pa. Samar kamã na pre wajaga Simãwti ri Samar nhõ xwỳnhjê hkôt mẽ no kupyrrãhã ho ri mẽ hkôt pa. Nê ãhpumunh tỳx ã amnhĩ to jarkrar o ri pa. Jakamã nhũm mẽ kot amnhĩ nhĩpêx ã omu nê kamã no pyma nê. Nê htỳx ho ãm hãmri kot amnhĩ jarênh ã hkamnhĩx. Jakamã nhũm pre mẽ kãm tanhmã ri amnhĩ to hêx to ho pa pê mẽ no kupyrrãhã ho ri pa nhũm mẽ amnhĩ jaêr pê omu. Mẽ kot amnhĩ to hkryre xwỳnhhaja nê mẽ kot amnhĩ to rũnh xwỳnhhaja nhũm mẽ amnhĩ

jaêr pê kot tanhmã amnhĩ nhĩpêx to hã omunh o hkôt pa. Nê ri axpênh mã harênh o:

–Kokỳỹ. Wajagaja ãhpumunh tỳx kumrêx. Tĩrtũm nhỹ hã mãn te ã amnhĩ nhĩpêx anhỳr o pa nà? Mãn pre Tĩrtũm kãm ãhpumunh xà hkwỳ gõ nhũm ỹ hã ã amnhĩ nhĩpêx anhỳr o pa. Anê.

Hãmri nê hkôt hamaxpêr o ri hkôt amnhĩ nhĩpêx o pa.

Tã nhũm Firipti mẽ õ krĩ hwỳr mõi nê mẽ kãm Jejus Kris jarênh o ri mẽ hkôt pa nê mẽ kãm:

–Jesús kêp Tĩrtũm kot mẽ pahwỳr mênh xwỳnh jakamã kot kaj mẽ amnhĩ kaxyw hkôt ajamaxpêr nê hkôt amnhĩ xunhwỳ nhũm Tĩrtũm hã mẽ apumu nê mẽ ato hkra. Anê.

Hãmri nê Tĩrtũm nhỹ hã akupỳm tanhmã mẽ kute xwỳnhjê ho mex to ho pa. Mẽ ĩ kamã mẽ htyk xwỳnhhaja nê mẽ hyk o mẽ pa xwỳnhhaja nhũm mẽ ohtõ nê akupỳm mẽ ho mex o pa. Nê mẽ hkwỳjê nê mẽkarõmnuti hkwỳ jano nhũm mẽ ãmra htỳx o mẽ hkaga nê ma mẽ kurũm hapõx nê mra. ã Firiptija Jejus nhỹ hã mẽ ho mex o pa anê nhũm mẽ piitã ja hã omu nê kapêr ma nê hkĩnh nê. Nê kapêr mar tỳx nê hkôt hamaxpêr. Jao wajaga Simãwti kaga nê hpãnhã amnhĩ kaxyw Jejus kôt pix mã hamaxpêr nê hkôt amnhĩ xunhwỳ. Hãmri nhũm Firipti ja hã mẽ omu nê mẽ hkrã kumrã. Mẽmyjaja nê mẽnijaja nê mẽ piitã mẽ hkrã kumrã.

Ra mẽ kot Jejus kôt amnhĩ xunhwỳr ã mẽ piitã mẽ kãm amnhĩ to amnhĩrĩt kaxyw nhũm mẽ hkrã kumrãr pa.

13 Hãmri nhũm wajaga Simãwti haxwỳja Jejus kapẽr ma nẽ mẽ uràk nẽ amnhĩ kaxyw hkôt hamaxpẽr nẽ hkôt amnhĩ xãm nhũm Firipti hkrã kumrã. Hãmri nhũm hkĩnh nẽ Firipti hkôt ri pa. Nẽ aa mẽ kot mẽmoj pumunh kêt kwỳ ho anhỳr o ri pa hã omu nẽ kamã no pyma ho hkôt ri pa. Nẽ kot Tĩrtũm nhỹ hã akupỳm mẽ ho mex ã omu nẽ tee ri hamaxpẽr.

14 Tã hãmri nhũm Jerujarẽ kamã Jejus nhỹ hã mẽ ahkre xwỳnh maatijaja Samar nhõ xwỳnhjẽ jarẽnh ma. Ra mẽ kot Tĩrtũm kapẽr kôt amnhĩ nhĩpêx ã mẽ harẽnh ma nẽ hkĩnh nẽ. Hãmri nẽ ma mẽ hwỳr Simãw Pẽtre mẽ Juãw wa kumẽ.

15-17 Hãmri nhũm wa ma mẽ hwỳr wa mõi nẽ pøj. Hãmri nhũm Firipti wa omu nẽ wa kãm krĩ nhõ xwỳnhjẽ jarẽ nẽ wa kãm:

—Nà na pa pre mẽ kãm Jejus kapẽr jarẽ nhũm mẽ inhma nẽ hkôt amnhĩ xunhwỳ. Jakamã pa pre mẽ hkrã kumrã. Nom na kormã Tĩrtũm Karõja mẽ hkarõ mã gjêx kêt nẽ. Anẽ.

Hãmri nhũm wa mẽ harẽnh ma nẽ mẽ himõk ã wa ìhkra jaxwỳr o ri mẽ hkôt mra. Ja kôt nhũm Tĩrtũm Karõ mẽ hwỳr wrỳ nẽ mẽ hkarõ mã gjêx pa.

18-19 Hãmri nhũm wajaga Simãwja mẽ amnhĩ tã wa omunh o xa nẽ hamaxpẽr o:

—Kokỹỹ. Kwa wa kot mẽ hã ìhkra jaxwỳrja kôt na hte Tĩrtũm Karõ mẽ hkarõ mã agjẽ. Hẽxta waa nẽ. Inhmã ã mẽ hipêx anhỳr o ri ixpa hprãm tỳx. E pa ixkàxpore hkwy jamỳ nẽ o tẽ nẽ wa kãm kugõ kê wa tanhmã ixto pa wa uràk nẽ ã mẽ hipêx anhỳr o ri ixpa. Nà kot paj anẽ. Anẽ.

Hãmri nẽ wa hwỳr tẽ nẽ wa kãm:

—E ota ixkàxporeta. Kwa amnhĩm apy nẽ hpãnhã tanhmã ixto pa war apyrà nẽ mẽ hã inhìhkra jaxwỳr o ri mẽ hkôt ixpa kê Tĩrtũm Karõja mẽ hkarõ mã agjẽ. Inhmã ja ho anhỳr prãm tỳx. Anẽ.

20-23 Hãmri nhũm wa tee ri ã kapẽr anhỳrja ã omu nhũm Pẽtre kãm:

—Tk. Kwa ajamaxpẽrja mex kêt. Xà na htem kàxpore ho Tĩrtũm mã amnhĩrer pê y hã mẽ ho hwỳr o pa nhũm Karõ mẽ hwỳr agjẽ? Nà na htem kàxpore ho Tĩrtũm Karõ japrõr kêt nẽ. Kot kaj wa ixpyrà nẽ ã mẽ hipêx anhỳr kêt nẽ. Ajamaxpẽrja mexre hã. Kormã ate Tĩrtũm kôt amnhĩ xãm tỳx kêt jakamã na ka atỳx ã ri ajamaxpẽr anẽ.

—Na ka ã wa ixte Tĩrtũm nhỹ hã mẽ hipêx anhỳr ã wa ixpumu nẽ amã wa ixpyrà nẽ ã mẽ hipêx anhỳr o ri apa hprãm xàj ajamaxpẽr punuj nẽ. Nhũm ajamaxpẽr punuj te kot apa hã apyr ka tee ate kêp amnhĩ kjẽnh pyràk. Kwa tokyx ajamaxpẽr punuj ã amnhĩ pumu nẽ akaprĩ nẽ tokyx hkaga. Hãmri nẽ amnhĩ to Tĩrtũm wỳ kê amnhĩ katut

kôt ajamxpēr punujja mē ka axte ã ajamxpēr anhÿr kêt nē. ã mē hamaxpēr punuj anhÿr xwÿnhjaja koja mē nhÿrmã ma kuwy hwÿr pa. Anē.

²⁴ Hāmri nhūm tee ri amnhÿ tā kuma nē hkaprÿ nē wa kām:

—Kwa xà wehe? Tô tokyx ixto Tÿrtūm wÿ kē ã ijamxpēr anhÿrja mÿrapē hwÿr inhmēnh kêt nē. Anē.

²⁵ Tã nhūm Simãw Pētre mē Juãw wa Samar nhō xwÿnhjē mã Pahihti Jejus kapēr jarēnh pē ho mē ahkre hāmri nē ma akupÿm Jerujarē hwÿr mō. Ma pyka pē Samar hkôt mē kām Jejus kapēr jarēnh o ma akupÿm mō.

Firipti mē Exiop nhō xwÿnh wa harēnh
Ijais 53.7-8

²⁶ Hāmri nhūm Firipti arÿ Samar kamã arÿk. Hāmri nhūm Tÿrtūm kapēr o mē wrÿk xwÿnhja hwÿr wrÿ nē kām:

—Pa? E ot pa awÿr wrÿ nē tē. Nà kēr ka tokyx akato nē ma mō nē Jerujarē rūm kànhmã Kas wÿr pry kahpēr ta nē hã juk nē ma hã mō. Kapôt ã pry nōrta kahpēr ta nē hã mō. E kwa tokyj.

Anhÿr o kām kapēr hāmri nē ma akupÿm tē nē kaxkwa hwÿr api.

²⁷ Hāmri nhūm Firipti kuma nē kato nē ma hwÿr mōr kurē kumrēx. Mōō hāmri nē pryja kahpēr ta nē hã mō.

Hāmri nhūm ra mēhō myja mō. Exiop nhō xwÿnh na pre. Exiop kamã mēō pahi na pre

niti. Hixi pē na pre Kātatre. Nhūm pry hã mōr xwÿnhja kēp kām kàxpore jamãr o pa xwÿnh. Exiop kamã te kēp mē ò kōwenatō pyrãk. Tã kot Tÿrtūm mã mex o mex ã harēnh kaxyw ma Jerujarē hwÿr mō.

²⁸ Hāmri nē akupÿm Exiop wÿr kormã mō. Ò pàr kām nhÿ nē Tÿrtūm kapēr ã kagã htūm kamã kapēr o mō. Tÿrtūm nhÿ hã kapēr o pa xwÿnh pē Ijais kot Tÿrtūm kapēr ã kagã htūmjã nhūm kamã kapēr o mō.

²⁹ Hāmri nhūm Tÿrtūm Karō Firipti mã harē nē kām:

—E mēhō mÿj wÿr aprōt nē tē nē hã ajēt nē ma hkôt tē. Anē.

³⁰ Hāmri nhūm kuma nē ma hwÿr hprōt nē hã ajēt nē kot kagã kamã kapēr ã kuma. Ijais kot Tÿrtūm kapēr ã kagã htūm kamã kapēr ã kuma nē kām:

—Pa? Mãn ka aprÿ hã ate kamã akapēr xwÿnhnta ma nã? Anē.

³¹ Hāmri nhūm kām:

—Nà ixte maare hã. Mēhō kot hprÿ hã inhmã harē pa ixprÿ hã kuma? Xàt ka ixwÿr api nē ixri nhÿ nē aprÿ hã inhmã harēnh o ixkôt mō nã? Anē.

Hāmri nhūm kuma nē hwÿr api nē ìhkô hã nhÿ nē kagãta pumunh o nhÿ.

³² Nhūm hã kagã kot:

Na htem ôwēhti par kaxyw nhūm amarÿ mē kām akryk kuhē.

Nē mē kot kēp hkÿ jakàr kaxyw nhūm ma anē

ně amarĩ mẽ kãm akryk kuhê.

Tã na pre mēhōja ôwēhti kot amnhĩ nhĩpêx pyrāk o amnhĩ nhĩpêx.

Jakamã nhũm mẽ kot tanhmã hipêx to htã no nhũm arĩ mẽ kãm akryk xa. Amnhĩ nê tanhmã mẽ kãm kapêr punuj to hkêt nê. Âm arĩ mẽ kãm xa.

³³ Na prem homnuj tỳx nê ri hipêx kati rax nê.

Aa kot tanhmã amnhĩ tomnuj to hkêt kumrêx tã nhũm mẽ ã hipêx anê nhũm mēhō yr pê tanhmã nê mẽ kãm kapêr to hkêt nhũm prem kupĩ.

Nhũm amnhĩ kanrēhã hkra hkêt rāhã ty. Jakamã kot puj mẽ hkrajê nhĩxi mar kêt nê. Kra hkêt rāhã htyk kênã. Anê.

³⁴ Nhũm pre ã Exiop nhõ xwỳnh Tĩrtũm kapêr ã kagà htũm kamã harēnh anê. Hãmri nê tee ri ã kot mēhō jarēnh anhỹrja kukamã hamaxpêr nê hã Firipti kukja nê kãm:

—Kwa aprĩ hã inhmã mēhōja jarê. Mēhō na prem ã hipêx rax anê? Xà kot kagà xwỳnhnta na prem ã hipêx anê nà xà nhãm mēhō na prem ã hipêx anê? E kwa aprĩ hã inhmã harê pa ã mẽ kot hipêx anhỹr xwỳnh kôt omu. Anê.

³⁵ Hãmri nhũm kãm:

—Tôe kot paj amã harê. Nà Jejus na prem ã hipêx anê nhũm prem hã kagà. Anê.

Hãmri nê hprĩ hã kãm kot kamã harēnh xwỳnhnta jarê.

Jejus kot tanhmã mẽ panê amnhĩ nhĩpêx toja nhũm hprĩ hã kãm harēnh o hkôt mō.

³⁶ Hãmri nhũm wa kormã mō nê pry htã himô hãnh mō nhũm Exiop nhõ xwỳnh omu nê Firipti mã kãm:

—E mũj gô mũj nō. Xà kot kaj kamã ixkrã kumrã nà? Anê.

³⁷ Nhũm kãm:

—Nà kot kaj amnhĩ kaxyw Jejus Kris kôt ajamaxpêr nê hkôt amnhĩ xãm hã kot paj akrã kumrār kurê kumrêx. Anê.

Hãmri nhũm kãm:

—Tỳ. Kêp Tĩrtũm Kra kênã kot paj kêt amnhĩ kaxyw hkôt ijamaxpêr kêt. Anê.

³⁸ Hãmri nê pàr o mrar xwỳnh mã anê nhũm pàr o nō nhũm wa kato nê himô hwỳr wrỳ nhũm Firipti hkrã kumrã. Kot Jejus kôt amnhĩ xãm ã hkrã kumrã.

³⁹ Hãmri nê wa akupỹm api nhũm Tĩrtũm Karō Firipti mỳ nê ma nhỹhỹm o mō nhũm Exiop nhõ xwỳnhja axte omunh kêt nê. Hãmri nê ma akupỹm papxà hwỳr mō. Ra kot Jejus kôt amnhĩ xãm jakamã hkĩnh nê ma akupỹm mō.

⁴⁰ Rôm nhũm Firipti krĩ pê Ajôt kamã pôj. Tĩrtũm Karō kot Exiop nhõ xwỳnh pê kator nê tanhmã ho nê Ajôt wỳr o mō hãmri nê kamã kumê. Hãmri nhũm mẽ kãm Jejus kot tanhmã mẽ panê amnhĩ nhĩpêx to hã harēnh pê ma krĩ hō hwỳr mẽ kãm ujarēnh anhỹr o pa rāhã krĩ pê Sejarej wỳr mō nê pôj.

9

Sawti kot Jejus kôt amnhĩ xãm ã harênh

Atre 22.6-11, 26.12-18

¹ Rôm nhũm Sawtija xatã Jerujarê kamã Pahihti Jejus kôt mẽ kot amnhĩ xunhwỳr xwỳnhjaja tanhmã mẽ homnuj tỳx to ho ri mẽ hkôt pa. Kãm mẽ himex par prãm jakamã na pre hte ã amnhĩ nhĩpêx anhỳr pix o pa. Tã ra hamaxpêr nê ma patre maati hwỳr tẽ nê mẽ hã amnhĩ jarê nê kãm:

² —E ot pa awỳr tẽ. Kwa inhmã kagã nhĩpêx pa kupy nê ma krĩ pê Tamas kãm mẽ pahpê Ijaew xàptàr tũmrejê hwỳr o mỗ nê mẽ kãm kugõ. Kê mẽ kamã harê nê omu hãmri nê hkôt inhĩhkra kamã Jejus kôt mẽ kot amnhĩ nhĩpêx xwỳnhjê jagjê. Mênijaja nê mẽmyjaja. Hãmri pa mẽ unê nê man akupỳn awỳr mẽ o mỗ ka mẽ omu nê kam tanhmã mẽ hĩpêx to. Anê.

Hãmri nhũm kuma nhũm ja kãm mex nê. Hãmri nhũm kãm kagã nhĩpêx nê kugõ nhũm kupy nê hkôt mẽ pa xwỳnhjê mẽ ro hã ma Tamas wỳr mẽ hwỳr mỗr kurê kumrêx.

³ Mỗ mẽ ra hpôx o mỗr mẽ nhũm puh kaxkwa rũm hirã rax kumrêx wrỳ nê hã ajêť nhũm hipôk ri xa.

⁴ Hãmri nê tee ri omu nê kãm ma xàj pykap tẽm nê akryk nõ. Hãmri nhũm kaxkwa rũm mẽhõ kãm kapêr nê kãm:

—Pa Sawti? Hêxta waa nê. Kwa mon ka hte ixtomnuj tỳx o ri apa? Anê.

⁵ Hãmri nhũm amnhĩ jaêr pê kuma nê kãm:

—Kwa mẽ atõ na ka ã inhmã akapêr anê pahihti? Anê.

Hãmri nhũm kãm:

—Kwa nhũm ixpê Jejus ixte amã ixkapêr kênã. Pa na ka hte ixpê ixkôt mẽ kot amnhĩ xunhwỳr xwỳnhjê nhĩpêx kati ho apa. Jao te pa ate ixtomnuj tỳx pyrãk.

⁶ Nom kot kaj axte ã amnhĩ nhĩpêx anhỳr kêt kumrêx. E kànhmã xa nê mãmri ma krĩ hwỳr tẽ. Kot kaj hwỳr pỏj nhũm mẽhõ awỳr tẽ nê mẽmoj tã amã karõ ka ama nê hkôt amnhĩ nhĩpêx. Anê.

⁷ Nhũm pre ã Jejus Sawti mã kapêr anê. Nhũm hkôt mẽ pa xwỳnhjaja mẽmoja ma no ãm hprĩ mar nê mẽmoj pumunh kêt nê. Hãmri nê tee ri hamaxpêr nê kãm ma xàj akryk kapêr kêt kumrêx nê kuhê.

⁸ Hãmri nhũm Sawti kànhmã xa nom rĩť kêt nê tee ri rĩť mã nhũm mẽ hpa hã kupy nê ma krĩm o mỗ.

⁹ Nê Tamas wỳr o pỏj nê nhỹri mẽhõ nhỏrkwỹ hwỳr ho axà nhũm kamã nohkre nê arĩ hkrĩ. Tee ri amnhĩ kukamã hamaxpêr o hkrĩ. Nê apkur kêt nê hkõm kêt o ra hã apkati axkrunêpxi.

¹⁰ Tamas kamã na pre mẽhõ my pê Ananĩsja pa. Kot Jejus kôt amnhĩ xunhwỳr xwỳnhjê hõ na pre. Jakamã nhũm Jejus hwỳr kato nê kãm kapêr. Te hpimtir kãm hwỳr

kator nê kãm kapêr pyrà nê kãm:

—Pa Ananîs? Anê.

Nhũm kãm:

—ÿ? Ot pa xa. Mo na Pahihti? Anê.

¹¹ Nhũm Jejus kãm:

—E kêr ka akato nê ma mẽ kot kãm: “Pry katât” anhÿr xwÿnhhta wÿr tẽ. Hãmri nê kamã Jut nhõrkwÿ japêr. Kamã na Tas nhõ xwÿnh pê Sawtija hkrĩ. Na no hkre nê inhmã amnhĩ jarênh o hkrĩ. Ka hwÿr axà nê omu.

¹² Ate hwÿr atẽm nê inhÿ hã hã anhũhkra xir nhũm akupÿm rĩt mex kaxyw na ato amÿti. Jakamã e ma hwÿr tẽ nê ã hipêx anê. Anê.

¹³ Hãmri nhũm Ananîs tee ri kuma nê kãm Sawti puma ho amnhĩ kamã kahak nê. Hãmri nê kãm:

—Kwa nà Pahihti. Tãm na xep hte Jerujarê kamã mẽ kot amnhĩ kaxyw akõt mẽ hamaxpêr xwÿnhjê nhĩpêx kati ho pa. Pa ra mẽ hã harênh ma.

¹⁴ Tã na xep ra jar Tamas wÿr pøj. Patre krãhtũm kapêr nhÿ hã kot mẽ ixpê akõt amnhĩ xunhwÿr xwÿnhjê pynênh nê ma akupÿm hwÿr mẽ ixto mõi kaxyw. Tãn ka ri hwÿr ijano. Kwa nà ri ixto anhÿr kêt nê Pahihti. Anê.

¹⁵ Nhũm Jejus kãm:

—Nà mamrĩ ma hwÿr tẽ. Ra ixte amnhĩ kaxyw ãm kênã. Jakamã koja ã mẽ anhĩpêx anhÿrta hpãnhã ma mẽ pitã mẽ kãm ixkapêr jarênh o pa. Mẽ apê Ijaew mã nê mẽ anhõ pahi hkwÿjê mã nê mẽ kêp Ijaew kêt xwÿnhjê mã.

Koja mẽ piitã mẽ kãm ixkapêr jarênh mex o ri mẽ hkõt pa.

¹⁶ Koja mẽ ixtã homnuj tÿx nê nhũm amnhĩ xà htÿx kamã hamak o pa. Nom kot paj ixprĩ hã mẽ kot tanhmã ixtã hipêx to hkukamã kãm ixujarênh pa nhũm amnhĩ kukamã amnhĩ jarênh ma. E tokyx mãmrĩ ma axãmnhĩx hwÿr tẽ. Anê.

¹⁷ Hãmri nhũm kuma nê kato nê ma Sawti hwÿr htẽm kurê kumrêx. Hãmri nê ixkre hwÿr axà nê omu nê hkrã hã ãhkra xi nê kãm:

—Pa Jejus kõt ixtõ Sawti? E na Pahihti Jejus awÿr inhmẽ pa awÿr tẽ. Pry kahti ri kot awÿr kator xwÿnhhta. Tã akupÿm arĩt nhũm Tĩrtũm Karõ kot akarõ mã ãr kaxyw na awÿr inhmẽ pa tẽ. Anê.

¹⁸ Hãmri nhũm mẽmoj te tep kà pyrækja Sawti no rũm hapøj nê rôrøk nhũm akupÿm rĩt mex kurê kumrêx. Hãmri nê kãnhmã xa nhũm Ananîs hkrã kumrã. Ra amnhĩ kaxyw Jejus kõt hamaxpêr ã hkrã kumrã.

¹⁹ Hãmri nhũm nhÿ nê apku nê akupÿm hihtÿx.

Sawti kot Tamas kamã Jejus kapêr jarênh

Sikũn Korĩt 11.22-23

Nhũm Sawti Tamas kãm mẽ kot Jejus kõt amnhĩ xunhwÿr xwÿnhjê hkõt amnhĩ xãm nê mẽ hkõt ri pa nê tokyx ma akupÿm mõi kêt nê.

²⁰ Kormã mẽ hkõt ri pa nê Ijaew nhõ Tĩrtũm kapêr o mẽ ahkre xà hã ixkre hwÿr mra nê kamã mẽ kãm Jejus kapêr jarê. Kêp Tĩrtũm Kra hã harênh o kuhê.

²¹ Hāmri nhũm mẽ amnhĩ jaer pê ã harēnh anhỹrja ma nē tee ri hamaxpēr nē xepēn mā:

—Kokỹỹ. Kwa tām na xep pre Jerujarē kamā amnhĩ kaxyw Jejus kôt mẽ kot amnhĩ xunhwỳr xwỳnhjê homnuj tỳx o pa. Tã xep jar kot mẽ hkwyjê pynēnh nē ma mẽ o mōr nē Jerujarē kamā patre krãhtũmjê mã mẽ òr kaxyw na pre man mẽ pahwỳr mō. Tã ra tanhmã hamaxpēr to nē axtem nē mẽ pamã Jejus kapēr jarēnh o mẽ pajahkre ho pa. Anē.

²² Hāmri nhũm Sawti arĩ Tamas kãm Ijaew mã tanhmã Jejus jarēnh to kamã hihtỳx o mẽ hkôt pa nē mẽ kãm:

—Nà Jejus Krisja na pre Tĩrtũm mẽ pakaxyw ãm nē mẽ pahwỳr kumē. ãm hāmri na pa mẽ amã ja jarē. Anē.

Hāmri nhũm mẽ kuma nē tee ri kutã tanhmã kapēr to hkukamã hamaxpēr.

²³ Tã ra hã apkati xohtô nē nhũm Tamas kãm Ijaew kwỳjaja kot Sawti pĩr kaxyw hã xepēn ma.

²⁴ Hāmri nhũm mēhōja hã ama nē Sawti hwỳr tē nē kãm mẽ harē nē kãm:

—Kwa Sawti kêr ka axkãm ajamak rom. Na mẽ pahkwỳjaja atã amỹnê. Na mẽ ra krĩ puhã kahê xà hã hakwakre piitã hamār ho kuhê. Kot kaj nhỹhỹm akato nhũm mẽ apumu nē apynê nē apĩ. Anē.

²⁵ Jakamã nhũm kamàt nhũm Sawti hkôt ri mẽ pa xwỳnhjaja kawà rax ò mỳ nē

hwỳr o tē nē kãm ãm nhũm hwỳr axà nē nhỹ. Hāmri nhũm mẽ hkagrĩ nē kēn o krĩ puhã kahēja nhĩrô pê ho wrỳ nhũm mẽ kêp kato nē ma mō.

Sawti kot Jejus kwỳjê hkôt pikamēnh ã harēnh

Karatas 1.15-24

²⁶ Tã nhũm Sawti krĩ pê Tamas rũm kato nē ma akupỹm Jerujarē hwỳr mō hāmri nē hwỳr pōj. Hāmri nē mẽ kot Jejus kôt amnhĩ xunhwỳr xwỳnhjê hkôt amnhĩ jarēnh kaxyw mẽ hwỳr tē. Hāmri nhũm mẽ tee ri amnhĩ wỳr omu nē kot Jejus kôt amnhĩ xãm ã amnhĩ to hêx ã hkamnhĩx hāmri nē amnhĩ kamã kahak o amnhĩ nē hkurê nē mẽ piitã kãm uma nē.

²⁷ ãm Panãpe pix ãm hāmri kot Jejus kôt amnhĩ xãm kôt hamaxpēr. Hāmri nē ma hwỳr tē nē haprô nē ma Jejus nhỹ hã mẽ ahkre xwỳnh maatijê hwỳr o tē nē yr pê mẽ kãm kapēr nē mẽ kãm:

—Kwa ãm hāmri na Sawti amnhĩ jarē. Na ra mẽ pahpyrà nē Jejus kôt amnhĩ xãm. Na xep pre Tamas wỳr pry hã kormã mō nhũm xep Pahihti Jejus hwỳr kato nē kaxkwa rũm kãm kapēr nhũm kuma nē hkôt amnhĩ xãm. Jakamã nhũm xep ra axtem kot amnhĩ nhĩpêx nyw o Tamas nhõ xwỳnhjê mã Jejus kapēr jarēnh o ri mẽ hkôt pa. Ra amnhĩ kamã kãm mẽ uma hkêt nē ãmnhĩx ri mẽ kãm harēnh o ri mẽ hkôt pa. Anē.

²⁸ Hāmri nhũm mẽ kuma nē amnhĩ kôt Sawti mẽ nhũm mẽ hkôt ri pa. Hāmri nē

Jerujarē kamā mẽ piitā mẽ kām Jejus kapēr jarēnh o pa. Kām Jejus kôt amnhĩ xunhwýr kêt xwýnhjê pyma hkêt nê àmnhĩx ri mẽ kām kapēr jarēnh o ri mẽ hkôt pa.

²⁹ Nê Ijaew kwý pê Gresjê kapēr o mẽ kapēr xwýnhjê mã nhũm xatã mẽ kām Jejus jarēnh o ri mẽ hkôt pa. Kêp Tirtũm kot mẽ pakaxyw ãm xwýnh ã harēnh rãhã ho ri mẽ hkôt pa. No nhũm mẽ kām mar prãm kêt nê ra kot Jejus ã hpĩr mã.

³⁰ Hãmri nhũm mẽ kot Jejus kôt amnhĩ xunhwýr xwýnh kwýjaja mẽ harēnh ma nê mẽ kêp ho kato nê ma krĩ pê Sejurej wýr o mō. Hãmri nê kurũm ma akupỹm õ krĩ pê Tas wýr kumẽ nhũm ma akupỹm mō.

³¹ Tã ra Sawti kot Jejus kôt amnhĩ xãm jakamã nhũm mẽ kãm mẽ hkurê xwýnhjaja axte Jejus ã tanhmã hkwýjê hto hkêt nhũm mẽ piitã hamakêtkati nê àmnhĩx ri pa. Pika pê Jutej kamã nê Garirej kamã nê Samar kamã nhũm mẽ piitã hamakêtkati nê àmnhĩx ri pa. Hãmri nê Tirtũm mã mex o mex ã harēnh o ri pa. Nhũm Tirtũm Karõ tanhmã mẽ hkrã hto nhũm mẽ ra kapēr kôt amnhĩ nhĩpêx mex o mō. Hãmri nhũm mẽ ohtô rax nê mẽ urak nê Jejus kôt amnhĩ xunhwý nê hkwýjê hkôt axkamẽ.

Enejti akupỹm mex ã harēnh

Atre 3.1-10

³² Tã nhũm Simãw Pêtreja ma mẽ kot Jejus kôt amnhĩ

xunhwýr xwýnhjê mã Tirtũm kapēr jarēnh o mẽ ahkre kaxyw ma krĩ piitã hkôt pa. Jakamã krĩ pê Rit wýr mō

³³ nê hwýr pøj nê kamã Enejti pumu. Nhũm ì kamã htyk pa nê kupĩp kãm hikwý rãhã hã amgrã pê 8.

³⁴ Hãmri nhũm Simãw Pêtre omu nê Jejus nhỹ hã kãm kapēr nê kãm:

—Pa Enejti? E na Jejus Kris akupỹm ato mex. Jakamã e kãnhmã xa nê akupĩpta py. Anê.

Hãmri nhũm akupỹm mex nê kãnhmã xa nê amnhĩ pumu nê hkĩnh o hkĩnh.

³⁵ Hãmri nhũm krĩja kamã nê krĩ hõ pê Sarõ kamã mẽ piitã harēnh ma nê mẽ kot amnhĩ tomnuj kaga hpa nê hpãnhã Jejus kôt amnhĩ xunhwý nê hkôt amnhĩ nhĩpêx o pa.

Tapitre akupỹm htĩr ã harēnh

Rukre 8.49-56; Atre 20.7-12

³⁶ Nhũm Tapitreja krĩ pê Jope kamã na pre pa. Gres kapēr kãm hixi pê Nokre. Mẽ kapēr kãm Nokreja te kêp “karà” anhỹr jarēnh pyrak. Na pre ra Tapitre pê Nokreja Jejus kôt amnhĩ xãm nê mẽ piitã mẽ ho mex o ri mẽ hkôt pa. Nê mẽ kêp amrakati xwýnhjê kamã ukapĩri ho ri mẽmoj to mẽ kutã nojarêt o ri mẽ hkôt pa.

³⁷ Tã ra à htýx nê hãmri ty. Hãmri nhũm mẽ tee ri omu nê hkapĩri nê mýr rax nê. Nê kumý nê kuhõ hãmri nê kormã haxàr kêt ri kýx pê ixkre kamã kuxi nê kuri mýr o hkrĩ.

38 Nhũm Simãw Pêtre kormã krĩ hõ pê Rit kamã ri pa. Rit rũm Jope hwÿr jawÿ jakamã nhũm Jope kamã mẽ kot Jejus kôt amnhĩ xunhwÿr xwÿnhjaja Simãw Pêtre jarênh ma hãmri nẽ hwÿr ja wa ho hamẽxkrut nẽ wa kumẽ. Nhũm wa ma hwÿr tẽ nẽ hwÿr pøj nẽ omu nẽ kãm:

—Pa? E jar na pa wa awÿr tẽ. Na Jejus kôt mẽ pahtõx Tapitre ham mẽ pahpê ty. Kwa tokyx kormã mẽ kot haxàr kêt ri ma wa ixkôt hwÿr tẽn omu nà? Anẽ.

39 Hãmri nhũm wa kuma nẽ ma wa hkôt htẽm kurê kumrẽx. Hãmri nẽ Jope hwÿr pøj nẽ mẽ hwÿr tẽ nhũm mẽ kÿx pê htyk nẽ nõr xwÿnhja wÿr ho api nhũm hwÿr axà. Nhũm kuri mẽ kêp mẽ mjên htyk xwÿnhjaja hkaprĩ nẽ mÿr o hkrĩ. Hãmri nhũm Simãw Pêtre mẽ hwÿr axà nhũm mẽ omu nẽ kãm Tapitre kormã htĩr ri kot tanhmã mẽ ho mex to hã harê. Nẽ mẽ ê hkwy jamÿ nẽ kãm kupẽ nẽ kãm:

—Ga ja pumu. Tyk xwÿnhhta na pre mẽ inhmã hkay nẽ kugõ. Na pre hte mẽ ixto mex o pa. Tã mẽ ixpê ty. Hêxta gaa nẽ. Na pa mẽ ixkaprĩ htÿx kumrẽx. Anẽ.

40 Hãmri nhũm mẽ kuma nẽ mẽ kator pa hãmri nẽ htyk xwÿnhhta ri hkõn krã ho nhÿ nẽ ho Tĩrtũm wÿ. Hãmri nẽ htyk xwÿnhhta mã kapêr nẽ kãm:

—Pa Tapitre? E kwa kànhmã nhÿ. Anẽ.

Pu nhũm no amra nẽ Simãw Pêtre pumu nẽ kànhmã nhÿ.

41 Hãmri nhũm hpa hã kupy nẽ kànhmã ãm nẽ kapôt ã mẽ kuhê xwÿnhjê mã anẽ nhũm mẽ akupÿm wa hwÿr agjê nhũm mẽ kãm:

—E ota. Na Tĩrtũm akupÿm mẽ amã ho htĩr. Anẽ.

Hãmri nhũm mẽ amnhĩ jaêr pê omu nẽ hkĩnh tÿx nẽ.

42 Hãmri nhũm Jope kamã mẽ piitã harênh ma nẽ mẽ ohtô nẽ amnhĩ kaxyw Jejus kôt hamaxpêr nẽ hkôt amnhĩ xunhwÿ.

43 Hãmri nhũm Simãw Pêtre Jope kamã ri pa hã apkati xohtô nẽ tokyx mẽ kurũm kato nẽ ma krĩ hõ hwÿr mõi kêt nẽ. Na pre mry kà ho mẽmoj nhĩpêx o pa xwÿnh pê Simãw ri pøj nẽ kuri pa hã apkati xohtô nẽ.

10

*Konêre kot Simãw Pêtre hã karõ hã harênh
Rukre 7.1-10*

1 Tã nhũm Ijaew kêt xwÿnh Konêre. Kêp Rõmjê nhõ pôristi krãhtũm na pre. Õ pôristija pika pê Itar nhõ xwÿnh na pre mẽ nhũm Konêre kêp mẽ hkrãhtũm. Krĩ pê Sejarej kamã.

2 Konêreja kot amnhĩ to mex o pa xwÿnh na pre. Kêp Ijaew kêt tã na pre hte òrkwÿ kamã hkwyjê mẽ Tĩrtũm ã hpijaàm nẽ kãm mex o mex ã harênh o pa. Apkati mẽ kãm amnhĩ jarê. Nẽ mẽ kêp amrakati xwÿnhjê mã kàxpore hkwy nhõr o pa.

3 Jakamã nhũm mẽmo arĩgro hã ra myt japanh grire nhũm mẽmoj pumu.

Te hpimtir kām kot omunh pyrà nē kaxkwa kamā Tirtūm kapēr o wrýk xwýnh pumu. Nhūm hwýr wrý nē tanhmā kām kapēr to nē kām:

—Pa Konēre? Anē.

⁴ Nhūm tee ri omu nē kām ma htýx kumrēx. Hāmri nē kām:

—Mo na? Anē.

Hāmri nhūm kām:

—Nà ate amnhī to Tirtūm wýr o apaja nhūm ra amnhī tā ama nhūm ja kām mex nē. Nē ate mē kēp amrakati xwýnhjē mā kàxpore hkwy nhōr o apaja nhūm ja määnēn kām mex nē.

⁵ —Jakamā e inhma. Kēr ka ma Jope hwýr amā mē àpēnh xwýnh kwý rē kē mē ma hwýr mra nē kamā mēhō pé Simāw Pêtre japrō nē man akupýn awýr o mō.

⁶ Simāw kot mry kà ho mēmoj nhīpēx o pa xwýnhhta nhōrkwy kamā na hte pa. Ōrkwyja gō mý ri na. E hwýr mē arē kē mē ma hwýr mō nē haprō nē man awýr o mō kē amā mēmoj mex jarē ka ama. Anē.

⁷ Nhūm pre ã Tirtūm kapēr o wrýk xwýnhja Konēre mā kapēr anē hāmri nē kato nē ma akupým api. Hāmri nhūm kot mar xà hkôt jajē rē nē Simāw Pêtre hwýr mē kurē. Kām àpēnh xwýnhjē ho hamēxkrut nē kaxyw ò pôristi hō. Pôristija na pre hte Konēre pyrà nē Tirtūm ã hpijaàm o pa.

⁸ Jakamā nhūm mē kurē nē mē kām kapēr hāmri nē ma Jope hwýr Simāw Pêtre hwýr

mē kurē nhūm mē kato nē ma hwýr mō.

⁹ Hāmri nhūm apkati nhūm kaxkwa nhīpōk ri myt nhý nhūm mē hwýr hpōx o mō.

Simāw Pêtre tanhmā hpimtir to hā harēnh

Atre 11.5; Karatas 2.11-21

Rôm nhūm Simāw Pêtre kot Tirtūm mā amnhī jarēnh kaxyw ixkre nhīmōk ã api nē himōk po hā kām amnhī jarēnh o nhý.

¹⁰ Hāmri nē ra kām prām nē nom nhūm mē kormā kām ò hā àpēnh jakamā nhūm arī ixkre nhīmōk ã Tirtūm mā amnhī jarē.

Hāmri nē Konēre pyrà nē te hpimtir kām kot mēmoj pumunh pyrà nē mēmoj pumu nhūm Tirtūm Konēre hkukamā tanhmā kām mēmoj to amnhīrit to. No ãm hā kuxi nē kām harēnh jakamā nhūm Simāw Pêtre te hpimtir kām kot mēmoj pumunh pyrà nē mēmoj pumu.

¹¹ Nhūm kaxkwa katēr nhūm kurūm mēmoj te kot mē hpiro xà pyrāk xwýnhja pyka hwýr wrýk o mō. Nē hatúr xà piitā axpēn tā akuprō nē ajēt nē wrýk o mō nhūm omu.

¹² Mē hpiro xàta kamā mēmo mry piitā hikwy. Mēmo mry hpar o ri pa xwýnhjaja nē htu mýr pé ri pa xwýnhjaja nē mēmo àk kýx pé htor o ri mrar xwýnh piitā mē hpiro xàja kamā hikwy nhūm omu.

¹³ Hāmri nhūm Tirtūm kām: —Pa Simāw Pêtre? Mān ka ra amā prām nē nà? E kànhmā xa nē axàmnhīx māmri mryta ò kapi nē api nē ho anē nē

aku. Piitã mẽ ate hkur mã mex. Anẽ.

¹⁴ Hãmri nhũm tee ri kuma nẽ kãm:

—Kwa nà Pahi Maati. Mẽ ixpê Ijaew mẽ ixte mry piitã hkur kêt. Âm hkwỳ pix na pa htem kuku. No mry jaja aa mẽ ixte hõ hkwỳ hkrêr kêt. Anẽ.

¹⁵ Hãmri nhũm Tĩrtũm kãm:

—Nà kot anhỹr tã kot paj pam amã mẽmoj jarẽ ka kamã anhõkre kahak kêt nẽ. Mãmrĩ amnhĩm hõ kapi nẽ apĩ nẽ ho anẽ nẽ axãmnhĩx hkwỳ hkre. Anẽ.

¹⁶ Nhũm pre ã kãm mry hã karõ anhỹr o axkrunẽpxi. Simãw Pêtre kot mãmrĩ Ijaew kêt xwỳnhjê hkõt pa nẽ àmnhĩx ri mẽ kutã apkur nhũm Tĩrtũm kãm ja mex nhũm kot hã amnhĩ pumunh kaxyw nhũm ã kãm harênh anhỹr o axkrunẽpxi. Hãmri nhũm mẽ hpiro xàja ma akupỹm kaxkwa hwỳr àpir o mõi nẽ akunok.

¹⁷ Hãmri nhũm Pêtre te hkrãkator pyrãk jao tee ri hpimtir kukamã hamaxpêr o nhỹ nẽ hamaxpêr o:

—Kwa mo kaxyw na Tĩrtũm ã inhmã ja hã karõ anẽ? Anẽ.

Rôm nhũm Konêre kot hwỳr mẽ rênh xwỳnhjaja ra hwỳr hpõx o mõi. Ijaew kêt xwỳnhjtaja Simãw nhõrkwỹ hã mẽ hkukjêr o mõi nẽ hwỳr pøj nẽ hakwakrem kuhê.

¹⁸ Hãmri nẽ õrkwỹ nhõ xwỳnhjê mã kãm:

—Pa na ka mẽ arĩ akrĩ? E Simãw Pêtre hwỳr na pa mẽ mõi. Xà jar na hte pa nã? Anẽ.

Hãmri nhũm mẽ kãm: —Tỳ. Omũj kỳx pê ixkre nhĩmõk ã na nhỹ. Anẽ.

¹⁹ Nhũm Simãw Pêtre arĩ kot mẽmoj pumunhta kukamã hamaxpêr o nhỹ nhũm Tĩrtũm Karõ kãm mẽ hpõx xwỳnhjê jarẽ nẽ kãm:

—E Simãw Pêtre. Ota Ijaew kêt xwỳnhjaja axkrunẽpxi nẽ ajapêr o mõi nẽ ra anhõrkwỹ hwỳr pøj.

²⁰ Mẽ hwỳr wrỳ nẽ mẽ kot amã mẽmoj jarênh ma nẽ mãmrĩ axãmnhĩx ma mẽ hkõt mõi. Tanhmã ajamaxpêr to hkêt nẽ. Pa na pa awỳr mẽ kumẽ nhũm mẽ mõi. Anẽ.

²¹ Hãmri nhũm kuma nẽ mẽ hwỳr wrỳ nẽ mẽ omu nẽ mẽ kãm:

—Pa? Xà pa na ka mẽ ijapêr o mõi? E ot pa xa. Kam nẽ mẽ inhmã mẽmoj jarẽ pa mẽ ama. Mẽmo kaxyw na ka mẽ ixwỳr mõi? Anẽ.

²² Hãmri nhũm mẽ kãm:

—Nà mẽ inhõ patrãw Konêre na awỳr mẽ inhmẽ pa mẽ mõi. Na hte tãm amnhĩ nhĩpêx o pa. Nẽ Tĩrtũm ã hpijaàm nẽ kãm mex o mex ã harênh o pa. Nhũm mẽ inhõ krĩ kamã Ijaew kãm hkĩnh nẽ. Tã na Tĩrtũm kapêr o wrỳk xwỳnhja ham hwỳr wrỳ nẽ kãm ajarê. Kot amnhĩ wỳr atã karõ nhũm ate hwỳr amõr nẽ kãm axujarênh kaxyw kãm ajarênh jakamã nhũm mẽ ixte ajaprõr kaxyw awỳr mẽ inhmẽ pa mẽ man awỳr mõi. Anẽ.

²³ Hãmri nhũm mẽ kuma nẽ mẽ kãm:

—Tõe nã na pa mẽ ama. E mẽ agjê nẽ akrĩ nẽ jar mẽ

ixri nõ kê apkati pu mẽ rĩ ma akupỹm mỗ. Anẽ.

Hãmri nhũm mẽ kuma nẽ mẽ hwỳr agjê.

Tã nhũm apkati nhũm mẽ akupỹm nojarêt nhũm Simãw Pêtre ma mẽ hkôt mỗ. Nhũm Jope kamã mẽ kot Jejus kôt amnhĩ xunhwỳr xwỳnh kwỳjaja ma mẽ hkôt mỗ. Nhũm mẽ mỗr o kamàt.

²⁴ Hãmri nhũm apkati nhũm mẽ Sejarej wỳr hpõx o mỗ. Nhũm ra Konẽre mẽ kutêp amnhĩ wỳr hkwỳjê ho akuprõ nhũm mẽ Simãw Pêtre kutêp òrkwỹ kamã akuprõ nẽ hkrĩ.

²⁵ Hãmri nhũm mẽ hwỳr pôj nẽ mẽ hwỳr àr kaxyw nhũm Konẽre amnhĩ wỳr omu nẽ kànhmã xa nẽ kutã tẽ nẽ hpar pê hkõnkrã ho tẽm nẽ nhỹ.

²⁶ Hãmri nhũm tee ri ja hã omu nẽ pa hã kupy nẽ kànhmã ãm nẽ kãm:

—Kwa kànhmã xa. Ixpê Tĩrtũm kêt tã ka ri ã inhĩpêx anẽ. Anẽ.

²⁷ Hãmri nẽ hkôt òrkwỹ hwỳr axà nẽ kutêp mẽ pikuprõnh xwỳnhjê pumu nẽ mẽ kãm:

²⁸ —Pa na ka mẽ arĩ akrĩ? E mãn ra mẽ ate mẽ ixpê Ijaew kot amnhĩ nhĩpêx ã mẽ ixpupunh mex. Na pa htem mẽ apê axtem nhõ xwỳnhjê hkôt ri ixpa hkêt nẽ. Nẽ mẽ anhõrkwỹ hwỳr inhgiêx kêt nẽ. Tã ham Tĩrtũm inhmã mẽ ixte ã amnhĩ nhĩpêx anhỹr o ixpaja nẽ ixkurê nẽ inhmã: “Kot paj pam mẽ hkwỳjaja mex ã mẽ harê ka mẽ kamã anhõkre kahak kêt nẽ.”

²⁹ —Anhỹr jakamã ka xep pre ixtã karõ pa inhõtôt kêt nẽ

man mẽ awỳr inhmõr kurê kumrêx. E mẽ inhmã mẽmoj jarê pa mẽ ama. Mẽmo kaxyw na ka mẽ ixtã karõ? Anẽ.

³⁰ Hãmri nhũm Konẽre kãm: —Nà jãã na pa pre jar inhõrkwỹ kamã Tĩrtũm mã amnhĩ jarênh o nhỹ. Ra myt xàpanh grire pa kãm amnhĩ jarê. Hãmri nhũm Tĩrtũm kapêr o wrỳk xwỳnh ixwỳr wrỳ nẽ hirã rax kãm xa.

³¹ Hãmri nẽ inhmã: “Pa Konẽre? E na hte Tĩrtũm ate kãm amnhĩ jarênhta mar o hkrĩ. Nẽ ate mẽ kêp amrakati xwỳnhjê ho mex o apaja nhũm hã apumu.

³² Jakamã e ma Jope hwỳr amã mẽ àpênh xwỳnh kwỳ rê kê mẽ ma hwỳr mỗ nẽ kamã Simãw Pêtre japrõ nẽ man akupỹn awỳr o mỗ. Mry kà ho mẽmoj nhĩpêx o pa xwỳnh Simãw nhõrkwỹ kamã na hte pa. Òrkwỹja gô mỳ ri na.” Anẽ.

³³ —Ã kot inhmã kapêr anhỹr jakamã na pa kuma hãmri nẽ awỳr jajê rênh kurê kumrêx. Tã ka mẽ hkôt man mẽ ixwỳr mỗ nẽ ã apõx anẽ. ãm hãmri na ka mẽ hkôt mỗ. Mẽ apê Ijaew kot amnhĩ nhĩpêx kuhpa hã amnhĩ nhĩpêx nẽ axàmnhix man mẽ ixwỳr mỗ. Tã ot pa mẽ Tĩrtũm noo mã ixkrĩ. Kam nẽ mãmriỹ hã mẽ inhmã mẽmoj jarê pa mẽ ama. Anẽ.

Simãw Pêtre kot Konẽre mã ujarênh

³⁴ Hãmri nhũm Simãw Pêtre Konẽre kot kãm amnhĩ jarênhja ma nẽ mẽ kãm awjarê nẽ mẽ kãm:

—Nà ãm hãmri na Tĩrtũm mẽ akukamã tanhmã inhmã

kapêr to. Xep kãm mẽ ixpê Ijaew pix japê hkêt. Kãm mẽ pahpiitã mẽ pajapê nê mẽ panhîpêx o axpên pyræk.

³⁵ Koja ahpÿnhã pyka piitã hkôt mēhō mẽ ixpyrà nē kēp Ijaew kêt tãã hkôt amnhĩ xãm nē hã hpijaàm pē kãm mex o mex ã harē nē tãm amnhĩ nhîpêx. Hãmri nhũm Tĩrtũm ja hã omu nhũm ja kãm mex nē.

³⁶ —Na pre ra mẽ ixpê Ijaew mã tanhmã Kra Jejus Kris jarēnh to. Jejus kot mẽ panê htyk kukwak ri na hte mẽ ixte hkôt amnhĩ xunhwÿr xwÿnhjê ho hkra. Tã ra mãânēn ã mẽ apê Ijaew kêt xwÿnhjê mã ã amnhĩ jarēnh anē nē Jejus htyk kukwak ri mẽ ate mẽ ixpyrà nē hkôt amnhĩ xunhwÿr xwÿnhjê ho hkra. Jakamã Jejus Krisja kēp mẽ pahpiitã mẽ panhō Pahihtĩ.

³⁷⁻³⁸ —Mãn ka prem ra harēnh ma. Mẽ ixpê Ijaew nhō pika pē Jutej kumrēx kãm na pre Juãw Paxisja Jejus kukamã mẽ kãm harē nē mẽ hkrã kumrãr o pa. Mẽ piitã mẽ kot amnhĩ tomnuj kaga nē Tĩrtũm kôt amnhĩ xunhwÿr ã mẽ omunh xà hkôt mẽ hkrã kumrã. Jejusja krĩ pē Najare kamã na pre hprêk. Tã hwÿr na pre Tĩrtũm amnhĩ Karō mẽ nhũm wrÿ nē hkarō mã axà nē hkôt pa ho pa. Jakamã nhũm ahpumunh o ahpumunh nē ma krĩ piitã hkôt tanhmã mẽ ho mex to ho ri mẽ hkôt pa. Pika pē Garirej kumrēx kamã mẽ piitã ri mẽ kãm Tĩrtũm kapêr jarēnh o pa. Nē mẽkarōmnuti

kot Satanasti nhÿ hã tanhmã mẽ ho xwÿnhjaja nhũm mẽ nē mẽkarōmnuti japôx o pa. ã na pre Tĩrtũm nhÿ hã amnhĩ nhîpêx anhÿr o pa.

³⁹ —Tã Jejus nhÿ hã hkrajê jahkre ho mẽ ixpa xwÿnhjaja na pa prem kot ri tanhmã amnhĩ to ho pa hã omunh par o ri hkôt ixpa. Mẽ ixpê Ijaew nhō pyka kamã nē mẽ inhō krĩ pē Jerujarē kamã kot ri tanhmã amnhĩ nhîpêx to ho paja pa prem piitã omunh o hkôt ri ixpa. Tã nhũm prem axtem nē mẽ ixpê pĩ kahpa hã kunhō nē kupĩ.

⁴⁰ Hãmri nhũm htyk o apkati axkrunēpxi nhũm Tĩrtũm akupÿm ho htĩr nē akupÿm mẽ ixwÿr kumē pa prem akupÿm htĩr kãm omu.

⁴¹ No nhũm mẽ piitã akupÿm htĩr kãm omunh kêt nē. ãm mẽ ixwÿr pix na pre kato nē mẽ ixkutã apku pa mẽ papxipixjaja akupÿm htĩr ã omu. Hãmri nhũm Tĩrtũm mẽ ixte ma mẽ piitã mẽ kãm akupÿm htĩr ã harēnh o ri ixpa kaxyw mẽ ixrê.

⁴²⁻⁴³ Amnepēm Tĩrtũm nhÿ hã kapêr jarēnh o mẽ pa xwÿnhjaja na prem Jejus kukamã tanhmã hã kaga hto nē mẽ kãm harēnh o pa. Nē mẽ kãm:

Koja nhÿrmã mēhōja man mẽ pahwÿr wrÿ nē mẽ panê tanhmã amnhĩ nhîpêx to. Ka mẽ atō amnhĩ kaxyw hkôt ajamaxpêr nē hkôt amnhĩ xãm hã koja Tĩrtũm ja hã apumu

ně mēhō kot tanhmā
mē panē amnhī nhīpēx
to xwýnhhta kukwak ri
amnhī katut kôt ate
amnhī tomnuj rēnh pa
ně axte kām hamaxpēr
kēt nē. Anē.

Na pre Tirtūm nhỹ hā kapēr
jarēnh o mē pa xwýnhjaja
Jejus kukamā ā harēnh nē
hā kagā anē. Tā koja Jejus
nhỹrmā akupýn wrý hāmri
ně mē htyk xwýnhjē nē arī
mē htír xwýnhjē mē pahto
pimràatā tanhmā mē pa-
jarēnh to. Mē pahte tanhmā
amnhī nhīpēx to ho papa hā
mē pahpumunh kôt tanhmā
mē pajarēnh to. Hāmri nē
Tirtūm mē wa kuri mē pah-
tír tūm nē mē papa ho papa mā
xwýnhjē jarē nē mǎānēn wa
kuri mē htír tūm kēt xwýnhjē
jarē. Mē pahpiitā tanhmā
mē pajarēnh to kaxyw na
pre Tirtūm mē pakaxyw Jejus
xām. Tā ā kot mē pajarēnh
anhỹrja kukamā na pre mē
ixte mē amā tanhmā harēnh
to ho ixpa kaxyw mē awýr
mē ixrē. Mē ate kapēr mar
ně tokyx Jejus kôt amnhī
xunhwýr kaxyw. Anē.

⁴⁴ Nhūm Simāw Pētre ā mē
kām ujarēnh anhỹr rōm nhūm
Tirtūm mē kot mar o hkrī
xwýnhjē hwýr amnhī Karō rē
nhūm mē hwýr wrý nē mē
hkarō mā gjēx pa.

⁴⁵⁻⁴⁶ Hāmri nhūm mē Tirtūm
mā mex o mex ā harēnh o
hkrī. No ām mē kapēr kām
harēnh kēt nē. Mē kapēr
kwý hō ho kām mex o mex
ā harē. Aa mē kot mē kapēr
mar kēt tā ra ho kapēr mex
ně. Jakamā nhūm Jope rūm

mē kot Simāw Pētre hkôt mē
mōr xwýnhjaja. Ijaew kwý kot
ra Jejus kôt amnhī xunhwýr
xwýnhjaja amnhī jaēr pē ja hā
mē omu nē axpēn mā:

—Hēxta waa nē. Mē kēp
Ijaew kēt tā nhūm Tirtūm kot
mē panhīpēx pahpyrà nē mē
hwýr amnhī Karō rē nhūm
mē hwýr wrý nē mē kām agjē.
Nā ām hāmri na mē pahpyrà
ně ā mē hipēx anē. Anē.

Hāmri nhūm Simāw Pētre
mē kuma nē mē kām:

⁴⁷ —Kwa pu mē hkrā
kumrār kurē kumrēx. Ra
Tirtūm Karō kot mē pahpyrà
ně mē hkarō mā gjēx kēnā
kot kēt mēhō mē nē tanhmā
mē pahpē àmnàr to. Ra mē
kot mē pahpyrà nē Jejus kôt
amnhī xunhwýr kēnā. Anē.

⁴⁸ Hāmri nē Konēre mē
hkwýjē mā kām:

—E kot paj mē ate Jejus
Kris kôt amnhī xunhwýr ā mē
akrā kumrā. Anē.

Hāmri nē mē hkrā kumrār
pa nhūm mē Simāw Pētre mā
kām:

—Kwa kormā anojarēt kēt
ně. Kritpēm ri mē ixkôt ri apa
hā atā apkati grēre nē kormā
ma akupým mō. Anē.

Hāmri nhūm mē kuma
ně mē hkôt ri pa hā apkati
grēre hāmri nē nojarēt nē ma
akupým mō.

11

*Simāw Pētre kot hkwýjē mā
Konēre jarēnh*

Atre 10.1-48

¹⁻² Hāmri nhūm Simāw
Pētre ma akupým mō. Jutej
kamā krī pē Jerujarē wýr
ma akupým mō hāmri nē

pôj. Hāmri nhūm Jutej kamā Jejus nhỹ hã mẽ ahkre xwýnh maatiê mẽ mẽ kot Jejus kôt amnhĩ xunhwýr xwýnhjaja Ijaew kêt xwýnhjê jarēnh ma. Konēre mẽ hkwý kot mẽ uràk nē Jejus kôt amnhĩ xunhwýr ā mẽ harēnh ma. Jakamā nhūm Simāw Pêtre akupým mẽ hwýr pôj nhūm mẽ omu nē mẽ hã àhkukjêr kurê kumrêx. Hāmri nhūm mẽ hkwýjaja mẽ hã kām akir nē kām:

³ —Kwa mẽ pahpê Ijaew pyrà nē mẽ kot amnhĩ my kwryt kà jakàr kêt tã ka mẽmo hwýr mẽ hwýr mō mẽ kuri pôj nē mẽ kutā apku. Anē.

⁴ Hāmri nhūm Pêtre tee ri mẽ kuma hāmri nē hprĩ hã mẽ kām amnhĩ jarē. Nē tanhmā Tirtūm kot kām Ijaew kêt xwýnhjê jarēnh to hã mẽ kām harē nē mẽ kām:

⁵ —Kwa mẽ ā ri ajamxpêr anhỹr kêt nē. E pa mẽ amā amnhĩ jarē ka mẽ inhma mǎn. Nà na pa pre jāā Jope kamā Tirtūm mǎ amnhĩ jarēnh o nhỹ nē te ixpimtir kām mẽmoj pumunh pyrāk. Nhūm mẽmojja te mẽ hpiipro xà pyrà nē kaxkwa rŭm ixwýr wrýk o mō pa ixprĩ hã omu.

⁶ Nhūm kamā mry piitāā. Mry xoprê nē mry xuwapô nē mry hpar o ri pa xwýnhjaja nē mry htu mýr pê ri pa xwýnhjaja nē àk. Nē mẽ pahte hkur xwýnhjaja nē mẽ pahte hkur kêt xwýnhjaja.

⁷ Kamā mry piitā pa omu. Hāmri nhūm Tirtūm inhmā: “Pa Simāw Pêtre? Mǎn ka ra amā prām nē nà? E kǎnhmā xa nē axàmnhĩx māmri mryta

ō kapi nē apĩ nē ho anē nē aku. Piitā mẽ ate hkur mǎ mex.” Anē.

⁸ —Pa tee ri kuma nē kām: “Kwa Pahi Maati. Mē ixpê Ijaewjaja mẽ ixte mryja piitā hkur kêt. Ām hkwý hpix na pa htem kuku. No ja hkwý aa mẽ ixte hō hkwý hkrêr kêt.” Anē.

⁹ Nhūm inhmā: “Nà nom kot anhỹr tǎā. Kot paj pam amā mẽmoj jarē ka kamā anhōkre kahak kêt nē. Jakamā e māmri amnhĩm hō kapi nē apĩ nē ho anē nē axàmnhĩx hkwý hkrê.” Anē.

¹⁰ —Na pre ā Ijaew kêt xwýnhjê hwýr inhmōr kukamā inhmā karō ho axkrunêpxi anē. Nom hã kuxi nē inhmā mẽ pahte mry kur kēeta jarē. Hāmri nhūm mẽ hpiipro xàja ma akupým kaxkwa hwýr api nē kakrām axà nē akunok.

¹¹ Hāmri nhūm Ijaew kêt xwýnhjaja mẽ ixwýr axkrunêpxi nē mra nē pôj. Konēreja Sejarej rŭm ixwýr mẽ rēnh xwýnhjaja nhūm mẽ mra nē ixwýr pôj.

¹² Hāmri nhūm Tirtūm Karō ma mẽ hkôt inhmē. Mē kêp Ijaew kêt tã nhūm ixàmnhĩx ma mẽ hkôt ixpa kaxyw mẽ hkôt inhmē pa ma mẽ hkôt mō. Nhūm Jope kamā mẽ kot Jejus kôt amnhĩ xunhwýr xwýnh kwýjaja kêp 6ja ma mẽ ixkôt mō. Pa mẽ mō nē Sejarej kamā Konēreja wýr pôj.

¹³ Hāmri nhūm mẽ ixpumu nē mẽ inhmā amnhĩ jarē. Tirtūm kapêr o wrýk xwýnh kot hwýr wrýk nē òrkwý hwýr àr nē tanhmā kām kapêr toja

nhũm inhmã harê. Na xep pre kãm: “E kêr ka ma Jope hwÿr amã mẽ àpênh xwÿnh kwÿjê rê kê mẽ ma hwÿr mō. Hãmri nê kamã Simãw Pêtre japrô nê man akupÿn awÿr o mō kê tanhmã mẽ amã ujarênh to.

14 Koja mẽ amã tanhmã mẽ apê Tirtũm kra hprãm xaj tanhmã mẽ ate amnhĩ nhĩpêx to hã mẽ amã karō ka mẽ ama nê mar tÿx nê hkôt amnhĩ nhĩpêx. Ka mẽ anhōrkwÿ kamã akwÿjê mẽ apimràatã ama nê mar tÿx nê. Hãmri nê kot mẽ amã hã karō xà hkôt amnhĩ nhĩpêx nhũm Jesus mẽ ate amnhĩ tomnuj pê mẽ apytàr pa.” Anê.

—Na xep pre ã Tirtũm kapêr o wrÿk xwÿnhja kãm ijarênh anê. Jakamã nhũm ixwÿr jajê rê pa ma mẽ hkôt mō.

15 Hãmri nê kormã mẽ kãm tanhmã Jesus jarênh to. Tanhmã kot mẽ panê amnhĩ nhĩpêx to hã harê. Nê kormã mẽ kãm ixujarênh o ixãm rôm nhũm Tirtũm Karō te wam kot mẽ panhĩpêxta pyrã nê mẽ hwÿr wrÿ nê mẽ hkarō mã gjêx pa.

16 Pa ja hã mẽ omu nê Pahihti Jesus kot akupÿm kaxkwa hwÿr nojarêr nê tanhmã mẽ pamã kapêr tota mã ijamaxpêr kurê kumrêx. Na pre mẽ pamã: “Finat Juãw Paxis na pre hte gô ho mẽ hkrã kumrãr o pa. Tã koja Tirtũm ta hpãnhã mẽ awÿr amnhĩ Karō rê nhũm mẽ akarō mã agjê.” Anê.

—Ã na pre Pahihti Jesus akupÿm nojarêr nê mẽ pamã

kapêr anê. Jakamã pa ã kot mẽ hipêx anhÿr ã mẽ omu nê ã kapêr anhÿrja mã ijamaxpêr kurê kumrêx.

17 Na pu prem Pahihti Jesus Kris kôt amnhĩ xunhwÿ nhũm Tirtũm ja hã mẽ pahpumu nê mẽ pahwÿr amnhĩ Karō rê. Tã te kot mẽ panhĩpêxta pyrã nê mãânênh Ijaew kêt xwÿnhhtajê hwÿr kurê nhũm mẽ hkarō mã agjê. Mẽ kêp Ijaew kêt tã nhũm mẽ pahpyrã nê mẽ hwÿr kurê nhũm mẽ hkarō mã agjê. Tirtũm tãm kot amnhĩ krã hkôt mẽ hwÿr rênh kênã kot pa kêt mẽ nê tanhmã kêp ixãmnrã to. Anê.

18 Nhũm pre ã Simãw Pêtre mẽ kãm amnhĩ jarênh anê nhũm mẽ kuma nê tãm hamaxpêr nê hkĩnh nê. Nê axte mẽ hã tanhmã kãm nê hkêt nê. ãm mẽ hã Tirtũm mã mex o mex ã harê. Hãmri nê axpênh mã:

—Nà ãm hãmri. Mẽ kêp Ijaew kêt tã na prem Jesus kôt amnhĩ xunhwÿ nhũm Tirtũm kot mẽ panhĩpêxta pyrã nê amnhĩ katut kôt mẽ kot amnhĩ tomnuj rênh pa. Nhÿrmã wa hkuri mẽ pahpyrã nê htir tũm nê pa ho pa kaxyw nhũm ã mẽ hipêx anê. Nà ãm hãmri na ã kot mẽ panhĩpêx pyrã nê mẽ hipêx anê. Anê.

ãxiok kamã Jesus kwÿ jarênh

Atre 4.36-37

19 Tã ra mẽ kot kên o Estewãw kapêr o hpĩr xwÿj ri mẽ kot ã hipêx anhÿrta pyrã nê mẽ kot Jesus kôt amnhĩ xunhwÿr xwÿnhhaja

omnuj tỳx o pa. Jakamã nhũm mẽ hkwỳjaja mẽ umaj ma ahpỳnhã krĩ hkwỳ hkôt pigrành pa. Wēnĩs wỳr nē Sípře hwỳr nē ãxiok hwỳr nhũm mẽ ma ahpỳnhã krĩ hkwỳ hkôt angrà nē kamã pa ho pa. Nē mẽ kãm tanhmã Pahihti Jejus kot mẽ panê amnhĩ nhĩpêx to hã harēnh o ri mẽ hkôt pa. No ãm kormã Ijaew pix mã harēnh o pa.

²⁰ Tã hãmri nhũm mẽ hkwỳjaja Sípře mẽ Sirēn rũm ãxiok hwỳr pan pøj. Hãmri nē kamã mẽ kêp Ijaew kêt xwỳnhjê mã Pahihti Jejus kot amnhĩ nhĩpêx jarēnh o pa. ã mẽ kot amnhĩ nhĩpêx anhỹr jakamã na mẽ ra ahpỳnhã ri mẽ kãm harēnh o ri pa. Ijaew mã nē mãănēn Ijaew kêt xwỳnhjê mã

²¹ nhũm mẽ ma mẽ hkôt ri Pahihti Jejus nhỹ hã mẽ kãm kapêr jarēnh o ri mẽ hkôt pa. Hãmri nhũm mẽ ohtô nē amnhĩ nhĩpêx tũm kaga hpa nē hpãnhã amnhĩ kaxyw Jejus kôt hamaxpêr nē hkôt amnhĩ xunhwỳ.

²² Hãmri nhũm Jerujarē kamã Jejus kwỳjaja mẽ harēnh ma nē mẽ hwỳr Panãpe mẽ. ãxiok hwỳr mẽ hwỳr kumē. Ma mẽ hwỳr mōr nē Jejus kôt mẽ hamaxpêr o hihtỳx kaxyw.

²³ Hãmri nhũm ma mẽ hwỳr mō nē mẽ hwỳr pøj nē mẽ omu. Tĩrtũm kot mẽ ho mex ã mẽ omu hãmri nē mẽ ý hã hkĩnh nē. Nē mẽ kãm:

—Nà ãm hãmri na ka mẽ ra Jejus kôt amnhĩ xunhwỳ nē hkôt amnhĩ nhĩpêx mex o ri

apa. Tã kêr ka mẽ ãm kapêr kôt pix mã ri amnhĩ nhĩpêx rãhã ho ri apa nē aa hkaga hkêt nē. Anē.

²⁴ Panãpeja na pre tãm amnhĩ nhĩpêx o pa. Nē amnhĩ kaxyw Jejus kôt pix mã hamaxpêr mex o pa. Nē Tĩrtũm Karō hkôt amnhĩ nhĩpêx rãhã jakamã na pre hte ý hã mẽ kãm Pahihti Jejus kot mẽ panê tanhmã amnhĩ nhĩpêx to hã harēnh o ri mẽ hkôt pa. Hãmri nhũm mẽ kuma nē ohtô nē Jejus kôt amnhĩ xunhwỳ.

²⁵ Tã nhũm Panãpe ãxiok rũm kato nē kot Sawti japrōr kaxyw ma krĩ pê Tas hwỳr mō.

²⁶ Hãmri nē hwỳr pøj nē Sawti pumu nē haprô nē ma akupỹm amnhĩ kôt ãxiok hwỳr o mō. Hãmri nē kamã mẽ kot Jejus kôt amnhĩ xunhwỳr xwỳnhjê hkôt wa ri pa hã amgrà pyxi nē hapêx. Nē mẽ ho ohtô nē ri mẽ kãm Jejus kapêr o mẽ ahkre ho ri mẽ hkôt pa. Jakamã nhũm krĩ nhõ xwỳnhjaja mẽ kot Jejus kôt amnhĩ nhĩpêx xwỳnhjê pumu nē mẽ hã mẽ hixi rē nē mẽ harēnh o: “Kris tō nē htōxjaja” anhỹr o mẽ harē. ãxiok kumrêx kãm na prem ã mẽ kot Jejus kôt amnhĩ xunhwỳr xwỳnhjê jarēnh anē. Jakamã nhũm mẽ piitã ã mẽ harēnh anhỹr o pa.

²⁷ Tã nhũm Panãpe mẽ Sawti wa kormã ãxiok kamã paja rôm nhũm Tĩrtũm nhỹ hã kapêr jarēnh xwỳnh kwỳjaja mẽ hwỳr mran pøj. Jerujarē rũm mẽ hwỳr mran pøj.

28 Hāmri nhūm mē piitā mē kot mē kapēr mar kaxyw mē hwÿr akuprō. Jakamā nhūm hō pē Akapōja kànhmā xa nē tanhmā mē kām ujarēnh to. Tirtūm Karō nhÿ hā mēmoj kukamā mē kām awjarē nē mē kām:

—Kwa okora kēr ka mē axkām ajamak rom. Koja tokyx pika piitā hkôt mē apkur xà hā mēōja mē kēp hkryre nē mē piitā mē hipēx kēt nē. Anē.

Tā nhūm gaa nē ujarēnh xàja kôt mēmoj ā amnhī nhīpēx anē. Kormā Pahihti Krawti kot mē ho amnhīptār ri nhūm mēmoj ā amnhī nhīpēx anē. No nhūm kormā ā amnhī nhīpēx anhÿr kēt ri nhūm Akapōja kukamā ā mē kām ujarēnh anē.

29 Hāmri nhūm mē kuma nē tee ri Jutej kamā Jejus kôt mē hkwyjē hkukamā hamaxpēr nē axpēn mā:

—E kwa pu mē Jutej kamā Jejus kôt mē pahtō nē pahtōxjē mā pahkàxpore hkwy gō kē mē ho amnhīm awjarō nē hkur o pa. Anē.

Hāmri nē mē kaxyw kàxpore hkwy ho akuprō. Nhūm mē hikàxpore hkryre xwÿnhjaja ām mē kām ho hkryre nē kugō nhūm mē hikàxpore rūnh xwÿnhja mē kām ho rūnh nē kugō.

30 Jakamā nhūm mē ho hpikuprōnh pa nē Panāpe mē Sawti wa kot mē hwÿr o mōr nē mē kām ōr kaxyw wa kām kugō. Hāmri nhūm wa hamÿ nē ma Jutej kamā Jerujarē hwÿr mē hwÿr o mō.

Hāmri nē hwÿr pōj nē mē kot Jejus kapēr o mē ahkre xwÿnhjē mā kugō. Hāmri nhūm mē kām Jejus kôt mē htō nē htōxjē mā o anhgrā nhūm mē hamÿ nē hkīnh nē ho amnhīm awjarō.

12

Mē kot Simāw Pētre pynēnh nē haxār ā mē harēnh Matēwre 18.19-20

1 Tā nhūm mē ō pahi Eroxa ō pōristi mā Kris kwÿjē hā amÿnē nhūm mē mē hipēx katī nē nhūm mē amnhī xà htÿx kamā hamak o pa.

2 Juāw tō Xiakreja nhūm mē pahi Erox nhÿ hā unē nē hkanhwÿr o kupī.

3 Hāmri nhūm Ijaew kām ja mex jakamā nhūm pahi Erox hpānhā mē kām Simāw Pētre hā amÿnē nhūm unē nē haxà. Mē kot pāwti kaxkrit kēt kur ā mē hkīnh xà hā arīgro pē Pasja ā nhūm prem unē.

4 Na pre Erox Simāw Pētre hkukamā hamaxpēr o:

—Nà koja mē hkīnh hapēx pa Ijaew nom kupī nhūm rī amnhī pumu. Anē.

Hāmri nhūm pōristi kot Simāw Pētre jamār xwÿnhjaja kēp 16. Nhūm mē axpēn pānhā kēp 4 kapēn nē hamār rāhā ho kuhē.

5 Nhūm arī mē hagjēnh xà kamā hkrī ho hkrī. Hāmri nhūm Kris kôt htō nē htōxjaja harēnh ma nē tee ri hkukamā hamaxpēr hāmri nē axpēn wÿr akuprō nē ho Tirtūm wÿr rāhā ho hkrī.

Tirtūm kapēr o wÿrk xwÿnh kot Simāw Pētre kator ā harēnh

⁶ Tã nhũm ra mẽ hkĩnh hapêx nhũm kamàt. Hãmri nhũm pahi Erox kot tanhmã Simãw Pêtre ho xà hã arĩgroja wỳr nhũm kamàt nhũm pôristijaja arĩ mẽ hagjênh xà kamã hamãr mex o kuhê. Nhũm kuri wa hamêxkrut nê akutã hijê nê hamãr o nō. Kàx o akutã kãm ê nê wa ho nō nhũm wa hkaêx kãm htỳx gōr nê nō. Nhũm ja wa hakwa krem mãnên hamãr o xa.

⁷ Puh nhũm Tĩrtũm kapêr o wrỳk xwỳnhjê hōja mẽ hwỳr axà nê wrỳhtak rax kãm xa. Hãmri nê Simãw Pêtre grêk nê kumra nê kãm:

—Pa Simãw Pêtre? E kwa tokyj kãnhmã xa pu mō. Anê.

Hãmri nhũm hkrãkato nê omu nê kãnhmã ãm kurê kumrêx nhũm kaxprexà hã kàxja axrê nê pykap rôrôk nê hikwỹ. No nhũm kuri pôristi wa nōr xwỳnhhta wa mar kêt nê. Wa arĩ ôt tỳx nê nō.

⁸ Hãmri nhũm Tĩrtũm kapêr o wrỳk xwỳnhja Simãw Pêtre mã:

—E tokyx anhō kamĩs jaxà nê amnê ixkôt tẽ pu pakato nê ma tẽ. Anê.

⁹ Hãmri nhũm kamĩs nê hparkà jaxà nê ma hkôt tẽ. No ãm kormã amnhĩ pumunh mex kêt nê. Te hpimtir kãm ã kot amnhĩ nhĩpêx anhỹr pyràk ã amnhĩ kamnhĩx.

¹⁰ Hãmri nhũm wa hakwakrem pôristi wa kot hamãr o wa ãm xwỳnhja hãnh wa tẽ nê wa hakre nê hpãnhã ihōja wa hãnh wa tẽ no nhũm mẽ ôt tỳx nê hkrĩ nê wa omunh kêt nê. Nhũm wa hakwakre nhĩtep xà hkôt wa tẽn kato nê hpãnhã krĩ nê kahê xà hã

hakwakreja wỳr wa tẽ. Hãmri nhũm tãm wa kãm amnhĩ kahê xà mẽ nhũm wa kato nê pry hã tẽ. Ja kôt nhũm Tĩrtũm kapêr o wrỳk xwỳnhja akunok nhũm Simãw Pêtre axte omunh kêt nê.

¹¹ Hãmri nê hprĩ hã amnhĩ pumunh kurê kumrêx nê hamaxpêr o:

—Kwa te ixpimtir kãm ã ixte amnhĩ nhĩpêx anhỹr pyràk tã xep ixpimtir kêt. Tĩrtũm na ixwỳr kapêr o wrỳk xwỳnhja mẽ nhũm ixwỳr wrỳ nê mẽ kêp ixkator. Pahi Erox ra kot ixpĩr nhũm ixkwỹ Ijaew kãm ja prãm tã nhũm mẽ kêp ixkator. Nà ãm hãmri na Tĩrtũm ã mẽ kêp ixkator anê. Anê.

¹² Hãmri nê Marir nhōrkwỹ hwỳr htêm kurê kumrêx. Juãw Makre katorxà Marirja nhũm òrkwỹ hwỳr tẽ nhũm mẽ ra kamã hpikuprōnh rax nê ho Tĩrtũm wỳr o hkrĩ nhũm tãm mẽ hwỳr tẽ.

¹³ Hãmri nê kormã kapôt ã hakwa krem mẽ kãm kahê xà tatak o xa nhũm ixkre kamã mẽ kãm ãpênh xwỳnh Rotreja kuma nê hwỳr tẽ.

¹⁴ Hãmri nhũm kãm kapêr nhũm amnhĩ jaêr pê kuma nê hkĩnh nê. Nê kormã kãm kahê xà mênh kêt ri ma akupỹm tẽ nê mẽ kot ho Tĩrtũm wỳr xwỳnhjê hwỳr axà nê mẽ kãm:

—Xê pêr Simãw Pêtre na tẽ nê kapôt ã hakwakrem xa nê inhmã kapêr.

¹⁵ Hãmri nhũm mẽ tee ri kuma nê kãm:

—Kwa arĩ mẽ hagjênh xà kamã hkrĩ kênã. Mãn ka tanhmã amnhĩ krã amnhĩ to

hã na ka ri atỳx ã akapěr aně. Aně.

Hãmri nhũm mẽ kãm:

—Ma tanhmã kot pa kêt ri ixkrã amnhĩ to? ãm hãmri na pa mẽ amã harě. Mẽ kam nẽ mra nẽ omu. Aně.

Nom nhũm mẽ kuma nẽ ãm kuma nẽ kãm:

—Nà tãm kêt. Kaxkwa rũm Tirtũm mã hamãr o pa xwỳnh mãn amã kapěr nom tãm kêt. Aně.

¹⁶ Rôm nhũm Simãw Pêtre arĩ hakwakre tatak o xa. Hãmri nhũm mẽ jatã hwỳr mra nẽ kãm kahê xà mẽ nẽ amnhĩ jaěr pẽ omu nẽ hkĩnh nẽ.

¹⁷ Hãmri nhũm kànhmã mẽ kãm ìhkra hpẽ nẽ mẽ ho hpinhkrênh pa nẽ mẽ kãm:

—Nà Tirtũm na ixwỳr kapěr o wrỳk xwỳnhja mẽ nhũm ixwỳr wrỳ nẽ pôristi pẽ ixkator. Aně.

Hãmri nẽ mẽ kãm:

—E kêt ka mẽ Xiakre nẽ Jesus kôt mẽ pahtõ nẽ pahtõxjê mã ijarẽ kê mẽ ijarênh mar kurě kumrẽx. Nom kot paj ixkato nẽ ma krĩ hõ hwỳr mõ. Aně.

Hãmri nẽ mẽ kęp kato nẽ ma mõ.

¹⁸ Tã nhũm apkati nhũm pôristi kot hamãr o hkrĩ xwỳnhjaja hkrã hapôj nẽ tee hapêr nẽ nhỹri omunh kêt nẽ. Hãmri nẽ tee ri amnhĩ kukamã hamaxpêr o kãm ma htỳx kumrẽx nẽ axpẽn mã:

—Kwa tanhmã na pre we amnhĩ to nẽ mẽ pahpê akunok? Tanhmã koja we pahi Erox hã mẽ pahkukja pu mẽ harênh to? Aně.

¹⁹ Hãmri nhũm pahi Erox hpikunor ã harênh ma nẽ

axtem pôristi hkwyjê mã aně nhũm mẽ mra nẽ tee ri mẽ hagjênh xà kamã hapêr nom nhỹri omunh kêt nẽ. Hãmri nhũm Erox mẽ kot hamãr xwỳnhjê kamã gryk tỳx kumrẽx nẽ amnhĩ wỳr mẽ hã karõ nẽ mẽ kãm:

—Kwa nok? Mẽ ate hamãr rãhã ho akuhê hã ixte mẽ amã karõ htã nhũm tanhmã amnhĩ to nẽ akunok. Nà kot paj mẽ anhũmex ka mẽ rĩ amnhĩ pumu. Aně.

Hãmri nhũm mẽ tee ri kãm amnhĩ tã ãprãr kaprỳ nhũm mẽ hã amỳnê nhũm mẽ ho kator nẽ ma mẽ o mra nẽ mẽ himex. Hãmri nhũm pahi Erox Jutej rũm kato nẽ ma Se-jarej wỳr mõ nẽ hpãnhã kamã pa ho pa.

Pahi Erox tanhmã htyk to hã harênh

Wam Pêtre 1.24-25

²⁰ Krĩ pẽ Xir mẽ Sito wa kamã mẽ pa xwỳnhjaja na pre htem pahi Erox nhõ pyka hwỳr pa nẽ mẽ kęp amnhĩm apkur xà hã mẽõ japrôr o pa. Tã nhũm Erox kot mẽmoj mỳrapê mẽ kamã gryk jakamã nhũm mẽ tee ri mẽ kęp ujaprôr kaxyw mẽ hwỳr mra nom nhũm mẽ kãm mẽmoj kwỳ ho wênê hkêt nẽ. Hãmri nhũm mẽ tee ri amnhĩ kukamã hamaxpêr nẽ pahi Erox nhõ kôwenatô Pratôja wỳr mra nẽ kãm:

—E awỳr na pa mẽ mra. Kwa mẽ ixyr pẽ pahi Erox mã tanhmã akapêr to kê ama nẽ mẽ ixkamã gryk kêt nẽ. Pa mẽ axte mẽ awỳr mra nẽ mẽ apê mẽmoj kwỳ japrôr o ri ixpa. Aně.

²¹ Hāmri nhũm mẽ kuma nẽ hwỳr tẽ nẽ mẽ yr pẽ tanhmã kãm kapẽr to nhũm kuma hāmri nẽ kot tanhmã mẽ kãm kapẽr to kaxyw mẽ kãm arĩgro hta.

Tã nhũm ra kot arĩgro hyr xwỳnhta kato nhũm Erox kęp pahi hã ê mex jaxà nẽ tẽ nẽ kęp pahi hã mẽ hkrĩ xà kamã nhỹ nẽ tanhmã mẽ kãm kapẽr to.

²² Mẽ kãm kapẽr ryy nẽ. Hāmri nhũm mẽ kuma nẽ hêx rom kãm mex o mex ã harẽ. Nẽ kỳx pẽe axpẽn mã harẽ nẽ harẽnh o:

—Kwa pahi Erox kęp mẽ panhĩo hkết. Pẽr kaxkwa rũm Mẽpahpãm na pre mẽ pahwỳr wrỳ nẽ ã mẽ pamã kapẽr mex anẽ. Anẽ.

Hāmri nẽ te kęp Tĩrtũm pyràk o hipêx nẽ kãm mex o mex ã harẽ. Nom hêx rom ã harẽnh anẽ. Kot mẽ mar nẽ kãm mẽ hkĩnh nẽ akupỹm mẽ kãm mẽmoj to wẽnê hprãm xàj nhũm mẽ hêx rom ã axpẽn mã mex ã harẽnh anẽ.

²³ Hāmri nhũm mẽ kuma nhũm ja kãm mex nẽ nhũm hkĩnh nẽ mẽ mar o nhỹ nẽ kęp Tĩrtũm pyràk ã harẽnhja nẽ tanhmã mẽ kãm nẽ hkết nẽ. Jakamã nhũm tee ri amnhĩ tã omu nẽ hwỳr kapẽr o wrỳk xwỳnhjê hõ mẽ nhũm hwỳr wrỳ nẽ tanhmã ho nhũm ôhy kamã kutõj rax nẽ htyk tokyx anẽ.

Panãpe mẽ Sawti wa akupỹm ãxiok hwỳr mõi ã wa harẽnh

Atre 11.27-30

²⁴ Tã nhũm mẽ ra ohtô nẽ Tĩrtũm Kra Jejus kot tanhmã mẽ panê amnhĩ nhĩpêx to hã

harẽnh ma nẽ hkôt amnhĩ xunhwỳ.

²⁵ Hāmri nhũm Panãpe mẽ Sawti wa ra Kris kôt htõ nẽ htõxjê mã kàxporeta jamỳ nẽ ma Jerujarẽ hwỳr o mõi nẽ mẽ kãm kugõ. Hāmri nẽ ma akupỹm ãxiok hwỳr nojarêt nẽ war amnhĩ kôt Juãw Makre o mõi. Hāmri nẽ mẽ ma mõi nẽ akupỹm mẽ hwỳr põi.

13

Tĩrtũm kot Panãpe mẽ Sawti wa hyr

Atre 9.15-16; Rõmãn 1.1

¹ ãxiok kamã Kris kôt mẽ kot axpẽn to htõjaja kot Tĩrtũm nhỹ hã kapẽr o mẽ ahkre ho pa xwỳnhjê nhĩxi ã kot anhỹr. Na pre Panãpe nẽ Sawti nẽ Simeãw kà htykre nẽ Rusti pẽ Sirẽn nhõ xwỳnh nẽ pahi Erox kràmnhwỳ Mãnahēja.

² Jakamã nhũm prem mẽmo arĩgro hã axpẽn wỳr akuprõ nẽ Tĩrtũm mã mex o mex ã harẽnh kaxyw apkur kêt rãhã kãm amnhĩ jarẽnh o hkrĩ. Hāmri nhũm Tĩrtũm Karõ mẽ kãm tanhmã kapẽr o amnhĩrit to nẽ mẽ kãm:

—E kër ka mẽ Panãpe mẽ Sawti war ata nẽ wa kot inhmã tanhmã amnhĩ nhĩpêx to ho pa kaxyw wa ãm. Anẽ.

³ Hāmri nhũm mẽ kuma nẽ wa hyr kurê kumrêx nẽ wa himõk ã mẽ ìhkra jaxwỳ nẽ wa ho Tĩrtũm wỳ. Hāmri nẽ wa kot Tĩrtũm mã tanhmã amnhĩ nhĩpêx to ho pa kaxyw wa kumẽ nhũm wa ma mõi.

Wajaga kot Jejus nẽ hkràmnhwỳ kurê hã harẽnh
Atre 8.9-24

4-5 Tã nhũm Tirtũm Karõ krĩ pẽ Serêw wýr Panãpe mẽ Sawti wa kumẽ nhũm wa ma hwýr mõi. Nẽ amnhĩ kõt Juãw Makre ho mõi. Kot tanhmã wa ho ajuta hto ho wa hkõt pa kaxyw. Hãmri nẽ wa mẽ mõi nẽ Serêw wýr pøj nẽ pàr krem axà nẽ ma gõi hipòk pẽ Sipre hwýr mõi. Hãmri nẽ gõi hipòk ã krĩ pẽ Saramĩn wýr pøj nẽ Ijaew nhõ Tirtũm kapẽr o mẽ ahkre xà hã ixkre hwýr tẽ nẽ kamã Jesus kot mẽ panẽ tanhmã amnhĩ nhĩpêx to hã mẽ kãm harẽnh o wa xa.

6-8 Tã nhũm mẽ krĩja rũm kato nẽ hpãnhã gõi hipòk kõt mõi nẽ hatur xà kamã krĩ pẽ Papos wýr pøj. Hãmri nẽ kamã wajaga Pajesus pumu. Gresjẽ kapẽr kãm hixi pẽ Erĩm. Erĩm haxwýja kęp Ijaew. Na pre hte hêx rom te kęp Tirtũm nhỹ hã kapẽr jarẽnh o pa xwýnh pyrãk o amnhĩ nhĩpêx nẽ ma mẽ kãm ujarẽnh o ri mẽ hkõt pa. No ãm mẽ kãm amnhĩ to hêx o pa. Gõi hipòkja ã pahi Sejupaw hkrãmnhwý na pre. Pahi Sejupawja àhpumunh tỳx jakamã na pre Panãpe mẽ Sawti wa harẽnh ma nẽ kãm wa kapẽr mar prãm nẽ wa kot kãm Tirtũm kapẽr jarẽnh kaxyw amnhĩ wýr wa kuwý. Nom nhũm hkrãmnhwý wajaga Erĩmja kãm wa hkĩnh kêt nẽ wa nẽ kãm kapẽr kãm hihtỳx nẽ kãm:

—Kwa nà wa kapẽr mar kêt nẽ. Kot kaj war ama nẽ wa urãk nẽ amnhĩ kaxyw Jesus kõt ajamxpẽr nẽ hkõt amnhĩ xãm. Kwarĩ wa kapẽr mar kêt

nẽ. Anẽ.

⁹ Hãmri nhũm Sawti ra axtem pãnhã hixi. Ra hpãnhã kęp Pawre. Nhũm Tirtũm Karõ ra hkarõ mã àr jakamã nhũm ý hã wajagata pumu nẽ wa nẽ hkrãmnhwý mã kapẽr ã kãm akir nẽ kãm:

¹⁰ —Tk. Kwa pẽr apẽ Satanasti hkwy hã na ka ã wa inhnẽ kãm akapẽr anẽ. Na ka hte mẽmoj punuj pix kukamã ajamxpẽr nẽ mẽmoj mex nẽ mẽ no kupyrr o apa. Tirtũm kapẽr mex kumrẽx tã ka axtem nẽ nẽ mẽ hkurẽ ho ri apa.

¹¹ ã ate amnhĩ nhĩpêx anhýrja mýrapẽ koja Tirtũm tanhmã ato ka ano hkre nẽ arĩt kêt o atã apkati xohtõ nẽ kãm ga. Anẽ.

Hãmri nhũm no hkre kurẽ kumrẽx nẽ tee ri rĩt kaxyw no pikrar pýnh o xa nom mẽmoj pumunh kêt nẽ. Hãmri nẽ mẽhõ kot hpa hã hpyr nẽ òrkwý hwýr ho mõi kaxyw ri amnhĩ pu hã mẽ hapêr pẽnh o xa.

¹² Hãmri nhũm hkrãmnhwý pahihtija tee ri ja hã omu nẽ amnhĩ kaxyw Jesus kõt hamaxpẽr nẽ hkõt amnhĩ xãm kurẽ kumrẽx. Hãmri nẽ Pawre mẽ Panãpe wa kot tanhmã Tirtũm kapẽr jarẽnh to hã wa kuma nẽ hamaxpẽr o:

—Hêxta waa nẽ. Aa ixte ã mẽhõ kapẽr kot anhýr mar kêt tã pa jarãhã kuma. Nà ãm hãmri na Jesus jarẽnhja. Anẽ.

Pawre mẽ Panãpe ãxiok ò hwýr wa mõi ã wa harẽnh

Atre 15.38

¹³ Tã nhũm Pawre mẽ Panãpe mẽ Juãw Makre wa

mě krī pê Papos rûm kato nê hpânhã ma pyka hõ hwÿr mō. Pâr kãm ma pyka pê Pâpir wÿr mō nê kamã krī pê Perke hwÿr pōj. Hãmri nhũm Juãw Makre tanhmã hamaxpêr to nê tee ri axte wa hkôt mōr kukamã hamaxpêr hãmri nê wa hkaga nê awjanã nê ma akupÿm Jerujarê hwÿr ahte mō.

¹⁴ Jakamã nhũm Pawre mẽ Panãpe wa ahte Perke rûm kato nê hamũ pika pê Pisit kãm krī pê äxiok wÿr mō nê hwÿr pōj. Nhũm Ijaew nhõ arïgromnu pê sap kato nhũm wa Tirtûm kapêr o mẽ ahkre xà hã ixkre hwÿr wa tẽ nê hwÿr axà nê nhÿ.

¹⁵ Hãmri nhũm mēhõ mẽ kãm Tirtûm kapêr ã kagà htũm kwÿ kamã harênh o xa. Mojes mẽ Tirtûm nhÿ hã kapêr o mẽ pa xwÿnh kot kapêr ã kagà hkwy kamã nhũm mẽ kãm kamã harênh o xa. Hãmri nê kamã harênh pa nhũm mẽ ahkre xwÿnhjaja Pawreja wa omu nê wa hwÿr mēhõ mẽ nhũm wa hwÿr tẽ nê wa kãm:

—E na mẽ ijahkre xwÿnhjaja war ate mẽ inhmã axujarênh prãm nê mãmri mẽ inhmã mēmoj jarênh kaxyw nhũm mẽ war atã anê. Anê.

¹⁶ Hãmri nhũm wa kuma nhũm Pawre kãnhmã xa nê mẽ hpinhkrênh kaxyw mẽ kãm kãnhmã ïhkra nhũm mẽ omu nê hpinhkrênh pa nhũm mẽ kãm awjarê. Amnhĩ kwÿ pê Ijaewjê mẽ mẽ kêp Ijaew kêt xwÿnhjê kãm Tirtûm kïnh xwÿnhjê mã nhũm mẽ kãm awjarê. Nê mẽ kãm kapêr

ryy nê. Tirtûm kot tanhmã mẽ hkukamã Ijaew nhīgêt nê pãmjê nhīpêx to hã mẽ kãm awjarê nê mẽ kãm:

—E kot paj mẽ amã awjarê ka mẽ inhma.

¹⁷ Nã mẽ ixpê Ijaew nhõ Tirtûmja amnepêm na pre mẽ ixpê Ijaew pãmjê rê. Kormã Ejit kãm mẽ pa ri nhũm amnhĩ kaxyw mẽ kurê nê mẽ ho ohtô rax kumrêx. Hãmri nê mẽ kaxyw hihtÿx jakamã Ejit rûm mẽ kator pa.

¹⁸ Hãmri nê mẽ ho mex ryy ho mẽ hkôt pa. Mẽ kot kapôt ã ri pa hã amgrà pê 40 kamã mẽ kot htÿx ri tanhmã amnhĩ nhīpêx to ho pa htã nhũm mẽ kamã ukapri ryy ho mẽ hkôt pa.

¹⁹⁻²⁰ Na pre mẽ kãm pyka pê Kanaã kamã mẽ pa xwÿnhjê nhīmex pa. Kanaã kamã mẽ pa xwÿnhjaja ahpÿnhã axpên kaxyw mẽo krī pê 7ja nhũm mẽ kãm mẽ ho hapêx pa. Hãmri nê hpânhã mẽ inhīgêtjê mã pykaja o hpigrãnh pa. Mẽ ixpê Ijaew nhīgêtjê mã ho hpigrãnh pa nhũm mẽ kamã pa hã amgrà xohtô nê. Hã amgrà pê 450. Tã nhũm Tirtûm hpânhã mẽ kãm juisti hkwy rê nê mẽ kaxyw mẽ unhwÿ nhũm mẽ ho pa. Tã nhũm hpânhã Sãmuew mẽ ho amnhĩptã nê mẽ o pa. Kêp Tirtûm nhÿ hã kapêr jarênh o pa xwÿnhjê hõ nhũm Tirtûm mẽ kaxyw ãm.

²¹ —Tã nhũm mẽ ixpãmjaja axpên ma nê ra te krī hkwy kamã mẽ urak nê mẽo pahi kot Sãmuew pãnhã mẽ ho amnhĩptar o pa hprãm xaj

amnhĩ to Tĩrtũm wỳ nẽ kãm:
 “Pa Tĩrtũm. Kwa mẽ ixkaxyw
 pahĩ hõ xãm kê mẽ ixto
 amnhĩptàr o pa nà. Ja na mẽ
 inhmã hprãm tỳx kumrẽx.”

—Anhỹr o amnhĩ to hwỳr
 jakamã nhũm mẽ kuma nẽ
 mẽ kaxyw Sawti xãm. Kisti
 hkra na pre. Nẽ mẽ inhĩgêt
 Pẽjamĩ kanrẽhã htàmnhwỳ na
 pre. Hãmri nhũm Tĩrtũm mẽ
 kaxyw ãm nhũm kêp mẽõ
 pahĩ nẽ mẽ ho amnhĩptàr o pa
 hã amgrà pẽ 40.

²² Tã nhũm Tĩrtũm kator nẽ
 hpãnhã mẽ kaxyw Tawi xãm.
 Hãmri nẽ harẽnh o: “Nà Jese
 hkra Tawija na hte inhmã
 hprãm xà hkõt amnhĩ nhĩpẽx
 mex o pa.” Anẽ.

²³ —Tã Jejus kêp Tawi
 hkanrẽhã htàmnhwỳ na pre.
 Kukamã na pre Tĩrtũm mẽ
 ixpẽ Ijaew nhĩgêtjẽ mã harẽ
 nẽ harẽnh o: “Koja nhỹrmã
 Tawi hkanrẽhã htàmnhwỳjẽ
 hõ mẽ ate amnhĩ tomnuj pẽ
 mẽ apytã.” Anhỹr o hkukamã
 mẽ kãm harẽ.

²⁴ No nhũm kormã Jejus kot
 mẽ ixpẽ Ijaewjẽ mã amnhĩ
 to amnhĩrĩt kêt ri nhũm
 Juãw Paxis kumrẽx hkukamã
 mẽ ixwỳr mõ nẽ mẽ inhmã
 Tĩrtũm kapẽr jarẽnh o ri mẽ
 ixkõt pa. Nẽ mẽ ixte amnhĩ
 tomnuj kaga nẽ hpãnhã tãm
 amnhĩ nhĩpẽx o ixpa hã
 mẽ ixpumunh kõt mẽ ixkrã
 kumrãr ã mẽ inhmã karõ ho
 pa.

²⁵ —Tã mẽ kãm kapẽr o pa
 ryy nẽ ra hatur xãm mẽn
 kaxyw nẽ amnhĩ tã tanhmã
 mẽ inhmã kapẽr to nẽ mẽ
 inhmã: “Na ka mẽ ixpumu nẽ

atỳx Tĩrtũm kot mẽ akaxyw
 pa ixãm ã ixkamnhĩx nom pa
 hkêt. Kot mẽ pakaxyw ãm mã
 xwỳnhhta kukamã na pa pre
 mõ. Tãm kot amnhĩ to rax
 o ijakrenh. Nẽ kot amnhĩ to
 mex o kot ijakrenh. Jakamã
 na pa hte ãm kukwak ri ixpa
 nẽ amnhĩ tã hã ixpijaàm o
 ixpa.” Anẽ.

—Na pre ã Juãw Paxisja mẽ
 inhmã Jejus jarẽnh anhỹr o
 pa.

²⁶ —Tã kwa mẽ inhma
 mẽ apẽ Apraãw kanrẽhã
 htàmnhwỳjaja nẽ mẽ apẽ
 Ijaew kêt xwỳnh kãm Tĩrtũm
 kĩnh xwỳnhjaja. E mẽ apiitã
 ixkapẽr ma nẽ kãm aja-
 maxpẽr tỳx rãhã ho ri apa.
 Nà mẽ pahpiitã mẽ pakaxyw
 na Tĩrtũm kapẽrja. Kot mẽ
 pahte amnhĩ tomnuj pẽ mẽ
 papytãr ã amnhĩ jarẽnhja mẽ
 ixpẽ Ijaew pix kaxyw kêt. Mẽ
 pahpiitã mẽ pakaxyw na. Mẽ
 pahpiitã mẽ pahte ja mar
 nẽ hkõt amnhĩ nhĩpẽxja na
 Tĩrtũm kãm hprãm.

²⁷ Nom Jerujarẽ nhõ
 xwỳnhjẽ mẽ mẽ àptãr
 tũmrejaja na prem Jejus kêp
 Tĩrtũm kot mẽ pakaxyw ãm
 xwỳnh ã harẽnh mar tã hkõt
 hamaxpẽr kêt nẽ. Na pre
 htem mẽ inhõ arĩgromnu pẽ
 sap ã akuprõ nẽ axpẽn mã
 Tĩrtũm kapẽr ã kagã htũm
 kamã ujarẽnh o hkrĩ. Kagàja
 kamã Tĩrtũm nhỹ hã mẽ
 kapẽr o mẽ pa xwỳnhjaja
 kot hprĩ hã Jejus jarẽnh
 nẽ hã kagã nhũm mẽ kot
 mar tã hprĩ hã mar tỳx
 kêt nẽ. Jakamã na prem
 axtem nẽ mẽ kãm hã amỹnẽ.

Tĩrtũm nhỹ hã kapêr jarênh xwýnhjaja kot mẽ hkukamã mẽ harênh xàja kôt nhũm mẽ kot hpĩr kaxyw mẽ kãm hã amỹnê.

28-29 Kot tanhmã amnhĩ tomnuj to hkêt tã nhũm mẽ amarĩ hã pahi Pirat wỳ. Kot mẽ kãm hã àmnênh nhũm õ pòristijaja kot hpĩr kaxyw nhũm mẽ hã kuwỳ nhũm mẽ kãm kupĩ. Ra Tĩrtũm kapêr ã kagà htũm kot mẽ hkukamã mẽ harênh xà hkôt. Hãmri nhũm mẽ kot hkôt pa ho pa xwýnhjaja pĩ kahpa nê ho wrỳ nê ma o tẽ nê kẽn kre kamã haxã.

³⁰ Tã nhũm Tĩrtũm akupỹm ho htĩr

³¹ nhũm xatã hkôt mẽ pa ho pa xwýnhjê hwỳr hapôj. Kormã htyk kêt ri ra Garirej rũm Jerujarê hwỳr hkôt mẽ pa ho mẽ pa xwýnhjê hwỳr xatã mẽ hwỳr hapôx o pa. Jao hã arĩgro xohtô nê nhũm prem piitã omu. Tã mẽ tãmjaja na htem mẽ ixpê Ijaew mã harênh o pa.

32-33 —Amnepê m Tĩrtũm na pre mẽ ixpê Ijaew nhĩgêjtê mã tanhmã Kra Jejus jarênh to. Kormã mẽ pahwỳr wrỳk kêt ri tanhmã mẽ kãm harênh to. Jakamã ra kot hkukamã harênh xà hkôt nhũm pre mẽ pahwỳr wrỳ nê tanhmã mẽ panê amnhĩ nhĩpêx to. Tã mẽ ate harênh mar kaxyw na pa wa man mẽ awỳr mỗ. Amnepê m finat Tawi na pre Tĩrtũm kapêr kwỳ hã kagà. Tĩrtũm mex ã mẽ grer xà pê Sam 2ja kamã hã kagà. Te Tĩrtũm tãm Jejus mã kapêr

pyrãk o hã kagà nê hã kagà ho:

Apê Ixkra na ka.

Tã mẽ piitã mẽ kot apê Ixkra hã apumunh kurê kumrêx kaxyw na pa jarãhã mẽ kãm ato amnhĩrĩt. Anê.

Nhũm pre ã Tĩrtũm Jejus mã kapêr anê nhũm Tawi ô ri mẽ pamã hã kagà.

³⁴ —Amnepê m na pre Tĩrtũm tanhmã Kra Jejus kukamã harênh to. Mẽ kot hpĩr nhũm kot akupỹm ho htĩr kukamã hã amnhĩ jarê. ĩ hkro pymaj kot mẽ htykjê pê hkaxãr nê akupỹm ho htĩr ã nhũm hkukamã hã amnhĩ jarê. Te Kraja mã amnhĩ jarênh pyrã nê amnhĩ jarênh o:

E kot paj ato mex rax nê. Ixte Tawi mã amnhĩ jarênh xà hkôt.

Anhỹr o hkukamã harênh xà hkôt akupỹm ho htĩr nhũm axte htyk kêt ã harê.

³⁵ —Nê kagàja nhãm hô hõ kot tanhmã Jejus jarênh kute. Te Jejus tãm Tĩrtũm mã kapêr pyrã nê harênh o:

Ixpê Akra hã ixte akapêr kôt ri amnhĩ nhĩpêx rãhã ho ixpa jakamã kot kaj ixpumunh mex pa inhĩ hkro hkêt nê. Anê.

Tĩrtũm kapêr ã kagà htũm kot ã Jejus jarênh kot anhỹr.

³⁶ Nom ã Tawi jarênh anhỹr kêt nê. Tawi na pre Tĩrtũm kapêr kôt amnhĩ nhĩpêx mex o pa hãmri nê ty nhũm prem mẽ panhĩgêjtê nhĩhkô hã haxã hãmri nhũm ĩ hkro nê hapêx.

37 —Tā no Jejusja Tirtūm kot akupŷm ho htīr jakamā nhūm Tawī pyrān ī hkro nē hapêx kêt nē.

38 —E mē inhmar tŷx nē ixkwŷjaja. Kra Jejus pix kukwak na hte Tirtūm amnhī katut kôt mē pahte amnhī tomnuj rē.

39 Jakamā kot kaj mē ām Mojes kapēr kôt pix mā ri amnhī nhīpêx nhūm Tirtūm tee ri ja hā mē apumu nē amnhī katut kôt mē ate amnhī tomnuj rēnh kêt nē. Jejusja tapxipix na pre htyk o Tirtūm mā mē pahte amnhī tomnuj piitā hpānhā amnhīrer pa.

40-41 Amnepēm na pre Tirtūm kapēr nhŷ hā kapēr xwŷnhjê hōja mē kām Tirtūm kapēr jarē nē hā kagà. Te Tirtūm tām mē kot kapēr ā hpēr o pikēnh xwŷnhjê mā kapēr pyrā nē mē kām:

E kot paj aa mē ate mēmoj pumunh kêt ō ho anē.

Nhūm mēhō mē amā harē ka mē harēnh ma nē ām ama.

Nhūm mē kot omunh mex xwŷnhjê hō kot hprī hā mē amā harēnh tā ka mē ām ama nē hkôt ajamaxpēr kêt nē.

Hāmri nē tee ri tanhmā kām ajamaxpēr to ho ri apa. Anē.

Ā Tirtūm mē kām kapēr anhŷr jakamā kwa mē o kora. Apu mē kajaja na pre ā mē ajarēnh anē rŷ ko. Anē.

42 Nhūm pre ā Pawre mē kām ujarēnh ryy anē. Hāmri nē Panāpe mē wa ixkreta rūm kator kaxyw nhūm mē kot

mar o hkrī xwŷnhjaja tee ri ma wa mōr ā wa omu nē ma wa hkôt mra nē wa kām:

—Kwa war axujarēnhja na mex kumrêx. Mē inhmā axte mar prām. Xà koja axte sap kato ka wa akupŷn mē ixwŷr wa tē nē axte mē inhmā awjarē? Anē.

Hāmri nhūm wa mē kām:

—Tōe. Nà kot paj war anē. Anē.

43 Hāmri nē wa ma tē nhūm mē hkŷŷja ma wa hkôt mra. Ijaew kwŷjaja nē Ijaew kêt xwŷnh kām Tirtūm kīnh xwŷnhjaja nhūm mē ma wa hkôt mra. Hāmri nhūm wa pry hā mē kām kapēr o mō. Tirtūm kot mē kutā nojarēt rāhā ho pa nhūm mē kot amnhī tā omunh nē hkôt amnhī nhīpêx tŷx rāhā ho pa nē hkaga hkêt ā mē kām kapēr o mō.

44 Tā nhūm axte sap nhūm krī nhō xwŷnh piitā axte Tirtūm kapēr mar kaxyw ixkre wŷr akuprō. Ijaewjaja nē Ijaew kêt xwŷnhjaja.

45 Hāmri nhūm Ijaew kwŷjaja tee ri mē amnhī wŷr Ijaew kêt xwŷnhjê pumu nē mē hā Pawre mē Panāpe wa kamā gryk nē. Mē kām Ijaew kêt xwŷnhjaja kot Tirtūm kapēr mar prām kêt jakamā mē hā wa kamā gryk nē. Hāmri nē Pawre kapēr ma nē xatā kām kapēr punuj nē kām:

—Tk. Kwa na ka Tirtūm kapēr jarēnh o axêx. Ja kot anhŷr kêt. Anē.

46 Nom nhūm wa kām mē uma hkêt nē. Wa ām Tirtūm Karō nhŷ hā amnhī to htŷx nē wa mē kām kapēr. Nē amnhī

tã tanhmã mẽ kãm kapër to nẽ mẽ kãm:

—Nà wa ixpyrà nẽ mẽ apê Ijaew jakamã na pa mẽ akumrëxjê mã Tirtüm kot mẽ pakaxyw Jejus xãm ã harẽ. Tã ka mẽ ama nẽ ãm ama nẽ te mẽ ate hkaga pyrà nẽ ã wa inhmã akapër anẽ nẽ wa ixte kapër o ixêx ã wa ijarẽ. Për ãm mẽ ate mẽ amã Tirtüm mẽ Kra wa kuri mẽ atır tùm nẽ mẽ apa hprãm kêt. Jakamã kot paj wa mẽ apê ixkato nẽ hpãnhã ma Ijaew kêt xwýnhjê mã Jejus kapër jarënh o ri mẽ hkôt ixpa.

⁴⁷ Tirtüm kapër ã kagà htüm ã kot mẽ ixte amnhĩ nhĩpêx anhÿrja kukamã mẽ ijarẽ nẽ mẽ ijarënh o:

Mẽ ate Ijaew kêt xwýnhjê mã ixkapër jarënh o ri apa kaxyw na pa pre mẽ kaxyw mẽ arê.

Jakamã koja pyka piitã hkôt mẽ pa xwýnhjaja ohtô nẽ mẽ akapër ma nẽ ixkra hkôt amnhĩ xunhwÿ.

Koja mẽ ã amnhĩ nhĩpêx anẽ pa ja hã mẽ omu nẽ mẽ ho ixkra. Anẽ.

Tirtüm kot ã ja kukamã mẽ ijarënh anhÿr jakamã kot paj wa mẽ apê ixkato nẽ mẽ apãnhã ma Ijaew kêt xwýnhjê mã Tirtüm kapër jarënh o ri mẽ hkôt ixpa. Anẽ.

⁴⁸ Hãmri nhùm Ijaew kêt xwýnhjaja amnhĩ tã wa kapërja ma nẽ hkĩnh nẽ Tirtüm kapër mex o mex ã harẽ. Hãmri nhùm ra Tirtüm kot nhÿrmã amnhĩ ri mẽ htır tùm nẽ mẽ pa ho mẽ pa kaxyw mẽ rënh xwýnhjaja

amnhĩ kaxyw Pahшти Jejus kôt hamaxpër nẽ hkôt amnhĩ xunhwÿ.

⁴⁹ Tã nhùm pika pê ãxiok kamã mẽ piitã Tirtüm kapër jarënh ma.

⁵⁰ Nom nhùm Ijaew xàptàr tùmrejaja kãm Pawre mẽ Panãpe wa hkĩnh kêt jakamã na prem krĩ hkôt mẽ kot amnhĩ to rũnh xwýnhjê mã wa ho kapër punuj o pa. Mẽ õ pahi mẽ mēni kot amnhĩ to rũnh xwýnhjaja nhùm mẽ kãm tanhmã wa ho kapër to nhùm mẽ kuma nẽ mẽ hkôt hamaxpër. Mēnijaja kãm Tirtüm prãm tã amnhĩ kaxyw Jejus kôt hamaxpër kêt jakamã tanhmã mẽ kot Pawre mẽ Panãpe wa ho hêx toja ma nẽ hkôt hamaxpër nẽ wa kamã gryk nẽ. Jakamã nhùm mẽ ohtô nẽ tanhmã wa hipêx to nẽ amnhĩ nê wa hano.

⁵¹ Hãmri nhùm wa mẽ kêp kato nẽ xa nẽ mẽ kot Tirtüm kapër kaga hã amnhĩ pumunh kaxyw mẽ noo mã wa hparkà kapa nẽ nẽ awjagrô kapĩ nẽ ma wa tẽ. Hãmri nẽ ma krĩ pê Ikõn wÿr hpãnhã wa mõ.

⁵² Hãmri nhùm ãxiok kamã mẽ kot Jejus kôt amnhĩ xunhwÿr xwýnhjaja hkĩnh nẽ ri pa. Tirtüm Karõ kot mẽ hkarõ mã gjêx jakamã nhùm mẽ hkĩnh nẽ ri pa ho pa.

14

Pawre mẽ Panãpe wa kot Ikõn wÿr mör ã wa harënh Matêwre 10.34-35

¹ Hāmri nhūm Pawre mẽ Panāpeja wa āxiok rūm kato nē hpānhā ma krī pē Ikōn wỳr wa mō. Hāmri nē hwỳr pōj nē Ijaew nhō Tirtūm kapēr o mẽ ahkre xà hā ixkre hwỳr wa tē nē kamā mẽ kām Jejus jarēnh o nhỹ. Mẽ kām harēnh kām hihtỳx jakamā nhūm mẽ hkwyjaja wa kuma nē amnhĩ kaxyw hkôt hamaxpēr nē hkôt amnhĩ xunhwỳ. Ijaew kwỳjaja nē mẽ kēp Ijaew kêt xwỳnh kwỳjaja nhūm mẽ ohtō nē Jejus kôt amnhĩ xunhwỳ.

² Tã nhūm mẽ hkwyjaja kām Jejus jarēnh mar prām kêt nē. Hāmri nē kato nē ma Ijaew kêt xwỳnh kwỳjê hwỳr mra nē tanhmā mẽ kām Pawre mẽ Panāpe wa ho hêx to nē wa ho kapēr punuj nē nhūm mẽ mar xà hkôt wa kamā gryk nē.

³ Nom nhūm wa tokyx kator nē ma mōr kêt nē arĩ Tirtūm Karō nhỹ hā amnhĩ to htỳx nē mẽ kām Tirtūm kapēr jarēnh o ri mẽ hkôt pa. Nē kēp mẽ kutā nojarêt xwỳnh ã harēnh o pa. Nē ý hā mẽ kām aa mẽ kot mẽmoj pumunh kêt kwỳ ho anhỹr o ri mẽ hkôt pa. Jakamā nhūm mẽ hkwyjaja ja hā wa omu nē wa kapēr ma nē hamaxpēr o:

—Kwa ãm hāmri na wa Tirtūm kēp mẽ pakamā ukaprĩ xwỳnh ã harē. Pēr ý hā wa kot ã amnhĩ nhĩpêx anhỹr o pa kēnā. Anē.

⁴ Hāmri nhūm Ijaew kêt xwỳnh kwỳjaja wa hkôt hamaxpēr nē wa hkôt amnhĩ xunhwỳ. No nhūm mẽ hkwyjaja wa hkôt hamaxpēr kêt nē. Ra mẽ kot Ijaew

kwỳ kot tanhmā wa ho kapēr punuj toja ma nē mẽ hkôt hamaxpēr jakamā nhūm krĩ nhō xwỳnhjaja axpēn kwỳm ri tanhmā wa hkôt hamaxpēr to ho pa. Jao axpēn kwỳm ri wa hkôt hamaxpēr o pa.

⁵ Tã nhūm wa hkôt hamaxpēr kêt xwỳnhjaja axpēn wỳr akuprō nē wa hā amỹnē. Ijaew kwỳjaja nē Ijaew kêt xwỳnh kwỳjaja nē mẽ õ pahijaja nhūm mẽ kot kēn o wa htak o wa hpĩr kaxyw wa hā amỹnē.

⁶ Hāmri nhūm wa amnhĩ tã ama nē mẽ kēp kato nē hpānhā ma pika hō hwỳr mō. Ma Rikōn kām krĩ hkwy hwỳr hpānhā mō. Risti wỳr nē Tepe wỳr nē pu hā krĩ hkwy hwỳr wa mō.

⁷ Wa mō nē pōj nē ma mẽ kām Jejus kot tanhmā mẽ panē amnhĩ nhĩpêx to hā harēnh o ri mẽ hkôt pa.

Te grà xwỳnh jarēnh

Atre 3.1-10

⁸ Nhūm Risti kamā mẽhō my hte grà nē hkrĩ xwỳnhja. Katorxà nhōxà kre rūm hte grà nē kator jakamā ri pa hkêt nē arĩ hkrĩ xà kamā hkrĩ ho hkrĩ.

⁹ Jakamā nhūm Pawre mẽ kām ujarēnh o xa nhūm kuri mar o nhỹ. Hāmri nē hamaxpēr o:

—Nà pēr Tirtūm àhpumunh o àhpumunh. Mãn kot ixto mex kaxyw àhpumunh tỳx. Nà koja ixto mex. Anē.

Hāmri nhūm Pawre ã hamaxpēr anhỹr ã omu

¹⁰ nē kàx pē kām kapēr nē kām:

—E kwa kànhmā xa. Anē.

Hāmri nhũm kuma nẽ kànhmã âm kurê kumrêx nẽ ri mra. Nẽ amnhĩ te kamã hamak o ri mra nẽ hkĩnh tỳx kumrêx.

¹¹ Hāmri nhũm kuri mẽ kuhê xwỳnhjaja Pawre kot ã hipêx anhỹrja ã omu nẽ htỳx wa kêp kaxkwa kamã mẽhpãm ã wa hkamnhĩx nẽ hkĩnh nẽ axpẽn mã:

—Kwa pẽr mẽpahpãm na wa. Mẽpahpãm Jupti mẽ Měkurtija na wa panhĩ hã amnhĩ jahkre nẽ mẽ pahwỳr wrỳ. Nã âm hāmri na wa mẽ pahwỳr wrỳ. Anẽ.

Nom mẽ kapêr pê Rikaôn o axpẽn mã kapêr jakamã nhũm Pawre mẽ Panãpe wa mẽ mar kêt nẽ. Wa kot mẽ kapêr mar kêt jakamã ã mẽ kot wa harênh anhỹrja mar kêt nẽ htỳx wa xa.

¹² Nhũm mẽ ã wa kêp mẽhpãm ã wa harênh anẽ nẽ hkĩnh tỳx nẽ. Panãpeja nhũm prem kêp mẽ hpãm Jupti hã hkamnhĩx no Pawreja nhũm prem kêp mẽhpãm Měkurti hã hkamnhĩx. Pawreja Měkurti pyrã nẽ kapêr japjê rũnh jakamã nhũm mẽ kêp hã hkamnhĩx.

¹³ Na prem krĩ htã mẽhpãm Juptija mã amnhĩ jarênh xà hã ixkre nhĩpêx nẽ hkarõ nhĩpêx. Hāmri nẽ hwỳr akuprõ nẽ kãm mex o mex ã harê nẽ amnhĩ to hwỳr o pa. Jakamã nhũm Jupti nhõ patrejaja Pawre mẽ Panãpe wa kêp mẽhpãm ã wa harênh ma hāmri nẽ wa hã hkwỳjê mã kãm:

—Kwa pu mẽ wa kãm môx kwỳ hpa nẽ pixôrã hkwỳ rê.

Hāmri nẽ wa kãm wa mex o wa mex ã wa harê nẽ wa kêp mẽpahpãm ã amnhĩ to wa kuwỳ. Wa kêp mẽpahpãm kênã. Anẽ.

Hāmri nẽ ra ã wa hipêx anhỹr kaxyw

¹⁴ nhũm wa tee ri mẽ kot amnhĩ nhĩpêx ã mẽ omu nhũm ja wa kêp omnuj tỳx nẽ. Jakamã nhũm wa amnhĩ pẽ hinôkà kaxônh pa nẽ mẽ kutã hprôt nẽ ã mẽ kot wa hipêx anhỹrja nẽ mẽ kãm kapêr kãm hihtỳx nẽ.

¹⁵ Nẽ mẽ kãm:

—Kwa mẽ ri ã wa inhĩpêx anhỹr kêt nẽ. Wa ixpê mẽapãm kêt kênã kot ka kêt mẽ ã wa inhĩpêx anẽ. Nom mẽapãmja na ka htem âm amnhĩ to hwỳr kaprỳ nẽ kãm mex o mex ã harênh kaprỳ o ri apa. Tã mẽ ate ã amnhĩ nhĩpêx anhỹr kaga nẽ hpãnhã Tĩrtũm kôt amnhĩ xunhwỳr nẽ amnhĩ to pix wỳr o apa kaxyw na pa pre wa mẽ awỳr mỗ nẽ pøj. Tĩrtũmja mẽ ate mẽ apãm jarênhhta rom htĩr o htĩr. Na pre mẽmoj piitã ho kato. Kaxkwa ho kato nẽ pyka ho kato nẽ gô xujanãr o kato. Nẽ kamã ri mẽmoj piitã ho kator pa.

¹⁶ —Amnepêm mẽ pa xwỳnhjaja na pre htem amnhĩ krã hkôt pix mã tanhmã ri amnhĩ nhĩpêx to ho pa nhũm Tĩrtũm ja hã mẽ omu nẽ âm mẽ omu nẽ tanhmã mẽ ho hkêt nẽ.

¹⁷ Mẽ pahte amnhĩ tã omunh kaxyw na hte amarĩ tanhmã mẽ pahto mex to ho pa. Na hte mẽ pahwỳr na rê nhũm mẽ pahpur go mex

ně. Nhũm mẽ pamã tanhmã mẽ pahpur kãm mẽmo hyja to nhũm ra mẽ pamã ô rũnh nẽ. Pu htem hamỳ nẽ ho paxàpkur mex nẽ pahkĩnh nẽ ri papa. Tĩrtũm pix kukwak ri na pu htem ã amnhĩ nhĩpêx anhỹr o ri papa. Anẽ.

18 Nhũm pre ã Pawre mẽ kot wa kãm mỗx parja nẽ mẽ kãm kapêr kãm hihtỳx anẽ. No nhũm mẽ kuma nẽ ãm kuma nẽ wa kãm mry hkwy hpar kaxyw wa hã hihtỳx nẽ. Jakamã kritpêm nhỹx prem wa kãm hkwy pa. Tã tanhmã hamaxpêr to nẽ hkaga nẽ wa kãm hpar kêt nẽ.

Mẽ kot Pawre pĩr ã àmnênh ã mẽ harênh

Sikũn Ximotre 3.10-11

19 Tã nhũm Ijaew kwỳjaja mẽ hwỳr mran pỏj. Krĩ pẽ ãxiok mẽ Ikõn rũm ma mẽ hwỳr mran pỏj nẽ mẽ kãm Pawre ho hêx o mẽ hkôt pa nhũm mẽ kuma nẽ axtem nẽ Pawre kamã gryk kato. Hãmri nẽ mẽ kot hpĩr kaxyw kẽn runh kwỳ jamỳ nẽ ho htak prêprêk o kuhê. Hãmri nhũm amnhĩ xà htỳx kamã ama nẽ tẽm nẽ akryk nõ nhũm mẽ omu nẽ htỳx ho ra htyk ã hkamnhĩx. Hãmri nẽ hwỳr tẽ nẽ hpa hã kupy nẽ ma hkjênh o mỗ nẽ krĩ pum kumẽ nẽ ma akupỹm mra.

20 Hãmri nhũm Jejus kôt mẽ kot axpẽn to htỏjaja tee ri ã mẽ kot hipêx anhỹr ã omu nẽ hkaprĩ htỳx nẽ hwỳr hprỏt nẽ omu nẽ mỳr o kuhê. Hãmri nhũm te htyk pyrà nẽ nõr tã Jejus nhỹ hã akupỹm hihtỳx

mex nẽ kànhmã nhỹ hãmri nẽ ma akupỹm mẽ hkôt krĩm tẽ.

Tã nhũm apkati nhũm Panãpe mẽ wa krĩja rũm kato nẽ ma wa mỗ. Pãnhã ma krĩ pẽ Tepe hwỳr wa mỗ.

Pawre mẽ Panãpe akupỹm ãxiok wỳr wa mỗr ã wa harênh

21-22 Tã nhũm wa ma Tepe hwỳr mỗ nẽ pỏj. Hãmri nẽ kamã mẽ kãm Jejus tanhmã kot mẽ panê amnhĩ nhĩpêx to hã harênh o ri mẽ hkôt wa pa nhũm mẽ wa kuma nẽ ohtỏ nẽ Jejus kôt amnhĩ xunhwỳ.

Tã nhũm wa kato nẽ awjanã nẽ ma akupỹm pika pẽ Pisit wỳr wa mỗ. Nẽ kamã krĩ hkwy hkôt ri ra mẽ kot Jejus kôt amnhĩ xunhwỳr xwỳnhjê jahkre ho ri mẽ hkôt pa. Krĩ pẽ Risti nẽ Ikõn nẽ ãxiokja kôt. Nẽ mẽ ahkre kamã Jejus kôt mẽ ho mẽ hihtỳx o wa pa nẽ mẽ kãm:

—E ra mẽ ate Jejus kôt amnhĩ xunhwỳr jakamã koja mẽ kãm Jejus kurê xwỳnhjaja tee ri ja hã mẽ apumu nẽ hã tanhmã mẽ anhĩpêx to. Tã kêt ka mẽ ãm amnhĩ tã mẽ omu nẽ ãm mẽ omu nẽ Jejus kaga hkêt nẽ. Nẽ arĩ hkôt amnhĩ nhĩpêx mex o ri apa rãhã nhỹrmã ma ô krĩ hwỳr api nẽ Tĩrtũm wa kuri amex kumrêx nẽ atĩr tũm nẽ apa ho apa. Anẽ.

23 Hãmri nẽ ahpỹnhã krĩ piitã hkôt ri mẽ kot pastỏ nhỹ hã mẽ ahkre kaxyw mẽ hkwyjê rê nẽ mẽ kaxyw mẽ unhwỳ nẽ mẽ ho Tĩrtũm wỳ. àpkur kêt rãhã mẽ ho kuwỳ nẽ kãm:

—Pa Tirtûm? E jajê pumu. Mě kot krî ja kamã pastô nhỹ hã akrajê jahkre ho pa kaxyw na pa wa mẽ unhwý. Jakamã e kêr ka mẽ kutã anojarêt rãhã ho ri mẽ hkôt apa. Anê.

Hãmri nê wa mẽ kêp kato nê ma hpãnhã nhỹhỹm wa mẽ.

²⁴Pyka pê Pisit kamã mẽ nê hpãnhã nhãm pyka pê Pãpir kôt mẽ. Wa ma mẽ kãm tanhmã Jesus kapêr jarênh to ho mẽ hkôt mẽ.

²⁵Hãmri nê krî pê Perke hwýr wa pøj nê kamã mẽ kãm Jesus kot tanhmã amnhĩ nhĩpêx to hã harê hãmri nê mẽ kurûm kato nê axte mẽ. Pãnhã ma krî pê Atari hwýr wa mẽ.

²⁶Hãmri nê hwýr pøj nê hpãnhã kurûm akupỹm ãxiok wýr wa mẽ. Pàr rax kãm ma akupỹm mẽ. ãxiokja kamã na pre wa nojarêt nhũm Jesus kôt wa htõ nê wa htõxjaja wa ho Tirtûm wý nê ma krî hkwy hwýr wa kumê. Wa kot ma mẽ hkôt tanhmã Jesus kot mẽ panê amnhĩ nhĩpêx to hã harênh o wa pa kaxyw wa kumê. Jakamã nhũm wa ra ja ho anhýr pa nê akupỹm mẽ hwýr wa mẽ.

²⁷Hãmri nê wa akupỹm pøj nê Jesus kôt mẽ kot axpên to htõ nê htõxjê ho akuprõ nê mẽ kãm amnhĩ jarê nê mẽ kãm:

—Nã ãm hãmri na pa wa ra ixkãhkĩnh pê akupỹn mẽ awýr pøj. Na pre Tirtûm wa ixkutã nojarêt rãhã ho wa inhĩhkõ hã pa. Jakamã pa pre wa ma ý hã Ijaew kêt xwýnhjê mã

Jejus jarênh o ixpa nhũm mẽ hkwyjaja wa inhma nê hkôt amnhĩ xunhwý.

²⁸Anhýr o wa mẽ kãm kapêr hãmri nê wa tokyx ma nhỹhỹm krî hõ hwýr axte mõi kêt nê. War arĩ ãxiok kamã Jesus kôt wa htõ nê htõxjê hkôt ri pa.

15

Jerujarê kamã Jesus kwý hpikuprõnh ã mẽ harênh

Matêwre 23.1-4; Karatas 2.1-5, 5.1-16

¹Tã hãmri nhũm Ijaew kwýjaja ãxiok wýr Jesus kwý pê Ijaew kêt xwýnhjê hwýr mõn pøj. Pika pê Jutej rûm mẽ hwýr pøj nê tanhmã mẽ ahkre hto ho pa. Nom axtem nê Tirtûm kapêr kuhpa hã mẽ ahkre nê mẽ kãm:

—Kot ka mẽ amã Jesus kôt amnhĩ xunhwýr prãm hãmri nê mẽ ixpyrà nê finat Mojes kot mẽ pamã karõ xà hkôt amnhĩ my kwrýt kà kwý jakã nê rĩ kormã hkôt amnhĩ xunhwý. Kot kaj mẽ ã amnhĩ nhĩpêx anhýr kêt nê nhũm Tirtûm tee ri ja hã mẽ apumu nê amnhĩ katut kôt mẽ ate amnhĩ tomnuj rênh nê mẽ ato hkra hkêt nê. Anê.

²Hãmri nhũm Pawre mẽ Panãpe tee ri mẽ kapêr anhýrja ma nhũm wa kêp ja omnuj týx nê. Hãmri nhũm wa mẽ kãm:

—Tk. Kwa kot anhýr kêt. Na hte Tirtûm mẽ pahte amnhĩ my kwrýt kà jakãr ã mẽ pahpumunh kôt mẽ pahto hkra hkêt nê. Anê.

Hãmri nê tee ri mẽ kapêrja nê mẽ kãm kapêr no nhũm

mě ãm wa kuma nẽ wa hkõt hamaxpër kêt nẽ. Nẽ arĩ ã mẽ ahkre anhÿr o mẽ hkõt pa. Jakamã nhũm mẽ ja hã axpẽn mã kapër rax nẽ. Hãmri nhũm Jejus kwÿ pê Ijaew kêt xwÿnhjaja amnhĩ tã Pawre mẽ Panãpe wa hkukja nẽ wa kãm:

–Kwa xà kot paj mẽ apyrà nẽ amnhĩ my kwryt kà jakà nhũm Tirtũm kãm ja mex nẽ nà? Kwa wa ma akupÿm Jeru-jarẽ hwÿr mõi nẽ ja hã Je-jus nhÿ hã mẽ ahkre xwÿnh maati-jẽ mẽ mẽ kot Jejus kwÿ jahkre xwÿnhjẽ kukja nẽ hã mẽ ama. Nẽ ota mẽ ixkwÿjaja koja ma war akõt mra. Kẽ mẽ tanhmã mẽ amã ja jarẽnh to ka mẽ ama nẽ man akupÿn mẽ ixwÿr mra nẽ tanhmã mẽ inhmã mẽ kapër jarẽnh to. Anẽ.

Hãmri nhũm wa mẽ kãm: “Tõe. Nà kot paj mẽ anẽ.” Anẽ.

³ Hãmri nẽ wa mẽ ma Jeru-jarẽ hwÿr mõi. Ma pyka pê Wẽnĩs mẽ Samar hkõt ma hwÿr mõi. Hãmri nẽ nhÿri Je-jus kõt mẽ htõ nẽ htõxjẽ pumu nẽ mẽ kãm Ijaew kêt xwÿnhjẽ jarẽ. Mẽ hkwÿjaja mẽ uràk nẽ Jejus kõt amnhĩ xunhwÿr ã mẽ harẽnh o mõi. Hãmri nhũm mẽ harẽnh ma nẽ mẽ ÿ hã hkĩnh nẽ.

⁴ Hãmri nhũm mẽ ra Jeru-jarẽ hwÿr Jejus kõt mẽ htõjẽ hwÿr mõi n pøj. Hãmri nẽ mẽ ahkre xwÿnhjẽ mẽ Jejus nhÿ hã mẽ ahkre xwÿnh maati-jẽ pumu nhũm mẽ haxwÿja amnhĩ wÿr mẽ omu nẽ hkĩnh nẽ. Nẽ tanhmã mẽ ho mex to nẽ mẽ kãm kapër mex nẽ. Hãmri nhũm Pawre mẽ Panãpe wa mẽ kãm amnhĩ

jarẽ. Tirtũm kot wa ãhkõ hã wa hkõt pa nhũm wa ÿ hã kot Ijaew kêt xwÿnhjẽ mã kapër o pa nhũm mẽ hkwÿja kot wa mar nẽ Jejus kõt amnhĩ xunhwÿr ã nhũm wa mẽ kãm amnhĩ jarẽ.

⁵ Nhũm Jejus kwÿjẽ kamã mẽ kęp Parijew nhõ xwÿnh kwÿjaja. Mẽ kęp Parijew tã hkwÿjẽ rom Jejus kõt amnhĩ xunhwÿ. Jakamã nhũm mẽ tee ri Pawre mẽ Panãpe wa kot Ijaew kêt xwÿnhjẽ jarẽnh ma nẽ kãnhmã kuhẽ nẽ wa kãm:

–Kwa kê mẽ pahpyrà nẽ amnhĩ my kwryt kà jakà nẽ finat Mojes kot Tirtũm nhÿ hã mẽ pamã mẽmoj tã karõ hkõt amnhĩ nhĩpêx o pa. No kot mẽ ã amnhĩ nhĩpêx anhÿr kêt nhũm ja mẽ pahpẽ omnuj nẽ. Anẽ.

⁶ Hãmri nhũm Jejus nhÿ hã mẽ ahkre xwÿnh maati-jẽ mẽ mẽ hkwÿjẽ jahkre xwÿnhjaja mẽ kuma nẽ hapøj nẽ nhÿri akuprõ. Ijaew kêt xwÿnh kot Jejus kõt amnhĩ xunhwÿr xwÿnhjaja kot tanhmã amnhĩ nhĩpêx to hã axpẽn mar kaxyw nhÿri akuprõ.

⁷ Hãmri nẽ mẽ hã axpẽn mar ryy nẽ. Hãmri nhũm Simãw Pẽtre tã kãnhmã xa nẽ mẽ kãm:

–Nà na pre Tirtũm mẽ pahkapi nẽ Ijaew kêt xwÿnhjẽ kaxyw pa ixta. Ixte mẽ kãm Jejus kot tanhmã mẽ panẽ amnhĩ nhĩpêx to hã harẽnh o ri mẽ hkõt ixpa nhũm mẽ kot inhmar nẽ hkõt amnhĩ xunhwÿr kaxyw nhũm mẽ

kaxyw ixta. Ra mẽ ate ja hã
ixpumunh mex.

⁸⁻⁹ Tirtũm kot tanhmã ri mẽ
pakute hkõt mẽ pahpumunh
par jakamã te kot ra mẽ
panhĩpêxta pyrã nẽ mãânẽn
Ijaew kêt xwýnhjê nhĩpêx. Mẽ
kot mẽ pahpyrà nẽ amnhĩ
kaxyw Jesus kõt hamaxpêr
jakamã nhũm Tirtũm te ra
mẽ panhĩpêx pyrã nẽ amnhĩ
katut kõt mẽ kot amnhĩ
tomnuj rẽ nẽ mẽ ho hkra.
Hãmri nẽ mẽ hwýr amnhĩ
Karõ rẽ nhũm mẽ hkarõ mã
agjê. Tirtũm tãm kot amnhĩm
mẽ rênh kênã.

¹⁰ —Tã xà mẽ pahpê Ijaew
na pu htem wam Tirtũm
kot finat Mojes mã kapêr
kõt amnhĩ nhĩpêx mex o
papa? Nà na pu htem hkõt
amnhĩ nhĩpêx mex kêt nẽ.
Nẽ mẽ panhĩgêjtaja na xep
prem haxwýja hkõt amnhĩ
nhĩpêx mex o pa hkêt nẽ. Mẽ
pahpiitã mẽ pahpê hihtýx
kênã. Tã Ijaew kêt xwýnhjaja
kot hkõt amnhĩ nhĩpêx o pa
hã ka mẽ ra mẽ kãm karõ
kaxyw. Kwa kot kaj mẽ anẽ
nhũm Tirtũm tee ri ja hã mẽ
apumu nhũm ja kêp omnuj
nẽ. Kãm ja prãm kêt.

¹¹ Kwa mẽ ã mẽ kãm hã
karõ anhýr kêt nẽ. Mẽ panhõ
pahihti Jesus na hte mẽ
pahpiitã mẽ pakutã nojarêt
o axpên pyrãk. Jakamã Ijaew
kêt xwýnhjaja nẽ mẽ pahpê
Ijaewjaja kot puj mẽ amnhĩ
kaxyw hkõt pajamaxpêr
nẽ hkõt amnhĩ xunhwý.
Hãmri nhũm Tirtũm ja hã mẽ
pahpumu nẽ mẽ panhĩpêx o
axpên pyrã nẽ Jesus kukwak

ri amnhĩ katut kõt mẽ pahte
amnhĩ tomnuj rẽ nẽ mẽ
pahto hkra. No na hte mẽ
pahte amnhĩ my kwryt kã
jakar rý finat Mojes kapêr
kõt amnhĩ nhĩpêx ã mẽ
pahpumunh kõt mẽ pahto
hkra hkêt nẽ. Anẽ.

¹² Nhũm pre ã Simãw Pêtre
mẽ kãm kapêr anẽ. Hãmri
nhũm hpãnhã Panãpe mẽ
Pawreja mẽ kãm amnhĩ
jarê. Tirtũm kot tanhmã
wa ho nhũm wa kot Ijaew
kêt xwýnhjê hwýr wa mõi
ã amnhĩ jarê. Nẽ Tirtũm
nhý hã mẽ kãm aa mẽ kot
mẽmoj pumunh kêt kwý ho
anhýr o ri mẽ hkõt pa hã mẽ
kãm amnhĩ jarê nhũm mẽ
piitã akryk wa mar o hkrĩ
nẽ wa ujarênhta hkukamã
hamaxpêr.

¹³ Hãmri nhũm Simãw
Pêtre mẽ Panãpe wa mẽ
kãm ujarênh pa hãmri nhũm
Xiakre wa hpãnhã kãnhmã xa
nẽ mẽ kãm kãnhmã ìhkra pẽ
nẽ mẽ kãm:

¹⁴ —E pa ijaxwýja mẽ amã
ixkapêr ka mẽ inhma. Nà na
pu mẽ ra Simãw Pêtre kapêr
ma. Tirtũm kot wam amnhĩ
kaxyw Ijaew kêt xwýnh
kwýjê rênh ã mẽ harênhja pu
mẽ ra kuma.

¹⁵ ãm hãmri na ã mẽ harênh
anẽ. Amnepêm Tirtũm kapêr
nhý hã mẽ kapêr o mẽ pa
xwýnhjaja na prem ra ja
kukamã Tirtũm kot tanhmã
mẽ hipêx to hã amnhĩ jarênh
kukamã hã kagà. Te ho tãm
kot kãm kapêr pyrã nẽ hã
kagà ho:

¹⁶ Amnepêm finat Tawija na
pre hte inhmã amnhĩ

kwÿjê ho amnhĩptâr o pa.

Mê kêp Ijaewjaja nhũm pre inhmã mê ho amnhĩptâr o pa.

Hãmri nhũm mê gaa nê axpên pê anhgrã nê ahpÿnhã ri pa.

Tã ixpê Tĩrtũm kot paj nhÿrmã ma mê hwÿr wrÿ nê axte mê ho akuprõ nê tãm mê unhwÿr pa.

17 Jakamã Ijaewjê kukwak ri koja Ijaew kêt xwÿnh kwÿjaja mãânên ixkõt amnhĩ xunhwÿ.

Pa te ixte Ijaewjê nhĩpêx pyrà nê mê ho ixkra.

18 ã mê hkukamã ijamaxpêr anhÿr xã hkõt.

19 Anhÿr o mê harênh jakamã nhũm ra mê hkwÿjaja mê higêt kot amnhĩ nhĩpêx kaga hpa nê hpãnhã Tĩrtũm kõt amnhĩ xunhwÿ. Jakamã kwa kêr pu mê axte ja nhĩjuk ri mê kãm mêmoj tã karõ hkêt nê. Ja pix na mex.

20 ãm ja pix kot puj mê kãm hã karõ nê hã kagã nê mê hwÿr kumê:

Mê kot sãnti hã mê õ hkur nê kot puj mê hkurê.

Nê mê kot mêmo mry hpar nê hkamrõ runh kêt rãhã hkur nê mê hkurê.

Nê mê kot mêmo mry kamrõ kur nê mãânên mê hkurê.

Nê mêmoyjaja kot amnhĩ prõ pix tânopxar ã mê kãm karõ.

Nê mênijaja haxwÿja kot amnhĩ mjên pix tânopxar ã mê kãm karõ.

—ãm ja pix kot puj mê kãm hã kagã nê mê kãm hã karõ.

21 Mê panhĩgêjtê mã finat Mojes kot ã mê kãm karõ anhÿrja na htem arĩ krĩ piitã hkõt ã mê kãm hã karõ anê. Mê panhõ arĩgromnu pê sap ã na htem arĩ ri Tĩrtũm kapêr o mê ahkre xã hã ixkre kamã ã mê kãm hã karõ anê. Anê.

Mê kot Ijaew kêt xwÿnhjê hwÿr kagã mênh ã mê harênh

Karatas 5.1

22 Hãmri nhũm mê Xiakre kapêr mar o hkrĩ. Jejus nhÿ hã mê ahkre ho mê pa xwÿnh maatijaja nê mê kot hkwÿjê jahkre xwÿnhjaja nê Kris kwÿjê piitã Xiakre kapêr ma nhũm ja mê kãm mex nê. Jakamã nhũm mê axpên mã:

—Tõe. Nã ãm hãmri na Xiakre ã Ijaew kêt xwÿnhjê jarênh anê. Nã ja mex. Pu mê ã ãxiok nhõ xwÿnhjê mã ja hã kagã anê hãmri nê mê hwÿr kumê. Koja Pawre mê Panãpeja wa kupy nê ma akupÿm mê hwÿr o mõi nê mê kãm kugõ. E mê pahtõ kot puj mê ma wa hkõt mê hwÿr mõi? Anê.

Hãmri nhũm mê kuma nê Siras mê Jut Pasapas wa kuta. Jejus kõt mê kot axpên to htõ nê htõxjaja kot axpên mã hamê wa kot amnhĩ to mex xwÿnh ã wa harênh jakamã nhũm mê ma Pawre mê Panãpe wa hkõt mõi kaxyw wa kuta.

23 Hãmri nê ãxiok kamã Kris kwÿ pê Ijaew kêt xwÿnhjê kaxyw kagã nhĩpêx nê kamã ã mê kãm kapêr anê nê mê kãm:

Pa? ãxiok mê Sir mê Siris kamã Ijaew kêt xwÿnhjaja? Xã mê amex? Mê ixpê Jejus kõt mê atõjaja na pa

mẽ awÿr kagàja nhîpêx nẽ
mẽ awÿr kumẽ. Mẽ ixpê
Jejus kôt mẽ kot amnhĩ
xunhwÿr xwÿnhjê jahkre
ho ixpa xwÿnhjaja nẽ Jejus
nhÿ hã mẽ ahkre ho mẽ
pa xwÿnh maatijaja pa mẽ
awÿr kumẽ.

24 Na xep ra ja rÿm mẽ
ixkwÿjaja ma mẽ awÿr mō
nẽ mẽmoj tã tanhmã mẽ
amã karō hto. Mẽ ate
amnhĩ my kwÿrèt kà jakàr
nẽ amnepêm mẽ inhîgêt
Mojes kapêr kôt amnhĩ
nhîpêx o apa hã mẽ amã
karō. Ka xep mẽ tee ri ja
kukamã ajamaxpêr. No mẽ
pajaja na pa prem mẽ awÿr
mẽ rēnh kêt nẽ. ãm amnhĩ
krã hkôt na prem mẽ awÿr
mō nẽ ã mẽ amã ja hã karō
anẽ.

25 Tã pa tee ri mẽ harēnh
ma nhÿm ja mẽ ixpê omnuj
tÿx nẽ. Jakamã na pa mẽ
jar akuprō nẽ mẽ akaxyw
mẽ inhîōja wa kuta. Wa
kot ma Panãpe mẽ Pawre
wa hkôt mẽ awÿr wa mōr
nẽ mẽ amã mẽ ixkapêr
jarēnh kaxyw. Panãpe mẽ
Pawreja mẽ inhmã wa
hapê htÿx.

26 Na hte mẽ amã Pahiht
Jejus Kris kapêr jarēnh o pa
kaxyw wa amnhĩ grōnh kôt
mẽ amã harēnh o pa.

27 Tã pa mẽ akupÿm mẽ
awÿr wa kumẽ nẽ wa hkôt
mẽ pahtō Jut mẽ Siras wa
kumẽ. Mẽ ixte mẽ amã
kagã kamã mẽ ixkapêrja
nhÿm wa kot hprĩ hã mẽ
amã harēnh kaxyw pa mẽ
wa hkôt mẽ awÿr wa kumẽ.

28-29 E ja pix nẽ kot paj mẽ
akurê:

Kêr ka mẽ sãnti hã mẽ ò
hkur kêt nẽ.

Nẽ mẽmo mry kamrō kur
kêt nẽ. Jao mẽmo mry pa nẽ
hkamrō runh kêt rãhã hkur
kêt nẽ. Kamrō runh pa nẽ rĩ
kormã tanhmã ho nẽ aku.

Nẽ kêr ka mẽ amyjaja
amnhĩ prō pix tãnopxar o
apa.

Nẽ mẽ anijaja ajaxwÿja
amnhĩ mjên pix tãnopxar o
apa.

E ãm ja pix kot paj mẽ
amã hã karō. Tirtÿm Karō
kãm ja mex. Nẽ mẽ inhmã
mãânēn ja mex. Kot kaj mẽ
ã amnhĩ nhîpêx anhÿr o ri
apa nẽ amex nẽ apa.

Tã ãm ja pix. Mẽ ixpê
Jejus kwÿjê jahkre xwÿnhjê
mẽ Jejus nhÿ hã mẽ ahkre
xwÿnh maatijê mẽ pa mẽ
mẽ awÿr kagàja nhîpêx nẽ
kumẽ. E kêr ka mẽ amex nẽ
akĩnh nẽ ri axpēn kôt apa.

ãm ja pix na hapêx. Anẽ.

Nhÿm prem ã kagã kamã mẽ
kãm mẽmoj tã karō anẽ.

30 Hãmri nẽ Jut wa mẽ kãm
kugō nẽ ma ãxiok wÿr wa
mẽ kumẽ nhÿm wa mẽ ma
akupÿm hwÿr o mō. Jut nẽ
Siras nẽ Pawre nẽ Panãpeja
nhÿm wa mẽ ma akupÿm mẽ
hwÿr o mẽ mō. Mōō hãmri nẽ
mẽ hwÿr pōj. Hãmri nẽ Jejus
kwÿjê ho akuprō nẽ mẽ kãm
kagàja gō

31 nhÿm mẽ kupy nẽ kamã
harē nẽ kuma. Kamã mẽ kot
mẽ kãm mẽmoj tã karō kamã
harē nẽ kuma nẽ ÿ hã hkĩnh
nẽ akupÿm tãm hamaxpêr.

32 Jut mẽ Siras wa kēp

Tirtũm nhỹ hã kapër o pa xwỹnh na pre wa. Jakamã na prem mẽ hwỳr mõn pøj hãmri mẽ kãm tanhmã ujarënh to ho pa. Mẽ kot Jejus kôt pix mã hamaxpër o pa kaxyw mẽ kãm ujarënh o pa nẽ mẽ kãm:

—E kër ka mẽ mãmri Jejus kôt amnhĩ nhĩpêx mex rãhã ho ri apa nẽ aa hkaga hkêt nẽ. Anẽ.

³³ Hãmri nẽ mẽ hkôt ri pa hã apkati xohtô nẽ. Hãmri nẽ wa akupỹm Jerujarë hwỳr nojarët nẽ mẽ kãm amnhĩ jarë nhũm mẽ wa kuma nẽ wa kãm:

—Tõe. Nà wa mãmri ma akupỹm mõi. Koja Tirtũm war apumunh mex nẽ ka wa ma akupỹm amex nẽ akà hkĩnh pê akwỳjê hwỳr akato. Anẽ.

³⁴ Hãmri nhũm wa nojarët tã nhũm Siras tanhmã hamaxpër to nẽ hitôt nẽ mẽ kuri arĩk nhũm Jut Pasapas pix ma akupỹm hkwỳjê kot mẽ hwỳr wa mẽnh xwỹnhjê hwỳr mõi.

³⁵ Hãmri nhũm Pawre mẽ Panãpe wa Siras pyrã nẽ kormã ãxiok kamã pa. Hãmri nẽ Jejus kôt mẽ htõ hkwỳjê mẽ pimràatã mẽ ahkre ho pa. Tirtũm kapër o mẽ hkôt mẽ ahkre ho pa.

Pawre mẽ Panãpe wa kot axpën pê pikjêr ã wa harënh
Atre 13.13; Korosë 4.10

³⁶ Hãmri nhũm Pawre mẽ Panãpe war arĩ mẽ hkôt ri pa hã apkati xohtô nẽ. Tã nhũm Pawre hamaxpër nẽ Panãpe mã:

—Kwa ma pu ma akupỹm ra pahte krĩ hkwỳ hkôt mẽ kãm Jejus jarënh o papa xwỹnhjê

hkôt akupỹm mõi. Pu ma mẽ hwỳr mõi nẽ Jejus kôt pahtõ nẽ pahtõxjê kot tanhmã ri amnhĩ nhĩpêx to hã mẽ omu. Anẽ.

³⁷ Hãmri nhũm kuma nẽ kãm:

—Tõe. Nà pu ma mõi. Nom kër pu ma amnhĩ kôt Juãw Makre ho mõi kè axte pahto ajuta ho pahkôt mõi. Anẽ.

³⁸ Hãmri nhũm Pawre tee ri kuma nhũm ja kęp omnuj nẽ nhũm kãm:

—Tk. Kwa na pre pahkôt pa htã Pãpir kamã tanhmã hamaxpër to nẽ pahkaga nẽ ma akupỹm Jerujarë hwỳr mõi. Jakamã kwarĩ koja axte pahkôt mõi kêt nẽ. Anẽ.

³⁹ Hãmri nhũm Panãpe tee ri hã hihtỹx no nhũm kęp hkaga kumrëx. Jakamã nhũm wa ja hã axpën pê axkjê nẽ ma ahpỹnhã mõi. Nhũm Panãpe amnhĩ kôt Juãw Makre ho mõi nẽ wa ma pàr kãm gô hipòk pê Sipre hwỳr wa mõi.

⁴⁰ Nhũm Pawre axtem amnhĩ kôt Siras wỳ nẽ ma wa mõi. Hãmri nẽ wa nojarët nhũm Jejus kôt wa htõjaja wa ho Tirtũm wỳ nẽ kãm:

—Pa Tirtũm. E koja Pawre mẽ Siras wa ma krĩ hkwỳ hkôt mẽ kãm akapër jarënh o ri wa pa. Jakamã kër ka wa htãnopxar o ri wa hkôt apa. Anẽ.

Hãmri nhũm wa kato nẽ ma krĩ hkôt ri Jejus kapër o mẽ ahkre ho wa pa.

⁴¹ Wa ma pyka pê Sir mẽ Siris kôt Jejus kôt mẽ htõ nẽ mẽ htõxjê pumunh nẽ Jejus kôt mẽ ho mẽ hihtỹx o wa pa kaxyw.

16

Ximotre kot Pawre mē Siras wa hkôt ri pa hã harēnh

Wam Ximotre 1.1-2; Sikũn Ximotre 1.5; Piripos 2.19-22

¹⁻³Tã nhũm Pawre mē Siras wa ma akupým krī pē Tepe hwýr wa mō nē hwýr pōj nē hpãnhã kurũm ma Risti hwýr mō. Hãmri nē wa hwýr pōj nē kamã Ximotre pumu. Ximotre na pre ra katorxã pyrà nē Jejus kôt amnhĩ xãm nhũm mē kot Jejus kôt axpēn to htõ xwýnhjaja kãm hapê nē. Nē kot Jejus kapēr kôt amnhĩ nhĩpêx mex o pa hã axpēn mã harē.

Krī pē Risti mē Ikõn kamã nhũm prem ã axpēn mã Ximotre jarēnh anhýr o pa. Jakamã nhũm Pawre mē Siras wa mō nē mē hwýr pōj nē Ximotre kot amnhĩ nhĩpêx ã omu nhũm Pawre kãm war amnhĩ kôt o mōr prãm nē. Nom Ximotre hkamrô pihkãr na pre. Katorxã kêp Ijaew nhũm hipêêxã kêp Gres jakamã nhũm ã Ximotre hkamrô pihkãr anē. Nhũm Ijaew kot katorxã hkôt kêp Ijaew ã omunh jakamã nhũm Pawre hamaxpēr nē mē kaxyw kêp my kwýt kã krãhta nē arĩ kormã mē hwýr amnhĩ kôt o mō.

⁴Hãmri nē mē ma krī hkwȳ hkôt mō. Mõõ nē Ijaew kêt xwýnhjaja ra kot amnhĩ kaxyw Jejus kôt hamaxpēr xwýnhjê jahkre ho mē hkôt pa. Ra Jerujarē kãm mē kot Jejus kwýjê jahkre ho pa xwýnhjê mē Jejus nhỹ hã mē ahkre xwýnh maatijaja mē

kot mē kãm mēmoj tã karõta nhũm mē ma mē kãm harēnh o ri mē hkôt pa.

⁵Hãmri nhũm mē kuma nē ra Jejus kôt amnhĩ nhĩpêx mex o mō. Hãmri nhũm apkati mē krī nhõ xwýnh kwýjaja mē urãk nē Jejus kôt amnhĩ xunhwý. Jakamã nhũm mē ra ohtõ rax o mō.

Pawre tanhmã hpimtir to hã harēnh

Rõmãn 15.18-21

⁶Tã nhũm Pawre mē Siras mē Ximotre mē ma pyka pē As wýr nojarêt. Mē kot mē kãm tanhmã Jejus jarēnh to ho pa kaxyw mē hwýr nojarêt tã nhũm Tirtũm Karõ kormã mē nē mē hkurê. Jakamã nhũm mē hpãnhã ma pyka hkwȳ pē Prik mē Karatas wa hkôt pa. Ixpê Rukre na pa pre mē hã ajêt nē ma mē hkôt ixpa ho ixpa.

⁷Hãmri nē mē pyka pē Mīs ã mō nē hpãnhã ma Pitĩn wýr inhmõr mã tã no nhũm Tirtũm Karõ axte kê mē nē mē ixkurê.

⁸Jakamã pa mē arĩ Mīs jakãr ã mō nē gõ xujanãr mý ri krī pē Tôx wýr pōj.

⁹Tã nhũm kamãt pa mē ixpiitã gõr nē inhĩkwý nhũm Pawre tanhmã hpimtir to. Nhũm xep pika pē Masetõn nhõ xwýnhja mē amnhĩ wýr hwýr kãm hihtýx o xa nhũm hprĩ hã omu nē kapēr ma. Nhũm xep pre kãm:

—Pa Pawre? Kwa amnē Masetõn wýr mē ixwýr mō nē tanhmã mē ijahkre hto. Anē.

¹⁰Hãmri nhũm Pawre hkrãkato nē mē inhmã

hpimtir jarē. Pa mẽ kuma nẽ axpẽn mã:

—Tõ kwa tokyx pu mẽ hwỳr. Tĩrtũm kot mẽ hwỳr mẽ parēnh kēnã. E pu mẽ ma mẽ hwỳr mō nẽ mẽ kãm Jejus jarēnh o mẽ ahkre. Anẽ.

Hãmri nẽ amnhĩ to akuprõ nẽ mẽ hwỳr inhnojarêt kurẽ kumrẽx.

*Ritre kot Jejus kõt amnhĩ xãm ã harēnh
Piripos 1.1*

¹¹ Hãmri pa mẽ ma Masetõn wỳr mō. Tõx rũm ma pàr kãm hwỳr mō. Hãmri nẽ gō nhĩpõk pẽ Samõtas wỳr pøj nhũm mẽ hã pàr nhõ. Hãmri nhũm apkati pa mẽ axte mō nẽ Masetõn kamã krĩ pẽ Nẽap wỳr pøj.

¹² Hãmri nẽ pàr rũm ijapõj nẽ hpãnhã kurũm hamũ krĩ pẽ Piripos wỳr ixpar o mō. Piriposja Masetõn kamã krĩ maati na. Rõm nhõ xwỳnhjaja na prem ho kato. Jakamã pa prem ma hwỳr mō nẽ pøj nẽ tokyx axte kurũm nhỹhỹm inhmõr kêt nẽ.

¹³ Hãmri nhũm sap kato pa mẽ axpẽn mã:

—Kwa pyhti mỳri mãn hte Ijaewjaja axpẽn wỳr akuprõ nẽ Tĩrtũm mã amnhĩ jarēnh o hkrĩ nã. E kwa pu mẽ hwỳr nẽ gō mỳri mẽ hapêr o ri papa. Anẽ.

Hãmri nẽ ma hwỳr mra nẽ mẽ hapêr o ri ixpa nhũm ãm mēni pixjaja axpẽn wỳr akuprõ. Pa mẽ omu nẽ mẽ kurĩ ixkrĩ nẽ mẽ kãm Jejus kapêr jarēnh o mẽ ahkre o ixkrĩ.

¹⁴ Nhũm mẽ kot mẽ inhmar o hkrĩ xwỳnhjẽ hõ pẽ Ritreja. Krĩ pẽ Xijaxir nhõ xwỳnh na pre. Nẽ kęp kupêxẽ mex o wēnẽ xwỳnh. Na pre hte kãm Tĩrtũm prãm o pa. Jakamã nhũm Pawre kot mẽ ahkre ho ýrja rõm nhũm Pahiiti Jejus tanhmã Ritre hkrã hto nhũm hprĩ hã Pawre kapêr mar tỳx nẽ.

¹⁵ Hãmri nẽ amnhĩ kaxyw Jejus kõt hamaxpêr nẽ hkõt amnhĩ xãm kurẽ kumrẽx. Õrkwỹ kamã hkwỳjẽ mẽ nhũm mẽ hkõt amnhĩ xunhwỳr pa. Jakamã pa mẽ kęp Jejus kwỳ hã mẽ hkrã kumrã. Mẽ piitã mẽ kot mẽ kęp Tĩrtũm kra hã mẽ omunh kaxyw. Hãmri nhũm Ritre amnhĩ kõt mẽ ixwỳ nẽ mẽ inhmã:

—An kot kaj mẽ ixte Jejus kõt amnhĩ xãm tỳx ã ixpumu hã kot kaj mẽ ma ixkõt mō nẽ hpãnhã inhõrkwỹ kamã pøj nẽ apa. Anẽ.

Pa mẽ kuma nẽ ma hkõt mō.

*Mẽ kot Pawre mẽ Siras wa haxàr ã mẽ harēnh
Makre 1.23-26, 1.34*

¹⁶ Tã nhũm arĩgro hõ hã pa mẽ Tĩrtũm mã amnhĩ jarēnh kaxyw axte pyhti mỳri mẽ pikuprõnh xàja wỳr mō. Hãmri nẽ pry kamã mẽ kãm àpēnh xwỳnh nija pumu. Ra mẽkarõmnuti kot tanhmã hkrã hto nhũm ý hã àhpumunh tỳx xwỳnhja. Nhũm hte mẽkarõmnuti nhỹ hã mẽ kãm mẽmo hkukamã tanhmã ujarēnh to ho pa. Jakamã nhũm õ patrãwjaja kukwak ri ujamyñh rũnh pẽ hkĩnh nẽ pa.

17 Jakamã pa mẽ mõi nhũm nija mẽ ixpumu nẽ mẽ ixtã ajêt nẽ ma mẽ ixkõt mõi. Hãmri nẽ mẽ kãm mẽ ijarênh o mẽ ixkõt mõi nẽ mẽ kãm:

—Xê mẽ mran jajê pumu. Na htem Tirtũm maati mã tanhmã amnhĩ nhĩpêx mex to ho pa. Tirtũm kot mẽ ate amnhĩ tomnuj pê tanhmã mẽ apytãr to hã mẽ amã ujarênh kaxyw na mẽ awỳr mra. Anẽ.

18 Nẽ ãm xatã mẽ kãm mẽ ijarênh o mẽ ixkõt paja o ra hã apkati xohtõ nẽ. Tã nhũm Pawre ra kãm mar kaga nẽ nẽ mẽkarõmnuti mã kapêr nẽ kãm:

—Tk. Kwa kêp akato nẽ ma tẽ. Pa Jejus Kris nhỹ hã amã ixkapêr ka inhma nẽ kêp akato nẽ ma atêm kurê kumrêx. Anẽ.

Hãmri nhũm kuma nẽ kêp kato nhũm akupỳm tãm hkrã.

19 Jakamã nhũm õ pa-trãwjaja tee ri ja hã omu nẽ gryk tỳx nẽ axpên mã:

—Kwa ra mẽkarõmnutijaja kêp kator jakamã koja axte mẽmoj kukamã tanhmã ujarênh to hkêt nẽ. Pu mẽ kukwak ri axte paxujamỳnh kêt nẽ. Anẽ.

Hãmri nẽ Pawre mẽ Siras wa kamã gryk tỳx nẽ. Hãmri nẽ wa unê nẽ ma mẽ kot axpên mar xã hã ixkre hwỳr wa hkjênh o tẽ

20 nẽ mẽ kot mẽ ho amnhĩptãr xwỳnhjê mã tanhmã wa ho hêx to nẽ mẽ kãm:

—Kwa mẽ amnẽ Ijaewja wa omu. Na hte wa mẽ panhõ krĩ kamã hêx pix o pa nhũm

mẽ tee ri wa kapêr ma nẽ wa kamã gryk tỳx nẽ.

21 Mẽ ixte amnhĩ nhĩpêx te kot axpên pyrãk kêt tã nhũm wa mẽ kot amnhĩ nhĩpêx o mẽ pajahkre kaxyw nhỹhỳnh mẽ pahwỳr mõi. Nom mẽ pahpê Rõm nhõ xwỳnhjaja axtem mẽ pahte amnhĩ nhĩpêx kênã kot pu kêt wa kuma nẽ wa kapêr kõt amnhĩ nhĩpêx. Anẽ.

22 Hãmri nhũm mẽ kuma nẽ piitã wa kamã gryk tỳx nẽ. Hãmri nhũm mẽ ho amnhĩptãr xwỳnhjaja wa kêp wa ê kaxõnh o hkapa nẽ wa hã mẽ õ põristi mã amỳnê nẽ mẽ kãm:

—E mẽ ma wa o tẽ nẽ mẽ htak xã ho wa htak. Anẽ.

23 Hãmri nhũm mẽ kuma nẽ ma wa o tẽ nẽ wa htak rax nẽ. Hãmri nẽ wa haxã nẽ mẽ hagjênh xã jamãr xwỳnh mã kãm:

—E kêr ka ja wa omunh mex nẽ kê wa kator kêt nẽ. Anẽ.

24 Hãmri nhũm mẽ kuma nẽ wa o tẽ nẽ ixkre jatur xã kamã wa haxã nẽ wa kator pymaj hamẽ wa htem pĩ jaxã nẽ ho htỳx nhũm wa arĩ hte tỳx nẽ nhỹ.

25 Tã nhũm kamãt. Nẽ kõt ã kamãt nhũm wa Tirtũm mã amnhĩ jarê nẽ mex o mex ã wa grer o wa nhỹ nhũm wa urãk nẽ mẽ hagjênh xwỳnhjaja wa mar o hkrĩ.

26 Puh nhũm pyka mẽ kãm htertet tỳx nẽ nhũm mẽ hã ixkreja amnhĩ to àpêr tỳx nẽ amnhĩ kahê xã rênh pa. Nhũm mẽ hagjênh xwỳnhjê kaxpre xã piitã mẽ nẽ pirênh pa.

27 Hãmri nhũm mẽ hamãr o kuhê xwỳnhja pika tertet

kamã ama nê hkrãkato. Hãmri nê mē hã ixkre jakwakre kahê xà rēnh parja pumu nê mē hagjēnh xwýnhjaja hapôx par ã mē hkamnhĩx nê tee ri amnhĩ kukamã hamaxpēr. Hãmri nê pahĩ kot mē hã hpĩr pymaj õ wapo kapa nê ra tãm kot ho amnhĩ pĩr kaxyw.

²⁸ Hãmri nhũm Pawre tee ri ja hã omu nê kãx pē kãm amýra nê kãm:

—Kwa amnhĩ pĩr kêt nê. Ot pa mē arĩ ixpiitã ixkuhê. Na pa mē ixtõ ixkator nê ixprõt kêt nê. Anê.

²⁹ Hãmri nhũm kuma nê kanê hã ahwý nê kuwy nê mē hwýr axà nê mē piitã mē omu. Hãmri nê Pawre mē Sirasja wa omu nê wa hwýr kãm ma ho htertet o tē. Hãmri nê wa hã hpijaàm kaxyw wa kutã tēm nê hkõnkrã ho nhý.

³⁰ Hãmri nê kãnhmã xa nê wa ho kato nê ixkre kapem wa o xa nê wa kãm:

—Kwa tanhmã kot pa amnhĩ nhĩpêx to kê Tĩrtũm war apyrã nê ixte amnhĩ tomnuj pē ixpytã? Anê.

³¹ Hãmri nhũm wa kãm:

—Nã kot kaj amnhĩ kaxyw Jejus Kris kôt ajamaxpēr nê hkôt amnhĩ xãm nhũm Tĩrtũm ja hã apumu nê amnhĩ katut kôt ate amnhĩ tomnuj piitã rēnh pa. Nhũm anhõrkwý kamã akwýjaja apyrã nê Jejus kôt amnhĩ xunhwý nhũm ã mē hipêx anê. Anê.

³² Hãmri nê wa ma hkôt õrkwý hwýr tē nê hprĩ hã mē kãm Tĩrtũm kapēr jarē nhũm mē wa mar o hkrĩ.

³³ Hãmri nhũm mē hagjēnh xà jamãr xwýnhja wa kãm

wa htak xà kuhõ. Kormã kamãt kô hkwy kamã wa kãm kuhõ nê hkane. Hãmri nhũm wa mē kot Jejus kôt amnhĩ xunhwýr par ã mē omu nê mē hkrã kumrã. Mē hamãr xwýnh mē hkwyjê mē hkrã kumrãr pa.

³⁴ Hãmri nhũm mē kot amnhĩ kaxyw Tĩrtũm kôt hamaxpēr jakamã piitã hkĩnh nê. Hãmri nhũm mē hamãr xwýnhja õrkwý hwýr Pawre mē Siras wa o tē nê wa kãm õ nhũm wa apku nhũm ma akupým mē hagjēnh xà hwýr wa o tē nê akupým wa haxà.

Mē kot Pawre mē Siras wa kãm urer ã mē harēnh

Atre 22.25-29

³⁵ Hãmri nhũm apkati nhũm krĩ pytãr xwýnhjaja mē õ pōristi mã anê nhũm mē hagjēnh jamãr xwýnh wýr tē nê kãm:

—E na mē papytãr xwýnhjaja ate Pawre mē Siras wa kãm anhūrer nhũm wa mãmrĩ ma akupým htēm kaxyw hã karõ. Anê.

³⁶ Hãmri nhũm mē kuma nê wa hwýr axà nê wa kãm:

—E na krĩ pytãr xwýnhjaja ixte war akator kaxyw war atã inhmã karõ. Jakamã e wa mãmrĩ axãmnhĩx ma mō. Anê.

³⁷ Hãmri nhũm Pawre kãm:

—Nã wa ixte tanhmã amnhĩ tomnuj to hkêt tã nhũm mē kot wa ixpynēnh nê wa ixtak. Wa ijaxwýja wa ixpē Rõm nhõ xwýnh tã nhũm prem axtem nê mē piitã mē noo mã wa ixtak nê wa ijaxà. Mē kot amarĩ Rõm nhõ xwýnh tak nê mē hagjēnh kêt tã nhũm mē ã mē noo mã ã wa inhĩpêx anê. Kormã wa ixte

tanhmã amnhĩ tã ixàprãr to hkêt tã nhũm mẽ ã wa inhĩpêx anê. Jakamã kwarĩ kot kaj mẽ no hkàx ã wa ixkator kêt nê. Kê mẽ kot wa ijaxàr xwýnhjaja tãm man mra nê wa ixkator pa war arĩ ma mō. Anê.

³⁸ Hãmri nhũm pôristija kuma nê ma akupým mẽ hwýr mra nê mẽ kãm wa kapêr jarê. Hãmri nhũm mẽ tee ri mẽ uràn wa kêp Rõm nhõ xwýnh ã wa harênh ma nê kãm ma htýx nê.

³⁹ Hãmri nê ma wa hwýr tẽ nê wa hwýr axà nê wa kãm:

—Pa? E mãmri war akato nê axãmnhĩx ma mō. Na pa prem war anhĩpêx kati rax nê. Tã kêr ka wa axte ja mã ajamaxpêr hkêt nê. Kê ja âm jar mẽ pakamã hapêx. Anê.

Hãmri nê wa kator nê wa kãm:

—E kwa wa mẽ inhõ krĩ pê akato nê ma nhýhým mō. Anê.

⁴⁰ Hãmri nhũm wa kuma nê kato nê ma akupým Ritre nhõrkwý hwýr wa tẽ. Hãmri nê Jesus kôt wa mẽ htõjê pumu nê wa mẽ kãm amnhĩ jarê nê mẽ kãm:

—E kot paj hãmri wa mã mō. Nom kêr ka mẽ arĩ Jesus Kris kôt amnhĩ nhĩpêx mex rãhã ho ri apa nê aa hkaga hkêt nê. Anê.

Hãmri nê wa mẽ kurũm kato nê ma krĩ hõ hwýr wa mō.

17

Tesarõn kamã mẽ kot wa kamã gryk ã mẽ harênh

Wam Tesarõn 1.1, 2.13-14

¹⁻² Tã nhũm Pawre mẽ Sirasja wa ma krĩ hkwý hkôt pa.

Piripos rũm ma Apiporip mẽ Apõrõn kôt wa mō hãmri nê ra Tesarõn wýr wa pøj. Na pre hte Pawre nhýri pøj nê Ijaew nhõ Tirtũm kapêr o mẽ ahkre xà hã ixkre hwýr agjê nê kamã mẽ kãm Jesus kapêr jarênh o kuhê. Jakamã nhũm wa mō nê Tesarõn wýr pøj nê ixkre hwýr mẽ hwýr tẽ nê mẽ kãm ujarênh o xa. Nê mẽ kãm ujarênh o hã arĩgromnu pê sap o axkrunẽpxi.

³ Nê hprĩ hã mẽ kãm tanhmã Tirtũm kapêr jarênh to nê mẽ kãm:

—Nà Tirtũm kapêr ã kagà htũm kot mẽ pakaxyw âm xwýnh jarênh. Amnhĩ xà htýx kamã hamak kãm htyk hãmri nê akupým htĩr ã nhũm kot hkukamã harênh. Tã na pre Jesusja ã amnhĩ nhĩpêx anê. Tãm kêp Krisja. Tirtũm kot mẽ pakaxyw âm xwýnhhta na. Anê.

⁴ Hãmri nhũm mẽ hkwýja kuma nê wa hkôt hamaxpêr nê wa uràk nê Jesus kôt amnhĩ xunhwý. Ijaew kwýjê nê Ijaew kêt xwýnh kwýjaja nê mẽni kot amnhĩ to rũnh xwýnh kwýjaja nhũm mẽ ohtõ nê amnhĩ kaxyw Jesus kôt hamaxpêr nê hkôt amnhĩ xunhwý.

⁵ Tã nhũm Ijaew kwýjaja tee ri hkwý kot wa hkôt amnhĩ xunhwýr ã mẽ omu nê mẽ hã Pawre mẽ Siras wa kamã gryk týx nê. Hãmri nê ma mra nê wa kaxyw mẽ kot amnhĩ tomnuj týx xwýnh kwýjê ho akuprõ nê mẽ kãm wa hã amýnê. Jakamã nhũm mẽ ma kapêr punuj pê wa hapêr o ri

mra nhũm mẽ piitã mẽ omu nẽ mẽ kuma. Hãmri nhũm mẽ wa hapêr o ra Jasãw nhõrkwỹ hwýr mra. Nẽ mẽ kot Pawre mẽ Siras pynênh nẽ ma mẽ utàr xwýnhjê hwýr wa o htêm kaxyw mẽ kêp kahê xà mẽ nẽ mẽ hwýr agjê.

⁶ Hãmri nẽ tee ri õrkwỹ kamã wa hapêr nhũm wa kamã amrakati. Jakamã nhũm mẽ Jasãw mẽ kot Jejus kôt axpên to htõ xwýnh kwýjê pynê nẽ ma mẽ kot mẽ ho amnhĩptàr xwýnhjê hwýr mẽ o mra. Hãmri nẽ mẽ kãm tanhmã Pawre mẽ Siras wa ho hêx to. Âm kapêr punuj kãm kàx pê mẽ kãm wa harê nẽ mẽ kãm:

—Kwa na hte Pawre mẽ Siras wa pyka piitã hkôt mẽ kãm ri mẽmoj to hêx o pa. Tã wa ra mẽ panhõ krĩ hwýr pøj nẽ jar mẽ pamã ri tanhmã hêx to ho ri mẽ pahkôt pa.

⁷ Jasãw nhõrkwỹ kamã na pre wa pøj nhũm amnhĩ wýr wa kuwý. Na hte wa hkôt mẽ hamaxpêr xwýnhjaja pahihiti Sesti kapêr kwým ri kuhpa hã kapêr o pa nẽ axtem nẽ mẽõ pahipê “Jesús” anhýr xwýnhja kapêr kôt amnhĩ nhĩpêx o pa. Anê.

⁸ Hãmri nhũm mẽ kot mẽ ho amnhĩptàr xwýnhjê mẽ krĩ nhõ xwýnhjaja mẽ kuma nẽ gryk týt kumrêx.

⁹ Hãmri nẽ Jasãw mã kãm:

—E kot paj mẽ apê mẽ akàxpore hkwy jamý. Ka mẽ ajapøj nẽ ma mẽ panê Pawre mẽ Siras wa hano nhũm wa kato nẽ ma mẽ pa ri akupým mẽ amã kugõ. Anê.

Hãmri nẽ mẽ kêp mẽ hikàxpore hkwy jamý.

Pawre mẽ Siras kot Perej wýr mõi ã wa harênh

¹⁰ Tã nhũm ra kamàt nhũm mẽ kot Jejus kôt axpên to htõjaja hãmri Pawre mẽ Sirasja wa ma krĩ pê Perej wýr wa kumê. Hãmri nhũm wa kato nẽ ma hwýr mẽ nẽ hwýr pøj. Hãmri nẽ Ijaew nhõ Tirtũm kapêr o mẽ ahkre xà hã ixkre hwýr htêm kurê kumrêx nẽ wa axã.

¹¹ Perej kamã Ijaew na pre te mẽ kot Tesarõn kamã Ijaew pyrak kêt nẽ. Mẽ kurom mẽ kãm Tirtũm kapêr mar prãm nẽ. Jakamã nhũm pre Pawre mẽ Siras Tirtũm kapêr o mẽ ahkre ho pa. Apkati mẽ mẽ ahkre mex o pa nhũm mẽ wa kuma nẽ hkĩnh nẽ. Nẽ Tirtũm kapêr ã kagà htũm kamã wa kot mẽ ahkreta japêr nẽ kamã omu nẽ axpên mã wa harênh o:

—Nà âm hãmri na wa ã Tirtũm kapêr o mẽ pajahkre anê. Tirtũm kapêr ã kagà htũm hkôt na hte wa mẽ pajahkre. Anê.

¹² Hãmri nẽ ohtõ nẽ Jejus kôt amnhĩ xunhwý. Ijaew kwý nẽ Ijaew kêt xwýnh kwý nẽ mẽni kot amnhĩ to rũnh xwýnhjaja nhũm mẽ ohtõ nẽ Jejus kôt amnhĩ xunhwý.

¹³ Tã nhũm Tesarõn kãm Ijaewjaja Pawre jarênh ma. Kot Perej nhõ xwýnhjê mã Tirtũm kapêr jarênh o pa hã harênh ma. Hãmri nẽ ma mẽ hwýr mra nẽ mẽ kãm tanhmã ho hêx to nhũm krĩ nhõ xwýnhjaja mẽ kuma nẽ ra Pawre kamã gryk týt nẽ.

14 Jakamã nhũm Jejus kôt mẽ htõjaja mẽ harẽnh ma mẽ mẽ umaj Pawre kator mẽ ma gô xujanãr wỳr o mỗ. No nhũm Siras mẽ Ximotre wa Perej kamã mẽ kuri arĩk.

15 Hãmri nhũm mẽ hkwỳjaja ma Pawre o mỗ. Ma krĩ pẽ Atenas wỳr o mỗ. Hãmri mẽ hwỳr o pỏj mẽ kamã kure. Hãmri mẽ ra akupỳm Perej wỳr nojarẽt nhũm Pawre mẽ kãm:

—E kẽr ka mẽ ma akupỳm mỗ mẽ Siras mẽ Ximotre wa kãm ijarẽ kẽ war amnhĩm nojarẽt mẽ tokyx man ixkõt wa mỗ. Anẽ.

Pawre kot Atenas nhõ xwỳnhjẽ mã kapẽr ã harẽnh

Rõmãn 1.18-20

16 Tã nhũm Pawreja kormã Atenas kamã pa. Siras mẽ Ximotre wa kamã hamak o ri kormã kamã mẽ kot amnhĩ nhĩpẽx ã mẽ omunh o pa. Na pre Atenas nhõ xwỳnhjaja sãnti ho ohtỏ rax mẽ mẽ õ krĩ kamã unhwỳ nhũm Pawre ri omunh o ri kuhẽ ho pa. Na pre htem ahpỳnhã mẽmo karõ nhĩpẽxja o te Tĩrtũm nhĩpẽx pyrã mẽ kutã hkõn krã ho rỏrỏk mẽ hkrĩ mẽ kãm mex o mex ã harẽnh o pa. Hãmri nhũm Pawre tee ri ja mẽ mẽ omunh o ri mẽ hkõt pa mẽ hkaprĩ mẽ.

17 Hãmri mẽ ma amnhĩ kwỳjẽ nhõ Tĩrtũm kapẽr o mẽ ahkre xà hã ixkre hwỳr pa mẽ mẽ kamã mẽ ahkre ho kuhẽ. Ijaewjẽ mẽ Ijaew kêt xwỳnh kot Tĩrtũm ã hpijaãm xwỳnhjẽ mã nhũm Tĩrtũm kapẽr jarẽnh o kuhẽ. Nẽ apkati mẽ mẽ kot mẽmoj to wẽnẽ xà hwỳr mra

nẽ mẽ ujaarprỏr xwỳnhjẽ mã Tĩrtũm kapẽr jarẽnh o kuhẽ.

18 Hãmri nhũm mẽ mar o pa. Atenas nhõ xwỳnhjaja na prem axpẽn kôt amnhĩ nhĩpẽx o pa hkết mẽ. Mẽ hkwỳjaja kẽp Epikure hkõt amnhĩ nhĩpẽx xwỳnh. Nẽ mẽ hkwỳjaja axtem kẽp Etok kôt amnhĩ nhĩpẽx xwỳnh. Hãmri nhũm Pawre mẽ kãm Jejus kot tanhmã mẽ panẽ amnhĩ nhĩpẽx to hã harẽnh o pa mẽ akupỳm htĩr ã harẽnh o pa. Hãmri nhũm mẽ tee ri kuma mẽ hã axpẽn kukjẽr o kuhẽ mẽ axpẽn mã:

—Tk. Kwa mo na hte myti ata harẽnh o pa? Anẽ.

Nhũm mẽ hkwỳja mẽ kãm:

—Ko. Axtem mẽpahpãm õ na hte tanhmã harẽnh to. Anẽ.

19-21 Atenas nhõ xwỳnhjẽ mẽ axtem krĩ hõ nhõ xwỳnhjaja na prem kãm mẽ ujarẽnh nyw mar prãm mẽ. Jakamã nhũm prem mẽmoj jarẽnh nyw ma hãmri mẽ ãm axpẽn mã harẽnh pix o ri pa. Tã ra Pawre xujarẽnh nyw ma mẽ ma amnhĩ kôt mẽ kot axpẽn mar xà hã ixkre hwỳr o tẽ. Ixkre pẽ Areopja wỳr nhũm prem amnhĩ kôt o tẽ mẽ kãm:

—E kwa aprĩ hã mẽ inhmã ate mẽmo jarẽnh nywta jarẽ pa mẽ ama. Mẽ inhmã mar prãm. Anẽ.

22 Hãmri nhũm mẽ kuma mẽ mẽ kãm ujarẽnh o xa. Mẽ kot axpẽn mar xà hã ixkre kamã Atenas nhõ xwỳnhjẽ mã awjarẽ mẽ mẽ kãm:

—E nà na ka htem anhõ mẽmo karõ nhĩpẽx xohtỏta ã

apijaàm pē kām amnhī jagrer o ri apa. Pa hte ja hā mẽ apumunh o mẽ akôt ixpa.

²³ Na pa ra mẽ anhō sānti piitā hkôt omunh o ri ixpa nē o mūj hō kuhē xà kaprýja wýr ixkato. Nhūm himōk ā mẽmo karō nhīpêx amrakati nom à hā kagà kot:

MĚPAHPĀM PUMUNH KĚT
KUHĚ XÀ NA JA

Ā mẽ ate hā kagà kot anhýr. Mẽ ate omunh kêt tã ka htem arī hā apijaàm o ri apa. No pa na ixte mẽhōja jarēnh mar mex. Tã kot paj mẽ amā harē ka mẽ inhma.

²⁴ —Měpahpām mẽ ate omunh kêt ā amnhī jarēnhta Tirtūm na. Tām na pre pyka ho kato nē kamā mẽmoj piitā ho kator pa. Gō ho kato nē mry ho kato nē panhī ho kato. Ām mẽmoj piitā ho kator par kumrêx. Na hte pika kamā nē kaxkwa kamā mẽmoj piitā ho amnhīptār mex rāhā ho pa. Jakamā mẽmo kaxyw kot puj mẽ jar kām ōrkwý nhīpêx? Tām kêp mẽmoj piitā ho kator xwýnh jakamā kot mẽmoj to presija hkêt.

²⁵ Kêp mẽmoj piitā hpām jakamā mẽmoj piitā ō na. Jakamā tanhmā kot pu wem amnhī to nē kām mẽmoj gō? Tām kot mẽmoj piitā ho kator nē ho htír nē kot mẽmoj piitā ōr kēnā kot puj kêt mẽ amnhī pyrà nē kām mẽmoj gō.

²⁶ Na pre mẽ pahkukamā ahpýnhā mẽ pahpiitā mẽ papapxà jarē nē mẽ pakator hā arīgro jarē. Na pre mẽ pahpām kot wa Atāwja nhīpêx. Jakamā nhūm Atāw

kêp mẽ pahpiitā mẽ pahpār krax.

²⁷ —Tã mẽmo kaxyw na pre ā Tirtūm mẽ panhīpêx mex anē? Nà ām mẽ pahte amnhī kaxyw hkôt pajamaxpēr nē hkôt amnhī xunhwýr kaxyw na pre mẽ panhīpêx. Ja mẽ pahpê hihtýx kêt. Koja mẽhō kām Tirtūm prām nhūm amnhī tã omunh kurē kumrêx.

²⁸ —Nē Tirtūm pix kukwak ri na pu htem pahtír nē tanhmā amnhī nhīpêx to ho ri papa. Mẽ akwý kot kagà jahkre xwýnhja na pre ja hā kagà nē hā kagà ho: “Mẽ pahpê mẽpahpām kra na pu htem papa.” Anē. Ā hā kagà kot anhýr.

²⁹ —Tã ka prem amnhīm mẽmo karō nhīpêx. ôr o hkwy nhīpêx nē prat o hkwy nhīpêx nē kēn o hkwy nhīpêx. Hāmri nē hipêx pa nē ho mẽpahpām ā harē nē ri hā apijaàm o apa. No mẽ ām amnhī krā hkôt mẽ ate hipêx. Tirtūm te kot ja pyrāk kêt.

³⁰ —Amnepêm mẽ pa xwýnhjaja na prem mẽ apyrà nē ā mẽmoj nhīpêx anhýr o pa nhūm Tirtūm ja hā mẽ omu nē ām mẽ omu nē hā tanhmā mẽ hipêx to hkêt nē. Kormā mẽ kot kapēr mar kêt jakamā nhūm pre ja hā mẽ omu nē ām mẽ omu. Tã na ra mẽ pahte mẽmo karō nhīpêx o mẽpahpām nē mẽ pamā kapēr. Mẽ pahte hpānhā amnhī kaxyw ām kôt pix mā pajamaxpēr o papaja na kām hpām.

31 Koja nhÿrmã tanhmã mẽ pahte amnhĩ nhĩpêx to ho papa hã mẽ pahpumunh kôt tanhmã mẽ pajarênh to. Nê amnhĩ ri mẽ htĩr tũm nê mẽ pa ho pa xwÿnhjê jarê nê amnhĩ ri mẽ pa hkêt xwÿnhjê jarê. Na pre ra ã mẽ harênh anhÿr kaxyw arĩgro hta. Arĩgrota ã kot hprĩ hã kãm tanhmã mẽ pajarênh to kaxyw na pre ra Jejusja xãm. Kaxyw na pre akupÿm ho htĩr. Nê akupÿm ho htĩr jao kot nhÿrmã kãm tanhmã mẽ pajarênh to xwÿnh ã ho amnhĩrĩt. Anê.

32 Nhũm pre ã Pawre mẽ kãm Tĩrtũm kapêr jarênh anê nhũm mẽ mar o kuhê. Kot mẽ kãm Jejus tyk nê akupÿm htĩr ã harê nhũm mẽ mar o kuhê. Nhũm mẽ hkwÿjaja kuma nê ãm kuma nê axtem nê ri hã akunha. Nom nhũm mẽ hkwÿjaja mẽ kurom mar tÿx nê Pawre mã kãm:

—E kwa mẽ inhmã ja mar prãm. Apkati hõ hã ka axte mẽ inhmã ja jarê pa mẽ ixprĩ hã mar mex nê. Anê.

33 Hãmri nhũm Pawre akupÿm nhÿri hpôx xà hã ixkre hwÿr ma tẽ.

34 Hãmri nhũm Xiônĩs pê Areop kãm mẽ kãm kapêr xwÿnh nê mẽhõ ni pê Tãmariis nê mẽ hkwÿjaja kapêr mar tÿx nê amnhĩ kaxyw Jejus kôt hamaxpêr nê hkôt amnhĩ xunhwÿ. Hãmri nê Pawre kôt pa.

18

*Pawre Korĩt wÿr mõi ã harênh
Wam Korĩt 1.1-3*

1 Tã nhũm Pawre krĩ pê Atenas rũm kato nê ma krĩ pê Korĩt wÿr mõi nê pøj.

2 Hãmri nê nhÿri Akirti pumu. Haxwÿja kêp Ijaew. Krĩ pê Pôt kamã na pre kato. Tã ma pyka pê Itar wÿr mõi nê Itar kamã krĩ pê Rõm kamã hpãnhã pa. Pa ho pa htã nhũm mẽ õ pahihtĩ Krawti tanhmã hamaxpêr to hãmri nê mẽ amnhĩ nê Ijaew piitã mẽ hanor pa. Jakamã nhũm Akirti kato nê hprõ Prisire mẽ wa ma Korĩt wÿr mõi. Hãmri nê hwÿr pøj nê kamã pa ho pa. Jakamã nhũm Pawre Korĩt wÿr pøj nê wa omu

3 nê wa kuri pøj nê wa hkôt ri pa. Nê Siras mẽ Ximotre wa kamã hamak pê wa ãhkô hã ãpênh o pa. Wa uràk nê kupêxê pytĩ ho ixkre nhĩpêx nê ho wênê ho ri wa hkôt pa.

4 Hãmri nhũm sap kato nhũm ma Tĩrtũm kapêr o mẽ ahkre xà hã ixkre hwÿr pa nê kamã mẽ kãm Tĩrtũm kapêr jarênh o hkrĩ. Ijaew mẽ Ijaew kêt xwÿnhjê mã nhũm mẽ kãm ujarênh o hkrĩ. Nê mẽ kãm Jejus kot mẽ panê tanhmã amnhĩ nhĩpêx to hã harê.

5 Tã nhũm Siras mẽ Ximotre wa ma Masetõn rũm Pawre wÿr mõi nê pøj. Jakamã nhũm Pawre axte ixkre nhĩpêx ã ãpênh kêt nê. Pãnhã apkati mẽ Ijaewjê jahkre ho pa. Mẽ kãm tanhmã Jejus jarênh to ho ri mẽ hkôt pa. Kêp Tĩrtũm kot mẽ pakaxyw ãm xwÿnh ã harênh o ri mẽ hkôt pa. Xatã mẽ kãm ujarênh o pa.

⁶ Nom nhũm mẽ kãm mar prãm kêt nê kamã gryk kato nê kãm kapêr punuj nê. Nhũm Pawre tee ri amnhĩ tã mẽ kuma nê mẽ kãm:

—E ixte mẽ amã Jejus kot mẽ panê tanhmã amnhĩ nhĩpêx to hã harênh tã ka mẽ amã mar prãm kêt nê. Nà mẽ kam nê mẽ mãmri ate amnhĩ tomnuj kãm ty nê arĩ kam amnhĩ pumu no ãm amnhĩ tã tanhmã inhmã nê hkêt nê. Ra mẽ ate Tirtũm kapêr kaga kênã. Nà kot paj mẽ akaga nê ma hpãnhã Ijaew kêt xwýnhjê hkôt ri mẽ kãm ja jarênh o ri ixpa. Anê.

Hãmri nê kànhmã xa nê hinôkà kapa nê ho apê. Mẽ kot hkaga hã amnhĩ pumunh kaxyw nhũm mẽ noo mã ã amnhĩ nhĩpêx anê.

⁷ Hãmri nê ixkre rũm kato nê hijuk ri Ijaew kêt xwýnhjê pê Xijutre nhõrkwỹ hwýr tẽ nê hpãnhã Xijutre hkôt pa ho pa. Xijutre kêp Ijaew kêt tã amnhĩ kaxyw Tirtũm mã hamaxpêr rãhã ho pa.

⁸ Tã nhũm Ijaew õ pê Kriptija hkwyjê rom amnhĩ kaxyw Pahihti Jejus kôt hamaxpêr nê hkôt amnhĩ xãm. Kêp Ijaew nhõ Tirtũm kapêr o mẽ ahkre xà hã ixkre kamã mẽ ahkre xwýnhjê na pre. Jakamã õrkwỹ kamã hkwyjê mẽ mẽ hpimràatã Pahihti Jejus kôt amnhĩ xunhwýr pa. Nê krĩja kamã ra Ijaew kêt xwýnhjê ohtô nê Kripti pyrã nê amnhĩ kaxyw Jejus kôt hamaxpêr nê hkôt amnhĩ xunhwý. Jakamã nhũm Pawre mẽ kêp Jejus

kwý hã mẽ piitã mẽ hkrã kumrã.

⁹ Tã nhũm kamàt nhũm Pawre gõr nê nõ nê amýti nhũm kêwe Pahihti Jejus axte hwýr kato nê kãm kapêr nê kãm:

—Pa Pawre? E kwa kêt ka mãmri axãmnhĩx ri atar mẽ kãm ijarênh rãhã ho ri apa nê amnhĩ kamã akahak o ri mẽ hkôt apa hkêt nê.

¹⁰ Kot paj atãnopxa nhũm mēhõ tanhmã ato hkêt nê. Krĩ ja kamã koja mẽ ohtô nê ixkôt amnhĩ xunhwý. Anê.

¹¹ Nhũm pre ã Pahihti Jejus Pawre hpimtir kãm kãm kapêr anê. Jakamã nhũm Korit kãm arĩ ri mẽ hkôt pa ryy nê. Arĩ mẽ hkôt pa hã amgrã pyxi nê hkôt mytwry kêp 6. Jao Tirtũm kapêr o mẽ ahkre ho ri mẽ hkôt pa.

¹² Tã nhũm Korit nhõ xwýnhjê nhõ pika pê Gres kamã mẽ ho amnhiptar xwýnhjê nyw Gartija. Korit kãm pa jakamã nhũm Ijaew xaptar tũmrejaja Pawre pynê nê ma hwýr o tẽ nê kãm tanhmã ho hêx to.

¹³ Jakamã nhũm Ijaew pikuprõnh xà hã ixkre kamã mẽ kãm kapêr xwýnhjê Sostenesja Garti mã Pawre o hêx nê kãm:

—Kwa jahti na hte mẽ ixpê Ijaew kot amnhĩ nhĩpêx kwým ri mẽ ahkre ho pa. Jao mẽ ixte axtem nê tanhmã Tirtũm kôt ri amnhĩ nhĩpêx to ho ri ixpa kaxyw mẽ inhmã karõ ho pa. Nom mẽ ixte amnhĩ nhĩpêx kuhpa hã mẽ inhmã karõ. Anê.

¹⁴ Hãmri nhũm ra Pawre kot Garti mã amnhĩ jarênh mã tã

nhũm Garti amnhĩ to wa nẽ
hã mẽ kãm kapêr nẽ mẽ kãm:

—Tk. Kwa kot tanhmã
amnhĩ tomnuj tore hã. Kot
tanhmã amnhĩ tomnuj to
nhũm mẽ ate inhmã harênh
ronhỹx pa arĩ mẽ ama nẽ
tanhmã mẽ amã hipêx to.

¹⁵No xep ãm kot mẽ axaptar
tũmrejaja kot amnhĩ nhĩpêx
kuhpa hã pix mã kot amnhĩ
nhĩpêx o pa kênã. Nẽ mẽ ate
mẽ ahkre kuhpa hã kot ri mẽ
ahkreja pix mýrapê na ka mẽ
kamã agryk nẽ ã inhmã ho
akapêr anẽ. Nà kot paj ja
hã tanhmã ho hkêt nẽ. Ka
mẽ kam nẽ amnhĩ krã hkôt
tanhmã ho hprãm xà hkôt
tanhmã ho. Anẽ.

¹⁶Hãmri nẽ amnhĩ nê mẽ
hano.

¹⁷Hãmri nhũm mẽ tee ri
kuma nẽ ra Sostenes kamã
gryk nẽ. Kot Garti mã tanhmã
Pawre jarênh to htã nhũm
kuma nẽ ãm mar jakamã
nhũm mẽ hã Sostenes kamã
gryk. Hãmri nẽ unê nẽ Garti
noo mã htak o xa. Nẽ htak rax
nẽ. Nom nhũm hã mẽ omu nẽ
ãm mẽ omu nẽ nê tanhmã mẽ
kãm nẽ hkêt nẽ.

*Pawre kot akupỹm ãxiok
wýr mõi ã harênh*

¹⁸Tã nhũm Pawre arĩ Korĩt
kamã mẽ hkôt pa nẽ gaa nẽ
nojarêt nẽ Jejus kôt htõjê mã
amnhĩ jarê nẽ mẽ kãm:

—E kot paj ma akupỹm pika
pê Sir wýr mõi. Anẽ.

Hãmri nẽ mẽ kêp kato nẽ
ma hwýr mõi. Nẽ ma amnhĩ
kôt Akirti mẽ hprõ Prisire wa
o mõi. Mõi nẽ krĩ pê Sênkrej
wýr põi. Nhũm Pawre amnhĩ
kukamã mẽmoj tã tanhmã
Tĩrtũm mã amnhĩ jarênh to

nẽ amnhĩ jarênh xà hkôt
amnhĩ krã hkên pa. Ijaew
kot amnhĩ nhĩpêx xà hkôt ã
amnhĩ nhĩpêx anẽ. Hãmri nẽ
mẽ pàr wýr agjê nẽ Sênkrej
rũm kato nẽ ma Sir wýr mõi.

¹⁹⁻²¹Mõi nẽ krĩ pê Epes wýr
põi. Hãmri nhũm Pawre mẽ
hkwýjaja pàr rũm hapõi nẽ
krĩ hwýr agjê nẽ Ijaew nhõ
Tĩrtũm kapêr o mẽ ahkre xà
hã ixkre hwýr mra nẽ hwýr
agjê nhũm Pawre mẽ kãm
Tĩrtũm kapêr jarênh o nhỹ.
Hãmri nhũm mẽ kuma nẽ kãm
mar prãm nẽ. Nẽ kãm:

—Kwa anojarêt kêt nẽ.
Kritpêm mẽ ixkôt ri apa ryre
nẽ Tĩrtũm kapêr o mẽ ijahkre.
Mẽ inhmã ja mar prãm.

Anhýr tã no nhũm mẽ kãm:

—Nà kot paj ma mõi. Nom
koja Tĩrtũm nhỹrmã akupỹn
mẽ awýr inhmẽ pa man
akupỹn mẽ awýr mõi nẽ axte
kapêr o mẽ ajahkre. Anẽ.

Hãmri nẽ ma mõi. Ma Epes
rũm pàr kãm mõi. Nom nhũm
Akirti mẽ Prisireja wa Epes
kamã arĩk nẽ hpãnhã kamã
pa ho pa.

²²Tã nhũm Pawre krĩ pê
Sejarej wýr põi. Hãmri nẽ
hpãnhã kurũm ma akupỹm
Jerujarê hwýr mõi. Kot Jejus
kôt htõjê pumunh mã ma mẽ
hwýr mõi. Hãmri nẽ mẽ hwýr
põi nẽ mẽ omu nẽ tanhmã mẽ
kãm amnhĩ jarênh to nẽ mẽ
kêp kato nẽ ma akupỹm ãxiok
wýr mõi.

²³Hãmri nẽ hwýr põi nẽ
kamã mẽ hkôt ri pa ryy nẽ
mẽ kurũm kato nẽ hpãnhã
ma akupỹm pyka pê Prik mẽ
Karatas wa hwýr mõi. Nẽ

kamã mẽ kot Jejus kôt amnhĩ xunhwÿr xwÿnhjê jahkre ho pa. Mẽ kot Jejus kôt amnhĩ nhĩpêx tÿx rãhã ho pa kaxyw mẽ hkôt mẽ ahkre mex o ri mẽ hkôt pa.

Apor kot Epes kãm Tirtũm kapêr jarênh

Epes 1.1-2; Wam Korõt 3.6-

9

²⁴ Tã nhũm Epes wÿr Ijaew õ pê Aporja mõ nê hwÿr pøj. Krĩ pê Aresãn kamã na pre kato. Na pre hte amnhĩ kaxyw Tirtũm kôt pix mã hamaxpêr nê kapêr ã kagà htũm mar tÿx nê. Jakamã mẽ kãm harênh mex o pa nhũm mẽ piitã kãm mar prãm nê.

²⁵ Nom kormã Jejus jarênh jatur xà mar kêt jakamã ãm mẽ kãm hkrax pix jarênh o pa. Juãw Paxis kot tanhmã mẽ ahkre htoja nhũm mar tÿx nê. Nê tanhmã kot mẽ hkrã kumrãr to ho paja nhũm mãânên mar tÿx nê. Jakamã na pre hte mẽ kãm ja pix jarênh o pa. No Jejus kêp Tirtũm kot mẽ pahwÿr mênh xwÿnh ã harênhja nhũm kormã mar kêt nê. Tã Epes wÿr mõ nê pøj.

²⁶ Hãmri nê Ijaew nhõ Tirtũm kapêr o mẽ ahkre xà hã ixkre hwÿr axà nê kamã mẽ kãm ujarênh o nhÿ. Amnhĩ kamã kahak kêt nê àmnhix ri mẽ kãm ujarênh mex nê. Hãmri nhũm Prisire mẽ Akirti wa kot mẽ kãm ujarênh ã kuma nê war axpên mã:

—Kwa mãn kormã Jejus jarênh piitã mar kêt. E pu amnhĩ kôt panhõrkwÿ hwÿr

o tẽ nê pahprĩ hã kãm harênh jatur xàm kumẽ kê hprĩ hã mar pa. Anẽ.

Hãmri nê war amnhĩ kôt kuwÿ nê hprĩ hã kãm ujarênh jatur xàm kumẽ nhũm hprĩ hã harênh piitã mar tÿx nê.

²⁷ Tã ra pyka pê Gres wÿr nojarêt nê Jejus kôt htõjê mã amnhĩ jarê nhũm mẽ kuma nhũm ja mẽ kãm mex nê. Hãmri nê Gres kamã Jejus kôt mẽ htõjê mã kagà nhĩpêx. Apor kot mẽ hwÿr amnhĩ kôt o mõi nê mẽ kãm õr nhũm mẽ kot omunh nê kamã harênh nê ho mex kaxyw mẽ kãm hipêx. Hãmri nê hipêx pa nê kãm kugõ nhũm kupy nê mẽ kurũm kato nê ma mẽ hwÿr mõ. Hãmri nê mẽ hwÿr pøj. Gres nhõ xwÿnh kwÿjaja na prem ra Jejus kôt amnhĩ xunhwÿ. Tirtũm kot mẽ kutã nojarêt jakamã nhũm mẽ ra hkôt amnhĩ xunhwÿ. Jakamã nhũm Apor mẽ hwÿr pøj hãmri nê mẽ ìhkõ hã tanhmã mẽ ho ajuta hto ho pa.

²⁸ Nê xatã Ijaew mã tanhmã Jejus jarênh to kamã hihtÿx o mẽ hkôt pa nê mẽ kãm:

—Nà Jejusja tãm na pre Tirtũm mẽ pakaxyw ãm. Tirtũm kapêr ã kagà htũm kamã ã harênh kot anhÿr. Anẽ.

19

Pawre akupÿm Epes wÿr mõr ã harênh

Rukre 3.15-16

¹ Tã nhũm Apor kormã Korõt kãm pa ri nhũm Pawre ma akupÿm Epes wÿr mõ. Ma krãhakÿx kôt akupÿm hwÿr

mõ. Hāmri nē hwÿr pōj nē mẽ kot Jejus kôt amnhĩ nhĩpêx o mẽ pa xwÿnhjê pumu. Nhũm mẽ kormã Jejus jarēnh jatur xà mar kêt nē.

² Jakamã nhũm Pawre mẽ hwÿr mõ nē mẽ omu nē Tirtũm Karõ hã mẽ hkukja nē mẽ kãm:

—Kwa mẽ ate Jejus kôt amnhĩ xunhwÿr xà hã arĩgrota ã xà na pre Tirtũm Karõ mẽ akarõ mã agjê? Anē.

Hāmri nhũm mẽ kuma nē kãm:

—Nà mẽ ixte Tirtũm Karõ jarēnh mar kêt. Anē.

³ Hāmri nhũm mẽ kãm:

—No mẽmoj kôt na prem mẽ akrã kumrã? Anē.

Nhũm mẽ kãm:

—Nà Juãw Paxis kot mẽ hkrã kumrãr o paja kôt na prem mẽ ixkrã kumrã. Anē.

⁴ Hāmri nhũm Pawre mẽ kãm:

—Nà Juãw Paxis na pre Ijaew mã kapër o: “Kot kaj mẽ mẽ ate amnhĩ tomnuj kaga nē hpãnhã tãm amnhĩ nhĩpêx pa hã mẽ akrã kumrã.” Anhÿr o mẽ kãm kapër o pa. Nē mẽ kãm Jejus jarēnh o: “Koja tokyx mēhõ ixkôt hapu hã mẽ pahwÿr kato nē tanhmã amnhĩ nhĩpêx to ho pa. Ka mẽ omu nē amnhĩ kaxyw hkôt ajamaxpēr nē hkôt amnhĩ xunhwÿ.” Anē. Tã Jejusja na pre ã mẽ kãm harēnh anhÿr o pa. Anē.

⁵ Nhũm pre ã Pawre mẽ kãm Juãw Paxis mẽ Jejus wa harēnh anē nē hpãnhã Jejus nhÿ hã mẽ hkrã kumrã.

⁶ Hāmri nē hpãnhã mẽ hã ïhkra jaxwÿ nhũm Tirtũm

Karõ mẽ hwÿr wrÿ nē mẽ hkarõ mã gjêx pa. Hāmri nhũm mẽ ÿ hã ahpÿnhã axtem mẽ kapër kwÿ ho kapër nē ÿ hã Tirtũm mex o mex ã harēnh o kuhê.

⁷ Æ mẽ kot amnhĩ nhĩpêx anhÿr xwÿnhjaja kêp 12.

⁸ Tã nhũm Pawre Epes kãm Ijaew nhõ Tirtũm kapër o mẽ ahkre xà hã ixkre hwÿr mrar ã mytwrÿ axkrunēpxi. Amnhĩ kamã kahak kêt nē hprĩ hã Ijaew mã hprĩ hã Jejus jarē nē mẽ kãm:

—E pa mẽ amã Jejus jarē ka mẽ inhma. Nà Tirtũm kot mẽ pahwÿr mēnh xwÿnhhta na. Nē mẽ pahte kamã pajamak o papa xwÿnhhta na. Jakamã kot ka mẽ amnhĩ kaxyw hkôt ajamaxpēr nē hkôt amnhĩ xunhwÿ nhũm Tirtũm ja hã mẽ apumu nē mẽ ato hkra. Anē.

Hāmri nhũm mẽ hkwÿjaja kuma nē hkôt hamaxpēr kurē kumrêx.

⁹ Nom nhũm mẽ hkwÿjaja kuma nē ãm kuma nē Jejus o kapër punuj nē. Mē piitã mẽ noo mã kuhê nē ho kapër punuj tÿx nē. Nhũm Pawre tee ri ja mẽ omu hāmri nē mẽ kurũm kato. Mē pikuprõnh xà hã ixkreta rũm kato nē hpãnhã nhãm mẽ kot kãm “Xirãn kot mẽ ahkre xà hã ixkre” anhÿr xwÿnhja wÿr hpãnhã mõ. Nē amnhĩ kôt mẽ kot Jejus kôt amnhĩ xunhwÿr xwÿnhjê ho pa nē hpãnhã ixkreta kamã mẽ ahkre ho pa. Apkati mẽ hwÿr mra nē mẽ ahkre.

¹⁰ Jao hã amgrà axkrut. Jakamã nhũm pyka pē As kamã mẽ piitã Pahihti Jejus

jarēnh ma. Ijaew nē Ijaew kêt xwÿnhjaja nhũm mē piitã harēnh ma.

Wajaga hkwÿ jarēnh

11 Tã nhũm Pawre Tirtũm nhÿ hã mē kãm aa mē kot mēmoj pumunh kêt kwÿ ho anhÿr o ri mē hkôt pa.

12 Jakamã nhũm pre htem hwÿr mra nē kêp ê hkwÿ jamÿ nē ma mē à xwÿnhjê hwÿr o mra nē mē hã haxwÿ nhũm mē akupÿm mex. Nē mēkarõmnuti kot tanhmã mē ho ho pa xwÿnhjê hã nhũm prem mãânēn mē hã ê kwÿ jaxwÿ nhũm mēkarõmnutija mē kurũm hapôj nē ma mrar kurê kumrêx nhũm mē akupÿm tãm hkrã.

13-14 Tã nhũm mẽõ patre maati Sewahtija hkra my kêp 7 nē piitã kêp wajaga. Hãmri nē mē kãm Pawre pyrã nē mē nē mēkarõmnuti japôx o pa hprãm nē. Jakamã kormã Jejus kôt amnhĩ xunhwÿr kêt tã mē kot ÿ hã Pawre pyrã nē mēhõ nē hkwÿ janor kaxyw nē kãm:

—E Pawre kot Jejus jarēnh o ri pa xwÿnhta nhÿ hã kot paj amã ixkapêr. Jakamã e kwa tokyx myta rũm akato nē ma tē. Anē.

15 Hãmri nhũm mēkarõmnutija mē kuma nē ãm mē kuma nē mē kãm:

—Tk. Mē apê Jejus mē Pawre wa hkwÿ hkêt tã mē nē ã mē inhmã akapêr anhÿr o apa. Nà Jejus mē hkwÿ pix-jaja na htem Tirtũm nhÿ hã mē kêp mē ijabôx o pa. Mē apê mē hkwÿ hkêt kênã. Nà pa ixkatoore kaxyw ã. Anē.

16 Hãmri nhũm mēkarõmnuti kot tanhmã ho xwÿnhta mēkarõmnuti nhÿ hã wajagajê pynê nē mē htak rax o kêp mē ê kaxôn pa nhũm mē tee ri amnhĩ nhĩpêx. Hãmri nē hkênh nē òrkwÿ rũm hapôj nē ma umaj hprôt nē mra.

17 Hãmri nhũm Epes kamã mē piitã ã kot mē hipêx anhÿr ã mē harēnh ma nē tee ri hamaxpêr nē kãm ma nē. Ijaew nē Ijaew kêt xwÿnhjaja nhũm mē piitã tee ri kãm hamaxpêr o pa. Nē Pahiht Jejus mã mex o mex ã harē.

18 Jakamã nhũm mē kot Jejus kôt amnhĩ xunhwÿr nyw xwÿnhjaja piitã tanhmã amnhĩ jarēnh to. Nē mē hkwÿjaja amnhĩ jarēnh o:

—Nà kormã ixte Jejus kôt amnhĩ xãm kêt ri na pa pre ã amnhĩ tomnuj anhÿr o ri ixpa. Tã Jejus kôt amnhĩ xãm hãmri nē axte ã amnhĩ nhĩpêx anhÿr kêt nē. Anē.

Nhũm mē hkwÿjaja kêp wajaga htã mē urak nē Jejus kôt amnhĩ xunhwÿ hãmri nē amnhĩ jarēnh o:

—Nà ijaxwÿja kormã Jejus kôt amnhĩ xãm kêt ri na pa pre hte nē mē no kupyr nē mē y pix o ri mē hkôt ixpa. Tã Jejus kôt amnhĩ xãm hãmri nē axte ã amnhĩ nhĩpêx anhÿr kêt nē. Pãnhã axtem amnhĩ nhĩpêx nyw o amnhĩ nhĩpêx o ri ixpa. Anē.

19 Hãmri mē õ wajaga xàhpumunh xà hã kagà jamÿ nē ma o mra nē kaxyw kuto nē kamã rēnh pa nē mē piitã mē noo mã ho xêt pa. Wajaga xàhpumunh xà hã kagàja ã

kàxpore xohtô rax kumrêx tã nhũm mẽ Jesus gryk ã hamỳ nê o mra nê ho hxêť pa nhũm hapêx.

²⁰ Hãmri nhũm krĩ nhõ xwỳnhjaja ã mẽ kot amnhĩ nhĩpêx anhỹr ã mẽ omu nê ohtô rax nê mẽ uràk nê Jesus kôt amnhĩ xunhwỳ.

Pawre kot Rõm wỳr hkrà hã harênh

Rõmãn 1.13-15, 15.22-29

²¹ Tã nhũm Pawre ra akupỹm Jerujarê hwỳr no-jarêť nê hamaxpêr o:

—E kot paj ixkato nê hpãnhã ma Masetõn mẽ Gres wa hkôt ma akupỹm Jerujarê hwỳr mỗ. Ma mẽ kot Jesus kôt amnhĩ xunhwỳr xwỳnhjê pumunh o mẽ hkôt mỗ. Hãmri nê Jerujarê hwỳr pỏj nê kamã tanhmã amnhĩ to hpa hãmri nê hpãnhã ma Rõm wỳr mỗ. Anê.

²² Hãmri nê hkôt ho ajuta ho wa pa xwỳnh Ximotre mẽ Eras wa kãm amnhĩ jarê nê wa kãm:

—E kêr ka wa ma ixkukamã Masetõn wỳr wa mỗ. Kot paj kormã jar As kamã ixpa grire hãmri nê ma war akôt mỗ pu mẽ hamũ ma Jerujarê hwỳr mỗ. Anê.

Hãmri nhũm wa kuma nê kato nê ma hkukamã Masetõn wỳr mỗ.

Mẽ kot sãnti hã Pawre mã àkjer ã mẽ harênh

Sikũn Korĩt 1.8-9

²³ Rõm nhũm Epes nhõ xwỳnhjaja tee ri Pawre kot tanhmã Pahihti Jesus jarênh to hã kuma nhũm ja mẽ kêp omnuj nê. Nhũm mẽ Jesus ã kamã gryk tỳx nê.

²⁴ Na prem amnhĩ kaxyw Tĩrtũm kôt hamaxpêr kêt nê. Na prem axtem sãnti ho mẽ hpãm nê amnhĩ to hwỳr pê hã hpijaam nê kãm mex o mex ã harênh o pa. Mẽ õ sãntija ni Xiãnre na pre. Nhũm mẽ kãm ixkre nhĩpêx nê kamã hkarõ nhĩpêx xãm. Hãmri nê hwỳr akuprõ nê hã hkĩnh nê hkarõ hã hpijaam nê kãm mex o mex ã harê. Nhũm pre hte Temêťja Xiãnre nhõrkwỹ karõ hkryre hkwy nhĩpêx nê mẽ kãm ho wênê ho pa. Prat o hipêx nê ho wênê ho pa. Jao ra hã mẽ àpênh xwỳnhjê mẽ nhũm mẽ kot haprõr xwỳnhjê kukwak ri kàxpore jamỳnh rũnh o pa.

²⁵ —Jakamã nhũm Pawre mẽ hwỳr mỗ nê pỏj nê mẽ kãm Mẽpahpãm Tĩrtũm jarênh o ri mẽ hkôt pa nhũm Temêť tee ri kuma nhũm ja kêp omnuj nê. Hãmri nhũm hamaxpêr nê mẽ kot uràk nê Xiãnre nhõrkwỹ karõ hkryre nhĩpêx nê ho wênê ho pa xwỳnhjê ho akuprõ nê mẽ kãm:

—E kwa mẽ inhma. Na pu htem mẽpanã Xiãnre nhõrkwỹ karõ hkryre pãnhã kàxpore jamỳnh rũnh o papa.

²⁶ Tã mãn ka mẽ ra ham hpõx xwỳnh Pawreja pumu nê kapêr ma. Na hte jar mẽ panhõ krĩ kamã nê As piitã hkôt mẽ kãm mẽpanã Xiãnre karõ nê mẽ kãm kapêr o pa. Xep mẽ pahte mẽ hkarõ nhĩpêxja kêp mẽpanã kumrêx kêt ã mẽ kãm harênh o pa nhũm xep mẽ ohtô nê kuma nê ra hkôt hamaxpêr.

27 —Kwa ja mex kêt. Koja mẽ kapêr ma nê hkôt amnhĩ nhĩpêx hãmri nê axte mẽ pahte ixkre karô hkryre nhĩpêx xwýnhhta japrôr kêt nê. Hãmri nê mẽ paxápênh o kapêr punuj nê. No âm ja pix omnuj kêt. Koja mẽpanã Xiânre mã amnhĩjarênh xà hã ixkreja kaga hpa. Nê haxwýja karôja kaga. Mẽ piitã kãm hapê kênã. As kamã nê pyka piitã hkôt mẽ piitã kãm hapê nê hwýr mra nê amnhĩ to hwýr o pa. Kêp mẽpanã mex kumrêx tã koja mẽ Pawre kapêr gryk ã hkaga hpa nê axte kãm hamaxpêr kêt nê. Hãmri pu mẽ axte mẽ kukwak ri pakàxpore rax nê papa hkêt nê. Kwa tanhmã kot puj mẽ amnhĩ nhĩpêx to? Anê.

28 Hãmri nhũm mẽ tee ri ã kapêr anhýr ã kuma nê Pawre kamã gryk tỳx kumrêx. Nê gryk xàj kàx pêê kapêr nê xatã kapêr tỳx kãm kapêr punuj nê. Nê kapêr o:

—Xiânre na mex kumrêx. Kêp mẽ pahpê Epes nhô xwýnhjê nã maati na.

Anhýr o kàxpêê kapêr o kuhê.

29 Hãmri nhũm krĩ nhô xwýnh piitã mẽ kuma nê mẽ hwýr hprôt nê haxwýja gryk nê kàxpêê mẽ hkôt ã harênh anhýr o kuhê. Hãmri nê gryk xàj Pawre hkôt ri wa pa xwýnhja wa unê nê ma mẽ kot axpên mar xà hã ixkre hwýr wa hkjênh o tẽ. Masetôn nhô xwýnh wa kêp Gajore mẽ Aristakja nhũm mẽ wa unê.

30 Hãmri nhũm Pawre mẽ kot wa unênh ã mẽ omu nê

tee ri wa hkukamã hamaxpêr nê mẽ hkôt hprôt nê mẽ kãm tanhmã kapêr to kaxyw nom nhũm mẽ kot Jejus kôt amnhĩ xunhwýr xwýnhjaja ja nê kãm kapêr kãm hihtỳx nê.

31 Hãmri nhũm As kamã mẽ kot mẽ ho amnhĩptâr xwýnh kwýjaja ã mẽ kot amnhĩ nhĩpêx anhýr ã mẽ omu nê Pawre hwýr hpêr mẽ. Mẽ kãm hkĩnh jakamã kot mẽ hkôt htêm nhũm mẽ kot hpĩr pymaj hwýr hpêr mẽ nê mẽ hkôt htêm nê hkurê kamã hihtỳx nê.

32 Rôm nhũm mẽ piitã mẽ kot axpên mar xà hã ixkre hwýr pikuprôn pa nê kàx pê kapêr punuj o kuhê. Nom axpên kôt kapêr kêt nê. Âm axpên kwým ri kàx pê tanhmã kapêr punuj to ho. Nhũm mẽ hkwyjaja hprĩ hã mẽ mar kêt tã amarĩ amnhĩ krã hkôt kàx pê kapêr punuj nê.

33 Nhũm Ijaew kwýjaja tee ri ja hã mẽ omu nê axpên mã:

—Tk. Kwa okora. Koja mẽ nã Xiânre hã gryk hãmri nê tanhmã mẽ pahpê Ijaew to nà? Anê.

Hãmri nê hamaxpêr nê mẽ hwýr amnhĩõ pê Aresanja mẽ nê kãm:

—Kwa ma mẽ hwýr tẽ nê mẽ kãm tanhmã mẽ pahtã axaprâr to. Pawre kêp mẽ pahkwý htã tãm na mẽ kãm mẽ gryk jaxà. No mẽ papajaja na pu mẽ kãm mẽ gryk jaxàr kêt nê. Anê.

Hãmri nhũm mẽ kuma nê mẽ hwýr tẽ nê xa nê tee ri kot mẽ ho hpinhkrênh kaxyw

kànhmã mẽ kãm ìhkra pěr kaprÿ.

³⁴ Nhũm mẽ omu nom hpinhkrênh kêt nê arĩ kàx pêê kapěr punuj ã 2 or. Nê kàx pê kapěr o:

—Měpanã Xiãnreja mex o mex. Kêp mẽ pahpê Epes nhõ xwÿnhjê nã mex na. Anê.

³⁵ Tã nhũm mẽ õ pahi nhõ kôwenatô jatã tanhmã Epes nhõ xwÿnhjê ho hpinhkrênh to hãmri nê ja nê mẽ kãm kapěr nê mẽ kãm:

—Kwa mẽ anhĩkrê. Mẽ piitã kot Xiãnre mex o mex ã omunh kênã. Nê mẽ pahpê kãm amnhĩ jarênh xà hã ixkre jamãr xwÿnh ã mẽ kot mẽ pahpumunh mex. Nê kaxkwa rũm karõ kot mẽ pahwÿr tẽm nhũm mẽ pahpê hamãr o papa xwÿnh ã nhũm mẽ kot mẽ pahpumunh mex.

³⁶ Jakamã mẽhõ kot kêt we mẽ pahpê hamãr xwÿnh kêt ã mẽ pajarê? Ra mẽ piitã mẽ kot ja hã mẽ pahpumunh jakamã kwa mẽ anhĩkrê nê ri ã akapěr anhÿr kêt nê.

³⁷ No mẽ ate wa unênh nê amnhĩ kôt wa ho atẽm xwÿnhhta wa. Wa kot tanhmã mẽpanã Xiãnre ho kapěr punuj to rÿ kêp õ ixkre kamã àhkĩnh kêt tã ka mẽ amarĩ wa unê nê amnê amnhĩ kôt wa o tẽ.

³⁸ —Kwa kê Temêt mẽ hkwyjaja kãm tanhmã wa ho kapěr to hprãm nê ma pahihti hwÿr wa o tẽ nê kumã mãn tanhmã wa ho kapěr to. Mẽmoj tã axpẽn mã mẽ kapěr xà hã arĩgrota ãã.

³⁹ Rÿ ka mẽ amã mẽmoj jarênh prãm nê arĩgroja ã mãn rĩ kormã mẽmoj jarê.

⁴⁰ No jarãhã mẽ ate amnhĩ nhĩpêxja te mẽ ate pahihti kutã amnhĩ xunhwÿr nê ho akapěr punuj pyræk. Koja Rõm nhõ xwÿnhjê nhõ pahi mẽ ajarênh ma hãmri nê mẽ ate kamã agryk ã amnhĩ kamnhĩx. Hãmri nê mẽ atã ixkukja pa tanhmã kãm mẽ ajarênh to? Mẽhõ nhÿ hã na ka mẽ ã apikuprõnh nê amnhĩ nhĩpêx anê? Nà amnhĩ krã hkôt na ka mẽ akuprõ nê ã amnhĩ nhĩpêx anê. Anê.

⁴¹ Hãmri nê mẽ kãm kapěr pa nê mẽ hano nhũm mẽ angrà nê ma akupÿm òrkwÿ hwÿr hapêx.

20

Pawre ma Masetõn mẽ Gres wa hwÿr mõi ã harênh

¹ Hãmri nhũm Pawre ra nojarêt. Jerujarê hwÿr mõi mã nom kormã pika pê Masetõn kumrêx wÿr mõi nê kurũm ma akupÿm Jerujarê hwÿr mõi mã. Hãmri nê nojarêt nê mẽ kot Jejus kôt amnhĩ xunhwÿr xwÿnhjê ho akuprõ nê mẽ kãm amnhĩ jarê nê mẽ kãm:

—E kot paj ma mõi. Nom kêr ka mẽ arĩ ixwakre kamã Tirtũm kapěr kôt amnhĩ nhĩpêx mex rãhã ho ri apa nê aa hkaga hkêt nê. Anê.

Hãmri nê mẽ kãm:

—E mẽ mãmri ixwa kre kamã axãmnhĩx ajamakêtkati nê ri apa. Anê.

Hãmri nê kato nê ma Masetõn wÿr mõi.

² Nē hwÿr pōj nē kamā krī hkwÿ hkôt mō nē nhÿri mē kot Jejus kôt amnhī xunhwÿr xwÿnhjê pumu nē Tirtūm kapēr o mē ahkre. Mē kot hkôt amnhī nhīpêx mex nē kām hprām xà hkôt pix mā amnhī nhīpêx kaxyw mē kām kapēr o ri mē hkôt pa. Hāmri nē kato nē ma mō nē pyka pē Gres wÿr pōj.

³ Nē kamā mē hkôt pa hā mytwrÿ axkrunēpxi hāmri nē akupÿm pyka pē Sir wÿr no-jarêt. Nē ma pàr kām hwÿr mōr kaxyw nē amnhī tā Sir kamā Ijaew kwÿ kot tanhmā harēnh to hā amnhī jarēnh ma. Na prem ra hā axpēn mā amÿnē nē axpēn mā:

—E koja amnē mē pahwÿr mō pu mē nhÿri omu nē hpÿr kurē kumrēx. Anē.

Hāmri nhūm Pawre amnhī tā mē kapēr ma nē pàr kaga nē mē hwÿr mōr kêt nē. Hāmri nē awjanā nē Jerujarē hwÿr Masetōn kamā pa.

⁴ Nhūm Jejus kôt htō hkwÿjaja ma hkôt mō. Ā mē hixi kot anhÿr.

Perej nhō xwÿnh Sopatōja.

Piro hkra na pre.

Nē Tesarōn nhō xwÿnh

Aristak mē Sikūn wa.

Nē Tepe nhō xwÿnh

Gajoreja.

Nē As nhō xwÿnh Xikitre mē Torow wa.

Nē Ximotreja.

Jajaja na prem ma Pawre hkôt Jerujarē hwÿr mō.

⁵ Nē pa ixpê Rukre ixte mē amā ja jarēnh nē hā kagà xwÿnhja na pa axte Pawre hā ajêt nē hkôt mō. Jakamā

nhūm jajaja piitā ma wa ixkukamā Tôx wÿr mō nē kamā wa ixkām hamak o pa.

⁶ Tā pa wa ma krī pē Piripos rūm ixkato nē pàr kām ma mē hkôt mō. Arīgro pē Pas jakành mē ma mē hkôt mō.

Tā wa ixtā arīgro pē 5 nē mē hkôt Tôx wÿr pōj nē kamā mē omu nē mē hkôt ixpa hā ixtā ũ semān.

Pawre kot akupÿm Exik o htÿr ā harēnh

Juāw 5.21; Atre 9.36-43

⁷ Tā nhūm sap nē kamāt pa mē kot Jejus kôt amnhī xunhwÿr xwÿnhjê hkôt akuprō nē axpēn kutā apku nhūm Pawre mē kām kapēr. Ra apkati hkôt mē inhnojarêt kaxyw jakamā nhūm mē kām Tirtūm kapēr jarēnh ryy nē. Ra kôt ā kamāt nhūm arī mē kām harēnh o nhÿ.

⁸⁻⁹ Ixkre hprêk axpēn nhÿpy axkrunēpxi nhÿtep xà kamā na pa prem akuprō nē mar o ixkrī. Ixkreja kamā kanē ohtō nē hpôk o harir. Jakamā nhūm Pawre arī mē kām ujarēnh o nhÿ nhūm mēhō xàptār nyw Exikja ra ôttxwa htÿx nē mē ixkuri ôt o nhÿ. Janere hā ôt o nhÿ. Tā ra gōr nē janere pē kato nē ahparmā tē nē pykap tēm. Pa mē tee ri omu nē ahparmā hwÿr ixprôt nē wrÿ nē omu nhūm htyk mex nē nō. Kÿj rūm ahpar mā htēm ryy jakamā htyk mex nē nō. Hāmri nhūm hkwÿjaja tee ri omu nē hkaprī htÿx nē kumÿ nē mÿr o hkrī.

10 Hāmri nhũm Pawre mẽ ixkôt wrý nē hwýr tē nē htyk ã omu nē kumý nē mẽ kām:

—E mẽ amýr kêt nē. Ra htyk tã koja Tĩrtũm akupỹm mẽ pamã ho htĩr.

Anhýrja kôt nhũm akupỹm htĩr.

11-12 Hāmri nhũm mẽ akupỹm htĩr ã omu nē hkĩnh tỳx kumrēx. Hāmri pa mẽ akupỹm kỳx pē ixkre hwýr api nhũm Pawre mẽ inhmã pãwti hkwy nhĩrē nē mẽ inhmã kugō pa mẽ Jejus kot mẽ panē htyk mã ijamaxpēr pē kuku. Hāmri nhũm Pawre axte mẽ kām kapēr o ýr rãhã nhũm myt kato pa mẽ kēp anhgrã nē ma ixpa.

Pawre Mĩrēt wýr mōr ã harēnh

13 Hāmri pa mẽ inhnojarēt nhũm Pawre mẽ ixte hkôt mẽ inhmōr xwýnhjē mã:

—E kēr ka mẽ ma pàr kām ixkukamã mō. Kot paj ahte ma kỳx pē mẽ akôt ixpar o Asôt wýr mō. Hāmri nē hwýr pōj nē mẽ anhō pàr mã axà pu mẽ ma pahpimràatã ma hamũ mō. Anē.

14 Hāmri pa mẽ kuma nē ma mō nē mẽmo arĩgro hã Asôt kamã axpēn wýr pōj. Hāmri nhũm Pawre mẽ ixkôt pàr wýr axà pa mẽ ma krĩ pē Mĩtirēn wýr mō.

15 Nē hwýr pōj nē kurũm kormã mō nhũm apkati pa mẽ gō hipōk pē Kiw jakrenh o mō. Nē hakre nē mō nhũm apkati pa mẽ gō hipōk pē Sãm wýr pōj nē hã pàr nhō. Hāmri nhũm apkati pa mẽ axte mō nē Mĩrēt wýr pōj.

16 Nom nhũm ra Pawre nojarēt nē. Kām tokyx As rũm kator nē Jerujarē hwýr mōr nē tokyx hpōx prãm nē. Kām mẽ hkĩnh pē Pētekos xwýj ri hwýr hpōx prãm jakamã nojarēt tỳx pa mẽ Epes wýr inhmōr kêt nē.

Pawre kot Epes kamã Kris kwýjē mã amnhĩ jarēnh

17 Tã pa mẽ Mĩrēt wýr pōj nhũm Pawre amnhĩ wýr Epes wýr Jejus kwý jahkre ho mẽ pa xwýnhjē hã karō.

18 Hāmri nhũm mẽ man mẽ ixwýr mō nhũm Pawre mẽ omu nē mẽ kām amnhĩ jarē nē mẽ kām:

—Nà ixte mẽ amã amnhĩ jarēnh kaxyw na pa mẽ atã karō. Ra mẽ ate tanhmã ixte amnhĩ nhĩpēx to hã ixpumunh mex. Wam mẽ awýr As wýr ixpōxta ã ka prem aprĩ hã ixpumunh mex nē.

19 Na pa pre mẽ akôt ri mẽ amã tanhmã amnhĩ nhĩpēx to ho ri ixpa. Te ixpē mẽ amã ixápēnh xwýnh pyrãk. Nē Pahihti Jejus mã tanhmã amnhĩ nhĩpēx to ho ri mẽ akôt ixpa. Nē ixkwý Ijaew kwý kot Jejus kapēr kaga hã mẽ omu nē ixkaprĩ nē inhmýr o ixpa. Nhũm prem Jejus ã ixtomnuj pa amnhĩ xà htỳx kamã ijamak o ri mẽ hkôt ixpa.

20 Nom arĩ ri Tĩrtũm kapēr o mẽ ajahkre ho ri mẽ akôt ixpa rãhã nē aa hkaga hkêt nē. Mē anhōrkwý kamã nē mẽ ahkre xà hã ixkre kamã. Mē ate tãm amnhĩ nhĩpēx prãm xaj pa pre ã mẽ ajahkre mex anhýr rãhã ho ri mẽ akôt ixpa.

21 —Nē mẽ ixpê Ijaewjê mẽ mẽ apê Ijaew kêt xwýnhjê mẽ pa pre mẽ ajahkre ho axpên pyræk. Mẽ apiitã mẽ ate amnhĩ tomnuj kaga nê hpãnhã Tirtũm kôt amnhĩ nhĩpêx kaxyw. Nê amnhĩ kaxyw mẽ panhõ Pahihti Jejus Kris kôt ajamxpêr kaxyw na pa pre mẽ akôt ri mẽ ajahkre rãhã ho ri ixpa.

22 —Tã ra Tirtũm Karõ kot akupým Jerujarê hwýr inhmên jakamã pa kormã hwýr mō. Kot paj hwýr pōj nhũm krĩ nhõ xwýnhjaja Jejus ã ixtomnuj nê nom tanhmã mẽ kot ixtoja kukamã ixte ixprĩ hã ixàhpumunh kêt.

23 Ja pix na ixte omunh. Na pa hte nhýri pōj nhũm htem Jejus ã ixpynê nê mẽ hagjênh xà kamã ijagjê nê tanhmã inhĩpêx to. Tirtũm Karõ na pre ra ã mẽ kot inhĩpêx anhýrja kukamã inhmã mẽ harê. Jakamã ixte amnhĩ kukamã amnhĩ tã ixàhpumunh mex. Kot paj xep akupým Jerujarê hwýr pōj nhũm mẽ ixpumu nê Jejus ã tanhmã inhĩpêx to.

24 Tã no pa amnhĩ kamã ixkahak kêt o inhmã mẽ uma hkêt nê. Koja mẽ kãm ixpĩr prãm nê mãmri xipi. Inhmã ixtyk puma hkêt. ãm mẽmoj pixi na inhmã hprãm. Ra Pahihti Jejus kot mẽmoj tã inhmã karõ xàja na inhmã kormã ixtĩr ri hatur xàm mẽnh prãm. Tirtũm kãm mẽ pajapê hã kot mẽ pahto mex prãm xàj mẽ pahwýr Kra Jejus mẽnh nhũm mẽ panê tanhmã amnhĩ nhĩpêx to hã harênhja

na inhmã mẽ piitã mẽ kãm harênh jatur xàm mẽnh prãm.

25 —Tã e ixkràmnhwýjaja. Na pa pre mẽ akôt mẽ ajahkre rãhã ho ri ixpa. Mẽ ate Jejus kôt amnhĩ nhĩpêx mex rãhã ho ri apa kaxyw. Tã kot puj pêr mẽ axte axpên pumunh kêt nê.

26-27 —Na pa pre ra mẽ amã Tirtũm kapêr piitã harênh pa. Mẽ ate mar týt nê hkôt pix mã amnhĩ nhĩpêx o apa kaxyw. Jakamã koja mẽ anhõ krĩ nhõ xwýnhjê hõ amnhĩ kaxyw Jejus kôt hamxpêr prãm kêt nê rĩ tãm. Kwãr mãmri kot amnhĩ tomnuj kamã ty nê arĩ tãm amnhĩ pumu no ãm kê amnhĩ tã tanhmã inhmã nê hkêt nê.

28 —E mẽ ate Kris kwý jahkre ho apa xwýnhjaja. Kêr ka mẽ amnhĩ pumunh mex o ri apa. Nê mẽ kot Jejus kôt amnhĩ xunhwýr xwýnhjê jamãr mex o ri apa. Ja kaxyw na pre Tirtũm Karõ mẽ kaxyw mẽ axunhwý. Tirtũm Kra Jejus kot htyk o Tirtũm mã mẽ pahte amnhĩ tomnuj piitã hpãnhã amnhĩrer pa jakamã kêr ka mẽ kãm mẽ omunh mex o ri mẽ hkôt apa. Te ôwêhti jamãr xwýnh kot ôwêhti jamãr mex o ri pata pyræk.

29 —Kot paj ma mō nhũm mẽmojjaja ixpãnhã mẽ awýr pōj nê mẽ ate Jejus kaga hprãm xàj tanhmã mẽ amã hêx to ho ri mẽ akôt pa.

30 Nê mẽ akwýjaja mẽ urà nê tanhmã hamxpêr punuj to nê mẽ ate Jejus kaga hprãm

xàj hêx rom tanhmã mẽ amã kapêr to ho ri mẽ akôt pa.

³¹ Jakamã kwa mẽ o kora. Kêr ka mẽ axkãm ajamakrom nê ri apa. Kê jajaja nhÿrmã ã mẽ amã kapêr anê ka mẽ ama nê mẽ hkôt ajamexpêr kêt nê. Mẽ ate mẽ mar nê mẽ hkôt ajamexpêr pymaj na pa pre mẽ akôt ri mẽ ajahkre ho ri ixpa hã ixtã amgrã axkrunêpxi. Arĩgro hã nê kamàt kãm mẽ ajahkre rũnh o ri ixpa. Nê mẽ ate mẽ amã mẽ hêx xwÿnhjê hkôt amnhĩ xunhwÿr pymaj mẽ ajahkre pê te inhmÿr pyrãk o ri mẽ akôt ixpa.

³² —E kot paj Tĩrtũm nhĩhkram mẽ ajagjênh pa. Koja mẽ atãnopxar o ri mẽ akôt pa nê mẽ akutã nojarêr rãhã ho pa. Hãmri ka mẽ ãm hkôt pix mã amnhĩ nhĩpêx. Jao Jejus kaga hkêt nê. Hãmri nhũm nhÿrmã Tĩrtũm mẽ pahpê hkrajê piitã tanhmã mẽ pahto mex to.

³³ —Na pa pre mẽ akôt ixpa ry htã no ãm aa mẽmoj tã mẽ awÿr kêt nê. Mẽ axê hkwÿ hã mẽ awÿrÿ mẽ akãxpore hã mẽ awÿr o ri ixpa hkêt nê.

³⁴ Na pa pre amnhĩ pa kukwak ri amnhĩm ixujaprôr pê ixàpkur o ri mẽ akôt ixpa. Nê ixkôt mẽ pa xwÿnhjê mã ixujaprôr o ri ixpa. Ra mẽ ate ja hã ixpumunh mex.

³⁵ —Tã mẽmo kaxyw na pa pre ã mẽ akôt amnhĩ nhĩpêx anhÿr o ri ixpa? Nà mẽ ate ja hã ixpumunh nê ixpyrà nê ã amnhĩ nhĩpêx anhÿr o ri apa kaxyw. Nê ixpyrà nê

tanhmã mẽ kute xwÿnhjê ho ajuta hto ho ri mẽ apa kaxyw. Na pre Pahihti Jejus ja jarênh o: “Koja mẽhõ amã mẽmoj gõ ka amnhĩm apy nê akĩnh nê. Nom kot kaj kam nhãm mẽhõ mã mẽmoj gõ hãmri nê akĩnh tÿx o ate mẽhõ mã mẽmoj nhõrta jakre.” Anê.

³⁶ Na pre ã Pawre mẽ kãm ujarênh anhÿr pa hãmri pa mẽ ra inhnojarêr. Hãmri nhũm mẽ piitã hkõnkrã ho hkrĩ pa nhũm Pawre mẽ ho Tĩrtũm wÿ.

³⁷⁻³⁸ Hãmri nhũm mẽ piitã kãm Pawre hkĩnh tÿx jakamã mÿr rax o kuhê. Tee ri kot axte mẽ kot axpên pumunh kêt ã mẽ kãm amnhĩ jarênhja ma nê hkaprĩ htÿx nê. Nê hkaprĩ xàj kahti hkôt hamÿ nê mur. Hãmri nê ma Jerujarê hwÿr hkujaêk kaxyw mẽ ixkôt pàr wÿr hkaprĩ nê mẽ ixkôt mÿr o mō.

21

Pawre kot Jerujarê hwÿr hpòx ã harênh

¹ Tã pa mẽ gô mÿri Jejus kôt mẽ ixtôjê re nê pàr krem agjê nê axte mō. Ma gô hipòk pê Kosti hwÿr ixkatàt kôt mō nê hã ajêr. Hãmri nhũm apkati pa mẽ axte hamũ mō nê hpãnhã gô hipòk pê Roxti hwÿr mō nê hwÿr pøj nê hã pàr xi. Hãmri nê hpãnhã axte krĩ pê Patar wÿr mō.

² Hãmri nê hwÿr pøj nê pàr rũm ijapøj nê pàr õ pumu. Nhũm ra pyka pê Wênĩs wÿr nojarêr pa mẽ hwÿr agjê nê ma kamã axte mō.

³ Mõõ nē amým amnhĩ kukamã gô hipôk pê Sipre pumu. Hãmri nē upôk rŭm hakrenh mã mō nē pyka pê Sir wÿr mō nē kamã Xir hwÿr pôj nē hã pàr nhô. Pàr pãm kot krĩ kamã pàr kukrêx rer kaxyw pa mē kormã hã ajêt nē tokyx axte nhãm inhmôr kêt nē.

⁴ Hãmri pa mē kutêp api nē krĩ kamã mē kot Jesus kôt axpên to htô nē htôx xwÿnhjê japêr o mō. Hãmri nē nhÿri mē omu nē mē hkôt ri ixpa ho ixtã ù semãn. Nhũm prem Tirtũm Karõ nhÿ hã Pawre mã kapêr nē kãm:

—Kwa Pawre mē inhma. Kot ka Jerujarê hwÿr pôj nhũm xep mē kãm akurê xwÿnhjaja tanhmã anhîpêx to. Tirtũm Karõ na ã akukamã mē inhmã ajarênh anê. Jakamã kwa hwÿr amôr kêt nē. Na pa mē tee ri akukamã ijamaxpêr. Anê.

⁵ Hãmri nhũm amnhĩ tã mē kuma nē âm mē kuma nē Jerujarê wÿr hkrã kamã hihtÿx nē. Jakamã nhũm semãn hapêx pa mē axte inhnojarêt. Axte Jerujarê hwÿr kormã inhmôr kaxyw inhnojarêt. Nhũm Jesus kôt mē ixtôjaja mē kot mē ixkujaêk kaxyw piitã pàr wÿr mē ixkôt mō. Mē hprõ nē mē hkrajê mē nhũm mē pimràatã mē ixkôt mō. Hãmri pa mē pàr wÿr pôj nē gô mÿ ri xpiitã ixkônkrã ho ixkrĩ hpa nē amnhĩ to Tirtũm wÿ.

⁶ Hãmri nē mē kãm amnhĩ jarênh pa nē mē noo mã pàr krem agjê nē ma axte

mō nhũm mē awjanã nē ma akupÿm ôrkwÿ hwÿr hapêx. Hãmri pa mē kurũm kormã ma Jerujarê hwÿr mō.

⁷ Mõõ nē krĩ pê Poremax wÿr pôj nē hã ajêt. Hãmri nē pàr rŭm ijapôj nē axte krĩ kamã Jesus kôt mē ixtô nē mē ixtôxjê japêr o mō nē nhÿri mē omu nē mē kuri amnhĩm hikra.

⁸ Tã nhũm apkati pa mē axte mō. Pãnhã ma krĩ pê Sejarej wÿr mō. Hãmri nē hwÿr pôj nē Firipti kuri pôj. Firiptija kormã nyw ri mē kot Jerujarê kamã mē mjên htyk xwÿnhjê mã mē apkur xà nhôr ho pa kaxyw mē ho 7 nē mē unhwÿr xwÿnhtajê hõ na pre. Tã hpãnhã kêp Tirtũm kapêr jarênh o pa xwÿnh.

⁹ Nhũm hkra nijaja kêp kwat. Piitã mjên kêt nē hkukrit rãhã pa. Mē kêp Tirtũm nhÿ hã kapêr o mē pa xwÿnh na pre mē. Jakamã pa mē mē kuri pôj.

¹⁰ Hãmri nē mē hkôt ri ixpa hã ixtã apkati grêre nhũm Akapô Jutej rŭm man mē ixwÿr môn pôj. Kêp Tirtũm nhÿ hã kapêr jarênh o pa xwÿnh na pre.

¹¹ Hãmri nē mē ixwÿr pôj nē Pawre pumu nē hkukamã kot tanhmã harênh to kaxyw hwÿr tèn kêp hprexà kapa nē ho amnhĩ te hpre nē ho amnhĩ pa hpre nē xa. Hãmri nē mē inhnoo mã Tirtũm Karõ nhÿ hã mē kot tanhmã hipêx to hkukamã kãm awjarê nē kãm:

—E kot kaj Jerujarê hwÿr pôj nhũm Ijaew xaptàr tũmjaja

apumu nê ã anhîpêx anê nê
apa hpre nê ate hpre hãmri nê
Ijaew kêt xwÿnhjê nhîhkram
ajaxà. Koja mẽ ã anhîpêx anê.
Anê.

12 Hãmri pa mẽ tee ri ã
ujarênh anhÿrja ma nê Pawre
kamã ixkahak tÿx nê ixkaprî
nê inhmÿr o ixkrî. Nê xatã kot
mê hwÿr môr nê kãm ixkapêr
kãm ixihitÿx nê kãm:

—Kwa mẽ ixkapêr ma
Pawre. Mẽ hwÿr amôr kêt o
mê hwÿr amôr kêt. Anê.

13 Hãmri nhùm mẽ inhmã:

—Tk. Kwa mẽ amÿr kêt nê.
Na pa mẽ apumu nê ixkaprî
nê. Nà kot paj ma mẽ hwÿr
mô. Kwãr mẽ mãmri Pahi-
hti Jejus ã tanhmã ixto rÿ hã
ixpî. Ixte amnhî kamã ixka-
hak kêt. Anê.

14 Hãmri pa mẽ tee ri mẽ
hwÿr môr nê hkurê kaprÿ nê
kãm:

—Tôe. Nà kam nê Tirtÿm
kãm hprãm xà hkôt mãmri mẽ
hwÿr mô rÿ mẽ hwÿr amôr
kêt nê. Anê.

15 Tã pa mẽ ra inhnojarêt
nê amnhî to ixpikuprôn pa
nê ma Pawre hkôt Jerujarê
hwÿr tã ma mô.

16 Hãmri nhùm Sejarej
kamã Jejus kôt mẽ ixtô
hkwyjaja ma mẽ ixkôt mô.
Pa mẽ môõ nê Jerujarê hwÿr
pôj. Hãmri nhùm mẽ ixkôt
mê môr xwÿnhjaja mẽ ixto
mô nê Mênasô nhôrkwy hwÿr
mê ixto pôj. Mênasôja Sipre
kamã na pre kato. Tã hpãnhã
Jerujarê hwÿr apha nê kamã
ri pa ho pa. Na pre ra Jejus kôt
amnhî xãm ã hã amgrà xohtô
nê. Tã pa mẽ kuri pôj.

*Pawre mẽ Xiakre wa
harênh*

*Atre 15.3-21; Wam Korî
9.19-22, 10.32-33*

17 Tã pa mẽ Jerujarê hwÿr
pôj nhùm Jejus kôt mẽ ixtôjaja
mê ixpumu nê hkînh nê.

18 Hãmri nhùm apkati pa
mê ma Pawre hkôt Xiakre
hwÿr mô. Nhùm mẽ kot
Tirtÿm kapêr o mẽ ahkre
xwÿnh piitã ra kuri akuprô
nê mẽ ixkutêp hkrî.

19 Jakamã nhùm Pawre mẽ
hwÿr axà nê mẽ kãm tanhmã
amnhî nhîpêx to ho pa hã
amnhî jarê nê mẽ kãm:

—Pa na ka mẽ rî akrî. E
ot pa axte mẽ apumunh mã
mô. Ixte mẽ amã amnhî
jarênh ã amnhî jarênh kaxyw.
Nà na pa pre ma Ijaew kêt
xwÿnhjê hkôt ixpa nê mẽ kãm
Jejus kot mẽ panê tanhmã
amnhî nhîpêx to jarênh o ri
mê hkôt ixpa. Nhùm Tirtÿm
inhîhkô hã ixkutã nojarêt
mex jakamã nhùm prem
inhma nê ohtô rax nê mẽ
pahpyrà nê Jejus kôt amnhî
xunhwÿ. Anê.

20-25 Hãmri nhùm mẽ Ijaew
kêt xwÿnh kwÿjaja kot Jejus
kôt amnhî xunhwÿr ã mẽ
harênh ma nê mẽ ÿ hã hkînh
nê mẽ hã Tirtÿm mã mex o
mex ã harê. Hãmri nê Pawre
mã kãm:

—Nà na pa prem ra mẽ
harênh ma. Hãmri nê mẽ
kãm kagà nhîpêx nê mẽmoj
tã mẽ kãm karô nê mẽ hwÿr
kumê. Mẽ kot omunh nê
kamã harênh nê hkôt amnhî
nhîpêx o pa kaxyw.

Na pa prem kagàja kamã mẽ
kot sãnti nhô hkur nê
mê hkurê.

Ně mry kamrô hkur nê mẽ
hkurê.

Ně mẽmo mry hpar nẽ
hkamrô runh kêt rãhã
hkur nê mẽ hkurê.

Ně mẽ kot amnhĩ prô pix
tãnopxar kaxyw mẽ
kãm hã karõ.

Ně mẽnijaja kot amnhĩ mjên
pix tãnopxar kaxyw mẽ
kãm hã karõ.

Ně nhãm mẽ kot axpên
to amnhĩkati nê mẽ
hkurê.

Ã na pa prem ja hã kagà nẽ
mẽ hwÿr mẽnh anẽ. Jakamã
e mẽ inhma. Na ra mẽ
pahpê Ijaew kwÿjaja ohtô rax
kumrêx nẽ mẽ pahpyrà nẽ Je-
jus kôt amnhĩ xunhwÿ. Mãn
ka pre mẽ harênh ma. Na
htem Jesus kôt amnhĩ nhĩpêx
o pa jao mãânên Tĩrtũm nhỹ
hã Mojes kapêr kôt amnhĩ
nhĩpêx mex o pa. Tã nhỹri
mẽ kot tanhmã ato hêx to
hã ajarênh ma. Na ka xep
hte Ijaew kêt xwÿnhjê nhõ krĩ
kamã pøj hãmri nẽ mẽ õ krĩ
kamã Ijaew kwÿjê pumu nẽ
mẽmoj nê tanhmã mẽ kãm
akapêr to ho ri apa. Nom
Ijaew kêt xwÿnhjê mã ka xep
hte ã mẽmoj nê akapêr anhÿr
kêt nẽ. Âm Ijaew mã pix
mã ka xep hte mẽ kot fi-
nat Mojes kapêr kôt amnhĩ
nhĩpêx nê mẽ hkurê ho ri apa.
Ně mẽ panhĩgêr kot amnhĩ
nhĩpêx kuhpa hã mẽ kot mẽ
hkra my kwÿrýt kà jakàr nê
ka xep hte mẽ hkurê ho ri
apa. Nẽ mẽ kot mẽ panhĩgêr
kôt amnhĩ nhĩpêx nê ka xep
hte mãânên mẽ hkurê ho ri
apa. Mẽ kêp Ijaew tã ka xep
pre hte ã mẽmoj nê mẽ hkurê

anhÿr ho ri apa. Na prem
jar ã Ijaewjê mã ato hêx o pa
anẽ nhũm mẽ kuma nẽ mẽ
hkôt hamaxpêr kurê kumrêx.
Jao ra ate mẽ pahpê Ijaew
kot amnhĩ nhĩpêx kôt amnhĩ
nhĩpêx kêt ã akamnhĩx.

—Tã ra mẽ kot apôx ã
ajarênh mar jakamã tanhmã
kot kaj we mẽ kãm amnhĩ tã
axàprãr to? Nẽ tanhmã kot
kaj we mẽ noo mã amnhĩ
nhĩpêx to kê mẽ arĩ mẽ pahte
amnhĩ nhĩpêx kôt ate amnhĩ
nhĩpêx o apa hã apumu? E
na pa mẽ ra ijamaxpêr. Kot
ka ã amnhĩ nhĩpêx anẽ. Na ra
jar mẽ pahkwÿjaja kêp kwat
nẽ Tĩrtũm mã tanhmã amnhĩ
jarênh to jatur xãm mẽnh
kaxyw amnhĩ krã hkênh
mã. Jakamã e kêr ka ma
mẽ hkôt tẽ nẽ mẽ uràk nẽ
amnhĩ krã hkênh nẽ kam
nẽ mẽ ate amnhĩ krã kênhta
pãnhã amnhĩre. Kot kaj ã
mẽ hkôt amnhĩ nhĩpêx anẽ
hãmri nhũm mẽ pahkwÿjaja
arĩ mẽ pahte amnhĩ nhĩpêx
o ate amnhĩ nhĩpêx o apa hã
apumu nẽ mẽ kot ato hêx ã
apumunh kurê kumrêx. Nẽ
arĩ ate finat Mojes kapêr kôt
amnhĩ nhĩpêx o ri apa hã
apumu. Anẽ.

²⁶ Hãmri nhũm Pawre mẽ
kuma nẽ mẽ kãm:

—Tõe. Nà âm hãmri na ka
mẽ inhmã awjarê. Nà kot paj
ã amnhĩ nhĩpêx anẽ. Anẽ.

Jakamã nhũm apkati nhũm
ma mẽ kêp 4tajê o mỗ nẽ mẽ
mex kaxyw tanhmã amnhĩ
nhĩpêx to. Hãmri nẽ Tĩrtũm
mã amnhĩ jarênh xà hã ixkre
hwÿr mra nẽ agjê nẽ mẽ õ

patre mǎ mẽ amnhĩ jarẽ nõ kãm:

—E ot pa mẽ awýr mra. Na pa prem ra mẽmoj tǎ tanhmǎ Tĩrtũm mǎ amnhĩ jarẽnh to. Tǎ kot paj mẽ axte ixtǎ ũ semǎn hǎmri nõ hatur xǎm mẽnh kaxyw akupýn awýr mra nõ amǎ mẽmoj gõ ka mẽ inhmǎ Tĩrtũm mǎ agõ nõ hkõt kãm mẽ ijarẽ. Nẽ pa kot paj mẽ ixpiitǎ hpǎnhǎ amǎ amnhĩre. Anẽ.

Mẽ kot Pawre pynênh ǎ mẽ harênh

Atre 24.12

²⁷ Tǎ nhũm semǎnja hapêx kaxyw nhũm pika pê As rũm Ijaew kwýjaja ma mra nõ Tĩrtũm mǎ amnhĩ jarẽnh xǎ hǎ ixkre hwýr agjê. Hǎmri nõ kamǎ Pawre pumu nõ kamǎ gryk týx nõ hwýr hprõt nõ unê nõ tanhmǎ hkwýjê mǎ ho hêx to nõ ho kapêr punuj nõ. Nẽ mẽ kãm:

²⁸ —E mẽ amnẽ mra nõ jahti pumu. Na hte krĩ piitǎ hkõt ri mẽ pahkwýjê mǎ tanhmǎ ri hêx to ho pa. Tĩrtũm nhỹ hǎ finat Mojes kapêr nhũm mẽ kãm ho kapêr punuj o pa. Nẽ mẽ pahte Tĩrtũm mǎ amnhĩ jarẽnh xǎ hǎ ixkreja nhũm hte mǎânên tanhmǎ mẽ kãm ho kapêr punuj to. Mẽ pahpyrà nõ kêp Ijaew tǎ mẽ pahpê hkwý ho kapêr o pa. Tǎ ra axtem nõ amnhĩ kõt Tĩrtũm nhõ ixkre hwýr Ijaew kêt xwýnh kwýjê ho agjê. Mẽ kot hwýr gjêx kêt kumrêx tǎ nhũm axtem nõ amnhĩ kõt mẽ ho agjê. Anẽ.

²⁹ Na pre krĩja kamǎ Ijaew kêt xwýnh Topĩja Pawre hkõt pa nhũm mẽ omu. Kêp

Epes nhõ xwýnh nhũm mẽ kot pry ǎ Pawre hkõt pa hǎ omu. Tǎ hǎ ahtũm nõ Tĩrtũm mǎ amnhĩ jarẽnh xǎ hǎ ixkre kamǎ Pawre pumu nõ htýx amnhĩ kõt Topĩ ho ǎr ǎ hkamnhĩx nõ ǎ mẽ kãm harênh anẽ.

³⁰ Hǎmri nhũm mẽ kuma nõ Pawre kamǎ gryk týx nõ. Nẽ hwýr hprõt nõ unê nõ ixkre rũm ho kato nõ kêp hakwa kre kahê.

³¹⁻³² Hǎmri nõ ma o tẽ nõ htak rax nõ. Ra mẽ kot htak o hpĩr mǎ tǎ nhũm mẽhõja pôristi krǎhtũm wýr hprõt nõ kãm awjarẽ nõ kãm:

—Kwa o mũj mẽ ra kot axpên nhĩmex kaxyw pijapu ho kuhê. Anẽ.

Hǎmri nhũm tee ri kuma nõ pôristi hkwýjê mǎ anê nõ mẽ ma mẽ hwýr hprõt kurê kumrêx. Nhũm mẽ arĩ Pawre htak tǎ amnhĩ wýr mẽ omu nõ mẽ umaj kãm ure.

³³ Hǎmri nhũm pôristi krǎhtũm Pawre hǎ amýnê nhũm pôristijaja unê nõ kǎx o mẽ hkaxprexǎ ho axkrut nõ ho hkaxpre pa. Hǎmri nhũm mẽ hkrǎhtũm Pawre hǎ mẽ hkukja nõ mẽ kãm:

—Kwa mẽ atõ inhmǎ jahti jarẽ. Tanhmǎ na hixi te? Tanhmǎ na we amnhĩ tomnuj to hǎ na ka mẽ ǎ hipêx anê? Anẽ.

³⁴ Hǎmri nhũm mẽ kuma nõ piitǎ anhĩpê kǎxpê kãm tanhmǎ harênh to. Nom axpên kwým tanhmǎ ri kãm harênh to. Hǎmri nhũm tee ri hprĩ hǎ kot mẽ mar kaxyw hǎmri nõ pôristi mǎ anê nhũm mẽ kêp Pawre ho kato nõ ma

mě àpênh xà hã ixkre hwÿr o tẽ.

³⁵⁻³⁶ Hãmri nhũm Ijaew kwÿ ohtô nẽ pry hã axpên nhĩgãnh o hkôt mra. Nẽ gryk xà kapër punuj tÿx o mẽ hkôt mō nẽ kàx pẽ pōristi mã kapër nẽ mẽ kãm:

—Kwa mẽ apĩhti ri. Mexti hã. Mẽmo kaxyw na ka mẽ ri amã hapê ho apahti? Anẽ.

Jakamã nhũm pōristija tee ri mẽ kuma hãmri nẽ mẽ kot tanhmã ho pymaj kumÿ nẽ kÿx pẽ mẽ kệp kupẽ nẽ o mō. Jao ixkreja wÿr mẽ àpir xà hã ho àpir o mō.

³⁷ Nẽ kot ho àr kaxyw tã nhũm Pawre mẽ hkrãhtũm mã kãm:

—E pa amã mẽmoj jarẽ ka inhma. Anẽ.

Mẽ kapër o kãm kapër hãmri nhũm amnhĩ jaer pẽ kuma nẽ kãm:

—Kwa xà na ka mẽ ixpyrà nẽ Gresjê kapër o akapër?

³⁸ Na pa ixtÿx apê Ejit nhõ xwÿnh pẽ mẽ hpar o apa xwÿnhnta ã akamnhĩx. Ham na pre mẽ inhõ pahihti kutã amnhĩ xãm nẽ kot hkurê kaxàr kaxyw mẽ ho ajuta xwÿnhjê ho 4.000 nẽ mẽ hkurê nẽ ma kapôt ã mẽ o pa. Nom tãm na xep Gresjê kapër o kapër kêt nẽ. Anẽ.

³⁹ Hãmri nhũm Pawre kãm:

—Nà ixpê Ejit nhõ xwÿnhnta kêt. Ixpê Ijaew na pa. Pyka pẽ Siris kamã krĩ rax pẽ Tas kamã na pa pre ixkato. E xà kot paj ixkôt mẽ mōr xwÿnh něj mã ixkapër nà? Anẽ.

⁴⁰ Hãmri nhũm kãm:

—Tõe. Kam nẽ mãmri tanhmã mẽ kãm akapër to. Anẽ.

Hãmri nhũm mẽ àpir xàta ã kÿx pẽ mẽ mÿri xa nẽ kãnhmã mẽ kãm ìhkra pẽ nhũm mẽ omu nẽ hpinhkrênh pa nhũm mẽ kãm amnhĩ jarẽ.

22

Pawre kot kãm hkurê xwÿnhjê mã amnhĩ jarênh

Atre 9.1-19, 26.1-23

¹⁻² Nhũm Pawre amnhĩ kwÿ Ijaew kapër o mẽ kãm kapër nẽ mẽ kãm:

—E ixkwÿjaja. Pa mẽ amã amnhĩ jarẽ ka mẽ inhma. Anẽ.

Hãmri nhũm kot mẽ kapër o kapër ma nẽ hpinhkrênh pa nẽ akryk mar o kuhê nhũm mẽ kãm:

³ —Nà ixpê mẽ anhĩõ na pa. Ijaxwÿja ixpê Ijaew. Pyka pẽ Siris kamã krĩ pẽ Tas kamã na pa pre ixkato no ãm jar Jeru-jarẽ kamã na pa pre ixaptàr. Kamariew na pre hte ijahkre ho pa. Finat Mojes kot Tĩrtũm nhÿ hã mẽ panhĩgêtjê mã kapërja nhũm pre hprĩ hã ho ijahkre ho pa. Na pa pre mẽ apyrà nẽ inhmã Tĩrtũm kôt amnhĩ nhĩpêx prãm nẽ.

⁴ —Jakamã na pa pre mẽ pahkwÿ kot Jesus kôt amnhĩ xunhwÿr xwÿnhjê japêr o ixpa nẽ nhÿri mẽ kãm ixkato nẽ mẽ unê. Mẽmyjê pynê nẽ mēnijê pynê. Hãmri nẽ mẽ kot mẽ hpar kaxyw mẽ hagjênh o ri ixpa.

⁵ Na pa pre ã mẽ hipêx o ri ixpa anẽ. Mẽ panhõ patre maati nẽ mẽ àptàr tũmrejaja

ra mẽ kot ja hã ixpumunh mex. Mẽ tãmjaja na prem krĩ pê Tamas kãm mẽ pahkwỳjê kaxyw kagà nhĩpêx nê inhmã kugõ pa kupy nê ma mẽ hwỳr o mõi. Ixte mẽ õ krĩ kamã Jesus kwỳjê pynênh par nê man akupỳn Jerujarê hwỳr mẽ ho inhmõr nhũm mẽ kot tanhmã mẽ ho kaxyw.

6 –Tã ra myt apha pa mẽ hwỳr ixãhtêp o mõi. Puh nhũm kaxkwa rũm hirã rax kumrêxja ixwỳr wrỳ nê ixtã ajêt pa hipõk ri xa.

7 Hãmri nê umaj pykap tẽm nhũm mẽhõ kapêr nê inhmã: “Pa Sawti? Hêxta waa nê. Kwa mon ka hte axtem nê ixtomnuj tỳx o ri apa?” Anê.

8 Hãmri pa kãm: “Kwa mẽ atõ na ka ri ã inhmã akapêr anê pahihti?” Anê nhũm inhmã: “Ixpê Najare nhõ xwỳnh Jesus. Pa na ka hte ixpê ixkõt mẽ kot amnhĩ xunhwỳr xwỳnhjê homnuj tỳx o ri apa. Jao te pa ixtomnuj pyrãk.”

9 –Anhỳr o inhmã kapêr nhũm ixkõt mẽ pa xwỳnhjaja kuma no ãm hprĩ hã mar mex kêt nê. ãm hirã raxta pix pumu.

10 Tã pa kãm: “No tanhmã kot pa we amnhĩ to Pahihti?” Anê nhũm inhmã: “E kãnhmã xa nê mãmrĩ ma Tamas wỳr mõi. Kot kaj hwỳr põi nhũm mẽhõ awỳr tẽ nê mẽmoj tã amã karõ ka ama nê hkõt amnhĩ nhĩpêx.” Anê.

11 –Nhũm pre ã inhmã kapêr anê. Hãmri pa hirã rax pumunh o ixãm kurê ra inhno hkre nê ixrĩt kêt nhũm ixkõt mẽ pa xwỳnhjaja ixpa hã

ixpy nê ma Tamas wỳr ixto mõi nê ixto põi.

12 –Tã nhũm Tamas nhõ xwỳnh pê ãnãnĩsti ixwỳr tẽ. Na pre hte Tĩrtũm kapêr ã kagà htũm kõt amnhĩ nhĩpêx mex nhũm Tamas kamã Ijaew piitã kãm hkĩnh nê xpênh mã mex ã harê.

13 Jakamã nhũm ixwỳr tẽ nê inhmã: “Pa Jesus kõt ixtõ Sawti? E akupỳm rĩt.” Anhỳrja kõt pa akupỳm ixrĩt mex kurê kumrêx nê omu.

14 Hãmri nhũm inhmã: “Nã mẽ panhĩgêjtê nhõ Tĩrtũm na amnhĩ kaxyw ata. Ate kapêr mar nê hkõt tanhmã amnhĩ nhĩpêx to ho apa kaxyw. Nê ate kaxkwa kamã Kra mex pumunh nê kapêr mar kaxyw. Tã ka xep ham hirã rax kamã omu nê kapêr ma.

15 Jakamã kêr ka ma mẽ piitã mẽ kãm ate omunh xwỳnhja jarênh o ari mẽ hkõt apa. Nê mẽ kãm kapêr jarênh o mẽ ahkre ho ri apa.

16 E tokyx kãnhmã xa nê Jesus mã amnhĩ jarê nê hkõt amnhĩ xãm kê anê ate amnhĩ tomnuj rênh pa. Hãmri pa apê hkwy hã akrã kumrã ka ma mẽ kãm kapêr jarênh o ri apa.” Anê.

–Nhũm pre ã ãnãnĩsti inhmã kapêr anê.

17 –Tã pa man akupỳn jar Jerujarê hwỳr mẽ awỳr mõi. Hãmri nê jar Tĩrtũm mã amnhĩ jarênh xã hã ixkre kamã kãm amnhĩ jarênh o ixãm rôm axte mẽmoj pumu.

18 Nhũm Jesus axte ixwỳr kato nê xa nê inhmã kapêr nê inhmã: “E inhma. Jerujarê nhõ xwỳnhjaja kãm ixkapêr

mar prām kêt jakamā kot kaj mē kām ixkapēr jarē nhūm mē amar kêt nē. Jakamā kwa tokyx akato nē hpānhā ma nhỹhỹm mō.” Anē.

—Hāmri pa tee ri ā kapēr anhỹrja ā kuma nē kām:

19 “Kwa nà koja mē inhma Pahihti. Ra mē kot ixte amnhĩ nhĩpêx ā ixpumunh mex. Ixte amnhĩ nhĩpêx tūmta kôt mē kot ixpumunh mex. Na pa pre hte krĩ piitā hkôt mra nē Tirtūm kapēr o mē ahkre xà hā ixkre kamā mē kot akôt amnhĩ kaxyw hamaxpēr xwýnhjê pynê nē mē htak nē mē hagjênh xà kamā mē hagjê nhūm mē kot ja hā ixpumunh mex.

20 Nhūm mē kot akapēr jarēnh o pa xwýnh Estewāw pĩrta pa pre hā mē omu nhūm ja inh mā mex pa mē kām mē hinôkà jamýnh o hā mē omunh o xa. Na pa pre ā amnhĩ nhĩpêx anhỹr o ri ixpa. Tā hpānhā akôt amnhĩ xām hāmri nē akôt amnhĩ nhĩpêx o ri ixpa. Jakamā koja mē ixte amnhĩ nhĩpêx nyw ā ijarēnh ma nē kām ixkapēr mar prām nē.” Anē.

21 —Pa pre ā Jejus mā amnhĩ jarēnh anē nhūm inh mā: “Nà. Kêr ka māmri krĩja rūm akato nē ma nhỹhỹm mō. Kot paj hpānhā ma Ijaew kêt xwýnhjê hwýr amē ka hpānhā ma mē hwýr mō nē mē hkôt mē kām ixkapēr jarēnh o ri apa.” Anē.

22 Nhūm pre Pawre ā amnhĩ hkwýjê mā amnhĩ jarēnh anē nhūm mē arĩ mar o kuhê rāhā Ijaew kêt

xwýnhjê jarēnh ma nē kamā gryk tỳx nē. Ijaew kêt xwýnhjaja kot mē urāk nē Tirtūm kapēr marja nhūm mē kām hprām kêt jakamā nhūm Pawre ā mē harēnh anē nhūm mē kuma nē kamā gryk tỳx kumrêx. Nē gryk xàj kapēr punuj nē kapēr o:

—Kwa mē māmri apĩhti ri. Ām hpĩr mā htāmti kênā. Anē.

23 Hāmri nē gryk xàj amnhĩ nhĩnôkà hkwry nē ho apê nē pyka jamý nē kànhmā ri ho ahkapê.

Pawre kot pôristi krāhtūm mā amnhĩ jarēnh

Atre 16.35-39

24 Hāmri nhūm pôristi krāhtūmja tee ri ā mē kot amnhĩ nhĩpêx anhỹr ā mē omu nē mē kapēr ma nē pôristijê mā kapēr nē mē kām:

—Kwa tanhmā na we jahti amnhĩ tomnuj to nhūm mē ā kamā gryk tỳx anē? E mē tokyx ixkre hwýr ho axà nē mē htak xà ho htak kê mē pamā tanhmā amnhĩ jarēnh to. Anē.

25 Hāmri nhūm mē kuma nē ho axà nē htak kaxyw kormā hpre ho xa. Hāmri nhūm pôristi krāhtūm nhō kôwenatôja mē hkôt axà nē hā mē omunh o xa nhūm Pawre omu nē amnhĩ tā kām kapēr nē kām:

—Kwa kormā ixte tanhmā mē amā amnhĩ jarēnh to hkêt tā ka mē ixtak kaxyw. Ixpê Ijaew tā määnēn ixpê Rôm nhō xwýnh kênā. Xà na htem ā Rôm nhō xwýnhjê nhĩpêx anē? Anē.

26 Hāmri nhūm tee ri ā amnhĩ jarēnh anhỹrja ā kuma

ně pôristi krähtümja wÿr hprôt në kãm:

—Kwa taxy pu mẽ tanhmã ho hkêt në. Xep kêp Rôm nhõ xwÿnh kênã. Anë.

²⁷ Hãmri nhũm tee ri kuma në Pawre hwÿr axà në kãm:

—Kwa xà ãm hãmri na ka amnhĩ jarê? Xà apê Rôm nhõ xwÿnh na ka? Anë.

Hãmri nhũm kãm:

—Tÿ. ãm hãmri ixte mẽ amã amnhĩ jarênh kênã. Ixpê Rôm nhõ xwÿnh na pa. Anë.

²⁸ Hãmri nhũm kãm:

—Kwa pa na pa pre amnhĩ to Rôm nhõ xwÿnh prãm xà amnhĩ pãnhã mẽ kãm amnhĩrer rax në. Anë.

Nhũm Pawre kãm:

—Tÿ nom pa na pa pre amnhĩ pãnhã mẽ kãm amnhĩrer kêt në. Inhĩpêxà hkôt ixpê Rôm nhõ xwÿnh na pa. Anë.

²⁹ Hãmri nhũm mẽ kuma në tee ri hamaxpêr o kãm ma në. Nễ kãm ma ho hk-aga kurê kumrêx. Nhũm mẽ hkrähtüm nhõ pahija mãânên kãm ma në. Kêp Rôm nhõ xwÿnh tã nhũm mẽ axtem në kot unênh në kax o hkax-preja mã hamaxpêr në kãm ma në. Na htem ã Rôm nhõ xwÿnhjê nhĩpêx anhÿr kêt në. Na htem tanhmã mẽ hkukjêr to në hprĩ hã mẽ kuma në rĩ kormã tanhmã mẽ hipêx to.

Pawre kot Ijaew xàptàr tũmrejê mã amnhĩ jarênh

Matêwre 23.27-28

³⁰ Tã nhũm apkati nhũm pôristi krähtümja Ijaew kwÿ ho akuprô. Mẽo patre maati në mẽ patre krähtümjaja në mẽ aptàr tũmrejaja nhũm kot mẽ

kãm tanhmã Pawre jarênh to kaxyw mẽ ho hpikuprôn pa. Hãmri në Pawre pê hkaxpre xà rê në ma mẽ hwÿr o tễ mẽ mẽ kutã ÿr.

23

¹ Hãmri nhũm mẽ omu në mẽ kãm amnhĩ jarê në mẽ kãm:

—E ixkwÿjaja. Pa mẽ amã amnhĩ jarê ka mẽ inhma. Na pa hte Tĩrtüm nom tãm amnhĩ nhĩpêx o ixpa në mẽ pahpê Ijaew mẽ pahte amnhĩ nhĩpêx kwÿm ri tanhmã amnhĩ nhĩpêx to hkêt në. Anë.

² Hãmri nhũm mẽ ô patre maati ãnãñisti kuma në kamã gryk në. Axtem ãnãñisti hõ na pre. Hãmri në ã Pawre kot amnhĩ jarênh anhÿrja ã kuma në kamã gryk në. Hãmri në mẽ kot mar o kuhê xwÿnhjê mã kãm:

—Kwa mẽ atõ hakwap hku-rahti ri. Tãm kot amnhĩ nhĩpêxti hã. Na ãm mẽ pamã amnhĩ to hêx o xa. Anë.

³ Hãmri nhũm Pawre kuma në hwÿr rit në omu në kãm:

—Nà ka koja Tĩrtüm akura kãm ga. Te ate finat Mojes kot ÿ hã kapêr kôt amnhĩ nhĩpêx pyràk tã ri axtem në ri mẽ kot ijakwap ixkuranh kaxyw ri mẽ kãm ixtã amÿnê. Anë.

⁴ Hãmri nhũm kuri mẽ kuhê xwÿnhja tee ri ã kãm kapêr anhÿrja ã kuma në kãm:

—Kwa kêp patre maati kênã kot ka kêt ri ã kãm akapêr anë. Anë.

⁵ Hãmri nhũm amnhĩ jaêr pê ja hã kuma në kãm:

—Kwa ixte ja hã omunh kêt jakamã na pa ã ixtÿx kãm

ixkapêr anê. Ixte kêp patre maati hã omunh ronhÿx pa ã kãm ixkapêr anhÿr kêt nê. Tirtûm kapêr ã kagà htûm kot ja nê mẽ pamã kapêr kênã. Mẽ pahte tanhmã mẽ panhõ pahì ho pakapêr punuj to nê mẽ pamã kapêr. Tã pa ãm ixtÿx ã kãm ixkapêr anê. Anê.

6-8 Hãmri nê hprĩ hã mẽ kot mar o hkrĩ xwÿnhjê pumu. Nhũm mẽ kamã Satusew nhõ xwÿnh kwÿ nê Parijew nhõ xwÿnh kwÿ. Satusew mẽ Parijew nhõ xwÿnhjaja na htem axpên kwÿm ri tanhmã mẽ htykjê jarênh to. Satusew nhõ xwÿnhjaja na htem mẽ htyk nê mẽ hkarõ mẽ ro hã mẽ hapêx o mẽ hapêx ã mẽ hkamnhÿx. Nê Tirtûm kapêr o mẽ wrÿk xwÿnh kêt ã mẽ harênh o pa. No Parijewjaja na hte mẽ kurom mẽ htyk nê akupÿm mẽ htÿr ã mẽ hkamnhÿx nê Tirtûm kapêr o mẽ wrÿk xwÿnh ã mẽ hkamnhÿx. Nhũm Pawre kot ja hã mẽ omunh jakamã tanhmã hamaxpêr to hãmri nê mẽ kãm kapêr. Na pre Parijew nhõ xwÿnhjê pyrà nê mẽ htyk nê akupÿm mẽ htÿr kôt hamaxpêr nê Tirtûm kapêr o mẽ wrÿk xwÿnh kôt hamaxpêr. Jakamã mẽ omu nê kàx pê mẽ kãm kapêr nê mẽ kãm:

—Nà ijaxwÿja ixpê Parijew nhõ xwÿnh. Nhũm inhÿpêêxà haxwÿja kêp Parijew nhõ xwÿnh. Jakamã na pa hte mẽ apê Parijew nhõ xwÿnhjê pyrà nê mẽ htyk nê akupÿm mẽ htÿr kôt ijamaxpêr. Tã ãm ja pix mÿrapê na ka mẽ

ixpynê nê ã inhÿpêx anê. Anê. Hãmri nhũm Parijew mẽ Satusew nhõ xwÿnhjaja kuma nê ja hã axpên kãm gryk nê. Nê hã axpên mã akir.

⁹ Hãmri nê ra axpên mã àkjêr rax nê. Hãmri nhũm Parijew kwÿ pê Mojes kapêr o mẽ ahkre ho mẽ pa xwÿnhjaja kànhmã kuhê nê mẽ kãm Pawre hã àprãr kãm hihtÿx nê mẽ kãm:

—Kwa pêr tanhmã kot amnhĩ tomnuj tore hã. Mãn ãm hpimtir kãm na pre ã ri kaxkwa kamã mẽmoj mar anê. Rÿ apu Tirtûm kapêr o wrÿk xwÿnh kãm tanhmã kapêr to nhũm pre Tamas wÿr pry kamã mar o xa rÿ ko. Anê.

¹⁰ Hãmri nhũm Satusew nhõ xwÿnhjaja tee ri Tirtûm kapêr o mẽ wrÿk xwÿnh kot kãm kapêr ã harênhja ma nê hã axpên mã àkjêr rax nê. Hãmri nhũm pôristi krãhtûmja tee ri mẽ kot axpên mã àkjêr ã mẽ omu hãmri nê pôristi mã kãm:

—Kwa mẽ Pawre hwÿr tẽ nê mẽ kêp utà nê ma akupÿm o tẽ nê haxà. Kot ka mẽ ho anhÿr kêt nhũm mẽ tanhmã hamaxpêr to nê gryk xàj axpên nhÿhkra kamã hkaxôn h pa. Anê.

Hãmri nhũm mẽ kuma nê hwÿr tẽ nê mẽ kêp utà nê akupÿm o tẽ nê ixkre hwÿr ho axà.

Jejus kot Pawre jamaxpêr o hihtÿx ã harênh

Atre 18.9-10

¹¹ Tã nhũm kamàt nhũm Jejus tãm Pawre hwÿr kato nê kãm:

—Pa Pawre? Kwa tee ri amnhĩ kukamã ajamexpër o amnhĩ kamã akahak kêt nê. Kot kaj te ra ate jar Jerujarê kamã mẽ kãm ijarênhta pyrà nê ma krĩ pê Rôm wÿr mō nê krĩ nhō xwÿnhjê mã ijarê. Anê.

Mẽ kot Pawre hã àmnênh ã mẽ harênh

Sikũn Ximotre 4.18

12-13 Tã nhũm apkati nhũm Ijaew kwÿjaja axpên wÿr akuprō. Měmyjaja kêp 40 nê axte hkôt mẽ hkwÿjaja axpên wÿr akuprō. Mẽ kot Pawre pĩr kaxyw hã axpên mar kaxyw hã akuprō nê hã axpên mã amÿnê nê axpên mã:

—Tôe. Nà kot puj mẽ hpĩr kaxyw amnhĩ jagri htÿx o paxàpkur kêt rãhã kupĩ nê rĩ kormã apku nê ixkō. Nà kot puj mẽ ho anê. Ra Tĩrtũm noo mã mẽ pahte ja hã amnhĩ jarênh kênã. Anê.

14 Hãmri nê mẽ ma mẽ õ patre krãhtũmjê mẽ mẽ àptàr tũmrejê hwÿr mra nê mẽ kãm hã amnhĩ jarê nê mẽ kãm:

—Ot pa mẽ amã amnhĩ jarênh mã mra. Nà kot paj mẽ tã Pawre pĩ. Kot paj mẽ kormã hpĩr kêt ri ixàpkur kêt rãhã kupĩ. Ra mẽ ixte Tĩrtũm noo mã ja hã amnhĩ jarênh xà hkôt.

15 Jakamã e mẽ inhma. Kêr ka mẽ axêx rom pōristi krãhtũm mã anê kê apkati kê man mẽ awÿr Pawre ho tẽ. Te mẽ ate aprĩ hã hkukjêr kaxyw pyràk o kãm axêx. Koja mẽ kormã mẽ awÿr ho hpōx kêt ri pa mẽ unên kupĩ. Anê.

16 Hãmri nhũm Pawre tãmnhwÿ mẽ kot ã hã amnhĩ jarênh anhÿrja ma hãmri nê ma pōristi xàpênh xà hã ixkrej wÿr Pawre hwÿr hprôt nê kãm mẽ harê.

17 Hãmri nhũm kuma nê amnhĩ wÿr pōristi krãhtũm nhÿ hã mẽ hamãr xwÿnh ã karō nê kãm:

—Kwa ma mẽ akrãhtũm wÿr ixtãmnhwÿta o tẽ kê kãm mẽmoj jarê nà? Anê.

18 Hãmri nhũm kuma nê ma hwÿr o tẽ nê kãm:

—E Pawre na inhmã anê pa awÿr htãmnhwÿ ho tẽ. Kot tanhmã amã ujarênh to kaxyw. Anê.

19 Hãmri nhũm omu nê hpa hã kupy nê o tẽ nê ahte mẽ hkàx ã o xa nê kãm:

—E mãmri inhmã mẽmoj jarê pa ama. Mẽmo na ka te inhmã harênh kaxyw? Anê.

20-21 Hãmri nhũm kãm:

—Nà Ijaew xàptàr tũmrejaja na mẽ kot inhĩgêt Pawre pĩr kaxyw hã amnhĩ jarê pa amã harênh o tẽ. Koja xep mẽ hã awÿ. Xep apkati nhũm ate ma mẽ hwÿr mẽ hkukjêr xà hã ixkre hwÿr ho amōr nhũm mẽ kot hprĩ hã kot amnhĩ nhĩpêx ã hkukjêr kaxyw. Nom koja mẽ ãm amã amnhĩ to hêx. Koja xep mẽ kêp 40 nê pry kamã kutêp amũxu nê kuhê. Na mẽ ra hã axpên mar pa nê axpên mã: “Kot puj mẽ paxàpkur kêt rãhã Pawre pĩ nê rĩ kormã apku nê ixkō.” Anhÿr o amnhĩ jarê pa mẽ kuma. Jakamã na mẽ kormã ate mẽ hwÿr mẽnh kaxyw akãm ama. Kwa mẽ hwÿr ho amōr kêt nê. Anê.

22 Hāmri nhūm kuma nē kām:

—Tôe. Nà na pa ra ama. Māmri ma akupÿm tē. Nom kêr ka inhmar kumrêx. Kêr ka nhām mēhō mā ja jarēnh kêt kumrêx. Ām kwarī ho kwarī. Anē.

Hāmri nhūm kuma nē kato nē ma akupÿm tē.

Mē kot Ijaew pymaj nhÿhÿm Pawre mēnh ā mē harēnh

23-24 Tā nhūm pōristi krāhtūmja amnhī wÿr ŷ hā pōristi jamār o mē pa xwÿnh wa ho hamēxkrut nē wa hā karō nē wa kām:

—E wa inhma. Koja kôt ā kamāt ka wa ma krī pê Se-jarej wÿr Pawre ho mō kê hkà hkīnh pê pahшти Peris wÿr pōj.

Nē amnhī kôt pōristi ho 200 nē o mō.

Nē kê mē kēp 70 nē kawar ā hkrī nē mē akôt mō.

Nē kê mē kēp 200 nē wapo jamÿ nē mē akôt o mō.

Kê mē ā ohtô rax anē.

Nē Pawre kot kawar ā ŷr nē mōr kaxyw ka mē kām hō ho mō.

E kêr ka mē ā axohtô nē hkôt amōr anē kê hkà hkīnh pê pahшти Peris wÿr pōj. Anē.

25 Hāmri nē pahшти Peris mā kagà nhīpêx nē kamā kām Pawre jarē nē kām:

26 Pa pahшти Peris? Xà amex? Ixpê Kraw Risas na pa awÿr kagà mē.

27 E ot pa awÿr Ijaew pê Pawre mē. Na pre hkwyja kot hpīr kaxyw unēnh tā pa määnēn kēp Rōm nhō xwÿnh ā harēnh ma hāmri

nē hwÿr inhō pōristi rē nhūm mē hwÿr hprōt nē mē kēp utà.

28 Hāmri nē Ijaew xàptār tūmrejê hwÿr o tē. Mē kot inhmā tanhmā kot amnhī tomnuj to hā harēnh kaxyw.

29 Tanhmā kot amnhī tomnuj to nhūm mē kot haxàr rÿ hpīr ronhÿx ja mex nē. No xep ām kot mē higêtjê kot amnhī nhīpêx kôt amnhī nhīpêx kêt pix mÿrapê na mē kamā gryk.

30 Tā pa mē kot hpīr kaxyw hā mē harēnh ma nē mē umaj awÿr kumē. Hāmri nē kamā mē gryk xwÿnhjê mā ajarē. Jakamā koja mē mēmo arīgro hā awÿr pōj nē tanhmā kot amnhī nhīpêx to hā amā harē ka kam ja hā mē ama nē tanhmā ho.

Tā ām ja pix na pa amā harē. Ixpê Kraw Risas na pa awÿr kagàja mē. Tā mān ka arī ixte amā harēnhja ma. Anē.

31 Tā nhūm kamāt nhūm mē hkrāhtūm kot mē kām karō xà hkôt nhūm pōristijaja ma Pawre o mō. Hāmri nē krī pê āxipat wÿr pōj nē kamā amnhīm hikra.

32 Nhūm apkati nhūm mē kot mē hkôt pykap mōr xwÿnhjaja mē ō pahi kot mē kām hā karō xà hkôt awjanā nē ma akupÿm mō nhūm kawar ā mē mōr xwÿnh pixjaja ma Pawre ho mō.

33 Hāmri nē mō nē Se-jarej wÿr pōj nē pahшти Peris nhīhkram Pawre jaxà nē kām kagàja gō nē awjanā nē ma akupÿm hapêx.

³⁴ Hāmri nhūm Perisa kagāja py nē omu. Nē omunh pa nē Pawre mā kām:

—E inhmā amnhī jarē. Tanhmā na anhō pyka hixi te? Anē.

Nhūm kām:

—Kêp Siris. Anē.

³⁵ Nhūm kām:

—Tōe. Kê mē kot ato kapēr xwỳnhjaja pōj pa kormā ixprī hā mē kot tanhmā ajarēnh to ma măn. Anē.

Hāmri nē ō pōristi mā anē nhūm mē ma Pawre o tē. Ma pahi Erox htyk xwỳnh nhōrkwỹ hwỳr o tē nē kamā haxà nhūm hkrī ho hkrī.

24

Ijaew kot tanhmā Pawre ho kapēr punuj to hā mē harēnh

Rukre 21.12-13; Atre 25.7

¹ Tā nhūm arīgro kêp 5 nē hapêx nhūm Ijaew kwỳjaja Sejarej wỳr pōj. Mē ō patre maati ânānīsti nē Tetur nē kaxyw mē aptār tūmrejaja nhūm mē ma hwỳr mō nē pōj. Tetur kêp axiwōkat ā mē yr pē kapēr xwỳnh jakamā nhūm mē kot tanhmā Pawre o kapēr punuj to kaxyw pahi Peris wỳr amnhī kôt o mō.

² Hāmri nhūm mē amnhī wỳr Pawre hā karō nhūm pōristi haprō nē mē hwỳr o tēn ho axà. Hāmri nhūm Teturja pahihti Peris mā Pawre kot tanhmā amnhī tomnuj to hā harē nē kām:

—E pahihti inhma. Nà na ka hte tām mē inhīpêx nē mē ixto mex o apa. Jakamā nhūm hte nhām pika hkwỳ nhō xwỳnhjaja mē ixkurē kaxàr kaxyw mē ixwỳr hprōt kêt

nē. Pa htem ixpiitā akukwak ri ijamakêtkati nē ixàmnhīx inhmex nē ixpa.

³ Nē mē ixkīnh rāhā ho ixpa. Hêxta waa nē. Mē ixpiitā inhmā akīnh.

⁴ E kot paj amā awjarē ka inhma. Kot paj ixujarēnh o hakotre ka inhma nē tokyx ma akupỹm tē.

⁵ Nà Pawre na hte amnhī tomnuj pix o pa. Kêp Jejus pē Najare nhō xwỳnhhta kôt amnhī nhīpêx o mē pa xwỳnhjê nhō pahi na. Jakamā na hte pyka piitā hkôt mē ixpê Ijaew tanhmā axpēn kaxyw mē ixkryx to ho pa.

⁶ Jāã na pre Tīrtūm mā amnhī jarēnh xà hā ixkre hwỳr amnhī kôt mē kêp Ijaew kêt xwỳnh kwỳjê ho agjê nē mē ixpê ixkreja omnu kaxyw mā tā pa mē omu nē unē.

⁷ Tā nhūm pōristi krāhtūm Risasja mē ixpê utà

⁸ nē awỳr mē ixte tanhmā amā harēnh to xwỳnhjê rē. Tā ot pa mē ixkrī. Nē ota Pawre nhỹ. Kam kot amnhī nhīpêx ā hkukja kê tanhmā amā amnhī jarēnh to ka ama nē ixte amā harēnh xà hkôt tanhmā mar to. Anē.

⁹ Hāmri nhūm Ijaew hkwỳ haxwỳja kām:

—Nà ãm hāmri na ã amā harēnh anē pahihti. Anē.

Pawre kot pahihti mā amnhī jarēnh

Rukre 21.14-19

¹⁰ Hāmri nhūm pahihti Peris Pawre mā anē nhūm kot kām amnhī tā aprār kaxyw kànhmā xa nē kām:

—Nà na ka ra inhõ pyka kamã mẽ ixto amnhĩptàr mex o atã amgrà xohtô nẽ pahihtì. Jakamã na pa pre ate ixkapër mar kaxyw ã ajarënh ma nẽ ixkĩnh nẽ.

11 —E kot paj amã amnhĩ jarë ka inhma. Ham na pa pre Jerujarë hwÿr mō nẽ pōj. Na pa hwÿr ixpōx ã ixtã arĩgro pē 12 pix. Kam nẽ ixtã ixkwÿjē kukja nẽ mẽ ama. Ixte Tĩrtũm mã amnhĩ jarënh xà hã ixkre kamã Tĩrtũm mã mex o mex ã harënh kaxyw na pa pre hwÿr mō.

12 No na pa pre nhÿri axpën kaxyw tanhmã ri mẽ hkryx to hkêt nẽ. Nẽ mẽ ixte Tĩrtũm mã amnhĩ jarënh xà hã ixkre kamã rÿ kapër o mẽ ahkre xà hã ixkre kamã rÿ nhÿri pry kamã tanhmã axpën kaxyw ri mẽ hkryx to hkêt nẽ. Æm amrakati ho amrakati.

13 Mẽ kot ã ri ijarënh anhÿrja amrakati kumrëx. Mẽhõ kot ã ixte amnhĩ nhĩpêx anhÿr ã ixpumunh kêt tã na htem amnhĩ krã hkôt amã ijarënh o hëx.

14 Na htem mẽ ixte Jejus kôt amnhĩ nhĩpêx xwÿnhjaja mẽ ixte amnhĩ nhĩpêx mex kêt ã mẽ ijarë nom kot anhÿr kêt. Æm mẽ inhĩgëtjē nhõ Tĩrtũm kapër nywja kôt na pa hte amnhĩ nhĩpêx mex o ri ixpa rãhã nẽ. Nhũm ixkwÿjaja htÿx axtem kapër õ hkôt ixte amnhĩ nhĩpêx o ixpa hã ixkamnhix no ãm kapër õ hkêt. Ijaxwÿja na pa hte mẽ uràk nẽ finat Mojes kapër ã kagà mar o ixpa. Nẽ Tĩrtũm nhÿ hã mẽ kapër o mẽ pa

xwÿnh kot kapër ã kagàja pa hte mẽ uràk nẽ hkôt amnhĩ nhĩpêx mex o ri ixpa.

15 Nẽ mẽ uràk nẽ Tĩrtũm kot nhÿrmã akupÿm mẽ ho htĩr kôt pa hte ijaxwÿja ijamaxpër tÿx nẽ. Mẽ htyk xwÿnh piitãã. Mẽ kot amnhĩ to mex xwÿnhjē mẽ mẽ kot amnhĩ tomnuj xwÿnhjē mẽ mẽ ho hpimràatã akupÿm mẽ ho htĩrja kôt pa hte mẽ uràk nẽ ijamaxpër tÿx o ri ixpa.

16 Jakamã na pa hte tãm amnhĩ nhĩpêx rãhã nẽ. Tĩrtũm noo mã nẽ mẽ piitã mẽ noo mã tãm ri amnhĩ nhĩpêx mex rãhã nẽ.

17 —Tã na pa pre pyka hkwy hkôt ri ixpa hã ixtã amgrà xohtô nẽ. Hãmri nẽ ma akupÿm Jerujarë hwÿr ixkwÿjē hwÿr mō. Amarĩ ixte mẽ kãm kãxpore hkwy nhõr kaxyw pa akupÿm mẽ hwÿr mō. Nẽ mãânën Tĩrtũm mã mẽmoj nhõr kaxyw.

18 Hãmri nẽ mẽ ixte amnhĩ nhĩpêx xà hkôt pa mẽ amnhĩ to mex pa nẽ ma tẽn Tĩrtũm mã amnhĩ jarënh xà hã ixkre hwÿr axà nhũm mẽ kamã ixpumu. Nom na pa pre ri ixkreja kamã tanhmã amnhĩ tomnuj to hkêt nẽ. Rÿtanhmã ixkapër punuj to hkêt nẽ. Na pa prem ãm inhgrère nẽ akryk ixkuhê nhũm mẽ ixpumu.

19 Pika pē As rũm Ijaew kwÿjaja na prem ixkre kamã ixpumu. Nar mẽ tãmjaja mãn awÿr mra nẽ tanhmã amã ijarënh to.

20 —Nẽ jar mẽ kot ixto kapër xwÿnhjaja. Na pa pre mẽ ãptàr

tũmrejê mã amnhĩ jarẽnh pa nhũm mẽ inhma nẽ tanhmã inhmã nẽ hkêt nẽ. Kam nẽ ja hã mẽ hkukja nẽ mẽ ama.

²¹ Rỳ ko. Koja apu mẽ amã ãm ja pix ã ijarẽnh japêr. Na pa pre mẽ kãm ixkapêr nẽ mẽ kãm: “Na pa hte mẽ htyk nẽ akupỹm mẽ htĩr kôt ija-maxpêr tỳx nẽ. Tã ja pix mỳrapê na ka prem ixpynê nẽ ã inhĩpêx anê.” Anhỹr o mẽ kãm ixujarẽnh jakamã nhũm apu mẽ hkwỳjaja kêp ja omnuj nẽ. Jakamã koja apu mẽ amã ja hã ijarẽnh japêr. Nom ja pix jarẽ. Anê.

Ã na pre Pawreja pahi Peris mã amnhĩ jarẽnh anê.

Peris mẽ hprõ wa kot Pawre mar ã wa harẽnh

²² Tã nhũm pahihti Peris kot mẽ kot Jejus kôt amnhĩ xunhwỳr xwỳnhjê kot amnhĩ nhĩpêx ã mẽ omunh mex jakamã hãmri Pawre mar pa nẽ ho kapêr xwỳnhjê mã kãm:

—Nà hãmri. Na pa ra mẽ ama. E mẽ mamrĩ ma mra. Kê pòristi krãhtũm Risasja mō nẽ pøj pa wa ixprĩ hã mẽ ate tanhmã harẽnh toja ma nẽ rĩ kormã tanhmã Pawre jarẽnh to. Anê.

²³ Hãmri nẽ hpãnhã pòristi pytãr xwỳnh mã Pawre jarẽ nẽ kãm:

—E mẽ ma akupỹm ixkre hwỳr o tẽ nẽ kamã hamãr o apa. No ãm kwãr mãmrĩ àmnhĩx ri ixkre kamã tanhmã amnhĩ to ho ri pa. Nẽ kê hkrãmnhwỳjaja mãmrĩ hwỳr mẽmoj to mra kê kuku. Anê.

Hãmri nhũm mẽ kuma nẽ ma o tẽ nẽ akupỹm ixkre

hwỳr ho axà nhũm kamã pa ho pa.

²⁴ Tã ra hã apkati grêre nhũm Peris mẽ hprõ wa ma Pawre hwỳr tẽ. Prõ haxwỳja kêp Ijaew. Hixi pẽ na pre Turujire. Jakamã nhũm wa ma Pawre nhõrkwỹ hwỳr wa tẽ. Nhũm Peris Pawre hã karõ nhũm kato nẽ wa hwỳr tẽ nẽ wa kãm awjarê. Tanhmã wa kot amnhĩ to nẽ amnhĩ kaxyw Jejus Kris kôt hamaxpêr nẽ hkôt amnhĩ xãm prãm xàj hprĩ hã wa kãm harê.

²⁵ Nẽ wa kãm:

—Nà na htem Jejus Kris kôt amnhĩ nhĩpêx nẽ tãm ri amnhĩ nhĩpêx o pa. Kãm tanhmã amnhĩ tomnuj to hprãm tã ho anhỹr kêt nẽ. Nẽ arĩ Jejus kot amnhĩ nhĩpêx kôt amnhĩ nhĩpêx o pa. Koja Tirtũm nhỹrmã mẽ pahpiitã mẽ pahte tanhmã amnhĩ nhĩpêx to ho papa hã mẽ pahpumunh xà hkôt tanhmã mẽ pajarẽnh to. Mẽ pahte tãm amnhĩ nhĩpêx xwỳnh ã mẽ pajarê rỳ mẽ pahte amnhĩ tomnuj xwỳnh ã mẽ pajarê. Anê.

Nhũm pre ã Pawre Peris mẽ Turujire wa kãm kapêr anê. Hãmri nhũm Peris tee ri ujarẽnhja ma nẽ kãm ma nẽ. Kot amnhĩ tomnuj o pa xwỳnh ã amnhĩ pumu nẽ ã kãm kapêr anhỹrja mar puma nẽ. Hãmri nẽ Pawre mã kãm:

—E hãmri. Nà na pa wa ra ama. Mamrĩ ma akupỹm tẽn axà. Kot paj mẽmo arĩgro hã mẽmoj to anhỹr kêt nẽ axte amnhĩ wỳr atã karõ ka axte

tanhmã wa inhmã axujarēnh to. Anē.

²⁶ Nē ht̄ȳx hamaxpēr o:

—Nà kot paj mēmo arīgro hã axte amnhĩ w̄yr hã karō kê ixw̄yr tē nē ixte kator prãm xàj inhmã amnhĩrer japēr. Anē.

Hãmri nē xatã amnhĩ w̄yr hã karō htã no nhũm aa kot kator kaxyw tanhmã kãm nē hkēt nē.

²⁷ Tã nhũm amgrà axkrut nē hapêx nhũm Pos Pesti pahi Peristi hpãnhã kêp mē õ pahi nē mē ho amnhĩptã. Jakamã nhũm Peris akup̄ym õ krĩ hw̄yr nojarēt nē Pawre mã ãhkra karo hkēt rãhã ma mō. Na pre hamaxpēr o:

—Nà kot paj Pawre kator nhũm Ijaew ja hã ijarēnh ma nē ixkamã gryk nē. Nà kwār mē hãgjēnh xã hã ixkre kamã hkrĩ ho hkrĩ. Kot paj kator kēt nē. Anē.

Hãmri nē kãm ãhkra karo hkēt rãhã ma akup̄ym õ krĩ hw̄yr mō. Jakamã nhũm Pawre arĩ ixkre kamã kêp prēs nē hkrĩ ho hkrĩ.

25

Pawre Rõm w̄yr hkrã ã harēnh

¹ Tã nhũm pahi nyw Pos Pesti krĩ pē Sejarej w̄yr mōn pōj. Hãmri nē kamã ri pa hã apkati axkrunēpxi pix nē ma Jerujarē hw̄yr mō.

² Hãmri nē hw̄yr pōj nhũm Ijaew kw̄yjaja omu nē hw̄yr mra nē kãm Pawre ho kapēr nē hã hw̄yr kurê kumrēx. Mēõ patre krãhtũmjê mē Ijaew xãptār tũmrejaja nhũm mē hw̄yr mra nē kãm:

³ —Pa pahihti? E ot pa mē aw̄yr mra. Kwa xã kot ka Pawre hã karō kê man aw̄yr mō ka jar kot tanhmã amnhĩ tomnuj to hã hkukja nē ama? Anē.

No ãm hêx rom ã hã kãm kapēr anē. Kot hã karō nhũm mē kot pry hã hp̄ir kaxyw nhũm mē hêx rom ã kãm kapēr anē.

⁴ Hãmri nhũm mē kuma nē mē kãm:

—Tk. Kwa ra Sejarej kamã kêp prēs nē hkrĩ kēnã kot pa kēt amnhĩ w̄yr hã karō. Kot pa tokyx ma akup̄ym hw̄yr mō.

⁵ Jakamã kêr ka mē axãptār tũmjaja ma ixkõt mra. Hãmri nē Sejarej kamã inhmã tanhmã kot amnhĩ tomnuj to hã harēnh to pa mē ama nē rĩ kormã tanhmã harēnh to. Anē.

⁶ Hãmri nē mē kamã pa hã apkati grēre nē ma akup̄ym Sejarej w̄yr mō. Hãmri nē hw̄yr pōj nhũm apkati nhũm mē hkukjêr xã hã ixkre hw̄yr tē nē mē kot mē mar xã hã mē hkrĩ xã kamã nh̄y nē amnhĩ w̄yr Pawre hã karō.

⁷ Nhũm mē hw̄yr o tē nē ãr nhũm hkw̄y kot Jerujarē rũm mē mōr xw̄ynhaja kãm hipôk nē pahi Pos Pesti mã tanhmã ho kapēr to nē ho kapēr punuj t̄yx nē. Kot tanhmã amnhĩ tomnuj to ho pa hã ho kapēr o kuhê. Nom mē kot ã kot amnhĩ nh̄ipêx anh̄yr ã omunh kēt tã ãm amnhĩ hkrã hkõt ri tanhmã ho hêx to.

⁸ Jakamã nhũm Pawre tee ri amnhĩ tã mē kot ho hêxja ma nē kãnhmã xa nē Pos Pesti mã amnhĩ tã aprã nē mē kãm:

—Nà aa ixte ã amnhĩ nhĩpêx anhÿr kêt. Na pa finat Mojes kot Tĩrtũm nhÿ hã kapêr nhĩrôp ixãm nê hkwỹm ri tanhmã amnhĩ nhĩpêx to hkêt nê. Nê mẽ ixte Tĩrtũm mã amnhĩ jarênh xà hã ixkre kamã ri tanhmã ixtÿx ri amnhĩ nhĩpêx to hkêt. Nê pahihiti Sesti kapêrja pa pre hirôp ixãm nê tanhmã amnhĩ tomnuj to hkêt nê. Aa ixte ã amnhĩ nhĩpêx anhÿr kêt kumrêx. Anê.

⁹ Hãmri nhũm Pos Pesti kuma nê tanhmã hkukamã hamaxpêr to nê hamaxpêr o:

—Kwa nhÿ krĩ kamã kot pa we Pawre kot inhmã tanhmã amnhĩ jarênh toja ma nhũm Ijaew ja hã kãm ixkĩnh japêr? Nà mẽõ krĩ pê Jerujarê hwÿr kot paj akupÿm mẽ hwÿr o mō nê kamã mãn hkukja nê kuma. Nà ja na mex. Nà kot paj anê. Anê.

Hãmri nê Pawre mã kãm:

—E xà kot puj ma akupÿm Jerujarê hwÿr mō pa kamã axte mẽ kot ajarênh ma nê tanhmã ajarênh to nà? Anê.

¹⁰ Hãmri nhũm kãm:

—Nà jar ixte pahihiti Sesti nhÿ hã mẽ kot mẽ hkukjêr xà hã ixkre kamã inhÿr nê amnhĩ jarênh kênã. Jar na htem mẽ hkukja nê tanhmã ri mẽ mar to. Na pa pre tanhmã ixkwÿjê ho hkêt nê. Mẽmo kaxyw kot pa akupÿm mẽ hwÿr mō nê axte mẽ kãm amnhĩ jarê?

¹¹ Kop apu pa tanhmã ixte amnhĩ tomnuj to ronhÿx mẽ mãmrĩ ja hã ixpĩ pa mẽ kêp tanhmã ri amnhĩ to hkêt nê. Nom mẽ kot ixto hêx pix o ã

ijarênh anhÿr kênã. Jakamã mẽmo mÿrapê kot kaj mẽ ïhkram ijaxà? E Rôm kãm pahihiti Sesti hwÿr mãn inhmê pa kumã mãn amnhĩ jarê. Anê.

Pahihiti Sesti kêp pyka piitã hkôt mẽ ho amnhĩptàr xwÿnh maati jakamã nhũm Pawre kot mar kaxyw hwÿr hkrà.

¹² Hãmri nhũm Pos Pesti kuma nê ma tẽ nê hã ò kôwenatôjê ma. Hãmri nê hã axpên mar pa nê akupÿm hwÿr tẽ nê kãm:

—Tôe. Nà kot paj pahihiti Sesti wÿr amê. Ra hwÿr akrà kênã. Anê.

Pos Pesti kot Akrip mã Pawre jarênh

¹³ Tã nhũm apkati grêre nê hapêx nhũm pahihiti hõ pê Akripja ma Pos Pesti hwÿr mō. Tõx Perênĩs mẽ wa mō.

¹⁴ Hãmri nê wa hwÿr pōj nê kuri wa pa hã apkati grêre nhũm Pos Pesti wa kãm Pawre jarê nê wa kãm:

—E pa war amã mẽhõ jarê. Na pre pahihiti Perisja mẽ hagjênh xà kamã mẽhõ jaxà nê kormã kator kêt ri nhũm mẽ ãpênh nê kator pa hpãnhã ãpênh o amnhĩptã.

¹⁵ Tã ra ma Jerujarê hwÿr mō nhũm Ijaew nhõ patre krãhtũmjê mẽ mẽ ãptãr tũmrejaja inhmã ho kapêr punuj rax nê. Nê ixte mẽ kãm hpĩr kaxyw inhmã hã ãmnênh kãm hihtÿx nê.

¹⁶ Nom pa mẽ kêp ja kaga nê mẽ kãm: “Nà mẽ ixpê Rôm nhõ xwÿnhjaja na pa htem ã mẽ hipêx anhÿr kêt nê. Na pa htem mẽ kot ho kapêr xwÿnh

noo mã tanhmã hkukjêr to nhũm tanhmã amnhĩ tã àprār to pa htem kuma nê rĩ kormã tanhmã mẽ ho. No na pa htem kormã mẽ kot tanhmã amnhĩ jarênh to hkêr ri tanhmã mẽ ho hkêr nê.” Anê.

17 —Jakamã nhũm prem kaxyw Sejarej wýr pøj nhũm apkati pa hã mẽ hkukjêr kurê kumrêx. Nê mẽ kot mẽ hkukjêr xà hã mẽ hkrĩ xà kamã nhỹ nê ixte hkukjêr kaxyw amnhĩ wýr Pawre hã karõ.

18 Na pa pre ijamaxpêr o: “Mãn pre tanhmã amnhĩ tomnuj tỳx to hã na mẽ inhmã harênh kaxyw.”

19 Anhỹr ã hkamnhĩx tã te kot amnhĩ to mex xwýnh pyræk. Æm kot mẽ hkôt amnhĩ nhĩpêx kêt pix ã nhũm mẽ inhmã harê. Nê kaxyw mẽhõ htyk xwýnh jarê. Mẽ kot kãm “Jejus” anhỹr xwýnhja na xep hte mẽ kãm akupỹm htĩr ã harênh o pa. Æm ja pix na prem inhmã harê.

20 Pa tee ri ixte nhỹri ixprĩ hã tanhmã mẽ kot harênh to hã mẽ mar kaxyw hkukamã ijamaxpêr. Hãmri nê hã Pawre kukja nê kãm: “Xà kot puj ma akupỹm Jerujarê hwýr mõi pa axte akwý kot tanhmã ajarênh to ma nê rĩ kormã tanhmã ajarênh to nà?”

21 Anhỹr tã no nhũm akupỹm Jerujarê hwýr mõi kaga kumrêx nê amnhĩm Rõm kãm pahi maati Sesti jarê. Ixte ma hwýr mẽnh nhũm kot kãm amnhĩ jarênh nhũm kot

mar nê tãm tanhmã harênh to kaxyw. Jakamã pa kormã ixte hwýr mẽnh kaxyw amnhĩ xa hã akupỹm mẽ hagiênh xà kamã haxà nhũm arĩ hkrĩ ho hkrĩ. Anê.

22 Hãmri nhũm Akrip kuma nê kãm:

—Xôwehe? Kwa na pa inhmã tanhmã kapêr to mar prãm nê. Anê.

Hãmri nhũm kãm:

—Tõe. Nà kê apkati pa hã karõ ka tanhmã kapêr mar to. Anê.

23 Jakamã nhũm apkati nhũm Akrip mẽ htõx Perênĩs wa pahi hã mẽ ê mex jagjê nê ma mẽ hkukjêr xà hã ixkre hwýr wa tẽ. Põristi krãhtũm kwýjê mẽ Sejarej kamã mẽ kot amnhĩ to rũnh xwýnh kwýjê mẽ nhũm mẽ hwýr akuprõ. Nhũm mẽ piitã Akrip mẽ htõx wa kêp pahi hã wa ê mex ã wa omu nê wa kamã no puma nê. Hãmri nhũm Pos Pesti Pawre hã karõ nhũm mẽ haprõ nê ma mẽ hwýr o tẽ.

24 Hãmri nhũm Pos Pesti omu nê Akrip mẽ htõx mẽ mẽ kot mar o hkrĩ xwýnhjê mã kãm:

—E pahihti Akrip mẽ mẽ apikuprõnh xwýnhjaja. Ota Pawre xa. Jerujarê kamã nê jar Sejarej kamã na pre hkwyjaja inhmã ho kapêr rax nê. Hãmri nê ixte hpĩr kaxyw inhmã hã àmnênh kãm hihtỳx nê.

25 Nom mẽmoj mýrapê kot pa kêt kupĩ? Tã nhũm amnhĩm pahi maati Sesti jarê pa ma hwýr mẽnh kaxyw.

26-27 Nom na htem amarĩ pahi maati Sesti hwýr mẽ rênh kêt nê. Na htem kãm mẽ

kot tanhmã amnhĩ tomnuj to hã kagà nẽ hwÿr kagà mẽ ro hã mẽ kurẽ. No jahti kot tanhmã amnhĩ tomnuj toja na ixte omunh kêt. Te inhmã tanhmã kot amnhĩ tomnuj to hkêt pyræk. Jakamã na pa mẽ awÿr o tẽ. Mẽ ate kapër mar nẽ kot tanhmã amnhĩ tomnuj to hã inhmã harënh nhũm ixte hã kagà nẽ pahi Sesti hwÿr mẽnh kaxyw. Jakamã e mẽ kam nẽ hkukja nẽ ama nẽ tanhmã mar to. Anẽ.

26

Pawre kot pahшти Akrip mã amnhĩ jarënh

Atre 8.3, 9.1-19, 22.1-21

¹ Hãmri nhũm Akrip Pos Pesti kot tanhmã Pawre jarënh toja ma nẽ Pawre mã kãm:

—E mãmrĩ mẽ inhmã amnhĩ jarë pa mẽ ama. Anẽ.

Hãmri nhũm kuma nẽ kãm amnhĩ jarënh kaxyw kànhmã kãm ìhkra pẽ nẽ kãm:

²⁻³ —Hêxta waa nẽ. Nà na pa amã amnhĩ jarënh kaxyw nẽ ixkĩnh nẽ pahi Akrip. Ra ate mẽ ixpê Ijaew kot amnhĩ nhĩpêx ã mẽ ixpumunh mex. Nẽ mẽ ixte tanhmã amnhĩ nhĩpêx to hã mẽ ixte xepën kukjërta ate hã mẽ ixpumunh mex. Jakamã na pa amã amnhĩ jarënh kaxyw nẽ ixkĩnh nẽ. E tokyx anojarêt kêt nẽ inhma. Pa amã ixujarënh jatur xàm kumẽ ka aprĩ hã inhma.

⁴ Nà ixkwÿjaja ra mẽ kot ixte amnhĩ nhĩpêx ã ixpumunh mex. Ixprĩre rùm ixpaxà kamã nẽ mãänën Jerujarë kamã ixte tanhmã

amnhĩ nhĩpêx to ho ixpaja mẽ kot hã ixpumunh mex.

⁵ Ixpê mẽ hkwȳpê Parijew nhõ xwÿnh kwÿjê hã mẽ kot ixpumunh. Koja mẽ apu ja hã amã ijarënh japër rÿ ko. Mẽ ixpê Parijew nhõ xwÿnhjaja na pa htem amnepêm finat Mojes kot Tirtũm nhÿ hã mẽ inhĩgêtjê mã mẽmoj tã karõ xà hkôt amnhĩ nhĩpêx mex o ixkwÿjê jakre.

⁶ —Amnepêm na pre Tirtũm mẽ inhĩgêtjê mã tanhmã amnhĩ jarënh to. Kot nhÿrmã mẽ piitã akupÿm mẽ ho htĩr ã amnhĩ jarë. Tã ixte ja kôt ijamaxpër pix mÿrapê na prem kot hã amã ixto kapër kaxyw awÿr ixto mõ.

⁷ Mẽ ixpê Ijaew nhĩgêt piitã na prem Tirtũm kapër kôt hamaxpër o ri pa. Kot nhÿrmã akupÿm mẽ ho htĩr ã amnhĩ jarënh kôt hamaxpër tÿx o pa. Amnepêm finat Jako mẽ hkra pê 12jaja na prem hkôt hamaxpër. Nẽ ixpê mẽ hkanrêhã mẽ htàmnhwÿ na pa hte ijaxwÿja ja kôt ijamaxpër tÿx rãhã ho ri ixpa. Tã ãm mẽmoj pixi mÿrapê na ixkwÿjaja ã amã ixto kapër punuj anẽ.

⁸ Mẽ kot ixpyrà nẽ ja kôt hamaxpër ã amnhĩ jarënh tã nhũm pre Tirtũm akupÿm Kra Jejus o htĩr nom nhũm mẽ ixkĩnhã ja kôt hamaxpër kêt. Nom Tirtũm kêp akupÿm mẽ pahto pahtĩr xwÿnh kênã.

⁹ —Amnepêm kormã Jejus kôt ijamaxpër kêt ri na pa pre ijaxwÿja mẽ uræk nẽ akupÿm htĩr kôt ijamaxpër kêt nẽ. Nẽ

ixtÿx ijamaxpër o: “Kot paj Jejus pê Najare nhõ xwÿnh kôt mẽ kot amnhĩ xunhwÿr xwÿnhjê nhĩpêx kati ho ixpa nhũm Tĩrtũm ja hã ixpumu nhũm ja kãm mex nê.”

10 —Anhÿr jakamã pa pre hte tanhmã mẽ homnuj tÿx to ho ri ixpa. Jao Jerujarẽ kamã mẽ inhõ patre krãhtũmjê nhÿ hã mẽ unê nê mẽ hagjênh xà kamã mẽ hagjênh o ixpa nhũm mẽ kot mẽ himex kaxyw mẽ hã inhmã amnhĩ jarẽ nhũm ja inhmã mex nê. Pa mẽ harênh ma nê ixkĩnh nê.

11 Pa pre hte xatã tanhmã mẽ hipêx to nê mẽ kot Jejus kaga hprãm xaj mẽ hipêx kati rũnh nê. Tĩrtũm kapêr o mẽ ahkre xà hã ixkre piitã kamã pa pre hte ã mẽ hipêx anê. Nê mẽ kamã inhgryk tÿx jakamã ma krĩ hkwÿ hkôt mẽ hapêr o ri ixpa. ã na pa pre mẽ hipêx anhÿr o ri ixpa.

12 —Tã axte ixte mẽ hkwÿjê pynênh nê mẽ hagjênh kaxyw ma Tamas wÿr mõi. Mẽ inhõ patre krãhtũmjê nhÿ hã ma mẽ hwÿr mõi.

13 Hãmri nhũm ra kaxkwa nhĩpøk ri myt nhÿ pa kormã pry hã inhmõr ri kaxkwa rũm mẽmo nhĩrãja pumu. Nhũm hirã htÿx o myt jakre nê ixtã ajêt pa ixkôt ri mẽ pa xwÿnhjê mẽ hipøk ri ixkuhê.

14 Hãmri nê mẽ inhmã ma xaj pykap ixrõrøk pa nhũm kaxkwa rũm mẽhõj inhmã kapêr. Mẽ ixpê Ijaew kapêr o kapêr nê inhmã: “Pa Sawti? Hêxta waa nê. Kwa moñ ka hte axtem nê ixtomnuj tÿx o

ri apa? Nom na ka tee ri ã amnhĩ nhĩpêx anhÿr kaprÿ.” Anê.

15 Hãmri pa tee ri kuma nê kãm: “Kwa mẽ atõ na ka ã inhmã akapêr anê?” Anê.

—Hãmri nhũm inhmã: “Ixpê Jejus na pa amã ixkapêr. Pa na ka hte ixpê ixkôt mẽ kot amnhĩ xunhwÿr xwÿnhjê homnuj tÿx o apa ho te pa ixtomnuj tÿx pyræk.

16 E kãnhmã xa. Ate inhmã tanhmã amnhĩ nhĩpêx to ho apa kaxyw na pa amã amnhĩ to amnhĩrit. Jarãhã ate ixpumunh xà hkôt ate mẽ kãm ma ijarênh nê mẽ kãm ixkapêr jarênh o mẽ ahkre ho ri mẽ hkôt apa kaxyw na pa amnhĩ kaxyw ata. Kot paj nhÿrmã axte awÿr ixkato nê tanhmã amã ixkapêr to ka inhma nê ma mẽ kãm ixkapêr jarênh o ri mẽ hkôt apa. Ja kaxyw na pa amnhĩm ata.” Anhÿr o inhmã kapêr.

17 Hãmri nê inhmã: “E kot paj Ijaew mẽ Ijaew kêt xwÿnhjê hwÿr amê nê anê mẽ omunh mex nê nhũm mẽhõ apĩr kêt nê.

18 Kêr ka ma mẽ hkôt mẽ kãm ixkapêr jarênh o ri apa kê mẽhpri hã kuma. Mẽ kot amnhĩ tomnuj kaga nê amnhĩ kaxyw ixkôt hamaxpêr nê ixkôt amnhĩ xunhwÿr kaxyw. Hãmri nhũm Tĩrtũm ja hã mẽ omu nê ixkukwak ri amnhĩ katut kôt mẽ kot amnhĩ tomnuj piitã rênh pa nê axte kãm hamaxpêr kêt nê. Hãmri nê mẽ ho hkra. Koja mẽ ã amnhĩ nhĩpêx anê hãmri nê axte Satanasti nhÿ hã

tanhmã amnhĩ nhĩpêx to hkêt nê. Pãnhã Tĩrtũm kôt pix mã amnhĩ nhĩpêx o pa.” Anê.

19 —Ã na pre Pahihti Jejus inhmã kapêr anê. Tã kot kaxkwa rũm inhmã ixapênh jarênh ã karõja pa pre mar tỳx nê hkôt amnhĩ nhĩpêx rãhã ho ri ixpa pahi Akrip.

20 Jakamã na pa pre ma mẽ hkôt mẽ kãm kapêr jarênh o ri ixpa. Tamas kumrêx hwỳr nê hpãnhã Jerujarê hwỳr nê hpãnhã pika pê Jutej piitã hkôt Ijaew mã kapêr jarênh o ri ixpa. Tã hpãnhã Ijaew kêt xwỳnhjê mã harê. Na pa hte mẽ kãm ixkapêr o: “Kwa mẽ ate amnhĩ tomnuj kaga nê hpãnhã Tĩrtũm kôt amnhĩ xunhwỳ. Hãmri nê hkôt pix mã amnhĩ nhĩpêx o ri apa. Mẽ piitã mẽ kot apê hkwỳ hã mẽ apumunh kaxyw.” Anê.

21 —Ãm ja pix mỳrapê na pre ixkwỳjaja ixpynê. Tĩrtũm mã amnhĩ jarênh xà hã ixkre kamã ixpynê nê ra mẽ kot ixpĩr kaxyw.

22-23 Nom na hte Tĩrtũm ixtãnopxa nê ixto ixihtỳx mex rãhã ho pa pa arĩ mẽ kãm harênh o ri ixpa. Mẽ kot amnhĩ to rũnh xwỳnhjê mã nê mẽ kêp amrakati xwỳnhjê mã nê mẽ piitã mẽ kãm harênh o ri ixpa. Finat Mojes mẽ Tĩrtũm nhỹ hã kapêr jarênh o mẽ pa xwỳnhjaja kot ra hkukamã tanhmã harênh to xà hkôt pa hte mẽ kãm harênh o ri ixpa. Nê mẽ kãm: “Tĩrtũm kot mẽ pakaxyw ãm xwỳnhta na pre amnhĩ ãm htỳx kamã hamak kãm ty. Tã

nhũm Tĩrtũm akupỳm ho htĩr. Kumrêx na pre akupỳm ho htĩr jakamã kumrêx na pre tanhmã mẽ kãm kapêr to ho ri mẽ hkôt pa. Mẽ kot amnhĩ kaxyw hkôt hamaxpêr nê hkôt amnhĩ xunhwỳr xwỳnh piitã urak nê nhỹrmã Tĩrtũm mẽ wa õ krĩ kamã htĩr tũm nê pa ho pa hprãm xaj mẽ harênh o pa. Mẽ ixpê Ijaew nê mããnênh mẽ apê Ijaew kêt xwỳnhjaja nhũm pre ã mẽ pajarênh anê.” Anhỳr o pa hte mẽ kãm harênh o ri mẽ hkôt ixpa pahi Akrip. Anê.

24 Nhũm Pawre kormã kot mẽ kãm amnhĩ jarênh par kêt ri nhũm Poş Pesti tee ri tanhmã Jejus jarênh to hã kuma nê kax pê kãm kapêr nê kãm:

—Kwa na ka akrã axpã nà? Pêr ate kaga pumunh tỳx kurê akrã pipãnh pyrak o ri atỳx ã ri mẽ inhmã axujarênh anê. Anê.

25 Hãmri nhũm kãm:

—Nà ixkrã pipãnh kêt. ãm hãmri na pa mẽ amã awjarê.

26 Jerujarê kamã na prem Jejus pĩ nhũm mẽ piitã omu. Tã nhũm akupỳm htĩr hãmri nê hpimxur pê ri pa hkêt nê. Na pre mẽ ohtô nê akupỳm htĩr kãm omu. Pahi Akrip ra kot ja mar mex jakamã na pa ixãmnhĩx ã mẽ amã harênh anê.

27 Anhỳr o kãm kapêr hãmri nê pahi Akrip wỳr rĩt nê kãm:

—Kwa pahi Akrip. Xà Tĩrtũm nhỹ hã kapêr jarênh o mẽ pa xwỳnhjaja kot Jejus kukamã tanhmã harênh toja kôt na ka hte ajamaxpêr? Nà ra hkôt ajamaxpêr kênã. Ra

ixte ajamaxpër kôt apumunh mex. Anê.

²⁸ Hâmri nhùm tee ri kuma nê kãm:

—Tk. Kwa xà kot kaj ã inhmã akapër anê pa ama nê apyrà nê amnhĩ kaxyw Jesus kôt ijamaxpër? Nà na ka ixte ã ate Jesus jarênh anhÿrja kôt ijamaxpër ã ixkamnhĩx kaprÿ. Anê.

²⁹ Hâmri nhùm Pawre kãm:

—Ko. Kot kaj ixpyrà nê amnhĩ kaxyw hkôt ajamaxpër pa ixkĩnh nê. Nom kaxipix kêt. Mẽ apiitã mẽ ate inhmar o akrĩ xwÿnhjaja mãânên. Mẽ ate mẽ ixpyrà nê Jesus kôt amnhĩ xunhwÿr na inhmã hprãm. ãm ixpyrà nê mẽ apê prês pix na inhmã hprãm kêt. Anê.

³⁰ Hâmri nhùm pahĩ Akrip nê htõx Perênis nê pahĩ Pox Pesti nê mẽ hkôt mẽ mõi xwÿnhjaja kãnhmã kuhê nê ma mrar kaxyw.

³¹ Nê nojarêt nê Pawre hã axpên mã:

—Kwa tanhmã kot amnhĩ tomnuj to hkêt kênã kot kêt mẽ haxà rÿ kupĩ. Anê.

³² Hâmri nhùm Akripja Pos Pesti mã kãm:

—Kwa kop apu kot amnhĩ kaxyw pahĩ maati Sesti hwÿr hkrà hkêt ronhÿx pu mẽ ra kator. Anê.

27

Mẽ kot Rõm wÿr Pawre mẽnh ã mẽ harênh

Atre 23.11, 25.12

¹ Tã nhùm mẽ pyka pê Itar wÿr pahĩ maati Sesti hwÿr Pawre mẽnh kaxyw. Itar kamã mẽ õ krĩ maati

na pre kêp Rõm. Jakamã nhùm Pawre mẽ mẽ kot mẽ hagjênh xà kamã mẽ hkrĩ xwÿnh mẽ ho hpimràatã ma mẽ o mra nê pôristi krãhtùm Jurti nhĩhkram mẽ haxàr pa. Kot ma Rõm wÿr mẽ o mõi kaxyw. Jurtija kêp Itar kamã mẽ õ pahĩ maati hã pôristi krãhtùm nhùm prem ma mẽ kãm mẽ o mõi kaxyw ïhkram mẽ hagjênh pa. Ixpê Rukre na pa pre inhmã Pawre hkôt inhmõi prãm nê mẽ hã ajêt nê mẽ hkôt mõi.

² Tã pa mẽ ra inhnojarêt nhùm Aristak haxwÿja ma mẽ ixkôt mõi. Pyka pê Masetõn nhõ xwÿnh na pre. Õ krĩ pê na pre Tesarõn. Jakamã nhùm ma wa ixkôt mõi. Hâmri nhùm pãrja nojarêt. Atamix rùm pãr nhùm ra As wÿr nojarêt pa mẽ hwÿr inhgjêx pa nê ma kamã mõi.

³ Hâmri nhùm apkati pa mẽ krĩ pê Sito hwÿr pøj nê hã pãr xi. Nhùm pôristi krãhtùm Jurtija Pawre ho mex jakamã pa mẽ Sito hwÿr pøj nhùm Pawre mã anê pa mẽ ixkato nê ma ixkrãmnhwÿjê hwÿr mra nê mẽ kutã apku nê ma akupÿm pãr wÿr mra.

⁴ Tã pa mẽ axte mõi. Nom nhùm kôk mẽ ixkutã àpêr tÿx jakamã pa mẽ umaj juk nê gô hipôk kupu ho mõi. Gô hipôk pê Sipreja pa mẽ upôk rùm ma hkupu ho mõi nhùm mẽ inhnê kôk pê àmnàr mex nê.

⁵ Hâmri pa mẽ mõi nê pyka pê Siris mẽ Pãpir wa hakrenh o mõi nê pyka pê Ris kamã Mira hwÿr pøj nê hã pãr xi nê ijapôx pa.

6 Hāmri nhūm pōristi krāhtūmja Aresānrir rūm pàr pumu nhūm ra Itar wỳr nojarêt. Pa mẽ hwỳr inhgjêx kurê kumrêx hāmri mẽ ma kamā axte mō.

7 Hāmri nhūm pàrja kôk kutā tee ri mōr prêprêk kaxyw mẽ ãm amnhĩm hprĩ mẽ mōr ã apkati xohtô mẽ pa mẽ tokyx ixpôx kêt mẽ. Tã Sito hwỳr ixàhtêp o mō nom nhūm kôk mẽ ixkutā hihtỳx rax kumrêx. Jakamā pa mẽ juk mẽ gô hipôk pê Kret jatur xà jahpa mẽ ma kape hã mō nhūm mẽ inhnê kôk pê àmnàr mex mẽ. Hāmri pa mẽ ma Sarmôn jakrenh o mō

8 nhūm pàr kôk kutā amnhĩm hprĩ mẽ kape hã mō. Pa mẽ mō mẽ jatã Rasej tã pàr nhĩkwỹ xà mex wỳr pôj mẽ kamā pàr xi.

9 Nom pàr kot amnhĩm hprĩ mẽ mōr jakamā nhūm ra kôk xàpêr tỳx mẽ kamā kry htỳx ã mytwrỳ mẽ ixtã kato. Mytwrỳja ã mẽ kot kôk xàpêr tỳx pymaj nhỹhỹm pàr kãm mrar kêt. Jakamā nhūm Pawre tokyx mẽ inhmōr nê pàr nhõ xwỳnhjê mã kapêr kãm hihtỳx mẽ mẽ kãm:

10 —Kwa pu mẽ jar kôk xàpêr tỳx jamãr o ri papa nà. Kê kôk mẽ kry htỳxja hapêx pu mẽ rĩ kormã axte mō. Kot puj mẽ anhỹr kêt mẽ kôk xàpêr tỳx kãm mō nhūm nhỹri pàrja mẽ pahpê axà nhūm gô mẽ apê mẽ akukrêx o hapêx pa. Pu mẽ pajaxwỳja axkaprã.

11 Anhỹr o mẽ kãm kapêr tã no nhūm mẽ kuma mẽ ãm kuma. Pàr pãm mẽ pàr o

mrar xwỳnh wa nojarêt tỳx mẽ kapêr ma mẽ ãm kuma. Nhūm pōristi krāhtūm wa nojarêt ã wa kuma mẽ haxwỳja Pawre mar kêt mẽ.

12 Nhūm mẽ kot pàr nhĩkwỹ xà mex jarênhja mẽ kot mex ã harênh tã mẽ kêp omnuj mẽ. Hã na wrỳk mẽ kôk xàpêr tỳx nhūm mẽ kêp omnuj tỳx mẽ. Jakamā nhūm mẽ piitã Pawre rom ra nojarêt mẽ. Mẽ kãm tokyx krĩ pê Wênĩs wỳr hpôx prãm jakamā nojarêt tỳx mẽ. Gô hipôk pê Kret kamã na Wênĩsja. Nẽ kamã kôk xàpêr tỳx kêt jakamā nhūm mẽ hwỳr nojarêt mẽ axpên mã:

—E kwa pu mẽ tokyx Wênĩs wỳr mō mẽ kamã mãn kôk xàpêr tỳx japêx jamãr o papa. Anê.

Hāmri mẽ piitã hwỳr nojarêt.

Kôk kot pàr o àpêr tỳx ã harênh

13 Tã nhūm kahpa hkôt kôk xàpêrja katat kôt kawax pê apê nhūm mẽ kamã ama mẽ axpên mã:

—E hāmri. Tokyx pu mẽ mō. Anê.

Jakamā pa mẽ pàr o htỳx xà ho api mẽ axte mō. Ma gô hipôk pê Kret jakàr ã mō.

14 Puh nhūm na wrỳ mẽ kôk àpêr tỳx kumrêx. Mẽ kot kãm “kôk xàpêr tỳx maati” anhỹr xwỳnhja gô hipôk rūm mẽ ixto àpêr tỳx kumrêx o mō.

15 Hāmri mẽ mẽ ixkutã àpêr tỳx nhūm pàr tee ri kutã hkarôt. Pa mẽ kormã Wênĩs wỳr ixpôx kêt ri ra ho awjanã

nhũm amnhĩ krã hkôt kôk kôt kôt mō.

¹⁶⁻¹⁷ Hāmri nē mō nē gō hipôk pê Krawti jahpa nē hakàr ā mō nhũm mē inhnē kôk pê amýtã nhũm amnhĩm hprĩ nē kawax pê apê. Hāmri pa mē pàr krare kot mē ixkôt mōr xwýnhja pa mē kumý nē pàr rax kãm kumē. Ra kamã gô rax tã pa mē ixkarôt týx nē nē hkapĩr pa nē ho api nē pàr rax kãm kumē nē ho htýx. Hāmri nē hpãnhã kôk xàpêr týx pymaj pàr rax kaxpre hpa. Hāmri nē kôk kot pykahti grã maati pê Sirteja wýr pàr mēnh nhũm kot amnhĩ to pykahti xãm o htēm pymaj nhũm mē kot ho mrrar xà hã kupêxê rax o wrý nhũm pàr amnhĩ krã hkôt ma kôk kôt mō.

¹⁸ Tã nhũm apkati nhũm kôk arĩ mē ixpê pàr o àpêr týx nē arĩ na wrýk rax rãhã nē. Jakamã pa mē pàr àr pymaj nē mē hikukrêx kwý gôx kãm rēnh pa. Kaxkritre nē àr kêt kaxyw.

¹⁹ Tã nhũm apkati pa mē hpãnhã pàr kre kamã ri nē hikukrêx kwý rê nē gôx kãm kurê.

²⁰ Nhũm kôk arĩ àpêr týx kumrêx ã apkati xohtôo nē. Nē na wrýk rax rãhã jakamã pa mē kanhêti pumunh kêt nē myt pumunh kêt o mē ixtã apkati xohtô rax kumrêx. Hāmri nē tee ri ahkapi nē tee ri amnhĩ kukamã ijamaxpêr. Nē ixyk par pix kukamã ija-maxpêr o ixkaprĩ nē ixkrĩ.

²¹ Hāmri nē mē inhmã ma xaj ixãpkur kêt ryy nē. Hāmri nhũm Pawre tee ri ja hã mē

ixpumu nē pàr nhõ xwýnh wa kãm kapêr nē wa kãm:

—Kwa na pa pre tee ri Kret kãm man mē pamōr nē war amã ixkapêr. Kop apu mūtãr mãn mē kuri arĩ ri mē hkôt mē papa ronhýx pu mē pajamakêtkati nē paxãmnhĩx ri papa. Tã nhýx pu mē ri mē hikukrêxja gôx kãm rēnh par kêt nē.

²² Nom kwa kêr ka mē tee ri amnhĩ kukamã ajamaxpêr kêt nē. Kot puj mē pahtõ pahtyk kêt nē. ãm pãrja pix koja axà nē hapêx.

²³ Ixpê Tĩrtũm krajê hõ na pa. Na pa hte kãm tanhmã amnhĩ nhĩpêx to ho ri ixpa. Jakamã na pre kamãt ja kamã ixwýr kapêr o wrýk xwýnhjê hõ mē nhũm ixwýr wrý nē inhmã awjarê

²⁴ nē inhmã: “Pa Pawre? Kwa tee ri amnhĩ kukamã ajamaxpêr o amã ma hkêt nē. Kot kaj akã hkĩnh pê ma Itar kamã Rõm wýr mō nē pøj nē pahi maati Sesti pumu nē kãm amnhĩ jarê. Jakamã koja Tĩrtũm akôt mē mōr xwýnh pi-itã omunh mex nē ka mē atõ tanhmã amnhĩ to hkêt nē.” Anê.

²⁵ —Ã kot inhmã kapêr anhýr jakamã kwa mē amnhĩ to htýx nē tee ri amnhĩ kukamã ajamaxpêr kêt nē. Tĩrtũm kapêr o wrýk xwýnh kot inhmã ujarēnh xà hkôt koja Tĩrtũm ã mē panhĩpêx anê. Ixte ja hã omunh mex kênã.

²⁶ Koja xep kôkja nhýri gô hipôk ã pàr krakrak pa. Nom mē papajaja kot puj mē

pahkà hkĩnh pê hwÿr pahpôx pa. Anẽ.

27 Tã pa mẽ mõi nẽ ã inhmõr anhÿrja ã ixtã semãn axkrut nẽ ra gô rax pê Ariax kôt axà. Kamàt kãm hkôt axà nhũm kôkja arĩ pàr o apêr tÿx rãhã ho mõi. Hãmri nhũm kôt ã kamàt nhũm pàr o mrrar xwÿnhja ra pàr kot pykahti grà htêp ã hkamnhĩx.

28 Jakamã nhũm mẽ gô xupÿm pumunh xà ho gô pumu nhũm upÿm kêp 36 met. Hãmri nhũm hã ahtũmre nẽ axte omu nhũm ra hpãnhã kêp 27 met pix. Jao ra pàr kot gô kokwe htêp o mõi ã omu.

29 Hãmri nẽ kot kên kuranh nẽ hã pikrakrak pymaj katê rũm ho htÿx xà ho 4 nẽ gôx kãm kurẽ nhũm arĩ ajêt. Hãmri nhũm mẽ tokyx kãm arĩgro hprãm o arĩgro mã nojarêt o hkrĩ.

30 Hãmri nhũm pàr kãm mẽ àpênh xwÿnhjaja tanhmã hamaxpêr to nẽ hêx rom pàr krare ho wrÿk o tẽ. Mẽ kot mẽ ixrer nẽ ahte xarmã mõi nẽ rêr nẽ tokyx gô hipôk wÿr hpôx kaxyw. No ãm hêx rom te mẽ kot axte pàr krã rũm ho htÿx xà hõ mẽnh kaxyw pyràk o amnhĩ nhĩpêx nẽ kaxyw ho wrÿk o tẽ.

31 Nom nhũm Pawre mẽ hamaxpêr ã mẽ omu hãmri nẽ pôristi mẽ mẽ hkrãhtũm mã mẽ harẽ nẽ mẽ kãm:

—Kwa koja mũjjaja mẽ pare nẽ ahte pàr krare kamã xarmã mõi rê ka mẽ apikapràr pa kãm ga. Anẽ.

32 Hãmri nhũm mẽ tee ri kuma nẽ mẽ hwÿr hprôt nẽ mẽ kêp pàr krare pê hkaxpre

xà jakà nhũm gôx kãm tẽm nẽ ma gô hkôt hkaprÿn mõi.

33 Tã hãmri nhũm ra myt kator o mõi nhũm Pawre akupÿm mẽ piitã mẽ ho mẽ hamaxpêr o hihtÿx kaxyw mẽ kãm:

—Kwa na ka mẽ tee ri amnhĩ kukamã ajamaxpêr o akaprĩ nẽ axàpkur kêt o atã semãn axkrut.

34 E pu mẽ mẽmoj krẽ nẽ ho amnhĩ xihtÿx. Kot puj mẽ pahtõ pahtyk kêt nẽ. ãm hãmri na pa mẽ amã ixkapêr. Anẽ.

35 Hãmri nẽ mẽmoj py nẽ mẽ noo mã Tirtũm mã harẽ nẽ hkur o xa

36 nhũm mẽ ja hã omunh xà hkôt akupÿm tãm hamaxpêr o mõi. Hãmri nẽ amnhĩm mẽõ hkwÿ jamÿ nẽ kumẽ kuku.

37 Pàr kãm mẽ inhmõr xwÿnhjaja na pa prem ixpê 276.

38 Tã pa mẽ ra ixàpkur pa. Hãmri nẽ pàr kaxkrit kaxyw mẽ apkur xà hã mẽmoj y jakrêxja gôx kãm hkapĩr pa.

Pàr mẽ kêp pikrakrak ã harênh

39 Tã nhũm ra myt kator mex nẽ nhũm mẽ amnhĩ kukamã gô hipôk pumu nẽ axpên mã:

—Kwa nhÿ pika na mũj wehe? Anẽ.

Hãmri nẽ nhÿri hakàx ã amnhĩm nõi xà mex pumu nẽ hwÿr pàr o mõi kaxyw hã axpên ma.

40 Hãmri nẽ kaxyw pàr o htÿx xà jakà nhũm axrê nẽ gôx kãm rôrôk pa. Nẽ pĩ ho pàr o juk xà nhõ xé xàja nhũm mẽ mãânên krãhta. Hãmri nẽ

akupÿm mrar xà hã kupëxê
nhô nhũm kôk ho hikot nê ma
gô jakàx wÿr o mō.

⁴¹ Nom nhũm pàr kormã
hakàx pê awry hã mōr ri
amnhĩ to kokwe kura nê
pyka nhĩmōk ã nō nhũm mẽ
tee ri kot hkaxàr nê akupÿm
gô xupÿm mã mēnh kaxyw.
Nom nhũm gô kot pàr nhĩxô
htak tÿx kurê nhũm mẽ
ixpê pikrakrak par o mō.

⁴² Jakamã nhũm pōristijaja
tee ri omu hãmri nê ra mẽ
kêp prêsjê nhĩmex kaxyw.
Mẽ kot gôx kãm rôrôk nê gô
hipôk wÿr hpa ho nana nê mẽ
kêp pikunor pymaj kot mẽ
himex kaxyw.

⁴³ Nom nhũm mẽ
hkrãhtũmja kãm Pawre pĩr
prãm kêt jakamã ja nê mẽ
hkurê nê mẽ inhmã:

—E mẽ ate apa ho gô rēnh
mex xwÿnhjaja. Akumrêx
mra nê mrō nê ho nana ho
mra nê rê.

⁴⁴ No mẽ ate apa ho nana
punuj xwÿnhjaja kêr ka mẽ
tapti rÿ pàr kukrêx ò mÿ nê hã
ajêt nê hã ma mōn rê. Anê.

Hãmri pa mẽ ã amnhĩ
nhĩpêx anê nê ixpiitã ixkã
hkĩnh pê ixrêr pa.

28

*Gô hipôk pê Maw kamã mẽ
pa hã mẽ harēnh*

Makre 16.17-18

¹ Tã pa mẽ ixpiitã ixkã
hkĩnh pê ixrêr pa. Nhũm gô
hipôk ã mẽ pa xwÿnhjaja mẽ
inhmã gô hipôk nhĩxi jarē
nhũm xep kêp Maw.

² Nhũm Maw nhõ xwÿnhjaja
mẽ ixto mex nê. Nhũm axte
na wrÿk rax nê nhũm kry htÿx

kumrêx nhũm mẽ ixkamã
ukaprĩ nê mẽ inhmã kuto nê
mẽ inhmã kapêr mex nê.

³ Hãmri nhũm Pawre kuwy
kaxyw ri pĩ kawrà ho mra nê
kuwy hwÿr o tē nê hã haxwÿr
o xa. Hãmri nhũm kagã xoprê
ō wēnēn xihtÿxja kuwy kagro
pymaj pĩ rũm kato nê ìhkra hã
kunha nê hã àpêr o ajêt.

⁴⁻⁵ Hãmri nhũm Pawre omu
nê amnhĩ nê ho apê nê kuwy
kamã kumê nhũm kamã tēm
nê xêt pa. Hãmri nhũm gô
hipôk nhõ xwÿnhjaja tee ri ja
hã omu nê axpēn mã:

—Kwa ga mēmyti mũj
pumu. Mãn kêp mẽ hpar o
pa xwÿnh na. Hã na kagã ò
wēnēn xihtÿxta kunha. Nã
koja ty nê rĩ amnhĩ pumu.
Ra hkà hkĩnh pê gô rũm mẽ
pahwÿr rêr tã koja tã ty kãm
ga. Anê.

⁶ Hãmri nhũm mẽ tee ri
kot tanhmã amnhĩ to hã
hkamnhĩx nê hamãr o kuhê.
à htÿx nê ìhkra hikot rÿ htyk
kurê kumrêx ã hkamnhĩx tã
nhũm tanhmã amnhĩ kamã
hamak to hkêt nê. ãm htÿx ri
hkĩnh nê kapêr nê hpikunhar
o ri mra. Hãmri nhũm mẽ tee
ri omu nê axpēn mã:

—Kwa tanhmã kot amnhĩ
tore hã. Kêp mẽ hpar o pa
xwÿnh kêt. Mãn kêp kaxkwa
kamã mẽpahpãmjê hō nà? Hã
na kagã kunha nhũm tanhĩ to
hkêt nê. Anê.

⁷ Nhũm gô hipôk ã mẽ ò
pahihtĩ pê Puptija. Òrkwÿ
hã jawÿ jakamã nhũm amnhĩ
kôt mẽ ixwÿ pa mẽ ma hkôt
mō nê kuri hkôt ixpa ho ixtã
apkati axkrunēpxi nhũm mẽ
ixto mex nê.

⁸ Nhũm ra Puṗti nhĩpêêxà kèp à nê nõ. Kà kagro htýx nê haòk. Hãmri nhũm Pawre hwýr tẽ nê omu nê hã ìhkra xi nê ho Tĩrtũm wý nhũm akupým ho mex kurê kumrêx.

⁹ Hãmri nhũm gô hipòk nhõ xwýnhja harênh ma nê Pawre hwýr mẽ à xwýnh piitã o mra nhũm mẽ omu nê Tĩrtũm nhỹ hã akupým mẽ ho mex pa.

¹⁰⁻¹¹ Hãmri nhũm gô hipòk nhõ xwýnhjaja mẽ ixto mex rax nê.

Pawre axte Rõm wýr no-jarêt ã harênh

Rõmãn 1.10-12, 15.30-32

Tã pa mẽ gô hipòta kamã ixpa hã mytwrý axkrunêpxi. Hãmri nhũm kòk xàpêr týxta hapêx pa mẽ axte inhnojarêt nê ma mõ. Pàr ò kamã hpãnhã mõ. Aresãnrir rũm pãrja pa mẽ hpãnhã kamã mõ. Mẽ kot kãm “sãnti piṗpo” anhỹr xwýnhhta kamã. Na pre gô hipòk kamã haxwýja kòk xàpêr týx hapêx jamãr xa hã hikwý htã ra axte no-jarêt. Hãmri nhũm gô hipòk nhõ xwýnhja ma mẽ inhmõr xà hã mẽ inhmã mẽ ixàpkur xà hkwy nhõr rax nê. Hãmri pa mẽ pàr wýr inhgjêx pa nê ma kamã mõ.

¹² Mõõ nê Sirakus wýr pøj nê hã pàr xi. Hãmri nê krĩja kamã mẽ ixtã apkati axkrunêpxi nê axte mõ.

¹³ Mõõ hãmri nê Rekre hwýr pøj nê hã pàr xi. Hãmri nê kamã mẽ ixtã apkati. Nhũm ra kahpa hkòt kòkja kawax pè àpêr mex jakamã pa mẽ ma hkòt mõ. Nê mẽ

ixtã apkati axkrut nê Potew wýr pøj nê hã pàr xi.

¹⁴ Hãmri nê pàr rũm ijapøj nê krĩ kamã Jejus kòt mẽ ixtõ nê htõx kwýjê pumu nhũm mẽ amnhĩ wýr mẽ ixwý. Pa mẽ ma mẽ hkòt mra nê mẽ hkòt ri ixpa hã ixtã ù semãn. Hãmri nê ma Rõm wýr hpãnhã ixpar o mõ.

¹⁵ Hãmri nê kormã amým inhmõr ri nhũm Rõm kãm Jejus kòt mẽ ixtõ nê ixtõxjaja mẽ ijarênh ma nê man mẽ ixkutã mra. Ma krĩ pè Prasxi Apja mẽ “Wẽn Pijakrunêpxi” anhỹr xwýnh jarênhja wa hwýr mẽ ixkutã mra. Hãmri pa mẽ axpẽn kaxpa nhũm Pawre mẽ omu nê hkĩnh nê. Nê mẽ hã Tĩrtũm mã amnhĩ jarê nê kãm:

—Pa Tĩrtũm? Nà ãm hãmri na ka mẽ ixkutã jajê rê. Na pa mẽ omu nê ixkĩnh nê. Nà amex o amex Tĩrtũm. Anê.

¹⁶ Hãmri pa mẽ ma mẽ hkòt Rõm wýr mõ nê pøj. Jatã Itar kãm Rõm wýr pøj. Hãmri nhũm pòristi krãhtũm Pawre mã:

—E kot paj mẽ hagjênh xà kamã ajaxàr kêt nê. Kot kaj amã nhỹri ixkre kamã apa hprãm nê mamrĩ kamã apa. Nom koja pòristi hõ akòt pa ho pa.

Anhỹr jakamã nhũm nhỹri ixkre kamã pahшти Sesti kot mar kaxyw kamã hamak o pa.

Pawre kot Rõm kamã tanhmã amnhĩ nhĩpêx to hã harênh

Atre 17.5-6

¹⁷ Tã nhũm Pawre Rõm kamã hã apkati axkrunêpxi

ně amnhĩ wỳr Ijaew xàptàr tùmrejê hwỳ nhũm mẽ hã akuprõ nhũm mẽ kãm amnhĩ jarẽ mẽ mẽ kãm:

—E ixkwỳjaja. Pa mẽ amã amnhĩ jarẽ ka mẽ inhma. Nà na pa pre mẽ panhĩgêjtê kapêr nhĩrõp tanhmã ixãm to hkêt nẽ rỳ ixte tanhmã mẽ pahkwỳjê hõ hto hkêt tã nhũm mẽ pahkwỳjaja amarĩ ixpynê. Jerujarẽ kamã ixpynê nẽ Rõm nhõ xwỳnhjê nhĩhkram ijaxà.

18 Hãmri nhũm mẽ ixte amnhĩ nhĩpêx ã ixkukja nẽ tee ri mẽ kot mẽmoj mỳrapê ixpĩr kaxyw tanhmã ixkukjêr to kaprỳ. Jakamã nhũm mẽ kãm ixkator prãm nẽ.

19 Nom nhũm mẽ pahkwỳjaja kãm ja mex kêt jakamã pa pre jar pahi maati Sesti kot ixte kãm amnhĩ jarênh ã inhmar kaxyw amnhĩm harê nẽ man hwỳr mō. Kot paj tanhmã kãm mẽ pahkwỳjê ho ixkapêr punuj to hkêt nẽ. ãm ixte amnhĩ tã tanhmã mar to hpix kaxyw na pa hwỳr mō.

20 —Tã pa amnhĩ wỳr mẽ awỳ. Ixte mẽ amã amnhĩ jarênh kaxyw. Mẽ pahkaprĩ xwỳnhta. Mẽ pahte kormã kamã pajamak o papa xwỳnh Jejusta. ãm ixte amnhĩ kaxyw hkôt ijamaxpêr pix mỳrapê na prem ã kàx o ixkaxpre anê. Anê.

21 Hãmri nhũm mẽ kuma nẽ kãm:

—Nà jar tanhmã ajarênh kute hkêt. Na pre Jutej kamã mẽ pahkwỳjaja tanhmã ajarênh to hã kagà nẽ mẽ

ixwỳr mênh kêt nẽ. Nẽ ham mẽ kurũm mẽ hpõx xwỳnhjaja na prem tanhmã mẽ inhmã ajarênh to hkêt nẽ.

22 No na xep hte pyka pitã hkôt mẽ kãm mẽ ate Jejus kôt amnhĩ xunhwỳr xwỳnhjê kurê nẽ. Na pa pre mẽ ajarênh ma nẽ mẽ inhmã axujarênh mar prãm nẽ. Anê.

23 Hãmri nhũm mẽ kot mar kaxyw arĩgro hta.

Tã nhũm mẽ kot arĩgro hyr kato nhũm mẽ Pawre nhõrkwỹ hwỳr pikuprõnh rax nẽ nhũm mẽ kãm awjarẽ. Mẽ kãm ujarênh ry nẽ. Nẽ ho kamàt. Nẽ mẽ kãm:

—Nà mẽ pahte amnhĩ wỳr kamã pajamak o papa xwỳnh Jejusta. Kot kaj mẽ atõ amnhĩ kaxyw hkôt ajamaxpêr nẽ hkôt amnhĩ xãm nhũm Tĩrtũm ja hã apumu nẽ ato hkra. Anê.

Nhũm pre ã mẽ kãm kapêr anê. Nẽ finat Mojes kot Tĩrtũm nhỹ hã Jejus kukamã tanhmã hã kagà htoja nhũm mẽ kãm harê. Nẽ Tĩrtũm nhỹ hã kapêr jarênh o mẽ pa xwỳnhjaja kot tanhmã hã kagà htoja nhũm mẽ kãm harê.

24 Hãmri nhũm mẽ hkwỳjaja kuma nẽ hkôt hamaxpêr nẽ amnhĩ kaxyw Jejus kôt hamaxpêr nẽ hkôt amnhĩ xunhwỳ. No nhũm mẽ hkwỳjaja kuma nẽ ãm kuma nẽ kãm axte mar prãm kêt nẽ.

25-29 Jakamã kãnhmã kuhê nẽ nojarêr nhũm Pawre mẽ kãm:

—Nà amnepêm na pre Tĩrtũm finat Ijaisti mã tanhmã kapêr to. ỳ hã kot mẽ

panhîgêtjê mã tanhmã kapêr jarênh to kaxyw. Tîrtûm Karõ nhỹ hã kot mẽ kãm kapêr nê tanhmã mẽ harênh to kaxyw. Te Tîrtûm tãm mẽ kãm kapêr pyræk mẽ kãm kapêr. Nê ãm hãmri tanhmã mẽ pahkwỳjê jarênh to. Na pre mẽ kãm:

E Ijaisti. Kêr ka ma akwỳjê hkôt ri mẽ kãm tanhmã ixkapêr jarênh to ho ri apa.

Nê mẽ kãm: “Kot kaj mẽ ajamak o axumar tỳx tã aprĩ hã ixkapêr mar kêt nê.

Nê mẽ ano ho arĩt tỳx tã aprĩ hã ixte amnhĩ nhĩpêx ã ixpumunh kêt nê.

Mê amã ixkapêr mar prãm kêt jakamã te mẽ ate mar pymaj amnhĩ jamak pro pyræk o amnhĩ nhĩpêx o ri apa.

Nê mẽ amã ixte amnhĩ nhĩpêx ã ixpumunh prãm kêt jakamã te mẽ ate ixte amnhĩ nhĩpêx ã ixpumunh pymaj te mẽ anomnhôt pyræk o amnhĩ nhĩpêx o ri apa.

Jao amnhĩ kaxyw ixkôt aja-maxpêr kêt nê.

Kop mẽ amã ixkapêr mar prãm ronhỹx ka mẽ aprĩ hã inhmar tỳx nê.

Nê aprĩ hã ixte amnhĩ nhĩpêx ã ixpumunh mex nê.

Jao amnhĩ tomnuj kaga hpa nê ixkôt amnhĩ xunhwỳ.

Pa ja hã mẽ apumu nê mẽ ato mex nê.

Tã ka mẽ ã amnhĩ nhĩpêx anhỹr kêt nê.” Anhỹr o kêr ka mẽ kãm ixkapêr

jarênh o ri mẽ hkôt apa Ijaisti. Anê.

Na pre ã Tîrtûm mẽ panhîgêtjê kaxyw Ijaisti mã kapêr anê nhũm ô ri mẽ kãm ujarênh o pa nê mẽ pamã hã kagà. Jakamã kwa mẽ okora. Kêr ka mẽ jajê pyrà nê ã amnhĩ nhĩpêx anhỹr hkêt nê. Kwa mẽ inhma nê inhmar tỳx nê. Ijaew kêt xwỳnhjaja kot kapêr marja na ra Tîrtûm kãm hprãm nê. Jakamã koja mẽ hwỳr mẽ kot kapêr jarênh o mẽ pa xwỳnh kwỳjê rê nhũm mẽ hkôt mẽ kãm ujarênh o pa nhũm mẽ kuma nê mẽ akurom kãm mar prãm nê. Anê.

Hãmri nhũm mẽ kuma nê hapôx pa nê ma akupỳm axpên mã tanhmã kapêr jarênh to ho mra.

³⁰ Hãmri nhũm pahi maati Sesti tokyx amnhĩ wỳr Pawre hwỳ nê tanhmã mar to hkêt nhũm ôrkwỳ kamã kêp prês nê pa ho hã amgrà axkrut. Nê tãm ôrkwỳ pãnhã mẽ kãm amnhĩre. Nhũm pre krĩ nhõ xwỳnhjaja ohtô nê hwỳr mra nhũm amnhĩ wỳr mẽ omu nê hkĩnh nê.

³¹ Na pre hte amnhĩ wỳr mẽ kuwỳ nê mẽ kãm Tîrtûm kapêr jarênh o hkrĩ. Mẽ kot Tîrtûm Kra Pahihti Jejus Kris kôt amnhĩ xunhwỳr nhũm Tîrtûm kot ja hã mẽ omunh nê amnhĩ katut kôt mẽ kot amnhĩ tomnuj rênh par nê mẽ ho hkra hã mẽ kãm ujarênh o hkrĩ. Nê mẽ kot hkôt amnhĩ xunhwỳr xwỳnhjê jahkre. Tanhmã mẽ kot Jejus kôt amnhĩ nhĩpêx

mex to ho pa hã mẽ kãm karõ
ho hkrĩ. Hãmri nhũm mẽhõ ja
nê tanhmã kãm kapěr to hkêt
nẽ.

Tã ãm ja pix Teopre. Ixpê
Rukre na pa awýr kagàja
nhĩpêx nõ kumẽ. Nẽ kamã
amã tanhmã mẽ pahkwýjê
jarẽnh to. Tã ãm ja pix na
hapêx.

Rõmãn Pawre kot Rõm kãm Jejus kôt hkwyjê hwÿr kagà nê mênh

Kagà ja na pre Pawre hipêx. Kêp Jejus nhÿ hã mē ahkre ho pa xwÿnh na pre. Na pre hte mry kà ho ixkre nhÿpêx nê mē kãm ho wênê ho mē hkôt pa pê mē piitã mē kãm Tirtũm kapêr jarênh o pa. Tã krÿ pê Rõm kamã mē kot Jejus kôt amnhÿ xunhwÿr xwÿnhjê hwÿr kagàja nhÿpêx nê mē hwÿr kumê. Kormã ma mē hwÿr mör nê mē omunh kêt ri.

Nê Jejus kêp Tirtũm mã tanhmã mē pajarênh to xwÿnh ã nhũm pre mē kãm harê nê hã kagà. Jejus kot mē pahte amnhÿ tomnuj pãnhã mē panê htyk jakamã na hte Tirtũm mē pahte hkôt amnhÿ xunhwÿr ã mē pahpumu nê Jejus kukwak ri mē pahte amnhÿ to mex xwÿnh ã mē pajarê.

Nê Tirtũm Karõ nhÿ hã mē kot amnhÿ nhÿpêx nyw nê hamaxpêr nyw o pa hã nhũm Pawre mē kãm karõ nê hã kagà. ã na pre mē kãm mēmoj jarê nê hã kagà anê. Nê hã kagà ho:

¹ Pa Rõm nhõ xwÿnhjaja? Xà mē amex? E ot pa mē awÿr kagà nhÿpêx nê kumê. Tirtũm na pre mē akaxyw ixãm. Ixte mē amã Jejus kot tanhmã mē panê amnhÿ nhÿpêx to hã harênh o ri ixpa kaxyw. Na pre ixpê Pawre hã ixpumu nê

ixãm. Jakamã na pa ã mē awÿr kagà nhÿpêx nê mênh anê. Ixte Jejus nhÿ hã mē ahkre ho ri ixpa xwÿnh na pa. Na pa hte kãm tanhmã amnhÿ nhÿpêx to ho ri ixpa. Tã ã mē awÿr kagà nhÿpêx nê mênh anê.

² Amnepêm na pre Tirtũm nhÿ hã kapêr jarênh o ri mē pa xwÿnhjaja mē pakukamã mē panhÿgêjtê mã Jejus kukamã tanhmã harênh to ho ri pa. Nê mē kãm kapêr jarênh o mē hkôt pa nê mē kãm:

—Koja nhÿrmã Tirtũm mē pahpiitã mē panê tanhmã kot amnhÿ nhÿpêx to mã xwÿnh mē nhũm mē hpiitã hprÿ hã harênh ma nê omu. Anê.

Nhũm prem ã Jejus kukamã mē kãm harênh anhÿr o ri mē hkôt pa. Tirtũm kapêr ã kagà htũm kamã harênh xà hkôt tanhmã mē kãm harênh to.

³ Tirtũm Kra Jejus Krisja na pre mē kãm harênh o ri mē hkôt pa. Mē panhõ Pahihti na. Kêp Tirtũm Kra htã na pre mē pahpyrà nê ï ho amnhÿ nhÿpêx nê wry nê katorxà nhõxà hkre rũm kato. Jakamã kêp Tirtũm Kra pix kêt mããnên katorxà hkôt kêp higêt Tawi hkanrêhã htãmnhwÿ.

⁴ Kêp Tirtũm Kra htã nhũm prem axtem nê tanhmã hamaxpêr to nê kupÿ. Nom nhũm Tirtũm kêp amnhÿ Kra hã akupÿm ho htÿr. Jakamã na pu htem harênh ma nê kãm pajamaxpêr o:

—Jejus kêp Tirtũm Kraa. Mē kot kêp hpÿr tã nhũm akupÿm nê

ho htír. Jakamã nhũm Tirtũm pyrã nẽ hihtýx o hihtýx. Anẽ.

⁵ Tã ã Tirtũm kot Kra nhĩpêx anhýrja ri na mãânên pa ixto mex nẽ mẽ akaxyw ixãm. Jakamã na pa hte ma krĩ pitã hkõt mẽ kãm tanhmã Jesus Kris jarênh to ho ri mẽ hkõt ixpa. Ijaew mã nẽ Ijaew kêt xwýnhjê mã. Mẽ kot harênh mar nẽ amnhĩ kaxyw kãm hamaxpêr nẽ kapêr kõt pix mã amnhĩ nhĩpêx mex kaxyw.

⁶⁻⁷ Nẽ mẽ apê Rõm nhõ xwýnhjaja. Na ka prem Jesus kõt amnhĩ xunhwý nhũm Tirtũm ja hã mẽ apumu nẽ mẽ ato hkra nẽ mẽ apê Jesus mẽ wa hkwý hã mẽ ajarê. Mẽ ate hkõt amnhĩ nhĩpêx kaxyw nhũm pre ã mẽ ajarênh anẽ.

Tã ot pa kagã nhĩpêx nẽ mẽ awýr mênh kaxyw. Tirtũm kot mẽ ato hkra xwýnhjê hwýr. Tirtũm kãm mẽ ajapêê.

Na pa hte mẽ ato mẽ panhĩpêêxã maati Tirtũm mẽ Pahihti Jesus Kris wa hwýr rãhã ri ixpa. Nẽ mẽ ato wa hwýr o:

—Kwa kêr ka wa Rõm kamã war akrajê pumunh mex nẽ mẽ kutã anojarêr rãhã nẽ. Kê mẽ hamakêtkati nẽ àmnhĩx ri tanhmã amnhĩ nhĩpêx to ho ri pa. Anẽ.

Pawre kot Rõm nhõ xwýnhjê pumunh prãm ã amnhĩ jarênh

Atre 28.15-16; Rõmään 15.22-29

⁸ Nẽ na ka prem amnhĩ kaxyw Jesus Kris mã ajamaxpêr nẽ hkõt amnhĩ xunhwý nhũm krĩ piitã hkõt

mẽ pa xwýnhjaja mẽ ajarênh ma. Nẽ mẽ ate amnhĩ nhĩpêx nyw ã mẽ ajarênh ma nẽ axpên mã tanhmã mẽ ajarênh to ho pa. Nẽ mẽ ajarênh o:

—Kwa na xep Rõm kãm mẽ hkwýjaja amnhĩ kaxyw Jesus mã hamaxpêr týx nẽ. Nẽ hkõt amnhĩ nhĩpêx mex rãhã ho ri pa. Anẽ.

Pa ã mẽ kot mẽ ajarênh anhýrja ma nẽ ixkĩnh týx nẽ. Nẽ Tirtũm mã mẽ anhý hã ixkĩnh ã amnhĩ jarênh o ri ixpa.

⁹ Na pa hte mẽ ato hwýr rãhã ho ri ixpa. Nẽ nhýri mẽ kãm Tirtũm Kra Jesus kapêr jarênh o ri ixpa nẽ mẽ amã ijamaxpêr nẽ mẽ ato kuwý. Nẽ tanhmã Tirtũm mã amnhĩ nhĩpêx to ho ixpa pê mẽ amã ijamaxpêr nẽ mẽ ato kuwý. Tirtũm kot ja hã ixpumunh mex.

¹⁰ Na pa hte tanhmã kãm amnhĩ jarênh to kaxyw nẽ mẽ akaxyw amnhĩ to kuma nẽ kãm:

—Pa Tirtũm? Na pa ra inhmã ma Rõm wýr inhmõr nẽ kamã akõt ixkwýjê pumunh prãm týx kumrêx. Xã kot ka tokyx mẽ hwýr inhmẽ nã? Anẽ.

¹¹ Na pa ra inhmã mẽ awýr inhmõr prãm týx nẽ. Na pre Tirtũm Karõ tanhmã ixkrã hto pa ý hã kapêr ã kagã mar týx nẽ. Nẽ hkõt mêmoj mex pumunh rax nẽ. Tã ra inhmã ma mẽ awýr inhmõr nẽ amnhĩ xô ri mẽ amã harênh prãm nẽ. Mẽ ate inhmar nẽ aprĩ hã Jesus Kris kõt amnhĩ xunhwýr týx nẽ

hkôt amnhĩ nhĩpêx mex rãhã ho ri apa kaxyw.

¹² Kot paj nhỹrmã ma mẽ awýr mõ. Nẽ mẽ awýr pøj pu mẽ axpên pumu mẽ pahkĩnh nẽ. Mẽ pahte amnhĩ kaxyw Jejus Kris mã pajamxpêr mex o papa hã axpên pumu mẽ pahkĩnh nẽ. Nẽ mẽ pahpiitã hkôt amnhĩ nhĩpêx mex o ri papa.

¹³ E ixkwýjaja. Xatã ixte mẽ awýr ixkrã htã nhũm mẽmoj xatã tanhmã ixpê àmtàr to pa kormã jar ixpa. Nom kot paj nhỹrmã ma mẽ awýr mõ. Mẽ ate ja hã inhmar kaxyw na pa ã Tirtũm noo mã mẽ amã amnhĩ jarênh anẽ. Na pa pre krĩ hkwy kamã mẽ apê Ijaew kêt xwýnh kwýjê hwýr ixpa. Nẽ mẽ kãm Jejus kot mẽ panê tanhmã amnhĩ nhĩpêx to hã harênh o ri mẽ hkôt ixpa. Nhũm mẽ hkwyjaja inhma nẽ hkôt amnhĩ xunhwý. Ja kaxyw na pa inhmã ma mẽ anhõ krĩ hwýr inhmõr prãm nẽ. Mẽ akwyjaja kot ixkapêr mar nẽ mẽ apyrã nẽ Jejus kôt amnhĩ xunhwýr kaxyw.

¹⁴ Na pre ra Tirtũm ixte kapêr o mẽ ajahkre ho ixpa kaxyw mẽ piitã mẽ kaxyw ixãm. Tanhmã ri mẽ kute xwýnhjê kaxyw. Mẽ kãm ma ho mẽ pa xwýnhjê mẽ mẽ kãm ma hkêt o mẽ pa xwýnhjê mã. Nẽ mẽ kot kagà pumunh xwýnhjê mẽ mẽ kot kagà pumunh kêt xwýnhjê mã. Mẽ piitã mẽ kaxyw na pre ixãm. Ixte mẽ kãm Jejus kot tanhmã mẽ panê amnhĩ nhĩpêx to hã harênh o ri mẽ

hkôt ixpa kaxyw.

¹⁵ Jakamã na pa ra inhmã mẽ apê Rõm nhõ xwýnhjê hwýr inhmõr prãm nẽ. Ixte mẽ anhõ krĩ kamã mẽ piitã mẽ kãm ja jarênh o ri ixpa nhũm mẽ kot inhmar nẽ mẽ pahpyrà nẽ Jejus kôt amnhĩ xunhwýr kaxyw.

Jejus kot mẽ panê htyk ã harênh

Sikũn Ximotre 1.6-12

¹⁶ Nẽ Jejus kot mẽ panê htyk ã harênhja ãm hãmri na. Harênhja mex o mex. Na htem kuma nẽ kãm hamaxpêr nẽ amnhĩ kaxyw hkôt hamaxpêr nẽ hkôt amnhĩ xunhwý. Hãmri nhũm Tirtũm ja hã mẽ omu nẽ mẽ nẽ mẽ kot amnhĩ tomnuj o hapêx pa nẽ mẽ ho hkra. Nom mẽ ixpê Ijaew nhõ xwýnhjê pix kêt. Mãänên mẽ apê Ijaew kêt xwýnhjaja nhũm kãm mẽ pajapê ho axpên pyrãk. Jakamã na pu htem Jejus kôt amnhĩ xunhwý nhũm Tirtũm ja hã mẽ pahpumu nẽ mẽ pahto hkra. Ja kaxyw àhpumunh tỳx o àhpumunh tỳx.

¹⁷ ãm mẽ kot amnhĩ kaxyw Jejus mã hamaxpêr xwýnh pixjaja na hte mẽ ho hkra. Kapêr ã kagà htũm kot tanhmã ja jarênh to nẽ harênh kot:

Na hte Tirtũm mẽ kot amnhĩ kaxyw Kra mã hamaxpêr ã mẽ omunh xà hkôt mẽ ho hkra nhũm mẽ amnhĩ kaxyw kãm hamaxpêr rãhã ho pa. Jao ra ô ri tãm amnhĩ nhĩpêx o pa. Anẽ.

Mê pahpiitã mê pahte amnhĩ tomnuj xwÿnh ã mê pajarênh

Atre 14.15, 17.22-29; Apokarip 9.20-21

¹⁸ Nê mê kot amnhĩ tomnuj o ri mê pa xwÿnhjaja na hte Tĩrtũm axtem tanhmã mê harênh to. Na htem Tĩrtũm kapêr ma nom amnhĩ tomnuj gryk ã ãm kuma. Nê mê hkwÿjaja kot kapêr mar py-maj kapêr õ ho mê kêp ãmnâr rãhã ho ri pa nhũm Tĩrtũm ja hã mê omu nhũm ja kêp omnuj nê.

¹⁹⁻²⁰ Te mê kot Tĩrtũm kot amnhĩ nhĩpêx ã omunh kêt pyrãk o amnhĩ nhĩpêx tã mê kot omunh mex. Tĩrtũm kot mêmoy to kator krax rũm ra kot mê pamã amnhĩ to amnhĩrit mex. Pu mê pano ho omunh kêt tã no ãm kot amnhĩ nhĩpêx kõt ra kêp Tĩrtũm ã omunh mex nê. Nê kêp mêmoy piitã ho kator xwÿnh ã omunh mex nê. Nê mex o mex ã omu nê hihtÿx o hihtÿx hã omu. Tĩrtũm kot amnhĩ nhĩpêx kot amnhĩrit mex nhũm mê kot omunh mex tã hkõt amnhĩ xunhwÿr kêt nê. Nê axtem nê hamaxpêr o:

—Tk. Tĩrtũm kot inhmã amnhĩ to amnhĩritre hã kot pa kêt ri hkõt amnhĩ nhĩpêx. Kot pa inhno ho omu nê rĩ kor-mã hkõt amnhĩ nhĩpêx japêr. Anê.

Ra mê kot amnhĩ nhĩpêx ã omunh mex tã ri ã hamaxpêr anê. Jakamã nhũm Tĩrtũm tee ri ja hã mê omu nhũm ja kêp omnuj tÿx nê.

²¹ Mê kot amnhĩ nhĩpêx ã omunh mex tã amnhĩ kaxyw

tanhmã kãm hamaxpêr hto hkêt. Rÿ arĩ hamaxpêr japêr nê kãm:

—Nà Tĩrtũm. ãm hãmri amex kumrêx. ãm amex o amex. Apê Tĩrtũm ã ãm apixi mex kumrêx na ka. ãm hãmri na ka hte mê ixto mex o apa.

Anhÿr o amnhĩ kaxyw kãm kapêr kêt nê. Nê ãm htÿx tanhmã hamaxpêr punuj to pix o ri pa. Te kamãt kô kamã ri mê pa xwÿnhjê kot amnhĩ nhĩpêx pyrã nê mêmoy mex pumunh kêt nê.

²² Mê kot ãhpumunh tÿx ã amnhĩ to jarkrar o ri pa htã no ãm te mê hkrã kanhĩn kêt nê mê hamaxpêr kêt pyrãk o amnhĩ nhĩpêx.

²³ Jakamã na htem amnhĩm mêmoy karõ nhĩpêx. Mêmoy htyk mã xwÿnhjê hõ karõ nhĩpêx. Tanhmã panhĩ karõ rÿ mêmoy mry karõ rÿ mêmoy kuwênh karõ. Rÿ mêmoy kagã karõ nhĩpêx. Hãmri nê ho õ sãnti nê te ri ho Tĩrtũm nhĩpêx pyrãk o hipêx. Jao hpar pê hkõn krã ho rôrok nê amnhĩ to kuwÿ nê kãm amnhĩ jagrer pê kãm mex o mex ã harê. Tĩrtũmja sãnti rom htĩr o htĩr tã nhũm mê axtem nê sãnti gryk ã hkaga nê ã amnhĩ nhĩpêx o pa anê.

²⁴ Jakamã nhũm tee ri ã mê kot amnhĩ nhĩpêx anhÿr ã mê omu nê amnhĩ pyrã nê mê hkaga nê ãm mê omu. Jakamã nhũm mê ãm amnhĩ krã hkõt tanhmã ri amnhĩ tomnuj to ho pa. Nê axpên kãm ri tanhmã hpijaãm kêt to. ã na htem htÿx ri amnhĩ tomnuj anhÿr o pa.

25 Tirtũm kapërja âm hãmri htã nhũm mẽ axtem nẽ te amnhĩ pum rênh pyrãk o hipêx nẽ kãm hamaxpër kêt nẽ. Nẽ hpãnã ri mẽ hêx xwýnhjê kapër pix ma nhũm ja te mẽ kãm mex pyrãk. Na htem ã amnhĩ nhĩpêx anẽ hãmri nẽ axtem nẽ Tirtũm kot mẽmoj nhĩpêx pix parpê rôrôk nẽ amnhĩm mex o mex ã harê. Nom kot hipêx xwýnh Tirtũm parpê mãn ã amnhĩ nhĩpêx anhÿr kêt nẽ. Nom kot mẽmoj nhĩpêx xwýnhhta mex o mex jakamã koja mẽ kot hkôt amnhĩ nhĩpêx xwýnhjaja jajê rom kãm mex o mex ã harênhtũm rãhã ho ri pa.

26 No mẽ kot amnhĩ tomnuj xwýnhjaja na hte Tirtũm amnhĩ pyrã nẽ mẽ hkaga nhũm mẽ htýx amnhĩ krã hkôt ri tanhmã amnhĩ tomnuj to ho ri pa. Jao mẽni hkwyjaja axtem nẽ axpẽn gryk ã mjên kaga nẽ axpẽn nhĩõ ho mjên.

27 Nhũm mẽmy hkwyjaja mããnên axtem nẽ amnhĩ kwýjê my gryk ã hprõ kaga nẽ axpẽn nhĩõ ho hprõ. Na htem ã axpẽn kamã hpijaãm kêt o pa anẽ. Mýrapê koja mẽ à pix kãm amnhĩ xà htýx kamã hamak o pa.

28 Na htem amnhĩ tomnuj gryk ã Tirtũm mã hamaxpër kêt nhũm tee ri amnhĩ tã mẽ omu nẽ hamaxpër o:

—Mẽ kãm amnhĩ tomnuj pix prãm jakamã kwãr mẽ mãmrĩ ã amnhĩ nhĩpêx anẽ. Kot paj axte ja nê tanhmã mẽ kãm ixkapër to hkêt nẽ. Anẽ.

Jakamã nhũm mẽ arĩ htýx ri amnhĩ krã hkôt tanhmã

amnhĩ tomnuj to ho ri pa rãhã nẽ.

29 Hãmri nẽ mẽmoj punuj pix mã hamaxpër.

Nẽ kãm amnhĩ mex pix prãm mã hamaxpër.

Nẽ kãm axpẽn tomnuj pix prãm.

Nẽ mẽmoj tã axpẽn kãm gryk pix prãm.

Nẽ mẽ kãm axpẽn par pix prãm.

Nẽ mẽmoj tã ri kãm axpẽn mã àkjêr prãm.

Nẽ mẽmoj tã kãm axpẽn mã hêx prãm.

Nẽ kãm axpẽn kaxyw tanhmã hamaxpër punuj to pix prãm.

Nẽ kãm tanhmã axpẽn to kapër punuj to pix prãm.

30 Nẽ kãm mẽmoj tã axpẽn to hêx pix prãm.

Nẽ kãm Tirtũm prãm kêt o ri pa.

Nẽ mẽmoj tã axpẽn mã àkjêr o ri pa.

Nẽ mẽmoj tã amnhĩ to jarkrar rãhã ho ri pa.

Nẽ tanhmã amnhĩ tomnuj to pix kukamã hamaxpër. Nhũm mẽ katorxã nẽ mẽ hipêxã tee ri ja nê tanhmã mẽ kãm kapër to no nhũm mẽ mar kêt kumrêx.

31 ã mẽ kot amnhĩ nhĩpêx anhÿr o ri mẽ pa xwýnhjaja na hte Tirtũm kãm mẽmoj mex nhũm mẽ kêp omnuj nẽ nhũm Tirtũm kêp mẽmoj omnuj nhũm mẽ kãm mex nẽ. Nẽ axpẽn mã mẽmoj tanhmã ho hã amnhĩ jarênhtã ho anhÿr kêt nẽ. Nẽ axpẽn kãm ukapri ho ri pa hkêt nẽ.

32 Tirtüm kapër ã kagà htüm kot tanhmã mẽ hkukamã mẽ harënh to nẽ mẽ harënh kot:

Ã mẽ kot amnhĩ nhĩpêx anhÿr o ri mẽ pa xwÿnhjaja koja mẽ nhÿrmã ty hãmri nẽ amnhĩ xà htÿx kamã hamak rãhã ho ri pa ho pa. Anẽ.

Nhũm mẽ kot amnhĩ tã ja mar tÿx tã aa amnhĩ tomnuj kaga hkêt nẽ. Arĩ ã amnhĩ nhĩpêx anhÿr o pa rãhã nẽ. Nhũm mẽ hkwyjaja mẽ kot amnhĩ tomnuj ã mẽ omu nẽ mẽ uràk nẽ ã amnhĩ nhĩpêx anhÿr o ri mẽ hkôt pa nhũm mẽ amnhĩ pyrã nẽ mẽ omu nẽ hkĩnh nẽ. Na htem ã amnhĩ nhĩpêx anhÿrja gryk ã Tirtüm kaga nhũm tee ri amnhĩ tã mẽ omu nẽ amnhĩ pyrã nẽ mẽ hk-aga nẽ ãm mẽ omu. Jakamã nhũm mẽ amnhĩ tomnuj tÿx pix rãhã ho pa.

2

Mẽ kot amnhĩ tomnuj xwÿnhjê hkukamã mẽ harënh

Matêwre 7.1-5; Sikũn Tesarõn 1.6; Eprêw 9.27; Sikũn Pêtre 2.4, 3.7; Jutre 6-14; Apokarip 6.15, 20.11

¹ Nẽ kot ka mẽ atõ ã mẽ kot amnhĩ tomnuj anhÿr xwÿnhjê kot amnhĩ nhĩpêx ã mẽ harënh ma nẽ ã ajamaxpër anẽ nẽ ajamaxpër o:

–Tk. Mẽ kot amnhĩ tomnuj pix o ri pa xwÿnh kênã. No pa na ã ixte amnhĩ nhĩpêx anhÿr o ri ixpa hkêt. Mẽ kurom ixte tãm amnhĩ nhĩpêx o ri ixpa xwÿnh na pa.

Anhÿr o amnhĩ jarẽ. Kwa nã mẽ ã ajamaxpër anhÿr

kêt nẽ. Mẽ pajaxwÿja na pu htem tõhã mẽ uràk nẽ tanhmã amnhĩ tomnuj to. Tã ka mẽ ã mẽ kot amnhĩ tomnuj ã mẽ harënh anẽ nẽ te ka ate amnhĩ jarënh pyrãk.

² Tirtüm kapër ã kagà htüm kot mẽ kot amnhĩ tomnuj o ri mẽ pa xwÿnhjê jarënh kot:

Mẽ kot amnhĩ tomnuj mÿrapê koja mẽ nhÿrmã amnhĩ xà htÿx kamã hamak rãhã ho ri pa. Anẽ.

Ãm hãmri ã mẽ harënh kot anhÿr.

³ Mãn ka mẽ atõ tanhmã amnhĩ kukamã ajamaxpër to nẽ ajamaxpër o:

–Nà koja Tirtüm nhÿrmã amnhĩ nẽ kuwy hwÿr mẽ kot amnhĩ tomnuj xwÿnhjê rẽ. No pa koja hwÿr inhmënh kêt nẽ. Anẽ.

Kwa mẽ ã ajamaxpër anhÿr kêt nẽ. Kot ka mẽ ã amnhĩ kukamã ajamaxpër anhÿr tã tõhã mẽ uràk nẽ tanhmã amnhĩ tomnuj to. Jakamã koja Tirtüm mẽ uràk nẽ hã tanhmã mẽ ato.

⁴ Kot kaj mẽ atõ tanhmã amnhĩ tomnuj to hãmri nẽ ãm ja hã amnhĩ pumu nẽ ajamaxpër o:

–Ixte amnhĩ tomnuj xwÿnh tã na hte Tirtüm ja hã ixpumu nẽ ãm ixpumu nẽ hã tanhmã ixto hkêt nẽ. Kêp mẽ ixkamã ukapri xwÿnh jakamã na hte gryk tokyx anhÿr kêt nẽ. Jakamã kot paj arĩ tanhmã amnhĩ tomnuj to ho ri ixpa nẽ aa jam inhÿrer kêt nẽ. Tirtüm kot ja hã tanhmã ixtore kaxyw hã.

Anhÿr o ajamaxpër. No ãm ja kot anhÿr kêt. Na hte

Tirtüm kormã amnhĩ tã mẽ pajamã. Mẽ pahte amnhĩ tomnuj kaga nõ hpãnhã hkõt amnhĩ xunhwÿr kaxyw na hte kormã amnhĩ tã mẽ pajamã. Jakamã na kormã tanhmã ate amnhĩ tomnuj tota ã tanhmã ato hkêt nõ.

⁵ Mẽ akrã hihtÿx jakamã mẽ amã hkõt amnhĩ xunhwÿr prãm kêt. Na ka htem tanhmã amnhĩ tomnuj to pix kukamã ajamaxpër o ri apa. Nẽ gaa nõ ra anhÿr kumrëx. Nhũm Tirtüm tee ri ja hã mẽ apumu nhũm ja kęp omnuj tÿx o mõ. Jakamã koja nhÿrmã tanhmã mẽ ajarënh to nõ gryk tÿx kãm tanhmã mẽ atomnuj tÿx to. Æm hãmri na hte mẽ pahte amnhĩ nhĩpëx ã mẽ pahpumunh xà hkõt ahpÿnhã tanhmã mẽ panhĩpëx to.

⁶ Koja nhÿrmã mẽ pahpiitã kormã mẽ pahtir ri mẽ pahte amnhĩ nhĩpëx ã mẽ pahpumunh xà hkõt tanhmã mẽ panhĩpëx to. Mẽ kot amnhĩ to mex o ri mẽ pa xwÿnhjaja nhũm mẽ ho mex nõ. Nẽ mẽ kot amnhĩ tomnuj o ri mẽ pa xwÿnhjaja nhũm mẽ homnuj nõ. Koja nhÿrmã mẽ pahpiitã mẽ pahto hpimràatã ã mẽ panhĩpëx anë.

⁷ Mẽ kot hkõt tãm ri amnhĩ nhĩpëx o pa pë kãm Tirtüm kot amnhĩm mẽ mex ã mẽ harënh prãm xwÿnhjaja koja nhÿrmã amnhĩm mẽ mex ã mẽ harë. Hãmri nhũm mẽ kuri htir tùm nõ hkĩnh nõ mex kumrëx nõ pa ho pa.

⁸ Nom mẽ kot amnhĩ mã pix mã ri hamaxpër o ri mẽ pa xwÿnhjaja. Nẽ mẽ kot

tanhmã amnhĩ tomnuj to gryk ã Tirtüm kapër kaga xwÿnhjaja koja kãm mẽ hkĩnh kêt nõ tanhmã mẽ homnuj tÿx to.

⁹ Mẽ kot amnhĩ tomnuj xwÿnh piitã koja mẽ nhÿrmã amnhĩ xà htÿx kamã hamak rãhã nõ pa ho pa. Ijaew kumrëxjaja nõ hpãnhã Ijaew kêt xwÿnhjaja nhũm mẽ amnhĩ xà htÿx kamã hamak rãhã nõ pa ho pa. Mẽ kot amnhĩ tomnuj tÿx o paja mÿrapë.

¹⁰ No kêt tãm mẽ kot amnhĩ nhĩpëx xwÿnhjaja koja Tirtüm mẽ ho mex rax rãhã ho pa ho pa. Nẽ amnhĩm mẽ kot amnhĩ to mex xwÿnhjê hã mẽ harë. Nẽ tanhmã mẽ ho mex to nhũm mẽ kamã amnhĩ krit nõ pa ho pa. Hamakëtkati nõ hkĩnh nõ àmnhix ri pa ho pa. Ijaew kwÿ kumrëxjaja nõ mãänën Ijaew kêt xwÿnh kwÿjaja nhũm mẽ mex nõ hamakëtkati nõ hkĩnh nõ àmnhix ri pa ho pa.

¹¹ Koja Tirtüm nhÿrmã ahpÿnhã mẽ pahte amnhĩ nhĩpëx ã mẽ pahpumunh xà hkõt tanhmã mẽ pajarënh to pë tanhmã mẽ panhĩpëx to. Mẽ ixpë Ijaewjaja nõ mẽ apë Ijaew kêt xwÿnhjaja nhũm ã mẽ pahpiitã mẽ panhĩpëx anë.

¹² Annepëm na pre finat Mojes mã tanhmã kapër to nhũm kuma nõ ô ri hã kagã hpa. Mẽ ixpë Ijaew ri na kapër ã kagãja. Ra mẽ ixte mar tÿx jakamã koja mẽ ixtõ ra kapër mar tÿx tã hkõt amnhĩ nhĩpëx kêt hãmri

nhũm Tirtũm tee ri amnhĩ
tã omu nẽ ã amnhĩ nhĩpêx
anhÿrja mÿrapê nhÿrmã ma
mẽ kot amnhĩ xà htÿx kamã
hamak tũm xàta wÿr kumẽ.
Kot kapêr mar tÿx tã hkôt
amnhĩ nhĩpêx kêt mÿrapê
nhũm ã hipêx anẽ. No kêt
mẽ apê Ijaew kêt xwÿnhjaja
mẽ ixkĩnhã mẽ ari Tirtũm
kapêr ã kagà hkêt jakamã
koja mẽ ate kapêr nhĩrôp
mẽ akuhê hã mẽ apumunh
kôt tanhmã mẽ anhĩpêx to
hkêt nẽ. Koja hpãnhã mẽ ate
tanhmã amnhĩ tomnuj to ho
apa mÿrapê mẽ kot amnhĩ xà
htÿx kamã hamak o pa tũm
xàta wÿr mẽ arẽ.

13 Na hte mẽ kot kapêr mar
ã mẽ omunh xà hkôt amnhĩm
mẽ kot amnhĩ to mex xwÿnh
ã mẽ harênh kêt nẽ. Æm mẽ
kot kapêr kôt amnhĩ nhĩpêx ã
mẽ omunh xà hkôt pix mã na
hte amnhĩm mẽ kot amnhĩ to
mex xwÿnh ã mẽ harẽ.

14 No mẽ hkwyjaja kormã
kot kapêr mar kêt tã te ra mẽ
kot mar mex pyrãk o amnhĩ
nhĩpêx. Jao amnhĩ krã hkôt
tãm ri amnhĩ nhĩpêx kurê
kumrêx. Te kot Ijaew pyrã nẽ
Tirtũm kapêr mar tÿx nẽ hkôt
amnhĩ nhĩpêx o ri pata pyrãk.

15 Na htem amnhĩ krã hkôt
tanhmã amnhĩ nhĩpêx mex
to. Te Tirtũm kapêr kot mẽ
hkrãm gjêx pyrãk o amnhĩ
nhĩpêx o pa. Jakamã tee
ri tanhmã amnhĩ tomnuj to
hã amnhĩ pumu nẽ hkaprĩ
nẽ. Nẽ tãm amnhĩ nhĩpêx ã
amnhĩ pumu nẽ hkĩnh nẽ.

16 Tã koja nhÿrmã Tirtũm
Jejus Kris mã anẽ nhũm kuma

hãmri nẽ mẽ piitã kormã mẽ
htĩr ri tanhmã mẽ kot amnhĩ
nhĩpêx to hã mẽ omunh xà
hkôt tanhmã mẽ harênh to.
Nẽ mẽ hamaxpêr kôt mẽ
omunh mex xà hkôt tanhmã
mẽ harênh to. Mẽ papajaja
mẽ pahte axpên jamaxpêr kôt
axpên pumunh kêt tã Jejus
kot mẽ pajamaxpêr kôt mẽ
pahpumunh par.

Tã na pa hte mẽ kãm Jejus
kot tanhmã amnhĩ nhĩpêx to
hã harênh o ixpa pê ã mẽ kãm
ixujarênh anhÿr o ri ixpa.

*Pawre kot hkwyjê mã
kapêr*

Rõmãn 3.19-20

17 Nẽ ixpyrà nẽ mẽ apê
Ijaew kwÿjaja na ka mẽ ax-
tem nẽ Ijaew kêt xwÿnhjê mã
tanhmã amnhĩ to jarkrar o ri
apa nẽ mẽ kãm:

—Nà mẽ ixpê Ijaew ri
Tirtũm kapêr ã kagà jakamã
ãm mẽ papxipixjaja na hte
Tirtũm amnhĩm mẽ inhmex
ã mẽ ijarẽ. Nẽ ãm mẽ
papxipixjaja na hte mẽ ixto
hkra.

18 Nẽ mẽ papxipixjaja na
mẽ ixte Tirtũm kãm hprãm
xà hkôt mẽmoj pumunh par
nẽ mẽ kot amnhĩ to mex
xà pumunh par nẽ mẽ kot
amnhĩ tomnuj xà pumunh
par. Mẽ apê Ijaew kêt
xwÿnhjê rom mẽ ixte mẽmoj
piitã omunh par kumrêx.
Anẽ.

19-20 Nẽ amnhĩ jarênh o:

—Nà te mẽ ixpê mẽ nohkre
xwÿnhjê pa hã mẽ hamÿnh nẽ
ri mẽ ho ixpa xwÿnh pyrãk.
Jakamã Ijaew kêt xwÿnhjê
htÿx ri mẽ pa xwÿnhjaja na
pa htem mẽ kãm Tirtũm kapêr

tũm o mẽ ahkre mex o ri ixpa. Kormã mẽ kot hprĩ hã mar kêt jakamã na pa htem ho mẽ ahkre ho ri mẽ hkôt ixpa. Mẽ kurom mẽ ixte mar par kênã.

²¹ Anhÿr ã amnhĩ jarênh nê mẽ ate kapêr o mẽ ahkre ho apa htã hkôt amnhĩ nhĩpêx kêt nê.

Nê mẽ ate mẽ kot axpên pê àhkĩnh nê mẽ hkurê htã no ãm mẽ kamjaja axpên pê axàhkĩnh o ri apa.

²² Nê mẽ amã sãnti hkĩnh kêt ã amnhĩ jarênh tã axtem nê hwÿr agjê nê hpar pê kãxpore nhĩkwÿ xwÿnh o axàhkĩnh o ri apa.

Nê mẽ kot axpên prô ho amnhĩkati nê mẽ hkurê ho apa htã mẽ kamjaja ã ri amnhĩ nhĩpêx anhÿr o ri apa.

²³ Nê mẽ ate Tĩrtũm kapêr ã kagà mex o mex ã harênh tã hkôt amnhĩ nhĩpêx hkêt nê. Jakamã nhũm mẽ akwÿjaja ja hã mẽ apumu nê mẽ apyrà nê Tĩrtũm ã hpijaam kêt o pa.

²⁴ Tĩrtũm kapêr ã kagà htũm kot tanhmã mẽ ate amnhĩ nhĩpêx ã mẽ ajarênh to nê mẽ ajarênh kot:

Mẽ kêp Ijaew kêt xwÿnhjaja na htem Ijaew kot htÿx ri amnhĩ nhĩpêx o ri mẽ pa hã mẽ omu nê mẽ ÿ hã tanhmã Tĩrtũm o kapêr punuj to ho ri pa. Anê.

²⁵ Mẽ pahpê Ijaew na pu htem mẽ pahkrajaja mẽ hapôx kôt

kormã mẽ hkryre ri pu htem mẽ kêp mẽmy kwryt kà jakà. Finat Mojes kot Tĩrtũm nhÿ hã mẽ panhĩgêjtê mã hã karô xà hkôt na pu htem ã mẽ hipêx anê. Mẽ pahte Tĩrtũm mã mẽ pahkrajê nhôr ã amnhĩ to amnhĩrit kaxyw. Jakamã na pu htem arĩ Mojes kapêr kôt ã mẽ hipêx anê nhũm Tĩrtũm kãm ja mex nê. Nom kot pu mẽ kapêr kwÿm ri tanhmã amnhĩ nhĩpêx to ho papa nhũm ja kêp omnuj tÿx nê hãmri pu mẽ tee ri mẽ pahkrajê my kwryt kà jakàr kaprÿ. Na hte Tĩrtũm ã mẽ pahkrajê nhĩpêx anhÿr ã mẽ pahpumunh kôt amnhĩm mẽ pamex ã mẽ pajarênh kêt nê. Nom mẽ pahte kapêr kôt amnhĩ nhĩpêx mex o papa pê mẽmy kwryt kà jakàrja nhũm kãm mex nê.

²⁶ Ijaew kêt xwÿnhjaja kot ã mẽ hkrajê nhĩpêx anhÿr kêt tã ra mẽ hkwÿjaja Tĩrtũm kapêr ma nê hkôt amnhĩ nhĩpêx o ri pa. Jao te mẽ kot amnhĩ my kwryt kà jakàr pyràk o amnhĩ nhĩpêx. Jakamã nhũm Tĩrtũm ja hã mẽ omu nê mẽ kãm:

—Nà ãm hãmri. Mẽ ate amnhĩ my kwryt kà jakàr kêt tã mẽ apê ixkra na ka mẽ. Anê.

²⁷ Mẽ kot amnhĩ jakàr kêt tã Tĩrtũm kapêr kôt amnhĩ nhĩpêx mex o ri pa nhũm amnhĩ tã mẽ omu nê mẽ arom amnhĩm mẽ kot amnhĩ to mex xwÿnh ã mẽ harê. Mẽ kot amnhĩ jakàr kêt tã.

No mẽ kajaja mẽ ate Tĩrtũm nhÿ hã Mojes kapêr ã kagà mar tÿx tã hkôt amnhĩ nhĩpêx

kêt nê. Ja mÿrapê koja ja hã mē apumu nê Ijaew kêt xwÿnhjê kĭnhã mē ate amnhĭ tomnuj xwÿnh ã mē ajarê. Ra mē ate amnhĭ jakâr tâ mē ate amnhĭ tomnuj xwÿnh ã mē ajarê.

²⁸ Nê kot ka mē atõ tanhmã amnhĭ to jarkrar to nê amnhĭ jarênh o:

—Nà ixpê Ijaew jakamã na hte Tirtüm mē kot inhmy kwryt kà krãhyr kôt ixto kraa. Anê.

Nom xà na hte Tirtüm ã mē pahte amnhĭ nhĭpêx anhÿr ã mē pahpumunh kôt mē pahto hkra? Nà kot anhÿr kêt. Na htem ãm htÿx ã amnhĭ to jarkrar anhÿr kaprÿ ho pa.

²⁹ Nê Tirtüm Karõ kot mē hkarõ mã gjêx xwÿnhjaja kêp Tirtüm kra jakamã na htem Tirtüm kãm hprãm xà hkôt amnhĭ nhĭpêx. Nom ri amnhĭ krã hkôt tanhmã amnhĭ nhĭpêx to ho pa hkêt nê. Rÿ htÿx hamaxpêr o:

—Nà kot paj Mojes kapêr ã kagà hkôt amnhĭ nhĭpêx nhüm Tirtüm ja hã ixpumu nê amnhĭm inhmx ã ijarê nê ixto hkra.

Anhÿr o hamaxpêr kêt nê. Na htem hamaxpêr o:

—Nà ra Tirtüm Karõ kot ixkarõm àr jakamã ixpê hkra nhüm amnhĭm inhmx ã ijarê. Jakamã kot paj ãm kôt pix mã ri amnhĭ nhĭpêx o ri ixpa rãhã ty. Kwâr mãmrĭ ixkwÿjaja amnhĭm inhmx kêt ã ijarê. Anê.

Kêr ka mē ã ajamxpêr anhÿr o ri pa. ã mē hamaxpêr anhÿr na mex o mex.

3

¹ Nê mãn ka mē ra tee ri tanhmã amnhĭ kukamã ajamaxpêr to nê ajamaxpêr o:

—Kwa mo kaxyw na pa ixpê Ijaew? Mon pa pre we ixpê Ijaew kêtêre hkêt nê? Mē kêp Ijaew kêt xwÿnhjaja kot amnhĭ jakâr kêt tâ nhüm Tirtüm mē pahpyrà nê mē ho hkra. Anê.

Kwa mē ã ri ajamaxpêr anhÿr kêt nê.

² Mē pahpê Ijaew na pre Tirtüm Ijaew kêt xwÿnhjê rom mē pahto mex rax nê. Na pre amnepê mã mē panhĭgêt mã tanhmã kapêr to. Mē pahpiitã mē pahte mar nê hkôt amnhĭ nhĭpêx kaxyw. Nom Ijaew kêt xwÿnhjê nhĭgêt mã ã kapêr anhÿr kêt nê. ãm mē pahpê Ijaew nhĭgêt pix mã kapêr. Jakamã mē pahpê Ijaew mã ja mex kumrêx.

³ Nom kot kaj mē atõ ja ma nê ajamaxpêr o:

—Nà Tirtüm kot mē ixto mex mã mē ixtã amnhĭ jarênh tâ no nhüm xep mē inhĭgêt kwÿjaja hkôt amnhĭ nhĭpêx kêt nê. Na xep prem kapêr kwÿm ri amnhĭ tomnuj o pa. Jakamã ko. Koja Tirtüm mē ixpê mē hkanrêhã mē htãmnhwÿjaja tanhmã mē ixto mex to japêr ko. Anê.

⁴ Kwa mē ri ã ajamxpêr anhÿr kêt nê. Tirtüm na hte mē pahpiitã mē pakurom mēmoj tâ amnhĭ jarênh o hêx kêt nê. Tã ra kot tanhmã mē pahtã amnhĭ jarênh to xà hkôt koja ã mē pahto mex anê. Kapêr ã kagà htüm

kot mēhō tanhmā Tīrtūm mā kapēr to nē harēnh kot:

Pa Tīrtūm. Nà ām kapxipix na ka hte mēmoj tā amnhī jarēnh xà hkôt amnhī nhīpēx o ri apa.

Jakamā na htem ām axpēn mā axēx ā akapēr ā ajarēnh kaprỳ. Anhỹr o harē.

⁵ No kot ka mē atō atỳx ajamaxpēr nē ajamaxpēr o:

—Xà koja Tīrtūm tanhmā mē ixte amnhī tomnuj to hā mē ixpumu nē gryk? Nà koja gryk kêt nē. Jakamā kot paj arī amnhī tomnuj o ri ixpa. Kê mē piitā ja hā ixpumu nē ixrom Tīrtūm tapxipix kot amnhī to mex o pa xwỳnh ā harēnh o pa. Nà ja mex. Jakamā kot paj arī amnhī tomnuj rāhā ho ri ixpa nhūm mē Tīrtūm pix mā măn kot tām amnhī nhīpēx xwỳnh ā harē. Hāmri nhūm Tīrtūm amnhī tā ixpumu nē tanhmā ixto hkêt nē. Koja tanhmā ixto japēr hāmri nē ixpyrà nē amnhī tomnuj nē. Anē.

Kot kaj mē ā ajamaxpēr anē nē ām amnhī krā hkôt ā ajamaxpēr anhỹr kaprỳ. Nom ā ajamaxpēr anhỹrja Tīrtūm jamaxpēr kôt kêt.

⁶ Kwa mē ri ā ajamaxpēr punuj anhỹr kêt nē. Tīrtūm kot mē pahpyrà nē aa kot amnhī tomnujre hā. Kop ām mē pahpyrà nē tanhmā kot amnhī tomnuj to ronhỹx tanhmā kot we amnhī to nē mē pahte amnhī tomnuj xwỳnh ā mē pajarē? Nhỹx mē pahpyrà nē ā amnhī jarēnh

anē. Nà ā mē ajamaxpēr anhỹrja mex kêt.

⁷⁻⁸ E pa ixprī hā mē amā ja jarē ka mē inhma. Kot kaj mē atō amnhī kukamā ajamaxpēr o:

—E kot paj māmri ri mēmoj tā ixēx o ri ixpa kê mē ixēx nhi hā ixpumu nē ixrom Tīrtūm pix mā măn kot amnhī to mex ā harē. Nē ām pix mā măn hēx kêt xwỳnh ā harē. Hāmri nhūm Tīrtūm amnhī tā ixpumu nē mē ā mē kot harēnh anhỹrja ma nhūm ja kām mex nē nhūm hkīnh nē. Jakamā ixēx o ri ixpaja ā tanhmā ixto hkêt nē. Ra mē kot ixrom tām kot amnhī nhīpēx o pa xwỳnh ā harēnh jakamā nhūm ixēx nhita ā tanhmā ixto hkêt japēr. Jakamā kot paj ixte amnhī tomnuj o ri ixpaja mā inhūrer kêt nē. Kêr kê mē ja hā ixpumu nē ixrom Tīrtūm tapxipix kot amnhī to mex xwỳnh ā harē.

Anhỹr o ajamaxpēr nom mē ajamaxpērja kot anhỹr kêt. Na hte akwỳjaja pa ixpē Pawre ixēx o ixpa hā ri axpēn mā ijarē no na pa hte ixēx o ri ixpa hkêt nē. Ā mē ajamaxpēr anhỹr o ri apa xwỳnhjaja koja Tīrtūm mē atomnuj tỳx nē kām ga.

Mē mē pahte amnhī tomnuj xwỳnh ā mē pajarēnh

Wam Korīt 6.9; Karatas 3.22; Xitre 3.3

⁹ Tā tanhmā kot puj mē pahpē Ijaew amnhī jarēnh to? Xà kot pu mē pahte amnhī to mex o Ijaew kêt xwỳnhjē jakrenh ā amnhī jarē? Nà

mē pahte ā amnhī nhīpêx an-
hỹyre hā. Mē pahpê Ijaew nē
Ijaew kêt xwýnhjaja. Mē pah-
piitā mē pahte amnhī tomnuj
o axpēn pyrāk. Na pa pre ra
mē amā ja jarē.

10 Tirtūm kapēr ā kagā htūm
kot ja jarēnh kot:

Mēhō na we aa kot amnhī
tomnuj kêt kumrēx nē
pa?

11 Nē mēhō na we kot mēmoj
mex piitā omunh par?

Nē mēhō na kām Tirtūm
prām?

12 Nā amrakati kumrēx. Na
mē ra piitā hkaga hpa.

Nē kapēr kwým ri tanhmā
amnhī tomnuj to ho
pa.

Ām mēhō pyxire nē amnhī
to mex o ri pa hkêt
kumrēx.

13 Na htem kapēr punuj pix o
ri pa.

Jakamā Tirtūm noo mā mē
kot amnhī nhīpêxja te
kot mēmoj tyk nē hkro
punuj pyrāk.

Na htem ām ri hêx pix
kukamā ri hamaxpēr o
pa. Tanhmā mē hêx to
xāja te kēp kagā xoprē
nhō wenēn xihtýx
pyrāk.

14 Nē na htem mē piitā mēmoj
nhīxi ho ri axpēn mā
mē hixi jarēnh o pa. Nē
ri tanhmā axpēn japyrý
hto ho pa.

15 Nē tanhmā kapēr mā gêt
kām mē kām kapēr to.

16 Nē tanhmā mē hkwyjê
homnuj to. Jakamā
nhūm mē piitā ri

hkaprī nē mex kêt nē
pa.

17 Nhūm htem ām axpēn mā
mē gryk xà pix o kapēr
o pa.

18 Nē Tirtūm ā hpijaàm kêt
o pa. Na htem kapēr
mā nē ām kuma nē kām
hkīnh kêt o pa.

Ā na htem amnhī nhīpêx
anhỹr rāhā ho pa. Anē.

Ā Tirtūm kapēr ā kagā htūm
kot mē pajarēnh anhỹr.

19 Mē pahpê Ijaew ra mē
pahte ja jarēnh mar týx.
Tirtūm kapēr ā kagā htūm
kwý na. Na hte ā mē
kot amnhī tomnuj xwýnhjê
jarēnh anē. Nē määñēn mē
papajaja. Mē pahpê Ijaew na
hte ā mē pajarēnh anē. No ām
mē papaxipix hkêt. Krī piitā
hkôt ri mē pa xwýnhjaja nhūm
ā mē harēnh kot anhỹr. Ijaew
kêt xwýnhjaja nē mē pahpê
Ijaew. Mē pahpiitā mē pahte
amnhī tomnuj xwýnh jakamā
mēmo kaxyw kot pu mē pahte
amnhī tomnuj kêt ā ri amnhī
to jarkrar o papa? Kot puj
mē ā amnhī jarēnh anhỹr
kaprý. Jakamā koja Tirtūm
mē pahpiitā mē pahte amnhī
tomnuj mýrapê tanhmā mē
panhīpêx to.

20 Mē pahtō koja mē pahte
kapēr kôt pix mā amnhī
nhīpêx o papa hā mē pajarē?
Nē mē pahtō mā koja mē
pamā kapēr nē mē pamā:

—Nā na ka hte akatāt kôt
ixkapēr kôt pix mā amnhī
nhīpêx mex nē. Ām hāmri na
ka hte ā amnhī nhīpêx anhỹr
o apa.

Anhÿr o mẽ pahtõ mã kot we ã kapër anê? Nà aa kot mẽ pahtõ mã kapër anhÿr kêt. Na pu htem ãm kapër ma nê tee ri amnhĩ kukamã pajamaxpër. Mẽ pahte amnhĩ tomnuj ã amnhĩ pumunh kaxyw na pre mẽ pamã kapër ã kagà htùmja gõ. Mẽ pahtõ mẽ pahte kapër ã kagà hkôt amnhĩ nhĩpêx mex o papa hkêt kênã kot kêt ri amnhĩm mẽ pahte amnhĩ to mex xwÿnh ã mẽ pajarê.

Tanhmã Tirtùm kot mẽ pahto hkra to hã harênh

Atre 17.30-31; Karatas 2.16-21; Piripos 3.7-9; Xitre 3.5; Xiakre 2.10

²¹ Nê na hte Tirtùm mẽ pahte kapër kôt amnhĩ nhĩpêx ã mẽ pahpumunh kôt amnhĩm mẽ pahte amnhĩ to mex xwÿnh ã mẽ pajarênh kêt nê. Jakamã mēhõ kukwak ri koja we ã mẽ pajarênh anê? Nà nhãm mēhõ kot tãm amnhĩ nhĩpêx rãhã ho pa hã omunh pix kukwak ri koja ã mẽ pajarênh anê. Tã mēhõ kukwak ri kot ã mẽ pajarênh anhÿr xwÿnhhta na pre ra mẽ pamã ho amnhĩrit. Amnepêm Tirtùm kapër ã kagà htùm kamã na pre mēhõ hkukamã tanhmã harênh to. Nê Tirtùm nhÿ hã mẽ kapër jarênh o pa xwÿnhjaja haxwÿja kukamã tanhmã harênh to ho pa.

²² Jejus Krisja na prem hkukamã harênh o pa. Tãm na pu htem hkôt amnhĩ xunhwÿ nê amnhĩ kaxyw kãm pajamaxpër rãhã ho papa nhũm Tirtùm ja pix ã mẽ pahpumunh kôt amnhĩm mẽ

pahte amnhĩ to mex xwÿnh ã mẽ pajarê. Mẽ kot Jejus kôt amnhĩ xunhwÿr xwÿnh piitãã. Mẽ ixpê Ijaew nê mẽ apê Ijaew kêt xwÿnhjaja. Mẽ pahpiitã mẽ pahte axpên pyrãk jakamã kot puj mẽ pahtõ Jejus kôt amnhĩ xãm nhũm Tirtùm Kra Jejus kot amnhĩ to mex pix o pa kukwak ri mẽ pahpumu nê amnhĩm pajarênh o:

—Nà ãm hãmri. Ra kot ixkra Jejus kôt amnhĩ xãm jakamã ra inhmã te Jejus kot amnhĩ nhĩpêx pyrã nê amnhĩ to mex o pa. Anê.

²³ No mẽ pahtõ na mẽ pahte Tirtùm mẽ Jejus wa urãk nê amnhĩ nhĩpêx mex rãhã ho ri papa? Nà amrakati kumrêx. Mẽ pahpiitã mẽ pahte amnhĩ tomnuj xwÿnh kênã.

²⁴ Tã Tirtùm kot mẽmoj tã mẽ pakutã nojarêt rãhã jakamã na hte Jejus Kris kukwak ri amarĩ amnhĩm mẽ pahte amnhĩ to mex xwÿnh ã mẽ pajarênh o pa. Mẽ pahte Jejus kôt amnhĩ xunhwÿr xwÿnh piitãã nhũm ã mẽ pajarênh anê. Ra Jejus kot htyk o mẽ pahte amnhĩ tomnuj piitã hpãnhã amnhĩrer par jakamã na hte Tirtùm Jejus kukwak ri amarĩ mẽ pahte amnhĩ to mex xwÿnhjê hã mẽ pajarê. Te mẽ pahte amnhĩ tomnuj kêt kumrêx pyrãk mẽ pajarê.

²⁵⁻²⁶ Na pre mẽ pahwÿr Jejus mẽ nhũm mẽ pahwÿr wrÿ nê mẽ panê ty nê htyk o mẽ pahte amnhĩ tomnuj piitã hpãnhã amnhĩrer pa. Jakamã kot pu mẽ pahtõ

amnhĩ kaxyw hkôt pajamaxpêr nhũm Tĩrtũm ja hã mẽ pahpumu nẽ Kra kukwak ri amnhĩ katut kôt mẽ pahte amnhĩ tomnuj piitã rẽnh pa. Jao te aa mẽ pahte amnhĩ tomnuj kêt kumrẽx pyrãk ã mẽ pahpumu.

No kêt amnepê m kormã Jejus wrỳk nẽ mẽ panê htyk kêt ri mẽ pa xwỳnhjaja. Tanhmã na pre Tĩrtũm mẽ kot hkôt amnhĩ xunhwỳr xwỳnhjê nhĩpêx to? Kormã Jejus mẽ panê htyk kêt ri mẽ pa xwỳnhjaja tanhmã na pre mẽ hipêx to? Nà na pre mẽ hkwỳjaja amnhĩ kaxyw Tĩrtũm kôt hamaxpêr nẽ hkôt amnhĩ xunhwỳ nhũm amnhĩ tã mẽ omu nẽ amnhĩm mẽ harẽnh o:

—Nà ãm hãmri. Kojã nhỹrmã Ixkra ma mẽ hwỳr wrỳ nẽ mẽ nê ty nẽ htyk o mẽ kot amnhĩ tomnuj pãnhã amnhĩrer pa. Jakamã kojã mẽ tãmjaja amnhĩ tomnuj pãnhã amnhĩrer kêt nẽ. Anẽ.

Tã nhũm Jejus tãm mẽ pahwỳr wrỳ nẽ mẽ pahpiitã mẽ panê ty. Jakamã nhũm Tĩrtũm ra mẽ pahte hkôt amnhĩ xunhwỳr xwỳnhjaja Kra kukwak ri amnhĩ katut kôt mẽ pahte amnhĩ tomnuj piitã rẽnh pa. No na hte amari ã mẽ panhĩpêx anhỹr kêt nẽ. ãm Jejus tyk pix kukwak ri na hte ã mẽ panhĩpêx anẽ. ãm hãmri na hte ã mẽ panhĩpêx mex anẽ. Na hte tãm mẽ panhĩpêx rãhã ho pa.

²⁷ Jakamã kot puj mẽ ã pajamaxpêr anẽ nẽ pajamaxpêr o:

—Nà na pa hte amnhĩ to mex rãhã o ri ixpa. Amnhĩ to mex o mẽ piitã mẽ hakrenh pa.

Anhỹr o pajamaxpêr kêt nẽ. Kojã mẽhõ ã hamaxpêr anẽ nẽ ãm amnhĩ jarẽnh o hẽx. Na hte Tĩrtũm mẽ pahte amnhĩ to mex ã mẽ pahpumunh kôt amnhĩm mẽ pahte amnhĩ to mex xwỳnh ã mẽ pajarẽnh kêt nẽ. Mẽ pahte amnhĩ to mex rãhãre hã. Nom na pu htem amnhĩ kaxyw Jejus mã pajamaxpêr nẽ hkôt amnhĩ xunhwỳ nhũm ja hã mẽ pahpumu nẽ rĩ kormã amnhĩm mẽ pamex ã mẽ pajarẽ.

²⁸ E pa axte tanhmã mẽ amã ja jarẽnh to ka mẽ aprĩ hã inhma. Mẽmoj pumunh kôt na hte Tĩrtũm mẽ pahte amnhĩ to mex xwỳnh ã mẽ pajarẽnh wehe? Xà mẽ pahte kapêr tũm kôt amnhĩ nhĩpêx o ri papa hã mẽ pahpumunh kôt? Nà na hte ja hã mẽ pahpumunh kôt ã mẽ pajarẽnh anhỹr kêt nẽ. Mẽ pahte hkôt amnhĩ nhĩpêx rãhã ho papare hã. ãm mẽ pahte amnhĩ kaxyw Kra Jejus kôt pajamaxpêr nẽ hkôt amnhĩ xunhwỳr ã mẽ pahpumunh kôt pix mã na hte mẽ pahte amnhĩ to mex xwỳnh ã mẽ pajarẽ. Ja pix ã mẽ pahpumunh kôt na hte ã mẽ pajarẽnh anẽ.

²⁹ Nẽ xà Tĩrtũm kêp mẽ ixpê Ijaew pix nhõ Tĩrtũm pix na? Nà kêp mẽ ixpix nhõ Tĩrtũm kêt. Kêp mẽ ixpê Ijaew nhõ Tĩrtũm nẽ mãânẽn kêp mẽ apê Ijaew kêt xwỳnhjê nhõ Tĩrtũm.

³⁰ Nē Tĩrtũm ãm pyxi mex. Axtem hõ kêt. Na hte mē pah-piitã mē panhĩpêx o axpên pyræk. Jakamã na hte mē kot amnhĩ kaxyw Jejus kôt hamaxpêr o mē pa xwýnhjê pumu nē mē kot amnhĩ to mex xwýnh ã mē harê. Mē ixpê Ijaew nē mãânên mē apê Ijaew kêt xwýnhjaja.

³¹ Tã koja mēhõ htýx hamaxpêr o:

—Nã ixte amnhĩ kaxyw Jejus kôt ijamaxpêr mex o ixpa nhũm Tĩrtũm kot amnhĩm inhmex ã ijarênh jakamã kot paj axte kapêr kôt amnhĩ nhĩpêx kêt nē. Kot paj ãm amnhĩ krã hkôt amnhĩ nhĩpêx o ri ixpa. Ra Tĩrtũm kot ixto hkra kênã.

Anhÿr o ajamaxpêr japêr. Kwa mē ã ri ajamaxpêr anhÿr kêt nē. Na htem amnhĩ kaxyw Jejus kôt hamaxpêr hãmri nē kãm hkôt amnhĩ nhĩpêx prãm rãhã nē pa ho pa.

4

Apraãw kot amnhĩ kaxyw Tĩrtũm kôt hamaxpêr

Karatas 3.6-18; Xiakre 2.23

¹ Nē mē panhĩgêt finat Apraãwja kêp mē pahpê Ijaew pãr krax. Tã mēmoj tã na pre Tĩrtũm omu nē kot amnhĩ to mex xwýnh ã harê?

² Xà kot kãm tanhmã amnhĩ nhĩpêx to hã karõ xà hkôt amnhĩ nhĩpêx mex ã omunh xà hkôt nhũm pre ã harênh anê? Nã ja kôt kêt. Kop apu ja kôt ã kot harênh anhÿr ronhÿx Apraãw amnhĩ tã

omu nē Tĩrtũm mã amnhĩ to jarkrar nē kãm:

—Pa Tĩrtũm? E mãn ka ix-pumu. Na pa hte akapêr kôt amnhĩ nhĩpêx mex o ri ixpa.

Anhÿr o nhÿx pre kãm amnhĩ to jarkrar. No na pre tanhmã kãm amnhĩ to jarkrar to hkêt nē.

³ Tã mēmoj tã omunh xà hkôt na pre Tĩrtũm amnhĩm mex ã harê? Nã Tĩrtũm kapêr ã kagà htũm kot tanhmã Apraãw jarênh to kot:

Na pre Apraãw amnhĩ kaxyw Tĩrtũm kôt hamaxpêr nē hkôt amnhĩ xãm nhũm amnhĩ tã omu nē amnhĩm mex ã harê. Anê.

⁴ Mē õ patrãwjaja na htem kãm mē àpênh xwýnhjaja àpênh mex ã mē omunh xà hkôt mē kãm amnhĩre.

⁵ No Tĩrtũm na hte ã mē panhĩpêx anhÿr kêt nē. Na hte mē pahte tãm amnhĩ nhĩpêx ã mē pahpumunh kôt amnhĩm mē pahte amnhĩ to mex xwýnh ã mē pajarênh kêt nē. ãm mē pahte amnhĩ kaxyw Kra Jejus kôt pajamaxpêr nē hkôt amnhĩ xunhwÿr ã mē pahpumunh kôt pix mã na hte amnhĩm ã mē pajarênh anê. Ra mē pahte amnhĩ tomnuj o ri papa htã hpãnhã amnhĩ kaxyw Jejus kôt pajamaxpêr xwýnh pixjaja na hte ã mē pajarênh anê.

⁶ Jakamã na hte mē pamã amnhĩ jarênh o:

—Ixte mē amex ã mē ajarênh tã no ãm mē ate amnhĩ to mex kôt mē apumunh kôt na pa ã mē

ajarēnh anhÿr kêt nē. Ām mē ate amnhī kaxyw Ixkra mē wa ixkôt ajamaxpēr nē wa ixkôt amnhī xunhwÿr ā mē apumunh kôt na pa hte ā mē ajarēnh anē. Anē.

Pu mē ā kot pamā kapēr anhÿr ā amnhī tā kuma nē pahkīnh nē. Pahi finat Tawi na pre haxwÿja ja jarēnh o:

7 Na hte Tirtūm amnhī katut kôt mē pahte amnhī tomnuj piitā rēnh pa nē axte kām hamaxpēr kêt nē.

Jakamā pu mē ja hā amnhī pumu nē pahkīnh nē.

8 Nē amnhī kukamā pajamaxpēr o: “Hēxta waa nē. Na pa pre amnhī tomnuj o ixpa nē tee ri ja hā amnhī pumu nē ixkaprī nē.

Hāmri nē amnhī to Tirtūm wÿ nhūm inhma nē ixte amnhī tomnuj o hapēx pa nē axte kām hamaxpēr kêt nē.

Nā ām hāmri. Ja mex kumrēx.” Anē.

9 Tā mē kot ja hā amnhī pumunh nē hkīnh xwÿnhjaja mēmojaja na mē? Xà mē kot amnhī my kwryt kà jakàr xwÿnh pix kwÿjaja na pre pahi Tawija ā mē harēnh anē nà? Nā mē tapxipixjaja kêt. Määnēn mē kot amnhī jakàr kêt xwÿnh kwÿjaja. Tanhmā na pre ra Tirtūm kapēr ā kagà htūm kot finat Apraāw jarēnh to? Na pre harēnh o:

Na pre Apraāw amnhī kaxyw Tirtūm kôt hamaxpēr nē hkôt amnhī xām nhūm amnhī tā omu nē

amnhīm mex ā harē. Anē.

10 Xà Apraāw ra kot amnhī my kwryt kà krāhyr nhīrō pē na pre Tirtūm amnhīm mex ā harē? Nā kormā kot amnhī krāhyr kêt ri na pre ā harēnh anē.

11 Kormā kot amnhī krāhyr kêt ri kām kapēr nē kām:

—E ate amnhī kaxyw inhmā ajamaxpēr nē ixkôt amnhī xām ā ixte apumunh kôt na pa amnhīm amex ā ajarē.

Anhÿr o kām kapēr hāmri nē rī kormā kām tanhmā amnhī krāhyr to hā kām karō nhūm kuma nē mar xà hkôt amnhī my kwryt kà hkwy krāhta. Kot Tirtūm mā amnhī nhōr ā amnhī to amnhīrit kaxyw ā amnhī nhīpēx anē.

Nom kormā amnhī krāhyr kêt ri na pre Tirtūm amnhīm mex ā harē. Tā Ijaew kêt xwÿnhjaja kot amnhī jakàr kêt tā mē hkwyjaja Apraāw pyrā nē amnhī kaxyw Tirtūm mā hamaxpēr nē kām amnhī nhōr jakamā Apraāw te kēp mē hpàr krax maati pyrāk.

12 Nē määnēn mē pahpē Ijaew. Kot puj mē pahtō amnhī kaxyw Tirtūm kôt pajamaxpēr nhūm amnhī tā mē pahpumu nē mē pamex ā mē pajarē. No ām mē pahte amnhī jakàr ā mē pahpumunh kôt ā mē pajarēnh anhÿr kêt nē. Ām Apraāw pyrā nē amnhī kaxyw Tirtūm kôt pajamaxpēr pix ā mē pahpumunh kôt na hte mē pamex ā mē pajarē. Kormā Apraāw kot amnhī my kwryt kà krāhyr kêt ri

ra kot amnhĩ kaxyw Tĩrtũm mã hamaxpěr jakamã kęp mẽ pahpê Ijaew mẽ pahte urak nẽ amnhĩ kaxyw Tĩrtũm mã pajamaxpěr xwýnhjê hpàr krax maati. Ijaew kêt xwýnhjê pyrà nẽ kęp mẽ pahpàr krax maati.

Tĩrtũm kot Apraãw mã mẽmoj mex jarěnh

Karatas 3.22

¹³ Amnepēm na pre Tĩrtũm Apraãw mã tanhmã kapěr to nẽ kãm:

—E koja nhỹrmã akanrêhã akra nẽ atàmnhwýjaja amýrpê apyrà nẽ krĩ piitã hkôt mẽ kęp mẽ õ pahi. Anẽ.

Tã tanhmã Apraãw kot amnhĩ nhĩpêx to hã omunh xà hkôt na pre ã kãm kapěr anẽ? Xà kot kãm tanhmã amnhĩ nhĩpêx to hã karõ nhũm kot hkôt amnhĩ nhĩpêx mex ã omunh xà hkôt na pre hkĩnh nẽ ã kãm kapěr anẽ? Nà kot anhỹr kêt. Mẽ pahtõ kot pu we Tĩrtũm kapěr xà hkôt pix mã amnhĩ nhĩpêx mex rãhã ho ri papa? Mẽ pahpê hihtýx kẽnã. ãm kot amnhĩ kaxyw Tĩrtũm kôt hamaxpěr nhũm kot amnhĩ tã omunh nẽ amnhĩm mex ã harěnh kôt pix mã na pre ã kãm kapěr anẽ.

¹⁴ Kop apu kot kãm tanhmã kapěr to nẽ kãm:

—E Apraãw. Kot kaj ixkapěr piitã ama nẽ hkôt amnhĩ nhĩpêx mex rãhã ho ri apa. Hã koja nhỹrmã akanrêhã akra nẽ atàmnhwýjaja kęp krĩ piitã hkôt mẽõ pahihtĩ.

Anhỹr o kãm kapěr ronhỹx ãm kãm ã kapěr anhỹr kaprý. Apraãw aa kot kapěr piitã

hkôt amnhĩ nhĩpêx mex o pare hã. Kop apu ã kãm kapěr anhỹr ronhỹx pre kuma nẽ tee ri amnhĩ kukamã hamaxpěr nẽ hamaxpěr o:

—Kwa nà. Ra ixte Tĩrtũm kôt amnhĩ xãm tã tanhmã kot pa amnhĩ to nẽ kapěr piitã hkôt amnhĩ nhĩpêx mex rãhã ho ri ixpa? Kot paj tee ri inhmã ã amnhĩ nhĩpêx anhỹr o ixpa hprãm kaprý. Jakamã koja nhỹrmã ixkanrêhã ixkra nẽ ixtàmnhwýjaja kęp mẽ õ pahi hkêt nẽ pa. Hêxta waa nẽ.

¹⁵ Kojã Tĩrtũm ixte kapěr kwým ri tanhmã ixte amnhĩ tomnuj to hã ixpumu nẽ tanhmã ixtomnuj to. No mēhõ kot we kapěr piitã hkôt amnhĩ nhĩpêx mex rãhã ho pa? Nà amrakati kumrêx.

Anhỹr o nhỹx pre hamaxpěr.

¹⁶ No na pre Tĩrtũm ã kãm kapěr anhỹr kêt nẽ. Ra kot hprĩ hã mẽ pahte amnhĩ nhĩpêx ã mẽ pahpumunh mex kẽnã. Na pre ãm kãm:

—E ate amnhĩ kaxyw ixkôt ajamaxpěr nẽ ixkôt amnhĩ xãm jakamã kot paj amarĩ ato mex nẽ. Anẽ.

Tĩrtũm na hte mẽmoj tã amnhĩ jarěnh o amnhĩ to hêx kêt nẽ. Na hte mẽmoj tã amnhĩ jarěnh xà hkôt tanhmã mẽmoj nhĩpêx to ho ri pa. Jakamã koja mẽ pahte Apraãw pyrà nẽ amnhĩ kaxyw hkôt pajamaxpěr xwýnh piitã mẽ pahto mex nẽ.

Nẽ xà na pre ã mẽ pamã kapěr anẽ nẽ mẽ pamã:

—E kot kaj mẽ ixkapêr kôt pix mã ri amnhĩ nhĩpêx o ri apa hã kot paj mẽ ato mex rax nê.

Anhỹr o mẽ pamã kapêr? Nà na pre ã mẽ pamã kapêr anhỹr kêt nê. Na pre mẽ pamã:

—Kot kaj mẽ finat Apraãw pyrã nê amnhĩ kaxyw ixkôt ajamaxpêr nê ixkôt amnhĩ xunhwý hã kot paj mẽ ato mex nê.

Anhỹr o mẽ pamã kapêr. Tã Apraãw kumrêx kot mẽ pakukamã amnhĩ kaxyw hkôt hamaxpêr jakamã te kêp mẽ pahpiitã mẽ pahte uràk nê ã amnhĩ nhĩpêx anhỹr xwýnhjê pàr krax maati pyràk.

¹⁷ Amnepêem na pre Tirtũm tanhmã Apraãw mã kapêr to. Kot tanhmã kãm kapêr toja Tirtũm kapêr ã kagà htũm kamã na. Na pre kãm:

Kot kaj apê ahpýnhã ri mẽ urojê hpàr krax. Anê.

Kormã Apraãw kra hkêt tã nhũm hkra hkukamã ã kãm kapêr anê. Hãmri nhũm kuma nê hkôt hamaxpêr kurê kumrêx nê hamaxpêr o:

—Hêxta waa nê. Ra ixprô mẽ wa ijamẽ wa ixpigêt tỳx nê wa ixkra hkêt kumrêx. Kot paj wa tanhmã amnhĩ to nê tokyx ty. Tã ra Tirtũm kot ixkra nê ixtãmnhwýjê hkukamã ã inhmã mẽ harênh anhỹr kênã. Jakamã kot pa xep wa ixpigêt tỳx tã tanhmã amnhĩ to nê ixkra. Nà kot pa xep wa anê. Nê koja ixkraja tanhmã amnhĩ to nê ixpê htyk japêr tã koja Tirtũm akupým inhmã ho htĩr. Nà

koja inhmã ho anê. Ra kot inhmã ixkra nê ixkanrêhã ixtãmnhwý xohtô jarênh kênã. Anê.

¹⁸⁻¹⁹ Na pre ra hpigêt tỳx nê. Ra hã amgrã pê 100 nê hkurê kêt nê pa. Nhũm hprô mããnên hpigêx tỳx nê. Nê õhy kamã hkra hkêt kumrêx. Kormã wa hkra hkêt tã nhũm Tirtũm Apraãw mã hkra nê htãmnhwý xohtô hã harê. Nê kêp mẽ urojê xohtôjê pàr krax ã kãm harê. Hãmri nhũm kuma nê amnhĩ kaxyw hkôt hamaxpêr tỳx kurê kumrêx.

²⁰ Nê ã amnhĩ nhĩpêx anhỹr rãhã ho pa. Na pre war amnhĩ kra hã amnhĩ jarênh ma nê tee ri amnhĩ kukamã hamaxpêr kêt nê. ãm Tirtũm tãm kot wa kãm wa hkra jarênh pix mã hamaxpêr pê amnhĩ kaxyw kãm hamaxpêr tỳx o ri wa pa. Nê hamaxpêr o:

—Nà ra wa ixpigêt tỳx kumrêx tã koja xep Tirtũm wa inhmã wa ixkra hõ gõ. Nà koja wa inhmã kugõ. Hêxta waa nê. ãm hãmri Tirtũmja mex o mex.

²¹ Nà kot wa inhmã wa ixkra jarênh xà hkôt koja wa inhmã kugõ. Ja kaxyw àhpumunh o àhpumunh. Tirtũmja hêx kêt. Anê.

²² Hãmri nhũm Tirtũm ã hamaxpêr anhỹr ã omu nê amnhĩm mex ã harê. Nê kot kãm amnhĩ jarênh xà hkôt wa kãm wa hkraja gõ.

²³ Nom na pre amnhĩm Apraãwja pix mex ã harênh kêt nê.

²⁴ Kot puj mẽ pahtõ uràk nê amnhĩ kaxyw hkôt paja-maxpêr nhũm amnhĩ tã mẽ

pahpumu nõ ra kot Apraaw jarõnhta pyrã nõ amnhim mẽ pamex ã mẽ pajarẽ. Na pre mẽ panhõ Pahihti Jejus ty nhũm Tirtũm akupõm ho htir. Tã mẽ papajaja na pu prem amnhĩ kaxyw Jejus kõt pajamaxpõr nhũm Tirtũm ja hã mẽ pahpumunh kõt mẽ pahte amnhĩ to mex xwõnh ã mẽ pajarẽ.

²⁵ Na pre mẽ pahwõr Kra Jejus mẽ nhũm mẽ pahwõr wrõ. Tã nhũm mẽ axtem nõ kupi nom nhũm amarĩ htyk kõt nõ. Na pre htyk o mẽ pahte amnhĩ tomnuj pãnhã amnhirer pa. Ja kaxyw na pre Tirtũm mẽ pahwõr kumẽ. Jakamã nhũm prem kupi nhũm akupõm ho htir. Tã mẽmo kaxyw na pre Tirtũm ã mẽ pahwõr Kraja mẽnh nhũm mẽ panẽ htyk anẽ nhũm akupõm ho htir? ãm kot kukwak ri amnhim mẽ pahte amnhĩ kaxyw hkõt pajamaxpõr xwõnhjaja mẽ pahte amnhĩ to mex xwõnh ã mẽ pajarõnh pix kaxyw.

5

Tirtũm kot mẽ pahto hkwy hã harõnh

Matõwre 5.12; Sikũn Korõt 4.8, 5.18-21; Xiakre 1.2-4; Wam Põtre 4.12, 5.9

¹ Nõ na pu prem amnhĩ tomnuj o ri papa nhũm Tirtũm ja hã mẽ pahpumu nhũm ja kõp omnuj nõ. Jakamã nhũm Jejus amnhĩ grõnh kõt wrõ nõ mẽ panẽ ty. Nhũm Tirtũm htykja kukwak ri mẽ pahto hkwy. Mẽ pahte amnhĩ kaxyw hkõt

pajamaxpõr nõ hkõt amnhĩ xunhwõr ã mẽ pahpumu hãmri nõ ã mẽ panhõpõx anõ pu mẽ ra pahpõ hkwy hã papa.

² Na pre Jejus Tirtũm mã mẽ pajarõnh o:

—E jajõ pumu. Na mẽ ra amnhĩ kaxyw pamã hamaxpõr nõ pahkõt amnhĩ xunhwõ. Anõ.

Hãmri nhũm kuma nõ mẽ pahto mex nõ mẽ pakutã nojarõt rãhã ho pa. Tã kot puj mẽ pahpõ hkrajaja nhõrmã pano ho Tirtũm mex o mex xwõnhja pumu. Jakamã na pu htem amnhĩ kukamã ã pajamaxpõr anhõr o pahkõnh nõ papa nõ pajamaxpõr o:

—Hõxta waa nõ. Kot paj nhõrmã inhno ho Tirtũm mex o mex ã omu nõ kuri ixpa ho ixpa. Nã ãm hãmri. Inhmã omunh prãm tõx kumrõx. Anõ.

³⁻⁴ Nõ na htem Jejus ã mẽ pahtomnuj nõ pu mẽ pahpunuj nõ ri papa. Pamex kõt nõ tã tee ri amnhĩ kukamã pajamaxpõr o ri pahkapri nõ papa hkõt nõ. Kwãr mẽ mãmrĩ ã mẽ panhõpõx anõ. Pu mẽ pahpunuj kurõ Jejus kõt amnhĩ xunhwõr tõx o kormã mõ. Nõ mẽ umaj hkaga hkõt nõ. Arĩ amnhĩ wõr kamã pajamak o papa. Jao amnhĩ kaxyw kumã pix mã kãm pajamaxpõr tõx rãhã pahkõnh nõ ri papa.

Kot puj mẽ ã amnhĩ nhõpõx anhõr o ri papa nhũm Tirtũm ja hã mẽ pahpumu nhũm ja kãm mex nõ. Hãmri nhũm ja kaxyw tanhmã mẽ pahto

paxihtÿx to pu mẽ pahpunuj
tã hkõt pajamexpër tÿx rãhã
nẽ.

⁵ Nẽ ra mẽ kot Jejus ã
tanhmã mẽ panhípêx to htã
pu mẽ amnhĩ kaxyw tee ri
kãm pajamexpër kaprÿ hkêt
nẽ. Ra kot mẽ pamã amnhĩ
Karõ nhõr nhũm kot mẽ
pahkarõ mã gjêx kênã kot pu
kêt mẽ ri tee ri amnhĩ kaxyw
kãm pajamexpër kaprÿ. Na
hte Karõja mẽ pahkarõ kamã
mẽ pamã Tirtũm kapër jarênh
o amnhĩrit nẽ kãm mẽ pajapê
htÿx ã harênh o amnhĩrit rãhã
nẽ.

⁶ Amnepê mã na pre mẽ
piitã amnhĩ tomnuj o ri pa
nẽ tee ri kãm amnhĩ to mex
rãhã hprãm kaprÿ. Mẽhõ kot
we ja kaxyw tanhmã mẽ hkrã
hto? Jakamã nhũm Tirtũm
ja hã mẽ omu hãmri nẽ mẽ
kaxyw Kra Jejus mã kãm:

—E inhma. Ka kot kaj mẽ
kot tanhmã amnhĩ tomnuj
to ho paja ã ma mẽ hwÿr
wrÿ. Ixte mẽ nê atyk kaxyw
agrõnh kõt mẽ hwÿr amênh
jakamã kot kaj wrÿ nẽ mẽ
kãm ixkapër jarênh o ri mẽ
hkõt apa. Rãhã nhũm mẽ
hkwÿjaja apĩ ka mẽ piitã mẽ
nê ty. Anẽ.

Hãmri nhũm kuma nẽ kãm:

—Tõe. Nã kot paj amã
hprãm xà hkõt ã amnhĩ
nhípêx anẽ. Anẽ.

Hãmri nẽ man amnhĩ grõnh
kõt mẽ pahwÿr wrÿ.

⁷⁻⁸ Xã koja mẽhõ kãm
axpên japê xàj axpên nê ty
nã? Xã kot mẽhõ tãm kot
amnhĩnhípêx xwÿnh tã nhũm
mẽ kot hpĩr kaxyw nhũm
hkrãmnhwÿja kãm hapê nẽ.

Nẽ nê amnhĩ grõnh kõt mẽ
kãm xa nhũm mẽ kupĩ nhũm
nê ty? Nã kot apu nê htyk
japêr ko. No mẽ papajaja. Na
pu htem mẽhõ hkrãmnhwÿta
kĩnhã arĩ amnhĩ tomnuj rãhã
ho ri papa htã nhũm Tirtũmja
arĩ kãm mẽ pajapê nẽ. Nẽ kãm
mẽ pajapê xàj mẽ pahwÿr
Kris mẽ nhũm mẽ panê ty.
Arĩ mẽ pahte amnhĩ tomnuj
rãhã ho papa tãã. Na pre ã
Tirtũmja kãm mẽ pajapê hã ã
mẽ pahwÿr mênh anẽ.

⁹ Na pre ty nhũm hkamrõ
hkwÿ axkapĩ nhũm Tirtũm
ja hã omunh xà hkõt tãm
amnhĩm mẽ paxunhwÿ. Tã
Jejus kukwak ri koja ma mẽ
kot amnhĩ xà htÿx kamã
hamak tũm xàta wÿr mẽ
parênh kêt nẽ. Mẽ pahpê
hkwÿ kênã kot kêt hwÿr mẽ
parê.

¹⁰ Nom kormã mẽ pahpê
hkwÿ hkêt ri na pu prem
te ra kutã amnhĩ xunhwÿr
pyræk o amnhĩ nhípêx. Tã
nhũm Kra mẽ panê ty pu mẽ
hkõt amnhĩ xunhwÿ. Jakamã
nhũm Tirtũm Jejus tyk kuk-
wak ri mẽ pahto hkwÿ. Nẽ
ra akupÿm Kra ho htĩr jakamã
kot puj mẽ pahte hkõt amnhĩ
xunhwÿr xwÿnhjaja nhÿrmã
wa uræk nẽ wa kuri pahtĩr
tũm nẽ pamex kumrêx nẽ
papa ho papa.

¹¹ Nẽ mẽ pahpê kuwy rax
wÿr mẽ papa mã xwÿnh kêt
jakamã na pu htem pahkĩnh
nẽ pajamakêtkati nẽ ri papa.
Nom ja pix ã na pu htem ã
amnhĩnhípêx anhÿr kêt nẽ.
Mẽ pahpê Tirtũm krãmnhwÿ

jakamã na pu htem mãänën pahkĩnh nẽ ri papa. Pahihti Jejus Kris kot mẽ panẽ htyk ã omunh xà hkõt na pre Tĩrtũm mẽ pahte hkõt amnhĩ xunhwýr xwýnhjê ho hkwy jakamã na pu htem pahkĩnh nẽ pajamakêtkati nẽ ri papa.

*Atãw mẽ Kris wa harẽnh
Wam Korõt 15.20-22, 45-49*

12-13 Nẽ amnepêm na pre Tĩrtũm finat Mojes mã tanhmã kapër to. Hãmri nhũm kuma nẽ Ijaew kot tanhmã amnhĩ nhĩpêx to ho pa kaxyw mẽ kãm mẽmojta ã karõ nẽ mẽ kãm hã hkagã. Mẽ kot kamã harẽnh nẽ mar nẽ Tĩrtũm kõt amnhĩ nhĩpêx kaxyw. Hãmri nhũm mẽ tee ri ã kot mẽ kãm mẽmoj tã karõja ma nẽ tanhmã axpên mã kapër to nẽ axpên mã:

—Kwa na pu htem ã amnhĩ nhĩpêx anhýr kêt nẽ. Na pu htem ãm amnhĩ tomnuj tỳx kumrêx o ri papa nẽ amnhĩ to mex kêt kumrêx. Anẽ.

Ãm hãmri na prem ã amnhĩ jarẽnh anẽ. Mẽ pahpiitã mẽ pahte amnhĩ tomnuj xwýnh kênã. My kot wa pé finat Atãwja kumrêx na pre tanhmã mẽ pahte amnhĩ tomnuj to ho hkra. Mýrapê na pre htĩr tũm nẽ ri pa ho pa hkêt nẽ. Na pre ri pa nẽ gaa nẽ rĩ hpigêt tỳx nẽ ty. Tã mýr pê ri mẽ papa xwýnhjaja na pu htem uràk nẽ tanhmã amnhĩ tomnuj to ho ri papa. Mýrapê na pu htem ri papa nẽ gaa nẽ Atãw pyrã nẽ pahtyk pa. Tĩrtũm kot mẽ pahtã Atãw mã kapër xà hkõt.

14-19 Jakamã na prem kormã Mojes kator xwýj ri pika piitã hkõt ri pa nẽ gaa nẽ haxwýja htyk pa. Mẽ kot amnhĩ tomnuj mýrapê ty. Atãw pyrã nẽ Tĩrtũm kot mẽmo xõ nẽ hkurê xwýnhhta krêr kêt tã uràk nẽ tanhmã amnhĩ tomnuj to ho ri pa. Hãmri nẽ mýrapê ty.

Na pre ã Atãwja mẽ pahpiitã mẽ pamã Tĩrtũm kapër nhĩrõp ãm nẽ amnhĩ tomnuj o hkra anẽ nẽ mẽmo xõta krê. Jao te mẽ pahpiitã mẽ pahte uràk nẽ kumẽ hkur pyrãk o mẽ panhĩpêx. Mýrapê nhũm htem arĩ pika piitã hkõt hapõj nẽ kormã hprĩre htã ra Atãw pyrã nẽ tanhmã amnhĩ tomnuj to ho ri pa. Jakamã nhũm Tĩrtũm Atãw kot tanhmã amnhĩ tomnuj to hã omunh xà hkõt mẽ pakukamã hamaxpër o:

—Nã koja mẽ Atãw pyrã nẽ amnhĩ tomnuj o ri pa. Mýrapê kot paj ma mẽ kot amnhĩ xà htỳx kamã hamak tũm xãta wýr mẽ rẽnh pa. Anẽ.

Tã Jejus Kris mẽ Atãw wa harẽnhja kot axpên pyrãk jakamã na hte Atãw kanrêhã hkra nẽ htãmnhwýjaja Atãw kot amnhĩ nhĩpêx kõt amnhĩ nhĩpêx o ri pa rãhã nẽ. Uràk nẽ amnhĩ tomnuj rãhã ho ri pa. Nhũm axtem Jejus kõt mẽ kot amnhĩ xunhwýr xwýnhjaja Jejus kõt amnhĩ nhĩpêx rãhã ho ri pa. Te mẽ kêp hkanrêhã hkra nẽ htãmnhwýjê pyrã nẽ uràk nẽ tãm amnhĩ nhĩpêx. Na htem ã ahpýnhã amnhĩ nhĩpêx anhýr o ri pa. Na pre Jejus mẽ

pahte amnhĩ tomnuj pãnhã amnhĩrer par kaxyw mẽ panê ty. Jakamã mẽ pahte hkôt amnhĩ xunhwÿr xwÿnhjaja na hte Tirtũm ja hã mẽ pahpumunh kôt mẽ pahto hkra. Kot puj mẽ nhÿrmã pahtyk tã nhũm akupÿm mẽ pahto mẽ pahtĩr pu mẽ wa kuri pahtĩr tũm nẽ papa ho papa.

Atãw kot Tirtũm kapër nhĩrõp ãm jakamã na hte Tirtũm mẽ pahpiitã mẽ pahte amnhĩ tomnuj xwÿnh ã mẽ pajarẽ. Nom nhũm Jejus Atãw rom kot Tirtũm kapër mar nẽ hkôt amnhĩ nhĩpêx rãhã jakamã na hte Tirtũm mẽ pahte hkôt amnhĩ xunhwÿr xwÿnhjaja amnhĩm mẽ pahte amnhĩ to mex xwÿnh ã mẽ pajarẽ.

Nhũm Atãw kot Jejus kĩnhã Tirtũm kapër nhĩrõp ãm mÿrapê na hte mÿr pẽ mẽ pa xwÿnhjaja ohtõ nẽ pa nẽ gaa nẽ Atãw pyrã nẽ htyk pa. Hãmri nẽ kormã htĩr ri amnhĩ to mex o pa hkêt mÿrapê ma mẽ kot amnhĩ xà htÿx kamã hamak tũm xàta wÿr ma hapêx. Tã nhũm Tirtũmja mex o mex jakamã na hte Jejus Kris mẽ wa mẽ pakamã ukaprĩ nẽ. Jakamã na pre mẽ pahwÿr Jejus mẽ nhũm mẽ pahwÿr wrÿ hãmri nẽ htyk o mẽ pahte amnhĩ tomnuj pãnhã amnhĩre. Nhũm Tirtũm ã kot amnhĩ nhĩpêx anhÿr kukwak ri mẽ pahte hkôt amnhĩ xunhwÿr xwÿnhjaja amarĩ tanhmã mẽ pahto mex to ho ri pa. Atãw kot amnhĩ tomnuj pix pumunh kôt na

pre Tirtũm mẽ pahpiitã mẽ pahte amnhĩ tomnuj xwÿnh ã mẽ pajarẽ. Tã nhũm Jejus mẽ pakamã ukaprĩ nẽ mẽ panê ty nhũm Tirtũm ja hã omunh xà hkôt ra mẽ pahte amnhĩ kaxyw hkôt pajamexpër xwÿnhjaja te mẽ pahte aa tanhmã amnhĩ tomnuj to hkêt pyrãk o mẽ panhĩpêx. Na hte amarĩ ã mẽ panhĩpêx anẽ.

Nẽ Atãw kot amnhĩ tomnuj mÿrapê na htem piitã ri pa nẽ tanhmã amnhĩ to nẽ ty rÿ ri pa nẽ gaa nẽ wejre nẽ ty. No na pre Jejus Krisja aa kot amnhĩ tomnuj kêt kumrêx tã amarĩ mẽ panê ty. Jakamã nhũm Tirtũm ra kukwak ri mẽ pahte hkôt amnhĩ xunhwÿr xwÿnhjê kutã nojarêt rãhã nẽ mẽ pakukamã hamaxpër o:

—Nà mẽ kot Ixkra hkôt amnhĩ xunhwÿr xwÿnhjaja na pa mẽ omunh pa. Tã kot paj Ixkrata kukwak ri tãm mẽ unhwÿ nhũm mẽ nhÿrmã wa ixri mex nẽ htĩr tũm nẽ pa ho pa. Anẽ.

20-21 Nẽ na pre Tirtũm tanhmã finat Mojes mã kapër to. Mẽ piitã mẽ kot amnhĩ tomnuj o ri mẽ pa hã amnhĩ pumunh kaxyw. Hãmri nẽ mẽ kot kapër mar nẽ hkôt amnhĩ nhĩpêx o pa kaxyw tanhmã mẽ kaxyw Mojes mã kapër to. Nhũm kuma nẽ amnhĩ xõ ri mẽ kãm hã kagà nẽ mẽ kãm harênh o ri mẽ hkôt pa. No nhũm prem kapër ma nẽ ãm kuma nẽ hkwÿm pix mã ri tanhmã amnhĩ tomnuj to ho pa. Nẽ pika piitã hkôt ja arĩ rãhãã. Ja mÿrapê koja mẽ nhÿrmã

ty nê ma mē kot amnhĩ xà htỳx kamã hamak tũm xàta wỳr ma pa. Nom Tĩrtũm arĩ kãm pika piitã hkôt mē papa xwỳnhjê japê nê. Mē pahte amnhĩ tomnuj o papa tã nhũm kãm mē pahto mex prãm nê. Jakamã na pre mē pahwỳr Kra Jejus Kris mē nhũm mē pahwỳr wrỳ. Mē panê htyk o kot mē pahte amnhĩ tomnuj pãnhã amnhĩrer kaxyw. Tã kukwak ri kot puj mē pahte amnhĩ kaxyw hkôt pajamaxpēr xwỳnhjaja nhỹrmã Tĩrtũm mē wa kuri pahĩr tũm nê pa mex nê papa ho papa.

6

*Mē kot mē pahkrã kumrãr
ã mē harēnh*

Sikũn Korĩt 5.17; Karatas 2.19-20, 5.24, 6.14; Epes 4.17-24; Korosē 3.1-11; Wam Pētre 4.1-6

¹ Nê mē pahte arĩ tōhã tanhmã amnhĩ tomnuj to htã nhũm Tĩrtũm arĩ kãm mē pajapê nê. Nê arĩ mē pakutã nojarêt rãhã nê. Jakamã xà kot kaj mē atõ ã harēnh anhỹrja ma nê atỳx ri ã ajamaxpēr anê nê ajamaxpēr o:

—Nà Tĩrtũm kãm ijapê nê kot ixkutã nojarêt rãhã ho ri pa jakamã mo kaxyw kot pa Jejus kôt amnhĩ nhĩpêx o ri ixpa? Nà kot paj ho anhỹr kêt nê. Anê.

Ka ã mē atõ atỳx ri ajamaxpēr anhỹr japêr. Kwa xà ajamaxpērja mex? Nà mex kêt.

² ã ajamaxpēr anhỹrja mē hamaxpēr mex xà hkôt kêt.

Ra mē pahte Jejus kôt amnhĩ xunhwỳr nê mē pahte amnhĩ tomnuj kaga jakamã nhũm mē pahte amnhĩ tomnujja te ra mē pahpê hapêx pyræk. Jakamã kot puj mē arĩ tanhmã amnhĩ tomnuj to ho ri papa hkêt nê.

³ Mēmo kaxyw na htem Tĩrtũm mã mē pahkrã kumrã? Nà mē pahte ra Jejus kôt amnhĩ xunhwỳr ã amnhĩ to amnhĩrĩt kaxyw. Te Jejus htyk nhũm mē pahte amnhĩ tomnujja haxwỳja hkôt htyk nê hapêx par pyræk o amnhĩrĩt kaxyw. Jakamã na pu htem pajamaxpēr o:

—Nà kot paj axte tanhmã amnhĩ tomnuj to ho ri ixpa hkêt nê. Anê.

⁴ Na htem Tĩrtũm mã gôx kãm mē pahkrã kumrã nhũm mē pahte amnhĩ nhĩpêx tũmja te mē kot Jejus kôt haxwỳja haxàr pyræk. Hãmri nhũm mē akupỳm mē pahto api. Te Tĩrtũm hihtỳx o hihtỳx o kot akupỳm Kra Jejus ho htĩr pyræk. Te mē pahtyk tã nhũm akupỳm kot mē pahto mē pahĩr pyræk. Pãnhã mē pahte amnhĩ nhĩpêx nyw o amnhĩ nhĩpêx kaxyw.

⁵ Nhũm mē pahte amnhĩ nhĩpêx tũmja te Jejus kôt htyk nê hapêx par pyræk. Nê mē pahte amnhĩ nhĩpêx nywja te Jejus akupỳm htĩr pyræk o amnhĩ nhĩpêx.

⁶ Amnepêm na pu pre htem amnhĩ tomnuj rãhã ho ri papa. Te mē kãm mē àpênh xwỳnhjaja kot mē õ patrãw mã àpênh rãhãta pyræk. Tã

nhũm Kris mẽ panê ty. Kot mẽ panê mẽ pahte amnhĩ tomnuj pãnhã amnhĩrer nê ho hapêx par kaxyw mẽ panê ty. Jakamã te mẽ pahte amnhĩ tomnuj mẽ pajamaxpêr punujja te pĩ kahpa hã Jesus kôt harir nê htyk nê hapêx par pyræk. Pãnhã mẽ pahte amnhĩ nhĩpêx nyw pix o amnhĩ nhĩpêx kaxyw. Nê mẽ pajamaxpêr nyw pix o pajamaxpêr papa kaxyw.

⁷ Na hte mẽ htyk xwỳnhjaja axte tanhmã amnhĩ tomnuj to hkêt nê. Tã kêr pu mẽ uræk nê axte ã amnhĩ nhĩpêx anhỹr kêt nê.

⁸ Na pu prem Jesus kot mẽ panê htyk ã harênh ma nê pajamaxpêr o:

—Nà ra Jesus kot mẽ panê htyk jakamã kot paj ixte amnhĩ nhĩpêx tũm kaga hpa nê hpãnhã kot amnhĩ nhĩpêx kôt pix mã ri amnhĩ nhĩpêx o ri ixpa. Te ra ixtyk nê axte tanhmã ixte amnhĩ tomnuj to ho ri ixpa hkêt pyræk. Jao amnhĩ nhĩpêx nyw pix o amnhĩ nhĩpêx o ri ixpa. Anê.

⁹ Nê Jesus htyk nhũm Tĩrtũm akupỹm ho htĩr jakamã koja axte htyk kêt nê. Ra mẽ pahte ja mar mex.

¹⁰ Na pre ãm htyk tipxi htã htykja o mẽ pahpiitã mẽ pahte amnhĩ tomnuj pãnhã amnhĩre. Tã ra akupỹm htĩr o htĩr nê kaxkwa kamã Tĩrtũm mã tanhmã amnhĩ nhĩpêx to ho ri pa.

¹¹ Tã mẽ papajaja kot puj mẽ ã kot amnhĩ nhĩpêx anhỹrja ma nê ã pajamaxpêr anê nê pajamaxpêr o:

—Nà ãm hãmri. Te ixte Jesus pyræk nê ra ixtyk pyræk jakamã kot paj axte amnhĩ tomnuj o ri ixpa hkêt nê. Te ixte Jesus pyræk nê akupỹm ixtĩr nê ãm Tĩrtũm kôt pix mã amnhĩ nhĩpêx o ri ixpata pyræk o kot paj hpãnhã amnhĩ nhĩpêx o ri ixpa. Anê.

¹² Jakamã kot ka mẽ atõ nhỹrmã tanhmã amnhĩ kukamã ajamaxpêr punuj to japêr hãmri nê ajamaxpêr o:

—Nà inhmã ã amnhĩ tomnuj anhỹr prãm nê. Omnuj tã kot paj ho anê. Nà ixte ho anhỹr mã kênã.

Anhỹr o ajamaxpêr japêr tã kwa mẽ ã ajamaxpêr anhỹr kêt nê.

¹³ Kêt Tĩrtũm mã mãn amnhĩ gõ nê hkôt amnhĩ nhĩpêx o ri apa. Hãmri nê amnhĩ krã kamã mẽmoj mex pix mã ajamaxpêr nê tãm akapêr. Nê mẽ kot amnhĩ to mex xwỳnhjê kôt pix mã mãn ri apa.

Na ka pre htem akapêr punuj nê.

Nê ajamaxpêr punuj nê.

Nê mẽ kot amnhĩ tomnuj o mẽ pa xwỳnhjê hkôt ri apa.

Nê kagôxyhti japrô nê ho akõm o ri mẽ hkôt apa.

Tã ra hpãnhã Tĩrtũm mã amnhĩ gõ nê axte ã amnhĩ nhĩpêx anhỹr kêt nê.

¹⁴ Amnepêm na pu prem tanhmã mẽ pahte amnhĩ nhĩpêx to ho papa hkukamã pajamaxpêr nê pajamaxpêr o:

—Nà kot paj Tĩrtũm kapêr kôt pix mã mãn ri amnhĩ nhĩpêx o ri ixpa nê amnhĩ to

mex o ri ixpa nhūm Tīrtūm ja hā ixpumu nē amnhīm inhmex ā ijarē. Nà kot paj anē.

Anhÿr tā no ām tee ri mē pamā hkôt amnhī nhīpêx o ri papa hprām kaprÿ nē arī ri kapêr kwÿm tanhmā amnhī nhīpêx to ho ri papa. Tā ra hpānhā axtem pajamaxpêr o:

—Nà Tīrtūm kot ixkutā nojarêt rāhā ho pa xwÿnh. Tā ra ixte hkôt amnhī xām jakamā koja tanhmā ixto pa hkôt amnhī nhīpêx mex o ri ixpa. Nà koja ixto anē.

Anhÿr jakamā ra amnhī kaxyw kām pajamaxpêr tÿx o mēmoj punuj kutā amnhī to htÿx nē.

Mē pahte Tīrtūm mā tanhmā amnhī nhīpêx to hā mē pajarēnh

Juāw 8.34

¹⁵ Tā ā kot anhÿr jakamā tanhmā kot puj wem pajamaxpêr to? Xà kot pu mē ā pajamaxpêr anē nē pajamaxpêr o:

—Nà na hte Tīrtūmja ixte kapêr kôt amnhī nhīpêx o ixpa hā ixpumunh kôt amnhīm inhmex ā ijarēnh kêt nē. Ām kêp ixkutā nojarêt rāhā nē amarī amnhīm inhmex ā ijarēnh xwÿnh jakamā kot paj arī amnhī tomnuj rāhā nē aa ja kaga hkêt nē.

Anhÿr o kot puj mē pajamaxpêr? Nà kot puj mē ā pajamaxpêr anhÿr kêt nē. Ā mē pajamaxpêr anhÿrja mex kêt.

¹⁶ Koja mēhō nhÿri kot amnhī tomnuj tÿx xwÿnhjê

hō pumu nē kām amnhī jarēnh japêr nē kām:

—E inhma. Kot paj ām akôt pix mā tanhmā amnhī nhīpêx to ho ri ixpa. Jakamā e inhmā mēmoj tā karō pa ama nē amā tanhmā ho ho ri ixpa.

Anhÿr o kām kapêr japêr. Hāmri nē ā amnhī nhīpêx anhÿr tā amnhī tomnuj pix o ri pa. Tā ā mē kot amnhī nhīpêx anhÿr o mē pa xwÿnhjaja koja nhÿrmā ty hāmri mē kot amnhī xà htÿx kamā hamak tūm xàta wÿr ma hapêx.

No koja mēhō Tīrtūm mā amnhī jarēnh nē kām:

—Pa Tīrtūm. E kot paj ām akapêr kôt pix mā ri amnhī nhīpêx o ri ixpa.

Anhÿr o kām amnhī jarē nē hkôt amnhī nhīpêx mex o pa. Nē tām amnhī nhīpêx o ri pa. Hāmri nē nhÿrmā ty nē ma ō krī hwÿr api nē Jejus mē Tīrtūm wa kuri htīr tūm nē mex rāhā nē pa ho pa.

¹⁷ Tā mē kajaja na ka xep prem tee ri mē amā mē ate amnhī tomnuj mā anhÿrer prām tā nhūm te tām kot amnhī tā mē ato htÿx pyrāk o mē anhīpêx ka mē tee ri kām anhÿrer prām kaprÿ. Tā nhūm Tīrtūm tanhmā mē akrā hto ka mē kapêr ma nē amnhī kaxyw hkôt ajamaxpêr tÿx nē ām hkôt pix mā amnhī nhīpêx. Pa ja hā mē ajarēnh ma nē mē anhÿ hā ixkīnh nē. Nē Tīrtūm mā ixte mē ajarēnh mar nē mē anhÿ hā ixkīnh ā amnhī jarē.

¹⁸ Na pre Tīrtūm tanhmā mē akrā hto ka mē amnhī

tomnuj mã anhũrer pa nẽ hpãnhã hkõt pix mã amnhĩ nhĩpêx.

¹⁹ E kot paj ixprĩ hã tanhmã mẽ amã ja jarênh to. Te ixte ixkrajê jahkre pyræk o kot paj mẽ amã awjarê. Nã amnepêm na ka prem ajamxpêr punuj kõt amnhĩ tomnuj o ri apa. Nẽ gaa nẽ ra amnhĩ tomnuj pix kukamã ajamxpêr. Tã kêr ka mẽ arĩ ã amnhĩ nhĩpêx anhỹr kêt nẽ. Pãnhã tãm ri ajamxpêr o ri apa. Jao gaa nẽ ra Tĩrtũm kãm hprãm xà hkõt tãm amnhĩ nhĩpêx mex nẽ.

²⁰ Na ka prem tee ri amã amnhĩ tomnuj mã anhũrer prãm kaprỳ. Te tãm kot amnhĩ tã mẽ ato htỳx nẽ amnhĩ kõt mẽ ato pa pyræk o mẽ anhĩpêx.

²¹ Xãn ka prem ã amnhĩ tomnuj anhỹr o apa nẽ akĩnh nẽ ajamakêtkati nẽ ri apa? Nã na ka prem akĩnh nẽ apa hkêt nẽ. Tã na ka prem Jejus kõt amnhĩ xunhwỳ nẽ tee ri ate tanhmã amnhĩ tomnuj to hã amnhĩ pumu nẽ akaprĩ nẽ apijaàm nẽ. ã mẽ kot amnhĩ tomnuj anhỹr o pa xwỳnhjaja na htem ja mỳrapê ty nẽ ma mẽ kot amnhĩ xà htỳx kamã hamak tũm xàta wỳr pa.

²² No na pre ra Tĩrtũm tanhmã mẽ akrã hto ka mẽ amnhĩ tomnuj kaga hpa. Te Tĩrtũm tãm kot hpãnhã amnhĩ tã mẽ ato htỳx nẽ amnhĩ kõt mẽ ato pa pyræk ka mẽ ra ãm hkõt pix mã amnhĩ nhĩpêx mex o ri apa. Nẽ hpãnhã amã kapêr kõt pix mã amnhĩ

nhĩpêx mex prãm. Nẽ hkõt pix mã amnhĩ nhĩpêx hprãm. Jakamã kot kaj mẽ nhỹrmã kuri amex kumrêx nẽ atĩr tũm nẽ ri apa ho apa.

²³ Na hte mẽ kãm àpênh o ri mẽ pa xwỳnhjaja mẽ kãm mẽmoj tã apê nẽ àpênh pa nẽ hpãnhã amnhĩrer xà jamỳ. Ja pyrà nẽ koja mẽ kot amnhĩ tomnuj xwỳnhjaja nhỹrmã ty hãmri nẽ ma mẽ kot amnhĩ xà htỳx kamã hamak tũm xàta wỳr ma pa.

No mẽ pahte amnhĩ kaxyw Jejus Kris kõt pajamxpêr xwỳnhjaja na hte Tĩrtũm ja hã mẽ pahpumu nẽ mẽ pajarênh o:

—Nã ãm hãmri. Jajaja koja nhỹrmã Ixkra mẽ wa Ixkuri mex kumrêx nẽ htĩr tũm nẽ pa ho pa. Hêxta waa nẽ. Nã ãm hãmri koja mẽ anẽ. Anẽ.

Xà tãm mẽ pahte amnhĩ nhĩpêx ã mẽ pahpumunh kõt na hte ã mẽ pajarênh anẽ? Nã ãm mẽ pahte Kra Jejus Kris kõt amnhĩ xunhwỳr ã mẽ pahpumunh kõt pix mã na hte ã mẽ pajarênh anẽ.

7

Mẽ pahte amnhĩ tomnuj kot axte amnhĩ tã mẽ pahto htỳx kêt ã harênh

Rõmään 8.2, 10.4; Karatas 4.1; Epes 2.2; Korosê 3.7

¹ E Jejus kõt ixkwỳjaja. Nã Tĩrtũm kot mẽ pakaxyw tanhmã Mojes mã kapêr tota na ka mẽ ra mar tỳx nẽ. Na pu htem kormã pahfĩr ri hkõt amnhĩ nhĩpêx o ri papa. Tã ty hãmri nẽ axte hkõt amnhĩ nhĩpêx kêt nẽ. Ra mẽ ate ja

mar tÿx. E pa mẽ amã ja hã ejêp jarê ka mẽ inhma.

² Nã finat Mojes kot Tirtũm nhÿ hã mēnijaja kot tanhmã amnhĩ nhĩpêx to ho pa hã mẽ kãm karõja. Koja mēhõ ho mjên hãmri nē ãm kôt pix mã ri pa ho pa nē aa hkaga hkêt nē. No koja nhÿrmã mjên kēp ty nhũm ahte ri pa. Hãmri nē kãm axte mēhõ ho mjên prãm nē mãmri axte mēhõ ho mjên. Ja tanhmã kute hkêt.

³ Nom koja wam mjên arĩ htĩr japêr nhũm hprõ tanhmã hamaxpêr to nē hkaga nē hpãnhã nhãm mēhõ ho mjên. Hã koja Tirtũm pê ja homnuj nē. Nom koja mjên ra kēp ty nhũm mÿrpê axte kãm mēhõ ho mjên prãm nē mãmri ho mjên. Ja na Tirtũm pê homnuj kêt. Ra wam mjênja htyk kēnã. ã Tirtũm kot Mojes mã mẽ pakaxyw mēmoj tã karõ kot anhÿr.

⁴ Tã ja pyrã nē na pu prem amnepê m pajamaxpêr o:

—Ixte Tirtũm kapêr kôt pix mã amnhĩ nhĩpêx o ri ixpa jakamã nhũm Tirtũm ja hã ixpumu nē amnhĩm inhmex ã ijarê. Anê.

Tã pu mẽ ra tanhmã pajamaxpêr to nē hpãnhã pajamaxpêr õ ho pajamaxpêr o:

—Nã na xep hte Tirtũm mẽ ixte kapêr kôt amnhĩ nhĩpêx ã mẽ ixpumunh kôt amnhĩm mẽ inhmex xwÿnh ã mẽ ijarēnh kêt nē. Mẽ ixte hkôt amnhĩ nhĩpêx mex o ri ixpare hã. Kêt ãm Kris kot mẽ inhnē htyk nhũm mẽ ixte amnhĩ kaxyw hkôt ijamaxpêr

nē hkôt amnhĩ xunhwÿr pix ã mẽ ixpumunh kôt na hte mẽ inhmex ã mẽ ijarê. ãm ja pix ã mẽ ixpumunh kôt na hte mẽ ixto hkra nē mẽ ixkutã nojarêt o pa. Kra Jejus pix kukwak ri na hte ã mẽ inhĩpêx anhÿr o pa. Anê.

ã mẽ pajamaxpêr nyw kot anhÿr. Jakamã te mẽ pahte mēhõ kot mjên nyw xwÿnh gryk ã axte mjên htyk xwÿnh mã hamaxpêr kēeta pyrãk o na pu htem amnhĩ nhĩpêx o papa. Jao Kris kapêr kôt pix mã amnhĩ nhĩpêx o ri papa. Nē Tirtũm noo mã tãm ri amnhĩ nhĩpêx. Nē axte mẽ pahte amnhĩ tomnuj kukamã tanhmã pajamaxpêr to hkêt nē.

⁵ Nē amnepê mã mẽ pahte amnhĩ krã hkôt tanhmã mẽ pahte amnhĩ nhĩpêx to ho ri papata ã na pu prem amnhĩ tomnuj pix o ri papa. Ra mẽ pahte Tirtũm kapêr mar tÿx tã kuma nē ãm kuma nē ri papa nē ri hkôt amnhĩ nhĩpêx kêt nē. Mÿrapê nhũm Tirtũm tee ri ja hã mẽ pahpumu nē mẽ pahtyk nē ma mẽ kot amnhĩ xã htÿx kamã hamak tũm xã hwÿr papa mã xwÿnhjê hã mẽ pajarê.

⁶ Nē amnepê m na pu pre htem ã pajamaxpêr anhÿr o:

—Nã kot paj Tirtũm kapêr kôt pix mã amnhĩ nhĩpêx o ri ixpa nhũm amnhĩ tã ixpumu nē ixte amnhĩ tomnuj kêt xwÿnh ã ijarê.

Anhÿr o pajamaxpêr no ãm tee ri ã pajamaxpêr anhÿr kaprÿ. Nē arĩ tanhmã amnhĩ tomnuj to ho ri papa. Tã

hpãnhã te Jejus Kris kôt pahtyk pyræk o amnhĩ nhĩpêx nê hpãnhã Karõ nhỹ hã tãm amnhĩ nhĩpêx. Jao ra tee ri mẽ pamã Tĩrtũm kapêr kôt amnhĩ nhĩpêx prãm kaprỹ hkêt nê. Ra Tĩrtũm Karõ nhỹ hã amnhĩ nhĩpêx nyw o amnhĩ nhĩpêx mex o ri papa.

Tĩrtũm kapêr ã kagà htũm kot tanhmã mẽ pajarênh to

Rômãn 3.20, 5.20; Karatas 3.23-24

⁷ Tã Tĩrtũm mẽ pahte kapêr kôt ri amnhĩ nhĩpêx ã mẽ pahpumunh kôt amnhĩm mẽ pamex ã mẽ pajarênh kêt jakamã mẽmo kaxyw na kapêr ã kagà htũmja? Nà mẽ pahte mar nê pahprĩ hã Tĩrtũm noo mã mẽ kot amnhĩ tomnuj xà jarênh mar nê omunh mex kaxyw na. Na hte mẽ pahkwỹjê kukrêx kĩnh o pamã ho panhõ hprãm nê mẽ pamã karõ. ã kot mẽmoj punuj piitã nê mẽ pamã karõ kot anhỹr. Tã mẽ pahte ja mar kêt ronhỹx pu mẽ Tĩrtũm kêp ja homnuj ã harênh mar kêt nê.

⁸ Tã ra mẽ pahte harênh mar nê kêp ja homnuj ã harênh ma. Mẽ pamã axpên kukrêx kĩnh o ho pamã panhõ hprãmja mãânên kêp ja homnuj ã harênh mar tã nom aa hkaga hkêt nê arĩ pamã axpên kukrêx kĩnh o pamã ho panhõ hprãm tỳx rãhã ho ri papa. Kop ãm Tĩrtũm kapêr kêt ronhỹx pu mẽ kot amnhĩ tomnuj xãja aa mar kêt kumrêx nhũm te mẽ pamã amrakati pyræk.

⁹ Amnepê mã ixte Tĩrtũm kapêr mar kêt ri na pa pre ixtỳx ri amnhĩ kukamã ijamaxpêr o ri ixpa nê ijamaxpêr o:

—E kot paj nhỹrmã Tĩrtũm ri ixtĩr tũm nê inhmex nê ixpa ho ixpa.

Anhỹr tã hpãnhã pamã axpên kukrêx kĩnh o ho pamã panhõ hprãm nê kapêrta ma nê ja hã amnhĩ pumunh kurê kumrêx. Hãmri nê tee ri amnhĩ kukamã ijamaxpêr nê ijamaxpêr o:

—Hêxta waa nê. Nà ã ixte amnhĩ nhĩpêx anhỹr o ixpa jakamã kot paj nhỹrmã ty nhũm Tĩrtũm akupỹm ixto ixtĩr pa kuri ixtĩr tũm nê ixpa ho ixpa hkêt nê. Hêxta waa nê. Ixte amnhĩ tomnuj xwỹnh na pa. Kot paj nhỹrmã ty nhũm Tĩrtũm ma mẽ kot amnhĩ xà htỳx kamã hamak tũm xàta wỳr amnhĩ nê inhmẽ. Anê.

Hãmri nê ixkaprĩ nê tee ri amnhĩ kukamã ijamaxpêr o ri ixpa.

¹⁰ Tã hpãnhã axtem ijamaxpêr o:

—Nà kot paj Tĩrtũm kapêr kôt pix mã mãn ri amnhĩ nhĩpêx o ri ixpa hãmri nê nhỹrmã ixtyk tã hwỳr api nê kuri ixtĩr tũm nê inhmex nê ixpa ho ixpa. Nà kot paj anê.

Anhỹr ã ijamaxpêr tã no ãm tee ri inhmã hkôt amnhĩ nhĩpêx o ixpa hprãm kaprỹ. Na pa pre xatã kapêr nhĩrôp ixkuhê nê tee ri ja hã amnhĩ pumu nê ijamaxpêr o:

—Kwa tanhmã kot pa amnhĩ nhĩpêx to nê ãm Tĩrtũm

kôt pix mã ri amnhĩ nhĩpêx? Na pa hte tee ri inhmã ã amnhĩ nhĩpêx anhÿr prãm tÿx kaprÿ. ãm ixte amnhĩ tomnuj pix o ri ixpa xwÿnh jakamã ãm hãmri koja amnhĩ nê kuwyta wÿr inhmê. Nà koja ixto anê. Hêxta waa nê. Tanhmã kot paj we ja nê kãm ixkapêr to? Anê.

11 No mêhõ koja Tirtũm kapêr kôt amnhĩ nhĩpêx mex o ri pa? Na pu htem pahpiitã tee ri pamã ho anhÿr prãm kaprÿ. Mê pahpê hihtÿx kumrêx jakamã na pa pre ixtÿx ixte Tirtũm kuri ixtĩr tũm nê ri ixpa hã amnhĩ kukamã amnhĩ jarênh kaprÿ. ãm xatã kapêr nhĩrõp ixkuhê nê amnhĩ tomnuj pix o ri ixpaja mÿrapê koja mê kot amnhĩ xà htÿx kamã hamak tũm xàta wÿr amnhĩ nê inhmê.

12 Kot anhÿr tã tanhmã kot puj mê Tirtũm kapêr ã kagã htũmta jarênh to? Nà kot mê pamã mê pahte amnhĩ nhĩpêx ã karõta mex kumrêx. Mex o mex.

13 Mex kumrêx tã na htem kuma nê tee ri kãm hkôt amnhĩ nhĩpêx hprãm kaprÿ. Jao nhÿrmã ty nê ma kuwy hwÿr pa. Kêt pa na pa pre ra mar nê omunh mex tã hkôt amnhĩ nhĩpêx mex kêt nê. Jao ra ixte amnhĩ tomnuj xwÿnh ã amnhĩ pumu. Na pa pre tee ri inhmã hkôt amnhĩ nhĩpêx o ri ixpa hprãm tã no ãm xatã kapêr nhĩrõp ixkuhê nê hkwÿm ri amnhĩ nhĩpêx rãhã ho ri ixpa. Tã ra tee ri ja hã amnhĩ pumu nê amnhĩ

kukamã ijamaxpêr o:

—Nà na pa hte ãm tee ri inhmã Tirtũm kôt amnhĩ nhĩpêx prãm kaprÿ no ãm ho anhÿr kêt nê. ãm ixte amnhĩ tomnuj pix o ixpa xwÿnh na pa. Ja mÿrapê koja Tirtũm amnhĩ nê ma kuwy hwÿr inhmê. Nà koja ixto anê. Anê.

Mê pahte mê pamã amnhĩ tomnuj kaga hprãm kaprÿ hã mê pajarênh

Karatas 5.17

14 Nê Tirtũm kapêr ã kagã htũmta Tirtũm kapêr na. Nê Tirtũm kĩnhã ãm inhĩ pix na pa ri ixpa jakamã tanhmã kot pa amnhĩ to nê kapêr kôt ri amnhĩ nhĩpêx mex o ri ixpa?

15 Inhmã tãm ixte amnhĩ nhĩpêx prãm tã no ãm amnhĩ tomnuj pix o ri ixpa. Mẽmoj ixpê omnuj tã pa hte ra hkôt tanhmã amnhĩ tomnuj to ho ri ixpa. Hãmri nê ja hã amnhĩ pumu nê tee ri amnhĩ kukamã ijamaxpêr o:

—Hêxta waa nê. Mon pa hte axtem nê ã amnhĩ nhĩpêx anhÿr o ri ixpa? Mẽmoj ixpê omnuj nhũm inhmã ho anhÿr prãm kêt tã ra ho anê. Nhũm mẽmoj mex nhũm inhmã ho anhÿr prãm tã ho anhÿr kêt nê. Mon pa hte axtem nê ã amnhĩ nhĩpêx anhÿr o ri ixpa? Anê.

16 ã ixte amnhĩ nhĩpêx anhÿr o ri ixpa htã ra Tirtũm kapêr mexta ma hãmri nê ra ijamaxpêr o:

—Nà Tirtũm kapêrja mex kumrêx tã pa tee ri inhmã hkôt amnhĩ nhĩpêx mex

hprām kaprý ho ri ixpa.
Hêxta waa nê. Anê.

17 Inhmā amnhĩ tomnuj
prām kêt tâ arĩ ixkaxwýnh
kām ijamaxpêr punuj nhỹ hã
ã amnhĩ nhĩpêx anhỹr o ri
ixpa.

18 Nê inhmā tām amnhĩ
nhĩpêx prām tâ no âm tee ri
ã inhmā amnhĩ nhĩpêx anhỹr
prām kaprý. Tanhmã kot
pa amnhĩ to nê tām amnhĩ
nhĩpêx o ri ixpa? Na pa tee
ri inhmā ja ho anhỹr prām
kaprý. Ixte amnhĩ tomnuj
xwýnh na pa. Nê aa ixte
amnhĩ to mex kêt kumrêx
xwýnh.

19 Inhmā mēmoj mex kôt
pix mã amnhĩ nhĩpêx prām tâ
no âm ã amnhĩ nhĩpêx anhỹr
kêt nê. Nê âm hkwým ri
tanhmã amnhĩ tomnuj to ho
ri ixpa. Mēmoj ixpê omnuj
tã pa hkôt amnhĩ nhĩpêx o ri
ixpa.

20 Ixte Tĩrtũm kapêr kôt
amnhĩ nhĩpêx kêt jakamã
na pa hte ã amnhĩ tomnuj
anhỹr o ri ixpa. Mēmoj ixpê
omnuj pa inhmā ho anhỹr
prām kêt tâ ra hkôt amnhĩ
nhĩpêx. Ixte Tĩrtũm kapêr kôt
amnhĩ nhĩpêx kêt jakamã ã
amnhĩ nhĩpêx anhỹr o ri ixpa.

21 Nê mēmoj mex nhũm
inhmā hkôt amnhĩ nhĩpêx
prām tâ ra hkwým ri amnhĩ
nhĩpêx. ã ixte amnhĩ nhĩpêx
anhỹr xwýnh na pa.

22 Nê inhmā Tĩrtũm kapêr
mar nê hkôt ri amnhĩ nhĩpêx
prām tâ

23 nom ixte amnhĩ tomnuj
xwýnh jakamã hkôt amnhĩ
nhĩpêx kêt nê. Na pa tee ri

ja hã amnhĩ pumu nê amnhĩ
kukamã ijamaxpêr o:

—Nà kot paj axte amnhĩ
tomnuj kêt nê. Kot paj âm
amnhĩ to mex pix kukamã
ijamaxpêr o ri ixpa.

Anhỹr tâ no âm arĩ amnhĩ
tomnuj o ri ixpa nê amnhĩ to
mex kêt. Ixte amnhĩ tomnuj
xwýnh jakamã na pa hte ã
amnhĩ nhĩpêx anhỹr rãhã ho
ri ixpa nê tee ri inhmā amnhĩ
tomnuj kaga hprām kaprý.

24 Hêxta waa nê. Na pa
ixkaprĩ htýx nê ri ixpa. ã ixte
amnhĩ nhĩpêx anhỹr o ri ix-
paja mýrapê kot paj nhỹrmã ty
nê ma mē kot amnhĩ xà htýx
kamã hamak tũm xàta wýr
ma mō. Mēhō kot tanhmã
ixkrã hto pa ã amnhĩ nhĩpêx
anhỹrja kaga?

25 Nà mē panhō Pahihti Je-
jus Krisja pix. Tām koja ixte
amnhĩ tomnuj kutã tanhmã
ixto ixihtýx to. Jakamã na pa
axte tee ri amnhĩ kukamã ija-
maxpêr kêt nê. Pãnhã ixkĩnh
nê ri ixpa nê Tĩrtũm mã kãm:

—Pa Tĩrtũm. Nà âm hãmri
amex o amex. Anê.

Tã ra ixte Jejus Kris kôt
amnhĩ xãm jakamã koja tām
tanhmã ixto ixihtýx to pa
rĩ kormã Tĩrtũm kapêr kôt
amnhĩ nhĩpêx mex o ri ixpa.
No kot pa pam amnhĩ krã
hkôt amnhĩ tomnuj rãhã ho ri
ixpa. ã ixte anhỹr xwýnh na
pa.

8

*Tĩrtũm Karō kot mē pahto
tām mē pahte amnhĩ nhĩpêx
xwýnh ã harênh*

Karatas 5.16-26

1 Nē Jejus Kris kēp mēmoj punuj kutā mē pahto mē paxihtýx xwýnh jakamā mē pahte hkôt amnhī xunhwýr xwýnhjaja na pu htem ý hā amnhī tomnuj o ri papa hkēt nē. Jao mē pahte kuwy hwýr papa mā xwýnh kēt.

2 Te ra mē pahtyk nhūm Tirtūm kot akupým mē pahto mē pahtír pyrāk jakamā nhūm Karōja mē pahkarō mā agjē pu mē ý hā tām amnhī nhīpēx o ri papa. Te tām kot amnhī nhīpēx pyrāk o amnhī nhīpēx nhūm Karō mēmoj punuj piitā kutā mē pahto mē paxihtýx. Kēp mē pajamxpēr punuj kutā mē pahto mē paxihtýx xwýnh jakamā kot puj mē nhýrmā mē kot amnhī xā htýx kamā hamak tūm xāta wýr papa hkēt nē.

3 Nom kormā mē pahte Jejus kôt amnhī xunhwýr kēt ri na pu prem tee ri pamā Tirtūm kapēr piitā hkôt amnhī nhīpēx prām kaprý nhūm mē pahpē hihtýx kumrēx. Jakamā tanhmā koja Tirtūm amnhī to nē amnhī mā mē pamex xwýnh ā mē pajarē? Na pre tee ri amnhī tā mē pajamā hāmri nē mē pahwýr Kraja mē nhūm man mē pahwýr wrý nē mē pahpyrà nē í ho mē pakamā kato. Nom mē parom aa tanhmā amnhī tomnuj to hkēt kumrēx nē ri pa. Tā mē kot hpír tā nhūm amarī htyk kēt nē. Na pre htyk o mē pahte amnhī tomnuj piitā hpānhā amnhīrer pa. Jakamā tām kēp

mē pajamxpēr punuj kutā mē pahto paxihtýx xwýnh. Na pu htem hkôt amnhī xunhwý hāmri nē kukwak ri amnhī tomnuj o ri papa hkēt nē.

4 Pānhā Tirtūm kot amnhī nhīpēx kôt amnhī nhīpēx o ri papa nē axte mē pahte amnhī nhīpēx tūm kôt amnhī nhīpēx kēt nē. Hāmri hpānhā Tirtūm Karō kot amnhī nhīpēx kôt pix mā amnhī nhīpēx. Nē hamaxpēr kôt pix mā paja-maxpēr. Ja kaxyw na pre Tirtūm mē pahwýr Kraja mē nhūm wrý nē mē pahpiitā mē panē ty.

5 Nē mē kot amnhī krā hkôt tanhmā amnhī nhīpēx to ho ri mē pa xwýnhjaja na htem htýx ri tanhmā hamaxpēr to xā hkôt amnhī nhīpēx o ri pa. No kēt Tirtūm Karō kot mē pahkarō mā gjēx xwýnhjaja na pu htem mē kurom te Jejus jamaxpēr pyrāk o pajamaxpēr o papa.

6 Nē mē kot amnhī krā hkôt amnhī nhīpēx xwýnhjaja koja mē nhýrmā ty nē ma kuwy hwýr pa nē kamā pa ho pa. No mē pahte Tirtūm Karō hkôt amnhī nhīpēx xwýnhjaja kot puj mē pajamaxpēr nyw o pajamaxpēr nē amnhī nhīpēx nyw o amnhī nhīpēx. Jao paxāmnhīx ri pajamakētkati nē ri papa. Nē nhýrmā ty hāmri nē Tirtūm mē Jejus wa kuri akupým pahtír tūm nē pamex kumrēx nē papa ho papa.

7 Nē mē kot amnhī krā hkôt ri amnhī nhīpēx xwýnhjaja kām Tirtūm kīnh kēt. Nē kām kapēr mar prām kēt jakamā

tanhmã kot mẽ amnhĩ to nẽ hkôt amnhĩ nhĩpêx?

⁸ Koja mẽhõ amnhĩ krã hkôt kãm hprãm xà hkôt pix mã amnhĩ nhĩpêx hãmri nhũm Tĩrtũm tee ri ja hã omu nẽ hkĩnh kêt nẽ.

⁹ No mẽ papajaja na pu htem mẽ uràk nẽ ã amnhĩ nhĩpêx anhỹr kêt nẽ. Ra Tĩrtũm Karõ kot mẽ pahkarõ mã gjêx jakamã na pu htem hkôt pix mã amnhĩ nhĩpêx hprãm. No koja Tĩrtũm Karõ mẽhõ kaxwỳnh mã àr kêt nẽ nhũm kêp hkra hkêt nẽ.

¹⁰⁻¹¹ Tã mẽ papajaja. Mẽ pahte amnhĩ tomnuj mỳrapê koja mẽ pakrãhkàja nhỹrmã ty. No nhũm Tĩrtũm ra kot amnhĩm mẽ pahte amnhĩ to mex xwỳnh ã mẽ pajarênh nhũm Kris Karõ kot mẽ pahkarõ mã gjêx jakamã koja mẽ pahkarõja htyk kêt nẽ. Mẽ pakrãhkà pix koja ty nhũm mẽ pahkarõja ma kaxkwa hwỳr àpir kurê kumrêx. Tã nhũm nhỹrmã Tĩrtũm akupỹm mẽ pakrãhkà ho htĩr nẽ akupỹm mẽ pahkarõja mẽ pakrãhkàm hagjê pu mẽ wa kuri pahtĩr tũm nẽ papa ho papa.

¹² Jakamã e kwa ixkwỳjaja. Kêr pu mẽ axte ri mẽ pajamaxpêr tũm kôt amnhĩ nhĩpêx o ri papa hkêt nẽ.

¹³ Kot puj mẽ arĩ ã amnhĩ nhĩpêx anhỹr o ri papa hãmri nẽ nhỹrmã ty nẽ ma mẽ kot amnhĩ xà htỳx kamã hamak tũm xàta wỳr papa. Jakamã kêr pu mẽ mẽmo arĩgro hã pamã tanhmã amnhĩ tomnuj to hprãm hãmri nẽ amnhĩ

kukamã pajamaxpêr o:

—Nà inhmã ã amnhĩ nhĩpêx anhỹr prãm tã kot paj Tĩrtũm Karõ nhỹ hã ja kutã amnhĩ to htỳx nẽ ho anhỹr kêt nẽ. Anẽ.

Kot puj mẽ ã pajamaxpêr anẽ hãmri nẽ nhỹrmã kuwy wỳr papa hkêt nẽ. Pãnhã Tĩrtũm mẽ Jejus wa kuri pamex nẽ pahtĩr tũm nẽ ri papa ho papa.

¹⁴ Mẽ kot Tĩrtũm Karõ hkôt amnhĩ nhĩpêx xwỳnhjaja kêp Tĩrtũm kraa.

¹⁵ Nom amnepêm kormã mẽ pahte hkôt amnhĩ xunhwỳr kêt ri. Nẽ kormã mẽ pamã kapêr mar prãm kêt ri nhũm kot amnhĩ tã mẽ pahpumunh nẽ tanhmã mẽ pahto pumaj na pu prem pamã uma ho ri papa. Tã hkôt amnhĩ xunhwỳ nhũm Karõja mẽ pahkarõ mã gjêx jakamã na pu htem ra pamã uma hkêt nẽ ri papa. Karõ kot mẽ pahpê Tĩrtũm kra hã mẽ pajarênh jakamã pu mẽ amnhĩ kamã kot tanhmã mẽ panhĩpêx to puma hkêt nẽ ri papa. Nẽ paxàmnhĩx pajamakêtkati nẽ kãm amnhĩ jarẽ nẽ kãm amnhĩ jarênh o:

—Pa Inhĩpêêxà maati? Ot pa ixpê akra hã amã amnhĩ jarênh kaxyw amnhĩ kaxyw amã ijamaxpêr. Anẽ.

Ja o ra mẽ pamã uma hkêt nẽ ri papa.

¹⁶ Karõ kot mẽ pahkarõ mã gjêx nhũm mẽ pahte amnhĩ tã omunh jakamã na pu htem pajamaxpêr o:

—Nà Tĩrtũm Karõ kot ixkarõ mã àr jakamã ixpê hkra na pa. Anẽ.

Nhỹrmã mẽmoj piitã akupỹm mex par ã harẽnh

Sikũn Korõt 4.16-18; Korosẽ 3.4; Wam Pẽtre 4.13

17 Nẽ mẽ kãm Tĩrtũm prãm kêt xwỹnhjaja na htem te mẽ kot Tĩrtũm Kra Jejus nhĩpêx pyræk o mẽ panhĩpêx pu mẽ pahpunuj nẽ ri papa. Nom kot puj mẽ nhỹrmã Tĩrtũm mex o mex xwỹnhja kuri pamex kumrêx nẽ papa. Mẽ pahpê hkra jakamã kot puj mẽ Kra Jejus pyrà nẽ õ krĩ kamã kuri pamex kumrêx nẽ ri papa ho papa.

18 Jar Jejus ã mẽ pahpunuj nẽ ri papa htã kot puj mẽ nhỹrmã kuri pamex kumrêx nẽ papa ho papa. Hãmri nẽ mẽ pamex o pamex ã amnhĩ pumu nẽ jar pika ja kamã tanhmã mẽ pahpunuj toja mã axte pajamaxpêr kêt kumrêx.

19 Nẽ pika hkõt Tĩrtũm kot mẽmoj ho kator xwỹnhjaja na htem Tĩrtũm kot mẽ pahto mex par jatur xàm mẽnh ã arĩgro jamãr rãhã ho pa. àk nẽ mry nẽ pĩ nẽ gô nẽ mẽmoj piitã mẽ pajamãr o pa. Te kot mẽ pakukamã hamaxpêr o:

—Kwa mẽmo arĩgro hã koja Tĩrtũm hkrajê piitã ho amnhĩrit nẽ mẽ ho mex par jatur xàm kumẽ pu mẽ ja hã mẽ omu? Hẽxta waa nẽ. Inhmã tokyx ja hã mẽ omunh prãm tỳx. Koja tokyx ã mẽ hipêx anẽ pa ixkĩnh tỳx kumrêx.

Anhỹr o hamaxpêr pyræk.

20 Mẽmo kaxyw na hte mryja ã mẽ pakukamã hamaxpêr anẽ? Nà amnepê

mã Tĩrtũm kot mẽmoj piitã ho katorta ã nhũm pre piitã mex o mex. Pĩ nẽ mry nẽ gô. Mẽmoj piitã mex kumrêx rãhã nẽ. Aa grà nẽ htyk kêt kumrêx. Tã Atãw kot amnhĩ tomnuj mỳrapê nhũm ra ỹ hã mẽmoj piitã homnu par jakamã na hte mẽmoj htĩr nẽ pa nẽ gaa nẽ ty nẽ hapêx. Nẽ mẽ pahpur kãm ahkagrõt punuj hapôj. Atãw kot amnhĩ tomnuj mỳrapê nhũm Tĩrtũm kapêr xà hkõt ã mẽmoj omnu hpar anẽ.

21 Nom koja arĩ rãhã ho rãhã hkêt nẽ. Koja nhỹrmã Tĩrtũm akupỹm mẽmoj piitã ho mex pa nhũm mex o mex nẽ axte grà rỳ axte htyk nẽ hapêx kêt nẽ. Nẽ axte omnu nẽ hikwỹ hkêt nẽ. Koja mẽ pahpyrà nẽ mex o mex. Jakamã na htem Tĩrtũm kot mẽ pahto mex par jatur xàm mẽnh xà hã arĩgro jamãr rãhã ho pa.

22 Te mẽhõ ni hpijagri kaxyw õhy xà htỳx nẽ tokyx kãm hpijagri hprãm xàj àmra ho nør pyræk o amnhĩ nhĩpêx pẽ mẽ pahto mex jatur xàm mẽnh ã arĩgrota jamãr o pa.

23 Nẽ mẽ papajaja na pu htem tanhmã pahpunuj to nẽ jajê pyrà nẽ te amnhĩ kamnhêr o ri papa pyræk. Rỳ tanhmã paxà kute nẽ ri papa. Rỳ pamã prãm nẽ paxàà nẽ ri papa. Nẽ tanhmã mẽ pahpunuj to nẽ ri papa. Jao te pĩ nẽ gô nẽ mryja pyrà nẽ amnhĩ tã Tĩrtũm kot mẽ pahto mex par jatur xàm mẽnh ã arĩgro jamãr rãhã ho ri papa.

Na pre Tirtūm mē pahwyr Karō rē nhūm mē pahkarō mā agjē nē mē pakukamā Tirtūm tanhmā kot mē pahto mex to hā mē pamā ho amnhīrit nē mē pamā ho amnhīrit o:

—Koja nhỹrmā Tirtūm mē ato mex par jatur xām kumē nē mē piitā mē kām mē apē hkra hā mē ato amnhīrit. Hāmri nē mē amā mē anhi nyw gō ka mē axte axā nē ri apa nē atyk kēt nē. Hāmri nē Tirtūm ri amex kumrēx nē ri apa ho apa. Nā kot kaj mē nhỹrmā ā amnhī nhīpēx anē. Anē.

Ā Tirtūm Karō kot mē pakukamā mē pajarēnh anhỹr jakamā na pu htem amnhī tā kot mē pahto mex jatur xām mēnh pix jamār o ri papa.

²⁴ Nom na kormā ā mē pahto mex anhỹr kēt nē. Kormā mē pamā mē panhi nyw nhōr kēt nē. Nom ra kot mē pahto hkra jakamā pu mē ja hā amnhī pumu nē pajamaxpēr o:

—Nā ra Tirtūm kot ixto hkra jakamā koja nhỹrmā määnēn inhmā inhī nyw gō. Nā koja inhmā kugō.

²⁵ Anhỹr o pajamaxpēr tā kormā. Na pu htem kormā amnhī tā hamār rāhā ho ri papa nē aa hkaga hkēt nē papa.

Mē pahte Tirtūm Karō nhỹ hā Tirtūm mā amnhī jarēnh

²⁶ Nē na pu htem Tirtūm mā amnhī jarēnh kaxyw nhūm hte Karōja mē pahto ajuta pu mē ŷ hā pakatāt kōt kām tanhmā amnhī jarēnh to. No

kot puj mē amnhī krā hkōt kām amnhī jarēnh mex kēt nē. Na pu htem ja kaxyw tee ri amnhī kukamā paja-maxpēr o:

—Kwa tanhmā kot pa Tirtūm mā amnhī jarēnh to? Tanhmā kot pa mēmoj tā ixāhwyr to rý amnhī to hwyr to? Nā kot paj amnhī krā hkōt ja ho anhỹr mex kēt nē. Hēxta waa nē. Anē.

No nhūm Tirtūm Karō ra kot mē pahkarō mā gjēx jakamā na hte tanhmā mē pahkrā hto pu mē ŷ hā kām amnhī jarēnh mex nē pakatāt kōt mēmoj tā kuwý. Te Karōja tanhmā mē pakute hā mē pahpumunh nē mē pakamā ukaprī xāj tām mē pahto hwyr pyrāk.

²⁷ Jakamā pu mē ŷ hā tanhmā Tirtūm mā amnhī jarēnh to nhūm mē pamar kurē kumrēx. Ra kot mē pajamaxpēr kōt mē pahpumunh par kēnā. Nhūm ra Karō kot mē pahkarō mā gjēx jakamā na pu htem kām hprām xā hkōt kām amnhī jarē nē tanhmā amnhī to paxāhwyr to.

Tirtūm kot mē pamā mēmoj piitā ho mex ā harēnh

Römān 8.37; Piripos 1.12; Wam Pētre 5.10

²⁸ Nē mē pamā Tirtūm kīnh xwýnhjaja. Tirtūm kot mē pahto hkra xwýnhjaja. Koja mēmoj mē pakamā tanhmā amnhī to htā kēr pu mē ām ja hā amnhī pumu nē tee ri amnhī kukamā pajamaxpēr kēt nē. Koja te mē pahpē omnuj pyrāk tā koja nhỹrmā

hpãnhã mẽ pamã mex nê. Koja Tirtũm nhỹrmã tanhmã mẽ pamã mẽmojta o mex to.

²⁹ Amnepê mã mẽmoj pitã hkêt ri na pre Tirtũm mẽ pakukamã tanhmã mẽ pajarênh to nê mẽ pajarênh o:

—E kot paj nhỹrmã mẽ kot Ixkra Jejus kôt amnhĩ xunhwýr xwýnhjê ho ixkra jakamã nhũm mẽ Jejus pyrã nê kêp ixkraa. Nê uràk nê ixkapêr kôt amnhĩ nhĩpêx o pa. Jao pa ra ixkra xohtô nê. Nà ja na inhmã hprãm. Anê.

³⁰ Tã pu htem pajapôj nê ri papa. Hãmri nê kapêr ma nê amnhĩ kaxyw Kra Jejus kôt pajamãxpêr nê hkôt amnhĩ xunhwý. Hãmri nhũm Tirtũm ja hã mẽ pahpumu nê pahto hkra nê amnhĩm mẽ pamex xwýnh ã mẽ pajarê nê mẽ pahto mex nê. Nê te ho Kra Jejus nhĩpêx pyrãk o mẽ panhĩpêx. Jao nhỹrmã wa kuri mẽ pahitĩr tũm nê papa ho papa mã xwýnh ã mẽ pajarê.

Mêhõ kot Tirtũm pê aa mẽ papytãr kêt ã harênh

Römãn 5.1

³¹ Tã ã Tirtũm kãm mẽ pajapê nê mẽ pahto mex kot anhỹr. ã kot mẽ panhĩpêx mex anhỹr jakamã ra mẽ pahkôt pa ho pa rãhãã. Jakamã mêhõ koja ãhkra pê mẽ pahpytã? Nê mêhõ koja tanhmã ri kêp mẽ pahto? Nà koja kêp mẽ papytãr rý tanhmã kêp mẽ pahto hkêt nê.

³² Tirtũm kãm Kra Jejus japê htýx tã na pre mẽ pahpê nê

hkêt nê mẽ pahwýr kumê. Te kot mẽ pamã òr pyrãk o hipêx nhũm mẽ pahwýr wrý nê mẽ panê ty. Tã ra Tirtũm kot mẽ pamã òr jakamã koja mããnên kãm mẽ pahte Kra hkôt amnhĩ xunhwýr xwýnhjê japê nê mẽ pahto mex rãhã ho ri pa. Nà koja ã mẽ pahto mex anê.

³³ Jakamã mêhõ koja kãm mẽ pahte amnhĩ tomnuj xwýnh ã mẽ pajarê? Ra tãm kot mẽ pahto hkra nê mẽ pahte amnhĩ to mex xwýnh ã mẽ pajarênh kênã kot kêt mêhõ kãm tanhmã mẽ pahto kapêr punuj to nhũm mẽ kuma. Koja mẽ tee ri kãm tanhmã mẽ pahto kapêr to kaprý.

³⁴ Na pre ra Jejus Kris mẽ pahte amnhĩ tomnuj pãnhã amnhĩrer kaxyw mẽ panê ty nhũm Tirtũm akupým ho htĩr. Hãmri nhũm ma akupým kaxkwa hwýr api nê Pahi Maati krĩ xà kamã Tirtũm nhĩhkô hã hkrĩ ho hkrĩ. Nê Tirtũm mã mẽ pakutã nojarêt rãhã ho kuri hkrĩ ho hkrĩ. Jakamã mêhõ koja kêp mẽ kot amnhĩ xà htýx kamã hamak tũm xàta wýr mẽ pajano? Nà amrakati kumrêx.

³⁵ Nê Krisja kaxkwa kamã Tirtũm nhĩhkô hã hkrĩ ho hkrĩ htã mããnên jar mẽ pahkôt pa ho pa. Kãm mẽ pajapê htýx jakamã kot puj mẽ tanhmã pahpunuj to htã nhũm arĩ kãm mẽ pajapê nê mẽ pahkôt pa ho pa.

Rý nhũm mẽ kot hkôt amnhĩ xunhwýr kêt xwýnhjaja tanhmã hã mẽ pahto

htã nhũm arĩ kãm
mẽ pajapê kamã mẽ
pahkôt pa ho pa.

Rỳ mẽ pamã prãm nẽ ri papa.
Rỳ mẽ paxê hkêt nẽ
pamã kry nẽ ri papa
htã nhũm arĩ kãm
mẽ pajapê kamã mẽ
pahkôt pa ho pa.

Rỳ ra mẽ kot hã mẽ panhĩmex
kaxyw rỳ hã mẽ pah-
par kumrêx. Tã nhũm
arĩ kãm mẽ pajapê
kamã mẽ pahkôt pa ho
pa rãhã nẽ.

Kãm mẽ pajapê kamã mẽ
pahkôt pa ho pa rãhã jakamã
pu mẽ tee ri amnhĩ kukamã
pajamaxpêr kêt nẽ. ãm hkôt
paxãmnhĩx ri pajamakêtkati
nẽ ri papa ho papa.

³⁶ Tĩrtũm kapêr ã kagã htũm
te mẽ papajaja mẽ pahte kãm
tanhmã amnhĩ jarênh to pyrà
nẽ mẽ pajarênh kot:

Pa Tĩrtũm. Na htem atã mẽ
ixtomnuj tỳx o pa.

Nẽ ra mẽ kot mẽ inhĩmex
kaxyw.

Nẽ mẽ inhĩpêx o te mẽ kot
ôwêhti ho mõi nẽ hpar
kaxyw tanhmã hipêx
to pyrãk.

Jakamã na pa mẽ ra ixtyk
kaxyw.

Anhỹr o kot mẽ pajarênh.

³⁷ Tã kwãr mẽ ã mẽ panhĩpêx
anẽ. Arĩ Kris kãm mẽ
pajapê kamã mẽ pahkôt pa
ho pa rãhã jakamã mẽ kot
tanhmã mẽ pahto htã pu
mẽ arĩ amnhĩ kaxyw kãm
pajamaxpêr tỳx rãhã ho ri
papa. Nhũm arĩ mẽ kutã mẽ
pahto paxihtỳx pu mẽ arĩ mẽ
kãm pakuhê.

³⁸ Mẽmoj koja tanhmã mẽ
pahto nhũm Tĩrtũm tee ri ja
hã mẽ pahpumu nẽ kãm mẽ
pajapê hkêt nẽ? Nã am-
rakati kumrêx. Koja mẽhõ rỳ
mẽmoj mẽ pahpê àmnar kêt
nẽ. Na hte jar pika ja kamã
Kris kãm mẽ pajapê kamã mẽ
pahkôt pa ho pa. Nẽ kot puj
mẽ nhỹrmã ty nhũm arĩ kãm
mẽ pajapê kamã mẽ pahkôt
pa ho pa rãhã nẽ. Jakamã
koja mẽkarõ rỳ mẽkarõmnuti
rỳ jar pika ja kamã mẽ kãm
Tĩrtũm prãm kêt xwỳnhjaja mẽ
pahpê àmnar kêt nẽ. Rỳ
mẽmoj tanhmã kute. Rỳ ko-
rmã hapu hã mẽmoj tanhmã
kute. Koja mẽmoj piitã tee
ri tanhmã kêp mẽ pahto htã
nhũm Kris arĩ kãm mẽ pajapê
kamã mẽ pahkôt pa ho pa
rãhã nẽ nhũm mẽmoj tee ri mẽ
pahpê àmnar kaprỳ.

³⁹ Nẽ koja kỳj rũm mẽmoj
wry nẽ tanhmã kêp mẽ pahto
japêr. Rỳ pyka rũm mẽmoj
kato nẽ tanhmã kêp mẽ pahto
japêr. Rỳ kuwy rỳ kòk xapêr
tỳx tanhmã kêp mẽ pahto. Tã
nhũm mẽ panhõ Pahihti Je-
jus Kris arĩ kãm mẽ pajapê
kamã mẽ pahkôt pa ho pa
rãhã nẽ. Te Tĩrtũm kãm mẽ pa-
japê pyrãk o kãm mẽ pajapê
htỳx kãm mẽ pahkôt pa ho pa
rãhã jakamã nhũm mẽmoj tee
ri mẽ pahpê àmnar kaprỳ.

9

Ijaew jarênh

Atre 3.25; Rõmään 3.1-2

¹⁻² Nẽ na pa tee ri ixkwỳ
Ijaew kot tanhmã amnhĩ
nhĩpêx to ho pa hã mẽ omu

nē ixkaprī nē. Ixpyrà nē mē kēp Ijaew tā ixkīnhā amnhī kaxyw Kris kōt hamaxpēr kēt jakamā nhūm Kris tee ri kām mē hamakētkati nē àmnhīx ri mē pa hprām kaprý. Pa tee ri mē hkukamā ijamaxpēr nē ixkaprī nē ri ixpa. Nē aa ixkaprī ixpē kator kēt kumrēx. Mē kot inhmā mē hkīnh kēt ā amnhī tā ijarēnh tā inhmā mē hkīnh kēnā. Ām hāmri na pa ā amnhī jarēnh anē. Tīrtūm Karō kot ja hā ixpumunh mex nē inhmā:

—Nà ām hāmri na ka amā mē hkīnh ā amnhī jarē. Anē.

³ Mē kēp ixkwý na mē. Mē ixpār kraxja ām pixi mex. Tā nhūm mē ixkīnhā amnhī kaxyw Kris kōt hamaxpēr kēt jakamā kop ām Tīrtūm kot mē nē kuwy hwýr pa inhmēnh ronhýx ja inhmā mex. Nhýx pa kām:

—Kwa Tīrtūm. Amnhī nē kuwy hwýr ixkwýjē rēnh kēt nē. Inhmā mē hapé htýx kumrēx. Mē hpānhā pa mán mē nē hwýr inhmē nà.

Anhýr o nhýx pa kām ixkapēr. Nom kot paj amnhī to ā ixàhwýr anhýr kaprý. Tīrtūm kot mē kamā ukaprī htā no nhūm mē amnhī kaxyw Kris mā hamaxpēr kēt jakamā tanhmā koja amnhī to nē mē hpānhā pa mē nē kuwy wýr inhmē nhūm mē ixrom kuri htír tūm nē pa ho pa? Mē kot hkōt amnhī xunhwýýre hā.

⁴ Mē ixpē Ijaew nhīgētjaja na pre Tīrtūm amnepē mā mē ho mex rax nē. Nē kām mē ho hkra hprām nē. Nhūm prem tanhmā kot amnhī nhīpēx

mex to hā no ho omunh o pa. Nē hirā htýx kām ri pa hā omu nhūm mē kām:

—E kot kaj mē ixkapēr ma nē ixkōt amnhī nhīpēx o ri apa. Hā kot paj mē akōt ixpa ho ixpa nē mē ato mex nē ka mē axpēn kanrēhā axàmnàr rax nē. Hāmri pa mē amā pika mex gō ka mē kamā ajamakētkati nē axàmnhīx ri apa ho apa.

Anhýr o mē kām kapēr. Hāmri nē mē kaxyw Mojes mā tanhmā kapēr to nē mē kaxyw kām mēmoj piitā hā karō. Mē kot tanhmā amnhī tomnuj to hāmri nē tee ri ja hā amnhī pumunh nē tanhmā amnhī to Tīrtūm wýr to nhūm kot mē mar nē mē nē ja ho hapēx par kaxyw. Finat Mojes kot amnhī xō ri mē kām ujarēnh nhūm mē kot mar nē hkōt amnhī nhīpēx mex o ri pa kaxyw.

⁵ Mē ixkukamā mē ixpāmjaja. Apraāw nē Ijak nē Jako kanrēhā mē hkra nē mē htāmnhwýjaja na pre mē. Mē hwýr na pre Tīrtūmjaja Kra Jejus Kris mē nhūm mē hwýr wrý nē mē kamā ī ho ī ho kator jakamā haxwýja kēp Ijaew na pre. Kēp Mēpahpām nē mex o mex nē hihtýx o hihtýx tā Ijaew wýr wrý nē mē kamā kato. Hāmri nhūm Ijaew kēt xwýnhjaja harēnh ma nē tee ri hamaxpēr nē hamaxpēr o:

—Hēxta waa nē. Kēp ām Jejus mē papa kamā mán kator ronhýx mē pamā mex kumrēx. Anē.

6 No nhūm kormā Ijaew hwÿr wrÿk kêt ri nhūm Tirtūm ra kot mẽ ho hkra kaxyw mẽ hã amnhĩ jarẽ nhūm mẽ hkwyja kãm ja prãm kêt nẽ hkaga. Tã xà na pre Tirtūm kot mẽ ho hkra hã amnhĩ jarẽnh ã amnhĩ to hêx? Nà aa hêx kêt kênã kot kêt ri mẽmoj tã amnhĩ jarẽ nẽ hã amnhĩ to hêx. Jakamã na pre mẽ hkwyjaja hkwyjê rom hkaga hkêt nẽ nhūm amnhĩ tã mẽ omu nẽ mẽ ho hkra. Nom mẽ piitã mẽ ho hkra hkêt nẽ. Mẽ hkwyjaja kot hkaga jakamã nhūm ãm mẽ hkwyjê pix o hkra.

7 Nẽ finat Apraãwja na pre hkanrêhã hkra nẽ htàmnhwÿ xohtô nẽ. Tã xà na pre Tirtūm htàmnhwÿ piitã mẽ ho hkra hã amnhĩ jarẽ? Nà mẽ piitã ã mẽ harẽnh anhÿr kêt nẽ. ãm mẽ hkwyjê pix na pre mẽ ho hkra hã mẽ harẽ. Apraãw kra Ijak kôt hkanrêhã htàmnhwÿ pixjaja nhūm kot mẽ ho hkra hã mẽ harẽ.

8-9 Nẽ Apraãw kormã hprõ kamã hkra hkêt ri na pre kãm àpênh xwÿnh kamã hkra nhūm kato nẽ myre nẽ hixi pẽ Ismael. Nom kêp Apraãw prõ kumrêx kamã hkra hkêt. Prõ kuprÿ kamã hkra na pre. Tã nhūm Tirtūm kãm hkra kumrêx kukamã harẽ nẽ kãm:

—E kot paj ma tẽ hãmri nẽ mẽmo arÿgro hã akupÿn awÿr tẽ nhūm ra aprõ hpijagri nhūm war akra myre. Anẽ.

Tã nhūm hprõ Saraja htujarô. Nẽ gaa nẽ hpijagri nhūm hkraja myre. Hixi

pẽ Ijak. Kêp Apraãw prõ kamã hkra jakamã Tirtūm nom kêp Apraãw kra kumrêx. Jakamã hkra Ijak kanrêhã htàmnhwÿjaja na pre Tirtūm kot mẽ ho hkra hã mẽ harẽ. Ra kot Apraãw mã ja hã amnhĩ jarẽnh xà hkôt.

10 Tã nhūm Ijakja hprêk nẽ Repek o hprõ. Nẽ gaa nẽ ra haxwÿja wa hkra nhūm hkraja wa ahpo nẽ kato nẽ wa hamẽ my. Kot wa pẽ Ejau nhūm kot hapu pẽ Jako.

11-12 Nom nhūm kormã wa kator kêt ri nhūm Tirtūm wa hkukamã tanhmã wa harẽnh to. àhpumunh xà hkôt wa katorxà mã wa harẽ nẽ kãm:

—E kot paj amã war akra wa hkukamã tanhmã wa harẽnh to ka inhma. Nà koja wa kato nẽ gaa nẽ hprêk hãmri nhūm kot haputa amnhĩ to rax o kot wa jakre. Anẽ.

Kot wata koja kot hapu kÿnhã amnhĩ to grire nẽ ri pa nhūm ã wa hkukamã wa harẽnh anẽ. Kãm wa kot tanhmã amnhĩ nhÿpêx to hprãm xà hkôt ã wa harẽnh anẽ. Kormã wa kot tanhmã amnhĩ tomnuj to rÿ tanhmã amnhĩ to mex to hã kot wa omunh kêt tã kãm hprãm xà hkôt ã wa hkukamã wa harẽnh anẽ.

13 Tirtūm kapêr ã kagà htūm kot wa harẽnh nẽ wa hã kagà kot:

Ejau rom Jako kanrêhã hkra nẽ htàmnhwÿ pixjaja na pre Tirtūm amnhĩm mẽ ho hkra. Anẽ.

14 Mãn ka mẽ Tirtūm kot ã wa harẽnh anhÿrja ma nẽ aja-maxpêr o:

—Tk. Kwa ja mexti hã. Mo na pre hamẽ wa hkanrẽhã wa hkra nẽ wa htãmnhwý piitã ho hkra hkêt nẽ? Anẽ.

Kwa mẽ ã ajamaxpër anhÿr kêt nẽ. Tirtũm na hte kãm hprãm xà hkõt tanhmã mẽ panhĩpêx to ho pa pu mẽ kot tanhmã mẽ panhĩpêx to hã omu nẽ ãm omu nẽ amnhĩ tã tanhmã kãm nẽ hkêt nẽ.

¹⁵ Na pre finat Mojes mã amnhĩ jarẽnh o:

Inhmã hprãm xà hkõt na pa hte mẽ omu nẽ tanhmã mẽ kamã ixukaprĩ hto ho ri ixpa.

Nẽ inhmã hprãm xà hkõt na pa hte ahpÿnhã tanhmã mẽ hipêx to ho ri ixpa.

Anhÿr o kãm amnhĩ jarẽ.

¹⁶ Nom tanhmã mẽ pahte amnhĩ nhĩpêx to hã mẽ pahpumunh kõt na hte mẽ pakamã ukaprĩ hkêt nẽ. ãm tãm kãm hprãm xà hkõt na hte tanhmã mẽ pakamã ukaprĩ hto ho pa.

¹⁷ Amnepê mã Ejit kãm mẽ õ pahihti Paraohti hwÿr na pre Mojes mẽ nhũm ma hwÿr mõ nẽ kãm tanhmã Tirtũm kapër jarẽnh to nẽ kãm:

—E Tirtũm na awÿr inhmẽ pa mõ. Tãm na pre apê Ejit nhõ xwÿnhjê nhõ pahi kaxyw axãm. Akrã hihtÿx tã nhũm mẽ kaxyw axãm. Tã ra xatã àhpumunh tÿx o tanhmã anhĩpêx to. Krĩ piitã hkõt ri mẽ pa xwÿnhjaja kot atã harẽnh mar nẽ àhpumunh o àhpumunh ã omunh kaxyw. Tã ixte amã ja jarẽnh kaxyw

na pre awÿr inhmẽ pa man awÿr mõ. Anẽ.

¹⁸ ã na hte Tirtũm kãm hprãm xà hkõt tanhmã mẽ panhĩpêx anhÿr to ho pa. Jao mẽ hkwÿjê kamã ukaprĩ ho pa. No mẽ hkwÿjaja nhũm tee ri mẽ hkrã hihtÿx ã mẽ omu nẽ ãm mẽ omu nhũm mẽ amnhĩ krã hkõt ri tanhmã amnhĩ tomnuj to ho ri pa.

Tirtũm kêp mẽ pakamã ukaprĩ xwÿnh ã harẽnh

¹⁹ Nẽ kot kaj mẽ atõ Tirtũm kot ã mẽ hipêx anhÿrja ã harẽnh ma nẽ tanhmã hã ixkukjêr to nẽ inhmã:

—Kwa na xep hte Tirtũm ahpÿnhã tanhmã mẽ hipêx to. Nẽ mẽ hkwÿjê kamã ukaprĩ ho pa nẽ mẽ hkwÿjaja mẽ hkrã hihtÿx ã mẽ omu nẽ ãm mẽ omu nẽ mẽ kamã ukaprĩ hkêt nẽ. Jakamã kwa mo na hte mẽ kot amnhĩ tomnuj xwÿnh ã mẽ harẽ? Tãm kot ã mẽ hipêx anhÿr kênã kot kêt mẽ kot amnhĩ tomnuj xwÿnh ã mẽ harẽ.

Anhÿr o ajamaxpër japêr.

²⁰ Kwa mẽ ri ã atÿx Tirtũm jarẽnh anhÿr kêt nẽ. E pa mẽ amã ejêp jarê ka mẽ inhma. Xà kot mẽhõ gyw kwÿ ho amnhĩm poti nhĩpêx nhũm tee ri amnhĩ tã omu nẽ amnhĩ tã tanhmã kãm kapêr to nẽ kãm: “Tk. Kwa mon ka ri ã inhĩpêx anê?” Anhÿr o amnhĩ tã kãm kapêr? Nã koja kãm tanhmã nẽ hkêt nẽ.

²¹ Hipêx xwÿnh kãm hprãm xà hkõt kot ã hipêx anhÿr kênã kot kêt amnhĩ tã kãm akir. Koja amnhĩm gyw kwÿ kakwÿ nẽ ho poti ho axkrut

nē hipêx. Nē hõ ho muxre. Ho mex kumrêx nhũm xa. Nhũm ihõja mã ho anē nē hipêx no ãm wamta kĩnhã ho hanhãjti nhũm omnajti nē xa. No ãm tãm kot hamē wa hipêx prãm xà hkõt wa hipêx kēnã.

22 Tã na hte ã Tĩrtũm mē panhĩpêx anē. Te poti pynajre pyrã nē mē pahkwýjē nhĩpêx nhũm mē kãm kapêr mar prãm kêt nē htýx ri tanhmã amnhĩ tomnuj to ho ri pa. Hãmri nhũm amnhĩ tã mē omu nē te amnhĩ nē mē rēnh kaxyw pyrãk o mē hipêx no ãm kormã hamaxpêr o:

—Nà kot paj nhỹrmã mē kot amnhĩ tomnuj mýrapê mē ho ijarêx pa nhũm mē piitã ja hã ixpumu nē inhmã ixãhpumunh o ixãhpumunh ã ijarē. Nē inhmã mēmoj punuj piitã hkĩnh kêt kumrêx ã axpēn mã ijarē. Anē.

23 Nom na hte jajē rom mē pahkwýjē nhĩpêx o te poti mexta nhĩpêx pyrã nē amnhĩ kaxyw mē paxunhwý nē mē pahto hkra kaxyw. Nē mē pajarēnh o:

—Nà koja mē amnhĩ kaxyw Ixkra Jejus mã hamaxpêr nē hkõt amnhĩ xunhwý pa ja hã mē omu nē mē kamã ixukaprĩ ho ri ixpa. Nē mē ho mex pē mē kutã inhnojarêt rãhã ho ri ixpa. Hãmri nhũm mē nhỹrmã Ixkra mē wa ixri htĩr tũm nē mex nē pa ho pa. Kot paj ã mē ho mex anē nhũm mē amnhĩ tã ixpumu nē inhmã inhmex o inhmex ã ijarēnh o pa. Anē.

Ã na hte Tĩrtũm ahpýnhã mē pahpiitã mē panhĩpêx

anē.

24 Nē na hte mē ixpê Ijaew pix o hkra hkêt nē. Na hte mããnēn mē apê Ijaew kêt xwýnhjê ho hkra.

25 Amnepê mã mē kãm kapêr jarēnh o ri mē pa xwýnhjê hõ pē finat Ojejja na pre te Tĩrtũm tãm kot Ijaew kêt xwýnhjê jarēnh pyrã nē mē harēnh o:

Amnepēm na pa pre mē ho ixkra hkêt tã kot paj mē hkwyjê ho ixkra.

Na pa pre mē kamã ixukaprĩ hkêt tã pa ra inhmã mē hapê nē.

26 Nē ixte mē kêp ixkra hkêt ã mē harēnh tã kot paj ra mē kêp ixkra hã mē harē.

Ixpê mēõ Tĩrtũm kot paj ã mē harēnh anē. Anē.

27 Hãmri nhũm finat Ijais Ojej pãnhã tanhmã Ijaew jarēnh to. Ijaisja Tĩrtũm nhỹ hã kapêr jarēnh o ri pa xwýnhjê hõ na pre. Jakamã nhũm Tĩrtũm kãm tanhmã mē ijarēnh to nhũm kuma nē ô ri mē ixkukamã mē inhĩgêxjê mã ujarēnh o pa nē hã kagã. Nē hã kagã ho:

Ijaew na mē ohtô rax kumrêx.

Te gõ xujanãr mýri pykahti grã hkryre xohtô pyrãk.

Tã koja mē piitã ixkõt amnhĩ xunhwýr kêt nē.

Koja mē ãm grêre nē amnhĩ kaxyw inhmã hamaxpêr nē ixkõt amnhĩ xunhwý.

Jakamã mẽ tapxipixjaja koja
hkwỳjê rom nhỹrmã
inhõ krĩ hwỳr api.

28 No mẽ kot amnhĩ kaxyw
inhmã mẽ hamaxpêr
kêt xwỳnhjaja kot paj
tokyx tanhmã mẽ
harênh to.

Mẽ kot amnhĩ tomnuj mỳrapê
tanhmã mẽ harênh to
nhũm mẽ ma mẽ kot
amnhĩ xà htỳx kamã
hamak tũm xàta wỳr
ma pa.

Nà kot paj tokyx ã mẽ hipêx
anê.

Anhỹr o mẽ harê.

29 Nom nhũm kormã ã mẽ
harênh anhỹr kêt ri nhũm ra
wam tanhmã mẽ harênh to
nê mẽ harênh o:

Amnepêm Sotõ mẽ Komo
kamã mẽ pa xwỳnhjaja
na prem amnhĩ tom-
nuj tỳx rãhã ho ri pa.

Mỳrapê nhũm Tĩrtũm
xàhpumunh o àhpumunh
xwỳnhja tee ri ja hã mẽ
omu hãmri nê kaxkwa
rũm mẽ õ krĩ wa hipy
mẽmoj pôõta rê.

Nhũm mẽ hã rôrôk nê mẽ
ho hkaxàr pa nhũm mẽ
hapêx.

Tã na pu htem mẽ uràk nê
amnhĩ tomnuj o ri
papa.

Jakamã kop ãm Tĩrtũm kot
mẽ pahkwỳjê kamã
ukapĩrĩ kêt ronhỹx pu
mẽ ra mẽ uràk nê
pahpiitã pajapêx pa.
Anê.

*Ijaew kwỳ kot Jejus kôt
amnhĩ xunhwỳr kêt ã mẽ
harênh*

Rômãn 10.1-4

30 Nê Ijaew kêt xwỳnhjaja
na prem Ijaew pyrã nê kãm
Tĩrtũm prãm kêt tã Jejus
jarênh ma nê Ijaew rom
amnhĩ kaxyw hkôt hamaxpêr
nê hkôt amnhĩ xunhwỳ.
Hãmri nhũm Tĩrtũm ja hã mẽ
omu nê mẽ ho hkra nê mẽ kot
amnhĩ to mex xwỳnhjê hã mẽ
harê.

31-32 Hãmri nhũm Ijaew tee
ri mẽ kot Jejus kôt amnhĩ
xunhwỳr ã mẽ omu nhũm ja
mẽ kãm mex kêt nê. Hãmri
nhũm mẽ hamaxpêr o:

—Tk. Kwa ra mẽ ixte
finat Mojes kapêr kôt amnhĩ
nhĩpêx mex o ri mẽ ixpa
xwỳnh jakamã koja Tĩrtũm
ja hã mẽ ixpumu nê mẽ ixte
amnhĩ to mex xwỳnhjê hã mẽ
ijarê nê mẽ inhnê mẽ ixte
amnhĩ tomnuj rênh pa. No
kot paj mẽ Ijaew kêt xwỳnhjê
pyrã nê Jejus kôt amnhĩ
xunhwỳr kêt nê. ãm kwarĩ
ho kwarĩ.

Anhỹr ã amnhĩ jarê. No
ãm ã mẽ hamaxpêr anhỹrja
mex kêt. Na prem htỳx Tĩrtũm
noo mã kot amnhĩ to mex ã
amnhĩ jarênh kaprỳ nê arĩ ri
tanhmã amnhĩ tomnuj to ho
ri pa. Te pry kamã kên nôr
nhũm mẽ kot nhãm nê mẽnh
kaxyw hkamnãr nê ho amnhĩ
par krã hi kukênh pyrãk
o na htem amnhĩ nhĩpêx.
Jao amnhĩ krã hkôt tanhmã
amnhĩ nhĩpêx to ho pa hprãm
xà te Jejus kapêrja nhãm
amnhĩ nê rênh pyrãk o hipêx.
Jakamã koja mẽ Tĩrtũm nhõ
krĩ hwỳr àpir kêt nê.

33 Tĩrtũm kapêr ã kagã htũm
kot ja jarênh kot:

E mẽ inhma. Kot paj nhỹrmã Ijaewjê hwỳr mēhõ mẽ nhũm mẽ hkôt kapêr o pa.

Nom koja mẽ kapêr mar kêt nê. Koja mẽ kuma nê âm kuma.

Te pry kamã kên nỡr nhũm mẽ kot nhãm pry nê mẽnh kaxyw hkamnâr nê ho amnhĩ par krã hi kukênh pyrãk o koja mẽ amnhĩ nhĩpêx.

No te mẽ kot nhãm pry nê mẽnh kaxyw hkamnâr kêt pyrãk xwỳnhjaja koja mẽ kurom nhỹrmã ma Tirtũm nhõ krĩ hwỳr api.

Hãmri nê hkĩnh nê pa ho pa. Anê.

Nom kên kumrêx jarênh kêt nê. Na prem Jejus ã kuxi nê ã harênh anê. Ijaew te mẽ kot kên nhĩpêx pyrãk o Jejus nhĩpêx nê amnhĩ kaxyw hkôt hamaxpêr kêt nê axtem nê hkaga nê âm kamã gryk pix o ri pata ã nhũm mẽ harê. No mẽ kot amnhĩ kaxyw hkôt hamaxpêr ronhỹx Jejus te kên kot mẽ kêp àmnâr pyrãk kêt nê. Jakamã ã mẽ harênh kot anhỹr.

10

¹ Hêxta waa nê. Ijaxwỳja ixpê Ijaew. Mẽ kêp ixkwỳ jakamã kêp apu mẽ kot amnhĩ kaxyw Jejus mã hamaxpêr nê hkôt amnhĩ xunhwỳr ronhỹx pa ixkĩnh tỳx kumrêx. Inhmã mẽ kêp Tirtũm kra hprãm tỳx kumrêx kênã. Inhmã ja prãm xaj na

pa hte mẽ ho Tirtũm wỳr rãhã ho ri ixpa.

² Ra ixte mẽ omunh mex. Mẽ kãm Tirtũm mã tanhmã amnhĩ nhĩpêx to hprãm tâ no âm mẽ kot hprĩ hã kapêr mar kêt. Jakamã na htem tee ri tanhmã kãm amnhĩ nhĩpêx to ho ri pa hprãm kaprỳ.

³ Nhũm pre Tirtũm tee ri amnhĩ tâ mẽ omu nê hamaxpêr o:

—Koja mēhõ amnhĩ kaxyw Ixkra Kris kôt hamaxpêr nê hkôt amnhĩ xãm pa ja hã omu nê kot amnhĩ to mex xwỳnh ã harê nê ho ixkra kurê kumrêx. Nom na hte Ijaew ohtõ nê ã amnhĩ nhĩpêx anhỹr kêt nê.

Anhỹr o mẽ harê. Âm hãmri na ã mẽ harênh anê. Na htem âm axtem nê hamaxpêr o:

—Tk. Kot paj amnhĩ kaxyw Kris kôt ijamaxpêr nê hkôt amnhĩ xãm kêt nê. Kot paj âm pam amnhĩ krã hkôt tãm ri amnhĩ nhĩpêx o ri ixpa. Mẽ ixpê Ijaewjê mẽ ixte amnhĩ nhĩpêx xà hkôt. Hãmri nhũm Tirtũm ja hã ixpumu nê amnhĩm inhmex ã ijarê. Nom kot paj Kris kôt amnhĩ xãm kêt nê. Âm kwarĩ ho kwarĩ.

Anhỹr ã amnhĩ jarê.

⁴ Nom na htem âm htỳx ri amnhĩ krã hkôt amnhĩ to mex o pa hã amnhĩ kamnhĩx kaprỳ. Koja mẽ tee ri kãm finat Mojes kapêr kôt amnhĩ nhĩpêx o ri pa hprãm kaprỳ. Jejus tapxipix na pre tãm amnhĩ nhĩpêx mex rãhã ho pa. Na pre Tirtũm kapêr kôt amnhĩ nhĩpêx mex o ri pa nê aa kapêr õ nhĩrôp âm nê hkwỳm ri tanhmã amnhĩ

tomnuj to hkêt nê. Kot amnhĩ tomnuj kêt xwÿnh ã ãm pixi mex na. Jakamã tapxipix kukwak ri na hte Tĩrtũm amnhĩm mẽ pahte amnhĩ to mex xwÿnh ã mẽ pajarẽ.

Tĩrtũm kãm mẽ pahpiitã mẽ pahto hkra hprãm ã harẽnh

⁵ Nê amnepêm na pre finat Mojes Tĩrtũm nhÿ hã Ijaew mã tanhmã ujarẽnh to nê hã kagà. Nê mẽ kãm ujarẽnh o:

—E kot kaj mẽ atõ Tĩrtũm nhÿ hã ixujarẽnh ma nê hkõt amnhĩ nhĩpêx mex o ri apa nê hkwym ri tanhmã amnhĩ nhĩpêx to hkêt nê. Hã koja Tĩrtũm hã apumu nê amnhĩm ate amnhĩ to mex xwÿnh ã ajarẽ ka nhÿrmã kuri atĩr tũm nê amex nê apa ho apa. Anê.

⁶ Æ mẽ kãm kapêr anhÿr tã mẽ pahte Mojes kapêr xà hkõt amnhĩ nhĩpêx o papaja na mẽ pahpê hihtÿx kumrêx. Tĩrtũm kapêr tũm na. Kapêr ã kagà kamã kot mẽ pamã mẽ pahte tanhmã amnhĩ nhĩpêx to hã karõja ohtõ rax kumrêx jakamã pu mẽ tee ri pamã piitã hkõt amnhĩ nhĩpêx prãm kaprÿ. Nhũm Tĩrtũm tee ri amnhĩ tã mẽ pajamã hãmri nê mẽ pahwÿr Kra Jejus mẽ. Jakamã na pu htem amnhĩ kaxyw hkõt pajamaxpêr nê hkõt amnhĩ xunhwÿ nhũm Tĩrtũm hã mẽ pahpumu nê kukwak ri mẽ pahto hkra kurê kumrêx. Kra kukwak ri kot mẽ pahto hkra kaxyw kot mẽ pahwÿr mẽnh nhũm mẽ kot hpĩr nhũm akupÿm ho htĩr jakamã na pu htem harẽnhja ma nê pajamaxpêr o:

—Nà na xep pre Jejus ixto ixpê Tĩrtũm kra. Anê.

Nom xà na hte Tĩrtũmja ã mẽ pamã kapêr anê nê mẽ pamã:

—E kot kaj mẽ ma kaxkwa hwÿr api nê Kris japrõ nê man amnhĩ kõt akupÿn o wrÿ pa ja hã mẽ apumu nê mẽ ato ixkra.

Anhÿr o mẽ pamã kapêr? Nà na hte ã mẽ pamã kapêr anhÿr kêt nê. Tanhmã kot puj mẽ amnhĩ to nê ã amnhĩ nhĩpêx anê?

⁷ Rÿ xà na hte ã mẽ pamã kapêr anê nê mẽ pamã:

—E na pre Krisja ty. Jakamã mẽ kam nê ma hwÿr mra nê akupÿm amnhĩm ho htĩr. Hãmri pa ja hã mẽ apumu nê mẽ ato ixkra.

Anhÿr o mẽ pamã kapêr? Nà na hte ã mẽ pamã kapêr anhÿr kêt nê. Tanhmã kot pu mẽ amnhĩ to nê akupÿm ho htĩr? Ja pyrã nê na hte Tĩrtũm mẽ pamã mẽmoj tã karõ pu mẽ kãm ho anhÿr nhũm ja hã mẽ pahpumunh kõt mẽ pahto hkra hkêt nê.

⁸ Æm mẽ pahte amnhĩ kaxyw Jejus kõt pajamaxpêr nê hkõt amnhĩ xunhwÿr ã mẽ pahpumunh kõt pix mã na hte mẽ pahto hkra. Hãmri nê mẽ pahwÿr Karõ rẽ nhũm mẽ pahkarõ mã gjêx jakamã mẽ pahte Tĩrtũm kãm hprãm xà hkõt amnhĩ nhĩpêx o papaja na mẽ pahpê hihtÿx kêt. Te kapêr ra mẽ pahkrã hi kaxwÿnh kãm hikwÿ pyrãk o pu mẽ piitã mẽ kãm harẽnh o ri mẽ hkõt papa. Jakamã na pa hte mẽ

piitã mẽ kot amnhĩ kaxyw
Jejus kôt hamaxpêr kaxyw
tanhmã mẽ kãm harênh to ho
ri mẽ hkôt ixpa nê mẽ kãm:

9 –Kot ka mẽ atõ Jejus
kêp anhõ Pahihti hã harê nê
Tĩrtũm kot akupỹm ho htĩr kôt
ajamaxpêr. Hã koja Tĩrtũm ja
hã apumu nê anê ate amnhĩ
tomnuj o hapêx nê ato hkra.
Ãm ja pix ã mẽ pahpumunh
kôt na hte mẽ pahto hkra.
Anê.

10 Nê na pu htem mẽ
pahkrãhi kaxwỹnh kãm
amnhĩ kaxyw Jejus mã
pajamaxpêr. Nê mẽ pajakwa
ho kêp mẽ panhõ Pahihti hã
harê. Hãmri nhũm Tĩrtũm ja
hã mẽ pahpumu nê amnhĩm
mẽ pahte amnhĩ to mex
xwỹnh ã mẽ pajarê nê mẽ
pahto hkra.

11-13 Tã mẽ pahte amnhĩ
kaxyw Jejus kôt pajamaxpêr
nê hkôt amnhĩ xunhwỹr
xwỹnhjaja kot puj mẽ pahkĩnh
nê papa ho papa. Mẽ
pahpiitãã. Ijaew nê Ijaew kêt
xwỹnhjaja. Mẽ pahpiitã mẽ
panhõ Pahi Maati ja ãm pyxi
mex na. Jakamã koja Ijaewjê
hõ rỹ Ijaew kêt xwỹnhjê hõ
amnhĩ to kuwỹ nhũm kuma
nê ho hkra. Kapêr ã kagã
htũm kot ja jarênh kot:

Mẽ kãm kêp Tĩrtũm kra hprãm
xwỹnhjaja koja mẽ
amnhĩ to Tĩrtũm wỹ
nhũm mẽ kuma nê
Jejus kot mẽ nê htyk
kukwak ri mẽ nê mẽ
kot amnhĩ tomnuj o
hapêx nê mẽ ho hkra
nhũm mẽ hkĩnh nê pa.
Anê.

14-15 Xã na htem kormã
amnhĩ kaxyw Kris mã
hamaxpêr kêt rãhã amnhĩ to
Tĩrtũm wỹ nhũm mẽ kuma
nê mẽ ho hkra? Nã tanhmã
kot wem amnhĩ to nê amnhĩ
kaxyw kãm hamaxpêr kêt
rãhã amnhĩ to kuwỹ? Na
hte Tĩrtũm ma mẽ hwỹr mẽ
hkwỹjê rê nhũm mẽ ma mẽ
hwỹr mra nê Tĩrtũm kapêr
o mẽ ahkre ho ri mẽ hkôt
pa. Nhũm mẽ hkwỹjaja mẽ
kuma nê amnhĩ kaxyw Jejus
kôt hamaxpêr nê amnhĩ to
Tĩrtũm wỹ. Kapêr ã kagã htũm
kot ja jarênh kot:

Koja mẽmoj mex jarênh
xwỹnhjaja ma mẽ hwỹr
mra.

Nê mẽ hwỹr hpôx o mõ nhũm
mẽ amỹm amnhĩ wỹr
mẽ omu nê hkĩnh nê.
Anê.

16 Tã ra mẽ piitã kot kapêr
mar tã piitã amnhĩ kaxyw
hkôt hamaxpêr kêt nê.
Jakamã nhũm finat Ijais tee
ri ja hã mẽ omu nê Tĩrtũm mã
mẽ harênh o:

Pa Pahi Maati. Kwa ra mẽ
kot akapêr mar tỹx tã
akôt amnhĩ nhĩpêx kêt
nê. Mẽ kãm akapêr
kôt amnhĩ nhĩpêx o
pa hprãm kêt. Na
htem ãm grêre nê akôt
amnhĩ xunhwỹ nê
akôt amnhĩ nhĩpêx o ri
pa. Anê.

17 Kot anhỹr tã ãm mẽ kot
Kris kapêr jarênh mar kôt pix
mã na htem amnhĩ kaxyw
hkôt hamaxpêr. Koja mẽ
harênh mar kêt tã tanhmã
koja wem amnhĩ to nê amnhĩ

kaxyw hkôt hamaxpēr nē
hkôt amnhī xunhwỳ?

18 Mān ka mẽ atō atỳx ā aja-
maxpēr anhỳr o:

—Ko mǎn Ijaew kormǎ
Jejus kot mẽ panē tanhmǎ
amnhī nhīpēx to hǎ harēnh
mar kēt jakamǎ na mẽ kormǎ
hkôt amnhī xunhwỳr kēt nē.

Anhỳr o ajamaxpēr. Nom
ja kot anhỳr kēt. Ijaew piitǎ
ra mẽ kot harēnh mar kēnǎ.
Tirtūm kapēr ā kagǎ htūm kot
ja hǎ mẽ harēnh kot:

Na prem ma mẽ piitǎ mẽ
kām ja jarēnh o ri mẽ
hkôt pa nhūm mẽ piitǎ
kuma. Anē.

19 Tǎ mǎn ka prem ra ja ma nē
atỳx ajamaxpēr o:

—Kot anhỳr tǎ no mǎn ko-
rmǎ hprī hǎ Jejus jarēnh mar
kēt jakamǎ mẽ hkôt amnhī
xunhwỳr kēt nē. Anē.

Nom ja haxwỳja kot anhỳr
kēt. Ra mẽ kot hprī hǎ harēnh
mar mex tǎ kuma nē ām
kuma nē amnhī kaxyw kām
hamaxpēr kēt nē. No mẽ
apē Ijaew kēt xwỳnh kwỳjaja
na ka mẽ kurom harēnh ma
nē amnhī kaxyw hkôt aja-
maxpēr nē hkôt amnhī xun-
hwỳr kurē kumrēx. Hāmri
nhūm Ijaew tee ri ja hǎ mẽ
apumu nē mẽ akamǎ gryk
tỳx nē. Nom ra Tirtūm kot ā
mē hkukamǎ mẽ kot amnhī
nhīpēx anhỳr ā mẽ omunh nē
mē harēnh kot anhỳr kēnǎ.
Na pre finat Mojes mẽ kām
tanhmǎ hǎ kagǎ hto. Te
Tirtūm tǎm kot mẽ hǎ kagǎ
pyrǎ nē kapēr ā kagǎ htūm
kamǎ kot mẽ harēnh kot:
Mē ate mẽ kamǎ mẽ akahak o
apa xwỳnhjaja.

Mē kot htỳx ri amnhī nhīpēx
o mẽ pa hǎ mẽ ate mẽ
harēnh tǎ no kot paj mẽ
arom amnhīm mẽ kot
amnhī to mex xwỳnhjē
hǎ mẽ harē.

Kot kaj mẽ tee ri ja hǎ mẽ omu
nē mẽ kamǎ agryk tỳx
kumrēx.

Nē mǎānēn pa ixte mẽ ho mex
ā ixpumu nē mẽ hǎ
ixkamǎ agryk nē. Anē.

20 Nē finat Ijais na pre
haxwỳja ā mẽ harēnh anē. Na
pre kām amnhī kwỳ pē Ijaew
pyma hkēt nē xatǎ Tirtūm nhỹ
hǎ tanhmǎ mẽ kām Ijaew kēt
xwỳnhjē jarēnh to ho pa. Te
Tirtūm tǎm kot mẽ harēnh
pyrǎk o mẽ kām:

Nǎ Ijaew kēt xwỳnhjaja kot
Tirtūm japēr kēt tǎ koja
tǎm mẽ kām amnhī
to amnhīrīt nhūm mẽ
hkôt amnhī xunhwỳ.

Mē kot kormǎ amnhī kaxyw
kām hamaxpēr kēt
tǎ koja tǎm mẽ kām
amnhī to amnhīrīt.
Anē.

21 Ā Ijaew kēt xwỳnhjē jarēnh
kot anhỳr. Nē axte mǎ
tanhmǎ Ijaewjē jarēnh to kot:

Te mẽ katorxǎ kot tanhmǎ
hkrajē ho mex to
kaxyw tee ri amnhī
wỳr mẽ kām àkjēr
pyrǎk o na hte Tirtūm
Ijaewjē nhīpēx o pa.

Jao tee ri kām tanhmǎ mẽ ho
mē mex to hprām tǎ
no nhūm mẽ amnhī tǎ
kuma nē ām kuma nē
hkôt amnhī nhīpēx kēt
nē. Anē.

11

Tîrtûm kot Ijaew kamã ukapri hã harênh

Matêwre 13.10-17

¹ Tã ra Ijaew kot Tîrtûm kaga jakamã mân ka mê atô mê harênh ma nê ajamaxpêr o:

—Mãn pre Tîrtûm tee ri amnhî tã mê omu nê amnhî pyrà nê mê hkaga.

Anhÿr o ajamaxpêr. Nom na pre mê hkaga hkêt nê. Ijaxwÿja ixpê Ijaew na pa. Mê urak nê ixpê Ijaew pâr kraxpê finat Apraãw kanrêhã htãmnhwÿ Pêjamî kanrêhã hõ na pa. Tã xà na pre Tîrtûm ixkaga? Nà kot ixkaga hkêt.

² Amnepê m kormã mëmoj piitã hkêt ri na pre mê ixpê Ijaew hkukamã mê ixto hkra hã amnhî jarê. Tã nhùm amgrã xohtô nê hapêx nhùm mê hapôj hãmri nê Tîrtûm kôt amnhî nhîpêx o pa hkêt nê. Hãmri nhùm finat Erisja tee ri mê kot amnhî nhîpêx ã mê omunh o pa nê Tîrtûm mã tanhmã mê harênh to nê mê hã kagã. Nê hã kagã ho:

³ Kwa Tîrtûm. Mê ixte amã amnhî jarênh xà hã mêsti hkwy na prem ra hkrakrak pa. Nê anhÿ hã akapêr jarênh o ri mê pa xwÿnh kwÿ nhîmex rax nê. Æm papxipix na pa arî ixtîr nê ri ixpa nom nhùm mê ra kot ixpîr kaxyw ixtã amnhî jarê. Anê.

⁴ Tã tanhmã na Tîrtûm kutã kãm kapêr to? Na pre kãm:

Nà kapxipix na ka arî atîr kêt nê. Arî mê ohtô nê apyrã nê amnhî kaxyw

ixkôt hamaxpêr. Mê ohtô. Arî mê kêp 7.000 nê akwÿjê rom ri sãnti Paaw kutã hkônkrã ho hkrî nê kãm mex ã harênh kêt nê. Anê.

⁵ Tã arî ã jarãhã mê kot ã amnhî nhîpêx anhÿr kênã. Tîrtûm kãm Ijaew japê jakamã mê kamã ukapri. Jakamã nhùm ra mê hkwyjaja mê pahpyrà nê amnhî kaxyw Kris kôt hamaxpêr nhùm Tîrtûm mê ho hkra.

⁶ Nom mê kot amnhî to mex ã mê omunh xà hkôt mê ho hkra hkêt nê. Amarî kãm mê hapê htùm xà hkôt na hte mê ho hkra. Kop apu mê kot amnhî to mex ã mê omunh xà hkôt kot mê ho hkra ronhÿx amarî mê ho hkra hkêt nê. Nhÿx mê kot tanhmã amnhî nhîpêx to ho pa hã mê omunh xà hkôt pix mã mê ho hkra.

⁷ Ijaew piitã Tîrtûm kot amnhî mê mex ã mê harênh prãm tã no ãm mê grêre nê hamaxpêr xà hkôt Jesus kôt amnhî xunhwÿ. Na htem ohtô rax nê kapêr ma nê ãm kuma nê tee ri kot amnhî mê mex ã mê harênh prãm xà amnhî krã hkôt tanhmã amnhî nhîpêx to ho ri pa. Nom ra mê kot Jesus kaga jakamã ã amnhî nhîpêx anhÿr kapri. Mê kot hkaga jakamã te ri mê hamak kro nê Tîrtûm kapêr mar kêt pyrà nê pa.

⁸ Tîrtûm kapêr ã kagã htùm kot mê harênh kot:

Tîrtûm na hte mê kãm kapêr mar prãm kêt xwÿnhjê pumu nê ãm mê omu nhùm htem htÿx ri pa

ho pa. Nē Tirtūm mā hamaxpēr kêt o ri pa. Mē kot kapēr mar tā hprī hā mar tỳx kêt nē. Nē mē kot kapēr ā kagà kamā harēnh tā hprī hā mar tỳx kêt nē. Jakamā na htem amnhī kaxyw hkôt hamaxpēr kêt o pa.

Tā na htem arī jarāhā ā amnhī nhīpêx anhỹr o ri pa. Te mē nohkre nē mē hamak kro xwỳnh kot amnhī nhīpêx pyrāk. Anē.

⁹ Nē amnepēm na pre pahi finat Tawija amnhī kwỳ Ijaew jarēnh o:

Na htem htỳx ri hkĩnh kām apkur o pa.

Te tutre kām prām nē kot rapuuti hwỳr àr nē tee ri kām kator prām kaprỳ pyrāk.

Ja pyrà nē mē kot Tirtūm kapēr mar kêt mỳrapê koja Tirtūm tanhmā mē ho nhūm mē tee ri kām mex prām kaprỳ.

¹⁰ Te mē nohkre xwỳnhjaja tee ri mē hpa nhīpêx o pa pyrāk.

Nē omnuj nē à nē ho gjêx o ri pa pyrāk o amnhī nhīpêx o ri pa.

Anhỹr o mē harē.

¹¹ Tā arī Ijaew Jejus kaga nē kām kapēr mar prām kêt jakamā xà na Tirtūm tee ri ja hā mē omu nē mē hkaga kumrêx? Nà kot mē hkaga hkêt. Ām mē tāmjaja kêp Jejus prām nōkati jakamā nhūm tee ri ja hā mē omu nē mē hpānhā

Ijaew kêt xwỳnhjê mā amnhī to amnhīrīt nē mē hkwyjê ho hkra. Jakamā koja Ijaew kwỳjaja ja hā mē omu nē tee ri hamaxpēr nē hamaxpēr o:

—Kwa na xep Ijaew kêt xwỳnh kwỳjaja Jejus kôt amnhī xunhwỳ nhūm Tirtūm ja hā mē omu nē mē ho hkra. Kwa mon pu prem axtem nē ri Jejus kaga? E pu mē kuxwar amnhī kaxyw hkôt măn pajamaxpēr nē hkôt amnhī xunhwỳ kê Tirtūm ja hā mē pahpumu nē Ijaew kêt xwỳnhjê pyrà nē mē pahto hkra. Hāmri nē amnhī mā mē pahte amnhī to mex xwỳnh ā mē pajarē. Anē.

Ā Ijaewjaja hamaxpēr anhỹr kaxyw na pre Tirtūm Ijaew kêt xwỳnhjê mā amnhī to amnhīrīt.

¹² Hāmri nhūm mē amnhī tā omu nē hkĩnh nē pa. No nhūm Ijaew kwỳjaja. Mē kām Jejus prām nōkati ho mē pa xwỳnhjaja mē hkĩnhā hkaprī nē pa. Tā koja mē nhỹrmā amnhī kaprī hā amnhī pumu nē amnhī kĩnh kêt ā amnhī pumu hāmri nē Tirtūm kôt amnhī xunhwỳr nē amnhī kaxyw Kra Jejus Kris mā hamaxpēr japêr. Koja mē ā amnhī nhīpêx anē hāmri nē Ijaew kêt xwỳnhjê pyrà nē hkĩnh nē ri pa. Hāmri nhūm Tirtūm ja hā mē omu nē Ijaew kêt xwỳnhjê mē mē ho hpimràatā mē ho mex rax nē nhūm mē hkĩnh nē hamakêtkati nē pa ho pa.

Tirtūm kot Ijaew kêt xwỳnhjê ho hkra hā harēnh

13 E kot paj hpãnhã mẽ apê Ijaew kêt xwýnhjê mã ixkapêr nê mẽ atã kagã. Na pre Jesus ma mẽ awýr inhmê. ý hã ixte mẽ ajahkre ho ri mẽ akôt ixpa kaxyw. Pa pre ma krĩ hkwy kamã mẽ akwýjê hwýr mō nê ixkĩnh kãm mẽ kãm kapêr jarênh o ri mẽ hkôt ixpa. Nhũm mẽ hkwyjaja inhma nê amnhĩ kaxyw Jesus kôt hamaxpêr nê hkôt amnhĩ xunhwý.

14 Tã koja apu ixkwýjaja mẽ harênh mar japêr. Ijaew tee ri mẽ apê Ijaew kêt xwýnhjê jarênhja ma hãmri nê ra amnhĩ kamã gryk japêr. Jao mẽ apyrã nê Jesus kôt amnhĩ xunhwý nê nhỹrmã kuri htĩr tũm nê mex nê pa ho pa.

15 Kormã mẽ kot amnhĩ kaxyw kãm hamaxpêr kêt jakamã na pre Tĩrtũm hpãnhã mẽ apê Ijaew kêt xwýnhjê mã amnhĩ to amnhĩrĩt. Ka mẽ ra krĩ piitã hkôt axohtō nê hkôt amnhĩ xunhwý nê hkôt amnhĩ nhĩpêx mex o ri apa. Tã koja Ijaewjaja nhỹrmã amnhĩ kaxyw Tĩrtũm mã hamaxpêr nê mẽ apyrã nê Jesus kôt amnhĩ xunhwýr japêr. Hãmri nê te mēhō hkra kêp htyk nhũm hkaprĩ htã nhũm hkraja tanhmã amnhĩ to nê akupým kãm htĩr nhũm kot omunh nê hkĩnh týx kumrêxta pyrãk o amnhĩ nhĩpêx. Jao Tĩrtũm mẽ kot hkôt amnhĩ xunhwýr ã mẽ omu nê hkĩnh nê. Pu mẽ pahpimràatã urãk nê pahkĩnh nê ri papa.

16 E pa mẽ amã mẽ ujarênhja ã ejêp kwý jarê.

Koja mẽmo pĩ hpàr jarê mex nê hã koja pàr mex nê xa. Ja pyrã nê Ijaew pàr krax finat Apraãwja kumrêx na pre amnhĩ kaxyw Tĩrtũm mã hamaxpêr nhũm ho hkra. Jakamã koja nhỹrmã hkanrêhã htãmnhwýjaja urãk nê amnhĩ kaxyw kãm hamaxpêr nhũm mã mẽ ho anê nê mããnên mẽ ho hkra nhũm mẽ mex nê pa. Te kot mẽmo pĩ hpàr jarê mexja nhỹ hã pàr mexta pyrãk.

17 Nê na htem akunĩ kamã mẽmo pĩ hpa jakã nê hamý nê ma amnhĩ kôt o mra. Nê ixkre kapem ra mẽ kot mẽmo pĩ hkreja hpa jakàr nê rênh xwýnh xwakre kamã wam pĩ hpa jakàr xwýnhhta nhō nê axpên tã hkaxpre nê gaa nê axpên jamýnh mex nê grã hkêt nê. Nê arĩ htĩr mex nê. Te kêp hpa kumrêx pyrãk. Tã Ijaew kwý kot amnhĩ kaxyw Jesus kôt hamaxpêr xwýnhjaja te mẽ kêp ixkre kapem pĩ hpàrta pyrãk. No mẽ hkwyjaja mẽ kot Jesus kaga xwýnhjaja te mẽ kêp mẽ kot kêp hpa jakàr nê rênhta pyrãk. Jakamã nhũm Tĩrtũm te mẽ kot pàr pê hpa jakàr nê rênhta pyrãk o mẽ hipêx nê mẽ hkaga. Nê axtem te mẽ kot mẽmoj pàr pa jakàr nê hpãnhã kamã axtem pĩ hpa janhōr nê hã hkaxpreta pyrãk o mẽ apê Ijaew kêt xwýnhjê nhĩpêx nê mẽ amã amnhĩ to amnhĩrĩt. Ka mẽ ra amnhĩ kaxyw Jesus mã ajamaxpêr nê hkôt amnhĩ xunhwý nhũm Tĩrtũm mẽ ato mex nê.

18 Tã kêr ka mẽ arĩ Ijaew

o mex o ri apa. Tanhmã ri mẽ hipêx to mã ajamaxpêr to hkêt nê. Rỳ ajamaxpêr o:

—Nà ãm hãmri na Tĩrtũm mẽ hkaga nê ãm kãm mẽ papxip-ixjê japê.

Anhỹr o ajamaxpêr kêt nê. Ijaew te ixkre kapem pĩ hpàr mexta pyræk. No mẽ kajaja te mẽ ate akunĩ rũm pĩ hpa kot ixkre kapem pàr mex pix kukwak ri htĩr nê hã harirta pyræk. Kêt akunĩ rũm pĩ hpa jakàr kukwak ri na hte ixkre kapem pàrta htĩr nê kuhê hkêt nê. Kop apu pàrta mex kêt ronhỹx ra akunĩ rũm hpaja grà pa. Ja pyrà nê Ijaew kukwak ri kot kaj mẽ nhỹrmã Tĩrtũm ri atĩr tũm nê apa ho apa. Jakamã kwa kêt ka mẽ ate amnhĩ to rũnh o mẽ hakrenh ã amnhĩ to jarkrar kêt nê.

¹⁹ Mãn ka mẽ atõ ajamaxpêr o:

—Ra Tĩrtũm kot Ijaew kaga nê hpãnhã mẽ pajaja mẽ ixto hkra jakamã mãn kãm mẽ ijapê ho mẽ hakre. Ra mẽ hpãnhã mẽ ixto hkra kênã. Anê.

²⁰ Nà ãm hãmri na pre Tĩrtũm Ijaew kwỳ kaga. Mẽ kot Jejus kôt amnhĩ xunhwỳr kêt mỳrapê na pre te mẽmo pĩ hpa jakàr nê rênhta pyræk o mẽ hipêx. Ka mẽ ra mẽ kurom amnhĩ kaxyw hkôt ajamaxpêr jakamã nhũm Tĩrtũm te kot akunĩ kamã pĩ hpa jakàr nê ho htẽm nê ixkre kapem pĩ hpàr mex ã hanhõr nê hã hkaxpre pyræk o mẽ anhĩpêx. Nom kwa kêt ka mẽ ja hã amnhĩ pumu nê ri hã Ijaewjê mã amnhĩ to

jarkrar kêt nê. ãm amnhĩ to mex nê Tĩrtũm kapêr kôt amnhĩ nhĩpêx mex o ri apa. No kot kaj mẽ ã amnhĩ nhĩpêx anhỹr kêt nhũm amnhĩ tã mẽ apumu nê ra kot Ijaew kwỳ nhĩpêxta pyrà nê tanhmã mẽ ato nê mẽ akaga.

²¹ ã Ijaew jarênh kot anhỹr. Te mẽ kêt pàr mex pyræk. Tã nhũm mẽ kot Jejus kôt amnhĩ xunhwỳr kêt jakamã nhũm Tĩrtũm te kot pĩ hpa jakàr nê rênhta pyræk o mẽ hipêx nê mẽ homnuj nê. Kot kaj mẽ uræk nê ã amnhĩ nhĩpêx anê nhũm mã mẽ ato anê nê.

²² Ijaew kot Jejus kôt amnhĩ xunhwỳr kêt jakamã nhũm Tĩrtũm mẽ hpãnhã mẽ apê Ijaew kêt xwỳnhjê mã amnhĩ to amnhĩrit. Tã ka mẽ Ijaew rom amã Jejus prãm nhũm Tĩrtũm ja hã mẽ apumu nê amnhĩ pyrà nê kãm mẽ aprãm nê mẽ akamã ukapri rãhã nê pa ho pa. Tã kwa mẽ okora. Kêt ka mẽ hkôt pix mã amnhĩ nhĩpêx o ri apa rãhã ty. Kot kaj mẽ hkaga nhũm amnhĩ tã mẽ apumu nê te Ijaew kot hkaga xwỳnhjê nhĩpêx pyræk o mẽ anhĩpêx nê mẽ akaga.

²³ Koa Ijaew nhỹrmã Jejus kôt amnhĩ xunhwỳr japêr nhũm Tĩrtũm ja hã mẽ omu nê mẽ ho hkra. Te mẽ kot pàr pa jakàr nê rênh nhũm grà par xwỳnh nhũm kot akupỹm amnhĩm hamỳnh nê ixkre kapem pàr wỳr o htẽm nê akupỹm hã hanhõr nê hã hkaxpre ho htỹx nhũm kukwak ri akupỹm htĩrta pyræk. Ja kêt tanhmã kute

hkêt. Kot ã hipêx anhÿr kaxyw àhpumunh tÿx.

²⁴ Mẽ apê Ijaew kêt xwÿnhjaja te mẽ ate akunĩ kamã pĩ hpa jakàr nẽ ixkre kapem pàr ã hanhòr nẽ hã kaxpreta pyràk. Jao Jejus kòt amnhĩ xunhwÿ nhũm mẽ ato hkra kurê kumrêx. No Ijaew te mẽ kêp ixkre kapem pàrta pyràk jakamã Tirtũm kot akupÿm hanhòrta tanhmã kêp kute hkêt. Kêp Tirtũm kênã kot tanhmã kêp kute. Jakamã koja mẽ hkòt amnhĩ xunhwÿ nhũm amnhĩ tã mẽ omu nẽ mẽ ho hkra kurê kumrêx.

Tirtũm kot mẽ piitã mẽ kamã ukapri hã harênh

Matêwre 23.37-39; Rukre 21.24; Juãw 10.16

²⁵ E kot paj mẽ amã mẽmoj to amnhĩrit ka mẽ inhma. Nã na pa ra mẽ amã Ijaew krã xihtÿx xwÿnhjê jarê ka mẽ harênh ma. Ra mẽ kot Jejus kaga hã mẽ harênhja. Tã koja mẽ ã amnhĩ nhĩpêx anhÿr o pa rãhã hkêt nẽ. Na hte Tirtũm kormã amnhĩ tã mẽ apê Ijaew kêt xwÿnhjê jamãr o pa. Amnepê na pre amnhĩ kaxyw mẽ akukamã tanhmã mẽ akwÿjê jarênh to. Tã kot kaj mẽ kot tanhmã mẽ ajarênh to xwÿnh piitã Jejus kòt amnhĩ xunhwÿr pa nhũm rĩ Ijaew amnhĩ to hapu nẽ kormã hkòt amnhĩ xunhwÿ. ã mẽ kot amnhĩ nhĩpêx anhÿr kaxyw. Jakamã kwa kêr ka mẽ ri ja hã amnhĩ to jarkrar o ri mẽ hkòt apa hkêt nẽ. Mẽ pahpyrà nẽ mẽ kot Jejus kòt

amnhĩ xunhwÿr mã xwÿnh kênã.

²⁶ Koja Tirtũm nhÿrmã Ijaew piitã ho hkra. Kapêr ã kagà htũm kot mẽ harênh kot: Nhÿrmã kot mẽ ate amnhĩ tomnuj pê mẽ apytãr mã xwÿnhja Ijaew ò koja.

Jako hkanrêhã htãmnhwÿjê hõ koja.

Koja nhÿrmã wrÿ nẽ mẽ ate amnhĩ tomnuj pê mẽ apytã nẽ mẽ ate amnhĩ tomnuj o hapêx pa. Anê.

Anhÿr o kot harênh.

²⁷ Nẽ mãânên ja:

Kot paj mẽ nê mẽ kot amnhĩ tomnuj o ijapêx pa.

Amnepê mã ixte mẽ hkukamã mẽ hã amnhĩ jarênh xà hkòt. Anê.

²⁸ Nom arĩ mẽ kãm Jejus mar prãm kêt jakamã te mẽ kot kutã amnhĩ xunhwÿr pyràk o amnhĩ nhĩpêx. Tã ã mẽ kot amnhĩ nhĩpêx anhÿrja ri ka mẽ kamjaja mẽ hpãnhã mẽ apê Tirtũm kra. Nom nhũm Tirtũm arĩ kãm mẽ hapêê. Na pre amnepê mã kot tanhmã mẽ ho mex to hkukamã tanhmã mẽ hã amnhĩ jarênh to. Mẽ hpàr kraxjê mã tanhmã mẽ hã amnhĩ jarênh to. Finat Apraãw mẽ Ijak mẽ Jakoja mã mẽ hkanrêhã mẽ htãmnhwÿjê hã tanhmã amnhĩ jarênh to.

²⁹ Na hte Tirtũm mẽmoj tã tanhmã amnhĩ jarênh to nẽ ãm hãmri hã amnhĩ jarê nẽ amnhĩ jarênh xà hkòt tanhmã hipêx to. No na hte mẽmoj

tã amnhĩ jarēnh tã gaa nē ho hamakētkati hkēt nē. Rỳ hpānhã axtem tanhmã hipêx to hkēt nē. Na hte mēmoj tã amnhĩ jarēnh xà hkôt tanhmã hipêx to. Tã ra amnepê mã kot Ijaew o mex ã amnhĩ jarēnh jakamã koja nhỹrmã mē ho mex rax nē ã mē hipêx anhỹrja o hamakētkati hkēt nē.

³⁰ No mē kajaja mē apê Ijaew kêt xwýnhjaja. Amnepêm na ka prem ajaxwýja Tirtũm kôt amnhĩ nhĩpêx kêt nē. Tã nhũm mē akamã ukaprĩ nē kãm mē ajapê nē. Ka mē ra harēnh ma nē hkôt amnhĩ xunhwý nē hkôt amnhĩ nhĩpêx mex nē. No ãm Ijaew kukwak ri. Mē kot kapēr kôt amnhĩ nhĩpêx o pa hkēt jakamã nhũm Tirtũm mē hpānhã nhãm mē amã amnhĩ to amnhĩrit nē mē ato mex rax nē. Jakamã te Ijaew kukwak ri mē amex nē ri mē apa pyrãk.

³¹ Tã koja nhỹrmã kot mē anhĩpêxta pyrã nē Ijaew ho hkra. Nē mē apyrã nē mē kamã ukaprĩ nē. Mē kot mē apyrã nē amnhĩ kaxyw Kra hkôt hamaxpēr xwýnhjaja nhũm mē apyrã nē mē ho hkra nē mē ho mex nē.

³² Mē apê Ijaew kêt xwýnhjaja nē mē ixpê Ijaew mē pahte xepēn pyrãk. Na pu htem pahpiitã Tirtũm kapēr piitã hkôt amnhĩ nhĩpêx rãhã ho ri papa hkēt nē. Tã kot puj mē tee ri ja hã amnhĩ pumu nē amnhĩ to kuwý nhũm mē pama nē amarĩ mē pakamã ukaprĩ nē mē pahto mex nē.

Pawre kot Tirtũm mex o mex ã harēnh

Epes 3.20; Korosē 1.16; Wam Korĩt 2.9, 2.16

³³ Tirtũmja ãhpumunh tỳx o ãhpumunh tỳx. Nē ukaprĩ ho ukaprĩ nē mex o mex. Mē pahtõ na pu urãk nē ã amnhĩ nhĩpêx anhỹr o papa? Nã amrakati kumrēx. Nē mē pahtõ na pahte Tirtũm jamaxpēr kôt omunh? Nã mē pahte hamaxpēr kôt omunh kêt.

³⁴ Kapēr ã kagã htũm kot ja jarēnh kot:

Mē pahte Tirtũm jamaxpēr kôt omunh kêt.

Nē kot pu mē pahtõ mēmoj tã hakre hkēt nē.

Mē parom ãhpumunh o ãhpumunh xwýnh kēnã.

³⁵ Nē mē pahtõ kot puj we kãm pakapēr nē kãm: "Kwa Tirtũm. Ra ixte amã mēmoj nhõrta pãnhã kwa amnhĩ xwar inhmã mēmoj gõ." Anē.

Nã mēmoj piitã õ kēnã kot puj kêt ri ã kãm mēmoj nhõr ã amnhĩ jarēnh anē. Anē.

³⁶ Tãm na pre amnhĩ kaxyw mēmoj piitã ho kator pa. Nē ãm pix kukwak ri na mēmoj piitã htĩr nē pa. Jakamã kwa pu mē kãm mex o mex ã mãn harēnh rãhã ho ri papa.

12

Mē pahte Tirtũm mã amnhĩ nhõr ã mē pajarēnh

Wam Korĩt 6.20; Epes 4.1; Piripos 4.8-9; Korosē 1.10; Wam Tesarõn 4.1-3; Wam Pêtre 2.11

1 Kwa Jejus kôt ixkwỳjaja. Tirtũm na hte mẽ pahto mex mẽ mẽ pakamã ukapřĩ rãhã jakamã na pa ã mẽ amã ixkapēr anẽ. Kwa mẽ tokyx kãm amnhĩ jarẽ nõ kãm amnhĩ gõ. Te mẽ ate kãm hkĩnh xà nhõr pyrãk o amnhĩ nhĩpêx nõ kãm amnhĩ gõ. Jao mẽ amã kapēr kôt pix mã amnhĩ nhĩpêx o ri apa hprãm ã kãm amnhĩ jarẽ. Nẽ kãm hprãm xà hkôt pix mã tanhmã amã amnhĩ nhĩpêx to ho ri apa hprãm ã kãm amnhĩ jarẽ. Kot kaj mẽ ã kãm amnhĩ jarẽnh anẽ nhũm amnhĩ tã mẽ ama nõ hkĩnh nõ. ã mẽ pahte kãm amnhĩ jarẽnh anhỹrja na kãm mar prãm.

2 Nẽ kær ka mẽ kãm Tirtũm prãm kêt xwỳnhjaja kot amnhĩ nhĩpêx o ri amnhĩ nhĩpêx o ri apa hkêt nõ. Nẽ mẽ amnhĩ to Tirtũm mãn wỳkê mẽ amã mẽ ajamxpēr mex jagjê. Koja mẽ ama nõ mẽ amã hagjê ka mẽ ra aprĩ hã hamxpēr xà hkôt mẽ pahte amnhĩ to mex xà pumunh mex nõ. Na pu htem hkôt amnhĩ nhĩpêx o ri papa nhũm amnhĩ tã mẽ pahpumu nõ hkĩnh nõ. Pu mẽ pajaxwỳja ỹ hã pahkĩnh nõ ri papa.

Kris kwỳjaja kot tanhmã axpẽn nhĩpêx to hã mẽ kãm karõ

Römān 12.1-11; Epes 4.11-16; Wam Pêtre 4.10-11

3 Nẽ na pre Tirtũm ixto mex nõ. Nẽ mẽ akaxyw ixãm. Ixte mẽ amã Kra Jejus kot tanhmã mẽ panẽ amnhĩ nhĩpêx to hã harẽnh o ri mẽ akôt ixpa

kaxyw. Tã na pa ã kagãja kamã mẽ amã harẽnh anẽ.

Jakamã kwa kær ka mẽ amnhĩ to jarkrar o ri mẽ kãm apa hkêt nõ. ãm kwarĩ ho kwarĩ. Rỳ atỳx ri ajamxpēr o:

—Nà pa na ixte amnhĩ to mex o ixte ixkwỳjê piitã mẽ hakrenh par.

Anhỹr ã amnhĩ to jarkrar o ri mẽ hkôt apa hkêt nõ. Kêt mẽ ãm amnhĩ jarẽnh o:

—Na pa pre amnhĩ kaxyw Jejus kôt ijamxpēr nhũm Tirtũm ixpumu nõ ixto hkra. Jakamã na pa hte Jejus Kris pix kukwak ri tãm amnhĩ nhĩpêx o ri ixpa. No amnhĩ krã hkôt ã amnhĩ nhĩpêx anhỹr kêt nõ. Anẽ.

4 E pa mẽ amã mẽmoj jarẽ ka mẽ inhma. Nà mẽ panhĩja pyxi htã kamã mẽmoj xohtõ. Na kamã mẽ pano nõ mẽ pajakwa. Nẽ kamã mẽ pajamak nõ mẽ pahte. Na pu htem mẽ pano ho rĩt nõ mẽ pajakwa ho pakapēr. Nẽ mẽ pajamak o ri ama nõ mẽ pahte ho ri mra.

5 Ja pyrã nõ Kris kôt mẽ pahte amnhĩ xunhwỳr xwỳnhja ãm pyxi tã hkôt mẽ pahte amnhĩ xunhwỳr xwỳnhjaja mẽ paxohtõ. Jakamã na pu htem ahpỹnhã tanhmã axpẽn to mex to ho ri papa. Jao Kris kôt axpẽn to pahtõ nõ pahtõx o papa.

6 Tirtũm na hte mẽ pahpê hkwỳ hã ahpỹnhã mẽ pamã tanhmã mẽmoj tã karõ to nõ kaxyw mẽ pahto mẽ paxihtỳx. Tã kær pu mẽ ra kot mẽ pamã mẽmoj tã karõ xà hkôt kãm amnhĩ nhĩpêx rãhã ho ri

papa. Jakamā koja mēhō ate Tirtūm kapēr jarēnh o ri apa kaxyw axām nē amā anē ka Tirtūm kamnār rom mē kām kapēr jarēnh mex o ri mē hkôt apa.

⁷ Rỳ ate akwỳjê mǎ tanhmǎ axàpēnh to ho ri apa kaxyw axām ka mē kām axàpēnh mex o ri mē hkôt apa.

Rỳ ate Tirtūm kapēr ho mē ahkre ho ri apa kaxyw axām ka ho mē ahkre mex o ri apa.

⁸ Rỳ ate Tirtūm kapēr o ri Jejus kôt mē akwỳjê jamaxpēr o hihtỳx o ri apa kaxyw axām ka mē kām kapēr jarēnh pē mē ho mē hihtỳx mex o ri mē hkôt apa.

Rỳ ka mē atō akukrēx rax japēr nē ate mē kēp amrakati xwỳnhjē mǎ mēmoj nhōr o ri apa kaxyw axām ka axāmnhīx ri mē kām mēmoj nhōr o ri mē hkôt apa.

Rỳ ate akwỳjê ho amnhīptār kaxyw axām ka mē ho amnhīptār mex o ri apa.

Rỳ ate tanhmǎ mē akwỳjê ho mex to nē mēmoj to mē kutā anojarēt o ri apa kaxyw axām ka akīnh kām ā mē hipēx anhỳr rāhā ho ri apa nē tanhmǎ akapēr punuj to hkukamā ri ajamaxpēr o ri mē hkôt apa hkēt nē.

⁹ Nē kēr ka mē apiitā amā axpēn kīnh kām axpēn to mex

rāhā ho ri apa nē ri axēx rom amā axpēn kīnh ā amnhī jarēnh o ri apa hkēt nē. Nē mē kot amnhī tomnuj xà piitā hkaga hpa nē hpānhā mē kot amnhī to mex xà pix pyr tỳx nē hkôt amnhī nhīpēx rāhā ho ri apa.

¹⁰ Nē mē apē Kris kwỳ hā amā axpēn kīnh kām tām axpēn nhīpēx o ri apa. Nē mē akwỳjaja mē kot amnhī to mex xwỳnh ā mē harēnh o ri mē hkôt apa. No mē ri atỳx ajamaxpēr o:

—Nà koja mēhō ixkumrēx ixte tām amnhī nhīpēx xwỳnh ā ijarē pa rī kormā amnhī xwar tām kot amnhī nhīpēx xwỳnh ā harē.

Anhỳr o ajamaxpēr kēt nē. Kēr ka akumrēx tām kot amnhī nhīpēx xwỳnh ā harē.

¹¹ Nē kēr ka mē Tirtūm mǎ mēmoj to anhỳr kaxyw nē kamā amā kaga hkēt kām tanhmǎ kām mēmoj to ho ri apa. Jao akīnh kamā kām ho anhỳr mex nē.

¹² Nē mē nhỳrmǎ Tirtūm kot kaxkwa kamā mē ato mex rax kukamā ajamaxpēr nē akīnh rāhā kām mēmoj to anhỳr o ri apa.

Nē kēr ka mē tanhmǎ amnhī to rỳ nhūm mēhō tanhmǎ mē ato ka mē akaprī nē ri apa htā no ām tee ri amnhī kukamā ajamaxpēr o Tirtūm kaga hkēt nē. Arī amnhī to hwỳr rāhā ho ri apa.

¹³ Nē koja Kris kôt atōjē hō kēp amrakati ka mē ja hā omu nē anhō mēmoj japēr nē māmri kām hkwy gō. Nē

amnhĩ wỳr awỳ nẽ tanhmã ho mex to.

¹⁴ Nẽ mẽ kot tanhmã mẽ atomnuj to xwỳnhjaja kêt ka mẽ amnhĩ tã mẽ omu nẽ agryk nẽ wajaga kot tanhmã amã ho kaxyw hwỳr atẽm nẽ kãm tanhmã hã axàmnẽn to hkêt nẽ. Kêt ãm ho Tirtũm pix wỳ nẽ kãm:

—Pa mẽ ijamãr mex xwỳnh maati. Nà na ixkwỳjê hõja ã inhĩpêx anẽ. Tã nom kêt ka ixtã tanhmã homnuj to hkêt nẽ. ãm tanhmã ho mex to.

Anhỹr o mãn mẽ ho awỳ.

¹⁵ Nẽ koja akwỳjê hõ mẽmoj tã hkĩnh nẽ. Ka omu nẽ uràk nẽ ỹ hã akĩnh nẽ. No koja mẽmoj tã hkaprĩ nẽ mỳr o nhỹ ka omu nẽ ra uràk nẽ ỹ hã akaprĩ nẽ.

¹⁶ Nẽ kêt ka mẽ piitã mẽ hipêx o axpẽn pyràk o ri apa. Te mẽ ate amnhĩ to rax o akwỳjê jakrenh o te mẽmoj kamã akahak o amnhĩ nhĩpêx pyràk kêt nẽ. Nẽ axàhpumunh tỳx o ate mẽ piitã mẽ hakrenh par pyràk o ri amnhĩ nhĩpêx o ri apa hkêt nẽ.

¹⁷ Nẽ koja mẽhõ tanhmã ato htã ka ãm amnhĩ tã omu nẽ tanhmã amnhĩ tã ho hkêt nẽ. Nẽ mẽ piitã mẽ noo mã tãm ri amnhĩ nhĩpêx o ri apa.

¹⁸⁻¹⁹ Nẽ kêt ka mẽ tãm ri axpẽn mã akapêr rãhã ho ri apa.

Nẽ kot kaj akràmnhwỳ mẽ wa tanhmã axpẽn nhĩpêx to. Hãmri ka wa akupỹm tãm axpẽn xãm kaxyw kãm akapêr tã nhũm ama nẽ ãm ama nẽ akaga. Ka ãm amnhĩ tã omu nẽ kamã agryk kêt nẽ. Koja Tirtũm tãm tanhmã atã

ho. Kapêr ã kagà htũm kot ja jarẽn kot:

Kêt ka mẽ amnhĩ tã tanhmã kot ato xwỳnh to hkêt nẽ. Pa kot paj mẽ atã tanhmã ho. Anẽ.

Nẽ harẽn kot:

²⁰ Kêt ka mẽ amã mẽ kãm mẽ akurê xwỳnhjê o mex pix o ri apa.

Kê mẽ kãm prãm ka ja hã mẽ omu nẽ mẽ kamã axukaprĩ nẽ mẽ kãm mẽmoj kwỳ gõ kê mẽ kuku.

Rỳ nhũm mẽ kãm kôr ka mẽ kãm gô hkwyê kê mẽ ho ixkõ.

Kot kaj mẽ ã amnhĩ tã mẽ hipêx mex anẽ nhũm mẽ tee ri amnhĩ tã mẽ apumu nẽ amnhĩ kamã hpijaam jao mẽ atã amnhĩ kamã gryk nẽ. Anẽ.

²¹ Nom kot kaj mẽ amnhĩ tã tanhmã mẽ homnuj to hãmri nẽ ajaxwỳja uràk nẽ amnhĩ tomnuj nẽ. Ja pymaj kêt ka mẽ amnhĩ rom tãm mẽ hipêx. Hãmri nhũm mẽ amnhĩ tã mẽ apumu nẽ mẽ apyrà nẽ tãm mẽ anhĩpêx japêr.

E kêt ka mẽ ã axpẽn nhĩpêx o ri apa anẽ.

13

Mẽ pahto amnhĩptàr xwỳnhjê jarẽn

Matêwre 22.21; Xitre 3.1; Wam Pêtre 2.13-17

¹ Nẽ kêt ka mẽ kot mẽ ato amnhĩptàr xwỳnhjê kapêr ma nẽ kapêr kôt ri amnhĩ nhĩpêx rãhã ho ri apa. Tirtũm kot mẽ pakaxyw mẽ unhwỳr kẽnã. Mẽ kot mẽ pahto amnhĩptàr o pa kaxyw na hte mẽ unhwỳ.

2 Jakamã koja mēhõ mē kapēr ma nē ãm kuma nē hkõt amnhĩ nhĩpêx kêt nē hãmri nē te kot Tĩrtũm kapēr mar nē ãm mar pyræk o amnhĩ nhĩpêx. Hãmri nhũm Tĩrtũm tee ri ja hã omu nē nhỹrmã tanhmã hã ho.

3 Xà na hte tãm mē kot amnhĩ nhĩpêx xwỳnhjaja kãm mē kot mē ho amnhĩptàr xwỳnhjê pyma ho pa? Nà na htem kãm mē uma hkêt kãm ri pa. Æm mē kot amnhĩ tomnuj xwỳnh pixjaja na amnhĩ kamã kãm mē uma ho pa. Tã ka mē amã mē kot mē ato amnhĩptàr xwỳnhjê pyma hprãm kêt xwỳnhjaja kêt ka mē kapēr ma nē hkõt amnhĩ nhĩpêx kê amnhĩ tã mē apumu nē hkĩnh nē. Nē amnhĩm mē ate amnhĩ to mex xwỳnh ã mē ajarē.

4 Tĩrtũm nhỹ hã mē panhõ pahi kot mē pahto amnhĩptàr jakamã na htem mē kãm mē pahto mex prãm nē. Nē kot pu mē pahtõ axtem nē tanhmã amnhĩ tomnuj to hãmri nhũm tee ri ja hã pajarēnh ma nē tanhmã hã mē pahto. Æm hãmri na hte ã mē pahto amnhĩptàr xwỳnhjaja mē panhĩpêx anē. Tĩrtũm kãm hprãm xà hkõt.

5 Jakamã kwa mē kapēr ma nē hkõt ri amnhĩ nhĩpêx mex rãhã ho ri apa. Nom amã kot tanhmã ato pix pymaj hkõt ri amnhĩ nhĩpêx kêt nē. Mããnēn ã amnhĩ kukamã ajamaxpēr anē nē ajamaxpēr o:

—Nà Tĩrtũm kot mē ixkaxyw unhwỳr jakamã na pa hte kapēr ma nē hkõt

amnhĩ nhĩpêx mex o ri ixpa.

Anhỹr o ajamaxpēr.

6 Nē mē pahto amnhĩptàr xwỳnhjaja kot Tĩrtũm nhỹ hã tanhmã mē panhĩpêx to ho pa jakamã na pu htem mē àpēnh pãnhã mē kãm amnhĩre. Mē pahpiitã axpēn kaxyw kãm kàxpore ho hkryre nē kugõ. Tanhmã kot ho mē pamã mēmoj to mex to kaxyw.

7 Jakamã kêt ka mē hã api-jaàm o ri apa kamã mãmri mē kãm kàxpore hkwy ho hkryre nē õr o ri apa. Mē kot hã àhwỳr xà hkõt.

Mē pahte tanhmã axpēn nhĩpêx to hã mē pamã karõ

Matêwre 22.39-40; Karatas 5.13-15; Wam Juãw 3.11-24

8 Nē kêt ka mēhõ ho tewēn japēr nē tokyx kãm amnhĩre. Nē mē amã axpēn kĩnh o aa ho ajamakêtkati hkêt nē. Jao mēmoj to axpēn kutã ano-jarêt rãhã ho ri apa. Kot kaj mē ã axpēn nhĩpêx anē nē Tĩrtũm kapēr piitã hkõt amnhĩ nhĩpêx mex o ri apa.

9 Amnepê mã na pre finat Mojesja Tĩrtũm nhỹ hã Ijaew mã mēmoj tã karõ nē mē kãm: Kêt ka mē aprõ pix tãnopxa nē nhãm mēnijê hõ kamã ri akurē ho apijaàm kêt o apa hkêt nē.

Nē mē anijaja mē amjên pix tãnopxa nē nhãm ri mēmyjê hõ kamã akurē ho apijaàm kêt o ri apa hkêt nē.

Nē mē ri axpēn par kêt nē. Nē mē ri axpēn pē axàhkĩnh o ri apa hkêt nē.

Nē mẽ amã ri axpẽn kukrêx
kĩnh o ri amã ho anhõ
hprãm o ri apa hkêt nê.
Anê.

Nē mãnên ja:

Kêr ka mẽ nhãm mẽ axpẽn
nhĩpêx o te ka amã
amnhĩ tã ma pyræk. Jao
tãm axpẽn nhĩpêx o ri
apa. Anê.

Ã kot mẽ kãm hã karõ
kot anhÿr. Kot puj mẽ ã
pamã pahkwÿjê kĩnh anê nê
mãânên wam finat Mojes kot
mẽmoj tã mẽ panhĩgêjtê mã
karõ hkôt amnhĩ nhĩpêx o
ri papa rãhã nê. Jao axpẽn
par kêt nê. Nê axpẽn pê
paxàhkĩnh kêt nê. Nê axpẽn
kutã panojarêr rãhã nê.

¹⁰ Kojã mẽhõ kãm amnhĩ tã
ma pyræk o hkwÿjê nhĩpêx nê
mê ho mex pix o pa. Jakamã
kot kaj mẽ amã ri axpẽn kĩnh
nê mẽmoj to axpẽn kutã ano-
jarêr pix nê. Jao Tirtũm kapêr
piitã hkôt amnhĩ nhĩpêx mex
o ri apa.

¹¹ Amnepê mã mẽ pahte
amnhĩ kaxyw Jejus kôt pa-
jamaxpêr xà hã arĩgrota ã
na pre kormã akupÿn mẽ
pahwÿr hpôx xà hã arĩgro ko-
rmã hwÿr awry rax nê. Tã ra
hwÿr ahtêp o mō. Kojã tokyx
akupÿn mẽ pahwÿr wrÿ nê
ma akupÿm kaxkwa hwÿr mẽ
pahto api. Jakamã kwa kêr pu
mê arĩ hamãr rãhã ho ri apa.
Jao tanhmã amnhĩ tomnuj to
kaxyw nê pajamaxpêr o:

—Kwa kojã Jejus tanhmã
amnhĩ to nê jarãhã akupÿn
wrÿk japêr. Tã kot pa ri ã
amnhĩ nhĩpêx anê nhũm wrÿ
nê tee ri ja hã ixpumu pa

amnhĩ kamã ixpijaàm tÿx nê.
Nà kot paj ã amnhĩ tomnuj
anhÿr kêt nê. Anê.

Hãmri nê Jejus kamã aja-
mak pê kutêp Tirtũm kapêr
kôt pix mã ri amnhĩ nhĩpêx
mex rãhã ho ri papa.

¹² Na pu htem kamàt
kãm gõr nê arĩgro jamãr pê
kamã pajamak o panhĩkwÿ.
Arĩgro te kêp Jejus akupÿn
wrÿk pyræk. Jakamã kwa
pu mẽ kamã pajamak pê
kãm panojarêr rãhã ho ri
papa nê amnhĩ nê tanhmã
mê omnu xà kute pumunh
mex o ri papa. Te ho pōristi
kot amnhĩ nê mẽ kot kãm
mê hkurê xwÿnhjê pumunh
mex pyræk o Jejus kutêp tãm
amnhĩ nhĩpêx o ri papa. Na
pre tanhmã mẽ pahkrã hto
pu mẽ ÿ hã tãm ri amnhĩ
nhĩpêx. Tã kêr pu mẽ arĩ ã
amnhĩ nhĩpêx anhÿr o ri papa
nê te mẽ pahte arĩgro hã mẽ
pa xwÿnhjê kot amnhĩ nhĩpêx
pyræk o amnhĩ nhĩpêx.

¹³ Kot puj mẽ ã amnhĩ
nhĩpêx anê nê mẽ piitã mẽ
noo mã tee ri tanhmã mẽ
pahte amnhĩ tomnuj to mã
pajamaxpêr kêt nê. Jao
amnhĩ kamã pahpijaàm nê
ri papa hkêt nê. Nê paja-
makêtkati nê paxàmnhĩx ri
papa. Te ho hirã kamã ri mẽ
pa xwÿnhjê kot amnhĩ nhĩpêx
pyræk nê ãm ri paxàmnhĩx tãm
amnhĩ nhĩpêx o ri papa.

Nê mẽ pahprõ pix tãnopxar o
ri papa.

Nê mẽ pahpipãnh nê ri pa-
pijapu ho ri papa hkêt
nê.

Nē mẽmoj tã axpën mã
paxàkjêr hkêt nê.

Nē mẽmoj tã axpën kãm pa-
gryk kêt nê.

¹⁴ Nom kot puj mẽ axtem nê
ã amnhĩ tomnuj anê nê mẽ
pahte amnhĩ nhĩpêx tũm kôt
pix mã amnhĩ nhĩpêx. Tã kêt
pu mẽ ã amnhĩ nhĩpêx anhÿr
pumaj hpãnhã amnhĩ to Pahi-
hti Jejus Kris wÿ nê kãm:

—Pa Jejus. Nà kormã jar
apa ri na ka pre mẽ kot
tanhmã amnhĩ tomnuj to
kutã axihtÿx o axihtÿx nê
aa tanhmã amnhĩ tomnuj
to hkêt nê. Tã inhmã apyrà
nê ixte amnhĩ tomnuj kutã
ixihtÿx o ixihtÿx o ixpa
hprãm. Anê.

Jao mẽ pajamexpêr tũmja
te ra kot amnhĩ tã mẽ pahto
htÿx kêt pyràk o pu mẽ amnhĩ
nhĩpêx o ri papa.

14

*Mẽ pahte Kris kôt
pahkwÿjê mã paxàkjêr kêt ã
mẽ pamã karõ*

*Matêwre 7.1-5; Rõmään 2.1;
Wam Korõt 10.23-33; Xiakre
4.11*

¹ Nê koja mẽhõ kormã Je-
jus kôt amnhĩ xãm nyw ri
kormã hkôt hamaxpêr tohtuj
anê. Hãmri nê htÿx tanhmã
hamaxpêr to nê mẽmoj mex
kaga. Ka mẽ ja hã omu nê
ãm omu nê hã tanhmã kãm
nê hkêt nê. Kwâr mãmrĩ ã
amnhĩ nhĩpêx anê. Koja gaa
nê rĩ hprĩ hã Tirtũm kapêr
mar tÿx nê hãmri nê hkôt
mẽmojta pumunh mex nê.

² Jakamã koja Jejus kôt
akwÿjê hõ mẽ apkur xà

piitã hkur pymaj tanhmã hõ
kute hã harê nê hkaga nê
hamaxpêr o:

—Nà kot pa ja hkur kêt nê.
Kot pa apu kuku nê hkur o
amnhĩ tomnuj nê. Anê.

Kwâr mãmrĩ ã hamaxpêr
anê nê hkur kêt nê. Nom
mẽ pahte Jejus kôt amnhĩ
xunhwÿr tÿx xwÿnhjaja na
pu htem paxãmnhĩx Jejus
kamnàr rom mẽmoj piitã
kuku. Nom mẽ pahkĩnhã
ham mẽ kot hkôt amnhĩ
xunhwÿr xwÿnhjaja kormã
kapêr piitã mar kêt jakamã
kwâr mẽ mãmrĩ anê nê mẽmoj
kur kêt nê.

³ Nom kêt ka mẽ ri tanhmã
hã mẽ kãm akapêr to hkêt nê.
Rÿ mẽ kãm:

—Kwa mẽ ixpyrà nê mẽmoj
piitã aku.

Anhÿr o mẽ kãm akapêr kêt
nê. Ano ho ãm hã mẽ omu.

Nê mẽ ate mẽmoj piitã
hkur kêt xwÿnhjaja kêt ka mẽ
ajaxwÿja mẽ ixte mẽmoj piitã
hkur ã tanhmã mẽ inhmã
axàkjêr to hkêt nê. Mẽ ixte
mẽmoj piitã hkur o ixpa hã
mẽ ixpumu nê ãm hã mẽ
ixpumu nê hã tanhmã mẽ
inhmã axàkjêr to hkêt nê. Rÿ
hã mẽ inhmã:

—Kwa nà kot kaj mẽ ja kur
o amnhĩ tomnuj nê.

Anhÿr o hã mẽ inhmã
akapêr kêt nê. Ano ho ãm
ja hã mẽ ixpumu. Mẽ pahte
ahpÿnhã tanhmã paxàpkur
to htã Tirtũm kot mẽ pahte
Kra Jejus kôt amnhĩ xunhwÿr
xwÿnh piitã mẽ pahto hkra
kênã.

⁴ Jakamã kwa mẽmoj tã
tanhmã axpën mã axàkjêr to

ho ri apa hkêt nê. Koja Kris kôt atõjê hõ axtem tanhmã hamaxpêr to ka mẽ tee ri ja hã omu nê tanhmã hã kãm nê hkêt nê. Rý ajamaxpêr o:

—Tk. Na hte ã ri amnhĩ nhĩpêx anhÿr o pa. Ja omnuj. Pa na pa hte ã amnhĩ nhĩpêx anhÿr kêt nê.

Anhÿr o ri axpên kukamã ajamaxpêr hkêt nê. Mẽ pahpê Tirtüm kêt kênã kot pu kêt mẽ ã ri axpên kukamã pajamaxpêr anê. Tirtüm pix na hte tanhmã mẽ pajarênh to xwÿnh. àhpumunh o àhpumunh xwÿnh jakamã koja tanhmã mẽ hkrã hto nhũm mẽ rĩ kormã tãm hamaxpêr pê àmnhĩx ri tanhmã amnhĩ nhĩpêx to ho pa.

⁵ Nê koja Jejus kôt atõjê hõ mẽmo arĩgromnu jarê nê hã àpênh kêt nê. Ka mẽ apê hkwyjaja tee ri ja hã omu nê ajamaxpêr o:

—Nà arĩgro piitã mẽ pamã mex kênã. Kot paj mãmri arĩgro piitã hã apê.

Anhÿr o ajamaxpêr japêr. Nom kêr ka mẽ ja hã axpên mã tanhmã axàkjêr to hkêt nê. Na pu htem ahpÿnhã pamã tanhmã mẽ pahte amnhĩ nhĩpêx to hprãm xà hkôt tanhmã amnhĩ nhĩpêx to. No tanhmã ri hã axpên mã paxàkjêr to ho ri papa hkêt nê.

⁶ Kêt mẽ kot arĩgromnu jarênh xwÿnhjê mẽ mẽ pahte arĩgro piitã mex ã harênh xwÿnhjaja mẽ pahpiitã mẽ pahpê Tirtüm kraa. Jakamã mẽ pahpiitã na pu htem pajamaxpêr o:

—Na pa hte Tirtüm kãm hprãm xà hkôt ã amnhĩ nhĩpêx anhÿr o ri ixpa. Anê.

Nê mẽ pahte mẽmoj piitã hkur xwÿnhjaja nê mẽ kot mẽmoj kwÿ hkur kêt xwÿnh piitã mẽ pahpê Tirtüm kraa. Mẽ pahpiitã mẽ pamã kãm hprãm xà hkôt amnhĩ nhĩpêx prãm jakamã na pu htem paxàpkur kaxyw nê Tirtüm mã amnhĩ jarê nê kãm:

—Pa mẽ ijamâr mex xwÿnh maati. Nà ãm hãmri na ka hte apkati mẽ mẽ inhmã mẽ inhõ ho apa. Amex o amex Tirtüm.

Anhÿr o kãm amnhĩ jarê. Hãmri nê kormã hkamnâr rom paxàmnhĩx ri tanhmã mẽõ kuteta ku.

⁷⁻⁸ Mẽ pahpê Tirtüm kra jakamã na pre ra mẽ pakukamã tanhmã mẽ pajarênh to. Mẽ pakukamã pahtyk ã arĩgro jarê nê mẽ pahte pahtir ri tanhmã ri amnhĩ nhĩpêx to ho papa hkukamã hamaxpêr. No mẽ papajaja na pu htem amnhĩ krã hkôt tanhmã mẽ pahte amnhĩ nhĩpêx to kukamã paxàhpumunh kêt.

⁹ Jakamã na pre Kris ja hã mẽ pahpumu nê tãm mẽ pakaxyw amnhĩ to kêp mẽ panhõ Pahihti nê mẽ panê ty. Hãmri nê akupÿm htir. Kêp mẽ panhõ Pahihti hã akupÿm htir. Kêp mẽ pahte hkôt amnhĩ xunhwÿr xwÿnhjê nhõ Pahihti kaxyw. Jakamã kêp ra mẽ pahkwÿ htyk xwÿnhjê nhõ Pahihti nê mãânên kêp arĩ mẽ pahtir xwÿnhjê nhõ Pahihti.

10 No mẽ papajaja mẽ pahpê Kris kôt mẽ pahkwýjê nhõ pahi hkêt jakamã kêr mẽ Kris kôt akwýjê hõ tanhmã amnhĩ nhĩpêx to hã omu hãmri nê tanhmã ho akapêr to hkêt nê. Rý ajamexpêr o:

—Kwa na ã amnhĩ nhĩpêx anê. Inhmã ja mex kêt.

Anhÿr o ajamexpêr kêt nê. Koja nhÿrmã Tĩrtũm tãm mẽ pahpiitã tanhmã mẽ pahte amnhĩ nhĩpêx to hã mẽ pahpumunh xã hkôt tanhmã mẽ pajarênh to. Nom kêr pu mẽ papajaja amnhĩ hkrã hkôt ã axpên jarênh anhÿr kêt nê.

11-12 Kot puj mẽ nhÿrmã pahpiitã Tĩrtũm kutã pahkrĩ nê kãm tanhmã amnhĩ jarênh to. Kormã mẽ pahtĩr ri tanhmã mẽ pahte amnhĩ nhĩpêx to ho papa hã kãm pahprĩ hã amnhĩ jarê. Kê mẽ pama nê tanhmã mẽ pajarênh to. Kapêr ã kagã htũm kot mẽ pakukamã mẽ pajarênh kot:

Koja nhÿrmã mẽ piitã ixpê mẽ õ pahi hã ixkutã hkõn krã ho rôrõk nê hkrĩ nê inhmã inhmex o inhmex ã ijarê.

Nê mẽ piitã ixpê Tĩrtũm ã ixpyxi mex ã ijarê. Æm hãmri na pa ã mẽ hkukamã mẽ harênh anê. Anê.

Mẽ pahte Kris kôt pahkwýjê ho mex ã mẽ pamã karõ

Wam Korĩt 8.9-13

13 Nê kwa kêr ka mẽ akwý kot Jejus kôt amnhĩ xunhwÿr tohtuj anhÿr xwýnhjaja tanhmã mẽ kot amnhĩ nhĩpêx

to ho pa hã mẽ omu nê ja nê tanhmã mẽ kãm akapêr to hkêt nê. Æm mẽ noo mã tãm ri amnhĩ nhĩpêx rãhã ho ri apa. Mẽ kot ja hã mẽ apumunh nê mẽ akôt amnhĩ nhĩpêx kaxyw. No kot ka mẽ kot tanhmã amnhĩ nhĩpêx toja ã kãm akapêr nhũm ama nê tee ri amnhĩ kukamã hamexpêr nê hkaprĩ nê.

14 E kot pa hpãnhã mẽ paxàpkur xã hã tanhmã mẽ panhõ jarênh to. Ixte Pahihti Jejus jamexpêr xã hkôt tanhmã ijamexpêr to ho ri ixpa jakamã kot paj ixkatat kôt mẽ amã tanhmã mẽ panhõ jarênh to nê ãm hãmri harê. Nã mẽ paxàpkur xãja ãm pixi nê omnu hkêt. Piitã mex o mex. Nom koja mēhõ tee ri mẽmo mẽ apkur xã hõ pumu nê hamexpêr o:

—Nã kot paj ja hkur kêt nê. Kot paj apu kuku nê ho amnhĩ tomnuj nê. Anê.

Hãmri nê hkur kêt nê. Tã kwãr mãmrĩ ã hamexpêr anê nê hkur kêt nê. Nom na ãm amnhĩ krã hkôt Tĩrtũm kêp ja omnuj ã hkamnhĩx. Kêp omnuj kêt. Ra kot mẽmo mẽ paxàpkur xã piitã mex ã harênh.

15 Tã kot kaj mẽ kot mẽmoj kur kêt xwýnhhta py nê o tẽ nê kot hkaga xwýnh noo mã hkur o xa nhũm apumu nê tee ri hamexpêr nê hkaprĩ nê. Jakamã kot ka mẽ ã noo mã amnhĩ nhĩpêx anhÿrja o ho mex kêt nê. Kwa mẽ ã ri axpên nhĩpêx anhÿr hkêt nê. Kot ka mẽ ã axpên nhĩpêx anê nê te amnhĩ pix kukamã

ajamaxpēr pyrāk o amnhī nhīpēx. Jao akwýjê ho mex kukamā ajamaxpēr kêt nê. Kris kām mē hapê htýx kôt mē kot amnhī tomnuj pānhā amnhīrer kaxyw ra nê htyk kēnā kot ka kêt mē axtem nē ri ā mē noo mā mē kot mēmoj kur kēēta kur anē. Rý koja apu tee ri kot mēmoj kur kēēta kur ā mē apumu nē tanhmā amnhī tomnuj to. Jao Kris kaga japêr. Jakamā kwa mē ā mē noo mā mēmojta kur kêt nē.

¹⁶ Mēmo mē apkur xàja mex tā nhūm mē akwýjê hō kām mex kêt japêr ka mē noo mā hkur kêt nē. Nē tanhmā hā kām nē hkêt nē. Kot kaj mē anē nhūm Kris kra hkêt xwýnhjaja tee ri ja hā mē apumu nē tanhmā axpēn mā mē apê Kris kwýjê ho kapêr punuj to.

¹⁷ Mē pahpê Tirtūm krajaja na pu htem paxàpkur xà nē pahkōm xà pix kukamā pajamaxpēr o ri papa hkêt nē. Na pu htem amnhī mē pahkwýjê mex kukamā pajamaxpēr. Nē mē pahte tām amnhī nhīpēx kukamā pajamaxpēr. Nē tām axpēn nhīpēx kukamā pajamaxpēr. Kot puj mē ā amnhī nhīpēx anē nhūm Tirtūm Karō ja hā mē pahpumu nē mē pahto mē pahkīnh nē. Pu mē pahkīnh nē pajamakêtkati nē ri axpēn kôt papa.

¹⁸ Tā kot puj mē ā Kris mā tanhmā amnhī nhīpēx to ho ri papa anē nhūm Tirtūm ja hā mē pahpumu nhūm ja kām mex nē. Nē Kris kôt mē pahkwýjê mā haxwýja ja mex

nē.

¹⁹ Jakamā kêr pu mē tām axpēn mā pakapêr o ri papa. Nē pajamakêtkati nē axpēn kôt ri pajapôj. Nē Kris kôt tanhmā axpēn to paxihtýx to ho ri papa.

²⁰ No kot ka mē axàpkur xà gryk ā akwý hkukamā ajamaxpēr kêt nē atýx ri mēhō noo mā mēmoj kur japêr. Kêp omnuj tā ka mē ām amnhī pix kukamā ajamaxpēr nē noo mā hkur japêr. Hāmri nhūm ja hā mē apumu nē ra kot Tirtūm kaga mā. Ra kêp hkra jakamā kwa mē noo mā mē kot mēmoj punuj ā harēnh xwýnhhta kur kêt nē. Nom mē paxàpkur xàja piitā mex. Tirtūm kot mē pamā ōr jakamā piitā mē panhō. Tā koja akwýjê hō Tirtūm kêp mēmoj omnuj ā hkamnhīx tā ka mē noo mā aku nē ho amnhī tomnuj nē.

²¹ Kêr pu mē pahkwýjaja tanhmā kot amnhī tomnuj to pymaj pu mē pahte amnhī nhīpēx kukamā pajamaxpēr mex o papa. Mēmo mēō nē mēmo kagô pê wīhtija. Tirtūm kot mē pamā mēmoj piitā ōr tā no nhūm mē pahkwýjaja kêp ja omnuj nē pu mē noo mā hkur rý ho pahkōm kêt nē. Mēmo mry nē mēmo wīhti pu mē noo mā hkur rý ho pahkōm kêt nē.

²² Nē kêr ka mē atō mēmoj krêr kaxyw nē hkukamā ajamaxpēr o:

—Nà kot paj ja krê. Tirtūm kām ja mex kēnā. Anē.

Hāmri nē māmri Tirtūm kamnār rom axāmnhīx akrê.

Kãm ja mex kênã kot ka kêt ri tee ri hkrêr kaxyw hkukamã ajamaxpêr nê hkaga.

²³ No kot kaj mē atõ mēmoj to anhÿr kaxyw nê tee ri amnhĩ kukamã ajamaxpêr nê ajamaxpêr o:

—Ko kot paj apu ja ho anē nhũm Tirtũm hã ixpumu nhũm ja kēp omnuj nē rÿ ko. Anē.

Hãmri nê tee ri amnhĩ kukamã ajamaxpêr. Tã ra ã amnhĩ nhĩpêx anē nê akrê rÿ mēmoj to anē. Hãmri nhũm Tirtũm tee ri ã ate amnhĩ nhĩpêx anhÿr ã apumu nhũm ja kēp omnuj nē. Ate hkamnãr rom mēmoj to anhÿr kêt nê amarĩ amnhĩ krã hkôt ho anhÿr jakamã ho amnhĩ tomnuj nē.

15

Mē pahte amnhĩ pix kukamã pajamaxpêr kêt ã mē pamã karõ

Makre 10.45; Wam Korõt 10.24; Piripos 2.3-5

¹ Nê kêt pu mē pahte ra Jejus kôt amnhĩ xunhwÿr tÿx xwÿnhjaja amnhĩ kôt kormã mē kot Jejus kôt amnhĩ xunhwÿr totuj janhÿr xwÿnhjê jamãr mex nê. Jao mē kamã pagryk tokyx anhÿr kêt nê. Æm mē kutã panojarêt pix o papa. Jao ra amnhĩ pix kukamã pajamaxpêr kêt nê.

² Määnēn amnhĩ mē Kris kôt mē pahkwÿjê hkukamã mãn mē pajamaxpêr. Jao mē kot tãm amnhĩ nhĩpêx kaxyw mē ho mex o ri papa.

³ Kris na pre jar pa ri amnhĩ pix kukamã hamaxpêr kêt

nē. Na pre määnēn õ Papaj kukamã hamaxpêr. Jakamã Tirtũm kapêr ã kagã htũm kot kãm kapêr jarēnh kot:

Pa Papaj. Na hte mē pahkurê xwÿnhjaja ixto kapêr punuj nē. Nom määnēn ã ato kapêr o pa anē. Anē.

⁴ Mē pakaxyw na Tirtũm kapêr ã kagãja. Mē pahte kamã harēnh nê mar nê amnhĩ kaxyw hkôt pajamaxpêr tÿx o ri papa kaxyw. Jakamã na pu htem tanhmã pahpunuj to htã kapêr kwÿ ma nê pahkĩnh nē. Jao tee ri amnhĩ kukamã pajamaxpêr o ri pahkaprĩ hkêt nē. Æm nhÿrmã Tirtũm kot mē pahto mex kukamã pajamaxpêr o akupÿm paxihtÿx nê pahkĩnh nê ri papa. Mē pahkĩnh nê ri papa kaxyw na Tirtũm kapêr ã kagãja.

⁵⁻⁶ Na pu htem Tirtũm kamnãr rom pahkĩnh nē. Nê axpēn kamã paxukaprĩ ho ri papa. Jakamã na pa hte tanhmã mē ato Tirtũm wÿr to nê kãm:

—Pa Tirtũm. Apê mē ijamãr xwÿnh maati na ka. Nê apê mē inhõ Pahiiti Jejus Kris nhõ Papaj na ka. Nã xep ra Rõm nhõ xwÿnh kwÿjaja kãm akapêr kôt amnhĩ nhĩpêx prãm jakamã kwa tanhmã mē hkrã ho mex to kê mē hamakêtkati nê ajamaxpêr kôt hamaxpêr rãhã ho ri akôt pa. Hãmri nhũm mē amnhĩ tã apumu nē piitã amex o amex ã ajarê.

Anhÿr o pa hte mē ato kuwÿ.

Ijaew kêt xwỳnhjê jarênh

Atre 10.34; Rômãn 9.24; Karatas 3.28

⁷ Nê kwa kêr ka mê amã axpên tâ ma ho ri apa. Te ho Kris kãm mê pahtã mata pyrãk. Jao axpên to mex pix o apa. Kot kaj mê ã axpên nhĩpêx anê nhũm mê piitã axpên tâ mê apumu nê mê anhỹ hã Tĩrtũm mã mex o mex ã harê.

⁸ Amnepê m Tĩrtũm Ijaew mã tanhmã Kris jarênh to. Kormã pika hwỳr wrỳk kêt ri nhũm hkukamã nhỹrmã mê hwỳr wrỳk nê mê kamã kator ã harê.

Tã nhũm mê hwỳr wrỳ nê mê kamã kato. Ijaew hkanrêhã htãmnhwỳjê kamã kato nê mê ho mex o ri mê hkôt pa. Mê kot amnhĩ tâ omunh nê ã hamaxpêr anhỹr kaxyw. Nê hamaxpêr o:

—Amnepê m Tĩrtũm kot mê panhĩgê t mã hkukamã harênh xà hkôt na mê ixwỳr Kraja mê nhũm wrỳ nê mê ixto mex o ri pa. Nà ãm hãmri na pre mê ixwỳr kumê.

Anhỹr o hamaxpêr kaxyw.

⁹ Nê mê apê Ijaew kêt xwỳnhjaja mê ajaxwỳja mê ate tanhmã kot amnhĩ nhĩpêx to hã harênh mar nê Tĩrtũm mã mex o mex ã harênh kaxyw. Nê Tĩrtũm kot mê akamã ukaprĩ hã mê ate amnhĩ tâ omunh nê mex o mex ã harênh kaxyw na pre wrỳ. Tĩrtũm kapêr ã kagà htũm kot tanhmã mê ixpê Ijaew jarênh to nê mãânê n tanhmã mê apê Ijaew kêt xwỳnhjê jarênh to nê mê pajarênh kot:

Kot paj Ijaew kêt xwỳnhjê jamak mã amã amex ã ajarênh o ri mê hkôt ixpa.

Nê amex ã inhgrer o ri mê hkôt ixpa. Anê.

¹⁰ Nê ja:

Kwa mê apê Ijaew kêt xwỳnhjê mê mê apê Ijaew. Kêr ka mê apiitã Tĩrtũm nhỹ hã akĩnh nê ri apa. Anê.

¹¹ Nê mãânê n ja:

E kêr ka mê apê Ijaew kêt xwỳnhjaja nê krĩ piitã hkôt mê apa xwỳnhjaja mê apiitã Tĩrtũm mã mex o mex ã harênh o ri apa.

Anhỹr o kot harênh.

¹² Nê Tĩrtũm nhỹ hã kapêr o pa xwỳnh finat Ijais haxwỳja Ijaew mã Jejus jarênh o:

Koja nhỹrmã Jese kanrêhã htãmnhwỳjê hõja mê pahwỳr kato.

Hãmri nê mê pahpê Ijaew mê Ijaew kêt xwỳnhjê ho amnhĩptar o pa.

Jakamã nhũm mê amnhĩ kaxyw hkôt hamaxpêr o pa. Anê.

¹³ Nê na pa hte tanhmã mê ato Tĩrtũm wỳr to ho ri ixpa nê kãm:

—Pa Tĩrtũm. Kwa kêr ka Rôm nhõ xwỳnhjê ho mex kê mê amnhĩ kaxyw Akra hkôt hamaxpêr mex o ri pa. Jao hkôt hkĩnh nê hamakêtkati nê ri axpên to pa. Nê kê Akarõ mê ho mê hihtỳx o pa kê mê amnhĩ kaxyw amã mãn hamaxpêr tỳx rãhã ho ri pa. Anê.

Pawre kot hprî hã amnhî jarênh

Sikûn Pêtre 1.12-13

¹⁴ E Kris kôt ixkwÿjaja. Nà ra ixte mē ajarênh mar mex. Na ka xep htem amnhî to mex o ri apa. Nē mēmoj to xepên kutã anojarêt rãhã ho ri apa. Nē mē kot tanhmã Tirtûm kapêr kôt amnhî nhîpêx to xàja ka mē omunh mex nē ho xepên jahkre ho ri apa.

¹⁵ Tã ot pa kagã ja kamã mē amã ixujarênh kãm ixihitÿx nē. Tirtûm nhÿ hã. Ra mē ate mēmoj mar mex tã pa axte mē amã harê. Mē ate mar tÿx nē hã anohtÿx kaxyw. Nã ã ixte amnhî nhîpêx anhÿr kaxyw na pre Tirtûm mē akaxyw ixãm.

¹⁶ Ixte Jejus Kris mã mē apê Ijaew kêt xwÿnhjê mã kapêr jarênh o ri mē akôt ixpa kaxyw. Nē mē ato hwÿr o ri ixpa kaxyw. Tã pa hte krî hkwÿ kamã ã mē akwÿjê mã harênh anhÿr o ri mē hkôt ixpa. Nē Jejus jarênhja pa hte mē hkôt mē kãm harênh o ri ixpa. Mē kot mar nē hkînh kãm hkôt amnhî nhîpêx mex kaxyw. Hãmri nhûm Tirtûm Karô mē kãm mē hamaxpêr nyw jagjê nhûm Tirtûm hã mē omu nhûm ja kãm mex nē nhûm hkînh nē hamaxpêr o:

—Nã ãm hãmri. Koja mē nhÿrmã wa ixri htîr tûm nē mex nē pa ho pa. Anê.

¹⁷ Tã na pa ixte Jejus Kris nhÿ hã Tirtûm mã tanhmã amnhî nhîpêx to ho ixpa hã amnhî pumu nē ixkînh nē.

¹⁸⁻¹⁹ Na pa hte ÿ hã mē apê Ijaew kêt xwÿnhjê mã Tirtûm

kapêr jarênh o ri mē akôt ixpa. Nē mē anoo mã tanhmã ri Kris kot mē amã amnhî nhîpêx to hã harê. Nē mē amã aa mē kot mēmoj pumunh kêt kwÿ ho anhÿr o ri mē akôt ixpa. Tirtûm Karô nhÿ hã. Nhûm hte mē akwÿjaja amnhî jaêr pê omu nē kamã no puma nē. Hãmri nē mē pahpyrà nē Jejus kôt amnhî xunhwÿ. Nom pa hte ã amnhî nhîpêx anhÿr ã amnhî pumu nē ri hã amnhî to jarkrar kêt nē. ãm ixte Kris pix nhÿ hã mē kãm ixkapêr ã mē kãm amnhî jarênh o ri mē hkôt ixpa. Tã pa ra Jerujarê rûm Irir wÿr krî piitã hkôt mē kãm Kris kapêr jarê. Tirtûm Karô kot tanhmã ixto hihtÿx to jakamã pa mē piitã mē kãm harênh mex nē.

²⁰ Na pa hte mē hwÿr inhnojarêt nē ã ijamaxpêr anê nē ijamaxpêr o:

—Kormã mē kot Kris jarênh mar kêt xwÿnhjê hwÿr kot paj mō. Nom ra mē kot harênh mar xwÿnhjê nhõ krî hwÿr inhmôrja inhmã prãm kêt. Anê.

²¹ Tirtûm kapêr ã kagã htûm kot kapêr mar kêt xwÿnhjê jarênh kot:

Kormã mē kot Tirtûm kapêr mar kêt xwÿnhjaja koja mē kuma nē hprî hã mar tÿx nē. Anê.

Pawre kot Rôm wÿr hkrã hã amnhî jarênh

Rômân 1.8-15

²² Hêxta waa nē. Inhmã mē apumunh prãm tÿx nē Rôm kãm Jejus kôt ixkwÿjaja. Na pa hte xatã mē awÿr ixkrã

nom kormã mẽ awÿr inhmõr kêt nê. Kormã ixte krĩ hkwy kamã mẽ kãm Kris jarênh o ri ixpa jakamã kormã mẽ awÿr inhmõr kêt nê.

²³ Na pa ra xatã mẽ awÿr ixkrã hã ixtã amgrã xohtô nê. Tã ra jar mẽ kãm Kris kot mẽ panê tanhmã amnhĩ nhĩpêx toja jarênh pa.

²⁴ Jakamã kot paj tokyx ma mẽ awÿr mõ. Hãmri nê mẽ awÿr pøj pu mẽ axpên pumu nê pahkĩnh nê axpên mã pakapêr o papa. Pa mẽ akôt ri ixpa tãmtã hamũ pyka pê Espãnhã wÿr ma mõ. Nê kot paj inhnojarêr ka mẽ ixto Tĩrtũm wÿ nê inhmã ixàpkur xà hkwy gõ pa ma mẽ hwÿr pry hã hkur o mõ.

²⁵⁻²⁶ No na pa kormã mẽ awÿr inhnojarêr kêt nê. Kot paj ja rũm awjanã nê akupÿm Jerujarê hwÿr mõ. Kamã Kris kôt mẽ pahkwÿjaja kêp amrakati nê ri pa nhũm pika pê Gres mẽ Masetõn kamã Kris kôt mẽ pahkwÿjaja mẽ harênh ma nê mẽ kãm kãxpore hkwy ho akuprõ nê mẽ kaxyw inhmã kugõ. Tã kot paj ma mẽ hwÿr o mõ nê mẽ kãm kure nê rĩ kormã ma mẽ awÿr mõ.

²⁷ Jerujarê kamã Kris kôt mẽ pahkwÿjaja Ijaew na mẽ. Mẽ kumrêx na prem Kris kôt amnhĩ xunhwÿ. Hãmri nhũm mẽ hkwyjaja ma mẽ apê Ijaew kêt xwÿnhjê mã kapêr jarênh o ri mẽ akwy hkôt pa. Hãmri nhũm pika pê Gres kamã mẽ pa xwÿnhjaja mẽ kapêr ma nê mẽ urak nê Kris kôt amnhĩ xunhwÿr

kurê kumrêx. Jakamã amnhĩ xwar kãm nhãm krĩ hõ kamã Kris kôt mẽ pahkwÿjê ho mex prãm nê. Hãmri mẽ kãm kãxpore hkwy ho akuprõ nê mẽ kaxyw inhmã kugõ.

²⁸⁻²⁹ Tã kot paj ma Jerujarê hwÿr mẽ kãm o mõ nê mẽ kãm kure hãmri nê awjanã nê rĩ kormã ma Rõm wÿr mẽ awÿr mõ. Hãmri nê mẽ awÿr pøj pu mẽ axpên pumu nê pahkĩnh nê. Nê axpên mã Jesus Kris mex o mex ã harê nê kãm tanhmã amnhĩ jarênh to ho papa. Jao pahkĩnh nê papa. Tã pa hpãnhã hamũ ma Espãnhã wÿr mõ.

³⁰ Nê na pu prem Jesus Kris o panhõ Pahihti. Jao te mẽ pahpê hkôt axpên to pahtõ nê pahtõx pyrak o axpên nhĩpêx. Nê Karõ nhỹ hã pamã axpên kĩnh nê. Jakamã kwa Jesus kôt ixkwÿjaja. Kêr ka mẽ ixpê mẽ atõ hã ixto Tĩrtũm wÿr kãm axihtÿx nê.

³¹ Kêr pa ma pyka pê Jutej kamã Jerujarê kamã Kris kôt mẽ pahkwÿjê hwÿr mõ nê mẽ kãm kãxporeta gõ nhũm mẽ omu nê Ijaew kêt xwÿnhjê kot mẽ kãm õr ã mẽ omunh tã tee ri hamaxpêr kêt nê. Am hkĩnh kãm mãmri àmnhĩx hamÿ nê ho amnhĩm awjaprõ.

Nê kêr ka mẽ ixto awÿ kê inhnê mẽ kêp mẽ pahkwÿ hkêt xwÿnhjê pumunh mex nê.

³² E kêr ka mẽ ã ixto Tĩrtũm wÿr anê. Kê ixte ma Jerujarê rũm ma Rõm wÿr pàr kãm inhmõrta ã kê ixpumunh mex nê. Pa inhmex pê mẽ kurũm ma mẽ awÿr mõn pøj

pu mẽ tokyx axpẽn pumu nẽ pahkĩnh nẽ. Pa mẽ ate tanhmã amnhĩ nhĩpêx to ho ri apa hã mẽ apumunh o mẽ akôt ri ixpa nẽ ixkĩnh nẽ.

³³ Tã ãm ja pix. Kê Tĩrtũm mẽ akôt pa ho pa. Tãm na hte tanhmã mẽ pahto pu mẽ ý hã pajamakêtkati paxãmnhĩx ri pahkĩnh nẽ ri papa.

16

Pawre kot ahpỹnhã hkrãmnhwýjê mã kapêr

¹ Ku nẽ mããnẽn ja. Ot pa mẽ awýr Kris kôt pahtõx Pepreja mẽ awýr kumẽ. Na hte krĩ pê Sênkrej kamã Kris kôt mẽ pahkwýjê tanhmã mẽ ho mex to ho ri mẽ hkôt pa.

² Nẽ mããnẽn pa na hte tanhmã ixto mex to. Tã kê mẽmo arĩgro hã mẽ awýr pøj ka mẽ kêp Kris kôt mẽ pahtõx ã omu nẽ ho mex nẽ tanhmã ho ajuta hto.

³ Nẽ kêr ka mẽ atar Kris kôt ixkrãmnhwýjê mã ijarẽ. Na pa hte mẽ kãm ijamaxpêr rãhã ho ri ixpa. Nẽ Akirti mẽ hprõ Prisireta ka mẽ wa kãm ijarẽ. Na pre hte wa inhĩhkô hã Jejus Kris mã tanhmã amnhĩ nhĩpêx mex to ho wa pa.

⁴ Jao wa amnhĩ grõnh kôt mẽ kãm ixkurê xwýnhjê pê ixpytã. Pa amnhĩ tã wa omu nẽ inhmã wa hkĩnh nẽ. No ãm papxipix inhmã wa hkĩnh kêt nẽ. Na pre Ijaew kêt xwýnh kwý pê Kris kwýjaja ixtã wa harẽn ma nẽ haxwýja kãm wa hkĩnh nẽ.

⁵ Nẽ na hte Kris kwýjaja wa òrkwỹ kamã axpẽn wýr akuprõ. Mẽ kot Tĩrtũm mã

amnhĩ jarẽn nẽ kapêr ã kagã hkwy mar kaxyw axpẽn wýr akuprõ. Tã kêr ka mẽ mẽ kãm ijarẽ.

Nẽ Kris kôt mẽ pahtõ Epẽnre mã ijarẽ. Kêp ixkrãmnhwý mex na. Inhmã hkĩnh. Kumrêx na pre jar pika pê As kamã amnhĩ kaxyw Kris kôt hamaxpêr nẽ hkôt amnhĩ xãm.

⁶ Nẽ Kris kôt mẽ pahtõx Marir ka mẽ kãm ijarẽ. Na xep hte tanhmã mẽ ato mex to rũnh o pa.

⁷ Nẽ Kris kôt mẽ pahtõ ãrõhti mẽ Jũhti wa kãm ijarẽ. Ixpyrà nẽ wa kêp Ijaew na wa. Kormã ixte Kris kôt amnhĩ xãm kêt ri na pre wa kumrêx hkôt amnhĩ xãm. Na hte Jejus nhỹ hã mẽ ahkre ho mẽ pa xwýnhjaja wa kot Kris kapêr jarẽn mex ã wa harẽ. Tã ã amnhĩ nhĩpêx anhỹrja mýrapê na pre mẽ hkwyjaja wa unê nẽ wa haxã pa prem ixpimràatã ixpê prês nẽ mẽ hagjênh xã kamã ixkrĩ.

⁸ Nẽ Kris kôt mẽ pahtõ ãpĩtre mã ka mẽ ijarẽ. Kêp Kris kôt ixkrãmnhwý mex na.

⁹ Nẽ Kris kôt mẽ pahtõ Upãnre mã ijarẽ. Na hte ixpyrà nẽ Kris mã tanhmã amnhĩ nhĩpêx to ho ri pa.

Nẽ Kris kôt mẽ pahtõ Etaki mẽ ijarẽ. Kêp ixkrãmnhwý mex na.

¹⁰ Nẽ Kris kôt mẽ pahtõ Apes ka mẽ kãm ijarẽ. Na prem ra Kris ã hipêx punuj nẽ no nhũm mẽ kutã amnhĩ to htýx nẽ Kris kaga hkêt nẽ.

Nẽ Aristopti nhõrkwỹ kamã hkwyjê mã ijarẽ.

11 Nē Kris kôt mē pahtō Erojāwti mā ijarē. Ixpyrà nē kēp Ijaew na.

Nē Nasisti nhōrkwỹ kamā Kris kwỳjaja ka mē kām ijarē.

12 Nē Kris kôt mē pahtōx Xiripēre mē Xiripos wa kām ijarē. Wa kēp Pahihti Jejus mā tanhmā amnhĩ nhĩpēx mex to xwỳnh na wa.

Nē Kris kôt mē pahtōx Pexiti mā ijarē. Haxwỳja kēp ixkrāmnhwỳ na. Na hte Pahihti Jejus mā tanhmā amnhĩ nhĩpēx mex to ho ri pa.

13 Nē Kris kôt mē pahtō Rupti mā ijarē. Na hte Kris kôt amnhĩ nhĩpēx mex o ri pa. Nē katorxà mā ijarē. Na pre te ixpē hkra nhĩpēx pyrāk o inhĩpēx.

14 Nē Kris kôt mē pahtō Asĩnre mā nē Prekōxti nē Emes nē Patopas nē Emas mē. Jajē piitā mē pahkwỳ kot mē hwỳr pikuprōnh xwỳnhjē mē mē ho apimràatā mē kām ijarē.

15 Nē Kris kôt mē pahtō Pirorti mā nē mē pahtōx Jure mē Nērew wa nē htōxja nē mē pahtō Orĩpti wa mē kām ijarē. Nē mē pahkwỳ kot mē hwỳr pikuprōnh xwỳnhjē mē mē ho apimràatā mē kām ijarē.

E kēp ka mē jajē piitā mē kām ijarē. Na pa hte mē kām ijamaxpēr rāhā ho ri ixpa.

16 Nom mē tapxipixjaja kēt. Ā mē apiitā mā na pa hte ijamaxpēr rāhā ho ixpa.

Nē ota jar Kris kwỳjaja mē awỳr hpēr mē.

17 Kwa ixkrāmnhwỳjaja. Na ka mē ra aprĩ hā Tĩrtũm kapēr mar tỳx nē. Tā kēp ka mē amnhĩ nē mē kot Tĩrtũm kapēr o hēx xwỳnhjē pumunh mex o apa. Mē kām axpēn nē mē ato hpigrānh par prām. Nē mē ate Kris kaga nē hpānhā mē kot amnhĩ nhĩpēx o amnhĩ nhĩpēxja mē kām hprām jakamā kwa mē amnhĩ nē mē omunh mex nē axkām ajamak rom.

18 Na htem ā amnhĩ nhĩpēx anhỹr o Pahihti Kris mā tanhmā amnhĩ nhĩpēx to ho pa hkēt nē. Ām amnhĩ hkrā hkôt tanhmā ri hkwỳjē jahkre hto ho pa. Kot mē no kupyr kaxyw tanhmā mē kām hēx to ho ri mē hkôt pa. Te mē ahkre mex pyrāk tā mē ahkre mex kēt nē. Jakamā nhũm htỳx ri mē pa xwỳnhjaja mē kot mē ahkreja ma nhũm te mē kām mex pyrāk. Jakamā kwa mē okora mē amnhĩ nē mē omunh mex nē.

19 Na ka htem mē kurom Kris kôt amnhĩ nhĩpēx mex nē nhũm xep mē piitā mē apumu nē axpēn mā ja hā mē ajarēnh o ri pa. Pa mē ajarēnh ma nē ixkĩnh nē. Tā kēp ka mē arĩ ajamaxpēr mex rāhā ho ri ajamaxpēr o apa. Nē amnhĩ nhĩpēx mex rāhā nē. No tanhmā ajamaxpēr punuj to ho ri amnhĩ tomunuj o ri apa hkēt nē. Ā mē ate amnhĩ nhĩpēx anhỹrja na inhmā hprām.

20 Nē na hte Satanasti mē hkwỳjaja mē ate Jejus kaga hprām xàj mē akôt tanhmā ri mē anhĩpēx to ho ri pa

htã kêr ka mẽ amnhĩ tã mẽ omu nê tee ri amnhĩ kukamã ajamaxpêr kêt nê. Koja gaa nhũm Tĩrtũm mẽ hipêx o te mẽ kot kagã xoprê hkrã xôm nê hpĩr pyrãk o mẽ hipêx. Jakamã ã mẽ kot mẽ anhĩpêx anhỹr tã koja Tĩrtũm mẽ amã mẽ ajamakêtkati xaja gõ. Tapxipix na kot mẽ pajamakêtkati xã nhõr kaxyw àhpumunh tỳx.

Nê na pa hte mẽ ato Pahihti Jejus wỳ nê kãm:

—Pa Pahihti. Kwa kêr ka Rõm kãm akwỳjê pumu nê mẽ ho mex nê mẽmoj to mẽ kutã anojarêr rãhã ho ri apa. Anê.

²¹ Nê ota mẽ pahtõ Ximotreja mẽ awỳr hpêr mẽ. Na hte inhĩhkõ hã Kris mã tanhmã amnhĩ nhĩpêx to ho ri pa. Nê ixtõ Rusti mẽ Jasãwti mẽ Sosipa wa mẽ haxwỳja mẽ awỳr hpêr mẽ.

²² Nê kot inhmã ixkapêr ã kagã xwỳnh Testi haxwỳja mẽ awỳr hpêr mẽ. Kêp Kris kôt mẽ pahtõ na.

²³ Nê Kris kôt mẽ pahtõ Gajre haxwỳja mẽ awỳr hpêr mẽ. Õrkwỳ kamã na hte Kris kwỳjaja axpên wỳr akuprõ nê kamã Tĩrtũm mã amnhĩ jarê nê kapêr ã kagã kamã harê nê mar o hkrĩ. Õrkwỳ kamã na pa pre pøj.

Nê mẽ pahtõ Eras haxwỳja mẽ awỳr pêr mẽ. Na hte jar krĩ ja kamã Rõm nhõ pahihti mã õ kaxpore jamãr pê ho mẽmoj to anhỹr o pa.

Nê Kris kôt pahtõ Kwatre haxwỳja mẽ awỳr hpêr mẽ. E jajaja piitã na mẽ awỳr hpêr rê.

²⁴ E kê Pahihti Jejus Krisja mẽ akutã nojarêr rãhã ho pa.

Pawre kot Tĩrtũm mex o mex ã harênh

Epês 1.3, 3.20-21; Wam Ximotre 1.17; Eprêw 13.20; Jutres 24-25

²⁵ Nê kwa kêr pu mẽ Tĩrtũm mã mex ã harênh rãhã ho ri papa.

Nê ixte mẽ amã Jejus Kris jarênhta ã ka prem ama nê hkôt amnhĩ xunhwỳ. Tã koja mẽ ato mẽ axihtỳx ka mẽ hkôt axihtỳx kãm hkôt ri amnhĩ nhĩpêx mex o ri apa. Anepêr na pre Tĩrtũm mẽ apê Ijaew kêt xwỳnhjê ho hkra kaxyw hã amnhĩ jarênh kêt nê. Kormã ja ho hpimxur ryy nê.

²⁶ Tã ã mẽ anhĩpêx anhỹrja o amnhĩrit nê ý hã mẽ kapêr jarênh o ri pa xwỳnhjê mã kapêr nê mẽ kãm:

—E Jejus kot tanhmã amnhĩ nhĩpêx to ho pata kêr ka mẽ piitã mẽ kãm hã kagã kê mẽ pyka piitã hkôt kamã harê nê kuma. Nom kê Ijaew pixjaja mar kêt nê. Kê pika piitã hkôt kamã harê nê kuma. Panhĩ nê kupê nê kupê hkã htykre nê mẽ hkã haka nê mẽ hkã kamrêkjaja. Kê mẽ piitã Jejus jarênh ma nê amnhĩ kaxyw hkôt hamaxpêr nê hkôt amnhĩ xunhwỳ. Hãmri nê hkôt amnhĩ nhĩpêx mex o ri pa. Anê.

Nhũm pre ã mẽ pakaxyw mẽ kãm kapêr anê nhũm prem kuma nê hã kagã.

²⁷ Nã Tĩrtũmja tapxipix na àhpumunh tỳx xwỳnh ã ãm pyxi mex. Nê tapxipix kêp

mě pahpiitã Měpahpãm. Tã
kêr pu mẽ Jejus Kris kot mẽ
panê htyk ã omunh xà hkôt
Tĩrtũm pix mã mex o mex ã
mãn harẽnh rãhã ho papa.

Tã ãm ja pix. Ixpê Pawre na
pa ã mẽ awỳr ixpêr mẽnh anẽ.
Na hapêx.

Wam Korît Pawre kot Korît kãm Jejus kôt hkwýjê hwýr kagà nê mênh

Pawre na pre kagàja nhîpêx. Jejus nhÿ hã kapêr jarênh o pa xwýnhjê hõ na pre. Na pre hipêx nê ma krî pê Korît kãm Jejus krajê hwýr kumê. Nê kagàja kamã mê kãm tanhmã mêmoj tâ karõ hto. Na pre mê kot àhpumunh tÿx ã amnhî to jarkrar o pa nê mê kãm kapêr. Nê tanhmã amnhî tomnuj to nê mê kãm kapêr. Nê mê hprõ nê mê mjên xwýnhjaja tanhmã wa kot axpên nhîpêx to hã mê kãm karõ. Nê mê kot Tirtûm mã mex o mex ã harênh kaxyw axpên wýr mê pikuprõnh nê tanhmã amnhî nhîpêx to hã nhùm mê kãm karõ. Æ na pre Pawre mê kãm mêmoj tâ karõ nê hã kagà anê. Nê mê kãm:

1 Pa Korît kãm Jejus kôt ixkwýjaja. Xà mê amex? Ot pa mê awýr kagàja nhîpêx nê kumê. Ixpê Pawre na pa Kris kôt mê pahtõ Sostenes mê wa awýr ixpêr mê. Tã kagàja nhîpêx nê mê awýr kumê. Tirtûm na pre ixte Jejus Kris nhÿ hã mê ajahkre ho ri ixpa kaxyw ixãm.

2 Tã ot pa mê awýr kagà nhîpêx nê mênh mã. Korît kãm ixpyrà nê mê apê Tirtûm krajê hwýr.

Tirtûm kot amnhî kaxyw mê axunhwýr jakamã na ka prem amnhî tomnuj kaga nê

Kris kôt amnhî xunhwý nê hkôt amnhî nhîpêx mex o ri apa. Krî piitã hkôt mê kot amnhî to Jejus Kris wýr o mê pa xwýnhjê pyrà nê. Mê panhõ Pahihti Jejus Krisja ãm pixi mex na.

3 Nê Tirtûm kêp Mëpahpãm maati nê Jejus Kris kêp mê panhõ Pahihti jakamã na pa hte mê ato wa hwýr rãhã o ri ixpa nê mê ato wa hwýr o:

—Kwa Tirtûm mê Jejus wa. Kêr ka wa Korît nhõ xwýnhjê kutã anojarêt rãhã ho wa ri apa. Nê mê ho mex rãhã nê. Kê mê amnhî tâ war apumunh kôt ri hamakêtkati nê hkînh nê àmnhîx tanhmã ri amnhî nhîpêx to ho ri pa. Anê.

Tirtûm kot Jejus Kris kukwak ri mê pahto mex ã harênh Sikûn Pêtre 1.2; Wam Tesarôn 5.23-24

4 Nê mê ate amnhî kaxyw Jejus Kris kôt ajamaxpêr o ri apa jakamã na hte Tirtûm mê ato mex nê. Tã pa hte kãm amnhî jarênh kaxyw nê kãm mê ajarênh o:

—Pa Tirtûm. Æm hãmri na ka pre Korît nhõ xwýnh kwýjê ho akra. Nà ja mex o mex. Anê.

5 Nê ra mê ate Kris kôt amnhî xunhwýr jakamã na ka mê ra amex kumrêx nê ri apa. Nê aprî hã Kris kot amnhî nhîpêx pumunh mex nê aprî hã akwýjê mã harênh o ri mê hkôt apa.

6 Na pa pre mê awýr mõ nê mê amã Kris kot amnhî nhîpêx ã harênh o ri mê akôt ixpa. Ka prem inhma nê hkôt

amnhĩ xunhwÿr tÿx kurê kumrêx.

⁷ Jakamã nhũm Tirtũm mẽ ate kãm tanhmã amnhĩ nhĩpêx to ho apa kaxyw mẽ ato mẽ axihtÿx. Nê kaxyw mẽ amã mẽ ate axpên to mex xà piitã mẽ amã kugõ. Mẽ ate Jejus kot akupÿn mẽ pahwÿr wrÿk jamãr pê hapêr arit o apa pê tanhmã kãm axpên nhĩpêx to ho apa kaxyw.

⁸ Koja Tirtũm tanhmã mẽ akrã hto ka mẽ hkôt pix mã ri amnhĩ nhĩpêx rãhã nhũm Pahihti Jejus Krisja akupÿn mẽ pahwÿr wrÿ. Hãmri nê mẽ ate amnhĩ nhĩpêx ã mẽ apumu nê mẽ ajarênh o:

—Nà ãm hãmri na hte jajaja amnhĩ to mex pix o ri pa. Anê.

⁹ Nê koja Tirtũm ra kot amnhĩ jarênh xà hkôt mẽ ato mex nê. Ra kot mẽ ate Pahihti Jejus Kris kôt apa kaxyw amnhĩm mẽ axunhwÿr jakamã koja ra kot amnhĩ jarênh xà hkôt mẽ ato mex rãhã nê.

Mẽ pahte mẽmoj tã axpên pê pahpigrãnh kêt ã mẽ pamã karõ

Rõmãn 15.5-6; Sikũn Korit 13.11; Epes 4.1-6; Piripos 2.1-4; Wam Pêtre 3.8

¹⁰⁻¹¹ E Kris kôt ixkwÿjaja. Na ka xep htem mẽmoj tã axpên mã axàkjêr pix o ri apa nhũm pre Krojre hkwÿjaja amnê ixwÿr pøj nê inhmã mẽ ajarê. Kwa nà mẽ ã amnhĩ nhĩpêx anhÿr kêt nê. Kêr ka mẽ axpên kôt ri amnhĩ nhĩpêx rãhã ho ri apa. Nê axpên kôt ri ajamaxpêr rãhã nê. Te ixkre tipxi kamã mẽ ri apa

pyràk o mãn kêt mẽ axpên nhĩpêx o ri axpên kôt apa. Nê mẽ axpên kutã anojarêt rãhã ho ri apa. No mẽmoj tã axpên mã axàkjêr pê axpên pê apigrãnh kêt nê. Na pa Pahihti Jejus Kris nhÿ hã mẽ amã ã ja hã karõ anê.

¹² Nê na ka xep htem ahpÿnhã ri mẽ apê mẽ ixkwÿ hã amnhĩ jarênh o ri apa. Jao mẽ akwÿjaja pa ixkôt ri amnhĩ nhĩpêx xwÿnh ã amnhĩ jarê. Nê mẽ akwÿjaja axtem Apor kôt ri amnhĩ nhĩpêx xwÿnh ã amnhĩ jarê. Nê mẽ akwÿjaja axtem Simãw Pêtre hkôt amnhĩ nhĩpêx xwÿnh ã amnhĩ jarê. Nê mẽ akwÿjaja axtem Kris kôt amnhĩ nhĩpêx o ri apa xwÿnh ã amnhĩ jarê. ã na ka xep htem ahpÿnhã amnhĩ jarênh anhÿr o ri pa.

¹³ Kwa nà ka mẽ ã ahpÿnhã amnhĩ jarênh anê nê te mẽ ate Kris o apigrãnh pyràk o hipêx. Kwa mon ka hte mẽ akwÿjaja apê ixkwÿ hã amnhĩ jarê? Xà pa na pa pre pĩ kahpa hã ajêt nê mẽ anê ty? Nà Kris pix na pre mẽ panê hã ajêt nê ty. Xà mẽ apê pa ixkwÿ hã amnhĩ jarênh kaxyw na prem mẽ akrã kumrã? Nà mẽ apê Kris kwÿ hã amnhĩ jarênh kaxyw na prem ã mẽ anhĩpêx anê. Mẽ kot ja hã mẽ apumunh xwÿnhjaja kot mẽ apê Kris kwÿ hã mẽ apumunh kaxyw. Tã na ka xep htem axtem nê ã ri ahpÿnhã mẽ kãm amnhĩ jarênh anhÿr o ri apa.

¹⁴⁻¹⁵ Kop ãm ixte amnhĩ kôt mẽ axunhwÿr prãm ronhÿx

pa mẽ ato mẽ axohtô nẽ mẽ akrã kumrã nẽ mẽ amã: “E ra mẽ apê ixkwý na ka mẽ.” Anẽ. Nom na pa pre ã mẽ amã ixkapêr anhÿr kêt nẽ. ãm hãmri na pa pre ãm mẽ ato grêre nẽ mẽ akrã kumrã. ãm Kripti mẽ Gajre wa pix.

¹⁶ Ku nẽ xep mãânên Es-tepti nẽ kaxyw mẽ hkwýjaja. ãm jajê pixjaja. Nom ko apu axte mẽ hkwý ko. Ixte mẽ hkrã kumrãr xwýnhjê mã ija-maxpêr tÿx kêt.

¹⁷ Na pre Kris ixte mẽ hkrã kumrãr o ri ixpa kaxyw ixãm kêt nẽ. ãm ixte mẽ kãm kapêr jarênh o ri mẽ hkôt ixpa pix kaxyw na pre ixãm.

Nẽ na pa hte amnhĩ krã hkôt ri ixujarênh o ri mẽ akôt ixpa hkêt nẽ. Kot pa ã amnhĩ nhĩpêx anẽ nhũm mẽ ixkapêr mex ã inhma nẽ pa ixkôt amnhĩ xunhwý. Ja pymaj na pa hte amnhĩ krã hkôt ri tanhmã ixujarênh to ho ri ixpa hkêt nẽ. Na pa hte ãm ixprĩ hã Kris kot tanhmã mẽ panê amnhĩ nhĩpêx to hã harênh o ri mẽ hkôt ixpa. Mẽ pahpiitã mẽ panê htyk ã harênhja pa hte mẽ kãm harê. Mẽ kot hprĩ hã mar nẽ hkôt amnhĩ xunhwýr kaxyw. Jao amnhĩ krãm mẽ ujarênh mexta jagjênh nẽ hã no htÿx kaxyw. Pa ja hã mẽ omu nẽ ixkĩnh nẽ ijamaxpêr o:

—Na htem ixkapêr ma nẽ Jejus kôt amnhĩ xunhwýr kurê kumrêx. Nã ãm hãmri na pa hte mẽ kãm ixkapêr kaprÿ ho ri ixpa hkêt nẽ. Anẽ.

¹⁸ No kêt mẽ pahte Tirtũm

kot mẽ pahto hkra xwýnhjaja ra mẽ pahte Kris pĩ kahpa hã mẽ panê htyk ã harênh mar nẽ pahkĩnh nẽ papa xwýnh na pu mẽ. Jakamã na pu htem pajamaxpêr o:

—Nã ãm hãmri na Tirtũm Kraja htyk kukwak ri mẽ ixto mex nẽ mẽ ixto hkra. Mẽ ujarênhja mex kumrêx. Anẽ.

No kêt mẽ kêp hkra hkêt xwýnhjaja na htem tee ri Kris tyk ã harênh ma nẽ hamaxpêr o:

—Tk. Tanhmã kot kêt we amnhĩ to nẽ mẽ panê ty? ãm amarĩ mẽ kot amnhĩ krã hkôt pĩ kahpa hã nhôr nẽ hprĩ kênã. Anẽ.

Tirtũm kra hkêt xwýnhjê jarênh

Matêwre 11.25-26; Wam Korit 3.19

¹⁹ Nẽ Tirtũm kapêr ã kagã htũm kot mẽ kêp hkra hkêt xwýnhjê jarênh kot:

Mẽ kot htÿx ri àhpumunh tÿx ã amnhĩ to jarkrar o pa htã kot paj mẽ kêp ja ho ijapêx pa nhũm mẽ ã amnhĩ jarênh anhÿr kaprÿ. Anẽ.

²⁰ Jakamã mẽ àhpumunh tÿx ã mẽ kot amnhĩ to jarkrar xwýnhjaja nẽ mẽ kot Mojes kapêr o mẽ ahkre ho ri mẽ pa xwýnhjaja nẽ mẽ kapêr rũnh xwýnhjaja. Mẽ kot Tirtũm Kra hkôt amnhĩ xunhwýr kêt jakamã te mẽ àhpumunh kêt pyrãk. Tirtũm kra hkêt xwýnhjaja kot mẽ àhpumunh tÿx ã mẽ harênh tã no ãm Tirtũm noo mã te mẽ àhpumunh kêt pyrãk. Nẽ te htÿx ri mẽ kot amnhĩ nhĩpêx o pa pyrãk.

21 Tirtũm àhpumunh o àhpumunh jakamã na pre ra mẽ hkukamã hamaxpër o:

—Nà kot paj mẽ àhpumunh tỳx ã mẽ omunh xà hkõt mẽ ho ixkra hkêt nẽ. ãm mẽ kot ixkra Jejus kot mẽ nẽ htyk ã harẽnh mar nẽ amnhĩ kaxyw hkõt hamaxpër pix ã mẽ omunh xà hkõt kot paj mẽ ho ixkra. Anẽ.

22-24 No Ijaewjaja kãm amnhĩ krã hkõt pix mã amnhĩ nhĩpêx prãm jakamã na pa hte mẽ ixpê Jejus kwỳjaja mẽ hwỳr mra nẽ mẽ kãm Kris kapër jarẽnh o ri ixpa nhũm mẽ inhma nẽ ãm mẽ inhma. Nẽ te mẽ kot mẽ inhmar kêt pyrã nẽ mẽ inhmã:

—Tk. Nà kot paj mẽ tokyx axujarẽnh kõt amnhĩ nhĩpêx kêt nẽ. Kot kaj mẽ inhmã mẽ ixte aa mẽmoj pumunh kêt õ ho anẽ pa mẽ ja hã apumu nẽ axihtỳx ã apumu nẽ rĩ kormã hkõt amnhĩ nhĩpêx.

Anhỹr o inhmã kapër. Tã no pa mẽ kãm ã amnhĩ nhĩpêx anhỹr kêt nẽ. ãm Kris kot mẽ panê pĩ kahpa hã htykja pix pa htem mẽ kãm harẽnh o ri ixpa. Ja kamã nhũm mẽ hkwỳjaja mẽ inhma nẽ ãm mẽ inhma nẽ Kris xihỳx kêt ã ãm amarĩ htyk ã harẽ. No mẽ hkwỳjaja. Tirtũm kot amnhĩ kaxyw mẽ unhwỳr xwỳnhjaja na htem mẽ kurom mẽ inhma nẽ ra mẽ inhmar tỳx kurê kumrêx. Nẽ mẽ inhmã kapër o:

—Nà ãm hãmri na Krisja Tirtũm pyrã nẽ hihtỳx o hi-

htỳx. ãm hãmri na ka ã harẽnh anẽ. Anẽ.

No Ijaew kêt xwỳnhjaja na Ijaew pyrã nẽ kãm amnhĩ krã hkõt amnhĩ nhĩpêx o pa hprãm kêt nẽ. Nẽ mẽ kãm mẽ àhpumunh tỳx pix prãm o pa. Jakamã na pa htem mẽ kãm Kris kapër jarẽnh o ri mẽ hkõt ixpa nhũm mẽ hkwỳjaja mẽ inhma nẽ Ijaew kwỳjê pyrã nẽ ãm mẽ inhma nẽ mẽ inhmã:

—Tk. Nà na ka htem ãm ri axêx o ri apa. Kot pa mẽ akapër mar kêt nẽ. Kot paj mẽ axàhpumunh tỳx ã mẽ apumu nẽ rĩ kormã mẽ ama nẽ mẽ akõt amnhĩ nhĩpêx.

Anhỹr tã pa mẽ ãm arĩ Kris kot mẽ panê htykja pix pa mẽ kãm harẽnh o ri mẽ hkõt ixpa. Nhũm mẽ hkwỳjaja mẽ inhma nẽ mẽ inhmã:

—Nà mẽ axàhpumunh kêt jakamã na ka htem atỳx ri ã ja jarẽnh anẽ.

Anhỹr tã no nhũm mẽ hkwỳjaja. Tirtũm kot amnhĩ kaxyw mẽ unhwỳr xwỳnhjaja na htem mẽ inhma nẽ mẽ inhmã kapër o:

—Nà ãm hãmri na ka mẽ ã Krisja jarẽnh anẽ. Tirtũm pyrã nẽ àhpumunh o àhpumunh kênã. Anẽ.

25 Tirtũm mẽ Jejus wa mẽ pakurom àhpumunh o àhpumunh nẽ hihtỳx o hihtỳx.

Tirtũm mẽ parom hihtỳx o hihtỳx ã harẽnh

Matêwre 11.25; Sikũn Korit 12.7-10; Xiakre 2.5

26 E Kris kõt ixtõ nẽ ixtõxjaja. Amnepê mã Tirtũm kot amnhĩm mẽ axunhwỳrta ã tanhmã na ka prem amnhĩ

nhîpêx to ho ri apa? Nà na ka prem axohtô nê jar mē noo mā axàhpumunh kêt nê ri apa. Nê mē apê pahi hkêt nê ri apa. Mē axohtô nê amnhî to hkryre nê ri apa.

27 Tã nhũm Tirtũm amnhî kôt mē ate amnhî to hkryre xwÿnhjê xunhwÿ. Koja nhÿrmã kot tanhmã mē pahpiitã mē pajarênh to xà hã arîgrota kato hãmri nhũm mē àhpumunh tÿx ã amnhî to jarkrar xwÿnhjaja Tirtũm kot mē kurom mē pahto hkra hã mē pahpumu hãmri nê tee ri amnhî kukamã hamaxpêr nê amnhî kamã hpijaàm tÿx nê. Nê mē hihtÿx ã amnhî to jarkrar xwÿnhjaja haxwÿja. Nhũm Tirtũm kot mē kurom mē pahto hkra hã mē pahpumu nê tee ri amnhî kukamã hamaxpêr nê amnhî kamã hpijaàm tÿx nê.

28 Na hte Tirtũm amnhî kaxyw mē kot amnhî to hkryre xwÿnhjê xunhwÿ. Nê mē kot mē kamã kahak o pa xwÿnhjê xunhwÿ. Jar pyka ja kamã mē hkwy kot mē hkaga htã nhũm Tirtũm amnhî mã mē unhwÿ. Mēmo kaxyw na hte ã amnhĩm mē unhwÿr anê? Nà mē kot nhÿrmã tee ri mē àhpumunh tÿx ã amnhî jarênh xwÿnhjê pumunh nê expên mã mē harênh o:

—Kwa mē pahte mē àhpumunh tÿx ã mē harênh tã nhũm Tirtũm mē pahpyrà nê amnhî kaxyw mē unhwÿr kêt nê. Nà te mē àhpumunh kêt pyræk.

Anhÿr o expên mã mē harênh kaxyw na pre Tirtũm

amnhĩm mē kot amnhî to hkryre xwÿnhjê xunhwÿ.

29 Jakamã kot puj mē nhÿrmã Tirtũm mã amnhî to jarkrar pê tanhmã kãm amnhî jarênh to hkêt nê. Rÿ kãm:

—Kwa ga ixpumu Tirtũm. Na pa hte ã amnhî nhîpêx anê nê ã amnhî nhîpêx anê. Kwa ja hã ixpumu nê ixto akra nà?

Anhÿr o amnhî to hwÿr kêt nê.

30 Æm Jejus pix kukwak ri na hte Tirtũm mē pahto hkra. Tãm na pre Tirtũm noo mã amnhĩm mē paxunhwÿ. Mē pahte uræk nê pahpê hkra kaxyw. Jakamã na pu htem ãm pix kukwak ri amnhî nhîpêx mex o ri papa. Nhũm mē pamã àhpumunh tÿx xà hkwy gõ. Tã ra kot mē pahte amnhî tomnuj pê mē papytãr jakamã kot puj mē nhÿrmã pahtyk tã no ãm akupÿm pahtir nê Tirtũm mē wa kuri pahtir tũm nê pamex kumrêx nê papa ho papa.

31 Tã ã Jejus kot mē panhîpêx kot anhÿr jakamã Tirtũm kapêr ã kagã htũm kot ja jarênh kot:

Kot ka mē amã mēmoj tã jarkrar prãm nom kêr ka mē kamjaja amnhî to jarkrar kêt nê. Mē panhõ Pahihti ra kot mē panê tanhmã amnhî nhîpêx toja pix ã tanhmã ho jarkrar to ho ri apa. Anê.

2

Pawre kot tanhmã Kris

jarēnh to hā harēnh

Sikūn Korit 4.1-7; Wam Pētre 3.15

¹⁻² E Kris kôt ixtō nē ixtōxjaja. Amnepē mā ixte mē awÿr inhmōrta ā na pa pre inhnojarēt nē ijamaxpēr o:

—Kot paj ma mē hwÿr mō nē mē kām Kris kapēr jarē. Kot amnhī grōnh kôt mē inhnē htykja pa mē kām harē. Ām ja pix jarēnh o ri mē hkôt ixpa. Nom kot paj mē kapēr japjē xwÿnhjē pyrā nē mē kām ixkapēr japjē hkêt nē. Rÿ mē urāk nē te ixāhpumunh tÿx o ri ixkapēr japjē pyrāk o ri mē kām ixkapēr japjē hkêt nē. Kot paj ām ixkatāt kôt ri mē kām tanhmā Jesus jarēnh to pix o ri mē hkôt ixpa.

Anhÿr o mē akukamā ijamaxpēr. Hāmri nē ma mē awÿr mō nē mē awÿr pōj nē mē amā Jesus kot mē panē htyk nē akupÿm htirja pix jarēnh rāhā ho ri ixpa.

³ Na pa pre tee ri amnhī kukamā ijamaxpēr nē ijamaxpēr o:

—Hēxta waa nē. Tanhmā kot pa we mē kām Tirtūm kapēr jarēnh to nhūm mē inhmar tÿx nē hkôt amnhī xunhwÿr kurē kumrēx wehe? Kot paj amnhī krā hkôt mē kām harēnh kêt nē. Ja kaxyw ijamaxpēr tÿx kêt kēnā. Kot paj amnhī krā hkôt mē kām harē nhūm mē ām inhma nē hkôt amnhī xunhwÿr kêt nē. Nà kot paj Tirtūm nhÿ hā mē kām tanhmā ixkapēr to kê tām tanhmā mē hkrā hto kê mē inhma nē hkôt amnhī xunhwÿr japēr.

Anhÿr o ijamaxpēr.

⁴ Nē mē ate inhmar kaxyw na pa pre ixêx rom tanhmā mē ano kupyw to ho ri ixpa hkêt nē. Rÿ mē pajaja mē ixāhpumunh xā hkôt tanhmā mē amā ixkapēr to hkêt nē. Na pa pre ām Tirtūm Karō nhÿ hā mē amā awjarē. Mē ate mar nē hihtÿx o hihtÿx ā omunh kaxyw.

⁵ Jakamā na ka prem Tirtūm xihtÿx ā omu nē amnhī kaxyw hkôt ajamaxpēr kurē kumrēx. No pa ixāhpumunh tÿx ā ixpumunh kôt ixkôt ajamaxpēr kêt nē. Na ka prem ixkapēr ma nē ajamaxpēr o:

—Nà Tirtūm na mē parom āhpumunh o āhpumunh nē hihtÿx o hihtÿx.

Anhÿr o ajamaxpēr kôt ajamaxpēr kurē kumrēx.

Tirtūm Karō kot mē pamā āhpumunh xā nhōr ā harēnh

Matēwre 7.6; Juāw 14.22, 16.13-15; Xiakre 3.13-18

⁶ Nē na hte Tirtūm kra hkwyjaja Tirtūm kot amnhī nhīpēx ā omunh mex. Nē hamaxpēr ā omunh mex. Jakamā na pa hte mē ahkre japjē ho mē hkôt ixpa. Nom jar pika ja kamā mē pajamaxpēr tÿx xā ho mē ahkre hkêt nē. Rÿ pika piitā hkôt mē utār xwÿnhjē jamaxpēr tÿx xā ho ri mē ahkre ho ri ixpa hkêt nē. Kojā nhÿrmā mē āhpumunh xāja mē kēp hapēx pa.

⁷ Jakamā na pa hte ām Tirtūm xāhpumunh xā pix o mē ahkre o ri ixpa.

Amnepê mã kormã mẽmoj piitã hkêt ri na pre Tirtũm amnhĩ kukamã amnhĩ jarẽnh o:

—Mẽ kot amnhĩ kaxyw Ixkra hkôt mẽ hamaxpẽr o mẽ pa xwýnhjaja kot paj mẽ ho ixkra nhũm mẽ mex kumrẽx nẽ pa ho pa.

Anhỹr o mẽ harẽ. Nom mẽ kot hkôt amnhĩ xunhwýr kêt xwýnhjaja nhũm kormã mẽ kãm ja ho amnhĩrĩt kêt nẽ. Tã ja na pa hte ra mẽ kãm harẽnh rãhã ho ri mẽ hkôt ixpa nhũm mẽ Tirtũm kãm mẽ pahto hkra hprãm hã harẽnh ma.

⁸ Nom pika piitã hkôt mẽ ho amnhĩptãr xwýnhjaja na mẽ kormã ja mar kêt nẽ. Kẽp apu mẽ kot mar ronhỹx prem pĩ kahpa hã mẽ panhõ Pahihti nhõr nẽ hpĩr kêt nẽ. Mex o mex tã nhũm prem axtem nẽ ã hipẽx anẽ.

⁹ Mẽ kot mẽmoj mex pumunh kêt tã Tirtũm kapẽr ã kagã htũm kot mẽmoj mex jarẽnh kot:

Na pre Tirtũm mẽ kãm hkĩnh xwýnhjẽ kutẽp mẽmoj mex kwý jaxwý nhũm mex o mex nẽ mẽ ahã hikwý.

Aa mẽhõ kot mẽmoj mex o mexja pumunh kêt.

Nẽ aa mẽhõ kot ã mẽmoj kot anhỹr pumunh kêt.

Nẽ aa ã mẽmoj mex kot anhỹr kukamã hamaxpẽr kêt.

Tã nhũm Tirtũm mẽ kutẽp hkwý jaxwý.

Anhỹr o kot harẽnh tã no nhũm mẽ kot hkôt amnhĩ xunhwýr kêt xwýnhjaja ã kapẽr anhỹrja mar kêt nẽ.

¹⁰ Mẽ pamã na pre Tirtũm ja ho amnhĩrĩt. Na pre ra mẽ pamã Karõ gõ nhũm mẽ pamã gjẽx o mẽ pamã mẽmoj to amnhĩrĩt mex nẽ. Tirtũm Karõja ãhpumunh tỳx o ãhpumunh tỳx. Nẽ kot hprĩ hã Tirtũm jamaxpẽr pumunh par.

¹¹ No mẽ papajaja na pu htem axpẽn jamaxpẽr kôt axpẽn pumunh kêt nẽ. Na pu htem papam amnhĩ jamaxpẽr ã amnhĩ pumu. Ja pyrà nẽ Tirtũm Karõ pix na hte Tirtũm jamaxpẽr pumunh.

¹² No mẽ pahpẽ hkrajaja na hte mẽ pahkarõja pix mẽ pakamã pa hkêt nẽ. Na hte mããnẽn Tirtũm Karõja mẽ pakamã pa nẽ mẽ pamã tanhmã mẽmoj to amnhĩrĩt to ho mẽ pahkôt pa. Nẽ Tirtũm kot mẽ pakutẽp mẽmoj mex jaxwýrja nhũm ja kukamã mẽ pamã harẽnh o amnhĩrĩt.

¹³ Jakamã na pa htem amnhĩ krã hkôt ri mẽ kãm ixujarẽnh kêt nẽ. ãm Tirtũm Karõ nhỹ hã na pa hte ixprĩ hã mẽ kãm kapẽr jarẽnh o ri mẽ hkôt ixpa. Ra Tirtũm Karõ kot mẽ amã gjẽx xwýnhjẽ mã pa ý hã ixkapẽr.

¹⁴ No mẽ kãm Tirtũm Karõ kapẽr mar prãm kêt xwýnhjaja na htem Tirtũm kot amnhĩ nhĩpẽx pumu nẽ hprĩ hã omunh kêt nẽ. Mẽ kãm kapẽr mar prãm kêt jakamã na htem ri kot tanhmã mẽ pahto mex to hã harẽnh ma nẽ hamaxpẽr o:

—Tk. Kwa mo kaxyw na htem ri ã Tirtũm jarẽnh anẽ? Tanhmã kot we amnhĩ to nẽ

mě pahto mex? Nà kot anhÿr kêt. Aně.

¹⁵ Nom mẽ pahpê Tirtùm kra hkwÿ hã mẽ pahte Karõ kapêr mar mex xwÿnhjaja na pu hte mẽ kurom Tirtùm kot amnhĩ nhĩpêx ã omunh mex nê. Nê Karõ xô ri mar mex nê nhũm mẽ kot Karõ kapêr mar kêt xwÿnhjaja tee ri ã mẽ pahte amnhĩ nhĩpêx anhÿr ã mẽ pahpumu. Nom hprĩ hã mẽ pahte Tirtùm kôt amnhĩ nhĩpêx pumunh kêt nê.

¹⁶ Tirtùm kapêr ã kagã htùm kot ja jarênh kot:

Mêhõ na kot Tirtùm jamaxpêr pumunh?

Nê mêhõ na pre we kãm hamaxpêr gõ?

Nà amrakati kumrêx. Tapx-
ipix na àhpumunh tÿx o
àhpumunh tÿx. Aně.

Tã mẽ papajaja mẽ pahte Tirtùm Karõ kapêr mar tÿx xwÿnhjaja na pu htem Kris xô ri pahprĩ hã hamaxpêr kôt omunh mex nê.

3

Mě kot Tirtùm mã tanhmã amnhĩ nhĩpêx to xwÿnhjê jarênh

Wam Korit 14.20; Karatas 5.16-21; Epes 4.14; Eprêw 5.11

¹ E Kris kôt ixtõ nê ixtõxjaja. Pa mẽ amã mẽmoj jarê ka mẽ inhma nê kãm ajamxpêr. Nà amnepê mã kormã mẽ ate Kris kôt amnhĩ nhĩpêx tohtuj anhÿrta ã tanhmã na ka prem amnhĩ nhĩpêx to ho ri apa wehe? Na ka prem arĩ ajamxpêr tùm kôt pix mã amnhĩ nhĩpêx. Kormã mẽ ate Tirtùm Karõ hkôt amnhĩ

nhĩpêx mex kêt jakamã na ka pre htem mẽhprĩre kot amnhĩ nhĩpêx pyrãk o amnhĩ nhĩpêx. Nê mẽ urãk nê kormã mẽmoj piitã omunh kêt nê. Jakamã na pa pre mẽ amã ixujarênh kaxyw nê te mẽ ate kormã Tirtùm kapêr mar kêt xwÿnhjê pyrãk o mẽ anhĩpêx nê mẽ amã tanhmã ixujarênh to.

² Mě hkarãre na htem mẽ hkã kagõ pix kaõ nê kormã mẽ apkur xã mex kur kêt nê. Ja pyrã nê na pa pre te ixte mẽ ato hpijaõr pyrã nê mẽ amã Tirtùm kapêr piitã harênh par kurê kumrêx kêt nê. Æm mẽ amã hkwÿ pix jarê ka prem ama nê Jesus kôt amnhĩ xunhwÿ. Tã na pa hte arĩ mẽ amã hkwÿ pix jarênh o ri ixpa nê kormã piitã ho mẽ ajahkre jatur xãm mênh kêt nê.

³ Na ka htem arĩ te mẽ apê Kris kwÿ hkêt pyrãk o amnhĩ nhĩpêx o apa. Nê mẽmoj kôt axpên kãm agryk axpên mã axãkjêr o apa. Æ amnhĩ nhĩpêx anhÿr jao arĩ mẽ ate amnhĩ nhĩpêx tùm kôt amnhĩ nhĩpêx rãhã nê.

⁴ Na hte mẽ akwÿjaja amnhĩ jarênh o: "Ixpê Pawre hkwÿ na pa." Aně. Nê mẽ akwÿjaja amnhĩ jarênh o: "Pa na ixpê Apor kwÿ na pa." Aně. Kwa na ka htem ã amnhĩ jarênh anhÿr o te mẽ apê Kris kwÿ hkêt pyrãk.

⁵ Apor mẽ pa ãm wa ixte Tirtùm kapêr o mẽ ajahkre xwÿnh pix na pa wa. Wa ixpê mẽ anhõ pahihtĩ hkêt kênã kot ka kêt mẽ axtem nê mẽ apê ahpÿnhã wa ixkwÿ hã

amnhĩ jarẽ. Na pa pre wa mẽ amã Tĩrtũm kapẽr jarẽnh o ri mẽ akõt ixpa ka prem wa inhma nẽ amnhĩ kaxyw hkõt ajamxpẽr tỳx nẽ. Nẽ hkõt amnhĩ xunhwỳ nom wa pa wa ixkõt amnhĩ xunhwỳr kêt nẽ. Na pa wa ãm Tĩrtũm kapẽr o mẽ ajahkre nom amnhĩ kõt mẽ axunhwỳr kêt nẽ.

6-9 E pa ixprĩ hã mẽ amã war amnhĩ jarẽ ka mẽ inhma. Te wa ixpê Tĩrtũm pur kãm wa ixàpênh xwỳnh pyrãk no mẽ kajaja te mẽ apê hpur pyrãk. Na htem hpur karê nhũm hirã nhũm mẽ kamã ahkre ho pa. Ja pyrã nẽ na pa pre ixkumrẽx mẽ awỳr ixpa nẽ mẽ amã Tĩrtũm kapẽr jarẽnh o ri mẽ akõt ixpa. Te mẽ kot pur kãm ahkre ho ri pata pyrãk. Tã nhũm Apor ixpãnhã ma mẽ awỳr pa nẽ te mẽ kot pur karêta pyrãk o mẽ anhĩpêx nẽ mẽ amã Tĩrtũm kapẽr o mẽ ajahkre mex o ri pa. Xà na hte pur karêr xwỳnhja rỳ kamã ahkre xwỳnhja tãm tanhmã mẽmo hy hto nhũm ra higrõt nẽ hprêk nẽ ô? Nà na htem ãm ahkre hpa nhũm arĩ hikwỳ. Nhũm Tĩrtũm tãm tanhmã hyta to nhũm higrõt nẽ hprêk nẽ ô. Ja pyrã nẽ na hte Tĩrtũm mẽ ho hkra nẽ tanhmã mẽ ho nhũm mẽ amnhĩ kaxyw hkõt hamaxpẽr tỳx nẽ hkõt amnhĩ nhĩpêx mex o pa. Nom mẽ kãm harẽnh o pa xwỳnhhta kõt amnhĩ xunhwỳr kêt nẽ.

Nẽ na hte pur karêr xwỳnh rỳ kamã ahkre xwỳnhja tãm tanhmã hyta to nẽ ho hĩr kêt nẽ. Tĩrtũm pix na hte tanhmã ho nhũm higrõt. Ja pyrã nẽ

na pa hte Tĩrtũm kapẽr o mẽ ajahkre o ri mẽ akõt ixpa nom pa tanhmã mẽ ato ka mẽ apê Tĩrtũm kra nẽ ri apa hkêt nẽ. Tanhmã kot pa mẽ ato ka mẽ apê hkra? Tapxipix na kot mẽ pahto hkra kaxyw àhpumunh. Nẽ tapxipix na hte tanhmã mẽ pahkrã hto pu mẽ kãm hprãm xà hkõt amnhĩ nhĩpêx mex o ri papa.

Nẽ pur karêr xwỳnh mẽ pur kãm ahkre xwỳnhja wa. Hamẽ wa àpênh mex jakamã koja hamẽ wa kot pur kãm àpênh pãnhã amnhĩm ujamỳnh rax nẽ. Ja pyrã nẽ kot paj mẽ ixte Tĩrtũm kapẽr o mẽ ajahkre ho ri mẽ akõt ixpa xwỳnhjaja nhũm Tĩrtũm nhỹrmã mẽ ixàpênh pãnhã mẽ inhmã amnhĩrer mex nẽ.

Nẽ te mẽ ate Tĩrtũm nhõ ixkre pyrãk.

10 Nẽ pa te ixpê Tĩrtũm mã ixkre hã ixàpênh xwỳnh pyrãk jakamã na pre Tĩrtũm mẽ akaxyw tanhmã ixto pa mẽ amã tanhmã kot amnhĩ nhĩpêx to hã harẽnh o ri mẽ akõt ixpa. Te ixte õ ixkre kaxyw ãm xà maati xãm pyrãk o mẽ anhĩpêx. Jao mẽ amã kapẽr jarẽnh o ri mẽ akõt ixpa. Mẽ ate amnhĩ kaxyw hkõt ajamxpẽr nẽ hkõt amnhĩ xunhwỳr kaxyw. Tã na ka prem hkõt amnhĩ xunhwỳ nhũm ixpãnhã Tĩrtũm kapẽr o mẽ ahkre ho mẽ pa xwỳnh kwỳjaja mẽ awỳr mra nẽ mẽ amã kapẽr jarẽnh jatur xàm kurẽ. Nẽ hprĩ hã ho mẽ ajahkre ho ri mẽ akõt pa. Te ho mẽ kot ixkre krax nhĩpêx pyrãk o mẽ anhĩpêx.

Ně kwa mẽ ate mẽ ahkre o mẽ apa xwýnhjaja kër ka mẽ akatàt kòt mẽ ahkre mex rāhā ho ri mẽ hkòt apa.

11 Ně Jejus Kris tapxipix na pu htem hkòt amnhĩ xunhwý nhũm mẽ panê mẽ pahte amnhĩ tomnuj o hapêx. Jakamā te kêp kýxpê ixkre nhĩmòk ā nōr xà maatita pyrāk.

12 Ně na htem tōhā ixkre nhĩpêx kaxyw nē pĩ htýx jakā nē ho hipêx nhũm kritpêm mẽ kām mex ry nē kuhê. No na htem tōhā nojarêt kām ixkre hā apê nē pĩ rerek o hipêx nhũm mẽ kām mex ry hkêt nē. Koja rôr nhyre hwýr mra nē mẽ kêp hapòk nē homnu. Ja pyrā nē na hte Tirtũm kapêr o mẽ ahkre ho ri mẽ pa xwýnh kwýjaja te mẽ kot katàt kòt pĩ htýx o ixkre nhĩpêxta pyrā nē katàt kòt mẽ ahkre ho ri mẽ hkòt pa. No nhũm mẽ hkwýjaja axtem nē te mẽ kot pĩ rerek o ixkre nhĩpêxta pyrāk o amnhĩ nhĩpêx nē htýx ri Tirtũm kapêr kwým ri tanhmā mẽ ahkre hto ho pa. Jao hkwým ri amnhĩ nhĩpêx rāhā ho ri pa.

13 Ně koja mēhō pĩ htýx pix o amnhĩm òrkwý nhĩpêx hāmri nhũm mẽmo arĩgro hā tanhmā amnhĩ to nē kêp pòr. No ãm hā pòja pix xêt pa nhũm kām hikwý xà nē òkwa êja arĩ piitā mex nhũm ixkre hpām axte hā pò janhòr o nyw. No koja pĩ rerek o hipêx nhũm mẽmo arĩgro hā kêp pòr hāmri nē piitā kêp kaxàr pa. Ja pyrā nē koja nhýrmā Krisja akupyñ mẽ

pahwýr wrý hāmri nē mẽ pahte kām tanhmā amnhĩ nhĩpêx to ho papaja piitā hā mẽ pahpumunh kòt tanhmā mẽ pajarēnh to. Koja mẽ pahkwýjaja mẽ pahte mẽ kot pĩ htýx o ixkre nhĩpêxta pyrā nē Tirtũm mā mẽ pahte amnhĩ nhĩpêx mex o mẽ papa xwýnhjê xápênh pumu nē mẽ pahte amnhĩ to mex xwýnh ā mẽ pajarē. Hāmri nē hpānhā mẽ kot pĩ rerek o ixkre nhĩpêxta pyrā nē mẽ kot kām amnhĩ nhĩpêx mex kêt xwýnhjê pumu nē mẽ kot amnhĩ to mex kêt xwýnh hā mẽ harê.

14 Ně pĩ htýxja na hte tanhmā amnhĩ to nē hpòr no ãm arĩ mex nē kuhê nhũm mẽ piitā arĩ mex ā omu. Ja pyrā nē koja Krisja mẽ kot kām tanhmā amnhĩ nhĩpêx mex to ho mẽ pa xwýnhjê pumu nē mẽ kot tanhmā kām amnhĩ nhĩpêx to hpānhā mẽ kām amnhĩre nhũm mẽ piitā mẽ kot amnhĩ to mex ā mẽ omu.

15 No pĩ rerekja na hte pòr nē kaxàr pa. Ja pyrā nē mẽ kot Kris mā amnhĩ nhĩpêx mex hkêt xwýnhjaja koja Tirtũm mẽ kām amnhĩrer kêt nē. Nom arĩ mẽ kêp hkra jakamā koja mẽ arĩ kuri htĩr tũm nē pa. No ãm mẽ kot Tirtũm mā amnhĩ nhĩpêx mex kêt jakamā koja mẽ hkwýjê hkĩnh ā amnhĩm mẽmoj mex kwý jamýnh kêt nē. Te mēhō nhòrkwý kêp hpòr nhũm mẽ hkukrêx kwý jamýnh kêt nē ý kamā kurũm hapòx pyrāk.

16-17 E pa mẽ amā mẽmoj

jarë. Ra mẽ ate mar tã mãn ka mẽ ra tanhmã amnhĩ to nẽ hã ano hkêt rý ko. Nã te mẽ pahpê Tirtũm nhõrkwỹ pyræk. Tirtũm nhõrkwỹja õ na. Tã mẽ pahpê hkra nhũm Karõ kot mẽ pakaxwỹnh mã gjêx jakamã te mẽ pahpê õrkwỹ pyræk. Jakamã mẽ kot kapêr kwỹm ri mẽ ajahkre o ri mẽ pa xwỹnhjaja te mẽ kot Tirtũm nhõrkwỹ grãnh xwỹnh pyræk. Kojã mẽ nhỹrmã amnhĩ xà htỹx kamã hamak o pa.

Mẽ pahte amnhĩ to jarkrar kêt ã mẽ pamã karõ

Wam Korit 1.10-25

¹⁸ Nẽ kot kaj mẽ atõ axàhpumunh tỹx o amnhĩ to jarkrar o ri apa japêr. Kwa mẽ jam anhũre nẽ axte ri ã amnhĩ nhĩpêx anhỹr kêt nẽ. Nẽ te mẽ ate amnhĩ nẽ axàhpumunh tỹx xàja nhãm rênh par pyræk o amnhĩ nhĩpêx. Mẽ paxàhpumunh xàja pika kamã mẽ àhpumunh pix jakamã kêt ka mẽ te amnhĩ nẽ nhãm rênh pyrã nẽ hpãnhã Tirtũm xàhpumunh xà hkõt pix mã amnhĩ nhĩpêx o ri apa.

¹⁹ No pika kamã mẽ àhpumunh xwỹnhjaja Tirtũm noo mã te mẽ hkrã pipãnh nẽ htỹx ri pata pyræk. Tirtũm kapêr ã kagã htũm kot mẽ harênh kot:

Pika ja kamã mẽ àhpumunh tỹx ã mẽ kot amnhĩ to jarkrar xwỹnhjaja Tirtũm noo mã te mẽ kot amnhĩ to hêx o pa pyræk. Anẽ.

²⁰ Nẽ mãânên mẽ harênh kot: Mẽ kot amnhĩ xàhpumunh tỹx ã amnhĩ to jarkrar o

ri mẽ pa xwỹnhjaja na hte Tirtũm mẽ omu nẽ mẽ kot ã amnhĩ jarênh anhỹr kaprý hã mẽ harẽ. Anẽ.

²¹⁻²² Jakamã kwa kêt ka mẽ axte mẽ apê ixkwỹ rý mẽ apê Apor kwỹ hã amnhĩ jarênh o ri apa hkêt nẽ. Mẽ apê wa ixkwỹ hkêt kênã. Nẽ mẽ apê nhãm mẽhõ hkwỹ hkêt. Mẽ pahpiitã mẽ pahpê Kris kwỹ na pu mẽ.

Nẽ kot puj mẽ nhỹrmã pahtyk tã akupỹm pahtír nẽ Tirtũm mẽ Jesus wa kuri pamex nẽ pahtír tũm nẽ ri papa. Jakamã kwa mẽ tee ri amnhĩ kukamã ajamaxpêr kêt nẽ.

Nẽ jarãhã mẽmoj piitã mẽ panhõõ. Nẽ kormã mẽmoj kot amnhĩrít kêt xwỹnhjaja haxwỹja mẽ panhõ na. Æm mẽmoj piitã mẽ panhõ jakamã te mẽ pahpê mẽmoj piitã mẽõ pahi pyræk.

²³ No mẽ papajaja axtem Kris kêt mẽ panhõ Pahihti. Nẽ Tirtũm kêt Kris nhõ Pahihti.

4

Tirtũm pix kot tanhmã mẽ pajarênh to xwỹnh ã harênh Eprêw 13.17

¹ Nẽ mẽ pajaja mẽ ixpê mẽ anhõ pahi hkêt. Æm mẽ ixte Kris mã tanhmã amnhĩ nhĩpêx to ho ixpa xwỹnh pix jakamã Tirtũm kormã kapêr kwỹ ho amnhĩrít kêtja na pa htem mẽ amã ho amnhĩrít o ri mẽ akõt ixpa. Ja kaxyw na pre mẽ ixunhwỹ.

² Na pre Kris tanhmã mẽ inhmã kapêr to nê mẽ inhmã:

—E kêr ka mẽ ixkapêr pix o măn mẽ ahkre ho ri mẽ hkôt apa. Anê.

³⁻⁴ Kumã pix mã ixte amnhĩ nhĩpêx o ri ixpa jakamã koja tapxipix ixte kãm amnhĩ nhĩpêx ã ixpumunh kôt tanhmã ijarênh to. Ixte kãm amnhĩ nhĩpêx mex ã ijarê rỳ ixte kãm amnhĩ nhĩpêx mex kêt ã ijarê. ãm tapxipix koja tanhmã ijarênh to. No koja nhãm mēhō rỳ mẽ atō ã ijarênh anê pa ama nê ãm ama. Rỳ papam tanhmã kãm ixte amnhĩ nhĩpêx mex to hã kãm amnhĩ jarênh japêr hãmri nê ãm ixtỳx kãm ã amnhĩ nhĩpêx anhỹr ã amnhĩ jarênh kaprỳ. Pahihti Kris pix kot hprĩ hã mẽ pahte amnhĩ nhĩpêx kôt pahpumunh jakamã tapxipix koja tanhmã mẽ pajarênh to.

⁵ Jakamã kwa kêr ka mẽ ri mẽ kot Tirtũm mã tanhmã amnhĩ nhĩpêx to hã mẽ omunh xà hkôt tanhmã mẽ harênh to hkêt nê. Koja nhỹrmã Pahihti Krisja akupỹn mẽ pahwỳr wrỳ nê rĩ tãm tanhmã mẽ pahte amnhĩ nhĩpêx to hã mẽ pahpumunh xà hkôt tanhmã mẽ pajarênh to. Nê mẽ kot hpimxur pê tanhmã amnhĩ tomnuj to ho mẽ pa xwỳnhjaja nhũm mẽ piitã mẽ noo mã mẽ kãm ja ho amnhĩrit nhũm mẽ ja hã mẽ omu. Nê mẽ pahpiitã mẽ pajamxpêr xà ho amnhĩrit nhũm mẽ piitã hprĩ hã ja hã axpên pumu. Hãmri nhũm Tirtũm rĩ kormã mẽ pahte

kãm tanhmã amnhĩ nhĩpêx mex to ho pa xwỳnhjê jarê.

⁶ E Jejus kôt ixkwỳjaja. Nà na pa ã mẽ amã Apor mẽ wa amnhĩ jarênh anê. Mẽ ate inhmar nê Tirtũm kapêr ã kagà hkôt tanhmã wa ijarênh to kaxyw. Kot kaj mẽ ã amnhĩ nhĩpêx anê hãmri nê ahpỹnhã tanhmã mẽ ixte Kris kapêr jarênh xwỳnhjê jarênh to hkêt nê. Nê axpên mã mẽ ijarênh o:

—Nà tãm kot Kris kapêr jarênh mex o kot hkwỳjê jakrenh jakamã kot paj hkôt pix mã măn ri ixpa.

Anhỹr o axpên mã mẽ ixtō jarênh kêt nê. Kot kaj mẽ ã mẽ ixtō jarênh anê nê te mẽ ixtō jarkrar pyræk o amnhĩ nhĩpêx.

⁷ Kwa mēhō na pre mẽ amã tanhmã ri mẽ ijarênh to ka mẽ mar xà hkôt ã mẽ ijarênh anê? Nê mẽ ixkapêr mex ã mẽ ixkwỳjê jarê nê mẽ ixkapêr mex kêt ã mẽ ixkwỳjê jarê. Nà na ka mẽ ãm amnhĩ krã hkôt ã mẽ ijarênh anê nom Kris xàhpumunh xà ho ã mẽ ijarênh anhỹr kêt nê. ãm mẽ ixte Tirtũm kapêr o mẽ ajahkre xwỳnhjaja na pa prem mẽ amã mẽmoj jarê ka mẽ ama nê mẽ inhỹ hã hkôt axàhpumunh mex nê. No amnhĩ krã hkôt mẽ axàhpumunh kêt kênã kot ka kêt mẽ ã ahpỹnhã tanhmã mẽ ixtō jarkrar anhỹr to ho ri apa.

⁸ Te mẽ ate Apor mẽ wa ixrom Tirtũm kapêr mar par nê hkôt amnhĩ nhĩpêx mex pyræk. Te wa ixrom mẽ

ate Jejus nhĩhko hã mẽ ho amnhĩptar pyrak. Hẽxta waa nẽ. Kop apu am hãmri mẽ ate iħkõ hã mẽ ho amnhĩptar ronhỹx pa ijaxwỹja mẽ apyrã nẽ ã amnhĩ nhĩpẽx anẽ. Hãmri nẽ ixkĩnh tỹx kumrẽx.

⁹ Nom ja kot anhỹr kêt.

Jejus nhỹ hã mẽ ahkre xwỹnhjẽ jarẽnh

Sikũn Korit 4.8-10; Eprẽw 12.1

Nẽ mẽ ixpẽ Jejus nhỹ hã mẽ ajahkre ho mẽ ixpa xwỹnhjaja te Tirtũmja axtem tanhmã mẽ inhĩpẽx to pyrak pa mẽ inhmex kêt nẽ ixpa. Te mẽ ixte gyw kãm amnhĩ rẽnh nhũm mẽ kot mẽ ixkamã õkre kahak pyrak o na htem mẽ inhĩpẽx. Jakamã na hte mẽ hkwyjaja mẽ ixpumu nẽ mẽ ixkapẽr ma nẽ am mẽ inhma nẽ axpẽn mã mẽ ijarẽnh o:

—Tk. Kot mẽ ahkreja mexti hã. Kwa pu mẽ himex ri.

Anhỹr jakamã te ra mẽ ixtyk nẽ mẽ inhĩkwỹ nhũm mẽ piitã mẽ ixtã htu nẽ mẽ ixpumunh nẽ ma pa pyrak o amnhĩ nhĩpẽx. Jakamã na htem mẽ ixte mẽ ahkre ma nẽ am kuma nẽ ma pa. Nom Tirtũm kapẽr o mẽ wrỹk xwỹnhjaja na htem ja hã mẽ pahpumu nẽ axpẽn mã mẽ pajarẽnh o:

—Kwa mẽ kot Jejus ã mẽ hipẽx kati htã nhũm mẽ arĩ hkõt amnhĩ nhĩpẽx mex nẽ aa hkaga hkêt nẽ. Hẽxta waa nẽ. Nã am hãmri na htem ã amnhĩ nhĩpẽx anhỹr o pa. Anẽ.

¹⁰ Na hte mẽ kot mẽ ixkapẽr mar xwỹnh kwỹjaja kãm mẽ ixkĩnh kêt nẽ tanhmã mẽ ixto

kapẽr punuj to. No mẽ kajaja nhũm mẽ ã mẽ ato kapẽr anhỹr kêt nẽ. Na htem mẽ ixkrã pipãnh ã mẽ ijarẽ no mẽ kajaja nhũm mẽ Kris nhỹ hã mẽ axahpumunh tỹx ã mẽ ajarẽ. Nẽ mẽ ixte Tirtũm kapẽr kõt amnhĩ nhĩpẽx mex kêt ã mẽ ijarẽ no mẽ kajaja na htem Tirtũm kõt mẽ ate amnhĩ nhĩpẽx mex ã mẽ ajarẽ. Nẽ mẽ kot mẽ ixkamã õkre kahak tỹx tã mẽ akamã õkre kahak kêt nẽ mẽ kãm mẽ akapẽr mar prãm nẽ.

¹¹ Na pa htem arĩ Kris ã ixpunuj nẽ ixpa. Nẽ mẽ inhmã prãm nẽ mẽ inhmã kôr nẽ ri ixpa. Nẽ mẽ ixẽ pikaxõnhre nẽ ri ixpa. Nhũm htem Kris ã mẽ ixtak rũnh nẽ. Pa mẽ inhõrkwỹ hkêt nẽ nhãm ri ixpa nẽ nhãm ri ixpa. Na pa htem arĩ ã amnhĩ nhĩpẽx anhỹr o ri ixpa.

¹²⁻¹³ Nẽ ixapkur xã kaxyw ixapẽnh rũnh o ri ixpa. Nhũm hte mẽ kãm Jejus prãm kêt xwỹnhjaja mẽ ijapry ho pa htã pa mẽ amnhĩ kurom mẽ kãm ixkapẽr mex nẽ mẽ kãm:

—E kẽ Tirtũm mẽ ato mex nẽ ka mẽ amex nẽ apa. Anẽ.

Nẽ mẽ kot mẽ inhĩpẽx kati htã pa htem mẽ kutã amnhĩ to htỹx nẽ arĩ mẽ hkõt ixpa. Na htem te mẽ kot ahpunuj nhĩpẽx pyrak o mẽ inhĩpẽx nẽ mẽ ixwyr mrar kêt nẽ. ã na htem mẽ ixte Jejus nhỹ hã mẽ ahkre o mẽ ixpa xwỹnhjẽ nhĩpẽx anẽ.

Pawre te kęp mẽ hpãm pyrãk ã kot amnhĩ jarẽnh

Wam Tesarõn 2.11-12

14-15 E Kris kôt ixkwỳjaja. Na pa ã mẽ amã kagà nẽ mẽnh anẽ. Nom mẽ ate inhmar nẽ amnhĩ kamã apijaàm kaxyw kêt. Inhmã mẽ ajapê jakamã na pa ã mẽ amã ixkapêr nẽ hã kagà nẽ mẽnh anẽ. Na mẽ ra ohtô nẽ xipãnhã mẽ awỳr pa nẽ mẽ amã Tirtũm kapêr o mẽ ajahkre. Nom ixkumrêx na pa pre mẽ amã kapêr jarê ka prem inhma nẽ Kris hkôt amnhĩ xunhwỳ nẽ amnhĩ kaxyw hkôt ajamaxpêr tỳx nẽ. Jakamã paxipix te xipê mẽ apãm nhũm te mẽ apê ixkra pyræk.

16 Jakamã kwa mẽ ixte amnhĩ nhĩpêx kôt ixpumu nẽ ixkôt mãn kêt mẽ amnhĩ nhĩpêx o ri apa.

17 ã mẽ ate amnhĩ nhĩpêx anhỳr kaxyw na pa pre ijaxmaxpêr nẽ ma mẽ awỳr Ximotre mẽ. Haxwỳja Kris kôt te kêp ixkra pyræk. Nẽ inhmã hapêê. Na hte jar Kris mã tanhmã amnhĩ nhĩpêx mex to ho pa. Tã pa pre mẽ awỳr kumẽ. Koja ma mẽ awỳr mỗ nẽ pøj nẽ mẽ amã Kris kapêr jarênh o ri mẽ akôt pa. Nẽ mẽ amã tanhmã ijarênh to nẽ mẽ amã:

—Nà Pawre na hte Jesus Kris jamaxpêr kôt hamaxpêr o pa. Nẽ kot amnhĩ nhĩpêx kôt amnhĩ nhĩpêx o pa. Nẽ krĩ piitã hkôt mẽ kot uræk nẽ ã amnhĩ nhĩpêx o pa anhỳr kaxyw mẽ ahkre mex o pa. Anẽ.

18 Nẽ na xep mẽ akwỳjaja te ra àhpumunh tỳx pyrà nẽ tanhmã ijarênh to nẽ ijarênh o:

—Pawreja akupỳn mẽ pahwỳr mỗr ã amnhĩ jarênh tã koja akupỳn mỗr kêt nẽ kãm ga. ãm kapêr kati xwỳnh na.

19 Anhỳr ã ijarênh tã koja Tirtũm kãm tokyx ma mẽ awỳr inhmỗr prãm hã kot pa ma mẽ awỳr inhmỗr kurê kumrêx. Hãmri nẽ pøj nẽ ixprĩ hã ã mẽ kot ixto kapêr anhỳr xwỳnhhtajê pumu. Nẽ mễhỗ kot ã mẽ kãm ijarênh anhỳr xwỳnhhta ã ahkukja.

20 Tirtũm krajaja na htem hkôt pix mã amnhĩ nhĩpêx jakamã na htem hkôt tanhmã amnhĩ nhĩpêx to hã mẽ omu nẽ rĩ kormã kêp hkra hã mẽ harê. Tã kot paj nhỹrmã mẽ awỳr pøj nẽ ã ixto kapêr anhỳr xwỳnhjê pumu nẽ ixprĩ hã mẽ kot amnhĩ nhĩpêx ã mẽ omu nẽ rĩ kormã tanhmã mẽ harênh to. Jao Tirtũm nhỹ hã mẽ kot mẽ ajahkre hã mẽ omu rỳ amnhĩ krã hkôt mẽ kot mẽ ajahkre hã mẽ omu nẽ rĩ kormã tanhmã mẽ harênh to.

21 Jakamã kwa mẽ tokyx ixkutêp tãm amnhĩ nhĩpêx o ri apa. Kêr pa mỗ nẽ mẽ awỳr pøj nẽ mẽ ate tãm amnhĩ nhĩpêx ã mẽ apumu nẽ ixkĩnh nẽ. Nẽ mẽmoj tã mẽ amã ixàkjêr kêt nẽ. Nẽ mẽ amã ixkapêr mex pix o ri mẽ amã ixkapêr. Te mẽ hipêêxà kot hkrajê mã kapêr mex pyræk o mẽ amã ixkapêr mex nẽ. Hãmri pu mẽ axpênh pumu nẽ pahkĩnh nẽ.

5

Mễhỗ kot tanhmã amnhĩ

tomnuj to hã harënh

Sikũn Korit 2.5-11

¹ Nê kwa na pa pre tee ri mẽ anhiõja jarënh ma nê ixkaprĩ htỳx nê. Na xep hte amnhĩ tomnuj tỳx pẽ nã puro hã hpijaàm kêt o pa. Kwa mẽ pahpê Kris kwỳjaja mẽ pahte ã amnhĩ nhĩpêx anhỹr kêt nhũm mẽ kot Kris kôt amnhĩ xunhwỳr kêt xwỳnhjaja haxwỳja ã amnhĩ nhĩpêx anhỹr kêt tã nhũm ra mẽ anhiõja kot Kris kôt amnhĩ xãm tã ã amnhĩ nhĩpêx anê. Kwa ja omnuj tỳx kumrêx.

² Na xep ri ã amnhĩ nhĩpêx anhỹr o pa ka mẽ ja hã omu nê ãm omu nê nê tanhmã kãm nê hkêt nê. Amari hã omunh o ri hkôt apa. Mẽ ate Tirtũm kôt axàhpumunh tỳx ã amnhĩ jarënh tã no ãm ja hã omu nê ãm hã omu nê nê tanhmã kãm nê hkêt nê. Kwa nà. Mẽ tee ri kot ã amnhĩ nhĩpêx anhỹrja ã omu nê akaprĩ nê hkêt wehe. Nê mẽ tokyx amnhĩ nê hano kê mẽ akôt Tirtũm mã amnhĩ jarënh xà hã ixkre hwỳr axte mrar kêt nê.

³⁻⁵ Ixte mẽ apê awry htã ã kot amnhĩ nhĩpêx anhỹr ã harënh ma nê hkukamã tanhmã ijamaxpêr to. Nã ra ixte mẽ awỳr ixpôx ronhỳx pa mẽ ato akuprô. Pahihti Jejus nhỹ hã mẽ ato akuprô nê mẽ amã kot amnhĩ tomnuj xwỳnhhta jarë nê mẽ anê hanor kurê kumrêx. Jakamã e kêr ka mẽ mãmri ã amnhĩ nê hipêx anê. Mẽ panhõ Pahihti Jejus nhỹ hã amnhĩ nê hano nê te Satanasti mã rer pyrãkê tee ri ja hã amnhĩ pumu nê tokyx kãm urer

japêr. Hãmri nê akupỳm tãm amnhĩ nhĩpêx. Kê nhỹrmã Pahihti akupỳn mẽ pahwỳr wrỳ nhũm ma mẽ pahkôt ô krĩ hwỳr api.

⁶ Mẽ ate Tirtũm kapêr jarënh mar mex ã amnhĩ jarënh tã kormã amnhĩ nê ã kot amnhĩ nhĩpêx anhỹr xwỳnhhta janor kêt nê. Kwa mẽ tokyx amnhĩ nê hano. Na htem pãwti nhĩpêx kaxyw nê kamã kot ho hikot xà ho hkryre nê kamã kurê nê gaa nê ri ho piitã hikot pa. Ja pyrã nê kot ka mẽ amnhĩ nê kot amnhĩ tomnuj xwỳnhhta janor kêt nê hãmri nê gaa nê ra urak nê apiitã ã amnhĩ nhĩpêx anhỹr o ri apa.

⁷ Kwa mẽ tokyx amnhĩ nê hano. Kêr ka mẽ arĩ amnhĩ to mex pix o ri axpên kôt apa nê tãm ri amnhĩ nhĩpêx o ri axpên kôt apa. Na pre ra Jejus Kris mẽ pahte amnhĩ to mex o papa kaxyw mẽ panê ty. Mẽ pahpiitã mẽ panê ty.

⁸ Jakamã na pu htem ãm amnhĩ to mex pix o ri papa. Nê tãm amnhĩ nhĩpêx o ri papa. Jao tanhmã amnhĩ tomnuj to ho ri papa hkêt nê.

⁹ Nê wam ixte mẽ awỳr kagà nê mênhta kamã na pa pre mẽ amã:

–Kêr ka mẽ nhãm mẽ kot mênijê kamã hpijaàm kêt o mẽ pa xwỳnhjê hkôt ri apa hkêt nê. ãm ri mẽ hkax ã apa.

Anhỹr o mẽ amã hã karô.

¹⁰⁻¹¹ Nom na pa pre mẽ piitã ã mẽ nê mẽ akurê anhỹr kêt nê. ãm mẽ kêp Kris kwỳ hã amnhĩ jarënh tã ã ri amnhĩ tomnuj anhỹr xwỳnh pixjaja

na pa pre mẽ nê mẽ akurê. Koja mẽhõ kêp Kris kôt mẽ pahtõ rỳ mẽ pahtõx ã amnhĩ jarênh tã mẽ kamã hpijaàm kêt o ri pa ka mẽ ja hã omu nê hkôt ri apa hkêt kurê kumrêx.

Nẽ mẽ kãm nhãm mẽ hkukrêx kĩnh o kãm ho õ hprãm o ri mẽ pa xwỳnhjaja.

Nẽ sãnti kutã hkõn krã ho rôrõk nê hkrĩ nê kãm mex ã harênh o ri mẽ pa xwỳnhjaja.

Nẽ mẽ kot axpẽn to kapêr punuj o ri mẽ pa xwỳnhjaja.

Nẽ mẽ pipãnh o ri mẽ pa xwỳnhjaja.

Nẽ axpẽn pê ri mẽ àhkĩnh o mẽ pa xwỳnhjaja.

Koja mẽhõ kêp Kris kwỳ hã amnhĩ jarênh tã ã amnhĩ nhĩpêx anhỹr o ri pa ka mẽ ja hã mẽ omu nê hkôt ri apa hkêt kumrêx. Nẽ mẽ kutã axàpkur kêt nê. ãm mẽ hkàx ã ri mra.

No mẽ kêp Kris kwỳ hkêt xwỳnhjê nê na pa pre ã mẽ akurê anhỹr kêt nê. Mẽ piitã ã mẽ kot amnhĩ nhĩpêx anhỹr o pa kênã. Na htem axpẽn kãm hpijaàm kêt o ri pa.

Nẽ mẽ kãm axpẽn kukrêx kĩnh o kãm ho õ hprãm o ri pa.

Nẽ sãnti kutã hkõn krã ho rôrõk nê hkrĩ nê kãm amnhĩ jagrer pê amnhĩ to hwỳr o pa.

Nẽ mẽ axpẽn pê àhkĩnh pix o pa.

Kris kwỳ hkêt xwỳnhjaja na htem ã amnhĩ nhĩpêx anhỹr o pa. Tã tanhmã kot ka wem amnhĩ to nê mẽ hkàx ã ri

apa? Mẽ piitã ã mẽ kot amnhĩ nhĩpêx anhỹr kênã. Kot puj mẽ nhỹrmã Tĩrtũm nhõ krĩ mex wỳr api nê rĩ kormã mẽ hkàx ã ri papa.

12-13 Nẽ mẽ kêp Kris kwỳ hkêt xwỳnhjaja na pa hte mẽ kot amnhĩ tomnuj ã mẽ omu nê ãm mẽ omu nê tanhmã hã mẽ kãm nê hkêt nê. Tĩrtũm tãm koja nhỹrmã ja hã tanhmã mẽ hipêx to. No koja Kris kôt mẽ pahtõ rỳ mẽ pahtõxjê hõ tanhmã amnhĩ tomnuj to ho pa pu mẽ pahtõ ja hã omu nê nê tanhmã kãm pakapêr to kurê kumrêx. Tĩrtũm kapêr ã kaga htũm kot ja jarênh kot:

Kêr ka mẽ amnhĩ nê Kris kôt akwỳjê hõ kot tanhmã amnhĩ tomnuj to ho pa xwỳnhjê jano. ã harênh kot anhỹr.

6

Mẽ pahte Kris kwỳjê ho pakapêr kêt

Matêwre 5.38-40

1 Nê na ka xep htem Kris kôt atõ rỳ atõxjê hõ mẽ ka wa tanhmã axpẽn tomnuj to nê axtem nê juisti hwỳr axpẽn to mra. Mẽ apyrã nê kêp Kris kwỳ hkêt tã ka htem ma hwỳr amnhĩ to mra nhũm war axpẽn tã war ama nê tanhmã war ajarênh to. Kwa mon ka htem axtem nê ã Kris kwỳ hkêt xwỳnhjê hwỳr mẽ amnhĩ to amrar anê? Kêt mẽ Kris kôt anhĩõ hwỳr mãn kêt mẽ amnhĩ to mra nê kumã mãn amnhĩ jarê kê axpẽn tã war ama nê axpẽn tã tanhmã war amã kapêr to.

² Ra mẽ ate ja mar tỳx tã hkôt amnhĩ nhĩpêx kêt nê. Mẽmoj ãm grire htã ka wa tokyx akupỹm hã tãm axpẽn xãm kêt nê. Rỳ Kris kôt war atôjê hõ hwỳr wa amnhĩ to atẽm nhũm akupỹm tãm axpẽn tã war axãm kêt nê. ãm axtem nê mẽ kêp Kris kôt mẽ atõ hkêt xwỳnhjê hwỳr amnhĩ to mra. Kwa mẽ ã amnhĩ nhĩpêx anhỳr kêt nê. Mẽ pahpê Kris kwỳjaja kot puj mẽ nhỹrmã Kris nhĩhkô hã mẽ kêp hkwyỳ hkêt xwỳnhjê tanhmã mẽ harẽnh to.

³ Nê Tĩrtũm kapêr o mẽ wrỳk xwỳnhjaja kot puj mẽ mããnẽn nhỹrmã tanhmã mẽ harẽnh to ho pahkrĩ. Jakamã kwa mãmrĩ ã mẽ pahte amnhĩ nhĩpêx anhỳrja kukamã akupỹm tanhmã axpẽn xunhwỳr to ho apa. Mẽmoj tã mẽ atôjê hõ wa kot tanhmã axpẽn to hã wa omu nê tokyx akupỹm axpẽn tã wa kãm akapêr kê wa tokyx akupỹm tãm axpẽn nhĩpêx. ã mẽ kot axpẽn nhĩpêx anhỳr o paja na kêt mex.

⁴ No na ka xep htem arĩ Kris kôt mẽ akwỳ hkêt xwỳnhjê hwỳr axpẽn to mra nê mẽ kãm amnhĩ jarẽ. Kwa mẽ ri ã amnhĩ nhĩpêx anhỳr kêt nê.

⁵ Mẽ tokyx tee ri ja hã amnhĩ pumu nê amnhĩ kamã apijaam kêt wehe. Xà mẽ akamã Kris kôt mẽ atôjê hõ pixire nê kot tãm akupỹm mẽ axunhwỳr kaxyw amrakati kumrêx?

⁶ Na ka xep htem mẽmoj tã axpu. Kris kôt mẽ atôjê hõ mẽ mẽmoj tã axpu nê ra mẽ

kêp Kris kwỳ hkêt xwỳnhjê hwỳr amnhĩ to mra. Kot tãm akupỹm mẽ unhwỳr xwỳnhjê hwỳr amnhĩ to mra.

⁷ Mẽ apijapu ho apa jakamã na ka mẽ amnhĩ tomnuj tỳx nê. Hãmri nê te mẽ apê Kris kwỳ hkêt xwỳnh pyrà nê mẽ hwỳr amnhĩ to mra. Kwa kwãr Kris kôt anhĩõ mãmrĩ apê ahkĩ rỳ tanhmã anhĩpêx to. Ka mẽ ãm amnhĩ tã omu kê tapxipix tanhmã amnhĩ tomnuj to.

⁸ Ja mex tã mẽ ate ã amnhĩ nhĩpêx anhỳr kêt. Na ka htem axpẽn pê ahkĩ. Mẽ ate Kris kôt axpẽn to atõ nê atõx tã axtem nê ã axpẽn nhĩpêx anê. Te mẽ apijaam kêt pyrãk o amnhĩ nhĩpêx o ri apa.

⁹⁻¹⁰ Mẽ kot tanhmã amnhĩ tomnuj to xwỳnhjaja koja mẽ nhỹrmã ma Tĩrtũm nhõ krĩ mex wỳr àpir kêt nê. Ra mẽ ate ja jarẽnh mar tỳx.

Mẽmyjê hõ kot nhãm mẽnijê hõ ho amnhĩ kati xwỳnhjaja.

Nê mẽnijê hõ kot nhãm mẽmyjê hõ ho amnhĩ kati xwỳnhjaja.

Nê mẽnijaja axtem nê mẽ kot amnhĩõ ho mjên o ri mẽ pa xwỳnhjaja.

Nê mẽmyjaja haxwỳja axtem nê amnhĩõ ho hprõ ho ri mẽ pa xwỳnhjaja.

Nê mẽ ãhkĩnh o ri mẽ pa xwỳnhjaja.

Nê mẽ kãm nhãm mẽ hkukrêx kĩnh o kãm ho õ hprãm o ri mẽ pa xwỳnhjaja.

Nê ri mẽ pipãnh o mẽ pa xwỳnhjaja.

Nē ri axpēn to kapēr punuj
o mē pa xwýnhjaja.

Nē mē kot amnhĩ to sãnti
hwýr o mē pa xwýnhjaja.

Ã mē kot amnhĩ nhĩpêx anhýr
xwýnh piitã koja mē Tirtũm
nhõ krĩ hwýr àpir kêt nē.

¹¹ Kormã mē ate Kris
kõt amnhĩ xunhwýr kêt ri
na ka pre mē akwýjaja ã
amnhĩ nhĩpêx anhýr o ri apa.
Tã amnhĩ kaxyw Jejus kõt
ajamaxpēr nē hkõt amnhĩ
xunhwý. Hãmri nhũm Tirtũm
Karõ mē Pahihti Jejus Krisja
wa mē anê mē ate amnhĩ
tomnuj piitã rēnh pa nē
mē apê Tirtũm kra hã mē
axunhwý nē amnhĩm mē ate
amnhĩ to mex xwýnh ã mē
ajarē.

*Mē pahte tãm amnhĩ nhĩpêx
o papa hã mē pamã karõ*

*Matêwre 5.27; Rõmãn 12.1-
2; Epes 5.3; Korosē 3.5; Wam
Tesarõn 4.1-8*

¹² Nē na ka hte mē akwýjaja
amnhĩ jarēnh o:

—Nà na pa hte pa inhmã
tanhmã amnhĩ nhĩpêx to
hprãm xà hkõt amnhĩ krã
hkõt amnhĩ nhĩpêx o ri ixpa.
Anē.

Mē ate ã amnhĩ jarēnh
anhýr tã no ãm mē ate amnhĩ
jarēnhja mex kêt. Mēmoj
piitã mē pamã mex kêt. Na
pu htem pamã hprãm xà
hkõt mēmoj to anē nē gaa
nē ra ho amnhĩ pyrã nē ho
anhýr pix o papa. Nē gaa nē
kãm panhũrer kêt kumrēx.
Jao ra pahpipãnh pix o ri
papa. Rý paxêx pix o ri
papa. Rý paxãhkĩnh pix o
ri papa. Jakamã kēr pu mē

pamã tanhmã amnhĩ nhĩpêx
to hprãm xà hkõt tanhmã
amnhĩ nhĩpêx to ho papa hkêt
nē. ãm amnhĩ mē amnhĩ
kaxyw Jejus mã pajamaxpēr
pix nē.

¹³ Nē na htem amnhĩ jarēnh
o:

—Nà kot paj inhmã prãm nē
mãmri mēmoj ku. Nē inhmã
nhãm mēhõ kamã ixpijaãm
kêt prãm nē mãmri ã amnhĩ
nhĩpêx anē. Ja tanhmã inhmã
kute hkêt. Anē.

Tã koja nhýrmã Tirtũm mē
panhĩja o hapêx pa. Na pre
mē pahte nhãm mē kamã
pahpijaãm kêt o papa kaxyw
mē panhĩpêx kêt nē. ãm mē
pahte mē panhĩpêx xwýnh
maatija mã tanhmã amnhĩ
nhĩpêx mex to ho papa pix
kaxyw na pre mē panhĩpêx.

¹⁴ Nē na pre Pahihtija ty
nhũm Tirtũm akupým ho
htĩr. Ja pyrã nē kot puj mē
nhýrmã mē pajaxwýja ty
nhũm akupým mē pahto mē
pahtĩr. Ja kaxyw tapxipix pix
na àhpumunh týt x o àhpumunh
týt x.

¹⁵ Na pu htem Kris kõt
amnhĩ xunhwýr kõt pahpê
hkwý nē te pahpê ĩ pyrãk.
Jakamã kwa mē ja hã
anohtýt x nē axte nhãm mē
hkuprýtjê hwýr amrar nē mē
ho amnhĩkati hkêt nē. Tirtũm
kêp ja omnuj. Te mē pahte
Kris nhĩ pyrãk jakamã kot
kaj mē ã amnhĩ nhĩpêx anhýr
jao te Kris tãm kot ã amnhĩ
nhĩpêx anhýr o pa pyrãk. Kwa
ja mex kêt. Xà kot we Krisja ã
amnhĩ nhĩpêx anē? Nà koja ã
amnhĩ nhĩpêx anhýr kêt nē.

16 Tirtũm kapēr ā kagà htũm kot ja jarēnh kot:

Kot ka mẽ atō mēnijē hō ho aprō nhũm kēp aprō kumrēx. Hāmri nē te ra war atipxi pyrāk o axpēn nhīpēx. Anē.

Ā kot aprō mẽ wa ajarēnh anhȳr jakamā kwa kēr ka mẽ atȳx ri nhām mẽ hkuprȳjē hwȳr apa hkēt nē. Kot kaj mẽ ā amnhī nhīpēx anē nē Tirtũm noo mã te ate aprō kuhpa hā hkuprȳta o aprō pyrāk. Te wam aprōta kuhpa hā war atipxi pyrāk.

17 Na pu htem Pahihti Je-
 jus Kris kōt amnhī xunhwȳ
 nhũm amnhī tā mẽ pahpumu
 nē mẽ pamā Karō gō nhũm
 mẽ pamā agjē. Pu mẽ ra
 Karōja kōt te ra Jejus mẽ wa
 pahtipxi nē ri papa pyrāk o
 axpēn nhīpēx. Jao Kris ja-
 maxpēr mẽ mẽ pajamaxpērja
 te wa kot axpēn pyrāk. Nē
 Kris kot amnhī nhīpēx mẽ mẽ
 pahte amnhī nhīpēxja te kot
 axpēn pyrāk.

18 Jakamā kwa kēr ka mẽ
 amnhī prō pix tãnopxar o ri
 apa. Nē mẽ anijaja amjēn
 pix tãnopxar o ri apa. No mẽ
 nhām mẽmyjē ho amnhīkati
 ho ri apa hkēt nē. Nē mẽ
 amyjaja nhām mēnijē ho
 amnhīkati ho ri apa hkēt
 nē. Kot ka mẽ nhām mẽmoj
 tanhmā omnuj kute ho anē
 no ām amnhī nhī homnu hkēt
 nē. Nom kot kaj mẽ nhām
 mēnijē ho amnhīkati rȳ nhām
 mẽmyjē ho amnhīkati hāmri
 nē ra amnhī nhī homnu hpa.

19 Mē panhī kamā na
 hte Tirtũm Karō agjē nē

kamā hkrī. Tirtũm na pre
 mẽ pahwȳr kurē nhũm mẽ
 pahkarō mã agjē pu mẽ te mẽ
 pahpē ōrkwȳ pyrāk. Jakamā
 na pu htem amnhī krā hkōt
 pahȳx ri mẽmoj tanhmā ho
 ho papa hkēt nē. Ām Tirtũm
 jamaxpēr xā hkōt pix mã
 na pu htem tanhmā mẽmoj
 nhīpēx to ho papa.

20 Na pre ra Jejus mẽ
 pahte amnhī tomnuj pãnhā
 amnhīrer kaxyw mẽ pahpiitā
 mẽ panē ty. Te htyk o
 amnhīm mẽ pajaprōr pyrāk
 o mẽ panhīpēx. Jakamā kwa
 kēr pu mẽ ām hkōt pix mã
 mãn ri amnhī nhīpēx rāhā ho
 ri papa. Kē mẽ pahkwȳjaja
 ja hā mẽ pahpumunh kōt
 Tirtũm mã mex o mex ā
 harēnh o ri pa.

7

*Mē mjēn mẽ mẽ hprō wa
 kot axpēn to mex ā mẽ pamā
 karō*

*Epes 5.22; Korosē 3.18;
 Eprēw 13.4*

1 Nē ota mẽ ate ixwȳr kaga
 nē mēnhta na pre ixwȳr pōj
 pa omu. Nē kamā mẽ ate mẽ
 aprō hā ixkukjēr xwȳnhta pa
 kamā harē nē omu. Tā kot paj
 mẽ amā tanhmā harēnh to ka
 mẽ inhma.

Nā kot ka mẽ amyjē hō
 amā aprō hkēt nē ahte ri apa
 hprām nē kam nē aprō hkēt
 apa. Ja tanhmā kute hkēt.
 Nom kēr ka mẽ hkuprȳjē ho
 presija ho ri apa hkēt nē.

2 Na htem tōhā kām hprō
 hprām kēt nē ri pa nē gaa
 nē mẽ hkuprȳjē hō pumu rȳ
 mẽ kēp mẽ hprōjē hō pumu

nē kamā hpijaàm kêt o ri pa. Ja pymaj kêt ka mē amyjaja māmri aprō nē mē anijaja māmri amjên.

³ Nē mē anijaja. Koja mē amjên akamā hkurē ka mē māmri kām amnhī gō kē mē anī. Nē mē amyjaja määnēn. Koja mē aprō mē akamā hkurē ka mē māmri mē anī.

⁴ Ām ka amā tanhmā amnhī nhīpêx to hprām xà hkôt pix mā amnhī nhīpêx kêt nē. Määnēn amā aprō kot kām tanhmā amnhī nhīpêx to hprām xà hkôt määnēn hkôt kām amnhī nhīpêx.

⁵ Nē kot kaj mē mēmo arīgro hā amā Tirtūm mā amnhī jarēnh ryy hprām japêr. Hāmri nē aprō mā:

—E kot puj jarāhā axpēn to amnhīkati hkêt nē. Kot puj ām Tirtūm pix mā amnhī jarēnh o amŷkry. Anē.

Hāmri nē māmri ā amnhī nhīpêx anē. No kwa kêt ka mē ām ja ho anhŷr o apkati pixi nē kām anhūre. Nhūm jāā ka mē amā axpēn to amnhīkati hprām nē māmri tanhmā axpēn nhīpêx to. No kot kaj mē ā amnhī nhīpêx anhŷr kêt o hā atā apkati xohtō nē gaa nē ra akurē xāj axtem nē Satanasti jamaxpêr o ajamaxpêr. Jao nhām mēhō ni hwŷr mra nē aprō kuhpa hā kamā akurē ho kamā apijaàm kêt. Rŷ nhūm mēnijaja nhām mēmyjê hō hwŷr mra nē mjên kuhpa hā kamā hkurē ho war axpēn kamā hpijaàm kêt.

⁶ E mē ate ja hā ixkukjêr jakamā na pa ā ixprī hā mē amā ja jarēnh anē. Ka mē

akwŷjaja amā aprō hprām nē māmri aprō nē ri apa. Nē mē akwŷjaja amā aprō hprām kêt nē māmri aprō hkêt nē ri apa. Nom kot pa paa mē amā mē aprō hā ixàmnēnh kêt nē. Ka mē kam amnhī krā hkôt ajamaxpêr xà hkôt tanhmā amnhī nhīpêx to.

⁷ Na pa hte ixprō hkêt nē ri ixpa nom inhmā ja mex pa hte ahte ixpa.

Mē mjên kêt nē mē hprō kêt xwŷnhjê jarēnh

Nē kormā mē aprō hkêt xwŷnhjaja. Ka mē ixpyrà nē aprō hkêt nē ri apa ronhŷx inhmā ja mex nē. Na hte mēmy hkwŷjaja hprō kêt nē ri pa nhūm Tirtūm ja hā mē omu nē tanhmā mē ho nhūm mē mex nē ri pa nē mēnijê kamā hkurē ho mē kamā hpijaàm kêt o ri pa hkêt nē. No na hte mē hkwŷjaja hprō hkêt nē ri pa nē gaa nē ra hkurē xāj mēnijê kamā hpijaàm kêt. Ā mē ate amnhī nhīpêx anhŷr pymaj kêt ka mē amā aprō hprām nē māmri aprō. Tirtūm mā ja mex kēnā.

⁸ E mē aprō hkêt nē mē amjên kêt xwŷnhjaja. Nē ra mē apê mē aprō htyk rŷ mē amjên htyk xwŷnhjaja. Pa mē amā mēmoj jarē. Nà kot kaj mē ixpyrà nē mē aprō hkêt nē ri apa rŷ mē amjên kêt nē ri apa nhūm ja inhmā mex nē.

⁹ No kot ka mē atō ra akurē japêr nē māmri aprō rŷ māmri amjên. Ja määnēn tanhmā kute hkêt.

*Mē pahte axpēn kaga hkēt
ã mē pamã karõ*

*Matêwre 5.31, 19.3-9;
Makre 10.2*

¹⁰ E kot paj hpãnhã ra mē ate axpēn to amjēn nē axpēn to aprõ xwýnhjē mã ixkapēr. Nom kot paj amnhĩ krã hkôt tanhmã ixkapēr to hkēt nē. Pahihti Jejus Kris kapēr xà hkôt kot paj mē amã ixkapēr. Jakamã e kêr ka mē anijaja mē amjēn kaga hkēt nē.

¹¹ Nom kot kaj mē tanhmã ajamaxpēr to nē hkaga japēr hãmri nē ahte ri apa nē axte nhãm mēhõ ho amjēn kêt nē. Rý tee ri amnhĩ kukamã ajamaxpēr nē mãmri akupým amjēnta wýr tē nē akupým hkôt ri apa. No kêr ka mē axte nhãm mēhõ ho amjēn kêt nē.

Nē ra mē amyjaja kêr ka mē ajaxwýja ã amnhĩ nhĩpêx anē nē mē aprõ kaga hkēt nē. E kêr ka mē ã amnhĩ nhĩpêx anhýr o ri apa.

¹² Nē mē ate ixwýr kagã mēnh kamã axpēn tã ixkukjêrta kot paj hpãnhã mē amã harē. Na Pahihti Jejusja ja hã tanhmã inhmã nē hkēt nē. Æm amnhĩ krã hkôt kot paj mē amã tanhmã harēnh to ka mē inhma.

Ka mē amyjē hõ ra Kris kôt amnhĩ xãm nom nhũm aprõ kormã hkôt amnhĩ xãm kêt japēr. Nom koja kãm arĩ ri akôt pa hprãm ka hkaga hkēt nē. Kê arĩ ri akôt pa.

¹³ Nē mē anijaja. Ka mē ajaxwýja ra apē Kris kwý hã ri apa nhũm amjēn kēp hkwy hkēt tã arĩ ri akôt pa hprãm nē

arĩ ri akôt pa ka hkaga hkēt nē.

¹⁴ Kêp Kris kwý hkēt tã koja akôt Kris kwýjē hkôt ri pa. Rý mē aprõ kêp Kris kwý hkēt tã koja akôt Kris kwýjē hkôt ri pa. Jao Tirtũm kapēr mar o pa nē gaa nē apyrà nē hkôt amnhĩ xãm japēr. Nē mē akra kêp Kris kwý hkēt xwýnhjaja haxwýja mē akôt Kris kwýjē hkôt ri pa nē Tirtũm kapēr mar o pa nē gaa nē akôt Jejus kôt amnhĩ xunhwýr japēr.

¹⁵ Nom koja aprõ kêp Kris kwý hkēt ã kãm akaga hprãm nē rĩ tãm mãmri akaga. Rý amjēn kêp Kris kwý hkēt ã kãm akaga hprãm nē rĩ tãm mãmri akaga. Kêr ka mē kot akaga nē tee ri kãm tanhmã akapēr to hkēt nē. Kwâr mãmri akaga ka ahte ajamakêtkati nē axãmnhix ri apa. Mē pajamakêtkati nē mē pamex nē ri papaja na Tirtũm kãm hprãm.

¹⁶ No koja amjēn kêp Kris kwý hkēt tã kãm mē akaga hprãm kêt nē ka mē hkaga hkēt nē. Rý aprõ kêp Kris kwý hkēt tã ka mē kam hkaga hkēt nē. Koja arĩ ate amnhĩ nhĩpêx ã apumunh o ri akôt pa nē gaa nē rĩ apyrà nē Kris kôt amnhĩ xãm japēr.

¹⁷ Jakamã kot ka mē aprõ rý amjēn ra Kris kôt ahte amnhĩ xãm. Hãmri nē wa arĩ ri axpēn kôt ri apa ho apa. Na pa hte krĩ piitã hkôt Jejus kôt mē pahkwýjē mã ã ixujarēnh anhýr o ri ixpa. Tã kêr ka mē ã amnhĩ nhĩpêx anhýr o ri apa.

Kris kôt amnhĩ xunhwýr

kêt ri tanhmã mẽ pakute hã mẽ pajarênh

18 Ja pyrã nê kot kaj mẽ ra amy kwryt kà jakàr japêr. Tã ra Kris kôt amnhĩ xãm nê arĩ arãhã ri apa. Rỳ amnhĩ jakàr kêt rãhã hkôt amnhĩ xãm japêr nê arĩ arãhã ri apa. Mo kaxyw kot ka kêt amnhĩ jakà?

19 Tirtũm na hte mẽ pahte amnhĩ my kwryt kà jakàr ã mẽ pahpumunh kôt tanhmã mẽ pajarênh to hkêt nê. Rỳ mẽ pahte amnhĩ jakàr kêt ã mẽ pahpumunh kôt mãnên tanhmã mẽ pajarênh to hkêt nê. ãm mẽ pahte hkôt amnhĩ nhĩpêx pix ã mẽ pahpumunh kôt na hte tanhmã mẽ pajarênh to.

20 Jakamã kêr pu mẽ pahte Kris kôt amnhĩ xunhwýr kêt ri tanhmã mẽ pakuteja arĩ rãhã ri papa.

21 Ka mẽ akwýjaja ate nhãm mẽ kãm mẽ axápênh o apa htã Jejus kôt amnhĩ xunhwý. Tã kêr ka mẽ mãmrĩ mẽ kãm axápênh o ri apa. Nom koja anhõ patrãwja amnhĩ nê mẽ ajano ka mẽ mãmrĩ ma mra nê amnhĩ mã tanhmã axápênh to ho ri apa.

22 Nê koja mēhõ Kris kôt amnhĩ xãm. Tanhmãn kêp mẽ õ patrãw rỳ kot mẽ kãm mẽ àpênh xwýnhjê hõ. Tã Kris kôt amnhĩ xãm hãmri nê arĩ amnhĩ nhĩpêx tũm kôt ri amnhĩ nhĩpêx o pa hkêt nê. Ra Kris kôt amnhĩ nhĩpêx nyw o amnhĩ nhĩpêx o pa. Jao ra tanhmã amnhĩ tomnuj to hkêt nê. Te kot õ patrãw punuj kaga nê hpãnhã õ pa-

trãw mex kapêr kôt amnhĩ nhĩpêx pix o pa pyrãk.

23 Na pre Jejus mẽ pahte amnhĩ tomnuj piitã hpãnhã amnhĩrer kaxyw mẽ panê ty. Te htyk o kot amnhĩm mẽ pajaprõr pyrãk o mẽ panhĩpêx. Jakamã kwa kêr ka mẽ jar mẽ anhõ patrãw kôt pix mã amnhĩ nhĩpêx o ri apa hkêt nê. Mẽ mãnên Tirtũm kapêr kôt amnhĩ nhĩpêx o ri apa.

24 Jakamã kêr pu mẽ pahte Kris kôt amnhĩ xunhwýr kêt ri tanhmã mẽ pakuteta pu mẽ arĩ rãhã ri hã papa.

Ra mẽ pahte amnhĩ jakà rỳ mẽ pahte amnhĩ jakàr kêt.

Rỳ ra mẽ pahte nhãm mēhõ mã paxápênh o papa rỳ amnhĩ mã paxápênh o papa.

Rỳ ra mẽ pahprõ nê ri papa rỳ mẽ pahprõ hkêt nê ri papa.

Pu mẽ pahte Kris kôt amnhĩ xunhwýr kêt ri tanhmã mẽ pakuteta ãm arĩ rãhã hã ri papa. Jao Tirtũm kãm hprãm xà kôt pix mã amnhĩ nhĩpêx o ri papa.

Mẽ hprõ nê mẽ mjên kêt xwýnhjê jarênh

Matêwre 19.10-12

25 Nê mẽ ate ixwýr kaga mēnhta kamã na ka mẽ mãnên kormã mẽ hprõ hkêt xwýnhjê hã ixkukja. Tã kot paj mẽ amã tanhmã mẽ harênh to. Nom Pahihti Jejus Kris na pre ja hã tanhmã inhmã nê hkêt nê. ãm pa kot paj ãm amnhĩ krã hkôt tanhmã hã mẽ amã ixkapêr to. Na pre Pahihti mẽ akaxyw

tanhmã ixkrã hto pa hte ý hã tanhmã mẽ amã mẽmoj tã karõ hto ho ri ixpa. Jakamã e mẽ inhma nẽ inhmar tỳx nẽ.

26-27 Nà ra mẽ kãm mẽ pahkurê xwýnhjaja Kris ã mẽ pahtomnuj o pa jakamã koja ixpyrà nẽ mẽ hprõ hkêt rãhã mẽ pa xwýnhjaja ahte ri pa nhũm ja mex nẽ. Nhũm mẽ umaj amnhĩ pix tãnopxar o ri pa. Nẽ mẽ aprõ xwýnhjaja kêt ka mẽ kãm mẽ pahkurê xwýnhjê pymaj mẽ aprõ kaga hkêt nẽ. ãm pix tãnopxar o ri apa.

28 Tã kot ka mẽ atõ amã aprõ hprãm nẽ mãmrĩ aprõ. Ja mããnẽn tanhmã ixpê kute hkêt. Nẽ mẽ anijaja mẽ amã amjẽn prãm nẽ mãmrĩ amjẽn. Ja tanhmã ixpê kute hkêt. Nom kot ka mẽ akwýjê pyrà nẽ aprõ rý amjẽn. Nẽ gaa nẽ akra. Hãmri nẽ tanhmã mẽmoj kute kamã ka tee ri wa mẽ amnhĩ kukamã ri ajamaxpêr o ri apa. Ja pymaj na pa hte mẽ amjẽn kêt nẽ mẽ aprõ hkêt ã mẽ amã awjarê.

29 Nẽ Kris tokyx akupýn mẽ pahwýr wrýk kaxyw jakamã kwa ra mẽ aprõ nẽ apa xwýnhjaja. Kêt ka mẽ amnhĩ prõ nẽ amnhĩ kra pix kukamã ajamaxpêr o ri apa hkêt nẽ. Te ho mẽ hprõ hkêt nẽ mẽ pa xwýnhjaja kot amnhĩ nhĩpêx pyrà nẽ Kris kutêp kumrêx mã ajamaxpêr pê tanhmã amnhĩ nhĩpêx to ho apa nẽ arĩ kormã aprõ nẽ akrajê ho hapu nẽ tanhmã mẽ kutã anojarê to ho apa.

30 Kris kot tokyx akupýn mẽ pahwýr wrýk jakamã kwa mẽ

ri amýr o ri mẽ apa xwýnhjaja. Kêt ka mẽ kutêp tee ri amnhĩ kaprĩ pix mã ajamaxpêr o akaprĩ nẽ ri apa hkêt nẽ. Nẽ mẽ akĩnh nẽ ri apikunhar o ri mẽ apa xwýnhjaja kêt ka mẽ Kris kutêp amnhĩ kĩnh xà pix mã ajamaxpêr o ri apa hkêt nẽ. Nẽ ri mẽ axujaprõr o ri mẽ apa xwýnhjaja kêt ka mẽ Kris kutêp tanhmã axujaprõr to pix kukamã ri ajamaxpêr kêt nẽ.

31 Nẽ mẽ apê mẽ ate mẽmoj to wẽnê ho ri mẽ apa xwýnhjaja Kris kutêp ãm ri mẽ akukrêx pix kukamã ajamaxpêr kêt nẽ. Koja mẽ panhõ pika piitã hkôt mẽ pakukrêxja nẽ mẽmoj piitã arĩ rãhã hkêt nẽ.

32 Jakamã kot kaj mẽ akukrêx pix kukamã ajamaxpêr nẽ amnhĩ pix kukamã ajamaxpêr nhũm ja apê omnuj nẽ. Kris kwý pê mẽ hprõ hkêt xwýnhjaja na htem Pahiiti Jejus Kris kãm hprãm xà hkôt pix mã kãm tanhmã amnhĩ nhĩpêx to ho ri pa hprãm. Jao ãm pix kutã tanhmã nojarê to rãhã ho ri pa.

33 No kêt ra mẽ hprõ nẽ mẽ pa xwýnhjaja na htem hprõ pix kukamã kãm tanhmã amnhĩ nhĩpêx to ho pa hprãm. Jao pix kukamã amnhĩ nhĩpêx o pa.

34 Mẽ kãm Tirtũm kapêr kôt amnhĩ nhĩpêx prãm tã no ãm mããnẽn kãm hprõ kapêr mar nẽ hkôt kãm tanhmã amnhĩ nhĩpêx to ho ri pa hprãm.

Nẽ mênijaja kot Jejus kôt amnhĩ nhĩpêx nẽ kormã mẽ

mjên kêt xwÿnhjaja na htem kãm Pahihiti Jejus kãm hprãm xà hkôt pix mã kãm tanhmã amnhĩ nhĩpêx to ho pa hprãm. Nê ãm pix mã hamaxpêr o pa. Nê ãm hkôt pix mã amnhĩ nhĩpêx o pa. No ra mẽ mjên nê mẽ pa xwÿnhjaja na htem arĩ ri mẽ hikukrêx tânopxar o pa. Nê mjên mã hprãm xà hkôt tanhmã kãm amnhĩ nhĩpêx to ho pa. Jakamã tanhmã kot wem amnhĩ to nê Jejus kãm prãm xà hkôt pix mã amnhĩ nhĩpêx o pa?

³⁵ E ixte mẽ ato ajuta kaxyw na pa ã mẽ amã ixkapêr anê. Jakamã na pa mẽ ate mēhō ho aprō nê mẽ akurê hkêt nê. ãm mẽ ate Tirtũm kapêr kôt pix mã amnhĩ nhĩpêx o apa hã na pa mẽ amã karō. Mẽ ate kumã pix mã ajamaxpêr o ri apa pix kaxyw. Nê kumã pix mã tanhmã ri amnhĩ nhĩpêx to ho apa kaxyw na pa mẽ amã tanhmã mẽmoj tã karō hto.

Mẽ kot mẽ hprō mã xwÿnhjê jarênh

³⁶ E kot paj hpãnhã mẽ ate mēhō ho aprō mã xwÿnhjê mã ixkapêr ka mẽ ixkapêr ma. Nà kot kaj mẽ atō ate ho aprō mã xwÿnhjê kukamã ajamaxpêr o:

—Nà kot paj ho ixprō hkêt nê. Inhmã hkĩnh tÿx tã kot paj ho ixprō hkêt nê. Kot paj ãm ixprō hkêt nê ahte ri ixpa. Anê.

Hãmri nê ahte ri apa. Tã ra tee amnhĩ kurê kamã ama nê ajamaxpêr o:

—Hêxta waa nê. Mon pa pre ho ixprō hkêt nê ahte ri ixpa? Anê.

Hãmri nê mãmrĩ ma hwÿr tē nê kãm amnhĩ jarē nê ho aprō. Ra ate aprō hkêt nê ahte ri apa hã amnhĩ jarēnh tã no ãm mãmrĩ ho aprō. Ja tanhmã kute hkêt kēnã.

³⁷ Nom kot kaj ho aprō hkêt ã amnhĩ jarē nê mããnēn akurê hkêt nê ri apa. Hãmri nê mãmrĩ ho aprō hkêt nê ri ahte ri apa. Ja mããnēn tanhmã kute hkêt.

³⁸ Kot ka ho aprō nê war amex nê apa. Rÿ kot ka ho aprō kêt nê mããnēn amex kumrêx nê ri apa. Ja na mex o ate mēhō ho aprō nê ho apata jakrenh.

Mẽ kêp mẽ mjên tyk xwÿnhjê jarênh

³⁹ E kot paj hpãnhã mẽ apê mẽ amjên tyk xwÿnhjê mã ixkapêr. Nà koja amjên arĩ htĩr ri ka ãm hkôt pix mã axkamē nê hkaga hkêt nê. No koja nhÿrmã apê ty hãmri ka tee ri amnhĩ kukamã ajamaxpêr hãmri nê amã axte amjên prãm nê mãmrĩ axte amjên. Nom kwa kêr ka mẽ amnhĩ pyrã nê Kris kôt akwÿjê hō pix o amjên. No mamrĩ nhãm mēhō ho amjên kêt nê.

⁴⁰ No kot ka mẽ axte amjên kêt nê ahte ri apa hãmri nê axãmnhĩx ri ajamakêtkati nê apa. No na pa ãm amnhĩ krã hkôt mẽ amã ã ja jarēnh anê. Mãn Tirtũm Karō mã mããnēn ja mex nê.

8

Sānti hā mẽ apkur xà jarēnh Rōmān 14.13-23; Wam Korīt 10.14-22, 13.2; Karatas 5.13; Wam Pētre 4.8; Wam Juāw 3.18

¹ Nē mẽ ate ixwỳr kagà mēnhta kamā na ka prem määnēn sānti hā mẽ apkur xà hā ixkukja. Tā kot paj mẽ amā tanhmā ja jarēnh to ka mẽ inhma.

Nà na hte Kris kôt pahkwỳ hkêt xwỳnhjaja mẽmo karō ho sānti nhīpēx mã mẽo hkwy nhīpēx nē hwỳr o mra. Hāmri nē hpar pē haxwỳ nē kutā hkōn krā ho rōrōk nē hkrī nē kām mex o mex ā harē nē kām amnhī jagrer pē amnhī to kuwỳ. Hāmri nē kām amnhī jagrer pa nē akupỳm amnhīm mẽoṭa jamỳ nē ma o mra nē hkwyjē mã ho wēnē. Na htem ā amnhī nhīpēx anhỳr o pa. Tā na ka prem kagàta kamā mẽ ate mẽ kēp mẽo japrōr nē hkur ā ixkukja. Nà ra mẽ ate sānti pumunh mex. Ām mẽ kot ĩhkra pix o hipēx ā omunh mex jakamā na pu htem hā pamā mẽ apkur xàta hkur prām nē māmri paxāmnhīx ri kuku. Ja tanhmā Tirtūm pē kute hkêt. Ra mẽ pahte ja pumunh mex. Tā nom kwa kêr pu mẽ ja hā Kris kôt mẽ pahkwỳjē mã amnhī to jarkrar o ri papa hkêt nē. Nē ja hā mẽ kurom paxāhpumunh tỳx ā mẽ kām amnhī to jarkrar hkêt nē. Kot pu mẽ ā amnhī nhīpēx anhỳr o mẽ hamaxpēr o hihtỳx hkêt nē. Kēr pu mẽ ām mẽ kamā paxukapri

pē tanhmā mẽ ho mex to ho papa. Nē Kris kôt mẽ hamaxpēr o hihtỳx o papa. Ā mẽ pa hte amnhī nhīpēxja na Tirtūm kām hprām.

² No koja mẽhō mẽmoj pumunh tỳx ā amnhī to jarkrar o ri pa nē ām tee ri ā amnhī jarēnh anhỳr kaprỳ.

³ No koja mẽhō àhpumunh tỳx kêt tā kām Tirtūm kīnh nhūm amnhī tā omu nē kām hapē nē ho hkra. Kêt ja na mex o mex.

⁴ E kot paj ixpri hā mẽ amā tanhmā sānti hā mẽ apkur xàta jarēnh to ka mẽ inhma. Nà Mēpahpāmja pixii. Axtem hō hkêt. Nom mẽ kot sānti nhīpēxta ām mẽ kot ĩhkra o hipēx jakamā htir kêt. Ra mẽ pahte ja jarēnh mar tỳx nē omunh mex.

⁵ Na htem ohtō nē ri sānti kēp Mēpahpām ā hkamnhīx o pa. Kaxkwa kamā mẽmo karō nhīpēxja nē pika kamā mẽmo karō nhīpēxja nhūm htem kēp Mēpahpām ā harēnh ho pa. Nom ja kot anhỳr kêt.

⁶ Mēpahpāmja ām pixi ho pixi mex. Mē panhō Tirtūmja. Tām na pre mẽmoj piitā ho kator pa. Jakamā na pu htem kapēr kôt pix mã amnhī nhīpēx o ri papa.

Nē mẽ panhō Pahihti haxwỳja pixii. Pahihti Jejus Krisja. Na pre Tirtūm nhīhkō hā mẽmoj piitā ho kator pa. Na pu htem ja hā omunh xà hkôt ri pamex nē ri papa. Ra mẽ pahte ja jarēnh mar tỳx nē omunh mex. Jakamā na pu htem paxāmnhīx ri mẽmoj piitā hkur o papa. Tirtūm

kot mẽmoj piitã ho kator par kênã.

⁷ Tã no ãm ham mẽ kot Kris kôt amnhĩ xunhwÿr xwÿnhjaja na htem mẽ pahkĩnhã kãm sãnti hã mẽ apkur xà hkur puma nẽ. Ham mẽ kot sãnti kaga nẽ amnhĩ kaxyw Kris kôt amnhĩ xunhwÿr jakamã kormã Tirtũm kôt amnhĩ nhĩpêx tohtuj anẽ. Jakamã na htem tee ri sãnti hã mẽ apkur xaja pumu nẽ hamaxpêr o:

—Nà kot paj ja kur kêt nẽ. Kot paj anẽ nhũm apu Tirtũmja pê ja omnuj nẽ. Anẽ.

⁸ Nom na kêt hte Tirtũm mẽ paxàpkur xà hã mẽ pahpumunh kôt mẽ pahte amnhĩ to mex xwÿnh ã mẽ pajarênh kêt nẽ. Kot puj mẽ mẽmoj ku rÿ mẽmoj kur kêt nẽ nhũm ja hã mẽ pahpumunh kôt tanhmã mẽ pamex ã pajarênh to hkêt nẽ. Jakamã na pu htem mãmrĩ paxàmnhĩx ri mẽmoj tã mẽ apkur xà hkur o papa nẽ tanhmã amnhĩ to hkêt nẽ.

⁹⁻¹⁰ Nom kwa mẽ okora. Kêr ka mẽ sãnti mã amnhĩ jarênh xà hã ixkre hwÿr agjêx nẽ kamã axàpkur hkêt nẽ. Kot kaj mẽ atõ ã amnhĩ nhĩpêx anẽ nhũm mẽhõ kormã kot Kris kôt amnhĩ xãm tohtuj anhÿr xwÿnhja ja hã mẽ apumu nẽ tee ri hamaxpêr. Axàhpumunh tÿx ã ate amnhĩ jarênh tã sãnti nhõrkwÿ kamã axàpkur o nhÿ nhũm ja hã apumu nẽ tanhmã amnhĩ nhĩpêx to wehe? Kojaja kêt omnuj tã apyrà nẽ tẽ nẽ axà nẽ mẽ kutã apku. Hãmri nẽ

apkur pa nẽ tee ri amnhĩ kukamã hamaxpêr o:

—Hêxta waa nẽ. Kwa mon pa axtem nẽ ri ã mẽmojja kur anẽ? Nà na pa anẽ nẽ ra amnhĩ tomnuj tÿx nẽ. Anẽ.

Hãmri nẽ hkaprĩ nẽ pa.

¹¹ Ate axàhpumunh tÿx ã amnhĩ jarênh tã amnhĩ kôt atõja mex kukamã ajamaxpêr kêt nẽ. Kris ra mÿrapê htyk tã nhũm ã ate sãnti hã mẽhõ hkur ã apumu nẽ tee ri hamaxpêr o Jesus hkôt amnhĩ nhĩpêx mex kêt nẽ.

¹² Kormã kot Kris kôt amnhĩ xãm tÿx kêt tã tee ri ja hã mẽ apumu nẽ hamaxpêr mex kêt nẽ. Jakamã ka Kris noo mã amnhĩ tomnuj nẽ.

¹³ Tã ã ixte Kris kôt ixkwÿjê nhĩpêx anhÿr pymaj koja ixtõjê hõ kãm mẽmoj kur pyma nẽ. Nẽ htÿx ho Tirtũm kêt omnuj ã hkamnhĩx. Pa ja hã omu nẽ ijaxwÿja axte hkur kêt nẽ. Ixte mex ã omunh tã no ãm kot tee ri ja hã ixpumunh nẽ hamaxpêr o:

—Kwa Tirtũm kêt ja mex kêt tã nhũm Pawreja ri kuku. Jakamã kot paj ijaxwÿja urak nẽ kuku. Omnuj tãã.

Anhÿr o hamaxpêr pymaj kot paj urak nẽ mẽmota kur kêt nẽ. Na pa hte ã Kris kôt ixtõjê mex kukamã ri ijamaxpêr anhÿr o ixpa.

9

Pawre kot amarĩ Tirtũm kapêr o mẽ ahkre hã amnhĩ jarênh

Atre 9.1-18, 20.33-35; Sikũn Korit 11.7-9

1 Nē ixte Jejus nhỹ hã mē ahkre ho mē pa xwýnhjê hõ jakamã na pa hte Tirtũm kapēr o mē ajahkre ho ri ixpa. Na pa pre inhno ho mē panhõ Pahihti Jejus pumu nē mē amã harēnh o ri mē akõt ixpa ka prem inhma nē hkõt amnhĩ xunhwý.

2 Mē hkwyjaja kot axpēn mã ixpē Jejus nhỹ hã mē ahkre xwýnh kêt ã ijarēnh tã mē kajaja mē ate ja hã ixpumunh mex. Ixte mē amã mē ujarēnh mexja jarēnh nhũm mē ate mar nē hkõt amnhĩ xunhwýrja kukwak ri na ka mē apē Jejus kwýy.

3 Jakamã koja mē atã ixto kapēr japēr kot paj ã mē kãm mē ajarēnh anē.

4 Nē ixte Jejus nhỹ hã kapēr jahkre o ixpa xwýnh jakamã kot paj inhmã Kris kwýjê kutã amarĩ ixàpkur prãm nē mãmri mē kutã apku. Ja tanhmã kute hkêt tã kot paj ã amnhĩ nhĩpēx anhỹr kêt nē. Kot paj ixàpkur kaxyw nē amnhĩ pãnhã amnhĩre nē rĩ kormã apku. Na pa hte ã amnhĩ nhĩpēx anhỹr o ri mē akõt ixpa.

5 Rý kot pa ixkwýjê pyrã nē inhmã Kris kôt ixkwýjê hõ ho ixprõ hprãm nē mãmri ho ixprõ. Nē wa ma krĩ piitã hkõt Kris kwýjê kukwak ri ixàpkur o ixpa hprãm nē wa mãmri ã amnhĩ nhĩpēx anhỹr o ixpa. Ja mex kēnã. Na hte ã Simãw Pētre mē Jejus tõ kot hapujaja amnhĩ nhĩpēx anhỹr o pa nhũm ja tanhmã kēp kute hkêt. No ãm mē hkĩnhã ixprõ hkêt na pa hte ri ixpa.

6 Nē ixkwýjaja na htem apkur xà hpãnhã àpēnh o pa hkêt nē. Na htem Jejus nhỹ hã kapēr jarēnh o ri pa nhũm hte Jejus kwýjaja mē kãm mē apkur xà gõ nhũm mē amarĩ hkur o pa. Tã no pa na pa hte Panãpe mē wa ã amnhĩ nhĩpēx anhỹr kêt nē. Na pa hte wa mry kà ho ixkre nhĩpēx nē mē kãm ho wēnē nē hpãnhã amnhĩm awjaprõ. Na pa hte wa ã amnhĩ pa kukwak ri ixujaprõr nē ho ixàpkur o ri ixpa anē.

7 Mē kãm pur kãm harõj jamýnh o mē pa xwýnhjaja na htem amarĩ hkwy jamý nē ho apkur o pa. Nē motre jamãr o mē pa xwýnhjaja haxwýja amarĩ hkà kagõ janê nē ho hkõm o pa. Nē pôristijaja na hte mē õ pahija mē àpēnh pãnhã mē kãm amnhĩrer o pa. Jajê piitã na htem mē àpēnh pãnhã mē kãm amnhĩrer o pa. Ja pyrã nē te ixpē mē amã ixàpēnh o ixpa xwýnh pyrãk jakamã ixte mē ajahkreta pãnhã kot ka mē inhmã inhõ ho apa nhũm ja mãänēn mex nē.

8 No ãm papxipix na pa hte ja mex ã harēnh kêt nē. Tirtũm kapēr ã kagã htũm haxwýja kot ja mex ã harēnh.

9 Kamã na pre finat Mojesja Tirtũm nhỹ hã harēnh kot:

Koja akrit amã àpēnh o pa
ka omu nē ho mex nē.
Kãm õ mex nē.

Anhỹr o kot harēnh. Xà na pre Tirtũmja ãm mē pahkrit pix kukamã ukapri nē ã harēnh anē nà? Nà kot anhỹr kêt.

10 Määnēn mē pahpē panhī kaxyw na pre ā ja jarēnh anē. Mē pahte mē hpur kām paxàhkre xwýnhjaja nē mē pahte kamā paxujamýnh o papa xwýnhjaja. Jajé kaxyw mē pahte pur kukwak ri amarī paxàpkur o ri papa kaxyw ā pre ā ja jarēnh anē.

11 Tā ja pyrā nē na pa hte mē awýr mō nē mē amā Tirtūm kapēr jarēnh o ri mē akôt ixpa. Nē mē akôt ho mē ajahkre ho ri ixpa ka htem inhmā ixàpēnhhta pānhā amnhīrer kêt nē. Ixkwýjaja kot Tirtūm kapēr o mē ajahkre hpānhā mē ate mē kām amnhīrer tā pa inhmā amnhīrer kêt nē. Na pa pre mē ajahkreta pānhā mēmoj tā mē awýr kêt nē. Ām nhām ixàpēnh ôta kukwak ri na pa hte ixàpkur o ri ixpa.

12 Nē na hte mē ixkwýjaja mē awýr mra nē Tirtūm kapēr o mē ajahkre o ri mē akôt pa. Hāmri nē hpānhā mē apkur xà hā mē awý ka mē kām mēmoj gō. No kêt pa na pa hte mē urāk nē ixàpkur xà hā mē awýr kêt nē. Kot pa apu hā mē awý ka mē tanhmā ixto akapēr to nē axpēn mā ijarēnh o:

—Pēr ām mē pahte kām amnhīrer pix kaxyw na hte Pawre mē pahwýr mra nē mē pamā Jejus Kris kot tanhmā mē panē amnhī nhīpēx to hā harēnh o pa. Pēr ām apkur xà pix prām xàj ā kot mē pamā ujarēnh anhýr o pa. Jakamā kot puj mē kuma nē ām kuma.

Anhýr o axpēn mā ijarēnh

pymaj na pa hte mē ajahkre hpānhā mēmoj tā mē awýr kêt nē. Na pa hte ām mry kà ho ixkre nhīpēx nē ho wēnē nē ja pix kukwak ri ixàpkur o ri ixpa. Nē amarī ri mē ajahkre ho ri mē akôt ixpa.

13 Nē Tirtūm mā amnhī jarēnh xà hā ixkre kamā mē àpēnh xwýnhjaja na htem hwýr mē mrrar xwýnhjaja mē àpēnh pānhā mē kām amnhīre. Nē mē kot mē kām Tirtūm mā mēmoj nhōr o kuhē xwýnhjaja na htem määnēn mē àpēnh pānhā mē kām amnhīre.

14 Nē Pahihti Krisja na pre ja hā mē pakukamā pahtā karō kot:

—Kēr ka mē kot tanhmā mē amā ijarēnh to ho ri mē pa xwýnhjē mā amnhīrer o ri apa. Anē.

15 Tā no na pa hte aa mēmoj tā ixàhwýr kêt nē. Nē mē ate inhmā amnhīrer kaxyw pa mē amā ja jarēnh kêt nē. Aa ixte mēmoj tā mē awýr kêt. Kot paj apu anē nē xpijaām nē. Rý kot pa apu anē nē mē akukwak ri ixàpkur o ri ixpa hāmri nhūm mē akwýjaja ja hā ixpumu nē hā ijarēnh o:

—Tk. Na hte amarī mē pajahkre o ri pa hkêt nē. Ām mē apkur xà pix prām xàj na hte ā mē pajahkre ho pa anē. Anē.

Jakamā na pa hte mēmoj tā mē awýr kêt nē.

16 Ixte mē amā mē ujarēnh mexja jarēnh o ri ixpa htā na pa hte ja hā amnhī to jarkrar o ri ixpa hkêt nē. Pahihti Jejus na pre ja hā inhmā karō pa hte kām ho anhýr o ri ixpa.

Kot paj kām ho anhÿr kêt nē
ixpunuj nē ri ixa.

¹⁷ Kêp âm amnhĩ krā hkôt
mān tanhmā mẽ amā ixa-
jarēnh to ho mẽ akôt ri ixa
ronhÿx pa hpānhā ixāmnhĩx
kàxpore hā mẽ awÿ. No âm
ā ixte amnhĩ nhĩpêx anhÿr
kêt. Tirtũm tām kot inhmā
ja hā karō jakamā na pa hte
amarĩ ixāmnhĩx ri mẽ amā
kapêr jarēnh o mẽ ajahkre ho
ri mẽ akôt ixa nē mẽmoj tã
ixāhwÿr o ri ixa hkêt nē.

¹⁸ Ixte amarĩ ri mẽ amā
mē ujarēnh mexta jarēnh o ri
ixpaja na inhmā hprām. Ja
na inhmā mex. Na pa hte ā
amnhĩ nhĩpêx anhÿr o ri ixa
nhũm ja inhmā mex pa ixkĩnh
nē ri ixa. Jakamā na pa hte
hpānhā ixāhwÿr kêt nē. Nē
inhmā mẽmoj prām o ri ixa
hkêt nē.

¹⁹ Nē nhām mẽ kām tanhmā
ixāpēnh to ho ixa hkêt tã pa
hte mẽ piitā tanhmā mẽ kām
amnhĩ nhĩpêx to ho ri ixa. Pē
mẽ kām Jejus kapêr jarēnh o ri
ixa. Jakamā na mẽ ra ohtō
nē ixujarēnh ma nē amnhĩ
kaxyw Jejus kôt hamaxpêr nē
hkôt amnhĩ xunhwÿ.

*Pawre kot tām mẽ piitā mẽ
hipêx o pa hā amnhĩ jarēnh*

Wam Korit 10.33

²⁰ Nē na pa hte Ijaewjê
hwÿr ixa nē mẽ kot amnhĩ
nhĩpêx kôt amnhĩ nhĩpêx o
ri mẽ hkôt ixa. Ixte mẽ
kurom Tirtũm kot finat Mojes
mā mẽmoj tã karō hkôt amnhĩ
nhĩpêx o ixa hkêt tã mẽ hkôt
ri ixa nē mẽ urāk nē hkôt
amnhĩ nhĩpêx o ri ixa. Mẽ
kot ja hā ixpumunh nē ixte

mẽ kām Jejus jarēnh mar nē
ixpyrà nē amnhĩ kaxyw hkôt
hamaxpêr kaxyw.

²¹ Tã pa hpānhā mẽ kêp
Ijaew kêt xwÿnhjê hwÿr ixa
nē mẽ kot amnhĩ nhĩpêx kôt
amnhĩ nhĩpêx o ri mẽ hkôt
ixa. Mẽ kot ja hā ixpumunh
nē ixkapêr mar nē ixpyrà
nē amnhĩ kaxyw Jejus kôt
hamaxpêr kaxyw. Tirtũm mẽ
Kris wa hamaxpêr xà hkôt na
pa hte ahpÿnhā mẽ kot amnhĩ
nhĩpêx xwÿnhjê hwÿr mra nē
ā amnhĩ nhĩpêx anhÿr o ri mẽ
hkôt ixa.

²² Nē na pa hte kormā mẽ
kot Kris kôt amnhĩ xunhwÿr
tohtuj anhÿr xwÿnhjê hkôt ri
ixa nē te ixte ho mẽ urāk
nē kormā hkôt amnhĩ xām
nyw pyrāk o amnhĩ nhĩpêx o
ri mẽ hkôt ixa. Mẽ kot ja
hā ixpumunh nē ixkapêr mar
nē hkôt amnhĩ nhĩpêx mex
kaxyw. Ā na pa hte mẽ piitā
mẽ hkôt ri ixa nē mẽ hkôt
amnhĩ nhĩpêx o ri ixa anē.
Mẽ kot ja hā ixpumunh nē
inhmar nē ixpyrà nē Kris kôt
amnhĩ nhĩpêx tÿx kaxyw.

²³ Mẽ kot mẽ ujarēnh mex
mar kaxyw na pa hte mẽ pi-
itā mẽ hkôt ā amnhĩ nhĩpêx
anhÿr o ri ixa. Tirtũm kot mẽ
ho hkra nē mẽ ho mex kaxyw.
Nē määnēn pa kot mẽ hā ixto
mex kaxyw.

*Pawre kot htÿx ri amnhĩ
nhĩpêx kêt ā kot amnhĩ jarēnh*

*Sikũn Ximotre 4.7; Eprêw
12.1-3*

²⁴ Mẽ hprôt xwÿnhjaja na
htem hprôt tÿx no nhũm
mēhō pixi nē wam hkwÿjê re

ně wam tēn pōj nhūm htem ja hã omu ně kām mẽ hkĩnhxà gō. Ja pyrà ně kēr ka mẽ apiitã tām amnhĩ nhĩpêx mex rãhã ho ri apa kê Tĩrtũm mẽ apumu ně nhỹrmã ja pãnhã mẽ amã mẽmoj mex gō.

²⁵ Ně mẽ hprõt xwỳnhjaja na htem mẽ hkĩnhxà hpyr prãm xàj mẽ hprõt xà hã arĩgro hwỳr apkati mẽ hprõt o kuhê. Prõt tỳx prãm xàj. Tã mẽ hprõt xà hã arĩgrota ã nhūm hkwỳjê pê amnhĩ to wa ně amnhĩm hkĩnhxà py. Nom koja hkĩnhxàja kritpêm kãm mex ry hkêt nẽ. Koja gaa ně hapêx tokyx anẽ. Tã nom kot puj mẽ Tĩrtũm kapêr kôt amnhĩ nhĩpêx mex o ri papa. Ně mẽ hprõt xwỳnhjê kot hkĩnhxà hpyr prãm xàj apkati mẽ hprõt o kuhêta pyrà ně apkati mẽ hkôt amnhĩ nhĩpêx mex o ri papa. Hãmri nhūm amnhĩ tã mẽ pahpumu ně nhỹrmã mẽ pamã hkĩnhxà mex õ gō. No ãm jar hkĩnhxà kurom koja aa mẽ pahpê hapêx kêt nẽ. Koja mẽ pamã mex rãhã ho rãhã.

²⁶ Ně na hte mẽ hprõt xwỳnhjaja htỳx ri tanhmã hprõt to ho pa hkêt nẽ. Na htem hkwỳjê pê amnhĩ to wa kaxyw hprõt nẽ nhỹri mẽ àhuk xàta pix pumunh pê hwỳr hprõt nẽ mra hãmri ně kamã ahtwỳ. Ně kamã àhuk pix kukamã hamaxpêr o hprõt tỳx nẽ mra. Ja pyrà ně na pa hte apkati mẽ Tĩrtũm kôt pix mã amnhĩ nhĩpêx o ri ixpa. Nhỹrmã kot inhmã mẽmoj mex nhõr kaxyw.

Ně mẽ pijapu mex

xwỳnhjaja na htem htỳx ri nhỹhỹnh axpêr tak kêt nẽ. Na htem nhỹhỹnh kot mẽ htak o mẽ rênh xà pix kamã mẽ htak o mẽ rênh kukamã hamaxpêr pê kamã mẽ htak. Ja pyrà ně na pa hte ixtỳx ri tanhmã amnhĩ nhĩpêx to ho ri ixpa hkêt nẽ. Na pa hte Tĩrtũm mã ijamaxpêr pê tanhmã amnhĩ nhĩpêx to rãhã ho ixpa. Kot nhỹrmã inhmã mẽmoj mex nhõr kaxyw.

²⁷ No na pa hte ixtỳx ri amnhĩ jamaxpêr xà hkôt tanhmã amnhĩ nhĩpêx to ho ri ixpa hkêt nẽ. Kot pa ã amnhĩ nhĩpêx anẽ nẽ ixte mẽ kãm Jejus kapêr jarênh o ri ixpa htã ãm ri ixtỳx ri ã amnhĩ nhĩpêx anhỹr kaprỳ nhūm Tĩrtũmja tee ri ja hã ixpumu ně inhmã mẽmoj mex nhõr kêt nẽ.

10

Ijaew kot amnhĩ nhĩpêx

Rõmãn 15.4; Eprêw 3.8-11;

Jutre 5

¹ E Kris kôt ixkwỳjaja. Kot paj mẽ amã amnepê mã mẽ ixpê Ijaew hkukamã mẽ inhĩgêjtjaja tanhmã mẽ harênh to ka mẽ inhma. Mẽ kot pahi finat Mojes kôt ri mẽ pa xwỳnhjaja kot paj mẽ amã harê. Mẽ pahte mẽ uràk nẽ pahtỳx ri amnhĩ nhĩpêx pymaj kot paj mẽ amã tanhmã mẽ harênh to ka mẽ inhma. Mãn ka mẽ arĩ mẽ harênh ã anohtỳx japêr. Na prem piitã pika pê Ejit kamã pa htã kurũm kator pa. Hãmri nẽ ma kapôt ã kakrã pumunh o hkôt pa ho pa. Pry

hkêt jakamã nhũm pre Tirtũm tanhmã kakrã hto nhũm ma mẽ hkukamã pa nhũm mẽ omu nẽ hkôt pa. Hãmri nẽ ra gô xujanãr mẽ kot kãm: “Gô kamrêk” anhÿr xwÿnhja wÿr pøj nẽ tee ri rêr prãm xàj amnhĩ kukamã hamaxpêr. Hãmri nhũm Tirtũm mẽ kãm hkôt ã ho amgrã nhũm mẽ hkôt mex pê rêr pa nẽ axte kakrã hkôt pa ho pa.

² Finat Mojes kot mẽ o pa jakamã nhũm prem kêp hkwȳ hã amnhĩ jarẽ nẽ kãm amnhĩ jarẽnh o:

—Nà kot paj mẽ akapêr ma nẽ akôt ri amnhĩ nhĩpêx o ixpa. Anẽ.

Te mẽ pahpê Kris kw̄ȳ hã amnhĩ jarẽnh kaxyw mẽ kot gôx kãm mẽ pahkrã kumrãr nhũm mẽ pahte Kris mã amnhĩ jarẽnh ta pyrãk.

³ Na prem kapôt ã ri pa nhũm Tirtũm tãm kaxkwa rũm mẽ hwÿr mẽ apkur xà rẽ nhũm mẽ hkawrã nẽ ho apkur o pa.

⁴ Tã ra kôr xàj hirok nhũm Tirtũm tanhmã mẽ kãm kên prêkja to nhũm kurũm mẽ kãm gô axkapĩ nhũm mẽ ho ixkô nẽ akupÿm hihtÿx. ã Krisja mẽ hkôt mẽ ho mẽ hihtÿx o pa anẽ. Mẽ kot no ho omunh kêt tã nhũm mẽ hkôt mẽ ho mẽ hihtÿx o pa.

⁵ Tã no nhũm mẽ ohtô nẽ Tirtũm kôt amnhĩ nhĩpêx kêt nẽ. Kot mẽ ho mex kumrêx tã nhũm mẽ ãm amnhĩ tã omu nẽ ãm omu nẽ kapêr kôt amnhĩ nhĩpêx kêt nẽ. ãm kapêr kw̄ȳm ri tanhmã amnhĩ tomnuj to ho pa nhũm tee ri amnhĩ tã mẽ omu nẽ

tanhmã mẽ ho nhũm mẽ hkwȳja hpikaprãr pa. Hãmri nhũm arĩ mẽ htir xwÿnhja kapôt ã mẽ hagjênh pa nẽ axte mã pa.

⁶ Jakamã kwa kêr pu mẽ kot ã amnhĩ nhĩpêx anhÿr ã mẽ harênh ma nẽ hã pano htÿx nẽ ho papa hãmri nẽ ho mẽ urãk kêt nẽ. Mẽ urãk nẽ pahtÿx ri tanhmã amnhĩ nhĩpêx to ho ri papa hkêt nẽ.

⁷ Nẽ na pre mẽ hkwȳjaja sãnti kutã hkõn krã ho rôrôk nẽ hkrĩ nẽ kãm amnhĩ jagrer pê amnhĩ to kuwÿ. Tirtũm kapêr ã kagã htũm kot mẽ kot amnhĩ nhĩpêx anhÿr ã mẽ harênh kot:

Na prem sãnti kutã apkur o hkrĩ nẽ kãm amnhĩ jagrer o hkrĩ nẽ gaa nẽ pipãnh pix o pa. Jao axpên kamã hpijaãm kêt o pa.

Anhÿr jakamã kwa kêr pu mẽ ã mẽ kot amnhĩ nhĩpêx anhÿrja ã pano htÿx nẽ ho mẽ urãk hkêt nẽ.

⁸ Nẽ na pre mẽ hkwȳjaja htÿx ri mjên nẽ hprô kuhpa hã nhãm ri mẽ kamã hpijaãm kêt o pa. Mÿrapê nhũm arĩgro pixi hã mẽ ohtô rax kumrêx nẽ axkaprã. Mẽ kêp 23.000 nẽ pikaprãr pa. Tã ã Tirtũm kot mẽ panhĩpêx anhÿr pymaj kêr pu mẽ ja hã pano htÿx nẽ ho mẽ urãk kêt nẽ. ãm kwarĩ ho kwarĩ.

⁹ Nẽ na pre mẽ hkwȳjaja axtem nẽ htÿx ri tanhmã axpên mã Tirtũm jarênh to nẽ harênh o:

—Nà Tirtũmja gryk tokyx anhÿr kêt jakamã kwa pu mẽ ã amnhĩ tomnuj anhÿr o

papa. Kojã mē pahpumu nē tanhmã mē pahto hkēt nē.

Anhÿr tã nhũm tee ri ja hã mē kuma nē mē omu nhũm ja kãm mex kēt nē nhũm mē hwÿr kagã xoprê nhõ wenēn xihtÿx kwÿ rē nhũm mē hwÿr mra nē mē hkamnhar o mē hkwyjê pa. Tã ã kot mē panhÿpêx anhÿr pymaj kwa kêr pu mē ja hã pano htÿx nē mē urak nē amnhÿ tã Tirtũm kamã pajamak o papa hkēt nē. Kwarĩ ho kwarĩ.

¹⁰ Nē na pre mē hkwyjaja axtem nē Tirtũm o kapêr punuj nē nhũm tee ri amnhÿ tã mē kuma nē mē hwÿr kapêr o wrÿk xwÿnh mē nhũm ma mē hwÿr wrÿ nē ÿ hã mē hkwyjê nhĩmex. Tã ã kot mē panhÿpêx anhÿr pymaj kwa kêr pu mē ja hã pano htÿx nē ho mē urak nē Tirtũm o pakapêr punuj kēt nē.

¹¹ Na pre mē ixpê Ijaew nhĩgêjtaja ã htÿx ri amnhÿ nhÿpêx o pa anē. Tirtũm kapêr ã kagã htũm kot ã mē kot amnhÿ nhÿpêx anhÿr piitã harēnh par. Mē panhõ ejêp kaxyw. Mē pahte kamã harēnh nē mē harēnh mar tÿx nē mē urak nē ã amnhÿ nhÿpêx anhÿr kēt kaxyw. Ra Jejus akupÿn mē pahwÿr wrÿk xã hã arĩgro hkukamã grêre jakamã kwa kêr pu mē kutêp mē kurom kapêr kôt pix mã ri amnhÿ nhÿpêx mex rãhã ho ri papa.

Mē pahte mēmoj punuj nē amnhÿ to htÿx ã mē pamã karõ Matêwre 4.1, 6.9-13; Wam Korit 1.8; Sikũn Pêtre 2.9; Jutre 24

¹² Tã kêr ka mē ã Ijaew kot amnhÿ nhÿpêx anhÿr ã mē harēnhja ma nē ã ajamaxpêr anhÿr kēt nē. Rÿ mē ajamaxpêr o:

—Nà mēmoj piitã kutã ixih tÿx kēnã kot pa hkēt mē urak nē ã amnhÿ nhÿpêx anhÿr o ri ixpa.

Anhÿr o mē ajamaxpêr kēt nē. Kot kaj mē ã amnhÿ jarēnh anē nē ra mē urak nē tanhmã amnhÿ tomnuj to.

¹³ Nē na prem kapôt ã pare ri omnuj nē ri pa. Nhũm mēkarõmnuti tanhmã mē hkrã hto nhũm mē tanhmã amnhÿ tomnuj to ho pa. Ja pyrã nē na hte arĩ mē pahte amnhÿ tomnuj hprãm xaj tanhmã mē pahkrã hto ho pa. Mē pahpiitã ã mē pahto anhÿr o ri mē pahkôt pa. Nom nhũm Tirtũm ra kot mē pamã amnhÿ jarēnh xã hkôt mē panē omunh mex rãhã ho pa. Jakamã na pu htem tanhmã amnhÿ tomnuj to hkukamã pajamaxpêr nhũm ja hã mē pahpumu nē mē panē mēkarõmnuti mã kapêr. Nē kutã mē pahto paxihtÿx nē pu mē ÿ hã amnhÿ tomnuj kēt nē. Nē ãm kôt pix mã amnhÿ nhÿpêx mex o ri papa.

Mē kot sãnti mã mēmoj nhõr xwÿnhjê jarēnh

Wam Korit 8.1-13; Karatas 4.8; Apokarip 9.20

¹⁴ Jakamã e Kris kôt ixkwÿjaja. Kêr ka mē amnhÿ kaxyw sãnti hkôt ajamaxpêr o ri apa hkēt nē. Nē amnhÿ to hwÿr kēt nē. ãm kwarĩ ho kwarĩ.

15 E mẽ axàhpumunh tỳx ã amnhĩ jarēnh jakamã kot paj mẽ amã mẽmoj jarē ka mẽ aprĩ hã inhmar tỳx japêr.

16 Nà na pu htem tōhã Je-jus kot mẽ panê htyk mã pa-jamaxpêr kaxyw axpên wỳr akuprō. Hāmri nê mẽmo kagō hkwỳ ru nê Tirtũm mã mex ã harē nê mẽmoj o pahkōm pê Jejus kot mẽ panê hkamrō pikapĩr mã pajamaxpêr. Nê hpānhã pāwti hō py nê axpên mã ho hkry nê mẽ kot Kris pĩr nê ĩ kamã hkamnhwỳr nhũm mẽ panê htykja mã pa-jamaxpêr pê kuku.

17 Pāwtita ãm pixire htã pu htem axpên mã ho hkry nê pahpiitã kuku. Mẽ pahpê Kris kwỳ hã mẽ pahte amnhĩ jarēnh nhũm mẽ pahkwỳ kot ja hã mẽ pahpumunh kaxyw. Te mẽ pahtipxi nê ri mẽ papa pyrāk nê pāwti pixire htã pu mẽ pahpiitã kuku.

18 E kot paj hpānhã mẽ amã amnepê mã Ijaew kot tanhmã amnhĩ nhĩpêx to jarē ka mẽ inhma. Na pre htem Tirtũm mã mex ã harēnh nê kãm amnhĩ nhōr ã kot amnhĩ tã mẽ omunh kaxyw nhũm prem tanhmã amnhĩ nhĩpêx to. Jao kãm mẽ apkur xà hkwỳ gō nê kãm mex o mex ã harē. Hāmri nê amnhĩ mã mẽmojta kwỳ xà nê hkur o hkrĩ. Jao ra Tirtũm mã mex o mex ã harē nê kãm kêp hkra hã amnhĩ jarē.

19 Nom mẽ kot sãnti mã mẽmoj nhōr xwỳnhjaja na htem kãm mẽmo mẽ apkur xà hkwỳ gō nom ãm kãm òr kaprỳ. Tanhmã kot we amnhĩ

to nê amnhĩ tã mẽ omu? Mo rĩt kaxyw no? ãm mẽ ĩhkra ho mẽ kot amnhĩm hipêx kênã. Jakamã na htem ãm kãm mẽ apkur xà hkwỳ nhōr kaprỳ.

20 Mẽ kot sãnti mã mẽmoj nhōr xwỳnhjaja na htem Tirtũm mã òr kêt nê. Mẽkarōmnuti mã na htem kugō. Jakamã kot kaj mẽ urāk nê sãnti mã mẽmoj gō nê apê mẽkarōmnuti hkwỳ hã amnhĩ to amnhĩrĩt nê apê hkwỳ hã ri apa. Jakamã mẽ ate sãnti mã mẽmoj nhōrta na inhmã hprãm kêt kumrêx.

21 Kot kaj mẽ panhō Pahihti Jejus kot mẽ panê htyk ã mẽmoj kagō hkwỳ ho ixkō hāmri nê ma mra nê hpānhã sãnti pê mẽkarōmnuti hã mẽmoj to ixkō. Hāmri nhũm Tirtũmja tee ri ja hã mẽ apumu nhũm ja kêp omnuj tỳx nê. Rỳ ka mẽ Pahihti Jejus kot mẽ panê htyk ã pāwti hkwỳ hku nê hpānhã ma mra nê sãnti pê mẽkarōmnuti hã mẽmoj hku. Hāmri nhũm Tirtũm kêp ja omnuj tỳx nê. Mẽ pahte ã amnhĩ nhĩpêx anhỳrja na axpên kuhpa hã.

22 Jakamã kot ka mẽ ã amnhĩ nhĩpêx anê nê te ra mẽ amã mẽkarōmnuti hkĩnh nê mãānēn amã Tirtũm kĩnh pyrāk o amnhĩ nhĩpêx. Nê te Tirtũm kurom mẽ kajaja mẽ axàhpumunh tỳx pyrāk o amnhĩ nhĩpêx. Nhũm tee ri amnhĩ tã mẽ apumu nê mẽ akamã gryk tỳx nê. Kwa mẽ okora. Kojã Tirtũm akamã gryk ka amex kêt kumrêx.

Mẽ pamã Kris kôt mẽ pahkwỳjê hkĩnh pê mẽ ho mex

ã mẽ pamã karõ

Matêwre 20.28; Rõmãn 14.1-15.7; Piripos 2.1-4

23 Nẽ na htem tõhã amnhĩ jarẽnh o:

—Nà kot pa inhmã mẽmoj to anhỹr prãm nẽ ixãmnhĩx ã amnhĩ nhĩpêx anhỹr o ri ixpa. Anẽ.

Tã no ãm mẽmoj piitã mẽ pamã mex kêt. Na htem kãm mẽmoj to anhỹr prãm xà hkõt mẽmoj piitã tanhmã ho ho ri pa nẽ tanhmã amnhĩ tomnuj to. Hãmri nhũm mẽ hkwyjaja ja hã mẽ omu nẽ mẽ urak nẽ tanhmã ri amnhĩ tomnuj to. Jao Kris kõt amnhĩ xunhwỳr tỳx kêt nẽ.

24 Jakamã kwa kêr pu mẽ amnhĩ pix kukamã pajamaxpêr pê tanhmã amnhĩ nhĩpêx to ho papa hkêt nẽ. Mãânẽn amnhĩ kwỳjê hkukamã pajamaxpêr pê tanhmã mẽ ho mex to ho ri papa pê tãm ri amnhĩ nhĩpêx o papa.

25 Nẽ kot kaj mẽ amnhĩ xàpkur xà japrôr kaxyw ma nhỹhỹm mra nẽ mãmrĩ axãmnhĩx ri amã mẽmoj prãm xà hkõt mẽmoj japrô. Nom kêr ka mẽ axujaprôrja kêp sãnti xàpkur xà hã mẽ hkukjêr kêt nẽ. ãm axãmnhĩx ri mẽ kêp mẽmoj japrôr o ri apa.

26 Tirtũm kapêr ã kagã htũm kot ja jarẽnh kot:

Pika piitã hkõt mẽmoj piitã kêp Tirtũm nhõ na. Anẽ.

Jakamã mẽ mãmrĩ axãmnhĩx ri mẽmoj piitã haprô nẽ mẽmoj piitã hkur o apa.

27 Tã koja mẽ kêp Kris kwỳ hkêt xwỳnhjê hõ ate kutã axàpkur kaxyw amnhĩ wỳr awỳ ka amã hwỳr amõr prãm nẽ mãmrĩ ma hwỳr mõ. Nhũm mẽmoj to amã anhõ ka axãmnhĩx ri mãmrĩ aku. No ri tee ri amnhĩ kukamã ajamaxpêr nẽ tanhmã hã hkukjêr to hkêt nẽ. Rỳ kãm:

—Kwa xà we mryja sãnti hã mẽ apkur xà na nà?

Anhỹr o hã mẽ hkukjêr kêt nẽ. ãm mãmrĩ axãmnhĩx hkur o akrĩ.

28-29 Nom koja Kris kõt mẽ kot amnhĩ xãm tohtuj anhỹr xwỳnhjê hõ mẽ awỳr axà nẽ tee ri ja hã apumu nẽ amã:

—Kwa sãnti hã mẽ apkur xà na ka ri mẽ kutã hkur o akrĩ.

Anhỹr o amã kapêr ka ama nẽ hkaga kurê kumrêx nẽ hkur kêt nẽ. Amã mex tã Kris kõt atõja kêp omnuj jakamã ka hkaga nẽ hkur kêt nẽ. No kot ka ãm ama nẽ arĩ hkur o anhỹr japêr. Kot amã harẽnh xwỳnhnta kêp omnuj tã ka arĩ noo mã hkur japêr. Nhũm ja hã apumu nẽ tee ri Tirtũm kapêr kukamã tanhmã hamaxpêr to. Hãmri nẽ apyrã nẽ kuku nẽ gaa nẽ tee ri amnhĩ kukamã hamaxpêr nẽ amnhĩ mã:

—Hêxta waa nẽ. Sãnti nhõja mex kêt tã pa ri kuku. Kwa na pa pêr hkurja o amnhĩ tomnuj nẽ. Hêxta waa nẽ. Anẽ.

Hãmri nẽ tee ri amnhĩ kukamã hamaxpêr o hkaprĩ nẽ. ã kot amnhĩ nhĩpêx anhỹr pymaj koja mẽhõ ã mẽmo mẽ apkur xà nẽ amã kapêr anẽ ka ama nẽ hkaga kurê kumrêx. Jao amnhĩ pix

kukamã ajamxpêr kêt nê. Määnên Kris kôt atõ nê atõxjê mex kukamã ajamxpêr. Nom koja amã kêp sânti hã mẽ apkur xà hã harê ka ama nê ã ajamxpêr anhÿr japêr nê ajamxpêr o:

—Nà kêp omnuj tã kot paj mamrĩ kuku. Ja inhmã mex kênã.

³⁰ Ra ixte Tirtũm mã harênh nê ixãmnhĩx hkur o inhÿr kênã kot kêt ã nê inhmã kapêr anê. Anê.

Kwa mẽ ã ajamxpêr anhÿr kêt. Kot kaj mẽ ã ajamxpêr anê hãmri nê Kris kôt atõ rÿ atõx mex kukamã ajamxpêr kêt nê.

³¹ Jakamã kêr ka mẽ tãm tanhmã amnhĩ nhĩpêx to ho ri apa. Nê axàpênh mex nê. Kêr kê mẽ piitã ja hã mẽ apumu nê mẽ apumunh kôt amnhĩm Tirtũm mex ã harê.

³² Nê kêr ka mẽ piitã mẽ noo mã tãm ri amnhĩ nhĩpêx o apa. Ijaew noo mã nê Ijaew kêt xwÿnhjê noo mã. Nê Jejus kwÿjê noo mã. Mẽ piitã mẽ noo mã tãm ri amnhĩ nhĩpêx rãhã ho ri apa. Mẽ kot tee ri mêmoj tã mẽ apumunh nê hpijaàm pymaj ka mẽ tãm ri mẽ piitã mẽ noo mã tanhmã amnhĩ nhĩpêx mex to ho ri apa.

³³ Na pa hte ã amnhĩ nhĩpêx anhÿr o ri ixpa. No na pa hte pa amnhĩ pix kukamã ijamxpêr kêt nê. Mẽ piitã mẽ mex kukamã na pa hte ijamxpêr o ri ixpa. Pê tanhmã amnhĩ nhĩpêx to ho ri ixpa. Mẽ kot ja hã ixpumunh nê ixpyrà nê Jejus kôt amnhĩ xun-

hwÿr nê ãm kôt pix mã ri amnhĩ nhĩpêx o pa kaxyw.

11

¹ Na pre hte Kris ã ã amnhĩ nhĩpêx anê nê mẽ piitã mẽ mex kukamã hamxpêr rãhã ho ri pa. Tã na pa hte uràk nê ã amnhĩ nhĩpêx anê. Jakamã kwa kêr ka mẽ ixpyrà nê ã amnhĩ nhĩpêx anhÿr o mãn ri apa.

Mënijaja mẽ mjên ã hpijaàm ã mẽ kãm karõ
Epes 5.22; Wam Pêtre 3.1-6

² Nê na ka xep htem arĩ ra ixte tanhmã mẽ amã ixkapêr toja mã ajamxpêr tÿx o ri apa. Na pa pre Kris kôt mẽ pahtõ nê mẽ pahtõxjaja xpên wÿr pikuprõnh nê tanhmã amnhĩ nhĩpêx to hã mẽ amã karõ ka prem inhma nê mẽ uràk nê ã amnhĩ nhĩpêx anê. ãm hãmri na ka htem ã amnhĩ nhĩpêx anhÿr o apa. Ja na inhmã mex.

³ Na pa pre krĩ hõ kamã mënijaja kot amnhĩ krã hpro hã mẽ amã mẽ harê. Ka prem inhma nhũm mẽ akwÿjaja kãm ja mex nê nhũm mẽ akwÿjaja tee ri ja kukamã ajamxpêr. No mêmoj kaxyw na hte mënijaja amnhĩ krã hpro? E kot paj ixprĩ hã mẽ amã ja jarê ka mẽ inhma. Nà Tirtũm kêp Kris jamãr xwÿnh nhũm Kris kêp Tirtũm mã mẽ inhmyjê jamãr xwÿnh. No mẽ anijaja mẽ amjên kêp Kris mã mẽ ajamãr xwÿnh. Na hte mënijaja ohtõ nê ra mẽ mjên ã amnhĩ to amnhĩrĩt kaxyw amnhĩ krã hpro nê ri pa. No mẽ inhmyjaja na pa htem

ã amnhĩ nhĩpêx anhÿr kêt nê. Na pa htem amarĩ ixkrã hkênh nê ixpa.

4 Jakamã na pa htem Tirtũm kapêr mar xà hã ixkre hwÿr axpên wÿr akuprõ nê Tirtũm nhÿ hã mẽ anijê mã kapêr jarênh o ixkuhê. Rÿ Tirtũm mã tanhmã mẽ pajarênh to. No ãm amnhĩ krã hpro hkêt rãhã kãm mẽ ajahkre rÿ kãm mẽ pajarê. Kot pa mẽ amnhĩ krã hpro nê te mẽ apê ixprõjaja mẽ apê mẽ ijamãr xwÿnh ã mẽ ajarênh pyrãk. Jao te mẽ ixte mẽ ijamãr xwÿnh Kris ã xpijaãm kêt pyrãk o amnhĩ nhĩpêx.

5 No mẽ anijaja mẽ ixte Kris mã mẽ ajamãr xwÿnh jakamã na ka htem Tirtũm nhÿ hã mẽ inhmã kapêr jarênh rÿ kãm mẽ pajarênh kaxyw nê amnhĩ krã hpro. Mê ixte Kris mã mẽ ajamãr xwÿnhjê hã apijaãm kaxyw ã amnhĩ nhĩpêx anê nê mẽ amnhĩ krã hpro. Kot ka mẽ ã amnhĩ nhĩpêx anhÿr kêt nê te mẽ ate mẽ ixtã apijaãm kêt pyrãk o amnhĩ nhĩpêx nhũm mẽ amjên tee ri ja hã apumu nê hpijaãm nê. Te ate amnhĩ krã hkênh nê ri apa nhũm tee ri apumunh nê hpijaãm pyrãk.

6 Kot kaj mẽ amnhĩ krã hkênh nê ri apa nê amnhĩ kamã apijaãm nê ri apa. Mẽ anijaja na ka htem akrã hkĩ japjê nê kamã amex nê ri apa. No kot ka mẽ amnhĩm akrã hkênh nê apunuj nê amnhĩ kamã apijaãm nê ri apa. Jakamã kêr ka mẽ Tirtũm mã amnhĩ jarênh kaxyw nê

amnhĩ krã hpro. Nom kot ka mẽ amjên ã apijaãm kêt nê ri apa hprãm japêr nê mamrĩ amnhĩm akrã hkênh nê ri amnhĩ kuk ã apijaãm kêt nê ri apa.

7 No mẽ inhmyjaja na pa htem amnhĩ krã hpro hkêt nê. Te mẽ ixpê Tirtũm pyrãk nhũm mẽ anijaja te mẽ apê Tirtũm kra pyrãk o na pu htem axpên nhĩpêx. Tirtũm krajaja na htem mẽmoj tã Tirtũm mã karõ hkêt nê. Ja pyrã nê mẽ anijaja na ka htem mẽ inhmyjê mã mẽmoj tã karõ kamã axihtÿx o apa hkêt nê. Na ka htem mẽ ixtã apijaãm kãm mẽmoj tã mẽ ixwÿ.

8 Amnepê mã Tirtũm kot mẽmoj to kator krax rũm na pre myja kumrêx nhĩpêx hãmri nê kêp õkwa i hõ kapa nê ho kãm hprõ nhĩpêx. No na pre nija kumrêx nhĩpêx nê õkwa i ho kãm mjên nhĩpêx kêt nê.

9 Myja mã na pre hprõ nhĩpêx. No nija mã mjên nhĩpêx kêt nê.

10 Jakamã kêr ka mẽ anijaja amjên ã apijaãm ã amnhĩ to amnhĩrit kaxyw hãmri nê mẽ inhmã Tirtũm nhÿ hã tanhmã akapêr jarênh to kaxyw rÿ kãm amnhĩ jarênh kaxyw hãmri nê amnhĩ krã hpro nê akuhê. Hãmri nhũm Tirtũm kapêr o mẽ wryk xwÿnhjaja ja hã mẽ apumu nê hkĩnh nê tee ri mẽ akukamã hamaxpêr kêt nê.

11-12 Nê wam ni kator xwÿnhnta na pre myja rũm kato. Tã na pa htem jarãhã

mē inhmyjaja hpānhā mē anijē rūm ijapôj. Tirtūm jamaxpēr xā hkôt. Tām na pre ā mē pahte amnhī nhīpêx anhÿr kaxyw ā mē panhīpêx anē. Tā mē ixpê Pahihiti Kris kwÿ hā mē inhmyjaja nē mē anijaja na pu htem ri ahte papa hkêt nē. Na pu htem axpēn kutā pamā axpēn hkīnh o papa nē mēmoj to axpēn kutā panojarêt o ri papa. Nē axpēn to presija ho papa. Na hte mē anijaja mē amjên o presija ho apa. Nē mē amyjaja na ka htem mē aprô ho presija ho apa. Tā kēr ka mē anijaja mē amjên ā apijaam o ri hkôt apa.

¹³ Jakamā kwa mē kot amnhī krā hproja kukamā ajamaxpēr tÿx nē. Xā mē anhō krī kamā mēnijaja mē mjên ā hpijaam ā amnhī to amnhīrit kaxyw amnhī krā hpro nā? Koja mē ja kaxyw ā amnhī nhīpêx anhÿr japêr kê mē rī mē anoo mā Tirtūm mā amnhī jarēnh kaxyw nē kupê xē hkwÿ ho amnhī krā hprô nē rī kām amnhī jarē. Nom koja mē ā amnhī nhīpêx anhÿr kêt nhūm mēmyjaja tee ri ja hā mē omunh nē ho kapêr hkêt japêr hāmri kê mē rī amnhī krā hpro hkêt nē ri pa.

¹⁴ Mē kot mē pahte amnhī nhīpêx ā mē pahpumunh nē hkīnh kaxyw na pu htem tanhmā amnhī nhīpêx to ho ri papa. Na htem mē pahkrā hkī jarēnh o: “Koja mēmyjaja hkrā hkī japjê nē ri pa nē ra kamā omnajti.” Anhÿr jakamā na pa htem amnhī

krā hkēnh nē ri ixpa.

¹⁵ No mē anijaja na htem mē ajarēnh o: “Mēnijaja na htem hkrā hkī japjê nē ri pa nē kamā muxti.” Anhÿr jakamā na ka htem akrā hkī japjê nē ri apa. Mē akī te kēp mē akrā hpro xā pyrāk. Na ka htem ā amnhī nhīpêx anhÿr o apa.

¹⁶ E na pa ra mē amā krī hkwÿ kamā Kris kwÿ nijaja kot mjên ā hpijaam ā amnhī to amnhīrit kaxyw tanhmā amnhī nhīpêx to hā mē harē. Tā koja mēhō nija tee ri ja ma nhūm ja kēp omnuj japêr. Nhūm amnhī jarēnh o:

—Kêt. Kot paj tanhmā inhmā amnhī nhīpêx to hprām xā hkôt tanhmā ri amnhī nhīpêx to ho ri ixpa. Koja inhmjên ja hā ixpumu nē hpijaam nē rī tām.

Anhÿr ā amnhī jarē ka mē tee ri ā kot amnhī jarēnh anhÿrja ā ama nē kām:

—Kwa nā ā ri ajamaxpēr anhÿr kêt nē. Na hte Kris kwÿjaja ā hamaxpēr anhÿr kêt nē. Anē.

Jejus tyk mā mē paja-maxpēr pē tanhmā mē pahte amnhī to hā mē pajarēnh

Matêwre 26.26-30; Makre 14.22-26; Rukre 22.19-20

¹⁷ Nē na ka xep htem Tirtūm mā amnhī jarēnh xā hā ixkre hwÿr axpēn wÿr akuprô nē kamā amnhī to mex kêt nē. Na ka htem tanhmā amnhī tomnuj to pa tee ri mē ajarēnh ma nē ixkaprī nē. Nē amnhīm mē amex ā mē ajarēnh kêt nē.

¹⁸ Na ka xep htem axpēn wÿr akuprô nē mēmoj tā

axpën mã akir nê axpën pê anhgrà. Nê ahpÿnhã mẽmoj mã ajamaxpër jao ra mẽ amã axpën kÿnh kêt nê. Na pa tee ri ã mẽ ajarënh anhÿrja ma nê ixkaprÿ htÿx nê.

¹⁹ Xà na hte Tÿrtÿm ahpÿnhã tanhmã mẽ pahte amnhÿ anhÿpêx to hã mẽ pah-pumunh kôt kãm mẽ pajapê hkêt ã amnhÿ jarê? Nà na hte ã amnhÿ nhÿpêx anhÿr kêt nê. Kãm mẽ pajapê ho axpën pyræk kênã.

²⁰ Nê na hte Kris kwÿjê piitã tōhã axpën wÿr akuprō nê Jesus tyk mã hamaxpër kaxyw pãwti hkwÿ hku. Tã mẽ kajaja na ka xep htem ja kaxyw axpën wÿr akuprō nom axtem nê Jesus tyk mã ajamaxpër pê axàpkur kêt nê. Âm mẽ axàpkur pix kukamã ajamaxpër nê axtem nê axàpkur rÿnh o akrÿ.

²¹ Jao amnhÿ pix kukamã ajamaxpër. Mẽ akwÿjaja wam mrar nê hpôx nê mẽ apkur xà hã mẽ hkrÿ xwÿnhjaja na xep htem hkwÿjê rom mẽõta pinh pa. Nê wÿhtija nhÿm mẽ mãânën hpenh pa nê axtem nê ho axpã. Jakamã nhÿm mẽ akwÿjaja kot amnhÿ to hapu nê hpôx xwÿnhjaja mẽmojta ã hprâr pa.

²² Kwa mon ka mẽ amã hprãm nê anhôrkwÿ kamã axàpkur kêt nê? Mẽ kot Tÿrtÿm mã amnhÿ jarënh xà hã ixkre kamã na htem apkur rÿnh hkêt nê. Ka mẽ ã amnhÿ nhÿpêx anê nhÿm mẽõ hkêt xwÿnhjaja amnhÿ to hapu nê mra nê mẽõ hã prã nê amnhÿ kamã hpijaãm nê. Kwa xà kot

pa ã mẽ ate amnhÿ nhÿpêx anhÿr ã mẽ ajarënh ma nê ixkÿnh nê mẽ ate amnhÿ nhÿpêx mex ã mẽ ajarê? Nà kot paj ã mẽ ajarënh anhÿr kêt nê.

²³ Pahihti Jejus na pre ja hã tanhmã inhmã kapêr to nê inhmã:

—Kêr ka mẽ tōhã axpën wÿr akuprō nê axàpkur pê ixtyk mã mãn mẽ ajamaxpër pê ã amnhÿ nhÿpêx anê nê ã amnhÿ nhÿpêx anê. Anê.

Jakamã kot paj ixprÿ hã amnhÿ xō ri mẽ amã kot tanhmã inhmã kapêr tota jarê ka mẽ inhma. Nà Jejus kormã htyk kêt ri Jut Kariot ra kot pōristi mã hã àmnênh kaxyw nhÿm kamàt nhÿm Jejus mẽ ÿ hã mẽ ahkre xwÿnhjê mẽ apkur kaxyw hkrÿ hpa. Hãmri nhÿm Jejus pãwti hō py nê o xa

²⁴ nê Tÿrtÿm mã harê nê kãm:

—Pa Papaj. Nà âm hãmri na ka hte mẽ inhmã mẽ inhō mex o apa. Anê.

Nê hpãnhã pãwja o hkry pa nê ho mẽ kot ÿ hã mẽ ahkre ho mẽ pa xwÿnhjê nhÿpêx pa nê mẽ kãm:

—E na pa ã pãwti ho hkry nê mẽ amã òr anê. Koja mẽ ã inhÿpêx anê nê te mẽ kot ixto hkry hpar pyræk o inhÿpêx pa amnhÿ xà htÿx kamã ijamak kãm ty. Nom mẽ anê kot paj ty. Jakamã e kêr ka mẽ ixwakre kamã tōhã axpën wÿr akuprō nê ixte mẽ ate amnhÿ tomnuj pãnhã amnhÿrer kaxyw mẽ anê ixtyk mã ajamaxpër pê akÿnh

ně pāwta kur o akrī. E mẽ māmri axàmnhīx aku. Aně.

²⁵ Hāmri ně hpānhā kop kām wīhtita py ně o xa ně mẽ kām:

—E kop kām wīhtija te kēp Tirtūm kot mẽ atā amnhī jarēnh nyw xà jarēnh pyrāk. Ixtyk kukwak ri koja mẽ ato hkra. Kot paj ty nhūm ixkamrō mẽ anē axkapī. Jakamā e. Mě kopja kamā wīhti ho akōm o axpēn nhīpēx. Ně ho akōm pē ixte mẽ anē ixtyk mā ajamxpēr. Aně.

²⁶ Tā ā kot amnhī jarēnh anhỹr jakamā na pu htem axpēn wỹr akuprō ně pāwti hkwy hku ně mẽmo kagō hkwy o ixkō. Ně ho pahkōm pē axpēn mā Jejus tyk jarēnh o pahkrī. Tā kēr pu mẽ arī ā amnhī nhīpēx anhỹr o ri papa rāhā nhūm Jejus akupỹn mẽ pahwỹr wrỹ.

²⁷ Jakamā kot kaj mẽ tōhā mẽmo arīgro hā kot mẽ panē htykja mā ajamxpēr kaxyw axpēn wỹr akuprō. Hāmri nhūm mẽ anhīō mẽ awỹr axà ně nhỹ. Nom axtem ně Jejus tyk mā hamxpēr kēt japēr. Ně htyx pāwti kur o nhỹ. Ně hkōt amarī mẽmo kagō ho hkōm o nhỹ. Koja ā htyk mā hamxpēr kēt rāhā amnhī nhīpēx aně ně te Jejus o kapēr pyrāk o amnhī nhīpēx. Te ho kapēr o:

—Nà Jejus amarī htyk nhūm hkamrō amarī hpikapīr kēnā. Na pre mẽ panē htyk kēt ně.

Anhỹr o ho kapēr pyrāk.

²⁸ Jakamā kwa kēr ka mẽ ate pāwta kur kaxyw ně taxy kormā tanhmā ate amnhī

nhīpēx to mā ajamxpēr ně ajamxpēr o:

—Kwa mǎn pa Tirtūm kapēr kōt amnhī nhīpēx mex rāhā ho ri ixpa nà?

Anhỹr o mǎn ajamxpēr. Hāmri ně ate hkōt amnhī nhīpēx mex ā amnhī pumu ně amarī axàmnhīx aku. No kot ka mẽ kormā mẽmoj punuj kaga hkēt ně arī ri ho anhỹr o pa hāmri ně kām ajamxpēr ně hkur kēt ně. Rỹ tanhmān tee ri tanhmā ate amnhī tomnuj tota mā ajamxpēr ně akaprī ně. Hāmri ně tokyx Tirtūm mā amnhī jarē ně amnhī to mex prām xāj amnhī to awỹ hāmri ně arī kormā axàmnhīx pāwtita ku.

²⁹ Koja mēhō mẽ akōt axà ně mẽmoj kukamā hamxpēr pē htyx pāwti nhīrēnhta ō py hkur o nhỹ. Hāmri nhūm Tirtūm tee ri ja hā omu ně hā tanhmā ho.

³⁰ Na ka mẽ ra axohtō ně ā amnhī nhīpēx aně ně atỹx ri mẽmoj kukamā ajamxpēr pē pāwta ku. Jejus kot mẽ panē htykja mā ajamxpēr kēt pē atỹx tanhmā ajamxpēr to pē hkwy hkur o akrī. Mýrapē na ka mẽ ra ja hā axà ně ri apa. Ně mẽ akwýjaja ra htyk rax ně.

³¹ Nom kot ka mẽ axpēn wỹr akuprō hāmri ně akupỹm tām axpēn kōt ajamxpēr ně axpēn kōt amnhī nhīpēx ně rī kormā pāwtita ku. Hāmri nhūm Tirtūm ja hā mẽ apumu ně tanhmā mẽ ato hkēt ně.

³² Na hte mẽ pahte tanhmā amnhī tomnuj to hā mẽ pahpumu ně hā tanhmā mẽ pahto. Mě pahte ja hā amnhī

pumunh nê axte ã amnhĩ nhĩpêx anhÿr kêt kaxyw na hte ã mẽ pahpê hkrajê nhĩpêx anê. Jakamã kot puj mẽ nhÿrmã mẽ kêp hkra hkêt xwÿnhjê hkôt kuwyta wÿr ma papa hkêt nê.

³³ Jakamã e Kris kôt ixtô nê ixtôxjaja. Kêr ka mẽ axte Pahihti Jejus tyk mã ajamaxpêr kaxyw axpên wÿr akuprô. Hãmri nê ra axpên wÿr apikuprôn pa hã axpên pumu nê rĩ kormã pãwti hkwy hku nê hkur pê Jejus kot mẽ panê htyk mã ajamaxpêr o akrĩ.

³⁴ Nê ka mẽ atô ra amã prãm japêr nê anhôrkwÿ kamã apku nê rĩ kormã mẽ hkôt tê. Jao ra anhôhy htu nê ajamakêtkati nê akwÿjê jamãr o nhÿ. Kê mẽ hpôx pa ka mẽ atipxi nê Pahihti Jejus tyk mã ajamaxpêr pê hkur o akrĩ. Hãmri nhũm Tĩrtũm ja hã mẽ apumu nê hkĩnh nê tanhmã mẽ ato hkêt nê.

Na ka prem mẽ ate inhmã kagà nê mênhta kamã mẽmoj tã ixkukjêr rax nê. Tã na pa ra kagà ja kamã mẽ amã hkwy jarênh rax nê. Nom kot paj piitã harênh par kêt nê. Kot paj ãm mẽ amã hkwy pix jarê. Hãmri nê nhÿrmã ma mẽ awÿr mō nê mẽ apumu nê kormã axte mẽ amã harênh jatur xàm kumê.

12

Mê kot Tĩrtũm kapêr o hêx xwÿnhjê jarênh

Rômãn 12.6-8; Wam Korît 14.29; Wam Pêtre 4.10-11; Wam Juãw 4.1-2

¹ Nê kot paj hpãnhã mẽ amã tanhmã Tĩrtũm Karô jarênh to ka mẽ inhma. Tanhmã kot mẽ pahkrã hto nhũm mẽ pahte ahpÿnhã tanhmã kãm amnhĩ nhĩpêx to ho papaja kot paj mẽ amã harê.

² Amnepê mã kormã mẽ ate Kris kôt amnhĩ xunhwÿr kêt ri na ka prem sãnti hkôt ri amnhĩ nhĩpêx o ri apa. Kapêr kêt tã ka prem hkôt ri amnhĩ nhĩpêx rãhã ho ri apa. Te kot mẽ ano kupyrr pyrãk ka mẽ kãm mex o mex ã harênh o ri apa. Nê kãm amnhĩ jagrer pê amnhĩ to hwÿr o ri apa. ã na ka prem amnhĩ nhĩpêx anhÿr o ri apa.

³ Tã ra hpãnhã Tĩrtũm kôt amnhĩ xunhwÿ.

Na htem ohtô nê Tĩrtũm nhÿ hã kapêr jarênh o pa hã amnhĩ jarênh tã no ãm mẽ hkwyjaja ja hã amnhĩ to hêx. Tã kot paj ixprĩ hã mẽ amã tanhmã mẽ harênh to. Koja mēhō mẽ kãm Tĩrtũm nhÿ hã kapêr jarênh o pa hã amnhĩ jarê hã koja Jejus o kapêr punuj o pa hkêt nê. Koja harênh o:

—Jejus kêp mẽ panhō Pahihti jakamã kwa pu mẽ hkôt amnhĩ xunhwÿ nê hkôt amnhĩ nhĩpêx o ri papa.

Anhÿr o harê. Koja mēhō ã mẽ amã kapêr anê ka mẽ ama nê mẽ kot Tĩrtũm nhÿ hã kapêr jarênh o pa xwÿnh ã omunh kurê kumrêx. No koja mẽ amã ã kapêr anhÿr kêt nê ka mẽ ama nê Tĩrtũm kapêr o hêx o pa hã omunh kurê kumrêx.

*Tirtüm Karō kām mẽ pahte
axpën to mex prãm ã harënh*

*Rômãn 12.6; Epes 4.7; Wam
Pêtre 4.10*

⁴ Nẽ ahpÿnhã kot tanhmã mẽ panhîpêx to xwÿnhja ãm pixii. Kêp Tirtüm Karō. Na hte mẽ pahkarō mã agjê nẽ ahpÿnhã tanhmã mẽ pahte axpën to mex kaxyw tanhmã mẽ panhîpêx to. Kot tanhmã mẽ panhîpêx to xàja ohtôô. Mẽ pahte ahpÿnhã ri tanhmã kãm amnhî nhîpêx to nẽ tanhmã axpën to mex to ho ri papa kaxyw na. Tirtüm Karō na hte ja kaxyw tanhmã mẽ pahkrã hto.

⁵ Nẽ mẽ pahte kãm tanhmã amnhî nhîpêx to ho papa xwÿnhja haxwÿja ãm pixii. Kêp Pahihti Jejus. Tã na pu htem ahpÿnhã kãm tanhmã amnhî nhîpêx to ho ri papa.

⁶ Nẽ kot mẽ pahto ajuta nhũm mẽ pahte ahpÿnhã tanhmã axpën to mex to ho papa xwÿnhja haxwÿja ãm pyxii. Kêp Tirtüm. Na pu htem ahpÿnhã tanhmã hkôt axpën xunhwÿr tÿx to kaxyw tanhmã axpën to mex to ho papa.

⁷ Nẽ Karōja na hte ahpÿnhã tanhmã axpën kaxyw mẽ panhîpêx to pu mẽ axpën to ajuta mex o ri papa.

⁸ Jakamã na pu hte mẽ pahkwÿjaja Tirtüm Karō nhÿ hã ma mẽ pahkwÿjê mã Tirtüm kapër jarënh o ri mẽ hkôt papa.

Nẽ mẽ pahkwÿjaja ma ÿ hã paxãhpumunh mex pẽ ma ri kapër o mẽ ahkre ho mẽ hkôt papa.

⁹ Nẽ mẽ pahkwÿjaja Karō nhÿ hã Tirtüm kot tanhmã mẽ pahto ajuta hto kaxyw hkôt paja-maxpër tÿx nẽ.

Nẽ mẽ pahkwÿjaja akupÿm mẽ à xwÿnhjê ho mex o papa nhũm mẽ akupÿm mex nẽ pa.

¹⁰ Nẽ mẽ pahkwÿjaja aa mẽ kot mẽmoj pumunh kêt kwÿ ho anhÿr o ri mẽ hkôt papa.

Nẽ mẽ pahkwÿjaja Tirtüm kapër mar tÿx nẽ ô ri mẽ kãm harënh o mẽ hkôt ri papa.

Nẽ mẽ pahkwÿjaja Tirtüm Karō nhÿ hã tanhmã mẽ kot amnhî nhîpêx to hã mẽ omunh o papa. Rÿ pahprî hã mẽkarōmnuti nhÿ hã mẽ kot amnhî nhîpêx ã mẽ omunh o papa.

Nẽ mẽ pahkwÿjaja nhãm mẽ kapër mar kêt tã ra mẽ kapër o pakapër.

Nẽ mẽ pahkwÿjaja mẽ kapër o pakapërja ma mẽ mẽ kot mar kêt xwÿnhjê mã harê. Kormã aa pahte mar kêt tã ra pahprî hã mar mex mẽ mẽ kãm harê.

¹¹ ã na hte Tirtüm Karō kãm hprãm xà hkôt tanhmã mẽ panhîpêx to pu mẽ ahpÿnhã ÿ hã ã axpën nhîpêx anhÿr o ri axpën kôt papa.

*Te mẽ pahpê Kris nhî pyrãk
ã mẽ pajarënh*

Rômãn 12.3-8; Epes 1.22-23, 4.11-16; Korosê 3.15

¹² E pa hpãnhã mẽ amã mẽ panhî kamã tanhmã mẽmoj

jarēnh to ka mẽ inhma nē hã anohtỳx nē. Mẽ panhĩa ãm pixi htã no ãm kamã mẽmoj xohtôô. Kamã mẽ pahpa nē kamã mẽ pajakwa. Nē mẽ panhĩnhu nē mẽ pano. Ǻ mẽ panhĩ kamã mẽmoj xohtô kot anhỹr. Ja pyrã nē Kris nhĩa ãm pixi htã te mẽ pahpê ĩ kamã mẽmoj xohtôta pyrãk. Mẽ pahkwỳjaja te mẽ pahpê hte pyrãk. Nē mẽ pahkwỳjaja te mẽ pahpê ĩhkra pyrãk. Nē mẽ pahkwỳjaja te mẽ pahpê no pyrãk.

13 Mẽ pahpê Kris kwỳjaja axpēn kaxyw mẽ paxohtôô. Mẽ ixpê Ijaewjaja nē mẽ apê Ijaew kêt xwỳnhjaja. Nē amarĩ ri mẽ kãm mẽ axàpēnh o mẽ apa xwỳnhjaja nē amnhĩ mã ri mẽ axàpēnh o mẽ apa xwỳnhjaja. Ǻ ahpỳnhã mẽ paxohtô kot anhỹr tã nhũm Tĩrtũm Karõ te mẽ pahpê Kris nhĩ pixi pyrãk o mẽ panhĩpêx. Nhũm Krisja mẽ pahpiitã mẽ pamã Karõ gõ nhũm mẽ pahkarõ mã agjê. Pixi htã mẽ pahpiitã mẽ pahkarõ mã agjê.

14 Nē mẽ panhĩa pixi tã kamã tanhmã mẽ pakute xàja ohtôô. Tã Kris nhĩa te kot mẽ panhĩa pyrãk. Urãk nē kamã mẽ paxohtôô. Jakamã na pu htem ahpỳnhã tanhmã kãm amnhĩ nhĩpêx to ho ri papa. Karõ kot tanhmã amnhĩ kaxyw mẽ panhĩpêx to xà hkôt.

15 Nē kop ãm mẽ pahparja kapēr ronhỹx tee ri mẽ

panhĩhkra pumu nē amnhĩ mã:

—Hêxta waa nē. Kêp ãm ixpê mẽ ĩhkra ronhỹx pa inhmex nē ijarir. No ãm ixpê mẽ hpar pix jakamã pēr ãm mẽ hkĩnhã ixpê mẽ hkwỳhkêt ãm ixpê mẽ hatur xà pix na pa.

Anhỹr o amnhĩ jarēnh japêr. Nom ja kot anhỹr kêt. Axtem nhỹhỹm kot mẽ pahto pa kaxyw na mẽ pahparja. Nē axtem mẽmoj tã mẽ paxàpēnh rỳ mẽmoj jamỳnh kaxyw na mẽ panhĩhkraja. Na pu htem hamẽ wa ho presija rãhã ho papa. Ja pyrã nē kot puj mẽ pahkwỳjê hõ mẽ parom Tĩrtũm Karõ nhỹ hã mẽmoj tã àpēnh tỳx ã omu nē hkĩnhã mẽ pahpa amnhĩ to warê hkêt ã amnhĩ jarēnh o papa hkêt nē.

16 Nē mẽ pajamakja kapēr ronhỹx kapēr o:

—Hêxta waa nē. Kêp apu ixpê mẽ no ronhỹx pa inhmex nē ijarir. No ãm ixpê mẽ umar xà pix jakamã pēr ãm ixte ho warê hkêt kumrêx.

Anhỹr o amnhĩ jarēnh japêr. Nom ja kot anhỹr kêt. Hamẽ wa mex kênã. Axtem ho mẽ paxumar kaxyw na mẽ pajamakja. Nē axtem ho mẽ parĩt kaxyw na mẽ panoja.

17 Kêp ãm mẽ pano pix ronhỹx pu mẽ parĩt pix nē paxumar kêt nē ri papa. Rỳ kêp ãm pajamak pix ronhỹx pu mẽ paxumar pix nē parĩt kêt nē mẽ paxupār kêt nē ri papa.

18 Mẽ panhĩa pixi htã kamã hikukrêx xohtôô. Na pre

Tirtũm amnhĩ krã hkõt kamã mēmoj piitã hipêx nē hanhõ.

¹⁹ Kêp ãm mē panhĩja kamã ãm mēmoj pixi ronhỹx pu mē pamex kêt nē papa.

²⁰ Tã no ãm kot anhỹr kêt. Mē panhĩja ãm pixi htã kamã hikukrêx xohtõ.

²¹ Jakamã na hte mē panoja amnhĩ nē mē panhĩhkra mã kãm:

—Tk kwa ma tẽ. Ixte ato presijare hã.

Anhỹr o kãm kapêr kêt nē. Rỳ mē pahkrãja amnhĩ nē mē pahpar mã kãm:

—Tk kwa ma tẽ. Na pa ato presija hkêt nē.

Anhỹr o kãm kapêr kêt nē. Ja pyrà nē kot puj mē nhỹri Kris kõt panhĩõ pumu nē pamex o pahte hakrenh ã amnhĩ jarênh kêt nē.

²² Nē mē panhĩ kamã mēmoj kwỳ te hirerek pyrãk tã no pu mē arĩ pamã hapê nē. Ja pyrà nē kêr pu mē kormã mē kot Kris kõt amnhĩ xunhwỹr tohtuj anhỹr xwỹnhjaja pu mē pamã mē hkĩnh kãm tanhmã mē kutã panojarêt to ho ri papa.

²³⁻²⁴ Nē na pu htem mē panhĩ kamã mē pakukrêx kwỳ hã pahpijaãm nē hpro nē ri ho papa. Nē hkwy hã pahpijaãm kêt nē hpro hkêt nē ho ri papa. Nē hkwy mē pahpê omnajti htã pu mē ho mex nē ri ho papa. Tirtũm kot ã mē panhĩpêx anhỹr jakamã na pu htem mē pakamã mē pakukrêx kwỳ mē pahpê omnajti htã pu mē ho mex nē ri ho papa. Ja pyrà nē kêr pu mē Tirtũm kõt mē pahtõ

nē mē pahtõx piitã ho mex o ri papa. Nē tãm mē hipêx. Mē pahkwỳjaja muxre nē mē pahkwỳjaja omnajti htã. Tanhmã mē kute htã pu mē kêp mē Jejus kõt mē pahtõ nē mē pahtõx ã mē ho mex o ri apa.

²⁵ Nē na hte mē panhĩkamã mē pahpar nē mē panhĩhkra nē piitã axpên kõt àpênh mex o pa. No na hte mē pahparja nhỹhỹm ma mra nhũm ihõja hkwy m nhỹhỹm ma mrar kêt nē. Na hte wa axpên kõt àpênh mex o pa. Ja pyrà nē kêr pu mē pahpê Tirtũm kraja axpên kõt amnhĩ nhĩpêx rãhã ho ri papa. Nē axpên to mex rãhã ho ri papa. No ri axpên kwỳm ri tanhmã amnhĩ nhĩpêx to ho ri papa hkêt nē.

²⁶ Na pu htem tõhã nhỹhỹnh panhĩ kamã paxà nē ri papa. Pahkrã tãtãk rỳ pakatut gêk. Jao te mē panhĩ piitã kamã mē paxà pyrãk. Nē nhỹhỹnh akupỹm pamex nē te panhĩ piitã hkõt akupỹm pamex pyrãk. Ja pyrà nē koja Kris kõt panhĩõ nhỹhỹnh ã nē ri pa. Rỳ tanhmã amnhĩ to nē ra hkaprĩ nē ri pa pu mē ja hã omu nē ý hã pahkaprĩ nē papa. No koja mēmoj tã hkĩnh nē pa pu mē ja hã omu nē ý hã pahkĩnh nē papa.

Te mē pahpê Kris nhĩ pixi pyrãk ã mē pa jarênh

²⁷ Nē mē pahpê Kris kwỳjaja te mē pahpê Kris nhĩ pixi pyrãk. Ahpỹnhã mē pahte tanhmã amnhĩ nhĩpêx to ho papa htã mē pahpê Kris kwỳ

jakamã te mẽ pahpê ĩ pixi pyrãk.

28 Nẽ mẽ pahte Kris kôt tanhmã pahkwỳjê ho ajuta hto ho papa kaxyw na pre Kris ahpỳnhã tanhmã mẽ paxunhwỳr to.

Mẽ pahkwỳjaja mẽ pahte ỹ hã nhãm mẽ kãm kapêr jarênh o papa kaxyw mẽ paxunhwỳ.

Nẽ mẽ pahkwỳjaja mẽ pahte ỹ hã tanhmã kapêr jarênh to ho ri papa kaxyw mẽ paxunhwỳ.

Nẽ mẽ pahkwỳjaja Tĩrtũm kapêr jarênh o mẽ ahkre ho ri mẽ papa kaxyw mẽ paxunhwỳ.

Nẽ mẽ pahkwỳjaja mẽ pahte aa mẽ kot mẽmoj pumunh kêt kwỳ ho anhỹr o ri papa kaxyw mẽ pa xunhwỳ.

Nẽ mẽ pahkwỳjaja akupỹm mẽ à xwỳnhjê ho mex o mẽ papa kaxyw mẽ pa xunhwỳ.

Nẽ mẽ pahkwỳjaja mẽ kapêr o mẽ hihtỳx o mẽ papa kaxyw mẽ pa xunhwỳ.

Nẽ mẽ pahkwỳjaja mẽ pahte tanhmã mẽ ho ajuta ho ho ri papa kaxyw mẽ pa xunhwỳ.

Nẽ mẽ pahkwỳjaja nhãm mẽ kapêr õ ho mẽ pakapêr o mẽ papa kaxyw mẽ pa xunhwỳ.

Ã na pre ahpỳnhã mẽ pahpê hkwyjê piitã mẽ paxunhwỳr anê.

29 No na pu htem pahpiitã axpên kôt Tĩrtũm kapêr o mẽ

ahkre ho ri papa hkêt nẽ.

Nẽ mẽ pahpiitã ỹ hã tanhmã pakapêr to ho ri papa hkêt nẽ.

Nẽ mẽ pahpiitã kapêr jarênh o ri papa hkêt nẽ.

Nẽ mẽ pahpiitã aa mẽ kot mẽmoj pumunh kêt kwỳ ho anhỹr o ri papa hkêt nẽ.

30 Nẽ mẽ pahpiitã akupỹm mẽ à xwỳnhjê ho mex o ri papa hkêt nẽ.

Nẽ mẽ pahpiitã mẽ kapêr õ ho ri pakapêr o ri papa hkêt nẽ.

Nẽ mẽ pahpiitã ri mẽ kapêrja ma nẽ pakapêr kãm pahkwỳjê mã harênh o ri papa hkêt nẽ.

Na pu htem ahpỳnhã tanhmã Kris kôt mẽ pahkwỳjê ho ajuta hto ho ri papa.

31 Tã kêr pu mẽ pahpiitã pamã axpên kĩnh pê tanhmã axpên to mex to ho ri papa. Ja na mex o kot mẽmoj piitã hakrenh par. E kot paj ixprĩ hã tanhmã mẽ amã ja jarênh to ka mẽ inhma.

13

Mẽ pahte axpên kamã paxukaprĩ ho papa hã mẽ pamã karõ

Juãw 13.31-35; Karatas 5.13-15; Korosê 3.12-14

1 Kot pa ma mẽ piitã ahpỳnhã mẽ kapêr kãm mẽ kãm Tĩrtũm kapêr jarênh o ri ixpa japêr. Ãm mẽ piitã mẽ kapêr o ixkapêr mex o mẽ kãm harênh o ri ixpa japêr. Nẽ Tĩrtũm kapêr o mẽ wrỳk xwỳnhjê kapêr o mẽ ahkre ho ri ixkwỳjê hkôt ixpa japêr. Tã

inhmã mẽ hkĩnh kêt kãm ixte mẽ ahkre ho ri ixpa ronhỹx mẽ inhma nẽ ãm inhma. Nhũm ixkapërja te ixte rat tatak pyræk o pa tee ri Tirtũm kapër o mẽ ahkre kaprý ho ri mẽ hkõt ixpa nhũm Tirtũm tee ri inhmã mẽ hkĩnh kêt ã xpumu nẽ inhmã:

—Nà amã mẽ hkĩnh kêt jakamã na ka tee ri ixkapër o mẽ ahkre kaprý. Anẽ.

² Rý kot paj Tirtũm xàhpumunh tỳx o mẽ kãm kapër pimxur kwý jarẽnh o ri ixpa japêr. Rý Tirtũm mẽ kurom inhmã mẽmoj to amnhĩrit pa omu nẽ mẽ kãm harẽnh o ri ixpa japêr. Rý pa Tirtũm kot amnhĩ nhĩpêx piitã omunh par japêr. Rý ixte amnhĩ kaxyw hkõt ijamaxpêr tỳx kõt ỹ hã kẽn krã hprêk õ mã ixkapêr nhũm kot inhmar nẽ inhmar xà hkõt nhãm pikamẽnh japêr. Tã inhmã ixkwýjê hkĩnh kêt kãm ã amnhĩ nhĩpêx anẽ nhũm Tirtũm tee ri ja hã xpumu nẽ inhmã:

—Nà amã mẽ hkĩnh kêt jakamã te axàhpumunh tỳx kêt kumrêx pyræk. Na ka tee ri ã mẽ kãm ixkapêr jarẽnh anhỹr o ri apa kaprý. Anẽ.

³ Rý pa mẽ kêp amrakati xwýnhjê mã ixkukrêx nhõr par japêr. Rý Kris ã mẽ kãm amnhĩ grõnh kõt mẽ kãm xa nhũm mẽ hã xpĩr japêr. Tã inhmã mẽ hkĩnh kêt kãm ã amnhĩ nhĩpêx anẽ nhũm Tirtũm tee ri ja hã xpumu nẽ inhmã:

—Nà ã ate mẽ kãm amnhĩ nhĩpêx anhỹr o ri apa htã amã mẽ hkĩnh kêt jakamã na ka

tee ri ã mẽ kãm amnhĩ nhĩpêx anhỹr kaprý. Anẽ.

⁴ Kot puj mẽ pamã axpẽn kĩnh hã kot puj mẽ kritpêm mẽ piitã mẽ kãm pahprĩ ho papa.

Jaο axpẽn kãm pagryk tokyx anhỹr kêt nẽ.

Nẽ pamã axpẽn to mex pix prãm.

Nẽ mẽmoj tã axpẽn kamã pagryk kurê kumrêx kêt nẽ.

Nẽ mẽmoj tã amnhĩ to jarkrar o ri papa hkêt nẽ.

Kot puj mẽ pamã axpẽn kĩnh hã kot puj mẽ ã amnhĩ nhĩpêx anhỹr o ri papa hkêt nẽ.

⁵ Nẽ kot puj mẽ axpẽn kamã paxukapri ho papa hã kot puj mẽ tãm axpẽn nhĩpêx rãhã ho papa. Jaο amnhĩ pix kukamã pajamaxpêr o ri papa hkêt nẽ. Nẽ mẽ pagryk tokyx anhỹr kêt nẽ. Rý axpẽn kãm pagryk tokyx anhỹr hkêt nẽ. Rý koja mẽhõ tanhmã mẽ panhĩpêx kati hto pu mẽ ãm amnhĩ tã omu nẽ axte kot tanhmã mẽ panhĩpêx tota mã pajamaxpêr kêt nẽ.

⁶ Nẽ kot puj mẽ pamã axpẽn kĩnh o papa hã kot puj mẽ tee ri mẽhõ kot tanhmã amnhĩ tomnuj to hã omu nẽ pahkapri nẽ. Rý tanhmã kot amnhĩ to mex to hã omu nẽ pahkĩnh nẽ.

⁷ Nẽ kot puj mẽ pamã axpẽn kĩnh o papa hã kot puj mẽ arĩ Tirtũm kot mẽ pahto mex par jatur xà mẽnh xà hã arĩgro jamãr rãhã ho ri papa. Nẽ mẽ kot Kris ã tanhmã mẽ pahto htã pu mẽ tee ri amnhĩ kukamã tanhmã pajamaxpêr

to hkêt nê. Ām mē kutā amnhī to htýx nê mē kām pakuhê nê arī amnhī kaxyw Tirtūm mā pajamaxpēr týx rāhā nê.

⁸ Nê kot puj mē pamā axpēn kīnh o papa hāmri nê aa mē pahte ā amnhī nhīpêx anhýrja mā panhūrer kêt nê. Nê arī mē pamā axpēn kīnh rāhā ho papa ho papa. Jar pika ja kamā mē pahte Tirtūm nhý hā mē kām kapēr jarēnh o ri papa htā kot puj mē nhýrmā ma ō krī hwýr api hāmri nê kuri axte ā kām amnhī nhīpêx anhýr kêt nê. Mo kaxyw kot puj mē axte ri mēhō mā kapēr jarē? Kot puj mē ō krī hwýr api nê ra mē pahpiitā paxàhpumunh o axpēn pyrāk.

Nê na pu htem tōhā mē kapēr ō ho pakapēr o ri papa. Nom kot puj mē nhýrmā Tirtūm nhō krī hwýr api hāmri nê kuri axte nhām ri mē kapēr o pakapēr kêt nê.

Nê na pu htem jar mē pahkwýjaja mē paxàhpumunh mex kôt Tirtūm kapēr jarēnh o ri papa. Tā kot puj mē nhýrmā ō krī hwýr api hāmri nê axte ā amnhī nhīpêx anhýr kêt nê. Ām mē pamā axpēn kīnh pixja kot puj mē arī ō krī kamā mē pamā axpēn kīnh tūm rāhā papa ho papa.

⁹ Jar mē pahpiitā mē paxàhpumunh tohtuj anhýr o pakapēr jakamā na pu htem kormā Tirtūm kapēr jarēnh tohtuj anhýr o ri papa.

¹⁰ Tā kot puj mē nhýrmā ō krī hwýr api nê kuri paxàhpumunh jatur xām mēnh pa. Jakamā nhūm jar mē

paxàhpumunh tohtuj anhýr xwýnhta mē pahpê hapêx.

¹¹ E pa mē amā ja hā ejēp jarē ka mē inhma. Nà amnepê mā ixprīre ri na pa pre ixtyx ri mēhprījê kot amnhī nhīpêx o amnhī nhīpêx nê mē hamaxpēr o ijamaxpēr. Nê mē kapēr mex kêt o ixkapēr o ri ixpa. Tā ra ixaptār hāmri nê mē aptārjê jamaxpēr o ijamaxpēr o ri ixpa. Te ra mē pahte kaxkwa kamā mē paxàhpumunh jatur xām mēnh parta pyrāk mē aptārjê jamaxpēr o ijamaxpēr o ri ixpa.

¹² Ja pyrā nê na pu htem kormā Tirtūm kot amnhī nhīpêx ā omunh tohtuj anhýr. Te mē pahte amnhī pumunh xā pynajre kamā pahprī hā amnhī pumunh mex kêêta pyrāk. Nom kot puj mē nhýrmā ō krī hwýr api hāmri nê pahprī hā paxàhpumunh jatur xām kumê. Te Tirtūm kot hprī hā tanhmā mē pakute hā mē pahpumunh parja pyrāk.

¹³ E arī mē pahte Tirtūm kôt amnhī nhīpêx o papa xāja na axkrunēpxi. Mē pahte hkôt amnhī nhīpêx o papa rāhā ho papa kaxyw. Wamta na ja: Kêr pu mē arī amnhī kaxyw Tirtūm mā pajamaxpēr mex rāhā ho ri papa. Nê hkôt ja: Kêr pu mē arī Tirtūm kot mē pahto mex par jatur xā mēnh xā hā arīgro jamār rāhā ho papa. Nê hkôt ja: Kêr pu mē arī pamā axpēn kīnh pé tanhmā axpēn to mex to rāhā ho papa. Ja na mex o kot wamta wa hakrenh. E kêr

pu mẽ ã amnhĩ nhĩpêx anhÿr
rãhã ho ri papa.

14

*Tĩrtũm Karõ kot mẽ pahto
mẽ paxihtÿx ã harênh*

*Wam Korît 12.7-11, 12.27-
31*

¹ E kêr ka mẽ arĩ amã axpên
kĩnh pê axpên to mex rãhã
ho ri apa nẽ aa jam anhũrer
nẽ ho ajamakêtkati hkêt nẽ.
Nẽ amnhĩ to Tĩrtũm Karõ mãn
amnhĩ to awÿ kê mẽ amã
tanhmã mẽ ajamaxpêr to ka
mẽ ahpÿnhã tanhmã axpên to
mex to ho ri axpên kôt apa.
Nẽ kêr ka mẽ ã ajamaxpêr anẽ
nẽ ajamaxpêr o:

—Inhmã mẽ hkĩnh o ri ixpa
hprãm tÿx. Nẽ Tĩrtũm Karõ
kot tanhmã ixto nhũm ixte
ahpÿnhã tanhmã mẽ ho ajuta
hto ho ixpaja pa mãânẽn
inhmã ho anhÿr prãm. Nẽ
kot tanhmã ijakwa hto nhũm
ixte ahpÿnhã mẽ kapêr õ ho
ixkapêrja pa mãânẽn inhmã
ho anhÿr hprãm. No kêr ixte
Tĩrtũm nhÿ hã mẽ kãm kapêr
jarênhja na inhmã ho anhÿr
prãm tÿx kumrêx. Anẽ.

²⁻⁴ Mẽ pakamã mẽ kapêr õ
ho Tĩrtũm mã kapêr xwÿnhjaja
na htem Tĩrtũm Karõ nhÿ hã
ãm kumã pix mã kapêr õta
o kãm kapêr nhũm tapxipix
mẽ kuma. No mẽ papajaja
na pu htem tee ri mar o
pahkrĩ nom mar kêr nẽ. ãm
kapêr xwÿnhta pix koja mẽ
pakurom amnhĩ ma. Nom
koja mẽ pakapêr kãm Tĩrtũm
mã amnhĩ jarê pu mẽ mar
mex nẽ. Nhũm mẽ pakapêr
kãm Tĩrtũm nhÿ hã mẽ pamã

kapêr jarê pu mẽ pahprĩ hã
kuma. Jao mẽ pamã kapêr
kôt amnhĩ nhĩpêx prãm nẽ.
Nẽ mẽmoj tã pahkaprĩ nẽ ri
papa htã mẽ kuma nẽ amnhĩ
kaxwÿnh kãm amnhĩ to paxi-
htÿx.

⁵ Mẽ apiitã mẽ ate nhãm mẽ
kapêr õ ho Tĩrtũm mã amnhĩ
jarênhja na mex. Nom mẽ ate
mẽ akapêr o mẽ akwÿjê mã
Tĩrtũm kapêr jarênh o ri mẽ
apaja na mex o wamta jakre.
Kot ka mẽ nhãm mẽ kapêr
õ ho Tĩrtũm mã amnhĩ jarê
nhũm mẽ akwÿjaja mẽ amar
kêr jakamã ka mẽ ã akapêr
anhÿrja o Kris kôt mẽ ho mẽ
hamaxpêr o hihtÿx kêr nẽ. ãm
kapxipix amnhĩ ma. Rÿ koja
kapêr õja mar mex xwÿnhjê
hõ amar japêr nẽ mẽ akapêr
kãm akwÿjê mã harê. Hã koja
ja mex nẽ. Nom kot kaj mẽ
apiitã ma mẽ kapêr kãm mẽ
kãm Tĩrtũm kapêr jarênh o ri
apa nhũm mẽ piitã hprĩ hã
amar mex nẽ. Nẽ amar xã
hkôt Tĩrtũm kapêr kôt amnhĩ
nhĩpêx mex nẽ.

⁶ Jakamã e Kris kôt ixtõ nẽ
ixtõxjaja. Kot paj apu nhÿrmã
ma mẽ awÿr mõ hãmri nẽ
nhãm mẽ kapêr õ ho mẽ amã
ixkapêr japêr ka mẽ inhmar
kêr nẽ. Nom kot paj mẽ
akapêr o mẽ amã ixkapêr
ka mẽ apiitã aprĩ hã inhmar
mex nẽ. Pa Tĩrtũm nhÿ hã mẽ
amã mẽmoj jarê rÿ tanhmã
kot amnhĩ nhĩpêx toja pa mẽ
amã harê. Rÿ Karõ nhÿ hã
mẽ amã mẽmoj jarênh o ã mẽ
amã Tĩrtũm kapêr jarênh anẽ
ka mẽ aprĩ hã inhmar mex

ně.

⁷ Nom mẽ kapěr õ ho mẽ kapěr o mẽ akõt ri mẽ pa xwýnhjaja te mēhõ kot htýx ri wiorãwti kakrēnh xwýnh pyræk. Koja htýx ri hkakrēnh o xa nhũm mẽ tee ri kot grer mar mã. Rý nhũm mēhõ htýx ri pifti kakõr o xa nhũm mẽ tee ri mẽmo mẽ grer mar mã.

⁸ Põristijaja na htem amarĩ ri tanhmã amnhĩ nhĩpêx to ho pa nhũm mẽ hkrãhtũmja mẽ kãm pifti kakõ nhũm mẽ kuma nẽ mẽ pijapu mã hamaxpěr kurê kumrêx nẽ hwýr hprõt. Nom koja kawax pê hkakõ rý htýx ri tanhmã hkakõr to nhũm mẽ kuma nẽ ãm kuma.

⁹ Ja pyrã nẽ kot kaj mẽ kapěr õ ho akwýjê mã akapěr nhũm mẽ ama nẽ ãm mẽ ama. Ka te ãm mẽ kãm ajakwa momok pyræk o axãm o amnhĩ nhĩpêx.

¹⁰ Nẽ ahpýnhã mẽ pakapěr xohtõ. Na htem ahpýnhã mẽ kapěr o amnhĩ kwýjê mã kapěr nẽ axpẽn mar mex nẽ.

¹¹ Nom koja mēhõ nhỹhỹnh pika hõ rũm ixwýr mõ nẽ mẽ kapěr o inhmã kapěr pa mar kêt nẽ. Nẽ amnhĩ xwar kutã ixkapěr o kãm ixkapěr nhũm ixpyrà nẽ inhmar kêt nẽ.

¹² Jakamã kot kaj mẽ amã Tirtũm Karõ xihtýx xà ho amã tanhmã kãm amnhĩ nhĩpêx to ho apa hprãm hã kot kaj mẽ amnhĩ to awý nẽ kãm:

—Kwa amnhĩ kõt ijamaxpěr o axihtýx Tirtũm. Pa anhy hã ixkapěr o ma Kris kõt ixkwýjê ho mẽ hamaxpěr o ixihtýx o ri mẽ hkõt ixpa.

Kê mẽ akapěr ma nẽ Kris kõt amnhĩ xunhwýr týt nẽ. Nẽ hkõt amnhĩ nhĩpêx mex o ri pa. Anẽ.

¹³ Nẽ kër ka mẽ nhãm mẽ kapěr õ ho Tirtũm mã amnhĩ jarēnh xwýnhjaja amnhĩ to Tirtũm Karõ wý nẽ kãm:

—Ixte mẽ kapěr õ ho ixkapěr tã ixte amnhĩ mar kêt. Jakamã kwa tanhmã ixto ijamaxpěr mex to pa amnhĩ mar mex nẽ ixkapěr kãm ixprĩ hã Kris kõt ixkwýjê mã ja jarẽ kê mẽ inhmar týt nẽ. Anẽ.

¹⁴ Nom kot paj nhãm mẽ kapěr õ ho Tirtũm mã mex ã harēnh tã amnhĩ mar kêt nẽ. Te ixpimtir kãm ixkarõ pix kapěr pyræk. No kot paj pam amnhĩ krã hkõt ixkapěr o kãm mex ã harẽ hãmri nẽ ra amnhĩ mar mex nẽ.

¹⁵ Nà ja na inhmã mex jakamã kot paj nhãm mẽ kapěr õ ho Tirtũm mã mex ã harẽ nẽ kãm gre. Nẽ mããnēn ijamaxpěr xà hkõt ixkapěr o mããnēn kãm mex ã harẽ nẽ kãm gre. Nà ja na inhmã mex.

¹⁶ Nom kot puj mẽ ma mẽ kot Tirtũm kapěr mar xà hã ixkre hwýr mra nẽ kamã Tirtũm mã mex ã harẽ. Tã pa nhãm mẽ kapěr õ ho kãm ixkapěr japēr. Ka mẽ ate inhmar o akrĩ xwýnhjaja tee ri inhma. Jakamã tee ri inhma nẽ ixkõt Tirtũm mã akapěr kêt nẽ. Rý kãm:

—Nà ãm hãmri na ã amex ã ajarēnh anẽ Tirtũm.

Anhyr o kãm akapěr kêt nẽ. Mẽ ate inhmaare hã kot ka mẽ ã kãm akapěr anẽ. Jakamã kot paj ri mẽ akamã mẽ kapěr

õ ho ixkapër kêt nê. Âm mẽ akapër pix o mẽ anom Tirtüm mã mex ã harê.

17 Kot paj mẽ kapër õ ho Tirtüm mã mex o mex ã harênh mex tâ ka mẽ mẽmo mẽ kapërja aprî hã mar kêt jakamã inhmar pê Tirtüm kôt amnhĩ xunhwÿr tÿx kêt nê.

18 Na pa hte tõiã mẽ arom nhãm mẽ kapër õ ho Tirtüm mã amnhĩ jarê. Nom nhÿri ahte nhÿ nê ã kãm amnhĩ jarênh anê. Âm hãmri na pre Tirtüm ja kaxyw tanhmã ixto pa hte ã amnhĩ nhĩpêx anhÿr o ri ixpa.

19 Tã na pu htem Tirtüm mã mex o mex ã harênh kaxyw nê ma mẽ kot kãm amnhĩ jarênh xã hã ixkreta wÿr axpên wÿr mra pa mẽ pikuprõnh xwÿnhjê kapër o mẽ kãm ixkapër. Nom kot paj nhãm mẽ kapër õ ho mẽ kãm ixkapër ry rax kumrêx tâ no nhũm mẽ inhmar kêt nê. Nom kot paj mẽ kapër o âm ixkapër krãnre htã no nhũm mẽ inhmar mex kurê kumrêx. Ja na inhãm mã mex.

20 Kwa mẽ ixkapër ma nê mar tÿx nê. Nê mẽhprĩrejê jamaxpër o ajamaxpër kêt nê. Âm Kris kôt mẽ àptàr tũmjê jamaxpër o mãn kêt mẽ ajamaxpër o ri apa. Âm mẽmoj pixire hkôt kot kaj mẽ âm hãmri te mẽhprĩjê jamaxpër pyræk o ajamaxpër. Mẽhprĩjaja na htem mẽmoj punuj kukamã hamaxpër kêt nê. Na htem âm htÿx pa. Tã kër ka mẽ uræk nê mẽmoj punuj kukamã ajamaxpër o ri apa hkêt nê.

21 Amnepêm na pre Tirtüm tanhmã Ijaewjê mã kapër to. Mẽ kapër o mẽ kãm kapër tâ no nhũm mẽ kuma nê âm kuma. Jakamã nhũm tee ri ja hã mẽ omu nê amnhĩ tâ tanhmã mẽ harênh to. Tanhmã mẽ harênh toja Tirtüm kapër ã kagà htũm kamã na. Kot mẽ harênh kot: E kot paj ma mẽ hwÿr axtem pika hõ rũm pòristi hkwy rê kê mẽ ma mẽ hwÿr mra nê mẽ unê. Hãmri nê amnhĩ kapër o mẽ kãm kapër nhũm mẽ tee ri mẽ kuma no âm hkôt mẽmoj pumunh kêt nê.

Koja mẽ ã mẽ hipêx anhÿr tâ nhũm mẽ arĩ kãm ixkapër mar nê amnhĩ kaxyw ixkôt hamaxpër prãm kêt nê. Anê.

Tirtüm kapër ã kagà htũm kot ã mẽ harênh kot anhÿr.

22 Jakamã kot kaj mẽ Tirtüm mã amnhĩ jarênh xã hã ixkre hwÿr akuprõ nê mẽ kapër õ ho Tirtüm mã amnhĩ jarênh japêr. Nhũm Kris kôt amnhĩ xunhwÿr kêt xwÿnhjaja mẽ akôt agjê nê hkrĩ nê tee ri mẽ akapër ma nê Kris kôt amnhĩ xunhwÿr kêt nê. Tanhmã kot mẽ amnhĩ to nê hkôt amnhĩ xunhwÿ? Mẽ kot akapërta maare hã. No kot ka mẽ akapër o Tirtüm nhÿ hã mẽ kãm akapër nhũm mẽhprĩ hã amar mex nê. Jao tanhmã hamaxpër to nê mẽ apyrà nê Kris kôt amnhĩ xunhwÿr japêr.

23 Nom kot ka mẽ apiitã nhãm mẽ kapër õ ho Tirtüm mã mex ã harê nhũm amarĩ ri mẽ pa

xwỳnhjaja mẽ awỳr agjê nẽ mẽ akapêr ã mẽ ama nẽ hã mẽ apumu. Hãmri nẽ tee ri hamaxpêr nẽ mẽ akrã pipãnh ã axpên mã mẽ ajarê.

²⁴ Nom koja mẽ awỳr agjê ka mẽ akatât kôt mẽ amnhĩ kapêr o Tirtũm kapêr jarênh o akuhê nhũm mẽhprĩ hã mẽ amar mex nẽ. Hãmri nẽ amnhĩ kapêr o akapêr ma nẽ hamaxpêr o:

—Hêxta waa nẽ. Xep ixte amnhĩ tomnuj xwỳnh na pa. Nà ãm hãmri na mẽ Tirtũm kapêr jarê. Nà ãm hãmri na kêt ja. Anê.

²⁵ Hãmri nẽ mẽ amã tanhmã kot amnhĩ tomnuj to hã amnhĩ jarênh pa hãmri nẽ hkaga nẽ Jejus kôt amnhĩ xunhwỳ. Nẽ hkõnkrã ho htêm nẽ hkrĩ nẽ Tirtũm mã mex o mex ã harê. Hãmri nẽ mẽ amã:

—Nà ãm hãmri na hte Tirtũm mẽ akamã pa ho pa. Anê.

Tirtũm nhõrkwỳ kamã mẽ pahte tanhmã amnhĩ nhĩpêx to hã mẽ pamã karõ

Atre 2.42, 5.12-13; Eprêw 10.25

²⁶ E Jejus kôt ixkwỳjaja. Kot paj hpãnhã axtem mẽ amã mẽmoj tã karõ. Mẽ kot Tirtũm mã amnhĩ jarênh xà hã ixkre kamã tanhmã mẽ ate amnhĩ nhĩpêx to hã karõ ka mẽ inhma.

Nà kêr ka mẽ axpên wỳr akuprõ nẽ akrĩ ka mẽ atõ amã Tirtũm mã mex ã harênh ã mẽ grer o agrer prãm hãmri nẽ mãmrĩ kãm ho gre. Hãmri nẽ agrer pa kê apãnhã mẽhõ kãnhmã xa nẽ Tirtũm kapêr

kwỳ ho mẽ ajahkre. Nẽ ho anhỳr pa nhũm hpãnhã mẽhõ kãnhmã xa nẽ Tirtũm kot tanhmã ho mex to hã mẽ amã amnhĩ jarê. Nẽ amnhĩ jarênh pa hãmri nhũm mẽhõ nhãm mẽ kapêr õ ho mẽ amã ujarênh japêr. Hãmri nẽ ujarênh pa kê mẽhõ hpãnhã mẽ akapêr o hprĩ hã mẽ amã kapêrta jarê.

E kêr ka mẽ axpên wỳr akuprõ nẽ Kris kôt axpên to axihtỳx kaxyw ã axpên pãnhã amnhĩ nhĩpêx anê.

²⁷ Nẽ ka mẽ atõ amã nhãm mẽ kapêr õ ho mẽ kãm akapêr prãm japêr. Nom kêr ka mẽ axohtõ nẽ ã mẽ kãm amnhĩ nhĩpêx anhỳr kêt nẽ. ãm mẽ atõ wa axkruttre rỳ axkrunêpxire nẽ mẽ kapêr õ ho mẽ kãm akapêr. Hãmri nẽ axpên pãnhã akapêr pa kê mẽhõ kot hprĩ hã mẽ kapêr õta mar japêr nẽ mẽ apãnhã xa nẽ mẽ akapêr o mẽ kãm harê kê mẽhprĩ hã mar mex nẽ.

²⁸ Nom koja ja kaxyw mẽhõ amrakati japêr ka mẽ kapêr õ ho akapêr kêt nẽ. ãm kapxipix nhỹri ahte Tirtũm mã akapêr.

²⁹ Nẽ kê Tirtũm nhỹ hã kapêr jarênh xwỳnhjê hõ wa axkrut rỳ axkrunêpxi nẽ mẽ ajahkre ka mẽ aprĩ hã mar o akrĩ. Hãmri nẽ mar pa nẽ tanhmã mẽ harênh to. ãm hãmri Tirtũm nhỹ hã kapêr ã mẽ harê rỳ ho hêx ã mẽ harê.

³⁰ Nẽ koja mẽhõ Tirtũm nhỹ hã mẽmoj jarênh o xa. Rõm nhũm Tirtũm mẽ kaxyw mẽ atõ mã ajamaxpêr kwỳ

gõ. Ka kapër o ãm xwÿnhnta mã kànhmã anhĩhkra pẽ kê apumu nẽ anhĩkrê. Hãmri ka hpãnhã xa nẽ mẽ kãm tanhmã ajamaxpër tota jarẽ.

³¹ Nom kêr ka mẽ anhĩpê mẽ kãm akapër hkêt nẽ. Æm axpën pãnhã Tirtùm kapër o axpën jahkre nẽ ho axpën jamaxpër o axihtÿx. Ja mex.

³²⁻³⁴ Nom kêr ka mẽ axpën wÿr akuprõ nẽ apiitã anhĩpê atÿx ri akapër kêr nẽ. Ja na Tirtùm kêp hprãm nõkati. Mẽ ate axpën pãnhã axpën mã akapërja na kãm hprãm. Jakamã kê mẽ kot Tirtùm nhÿ hã mẽ kapër jarënh o pa xwÿnhjaja taxy axpën jahkre hã axpën jamã. Nhùm mẽhõ kumrêx kapër pa hãmri ka hpãnhã mẽ kãm akapër.

Nẽ kê mënijaja amarĩ mẽ ahkreja mar o hkrĩ. Ijaew kot amnhĩ nhĩpêx xà hkôt. Jakamã kwa mẽ anijaja. Kêr ka mẽ amarĩ akryk mẽ mar o akrĩ nẽ axpën mã akapër o akrĩ hkêt nẽ.

³⁵ No kot kaj mẽ tee ri mẽmoj ma nẽ mar mex kêr japêr tã hã axpën kukjêr kêr nẽ. Æm akryk arĩ mar o akrĩ. Hãmri nẽ akupÿm anhõrkwÿ hwÿr tẽ nẽ rĩ kormã hã amjên kukja. Nom kot ka mẽ apikuprõnh xà hã ixkre kamã axpën mã akapër o akrĩ nhùm mẽ amjênjaja tee ri ja hã mẽ apumu nẽ hpijaãm nẽ.

³⁶ E na pa ã Tirtùm mã amnhĩ jarënh xà hã ixkre kamã tanhmã mẽ pahte amnhĩ nhĩpêx to hã mẽ amã karõ anẽ. Tã te mẽ apê ja mex

kêt pyrãk. Kwa mon ka wem ja ma nhùm mẽ apê omnuj nẽ? Xà mẽ ate Tirtùm kapër mar mex o ijakrenh kôt na ka mẽ ã ajamaxpër anẽ? Xà na pre Tirtùm mẽ akumrêx mã kapër? Hã na ka mẽ ã ajamaxpër anẽ? Rÿ xà mẽ kapxipix mã na pre kapër? Hã na ka mẽ ixkapêr ma nhùm mẽ apê omnuj nẽ? Nã ixkumrêx na pa pre mẽ awÿr inhmõr nẽ mẽ amã Tirtùm kapër jarënh kênã kot ka kêr mẽ axtem nẽ ã ajamaxpër anẽ.

³⁷ Kot kaj mẽ atõ ã ajamaxpêr anhÿr japêr nẽ ajamaxpêr o:

—Nã na pre Tirtùm tanhmã inhmã kapêr to pa ô ri mẽ kãm ixujarënh mex o ri ixpa.

Anhÿr o ajamaxpêr. Rÿ ajamaxpêr o:

—Nã na pre Tirtùm Karõ mẽ kaxyw tanhmã ixto pa ÿ hã tanhmã mẽ ho mex to ho ri ixpa.

Anhÿr o ajamaxpêr. Kot kaj mẽ ã ajamaxpêr anẽ hãmri nẽ mããnên pa ã ixte amnhĩ nhĩpêx anhÿr ã ixpumunh mex kurê kumrêx. Amnhĩ pyrã nẽ ixte Tirtùm nhÿ hã mẽ kãm ixkapêr xwÿnh ã ixpumunh nẽ hã ijarënh kurê kumrêx.

³⁸ Nom koja ja hã ijarënh kêr ka mẽ ja hã omu hãmri nẽ tanhmã kot mẽ amã kapêr toja ma nẽ ãm ama.

³⁹ E Kris kôt ixtõ nẽ ixtõxjaja. Kêr ka mẽ amnhĩ to Tirtùm Karõ wÿr kê ma mẽ ate mẽ kãm Tirtùm kapêr jarënh o ri apa kaxyw mẽ ato mẽ axihtÿx.

Nē koja mēhō kām nhām mē kapēr ō ho kapēr prām ka mē ja nē kām akapēr kēt nē. Kwār māmri ā amnhī nhīpēx anē.

⁴⁰ Nom kēr ka mē ate Tirtūm mā amnhī jarēnh xà hā ixkre kamā xpēn pānhā xpēn mā akapēr nom anhīpē kām akapēr hkēt nē.

15

Kris akupŷm htīr kumrēx ā harēnh

Atre 2.23-36, 10.39-41; Wam Korit 6.14

¹ E Kris kōt ixkwŷjaja. Kot paj axte mē amā Jejus kot mē panē tanhmā amnhī nhīpēx to hā harē ka mē inhma. Na pa pre ra mē amā ja jarē ka mē ama nē hkōt amnhī xunhwŷ. Nē hkōt amnhī nhīpēx mex o ri apa.

² Na pa pre mē amā harē ka mē amnhī kaxyw kām ajamaxpēr tŷx nē nhūm Tirtūm mē ato hkra. Tā ka htem arī kapēr kōt amnhī nhīpēx mex o ri apa. Koja mēhō kot Tirtūm kapēr mar tā amnhī kaxyw hkōt hamaxpēr kēt nē nhūm Tirtūm tee ri amnhī tā omu nē ho hkra hkēt nē.

³ Na pa pre amnhī krā hkōt mē amā tanhmā Kris jarēnh to hkēt nē. Ixte kapēr mar xà hkōt na pa hte amnhī xō ri mē amā tanhmā harēnh to ho ri ixpa. Jejus jarēnhja na mex o kot mē ujarēnh piitā hakrenh par kumrēx. Tā tām kot paj mē amā harē. Na pre Krisja mē pahte amnhī tomnuj pānhā amnhīrer kaxyw mē panē ty. Tirtūm kapēr

ā kagà htūm kot hkukamā harēnh xà hkōt.

⁴ Hāmri nhūm mē kēn kre kamā haxà nhūm kamā nōr o apkati. Nē axte hā apkati. Hāmri nhūm Tirtūm akupŷm ho htīr. Kapēr ā kagà htūm kot hkukamā harēnh xà hkōt.

⁵ Tā nhūm Simāw Pētre kumrēx akupŷm htīr ā omu nhūm hpānhā Jejus nhŷ hā mē ahkre ho mē pa xwŷnh maatijaja haxwŷja omu.

⁶ Hāmri nhūm mē kot hkōt mē pa xwŷnh pē 500 jakrenh xwŷnh piitā anhīpē haxwŷja akupŷm htīr kām omu. Na pre ra mē hkŷŷjaja ty nhūm mē hkŷŷjaja arī htīr nē pa.

⁷ Jakamā nhūm prem ra akupŷm htīr kām omu. Hāmri nhūm hpānhā Xiakreja omu. Nhūm hpānhā ŷ hā mē ahkre o mē pa xwŷnh piitā omu. Akupŷm htīr kām omu.

⁸ Tā pa na pa pre ijaxwŷja amnhī to hapu nē akupŷm htīr kām omu. Te ixpē mē hkra kot hapu pyrà nē amnhī to hapu nē omu. Na pre kaxkwa kamā inhmā kapēr o xa pa ixprī hā omu.

⁹ No mē kot ixpyrā nē Kris nhŷ hā mē ahkre ho mē pa xwŷnh maati hkŷŷjaja na mē mex o kot ijakrenh. Na pa pre hte mē hkīnhā amnhī tomnuj tŷx nē. Jao Kris pē hkrajē homnuj tŷx o ri ixpa. Tā hkōt amnhī xām hāmri nē tee ri ā amnhī nhīpēx anhŷr ā amnhī pumu nē amnhī kamā ixpijaàm tŷx nē. Jakamā na pa hte Kris nhŷ hā kapēr jarēnh o ixpa hā amnhī pumu nē ixte hkōt amnhī xām kēt ri tanhmā ixte amnhī nhīpēx

toja mā ijamaxpēr nē ixpi-
jaàm nē.

¹⁰ Na pa pre amnhĩ tomnuj
tỳx o ixpa htã nhũm Tĩrtũm
arĩ kãm ijapê nē. Nē ixkamã
ukaprĩ nē. Pa pre hkôt amnhĩ
xãm nhũm ixto hkra pa ra
kãm tanhmã amnhĩ nhĩpêx to
mex rãhã ho ixpa. Jakamã na
hte tee ri amnhĩ tã ixpumu nē
tanhmã hamaxpēr to hkêt nē.
Rỳ hamaxpēr o:

—Hêxta waa nē. Inhmã
Pawre japê nē ixte ho mex tã
nhũm ixkôt amnhĩ nhĩpêx kêt
kumrêx.

Anhỹr o tee ri hamaxpēr
kêt nē. Na pa hte kãm tanhmã
amnhĩ nhĩpêx to ho ixpa rũnh
o ỹ hã mẽ kapēr o pa xwỳnh
kwỳjê jakre ho ixpa. Nom
amnhĩ krã hkôt mẽ ahkre
hkêt nē. Ja kaxyw na pre
Tĩrtũmja ixto ixihỳx pa ỹ hã
kãm tanhmã amnhĩ nhĩpêx to
ho ri ixpa nhũm ja hã ixpumu
nē hkĩnh nē.

¹¹ Nē Jejus jarênhja ãm pixii.
Axtem hõ hkêt. Nē ỹ hã mẽ
ahkre ho mẽ pa xwỳnhjê
kapêrja nē pa ixte mẽ amã
harênhja kot axpên pyrãk.
Harênh tipxi. Kris kot mẽ
pahte amnhĩ tomnuj mỳrapê
mẽ panê htyk nhũm Tĩrtũm
kot akupỹm ho htĩr ã wa
harênhja na pa hte pix jarênh
o ri mẽ akôt ixpa. Ka prem
inhma nē amnhĩ kaxyw hkôt
ajamaxpēr tỳx nē.

*Tĩrtũm kot akupỹm mẽ
pahto mẽ pahťĩr ã harênh*

Rukre 20.37

¹² Nē kwa ra ixte mẽ amã
Kris htyk nē akupỹm htĩr ã
harênh tã ka xep mẽ akwỳjaja

axtem nē mẽ htyk nē akupỹm
mẽ htĩr kêt ã mẽ hkamnhĩx o
ri apa.

¹³ Kwa mẽ ajamaxpêrja
mex kêt. Kêp apu ãm hãmri
mẽ ate ã mẽ harênh anhỹr
ronhỹx pre Kris haxwỳja
akupỹm htĩr kêt nē. Nhỹx pre
htyk o ty.

¹⁴ Nē kêp apu Kris akupỹm
htĩr kêt ronhỹx pa
mẽ ãm mẽ amã kapêr
jarênh o ixpa kaprỳ.
Ka mẽ ajaxwỳja amnhĩ
kaxyw hkôt ajamaxpêr
kaprỳ.

¹⁵ Nē kêp ãm akupỹm mẽ
htĩr kêt ronhỹx pa mẽ
ixte mẽ amã Tĩrtũm
kapêr jarênh o ri ixpa
xwỳnhjaja mẽ amã ho
ixêx o ri ixpa. Na pa
htem mẽ amã Tĩrtũm
ra kot akupỹm Jejus
o htĩr ã harênh o mẽ
akôt ixpa. Tã kêp apu
akupỹm mẽ htĩr kêt
ronhỹx pa mẽ ãm mẽ
amã harênh o ixêx.

¹⁶ Nē kêp apu akupỹm mẽ
htĩr kêt ronhỹx pre Kris
haxwỳja akupỹm htĩr
kêt nē. Nhỹx pre ãm
amarĩ tyn hapêx.

¹⁷ Nē Kris amarĩ htyk nē
hapêx ronhỹx kot pu
mẽ ri amnhĩ kaxyw
hkôt pajamaxpêr nē
hkôt amnhĩ xunhwỳr
kaprỳ.

Nē Kris amarĩ htyk nē hapêx
ronhỹx pre Tĩrtũm
Jejus kukwak ri mẽ
panê mẽ pahte amnhĩ
tomnuj o hapêx kêt nē.
Nhỹx pu mẽ pahpiitã

nhÿrmã ma kuwy hwÿr
pajapêx pa.

18 Nê kêp apu Kris htyk nê
hapêx ronhÿx ra mẽ
kot amnhÿ kaxyw hkôt
hamaxpêr tã ra htyk
xwÿnhjaja ma mẽ kot
amnhÿ tomnuj mÿrapê
kuwyta wÿr hapêx.

19 Nê kêp apu Kris htyk
kumrêx nê hapêx
ronhÿx pu mẽ kormã
pahtyk kêt xwÿnhjaja
tee ri amnhÿ wÿr kamã
pajamak o ri papa
kaprÿ. Nê pahpê
hkra hã amnhÿ jarênh
kaprÿ. Jao pahkaprÿ
htÿx o mẽmoj piitã
hakrenh par kumrêx
nê ri papa.

*Kris kumrêx akupÿm htÿr ã
harênh*

*Atre 26.23; Sikÿn Korit
4.14; Piripos 3.10-11; Wam
Tesarôn 4.15-18; Apokarip
20.1-15*

20 Nã mẽ htyk nê nhÿrmã
akupÿm mẽ htÿr kêt ã mẽ
harênhja kot anhÿr kêt. Ra
Tÿrtÿm kot akupÿm Kris o htÿr
jakamã koja mãânên hkra
htyk xwÿnhjaja nhÿm mẽ piitã
Jejus pyrã nê nhÿrmã akupÿm
mẽ ho htÿr pa. Jakamã na
pu htem Kris akupÿm htÿrja
mã pajamaxpêr nê amnhÿ
kukamã pajamaxpêr o:

—Nã ra Tÿrtÿm kot akupÿm
Jejus o htÿr jakamã koja urak
nê nhÿrmã akupÿm mẽ pahte
hkôt amnhÿ xunhwÿr xwÿnh
piitã mẽ pahto mẽ pahtÿr. Nã
koja ã mẽ panhÿpêx anê. Ja

kaxyw àhpumunh tÿx kumrêx
xwÿnh kênã. Anê.

21 Nê amnepê m na pre
Tÿrtÿm my kot waja nhÿpêx.
Hãmri nhÿm kot tanhmã
amnhÿ tomnuj to ho ra mẽ
htykja o hkrax. Tã nhÿm
wamta kôt my hõta wamta
rom amnhÿ to mex o mẽ htyk
tã akupÿm mẽ ho htÿr o hkrax.

22-23 Tã mẽ pahpê wam my
pê Atãw kanrêhã tàmnhwÿ
jakamã kot puj mẽ urak nê
nhÿrmã ty. No ãm mãânên mẽ
pahpê Kris kraa. Kris kumrêx
na pre akupÿm htÿr. Tã koja
nhÿrmã akupÿn mẽ pahwÿr
wry hãmri nhÿm Tÿrtÿmja kot
hipêx pyrã nê akupÿm mẽ
pahto mẽ pahtÿr. Mẽ pahte
hkôt amnhÿ xunhwÿr ã mẽ
pahpumunh kôt akupÿm mẽ
pahto mẽ pahtÿr pa. No ãm
kormã.

*Kris nhÿrmã kot mẽ htyk o
hapêx ã harênh*

*Juãw 11.25; Rômãn 6.23;
Wam Korit 15.54; Sikÿn
Ximotre 1.10; Eprêw 2.14;
Apokarip 20.14*

24-28 Nê koja Kris arÿ mẽ ho
amnhÿptar rãhã nhÿm Tÿrtÿm
mẽ kot kutã amnhÿ xunhwÿr
xwÿnhjê pê mẽ hihtÿx xã ho
hapêx pa. Kapêr ã kagã htÿm
kot ja jarênh kot:

Koja nhÿrmã Tÿrtÿm Kris kot
kãm mẽ ho amnhÿptar
kaxyw ãm. Anê.

Jakamã Jesus tapxipix koja
mẽ ho amnhÿptar o pa. Koja
Tÿrtÿm pix mẽ ho amnhÿptar
kêt nê. Nom koja pahi
hkwÿjê hõ axte nhãm mẽ ho
amnhÿptar kêt kumrêx.

Tã mẽ kot mẽkarõmnuti hkõt kãm tanhmã amnhĩ to ho mẽ pa xwýnhjaja koja Tirtũm ma amnhĩ nẽ kuwy hwýr mẽ rẽnh pa. Nẽ mẽhtykja o hapêx nhũm mẽhõ axte htyk kêt kumrẽx. Jakamã koja Jejus Kris mẽmoj punuj piitã ho hapêx nẽ Mẽpahpãm Tirtũm nhĩhkram akupým mẽmoj piitã haxàr pa. Tirtũm jamaxpêr xà hkõt ã mẽmoj to anhýr par anẽ hãmri nẽ ìhkram mẽmoj jaxàr pa. Nẽ mãânẽn tãm kãm amnhĩ gõ. Jakamã nhũm Tirtũm tapxipix mẽmoj piitã ho amnhĩptàr pa.

Mẽ htyk xwýnhjê jarẽn

²⁹ Nẽ na hte mẽ pahkwýjaja kormã kęp Tirtũm kra hkêt tã Jejus kõt mẽ kot amnhĩ xunhwýr nẽ mẽ htyk xwýnhjê mã hamaxpêr o pa. Hãmri nẽ mẽ kãm nhýrmã axte mẽ omunh prãm xàj mẽ uràk nẽ Jejus kõt amnhĩ xunhwý nhũm mẽ hkrã kumrã. Tã akupým mẽ htír kêt ronhýx mẽ ãm ã paja-maxpêr anhýr kaprý.

³⁰ Nẽ paa. Na pa hte ma mẽ kãm Tirtũm kapêr jarẽn o ri mẽ hkõt ixpa. Nhũm mẽ hkwyjaja ja hã inhma nẽ ixkamã gryk nẽ ixtã amýnẽ pa mẽ mýrapê ixpunuj nẽ ri ixpa. No ãm amnhĩ to htýx nẽ arĩ ri mẽ kãm Kris kapêr jarẽn o ri mẽ hkõt ixpa. Tã kęp ãm nhýrmã akupým ixtír mã kêt ronhýx pa tee ri ã amnhĩ nhĩpêx anhýr o ri ixpa kaprý.

³¹ Na htem apkati mẽ ixtã tanhmã àmnẽn to ho ri pa.

Ãm hãmri na pa mẽ amã ã mẽ harẽn anẽ. Nom na pa hte tee ri amnhĩ kukamã ija-maxpêr o ri ixkaprĩ nẽ ixpa hkêt nẽ. Mẽ kot ixpír mã tã pa hte mẽ ate Pahihtu Jejus Kris kõt amnhĩ nhĩpêx mex ã mẽ apumunh kõt ixkĩnh nẽ ri ixpa. Nhũm te ixkamã mẽmoj kêt pyràk pa hte ri ixpa.

³² Na pa hte jar Epes kamã mẽ oprẽ xwýnhjê kutã amnhĩ to htýx pẽ mẽ kãm Jejus kapêr jarẽn o ri mẽ hkõt ixpa nhũm mẽ kãm mar prãm kêt jakamã hã ixtomnuj týx nẽ. No nhýrmã ixyk nẽ akupým ixtír mã kêt ronhýx pa mẽ kęp Kris kwý hkêt xwýnhjê jamaxpêr o ijamaxpêr nẽ mẽ uràk nẽ ijamaxpêr o:

Ixte ixyk ã arĩgro pumunh kêt jakamã kot paj mãmrĩ mẽmoj piitã hkur o ri ixpa.

Nẽ mãmrĩ mẽmoj piitã ho ixkõm o ri ixpa.

Nẽ mãmrĩ mẽmoj piitã ri tanhmã ho ho ri ixpa.

Ixyk nẽ axte ixte ã amnhĩ nhĩpêx anhýr o ixpare kaxyw ã.

Anhýr o nhýx pa ijamaxpêr o ixpa. Kęp ãm Tirtũm kot akupým mẽ pahto mẽ pahtír mã kêt ronhýx pu mẽ ã mẽ kęp Kris kwý hkêt xwýnhjê jamaxpêr anhýrja kõt paja-maxpêr pix o ri papa. No ãm ja kot anhýr kêt.

³³ Na htem mẽmoj jarẽn o:

—Mẽ kot htýx ri amnhĩ tomnuj xwýnhjê hkõt ri mẽ pa xwýnhjaja koja mẽ gaa nẽ mẽ

kot amnhĩ nhĩpêx kôt amnhĩ nhĩpêx o ri pa. Anê.

Ăm hămri na ã mẽ harênh anhÿrja. Jakamã kwa mẽ okora. Kêr ka mẽ ã amnhĩ nê mẽ kot amnhĩ nhĩpêx anhÿr o mẽ pa xwÿnhjê pumunh mex o ri apa.

³⁴ Kwa mẽ tokyx mẽ ate tanhmã amnhĩ tomnuj to hã amnhĩ pumu nê axte ã amnhĩ nhĩpêx anhÿr kêt nê. Nê mẽ ate Tirtũm kot akupÿm mẽ ho htĩr kêt ã harênh xwÿnhjaja. Te mẽ ate Tirtũm kot amnhĩ nhĩpêx ã omunh kêt pyræk. Tã mẽ ate tokyx ja hã amnhĩ pumunh nê amnhĩ kamã api-jaàm kaxyw na pa ã mẽ amã ixkapêr anê.

Mê panhĩ nyw jarênh

Rukre 20.34-36; Rômãn 8.10-11; Sikũn Korit 5.1; Piripos 3.20-21

³⁵ Nê mãn ka mẽ atõ akupÿm mẽ htĩr ã mẽ harênh ma nê tee ri mẽ hkukamã ajamaxpêr nê hã ri tanhmã axpên kukjêr to nê axpên mã:

—Kwa tanhmã koja we Tirtũm akupÿm hkra htyk xwÿnhjê ho htĩr to? Ra mẽ htyk nê mẽ ĩ katøk nê hapêx par mã kênã. Tanhmã kot wem amnhĩ to nê akupÿm htĩr? Nê tanhmã koja we mẽ ĩ nywja kute wehe? Anê.

³⁶ Nà na ka mẽ atÿx ri ã ajamaxpêr anê nê tee ri mẽ hkukamã ajamaxpêr. E kot paj ixprĩ hã ja hã ejêp jarê ka mẽ inhma. Nà na htem mẽmo y hkre. Te mẽ kot mẽ htyk jaxâr pyræk o hipêx nê hkre nhũm hikwÿ nê gaa nê higrôt

hapôj. Nom te kêp mẽmo yta pyræk kêt.

³⁷ Ăm hy pix na htem hkre. No higrôt kre hkêt nê. Rÿ tanhmãn pâr nywja kre hkêt nê. Ăm hy pix na htem hkre. Tã nhũm higrôt hapôj nê hprêk nê gaa nê ô.

³⁸ Tirtũm na hte hamaxpêr xà hkôt tanhmã ho nhũm higrôt hapôj nê hprêk nê ô. Tã ja pyrã nê kot puj mẽ Tirtũm jamaxpêr xà hkôt pahtyk tã koja akupÿm mẽ pahto mẽ pahtĩr nê mẽ pamã mẽ panhĩ nyw gô.

³⁹ Nê mẽmo hy piitã te kot axpên pyræk kêt. Ahpÿnhã na. Ja pyrã nê ahpÿnhã ri mẽmoj piitã ĩ. Na axtem mẽ panhĩ nê axtem mry nhĩ nê axtem àk nhĩ nê axtem tep nhĩ. Mẽmoj piitã ahpÿnhã ri ĩ.

⁴⁰⁻⁴¹ Nê kaxkwa kamã haxwÿja mẽmoj piitã ahpÿnhã no ãm muxre. Myytija mex. Nê mytwrÿreja axte mã no ãm haxwÿja mex. Nê kanhêti haxwÿja mex. Haxwÿja axte mã. Kamã hkwy hpòk kryre nê kamã hkwy hpòk rünhti no ãm piitã mex.

Nê jar pika ja kamã haxwÿja mẽmoj piitã mex. No ãm te kot kaxkwa kamã mẽmoj jarir xwÿnhja mex pyræk kêt. Axtem na raa.

⁴² Tã koja mẽ panhĩ nywja haxwÿja axte mã. Te kot panhĩ htũm pyræk kêt. Na htem ty nhũm mẽ ma mẽ o mra nê mẽ hagjê. Nhũm mẽ hikwÿ nê gaa nê ĩ rerek nê hapêx. Tã koja Tirtũm akupÿm tanhmã mẽ pahto mẽ pahtĩr to pu mẽ hpãnhã

pamex kumrêx. Hāmri nê axte mā mẽ panhĩ nyw mex o mex jakamã koja axte htyk nê ĩ rerek kêt nê.

⁴³ Na htem ty nhũm mẽ hagjê nhũm htyk xwỳnhhta tanhmã amnhĩ to hkêt nê amarĩ hikwỹ. Omnuj nê ĩ nhenhek nê hikwỹ. Tã koja Tirtũm akupỹm mẽ ho mẽ htĩr nê mẽ kãm mẽ ĩ nyw gõ nhũm mẽ hpãnhã mex kumrêx nê hihtỹx nê Tirtũm nhõ krĩ kamã pa ho pa.

⁴⁴ Mẽ htyk nhũm mẽ kot mẽ hagjênh xwỳnhhaja na htem arĩ ĩ htũm ã hikwỹ. ãm jar pika ja pix kãm ri mẽ papa kaxyw na mẽ panhĩ htũmja. No mẽ panhĩ nywja axtem Tirtũm nhõ krĩ kamã ri mẽ papa kaxyw jakamã koja mẽ panhĩ nywja axte mã. Tirtũm Karõ koja mẽ pamã kugõ.

Mẽ panhĩ nyw te kot Kris nhĩ pyrãk ã harênh

Rukre 20.34-36

⁴⁵⁻⁴⁶ Nê Tirtũm kapêr ã kagà htũm kot Atãw jarênh kot:

Na pre Tirtũm my kot wa Atãwja nhĩpêx. Jakamã Atãw kêp pika nhõ xwỳnh na pre. Anê.

ã Atãw jarênh kot anhỹr. Ja pyrã nê na pu htem pakatorxã nhõhy rũm pajapôj nê Atãw pyrã nê pahpê pika nhõ xwỳnh. Tã nhũm Atãwja pa nê gaa nê hpigêt nê ty. Jakamã kot puj mẽ urak nê papa nê gaa nê ty. Nom nhũm Krisja Atãw kurom kêp akupỹm mẽ ho mẽ htĩr xwỳnh jakamã kot puj mẽ pahpê hkwyjaja Atãw pyrã nê

nhỹrmã mẽ pahtyk tã nhũm Kris akupỹm mẽ pahto mẽ pahtĩr. Hāmri nhũm Tirtũm Karõ mẽ pamã mẽ panhĩ nyw gõ pu mẽ axte pahtyk kêt nê. Pãnhã axte mã mẽ pahpê kaxkwa nhõ xwỳnh.

⁴⁷ Nê Atãw na pre Tirtũm pika ho hipêx nê ho htĩr nhũm ri pa. Nom Kris na pre Atãw rom kaxkwa rũm mẽ pahwỳr wrỹ.

⁴⁸ Tã mẽ pahpê pika nhõ xwỳnhhaja te mẽ pahpê Tirtũm kot wam my nhĩpêx xwỳnhhta pyrãk. No mẽ pahte kaxkwa hwỳr ma papa mã xwỳnhhaja te mẽ pahte kaxkwa rũm my kot mẽ pahwỳr wrỹk xwỳnh Krista pyrãk.

⁴⁹ Tã kormã mẽ pahpê pika nhõ xwỳnh jakamã te mẽ pahpê my pika ho hipêx xwỳnhhta nhĩ pyrãk. Nom kot puj mẽ nhỹrmã ty hāmri nê hpãnhã te pahpê kaxkwa rũm my kot mẽ pahwỳr wrỹk xwỳnhhta nhĩ pyrãk.

Axte mẽ pahtyk kêt kumrêx ã mẽ pajarênh

Juãw 11.25; Sikũn Korit 5.4; Wam Tesarõn 4.13-18

⁵⁰ Nê kot puj mẽ panhĩ htũm rãhã Tirtũm nhõ krĩ hwỳr paxãpir kêt nê. Panhĩ htũm na hte ty nê rerek nê hapêx. Jakamã koja Tirtũm Karõ mẽ pamã mẽ panhĩ nyw gõ pu mẽ rĩ kormã ma õ krĩ hwỳr pajapêx pa nê kamã papa ho papa.

⁵¹⁻⁵² E mẽ inhma. Na pre kormã Tirtũm mẽ amã mẽmoj to amnhĩrĩt kêt tã ra inhmã ho amnhĩrĩt. Jakamã kot paj

ÿ hã mē amã harē ka mē inhma. Nà kot puj mē pahpiitã mē pahtyk kêt nē. Koja nhÿrmã Tirtũm kapēr o mē wrÿk xwÿnhjê hõja mē pamã pifti kakô. Mē pajaēr pē h̄kakô. Hãmri nhũm Tirtũm kra ra mē htyk nē mē hikwÿ xwÿnhjaja akupÿm ĩnyw o htír kurê kumrēx. Nē kormã mē pahtyk kêt xwÿnhjaja kot pu mē mē pahtyk kêt ri mē uràk nē panhĩ nyw kurê kumrēx. Hãmri pu mē pahpiitã pahtír o pahtír tũm nē papa.

⁵³ Koja Tirtũm mē panhĩpêx o te mē pahte paxê htũm o papinhĩpanh nē hpãnhã paxê nyw jagjênh pyrãk. Jao mē panhĩ htũm o hapêx nē hpãnhã mē pamã mē panhĩ nyw gõ pu mē axte pahtyk kêt kumrēx nē ri papa ho papa.

⁵⁴ Tirtũm kapēr ã kagã htũm kot ja jarênh kot:

Na ra Tirtũmja mēhtyk ho hapêx pa. Anē.

Te ra kot ho hapêx par pyrãk o ã harênh kot anhÿr. No ãm kormã. Jakamã kot puj mē nhÿrmã panhĩ nyw nē ri papa nē mē pahtõ axte pahtyk kêt kumrēx.

⁵⁵ Mē pahtykja te mē kot makre par nhũm axte kot mē hkamnhwÿr kêtja pyrãk. Urã nē koja Tirtũm akupÿm mē pahto mē pahtír pu mē axte pahtyk kêt nē. Nē axte ri pamã ma hkêt nē papa. Nē axte paxã hkêt nē.

⁵⁶ Tirtũm kapēr ã kagã htũmja ã mē pakukamã mē pajarênh kot anhÿr. Mē pahte amnhĩ tomnuj xwÿnh jakamã kot puj mē nhÿrmã ty.

⁵⁷ Nom nhũm Tirtũm àhpumunh tÿx o àhpumunh tÿx jakamã na hte Pahihti Jejus Kris kukwak ri mē pahte hkôt amnhĩ xunhwÿr xwÿnhjê nē mē pahte amnhĩ tomnuj rênh pa. Pu mē nhÿrmã mē pahtyk tã nhũm akupÿm mē pahto pahtír.

Mē pahte Jejus mã tanhmã amnhĩ nhĩpêx mex to hã mē pamã karõ

Karatas 6.9; Korosẽ 1.10

⁵⁸ Jakamã e kwa Jejus kôt ixkwÿjaja. Kêr ka mē arĩ Pahihti Jejus kôt mãn amnhĩ xunhwÿr tÿx rãhã ho ri apa. Nē kapēr kôt pix mã ri amnhĩ nhĩpêx rãhã nē kãm tanhmã amnhĩ nhĩpêx mex to ho ri apa. Kot kaj mē ã amnhĩ nhĩpêx anē hãmri nē kãm tanhmã amnhĩ nhĩpêx to kaprÿ ho ri apa hkêt nē. ãm hãmri kãm mēmoj to anhÿr mex rãhã ho ri apa.

16

Mē kêp amrakati xwÿnhjê jarênh

Atre 11.27-30; Rõmãn 15.25-27; Sikũn Korit 8.1-24, 9.1-5; Wam Ximotre 6.18

¹ Nē na pa pre krĩ pē Karatas kamã tanhmã Jeru-jarē kamã Kris kwÿjê jarênh to. Ijaew kwÿ kot mē pahpyrà nē Jejus kôt amnhĩ xunhwÿr ã mē harē nē mē kêp amrakati hã mē harē hãmri nē mē kãm: —E. Kwa kêr ka mē kãm mē akàxpore hkwÿ ho akuprõ nē ma mē hwÿr amē.

Anhÿr o mē kãm ixkapēr. Jakamã kwa kêr ka mē uràk

nē mē kaxyw mē kām kàxpore hkwỳ ho akuprō.

² Mē panhō arīgromnu pē sap ā hkwỳ ho akuprō. Kot kaj mē akàxpore rax japêr nē mē kaxyw hkwỳ ho rax nē axi. Nom kot kaj akàxpore grire japêr nē mē kaxyw mē kām ho grire nē agō. Kêr pa mēmo arīgro hā ma mē awỳr mō ka mē ra mē kaxyw ho apikuprōnh rax nē.

³ Nē ma mē kot mē kām ho mōr mā xwỳnhjaja ka mē ixkutêp mē akwỳjê rê. Kêr pa pōj nē mē omu hāmri nē mē kaxyw kagā nhīpêx nē kamā mē harē. Nē mē kām kugō nhūm mē ma Jerujarē hwỳr kàxpore mē ro hā amnhī kōt o mō nē mē kām kugō. Mē kot kamā harēnh nē mar hāmri nē mē kamjaja mē ate mē kaxyw mē rēnh ā mē ajarēnh ma.

⁴ Rỳ kot ka mē amā mē hkōt inhmēnh prām nē māmri mē hkōt inhmē pa ma mē hkōt mō.

Pawre kot amnhī kukamā amnhī jarēnh

Atre 19.21-22

⁵ Nom kot paj tokyx mē awỳr inhmōr kêt nē. Kot paj ja rūm ixkato nē hpānhā ma pika pē Masetōn wỳr mō. Hāmri nē mē hkōt ixpa grire nē ma kormā mē awỳr Korit wỳr mō.

⁶ Hāmri nē pōj nē mē akōt ri ixpa ryy nē. Nē ixtā amgrà pixi nē hapêx nē rī kormā ma axte nhām krī hō hwỳr mō. Nē inhnojarêt ka mē ixto Tirtūm wỳ nē inhmā ixàpkur

xà hkwỳ gō pa ma mē hwỳr pry hā hkur o mō.

⁷ No ixte mē awỳr ixpōx nē tokyx mē akurūm ixkator nē hpānhā ma nhām krī hō hwỳr inhmōrja na inhmā hprām kêt. Jakamā koja Tirtūm kām ja mex pa arī ri mē akōt ri ixpa hā ixtā mytwrỳ xohtō nē tokyx ma nhām inhmōr kêt nē.

⁸ Kot paj kormā jar Epes kamā ri ixpa rāhā nhūm mē hkīnh pē Pētekos kato nē hapêx pa rī kormā ma Masetōn wỳr mō.

⁹ Na pa hte jar kormā mē kām Jejus kapêr jarēnh o ri mē hkōt ixpa nhūm mē ohtō nē inhmar o pa. Mē kām mar prām. Tā no nhūm mē hkwỳjaja ohtō nē mē kēp ja omnuj nē nhūm mē hā ixkamā gryk nē ixtomnu o pa.

Mē kot Ximotre ho mex ā mē harēnh

Hapuhā Juāw 5

¹⁰ Nē kwa koja Ximotre mēmo arīgro hā mē awỳr pōj ka mē omu nē ho mex nē. Nē mē amnhī nhōrkwỳ hwỳr awỳr kê mē akutā apkur o pa. Na hte ixpyrà nē Pahihti Jejus mā tanhmā amnhī nhīpêx to mex o pa.

¹¹ Kormā mē pahkīnhā nyw tā kêr ka mē tee ri ja hā omu nē ri axpēn mā tanhmā harēnh to hkêt nē. Mē ām akapêr mex pix o kām akapêr. Nē koja akupỳn nojarêt ka mē pry hā kām apkur xà hkwỳ gō kê mex pē man akupỳn ixwỳr mō pa tokyx omu. Kot paj

jar mẽ pahkwỳjê mẽ akupỳn hpôx kamã ijamak o ixa.

¹² Nẽ na pa hte xatã jar mẽ pahtõ Aporja ma mẽ awỳr mõi kaxyw mẽ awỳr hano. Kot jar mẽ pahtõ hkwyjê mẽ ma mẽ awỳr mõi kaxyw. Nom kormã. Koja xep mẽ jar tanhmã amnhĩ to hpa nẽ rĩ kormã ma mẽ awỳr mõi.

Kagà jatur xà kamã Pawre kot mẽmoj tã karõ

Epes 6.10-12; Sikũn Ximotre 1.7; Wam Pẽtre 5.8-9

¹³ E kwa kêr ka mẽ arĩ amnhĩ wỳr Jejus kamã ajamak rãhã ho ri apa. Nẽ hamãr pẽ kutẽp tãm amnhĩ nhĩpẽx o ri apa. Nẽ amnhĩ kaxyw hkõt ajamaxpẽr tỳx rãhã nẽ.

¹⁴ Nẽ mẽ amã axpẽn kĩnh pẽ tanhmã axpẽn to mex to.

¹⁵ Mãn ka mẽ ra Estepti mẽ hkwyjê jarẽnh ma. Mẽ hkumrẽxjaja na prem pika pẽ Gres kamã Kris kõt amnhĩ xunhwỳ. Tã xep mẽ ra Kris kõt hkwyjê ho mex o ri mẽ hkõt pa.

¹⁶ Kêr ka mẽ ã mẽ kot amnhĩ nhĩpẽx anhỳr xwỳnhjê kapẽr ma nẽ hkõt ri amnhĩ nhĩpẽx o ri apa. Mẽ kot Kris mã mẽ ajamãr xwỳnh piitã kêr ka mẽ kapẽr ma nẽ mẽ hkõt ri amnhĩ nhĩpẽx mex nẽ.

¹⁷ Nẽ ota Estepti nẽ Akajkre nẽ Putunatreta na mẽ ra jar põi. Pa mẽ Sostenes mẽ wa mẽ omu nẽ wa ixkĩnh nẽ. Te ixte mẽ apumunh nẽ ixkĩnh tỳxta pyrãk.

¹⁸ Na xep prem ma mẽ awỳr mõi nẽ tanhmã mẽ amã kapẽr to ka prem mẽ ama nẽ akĩnh nẽ. Tã mẽ ra amnẽ ixwỳr mõi

nẽ tanhmã inhmã kapẽr mex to pa mẽ kuma nẽ ijaxwỳja ixkĩnh nẽ. Kwa kêr pu mẽ ã mẽ kot mẽ panhĩpẽx anhỳr xwỳnhjê ho mex o papa.

¹⁹⁻²⁰ Nẽ ota jar pika pẽ As kamã Kris kõt mẽ pahkwỳjaja piitã mẽ awỳr hpẽr mẽ. Nẽ Akir mẽ hprõ Prisireja wa. Nẽ wa õrkwỳ kamã mẽ kot Tirtũm mã amnhĩ jarẽnh kaxyw mẽ pikuprõnh xwỳnh piitã mẽ awỳr hpẽr mẽ.

Nẽ kêr ka mẽ nhỳri axpẽn pumu nẽ mẽ apẽ Kris kõt mẽ ate axpẽn to atõ nẽ atõx ã axpẽn mã akapẽr mex nẽ akĩnh nẽ.

²¹ E kot paj kagà jatur xà kamã inhĩhkra ho mẽ amã amnhĩ nhĩxi nhĩpẽx ka mẽ omu. Koja inhmã ixkapẽr ã kagà xwỳnhnta ja hã kagà hkêt nẽ. Pa kot paj hipẽx. Ixpẽ Pawre na pa ã amnhĩ nhĩxi nhĩpẽx anẽ ka mẽ omu.

²² Nẽ kwa kêr ka mẽ arĩ amã Pahihti Jejus kĩnh o ri apa. Koja mẽhõ kãm hkĩnh kêt hã koja Tirtũm ja hã homnuj tỳx kumrẽx.

E “maranat.” Mẽ pakapẽr kãm na htem maranat jarẽnh o: “Kwa tokyx akupỳn mẽ ixwỳr wrỳ Pahihti.” Anẽ.

²³ E kê Pahihti Jejus Krisja mẽ ato mex nẽ mẽ akutã nojarêt rãhã ho pa.

²⁴ Ixpyrà nẽ mẽ apẽ Jejus Kris kwỳ jakamã na pa hte inhmã mẽ akĩnh nẽ.

Tã ãm ja pix. Ixpẽ Pawre na pa ã mẽ awỳr kagà nhĩpẽx nẽ mẽnh anẽ.

**Sikūn Korīt
Pawre wam Korīt
kām Jejus kôt
hkwỳjê hwỳr kagà
nē mēnh kôt kagà hō
mēnh**

Pawre na pre kagàja nhìpêx. Kêp mry hkà ho ixkre nhìpêx nê ho wēnê ho pa xwỳnh na pre. Tã hpãnhã kêp Jejus nhỹ hã hkrajê jahkre ho pa xwỳnh. Jakamã na pre kagàja nhìpêx nê Korīt kãm mē kot Jejus kôt amnhĩ xunhwỳr xwỳnhjê hwỳr kumê. Na pre ra mē hwỳr wamta nhìpêx nê kumê. Wam kagà nhĩxi pê Wam Korīt. Tã axte hkôt ja nhìpêx nê mē hwỳr mēnh jakamã kagà nhĩxi pê Sikūn Korīt.

Na pre Korīt kãm Jejus kôt mē htôjê hō axtem nê nã puro kamã hpijaàm kêt o pa nhũm Pawre tee ri harēnh ma nê mē hwỳr wam kagàta mē nê kamã tanhmã mē kot hipêx to hã mē kãm karō. Tã kagà ja kamã axte tanhmã hã mē kãm karō hto.

Na pre ra Korīt wỳr mē kêp Kris nhỹ hã mē ahkre hã amnhĩ to hêx xwỳnhjaja mē hwỳr pøj nê tanhmã mē kãm kapêr jarēnh to ho mē hkôt pa. Nê tanhmã mē kãm Pawre ho hêx to. Jakamã nhũm kagàja kamã tanhmã mē kãm amnhĩ tã àprãr to nê kãm mē hkĩnh tỳx ã amnhĩ jarê. ã na pre Pawre mē kãm mēmoj jarēnh nê hã kagà anê. Nê mē kãm hã kagà ho:

¹ Pa Korīt kãm Tĩrtũm kraja. Xà mē apiitã mē amex na ka mē apa? E ot pa mē awỳr kagà nhìpêx nê kumê. Mē amã nê mē anhō pika pê Gres kamã Tĩrtũm krajê mē mē ato ixpimràatã mē awỳr hipêx nê kumê. Ixpê Pawre na pa hte Tĩrtũm jamaxpêr xà hkôt ma Jejus Kris nhỹ hã krĩ piitã hkôt hkrajê jahkre ho ri ixpa. Tã Kris kôt mē pahtō Ximotre mē wa mē awỳr hipêx nê kumê.

² E kê Mēpahpãm Tĩrtũm mē Pahihti Jejus Kris wa mē ato mex rãhã ho pa. Nê mēmoj to mē akutã nojarêt rãhã ho pa. Ka mē wa kukwak ri ajamakêtkati nê amex nê ri akĩnh nê apa ho apa.

Pawre kãm amnhĩ xà htỳx kamã hamak pyma hkêt ã harēnh

Rômãn 1.11-12; Korosê 1.11; Sikūn Tesarôn 2.16

³⁻⁴ Nã Tĩrtũm kêp mē panhō Pahihti Jejus Kris nhìpêxà na. Nê kêp Mēpahpãm maati jakamã na hte mē pakamã ukaprĩ nê tanhmã mē pahto mex to ho pa. Kot puj mē mēmoj tã tanhmã amnhĩ to nê pahkaprĩ nê ri papa nhũm ja hã mē pahpumumu hãmri nê hamaxpêr pix o akupỹm mē pahto mē paxihtỳx. Mēmo kaxyw na hte ã mē pahto mex anê? Nã mē pahte amnhĩ tã omunh nê amnhĩ pyrãk mē hkaprĩ nê ri mē pa xwỳnhjê jamaxpêr o hihtỳx o mē hkôt papa kaxyw. Ja kaxyw na hte mē pajamaxpêr o hihtỳx. Jakamã kwa pu mē kãm mex

o mex ã mãn harênh rãhã ho papa.

⁵ Na htem tãhã ixto Kris nhîpêx pyrã nê tanhmã ixto pa amnhî xã htýx kamã ijamak o ri ixpa. Tã nhũm Tirtũm inhîpêx o te Kris nhîpêx pyrã nê hamaxpêr pix o tanhmã ixkrã hto pa mẽ kutã amnhî to htýx nê arî mẽ hkôt ixpa.

⁶⁻⁷ Na pa hte mẽ amã Kris kapêr jarênh o ixpa. Mẽ ate inhmar nê hkôt amnhî nhîpêx kaxyw. Jakamã na hte mẽ kãm Tirtũm kapêr mar prãm kêt xwýnhjaja tãhã mẽ atã ixtomnuj nê pa amnhî xã htýx kamã ijamak o ri ixpa. Tã kwãr mẽ mãmrî ã inhîpêx anê. Mẽ ate Jejus kôt amnhî xunhwýr týxja na inhmã hprãm. Na htem tanhmã Kris ã inhîpêx to nhũm Tirtũm mẽ hã ixpumu nê tanhmã ixkrã hto pa inhmã amnhî xã htýx kamã ijamak pyma hkêt nê ixpa. Nê arî mẽ hkôt mẽ kãm kapêr jarênh rãhã ho ri ixpa. Na hte Tirtũm amarî ã inhîpêx anhýr kêt nê. Mẽ ate ã kot inhîpêx anhýr ã ixpumunh nê ixpyrà nê amnhî kaxyw kãm ajamaxpêr týx kaxyw na hte ã inhîpêx anê. Mẽ ate ja hã ixpumunh nê ã ajamaxpêr anhýr kaxyw nê mẽ ajamaxpêr o:

—Nà kot pa nhýrmã Pawre pyrã nê tãhã mẽ mýrapê amnhî xã htýx kamã ijamak o ixpa. Hãmri nhũm Tirtũm ja hã ixpumu nê te ho Pawre nhîpêx pyrã nê tanhmã ixto pa inhmã amnhî xã htýx kamã ijamak pyma hkêt nê

ixpa. Nà koja ã inhîpêx anê.

Anhýr o mẽ ajamaxpêr kaxyw na hte Tirtũm mẽ kutã ixto ixihtýx. Mẽ ate ja hã ixpumunh nê akupým tãm ajamaxpêr pê Karõ nhý hã amnhî to axihtýx kaxyw. Jakamã na pa tee ri mẽ akukamã ijamaxpêr kêt nê.

Tirtũm kêp mẽ papytãr xwýnh ã harênh

⁸ E Kris kôt ixkwýjaja. Kot paj ixprî hã mẽ amã tanhmã amnhî jarênh to ka mẽ inhma. Na pa pre ma pika pê As wýr mõi nê mẽ kãm Jejus kapêr jarênh o ri mẽ hkôt ixpa. Hãmri nhũm mẽ hkwyjaja ja hã ixtomnuj týx nê pa amnhî xã htýx kamã ijamak pê mẽ hkôt ixpa. Kironhýx pa pre mẽ kamã ty.

⁹ Na pa pre tee ri amnhî kukamã ijamaxpêr o:

—Koja pêr mẽ xpi. Tanhmã kot pa we amnhî to nê tokyx mẽ kêp amnhî pytà? Kot paj tee ri inhmã mẽ kêp amnhîptãr prãm. Tirtũm pix na ja kaxyw mẽ kutã àhpumunh týx. Rý nhũm mẽ kot xpir tã nhũm kot akupým ixto ixtir kaxyw tapxipix na àhpumunh týx. Nà kot paj amnhî kaxyw tapxipix mã mãn ijamaxpêr o ri ixpa nhũm amnhî tã ixpumu nê hkînh nê. ã ixte amnhî nhîpêx anhýr o ixpaja na kãm hprãm. Anê.

¹⁰ Tã nhũm pre ã inhîpêx anê nê xatã mẽ kêp ixpytãr o ixkôt pa. Kojã ã mẽ kêp inhîpêx anhýr rãhã ho pa. Nà ã kot inhîpêx anhýr mã kênã.

11 Nom kwa kêr ka mẽ api-itã arĩ ixto Tĩrtũm wỳr rãhã ho ri apa kê mẽ ama nẽ mẽ kãm ixkurê xwỳnhjê kutã ixto ixihtỳx rãhã ho pa. Nẽ ixto mex rãhã nẽ. Hãmri nhũm mẽ ohtô nẽ kot mẽ kêp tanhmã ixpytãr to hã ixtã omu nẽ ixtã kãm mex o mex ã harê.

Pawre kot mẽ kãm amnhĩ tã aprãr ã harênh

Wam Korīt 2.1-5

12 Nẽ na xep pre atar Kris kôt mẽ pahkwỳjaja tanhmã ixto kapêr punuj to nẽ Jejus kot mẽ awỳr inhmênh kêt ã mẽ amã ixto hêx. Nẽ ijakwa nhĩkjê ho inhmã mẽ akĩnh nẽ ijakwa nhĩkjê ho mẽ ato ixkapêr punuj ã ijarênh o ri pa. Nom ixte ã amnhĩ nhĩpêx anhỳr kêt. Aa ixte tanhmã mẽ ano kupyw to hkêt. ãm hãmri na pa mẽ amã amnhĩ jarê nẽ tãm mẽ amã ixkapêr o ri ixpa nẽ tãm ri mẽ anhĩpêx o ri ixpa. No ijamaxpêr tũm kôt tanhmã mẽ anhĩpêx to hkêt nẽ. ãm Tĩrtũm kot mẽmoj to mẽ pakutã nojarêr ã omunh xà hkôt pix mã na pa hte ý hã mẽ ato mex o ri ixpa. Ijamaxpêr nyw o. Na pa hte Tĩrtũm pyrà nẽ mẽ piitã mẽ ho mex nẽ. No mẽ kajaja ixpyràn mẽ apê hkra jakamã na pa hte mẽ ato mex kumrêx o ri ixpa.

13 Na pa hte mẽ amã kagà hkwỳ nhĩpêx nẽ ixprĩ hã mẽ amã tanhmã mẽmoj jarênh to. Mẽ ate kamã harênh nẽ mar mex kurê kumrêx kaxyw. No na pa hte mẽ amã tanhmã ixêx to rỳ tanhmã mẽ ano kupyw to hkêt nẽ.

14 ã ixte amnhĩ nhĩpêx anhỳr o ri ixpa htã kormã mẽ apiitã ja hã ixpumunh mex kêt nẽ. Nẽ Jejus kot mẽ awỳr inhmênh ã ixpumunh mex kêt nẽ. Jakamã na hte mẽ akwỳjaja ixto akapêr punuj o pa. Tã kot kaj mẽ nhỹrmã ãm hãmri Jejus kot mẽ awỳr inhmênh ã axpên mã ijarê pa mẽ ama nẽ ixkĩnh nẽ. Hãmri nhũm nhỹrmã mẽ panhõ Pahihti Jejus mẽ pahwỳr akupỳn wrỳ pa kãm mẽ ajarê nẽ kãm:

—E Pahihti. Jajê mã na pa pre akapêr jarênh o ixpa nhũm mẽ inhma nẽ akôt amnhĩ xunhwỳr kurê kumrêx nẽ tãm amnhĩ nhĩpêx mex o pa.

Anhỳr o kãm mẽ ajarê. Hãmri nẽ ã mẽ ate amnhĩ nhĩpêx anhỳr ã mẽ apumunh kôt ixkĩnh nẽ. Ka mẽ ajaxwỳja akĩnh pê tanhmã kãm ijarênh to ho akuhê.

Pawre hêx kêt ã kot amnhĩ jarênh

Wam Korīt 16.5-6

15-16 Nẽ na pa pre ra mẽ awỳr ixkrà. Ixte ma mẽ awỳr inhmõr nhũm mẽ ate ixpumunh nẽ akĩnh ã mẽ akamnhĩx nẽ mẽ awỳr ixkrà nẽ ijamaxpêr o:

—Nà ma Masetõn wỳr inhmõr xwỳj ri kot paj ma Korīt kumrêx wỳr mō. Hãmri nẽ Kris kôt ixkwỳjê pumu nẽ rĩ kormã hamũ Masetõn wỳr mō. Nẽ mẽ kamã ri ixpa tãmtã awjanã nẽ akupỳn Korīt wỳr mō nẽ axte mẽ omu. Jao Tĩrtũm kapêr o mẽ ahkre ho axkrut nhũm mẽ amnhĩ tã ixpumu nẽ hkĩnh

nē. Hāmri pa akupým Jutej wýr inhnojarêt nhūm mē pry hã ixàpkur xà hã inhmã mēmoj kwý nhõr japêr.

Anhÿr o ijamaxpêr.

17 Tã kormã jar tanhmã amnhĩ nhĩpêx to ho ixpa ka xep mē tee ri amnhĩ wýr ixkãm ama nē axpên mã ijarênh o:

—Kwa Pawre kot ra mē pahwýr nojarêt ã amnhĩ jarênh tã amnhĩm nojarêt kêt kumrêx. Mãn pre ãm mē pamã amnhĩ to hêx nà? Ra kot mē pamã amnhĩ jarênh tã tokyx hpôx kêtne hã. Anê.

18 Kwa mē ri ã inhmã ajamaxpêr anhÿr kêt nē. Na pa pre mē amã ixêx kêt nē. Na pa hte Tirtūm noo mã ãm hāmri mēmoj jarênh o ri ixpa nē mē amã mēmoj jarênh o ixêx kêt nē. Nà ãm hāmri na pa pre ma mē awýr inhmõr ã amnhĩ jarê.

19 Na pa pre ra Ximotre mē Siras mē wa mē amã Jesus Kris jarênh o ri mē akôt ixpa. Jesus kêp Tirtūm Kra hã harê nē kot amnhĩ nhĩpêx te kot Tirtūm kot amnhĩ nhĩpêx pyrãk ã harênh o ri ixpa. Jesus haxwýja amnhĩ to hêx kêt. Kot mēmoj tã amnhĩ jarênh xà hkôt na hte ãm hāmri tanhmã amnhĩ nhĩpêx to. Tã ã kot amnhĩ nhĩpêx anhÿrja kôt na pa inhmã ixte amnhĩ nhĩpêx o ixpa hprãm nē.

20 Ra Tirtūm Jesus Kris kukwak ri kot mē pahto mex ã amnhĩ jarênh jakamã na pu htem axpên mã harênh o:

—Koja Tirtūm Jesus kukwak ri mē pahto mex rax nē. Ra

kot mē pahtã amnhĩ jarênh xà hkôt. Nà Tirtūm mex o mex. Anê.

*Tirtūm kot mē pa hwýr
Karõ rênh ã harênh
Rômãn 8.14; Epes 1.13*

21 Nà Tirtūmja mex o mex. Kot mē pahpê hkra kaxyw amnhĩm mē paxunhwýr jakamã na hte tanhmã mē pahkrã hto pu mē Kris kôt amnhĩ nhĩpêx mex o papa.

22 Na pu htem Kris kôt amnhĩ xunhwý nhūm Tirtūm ja hã mē pahpumu nē mē pahwýr Karõ rē nhūm mē pahwýr agjê. Mē piitã mē kot mē pahpê hkra hã mē pahpumunh kaxyw. Te mē kot tanhmã mē hikukrêx kagà hto nhūm mē kot kêp õ dõn ã omunhta pyrãk. Tã koja Tirtūm Karõ mē pakamã hkrĩ pu mē ja hã amnhĩ pumunh kôt Tirtūm kot nhÿrmã mē pahto mex rax ã amnhĩ tã omunh kurê kumrêx. Ra kot mē pahto mex tã koja nhÿrmã mē pahto mex rax o wam kot mē pahto mex raxta jakre.

*Pawre kãm mē kãm àkjêr
prãm kêt ã kot amnhĩ jarênh
Wam Korīt 4.21; Sikūn
Korīt 10.1-2*

23 E Kris kôt ixtõ nē ixtõxjaja. Kot paj kormã ma mē awýr inhmõr kêt ri ixprĩ hã mē amã tanhmã amnhĩ jarênh to ka mē ixte amnhĩ jarênh ma. Tirtūm tãm mē arom kot ijamaxpêr kôt ixpumunh mex jakamã kot paj noo mã ixprĩ hã mē amã tanhmã amnhĩ jarênh to ka mē inhma.

Na pa pre ra mẽ awÿr inhnojarêt tâ no âm tee ri amnhĩ kukamã ijamaxpêr nê ijamaxpêr o:

—Nà kot paj taxy kormã ma mẽ hwÿr inhmôr kêt nê. Kot paj tokyx mẽ hwÿr mōn pōj nê kot amnhĩ tomnuj xwÿnh̄ta ã mẽ kãm akir nê nê tanhmã mẽ kãm ixkapêr to. Hãmri nhũm mẽ amnhĩ tâ inhma nê hkaprĩ nê tee ri amnhĩ kukamã hamaxpêr. ã mẽ kot amnhĩ nhĩpêx anhÿr pymaj kot paj kormã mẽ hwÿr inhmôr kêt nê.

Anhÿr o ijamaxpêr.

²⁴ Inhmã ma mẽ awÿr inhmôr nê tanhmã mẽ ate amnhĩ nhĩpêx to hã axte mẽ amã karō kamã ixihtÿx prãm kêt. Mẽ akwÿjê rom ra mẽ ate Kris hkôt amnhĩ xunhwÿr tÿx kênã. Tã mẽ ate hkôt amnhĩ nhĩpêx mex o akĩnh nê apaja na inhmã hprãm.

2

¹ Na pa pre ma mẽ awÿr mō nê mẽmoj tâ mẽ amã akir nê nê tanhmã mẽ amã ixkapêr to ka prem inhma nê akaprĩ nê ri apa. Tã inhmã akupÿm mẽ awÿr inhmôr nê axte mẽ amã ixàkjêr prãm kêt jakamã na pa kormã mẽ awÿr inhmôr kêt nê.

² Kot kaj mẽ akĩnh nê apa pa ijaxwÿja ixkĩnh nê ixpa. No kot paj ma mẽ awÿr mō nê mẽmoj tâ mẽ amã akir ka mẽ tee ri inhma nê akaprĩ nê. Pa mẽ apumu nê ijaxwÿja ixkaprĩ nê.

³ Ja pymaj na pa pre wam ixte mẽ awÿr kagã mēnh̄ta kamã mẽmoj nê tanhmã mẽ

amã ixàkjêr to. Mẽ ate kamã harēnh nê mar nê tokyx kormã mẽ awÿr inhmôr xwÿj ri tanhmã mẽ ate amnhĩ tomnuj tota kaga nê tãm amnhĩ nhĩpêx kaxyw. Kêr pa mẽmo arĩgro hã ma mẽ awÿr mōn pōj nê mẽ ate tãm amnhĩ nhĩpêx o apa hã mẽ apumu nê ixkaprĩ hkêt nê ixkĩnh nê. Ka mẽ ajaxwÿja ixpumu nê akĩnh nê.

⁴ Jakamã na pa pre ã mẽ amã kagãta nhĩpêx nê mẽ awÿr mēnh̄ anê. Nê kamã mẽmojta nê tanhmã mẽ amã ixàkjêr to. Na pa pre ixkaprĩ htÿx nê tee ri mẽ akukamã ijamaxpêr o inhmÿr rax pē mẽ amã mẽmojta ã kagã. No âm mẽ akaprĩ kaxyw na pa pre mẽ amã hipêx kêt nê. ãm mẽ ate kamã harēnh nê inhmar nê ajamaxpêr o:

—Hêxta waa nê. Nà Pawre na kãm mẽ pahkĩnh tÿx kumrêx. Hã na pre mẽ pahte tanhmã amnhĩ tomnuj to hã mẽ pajarēnh ma nê tee ri mẽ pakukamã hamaxpêr pē kagãja kamã hã mẽ pamã akir nê mẽ pahwÿr kumê. Nà kãm mẽ pahkĩnh tÿx kãm na ã mẽ pamã kapêr kãm hihtÿx anê.

Anhÿr o ajamaxpêr kaxyw na pa pre hipêx nê mẽ awÿr kumê.

Mẽ kot axte amnhĩ tomnuj mã hamaxpêr kêt ã mẽ kãm karō

Rukre 17.3-4; Wam Korīt 5.1-13; Karatas 6.1-2

⁵⁻⁹ Nê wam kagãta kamã na pa pre mẽ amã mẽ akwÿjê hō kot nã kaàkre kamã hpijaam kêeta pa mẽ amã tanhmã hã

karō hto. Ra mē ate harēnh mar tā nē kām akapēr kêt nē. Tā mē ate inhmar nē nē tanhmā kām akapēr to nē amnhī nē hanor kaxyw na pa pre mē awȳr kagàja mē. Hāmri nē ijamaxpēr o:

—Ko. Koja mē ixkapēr mar xà hkôt amnhī nē hanor japēr. Anē.

Tā ka xep prem kamā harē nē ama nē tee ri ja hā amnhī pumu nē akaprī nē. Nē ixpyrà nē apijaàm nē. Hāmri nē ijamaxpēr xà hkôt amnhī nē hanor kām axihtȳx nē. Ām hāmri na ka prem ā hipêx anē. Nhūm xep tee ri ja hā amnhī pumu nē hkaprī nē hkaprī xàj ri m̄ȳr o pa. Jao ra ā amnhī nhīpêx anh̄ȳrta kaga nē akup̄ym tām amnhī nhīpêx. Tā ra ā kot amnhī nhīpêx anh̄ȳr jakamā kwa mē tokyx akup̄ym amnhī w̄ȳr aw̄ȳ kē axte mē aw̄ȳr mra nē mē akôt pa. Ra kot amnhī tomnujta kaga jakamā kēr ka mē axte kām ajamaxpēr kêt nē. Akup̄ym tām kām akapēr kē tokyx akup̄ym tām hamaxpēr nē hkīnh nē pa. Kot kaj mē tokyx ā hipêx anh̄ȳr kêt nē nhūm tee ri amnhī kukamā hamaxpēr nē hkaprī nē pa. Ja pymaj kwa mē amā hkīnh ā kām amnhī jarē nē akup̄ym tām kām akapēr pē tām hipêx o ri apa. Kē amnhī tā mē apumu nē akup̄ym hkīnh nē tām hamaxpēr.

¹⁰ E kēr ka mē axte kot tanhmā amnhī tomnuj tota mā ajamaxpēr kêt nē. Kwarī ho kwarī. Kot kaj mē ā

hipêx anē pa ijaxw̄ȳja ma hipêx anē. No pa na pre tanhmā ixtomnuj to hkêt nē. Ām Jejus kapēr kw̄ym na pre ri ā amnhī nhīpêx anē. Tā ra kot amnhī tomnujta kaga jakamā kot paj Jejus nh̄ȳ hā akup̄ym tām hipêx nē kot amnhī tomnujta o ijamakêtkati tokyx anē nē axte kām ijamaxpēr kêt nē. Mē apiitā mē amex nē ri mē apa kaxyw. Jakamā kēr ka mē ajaxw̄ȳja mē amex nē apa kaxyw ā amnhī nhīpêx anē nē axte kām ajamaxpēr kêt nē.

¹¹ Kwa mē tokyx ja ho ajamakêtkati. Kē Satanasti tee ri ja hā mē apumu nē mē amā mē ate tanhmā amnhī tomnuj to hprām xàj tee ri tanhmā ri mē ato ho pa kapr̄ȳ. Kēr pu mē Satanasti kot amnhī nhīpêx kôt amnhī nhīpêx o ri papa hkêt nē. Ra mē pahte Tirtūm kapēr kuhpa hā tanhmā kot amnhī nhīpêx to ho pa hā omunh mex kēnā.

Pawre kot Xitre japēr o pa hā harēnh

¹² Nē na pa pre ja rūm ixkato nē ma Tôx w̄ȳr mō. Ixte mē kām Kris jarēnh o mē hkôt ixpa kaxyw ma mē hw̄ȳr mō. Nhūm Pahiiti Kris ixkukamā tanhmā mē hkrā hto jakamā pa pre mē hw̄ȳr pōj nhūm mē piitā kām ixu-jarēnh mar prām nē. Pa pre mē kām Tirtūm kapēr jarēnh ryy ho mē hkôt ixpa.

¹³ Na pa pre Xitre ra mē hw̄ȳr ixkukamā hpôx ā hkamnhīx tā nh̄ȳri omunh kêt nē. Hāmri nē ijamaxpēr o:

—Hêxta waa nê. Inhmã Korĩt kãm Jejus kwýjê jarênh mar prãm. Na pa tee ri mẽ hkukamã ijamaxpêr o ixpa. Nom kormã Xitre mẽ kurũm akupýn hpôx kêt. Mãn kormã Masetõn kamã pa.

Anhýr o ijamaxpêr hãmri nê mẽ kãm amnhĩ jarê nê ixkato nê ma Masetõn wýr krĩ hkwyê hkôt hapêr o mõi. Tã ra hwýr ixkato nê omu.

Te mẽ pahpê mẽhkuxwa xà pyræk ã mẽ pajarênh

Epes 5.2; Piripos 4.18

14-16 Nà Tĩrtũmja mex o mex. Na hte mẽ pahto mex rãhã ho pa. Nê mẽ kot mẽ panê àmnàr xwýnhjaja nhũm hte tanhmã mẽ ho pu mẽ ma paxàmnhĩx ri mẽ hkôt mẽ kãm Kris kapêr jarênh o ri papa. Te mẽ pahte mẽ hkuxwa xà ho ri mẽ hkuxwa ho papa pyræk. Mẽ pahte Kris kôt amnhĩ nhĩpêx jakamã Tĩrtũm mã te mẽ pahkuxware nê ri mẽ papa pyræk. Nê te mẽ kãm Kris jarênh o ri papa pê te mẽ hkuxwa xà ho mẽ hkuxwa ho ri mẽ hkôt papa pyræk. Nhũm hte mẽ hkwyêjaja mẽ pama nê kãm mar prãm nê. Nê mẽ paxujarênhja haxwýja te kot mẽ hkuxwa xà kuxwa mex nhũm htem hpãr nê kãm ho amnhĩ kuxwa hprãm pyræk. Jao kãm mẽ pamar prãm nê Kris kôt amnhĩ xunhwý. No nhũm mẽ hkwyêjaja axtem nê mẽ kêp mẽ pamar prãm nõkati. Mẽ kumã Tĩrtũm kapêrja te kêp wenên kuxý htýx nhũm mẽ kot hpãr nê htyk pymaj amým kuhê

pyræk. Jao kapêr kaga nê kêp amým amnhĩ xunhwý.

Nê na pu htem amnhĩ krã hkôt mẽ kãm Kris kapêr jarênh o ri papa hkêt nê. ãm Tĩrtũm nhý hã pix mã tanhmã harênh to ho papa.

Pawre kot katàt kôt Tĩrtũm kapêr o mẽ ahkre hã harênh

17 Na hte mẽ kot mẽ kêp Kris nhý hã mẽ ahkre hã amnhĩ to hêx xwýnhjaja te Tĩrtũm kapêr o wênê pyræk o mẽ hkôt pa. Jao kãxpore hprãm xàj amnhĩ krã hkôt tanhmã mẽ kãm harênh to nhũm htem mẽ kuma nê hpãnhã tanhmã mẽ kãm amnhĩrer to. Nom pa na pa hte ã amnhĩ nhĩpêx anhýr kêt nê. Nê mẽ uræk nê amnhĩ krã hkôt Tĩrtũm kapêr jahkre ho ixpa hkêt nê. Tĩrtũm kot mẽ akaxyw ixãm jakamã na pa hte ixkatàt kôt Kris nhý hã amarĩ mẽ amã kapêr jarênh o ri mẽ akôt ixpa. No mẽ uræk nê kãxpore prãm xàj mẽ amã harênh kêt nê. Tĩrtũm kot ja hã ixpumunh mex.

3

1 Mẽ kêp Kris nhý hã mẽ ahkre hã amnhĩ to hêx xwýnhjaja na htem nhýhým nojarêt nê mẽ kot mar xwýnhjê mã:

—E kot paj ma nhãm krĩ hõ hwýr mõi nê Tĩrtũm kapêr o mẽ ahkre. Jakamã kwa mẽ kaxyw inhmã kagà nhĩpêx nê kamã ixte Tĩrtũm kapêr o mẽ ajahkre mex xwýnh ã ijarê nê hã kagà. Hãmri nê inhmã agõ pa ma amnhĩ kôt o mõi nê mẽ kot inhmar mã xwýnhjê

mā kugō kê mē kamā harē nē ijarēnh ma nē kām ixkapēr mar prām nē.

Anhÿr o na htem amnhī to mē hwÿr o pa. No pa na inhmā ā amnhī nhīpēx anhÿr prām kêt. Inhmā nhām mē kām amnhī to jarkrar prām kêt. Mē ate ja hā ixpumunh mex. Ra mē piitā mē kot ixkatāt kôt ixte Tirtūm kapēr jarēnh mex ā ixpumunh mex jakamā mo kaxyw kot pa ri amnhī kôt kagā jamÿ nē ho ixpa? Nā kot pa amnhī kôt hō ho inhmōr kaxyw hā ixàhwÿr kêt nē.

²⁻³ Mē kajaja te mē apē inhō kagā pyrāk. Na ka prem ixte mē ajahkre ma nē Jejus kôt amnhī xunhwÿr kurē kumrēx. Hāmri nhūm Tirtūm mē amā amnhī Karō rē nhūm mē amā agjē ka mē ŷ hā amnhī nhīpēx nyw o amnhī nhīpēx o apa. Hāmri nhūm mē akwÿjaja amnhī jaēr pē mē ate amnhī nhīpēx nyw ā mē apumu nē mē atā xapēn mā ijarēnh o:

—Hēxta waa nē. Pēr ām hāmri na pre Kris mē hwÿr Pawre mē. Na pre ma mē hwÿr mō nē mē kām Tirtūm kapēr o mē ahkre nhūm mē kuma nē amnhī tomnuj kaga hpa nē hpānhā Tirtūm kapēr kôt amnhī nhīpēx nē tām ri amnhī nhīpēx o pa. Ām hāmri na hte Pawre mē ahkre mex o pa. Hēxta waa nē.

Anhÿr o mē atā ijarēnh jakamā mo kaxyw kot pa kagā hkwÿ jamÿ nē amnhī kôt ho ixpa? Nā mē kajaja te mē apē inhō kagā pyrāk.

⁴ Na pa pre Jejus kôt amnhī xām nhūm Tirtūm ja hā ixpumu nē tanhmā inhmā kapēr o amnhīrit to nē inhmā:

—E Pawre. Kēr ka ma mē kām ixkapēr jarēnh o ri mē hkôt apa.

Anhÿr jakamā na pa hte Tirtūm kamnār rom ā amnhī nhīpēx anhÿr o ri mē hkôt ixpa.

⁵ Nom amnhī krā hkôt mē ahkre hkêt nē. Tanhmā kot pa we amnhī to nē amnhī krā hkôt mē kām kapēr o mē ahkre mex nē? Nā Tirtūm pix na hte ja kaxyw tanhmā ixkrā hto pa ô ri mē ahkre ho ri ixpa.

Tirtūm kapēr nyw jarēnh

⁶ Nē Tirtūm na hte tanhmā ixkrā hto pa Karō nhÿ hā mē piitā mē kām kapēr nyw jarēnh o ri ixpa. Amnepēm Tirtūm kot Ijaew mā mēmoj tā karō xwÿnhta. Mojes kot kapēr tūm jarēnh o pa xwÿnhta mex tā no nhūm mē tee ri hkôt kām amnhī nhīpēx prām o pa. Nē xatā kamā harē nē omunh tā tee ri kot hkôt kām amnhī nhīpēx prām. Tā mē kot hkôt amnhī nhīpēx kêt mÿrapē na prem pikaprār pan hapēx. No kêt Tirtūm kapēr nywja. Jejus jarēnhja. Na hte Tirtūm Karō tanhmā mē pahkrā hto pu mē Jejus kôt amnhī nhīpēx o ri papa. Jao mē pahpē pahÿr tūm nē papa mā xwÿnh. No na hte nhām mē hkwÿjaja kām harēnhja mar prām kêt nē amnhī jarēnh o:

—Nā kot paj amnhī krā hkôt ā amnhī nhīpēx anē nē

ã amnhĩ nhĩpêx anê nhũm Tĩrtũm ja hã ixpumu nê ixťĩr tũm nê ixpa mã xwýnh ã ijarê.

Anhỹr tã no ãm ã amnhĩ jarênh anhỹr kaprý. Tĩrtũm Karô nhỹ hã mẽ kot amnhĩ to mex o mẽ pa xwýnh pixjaja koja mẽ htĩr tũm nê pa ho pa.

⁷ Nê Tĩrtũm kapêr tũmta na pre Mojes mẽ kãm harênh kaxyw nhũm mẽmoj tanhmã amnhĩ nhĩpêx to rax kumrêx. Naja hkrakrak nê haxênh nê kamã kamãt kô htyk. Hãmri nhũm Tĩrtũm mẽ kot hkôt amnhĩ nhĩpêx kaxyw kên po hã mẽ kãm mẽmoj tã karô nhũm Mojes kumý nê mẽ hwýr o wrý nê mẽ kãm kamã harê. Tĩrtũm kot hirã htýx kamã kãm kapêr nhũm kuri mar o ãm jakamã urak nê ý hã hkuk nhĩrã htýx kumrêx nê mẽ kãm kapêr jarênh o xa. Jakamã nhũm mẽ tee ri kot hprĩ hã omunh mex kaxyw no ãm nom gêk týt nê. Tã gaa nhũm hkuk kãm hirãja amnhĩm hprĩ nê hapêx o mō. Na pre ã Tĩrtũm Ijaewjê mã kapêr tũm nhõr anê. Hãmri nhũm Mojesja ô ri mẽ kãm kamã harê nê harênh pa hãmri nê mẽ kãm:

—E kêr ka mẽ Tĩrtũm kapêr mar týt nê hkôt amnhĩ nhĩpêx mex rãhã ho ri apa. Kêr ka mẽ nhỹrmã atyk tã kê akupým mẽ ato mẽ atĩr ka mẽ ô krĩ kamã kuri atĩr tũm nê amex nê apa ho apa. Anê.

Hãmri nhũm mẽ kuma nê kãm:

—Tõe. Nà kot paj mẽ hkôt pix mã ri amnhĩ nhĩpêx mex rãhã ho ri ixpa.

Anhỹr ã amnhĩ jarênh tã no ãm hkôt amnhĩ nhĩpêx kêt nê nhũm Mojes tee ri mẽ kot amnhĩ nhĩpêx ã mẽ omu nê mẽ kãm:

—Nà mẽ ate Tĩrtũm kapêr kôt amnhĩ nhĩpêx kêt jakamã kot kaj mẽ nhỹrmã ty nê Tĩrtũm pê awry rax kumrêx nê ri apa. Anê.

⁸ Tã na hte Tĩrtũm jarãhã axtem tanhmã mẽ pamã kapêr to. Pãnhã kapêr nyw o kapêr nê mẽ pamã:

—Kot kaj mẽ Ixkra Jejus kôt amnhĩ xunhwý pa hã mẽ apumu nê mẽ ato ixkra. Hãmri nhũm Ixkarô mẽ amã agjê. Anê.

Kapêr ja na mex kumrêx o kot kapêr tũm jakrenh.

⁹ Kapêr tũmja mex tã nhũm htem hkôt amnhĩ nhĩpêx kêt nê. Jakamã na htem ty nê Tĩrtũm pê awry rax ã ri pa. No kapêr nywja na tũmta rom mex o mex. Na hte Tĩrtũm mẽ pamã kapêr nywja jarênh o:

—Kot paj tanhmã mẽ akrã hto ka mẽ amnhĩ to mex pix o ri apa. Jao ixkôt ri amnhĩ nhĩpêx mex o ri apa. Anê.

¹⁰ Nê kapêr tũmja te kot kanê hpôk kryre pyrãk. No kapêr nywja mex o kot tũm jakrenh jakamã te kot mẽmo hpôk rũnh o kanê hpôk kryre jakrenh pyrãk. Jakamã nhũm mẽ kot hirã rax kãm ri mrar gryk ã hpôk grire nhĩrã kamã mrar kêt pyrãk.

¹¹ Tĩrtũm kapêr tũm te kot Mojes kuk pyrãk. Na pre kamã hirã rax tã gaa nê amnhĩm hprĩ nê kamã hirã hapêx o mō. Nê gaa nê hapêx.

No kêt Tîrtûm kapêr nywja te kot Tîrtûm nhîrã htÿx rãhã ho rãhãta pyrãk. Koja urãk nê aa hapêx kêt kumrêx.

Ijaewjê jarênh
Rômãn 11.7-10

12 Nê Tîrtûm kapêr nywja mex o mex jakamã na pa hte ixãmnhîx mẽ kãm harênh o ri ixpa.

13 Te ixte Mojes kot amnhî nhîpêx pyrãk kêt. Na pre hte Mojes ixkînhã àmnhîx Ijaewjê mã Tîrtûm kapêr jarênh o ri pa hkêt nê. Mê kot hkuk kãm hirãta ra hapêx o mör ã omunh nhûm hpîjaãm py-maj na pre kupêxê puroore ho amnhî kuk pro nê ri mẽ hkôt pa.

14 Jakamã nhûm prem hprî hã hkuk kãm hirã pumunh mex kêt nê. Nê Tîrtûm kapêr ã kagã htÿmjã nhûm prem mãânên hprî hã mar mex kêt nê. Mê hkrã hihtÿx jakamã te mẽ kot amnhî jamak pro nê mẽmoj mar mex kêt pyrãk jakamã mẽ kot mar tã hprî hã mar kêt nê. Nê hkôt ri amnhî nhîpêx mex kêt nê. No mẽ kot Kris kôt amnhî xunhwÿr xwÿnhjaja na hte Tîrtûm amnhî tã mẽ omu nê te mẽ nê mẽ hamak hpro xãta rênh par nê rênh pyrãk o mẽ hipêx nhûm mẽhprî hã kapêr mar tÿx nê.

15 Tã na hte Ijaewjaja arî jarãhã Mojes kot Tîrtûm kapêr ã kagã htÿm kamã harênh o pa. Nom arî mẽ hkrã hihtÿx jakamã te mẽ kot amnhî jamak pro nê kamã harênh o pa pyrãk o amnhî

nhîpêx jakamã kormã hprî hã mar kêt nê.

16 Tã koja mẽ hkwÿjaja Pahihti Jejus Kris kôt amnhî xunhwÿ nhûm amnhî tã omu nê te kot mẽ hamak nê hpro xã hpyr nê mẽnh pyrãk o mẽ hipêx nhûm mẽhprî hã kapêr nyw mar tÿx nê.

17 Pahihti mẽ Karõja wa htipxi jakamã na hte mẽ pakamã agjê nê hprî hã mẽ pamã kapêr o amnhîrît o pa.

18 Ra mẽ pahte Pahihti Kris kôt amnhî xunhwÿr jakamã te mẽ pahte mẽ kot amnhî jamak pro xwÿnh kot amnhî nhîpêx pyrãk kêt. Nhûm Pahihti Karõja tanhmã mẽ panhîpêx to pu mẽ ra hkôt amnhî nhîpêx mex o mō. Jakamã na htem mẽ pahte amnhî nhîpêx nyw pumunh kôt Tîrtûm kot tãm amnhî nhîpêx ã omunh kurê kumrêx. Kormã mẽ pahte hkôt amnhî nhîpêx mex kumrêx kêt tã ra hkôt amnhî nhîpêx mex o mō. Jao te tãm kot amnhî nhîpêx pyrãk o amnhî nhîpêx o mō.

4

Jejus kapêr te kêp kanê pyrãk ã harênh

Wam Korî 2.1-5; Sikûn Korî 1.12; Wam Tesarôn 2.1

1 Nê na pre Tîrtûm ixto mex nê tanhmã kãm ixãpênh to hã inhmã karõ. Ixte ma mẽ kãm kapêr jarênh o ri mẽ hkôt ixpa kaxyw. Jakamã na pa hte ixãmnhîx mẽ hkôt mẽ kãm harênh o ri ixpa.

2 Nhûm mẽ hkwÿjaja axtem nê ixêx o ri ixpa hã ijarênh

tã ixte ã amnhĩ nhĩpêx anhÿr kêt. Na pa hte amnhĩ tomnuj o ri ixpa hkêt nê. Mẽ hkwÿjaja kot mẽ no kupyw kaxyw mẽ kãm Tĩrtũm kapêr o hêx o pa htã pa na pa hte ã amnhĩ nhĩpêx anhÿr kêt nê. Ixpri hã mẽ kãm harênh o ixpaja na inhmã hprãm jakamã na pa hte ixkatat kôt harênh o ri mẽ hkôt ixpa. Mẽ piitã mẽ kot ixêx kêt kôt ixpumunh mex kaxyw. Tĩrtũm kot ixêx kêt kôt ixpumunh mex.

³ No nhÿrmã mẽ htyk nê ma kuwy hwÿr mẽ pa mã xwÿnh pixjaja na htem hprĩ hã ixkapêr mar mex kêt nê.

⁴⁻⁶ Satanasti tãm kêp mẽ hpãm. Kêp mẽ kãm Tĩrtũm kapêr mar prãm kêt xwÿnh piitã mẽ hpãm. Jakamã na pa hte mẽ kãm tanhmã Jejus jarênh to. Kêp Tĩrtũm Kra hã harê nê te kot Tĩrtũm kot amnhĩ nhĩpêx pyrãk ã harênh o ri ixpa. Hãmri nhũm Satanasti tee ri ja hã ixpumu nhũm ja kêp omnuj nê. Jakamã nhũm tanhmã Tĩrtũm nê mẽ hkrã hto nê te mẽ hamak pro pyrãk o mẽ hipêx. Mẽ kot hprĩ hã Jejus jarênh mar nê hkôt amnhĩ xunhwÿr pymaj nhũm ã nê mẽ hipêx anê. Jejus jarênh te kêp kanê hpôk mex pyrãk jakamã mẽ kot mar kêt xwÿnhjaja te kamãt kô kamã ri mẽ pa pyrãk. No nhũm Satanasti tãm kot nê mẽ no kupyw jakamã nhũm htem ã ri kamãt kô kamã mẽ pa pyrãk o amnhĩ nhĩpêx anê.

Amnepê mã kormã mẽmoj kêt ri nhũm kamãt kô pix. Tã

nhũm Tĩrtũm tanhmã kapêr to nê kapêr o:

—E kê hirã kato. Anê.

Hãmri nhũm ra kapêr xã hkôt hirã kator kurê kumrêx. Tã ja pyrã nê na pa pre kamãt kô kamã ixtÿx ri ixpa pyrãk nhũm Tĩrtũm te kot inhmã kanê hpôk nhũm hirã pyrãk o inhĩpêx pa mex o mex ã omunh kurê kumrêx. Hãmri nê Jejus Kris kot amnhĩ nhĩpêx ã omu nê te Tĩrtũm kot amnhĩ nhĩpêx ã omunh pyrãk. Wa kot amnhĩ nhĩpêx te kot axpên pyrãk.

Nê na pa hte pam tanhmã amnhĩ jarênh to ho ri ixpa hkêt nê. ãm Jejus Krisja pix na pa hte harê. Tapxipix na kêp mẽ panhõ Pahihti. Jakamã hkĩnhã te ixpê mẽ amã ixapênh xwÿnh pyrãk o na pa hte mẽ amã kapêr jarênh o ri mẽ akôt ixpa.

Pawre te kêp poti grãre nhĩpêx pyrãk ã harênh

Wam Korĩt 2.4-5; Sikũn Korĩt 11.23, 12.9

⁷ Nê Tĩrtũm ixrom hihtÿx o hihtÿx. No pa na hkĩnhã ixihtÿx kêt. Te ixpê poti grãre nhĩpêx pyrãk jakamã na pa hte Tĩrtũm xihtÿx xwÿnh pix nhÿ hã mẽ kãm kapêr jarênh o ri mẽ hkôt ixpa. Nhũm htem inhma nê ãm hãmri ixte ÿ hã ixkapêr ã ixpumunh kurê kumrêx. No pa ixte amnhĩ krã hkôt ixkapêr ã ijarênh kêt nê.

⁸ Na pa hte mẽ hkôt mẽ kãm Jejus jarênh o ri ixpa nhũm mẽ hkwÿja tõhã inhma nê ja hã inhĩpêx kati nê pa amnhĩ xã htÿx kamã ama.

Nom nhūm Tīrtūm mẽ kutā tanhmā ixkrā hto pa inhmā amnhī xà kamā ijamak pyma hkêt nē arī mẽ kām kapēr jarēnh o ri mẽ hkôt ixpa. Nē amnhī kaxyw Jejus kôt pix mã ijamaxpēr tỳx rāhā pē tee ri amnhī kukamā ijamaxpēr o ri ixpa hkêt nē.

⁹ Nē mẽ kām ixkurê xwỳnhjaja ohtô. Na htem xatā Jejus ā tanhmā ixtomnuj to htā pa kormā ixtyk kêt nē. Na pa hte Tīrtūm kamnār rom arī mẽ hkôt ixpa nhūm Tīrtūm ixkôt pa ho pa.

¹⁰ Na htem Jejus pyrā nē ixpīr kaxyw tanhmā inhīpêx to. No âm ko. Kojā mẽ nhỹrmā ixpī rỳ ko. Ixte amnhī kukamā ixāhpumunh kêt. Kot paj âm arī ixtīr ri mẽ kām Jejus jarēnh o ri mẽ hkôt ixpa. Kêr kê mẽ hkwyjaja ixkapēr ma nē axpēn mã tanhmā Jejus jarēnh to nē harēnh o:

—Nà pēr âm hāmri na pre Jejus akupỹm htīr nē tanhmā hkwyjê ho mex to. Âm hāmri na hte Pawre ja hā harē. Anē.

¹¹ Mẽ kot Jejus ā ixpīr mã tã pa arī mẽ kām akupỹm htīr ā harē. Tīrtūm na hte ja kaxyw tanhmā ixkrā hto pa arī mẽ kām harēnh o ri mẽ hkôt ixpa.

¹² Na pa pre ra mẽ amā harē ka prem inhma nē Jejus kôt amnhī xunhwỳr kurê kumrêx nē amnhī nhīpêx nyw o amnhī nhīpêx o ri apa. Jakamā ixpyrà nē mẽ apê atīr tūm nē apa mã xwỳnh. Nhūm htem piitā mẽ ate Jejus kôt amnhī xunhwỳr ā mẽ apumu. Tã nhūm mẽ kot Jejus ā ixpīr kaxyw. Nom kwār mẽ

māmri ixpī. Ja inhmā tanhmā kute hkêt. Mẽ kot ixpīr mã tã kot paj arī Jejus kapēr jarēnh o ri ixpa rāhā ty. Ra mẽ kot ixkapēr mar nē Jejus kôt amnhī xunhwỳr xwỳnhjaja mẽ pahpyrà nē kêp htīr tūm nē pa ho pa mã xwỳnh kênā.

¹³ Jakamā kwār mẽ māmri ixpī. Na pa hte arī amnhī kaxyw Tīrtūm kôt ijamaxpēr mex rāhā nē. Amnepê mã na pre Pahi finat Tawija tanhmā Tīrtūm kapēr jarēnh to nē harēnh o:

Âm hāmri na Tīrtūm kapērja. Hêx kêt jakamā na pa hte mẽ kām harēnh rāhā ho ri ixpa. Anē.

Tã pa hte Tawi pyrā nē mẽ piitā mẽ kām Tīrtūm kapēr jarēnh o ri ixpa. Tīrtūm kot mẽ pamā tanhmā mẽmoj to hêx to hkêt.

¹⁴ Ra kot amnhī jarēnh xà hkôt akupỹm Pahihti Jejus o htīr jakamā kot puj mẽ nhỹrmā urāk nē ty nhūm akupỹm mẽ pahto mẽ pahtīr nē ma war amnhī wỳr mẽ pahto api.

¹⁵ Amnepēm na pa pre ma mẽ awỳr mō nē mẽ akôt mẽ amā Tīrtūm kapēr jarēnh o ri ixpa. Ka prem inhma nē Jejus kôt amnhī xunhwỳ nē ixpyrà nē Tīrtūm mã mex o mex ā harē. Jakamā kwār mẽ māmri Jejus ā tanhmā inhīpêx to. Kojā mẽ gaa nē rī mẽ hkwyjaja mẽ pahpyrà nē Jejus kôt amnhī xunhwỳ nē Tīrtūm mã mex o mex ā harē.

Pawre tee ri amnhī kukamā hamaxpēr kêt ā kot

amnhĩ jarēnh

Rōmān 8.17; Sikûn Korî̄t 1.7; Wam Pētre 1.3-9, 4.12-16, 5.10

¹⁶ Jakamā na pa tee ri amnhĩ kukamā ijamaxpēr o ixkaprĩ nē ixpa hkēt nē. Mē kot Jejus ā tanhmā ixtomnuj to htāā pa hte ixamnhĩx kapēr jarēnh o ri ixpa. Ra ixpigēt nē ixirerek o inhmōr tā inhōpinh xà kaxwỳnh kām ijamaxpēr o Jejus kōt amnhĩ nhĩpēx mex o mō.

¹⁷ Mē kām ixkurē xwỳnhjaja na htem Jejus ā inhĩpēx kati htā ā inhĩpēx anhyr japjē hkēt nē. Nom kot paj nhỹrmā ty nhũm Jejus akupỹm ixto ixtĩr pa Tĩrtũm mē wa kuri inhmex kumrēx nē ixpa ho ixpa. Mē kot ixtomnujja na mē ho apkati grēre no kot paj nhỹrmā Tĩrtũm mē Krata wa kuri inhmex kumrēx nē ixtĩr tũm nē ri ixpa ho ixpa. Jao rāhā ho rāhā.

¹⁸ Jakamā na pa tee ri mē kot tanhmā ixtomnuj tota kukamā ijamaxpēr o ri ixpa hkēt nē. Ja koja tokyx hapēx. Na pa hte ām nhỹrmā Tĩrtũm nhō krĩ kamā inhmex nē ixkĩnh rāhā ri ixpaja pix kukamā ijamaxpēr o ri ixpa.

5*Mē panhĩ nyw jarēnh*

Piripos 3.21; Sikûn Pētre 1.13-14

¹ Nē mē panhĩja te kot tyrti hô ho ixkre pyrāk. Na htem tyrti hô ho ixkre nhĩpēx nhũm gaa nē hapēx. Tā mē panhĩja na hte urāk nē hapēx tokyx anē. Na pu htem ri papa nē gaa nē pawej nē ty. Tā nhũm

Tĩrtũm hpānhā mē pahpē hkrajē mā mē panhĩ nyw gō pu mē kuri ō krĩ kamā pamex kumrēx nē pahtĩr tũm nē papa ho papa.

²⁻³ Na pu htem jar pahpunuj nē papa. Nē mē paxà nhi nē mē pahkaprĩ nē. Mē panhĩ htũmja te kot mē paxē htũm pyrāk jakamā na pu htem ty nē te paxē htũm kwrynh nē hpānhā nyw jagjēnh pyrāk o amnhĩ nhĩpēx. Tā na pu htem amnhĩ kukamā panhĩ nywja mā pajamaxpēr o ri papa. Kot pu mē kaxkwa kamā pahkarō pix nē ri papa hkēt nē. Mē panhĩ nyw ā kot puj mē ri papa ho papa.

⁴ Nē na pu htem jar pahpunuj nē pamex kēt nē ri papa. Nē tokyx mē pahtyk nē panhĩ htũm o pajapēx nē hpānhā panhĩ nyw ā mē papa hprām. Tā koja Jejus tokyx akupỹn wrỳk japēr pu mē pahtyk kēt rāhā tokyx panhĩ nywta o panhĩ nyw. Nom koja tokyx akupỹn wrỳk kēt japēr pu mē nhỹrmā ty nhũm Tĩrtũm akupỹm mē pahto mē pahtĩr nē mē pamā mē panhĩ nyw gō pu mē ho panhĩ nyw.

⁵⁻⁶ Na pre ra Tĩrtũm mē panhĩ nyw kukamā hamaxpēr nē mē pahtā tanhmā amnhĩ jarēnh to. Nē mē pahwỳr Karō rē nhũm mē pahkarō mā agjē pu mē ja hā amnhĩ pumu nē pahkĩnh nē pajamaxpēr o:

—Nà ra Tĩrtũm kot ixwỳr amnhĩ Karō mēnh nhũm ixkarō mā àr jakamā koja määnēn nhỹrmā inhmā inhĩ

nyw gō. Kormã inhĩ htŭm kamã ixpa nē Pahihiti Jejus mē wa ō krī kamã ixpa hkēt tā koja nhỹrmã inhmã inhĩ nywja gō pa inhĩ nyw o wa kuri ixpa ho ixpa. Nã koja ã inhĩpêx anē.

Anhỹr o pajamaxpêr pē pahkĩnh nē papa.

7 Nē mē pahte jar pano ho nhỹri Jejus pumunh kêt tā no ãm panhōpinh xã kaxwỹnh kãm kãm pajamaxpêr mex nē.

8 Jakamã na pu mē tee ri amnhĩ kukamã pajamaxpêr o papa hkēt nē. Na pu htem ãm tokyx mē pahtyk nē ma Pahihiti Jejus nhō krī hwỹr paxàpir jamãr o papa. Ō krīja kēp mē papapxã kumrêx jakamã na pu htem ma hwỹr paxàpir pix kukamã pajamaxpêr rãhã nē.

9 No ãm mē pamã ja pix prãm kêt. Na pu htem mããnēn pamã Jejus mã hprãm xã hkôt nhỹri tanhmã kãm amnhĩ nhĩpêx to ho ri papa hprãm o papa. Jar mē panhĩ htŭm rãhã rỹ mŭtar kuri ō krī mex kãm mē panhĩ nyw ã tanhmã kãm amnhĩ nhĩpêx to ho ri papaja na mē pamã hprãm.

10 Nē na hte Krisja jar mē pahte tanhmã amnhĩ nhĩpêx to hã mē pahpumunh o hkrĩ. Mē pahte tãm amnhĩ nhĩpêxja nē mē pahte amnhĩ tomnujja nhŭm hte hã mē pahpumunh rãhã ho hkrĩ. Tã koja nhỹrmã kot mē pahte tanhmã amnhĩ nhĩpêx to hã mē pahpumunh kôt tanhmã mē panhĩpêx to. Mē pahte tãm amnhĩ nhĩpêx o ri papa xwỹnhjaja koja ra

mē panê htyk kukwak ri mē pahto mex nē. No mē kot amnhĩ tomnuj o mē pa xwỹnhjaja koja mē homnuj tỹx nē. Jakamã na pa inhmã kãm hprãm xã hkôt pix mã amnhĩ nhĩpêx o ixpa hprãm nē.

Mē pajamaxpêr nyw jarênh Rômãn 6.4-6; Sikŭn Korīt 4.2; Epes 4.22-24; Korosê 3.9-10

11 Nē Tĩrtŭm kot hprĩ hã mē pahpumunh rãhã ho hkrĩ jakamã inhmã kãm hprãm xã hkôt pix mã amnhĩ nhĩpêx o ri ixpa hprãm. Mãn ka mē ra ja hã ixpumunh mex nē rỹ ko. Mē piitã mē kot hkôt amnhĩ xunhwỹr prãm xaj na pa hte mē kãm kapêr jarênh o ri ixpa.

12 Nom ixte ja hã amnhĩ to jarkrar o ri ixpa hkēt. ãm mē ate inhmar nē mē kēp Kris nhỹ hã mē ahkre hã amnhĩ to hêx xwỹnhjê mã tanhmã ijarênh to kaxyw na pa ã mē amã amnhĩ jarênh anē. Mē kot Tĩrtŭm kapêr jahkre mex kumrêx ã amnhĩ to jarkrar tā na htem hkôt amnhĩ nhĩpêx kêt nē. Tã mē ate aprĩ hã ixte Tĩrtŭm kapêr kôt amnhĩ nhĩpêx mex ã ixpumunh nē tanhmã mē kãm ijarênh to kaxyw na pa ã te ixte amnhĩ to jarkrar pyrãk o mē amã amnhĩ jarênh anē.

13-14 Mē kot ixkrã pipãnh ã ijarênh tā Tĩrtŭm na mē akaxyw ixãm pa hte mē amã kapêr jarênh o ri mē akôt ixpa. Ixkrã pipãnh kêt. Ixte Tĩrtŭm kãm hprãm xã hkôt tanhmã amnhĩ nhĩpêx

to xwýnh na pa. Tã mẽmo kaxyw na pa hte ã kapër jarënh rũnh anhýr o ri mẽ akõt ixpa? Nà inhmã mẽ akĩnh kënã. Mẽ ate Tĩrtũm kõt tãm amnhĩ nhĩpêx prãm xà na pa hte ã mẽ amã kapër jarënh anhýr rãhã nẽ. Kris na pre tanhmã ixto pa inhmã mẽ akĩnh nẽ. Te tãm kãm mẽ ajapê pyræk. Na pre Kris amnhĩ grõnh kõt mẽ pahpiitã mẽ nê ty. Tĩrtũm kot mẽ pahte amnhĩ tomnuj mýrapê tanhmã mẽ pahto pymaj nhũm mẽ pahpiitã mẽ panê ty. Jakamã te mẽ pahpiitã Jejus kõt mẽ pahtyk pyræk o na pu htem amnhĩ nhĩpêx. Jao te mẽ pahte amnhĩ nhĩpêx tũmja mẽ pahpê hapêx par pyræk o pu mẽ amnhĩ nhĩpêx nyw o amnhĩ nhĩpêx o ri papa.

15 Mẽ pajamaxpër nyw o tãm mẽ pahte amnhĩ nhĩpêx o papa kaxyw na pre Jejus mẽ panê ty. Jakamã na pu htem axte amnhĩ pix kukamã ri pamã mẽmoj prãm o ri papa hkêt nẽ. Na pu htem mãânèn Tĩrtũm kãm hprãm xà hkõt tanhmã kãm amnhĩ nhĩpêx to ho ri papa. Ja kaxyw na pre Tĩrtũm akupým Kris o htĩr pu mẽ kukwak ri pajamaxpër nyw o amnhĩ nhĩpêx o papa.

16 Jao mẽ piitã mẽ hkrã hkã hã mẽ omunh xà hkõt pix mã tanhmã mẽ harënh to hkêt nẽ. Mẽ kot amnhĩ tomnuj ã mẽ harënh rý mẽ kot amnhĩ to mex ã mẽ harënh kêt nẽ. Amnepê mã na pa pre ã Kris jarënh anê nẽ harënh o:

—Nà Krisja na hte mẽ pahte

amnhĩ nhĩpêx kõt amnhĩ nhĩpêx kêt nẽ. ãm ri kot mẽ pahte amnhĩ nhĩpêx kwým ri amnhĩ nhĩpêx jakamã kot amnhĩ tomnuj týt xwýnh na.

Anhýr ã harënh o ixpa. Tã axte ã harënh anhýr hkêt nẽ. Kot amnhĩ tomnuj xwýnh kêt jakamã na pa hte hpãnhã hkõt pix mã tanhmã kãm amnhĩ nhĩpêx to ho ri ixpa.

Mẽ pahpê Tĩrtũm krãmnhwý hã mẽ pajarënh

Rõmãn 5.1, 5.10; Epes 6.20; Korosẽ 1.20

17 Nẽ koja mẽhõ Kris kõt amnhĩ xãm nhũm kot amnhĩ nhĩpêx tũmja kęp hapêx nhũm hpãnhã kot amnhĩ nhĩpêx nyw pix o amnhĩ nhĩpêx nẽ hamaxpër nyw pix o hamaxpër.

18 Tĩrtũm na hte tanhmã mẽ pahto pu mẽ ã amnhĩ nhĩpêx anhýr o ri papa. Na pu prem pamã hkurê htã nhũm Kris kukwak ri mẽ pahte hkõt amnhĩ nhĩpêx xwýnhjê ho hkrãmnhwý. Hãmri nẽ tanhmã mẽ pahte amnhĩ nhĩpêx to hã mẽ pamã karõ nẽ mẽ pamã:

—E kër ka mẽ ma krĩ piitã hkõt ri mẽ kãm ixkapër jarënh o ri apa kê mẽ ama nẽ mẽ apyrã nẽ Kris kõt amnhĩ xunhwý. Pa ja hã mẽ omu nẽ ixte mẽ anhĩpêx pyrã nẽ mẽ ho ixkrãmnhwý. Anê.

19 Jakamã na pa hte ma mẽ kãm kapër jarënh o ri mẽ hkõt ixpa nẽ mẽ kãm:

—E pa mẽ amã mẽmoj mex jarë ka mẽ inhma. Nà na pre Krisja mẽ pahte

amnhĩ tomnuj mÿrapê mẽ panê ty. Nê htyk o Tĩrtũm mã mẽ pahpãnhã amnhĩrer par kumrêx. Jakamã na ra Tĩrtũmja Kris kukwak ri kãm mẽ pahpiitã mẽ pahto hkrãmnhwÿ prãm. Koja kukwak ri mẽ pahte amnhĩ tomnuj piitã ho hamakêtkati nê axte kãm hamaxpêr kêt kumrêx. Kãm mẽ pahto hkrãmnhwÿ hprãm jakamã koja ã mẽ panhĩpêx anê. Jakamã e kwa mẽ tokyx Kris kôt amnhĩ xunhwÿ kê Tĩrtũm kot inhĩpêx pyrã nê mẽ ato hkra nê mẽ ato hkrãmnhwÿ.

Anhÿr o mẽ kãm harênh o ri mẽ hkôt ixpa.

²⁰ Kris kot mẽ apiitã mẽ awÿr inhmênh jakamã na pa hte ÿ hã mẽ amã kapêr jarênh o ri mẽ akôt ixpa nê mẽ amã:

—E Tĩrtũm kãm mẽ ajapê jakamã na mẽ awÿr inhmê pa mō. Jakamã kwa mẽ tokyx amnhĩ tomnuj kaga nê hkôt amnhĩ xunhwÿ. Kê amnhĩ tã mẽ apumu nê mẽ ato hkrãmnhwÿ. Anê.

²¹ Krisja aa kot tanhmã amnhĩ tomnuj to hkêt kumrêx tã nhũm pre Tĩrtũmja te mẽ kot amnhĩ tomnuj tÿx kumrêx xwÿnh pyrãk o hipêx. Tã mẽmo kaxyw na pre ã hipêx anê? Nà mẽ panê kênã. Mẽ pahte hkôt amnhĩ xunhwÿr nhũm kot mẽ panhĩpêx o te aa mẽ pahte amnhĩ tomnuj kêt kumrêx xwÿnh pyrãk o mẽ panhĩpêx kaxyw na pre ã mẽ panê Krata nhĩpêx anê.

6

¹ Tã kot ã Kra nhĩpêx anhÿr jakamã kwa mẽ ixkapêr ma nê mar tÿx nê. No mẽ ama nê ãm mar kêt nê. Tĩrtũm kãm mẽ pajapê htÿx jakamã mẽ pakutã nojarêt rãhã ho pa. Kumã na pa hte ã mẽ amã kapêr jarênh anhÿr o ri mẽ akôt ixpa.

² Amnepê mã na pre Ijaew mã kapêr nê mẽ kãm:

Na ka prem amex kêt nê ri apa nê amnhĩ to ixwÿ pa pre mẽ ama nê mẽmojta pê mẽ apytã nê mẽ ato mex nê. Anê. Jakamã kwa mẽ inhma.

Tĩrtũm kãm mẽ ate amnhĩ tomnuj pê mẽ apytãr prãm tÿx jakamã kwa mẽ tokyx amnhĩ to awÿ kê ã kêp mẽ apytãr anê.

Mẽ kot Kris ã tanhmã Pawre nhĩpêx to hã mẽ harênh

Sikûn Korîť 4.7, 11.23-33; Korosê 1.10

³⁻⁴ Nê mẽ kot Tĩrtũm kapêr mar nê hã ixtomnuj tã pa hte amnhĩ katut kôt mẽ kot tanhmã ixtomnuj toja rê nê ho ijamakêtkati tokyx anê. Nê arĩ mẽ kãm kapêr jarênh rãhã ho ri mẽ hkôt ixpa. Mẽ kot mar nê ãm mar nê hkaga py-maj na pa hte ã amnhĩ nhĩpêx anhÿr rãhã nê. Mẽ kot ja hã inhĩpêx punuj tã pa arĩ mẽ kãm harênh o ri mẽ hkôt ixpa.

⁵ Mẽ kot Kris ã ixtak nê ijagjênh nê tanhmã ixto kaxyw ixtã htu htã pa hte mẽ kutã amnhĩ to htÿx nê ixkuhê. Na pa pre hte Tĩrtũm mã mẽ kãm kapêr jarênh rax nê. Jao tōhã inhôt kêt nê inhōtxwa ho ri mẽ hkôt ixpa. Nê tōhã

inhmā prām tỳx nē ri ixpa. Tā no ãm arī mẽ kām kapēr jarēnh rāhā nē.

6 Inhmā tanhmā ixte amnhĩ tomnuj to hprām kêt. Inhmā Tĩrtũm kot amnhĩ nhĩpêx kôt pix mã amnhĩ nhĩpêx prām. Nē inhmā inhgryk tokyx anhỹr prām kêt. ãm inhmā mẽ piitā mẽ hkĩnh kām mẽ ho mex pix prām. Ā na pa hte Tĩrtũm Karō nhỹ hã amnhĩ nhĩpêx anhỹr o ri mẽ hkôt ixpa. Mẽ kot ja hã ixpumunh nē ra Tĩrtũm kapēr ma nē hkôt amnhĩ xunhwỳr kaxyw.

7 Na pa hte ixkatàt kôt mẽ kām ixkapēr mex pix nē. Tĩrtũm xihtỳx xwỳnhja nhỹ hã ri mẽ kām kapēr jarēnh jao tām amnhĩ nhĩpêx nē tām ri ijamaxpēr o ri mẽ hkôt ixpa. Jakamā na htem ja hã ixpumu nē ixte Tĩrtũm kapēr jarēnh ma nē hkôt amnhĩ xunhwỳ.

8 Na hte mẽ hkwỳjaja kām ixkĩnh nē nhũm mẽ hkwỳjaja axtem kām ixkurê nē. Nē mẽ hkwỳjaja amnhĩm inhmex ã ijarē nhũm mẽ hkwỳjaja axtem axpēn mã tanhmā ixto kapēr punuj to. Mẽ kot ixêx nhi hã ijarēnh tā pa hte ixkatàt kôt mẽ kām ixkapēr o ri ixpa. Nom kwār mẽ māmri tanhmā ri ixto kapēr to. Ja tanhmā inhmā kute hkêt.

9 Na hte mẽ hkwỳjaja ixkamā ôkre kahak nē pika piitā hkôt axpēn mã tanhmā ijarēnh to ho pa. Mẽ kām ixpĩr prām tā no pa arī ixtĩr nē ixpa. Mẽ kot Jesus ã ixtomnuj tỳx tā kormā ixpĩr kêt nē pa ri ixtĩr

nē ixpa.

10 Ixte Kris ã amnhĩ xà htỳx kamā ijamak o ri ixpa htā arī ixkĩnh nē ixpa. Nē ixkàxpore hkêt tā nhũm mẽ ohtô nē ixte mẽ kām Jesus kapēr jarēnh kukwak ri mex nē pa. Nē ixkukrêx rax kêt tā nhũm Tĩrtũm ixto mex nē pa inhmex nē ixpa. Tā kot paj nhỹrmā ô krĩ kamā kuri inhmex kumrêx nē ixtĩr tũm nē ixpa ho ixpa. Jakamā na pa hte arī mẽ kām Jesus kapēr jarēnh o ri mẽ hkôt ixpa.

11 E Korīt kām ixkràmnhwỳjaja. Na pa ixpĩr hã mẽ amā amnhĩ nhĩpêx jarēnh par kumrêx.

12 Inhmā mẽ akĩnh tỳx tā te mẽ amā ixkĩnh kêt pyràk.

13 Kwa te mẽ ate ixto mẽ akatut nē akuhê pyràk o inhĩpêx kêt nē. Amnhĩ pyrà nē amā ixkĩnh nē hkêt wehe. Te mẽ apê ixkra pyràk o na pa ã mẽ amā ixkapēr anē.

*Te mẽ pahpê Tĩrtũm nhôrkwỳ pyràk ã mẽ pajarēnh
Wam Korīt 10.20-22, 15.33;
Epes 5.3-14; Sikŭn Ximotre 2.4; Xiakre 4.4-5; Wam Pêtre 2.11, 4.1-6*

14 Nē kêt ka mẽ kot Kris kôt amnhĩ xunhwỳr kêt xwỳnhjê mẽ mẽ mẽmoj tā tanhmā axpēn mar to hkêt nē. Rỳ mẽhõ ho amjên rỳ mẽhõ ho aprõ hkêt nē. Ahpỹnhã mẽ pajamaxpēr kênã. Tanhmā kot we mẽ hamaxpēr nyw xwỳnhjaja nē mẽ hamaxpēr tũm xwỳnhjaja amnhĩ to nē axpēn kôt hamaxpēr nē ri axpēn kôt pa? Nà koja mẽ ã amnhĩ nhĩpêx anhỹr kêt nē. Ahpỹnhã mẽ pajamaxpēr. Na

hte hirã htỳxja kamàt kô mẽ pihkàr kêt nẽ.

¹⁵ Xà na hte Kris mẽ Satanasti wa axpẽn kôt hamaxpěr? Nà wa kot axpẽn kôt hamaxpěr kêt. Ahpỳnhã wa hamaxpěr nẽ ahpỳnhã wa kot amnhĩ nhĩpêx. Nẽ ahpỳnhã hirã nẽ ahpỳnhã kamàt kô. Nẽ mẽ pahpê Kris kwỳjaja nẽ mẽ kêp hkwỳ hkêt xwỳnhjaja ahpỳnhã mẽ pajamaxpěr nẽ ahpỳnhã mẽ pahte amnhĩ nhĩpêx.

¹⁶ Na pu htem Tĩrtũm mã amnhĩ jarẽnh xà hã ixkre kamã sãnti xunhwỳr nẽ amnhĩ to hwỳr pẽ kãm mex o mex ã harẽnh kêt nẽ. Axtem na sãntija. Mẽ panhõ Tĩrtũmja sãnti rom htĩr tũm rãhã nẽ pa ho pa xwỳnh. Nẽ mẽ papajaja te mẽ pahpê Tĩrtũm nhõrkwỳ pyràk. Kapěr ã kagà htũm kot ja jarẽnh kot:

Ixkrajaja te kêp inhõrkwỳ nhũm ixpê õ dõn pyràk. Te ixpê inhõrkwỳ kamã ixpa xwỳnh pyràk jakamã kot paj ixkrajê kamã ri ixpa ho ixpa. Ixpê Mẽhpãm na pa. Anẽ.

¹⁷⁻¹⁸ ã Tĩrtũm xihtỳx xwỳnhja kot amnhĩ jarẽnh anhỳr jakamã na hte mẽ kot amnhĩ tomnuj xwỳnhjê nẽ mẽ pahkurẽ ho:

Kêr ka mẽ hkôt ri apa hkêt nẽ.

Kwarĩ ho kwarĩ.

Nẽ mẽ hkôt ri amnhĩ nhĩpêx o apa hkêt nẽ.

Kot kaj mẽ ixkapěr ma nẽ ixkôt amnhĩ nhĩpêx hã kot paj amnhĩ wỳr mẽ awỳ nẽ mẽ ato ixkra.

Nẽ pa kot paj ixpê Mẽapãm maati. Anẽ.

7

¹ Tã ã Tĩrtũm kot mẽ pahto hkra nẽ mẽ pahkôt pa ho pa hã amnhĩ jarẽnh kot anhỳr jakamã kwa ixkràmnhwỳjaja. Kêr pu mẽ kapěr ma nẽ tanhmã amnhĩ tomnuj to hkêt nẽ. Nẽ mẽmoj punuj kukamã pajamaxpěr kêt nẽ. Nẽ ãm kapěr kôt pix mã amnhĩ nhĩpêx mex rãhã nẽ.

Pawre kot Korĩt nhõ xwỳnhjê nhỹ hã hkĩnh ã harẽnh

² Nẽ kwa Kris kôt ixtõ nẽ ixtõxjaja. Kêr ka mẽ tee ri amnhĩ tã tanhmã inhmã ajamaxpěr to hkêt nẽ. Na pa pre tanhmã mẽ atõ hto hkêt nẽ. Rỳ tanhmã mẽ atõ hto ka mẽ ja hã ixpumu nẽ ixkôt tanhmã amnhĩ tomnuj to hkêt nẽ. Rỳ pa pre ixêx rom tanhmã mẽ anokupyr to ho ri ixpa hkêt nẽ. Kwa mẽ amã ixkĩnh nẽ tokyx ixkôt ajamaxpěr kêt wehe.

³ Mẽ ate inhmar nẽ amnhĩ tã apijaàm kaxyw na pa ã mẽ amã ixkapěr anhỳr kêt nẽ. Inhmã mẽ akĩnh kênã. Na pa pre inhmã mẽ akĩnh ã amnhĩ jarẽnh rax nẽ. Inhmã ri mẽ akôt ixpa rãhã ho ixpa hprãm. Rỳ ka mẽ nhỹrmã apiitã apikaprãr par japêr pa inhmã mẽ akôt ixtyk prãm nẽ.

⁴ Na pa hte ra mẽ amã ijamaxpěr pẽ ixkĩnh nẽ ixpa. Nà kot kaj mẽ ixkapěr ma nẽ Jẽjus kôt amnhĩ nhĩpêx mex nẽ. Tã kêr ka mẽ ã amnhĩ nhĩpêx anhỳr rãhã nẽ. Na pa hte jar

ra amnhĩ xà htỳx kamã ija-
mak o ri ixpa htã no ãm mẽ
amã ijamaxpěr nẽ ixkĩnh nẽ.

5 Nẽ na pa pre amnẽ
Masetõn wỳr kormã Xitre
japêr o mỗ. Hãmri nẽ
Masetõnja wỳr pỏj nẽ hapêr
pê mẽ kãm Jesus kapêr
jarênh o ri mẽ hkôt ixpa.
Hãmri nhũm mẽ kãm ixkurê
xwỳnhjaja Kris ã inhĩpêx
punuj nẽ hã inhmã àkjêr pix
o pa. Hãmri nẽ ma Masetõn
kamã krĩ piitã hkôt ri mẽ
kãm ixto kapêr punuj nẽ pa
amnhĩ tã mẽ mar o ri mẽ
hkôt ixpa. Nẽ mẽ kajaja mẽ
ate Kris kaga nẽ nhãm mẽ
hamaxpěr kôt amnhĩ nhĩpêx
pymaj na pa pre tee ri mẽ
akukamã ijamaxpěr o ri mẽ
hkôt ixkaprĩ nẽ ixpa.

6 Tã Tĩrtũm kêp mẽ hkaprĩ
xwỳnhjê pumunh nẽ akupỳm
mẽ ho mẽ hkĩnh xwỳnh
jakamã na pre ixkaprĩ hã
ixpumu nẽ ixwỳr Xitre mẽ.
Pa pre omu nẽ akupỳm ixkĩnh
nẽ tãm ijamaxpěr.

7 No ãm Xitre pumunh kôt
pix mã ixkĩnh kêt. Na pre
ixwỳr pỏj nẽ tanhmã inhmã
mẽ ajarênh to nẽ mẽ ate
tanhmã ho mex to hã mẽ
ajarê. Nẽ mẽ amã ixpumunh
prãm tỳx ã mẽ ajarê. Nẽ Kris
kôt mẽ atõta hpijaàm kêt o
pa nhũm ixte kagà kamã hã
mẽ amã ixàkjêr nhũm mẽ ate
ja hã omunh nẽ ra amnhĩ
kamã apijaàm o akaprĩ htỳx
ã mẽ ajarê. Nhũm Tĩrtũm
kot inhnê mẽ kãm ixkurê
xwỳnhjê pumunh mex kaxyw
mẽ ate ixto hwỳr ã mẽ ajarê.
Na pre ã inhmã mẽ ajarênh

anẽ pa kuma nẽ mẽ anhy hã
ixkĩnh tỳx kumrêx.

8-9 Nẽ wam ixte mẽ amã
kagàta nhĩpêx kêt ri na pa pre
tee ri mẽ ate amnhĩ nhĩpêx ã
mẽ ajarênh ma nẽ mẽ akaxyw
hipêx. Nẽ kamã mẽ ate hpi-
jaàm kêt xwỳnhnta kot tanhmã
amnhĩ nhĩpêx to hã omunh
nẽ ãm omunh o arĩ hkôt apa
hã kagàta kamã mẽ amã akir
hãmri nẽ Xitre mã kugõ nhũm
kupy nẽ ma mẽ awỳr o mỗ.
Tã ka xep prem kamã harê nẽ
ama nẽ amnhĩ kamã apijaàm
nẽ. Nẽ akaprĩ nẽ ajamaxpěr
o:

—Hêxta waa nẽ. ãm hãmri
na Pawre ã mẽ ijarênh anẽ.
Na pa mẽ ã amnhĩ nhĩpêx anẽ
nẽ amnhĩ tomnuj tỳx nẽ. Anẽ.

Tã nhũm Xitre akupỳn
ixwỳr pỏj nẽ inhmã mẽ ajarê.
Pa mẽ ajarênh ma nẽ tee ri
ijamaxpěr nẽ ijamaxpěr o:

—Hêxta waa nẽ. Mon pa
pre axtem nẽ ã ri mẽ kãm
ixàkjêr anẽ? Nà na xep prem
kagàta kamã harê nẽ kuma
nẽ hkaprĩ htỳx nẽ. Anẽ.

Tã ãm hãmri na pa pre ã
mẽ akaxyw hipêx nẽ mẽmojta
ã mẽ amã ixàkjêr anẽ. Na
ka xep prem kamã harê nẽ
ama nẽ tee ri ajamaxpěr o
ra akaprĩ nẽ. Nom Tĩrtũm
kãm hprãm xà hkôt na ka
prem ja hã amnhĩ pumu nẽ ã
akaprĩ anẽ. Tã xep ra akupỳm
tãm amnhĩ nhĩpêx nẽ akupỳm
Tĩrtũm kôt amnhĩ nhĩpêx mex
nẽ. Jao akupỳm akĩnh nẽ ri
apa. Jakamã ãm hãmri na
pa pre mẽ awỳr wam kagàta
mênh nẽ mẽmoj tã ã mẽ amã
ixàkjêr anẽ.

10 Koja Tĩrtũm krajê hõ tanhmã amnhĩ tomnuj to. Hãmri nê tee ri ja hã amnhĩ pumu nê amnhĩ kamã hpijaàm nê akupỹm Tĩrtũm kõt tãm amnhĩ nhĩpêx. Hãmri nê akupỹm mex nê tãm hamaxpêr pê hkĩnh nê ri pa. Nê axte tee ri amnhĩ kukamã hamaxpêr hkêt nê. Ja na Tĩrtũm kãm hprãm. Tã koja mẽ kêp hkra hkêt xwỹnhjê pyrà nê tanhmã amnhĩ tomnuj to nê ra hpijaàm japêr. Nom hkwyjaja kot ja hã omunh pix mýrapê hpijaàm nê arĩ Tĩrtũm kõt amnhĩ nhĩpêx kêt japêr. Hã koja nhỹrmã ty nê Tĩrtũm kra kot akupỹm hkõt tãm amnhĩ nhĩpêx xwỹnhjê kĩnhã Tĩrtũm pê awry rax kumrêx nê ri pa.

11 Mẽ pahte Tĩrtũm kapêr kwỹm ri tanhmã amnhĩ nhĩpêx to hã tee ri amnhĩ pumunh nê amnhĩ kamã hpijaàm nê akupỹm tãm amnhĩ nhĩpêxja na Tĩrtũm kãm hprãm. Tã na ka xep ã amnhĩ nhĩpêx anê. Wam ixte mẽ awýr kagà mênhta na ka xep prem kamã tanhmã ixte nã puro kamã hpijaàm kêt xwỹnhhta ã mẽ amã ixàkjêr tota kamã akapêr nê ama. Hãmri nê tee ri mẽ ate kormã kot amnhĩ tomnuj ã kãm axàkjêr kêt ã amnhĩ kukamã ajamxpêr nê amnhĩ kamã apijaàm nê. Nom Tĩrtũm kãm hprãm xà hkõt. Mẽ ate jam ajamxpêr pê amnhĩ kamã apijaàmja na kãm hprãm. Tã ka mẽ hpijaàm xwỹnhhta kamã agryk nê kãm akapêr o:

—Kwa mẽ pahpê Jejus

kwýjaja mẽ pahte ã amnhĩ nhĩpêx anhýr kêt tã ka ã amnhĩ nhĩpêx anê. Nà na ka amnhĩ tomnuj tỳx kumrêx. Kot kaj ã amnhĩ nhĩpêx anê pa mẽ hã apumu nê gaa nê apyrà nê ã amnhĩ tomnuj anê. Kwa ja kaga nê axte ã amnhĩ nhĩpêx anhýr kêt nê. Nê akupỹm Tĩrtũm kõt amnhĩ xãm tỳx nê hkõt amnhĩ nhĩpêx rãhã ho ri apa. Anê.

Hãmri nhũm krĩ nhõ xwỹnhjaja ja hã mẽ ajarênh ma nê mẽ apê jamnuj ã mẽ apumunh kurê kumrêx. ãm hãmri na ka prem ã kãm akapêr anê.

12 Nê ixte mẽ awýr kagà nê mênhta kamã na pa pre nã puro kamã hpijaàm kêt xwỹnhhta mã tanhmã ixàkjêr to hkêt nê. Rý nã purota mã tanhmã ixàkjêr to hkêt nê. Na pa pre mẽ apê Kris kwýjê hwýr kagà nhĩpêx nê kamã tanhmã mẽ amã hpijaàm xwỹnhhta ã karõ hto. Mẽ ate kamã harênh hãmri nê inhỹ hã amnhĩ nê hanor nhũm Korĩt nhõ xwỹnh piitã kot ã mẽ ate amnhĩ nhĩpêx anhýr ã mẽ apumunh kaxyw. Nê mẽ ate Tĩrtũm nom ã hipêx anhýr jao mẽ amã ixkĩnh pê ixkapêr kõt ã hipêx anhýr ã amnhĩ pumunh kaxyw.

13 Tã nhũm Xitre ixwýr pôj nê tanhmã inhmã mẽ ajarênh to. Na xep pre mẽ awýr nojarêr nê tee ri amnhĩ kukamã hamaxpêr. Mẽ ate kagàta kamã harênh nê ijarênh mar nê kamã agryk pymaj tee ri amnhĩ kukamã hamaxpêr. Tã ma mẽ awýr

mõn pøj nē mã amã kugõ. Ka xep prem kamã harē nē ama nē hkõt amnhĩ nhĩpêx kurê kumrêx nhũm mẽ ate amnhĩ nhĩpêx ã mẽ apumu nē hkĩnh nē. Hãmri nē tãm hamaxpêr. Tã ra akupÿn ixwÿr mõ nē inhmã mẽ ajarē pa mẽ ajarēnh ma nē ijaxwÿja ixkĩnh nē.

¹⁴ Na pre kormã mẽ awÿr nojarêť pa kãm tanhmã mẽ amex ã mẽ ajarēnh to. Tã nhũm xep ma mẽ awÿr mõn pøj nē mẽ apumu nē hamaxpêr o:

—Na pêr ãm hãmri na pre Pawre inhmã mẽ mex ã harē. Mẽ mex kênã. Anē.

¹⁵ Tã nhũm pre mẽ arũm kato nē ra man akupÿn ixwÿr mõn pøj nē inhmã mẽ ajarēnh o:

—Na pa pre ma mẽ hwÿr mõ nē mẽ kãm ixkapêr o ri mẽ hkõt ixpa nhũm mẽ ixkapêr ma nē ixkõt amnhĩ nhĩpêx kurê kumrêx nē ixto mex nē. Kormã ixte mẽ hwÿr inhmõr kêt tã mẽ harēnh ma nē inhmã mẽ hkĩnh nē. Tã pa ma mẽ hwÿr mõ nhũm mẽ ixto mex rax nē pa ra inhmã mẽ hkĩnh tÿx kumrêx. Anē.

¹⁶ ã inhmã mẽ ajarēnh anē pa mẽ ajarēnh ma nē ixkĩnh tÿx nē. ãm hãmri na ka htem mẽmoj tã amnhĩ jarēnh xà hkõt tanhmã amnhĩ nhĩpêx to ho apa.

8

*Mẽ kot Kris kõt mẽ hkwÿjê pê õxÿ hkêt ã mẽ kãm karõ
Atre 11.27-30; Rõmãn
15.25-27; Wam Korîť 16.1-4*

¹ E Kris kõt ixkwÿjaja. Kot paj hpãnhã mẽ amã jar Masetõn kamã tanhmã Jejus kwÿjaja kot amnhĩ nhĩpêx to hã mẽ harē ka mẽ harēnh ma. Na hte Tĩrtũm mẽ kutã nojarêť nhũm mẽ mex nē pa.

² Mẽ hkwÿjaja kot Kris ã mẽ hipêx kati nhũm mẽ kot amnhĩ xà htÿx kãm hamak o pa htã hkĩnh nē hamakêtkati nē ri pa. Nē mẽ hkàxpore hkryre htã ho õxÿ hkêt nē pa. Na htem àmnhĩx ri mẽ kêp amrakati xwÿnhjê mã hkwÿ nhõr o pa.

³⁻⁴ Tã na prem Jerujarē kamã Kris kõt mẽ pahkwÿjê jarēnh ma. Mẽ kêp amrakati hã mẽ harēnh ma nē kãm mẽ hkaprĩ nē. Nē mẽ kãm mẽ hwÿr mẽmoj rēnh nē mẽ ho ajuta hprãm nē. No ãm pa ixte mẽ kãm hã karõ xà hkõt kêt. Mẽ tãmjaja mẽ hamaxpêr xà hkõt na prem ã hamaxpêr anē nē mẽ kaxyw kàxpore ho pikuprõnh rax nē. Hãmri nē inhmã kugõ nē inhmã:

—Kwa na pa prem Jerujarē kamã Kris kõt mẽ pahkwÿjê jarēnh ma nē mẽ inhmã mẽ hkaprĩ nē mẽ kãm mẽ ixkàxpore hkwÿ ho akuprõ. Jakamã e amÿ nē ma mẽ hwÿr o mõ nē mẽ kãm agõ kē mẽ tokyx ho amnhĩm awjaprõ nē kuku. Anē.

⁵ Pa mẽ kuma nē ixtÿx ho ãm kàxpore grire hã hkamnhĩx nē ijamaxpêr o:

—Kwa mo mẽ hikàxpore rax koja mẽ ri ho akuprõ nē mẽ kãm kugõ? ãm mẽ hikàxpore hkryre kênã.

Anhÿr o ijamaxpēr tā no nhūm mē kaxyw ho rax nē ho akuprō. Mē hikàxpore hkryre htā mē kām ōr rax nē. Hāmri nē inhmā amnhī jarēnh o:

—Na pa mē ra Pahihti Jejus Kris mā amnhī gō. Mē ixte tanhmā kām amnhī nhīpēx to ho ri ixpa kaxyw. Jakamā e tanhmā mē inhmā mēmoj tā karō hto. Kot pa mē ama nē akapēr kōt amnhī nhīpēx. Ja na pa mē inhmā hprām nhūm Tirtūm haxwÿja kām ja prām. Anē.

⁶ Na pa pre ā mē kot amnhī nhīpēx anhÿr ā mē omu nē mē apē Korīt nhō xwÿnhjē mā ijamaxpēr kurē kumrēx. Hāmri nē Xitre mā mē ajarē. Na pre mē awÿr mō nē mē amā Jerujarē nhō xwÿnhjē jarē. Mē ate mē kām kàxpore hkwÿ ho apikuprōnh kaxyw. Tā pa pre jam ijamaxpēr nē ra akupÿm mē awÿr mēnh mā nē kām:

—Kwa ma akupÿm Korīt wÿr mō nē mē kām anē kē mē ra kot amnhī jarēnh xà hkōt Jerujarē nhō xwÿnhjē kaxyw kàxpore hkwÿ ho akuprō nē tokyx mē hwÿr kumē. Ra mē kām Kris kōt mē hkwÿjē hkīnh ā amnhī jarēnh kēnā. E kwa tokyj. Anē.

⁷ Na ka htem amnhī to mex o ri apa. Nē amnhī kaxyw Kris hkōt ajamaxpēr tÿx nē. Nē ma mē kām Tirtūm kapēr jarēnh mex o ri mē hkōt apa. Nē mē ajamaxpēr mex nē. Nē mē piitā mē ho mex o ri apa. Nē mē amā ixkīnh o ri apa. Jakamā kwa kēr ka mē axàmnhīx mē

kēp amrakati xwÿnhjē mā mē akàxpore hkwÿ nhōr o apa. Jao mē amā Tirtūm kīnh tÿx ā amnhī to amnhīrit.

⁸ Ixte ā mē amā ja hā karō anhÿr tā hā mē atā ixihitÿx kēt nē. Ām mē kamā axukapri hkōt mē ate mē kām axàmnhōr o apa kaxyw na pa ā mē amā ixkapēr anē. Masetōn kamā mē pahkwÿjaja kot amnhī nhīpēxta pyrā nē.

⁹ Ra mē ate Jejus Kris kām mē pajapē hā kot tanhmā amnhī nhīpēx to hā mar mex. Annepēm na pre kaxkwa kamā mex kumrēx nē ri pa ho pa nhūm mēmoj piitā kēp ō htā nhūm rer pa nē mē pahwÿr wrÿ nē mē pakamā kēp amrakati nē ri pa. Hikàxpore hkēt nē ri pa. Tā mēmo kaxyw na pre ā mēmoj mex piitā rer par nē mē pahwÿr wrÿk anē? ām kot mē pahto mex pix kaxyw. Kot mē pahto mex nhūm mē pahte kukwak ri mē paxàmnhīx ri mē pajamakētkati nē mē papa kaxyw na pre ā amnhī nhīpēx anē. Mē pahte nhÿrmā urāk nē kaxkwa kamā pamex kumrēx nē ri papa ho papa kaxyw.

¹⁰ E kwa kēr ka mē tokyx kàxpore hkwÿ ho apikuprōnh pa nē Jerujarē nhō xwÿnhjē hwÿr amē. Mē akumrēxjaja na ka prem ham amgrā hapēxta kamā ra mē kaxyw ho apikuprōnhja krax. Mē amā mē ho mex prām xāj ham ho hkrax tā no ām kormā hatur xām mēnh nē mē hwÿr

mênh kêt nê.

¹¹ Kwa mê tokyx ja ho ajapêx nà. Na ka prem ate ho anhÿr krax ã akînh pê kàxpore hkwy ho apikuprôn h o apa. Tã kêr ka mê arî akînh rãhã ho apikuprôn h par jatur xãm amê. No mê ri atÿx tanhmã ajamxpêr to hkêt nê. Rÿ mê ajamxpêr o:

—Nà kormã. Kot paj nhÿrmã ixkàxpore rax nê rî kormã mê hwÿr hkwy mê.

Anhÿr o mê ri ajamxpêr hkêt nê. Mê ate tanhmã akàxpore hkre kamã kute hã omunh xà hkôt mê kãm hkwy pix gô.

¹² Kêr ka mê axàmnhÿx akînh kãm mê kãm ho akuprô. Ate amnhî kàxpore pumunh xà hkôt. Ka mê akàxpore rax nê mê kãm ho rax nê agô. Rÿ mê akàxpore grire nê mê kãm ho grire nê agô. Ja na kêt mex.

¹³ No mê ate mê kãm ôr par nhÿm mê arom mê hikàxpore rax nê ri paja mex kêt.

¹⁴ Nom ra mê akàxpore rÿnh jakamã kwa mê amnhî kutã mê kãm hkwy ho hkryre nê ho akuprô kê mê apyrã nê hikàxpore nê ri pa. Kêr ka mê nhÿrmã tanhmã amnhî to nê axà nê nhÿm akàxpore apê hapêx nhÿm mê ajarênh ma nê amnhî kuxwar mê ato ajuta nê mê amã hkwy ho akuprô nê mê awÿr kumê. Ka mê akàxpore ho axpên pyrã nê ri apa.

¹⁵ Amnepê m Tîrtûm kot kaxkwa rÿm Ijaewjê hwÿr mêõ rênh nhÿm mê kot apkati mê amnhîm hkawrà nê ho apkur o pata ã na pre Tîrtûm

kapêr ã kagà htûmja ã mê harênh anê nê mê harênh kot: Na pre mê hkra xohtô xwÿnhjaja mê apkur xà hkawrà rÿnh nê. Nê gôj kãm unhwÿ nê kuku nê piitã ho ôhy htu. Nhÿm mê hkra grêre xwÿnhjaja haxwÿja hkwy kawrà no ãm ho hkryre nê hkawrà. Nê gôj kãm unhwÿ nê kuku nê haxwÿja ho ôhy htu hpa. Na pre htem apkati mê ã amnhî nhÿpêx anhÿr o pa. Anê.

Ja pyrã nê kêr ka mê akàxpore ho axpên pyrãk o ri ho apa.

Xitre mê hkràmnhwÿjê jarênh

¹⁶ Nê Xitre na pre ixpyrà nê kãm mê ato ajuta hprãm nê. Na pre inhmã mê atã amnhî jarê pa pre kuma nhÿm ja inhmã mex nê pa ixkînh nê. Nê ijamxpêr o:

—Nà ãm hãmri na Tîrtûm tanhmã Xitre hkrã hto nhÿm ã hamxpêr mex anê. Anê.

¹⁷ Tã pa ma akupÿm mê awÿr môr ã hkukja nhÿm inhma nê hkînh nê mê awÿr nojarêt kurê kumrêx. Nom kormã ixte kãm mê ajarênh kêt ri nhÿm tãm amnhî kukamã hamxpêr nê mê awÿr hkrã.

¹⁸ Tã na ra nojarêt kaxyw. Kot paj ma hkôt Kris kôt mê pahtôjê hõ mê kê ma hkôt mō. Kôt ixte mênh xwÿnhhta na hte mê kãm Tîrtûm kapêr jarênh mex nê nhÿm htem amnhîm mex ã harê.

19 Na pre jar Jejus kwỳjaja kot ma ixkôt Jerujarē hwỳr kàxpore hkwỳ ho mōr kaxyw nhūm prem amnhīm mẽ kurê. Tã koja Xitre mẽ wa mẽ awỳr mōn pōj ka mẽ kãm kàxporeta gō nhūm man akupỳn o mō pa wa rĩ kormã ma Jerujarē hwỳr mẽ kãm o mō. Mẽ kot hamỳnh nẽ mẽ pamã mẽ hkĩnh ã kot amnhĩ tã mẽ pahpumunh kaxyw. Nẽ Tĩrtũm mã mex o mex ã harēnh kaxyw.

20-21 Nom kàxpore rax nhūm ixte mẽ hwỳr o inhmōr nhūm mẽ kot hã ixkamnhĩx pymaj kot paj ma amnhĩ kôt Kris kôt mẽ pahtōta o mō. Ixte Xitre hkôt mẽ awỳr mēnh xwỳnhhta pa ma amnhĩ kôt o mō. Nom ixàhkĩnh o ixpare hã. Tĩrtũm kot ja kôt ixpumunh mex tã kot paj ma amnhĩ kôt o mō.

22 Nẽ ot pa ma Xitreta wa hkôt axte mẽ awỳr ja mẽ. Kêr kê mẽ axkrunēpxi nẽ ma ixkukamã mẽ awỳr mō. Ixte wa hkôt mēnh xwỳnhhta ixte kot amnhĩ nhĩpêx ã omunh mex. Na hte kãm mẽ piitã mẽ ho ajuta ho pa hprãm nẽ. Tã mẽ ajarēnh ma nẽ inhmã mẽ ajarēnh o:

–Nà koja mẽ Jerujarē nhō xwỳnhjê mã kàxpore nhōr rax nẽ kãm ga. Mẽ kot amnhĩ to mex kēnã. Anẽ.

Jakamã ra mẽ awỳr hkrà. Tã koja ma Xitre wa hkôt mō nẽ mẽ ato ajuta ka mẽ tokyx kàxpore ho apikuprōnh pa.

23 Nẽ koja mēhō tanhmã Xitre hã mẽ akukjêr to ka mẽ kêp ixkràmnhwỳ mex ã harê. Nẽ kot inhĩhkô hã mẽ ho ajuta

mex o pa hã harê. Na pre ra jar Kris kwỳjaja mẽ akaxyw kuta nẽ ma mẽ awỳr kumê. Jakamã koja ma mẽ awỳr mō nhūm Kris kôt mẽ pahtōjê hō wa pijakrutja wa ma hkôt mō. Na hte wa haxwỳja Kris kôt amnhĩ nhĩpêx mex o pa.

24 Koja mẽ awỳr pōj ka mẽ omu nẽ mẽ ho mex nẽ. Nẽ mẽ amã mẽ hkĩnh nẽ. Kê krĩ piitã hkôt Kris kôt mẽ pahkwỳjê piitã mẽ hã mẽ ajarēnh ma nẽ axpēn mã mẽ amex ã mẽ ajarê. Nẽ mẽ ajarēnh o:

–Pēr ãm hãmri na pre Pawreja mẽ pamã Korīt kãm mẽ pahkwỳjê jarê. Na xep pre Xitre mẽ hkwỳta ma mẽ hwỳr mō nhūm mẽ ho mex rax nẽ. Ra Pawre kot mẽ pamã mẽ harēnh xà hkôt. Anẽ.

9

Mẽ kot kàxpore ho pikuprōnh ã mẽ harēnh

1-2 Kwa ixkràmnhwỳjaja. Kot paj Jerujarē nhō xwỳnhjê kaxyw mẽ atã ixihtỳx kêt nẽ. Ra mẽ amã mẽ ho ajuta hprãm jakamã na pa pre Masetōn kamã Kris kôt mẽ pahkwỳjê mã mẽ ajarēnh o:

–Pika pê Gres kamã Kris kôt mẽ pahkwỳjaja na prem ham amgrà hapêxta kamã Jerujarê kamã mẽ pahkwỳjê jarēnh ma nẽ kãm mẽ ho ajuta hprãm. Anẽ.

Hãmri nhūm mẽ ajarēnh ma nẽ mẽ apyrà nẽ kãm tanhmã mẽ ho ajuta hto hprãm.

3-4 Tã ot pa mẽ awỳr Xitre mẽ hōta wa mẽ ho ixpimràatã wa mẽ kumê. Mẽ kot kàxpore

hã mē akukjêr kaxyw. Kêr pa mytwrÿ hõ hã ma Masetõn nhõ xwÿnh kwÿjê mē mē awÿr mõ nē ra ixte mē kãm kàxpore hkwy ho mē apikuprõnh ã mē ajarēnh kôt mē ate ho apikuprõnh rax ã mē apumu nē ixkĩnh nē. Nom kot pa mõ nē tee ri hapêr nē te ixte Masetõn nhõ xwÿnhjê mã mē ato ixêx pyrã nē ixpijaàm nē. Ka mē ajaxwÿja amnhĩ kamã apijaàm nē.

⁵ ã mē pahte amnhĩ nhĩpêx anhÿr pymaj na pa ã mē amã kagãja nhĩpêx nē Xitre mã õr nē ma amnhĩ kukamã mē awÿr mēnh anē. Nē hkôt wa mõr mã xwÿnhhta mē ho ixpimrààtàã amnhĩ kukamã wa mē kumē. Tã kê mē awÿr pøj nē mē amã kagãja gõ ka mē kamã harē nē ama nē tokyx kàxpore ho apikuprõnh jatur xàm amē. Kêr pa mē hapu hã mē awÿr mõ ka mē ra mē ixkutêp ho apikuprõnh pa nē mē kãm agõ nē ajamakêtkati nē apa. No pa ixte mē amã mē ate ho apikuprõnh kaxyw mē atã ixihÿx kêt.

⁶ Na htem piitã ã hamaxpêr anhÿr o pa nē hamaxpêr o:

—Kot ka apur rax nē kamã anhõ rax nē. Nom kot ka apur grire nē kamã anhõ grire.

Anhÿr o hamaxpêr jakamã kêr ka mē apiitã ajamakêtkati nē Jerujarē nhõ xwÿnhjê mã kàxpore nhõr mex nē. Kêr ka mē ho apikuprõnh pa nhũm rax nē. Te mēhõ ihpur rax nē kamã õ raxta pyrãk. Kê Tĩrtũm ã mē ate amnhĩ

nhĩpêx anhÿr ã mē apumu nē nhÿrmã mē ato mex nē.

⁷ Nom kêr ka mē anhõxÿ kamã mē kãm õr kêt nē. Mē pahte pahkĩnh kãm panhõxÿ hkêt kãm mē kêp amrakati xwÿnhjê mã mēmoj nhõr o pa-paja na Tĩrtũm kãm hprãm.

⁸⁻⁹ Koja mē hã mē apumu hãmri nē amnhĩm mē amex ã mē ajarēnh rãhã ho pa. Mē kãm Tĩrtũm kĩnh xwÿnhjaja na htem àmnhĩx ri mē kêp amrakati xwÿnhjê mã mēmoj nhõr o pa. Te Tĩrtũm kot amnhĩ nhĩpêx pyrãk. Na hte àmnhĩx ri mē pamã mēmoj nhõr o pa. Mē pahwÿr na rē nhũm wrÿ. Nhũm mē pamã mē paxàpkur xà nhõr o pa. Nē tanhmã mē pahto pu mē paxà hkêt nē pajamakêtkati nē paxàpênh o papa. Nē pamex nē ri papa. Panhõ rũnh nē ri papa. Jakamã kwa pu mē urãk nē paxàmnhĩx ri mē kêp amrakati xwÿnhjê mã mēmoj nhõr o papa.

¹⁰ E pa ixprĩ hã mē amã ja jarē ka mē inhma. Nà na hte ã Tĩrtũm mē pamã mē paxàpkur xà nhõr o pa anē. Kot kaj apur kãm ahkre nhũm tanhmã amã mēmo hyta nhĩpêx to nhũm amã hapôx mex nē amã ô rũnh nē ka anhõ rax nē. Nē hkwy ho axàpkur o apa nē axte hkwy hkre. Tã kêr ka mē ã Tĩrtũm kot mē ato mex anhÿr ã amnhĩ pumu hãmri nē urãk nē axàmnhĩx ri mē kêp amrakati xwÿnhjê mã axàmnhõr pē mē ho mex o ri apa. Nhũm Tĩrtũm mē hã mē apumu nē mē amã mēmoj nhõr rãhã nē. Ka mē amnhĩ pyrã nē mē kêp amrakati

xwỳnhjê mã hkwy nhõr o apa.

¹¹ Koja Tĩrtũm mẽ ato mex rax nẽ ka mẽ anhõ mẽmoj rax nẽ. Ja o amnhĩ xwar mẽ kęp amrakati xwỳnhjê kaxyw kàxpore hkwy jaxwỳ. Kêr pa mẽ amã hkwy jamỳ nẽ ma Tĩrtũm kõt mẽ pahkwỳjê mã o mõi nẽ mẽ kãm kugõ kê mẽ omu nẽ hkĩnh nẽ. Nẽ mẽ atã Tĩrtũm mã mex o mex ã harẽ.

¹² Hãmri nẽ mẽ akukwak ri mex nẽ ri pa. Nẽ axpẽn mã Tĩrtũm mex o mex ã harẽnh o ri pa.

¹³ Koja mẽ amnhĩ tã mẽ apumu nẽ hkĩnh nẽ. Hãmri nẽ Tĩrtũm mã amnhĩ tã tanhmã mẽ ajarẽnh to nẽ kãm:

—Pa Tĩrtũm. Nà ãm hãmri na pre Korĩt kãm akõt mẽ ixkwỳjaja amnhĩ jarẽ. Na htem akõt pix mã amnhĩ nhĩpêx mex o ri pa. Jao mẽ ixpê õxy hkêt nẽ mẽ inhmã kàxpore hkwy nhõr rax nẽ. àmnhĩx ri hamakêtkati nẽ mẽ inhmã hkwy nhõr rax nẽ. No ãm mẽ papxipix na htem ã mẽ inhĩpêx anhỹr kêt nẽ. Na htem mẽ kęp amrakati xwỳnh piitã ã mẽ hipêx anhỹr o pa. ãm hãmri na ka pre tanhmã mẽ hkrã hto nhũm mẽ anhỹ hã ã amnhĩ nhĩpêx anhỹr o pa. Amex o amex Tĩrtũm. Anẽ.

¹⁴ Hãmri nẽ mẽ ato hwỳr o:

—Pa Tĩrtũm. ãm hãmri na hte Korĩt nhõ xwỳnhjaja amnhĩ pyrã nẽ mẽmoj to mẽ ixkutã nojarêt o pa. Jakamã aa mẽ ixte amnhĩ tã mẽ inhno ho mẽ omunh kêt tã mẽ inhmã mẽ hkĩnh nẽ. Kwa kêr ka mẽ ixtã mẽmoj to mẽ kutã anojarêt rãhã ho apa Tĩrtũm.

Anhỹr o mẽ ato kuwỳ.

¹⁵ Tĩrtũmja mex o mex. Nom na hte mẽ pahto mex pẽ mẽ pamã kàxpore nhõr kêt nẽ. Kra Jejusja na pre mẽ pamã kugõ. Kãm mẽ pajapê ho mẽ pahwỳr kumẽ nhũm mẽ pahwỳr wrỳ nẽ mẽ pahpiitã mẽ pahte amnhĩ tomnuj pãnhã amnhĩrer kaxyw mẽ panê ty. Ja na mex o kot mẽ pamã kàxpore nhõr jakrenh. Mẽhõ koja urak nẽ ã mẽ panê htyk anẽ? Nà amrakati ho amrakati. ãm Jejus pix na pre ã amnhĩ nhĩpêx anẽ.

10

Pawre kęp Tĩrtũm Karõ nhỹ hã kapêr xwỳnh ã harẽnh

Epes 6.10-20; Wam Tesarõn 5.8

¹ E Kris kõt ixkwỳjaja. Nà ixpê Pawre kot paj mẽ akwỳ kot tanhmã ixto kapêr to xwỳnhjê mã amnhĩ jarẽ ka mẽ apiitã inhma. Nà na hte Kris mẽ pakamã gryk tokyx anhỹr kêt nẽ. Na hte mẽ pahto mex japjê nẽ. Tã inhmã urak nẽ ã mẽ anhĩpêx anhỹr prãm nẽ. No na hte mẽ akwỳjaja axpẽn mã tanhmã ixto kapêr punuj to nẽ ri axpẽn mã:

—Pawre na hte nhỹri krĩ kamã pa nẽ mẽ pamã kagã nhĩpêx nẽ mẽ pahwỳr kurẽ nẽ kamã mẽmoj tã mẽ pamã kapêr kãm hihtỳx nẽ hã mẽ pamã akir. Tã amnẽ mẽ pahwỳr mõi hãmri nẽ te kãm mẽ pahpyma pyrak o mẽ pamã kapêr o pa.

Anhỹr o ijarẽ.

2 Nom inhmā mẽ awỳr inhmōr nē mẽmoj tã mẽ amã ixàkjēr prãm kêt tã kot paj nhỹrmã mẽ awỳr mō ka mẽ tanhmã amnhĩ tomnuj to ho apa japêr. Pa ja hã mẽ apumu nē hã mẽ amã akir kãm ga.

3 Na pa htem jar pika ja kamã Tĩrtũm kwỳ hkêt xwỳnhjê kaêx ã ri ixpa nom mẽ uràk nē amnhĩ krã hkôt tanhmã amnhĩ nhĩpêx to ho ixpa hkêt nē. Nē mẽ uràk nē amnhĩ krã hkôt tanhmã ijamaxpêr to ho ixpa hkêt nē. Na pa htem Tĩrtũm Karō nhỹ hã àhpumunh xà ho amnhĩ nhĩpêx o ri ixpa.

4 Nē Tĩrtũm xàhpumunh tỳx xà ho mẽ kãm kapêr jarênh o ri ixpa. Mẽ kot mar nē hkôt amnhĩ nhĩpêx kaxyw. Nē àhpumunh tỳx o na pa htem mẽ kot Tĩrtũm kôt amnhĩ xunhwỳr pymaj mẽ kêp àmnàr xwỳnhjaja tanhmã mẽ nê mẽ ho.

5 Na htem htỳx ri tanhmã Tĩrtũm nê hkwỳjê mã kapêr to ho pa. Amnhĩ kaxyw hkôt mẽ hamaxpêr kêt kaxyw tanhmã nê mẽ kãm kapêr to. Na pa htem ja hã mẽ omu nē Tĩrtũm xàhpumunh tỳx xà ho tanhmã mẽ kãm ixkapêr to nhũm mẽ tee ri inhma nē axte mẽ kêp àmnàr kêt nē. Pa mẽ kãm Tĩrtũm kapêr jarê nhũm mẽ ohtô nē kuma nē Kris kôt amnhĩ xunhwỳ nē hkôt amnhĩ nhĩpêx o pa.

6 Tã mẽ kajaja kot kaj mẽ Tĩrtũm kôt amnhĩ nhĩpêx mex tã mẽ atō ra kapêr nhĩrōp xa nē tanhmã amnhĩ tomnuj to. Pa ja hã apumu rỳ hã ajarênh

ma nē hã amã akir.

7 Mẽ ate Tĩrtũm kot mẽ awỳr inhmênh kêt ã axpên mã ijarênh tã kot kaj mẽ atō ãm hãmri apê Kris kwỳ hã amnhĩ pumu nē ra mãânên pa ixpê hkwy hã ixpumunh kurê kumrêx. Mẽ apyrà nē ixpê hkwy kênã.

8 Na pa pre ma mẽ awỳr mō nē tanhmã mẽ amã amnhĩ jarênh to nē mẽ amã:

—Tĩrtũm na pre mẽ awỳr inhmê pa mō. Ixte y hã mẽ amã kapêr jarênh o ri mẽ akôt ixpa kaxyw. Anê.

Tã pa hte arĩ ã amnhĩ jarênh anhỹr o ri ixpa. ãm hãmri na pre Tĩrtũm mẽ awỳr inhmê pa hte ãm hãmri mẽ amã kapêr jarênh o ri mẽ akôt ixpa. Na pa hte Tĩrtũm nhỹ hã mẽ amã ixkapêr nē kapêr o ixêx o amnhĩ to jarkrar kêt nē. Ixte tanhmã mẽ atomnuj to ho ri ixpa kaxyw na pre Tĩrtũm mẽ awỳr inhmênh kêt. Mẽ amã ixkapêr mex nhũm mẽ ate inhmar nē Kris kapêr kôt amnhĩ nhĩpêx mex o apa kaxyw na pre mẽ awỳr inhmê.

9 E kwa Kris kôt ixkwỳjaja. Na pa hte mẽ amã ixpuma kaxyw mẽ awỳr kagà rênh kêt nē. Mẽ ate kamã harênh nē tee ri amnhĩ kukamã ajamaxpêr o amnhĩ kamã amã ma kaxyw kêt.

10 Mẽ akamã mẽ kãm ixkĩnh kêt xwỳnhjaja na htem ijarênh o:

—Pawre na hte awry hã pa nē mẽ pahwỳr kagà rênh nē kamã te kêp pahi ho amnhĩ nhĩpêx pyrà nē mẽmoj tã mẽ pamã kapêr kãm hihtỳx nē.

Tā mẽ pahwỳr pōj hāmri nẽ kapēr kaxyw nom kapēr kām hihtỳx o kapēr kêt nẽ. Jakamã mo kaxyw kot puj mẽ hwỳr mra nẽ kapēr ma?

Anhỳr o ijarẽ.

¹¹ Nom ã ixte anhỳr kêt. Kwa mẽ inhma. Kot paj nhỹrmã ma mẽ awỳr mō hāmri nẽ te kagà ja kamã mẽ amã ixkapēr pyrāk o mẽ amã ixkapēr nẽ ixkapēr xihtỳx o mẽ amã ixkapēr kām ga.

¹² Na hte mẽ akwỳjaja kot amnhĩ to mex o mẽ ajakrenh ã amnhĩ to jarkrar o ri pa. No ãm amnhĩ krã hkôt pix mã na htem ã ri amnhĩ jarẽnh anẽ. Na hte Tĩrtũm ã mẽ harẽnh anhỳr kêt nẽ.

¹³ Tã inhmã mẽ urāk nẽ ã amnhĩ jarẽnh anhỳr prãm kêt. Æm ixte Tĩrtũm kot tanhmã inhmã karō hto xà hkôt amnhĩ nhĩpêx o ixpaja na inhmã hprãm. Tã mẽ kajaja mẽ awỳr na pre inhmẽ.

¹⁴ Ra kot mẽ awỳr inhmẽnh jakamã ixkumrêx na pa pre mẽ awỳr mō nẽ mẽ akôt ri mẽ amã tanhmã Kris jarẽnh to ho ri ixpa. Tĩrtũm kãm nhỹhỹm ixpa hprãm xà pix wỳr na inhmã ixpa hprãm.

¹⁵ No kêt mẽ kot amnhĩ krã hkôt htỳx ri Tĩrtũm kapēr jahkre o mẽ pa xwỳnhjaja na htem nhỹri krĩ kamã mẽ kot Kris kôt amnhĩ xunhwỳr ã mẽ harẽnh ma nẽ mẽ hã amnhĩ to jarkrar o ri pa. Te tãm kot mẽ hwỳr mōr nẽ mẽ kãm ujarẽnh nhũm mẽ kot mẽ mar xà hkôt Kris kôt amnhĩ xunhwỳr pyrāk. Nẽ mẽ hã amnhĩ to jarkrar o:

—E na pa pre ma mẽ hwỳr mō nẽ mẽ kãm Tĩrtũm kapēr jarẽ nhũm mẽ inhma nẽ hkôt amnhĩ xunhwỳr kurẽ kumrêx. Ixkukwak ri na prem ã amnhĩ nhĩpêx anẽ. Anẽ.

Nom ã amnhĩ nhĩpêx anhỳrja ã amnhĩ to hêx. No pa na pa hte ho mẽ urāk kêt nẽ. Koja Tĩrtũm ma nhỹri krĩ hwỳr ixkwỳjê hō mẽ nhũm ma hwỳr mō nẽ mẽ kãm Kris kapēr jarẽ. Hāmri nhũm mẽ kũa nẽ Kris kôt amnhĩ xunhwỳ. Pa mẽ harẽnh ma nẽ mẽ y hã ixkĩnh nẽ nom pa ixkukwak ri mẽ kot hkôt amnhĩ xunhwỳr ã amnhĩ to jarkrar kêt nẽ. Ixte mẽ hwỳr ixpa nẽ mẽ kãm ixujarẽnhre hã kot pa hkêt mẽ hã amnhĩ to jarkrar. Æm Tĩrtũm kãm nhỹhỹm ixpa hprãm xà pix wỳr na pa hte ixpa nẽ mẽ kãm kapēr jarẽ. Jakamã kot kaj mẽ nhỹrmã Kris kôt amnhĩ nhĩpêx mex o ri apa pa ja hã mẽ apumu nẽ mẽ are nẽ hpãnhã ma krĩ hō hwỳr Kris kot mẽ hwỳr inhmẽnh xà hō hwỳr mō. Ka mẽ ja hã ixto Tĩrtũm wỳr o apa.

¹⁶ Kot paj mẽ anhō krĩ kamã mẽ piitã mẽ kãm Jejus kapēr jarẽnh pa hāmri nẽ hpãnhã ma krĩ hkwy hkôt ijapôx o ri ixpa nẽ kamã mẽ kãm harẽnh o ri mẽ hkôt ixpa. Kormã aa mẽ kot mar kêt kumrêx xwỳnhjê mã harẽnh o ri mẽ hkôt ixpa. Na pa hte ã mẽ hwỳr ixpa nẽ mẽ kãm ixujarẽnh anẽ. Jakamã nhũm mẽ ja hã ixpumu nẽ mẽ kot Tĩrtũm kapēr mar xwỳnhjê

pix wÿr ixpa hã ijarënh kêt nê.

¹⁷ Nê Tirtûm kapër ã kagà htûm kot mëmoj tã më kot amnhĩ to jarkrar ã harënh kot:

Kêr ka më kamjaja amnhĩ mex ã amnhĩ to jarkrar kêt nê. Æm Tirtûm pix mã mãn mex o mex ã harënh o ri ho jarkrar o ri apa. Anê.

¹⁸ Kot pu më Tirtûm noo mã amnhĩ to mex ã amnhĩ to jarkrar nê ãm amnhĩ to jarkrar kaprÿ. Nom koja Tirtûm tãm ja hã më pahto jarkrar nê ãm hãmri më pahte amnhĩ to mex xwÿnh ã pahto jarkrar.

11

Jejus kot më hwÿr më rënh ã amnhĩ to hêx xwÿnhjê jarënh

Matêwre 7.15; Rômãn 16.17; Karatas 1.6-9; Korosê 2.8; Sikûn Pêtre 2.1

¹ E kot paj te më hkrã pipãnh xwÿnh kot htÿx ri amnhĩ jarënh pyrãk o tanhmã më amã amnhĩ to jarkrar to. Kwa më inhma nê ixkamã agryk kêt nê. No më ixkapër kumrëx mãn ma.

² Inhmã më akĩnh. Te ho Mëpahpãm Tirtûm kãm më akĩnh ta pyrãk. Te më apê mēhō kukrit kãm my hkĩnh nê kot ho mjên prãm xwÿnh ta pyrãk. Kãm mëmyjê piitã më hkĩnh kêt ãm kãm pix kĩnh. Ja pyrã nê kêr ka më amã Kris kĩnh o nhãm amã më hkĩnh xwÿnhjê jakre. Te ho mēhō ni kot kãm myta pix kĩnh nê kãm ho mjên prãm xwÿnh ta pyrãk. Ja na pa inhmã hprãm.

³ Ra më amã Kris kĩnh tÿx o apa nê hkôt amnhĩ nhĩpêx mex o ri apa htã nhũm më kot amnhĩ krã hkôt htÿx ri Tirtûm kapër jahkre ho më pa xwÿnhjaja tee ri ja hã më ajarënh ma nê axpën mã më ajarënh o:

—Kwa nà ja mex kêt. Koja më Pawre kapër ma nê ãm kuma nhũm ja mex nê. No më pahkôt më kot amnhĩ nhĩpêxja na më pamã mex. Ja na kêt më pamã mex o mex. Anê.

Hãmri nê ra kot Kris nê tanhmã më amã hêx to kaxyw. Te amnepê mã kagã kot më panã kot wa pê Ewa mã hêx nhũm kot mar nê hkôt amnhĩ nhĩpêx ta pyrãk.

⁴ Na pa pre ra më awÿr mō nê më amã tanhmã Jejus jarënh to. Nê tanhmã më amã Tirtûm Karō jarënh to. Nê tanhmã wa kot më pahto hkra hto hã më amã wa harê ka prem inhma nê mar tÿx nê. Tã nhũm ra më kot htÿx ri Tirtûm kapër jahkre xwÿnhjaja ixpãnhã më awÿr mō nê Jejus kapër kwÿm ri tanhmã më amã ujarënh to nê më amã harënh o hêx rãhã ho pa. Nê Tirtûm Karōja nhũm më amã tanhmã ho hêx to. Nê ixte më amã Tirtûm kapër jarënh kwÿm ri ixpãnhã tanhmã më amã harënh to ho pa. Na ka prem më ama nê ãm hãmri harënh ã hkamnhix. Kwa kêr ka më ri më ujarënh piitã mar nê hkôt amnhĩ nhĩpêx kêt nê. Më kot Jejus jarënh tã no ãm katat kôt harënh kêt nê. Æm ri ho hêx o pa. Ka htem ama nê ãm hãmri harënh ã hkamnhix nê

mē amā mē mar prām nē. Mē kot mē amā harēnh o hēx o pa htā ka mē ama nē ra mē hkôt amnhī nhīpēx kaxyw. Kwa mē ri ā amnhī nhīpēx anhÿr hkēt nē.

⁵ Kris kot mē awÿr mē rēnh ā mē kot amnhī jarēnh tā amnhī to hēx. Ka prem ama nē ām hāmri mē kot mē amā harēnh ā mē hkamnhīx. Nom na pre Krisja mē awÿr mē rēnh kēt nē. Kēt pa na pre mē awÿr inhmē.

⁶ Mē hkīnhā ixkapēr krór pyrāk tā no ām ixte Tirtūm kapēr mar tÿx. Nē kot amnhī nhīpēxja na ixte omunh par. Ra mē ate ja hā ixpumunh mex.

⁷ Na pa pre mē akôt ri mē amā Jejus jarēnh o ri ixpa no ām hpānhā mēmoj tā mē awÿr o ri ixpa hkēt nē. Xà amarī ixte mē amā harēnh nē hpānhā mēmoj tā mē awÿr kētja mē apē omnuj?

⁸⁻⁹ Kormā ixte mē amā Tirtūm kapēr jarēnh o ri ixpata ā na pa pre hte tōhā kàxpore ho presija no ām aa hā mē awÿr kēt nē. Jar Masetōn kamā Kris kôt mē pahkwÿjaja na prem ixwÿr hkwy rēnh o pa pa ho ixàpkur xà japrōr o ri mē akôt ixpa. Mē kumā ixte Tirtūm kapēr jarēnh o ri ixpa hkēt tā pa hte mē kukwak ri mē akôt ho ixàpkur o ri ixpa. Tā kot paj arī ā mē akôt ixpa nē ā amnhī nhīpēx anē nē mēmoj tā mē awÿr o ri ixpa hkēt nē.

¹⁰ Ja inhmā mex. Jakamā kot paj amarī mē anhō pika pē Gres kām ā mē amā Tirtūm kapēr jarēnh o ixpa anē nē

mēmoj tā mē awÿr kēt nē. Ām hāmri na pa ā mē amā amnhī jarēnh anē. Kris pyrā nē ixēx kēt kēnā.

¹¹ Xà we inhmā mē akīnh kēt kôt na pa hte ā mē amā Tirtūm kapēr jarēnh pānhā mē awÿr kēt anē? Nà inhmā mē akīnh jakamā na pa hte kapēr jarēnh pānhā mē awÿr o ri ixpa hkēt nē. Inhmā mē akīnh tÿx kēnā. Tirtūm kot ja hā ixpumunh mex.

¹² No mē kot amnhī krā hkôt htÿx ri Tirtūm kapēr jahkre xwÿnhjaja na htem mē ajahkre hpānhā kàxpore hā mē awÿr pix o pa. Nē mē amā tanhmā amnhī to hēx to nē mē amā:

—Nà mē ixte Pawre kot amnhī nhīpēx pyrāk. Mē ixte amnhī nhīpēxja kot axpēn pyrāk.

Anhÿr o mē amā amnhī to hēx. Nom ixte ho mē urāk kēt kumrēx. Mē ixte amnhī nhīpēx kot axpēn pyrāk ronhÿx pa mē urāk nē kàxpore hā mē awÿr o ri ixpa. Nom ixte ā amnhī nhīpēx anhÿr kēt. Kot paj aa ā amnhī nhīpēx anhÿr o ixpa hkēt nē.

¹³ Ā mē kot amnhī nhīpēx anhÿr xwÿnhjaja na pre Tirtūm mē awÿr mē rēnh kēt nē. Mē kot Kris nhÿ hā mē ahkre xwÿnh ā amnhī jarēnh tā ām amnhī to hēx.

¹⁴ Mē ō pahi Satanastija te mēmoj mex jarēnh pyrāk tā no ām na hte mē pano kupyr pē mē pamā tanhmā hēx to ho mē pahkôt pa. Te kot mēmoj mex ā ām hāmri kot harēnh pyrāk tā no ām ho hēx.

15 Tã hkõt mẽ kot amnhĩ nhĩpêx xwýnhjaja na htem uràk nê te tãm mẽ kot amnhĩ nhĩpêx xwýnhjê pyrã nê mẽ pahwýr mra nê tanhmã mẽ pamã hêx to. Satanasti pyrã nê mẽ pano kupyr kaxyw tanhmã mẽ pamã hêx to. Nom koja Tĩrtũm nhỹrmã mẽ pahatã mẽ homnuj tỳx kumrêx nhũm mẽ rĩ amnhĩ pumu.

Tanhmã mẽ kot Kris ã Pawre nhĩpêx to ã mẽ harênh Atre 9.23-25

16 E kot paj axte te ixtỳx ri amnhĩ to jarkrar pyrãk o mẽ amã tanhmã amnhĩ jarênh to ka mẽ inhma nê ixkamã agryk kêt nê.

17 Pahihti Kris nhỹ hã kot paj mẽ amã amnhĩ jarênh kêt ãm amnhĩ krã hkõt kot paj mẽ amã amnhĩ jarê.

18 Na htem ohtô nê mẽ ate mẽ hã apijaãm kaxyw tanhmã mẽ amã amnhĩ to jarkrar to ho pa. Tã kot paj mẽ uràk nê amnhĩ krã hkõt mẽ amã amnhĩ to jarkrar ka mẽ inhma.

19 Mẽ ate amnhĩ xàhpumunh tỳx ã amnhĩ jarênh tã ka htem htỳx ri mẽ kot amnhĩ to jarkrar o ri mẽ pa xwýnhjê kapêr ma nê mẽ hkõt aja-maxpêr nê mẽ hkõt amnhĩ nhĩpêx kurê kumrêx.

20 Mẽ kot Kris nhỹ hã mẽ ahkre hã amnhĩ to hêx xwýnhjaja mẽ pakurom mẽ kot amnhĩ to rax xwýnh ã amnhĩ jarênh jakamã na htem mẽmoj tã mẽ amã karõ ho pa.

Nê mẽ kãm hprãm xà hkõt nhỹhỹm mẽ arê nê nhỹhỹm mẽ arê.

Nê mẽ apa pix kukwak ri apkur o pa.

Nê mẽmoj tã mẽ ajakwap mẽ atak o pa.

Ã mẽ kot mẽ anhĩpêx anhỹr tã ka te mẽ ate atũm kêt pyrã nê atỳx ri mẽ kapêr ma nê mẽ hkõt amnhĩ nhĩpêx o ri apa.

21 Tã ixte mẽ uràk nê ã mẽ anhĩpêx anhỹr kêt tã kot paj mẽ uràk nê mẽ amã tanhmã amnhĩ to jarkrar to ka mẽ inhmar japêr. Te ixtỳx ri amnhĩ jarênh pyrãk o kot paj mẽ amã amnhĩ jarê nom ãm hãmri mẽ amã amnhĩ jarê.

22 Mẽ kot Jesus nhỹ hã mẽ ahkre hã amnhĩ to mẽ hêx xwýnhjaja na htem mẽ amã tanhmã amnhĩ to jarkrar to nê mẽ amã:

—E mẽ inhma. Mẽ ixpê Ijaew na pa mẽ. Mẽ arom mẽ ixpê finat Apraãw kanrêhã htãmnhwý jakamã kwa mẽ ixkapêr ma nê mẽ ixkõt amnhĩ nhĩpêx. Anê.

Nom ijaxwýja ixpê Ijaew tã pa hte mẽ uràk nê ja hã amnhĩ to jarkrar hkêt nê.

23 Nê mẽ kot Kris kapêr jarênh mex o pa hã amnhĩ jarênh tã pa na pa hte harênh mex o mẽ hakre. Te ixkrã pipãnh pyrãk o ã mẽ amã amnhĩ jarênh anhỹr tãã.

E pa mẽ amã tanhmã amnhĩ jarênh to ka mẽ inhma. Nà na pre Kris ã mẽ kãm ixkurê xwýnhjaja mẽ kot amnhĩ to jarkrar xwýnhjê hkĩnhã Kris ã ixpynênh nê ijagjênh xohtô nê. Nê mẽ hkĩnhã tōhã ixtak rũnh kumrêx. Pa mẽ hkĩnhã xatã mẽ kot tanhmã ixto hã kritpêm ronhỹx pa pre ty.

24 Na pre Ijaew krähtûmjaja Kris ã ixkatut kãm ixtak rûnh nê. Nê ixtak xâja pî hã mry kà janhôr o ixtak. Nê ixtak kaxyw nê ixtak xà jatur xà kamã kàx xwa gixre janhô nê ho ixtak rûnh o ixkatut kà rê. Ixtak o 39 hãmri nê rî kormã mê kot ixpîr pymaj inhmã ure. Na pre htem nhÿri ixpynê nê ã inhîpêx anê. Na prem ã inhîpêx anhÿr o 5 wês.

25 Nê na prem ra mê kot ixpîr kaxyw nê kên rûnh kwÿ jamÿ nê ho ixtak o kuhê. Nê Rôm nhõ xwÿnhjaja haxwÿja pî ho ixtak rax kumrêx. Æ inhîpêx anhÿr o axkrunêpxi.

Nê na pa pre hte gô xujanãr kãm nhÿhÿm Jejus jarênh o ri ixpa kaxyw pâr kãm mê hwÿr ixpa nhûm pârja tanhmã amnhî to nê agjê. Kritpêm nhÿx pre hte gôja xpi. Pa pre ã amnhî nhîpêx anhÿr o axkrut. Tã arîgro hõ hã kê axte pâr õ mã axà nê ma axte krî hõ hwÿr mõ. Nhûm kê pârta axte mê ixpê axà nhûm gôja nhÿx kê axte xpi. Pa pâr jakà hã kumÿ nê hã ijêť o amÿkry. Nê ho apkati. Tã nhûm nhÿhÿnh pâr õja mõ nhûm kamã mê mõr xwÿnhjaja xpumum nê ixwÿr pâr o mõ nê amnhî wÿr ixto api nê ma amnhî kôt ixto mõ.

26 Na pa pre amnhî xà htÿx kamã ijamak o ri ã mê kãm Kris kapêr jarênh o ri ixpa anê. Kironhÿx pre gô tãmja xpi. Nhûm mê àhkînh nhi xwÿnhjaja kironhÿx prem mãânên xpi. Nê Ijaew nê Ijaew kêt xwÿnhjaja tõhã tanhmã ixtomnuj to ho pa.

Pa pre krî hkwÿ hwÿr ixpa rÿ kapôt ã ixpa nhûm mê ixtã amÿnê. Pa pre gô xujanãr kãm pâr kãm ri ixpa nê nhÿx kamã ty. Nhûm mê kêp Kris kwÿ hã amnhî to hêx xwÿnhjaja haxwÿja tanhmã ixtomnuj to pa mê ŷ hã amnhî xà htÿx kamã ijamak o ri ixpa. Æ na prem Kris ã inhîpêx anhÿr o pa.

27 Nê na pa Jejus kapêr jarênh o ri ixpa kurê ixkêngrà nê ri ixpa. Nê tõhã inhõt kêt ã ixtã apkati. Nê tõhã inhmã prãm nê inhmã kôr nê ri ixpa. Nê tõhã ixê mex kêt nê inhmã kry nê ri ixpa.

28 Na pa hte Kris kapêr jarênh o ri ixpa pê ã amnhî nhîpêx anê. Nom ja pix kêt. Na pa hte krî piitã hkôt Kris kwÿjê hkukamã tee ri ijamaxpêr nê ijamaxpêr o:

—Hêxta waa nê. Mãn mê arî Kris kôt amnhî nhîpêx mex japêr rÿ ko. Mãn mê ra kapêr kwÿm ri tanhmã amnhî tomnuj to rÿ ra hkaga.

Anhÿr o ijamaxpêr o ixpa.

29 Nê na hte mêhõ Tirtûm kapêr nhîrôp xa nê tanhmã amnhî tomnuj to pa tee ri omu nê ixkaprî htÿx kumrêx. Kojã mêhõ tanhmã Tirtûm nê mêhõ mã kapêr to nhûm kuma nê Tirtûm kôt amnhî nhîpêx kêt pa tee ri ja hã omu nê nê kêp àmnâr xwÿnhnta kamã inhgryk tÿx kumrêx.

30 E Kris kôt ixkwÿjaja. Na pa ã mê amã amnhî jarênh anê. Te ixte amnhî to ijarkrar pyrãk no ãm mê ate ixirerek xwÿnh ã xpumunh pix kaxyw.

31 ãm hãmri na pa ã mẽ amã amnhĩ jarẽnh anẽ. Ixêx kêt. Pahihti Jejus nhĩpêxà Tĩrtũm kot ja hã ixpumunh mex. Tĩrtũmja mex o mex. Koja mex o mex tũm nẽ pa rãhã ho pa. Tãm kot ixirerek ã ixpumunh mex.

32 Kormã krĩ pẽ Tamas kãm ixpare ri na pre mẽ õ pahi Arêtja mẽ kãm ixtã amÿnẽ nhũm pôristijaja krĩ hpu hã kahê xà nhõ hakwakre pitã kãm hipôk pa nẽ ixkãm hamak o kuhê. Pa tee inhmã nhÿhÿnh ixkator nẽ ma mẽ umaj ixprõt nẽ ixtẽm prãm nẽ ixirerek xwÿnh ã amnhĩ pumunh kurê kumrẽx.

33 Tã nhũm Kris kôt mẽ pahkwÿjaja hamaxpẽr nẽ kawà rax mÿ nẽ o tẽ nẽ inhmã ãm pa hwÿr axà nẽ kamã nhÿ. Hãmri nhũm mẽ pàr nhõr o kahê nhĩrõ pẽ ixto wrÿ pa ixkato nẽ mẽ kęp amũxu nẽ amnhĩm ixprĩ nẽ ma tẽ nẽ mẽ kęp akunok. ã na pre Tĩrtũm ixirerek xwÿnh ã inhmã ixto amnhĩrit anẽ.

12

Tĩrtũm kot Pawre mã mẽmoj to amnhĩrit ã harẽnh

1 E Kris kôt ixkwÿjaja. Nà inhmã amnhĩ to jarkrar hprãm kêt tã kot paj tanhmã mẽ amã amnhĩ jarẽnh to ka mẽ inhma nẽ hã ixtã apijaam japêr. Na hte Tĩrtũm tõhã inhõt kãm ixkarõ mã tanhmã kapêr to.

2-3 Amnepê mã amgrà hõ hã na pre tanhmã ixkrã hto nẽ õ krĩ hwÿr amnhĩ wÿr ixto api. Na pre ra hã amgrà pẽ

14 ãn. Apu inhĩ rãhã ixto api rÿ apu ãm ixkarõ pix o api rÿ ko. Ixte ja hã amnhĩ pumunh mex kêt. Tĩrtũm pix kot ja hã ixpumunh.

4 Na pre ixto api pa põi nẽ õ krĩ kamã axtem tanhmã mẽ kapêr to hã mẽ kuma. Na prem mẽmoj mex kumrẽx jarẽ pa kuma nẽ ixkĩnh nẽ. Nẽ inhmã mar prãm nẽ. Hãmri nẽ ijamaxpẽr o:

—Hêxta waa nẽ. Mẽmoj jarẽnhja mex kumrẽx. Nà kot paj akupÿm wrÿ nẽ ixkwÿjẽ mã harẽ kẽ mẽ ixpyrà nẽ kuma. Nà kot paj anẽ.

Anhÿr tã nhũm Tĩrtũm Karõ ja nẽ ixkurê nẽ inhmã:

—Nà kær ka mẽ kãm ja jarẽnh kêt nẽ. ãm kapxipix kot kaj ama nẽ ri hã apa.

5 Anhÿr jakamã pa pre paxipix mẽ arom mẽmojja pumu nẽ kuma nom kot paj ri hã amnhĩ to jarkrar kêt nẽ. Kot paj ãm Jejus pix tanhmã harẽnh to ho ri ixpa. Jao ixrom mex o mex ã harẽ. Nẽ ixrom hihtÿx o hihtÿx nẽ àhpumunh o àhpumunh ã harẽnh o ri ixpa.

6 Nẽ ixte Tĩrtũm nhõ krĩ hwÿr ixãpirja ãm hãmri ixte hã amnhĩ jarẽnh tã kot paj ja hã amnhĩ to jarkrar o ri ixpa hkêt nẽ. Mẽ ate ja hã inhmar kôt inhmex ã ijarẽnhja na inhmã hprãm kêt. Nom kot ka mẽ ixte tãm amnhĩ nhĩpêx ã ixpumu nẽ tãm ixkapêr ã inhma hãmri nẽ rĩ kormã inhmã inhmex ã ijarẽ. ã mẽ ate amnhĩ nhĩpêx anhÿrja na inhmã hprãm.

7 Na pre Tĩrtũm inhõt kãm inhmã mẽmoj mex kwỳ jarẽnh rax nẽ. Hãmri nẽ hpãnhã inhmã:

—E na ka akwỳjê rom inhõ krĩ hwỳr api nẽ mẽ kurom mẽmoj mex pumunh rax nẽ. Tã ate ja hã amnhĩ pumunh nẽ ma mẽ kãm hã amnhĩ to jarkrar o ri apa pymaj kot paj Satanasti mã anẽ nhũm inhma nẽ tanhmã atomnuj to ho pa. Nom ijamaxpẽr xà hkõt koja ã anhĩpêx anẽ.

Anhỹr jakamã nhũm tanhmã inhĩpêx to pa inhmex kêt nẽ ixpa. Te mrõnhĩ rax nhỹhỹnh kot ixkamnhwỳr nhũm inhmã tee ri hkaxàr prãm kaprỳ nẽ ý hã ho inhgêx rãhã nẽ ixpaja pyræk.

8 Tã pa tee ri ja hã amnhĩ pumu nẽ amnhĩ to Jejus wỳ nẽ kãm:

—Kwa Pahihtĩ. Na pa ra mẽmojta nhỹ hã ixpunuj nẽ ixirerek nẽ ixpa. Kwa inhnê ata pa akupỹm ixihtỳx nẽ ijamakêtkati nẽ ri ixpa nà?

Anhỹr o amnhĩ to hwỳr o axkrunêpxi.

9 Hãmri nhũm inhmã:

—Nà kot paj anê hyr kêt nẽ. Kot paj ãm akutã inhno-jarêt rãhã ho ri akõt ixpa. Ka axirerek nẽ apa htã ixihtỳx xwỳnh ã ixpumunh kõt ixkamnàr rom tanhmã inhỹ hã amnhĩ nhĩpêx to ho ri apa. Anẽ.

Ã inhmã kapẽr anhỹr jakamã na pa ixpunuj nẽ ri inhĩrot nẽ ixpa htã ixrom hihtỳx xwỳnhnta nhỹ hã ixkĩnh nẽ ixpa. Nẽ kurom ixirerek

xwỳnh pix ã amnhĩ to jarkrar o ri ixpa.

10 Jakamã kot paj Kris ã ixpunuj nẽ ri ixpa htã ixkĩnh nẽ ijamakêtkati nẽ ri ixpa. Kwãr mẽ mãmrĩ hã tanhmã ixto kapẽr to nẽ tanhmã hã inhĩpêx to pa amnhĩ xà htỳx kamã ijamak o ri ixpa. Nẽ ixpê amrakati nẽ inhĩrot nẽ ri ixpa htã Kris nhỹ hã tanhmã kãm amnhĩ nhĩpêx mex to rãhã ho ri ixpa.

Pawre kot tee ri mẽ hkukamã hamaxpẽr ã harẽnh

11 Tã mẽmo kaxyw na pa ã mẽ amã amnhĩ jarẽnh anẽ? Nà mẽ ate ixtã apijaàm kêt jakamã na pa ã mẽ amã amnhĩ jarẽnh anẽ. Mẽ kêp Kris nhỹ hã mẽ ajahkre xwỳnh ã amnhĩ to hêx xwỳnhjaja na ka htem ixrom kot amnhĩ to rũnh xwỳnh ã mẽ harẽ nẽ mẽ hã apijaàm o ri apa. Nom ixte amnhĩ to grire xwỳnh tã mẽ kot amnhĩ to rũnh o ijakrenh kêt.

12 Na pa pre mẽ akamã ri ixpa nẽ Tĩrtũm nhỹ hã aa mẽ ate mẽmoj pumunh kêt kwỳ ho anhỹr rax o ri mẽ akõt ixpa. Nẽ ý hã akupỹm mẽ à xwỳnhjê ho mex. Nẽ mẽ nohkre xwỳnhjê no ho mex. Na pa pre hte ã mẽ amã mẽmoj nhĩpêx anhỹr o ri mẽ akõt ixpa. Amnhĩ xà htỳx kamã ijamak o ri ixpa htã Tĩrtũm xihtỳx xà ho amnhĩ to htỳx nẽ ã mẽ amã mẽmoj to anhỹr o ri mẽ akõt ixpa. Mẽ ate omunh nẽ Tĩrtũm àhpumunh tỳx ã omunh kurê kumrêx kaxyw.

Nē ixpê Kris nhỹ hã mẽ ajahkre hã ixpumunh kurê kumrêx kaxyw na pa pre ã mẽ amã amnhĩ nhĩpêx anhỹr o ri mẽ akôt ixpa.

13 Xãn pa pre nhãm krĩ hkwỳ kamã Kris kôt mẽ pahkwỳjê ho mex tã mẽ kajaja tanhmã mẽ ato mex to hkêt nẽ? Nà na pa pre hte mẽ anhĩpêx o axpẽn pyræk. ãm mẽmoj pixire na pa pre mẽ uræk nẽ mẽ awỳr kêt nẽ. Nhãm krĩ hkwỳ kamã ixpata ã na pa pre mẽmoj to presija nhũm prem inhmã òr o pa. Tã pa pre mẽ mỗ nẽ mẽ akôt ixpa nẽ mẽmoj to presija htã hã mẽ awỳr kêt nẽ. Kwa mẽ ã ixte amnhĩ jarênh anhỹrja ma nẽ ixkamã agryk kêt nẽ.

14 Tã ot pa ra akupỹm mẽ awỳr inhnojarêt kaxyw. Na pa pre ra mẽ awỳr inhmõr o axkrut. Tã ra axte mẽ awỳr inhnojarêt kaxyw. Kot paj mẽ awỳr mỗ nẽ mẽ akôt ixpa nom te wam ixtẽmta pyrà nẽ mẽmoj tã ri mẽ awỳr kêt nẽ. ãm mẽ amã ixkĩnh pix na inhmã hprãm. Mẽ apiitã te mẽ apê ixkra pyræk. Na hte mẽ hkrarejaja mẽ katorxà nẽ mẽ hipêêxà mã ujaaprôr o pa hkêt nẽ. Mẽ hipêêxà nẽ mẽ katorxà na hte hkrare mã kot mẽmoj to presija xà hkôt kãm haprôr o pa nom mẽmoj tã hwỳr kêt nẽ. Ja pyrà nẽ kot paj mẽ apê ixkra pyræk ã mẽmoj tã mẽ awỳr kêt nẽ.

15 Kot kaj mẽ mẽmoj to presija japêr nẽ inhmã harê pa ixãmnhĩx ixkĩnh kãm mẽ amã ixkãxpore piitã òr par pyræk

o amnhĩ nhĩpêx. Nẽ mẽ amã tanhmã amnhĩ nhĩpêx to ho ixpa rãhã ixtykja na inhmã hprãm. Inhmã mẽ akĩnh tỳx kumrêx tã mẽ kajaja mẽ amã ixkĩnhja mẽ atã hkwỳ jêt kêt kumrêx.

16 Ixte amnhĩ mã mẽmoj tã mẽ awỳr kêt tã na hte mẽ akwỳjaja ixêx rom ixte nhãm mẽ kêp amrakati xwỳnhjê mã kãxpore hã mẽ awỳr o ixpa hã ixkamnhĩx.

17 Kwa tanhmã na pa pre ri mẽ ano kupyrr to? Xà ja kaxyw na pa pre mẽ awỳr ixkrãmnhwỳta wa kumẽ?

18 Na pa pre Xitre hã ixih-tỳx nẽ mẽ awỳr kumẽ. Nẽ Kris kôt mẽ pahtõja pa Xitre hkôt kumẽ nhũm wa ma mẽ awỳr mỗ. Tã xà na pre Xitre tanhmã mẽ ano kupyrr to? Nà na pre ã mẽ anhĩpêx anhỹr kêt nẽ. Tã wa ixte amnhĩ nhĩpêx nẽ wa ijamaxpêrja kot axpẽn pyræk. Nà na pa hte uræk nẽ mẽ ano kupyrr o ri ixpa hkêt nẽ.

19 Mãn ka mẽ axpẽn mã mẽ ijarênh o:

—Nà Pawre mẽ hkwỳjaja mẽ kãm amnhĩ to rũnh xwỳnh prãm jakamã na ã Pawre kagàja kamã mẽ pamã amnhĩ tã àprãr anẽ.

Anhỹr o mẽ ijarênh japêr nom mẽ inhmã amnhĩ tã tanhmã ixàprãr to hprãm kêt. ãm mẽ inhmã mẽ akĩnh nẽ mẽ ato mex prãm jakamã na pa htem tanhmã mẽ amã amnhĩ nhĩpêx to ho ri ixpa. Na pa Tĩrtũm noo mã Kris nhỹ hã ã mẽ amã mẽ amnhĩ jarênh anẽ.

20 Tā kot paj jatā ma mẽ awỳr mō ka mẽ akwỳjaja tanhmā amnhĩ tomnuj to japêr.

Měmoj tā axpẽn mã axàkjêr o apa.

Rỳ mẽmoj tā axpẽn kām agryk.

Rỳ axpẽn kām agryk tokyx anhỳr o apa.

Rỳ axpẽn pẽ anhõxỳ.

Rỳ axpẽn to akapêr punuj o apa.

Rỳ mẽ ajakwa kamā nhām mẽ hixi ho rêr o ri apa.

Rỳ amnhĩ to rūnh prām xàj anhmā amnhĩ nhĩpêx to ho apa.

Kot kaj mẽ ã amnhĩ nhĩpêx anhỳr o ri apa pa ja hã mẽ apumu nẽ ixkaprĩ htỳx kumrêx ka mẽ tee ri amnhĩ tã ixpumu.

21 Xà kot paj mẽ awỳr mō nẽ mẽ apumu ka mẽ akwỳjaja arĩ mẽ aprõ kuhpa hã nhām mênijê ho amnhĩkati ho ri apa? Rỳ arĩ tanhmā ajamaxpêr punuj to ho apa? Rỳ atỳx ri apijaàm kêt o apa? Kot ka mẽ arĩ ã amnhĩ nhĩpêx anẽ pa ja hã mẽ apumu nẽ ixkaprĩ xàj inhmỳr rax nẽ. Nẽ mẽ anhỹ hã Tĩrtũm noo mã ixpijaàm tỳx kumrêx.

13

Pawre kot tanhmā amnhĩ kukamā mẽ kām karõ hto

¹ Tĩrtũm kapêr ã kagà htũm tanhmā mẽ kot amnhĩ tomnuj to xwỳnhjê jarênh kot:

Koja mẽhõ tanhmā amnhĩ tomnuj to nhũm mẽhõ pyxi nẽ ã amnhĩ nhĩpêx anhỳr ã omu nẽ awỳr

tẽ nẽ amã harê ka mẽ ama nẽ ãm ama nẽ hkõt ajamaxpêr kêt nẽ. No koja mẽmojaja axkrut rỳ axkrunêpxi nẽ hã omu nẽ awỳr mra nẽ axpẽn kõt amã harê ka mẽ ama nẽ mẽ hkõt ajamaxpêr kurê kumrêx. Anẽ.

Tã ra mẽ awỳr inhmõr o axkrut tã kot paj akupỹm mẽ awỳr mō nẽ mẽ apumu.

² Hapu hã mẽ awỳr inhmõrta ã na pa pre mẽ akwỳ kot tanhmā amnhĩ tomnuj to hã mẽ omu nẽ hã mẽ kām akir nẽ mẽ kām:

—Kot kaj mẽ amnhĩ tomnuj kaga nẽ tãm amnhĩ nhĩpêx kêt kot paj nhỹrmã akupỹn mẽ awỳr mō nẽ ã mẽ ate amnhĩ nhĩpêx anhỳr ã mẽ apumu nẽ hã mẽ atomnuj tỳx kumrêx kām ga. Anẽ.

Jakamā kot paj mẽ ma mẽ awỳr mō nhũm mẽ akwỳjaja arĩ mẽ ate amnhĩ tomnuj o apa hã inhmā mẽ ajarê pa mẽ atã mẽ kuma nẽ tanhmā mẽ ato htỳx nẽ.

³ Kot kaj mẽ ja hã ixpumu nẽ aprĩ hã ixte Kris nhỹ hã ixkapêr xwỳnh ã ixpumunh tỳx kurê kumrêx. Kris ixrom hihtỳx o hihtỳx. Na pre ra mẽ ate amnhĩ tomnuj o apata mỳrapê tanhmā mẽ anhĩpêx to. Tã kot kaj mẽ kormã ã ate amnhĩ nhĩpêx anhỳrja kaga hkêt hã koja tee ri ja hã mẽ apumu nẽ mẽ anhĩpêx kati nẽ.

⁴ Amnepêm na pre Krisja te hihtỳx kêt pyrã nẽ ãm arĩ mẽ kām xa nhũm mẽ unẽ nẽ pĩ kahpa ã kunhõ nẽ kupĩ.

Tã nhũm Tĩrtũmja àhpumunh tỳx o akupỹm ho htĩr nhũm akupỹm htĩr o htĩr nẽ Tĩrtũm nhỹ hã hihtỳx o hihtỳx ã amnhĩ to amnhĩrĩt. Ja pyrã nẽ wam mẽ awỳr inhmõrta ã na pa pre hte mẽ akamã te Kris kormã htyk kêt ri hihtỳx kêeta pyrã nẽ mẽ akõt ixpa. Tã kot paj ma akupỹm mẽ awỳr mõ hãmri nẽ te Kris ra akupỹm htĩr nẽ hihtỳx o hihtỳxta pyrã nẽ Tĩrtũm xihtỳx xà ho tanhmã mẽ kot amnhĩ tomnuj xwỳnhjê nhĩpêx to. Hãmri nhũm mẽ amnhĩ tã ixpumu nẽ Tĩrtũm nhỹ hã ijamaxpêr tỳx ã ixpumunh kurê kumrêx.

⁵ Kwa mẽ aprĩ hã tanhmã mẽ ate amnhĩ nhĩpêx to hã amnhĩ pumu. Xãn ka htem ãm hãmri amnhĩ kaxyw Jejus Kris kõt ajamaxpêr o ri apa nã? Kot kaj mẽ apê hkwy hã koja mẽ akaxwỳnh kãm mẽ akamã hkrĩ rãhã nẽ. Nom koja mẽ akaxwỳnh kãm mẽ akamã hkrĩ hkêt ka mẽ ãm apê hkwy hã amnhĩ jarênh kaprỳ.

⁶ No pa na ixte ja hã amnhĩ pumunh mex. Ixpê Jejus kwỳ na pa. Ra ixkamã hkrĩ nẽ ixkõt pa ho pa jakamã ixpê hkwy na pa. Tã mẽ ate ja hã ixpumunh mexja na inhmã hprãm. Na pa hte ixpê Jejus kwỳ hã amnhĩ jarênh kaprỳ hkêt nẽ.

⁷ Nẽ na pa hte mẽ ato tanhmã Tĩrtũm wỳr to ho ri ixpa nẽ mẽ ato hwỳr o:

—Pa Tĩrtũm, Kwa tanhmã Korĩt nhõ xwỳnhjê hkrã hto kê mẽ tanhmã amnhĩ tomnuj to ho pa hkêt nẽ.

Anhỳr o mẽ ato kuwỳ. Mẽmo kaxyw na pa hte ã mẽ ato hwỳr anê? Ixte mẽ ajahkre mex ã amnhĩ to amnhĩrĩt kaxyw kêt. ãm mẽ ate amnhĩ to mex rãhã ho ri apa kaxyw. Kot kaj mẽ ã amnhĩ nhĩpêx anhỳr o ri apa hãmri nhũm axtem mẽhõ mẽ awỳr mõn pøj nẽ tanhmã mẽ amã mẽ ijarênh to nẽ mẽ ijarênh o:

—Kwa Pawre mẽ hkwyjaja na htem Tĩrtũm kapêr kwỳm ri Korĩt nhõ xwỳnhjê jahkre ho pa.

Anhỳr tã pa amnhĩ tã mẽ kuma nẽ ãm mẽ kuma.

⁸ Na pa hte Tĩrtũm kapêr kutã amnhĩ xunhwỳr kêt nẽ. Na pa hte ãm mẽ ate hkõt amnhĩ nhĩpêx o ri apa hã mẽ amã karõ kamã ixihỳtỳx rãhã ho ri mẽ akõt ixpa.

⁹ Jakamã kot kaj mẽ hkõt amnhĩ nhĩpêx mex o apa pa ja hã mẽ apumu nẽ ixkĩnh nẽ. Mẽ kot axpên mã ixirerek ã ijarênh o pa htãã. ã mẽ ate amnhĩ nhĩpêx anhỳr o apa kaxyw na pa hte mẽ ato Tĩrtũm wỳr o ri ixpa nẽ kãm:

—Pa Tĩrtũm, Kwa tanhmã Korĩt nhõ xwỳnhjê hkrã hto kê mẽ kot amnhĩ tomnuj kaga hpa nẽ hpãnã akapêr kõt pix mã mãn amnhĩ nhĩpêx rãhã nẽ. Anê.

¹⁰ Tã pa kormã mẽ awỳr inhmõr xwỳj ri ã amnhĩ kukamã kagã nhĩpêx nẽ mẽn anê. Mẽ ate kamã harênh nẽ mar nẽ tokyx akupỹm tãm amnhĩ nhĩpêx kaxyw. Kot pa mẽ awỳr mõ nẽ Pahiti nhỹ hã mẽ ate amnhĩ tomnuj ã

mē amā akir. Nom inhmā
 ā mēmoj tā mē amā ixākjēr
 anhÿr prām kêt. Ām ŷ hā
 kapēr o mē ajahkre mex
 nhūm mē ate inhmar nē hkôt
 amnhī nhīpêx rāhā ho apaja
 na inhmā hprām.

¹¹ E Kris kôt ixkwÿjaja. Ām
 ja pix. Kwa kêt ka mē ixkapēr
 mar tÿx nē hkôt amnhī
 nhīpêx mex nē. Nē Tirtūm
 kôt pix mā ri tanhmā amnhī
 nhīpêx to ho apa rāhā ho apa.
 Nē tām ri amnhī nhīpêx. Nē
 axpēn kôt ajamakêtkati nē
 akīnh nē axamnhīx ri apa. Kot
 kaj mē ā amnhī nhīpêx anhÿr
 o apa nhūm Tirtūm mē akôt
 pa ho pa. Kām mē pajapê htÿx
 kumrêx. Kêp mē pamā mē
 pahkīnh nē mē pajamakêtkati
 jagjēnh xwÿnh.

¹²⁻¹⁴ Nē ota jar Kris kôt mē
 pahkwÿjaja pa mē ixpimràatā
 mē awÿr ixpēr mē. Mē ixpi-
 itā mē inhmā mē akīnh tÿx
 jakamā na pa mē awÿr ixpēr
 mē.

Nē kê Pahihti Jejus Kris
 mēmoj to mē akutā nojarêt
 rāhā ho pa. Nhūm Tirtūm
 arī kām mē ajapê rāhā ho
 pa. Nhūm Karō tanhmā mē
 akrā hto ka mē axpēn to mex
 pix kukamā mēn ajamxpēr o
 apa.

Tā e ixkwÿjaja. Ām ja pix.
 Ixpê Pawre na pa mē awÿr
 kagāja nhīpêx nē ā mēnh anē.

Karatas Pawre kot Karatas kamã Jejus kôt hkwÿjê hwÿr kagà nê mênh

Pawre na pre kagàja nhîpêx nê pika pê Karatas kamã Kris kwÿjê hwÿr kumê. Na pre ra Ijaew kwÿjaja mē hwÿr mra nê Tirtûm kapêr kwÿm ri mē ahkre ho pa nê mē kãm:

–Kot kaj mē amnhî kaxyw Jejus Kris kôt ajamaxpêr hãmri nê mãânên mē ixpê Ijaew nhîgêt kot amnhî nhîpêx kôt amnhî nhîpêx. Kê Tirtûm ja hã mē apumu nê mē ato hkra. Anê.

Nom ã mē kapêr anhÿrja kot anhÿr kêt. Mē pahte amnhî kaxyw Jejus Kris kôt pajamaxpêr nê hkôt amnhî xunhwÿr pix ã mē pahpumunh kôt na hte Tirtûm mē pahto hkra. Tã nhûm prem ã mē kãm ho hêx anhÿr o pa nhûm Pawre tee ri ã mē kapêr anhÿrja ã mē harênh ma nhûm ja kêp omnuj nê. Jakamã nhûm Karatas nhô xwÿnhjê mã kagàja nhîpêx nê mē hwÿr kumê. Nê kamã hprî hã Tirtûm kot mē ho hkra kaxyw tanhmã amnhî nhîpêx to hã mē kãm harê nê hã kagà. Nê mē kãm:

1-2 Pa Karatas nhô xwÿnhjaja? Xà mē amex? Ixpê Pawre na pa mē awÿr ixpê mē nê mēmoj tã mē amã karô.

Mêpahpãm Tirtûm mē Jejus Kris na pre wa mē akaxyw

ixãm. Ixte wa ÿ hã ma ri mē akôt mē ajahkre o ri ixpa kaxyw. Na pre Jejus ty nhûm Tirtûm akupÿm ho htîr. Hãmri nhûm wa mē akaxyw ixãm. Pyka ja kamã na pre mēhõ mē akaxyw ixãm kêt nê. Tirtûm mē Jejus Kris na pre wa ixãm. Jakamã na pa ã mē awÿr kagà nhîpêx nê mênh anê. Mē apê Tirtûm krajê hwÿr.

Nê ota jar krî ja kamã ixpyrà nê Kris kôt mē pahkwÿjaja mē awÿr hpêr mē.

³ E kê Mêpahpãm Tirtûm mē Pahihtî Jejus Kris wa mēmoj to mē akutã nojarêt rãhã ho pa. Nê mē ato mex rãhã nê. Ka mē wa ÿ hã akînh nê ajamakêtkati nê axãmnhîx ri apa.

⁴ Nà na pre Krisja amnhî grônh kôt mē pahwÿr wrÿ nê mē panê ty. Mē pahte amnhî tomnuj pãnhã amnhîrer kaxyw mē panê ty. Mêpahpãm Tirtûm kãm hprãm xà hkôt. Tã mēmo kaxyw na pre ã mē panê amnhî nhîpêx anê? Nà pika ja kamã mē kot amnhî nhîpêxja omnuj tÿx jakamã nhûm amnhî grônh kôt te mē kot amnhî tomnuj pê mē papytâr pyrâk o mē panhîpêx nê ã mē panê htyk anê.

⁵ Jakamã kwa kêr pu mē Tirtûm mã mex o mex ã mãn harênh o ri papa. Nà kot puj mē ã amnhî nhîpêx anhÿr rãhã ho ri papa.

Mê ujarênh pixi ãm hãmri hã harênh

Rômãn 16.17; Sikûn Korît 11.3-4; Epes 4.14; Korosê 2.8; Sikûn Pêtre 2.1-3

⁶ Kwa ixkràmnhwỳjaja. Na pa pre mẽ ate tanhmã amnhĩ nhĩpêx to hã mẽ ajarênh ma nê ixkaprĩ nê tee ri mẽ akukamã ijamexpêr. Na pre Tirtũmja Kris kukwak ri mẽ ato mex nê. Nê mẽ ate hkôt amnhĩ nhĩpêx o apa hprãm xàj te kot amnhĩ wỳr mẽ awỳr pyrak o mẽ anhīpêx ka mẽ hkôt amnhĩ xunhwỳ. Tã xep tanhmã mẽ ajamexpêr to nê ra hkaga kaxyw. Ra axtem mẽ ujarênh oja ma nê gryk ã Tirtũm kaga kaxyw. Pa tee ri mẽ ajarênh ma nê ixkaprĩ nê. Kwa mon ka mẽ axtem nê ri ã amnhĩ nhĩpêx anhỳr mã?

⁷ Jejus jarênh pix na ãm hãmri. Mo mẽ ujarênh mex õ kot ka kêt mẽ ama nê hkôt amnhĩ nhĩpêx? Nà amrakati kumrêx. ã mẽ amã ujarênh anhỳr xwỳnhjaja na htem Kris kapêr o pihkâr rũnh kumrêx o pa nê katàt kôt harênh kêt nê. Ka xep mẽ ama nê ajamexpêr kati rũnh nê.

⁸ Na pa pre ma mẽ awỳr mō nê ãm hãmri mẽ amã Jejus kot tanhmã mẽ panê amnhĩ nhĩpêx to hã harê ka prem inhma. Tã koja mēhō mẽ awỳr mō nê mẽ amã nhãm mẽ ujarênh õ jarê nhũm Tirtũm ja hã omu nê nhỹrmã ma mẽ kot amnhĩ xà htỳx kamã hamak tũm xà hwỳr kumē nhũm ma hwỳr mō nê aa kator kêt nê. Mẽ pahtō rỳ Tirtũm kapêr o wrỳk xwỳnhjê hō koja ã amnhĩ nhĩpêx anē nhũm ja hã omu nê ma kuwy pē himōta wỳr amnhĩ nê kumē.

⁹ E kot paj axte mẽ amã ja jarê ka mẽ aprĩ hã inhma.

Koja mēhō mẽ awỳr mō nê mẽ ate hkôt amnhĩ xunhwỳr xwỳnhta kwỳm ri tanhmã mẽ amã ujarênh to. Hã koja Tirtũm omu nê nhỹrmã ma mẽ kot amnhĩ xà htỳx kamã hamak tũm xà hwỳr kumē nhũm ma hwỳr mō nê kamã pa ho pa nê aa kator kêt kumrêx.

Tirtũm pix kãm Pawre hkĩnh hprãm ã kot jarênh

Juãw 5.44; Atre 26.9-20; Karatas 2.6

¹⁰ Nê koja mẽmojaja ixkapêr ma nê kãm mar prãm kêt o kãm ixkĩnh kêt japêr nê mãmrĩ kãm ixkĩnh kêt. Tirtũm kãm ixkĩnhja pix na inhmã hprãm. Kop apu mẽ piitã kãm ixkĩnhja mãn inhmã hprãm ronhỳx pa Kris nhỹ hã kapêr jarênh o ri ixpa hkêt nê.

Tirtũm kot Pawre mã Kra Jejus o amnhũrĩt ã harênh

Sikũn Korĩt 1.12; Wam Tesarõn 2.4

¹¹⁻¹² E Jejus kôt ixkràmnhwỳjaja.

Nà ixte mẽ ujarênh mex jarênh o ixpaja na pre jar pika ja kamã mēhō amnhĩ krã hkôt inhmã harênh rỳ inhmã ahkre hkêt nê. Jejus Kris tãm na pre ixwỳr kato nê inhmã ho amnhĩrĩt. Jakamã mex o kot pika jakamã mẽ ujarênh piitã hakrenh par.

¹³⁻¹⁵ E kot paj ixprĩ hã mẽ amã tanhmã amnhĩ jarênh to ka mẽ inhma. Tanhmã Tirtũm kot amnhĩ kaxyw ixãm to hã pa mẽ amã amnhĩ jarê. Nà na pre kormã ixkêt ri ixkukamã hamaxpêr nê amnhĩm ixta nê amnhĩ kaxyw ixãm nê kot ixto mex

ã ixtã amnhĩ jarẽ. Tã pa pre ixkato nẽ gaa nẽ ixaptãr nom kormã Jejus Kris kôt amnhĩ xãm kêt nẽ. Na pa pre axtem nẽ inhmã mẽ ixpê Ijaew kot amnhĩ nhĩpêx kôt pix mã amnhĩ nhĩpêx o ri ixpa hprãm nẽ. Nhũm pre ixpyrà nẽ arĩ mẽ nywjaja haxwýja kãm mẽ hkôt pix mã ri amnhĩ nhĩpêx o pa hprãm nẽ. No inhmã mẽ hkôt amnhĩ nhĩpêx mex o mẽ hakrenh par prãm jakamã na pa pre mẽ inhĩgêt kôt amnhĩ nhĩpêx mex kumrêx o ri ixpa. Mẽ kapêr piitãã hkôt amnhĩ nhĩpêx mex nẽ. Tã ã amnhĩ nhĩpêx anhÿr o ixpa kaprý. Na pa pre axtem nẽ mẽ kot Tĩrtũm Kra Jejus Kris kôt amnhĩ xunhwÿr xwýnhjê nhĩpêx kati ho ri mẽ hkôt ixpa nẽ inhmã mẽ himex prãm tÿx kumrêx. ã na pa pre amnhĩ nhĩpêx anhÿr o ri ixpa. Ra mẽ ate ja hã ixpumunh mex.

16-17 Tã pa pre ma Tamas wÿr mō. Kamã tanhmã Kris kwýjê nhĩpêx to kaxyw ma mẽ hwÿr mō. Hãmri nẽ kormã mẽ hwÿr ixãtêp o inhmōr mẽ nhũm Tĩrtũm tanhmã ixto nẽ inhmã Kra Jejus o amnhĩrĩt pa jatã omu. Kêp Tĩrtũm Kra hã pa ixprĩ hã omu. Nhũm inhmã kapêr nẽ ixte kãm tanhmã amnhĩ nhĩpêx to ho ri ixpa kaxyw ixãpênh ã inhmã karō nẽ Ijaew kêt xwýnhjê hwÿr inhmẽ. Ixkwý Ijaew wÿr inhmênh kêt nẽ. Na pre inhmã:

—E kêr ka ma Ijaew kêt xwýnhjê hkôt ri mẽ kãm ixkapêr jarênh o ri apa.

Anhÿr jakamã pa pre kuma nẽ hkôt amnhĩ xãm kurê kumrêx nẽ ã amnhĩ nhĩpêx anhÿr o ri ixpa. Jao tanhmã ixte kêp hkwýjê nhĩpêx tota kaga nẽ ma pyka pê Arap wÿr mō. Nom tanhmã amnhĩ tã Jejus kwýjê kukjêr to hkêt nẽ. Nẽ Jerujarê hwÿr inhmōr nẽ Jejus nhÿ hã mẽ ahkre xwýnh maatiijaja tanhmã amnhĩ tã mẽ kukjêr to hkêt nẽ. ãm Tĩrtũm kot inhmã hã karō xã hkôt ma Arap wÿr mō nẽ kamã kapôt ã ri ixpa. Kamã na pre Tĩrtũmja inhmã Jejus Kris kot tanhmã amnhĩ nhĩpêx to ho amnhĩrĩt o pa. Hãmri nẽ inhmã kapêr pa amnhĩ tã kuma hãmri nẽ ma akupým Tamas wÿr mō.

¹⁸ Tã nhũm ra amgrã axkrunêpxi nẽ hapêx pa Tamas rũm ixkato nẽ ma Jerujarê hwÿr Simãw Pêtre hwÿr mō. Hãmri nẽ kuri pøj nẽ hkôt ixpikamênh ã ixtã semãn axkrut.

¹⁹ Nom mẽ kot Jejus nhÿ hã hkwýjê jahkre ho mẽ pa xwýnh maati hkwýjê hō pumunh kêt kumrêx. ãm Simãw Pêtre mẽ Pahihti Jejus tō Xiakreja pix wa omu.

²⁰ ãm hãmri na pa ã amnhĩ jarênh anê. Tĩrtũm kot ja hã ixpumunh mex.

²¹ Tã pa pre mẽ kurũm ixkato nẽ hpãnhã ma pika hkwý hkôt ijapôx o mẽ hkôt ixpa. Ma pika pê Sir mẽ Sirisja wa hwÿr mō.

Mẽ kot amnhĩ jaêr pê Pawre kot amnhĩ nhĩpêx nyw ã omunh ã mẽ harênh

22 Nom Jutej kamã Kris kwÿjaja na prem kormã ixpumunh kêt nê. ãm Simãw Pêtre mē Xiakre pix na pre wa ixpumu.

23 Na pre ra mē hkwÿjaja tanhmã hkwÿjê kot axpên mã ijarênh toja ma. Na prem ijarênh o:

—Kwa Jejus ã mē panhîpêx kati htÿx o pa xwÿnhnta na pre tanhmã hamaxpêr to nê hpãnhã mē kãm Jejus kapêr jarênh o ri mē hkôt pa. Mē kot amnhî kaxyw hkôt hamaxpêr kaxyw. Ra kot Jejus nê mē pahkurê htã hpãnhã mē kãm kapêr jarênh o ri mē hkôt pa. Anê.

24 Hãmri nhũm Kris kwÿjaja amnhî jaêr pê ijarênh ma nê inhÿ hã hkînh nê. Nê ixtã Tirtũm mã mex o mex ã harê.

2

Pawre kot Kris kwÿ hkrãhtũmjê mã amnhî jarênh Atre 15.1-11

1-2 Tã nhũm amgrã pê 14 nê hapêx nhũm Tirtũm akupÿm Jerujarê hwÿr inhmê pa ma akupÿm mō. Panãpe nê Xitre mē pa mē mō nê mē hwÿr pōj. Hãmri nê Kris kwÿ hkrãhtũmjê hwÿr mra nê mē kãm amnhî jarê. Mē tapxipixjê mã amnhî jarê nê ixte Ijaew kêt xwÿnhjê mã Jejus kapêr jarênh o ixpa hã amnhî jarê. Na pa pre ra amnhî kukamã ijamaxpêr o:

—Koonên. Kot pa apu mē kãm amnhî jarê nhũm mē inhma nê ixte Tirtũm kapêr kwÿm ri mē ahkre ho ixpa hã ixkamnhîx rÿ hã inhmã

akir. Na pa hte Ijaew kêt xwÿnhjê mã Kris jarênh o ixpa no ãm mē ixpê Ijaew pyrã nê finat Mojes kapêr kôt mē kot amnhî my kwrÿt kã jakãr ã mē kãm karō hkêt nê. ãm mē kot Kris kôt amnhî xunhwÿr pix kaxyw na pa hte mē kãm hã karō ho ixpa. Tã kot paj Kris kôt mē ixkrãhtũmjê mã ja hã amnhî jarê nhũm mē inhma nê tanhmã hamaxpêr to nhũm ja mē kêp omnuj japêr nhũm mē tanhmã amnhî to nê ixte Kris kapêr jarênh o ixpaja nê ixkurê. Jakamã nhũm ra ixte mē kãm Kris kapêr jarênh o ixpa nhũm mē kot inhmar xwÿnhjaja ijarênh ma nê tee amnhî kukamã hamaxpêr o ra hkaprî nê pa.

Anhÿr o ijamaxpêr.

3 Tã na prem ixte amnhî jarênhja ma nê ja nê tanhmã inhmã nê hkêt nê. Pa mē kãm amnhî jarênh pa nhũm mē inhma nhũm Ijaew kêt xwÿnhjaja kot amnhî jakãr kêtja nhũm mē kãm mex nê. Mē kêp tanhmã kute hkêt nê. Nhũm Ijaew kêt xwÿnh Xitre ixkôt pa nhũm mē kot omunh tã kot mē ixpyrã nê amnhî my kwrÿt kã krãhyr ã kãm karō hkêt nê.

4 Tã nhũm mē kêp Jejus kwÿ hã amnhî jarênh o hêx xwÿnhjaja mē ixtã akuprō. Nom hêx rom mē ixte Kris kôt amnhî nhîpêx ã mē ixpumunh pix kaxyw. Hãmri nê ixkapêr ma nê Xitre hã inhmã akir nê inhmã:

—Kwa na pre Xitre Jejus kôt pix mã amnhî xãm nom fi-

nat Mojes kot mẽ pahpê Ijaew kot amnhĩ nhĩpêx ã karõ hkõt amnhĩ nhĩpêx kêt nê. Kwa ja mex kêt. Na htem Jejus kõt amnhĩ xunhwý nê mãânên finat Mojes kapêr kõt amnhĩ nhĩpêx. Jakamã kwa kãm anê kê amnhĩ my kwryt kà krãhta. Finat Mojes kot mẽ panhĩgêjtjê mã hã karõ xà hkõt.

⁵ Anhÿr tã pa prem mẽ kuma nê ãm mẽ kuma. Kot pa ri mẽ kãm ja hã karõ hkõt nê. ãm Jejus kapêr kõt pix mã kot puj mẽ amnhĩ nhĩpêx o papa nê finat Mojes kapêr mẽ Jejus kapêr o papihkàr kêt nê. Kot puj mẽ anhÿr o Jejus kapêr o ahkà nhũm ja mex kêt nê. Jejus kapêr kãm mo mẽ kot mẽmy kwryt kà jakàr ã mẽ kãm karõ? Amrakati. Jakamã na pa pre ãm mẽ pano kupyr o mẽ pa xwýnhtajê kapêr ma nê ãm mẽ kuma.

⁶ Tã pa pre ra Ijaew kwý pê Jejus kõt ixkwý hkrãhtũmjê mã amnhĩ jarênh pa. Tanhmã ixte Ijaew kêt xwýnhjê mã Jejus kapêr jarênh to hã mẽ kãm amnhĩ jarê nhũm mẽ inhma nhũm ja mẽ kãm mex nê. Jakamã Ijaew kêt xwýnhjaja kot mẽ ixpê Ijaew pyrã nê finat Mojes kapêr kõt amnhĩ nhĩpêxja nhũm mẽ tanhmã mẽ kaxyw inhmã hã karõ hto hkõt nê. Tirtũm na hte mẽ kêp mẽ hkrãhtũm ã mẽ omunh xà hkõt mẽ hkwýjê rom tanhmã mẽ ho mex to hkõt nê. Na hte mẽ pahpiitã mẽ panhĩpêx o axpên pyrãk. Jakamã na pa hte ijaxwýja Jejus kõt mẽ ixkrãhtũmjaja kot amnhĩ to

rax o ijakrenh ã tanhmã ija-maxpêr to hkõt nê.

⁷ Na pa pre mẽ kãm amnhĩ jarênh pa nhũm mẽ inhma nê axpên mã:

—Nà ãm hãmri na pre Tirtũm ahpýnhã Pawre mẽ Simãw Pêtre wa kãm wa àpênh ã karõ nê Ijaewjê hwýr Simãw Pêtre mẽ nê axtem Ijaew kêt xwýnhjê hwýr Pawre mẽ. Wa kot ahpýnhã mẽ hkõt mẽ kãm Jejus kapêr jarênh o ri pa kaxyw. Nà ãm hãmri na hte wa ã amnhĩ nhĩpêx anhÿr o pa. Nà ja mex. Anê.

⁸ Ra Tirtũm kot Ijaew wýr Simãw Pêtre mênh tã hpãnhã Ijaew kêt xwýnhjê kaxyw pa ixãm. ý hã wa ixte mẽ kãm Jejus kapêr jarênh o ri mẽ hkõt wa ixpa kaxyw.

⁹ Jakamã nhũm mẽ ixkrãhtũm Xiakre mẽ Simãw Pêtre mẽ Juãwja ixte mẽ kãm amnhĩ jarênh ma nê hkĩnh nê. Tirtũm kot ixto mex nê Ijaew kêt xwýnhjê hwýr inhmênh ã ixte amnhĩ jarênhja ma nê hkĩnh nê. Hãmri nê Panãpe mẽ wa inhmã kapêr nê wa inhmã:

—Nà ãm hãmri. Kot puj xep mẽ anê. Ka mẽ Panãpe wa kot kaj wa ma Ijaew kêt xwýnhjê hkõt mẽ kãm Jejus kapêr jarênh o ri apa. No mẽ pajaja kot paj mẽ axtem mẽ pahkwý Ijaew kêt harênh o ri ixpa. Á kot puj mẽ ahpýnhã mẽ hwýr papa anê.

¹⁰ Nom kêr ka wa inhmar kumrêx. Kêr ka wa mẽ ixpyrà nê Kris kõt mẽ pahkwýjê pê amrakati xwýnhjê ho mex o ri

apa. Měmoj to mẽ kutā ano-
jarēt rāhā ho ri apa.

Anhÿr o wa inhmā kapēr pa
wa mẽ kuma nē mẽ kām:

—Tōe. Nà kot paj wa anē.
Ra ā wa ixte amnhī nhīpêx
anhÿr kaxyw kēnā. Anē.

*Pawre kot Simāw Pêtre mǎ
àkjêr ā harēnh*

*Atre 10; Rōmān 3.21-31,
6.1-14*

11-14 Tā nhūm Simāw Pêtreja
man mẽ ixwÿr krī pē āxiok
wÿr mō. Nē jar mẽ ixkôt ri pa.
Ixyrā nē kēp Ijaew tā Kris
kôt Ijaew kêt xwÿnhjê hkôt
pa nē mẽ kutā apkur o pa.
Ixyrā nē àmnhīx ri mẽ kutā
apkur o ri mẽ hkôt pa. Ijaew
kêt xwÿnhjaja kot amnhī my
kwrÿt kà jakār kêt jakamā
na pa htem mẽ kutā ixàpkur
kêt nē. Tā ra mẽ ixte Kris kôt
amnhī xunhwÿr jakamā ja
mẽ ixpê tanhmā kute hkêt.
Na pa htem ixàmnhīx mẽ
hkôt ixpa nē mẽ kutā apku.
Ra mẽ ixte Kris kôt amnhī
xunhwÿr kēnā kot pa hkêt
ri mẽ hkôt ixpa hkêt. Na
pa htem ixàmnhīx mẽ hkôt
tanhmā amnhī nhīpêx to ho
ri ixpa.

Tā nhūm Xiakre kot mẽ
ixwÿr mẽ rēnh xwÿnhjaja
haxwÿja mẽ ixwÿr mō. Mẽ
ixyrā nē mẽ kēp Ijaew tā
mẽ ixyrā nē Kris kôt amnhī
xunhwÿ. Jakamā ra mō nē
mẽ ixwÿr pōj. Hāmri nhūm
Simāw Pêtre mẽ omu nē mẽ
umaj axte Ijaew kêt xwÿnhjê
kutā apkur kêt nē. Axtem
nē ōja py nē o tē nē mẽ hkàx
ā ahte apkur o nhÿ. Hāmri
nhūm ra mẽ ixri Ijaew kwÿpê

Kris kôt mẽ pahkwÿjaja ja hā
omu nē piitā uràk nē ā amnhī
nhīpêx anē nē Simāw Pêtre
ri Ijaew kêt xwÿnhjê hkàx ā
apkur o hkrī. Nhūm ixkôt
pa xwÿnh Panāpeja haxwÿja
ja hā mẽ omu nē mẽ uràk
nē ā amnhī nhīpêx anē nē
mẽ hkàx ā apku. Hāmri pa
tee ri ja hā mẽ omu nhūm
ja inhmā mex kêt nē. Na
prem ā amnhī nhīpêx anhÿr
o Tirtūm kapēr ā kagà htūm
kamā mẽ ujarēnh mex kwÿm
ri amnhī nhīpêx. Jakamā pa ā
mẽ kot amnhī nhīpêx anhÿrja
nē Simāw Pêtre mǎ ixkapēr.
Mẽ piitā mẽ noo mǎ xa nē ā
kot amnhī nhīpêx anhÿrja nē
kām ixkapēr nē kām:

—Tk. Kwa nà Simāw Pêtre.
Ri ā amnhī nhīpêx anhÿr kêt
nē. Pahpê Ijaew tā kormā
pahkwÿjaja hpôx kêt ri ka
hte ixyrā nē axàmnhīx Ijaew
kêt xwÿnhjê kutā axàpkur o
ri apa. Tā amnhī wÿr mẽ
pahkwÿjê pumu nē axtem
nē mẽ hkàx ā axàpkur o akrī.
Kwa nà na ka ā amnhī nhīpêx
anē nē ra axtem amnhī
nhīpêx. Te ate mẽ kām akapēr
nē mẽ kām: “Kot kaj mẽ
ixyrā nē amnhī my kwrÿt
kà jakà pa rī mẽ akôt ri ixpa
nē mẽ akutā ixàpkur o ixpa.”
Anhÿr pyrāk. Kwa ja mex kêt.

¹⁵ —Mẽ pahpê Ijaew na
pu htem mẽ kēp Ijaew kêt
xwÿnhjê jarēnh o: “Mẽ kot
mẽ pahte amnhī nhīpêx kôt
amnhī nhīpêx kêt xwÿnhjaja.”
Anē.

¹⁶ Tā mẽ pahpê Ijaew tā
na hte Tirtūmja mẽ pahte mẽ
panhīgēt kot amnhī nhīpêx

kôt mẽ pahte amnhĩ nhĩpêx ã mẽ pahpumunh kôt mẽ pahto hkra hkêt nê. Ra mẽ pahte ja pumunh mex. Æm mẽ pahte amnhĩ kaxyw Je-jus Kris kôt pajamaxpêr ã mẽ pahpumunh kôt pix mã na hte mẽ pahto hkra. Kot pu mẽ amnhĩ kaxyw hkôt pajamaxpêr nhũm ja hã mẽ pahpumunh kôt pix mã mẽ pahto hkra.

¹⁷ —Mẽ pahpê Kris kwý jakamã na hte Tĩrtũm amnhĩm mẽ pamex ã mẽ pajarê nê mẽ pahte amnhĩ tomnuj xwýnh kêt ã mẽ pajarê. Jakamã na pu htem paxãmnhĩx ri Ijaew kêt xwýnhjê kot Kris kôt amnhĩ xunhwýr xwýnhjê hkôt ri papa ho papa. Ra Tĩrtũm kot mẽ pahpyrà nê amnhĩm mẽ mex ã mẽ harênh kênã. Tã koja mēhō kormã ja mar kêt nê tanhmã hã mẽ pajarênh to nê mẽ pajarênh o: “Tk. Ra mẽ kot amnhĩ kaxyw Kris kôt hamaxpêr tã axtem nê Ijaew kêt xwýnhjê hkôt ri pa. Jakamã arĩ mẽ kot amnhĩ tomnuj xwýnh kênã.” Anhýr o mẽ pajarênh japêr. Nom ãm mẽ pahte amnhĩ tomnuj xwýnh ã mẽ pajarênh kaprý. Na pu htem Kris kôt amnhĩ nhĩpêx nê ra tãm amnhĩ nhĩpêx mex o papa.

¹⁸ No kot pu mẽ hkôt ri amnhĩ nhĩpêx o papa htã tanhmã pajamaxpêr to nê pahte amnhĩ nhĩpêx tũm o awjanã hãmri nê amnhĩ tomnuj tỳx kumrêx.

¹⁹ —Tã tanhmã kot puj wem amnhĩ to nê mẽ panhĩgêt

kot amnhĩ nhĩpêx piitã hkôt amnhĩ nhĩpêx mex o ri papa? Na pu htem pajamaxpêr o: “Kot paj ã amnhĩ nhĩpêx anê nê ã amnhĩ nhĩpêx anê nhũm Tĩrtũm ja hã ixpumu nê amnhĩm inhmex ã ijarê.” Anhýr o pajamaxpêr. Hãmri nê finat Mojes kot mẽ panhĩgêtjê mã kapêr piitã hkôt ri mnhĩ nhĩpêx o papa nom tōhã hkwým ri tanhmã amnhĩ tomnuj to. Jakamã nhũm Tĩrtũm ja hã mẽ pahpumunh kôt mẽ pamex ã mẽ pajarênh kêt nê. Kapêr ã kagã htũm kot ã ja jarênh kot anhýr. Nom kot puj mẽ amnhĩ kaxyw Kris kôt pajamaxpêr nhũm ja hã mẽ pahpumunh kôt amnhĩm mẽ pamex ã mẽ pajarê. Hãmri pu mẽ Tĩrtũm kôt amnhĩ nhĩpêx o ri papa nê axte mẽ pahpê Ijaew nhĩgêtjê kot amnhĩ nhĩpêx kôt amnhĩ nhĩpêx hkêt nê. Te ra mẽ pahtyk nê axte hkôt amnhĩ nhĩpêx kêt pyrà nê pãnhã Tĩrtũm kapêr kôt pix mã ri amnhĩ nhĩpêx o ri papa.

²⁰ —Nê na prem pĩ kahpa hã Kris nhô nê kupĩ nhũm mẽ pahte amnhĩ tomnuj te ãhkô hã jêt nê haxwýja htyk pyràk. Jakamã na pu htem amnhĩ tomnuj kaga nê Kris kôt amnhĩ xunhwý nhũm Karō mẽ pahkarōm agjê pu mẽ te Jejus Kris kot amnhĩ nhĩpêx pyràk o amnhĩ nhĩpêx o papa. Jao hpãnhã mẽ pahte amnhĩ nhĩpêx nyw pix o amnhĩ nhĩpêx o ri papa. Kris kãm hprãm xã hkôt pix mã tanhmã ri amnhĩ nhĩpêx to

ho papa. Kris kêp Tirtûm Krahtâ kãm mẽ pajapê kamã mẽ panê htykjakamã na pu htem amnhĩ kaxyw kôt pix mã pajamxpêr rãhã ho papa.

²¹—Ăm hãmri na pre Tirtûm mẽ pahto mex kumrêx nê mẽ pahwÿr Krisja mẽ nhũm mẽ pahwÿr wrÿ nê mẽ panê ty. Tã na pa pre kapêrja ma nê mar tÿx nê hã ri ixpa nê ho ijamakêtkati hkêr nê. Tã kop apu Tirtûm kot mẽ pahte mẽ panhĩgêjtjê kot amnhĩ nhĩpêx o amnhĩ nhĩpêx ã mẽ pahpumpunh kôt mẽ pamex ã mẽ pajarênh ronhÿx pre Krisja ãm mẽ panê htyk kaprÿ. Mo kaxyw nhÿx pre mẽ panê ty? Anê.

Ă na pa Simãw Pêtre mã ixkapêr anê nhũm mẽ piitã apkur pê hã inhma o hkrĩ.

3

Mẽ pahte amnhĩ krã hkôt pahpê Tirtûm kra hkêr ã mẽ pajarênh

Karatas 5.16-23; Epes 2.8; Piripos 3.9; Sikũn Ximotre 1.9; Xitre 3.4-7

¹ Kwa Karatas nhõ xwÿnhjaja. Te ri mẽ ajamaxpêr kêt kumrêx pyrãk. Amnepê mã mẽ awÿr inhmõrta ã na pa pre mẽ amã tanhmã Kris htykja jarênh to. Pĩ kahpa hã mẽ panê htyk ã harê ka mẽ aprĩ hã inhma. Tã nhũm Tirtûm kapêr jarênh o mẽ hêx xwÿnhjaja ixpãnhã mẽ awÿr mra nê tanhmã mẽ amã ujarênh to ka mẽ ama nê mẽ ajamaxpêr o apihkãr rax nê. Jao axte Kris tyk mã ajamaxpêr kêt nê.

² E mẽ inhmã mẽmoj jarê. Mẽmoj tã mẽ apumunh kôt na pre Tirtûm mẽ awÿr amnhĩ Karõ rê nhũm mẽ awÿr agjê? Xà mẽ anhĩgêr kot amnhĩ nhĩpêx kôt mẽ ate amnhĩ nhĩpêx ã mẽ apumunh kôt? Nã na pre ja hã mẽ apumunh kôt mẽ awÿr rênh kêt nê. Na ka prem Kris jarênh ma nê amnhĩ kaxyw hkôt ajamaxpêr nhũm ja hã mẽ apumunh kôt mẽ awÿr kurê nhũm mẽ awÿr agjê.

³ Na pu htem amnhĩ krã hkôt tanhmã amnhĩ nhĩpêx to ho pahpê Tirtûm kra hkêr nê. Tirtûm Karõ pix kukwak ri na pu htem pahpê hkra. Tã ka mẽ axtem nê ajamaxpêr o:

—Nã Tirtûm ra kot ixto hkra jakamã kot paj arĩ ri mẽ inhĩgêr kot amnhĩ nhĩpêx kôt amnhĩ nhĩpêx o ixpa rãhã nê inhmex kumrêx nê ri ixpa. Anê.

Kwa ã mẽ ajamaxpêr anhÿrja mex kêt.

⁴ Mẽ akwÿ kot Kris ã mẽ atomnuj tã ka mẽ amnhĩ xà htÿx kamã ajamak o ri apahtã Kris kaga hkêr nê. Tã ra axtem nê mẽ kapêr o mẽ hêx xwÿnhjê jamaxpêr kôt ajamaxpêr o te Kris ã amnhĩ xà kamã ajamak kaprÿ pyrãk. Kwa nã mẽ ri mẽ hkôt ajamaxpêr kêt nê.

⁵ Na pre Tirtûm mẽ awÿr amnhĩ Karõ rê nhũm mẽ awÿr agjê nê mẽ amã aa mẽ ate mẽmoj pumunh kêt kwÿ ho anhÿr o ri mẽ akamã pa ho pa. Xà mẽ anhĩgêr kot amnhĩ nhĩpêx kôt mẽ ate amnhĩ nhĩpêx ã mẽ apumunh kôt na

pre ã mẽ amã amnhĩ nhĩpêx anê? Nà ja kôt kêt. ãm mẽ ate Kris kapêr mar nê amnhĩ kaxyw hkôt ajamaxpêr ã mẽ apumunh kôt pix mã na pre ã mẽ amã amnhĩ nhĩpêx anê.

Tĩrtũm kot amnhĩ tã finat Apraãw pumunh kôt mex ã harênh

Rômãn 4.1-25; Xiakre 2.23

⁶ Nê mẽ ixpê Ijaew pãr krax finat Apraãw na pre amnhĩ kaxyw Tĩrtũm kôt hamaxpêr nhũm amnhĩ tã omu nê kãm: Nà ate amnhĩ kaxyw inhmã ajamaxpêr tỳx jakamã na pa amnhĩm amex ã ajarê. Amex kumrêx Apraãw.

⁷ Anhỹr o kãm kapêr jakamã mẽ pahte uràk nê amnhĩ kaxyw hkôt pajamaxpêr xwýnhjaja te mẽ pahpê Apraãw tãmnhwý pyràk.

⁸ Nê mẽ apê Ijaew kêt xwýnhjaja. Na hte Tĩrtũm mẽ pahto hpimràk tã mẽ pahte amnhĩ kaxyw kãm pajamaxpêr ã mẽ pahpumunh kôt amnhĩm mẽ pamex ã mẽ pajarê nê mẽ pahto hkra. Amnepêm na pre Apraãw mã kapêr nê kãm:

E ate amnhĩ kaxyw ixkôt ajamaxpêr jakamã kot paj akukwak ri pyka piitã hkôt mẽ piitã mẽ ho mex nê.

Anhỹr o kãm kapêr jao mããnên mẽ apê Ijaew kêt xwýnhjê jarê.

⁹ Jakamã mẽ pahte Apraãw pyrã nê amnhĩ kaxyw Tĩrtũm kôt pajamaxpêr xwýnhjaja kot puj mẽ pahpiitã uràk nê

pamex kumrêx nê papa ho papa.

Tanhmã Tĩrtũm kot mẽ panê pĩ kahpa hã jêt xwýnh nhĩpêx to hã harênh

Rômãn 4.14, 7.10; Wam Korõt 15.56

¹⁰ Nê koja mẽhõ hamaxpêr o:

—E kot paj finat Mojes kapêr kôt ri amnhĩ nhĩpêx o ri ixpa nhũm Tĩrtũm ja hã ixpumu nê amnhĩm inhmex ã ijarê nê ixto hkra. Anê.

No ãm ja kot anhỹr kêt. Tĩrtũm kapêr ã kagã htũm kot ja jarênh kot:

Ixte amnhĩm mẽ mex ã mẽ harênh kaxyw mẽ kot Mojes kapêr kôt amnhĩ nhĩpêx xwýnhjaja koja mẽ ãm mẽmoj pixire nê hirôp kuhê. Rý mẽmoj pixire nê hkôt amnhĩ nhĩpêx kêt pa ja hã mẽ omu nê hã mẽ homnuj tỳx kumrêx.

Anhỹr jakamã tanhmã kot pu mẽ amnhĩ to nê Mojes kapêr piitã hkôt amnhĩ nhĩpêx nê aa ho pixi nê hirôp pakuhê hkêt? Nà kot puj mẽ ho anhỹr kêt nê. Kot puj mẽ tee ri pamã ja ho anhỹr prãm kaprý. Jakamã Tĩrtũm kot amnhĩm mẽ mex ã mẽ harênh kaxyw mẽ kot ã amnhĩ nhĩpêx anhỹr mã xwýnhjaja koja mẽ mex kêt nê.

¹¹ Na hte Tĩrtũm mẽ kot finat Mojes kapêr kôt amnhĩ nhĩpêx o mẽ pa hã mẽ omunh xã hkôt mẽ mex ã mẽ harênh kêt nê. ãm mẽ kot amnhĩ kaxyw hkôt hamaxpêr xwýnh pixjaja na hte ã mẽ harênh

anē. Kapēr ā kagà htùm kot mē harēnh kot:

Mē kot amnhī kaxyw ixkôt hamaxpēr xwýnhjaja na pa hte mē mex ā mē harēnh o ixpa. Mē tapxipixjaja koja mē nhýrmā Ixkra mē wa ixri mex kumrēx nē htír tùm nē pa ho pa. Anē.

¹² Nom na htem amnhī kaxyw Tirtūm mā hamaxpēr pē finat Mojes kapēr kôt amnhī nhīpēx o pa hkēt nē. Mojes kapēr ā kagà kot ja jarēnh kot:

Mē kot ixkapēr piitā hkôt amnhī nhīpēx mex o mē pa xwýnh pixjaja koja mē htír tùm nē pa ho pa. Anē.

¹³ Tā kot pu mē ām kapēr o pixire nē hirôp pakuhē hāmri nē mýrapē pahtír tùm nē papa hkēt nē. Nē hpānhā mē kot amnhī xà htýx kamā hamak tùm xàta hwýr ma papa. Ja pymaj na pre Krisja ī ho mē pahwýr wrý nē mē pahte amnhī tomnuj mýrapē mē panē ty. Tirtūm kot mē pahte amnhī tomnuj mýrapē tanhmā mē pahto pymaj ā mē panē htyk anē. Jakamā nhūm Tirtūm mē pahte amnhī tomnuj ā mē pahpumunh kôt mē pakuhpa hā Kraja homnuj nē. Kapēr ā kagà htùm kot ja jarēnh kot:

Pī kahpa hā jēt xwýnhhta na pre Tirtūm homnuj týx kumrēx. Anē.

Mē kot amnhī kaxyw Kris kôt mē hamaxpēr xwýnhjē jarēnh

¹⁴ Tā ā Jejus Kris kot mē panē amnhī nhīpēx anhýr kukwak ri na pre Tirtūm kot Apraāw nhīpēx pyrà nē mē ixpē Ijaew pix o mex kēt nē. Māānēn mē apē Ijaew kēt xwýnhjē ho mex nē. Jakamā koja mēhō. Ijaew ō rý Ijaew kēt xwýnhjē hō amnhī kaxyw Kris kôt hamaxpēr nhūm Tirtūm hā omu nē ho hkra nē hwýr Karō mē nhūm kām axā.

Tirtūm kot finat Mojes kukamā mē pahto mex ā harēnh

Rômān 3.19-20, 5.20-21, 11.32; Eprēw 6.13-18

¹⁵ E ixkràmnhwýjaja. Kot paj ixprī hā mē amā ja jarē ka mē inhma. Nà koja mēhō wa hamēxkrut nē mēmoj tā axpēn ma. Pika hā war axpēn ma rý mēmoj tā war axpēn ma. Hāmri nē wa hā axpēn mar pa nhūm ja ām hāmri nē ām rāhāā. Koja nhām mēhō tē nē axtem tanhmā harēnh to hkēt nē.

¹⁶ Ja pyrà nē na hte ā Tirtūm mēmoj tā amnhī jarēnh anē. Na hte mēmoj jarē nhūm arī rāhāā. Na hte jarāhā mēmoj jarē nhūm jāā nhūm axtem hijuk ri mēmoj jarēnh kēt nē. Na hte ām kapēr pýnh nē. Tā na pre Apraāw mā hkanrēhā htàmnhwýjē hō kukwak ri Apraāw o mex ā amnhī jarē. Tàmnhwý piitā kukwak ri ho mex ā amnhī jarēnh kēt nē. Ām kanrēhā htàmnhwý Krisja pix kukwak ri ā Apraāw o mex ā kām amnhī jarēnh anē.

¹⁷ E kot paj hpānhā axtem tanhmā mē amā harēnh to. Na hte Tirtūm kot mēmoj tā

amnhĩ jarēnh xà hkôt tanhmã mẽmoj to ho pa rāhã nē. Ā na pre finat Apraāw mã kot ho mex ā amnhĩ jarēnh anē. Tā ra hã amgrà pē 430 nē hapêx nhũm hpānhã finat Mojes mã kapēr. Kot mar nē amnhĩ xô ri Ijaew mã harēnh o ri mẽ hkôt pa kaxyw. Tā no nhũm ra kot Apraāw mã mẽmoj jarēnhata arĩ hã no htỳx rāhã nē aa ho hamakêtkati hkêt nē. Nē kot Mojes mã tanhmã kapēr toja nē Apraāw mã tanhmã kapēr toja nhũm hamē wa ho hamakêtkati hkêt nē. Nhũm wa hamē arĩ rāhã ho rāhã.

¹⁸ Tā mẽ ano kupyri o ri mẽ pa xwỳnhjaja na htem htỳx tanhmã mẽ amã harēnh to nē mẽ amã harēnh o:

—Kwa kot puj mẽ Mojes kapēr kôt amnhĩ nhĩpêx o papa hkêt nē nhũm Tĩrtũm tee ri ja hã mẽ pahpumu nē mẽ pahto mex kêt nē. Anē.

Nom ja kot anhỹr kêt. Kop apu ā kot anhỹr ronhỹx Tĩrtũm ra wam kot tanhmã Apraāw mã kapēr tota ra ho hamakêtkati. Nom na hte arĩ kãm hamaxpēr rāhã nē ho pigrành nē ho hapêx kêt nē. Na pre Apraāw mã kãm:

Kot kaj amnhĩ kaxyw ixkôt ajamaxpēr hã kot paj ato mex kumrêx. Anē.

Tā kot ho mex ā amnhĩ jarēnhja arĩ rāhã. Na hte arĩ mẽ kot amnhĩ kaxyw hkôt hamaxpēr xwỳnhjê ho mex nē. Nom mẽ kot Mojes kapēr kôt amnhĩ nhĩpêx o pa hã mẽ omunh xà hkôt mẽ ho mex kêt nē. Ām mẽ kot amnhĩ kaxyw hkôt hamaxpēr xwỳnhjê pìxjaja na hte mẽ ho mex.

Mo kaxyw na Mojes kapēr ã kagà?

Rõmãn 3.20, 5.20, 7.7

¹⁹⁻²⁰ Tā mo kaxyw na Mojes kapēr ã kagàja? Nà mẽ pahte tanhmã amnhĩ tomnuj to ho papa hã amnhĩ pumunh nhũm Tĩrtũm kot ã mẽ pahte amnhĩ nhĩpêx anhỹrja nē mẽ pahkurê kaxyw. Na pre Mojes Tĩrtũm nhỹ hã mẽmoj nē mẽ pahkurê. Mẽ pahte axpēn pē paxàhkĩnh nē mẽ pahkurê. Nē mẽ pahte axpēn mã paxêx o ri papa nē mẽ pahkurê. Ā mẽmoj nē mẽ pahkurê anē. Mẽ pahprĩ hã kapēr mar nē tãm amnhĩ nhĩpêx o papa kaxyw. Ja kaxyw na pre Tĩrtũm Ijaew kaxyw Mojes mã kapēr gō. Na pre kaxkwa rũm kapēr o wrỳk xwỳnhjaja kumrêx kãm harē nhũm kuma nē Ijaew mã hã kagà. Jakamã na htem harēnh o: “Mojes kapēr” anhỹr o harē.

Tā Apraāw kanrēhã htàmnhwỳ Krisja kormã kator kêt ri nhũm Ijaew Mojes kapēr ma nē hkôt ri amnhĩ nhĩpêx o pa. Tā nhũm Krisja kator o Mojes kapēr o hapêx. Ra Tĩrtũm kot Kris kukamã ho mex ā amnhĩ jarēnh xà hã arĩgrota kator mẽ nhũm Mojes kapēr hapêx.

No na pre Tĩrtũm Ijaew mã ujarēnh kaxyw tãm mẽ kãm ujarēnh kêt nē. Kapēr o wrỳk xwỳnhjê mã na pre harē nhũm mẽ amnhĩ xô ri Mojes mã mẽ kaxyw kãm awjarē. Kot mẽ ô ri mẽ kãm harēnh kaxyw. No Apraāw mã na pre Tĩrtũm tãm kapēr. Na pre

hwÿr kapër o wrÿk xwÿnhjê hõ mën̄h kêt nê. Tãm kot kãm kapër jakamã kapërja na mex o Ijaew kaxyw Mojes mã kapër jakrenh.

²¹ Nê na pre Tÿrtũm tanhmã mẽ pamã kapër o amnhÿrit to nê mẽ pamã:

—E kot paj amnhÿ kaxyw ixkõt mẽ ajamaxpêr ã mẽ apumunh kõt pix mã mẽ amex ã mẽ ajarê.

Anhÿr o mẽ pamã kapër. Tã xà na pre kapërja nhÿjuk ri axte amnhÿ jarê nê amnhÿ jarênh o:

—E kot paj mẽ ate Mojes kapër kõt amnhÿ nhÿpêx mex o apa hã mẽ apumunh kõt mẽ amex ã mẽ ajarê.

Anhÿr o mẽ pamã kapër? Xà na hte mẽmoj jarê nhũm jãã nhũm ra hijuk ri axtem mẽmoj jarê? Nà Tÿrtũm kapër ãm hpÿnh kênã. Kop ãm mẽ pahte Mojes kapër kõt amnhÿ nhÿpêx o papa hã mẽ pahpumunh kõt mẽ pamex ã mẽ pajarênh ronhÿx mẽ pamã:

—Ãm ja pix ã mẽ apumunh kõt kot paj mẽ amex ã mẽ ajarê. Anê.

²² Nom na pre ã kapër anhÿr kêt nê. Kapër ã kagà htũm kot ja jarênh o:

Mẽ apiitã mẽ ate amnhÿ tomnuj o mẽ apa xwÿnh na ka mẽ.

Anhÿr jakamã tanhmã kot puj mẽ amnhÿ to nê Mojes kapër kõt amnhÿ nhÿpêx mex o papa? Mẽ pahpiitã mẽ pahte amnhÿ tomnuj xwÿnh kênã. Mẽ pahte kapër piitã hkõt amnhÿ nhÿpêx kêt jakamã koja Tÿrtũm ja hã mẽ

pahpumunh kõt mẽ pamex ã mẽ pajarênh kêt nê. Koja ãm mẽ pamã kapër o:

—Kot kaj mẽ amnhÿ kaxyw Jejus Kris mã ajamaxpêr pa ja hã mẽ apumunh kõt mẽ amex ã mẽ ajarê nê mẽ ato ixkra nê mẽ ato mex o ri ixpa. Anê.

Mojes kapër te kêp Kris xwÿj ri mẽ hamãr xwÿnh pyrãk ã harênh

Rômãn 10.4; Karatas 4.1

²³ Nê kormã Kris kot mẽ pahwÿr wrÿk nê mẽ panê htyk xwÿj ri na pre Ijaew Mojes kapër ma nê hkõt amnhÿ nhÿpêx o ri pa. Nhũm kapërja te kot amnhÿm mẽ unênh nhũm mẽ kot hkõt pix mã amnhÿ nhÿpêx o ri pa pyrãk. Na prem Tÿrtũm kot mẽ mex ã mẽ harênh prãm xàj ãm pix ma nê hkõt amnhÿ nhÿpêx o pa. Nom kapër piitã hkõt amnhÿ nhÿpêx mex kêt nê.

²⁴ Te mẽhprÿre nhũm Mojes kapër te kêp mẽ hamãr xwÿnh pyrãk. Mẽhprÿ jamãr xwÿnhjaja na htem mẽhprÿjê pumu nê tãm mẽ kot amnhÿ nhÿpêx kaxyw tanhmã mẽ ahkre hto ho mẽ hkõt pa. Ja pyrã nê na pre Ijaew tãm amnhÿ nhÿpêx o pa kaxyw Mojes kapër ma nê hkõt amnhÿ nhÿpêx o ri pa. Jejus Kris kutêp ã amnhÿ nhÿpêx anhÿr o ri pa. Tã nhũm Jejus tãm kaxkwa rũm wrÿ pa mẽ ixkwÿy pixjaja mẽ ixkwÿjê rom amnhÿ kaxyw hkõt ijamaxpêr. Hãmri nhũm Tÿrtũm ja hã mẽ ixpumunh kõt mẽ inhmex ã mẽ ijarênh kurê kumrêx.

*Jejus kukwak ri mē pahpê
Tĩrtũm kra ã mē pajarēnh*

*Juãw 1.12; Rõmãn 8.14;
Epes 1.5*

25-26 Tã ra mē ixte amnhĩ kaxyw Kris kôt ijamaxpēr jakamã na pre Tĩrtũm mē ixto hkra pa mē ra te ixpê hkra xàptàr pyræk o amnhĩ nhĩpêx nē kapēr kôt amnhĩ nhĩpêx mex o ri ixpa. Jao Mojes kapēr kaga. Te mēhprĩre ra mē ahkre kamã mē àptàr nē kot mē ahkre xwýnh kaga pyræk. Hãmri pa mē ixpê Tĩrtũm kra xàptàrjaja hãmri axte Mojes kapēr kôt amnhĩ nhĩpêx hkêt nē.

27 Tã mē kajaja na ka pre mē ixpyrà nē amnhĩ kaxyw Kris kôt ajamaxpēr nhũm mē akwý kot mē apê Jejus kwý hã mē apumunh kaxyw nhũm mē akrã kumrà. Hãmri ka mē Jejus kot amnhĩ nhĩpêx kôt pix mã amnhĩ nhĩpêx o ri apa.

28 Tã ra mē pahpê Jejus Kris kôt amnhĩ xunhwýr xwýnh jakamã na hte Tĩrtũm ahpýnhã ri tanhmã mē pakute hkôt mē pahpumunh kêt nē. Mē pahpê Ijaew rý mē pahpê Ijaew kêt xwýnhjaja. Rý mē pahpê nhãm mē kãm paxápēnh xwýnh rý amnhĩ mã mē paxápēnh xwýnh nhũm hte ja hã mē pahpumunh kôt tanhmã mē pajarēnh to hkêt nē. Rý mē anijê hkôt rý mē inhmyjê hkôt mē pahpumunh kôt tanhmã mē pajarēnh to kêt nē. ãm mē pahte Jejus Kris kôt amnhĩ xunhwýr ã mē pahpumunh kôt pix mã na

hte ã mē pahpumunh o pa anē.

29 Nē na pre Tĩrtũm Apraãw mã hkanrêhã htãmnhwý Jejus Kris o mex ã amnhĩ jarê. Tã Kris kêp mē panhõ Pahihti jakamã pu mē Tĩrtũm noo mã uræk nē te mē pahpê Apraãw tãmnhwý pyræk. Jakamã koja Apraãw nhĩpêxta pyrã nē mē pahto mex rax nē.

4

*Mojes kapēr te axte mē
pahpynēnh kêt pyræk ã harēnh*

*Rõmãn 7.1, 8.14-17;
Karatas 3.23*

1 E kot paj axte mē amã tanhmã mēhprĩjê jarēnh to ka mē inhma. Kojã mēhõ ra hkra mã mēmo hikukrêx nhõr kaxyw. Hikukrêx nē õ pika. Õ mēmoj piitã õr kaxyw. No nhũm hkraja kormã hprĩre nē hamaxpēr mex kêt jakamã nhũm kormã hprêk jamãr o pa. Nhũm hkraja arĩ te kãm àpēnh o pa xwýnh kot amnhĩ nhĩpêx pyrã nē amnhĩ krã hkôt ri amnhĩ nhĩpêx o pa hkêt nē. Kormã hipéêxà kapēr kôt ri amnhĩ nhĩpêx o pa. Nhũm hipéêxàja kot kãm õ mēmoj piitã õr kaxyw no ãm kormã hprêk jamã.

2 Tã kormã hkraja hprĩre ri nhũm hipéêxà tanhmã amnhĩ to nē ty. Nom nhũm hkraja mýr pê kormã õ mēmoj o amnhĩptàr kêt nē. Kormã hprĩre jakamã nhũm hipéêxà mýr pê kot kãm hamãr o pa xwýnhja kormã kãm hamãr o pa. Tã nhũm hipéêxà kot kãm amgrã jarēnh xwýnhnta

kato nhũm tãm mẽmoj piitã ho amnhĩptã. Ra àptãr mex nẽ hamaxpẽr mex nẽ amnhĩm ho amnhĩptãr pa.

³Tã Ijaew na prem ã amnhĩ nhĩpẽx anẽ. Amnepẽm kormã mẽ kot Mojes kapẽr kõt ri amnhĩ nhĩpẽx o pata ã na prem te mẽhprĩre hamaxpẽr kêeta pyrãk. Te kormã mẽ àptãr kêt pyrã nẽ jar pika ja kamã mẽ kot amnhĩ nhĩpẽx tũm kõt pix mã amnhĩ nhĩpẽx o pa. Mẽ kot amnhĩ nhĩpẽx tũm te kot amnhĩm mẽ unẽn nẽ mẽ kãm ê pyrãk o mẽ hipẽx nhũm mẽ hkõt pix mã amnhĩ nhĩpẽx o ri pa.

⁴Tã nhũm Tĩrtũm kot Kra hkukamã mẽ pahwỳr mẽnh xà hã arĩgrota kato hãmri nhũm mẽ pahwỳr kumẽ nhũm mẽ pahwỳr wrỳ nẽ mẽ pahpyrà nẽ mẽhõ nhõhy rũm kato. Nẽ mẽ pahpyrà nẽ gaa nẽ hprẽk nẽ mẽ ixpẽ Ijaew rom Mojes kapẽr piitã hkõt amnhĩ nhĩpẽx mex kumrẽx o ri pa.

⁵Jao te kot Mojes kapẽr pẽ mẽ papytãr pyrãk o mẽ panhĩpẽx pu mẽ hpãnhã pahpẽ Tĩrtũm kra kaxyw.

⁶Tã mẽ ixpẽ Ijaew kwỳjaja nẽ mẽ apẽ Ijaew kêt xwỳnh kwỳjaja ra mẽ pahpẽ Tĩrtũm kra jakamã na pre mẽ pahwỳr Kra Jejus Karõja rẽ nhũm mẽ pamã agjẽ. Hãmri nẽ mẽ pamã kapẽr o:

—Ra mẽ apẽ Tĩrtũm kra jakamã kêr ka mẽ kãm amnhĩ jarẽnh kaxyw nẽ kãm: “Pa Pa-paj” anẽ. Kêr ka mẽ ã kãm akapẽr anẽ. Anẽ.

⁷Jakamã na pu mẽ ra te

pahpẽ mẽ kãm paxapẽnh xwỳnh pyrãk kêt nẽ. Ra mẽ pahpẽ Tĩrtũm kra jakamã na hte mẽ panhĩpẽx o te Kra Jejus nhĩpẽx pyrã nẽ mẽ pahto mex nẽ.

Mojes kapẽr kõt mẽ kot amnhĩ nhĩpẽx xwỳnhjẽ jarẽnh

Sikũn Korõt 11.3-4; Korosẽ 2.16-19; Eprẽw 6.1; Wam Pẽtre 1.14

⁸Nẽ amnepẽ mã kormã mẽ ate amnhĩ kaxyw Jejus kõt ajamaxpẽr kêt ri na ka prem Tĩrtũm jarẽnh mar kêt nẽ. ãm atỳx ri sãnti mã mex ã harẽ nẽ kãm amnhĩ jagrer o ri apa. Nẽ amã mẽmoj kĩnh nẽ amã hprãm xà tanhmã amnhĩ to hwỳr to ho ri apa. Te mẽ kãm mẽ àpẽnh o mẽ pa xwỳnhjaja kot amnhĩ nhĩpẽx pyrã nẽ sãnti mã tanhmã amnhĩ nhĩpẽx to ho ri apa. Nom sãntija kęp Tĩrtũm kêt.

⁹Tã ka prem Tĩrtũm jarẽnh ma nẽ hkõt amnhĩ xunhwỳ nhũm amnhĩ tã mẽ apumu. Tã tãm kot amnhĩ kaxyw mẽ paxunhwỳr jakamã kwa mon ka mẽ ra axtem nẽ akupỳm sãnti hkõt amnhĩ nhĩpẽx kaxyw? Nã mẽ ajamaxpẽrja mex kêt. Sãnti nhĩpẽxta tanhmã koja amnhĩ to nẽ mẽ ato ajuta? ãm mẽ kot ãkra ho hipẽx pix jakamã hihtỳxti hã. Amarĩ kuhẽ xà kamã kuhẽ ho kuhẽ xwỳnh kẽnã. Tã te kot akupỳm amnhĩ kõt mẽ arẽnh kaxyw pyrãk o mẽ anhĩpẽx ka mẽ ra axtem nẽ akupỳm hkõt amnhĩ nhĩpẽx kaxyw. Kwa nã mẽ ã ri amnhĩ nhĩpẽx anhỳr kêt nẽ.

¹⁰ Nē na ka htem amnhī kukamā ajamaxpēr o:

—Na pre hte Ijaewjaja Mojes kapēr xà hkôt arīgro hkwy hā axtem tanhmā amnhī nhīpēx to nē mēmo mytwrý hā tanhmā amnhī nhīpēx to nē mēmo amgrà hā tanhmā amnhī nhīpēx to. Tā kot paj mē uràk nē ā amnhī nhīpēx anhÿr o ixpa. Kē Tirtüm ja hā ixpumu nē inhmex ā ijarē. Anē.

Kwa mē ā ajamaxpēr anhÿr kêt nē. Mon ka htem axtem nē ri ā ajamaxpēr anē? Na hte Tirtüm ā mē pahte amnhī nhīpēx anhÿr ā mē pahpumunh kôt mē pamex ā mē pajarēnh kêt nē.

¹¹ Na pa ja hā mē ajarēnh ma nē tee ri mē akukamā ijamaxpēr. Te ixte Tirtüm kapēr o mē ajahkre kaprý ho ri ixpa pyràk.

Karatas nhō xwÿnhjaja kot Pawre ho mex ā mē harēnh

Wam Korīt 9.21-23

¹² Kwa ixkrāmnhwÿjaja. Ixpē Ijaew tā te ixpē Ijaew kêt pyràk o amnhī nhīpēx o ri mē apē Ijaew kêt xwÿnhjē hkôt ri ixpa. Jao Kris kapēr gryk ā mē inhīgētjaja kot amnhī nhīpēx kaga nē axte hkôt amnhī nhīpēx kêt nē. Tā kwa mē ixpyrà nē ā amnhī nhīpēx anē. Wem ma amnhī to amōr gri kêt wehe. Wam ixte mē awÿr inhmōrta ā na pa pre mē amā Tirtüm kapēr jarēnh o ri mē akôt ixpa ka prem inhma nhūm ja mē amā mex nē ka mē ja hā tanhmā ixto hkêt nē.

¹³ Na pa pre ixàà nē mē awÿr mō nhūm ixàja ixto htÿx

nē pa tokyx ixkator nē ma akupÿm mē arūm inhmōr kêt nē arī mē amā Tirtüm kapēr jarēnh o ixpa.

¹⁴ Kormā ixà nē tanhmā ixkute htā ka prem ja hā ixpumu nē ixto mex nē ixkamā anhōkre kahak kêt nē. Na ka prem te ixto Jejus Kris nhīpēx pyràk o inhīpēx. Nē te ixto Tirtüm kapēr o wrÿk xwÿnh nhīpēx pyràk o inhīpēx.

¹⁵ Jao mē amā ixkīnh nē ā inhīpēx anē nē mē amā ixto mex pix prām. Nē nhÿri ixpumu nē ixkamā axukaprī nē inhmā akapēr o:

—Hēxta waa nē. Anopxàà. Inhmā amnhī no kaxàr nē amā ōr prām nom tanhmā kot pa mē amnhī to nē hkapa nē amā kugō? Anē.

Nē mē amā inhmā mēmoj mex pix nhōr prām. Tā ra tanhmā ajamaxpēr to nē axtem nē te mē amā ixkīnh kêt pyràk o inhīpēx.

Mē no kupyx xwÿnhjaja kot mē hamaxpēr o pihkàr ā mē harēnh

¹⁶ Nē na pa pre ām hāmri mē amā Tirtüm kapēr jarēnh o ri mē akôt ixpa. Nom ra mē amā mar prām kêt jakamā na ka mē axtem nē inhīpēx o te ixte mē akutā amnhī xām pyràk.

¹⁷ Mē amā Tirtüm kapēr o mē hēx xwÿnhjaja te mē kām mē akīnh pyràk o mē anhīpēx no ām mē kām akīnh kêt. Na htem mē amex kaxyw tanhmā mē amā kapēr to hkêt nē. Ām mē ate mē mar nē mē gryk ā ixkaga nē mē hkôt ri amnhī nhīpēx o apa

pix prām xàj na htem mẽ akôt tanhmã mẽ amã hêx to ho pa.

¹⁸ Pa mẽ harênh ma hãmri nê mẽ kamã inhgryk o ã mẽ amã mẽ harênh anhÿr kêt nê. Koja mêmhõ mẽ awÿr mra nê ixwakre kamã rÿ inhnoo mã mẽ amã mẽmoj mex jarê nhũm ja inhmã mex nê. No nhũm mẽ amã mẽ hêx xwÿnhjaja axtem nê mẽ ajamaxpêr o pihkâr pix kaxyw na htem mẽ awÿr mrar nê mẽ amã ã ujarênh o pa anê.

Pawre kot tee ri mẽ hkukamã hamaxpêr ã harênh

¹⁹ Te mẽ apê ixkra pyrâk jakamã na pa hte mẽ ate amnhĩ nhĩpêx ã mẽ apumu nê tee ri ijamaxpêr nê ixkaprĩ htÿx nê. Te nhÿhÿnh ixã htÿx nê ixte amnhĩ xã htÿx kamã ijamak o ri ixpaja pyrâk. Rÿ te mẽ hpijagri ho mẽ hikwÿ xwÿnh ôhy xã htÿxta pyrâk. Mẽ ate Kris kôt amnhĩ nhĩpêx mex o apa hprãm xàj na pa hte ã amnhĩ nhĩpêx anhÿr o ri xpa.

²⁰ Hêxta waa nê. Kop apu ra mẽ awÿr ixpôx nê mẽ akôt ixpa ronhÿx pa ixkĩnh tÿx kumrêx. Nhÿx pa ra ixprĩ hã mẽ amã ixkapêr ka mẽ inhma. Nê amnhĩ tã inhmã mẽ akĩnh tÿx ã mẽ akamã inhgryk kêt ã ixpumunh kurê kumrêx. No kagà pix kãm ixkapêrja ka mẽ kamã harê nom aprĩ hã inhmar mex kêt nê. Na pa tee ri mẽ akukamã ijamaxpêr o ixkaprĩ htÿx nê ixpa.

Mojes kapêr kôt mẽ kot amnhĩ nhĩpêx xwÿnhjê jarênh

Eprêw 12.18-29

²¹ Kwa mẽ amã arĩ Mojes kapêr kôt amnhĩ nhĩpêx o ri mẽ apa hprãm xwÿnhjaja. Mãn ka mẽ kormã aprĩ hã Mojes kapêr piitã mar par kêt jakamã na ka mẽ amã hkôt amnhĩ nhĩpêx prãm. E pa ixprĩ hã mẽ amã tanhmã harênh to ka mẽ inhma.

²² Nã Tirtũm kapêr ã kagà htũm kot finat Apraãw jarênhja. Na pre hkra myja wa hamêxkrut. Prõ Sara kamã ja nê kot amnhĩm haprôr nhũm ri kãm àpênh o pa xwÿnh Aga kamã ja.

²³ Kãm àpênh xwÿnh kamã ja na pre mẽ pahpiitã mẽ pahpyrà nê amarĩ kato. No hprõ Sara kamã ja. Sara na pre ra hpigêx tÿx nê. Ra hkamrô hkêt rÿy nê pa htã nhũm Tirtũm kot wa hkra hkukamã wa kãm ujarênh xã hkôt nhũm Apraãwja htu nhũm wa hkrata kato. Tirtũm kot hkukamã wa kãm harênh xã hkôt nhũm kamã hkra nhũm kato.

²⁴⁻²⁵ Tã wa nita ã wa harênh kot anhÿr. Na pre Tirtũm mẽmoj jarê. Te ho wa urâk o wa harê no ãm hã kuxi nê ã wa harênh anê. Jakamã ni wa harênhja te kot Tirtũm kapêr pijakruuta pyrâk. Wam ni Agata te kot hixêt prêk pê Sinai nhĩmök ã Tirtũm kot Mojes mã kapêrta pyrâk. Hixêtja pika pê Arap kamã na pre. Jakamã nhũm Tirtũm Ijaew kaxyw Mojes mã kapêr nhũm kuma nê amnhĩ xô ri mẽ kãm hã kagà. Tã na hte arĩ jarãhã mẽ hkwÿyjaja hamaxpêr o:

—E kot paj mẽ panhîgêt finat Mojes kapêr kôt amnhî nhîpêx o ri ixpa nhũm Tirtũm ja hã ixpumu nẽ amnhĩm inhmex ã ijarẽ nẽ ixto hkra.

Anhÿr o hamaxpêr no ãm ã hamaxpêr anhÿr kaprÿ. Æ mẽ hamaxpêr anhÿr xwÿnhjaja te mẽ kêp Apraãw mã àpênh xwÿnh Aga hkrata pyræk. Nẽ krĩ pê Jerujarẽ kêp Ijaew nhõ krĩ jakamã haxwÿja te kêp Agata pyræk. Nhũm krĩ nhõ xwÿnhjaja haxwÿja te mẽ kêp Aga hkrata pyræk. Na htem htÿx Tirtũm kot mẽ omunh nẽ mẽ ho hkra hprãm xaj Mojes kapêr kôt amnhî nhîpêx o pa hã amnhî jarênh kaprÿ. Jakamã haxwÿja te mẽ kêp mẽ kãm mẽ àpênh o pa xwÿnh pyræk.

Jejus kôt mẽ kot amnhî kaxyw hamaxpêr xwÿnhjê jarênh

²⁶ Nẽ hapu hã Tirtũm kapêrta. Apraãw prõ kumrêx Saraja te kêp kaxkwa kamã Jerujarẽ õja pyræk. Krĩ ja kamã mẽ pa mã xwÿnhjaja te mẽ kêp mẽ kãm mẽ àpênh xwÿnhjê pyræk kêt. Ra mẽ kot amnhî kaxyw Kris mã hamaxpêr nẽ hkôt amnhî xunhwÿr jakamã na htem hamaxpêr o:

—Ixte amnhî kaxyw Kris mã ijamaxpêr nẽ hkôt amnhî xãm jakamã na Tirtũm ixpumu nẽ amnhĩm inhmex ã ijarẽ nẽ ixto hkra. Anẽ.

ãm hãmri na mẽ ã wantajê rom hamaxpêr anẽ. Tã ã mẽ hamaxpêr anhÿr xwÿnhjaja te mẽ kêp Sara hkra pyræk.

²⁷ Tirtũm kapêr ã kagã htũm kot ja jarênh kot:

E kormã akra hkêt nẽ apa htã kêt ka mãmrĩ akĩnh nẽ ri apa.

Nẽ kormã apijagri hkêt tã kêt ka akĩnh tÿx nẽ ri apa.

Kormã amjên kot akamã hkra hkêt nẽ te kot akaga pyræk tã kot kaj akra nẽ akanrêhã atàmnhwÿ xohtô rax nẽ.

Mẽ ohtô rax o ra amjên kot nhãm hprõ hõ kamã hkrata jakre. Anẽ.

Æ kapêr kot anhÿr o mẽ kot amnhî kaxyw Kris kôt hamaxpêr xwÿnhjê hkukamã mẽ ohtô hã mẽ harê.

²⁸ E ixkràmnhwÿjaja. Te mẽ apê Ijak kanrêhã htàmnhwÿ pyræk. Koja mẽhõ amnhî kaxyw Kris kôt hamaxpêr hãmri nẽ te kêp Apraãw mẽ hprõ Sara wa hkra Ijak kanrêhã htàmnhwÿ pyræk. Na pre Tirtũm amnepé mã kormã Ijak kator kêt ri ra hkukamã hamaxpêr nẽ Apraãw mã harê. Nẽ mẽ papajaja nhũm Tirtũm Ijak pyrã nẽ mẽ pakukamã mẽ pamã hamaxpêr nẽ amnhĩm mẽ paxunhwÿr ã amnhî jarê. Tã ra mẽ ate amnhî kaxyw Kris kôt ajamaxpêr jakamã te mẽ apê Ijak kanrêhã htàmnhwÿ pyræk.

²⁹ Nhũm Apraãw kot Aga kamã hkra Ismaewja na pre hprõ kumrêx kamã hkrata pumu nẽ kãm hkĩnh kêt nẽ kamã gryk pix o pa. Nẽ tanhmã hipêx to pê ri haprÿ ho ri hkôt pa. Tã mẽ kot amnhî krã hkôt amnhî to

Tirtūm kra hprām xwýnhjaja na htem ã mẽ pahte Kris kôt amnhĩ xunhwÿr xwýnhjê nhĩpêx anhÿr o pa. Na htem Tirtūm kot mẽ pahto hkra hã mẽ pahpumu nê Ismaew kot Ijak nhĩpêx pyrã nê mẽ pakamã gryk pix o pa. Nê tanhmã mẽ pahtomnuj to pê mẽ pahto kapêr o ri pa.

³⁰Tã no ãm kwãr mẽ mãmrĩ ã mẽ panhĩpêx anê. Koja mẽ pahpyrà nê nhÿrmã Tirtūm nhõ krĩ hwÿr àpir kêt nê. Tirtūm kapêr ã kagã htūm kot mẽ harênh kot:

Na pre Tirtūm Apraãw mã kapêr nê kãm: “E kêt ka amnhĩ nê ate haprôr nhūm kot amã àpênh o ri pa xwýnh mẽ hkrata wa hano. Koja hkrata amÿr pê amnhĩm mẽmoj to àrĩk kêt nê.

Ate aprõ kumrêx kamã akrata pix koja hõja rom amÿr pê mẽmoj piitã ho amnhĩptãr pa.” Anê.

³¹Tã te mẽ pahpê àpênh xwýnh kamã hkrata pyrãk kêt. Te mẽ pahpê Apraãw prõ kumrêx kamã hkrata pyrãk. Te Tirtūm kot Ijak kukamã hamaxpêr pyrãk o na pre mẽ pakukamã hamaxpêr.

5

¹Nê Kris kot mẽ pahte amnhĩ nhĩpêx tūm pê mẽ papytãr jakamã kwa ixkrãmnhwÿjaja. Kêt ka mẽ arĩ ate amnhĩ nhĩpêx tūm kôt amnhĩ nhĩpêx kêt nê. Ra Kris kot ja pê mẽ papytãr nhūm mẽ paxãmnhĩx ri papa kênã.

Mẽ pahpê Tirtūm kra hprãm xaj tanhmã mẽ pahte amnhĩ nhĩpêx to

Juãw 8.32, 8.36; Korosê 2.20

²E mẽ inhma. Kot kaj mẽ atõ Tirtūm kot ato hkra hprãm xaj amnhĩ my kwryt kã krãhta hã kot kaj mẽ ãm amarĩ ã amnhĩ nhĩpêx anhÿr kaprÿ. Na hte Tirtūm ja hã mẽ omu nê ãm hã mẽ omu. Kot kaj ã amnhĩ nhĩpêx anê nhūm Krisja ãm ate amnhĩ tomnuj mÿrapê anê htyk kaprÿ pyrãk o amnhĩ nhĩpêx.

³Hãmri nhūm Tirtūm tee ri ja hã mẽ apumu nê te kot ã mẽ amã kapêr anhÿr pyrã nê mẽ amã kapêr o:

—E ra amã apê Kris kwÿ hprãm xaj amnhĩ my kwryt kã krãhyr jakamã kot kaj mããnêñ Mojes kapêr piitã hkôt amnhĩ nhĩpêx o ri apa.

Anhÿr o mẽ amã kapêr pyrãk.

⁴Nom kot kaj mẽ atõ amnhĩ kukamã ajamaxpêr o:

—Nà kot paj Mojes kapêr piitã hkôt amnhĩ nhĩpêx o ri ixpa nhūm Tirtūm ja hã ixpumu nê inhmex ã ijarê nê ixto hkra kãm ga. Anê.

No ãm ja kot anhÿr kêt. Na hte Tirtūm ã mẽ pahte amnhĩ nhĩpêx anhÿr ã mẽ pahpumunh kôt mẽ pahto hkra hkêt nê. Jakamã kot kaj mẽ ã amnhĩ nhĩpêx anê nê te ate Kris kutã amnhĩ xãm pyrãk nhūm Tirtūm ato mex kêt nê.

⁵Nom kot ka mẽ axtem ajamaxpêr o:

—Ra ixte amnhĩ kaxyw Kris kôt ijamaxpêr nê hkôt amnhĩ

xãm jakamã koja Tirtũm hã
ixpumu nẽ inhmex ã ijarẽ.
Karõ ra kot ã inhmã ja ho
amnhĩrit anhỹr kẽnã.

Anhỹr o ajamaxpẽr. ãm
hãmri ã mẽ ajamaxpẽr
anhỹrja.

⁶ Jakamã mẽ pahpẽ Kris
kõt amnhĩ xunhwyr xwỹnhjẽ
kamã ra mẽ kot amnhĩ my
kwrýt kà jakar xwỹnhjaja
nhũm mẽ pahkwỹjaja ã
amnhĩ nhĩpẽx anhỹr kêt nẽ.
Tã nhũm Tirtũm ja hã mẽ
pahpumu nhũm ja tanhmã
kẽp kute hkêt. Na hte mẽ
pahte amnhĩ my kwrýt kà
jakar ã mẽ pahpumu nẽ
ãm hã mẽ pahpumu. No
kot pu mẽ Jesus Kris kõt
amnhĩ nhĩpẽx mex o ri
papa. Nẽ amnhĩ kaxyw hkõt
pajamaxpẽr týx o ri papa. Nẽ
mẽ pamã axpẽn kĩnh pê tãm
ri axpẽn nhĩpẽx o ri papa. Ja
na kêt Tirtũm kãm hprãm.

⁷ Ra mẽ ate Kris kõt amnhĩ
nhĩpẽx mex o ri apa htã nhũm
mẽ hẽx xwỹnhjaja mẽ awyr
mra nẽ tee ri ã mẽ ate amnhĩ
nhĩpẽx anhỹr ã mẽ apumu nẽ
tanhmã mẽ amã Tirtũm kapẽr
o hẽx to. Ka mẽ ama nẽ axte
Tirtũm kõt amnhĩ nhĩpẽx mex
hkêt nẽ.

⁸ No ãm ã mẽ kot mẽ amã
mẽ ujarẽnh anhỹr xwỹnhjaja
na pre Tirtũm mẽ awyr mẽ
rẽnh kêt nẽ. Tirtũm kot amnhĩ
wyr mẽ awyr xwỹnh kẽnã kot
kêt axtem nẽ mẽ awyr kapẽr o
mẽ amã hẽx o mẽ pa xwỹnhjẽ
rẽ.

⁹ Nẽ koja mẽhõ pixi nẽ
tanhmã amnhĩ tomnuj to
nhũm mẽ piitã ja hã omu nẽ

urak nẽ kãm tanhmã amnhĩ
tomnuj to hprãm.

¹⁰ No kêt mẽ apẽ Kris kwỹ
na ka mẽ. Ixte ja hã mẽ
apumunh mex. Kot kaj mẽ
axte ixkapẽr ma nẽ akupỹm
Kris kõt amnhĩ nhĩpẽx mex
o ri apa. Nà kot kaj mẽ ã
amnhĩ nhĩpẽx anẽ nẽ axte mẽ
kot mẽ apẽ àmnar xwỹnhjẽ
kapẽr mar nẽ mẽ hkõt amnhĩ
nhĩpẽx kêt nẽ. Koja Kris mẽ
atã mẽ homnuj týx kumrẽx
nhũm mẽ rĩ amnhĩ pumu.

*Pawre kot mẽ kot amnhĩ
jakar ã mẽ kãm karõ hkêt ã
harẽnh*

¹¹ Nẽ na hte Tirtũm kapẽr o
mẽ hẽx xwỹnhjaja tanhmã mẽ
amã ixto hẽx to ho pa. Ixte mẽ
kãm Tirtũm kot mẽ ho hkra
kaxyw mẽ kot amnhĩ my
kwrýt kà jakar ã mẽ kãm karõ
hã ixto ri hẽx o pa. Nom ixte
anhỹr kêt ixkrãmnhwỹjaja.
Kop apu ixte mẽ kãm ja hã
karõ ho ixpa ronhỹx Ijaew
krãhtũmjaja ja hã ijarẽnh ma
nhũm ja mẽ kãm mex nẽ
nhũm mẽ axte Kris ã tanhmã
inhĩpẽx to hkêt nẽ. Nom ixte
ja hã mẽ kãm karõ hkêt. ãm
ixte mẽ kãm Kris kot mẽ panẽ
pĩ kahpa hã htyk jarẽnh pix
mỹrapẽ na htem ixkamã gryk
nẽ.

¹² Hẽxta waa nẽ. Mẽ kot
mẽ amã hẽx o pa pê mẽ aja-
maxpẽr o pihkãr xwỹnhjaja
kop mẽ ãm mẽ anhõ krĩ rũm
hapõx nẽ ma nhỹhỹm hapẽx
ronhỹx pa ixkĩnh týx kumrẽx.

*Mẽ pahte axpẽn to mex o
papa hã mẽ pamã karõ*

*Wam Korõt 13; Eprẽw 13.3,
13.16; Wam Pẽtre 1.22; Wam*

Juãw 3.11

13-14 Kwa ixkràmnhwýjaja. Nà na pre Kris amnhĩ kaxyw mẽ parê. Axte mẽ pahte amnhĩ nhĩpêx tũm kôt amnhĩ nhĩpêx kêt kaxyw. Ra kot ã mẽ pahte amnhĩ nhĩpêx anhÿr pê mẽ papytâr jakamã kêr ka mẽ amnhĩ tâ ja ma nê axte atÿx ri amã hprãm xà hkôt tanhmã amnhĩ nhĩpêx to ho ri apa hkêt nê. Mẽ ãm amã axpên kĩnh pix o ri axpên kôt apa. Nê nhãm mẽ hipêx o te ka amã amnhĩ tâ ma pyræk o mẽ hipêx. Jao mẽ piitã tãm mẽ hipêx o ri apa. Kot kaj mẽ ã amnhĩ nhĩpêx anê nê te mẽ ate wam Tĩrtũm kapêr piitã hkôt amnhĩ nhĩpêx pyræk.

15 No kot kaj mẽ axtem nê axpên kãm axoprê ho ri apa hãmri nê te ra mẽ ate axpên to ajapêx par o amõr pyræk o amnhĩ nhĩpêx. Te mry xoprê kot axpên par o pata pyræk. Kwa mẽ ã amnhĩ nhĩpêx anhÿr hkêt nê. Mẽ ãm axpên to mex pix nê mẽ axpên kãm axukaprĩ ho ri axpên kôt apa.

Mẽ pahte amnhĩ nhĩpêx nyw jarênh

Matêwre 26.41; Rõmãn 8.1-11

16 Nê kwa kêr ka mẽ amnhĩ to Tĩrtũm Karõ wý kê mẽ amã mẽ ate amnhĩ nhĩpêx nyw jagjê ka mẽ axte ate amnhĩ nhĩpêx tũm kôt amnhĩ nhĩpêx hkêt nê. ãm mẽ ate amnhĩ nhĩpêx nyw kôt pix mã mân amnhĩ nhĩpêx o ri apa.

17 Tĩrtũm Karõ kot amnhĩ nhĩpêxja nê mẽ pahte amnhĩ nhĩpêx tũmja wa kot axpên

pyræk kêt. Te wa kot axpên kutã amnhĩ xãm nê wa pi-japu pyræk. Jakamã kot puj mẽ pahte amnhĩ nhĩpêx tũm o amnhĩ nhĩpêx nê Tĩrtũm Karõ mã hprãm xà hkôt amnhĩ nhĩpêx hkêt nê.

18 No kot puj mẽ Tĩrtũm Karõ hkôt amnhĩ nhĩpêx nê ra jar pika ja kamã mẽ kot amnhĩ nhĩpêx kôt ri amnhĩ nhĩpêx kêt nê. Ra axtem mẽ pahte amnhĩ nhĩpêx nyw o amnhĩ nhĩpêx.

19 Jar mẽ kot amnhĩ nhĩpêx tũmta mex kêt. Ra mẽ piitã mẽ kot ja pumunh mex.

Na htem htÿx ri hkwýjê kamã hpijaam kêt o pa.

Jao mẽmyjaja hprõ kuhpa hã nhãm mênijê ho amnhĩkati.

Nhũm mẽ hprõjaja mẽ mjên kuhpa hã nhãm mẽmyjê ho amnhĩkati.

Nê mẽmy hkwýjaja axtem nê mẽmyjê hkwý ho amnhĩkati.

Nê mênĩ hkwý haxwýja axtem nê mênijê hkwý ho amnhĩkati.

20 Nê mẽ kãm mẽmoj mẽ hikukrêx japê htÿx o kãm Tĩrtũm kĩnh jakre.

Nê mẽmoj kaxyw ma wa-jaga hwÿr amnhĩ to pa.

Nê hkwýjê kamã oprê ho ri pa.

Nê mẽmoj tâ axpên kãm gryk pix nê.

Nê mẽmoj to axpên pê õxÿ nê.

Nê mẽmo mÿrapê axpên pê anhgrà nê amÿm ahpÿnhã ri pa.

21 Nê mẽmoj tâ axpên

kamnhĩx rāhā ho ri pa.

Nē axpā nē mē grer kām ri
axpēn kām hpījaam kēt o
ri pa.

Ā na htem mē kot amnhĩ
nhĩpēx tūm kōt amnhĩ nhĩpēx
o ri mē pa xwŷnhjaja amnhĩ
nhĩpēx anē. Ā mē kot amnhĩ
nhĩpēx anhŷr xwŷnhjaja koja
mē Tirtūm nhō krī hwŷr gjēx
kēt nē. Ra ixte mē amā ja
jarēnh tā pa axte mē amā
harē. Mē ate hā ano htŷx rāhā
ho ri apa kaxyw.

²² No mē kot amnhĩ nhĩpēx
nywja axtem na.

Tirtūm Karō hkōt mē kot
amnhĩ nhĩpēx nyw
o amnhĩ nhĩpēx
xwŷnhjaja na htem
axtem kām axpēn kīnh
nē.

Nē hkīnh nē ri hamakētkati
nē àmnhĩx ri axpēn kōt
pa.

Nē gryk tokyx anhŷr hkēt
nē. Ām axpēn to mex pix
o ri axpēn kōt pa.

Nē tām axpēn nhĩpēx.

Nē kot mēmoj tā amnhĩ
jarēnh xā hkōt tanhmā
mēmoj to.

²³ Nē axpēn mā kapēr mā
hprī ho ri axpēn mā
kapēr.

Nē mēmoj punuj piitā nē
amnhĩ to htŷx o ri pa.

Ā na hte mē kot Tirtūm Karō
hkōt amnhĩ nhĩpēx o mē pa
xwŷnhjaja Karō nhŷ hā amnhĩ
nhĩpēx nyw o amnhĩ nhĩpēx
anhŷr o pa. Jao mǎānēn Mojes
kapēr kwŷm ri amnhĩ nhĩpēx
hkēt nē. Jakamā koja mēhō
mē pahte amnhĩ nhĩpēx nyw

nē tanhmā mē pahkurē hto
hkēt nē.

²⁴ Tā mē pahpē Jejus Kris
kwŷ jakamā na pu mē pahte
amnhĩ nhĩpēx tūmja nhĩpēx o
te mē pahte amnhĩ nē hpīr
pyrā nē axte hkōt amnhĩ
nhĩpēx kēt nē.

*Tirtūm Karō hkōt mē pahte
amnhĩ nhĩpēx ā mē pamā karō
Epēs 4.23-24; Korosē 3.10*

²⁵ Tā ra Tirtūm Karō kot mē
pahto hkra jakamā kwa kēr
pu mē ām kōt pix mā amnhĩ
nhĩpēx nyw o amnhĩ nhĩpēx o
ri papa.

²⁶ Kot puj mē ā amnhĩ
nhĩpēx anē hāmri nē mēmoj
tā mē pahkwŷjē mā amnhĩ to
jarkrar o ri papa hkēt nē. Kot
puj mē ā amnhĩ nhĩpēx anē
nhūm mē pakamā gryk nē.
Jakamā kēr pu mē ā amnhĩ
nhĩpēx anhŷr o ri papa hkēt
nē.

6

*Mē pahte tanhmā axpēn to
ajuta hto hā mē pamā karō*

*Matēwre 18.15-17; Rukre
17.3-4; Sikūn Tesarōn 3.14-15;
Xiakre 5.19-20*

¹⁻³ Kwa ixkrāmnhwŷjaja.
Mē apē Tirtūm Karō hkōt
amnhĩ nhĩpēx o ri mē apa
xwŷnhjaja. Koja Kris kōt
akwŷjē hō tanhmā amnhĩ
tomnuy to ka mē ja hā omu
nē ā amnhĩ nhĩpēx anhŷrja
nē kām akapēr. Nom kēr
ka mē kamā agryk kamā
kām tanhmā nē hkēt nē. Ām
kām akapēr mā aprī ho kām
akapēr nē akupŷm tām ām.
Nom kwa kēr ka mē amnhĩ

pumunh mex nê uràk nê ã amnhĩ tomnuj anhyr kêt nê.

Kot ka mẽ atõ ã kot amnhĩ nhĩpêx anhyr ã omu nê ãm omu nê nê tanhmã kãm akapêr to hkêt nê. Nê ajamaxpêr o:

—Tk. Kwâr mãmri ã amnhĩ nhĩpêx anê. Pa ja nê tanhmã kãm ixkapêr to hkêt nê. Kurom ixte amnhĩ nhĩpêx mex o ri ixpa kênã.

Anhyr o ajamaxpêr japêr. Kwa mẽ ã ajamaxpêr anhyr kêt nê. Kot kaj mẽ ã ajamaxpêr anê nê kãm akapêr kêt nê hãmri nê te ate amnhĩ to mex ã amnhĩ jarênh kapry pyrak.

Nê kêr ka mẽ axpên to ajuta mex o ri axpên kôt apa. Jao Kris kôt amnhĩ nhĩpêx mex nê.

⁴⁻⁵ Nê na htem piitã amnhĩm àpênh pix tânopxar o pa. Jakamã kêr ka mẽ amnhĩ tânopxar pê tãm amnhĩ nhĩpêx rãhã ho ri apa. Hãmri nê ja hã amnhĩ pumu nê akĩnh nê. Nom kwa kêr ka mẽ ate amnhĩ nhĩpêx mex o akwýjê jakrenh ã mẽ kãm amnhĩ to jarkrar o ri apa hkêt nê.

⁶ Nê kêr ka mẽ kot Tĩrtũm kapêr o mẽ ajahkre xwýnhjê ho mex nê mẽ kãm mẽmoj nhõr o ri apa.

⁷ Koja Tĩrtũm nhỹrmã mẽ pahtĩr ri mẽ pahte amnhĩ nhĩpêx ã mẽ pahpumunh kôt tanhmã mẽ pajarênh to. Hãmri pu mẽ tee ri amnhĩ kukamã pajamaxpêr nom amnhĩ nê tanhmã kãm paxêx to hkêt nê. Koja mẽhõ kãm amnhĩ to hêx nê te tãm kot amnhĩ mã hêx pyrak nom kot

puj mẽ Tĩrtũm mã amnhĩ nê tanhmã paxêx to hkêt nê.

⁸ Jakamã kot kaj mẽ amnhĩ krã hkôt tanhmã ri amnhĩ nhĩpêx to rãhã ho apa hãmri nê nhỹrmã ty nê Tĩrtũm pê awry rax ã ri apa. Nom kot kaj mẽ Tĩrtũm Karõ mã hprãm xà hkôt pix mã amnhĩ nhĩpêx nê nhỹrmã ty nhũm Tĩrtũm akupým ato atĩr ka kuri amex nê ajamakêtkati atĩr tũm nê ri apa ho apa.

Mẽ pahte axpên to mex rãhã hã mẽ pamã karõ

Atre 20.35; Wam Korĩt 15.58; Xitre 3.14; Eprêw 13.3, 13.16; Xiakre 1.27

⁹ Jakamã kwa kêr ka mẽ arĩ tãm ri amnhĩ nhĩpêx nê tãm axpên nhĩpêx o ri axpên kôt apa nê jam anhũrer kêt nê. Mẽ ã amnhĩ nhĩpêx o ri apa anhyr rãhã ty nhũm Tĩrtũm nhỹrmã ja hã mẽ ato mex rax nê.

¹⁰ Tã kêr pu mẽ arĩ Kris kôt pahtõjê ho mex rãhã ho ri papa. Nom mẽ tapxipixjê ho mex kêt nê. Pu mẽ mẽ piitã mẽ ho mex o axpên pyrak.

¹¹ E ixte mẽ amã kagã nhĩpêx nê mênh nhũm mẽ ate ja hã ixpumunh kaxyw kot paj pam kagã jatur xà hã inhĩkra ho inhĩxi nhĩpêx ka mẽ ixte inhĩxi hã kagã rũnhtita pumu.

Jejus kot mẽ panê htyk ã Pawre kãm harênh prãm ã harênh

Wam Korĩt 1.22-24, 2.1-2

¹² Nê mẽ amã Tĩrtũm kapêr o mẽ hêx xwýnhjaja na htem hamaxpêr o:

—Nà kot paj Karatas nhõ xwỳnhjê mã Kris pĩ kahpa hã htyk ã harēnh o ri ixpa hkêt nē. Kot pa anē nhũm mẽ ixpê Ijaew kwỳjaja ja hã inhma nē hã tanhmã inhĩpêx to. Ja py-maj kot paj mẽ kãm tanhmã harēnh to hkêt nē. Kot paj ãm mẽ kot amnhĩ my kwỳt kà jakàr pix ã mẽ kãm karõ kē mẽ ixkapēr xà hkôt ã amnhĩ nhĩpêx anē. Pa hã mẽ omu nē ma ixkwỳjê mã mẽ hã amnhĩ to jarkrar o ri ixpa. Anē.

¹³ Te mẽ kot finat Mojes kapēr kôt ri amnhĩ nhĩpêx pyræk tã no na htem ã amnhĩ nhĩpêx anhỹr kêt nē. Ra mẽ kot amnhĩ jakàr tã no ãm Mojes kapēr piitã hkôt amnhĩ nhĩpêx hkêt nē. ãm hkwy hkôt pix mã amnhĩ nhĩpêx o pa. Nom kot kaj mẽ ama nē mẽ uræk nē amnhĩ jakà nhũm mẽ ja hã mẽ apumu nē hkĩnh nē. Nē ma ri mẽ hkwyjê mã mẽ atã amnhĩ to jarkrar o ri pa nē mẽ kãm:

—E Karatas nhõ xwỳnhjaja na pa prem mẽ kot amnhĩ my kwỳt kà jakàr ã mẽ kãm karõ nhũm mẽ inhma nē mẽ pah-pyrà nē ã amnhĩ nhĩpêx anē. Anē.

¹⁴ No pa na pa hte ã mẽ kãm mẽmoj tã karõ anhỹr o ri ixpa hkêt nē. ãm Tĩrtũm kot mẽ pahto hkra kaxyw mẽ panhõ Pahihti Jejus Kris kot mẽ nē htykja pix na pa hte mẽ kãm harē. Ra kot inhnē htyk jakamã te pa ixte kuri ijēt nē ixtyk pyræk. Jakamã ra jar pika ja kamã mẽ kot amnhĩ nhĩpêxja te ixpê htyk

nē hapêx pyræk pa axte hkôt amnhĩ nhĩpêx kêt pyræk.

¹⁵ No mẽ kot amnhĩ my kwỳt kà jakàr xwỳnhjaja nē mẽ kot amnhĩ jakàr kêt xwỳnhjaja na hte Tĩrtũm ja hã mẽ omu nē ãm mẽ omu. ãm mẽ pahte amnhĩ nhĩpêx nyw o amnhĩ nhĩpêx o ri papaja pix na kãm hprãm.

¹⁶ Kot kaj mẽ ã amnhĩ nhĩpêx anhỹr o ri apa nē apē Tĩrtũm kra mex nhũm mẽ ato mex rax nē. Nē mẽmoj to mẽ akutã nojarēt rãhã nē. Ka mẽ axãmnhĩx ajamakêtkati nē ri apa ho apa.

¹⁷ Nē na prem Kris ã ixtak rax nē nhũm ixkatut ã ixtak xà arĩ rãhã nē pa hte hã ixpa. Ixte Jejus Kris mã tanhmã amnhĩ nhĩpêx to xwỳnh ã ixto amnhĩrĩt xà na. Jakamã kē mēhõ axte Jejus kot mẽ awỳr inhmēnh ã tee ri ixpumu nē tanhmã hã ixkukjēr to hkêt nē.

¹⁸ E ixkrãmnhwỳjaja. Kē Pahihti Jejus Kris mẽmoj to mẽ akutã nojarēt nē mẽ ato mex rãhã ho pa. Nà koja mẽ ato anē.

ãm ja pix na hapêx. Ixpê Pawre na pa ã mẽ amã kagà nhĩpêx nē mẽ awỳr mēnh anē.

Epes

Pawre kot Epes kām Jejus kôt hkwỳjê hwỳr kagà nê mēnh

Pawre na pre kagàja nhìpêx. Jejus nhỹ hã hkrajê jahkre o pa xwỳnhjê hõ na pre. Jakamã na pre krĩ pê Epes kām Kris kwỳjê hwỳr hipêx nê kumê. Epes nhõ xwỳnhjaja Ijaew kêt xwỳnh na pre mē. Nhũm pre ra Pawre ma mē hwỳr mō nê mē kām Tĩrtũm kapêr jarênh o ri mē hkôt pa nhũm mē hkwỳjaja kuma nê Jejus kôt amnhĩ xunhwỳ.

Na pre hte Pawre ma krĩ piitã hkôt ri Tĩrtũm kapêr jarênh o ri mē hkôt pa. Hãmri nhũm mē hkwỳjaja Jejus ã unê nê krĩ pê Rõm wỳr kumê nê kamã haxà nhũm arĩ hkrĩ ho hkrĩ. Nom amarĩ hkrĩ hkêt nê. Na pre hte mē kot hwỳr mrar xwỳnhjê mã Tĩrtũm kapêr jarê. Nê krĩ hkwỳ hkôt Jejus kôt hkwỳjê mã kagà nhìpêx nê mē hwỳr kurê. Jakamã na pre Epes kamã hkwỳjê hwỳr kagàja nhìpêx nê mē hwỳr kumê.

Nê kagàja kamã hprĩ hã mē kot Jejus kôt amnhĩ xunhwỳr xwỳnhjê kot tanhmã amnhĩ nhìpêx to ho pa hã mē kām karõ. Ra mē kot hkôt amnhĩ xunhwỳr jakamã te mē htipxi nê ri mē pa xwỳnh kot amnhĩ nhìpêx pyrãk o amnhĩ nhìpêx o pa hã mē kām hã karõ. Nê jar pika hkôt te mē kêp Kris nhĩ pyrã nê pa hã mē harê. Æ

na pre Pawre mē kām mēmoj jarê nê hã kagà anê nê mē kām:

¹ Pa Epes kām Kris kôt ixkwỳjaja. Xà mē amex na ka mē apa? E ot pa mē awỳr kagà nhìpêx nê kumê. Ixpê Pawre na pa hipêx nê mē awỳr kumê. Ixpê Jejus Kris nhỹ hã mē ahkre ho mē ixpa xwỳnh na pa. Tĩrtũm kām hprãm xà hkôt. Tã pa ã mē awỳr kagà nhìpêx nê mē awỳr mēnh anê. Mē apê Tĩrtũm krajê hwỳr. Na ka xep htem Jejus Kris kôt amnhĩ nhìpêx mex o ri apa. Æm hãmri na ka htem ã amnhĩ nhìpêx anê.

² E kê Mēpahpãm Tĩrtũm mē Pahihti Jejus Kris wa mē ato mex nê mēmoj to mē akutã nojarêt rãhã ho pa. Ka mē wa ÿ hã axãmnhĩx ajamakêtkati nê akĩnh pê tanhmã amnhĩ nhìpêx to ho ri apa.

Tĩrtũm kot mē pakukamã amnhĩm mē parênh ã harênh

Rõmãn 8.28-30; Wam Korĩt 1.21-22; Wam Tesarõn 1.4; Sikũn Tesarõn 2.13; Wam Pêtre 1.2

³ Na hte mē panhõ Pahihti Jejus Kris nhìpêxà Tĩrtũmja mē pahto mex rãhã ho pa. Mē pahpê Kra Kris kwỳ hã mē pahpumunh kôt tanhmã mē pahto mex to ho pa. Ra wa Karõja mē pahkarõ mã gjêx jakamã te ra mē pahte kaxkwa kamã wa kuri mē pamex nê mē papa pyrãk. Tã ra mē pahte jar pika ja kamã paxãmnhĩx pajamakêtkati mē pamex nê ri papa jakamã

kwa kêr pu mẽ amnhĩm ãm mex o mex ã harênh rãhã nê.

⁴⁻⁵ Amnepê mã kormã mẽmojkêr ri na pre Tĩrtũm mẽ pakukamã amnhĩm mẽ parê. Kris kukwak ri amnhĩm mẽ parê. Tã mẽmo kaxyw na pre ã mẽ pakukamã mẽ parênh anê? ãm mẽ pahte kapêr kôt pix mã amnhĩ nhĩpêx o ri papa kaxyw. Jao tãm kot amnhĩnhĩpêx pyrã nê noo mã tãm amnhĩ nhĩpêx o ri papa. Kãm mẽ pajapê jakamã na pre mẽ pakukamã tanhmã hamaxpêr to nê hamaxpêr o:

—Nà Ixkra Jejus Kris koja nhỹrmã ma mẽ hwỳr wrỳ nê mẽ nê ty. Tã mẽ kot mẽ nê htyk ã harênh mar nê amnhĩ kaxyw hkôt hamaxpêr xwỳnhjaja kot paj mẽ ho ixkra. Nà kot paj ã mẽ hipêx anê. Anê.

⁶ No mẽ papajaja tanhmã mẽ pahte amnhĩ nhĩpêx mex to hã mẽ pahpumunh kôt na pre ã mẽ pahto hkra hã mẽ pajarênh anhỹr kêr nê. ãm Kra Kris pix kukwak ri na pre ã mẽ pajarênh anê. Kãm Kra japê jakamã na hte mẽmoj to mẽ pahpê hkwy hã mẽ pakutã nojarêr rãhã ho pa. Jakamã na pu htem amnhĩ tã kãm mex o mex ã harênh o papa.

⁷⁻⁸ Na pre Krisja mẽ panê htyk o Tĩrtũm mã mẽ pahte amnhĩ tomnuj pãnhã amnhĩre. Nhũm Tĩrtũm ã kot amnhĩnhĩpêx anhỹr ã omunh xà hkôt mẽ pahte hkôt amnhĩ xunhwỳr xwỳnhjê nê mẽ pahte amnhĩ tomnuj rênh pa. Koja aa tanhmã hã mẽ pahto

hkêt nê. Pu mẽ axte amnhĩ amnhĩ tomnuj o papa hkêt nê. Hêxta waa nê. Kãm mẽ pajapê htỳx kumrêx jakamã na pre ã mẽ pahto mex rax anê. ãm mex o mex nê ãhpumunh o ãhpumunh.

⁹⁻¹⁰ Amnepêr na pre hamaxpêr o:

—Nà na pa ra kaxkwa ho ixkato nê kamã mẽmoj piitã ho ixkato. Nê pika ho ixkato nê kamã mẽmoj piitã ho ixkato. Tã koja nhỹrmã Ixkra Kris mẽmoj piitã ho amnhĩptãr o pa. Kaxkwa kamã nê pika piitã hkôt mẽmoj piitã ho amnhĩptã nê tapxipix inhỹ hã kêp mẽõ Pahihti. Koja ã amnhĩnhĩpêx anhỹr xà hã arĩgro kato nhũm ã amnhĩnhĩpêx o pa anê. Nà ja na inhmã hprãm. Anê.

Ã Tĩrtũm amnhĩ kukamã hamaxpêr anhỹrja kôt na pre Kris kêp mẽ panhõ Pahihti hã harê. Tã nhỹrmã mẽ pahto amnhĩptãr kaxyw koja mẽ pakaxyw ãm. Amnepêr ri mẽ pa xwỳnhjê mã kot kormã ja ho amnhĩrĩt kêr tã ra jarãhã mẽ pamã ho amnhĩrĩt.

¹¹ Kris kukwak ri na pre amnhĩm mẽ parê. Ra kot mẽ pakukamã mẽ pahtã amnhĩ jarênh xà hkôt.

¹² Tã mẽ ixpê Ijaew kwỳ kumrêx mẽ ixte Kris kôt amnhĩ xunhwỳr jakamã koja mẽ piitã mẽ inhỹ hã Tĩrtũm mã mex o mex ã harênh o ri pa.

¹³ Nê mẽ kajaja na ka prem mẽ ixpyrã nê Tĩrtũm kapêr ma nê ajaxwỳja hkôt amnhĩ xunhwỳ. ãm hãmri na Tĩrtũm

kapërja. Tã ka prem ama nẽ hkõt amnhĩ xunhwỳ. Hãmri nhũm amnhĩ tã mẽ apumu nẽ kot inhĩpêx pyrã nẽ mẽ anê mẽ ate amnhĩ tomnuj piitã rênh pa nẽ mẽ ato hkra. Hãmri nẽ mẽ awỳr Karõ rê nhũm mẽ awỳr wrỳ nẽ mẽ akarõ mã agjê nẽ mẽ akamã pa ho pa. Kris kukwak ri na pre mẽ awỳr kurẽ. Amnepê mã na pre mẽ pakukamã hamaxpêr o:

—Koja mẽ Ixkra hkõt amnhĩ xunhwỳ pa ja hã mẽ omu nẽ mẽ ho ixkra nẽ mẽ hwỳr Ixkarõ rê. Hãmri nhũm mẽ hkarõ mã agjê nẽ mẽ kamã hkrĩ ho hkrĩ.

¹⁴ Anhỳr jakamã na pre mẽ pahwỳr kurẽ nhũm mẽ pahwỳr wrỳ nẽ mẽ pahwỳr agjê nẽ mẽ pakamã hkrĩ ho hkrĩ. Pu mẽ ja hã amnhĩ pumu nẽ pajamaxpêr o:

—Nà ra Tĩrtũm kot ixwỳr Karõ mẽn̄h jakamã na ixkarõ hwỳr axà nẽ kamã hkrĩ ho hkrĩ. Tã koja ra kot mẽ ixtã amnhĩ jarênh xà hkõt ja hã ixto mex nẽ. Ra kot ixto hkra kênã. Jakamã koja nhỹrmã ma amnhĩ wỳr ixto api pa kuri inhmex kumrêx nẽ ixpa ho ixpa. Hãmri nẽ kukwak ri axte tanhmã amnhĩ tomnuj to ho ri ixpa hkêt nẽ. Anẽ.

Jakamã koja mẽ piitã ã kot mẽ ho mex anhỳr ã amnhĩ tã kamã ama nẽ amnhĩ tã omu nẽ kãm mex o mex ã harênh rãhã ho pa.

Pawre kot Epes nhõ xwỳnhjê ho Tĩrtũm wỳr ã

harênh

Piripos 1.9; Korosê 1.9-12; Wam Tesarõn 5.23; Sikũn Tesarõn 1.11, 2.16; Eprêw 13.20

¹⁵ Nẽ na ka xep htem amnhĩ kaxyw Kris kõt ajamaxpêr tỳx pê amã Tĩrtũm krajê piitã mẽ hkĩnh o mẽ ho mex o apa. Na pa pre mẽ ajarênh ma nẽ ixkĩnh tỳx nẽ.

¹⁶⁻¹⁸ Nẽ xatã mẽ ato Tĩrtũm wỳr o ri ixpa nẽ mẽ ato hwỳr o:

—Pa Mẽinhĩpêxã maati Tĩrtũm. Nà amex o amex. Ka na ka pre mẽ ixwỳr mẽ inhõ Pahihti Jejus Krisja mẽ nhũm mẽ ixwỳr wrỳ nẽ hprĩ hã mẽ inhmã ate tanhmã amnhĩ nhĩpêx to ho apa hã ato amnhĩrĩt. Tã Epes kãm akrajaja na xep htem akõt pix mã ri amnhĩ nhĩpêx rãhã ho ri pa. ãm hãmri na htem ã amnhĩ nhĩpêx anẽ.

—Nẽ kwa Tĩrtũm. Kê Akarõ tanhmã mẽ hkrã hto kê mẽhprĩ hã akapêr mar tỳx rãhã ho pa. Jao ra ate mẽ ixkukamã mẽ ixtã tanhmã mẽ ixto mex to hã amnhĩ jarênhja kê mẽ kãm hamaxpêr tỳx rãhã ho pa. Nẽ ate nhỹrmã mẽ ixpê akrajaja mẽ ixpiitã tanhmã mẽ ixto mex to jarênhja kê mẽ kãm hamaxpêr tỳx pê hkĩnh rãhã ho pa ho pa.

¹⁹⁻²⁰ —Nẽ kê mẽ axàhpumunh o axàhpumunh ã ate akupỹm Akra Kris o htĩr ã apumunh mex nẽ Tĩrtũm. Na ka pre axàhpumunh xà ho akupỹm ho htĩr nẽ ma akupỹm anhõ krĩ hwỳr ho api nẽ amnhĩ nhĩhkô hã ỳr nhũm arĩ hkrĩ ho hkrĩ. Apyrà nẽ kot mẽ

ixto amnhĩptàr kaxyw. Æ axàhpumunh xà htỳx kot anhỳr. Tã kê akrajê piitã ja hã apumu nẽ axàhpumunh tỳx o ate tanhmã mẽ ixto ajuta hto ho apa hã apumu.

Anhỳr o na pa hte mẽ ato hwỳr o ri ipxa.

²¹ Nẽ Krisja àhpumunh tỳx o mẽkarõmnuti piitã hakrenh. Nẽ hihtỳx o mẽ hakrenh jakamã krĩ nhõ xwỳnhjê mã te mẽ àhpumunh tỳx kêt pyràk o na htem htỳx ri amnhĩ nhĩpêx o pa pyràk. Nẽ Krisja hihtỳx o pika piitã hkõt pahi piitã mẽ hakrenh par kumrêx. Nẽ hihtỳx o kot pika piitã hkõt mẽmoj piitã mẽ hakrenh par. Jakamã mẽhõ koja we tanhmã kot amnhĩ nhĩpêx to hã kãm karõ rỳ kãm hamaxpêr gõ? Nà amrakati kumrêx. Ra kot ã amnhĩ nhĩpêx anhỳr rãhã nẽ pa ho pa xwỳnh kênã. Nẽ hihtỳx o hihtỳx rãhã nẽ pa ho pa xwỳnh. Nẽ àhpumunh o àhpumunh rãhã nẽ pa ho pa xwỳnh. Nẽ hihtỳx o kot jar pika ja kõt mẽ pajakrenh par nẽ hihtỳx o Tĩrtũm nhõ krĩ kamã mẽ mẽmoj piitã hakrenh par. Tã koja mẽmoj piitã ho amnhĩptàr rãhã htĩr tũm nẽ pa ho pa.

Kris te kêp mẽ pahkrã pyràk ã harênh

Rõmãn 12.4; Wam Korõt 12.12; Epes 4.16; Korosẽ 3.25

²² Na pre Tĩrtũmja Kra Kris nhĩhkram mẽmoj pitã haxàr pa. ỳ hã kot nhỹrmã ho amnhĩptàr o pa kaxyw. Jakamã kot mẽ pahto

amnhĩptàr xwỳnh ã kêp mẽ panhõ Pahihti. Nẽ te kêp mẽ pahkrã pyràk. Nẽ mẽ papajaja te mẽ pahpê ì pyràk jakamã na pu htem hkõt ri amnhĩ nhĩpêx o papa.

²³ Na hte mẽ panhĩja mẽ pahkrã kamã mẽ pajamaxpêr xà hkõt tanhmã amnhĩ nhĩpêx to. Ja pyrà nẽ na pu htem mẽ pahkrã pyràk xwỳnh Krisja kapêr ma nẽ hkõt tanhmã ri amnhĩ nhĩpêx to ho ri papa.

Koja mẽhõ ãm hkrã pix nẽ ì hkêt nẽ pa hãmri nẽ mex kêt nẽ. Na htem hkrã nẽ mããnẽn ì nẽ pa nẽ mex nẽ. Ja pyrà nẽ na hte Kris mẽ pahte hkõt amnhĩ nhĩpêx o papa hã mẽ pahpumu nẽ hkĩnh nẽ mex nẽ pa. Pu mẽ pajaxwỳja hkõt ri amnhĩ nhĩpêx ã amnhĩ pumu nẽ pahkĩnh nẽ pamex nẽ papa ho papa.

2

Tanhmã Tĩrtũm kot mẽ pahto hkra hto ã harênh

Wam Korõt 6.11; Xitre 2.11-3.7

¹ Nẽ amnepê mã na pu pre htem Tĩrtũm kàx ã tanhmã amnhĩ tomnuj to ho ri papa.

² Nẽ jar mẽ kot amnhĩ nhĩpêx o amnhĩ nhĩpêx. Jao amnhĩ tomnuj pix o ri papa. Nẽ mẽkarõmnuti nhõ pahi Satanasti kapêr kõt pix mã ri amnhĩ nhĩpêx rãhã nẽ. Na pre hte tanhmã mẽ pahkõt mẽ pahto ho pa. Mẽ pahte tanhmã amnhĩ tomnuj to kaxyw mẽ pamã mẽ pajamaxpêr punuj jagjê. Pu mẽ amnhĩ tã omunh kêt tã ỳ hã amnhĩ tomnuj o papa.

Satanastija kêp mē kot Tirtūm kapēr kwým ri amnhī nhīpêx o mē pa xwýnhjê nhõ pahihtina. Tã pu pre htem pahtýx ri hkôt amnhī nhīpêx pix o ri papa.

³ Mē pahpiitã tanhmã amnhī tomnuj to hprãm xà hkôt pix mã tanhmã amnhī nhīpêx to. Nē mēmoj punuj kukamã pajamaxpēr nē ra hkôt ã amnhī tomnuj anē. Æ na pu prem mnhi nhīpêx anē nhūm Tirtūm ja hã mē pahpumu nhūm ja kãm mex kêt nē. Jakamã nhūm tee ri mē pakukamã hamaxpēr nē hamaxpēr o:

—Hêxta waa nē. Na htem ixkapēr kwým ri tanhmã amnhī tomnuj to rãhã ho pa. Æ mē kot amnhī nhīpêx anhýr o mē pa xwýnhjaja koja mē nhýrmã ixri htír tūm nē mex nē pa ho pa hkêt nē. Ixkínhã mē kot amnhī tomnuj xwýnh jakamã tanhmã kot mē amnhī to nē ixri htír tūm nē pa ho pa? Nã mē kot amnhī tomnuj mýrapê koja mē nhýrmã ma amnhī xà htýx kamã hamak tūm xàta wýr ma hapêx pa. Nã koja mē anē. Hêxta waa nē. Inhmã ma hwýr mē pa prãm kêt tã ra ma hwýr mē pa kaxyw.

Anhýr o hamaxpēr.

⁴⁻⁵ Nē amnepêm kormã mē pahte amnhī tomnuj o papata ã te mē pahte amnhī xà htýx kamã pajamak tūm xà hwýr pryta ã mē papa pyrãk. Nom Tirtūm kãm mē pajapê nē mē pakamã ukaprī jakamã na pre mē pahto mex rax nē. Nē akupým

Kris o htírja ri te ra mē pahte amnhī xà htýx kamã pajamak tūm xà hwýr pryta nē mē pahto ujanãr pyrãk o mē panhīpêx. Mē pakamã ukaprī nē kãm mē pajapê ho ã mē panhīpêx anē. Amarī ã mē panhīpêx anē nē mē panê mē pahte amnhī tomnuj rên pa. Jakamã kot puj mē pahte Kra hkôt amnhī xunhwýr xwýnhjaja nhýrmã amnhī xà htýx kamã mē hamak tūm xàta wýr papa hkêt nē.

⁶ Ra Tirtūm akupým Jejus Kris o htír jakamã te ra Jejus kôt akupým mē pahpê hkwýjê ho mē pahtír pyrãk. Jakamã te ra õ krī kamã ãhkô hã mē pamex kumrêx nē pahkrī pyrãk.

⁷ Mēmo kaxyw na pre Tirtūm kãm mē pajapê hkôt ã mē pahwýr Jejus Kris mēnh nhūm mē panê htyk anê? Nã kãm mē pajapê htýx ã mē pahte pahprī hã amnhī tã omunh kaxyw na pre ã mē pahwýr mēnh anē. Tã kot puj mē nhýrmã kaxkwa kamã hwýr pøj nhūm mē pamã amnhī jarênh o:

—E mē amnê ixpumu. Inhmã mē ajapê htýx jakamã na pa pre mē akamã ixukaprī xà ma mē awýr Ixkra Jejus Krisja mē nhūm amnhī grõnh kôt mē awýr wrý nē mē anê ty. Inhmã mē ajapê htýx jakamã na pa pre ã mē awýr mēnh nhūm mē anê htyk anê. Inhmã mē apê ixkrajê japê xà na pa pre ã mē ato mex rax anê.

Anhýr o mē pamã kapêr hãmri nē mē pahto mex rãhã

ho pa.

⁸⁻⁹ Xà na pu prem pahpê hkra hprâm xàj amnhĩ krã hkôt mẽ papamjaja kãm tanhmã amnhĩ to mex to nẽ kãm:

—E kwa Tirtũm. Na pa ã amnhĩ to mex anẽ nẽ ã amnhĩ to mex anẽ. Jakamã kwa ja hã ixpumu nẽ ixto akra nà?

Anhÿr o na pu prem amnhĩ to kuwÿ? Nà na pu prem ã amnhĩ to hwÿr anhÿr kêt nẽ. Na pu prem amnhĩ kaxyw hkôt pajamaxpêr nẽ hkôt amnhĩ xunhwÿ nhũm ja pix ã mẽ pahpumunh kôt mẽ panê mẽ pahte amnhĩ tomnuj rê nẽ mẽ pahto hkra. Kãm mẽ pajapê nẽ mẽmoj to mẽ pakutã nojarêt rãhã ho pa jakamã na hte ã mẽ panhĩpêx mex anẽ. Jakamã na pu htem amnhĩ tã omu nẽ pajamaxpêr o:

—Nà na xep hte Tirtũmja mẽ pahte tanhmã amnhĩ nhĩpêx to ho papa hã mẽ pahpumunh kôt mẽ pahto hkra hkêt nẽ. Æm mẽ pahte amnhĩ kaxyw kãm pajamaxpêr ã mẽ pahpumunh kôt pix mã na hte mẽ pahto hkra. Anẽ.

¹⁰ Nẽ Tirtũm tapxipix na hte tanhmã mẽ pahto pu mẽ amnhĩ to mex rãhã ho papa. Nom kormã kot mẽ pahto hkra hkêt ri na pu prem ã amnhĩ nhĩpêx anhÿr kêt nẽ. Tã Jejus Kris kôt amnhĩ xunhwÿ nhũm Tirtũm ja hã mẽ pahpumu nẽ mẽ pamã mẽ pahte amnhĩ nhĩpêx nyw jagjê pu mẽ ÿ hã tãm amnhĩ nhĩpêx o ri papa. Amnepêm tanhmã kot mẽ pakukamã

hamaxpêr to xà hkôt. No na hte tanhmã mẽ pahte amnhĩ krã hkôt amnhĩ nhĩpêx to hã mẽ pahpumunh kôt mẽ pahto hkra hkêt nẽ.

Tirtũm krajaja te kot axpên to htõ nẽ htõx pyræk

Karatas 3.28; Korosẽ 1.21-23

¹¹ E mẽ apê Ijaew kêt xwÿnhjaja. Na ka htem mẽ akatorxà nhõhy rũm ajapôj hãmri nẽ mẽ ixpê Ijaew pyrã nẽ amnhĩ my kwryt kà jakàr kêt nẽ. Jakamã na pre ixkwÿjaja mẽ akurom amnhĩ jakàr ã amnhĩ to jarkrar o ri pa nẽ amnhĩ jarênh o:

—Ra mẽ ixte amnhĩ my kwryt kà jakàr ã mẽ ixpumunh kôt na hte Tirtũm mẽ ixto hkra. Tã Ijaew kêt xwÿnhjaja kot mẽ ixkĩnhã amnhĩ jakàr kêt jakamã mẽ kêp hkra hkêt. Nẽ mãânên mẽ kêp mẽ pahkwÿ hkêt.

Anhÿr o mẽ ajarênh o pa.

¹² Æm hãmri na prem mẽ apê mẽ ixkwÿ hkêt ã mẽ ajarê. Na pa prem mẽ akurom amnhĩ my kwryt kà jakà nẽ mẽ akurom Kris kamã ijamak o ri ixpa. Jakamã nhũm Tirtũm kot mẽ ixto mex ã amnhĩ jarê pa mẽ mẽ apyrã nẽ tee ri amnhĩ kukamã ijamaxpêr o ri ixpa hkêt nẽ. Nẽ mẽ akurom amnhĩ kaxyw Tirtũm mã ijamaxpêr. Nà Æm hãmri na prem mẽ apê mẽ ixkwÿ hkêt ã mẽ ajarê.

¹³ Te Tirtũm kàx ã ri mẽ apa pyræk tã ka mẽ arĩ ã amnhĩ nhĩpêx anhÿr kêt nẽ. Jejus

Kris kot mē panē htyk nhūm mē ate hkôt amnhī xunhwÿr jakamā ra mē apē hkwyÿ. Jao arī hkàx ā ri apa hkêt nē. Te mē ixpē Ijaew kwÿ pyrā nē hpānhā kuri ra ri apa pyrāk.

¹⁴ Jakamā na pu htem Kris kukwak ri ra axpēn nhīpēx nyw o axpēn nhīpēx o ri papa. Mē ixpē Ijaewjaja nē mē apē Ijaew kêt xwÿnhjaja na pu htem te ra ixkre tipxi kamā ri papa pyrāk. Nom amnepēm na pu prem ā axpēn nhīpēx anhÿr kêt nē. Mē pahte amnhī nhīpēx tūmja ahpÿnhā na pre. Na pu prem pamā axpēn kurē nē axpēn kàx ā ri papa. Nē nhÿri axpēn pumu nē te pahte axpēn pumunh kêt pyrā nē nhām parīt o ri mra. Tā nhūm Kris mē panē htyk o mē pahte amnhī tomnuj piitā hpānhā amnhīrer pa. Mē ixpē Ijaew nē mē apē Ijaew kêt xwÿnhjaja. Nē htyk o te ra kot mē pahte axpēn nhōrkwÿ hwÿr axpēn wÿr o papa pyrāk. Jao mē pamā axpēn kurē ho hapēx nē hpānhā tām axpēn kaxyw mē paxunhwÿ pu mē hpānhā axpēn to mex rāhā ho ri papa.

¹⁵ Amnepēm Mojes kot Tirtūm nhÿ hā mē ixpē Ijaew mē ixte tanhmā amnhī nhīpēx to ho ixpa hā karōja. Na pa prem mē apē Ijaew kêt xwÿnhjaja mē ate Tirtūm kôt amnhī nhīpēx kêt ā mē apumu nē mē akamā inhgryk nē. Nē axpēn mā mē ajarēnh o:

—Nà mē pahkīnhā mē kot Mojes kapēr kôt amnhī

nhīpēx kêt jakamā koja Tirtūm mē ho hkra hkêt nē.

Anhÿr tā nhūm Kris mē pahwÿr wrÿ nē mē pahpiitā mē panē htyk o mē pahte hkôt amnhī xunhwÿr ā mē pahpumunh kôt pix mā mē pahto Tirtūm kra. Jakamā pa mē axte mē ate Mojes kapēr kôt amnhī nhīpēx kêt ā mē apumunh kôt mē apē Tirtūm kra hkêt ā mē ajarēnh kêt nē. Hāmri nē mē ixpē Ijaew nē mē apē Ijaew kêt xwÿnhjaja pu mē axte axpēn kām pagryk o ri papa hkêt nē. Ra te ixkre tipxi kamā mē pahte axpēn kôt ri papa pyrāk.

¹⁶ Kris na pre pī kahpa hā mē panē htyk o ā mē panhīpēx anē nē mē pahte axpēn kôt amnhī nhīpēx o papa kaxyw mē paxunhwÿ. Nom Tirtūm jamaxpēr xā hkôt ā mē panhīpēx anē. Jakamā na pu htem arī pamā axpēn kurē ho papa hkêt nē.

¹⁷ Na pre Kris mē pahwÿr wrÿ nē ā mē panhīpēx anē. Mē apē Ijaew kêt xwÿnhjaja mē ate kormā Tirtūm kapēr mar kêt xwÿnhjaja nē määnēn mē ixpē Ijaew mē ixte kapēr mar mex xwÿnhjaja nhūm pre akupÿm tām mē pahte axpēn kôt amnhī nhīpēx o papa kaxyw mē paxunhwÿ.

¹⁸ Hāmri nhūm Tirtūm mē pahwÿr amnhī Karō rē nhūm mē pahkarō mā agjē. Kris kukwak ri pix mā mē pahwÿr kurē pu mē ŷ hā paxāamnhīx ri kām tanhmā amnhī jarēnh to ho ri papa.

¹⁹ Hāmri nē te mē pahpē nhām axpēn kaxyw mē urojē

pyrà nē axpēn kàx ā ri papa
hkēt nē.

*Te mē pahpê Tirtūm
nhōrkwỹ pyrāk ā mē pajarēnh*

*Wam Korīt 3.16; Sikūn
Korīt 6.16; Wam Pêtre 2.5*

20 Nē mē pahpê Jejus kwỹ
jakamā te mē pahte ixkre
tipxikamā ri papa pyrāk. Nē
te mē pahpê ixkre nhīpēx
mex pyrāk. Nē Kris te kēp
ixkre hkrax mā kuhê xà nē
kỹxpê kām nōr xà maatiya
pyrāk. Nē mē kot Jejus nhỹ
hā mē ahkre xwỹnhjaja nē
mē kot Tirtūm nhỹ hā kapēr
o ri mē pa xwỹnhjaja te mē
kēp ixkre nhōkwa ēja pyrāk.
Nē mē papajaja te mē pahpê
ixkre nhīmōk ā pōja pyrāk.

21 Ixkre mā kuhê xà nē
kỹxpê kām nōr xà maati kuk-
wak ri pix mā na hte ōkwa ē nē
hā pōja kỹxpê mex nē axpēn
tā harir. Ja pyrà nē ām Kris
kukwak ri pix mā na pu htem
te ixkre tipxi kamā ri papa
pyrāk o axpēn nhīpēx mex o
ri papa. Te mē pahpê mē
kot ixkre rax kumrēx nhīpēx
o mōr nhūm muxre nē ām
xwỹnhta pyrāk.

22 Na htem amnhīm ōrkwỹ
nhīpēx nē hipēx pa nē hwỳr
agjê nē kamā pa ho pa. Ja
pyrà nē na hte Tirtūm Karōja
mē pahpê hkrajê karō mā
agjê nē mē pakamā pa ho pa.
Te mē pahpê Tirtūm nhōrkwỹ
pyrāk. Mē ixpê Ijaew nē
mē apê Ijaew kêt xwỹnhjaja
Tirtūm mā te mē pahpê ōrkwỹ
pyrāk.

3

*Pawre kot Ijaew kêt
xwỹnhjê mā mēmoj to amnhīrīt
ā harēnh*

*Rōmān 15.14-21; Korosē
1.24-29*

1 Tā te mē pahpê Tirtūm
nhōrkwỹ pyrāk jakamā na pa
hte jar mē hagiēnh xà kamā
mē ato hwỳr rāhā ho ixkrī.
Na pa pre hte ma mē apê
Ijaew kêt xwỹnhjê hwỳr ixpa
nē ixprī hā mē amā Jejus
kapēr jarēnh o ri mē akôt
ixpa. Mýrapê na prem ixpyné
nē ijaxà pa arī jar ixkrī ho
ixkrī. Nom arī amnhī kaxyw
Tirtūm mā ijamaxpēr tỳx pé
mē ato hwỳr rāhā ho ixkrī.

2 Na pre kām ijapê hā mē
apê Ijaew kêt xwỹnhjê kaxyw
ixām. Ma ixte ri mē akôt ixpa
nē mē amā kapēr jarēnh o ri
mē akôt ixpa kaxyw. Ra mē
ate ja hā ijarēnh mar mex.

3 Na pre mē pahto hpim-
ràatā tanhmā mē pahto
mex to hā inhmā amnhī to
amnhīrīt pa pre omu. Mē
kajaja nē mē pajaja. Pika
piitā hkôt mē piitāā tanhmā
mē ho mex to. Na pre kormā
kot mēhō mā ja jarēnh kêt tā
inhmā ho amnhīrīt pa pre
omu. Tā kagà ja kamā kot paj
mē amā hkwỹ ho grēre nē ho
amnhīrīt nē mē amā hā kagà
ka mē ixpyrà nē kamā harē
nē ama.

4 Jao aprī hā mar mex nē.

5 Amnepēm mē pahkêt ri
mē pa xwỹnhjê mā Tirtūm kot
ja ho amnhīrīt kêt tā nhūm
Karō mē ixkwỳjê kumrēx mā
ho amnhīrīt. ŷ hā kapēr o
ri mē pa xwỹnh mē mē ixpê

Jejus nhÿ hã mẽ ajahkre o mẽ ixpa xwÿnhjê kumrêx mã ho amnhĩrît. Mẽ ixte kãm tanhmã amnhĩ nhĩpêx to ho ixpa xwÿnhjê mã ho amnhĩrît pã prem omu.

⁶ Na pre mẽ inhmã tanhmã mẽ ato amnhĩrît to pa prem ja hã mẽ apumu nê mẽ akukamã ijamaxpêr o:

—Nà ãm hãmri koja xep Ijaew kêt xwÿnhjaja mẽ ixpê Ijaew pyrã nê Tĩrtũm kapêr ma nê Jejus Kris kôt amnhĩ xunhwÿ nhũm Tĩrtũm ã mẽ kot amnhĩ nhĩpêx anhÿr ã mẽ omu nê mẽ ixpyrã nê mẽ ho hkra nê mẽ ho mex o pa. Anê.

⁷ Tã nhũm Tĩrtũmja mẽ awÿr inhmê. Ixte mẽ amã ja jarênh o ri mẽ akôt ixpa nhũm tokyx mẽ ate mar kaxyw. Na pre ixto mex nê kãm hprãm xà hkôt mẽ akaxyw ixãm nê ixte ÿ hã kãm tanhmã amnhĩ nhĩpêx to ho ixpa kaxyw ixto ixihýtÿx nê mẽ awÿr inhmê.

⁸ Tã mo kaxyw na pre mẽ akaxyw ixãm? Te ixte ja kaxyw inhmex kêt pyrãk. Ixkwÿjaja ja kaxyw mex o kot ijakrenh tã nhũm pre ixpumu nê tanhmã hamaxpêr to nê mẽ akaxyw ixãm nê mẽ awÿr inhmê. Ixte mẽ amã mẽmoj mex kumrêx jarênh o ri mẽ akôt ixpa kaxyw. Na pre inhmã:

—Kêr ka ma Ijaew kêt xwÿnhjê hwÿr mō nê mẽ kãm Jejus Kris kapêr jarênh o ri mẽ hkôt apa. Nê mẽ kãm: “Kot kaj mẽ Jejus Kris kôt amnhĩ xunhwÿ hãmri nê kukwak ri amex nê apa.” Anê.

⁹ Koja mẽ apê Ijaew kwÿjê pyrã nê amnhĩ kaxyw Ixkra Kris kôt hamaxpêr nê hkôt amnhĩ xunhwÿ pa hã mẽ omu nê mẽ ho ixkra. Kormã aa ixte mẽ kãm ja hã amnhĩ to amnhĩrît kêt tã pa akumrêx mã harê. E ma mẽ hkôt ri mẽ kãm ã ijarênh anhÿr o ri apa kê mẽ ijarênh ma.

Anhÿr o mẽ pahto kator xwÿnh maatija inhmã kapêr.

¹⁰ Tã mẽmo kaxyw na hte mẽ pahto hpimràatã mẽ pahto hkra? Nà kaxkwa kamã kapêr o mẽ wrÿk xwÿnh pytãr xwÿnhjaja nê mẽkarõmnuti kot mẽ pahte amnhĩ nhĩpêx nyw o papa hã mẽ pahpumunh kôt axpên mã tanhmã Tĩrtũm jarênh to kaxyw. Nê harênh o:

—Kokÿÿ. Tĩrtũm àhpumunh tÿx o àhpumunh tÿx jakamã na hte tanhmã mẽ hipêx to nhũm mẽ tãm amnhĩ nhĩpêx mex o pa. Nà Tĩrtũm àhpumunh o àhpumunh nê hihtÿx o hihtÿx. Anê.

Koja mẽ ate amnhĩ to mex o apa hã mẽ apumu nê ã axpên mã Tĩrtũm jarênh anê.

¹¹ Amnepêm kormã mẽmoj kêt ri na pre Tĩrtũm mẽ pakukamã mẽ pahtã tanhmã amnhĩ jarênh to hãmri nê Jejus kukwak ri ã mẽ panhĩpêx anê. Jao mẽ piitã mẽ kãm àhpumunh o àhpumunh ã amnhĩ to amnhĩrît.

¹² Tã pu mẽ ra Jejus kukwak ri amnhĩ kamã pamã Tĩrtũm pyma hkêt nê. Kãm mẽ pajapê kênã kot pu kêt mẽ ri amnhĩ kamã pamã uma ho papa. Kot puj mẽ paxãmnhĩx

ri kãm amnhĩ jarẽnh rãhã ho ri papa. Te ra pahte hwÿr paxàpir nẽ pano ho omunh nẽ kãm pakapẽr o pakuhê pyrãk.

¹³ Jakamã kwa kêr ka mẽ kot mẽ atã tanhmã ixtomnuj to hã ijarẽnhja ma nẽ tee ri ixkukamã ajamaxpẽr hkêt nẽ. Kwãr mẽ mãmrĩ tanhmã inhĩpêx to. ãm ixte mẽ amã amnhĩ jarẽnh ma nẽ axpẽn mã ijarẽnh o:

—Hêxta waa nẽ. Mãn Pawre kãm mẽ pajapê hã na pre amnhĩ grõnh kõt mẽ pamex kaxyw mẽ pahwÿr mra nẽ mẽ pamã Tirtũm kapẽr jarẽnh o pa. Mẽ kot ja hã tanhmã hipêx kati hto htã nhũm jam urer kêt nẽ. Anẽ.

Kris kãm mẽ pajapê kamã tanhmã mẽ panê amnhĩ nhĩpêx to

Juãw 3.16; Wam Juãw 3.1

¹⁴ Nẽ na pa hte mẽ ato Mẽpanhĩpêêxã maati hwÿr kãm ixihitÿx o ixpa.

¹⁵ Kêp mẽ pahte hkõt amnhĩ xunhwÿr xwÿnhjê nhõ Pahi Maati mex kumrêx na. Kra hkwyjaja ra kaxkwa kamã kuri htĩr tũm nẽ pa ho pa nẽ arĩ pyka ja kamã mẽ pahpê hkwyjaja kormã jar papa. Nom te mẽ pahpiitã mẽ pahte ixkre tipxi kamã Tirtũm kõt ri papa pyrãk.

¹⁶ Jakamã na pa hte mẽ ato hwÿr o:

—Pa Tirtũm. Nà amex o amex. E ot pa Epes nhõ xwÿnhjê ho awÿr o ixkrĩ. Kwa kê Akarõ mẽ kãm axãhpumunh xã hkwy gõ kê mẽ akõt ri amnhĩ nhĩpêx rãhã ho pa.

¹⁷ —Nẽ kê mẽ amnhĩ kaxyw Kris kõt hamaxpẽr tÿx o pa. Te mẽmo pĩ hpàr jarê kot pika kaxwÿnh kãm pimãnh nẽ pika jamÿnh tÿxta pyrãk. Nhũm kók xapêr tÿx tã tee kot kãm mẽn prãmta pyrãk. Kê mẽ pĩ hpàr jarê kot pika jamÿnh pyrã nẽ kãm axpẽn kĩnh o pa. Jao mẽmoj to axpẽn kutã nojarêt rãhã ho pa.

¹⁸⁻¹⁹ —Nẽ kê krĩ piitã hkõt mẽ akrajê pyrã nẽ amnhĩ tã Kris kãm mẽ hapê htÿx o mẽ hapê htÿx ã amnhĩ pumu. Jao urãk nẽ mẽ kãm axpẽn kĩnh tÿx o pa. Nẽ kê mẽ ate amnhĩ nhĩpêx pix o amnhĩ nhĩpêx rãhã ho pa. Nẽ ajamaxpẽr pix o hamaxpẽr rãhã ho pa. Jao te mẽmo pĩ hpãrta pyrã nẽ akõt hihtÿx nẽ. Anẽ.

²⁰ Kot puj mẽ ã amnhĩ to Tirtũm wÿr anẽ nhũm mẽ pama nẽ ra àhpumunh tÿx xã ho ã mẽ panhĩpêx anẽ. Ra kot mẽ pakamã pa ho pa kênã.

²¹ ã Tirtũm Jejus Kris kukwak ri mẽ pahpê hkrajê nhĩpêx anhÿr jakamã kwa pu mẽ pahpê hkra xwÿnhjaja kêr pu mẽ kãm mex o mex ã harẽnh rãhã ho papa. Nà kot puj mẽ ã kãm anhÿr o papa.

4

Te ixkre tipxi kamã axpẽn kõt ri mẽ papa pyrãk

Rõmãn 15.5; Piripos 2.1-4; Korosẽ 3.12-17; Wam Pêtre 3.8

¹ Nẽ ra mẽ kot Kris ã ijaxàr nhũm ixkrĩ htã pa ã inhmã mẽ akĩnh xaj mẽ amã ixkapẽr nẽ hã kagã anhÿr o ixkrĩ. Kwa kêr ka mẽ Tirtũm kot amnhĩ

nhîpêx kôt amnhî nhîpêx mex rãhã ho ri apa. Ja kaxyw na pre amnhî kôt mẽ awỳ ka prem hkôt amnhî xunhwỳ.

² Nê kêr ka mẽ amã amnhî to rax o akwỳjê jakrenh prãm o ri apa hkêt nê. Nê mẽ agryk tokyx anhỳr kêt nê. ãm axpên kãm axukaprĩ pix o mãn ri axpên kôt apa. Kê mēhõ tee tanhmã ri mẽ ato htã ka mẽ kamã agryk tokyx anhỳr kêt nê. ãm mẽ amã ri axpên hkĩnh pix o mãn ri axpên kôt apa.

³ Ra Tĩrtũm Karõ kot mẽ pahkarõ mã gjêx par jakamã te mẽ pahte ixkre tipxi kamã axpên kôt ri mẽ papa pyrãk. Jakamã kêr ka mẽ axpên to mex pix kukamã mãn kêt ajamaxpêr o ri axpên kôt apa. Nê tãm axpên nhîpêx. Jao ajamakêtkati nê axãmnhĩx ri axpên kôt ri apa ho apa.

⁴ Te mẽ pahte ixkre tipxi kamã ri axpên kôt papa pyrãk jakamã mẽ pahpiitã mẽ pahkarõ kamã Tĩrtũm Karõja hkrĩ ho hkrĩ. Jakamã kot puj mẽ nhỹrmã ma õ krĩ hwỳr api nê kamã mẽ pamex rãhã papa ho papa.

⁵ Nê mẽ panhõ Pahihtija ãm pixii. Na pu prem pahpiitã amnhî kaxyw hkôt pajamaxpêr jao ra mẽ pahpê hkraa. Tã mẽ pahpê Kris kwỳ hã amnhî to amnhĩrit kaxyw na prem Tĩrtũm mã mẽ pahkrã kumrã. ã mẽ panhîpêx anhỳr o axpên pyrãk o mẽ panhîpêx o pa anê.

⁶ Nê Tĩrtũm haxwỳja ãm pixii. Kêp mẽ pahpiitã mẽ

panhîpêêxã maati na. Na hte mẽ pahpê hkrajê mã àhpumunh xà hkwy gõ pu mẽ ỹ hã kãm tanhmã amnhî nhîpêx to ho papa. Nhũm hte mẽ pahkarõ kamã pa ho pa. Jakamã te mẽ pahte ixkre tipxi kamã ri axpên kôt papa pyrãk.

Kris kot ahpỳnhã tanhmã mẽ pahto mex to hã harênh

Rômãn 12.3-8; Wam Korĩt 12.1-12; Wam Pêtre 4.10-11

⁷⁻⁸ Nê Tĩrtũm kapêr ã kagã htũm kot Kris jarênh kot:

Na pre mẽ kot kutã amnhî xunhwỳr xwỳnhjê pytãr pa nê ma akupỳm kaxkwa hwỳr api.

Tã arĩ jar pika hkôt mẽ pahpê hkwyjê mã tanhmã mẽ pahto paxihtỳx to ho pa.

Na hte Krisja tanhmã mẽ pahte ahpỳnhã kãm amnhî nhîpêx to ho papa kaxyw tanhmã mẽ pahto paxàhpumunh to. Kãm hprãm xà hkôt.

⁹ Tĩrtũm kapêr ã kagã htũm kot akupỳm kaxkwa hwỳr àpir ã harênh. ãm tapxipix na pre ã pika hwỳr wrỳk nê akupỳm kaxkwa hwỳr àpir anê. Na pre ty nhũm mẽ haxà. Hãmri nhũm akupỳm htĩr nê kato nê ma akupỳm api. Tapxipix na pre ã amnhî nhîpêx anê.

¹⁰ Tã akupỳm kaxkwa hwỳr àpir xwỳnhta na hte kaxkwa kamã nê pika hkôt amnhĩm mẽmoj piitã tanhmã ho ho hkrĩ.

¹¹ Na pre ahpỳnhã tanhmã mẽ pahto mex to. Ahpỳnhã

mě pahte tanhmã kãm amnhĩ nhĩpêx to ho papa kaxyw na pre mẽ paxunhwỳ.

Ně mẽ pahkwỳjaja mẽ pahte krĩ piitã hwỳr pamrar nẽ ý hã hkrajê mã kapêr jarênh o papa kaxyw mẽ paxunhwỳ.

Ně mẽ pahkwỳjaja mẽ pahte krĩ pixi kamã Tirtũm nhỹ hã hkrajê jahkre ho ri mẽ hkôt papa kaxyw mẽ paxunhwỳ.

Ně mẽ pahkwỳjaja mẽ pahte pahprĩ hã mẽ piitã mẽ kãm tanhmã mẽ kot amnhĩ nhĩpêx to nẽ Jejus kôt amnhĩ xunhwỳr ã mẽ kãm harênh o papa kaxyw mẽ paxunhwỳ.

Ně mẽ pahkwỳjaja mẽ pahpê pastô kaxyw mẽ paxunhwỳ.

Ně mẽ pahkwỳjaja mẽ pahte mẽ kãm Tirtũm kapêr ã kagà jarênh o mẽ ahkre ho papa kaxyw mẽ paxunhwỳ.

12 ã kot puj mẽ pahpiitã ahpỹnhã Kris mã tanhmã amnhĩ nhĩpêx to ho ri papa anẽ. Kot puj mẽ ã mẽ hipêx anhỹr o ri papa nhũm mẽ pamar tỳx nẽ. Ně gaa nẽ mẽ pahpyrà nẽ Tirtũm mã amnhĩ nhĩpêx mex o pa. Pu mẽ pahpiitã hkôt amnhĩ nhĩpêx mex o papa.

13 Ně gaa nẽ mẽ pahpiitã mẽ pahpê Tirtũm kra hã Jejus kot amnhĩ nhĩpêx kôt omunh mex nẽ. Ně amnhĩ kaxyw hkôt pajamexpêr tỳx nẽ. Jao te ra hkôt mẽ paxaptàr mex pyræk. Ně te kot amnhĩ

nhĩpêx pyræk o amnhĩ nhĩpêx.

14 Měhprĩrejaja na htem nhãm hamaxpêr nẽ nhãm hamaxpêr o pa. Te kôk xàpêr nẽ nhãm mẽmoj to mrar nẽ nhãm mẽmoj to mrar pyræk. Nom kêr pu mẽ ho mẽ uræk kêt nẽ. ãm Kris kôt pix mã pajamexpêr tỳx o papa. Jakamã nhũm mẽ tee ri mẽ pahte hkwym ri tanhmã amnhĩ tomnuj to hprãm xaj tanhmã mẽ pahto kaprỹ. Nom kêr pu mẽ mẽ mar kêt nẽ. ãm pakatát kôt mẽ àptàr kot amnhĩ nhĩpêx o amnhĩ nhĩpêx o papa. Jao Kris kôt axpên to paxihtỳx o papa.

15 Tãm axpên mã pakapêr nẽ pamã axpên kĩnh o axpên mã paxêx kêt nẽ. Kwa kêr pu mẽ ã amnhĩ nhĩpêx anhỹr o mãn papa. Jao te mẽ pahkrã Kris kot amnhĩ nhĩpêx pyræk o amnhĩ nhĩpêx mex o mỗ.

16 Ně mẽ panhĩ kamã tanhmã mẽ pakuteja piitã na hte mẽ pahkrã kamã mẽ pajamexpêr xà hkôt axpên kôt ahpỹnhã tanhmã axpên to ajuta hto. Te ixkre pixi kamã mẽ pahte axpên kôt tanhmã axpên to ajuta hto ho ri papa pyræk.

Kris kôt mẽ pahte amnhĩ nhĩpêx nyw ã mẽ pamã karô

Korosê 3.5-11; Wam Pêtre 4.7

17 E kot paj Pahihti nhỹ hã mẽ amã mẽmoj jarê nẽ nẽ mẽ amã ixkapêr kãm ixihtỳx nẽ ka mẽ inhma. Nà kêr ka mẽ axte mẽ kêp Tirtũm kra hkêt xwỳnhjê kot amnhĩ nhĩpêx o amnhĩ nhĩpêx o ri

apa hkêt nê. Na htem htÿx ri tanhmã hamaxpêr punuj to ho ri amnhĩ tomnuj o pa.

¹⁸ Jao Tĩrtũm mã hamaxpêr kêt nê pa. Kãm hamaxpêr prãm kêt kumrêx nê pa. Te mē kot omunh nê nhãm hkrã pyrãk o amnhĩ nhĩpêx. Rÿ te mēhõ wa kot axpên kãm gryk kãm axpên nhĩpêx pyrãk o hipêx. Jao te kamãt kô kamã ri pa pyrã nê Tĩrtũm kot amnhĩ nhĩpêx pumunh kêt nê pa. Jakamã koja mē nhÿrmã kuri htĩr tũm nê pa hkêt nê.

¹⁹ Na htem tanhmã amnhĩ tomnuj to htã amnhĩ kamã hpijaãm kêt nê pa. Nê axpên kamã hpijaãm kêt rãhã ho pa. ãm amnhĩ pix kukamã hamaxpêr nê tanhmã amnhĩ tomnuj to ho ri pa.

²⁰⁻²¹ Nom Jejus Krisja ã kot amnhĩ nhĩpêx anhÿr kêt. Mē kurom tãm kot amnhĩ nhĩpêx mex o pa xwÿnh nê tãm kapêr o pa xwÿnh na. Na pa pre ma mē awÿr mō nê ixprĩ hã mē amã ja hã harê ka prem inhma nê inhmar tÿx nê.

²² Na pa pre mē amã:

—Kwa mē ri axte amnhĩ nhĩpêx tũm kôt amnhĩ nhĩpêx o ri apa hkêt nê. Ja na omnuj tÿx. Na ka prem ã amnhĩ nhĩpêx anê nê ajamaxpêr punuj pix o ri apa. Jao amnhĩ tomnuj rãhã nê. Tã kêr ka mē amnhĩ nê awry hã mēnh pyrã nê axte ã amnhĩ tomnuj anhÿr o ri apa hkêt nê.

²³ —Nê kêr ka mē axte mē ajamaxpêr tũm nê mē ate amnhĩ nhĩpêx tũm kôt ri amnhĩ nhĩpêx kêt nê. Nê mē

ajamaxpêr nyw nê mē ate amnhĩ nhĩpêx nyw kôt pix mã ri amnhĩ nhĩpêx o ri apa. Te mē kot mē ê htũm kwryñh nê rēnh nê hpãnhã nyw jagjêx nê ri hã pata pyrã nê ãm amnhĩ nhĩpêx nyw kôt pix mã amnhĩ nhĩpêx o ri apa.

²⁴ Mē ajamaxpêr nyw nê mē ate amnhĩ nhĩpêx nywja axtem na. Te Tĩrtũm jamaxpêr nê kot amnhĩ nhĩpêxta pyrãk. Jakamã kwa kêr ka mē kãm hprãm xã hkôt pix mã tanhmã amnhĩ nhĩpêx to ho ri apa. Jao kãm amnhĩ nhĩpêx mex o ri apa. Nê kapêr kôt ri amnhĩ nhĩpêx. Anê.

Na pa pre ã mē amã ixkapêr anê. Tã kêr ka mē arĩ ixkapêr kôt pix mã amnhĩ nhĩpêx.

²⁵ Mē pahpê Kris nhĩ jakamã te pahte ixkre htipxi kamã axpên kôt amnhĩ nhĩpêx pyrãk jakamã kwa mē axte axpên mã mēmoj to axêx kêt nê. Nê amarĩ axpên xô ri axpên mã mēmoj to axêx kêt nê. ãm tãm axpên mã mēmoj jarēnh o ri apa.

²⁶ Nê kot kaj mē mēmoj tã agryk japêr. Rÿ mēhõ kamã agryk rÿ amarĩ agryk japêr. Tã kêr ka ho ajapêx tokyx anê agryk japjê hkêt nê. Kêr kê kormã kamãt kêt ri ka akupÿm tãm akrã nhũm ja amã mex nê.

²⁷ Nom kot ka mē arĩ kamã agryk o ri apa nhũm mēkarõmnuti nhõ pahi Satanastija ja hã mē apumu nê te mē ate amnhĩ tomnujta ã mē apynēnh pyrãk o mē anhĩpêx. Ka mē ra hkôt

tanhmã amnhĩ tomnuj to. Ja pymaj kêr ka mẽ agryk japjê hkêt nê. Satanasti kãm hprãm xà hkôt ã amnhĩ nhĩpêx anhÿr kêt nê.

²⁸ Nê mẽ axàhkĩnh o mẽ apa xwÿnhjaja kêr ka mẽ axte mẽ kêp axàhkĩnh hkêt nê. Mëmoj tâ apê nê hpãnhã kàxpore jamÿ nê ho amnhĩm awjaprô. Nê mẽ kêp amrakati xwÿnhjê mã mẽmoj japrôr o ri apa. Kêr ka mẽ ate amnhĩ nhĩpêx tũmta pãnhã ã amnhĩ nhĩpêx nyw o amnhĩ nhĩpêx anhÿr o ri apa.

²⁹ Nê kêr ka mẽ amã axpên kĩnh kamã tãm axpên mã akapêr o ri apa. Nê akapêr mã agêt kãm ri axpên mã akapêr kêt nê. ãm axpên mã akapêr mã aprĩ ho axpên mã akapêr. Nê mẽ amã axpên kĩnh nê mẽ amã axpên to mex pix prãm xaj tãm axpên mã ri akapêr o ri apa.

³⁰ Tĩrtũm na pre mẽ pahwÿr amnhĩ Karô rê nhũm mẽ pahpê hkra hã mẽ pahkarô mã agjê nê mẽ pakamã hkrĩ ho hkrĩ. Koja mẽ pakamã hkrĩ ho hkrĩ rãhã nhũm nhÿrmã Tĩrtũm amnhĩ wÿr mẽ pahto api pu mẽ kuri pahtĩr tũm nê papa ho papa. Jakamã kwa kêr ka mẽ tanhmã amnhĩ tomnuj to ho amnhĩ kamã Tĩrtũm Karô mã hkaprĩ jagjênh kêt nê. Nê kãm hpijaam jagjênh kêt nê. Koja mẽ pahte amnhĩ tomnuj ã mẽ pahpumu nê mẽ pahkaga hkêt tâ tee ri ja hã mẽ pahpumu nê hkaprĩ nê. Jakamã kêr pu mẽ ãm kãm hprãm xà hkôt pix mã

tanhmã ri amnhĩ nhĩpêx to ho ri papa.

³¹ Nê kêr ka mẽ axte ri axàhkurê ho ri apa hkêt nê. Nê agryk kãm axpên mã tanhmã akapêr punuj to hkêt nê. Rÿ axpên japrÿ ho ri apa hkêt nê. Nê atÿx ri axpên tâ apêr o apikênh kêt nê. Nê ri axpên tâ mẽ kãm axàmnênh kêt nê.

³² Kêt mẽ ãm axpên to mex pix nê axpên kãm axukaprĩ ho ri apa. Nhũm mēhō tanhmã mẽ ato ka mẽ ãm amnhĩ tâ omu nê tanhmã ho hkêt nê tanhmã kot atoja ho ajamakêtkati kurê kumrêx. Tĩrtũm na pre Kris kukwak ri mẽ pahte amnhĩ tomnuj grãnh pa nê axte kãm hamaxpêr kêt nê. Tã kêr ka mẽ urak nê mēhō kot tanhmã atomnuj tota tokyx ho ajamakêtkati nê axte kãm ajamaxpêr kêt nê.

5

¹ Nê koja mēhō kãm hkra japê nhũm amnhĩ tâ omu nê hkĩnh nê. Hãmri nê nhÿrmã hkra nê amnhĩ pyrã nê kãm hapê nê. Ja pyrã nê Tĩrtũm kãm mẽ pahpê hkwyjê japê jakamã kêr pu mẽ amnhĩ pyrã nê pamã pahkwjê hkĩnh tÿx o papa.

² Kris haxwÿja kãm mẽ pajapê jakamã na pre htyk o mẽ panê mẽ pahte amnhĩ tomnuj pãnhã amnhĩrer pa. Kêp Tĩrtũm Kra htã amnhĩ mex pix kukamã hamaxpêr kêt nê ã mẽ panê amnhĩ nhĩpêx anê. Tã ã kãm mẽ pajapê anhÿr jakamã nhũm Tĩrtũm ja hã omu nhũm ja kãm mex nê.

Te ho mẽ hkuxwa xà mex kuxwa pyràk. Jakamã kër pu mẽ amnhĩ tã omu nẽ uràk nẽ pamã axpẽn kĩnh o axpẽn to mex o mãn ri papa.

Mẽ pahte amnhĩ tomnuj kaga hã kot mẽ pamã karõ

Sikũn Korõt 6.14-7.1; Korošẽ 3.16-17; Wam Juãw 1.5-10, 2.15

³ Nẽ mẽ pahpê Tirtũm kra jakamã kër pu mẽ pahprõ pix tãnopxar o ri papa nẽ nhãm mênijê hõ kamã pahpijaàm kêt o ri papa hkêt nẽ.

Nẽ kër pu mẽ amnhĩ pix kukamã pajamaxpër kêt nẽ. ãm ja ho anhÿr hkêt kumrẽx. Mẽ pahpê Tirtũm kra kênã kot pu kêt axtem nẽ ã amnhĩ nhĩpêx anhÿr o ri papa. Tirtũm krajaja na htem ã amnhĩ nhĩpêx anhÿr kêt nẽ.

⁴ Nẽ mãânẽn mẽ pakapërja. Kër pu mẽ ri tanhmã axpẽn mã pakapër punuj to hkêt nẽ. Nẽ ri axpẽn japyrÿ hkêt nẽ. Nẽ amnhĩ krã hkõt pahtÿx ri tanhmã pakapër to hkêt nẽ. ãm tãm axpẽn mã pakapër mex nẽ axpẽn mã Tirtũm mex o mex ã harẽnh o ri papa.

⁵ Nẽ Tirtũm kapër kõt amnhĩ nhĩpêx kêt xwÿnhjaja nẽ axpẽn kãm mẽ hpijaàm kêt xwÿnhjaja nẽ amnhĩ pix kukamã mẽ hamaxpër o pa xwÿnhjaja. ã mẽ kot amnhĩ nhĩpêx anhÿr xwÿnhjaja kêp Tirtũm mẽ Kris wa hkra hkêt. Na htem ã amnhĩ nhĩpêx anhÿrja gryk ã wa kãm hamaxpër kêt nẽ.

⁶ Nẽ koja nhÿrmã mẽhõ mẽ awÿr mõ nẽ mẽ ate tanhmã amnhĩ tomnuj to prãm xaj

hêx rom amã kapër nẽ mẽ amã:

—Kwa mon ka hte mẽ ixpyrà nẽ ã amnhĩ nhĩpêx anhÿr kêt nẽ? Ja mex kênã. Anẽ.

Koja ã mẽ amã kapër anẽ ka mẽ ama nẽ ãm ama. ã mẽ kot amnhĩ nhĩpêx anhÿr xwÿnhjaja koja Tirtũm nhÿrmã ja hã mẽ homnuj tÿx kumrẽx.

⁷ Jakamã kwa kër ka mẽ ate ho mẽ kot amnhĩ nhĩpêx pyràk pymaj mẽ hkõt ri apa hkêt nẽ. Kwarĩ ho kwarĩ.

Mẽ pahte amnhĩ nhĩpêx nywjarẽnh

Juãw 1.4, 3.19, 8.12, 12.35; Rõmãn 13.12; Wam Tesarõn 5.5; Wam Juãw 1.5

⁸ Amnepêm kormã mẽ ate Tirtũm kõt amnhĩ xunhwÿr kêt ri na ka prem te kamàt kô kamã ri apa pyrã nẽ atÿx ri tanhmã amnhĩ tomnuj to ho ri apa. Tã ra Jejus kõt amnhĩ xunhwÿ hãmri nẽ te hirã kamã mẽ apa xwÿnh pyràk. Jakamã kwa kër ka mẽ hpãnhã Tirtũm kãm hprãm xà hkõt pix mã mãn ri amnhĩ nhĩpêx o apa. Ra mẽ apê hirã kamã mẽ apa xwÿnh kênã.

⁹ Kot kaj mẽ ã amnhĩ nhĩpêx anẽ nẽ tãm amnhĩ nhĩpêx mex nẽ tãm akapër o apa.

¹⁰ Jao Tirtũm kãm hprãm xà hkõt pix mã amnhĩ nhĩpêx o ri apa

¹¹⁻¹² nẽ te kamàt kô kamã ri mẽ pa xwÿnhjaja kot amnhĩ nhĩpêx pyràk o amnhĩ nhĩpêx kêt nẽ. ã mẽ kot amnhĩ nhĩpêx anhÿr xwÿnhjaja na htem hpimxur pẽ tanhmã amnhĩ tomnuj tÿx to ho pa.

Nom kot paj ixprĩ hã mẽ amã tanhmã mẽ kot amnhĩ tomnuj to hã mẽ harẽnh kêt nẽ. Kot pa mẽ amã harẽ nẽ ixpijaam tỳx nẽ. Ixte harẽnh mã xwỳnhja omnuju. Tã kêr ka mẽ uràk nẽ ã amnhĩ nhĩpêx anhỹr kêt nẽ. Âm mẽ noo mã tãm ri amnhĩ nhĩpêx o ri apa.

13 Mẽ kot ja hã mẽ apumunh nẽ tee ri tanhmã kot amnhĩ tomnuj to hkukamã hamaxpêr kaxyw. Jao amnhĩ tomnuj kaga japêr.

14 Te mẽ kot kanê hpôk rax kãm mẽmoj piitã omunh mexta pyràk. Tĩrtũm kapêr ã kagà htũm kot ja jarẽnh kot:

Mẽ amã Tĩrtũm prãm kêt xwỳnhjaja te ra mẽ atyk nẽ mẽ anhĩkwỹ pyràk.

Nẽ te kamàt kô kamã mẽ anhôt nẽ mẽ anhĩkwỹ pyràk.

Jakamã kwa te mẽ akrã hapôx nẽ kànhmã mẽ akrĩ pyràk o amnhĩ nhĩpêx nẽ Tĩrtũm kôt amnhĩ xunhwỳ.

Kê Kris tanhmã mẽ akrã hto ka mẽ te myt kato nhũm mẽ ate arĩgro hã ri apa pyràk o amnhĩ nhĩpêx. Anẽ.

Tĩrtũm krajaja kot tanhmã amnhĩ nhĩpêx to hã mẽ kãm karõ

Korosẽ 4.5; Sikũn Ximotre 4.2

15 Nẽ kwa kêr ka mẽ amnhĩ pumunh mex o ri apa. Nẽ mẽ ri htỳx ri mẽ kot amnhĩ nhĩpêx xwỳnhjê hkôt amnhĩ nhĩpêx kêt nẽ. Nẽ âm amnhĩ to mex pix o ri apa.

16 Na htem ra Kris ã mẽ pahtomnuj o pa pu mẽ pamex kêt nẽ ri papa. Tã nom kêr pu mẽ apkati mẽ arĩ Tĩrtũm mã tanhmã amnhĩ nhĩpêx to ho papa mã panhũrer kêt nẽ.

17 Nẽ âm Tĩrtũm pix mã amnhĩ jarẽnh o ri papa nẽ kãm:

—Pa Tĩrtũm. Inhmã akôt pix mã amnhĩ nhĩpêx prãm jakamã kwa ixte amã mẽmoj to anhỹr kaxyw ixkrãm ijamaxpêr mex jagjê nẽ ho amnhĩrit mex pa tanhmã amã amnhĩ nhĩpêx to ho ri ixpa.

Anhỹr o amnhĩ to kuwỳ. Nom kêr pu mẽ pahtỳx ri pajamaxpêr kôt tanhmã kãm amnhĩ nhĩpêx to hkêt nẽ.

18 Nẽ kêr pu mẽ ri pahpipãnh o papa hkêt nẽ. Kwarĩ ho kwarĩ. Kot puj mẽ ã amnhĩ nhĩpêx anẽ nẽ te kagôxyhti kot amnhĩ tã mẽ pahkaxpre pyràk o mẽ panhĩpêx pu mẽ tee ri pamã hkaga hprãm kaprỳ. Te kot amnhĩm mẽ pahto arĩk pyràk o mẽ panhĩpêx nhũm ja mex kêt nẽ. Na htem pipãnh kãm hamaxpêr mex kêt nẽ âm htỳx ri tanhmã amnhĩ nhĩpêx to ho pa. Tã kêr pu mẽ ã amnhĩ nhĩpêx anhỹr hkêt nẽ âm Tĩrtũm Karõ pix hkôt mãn ri amnhĩ nhĩpêx o ri papa.

19 Nẽ kêr pu mẽ axpẽn wỳr akuprõ nẽ pahkĩnh kãm Tĩrtũm mã mex o mex ã harẽnh pê ho pagrer o pahkrĩ.

20 Nẽ mẽ pamex nẽ ri papa rỳ pahpunuj nẽ ri papa htã arĩ kãm mex o mex ã

harēnh rāhā ho ri papa. Kêp Mēpanhîpêêxà maati jakamā mẽ pahpê Pahihtî Jejus Kris kwỳ hā pu mẽ kām mex ā harēnh rāhā ho papa nē aa ho pajamakêtkati hkêt nē.

21 Nē kêr ka mẽ Kris ā apijaam rāhā o ri apa. Jao axpēn kôt ajamaxpēr nē axpēn kôt ri amnhî nhîpêx mex o ri apa.

Tanhmā mẽ hprō nē mẽ mjên kot axpēn nhîpêx to hā mẽ kām karō

Wam Korît 11.3; Korosê 3.18-19; Wam Pêtre 3.1-7

22 Nē kêr ka mẽ anijaja mẽ amjên ā apijaam o ri apa. Nē mẽ hamaxpēr mex ā mẽ omu nē mẽ hkôt ri amnhî nhîpêx o ri apa. Te mẽ ate Pahihtî Kris kapēr kôt amnhî nhîpêx o ri apata pyrāk.

23 Kris kêp mẽ pakamā ukaprî xwỳnh nē kêp mẽ papytār xwỳnh jakamā te kêp mẽ pahpiitā mẽ pahkrā pyrāk. Nē mẽ papajaja te mẽ pahpê ī pyrāk. Jakamā na pu htem pahpê ĩja te mẽ pahkrā kot tanhmā hamaxpēr to xà hkôt amnhî nhîpêx o papaja pyrāk. Ja pyrā nē kêr ka mẽ anijaja mẽ amjên jamaxpēr mex ā mẽ omu nē mẽ hkôt amnhî nhîpêx mex nē.

24 Mē pahpê Kris kwỳ jakamā na pu htem hkôt amnhî nhîpêx mex o ri papa. Ja pyrā nē kêr ka mẽ amjên kôt amnhî nhîpêx mex o ri apa.

25 Nē mẽ amyjaja. Kêr ka mẽ amā aprō hā ma ho ri apa. Te ho Kris kot mẽ pahtā ma ho pata pyrāk. Na pre kām mẽ pajapê xàj amnhî grōnh kôt

mē pahwỳr wrỳ nē mẽ panē ty. Tā kêr ka mẽ urāk nē ā amā aprō hā ma ho apa anē.

26 Na pre Kris kām mẽ pajapê xàj mẽ pahte amnhî tomnuj pē mẽ pahpytā. Te mēhō my kām mēhō ni hkīnh nē mēmoj punuj pē utār nē ho hprōta pyrāk. Nhūm te mẽ kot axpēn mā wa rer kaxyw nhūm nija ma gōx mā htēm nē wỳr nē amnhî to mex nhūm mẽ kot axpēn kaxyw wa ho mexta pyrāk. Hāmri nē te ra axpēn mā wa rer nhūm wa kot axpēn kôt pa ho pata pyrāk.

Ja pyrā nē na pre Jejus kām mẽ pajapê nē kām amnhî kuri mẽ papa ho mẽ papa hprām xàj mẽ pahwỳr wrỳ nē mẽ pahte amnhî tomnuj pē mẽ pahpytā nē mẽ pamā Tirtūm kapēr jarēnh o pa. Tā mẽ pahpê hkrajaja na pu htem kapēr ma nē hkôt amnhî nhîpêx o papa ho amnhî tomnuj kaga. Te gōx kām mẽ paxwỳr nē mẽ pahte amnhî nē amnhî grā htyk kuhōnh par pyrāk. Jao Tirtūm kapēr kôt pix mā amnhî nhîpêx o ri papa. Te ra paxwỳr nē amnhî nē tanhmā mẽ pahte amnhî tomnuj to grānh par pyrāk. Nē te mjên mā xwỳnh wỳr nē amnhî to mex pyrāk.

27 ā mẽ pahte amnhî nhîpêx anhỳr jakamā te mẽ pamex nē ri papa pyrāk. Hāmri nhūm Krisja ja hā mẽ pahpumu nē kām mẽ pajapê htỳx nē. Jakamā koja nhỳrmā akupỳn wrỳ nē ma akupỳm amnhî kôt mẽ pahto api pu mẽ kuri pa

htír tūm nē papa ho papa.

28 Nē xà mē amyjaja mē amā amnhī japêê? Nà mē amā amnhī japê ho na ka htem amā amnhī tā ma ho apa. Tā kēr ka mē aprō nhīpêx o te ka amā amnhī tā mata pyrāk. Jao tām mē hipêx o ri apa. Te war apixire nē war apa pyrāk o wa axpēn nhīpêx. Kot kaj mē tanhmā hipêx to nē te ate amnhī nhī tanhmā hipêx to pyrāk.

29-30 Na htem amnhī nhī ho mex pix o pa nē kamā gryk kêt nē. Nē kām prām nē apku. Nē kām kôr nē ixkō. Nē nhỹhỹnh à nē amnhīkane. Na pu htem ā amnhī to mex o ri papa anē. Ja pyrā nē te mē pahpê Kris nhī pyrāk jakamā na hte mē pahto mex o pa. Te mē pamā mē papa mē pahte amnhī nhī hā mata pyrāk.

31 Tirtūm kapēr ā kagà htūm kot ja jarēnh kot:

Koja mēmyjê hō hprō kaxyw hāmri nē hipêêxà nē katorxà wa ōrkwỹ kaga nē ām hprō kôt pix mē hpānhā ri pa ho pa. Te wa tipxi nē ri pa pyrāk o wa axpēn nhīpêx o pa. Anē.

32 Na pre Tirtūm ā ja jarēnh anē. Kapērja mex tā amnepê mā mē pa xwỹnhjaja na prem hprī hā mar tỳx kêt nē. Na prem htỳx mē mjên kot tanhmā mē hprō nhīpêx to pix ā hkamnhīx no ām ja pix kêt. Māānēn te mē pahpê Kris nhī pyrā nē tām mē pahte amnhī nhīpêx nē axpēn nhīpêx o papa hā ā mē pajarēnh kot anhỹr. Te ixkre

tipxi kamā mē pahte Kris kôt mē papa pyrāk o ā mē pajarēnh anē.

33 Jakamā kwa kēr ka mē amyjaja mē amā mē aprō japê ho ri apa. Te ka amā amnhī tā ma pyrāk o mē hipêx. Jao tām mē hipêx. Nē mē anijaja kēr ka mē ajaxwỹja mē amjên ā apijaam o ri apa.

6

Mē hkrajaja kot tanhmā hipêêxà nē katorxà nhīpêx to hā mē kām karō

Korosē 3.20-21

1 Nē mē apê mē hkrajaja kēr ka mē anhīpêêxà nē mē akatorxà wa kapēr ma nē hā ano htỳx nē wa hkôt ri amnhī nhīpêx rāhā ho ri apa. Mē amā Pahihti Kris kôt amnhī nhīpêx prām xāj ā amnhī nhīpêx anhỹr o ri apa. Kot kaj mē ā amnhī nhīpêx anhỹrja o amnhī nhīpêx mex o ri apa.

2-3 Tirtūm kapēr ā kagà htūm kot ja jarēnh kot:

Kēr ka mē anhīpêêxà nē mē akatorxà wa kapēr ma nē wa hkôt ri amnhī nhīpêx. Kot kaj mē ā amnhī nhīpêx anē nē amex nē kritpēm atír nē ri apa ry nē.

Anhỹr jakamā kot kaj mē amā kritpēm atír nē ri apa hprām hā kēr ka mē ā amnhī nhīpêx anhỹr o ri apa. Kormā mē aprīre htā ā amnhī nhīpêx anē. E kēr ka mē ā mē anhīpêêxà nē mē akatorxà nhīpêx anhỹr o ri apa.

4 Nē mē apê mē hipêêxà nē mē katorxà kēr ka mē akrajê

gryk kaxyw mẽ kãm apêr o apikênh hkêt nê. Tãm mẽ kãm akapêr nê Pahihti Jejus kapêr o mẽ ahkre ho ri apa. E kêr ka mẽ ã akrajê nhîpêx anhÿr o ri apa.

Mẽ pahte mẽ panhõ patrãw kapêr kôt amnhî nhîpêx ã mẽ pamã karõ

Korosê 3.22-4.1; Wam Ximotre 6.1-2; Xitre 2.9-10; Wam Pêtre 2.18-25

⁵ Nê mẽ ate mẽ kãm mẽ axapênh o mẽ apa xwÿnhjaja kêr ka mẽ anhõ patrãw kapêr ma nê hkôt amnhî nhîpêx mex o ri apa. Te mẽ ate Kris kapêr mar nê hkôt amnhî nhîpêx pyrãk. Jao mẽ hã api-jaam rãhã nê.

⁶ Nom kêr ka mẽ ãm mẽ noo mã pix mã ri mẽ kãm axapênh mex kêt nê. Mãânên mẽ wa kre kamã mẽ kãm axapênh mex rãhã nê. Ja na Tirtũm kãm hprãm. Mẽ apê Tirtũm Kra Kris mã tanhmã amnhî nhîpêx to ho apa xwÿnh jakamã kêr ka mẽ anhõ patrãw mã axapênh mex o ri apa.

⁷ Nê mẽ akĩnh kãm mẽ kãm axapênh mex nê. Te mẽ ate Pahihti mã akĩnh kãm tanhmã kãm amnhî nhîpêx to pyrã nê mẽ kãm tãm amnhî nhîpêx pê axapênh mex o ri apa.

⁸ Kot puj mẽ amnhî kaxyw Tirtũm mã pajamaxpêr pê pahkĩnh kãm tãm amnhî nhîpêx o ri papa nhũm Pahihti ja hã mẽ pahpumu nê nhÿrmã ja hã mẽ pahto mex rax nê. Mẽ pahpê hkrajê piitãã. Mẽ pahte mẽ kãm paxapênh xwÿnhjaja

nê amnhî mã mẽ paxapênh xwÿnhjaja nhũm nhÿrmã mẽ pahpiitã mẽ pahte tãm amnhî nhîpêx xwÿnhjê ho mex rax nê.

Mẽõ patrãwjaja kot tanhmã kãm mẽ apênh xwÿnhjê nhîpêx to

Korosê 4.1

⁹ Nê mẽ apê mẽ õ patrãwjaja kêr ka mẽ amã mẽ apênh xwÿnhjê ho mex nê mẽ apênh ã mẽ kãm axakjêr o ri apa hkêt nê. Tãm mẽ hipêx. Kaxkwa kamã mẽ panhõ Pahi Maatiija mãânên kêp mẽ õ Pahi Maati jakamã ã mẽ hipêx mex anhÿr o apa. Tãm na kãm mẽ pahpiitã mẽ pajapê ho axpên pyrãk. E kêr ka mẽ ã mẽ hipêx anhÿr o ri apa.

Tanhmã mẽ pahte Satanasti kutã amnhî to htÿx to hã mẽ pamã karõ

Rõmãn 16.20; Sikũn Korõt 10.3-5; Wam Tesarõn 5.8-11; Xiakre 4.7; Wam Pêtre 5.8-11

¹⁰ E kot paj hpãnhã tanhmã mẽ pahte mẽkarõmnuti nhõ pahi Satanasti kutã amnhî to htÿx to jarê ka mẽ inhma. Kêr ka mẽ Pahihti nhÿ hã kutã amnhî to htÿx rãhã nê apa. Ate tanhmã amnhî tomnuj to hprãm xaj tanhmã kot ato htã ka Tirtũm xihtÿx o anhõpinh xà kaxwÿnh kãm kutã amnhî to htÿx nê. Rÿ koja ate mẽmoj mex o anhÿr nê tanhmã ato ka mẽ amnhî tã hamaxpêr ã omu nê ãm omu nê arĩ Tirtũm xihtÿx nhÿ hã tãm ajamaxpêr mex rãhã ho ri apa.

¹¹ Na hte põristijaja pijapu kaxyw hãmri nê amnhî nê kax o mẽ ê jagjê nhũm mẽ

tee ri kām mẽ hkamnhwÿr prām hkaprÿ. Tã ja pyrã nẽ koja Satanasti mẽ ate kapẽr kôt tanhmã amnhĩ nhĩpêx to hprãm xàj tanhmã mẽ ato ka mẽ amnhĩ tã hamaxpẽr ã omu hãmri nẽ Tĩrtũm xihtÿx nhÿ hã kutã amnhĩ to htÿx nẽ. Jao mẽ ate amnhĩ nhĩpêx nyw pix o amnhĩ nhĩpêx nẽ mẽ ajamaxpẽr nyw pix o ajamaxpẽr. Kot kaj mẽ ã amnhĩ nhĩpêx anẽ nhũm Satanasti tee ri tanhmã kãm mẽ ato hprãm hkaprÿ.

12 Mẽ pahpê Tĩrtũm kra jakamã mẽ kot mẽ pakutã amnhĩ xunhwÿr xwÿnh maatiijaja axtem na mẽ. Mẽ kêp mẽkarõmnuti jakamã mẽ pahkĩnhã mẽ ĩ hkêt. ãm mẽ hkarõ kaxkrit pix na mẽ. Na htem kôk kôt tanhmã amnhĩ tomnuj tÿx to ho pa. Nẽ mẽ hihtÿx. Na htem arĩ jar pika ja kamã mẽ kêp Tĩrtũm kra hkêt xwÿnhjê ho amnhĩptã nhũm htem mẽ hkôt ri htÿx tanhmã ri amnhĩ tomnuj tÿx to ho pa. Nom amnhĩ tã mẽ omunh kêt nẽ.

13 Jakamã kwa kêr ka mẽ Tĩrtũm kot mẽ akarõ mã amnhĩ Karõ jagjênh xwÿnhhta kôt pix mã amnhĩ nhĩpêx o apa. Jao mẽ ate amnhĩ nhĩpêx nyw kôt pix mã mãn ri mẽ amnhĩ nhĩpêx. Kêr kê mẽkarõmnuti tee ri kãm tanhmã mẽ ato hprãm kaprÿ ka mẽ arĩ Tĩrtũm Karõ xihtÿx nhÿ hã kutã amnhĩ to htÿx rãhã ho apa.

14 Jakamã kwa kêr ka mẽ axkãm ajamak rom nẽ te ho sôrdat kot pijapu kaxyw

ê jagjênh pyrãk o amnhĩ nhĩpêx. Na htem amnhĩ nẽ moux kã ho mẽ ê jagjê nẽ mẽ hpre xã ho amnhĩ pre hpa. Nẽ hipy kãx o mẽ hinô kã jagjê. Hãmri nẽ rĩ kormã ma mẽ kãm mẽ hkurê xwÿnhjê kutã mra nẽ axpu. No mẽ kajaja kêr ka mẽ kurom amnhĩ krãm Tĩrtũm kapẽr jaxar tÿx nẽ hkôt pix mã ri ajamaxpẽr rãhã ho ri apa. Nẽ hkôt ri amnhĩ nhĩpêx mex nẽ. Jao te sôrdat pijapu kaxyw kot amnhĩ nhĩpêxta pyrãk.

15 Na hte sôrdatjaja hpar kã jagjê nẽ aa hopoux kêt nẽ. ãm rãhã gôr nẽ hikwÿ. Jao ra mẽ kutã pijapu kaxyw amnhĩ grõnh rãhã gôr nẽ hikwÿ. Tã kêr ka mẽ ma mẽ kãm Jesus kot tanhmã mẽ panê amnhĩ nhĩpêx to hã harênh o apa kaxyw nẽ sôrdat pyrã nẽ amnhĩ grõnh kôt ma mẽ hwÿr apa nẽ amnhĩ kamã akahak kêt nẽ.

16 Nẽ sôrdatjaja na htem amnhĩ nẽ amnãr xã hã kãx po jamÿ nẽ ho kuhê nhũm mẽ tee ri kãm mẽ hkamnhwÿr prãm kaprÿ. Ja pyrã nẽ koja Satanasti tanhmã mẽ ato ka mẽ Tĩrtũm kêp mẽ anhõ pahĩ hã hihtÿx o kot Satanasti jakrenhja mã ajamaxpẽr kurê kumrêx nẽ ãm hkôt pix mã amnhĩ nhĩpêx. Na hte Satanasti te kot mẽ pahwÿr krur rênh pyrãk o mẽ panhĩpêx. Jao xatã mẽ pahte Tĩrtũm kaga hprãm xàj tanhmã mẽ pahto. Nẽ mẽ pahte Tĩrtũm mã tanhmã amnhĩ nhĩpêx to pymaj xatã tanhmã mẽ pahto kaprÿ. Pu

mē amnhĩ tã omu hãmri nē Tirtũm Karõ xihtỳx nhỹ hã Tirtũm kõt pix mã amnhĩ nhĩpêx.

17 Nē na hte sôrdatjaja kàx o mē hkrãjapap jagjê nē pijapu kaxyw mē kutã mra nhũm mē tee ri mē hkrã jayr prãm kaprỳ. Ja pyrã nē kêr ka mē amnhĩ kaxyw Tirtũm kõt pix mã ajamaxpêr rãhã ho ri apa. Nē ra kot mē ato hkra mã ajamaxpêr rãhã nē. Kê Satanasti tee ri kãm mē akrã kamã mē amã mē ajamaxpêr punuj jagjênh prãm hkaprỳ.

Nē sôrdatjaja na htem mē kutã wapo jamỳ nē ho kuhê. Nom mē papajaja mē panhõ wapoja na axtem kêp Tirtũm kapêr. Na hte Tirtũm Karõ mē pahkrã kamã kapêr o amnhĩrit pu htem pix mã pajamaxpêr o papa nhũm Satanasti tee ri kãm mē pahkrãm mē pajamaxpêr punuj jagjênh prãm kaprỳ. Te mē papijapu nhũm mē pahte amnhĩ nê ho pakrihkrit pyrãk o hipêx.

18 ã Satanasti pê mē pahte amnhĩ nê amnhĩ nhĩpêx kot anhỹr. Jakamã kêr pu mē amnhĩ to Tirtũm pix wỳr o ri papa kê Satanasti kutã mē pahto paxihtỳx pu mē hkõt tanhmã amnhĩ tomnuj to hkêt nē.

Nē kêr pu mē mēmoj to anhỹr kaxyw nē ra Tirtũm Karõ nhỹ hã amnhĩ to Tirtũm wỳ. Nē kãm amnhĩ jarênh rãhã ho papa nē aa ja ho pajamakêtkati hkêt nē. Nē Tirtũm krajê piitã mē ho hwỳr rãhã ho ri papa.

19 Nē kwa kêr ka mē mãânên ixto Tirtũm wỳr rãhã nē. Kot tanhmã ixto nhũm ixãmnhĩx ixte mē kãm kapêr jarênh mex o ri mē hkõt ixpa kaxyw. Mē kot ja hã tanhmã ixto htã pa arĩ ixãmnhĩx mē kãm harênh mex o ri mē hkõt ixpa. Nē ixprĩ hã mē kãm Jejus kot tanhmã mē panê amnhĩ nhĩpêx to hã harê. Kormã mē kot hprĩ hã ja mar mex kêt.

20 Tã ixte mē kãm ja jarênh kaxyw na pre Tirtũm mē hwỳr inhmê nhũm prem hã ijaxã pa arĩ mē hagjênh xã kamã ixkrĩ ho ixkrĩ. Jakamã kwa mē ixto Tirtũm wỳ kê tanhmã ixto ixihtỳx to pa arĩ mē kãm kapêr jarênh o ixkrĩ. Ja na Tirtũm kãm hprãm nē ijaxwỳja inhmã ja prãm.

Kagà jatur xà

Korosê 4.7-8

21 Nē ot pa mē awỳr Xikitre mē. Kot paj mē amã kagàja nhĩpêx pa nē kãm kugõ nhũm kupy nē ma mē awỳr o mõ. Hãmri nē mē awỳr o pøj nē mē amã kugõ nē mē amã tanhmã ijarênh to ka mē ijarênh ma nē akĩnh nē. Xikitre na hte Pahihti mã tanhmã amnhĩ nhĩpêx mex to o pa. Kris kõt mē pahtõ na. Nē inhmã hapêê.

22 Tã ot pa mē awỳr kumê. Kê mē awỳr pøj nē mē amã ijarê ka mē kam ama nē akupỳm tãm akrã nē tee ri ixkukamã ajamaxpêr kêt nē.

23 E ixkrãmnhwỳjaja. Kê Mēpahpãm Tirtũm mē Pahihti Jejus Krisja wa tanhmã mē akrã hto ka mē ajamakêtkati

ně axàmnhĩx ri apa. Ně mẽ
amã axpẽn kĩnh o ri axpẽn kôt
apa. Ně mẽ apiitã wa hkôt
ajamaxpěr mex o ri apa.

²⁴ E mẽ amã mẽ panhõ
Pahihti Jejus Kris kĩnh rãhã
ho apa xwỳnhjaja. Kê Tĩrtũm
mẽ ato mex nẽ mẽmoj to mẽ
akutã nojarêt rãhã ho pa.

Tã ãm ja pix na hapêx. Ixpê
Pawre na pa mẽ awỳr kagãja
nhĩpêx nẽ kumẽ.

Piripos

Pawre kot Piripos kamã Jejus kôt hkwýjê hwýr kagà nê mēnh

Pawre na pre kagàja nhîpêx. Jejus nhÿ hã mē ahkre o mē pa xwýnhjê hõ na pre. Na pre Jejus ã mē kãm hkurê xwýnhjaja unê nê ma krî pê Rôm wýr kumê nê kamã haxà nhùm mē haghênh xà kamã hkrî ho hkrî. Tã nhùm arî hkrî rãhã Piripos kamã Jejus kôt hkwýjê hwýr kagàja nhîpêx nê kumê. Na prem Pawre jarênh ma nê kãm ukaprî nê. Jakamã axpên kaxyw kàxpore hkwý ho akuprõ nê hwýr kumê. Hãmri nhùm omu nê hkînh nê amnhî tã kagàja nhîpêx nê kamã mē kãm amnhî jarê nê mē hwýr kumê. Kot amnhî xà htýx kamã hamak o hkrî htã arî hwýr mē mrar xwýnhjê mã Tirtüm kapêr jarênh rãhã ho hkrî hã amnhî jarê. Nê kãm Jejus kot amnhî nhîpêx kôt pix mã amnhî nhîpêx o pa hprãm ã amnhî jarê. Nê kãm Jejus jamaxpêr kôt pix mã hamaxpêr prãm ã amnhî jarê. ã na pre Pawre kagàja kamã mē kãm amnhî jarênh anê. Nê mē kãm:

¹ Pa Piripos kamã Jejus Kris kôt ixkwýjaja. Xà mē amex na ka mē apa? E ixpê Pawre na pa mē amã kagàja nhîpêx nê kamã mē amã amnhî jarê nê mē awýr kumê. Nhùm

Ximotre haxwýja kãm ja mex nê. Wa ixpê Jejus mã tanhmã amnhî nhîpêx to ho wa ixpa xwýnh jakamã na pa wa mē awýr hipêx nê kumê. Mē ate Tirtüm kapêr o mē ajahkre xwýnhjê hwýr nê mē kãm mē ate tanhmã amnhî to xwýnhjê hwýr nê mē ate mē mar o akrî xwýnhjê hwýr. Mē apê Kris kôt wa ixtõ nê wa ixtõxjê ho ixpimràatã mē awýr hipêx nê kumê.

² E kê Mēpanhîpêêxà maati Tirtüm mē Pahihti Jejus Kris wa mēmoj to mē akutã nojarêr rãhã nê ka mē axàmnhîx ri ajamakêtkati nê ri apa ho apa.

*Pawre kot Piripos nhõ
xwýnhjê ho Tirtüm wýr ã
harênh*

Epes 1.15-19; Korosê 1.9-12

³ Na pa hte xatã mē amã ijamaxpêr o ixkrî nê mē panhõ Tirtüm kot tanhmã mē ato mex toja pa kãm ijamaxpêr nê ixkînh nê ixkrî.

⁴ Nê Tirtüm mã mē ajarênh nê mē ato kuwý. Ixkînh kãm mē ato kuwý.

⁵ Wam ixte mē awýr inhmõrta ã na pa pre mē amã Jejus kot mē panê tanhmã amnhî nhîpêx to hã harênh o ri mē akôt ixpa. Ka prem inhma nê hkôt amnhî xunhwýr týx nê hkôt amnhî nhîpêx o ri apa. Jakamã inhmã axpên kaxyw ri kàxpore hkwý nhõr o apa. Te ham mē ate ixwýr mēnhhta pyræk pa pre mē akukwak ri amnhîm ho ixujaprõr o ri ixpa pê nhãm ri mē kãm Jejus

jarēnh o ri mẽ hkôt ixpa. Na pa hte arĩ jam ijamaxpēr rāhã ho ixkĩnh nẽ ixkrĩ. Nẽ Tĩrtũm mã mẽ ate ixto mex ã kãm mẽ ajarēnh o ixkrĩ.

⁶ Nẽ na pa pre ma mẽ awỳr mō nẽ mẽ amã Jesus jarē ka prem inhma nẽ hkôt amnhĩ xunhwỳ nhũm Tĩrtũm ja hã mẽ apumunh mex nẽ. Hãmri nẽ mẽ ate hkôt amnhĩ to htỳx kaxyw tanhmã mẽ ato mẽ axihtỳx to. Tã koja arĩ mẽ ato mẽ axihtỳx rāhã nhũm Jesus Kris nhỹrmã akupỳn mẽ pahwỳr wrỳ. Koja ã mẽ ato mex anẽ.

⁷ Na hte tanhmã ixto mex tota pyrã nẽ tanhmã mẽ ato mex to ho pa nẽ mẽ akutã nojarēt rāhã ho pa.

Nẽ kormã mẽ kot ijaxàr kêt ri pa pre ma mẽ piitã mẽ kãm Jesus jarēnh o ri ixpa. Nẽ ãm hãmri mẽ kãm harẽ. Mẽ kot mar nẽ hkôt amnhĩ xunhwỳr tỳx kaxyw pa pre mẽ hkôt harēnh rāhã ho ri ixpa. Ka prem ja kaxyw inhmã kàxpore hkwỳ gō pa pre ho amnhĩm ixujaprōr pẽ mẽ hkôt ri mẽ kãm harēnh o ri ixpa. Tã nhũm prem jar Rōm kamã ijaxà pa arĩ ixkrĩ htã ka mẽ axte ixwỳr hkwỳ mẽ. Jakamã na pa hte mẽ amã ijamaxpēr rāhã ho ixkrĩ nẽ inhmã mẽ akĩnh tỳx nẽ.

⁸ Te Jesus Kris kãm mẽ ajapê htỳx pyrāk. Tĩrtũm kot ja hã ixpumunh mex.

⁹⁻¹⁰ Na pa hte mẽ ato kuwỳ nẽ kãm:

—Pa Tĩrtũm. E Piripos nhō xwỳnhjê pumu. Na mẽ ra kãm axpẽn kĩnh o axpẽn kôt pa. Kwa tanhmã mẽ hipêx to kê mẽ arĩ kãm axpẽn kĩnh

tỳx pix nẽ. Jao axpẽn to mex rāhã ho pa. Nẽ tanhmã mẽ hkrã hto kê mẽ amnhĩ krãm akapēr jaxàr tỳx nẽ. Jao tãm amnhĩ nhĩpêx mex nẽ hamaxpēr mex o ri pa. Nom kormã mẽ kot ja pumunh tohtuj anhỳr. Tã kêr ka tanhmã mẽ ho kê mẽ ã amnhĩ nhĩpêx anhỳr rāhã Jesus Kris akupỳn mẽ ixwỳr wrỳ.

Anhỳr pa hte mẽ ato hwỳr o ixpa.

¹¹ Nã koja Jesus Kris mẽ akaxwỳnh kãm mẽ ato mẽ axihtỳx ka mẽ y hã axihtỳx pẽ tãm ri amnhĩ nhĩpêx nẽ tãm axpẽn nhĩpêx o ri axpẽn kôt apa. Nhũm mẽ piitã ja hã mẽ apumu nẽ axpẽn mã Tĩrtũm mex o mex ã harẽ.

Pawre kãm Kris kôt amnhĩ nhĩpêx prãm ã harēnh

Atre 28.30-31; Epes 6.19-20; Sikũn Ximotre 2.9

¹² E Kris kôt ixtō nẽ ixtōxjaja. Kot paj mẽ amã tanhmã amnhĩ jarēnh to ka mẽ inhma. Na prem ra Jesus ã ixtomnuj tỳx nẽ hã ijaxà pa amnhĩ xà htỳx kamã ijamak o ixkrĩ. Nom mẽ kot ã inhĩpêx anhỳr tã pa hte arĩ ixkrĩ xà kamã mẽ kãm Jesus jarēnh o ixkrĩ. Jakamã na mẽ ra ohtō nẽ tanhmã kot mẽ pané amnhĩ nhĩpêx to hã harēnh ma.

¹³ Pōristi kot inhĩhkō hã ixtānopxar xwỳnhjê mẽ ixwỳr mẽ mrrar xwỳnh piitã ixte Kris kapēr jahkre ho ixpa pix ã mẽ kot ijaxàr ã ijarēnh ma.

¹⁴ Nẽ jar Kris kôt mẽ pahtō nẽ mẽ pahtōxjaja haxwỳja ijarēnh ma nẽ ohtō nẽ ixpyrà

ně Kris nhỹ hã amnhĩ to htỳx nẽ arĩ hkwỳjê mã kapêr jarênh rãhã ho pa. Ixpyrà nẽ kãm mẽ uma hkêt nẽ mẽ kutã amnhĩ to htỳx pẽ mẽ kãm harênh rãhã ho pa.

15-18 Nẽ na pre mẽ hkwỳjaja ixte mẽ amã Kris jarênh o ixpa hã ijarênh ma nẽ hã ixkamã gryk nẽ axtem hamaxpêr nẽ ixwakre kamã gryk kãm mẽ kãm Kris kapêr jarênh o pa. Na htem hamaxpêr o:

—E kot paj ma Pawre kot ra mẽ hwỳr mõi xwỳnhjê hwỳr mõi nẽ kot ra mẽ kãm Jejus kapêr jarênh nhĩpy axte mẽ kãm harênh o ri mẽ hkôt ixpa. Hãmri nhũm mẽ inhma nẽ inhgryk ã Pawre kaga. Hãmri nhũm mẽ hagjênh xà kamã arĩ hkrĩ tã tee ri mẽ hã ijarênh ma nẽ hkaprĩ nẽ rĩ amnhĩ pumu. Nà kot paj anẽ.

Anhỹr o hamaxpêr tã pa mẽ harênh ma nẽ ixkaprĩ hkêt nẽ. Mẽ kot mẽ amã hprĩ hã Kris kapêr jarênh kênã kot pa kêt tee ri mẽ harênh ma nẽ ixkaprĩ. Kwār mẽ mãmri ri ixkamã gryk kãm kapêr jarênh o ri pa. Pa mẽ harênh ma nẽ ixkĩnh nẽ. Nom na hte mẽ hkwỳjaja jajê rom kãm ixkĩnh kãm mẽ kãm Kris kapêr jarênh o pa. Nẽ tãm hamaxpêr pẽ mẽ kãm harênh o pa. Ra mẽ kot ixpumunh mex jakamã nhũm Tĩrtũm kot jar mẽ hwỳr inhmênh nhũm ixte ãm hãmri mẽ kãm kapêr mex jarênh o ri ixkrĩ hã ixpumunh mex. Jakamã kwār mẽ mãmri tanhmã inhmã hamaxpêr to xà hkôt mẽ ujarênh mexja jarênh o

pa. Mẽ kãm ixkĩnh kãm harê rỳ ixkamã gryk kãm ri harênh o pa. ãm hãmri Kris kapêr jarênh o pa jakamã pa mẽ harênh ma nẽ ixkĩnh nẽ.

19 Nẽ ra mẽ ate ixto Tĩrtũm wỳr o apa jakamã koja Karõja ixkaxyw tanhmã jar Rõm kamã pahшти nhĩpêx to nhũm tokyx ixkator japêr. Pa ixãmnhĩx ijamakêtkati nẽ ri ma mẽ akôt ixpa.

20 Nom inhmã Jejus kãm hprãm xà hkôt pix mã tanhmã amnhĩ nhĩpêx to ho ixpa hprãm. Jakamã koja mẽ ixkator pa ixkĩnh nẽ arĩ kãm tanhmã amnhĩ nhĩpêx to ho ri ixpa. Nom koja mẽ tanhmã hamaxpêr to nẽ ixpĩ pa mẽ kutã mẽ kãm amnhĩ to htỳx nẽ ixãm rãhã nhũm mẽ ixpĩ pa ijamakêtkati nẽ ty. Kê mẽ ja hã ixpumu nẽ ixtã Kris mex o mex ã harê. ãm Jejus kãm hprãm xà hkôt pix mã na inhmã amnhĩ nhĩpêx prãm.

21 Tã kot paj tanhmã amnhĩ to nẽ arĩ ixtĩr japêr hã kot paj ãm kôt pix mã amnhĩ nhĩpêx rãhã ho ixpa. Nom koja mẽ tanhmã hamaxpêr to nẽ hã ixpĩ pa ty nhũm Tĩrtũm ma kaxkwa hwỳr ixkarõ ho àpir kurê kumrêx. Pa Tĩrtũm mẽ Krata wa kuri inhmex o inhmex nẽ wa kuri ixpa ho ixpa.

22-23 Tã nhỹ na we inhmã mex o hõ jakrenh wehe? Na pa tee ri amnhĩ kukamã ijamaxpêr. Inhmã tokyx ixtyk nẽ Kris kuri ixpa hprãm. Ja na inhmã hprãm o inhmã hprãm. Nom ko. Kot pa arĩ ixtĩr nẽ arĩ mẽ kãm Jejus

kot tanhmã mẽ panê amnhĩ nhĩpêx to hã harênh rãhã ho ri ixpa. Ko. Ja mãânênh inhmã mex.

²⁴ No mẽ amã na arĩ ixtĩr nê ixpaja mẽ amã hprãm

²⁵ Jakamã kot paj pêr tokyx ixyk kêt nê. Kot paj arĩ ri mẽ amã Kris kôt mẽ ato mẽ axihtỳx o ri mẽ akôt ixpa. Jao ãm ho hkrãre ka mẽ ra amnhĩ kaxyw kãm ajamaxpêr nê hkôt amnhĩ xunhwỳr tỳx nê. Jao akĩnh nê apa.

²⁶ Tã kot paj nhỹrmã akupỳm ixtĩr rãhã mẽ awỳr mō ka mẽ ixpumu nê akĩnh nê. Jejus Kris kot akupỳm ixkator ã akĩnh nê. Hãmri nê ixtã Jejus mã mex o mex ã harê.

Mẽ pahte Jejus ã pahpunuj tã mẽ pahte amnhĩ to htỳx ã mẽ pamã karō

Rukre 6.22; Sikũn Korĩt 2.14-16; Xiakre 1.12; Jutre 3

²⁷ Jakamã e kêr ka mẽ Jejus Kris kapêr kôt pix mã amnhĩ nhĩpêx. Nê axpênh kôt axpênh to axihtỳx pê mẽ kãm Jejus kot tanhmã mẽ panê amnhĩ nhĩpêx to hã harênh o ri apa kê mẽ ama nê mẽ pahpyrà nê hkôt amnhĩ xunhwỳ. E kêr ka mẽ ã amnhĩ nhĩpêx anhỳr o ri apa. Kêr pa nhỹrmã mẽ hagjênh xàja rũm ixkator japêr nê nhỹri ja hã mẽ ajarênh ma rỳ ma mẽ anhō krĩ hwỳr mō nê ja hã mẽ apumu nê ixkĩnh nê.

²⁸ Nom kwa kêr ka mẽ amã mẽ kot Kris ã tanhmã mẽ ato xwỳnhjê puma hkêt nê. Mẽ kot tanhmã mẽ anhĩpêx kati hto htã kêr ka mẽ kutã amnhĩ to htỳx nê mẽ hkôt apa. Kêr

kê mẽ amnhĩ tã mẽ apumu nê tee ri hamaxpêr hãmri nê axpênh mã:

—Kwa mẽ pahte Kris ã tanhmã mẽ hipêx to htã na htem amnhĩ to htỳx nê arĩ mẽ pamã harênh o ri pa. Pêr mẽ kãm mẽ pahpuma hkêt. Mãn hte Tĩrtũm tanhmã mẽ ho nhũm mẽ ý hã kãm mẽ pahpuma hkêt nà? Kwa tanhmã kot puj mẽ ho nhũm mẽ Jejus kapêr jarênh o pata kaga? Nà kot puj mẽ ãm tee ri hã tanhmã mẽ ho kaprỳ. Mãn ãm hãmri na htem nhỹrmã Tĩrtũm kuri htĩr tũm nê pa ho pa hã amnhĩ jarênh o pa nà? Anê.

Koja mẽ ã mẽ ajarênh anê. Tĩrtũm kot mẽ ato mẽ axihtỳx ã mẽ apumunh kôt.

²⁹ Na pre tanhmã mẽ ato ka mẽ Kris kôt amnhĩ xunhwỳ. Tã mẽ kot tanhmã hã mẽ anhĩpêx to htã na hte Tĩrtũm mẽ kutã tanhmã mẽ ato ka mẽ ý hã amnhĩ to htỳx nê apa.

³⁰ Ijaxwỳja na pa hte amnhĩ xà htỳx kamã ijamak o ixkrĩ. Na pre htem Jejus ã ixtomnuj o pa ka prem ja hã ijarênh ma nê hã ixpumu. Tã ota kê mẽ ra axte tanhmã hã inhĩpêx to. Pa kê amnhĩ xà htỳx kãm ijamak o ixkrĩ ka mẽ ijarênh ma. Tã xep mẽ ixpyrà nê Kris ã amnhĩ xà htỳx kamã ajamak o apa. Nom kwa kêr ka mẽ tee ri amnhĩ kukamã ajamaxpêr o akaprĩ nê apa hkêt nê.

2

Jejus kãm mẽ pajapê xà tanhmã kot amnhĩ nhĩpêx to

hã harēnh

Rômãn 15.5-6; Epes 4.1-6; Piripos 2.18

¹ Nē ra mē pahte Jejus kôt amnhĩ xunhwȳr jakamã pu mē tee ri amnhĩ kukamã pajamaxpēr o pahkaprĩ nē ri papa hkêt nē. Ām kãm mē pajapēja mã pajamaxpēr rãhã ho pahkĩnh nē pajamakêtkati nē ri papa. Nhũm Karō mē pahkarō mã agjê nē mē pahto mex nē mēmoj to mē pakutã nojarêt o ri mē pakamã pa.

² Tã kêr ka mē axpēn mar mex nē mēmoj tã axpēn mã axàkjêr o ri apa hkêt nē. Te ri ixkre pixi kamã mē atipxi nē axpēn kôt amnhĩ nhĩpêx pyræk. Nē Tĩrtũm kãm hprãm xà hkôt pix mã ajamaxpēr o ri apa. Nē mē amã axpēn kĩnh o ri apa. Kot kaj mē ã amnhĩ nhĩpêx anē pa ja mã mē apumu rȳ mã mē ajarēnh ma nē ixkĩnh tȳx kumrêx.

³ Nē kwa kêr ka mē axpēn pumu nē ã ajamaxpēr anhȳr kêt nē. Mē ajamaxpēr o:

—Tk. Kot pa ri tanhmã jahti ho ajuta hto ho ixpa hkêt nē. Ixte amnhĩ to rax o hakrenh kēnã kot pa hkêt ri ho ajuta. Kê tãm mãn tanhmã ixto ajuta hto.

Anhȳr o ajamaxpēr kêt nē. Kêt nhȳri mēhõ pumu nhũm tanhmã kute ka mã omu nē ajamaxpēr o:

—Hêxta waa nē. Kwa tanhmã kot pa we ho ajuta htoo?

Anhȳr o ajamaxpēr hãmri nē ajamaxpēr xà hkôt tanhmã ho ajuta hto.

⁴ Jao Jejus pyrã nē mēmoj to axpēn kutã anojarêt o ri apa. No ri amnhĩ pix kukamã ajamaxpēr o apa hkêt nē.

⁵ Kêr pu mē te Jejus tanhmã hamaxpēr toja pyræk o pajamaxpēr o ri papa.

⁶ Kêp Tĩrtũm Kra kumrêx jakamã te uræk tã xà na pre ja mã amnhĩ pumu nē amnhĩ pix kukamã ã hamaxpēr anē nē hamaxpēr o:

Te ixte Tĩrtũm pyræk jakamã mēmoj piitã inhõ na. Jakamã kot paj jar kaxkwa kamã inhmex nē ixkĩnh nē ixpa ho ixpa nē aa rer nē nhȳhȳm inhmõr kêt kumrêx. Anhȳr o na pre hamaxpēr? Nã na pre ã hamaxpēr anhȳr kêt nē.

⁷⁻⁸ Kãm mē pajapê xàj na pre kaxkwa kamã mēmoj mex piitã rer pa nē man mē pahwȳr wrȳ nē mē pahpyrà nē ã ho katorxà nhõhy rũm kato.

Kêp mē panhõ Pahihti htã te kêp mē panhĩõ nē te kot amnhĩ to grire pyræk o amnhĩ nhĩpêx o ri pa.

Nē Tĩrtũm kãm hprãm xà hkôt pix mã amnhĩ nhĩpêx o pa.

Nē ãm kôt pix mã amnhĩ nhĩpêx o pa rãhã nhũm prem kupĩ nhũm arĩ mē kãm xà nē tanhmã amnhĩ tã mēhõ hto hkêt nē.

Na prem hipêx kati nē. Te kêp mē kot amnhĩ tomnuj

tỳx xwỳnhjê nhĩpêx
pyràk o hipêx nê pĩ
kahpa hã kunhõ nê
kupĩ.

Jao mãănên Tĩrtũm hihtỳx o
hihtỳx nê àhpumunh o
àhpumunh ã omu. Nê
mex o mex ã omu.

Tã no nhũm mẽ kêp tanhmã
amnhĩmnuj to hkêt nê
arĩ mẽ kãm xa. Mẽ
panê na pre ã amnhĩ
nhĩpêx anê.

*Te mẽ pahpê kanhêti pyràk
ã mẽ pajarênh*

Matêwre 5.14-16

12-13 Tã kwa ixkràmnhwỳjaja.

9 Hãmri nhũm Tĩrtũm ã kot
amnhĩ nhĩpêx anhỹr ã
omu nê akupỹm ho htĩr
nê akupỹm amnhĩ wỳr
ho api.

Inhmã mẽ akĩnh. Kwa kêr
ka mẽ arĩ Tĩrtũm kôt amnhĩ
nhĩpêx mex rãhã nê. Te ixte
mẽ akamã ixpare ri mẽ ate
amnhĩ nhĩpêx mexta pyràk o
ixwakre kamã amnhĩ nhĩpêx
mex o ri apa. Na pre ra
Tĩrtũm mẽ panê mẽ pahte
amnhĩ tomnuj rê nê tanhmã
mẽ pahto pu mẽ ý hã kapêr
kôt amnhĩ nhĩpêx o ri papa.
Jakamã kwa kêr pu mẽ axte
tanhmã amnhĩ tomnuj to ho
papa hkêt nê. Nê mẽ pahte
Tĩrtũm kapêr kwỳm ri amnhĩ
nhĩpêx pymaj ãm hkôt pix mã
amnhĩ nhĩpêx o ri papa.

Nê mex o mex ã harê.

Nê kot nhỹrmã mẽ pahpiitã
mẽ pahto amnhĩptar
kaxyw mẽ pakaxyw
ãm.

14 Nê kêr ka mẽ mẽmoj to
anhỹr kaxyw nê agryk kãm
tanhmã ri ho hkêt nê. Nê
mẽmoj tã axapênh kaxyw nê
ri hã axpên mã akapêr kati
kamã ho anhỹr kêt nê.

10 Jakamã kot puj mẽ nhỹrmã
pahpiitã Jesus kutã
pahkõnkrã ho rôrõk nê
pahkrĩ hpa nê kàx pêê
kãm mex o mex ã harê.

15-16 Mẽ kot amnhĩ tomnuj
xwỳnhjaja na htem ã amnhĩ
nhĩpêx anhỹr o pa. No kêt
mẽ kajaja. Mẽ ate mẽ hkôt
apa htã kêr ka mẽ hkôt amnhĩ
nhĩpêx kêt nê. Mẽ kurom mẽ
apê Tĩrtũm kra jakamã kêr
ka mẽ hkôt pix mã amnhĩ
nhĩpêx o ri apa. Nê tanhmã
amnhĩ tomnuj to rỳ tanhmã
ajamaxpêr punuj to hkêt
nê. Mẽ kot amnhĩ tomnuj
xwỳnhjaja te ri kamãt kô
kamã ri mẽ kêp àhkĩnh o ri mẽ
pa xwỳnhjê kot amnhĩ nhĩpêx

Mẽ pahpiitãã. Kaxkwa kamã
mẽ pa xwỳnhjaja nê
pika piitã hkôt mẽ
papa xwỳnhjaja.

Nê mẽ htyk xwỳnh piitã
koja mẽ akupỹn htĩr pu
mẽ pahpimràatã Jesus kutã
pahkõnkrã ho parôrõk nê
pahkrĩ hpa nê kãm mex o
mex ã harê.

11 Nê kãm:

Pa Pahihti Jesus. Nã ãm hãmri
na apê mẽ inhõ Pahi
Maati hã apyxi mex na
ka.

Jakamã mẽ ixtõ kot paj mẽmoj
tã tanhmã amã karõ
hto? Nã kot paj mẽ ixtõ
ã amnhĩ nhĩpêx anhỹr
kêt nê. Anê.

Kot puj mẽ nhỹrmã ã Jesus mã
pakapêr anê.

pyràk. Tã kot kaj mẽ hkôt tãm ri amnhĩ nhĩpêx o apa nê te ate kanhêtija kamàt kô kamã hirã ho harir pyràk o amnhĩ nhĩpêx. Jao mẽ kãm Tĩrtũm kapêr jarênh o ri mẽ hkôt apa. Mẽ kot amar nê apyrà nê nhỹrmã kuri htĩr tũm nê pa ho pa kaxyw. Kot kaj mẽ ã amnhĩ nhĩpêx anê nhũm nhỹrmã Jejus Kris akupỹn mẽ pahwỳr wrỳk ã arĩgrota ã pa mẽ apumu nê ixkĩnh nê. Nê ixkĩnh kãm Jejus mã mẽ ajarê nê kãm mẽ ajarênh o:

—Kwa Pahihti. E jajê pumu. Na pa pre mẽ kãm akapêr jarênh o ri mẽ hkôt ixpa nhũm mẽ inhmar tỳx nê nê akapêr kôt amnhĩ nhĩpêx o ri pa. Jakamã na pa pre mẽ kãm akapêr jarênh kaprỳ hkêt nê.

Anhỹr o kãm mẽ ajarê.

¹⁷ Na pa pre mẽ akôt mẽ amã Tĩrtũm kapêr jarênh o ri ixpa ka prem inhma nê hkôt amnhĩ xunhwỳ. Jakamã te ixte Tĩrtũm mã mẽ ato ixkĩnh xà nê kãm mẽ anhõr pyràk.

Nê koja jar Rõm nhõ pahihitija tanhmã ixto hkêt japêr. Rỳ tanhmã ixto. Nom kwãr mẽ mãmri tanhmã kãm ixto hprãm xà hkôt tanhmã ixto rỳ ixpĩ. Koja mẽ ã ixte mẽ anhĩpêx anhỹr ã ixpĩ pa ixkĩnh nê. Nê tanhmã ijamaxpêr to hkêt kãm ty. Jakamã na pa ra ã mẽ kot inhĩpêx anhỹrja kukamã mẽ amã amnhĩ kĩnh ã amnhĩ jarê ka mẽ inhma.

¹⁸ Tã kêr ka mẽ ixpyrà nê ajaxwỳja ixtã akĩnh nê apa.

Ximotre mẽ Eparoxit wa harênh

¹⁹ Nê koja Pahihti Jejus kãm ja prãm hã kot paj ma mẽ awỳr Ximotre mẽ nhũm ma mẽ awỳr mō nê ri mẽ akôt pa nê tanhmã mẽ ate amnhĩ nhĩpêx to hã mẽ apumu. Hãmri nê man akupỹn ixwỳr mō nê inhmã mẽ ajarê pa mẽ ajarênh ma nê ixkĩnh nê tee ri mẽ akukamã ijamaxpêr o ixkrĩ hkêt nê. ãm tãm mẽ akukamã ijamaxpêr o ixkrĩ.

²⁰ Ximotre tapxipix na ixpyrà nê kãm mẽ akĩnh nê kãm mẽ ato ajuta hprãm. Na hte mẽ ajarênh rãhã ho pa.

²¹ Nom jar mẽ piitã Ximotre kĩnhã amnhĩ mex pix kukamã hamaxpêr o pa nê kãm Jejus Kris kôt tanhmã amnhĩ nhĩpêx to ho pa hprãm kêt nê.

²² Ximotre te kêp ixkra pyràk. Na hte ixkôt pa nê ixpyrà nê Jejus mã tanhmã amnhĩ nhĩpêx mex to ho pa. Pa pre wa ijamẽ mẽ kãm mẽ ujarênh mex jarênh o wa ri mẽ hkôt ixpa.

²³ Tã koja mẽ tanhmã ixtã axpênh mar to. Apu mẽ kot ixpĩr ã amnhĩ jarê rỳ ixkator ã amnhĩ jarê. Pa tanhmã amnhĩ tã mẽ mar to nê rĩ korãmã ma mẽ awỳr Ximotre mẽ kê ma mẽ awỳr mō nê mẽ amã tanhmã ijarênh to.

²⁴ Nê koja Pahihti Jejus kãm ja mex pa ijaxwỳja ma mẽ awỳr mō pu mẽ axte axpênh pumu.

²⁵ Nê kot paj tokyx ma akupỹm mẽ awỳr Kris kôt mẽ pahtõ Eparoxit mẽ. Na ka prem kãm kãxpore gō nhũm man ixwỳr o mō nê inhmã

kugõ. Hāmri nē jar inhmā àpēnh rax nē ixpyrà nē mē ujarēnh mexja jarēnh o pa.

²⁶⁻²⁷ Tā ra à htỳx nē. Kironhỳx pre mē pahpē ty. Tā nhũm Tĩrtũm omu nē kamā ukaprĩ nē. Nē mǎānēn pa ixkamā ukaprĩ nē. Nē tee ri ixte à htỳx ã omunh nē ixkaprĩ htỳx pymaj akupỹm inhmā ho mex nhũm ra akupỹm mex nē ri pa. Hāmri nē kām mē apumunh prām nē. Mē ate à htỳx ã harēnh mar nē akaprĩ hā mē ajarēnh ma nē tee ri mē akukamā hamaxpēr.

²⁸ Jakamā inhmā akupỹm tokyx mē awỳr mēnh prām. Tā koja mēmo arĩgro hā mē awỳr pøj ka mē omu nē akĩnh nē tām ajamaxpēr. Pa ijaxwỳja jar ixkĩnh nē tām ijamaxpēr.

²⁹⁻³⁰ Na ka prem ixwỳr amē nhũm man ixwỳr mō nē jar ixri mē kām Kris kapēr jarēnh o ri mē hkõt pa rāhā nhỳx hā ty nom kot amnhĩ kamā kahak kêt. Jakamā kē akupỹm mē awỳr pøj ka mē omu nē akĩnh nē. Nē kahti hkõt amỳ nē ho mex nē. Kēp Kris kõt mē pahtõ mex kēnā. ã na htem Kris mǎ mē kot tanhmā amnhĩ nhĩpēx to ho mē pa xwỳnhjē nhĩpēx mex anhỳr o pa.

3

Mēmoj tǎ mē pahpumunh kõt Tĩrtũm kot tām mē paxunhwỳr ã harēnh

Piripos 2.18, 4.4

¹ E Kris kõt ixtõ nē ixtõxjaja. Kris kēp mē panhõ Pahihti

jakamā kwa mē jam ajamaxpēr nē akĩnh rāhā ho ri apa.

Na pa ra mē amā mēmoj jarēnh rax nē. Nē hā kagà rax tǎ kormā inhmā ja ho anhỳr kaga hkêt nē. Kot paj axte mē amā hkwy hā kagà. Mē ate hā ano htỳx nē ho apa kaxyw.

² Jakamā e kwa mē okora. Kēr ka mē amnhĩ nē mē kot Tĩrtũm kapēr o hēx xwỳnhjē pumunh mex o ri apa. Na htem tanhmā mē amā kapēr ho pa nē mē amā:

—Kot kaj mē ixpē Ijaewjē pyrà nē amnhĩ my kwỳr kà jakà hāmri nē apē Tĩrtũm kra. Anē.

³ Nom ja kot anhỳr kêt. Mē pahte amnhĩ jakàr kõt mē pahpē Tĩrtũm kra hkêt. ã kot anhỳr ronhỳx pu mē amnhĩ krǎ hkõt tanhmā amnhĩ nhĩpēx to ho pahpē hkra. Nom ja kot anhỳr kêt. Mē ate amnhĩ jakàr kêt tǎ mē ixpyrà nē amnhĩ kaxyw Jejus Kris mǎ ajamaxpēr jakamā mē ixpyrà nē mē apē Tĩrtũm kra na ka mē. Na ka htem mē ixpyrà nē Karõ nhỹ hā kām mex o mex ã harēnh o ri apa nē mē ixpyrà nē Jejus kukwak ri akĩnh nē ri apa. Nom na pu htem pahpē hkra kaxyw amnhĩ jakàr kêt nē.

⁴ Kop ãm amnhĩ krǎ hkõt mē pahte amnhĩ to Tĩrtũm kra ronhỳx pa ra amnepēm amnhĩ to hkra nē ri ixpa. Na pa pre ixpē hkra hprām xǎj amnhĩ krǎ hkõt tanhmā ri amnhĩ nhĩpēx to rax o ixpa nom ã amnhĩ nhĩpēx anhỳr kaprỳ. E pa ja hā mē amā amnhĩ jarē ka mē ijarēnh ma.

⁵ Na pa pre ixkato nē kormã ixtã semãn pixire nhũm mẽ ixpê Ijaew ã inhmy kwryt kã krãhta. Nom pa ã mẽ kot inhĩpêx anhÿr kôt ixpê Tirtũm kra hkêt nē. Nē inhĩpêxã hkôt ixpê finat Pëjamĩ kanrêhã htãmnhwÿ jakamã ixpê Ijaew mex na pa. Nē Ijaew kapêr o ixkapêr o ri ixa. Nom ja kôt ixpê Tirtũm kra hkêt. Nē mããnēn ixpê Parijew nhõ xwÿnh jakamã na pa pre Tirtũm kot finat Mojes mã mẽ pakaxyw mẽmoj tã karõ kôt pix mã amnhĩ nhĩpêx o ixa hprãm.

⁶ Jao tee ri mẽ kot Jejus kôt amnhĩ nhĩpêx xwÿnhjê pumu nē mẽ homnuj tÿx o ri ixa. Na pa pre ijamaxpêr o: “Nà mũjjaja na htem mẽ ixkwÿm ri amnhĩ nhĩpêx o pa.” Anē nē mẽ hipêx kati ho ri ixa. Nē ijamaxpêr o: “Ra ixte finat Mojes kot Tirtũm nhÿ hã kapêr piitã hkôt amnhĩ nhĩpêx mex jakamã na pa hte tanhmã ri amnhĩ tomnuj to ho ri ixa hkêt nē.” Anē.

⁷ ã na pa pre ixpê Tirtũm kra hprãm xaj amnhĩ nhĩpêx anhÿr o ixa. Tã nom ãm ã amnhĩ nhĩpêx anhÿr hkaprÿ. Na htem ã ri amnhĩ nhĩpêx anhÿr kôt kêp Tirtũm kra hkêt nē. Tã pa hpãnhã amnhĩ kaxyw Kris kôt ijamaxpêr nhũm ixto hkra kurê kumrêx.

⁸ Ra ixte Jejus Kris kôt amnhĩ xãm jakamã Jejus kêp inhõ Pahшти pa inhmã kapêr kôt pix mã amnhĩ nhĩpêx o ri prãm. No hkrax rũm ixte amnhĩ nhĩpêx tũmja na pa ra Jejus gryk ã hkaga hpa.

Te ixte mẽmoj punuj pyr nē amnhĩ katut kôt mẽnh nē axte kãm ijamaxpêr kêt pyrãk. Jao amnhĩ kaxyw Jejus kôt pix mã ijamaxpêr o ri ixa.

⁹ Nom kormã ã ijamaxpêr anhÿr kêt ri na pa pre ixtÿx ri ijamaxpêr o:

—Nà ixte Mojes kot Tirtũm nhÿ hã kapêr kôt amnhĩ nhĩpêx o ixa jakamã koja Tirtũm ja hã ixpumu nē ixto hkra.

Anhÿr tã nom ja kot anhÿr kêt. Na htem amnhĩ krã hkôt tanhmã ri amnhĩ nhĩpêx to ho pa nhũm Tirtũm ãm ja hã mẽ omu nē ãm hã mẽ omu nē mẽ ho hkra hkêt nē. Nom koja mẽ Kris kôt amnhĩ xunhwÿ nhũm ja hã mẽ omu nē mẽ ho hkra kurê kumrêx. Jakamã ixte Kris kôt amnhĩ xãm ã ixpumunh kôt pix mã na pre ixto hkra nē inhmex ã ijarê.

¹⁰ Hãmri pa ra inhmã Kris kôt pix mã amnhĩ nhĩpêx o ri ixa hprãm. Na pre ty tã akupÿm htÿr nē hihtÿx nē ãhpumunh tÿx o tanhmã amnhĩ nhĩpêx to ho pa. Tã ijaxwÿja inhmã urãn ã amnhĩ nhĩpêx anhÿr prãm. Nē inhmã urãk nē amnhĩ xã htÿx kutã amnhĩ to htÿx nē ixa hprãm. Mẽ kot hã ixpÿr mã tã pa urãk nē Tirtũm kapêr kaga hkêt nē ãm kôt pix mã amnhĩ nhĩpêx o ri ixa rãhã urãk nē hã ty. Ja na inhmã ho anhÿr prãm.

¹¹ Kê Tirtũm kot hipêxta pyrã nē akupÿm ixto ixtÿr pa wa kuri ixtÿr tũm nē ixa ho ixa.

¹² Inhmã Kris kôt pix mã

amnhĩ nhĩpêx o ixpa hprãm tỳx kumrêx. Kormã ixte hkôt amnhĩ nhĩpêx o inhmôr nê kormã hatur xàm mênh kêt tâ inhmã tokyx hatur xàm mênh prãm. Na pa ã inhmã amnhĩ nhĩpêx anhỹr prãm tỳx kumrêx.

Nê na pa hte ixte amnhĩ tomnuj kêt ã amnhĩ to jarkrar o ri ixpa hkêt nê. Na pa hte arĩ tōhã tanhmã amnhĩ tomnuj to nom inhmã ã amnhĩ nhĩpêx anhỹr prãm kêt. Nê na pa kormã ixprĩ hã Kris kot amnhĩ nhĩpêx mar o inhmôr nê hatur xàm mênh kêt tâ inhmã hkôt amnhĩ nhĩpêx o inhmôr nê tokyx hatur xàm mênh prãm. Ja kaxyw na pre Jejus Kris amnhĩ kaxyw ixta.

13 Na pa hte mē akurom paxipix ixte Jejus kãm hprãm xà hkôt amnhĩ nhĩpêx o ixpa hã amnhĩ to jarkrar kêt nê. Nom ra ixte tanhmã amnhĩ tomnuj to ho ixpata pa axte kãm ijamaxpêr kêt nê. Te amnhĩ katut kôt ixte rênh par pyrak o hipêx nê axte kãm ijamaxpêr kêt nê. Nê Jejus kãm hprãm xà hkôt pix mã amnhĩ nhĩpêx prãm xaj amnhĩ kaxyw kãm ijamaxpêr o ri ixpa.

14 Koja nhỹrmã Tirtũm ixpê Kris kwỳ hã amnhĩ wỳr ixwỳ nê inhmã:

—E amnê ixwỳr api Pawre. Kot kaj jarãhã amnê mē ixwỳr api.

Anhỹr o nhỹrmã inhmã kapêr jakamã na pa hte amnhĩ tâ ãm pix jamãr rãhã ho ixpa. Pê ra Jejus kot amnhĩ nhĩpêx piitã omunh par o mō.

Nà kot paj gaa nê hkôt pix mã amnhĩ nhĩpêx mex o ri ixpa.

15 Kwa kêr pu mē pahpiitã ã pajamaxpêr anê. Jao amnhĩ wỳr hamãr pê hkôt pix mã amnhĩ nhĩpêx o ri papa. Mē pahpiitã mē pahpê Kris kwỳ kênã. Nom kot ka mē atō ja kaxyw tee ri amnhĩ kukamã ajamaxpêr nê ajamaxpêr o:

—Nà tanhmã kot paj we amnhĩ to nê Jejus kôt amnhĩ nhĩpêx mex rãhã o ri ixpa? Ja kaxyw ixãhpumunh tỳxre hã. Anê.

Hãmri nê ã ajamaxpêr anhỹr o apaja apê hihtỳx japêr. Hã koja Tirtũm hprĩ hã tanhmã amã ja kukamã harênh to nê kaxyw ato axihtỳx ka ixpyrà nê hkôt pix mã ri amnhĩ nhĩpêx o apa.

16 Jakamã kêr pu mē ãm Tirtũm kãm hprãm xà hkôt pix mã tanhmã kãm amnhĩ nhĩpêx to ho papa. Ra mē pahte hkôt amnhĩ nhĩpêx o papa xaja kôt pix mã arĩ amnhĩ nhĩpêx rãhã ho papa.

17 E Kris kôt ixtō nê ixtōxjaja. Na pa ra mē anoo mã Jejus kôt tãm ri amnhĩ nhĩpêx o ri ixpa. Tã kêr ka mē ja hã ixpumu nê ixpyrà nê hkôt amnhĩ nhĩpêx o ri apa. Hãmri nê nhỹri mē kot ixpyrà nê ã amnhĩ nhĩpêx anhỹr xwỳnhjê hō pumu nê urak nê ã amnhĩ nhĩpêx anê.

18-19 Jejus kot mē pamã mē pahte amnhĩ tomnuj mỳrapê pĩ kahpa hã mē panê htykja nhũm mē ra ohtō nê hprĩ hã mar tâ hkôt amnhĩ xunhwỳr kêt nê. Mē kãm ã kot amnhĩ nhĩpêx anhỹrja ã mar

prām nōkati. Jakamā te mē kām Jejus kurē xwýnh pyrāk. Na htem hā hpijaam kēt kām tanhmā ri amnhī tomnuj to ho pa. Nē kām amnhī mex pix prām. Nē tanhmā amnhī tomnuj to nē ja hā amnhī pumu nē hkīnh nē. Nom tee ri ja hā amnhī pumu nē hkaprī nē ri pa hkēt nē. Tā ā mē kot amnhī nhīpēx anhýr jakamā koja mē nhýrmā ma mē kot amnhī xà htýx kamā hamak o pa tūm xàta wýr hapēx. Nà koja mē ā amnhī nhīpēx anē. Ra ixte mē amā ja hā mē harēnh rax tā pa axte mē amā mē harē. Inhmā mē hkaprī hkôt na pa hte xàta mē amā ja hā mē harē.

²⁰ Kēt mē papajaja mē kurom mē pahpē kaxkwa nhō xwýnh nom kormā. Koja nhýrmā Jejus Kris akupýn mē pahwýr kaxkwa rūm wrý. Mē papytār xwýnh maati Pahihtija akupýn wrý hāmri nē ma akupým amnhī kôt mē pahto api. Jakamā na pu htem arī pahkīnh pē amnhī wýr kamā pajamak rāhā ho ri papa.

²¹ Na pu htem jar pyka ja kamā Jejus kīnhā paxirerek nē pahpunuj nē ri papa. Nom koja nhýrmā akupýn mē pahwýr wrý hāmri nē amnhī pyrā nē mē pamā mē panhī nyw gō pu mē urāk nē paxihtýx kām pahtür tūm nē papa ho papa. Ā kot mē panhīpēx anhýr kaxyw àhpumunh o àhpumunh. Tā koja àhpumunh týx kām mēmoj piitā ho amnhīptār pa. Pu mē pahpiitā hkôt amnhī nhīpēx mex rāhā ho ri papa.

4

Pawre kot mēmoj tā mē kām karō

Epes 4.3; Piripos 2.2; Korosē 3.15

¹ E Kris kôt ixtō nē ixtōxjaja. Inhmā mē ajapêê. Na pa hte mē ato ijamak o ixkrī nē mē amā ijamaxpēr nē ixkīnh nē. Nē jar mē pahkwýjē mā mē ajarēnh o ri ixkrī. E kwa kêr ka mē arī Pahihti kapēr kôt pix mā mān amnhī nhīpēx mex rāhā ho ri apa.

² Nē wa ka Ewox mē Sīxika wa. Na ka xep hte wa mēmoj tā axpēn kamā agryk rāhā ho ri apa. Kwa wa ā amnhī nhīpēx anhýrja mā anhūre nē tām axpēn nhīpēx. Pahihti Kris kôt war ate axpēn to war atōx kēnā kot ka kēt wa axtem nē mēmoj tā axpēn kamā agryk o ri apa.

³ Nē ka Xikitre. Apê ixkrāmnhwý mex jakamā kêr ka axpēn tā wa nita wa kām akapēr kām axihtýx nē kê war ama nē akupým tām axpēn nhīpēx. Na pre wa ra Kremēn mē hkwýjē mē hpimràatā ixpyrà nē Jejus kot tanhmā mē panē amnhī nhīpēx to hā harēnh o ri pa. Tirtūm nhō kagà kamā mē hixi piitā hikwý. Mē pahtür tūm nē mē papa mā xwýnhjaja ra Tirtūm nhō kagà kamā mē panhīxi jaxwýr par.

⁴ Nē kêr ka mē apê Pahihti hkwý hā akīnh nē ri apa. Mē ate ā amnhī nhīpēx anhýr o apaja na pa inhmā hprām týx jakamā kot paj axte mē amā harē. Kwa kêr ka mē akīnh nē ri axpēn kôt apa.

5 Pahihti Jejus ra akupÿn mē pahwÿr nojarēt jakamā kēr ka mē kutēp mē piitā ri mē ho mex o ri mē hkôt apa.

6 Nē kēr ka mē tee ri amnhī kukamā ajamxpēr o ri apa hkēt nē. Arī amnhī to Tirtūm wÿr rāhā nē. Kot ka mē mēmo arīgro hā apē amrakati japēr nē tee ri ja hā amnhī pumu nē amnhī to awÿ kē mē ama nē mē amā mēmoj gō. Rÿ mē ate mēmoj tā hwÿr xwÿnhata tanhmā mē amā hipēx to ka mē amnhī tā omu nē kām:

—Nà ām hāmri na ka ā inhīpēx anē nē inhmā ja gō Tirtūm. Amex o amex.

Anhÿr o kām amnhī jarē.

7 Kot kaj mē ā amnhī to hwÿr anhÿr o ri apa nhūm tanhmā mē akrā hto ka mē mē apē Jejus Kris kwÿ hā ajamakētkati nē axāmnhīx ri apa. Hāmri nē mēmoj tā tee ri amnhī kukamā ajamxpēr o ri akaprī nē apa hkēt nē. Ām akīnh rāhā ri apa. Tirtūm kot tanhmā mē pahto nhūm mē pajamakētkati nē ri mē papaja mē pahte amnhī tā omunh kēt. Ām tapxipix kot ā mē panhīpēx anhÿr kukamā àhpumunh tÿx.

8 E Kris kôt ixtō nē ixtōxjaja. Nà ixkapēr ā kagà jatur xà na ja. Kwa kēr ka mē ixu-jarēnh mar tÿx nē hkôt amnhī nhīpēx o apa.

Nē kēr ka mē axàpēnh mex pix kukamā ri ajamxpēr o apa.

Nē mēmoj mex pix kukamā ri ajamxpēr.

Nē axpēn mā akapēr mex pix kukamā ri

ajamxpēr.

Nē akatāt kôt akapēr xàptār pix o axpēn mā akapēr hkukamā ri ajamxpēr o ri apa.

Nē tām ri amnhī nhīpēx hkukamā mān ajamxpēr o ri apa.

Nē mē piitā ri mē ho mex o apa hkukamā ajamxpēr.

Nē mē akapēr mex pix kukamā mān ajamxpēr o ri apa.

E kēr ka mē ā amnhī nhīpēx anhÿrja kukamā ajamxpēr rāhā ho ri apa.

9 Nē mē akôt ixpare ri na pa pre Kris kôt amnhī to mex pix nē tām ixkapēr o ri ixpa. Tā kēr ka mē ixpyrà nē ā amnhī nhīpēx anē. Koja Tirtūm ja hā mē apumu nē mē akôt ri pa ho pa. Kēp mē pamā mē paxāmnhīx pajamakētkati xà nhōr xwÿnh na.

Mē kot Pawre hwÿr mēmoj mēnh nhūm kot omunh nē hkīnh ā harēnh

Sikūn Korūt 11.7-9; Piripos 1.5

10 Nē amnepēm na ka prem xatā tanhmā ixto mex to ho ri apa. Tā axte ā inhīpēx anhÿr prām nom mē apē awry nē ixpa jakamā ka xep prem tee ri tanhmā ixto mex to hkukamā ajamxpēr kaprÿ. Tā jar mē kot ijaxàr ā ijarēnh ma nē ixwÿr Eparoxit mē nhūm man ixwÿr mō nē inhmā kàxporeta gō. Mē amā ijapē hā ixwÿr amē pa omu nē ixkīnh tÿx nē. Nē ixkīnh kām Tirtūm mā mē ajarē. Ām hāmri na ka prem ixwÿr amē.

11-12 Nē na pa hte tanhmā ixkute htā arī ixkīnh nē ijamakētkati nē ri ixpa. Jakamā kot pa mēmo arīgro hā ixpē amrakati nē inhmā prām japēr tā no ām tee ri amnhī kukamā ijamaxpēr o ri ixkaprī hkēt nē. Arī ixkīnh rāhā ixāmnhīx ri ixpa. Rỳ pa inhō mēmoj rax japēr nē määnēn ixkīnh nē ixāmnhīx ri ixpa. Na pa pre tōhā inhō rax nē ixpa. Nē tōhā inhō hkēt nē ixpa. Tā arī ixkīnh rāhā nē ixpa ho ixpa.

13 Na hte Kris mēmoj piitā hkukamā ixto ixihtỳx pa ỳ hā mēmoj kutā ixihtỳx nē ixpa. Jao mēmo arīgro hā inhmā prām tỳx nē ri ixpa htā ỳ hā kutā ixihtỳx nē ixāmnhīx ri ixpa.

14 Tā jar ixpunuj nē ixkrī ka mē ijarēnh ma nē ixwỳr kàxpore hkwỳrē. Ām hāmri na ka prem ixwỳr arē.

15 Amnepēm na pa pre mē anhō pika pē Masetōn rūm ixkato nē mē piitā mē kām Jejus kot tanhmā mē panē amnhī nhīpēx to hā harēnh o ri ixpa ka mē xatā ixwỳr kàxpore hkwỳr rē pa ho amnhīm ixujaprōr o ri mē hkōt ixpa. Mē apē Piripos kamā Kris kōt ixtō nē ixtōx pixjaja na ka prem ā inhīpēx anē. Krī hkwỳr kamā Kris kōt mē pahkwỳjaja na mē akīnhā ā inhīpēx anhỳr kēt nē. Ām mē kapxipix na ka pre ā ixto mex anē.

16 Tesarōn kamā ixpare ri na pa pre ixpē amrakati kumrēx nē ri mē hkōt ixpa ka mē xatā ixwỳr kàxpore

hkwỳr rē pa pre ho amnhīm ixujaprōr rāhā ho ri mē hkōt ixpa.

17 Nom mē ate ixwỳr hkwỳr rēnh kaxyw mē akamā ijamak o ri ixpa hkēt nē. Rỳ ijamaxpēr o:

—Ko. Koja Piripos nhō xwỳnhjaja ijarēnh ma nē kām ixkaprī nē ixwỳr kàxpore hkwỳr rēnh japēr.

Anhỳr o mē akukamā ijamaxpēr kēt nē. Nom ra mē ate ixwỳr hkwỳr rēnh jakamā koja Tirtūm ja hā mē apumu nē mē ato mex nē. Ā mē pahte axpēn kutā panojarēt anhỳrja na kām hprām.

18 Tā nhūm Eparoxitja ham mē arūm kato nē man ixwỳr mō nē inhmā kàxporeta gō. Kwa na ka mē inhmā ōr rax nē. Koja tokyx ixpē hapēx kēt pa kritpēm ho ixàpkur o ixkrī. Tā ot pa ho kōta nē tanhmā hkre kamā kute pumunh xà hkōt hā kagā nē mē awỳr kumē. Nà mē ate ixwỳr axāmnhōrta na Tirtūm omu nē ixtā mē apumu nhūm ja kām mex kumrēx. Te mē kot mē hkuxwaxà hpār nhūm mē kām mexta pyrāk nhūm ja kām mex nē.

19 Nà koja Tirtūm mē apē Jejus Kris kwỳr hā mē amā mē ate mēmoj to presija xà nhōr rāhā ho pa. Mēmoj piitā kēp ō kēnā.

20 E kēr pu mē Mēpanhīpēxà maati Tirtūm mā mex o mex ā harēnh rāhā o papa. Ja na inhmā hprām.

21-22 Nē ot pa mē jar ixi-itā mē apē Jejus Kris kōt mē ixkwỳjē hwỳr kagāja kamā

mẽ ixpẽr mẽ. Mẽ ixpyrà
 nẽ mẽ apê Tĩrtũm kra hã.
 Pa nẽ Kris kôt mẽ pahtõ nẽ
 mẽ pahtõxjaja. Nẽ Rõm nhõ
 pahĩ mã mẽ àpênh xwýnh
 kot Kris kôt amnhĩ xunhwýr
 xwýnhjaja mããnên. ãm jar mẽ
 ixpê Tĩrtũm krajê piitã pa mẽ
 awýr ixpẽr mẽ.

²³ E kê Pahihti Jejus Kris
 mẽmoj to mẽ akutã nojarêr
 rãhã nẽ. Jao mẽ ato mex o pa.

Tã ãm ja pix. Ixpê Pawre na
 pa mẽ awýr kagãja nhĩpêx nẽ
 kumẽ.

Korosê Pawre kot Koros kamã Jejus kôt hkwÿjê hwÿr kagã nê mênh

Pawre na pre kagàja nhîpêx. Jejus nhÿ hã hkrajê jahkre o mẽ pa xwÿnhjê hõ na pre. Tã nhũm mẽ kêp Jejus kra hkêt xwÿnh kwÿjaja Jejus ã unê nê haxà nhũm arĩ hkrĩ ho hkrĩ. Hãmri nê krĩ pê Koros kamã Jejus krajê mã kagã nhîpêx nê mẽ hwÿr kumê. Koros kamã Jejus kwÿjê kamã Ijaew kwÿ nê kamã Ijaew kêt xwÿnh kwÿ nhũm Pawre mẽ ho hpimràatã mẽ hwÿr kumê. Kormã mẽ hwÿr mör nê mẽ omunh kêt tãã. Nê kagàja kamã mẽ kot tanhmã Jejus o hêx to ho pa xwÿnhjê jarênh to. Jejus kêp Tirtũm Kra hkêt ã mẽ kot ho hêx xwÿnhjê jarê nê mẽ nê mẽ kãm kapêr. Mẽ kot mẽ hkôt amnhĩ nhîpêx kêt kaxyw mẽ kãm kapêr nê hã kagã nê mẽ hwÿr kumê nê mẽ kãm:

¹ Pa Koros kamã Kris kôt ixkwÿjaja. Xà mẽ amex na ka mẽ apa? Ixpê Pawre na pa mẽ awÿr kagàja nhîpêx nê mẽ awÿr kumê. Kris kôt mẽ pahõt Ximotre mẽ wa kumê. Ixte Jejus Kris nhÿ hã mẽ ahkre ho mẽ ixpa xwÿnhjê hõ na pa. Tirtũm kãm hprãm xà hkôt.

² Tã pa mẽ awÿr kagã nhîpêx nê kumê. Mẽ apê Kris kôt mẽ ixtõ nê ixtõx na ka mẽ.

Na ka xep htem Kris kapêr kôt amnhĩ nhîpêx mex o ri apa. E kê Tirtũm mẽ apê hkra hã mẽ akutã nojarêt rãhã nê. Ka mẽ amex nê ajamakêtkati nê axãmnhix ri tanhmã amnhĩ nhîpêx ho ri apa.

Koros nhõ xwÿnh kwÿjaja kot Jejus kôt amnhĩ xunhwÿr ã mẽ harênh

Wam Tesarõn 1.2-5

³⁻⁴ Na pa ra Ximotre mẽ wa mẽ ajarênh ma. Mẽ ate amnhĩ kaxyw Jejus Kris kôt ajamxpêr tÿx nê hkôt amnhĩ nhîpêx mex o apa hã mẽ ajarênhja ma. Nê mẽ kot Tirtũm kôt amnhĩ xunhwÿr xwÿnh piitã mẽ amã mẽ hkĩnh ã mẽ ho mex o apa hã mẽ ajarênhja ma nê wa ixkĩnh nê. Jakamã na pa wa Pahihti Jejus Nhîpêxà Tirtũm mã amnhĩ jarênh kaxyw nê kãm mẽ anhÿ hã wa ixkĩnh ã amnhĩ jarê.

⁵ Na pre Epas ma mẽ awÿr mō nê mẽ amã Jejus kot tanhmã mẽ panê amnhĩ nhîpêx to hã harênh o mẽ akôt pa. ãm hãmri kot mẽ amã harênhja. Tã ka xep prem ama nê amnhĩ kaxyw hkôt ajamxpêr nê hkôt amnhĩ xunhwÿ. Hãmri nê amnhĩ wÿr Jejus jamãr o ri apa. Koja nhÿrmã akupÿn mẽ pahwÿr wrÿ nê amnhĩ pyrã nê ma akupÿm kaxkwa hwÿr mẽ pahõt api nê mẽ pahõt mex kumrêx o mẽ pahkôt pa ho pa. Tã ka xep htem amnhĩ kaxyw hkôt ajamxpêr tÿx nê ã kot amnhĩ nhîpêx anhÿr kutêp amnhĩ

wýr kamā ajamak rāhā nē. Nē mē amā mē kot Tirtūm kôt amnhī xunhwýr xwýnhjê hkīnh tỳx nē.

⁶ Na hte Tirtūm ām hāmri mē pahto mex pix rāhā ho pa. Nē mēmoj to mē pakutā nojarêt rāhā nē. Tā wam mē ate harēnh marta ā ka mē hkôt amnhī xunhwýr kurê kumrêx nē ri kapêr kôt axpên kôt amnhī nhīpêx mex pix o ri apa. Jao hkôt pix mā amnhī nhīpêx mex nē. Tā na hte pika piitā hkôt ri mē pa xwýnh kwýjaja mē apyrà nē Jejus jarēnh ma nē hkôt amnhī xunhwý. Nē mē apyrà nē axtem hkôt pix mā amnhī nhīpêx nē kapêr kôt amnhī nhīpêx mex o ri pa.

⁷ Nē mē awýr mōrta ā na pre Epasja mē amā Tirtūm kapêr jarēnh o ri mē akôt pa ka prem ama nē amnhī kaxyw hkôt ajamxpêr nē hkôt amnhī xunhwý. Epasja wa ixpyrà nē kot Kris mā tanhmā amnhī nhīpêx to ho pa xwýnh. Nē wa inhmā hapêê. Na pre katāt kôt mē amā Tirtūm kapêr jarēnh pa. Kot mēmoj to mē pakutā nojarêt rāhā hā harēnh o ri mē akôt pa.

⁸ Tā mē akupýn wa ixwýr mōn pōj nē wa inhmā tanhmā mē ajarēnh to. Tirtūm Karō nhý hā mē amā Kris kôt atō nē atōx piitā mē hkīnh o ri apa hā mē ajarē. Pa wa mē ajarēnh ma nē wa ixkīnh tỳx kumrêx.

Pawre mē Ximotre wa kot Koros kām hkwyjê ho Tirtūm

wýr ā wa harēnh

Epes 1.15-23, 3.14-21; Piri-pos 1.9; Wam Tesarōn 5.23-24; Sikūn Tesarōn 1.11, 2.16

⁹ Nē na pre Epas akupýn wa ixwýr pōj nē wa inhmā tanhmā mē ajarēnh to. Mē ate amnhī kaxyw Jejus kôt ajamxpêr o apa nē mē amā Kris kôt akwýjê piitā mē hkīnh o ri apaja nhūm wa inhmā mē ajarē. Pa wa mē ajarēnh ma nē mē ato Tirtūm wýr rāhā o jar mē hagiēnh xà kamā ixkrī. Nē arī mē ato hwýr rāhā ho ixkrī. Nē mē ato hwýr o:

—Pa Tirtūm. Ot pa Ximotre mē wa Korosē nhō xwýnhjê ho awýr kaxyw amā mē harê. Kwa tanhmā mē hamxpêr to kê mē amā hprām xà hkôt pix mā amā tanhmā amnhī nhīpêx to ho pa. Nē Akarō nhý hā hprī hā akapêr ma nē ām hkôt pix mā tanhmā amnhī nhīpêx to ho pa. Anê.

¹⁰ Na pa hte wa ā mē ato Tirtūm wýr anhýr rāhā ho ixkrī. Kot kaj mē ā amnhī nhīpêx anhýr o ri apa nē Jejus kot amnhī nhīpêx o amnhī nhīpêx mex o ri apa. Nē aprī hā Tirtūm kot amnhī nhīpêx ā omunh mex o mō. Jao mēmoj to axpên kutā anojarêt pix o ri apa hprām. Hāmri nhūm Tirtūm ja hā mē apumu nē hkīnh nē.

¹¹ Tirtūmja mē pakurom mēmoj piitā kaxyw àhpumunh o àhpumunh. Nē mēmoj piitā kaxyw hihtỳx o hihtỳx. Jakamā na pa hte wa mē ato hwýr o:

—Pa Tirtûm. Kwa tanhmã Koros nhõ xwÿnhjê ho kê mẽ axihtÿx nhÿ hã mẽmoj punuj kutã amnhĩ to htÿx nê. Mẽ kot Jejus ã tanhmã mẽ ho nhũm mẽ kot amnhĩ xà kamã hamak tâ kê mẽ tee ri amnhĩ kukamã hamaxpêr o hkaprĩ nê ri pa hkêt nê. ãm anhÿ hã mẽ hkurê xwÿnhjê kutã amnhĩ to htÿx nê hkĩnh kãm ri pa ho pa. Anê.

Na pa hte wa ã mẽ ato hwÿr anê.

¹²Na pre ra Tirtûm amnhĩ ri mẽ pakutêp mẽmoj mex kwÿ jaxwÿ. Mẽ pahpê hkrajê mã haxwÿ. Tã ka mẽ ÿ hã tãm amnhĩ nhĩpêx o apa jao mẽ ate mẽmoj mex jamÿnh mã tãm. Õ krĩ nhĩrã rax kumrêx kamãã. Jakamã kwa mẽ kot Jejus ã tanhmã mẽ pahto htã kêr pu mẽ arĩ Tirtûm mã mex o mex ã harênh rãhã ho ri papa.

¹³Nê Satanasti kêp kamãt kô kamã mẽ kot amnhĩ tomnuj ho mẽ pa xwÿnhjê pãm. Tãm na hte mẽ ho amnhĩptâr o pa nê hkôt na pu prem amnhĩ nhĩpêx o papa rãhã nhũm Tirtûm tee ri ja hã mẽ pahpumu. Hãmri nê kãm kêp mẽ papytâr prãm xàj mẽ pahwÿr Kra japê htÿx kumrêx xwÿnhja mẽ. Nhũm mẽ pahwÿr wrÿ nê mẽ panê htyk o mẽ pahte amnhĩ tomnuj pãnhã kãm amnhĩre. Tã pu prem hkôt amnhĩ xunhwÿ nhũm Tirtûm hã mẽ pahpumu nê mẽ panê mẽ pahte amnhĩ tomnuj o hapêx pa. Te kot amnhĩ katut kôt rênh par pyrãk.

Jao Satanasti pê mẽ pahpytã nhũm hpãnhã Jejusja tãm kêp mẽ pahto amnhĩptâr o pa xwÿnh.

¹⁴Ra htyk o mẽ pahte amnhĩ tomnuj piitã hpãnhã amnhĩrer jakamã na pu htem hkôt amnhĩ xunhwÿ nhũm mẽ pahte amnhĩ tomnuj o hapêx pu mẽ axte Satanasti hkôt ri amnhĩ nhĩpêx kêt nê. ãm Jejus kôt pix mã amnhĩ nhĩpêx o ri papa.

Kris mẽ Tirtûm wa kot amnhĩ nhĩpêx te wa kot axpên pyrãk ã harênh

Juãw 1.1-5; Korosê 2.9; Eprêw 1.1-14

¹⁵Nê Krisja te kot Tirtûm pyrãk. Mẽ pahte pano ho Tirtûm pumunh kêt tã Kra Kris kot amnhĩ nhĩpêx ã harênh mar kôt mããnên Tirtûm kot amnhĩ nhĩpêx ã omunh mex nê. Amnepê mã kormã mẽmoj kêt ri nhũm Jejus pa ho pa rãhã nê. Jakamã kot amnhĩ to rax o Tirtûm kot mẽmoj to katorja piitã hakrenh par kumrêx.

¹⁶Na pre hipêêxã Tirtûm nhÿ hã mẽmoj piitã ho kator pa. Kaxkwa kamã nê pika hkôt mẽmoj piitã ho kator pa. Nê kaxkwa kamã mẽ pahte pano ho mẽmoj pumunh par xwÿnhjaja nhũm pre ho kato. Nê kamã mẽ pahte pano ho mẽmoj pumunh kêt xwÿnhjaja nhũm pre mããnên ho kato. Nê kapêr o wrÿk xwÿnhjaja nê mẽ hkrãhtÿmjaja nhũm pre mẽ ho kato. Nê pika kamã mẽ ho amnhĩptâr xwÿnhjaja

nhūm pre mẽ piitã mẽ ho kator pa. Kãm hprãm xà hkôt Tirtũm nhỹ hã mẽmoj piitã ho kator pa.

17 Tã na hte arĩ kaxkwa kamã nẽ pika hkôt mẽmoj piitã hamãr rãhã ho pa. Kêp apu kot hamãr kêt ronhỹx mẽmoj piitã akupỹm hapêx pa.

18 Nẽ tãm na hte mẽ pahpê hkrajê ho amnhĩptâr o pa. Te kêp mẽ pahkrã nhūm te mẽ pahpê ĩ pyrãk jakamã na pu htem kapêr kôt pix mã amnhĩ nhĩpêx o papa. Kumrêx na pre akupỹm htĩr o htĩr jakamã kot amnhĩ to rax o mẽmoj piitã hakrenh par.

19 Nẽ na pre Tirtũm ã hamaxpêr anẽ nẽ hamaxpêr o: "Nã Ixkra mẽ wa ixte amnhĩ nhĩpêxja te kot axpên pyrãk. Nẽ wa ixihỹx mãânên te kot axpên pyrãk. Nẽ wa inhmex xà mẽ wa ixãhpumunhja te kot axpên pyrãk. ã wa ixte amnhĩ nhĩpêx kot anhỹr. Wa ixte amnhĩ nhĩpêxja na mex kumrêx." Anẽ.

20 Tã Jejus kot pĩ kahpa hã mẽ panê tyk nẽ hkamrô pikapĩr kukwak ri na hte Tirtũm mẽ kot hkôt amnhĩ xunhwýr xwýnh piitã mẽ ho hkra nhūm mẽ hamakêtkati nẽ ãmnhĩx pa ho pa. Kaxkwa kamã nẽ pika piitã hkôt mẽ kot Jejus kôt amnhĩ xunhwýr xwýnhjaja na htem ã amnhĩ nhĩpêx mex anhỹr o pa. ã Jejus kot mẽ panê htyk anhỹr jakamã kot amnhĩ to rax o kot mẽmoj piitã hakrenh par.

Jejus kêp tãm mẽ paxunhwýr xwýnh ã harênh

21 Nẽ mẽ papajaja na pu prem pamã Tirtũm prãm kêt o ri papa. Te hkàx ã ri papa pyrã nẽ kutã amnhĩ xunhwý nẽ pajamaxpêr punuj nẽ tanhmã amnhĩ tomnuj to pix o ri papa.

22 Tã Jejus kôt amnhĩ xunhwý nhūm amnhĩ tã mẽ pahpumu. Hãmri nẽ ra mẽ panê htyk jakamã amnhĩ tã mẽ pahpumu nẽ Tirtũm noo mã tãm mẽ paxunhwý. Te aa mẽ pahte tanhmã amnhĩ tomnuj to hkêt pyrãk o mẽ panhĩpêx nẽ tãm mẽ paxunhwý. Pu mẽ arĩ pahpê Tirtũm kutã amnhĩ xunhwýr xwýnh kêt nẽ hpãnhã pahpê hkrãmnhwýy.

23 Na pre Tirtũm mẽ pahte amnhĩ kaxyw Kra Kris kôt pajamaxpêr nẽ hkôt amnhĩ xunhwýr ã mẽ pahpumunh kôt ã mẽ pahto mex anẽ. Tã kêr pu mẽ arĩ hkôt amnhĩ nhĩpêx o ri papa nẽ aa hkaga hkêt nẽ. Mẽ kot Kris ã tanhmã mẽ pahto htã pu mẽ arĩ hkôt amnhĩ nhĩpêx mex rãhã ho ri papa.

Kormã mẽ kot jar ijaxàr kêt ri na pa pre hte mẽ kãm ã harênh anhỹr o ri mẽ hkôt ixpa. Tã ka prem Jejus jarênh ma nẽ hkôt amnhĩ xunhwýr kurê kumrêx. Nhūm krĩ piitã hkôt ri mẽ pa xwýnh kwýjaja mẽ apyrã nẽ harênh ma nẽ hkôt amnhĩ xunhwý nẽ hkôt amnhĩ nhĩpêx o pa.

Pawre kêp Ijaew kêt xwýnhjê mã Jejus jarênh xwýnh ã harênh
Epes 3.1-13

24 Nē ixte mē amā Kris kot tanhmā mē panē amnhī nhīpēx to hā harēnh o ixpaja ā na prem tanhmā ixto htỳx nē pa amnhī xà htỳx kām ijamak o ri ixpa. Tā arī Tirtūm kām hprām xà hkôt ā amnhī nhīpēx anhỹr jakamā na pa ixkīnh nē jar ixkrī. Ixte Kris kwỳjē kaxyw amnhī xà kamā ijamak tỳx o ixkrī. Te mē apē Kris nhī pyrāk xwỳnhjē mǎā. Tā pa te ixpē Kris kot amnhī nhīpēx pyrāk o mē akaxyw amnhī xà htỳx kām ijamak o ixkrī.

25 Na pre Tirtūm mē apē Ijaew kēt xwỳnhjē kaxyw ixām. Ixte mē amā kapēr piitā harēnh par nhūm mē ate mar nē hkôt amnhī nhīpēx mex o ri apa kaxyw.

26 Na pre kormā mēhō mē awỳr mōr nē mē amā harēnh kēt nē. Tā ra Tirtūm kām mē ate mar prām nē. Kām mē apē Ijaew kēt xwỳnhjē mē mē pahpē Ijaew xwỳnhjē japē o xppēn pyrāk. Nom na pre amnepēm ri mē pa xwỳnhjē mǎ kormā ja hā amnhī to amnhīrīt kēt nē. Tā ra jarāhā mē pahpē Kris kwỳjē mǎ ja ho amnhīrīt. Mǎānēn kām mē apē Ijaew kēt xwỳnhjē japē hā amnhī to amnhīrīt.

27 Mē apē Ijaew kēt tā na ka prem Kris kôt amnhī xunhwỳ nhūm Tirtūm Karō mē akarō mǎ agjē nē mē akamā pa ho pa. Ka mē ra hkôt amnhī nhīpēx jakamā kot kaj mē ixpyrà nē nhỹrmǎ kuri atīr tūm nē amex rāhā ho apa ho apa. Ja na mex kumrēx. Tā ja na Tirtūm kām mē ate mar prām

nē mē akaxyw ixām.

28 Jakamā na pa pre Ximotre mē wa mē apiitā mē amā Kris kot mē panē tanhmā amnhī nhīpēx to hā harēnh kām ixihtỳx o ri mē akôt ixpa. Nē kapēr o mē ajahkre ho ri mē akôt wa ixpa. Nē jar mē hagjēnh xà kamā krī piitā hwỳr kagā nhīpēx nē mē hwỳr kurē. Mē kot kamā harēnh nē mar nē amnhī tomnuj kaga nē hpānhā Kris kôt amnhī xunhwỳr nē ām kôt pix mǎ amnhī nhīpēx o pa kaxyw. Kēr pa nhỹrmǎ kām mē ate inhmar nē hkôt amnhī xunhwỳr xwỳnhjē jahkre nē kām:

—E Pahiiti. Ota akwỳjaja. Na htem akôt amnhī nhīpēx mex rāhā ho ri pa. Anē.

29 ā ixte kām mē piitā mē harēnh anhỹrja na inhmā hprām. Ja kaxyw na pre Jejus ixto ixihtỳx. Jakamā na pa hte Tirtūm nhỹ hā tanhmā kapēr o mē ahkre hto ho ri mē hkôt ixpa. Jao mē ho Tirtūm wỳr o ri ixpa nē mē kām kagā nhīpēx nē mē hwỳr kurē nē kamā kapēr o mē ahkre o ri ixpa.

2

Pawre kot Jejus kapēr o Koros nhō xwỳnhjē o hihtỳx ā harēnh

Epes 3.14-19; Piripos 1.9

1 E kot paj mē amā tanhmā amnhī jarēnh to ka mē inhma. Na pa hte mē ato Tirtūm wỳr rāhā ho ixkrī. Mē kajaja nē krī pē Ratisej kamā Jejus kôt mē pahkwỳjaja.

Kormã ixte mẽ apumunh kêt tâ pa hte mẽ ato Tirtũm wỳr kãm ixihỳx ãhã ho ixkrĩ.

² Mẽmo kaxyw na pa hte ã mẽ ato hwỳr anẽ? Nẽ mẽmo kaxyw na pa hte mẽ amã kagã nhĩpêx nẽ mẽ awỳr kurẽ? Nã ãm mẽ ate kamã harênh nẽ mar nẽ Jejus kapêr kôt axpên to axihỳx o ri apa kaxyw. Nẽ mẽ amã axpên kĩnh o ri apa kaxyw. Pê te mẽ ate ixkre tipxi kamã axpên kôt amnhĩ nhĩpêx o ri apa pyrãk. Jao aprĩ hã Tirtũm kot amnhĩ nhĩpêx pumunh mex nẽ amnhĩ kaxyw hkôt ajamaxpêr tỳx nẽ. Kot kaj mẽ ã amnhĩ nhĩpêx anẽ nẽ Kris kot amnhĩ nhĩpêxta pumunh pa. Na pre Tirtũm tokyx mẽ kãm Kris o amnhĩrĩt kêt tâ ra mẽ pamã ho amnhĩrĩt.

³ Tirtũm kot amnhĩ nhĩpêx nẽ kapêrja na pu htem Kris nhỹ hã pahprĩ hã omunh nẽ mar mex nẽ.

⁴ Jakamã koja mẽmojaja mẽ awỳr mra hãmri nẽ hêx rom Tirtũm kapêr kwỳm ri tanhmã mẽ amã mẽmoj jarênh to. Te mẽ àhpumunh tỳx pyrãk o mẽ amã harẽ no ãm mẽ àhpumunh kêt. Ka mẽ ama nẽ ãm mẽ ama nẽ Kris kaga hkêt nẽ.

⁵ Nẽ kormã arĩ Jejus ã ijaxàr nẽ ixkrĩ nẽ kormã mẽ akôt ixpa hkêt tâ ot pa hte mẽ amã ijamaxpêr rãhã ho ixkrĩ. Nẽ ra tanhmã mẽ ajarênh mar to. Na ka xep htem Kris kôt amnhĩ nhĩpêx tỳx o ri apa. Te ahkrô pẽ kukryt mut kuxêeti kot pĩ kupu htỳxta pyrãk. Nẽ ka xep htem arĩ

amnhĩ kaxyw Kris mã ajamaxpêr tỳx o ri apa. Pa mẽ ajarênh ma nẽ ixkĩnh tỳx nẽ.

⁶ Na ka prem Pahihti Jejus Kris kôt amnhĩ xunhwỳr pa. Tã kêr ka mẽ arĩ hkôt amnhĩ nhĩpêx mex rãhã ho apa. Kêp mẽ panhõ Pahihti kênã.

⁷ Jakamã mẽ ãm kôt pix mã amnhĩ xunhwỳr tỳx nẽ aa hkaga hkêt nẽ. Te mẽmo pĩ hpàr jarêja pika kaxwỳnh kãm pimãnh nẽ kot pika jamỳnh tỳxta pyrãk. Nhũm kôk xàpêr tỳx tâ tee kot mênh kaxyw pyrãk. Tã kêr ka mẽ pĩ hpàrta pyrã nẽ hkôt amnhĩ xunhwỳr tỳx nẽ hkôt amnhĩ nhĩpêx mex o ri apa. Ra Epas kot mẽ ajahkre ho pa xà hkôt. Nẽ amnhĩ krãm Kris kapêr jaxàr tỳx nẽ aa ho ajamakêtkati hkêt nẽ. Pê akĩnh kãm Tirtũm mã mex o mex ã harênh rãhã ho ri apa.

⁸ Nẽ kwa kêr ka mẽ kot hêx rom mẽ amã tanhmã kapêr to ho mẽ pa xwỳnhjaja ka mẽ amnhĩ nẽ mẽ omunh mex nẽ. Nẽ mẽ kapêr mar hkêt nẽ. Mẽ ate Kris kaga hprãm xàj na htem tanhmã mẽ amã hêx to ho ri mẽ akôt pa. Te anepêm mẽ kot Tirtũm kapêr kwỳm ri tanhmã mẽ ahkre hto xwỳnhjê pyrãk. Hinhu hikôoti kapêr kôt na htem tanhmã mẽ amã hêx to nom Kris nhỹ hã mẽ amã kapêr kêt nẽ. Jakamã kwa mẽ amnhĩ nẽ mẽ omunh mex nẽ.

⁹ Nẽ Kris mẽ Tirtũm wa kot amnhĩ nhĩpêx kot axpên pyrãk. Nẽ wa hamaxpêr kot axpên pyrãk.

¹⁰ Tã kêr pu mẽ pajaxwỳja wa hamaxpêr o pajamaxpêr

nê wa kot amnhĩ nhĩpêx o amnhĩ nhĩpêx. Jakamã kwa mẽ kot Tĩrtũm kapêr kwým ri tanhmã mẽ kapêr to xwýnhjê kot amnhĩ nhĩpêx o amnhĩ nhĩpêx kêt nê. Nê mẽ kapêr ma nê âm mẽ ama. Kris na hihtýx o hihtýx o kot mẽkarõmnuti nhõ pahi piitã mẽ hakrenh par. Nê hihtýx o hihtýx o kot Tĩrtũm kapêr o mẽ wrýk xwýnhjê piitã mẽ hakrenh par. Nê àhpumunh o àhpumunh o kot mẽmoj piitã hakrenh par jakamã kër ka mẽ kapêr kôt pix ma nê hkôt pix mã ri amnhĩ nhĩpêx o ri apa.

Mẽ pahte amnhĩ nhĩpêx nyw jarênh

Rõmãn 6.3; Karatas 5.24

¹¹ Nê na hte ixkwý Ijaew-jaja mẽ hkra nhýrmã hprêk nê Tĩrtũm kôt amnhĩ nhĩpêx ã mẽ harênh kaxyw mẽ kêp mẽmy kwryt kà jakà. Tã mẽ kajaja. Mẽ apê Ijaew kêt xwýnhjaja na pre Kris mẽ anhĩpêx o te mẽ kot amnhĩ jakarta pyræk. Jao te kot mẽ anê mẽ ate amnhĩ nhĩpêx tũm jakàr par pyræk o mẽ anhĩpêx ka mẽ ra amnhĩ nhĩpêx nyw o amnhĩ nhĩpêx o apa. Nhũm htem mẽ ate amnhĩ nhĩpêx nyw ã mẽ apumu nê mẽ ate Jejus kapêr kôt amnhĩ nhĩpêx ã mẽ apumunh kurê kumrêx.

¹² Tã na pu htem jarãhã mẽ pahte Tĩrtũm kôt amnhĩ nhĩpêx o papa hã amnhĩ jarênh kaxyw amnhĩ jakàr kêt nê. Na pu htem hpãnhã amnhĩ kaxyw Tĩrtũm xihtýx

o hihtýx xwýnhja kôt pajamaxpêr. Kot mẽ panê pahte amnhĩ tomnuj rênh par kôt pajamaxpêr hãmri nhũm mẽ gôx kãm mẽ pahkrã kumrã. Te mẽ pahte gôx kãm mẽ pahte amnhĩ nhĩpêx tũm rer par pyræk o amnhĩ nhĩpêx. Te Jejus htyk nhũm mẽ kot haxàr nhũm nõi nhũm mẽ pahte amnhĩ tomnujja ãhkô hã nõi nê hapêx par pyræk. Tã pu htem ra gõi rũm pahkrã hapõi. Te Tĩrtũm kot akupým Kris o htĩr pyræk. Jao ra mẽ pahte Kris kôt amnhĩ nhĩpêx nyw o amnhĩ nhĩpêx o papa hkrax ã amnhĩ to amnhĩrit.

¹³ Amnepêm kormã mẽ pahte Jejus kôt amnhĩ xunhwýr kêt ri na pu prem ri amnhĩ tomnuj to nê tanhmã pajamaxpêr punuj to ho ri papa. Tĩrtũm noo mã te ra mẽ pahtyk pyræk. Tã Tĩrtũm te akupým Kris kôt mẽ pahto pahtĩr pyræk o mẽ panhĩpêx nê mẽ panê mẽ pahte amnhĩ tomnuj piitã ho hapêx nê axte kãm hamaxpêr kêt kumrêx.

¹⁴ Te mẽ pahte tanhmã amnhĩ tomnuj to ho papa nhũm Tĩrtũm kot ja hã mẽ pahpumunh nê mẽ pahte amnhĩ tomnuj piitã hã kagà hpar pyræk. Nê kot kagàja pyr nê Kris nhĩhkô hã pĩ kahpa hã nhõi pyræk. Jao te kot mẽ pahte amnhĩ tomnuj ã kagàta hkaxõnh nê rênh par pyræk o hipêx.

¹⁵ Hãmri nhũm Krisja pĩ kahpa hã htykja o mẽkarõmnuti mẽ mẽ õ pahi Satanasti wa mẽ ho hirerek pa. Jao hihtýx o kot mẽ

hakrenh par ã amnhĩ to amnhĩrit. Te mẽ kot kutã amnhĩ xunhwÿr xwÿnh piitã mẽ noo mã mẽ ho krihkrit par nẽ ma akupÿm õ krĩ hwÿr hkĩnh nẽ grer o mõrta pyrãk.

16 Nẽ koja mẽmojaja mẽ awÿr mra nẽ tee ri mẽ ate mẽmoj kur o akrĩ hã mẽ apumu nẽ mẽ amã:

—Kwa na hte Tirtũm kõt mẽ kot amnhĩ xunhwÿr xwÿnhjaja ja kur kêt nẽ. Nẽ ja ho hkõm kêt nẽ. Nẽ mẽ panhõ arĩgromnu pẽ sap ã ri mẽmoj tã ãpênh kêt nẽ. Nẽ mytwrÿ nyw ã mẽmoj tã ãpênh kêt nẽ. Na htem ã Tirtũm ã hkĩnh o pa anẽ. Tã ã mẽ ate mẽ ixkõt amnhĩ nhĩpêx anhÿr kêt jakamã mãn mẽ apê Tirtũm kra hkêt nã. Anẽ.

Tã nom kær ka mẽ kapêr ma nẽ ãm ama.

17 Amnepêm kormã mẽ pahte Kris kõt amnhĩ xunhwÿr kêt ri na pu prem ã amnhĩ nhĩpêx anhÿr o papa. Tã Jejus kõt amnhĩ xunhwÿr hãmri nẽ axte ã amnhĩ nhĩpêx anhÿr kêt nẽ. Pãnhã kapêr pix ma nẽ hkõt pix mã amnhĩ nhĩpêx o ri papa.

Mẽ pahte mẽ kot Tirtũm kapêr o mẽ hêx xwÿnhjê mar kêt ã mẽ pamã karõ

18 Nẽ koja mẽmojaja mẽ awÿr mra nẽ hêx rom tanhmã mẽ amã amnhĩ jarênh to nẽ mẽ amã:

—Na pre Tirtũm ãm mẽ papxipix mẽ inhmã amnhĩ to amnhĩrit. Jakamã kwa mẽ ixkapêr ma. Kot kaj mẽ inhmar kêt nẽ hãmri nẽ mẽ amex kêt nẽ apa.

Anhÿr o mẽ amã kapêr japêr ka mẽ ama nẽ ãm mẽ ma. Rÿ nhũm mẽ amã:

—Tirtũm mẽ parom kot amnhĩ to rax o kot mẽ pahpiitã mẽ pajakrenh par jakamã kwa mẽ tanhmã amnhĩ to hwÿr to hkêt nẽ. Kot ka mẽ anẽ nhũm mẽ ama nẽ mẽ akamã gryk nẽ. No kêt mẽ amnhĩ to kapêr o wrÿk xwÿnhjê mãn wÿ. Koja mẽ ama nẽ mẽ akamã gryk kêt nẽ tanhmã mẽ amã mẽmoj nhĩpêx to. Anẽ.

Koja mẽ ã mẽ amã kapêr anẽ ka mẽ ama nẽ ãm mẽ ama. Te ho mẽ ãhpumunh tÿx kãm mẽ kot ã mẽ amã kapêr anhÿr pyrãk no ãm mẽ kapêrja mex kêt. Na htem amnhĩ krã hkõt te amnhĩ to rax pyrãk o ã mẽ amã kapêr jao mẽ hamaxpêr tũm o hamaxpêr o ri pa. No mẽ apyrã nẽ mẽ hamaxpêr nyw o hamaxpêr kêt nẽ.

19 ãm mẽ kot Tirtũm kapêr kwÿm ri mẽ ahkre jakamã mẽ kêp Jejus kwÿ hkêt. No mẽ papajaja mẽ pahpê Jejus kwÿ na pu mẽ. Nhũm Jejus kêp mẽ panhõ Pahihti jakamã na hte tanhmã mẽ pahto paxihtÿx to pu htem kukwak ri tanhmã axpên to ajuta hto ho ri papa. Nẽ hkõt axpên to paxihtÿx o ri papa. Mẽ pahpiitã mẽ pahte hkõt amnhĩ nhĩpêx mex o ri papa kaxyw. Tirtũm kãm hprãm xã hkõt.

Mẽ pahte amnhĩ krã hkõt tãm amnhĩ nhĩpêx kêt ã mẽ pajarênh

Karatas 3.1-5, 5.1-9; Epes 2.8; Piripos 3.9

20-21 Nê wam mē pahte amnhī nhīpêx tūm nê mē pajamaxpēr tūmta te kot Kris kôt htyk nê mē pahpê hapêx par pyrāk jakamā na pu htem arī hkôt amnhī nhīpêx kêt nê. Nê mēkarōmnuti hkôt amnhī nhīpêx kêt nê. Tā no nhūm xep ra mēhōja mē awȳr mō nê hêx rom mēmoj nê tanhmā mē amā kapēr to nê mē amā:

—Kwa mē ja jamȳnh kêt nê. Nê ja hkur kêt nê. Nê ja kupênh kêt nê.

Anh̄ȳr o mēmoj nê mē akurê ho pa. Xep mē ā mēmoj nê mē akurê anē ka xep mē ama nê mē hkôt amnhī nhīpêx. Kwa nà mon ka mē ri axtem nê mē hkôt amnhī nhīpêx?

22 Tīrtūm kot mēmojja nê tanhmā mē pahkurê htore hā. Ām mē kot amnhī krā hkôt mēmoj nê mē akurê ka mē ama nê mē hkôt amnhī nhīpêx. Mēmoj kur nê mē akurê xw̄ȳnh̄ta na htem kuku nhūm hapêx kurê kumrêx. Mo koja we Tīrtūm omu nhūm kēp omnuj? Nà ja kot anh̄ȳr kêt kēnā. Mē ām amnhī krā hkôt mē kot ja nê mē akurê.

23 Tā ā mēmoj nê mē akurê anh̄ȳr xw̄ȳnh̄jaja na ka htem nh̄ȳri mē omu nê mē kapēr ma nē atȳx ajamaxpēr o:

—Nà te Tīrtūm kôt amnhī nhīpêx mex o pa pyrāk. Te mē àhpumunh t̄yx pyrāk o ā mē inhmā mēmoj jarēnh anē. Anē.

No ām mē kot mēmoj jarēnhja kot anh̄ȳr kêt. Ā mē kot amnhī nhīpêx anh̄ȳr xw̄ȳnh̄jaja kēp Tīrtūm kra hkêt. Na htem ām amnhī krā

hkôt mēmoj nê mē akurê ho pa. Nê hā amnhī to jarkrar o ri pa. Mē ate ja hā mē mar nê mē kot amnhī to rūnh ā mē hkamnhīx kaxyw. Na htem kot amnhī tomnuj pymaj tanhmā amnhī nhī hto ho pa. No ām ri ā amnhī nhīpêx anh̄ȳr kapr̄ȳ. Nê ām htȳx Tīrtūm kapēr o mē wrȳk xw̄ȳnh̄jê hw̄ȳr kapr̄ȳ ho pa.

3

Mē pajamaxpēr nyw nê mē pahte amnhī nhīpêx nyw jarēnh

Rōmān 6.4-11

1 Nê na pre Tīrtūm akup̄ym Kris o ht̄ir nhūm mē pahte hkôt amnhī xunhw̄ȳr jakamā te Tīrtūm kot Kris nhīpêx pyrā nê akup̄ym mē pahto mē paht̄ir pyrāk o mē panhīpêx. Jakamā kwa kēr pu mē axte pahte amnhī nhīpêx tūm kôt amnhī nhīpêx kêt nê. Te Kris pyrā nē ra kaxkwa hw̄ȳr paxàpir nē kamā ri papa pyrāk o amnhī nhīpêx. Jao pajamaxpēr nyw pix o pajamaxpēr nê pahte amnhī nhīpêx nyw pix o amnhī nhīpêx o ri papa. Te Kris kot amnhī nhīpêx pyrāk. Na pre akup̄ym kaxkwa hw̄ȳr api nē Tīrtūm nhīhkô hā mē ho amnhīpt̄ar xā kamā hkrī ho hkrī.

2-3 Nê ra mē pahte Kris kôt amnhī xunhw̄ȳr jakamā te jar pika hkôt pajapêx par nê Tīrtūm wa kuri kaxkwa kamā pamex nē papa ho papa pyrāk. Jakamā kwa kēr pu mē pahte amnhī nhīpêx nyw mā m̄an pajamaxpēr

râhã ho papa. Nê axte mē pahte amnhĩ nhĩpêx tũm mã pajamaxpêr kêt nê.

4 Kris kêp akupÿm mē pahto mē pahtĩr xwÿnh. Kojã nhÿrmã akupÿn mē pahwÿr wrÿ hãmri nhũm Tĩrtũm te ho mex raxta pyrãk o mē panhĩpêx nê mē pahto mex rax kumrêx.

Mē pahte akupÿm amnhĩ nhĩpêx tũm o paxujanãr kêt ã mē pamã karõ

Epes 4.17-5.2

5 Jakamã kwa kêr ka mē axte ate amnhĩ nhĩpêx tũm kôt amnhĩ nhĩpêx kêt nê. Te ra mē apê htyk nê hapêx par pyrã nê axte kãm ajamaxpêr kêt nê.

Jakamã axte ri axpên mjên rÿ axpên prõ ho amnhĩkati hkêt nê.

Nê nhãm ri mēmyjê hõ rÿ mēnijê hõ ho amnhĩkati hkêt nê.

Nê mē amã tanhmã amnhĩ tomnuj to hprãm kêt nê.

Nê mē amã akukrêx rax prãm kêt nê. Kot ka mē ã amnhĩ nhĩpêx anê nê gaa nê akukrêx rax gryk ã axte Tĩrtũm mã ajamaxpêr kêt nê.

6 ã mē kot amnhĩ nhĩpêx anhÿr xwÿnhjaja Tĩrtũm kãm mē hprãm kêt. Kojã nhÿrmã tanhmã ja hã mē homnuj tÿx to.

7 Amnepêm kormã mē ate Kris kôt amnhĩ xunhwÿr kêt ri na ka prem ã amnhĩ nhĩpêx anhÿr o ri apa.

8-9 Tã kêr ka mē axte ã amnhĩ nhĩpêx anhÿr kêt nê.

Nê mē ri axpên kãm agryk o ano hkã karõt o axpên pumunh kêt nê.

Nê mē axpên kamã axãhkurê hkêt nê. Ri tanhmã axpên tomnuj to ho apa hkêt nê.

Rÿ axpên jakwa kamã mēmoj ma nê ri axpên xõ ri tanhmã ri axpên mã ho axêx to ho ri apa hkêt nê.

Nê mē akapêr mã agêt o ri mē kãm akapêr kêt nê.

Nê mē ri mēmoj to axpên mã axêx hkêt nê.

Ã mē ate amnhĩ nhĩpêx anhÿr tũmta ra mē apê hapêx par kênã.

Mē pahte amnhĩ nhĩpêx nyw kôt amnhĩ nhĩpêx ã mē pamã karõ

Rõmãn 12.2; Epes 4.23; Wam Pêtre 2.11

10 Nê na ka mē ra mē ate amnhĩ nhĩpêx nyw o amnhĩ nhĩpêx o ri apa. Jao ra mē pahto kator xwÿnh maatija kôt amnhĩ nhĩpêx mex o mõ. Kot kaj mē gaa nê rĩ hkôt amnhĩ nhĩpêx mex kumrêx o ri apa. Kãm hprãm xã hkôt.

11 Nê mē pahpê Kris kwÿjaja ahpÿnhã na pu mē. Na mē pakamã Ijaew nê Ijaew kêt xwÿnhjaja. Nê mē pakamã panhĩ nê kupê. Nê mē kãm àpênh xwÿnhjaja nê mē kot amnhĩ mã ri àpênh xwÿnhjaja. ãm ahpÿnhã mē pahpê Kris kwÿjaja mē pahte anhÿr tã na hte Tĩrtũm tanhmã mē pakute hkôt mē pahpumunh kêt nê. Na hte mē panhĩpêx o axpên pyrã nê mē pahpiitã mē pakamã pa ho pa pu htem

pahpimràatā hkôt ri amnhĩ nhĩpêx o papa.

12 Nē Tĩrtũm kām mē pajapê nē kām mē pajapê xaj mē pakukamā amnhĩm mē parê. Mē pahte kām tanhmā amnhĩ nhĩpêx to ho ri papa kaxyw mē pakukamā mē parê.

Jakamā kêr ka mē axpên kamā axukaprĩ ho ri axpên kôt apa.

Nē axpên to mex pix o ri axpên kôt apa.

Nē mē amā amnhĩ to rax o axpên jakrenh prām kêt nē.

Nē mē am amnhĩ pix kukamā ri ajamaxpêr kêt nē. Amnhĩ mē nhām mē hkukamā ajamaxpêr o ri apa.

Nē mē ri agryk tokyx anhÿr kêt nē.

13 Nē koja mēhō tanhmā mē ato ka mē amnhĩ tã omu nē tanhmā amnhĩ tã ho hkêt nē. Am ja ho ajamakêtkati kurê kumrêx nē axte kām ajamaxpêr o ri apa hkêt nē. Ra Jejus kot mē panê mē pahte amnhĩ tomnuj piitã rênh par kênã kot pu kêt mē amnhĩ tã tanhmā mēhō hto. Tã kêr ka mē axpên to mex o ri apa nē amnhĩ tã tanhmā axpên to ho ri apa hkêt nē.

14 E kêr ka mē ã axpên nhĩpêx anhÿr o ri apa. No am ja pix kêt. Nē mē mãânên amā axpên kĩnh pê axpên kutã anojarêt rãhã nē. Kot kaj mē ã amnhĩ nhĩpêx anê nē mãânên ra ixte mēmoj tã mē amā karōta ka mē ho anhÿr mex kurê kumrêx. Mē pamã

axpên kĩnhja na mex kumrêx o kot mēmoj piitã hakrenh par.

15 Nē kêr ka mē Kris kukwak ri anhōxàhkre kaxwÿnh kām akĩnh nē ajamakêtkati nē tãm ri axpên nhĩpêx o ri axpên kôt apa. Te ixkre tipxi kamā mē ate axpên kôt ri amnhĩ nhĩpêx pyræk. ã mē pahte amnhĩ nhĩpêx anhÿr o papa kaxyw na pre Tĩrtũm amnhĩ wÿr mē pahwÿ. Mē pahte hkôt amnhĩ xunhwÿr kaxyw.

Nē kêr ka mē Tĩrtũm mã amnhĩ jarênh kaxyw nē kām Kra Jejus ã akĩnh ã amnhĩ jarênh o ri apa.

Mē pahte Tĩrtũm mã mex ã pagrer ã mē pamã karō
Epes 5.19

16 Nē kêr ka mē Kris kapêr piitã hkôt amnhĩ nhĩpêx mex nē. Nē kapêr o axpên jahkre mex o ri axpên kôt apa. Tĩrtũm kot amnhĩ nhĩpêx o axpên jahkre ho ri axpên kôt apa. Nē kām agrer o ri apa. Kām mex o mex ã agrer o ri axpên kôt apa. Nē kām kukwak ri akĩnh ã amnhĩ jarênh o kām gre.

17 Nē kêr ka mē Mēpahpãm Tĩrtũm mã amnhĩ jarênh o:

—Pa Tĩrtũm. Nà am hãmri na ka pre mē ixwÿr Akra Jejus mē nhũm mē ixwÿr wrÿ nē mē inhnê ty.

Anhÿr o kām amnhĩ jarê. Hãmri nē am Pahihti Jejus kot amnhĩ nhĩpêx kôt pix mã tanhmā ri amnhĩ nhĩpêx to rÿ am kôt pix mã tanhmā akapêr to ho ri apa.

*Tanhmā mē pahte axpēn
nhīpēx to hā mē pamā karō*

Epes 5.22-6.9

18 Nē mē anijaja. Tirtūm kot myja kumrēx nhīpēx nē hkôt kām hprō nhīpēx jakamā kēr ka mē amjēn ā apijaam o apa. Nē mē hamaxpēr mex ā mē omu nē mē hkôt ri amnhī nhīpēx mex nē. Ā mē ate amnhī nhīpēxja na Tirtūm kām hprām.

19 Nē mē amyjaja kēr ka mē amā mē aprō japē nē. Te amā amnhī tā ma pyrāk o mē hipēx o ri apa. Jao tanhmā mē homnuj to hkēt nē.

20 Nē mē apē mē hkrajaja kēr ka mē anhīpēxā nē akatorxā wa hā apijaam nē wa kapēr ma nē wa hkôt ri amnhī nhīpēx. Ā mē ate amnhī nhīpēx anhīrja na Tirtūm kām hprām. Koja ā mē ate amnhī nhīpēx anhīr ā mē apumu nē hkīnh nē.

21 Nē kēr ka mē apē mē hipēxā nē mē katorxā mē akra gryk kaxyw mē kām apēr o apikēnh kēt nē. Kot kaj mē ā mē hipēx anē nhūm mē tee ri amnhī tā mē ama nē hkapri nē.

22 Nē mē ate mē kām tanhmā amnhī nhīpēx to ho ri mē apa xwýnhjaja kēr ka mē anhō patrāw kapēr ma nē hkôt amnhī nhīpēx. Nē mē noo mā mē kām tanhmā amnhī nhīpēx mex to nē määnēn mē wa kre kamā mē kām tanhmā amnhī nhīpēx mex to. Nom mē kot axàpēnh ā apumunh nē hā kām akīnh pix kaxyw axàpēnh mex kēt nē. Määnēn mē amā Pahihti

Kris kīnh ā akatāt kôt mē kām mēmoj tā axàpēnh mex nē. Mē noo mā nē määnēn mē wakre kamā.

23 Nē mē akīnh kām mē kām axàpēnh mex o ri apa. Te mē ate Pahihti mā akīnh kām tanhmā kām amnhī nhīpēx to pyrā nē tām amnhī nhīpēx o tām mē kām axàpēnh mex o ri apa.

24 Te mē anhō patrāw pix mā axàpēnh pyrāk nom kumā pix mā hkēt. Määnēn mē panhō Pahihti Krisja mā. Jakamā kot kaj mē ā amnhī kaxyw Tirtūm mā ajamaxpēr pē akīnh kām anhō patrāw mā mēmoj tā apē nhūm Pahihtija ja hā mē apumu nē nhīrmā mē ato mex rax nē.

25 E kēr ka mē ā mē anhō patrāw mā axàpēnh mex o ri apa anē. No kot kaj mē kapēr kwým amnhī krā hkôt ri tanhmā amnhī nhīpēx to nhūm Tirtūm tee ri ja hā mē apumu hāmri nē nhīrmā tanhmā hā mē anhīpēx to. Na hte ā mē kot amnhī tomnuj xwýnhjē piitā mē hipēx anē nē mē hipēx o axpēn pyrāk. Jakamā kwa kēr ka mē anhō patrāw mā axàpēnh mex rāhā ho ri apa.

4

1 Nē mē apē mē ō patrāw kēr ka mē kot mē amā mē àpēnh xwýnhjē ho mex nē tanhmā mē homnuj to hkēt nē. Mē urāk nē kaxkwa kamā mē anhō Patrāw maatija hkrī. Kot mē pahte tanhmā amnhī nhīpēx to nē tanhmā mē pajamaxpēr to hā mē pahpumunh rāhā jakamā kēr

ka mẽ noo mã mẽ ho mex rãhã ho ri apa.

E kêr ka mẽ apiitã ã axpẽn to mex anhÿr o ri apa.

Mẽ pahte Tirtũm mã amnhĩ jarẽn h rãhã hã mẽ pamã karõ

Matêwre 7.7; Rukre 11.1-8; Atre 1.14; Epes 6.18

² Nẽ kêr ka mẽ xatã Tirtũm mã amnhĩ jarẽn h rãhã ho ri apa. Nẽ tanhmã mẽhõ kot amnhĩ nhĩpêx to hã harẽn h ma nẽ ho Tirtũm wÿ. Nẽ mẽ ate kãm amnhĩ jarẽn h kamã kãm mex o mex ã harẽ.

³⁻⁴ Nẽ mããnẽn ixto awÿ kê mẽ tokyx ixkator japêr. Pa ixãmnhĩx mẽ kot kormã Kris jarẽn h mar kêt xwÿnhjê mã harẽn h o ri mẽ hkõt ixpa. ã ixte amnhĩ nhĩpêx anhÿrta ã na prem ixpynê nẽ ijaxà pa kormã jar ixkrĩ. Jakamã kwa mẽ mãmrĩ ja hã ixto Tirtũm wÿr o apa.

Mẽ pahte apkati mẽ mẽ pahkwÿjê mã Jesus jarẽn h ã mẽ pamã karõ

Epes 5.16

⁵ Nẽ kêr ka mẽ kêp Kris kwÿ hkêt xwÿnhjê hkõt nhÿhÿm ri apa nẽ tãm ri Tirtũm kapêr kõt amnhĩ nhĩpêx o mẽ hkõt ri apa.

⁶ Nẽ kê mẽhõ awÿr tẽ nẽ tanhmã Jesus ã akukjêr to ka amã hkĩnh ã aprĩ hã kãm aw-jarê. Ahpÿnhã tanhmã mẽ kot hã akukjêr to xà hkõt tanhmã mẽ kãm harẽn h to kê mẽhprĩ hã mar mex nẽ.

Pawre kot Koros wÿr Xikitre mẽ Ones wa mẽnh ã harẽn h Epes 6.21-22

⁷⁻⁸ Nẽ ot pa mẽ awÿr mẽ pahtõ Xikitre mẽnh mã. Kot ma mẽ awÿr ixte mẽ amã ixkapêr ã kagà nhĩpêx o mõi kaxyw. Na hte ixkõt Tirtũm mã amnhĩ nhĩpêx o ri pa. Inhmã hapêê. Tã kot paj mẽ awÿr kumê kê ma mẽ awÿr mõi nẽ hprĩ hã mẽ amã ijarê. Mẽ ate ijarẽn h mar nẽ tãm ajamaxpêr nẽ akĩnh kaxyw.

⁹ Mẽ akwÿ Onesti hkõt koja ma mẽ awÿr mõi. Mããnẽn Kris kõt kêp mẽ pahtõ hã mẽ pamã hapê xwÿnh na. Na hte Tirtũm kapêr kõt amnhĩ nhĩpêx mex rãhã ho ri pa. Tã Xikitre mẽ koja wa ma mẽ awÿr mõi. Hãmri nẽ mẽ awÿr pøj nẽ jar tanhmã mẽ ixte amnhĩ nhĩpêx to hã mẽ ijarê ka mẽ ama.

Kris kõt mẽ hkwÿ kot mẽ hwÿr hpêr mẽnh ã mẽ harẽn h

¹⁰ Nẽ ota Aristakja ixpyrà nẽ kêp prês nẽ hkrĩ. Tã mẽ awÿr hpêr mẽ. Nẽ Panãpe htõ Juãw Makreja mããnẽn mẽ awÿr hpêr mẽ. Na pa pre ra mẽ amã Juãw Makre jarê. Tã koja mẽmo arĩgro hã akupÿn mẽ awÿr mõi japêr ka mẽ omu nẽ ho mex nẽ.

¹¹ Nẽ Jesus Justija mããnẽn mẽ awÿr hpêr mẽ. Jajaja mẽ ixpyrà nẽ kêp Ijaew. Tã mẽ tapxipixjaja na htem ixpyrà nẽ mẽ ixpê Ijaew kwÿjê rom mẽ kãm Tirtũm kapêr nyw o mẽ ahkre ho ri mẽ hkõt pa. Tirtũm kot Kra Kris kõt mẽ kot amnhĩ xunhwÿr xwÿnhjê ho hkra hã harẽn h nywja na htem mẽ kãm harẽn h o ri mẽ hkõt pa. Pa ja hã mẽ omu nẽ ixkĩnh nẽ.

12 Nē mē anhiō Epasja māānēn mē awyr hpēr mē. Na hte Jesus Kris mā tanhmā amnhī nhīpēx mex to ho pa. Nē mē ato Tirtūm wyr rāhā ho pa nē mē ato hwyr o:

—Pa Tirtūm. E kwa tanhmā Koros kamā akrajē ho kê mē akôt amnhī xunhwyr t̄yx nē. Nē amā hprām xā hkôt pix mā amnhī nhīpēx o ri pa. Nē amnhī kaxyw Kris kôt pix mā hamaxpēr t̄yx rāhā nē. Anē.

13 ām hāmri na hte mē ato hwyr o pa. Nom mē kapxipix o hwyr kêt nē. Māānēn krī pē Ratisej kamā nē krī pē Jerop kamā Kris kôt mē pahtōjē ho hwyr o ri pa. Mē ate Tirtūm kôt amnhī nhīpēx mex o apa kaxyw. Ixte ja hā omunh mex.

14 Nē jar mē pahtō tōtō Rukre mē Tēmtija wa māānēn mē awyr hpēr mē. Tōtō Rukreja kêp ixkrāmnhw̄y mex na.

15 Nē kêr ka mē krī pē Ratisej kamā Kris kôt mē pahkw̄yjē mā ijarē. Nē Nīpare mā nē ōrkw̄y hwyr mē pikuprōnh nē Tirtūm mā mex o mex ā harēnh o mē hkrī xw̄ynhta mā māānēn ijarē.

16 Nē e kêr ka mē ixte mē awyr kagā mēnhja kamā harēnh pa nē hpānhā krī pē Ratisej kamā Kris kôt mē pahkw̄yjē hwyr amē kê mē apyrā nē kamā harē nē piitā kuma. Nē mē kām anē kê ra ixte mē hwyr kagā mēnh xw̄ynhta kê mē amā kugō ka mē kuxwar kamā harē nē ama.

17 Nē kêr ka mē Akip mā ijarē kê ra Tirtūm kot kām

mēmoj tā karō xw̄ynhta kê ho anhyr jatur xām kumē. Kêp hkra hā kê tām kām apēnh jatur xām kumē.

18 Tā ām ja pix. E paj pam amnhī nhīhkra ho hatur xā hā kagā. Mē ate ixte mēmoj tā kagā pumunh nē hkôt inhmā ajamaxpēr kaxyw. Nē ixte mē awyr mēnh ā ijarēnh mar kaxyw. Kwa kêr ka mē arī ixpē prēs ā ixto Tirtūm wyr rāhā ho ri apa.

E kê Tirtūmja mēmoj to mē akutā nojarēt nē mē ato mex nē ka mē amex nē ajamakētkati nē apa ho apa. Tā ām ja pix. Ixpē Pawre na pa mē awyr kagāja nhīpēx nē ā mē awyr mēnh anē.

Wam Tesarõn Pawre kot Tesarõn kamã Jesus kõt hkwỳjê hwỳr kagà nê mēnh

Pawre na pre kagàja nhìpêx. Kêp Jesus nhỹ hã mē ahkre ho pa xwỳnhjê hõ na pre. Jakamã na pre kagàja nhìpêx nê ma krĩ pê Tesarõn kamã Jesus kõt hkwỳjê hwỳr kumê. Tesarõn kamã Jesus ã kãm mē hkurê xwỳnhjaja na prem Jesus ã mē homnuj o pa nhũm mē amnhĩ xà htỳx kamã hamak o pa. Hãmri nhũm Pawre mē harēnh ma nê kagàja nhìpêx nê mē hwỳr kumê. Kot mē kãm mē hamaxpêr o hihtỳx kaxyw mē kot arĩ Jesus kõt amnhĩ nhìpêx mex o pa nê aa hkaga hkêt ã mē kãm karõ. Nê nhỹrmã Jesus akupỹn kaxkwa rũm mē pahpê hkwỳjê hwỳr wrỳk nê ma akupỹm amnhĩ kõt mē pahto àpirja nhũm mē kãm harê. ã na pre mē kãm mēmoj jarê nê hã kagà anê nê mē kãm:

1 Pa mē apê Tesarõn kamã Jesus kwỳ hã axpēn wỳr mē apikuprõnh xwỳnhjaja? Xà mē amex na ka mē apa? Ixpê Pawre na pa mē awỳr kagàja nhìpêx nê mē awỳr kumê. Siras mē Ximotre mē pa mē awỳr kumê. Mē pahpê Mēpanhìpêêxà maati Tirtũm mē Pahihti Jesus Kris wa hkwỳ jakamã na pa htem mē ato Tirtũm wỳr rãhã ho ri ixpa. Kot mē akutã nojarêt

rãhã nhũm mē ajamakêtkati nê axàmnhĩx mē apa kaxyw.

²⁻³ Nà mēmoj kêt. Na pa htem mē amã ijamaxpêr nê mē anhỹ hã ixkĩnh nê ixpa hãmri nê mē awỳr kagàja mē. Na pa htem mē ato Tirtũm wỳr rãhã ho ri ixpa nê kãm mē ajarēnh o:

—Pa Tirtũm. E mãn ka Tesarõn kamã akrajê pumu. ãm hãmri na ka pre tanhmã mē hkrã hto nhũm mē akõt amnhĩ nhìpêx mex o pa. Na htem amnhĩ kaxyw akõt hamaxpêr tỳx nê. Jao mē piitã mē kamã ukapřĩ kamã tanhmã mē ho ajuta hto ho pa. Nhũm mē kãm mē ixkurê xwỳnhjaja Pahihti Jesus Kris ã tanhmã mē ho ho pa htã nhũm mē tee ri amnhĩ kukamã hamaxpêr o hkapřĩ nê Jesus mē war akaga hkêt nê. Arĩ war anhỹ hã amnhĩ to htỳx nê Pahihti Jesus kutêp tanhmã kãm amnhĩ nhìpêx to ho pa. ãm hãmri na htem ã amnhĩ nhìpêx anê Tirtũm. Na pa htem mē kot ã amnhĩ nhìpêx anhỹrja mã ijamaxpêr nê ixkĩnh nê.

Anhỹr o pa htem mē ato kuwỳ.

⁴ E Kris kõt ixkwỳjaja. Nà Tirtũm kãm mē ajapê jakamã na pre amnhĩm mē arê. Kot mē ato hkra nhũm nhỹrmã kuri mē amex nê atĩr tũm nê apa ho apa kaxyw. Ra mē ixte ja hã mē ajarēnh mar mex.

Mē piitã mē kot Tesarõn nhõ xwỳnhjê jarēnh mar ã mē harēnh

⁵ Nê na pa prem ma mē awỳr mō nê mē amã Jesus

jarënh o mẽ akõt ixpa. Kot mẽ panê tanhmã amnhĩ nhĩpêx to hã harënh o ri mẽ akõt ixpa. Nom pa mẽ amnhĩ krã hkõt mẽ amã ixujarënh kêt nê. ãm Tirtũm Karõ nhỹ hã na pa prem hihtỳx xà ho tanhmã mẽ amã ixkapêr to ka prem mẽ inhma nê mẽ ixkõt ajamaxpêr kurê kumrêx. Na pa prem tãm amnhĩ nhĩpêx o ri ixpa ka mẽ ja hã mẽ ixpumunh o ri mẽ ixkõt apa.

6 Tã Jejus kõt amnhĩ xunhwỳ nê hkõt amnhĩ nhĩpêx mex nê. Nê mẽ ixkõt amnhĩ nhĩpêx mex nê. Mẽ kot Jejus ã tanhmã mẽ ato htã ka htem Tirtũm Karõ nhỹ hã akĩnh nê hkõt amnhĩ nhĩpêx mex rãhã ho ri apa.

7 Tã nhũm pika pê Masetõn mẽ Gres wa kamã Jejus kõt mẽ pahkwỳjaja ã mẽ ate amnhĩ nhĩpêx anhỹr ã mẽ ajarënh ma nê mẽ apyrà nê ã amnhĩ nhĩpêx anhỹr o pa.

8 Na ka prem tanhmã Jejus kot mẽ panê amnhĩ nhĩpêx to hã harënh o ri mẽ hkõt apa nhũm mẽ piitã mẽ akapêr ma. Nom mẽ tapxipixjaja mar kêt nê. Na mẽ ra ohtô nê mẽ ajarënh ma nê mẽ apyrà nê ma mẽ kãm Jejus jarënh o pa. Ra mẽ ate Jejus kõt amnhĩ xunhwỳr ã amnhĩ jarënh o ri apa nhũm mẽ piitã kot mẽ amar jakamã mẽ pajaja na pa htem mẽ kãm ã mẽ ajarënh anhỹr kêt nê. Mo kaxyw? Ra mẽ kot mẽ ajarënh mar mex kênã.

9 Na pa htem nhỹri krĩ hõ hwỳr pøj nhũm mẽ ixpumu nê ra mẽ tãmjaja mẽ inhmã

mẽ ajarënh kurê kumrêx. Nê mẽ ajarënh o:

—Kwa Tesarõn kamã Kris kõt mẽ pahkwỳjaja na xep kãm mẽ akĩnh nê. Amnepêm na pre htem amnhĩm sãnti nhĩpêx nê kêp mẽhpãm ã harë nê amnhĩ to hwỳr o pa. Tã ka xep prem ma mẽ hwỳr mō nê mẽ kãm Tirtũm kapêr jarë nhũm mẽ ama nê Tirtũmja sãnti rom ãm hãmri hã omunh kurê kumrêx. Hãmri nê gryk ã sãnti kaga hpa nê Tirtũm kõt amnhĩ xunhwỳ nê hkõt pix mã amnhĩ nhĩpêx mex o pa.

10 Nê amnhĩ wỳr Tirtũm Kra kamã hamak rãhã ho ri pa. Anê.

ãm hãmri na ka htem amnhĩ wỳr kamã hamak rãhã ho apa. Na pre ty nhũm Hipêêxà Tirtũm akupỳm ho htĩr. Tã koja nhỹrmã akupỳn mẽ pahwỳr kumẽ nhũm akupỳn mẽ pahwỳr wrỳ. Hãmri pu mẽ ãm pix kukwak ri mẽ kot amnhĩ xà htỳx kãm hamak o pa htũm xàta wỳr papa hkêt nê.

2

Pawre kot amnhĩ jarënh

Sikũn Korõt 1.12, 4.1-6

1-2 Nê kormã mẽ awỳr mẽ inhmõr kêt ri na pa prem kormã Piripos nhõ xwỳnhjê mã Tirtũm kapêr jarënh o ri mẽ hkõt ixpa. Nom nhũm mẽ hkwỳjaja kãm mẽ inhmar prãm kêt nê. Na prem Jejus ã mẽ inhmã kapêr punuj nê mẽ inhĩpêx kati pa prem amnhĩ xà htỳx kamã ijamak o mẽ hkõt ixpa. Na ka prem ja hã mẽ ijarënh ma. ã mẽ kot mẽ

inhîpêx anhÿr tâ pa mē tee ri amnhî kukamā ijamaxpêr pê Tîrtûm kapêr jarênh kaga hkêt nê. Na pa prem arî mē kām Jejus kot tanhmā mē panê amnhî nhîpêx to hā harênh o ri mē hkôt ixpa. Tā mē awÿr inhnojarêt nê Tîrtûm nhÿ hā amnhî to htÿx nê ma mē awÿr mō. Hāmri nê mē amā tanhmā Jejus jarênh to ho ri ixpa. Ka prem mē inhma hāmri nê axohtô nê hkôt amnhî xunhwÿ.

³ Nom pa prem ixêx rom tanhmā mē amā ixkapêr to hkêt nê. Rÿ mē inhmā mēmoj prām xàj mē ano kupyrr pê mē amā ixkapêr kêt nê.

⁴ Rÿ mē ate mē ixkapêr mar nê mē inhmex ā mē ijarênh kaxyw pa tanhmā mē amā ixkapêr to hkêt nê. Ām Tîrtûm kot mē inhmar nê tapxipix mē inhmex ā mē ijarênh pix prām xàj na pa prem mē amā kapêr jarênh o ri mē akôt ixpa. Tîrtûm tapxipix na hte tanhmā mē pakute hkôt mē pahpumunh rāhā ho pa. Tām na pre mē ixte kapêr jarênh o ri ixpa kaxyw mē ixunhwÿ.

⁵ Xàn pa prem mē ijakwa nhîkjê ho mē ate tām amnhî nhîpêx ā mē ajarê hāmri nê mē ijakwa nhîkjê ho mē ato ixkapêr punuj nê? Nà na pa prem ā amnhî nhîpêx anhÿr kêt nê. Na pa prem ixkatāt kôt mē ate amnhî nhîpêx ā mē apumunh kôt tanhmā mē ajarênh to ho ri ixpa.

Nê xà mē ate mē ixkapêr mar nê akînh nê hpānhā mē inhmā amnhîrer kaxyw na

pa prem mē awÿr mō nê mē amā Jejus kapêr o mē ajahkre? Nà na pa prem kàxpore prām xàj mē amā ixkapêr kêt nê. Tîrtûm kot ja kôt mē ixpumunh mex.

⁶ Rÿ xà mē ate mē inhmex ā mē ixto jarkrar kaxyw na pa prem mē awÿr mō? Nà mǎānēn ja kaxyw kêt. Ā mē ate mē ijarênh anhÿr prām xàj na pa htem Tîrtûm kapêr o mē ajahkre ho ri ixpa hkêt nê.

⁷ Rÿ xàn pa pre mē awÿr mō nê mē amā amnhî jarênh o:

—E mē ixte Jejus nhÿ hā ixkapêr o ixpa xwÿnh jakamā kot paj mē amā tanhmā ixkapêr to ka mē inhma nê hpānhā mē inhmā amnhîre.

Anhÿr o mē amā ixkapêr? Nà na pa pre ā mē amā ixkapêr anhÿr kêt nê. Na pa prem te mē katorxà kot hkrajê nhîpêx pyrāk o mē anhîpêx nê amarî mē ajahkre ho ixpa nê mēmoj tā mē awÿr kêt nê.

⁸ Mē inhmā mē akînh jakamā na pa prem mē amā ixprî hā Tîrtûm kapêr piitā harênh par o mē akôt ixpa nê mē kot ja hā tanhmā mē ixto pymaj tee ri amnhî kukamā ijamaxpêr o ri ixkaprî hkêt nê. Ām ixàmnhîx ri tanhmā Jejus kot mē panê amnhî nhîpêx to hā harênh o mē akôt ixpa.

⁹ Mē apê mē ixkwÿ jakamā na pa prem tanhmā mē amā ixkapêr to hpānhā mē ixàpkur xà rÿ mēmoj tā mē awÿr kêt nê. Na pa prem mē pamjaja mēmoj tā ixàpênh pê mē amā ixkapêr o ri ixpa. Nê ixàpênh

rũnh kumrẽx. Arĩgro hã nẽ kamàt kãm. Mãn arĩ mẽ ate ã mẽ ixte amnhĩ nhĩpêx anhỹrja ã anohtỳx japêr ko.

¹⁰ Na pa prem tãm amnhĩ nhĩpêx o mẽ akôt ixpa. Tĩrtũm kãm hprãm xà hkôt. Jao tanhmã amnhĩ to mex to rãhã ho ri ixpa ka prem amnhĩ tã mẽ ixpumu. Nhũm Tĩrtũm haxwỳja ja hã mẽ ixpumu.

¹¹ Na pa pre mẽ apê mẽ ixkra pyræk mẽ anhĩpêx o ri mẽ akôt ixpa.

¹² Jao mẽ amã ixkapêr mex nẽ. Nẽ mẽ akapri nẽ apa xwỳnhjaja pa prem akupỳm mẽ ajamaxpêr o mẽ axihtỳx hãmri nẽ mẽ apiitã mẽ amã ixkapêr nẽ mẽ amã:

—Kwa kêr ka mẽ Tĩrtũm kôt amnhĩ nhĩpêx mex rãhã ho ri apa nẽ aa hkaga hkêt nẽ. Anẽ.

Tĩrtũm tãm na pre amnhĩ wỳr mẽ pahwỳ pu prem hkôt amnhĩ xunhwỳ. Tã koja nhỹrmã amnhĩ wỳr mẽ pahto api pu mẽ Kra Jejus kukwak ri wa kuri pamex kumrẽx nẽ ri papa ho papa. Jakamã kwa kêr ka mẽ hkôt amnhĩ nhĩpêx mex rãhã ho ri apa.

Jejus kwỳjaja kãm Jejus kôt amnhĩ xunhwỳr hkêt xwỳnhjê pyma hkêt

Atre 17.1-9

¹³ Nẽ ma mẽ awỳr mẽ inhmõrta ã na pa prem mẽ amã Tĩrtũm kapêr jarênh o ri mẽ akôt ixpa ka prem mẽ inhma nẽ mẽ ixte amnhĩ krã hkôt mẽ ixkapêr ã mẽ ixkamnhĩx kêt nẽ. Na ka prem ãm hãmri mẽ ixte Tĩrtũm kapêr jarênh ã mẽ ixpumunh kurê kumrẽx

nẽ amnhĩ kaxyw hkôt ajamaxpêr nẽ Jejus mẽ Hipêêxà wa hkôt amnhĩ xunhwỳ. Jakamã na pa hte mẽ amã ijamaxpêr nẽ mẽ anhỹ hã ixkĩnh nẽ. Hãmri nẽ Tĩrtũm mã mẽ anhỹ hã ixkĩnh jarênh o ri ixpa. Nà na ka htem arĩ Tĩrtũm kapêr kôt amnhĩ nhĩpêx mex nẽ.

¹⁴ Nhũm hte mẽ akwỳjaja tee ri ja hã mẽ apumu nẽ Jejus ã mẽ atomnuj nẽ. Nom mẽ kapxipixjaja ã mẽ anhĩpêx anhỹr kêt nẽ. Jutej kamã Ijaew kwỳjaja na prem mẽ apyrà nẽ Jejus kôt amnhĩ xunhwỳ nhũm mẽ hkwỳjaja tee ri ja hã mẽ omu nẽ hã mẽ hipêx kati ho pa.

¹⁵ Amnepêm Ijaew na prem Tĩrtũm nhỹ hã mẽ kãm kapêr o mẽ pa xwỳnhjê homnuj nẽ mẽ hkwỳjê hpar o pa. Hãmri nhũm hpãnhã mẽ hkanrêhã mẽ htãmnhwỳjaja mẽ uræk nẽ Pahihti Jejusja pĩ. Tã jarãhã mããnên ã Jejus ã mẽ panhĩpêx anẽ nhũm Tĩrtũm tee ri mẽ pahtã mẽ omu nhũm ja kêp omnuj tỳx kumrẽx nhũm mẽ pahtã mẽ kamã gryk nẽ.

Na hte mẽ apê Ijaew kêt xwỳnhjê ho hkra nhũm Ijaew kãm ja prãm kêt

¹⁶ jakamã na htem mẽ akwỳ kot Tĩrtũm kôt amnhĩ xunhwỳr pymaj mẽ anê mẽ ixkurê nẽ mẽ inhmã:

—Kwa Ijaew kêt xwỳnhjê mã Tĩrtũm kapêr jarênh kêt nẽ. Ja mex kêt. Anẽ.

Mẽ ate Jejus kôt amnhĩ xunhwỳr nẽ nhỹrmã Tĩrtũm wa kuri atĩr tũm nẽ apaja mẽ kãm hprãm kêt jakamã

na htem ã mẽ anê àmnàr o pa anhÿrja o amnhĩ tomnuj nê. Mẽ kot amnhĩ tomnuj tÿx o mẽ pa xwÿnh jakamã na Tirtũm mẽ kamã gryk nê. Koja nhÿrmã mẽ kot amnhĩ xà htÿx kamã hamak tũm xà hwÿr mẽ rênh pa.

Pawre akupÿm Tesarõn nhõ xwÿnhjê hwÿr hkrà hã harênh

Atre 17.10-13

17 Nê ma mẽ awÿr mẽ inhmõr tã mẽ anhõ krĩ kamã mẽ kêp Kris kwÿ hkêk xwÿnhjaja na pre mẽ ixpumu nê mẽ anê mẽ ijano pa prem ijapôj nê hpãnhã ma nhÿhÿm krĩ hõ hwÿr ixpa. Nom arĩ mẽ amã ijamaxpêr rãhã nê mẽ ato ijamak o ri ixpa nê xatã akupÿm mẽ awÿr ixkrà.

18 Na pa prem inhmã akupÿm mẽ awÿr inhmõr prãm tÿx nê. Ixpê Pawre na pa pre xatã mẽ awÿr ixkrà htã nhũm Satanasti tanhmã mẽ anê ixpê amnàr to pa kormã mẽ awÿr inhmõr kêt nê. Âm tee ri inhmõr prãm kaprÿ.

19-20 Mẽ inhmã mẽ akĩnh tÿx. Mẽ ate Tirtũm kôt amnhĩ nhĩpêx mex jakamã koja nhÿrmã Pahihtĩ Jejus akupÿn mẽ pahwÿr wrÿ pa mẽ akuri xa nê kãm mẽ ajarênh o:

—Pa Pahihtĩ. E Tesarõn nhõ xwÿnhjê pumu. Na ka pre mẽ hwÿr inhmẽ pa mẽ hwÿr mō nê mẽ kãm ajarê nhũm prem inhma nê amnhĩ kaxyw akôt hamaxpêr tÿx nê akôt amnhĩ xunhwÿ. Tã na htem akôt tãm amnhĩ nhĩpêx rãhã ho pa.

Anhÿr o kãm mẽ ajarê nê mẽ anhÿ hã ixkĩnh tÿx kumrêx.

3

Pawre kot Tesarõn wÿr Ximotre mênh ã harênh

Atre 17.14-15, 18.5

1-5 Nê kormã mẽ akôt ixpa ri na pa pre Kris kwÿ hkêk xwÿnhjaja kot Kris ã tanhmã mẽ atomnuj to hkukamã mẽ amã mẽ harê ka prem mẽ inhma. Na htem ã Kris ã mẽ pahkurê xwÿnhjaja mẽ panhĩpêx anhÿr o pa. Tã nhũm prem ã mẽ anhĩpêx anê pa mẽ ajarênh ma nê tee ri mẽ akukamã ijamaxpêr nê axpên mã mẽ ajarênh o:

—Hêxta waa nê. Kwa mẽ kot Jejus ã tanhmã mẽ homnuj toja mÿrapê mãn mẽ tee ri amnhĩ kukamã hamaxpêr nê Jejus kaga rÿ ko. Mãn ra Satanasti tanhmã mẽ kãm Jejus o hêx to nhũm mẽ kuma nê tanhmã hamaxpêr to nê hkaga. Kwa mãn pu prem âm mẽ kãm Tirtũm kapêr jarênh kaprÿ nã? Anê.

Hãmri nê tee ri mẽ akukamã ijamaxpêr nê mẽ awÿr Ximotre mênh kaxyw nê kãm:

—Mãn ra Tesarõn nhõ xwÿnhjaja Jejus ã tanhmã mẽ homnuj to nhũm mẽ amnhĩ xà htÿx kamã hamak o ra tee ri amnhĩ kukamã hamaxpêr. Kwa ma mẽ hwÿr mō nê ja hã mẽ omu. Hãmri nê mẽ kot Kris kôt amnhĩ xunhwÿr tÿx kaxyw mẽ hamaxpêr o axihtÿx. Hãmri nê akupÿn wa ixwÿr mō nê wa inhmã tanhmã mẽ harênh to. Kot

paj Siras mẽ wa akutêp jar Atenas kamã wa arĩk. Anẽ.

Hãmri nẽ mẽ awýr kumẽ. Ximotre na hte Siras mẽ wa inhĩkõ hã mẽ kãm Tĩrtũm kapêr jarẽnh o pa. Nẽ Kris kot tanhmã mẽ panê amnhĩ nhĩpêx toja nhũm wa inhĩkõ hã mẽ kãm harẽnh o pa. Tã pa pre mẽ awýr kumẽ nhũm ma mẽ awýr mõ pa Siras mẽ wa Atenas kamã kutêp arĩk.

Ximotre akupýn mõi nẽ Pawre mã mẽ harẽnh

⁶ Tã nhũm ra ham akupýn mẽ arũm wa ixwýr mõi nẽ wa inhmã tanhmã mẽ ajarẽnh to pa wa mẽ ajarẽnh ma nẽ ixkĩnh nẽ. Na ka xep htem arĩ amnhĩ kaxyw Kris kõt ajamaxpêr tỳx rãhã nẽ. Jao mẽ amã mẽ piitã mẽ hkĩnh nẽ tanhmã mẽ ho mex to ho ri apa. Nẽ arĩ mẽ inhmã ajamaxpêr nẽ ixpyrà nẽ mẽ amã mẽ ixpumunh prãm o ri apa.

⁷ Nã ãm hãmri na ka htem ã amnhĩ nhĩpêx anẽ. Na pa wa ra jar ixpunuj nẽ ixpa nẽ Kris ã amnhĩ xà htỳx kamã ijamak tã mẽ ajarẽnh ma nẽ tãm ijamaxpêr.

⁸ Tesarõn nhõ xwýnhjaja kot Kris ã tanhmã mẽ anhĩpêx to htã ka mẽ arĩ hkõt amnhĩ xunhwýr tỳx rãhã nẽ. Pa wa mẽ ajarẽnh ma nẽ mẽ anhỹ hã ixkĩnh pê tanhmã Pahihti Jejus mã amnhĩ nhĩpêx to ho ri ixpa.

⁹ Nã na pa hte wa mẽ anhỹ hã ixkĩnh nẽ. Nẽ xatã Tĩrtũm mã mẽ ajarẽ nẽ kãm:

—Pa Tĩrtũm. Nã ãm hãmri na ka pre amnhĩ kõt Tesarõn kãm akwýjê xunhwýr tỳx nẽ nhũm htem akõt amnhĩ

nhĩpêx mex rãhã ho pa. ãm hãmri na ka hte ã mẽ hipêx anẽ. Na pa hte mẽ kot amnhĩ nhĩpêx mã ijamaxpêr o ri ixpa nẽ ixkĩnh nẽ.

Anhỹr o kãm mẽ ajarẽ.

¹⁰⁻¹¹ Nom kãm ja pix jarẽnh kêt nẽ. Na pa hte wa mããnẽn arĩgro hã nẽ kamàt kãm amnhĩ to Mẽpanhĩpêxà Tĩrtũm mẽ Pahihti Jejus Kris wa hwýr kãm ixihtỳx rãhã ho ixpa nẽ wa kãm:

—Kwa Tĩrtũm mẽ Jejus wa. Na pa wa ra inhmã Tesarõn wýr inhmõi nẽ mẽ pahkwýjê pumunh prãm tỳx nẽ. Kormã mẽ kot akapêr jatur xà mar kêt. Tã wa inhmã akupým mẽ hwýr wa inhmõi nẽ mẽ kãm akapêr jatur xãm mẽnh prãm. Mẽ kot mar nẽ akõt amnhĩ nhĩpêx mex o pa kaxyw. Kwa xat ka wa akupým mẽ hwýr wa inhmẽ nã? Anẽ.

Na pa hte wa ã amnhĩ to wa hwýr rãhã ho ixpa anẽ. Tã koja wa akupým mẽ awýr wa inhmẽ pa wa ma mẽ awýr inhmõi kurê kumrêx.

¹² Koja Tĩrtũm tanhmã mẽ akrã hto ka mẽ amã xpẽn kĩnh pê tanhmã xpẽn to ajuta hto ho ri apa. Nẽ mẽ amã akwýjê hã ma ho te mẽ kam amã amnhĩ tã ma pyræk o ri apa. ã kot kaj mẽ apiitã xpẽn nhĩpêx anẽ. Te wa inhmã mẽ akĩnh pê tanhmã mẽ ato mex to pyræk.

¹³ Koja Tĩrtũm ja kaxyw tanhmã mẽ akrã hto ka mẽ tãm ajamaxpêr mex nẽ. Kêr kê Jejus nhỹrmã akupýn wrý. Mẽ kot hkõt amnhĩ xunhwýr xwýnhjê mẽ ro hã

akupÿn wrÿ. Hãmri ka mẽ Mëpanhîpêêxà Tirtùm kutã amnhî kukamã ajamxpêr nê tãm mẽ ate amnhî nhîpêx ã amnhî pumunh kôt akînh nê apikunhar o kuri akuhê. No ri tee ri amnhî kamã ajamxpêr nê ajakwamnajre nê akuhê hkêt nê.

4

Tirtùm kãm mẽmoj prãm ã harênh

Rômãn 13.11-14; Epes 5.3-14

¹ E Jejus kôt ixkwÿjaja. Na pa prem ma mẽ awÿr mõi nê Tirtùm kapêr o mẽ ajahkre ho ri mẽ akôt ixpa. Më ate mar nê Tirtùm kãm hprãm xà hkôt tanhmã amnhî nhîpêx to kaxyw. Ka prem mẽ inhma nê hkôt amnhî nhîpêx mex o ri apa. Tã kot paj axte ja hã tanhmã mẽ amã karõ hto. Pahihti Jejus nhÿ hã axte mẽmoj tã mẽ amã karõ. Jakamã kwa kêr ka mẽ arî Tirtùm kapêr kôt pix mã ri amnhî nhîpêx mex nê ÿ hã amnhî to htÿx pê ã amnhî nhîpêx anhÿr o ri apa.

² Na pa prem ra Jejus nhÿ hã mẽ amã mẽmoj tã karõ. Më ate hkôt amnhî nhîpêx prãm xàj mẽ amã hã karõ ka prem mẽ inhma.

³ Nà mẽ pahte tãm amnhî nhîpêx o papaja na Tirtùm kãm hprãm. No kêt mẽ pahtÿx ri nhãm mënijê ho amnhîkati o papaja na kãm hprãm kêt.

⁴ Jakamã kwa kêr ka mẽ amyjaja aprõ pix tânopxar o ri apa. No mẽ ri nhãm mënijê ho amnhîkati ho ri apa hkêt

nê. Nê mẽ anijaja kêr ka mẽ amjên pix tânopxar o ri apa. No mẽ ri nhãm mẽmyjê ho amnhîkati ho ri apa hkêt nê.

⁵ Jejus kwÿ hkêt xwÿnhjaja kot htÿx ri kãm hprãm xà hkôt mënijê hwÿr mrar nê mẽ ho amnhîkati htã kêr ka mẽ ho mẽ urak kêt nê. Kwarî ho kwarî.

⁶ ã mẽ kot amnhî nhîpêx anhÿr xwÿnhjaja koja Tirtùm nhÿrmã mẽ homnuj tÿx kumrêx. Na pa prem ra mẽ amã ja jarê ka prem mẽ inhma. Jakamã kwa kêr ka mẽ ã amnhî nhîpêx anhÿr o ri apa hkêt nê.

⁷ Xà na pre Tirtùm ã mẽ pahte amnhî nhîpêx anhÿr kaxyw amnhî wÿr mẽ pahwÿ nê mẽ pahto hkra? Nà ja kaxyw na pre mẽ pahto hkra hkêt nê. ãm mẽ pahte tãm amnhî nhîpêx o ri papa kaxyw nê tãm ri axpên nhîpêx o ri papa kaxyw na pre mẽ pahto hkra.

⁸ Jakamã kot kaj mẽ atõ ja hã mẽ inhma nê ãm mẽ inhma nê arî ã amnhî nhîpêx anê. Hãmri nê mẽ pajaja mẽ ixkapêr nhîrõp axãm kêt nê. Tirtùm kapêr nhîrõp kot kaj xa. Nê mãânên kot mẽ pahwÿr Karõ mênh xwÿnhja kapêr nhîrõp kot kaj xa.

⁹ Nê mẽ amã axpên kînh pê axpên to mex o apa hprãm xàj na pre Tirtùm tanhmã mẽ amã kapêr o amnhîrît to ka htem ã axpên nhîpêx anhÿr o ri apa. Jakamã kot paj mẽ axte ja hã tanhmã mẽ amã nê hkêt nê.

¹⁰ Na ka mẽ ra amã axpên

kĩnh pê te mẽ kam amã amnhĩ tâ ma pyræk o axpẽn nhĩpêx o ri apa. Nẽ pika pê Masetõn kamã Kris kôt mẽ akwýjaja ka mẽ mãânẽn amã mẽ hkĩnh pê ã mẽ hipêx anẽ. Tã kêr ka mẽ arĩ ã amnhĩ nhĩpêx anhỹr rãhã nẽ.

¹¹ Kot kaj mẽ ã amnhĩ nhĩpêx anẽ hãmri nẽ ajamakêtkati nẽ axàmnhĩx axàpênh pix tânopxar o ri apa. Jao mẽ hakwa kamã nhãm tanhmã mẽ hixi jarênh to ho ri apa hkêt nẽ. Nẽ ãm amnhĩ pix tânopxar o ri apa. Nẽ amnhĩ pa kukwak ri axàpkur kaxyw amnhĩm axàpênh mex o ri apa. Na pa prem ra ã ja hã mẽ amã karõ anẽ.

¹² Kot kaj mẽ ã amnhĩ nhĩpêx anẽ hãmri nẽ amã prãm xaj axàhwýr o ri apa hkêt nẽ. Nhũm Kris kwý hkêt xwýnhjaja mẽ ate amnhĩ nhĩpêx ã mẽ apumu nẽ axpẽn mã mẽ ate tãm amnhĩ nhĩpêx xwýnhjê hã mẽ ajarênh kurê kumrêx.

Kris kwý htyk xwýnhjê jarênh

Matêwre 24.29-31; Wam Korõt 15.51-58

¹³ E Kris kôt ixkwýjaja. Na ka xep mẽ tee ri Kris kôt akwý htyk xwýnhjê hkukamã ajamaxpêr. Jakamã kot paj ixprĩ hã tanhmã mẽ amã mẽ harênh to ka mẽ inhma. Nà Kris kwý hkêt xwýnhjaja na htem ty nhũm mẽ hkwýjaja tee ri mẽ hkukamã hamaxpêr o hkaprĩ nẽ. Mẽ htyk nẽ ma Jejus wýr àpir kêt jakamã na htem mẽ mýr pê hkaprĩ htýx

nẽ pa. No mẽ papajaja na pu htem ho mẽ uræk kêt nẽ.

¹⁴ Jejus na pre ty nhũm Tĩrtũm akupým ho htĩr. Tã ra ã kot hipêx anhỹr jakamã koja nhỹrmã Jejus akupýn wrý nẽ mẽ kot hkôt amnhĩ xunhwýr nẽ htyk xwýnhjê karõ nhũm man amnhĩ kôt kaxkwa rũm mẽ o wrý. Na pu htem ã ja kôt pajamaxpêr anẽ.

¹⁵⁻¹⁶ Na pre Pahihti Jejus inhmã hkôt mẽ pahkwý htyk xwýnhjê jarênh o:

—Kot paj nhỹrmã akupýn mẽ awýr wrý ka mẽ ate ixkôt amnhĩ nhĩpêx xwýnh piitã ma ixkutã axàpir o mõ. Nom kot kaj mẽ arĩ atĩr nẽ apa xwýnhjaja akumrêx axàpir kêt nẽ. Kormã. Koja Tĩrtũm kapêr o mẽ wrýk xwýnh krãhtũmja Tĩrtũm mã pifti kakô. Kakôr týx pa ixkwý htyk nẽ hikwý xwýnhjê mã ixkapêr nẽ ixãmra kamã mẽ kumra. Nhũm mẽ hkarõ akupýn mẽ hwýr wrý nẽ mẽ kãm gjêx pa. Hãmri nhũm mẽ akupým htĩr nẽ kãnhmã hkrĩ hpa nẽ ma kumrêx ixkutã àpir o mõ.

¹⁷ Hãmri ka mẽ ate ixkôt amnhĩ xunhwýr xwýnh arĩ mẽ atĩr nẽ apa xwýnhjaja ka mẽ hã ajêt nẽ mẽ atipxi nẽ ma ixkutã axàpir o mõ pu mẽ kakrã kamã axpẽn kaxpa. Hãmri nẽ mẽ pahpimràatã ma kaxkwam api nẽ inhõ krĩ hwýr pøj. Kaj mẽ Tĩrtũm mẽ wa ixkuri amex kumrêx nẽ atĩr tũm nẽ apa ho apa. Anẽ.

¹⁸ ã Pahihti Jejus inhmã mẽ pakukamã mẽ pajarênh anẽ. Jakamã kwa kêr ka mẽ tee

ri mẽ pahkwỳ htyk xwỳnhjê hkukamã ajamexpêr hkêt nê. ã ixujarênh anhỳrta ã anohtỳx pê axpêñ jamaxpêr o axihtỳx o ri axpêñ kôt apa.

5

Mẽ pahte akupỳn Jejus wrỳk xà hã arĩgro pumunh kêt ã harênh

Matêwre 24.32-25.13; Wam Pêtre 3.8-13

¹⁻² Nê mẽ pahte Jejus akupỳm wrỳk xà hã arĩgro pumunh kêt jakamã kot paj mẽ amã tanhmã hã kagà hto hkêt nê. Koja nhỹrmã akupỳn mẽ pahwỳr nojarêh hãmri nê te kot mẽ ahkĩnh xwỳnh kot amnhĩ nhĩpêx pyrà nê mẽ pajaêr pê mẽ pahwỳr wrỳ.

³ Jakamã koja kormã wrỳk kêt ri nhũm Kris kwỳ hkêt xwỳnh kot amnhĩ wỳr kamã hamak kêt xwỳnhjaja hãmri mex nê pa hã amnhĩ pumu nê hkĩnh nê pa. Nê axpêñ mã kapêr o:

—Nà koja Tĩrtũm tanhmã mẽ pahto hkêt nê. Arĩ mẽ pamex nê ri mẽ papa kênã. Nà kot puj mẽ paxãmnhĩx ri pajamakêtkati nê ri papa ho papa.

Anhỳr o axpêñ mã kapêr rôm nhũm puh Jejus mẽ haêr pê akupỳn wrỳ. Hãmri nê ma mẽ kot amnhĩ xà htỳx kamã hamak o pa htũm xà hwỳr mẽ rênh pa nhũm mẽ tee ri kêp hpimxur prãm kaprỳ. Te mẽ htujarô xwỳnh kot amnhĩ nhĩpêx pyræk. Na htem mex nê pa htã hpijagri kaxyw ôhy xà htỳx kumrêx nê tee ri kãm

ôhy xà hkêt prãm kaprỳ ho hikwỳ.

⁴ Nom mẽ kajaja kot kaj mẽ urà nê amnhĩ jaêr pê akupỳm wrỳk kãm omu nê tee ri amnhĩ kukamã ajamexpêr o akaprĩ hkêt nê.

⁵ Mẽ pahpê Jejus kwỳ jakamã na pu htem kapêr kôt ri tãm amnhĩ nhĩpêx o ri papa. Jao te mẽ pahte mẽ kêp Jejus kwỳ hkêt xwỳnhjê kot amnhĩ nhĩpêx pyræk kêt.

⁶ Na htem mẽ pahkĩnhã akupỳn wrỳk kukamã hamaxpêr kêt nê. Te htỳx ri mẽ ôt rãhã ho hikwỳ pyræk. Nom mẽ papajaja na pu htem akupỳn wrỳk kamã pajamak o papa pê kãm tanhmã amnhĩ nhĩpêx mex to rãhã ho ri papa.

⁷ Te kot ja pyræk. Na htem kamàt kãm gôr nê mẽmoj mã hamaxpêr kêt nê htỳx hikwỳ. Nê mẽ hkwyjaja kamàt kãm axpã nê htỳx ri tanhmã amnhĩ tomnuj to ho pa. Jao hamaxpêr mex kêt nê. Tã mẽ kêp Jejus kwỳ hkêt xwỳnhjaja hte mẽ uræk nê htỳx ri tanhmã amnhĩ tomnuj to ho pa nê akupỳn Jejus wrỳk mã hamaxpêr kêt nê.

⁸ No kêt mẽ papajaja. Mẽ pahte hkôt amnhĩ xunhwỳr xwỳnhjaja. Kêr pu mẽ ho mẽ uræk kêt nê. Satanasti kãm mẽ pahte amnhĩ tomnuj prãm tã mẽ pahte kãm hprãm xà hkôt amnhĩ nhĩpêx pymaj kêr pu mẽ mẽmoj punuj pê amnhĩ to htỳx rãhã ho ri papa.

Nê amnhĩ kaxyw Jejus kôt pajamexpêr tỳx rãhã nê.

Nê mẽ pamã mẽ piitã mẽ

hkĩnh pê mẽ kutã pano-
jarêt rãhã ho ri papa.

Nẽ nhỹrmã Tĩrtũm mẽ hkra
Jejus wa kuri pahtĩr
tũm mẽ papa ho papa
hkukamã mãn paja-
maxpěr rãhã o ri papa.

Kot puj mẽ ã amnhĩ nhĩpêx
anê hãmri nhũm Satanasti tee
ri mẽ pahte amnhĩ tomnuj
prãm xaj mẽ pahkrãm paja-
maxpěr punuj jagjênh kaprỹ.

⁹ Xà na pre Tĩrtũm mẽ
pakamã gryk kãm mẽ kot
amnhĩ xà htỹx kamã hamak
tũm xà hwỳr mẽ pajanor
kaxyw mẽ parê? Nà na pre ja
kaxyw mẽ parênh kêt nê. ãm
Pahihti Jejus Kris kukwak ri
kot amnhĩ katut kôt mẽ pahte
amnhĩ tomnuj rênh par nê
mẽ pahto hkra kaxyw na pre
mẽ parê.

¹⁰ Tã mẽmo kaxyw na
pre Krisja mẽ panê ty? Nà
nhỹrmã Tĩrtũm mẽ wa kuri
mẽ pamex kumrêx nê pahtĩr
tũm mẽ papa ho papa hprãm
xaj na pre mẽ panê ty.
Jakamã koja nhỹrmã akupỹm
amnhĩ kôt ma mẽ pahto àpir
kaxyw akupỹn mẽ pahwỳr
wrỹ pu mẽ amnhĩ kaxyw
hkôt pajamaxpěr xwỳnh piitã
ma hkôt kaxkwa hwỳr api
hãmri nê Tĩrtũm wa kuri
pamex nê pahtĩr tũm mẽ
papa ho papa. Kormã mẽ
pahtĩr ri mẽ papa xwỳnhjaja
nê ra mẽ htyk nê hikwỹ
xwỳnhjaja nhũm akupỹm mẽ
ho htĩr. Hãmri nê mẽ pahto
hpimràatã amnhĩ kôt mẽ
pahto àpir pa. Mẽ pahte hkôt
amnhĩ xunhwỳr xwỳnh piitã
koja Jejus nhỹrmã akupỹn

wrỹ nê ã mẽ panhĩpêx mex
anê.

¹¹ Tã ã kot anhỹr jakamã
kwa kêr ka mẽ jam aja-
maxpěr o apa pê axpên
jamaxpěr o hihtỹx o ri axpên
kôt apa. Nẽ Jejus kôt axpên
jamaxpěr o hihtỹx o ri axpên
kôt apa. Ra ã mẽ ate axpên
nhĩpêx anhỹr tã kêr ka mẽ arĩ
ho anhỹr rãhã ho ri apa nê aa
hkaga hkêt nê.

*Tĩrtũm kapěr o mẽ pajahkre
xwỳnhjê jarênh*

*Karatas 6.6; Wam Ximotre
5.17-19*

¹² Nẽ kwa Kris kôt
ixkwỹjaja. Na hte mẽ kot
Tĩrtũm kapěr o mẽ ajahkre
xwỳnhjaja mẽ ajahkre mex pê
Tĩrtũm mã mẽ ajamãr mex o
pa. Na htem ã mẽ anhĩpêx
mex anhỹr rãhã ho ri mẽ akôt
pa. Tã kwa kêr ka mẽ amnhĩ
tã mẽ omu nê mẽ kapěr mar
tỹx nê.

¹³ Nẽ mẽ hã apijaàm pê
tanhmã mẽ ho mex to ho apa.

Nẽ kwa kêr ka mẽ tãm
axpên nhĩpêx nê axãmnhĩx ri
ajamakêtkati nê axpên kôt ri
apa ho apa.

*Mẽ pahte tanhmã Kris kôt
mẽ pahkwỳjê nhĩpêx to hã mẽ
pamã karõ*

Epes 4.1-6

¹⁴ Nẽ koja Kris kôt mẽ an-
hĩõ kãm kaga nê pa ka mẽ
ja hã omu nê kãm anê kê ã
amnhĩ nhĩpêx anhỹr kêt nê.
Kê hpãnhã amnhĩ xàpkur xà
kaxyw àpênh o pa.

Nẽ mẽ kãm ma ho mẽ pa
xwỳnhjaja ka mẽ kãm mẽ

hamaxpêr o axihtýx o ri mẽ hkõt apa.

Ně kormã amnhĩ kaxyw Jejus kõt mẽ hamaxpêr tohtuj anhÿr xwÿnhjaja ka mẽ tanhmã Jejus kõt mẽ ho mẽ axihtýx to kê mẽ hkõt amnhĩ nhĩpêx mex o pa.

E kêr ka mẽ ã mẽ axpên nhĩpêx anhÿr o ri apa mẽ axpên kamã agryk tokyx anhÿr kêt nê.

15 Ně koja mẽhõ tanhmã atomnuj to ka mẽ ãm omu mẽ amnhĩ tã tanhmã ho hkêt nê. ãm ho mex o ri apa. Ně mẽ piitã tanhmã mẽ ho mex to hpix kukamã ajamaxpêr rãhã nê.

16 ã mẽ pahte amnhĩ nhĩpêx anhÿr o papaja na Tirtũm kãm hprãm.

Mẽ pahpê hkra hã pahkĩnh rãhã papaja na kãm hprãm.

17 Ně mẽ pahte Tirtũm mã amnhĩ jarênh rãhã ho papaja na mããnên kãm hprãm.

18 Ně tanhmã mẽ pakute htã arĩ Tirtũm mã mex o mex ã harênh o papaja na mããnên kãm hprãm. Mẽ pahkĩnh nê papa kamã kãm mex o mex ã harê. Rÿ mẽ pahpunuj nê papa htã arĩ kãm mex o mex ã harê. Rÿ nhũm mẽhõ tanhmã mẽ panhĩpêx to htã pu mẽ arĩ kãm mex o mex ã harê.

ã mẽ pahte amnhĩ nhĩpêx anhÿr o papaja na Tirtũm kãm hprãm.

Mẽ pahte tanhmã Tirtũm Karõ nhĩpêx to hã mẽ pamã karõ

19 Ně koja Tirtũm Karõ mẽ amã mẽmoj tã tanhmã kapêr o amnhĩrit to ka mẽ ama nê hkõt amnhĩ nhĩpêx kurê kumrêx. Rÿ mẽhõ mã tanhmã akapêr to kurê kumrêx. No kêr ka mẽ ama nê ãm ama nê atýx ri hã apa hkêt nê.

20 Rÿ nhũm mẽhõ Tirtũm Karõ nhÿ hã tanhmã mẽ amã kapêr to ka mẽ ama nê agryk nê tanhmã ho akapêr punuj to hkêt nê.

21 Koja Tirtũm kapêr kõt tanhmã mẽ amã mẽmoj jarênh to nê ãm hãmri Tirtũm Karõ nhÿ hã harênh ã amnhĩ jarê. Ka mẽ ama nê hkõt amnhĩ nhĩpêx.

22 No koja Tirtũm kapêr kwÿm ri tanhmã mẽmoj jarênh to hãmri nê Tirtũm Karõ nhÿ hã ja jarênh kêt nê. ãm amnhĩ krã hkõt harê. Ka mẽ tee ri ama nê amnhĩ krã kamã kapêr xir týx kêt nê. Jao hkõt amnhĩ nhĩpêx kêt nê.

Tanhmã Pawre kot mẽ ho Tirtũm wÿr to hã harênh

Wam Tesarõn 3.3, 16

23 Ně na pa hte mẽ ato Tirtũm wÿr o ri ixpa nê kãm:

—Pa Tirtũm. Nã ate mẽ inhmã mẽ ijamakêtkati xà nhõr jakamã na pa htem anhÿ hã ixãmnhix ijamakêtkati nê ri ixpa. Jakamã kwa kêr ka tanhmã Tesarõn kamã akwÿjê ho kê mẽ amnhĩ to mex rãhã ri pa. Jao tãm amnhĩ nhĩpêx nê tãm ri hamaxpêr rãhã nhũm Pahihiti Jejus Kris akupÿn mẽ ixwÿr wÿr.

Anhÿr o mẽ ato kuwỳ.

²⁴Tã koja ã mẽ anhĩpêx anê.
Ra kot amnhĩ jarênh xà hkôt.
Ã mẽ anhĩpêx anhÿr kaxyw
na pre amnhĩm mẽ arê.

Kagà jatur xà

²⁵E Kris kôt ixkwỳjaja. Kwa
kêr ka mẽ amnhĩ xwar ixto
Tĩrtũm wỳr o apa.

²⁶Nê kêr ka mẽ atar Kris kôt
mẽ pahkwỳjê piitã mẽ kãm
mẽ ijarê.

²⁷⁻²⁸Nê kê Pahihti Jejus Kris
mẽ akutã nojarêt rãhã ho pa.
Ixte Pahihti nhÿ hã ã mẽ amã
ixkapêr nê hã kagà anhÿr
jakamã kêr ka mẽ atar Kris
kwỳjê piitã mẽ kãm kamã
harê kê mẽ piitã ixkapêr ma.

Tã ãm ja pix na hapêx. Ixpê
Pawre na pa ã mẽ amã kagà
nhĩpêx nê mẽ awỳr mẽnh anê.

Sikũn Tesarõn
Pawre kot Tesarõn
kamã Jesus kõt
kwýjê hwýr wam
kagà nê mẽnh kõt hõ
kagà nê mẽnh

Pawre na pre kagàja nhĩpêx nê ma Tesarõn kamã Jesus kõt hkwýjê hwýr kumê. Na pre hte Tesarõn kamã mẽ kãm Jesus ã mẽ hkurê xwýnhjaja Jesus ã tanhmã mẽ homnuj to nhũm mẽ amnhĩ xà htýx kamã hamak o pa. Hãmri nhũm Pawre mẽ harênh ma nê kagàja nhĩpêx nê mẽ hwýr kumê. Nê kamã mẽ kãm mẽ hamaxpêr o hihtýx. Nê mẽ kot arĩ Tĩrtũm kõt amnhĩ nhĩpêx mex o pa nê hamaxpêr kõt hamaxpêr o pa hã mẽ kãm karõ. Nê nhỹrmã Jesus akupýn kaxkwa rũm mẽ pahpê hkrajê hwýr wrýk nê pika ho hapêx par ã mẽ kãm harê. ã na pre Pawre mẽ kãm kagàja kamã mẽ kãm ujarênh anê. Nê mẽ kãm:

¹ Pa Tesarõn nhõ xwýnh kot Tĩrtũm kapêr mar kaxyw axpên wýr mẽ apikuprõnh xwýnhjaja? Xà mẽ amex na ka mẽ apa? Ixpê Pawre na pa axte mẽ awýr kagà nhĩpêx nê kumê. Siras mẽ Ximotre mẽ pa mẽ awýr kumê. Nà mẽ pahpê Mẽpanhĩpêxà maati Tĩrtũm mẽ Kra Jesus Kris kwý na pu mẽ.

² Jakamã na pa htem mẽ ato wa hwýr rãhã ho ri ixpa. Wa kot mẽ akutã nojarêr rãhã

ka mẽ ajamakêtkati nê apa kaxyw. Nê mẽmoj to mẽ akutã wa nojarêr rãhã ho pa kaxyw.

Tĩrtũm kot nhỹrmã hkrajê nhĩpêx kati xwýnhjê homnuj týx ã harênh

Wam Pêtre 4.12-19

³ Nê na ka htem amnhĩ kaxyw Tĩrtũm mã ajamaxpêr týx mex o ri apa. Nê axpên kutã anojarêr rãhã nê. Na pa htem ã mẽ ate amnhĩ nhĩpêx anhỹrja mã ijamaxpêr nê mẽ anhỹ hã ixkĩnh nê Tĩrtũm mã mẽ anhỹ hã ixkĩnh ã amnhĩ jarê.

⁴ Nê nhỹhým ixpa nê nhỹri krĩm agjê nê kamã Tĩrtũm kõt mẽ pahkwýjê mã mẽ ato amýra nê mẽ kãm:

—E pa mẽ amã Tesarõn kamã Kris kwýjê jarê ka mẽ inhma. Nà mẽ õ krĩ kamã mẽ hkwýjaja na htem Kris ã mẽ hipêx kati ho pa nhũm htem amnhĩ xà htýx kamã hamak pê mex kêt nê pa. Tã nom tee ri amnhĩ kukamã hamaxpêr o Jesus kaga hkêt nê. Na htem arĩ hkõt amnhĩ nhĩpêx mex rãhã ho pa. Anê.

⁵ ã mẽ ate mẽ kutã amnhĩ nhĩpêx anhỹr o apaja na hte Tĩrtũm hã mẽ apumu nê hkĩnh nê pa. Nê mẽ akukamã hamaxpêr o:

—Mê kot Ixkra Jesus ã tanhmã mẽ hipêx to ho pa htã ãm hãmri na htem mẽ kutã amnhĩ to htýx o pa nê mẽ umaj wa ixkaga hkêt nê. Na htem ã amnhĩ nhĩpêx anê nê mẽ kêp ixkra hã amnhĩ to amnhĩrit mex nê. Nà koja mẽ

nhÿrmã wa ixri mex kumrêx
nê htîr tûm nê pa ho pa.

Anhÿr o hamaxpêr.

⁶ Nê mê kot Kris ã mê
anhîpêx punuj xwÿnhjaja koja
Tirtûm nhÿrmã mê atã mê
homnuj tÿx nê nhûm mê
amnhî xà htÿx kamã hamak
rãhã ho pa. ãm hãmri koja ã
mê atã mê hipêx anê.

⁷⁻¹⁰ Koja Pahihti Jejusja
nhÿrmã man akupÿn pika
hwÿr hirã htÿx kãm wrÿ
nhûm Tirtûm kapêr o mê
wrÿk xwÿnh xihtÿx xwÿnhjaja
man hkôt wrÿ. Koja mê
wrÿ hãmri nê mê kot amnhî
tomnuj xwÿnhjê homnuj tÿx
kumrêx. Jao ma mê kot
amnhî xà htÿx kamã hamak
tûm xàta wÿr mê rênh pa
nhûm mê kamã htîr tûm nê
amnhî xà htÿx kamã hamak
rãhã ho pa ho pa. Koja ã
Pahihtija amnhî nê mê kot
hkôt amnhî xunhwÿr kêt
xwÿnhjê rênh anê nhûm mê
pahkînhã Tirtûm mê Krata
wa kuri mex nê pa hkêt nê.
Nê mê pahkînh ã wa mex o
wa mex nê wa hihtÿx o wa
hihtÿx ã wa omunh kêt nê.
Koja Pahihti Jejus nhÿrmã
akupÿn wrÿ nê ã mê panê
mê hipêx anê. Koja wrÿ
pu mê amnhî kaxyw hkôt
pajamaxpêr xwÿnhjaja amnhî
wÿr omu nê pahkînh nê.
Hãmri nê amnhî nhî nyw ã
amnhî pumu nê kãm:

—Hêxta waa nê. Amex o
amex Pahihti. Na ka pre mê
inhnê ty hãmri nê mê inhmã
mê inhî nyw gô. Kot paj mê
Tirtûm mê war ari inhmex
kumrêx nê ixtîr tûm nê ixpa

ho ixpa. ãm hãmri na ka ã
mê ixto mex anê. Nà amex
kumrêx o amex kumrêx Pahi-
hti. Anê.

ã kot puj mê pahpê
hkwÿjaja amnhî tã kãm mex
o mex ã harênh anê. Ra mê
ate mê ixkapêr mar nê hkôt
amnhî xunhwÿr jakamã kot
kaj mê ixpyrà nê ã kãm mex o
mex ã harênh anê.

*Pawre kot Tesarôn nhô
xwÿnhjê ho Tirtûm wÿr ã
harênh*

¹¹⁻¹² Nê na pa htem mê ato
Tirtûm wÿr rãhã ho ixpa nê
kãm:

—Pa Tirtûm? E Tesarôn kãm
akrajaja na pa mê ho awÿ. Na
ka hte Akra Pahihti Jejus Kris
mê wa mê ho mex rax o apa.
Jao amnhîm mê arê nhûm mê
ra kãm amnhî to mex prãm
nê. Na htem amnhî kaxyw
Jejus mã hamaxpêr rãhã pé
mêmoj to axpên kutã nojarêt
o pa. Jakamã kwa tanhmã mê
hkrã hto kê mê akôt ã amnhî
nhîpêx anhÿr rãhã ho pa. Kêr
ka mê kot akôt amnhî nhîpêx
o pa hã mê omu nê akînh nê
mê kãm mê mex ã mê harê.
Nhûm mê ate tanhmã mê ho
mex to hã amnhî tã apumu
hãmri nê mê amnhî pyrà nê
amã amex o amex ã ajarênh
rãhã ho pa. Anê.

2

*Kot amnhî tomnuj tÿx
kumrêx xwÿnh maati jarênh*

*Matêwre 24.23-25; Makre
13.14-23; Rukre 21.20-24;
Wam Juãw 2.18-19; Apokarip
13.1-18*

¹ Nê koja nhÿrmã mê panhô
Pahihti Jejus Kris akupÿn wrÿ

pu mẽ ma kutā api nē kakrā kamā hkaxpa. Jakamā kwa Jejus kōt ixkwỳjaja.

² Koja mẽhō mẽ awỳr mō nē mẽ amā Jejus ra akupỳn wrỳk ā harēnh japēr. Rỳ tanhmā mẽ amā Jejus hpōx xà hā arīgro jarēnh o hēx to nē mẽ amā:

—Kwa na ra Jejus akupỳn nojarēt. Koja tokyx akupỳn mẽ pahwỳr wrỳ. Semān ja kamā rỳ ko. Apu hō hā koja apu wrỳ rỳ ko.

Anhỳr o harē. Nē Tirtūm Karō nhỹ hā ā kot mẽ amā harēnh anhỳr ā amnhĩ jarē rỳ nhām mẽhō kot ā kām harēnh anhỳr ā harē. Rỳ pa ixte harēnh nē hā kagā hā ijarē. Nom kwa kēr ka mẽ kapēr ma nē ām ama nē hkōt ajamaxpēr kēt nē. Rỳ ama nē tee ri amnhĩ kukamā ajamaxpēr kēt nē. Koja mẽhō ā mẽ amā Jejus tokyx wrỳk ā harēnh anē nē ām amnhĩ krā hkōt ā harēnh anhỳr o hēx. Nom Tirtūm Karō nhỹ hā rỳ pa inhỹ hā rỳ nhām Kris kōt mẽ panhĩō nhỹ hā ā harēnh anhỳr kēt nē.

³⁻⁴ Jakamā kēr ka mẽ ām mẽ kot harēnh o hēxja ma nē hkōt ajamaxpēr kēt nē. Kormā Pahihtija Jejusja akupỳn nojarēt kēt. E kot paj ixprĩ hā mẽ amā ja jarē ka mẽ inhma. Nà kormā Pahihtija akupỳn nojarēt kēt ri koja mẽ ohtō rax kumrēx nē Tirtūm kutā amnhĩ xunhwỳ nē kām hkurē ho pa. Nē amnhĩ tomnuj tỳx o pa. Hāmri nhūm ra kot amnhĩ tomnuj tỳx kumrēx xwỳnh maatija amnhĩ to amnhĩrit. Nom na

pre ra Tirtūm tanhmā kot hipēx to hkukamā hā amnhĩ jarē. Koja xep gaa nē ma mẽ kot amnhĩ xà htỳx kamā hamak tūm xàta wỳr kumē nhūm kamā amnhĩ xà htỳx kamā hamak o pa rāhā nē pa ho pa.

Tā nom kormā Pahihtija akupỳn wrỳk nē ma hwỳr mẽnh kēt ri koja mẽ piitā omu nē kēp Mēhpām maati pixi hā harēnh kaxyw mẽ kēp mẽ ō sānti piitā hkrakrak pa. Nē mẽ kot mẽmo karō ho amnhĩ pām ā harēnh xwỳnhja nhūm piitā hkrakrak pa. Hāmri nē axtem nē Tirtūm mā amnhĩ jarēnh xà hā ixkre jatur xà kamā hitom wỳr axà nē kamā nhỹ nē hēx rom mẽ piitā mẽ kām kēp Tirtūm ā amnhĩ to hēx nē mẽ kām:

—E mẽ amnē ixpumu. Ixpē mẽ anhō Tirtūm na pa. Pa kot kaj mẽ inhmā inhmex o inhmex ā ijarē. No kēr ka mẽ anhō sānti ho apām o apa hkēt nē. Kwarĩ ho kwarĩ. Ām paxipix ixpē Mēapām maati nē paxipix ixpē mẽ anhō Tirtūm.

Anhỳr o amnhĩ to hēx.

⁵ Na pa pre arĩ mẽ akōt ixpa ri ā mẽ amā harēnh anē. Mān arĩ mẽ ate ja hā anohtỳx rỳ ko.

⁶ Nom kormā ā kot amnhĩ nhĩpēx anhỳr xà hā arīgrota kormā kator kēt. Mēhō kormā kot kēp àmnār jakamā nhūm kormā kator kēt nē. Ra mẽ ate kēp àmnār xwỳnhja jarēnh mar. Tā koja hpōx xà hā arīgro kato nhūm kēp àmnār xwỳnhhta kām pry kaprā nhūm rĩ kormā mō.

⁷ Nom na hte ra hpimxur pê Tirtûm nê mẽ piitã mẽ hkurê ho pa. Mẽ kot Tirtûm kôt amnhĩ xunhwÿr pymaj tanhmã nê mẽ ho ho pa. Nom kormã kêp àmnâr xwÿnhja kêp àmnâr jakamã nhũm hte mẽ noo mã tanhmã mẽ ho hkêt nê. Tã koja Tirtûm nhÿrmã kêp àmnâr xwÿnhja mã anê nhũm kuma nê kãm ure nhũm rĩ kormã amnhĩ to amnhĩrit nê mẽ piitã mẽ noo mã mō nê Tirtûm nê tanhmã mẽ kãm hêx to ho pa.

⁸⁻¹² Koja kato nê Satanasti mẽ wa mẽ piitã tanhmã mẽ nokupyr to ho ri mẽ hkôt pa. Nê hêx rom mẽ kãm aa mẽ kot mẽmoj pumunh kêt kwÿ ho anhÿr o ri pa. Koja wa hêx rom te Tirtûm kot amnhĩ nhĩpêx pyrãk o ã amnhĩ nhĩpêx anê. Hãmri nhũm mẽ kot Jesus kôt amnhĩ xunhwÿr kêt xwÿnhjaja ja hã wa omu nê wa hkôt hamaxpêr kurê kumrêx. Nê ãm hãmri wa kapêr ã wa hkamnhĩx. Kop apu ra mẽ kot Tirtûm kapêr mar nê hkôt amnhĩ xunhwÿr ronhÿx ra Tirtûm amnhĩ tã mẽ omu nê mẽ ho hkra. Nom koja mẽ kãm kapêr mar prãm kêt nê. ãm wa kot amnhĩ to hêx o wa pa xwÿnhhta kôt pix mã koja mẽ kãm amnhĩ nhĩpêx prãm.

Ja mÿrapê koja Tirtûm tee ri ja hã mẽ omu hãmri nê mẽ nê wa kot amnhĩ tomnuj tÿx xwÿnhhta wa omunh kêt nhũm wa tanhmã mẽ kãm amnhĩ nhĩpêx to nhũm mẽ wa omu nê wa hkôt hamaxpêr kurê kumrêx. Hãmri nê wa gryk ã Tirtûm kaga jakamã nhũm

nhÿrmã mẽ kot amnhĩ xã htÿx kamã hamak tũm xãja wÿr mẽ rênh pa.

Koja Satanasti mẽ kot amnhĩ tomnuj tÿx kumrêx xwÿnh maatita ã hêx rom tanhmã mẽ no kupyr to anhÿr o pa rãhã nhũm Pahihti Jesusja hirã rax kãm akupÿn mẽ pahwÿr wrÿ. Hãmri nê kot amnhĩ tomnuj tÿx kumrêx xwÿnh maatita ã amÿnê nhũm mẽ kãm hpÿr kurê kumrêx nhũm hapêx. Koja ã amnhĩ nhĩpêx anê.

Tirtûm kot tanhmã mẽ pahto mex to hã harênh

Rômãn 8.28-30; Wam Tesarôn 2.13, 5.23-24

¹³ Nê annepêm kormã mẽmoj kêt ri na pre Tirtûm amnhĩm mẽ arê. Mẽ ate kapêr mar nê hkôt amnhĩ xunhwÿr nhũm kot mẽ ato hkra kaxyw mẽ arê. Kãm mẽ ajapêê. Na pre mẽ awÿr amnhĩ Karõ rê nhũm mẽ akarõ mã agjê nê tanhmã mẽ ajamaxpêr to ka mẽ ÿ hã tãm amnhĩ nhĩpêx rãhã ho ri apa. Na pa htem ja hã mẽ amã ijamaxpêr nê mẽ anhÿ hã ixkÿnh kãm Tirtûm mã mẽ ajarênh o ri ixpa.

¹⁴ Na pre mẽ awÿr mẽ ixrê. Mẽ ixte mẽ awÿr ixpa nê mẽ amã tanhmã Jesus kot mẽ panê amnhĩ nhĩpêx to hã harênh o ixpa kaxyw. Mẽ ate mẽ inhmar nê Jesus kôt amnhĩ xunhwÿr nhũm Tirtûm kot Pahihti Jesus Kris o mex pyrã nê tanhmã mẽ ato mex to kaxyw.

¹⁵ Jakamã kwa kêr ka mẽ ra mẽ ixte wam mẽ awÿr kaga

mênhta kamã harê nê mar tỳx nê. Nê mẽ akôt mẽ ixpa ri tanhmã mẽ ixte mẽ ajahkre htoja mã ajamxpêr mex nê hã ano htỳx nê hkôt amnhĩ nhĩpêx rãhã ho ri apa. Jao Jejus kôt amnhĩ nhĩpêx mex o ri apa Kris kôt ixkwỳjaja.

16 Mēpanhĩpêêxà maati mẽ Pahihti Jejus Kris wa kãm mẽ pajapê htỳx kumrêx. Na hte wa tanhmã mẽ pajamxpêr o hihtỳx to ho pa pu mẽ wa ỹ hã tãm pajamxpêr o ri papa. Nê wa ỹ hã nhỹrmã wa kuri pamex nê pahtir tũm nê papa hkukamã pajamxpêr kaprỳ ho pa hkêt nê.

17 Na pa htem mẽ ato wa hwỳr o ixpa nê wa kãm:

—Pa Tirtũm mẽ Jejus wa? Kwa kêr ka wa tanhmã Tesarôn kamã akrajê mã mẽ hamaxpêr o hihtỳx to kê mẽ war anhỹ hã tãm amnhĩ nhĩpêx nê tãm hamaxpêr. Jao kapêr mex rãhã nê pa ho pa. Anê.

3

Tanhmã mẽ pahte axpên to Tirtũm wỳr to hã kot mẽ pamã karõ

Korosê 4.2-4

1 Nê kwa Kris kôt mẽ ixtõ nê ixtõxjaja. Kêr ka mẽ amnhĩ xwar mẽ ixtõ Tirtũm wỳr rãhã ho ri apa. Mẽ ixte krĩ piitã hkôt mẽ kãm Jejus jarênh o ri mẽ hkôt ixpa nhũm mẽ kot mẽ inhmar nê amnhĩ kaxyw Jejus kôt hamaxpêr kaxyw. Jao mẽ apyrà nê hkôt amnhĩ nhĩpêx mex o pa kaxyw.

2 Nom koja mẽ piitã ã amnhĩ nhĩpêx anhỹr kêt nê.

Mẽ hkwỳjaja kãm Jejus jarênh mar prãm kêt jakamã kwa mẽ ixtõ Tirtũm wỳr kê mẽ inhnê mẽ omunh mex nê nhũm mẽ Jejus ã tanhmã mẽ ixtõ hkêt nê.

3 Nê koja Pahihti tanhmã mẽ akrã hto ka mẽ ajamxpêr mex nê ỹ hã hkôt amnhĩ xunhwỳr tỳx o ri apa. Jakamã nhũm Satanasti mẽ ate amnhĩ tomnuj hprãm xaj tee ri tanhmã mẽ anhĩpêx to kaprỳ nhũm Pahihti mẽ anê omunh mex nê. Ra kot mẽ atã amnhĩ jarênh xà hkôt.

4 Koja ã mẽ anê hipêx anê ka mẽ ỹ hã tanhmã mẽ ixte mẽmoj tã mẽ amã karõ xà hkôt amnhĩ nhĩpêx mex o ri apa.

5 Tã kê Pahihti tanhmã mẽ akrã hto ka mẽ Tirtũm pyrã nê mẽ piitã mẽ kamã axukapri ho ri apa. Nê Pahihti Kris pyrã nê mẽmoj punuj kutã amnhĩ to htỳx nê. Jao hkôt amnhĩ nhĩpêx mex rãhã ho ri apa.

Mẽ kãm kaga xwỳnhjê jarênh

Wam Korît 4.12; Epes 4.28; Wam Tesarôn 4.9-12

6 E kot paj hpãnhã Kris kôt mẽ pahkwỳ kãm kaga xwỳnhjê jarê ka mẽ inhma. Pahihti Jejus nhỹ hã kot paj mẽ amã tanhmã mẽ harênh to. Nà koja mẽ akwỳjaja kãm kaga nê amnhĩm mẽmoj tã àpênh kêt japêr. Nê mẽ ixte mẽ axàpênh mex o apa hã mẽ amã karõja kuhpa hã amnhĩm mẽmoj tã àpênh kêt japêr. Koja mẽ ã amnhĩ nhĩpêx anê ka mẽ ja hã mẽ

omu hāmri nē mē hkôt ri apa hkêt nē.

⁷⁻⁸ Xà mē pajaja na pa prem ma mē awyr mō nē mē akôt inhmā kaga nē mēmoj tā ixàpēnh kêt nē ri ixpa? Nà na pa prem mē apa kukwak ri ixàpkur pymaj ixàpēnh rūnh nē amnhī pa pix kukwak ri ixàpkur o ri ixpa. Na ka prem mē inhmā mēmo mē apkur xà ho mra pa prem amarī amnhīm hamýnh nē hkur kêt nē. Na pa prem hpānhā mē amā amnhīre nē kormā kuku. Tā kēr ka mē ā amnhī nhīpēx anhýr o ri axpēn kôt apa nē amnhī pa pix kukwak ri apku. Nē mē amā kaga hā nhām akwýjê hpa kukwak ri axàpkur o ri apa kêt nē.

⁹ Na pa prem amnhī pa pix kukwak ri ixàpkur o ri mē akôt ixpa. Mē ate ja hā mē ixpumunh nē mē ixpyrà nē ā amnhī nhīpēx anhýr kaxyw. Nom mē ixte Jejus mā tanhmā mē ajahkre hto nhūm mē ate mē inhmar nē hpānhā mē inhmā mē ixàpkur xà nhōrja Jejus mā tanhmā kute hkêt tā pa prem ā amnhī nhīpēx anhýr kêt nē. Mē ate ja hā mē ixpumunh nē mē ixpyrà nē ā amnhī nhīpēx anhýr kaxyw na pa prem amnhī pa pix kukwak ri ixàpkur o ri mē akôt ixpa.

¹⁰ Na pa prem mē amā ja hā karō ho:

—Koja mēhō kām kaga nē àpēnh kêt nē ka mē ja hā omu nē kām ō hkêt nē. Kwār māmri apkur kêt nē kām prām nē ri pa nē amnhī pumu. Anē.

¹¹ Tā xep ra mē akwýjaja

ā amnhī nhīpēx anē nē kām kaga nē àpēnh kêt nē amarī ri pa. Nē xep htýx ri axpēn jakwa kamā nhām mē hixi ho rēr o ri pa.

¹² Kwa mē inhma Jejus kôt ixkwýjaja. Kot paj Pahihti Jejus nhý hā mē amā mē kot ā amnhī nhīpēx xwýnhjê jarē ka mē inhma nē mē inhmar týx nē. Kēr ka mē kām kaga xwýnhjê mā anē kê mē jam ure nē hpānhā àpēnh mex o pa. Jao mē apyrà nē amnhī pa kukwak ri apkur o pa. Kēr ka mē ā mē kām ixkapēr jarēnh anē.

¹³ Nē kwa kēr ka mē axpēn to mex o apata kaga hkêt nē.

¹⁴ E na pa mē ā Tirtūm nhý hā mēmoj tā mē amā karō nē hā kagà anē. Tā koja mēhō kamā harē nē kuma nē ām kuma nē hkôt amnhī nhīpēx kêt ka mē ja hā omu nē hkôt ri apa hkêt nē. Tokyx kot ja hā amnhī pumunh nē amnhī tā hpijaam kaxyw.

¹⁵ Nom arī Kris kôt kēp mē akwý jakamā kēr ka mē arī kēp mē atō rý atōx ā tām hipēx nē kām akapēr mex o ri apa. Nom te ho kēp mē akwý hkêt pyrāk o kām akapēr kêt nē.

Tanhmā Pawre kot mē ho Jejus wýr to hā harēnh

¹⁶⁻¹⁸ Nē na pa hte mē ato Pahihti Jejus wýr rāhā ho ixpa. Kot mē pamā mē pajamakētkati xà nhōr jakamā na pa htem mē ato kuwý nē kām:

—Pa Pahihti? Kwa kēr ka Tesarōn kamā akwýjê pumu nē mēmoj to mē kutā anojarēt rāhā ho ri mē hkôt apa. Kē mē

hamakêtkati nê àmnhĩx pa ho pa. Anê.

Tã ãm ja pix. Ixpê Pawre na pa kagà jatur xà kamã inhĩkra ho amnhĩ nhĩxi nhĩpêx. Na hte kagà nhĩpêx xwýnh inhmã ixkapêr ã kagà. Nê hã kagà hpa pa hpãnhã hatur xà kamã pam inhĩxi nhĩpêx. Tã na hapêx.

Wam Ximotre Pawre kot Ximotre hwÿr kagà nê mênh

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hõ na pre. Nê Ximotre kêp Pawre ho ajuta ho hkôt pa xwÿnh na pre. Tã hpãnhã krî pê Epes kamã arîk nê Tirtûm kapêr o Jejus kôt hkwyjê jahkre ho pa. Hãmri nhÿm Pawre krî hõ kamã pa nê kagàja nhîpêx nê hwÿr kumê. Nê kamã kãm mêmõj tã karõ. Na pre ra Epes kamã mē hkwyjaja Tirtûm kapêr o hêx o mē ahkre ho pa nhÿm Pawre mē harênh ma nê kagàja kamã Ximotre mã tanhmã mē harênh to. Nê kot Tirtûm kapêr o Jejus kwÿjê jahkre mex xwÿnhjê xunhwÿr kaxyw kãm karõ. Nê Tirtûm kãm hprãm xà hkôt pix mã mē ahkre ho pa hã kãm karõ nê hwÿr kagà nê kumê. Nê kãm:

1 Pa Ximotre? Xà amex? Ixpê Pawre na pa awÿr kagà nhîpêx nê kumê. Ixte Jejus Kris nhÿ hã mē ahkre ho ixpa kaxyw na pre Mēpapytâr xwÿnh Tirtûm mē Jejus Kris wa ixta nê ixãm. Jejus kamã na pu htem pajamak rãhã ho ri papa.

2 Nà ra ate ixkapêr mar xà hkôt Jejus kôt amnhÿ xãm jakamã te apê ixkra pyræk Ximotre. Jakamã na pa hte ato Mēpanhîpêêxà maati Tirtûm mē panhõ Pahihti Jejus Kris

wa hwÿr o ixpa nê ato wa hwÿr o:

—Pa Tirtûm mē Pahihti wa. E Ximotre ho na pa war awÿr kaxyw. Kwa kêr ka wa kamã axukaprî nê kutã war anojarêt rãhã ho wa ri apa. Kot kaj wa ã ho mex anê nhÿm war anhÿ hã hamakêtkati nê àmnhÿx pa ho pa.

Anhÿr o na pa hte war ato kuwÿ

Tirtûm kapêr o mē ahkre xwÿnhjê jarênh

Rômãn 16.17; Wam Ximotre 6.3; Sikûn Ximotre 2.23; Xitre 1.5-16

3 Nê na pu pre wa Epes kamã papa tã pika pê Masetõn wÿr panojarêt nê tee ri Epes kamã Tirtûm kapêr ho hêx o mē ahkre xwÿnhjê kapêr ma. Jakamã na pa pre amã:

—E Ximotre kêr ka Masetõn wÿr ixkôt amõr kêt nê. Am jar Epes kamã arîk nê ixwakre kamã Tirtûm kapêr o mē hêx xwÿnhjê mã akapêr nê ã mē hêx anhÿrja nê mē hkurê ho ri mē hkôt apa.

Anhÿr o amã harê hãmri nê Epes kamã are nê ma Masetõn wÿr ahte mõ.

4 Mē hêx xwÿnhjaja amnepêm panhîgêjtaja kot tanhmã amnhÿ nhîpêx to nê tanhmã ujarênh toja nhÿm htem mē kãm harênh pix o pa. Nê mē hixi piitã harênh o pa. Na htem ã amnhÿ krã hkôt hkwyjê mã ujarênh anhÿr o pa. Jao axpên kwÿm ri mē ahkre nê mē hã axpên mã àkjêr o pa. ã mē kot amnhÿ nhîpêx anhÿr jao Tirtûm nhÿ

hã kãm hprãm xà hkôt mẽ ahkre hkêt nẽ. Koja mẽhõ Tirtũm nhỹ hã kapẽr o mẽ ahkre hãmri nẽ amnhĩ kaxyw kãm hamaxpẽr tỳx pẽ tanhmã mẽ ahkre hto. Nom ixte amã mẽ harẽnh xwỳnhjaja Tirtũm nhỹ hã mẽ ahkre hkêt jakamã na pa pre inhnojarêt nẽ ã amã mẽ harẽnh anẽ nẽ mẽ kuri Epes kamã are.

5 Tã kêr ka arĩ mẽ ahkre ho ri mẽ hkôt apa Ximotre. Nẽ Kris kôt mẽ pahkwỳjẽ mã anẽ kê mẽ amnhĩ kaxyw Jejus kôt hamaxpẽr tỳx pẽ hamaxpẽr mex o pa. Jao tanhmã hamaxpẽr punuj to hkôt amnhĩ nhĩpêx kêt nẽ. Nẽ mẽ kãm anẽ kê mẽ te kãm amnhĩ tã ma pyræk o nhãm kãm mẽ hã ma ho pa.

6 Ixte amã mẽ hêx xwỳnh jarẽnh xwỳnhjaja na htem ã mẽ ahkre anhỹr kêt nẽ. Na htem htỳx ri amnhĩ krã hkôt tanhmã mẽ ahkre hto.

7 Tirtũm kot finat Mojes mã mẽmoj tã karõja mẽ kot mar tỳx ã amnhĩ kamnhĩx nẽ ho mẽ ahkre hprãm tã no ãm hprĩ hã mar kêt nẽ htỳx ri ho mẽ ahkre ho pa.

8 Tirtũm kot Mojes mã mẽmoj tã karõja mex. Mẽ kot mar nẽ hkôt amnhĩ nhĩpêx o pa kaxyw na pre.

9 No na pre mẽ kot tãm amnhĩ nhĩpêx xwỳnhjẽ mã ã hã karõ anhỹr kêt nẽ. ãm mẽ kot amnhĩ tomnuj xwỳnhjẽ mã na pre hã karõ.

Mẽ kot mẽ õ pahi kapẽr mar kêt xwỳnhjẽ mã.

Nẽ mẽ kot Tirtũm kapẽr nhĩrõp kuhê ho mẽ pa

xwỳnhjẽ mã.

Nẽ Tirtũm ã mẽ hpijaam kêt xwỳnhjẽ mã.

Nẽ mẽ kot mẽ hipêêxà nẽ mẽ katorxà hpar xwỳnhjẽ mã.

10 Nẽ mẽ hprõ kuhpa hã nhãm mẽnijê ho amnhĩkati xwỳnhjẽ mã.

Nẽ mẽ mjên kuhpa hã nhãm mẽmyjê ho amnhĩkati xwỳnhjẽ mã.

Nẽ mẽmyjaja kot mẽnijê kuhpa hã kãm amnhĩ kwỳ myjê hkĩnh nẽ mẽ ho amnhĩkati xwỳnhjẽ mã.

Nẽ mẽnijaja kot mẽmyjê kuhpa hã kãm amnhĩ kwỳ nijê hkĩnh nẽ mẽ ho amnhĩkati xwỳnhjẽ mã.

Nẽ mẽ kot mẽmoj to àhkĩnh nẽ nhãm mẽ kãm ho wẽnê o mẽ pa xwỳnhjẽ mã.

Nẽ ri mẽ hêx o mẽ pa xwỳnhjẽ mã.

ã mẽ kot Tirtũm kapẽr kwỳm ri amnhĩ nhĩpêx anhỹr o mẽ pa xwỳnh piitã mẽ kaxyw na pre Mojes mã mẽmojta ã karõ. Mẽ kãm Jejus prãm kêt xwỳnhjẽ mã. Mẽ kot mar nẽ tãm amnhĩ nhĩpêx kaxyw.

11 Tã pa na pa hte Pahihti kot tanhmã mẽ panê amnhĩ nhĩpêx to hã harẽnh o ri mẽ hkôt ixpa. Ja kaxyw na pre Tirtũm ixãm. Tirtũmja mex o mex. Tãm na pre ja kaxyw ixãm.

Tanhmã Pahihti Jejus Kris kot Pawre ho mex to hã harẽnh Atre 26.9-18

12 Nẽ Pahihti Jejus Kris na hte ixto mex rãhã ho pa. Na hte tanhmã ixto pa ÿ hã mẽ

piitã mē kãm tanhmã kot mē panê amnhĩ nhĩpêx to hã harênh o ri mē hkôt ixpa. Na pre ixte ã amnhĩ nhĩpêx anhÿrja kukamã inhmã ixapênh ã karõ nê inhmã:

—E ate amnhĩ kaxyw ixkôt ajamxpêr mex jakamã kêr ka ma mē piitã mē hkôt ri mē kãm ixkapêr jarênh o ri apa. Anê.

13 Nom amnepêr na pa pre hkôt ijamxpêr kêr nê. ãm axtem nê haprÿ rûnh nê ho ixkapêr punuj o ri ixpa. Nê hkwÿjê ho ixkrihkrit nê mē haprÿ nê mē htak. Nom kormã amnhĩ kaxyw Kris kôt ijamxpêr kêr jakamã ixtÿx ã mē hipêx anhÿr o ixpa nhũm Pahihti ja hã ixpumu nê ixkamã ukapri nê mē hã tanhmã ixto hkêt nê.

14 Nê kãm ijapê xaj mẽmoj to ixkutã nojarêt rãhã ho pa nê tanhmã ixkrã hto pa ra amnhĩ kaxyw hkôt ijamxpêr nê hkôt amnhĩ xãm. Hãmri nê kukwak ri ra inhmã hkwÿjê hkĩnh nê hpãnhã mē ho mex o ri mē hkôt ixpa.

15 Nê Jejus Kris ra wrÿk nê mē pahte amnhĩ tomnuj piitã hpãnhã amnhĩrer kaxyw mē panê htyk ã harênhja na pa hte harênh o ri ixpa. ã kot amnhĩ nhĩpêx anhÿrja na mex o mex. Kê mē piitã kuma nê hã nohtÿx rãhã ho pa.

Kormã ixte hkôt amnhĩ xãm kêr ri na pa pre amnhĩ tomnuj tÿx kumrêx o mē piitã mē hakrenh

16 nhũm Tirtũm ixpumu nê ixkamã ukapri nê. Hãmri nê

amnhĩ kaxyw ixãm. Mē piitã mē kot ja hã ixpumunh nê axpên mã ã ijarênh anhÿr kaxyw. Nê ijarênh o:

—Kwa Pawre na pre amnhĩ tomnuj tÿx kumrêx o pa nhũm Jejus Kris ja hã omu nê kamã gryk tokyx anhÿr kêr nê. Na pre tanhmã hkrã hto nhũm ra tãm amnhĩ nhĩpêx o pa. Kwa pu mē urak nê amnhĩ kaxyw Jejus kôt pajamxpêr nê hkôt amnhĩ xunhwÿ. Kêr pu mē Pawre pyrã nê nhÿrmã Tirtũm mē Kraja wa kuri pamex nê pahitir tũm nê papa ho papa.

Anhÿr o axpên mã ijarênh nê ixpyrã nê Jejus kôt amnhĩ xunhwÿr kaxyw na pre Tirtũm ã ixto mex anê.

17 Jakamã na pa hte kãm amnhĩ jarênh kaxyw nê kãm:

—Pa Tirtũm? Nã kapxipix apê Pahi Maati. Nê arãhã ho arãhã nê amex o amex. Mē ixte inhno ho aa apumunh kêr tã kapxipix apê Mëinhĩpêxã maati. Tã koja nhÿrmã mē piitã ã amã amex o amex ã ajarênh anhÿr o pa. Anê.

Ximotre kot tanhmã Epes nhõ xwÿnhjê jahkre hto hã kãm karõ

Wam Korũt 5.1-5

18 Nê te apê ixkra pyrãk Ximotre. Tã kot paj mẽmoj tã amã karõ ka inhma nê inhmar tÿx nê. Nã Pahihti Jejus mã ate tanhmã amnhĩ nhĩpêx to ho apa kaxyw na pa prem axãm nhũm Tirtũm nhÿ hã kapêr o mē pa xwÿnhjaja axapênh kukamã amã kapêr nê amã:

—E ate ma mẽ kãm Pahihti Jejus jarënh o apa kaxyw Tirtüm kot axãm jakamã kêr ka ã amnhĩ nhĩpêx anhÿr o ri mẽ hkôt apa. Anë.

Tã kot paj ijaxwÿja kagàja kamã amã ixkapêr nê mẽmoj tã amã karõ. Ka mar tÿx nê hkôt amnhĩ nhĩpêx mex pê Tirtüm mã amnhĩ nhĩpêx mex o ri apa. Jao aprĩ hã mẽ kãm tanhmã Jejus jarënh to ho ri mẽ hkôt apa.

¹⁹ Nê amnhĩ kaxyw Jejus mã ajamaxpêr mex nê. Nê mẽmoj punuj pumu nê amã ho anhÿr prãm tã Jejus nhÿ hã nê amnhĩ to htÿx nê ho anhÿr kêt nê. Jao tãm amnhĩ nhĩpêx ã amnhĩ pumunh mex o ri apa. Nom kot kaj ja nê amnhĩ to htÿx kêt nê tanhmã amnhĩ tomnuj to hãmri nê te ate Pahihti Jejus kaga pyræk. Na pre pahkwÿjaja ã amnhĩ nhĩpêx anhÿr o hkaga nê axte kãm hamaxpêr kêt nê.

²⁰ Imënew mẽ Aresãnja na pre wa ã amnhĩ nhĩpêx anë nê tanhmã Tirtüm o kapêr punuj to. Mÿrapê na pa pre Satanasti nhĩhkram wa haxà. Kot tanhmã wa ho nhùm wa kot tee ri amnhĩ tomnujta ã amnhĩ pumunh nê tokyx tãm amnhĩ nhĩpêx nê axte ã amnhĩ nhĩpêx anhÿr kêt kaxyw.

2

Tanhmã mẽ pahte Tirtüm mã amnhĩ jarënh to hã mẽ pamã karõ

Rukre 11.2-4; Atre 10.34-35; Epes 6.18

¹ E kot paj hpãnhã tanhmã mẽ pahte Tirtüm mã amnhĩ jarënh to hã amã karõ Ximotre. Ka inhma nê ixô ri ho mẽ pahkwÿjê jahkre ho ri mẽ hkôt apa. E ja kumrêx kot paj mẽ kaxyw amã hã karõ. Kêr ka mẽ piitã mẽ ho Tirtüm wÿr ho ri pa. Nê kãm mẽ harê nê mẽ kaxyw mẽmoj tã axàhwÿr o ri apa. Kêr kê ama nê tanhmã mẽ ho mex to. Kê mẽ amnhĩ tã omu nê ã kãm kapêr anë nê kãm:

—Pa Tirtüm? Nà ãm hãmri na ka ã mẽ ixto mex anë. Amex o amex. Anë.

² Nê mẽ kãm anë kê mẽ õ pahi nê mẽ ho amnhĩptàr xwÿnh piitã mẽ ho ahwÿr o pa ho:

—Pa Tirtüm? Kwa kêr ka mẽ inhõ pahi mẽ mẽ kot mẽ ixto amnhĩptàr xwÿnh piitã tanhmã mẽ ho kê mẽ ixto mex o pa. Kêr pa mẽ ijamakêtkati nê ixãmnhix ixpa pê amã tanhmã amnhĩ nhĩpêx to ho ri ixpa. Nê ixãmnhix mẽ hkôt tãm amnhĩ nhĩpêx. Anë.

³ Kot puj mẽ ã mẽ ho mẽ papytãr xwÿnh Tirtümja wÿr o papa anë nhùm mẽ pama nhùm ja kãm mex nê.

E kêr ka ã mẽ kãm ja hã karõ anë Ximotre.

Tirtüm kãm mẽmoj prãm ã harënh

Sikũn Pêtre 3.9

⁴ Nê mẽ piitã mẽ kot kapêr mar nê amnhĩ kaxyw Jejus kôt hamaxpêr nê hkôt amnhĩ xunhwÿrja na Tirtüm kãm hprãm.

⁵ Ja kaxyw na pre mẽ pahwÿr Kra Jejus mẽ nhùm

man mẽ pahwỳr wrỳ. Tirtũmja tapxipix na kęp Měpahpãm. Nẽ Kra Jejusja tapxipix na kot Tirtũm mã tãm mẽ paxunhwỳr mã xwỳnh. Ja kaxyw na pre amnhĩ grõnh kõt wrỳ mẽ pahpyrà nẽ i ho i nẽ kato.

⁶ Hãmri nẽ gaa nẽ àptàr hãmri nẽ mẽ pahpiitã mẽ panê ty. Jao Tirtũm mã mẽ pahte amnhĩ tomnuj piitã hpãnhã amnhĩrer pa. Tã mẽ pahpiitã mẽ pahte kot ã amnhĩ nhĩpêx anhỹr ã harẽnh mar nẽ tokyx hkõt amnhĩ xunhwỳrja na Tirtũm kãm hprãm.

⁷ Ja kaxyw na pre ixãm. Ixte Ijaew kêt xwỳnhjê mã Tirtũm kapêr jarẽnh o ri mẽ hkõt ixpa kaxyw. Nẽ Jejus nhỹ hã tanhmã mẽ kãm ixkapêr to ho ri ixpa kaxyw. Nẽ tanhmã kot mẽ panê amnhĩ nhĩpêx to hã harẽnh kaxyw. ãm hãmri na pa ã amnhĩ jarẽnh anẽ. Ixêx kêt. Na pa hte Ijaew kêt xwỳnhjê hkõt ixpa nẽ ã mẽ kãm ixkapêr anẽ nẽ mẽ kãm:

—E mẽ ate Tirtũm Kra Jejus kõt amnhĩ xunhwỳrja na Tirtũm kãm hprãm. Jakamã kwa mẽ tokyx amnhĩ kaxyw hkõt ajamxpêr nẽ hkõt amnhĩ xunhwỳ. Anẽ.

Ikrêsti kamã tanhmã mẽ pahte amnhĩ nhĩpêx to hã mẽ pamã karõ

⁸ Nẽ kot kaj mẽ tõhã Tirtũm kapêr mar kaxyw axpẽn wỳr akuprõ. Hãmri nẽ Tirtũm mã amnhĩ jarẽ nom kêt ka mẽ mẽmoj tã axpẽn kamã agryk kamã kãm amnhĩ jarẽnh kêt

nẽ. Rỳ mẽmoj tã axpẽn mã axàkjêr kamã kãm amnhĩ jarẽnh kêt nẽ. ãm tãm mẽ ajamxpêr pix o kãm amnhĩ jarẽ. Nẽ tãm amnhĩ nhĩpêx kamã kãm amnhĩ jarẽ. Ja na inhmã hprãm. Tã kêt ka ã Epes nhõ xwỳnhjê mã ja hã akarõ anẽ Ximotre.

Mẽnijaja kot tanhmã amnhĩ nhĩpêx to kaxyw mẽ hã kãm karõ

Wam Korõt 14.34; Epes 5.22; Xitre 2.3; Wam Pêtre 3.1-7

⁹ Nẽ kot paj hpãnhã Kris kõt mẽ pahtõxjaja tanhmã kot amnhĩ nhĩpêx to hã mẽ kaxyw amã karõ ka inhma. Nã mẽmyjaja kot mẽ omunh nẽ kãm mẽ hkĩnh prãm xàj kê mẽ htỳx ri mẽ noo mã tanhmã amnhĩ nhĩpêx to hkêt nẽ. Nẽ ja prãm xàj tanhmã ê jagjênh to hkêt nẽ rỳ tanhmã ri mrar to hkêt nẽ. Rỳ mẽ kãm mẽ hkĩnh prãm xàj òkrexê mex jagjênh rỳ mẽ ìhkra kamã kàx mex jagjênh nẽ ri hã mẽ hkõt pa kêt nẽ. Rỳ ja kaxyw tanhmã ri amnhĩ kĩ jaxwỳr to nẽ ri hã mẽ hkõt pa kêt nẽ. Rỳ mẽ ê mex jagjê nẽ mẽ noo mã htỳx ri hpijaam kêt o pa hkêt nẽ. Kê mẽmyjaja kãm mẽ hkĩnh prãm xàj ã htỳx ri amnhĩ nhĩpêx anhỹr o pa hkêt nẽ.

¹⁰ Mẽ kãm anẽ kê mẽ kãm Tirtũm mãn kĩnh xàj mẽ piitã mẽ kutã mẽmoj to nojarêt o pa.

¹¹ Nẽ mẽ kãm anẽ kê mẽ Tirtũm kapêr mar kaxyw mẽ pikuprõnh xà hwỳr agjê nẽ akryk Tirtũm kapêr mar o

hkrĩ nē htýx ri axpēn mǎ kapēr o hkrĩ kêt nē.

¹² Nē kê mē ikrēsti kamǎ Tĩrtũm kapēr o mēm̄yjê jahkre hkêt nē. Rý kamǎ mēm̄oj tǎ tanhmǎ mē kǎm karō hto hkêt nē. Ām akryk Tĩrtũm kapēr mar o hkrĩ.

¹³ Mēm̄o mýrapê koja mē ã amnhĩ nhĩpêx anê? Nà na pre Tĩrtũm my kot wa finat Atǎwja kumrêx nhĩpêx nē kormǎ hprō Ewa o hapu nē hipêx.

¹⁴ Nē Atǎwja na pre kagǎ kapēr mar nē hkôt amnhĩ nhĩpêx kêt nē. Prō na pre mar xà hkôt Tĩrtũm kapēr nhĩrôp xa nē tanhmǎ amnhĩ tomnuj to.

¹⁵ Mýrapê na htem mēnijaja hpijagri ho hikwý nhũm mē hkrajaja à htýx kǎm hapôj. Tǎ nom koja mē Jejus kôt amnhĩ xunhwý nē ã ixte mē kaxyw amǎ mēm̄oj tǎ karō xà hkôt amnhĩ nhĩpêx hāmri nē nhýrmǎ mex kumrêx nē htĩrtũm nē pa ho pa. E kēr ka ã mēnijê mǎ mēm̄oj tǎ karō anê Ximotre.

3

Pastô kot tanhmǎ amnhĩ nhĩpêx to kaxyw mē hǎ kǎm karō

Xitre 1.5-9

¹ E kot paj hpǎnhǎ tanhmǎ pastô jarēnh to. Koja mēhō kǎm kêp Kris kwýjê nhō pastô nē Tĩrtũm kapēr o mē ahkre hprām nē ãm hāmri ã hamaxpēr anê. Ja mex.

² Jakamǎ koja mēhō kǎm kêp pastô hprām hāmri nē ã amnhĩ nhĩpêx anhýr o apa.

Koja mē piitǎ mē noo mǎ tǎm ri amnhĩ nhĩpêx.

Nē hprō pix tǎnopxar o pa. Nē mēm̄oj punuj kutǎ amnhĩ to htýx nē.

Nē tǎm hamaxpēr. Nē àmnhĩx amnhĩ wýr mē piitǎ mē kuwý.

Nē Tĩrtũm kapēr o mē ahkre mex nē.

³ No kê mē kagōxyhti japrôr nē ho pipǎnh o pa hkêt nē.

Nē àhkurê ho pa hkêt nē.

Nē mē piitǎ mē kamǎ ukaprĩ ho ri mē hkôt pa. Jao mē kutǎ nojarêt rǎhǎ ho pa.

Nē amnhĩm kàxpore rax o pikuprōnh prām xàj tanhmǎ amnhĩ nhĩpêx to hkêt nē.

⁴⁻⁵ Nē hkrajê jahkre mex o pa nhũm mē kapēr ma nē hkôt amnhĩ nhĩpêx. Nē hǎ hpijaàm kǎm tǎm amnhĩ nhĩpêx.

Koja mē hkrajê jahkre mex kêt nē hāmri nē mǎânēn Kris kwýjê jahkre mex kêt nē. Jakamǎ nhũm hkrajê mē Kris kwýjaja tǎm amnhĩ nhĩpêx kêt nē.

⁶⁻⁷ Nē kê mē kot Jejus kôt amnhĩ xunhwýr kêt xwýnhjê noo mǎ tǎm amnhĩ nhĩpêx rǎhǎ ho pa. Mē kot ja hǎ mē omunh nē mē hǎ hpijaàm o pa kaxyw. Nom koja mē tanhmǎ amnhĩ tomnuj to nhũm mē tee ri ja hǎ mē omu nē mē ho kapēr punuj nē. Sattanasti kǎm hprām xà

hkôt.

Nē kē mē kot Kris kôt amnhī xunhwÿr nyw xwÿnhjaja kēp pastô hkêt nē.

Koja mē kēp pastô hāmri nē mēmo arīgro hā tanhmā hamaxpēr to nē amnhī to rax prām xàj tanhmā amnhī to jarkrar to ho pa. Hāmri nhūm Tirtūm tee ri ja hā omu nē te kot Satanasti nhīpēx pyrāk o hipēx nē tanhmā homnuj to. Ja pymaj kē mē kot Kris kôt amnhī xunhwÿr nyw xwÿnhjaja kēp pastô hkêt nē.

E pastô na hte ā amnhī nhīpēx anhÿr o pa kamā Jejus kwÿjē jahkre nē tanhmā mē ho ajuta hto ho mē hkôt pa Ximotre.

Mē kot Kris kôt hkwÿjē ho ajuta xwÿnhjē kaxyw mē hā kām karō

Atre 6.1

⁸ Nē kot paj hpānhā amā mē kot Kris kôt hkwÿjē ho ajuta xwÿnhjē jarē ka inhma Ximotre. Nā koja mēhō kām Kris kôt hkwÿjē ho ajuta hprām hā koja ā amnhī nhīpēx anhÿr o pa.

Koja mē htÿx ri mēmoj tā mē kām hpēr o pikēnh o pa hkêt nē.

Nē tanhmā mēmoj to hēx to ho pa hkêt nē.

Nē kagôxyhti japrōr nē ho pipānh o pa hkêt nē.

Nē amnhīm kàxpore ho pikuprōnh nē ho rax prām xàj tanhmā amnhī nhīpēx to hkêt nē.

⁹ Nē kē Tirtūm kapēr piitā hkôt hamaxpēr o pa. Ra Tirtūm kot mē pamā kapēr piitā ho amnhīrīt jakamā koja Kris kôt hkwÿjē ho ajuta xwÿnhjaja kapēr piitā hkôt hamaxpēr pē hkôt amnhī nhīpēx mex rāhā ho pa.

¹⁰⁻¹³ Nē kē mē amnhī prō pix tānopxar o pa.

Nē pastô pyrā nē mē hkrajē jahkre mex nhūm mē hkôt ri amnhī nhīpēx mex o pa.

Nē kē mē hprōjaja mjēn pyrā nē mē piitā mē noo mā tām ri amnhī nhīpēx.

Nē hkwÿjē ho kapēr rÿ mē axpēn jakwa kamā ri axpēn mā mē hixi ho rēr o pa hkêt nē.

Nē mjēn pyrā nē mēmoj punuj kutā amnhī to htÿx o ri pa. Nē amnhī to mex rāhā nē.

E koja mēhō kām Kris kwÿjē ho ajuta ho pa hprām hā koja ā amnhī nhīpēx anhÿr o pa. Nom kēr ka mē kot mē ho ajuta kaxyw mē unhwÿr tokyx anhÿr kēt nē Ximotre. Taxy mē kamā ama nē aprī hā mē kot ri tanhmā amnhī nhīpēx to hā mē omu mām. Hāmri nhūm mē piitā mē mex ā mē harē ka mē hā mē ama nē rī kormā mē kot mē ho ajuta ho pa kaxyw mē unhwÿ. Hāmri nhūm mē amnhī tā omu nē axpēn mā mex ā harē. Nē amnhī kaxyw Jejus Kris mā hamaxpēr mex o pa hā mē omu nē mē hā hpijaam o pa.

Pawre kot Ximotre mã amnhĩ jarēnh

14 Nē inhmã awỳr inhmõr nē apumunh prãm Ximotre. Nom kot pa amnhĩ kukamã ã mēmoj tã amã karõ nē hã kagà anē.

15 Kêr pa tokyx awỳr inhmõr kêt japêr ka ixte amã mēmoj ã kagàta kamã harē nē ixkutêp ho mē ahkre ho ri apa. Mē kot mar nē hprĩ hã mē õ pastô nē mē kot mē ho ajuta ho mē pa xwỳnhjaja kot tanhmã amnhĩ nhĩpêx to hã mē harēnh mar kaxyw.

Mē pahpê Kris kwỳjaja mē pahpê Tĩrtũm kra jakamã na pu htem kapêr kôt ri amnhĩ nhĩpêx nē pakatãt kôt mē pitã mē kãm pakapêr o papa. Jao tanhmã mē kãm Jejus Kris jarēnh to ho ri papa.

Pawre kot Jejus mex o mex ã mē grer jarēnh

16 Nē Jejusja mex o mex. Amnepêm kormã mē pahte harēnh mar kêt tã pu prem harēnh ma hãmri nē mex o mex ã pagrer o papa. Nē pagrer o:

Kris kêp Mēpahpãm tã na pre mē pahwỳr wrỳ nē mē pahpyrà nē ĩ ho ĩ nē kato.

Nhũm pre Tĩrtũm Karõja mex o mex ã harē.

Nhũm Tĩrtũm kapêr o mē wrỳk xwỳnhjaja omunh o pa.

Nhũm ahpỳnhã pika piitã hwỳr tanhmã kot mē panê amnhĩ nhĩpêx to hã harēnhja anhgrã.

Nhũm hte mē hkwỳjaja harēnh ma nē amnhĩ

kaxyw hkôt hamaxpêr nē hkôt amnhĩ xunhwỳ.

Tã nhũm pika kamã àpênh jatur xãm kumē nhũm Tĩrtũm akupỳm amnhĩ wỳr ho api.

Na pu htem ã Jejus mex o mex ã pagrer anē.

4

Mē kot Tĩrtũm kapêr kwỳm ri tanhmã Kris kwỳjê jahkre hto xwỳnhjê jarēnh

Matêwre 24.4-13; Korosê 2.16-19; Sikũn Ximotre 3.1-9; Sikũn Pêtre 2.1-3; Jutre 3-16

1 Nē nhỹrmã Jejus akupỳn mē pahwỳr wrỳk kaxyw koja pika nhõ xwỳnh kwỳjaja ma hkwỳjê mã tanhmã Tĩrtũm kapêr o hêx to ho pa. Na pre Tĩrtũm Karõ hprĩ hã mē hkukamã tanhmã mē harēnh to. Koja xep Satanasti hkwỳjaja Jejus kwỳjê hwỳr mra nē hêx rom tanhmã mē kãm kapêr to. Satanasti nhỹ hã mē kãm hêx o pa nhũm mē hkwỳjaja mē kuma nē mē hkôt hamaxpêr nē Jejus kaga. ã koja mē Jejus akupỳn mē pahwỳr wrỳk kukamã amnhĩ nhĩpêx anē.

2 Nē Satanasti nhỹ hã mē kãm mēmoj to hêx xwỳnhjaja ãm Satanasti pix mar o pa jakamã koja mē hamaxpêr mex kêt nē. Koja mē mēmoj punuj pumu nē htỳx mex ã hkamnhĩx.

3 Tã koja mē Tĩrtũm kapêr kwỳm ri ã Jejus kwỳjê mã hêx ho pa anē nē mē kãm:

—Kwa kêr ka mē axpên mã ri mē rer o apa hkêt nē.

Tirtũm kãm ja prãm kêt. Æm ahte ri mẽ papaja na kãm hprãm. Anẽ.

Nẽ mẽ kot mẽmoj mex kur ã mẽ omu nõ mẽ mẽ kãm kapẽr nõ mẽ kãm:

—Kwa na htem ata hkur kêt nõ. Tirtũm pẽ omnuj kẽnã kot ka kêt ri aku.

Anhÿr o koja mẽ mẽ kãm kapẽr o pa.

⁴ Nom Tirtũm na pre mẽ pamã mẽ apkur xã piitã ho kato. Mẽ paxãmnhĩx mẽ pahte piitã hkur o papa kaxyw. Jakamã mẽ pahpẽ hkrajaja na pu htem mẽmoj kaga hkêt nõ. Na pu htem mẽmoj kur kaxyw nõ Tirtũm mã harẽ hãmri nõ paxãmnhĩx kuku.

⁵ Tirtũm kot mẽ paxãpkur xã piitã mex ã harẽnh jakamã na pu htem kãm harẽnh pẽ paxãmnhĩx piitã hkur o papa.

Pawre kot mẽmoj tã Ximotre mã karõ

Sikũn Ximotre 1.6-14; Xitre 2.1-8

⁶ E Ximotre. Ixte mẽmoj tã amã karõta kêt ka ho Kris kõt pahkwÿjẽ jahkre mex o ri mẽ hkõt apa. Kot kaj ã mẽ ahkre anhÿr jao ra Jejus Kris mã axãpẽnh mex nõ. Na ka pre harẽnh ma nõ hkõt amnhĩ xãm hãmri nõ hkõt amnhĩ nhĩpẽx mex nõ. Tã kêt ka arĩ hkõt amnhĩ nhĩpẽx mex rãhã kẽ mẽ piitã ja hã apumu.

⁷ Nẽ mẽ ujarẽnhja kot paj tanhmã amã hã karõ hto. Mẽ panhĩgêt xujarẽnh kamã mo Tirtũm jarẽnh? Amrakati kumrẽx. Jakamã kêt ka mẽ hkõt ajamaxpẽr o ri apa hkêt nõ. Æm Tirtũm kapẽr kõt pix

mã ajamaxpẽr tÿx rãhã ho ri apa. Tirtũm kapẽrja ãm hãmri nã.

⁸ Nẽ na htem amnhĩ karo hprãm xãj tanhmã amnhĩ karo hto ho pa. Ja mex. Tanhmã kute hkêt. Na htem tanhmã amnhĩ karo hto nõ gaa nõ ra hkarore nõ pa. No kêt mẽ kot Tirtũm kapẽr kõt ri amnhĩ nhĩpẽx o paja na mex o mẽ hkarota jakre. Na htem Tirtũm kapẽr kõt ri amnhĩ nhĩpẽx hãmri nõ mex nõ hkĩnh nõ pa ho pa. Hãmri nõ nhÿrmã kaxkwa kamã Tirtũm mẽ Kra Jejus wa kuri mex nõ htir tũm nõ pa ho pa. Ja na mex o mex.

⁹ ãm hãmri ixte amã ja jarẽnh jakamã kwa kêt ka ja hã anohtÿx nõ ri ho apa Ximotre.

¹⁰ Nẽ Tirtũmja rãhã ho rãhã. Tã na pu pre amnhĩ kaxyw Kra Jejus kõt pajamaxpẽr nõ hkõt amnhĩ xãm nhũm Tirtũm pahto hkra. Kãm mẽ piitã mẽ ho hkra hprãm jakamã na htem pahpyrà nõ amnhĩ kaxyw Kra hkõt hamaxpẽr nõ hkõt amnhĩ xunhwÿ nhũm amnhĩ tã mẽ omunh xã hkõt mẽ ho hkra. Ja kaxyw na pu htem mẽ piitã mẽ kãm Jejus kot tanhmã mẽ panẽ amnhĩ nhĩpẽx to hã harẽnh rãhã o ri mẽ hkõt papa. Jao Tirtũm mã paxãpẽnh mex nõ.

¹¹ E kêt ka ã ja ho pahkwÿjẽ jahkre anhÿr ho ri mẽ hkõt apa. Mẽ kot amar nõ akapẽr kõt amnhĩ nhĩpẽx mex ho pa kaxyw.

¹² Nẽ kormã anyw tã kêt ka mẽ piitã mẽ noo mã tãm ri akapẽr nõ tãm amnhĩ nhĩpẽx o apa. Mẽ kot Jejus ã tanhmã

ato htã arĩ amnhĩ kaxyw kãm ajamaxpêr tỳx nê. Nê mẽ piitã mẽ kutã anojarêt nê ajamaxpêr mex pix o ri apa. Kot kaj kormã anyw tã ã mẽ noo mã amnhĩ nhĩpêx anê nhũm mẽ hã apumu nê kãm akapêr mar prãm nê. Anyw ã apumunh tã kãm akapêr mar prãm nê.

¹³ Nê kêr ka mẽ ate Tĩrtũm kapêr mar kaxyw xypên wỳr akuprõ ka arĩ ixkutêp mẽ kãm Tĩrtũm kapêr tũm ã kagã kamã akapêr rãhã ho apa. Nê aprĩ hã tanhmã ho mẽ ahkre hto nê ho mẽ ahkre mex nê Ximotre.

¹⁴⁻¹⁵ E kêr ka ã amnhĩ nhĩpêx anhỹr o ri mẽ hkõt apa nê amã ho anhỹr kaga hkêt nê. Mẽ piitã mẽ kot ate Jejus mã amnhĩ nhĩpêx mex o amõr ã apumunh kaxyw. Kormã ate mẽ kãm Jejus jarênh o apa hkêt ri na pre pastõ nhỹ hã mẽ kapêr xwỳnhjaja ate Jejus mã tanhmã amnhĩ nhĩpêx to ho apa kaxyw axãm. Hãmri nê anhĩmõk ã mẽ ìhkra jaxwỳ nê axàpênh kukamã tanhmã ajarênh to nê ato Tĩrtũm wỳ. Hãmri nhũm ate mẽ kãm kapêr jarênh o ri apa kaxyw amã ajamaxpêr o hihtỳx. Tã kêr ka ã hã ã kãm amnhĩ nhĩpêx anhỹr rãhã ho ri apa.

¹⁶ Nê kwa kêr ka amnhĩ pumunh mex nê Ximotre. Jao tãm ri amnhĩ nhĩpêx nê akatãt kõt Tĩrtũm kapêr o mẽ ahkre ho ri mẽ hkõt apa. Kot kaj ã amnhĩ nhĩpêx anê hãmri nhũm mẽ ama nê apyrã nê Jejus kõt amnhĩ xunhwỳ. Hãmri nê pahpyrã nê nhỹrmã Tĩrtũm wa kuri htĩr tũm nê pa ho pa.

5

Tanhmã mẽ pahte Kris kõt mẽ pahkwỳjê nhĩpêx to kaxyw mẽ pamã karõ

Sikũn Ximotre 2.24-25

¹⁻² E kot paj hpãnhã Kris kõt pahkwỳjê hõ kot tanhmã amnhĩ tomnuj to nhũm ate tanhmã ja nê kãm akapêr to hã amã karõ.

Nà koja mẽhõ tanhmã ri amnhĩ tomnuj to ka harênh ma hãmri nê ma hwỳr tẽ nê ja nê tanhmã kãm akapêr to. Nom kêr ka kãm akapêr mã agêt kêt nê.

Koja mẽwejjê õ tanhmã amnhĩ tomnuj to ka te kêp anhĩpêxã rỳ akatorxã pyrãk o kãm akapêr. Jao hã apijaãm o tanhmã kãm akapêr to.

Rỳ koja apyrã nê mẽ nywjê hõ tanhmã amnhĩ tomnuj to ka te kêp atõ pyrãk o kãm akapêr.

Rỳ mênijê nyw õ amnhĩ tomnuj japêr ka te kêp atõx pyrãk o kãm akapêr. Jao hã apijaãm o kot amnhĩ tomnujja nê tanhmã kãm akapêr to.

E kêr ka mẽ kot amnhĩ tomnuj nê ã mẽ pahkwỳjê mã akapêr anhỹr o apa Ximotre.

Mẽ kêp mẽ mjên htyk xwỳnhjê jarênh

Xiakre 1.27

³ Nê kot paj hpãnhã Kris kõt pahkwỳ pê mẽ mjên htyk xwỳnhjê jarê. Nà koja mẽhõ nija hkra hkêt nê htãmnhwỳ hkêt nê pa nhũm mjên kêp ty ka mẽ apê Kris kõt hkwyjaja

ja hã omu nẽ mẽmoj to kutã anojarêt rãhã ho ri apa.

4 Nom koja ra hkra rý ra htãmnhwý japêr kê mẽ tãmjaja tanhmã ho ajuta hto ho pa. Kãm õ nẽ kãm mẽmoj nhõr o pa. Kormã mẽhprĩre ri na pre mẽ õ wõwõ nẽ mẽ katorxà nẽ mẽ hipêêxà mẽ hamãr mex pê mẽ kãm õ ho pa. Tã ra mẽ àptâr jakamã kê mẽ amnhĩ pyrà nẽ mẽ hamãr mex pê mẽmoj to mẽ kutã nojarêt rãhã ho pa. Ja na Tĩrtũm kãm hprãm. A mẽ kot hkwýjê kamã ukaprĩ ho pa jakamã te mẽ kot Tĩrtũm mã àpênh pyràk.

5 No koja mẽhõ ni ra wejre nẽ ahte ri pa. Nẽ hkra nẽ htãmnhwý hkêt nẽ ri pa. Tã kê ja hã amnhĩ pumu nẽ Tĩrtũm kamnàr rom amnhĩ to hwýr o pa. Nẽ mẽ piitã mẽ ho hwýr o pa. Jao tãm hamaxpêr. Ka mẽ apê Kris kôt hkwýjaja ja hã omu hãmri nẽ mẽ kam nẽ tanhmã kutã anojarêt to ho ri apa.

6 No koja mẽ ã amnhĩ nhĩpêx anhýr kêr nẽ. Nẽ htýx ri mẽ greer wýr mra nẽ hpijaam kêr o ri mra ka mẽ ja hã mẽ omu nẽ mẽ ho ajuta hkêt nẽ. Na htem ã amnhĩ nhĩpêx anhýr o pa nẽ arĩ htĩr tã te ra htyk nẽ hikwý pyràk.

7 E kêr ka ã ja hã Kris kôt pahkwýjê mã karõ anẽ. Kê mẽ ama nẽ ã mẽ mjên htyk xwýnhjê nhĩpêx anhýr o pa.

8 Nom koja mẽhõ amnhĩ kwýjê ho mex kêr japêr. Nẽ õrkwý kamã hprõ nẽ hkrajaja nẽ hipêêxà nẽ katorxà nhũm mẽ kãm mẽ apkur xà nhõr

kêr japêr. Koja mẽ ã amnhĩ nhĩpêx anhýr jao Jejus kaga nẽ te mẽ kot hkôt amnhĩ xunhwýr kêr xwýnhjaja kot amnhĩ nhĩpêx pyràk o amnhĩ nhĩpêx nom amnhĩ tomnuj týx o mẽ hakre.

9 Nẽ mẽ mjên htyk nẽ mẽ hkra nẽ mẽ htãmnhwý hkêt xwýnhjaja kêr ka mẽ tanhmã mẽ ho ajuta hto kaxyw hãmri nẽ mẽ hixi piitã hã kagã. Nom kwa kêr ka aprĩ hã tanhmã mẽ amnhĩ nhĩpêx to hã mẽ omu nẽ rĩ kormã mẽ hixi hã kagã.

Koja mẽhõ kormã mjên htĩr ri tãm hipêx nẽ nhãm mẽmyjê ho amnhĩkati hkêt nẽ.

Nẽ ra hã amgrà pê 60 rý ra hã 60 jakre.

10-11 Nẽ tãm mẽ piitã mẽ hipêx o pa.

Nẽ hkrajaja kormã htĩr ri nhũm mẽ hamãr mex nẽ mẽ ahkre mex o pa.

Nẽ nhãm krĩ hõ nhõ xwýnhjaja õ krĩ hwýr pøj nhũm mẽ omu nẽ amnhĩ nhõrkwý hwýr mẽ kuwý.

Nẽ mẽ kêp amrakati xwýnhjê ho mex o pa.

Koja mẽ ã amnhĩ nhĩpêx anẽ ka ja hã mẽ omu nẽ rĩ kormã mẽ ho ajuta kaxyw mẽ hixi hã kagã. Nom mẽ hixi hã kagã kaxyw nẽ mẽmoj tã mẽ hkukja nẽ mẽ kãm:

—E kot kaj ã amnhĩ nhĩpêx anhýr o apa hã inhmã amnhĩ jarê pa ama nẽ rĩ kormã anhixi hã kagã.

Kot kaj axte amjên kêr nẽ.

Nẽ tanhmã Kris kôt akwýjê ho mex to ho ri apa.

Nhũm mēhõ mēmo mýrapê
hkaprĩ nē pa ka ja hã
omu nē tanhmã ho
ajuta hto.

E kot kaj ã amnhĩ nhĩpêx
anhÿr o apa hã amnhĩ jarē pa
ama nē anhĩxi hã kagã. Hãmri
nhũm Kris kôt akwýjaja amã
axàpkur xà nhõr o pa. Anē.

Ã mē kãm akapēr anē nhũm
mē ama nē amã:

—ÿ. Ma kot paj ã amnhĩ
nhĩpêx anē.

Anhÿr ã amnhĩ jarē ka mē
ama nē mē hixi hã kagã. No
kormã mē hã amgrã pē 60 kêt
xwýnhjaja kēr ka kormã mē
hixi hã kagã hkêt nē. Koja mē
tanhmã mē kot amnhĩ nhĩpêx
to ho pa hã mē kãm karõja ma
nē wam tajē pyrã nē amã:

—ÿ. Ma kot paj ã amnhĩ
nhĩpêx anē. Na pa Jejus Kris
noo mã ã amnhĩ jarēnh anē.

Anhÿr ã amnhĩ jarēnh tã
gaa nē ra hkurē hapõj nē ra
kot amnhĩ jarēnh ta kwým ri
tanhmã amnhĩ nhĩpêx to nē
axte mjên.

¹² Ra amnhĩ jarēnh o:

—Ma kot paj ãm Jejus mã
pix mã tanhmã amnhĩ nhĩpêx
to ho ri ixpa nē axte inhmjên
kêt nē.

Anhÿr tã tanhmã hamaxpēr
to nē kot amnhĩ jarēnh kwým
ri axte mjên. Jao te Jejus mã
amnhĩ to hêx pyrãk nhũm
Tĩrtũm pē jamnuj. Ja pymaj
kēr ka mē kormã mē hã
amgrã pē 60 kêt xwýnhjê
nhĩxi hã kagã hkêt nē. Kormã
mē hã amgrã pē 60 kêt
xwýnhjaja arĩ mē hkĩnh tỳx

¹³ jakamã kot kaj mē kãm
mē apkur xà nhõr o apa nhũm

mē ja hã amnhĩ tã mē apumu
nē axte amnhĩm àpênh kêt
nē. ãm kãm kaga nē htỳx ri
nhãm mē hwýr mra nē nhãm
mē hwýr mra. Nē amnhĩ
pumunh mex kêt nē htỳx ri
axpên jakwa kamã ri mē hixi
ho rēr o pa. Nē nhÿri mēmoj
pumu rỳ tanhmã mēmoj
jarēnh mar to hãmri nē ma
htỳx ri hkwýjê mã harēnh o
mra. Koja mē ã amnhĩ nhĩpêx
anhÿr o pa hãmri nhũm mē
kêp Kris kwý hkêt xwýnhjaja
ja hã mē omu nē mē hkôt mē
pahpê Kris kôt pahkwýjê ho
kapēr punuj nē.

¹⁴ ã mē kot amnhĩ nhĩpêx
anhÿr o pa pymaj kēr ka ko-
rmã mē nyw xwýnhjê mã anē
kê mē mãmrĩ axte mjên nē o
pa. Hãmri nē hkra nē hkrajê
jamãr o pa. Ja na inhmã
hprãm. Koja mē ã amnhĩ
nhĩpêx anē hãmri nhũm mē
kêp Kris kôt pahkwý hkêt
xwýnhjaja mē hkôt tanhmã
mē pahto kapēr punuj to hkêt
nē.

¹⁵ Mãñ ka ra Kris kôt
pahkwýjê nyw pē mē mjên
htyk xwýnh kwýjaja tanhmã
amnhĩ tomnuj to hã mē
harēnh ma. Na prem Jejus
kaga nē Satanasti hkôt amnhĩ
nhĩpêx o pa.

¹⁶ E kēr ka mē ã Kris kwý
pē mjên htyk xwýnhjê nhĩpêx
o apa anē Ximotre. Nom koja
mē akwý kamã mēhõ nhõ
wôwô mjên rỳ katorxã mjên
kêp ty kê tãm kãm õ ho pa.
Kêr kê Kris kôt pahkwýjaja ãm
mē kêp mē mjên htyk xwýnh
pê mē hkra nē mē htãmnhwý
hkêt nē ahte ri mē pa xwýnh

pixjaja tanhmã mē ho ajuta
hto ho pa.

*Mē pahpê Kris kôt
pahkwýjê hkrãhtũm kaxyw mē
pahtã kãm karõ*

*Atre 14.23; Wam Korõt 9.7-
14; Karatas 6.6; Wam Tesarõn
5.12; Wam Pêtre 5.1-4*

¹⁷⁻¹⁸ Nē kot paj hpãnhã amã
Kris kôt mē pahkrãhtũmjê
jarê. Tĩrtũm kapêr ã kagã
htũm kot mē harênh kot:

Kêr ka Tĩrtũm kapêr o mē
ajahkre xwýnhjaja mē
ahkre pãnhã mē kãm
amnhĩre. Anê.

Nē mãnên mē harênh ã kuxi
nē mē harênh o:

Koja akrit amã àpênh o pa ka
ho mex nē kãm õ mex o
apa. Anê.

Ã ja jarênh kot anhÿr jakamã
koja Kris kôt mē akrãhtũmja
Kris mã tanhmã mē ato mex
to ho pa ka mē amnhĩ tã kãm
amnhĩrer mex o ri apa. Kot
Tĩrtũm kapêr o mē ajahkre
mex jakamã ka mē amnhĩ tã
kãm amnhĩrer mex nê.

¹⁹ Nē koja mēhõ pixi nē mē
awÿr tē nē amã Kris kôt mē
akrãhtũm kot tanhmã amnhĩ
tomnuj to hã harênh to ka
ama nē ãm ama. Nom koja wa
hamẽxkrut rÿ mē axkrunẽpxi
nē mē awÿr mra nē axpên kôt
tanhmã harênh to ka mē ama
nē ãm hãmri mē kot tanhmã
kot amnhĩ tomnuj tota kôt
ajamaxpêr.

²⁰ Hãmri nē Kris kwýjê
piitã mē noo mã kot amnhĩ
tomnuj xwýnhhta mã tanhmã
kot amnhĩ tomnuj to nê
kãm akapêr kê axte ã amnhĩ
nhĩpêx anhÿr kêt nê. Mē piitã
mē kot hã amar nē nhÿrmã

tanhmã amnhĩ tomnuj to
nhũm ate urak nē hã tanhmã
mē kãm axãkjêr to pymaj
tanhmã amnhĩ tomnuj to
hkêt nê.

²¹ E Tĩrtũm noo mã na pa
ã amã mē kaxyw mēmoj tã
karõ anê Ximotre. Nê Jejus
Kris mē Tĩrtũm kapêr o mē
wryk xwýnhjê noo mã pa ã
amã karõ anê. Jakamã kêr
ka inhmar tÿx nê hkôt amnhĩ
nhĩpêx o ri apa. Jao mē pi-
itã mē hipêx o axpên pyrãk.
Nom kêr ka akrãmnhwÿ kot
tanhmã amnhĩ tomnuj to hã
omu nê axtem nê ãm omu nê
ajamaxpêr o:

—Nà kêp ixkrãmnhwÿ kênã
kot paj kêt ja nê tanhmã kãm
ixkapêr to. Pa ho anhÿr kêt
nê.

Anhÿr o ajamaxpêr kêt nê.
Mē piitã mē hipêx o axpên
pyrãk.

²² Nê kêr ka anojarêt kãm
mē kot Tĩrtũm mã tanhmã
amnhĩ nhĩpêx to ho mē pa
kaxyw mē unhwÿr kêt nê.
Aprĩ hã tanhmã mē kot
amnhĩ nhĩpêx ã hã mē omu
nē mē hkapi nē rĩ kormã mē
unhwÿ rÿ tee ri mēmoj tã mē
omu nē mē hkaga.

Nê koja mēhõ tanhmã
amnhĩ tomnuj to ka ja hã
omu rÿ harênh ma hãmri
nē urak nê ã amnhĩ nhĩpêx
anhÿr kêt nê. Arĩ Tĩrtũm
kôt amnhĩ nhĩpêx pê tãm ri
amnhĩ nhĩpêx pix o apa.

²³⁻²⁵ Na htem tãhã tanhmã
amnhĩ tomnuj to nhũm mēhõ
ja hã mē omu nē mē harênh
kurê kumrêx. Kris kôt mē
hkrãhtũm kormã kot tanhmã
hã kãm nê hkêt ri nhũm mē

ja hã mẽ omu nẽ tanhmã mẽ harẽnh to. Nom na htem tõhã hpimxur pê tanhmã amnhĩ tomnuj to nhũm Tĩrtũm pix ja hã mẽ omu. Tã koja nhỹrmã mẽ piitã mẽ kãm ja ho amnhĩrit nhũm mẽ piitã harẽnh ma nẽ hkõt omu.

Nẽ mẽ kot amnhĩ to mex xwỳnhjaja haxwỳja. Na htem tõhã mẽ noo mã tanhmã mẽhõ ho mex to nhũm hkwỳjaja ja hã omu nẽ axpẽn mã mẽ ã mẽ harẽ. Nẽ tõhã hpimxur pê tanhmã mẽhõ ho mex to nhũm mẽhõ ja hã omunh kêt nẽ. ãm Tĩrtũm pix ã kot amnhĩ nhĩpêx anhỹr ã omu. Tã koja nhỹrmã mẽ piitã mẽ kãm ja ho amnhĩrit nhũm mẽ piitã harẽnh ma nẽ hkõt omu.

Nẽ kwa Ximotre. Axà nẽ anhõhymnuj nẽ ri apa jakamã kwa kêr ka gô pix o akõm o apa hkêt nẽ. Mããnẽn wĩhti hkwỳ ho ixkõ kêr ka anhõhy mex japêr.

6

Mẽ kãm mẽ àpênh xwỳnhjê kaxyw mẽ hã kãm karõ

Epes 6.5-9; Korosẽ 3.22-4.1; Xitre 2.9-10; Wam Pêtre 2.18-25

¹ E kot paj mẽ akwỳjaja mẽ kãm mẽ àpênh o mẽ pa xwỳnhjê kaxyw mẽmoj tã amã karõ. Mẽ kãm anẽ kê mẽ õ pa-trãw ã hpijaam o ri pa. Jao mẽ kapêr ma nẽ hkõt kãm àpênh mex nẽ. Koja mẽ ã amnhĩ nhĩpêx anẽ nhũm amnhĩ tã mẽ omu nẽ hamaxpêr o:

—Kwa pêr Tĩrtũm kapêr na mex kumrêx. Inhmã àpênh xwỳnhja na hte hkõt amnhĩ

nhĩpêx pê amnhĩ to mex o pa. Pêr ãm hãmri na hte Pawre ho mẽ ahkre ho pa.

Anhỹr o hamaxpêr.

² Nẽ koja mẽ õ patrãw ra Kris kõt amnhĩ xãm japêr ka kãm mẽ àpênh xwỳnhjê mã anẽ kê Kris kõt mẽ kêp mẽ htõ hã mẽ kãm àpênh mex o ri pa. Nom kê mẽ urak nẽ kêp Kris kõt hkwỳ hã mẽ omu nẽ hamaxpêr o:

—Nà Kris kõt ixtõ kênã kot paj kêt ri kapêr kõt amnhĩ nhĩpêx nẽ kãm ixàpênh mex o ri ixpa.

Anhỹr o hamaxpêr kêt nẽ. Kê kêp Kris kõt htõ hã kãm ho mex prãm xaj kãm àpênh mex o pa.

E kêr ka mẽ kãm mẽ àpênh o mẽ pa xwỳnhjê mã ã tanhmã mẽ àpênh to ho pa hã karõ anẽ Ximotre.

Tĩrtũm kapêr kwỳm ri mẽ ahkre xwỳnhjê jarênh

Rukre 12.13-21; Xiakre 5.1-6

³ Nẽ na hte Kris kwỳ hkêt xwỳnh kwỳjaja Kris kwỳjê mã Tĩrtũm kapêr o hêx o pa. Nẽ htỳx ri Jejus kapêr kwỳm ri tanhmã harẽnh to ho pa. ãm hãmri na Tĩrtũm mẽ Pahihti Jejus Kris wa kapêr tã nhũm htem htỳx ri tanhmã ho hêx to ho ri mẽ hkõt pa.

⁴ Mẽ kot amnhĩ to rũnh xwỳnh ã amnhĩ to jarkrar tã mẽ àhpumunh tỳx kêt. Na htem tanhmã Tĩrtũm kapêr kute hã axpẽn mã akir nẽ mẽmoj tã axpẽn kãm gryk o pa. Nẽ axpẽn mã kapêr punuj nẽ mẽmoj tã axpẽn kamnhĩx o pa.

5 Nē hamaxpēr mex kêt jakamã mēmoj tã axpēn mã àkjēr pix o pa. Na htem ã amnhĩ nhĩpēx anhỹr o Tĩrtũm kapēr mar tỳx kêt nē. Hãmri nē htỳx ri hamaxpēr nē hamaxpēr o:

—Kot paj Tĩrtũm kapēr o mē ahkre ho ixpa nhũm mē inhma nē inhmã amnhĩrer mex nē pa ixkàxpore rax nē ri ixpa. Nà kot paj ã amnhĩ nhĩpēx anhỹr o ri ixpa. Ja inhmã mex.

Anhỹrja o kãm hikàxpore rũnh prãm o amnhĩ to amnhĩrit o pa.

Kàxpore jarēnh

6-8 E kot paj hpãnhã amã tanhmã kàxpore jarēnh to ka inhma Ximotre. Xà na pu htem pakatorxà nhõhy rũm pajapôj nē amnhĩ kôt kàxpore hkwỳ jamỳ nē ho pajapôj? Nà na pu htem pahkēnh nē panhỹ kamã pajapôj. Tã kot puj mē ja pyrã nē nhỹrmã ty nē mã ho anē nē panhỹ kamã ma papa. Jakamã kēr pu mē kormã pika ja kamã pahtĩr nē papa ri paxàpkur xà nē mē paxê pix tãnopxar pē pahkĩnh nē ri papa. Pakàxpore rũnh kêt tã na pu htem Tĩrtũm kamnàr rom pahkĩnh nē pajamakêtkati nē papa. Jao pajamaxpēr o:

—Nà ixkàxpore rax kêt nē ixkukrêx rax kêt tã na hte Jesus ixkôt pa ho pa nē mēmoj to ixkutã nojarêt rãhã ho pa. Jakamã ixkàxpore rax kêt tã ixkĩnh nē ijamakêtkati nē ixãmnhĩx ixpa.

Anhỹr o pajamaxpēr o papa.

9-10 Mē kot amnhĩm kàxpore o pikuprõnh rũnh xwỳnhjaja na htem kàxpore pix kukamã hamaxpēr o pa nē gaa nē kàxpore rũnh gryk ã amnhĩ tomnuj o pa. Na pre mē pahkwỳjaja kàxpore rũnh prãm xàj Jejus kaga. Tã ra mē hikàxpore rũnh tã hkĩnh nē hamakêtkati nē pa hkêt nē. Na htem omnuj nē hkaprĩ nē pa. ã na htem mē hikàxpore rũnh xwỳnh kwỳjaja amnhĩ nhĩpēx anhỹr o pa. Jao kàxpore pix kukamã hamaxpēr nē gaa nē ra gryk ã mē kot amnhĩ to mex xà kaga hpa nē htỳx ri tanhmã amnhĩ tomnuj to ho pa. Nē tanhmã hkwỳjê nhĩpēx punuj to. Te tutre kot harôj xành ã htỳx rapuuti hwỳr gjêx nē tee ri kãm kator prãm kaprỳ pyrãk. ã mē kot amnhĩ nhĩpēx anhỹr o pa jakamã koja nhỹrmã Tĩrtũm ma mē kot amnhĩ xà htỳx kamã hamak tũm xà hwỳr mē kurê.

Pawre kot Ximotre mã mēmoj tã karô

Korosê 4.17; Wam Ximotre 4.14; Sikũn Ximotre 2.1-7

11 Nē kwa Ximotre kēr ka mē urãk nē kàxpore rax prãm xàj amnhĩ tomnuj o apa hkêt nē. Ate Tĩrtũm mã tanhmã amnhĩ nhĩpēx to ho apa xwỳnh jakamã kēr ka kãm hprãm xà hkôt pix mã amnhĩ nhĩpēx o ri apa. Jao Tĩrtũm pyrã nē ate amnhĩ jarēnh xà hkôt amnhĩ nhĩpēx o ri apa. Nē amã Kris kôt akwỳjê hkĩnh pē mēmoj to mē kutã anojarêt o ri apa.

Nē Kris kôt mē hkwỳ hkêt xwỳnhjaja kot Kris ã tanhmã ato htã ka arĩ hkôt amnhĩ nhĩpêx mex nē mē piitã mē ho mex o ri mē hkôt apa.

¹² Na ka pre Kris kôt mē pahkwỳjê noo mã tanhmã amnhĩ jarênh to. Tĩrtũm kot amnhĩ wỳr awỳr nhũm ate Je-jus kôt amnhĩ xãm nē amã kãm tanhmã amnhĩ nhĩpêx to ho apa hprãm ã amnhĩ jarê nhũm ikrêsti kamã mē piitã ja hã ama. Jakamã kwa kêr ka arĩ Jejus kôt amnhĩ nhĩpêx mex rãhã ho ri apa. Hãmri nē nhỹrmã Tĩrtũm mē Kra wa kuri amex kumrêx nē atĩr tũm nē apa ho apa.

¹³⁻¹⁴ E na pa mēmoj tã amã karõ rax ka piitã kamã harê nē mar pa. Tã kêr ka inhmã ja hã tanhmã amnhĩ jarênh to. Mēmoj piitã ho htĩr xwỳnh Tĩrtũm mē Jejus Kris wa noo mã tanhmã ja hã inhmã amnhĩ jarênh to. Jejus htyk kaxyw nē àmnhĩx kot Pahi Põn Pirat mã amnhĩ jarênh xwỳnhnta noo mã amnhĩ jarê nē inhmã amnhĩ jarênh o:

—Nà kot paj ate mēmoj tã inhmã karõ piitã hkôt amnhĩ nhĩpêx rãhã nhũm Pahihti Je-jus Kris akupỳn mē pahwỳr wrỳ. ãm hãmri na pa ã amã amnhĩ jarênh anê Pawre.

Anhỹr o inhmã amnhĩ jarê.

Tĩrtũm mex o mex ã mē grer

¹⁵ Nē koja Tĩrtũm akupỳn mē pahwỳr Jejus mēnh xà hã arĩgro jarê hãmri nhũm kot harênh xàta wỳr pøj nhũm akupỳn mē pahwỳr kumê.

Tĩrtũmja mex o mex. Tapxipix kêp mēmoj piitã ho amnhĩptàr xwỳnh maati. Nē kêp jar mē ho amnhĩptàr xwỳnh piitã mē õ Pahi Maati.

¹⁶ Nē tapxipix na rãhã ho rãhã nē mex o mex jakamã puhã hirã rax kumrêx. Tã hkĩnhã mē pahte amnhĩ tom-nuj xwỳnh jakamã kot puj mē puhã hirã raxja kutã hkêt nē. Jao hwỳr mē pamrar kêt nē.

Nē aa mēhõ kot no ho Tĩrtũm pumunh kêt tã kwa kêr pu mē pahpiitã kãm mex o mex nē hihtỳx o hihtỳx ã harênh rãhã ho papa.

Axte mē hikàxpore rũnh xwỳnhjê jarênh

Rukre 16.9

¹⁷ Nē kêr ka Kris kwỳjê kamã mē hikàxpore rũnh xwỳnhjê mã anê kê mē kot amnhĩ to rũnh kôt amnhĩ to àmra ho pa hkêt nē. Nē amnhĩ kaxyw mē hikàxpore rũnh kôt hamaxpêr o pa hkêt nē. Kàxpore na hte hapêx tokyx anê. Mē kãm anê kê mē hpãnhã amnhĩ kaxyw Tĩrtũm kôt mãn hamaxpêr tỳx rãhã ho pa. Na hte àmnhĩx tanhmã mē pahto mex to ho pa nē mē pahpê õxỳ hkêt nē. Jao mē pahwỳr na rē nhũm mē pahpur go mex nē pu mē kamã panhõ rũnh o papa. Nē mē pamã myyti ho hirã pu mē kukwak ri parĩt mex pē mēmoj tã paxàpênh o papa. ã Tĩrtũm kot mē pahto mex

kot anhÿr pu mē kukwak ri pahkĩnh nē pajamakētkati nē ri papa. Tã kēr ka mē hikàxpore rūnh xwÿnhjê mã anē kê mē amnhĩ kaxyw kumã pix mã mãn hamaxpēr rãhã ho pa.

¹⁸ Nē mē kãm anē kê mē hikàxpore ho hkwÿjê pē ôxÿ hkēt nē ho tanhmã mē ho mex to ho pa. Nē àmnhĩx ho tanhmã mē kêp amrakati xwÿnhjê ho ajuta hto ho pa.

¹⁹ Koja mē ã amnhĩ nhĩpêx anē nhũm Tĩrtũm ja hã mē omu nē hkĩnh nē ô krĩ kamã mē kutêp mē kãm mēmoj mex o akuprô. Jakamã nhũm mē kormã jar htĩr nē pa ri mex nē pa nē mãânên nhÿrmã kaxkwa kamã mex kumrêx o jar pika ja kamã mex nē pata jakre. E kēr ka ã mē hikàxpore rūnh xwÿnhjê mã ja hã karô anē Ximotre.

Pawre kot Ximotre mã mēmoj tã karô jatur xà

Korosẽ 4.17; Wam Ximotre 6.14; Sikũn Ximotre 1.13, 4.5

²⁰ Nē ra Tĩrtũm kot ate kapēr o mē ahkre ho apa kaxyw axãm jakamã kēr ka tãm amnhĩ nhĩpêx pē mē ahkre mex rãhã ho ri apa. Jao Tĩrtũm kapēr o hêx o ri mē ahkre xwÿnhjê hkôt apa hkēt nē. Na htem mē kuma nē mē kapēr mex ã mē hkamnhĩx nom mē kapēr mex kêt. Jakamã kwa kēr ka mē kot tanhmã mē ahkre hto hã mē ama nē ãm mē ama.

²¹ Na pre ra mē pahkwÿjaja mē kuma nē mē kapēr gryk ã Jejus kaga.

E ãm ja pix. Kê Tĩrtũm mē apiitã mē akutã nojarêt rãhã

ho pa. Ixpê Pawre na pa ã amã ixkapēr ã kagà anē.

Sikūn Ximotre Pawre kot Ximotre hwÿr wam kagà nē mēnh kôt hō mēnh

Pawre na pre kagàja nhīpēx. Na pre Jejus kwÿhkēt xwÿnhjaja Jejus ā unē nē krī pē Rōm kamā haxà nhūm arī hkrī ho hkrī. Tā ra mē kot hpīr kaxyw nhūm Ximotre mā kagàja nhīpēx nē hwÿr kumē. Na pre Ximotre Pawre hkôt pa ho pa hā mytwrÿ xohtō nē. Tā hpānhā krī pē Epes kamā arīk nē Tīrtūm kapēr o Jejus kôt hkwÿjē jahkre ho ri mē hkôt pa. Jakamā nhūm Pawre kagàja nhīpēx nē kamā kām mēmoj tā karō nē hwÿr kumē. Nē nhÿrmā mē kot Pawre pyrā nē Jejus ā hpīr mā htā tee ri amnhī kukamā hamaxpēr kēt ā kām karō.

Nē mē hkwÿjaja kēp Tīrtūm kra hā amnhī jarēnh tā nhūm Pawre Tīrtūm kām hprām xà kuhpa hā mē kot tanhmā amnhī nhīpēx to ho pa hā Ximotre mā mē harē. Kot mē harēnh mar nē Jejus kwÿjē nē mē omunh mex o pa kaxyw. Nē Ximotre kot Tīrtūm kām hprām xà kot pix mā amnhī nhīpēx o pa hā kām karō. Ā na pre Pawreja Ximotre mā mēmoj tā karō kamā hihtÿx nē hā kagà nē hwÿr mēnh anē. Nē kām:

¹ Pa Ximotre? Xà amex? Ixpē Pawre na pa amā ixkapēr nē hā kagà nē awÿr kumē. Ixpē Jejus nhÿ hā

hkwÿjē jahkre ho ixpa xwÿnh na pa. Tīrtūm na pre ja kaxyw ixām. Tīrtūm Kra Jejus Krisja kot puj mē pahpē hkwÿjaja nhÿrmā kukwak ri pamex kumrēx nē pahtīr tūm nē ri papa ho papa.

Pawre kot Ximotre ho Tīrtūm mē Jejus wa hwÿr ā harēnh

Atre 16.1-2

²⁻³ Te apē ixkra pyrāk Ximotre. Jakamā na pa hte ato Mēpanhīpēxà maati Tīrtūm mē Pahihti Jejus Kris wa hwÿr rāhā ho ri ixpa. Na pa hte mē pakukamā mē panhīgēt pyrā nē tām ijamaxpēr o ixpa pē Tīrtūm mā tanhmā amnhī nhīpēx to ho ri ixpa. Jakamā na pa hte ato Kra Jejus mē wa hwÿr rāhā ho ri ixpa. Arīgro hā nē kamāt kām amā ijamaxpēr nē ato wa kuwÿ nē wa kām:

—Pa Tīrtūm mē Pahihti wa. E ixte ixkra puro Ximotre ho war awÿr kaxyw war amā ijamaxpēr. Na ka hte wa ho mex nhūm war akôt amnhī nhīpēx mex o pa. Te ō wōwō mē katorxà wa kot amnhī nhīpēx pyrāk. Na pa hte kot amnhī nhīpēx o paja mā ijamaxpēr nē ŷ hā ixkīnh nē. War ate kamā axukaprī ho ri apa kaxyw na pa ho war awÿ. War ate kutā war anojarēt rāhā ho ri war apa nhūm hamakētkati nē amnhīx ri pa ho pa kaxyw. Anē.

Pawre kot Ximotre nhÿ hā hkīnh ā harēnh

⁴ Nē na ka pre hte ixkôt ixto ajuta ho ri ixkôt apa htā pa

pre nh̄yh̄m inhnojarê t nê ax-
tem axâpênh ã hã amã karõ
hãmri nê Epes kamã are nê
ma mõi. Ka amã ijapê xaj tee
ri ma inhmõr ã ixpumu nê
am̄yr rax nê. Na pa hte arĩ
ja hã inhnoht̄yx nê ri ho ixpa
Ximotre. Jao ra ato ama nê.
Tã kot puj nh̄yrmã axte axpên
pumu nê pahkĩnh t̄yx nê.

⁵ Nê na pa hte akatorxã
Enĩtre mẽ anhõ wõwõre Rojti
wa kãm ijamaxpêr rãhã ho
ri ixpa. Na pre wa kumrêx
amnhĩ kaxyw Jejus kõt
hamaxpêr nê hkõt amnhĩ
xãm. Tã ka wa hkanrêhã wa
urak nê ã amnhĩ nhĩpêx anê.
Ixe ja hã apumunh mex.

⁶ Na pa pre ate tanhmã Je-
jus mã amnhĩ nhĩpêx to ho
ri apa kaxyw axãm kaxyw
anhĩmõk ã inhĩhkra xi nê ato
Tĩrtũm w̄y. Kot tanhmã akrã
hto nhũm ate Karõ nh̄y hã
tanhmã amnhĩ nhĩpêx to ho
apa kaxyw. Tã kêr ka arĩ
ã kãm amnhĩ nhĩpêx anh̄yr
rãhã ho ri apa.

⁷ Na pu htem Tĩrtũm Karõ
nh̄y hã pamã ma ho papa
hkêt nê. Na pu htem ÿ hã
pamã mẽ piitã mẽ hkĩnh pê
paxãmnhĩx tanhmã mẽ ho
ajuta hto ho papa. Nê ÿ hã
kapêr o mẽ ahkre ht̄yx o ri mẽ
hkõt papa. Nê mẽmoj punuj
kutã amnhĩ to ht̄yx rãhã nê.
Jao amnhĩ to mex pix nê.

⁸ Jakamã kwa kêr ka amã
mẽ kãm Jejus jarênh o apa
pymaj tee ri amnhĩ kukamã
ajamaxpêr kêt nê. Nê mẽ
kot Jejus ã ijaxãr nhũm arĩ
ixkrĩ hã ijarênh ma nê mẽ
kot ixkuxwar ajaxãr pymaj

mẽ kãm Tĩrtũm kapêr o mẽ
ahkre hkukamã tee ri aja-
maxpêr kêt nê. Mẽ kot ã
anhĩpêx anh̄yr mã tã kêr ka
amnhĩ kamã akahak kêt nê.
Ãm Tĩrtũm nh̄y hã hiht̄yx xã
ho amnhĩ to ht̄yx nê ixpyrà
nê ma mẽ kãm Jejus kot mẽ
panê tanhmã amnhĩ nhĩpêx
to hã harênh to rãhã ho ri mẽ
hkõt apa. Mẽ kot tanhmã hã
anhĩpêx to htãã.

⁹ Na pu htem Jejus kõt
amnhĩ xunhw̄y nhũm Tĩrtũm
ja hã mẽ pahpumu nê Jejus
kukwak ri amnhĩ katut kõt
mẽ pahte amnhĩ tomnuj piitã
rênh pa nê mẽ pahto hkra.
Hãmri nê mẽ pahte hkõt pix
mã amnhĩ nhĩpêx o papa
kaxyw mẽ paxunhw̄y. Ãm
Jejus pix kukwak ri na hte
mẽ pahto hkra nê ã mẽmoj
to mẽ pakutã nojarê t rãhã
ho pa anê. No na hte mẽ
pahte amnhĩ to mex ã mẽ
pahpumunh kõt mẽ pahto
hkra hkêt nê. Amnepêm
kormã mẽmoj piitã hkêt ri na
pre mẽ pakukamã hamaxpêr
õ:

—Koja mẽ nh̄yrmã Ixkra Je-
jus Kris kõt amnhĩ xunhw̄y
pa ja hã mẽ omu nê Ixkra
kukwak ri mẽ ho mex nê.
Anê.

¹⁰ Tã kormã mẽ pahte
amnhĩ tã ã kot mẽ pajarênh
anh̄yrja mar kêt jakamã na
pre Jejus mẽ pahw̄yr wr̄y
nê tanhmã mẽ pahto mex
to. Na pre ty nhũm Tĩrtũm
akup̄ym ho ht̄ir. Jakamã na
pu htem ra amnhĩ kaxyw
hkõt pajamaxpêr nê hkõt
amnhĩ xunhw̄y hãmri nê

nhỹrmã mẽ pahtyk tã nhũm Tĩrtũm kot Kra Jejus nhĩpêx pyrã nẽ akupỹm mẽ pahto mẽ pahtĩr pu mẽ Jejus kukwak ri wa kuri pamex nẽ pahtĩr tũm nẽ papa ho papa. Jakamã na pu htem mẽ pamã pahtyk pyma ho papa hkêt nẽ.

¹¹ Amnepêm na pre Tĩrtũm ixãm nẽ tanhmã inhmã ixãpênh ã karõ hto nẽ inhmã:

—E Pawre kêr ka Jejus nhỹ hã ma hkwyjê jahkre ho ri mẽ hkôt apa. Nẽ ixkapêr o mẽ ahkre mex nẽ. Kêr ka ã amnhĩ nhĩpêx anhỹr rãhã ho ri mẽ hkôt apa. Anẽ.

¹² Tã ã kot inhmã kapêr anhỹr nhũm ixte kapêr kôt amnhĩ nhĩpêx o ixpaja mýrapê na htem Jejus ã tanhmã inhĩpêx kati hto ho pa. Pa hte ixpunuj nẽ amnhĩ xã htỹx kamã ijamak o ri Jejus mã tanhmã amnhĩ nhĩpêx to ho ri mẽ hkôt ixpa. Tã nom tee ri ja hã amnhĩ pumu nẽ amnhĩ kamã ixpijaãm nẽ ixkaprĩ hkêt nẽ. Ixte amnhĩ kaxyw hkôt ijamaxpêr xwỹnhja na ixte tanhmã kot amnhĩ nhĩpêx to hã omunh mex jakamã kot paj ty nhũm mẽ arĩ inhmýr pê Tĩrtũm kapêr mar o pa. Mẽ kot ja hã ixpĩr tã koja mẽ apê Kris kôt ixkwỹjaja inhmýr pê arĩ mẽ kãm harênh o apa. Koja mẽ ã axpên mýr pê amnhĩ nhĩpêx anhỹr o pa rãhã nhũm Pahihti Jejus akupỹn mẽ pahwýr wrý.

¹³ Kwa Ximotre. Ra ixte amã mẽmoj tã karõ rax jakamã kêr ka mar tỹx nẽ hkôt amnhĩ nhĩpêx rãhã o ri apa. Jao Jejus Kris nhỹ hã

mẽ piitã mẽ noo mã amnhĩ kaxyw kãm ajamaxpêr tỹx rãhã nẽ. Nẽ mẽ piitã mẽ ho mex o ri apa.

¹⁴ Ate mẽ kãm tanhmã Jejus jarênh to ho ri apaja ãm hãmri na. Tã koja mẽhõ htỹx ri tanhmã ho kapêr punuj to rý axtem nẽ tanhmã harênh to ka ja hã ama nẽ nẽ kãm akapêr kãm axihtỹx nẽ. Tĩrtũm Karõ ra kot akarõ hwýr ãr jakamã kêr ka ý hã ã Jejus jarênhja jamãr mex o ri apa anẽ.

Pawre kot tanhmã amnhĩ jarênh to

Sikũn Ximotre 4.16-18

¹⁵ Nẽ mãn ka pre ra pika pê As kamã Kris kwý kot ixkaga hã mẽ harênh ma. Na pre Pijerti mẽ Emosti mẽ mẽ ohtõ nẽ tanhmã hamaxpêr to nẽ ixto ajuta hkêt nẽ.

¹⁶⁻¹⁸ ãm Onësipti pix na pre mẽ kurom ijarênh ma nẽ man ixwýr Rõm wýr mõ nẽ ijapêr o ri mẽ hkôt mra nẽ ixwýr kato. Hãmri nẽ xatã ixwýr mra nẽ tanhmã ixto mex to. Jao akupỹm ijamaxpêr o hihtỹx. Ixpê prês nẽ ixkrĩ htã kęp ixkrãmnhwý hã amnhĩ jarênh ã hpijaãm kêt nẽ. Nẽ amnepêm kormã krĩ pê Epes kamã ixpa ri na pre mããnên tanhmã ixto mex to ho pa. Tã ã kot inhĩpêx mex anhỹr o pa jakamã na pa hte ho Pahihti Jejus wý nẽ kãm:

—Pa Pahihti? Onësipti o na pa awý. Kot ixto mex rãhã ho pa jakamã kwa kêr ka ixtã omu nẽ kutã anojarêt rãhã ho apa. Nẽ õrkwý kamã hkwyjaja mããnên tanhmã mẽ ho mex

to. Hāmri nē nhỹrmã akupÿn mẽ ixwÿr wrÿ nē ixtã kamã axukapri hã tanhmã ho mex to. Anē.

2

Mẽ pahte Jejus kôt amnhĩ nhĩpêx pix prãm ã mẽ pamã karõ

Wam Ximotre 6.11-16

¹ E Ximotre. Jejus Kris kot mẽmoj to mẽ pakutã nojarêt rãhã jakamã kwa kêr ka ÿ hã amnhĩ to htÿx nē kãm tanhmã amnhĩ nhĩpêx to ho apa hã amnhĩ kamã akahak o ri apa hkêt nē.

² Ra ate pa tanhmã Tirtũm kapêr o mẽ ahkre htoja mar jakamã kêr ka amnhĩ xô ri ã Jejus kôt mẽ pahkwÿjê jahkre ho apa anē. Mẽ kot amar nē pahpyrãn axpên xô ri ho axpên jahkre ho pa kaxyw.

³⁻⁴ Sôrdat na htem mẽ hkrãhtũm kãm prãm xã hkôt tanhmã amnhĩ nhĩpêx to. Jao tanhmã kute htã kapêr ma nē hkôt amnhĩ nhĩpêx. Tanhmãn à rÿ kãm prãm rÿ tanhmã omnuj to htã kutã amnhĩ to htÿx nē mẽ hkrãhtũm kôt amnhĩ nhĩpêx. Na htem amnhĩ xãpênh kukamã tee ri hamaxpêr o pa hkêt nē. ãm mẽ hkrãhtũm kapêr kôt pix mã amnhĩ nhĩpêx o pa hprãm. Tã kêr ka mẽ uràk nē Pahihti Jejus kôt amnhĩ nhĩpêx rãhã ho ri apa hprãm. Mẽ kot hã tanhmã atomnuj to htãã.

⁵ Nē mẽ hprõt tÿx xwÿnhjaja na htem hkwyjê pê amnhĩ to wa hprãm xãj ãm ja pix kukamã hamaxpêr. Hāmri nē hprõt tÿx prãm xãj mẽmoj kot

mẽ ho hirerek kêt nē amnhĩ jagri htÿx nē. Hāmri nē hprõt tÿx o hkwyjê jakre nē amnhĩ to wa nē pøj nē kot amnhĩ to wa hã mẽmoj to kãnja. Tã kêr ka mẽ uràk nē amã Pahihti Jejus kot amnhĩ nhĩpêx kôt pix mã amã amnhĩ nhĩpêx prãm.

⁶ Nē pur kãm mẽ àpênh xwÿnhjaja na htem mẽ hpur kãm àpênh pix tãnopxar o pa nē àpênh rũnh nē. Kãm kaga hkêt kãm àpênh o pa. Tã àpênh rũnhja kukwak ri ihpur kãm õ rũnh nē ho apkur mex o pa. Nom koja mẽ kãm kaga nē àpênh mex kêt nē hāmri nē õ grire nē apkur mex kêt nē. Tã kêr ka pur kãm mẽ àpênh rũnh xwÿnhjê pyrã nē Pahihti Jejus mã amnhĩ nhĩpêx mex o apa. Nē mẽ uràk nē amã kaga hkêt kãm axãpênh pix tãnopxar o ri apa.

⁷ E na pa ã ajahkre anē Ximotre. Tã kêr ka ixte ajahkreja ma nē kãm ajamaxpêr rãhã nē. Koja Pahihti tanhmã akrã hto ka aprĩ hã mar tÿx nē.

⁸ Nē kêr ka Pahihti Jejus Kris mã ajamaxpêr rãhã ho ri apa. Na pre katorxã hkôt kêp Pahi finat Tawi kanrêhã htãmnhwÿ hã mẽ pahpyrã nē ï ho ï nē kato nē panhõ pika kamã pa ho pa. Tã nhũm prem kupĩ nhũm amnhĩ xã htÿx kamã hamak kãm ty. Hāmri nhũm Tirtũm akupÿm ho htĩr nhũm akupÿm htĩr o htĩr. ã na pre hte harênh anhÿr rãhã ho ri mẽ hkôt ixpa.

⁹ Mÿrapê na prem ijaxã pa arĩ jar ixkrĩ ho ixkrĩ. Na htem

ixte amnhĩ tomnuj xwỳnh pyrək o inhĩpêx nê axte ixte Jejus kapêr jarênh o ixpa pymaj ijaxà. Tã ã mẽ kot inhĩpêx anhỹr tã na hte Kris kôt pahtōjaja arĩ xipãnhã mẽ kãm harênh o ri pa. Koja mẽ tee ri kãm Jejus jarênh o hapêx prãm kaprỹ.

¹⁰ Jakamã kwār mẽ mãmri ã inhĩpêx anê. Koja mẽ arĩ Jejus kot tanhmã mẽ panê amnhĩ nhĩpêx toja mar o pa nhũm mẽ hkwyjaja hkôt amnhĩ xunhwỳ nê nhỹrmã pahpyrà nê kêp Jejus Kris kwỳ hã Tĩrtũm mẽ wa kuri mex nê htĩr tũm nê pa ho pa.

Kris kwỳ kot tanhmã amnhĩ tã grer to hã mẽ harênh

¹¹ Na pu htem mẽ pahpê Kris kwỳ hã ã amnhĩ tã pagrer anê:

Mẽ kot Kris ã mẽ panhĩmex tã kot puj mẽ akupỹm pahtĩr nê kuri pamex nê pahtĩr tũm nê papa ho papa.

¹² Mẽ kot tanhmã Kris ã mẽ pahtomnuj to htã kot puj mẽ arĩ hkôt amnhĩ nhĩpêx o papa rãhã ty nê nhỹrmã ìhkô hã mẽ ho amnhĩptar o papa.

Nom kot puj mẽ amnhĩ kamã pakahak pê mẽ pahpê Jejus kwỳ hkêt ã amnhĩ jarê hã koja Jejus amnhĩ xwar mẽ pahpê hkwyjaja hkêt ã mẽ pajarê.

¹³ Nê mẽ pahte amnhĩ kaxyw Jejus kôt pajamaxpêr kêê tã tanhmã amnhĩ jarênh to xà hkôt

tanhmã amnhĩ nhĩpêx to.

Aa kot mẽmoj tã amnhĩ jarênh kuha hã ri tanhmã amnhĩ nhĩpêx to hkêt. Anê.

Mẽ kot Tĩrtũm kapêr o mẽ ahkre mex xwỳnhjê jarênh

Wam Pêtre 3.15-16

¹⁴ E Ximotre. Ixte ã mẽmoj tã amã karō anhỹrja kêt ka ho mẽ ahkre rãhã ho ri mẽ hkôt apa. Kê mẽ ama nê kãm hamaxpêr rãhã nê.

Nê mẽ kãm anê kê mẽ Tĩrtũm kapêr o mẽ ahkre mex o ri pa nê kapêr ã tanhmã axpên mã àkjêr to hkêt nê. Koja mẽ hã axpên mã akir hãmri nê amnhĩ to mex kêt nê. Hãmri nhũm mẽ kot mẽ kapêr mar xwỳnhjaja ja hã mẽ omu nê tee ri Tĩrtũm kapêr kukamã hamaxpêr nê hkôt amnhĩ nhĩpêx mex kêt nê.

¹⁵ Nê na htem mẽ kãm mẽ àpênh mex xwỳnhjaja mẽ ò patrãw kapêr ma nê hkôt mẽmoj tã àpênh mex nê. Nhũm ò patrãwja hwỳr mra nê àpênh ã omu. Hãmri nhũm amnhĩ wỳr omu nê àmnhĩx noo mã apê. Kãm àpênh mex jakamã amnhĩ kamã kãm uma hkêt nê. Ja pyrà nê kêt ka Tĩrtũm noo mã kãm amnhĩ nhĩpêx mex rãhã nê aprĩ hã kapêr o mẽ ahkre mex o ri mẽ hkôt apa. Kê ã ate amnhĩ nhĩpêx anhỹr ã apumu nê anhỹ hã hkĩnh nê. Ka àpênh xwỳnhhta pyrà nê amnhĩ kamã amã uma hkêt nê noo mã kãm amnhĩ nhĩpêx mex o ri apa.

¹⁶ No mẽ kot Tĩrtũm kapêr o hêx o mẽ pa xwỳnhjaja kêt ka mẽ hkôt ri apa hkêt nê. Nê mẽ

kapēr mar nē ri mē hkôt axām
hkêt nē. Na htem mē kapēr
ma nē mē hkôt amnhī nhīpêx
o pa nē kām Tirtūm kapēr mar
prām kêt nē. Nē gaa nē te kēp
mar pumaj amnhī jamak pro
pyrāk o amnhī nhīpêx.

17 Tỳx ri tanhmā mē ahkre
hto xāja te kot mē hkànhy aa
mex kêt nē ra omnuj tỳx o
mōrja pyrāk. Jao mē kot mē
kapēr mar o mē pa xwỳnhjaja
mē mar pē ra mē hkôt amnhī
tomnuj tỳx o mō. Na hte ra
Imēnew mē Pijertija wa ā htỳx
ri amnhī krā hkôt mē ahkre
anhỹr o pa.

18 Nē Tirtūm o hêx o mē hkôt
pa nē nhỹrmā akupỹm mē
pahto mē pahtĩr kêt ā harēnh
o pa. Hāmri nhũm mē amnhī
tā wa kuma nē tee ri amnhī
kukamā hamaxpēr pē Jejus
kaga nē axte amnhī kaxyw
hkôt hamaxpēr kêt nē. Nom
wa kapērja kot anhỹr kêt.

19 Kêt Tirtūm kapērja ām
hāmri na. Kot mēmoj to
hêx kêt jakamā na pu htem
amnhī kaxyw hkôt pajaxpēr
kaprỳ hkêt nē. Kapēr
ā kaga htũm kot tanhmā mē
pahpē hkrajê jarēnh to nē
harēnh kot:

Tirtūm na kot hkrajê piitā
omunh mex rāhā ho pa
xwỳnh.

Anhỹr o mē pajarēnh. Nē mē
pamā mēmoj tā karō kot:

Kē mē kot Jejus kôt amnhī
xunhwỳr xwỳnhjaja
amnhī tomnuj o pa
hkêt nē. Anē.

*Tirtūm krajaja te kēp prat
mex pyrāk ā mē harēnh*

20 Nē mē hikàxpore rūnh
xwỳnhjaja mē ō xijere nē
mē ō prat xohtōō. Prat kwỳ
muxre nē hkwy omnajre.
Prat pynajre na htem māmri
kamā apku no prat muxreja
ām mēmoj mex pix kaxyw
na htem mēsti hā haxwỳ nē
kamā apku. Kasamēt ā rỳ mē
hkra krā hkēnh ā mē hkĩnh
nhũm htem mēsti hā haxwỳ
nē kamā apku.

21 Tā mē kot Tirtūm kapēr
o hêx o mē pa xwỳnhjê hkôt
hamaxpēr kêt nē mē hkôt
amnhī tomnuj kêt xwỳnhjaja
te mē kot prat muxre pyrāk.
Na htem tām amnhī nhīpêx
nē tanhmā hamaxpēr punuj
to ho pa hkêt nē. Hāmri nhũm
Tirtūm ja hā mē omu nē mē
ỳ hā hkĩnh nē. Hāmri nē te
mē kot prat muxre jaxwỳr nē
kamā apkur pyrā nē mē kot
kām tanhmā amnhī nhīpêx to
ho pa kaxyw mē unhwỳ.

*Mē pahte tām amnhī nhīpêx
ā mē pamā karō*

22 Nē mē àptār nyw ja-
maxpēr punujja kēr ka te ate
hamỳnh nē amnhī katut kôt
rēnh par pyrāk o hipêx Xi-
motre. Jao axte ho ajamaxpēr
o ri apa hkêt nē. Nom mē
hamaxpēr mexja kēr ka hamỳ
nē amnhī krā him hagjê nē ho
ajamaxpēr rāhā ho ri apa. Jao
tām amnhī nhīpêx nē amnhī
kaxyw Tirtūm kôt ajamaxpēr
rāhā nē. Nē amā mē kēp
Kris kôt akwỳjê hkĩnh pē
tanhmā mē ho ajuta hto ho
ri mē hkôt apa. Jao mēmoj
to mē kutā anojarêt rāhā
nē. Na hte ā Pahihti Jejus

kôt amnhī nhīpêx xwÿnhjaja amnhī nhīpêx anhÿr o pa.

²³ Nē kēr ka mē kot htÿx ri amnhī krā hkôt mē ahkre ho mē pa xwÿnhjê hkôt apa hkêt nē. Te ate mē kēp awry hā ri apa pyrā nē mē kapēr ma nē ām ama. Na htem mē kapēr mar o pa nē ra hā axpēn mā tanhmā ākĵēr to ho pa. Jakamā kwarī mē hkôt ri apa hkêt nē.

²⁴ Mē pahte Tirtūm mā amnhī nhīpêx o papa xwÿnhjaja na pu htem mē kurom mēmoj tā axpēn mā paxākĵēr o ri papa hkêt nē. Na pu htem ām mē piitā mē kamā paxukaprī pē mē ho mex nē mē kamā pagryk tokyx anhÿr kêt nē. Nē Tirtūm kapēr o mē ahkre mex nē. Na hte ā mē pahte Tirtūm mā tanhmā amnhī nhīpêx to xwÿnhjaja amnhī nhīpêx o papa anē.

²⁵⁻²⁶ Jakamā koja mēhō ate Tirtūm kapēr o mē ahkreja ma nē tanhmā ho amā kapēr to ka ama nē amnhī tā tanhmā kām akapēr punuj to hkêt nē. Ām kamā axukaprī ho tanhmā hā kām akapēr mex to. Na hte Satanasti te kot amnhīm mē unēnh pyrāk o mē hipêx nē tanhmā mē kām Tirtūm kapēr o hêx to nhūm mē kuma nē hkôt hamaxpēr nē kapēr kôt amnhī nhīpêx. Tā kot kaj mē kamā axukaprī ho mē kām akapēr mex nē nhūm Tirtūm tanhmā mē hkrā hto nhūm mē ama nē hkôt amnhī xunhwÿr japēr. Te Tirtūm kot Satanasti pē amnhīm mē utār pyrāk. Jakamā nhūm mē

hpānhā Tirtūm kapēr mex ā harē nē harēnh o:

—Nā pēr ām hāmri na Tirtūm kapērja. Ām mex o mex. Anē.

3

Jejus akupÿn wrÿk kukamā mē kot amnhī tomnuj xwÿnhjê jarēnh

Matêwre 24.4-13; Korosê 2.16-19; Wam Ximotre 4.1-5; Sikūn Pêtre 2.1-3; Jutre 3-16

¹ Nē Jejus akupÿn mē pahwÿr wrÿk xwÿj ri mē kot tanhmā amnhī nhīpêx toja kot paj hpānhā ixprī hā amā harē ka inhmar tÿx nē Ximotre. Koja Jejus akupÿn mē pahwÿr nojarēt pu mē pahpê hkwÿjaja pahpunuj nē papā.

² Nē Kris kwÿ hkêt xwÿnhjaja koja mē amnhī pix kukamā hamaxpēr o pa.

Jao hikāxpore rax o pikuprōnh pix kukamā hamaxpēr pē hkwÿjê pē ōxÿ htÿx o pa.

Nē mēmoj tā amnhī to jarkrar o pa.

Nē tanhmā hkwÿjê japry hto ho pa.

Nē mē hipêxà nē mē ka-torxà hā hpijaàm kêt o pa.

Nē Tirtūm ā hpijaàm kêt o pa.

Nhūm mēhō tanhmā mē ho mex to nhūm mē amnhī tā mē omu nē ām mē omu nē amnhī tā tanhmā mē kām nē hkêt nē. Rÿ mē kām: “Nā ām hāmri na ka ā ixto mex anē. Nā ja mex.” Anhÿr o mē kām kapēr kêt nē.

³ Mē ukapri hket jakamā koja mēhō tanhmā mē homnuj to nhūm amnhī tā mē omu nē kamā gryk kurē kumrēx nē aa gryk o hapēx kēt nē.

Nē amnhī tā tanhmā hkwýjē ho hēx to ho pa.

Nē htýx ri kām hprām xà hkôt tanhmā amnhī tomnuj to.

Nē oprē ho pijapu pix kukamā hamaxpēr.

Nē axtem nē kām mēmoj mex pumunh prām rý mēmoj mex mar prām kēt nē.

⁴ Nē mēhō ho hkràmnhwý htā axtem nē mē kām mē hkurē xwýnhjē nhīhkram haxà.

Nē hamaxpēr mex kēt o tanhmā amnhī tomnuj to rāhā ho ri pa.

Nē amnhī to rūnh o mē piitā mē hakrenh par ā amnhī to jarkrar o ri pa.

Nē amnhī krā hkôt kām amnhī nhīpēx prām xà hkôt amnhī nhīpēx o pa nē kām Tirtūm kām prām xà hkôt amnhī nhīpēx prām kēt nē.

⁵ Hāmri nē mē kēp hkra hā amnhī jarēnh o pa htā aa hkôt amnhī nhīpēx kēt. Ā Tirtūm kra hket xwýnhjaja amnhī nhīpēx kot anhýr jakamā kwa kēr ka ā mē hkôt apa hket nē Ximotre.

⁶⁻⁷ Na htem hēx rom hkwýjē nhōrkwý hwýr agjē nē kamā tanhmā mēnijē mā hēx to. Mē kot mē mar nē tanhmā amnhī tomnuj to hāmri nē ja hā amnhī pumu nē tee ri amnhī kukamā hamaxpēr

kaxyw. Nē mē kām mē kapēr nyw mar prām tā nhām mē kapēr ma nē nhām mē kapēr mar nē aa Tirtūm kapēr mar nē amnhī kaxyw hkôt hamaxpēr kēt nē. Jakamā nhūm mē kot amnhī tomnuj xwýnhjaja hēx rom mē hwýr mra nē mē ōrkwý hwýr agjē nē tanhmā mē kām mēmoj to hēx to.

⁸ Te kot amnepēm finat Jānre mē finat Jāmtija wa kot amnhī nhīpēxta pyrāk. Na pre finat Mojestija Tirtūm nhý hā tanhmā mē ahkre hto ho pa nhūm Jānre mē Jāmti wa kām mar prām kēt nē. Nē tanhmā ja nē hkwýjē mā kapēr to ho pa. Tā ā mē kot amnhī tomnuj anhýr o mē pa xwýnhjaja na htem wa urāk nē kām Tirtūm kapēr mar prām kēt nē kapēr nē tanhmā hkwýjē mā kapēr to ho pa. Nhūm mē hamaxpēr mex kēt jakamā ām mēmoj punuj pix kukamā hamaxpēr nē mē kuma nē amnhī kaxyw Jejus kôt hamaxpēr kēt nē.

⁹ Tā nom koja mē hkwýjaja tokyx hprī hā mē kot mēmoj to hēx ā mē omu hāmri nē axte mē hkôt hamaxpēr kēt nē nhūm mē rī amnhī pumu. Te amnepēm mē kot hprī hā Jānre mē Jāmti wa kot tanhmā amnhī tomnuj to hā wa omunhta pyrāk.

Mē pahte Jejus ā pahpunuj tā hkaga hket ā mē pamā karō Atre 13.50-14.7, 14.19-22

¹⁰ E Ximotre. Ate ixkôt apa ryy jakamā ra ate tanhmā ixte amnhī nhīpēx ho ixpa hā ixpumunh mex.

Ixte tanhmā Tīrtūm kapēr o
mē ahkre hto ho ixpaja.

Nē inhmā mēmoj to anhūr
prām xwŷnhja.

Nē ixte amnhī kaxyw Kris
kôt ijamaxpērja.

Nē inhgryk tokyx anhūr
kētja.

Nē ixte tanhmā Kris kôt
ixkwŷjē ho mex to ho ri
ixpaja.

Nē ixpunuj nē ixpa htā arī
Kris kôt amnhī nhīpēx
mex o ixpaja.

Ā ixte amnhī nhīpēx anhūr o
ixpaja ate ixpumunh mex.

¹¹ Na pa pre krī pē āxiok
nē Ikōn nē Ristija kamā mē
kām Jejus jarēnh o ixpa nhūm
mē hkwŷjaja Jejus ā tanhmā
inhīpēx to pa amnhī xā htŷx
kamā ijamak o ri mē hkôt
ixpa. Tā nhūm Pahihti Kris
xatā mē kēp ixpytā pa ixtīr pē
mē ĩhkra rūm ijapōx o ixpa.

¹² Na hte Kris kwŷ hkēt
xwŷnhjaja mē pahte Kris kôt
amnhī nhīpēx o papa hā mē
pahtomnuj o pa.

¹³ Nē mē kot Tīrtūm kapēr
o hēx o mē pa xwŷnhjaja koja
arī mē kēp Kris kwŷ hā amnhī
to hēx pē mē nokupyr. Nē
mē kām Tīrtūm kapēr o hēx o
pa. Jao ra mē tāmjaaja amnhī
nokupyr o pa nē amnhī tom-
nuj tŷx kumrēx.

*Pawre kot tanhmā Tīrtūm
kapēr ā kagā jarēnh to*

*Rōmān 15.4; Sikūn Pētre
1.19-21*

¹⁴⁻¹⁵ No ka Ximotre. Am-
nepēm aprīre rūm na pa pre
mē ixohtō nē Tīrtūm kapēr
o ajahkre ho ixpa. Aka-
torxā nē anhō wōwōre nē pa

nē Kris kwŷjaja pa prem ho
ajahkre rāhā ho akôt ixpa
ka mē inhmar tŷx nē amnhī
kaxyw Jejus kôt ajamaxpēr.
Jakamā kwa kēr ka arī hkôt
ajamaxpēr mex rāhā ho ri
apa. Tīrtūm kapērja na htem
mar pē amnhī kaxyw Jejus
Kris kôt hamaxpēr nē hkôt
amnhī xunhwŷ nhūm Tīrtūm
ja hā mē omunh xā hkôt mē
ho hkra.

¹⁶ Tīrtūm kapēr ā kagāja
Tīrtūm kapēr na. Na htem ho
mē ahkre ho pa. Koja mēhō
hkwŷm ri tanhmā amnhī
tomnuj to nē kapēr ma nē tee
ri amnhī tomnujja kukamā
hamaxpēr o ra hkaprī nē.
Rŷ tanhmā amnhī tomnuj to
htā kapēr ā kagā kamā kapēr
nē Tīrtūm kot ā kot amnhī
tomnuj anhūrja nē mē pamā
kapēr ā harēnh ma nē amnhī
tomnujta kaga kurē kumrēx.
Rŷ kamā kapēr nē Tīrtūm kot
tanhmā mē pahte amnhī to
mex to hā mē pamā karō
kamā harē nē kuma. Hāmri
nē ŷ hā hkôt amnhī nhīpēx
mex rāhā nē. Ā na hte Tīrtūm
kapēr kagāja mē kot mar nē
hkôt amnhī nhīpēx xwŷnhjē
ho mex anē.

¹⁷ Na hte mē kot Tīrtūm
mā amnhī nhīpēx o mē pa
xwŷnhjaja kamā harē nē hkôt
amnhī nhīpēx mex pē mē pi-
itā mē ho mex nē ho mē ahkre
mex rāhā ho pa.

4

*Pawre kot mēmoj tā Xi-
motre mā karō*

Korosē 4.5-6

¹ Nē koja nhŷrmā Jejus
Krisja akupŷn mē pahwŷr

wrý hāmri nē mē pahpiitā tanhmā mē pajarēnh to. Ra mē htyk xwýnhjaja nē arī mē pahtír xwýnhjaja nhūm tanhmā mē pahte amnhī nhīpēx to ho papa hā mē pahpumunh kôt tanhmā mē pajarēnh to. Jao Tirtūm mē wa kuri mē pahtír tūm nē papa ho papa hā mē pajarē rý wa kuri pahtír tūm nē papa hkēt ā mē pajarē. Jakamā kwa Ximotre kot paj Tirtūm mē Jejus Krisja wa noo mā mēmoj tā amā karō ka inhmar tỳx nē.

²⁻⁴ Koja nhýrmā mē kēp Tirtūm kra hkēt xwýnhjaja axte kām Tirtūm kapēr mar prām kēt nē nhām mē kapēr pix mar prām o ri pa. Jao amnhī kukamā hamaxpēr o:

—Nà inhmā Tirtūm kapēr mar prām kēt. Kot mēmoj pi-itā nē mē hkurē kēnā. Kot paj hpānhā mēhō kot mēmoj nē mē hkurē hkēt xwýnhjē kapēr pix mar o ri ixpa. Nà kot paj anē. Ja na inhmā hprām. Nom kot paj axte Tirtūm kapēr mar kēt nē.

Anhýr jao kapēr kaga nē hpānhā htỳx ri nhām mē ujarēnh pix ma nē hkôt hamaxpēr. Koja mē ā amnhī nhīpēx anhýr o pa. Jakamā kwa kēr ka arī mē kām Jejus kot tanhmā mē panē amnhī nhīpēx to hā harēnh rāhā ho ri mē hkôt apa Ximotre. Mē kām mar prām kēt tā māmri ri mē kām harē. Nē nhýri mēhō pumu nē kām harē. Mē kām mar prām xwýnhjē mā harē nē mē kām mar prām kēt xwýnhjaja ka määnēn mē kām

harē. Nhūm mēhō tanhmā amnhī tomnuj to ka hā omu nē tanhmā nē kām akapēr to kē hkaga tokyx anē nē akupým tām amnhī nhīpēx. Rý nhūm mēhō tām amnhī nhīpēx o pa ka ja hā omu nē hā kām akapēr nē kām:

—Ām hāmri na ka hte Tirtūm kôt amnhī nhīpēx mex nē. Anē.

Hāmri nē anojarēt kēt kām mē kām Tirtūm kapēr o mē ahkre rāhā ho ri apa.

⁵ Nē tām ri amnhī nhīpēx rāhā nē. Mē kot Jejus ā tanhmā anhīpēx to htā kēr ka ý hā amnhī to htỳx nē arī mē kām kapēr jarēnh o ri mē hkôt apa. Jao Tirtūm mā amnhī nhīpēx mex rāhā nē. Kēr ka ā mē hkôt amnhī nhīpēx anhýr o ri apa Ximotre.

Pawre kot ra htyk kaxyw ā amnhī jarēnh

Atre 20.17-35

⁶ Nē mē kot ixpír xà hā arīgroja ra hwýr ahtēp o mō. Kot paj pēr tokyx ty. Amnepēm na prem Tirtūm mā mēmoj nhōr kaxyw nē mē hkōm xà kamā mēmo kagōja py nē mē kot Tirtūm mā mēmoj nhōr xà hā mēstija ā hkapír pa nhūm hapēx. Tā te ixpē mē hkōm xà kamā mēmo kagō pikapírta pyrāk. Kot paj tokyx ty nē jar ijapēx.

⁷ Na pa ra Pahihti Jejus mā amnhī nhīpēx mex o ri ixpa. Mē kot tanhmā hā ixtomnuj to htā pa hkaga hkēt nē arī hkôt amnhī nhīpēx mex rāhā ra ixyk kaxyw.

⁸ Ixte Pahihti kām hprām xà hkôt amnhī nhīpēx mex o ri

ixpa jakamā koja amnhī tā tanhmā ixto mex to. Nom papxpix ixto mex kêt nē. Na hte âm hāmri tām mē pahpiitā mē panhīpêx. Jakamā nhÿrmā kot mē piitā tanhmā mē harênh to xà hā arĭgrota ā koja mē pahkĭnh pê mē pahte amnhī wÿr kamā pajamak o papa xwÿnh piitā mē pamā mā mēmoj mex gō.

Pawre kot amnhī wÿr Ximotre hwÿr

⁹ Kwa na pa ra ato ijamak tÿx nē Ximotre. Kwa kêt ka amnhĭm anojarêt nē tokyx tanhmā amnhī to hpa nē man ixwÿr mō.

¹⁰ Na pre ra Kresêx ma Karatas wÿr mō nhÿm Xitre ma pika pê Tawmas wÿr mō. Nhÿm Tēmti ra tanhmā hamaxpêr to nē âpênh gryk ā ixkaga nē ma akupÿm Tesarôn wÿr mō.

¹¹ âm Rukre pix na arĭ ixkôt pa jakamā kêt ka anojarêt hāmri nē ahte amôr kêt nē. Makre mā anē kê man akôt ixwÿr mō nē tanhmā ixto ajuta hto ho pa.

¹² Nē Xikitre na pa pre ra Epes wÿr kumê.

¹³ Nē Torôt kām Kapti nhôrkwÿ kamā ixte kry pê inhô kamĭs pa hkà ryti rer jakamā kêt ka anojarêt nē inhmā apy nē man inhmā o mō. Nē inhô kagàta ka määnên inhmā amÿ nē o mō. Nē mēmo mry kà hā ixte mēmoj tā kagàta ka määnên apy nē mân inhmā o mō. E kêt ka anojarêt nē ixkukrêxja jamÿ nē ixwÿr ho mō.

Tanhmā Aresānti kot Pawre nhīpêx to hā harênh

¹⁴⁻¹⁵ Nē na pre kàx o mēmoj nhīpêx xwÿnh Aresāntija ixtomnuj nē. Pa pre mē kām Tĭrtūm kapêr o mē ahkre ho ri mē hkôt ixpa nhÿm tee ri inhma nē kām mar prām kêt nē. Hāmri nē ixkutā amnhī xām nē inhīpêx kati nē. Nom koja Pahihti Jejus ixtā tanhmā ho. Kwa kêt ka amnhī nē omunh mex nē Ximotre.

Pahihti Jejus kot Pawre mā hamaxpêr o hihtÿx ā harênh

¹⁶ Nē pahi kot mē mar xà hā ixkre kamā wam ixte mē kām amnhī jarênhhta ā na pre mēhō ixyr pê mē kām tanhmā ijarênh to hkêt nē. Na prem piitā mē umaj ixkaga hpa. Nom kwār mē māmri ā amnhī nhīpêx anē. Tĭrtūm kot ixtā tanhmā mē hoja na inhmā hprām kêt.

¹⁷ âm Pahihti Jejusja pix na pre mē kurom ixkaga hkêt nē. Na pre ixto ixihtÿx nē pa ÿ hā mē kām tanhmā mē panê kot amnhī nhīpêx to hā harênh pa. Nhÿm Ijaew kêt xwÿnh kot inhmar o hkrĭ xwÿnhjaja ixujarênh mar o hkrĭ nhÿm Tĭrtūm inhnê tanhmā mē ho nhÿm mē xpĭr kêt nē.

¹⁸ Koja Pahihti mē kutā ixto ixihtÿx rāhā nē mēmo arĭgro hā amnhī wÿr ixto api. Pa Tĭrtūm mē wa kuri inhmex kumrêx nē ixtĭr tūm nē ixpa ho ixpa. Pahihti mex o mex jakamā kêt pu mē kām mex o mex ā harênh rāhā ho papa nē aa jam panhÿrer kêt nē.

*Pawre kot tanhmã
hkrãmnhwỳjê jarēnh to*

¹⁹ Nē kêr ka Prisire mẽ
mjên Akir wa kãm ijarē. Nē
Onēsipti hprō nē hkrajaja ka
mãânēn mẽ kãm ijarē.

²⁰ No Eras kormã Korīt kãm
pa. Nē Toropti na pre à nē pa
Mírêt kãm kure nhũm ixkôt
môr kêt nē.

²¹ Kwa kêr ka amnhĩm ano-
jarêt nē amgrà pê man tokyx
ixwỳr mō Ximotre.

Nē ota Epti mẽ Prutēhti mẽ
Rĩnre mẽ Krawreja awỳr hpěr
mẽ. Nē jar Kris kôt pahkwỳjê
piitã awỳr hpěr mẽ.

²² E kê Pahihti Jejus ato mex
rãhã nē mẽ apiitã mẽ akutã
nojarêt rãhã ho pa.

Tã ãm ja pix. Ixpê Pawre
na pa awỳr kagàja nhĩpêx nē
kumẽ.

Xitre Pawre kot Xitre hwÿr kagà nê mênh

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hõ na pre. Nhÿm pre Xitre Pawre hkôt pa hã mytwrÿ xohtô nê. Tã kêp Jejus kôt hkwyjê nhõ pastô kaxyw gô hipôk pê Kret ã arîk nê Tirtûm kapêr o mē ahkre ho mē hkôt pa. Jakamã nhÿm Pawre kãm kagàja nhîpêx nê kamã kãm mēmoj tã karõ. Tirtûm kapêr o mē hêx xwÿnhjaja tanhmã kot ja nê mē hkurê to hã kãm karõ. Nê mē kot Tirtûm kapêr o mē ahkre mex pix xwÿnhjaja Jejus kwÿjê kaxyw kot mē rênh ã kãm karõ. Nê Jejus kwÿjaja kot axpên to mex o pa hã kot mē kãm karõ kaxyw kagàja kamã mē kaxyw kãm hã kagà. ã na pre Pawre Xitre mã mēmoj tã karõ nê hã kagà nê hwÿr mênh anê. Nê kãm:

¹ Pa Xitre? Xà amex? Ixpê Pawre na pa awÿr kagà nhîpêx nê kumê. Na pa hte Tirtûm mã tanhmã amnhî nhîpêx to ho ixpa. Nê ixpê Jejus Kris nhÿ hã hkrajê jahkre o ixpa xwÿnh jakamã na pa hte mē kot amnhî kaxyw hkôt hamaxpêr tÿx kaxyw tanhmã mē kãm ixkapêr to ho ri ixpa. Nê mē kot hprî hã mar kaxyw Tirtûm kapêr o mē ahkre mex nê.

² Mē kot inhmar nê nhÿrmã htyk nê ma Tirtûm mē Jejus wa hwÿr àpir nê wa kuri htîr tûm nê pa ho pa hã amnhî kukamã hamaxpêr kaxyw. Amnepêm na pre Tirtûm ã mē pahpê hkrajê hkukamã mē pajarênh anê. Nê ãm hãmri ã mē pajarênh anê. Na hte mēmoj tã amnhî to hêx kêt nê.

³ Tã ra mē pakukamã mē pamã mēmoj to amnhîrit nê inhmã kapêr o:

—E Pawre kêr ka ma mē hpiitã mē hkôt ri apa nê mē kãm ixkapêr jarê nê mē kãm: “Kot kaj mē amnhî kaxyw Tirtûm Kra hkôt ajamaxpêr nê hkôt amnhî xunhwÿ nhÿm Tirtûm ja hã mē apumu nê mē ato hkra. Ka mē nhÿrmã atyk tã nhÿm amnhî wÿr mē ato api ka mē wa kuri amex kumrêx nê atîr tûm nê apa ho apa.” Anhÿr o mē kãm ixkapêr jarênh o ri mē hkôt apa Pawre.

⁴ Anhÿr o inhmã kapêr tã pa ã amã ixkapêr nê hã kagà anê Xitre. Pajamê pahte amnhî kaxyw Jejus kôt pajamaxpêr nê hkôt amnhî xãm jakamã te apê ixkra pyrâk. Jakamã na pa hte ato Mēpanhîpêêxã maati Tirtûm mē mē papytâr xwÿnh Jejus Krisja wa hwÿr rãhã ho ri ixpa nê wa kãm:

—Pa Tirtûm mē Pahihti wa. Nã Xitre ho na pa wa awÿ. Kwa kêr ka wa kutã anojarêt rãhã ho ri apa. Kê wa akuk-wak ri hamakêtkati nê àmnhîx pa ho pa. Anê.

*Kris kwÿ hkrãhtûmjaja
kot tanhmã amnhî nhîpêx to*

kaxyw mẽ hã kãm karõ

Wam Ximotre 3.1-13

⁵ Nẽ na pa pre Kret rũm inhnojarêt hãmri nẽ amã axapênh ã karõ nẽ Kret kãm are nẽ man mõi. Na pa pre amã:

—E kêr ka jar arĩk nẽ mẽ kãm ixkapêr jarênh jatur xàm mẽnh o mẽ hkõt apa. Nẽ Kris kõt pahkwýjê mã mẽ hkrãhtũmjê xunhwý. Kret kãm krĩ piitã hkõt. Na pa pre ixprĩ hã tanhmã amã mẽ harênh to. Tã kêr ka ate inhmar xà hkõt mẽ hkwýjê kapi nẽ mẽ unhwý. Koja mẽ ã amnhĩ nhĩpêx anhÿr o pa ka ja hã mẽ omu nẽ mẽ unhwý.

⁶ Koja mẽ tãm amnhĩ nhĩpêx o pa nhũm mẽ piitã axpên mã mẽ mex ã mẽ harê.

Nẽ mẽ hprõ pix tânopxar o pa nẽ kuhpa hã nhãm mẽnijê ho amnhĩkati hkêt nẽ.

Nẽ kê mẽ hkrajaja hipêêxà pyrã nẽ amnhĩ kaxyw Jejus kõt hamaxpêr o pa. Jao hipêêxà nẽ katorxà wa kapêr ma nẽ wa hkõt amnhĩ nhĩpêx. No ri htýx ri amnhĩ tomnuj o pa hkêt nẽ.

Anhÿr o na pa pre mẽ hã amã karõ.

⁷ Jejus kõt pahkwýjê hkrãhtũmjaja kot Tĩrtũm nhÿ hã hkrajê mã kapêr mex o pa jakamã na htem tãm amnhĩ nhĩpêx o pa.

Nẽ amnhĩ pix kukamã hamaxpêr o pa hkêt nẽ.

Nẽ gryk tokyx anhÿr kêt nẽ.

Nẽ kagõxyhti japrõr nẽ ho pipãnh o pa hkêt nẽ.

Nẽ oprê ho pa hkêt nẽ.

Nẽ kàxpore rũnh prãm xàj hêx rom tanhmã amnhĩ nhĩpêx to hkêt nẽ.

Na htem ã amnhĩ nhĩpêx anhÿr hkêt nẽ.

⁸ ãm ãmnhĩx amnhĩ nhõrkwý hwÿr mẽ hwÿr o pa.

Nẽ mẽ piitã mẽ kutã nojarêt rãhã nẽ.

Nẽ tãm hamaxpêr nẽ tãm mẽ piitã mẽ hipêx o pa.

Nẽ amnhĩ tomnuj pymaj amnhĩ to htýx pẽ Tĩrtũm kõt amnhĩ nhĩpêx mex rãhã ho pa.

⁹ Nẽ mẽ kot Tĩrtũm kapêr mar týx jakamã kê mẽ arĩ hã nohtýx nẽ mar týx xà hkõt amnhĩ xô ri ho hkwýjê jahkre mex o pa.

Nẽ ho mẽ piitã mẽ hamaxpêr o hihtýx o pa.

Nhũm mẽhõ Tĩrtũm kapêr kwým ri tanhmã ujarênh to nhũm hã kuma nẽ hprĩ hã kãm tanhmã harênh to kê mar mex nẽ.

E Xitre. Na hte ã Jejus kwýjê hkrãhtũmjaja amnhĩ nhĩpêx anhÿr o pa. Jakamã kêr ka aprĩ hã Kret kãm Jejus kõt pahkwýjê kapi nẽ mẽ kot tanhmã amnhĩ nhĩpêx to ho pa hã mẽ omu. Nhũm mẽhõ ã amnhĩ nhĩpêx anê ka ja hã omu hãmri nẽ kệp Jejus kwýjê hkrãhtũm kaxyw ãm.

Kret nhõ xwýnhjaja kot tanhmã amnhĩ tomnuj to hã mẽ harênh

Xitre 3.9-11

¹⁰ Nẽ atar Kret kãm na hte mẽ ohtõ nẽ kãm mẽ õ pahi kapêr mar prãm kêt nẽ htýx ri

tanhmã Kris kwÿjê mã kapêr to ho pa. Na hte Ijaew kwÿjaja ã amnhĩ nhĩpêx anhÿr o pa. Jao Ijaew kêt xwÿnh kot Jejus kôt amnhĩ xunhwÿr xwÿnhjê mã kãm:

—Kwa mẽ ixpyrà nê mẽ ixpê Ijaewjê kot amnhĩ nhĩpêx kôt mãn amnhĩ nhĩpêx kêt wehe.

¹¹ Anhÿr o mẽ kãm kapêr jakamã kwa kêr ka ã mẽ kapêr anhÿrja nê mẽ kãm akapêr kãm axihtÿx nê. Na htem hpijaàm kêt o hikàxpore hprãm xàj ã mẽ kãm kapêr anhÿr o pa. Jao mẽ hamaxpêr o ahkà nhũm mẽ kuma nê tee ri hamaxpêr.

¹² Na pre ra mẽ hkwÿjê hõ tanhmã mẽ harênh to. Mẽ ahkre xwÿnhjê hõja mẽ harênh o:

—Kret nhõ xwÿnhjaja na htem hêx pix o pa. Nê oprê nê kãm kaga nê apkur xà pix kukamã hamaxpêr o pa. Anê.

¹³ ãm hãmri ã mẽ harênh kot anhÿr. ã mẽ kot amnhĩ nhĩpêx anhÿr jakamã kwa mẽ kot amnhĩ nhĩpêxja nê mẽ kãm akapêr kãm axihtÿx o ri mẽ hkôt apa Xitre. Kê mẽ ã amnhĩ nhĩpêx anhÿr kêt nê. Nê mẽ kãm anê kê mẽ amnhĩ kaxyw Tirtũm kôt mãn hamaxpêr tÿx nê.

¹⁴ Nê kê mẽ axte Ijaewjê xujarênh nê mẽ kot amnhĩ nhĩpêx kôt amnhĩ nhĩpêx kêt nê. ã mẽ kot amnhĩ nhĩpêx o pa hã mẽ kãm karõ xwÿnhjaja na prem Tirtũm kapêr kaga hpa.

¹⁵ Mẽ kot Jejus kôt amnhĩ xunhwÿr xwÿnhjaja tãm mẽ

hamaxpêr o pa jakamã na htem Tirtũm kot mẽmoj piitã ho kator xwÿnh pumu nê piitã mex ã harê. No mẽ kêp Jejus kwÿ hkêt xwÿnhjaja na htem hamaxpêr punuj pix o pa. Nê mẽmoj mex pumu nê mex kêt ã harê. Mex tã nhũm mex kêt ã harênh o pa.

¹⁶ Nê mẽ kêp Tirtũm kra hã amnhĩ jarênh tã amnhĩ tomnuj pix o pa. Jao kêp hkra hã amnhĩ jarênh o hêx nê kapêr kwÿm ri amnhĩ nhĩpêx pix o pa. Nhũm Tirtũm tee ri ja hã mẽ omu nê kãm mẽ hkĩnh kêt nê. Tirtũm mã mẽ kot amnhĩ to mex kwÿ mẽ hã jêt kêt kumrêx.

2

¹ E Xitre kot paj tanhmã ate mẽ ahkre hto hã amã karõ ka inhma nê amnhĩ xô ri mẽ kãm hã karõ ho ri apa.

Mẽmy wejjaja kot tanhmã amnhĩ nhĩpêx to kaxyw mẽ hã kãm karõ

² Nê kêr ka mẽmy wejjê mã anê kê mẽ amnhĩ to àptàr mex nê pa.

Nê pipãnh nê ri pa hkêt nê. Nê mẽ gryk kaxyw htÿx ri hkwÿjê hã hpêr o pikênh kêt nê.

Kê mẽ tãm hamaxpêr nê tãm amnhĩ nhĩpêx o pa.

Nê amnhĩ kaxyw Jejus kôt hamaxpêr tÿx rãhã nê.

Nhũm mẽ hkwÿjaja kot mẽmoj tã tanhmã mẽ homnuj to htã kê mẽ arĩ tãm amnhĩ nhĩpêx o pa nê amnhĩ tã tanhmã mẽ ho hkêt nê.

E kêr ka ã mẽmy wejjê mã ja hã akarõ anê.

Mēni wejjaja kot tanhmã amnhĩ nhĩpêx to kaxyw mẽ hã kãm karõ

Wam Korõt 14.34-35; Wam Ximotre 2.9-15, 3.11; Wam Pêtre 3.1-6

³⁻⁴Nē mēni wejjê mã anē kê mẽ kãm Jejus kĩnh xàj tãm ri amnhĩ nhĩpêx o pa.

Jao axpēn jakwa kamã nhãm mẽ hixi ho rêr o pa hkêt nê.

Nē kagôxyhti ho pipãnh o pa hkêt nê.

Nē mẽ kãm anē kê mēni xaptâr nywjê jahkre mex o pa. Mẽ kot mẽ mar nê mẽ urak nê tãm amnhĩ nhĩpêx kaxyw. Jao mẽ kãm mẽ mjên nê mẽ hkrajê japê hã mẽ kãm mẽmoj to anhÿr o mẽ kutã nojarêt rãhã ho pa.

Kêr ka ã mēni wejjê mã akapêr anê.

Mēni xaptâr nywjaja kot tanhmã amnhĩ nhĩpêx to kaxyw mẽ hã kãm karõ

⁵Nē mēni xaptâr nywjê mã anē kê mẽ tãm hamaxpêr pē tãm amnhĩ nhĩpêx o pa.

Nē mẽ òrkwÿ kamã àpênh mex o pa.

Nē mẽ mjên kapêr ma nê hkôt amnhĩ nhĩpêx.

E. ã mēni xaptâr nywjê mã karõ anê. Koja mẽ ã amnhĩ nhĩpêx anhÿr o pa hãmri nhũm mẽ piitã mẽ kot amnhĩ nhĩpêx ã mẽ omu nê mẽ harênh o:

—Tĩrtũm kapêrja mex kumrêx. Mẽ kot hkôt amnhĩ nhĩpêx o mẽ pa xwÿnhjaja na htem tãm amnhĩ nhĩpêx mex o pa. Anê.

Mēmy xaptâr nywjaja kot tanhmã amnhĩ nhĩpêx to kaxyw mẽ hã kãm karõ

Wam Ximotre 4.12; Sikũn Ximotre 2.22; Wam Pêtre 5.5

⁶Nē kêr ka mēmy xaptâr nywjê mã anē kê mẽ mẽmoj punuj pē amnhĩ to htÿx o pa. Mẽ hamaxpêr punuj nē mẽ kot tanhmã amnhĩ tomnuj to pē amnhĩ to htÿx o pa.

⁷Nē kêr ka ajaxwÿja tãm amnhĩ nhĩpêx rãhã ho ri mẽ hkôt apa Xitre. Mẽ kot ja hã apumunh nê akôt amnhĩ nhĩpêx o pa kaxyw. Nom kêr ka tanhmã mẽ ahkre hto hkwȳm ri tanhmã amnhĩ nhĩpêx to hkêt nê. ãm Tĩrtũm ã apijaàm o akatât kôt mẽ kãm kapêr o mẽ ahkre pē tãm amnhĩ nhĩpêx o ri apa.

⁸Nē kêr ka tãm akapêr rãhã ho ri apa. Kêr kê mẽ kãm mẽ pahkurê xwÿnhjaja ja hã ama nê amnhĩ kamã hpijaàm hãmri nê apê Kris kwÿ hã tanhmã ato kapêr punuj to hkêt japêr.

Mẽ kãm mẽ àpênh xwÿnhjaja kot tanhmã amnhĩ nhĩpêx to kaxyw mẽ hã kãm karõ

Epes 6.5-8; Korosê 3.22-25; Wam Ximotre 6.1-2; Wam Pêtre 2.18-25

⁹Nē kêr ka mẽ kãm mẽ àpênh o mẽ pa xwÿnhjê mã anē kê mẽ ò patrãw kãm hprãm xà hkôt amnhĩ nhĩpêx o pa.

Jao mẽ kapêr ma nê hkôt amnhĩ nhĩpêx mex nê.

Nē amnhĩ tã tanhmã mẽ kãm kapêr punuj to hkêt nê.

10 Nê kê mẽ kêp mẽmoj to àhkĩnh kêt nê.

Nê tãm mẽ hipêx rãhã nê.

Nê kãm hkukrêx jamãr mex o pa.

Koja mẽ ã amnhĩ nhĩpêx anhÿr o pa nhũm mẽ õ patrãw amnhĩ tã mẽ omu nê mẽ ÿ hã hkĩnh nê pa. Hãmri nê hamaxpêr o:

—Hêxta waa nê. Inhmã àpênh xwÿnhhta na hte inhmã àpênh mex o pa. Na hte ixkukrêx nê ixkrit jamãr mex nê ixpê mẽmoj to àhkĩnh kêt nê. Nã mẽ kot Tĩrtũm kapêr kôt amnhĩ nhĩpêx o mẽ pa xwÿnhjaja na htem tãm amnhĩ nhĩpêx o pa. Pêr Tĩrtũm kapêr ãm hãmri na. ãm mex o mex. Anê.

E Xitre kêr ka mẽ kãm mẽ àpênh xwÿnhjê mã ã mẽ kot amnhĩ nhĩpêx anhÿr ã karõ.

Tanhmã Jejus kãm mẽ papajê xaj amnhĩ nhĩpêx to hã harênh

Epês 2.8-10; Wam Tesarõn 1.9-10

11 Nê Tĩrtũm kot mẽmoj to mẽ pakutã nojarêr rãhã ho pa jakamã na hte mẽ pahte Kra hkôt amnhĩ xunhwÿr xwÿnhjê ho hkra pu mẽ nhÿrmã wa kuri pahťir tũm nê papa ho papa.

12 Na hte ã mẽ pamã kapêr o amnhĩrĩt anê nê mẽ pamã:

—E kêr ka mẽ apê ixkra hã tãm amnhĩ nhĩpêx rãhã ho ri apa nê axte tanhmã amnhĩ tomnuj to nê tanhmã ajamaxpêr punuj to hkêt nê. Mẽ ate amnhĩ tomnuj pê amnhĩ to htÿx nê ixkapêr kôt pix mã ri amnhĩ nhĩpêx rãhã nê. Anê.

13 Na pu htem ã amnhĩ nhĩpêx anhÿr o papa jao pahkĩnh nê mẽ papytãr xwÿnh Jejus Kris jamãr o papa. Koja nhÿrmã mẽ panhõ Tĩrtũm xihtÿx xwÿnhja akupÿn mẽ pahwÿr kumê pu mẽ mex o mex ã omu.

14 Na pre Jejus amnhĩ grõnh kôt mẽ pahwÿr wrÿ nê mẽ pahpiitã mẽ pahte amnhĩ tomnuj pãnhã amnhĩrer kaxyw htyk o Tĩrtũm mã amnhĩrer pa. Mẽmo kaxyw na pre ã mẽ panê amnhĩ nhĩpêx anê? Nã mẽ pahpê hkwyjja na kãm hprãm. Nê mẽ pahte tãm ri Tĩrtũm kapêr kôt amnhĩ nhĩpêx o papaja na kãm hprãm. Nê mẽ pahte urak nê mẽ piitã mẽ kutã panojarêr rãhã ho papaja na kãm hprãm. Jakamã na pre ã mẽ panê amnhĩ nhĩpêx anê.

15 E Xitre. Ixte mẽmoj tã amã karõja kêr ka ho Kris kwÿjê jahkre mex o apa kê mẽ ama nê kapêr kôt amnhĩ nhĩpêx o pa. Nhũm mẽhõ tanhmã amnhĩ tomnuj to ka hã omu nê Tĩrtũm nhÿ hã tanhmã nê kãm akapêr to kê axte hkêt nê. Tã mãn ka inhma. Kêr ka ã Kris kwÿjê jahkre mex o apa anê.

3

Tanhmã Kris kwÿ kot amnhĩ nhĩpêx to hã mẽ kãm karõ

Rõmãn 13.1-10; Epês 2.1-10

1 Nê kêr ka Kris kôt akwyjê mã anê kê mẽ ho amnhĩptãr xwÿnhjê kapêr ma nê mẽ hkôt amnhĩ nhĩpêx o pa. Nê mẽmoj to mẽ kutã nojarêr rãhã ho pa.

² Nē mẽ kām anē kē mẽ tanhmā hkwỳjê mã kapēr punuj to ho pa hkêt nē. Rỳ mẽmoj tâ mẽ kām àkjêr kêt nē. Kê mẽ tām mẽ hipêx nē mẽ kamã ukaprĩ pē mẽ ho mex rãhã ho pa. Na hte ã Kris kwỳjaja axpên nhĩpêx o pa anē.

³ Kormã mẽ pahte hkôt amnhĩ xunhwỳr kêt ri na pu prem ã amnhĩ nhĩpêx anhỳr kêt nē. Na pu prem Tĩrtũm mã pajamexpêr kêt nē kapêr kôt ri amnhĩ nhĩpêx hkêt nē. Nē amnhĩ tomnuj pix kukamã pajamexpêr o ri papa. Nē amnhĩ pix kukamã pajamexpêr. Jao mẽ pamã pam amnhĩ nhĩpêx prãm xà kôt pix mã tanhmã amnhĩ nhĩpêx to ho ri papa. Nē axpên tomnuj nē. Nē axpên kãm pagryk rãhã ho papa. ã mẽ pahte amnhĩ nhĩpêx anhỳr ho papa jakamã nhũm pre mẽ piitã kãm mẽ pahkĩnh kêt nē. Pu mẽ pajaxwỳja pamã mẽ hkĩnh kêt nē.

Tanhmã Tĩrtũm kot mẽ pahto mex to hã harênh

Rômãn 5.6-8; Epes 2.4-10

⁴ Tã pu prem Tĩrtũm kêp mẽ papytãr xwỳnh ã harênh ma. Kot tanhmã mẽ panê amnhĩ nhĩpêx to hã harênh ma nē mex o mex nē mẽ pakamã ukaprĩ hã harênh ma.

⁵⁻⁶ Hãmri nē amnhĩ kaxyw hkôt pajamexpêr nē hkôt amnhĩ xunhwỳ nhũm amnhĩ tâ mẽ pahpumu nē mẽ pahto hkra. Nom mẽ pahte tanhmã amnhĩ to mex to hã mẽ pahpumunh kôt mẽ pahto

hkra hkêt nē. Mẽ pahte tanhmã amnhĩ to mex tore hã. Na pre mẽ pakamã ukaprĩ nē ã mẽ papytãr anē. Tã tanhmã na pre mẽ papytãr to wehe? Nà na pre Jejus Kris kukwak ri te kot mẽ pane mẽ pahte amnhĩ tomnuj piitã kuhõnh par pyrãk o mẽ panhĩpêx. Hãmri nē mẽ pahwỳr amnhĩ Karõ rē nhũm mẽ pahwỳr agjê nē mẽ pamã mẽ pahte amnhĩ nhĩpêx nyw gõ. ã na pre Tĩrtũm Jejus Kris kot mẽ panê htyk kukwak ri mẽ pahto mex rax anē hãmri nē mẽ pahwỳr amnhĩ Karõ rēnh anē.

⁷ Tã mẽmo kaxyw na pre ã mẽ pahto mex anē? Nà kãm mẽ pajapê jakamã na pre ã mẽ panhĩpêx anē. Mẽ pahte amnhĩ tomnuj xwỳnh tâ kãm mẽ pajapê htyx nē kãm tanhmã mẽ pahto hprãm kêt nē. Nē mẽ pahwỳr Kra Jejus mẽ nhũm wrỳ nē mẽ pahte amnhĩ tomnuj pãnhã mẽ panê ty. Jakamã mẽ pahte amnhĩ kaxyw hkôt pajamexpêr nē hkôt amnhĩ xunhwỳr xwỳnhjaja Jejus kukwak ri mẽ pahpê Tĩrtũm kraa. ã na pre Jejus mẽ pahto mex anē. Jakamã kot puj mẽ nhỹrmã Tĩrtũm mẽ wa kuri pahtĩr tũm nē pamex nē papa ho papa. Kojã wa nhỹrmã ã mẽ pahto mex anē.

⁸ ãm hãmri na pa amã ã ja jarênh anē Xitre. Jakamã kwa kêr ka inhma nē inhmar tỳx nē. Nē ho amnhĩ kaxyw Tĩrtũm kôt mẽ hamaxpêr xwỳnhjê jahkre mex o ri apa. Kê mẽ amar xà hkôt tãm ri

amnhĩ nhĩpêx o pa.

⁹ Nê mẽ kot htỳx ri mẽmoj tã axpên mã àkjer o mẽ pa xwỳnhjaja kêr ka mẽ hkôt apa hkêt nê. Nê mẽ hkukamã mẽ higêt kôt apa hkêt nê. Rỳ finat Mojes kot Tirtũm nhỹ hã kapêr ã axpên mã mẽ àkjer xwỳnhjê hkôt apa hkêt nê. Na htem ã ri axpên mã àkjer anhỹr o pa nê tãm amnhĩ nhĩpêx kêt nê.

¹⁰ Nê koja mẽ akwỳjê hõ amnhĩ krã hkôt tanhmã hkwỳjê mã kapêr to nhũm mẽ kuma nê hã axpên mã akir nê axpên pê pikjêr kaxyw. Ka ja hã omu nê ã kapêr anhỹrja nê kãm akapêr kê axte hkêt nê. Hãmri nhũm ama nê ãm ama nê arĩ ã mẽ kãm kapêr anhỹr japêr ka axte nê kãm akapêr. Tã ra ate nê kãm akapêr o axkrut tã nhũm arĩ ã kapêr anhỹr o axkrunêpxi japêr ka ja hã omu hãmri nê mẽ amnhĩ nê hano kê axte mẽ apê Kris kwỳjê hkôt ri pa hkêt nê.

¹¹ ã mẽ kot amnhĩ nhĩpêx anhỹr o mẽ pa xwỳnhjaja na mẽ ra Jejus wỳr pry kaga nê htỳx ri tanhmã amnhĩ tomnuj to ho pa. Nê ã amnhĩ nhĩpêx anhỹr o pa jao kêp Kris kwỳ hêt ã amnhĩ to amnhĩrit.

Pawre kot kagà jatur xà kamã tanhmã Xitre mã kapêr to

¹² Nê kot paj tokyx ma Nĩkop wỳr mō. Kêr pa tokyx hwỳr pōj nê amgrà pê krĩ nhõ xwỳnhjê hkôt ixpa. Jakamã kot paj tokyx ma awỳr Atêmti rỳ Xikitre mẽ. Kê mō nê awỳr pōj ka tokyx tanhmã amnhĩ

to hpa nê man ixwỳr mō pu mẽ Nĩkop kamã axpên pumu.

¹³ Nê ota mẽ akuri Apor mẽ axiwôkat Jêntija. Koja wa mẽmo arĩgro hã ma krĩ hõ hwỳr nojarêt ka wa kãm mẽ apkur xà hkwỳ gō kê wa ma ỵ kamã mōr kêt nê.

¹⁴ Nê kêr ka Kris kwỳjê mã anê kê mẽ arĩ òrkwỹ pix kãm hkrĩ ho hkrĩ hkêt nê. Kê mẽ tanhmã axpên to mex to ho axpên kôt pa. Nhũm mẽhõ kêp amrakati kê mẽ tanhmã ho ajuta hto. Mẽ kãm anê kê mẽ ã axpên nhĩpêx anhỹr o pa.

¹⁵ Nê ota jar Kris kôt pahkwỳjê piitã awỳr hpêr mẽ Xitre. Nê kêr ka atar Kris kôt mẽ pahkrãmnhwỳjê mã mẽ ijarê.

E ãm ja pix. Kê Pahihti Jejus mẽ akutã nojarêt rãhã ho pa. Ixpê Pawre na pa amã ã ixkapêr nê hã kagà nê awỳr mẽnh anê.

Piremõ

Pawre kot Piremõ hwÿr kagà nê mênh

Pawre na pre kagàja nhîpêx nê hkràmnhwÿ Piremõ hwÿr kumê. Na pre Piremõja amnhîm kãm àpênh xwÿnh Onesti japrô. Kàxpore ho haprô nhùm amarî kãm àpênh o pa. Tã tanhmã hamaxpêr to nê hkaga nê ma umaj krî hõ hwÿr hprôt nê tèn amûxu nê kamã pa ho pa. Hãmri nê Pawre pumu nê kãm amnhî jarê. Pawre arî kêp prês nê hkrî ho hkrî nhùm Onesti omu nê kãm amnhî jarê. Hãmri nhùm Pawre kãm Jejus jarê nhùm kuma nê hkôt amnhî xãm kurê kumrêx. Hãmri nhùm Pawre ja hã omu nê hkràmnhwÿ Piremõ mã kagà nhîpêx nê kamã Onesti xyr pê kãm kapêr. Hãmri nê hipêx pa nê Onesti mã kugõ nê ma akupÿm õ patrãw Piremõ wÿr kumê nhùm ma mõ. Nhùm Pawre kagàja kamã kãm kapêr nê kãm:

¹ Pa ixkràmnhwÿ Piremõ? Xà amex? Ixpê Pawre na pa awÿr kagà nhîpêx nê kumê. Apê Kris kôt ixtõ hã inhmã akînh. Na ka hte ixpyrà nê Kris mã tanhmã amnhî nhîpêx to ho apa. Ta ot pa awÿr kagàja kamã ixpêr mê.

² Amã nê anhõrkwÿ kamã Tirtûm kapêr mar kaxyw mê kêp Jejus kwÿ hã mê pikuprõnh xwÿnhjê hwÿr. Nê Kris kôt pahtõx Apti mê Akip wa hwÿr kumê. Akipja na hte

mê pahpyrà nê Pahihti Jejus mã tanhmã amnhî nhîpêx to ho pa.

³ Na pa hte mê ato Mëpanhîpêêxà maati Tirtûm mê Pahihti Jejus Kris wa hwÿr rãhã ho ri ixpa. Kot mêmioj to mê akutã nojarêt rãhã nhùm wa ÿ hã mê ajamakêtkati nê axàmnhîx apa ho apa kaxyw.

*Pawre kot Piremõ nhÿ hã
hkînh ã harênh*

⁴⁻⁵ Na pa pre ajarênh ma Piremõ. Na htem xatã tanhmã inhmã ajarênh to nê ajarênh o:

—Hêxta waa nê. Piremõ na hte amnhî kaxyw Pahihti Jejus Kris kôt hamaxpêr tÿx nê kãm mê ixpê Kris kôt hkwyjê piitã hkînh pê tanhmã mê ixto mex to ho ri mê ixkôt pa.

Anhÿr o inhmã ajarê pa mê kuma nê anhÿ hã ixkînh nê ato Tirtûm wÿr rãhã ho ixpa nê ato hwÿr o:

—Pa Tirtûm. Na xep hte Piremõ kãm akînh tÿx nê akwyjê ho mex rãhã ho pa. ãm hãmri na hte ã mê hipêx anhÿr o pa.

⁶ Na xep mê piitã mê kãm tanhmã Jejus kot mê inhnê amnhî nhîpêx to hã harênh o ri mê hkôt pa. Jakamã kêr ka tanhmã mê kot mar xwÿnhjê hkrã hto kê mênhrî hã mar tÿx nê Kris kot tanhmã mê ho mex to hã amnhî tã omu.

Anhÿr o ato kuwÿ.

⁷ Ate Kris kwÿjê ho mex o apa jakamã te ate pa ixto mex pyràk Piremõ. Na htem anhÿ hã hkînh nê pa. Pa ijaxwÿja ajarênh ma nê anhÿ hã ixkînh

tỳx nẽ jar mẽ hagiênh xà kamã ixkrĩ.

Piremõ kot Onesti kamã ukapri hã Pawre kot kãm karõ Rõmãn 15.7; Epes 4.31

8 Nà ixte amã mẽmoj jarênhja tanhmã kute hkêt. Kot paj âm amã mẽmoj jarẽ nẽ hã awỳ. Nom kot paj Kris nhỹ hã amã tanhmã hã karõ hto hkêt nẽ.

9 Kot paj âm pahte axpẽn to pahkràmnhwỳ hã hã awỳ. Ra ixwej tỳx nẽ Kris ã arĩ mẽ hagiênh xà kamã ixkrĩ htã mẽmoj tã awỳ ka inhma nẽ inhmã ho anhỹr japêr ko.

10 E amã àpênh xwỳnh Onestija na ixte amã harênh kaxyw. Na pre man ixwỳr mỗ. Ixpê prês nẽ ixkrĩ nhũm ixwỳr mỗ. Pa omu nẽ kãm Jejus jarẽ nhũm inhma nẽ pahpyrà nẽ amnhĩ kaxyw hkôt hamaxpêr nẽ hkôt amnhĩ xãm. Jakamã te kêp ixkra pyràk. Hãmri nẽ ixto ajuta mex o pa.

11 Xep kormã Jejus kôt amnhĩ xãm kêt ri na pre amã àpênh mex kêt nẽ. Nẽ kãm kaga nẽ htỳx ri tanhmã àpênh to ho pa. Tã ra Jejus kôt amnhĩ xãm hãmri nẽ katàt kôt inhmã àpênh mex o pa. Nẽ ixto ajuta mex nẽ. Koja akupỹm amã apê hãmri nẽ amã àpênh mex nẽ.

12 Jakamã ot pa akupỹm awỳr kumẽ ixkràmnhwỳ. Nom inhmã hapê jakamã koja ma akupỹm mỗ pa ho ama nẽ. Tã kot paj akupỹm awỳr kumẽ.

13 Kot jar ixri arĩk nẽ apãnhã tanhmã ixto ajuta hto ho paja na inhmã hprãm.

14 Jakamã kot kaj amã akupỹn ixwỳr mẽnh prãm nẽ mãmri ixwỳr amẽ. Nom ixte ja pumunh kêt. Kam nẽ amã hprãm xà hkôt tanhmã kãm akapêr to. Kãm anẽ kê akuri arĩk nẽ amã àpênh o pa rỳ akupỹn ixwỳr amẽ.

15 Nom konẽn. Mãn akupỹm awỳr mỗr nẽ kêp Kris kôt akwỳ hã amã àpênh mex kaxyw na pre Tirtũm ixwỳr kumẽ nhũm ixwỳr mỗ nẽ ixri Jejus kôt amnhĩ xãm nẽ ixri pa hã mytwrỳ hkwy hapêx pa akupỹm awỳr kumẽ.

16 Nom ra kêp amã àpênh xwỳnh pix kêt mãânẽn kêp Kris kôt atõõ. Jakamã kot kaj wa atar axpẽn kôt Pahihti Jejus kôt tãm amnhĩ nhĩpêx o ri apa. Nom mãânẽn kêp ixkràmnhwỳ mex ã inhmã hapêê.

17 Jakamã kot kaj ixpê Kris kôt akràmnhwỳ hã ijarẽ hã kot kaj mãânẽn inhmã ho mex o apa.

18 Nẽ wam amã àpênh o pata ã mãn pre apê mẽmoj to ahkĩ rỳ akàxpore hkwy ho ahkĩnh japêr. Tã pa kot paj hpãnhã amã amnhĩre. Ka inhmã tanhmã kàxpore jarênh to pa amã amnhĩre.

19 Ixpê Pawre kot paj tanhmã kot ato tewẽn toja pãnhã amã amnhĩre. E pa amnhĩ nhĩhkra ho ã amã amnhĩ jarênh ã kaga anẽ. Nom ajaxwỳja na ka tanhmã ixto tewẽn to Piremõ. Na pa pre amã Jejus kot mẽ panê

htyk ã harẽ ka pre inhmar
xà hkôt hkôt amnhĩ xãm. Jao
ixpyrà nẽ atĩr tũm nẽ apa ho
apa mã xwýnhnta pãnhã te ate
ixto tewẽn pyràk.

²⁰ E kwa ixkràmnhwỳ. Ix-
pyrà nẽ apê Kris kwỳ jakamã
kêr ka ixkamã axukaprĩ hã
inhmã Onesti ho mex nẽ. Kêr
pa ja hã ajarẽnh ma nẽ ixkĩnh
nẽ tãm ijamaxpêr.

²¹ Nà ra ixte apumunh mex
kênã. Kot kaj ixte hã awỳrta
kôt hipêx. Ja kaxyw na pa
amã kagàja nhĩpêx nẽ awỳr
kumẽ. Nom kot kaj ãm ja pix
ho anhỹr kêt nẽ. Kot kaj ixte
hã awỳrja kôt amnhĩ krã hkôt
tanhmã ho mex to. Nà kot kaj
ho anẽ.

*Pawre kãm Piremõ hwỳr
mõr nẽ omunh prãm ã harẽnh*

²² Nẽ Tĩrtũm kot mẽ awỳr
inhmẽnh kaxyw mẽ ate ixto
hwỳr o apa jakamã koja apu
tokyx ma mẽ awỳr inhmẽ.
Jakamã kwa kêr ka ixkutêp
tanhmã mẽmoj to mex to. Kêr
pa mẽmo arĩgro hã mõi awỳr
pôj ka ra ixkutêp tanhmã
amnhĩ to hpa nẽ ãm ixpix kãm
ajamak o apa.

²³ Nẽ ota Epasja awỳr hpêr
mẽ. Na hte ixpyrà nẽ Jeju
Kris ã mẽ hagjẽnh xà kamã
kêp prês nẽ hkrĩ ho hkrĩ.

²⁴ Nẽ Makre nẽ Aristak nẽ
Tẽmti nẽ Rukre mẽ awỳr hpêr
mẽ. Na htem ixpyrà nẽ Kris
mã tanhmã amnhĩ nhĩpêx to
ho pa nom ixrom mẽ kêp prês
kêt.

²⁵ E kê Pahihti Jeju Krisja
akutã nojarêt rãhã ho pa. Ta
ãm ja pix. Ixpê Pawre na pa
amã kagà nẽ awỳr kumẽ.

Eprêw Ijaew hwÿr kagà

Kagà ja na pre Ijaew ò amnhĩ kwÿjê mã hipêx nom mẽ pahte hipêx xwÿnh nhĩxi mar kêt. Na pre tanhmã hamaxpêr to nê amnhĩ nhĩxi hã kagà hkêt nê. Apu Pawre rÿ apu axtem mēhōja na pre hipêx. Ijaew kwÿjaja uràk nê Jejus kôt amnhĩ xunhwÿr xwÿnhjê mã na pre hipêx nê mẽ hwÿr kumê. Ijaewjaja mẽ hixi hō pê Eprêw. Jakamã nhũm kagà nhĩpêx xwÿnhja mẽ hwÿr hipêx nê kumê. Nê kamã mẽ kãm mẽmoj jarênh rax nê tanhmã Jejus jarênh to.

Nê mẽ hwÿjaja hwÿjê hkĩnhã kãm Jejus prãm kêt jakamã na prem hkaga nê mẽ kot amnhĩ nhĩpêx tũm o ujanãr prãm xàj tanhmã mẽ homnuj to ho pa. Jakamã nhũm kagà nhĩpêx xwÿnhja tanhmã ja hã mẽ kãm kapêr to.

Nê na pre tanhmã Tĩrtũm nhõrkwÿ kaàkre hã kagà hto. Nê kaxkwa kamã õrkwÿ mexja nhũm tanhmã hã kagà hto nê mex o õrkwÿ kaàkre jakrenh ã harê.

Nê mẽ kot Jejus ã amnhĩ xà htÿx kamã hamak o pa htã mẽ kot tee ri ja hã amnhĩ pumunh nê Jejus kaga nê mẽ hkurê kamã hihtÿx nê. ã mēhōja mẽ kãm kapêr anê nê hã kagà nê mẽ hwÿr kumê. Nê mẽ kãm kapêr o:

¹ Pa Kris kôt ixkwÿjaja? Xà mẽ amex? E ot pa mẽ amã kagà nhĩpêx nê mẽ awÿr kumê. Amnepêm Tĩrtũm na pre mẽ panhĩgêtjê hwÿr ÿ hã kapêr jarênh o ri mẽ pa xwÿnhjê rē nhũm mẽ xatã mẽ kãm kapêr jarênh o ri mẽ hkôt pa. Ahpÿnhã tanhmã mẽ kãm kapêr to ho amnhĩrīt o mẽ hkôt pa. Nhũm Tĩrtũm xatã mẽ hkanrêhã mẽ hkra nê mẽ htãmnhwÿjê hwÿr mẽ hwÿjê rē nhũm mẽ kãm kapêr jarênh o ri mẽ hkôt pa. Nom mẽ kãm kapêr piitã harênh kurê kumrêx kêt nê. Na prem ãm hwÿr pix jarê. Tã nhũm hpãnhã mẽ hwÿjaja wamtajê mÿr pê mẽ hwÿr mra nê axte mẽ kãm hwÿr jarênh o ri pa. Jao ra mẽ kãm harênh jatur xãm mēnh o mō.

²⁻³ Tã nhũm Tĩrtũm Kraja mẽ pahwÿr wrÿ nê mẽ pamã kapêr jarênh jatur xãm kumê. Kêp Tĩrtũm Kra jakamã te kot amnhĩ nhĩpêx pyrã nê pa. Uràk nê mex o mex. Nê wa hihtÿx xàja tipxi. Nê wa àhpumunh tÿxja mããnēn tipxi. Jakamã mẽ pahte pano ho Tĩrtũm pumunh kêt tã Jejus pumunh pê te mẽ pahte Tĩrtũm pumunh pyrãk. Uràk nê kot amnhĩ to rax o mẽ pahpiitã mẽ pajakrenh par. Amnepêm kormã mẽmoj kêt ri nhũm Jejus Tĩrtũm kukwak ri mẽmoj piitã ho kator pa. Tã koja Tĩrtũm nhÿrmã kãm mẽmoj piitã õr pa. Kaxkwa kamã mẽmoj piitã nê jar pika piitã hkôt nhũm kãm piitã õr pa.

Nê Jejus xàhpumunh xà pix

kukwak ri na mēmoja arī rāhāā. Na pre mē panē mē pahte amnhī tomnuj piitā hpānhā amnhīrer par kaxyw mē panē ty. Hāmri akupŷm htīr hāmri nē ma akupŷm kaxkwa hwŷr api. Tīrtūm xihtŷx o hihtŷx xwŷnhja wŷr akupŷm api. Nē ō krī kamā upōk rūm pahi maati hkrī xā hā kuri hkrī ho hkrī. Nē ĩhkō hā mē pahto amnhīptār rāhā ho hkrī.

Jejus mē Tīrtūm kapēr o mē wryk xwŷnhjē jarēnh

⁴⁻⁵ Nē Jesus kot amnhī to rax o Tīrtūm kapēr o mē wryk xwŷnhjē jakrenh jakamā na pre ā Tīrtūm kām kapēr anē nē kām:

Na ka amnhī to rax o mē kot ixkapēr o mē wryk xwŷnhjē jakre.

Mē kot inhmā tanhmā amnhī nhīpēx to ho mē pa xwŷnh na mē.

No mē kurom apē Ixkra kumrēx jakamā amex o ate mēmoj piitā hakrenh par.

Nē apē pika nhō xwŷnhjē hwŷr ixte amēnh mā xwŷnh na ka. Nā apē Ixkra kumrēx.

Kot paj jarāhā ixpē anhīpēêxā hā mē piitā mē kām amnhī to amnhīrīt. Pa na ixpē anhīpēêxā.

Anhŷr o Kra Jejus mā kapēr. Na pre kapēr o mē wryk xwŷnhjē mā ā kapēr anhŷr kēt nē. Jejus mā pix mā ā kapēr anē.

⁶ Nē koja nhŷrmā akupŷn mē pahwŷr Kra mēnh kaxyw

hāmri nē kapēr o mē wryk xwŷnhjē mā kām:

E ota Ixkrata. Ixkra kumrēx na. Kot amnhī to rax o mē piitā mē hakrenh par.

Jakamā kēr ka mē apiitā kutā arôrōk nē kām mex o mex ā harē.

Anhŷr o mē kām kapēr.

⁷ Nē kapēr o mē wryk xwŷnhjē na pre axtem tanhmā mē harēnh to nē mē harēnh o:

Ixkapēr o mē wryk xwŷnhjaja na pa hte nhŷhŷm mē kurē nhŷm htem inhmār xā hkōt ma nhŷhŷm mra nē inhmā tanhmā amnhī nhīpēx to.

Te ixte ma nhŷhŷm kōk nē kuwyja mēnh nhŷm ixkapēr kōt nhŷhŷm mōrja pyrāk.

Anhŷr o mē harē.

⁸ No ā Krata jarēnh anhŷr kēt nē. Na pre tanhmā kām kapēr to nē amnhī pyrā nē kēp Tīrtūm ā harē nē kām:

Pa Tīrtūm? E ka kot kaj mē ho amnhīptār rāhā ho akrī. Nē akatāt kōt mē ho amnhīptā.

⁹ Koja mē tām amnhī nhīpēx ka ja hā mē omu nhŷm ja amā mex nē.

No koja mē tanhmā amnhī tomnuj to ka ja hā mē omu nhŷm ja apē omnuj nē. Mē kot tanhmā amnhī tomnuj to ho paja na omnuj tŷx.

Tā ate inhmā hprām xā hkōt amnhī nhīpēx jakamā na pa mē kaxyw axām ka akīnh kām mē ho amnhīptā.

Ixpê anhõ Tĩrtũm na pa ã amã
ixkapêr anê. Anê.

¹⁰ Hãmri nê kãm:

Pa Pahihti. Nà amnepê m ko-
rmã mẽmoj kêt ri na ka
pre ixkukwak ri pika
nê kaxkwa ho akato.
Ãm hãmri na ka pre ã
amnhĩ nhĩpêx anê.

¹¹ Tã nom koja nhỹrmã hamê
wa hapêx pa. Ãm kax-
ipix kot kaj kurom arĩ
arãhãã nê aa ajapêx kêt
nê.

Kaxkwa nê pika koja wa
nhỹrmã te ixkre hã pô
htũm kot amnhĩ nhĩpêx
pyràk.

¹² Kot kaj wa hipêx o te mẽ kot
ixkre nê pô htũm mã
hikranh par nê hpãnhã
hã nyw janhôr pyràk.

Jao pika nê kaxkwa htũm o
ajapêx pa nê hpãnhã
nyw nhĩpêx. Kaxkwa
nyw nhĩpêx nê pika
nyw nhĩpêx.

Nom kot kaj pika nê kaxkwa
tũmta pyrà nê aa awej
nê axirerek kêt nê.

Kot kaj arĩ anyw nê axihtyx
rãhã apa ho apa nê aa
ajapêx kêt nê. Arãhã
atĩr tũm nê apa ho apa
xwỹnh na ka.

¹³ E jar inhĩhkô hã nhỹ
nê inhmã mẽ ho
amnhĩptâr o akrĩ.

Kot paj mẽ kãm akurê
xwỹnhjê pynênh pa nê
man awỹr mẽ o mra nê
anhĩhkram mẽ haxàr
pa. Anê.

Ã na pre Tĩrtũmja Kra Jejus
mã kapêr anê. No kapêr o

mẽ wrỹk xwỹnhjê mã ã kapêr
anhỹr kêt nê.

¹⁴ E kot paj hpãnhã ixprĩ
hã mẽ amã Tĩrtũm kapêr o
mẽ wrỹk xwỹnhjê jarê ka mẽ
inhma. Tĩrtũm mã na htem
tanhmã amnhĩ nhĩpêx to ho
pa. Na hte nhỹrmã kuri mẽ
htĩr tũm nê mẽ pa mã xwỹnhjê
hwỹr mẽ kurê nhũm mẽ ma
mẽ hwỹr wrỹ nê tanhmã mẽ
ho ajuta hto ho pa. Na htem ã
amnhĩ nhĩpêx anhỹr o pa.

2

*Mẽ pahte Jejus kaga hkêt ã
mẽ pamã karõ*

¹ Tã ã Tĩrtũmja Kra kot
amnhĩ to rax o kapêr o mẽ
wrỹk xwỹnhjê jakrenh ã
harênh kot anhỹr jakamã
kwa kêr pu mẽ kapêr mar tỳx
rãhã nê hkôt pix mã amnhĩ
nhĩpêx o papa. Kot pu mẽ
ho anhỹr kêt hãmri nê gaa nê
hkaga.

² Na pre Tĩrtũm kapêr o mẽ
wrỹk xwỹnhjaja amnepê mã
mẽ panhĩgêjtê hwỹr wrỹ nê
Tĩrtũm nhỹ hã mẽ kot tanhmã
amnhĩ nhĩpêx to ho pa hã mẽ
kãm karõ nê ma akupỹm api.
Nê katàt kôt ri mẽ kãm Tĩrtũm
kapêr jarênh o pa. Hãmri
nhũm mẽ kot hkôt amnhĩ
nhĩpêx nê mar mex xwỹnhjaja
nhũm mẽmoj mẽ kãm mex nê.
No nhũm mẽ kot mar nê ãm
mar xwỹnhjaja koja mẽmoj mẽ
kêp omnuj nê.

³ Koja nhỹrmã mẽmoj mẽ
kêp omnuj tỳx kumrêx nhũm
mẽ tee ri amnhĩ tã omu nê
tee ri kêp amnhĩptâr prãm
kaprỹ nê mex kêt nê pa.
Nom mẽ kot Tĩrtũm kapêr o

mar tÿx xwÿnhjaja koja mẽmoj mẽ kãm mex o mex. Koja Tirtũm amnhĩ katut kõt mẽ kot amnhĩ tomnuj rēnh pa nē axte kãm hamaxpēr kēt nhũm mẽ kuri htĩr tũm nē mex rāhā nē pa ho pa. Na pre Pahihtĩ Jejus mẽ kot kapēr mar o kuhē xwÿnhjē kumrēx mā ā ja jarēnh anē nē mẽ kãm:

—Nà kot kaj mẽ amnhĩ kaxyw inhmā ajamaxpēr nhũm Tirtũm ixtā mẽ apumu nē mẽ anē mẽ ate amnhĩ tomnuj piitā ho hapēx pa nē axte kãm hamaxpēr kēt nē. Anē.

Hāmri nhũm mẽ kot kapēr mar nē hkõt mẽ pa ho mẽ pa nē xwÿnhjaja mar tÿx nē amnhĩ xō ri mẽ pamā harēnh o ri pa. Nē mẽ pamā:

—Nà ām hāmri. Nà ā ja jarēnh kot anhÿr. Anē.

⁴ Hāmri nē mẽ pamā aa mẽ pahte mẽmoj pumunh kēt kwÿ ho anhÿr o ri mẽ pahkõt pa. Tirtũm Karō kot ja kaxyw mẽ ho mẽ àhpumunh tÿx jakamā nhũm mẽ ŷ hā ahpÿnhā tanhmā mẽ pamā amnhĩ nhĩpēx to ho pa. Mē pahte ja hā mẽ omunh nē kamā pano puma kaxyw. Nē ā mẽ pajamaxpēr anē nē pajamaxpēr o:

—Nà ām hāmri na mẽ pamā ā Jejus jarēnh anē nē ŷ hā ā amnhĩ nhĩpēx anhÿr o pa.

Anhÿr o pajamaxpēr kaxyw na prem ā mẽ pahkõt amnhĩ nhĩpēx anhÿr o pa.

Mē pahpē Jejus tō nē htōx ā mẽ pajarēnh

Juāw 1.14; Rōmān 8.3-4; Piripos 2.5-11; Korosē 2.9;

Wam Juāw 4.2

⁵ Nē na pre Tirtũm amnhĩ kukamā tanhmā amnhĩ jarēnh to nē nhÿrmā kot akupÿm mẽmoj piitā ho nyw nē tām mẽmoj piitā ho amnhĩptār o pa hā amnhĩ jarē. No na pre kapēr o mẽ wryk xwÿnhjē mā ā mẽ kot amnhĩ nhĩpēx anhÿr ā mẽ kãm karō hkēt nē. Koja jajaja mẽ pahto amnhĩptār o pa hkēt nē.

⁶ Tirtũm kapēr ā kagā htũm kot ja jarēnh kot:

Kwa Tirtũm. Nà ām hāmri na ka hte pika ja kamā ri mẽ ixpa xwÿnhjē jamār mex rāhā ho apa.

Akĩnhā amarĩ ri mẽ ixpa xwÿnh tā amā mẽ ijapēē.

Nē mẽ ixkutā anojarēt rāhā ho apa.

⁷ Na ka hte tanhmā mẽ inhĩpēx to pa mẽ te mẽ ixpē akapēr o mẽ wryk xwÿnhjē pyrāk.

Jao mẽ urāk nē akukwak ri mẽ inhmex nē ixpa ho ixpa.

Mē uràn mẽ ixàhpumunh nē ixihtÿx kēt tā mẽ inhmex nē ixpa.

⁸ Na ka pre ra ate mẽmoj to akator xwÿnh piitā mẽ inhĩhkram haxā.

Nà ām hāmri na ka pre ā mẽ inhĩpēx anē Tirtũm. Amex o amex. Anē.

Na pre ra mẽmoj piitā mẽ panhĩhkram haxā. Pika nē kaxkwa nē kapēr o mẽ wryk xwÿnhjaja nē mẽkarōmnuti nē kot mẽmoj piitā mẽ hipēxja nhũm mẽ panhĩhkram haxār

pa. Mē pahte ïhkô hã ho amnhĩptâr o papa kaxyw. No na pu mē kormã piitã ho amnhĩptâr kêt nē.

⁹ No kêt Jejusja na Tĩrtũm mē pakurom ïhkram mēmoj piitã haxâr par kumrêx. Kormã pika ja kamã ri pare ri na pre tanhmã amnhĩ nhĩpêx to nē Tĩrtũm kapêr o mē wrÿk xwÿnhjê hkĩnhã te amnhĩ to grire pyrã nē amnhĩ xà htÿx kamã hamak kãm ty. Tĩrtũm kãm mē pahto mex prãm xàj ã mē pahpiitã mē panê htyk anê. Tã nhũm Tĩrtũm akupÿm ho htĩr nē akupÿm amnhĩ wÿr ho api nē kêp Pahi Maati mex o mex ã harê. Na pre ã Jejusja mē panê amnhĩ nhĩpêx anê nhũm Tĩrtũm ja hã omu nē kukwak ri mē pahto mex nē.

¹⁰ Nē Tĩrtũm kot mēmoj piitã ho kator jakamã mēmoj piitã õ na. Na pre mē pakukamã hamaxpêr o:

—Inhmã ixkra xohtô hprãm. Kot paj nhÿrmã man amnhĩ wÿr mē ho api kê mē ixri mex rãhã nē pa ho pa. Nã kot paj ã mē hipêx anê. Nē Ixkra Jejus koja kêp mē õ Pahihti. Koja mē uràk nē mēmoj punuj pumunh o pa hãmri nē à htÿx kamã hamak o kêp mē õ Pahihti mã tãm. Anê.

¹¹ Na hte Jejus mē panê mē pahte amnhĩ tomnuj rē nē hpãnhã mē pamã mē pahte amnhĩ nhĩpêx nyw jagjê nhũm Tĩrtũm ja hã mē pahpumunh kôt mē pahto hkra. Kêp Jejus Nhĩpêxã nē kêp Mēpanhĩpêxã maati jakamã nhũm Jejusja mē

pahpê htô nē mē pahpê htôx ã mē pajarē nē mē panhÿ hã hkĩnh nē.

¹² Tĩrtũm kapêr ã kagã htũm ã mē pajarēnh kot anhÿr. Kamã Jejusja Mēpanhĩpêxã maati mã mē pajarēnh kot:

Koja ixtô nē ixtôxjaja akapêr mar kaxyw axpên wÿr akuprô pa ma mē hkôt mra nē mē kãm akapêr jarē nē mē ïhkô hã amex ã gre. Anê.

¹³ Hãmri nē kãm:

Kot paj amnhĩ kaxyw akôt pix mã ijamaxpêr mex o ri ixpa. Anê.

Hãmri nē hpãnhã kãm:

Ot pa akrajê hkôt ri ixpa ho ixpa.

Ka na ka pre mē kêp ixtô nē ixtôx kaxyw inhmã mē agô.

Koja mē ixpyrà nē amnhĩ kaxyw amã hamaxpêr rãhã ho pa Tĩrtũm. Anê.

¹⁴ Nē mē pahpê pika nhô xwÿnhjaja na pu htem ãm ri panhĩ pix ã papa. Nē panhĩ kamã pahkamrô hã ri papa. Jakamã na pre Jejus kot mē panê htyk kaxyw mē pahwÿr wrÿ nē mē pahpyrà nē ï ho mē pakamã kato. Tã mēmo kaxyw na pre ï ho ï nē mē pahkôt pa? Nã ï ho htyk o Satanasti pê hihtÿx xà ho hapêx par kaxyw na pre ã amnhĩ nhĩpêx anê. Satanasti kêp mē kot amnhĩ tomnuj xwÿnhjê hpãm nē kêp mē htyk xwÿnhjê hpãm.

¹⁵ Jakamã na hte kot mē pahtã ïhkra pikamÿr pyrãk o mē panhĩpêx pu mē ÿ hã

pamã pahtyk pyma nê ri papa. Tã ra Jejus kot mē pahwÿr wrÿk nê te kêp mē papytâr pyrâk o mē panhîpêx jakamã pu mē tee ri pahtyk kukamã pajamxpêr o ri pamã ma ho papa hkêt nê.

16 Nê Tîrtûm kapêr o mē wrÿk xwÿnhjê ho mex kaxyw na pre Jejus pika hwÿr wrÿk kêt nê. Mē panhîgêt finat Apraãw pyrâ nê mē panhî ho panhî xwÿnhjê ho mex kaxyw na pre wrÿ.

17 Ijaew nhô patrejaja na pre htem mē kot amnhî tomnuj mÿrapê mē hpãnhã Tîrtûm mã mry hkwy pa nê hkamrô kapî nê mē ho Tîrtûm wÿ. Kot hã mē omunh nê mē mex ã mē harênh kaxyw. Tã nhûm Jejus wrÿ nê mēmo mryta pyrâ nê ã mē panê hkamrô pikapîr anê. Kaxyw na pre mē pahtô maatija mē pahwÿr î ho î nê wrÿ nê mē pahpyrà nê ni nhôhy rûm kato. Jao kêp mē pahto Tîrtûm wÿr xwÿnh maati. Na pre Tîrtûm kãm hprãm xà hkôt mē panê mē pahte amnhî tomnuj pãnhã amnhîrer pa. Tã kot mē pahpyrà nê mēmoj punuj pumunh nê amnhî xà htÿx kamã hamak o pa jakamã kêp mē pakamã ukapîrî xwÿnh ã pixi mex na.

18 Kormã htyk kêt ri na pre mē pahpyrà nê omnuj nê ri pa. Nhûm mēkarõmnuti nhô pahi kot tanhmã amnhî tomnuj to hprãm xàj tee ri hkôt kãm ahkrox o pa hkapyrÿ nhûm hkôt amnhî nhîpêx kêt nê amnhî nê ho axtem nê.

Jakamã koja Satanastija urâk nê tanhmã mē panhîpêx to nhûm Jejus mē pahtã omu nê amnhî pyrâ nê tanhmã kêp mē panhîpêx to pu mē ÿ hã kutã amnhî to htÿx nê papa.

3

Jejus kot amnhî to rax o Mojes jakrenh ã harênh Juãw 1.17-18

1 E ixkrãmnhwÿjaja. Ra Tîrtûm kot mē pahte kapêr mar nê tãm amnhî nhîpêx o ri papa kaxyw mē pahto hkra jakamã kwa kêr ka mē Jejus kot tanhmã mē pamã amnhî nhîpêx toja mã ajamxpêr rãhã ho ri apa. Na pre Tîrtûm mē pahwÿr kumê nhûm mē pahwÿr wrÿ nê Tîrtûm kapêr o mē pajahkre ho ri mē pahkôt pa. Nê te kêp mē panhõ patre pyrâ nê mē pahto Tîrtûm wÿr o pa.

2 Na pre Tîrtûm finat Mojes kwÿ kaxyw Mojesja xãm nhûm kãm hprãm xà hkôt tanhmã mē hipêx to ho pa. Tã nhûm hpãnhã mē pakaxyw Kra Jejusja xãm nhûm Mojes pyrâ nê Tîrtûm kãm hprãm xà hkôt pix mã tanhmã mē panhîpêx to ho pa. Hamê na pre wa Tîrtûm jamaxpêr xà hkôt tanhmã kãm mē panhîpêx to ho pa.

3 Koja mēhõ amnhîm ixkre mex nhîpêx nê hipêx pa nhûm hkwyjaja hwÿr mra nê omu nê mex kumrêx ã harê. Nom kot hipêx xwÿnhnta ãhpumunh xà hkôt hipêx jakamã tãm na mex o kot ixkreta jakrenh. Ja pyrâ nê finat Mojes kot

amnhĩ to rax tã nhũm Je-
jus kot amnhĩ to rax o kot
hakrenh. Mojes te kêp ixkre
nhĩpêxta pyræk no Jejus te kêp
ixkre nhĩpêx xwÿnhnta pyræk
jakamã kot amnhĩ to rax o kot
Mojes jakrenh.

⁴ Nê mẽ kot ahpÿnhã amnhĩ
krã hkôt tanhmã ixkre nhĩpêx
to jakamã kot hipêx xwÿnhnta
na mex o ixkreja jakrenh. Tã
ja pyrã nê Tĩrtũm kot mẽmoj
piitã ho kator jakamã kot
amnhĩ to rax o kot mẽmoj pi-
itã ho kator xwÿnh jakrenh
par.

⁵ Nê finat Mojes na pre hte
Tĩrtũm kãm hprãm xã hkôt
tanhmã amnhĩ nhĩpêx to ho
pa. Nê ma kãm hkwyjê pi-
itã hkôt mẽ kãm kapêr jarênh
o ri pa. Tĩrtũm tanhmã kot
mẽ kãm kapêr tota kukamã
nhũm mẽ kãm harênh o mẽ
hkôt pa. No ãm Tĩrtũm mã
tanhmã amnhĩ nhĩpêx to ho
hpa xwÿnh pix na pre.

⁶ Nê Kris haxwÿja na pre
hte Tĩrtũm kãm hprãm xã hkôt
tanhmã amnhĩ nhĩpêx to ho
pa. Nom Mojes rom kêp
Tĩrtũm Kra kumrêx jakamã
kurom kêp mẽ panhõ Pahiti
kumrêx. Tã kwa kêr pu mẽ
kãm hprãm xã hkôt pix mã
tanhmã kãm amnhĩ nhĩpêx to
ho ri papa. Mẽ kot hã tanhmã
mẽ panhĩpêx to htã pu mẽ ÿ
hã mẽ kutã amnhĩ to htÿx nê
papa nê pajamxpêr o:

—Nà ixpunuj nê ixpa htã
kot paj ixpunuj rãhã ixpa ho
ixpa hkêt nê. Koja nhÿrmã
Tĩrtũm ixto mex kumrêx pa
axte tanhmã ixpunuj to nê
ixpa hkêt nê. Hêxta waa

nê. Nà ja inhmã hprãm tÿx
kumrêx.

Anhÿr o amnhĩ kukamã pa-
jamaxpêr o papa.

*Mẽ pahte Tĩrtũm kaga hkêt
ã mẽ pamã karõ*

Wam Korõt 10.1-11; Jutre 5

⁷⁻⁸ Amnepêm na pre mēhõja
tanhmã Tĩrtũm Karõ nhÿ hã
kapêr to nê kapêr o:

E kêr ka mẽ Tĩrtũm kapêr mar
tÿx o apa.

No ama nê ãm ama nê ri hã
apa hkêt nê. Rÿ kapêr
pê akrã hihtÿx o apa
hkêt nê.

Mẽ akukamã mẽ anhĩgêtjaja
na prem ã amnhĩ
nhĩpêx anê nê Tĩrtũm
kapêr pê hkrã hihtÿx o
pa. Kapôt ã Mojes kôt
mẽ pata ã na prem kãm
Tĩrtũm kapêr mar prãm
kêt nê. Nê tee ri amnhĩ
kukamã hamaxpêr nê
akupÿm Ejit wÿr hkrã
nê axpên mã: “Kwa na
pu mẽ ra pahpunuj tÿx
nê papa nhũm Tĩrtũm
ãm ja hã mẽ pahpumu
nê tanhmã mẽ pahto
mex to hkêt nê. Mãn ra
mẽ pahkaga nã? E kwa
pu mẽ awjanã nê ma
akupÿm Ejit wÿr mãn
papa.” Anê.

⁹⁻¹⁰ Na prem ã axpên mã
kapêr anhÿr o ri pa hã
amgrã pê 40.

Tĩrtũm xatã kot tanhmã mẽ
ho mex to nhũm mẽ kot
amnhĩ tã omunh tã ãm
omu nê htÿx ri amnhĩ
hkrã hkôt pa.

Nhũm tee ri amnhĩ tã mẽ omu
nê mẽ kamã gryk nê.

Hāmri nē hamaxpēr o: “Nà pēr mē hamaxpēr kot mē hā hkwy jēt kêt kumrêx. Te mē hamak kre hkêt pyrà nē ixkapēr mar kêt nē.” Anhÿr o hamaxpēr.

11 Hāmri nē mē kām: “E mē inhma. Ā mē ate amnhī nhīpêx anhÿrja mÿrapê kot kaj mē ma ixte mē amā pika mex nhôr mā xwÿnhhta wÿr apa hkêt nē.” Anhÿr o mē kām kapēr. Anē.

Ā mēhōja Tirtūm Karō nhÿ hā te Tirtūm tām kot mē kām kapēr pyrāk o mē harēnh anē.

12 Jakamā kwa mē okora ixkrāmnhwÿjaja. Kêr ka mē amnhī to mex o apa. Tirtūm kêp Mēpahpām ā pixi mex tā kot kaj mē tanhmā ajamaxpēr punuj to rÿ amnhī kaxyw hkôt ajamaxpēr kêt hāmri nē te ate amnhī katut kôt ām pyrāk o hipêx nē hkaga. Kwa mē ā amnhī nhīpêx anhÿr kêt nē.

13 Kêt mē Kris kôt axpēn to axihtÿx o ri apa. Nē apkati mē ā axpēn nhīpêx anhÿr rāhā nē. Kot kaj mē anhÿr kêt hāmri nē mē amā Tirtūm kapēr mar prām kêt ā amnhī to amnhīrīt. Jao tanhmā amnhī tomnuj to ho ri apa nē atÿx ajamaxpēr o: —Nà ixte ā amnhī tomnuj anhÿr tā nhūm Tirtūm ja hā ixpumu nē ām hā ixpumu.

Anhÿr o ajamaxpēr japêr. Rÿ mē ajamaxpēr o:

—Nà na pa hte ā amnhī tomnuj anē nhūm Tirtūm ja hā ixpumu nhūm ja kām mex nē.

Anhÿr o ajamaxpēr japêr.

14 Kwa mē ri ā ajamaxpēr anhÿr kêt nē. Amnepê mā mē pahte Kris kôt amnhī xunhwÿr nhūm kot mē pahto hkrata ā na pu prem amnhī kaxyw hkôt pajamaxpēr o papa. Tā kêr pu mē arī ā amnhī nhīpêx anhÿr tÿx o papa rāhā ty.

15 Tirtūm kapēr ā kagā htūm kot ja jarēnh kot: E kêr ka mē Tirtūm kapēr ma nē mar tÿx nē.

No ama nē ām mar nē ri hā apa hkêt nē.

Rÿ mē kot hkaga xwÿnhjē pyrà nē kêp akrā hihtÿx kêt nē. Anē.

16 Mē panhīgētjaja na prem Mojes kôt pika pē Ejit rūm kato nē hkīnh nē ma kapôt ā kormā pika mex wÿr pa. Nom Tirtūm kapēr mar nē hkôt amnhī nhīpêx rāhā hkêt nē. Na prem kuma nē hkôt amnhī nhīpêx o hā apkati grēre htā ra mēmoj nhÿ hā omnuj nē pa hā amnhī pumu nē tee ri amnhī kukamā hamaxpēr.

17 Jao xatā kapēr nhīrôp kuhē nē amnhī hkrā hkôt pix mā amnhī nhīpêx o pa ho ra hā amgrā pē 40. Hāmri nhūm tee ri amnhī tā mē omu nhūm ja kêp omnuj nē. Jakamā nhūm mē piitā kapôt ā ri pa nē gaa nē pikaprār pa.

18 Mē kot kapēr mar kêt jakamā nhūm mē kām:

—Nà ā mē ate amnhī nhīpêx anhÿr o ri apaja mÿrapê kot kaj mē ixte mē amā mē amex nhôr mā xwÿnhhta wÿr apa hkêt nē. Anē.

19 Tã mẽ kot amnhĩ kaxyw Tĩrtũm kõt hamaxpêr o pa hkêt jakamã na prem pika mexta wỳr hpôx kêt rãhã pikaprãr pa. Nhũm mẽ hkra nẽ mẽ htãmnhwỳjê pixjaja na prem mẽ mỳr pẽ hwỳr pøj nẽ kamã pa.

4

Mẽ pahte Tĩrtũm kukwak ri pajamakêtkati nẽ ri papa hã mẽ pajarẽnh

1 Mẽ pahte Tĩrtũm kukwak ri pajamakêtkati nẽ ri papa ho papaja Tĩrtũm kãm hprãm jakamã kwa kêr pu mẽ amnhĩ pumunh mex o papa. Nẽ wam mẽ panhĩgêt rom Tĩrtũm kapêr mar tỳx nẽ hkôt mãn kêt ri amnhĩ nhĩpêx mex rãhã nẽ. Kêr pu mẽ kurom mẽ pajamak kãm amnhĩ krit xà hã pika mexta wỳr pøj.

2 Mẽ kot mẽ pahpyrà nẽ Tĩrtũm kapêr mar mex tã na htem amnhĩ kaxyw hkôt hamaxpêr kêt nẽ. Te mẽ kot mar kêt pyràk.

3 ãm mẽ kot amnhĩ kaxyw Kris mã hamaxpêr xwỳnh pixjaja na htem kukwak ri hamakêtkati nẽ ri pa ho pa. Amnepê mã mẽmoj piitã hkêt ri na pre Tĩrtũm mẽmoj piitã ho kator pa hãmri nhũm apkati nhũm axte mẽmoj tã àpênh kêt nẽ. ãm õ krĩ kamã arĩ hamakêtkati nẽ hkôkôt o hkrĩ. Tã mẽ pahte uràk nẽ pajamakêtkati nẽ papa ho papaja na kãm hprãm. No wam ri mẽ pa xwỳnhjaja mẽ kot amnhĩ tomnuj mỳrapê na pre Tĩrtũm mẽ kot urà nẽ

hamakêtkati nẽ paja nẽ mẽ hkurê. Kapêr ã kagà htũm kot harẽnh kot:

Na pre Tĩrtũm tee ri amnhĩ tã mẽ kot hipêx ã mẽ omu nhũm ja kêp omnuj nẽ. Hãmri nhũm mẽ kãm: “Nà kot kaj mẽ ixkukwak ri axãmnhĩx aja-makêtkati nẽ apa hkêt nẽ.” Anẽ.

4 Nẽ kot harẽnh kot:

Na pre Tĩrtũm àpênh ã arĩgro kêp 6 hãmri nhũm arĩgro pẽ 7ta ã nhũm axte mẽmoj tã àpênh kêt nẽ. Na pre arĩ hkôkôt o nhỹ.

Arĩgro pẽ 7 ã arĩ hamakêtkati nẽ hkôkôt o nhỹ. Anẽ.

5 Nẽ mẽ kot kapêr mar nẽ ãm mar xwỳnhjê jarẽnh kot:

Kot kaj mẽ aa ixkukwak ri axãmnhĩx nẽ aja-makêtkati nẽ apa hkêt nẽ. Anẽ.

6 Mẽ panhĩgêtjaja kot amnhĩ kaxyw Tĩrtũm kõt hamaxpêr kêt jakamã na prem hamakêtkati nẽ ri pa hkêt nẽ. Tã mẽ papajaja na Tĩrtũm arĩ kãm mẽ paxãmnhĩx nẽ pajamakêtkati nẽ papa hprãm.

7 Amnepêm Ijaew Tĩrtũm kõt hamaxpêr kêt jakamã na prem kapôt ã pikaprãr pa. Hãmri nhũm amgrà xohtô nẽ hapêx nhũm Tĩrtũm mẽ hkanrêhã mẽ htãmnhwỳjê hõ pẽ finat Tawija mã kapêr nhũm kuma nẽ mẽ pamã tanhmã kapêr tota ã kagà nẽ hã kagà kot:

Kwa kêr ka ixkapêr ma nẽ mar tỳx nẽ.

No mẽ anhîgêtjê pyrà nê akrã
hihtỳx ho inhma nê ãm
inhmar kêt nê. Anê.
Na pa pre ra mẽ amã ã ja
jarênh anê.

⁸ Na pre finat Jojueja finat
Mojes mỳr pê ma pika pê
Kanaã hwỳr mẽ hkanrêhã
mẽ hkrajê o pa nê hwỳr mẽ
o pôj. Tã nhũm prem Jojue
kukwak ri hamakêtkati nê
pa ho pa hkêt nê. Kêp ãm
kukwak ri ã amnhĩ nhĩpêx
anhỳr ronhỹx Tĩrtũm axte mẽ
kãm mẽ hamakêtkati nê mẽ
hamak kãm amnhĩ krit nê mẽ
pata hkukamã harênh kêt nê.

⁹ Nom mẽ pahte kukwak ri
pajamakêtkati nê pajamak
kãm amnhĩ krit nê ri papa
ho papaja na Tĩrtũm arĩ kãm
hprãm.

¹⁰ Na pre arĩgro pê 6ja ã
mẽmoj piitã ho kator pa nhũm
apkati nhũm hamakêtkati nê
hkôkôt o nhỹ. Tã kot puj
mẽ pahpê hkrajaja amnhĩ
to kuwỳ nhũm tanhmã mẽ
pahkrã hto pu mẽ kukwak ri
uràk nê paxãmnhĩx nê paja-
makêtkati nê papa ho papa.
Te Tĩrtũm ãpênh pa nhũm
apkati nhũm hamakêtkati nê
hkôkôt o ỳrta pyràk.

¹¹ Jakamã kwa kêr pu mẽ
amnhĩ to kuwỳ kê ã mẽ
panhĩpêx anê pu mẽ uràk
nê ã amnhĩ nhĩpêx anhỳr
rãhã ho papa. Nom kot pu
mẽ pahkwỳ Ijaewjê pyrà nê
kapêr kwỳm amnhĩ nhĩpêx
o papa hãmri nê mẽ urà nê
paxãmnhĩx pajamakêtkati nê
papa hkêt nê.

*Tĩrtũm kapêr te kot wapo
xwa gix pyràk ã harênh*

¹² Nê Tĩrtũm kapêrja te ã ho
tanhmã kot mẽmoj to kaxyw
hihtỳx pyràk. Nê te wapo xwa
gix pyràk. Koja mẽhõ õ wapo
xwa mex nê ho mẽmoj jakàr
mex nê. Ho mry hi jakàr mex
pê kaxwỳnh kãm hi kanhĩn o
amnhĩrit. Ja pyrà nê na hte
Tĩrtũm kapêr mẽ pajamaxpêr
o amnhĩrit nê mex ã harê rỳ
omnuj ã harê.

¹³ Nê na htem Tĩrtũm pê
mẽmoj to pimxur kêt nê.
Na hte hprĩ hã mẽmoj piitã
omunh pa. Nê mẽ paja-
maxpêr kôt mẽ pahpumunh
pa. Na pu htem ã kot
mẽmoj piitã omunh par anhỳr
xwỳnhja noo mã tanhmã
amnhĩ nhĩpêx to rãhã ho
papa.

*Jejus kêp mẽ panhõ patre
maati hã harênh*

*Eprêw 10.19-25; Wam Juãw
2.1-2*

¹⁴ Nê Ijaew nhõ patrejaja
na pre htem Tĩrtũm mã
amnhĩ jarênh xà hã ixkre
hwỳr agjê nê kamã mẽ ho
Tĩrtũm wỳr o pa. Ja pyrà nê
na pre ra Jejus Tĩrtũm nhõ krĩ
hwỳr api nê kamã mẽ pahto
hwỳr o hkrĩ. Kêp Kra kumrêx
jakamã kêp mẽ pahto Tĩrtũm
wỳr xwỳnh maati. Jakamã
kwa kêr pu mẽ amnhĩ kaxyw
hkôt pajamaxpêr tỳx rãhã ho
papa.

¹⁵ Satanasti na pre te kot
mẽ panhĩpêx pyràk o Jejus
nhĩpêx. Nê tee ri kot tanhmã
kãm kapêr to nhũm kot mar
nê tanhmã amnhĩ tomnuj to
hprãm xaj ãm ri kãm ahkrox
kaprỳ nhũm kutã amnhĩ to
htỳx nê hkôt amnhĩ nhĩpêx

kêt nê. Tã kot Satanasti kot amnhĩ nhĩpêx ã omunh mex jakamã na hte kêp mẽ pahtãnopxar mex o pa. Kot mẽ paxirerek kôt mẽ pahpumunh mex.

¹⁶ Jakamã kwa kêr pu mẽ amnhĩ tã kamã pahpijaãm kêt kãm paxãmnhĩx ri amnhĩ to hwÿr o papa. Kêp mẽ pakutã nojarêt xwÿnh nê kêp mẽ pakamã ukaprĩ xwÿnh jakamã kêr pu mẽ tee ri mẽmoj tã amnhĩ pumu nê amnhĩ to hwÿr kurê kumrêx. Hãmri nê ÿ hã paxãmnhĩx nê pajamakêtkati nê ri papa.

5

¹ Nê mẽ panhõ patre maati Jejusja Tirtũm na pre mẽ pakaxyw ãm. Kêp mẽ pahkwÿ hã mẽ pakaxyw ãm nhũm hte mẽ pahto Tirtũm wÿr o pa. Nê kãm mẽ pahkĩnh xà nhõr o pa. Kot ja hã mẽ pahpumunh nê mẽ pahte kapêr kwÿm tanhmã amnhĩ nhĩpêx to ho papa hã mẽ pakamã gryk o hapêx tokyx anhÿr kaxyw.

² Mẽ panhĩgêjtaja na pre htem mẽ õ patre maati hwÿr mra nê kãm tanhmã amnhĩ tomnuj to hã amnhĩ jarẽ nhũm mẽ kuma nê mẽ kamã ukaprĩ nê. Mẽ urà nê kormã kot Tirtũm kôt amnhĩ nhĩpêx totuj anhÿr jakamã na pre mẽ kot tanhmã amnhĩ jarẽnh toja ma nê mẽ kamã ukaprĩ nê.

³ Hãmri nê mẽ hpãnhã Tirtũm mã mẽmoj gõ nê mããnên amnhĩ pãnhã kãm mẽmoj gõ. Mẽ urak nê kot

amnhĩ tomnuj o paja mÿrapê amnhĩ pãnhã kãm mẽmoj gõ.

⁴ No na pre hte patrejaja amnhĩ krã hkôt kêp patre maati kaxyw amnhĩ xunhwÿr kêt nê. Tirtũm kot mẽ kaxyw mẽ unhwÿr jakamã na pre mẽ kaxyw finat Arãwja xãm nhũm kêp mẽ õ patre maati hã mẽ ho Tirtũm wÿr o pa.

⁵ Nê Kris haxwÿja kêp mẽ panhõ pahi maati hã tãm kot amnhĩ xãm kêt. Tirtũm na pre mẽ pakaxyw ãm nê tanhmã kãm kapêr to nê kãm:

Nà apê Ixkra na ka.

Kot paj jarãhã ixpê Anhĩpêêxã hã mẽ kãm amnhĩ jarẽ. Anê.

⁶ Nê hpãnhã kãm:

Kot kaj Mekijetek pyrã nê apê patre maati hã mẽ ho ixwÿr rãhã ho ri apa. Anê.

⁷ Jejus kormã pika ja kamã pa ri na pre amnhĩ to Tirtũm wÿr rãhã ho pa. Tõhã hkaprĩ nê tee ri mẽmoj tã amnhĩ pumu nê amnhĩ to kuwÿ. Nê tee ri mẽ kot hpĩrta kukamã hamaxpêr nê mÿr kãm amnhĩ to kuwÿ. Kop apu Tirtũm kãm mẽ kot kêp hpĩr prãm kêt ronhÿx pre tanhmã nê mẽ kãm hkurê xwÿnhjê ho nhũm mẽ hpĩr kêt nê. Jakamã nhũm pre ã amnhĩ to hwÿr anê. No ãm Tirtũm kãm prãm xà hkôt kãm amnhĩ nhĩpêx prãm jakamã nhũm kuma no ãm tanhmã nê mẽ ho hkêt nhũm prem kupi.

⁸ Kêp Tirtũm Kra kumrêx tã amnhĩ xà htÿx kãm hamak kãm ty. Jao Tirtũm kãm

hprãm xà hkôt amnhĩ nhĩpêx
ã amnhĩ pumunh mex nê.

⁹ Na pre amnhĩ xà htỳx kãm
hamak o amnhĩ mex o amnhĩ
mex ã mẽ kãm amnhĩ to
amnhĩrît. Jakamã na hte mẽ
kot kapêr kôt ri amnhĩ nhĩpêx
o mẽ pa xwỳnhjê mã mẽ kot
amnhĩ nhĩpêx nyw jagjê nê
nhỹrmã Tĩrtũm mẽ wa kuri
mẽ htĩr tũm nê mẽ pa mã
xwỳnhjê hã mẽ harê.

¹⁰ Jakamã na pre Tĩrtũm Mek-
ijetek pyrã nê kêp patre maati
kaxyw ãm.

*Mẽ pahte Kris kaga nê mẽ
pahkurê*

*Wam Korĩt 3.1-2, 13.11,
14.20; Epes 4.11-16*

¹¹ Nê Jejus kêp mẽ pahto
Tĩrtũm wỳr xwỳnh maati hã
harênhja inhmã ixprĩ hã mẽ
amã harênh par prãm tã ka
mẽ kormã inhmãr tỳx kêt nê.
Pa tee ri ixprĩ hã mẽ amã
harênh kaprỳ. Te mẽ amã
mar prãm kêt o amôr pyrãk.

¹² Amnepê mã mẽ ate
Kris kôt amnhĩ xunhwỳr nê
kapêr mar tỳx tã kormã nhãm
amnhĩ xô ri ho amnhĩ kwỳjê
jahkre ho ri apa hkêt nê. Te
mẽ ate hã ano hkêt pyrãk
jakamã na pa hte arĩ mẽ
amã kapêr kot amnhĩrît mex
xwỳnh kwỳ ho mẽ ajahkre
ho pa. No kot amnhĩrît mex
kêt xwỳnh o mẽ ajahkre hkêt
nê. Te mẽ hkaràre kot amnhĩ
nhĩpêx pyrãk o na ka htem
amnhĩ nhĩpêx o apa. Na hte
mẽ hkaràre mẽõ mex kur
kêt nê. ãm kormã katorxà
hkà pix kaõ. Ja pyrã nê ãm
Tĩrtũm kapêr kot amnhĩrît
mex xwỳnhnta pix na ka mẽ

mar tỳx o apa nom kapêr kot
amnhĩrît mex kêt xwỳnhja ka
mẽ mar mex kêt nê.

¹³ Nê mẽ hkaràre kormã
Tĩrtũm kapêr mar kêt jakamã
na htem kormã mẽmoj mex
nê mẽmoj punuj pumunh kêt
nê. Tã te mẽ ate mẽ kot amnhĩ
nhĩpêx pyrãk.

¹⁴ Mẽ kot Tĩrtũm kapêr mar
mex xwỳnhjaja na htem hprĩ
hã kapêr piitã mar tỳx nê. Kot
amnhĩrît mex xwỳnhnta mar
tỳx nê mããnên kot amnhĩrît
mex kêt xwỳnhja nhũm
mêhprĩ hã piitã mar tỳx nê.
Te ho mẽ àptàr kot mẽõ mex
kur o pata pyrãk. Jao ra mẽ
àptàr jamaxpêr o hamaxpêr o
ri pa nê hamaxpêr o:

—Kot paj tãm amnhĩ nhĩpêx
o ri ixpa nhũm ja inhmã
mex nê. Nom kot paj axtem
tanhmã amnhĩ tomnuj to
nhũm ja ixpê omnuj nê.
Jakamã kot paj tãm amnhĩ
nhĩpêx pix o ri ixpa nhũm
Tĩrtũm mã ja mex nê. Anê.

6

¹⁻² Na pu prem ra Tĩrtũm
kapêr kot amnhĩrît mex
xwỳnhnta kwỳ ma. Tãm na ja:

Kris kot mẽ panê tanhmã
amnhĩ nhĩpêx to hã
harênhja.

Nê mẽ pahte amnhĩ tom-
nuj kaga hã kot mẽ pamã
karõja.

Nê amnhĩ kaxyw Tĩrtũm
kôt mẽ pajamaxpêr ã mẽ
pamã karõja.

Nê mẽ pahpê Tĩrtũm kra
hã amnhĩ to amnhĩrît
kaxyw mẽ kot mẽ pahkrã
kumrãr ã pamã karõja.

Nê mē pahte Tirtūm mā tanhmā amnhī nhīpêx to ho papa hkukamā mē kot mē pahkrā hā ĩhkra jaxwÿr nê mē pahto Tirtūm wÿr ā mē pamā karōja.

Nê mē pahtyk nê akupÿm mē pahťir ā mē pajarēnhja.

Nê Tirtūm kot nhÿrmā mē kot amnhī xà htÿx kām hamak tūm xà hwÿr mē kēp hkra hkēt xwÿnhjē janorja.

Mēmoja piitā pu mē ra harēnh mar tÿx nē. Prī hā kot amnhīrīt mex. Tā kwa kēr pu mē hpānhā hijuk ri kot amnhīrīt mex kēt xwÿnh kwÿ ma. Jao mē pahpē Tirtūm kra xaptār mex nē ri papa.

³ Jakamā kwa kēr pu mē kot amnhīrīt mex xwÿnh kumrēx kwÿ ma nē hpānhā hijuk ri kot amnhīrīt mex kēt xwÿnh kwÿ ma. Nê axpēn mā harēnh rāhā ho ri papa. Nà koja Tirtūm kām ja prām pu mē ā amnhī nhīpêx anhÿr rāhā o ri papa.

⁴⁻⁶ Na pre ra mē pahkwÿjaja Kris kaga nē htÿx ri amnhī nhīpêx o pa. Mē kot kapēr mar tÿx tā axtem nē hkaga jakamā koja mē axte kapēr mar kēt nē. Ra mē kām mar prām kēt. Kot puj mē tee ri axte mē kām harēnh o papa kaprÿ. Na prem hprī hā kuma. Tirtūm kām mē ho hkra hprām ā harēnhja nhūm prem hprī hā kuma nē kām mar prām nē hkōt amnhī xunhwÿ. Hāmri nhūm Tirtūm Karō te mē panhīpêx

pyrà nē mē hkarō mā agjē nē mē kot amnhī to mex o pa kaxyw tanhmā mē hkrā hto nhūm prem ÿ hā tanhmā kām amnhī nhīpêx to ho pa. Nē kām Tirtūm kapēr mar prām nē. Nê axpēn mā mex o mex ā harēnh o pa. Nē aa mē kot mēmoj pumunh kēt kwÿ pumu nē axpēn mā harēnh o:

—Nà Krisja ām hāmri àhpumunh tÿx o àhpumunh tÿx. Koja nhÿrmā akupÿn mē pahwÿr wrÿ nē axte mē pamā àhpumunh tÿx o amnhīrīt pu mē omu.

Anhÿr o kapēr tā tanhmā hamaxpēr to nē hkaga. Jakamā te mē kot axte Tirtūm pē Krata pī hā nhōr nē hpīr pyràk. Nē te mē piitā mē noo mā tanhmā haprÿ hto nē tanhmā kām kapēr punuj to pyràk. Jakamā kot pu mē tee ri akupÿm tām mē unhwÿr prām kaprÿ.

⁷ Na hte Tirtūm mē pahto mex rāhā ho pa. Jao mē pamā mē pahpur ā na rē pu mē kamā panhō rūnh nē. Jakamā mē kot amnhī kaxyw Kris kōt hamaxpēr nē hkōt amnhī xunhwÿr prām xwÿnhjaja te mē hpur mex nē kamā mēmoj ô rūnh pyràk. Nē urāk nē amnhī to mex o pa.

⁸ Nom koja mē hpur kām mēmoj nhīgrōt mex kēt japēr. Kamā mrōnhī nē kahpare nē mēmoj punuj pix hapōj nhūm mē tee ri omu nē hkaga kurē kumrēx. Tā mē kot Kris kaga xwÿnhjaja te pur punuj kot amnhī nhīpêxta pyràk nhūm Tirtūm te kēp pur nhō dōn pyràk. Jao tee ri amnhī tā mē

kot amnhĩ nhĩpêx ã mẽ omu nẽ mẽ hkaga kurê kumrêx nẽ ma mẽ kot amnhĩ xà htỳx kãm hamak tũm xà pê kuwyta wỳr mẽ rênh pa.

⁹ E ixkrãmnhwỳjaja. Inhmã mẽ akĩnh jakamã na pa ã mẽ amã mẽ kot Kris kaga xwỳnhjê jarênh anê. Nom te mẽ ate mẽ uràk kêt. Kris kôt mẽ ate amnhĩ xunhwỳr xwỳnh mex na ka mẽ. Ra mẽ ate hkôt amnhĩ xunhwỳr tỳx jakamã te mẽ apê pur mexta pyràk.

¹⁰ Na ka htem Kris kôt mẽ akwỳjê ho mex o ri apa. Te mẽ amã amnhĩ tã ma pyràk o axpên nhĩpêx o ri apa nhũm Tĩrtũm ja hã mẽ apumu. Tã koja tanhmã ja hã mẽ ato mex to. Kot tãm mẽ panhĩpêx o pa jakamã koja tanhmã mẽ ate axpên nhĩpêx mex tota ã tanhmã mẽ ato mex to.

¹¹ Tã kêt ka mẽ arĩ ã axpên nhĩpêx anhỳr o ri apa rãhã ty kê nhỹrmã ja hã mẽ ato mex nẽ. ã mẽ ate amnhĩ nhĩpêx anhỳr o apaja na inhmã hprãm tỳx kumrêx.

¹² Kot kaj mẽ ã amnhĩ nhĩpêx anê hãmri nẽ amã kaga nẽ apa hkêt nẽ. Nẽ amnhĩ nhĩpêx o te Tĩrtũm kra hkwy htyk xwỳnhjaja kormã htĩr ri kot amnhĩ nhĩpêxta pyràk. Na prem amnhĩ kaxyw Tĩrtũm mã hamaxpêr tỳx rãhã ho pa. Kot mẽ ho mex ã mẽ hã amnhĩ jarênhja nhũm prem amnhĩ tã kamã hamak rãhã ho pa. Tã amnhĩ tã kamã hamak o pa ry rax rãhã ty nhũm Tĩrtũm ra kot mẽ hã amnhĩ jarênh xà hkôt

mẽ ho mex nẽ. Tã kêt ka mẽ uràk nẽ ã amnhĩ nhĩpêx anhỳr o ri apa rãhã ty.

¹³⁻¹⁵ ã na pre finat Apraãwja amnhĩ nhĩpêx anê. Kormã hkra hkêt tã nhũm Tĩrtũm kãm hkra nẽ kanrêhã htãmnhwỳjê hkukamã tanhmã mẽ harênh to nẽ kãm:

—Pa Apraãw. E inhma. Kot paj aprõ mẽ war ato mex nẽ. Kot kaj war akra hãmri nẽ gaa nhũm akanrêhã war atãmnhwỳjaja ohtô rax kumrêx. ãm hãmri na pa ã mẽ hkukamã amã mẽ harênh anê. Kot paj amã amnhĩ jarênh xà hkôt ã anhĩpêx anê. Ixpê mẽ anhĩpêx xwỳnh na pa ã amã amnhĩ jarênh anê. Anê.

Tã ã kãm wa hkra jarênh anhỳr tã nhũm wa tokyx hkra hkêt nẽ. Nom tee ri ja hã amnhĩ pumu nẽ Tĩrtũm kot wa kãm hêx ã hkamnhĩx kêt nẽ. ãm hkamnàr rom ã hamaxpêr anê nẽ hamaxpêr o:

—Nà kot paj wa nhỹrmã ixkra. Tĩrtũm tãm kot wa inhmã wa ixkra jarênh kênã. Anê.

Tã nhũm amgrà xohtô rax kumrêx nẽ hapêx nhũm wa hkra. Nhũm axte amgrà hkwy hapêx nhũm wa hkanrêhã htãmnhwỳ hkwy. Ra Tĩrtũm kot mẽ hkukamã Apraãw mã mẽ harênh xà hkôt. Tĩrtũmja hihtỳx o hihtỳx nẽ àhpumunh o àhpumunh jakamã na pre amnhĩ jarênh xà hkôt ã wa kãm wa hkra nẽ wa htãmnhwỳjê nhõr anê. Kot ra wa kãm hã amnhĩ jarênh xà hkôt. No ri nhãm mēhõ nhĩxi jarênh kôt wa kãm wa

hkra jarênh kêt nê. Mêhõ kot we hihtýx o hihtýx o Tirtüm jakre nhùm we ri hixi jarênh kôt ã wa kãm mẽ harênh anê? Amrakati kumrêx. Jakamã na pre wa kãm amnhĩ jarênh o:

—Nà ixàhpumunh xà hkôt na pa ã war amã war akra jarênh anê. Anê.

¹⁶ No pika ja kamã na htem ã amnhĩ jarênh anhýr kêt nê. Na htem mêhõ mã tanhmã mẽmoj tâ amnhĩ jarênh to kaxyw nê mêhõ hihtýx o kot hakrenh xwýnh nhĩxi jarênh kôt amnhĩ jarê. Nê amnhĩ jarênh o:

—Nà ixte jahti noo mã ã amã amnhĩ jarênh anhýr jakamã ãm hãmri na pa ã amnhĩ jarênh anê. Anê.

Kot hã amnhĩ to hêx nhùm hihtýx o kot hakrenh xwýnhnta kot hã harênh mar nê hã tanhmã homnuj to pymaj na htem ã mẽ hixi jarênh kôt mẽmoj tâ amnhĩ jarênh anê. Hãmri nê kot tanhmã hã ho pymaj ra kot amnhĩ jarênh xà hkôt tanhmã mẽmoj nhĩpêx to.

¹⁷ Nom Tirtüm na hte uràk nê nhãm mêhõ nhĩxi jarênh kôt ri mẽmoj tâ amnhĩ jarênh kêt nê. Na hte tãm amnhĩ jarênh xà hkôt mẽmoj to anê nê aa hã amnhĩ to hêx kêt nê. Na pre mẽ pahpê hkrajê mã kãm:

—Kot paj nhýrmã mẽ ato mex rax nê. ãm hãmri na pa mẽ amã amnhĩ jarê. Ixte amnhĩ pumunh xà hkôt na pa ã mẽ amã amnhĩ jarênh anê. Anê.

Mẽ pahte ãm hãmri kot amnhĩ jarênhja mar nê

amnhĩ to hêx kêt ã omunh kurê kumrêx kaxyw. Koja Tirtüm mẽmoj tâ ã amnhĩ jarênh anê hãmri nê hijuk ri axtem hpãnhã tanhmã amnhĩ jarênh to hkêk nê.

¹⁸ Jakamã koja nhýrmã ma amnhĩ wýr mẽ pahto àpir ã amnhĩ jarê hãmri nê ãm hãmri amnhĩ jarê nê amnhĩ jarênh o:

—Nà ãm hãmri ixte amnhĩ pumunh xà hkôt na pa mẽ amã ja hã amnhĩ jarê. Anê.

Koja ã amnhĩ jarênh anê hãmri nê hijuk ri axte hpãnhã tanhmã mẽmoj jarênh to hkêk nê. Ra kot ã amnhĩ jarênh anhýrja koja arĩ rãhã nê. Jakamã e kwa kêr ka mẽ tee ri amnhĩ kukamã ajamaxpêr o ri apa hkêk nê. Ra mẽ pamex nê ri papa kaxyw Tirtüm kôt amnhĩ xunhwýr jakamã kêr pu mẽ arĩ kot mẽ pahto mex rax xà hã arĩgrota jamãr rãhã ho ri papa.

¹⁹ Na hte kanôre ho htýx xàja kanôre ho htýx nhùm ma gô hkôt pa hkêk nê. Ja pyrà nê kot puj mẽ Tirtüm kot mẽ pahto mex xà kamã pajamak o papa hãmri nê hkaga hkêk nê.

Amnepê mã na pre hte mẽ panhõ patre maatija Tirtüm mã amnhĩ jarênh xà hã ixkre hwýr agjê nê hkôt ã kupêxê ho hitom maati hwýr agjê nê kamã mẽ ho Tirtüm wýr o kuhê. Tã nhùm Jejus akupým kaxkwa hwýr api nê Tirtüm ri hkrĩ hãmri nê patre maatita pãnhã tãm mẽ pahto hwýr o hkrĩ.

20 Na pre ra mẽ pakukamã kaxkwa hwÿr api nẽ kamã pa ho pa nẽ finat Mekijetekja pyrã nẽ kęp mẽ panhõ patre maati. Tã koja mẽ pahto Tirtũm wÿr rãhã nẽ pa ho pa.

7

Patre Mekijetek jarẽnh

1-3 E kot paj ixprĩ hã mẽ amã tanhmã finat Mekijetekja jarẽnh to ka mẽ inhma. Krĩ pẽ Sarẽ kamã na pre kęp mẽ õ pahi nẽ mãânẽn kęp mẽõ patre. Sarẽja mẽ pakapẽr kãm kęp: “Mẽ hamakêtkati nẽ ri mẽ pa xwÿnhjê nhõ krĩ.” Jakamã Mekijetekja mẽ pakapẽr kãm kęp: “Mẽ hamakêtkati nẽ ri mẽ pa xwÿnhjê nhõ pahi.” Nẽ mãânẽn kęp: “Pahi kot tãm amnhĩ nhĩpêx o pa xwÿnh.” Nẽ Mekijetek nhĩpêêxã nẽ katorxã nẽ higêt nhĩxija mẽ pahte harẽnh mar kêt. Nẽ kator ã arĩgro nẽ htyk ã arĩgroja mãânẽn mẽ pahte harẽnh mar kêt. Tirtũm kapẽr ã kagã htũm kot tanhmã ja jarẽnh to hkêt. ãm Jejus pyrã nẽ kęp patre hã mẽ ho Tirtũm wÿr rãhã ho pa xwÿnh pix ã kot harẽnh. ãm ja pix na mẽ pahte harẽnh mar. Nẽ kot amnhĩ to rax xwÿnhjakamã na pre Apraãw nhÿri omu nẽ hã hpijaãm kaxyw kãm hikukrêx kwÿ gõ. Na pre hkwyjê mẽ ra mẽ urojê kutã amnhĩ xunhwÿ nẽ pijapu nẽ mẽ kęp mẽ õ pahi ho 4 nẽ mẽ himex. Nẽ mẽ kęp mẽ hikukrêx kwÿptã nẽ hamÿ nẽ ma õ krĩ hwÿr o

mõ. Nẽ kormã pry hã mõr ri Mekijetek kaxpa nhũm amnhĩ wÿr omu nẽ kãm:

—Pa Apraãw? E kêt Tirtũm ato mex nẽ ka amex nẽ apa. Anẽ.

Nhũm amnhĩ tã kuma nẽ hkĩnh nẽ. Hãmri nẽ kãm mẽ hikukrêx kwÿptãr xwÿnhhta hkwy gõ nhũm hamÿ nẽ ma amnhĩm o mẽ.

4 Na pre Apraãw kot amnhĩ to rax ã omu nẽ kãm mẽmojta kwÿ gõ. Kęp mẽ pahpê Ijaew pãr krax jakamã mãânẽn kot amnhĩ to rax tã Mekijetekja urak nẽ kot amnhĩ to rax ã omu nẽ kãm mẽmota kwÿ gõ.

5 Finat Mojes kot Ijaew mã Tirtũm kapẽr jarẽnh xã hkõt kãm kugõ. Na pre mẽ kãm:

—Mẽ akwÿ pẽ finat Rewi hkanrêhã htãmnhwÿjaja kęp mẽ anhõ patre jakamã kër ka mẽ kãm mẽ akukrêx kwÿ nhõr o ri apa. Kot kaj mẽ akrit kęp 10 nẽ kãm ho pixi nẽ agõ. Nẽ mẽ akãxpore kęp 10 nẽ kãm hõ gõ. Kër ka mẽ ã mẽ kãm mẽ akukrêx nẽ mẽ akrit kwÿ nhõr o apa anẽ. Nẽ kër ka mẽ kãm mẽmoj mex pix gõ. Mẽ kęp mẽ akwÿ na mẽ. Mẽ api-itã mẽ apê Apraãw kanrêhã htãmnhwÿ jakamã kër ka mẽ ã mẽ hipêx anhÿr o apa. Anẽ.

6 Tã Mekijetekja kęp Rewi hkwy hkêt tã nhũm Apraãw amarĩ ã hipêx anẽ nẽ kãm pahi htyk xwÿnhjê kukrêxta kwÿ gõ. Jao hikukrêxta kamã mẽmoj kęp 10 nhũm omu nẽ kamã kãm ho hpÿnh nẽ kugõ. Na pre ã kãm mẽmoj nhõr anẽ. Hãmri nhũm amnhĩm hamÿ nẽ kãm:

—Nà ãm hãmri koja Tĩrtũm ato mex rax nẽ. Anẽ.

Ra Tĩrtũm kot Apraãw kanrẽhã kãm htãmnhwỳ ho ohtô nẽ mẽ hkukamã mẽ harẽnh jakamã nhũm Mekijetekja ã kãm Tĩrtũm kot ho mex ã harẽnh anẽ.

⁷ Mẽ kot amnhĩ to rũnh o mẽ hakrenh xwỳnh pixjaja Tĩrtũm kot mẽ ho mex kaxyw mẽ ho àhwỳr o pa jakamã na pre Apraãw o Tĩrtũm wỳ. Jao kot amnhĩ to rax o kot hakrenh ã amnhĩ to amnhĩrĩt.

⁸ Hãmri nẽ Rewi hkanrẽhã htãmnhwỳ kot amnhĩ nhĩpêx pyrã nẽ Apraãw o Tĩrtũm wỳ nẽ kệp mẽmojta jamỳ. Mẽ uràk nẽ mẽmoj kamã kệp 10ja rũm ho hpỳnh nẽ amnhĩm hamỳ. Nom kot amnhĩ to rax o Rewi hkanrẽhã htãmnhwỳjẽ jakrenh. Tĩrtũm kapẽr ã kagà htũm kot Rewi hkanrẽhã htãmnhwỳjẽ htyk par ã mẽ harẽnh tã tanhmã Mekijetek htyk ã harẽnh to hkêt jakamã kot amnhĩ to rax o kot Rewi hkwyjẽ jakrenh.

⁹⁻¹⁰ Nẽ kot pry kamã Apraãw kaxparta ã kormã Rewi kator kêt tã kệp Apraãw kanrẽhã htãmnhwỳ mã xwỳnh. Jakamã nhũm Apraãwja Mekijetek mã mẽ hikukrẽxta kwỳ nhõr jao te Rewi mã õr pyrãk. Tã nhũm amgrã xohtô nẽ hapêx nhũm Rewi hkanrẽhã htãmnhwỳjaja hapôj nẽ kệp mẽ õ patre nẽ ri pa. Jao Mekijetek pyrã nẽ mẽ kệp mẽ hikukrẽx kwỳ jamỳnh o ri pa.

¹¹ Nẽ finat Mojes na pre Ijaewjẽ mã tanhmã Rewi hkanrẽhã htãmnhwỳjẽ jarẽnh

to. Kormã mẽ hapôx kêt ri nhũm hkwyjẽ mã tanhmã mẽ harẽnh to. Mẽ kệp patre hã mẽ harẽ. Tã nhũm mẽ hapôj nẽ hprêk nẽ mẽ ho Tĩrtũm wỳr o ri mẽ hkôt pa. Nom mẽ kot tãm amnhĩ nhĩpêx o pa kaxyw na prem tanhmã mẽ hkrã hto hkêt nẽ. Tanhmã kot mẽ amnhĩ to nẽ ã mẽ hipêx anẽ? Jakamã nhũm Tĩrtũm mẽ hpãnhã mẽ pahwỳr kỳj rũm mẽhõja mẽ nhũm mẽ pahwỳr wrỳ. Nom kệp Rewi hkanrẽhã htãmnhwỳ hkêt. Nẽ mããnẽn kệp Rewi hpãm Arãw kanrẽhã htãmnhwỳ hkêt. Axtem te Mekijetek kot amnhĩ nhĩpêx pyrãk xwỳnh na pre. Jejus Krisja. Tãm na pre mẽ pahwỳr wrỳ hãmri nẽ tanhmã mẽ pahkrã hto pu mẽ ý hã tãm amnhĩ nhĩpêx o papa.

¹² No Mojes kapẽr kot Rewi hkanrẽhã htãmnhwỳ pixjaja kệp mẽ ho Tĩrtũm wỳr xwỳnh ã mẽ harẽnh. Tã nhũm Krisja mẽ pahwỳr wrỳ nẽ mẽ hpãnhã kệp mẽ pahto àhwỳr o pa xwỳnh. Jakamã na pu htem axte Mojes kapẽr kôt amnhĩ nhĩpêx kêt nẽ. Pãnhã Jejus kapẽr kôt pix mã amnhĩ nhĩpêx o papa.

¹³⁻¹⁴ Nẽ Jejus kệp Rewi hkanrẽhã htãmnhwỳ hkêt. Katorxà hkôt kệp Apraãw tãmnhwỳ Juta hkanrẽhã htãmnhwỳ na pre. Ra mẽ pahte ja mar mex. Aa Juta hkanrẽhã htãmnhwỳjaja kệp patre hkêt. Na pre Tĩrtũm jajẽ mã mẽ kot mẽmoj nhõr xà hã mēsti kunĩhtita ã kãm mẽmoj nhõr nẽ hkwyjẽ ho

hwÿr ã mē kãm karō hkêt nē. Æm Apraãw tàmnhwÿ Rewi hkanrēhã htàmnhwÿjê mã pix mã na pre ã mē kãm ja hã karō anē. Tã nhũm Jejus wrÿ nē mē hpãnhã mē pahto hwÿr o pa. Mē uràk nē kēp Rewi hkanrēhã htàmnhwÿ hkêt axtem kēp Juta hkanrēhã htàmnhwÿ htã Rewi hkwÿjê hpãnhã mē pahto Tirtũm wÿr o pa.

Mekijetek pyrã nē mē pahto Tirtũm wÿr xwÿnh jarēnh

15-19 Nē Ijaewja na prem Mojes kapēr mar tÿx nē hkôt amnhĩ nhĩpēx tã aa amnhĩ to mex kêt nhũm Tirtũm tee ri ja hã mē omu nē hamaxpēr o:

—Nà Rewi hkanrēhã htàmnhwÿjaja kēp mē õ patre nē mē ho ixwÿr o pa htã nhũm mē arĩ htÿx ri amnhĩ tomnuj pix o pa. Jakamã koja mē axte ri mē ho ixwÿr o pa hkêt nē. Anē.

Hãmri nē mē pakaxyw mē pahto àhwÿr xwÿnhja ta nē ãm. Kra Jejusja nhũm kuta nē ãm. Tãm na hte Rewi hkwÿjê rom tanhmã mē pahkrã hto pu mē kukwak ri tãm amnhĩ nhĩpēx nē Tirtũm kôt amnhĩ nhĩpēx mex nē. Jao nhÿrmã ma mē pahte Tirtũm nhõ krĩ hwÿr paxàpirja jamãr o papa.

Jejus na hte Mekijetek pyrã nē kēp mē panhõ patre maati nē mē pahto Tirtũm wÿr rãhã ho pa. Kēp Rewi hkanrēhã htàmnhwÿ hkêt tã Tirtũm pyrã nē kēp htĩr tũm nē pa ho pa xwÿnh jakamã na pre Tirtũmja mē pakaxyw kuta nē

mē pahwÿr kumē. Kapēr ã kagã htũm kot harēnh kot:

Kot kaj Mekijetek pyrã nē mē ho ixwÿr rãhã ho ri apa. Anē.

20-21 No Rewi hkwÿjê mã na pre ã kapēr anhÿr kêt nē. Æm Jejus pix mã ã kapēr anē nē kãm:

E kot kaj apē mē ho ixwÿr rãhã o apa xwÿnh. Kot paj nhÿrmã apãnhã axtem mēhõ xãm kêt nē. Æm kapxipix kot kaj mē ho ixwÿr o apa rãhã ho rãhã. Æm hãmri na pa amã ã ixkapēr anē. Ixpē Pahi Maati hã ã ajarēnh anē.

22 Anhÿr jao Jejus kot amnhĩ to rax o Rewi hkwÿjê jakrenh par ã ho amnhĩrit. Mē kot Ijaew mã Tirtũm kapēr jarēnh nhũm mē kot mar nom hkôt amnhĩ nhĩpēx kêt jakamã nhũm Tirtũm mē hpãnhã Jejus xãm. Tapxipix na hte tanhmã mē pahkrã hto pu mē tãm amnhĩ nhĩpēx mex o ri papa.

23 Rewi hkwÿjaja na prem axpēn mÿr pē kēp mēõ patre nē ri pa htã htyk pa nē hapēx.

24 Nom Jejusja htĩr tũm nē pa ho pa xwÿnh jakamã koja mē uràk nē aa hapēx kêt. Koja mē pahto Tirtũm wÿr rãhã ho pa nē aa jam urer kêt nē.

25 ã Jejus kot amnhĩ nhĩpēx anhÿr jakamã te kēp Tirtũm wÿr mē panhõ pry pyrãk. Na pu htem hkôt amnhĩ xunhwÿ nhũm mē panē mē pahte amnhĩ tomnuj piitã rēnh pa nē mē pahpē Tirtũm kra hã mē pajarē.

26 Nê ãm hãmri kêp mẽ pahto Tĩrtũm wỳr xwỳnh maati mex na. Mẽ pakurom tãm kot amnhĩ nhĩpêx mex o pa nê aa kot tanhmã amnhĩ tomnuj to hkêt. Tã ra Tĩrtũm kot amnhĩ wỳr ho àpir jakamã nhũm ra kuri mẽ pahto hwỳr rãhã ho pa.

27 Nê kot amnhĩ to rax o wam mẽõ patre maatijê jakrenh. Wamtaja na prem hkwỳjê pyrã nê amnhĩ tomnuj o pa. Jakamã na prem apkati mẽ amnhĩ tomnuj pãnhã Tĩrtũm mã mẽmoj gõ nê kãm amnhĩ jarê nê amnhĩ to kuwỳ. Hãmri nê rĩ kormã kot nhãm mẽ hwỳr mẽ mrar xwỳnhjê mã mẽ ho anê nê mẽ hpãnhã Tĩrtũm mã mẽmoj nhõr pê mẽ ho kuwỳ. No kêt Jesusja wam patre maati rom aa kot amnhĩ tomnuj kêt jakamã na pre hte mẽ uràk nê amnhĩ tomnuj pãnhã Tĩrtũm mã mẽmoj nhõr o pa hkêt nê. ãm mẽ papajaja na pre mẽ pahte amnhĩ tomnuj pãnhã htyk o kãm amnhĩre. ãm htyk tipxi htã mẽ pahpiitã mẽ pahpãnhã amnhĩrer pa. Jakamã koja axte ã amnhĩ nhĩpêx anhỳr kêt nê. Mo kaxyw kot kêt axte mẽ panê ty?

28 Mojes kapêr kôt na pre Ijaew amnhĩm Rewi hkwỳjê xunhwỳ nhũm mẽ kêp mẽ õ patre nê ri pa. Tã no nhũm mẽ uràk nê arĩ amnhĩ tomnuj o pa nhũm Tĩrtũm tee ri mẽ omu nê mẽ hpãnhã mẽ pakaxyw Krata xãm nê kãm:

—Nã kapxipix mẽ kurom ate tãm amnhĩ nhĩpêx o apa

jakamã kapxipix kot kaj mẽ hpãnhã mẽ ho ixwỳr o apa rãhã ho rãhã. Anê.

8

Jejus kêp mẽ pahto Tĩrtũm wỳr xwỳnh maati hã harênh

Rukre 22.20; Sikũn Korĩt 3.6-11

¹ E kot paj axtem tanhmã mẽ amã mẽ pahto Tĩrtũm wỳr xwỳnh maatita jarênh to ka mẽ inhma. Na hte kaxkwa kamã Tĩrtũm nhĩhkô hã hkrĩ. ĩhkô hã kêp Pahi Maati hã hkrĩ xã hã upòk rũm hkrĩ ho hkrĩ.

² Wam patre maati jaja na prem Tĩrtũm nhõrkwỳ kaàkre wỳr mra nê kamã hitom maati kamã mẽ ho Tĩrtũm wỳr o pa. Nom nhũm Jesus na hte mẽ kurom kaxkwa kamã Tĩrtũm nhõrkwỳ mex kãm mẽ pahto àhwỳr o hkrĩ. Õrkwỳ kaàkreja na prem ĩhkra ho hipêx nom kaxkwa kamã òrkwỳ mexja na pre mẽhõ ĩhkra ho hipêx kêt nê. Tĩrtũm na pre tanhmã hipêx to nhũm kamã Jesusja mẽ pahto hwỳr o hkrĩ.

³ Nê mẽ pahpê Ijaew nhõ patre maati jaja na prem mẽ ho hwỳr kaxyw nê mẽ kot amnhĩ tomnuj pãnhã Tĩrtũm mã mẽmoj nhõr kôt mẽ ho kuwỳ. No Kris na hte ã amnhĩ nhĩpêx anhỳr kêt nê. Ra htyk o kot kãm amnhĩ nhĩ nhõr jakamã na hte wam patre maati pyrã nê xatã kãm mẽmoj nhõr kêt nê.

⁴ Tã na hte arĩ Ijaew Mojes kapêr kôt amnhĩm Rewi hkwỳ kêp mẽ õ patre kaxyw mẽ unhwỳ nhũm mẽ ho

Tirtûm wÿr o pa. No Jejus kêp Rewi hkanrêhã htàmnhwÿ hkêt. Katorxà hkôt kêp Juta hkanrêhã htàmnhwÿ jakamã kop apu arĩ jar pika ja kamã htĩr nê pa ronhÿx Ijaew nhõ patre pyrã nê kêp mē ho Tirtûm wÿr o pa xwÿnh kêt. Æm Rewi hkanrêhã htàmnhwÿ pixjaja na htem mē kaxyw kãm mēmoj gõ nê hkôt mē ho kuwÿ.

⁵ Jar na htem arĩ ã amnhĩ nhĩpêx anhÿr o pa nom kaxkwa kamã na htem ã amnhĩ nhĩpêx anhÿr hkêt nê.

Nê jar Tirtûm nhõrkwÿ kaàkreja te kot kaxkwa kamã õrkwÿ mexta pyrãk. Na pre Mojes õrkwÿ kaàkre nhĩpêx kaxyw nhũm Tirtûm tanhmã kãm hã karõ hto nê kãm:

—E jãã hixêt prêk nhĩmõk ã axãmta ã na pa pre amã ixkreta kukamã ixprĩ hã tanhmã mē ate hipêx to hã amã karõ. Tã kër ka ã hipêx anê. Anê.

Hãmri nhũm kuma nê kot kãm hã karõ xà hkôt hipêx. Hãmri nhũm mē õ patre maati ixkreja kamã mē ho Tirtûm wÿr o pa. Na prem ã amnhĩ nhĩpêx anhÿr o pa.

⁶ Tã nhũm ra Tirtûm axtem mē hpãnhã mē pakaxyw Kris xãm nhũm hte mē pahto hwÿr mex o wamtajê jakre. Na hte kaxkwa kamã mē pahpiitã mē pahpumunh mex rãhã ho hkrĩ nê wamtajê rom tanhmã mē pahkrã hto pu mē tãm amnhĩ nhĩpêx o ri papa. Tirtûm kot finat Mojes mã kapêrja mex nê nom axtem na pre. Tã kapêr nyw na mex

o kot wam kapêr jakrenh. Kapêr nyw kôt kot puj mē pahtyk tã akupÿm pahtĩr nê nhÿrmã Tirtûm mē Jejus wa kuri pamex nê pahtĩr tũm nê papa ho papa nê axte pahtyk kêt nê.

⁷ Kêp apu Tirtûm kot Mojes mã kapêr kôt mē kot tãm amnhĩ nhĩpêx o pa ronhÿx pre Tirtûm axte kapêr nyw ã kagã hkêt nê.

⁸ Nom wam kapêr tũmta na pre mē mar tÿx htã arĩ amnhĩ tomnuj rãhã ho pa nhũm tee ri ja hã mē omu nê mē kãm:

Nà kot paj axte nhÿrmã mē apê Ijaew mã axtem tanhmã ixkapêr to.

⁹ Amnepê mē anhĩgêtjê mã na pa pre ixkapêr.

Na pa pre Ejit pê mē kator nê mē kot tanhmã amnhĩ nhĩpêx to ho pa kaxyw tanhmã hã mē kãm karõ hto.

Nom na prem ixkapêr ma nê ãm kuma nê ixkôt amnhĩ nhĩpêx kêt nê. Pa tee ri ja hã mē omu hãmri nê mē hkaga.

¹⁰ Tã kot paj mē apê mē hkanrêhã mē htàmnhwÿ nywjê mã axtem ixkapêr ka mē ixkapêr nywja ma.

Kot paj nhÿrmã tanhmã mē akrã hto ka mē ixkapêr nyw mar tÿx nê hã ano htÿx nê ho apa.

Nê akĩnh nê apa.

Nê ixkôt ri amnhĩ nhĩpêx mex o apa.

Nê axpên mã ijarênh o: “Nã ãm hãmri Tirtûm kêp mē panhõ Tirtûm na.”

Anhÿr o ri axpën mã
ijarënh o apa.

Pa amnhĩ tã mẽ ama nẽ
mẽ apumu nẽ amnhĩ
xwar mẽ apê ixkra hã
amnhĩm mẽ ajarë.

11 Kot kaj mẽ apiitã ixte
amnhĩ nhĩpêx kôt
ixpumunh mex o ri
apa. Mẽ akàxpore
rũnh xwÿnhjaja nẽ
mẽ akàxpore hkryre
xwÿnhjaja mẽ apiitã ix-
pumunh mex jakamã
kot kaj mẽ ri axte ixtã
tanhmã axpën kujêr
to ho ri apa hkêt nẽ.

12 Nẽ kot paj mẽ ato mex rax o
ixpa.

Nẽ axte tanhmã mẽ ate
amnhĩ tomnu hto ho
apaja mã ijamaxpër
kêt nẽ. Anẽ.

13 Nẽ koja mẽmoj ra htũm
hãmri nẽ hapêx tokyx anẽ. Ja
pyrà nẽ na pre Tĩrtũm mẽ
pamã kapër tũmta jarënh o:

—E kêr ka mẽ axte ixkapër
tũm mar kêt nẽ. Pãnhã
ixkapër nyw pix mãn mar o
apa nẽ ãm kôt pix mã mãn
amnhĩ nhĩpêx rãhã ho ri apa.
Anẽ.

9

*Tĩrtũm nhõrkwÿ kaàkre
jarënh*

1 Nẽ amnepêm na pre
finat Mojesja mẽ panhĩgêt
nẽ mẽ pahpãmjê mã tanhmã
Tĩrtũm nhõrkwÿ kaàkre jarënh
to. Tanhmã mẽ kot hipêx
to nẽ kamã tanhmã amnhĩ
nhĩpêx to hã mẽ kãm karõ.
Nẽ kamã tanhmã mẽ kot
amnhĩ to Tĩrtũm wÿr to hã
mẽ kãm karõ. Nẽ tanhmã mẽ

hkwÿjê ho hwÿr toja nhũm
pre mãânën mẽ kãm hã karõ.
No Tĩrtũm nhõrkwÿ kaàkreja
kêp õrkwÿ kumrêx kêt. ãm mẽ
kot omunh nẽ kaxkwa kamã
õrkwÿ kumrêx mã hamaxpër
kaxyw na pre.

²Jakamã nhũm prem Mojes
kapër ma nẽ hipêx. Kamã
hitom hamêxkrut. Wam
hitom kamã na pre kanê
hprêêti xãm nẽ kutã mēsti
xãm. Nẽ mēsti nhĩmõk ã
Tĩrtũm mã õ pãwti jaxwÿ. Mẽ
panhõ patre na pre htem
Tĩrtũm mã kugõ nẽ mēsti ã
kãm haxwÿ hãmri nẽ hkwÿjê
ho kuwÿ. Tã hitom ja na
prem kêp Tĩrtũm nhõ hitom
mex ã harê.

³⁻⁴Nẽ hitom wa hkaêx kãm
na pre kupêxê ho hakwakre
kahê xàja ajêt. Haturxà kamã
hitomja na prem Tĩrtũm nhõ
hitom maati hã harê. Tĩrtũm
na pre te hirã htÿx kãm hwÿr
wÿr nẽ te kamã hkrĩ pyrãk.
Nẽ kamã na pre Tĩrtũm mã
mêhkuxwa xà ho xêt xà hã mēs
kunĩhtija kuhê. Na prem ôr
o hipêx nẽ kamã ãm nhũm
kuhê. Nhũm pre hte mẽõ pa-
tre hwÿr agjê nẽ kutã kuhê
nẽ mẽ ho Tĩrtũm wÿ. Nẽ mēs
kunĩhti haxwÿja hitom maati
kamã kuhê. Na prem pĩ ho
hipêx nẽ ôr o hpro nẽ kamã
ãm. Mēstija kaxwÿnh kãm na
pre htem mẽmoj jagjê.

Tĩrtũm kot Ijaew mã
tanhmã mẽ kot amnhĩ
nhĩpêx to ho pa hã karõ
nẽ kên po hã mẽ kãm hã
kagàja nhũm prem kamã
kuxà nhũm hikwÿ.

Nẽ mãânën ôr o xijereja
xà nhũm hikwÿ. Nẽ

xijere kamã amnepê mã Tirtûm kot kaxkwa rûm mẽ hwÿr mẽõ rênh kwÿ hikwÿ. Mẽõja mẽ kot kãm: “Manã” anhÿr xwÿnhja na prem hkwÿ hkawrà nê xijere kamã kugjê hãmri nê mêsti kamã kuxà.

Nê finat Arãw nhõ kô kot ho amnhĩ kaxpar xà htũmta nhũm prem kamã kuxà. Tirtûm kot tanhmã ho nhũm kurũm pixôrà muxre hapôx xwÿnhhta nhũm prem mãânên mês kunĩhti kamã kuxà nhũm hikwÿ.

⁵ Nê himõk ã Tirtûm kapêr o wryk xwÿnh wa hkarõ nhĩpêxja wa hamêxkrut nê axpên kutã wa hkõn krã ho hkrĩ. Axpên wÿr hara koror nê wa hkrĩ. Patre maati kot omunh nê Tirtûm kot mẽ hkõt pa ho paja mã hamaxpêr kaxyw. Nê wa hkaêx kãm ahkaprÿja Tirtûm kot mẽ nê mẽ kot amnhĩ tomnuj rênh mã hamaxpêr xà na pre.

Ã Tirtûm nhõrkwÿ kaàkre kot anhÿr. No kot paj ixprĩ hã mẽ amã piitã harênh par kêt nê.

⁶ Na pre hte mẽõ patre apkati mẽ wam hitom wÿr agjê nê kamã Ijaew ho Tirtûm wÿr o pa.

⁷ No hitom maatija ãm mẽ õ patre maati pix na pre hwÿr agjê. Nom apkati mẽ hwÿr pa nê gjêx kêt ãm amgrà pÿnh kãm hwÿr gjêx pÿnh nê. Nê hwÿr gjêx kaxyw nê mẽmo mry pa nê hkamrô ru nê o pa nê hitom maati hwÿr ho agjê. Hãmri nê ho mês kunĩhti

nhĩmõk kamĩ nê Tirtûm mã kãm:

—Pa Tirtûm. E ota mry kamrôta. Mẽ ixpê akwÿjaja mẽ ixte amnhĩ tomnuj jakamã na pa mẽ amnhĩ pãnhã mẽmo mry nhõkre jakà nê kupĩ nê hkamrô ru nê man awÿr o mra. Te kot mẽ ixte amnhĩ tomnuj mÿrapê htyk pyrãk. Jakamã kwa ã mẽ ixte amnhĩ nhĩpêx anhÿrja ã mẽ ixpumunh hkõt mẽ inhnê mẽ ixte amnhĩ tomnuj rê.

Anhÿr o mẽ amnhĩ to kuwÿ.

⁸ Nê patre maati pix na pre hitom maatija wÿr agjê nê mẽ ho Tirtûm wÿ. Ijaew na prem ixkre kapem hamãr o kuhê nê hwÿr gjêx kêt nê. Tirtûm Karõ kot hã mẽ kãm karõ xà hkõt. Te Tirtûm pê amÿm kuhê pyrãk. Tã na htem jarãhã arĩ Ijaew kanrêhã mẽ hkra nê mẽ htãmnhwÿjaja ã amnhĩ nhĩpêx anhÿr o pa. Jao mẽ higêjtê pyrã nê Tirtûm pê amÿm kuhê.

⁹ Mẽ kot arĩ Tirtûm mã mry hpar nê hkamrô ho mẽmoj kamĩr nê amnhĩ to hwÿr o pa htã na htem arĩ hamaxpêr punuj pix o pa.

¹⁰ Tirtûm kapêr tũm kot tanhmã mẽmoj tã mẽ kãm karõ hto.

Na pre tanhmã mẽ apkur xà hã mẽ kãm karõ hto nhũm htem pix kur o pa.

Nê tanhmã mẽ hkõm xà hã mẽ kãm karõ hto nhũm htem pix o hkõm o pa.

Nê tanhmã amnhĩmnuj to hã tanhmã mẽ kot amnhĩ kuhõnh to hã karõja nhũm htem hkõt pix mã

tanhmã amnhĩ kuhõnh
to ho pa.

Në tanhmã mẽ kot ri mẽ
hikukrêx kuhõnh to hã
mẽ kãm karõja nhũm
htem kôt pix mã tanhmã
kuhõnh to ho pa.

Ã na pre Tirtũm Kris kukamã
mẽ kãm mẽmoj tã karõ rax
anẽ. Kris kutêp pix mã ã
mẽ kot amnhĩ nhĩpêx anhÿr
kaxyw. No mẽ pahte arĩ ã
amnhĩ nhĩpêx anhÿr kaxyw
kêt. Na pre ra Kris mẽ
pahwÿr wrÿ nẽ Tirtũm kapêr
tũm o hapêx nẽ hpãnhã mẽ
pamã kapêr nyw jarẽ pu mẽ
hpãnhã nywta kôt pix mã
amnhĩ nhĩpêx o papa. Kapêr
nywja mex o mex. Nẽ mex o
wamta jakrenh.

*Kris htyk o mẽ pahte
amnhĩ tomnuj pãnhã amnhÿrer
ã harênh*

11 Tã na pre Krisja tãm mẽ
pahwÿr wrÿ nẽ kêp mẽ pahto
Tirtũm wÿr xwÿnh maati nẽ
patre hpãnhã mẽ pahto hwÿr
o pa. Nom jar pika ja kamã
mẽ kot mẽ ïhkra ho Tirtũm
nhõrkwÿ kaàkre nhĩpêxta wÿr
àr nẽ kamã mẽ pahto hwÿr
kaxyw na pre wrÿk kêt nẽ.
Na pre ra akupÿm kaxkwa
hwÿr api nẽ kamã õrkwÿ mex
wÿr axà nẽ kamã tanhmã mẽ
pahto mex to nẽ tanhmã mẽ
pahto Tirtũm wÿr to rãhã ho
hkri.

12 ã kaxkwa kamã Tirtũm
nhõ hitom maatija wÿr
àr tipxi htã mẽ pahpiitã
mẽ pahte amnhĩ tomnuj
pãnhã amnhÿrer pa. Nom
mẽmo mry kamrô ho mẽ
pahpãnhã amnhÿrer kêt nẽ.

Mõx kamrô rÿ motre kamrô
ho mẽ pahpãnhã amnhÿrer
kêt nẽ. Amnhĩ kamrô ho na
pre mẽ pahpãnhã amnhÿre.
Tyk nẽ hkamrô pikapirta o
mẽ pahpiitã mẽ pahpãnhã
amnhÿrer pa.

13 Nẽ annepêp Ijaew kot
Tirtũm kapêr tũm kôt amnhĩ
nhĩpêx mex o pa hkêt jakamã
nhũm tee ri mẽ omu nẽ mẽ
kot amnhĩ tomnuj o mẽ pa
xwÿnh ã mẽ harẽ. Jakamã
na pre mẽõ patre xatã mry
kamrô ho mẽ hkamĩ. Mõx
kamrô nẽ motre kamrô ho
mẽ hkamĩ. Na pre mõx krare
hkwÿ hpa nẽ ho hxêt nẽ hprà
ho hkwÿjê kamĩ. Æ na prem
xatã mẽ hipêx anhÿr o pa.
Tirtũm kot ja hã mẽ omunh nẽ
mẽ mex ã mẽ harênh kaxyw.
Nom te mẽ krãhkà pix mex
pyrà nẽ mẽ hkrã kaxwÿnh
kãm arĩ hamaxpêr punuj o
pa.

14 ã na prem amnhĩ nhĩpêx
anhÿr o pa. Nom Krisja mẽ
kurom aa tanhmã amnhĩ
tomnuj to hkêt jakamã na
pre mẽ pahte amnhĩ tomnuj
xwÿnhjê nẽ ty. Te mẽ kot
amnhĩ nẽ mõx rÿ motre hpar
nẽ hkamrô runhta pyràk o
amnhĩ nhĩpêx nẽ mẽ panê
Tirtũm mã amnhĩ gõ nhũm
pre mẽ kãm hkurê xwÿnhjaja
kupĩ. Na pre Tirtũm Karõja
ã kot mẽ panê htyk anhÿr
kaxyw tanhmã ho hihtÿx
to. Karõja aa hapêx kêt
kumrêx rãhã nẽ pa ho pa
xwÿnh jakamã na pre Kris
tykja kukamã tanhmã ho
hihtÿx to nhũm mẽ panê ty.
Tapxipix na mẽ pahte tãm

amnhĩ nhĩpêx o papa kaxyw kêp tanhmã mẽ pahkrã hto xwýnh. Jakamã na pu htem ra pajamexpêr nyw o pajamexpêr o papa nê pajamexpêr o:

—Na pa pre tee ri inhmã amnhĩ krã hkôt tãm amnhĩ nhĩpêx o ixpa hprãm kaprý nê ãm amnhĩ tomnuj pix o ri ixpa. Tã Kris kot inhnê htyk o hkamrô pikapĩr ã harênh ma nê amnhĩ kaxyw hkôt ijamaxpêr tỳx nê nhũm amnhĩ tã ixpumu nê ixte tãm amnhĩ nhĩpêx o ixpa kaxyw ixãm. Jakamã kot paj ãm Tĩrtũm pix mã kãm tanhmã amnhĩ nhĩpêx to ho ri ixpa. Tĩr rãhã nê pa ho pa xwýnh jakamã kot paj nhỹrmã kuri urak nê ixtĩr tũm nê ixpa ho ixpa. Anê.

15 Nê amnepê mã na prem piitã Tĩrtũm kapêr tũm kôt amnhĩ nhĩpêx mex o pa hkêt nê. Mẽ kot xatã hkôt amnhĩ nhĩpêx o pa hã amnhĩ jarênh tã hkôt amnhĩ nhĩpêx kêt nê. Jakamã na pre Kris wrý nê mẽ pahte hkôt amnhĩ xunhwýr mã xwýnhjê mã Tĩrtũm kapêr nyw jarê nê mẽ pamã:

—Kot paj mẽ anê ty nhũm Tĩrtũm ã ixte amnhĩ nhĩpêx anhỹrja kukwak ri mẽ ato mex rãhã ho pa. Anê.

Hãmri nê amnhĩ jarênh xà hkôt mẽ pahte amnhĩ tomnuj piitã hpãnhã amnhĩrer kaxyw mẽ panê ty.

16-17 Te jar pika ja kamã mēhō htyk kukamã hkrajê mã tanhmã amnhĩ jarênh to pyrak. Na htem htyk kaxyw nê hkrajê mã:

—Nà kot paj mẽmo arĩgro hã ty ka mẽ inhmýr pê ixpê ixkukrêx kwý o arĩk.

Anhỹr o na htem amnhĩ jarê. Hãmri nê ty nhũm hkrajaja amnhĩm õ mẽmoj to arĩk pa. Mẽ hipêêxà kukwak ri mẽ hikukrêx mex nê mýr pê o pa. No kormã htĩr ri nhũm mẽ kormã kêp hamýnh kêt nê. Ja pyrã nê na pre Tĩrtũmja Jejus htyk kukwak ri tanhmã mẽ pahto mex to pu mẽ kukwak ri mẽ pamex nê pahkĩnh nê ri papa.

18 Nê Tĩrtũm kapêr tũm kôt na pre hte mẽ õ patre mry pa nê ãm hkamrô runh kôt pix mã mẽ ho Tĩrtũm wýr o pa nhũm amnhĩ tã mẽ omunh xà hkôt mẽ kuma nê tanhmã mẽ ho mex to.

19 Na pre finat Mojesja Ijaew mã Tĩrtũm kapêr tũm piitã harê nê harênh pa hãmri nê môx õxpĩ nê kaxyw motre hõxpĩ. Hãmri nê xijere kamã hamê wa hkamrô runh pa nê kamã gô hkwý ru. Hãmri nê kaxyw mẽmo pĩ hpa hkryre pê “isop” jarênhja kwý kukê. Nê kaxyw ôwêhti hkĩ kamrêkre hkwý hpy nê isop mẽ ho pihkàr pa nê mry kamrô o go. Hãmri nê ho hkwýjê kamĩ. Nê ho Tĩrtũm kapêr ã kagã tũmta kamĩ.

20-22 Hãmri nê ho anhỹr pa nê mẽ kãm:

—Nà na Tĩrtũmja ixte mry kamrô ho mẽ akamĩr pumunh kôt mẽ pamã kapêr o: “E kot kaj mẽ ixkapêr kôt amnhĩ nhĩpêx o ri apa hã kot paj tanhmã mẽ ato mex to rãhã ho ri ixpa ka mẽ amex

nê akĩnh nê ajamakêtkati nê ri apa. Jakamã kêr ka mẽ mry kamrô ho mẽmoj piitã hkamĩr pa. Nê ho amnhĩ kamĩ. Kêr pa ja hã mẽ apumu hãmri nê axte tanhmã mẽ ate amnhĩ tomnuj tota mã ijamexpêr kêt nê." Anê. ã na Tĩrtũm mẽ pamã kapêr anê. Anê.

Hãmri nê hpãnhã mry kamrôta o ôrkwỹ kaàkre kamĩ. Nê hkre kamã mẽmoj kuhê xwỹnh piitã nhũm ho hkamĩr pa. ã na pre mẽ õ patre mẽ mex kaxyw mẽ hipêx anhỹr o pa. Mẽ kot tũhã mẽmoj to hpỹnhre nê ho hkamĩr kêt jakamã kironhỹx pre mẽmoj piitã ã hipêx anhỹr o pa. Kop apu mẽ kot mry hpar nê hkamrô runh kêt ronhỹx pre Tĩrtũm arĩ mẽ kot amnhĩ tomnuj mã hamaxpêr rãhã ho pa.

²³ Na prem ã Tĩrtũm nhõrkwỹ kaàkre kamã mẽmoj kuhê xwỹnh piitã mex kaxyw hipêx anê. Te Tĩrtũm kot mẽ pahto mex nhũm mẽ pahte nhỹrmã ma kaxkwa hwỹr õ krĩ hwỹr paxãpirta pyrã nê. Nom mẽ kot mry hpar nê hkamrô runhta kukwak ri mẽ pamex nê papa hkêt. ãm mẽhõ kamrô kukwak ri mẽ pamex xwỹnhhta pix kukwak ri na mẽ pahpê pahtĩr tũm nê papa mã xwỹnh. Ja na mex o mry kamrô piitã hakrenh pa.

²⁴ Jejus Krisja pix kukwak ri. Tãm na pre patre pyrã nê mẽ pahto Tĩrtũm wỹr kaxyw mẽ ãhkra ho Tĩrtũm nhõrkwỹ kaàkre nhĩpêxta wỹr gjêx kêt nê. ãm ixkre kaàkre pix na pre. Na pre kaxkwa kamã

Tĩrtũm nhõ krĩ hwỹr axã. Tã arĩ kamã Tĩrtũm nhĩhkõ hã mẽ pahto hwỹr rãhã ho hkrĩ.

²⁵ Nê Ijaew nhõ patre maati na hte amgrã mẽ ôrkwỹ kaàkre kamã hitom maati hwỹr gjêx tipxi. Nê amnhĩ kôt mry kamrô ru nê ho agjê. Tĩrtũm kot hã omunh nê axte mẽ kot amnhĩ tomnuj mã hamaxpêr hkêt kaxyw. Nom Kris na pre mẽ urak nê mẽmo mry pa nê Tĩrtũm mã hkamrô kapĩr kêt nê. Kamrô na pre mẽ panê axkapĩ. Nom patre pyrã nê amgrã mẽ ã amnhĩ nhĩpêx anhỹr kêt nê. Na pre htyk o Tĩrtũm mã amnhĩ nhõr tipxi.

²⁶ Kêp apu patre pyrã nê amgrã mẽ mẽ panê htyk o pa ronhỹx ra mẽ panê htyk xohtõ rax kumrêx. Nhỹx pre amnepê mã Tĩrtũm kot mẽmoj piitã ho katorta rũm amgrã mẽ mẽ panê htyk o pa ho hkrax. Jao xatã htyk o amgrã xohtõ rax kumrêx. Nom ja kot anhỹr kêt. Na pre mẽ pahwỹr wrỹ nê mẽ panê htyk tipxi htã htykja o mẽ pahte amnhĩ tomnuj piitã hpãnhã amnhĩrer par kumrêx. Jakamã mo kaxyw koja axte ty?

²⁷ ãm pahtyk tipxi htã koja Tĩrtũm nhỹrmã akupỹm mẽ pahpiitã mẽ pahto pahtĩr nê ahpỹnhã tanhmã mẽ pajarênh to nê ahpỹnhã tanhmã mẽ panhĩpêx to. Kormã mẽ pahtĩr ri mẽ pahte amnhĩ nhĩpêx ã mẽ pahpumunh xã hkôt tanhmã mẽ panhĩpêx to.

²⁸ Ja pyrã nê na pre Krisja ãm mẽ panê htyk tipxi htã

mê pahto ohtô nê mê panê
 mê pahte amnhî tomnuj
 piitã rênh pa. Hãmri nhũm
 Tirtũm akupỹm ho htĩr nê
 akupỹm amnhî wỳr ho api.
 Tã koja nhỹrmã akupỹn mê
 pahwỳr wrỳ. Nom axte mê
 pahte amnhî tomnuj pãnhã
 amnhî rer kaxyw mê panê
 htyk kaxyw wrỳk kêt nê. Ra
 kot mê pahte amnhî tomnuj
 pãnhã amnhĩrer kênã. Koja
 akupỹn wrỳ nê mê pahte
 amnhî wỳr kamã pajamak o
 papa xwỳnhjaja ma akupỹm
 amnhî kôt kaxkwa hwỳr mê
 pahto àpir pa. Ra mê pahtyk
 tã nhũm akupỹm mê pahto
 mê pahĩr nê ma amnhî kôt
 mê pahto àpir pa pu mê kuri
 pamex nê pahĩr tũm nê papa
 ho papa.

10

*Kris kot mê panê htyk tipxi
 hã harênh*

¹ Nê arĩ mê kot Tirtũm
 kapêr tũm kôt amnhî nhĩpêx o
 mê pa xwỳnhjaja kormã hprĩ
 hã Tirtũm kot tanhmã mê
 pahto mex to hã harênh mar
 tỳx kêt. Na prem kormã hkwy
 pix ma. Na hte mê õ patreja
 amgrã mê kãnhmã kaxkwa
 hwỳr mry kamrôta pẽ nê mê
 amnhî to Tirtũm wỳ. Kot ja
 hã mê omunh nê axte mê kot
 amnhî tomnuj mã hamaxpêr
 hkêt kaxyw. Tã ã mê kot
 amnhî nhĩpêx anhỹr tã arĩ
 Tirtũm kapêr kwỳm amnhî
 nhĩpêx rãhã

² Jakamã na prem xatã kãm
 mẽmo mry kamrô runh o pa.
 Kêp apu tãm amnhî nhĩpêx nê
 tãm ri hamaxpêr ronhỹx arĩ ã

amnhî nhĩpêx anhỹr o pa hkêt
 nê. Nê xatã amnhî pãnhã mry
 hpar nê hkamrô ho Tirtũm
 nhõrkwy kaakre kamã mẽmoj
 kamĩr kêt nê.

³ Nom na prem tãm amnhî
 nhĩpêx o pa hkêt nê. Mê kot
 amgrã mê Tirtũm kot mê nê
 mê kot amnhî tomnuj rênh
 kaxyw mê kot kãm mẽmo
 mry hpar o pa htã no ãm
 hkôt amnhî nhĩpêx xwỳnh
 ã amnhî jarênh kêt nê. Arĩ
 mê kot amnhî tomnuj o pa
 jakamã na prem mry hparta
 ã amnhî pumu nê tee ri
 amnhî kukamã hamaxpêr o
 hkaprĩ nê pa.

⁴ Nom na hte môx kamrô rỳ
 motre kamrôja mê panê mê
 pahte amnhî tomnuj rênh kêt
 nê.

⁵⁻⁸ Jakamã na pre Krisja mê
 pahwỳr nojarêt nê Tirtũm mã
 amnhî jarênh o:

Pa Tirtũm? E kot paj ma mê
 hwỳr wrỳ.

Mê kot amnhî pãnhã amã
 mry hparta apê hprãm
 nõkati nê amã hkĩnh
 kêt.

Ate mê nê mê kot amnhî tom-
 nuj rênh kaxyw mê kot
 amã mẽmo mry hparta
 amã hprãm kêt. ãm
 ixkukamã na ka pre ã
 mê kot amnhî nhĩpêx
 anhỹr kaxyw mê kãm
 ja hã karõ.

Mê kot mry nhĩpêx o te pa
 ixte mê nê ixtyk nê
 ixkamrô pikapĩr pyrãk
 o na prem ixkukamã ã
 amnhî nhĩpêx anê.

Jakamã na ka ra mê kaxyw
 inhmã inhĩ gõ pa mê

urak nê inhĩ ho inhĩ.

Tã kot paj ma mẽ hwÿr wrÿ. Ixte amã hprãm xà hkôt pix mã ixte tanhmã amã mnhĩ nhĩpêx to ho ixpa kaxyw. Akapêr ã kagã htũm kot tanhmã ixkukamã ijarênh to xà hkôt kot wrÿ nê ã amã amnhĩ nhĩpêx anê. Anê.

Hãmri nê man mẽ pahwÿr wrÿ.

⁹ Kot Tirtũm kapêr tũm o hapêx par nê hpãnhã tãm mẽ panê htyk kaxyw wrÿ. Jakamã na pre nojarênt nê Tirtũm mã amnhĩ jarênh o:

—E ixte amã hprãm xà hkôt amnhĩ nhĩpêx kaxyw kot paj ma mẽ hwÿr wrÿ.

¹⁰ Anhÿr jakamã wrÿ nê Tirtũm kãm hprãm xà hkôt mẽ panê ty. Na pre nhãm mēhõ mẽ kãm hkurê xwÿnhjê mã òr nhũm mẽ kot hpĩr nhũm amarĩ htyk kêt nê. Na pre amnhĩ grõnh kôt mẽ kãm amnhĩ gõ nhũm prem kupĩ. Hãmri nhũm htyk o mẽ pahte hkôt amnhĩ xunhwÿr xwÿnhjê o Tirtũm kra. Mẽ kot xatã mry hparta rom htyk tipxi tã mẽ pahpiitã mẽ pahte amnhĩ tomnuj pãnhã amnhĩrer pa.

¹¹ Nê mẽ õ patrejaja na htem apkati mẽ Tirtũm nhõrkwÿ kaakre kamã kãm tanhmã amnhĩ nhĩpêx to. Nê apkati mẽ hkwÿjê hpãnhã mry hkwÿ hpa nê hkamrõ ru nê mẽ ho Tirtũm wÿ. Tã nom ja hã mẽ omunh xà hkôt mẽ

nê mẽ kot amnhĩ tomnuj rênh kêt nê.

¹² No kêt Kris na pre mẽ kot xatã mry hpar xwÿnhnta rom ãm htyk tipxi htã mẽ pahte amnhĩ tomnuj piitã hpãnhã amnhĩre. Hãmri nê ma akupÿm kaxkwa hwÿr api nê Tirtũm nhĩhkõ hã Pahi Maati hkrĩ xà kamã upòk rũm hkrĩ ho hkrĩ.

¹³ Kojã kuri hkrĩ rãhã nhũm Tirtũmja ìhkram mẽ kot kutã amnhĩ xunhwÿr xwÿnhjê jaxar pa. Ja kaxyw na kormã kuri hamãr o hkrĩ.

¹⁴ ãm htyk tipxi htã htykja o mẽ pahte hkôt amnhĩ xunhwÿr xwÿnhjê ho Tirtũm kra pu mẽ ra hpãnhã tãm amnhĩ nhĩpêx rãhã ho papa. Nê paja-maxpêr mex o ri papa. Tirtũm kãm hprãm xà hkôt.

¹⁵ Amnepêr mẽ kot Tirtũm nhÿ hã kapêr jarênh o mẽ pa xwÿnhjaja na prem mẽ panhĩgêttjê mã kapêr o pa. Tirtũm Karõ nhÿ hã mẽ kãm kapêr nê mẽ kãm:

¹⁶ —E na Tirtũm mẽ pamã amnhĩ jarê nê amnhĩ jarênh o:

Kot paj nhÿrmã axtem ixkapêr nyw o mẽ amã ixkapêr.

Nê mẽ akrãm hagjê ka mẽ mar tÿx pê hã ano htÿx nê ho apa.

Ixkapêr tũm na pa pre mẽ amã kên pota ã hã kagã.

Nom ixkapêr nyw kot paj axtem mẽ akrãm hagjê.

¹⁷ Nê kot paj axte mẽ ate amnhĩ tomnuj mã ija-maxpêr kêt nê.

Anhÿr o mẽ pamã amnhĩ jarênh. Anê.

18 Tã ra axte mẽ pahte amnhĩ tomnuj mã hamaxpêr kêt ã kot amnhĩ jarênh jakamã mo kaxyw kot pu mẽ arĩ amnhĩ pãnhã kãm mẽmo mry hpar nê hkamrô runh o papa? Tã mẽ pahkwÿjaja na hte arĩ kãm ja ho anhÿr prãm o pa. E kwa mẽ axte ã amnhĩ nhĩpêx anhÿr kêt nê ixkwÿjaja.

Akupÿm mẽ pahte amnhĩ nhĩpêx tũm o paxujanãr kêt ã mẽ pamã karõ

Matêwre 27.51; Rukre 23.45; Rõmãn 5.1-2; Epes 3.12; Eprêw 4.14-16

19-20 E ixkrãmnhwÿjaja. Ra Jejus kot mẽ panê htyk o hkamrô pikapĩr jakamã na pu htem arĩ tee ri amnhĩ kukamã pajamaxpêr hkêt nê. Tĩrtũm axte kot mẽ pahte amnhĩ tomnuj mã hamaxpêr kêt jakamã na pu htem paxãmnhĩx amnhĩ to hwÿr o papa. Te paxãmnhĩx õrkwÿ kaãkre kamã hitom maati hwÿr pagjêx nê kamã amnhĩ to hwÿrta pyrãk. Jao ra mẽ papamjaja amnhĩ to hwÿr o papa nhũm patre axte mẽ pahto hwÿr kêt nê. Jejus na pre htyk o mẽ pamã hitom maati wÿr hakwakre kahêxã hã kupêxêja kõt ã ho axkjê. Jao mẽ paxãmnhĩx hwÿr mẽ pagjêx kaxyw mẽ pamã kahêxã mẽ.

21 Tã ra kêp Tĩrtũm nhõ krĩ kamã mẽ pahto hwÿr xwÿnh maati na. Nê mex kumrêx o jar pika ja kamã patre kot

mẽ ho hwÿr o pa xwÿnhnta jakrenh.

22 Jakamã e kwa kêr pu mẽ mãmrĩ paxãmnhĩx amnhĩ to Tĩrtũm wÿr o papa. Ra Jejus kot mẽ panê htyk nhũm mẽ pahte amnhĩ kaxyw hkõt pajamaxpêr rãhã ho papa jakamã kêr pu mẽ axte mẽ pahpê amnhĩ tomnuj xwÿnh ã amnhĩ jarênh kêt nê. Kêr pu mẽ nhÿrmã tanhmã pajamaxpêr punuj to rÿ tanhmã amnhĩ tomnuj to hãmri nê tee ri ja hã amnhĩ pumu nê pahkaprĩ kamã amnhĩ to Tĩrtũm wÿr kurê kumrêx. Jejus ra kot mẽ pahte amnhĩ tomnuj pãnhã amnhĩrer par jakamã kot puj mẽ Tĩrtũm mã tanhmã mẽ pahte amnhĩ tomnuj to hã amnhĩ jarê nhũm mẽ pama nê axte kãm hamaxpêr kêt nê. Pu mẽ te paxwÿr nê pahte amnhĩ nê pagrã htyk kuhõnh par nê akupÿm pamex pyrãk. Nê axte paxãmnhĩx amnhĩ to Tĩrtũm wÿr o papa.

23 Nê mẽ kot Kris ã tanhmã mẽ pahto htã kwa kêr pu mẽ tee ri amnhĩ kukamã pajamaxpêr kêt nê. Rÿ pajamaxpêr o:

—Konên. Koja mẽ tanhmã hamaxpêr to nê Kris ã ixpĩ rÿ ko. Pa apu mẽ kot ixpĩr pymaj akupÿm ixte amnhĩ nhĩpêx tũm o awjanã nê akupÿm hkõt amnhĩ nhĩpêx japêr rÿ ko. Anê.

Kwa pu mẽ tee ri ã pajamaxpêr anhÿr hkêt nê. Pu kêt mẽ pajamaxpêr o:

—Nã mẽ kot Kris ã tanhmã ixto htã kot paj aa hkaga hkêt

nê. Mê kot hã ixpîr mã tã kot paj hkaga hkêt kumrêx.

Anhÿr ã amnhî jarê.

²⁴ Nê kêr ka mê akwÿjê mã anê kê mê mêmoj to axpên kutã nojarêt rãhã ho ri axpên kôt pa. Jao tanhmã axpên to mex to o ri axpên kôt pa.

²⁵ Na pre ra mê pahkwÿjaja tanhmã hamaxpêr to nê axte mê pahkôt pikuprônh nê Tirtûm kapêr mar o hkrî hkêt nê. No kêr pu mê ho mê uràk kêr nê. Kêr pu mê arî xatã axpên wÿr akuprô nê mê pahte tee ri amnhî kukamã pajamaxpêr nê axpên mã pakapêr o papa. Kêt mê panhõ Pahihtija ra akupÿn mê pahwÿr wrÿk kaxyw jakamã kwa kêr pu mê kutêp arî axpên mã pajamaxpêr mex nhõr pê tãm axpên nhîpêx mex rãhã ho i papa.

²⁶ Mê pahkwÿjaja kot Tirtûm kapêr mar mex tã na htem kuma nê ãm kuma. Kwa kêr ka mê ho mê uràk kêr nê. Kris kot mê panê htyk ã harênhja mê kot mar mex tã na htem kuma nê ãm kuma nê hkaga kumrêx. Jakamã mêmõ koja Kris pyrà nê htyk o mê kot amnhî tomnuj pãnhã amnhîre? Nà amrakati kumrêx. ãm Jejus pix na pre Tirtûm ja kaxyw ãm. Tapxipix na pre ã mê panê amnhî nhîpêx anê. Tã nhûm mê kot hkagaja mÿrapê koja mê nhÿrmã mê tãmjaja mê kot amnhî tomnuj pãnhã amnhîre.

²⁷ Mê kot Tirtûm kutã amnhî xunhwÿr xwÿnh na mê. Amnepêr na pre Tirtûm

mê kot kutã amnhî xunhwÿr xwÿnhjê kaxyw mê kot amnhî xà htÿx kamã hamak tûm xàta nhîpêx. Tã ra mê kot Jejus kaga jakamã koja nhÿrmã ma hwÿr mê rênh pa nhûm mê tee ri kãm hwÿr pa hprãm kêt kaprÿ.

²⁸ Amnepêr finat Mojesja kormã htîr ri na pre hte mêmõ pixi nê kapêr kaga nê akupÿm kot amnhî nhîpêx tûm o awjanã nê tanhmã amnhî tomnuj to nhûm hkwyÿjaja ja hã omu. Tanhmãn axkrut rÿ axkrunêpxi nê ja hã omu. Hãmri nê ma Mojes wÿr mra nê axpên kôt kãm tanhmã kot amnhî tomnuj to hã harê. Hãmri nhûm harênh ma nê mê kãm hã amÿnê nhûm tee ri kãm htîr prãm kaprÿ. Mê kot akupÿm amnhî nhîpêx tûm o ujanâr nê amnhî tomnuj o paja mÿrapê na prem mê kupa. ã na pre htem mê hipêx anhÿr o pa.

²⁹ Nê koja mêmõ tanhmã Tirtûm Kra Jejus o kapêr punuj to. Tirtûm kapêr ã kaga htûm kot ra mê kot kêp Tirtûm Kra hã harênh mar mex tã axtem nê tanhmã ho kapêr punuj to ho pa. Kot mê panê htyk nê hkamrô pikapîr kôt kot mê pahte amnhî tomnuj pãnhã amnhîrer ã harênh mar tã kuma nê ãm kuma nê harênh o:

—Nà mê pahpyrà nê kot amnhî tomnuj xwÿnh nhûm mê kot hã hpîr kênã. Na pre mê panê htyk kêr nê.

Anhÿr ã harê. Nê Tirtûm Karõja nhûm mãânên tanhmã ho kapêr punuj to. Kêp

mê pakutã nojarêt xwÿnh
tã nhÿm axtem nê tanhmã
ho kapêr punuj to. Mÿrapê
koja nhÿrmã Tirtÿm tanhmã
homnuj tÿx to. Homnuj tÿx
o mê kot Mojes kapêr kaga
nhÿm mÿrapê kot mê hparta
jakre. Jakamã kwa kêr ka mê
ã amnhÿ nhÿpêx anhÿr hkêt
nê.

³⁰ Tirtÿm kapêr ã kagà htÿm
kot ja jarênh kot:

Ixpê Tirtÿm kot paj mê
kot amnhÿ tomnuj
xwÿnhjê homnuj tÿx
nê. Anê.

Nê mê kot tãm amnhÿ nhÿpêx
xwÿnhjê jarênh kot:

Mê kot amnhÿ to mex o mê
pa xwÿnhjaja kot paj
nhÿrmã mê ho mex
rax nê. No mê kot
amnhÿ tomnuj o mê
pa xwÿnhjaja kot paj
nhÿrmã mê homnuj tÿx
nê. Anê.

Ra mê pahte ã kapêr anhÿr
xwÿnhja kot amnhÿ nhÿpêx ã
omunh mex.

³¹ Jakamã kwa mê okora. Kêr
ka mê amnhÿ to mex rãhã ho
ri apa. Tirtÿm rãhã ho rãhã
nê hihtÿx o hihtÿx jakamã
koja mêmoj tã akamã gryk ka
amex kêt o amex kêt.

³² Nê amnepêem mê ate Je-
jus kôt amnhÿ xunhwÿr krax
kãm na prem Jesus ã mê atom-
nuj tÿx tã ka prem mê umaj
hkaga hkêt nê. Tã kêr ka mê
arÿ ã amnhÿ nhÿpêx anhÿrja
kukamã mãn ajamaxpêr nê
hã anohtÿx rãhã ho apa. Jao
arÿ ã amnhÿ nhÿpêx anê nê mê
umaj Jesus kaga hkêt nê.

³³ Na prem mê piitã mê
noo mã tanhmã mê amã

kapêr punuj to nê tanhmã mê
anhÿpêx to. Nê tãhã tanhmã
mê akwÿjê homnuj tÿx to ka
mê tee ri ja hã mê omu nê
mê kamã axukapri nê. Nê mê
hkôt axkamê nhÿm prem mã
mê ato anê nê.

³⁴ Na prem mê akwÿjê jagjê
ka prem ja hã mê omu nê ma
mê hagiênh xà hã ixkre hwÿr
mê hwÿr mra nê tanhmã mê
ho mex to. Nhÿm prem mê
apê mê akukrêx kwÿptã nê
ma amnhÿm o pa ka mê ãm
amnhÿ tã mê omu nê aja-
maxpêr o:

—Kwâr mê mãmri ma
amnhÿm hamÿn o pa. Koja
nhÿrmã Tirtÿm inhmã
ixkukrêx mex o kot ja jakren-
hta kwÿ nhôr rax nê pa
amnhÿm hamÿ nhÿm aa ixpê
hapêx kêt nê. Hãmri nhÿm
axte mēhō aa ixpê utār kêt nê.
Jar mê ixkukrêxta mexti hã.
Anê.

Jao mê kot mê apê utār tã
ka mê akapri nã apa hkêt nê.
Ã amnhÿ kukamã ajamaxpêr
anhÿr pê akÿnh nê apa. ãm
hãmri na ka prem ã amnhÿ
kukamã ajamaxpêr anê.

³⁵ Na ka prem mê kutã
amnhÿ to htÿx kãm ã apa anê.
Tã kwa kêr ka mê arÿ ã amnhÿ
nhÿpêx anhÿr o ri apa. Kêr kê
nhÿrmã Tirtÿm ja hã mê ato
mex rax nê.

³⁶ Nê kêr ka mê arÿ amnhÿ
kaxyw Tirtÿm mã ajamaxpêr
rãhã ho ri apa. Mê kot Jesus
ã tanhmã mê ato htã ka mê
hkaga hkêt nê. Kot kaj mê
ã amnhÿ nhÿpêx anhÿr o apa
nhÿm Tirtÿm ja hã mê apumu
nhÿm ja kãm mex nê. Hãmri
nhÿm ra kot amnhÿ jarênh xà

hkôt nhÿrmã amã mẽmoj mex nhõr rax nê. Jakamã kwa mẽ kot tanhmã mẽ anhÿpêx to hã amnhÿ pumu nê tee ri amnhÿ kukamã ajamexpêr o ri akaprÿ hkêt nê. Kot kaj mẽ Kris ã apunuj rãhã apa hkêt nê.

³⁷Tÿrtũm kapêr ã kagà htũm kot Jejus jarênh kot:

Koja mẽ pahwÿr wrÿk mã xwÿnhnta tokyx wrÿ. Na ra wrÿk kaxyw nojarêt. Anê.

³⁸Nê harênh kot:

Ixxôt mẽ kot amnhÿ nhÿpêx mex o mẽ pa xwÿnhjaja koja mẽ amnhÿ kaxyw ixkôt hamaxpêr tÿx rãhã nê. Jao nhÿrmã ixri htÿr tũm nê mex rãhã nê pa ho pa.

Nê koja mẽhõ ixkaga pa tee ri kãm ixkÿnh kêt ã omu. Anê.

³⁹No mẽ papajaja te mẽ pahte mẽ kot Jejus kaga nhũm kot amnhÿ tã mẽ homnuj mã xwÿnhjê pyræk kêt. Arÿ mẽ pahte amnhÿ kaxyw hkôt pajamexpêr rãhã jakamã koja nhÿrmã amnhÿ wÿr mẽ pahto api.

11

Amnhÿ kaxyw Tÿrtũm kôt mẽ hamaxpêr mex xwÿnhjê jarênh

Sikũn Pêtre 3.5-7

¹Nê na htem Kris ã mẽ panhÿpêx kati ho pa pu mẽ pahpunuj rãhã nê ri papa. Te Kris kot mẽ pahto mex kêt pyræk pu htem mẽmoj punuj pix kãm ri papa nê kormã Tÿrtũm kot mẽ pahto mex ã amnhÿ tã omunh kêt

nê. Tã ã mẽ pahte anhÿr tã kwa kêr pu mẽ arÿ kapêr kôt amnhÿ nhÿpêx rãhã ho papa. Mẽ pahte pano ho Tÿrtũm pumunh kêt tã kot mẽ pahkôt pa ho pa hã amnhÿ kaxyw kãm pajamexpêr tÿx rãhã ho papa. Jakamã na pu htem ãm kapêr kôt pix mã amnhÿ nhÿpêx o papa.

²Amnepê mã mẽ pakukamã mẽ panhÿgêtjaja na prem no ho Tÿrtũm pumunh kêt tã amnhÿ kaxyw kãm hamaxpêr nê kapêr kôt amnhÿ nhÿpêx o pa nhũm amnhÿ tã mẽ omu nhũm ja kãm mex nê.

³Nê mẽ papajaja na pu htem pajaxwÿja mẽ pano ho omunh kêt tã amnhÿm harênh o:

—Nà amnepêm kormã mẽmoj piitã amrakati ri nhũm Tÿrtũm ãm kapêr pix o mẽmoj piitã ho kato. Ixte inhno ho ja hã omunh kêt tã kot ã amnhÿ nhÿpêx anhÿr ã amnhÿ jarênhja jakamã kot paj hkôt ijamexpêr tÿx rãhã ho ri ixpa. Anê.

⁴Na pre finat Atãw nhÿpêx nê kaxyw hprõ Ewa nhÿpêx. Hãmri nhũm wa hkra Apewja htõ Kaÿ rom amnhÿ kaxyw Tÿrtũm kôt hamaxpêr tÿx o pa. Jakamã nhũm wa Tÿrtũm mã mẽmoj gõ. Nhũm Apew kot Kaÿ rom Tÿrtũm kãm hprãm xà hkôt kãm mẽmoj nhõr jakamã nhũm amnhÿ tã omu nê kot amnhÿ to mex xwÿnh ã harê nê kot kãm õr xwÿnhnta nhũm mex ã harê. Tã Apew amnepêm htyk tã pu htem arÿ

harênh mar rãhã ho papa nê kãm pajamaxpêr o:

—Apew na pre hte amnhĩ kaxyw Tirtũm kôt hamaxpêr tỳx rãhã ho pa.

Anhỹr ã kãm pajamaxpêr.

⁵ Nê Atãw kanrêhã htãmnhwỳ Enokja na pre haxwỳja amnhĩ kaxyw Tirtũm mã hamaxpêr tỳx o pa. Jao hkamnàr rom kãm hprãm xà hkôt pix mã tanhmã kãm amnhĩ nhĩpêx to ho pa nhũm amnhĩ tã omu nê amnhĩm mex ã harê. Jakamã na pre htyk kêt nê. Na pre Tirtũm htĩr rãhã ma amnhĩ wỳr ho api nhũm hkwyjaja tee ri hapêr o pa. Jakamã na pu htem arĩ axpên mã Enok kot amnhĩ kaxyw Tirtũm kôt hamaxpêr mex o pa hã harênh o papa.

⁶ Mê kot amnhĩ kaxyw Tirtũm mã mẽ hamaxpêr kêt xwỳnhjaja na hte Tirtũm mẽ mex ã mẽ harênh kêt nê. Tã mẽ papajaja kêr pu mẽ Enok pyrã nê amnhĩ kaxyw kãm pajamaxpêr tỳx rãhã ho papa. Nê pajamaxpêr o:

—Tirtũmja htĩr rãhã ho rãhã. Kojã nhỹrmã mẽ ixte amnhĩ kaxyw hkôt ijamaxpêr xwỳnhjê ho mex rax nê. Nã kojã mẽ ixto anê.

Anhỹr o mẽ pajamaxpêr nhũm Tirtũm amnhĩ tã mẽ pajamaxpêr ã mẽ pahpumu nê mẽ pahte amnhĩ to mex ã mẽ pajarê. No mẽ kot amnhĩ kaxyw kãm hamaxpêr kêt xwỳnhjaja na hte ã mẽ harênh anhỹr kêt nê.

⁷ Nê Enok kanrêhã htãmnhwỳ Noehtija na pre

haxwỳja amnhĩ kaxyw Tirtũm mã hamaxpêr tỳx o pa. Jao hkamnàr rom amnhĩm pàr raxja nhĩpêx. Na pre ra Tirtũm na rax kukamã tanhmã kãm ujarênh to. Kormã aa na wrỳk nhũm Noehti kot omunh kêt tã Tirtũm kapêr ma nê mar xà hkôt amnhĩm pàr rax kumrêxta nhĩpêx. Ōrkwỳ kamã hkwyjê mẽ mẽ amnhĩm hipêx. No mẽ kot Tirtũm kapêr mar nê ãm mar xwỳnhjaja na pre Tirtũm gô tãm o mẽ hanhi nê mẽ himex pa. Nom Noehtija nhũm kot amnhĩ to mex xwỳnh ã harê. Kot amnhĩ kaxyw hkôt hamaxpêr rãhã ho pa jakamã nhũm pre ã mex ã harênh anê.

⁸ Nê Noehti kanrêhã htãmnhwỳ Apraãwja na pre haxwỳja amnhĩ kaxyw Tirtũm mã hamaxpêr tỳx o pa. Na pre Tirtũm kot kãm pika nhõr ã kãm amnhĩ jarê nê ra kot ma hwỳr mênh kaxyw. Hãmri nhũm Apraãw kuma nê hkamnàr rom õ pika kaga nê ma pika hõja wỳr pa. Aa kot ma hwỳr mõr nê omunh kêt tã Tirtũm kapêr mar xà hkôt õ pika kaga nê ma hwỳr pa ho pa.

⁹ Hãmri nê hwỳr pøj nê omu nhũm Tirtũm kãm:

—E pika ja kot paj nhỹrmã akanrêhã akra nê atãmnhwỳjê mã kugõ. Anê.

Hãmri nhũm kuma nê pikaja kamã pa ho pa. Ra kamã axtem mẽ uro hkwyjaja ri pa nhũm Tirtũm kormã mẽ kator kêt ri nhũm mẽ õ pika hwỳr pøj nê mẽ kamã pa ho pa. Nom amnhĩm ōrkwỳ mex

nhîpêx kêt nê. Kormã kêp ò pika kumrêx kêt ã hkamnhîx jakamã ãm mry kà o ixkre nhîpêx nê kamã pa ho pa. Nê nhÿhÿm pa kaxyw nê kugrà nê ma amnhî kôt o pa. Amnhî kaxyw Tirtûm mã hamaxpêr rãhã jakamã ã amnhî nhîpêx anhÿr o pa.

Nê Apraãw kra Ijak nê htãmnhwÿ Jakoja wa Apraãw pyrã nê mry kà ho òrkwÿ nê ma amnhî kôt o pa. Nhûm Tirtûm kot Apraãw mã kapêr pyrã nê wa kãm wa hkanrêhã wa hkra nê wa htãmnhwÿjê mã pika nhôr ã amnhî kukamã wa kãm amnhî jarê.

¹⁰ Jakamã nhûm Apraãw kormã Tirtûm nhô krî hwÿr àpir xa hã amnhî tã hamãr pê kot ho ò pika mã xwÿnhjê kamã pa ho pa. Kaxkwa hwÿr àpir mã xwÿnhta mex kumrêx. Tirtûm kot hipêx jakamã koja mry kà ho ixkre nhîpêxta rom aa hapêx kêt nê. Jakamã nhûm Apraãw mē pahpyrà nê ma kot hwÿr àpir xa hã amnhî tã Tirtûm jamãr rãhã ho pa.

¹¹⁻¹² Tã ra hpigêt tÿx nê hkurê hkêt nê pa. Te ra ri htyk kaxyw pa pyrãk. Nhûm hprô Sara haxwÿja hpigêx tÿx nê. Kamrô hkêt ã amgrã xohtô rax kumrêx. Nhûm wa aa hkra hkêt nê pa htã nhûm Tirtûm nhÿrmã wa hkra hã wa kãm awjarê nhûm wa kuma nê amnhî kaxyw hkôt hamaxpêr kurê kumrêx. Nom amnhî tã kuma nê tee ri amnhî kukamã hamaxpêr hkêt nê. Na pre wa kuma nê

axpên mã:

—Nà kot puj xep hãmri tã pahkra. Tirtûm kot hã ã pa-jarênh anhÿr kênã. Anê.

Tã ã wa kot hkra kaxyw Tirtûm mã hamaxpêr anhÿr jakamã na pre Apraãwja hprô htû. Ra wa hamê hpigêt tÿx kumrêx tã nhûm htû. Nhûm wa hkra Ijakja gaa nê wa kãm kato. Jakamã nhûm wa gaa nê rî wa hkanrêhã wa htãmnhwÿ xohtô rax o ohtô rax. Ohtô ho kaxkwa kamã kanhêti xohtô jakre. Nê ohtô ho gô xujanãr mÿri pikahti grã hkryre jakre. Jakamã nhûm mē tee ri mē ho kôta hpar mã. Nhûm Apraãw kêp mē hpar krax.

¹³ Tã nhûm Apraãw nê Ijak nê Jakoja mē ri pa tãmtã nê htyk pa nê hapêx. Tirtûm kormã kot mē kãm pika jarênhta nhôr xwÿj ri ra htyk pa. Nom kormã mē htîr ri tanhmã kãm hamaxpêr to nê hamaxpêr o:

—Nà kormã Tirtûm kot mē inhmã pika jarênhja nhôr kêt tã koja nhÿrmã inhmÿr pê ixkanrêhã ixkra nê ixtãmnhwÿjê mã kugô. Nà koja mē kãm kugô. Ra kot hã inhmã amnhî jarênh kênã kot kêt mē kãm òr kêt.

Anhÿr o kaxyw kãm hamaxpêr rãhã ho pa. Jao hkînh nê hamaxpêr o:

—Nà inhô krîja axtem na. Na pa hte jar pika ja kamã ri mē hkôt ri ixpa. Te ixpê mē uro pyrã nê ri mē hkôt ixpa nom jar inhô krî hkêt. Inhô krî na kêt axte mã. Anê.

¹⁴⁻¹⁵ Na prem ã ò krî hõ hkukamã hamaxpêr anhÿr o pa. No ò krî htûmta mē kot

hkaga nê pika hõ hwÿr mõi
xwÿnh̄ta na prem ã harēnh
anhÿr kêt nê. Kop apu mē
kot amnhīm tām mǎn jarēnh
ronhÿx prem awjanā nē ma
akupÿm hwÿr pa. Na prem
axtem krī hõ jarē nē kormā
hwÿr mõi kêt ã amnhī jarēnh
o pa.

16 Tā nhÿ krī na prem ã
harēnh anē? Nā kaxkwa
kamā Tirtūm nhõ krīja. Tām
na mex kumrēx jakamā
nhūm prem kormā hwÿr ma
àpir xa hā mē pahpyrà nē
amnhī tā Tirtūm jamār rāhā
ho pa nhūm amnhī tā mē omu
nē hkīnh nē. Nē mē kot tām
amnhī nhīpēx ã mē omu nē
mē kēp hkra hā mē harēnh ã
hpijaam kêt nē. Hāmri nē mē
kutēp tanhmā õ krī ho mex to
ho pa.

17-18 Na pre ra tanhmā
Apraāw mǎ hkra Ijakja jarēnh
to nē kām:

—Akra Ijak kanrēhā hkra
nē htāmnhwÿjaja koja mē kēp
ixkra. Anē.

Tā ra kot amnhī tā
Apraāw kamā hamak kaxyw
hkukamā hamaxpēr nē
hamaxpēr o:

—Xà we Apraāw kām ixkīnh
tÿx kumrēx nē kām ixkõt
amnhī nhīpēx rāhā ho pa
hprām nā? Xà we kām ixkīnh
tÿx o hkrata jakrenh? E pa
kop we ja hā amnhī tā kamā
ama nē omu mǎn. Anē.

Hāmri nē kot hkra hpīr nē
kām õr ã kām karõ. Hāmri
nhūm kuma nē ra kot kām
hpīr kaxyw. Kot Tirtūm kot
amnhī nhīpēx ã omunh mex
jakamā hkamnār rom kot
kām hpīr kaxyw.

19 Nē hamaxpēr o:

—Nā Tirtūm akupÿm kot mē
ho htīr xwÿnh kēnā.

Anhÿr jakamā kām hkra
hpīr puma hkēt nē ra kot
kām hpīr mā tā nhūm Tirtūm
amnhī tā omu nē nē kām
kapēr nhūm kuma nē hpīr
kēt nē wa ma akupÿm õrkwÿ
hwÿr mõi. Tā ã kot hkra
nhīpēx anhÿr jakamā Apraāw
mā te Ijak htyk nē akupÿm
htīr pyrāk.

20 Nē Ijakja na pre haxwÿja
amnhī kaxyw Tirtūm mǎ
hamaxpēr tÿx o pa. Jao
hkamnār rom amnhī kra wa
kām Tirtūm kot wa ho mex
kukamā wa kām harē. Kra
Jako mē Ejauta wa kām harē
nē wa kām:

—E koja nhÿrmā Tirtūm
inhmÿr pē war ato mex rāhā
ho pa. Anē.

21 Nē Jakoja na pre haxwÿja
amnhī kaxyw Tirtūm mǎ
hamaxpēr tÿx o pa. Jao
hkamnār rom hkra Juje
mā Tirtūm kot mē ho mex
kukamā harē. Na pre Jakoja
hkra nē htāmnhwÿ mē hpim-
ràatā hprām xà ma Ejit wÿr
pa nē kamā pa ho pa. Tā
nhūm Jako hpigēt tÿx nē ra
htyk kaxyw. Hāmri nē hkra
Juje mē hkra wa mē kām
kapēr nē mē kām:

—E na pa tee amnhī kamā
ama. Na pa ra ixtyk kaxyw.
Nom koja Tirtūm nhÿrmā
inhmÿr pē mē ato mex rax
nē. Anē.

Hāmri nē amnhī kaxpar xà
hā pī hā amnhī kaxpa nē
kānhmā xa nē Tirtūm mǎ mex
o mex ã harē. Hāmri nē
akupÿm nõr xà kamā nõn ty.

22 Nê Jujeja na pre haxwýja amnhĩ kaxyw Tĩrtũm mã hamaxpêr tỳx o pa. Jao htyk kaxyw nê hkamnàr rom hkwýjê mã tanhmã amnhĩ jarênh to. Ra hpigêt nê htyk kaxyw nê hkwýjê mã tanhmã amnhĩ tã karõ hto nê mẽ kãm:

—E na pa ra ixyk kaxyw. Tã koja Tĩrtũm inhmýr pê nhýrmã Ejit rũm mẽ akator nê ma akupým mẽ panhõ pika hwýr mẽ ato pa. Ra kot mẽ panhĩgêt Apraãw mã amnhĩ jarênh xà hkõt. Jakamã kwa mẽ inhma. Kêr ka mẽ akupým anojarêt nê ma amnhĩ kõt ixtã kasãwja mý nê amnhĩ kõt ixto mõi. Hãmri nê mũtar mẽ panhõ pika kamã mẽ anhõ krĩ htã ijaxà pa jawý mẽ akuri ixtã pyka. Anê.

23 Nê Mojes katorxà mẽ hipêêxàja na pre wa haxwýja jajê pyrà nê amnhĩ kaxyw Tĩrtũm mã hamaxpêr tỳx o pa. Juje hkanrêhã htãmnhwý na pre wa. Jakamã nhũm Ejit nhõ pahija tee ri Ijaew xohtõ rax kumrêx ã mẽ omu nhũm ja kêp omnuj nê. Hãmri nhũm mẽ hkra myjaja mẽ hapõx kõt mẽ hamýnh xwýnhjaja kot mẽ hpar ã mẽ kãm karõ. Tã nhũm Mojes kato nhũm hipêêxà mẽ katorxàja wa omu nhũm muxre nhũm wa tee ri hkukamã hamaxpêr. Hãmri nê pahi Paraohti mã mẽ hkra jamýnh xwýnh kot wa kêp hpĩr pymaj ho pimxur o hã mytwrý axkrunêpxi. Tĩrtũm kamnàr rom wa amnhĩ tã kãm uma hkêt nê ã kêp hkra ho hpimxur anê.

24 Nê Mojes na pre haxwýja amnhĩ kaxyw Tĩrtũm mã hamaxpêr tỳx o pa. Kormã karàre ri na pre Paraohti hkra nija omu nê amnhĩm kumý nê ho hkra nê amnhĩ kõt o pa. Rãhã nhũm àptàr nhũm Ejit nhõ xwýnhjaja kêp pahi Paraohti htãmnhwý hã axpên mã harê. Hãmri nhũm tee ri amnhĩ tã mẽ kuma nê amnhĩ tã mẽ kãm aprã nê mẽ kãm:

—Kwa mẽ ã ijarênh anhýr kêt nê. Ixpê mẽ akwý hkêt. Anê.

25 ãm kãm Tĩrtũm kwýjê kõt pix mã ri pa ho pa hprãm. Nê kãm Ejit nhõ pahi hkõt amnhĩ tomnuj prãm kêt nê. ãm mẽ kot amnhĩ tomnuj pix o paja na mẽ kãm hprãm nhũm ja hã mẽ omu nê tee ri mẽ hkukamã hamaxpêr nê hamaxpêr o:

—Nà kot paj mẽ hkõt ri ixpa hkêt kumrêx. Mẽ hkĩnh nê pa htã koja mẽ gaa nê ty nhũm mẽ hkĩnhja mẽ kêp hapêx. Nà kot paj Tĩrtũm kwýjê hkõt mãn ri ixpa ho ixpa. Mẽ kot Tĩrtũm ã mẽ inhĩpêx kati htã pa arĩ mẽ hkõt ixpa ho ixpa.

26 Inhmã Ejit nhõ xwýnhjê hkõt ixkukrêx rax nê ri ixpa hprãm kêt. Kwãr mẽ mãmrĩ Tĩrtũm ã tanhmã inhĩpêx to. Koja mẽ ã inhĩpêx anê pa ixpunuj nê ri ixpa htã koja Tĩrtũm nhýrmã ixto mex rax nê. Nà kot paj Ejit nhõ pahihti hkõt ri ixpa hkêt nê.

Anhýr jao ra mẽ pahpyrà nê Kris gryk ã mẽ hkaga.

27 Tã akupým mẽõ pika hwýr Ijaewjê ho mõi kaxyw nhũm Ejit nhõ pahihtija tee

ri ja hã omu nê kamã gryk tÿx nê. No nhũm Mojesja amnhĩ kaxyw Tirtũm kôt hamaxpêr tÿx o hkamnàr rom kãm mē uma hkêt nê. Nê mē kêp hkwyjê kator pa nê ma akupÿm mēõ pika hwÿr amnhĩ kôt mē o pa. Tirtũm kamnàr rom ã mē kêp mē ho kator anê. Aa kot no ho omunh kêt tã amnhĩ kaxyw kãm hamaxpêr tÿx nê hkamnàr rom mē kator nê hamakêtkati nê mē o pa.

28 Nê hkamnàr rom mē hkĩnh ã arĩgro mē kot kãm “Pas” anhÿr xwÿnhhta ho hkrax. Kormã Ejit rũm kator kêt ri. Nê kaxyw amnhĩ kwÿjê mã hã karõ nê mē kãm:

—E pa mē amã Tirtũm kapêr jarê ka mē inhma. Nà kot puj xep mē jarãhã ôwêhti hkwy pa nê hkamrô ru. Nê hkamrô ho panhõrkwy jakwakre hã pĩ kukõ. Hãmri nê ï kuxõt nê kuku. Kojã kamàt nhũm mē kot amnhĩ tomnuj xwÿnhjê pé mē hkra my kot wa piitã mē hpar mã xwÿnhja mō. Hãmri nê mē pamÿ ri mō nê ã mē pahte mē panhõrkwy nhĩpêx anhÿrja ã omu nê tanhmã mē pahkrajê ho hkêt nê. Tirtũmja ã mē pahte amnhĩ nhĩpêx anhÿr kaxyw ã inhmã karõ anê. Jakamã e pu mē hkamnàr rom ã amnhĩ nhĩpêx anê kê mē pahkrajaja mē pahpê htyk kêt nê. Anê.

Hãmri nê ã mē kot Ejit rũm kator xà hã arĩgrota ã mē hkĩnh o kator krax anê. Mē hkĩnhja na htem kãm “Pas” anê.

29 Nê Ijaewjaja na prem haxwÿja Ejit rũm kormã

Mojes kôt mē pa ri uràk nê amnhĩ kaxyw Tirtũm mã hamaxpêr. Jakamã na prem ra gô xujanãr pé “Gô Kamrêk” anhÿr xwÿnhja mÿ ri kuhê nhũm Tirtũm mē kãm ho axkjê. Nê mē kãm hkôt ã ho amgrà nhũm mē hã hkamnàr rom mex nê rêr pa. No nhũm mē hkôt mē kot mē himex kaxyw mē mrar xwÿnhjaja. Ejit nhõ pôristijaja nhũm gôja akupÿm mē hã axkamur nê mē himex pa.

30-31 Nê Ijaew kot Mojes mÿr pé Jojue hkôt pa ri mē uràk nê amnhĩ kaxyw Tirtũm kôt hamaxpêr o pa. Na prem ra Tirtũm kot mē kãm pika nhõr xwÿnhhta wÿr pøj nhũm Tirtũm krĩ pé Jeriko hwÿr mē kurê. Mē kot kamã mē pa xwÿnh pé utàr kaxyw mē hwÿr mē kurê. Mēõ krĩ pu hã kahêja kên tÿx pix o na pre. Nê hprêk rax kumrêx. Nê krĩ nhõ xwÿnhjaja kãm Tirtũm kapêr mar prãm kêt. Hãmri nhũm Tirtũm mē hã Ijaewjê mã amÿnê nê mē kãm:

—E mēõ krĩja kot paj mē amã kugõ nom kêr ka mē inhmar kumrêx. Kêr ka mē apkati mē mē õ krĩ hwÿr mra nê kupu hpÿnh o atã apkati kêp 7 nê rĩ ma akupÿm mra. Anê.

Hãmri nhũm mē kuma nê mar xà hkôt ma Jeriko hwÿr mra. Hãmri nê hwÿr pøj nê Tirtũm kamnàr rom krĩ puhã kahêja kupu hpÿnh o hã apkati kêp 7. Hãmri nhũm apkati pé 7ta ã nhũm kên tÿx o kahêja mē kêp amnhĩ krakrak nê rôrôk pa. Nhũm mē mra nê hkôt krĩ hwÿr agjê

nê krī nhō xwÿnhjê nhīmex pa. Nom krī kamã kuprÿ pê Raapja Ijaew pyrã nê amnhĩ kaxyw Tĩrtũm mã hamaxpêr o pa jakamã nhũm mẽ kormã mẽ himex kaxyw mẽ hwÿr mōr kêt ri amnhĩ kukamã mẽ hkwyjaja kot mẽ hã ukapĩ ho pa kaxyw mẽ hwÿr mẽ kurê. Hãmri nhũm Raapja mẽ kêp amnhĩ pyrã nê Tĩrtũm kôt hamaxpêr ã mẽ omu nê hkwy kot mẽ himex pymaj amnhĩ nhōrkwy kamã mẽ kêp mẽ ho amũxu nhũm mẽ hkã hkĩnh pê ma akupÿm hkwyjê wÿr mō. Jakamã nhũm mẽ kot mẽ himex kaxyw mẽ hwÿr mra hãmri nê amnhĩ pyrã nê tanhmã Raap mẽ õ fãmii ho hkêt nhũm mẽ arĩ htĩr nê pa. Mẽ urak nê amnhĩ kaxyw Tĩrtũm kôt hamaxpêr o pa hã omunh xã hkôt tanhmã mẽ ho hkêt nê.

³² ã na pre mẽ kot amnhĩ kaxyw Tĩrtũm kôt mẽ hamaxpêr xwÿnhjaja Tĩrtũm kamnàr rom amnhĩ nhĩpêx anhÿr o pa. Nom jajê pixjaja na prem ã amnhĩ nhĩpêx anhÿr hkêt nê. Mãänên Giteãw nê Parak nê Sãsõ nê Jepte nê Tawi nê Sãmuew nê Tĩrtũm nhÿ hã mẽ kapêr o pa xwÿnhjaja. Jajê piitã na prem wamtajê pyrã nê amnhĩ kaxyw Tĩrtũm kôt hamaxpêr tÿx rãhã ho pa. Nom kot paj ixprĩ hã tanhmã mẽ kot hkamnàr rom amnhĩ nhĩpêx to hã mẽ harênh kêt nê. Kot pa anê nê tokyx harênh par kêt nê. Mẽ ohtô rax kumrêx jakamã na pa ãm hkwy pix jarê nê hã kagã.

³³ Na prem hkwyjaja Tĩrtũm

kamnàr rom ma mẽ kot amnhĩ tomnuj xwÿnhjê nhō krī hwÿr mra nê mẽ kêp mẽ õ pika pytà. Nê mẽ hkwyjaja Tĩrtũm kamnàr rom mẽ ho amnhĩptàr mex o pa. Nhũm prem kãm Tĩrtũm kurê xwÿnhjaja mẽ hkwyjê pynê nê ahkrehti kamã mry xoprê hkwy nhĩpy mẽ kurê. Nhũm prem amnhĩ tã mẽ omu nê amnhĩ kaxyw Tĩrtũm mã hamaxpêr kurê kumrêx nhũm amnhĩ tã mẽ omu mẽ nê te mry jakwa ho pikamÿr tÿx pyrak o mẽ hipêx nhũm ãm mẽ omunh o kuhê nê tanhmã mẽ ho hkêt nê. Á na prem Tĩrtũm kamnàr rom amnhĩ nhĩpêx anhÿr o pa.

³⁴ Nhũm mẽ kot kuwy rax kãm mẽ hkwyjê rênh tã nhũm mẽ kot amnhĩ kaxyw Tĩrtũm mã hamaxpêr tÿx nhũm amnhĩ tã mẽ omu nê mẽ nê tanhmã kuwy ho nhũm mẽ hxêt kêt nê. Nhũm pre mẽ hkwyjaja wapo ho mẽ hkamnhwÿr o mẽ hkwyjê hpar kaxyw nhũm mẽ amnhĩ kaxyw Tĩrtũm mã hamaxpêr nhũm amnhĩ tã mẽ omu nê mẽ nê tanhmã mẽ ho nhũm mẽ amnhĩ rê nê mẽ umaj hprôt nê ma mra. Mẽ hihtÿx kêt tã Tĩrtũm kamnàr rom ÿ hã hihtÿx nê mẽ kãm mẽ hkurê xwÿnhjê ho krihkrit pa nhũm mẽ ma akupÿm hapêx.

³⁵ Nê mēni hkwyjaja na prem haxwÿja amnhĩ kaxyw Tĩrtũm mã hamaxpêr tÿx o pa. Jao mẽ hkrajaja mẽ kêp htyk tã nhũm prem Tĩrtũm kamnàr rom mẽ ho kuwy nhũm mẽ kuma nê akupÿm mẽ kãm mẽ ho htĩr.

Ã na prem amnhĩ kaxyw Tĩrtũm mã hamaxpêr pê mex nê pa anê. No na pre mẽ hkwỳjaja mẽ uràk nê amnhĩ kaxyw kãm hamaxpêr tỳx tã nhũm Tĩrtũm tokyx mẽ ho mex kêt nê. Na pre mẽ kãm mẽ hkurê xwỳnhjaja Tĩrtũm ã mẽ par kaxyw. Nê mẽ hkwỳjaja Tĩrtũm ã mẽ hipêx kati ho pa nhũm mẽ amnhĩ xà htỳx kãm hamak kãm ty. Nhũm mẽ himex kaxyw nê mẽ kãm:

—Kwa mẽ Tĩrtũm kaga. Kot kaj mẽ hkaga pa mẽ amã inhũre nê mẽ anhĩmex kêt nê. Anê.

No nhũm mẽ kuma nê ãm mẽ kuma nê amnhĩ kaxyw kãm hamaxpêr tỳx pê mẽ kãm:

—Nà mẽ kam nê mãmri xpi. Inhmã ixyk pyma hkêt. Kot paj ty nhũm Tĩrtũm akupỹm ixto ixtĩr pa kuri inhmex kumrêx nê ri ixtĩr tũm nê ixpa ho ixpa.

Anhỹr o mẽ kãm amnhĩ jarênh jakamã hãmri Tĩrtũm kaga hkêt rãhã nhũm mẽ himex.

³⁶ Nê mẽ kãm mẽ hkurê xwỳnhjaja na prem Kris ã mẽ hkwỳjê mã hpêr o pikênh pê mẽ htak xà ho mẽ htak rũnh o pa. Nê kax o mẽ hkwỳjê hpa hpre nê mẽ hte hpre nhũm mẽ kêp prês nê hkrĩ ho hkrĩ.

³⁷⁻³⁸ Nhũm prem kên rũnh o mẽ hkwỳjê htak o mẽ kupa. Nê mẽ hayr o mẽ hkwỳjê pa. Nê mẽ hkamnhwỳr o mẽ hkwỳjê pa. ã na prem Kris kôt mẽ hamaxpêr ã mẽ omunh xà hkôt mẽ hipêx anhỹr o pa. Jakamã na pre

mẽ hkwỳjaja mẽ umaj mẽõ krĩ rũm hapôj nê ma hprôt nê mra. Nê te mẽ õ krĩ hkêt pyrà nê kapôt ã kêp amrakati nê ri pa. Mẽ ê hkêt nê ôwêhti hkà ho ê nê ri hã pa. Nê motre kà ho amnhĩ pre nê ri hã pa. Nê kên prêk ã api nê kre kamã hpimxur o pa. Nê pika hkre kamã hpimxur o pa. Nhũm mẽ kãm mẽ hkurê xwỳnhjaja te mẽ kêp ahpunu nê mẽ kêp ahkro pyràk o mẽ hipêx nê axpên mã mẽ harênh o:

—Nà mẽ mexti hã. Kwa pu mẽ piitã mẽ himex paa ri.

Anhỹr o mẽ harênh tã nhũm Tĩrtũm mẽ uràk nê ã mẽ harênh anhỹr kêt nê. Na pre mẽ mex kumrêx ã mẽ harê. Nê nhỹrmã kuri mẽ mex nê pa ho pa hkukamã mẽ harê.

³⁹ ã na prem Tĩrtũm kamnàr rom mẽ kãm mẽ hkurê xwỳnhjê kutã amnhĩ to htỳx kãm htyk o pa anê. Nhũm Tĩrtũm ja hã mẽ omu nê hkĩnh nê kãm mẽ hapê htỳx nê. No nhũm mẽ kormã htĩr ri amnhĩm Tĩrtũm kot mẽ ho mex xà jamỳnh kêt rãhã ty.

⁴⁰ Tã mo na pre Tĩrtũm kormã mẽ htĩr ri hkwỳjê pyrà nê mẽ ho mex kêt nê? Nà na pre kormã mẽ hkukamã hamaxpêr o:

—Nà kot paj kormã mẽ ho mex kêt nê. Kot pa mẽ mỳr pê mẽ kot ixkôt amnhĩ xunhwỳr mã xwỳnhjê jamãr grire mãn. Kêr pa inhõ krĩ kamã mẽ ho xipimràatã mẽ ho mex rax kumrêx. Nà kot paj ã mẽ ho mex anê. Ja na kêt inhmã mex o kormã mẽ htĩr ri ixte mẽ ho mexta jakrenh. Anê.

Jao ra ã mẽ papajaja mẽ pakukamã hamaxpêr anê.

12

Mẽ pahte Jejus pyrã nê mẽmoj kutã amnhĩ to htýx ã mẽ pamã karõ

Piripos 3.12-21

¹ Na pre mẽ pakukamã mẽ panhĩgêť kwýjaja amnhĩ kaxyw Tirtũm mã hamaxpêr pê ã amnhĩ xà htýx kamã hamak o pa anê. Tã te ra mẽ kot kýt rũm kaxkwa rũm mẽ pahpumunh nê tanhmã mẽ pamã kapêr to pyrã nê mẽ pamã kapêr o:

—E mẽ inhma mẽ ixkanrêhã mẽ ixtãmnhwýjaja. Na pa prem ã Tirtũm kamnàr rom amnhĩ nhĩpêx o ixpa anê. Mẽ kot ja hã mẽ inhĩpêx kati htã pa prem Jejus kaga hkêť nê. Tã kêr ka mẽ ixpyrà nê ã mẽ kãm mẽ akurê xwýnhjê kutã amnhĩ to htýx anê. Nê mẽ ixpyrà nê amnhĩ kaxyw Tirtũm kôt pix mã ajamaxpêr týt rãhã ho ri apa. Anê.

Jakamã kwa kêr pu mẽ uràk nê ã amnhĩ nhĩpêx anhýr rãhã ho mãn ri papa. Te mẽ hprôt xwýnhjaja kot amnhĩ nhĩpêx pyrãk o amnhĩ nhĩpêx. Na htem hprôt týt kaxyw mẽmoj pyť jamýnh nê ho hprôt hkêť nê. Na htem ý kamã hprôt o hprôt týt nê wam hkwyjê mã wa nê mra. Ja pyrã nê kêr pu mẽ pahte Tirtũm kapêr kôt amnhĩ nhĩpêx mex o papa kaxyw tanhmã mẽ pahte amnhĩ tomnuj to hã amnhĩ pumu nê hkaga kurê kumrêx.

Mẽ pahte amnhĩ tomnuj o papa xàja te mex pyrãk no ãm mex kêt. Te ho mẽ hprôt xwýnh kot axtem nê mẽmoj pyť mýnh nê tee ri ho hprôt týtta pyrãk. Kot puj mẽ tanhmã amnhĩ tomnuj to ho papa nê Tirtũm kapêr kôt amnhĩ nhĩpêx mex kêt nê. Jakamã kwa kêr pu mẽ Tirtũm kapêr gryk ã amnhĩ tomnuj nê amnhĩ to htýx rãhã ho papa. Te ho mẽ hprôt nê nhýri mẽ àhuk xà pix kukamã hamaxpêr rãhã hprôt týt xwýnhnta pyrã nê ãm Jejus mã pajamaxpêr týt rãhã ho papa.

² E kot paj mẽ amã Jejus kot tanhmã mẽ panê amnhĩ nhĩpêx toja jarê ka mẽ inhma. Nà kot mẽ panê mẽ pahte amnhĩ tomnuj pãnhã amnhírer kaxyw htyk nhũm mẽ pahte hkôt amnhĩ xunhwýr jakamã na hte mẽ pamã pajamaxpêr nyw gõ pu mẽ amnhĩ kaxyw hkôt pajamaxpêr ho ri papa. Na pre mẽ kãm hkurê xwýnhjaja kot pĩ kahpa hã nhôr nê hpír mã nhũm mẽ kutã mẽ kãm amnhĩ to htýx nê arĩ mẽ kãm xa nhũm prem kupĩ. Tã tee ri amnhĩ kukamã hamaxpêr o Tirtũm kaga hkêť nê. Na pre hamaxpêr o:

—Nà kwãr mẽ mãmrĩ ixpĩ. Kot paj ty nhũm Inhĩpêxà akupým ixto ixtír pa kuri inhmex kumrêx nê ixtír tũm nê ixpa ho ixpa. Anê.

Tã na ra kaxkwa kamã Tirtũm xupòk rũm mex nê hkrĩ ho hkrĩ.

³ Jakamã kwa kêr pu mẽ kot ã mẽ panê amnhĩ nhĩpêx

anhÿrja mã pajamaxpêr rãhã ho ri papa. Mẽ kot hipêx kati htã nhũm mẽ kutã amnhĩ to htÿx nẽ xa. Tã kêr pu mẽ uràk nẽ mẽ kãm mẽ pahkurê xwÿnhjê kutã amnhĩ to htÿx rãhã ri papa. Jao tee ri amnhĩ kukamã pajamaxpêr o mẽ umaj Tirtũm kaga hkêt nẽ.

⁴ Na ka htem ma mẽ kot amnhĩ tomnuj xwÿnhjê hwÿr mra nẽ mẽ kot amnhĩ tomnuj kaga kaxyw tanhmã mẽ kãm akapêr to nhũm mẽ ja hã mẽ ama nhũm ja mẽ kêp omnuj nhũm mẽ amnhĩ tã tanhmã mẽ atomnuj to. Nom wam mẽ kot mẽ pahkwÿjê nhĩpêxta pyrã nẽ kormã mẽ atõxpîr kêt nẽ.

Tirtũm kot tanhmã hkrajê nhĩpêx to hã harênh

Juãw 15.1-2; Eprêw 5.7-8; Xiakre 1.2-4

⁵ Nẽ mãn ka mẽ arĩ Tirtũm kapêr ã kagã htũm kwÿ hã ano htÿx japêr. Mẽ pahpê Tirtũm krajê mã kapêr jarênh kot:

Koja Pahi Maati tanhmã mẽ ate amnhĩ tomnuj to nê mẽ amã kapêr ka mẽ ama nẽ mar tÿx nẽ mẽmojta kaga kurê kumrêx. No mẽ ama nẽ tee ri kot nê akurê xwÿnhhta kukamã ajamaxpêr o ri akaprĩ o axtem nẽ Tirtũm kaga hkêt nẽ. Ama nẽ kot amã mẽmoj nê kapêr xwÿnhhta kaga kurê kumrêx.

⁶ Na hte Tirtũm kãm mẽ pajapê hã tanhmã mẽ pahte amnhĩ tomnuj to hã mẽ pahpumu

nẽ hã tanhmã mẽ panhĩpêx to. Tãm mẽ pahte amnhĩ nhĩpêx o papa kaxyw. Kot mẽ pahpê hkra hã mẽ pajarênh jakamã na hte ã mẽ pahte tãm amnhĩ nhĩpêx o papa kaxyw mẽ panhĩpêx anê. Anê.

⁷ Jakamã kot kaj mẽ tanhmã amnhĩ tomnuj toja mÿrapê tanhmã apunuj kute nẽ ri apa htã no ãm tee ri amnhĩ kukamã ajamaxpêr hkêt nẽ. Kêt mẽ ãm ajamaxpêr o:

—Nà ixte tãm amnhĩ nhĩpêx kaxyw na Tirtũm ã inhĩpêx anê. Ixpê hkra hã ixte amnhĩ to mex o ixpa prãm xaj ã inhĩpêx anê.

Anhÿr o mãn kêt ajamaxpêr. Na hte mẽ hipêxã mẽ hkra kot amnhĩ to mex kaxyw ã mẽ hipêx anê. Tã Tirtũm na hte mẽ uràk nẽ ã mẽ panhĩpêx anê.

⁸ No koja mẽhõ hkra kot tanhmã amnhĩ tomnuj to hã omu nẽ ãm omu nẽ hã tanhmã ho hkêt nẽ. Hã koja hkraja te hipêxã hkêt nẽ hã awrãre nẽ ri pa pyrãk. Tã mẽ pahpê Tirtũm krajaja kot puj mẽ tanhmã amnhĩ tomnuj to nhũm ja hã mẽ pahpumu nẽ hã tanhmã mẽ pahto. Nom mẽ kêp hkra hkêt xwÿnhjaja nhũm hte ja hã mẽ omu nẽ ãm hã mẽ omu nẽ hã kormã tanhmã mẽ hipêx to hkêt nẽ.

⁹ Nẽ na hte mẽ panhĩpêxã mẽmoj tã mẽ pamã karõ pu htem kuma nẽ hkôt amnhĩ nhĩpêx. Ja mex. Nom kaxkwa kamã Mẽpahpãm maatija mẽ pahte mar nẽ hkôt amnhĩ

nhîpêxja na kêt mex kumrêx. Kot puj mē ã amnhî nhîpêx anê nê nhÿrmã kuri pamex nê pahťir tũm nê papa ho papa.

10 Nê mēhprîre na htem hamaakro nhũm mē hipêêxà tanhmã hã mē ho. Hã mē hkaprêprêk rÿ hã mē kãm akir. Amnhî krã hkôt tanhmã mē hipêx to. Mē kot ja hã amnhî pumunh nê axte hkêt kaxyw. Ja mex. Tã mē papajaja. Mē pahpê Tirtũm kra na pu htem tũhã tanhmã amnhî tomnuj to nhũm mē pahpumu nê tanhmã hã mē pahto. Mē pahte amnhî pumunh nê axte hkêt kaxyw. Uràk nê amnhî to mex pix o papa kaxyw.

11 Na hte mēmoj tã tanhmã mē panhîpêx to pu mē tee ri amnhî pumu nê pahkaprî nê pahkĩnh kêt nê ri papa. Nom kot puj mē tokyx tanhmã amnhî tomnuj tota kaga nê akupÿm Tirtũm kôt tãm amnhî nhîpêx o papa nê akupÿm pahkĩnh nê pajamakêtkati nê ri papa.

Mē pahte Tirtũm kaga hkêt ã mē pamã karõ

12 Jakamã e kwa kêt ka mē amnhî to htÿx nê apa. Mē kot Kris ã tanhmã mē anhîpêx to htãã. Æm Tirtũm kôt pix mã amnhî nhîpêx mex pê akĩnh nê apa.

13 Kêr kê Kris kôt atõjê hõ tee ri mēmoj tã amnhî pumunh kôt ra Tirtũm kaga kaxyw tã ã mē ate amnhî nhîpêx anhÿr ã mē apumu nê mē apyrà nê akupÿm hkôt

amnhî xãm tÿx nê hkaga hkêt nê.

14 Nê kêr ka mē tãm ri axpên nhîpêx o ri apa. Jao axpên kôt ajamakêtkati nê ri apa nê amnhî to mex pix kukamã ajamexpêr. No kot kaj mē anhÿr kêt nê nhÿrmã mē panhõ Pahi Maati hwÿr axàpir nê kuri amex nê apa hkêt nê.

15 Na hte Tirtũm mē pahto mex nê mēmoj to mē pakutã nojarêt rãhã o pa. Jakamã kwa kêt ka mē hkaga hkêt nê. Nê tanhmã ri ajamexpêr punuj to ho ri apa hkêt nê. Kot ka mē ã amnhî nhîpêx anê nhũm Kris kôt mē pahkwÿjaja ja hã mē apumu nê mē apyrà nê tanhmã amnhî tomnuj.

16 Nê kêr ka mē axpên kãm apijaàm kêt o ri apa hkêt nê. Nê te finat Ejau kot amnhî nhîpêx pyràk o ri apa hkêt nê. Na pre Tirtũm ã hpijaàm kêt nê hkwyjê kamã hpijaàm kêt o pa. Nê Tirtũm mã hamexpêr kêt kumrêx. Kêp Ijak kra kot wa jakamã koja nhÿrmã hipêêxà mÿr pê kêp hikukrêx nê õ pika piitã ho àrĩk pa. Hãmri nhũm hipêêxà kot ho Tirtũm wÿr nhũm kot ho mex kaxyw mã tã nhũm axtem nê mēmo arĩgro hã kãm prãm xàj kot kêp mēmoj to àrĩk mã xwÿnhhta htõ Jako mã hkaga hpa. Mankwÿtre gõj kãm ãm prãm xàj kãm hkaga hpa. Jakamã nhũm Jako hpãnhã te kêp Ijak kra kot wa pyrà nê mÿr pê õ mēmoj piitã ho àrĩk mã.

17 Gaa nhũm Ejau tee ri ã amnhĩ nhĩpêx anhÿrja mã hamaxpêr o hkaprĩ nê. Nê tee ri kãm Jako kot akupÿm kãm mêmojta nhõr prãm kaprÿ. Nê mur nê hã hipêêxà wÿ no nhũm axte kãm mêmoj nhõr kêt nê. Nhũm kot ho Tirtũm wÿr kaxyw tee ri amnhĩ to kuwÿ no nhũm kuma nê ãm kuma nê kãm ho anhÿr kêt nê.

18 Nê amnepê mã Tirtũm kot mẽ panhĩgêxjê mã kapêr kaxyw na prem hixêt prêk pê Sinai jarênhja wÿr akuprõ nê hparpê kuhê. Hãmri nhũm hixêt nhĩmõk ã kuwy hpòk rax kumrêx. Nê kuwy mÿr ri kakrã htyk ajêt. Nê kòk àpêr tÿx nê. Nhũm Ijaewjaja hixêt krax ã omu nê kãm maa ho htertet o kuhê.

19-21 Hãmri nhũm mêmõ pifti kakô nhũm Tirtũm hixêt nê mẽ kãm kapêr nê mẽ kãm:

—E mẽ inhma. Kêr ka mẽ hixêt ã axàpir kêt nê. Kot kaj mẽ atõ hã api rÿ mẽ akrit õ hã api ka mẽ ja hã omu nê kaxyw kên rũnh kwÿ jamÿ nê ho htak o apĩ. Anê.

Hãmri nhũm mẽ piitã tee ri kuma nê kãm ma htÿx kumrêx nê amnhĩ nê kãm:

—Kwa hãmri Tirtũm. Axte mẽ inhmã mêmoj jarênh kêt nê. Mojes pix mã mãn mẽ ixkaxyw tanhmã kãm akapêr to. Anê.

Jakamã nhũm Mojes Tirtũm mã amnhĩ jarênh nê kapêr mar kaxyw hixêtja ã api. Kãm ma nê htertet rãhã mõ nê hã api.

22 Nom mẽ kãm ma ho Tirtũm mã amnhĩ jarênh tã mẽ papajaja na pu htem

mẽ kurom paxàmnhĩx kãm amnhĩ jarênh o papa. Na pu htem kãm amnhĩ jarênh kaxyw nê hixêt prêk ã paxàpir kêt nê. Te ra mẽ pahte ma kaxkwa hwÿr õ krĩ hwÿr paxàpir nê pano ho omunh pê kãm amnhĩ jarênh pyræk. Õ krĩja mex o mex. Kamã kapêr o mẽ wrÿk xwÿnhjaja ohtõ o ohtõ. Na htem kamã hkĩnh rãhã ho pa ho pa.

23 Nê õ krĩ hwÿr na hte hkra xàpir xwÿnhjaja ri pa. Nê mẽ papajaja na pu htem kãm amnhĩ jarênh kaxyw nê te kaxkwa kamã kuri pakuhê nê kãm amnhĩ jarênh pyræk o amnhĩ nhĩpêx. Te mẽ pahpê hkra kot wa pyræk jakamã mẽ pamã uma hkêt. Nhũm pre Tirtũm ra õ kagà kamã mẽ pakutêp amnhĩm mẽ panhĩxi hã kagà hpa. Na hte mêmoj piitã hamãr o hkrĩ. Nê krĩja kamã amnepêr kormã Kris kot mẽ pahwÿr wrÿk kêt ri nhũm ra amnhĩ kaxyw Tirtũm kôt hamaxpêr mex xwÿnhjaja haxwÿja ra kamã ri pa. Ra Tirtũm kot mẽ ho hkra jakamã nhũm mẽ kuri ri pa ho pa.

24 Nê Jejus haxwÿja kamã pa ho pa. Na pre mẽ panê htyk nê hkamrõ pikapÿrja o mẽ pahte amnhĩ tomnuj pãnhã amnhĩre. Jakamã na pu htem hkôt amnhĩ xunhwÿ nhũm mẽ pahto hkra pu mẽ paxàmnhĩx ri Tirtũm mã amnhĩ jarênh nê amnhĩ to hwÿr o papa.

Amnepêr na pre Tirtũm tee ri Kaĩ kot htõ Apew pÿr nê

hkamrô pikapîrja ã omu nê hamaxpêr o:

—Nà ã kot amnhĩ nhĩpêx anhÿr jakamã kot pajhã homnuj tÿx nê. Anê.

Tã ra hpãnhã Jejus kot mē panê htyk nē hkamrô pikapîrja ã omu nē ra axtem hamaxpêr o:

—Nà ãm hãmri na Ixkrajã mē nē ty. Jakamã mē kot hkôt amnhĩ xunhwÿr xwÿnhjaja kot pa Ixkra kukwak ri mē kot amnhĩ tomnuj mÿrapê tanhmã mē ho hkêt nê.

Anhÿr o mē pakukamã hamaxpêr. ã hamaxpêr anhÿrja mex o mex.

25 Na pre Mojes Tirtûm nhÿ hã mē panhĩgêxjê mã xatã mē kãm Tirtûm kapêr jarênh o ri pa nhûm mē kuma nê hkôt amnhĩ nhĩpêx o pa. Tã gaa nê ra hã nohkêt pa nê akupÿm mē kot amnhĩ nhĩpêx tûm o awjanã nhûm Tirtûm tee ri ja hã mē omu nê mÿrapê tanhmã mē hipêx to. Tã nhûm Kraja kaxkwa rûm mē pahwÿr wrÿ nê mē pamã kapêr. Jakamã kwa mē okora kêr pu mē panhĩgêjtê pyrã nê mē pahte amnhĩ nhĩpêx tûm o paxujanãr kêr nê. Kot puj mē anê nhûm Tirtûm ja hã mē pahpumu nê mē urak nê ja hã tanhmã mē panhĩpêx to.

26 Amnepê m Tirtûm kot hixêt prêk pê Sinai kamã mē kãm kapêrja. Na pre kapêr tÿx o pika ho ãk nhûm htertê tÿx nê. Tã koja nhÿrmã axte pika ho ãk nê kaxkwa ho ãk nhûm wa hamê htertê tÿx kumrêx. Kojã axte ho anhÿr ho pixi nê axte ho anhÿr kêr nê.

27 Tã nhÿrmã axte mēmoj to ãk ã amnhĩ jarênh jakamã koja mēmoj to kator xwÿnhnta piitã ho ãk. Nê mē pahte panhĩhkra ho mēmoj nhĩpêx xwÿnhja nhûm ho ãk nhûm htertê tÿx kãm hpigrãnh pa nê hapêx. Nhûm mēmoj htertê nê hpigrãnh kêr xwÿnh pixjaja arĩ rãhã ho rãhã.

28 No Tirtûm nhõ krĩ koja htertê nê hapêx kêr nê. Nê mē papajaja mē pahpê hkra jakamã te ra kuri õ krĩ kamã ri mē papa pyrãk. Jakamã kot puj mē mē urak nê pajapêx kêr nê. Jakamã e kwa kêr pu mē amnhĩ tã Tirtûm mã mex o mex ã harênh nê hã pahpijaãm rãhã ho papa. Nê tanhmã amnhĩ tomnuj to hã amnhĩ pumu nê Tirtûm pumaj mēmojta kaga kurê kumrêx. ã mē pahte amnhĩ nhĩpêx anhÿr o papaja na Tirtûm kãm hprãm.

29 Hihtÿx o hihtÿx jakamã koja mēmoj tã akamã gryk kot kaj amex kêr o amex kêr.

13

Mê pahte Tirtûm kãm hprãm xã hkôt amnhĩ nhĩpêx ã mē pamã karõ

Rômãn 12.1-2; Epes 4.1-3; Korosê 1.10-11; Wam Tesarõn 4.1-12; Wam Pêtre 2.11-12; Wam Juãw 3.17-18

1 Nê e kwa Kris kôt ixtõ nê ixtõxjaja. Kêr pu mē arĩ Kris kôt pahkwÿjê ho mex o mãn axpên kôt ri papa. Nê kêr pu mē tanhmã pahpunuj to hã amnhĩ pumunh tã axpên to mex mã panhÿrer kêr nê. ã

axpên nhîpêx anhÿr rãhã ho papa.

² Nê amnepê mã na pre mẽmojaja nhÿhÿnh mra nê mẽ panhîgêtjê hõ hwÿr pøj. Hãmri nhũm mẽ omu nê htÿx axtem krî hõ nhõ xwÿnh ã mẽ hkamnhîx tã no nhũm mẽ kêp Tirtũm kapêr o mẽ wrÿk xwÿnh kwÿ na prem. Hãmri nhũm amnhî nhõrkwÿ hwÿr mẽ kuwÿ nhũm mẽ ma hkôt mra nê kuri pøj nê kutã apku. Jakamã kwa koja nhÿhÿnh krî hõ rũm mẽmojaja ma mẽ awÿr mō ka mẽ omu nê axamnhîx amnhî nhõrkwÿ hwÿr mẽ hwÿr kurê kumrêx kê mẽ ari pøj. ã mẽ hipêx anhÿr o apa hãmri nê nhÿrmã mẽ panhîgêtja pyrã nê amnhî wÿr Tirtũm kapêr o mẽ wrÿk xwÿnhjê hõ hwÿr japêr. Mẽ urãk nê ja hã mẽ omunh kêt tã atÿx amnhî wÿr mẽ awÿ nhũm ja mẽ amã mex o mex.

³ Nê kêr ka mẽ ra mẽ kot Jejus ã mẽ akwÿjê pynênh nê mẽ hagiênh xwÿnhjê mã ajamaxpêr rãhã ho ri apa nê mẽ ho ajamakêtkati hkêt nê. Te mẽ kajaja mẽ ïhkô hã mẽ hagiênh xà kamã apunuj nê akrî pyrãk o mẽ kãm ajamaxpêr o ri apa. Jao mẽ kamã axukaprî ho mẽ hwÿr mra nê mẽ kãm mẽmoj nhõr o ri apa.

⁴ Nê mẽ kot axpên to hprõja na mex. Nom kêr ka mẽ amyjaja ãm aprõ pix tânopxar o ri apa. Nê mẽ anijaja mẽ ajaxwÿja amjên pix tânopxar o ri apa. No mẽ hkuprÿjê hwÿr mẽ mrrar xwÿnhjaja nê nhãm mẽ kêp mẽ hprõ ho amnhîkati xwÿnhjaja nê nhãm

mẽ kêp mẽ mjên o amnhîkati xwÿnhjaja koja Tirtũm ja hã mẽ omu nê mẽ homnuj tÿx kumrêx.

⁵⁻⁶ Nê kêr ka mẽ akàxpore rũnh kêt ã amnhîpumu nê tee ri amnhî kukamã ajamaxpêr o akaprî hkêt nê. Na pre Tirtũm mẽ pamã kapêr o:

Kot paj akôt ri ixpa rãhã ho ixpa nê aa arer rÿ akaga hkêt kumrêx.

Anhÿr jakamã kot kaj mẽ akàxpore grire htã akaprî nê apa hkêt nê. Aa Tirtũm kot mẽ pahkaga hkêt ã amnhî jarênh jakamã mẽmoj kot pu wem omu nê pamã nhãm ri mẽ uma ho papa? Tirtũm kot mẽ pahkôt pa ho pa kênã. Jakamã na pu htem pajamaxpêr o:

Nã Pahi Maatija ra kot ixkôt pa ho pa xwÿnh jakamã mẽmo kot pa hkêt ri inhmã uma ho ixpa?

Mẽmo kot kêt ri tanhmã kêp ixto?

Anhÿr o pajamaxpêr o papa. ⁷ Nê mẽ kot Kris mã mẽ ajamãr o mẽ pa xwÿnh ra mẽ htyk xwÿnhjaja ka mẽ arî mẽ kot tanhmã amnhî nhîpêx to ho paja mã ajamaxpêr rãhã ho ri apa. Na prem Tirtũm kapêr o mẽ ajahkre mex nê. Nê tãm ri amnhî nhîpêx o ri mẽ akôt pa. Nê amnhî kaxyw Tirtũm kôt pix mã hamaxpêr rãhã ty. Tã kêr ka mẽ urãk nê ã amnhî nhîpêx anhÿr o ri apa rãhã ty.

⁸ Nê Jejus Krisja arî rãhãã. Nê amnepê mã kot amnhî nhîpêxja mãânên arî rãhãã.

Aa kot amnhĩ nhĩpêxja nhĩjuk ri axtem tanhmã amnhĩ nhĩpêx to hkêt.

⁹ Nê kwa kêr ka mẽ Tĩrtũm kôt amnhĩ nhĩpêx rãhã ho ri apa. Na hte kapêr o hêx xwýnhjaja mẽ awýr mra nê mẽ amã:

—Amnepêr mẽ ate Tĩrtũm kot mẽ amex ã mẽ ajarênh kaxyw mẽ ate kãm mẽmo mry nhõr nê akupým hamýnh nê hkur o apa htã ra ja ho anhýr kaga. Kwa mẽ ja ho awjanã nê axte ã amnhĩ nhĩpêx anhýr o ri apa. Kê Tĩrtũm ja hã mẽ apumunh kôt mẽ amex ã mẽ ajarê.

Anhýr o mẽ amã kapêr. Nom xà na hte Tĩrtũm ã mẽ pahte amnhĩ nhĩpêx anhýr ã mẽ pahpumunh kôt mẽ pamex ã mẽ pajarê? Xà na htem mẽmo mẽ apkur xà hkur pê amnhĩ kaxyw Jesus kôt hamaxpêr týt o pa? Nà na htem anhýr kêt nê. Na pu htem mẽmoj kur kôt pamã Tĩrtũm kĩnh kêt nê. Kêt mẽ paxàpkur xàja mẽ panhĩ pix o hihtýt kaxyw na. Na hte Jesus kôt mẽ pahto paxihtýt kêt nê. ãm Tĩrtũm kot amarĩ kãm mẽ pajapê nê mẽmoj to mẽ pakutã nojarêt jakamã na pu htem ja hã amnhĩ pumu nê amnhĩ kaxyw hkôt pajamaxpêr týt o papa.

¹⁰ Tĩrtũmja Jesus kot mẽ panê htyk ã omunh xà hkôt ra kot mẽ pamex ã mẽ pajarênh jakamã mo kaxyw kot pu mẽ axte kot mẽ pamex ã mẽ pajarênh kaxyw kãm mẽmo mry gõ nê hkwy hku? Koja mẽhõ akupým Tĩrtũm kapêr

tũm o ujanãr jao Jesus kot nê htyk nê hkamrõ pikapĩrja kaga.

¹¹ Amnepêr na pre patre maatijaja tõiã mẽ kãm mẽmo mry hpar xwýnh hkamrõ ru nê guhkrax kãm kuru nê hamý nê ma o mra nê Tĩrtũm nhõrkwý kaàkre hwýr hitom maati hwýr ho agiê. Tĩrtũm kot mẽ omunh nê axte mẽ kot amnhĩ tomnuj mã hamaxpêr kêt kaxyw. Hãmri nhũm hpãnhã ĩ mý nê krĩ pê ho kato nê ma o mra nê nhýri amým hkwyjê hkax ã ho hxêt pa. Tĩrtũm kapêr tũm kôt na prem ã amnhĩ nhĩpêx anhýr o pa.

¹² Tã ja pyrã nê na prem ma krĩ pê amým Jesus o tẽ nê kupĩ nhũm hkamrõ axkapĩ. Kot mẽ pahte amnhĩ tomnuj pãnhã amnhĩrer nê mẽ pahto mẽ pahpê Tĩrtũm kra kaxyw ã htyk nê hkamrõ pikapĩr anê.

¹³ Na prem Tĩrtũm kapêr tũm gryk ã Jesus kaga nê põristijê mã anê nhũm mẽ ma krĩ pê ho kato nê o tẽ nê kupĩ. Tã kêr pu mẽ jajê rom Jesus gryk ã mãn Tĩrtũm kapêr tũm kaga. Kwãr mẽ mãmrĩ Jesus pyrã nê Tĩrtũm ã tanhmã mẽ pahto nê amnhĩ nê nhýhým mẽ pajano.

¹⁴ Kêt jar mẽ papaxàja kêp mẽ papaxà kumrêx kêt. Nê jar mẽ panhõ krĩja kêp mẽ panhõ krĩ kumrêx kêt. Mẽ pamã te kot pô nhĩrõnh o ixkre pix pyrãk. No kêt mẽ panhõ krĩ kumrêx koja jar mẽ panhõ krĩ rom aa hapêx kêt nê. Tã tãm na pu mẽ kormã ma hwýr papa kaxyw

arĩ amnhĩ tã Tĩrtũm jamãr o papa.

15 Nẽ na htem Ijaew arĩ ohtô nẽ amnhĩ pãnhã Tĩrtũm mã mry hpar ho pa. Nom mẽ papajaja kot puj mẽ axte ã amnhĩ nhĩpêx anhÿr hkêt nẽ. Kot puj mẽ ãm Jejus kukwak ri Tĩrtũm mã mex o mex ã harênh rãhã ho mãn papa. Jao te mẽ pahte kãm hkĩnh xã nhõr pyrãk o amnhĩ nhĩpêx.

16 Nẽ kêr pu mẽ arĩ axpẽn to mex o ri axpẽn kôt papa. Nẽ kê mẽhõ kêp amrakati japêr ka ja hã omu nẽ amnhĩ kutã kãm anhõ mẽmoj kwÿ. ã kot puj mẽ axpẽn nhĩpêx anhÿr rãhã ho ri axpẽn kôt papa. Kot puj mẽ anẽ nẽ te mẽ pahte Tĩrtũm mã hkĩnh xã nhõr pyrãk o amnhĩ nhĩpêx. ã mẽ pahte amnhĩ nhĩpêx anhÿrja na mex o mex.

17 Nẽ kêr ka mẽ Kris kôt mẽ akrãhtũmjê kapêr ma nẽ mẽ hkôt amnhĩ nhĩpêx mex nẽ. Na htem Tĩrtũm mã mẽ ajamãr o ri mẽ akôt pa. Koja mẽ nhÿrmã mẽ kot tanhmã mẽ anhĩpêx to hã Tĩrtũm mã amnhĩ jarẽ. Jakamã mẽ kãm mẽ ato ajuta prãm. Tã kêr ka mẽ kapêr ma nẽ mẽ hkôt ri amnhĩ nhĩpêx mex o ri apa. Kêr kê mẽ amnhĩ tã mẽ apumu nẽ hkĩnh nẽ. No kot kaj mẽ ama nẽ ãm mẽ ama nhũm mẽ tee ri amnhĩ tã mẽ apumu nẽ hkaprĩ nẽ. Jao tee ri kot tanhmã mẽ ato ajuta mex to hkukamã hamaxpêr.

18 Nẽ kwa kêr ka mẽ ixto Tĩrtũm wÿr rãhã ho apa. Inhmã Tĩrtũm noo mã tanhmã amnhĩ tomnuj to

hprãm kêt. ãm inhmã amnhĩ to mex pix o ri ixpa hprãm.

19 Nẽ kêr ka mẽ ixto awÿ kê tokyx akupÿm mẽ awÿr inhmẽ. Na pa ra inhmã mẽ apumunh prãm tÿx nẽ.

Kagã nhĩpêx xwÿnh kot tanhmã mẽ ho Tĩrtũm wÿr to hã harênh

Epes 3.14-19; Piripos 1.0-11; Wam Tesarõn 3.9-13, 5.23; Sikũn Tesarõn 1.11-12, 2.16-17

20 Nẽ mẽ panhõ Pahihti Jejus Krisja na hte mẽ panhĩpêx o te ôwêhti jamãr xwÿnh kot hkrit jamãr pyrãk o pa. Jakamã kêp mẽ pajamãr xwÿnh maati mex na. Na pre mẽ panê ty nhũm Tĩrtũm akupÿm mẽ pamã ho htĩr nẽ mẽ pamã harênh o:

—E ra Ixkra kot mẽ anê htyk jakamã kêr ka mẽ ãm ixkapêr nyw kôt pix mã ri amnhĩ nhĩpêx o ri apa. Kot kaj mẽ ã amnhĩ nhĩpêx anê hãmri nẽ nhÿrmã ty pa akupÿm mẽ ato mẽ atĩr ka mẽ ixri atĩr tũm nẽ apa ho apa. Anê.

Tĩrtũm kêp mẽ pahto mẽ pajamakêtkati nẽ ri mẽ papa xwÿnh na.

21 Tã na pa hte tanhmã mẽ ato hwÿr to ho ixpa nẽ mẽ ato hwÿr o:

—Pa Tĩrtũm. E kwa tanhmã ixkwÿjê ho mex to kê mẽ kãm akapêr kôt pix mã amnhĩ nhĩpêx o pa hprãm. Nẽ mẽ kãm tãm amnhĩ nhĩpêx o pa hprãm. Nẽ kê Jejus haxwÿja tanhmã mẽ ho mex to kê mẽ war amã hprãm xã hkôt pix mã war amã tanhmã ri amnhĩ nhĩpêx to ho pa. Anê.

E kêr pu mẽ arĩ Jejus Kris
mã mex o mex ã harẽnh rãhã
ho papa.

*Kagà jatur xà kamã mẽmoj
jarẽnh*

²²E Kris kôt ixkràmnhwỳjaja.
Nà na pa ã mẽ amã kagà
nhĩpêx anẽ. Jejus kôt mẽ ato
mẽ axihtỳx kaxyw. No na pa
ho ry nẽ hipêx kêt nẽ. Ixte ho
grire nẽ hipêx jakamã kwa
kêr ka mẽ kamã harẽ nẽ mar
tỳx nẽ hkôt amnhĩ nhĩpêx
mex o ri apa.

²³Nẽ mãn ka mẽ ra Ximotre
jarẽnh mar japêr. Na pre Kris
ã mẽ hagiênh xà kamã hkrĩ hã
apkati xohtô nẽ. Tã nhũm xep
mẽ ra kator. Tã koja kormã
mẽ awỳr inhmõr xwỳj ri man
ixwỳr mỗ nẽ hpôx japêr kot
paj ma amnhĩ kôt mẽ awỳr o
mỗ ka mẽ omu.

²⁴Nẽ kêr ka mẽ kot Kris mã
mẽ ajamãr xwỳnhjê mã ijarẽ.
Nẽ atar Tĩrtũm krajê piitã mẽ
kãm ijarẽ.

Nẽ ota jar Tĩrtũm kra
hkwỳja piitã mẽ awỳr hpêr
mẽ.

²⁵E kê Tĩrtũm mẽ apiitã mẽ
ato mex o pa. Tã ãm ja pix. Na
pa ã mẽ amã hã kagà ho anẽ.
Na hapêx.

Xiakre Xiakre kot Jejus kôt hkwỳjê piitã hwỳr kagà nê mênh

Xiakre na pre kagàja nhĩpêx. Kêp Jejus tō nê kêp Jerujarê kamã mē kot Jejus kôt amnhĩ xunhwỳr xwỳnhjê nhõ pastô na pre. Nê kêp Ijaew. Jakamã na pre hkwỳjê mã kagàja nhĩpêx nê krĩ piitã hkôt urak nê Jejus kôt mē kot amnhĩ xunhwỳr xwỳnhjê hwỳr kurê. Jejus ã mē kãm mē hkurê xwỳnhjaja na prem mē hipêx kati nhũm mē amnhĩ xà htỳx kamã hamak o pa. Jakamã nhũm Xiakre kot mē hamaxpêr o mē hihtỳx kaxyw kagàja nhĩpêx nê mē hwỳr kurê nê mē kãm:

¹ Pa ixkwỳjaja. Xà mē amex? E ixpê Xiakre na pa. Ixte Tĩrtũm mē Pahĩti Jejus Kris wa kãm tanhmã amnhĩ nhĩpêx to xwỳnh na pa. Jakamã kot paj kagàja nhĩpêx nê pika piitã hkôt mē apiitã mē awỳr kurê. Mē apê Tĩrtũm krajê hwỳr.

Mê pahpunuj tã mē pahte amnhĩ kaxyw Tĩrtũm kôt pajamaxpêr

Rukre 6.20-23; Rõmãn 5.3-5; Korosê 1.11; Wam Pêtre 4.12-19

²⁻³ E ixkwỳjaja. Kêr ka mē atõ tanhmã amnhĩ to rỳ tanhmã apunuj to. Rỳ mēhõ tanhmã Jejus ã mē anhĩpêx to. Tã kêr ka mē ja hã amnhĩ pumu nê tee ri

amnhĩ kukamã ajamaxpêr o ri akaprĩ hkêt nê. Arĩ akĩnh kãm amnhĩ kaxyw Tĩrtũm kôt ajamaxpêr tỳx rãhã ho ri apa. Kot kaj mē ã amnhĩ nhĩpêx anê nê gaa nê rĩ mēmoj punuj pê Jejus kôt amnhĩ xunhwỳr tỳx nê. Jakamã kwa kêr ka mē tanhmã apunuj to hã amnhĩ pumu nê ã mē ate amnhĩ nhĩpêx anhỳrja kukamã ajamaxpêr pê akĩnh nê ri apa.

⁴ Nom kêr ka mē tee ri tanhmã apunuj to hã amnhĩ pumu nê akaprĩ xaj Tĩrtũm kaga hkêt nê. ãm amnhĩ kaxyw hkôt ajamaxpêr tỳx rãhã ho ri apa. Kot kaj mē ã amnhĩ nhĩpêx anê nê gaa nê Tĩrtũm noo mã tãm amnhĩ nhĩpêx mex o ri apa. Nê kãm hprãm xà hkôt pix mã amnhĩ nhĩpêx o apa.

Mê pahte tanhmã amnhĩ kute hã amnhĩ pumunh kôt amnhĩ to Tĩrtũm wỳr ã mē pamã karõ

Matêwre 21.18-22

⁵ Nê kêr ka mē mēmoj mỳrapê tanhmã apunuj to hãmri nê tee ri ja hã amã Tĩrtũm mã ajamaxpêr tỳx prãm nhũm apê ja hihtỳx japêr. Rỳ mēmoj tanhmã apê amnhĩ nhĩpêx to ka tee ri hkukamã ajamaxpêr japêr. Kêr ka mē ã ajamaxpêr anhỳr japêr hãmri nê amnhĩ to Tĩrtũm wỳr kurê kumrêx. Kot amã ajamaxpêr mex nhõr nhũm ate y hã tãm ajamaxpêr kaxyw amnhĩ to awỳ. Kot kaj mē ã amnhĩ to hwỳr anê nhũm amnhĩ tã mē ama nê mēmojta kutã tanhmã ato

axihtỳx to kurê kumrêx ka ỹ
hã hkôt ajamxpêr tỳx mex
o ri apa. Jao tanhmã akute
htã akĩnh nê ajamakêtkati nê
ri apa. Koja Tĩrtũm tee ri
amã mẽmoj kôt ajamxpêr
tỳx prãm kaprỳ hã apumu
nê hã amã àkjêr kêt nê. Koja
ate amnhĩ to hwỳrta ma nê
tanhmã ato mex to.

⁶ Nom kêr ka mẽ amnhĩ
to hwỳr kãm tee ri amnhĩ
kukamã ajamxpêr kati hkêt
nê. Rỳ ajamxpêr o:

—Koonên. Koja apu Tĩrtũm
inhmã ja ho anhỹr japêr.

Anhỹr o tee ri amnhĩ
kukamã ajamxpêr kati hkêt
nê. ãm akĩnh kãm tanhmã ate
amnhĩ to hwỳr toja kukamã
ajamxpêr o:

—Nà koja inhmã ho anê.
Ixte amnhĩ kaxyw kãm ija-
maxpêr nê amnhĩ to hwỳr
xà hkôt koja inhmã tanhmã
amnhĩ nhĩpêx to.

Anhỹr o hkamnàr rom ã
amnhĩ kukamã ajamxpêr
anê.

Nom kot kaj mẽ tanhmã
amnhĩ to hwỳr to nê tee ri
amnhĩ kukamã ajamxpêr
kati nê hkôt ajamxpêr tỳx
kêt nê. Nê te kôk nhãm
àpêr nê nhãm àpêrta pyrà
nê nhãm ri ajamxpêr nê
nhãm ri ajamxpêrja o hkôt
ajamxpêr kêt nê. Kot kaj
mẽ ã amnhĩ nhĩpêx anê nhũm
Tĩrtũm tee ri ja hã mẽ apumu
nhũm ja kãm mex kêt nê.

⁷⁻⁸ ã mẽ hamxpêr
anhỹr xwỳnhjaja na htem
nhãm hamxpêr nê nhãm
hamxpêr jao hamxpêr mex
kêt nê. Jakamã kot kaj mẽ

ã ajamxpêr anhỹr o amnhĩ
to Tĩrtũm wỳ hãmri nê ãm
amnhĩ to hwỳr kaprỳ. Koja
ama nê ãm ama. Nom kot kaj
mẽ tanhmã akute hã amnhĩ
kaxyw hkôt ajamxpêr tỳx
pê amnhĩ to awỳ. Nê tee ri
amnhĩ kukamã ajamxpêr
kati hkêt kãm tanhmã amnhĩ
to hwỳr to nhũm amnhĩ tã
ama nê hkĩnh nê tanhmã amã
mẽmoj nhĩpêx to. Mẽ ate hã
axàhwỳr xà hkôt tanhmã mẽ
amã mẽmoj nhĩpêx to.

*Mẽ kêp amrakati xwỳnh mẽ
mẽ kot amnhĩ to rũnh xwỳnhjê
jarênh*

*Eprêw 13.5-6; Wam Pêtre
1.24-25*

⁹ Nê kwa mẽ akàxpore
hkêt xwỳnhjaja. Jar mẽ apê
amrakati htã mẽ apê Tĩrtũm
kra na ka mẽ. Jakamã kêr
ka mẽ akàxpore rũnh kêt tã
mẽ apê Tĩrtũm kra hã amnhĩ
pumunh kôt ajamakêtkati nê
nê akĩnh nê apa.

¹⁰⁻¹¹ Nê mẽ akàxpore rũnh
xwỳnhjaja. Mẽ akàxpore rũnh
nê mẽ akukrêx rũnh tã kot kaj
mẽ nhỹrmã ty nê piitã rer pa
nê mẽ kêp amrakati xwỳnhjê
pyrà nê anhỹ kamã Tĩrtũm
kuri akrĩ nhũm tanhmã mẽ
ajarênh to. Te mẽ apê mẽmo
pixôrà kot amnhĩ nhĩpêx
pyràk. Na hte kwỳhtã axpên
pê axpôt nê muxre nê mex
nê harir. Tã gaa nê rĩ hã myt
xàhpanh mẽ nhũm ra nhôôre.
Nê gaa nê ra grà pa nê rôrôk
nê hapêx. Tã kot kaj mẽ
nhỹrmã uràk nê ty nê akukrêx
rer pa. Jakamã kwa kêr ka mẽ
akàxpore rũnh pumunh kôt
akĩnh nê ri apa hkêt nê. Kêt

ãm mẽ apê Tirtũm kra hã mãn amnhĩ pumunh kôt akĩnh nẽ apa.

Mẽ pahpunuj kôt pagryk nẽ mẽ pahkurê

¹² Nẽ kot kaj mẽ atõ tanhmã apunuj to htã arĩ amnhĩ kaxyw Tirtũm mã ajamexpẽr tỳx rãhã ho ri apa. No tanhmã apunuj to hã amnhĩ pumu nẽ hkaga hkêt nẽ. Rỳ kot tanhmã ato xwỳnhhta kêr ka mẽ amnhĩ tã kamã agryk nẽ tanhmã ho hkêt nẽ. ãm Jejus kôt pix mã amnhĩ nhĩpêx rãhã ho ri apa. Kêr kê Tirtũm amã hkĩnh ã amnhĩ tã apumu nẽ amex ã ajarẽ. Ka nhỹrmã kuri amex kumrêx nẽ atĩr tũm nẽ apa ho apa. Ra kot mẽ pakukamã mẽ pahtã amnhĩ jarênh xà hkôt. Jakamã kêr ka mẽ tanhmã apunuj to htã ã amnhĩ kukamã ajamexpẽr anhỹr pẽ akĩnh nẽ apa.

¹³ Nẽ Tirtũm aa kãm tanhmã amnhĩ tomnuj to hprãm kêt. Nẽ mẽ papajaja mẽ pahte tanhmã amnhĩ tomnuj to kaxyw na hte mẽ pamã tanhmã àmnênh to rỳ mẽ pamã mẽ pajamexpẽr punuj jagjênh kêt nẽ. Jakamã kot ka mẽ atõ amã tanhmã amnhĩ tomnuj to hprãm tã kwa kêr ka Tirtũm tãm kot ja kaxyw mẽ akrãm mẽ ajamexpẽr punuj jagjênh to hã hkamnhĩx kêt nẽ.

¹⁴⁻¹⁵ Mẽ papamjaja na pu htem pajamexpẽr punuj xà hkôt tanhmã amnhĩ tomnuj to. No Tirtũm Karõ na hte mẽ pamã mẽ pajamexpẽr punuj jagjênh kêt nẽ. Mẽ papamjaja na pu htem pajamexpẽr

punuj nẽ gaa nẽ ra hkôt tanhmã amnhĩ tomnuj to. Hãmri nẽ gaa nẽ ã amnhĩ nhĩpêx anhỹr rãhã ho ri papa. Mẽ kot amnhĩ tomnuj o mẽ pa xwỳnhjaja koja mẽ nhỹrmã ty hãmri nẽ Tirtũm mẽ Kra wa kuri htĩr tũm nẽ pa ho pa hkêt nẽ.

Tirtũm kot tanhmã mẽ pahto mex to hã harênh

Xiakre 3.17-18; Sikũn Pêtre 1.3-4

¹⁶ Nẽ e ixkwỳjaja. Tirtũm kot mẽ pahte amnhĩ tomnuj prãm xaj mẽ pamã mẽ pajamexpẽr punuj jagjênh kêt jakamã kwa kêr ka mẽ ã ajamexpẽr anhỹr kêt nẽ.

¹⁷ Na hte mẽ pahto mex pix o pa. Na pre myyti ho kato. Kapêr pix o ho kato. Nẽ mytwrỳre ho kato. Nẽ kanhêti ho kato. Ja pitã ho kato nhũm mẽ pamã hirã mex o harir. Na hte mytwrỳre tõtã hirã mex o pa. Nẽ gaa nẽ nyw kaxyw nẽ kamàt kô. Nẽ gaa nẽ nyw mẽ nhũm akupỹm hirã. ã na hte amnhĩ nhĩpêx anhỹr o pa. No Tirtũmja ã kot anhỹr kêt. Kot amnhĩ nhĩpêxja ãm rãhã ho rãhã. Na hte mẽ pahto mex pix o pa. No tõtã tanhmã mẽ pahto mex to nhũm jãã nhũm tanhmã mẽ pahtomnuj to hkêt nẽ.

¹⁸ Tã kapêr pix o kot ã mẽmoj to kator kot anhỹr. Nẽ mẽ pamã kapêr o amnhĩrit. Kãm mẽ pahto hkra hprãm xaj mẽ pamã Jejus kot tanhmã mẽ panê amnhĩ nhĩpêx toja nhũm pre mẽ pamã ho amnhĩrit. Na pu

prem kuma nē hkôt amnhĩ xunhwý nhũm amnhĩ tã mẽ pahpumu nē mẽ pahto hkra. Mẽ pahpê Ijaew kumrêxjaja na pre mẽ pahto hkra.

Mẽ pagryk o papa nê mẽ pahkurê

Rômãn 12.17-21; Epes 4.25-5.2

¹⁹ E ixkwýjaja. Kwa mẽ ixkapêr ma nê hã anohtýx nê ho apa. Koja mēhō Tirtũm kapêr o mẽ ajahkre kaxyw mẽ awýr mō nē mẽ amã kapêr jarê ka mẽ mar týx nē. Koja mẽ ate tanhmã amnhĩ tomnuj to nê mẽ amã kapêr ka mẽ amnhĩ tã ama nē kamã agryk kêt nē.

²⁰ Mẽ gryk o mẽ pa xwýnhjaja na htem Tirtũm kapêr kôt ri amnhĩ nhĩpêx kêt nē.

²¹ Jakamã kwa kêr ka mẽ axte amnhĩ tomnuj rý aja-maxpêr punuj o ri apa hkêt nē. Na htem ohtô nē ã amnhĩ nhĩpêx anhýr o pa nom kêr ka mẽ kurom Tirtũm kapêr mãn amnhĩ krã him haxàr týx nē. Kapêr o mẽ ajahkre xwýnhjaja na htem ho mẽ ajahkre mex o pa. Tã kêr ka mẽ ama nē amã hkôt amnhĩ nhĩpêx prãm rãhã ho ri apa. Na pu htem Tirtũm kapêr ma nē hkôt amnhĩ nhĩpêx o papa hãmri nē nhýrmã Tirtũm mẽ Kra wa kuri pahtír tũm nē pa mex nē papa ho papa.

Mẽ pahte Tirtũm kapêr kôt amnhĩ nhĩpêx ã mẽ pamã karõ
Matêwre 7.24-27; Wam Juãw 2.3-6

²² Nē kwa mẽ okora. Kêr ka mẽ ãm Tirtũm kapêr ma

nē ãm mar kêt nē. Mããnēn hkôt amnhĩ nhĩpêx rãhã ho ri apa. Kot kaj mẽ ama nē ãm ama nē hkôt amnhĩ nhĩpêx kêt nē hãmri nē apê Tirtũm kra hã amnhĩ jarēnh kaprý. Jao nhýrmã Tirtũm mẽ Kra wa kuri atír tũm nē apa hkêt nē.

²³⁻²⁴ Te ho mēhō kot amnhĩ pumunh xà hpyr nē kamã amnhĩ pumunh nē amnhĩ krã hkĩ jaê rý amnhĩ kuk tyk pumunh pyræk. Tã te kot ãm ja hã amnhĩ pumunh nē kot amnhĩ to mex kêt rãhã akupým amnhĩ pumunh xà xir nē ma htēm nē axte amnhĩ kuk tyk rý amnhĩ krã kĩ jaërta mã hamaxpêr kêt pyræk. Mẽ kot Tirtũm kapêr mar nē ãm mar nē hkôt amnhĩ nhĩpêx kêt xwýnhjaja te kot ja jarēnh pyræk.

²⁵ Tã kêr ka mẽ ã amnhĩ nhĩpêx anhýr kêt nē. Mẽ ate Tirtũm kapêr kôt amnhĩ nhĩpêx o apa kaxyw xatã kamã harê nē mar týx o apa. Jao hkôt amnhĩ nhĩpêx mex o apa. Tirtũm kot mẽ pahte tanhmã amnhĩ nhĩpêx to ho papa hã mẽ pamã karõ xàja ãm hãmri na. Na htem hkôt amnhĩ nhĩpêx nhũm Tirtũm ja hã mẽ omu nē mẽ ho mex nē nhũm mẽ ãmnhĩx hamakêtkati nē hkôt amnhĩ nhĩpêx o pa.

²⁶ Nom koja mēhō kêp Tirtũm kra hã amnhĩ jarēnh tã htýx ri kapêr punuj o ri pa hãmri nē ãm kêp hkra hã amnhĩ jarēnh kaprý. Mẽ pahpê Tirtũm krajaja na pu htem ã pakapêr anhýr kêt nē.

²⁷ Axtem mẽ pahte amnhĩ nhĩpêx. Na pu htem mẽ hã awrã rý mẽ kêp mẽ mjên

tyk xwýnhjê ho mex nê mẽ
hã pahpêr o pahpikênh o
papa hkêt nê. Nê tanhmã
mê kute hã mẽ omu nê mẽ
ho ajuta ho papa. A na pu
htem pahpê Tirtùm krajaja
amnhĩ nhĩpêx anhÿr o papa
nhũm Mēpanhĩpêêxà Maati
Tirtùm ja hã mẽ pahpumu
nê hkĩnh nê. No na pu htem
mê kot amnhĩ tomnuj o mẽ
pa xwýnhjê hkôt ri amnhĩ
nhĩpêx kêt nê ãm Tirtùm
kapêr xà kôt pix mã amnhĩ
nhĩpêx nhũm amnhĩ tã mẽ
pahpumu nê hkĩnh nê.

2

*Mê pahte mẽ piitã mẽ hipêx
o axpên pyræk ã mẽ pamã karõ
Rômãn 2.11; Korosê 3.25*

¹ E ixkwýjaja. Pahihti Je-
jus Krisja mex o mex. Tã
ra mẽ ate hkôt amnhĩ xun-
hwÿr jakamã kwa kêr ka mẽ
apê hkwý hã mẽ piitã tãm mẽ
hipêx o apa. Nê mẽ hipêx o
axpên pyræk.

² Jakamã kot kaj mẽ
nhÿrmã Tirtùm kapêr mar
kaxyw axpên wÿr akuprõ
nhũm hikàxpore rax xwýnhta
mê akôt axà. ê mex nê ôr
o ìhkra kamã kãx hãmri nê
mê akôt axà. Nhũm hkôt
mêhõ pê amrakati xwýnhja
tê nê axà. Nom wamta kĩnhã
kêp amrakati nê ê omnajti
nê pikaxônhti. Hãmri nê
hikàxpore rax xwýnhta hkôt
mê awÿr tẽn axà.

³ Tã tanhmã kot kaj wem ri
wa hipêx to? Xà kot kaj mẽ
wa hipêx o axpên pyræk nà?
Nà xà kot kaj mẽ ã wa hipêx
anê nê wam àr xwýnhta ê mex

ã omunh xà hkôt kãm kadêre
hõ gõ nê kãm:

—E ota kadêre. Mãmri hã
nhÿ. Anê.

Hãmri nê ê pynajti xwýnhta
pumu nê axtem nê kãm:

—E atar pikap nhÿ.

Anhÿr o ahpÿnhã wa kãm
akapêr?

⁴ Kot kaj mẽ ahpÿnhã ã wa
hipêx anê nê amnhĩ tomnuj
nê. Wam àr xwýnhta ka kãm
akapêr mex nê tanhmã ho
mex to. No hkôt hõta om-
najti hã omunh xà hkôt te
kamã anhõkre kahak pyræk o
hipêx. Kot kaj mẽ ã ahpÿnhã
wa hipêx anê nhũm Tirtùm
tee ri ja hã mẽ apumu nhũm
ja kêp omnuj nê.

⁵ Kwa mẽ inhma ixkwýjaja.
Mê kêp amrakati xwýnhjaja
mê hikàxpore hkêt tã na hte
mê hkwýjaja amnhĩ kaxyw
Tirtùm kôt hamaxpêr nê
hkôt amnhĩ xunhwÿ nhũm
amnhĩ tã mẽ omu nê kot
mê panhĩpêx pyræk nê mẽ ho
hkra. Jakamã jar mẽ kêp
amrakati htã na htem amnhĩ
kaxyw Tirtùm kôt hamaxpêr
tÿx rãhã ho pa. Jakamã koja
mê nhÿrmã kuri htir tũm nê
mex kumrêx nê pa ho pa.
Mê kãm Tirtùm kĩnh o mẽ pa
xwýnh piitã koja mẽ nhÿrmã
ã mex nê ri pa anê.

⁶ Nom kot kaj mẽ ahpÿnhã
mê hipêx nê amnhĩ tomnuj
nê. E pa mẽmoj tã mẽ akukja.
Mẽmojaja na htem tanhmã mẽ
ato hêx to? Nê mẽmojaja na
htem juisti mã tanhmã mẽ
ato kapêr punuj to? Xà mẽ
kêp amrakati xwýnhjaja? Nà
mê tãm kêt. Mê hikàxpore

rũnh xwÿnhjaja na htem ã mẽ anhĩpêx anhÿr o pa.

⁷ Nẽ ra mẽ ate hkôt amnhĩ xunhwÿr xwÿnhja nhũm mẽ axtem nẽ tanhmã mẽ apê ho kapêr to ho pa. Tã ka htem mẽ kêp amrakati xwÿnhjê rom mẽ kãm akapêr mex nẽ mẽ kãm kadêre mex gõ nhũm mẽ hã hkrĩ.

⁸ Tĩrtũm kapêr ã kagà htũm kot ja jarênh kot:

Kêr ka mẽ piitã mẽ hipêx o
te ka amã amnhĩ tã ma
pyràk. Anẽ.

Ã kot mẽ pamã karõ kot anhÿr. Kapêrja mex kumrêx. Kot puj mẽ ã axpên nhĩpêx anhÿr jao Tĩrtũm kãm hprãm xà hkôt amnhĩ nhĩpêx mex nẽ.

⁹ Nom kot puj mẽ ã amnhĩ nhĩpêx anhÿr kêt nẽ ahpÿnhã tanhmã mẽ hikàxpore rũnh xwÿnhjê ho mex to nẽ ahpÿnhã tanhmã mẽ kêp amrakati xwÿnhjê nhĩpêx to japêr. Hã kot puj mẽ Tĩrtũm kapêr htũmta nhĩrôp pakuhê nẽ amnhĩ tomnuj nẽ.

¹⁰ Kot pu mẽ kapêr tũm piitã hkôt ri amnhĩ nhĩpêx mex o ri papa htã ãm pixire nẽ hirôp pakuhê. Jao te pahte kapêr piitã hirôp pakuhê pyràk.

¹¹ Na pre Tĩrtũm mẽ pahte mẽ pahprõ pix tãnopxar o papa hã mẽ pamã karõ. Nẽ mẽ pamjên pix tãnopxar o papa hã mẽ pamã karõ. Nẽ mẽ pahte axpên par nẽ mẽ pahkurê. Jakamã kot puj mẽ pahprõ pix tãnopxar mex o ri papa japêr. Nẽ mẽ pamjên pix tãnopxar mex o ri papa japêr tã tanhmã pajamxpêr to nẽ

pahkwÿjê hõxpĩ. Jao te Tĩrtũm kapêr tũm piitã hirôp pakuhê hpar pyràk o amnhĩ nhĩpêx.

¹²⁻¹³ Koja nhÿrmã Tĩrtũm mẽ pahtĩr ri tanhmã axpên nhĩpêx to ho papa hã mẽ pahpumunh kôt tanhmã mẽ pajarênh to. Mẽ pamã axpên kĩnh ã axpên to mex o papa hã mẽ pahpumunh kôt mẽ pajarê rÿ mẽ pamã axpên kĩnh kêt ã axpên nhĩpêx o papa hã mẽ pahpumunh kôt mẽ pajarê. Jakamã mẽ kamã mẽ ukaprĩ kêt xwÿnhjaja koja nhÿrmã ja hã mẽ omu nẽ mẽ uràk nẽ mẽ kamã ukaprĩ hkêt nẽ. Nom mẽ kamã mẽ ukaprĩ ho mẽ pa xwÿnhjaja koja ja hã mẽ omu nẽ mẽ uràk nẽ mẽ kamã ukaprĩ nẽ mẽ nê mẽ kot amnhĩ tomnuj piitã rênh pa. Jakamã kwa kêr ka mẽ amnhĩ to mex nẽ tãm axpên nhĩpêx o ri axpên kôt apa. Nẽ axpên mã akapêr mex nẽ axpên kamã axukaprĩ pix kukamã ajamxpêr o apa.

Amnhĩ kaxyw Tĩrtũm kôt mẽ hamaxpêr xwÿnhjê jarênh

Rukre 3.8-14

¹⁴ Nẽ kwa ixkwÿjaja. Koja mēhõ kot amnhĩ kaxyw Jejus kôt hamaxpêr nẽ hkôt amnhĩ xãm ã amnhĩ jarênh tã hkôt ri amnhĩ nhĩpêx kêt nẽ. Hã koja nhÿrmã ty hãmri nẽ tanhmã kot we amnhĩ to nẽ Tĩrtũm mẽ Jejus wa kuri htĩr tũm nẽ pa ho pa? Nà koja anhÿr kêt nẽ. Kêp hkra hã amnhĩ jarênh tã hkôt amnhĩ nhĩpêx kêt jakamã koja nhÿrmã wa hwÿr àpir kêt nẽ.

15 Nē xà koja mēhō kēp am-rakati nē ri pa. Nē ê pynajre pix jagjê nē ri hã pa. Nē õ hkêt nē ri kãm prãm nē pa.

16 Ka mē ja hã omu nē tanhmã kãm akapēr to nē kãm:

—Kwa ã amnhĩ nhĩpêx anhÿr kêt nē. Anhõrkwÿ hwÿr tēn axê mex japêr nē axà nē amnhĩm mēmoj japêr nē aku. Koja Tĩrtũm ato mex rax nē.

Anhÿr o kãm akapēr tã kãm mēmoj nhõr kêt nē. Tã xà koja we ama nē amar xà hkôt ê mex jagjê nē apkur mex o ri pa? Nà kot ka mē ã kãm akapēr anē nē ho ajuta hkêt nē nhũm arĩ kãm prãm nē ê hkêt nē omnuj nē ri pa. Na htem mē kapēr pix o mē ho mex kêt nē. Kot kaj mē ã kãm akapēr anē nē ãm kãm mēmoj tã karõ kaprÿ.

17 Ja pyrã nē koja mēhõ ra amnhĩ kaxyw Jejus kôt hamaxpēr nē hkôt amnhĩ xãm ã amnhĩ jarēnh tã kapēr kôt ri amnhĩ nhĩpêx kêt japêr. Hã koja ãm kēp hkra hã amnhĩ jarēnh kaprÿ.

18 Nē kot kaj mē atõ ã ajamaxpēr anē nē ajamaxpēr o:

—Nà Jejus kwÿjaja na htem ahpÿnhã tanhmã amnhĩ nhĩpêx to ho pa. Na hte mē hkwyjaja amnhĩ kaxyw Jejus kôt hamaxpēr tÿx pix o ri pa. Nē mē hkwyjaja tanhmã hkwyjê ho mex to ho ri pa. ã na htem ahpÿnhã tanhmã amnhĩ nhĩpêx anhÿr to ho pa. Anē.

Kwa mē ri ã ajamaxpēr anhÿr kêt nē. Mē hkwyjê ho mex o mē pa xwÿnhjaja na

htem Tĩrtũm hkôt hamaxpēr pê mãânēn hkôt amnhĩ nhĩpêx nē hkwyjê ho mex o pa. Koja mēhõ amnhĩ kaxyw Jejus kôt hamaxpēr hã koja mãânēn hkôt amnhĩ nhĩpêx pê tanhmã hkwyjê ho mex to ho pa. Na htem amnhĩ kaxyw hkôt hamaxpēr pix o pa hkêt nē. Na htem mãânēn hkôt mē piitã mē ho mex o ri pa.

19 Na ka hte mē akwyjaja ã ajamaxpēr anē nē ajamaxpēr o:

—Nà Tĩrtũmja pyxi mex o pyxi mex. Tã kot paj jam ijaxpēr rãhã ho ri ixpa nē ra ixpê hkra hã ri ixpa. Nom kot paj kapēr kôt amnhĩ nhĩpêx o ri ixpa hkêt nē.

Anhÿr o ajamaxpēr nē ã ajamaxpēr anhÿr kaprÿ.

Nē ãm hãmri na ka htem Tĩrtũm pyxi mex o pyxi mex ã harē. Nom na htem jam hamaxpēr kôt pix mã kēp hkra hkêt nē. Mēkarõmnutijaja na htem haxwÿja Tĩrtũm pyxi mex o pyxi mex kôt hamaxpēr tã mē kēp hkra hkêt. Na htem ã hamaxpēr anhÿr pê kãm uma ho pa.

20 ã mē ajamaxpēr anhÿrja mex kêt. Koja mēhõ amnhĩ kaxyw Tĩrtũm kôt hamaxpēr ã amnhĩ jarēnh tã hkôt amnhĩ nhĩpêx o pa hkêt japêr. Hãmri nē ãm amnhĩ kaxyw hkôt hamaxpēr ã amnhĩ jarēnh hkaprÿ. E kot paj ixprĩ hã mē amã ja jarē ka mē inhma.

21 Mē panhigêt finat Apraãw na pre amnhĩ kaxyw Tĩrtũm mã hamaxpēr nē hkôt ri amnhĩ nhĩpêx mex o pa. Tã nhũm amnhĩ tã kamã

hamak kaxyw hkra Ijak ã kuwỳ nhũm kuma nẽ ra kot kãm hpĩr nẽ õr kaxyw nhũm Tĩrtũm amnhĩ tã omu nẽ amnhĩm mex ã harẽ. Hãmri nẽ kot hkra hpĩr nẽ kãm kapër.

²² Ra kot amnhĩ kaxyw hkõt hamaxpër nẽ hkõt amnhĩ xãm jakamã mãânẽn hkõt amnhĩ nhĩpêx nẽ ra kot kãm hkra nhõr kaxyw Tĩrtũm amnhĩ tã omu nẽ amnhĩm mex ã harẽ. Na pre ã finat Apraãw Tĩrtũm kapër kõt amnhĩ nhĩpêx mex anhỹr o pa. Jao amnhĩ kaxyw hkõt hamaxpër mex ã amnhĩ to amnhĩrit.

²³ Nẽ kormã Apraãw wa hkra hkêt ri nhũm Tĩrtũm wa kãm hkra jarẽ nhũm kuma nẽ hkra hkukamã amnhĩ kaxyw Tĩrtũm kõt hamaxpër tỳx o pa nhũm amnhĩ tã omu nẽ mex ã harẽ. Nẽ kêp hkrãmnhwỳ hã harẽ. Kapër ã kagã htũm kot ja jarênh kot:

Na pre Apraãw hkra hkukamã amnhĩ kaxyw Tĩrtũm kõt hamaxpër tỳx nhũm amnhĩ tã omu nẽ amnhĩm mex ã harẽ. Anẽ.

²⁴ ã na pre finat Apraãwja hkra kaxyw Tĩrtũm kõt hamaxpër anhỹrja o ra hkõt amnhĩ nhĩpêx nẽ ra kot kãm hpĩr kaxyw. Nom kop apu amnhĩ kaxyw hkõt hamaxpër pix nẽ hkõt amnhĩ nhĩpêx kêt ronhỹx pre Tĩrtũm tee ri amnhĩ tã omu nẽ amnhĩm mex ã harênh kêt nẽ. Na htem amnhĩ kaxyw Tĩrtũm mã hamaxpër nẽ mãânẽn hkõt ri amnhĩ nhĩpêx mex o

pa nhũm amnhĩ tã mẽ omu nẽ amnhĩm mẽ mex ã mẽ harẽ. ²⁵ Mẽhõ ni kuprỳ finat Raapja na pre ã amnhĩ nhĩpêx anẽ nẽ amnhĩ kaxyw Tĩrtũm kõt hamaxpër pê tanhmã hkõt amnhĩ nhĩpêx to ho pa. Na pre Ijaew myja wa hamẽxkrut nẽ ma Raap nhõ krĩ hwỳr wa tẽ. Mẽ hã ukapi nẽ kot mẽ hkurê kaxàr kaxyw mẽ hwỳr wa tẽ. Hãmri nhũm Raap Tĩrtũm kot wa mẽnã ã wa omunh kurê kumrêx nẽ põristi kot tanhmã wa ho py-maj amnhĩ nhõrkwỹ kamã mẽ kêp wa ho amũxu nẽ wa nẽ mẽ kãm tanhmã hêx to. Nẽ hpãnhã nhãm pry hõ hkõt akupỹm wa kumẽ nhũm wa hkã hkĩnh pê ma akupỹm mex nẽ tẽ. Hãmri nhũm Tĩrtũm wa hã Raap pumu nẽ amnhĩm mex ã harẽ.

²⁶ Tã kot kaj mẽ atõ amnhĩ kaxyw Tĩrtũm kõt ajamaxpër ã amnhĩ jarênh tã hkõt amnhĩ nhĩpêx kêt japêr. Hãmri nẽ apê hkra hã amnhĩ jarênh kaprỳ. Te ra mẽhõ htyk nẽ nõr tã nhũm mẽ kot arĩ htĩr ã harênh kaprỳta pyrãk.

3

Mẽ kot Tĩrtũm kapër o mẽ ahkre xwỳnhjê jarênh

¹ Nẽ kwa Kris kõt ixkwỳjaja. Mẽ axohtõ nẽ mẽ amã Tĩrtũm kapër o mẽ ahkre hprãm tã kormã ja kaxyw mẽ apiitã mẽ amex kêt. Mẽ ixte Tĩrtũm kapër o mẽ ajahkre xwỳnhjaja kot paj mẽ tanhmã amnhĩ tomnuj to japêr nhũm Tĩrtũm ja hã mẽ ixpumu nhũm ja kêp omnuj nẽ. Mẽ ixte kapër o mẽ ajahkre ho mẽ ixpa kẽnã kot

pa hkêt mẽ ri tanhmã amnhĩ tomnuj to ho ri ixpa. Jakamã kot kaj mẽ Tĩrtũm kapẽr piitã hkôt ri amnhĩ nhĩpêx mex mẽ rĩ kormã ho akwỳjê jahkre ho ri apa.

² Nẽ mẽ pahpiitã na pu htem tũhã mẽ pajakwa ho tanhmã amnhĩ tomnuj to. Mẽmoj tã axpẽn kãm pagryk mẽ tanhmã mẽ kãm pakapẽr punuj to. Nom koja mẽhũ tanhmã kapẽr punuj toja nõ amnhĩ to htỳx mẽ hãmri mẽ tãm amnhĩ nhĩpêx o pa.

*Mẽ pajakwa jarẽnh
Epes 4.29*

³ Na htem nhỹhỹm kawar o juk kaxyw hakwam kax jagjê nõ kãm nhỹhỹm o htem prãm xà hkôt ma nhỹhỹm ho juk o tẽ. Kaxja hkryre nhũm kawar rũnh tã no nhũm kãm ma nhỹhỹm ho mrar prãm xà hkôt ho juk o mra.

⁴ Nẽ gũ xujanãr kãm pãr rũnh ta rũnh tã na hte kũk àpêr tỳx mẽ ma nhỹhỹm o pa. Nẽ pĩ ho pãr o juk xàta hkryre htã ma nhỹhỹm ho juk o mũ. Nhỹhỹm pãr o mrar xwỳnh kãm o mũr prãm xà hkôt o mũ.

⁵ Ja pyrã nõ mẽ pajakwaja hkryre htã na htem ho kapẽr o tanhmã mẽ hipêx to ho pa. Tũhã ho kapẽr mex mẽ nhũm mẽ kuma mẽ hkĩnh mẽ. Nẽ tũhã ho kapẽr punuj mẽ nhũm mẽ tee ri mẽ kapẽr ã mẽ kuma mẽ hkaprĩ mẽ rỳ kapẽr xwỳnh ta kamã gryk mẽ. Mẽ pajakwa hkryreja te kot kuwy jakrax kryre pyrãk. Kot ka kuwy jakrax grire ho tẽ mẽ nhỹri pũti kamã amẽ nhũm

kũk ho apê nhũm hpũk rax tokyx anẽ. Hãmri mẽ ma pã ho hkaxãr par o mũ mẽ ho hkaxãr pa.

⁶ Mẽ pajakwaja mã kot anhỹr. Kot kaj atỳx ri tanhmã ho akapẽr punuj to nhũm mẽ ama mẽ axpẽn mã anhĩxi ho krĩ nhĩpêx ka amex kêt mẽ apa. Rỳ ka atỳx ri ajakwa ho tanhmã akwỳjê ho akapẽr to nhũm mẽ tee ri amnhĩ tã ama mẽ hkaprĩ mẽ rỳ akamã gryk mẽ. Satanasti nhỹ hã na htem ã mẽ hakwa ho kapẽr punuj anẽ.

⁷ Na htem tũhã mẽmo mry xoprê pynê mẽ tanhmã ho mẽ ra ho kãm ma hkêt. Kagã rỳ hagrũre rỳ àati rỳ gũx kãm mẽmo mryja nhũm htem unẽ mẽ tanhmã ho nhũm kãm ma hkêt mẽ mẽ hkôt pa ho pa. Nom na htem mry piitã ã hipêx anhỹr kêt mẽ.

⁸ Tã mẽ pajakwa te mẽ kot tee ri mẽmo mry ho kãm ma hkêt kaprỳ xwỳnh ta pyrãk. Na pu htem amnhĩ krã hkôt pajakwa ho pakapẽr mex pix kêt mẽ. Tanhmã kot puj mẽ pakapẽr punuj kêt kaxyw amnhĩ jakwa hto? Mẽ pakapẽr punuj te kot kagã xoprê kot mẽ hkamnar mẽ õ wenẽn o mẽ hparta pyrãk.

⁹⁻¹⁰ Na pu htem tũhã pajakwa ho tãm pakapẽr mẽ tũhã pakapẽr punuj mẽ. Nẽ tũhã Pahi Maati Tĩrtũm mã mex o mex ã harẽnh tã ra axtem mẽ tanhmã mẽhũ japyrỹ hto. Tĩrtũm kot mẽ pahto amnhĩ pyrã mẽ mẽ panhipêx tã pu htem axtem mẽ tanhmã axpẽn japyrỹ hto ho ri papa.

Jao te pahte Tirtũm japry pyrak. Kwa ixkwýjaja. Kêr pu mẽ pahpê Tirtũm krajaja ã pakapêr punuj anhÿr hkêt nê. ãm mẽ pajakwa ho mẽmoj mex pix jarênh o ri papa.

11-12 Xà koja pà kamã hinore pyxi htã kamã gô xành nê mãânên kamã gô xenh nõkati? Nà koja anhÿr kêt nê. Na hte kamã gô mex pix nê rý kamã gô xenh nõkati pix nê.

Nê xà koja jààxô hpàr ã rãrãj harir? Rý ahkrô xô hã mànkwrýtire harir? Nà na hte ahpyñhã hpàr ã harir. Ja pyrà nê kêr pu mẽ pahpê Tirtũm krajaja pajakwa ho pakapêr punuj pê ho papikamÿr tÿx nê. Nê te hinore kamã gô mex pixta pyrà nê ãmoj mex pix jarênh o ri papa. No mẽ pajakwa nhĩkjê ho tãm pakapêr nê hikjê ho pakapêr punuj kêt nê. ãm pakapêr mex pix o pakapêr o ri papa. Kwa kêr pu mẽ ã amnhĩ nhĩpêx anhÿr rãhã ho papa.

Tirtũm kôt mẽ àhpumunh xwýnhjê jarênh

Wam Korĩt 2.6-16

13 Nê kwa mẽ axàhpumunh tÿx xwýnhjaja kêr ka mẽ amnhĩ to mex o ri apa. Nê mẽ piitã tãm mẽ hipêx mex nê mẽ amã axpên japê hã axpên to ajuta mex o ri apa. Tirtũm kapêr xà hkôt. Kot kaj mẽ ã amnhĩ nhĩpêx anê nê axàhpumunh mex ã amnhĩ to amnhĩrit.

14 Nom kot ka mẽ mẽmoj tã axpên kamã agryk o ri apa. Rý amnhĩ pix kukamã ajamaxpêr o ri apa hãmri nê ãm

ate Tirtũm kapêr kôt amnhĩ nhĩpêx ã amnhĩ jarênh kapry.

15 ã mẽ kot amnhĩ nhĩpêx anhÿr xwýnhjaja na htem Tirtũm kôt amnhĩ nhĩpêx kêt nê. Mẽ kêp Tirtũm kra hkêt xwýnh pixjaja na htem ã amnhĩ nhĩpêx anhÿr o pa. Jao mẽkarõmnuti kot amnhĩ nhĩpêx kôt pix mã amnhĩ nhĩpêx o pa.

16 Axpên kamã mẽ gryk o mẽ pa xwýnhjaja na htem amnhĩ pix kukamã hamaxpêr jao tanhmã amnhĩ tomnuj to ho pa. Nê amnhĩ tã mẽ kamã mẽ gryk xwýnhjê homnuj o pa. Tã ã mẽ pahte amnhĩ nhĩpêx anhÿr pumaj kwa kêr pu mẽ mẽmoj tã axpên kamã pagryk o ri papa hkêt nê.

17 Mẽ kot Tirtũm kôt amnhĩ nhĩpêx xwýnhjaja na htem jajê rom tãm axpên nhĩpêx rãhã o pa.

Nê axpên kamã ukaprĩ pix o ri axpên kôt pa.

Nê tãm hamaxpêr o pa.

Nê mẽ piitã mẽ hipêx o axpên pyrak.

Nê axpên tã hpijaàm o ri pa. Nê tanhmã ri axpên no kupyry to hkêt nê.

Nê ri oprê ho pa hkêt nê.

Nê mẽ axpên kamã ôkre kahak kêt nê.

Nê mẽ piitã mẽ ho mex o axpên pyrak.

Nê tãm mẽ piitã mẽ hipêx rãhã nê.

ã na htem Tirtũm kôt mẽ kot amnhĩ nhĩpêx xwýnhjaja amnhĩ nhĩpêx anhÿr o pa.

18 Kot puj mẽ ã amnhĩ nhĩpêx anê nê pajamakêtkati nê

paxàmnhìx pahkình nē ri papa. Nhūm nhÿri mēhō wa axpēn kām gryk pu mē wa omu rÿ wa harēnh ma hāmri nē mē pahtō ma wa hwÿr tē nē wa kām pakapēr nē tām akupÿm wa âm. Hāmri nhūm wa ra mē pahpyrà nē tām amnhī nhīpēx pē hamakētkati nē wa ri pa. àmnhìx ri hkình nē wa ri pa.

4

Mē kot amnhī pix kukamā mē hamaxpēr xwÿnhjē jarēnh Matēwre 20.20-28; Juāw 16.24

¹ Nē kwa mon ka hte mē akwÿjaja axpēn mā akapēr mā agēt o axpēn kām agryk pix o apa? Na ka htem ā amnhī nhīpēx anhÿr o amnhī pix kukamā ajamaxpēr. Nē mē amā amnhī jamaxpēr kōt pix mā ri amnhī nhīpēx prām. No Tirtūm kām hprām xā hkōt amnhī nhīpēx prām kēt nē.

² Na ka htem nhÿri mēmoj pumu nē tee ri ho amā anhō hprām kaprÿ. Nē amā ho anhō hprām xāj ō xwÿnhta pīr nē kēp utār mā.

Nē na ka htem tanhmā axpēn kukrēx kute hā omu nē amā ho anhō hprām nē hā ō xwÿnhta mē wa axpu. No mē amā hprām xwÿnhta mē ate hō hā Tirtūm wÿr ronhÿx ra mē ama nē mē amā hō gō. Tā mē ate hā axāhwÿr kēt jakamā nhūm mē amā ōr kēt nē.

³ Rÿ ka mē tōhā mēmoj tā awÿnhūm kot mē amar tā mē amā ōr kēt nē. Kot mē amā ōr nhūm mē ate ho anhōxÿ

ho apa pymaj na hte tōhā mē amā mē ate hā axāhwÿr xwÿnhta nhōr kēt nē.

⁴ Kormā mē ate hkōt amnhī nhīpēx mex kēt. Te mēni hō ra mjēn tā nhām kot mēhō my ho amnhīkati pyrāk o na ka htem amnhī nhīpēx o apa. Jao mē amā mē apē Tirtūm kra hprām tā axtem nē mē kām hprām kēt xwÿnhjē hkōt amnhī nhīpēx o ri apa nē mē urāk nē tanhmā amnhī tomnuj to ho ri apa. Nē mē ate amnhī tomnuj gryk ā mē amā Tirtūm prām kēt ā amnhī to amnhīrīt.

⁵ Tirtūm kapēr ā kagā htūm kot tanhmā Karō jarēnh to nē harēnh kot:

Na pre Tirtūm mē pahwÿr amnhī Karō rē nhūm mē pahwÿr wrÿ nē mē pakamā agjē nē mē pahkōt pa ho pa. Mē pahte hkōt pix mā amnhī nhīpēx o papaja na kām hprām. Anē.

Ām hāmri ā harēnh kot anhÿr jakamā kwa kēr ka mē harēnh ma nē kām ajamaxpēr tÿx rāhā ho ri apa.

⁶ Na hte Tirtūm mēmoj to mē pakutā nojarēt rāhā pu mē ŷ hā tām amnhī nhīpēx o ri papa. Kapēr ā kagā kot ja jarēnh kot:

Mē kām Tirtūm kōt amnhī nhīpēx prām kēt xwÿnhjaja na hte Tirtūm amnhī tā mē omu nē mē kutā amnhī xunhwÿ.

No mē kām hkōt ri amnhī nhīpēx prām xwÿnhjaja na hte amnhī tā mē omu nē mē ho mex o

pa nhũm htem hihtỳx
xà nhỹ hã mẽ kãm
hprãm kêt xwỳnhjê
hkôt ri amnhĩ nhĩpêx
kêt nê. Anê.

7 Jakamã kwa kêr ka mẽ
Tĩrtũm kapêr kôt pix mã mãn
ri amnhĩ nhĩpêx o ri apa. Kêr
kê Satanasti tanhmã mẽ ate
amnhĩ tomnuj to hprãm xàj
tanhmã mẽ ato ka mẽ Tĩrtũm
Karõ nhỹ hã âm ama nê hkôt
amnhĩ nhĩpêx kêt nê. Nhũm
tee ri amã àhkrox kaprỳ nê
akaga nê ma tẽ.

8 Nê kot kaj mẽ Tĩrtũm
kapêr kôt pix mã ri amnhĩ
nhĩpêx o apa nhũm amnhĩ tã
mê apumu nê te kot mẽ apa
hã mẽ ajamỳnh nê mẽ ato pa
pyràk o mẽ anhĩpêx. Jao mẽ
ato mex o ri mẽ akôt pa ho
pa. Nê mẽ atãnopxar rãhã ka
mê ajamakêtkati nê akĩnh nê
ri apa.

Nê kêr ka mẽ tanhmã
amnhĩ tomnuj to hãmri nê
tee ri ja hã amnhĩ pumu nê
hkaga kurê kumrêx nê axte
ã amnhĩ nhĩpêx anhỹr kêt nê.
Rỳ ka mẽ tanhmã ajamaxpêr
punuj to hãmri nê ja hã amnhĩ
pumu nê hkaga nê hpãnhã
tãm ajamaxpêr pix o ri apa.
Mê apê Tĩrtũm kra hã kêr ka
mê âm hkôt pix mã ri tãm
amnhĩ nhĩpêx o ri apa.

*Mê pahte amnhĩ tomnuj ã
tanhmã amnhĩ nhĩpêx to hã
mê pamã karõ*

Wam Juãw 1.5-10

9 Nê kêr ka mẽ tee ri ate
tanhmã amnhĩ tomnuj to hã
amnhĩ pumu nê akaprĩ xàj
mur nê akĩnh kêt nê. Nê
akaprĩ xàj amỳr rax nê.

10 Hãmri nê Tĩrtũm mã
amnhĩ jarênh o:

—Pa Tĩrtũm. Na pa ã amnhĩ
tomnuj anê. Nom kot paj axte
hkêt nê. Âm inhmã akapêr
kôt pix mã ri amnhĩ nhĩpêx
prãm.

Anhỹr o kãm akapêr kê mẽ
ama nê mẽ ate amnhĩ tom-
nujta ã tanhmã mẽ ato hkêt
nê. Âm mẽ ato mex nê ka
mê akupỳm ajamakêtkati nê
axãmnhĩx akĩnh nê ri apa.

*Mê pahte axpêh to pakapêr
nê mẽ pahkurê*

*Matêwre 7.1-5; Rômãn 2.1-
3, 14.10-13; Wam Korit 4.5*

11 E ixkwỳjaja. Kwa kêr
ka mẽ anhĩõ kot tanhmã
amnhĩ tomnuj to hã omu nê
tanhmã ho akapêr punuj to
hkêt nê. Tĩrtũm kapêr ã kagà
htũm kot ja nê mẽ pahkurê
kamã hihtỳx jakamã kot ka
mê ri ã amnhĩ nhĩpêx anê
nê te ate Tĩrtũm kapêr tũm
kwỳ omnuj ã harênh pyràk.
Rỳ te axàhpumunh tỳx o ate
Tĩrtũm jakrenh ã amnhĩ to
jarkrar pyràk. Jao kapêr kôt
amnhĩ nhĩpêx kêt nê. Na
htem Tĩrtũm kapêr ã kagà
htũm kwỳ mex ã harê nê
hkwỳ omnuj ã harênh kêt nê.
Piitã mex kênã.

12 Nê Tĩrtũmja tapxipix
na kêp mẽ pahto amnhĩptar
xwỳnh maati. Nê tapxipix na
hte mẽ pahte tanhmã amnhĩ
nhĩpêx to hã mẽ pahpumunh
hkôt tanhmã mẽ pajarênh
to. Mê pahte amnhĩ to mex
xwỳnh ã mẽ pajarê rỳ mẽ
pahte amnhĩ tomnuj xwỳnh
ã mẽ pajarê. Âm tapxipix
kot ã mẽ pajarênh kot anhỹr

xwÿnh. Tã ka mẽ axtem nẽ kapẽr kwÿm ri tanhmã akwÿjê ho akapẽr punuj to ho ri apa.

Mẽ pahte Tirtũm mã paja-maxpẽr pẽ kãm amnhĩ jarẽnh ã mẽ pamã karõ

Rukre 12.13-21

¹³ E kwa mẽ inhma ixkwÿjaja. Na ka hte mẽ akwÿjaja tanhmã amnhĩ kukamã ajamaxpẽr to nẽ akwÿjê mã amnhĩ jarẽnh o:

—Koja apkati pa ma krĩ hõ hwÿr mõ nẽ kamã mẽ kãm ixãpênh o ixpa hã ixtã amgrã pyxi nẽ hpãnhã kãxpore jamÿnh rax nẽ man akupÿn mõ.

Anhÿr o amnhĩ jarẽ.

¹⁴ Kwa mẽ ã amnhĩ kukamã amnhĩ jarẽnh anhÿr kêt nẽ. Mẽ pahõt mẽ pahte amnhĩ kukamã paxãhpumunh mex? Amrakati kênã. Kot ka mẽ ã amnhĩ kukamã amnhĩ jarẽnh anhÿr tã kormã ã amnhĩ nhĩpêx anhÿr kêt ri tanhmã amnhĩ to nẽ ty. Rÿ tanhmã amnhĩ to nẽ axã hãmri nẽ nhÿhÿm amõr kêt nẽ. Te mẽ pahpê namê pyrãk na pu htem ri papa nẽ tanhmã amnhĩ to nẽ ty nẽ pajapêx tokyx anẽ.

¹⁵ Jakamã mẽ ã amnhĩ kukamã amnhĩ jarẽnh anhÿr kêt nẽ. Kêt amnhĩ jarẽnh o:

—Koja Tirtũm kãm ja prãm koja apkati pa ã amnhĩ nhĩpêx anẽ nẽ ã amnhĩ nhĩpêx anẽ.

Anhÿr o Tirtũm kamnàr o tanhmã amnhĩ kukamã amnhĩ jarẽnh to.

¹⁶ No mẽ ate amnhĩ krã hkõt amnhĩ kukamã amnhĩ

jarẽnhata Tirtũm jamaxpẽr xã hkõt kêt. ãm amnhĩ krã hkõt mẽ ate amnhĩ kukamã amnhĩ jarẽnh kênã. ã mẽ ate amnhĩ jarẽnh anhÿrja mex kêt.

¹⁷ Nẽ mẽ kot tãm amnhĩ nhĩpêxja kot kaj mẽ ate mar mex tã hkõt amnhĩ nhĩpêx kêt japêr hãmri nẽ amnhĩ tomnuj o apa.

5

Mẽ hikãxpore rũnh xwÿnhjê jarẽnh

Rukre 12.13-21; Wam Ximotre 6.9-10; Apokarip 18.14

¹ Nẽ kwa mẽ akãxpore rũnh xwÿnhjaja. Mẽ inhma nẽ inhmar tÿx nẽ. Nhÿrmã mẽ amex kêt jakamã kwa mẽ tee ri amnhĩ kukamã ajamaxpẽr o ra akapri nẽ amÿr o apa kurê kumrêx.

² Tirtũm noo mã mẽ akãxpore te ra mẽ apê hapêx par pyrãk. Te ra mẽ anhÿ kamã mẽ ate amnhĩ tomnuj xwÿnh ã kutã akri pyrãk.

³ Mẽ ate mẽ akukrêx nẽ mẽ akãxpore ho apikuprõnh rũnh tã ka htem mẽ akwÿjê pẽ ho anhõxÿ ho ri apa. Mÿrapê koja nhÿrmã tanhmã mẽ apê amnhĩ to nẽ omnu pa ka mẽ ho apikuprõnh rax kaprÿ. Hãmri nẽ mẽ ate amnhĩ tomnuj mÿrapê Tirtũm mẽ Kra wa kuri atir tũm nẽ apa ho apa hkêt nẽ. ãm kuwy kamã mẽ amnhĩ xã htÿx kamã ajamak rãhã ho ri apa.

⁴ Na ka htem apur kãm mẽ àpênh xwÿnhjê mã amnhirer kêt nẽ. Nhũm mẽ tee ri amnhĩ tã mẽ ajamã hãmri nẽ mẽ atã amnhĩ to Pahi Maati

Tirtũm xihtỳx xwỳnhhta wỳr o pa nhũm mẽ atã mẽ kuma.

⁵ Mẽ akĩnhã mẽ kệp am-rakati htã ka htem ãm ja hã mẽ omu nẽ mẽ ãpênh pãnhã mẽ kãm amnhĩrer kêt nẽ amnhĩ pix kukamã ajamaxpêr. Nẽ amã prãm xà hpix kukamã amnhĩm mẽmoj japrôr pê akĩnh o ri apa. Jao te mẽ apê môx htwỳm nhũm mẽ kot hpĩr nẽ hkrêr mã mex ã harênh xwỳnhhta pyrãk. Mỳrapê kot kaj mẽ môxta pyrà nẽ nhỹrmã ty hãmri nẽ Tirtũm mẽ Kra wa kuri atĩr tũm nẽ apa ho apa hkêt nẽ.

⁶ Nom ja pix kêt. Na ka htem mẽ anhõ krĩ kamã mẽ anhõ pahi mã tanhmã akwỳjê ho axêx to ho ri apa. Mẽ kot tanhmã atomnuj to hkêt tã ka mẽ kãm mẽ ho axêx rũnh nẽ. Tã koja nhỹrmã Tirtũm mẽ hã tanhmã mẽ ato rax kumrêx ka mẽ rĩ amnhĩ pumu.

Mẽ pahte Jejus kutêp amnhĩ kaxyw kãm pajamaxpêr o papa hã mẽ pamã karô

Sikũn Pêtre 3.1-13

⁷ E ixkwỳjaja. Koja mẽhõ tanhmã mẽ atomnuj to htã ka mẽ arĩ amnhĩ kaxyw Jejus mã ajamaxpêr rãhã ho ri apa. Pê akupỳn hpôx xà hã arĩgro jamãr rãhã nẽ. Te pur nhõ dõn kot amnhĩ nhĩpêx pyrãk. Koja hpur kãm ahkre nẽ ahkre hpa hãmri nẽ arĩ hamãr o pa nẽ kãm nojarêtkêt nẽ hã na wrỳk jamãr o pa. Jao hamakêtkati nẽ ô jamãr rãhã ho pa.

⁸ Tã kêr ka mẽ uràk nẽ arĩ Pahihti akupỳn hpôx xà hã arĩgro jamãr rãhã ho ri apa. Koja tokyx akupỳn mẽ pahwỳr wrỳ. Jakamã kêr ka mẽ kutêp mẽ kot mẽ atomnuj xwỳnhjê kutã amnhĩ to htỳx nẽ ri apa. Nom tee ri amnhĩ kukamã ajamaxpêr o Jejus kaga hkêt nẽ. Arĩ hamãr pê akĩnh nẽ ajamakêtkati nẽ ri apa. Koja akupỳn mẽ pahwỳr wrỳ nẽ mẽ pahto mex rax kumrêx.

⁹ Nẽ kêr ka mẽ axpên to akapêr o ri apa hkêt nẽ. Kot ka mẽ ã amnhĩ nhĩpêx anẽ nhũm Tirtũm mẽ ama nẽ tanhmã mẽ ajarênh to. Kot mẽ pahpumunh xà hkôt tanhmã mẽ pajarênh to xwỳnh na. Tã ra tanhmã kot mẽ pahpiitã mẽ pajarênh to xà hã arĩgroja ra ahtêp o mō.

¹⁰ E ixkwỳjaja. Kêr ka mẽ wam mẽ kot Tirtũm nhỹ hã kapêr jarênh xwỳnhjaja kot amnhĩ nhĩpêx mã ajamaxpêr rãhã nẽ. Na prem Tirtũm nhỹ hã mẽ kãm kapêr o ri mẽ hkôt pa nhũm mẽ hkwỳjaja ja hã tanhmã mẽ hipêx to nhũm mẽ amnhĩ xà htỳx kamã hamak rãhã ho pa. Tã tee ri amnhĩ kukamã hamaxpêr pê Tirtũm kaga hkêt nẽ. Na prem arĩ ý hã kapêr jarênh rãhã ho ri mẽ hkôt pa. Tã kêr ka mẽ kot amnhĩ nhĩpêx pyrãk o amnhĩ nhĩpêx nẽ Tirtũm kaga hkêt nẽ.

¹¹ Na prem amnhĩ xà htỳx kamã hamak o pa rãhã ty hãmri nẽ Tirtũm kuri mex nẽ hkĩnh nẽ pa ho pa. Ra mẽ ate finat Johti jarênh mar mex.

Na pre omnuj tỳx nē pa htã amnhĩ tã Pahi Maati Tĩrtũm kamã gryk nē hkaga hkēt nē. Hãmri nhũm amnhĩ tã omu nē gaa nē ho mex rax nē nhũm akupỹm mex kumrẽx nē pa. Pahi Maatija ukaprĩ ho ukaprĩ nē mex o mex jakamã na pre ã Johti ho mex anē. Tã koja ho mexta pyrã nē ã mē pahto mex anē.

Mē pahte tanhmã amnhĩ nhĩpẽx to hã mē pamã karõ

Matẽwre 5.33-37, 18.15; Rõmãn 12.15; Karatas 6.1-2; Jutre 22-23

¹² E ixkwỳjaja. Pa mē amã mẽmoj jarē ka mē inhma nē inhmar tỳx nē. Kêr ka mē mẽmoj tã amnhĩ jarēnh kaxyw hãmri nē akatãt kõt amnhĩ jarēnh kurê kumrẽx. Nē amnhĩ jarēnh o: “Nà kot paj ja ho anē.” Anē. Rỳ amnhĩ jarēnh o: “Nà kwarĩ pa ja ho anhỹr kêt nē.” Anhỹr o amnhĩ jarēnh kurê kumrẽx. Kê mē akwỳjaja ãm hãmri mē ate amnhĩ jarēnh ã mē apumunh kurê kumrẽx nē axêx ã mē akamnhĩx kêt nē. Mē apê Tĩrtũm kra kênã kot ka kêt mē ri axtem nē amnhĩ jarēnh o axêx.

¹³ Nē koja mē anhĩõ mẽmoj tã tanhmã amnhĩ to nē omnuj nē. Ka mē ja hã omu nē kãm anē kê amnhĩ kaxyw Tĩrtũm mã hamaxpêr pê amnhĩ to hwỳr rãhã ho pa. Rỳ koja hkĩnh nē ri pa ka mē ja hã omu nē kãm anē kê hkĩnh kãm mex o mex ã grer o pa.

¹⁴ Rỳ koja à nē nõ ka mē ja hã omu nē kãm anē kê amnhĩ wỳr pastõ nhỹ hã mē kapêr xwỳnh kwỳjê hã karõ. Kê

mē hwỳr mra nē Jejus nhỹ hã mẽmo twỳm kwỳ ho hkukõ nē ho Tĩrtũm wỳ.

¹⁵ Kê mē ã mē à xwỳnhjê hwỳr mrrar nē mē ho Tĩrtũm wỳr o pa anē. Koja mē ho kuwỳ nhũm mē kuma nē akupỹm mē ho mex. Nhũm mē tanhmã amnhĩ tomnuj to japêr kê mē ja hã amnhĩ jarē kê Tĩrtũm mē kuma nē ja hã tanhmã mē ho hkēt nē.

¹⁶ Jakamã kêr ka mē atõ tanhmã amnhĩ tomnuj to nē tee ri ja hã amnhĩ pumu hãmri nē tokyx akwỳjê mã amnhĩ jarē kê mē tokyx ato Tĩrtũm wỳ. Kê atã mē kuma nē tanhmã akrã hto ka axte ã amnhĩ nhĩpẽx anhỹr kêt nē. Nē ra amex nē apa.

Nē koja mēhõ Tĩrtũm kõt pix mã amnhĩ nhĩpẽx mex rãhã ho pa. Hãmri nē mẽmoj tã kuwỳ nhũm kuma nē kãm tanhmã mẽmoj to.

¹⁷ Te finat Eris kot mẽmoj tã hwỳr nhũm kot mar nē kãm ho anhỹrta pyrãk. Erisja kêp mē panhĩõ na pre. Tã na pre hkwỳjaja amnhĩ tomnuj pix o pa nhũm tee ri mē omu nē mē hã na wrỳk kêt kaxyw ho Tĩrtũm wỳr kãm hihtỳx nē. Hãmri nhũm kuma nē kãm ho anē nhũm na wrỳk kêt ry rax kumrẽx. Hã amgrã axkrunẽpxi nē hkõt mytwrỳ kêp 6. Mē kot amnhĩ tomnuj tỳx o paja mỳrapê.

¹⁸ Tã nhũm Eris axte mē ho kuwỳ nhũm axte mē hwỳr na rē nhũm akupỹm katãt kõt wrỳk mex nē. Nhũm akupỹm mē hpur kãm mē õja mē kãm mex nē akupỹm mē

kām ô rũnh nê. Tã ã Tĩrtũm kot Eris mar nê kãm mēmoj nhĩpêx anhỹrja pyrà nê koja mē pama nê mē pamã mēmoj tanhmã ho.

¹⁹Nê e mē inhma ixkwỳjaja. Koja mēhõ Tĩrtũm kapêr mar tỳx nê te kêp hkra pyràk o amnhĩ nhĩpêx. Tã tanhmã hamaxpêr to nê kapêr kaga nê htỳx ri amnhĩ tomnuj pix o pa. Ka mē ja hã omu nê hwỳr mra nê kot amnhĩ tomnuj nê kãm akapêr kãm axihtỳx kê tokyx hkaga nê akupỳm Tĩrtũm kôt amnhĩ xãm tỳx nê ãm hkôt pix mã amnhĩ nhĩpêx.

²⁰Koja amnhĩ tã mē ama nê Tĩrtũm kôt amnhĩ xãm tỳx nhũm amnhĩ tã omu nê kot tanhmã amnhĩ tomnuj tota ho hamakêtkati nê amnhĩ katut kôt kurê nhũm nhỹrmã kuri htĩr tũm nê mex nê pa ho pa. Koja amnhĩ tomnuj tỳx o pa htã hkaga hpa nhũm Tĩrtũm ja hã omu nê hã tanhmã ho hkêr nê axte tanhmã kot amnhĩ tomnuj tota mã hamaxpêr kêt nê.

Tã ãm ja pix. Ixpê Xiakre na pa ã mē awỳr kagà nhĩpêx nê mēnh anê.

Wam Pêtre Simãw Pêtre kot Jejus kôt hkwýjê hwýr kagà nê mênh

Simãw Pêtre na pre kagàja nhîpêx. Kêp tep pynênh o pa xwýnh tâ hpãnhã kêp Jejus nhý hã hkrajê jahkre ho pa xwýnh. Nê krî pê Jerujarê kamã kêp Jejus krajê nhô pastô. Na pre krî piitã hkôt Jejus ã mē kãm mē hkurê xwýnhjaja tanhmã hã mē hipêx to nhũm Pêtre mē harênh ma nê mē hamaxpêr o hihtýx kaxyw mē kãm kagàja nhîpêx nê krî piitã hkôt mē hwýr kurê. Mē kot kamã harênh nê mar nê amnhî kamã kahak kêt nê arî Tirtũm kôt amnhî nhîpêx mex o pa kaxyw. Nê Jejus ã mē kot amnhî xà htýx kamã hamak tâ nhýrmã kaxkwa kamã mex nê pa ho pa hã mē kãm awjarê. ã mē kãm mēmoj jarê nê hã kagà anê. Nê mē kãm:

¹ Pa mē ate Jejus kôt amnhî xunhwýr nhũm Tirtũm kot mē ato hkra xwýnhjaja. Xà mē amex? Ot pa mē awýr kagà nhîpêx nê kumê. Ixpê Simãw Pêtre na pa. Ixte Jejus nhý hã hkrajê jahkre ho mē ixpa xwýnhjê hõ na pa mē awýr kagà nê kumê.

Na xep pre Kris ã mē kãm mē pahkurê xwýnhjaja tanhmã mē anhîpêx to ka mē panhõ pika rùm mē umaj anhrã nê ma ahpýnhã krî hkôt ri apa.

Jao mē akwýjaja ma pika pê Põt kamã krî hkwý hkôt apa.

Nê mē akwýjaja pika pê Karatas wýr apa.

Nê mē akwýjaja pika pê Kapatos wýr apa.

Nê mē akwýjaja pika pê As wýr apa.

Nê mē akwýjaja Pitĩn wýr apa.

ã ahpýnhã pika hkôt mē api-grãnh par anê. Tã ot pa mē awýr kagà nhîpêx nê mē apitã mē awýr kurê. Mē apýnh nê mē ate kamã harênh nê ixkapêr mar kaxyw.

² Na pre Mēpahpãm Tirtũmja amnhĩm mē pahte amnhĩ kaxyw kãm pajamaxpêr xwýnhjê rê nê mē pahtã amnhĩ jarênh o:

—Kot paj jajê ho ixkra. Na pre ra Ixkra Jejus Kris ixpê mē nê ty nê htyk o hkamrô axkapĩ nhũm mē harênh ma nê hkôt amnhĩ xunhwý. Tã nhũm Ixkarõ mē hkarõ mã agjê nhũm mē ra inhmã hprãm xà kôt pix mã ri inhmã tanhmã amnhĩ nhîpêx to ho pa.

Anhýr o mē pahtã amnhĩ jarênh. Tã kê mē akutã nojarêr rãhã ho ri mē akôt pa ka mē ý hã axãmnhix ajamakêtkati nê akĩnh nê ri apa.

Mē pahte amnhĩ kukamã pajamaxpêr pê pahkĩnh o papa hã mē pamã karõ

Rukre 12.32-34; Rõmãn 8.18-25; Sikũn Korĩt 4.16-18

³ Nê na pre mē panhõ Pahihti Jejus Krisja ty nhũm Hipêêxã Tirtũm akupým ho htĩr. Tã kot mē pakutã nojarêr

râhã ho pa jakamã na pre mē pahpê hkrajê mã mē pajamaxpêr nyw jagjê pu mē ý hã pahte amnhĩ nhĩpêx nyw o amnhĩ nhĩpêx o papa. Hãmri nê Jesus akupým htĩrja mã pajamaxpêr nê amnhĩ kukamã pajamaxpêr o:

—Kot paj nhỹrmã ty nhũm Tĩrtũm kot Jesus nhĩpêx pyra nê akupým ixto ixtĩr pa wa kuri ixtĩr tũm nê inhmex kumrêx râhã ixpa ho ixpa. Nã koja ã inhĩpêx anê.

Anhỹr o pajamaxpêr jakamã kwa kêr pu mē Tĩrtũm mã mex o mex ã mãn harênh râhã ho papa.

4 Na ra mē pakutêp õ krĩ kamã mēmoj piitã ho mex nê. Õ krĩ kamã mēmoj kot omnu nê hapêx kêt jakamã na pu htem amnhĩ tã hamãr râhã ho papa.

5 Nê mē kot Kris ã mē atomnuj mýrapê na ka mē amnhĩ xã htýx kamã ajamak o ri apa nom arĩ amnhĩ kaxyw Tĩrtũm mã ajamaxpêr râhã ho ri apa. Hihtýx o hihtýx jakamã koja mē pahkôt pa ho pa nê mē pamã pajamaxpêr o hihtýx râhã nhũm nhỹrmã Jesus akupým mē pahwýr wrý. Hãmri pu mē hkôt ri amnhĩ nhĩpêx mex râhã ho ri papa. Ra Tĩrtũm kot mē pakukamã mē pajarênh xã hkôt.

6 Jar mē pahte arĩ amnhĩ xã htýx kãm pajamak o papa htã na pu htem Tĩrtũm nhỹrmã kot mē pahto mexta kukamã pajamaxpêr hãmri nê tee ri amnhĩ kukamã pajamaxpêr kêt nê. Mē pahpê mē pahpunuj tũm nê ri papa ho papa

mã xwýnh kêt.

7 Na hte Tĩrtũm mē panhĩpêx o te mē kot ôr nhĩpêx pyrãk. Na htem hprĩ hã tanhmã ôr kute hã omu. Kêp ôr kumrêx ã omu rý mēmoj mē ho pihkàr ã omunh kaxyw kuwy kamã kurê. Nhũm piitã ôr nê pigãnh pa japêr nhũm mē omu nê harênh o:

—Nã ãm hãmri. Kêp ôr kumrêx nê mēmoj mē ho pihkàr kêt. Anê.

Na hte Tĩrtũm ã mē panhĩpêx anê. Jakamã mē pahpê Jesus kôt amnhĩ nhĩpêx o mē papa xwýnhjaja mē pahte tõhã tanhmã pahpunuj to htã no nhũm mē panê ja rênh kêt nê. Na hte amnhĩ tã mē pahpumu nê hamaxpêr o:

—Kot paj kormã ja hã mē hamã nê tokyx akupým mē ho mex kêt nê. Koja mē omnuj nê pa htã tee ri amnhĩ kukamã hamaxpêr nê ixkaga hkêt nê arĩ amnhĩ kaxyw ixkôt hamaxpêr râhã ho pa. Hãmri nhũm mē hkwyjaja ja hã mē omu nê mē kêp ixkra hã mē omunh kurê kumrêx. Te mē kot hprĩ hã ôr pumunh nê kêp ôr kumrêx ã omunhta pyrãk. Anê.

Jakamã kêr pu mē arĩ amnhĩ kaxyw hkôt pajamaxpêr râhã ho papa. Mēmo mýrapê mē pahpunuj nê ri papa htã arĩ hkôt pajamaxpêr râhã nhũm Jesus nhỹrmã akupým mē pahwýr wrý. Hãmri nhũm Tĩrtũm mē pahpumu nê mē pamã:

—Nã ãm hãmri na ka prem amnhĩ kaxyw ixpix mã ajamaxpêr râhã ho ri apa. Mē

kot ixtã tanhmã mẽ atomnuj to nhũm mẽ ate amnhĩ xà htỳx kamã ajamak o apa htã aa ixkaga hkêt nẽ arĩ amnhĩ kaxyw inhmã ajamaxpêr rãhã ho ri apa. Nà ãm hãmri mẽ ate amnhĩ to mex kumrẽx xwỳnh na ka mẽ. Kot paj mẽ piitã mẽ kãm ja hã mẽ ajarẽ.

Anhỹr o mẽ pamã kapêr.

Nẽ ôr o mẽ hikukrêxja mex tã koja arĩ mex rãhã hkêt nẽ. Koja mẽhõ kãm tanhmã homnu hto hprãm nẽ homnu hpa. No mẽ papajaja kot puj mẽ arĩ amnhĩ kaxyw Tĩrtũm mã pajamaxpêr rãhã ho papa hãmri nẽ ôrta pyrã nẽ pajapêx kêt nẽ. Kurom mẽ pamex tũm nẽ aa pajapêx kêt nẽ papa ho papa.

8-9 Nẽ Jejusja aa mẽ ate ano ho omunh kêt tã na ka htem kãm mẽ ajapê htỳx nẽ kot mẽ panê tanhmã amnhĩ nhĩpêx to hã harênh ma nẽ mẽ amã hkĩnh nẽ. Nẽ amnhĩ kaxyw hkôt ajamaxpêr mex rãhã ho ri apa. Jakamã na pre Tĩrtũm ja hã mẽ apumu nẽ mẽ ato hkra nẽ mẽ apê õ krĩ kamã wa kuri amex nẽ apa mã xwỳnh ã mẽ ajarẽ. Ja kaxyw na pu prem amnhĩ kaxyw hkôt pajamaxpêr rãhã jao pahkĩnh nẽ ri papa. Nẽ tee ri tanhmã amnhĩ kĩnh tỳx ã amnhĩ jarênh to hkukamã pajamaxpêr. Kormã aa ã mẽ pahkĩnh anhỹr kêt tã mẽ pahkĩnh tỳx nẽ ri papa.

¹⁰ Nẽ Tĩrtũm kot mẽ pahto mex pê mẽ panê mẽ pahte amnhĩ tomnuj rênh par nhũm kuri mẽ pahtĩr tũm nẽ mẽ

papa hã mẽ pajarênhja. Amnepê mã Tĩrtũm nhỹ hã kapêr jarênh o ri mẽ pa xwỳnhja na pre mẽ pakukamã ã mẽ pajarênh anhỹrja ma nẽ tee ri hamaxpêr nẽ tee ri hã axpên kukjêr o ri axpên kôt pa. Nom hprĩ hã mar mex kêt nẽ. Tã arĩ ri mẽ pakukamã hkwyjê mã ja hã mẽ pajarênh o ri pa.

¹¹ Na pre Tĩrtũm Karõja Kris tyk kukamã mẽ kãm ã mẽ pajarênh anhỹr o amnhĩrit. Kormã Kris kaxkwa kamã pa ri. Kormã wrỳk nẽ katorxã nhõxàhkre rũm kator kêt ri nhũm pre hkukamã mẽ kãm tanhmã ho amnhĩrit to. Mẽ kot hpĩr nhũm kot amnhĩ xà htỳx kãm hamak kãm mẽ panê htykja ã hkukamã mẽ kãm harênh o amnhĩrit. Nhũm Tĩrtũm kot akupỳm ho htĩr nẽ kãm mex o mex ã harênhja nhũm hkukamã mẽ kãm harênh o amnhĩrit. No ãm hprĩ hã mẽ kãm mẽhõ nhĩxi hkôt harênh kêt jakamã nhũm prem harênh ma nẽ tee ri hkukamã ri hamaxpêr nẽ tee ri hã axpên kukjêr o ri axpên kôt pa. Nẽ hã axpên kukjêr o:

—Kwa mẽhõ koja we ã amnhĩ nhĩpêx anê? Xà koja tokyx ã amnhĩ nhĩpêx anê nà kormã?

Anhỹr o hã axpên kukjêr o ri pa.

¹² Hãmri nhũm Tĩrtũm axte mẽ kãm Jejus jarênh kwỳ ho amnhĩrit nẽ mẽ kãm:

—Nà mẽ anoo mã koja ã amnhĩ nhĩpêx anhỹr hkêt nẽ. Mẽ amỳr pê mẽ akanrêhã mẽ akra nẽ mẽ atãmnhwỳjê noo mã koja kato nẽ mẽ hkôt ã

amnhĩ nhĩpêx anhÿr o pa. Anê.

Mê papamjaja mê panoo mã kator nê ã kot amnhĩ nhĩpêx anhÿr o paja o ã mê kãm ho amnhĩrit anê.

Amnepêm Tirtüm nhÿ hã kapêr o ri mê pa xwÿnhjaja nê jarãhã mê ixte Jejus nhÿ hã mê ahkre ho ri ixpa xwÿnhjaja mê ixkapêr ãm pixii. Na pa htem wamtajê pyrã nê Tirtüm Karõ nhÿ hã ahpumunh tÿx xà ho mê amã tanhmã Jejus jarênh to ho ri mê akôt ixpa. Nhÿm hte Tirtüm kapêr o mê wrÿk xwÿnhjaja mê ixkapêr ma nê tee ri hamaxpêr o mê pahpyrã nê kãm hprĩ hã harênh mar par prãm nê.

Mê pahte Tirtüm pyrã nê tãm amnhĩ nhĩpêx ã mê pamã karõ

Epes 4.1-3; Korosê 1.10-12; Sikün Pêtre 3.10-13; Wam Juãw 3.1-6

¹³ E kwa Kris kôt ixtõ nê ixtõxjaja. Kêr ka mê Jejus kutêp mëmoj punuj kutã amnhĩ to htÿx rãhã ho ri apa. Nê Tirtüm mã amnhĩ nhĩpêx mex rãhã nê. Pê tãm ajamaxpêr nê tãm amnhĩ nhĩpêx o apa. Nê mê ã ajamaxpêr anhÿr o:

—Nã koja nhÿrmã Jejus akupÿn mê ixwÿr wrÿ hãmri nhÿm Tirtüm ixto mex rax nê. Nã koja ã inhĩpêx anê. Anê.

¹⁴ Nê kêr ka mê Tirtüm kapêr kôt pix mã mãn ri amnhĩ nhĩpêx mex rãhã ho ri apa. Te mëhprĩre kot mê hipêêxã kapêr mar nê hkôt amnhĩ nhĩpêx pyrãk. Kormã mê ate Kris kôt amnhĩ xunhwÿr kêt ri na ka prem

ate amnhĩ nhĩpêx tùm kôt ri tanhmã amnhĩ tomnuj to ho ri apa.

¹⁵ Tã kêr ka mê hpãnhã amnhĩ to mex o mãn ajamaxpêr o apa nê Tirtüm pyrã nê amnhĩ tomnuj o apa hkêt nê. Tirtümja kot amnhĩ to mex pix o pa xwÿnh na.

¹⁶ Kapêr ã kagã htüm kot ja jarênh kot:

Kêr ka mê ixpyrã nê amnhĩ to mex pix o ri apa. Anê.

¹⁷ Tã koja nhÿrmã kêp Mëpahpãma maati hã hprĩ hã mê pahte amnhĩ nhĩpêx ã mê pahpumunh hkôt tanhmã mê pajarênh to. Tãm mê pahte amnhĩ nhĩpêx kôt mê pajarê rÿ mê pahte amnhĩ tomnuj kôt mê pajarê. Hãmri nê ahpÿnhã mê panhĩpêx. Mê pahto mex nê rÿ mê pahtomnuj nê. Jakamã kwa pu mê nhÿrmã kot tanhmã mê pahtomnuj to pymaj hkôt pix mã amnhĩ nhĩpêx o ri papa rãhã nê.

¹⁸ Nê kormã mê pahte Jejus kôt amnhĩ xunhwÿr kêt ri na pu prem mê panhĩgêt pyrã nê pahtÿx ri amnhĩ tomnuj o ri papa. Tã nhÿm Krisja te amnhĩm mê pajaprôr pyrãk o mê panhĩpêx. Mê pahte hpãnhã kapêr kôt pix mã amnhĩ nhĩpêx o papa kaxyw. No mëmoj to na pre mê pahpãnhã amnhĩre? Nã ra mê pahte ja jarênh mar tÿx. Na pre kãxpore ho mê pahpãnhã amnhĩrer kêt nê. Rÿ ôr o mê hikukrêx ã ohtô ho mê pahpãnhã amnhĩrer kêt nê. Rÿ prat o mê hikukrêx ã ohtô

ho mē pahpānhā amnhīrer kêt nē. Jajaja hapêx tokyx anhÿr mā xwÿnh na.

¹⁹ Na pre ā mē hpānhā amnhīrer anē nē tām mē panē ty nē htyk o amnhī nhī ho mē pahpānhā amnhīrer pa. Nhūm hkamrô axkapī. Te amnepê mā mē panhīgēt kot amnhī pānhā Tīrtūm mā ôwēhti hkrare hpar nhūm hkamrô pikapīrta pyrāk. ôwēhti krare mexre pix na prem kām kupa. Mex nē tanhmā kute hkêt xwÿnh pix. Tā Krisja aa tanhmā amnhī tomnuj to hkêt kumrêx nē mē panē ty nē htyk o Tīrtūm mā mē pahte amnhī tomnuj piitā hpānhā amnhīrer pa.

²⁰ Amnepê mā kormā mēmoj kêt ri na pre Tīrtūm kot ā mē pahpānhā amnhīrer anhÿr kaxyw mē pakukamā kuta nē âm. Tā nhūm amgrā ohtô nē hapêx nhūm mē pahwÿr kumē nhūm man mē pahwÿr wrÿ. Kot ā mē pahpānhā amnhī nhīpêx anhÿr kaxyw.

²¹ Tā nhūm prem kupī nhūm Tīrtūm akupÿm ho hÿr nē mex o mex ā harē. Mē pahte ja hā harēnh mar kôt amnhī kaxyw Tīrtūm pix mā pajamaxpêr o ri papa kaxyw. Nē mē pahte amnhī wÿr Jejus jamār rāhā ho ri papa kaxyw.

²² Tā pu prem ra kot ā mē panē amnhī nhīpêx anhÿr ā harēnh ma nē mē pahte amnhī tomnuj kaga nē hkôt amnhī xunhwÿ. Jao amnhī to mex pix o ri papa. Nē mē pamā Kris kôt mē pahkwÿjê

hkīnh o papa. Tā kwa kêr pu mē arī pamā axpên kīnh tÿx rāhā ho papa.

Te mē pakatorxà rūm mē pajapôx pyrāk o axte mē pajapôx ā mē pajarēnh
Juāw 3.1-21

²³ Nē na pu prem mē pakatorxà nhōxāhkre rūm mē pajapôx pyrā nē axte mē pajapôx pyrāk o amnhī nhīpêx. Jao ra mē pahpê Tīrtūm kra nē ri papa. Na hte mē pakatorxà nē mē panhīpêxàja wa ri pa nē gaa nē mē pahpê ty. No kêt Mēpanhīpêxà maati Tīrtūmja wa kurom rāhā ho rāhā. Tā ra mē pahte amnhī kaxyw kapêr kôt pajamaxpêr o pahpê hkra jakamā kot puj mē urāk nē nhÿrmā pahtÿr tūm nē papa rāhā ho papa.

Nē Tīrtūm kapêrja Tīrtūm pyrā nē rāhāā. Koja aa hapêx kêt nē.

²⁴ Kapêr ā kagà htūm kot ja jarēnh kot:

Pika piitā hkôt mē pa xwÿnhjaja te mē kot pōti grā pyrāk.

Nē mē kot amnhī to mex xàja te kot kapôt ā pixôrà pyrāk.

Na hte pōti tokyx grā nē hapêx.

Nē pixôràja haxwÿja arīgro htÿx mē nhūm grā tokyx anē nē rarak pa nē hapêx.

²⁵ No Tīrtūm kapêr koja pōti mē pixôràta wa kurom aa hapêx kêt nē. Koja arī rāhā ho rāhā. Anē.

Tã kapêrja tãm na htem mẽ pamã kamã harê pu mẽ pah-piitã mar o papa.

2

Mẽ pahte Tirtũm kot amnhĩ nhĩpêx kôt amnhĩ nhĩpêx ã mẽ pamã karõ

Rõmãn 12.2; Wam Korõt 3.16-17; Epes 2.19-22

¹ Nẽ kwa kêr pu mẽ axte tanhmã amnhĩ tomnuj to ho ri papa hkêt nẽ.

Rỳ tanhmã axpẽn mã paxêx to hkêt nẽ.

Nẽ paxêx rom tanhmã ri axpẽn nokupyr to hkêt nẽ.

Nẽ mẽmoj tã axpẽn kãm pa-gryk kêr nẽ.

Nẽ tanhmã axpẽn japrỳ hto hkêt nẽ.

Kêr pu mẽ ã amnhĩ nhĩpêx anhỹr o papa hkêt kumrêx.

² Mẽ hkaràre na htem ãm kãm pijaôr pix prãm. Nẽ gaa nẽ htỳxre nẽ ra hprêk o mõi. Tã kêr ka mẽ pijaôr pix prãm xwỳnhjê pyrã nẽ amã Tirtũm kapêr mar nẽ hkôt pix mã amnhĩ nhĩpêx o apa hprãm. Jao mar tỳx pê ra hkôt amnhĩ nhĩpêx mex o mõi nẽ gaa nẽ hkôt amnhĩ nhĩpêx mex o apa. Te mẽ karàre pijaôr nẽ gaa nẽ ra hprêk o mõi pyràk.

³ Ra mẽ ate Jejus kot mẽ pahto mex ã omunh mex kênã.

⁴ Nẽ na htem kên o ixkre nhĩpêx kaxyw hãmri nẽ hkwỳ kawrà nẽ ri hkapi. Nhũm hõ mex kêr nhũm mẽ tee ri omu nẽ nhãm kumẽ. Tã ja pyrà nẽ na pre mẽ pahkwỳjaja tee ri Kris pumu nẽ htỳx

mex kêr ã hkamnhĩx nẽ te mẽ kot kên mênhta pyràk o hipêx nẽ hkaga. No nhũm Tirtũmja amnhĩm Kris mex o mex ã harê. Te ho mẽhõ kot kên mex kêr ã hkamnhĩx nẽ mênh nhũm mẽhõ kot mex ã omunh nẽ amnhĩm mỳnhta pyràk. Nom Krisja kên rom kêp htĩr tũm nẽ pa xwỳnh jakamã nhũm pre Tirtũm mẽ pakaxyw ãm pu prem hkôt amnhĩ xunhwỳ.

⁵ Nẽ Tirtũm na hte nhỹrmã mẽ pahtĩr tũm nẽ wa kuri mẽ papa mã xwỳnh ã mẽ pajarê. Te mẽ pahpê kên nhũm Tirtũm te kot amnhĩ Karõ mã mẽ pahto ixkre nhĩpêx pyràk. Jakamã na hte Jejus Kris tanhmã mẽ pahkrã hto pu mẽ Tirtũm kôt amnhĩ nhĩpêx mex rãhã ho ri papa. Nẽ tanhmã kãm amnhĩ nhĩpêx mex to nhũm ja hã mẽ pahpumu nẽ hkĩnh nẽ.

⁶ Tirtũm kapêr ã kagà htũm kot tanhmã Kris jarênh to. Nẽ hã kuxi nẽ tanhmã harênh to. Te kêp kên pyràk ã harê nẽ harênh kot:

Kot paj nhỹrmã Ijaew wỳr mẽhõ mẽ nhũm mẽ hkôt pa ho pa.

Koja te kêp kên o inhõrkwỳ nhĩpêx kaxyw kên maati mex kumrêxta pyràk.

Koja amnhĩ kaxyw hkôt mẽ hamaxpêr xwỳnhjaja nhỹrmã ma inhõ krĩ hwỳr api nẽ hkĩnh nẽ mex rãhã nẽ pa ho pa. Anẽ.

⁷ Tã ra amnhĩ kaxyw hkôt mẽ pajamaxpêr xwỳnhjaja. Kên pyràk xwỳnh pê Jejusja na

mê pamã mex o mex. No
mê kot hkaga xwÿnhjaja na
hthem hamaxpêr punuj xwÿnh
ã hkamnhĩx nê hkaga nê kãm
hkĩnh kêt nê. Tĩrtũm kapêr ã
kagà htũm kot mê harênh kot:
Na prem kên o amnhĩm òrkwÿ
nhĩpêx kaxyw hkawrà
ho pa nê kên maatija
pumu nê htÿx omnuj ã
hkamnhĩx nê hkaga.

Mê kot hkaga htã nhũm
Tĩrtũm mê kurom mex
o kot kên piitã hakrenh
par ã omunh kurê
kumrêx. Anê.

⁸ Nê mãânên harênh kot:

Koja mê kapêr mar kêt
kumrêx.

Te pry kamã kên nôr nhũm
mê kot nhãm pry nê
mênh kaxyw hkamnãr
o amnhĩ par krã hi
kukênh pyrãk o koja
mê amnhĩ nhĩpêx. Anê.

Mê kot Kris kapêr mar tã
hkôt amnhĩ xunhwÿr kêt
jakamã te ho mê kot amnhĩ
nê kên kamnãr o amnhĩ par
krã hi kukênh pyrãk o koja
mê amnhĩ nhĩpêx. Jakamã
koja nhÿrmã Tĩrtũmja ja hã
tanhmã mê ho htÿx kumrêx.
Ra kot amnhĩ kukamã mê
kãm amnhĩ jarênh xã hkôt.

⁹ No mê papajaja na pre
Tĩrtũm jajê rom amnhĩ kôt
mê paxunhwÿ. Nhÿrmã ò
krĩ kamã mê papa ho papa
kaxyw. Nê mê pahte mex
o mex ã harênh kaxyw. Na
pu htem Ijaew nhõ patre
pyrà nê Pahi Maati Tĩrtũm
mã tanhmã amnhĩ nhĩpêx
to ho papa. Nom kormã
mê pahte Kris kôt amnhĩ

xunhwÿr kêt ri te mê pahpê
kamãt kô kamã mê pahtÿx
ri mê papa xwÿnh pyrãk. Tã
Jejus kôt amnhĩ xunhwÿ nê
hpãnhã te mê pahpê hirã
mex kãm ri mê papa xwÿnh
pyrà nê tãm amnhĩ nhĩpêx
rãhã ho papa. Ra mê pahpê
Tĩrtũm kra jakamã na pu
hthem amnhĩ to mex rãhã ho
ri papa. Nê Mêpahpãm maati
Tĩrtũm mã tanhmã amnhĩ
nhĩpêx to ho ri papa. Te mê
kot mê ho àhwÿr xwÿnhjaja
kot kãm amnhĩ nhĩpêx o pata
pyrãk. ã na pre Tĩrtũm mê
pahte amnhĩ nhĩpêx anhÿr o
papa kaxyw mê panhĩpêx.

¹⁰ Amnepêm kormã mê
pahpê hkra hkêt ri na pre
mêhõ mê pakamã ukapri
hkêt kumrêx pu htem pah-
punuj nê ri papa. Tã Jejus kôt
amnhĩ xunhwÿ nhũm Tĩrtũm
mê pahto hkra pu mê pahpê
hkra hã ri papa nhũm mê
pakamã ukapri rãhã ho mê
pahkôt pa.

*Mê pahpê Tĩrtũm mã
tanhmã amnhĩ nhĩpêx to
xwÿnh ã mê pajarênh*

Rômãn 13.1-7; Xitre 3.1

¹¹ E ixkrãmnhwÿjaja. Ra mê
pahpê Tĩrtũm kra jakamã mê
pahpê ò krĩ nhõ xwÿnh. Te
mê pahpê jar pika nhõ xwÿnh
kêt pyrãk jakamã kwa kêr
pu mê arĩ mê pahte amnhĩ
nhĩpêx tũm o amnhĩ nhĩpêx
kêt nê. Nê mê pajamaxpêr
tũm o pajamaxpêr kêt nê.
Ra axtem mê pajamaxpêr
nyw nê axtem mê pahte
amnhĩ nhĩpêx nyw kênã. Mê
pahte amnhĩ nhĩpêx tũmja

te kãm akupÿm mẽ pahte hkõt amnhĩ to paxujanãr prãm pyrãk. Mẽ pahte axte hkõt amnhĩ nhĩpêx o ri papa kaxyw. Tã nom kêr pu mẽ anhÿr kêt nẽ.

12 E kwa kêr ka mẽ anhõ krĩ kamã akwÿ kot Kris kõt amnhĩ xunhwÿr kêt xwÿnhjê noo mã tãm ri amnhĩ nhĩpêx o ri apa. Mẽ kot Kris ã tanhmã mẽ anhĩpêx to rÿ tanhmã hã mẽ ato kapêr punuj to htãã. Kot kaj mẽ ã mẽ hkõt amnhĩ nhĩpêx anhÿr o ri apa hãmri nhũm mẽ tee ri mẽ apumu nẽ hamaxpêr o:

—Kwa mẽ ixte mẽ kot amnhĩ tomnuj xwÿnh ã mẽ harênh tã mẽ kot amnhĩ to mex pix xwÿnh na mẽ. Anẽ.

Hãmri nẽ nhÿrmã mẽ pahpyrà nẽ Tĩrtũm kõt amnhĩ xunhwÿ nẽ kãm mex o mex ã harê nẽ kãm:

—Kwa Tĩrtũm. Na pre hte akrajaja anhÿ hã amnhĩ to mex rãhã nẽ pa ho pa pa ja hã mẽ omu. Nã xep amex o amex Tĩrtũm. Anẽ.

13 Nẽ mẽ apê Pahihti Jejus Kris kõt amnhĩ nhĩpêx xwÿnh jakamã kêr ka mẽ anhõ krĩ kamã mẽ anhõ pahihti kapêr ma nẽ kapêr kõt mãn amnhĩ nhĩpêx mex o ri apa. Nẽ mẽ anhõ pika kamã mẽ anhõ prêjitênja ka mẽ kapêr ma nẽ hkõt amnhĩ nhĩpêx. Mẽ kot mẽ ato amnhĩptàr xwÿnhjaja ka mẽ piitã mẽ kapêr ma nẽ mẽ kapêr kõt pix mã amnhĩ nhĩpêx rãhã ho ri apa.

14 Nẽ mẽ anhõ pahi nhÿ hã mẽ kapêr o mẽ pa xwÿnhjaja

na htem mẽ akaxyw mẽ unhwÿ. Mẽ kot amnhĩ tomnuj xwÿnhjaja nhũm tanhmã mẽ kot mẽ ho kaxyw. Nẽ tãm mẽ kot amnhĩ nhĩpêx o ri mẽ pa xwÿnhjaja nhũm mẽ kot mẽ õ pahi mã mex ã mẽ harênh kaxyw.

15 Tã kêr ka mẽ kapêr ma nẽ mẽ hkõt tãm amnhĩ nhĩpêx rãhã ho ri apa. Hãmri nhũm mẽ ato kapêr punuj xwÿnhjaja hã mẽ apumu nẽ axte tanhmã mẽ ato kapêr to hkêt nẽ. ã mẽ ate amnhĩ nhĩpêx anhÿr o apaja na Tĩrtũm kãm hprãm.

16 Nẽ mẽ pahpê Tĩrtũm kra jakamã na pu htem paxãmnhĩx kãm tanhmã amnhĩ nhĩpêx to ho ri papa. Nom kêr pu mẽ pahpê hkra hã pahtÿx ri amnhĩ nhĩpêx kêt nẽ.

17 Nẽ kêr ka mẽ piitã mẽ ho mex o ri apa.

Nẽ mẽ ato amnhĩptàr xwÿnhjê ho mex nẽ mẽ hã apijaãm rãhã ho ri apa.

Nẽ mẽ apê Kris kõt mẽ ate axpên to mẽ atõ nẽ mẽ atõxjê hã amã axpên kĩnh pê axpên to mex nẽ.

Nẽ Tĩrtũm ã apijaãm rãhã nẽ.

Mẽ kãm mẽ apênh xwÿnhjaja kot tanhmã amnhĩ nhĩpêx to hã mẽ kãm karõ

Epes 6.5-8; Korosẽ 3.22-25; Wam Ximotre 6.1-2; Xitre 2.9-10

18 Nẽ mẽ apê mẽ kãm mẽ axapênh xwÿnhjaja kêr ka mẽ anhõ patrãw kapêr ma nẽ hkõt ri amnhĩ nhĩpêx. Kot mẽ

ato mex o pa rÿ mẽ atomnuj o pa htã ka mẽ arĩ mẽ hã api-jaãm pê hkôt ri amnhĩ nhĩpêx.

¹⁹ Tanhmã kot mẽ anhĩpêx punuj to htã ka mẽ arĩ kãm axapênh mex rãhã nê. Kêr kê Tirtũm ja hã mẽ apumu nê mẽ ato mex nê ka mẽ ajamakêtkati nê axamnhĩx ri kãm axapênh o apa.

²⁰ Nom kot kaj tanhmã amnhĩ tomnuj to nhũm anhõ patrãw ja hã apumu nê hã atak ka amnhĩ xà htÿx kamã ama nê rĩ amnhĩ pumu. No kot kaj akatãt kôt kãm axapênh mex tã nhũm amarĩ atak japêr tã kêr ka amnhĩ tã kamã agryk kêt nê. Arĩ kãm amnhĩ to htÿx kamã kãm xa nê amnhĩ tã tanhmã ho hkêt nê. Hãmri nhũm Tirtũm ja hã apumu nê ato mex nê.

²¹ Amnepê m na pre mẽ pahte hkôt amnhĩ xunhwÿr xwÿnhjaja Kris pyrã nê mẽ paxã htÿx kamã pajamak o papa hkukamã ja hã mẽ pahpumunh mex. Na pre Kris mẽ pakaxyw amnhĩ xà htÿx kãm hamak tÿx tã amnhĩ to htÿx nê mẽ kãm xa. Tã kêr pu amnhĩ xà htÿx kamã pajamak tã ÿ hã urãk nê amnhĩ to htÿx nê papa.

²² Krisja aa tanhmã amnhĩ tomnuj to hkêt nê pa ho pa. Nê aa mẽmoj tã amnhĩ to hêx o pa hkêt.

²³ Mẽ kot kãm kapêr punuj tã nhũm amnhĩ tã tanhmã mẽ kãm nê hkêt nê. Nê mẽ kãm kapêr punuj kêt nê. Nhũm prem homnuj tÿx kumrêx nhũm amnhĩ xà htÿx kamã hamak tã amnhĩ

tã mẽ kãm àkjêr nê tanhmã mẽ haprÿ hto hkêt nê. Na pre ãm hamaxpêr o: “Nã Tirtũm kot ixtã mẽ omunh mex kênã. Koja nhÿrmã mẽ piitã tanhmã mẽ kot amnhĩ nhĩpêx to hã mẽ omunh xà hkôt tanhmã mẽ hipêx to. Tãm koja àhpumunh tÿx xà hkôt tanhmã ixtã mẽ harênh to. Mẽ kurom àhpumunh tÿx o àhpumunh tÿx xwÿnh kênã.” Anê.

²⁴ Kris na pre te kawã kamã mẽ pahte amnhĩ tomnuj piitã gjênh nê ho nÿt nê htur rãhã pĩ kahpa hã mẽ panê htyk pyrãk o amnhĩ nhĩpêx. Mẽ pahte axte tanhmã amnhĩ tomnuj to hkêt prãm xaj. Pãnhã mẽ pahte amnhĩ to mex pix o ri papa kaxyw. Tã ã kot amnhĩ xà htÿx kãm hamak anhÿr o jêt jakamã kot puj mẽ pahte hkôt amnhĩ xunhwÿr xwÿnhjaja aa mẽ pahte amnhĩ tomnuj pãnhã amnhĩrer kêt nê. Ra Jejus htyk o kot mẽ panê amnhĩrer par kênã.

²⁵ Na pu pre te mẽ pahpê ôwêhti pikunor pyrã nê pahtÿx ri papa. Tanhmã amnhĩ tomnuj to rãhã ho ri papa. Tã nhũm Kris te kot ôwêhti jamãr xwÿnh kot ôwêhti pikunor mã katorta pyrãk o mẽ panhĩpêx. Pu mẽ hkôt amnhĩ xunhwÿ nê hkôt amnhĩ nhĩpêx mex o ri papa. Jao hkôt papa ho papa.

3

Mẽ mjên mẽ mẽ hprõ kot tanhmã axpênh nhĩpêx to hã mẽ

kãm karõ

Wam Korõt 7; Epes 5.22-25; Korosẽ 3.18-19; Wam Ximotre 2.9-15

¹ Nẽ kêr ka mẽ anijaja mẽ amjên kapêr ma nẽ hkõt amnhĩ nhĩpêx. Akĩnhã kormã kot Tĩrtũm kõt amnhĩ nhĩpêx kêt japêr tã arĩ kapêr ma nẽ hkõt amnhĩ nhĩpêx mex o ri apa. Kê mẽ ate amnhĩ nhĩpêx ã mẽ apumu nẽ mẽ apyrã nẽ Kris kõt amnhĩ xunhwÿr japêr. Mẽ kãm Tĩrtũm kapêr mar prãm kêt tã koja mẽ ã mẽ ate amnhĩ nhĩpêx anhÿr ã mẽ apumunh kõt mẽ apyrã nẽ amnhĩ kaxyw hkõt hamaxpêr japêr.

² Na htem mẽ ate Tĩrtũm kapêr kõt tãm ri amnhĩ nhĩpêx o apa hã mẽ apumunh o ri mẽ akõt pa.

³ Jakamã kêr ka mẽ anijaja amnhĩ mex pix kukamã ajamaxpêr o ri apa hkêt nẽ. Rÿ ajamaxpêr o:

—Ma kot paj mẽ hkuxwaxã ho amnhĩ krã hkĩ kuxwa mex nẽ inhõkrexê mex jagjê nẽ ri hã mra. Nẽ kupêxê mex kwÿr japrõ nẽ ho amnhĩm ixê mex nhĩpêx hãmri nẽ hagjê nẽ ri hã mra. Kot paj ã amnhĩ nhĩpêx anẽ nhũm mẽ piitã ja hã ixpumu nẽ kãm ixkĩnh nẽ inhmex ã ijarê. Ma kot paj ã amnhĩ nhĩpêx anẽ.

Anhÿr o ri amnhĩ kukamã ajamaxpêr kêt nẽ.

⁴ Tĩrtũm na hte ã mẽ pahte amnhĩ nhĩpêx anhÿr ã mẽ pahpumu nẽ ãm hã mẽ pahpumu. Mẽ õkrexê nẽ mẽ ê mex na hte hapêx tokyx anẽ. No mẽ panhõpinhxã kaxwÿnh

kãm tãm ri mẽ pajamaxpêr nẽ pakamã amnhĩkrit nẽ papaja. Kot kaj mẽ ã amnhĩ nhĩpêx anhÿr o ri apa hãmri nhũm Tĩrtũm ja hã mẽ apumu nhũm ja kãm mex nẽ.

⁵ Amnepê mã mẽ pakukamã mẽ panhõ wõwõ nẽ mẽ panãjaja. Mẽ hkwy kot Tĩrtũm kõt amnhĩ nhĩpêx xwÿnhjaja na prem ã amnhĩ nhĩpêx anhÿr o pa. Mẽ kot mjên kõt amnhĩ nhĩpêx o pa jakamã na prem amnhĩ tã mẽ omu nẽ mẽ ho mex nẽ kãm mẽ hapê nẽ.

⁶ Mẽ panhõ wõwõ finat Saraja na pre ã amnhĩ nhĩpêx anhÿr o pa. Jao mjên Apraãw kapêr ma nẽ hkõt amnhĩ nhĩpêx. Nẽ kêp õ pahi hã harê nẽ hkõt pix mã amnhĩ nhĩpêx o ri pa. Tã kot kaj mẽ urak nẽ amnhĩ to htÿx nẽ ã amnhĩ nhĩpêx anhÿr o apa. Hãmri nẽ amnhĩ tã amã amjên puma hkêt nẽ apa nẽ te apê Sara hkra pyrak.

⁷ Nẽ mẽ amyjaja kêr ka mẽ tãm mẽ aprõ nhĩpêx o ri mẽ hkõt apa. Mẽ akĩnhã mẽ hihÿtÿx kêt jakamã mẽ kamã axukapri rãhã ho ri mẽ hkõt apa. War ajamẽ war apê Jejus kukwak ri war atĩr tũm nẽ apa mã xwÿnh jakamã kêr ka mẽ ho mex rãhã ho ri mẽ hkõt apa. Tĩrtũm kãm war ajamẽ war ajapê jakamã kot kaj mẽ ã mẽ hipêx anhÿr o ri apa hãmri nẽ ra axãmnhix mẽmoj tã amnhĩ to Tĩrtũm wÿr nhũm mẽ amar kurê kumrêx.

Tĩrtũm krajaja kot amnhĩ xã htÿx kamã hamak ã mẽ

harênh

Rômãn 12.9-21; Korosê 1.10; Wam Tesarôn 5.14-15

⁸ E Kris kôt ixkràmnhwÿjaja. Nà ixkapêr jatur xà na ja. Kêr ka mê ri axpên kôt ajamxpêr mex pê axpên to mex rãhã ho ri apa. Nê mê ate Kris kôt axpên to atõ nê atõx ã amã axpên kînh o ri apa. Jao axpên kamã axukaprî nê mêmoj to axpên kutã anojarêt rãhã nê.

⁹ Na pu prem Jesus kôt amnhî xunhwÿ nhùm Tîrtüm mê pahto hkra nê mê pahto mex ã amnhî jarê. Tã koja mēhõ tanhmã mê anhîpêx to rÿ tanhmã mê ato kapêr punuj to. Nom kêr ka mê ama nê amnhî tã tanhmã ho rÿ tanhmã ho akapêr punuj to hkêt nê. ãm te Tîrtüm kot mê panhîpêx pyrãk o mê hipêx nê mê ho mex pix o ri mê hkôt apa. Ja na Tîrtüm kãm hprãm.

¹⁰ Kapêr ã kagã htüm kot ja jarênh kot:

Kot kaj mê amã amex nê akînh nê ri apa hprãm hã kot kaj mê ã amnhî nhîpêx anê:

Kot kaj mê ri akapêr punuj o ri apa hkêt nê.

Nê mêmoj tã amnhî to axêx o ri apa hkêt nê.

¹¹ Nê te mê ate amnhî katut kôt ate amnhî tomnuj rênh o apa pyrã nê hpãnhã amnhî to mex pix o ri apa.

Nê mê amã tãm axpên nhîpêx pix prãm o ri axpên kôt apa.

Nê mê amã ajamakêtkati nê axpên kôt apa hprãm rãhã ho ri apa.

¹² Na hte Tîrtümja ã mê kot amnhî nhîpêx anhÿr o pa xwÿnhjê jamãr mex rãhã ho pa.

Nhùm mê tanhmã amnhî to hwÿr to nhùm mê mar kurê kumrêx.

No mê kot amnhî tomnuj o mê pa xwÿnhjaja na hte mê kutã amnhî xãm nê ãm mê omu nê mê ho mex kêt nê. Anê.

Tîrtüm kapêr ã kagã htüm kot ã mê harênh kot anhÿr.

¹³ Nê kot kaj mê amã amnhî to mex pix o apa hprãm nhùm mēhõ ja hã tanhmã mê atomnuj to hkêt nê.

¹⁴ No kot kaj mê amnhî to mex pix o apa htã nhùm mēhõ ja hã apumu nê tanhmã hamaxpêr to nê atomnuj ka amnhî xã htÿx kamã ajamak japêr. Tã koja Tîrtüm nhÿrmã ja hã tanhmã mê ato mex to. Jakamã kwa kêr ka mê tee ri mēhõ kot tanhmã mê atomnuj to hkukamã ajamxpêr pê amã mê uma ho ri apa hkêt nê. Nê tee ri amnhî kukamã ajamxpêr o akaprî nê ri apa hkêt nê.

¹⁵ ãm amnhî kaxyw Kris mã mãn ajamxpêr tÿx rãhã nê mê panhõ Pahihti hã apijaàm rãhã ho ri apa. Nhùm mēhõ ja hã mê apumu nê tanhmã hã mê akukjêr to nê mê amã:

—Kwa mēmo kaxyw na ka pre Kris kôt amnhî xãm nê hkôt ri amnhî nhîpêx o apa? Anê.

Ka mê ama hãmri nê aprî hã kãm amnhî jarênh kurê kumrêx.

¹⁶ Nom kêr ka mê akapêr mã aprî kamã kãm amnhî

jarê. Tîrtûm kapêr kôt amnhî nhîpêx o apa hã mē kãm amnhî jarê. Kojã mē Kris ã mē ato kapêr punuj rÿ hã mē atã hpêr o axkê nê pikunhar japêr ka mē ãm amnhî tã mē ama nê ãm mē ama. Kwâr mē mãmri ã mē anhîpêx anê. Kêr ka mē amnhî tã mē omu nê arî amnhî to mex rãhã ho ri apa. Kêr kê mē tee ri amnhî tã mē apumu nê hpîjaãm nê.

17 Nê kojã mē akwÿjaja mē ate Tîrtûm kapêr kôt amnhî nhîpêx mex o apa hã mē apumu nê hã tanhmã mē anhîpêx to htã kêr ka mē arî Tîrtûm kôt amnhî nhîpêx o ri apa. Ja na kãm hprãm. Nom kot kaj mē tanhmã amnhî tomnuj to nhûm mē ja hã mē apumu nê pahihtî mã mē ajarê nhûm kuma nê ja hã tanhmã mē amã àkjêr to ka mē ra apîjaãm nê.

18 Nê Krisja na pre mē panê ty. ãm htyk tipxi tã mē pahpiitã mē pahpãnhã amnhîre. Mē pakurom aa kot tanhmã amnhî tomnuj to hkêt tã mē pahte amnhî tomnuj piitã hpãnhã amnhîrer pa. Mē pahte hkôt amnhî xunhwÿr nê nhÿrmã ma Tîrtûm nhõ krî hwÿr paxàpir nê kamã pahhtîr tûm nê papa ho papa kaxyw. Mē kot hpîr tã nhûm Tîrtûm akupÿm ho htîr nhûm htîr o htîr.

19-20 Nom kormã akupÿm htîr kêt ri na pre hkarõ pix o mē htyk xwÿnhjê hwÿr mõ. Ahpunu kamã mē hkarõ kêp prês nê hkrî xwÿnhjê hwÿr mõ nê mē kot Noehti kapêr mar nê hkôt amnhî

nhîpêx kêt nhûm gô htãm kot mē hanhir par xwÿnhjê mã kapêr. Tîrtûm kot nhÿrmã mē kot amnhî tomnuj mÿrapê kuwy maati wÿr mē rênh ã mē hkukamã mē kãm awjarê. Amnepêm kormã Noehti kot pâr raxta nhîpêx o kuhê ri na prem kãm Tîrtûm kapêr mar prãm kêt nê. Nhûm amnhî tã mē omu nê mē kamã gryk tokyx anhÿr kêt nê. Arî amnhî tã mē hamâr o pa. Mē kot hkôt amnhî xunhwÿr nê hkôt amnhî nhîpêx prãm xaj arî mē hamâr ry ho pa. No ãm tee ri mē hamâr kaprÿ nhûm mē amnhî kaxyw hkôt hamaxpêr kêt nê htÿx ri amnhî tomnuj o pa. Mē ãm grêre nê Noehti kapêr ma nê gô htãm pymaj hkôt pâr raxta wÿr agjê. ãm mē kêp 8 pix nê hwÿr agjê nhûm gô htãm mē hanhir kêt nê. Tîrtûm na pre mē nê omunh mex nê. No mē kot amnhî tomnuj xwÿnhjaja nhûm gô htãmja mē hanhir o mē himex pa. Nhûm mē kêp 8ja pix arî htîr nê mex nê pâr raxta kamã gô krãhkã hã mex rãhã pa.

21 Gô tãmja kêp hprî hã mē pahte Jejus kôt amnhî xunhwÿr ã mē pahto amnhîrît xà na. Mē pahte amnhî nhîpêx tûm kaga nê hpãnhã amnhî nhîpêx nyw o amnhî nhîpêx o papa hã mē pahto amnhîrît xà. Jakamã na htem mē pahkrã kumrã. Nom mē kot mē panê mē pagrã kugrãnh kaxyw kêt ra mē pahte Jejus kôt amnhî xunhwÿr ã amnhî to amnhîrît kaxyw na htem mē pahkrã kumrã.

Ra mẽ pahte Tĩrtũm kapẽr kõt amnhĩ nhĩpêx o papa hã amnhĩ to amnhĩrĩt kaxyw. Pu mẽ ra mẽ pahte amnhĩ nhĩpêx nyw o amnhĩ nhĩpêx ã amnhĩ to amnhĩrĩt. Te mẽ pahte gõx kãm mẽ pahte amnhĩ tomnuj rer par pyrà nẽ hpãnhã amnhĩ nhĩpêx nyw o amnhĩ nhĩpêx o papa.

²² Nẽ na pre Jejus akupỹm htĩr nẽ ma akupỹm Tĩrtũm nhõ krĩ hwỳr api nẽ Tĩrtũm nhĩhkõ hã pahihtĩ hã mẽ hkrĩ xà kamã hkrĩ ho hkrĩ. Hãmri nẽ ra Tĩrtũm kapẽr o mẽ wrỳk xwỳnh nẽ pahĩ piitã mẽ ho amnhĩptãr o hkrĩ.

4

Mẽ pahte amnhĩ nhĩpêx nyw o amnhĩ nhĩpêx ã mẽ pamã karõ

Epes 4.17-24; Korosẽ 3.1-11

¹ Nẽ na prem Kris pĩ nhũm amnhĩ xà htỳx kãm hamak kãm htyk kaxyw tã arĩ mẽ kãm xa. Ra kot amnhĩ xà hkukamã amnhĩ tã mẽ omunh tã tee ri amnhĩ kukamã hamaxpẽr o amnhĩ tã tanhmã ri mẽ kot hpĩr mã xwỳnhjẽ homnuj to hkêt nẽ. Arĩ mẽ kãm xa nhũm prem kupĩ. Tã kêt pu mẽ uràk nẽ ã amnhĩ nhĩpêx anhỳr o ri papa. Mẽ kot hã tanhmã mẽ panhĩpêx to htã pu mẽ uràk nẽ amnhĩ xà htỳx kãm pajamak tã tanhmã amnhĩ tã mẽ ho hkêt nẽ. Na hte ra mẽ htyk nẽ mẽ hikwỹ xwỳnhjaja axte amnhĩ tomnuj kêt nẽ. Tã kêt pu mẽ uràk nẽ axte tanhmã amnhĩ tomnuj to ho ri papa hkêt nẽ.

² Jakamã kêt pu mẽ axte mẽ pahte amnhĩ nhĩpêx tũm kõt amnhĩ nhĩpêx o papa hkêt nẽ. Nẽ mẽ pajamaxpẽr tũm kõt axte pajamaxpẽr o papa hkêt nẽ. Æm Tĩrtũm kãm hprãm xà hkõt pix mã tanhmã amnhĩ nhĩpêx to ho papa rãhã ty.

³ Amnepẽm kormã mẽ pahte Jejus kõt amnhĩ xunhwỳr kêt ri na pu prem mẽ kêt Tĩrtũm kra hkêt xwỳnhjẽ hkõt amnhĩ nhĩpêx.

Jao nhãm mẽnijẽ pumu nẽ mẽ kamã pahpijaam kêt hprãm.

Nẽ pahpipãnh o ri papa.

Nẽ mẽ pahpipãnh kaxyw axpẽn wỳr akuprõ nẽ mẽnijẽ kamã pahpijaam kêt.

Nẽ sãnti hwỳr pahkõnkrã ho pahkrĩ nẽ kãm amnhĩ jagrer.

⁴ Tã Kris kõt amnhĩ xunhwỳ hãmri nẽ mẽ pahte amnhĩ nhĩpêx nyw o amnhĩ nhĩpêx o papa. Hãmri nhũm arĩ mẽ kot amnhĩ nhĩpêx tũm o amnhĩ nhĩpêx xwỳnhjaja tee ri ja hã mẽ pahpumu nẽ hẽx rom amnhĩ kõt mẽ pamã tanhmã ri àhkrox to ho pa. Pu mẽ axte mẽ hkõt amnhĩ nhĩpêx kêt nhũm mẽ tee ri ja hã mẽ pahpumu nẽ mẽ pakamã gryk kato nẽ tanhmã mẽ pahto kapẽr punuj to.

⁵ Tã koja Tĩrtũm nhỹrmã amnhĩ wỳr mẽ hã karõ nhũm mẽ ma hwỳr mra nẽ kutã hkrĩ. Nẽ kormã mẽ htĩr ri tanhmã mẽ kot amnhĩ nhĩpêx to ho pa hã kãm amnhĩ jarẽnh pa. Hãmri nhũm mẽ kot amnhĩ nhĩpêx ã tanhmã mẽ

hipêx to. Koja mẽ pahpiitã tanhmã mẽ pajarênh to. Mẽ htyk xwýnhjaja nẽ kormã mẽ pahptĩr nẽ mẽ papa xwýnhjaja nhũm mẽ pahpiitã tanhmã mẽ pajarênh to.

⁶ Na pre Jesus ty hãmri nẽ kormã akupým htĩr kêt rãhã hkarõ pix o ma amex wýr tẽ nẽ kamã mẽ htĩr ri amnhĩ kaxyw Tĩrtũm mã hamaxpêr xwýnhjê mã awjarê. Na prem mẽ kot amnhĩ tomnuj mýrapê ra wej nẽ ty nẽ arĩ amex kãm ri pa. Jakamã nhũm Jesusja hkarõ ho ma mẽ hwýr tẽ nẽ mẽ kãm:

—E na pa ra mẽ ate amnhĩ tomnuj pãnhã amnhĩrer pa. Tã kormã mẽ atĩr ri mẽ ate amnhĩ kaxyw Tĩrtũm kôt ajamaxpêr jakamã kot kaj mẽ ma hwýr api nẽ wa ixkuri wa ixpyrà nẽ atĩr tũm nẽ amex nẽ apa ho apa. Anê.

Mẽ pahpê Kris kwý hã tanhmã mẽ pahte axpên nhĩpêx to hã mẽ pamã karõ

Rõmãn 12.6-8; Wam Korĩt 12.1-11

⁷ Nẽ koja tokyx mẽ panhõ pikaja mẽ pahpê hapêx nẽ kamã mẽmoj piitã hapêx pa. Jakamã kwa kêt ka mẽ ate amnhĩ nhĩpêx ã amnhĩ pumunh mex o apa.

Nẽ mẽ atýx ri ajamaxpêr ri apa hkêt nẽ.

Nẽ mẽmoj punuj nê amnhĩ to htýx o ri apa ho ajamaxpêr nyw pix o amnhĩ to Tĩrtũm wýr rãhã ho ri apa.

⁸ Nẽ kwa kêt ka mẽ amã axpên kĩnh o ri axpên kôt apa. Ja na mex o mex. Kot kaj mẽ ã

axpên nhĩpêx anê nhũm Kris kôt atõ rý atõxjê hõ tanhmã atomnuj to japêr ka amnhĩ tã omu nẽ ãm omu. Amã hkĩnh o ãm amnhĩ tã omu. Jao axte kot tanhmã atoja mã ajamaxpêr kêt nẽ.

⁹ Nẽ kêt ka mẽ axãmnhĩx ajamakêtkati nẽ amnhĩ nhõrkwy hwýr axpên wý nẽ axpên to mex o ri apa. Nom kêt ka mẽ agryk kãm amnhĩ wýr mẽ hwýr kêt nẽ.

¹⁰ Na pre ra Tĩrtũm mẽ pahpê hkra hã ahpýnhã tanhmã mẽ pamã mẽmoj tã karõ hto nẽ ã mẽ pahte amnhĩ nhĩpêx anhýr o papa kaxyw mẽ pahto mẽ paxihtýx. Mẽ pahte ahpýnhã tanhmã axpên to mex to ho ri axpên kôt papa kaxyw. Tã kêt ka mẽ ra kot mẽmoj tã mẽ amã karõ hkôt axpên nhĩpêx o ri axpên kôt apa.

¹¹ Koja ma mẽ ate akwýjê mã kapêr jarênh o ri apa kaxyw mẽ amã karõ ka mẽ ama nẽ akatàt kôt ý hã mẽ kãm harênh mex o ri mẽ hkôt apa. Rý tanhmã axpên to ajuta hto ho ri apa kaxyw mẽ axunhwýr japêr ka mẽ amnhĩ tã omu nẽ hkamnàr rom mẽ ho ajuta mex rãhã ho ri apa. Mẽ apiitã Jesus nhý hã ã amnhĩ nhĩpêx anhýr o ri apa. Kêt kêt Jesus kôt mẽ akwýjaja amnhĩ tã mẽ apumu nẽ mẽ anhý hã Tĩrtũm mã mex o mex ã harê.

Jesus kwýjaja kot amnhĩ xà htýx kamã hamak o pa hã mẽ harênh

Rukre 6.20-23; Juãw 16.1-4; Sikũn Tesarõn 1.3-12; Sikũn Xi-

motre 3.13; Eprêw 12.3; Xiakre 1.2-4

¹² E Kris kôt ixkràmnhwýjaja. Koja Kris kwý kêt xwýnhjaja Kris ã tanhmã mẽ anhîpêx to nom kwa kêr ka mẽ tee ri amnhî kukamã ajamexpêr o akaprî nê apa hkêt nê. Kêt mẽ akînh rãhã axpên kôt ri apa. Na htem ã mẽ pahpê Kris kwýjê nhîpêx anhÿr o pa. Jakamã kwa mẽ amnhî tã mẽ omu nê tee ri amnhî kukamã ajamexpêr kêt nê.

¹³ Mẽ arî akînh nê ri apa. Mẽ kot Kris pyrã nê mẽ panhîpêx punuj tãã. Kêr kê Jejus nhÿrmã akupÿn mẽ pahwÿr wrý pu mẽ omu nê pahkînh tÿx o pahkînh tÿx.

¹⁴ Kwãr mẽ mãmri mẽ pahpê Kris kwý hã tanhmã mẽ panhîpêx to. Na htem ã Tirtüm Karõ kot mẽ pahkarõ mã gjêx xwýnhjê nhîpêx o pa anê.

¹⁵ Nê mẽ apê Kris kwý jakamã kwa kêr ka mẽ amnhî to mex rãhã o ri apa.

Ja o mẽ hpar o ri apa hkêt nê.

Nê ri axãhkînh o ri apa hkêt nê.

Nê nhãm mẽ hkaêx mã agjêx o ri apa hkêt nê.

Nê tanhmã mẽ homnuj to ho ri apa hkêt nê.

Kot kaj mẽ ã amnhî nhîpêx anhÿr o ri apa nhũm mẽ anhõ pahihti ja hã tanhmã mẽ ato ka mẽ amnhî kamã apijaàm tÿx nê.

¹⁶ Nom koja mẽ apê Kris kwý hã tanhmã mẽ anhîpêx to ka mẽ ja hã amnhî tã mẽ omu nê amnhî kamã apijaàm kêt nê.

Ãm Tirtüm pix mã amnhî jarê nê kãm:

—Pa Tirtüm. Ixpê akra Kris kwý hã na mẽ ã ixtomnuj anê. Nom ixpê akra jakamã kwãr mẽ mãmri tanhmã inhîpêx to. Amex o amex o ate ixto akra jakamã kwãr mẽ mãmri ã inhîpêx anhÿr o pa. Anê.

¹⁷ Nê koja Tirtüm tokyx mẽ pahpiitã tanhmã mẽ pahte amnhî nhîpêx to hã mẽ pahpumu nê tanhmã mẽ panhîpêx to. Mẽ pahpê hkrajaja koja tanhmã mẽ pahte amnhî nhîpêx to hã tanhmã mẽ pahto mex to. Hãmri nê hpãnhã mẽ kêp hkra hkêt xwýnhjê ho hapu nê tanhmã mẽ hipêx to. Mẽ kot amnhî kaxyw hkôt hamaxpêr kêt jakamã nhũm mẽ pahkînhã tanhmã mẽ homnuj tÿx to.

¹⁸ Kapêr ã kagã htüm kot ja hã mẽ pajarênh kot:

Mẽ kot Tirtüm kapêr kôt amnhî to mex xwýnhjaja na htem ãmnhîx amnhî xã htÿx kamã hamak o pa kamã ty nhũm Tirtüm ma õ krî hwÿr amnhî wÿr mẽ ho àpir kurê kumrêx.

Nom mẽ kot amnhî tomnuj xwýnhjaja koja mẽ hkînhã amnhî xã htÿx kamã hamak rãhã nê pa ho pa nê aa mex kêt nê. Anê.

¹⁹ Tã koja Tirtüm kãm ja prãm japêr kwãr mẽ mãmri Kris ã tanhmã mẽ pahtomnuj to. Nom kêr pu mẽ Tirtüm kamnàr rom amnhî to mex pix o ri papa. Kêp

mê panhîpêx xwÿnh maati jakamã ra kot amnhî jarênh xà hkôt koja tanhmã ri mê pamã amnhî nhîpêx to ho pa.

5

Tîrtûm krajaja kot tanhmã amnhî nhîpêx to hã mê kãm karô

Atre 20.28-31

¹ E kot paj hpãnhã mê apê Kris kwÿ hkrãhtûmjê mã ixkapêr ka mê inhma. Ijaxwÿja ixpê mê akrãhtûmjê hõ na pa. Na pa pre mê akurom Kris htyk kãm omu. Nom kot puj mê nhÿrmã pahpimràatã mex o mex ã omu nê uràk nê mê pamex nê ri papa ho papa.

²⁻³ Jakamã e Kris kôt mê hkrãhtûmjaja kêr ka mê atar Kris kôt pahkwÿjê jamãr mex nê. Ra Tîrtûm kot mê ate kãm hkwyjê jamãr kaxyw mê axunhwÿr jakamã kêr ka mê omunh mex rãhã ho mê hkôt ri apa. Te ho ôwêhti jamãr xwÿnh kot ôwêhti jamãr mexta pyrãk. Te mê kêp Tîrtûm krit ôwêhti nhûm mê ate kãm mê hamãr o apa xwÿnh pyrã nê kãm mê omunh mex rãhã ho ri mê hkôt apa. Nê akînh pé tanhmã ri mê ho ajuta hto ho ri mê hkôt apa. Ja na Tîrtûm kãm hprãm. Nom kêr ka mê ano hkã karôt kãm mê ho ajuta hkêt nê. Rÿ kàxpore hprãm xàj mê kãm tanhmã amnhî nhîpêx to hkêt nê. ãm amarî tanhmã mê kutã anojarêt to pix kukamã ajamexpêr o ri mê hkôt apa.

Nê kêr ka mê kãm mêmoj tã karô kamã axihtÿx kêt nê. Mê

akapêr mã aprî kamã mê kãm mêmoj jarê kê mê amnhî tã mê apumu nê mê apyrã nê ã axpên nhîpêx anhÿr o pa.

⁴ E kêr ka mê ã Kris kôt mê akwÿjê jamãr mex pê mê hipêx o apa anê. Hãmri nhûm mê pajamãr xwÿnh maatija ja hã mê apumu nê nhÿrmã akupÿn mê pahwÿr wrÿ nê mê ato mex rax nê.

⁵ Nê e mê amy xãptàr nyw-jaja. Kêr ka mê Kris kôt mê akrãhtûmjê kapêr ma nê mê hkôt ri amnhî nhîpêx mex o ri apa.

Nê kwa kêr ka mê api-itã axpên nhîpêx o te anhîõ kot amnhî to rax o ajakrenh pyrãk. Tîrtûm kapêr ã kaga htûm kot ja jarênh kot:

Mê kot amnhî to jarkrar o ri mê pa xwÿnhjaja na hte Tîrtûm mê kutã amnhî xunhwÿ.

No mê kot amnhî to hkryre nê axpên tã hpijaam o mê pa xwÿnhjaja na hte mê ho mex o pa.

⁶ Anhÿr ã mê harênh jakamã kwa kêr ka mê Tîrtûm ã api-jaam rãhã ho ri apa ixkwÿjaja. Nê axpên mã ri amnhî to jarkrar o ri apa hkêt nê. Kêr kê Tîrtûm xihtÿx xwÿnhja ja hã mê apumu hãmri nê nhÿrmã kot mê pahto mex xà hã arîgroja kato nhûm mê ate amnhî to mex xwÿnh ã mê ajarê nê mê ato mex rax nê.

⁷ Nê kêr ka mê tee ri amnhî kukamã ajamexpêr pê akaprî ho ri apa hkêt nê. ãm te mê ate Tîrtûm mã akaprî nhôr pyrãk o amnhî nhîpêx nê axãmnhîx akînh nê akaprî

hkêt nê apa. Tîrtûm kêp mē pajamār xwÿnh maati kênã kot ka kêt mē ri akaprî nê ri apa.

8 Nê kwa mē okora. Kêr ka mē amnhî nê kot mē pakutã amnhî xunhwÿr xwÿnh maati Satanastija pumunh mex rãhã ho ri apa. Na hte mē panhîpêx o te ropkror kot akunî kamã mry ho krihkrit o ri mrar pyrãk o mē panhîpêx. Jao mē pahte Kris kaga hprãm xàj apkati mē tanhmã nê mē pahto ho ri mē pahkôt pa.

9 Na hte ã pika piitã hkôt Kris kôt mē pahtõ nê mē pahtõxjê nhîpêx anhÿr o pa nhûm mē pahpyrà nê amnhî xà htÿx kamã hamak o pa pê omnuj nê pa. Jakamã kwa kêr ka mē Kris kôt amnhî xunhwÿr tÿx nê kutã amnhî to htÿx rãhã ho ri apa.

10 Tîrtûm kãm mē pajapê jakamã na hte mēmoj to mē pakutã nojarêt rãhã ho ri pa. Na pre mē pamex nê nhÿrmã mē pahte kuri tãm amnhî nhîpêx o papa mã xwÿnh ã mē pajarê. Kris kukwak ri ã mē pajarênh anhÿr jakamã mē ate jar Kris ã apunuj nê ri apa htã kot kaj mē kritpêm ã amnhî nhîpêx anhÿr ry hkêt nê. Koja Tîrtûm mē akrã kamã mē ajamaxpêr xihtÿx jagjê ka mē akupÿm amex nê axihtÿx pê ate amnhî nhîpêx nyw o amnhî nhîpêx rãhã ho ri apa.

11 Tîrtûmja hihtÿx o hihtÿx nê àhpumunh o àhpumunh. Nê hihtÿx xà nê àhpumunh xà koja aa kêp hirerek nê hapêx

kêt kumrêx. Æm hãmri na mē kot harênh kot anhÿrja.

Pêtre kapêr jatur xà

12 Nê ota Kris kôt mē pahtõ Sirastija na inhmã mē akaxyw kagàja nhîpêx pa mē awÿr mênh kaxyw. Na pa hte kãm ixkapêr nhûm inhma nê inhmã hã kagà. Na hte Kris kapêr kôt amnhî nhîpêx rãhã ho ri pa. Tã inhmã kagàja nhîpêx. Mē ate kamã harênh nê mar nê tãm ajamaxpêr kaxyw. Nê Tîrtûm kãm mē ajapê nê kot mēmoj to mē akutã nojarêt ã mē ate kamã harênh kaxyw. Tã kêr ka mē kãm mē ajapê hã amnhî tã harênh ma nê kapêr kôt pix mã amnhî nhîpêx mex rãhã ho ri apa. Mē akwÿjjaja kot tanhmã hã mē ato htã.

13 Nê ota jar Papirôn kamã Kris kôt mē pahtõ nê mē pahtõxjaja mē awÿr hpêr mē. Tîrtûm kot mē pahpyrà nê mē ho hkra jakamã mē kêp mē atõ nê mē atõx ã mē awÿr hpêr mē. Nê Xiakre mãânên mē awÿr hpêr mē. Te kêp ixkra pyrãk.

14 Nê kêr ka mē nhÿri apê Kris kwÿ hã axpên pumu nê mē axpên to atõ nê atõx ã axpên mã akapêr mex kurê kumrêx.

E kê Tîrtûm mē apê Kris kwÿ hã mē amã mē ajamakêtkati nê mē apa xà gõ ka mē axãmnhîx ajamakêtkati nê amex nê ri apa ho apa.

Tã ãm ja pix. Ixpê Simãw Pêtre na pa ã mē awÿr kagà nê mênh anê.

**Sikũn Pêtre
Simãw Pêtre kot
Jejus kôt hkwyjê
hwÿr wam kagà nê
mênh kôt hõ mênh**

Simãw Pêtre na pre kagàja nhîpêx. Jejus nhÿ hã hkrajê jahkre ho mê pa xwÿnhjê hõ na pre. Mê kêp Jejus kra hkêt xwÿnhjaja ra kot Jejus ã hpîr kaxyw nhũm pre kagàja nhîpêx nê krî piitã hkôt Jejus kwÿjê hwÿr kurê nê kamã hpri hã mê kãm mêmoj tâ karõ. Mê kot arî Tirtũm kot amnhî nhîpêx kôt amnhî nhîpêx rãhã ho pa hã mê kãm karõ. Nê hamaxpêr o mê hamaxpêr rãhã ho pa hã mê kãm karõ.

Nê mê hkwy kot Tirtũm kôt amnhî nhîpêx ã amnhî jarênh tâ hkôt amnhî nhîpêx kêt xwÿnhjaja nhũm pre tanhmã mê harênh to. ã na pre mê kãm mêmoj jarênh nê hã kagà nê krî piitã hkôt mê hwÿr rênh anê. Nê mê kãm:

1 Pa Kris kôt ixtõ nê ixtõxaja. Xà mê amex? Ot pa mê awÿr kagà nhîpêx nê krî piitã hkôt mê awÿr kurê. Ixpê Simãw Pêtre na pa wam ixte kagà nhîpêx nê mê awÿr mênh tâ axte hõ nhîpêx. Ixte Jejus Kris nhÿ hã mê ajahkre ho ixpa xwÿnh ã mê amã hipêx nê kumê. Na pa hte Jejus mã amnhî nhîpêx mex o ri ixpa.

Nê mê papytãr xwÿnh Jejus Krisja Tirtũm pyrã nê mex o mex. Nê wa kot amnhî

nhîpêxja mex o mex. Jakamã na pre wa tanhmã mê pahkrã hto pu mê amnhî kaxyw wa hkôt pajamaxpêr tÿx rãhã ho ri papa. Na ka htem ixpyrà nê ã amnhî nhîpêx anê. Tã pa mê amã kagàja nhîpêx.

2 Nà Tirtũm mê mê panhõ Pahihti Jejus wa kot amnhî nhîpêxja na ka mê ra harênh mar tÿx nê. Wa kot tanhmã amnhî nhîpêx to nê tanhmã wa hamaxpêr toja ka mê mar tÿx nê wa hkôt pix mã amnhî nhîpêx. Tã kêr ka mê arî ã amnhî nhîpêx anhÿr rãhã ho ri apa. Jao axãmnhix ajamakêtkati nê akînh nê apa ho apa. Na pa hte ã mê ato Tirtũm mê Pahihti Jejus Kris wa hwÿr o ri ixpa anê. Na hte Tirtũm mê ato mex nê mê akutã nojarêr rãhã ho pa.

Tirtũm kot mê pahto mex o pa hã harênh

Epes 2.12-13; Wam Tesarõn 1.2-4; Sikũn Pêtre 3.18

3 Nê Tirtũmja àhpumunh tÿx o àhpumunh tÿx jakamã na pu htem hkôt amnhî xunhwÿ nhũm amnhî tâ mê pahpumu nê mê pamã àhpumunh tÿx xà hkwy gõ. Hãmri pu mê ra urak nê amnhî to mex nê tãm amnhî nhîpêx o ri papa. Tã kot puj mê nhÿrmã ma õ krî hwÿr api.

4 Na pre mê pakukamã amnhî jarênh o:

—Kot paj nhÿrmã ixkrajê mã ixte amnhî nhîpêx mex kwÿ gõ nhũm mê inhÿ hã ho tãm ri amnhî nhîpêx mex o pa. Nê ixpyrà nê hamaxpêr mex o pa.

Anhÿr jao te ra mẽ pamã hkĩnh xà mex kwỳ nhõr pyràk o mẽ panhĩpêx. Nẽ te ra kot mẽ pahkrãm hamaxpêr mex jagjênh nẽ mẽ pamã kot amnhĩ nhĩpêx mex jagjênh pyràk. Mẽmo kaxyw na pre ã mẽ panhĩpêx mex anê? Nà uràk nẽ tãm mẽ pahte amnhĩ nhĩpêx mex rãhã o ri papa kaxyw. Jao mẽ pahte mẽ kêp hkwỳ hkêt xwỳnhjê hkôt amnhĩ nhĩpêx kêt nẽ. Nẽ mẽ hamaxpêr punuj o paja-maxpêr kêt nẽ. Nẽ hpãnhã mẽ pahte Tirtũm kôt pix mã amnhĩ nhĩpêx rãhã ho papa. ã mẽ pahte amnhĩ nhĩpêx anhÿrja na mex o mex.

⁵ Tã ã Tirtũm kot mẽ panhĩpêx mex anhÿr jakamã kwa kêt ka mẽ kapêr mar tỳx nẽ hkôt pix mã amnhĩ nhĩpêx mex o ri apa. Jao amnhĩ kaxyw hkôt ajamaxpêr rãhã nẽ. Kot kaj mẽ ã amã amnhĩ nhĩpêx anhÿr o apa hprãm hã kot kaj mẽ mããnẽn amã tãm amnhĩ nhĩpêx o apa hprãm. Nẽ mẽ amã Tirtũm kapêr piitã mar prãm o ri apa.

⁶ Hãmri nẽ piitã mar pa nẽ mẽmoj punuj piitã nê amnhĩ to htỳx nẽ. Nhũm mẽ kêp Kris kwỳ hkêt xwỳnhjaja Kris ã tanhmã mẽ anhĩpêx to htã ka mẽ ãm amnhĩ tã mẽ omu nẽ mẽ umaj mẽ amã Kris kaga hprãm kêt nẽ.

Nẽ mẽ amã Tirtũm mã amnhĩ jarênh rãhã ho apa hprãm.

Nẽ mẽ amã kapêr mar rãhã ho apa hprãm.

⁷ Nẽ mẽ amã Kris kôt mẽ atõ nẽ mẽ atõxjê ho mex

pix o ri apa hprãm. Jao te mẽ amã amnhĩ tã ma pyràk o mẽ piitã mẽ hipêx o ri mẽ hkôt apa.

⁸ E kêt ka mẽ ã amnhĩ nhĩpêx anhÿr o ri apa. Kot ka mẽ ã amnhĩ nhĩpêx anê nẽ mẽ panhõ Pahihti Jejus Kris kôt amnhĩ nhĩpêx mex o mõ. Hãmri nhũm mẽ akwỳjaja mẽ apumu nẽ mẽ apê Kris kwỳ hã mẽ ajarênh kurê kumrêx.

⁹ No kot ka mẽ atõ ixkapêr mar tã hkôt amnhĩ nhĩpêx kêt nẽ hãmri te Tirtũm kot anê ate amnhĩ tomnuj rênh par mã ajamaxpêr kêt pyràk.

¹⁰⁻¹¹ No na ka htem ã amnhĩ nhĩpêx anhÿr kêt nẽ. Ra mẽ ate Pahihti Jejus Kris kôt amnhĩ nhĩpêx mex jakamã na htem ja hã mẽ apumu nẽ Tirtũm kot mẽ ato hkra hã mẽ ajarênh kurê kumrêx. Kot kaj mẽ ã hkôt amnhĩ nhĩpêx anhÿr o apa nẽ mẽmo arĩgro hã apunuj nẽ apa htã Jejus kaga hkêt nẽ. Hãmri nẽ nhÿrmã ma Tirtũm nhõ krĩ hwỳr api nhũm mẽ apumu nẽ mẽ ato mex rax nẽ. Hãmri ka mẽ õ krĩ kamã mẽ panhõ Pahihti Jejus Kris wa kuri atĩr tũm nẽ amex nẽ apa ho apa.

¹² Nẽ na ka mẽ ra Tirtũm kot amnhĩ nhĩpêx mar tỳx nẽ amnhĩ krã kamã kot amnhĩ nhĩpêx mã ajamaxpêr tỳx o ri apa. Tã nom kot paj arĩ mẽ amã ja jarênh rãhã ho ri ixpa.

¹³ Kormã ixtĩr ri kot paj xatã mẽ amã harênh o amnhĩrĩt. Ja na kêt inhmã hprãm. Mẽ ate nhÿrmã tanhmã ri ajamaxpêr to nẽ hkaga pumaj.

¹⁴ Na pre mẽ panhõ Pahi-

hti Jejus Krisja inhmã tokyx ixytk ã ijarẽ. Kot paj xep kritpẽm ri ixtĩr nẽ ixpa hkêt nẽ.

¹⁵ Jakamã na pa kormã ixtĩr ri ã mẽ amã kagà nhĩpêx anẽ. Mẽ ate inhmỹr pê arĩ omunh nẽ kamã harẽnh nẽ Tĩrtũm kot amnhĩ nhĩpêx mã ajamaxpêr tỳx rãhã ho ri apa kaxyw.

Pêtre kot no ho Jejus pumunh ã amnhĩ jarẽnh

Matêwre 17.1-5; Makre 9.1-8; Sikũn Ximotre 3.16-17

¹⁶ Nẽ na pa pre ra tanhmã mẽ amã mẽ panhõ Pahihti Jejus Krisja jarẽnh to. Hihtỳx o hihtỳx ã harẽ nẽ àhpumunh tỳx o àhpumunh tỳx ã harẽ. Nẽ nhỹrmã akupỹn mẽ pahwỳr wrỳk ã harẽ. No na pa pre amnhĩ krã hkôt ã harẽnh anhỹr kêt nẽ. Na pa pre inhno ho Jejus hihtỳx o hihtỳx ã omunh o hkôt ixpa nẽ ixte omunh xà hkôt ã mẽ amã harẽnh anẽ.

¹⁷⁻¹⁸ Amnepê mã kormã ixkwỳjê mẽ mẽ ixte arĩ hkôt ixpa ri pa prem hkôt hixêt prêk nhĩmõk wỳr api. Pa nẽ kaxyw Xiakre nẽ Juãw mẽ pa mẽ hkôt ixpimràatã hixêt ã api nẽ himõk ã ixkuhê. Hãmri nhũm Tĩrtũm tanhmã Jejus to nhũm hirã htỳx kãm xa. Hãmri nhũm Mẽpahpãm Tĩrtũmja mẽ inhmã kapêr. Kaxkwa kamã hirã htỳx rax rũm mẽ inhmã kapêr o:

—E ota Ixkrata xa. Inhmã hapê ho inhmã hapê. Anẽ.

Tã ra ixte mar xà hkôt pa amnhĩ xõ ri mẽ amã harẽ nẽ hã kagã.

¹⁹ Na pa pre ã hixêt prêk nhĩmõk ã Jejus pumunh nẽ

Tĩrtũm kot tanhmã harẽnh to hã mar anẽ. Hãmri nẽ ija-maxpêr o:

—Nà ãm hãmri na pre amnepêm Tĩrtũm nhỹ hã kapêr jarẽnh o mẽ pa xwỳnhjaja Jejus kukamã ã harẽnh anhỹr o pa. Anẽ.

Mẽ kot tanhmã Jejus kukamã harẽnh toja te kot kamàt kô kamã kanê hpôk nhĩrã hkryre pyrãk. Tã koja nhỹrmã akupỹn wrỳ hãmri nẽ te myt kator nẽ hirã mex nhũm mẽ pahte mẽmoj pumunh mex pyrãk. Jakamã kwa kêr pu mẽ kot tanhmã Jejus kukamã harẽnh toja mar tỳx rãhã nhũm nhỹrmã te myt kator pyrã nẽ akupỹn mẽ pahwỳr wrỳ.

²⁰ Tĩrtũm kapêr ã kagà htũm kot tanhmã ÿ hã kapêr jarẽnh xwỳnhjê jarẽnh to. Mẽ kot mẽmoj kukamã ujarẽnh ã mẽ harẽ. Nẽ Jejus kukamã tanhmã ujarẽnh to hã mẽ harẽ. ã mẽ kot mẽmoj kukamã harẽnh kot anhỹr. Nom na pu htem amnhĩ krã hkôt ã mẽ ujarẽnh anhỹrja mar tỳx kêt nẽ. Koja Tĩrtũm Karõ hprĩ hã mẽ pamã ho amnhĩrit pu mẽ rĩ kormã pahprĩ hã mar tỳx nẽ.

²¹ Na pre ÿ hã kapêr jarẽnh o mẽ pa xwỳnhjaja amnhĩ krã hkôt hkwỳjê mã ujarẽnh o pa hkêt nẽ. Tĩrtũm Karõ na pre tanhmã mẽ hkrã hto nhũm mẽ ÿ hã hkwỳjê mã tanhmã harẽnh to ho pa nẽ ÿ hã mẽ pamã hã kagã.

2

Tĩrtũm kapêr jarênh o hêx xwýnhjê jarênh

Korosê 2.16-17; Wam Ximotre 4.1-5; Sikũn Ximotre 3.1-9; Jutre 3-16

¹ Nê amnepê m na pre Ijaew kwýjaja te mê kêp Tĩrtũm nhý hã kapêr jarênh xwýnh pyrãk. Nom Tĩrtũm kapêr kwým ri hkwyjê mã tanhmã ho hêx to ho pa. Tã koja nhýrmã mẽmojaja mẽ urãk nê mẽ awýr mra nê ã mẽ amã Tĩrtũm kapêr o hêx o pa anê. Nê kapêr kwým ri tanhmã mẽ ajahkre hto ho mẽ amã hêx o mẽ akôt pa. Mẽ ate mẽ mar nê amnhĩ nhĩpêx nyw kaga nê hpãnhã mẽ kot amnhĩ tomnuj kôt apa hprãm xàj nhũm mẽ hêx rom tanhmã mẽ ajahkre hto ho pa. Pahihti Jejus kot mẽ nê htyk tã nhũm mẽ hkôt amnhĩ nhĩpêx kêt nê axtem nê ri kapêr o hêx o pa. Mýrapê koja Tĩrtũm tokyx mẽ kot amnhĩ xà htýx kamã hamak tũm xà hwýr mẽ rênh pa.

² Koja mẽ ohtô nê mẽ kapêr ma nê kãm mẽ mar prãm nê. Nê mẽ hkôt hamaxpêr nê mẽ hkôt amnhĩ nhĩpêx o pa. Jao ra hpijaam kêt nê mẽ hkôt htýx ri tanhmã amnhĩ tomnuj to ho ri pa. Tã ã mẽ kot Tĩrtũm kapêr o mẽ hêx xwýnhjê mar nê mẽ hkôt amnhĩ nhĩpêx anhýr jakamã koja mẽ kãm Tĩrtũm kapêr mar prãm xwýnhjaja mẽ kot amnhĩ nhĩpêx ã mẽ omu nê Tĩrtũm kapêrja mex kêt ã harênh japêr.

³ Tĩrtũm kapêr o mẽ hêx o mẽ pa xwýnhjaja na htem kãxpore pix prãm xàj mẽ awýr mra nê tanhmã mẽ amã kapêr jarênh o hêx to ho pa nhũm Tĩrtũm ja hã mẽ omunh rãhã ho hkrĩ. Na hte nhýhým mrrar kêt nê rý htýx ôt o hikwý hkêt nê. Na hte arĩ mẽ kot amnhĩ nhĩpêx ã mẽ omunh rãhã ho hkrĩ. Tã koja nhýrmã ma mẽ kot amnhĩ xà htýx kamã hamak tũm xàta hwýr mẽ kurê nhũm mẽ ma hwýr hapêx pa.

⁴ Nê amnepê mã kaxkwa kamã Tĩrtũm kapêr o mẽ wrýk xwýnh kwýjaja na prem axtem nê Tĩrtũm kapêr nhĩrôp kuhê nhũm tee ri amnhĩ tã mẽ omu hãmri nê amnhĩ nê mẽ kator pa. Mẽ kamã ukaprĩ hkêt nê amnhĩ nê mẽ kator pa hãmri nê mẽ kot amnhĩ xà htýx kamã hamak tũm xàta wýr mẽ hano. Nhũm prem ma hwýr pa nê ahkre xupým kãm kamãt kô kamã arĩ hkrĩ ho hkrĩ. Tĩrtũm kot mẽ piitã tanhmã mẽ harênh to xà hã arĩgroja jamãr o hkrĩ. Nê tee ri kãm hapôx prãm kaprý ho hkrĩ.

⁵ Nê amnepê m pika kamã ri mẽ pa xwýnhjaja na prem haxwýja piitã amnhĩ tomnuj pix o ri pa. Jakamã nhũm Tĩrtũm ja hã mẽ omu nê mẽ kamã ukaprĩ hkêt nê. Nê mẽ hwýr na rax mẽ. Mẽ kãm kapêr mar prãm kêt jakamã nhũm mẽ hwýr kumê nhũm wrýk rax kumrêx nê mẽ hanhir pa nê mẽ himex. Âm Noehti mẽ hkwy pê 7 pixjaja nhũm mẽ kurom htĩr nê hkã hkĩnh nê mex nê pa. Noehti

kormã na xwỳj ri kot mẽ kãm Tĩrtũm kapêr jarênh o ri mẽ hkôt pa htã nhũm mẽ kuma nê ãm kuma. Mỳrapê na prem piitã pikaprãr pa.

⁶ Nê Sotô mẽ Gomo wa kamã mẽ pa xwỳnhjaja haxwỳja na prem amnhĩ tomnuj tỳx kumrêx o pa nhũm Tĩrtũm wamtajê pyrà nê mẽ kamã ukaprĩ hkêt nê. Na pre kaxkwa rũm mẽ hipy mẽmo hpôk kwỳ rê nê ho mẽ ho hapêx pa. Tã mẽmo kaxyw na pre ã mẽ hipêx anê? Nà mẽ piitã mẽ kot mẽ harênh mar nê hamaxpêr o:

—Na hte ã Tĩrtũm mẽ kot amnhĩ tomnuj xwỳnhjê nhĩpêx anê.

Anhỳr o hamaxpêr kaxyw na pre ã mẽ hipêx anê.

⁷⁻⁸ Nom Rohtija na pre Tĩrtũm Sotô nê kator jakamã nhũm htyk kêt nê. Na pre hkwyjê rom tãm amnhĩ nhĩpêx tã mẽ kot amnhĩ tomnuj tỳx xwỳnhjê nhô krĩ kamã ôrkwỳ nê ri pa. Nê apkati mẽ tee ri mẽ kot amnhĩ nhĩpêx ã mẽ omu nê mẽ ỹ hã hkaprĩ nê tee ri mẽ hkukamã hamaxpêr o pa. No nhũm mẽ amnhĩ tomnuj ã amnhĩ pumunh nê tokyx tãm amnhĩ nhĩpêx kêt nê. Nê apkati mẽ tanhmã amnhĩ tomnuj to nê kapêr punuj o pa nhũm Rohti tee ri mẽ omu nê hkaprĩ htỳx nê pa.

⁹ Tã nhũm Tĩrtũm mẽ himex kaxyw nê mẽ nê kator nê mẽ himex pa. Na hte ã Tĩrtũm mẽmoj punuj pê mẽ kot amnhĩ kaxyw kãm hamaxpêr nê hkôt amnhĩ

nhĩpêx xwỳnhjê pytàr anê. No mẽ kot amnhĩ tomnuj xwỳnhjaja na hte axtem mẽ hipêx. Tã koja nhỹrmã mẽ pahpiitã tanhmã mẽ pajarênh to xà hã arĩgro kato nhũm ma mẽ kot amnhĩ xà htỳx kamã hamak tũm xà wỳr mẽ rênh pa. ãm tapxipix kot ã mẽ hipêx anhỳr kaxyw àhpumunh tỳx.

¹⁰ Tã mẽ hpijaàm kêt kãm amnhĩ tomnuj o mẽ pa xwỳnhjaja nê mẽ kot Tĩrtũm kapêr mar nê ãm mar xwỳnhjaja koja nhỹrmã mẽ homnuj tỳx nê.

Nê Tĩrtũm kapêr o hêx o ri mẽ pa xwỳnhjaja na htem amnhĩ to jarkrar pix o pa. Nê Tĩrtũm kapêr o mẽ wrỳk xwỳnhjê hã hpijaàm kêt nê. Nê axtem nê mẽ ho kapêr punuj pê tanhmã mẽ haprỳ hto ho pa.

¹¹ Tã nhũm htem amnhĩ tã mẽ kuma nê ãm mẽ kuma. Mẽ kurom mẽ hihtỳx kumrêx tã no ãm amnhĩ tã Tĩrtũm mã tanhmã mẽ ho kapêr to hkêt nê.

¹² Nê mry xoprê na hte htỳx ri pa ho pa. Tã Tĩrtũm kapêr o mẽ hêx o mẽ pa xwỳnhjaja htem mry xoprêta pyrà nê htỳx ri hamaxpêr mex kêt o pa. Jao hprĩ hã mẽmoj mar kêt tã htỳx ri hijuk ri tanhmã mẽmoj jarênh to.

Nê mry xoprêja htỳx pa nhũm mẽ kot hparja pyrà nê mẽ kot Tĩrtũm kapêr o hêx o mẽ pa xwỳnhjaja koja Tĩrtũm nhỹrmã kuwy hwỳr mẽ ho hapêx nê kamã mẽ rênh pa.

13 Nē koja nhỹrmã Tĩrtũm mẽ kot tanhmã mẽ ama hêx to ho pa hã mẽ omunh xà hkôt mẽ homnuj tỳx nê. Na htem hpijaàm kêt nê mẽ piitã mẽ noo mã tanhmã amnhĩ tomnuj to ho pa. Kamàt kãm nê arĩgro hã. Nê mẽ kãm tanhmã amnhĩ nhĩpêx to hprãm xà hkôt pix mã amnhĩ tomnuj o pa.

Na htem te mẽ kêp Kris kôt mẽ atôjê pyrã nê mẽ akôt Tĩrtũm kapêr mar xà hã ixkre hwỳr agjê nê mẽ anhĩhkô hã mẽ kot Jejus tyk mã hamaxpêr kaxyw pãwti hkwy hku. Nom htỳx hkur o hkrĩ nê htyk mã hamaxpêr kêt nê. Kãm Jejus kĩnh kêt tã hêx rom hpijaàm kêt kãm mẽ anhĩhkô hã htỳx ri hkur o hkrĩ.

14 Nê nhỹri krĩ hwỳr pôj nê mênĩjê pumu nê kãm mẽ hkĩnh nê. Ra mẽ mjên ri pa htã nhũm mẽ kãm mẽ ho amnhĩkati hprãm nê mẽ kamã hpijaàm kêt o ri pa.

Nê kormã mẽ kot Kris kôt amnhĩ xunhwỳr tohtuj anhỹr xwỳnhjê hwỳr mra nê hêx rom tanhmã mẽ kãm kapêr to pê mẽ no kupyw o ri mẽ hkôt pa. Mẽ kot mẽ mar nê Kris kaga nê mẽ hkôt ri amnhĩ nhĩpêx prãm xàj ã mẽ hipêx anhỹr o pa.

Na htem hikàxpore rũnh o pikuprõnh pix kukamã hamaxpêr o ra ho õxy nê.

Ã na htem amnhĩ nhĩpêx anhỹr o pa. Tã ra Tĩrtũm kot mẽ homnuj tỳx kaxyw mẽ hã amnhĩ jarê.

15-16 Te mẽ kot kamàt kô kamã pry juk ã hpikunor nê htỳx ri pa pyrãk o na htem amnhĩ nhĩpêx nê kãm Tĩrtũm kapêr mar prãm kêt nê amnhĩ tomnuj pix o pa.

Amnepêm Peo hkra Paraãwta kêp Tĩrtũm nhỹ hã kapêr jarênh o pa xwỳnh tã axtem nê kàxpore rax prãm xàj tanhmã amnhĩ tomnuj to kaxyw. Nhũm Tĩrtũm tee ri ja hã omu nê Paraãw krit jumênreja tanhmã hakwa hto nhũm kãm kapêr. Jumênre kapêr kêt tã nhũm Tĩrtũm tanhmã hakwa hto nhũm kãm kapêr nê tanhmã kot amnhĩ tomnuj to kaxywta ã kãm akir nhũm amnhĩ tã kuma hãmri nê ã amnhĩ nhĩpêx anhỹr kêt nê. Tã mẽ kot Tĩrtũm kapêr o mẽ hêx ho mẽ pa xwỳnhjaja na htem Paraãw pyrã nê kàxpore rax prãm xàj tanhmã amnhĩ tomnuj to pix prãm.

17 Te hino ra grã nhũm mẽ tee ri kamã gô japêr pyrãk o na htem amnhĩ nhĩpêx. Rỳ te kakrã hapôx nhũm mẽ kot omunh nê na wrỳk ã hkamnhĩx kaprỳ pyrãk. Tã ra Tĩrtũm mẽ kaxyw kamàt kô htỳx pê mẽ kot amnhĩ xà htỳx kamã hamak tũm xàta o mẽ nê.

18 Na htem htỳx ri amnhĩ tomnuj o pa hã mẽ amã amnhĩ to jarkrar o ri pa. Jakamã nhũm mēhõ ra amnhĩ tomnuj kaga kaxyw nhũm mẽ tee ri ja hã omu nê kot ã amnhĩ nhĩpêx anhỹr pymaj tanhmã nê kãm kapêr to nê mẽ kãm:

—Kwa ixte amnhĩ tomnuj o

ixpa htã nhûm Tîrtûm ja hã
ixpumu nê ãm ixpumu nê arĩ
inhmex ã ijarê. Na pa hte
mê hkuprÿjê hwÿr mra nhûm
ja hã ixpumu nê ãm ixpumu
nê hã tanhmã ixto hkêt nê.
Jakamã kwa mê ixpyrà nê arĩ
ã amnhĩ nhĩpêx anhÿr o ri
apa. Koja Tîrtûm tanhmã hã
ato hkêt nê. Anê.

Hãmri nhûm mê tee ri
kuma nê ra hamaxpêr kati
nê.

¹⁹ Na htem mê kãm kapêr o:

—Kwa mê ixpyrà nê mãmri
amã tanhmã amnhĩ tomnuj
to hprãm xà hkôt amnhĩ
nhĩpêx o ri apa. Mêhõ kot kêt
ja nê tanhmã amã kapêr to?
Anê.

Mê kot amnhĩ tomnuj xàja
te kêp mê õ patrãw pyrãk
jakamã na htem ãm kôt
pix mã amnhĩ nhĩpêx o pa.
Jakamã kot pu mê tanhmã
amnhĩ tomnuj to. Nê gaa nê
axte. Nê gaa nê ra ho amnhĩ
pyrãk. Hãmri nê tee ri pamã
hkaga hprãm kaprÿ nhûm te
kêp mê panhõ patrãw pyrãk
o mê panhĩpêx pu mê ãm kôt
pix mã ri amnhĩ nhĩpêx o ri
papa.

²⁰ Nê koja mêhõ ra Tîrtûm
kapêr ma. Nê mê panhõ Pahi-
hti Jejus Kris jarênhja nhûm
hprĩ hã kuma. Kêp mê pahte
amnhĩ tomnuj pê mê papytãr
xwÿnh ã harênh ma. Tã
nhûm mê kot Tîrtûm kapêr o
mê hêx xwÿnhjaja hwÿr mra
nê tanhmã kãm ho hêx to
nhûm mê kuma nê kot amnhĩ
nhĩpêx tûm o awjanã. Jao
amnhĩ tomnuj tÿx o kormã
kot Tîrtûm kapêr mar kêt ri
kot amnhĩ tomnujta jakre.

²¹ Kêp ãm aa kot Tîrtûm
kapêr mar kêt rãhã htyk
ronhÿx ja kãm mex nê. Nom
ra kot mar mex tã ãm kuma
nê hkaga jakamã koja mex
kêt kumrêx.

²² Mê kot ã mê kot amnhĩ
nhĩpêx anhÿr ã mê harênh
kot:

Rop na hte ôjaïr nê akupÿm
ôjaïrta ku.

Nê hagrô na htem unê nê
hkumrã nhûm muxre.
Tã nhûm mê kãm ure
nhûm akupÿm hprôt
nê mra nê akupÿm gyw
o amnhĩ tomnu pa.
Anê.

Tã mê kot Tîrtûm kapêr o
mê hêx xwÿnhjê mar nê mê
hkôt amnhĩ nhĩpêx xwÿnhjaja
te mê kot rop mê hagrô wa
kot amnhĩ nhĩpêxta pyrã nê
Tîrtûm kapêr kaga nê akupÿm
mê kot amnhĩ nhĩpêx tûm
o awjanã nê htÿx ri amnhĩ
nhĩpêx o pa.

3

*Tîrtûm kot pika ho hapêx
kaxyw kormã amnhĩ tã mê pa-
jamãr ã harênh*

*Matêwre 24.29-31; Xiakre
5.7-11; Apokarip 19.11-16,
21.1-8*

¹ E Kris kôt ixkrãmnhwÿjaja.
Na pa pre ra wam kagãta
nhĩpêx nê mê awÿr kurê. Tã
ra axte hkôt ja nhĩpêx. Hamê
wa kamã na pa mê amã
Tîrtûm kot tanhmã amnhĩ
nhĩpêx to hã harê. Nê Jejus
Kris nhÿrmã akupÿn mê
pahwÿr wrÿk ã harê. Mê ate
mar nê tãm amnhĩ nhĩpêx nê
tãm ajamaxpêr o kutêp mê
apa kaxyw.

² Amnepê mã Tirtūm nhỹ hã kapêr jarênh o ri mẽ pa xwỹnhjaja na prem Tirtūm kot nhỹrmã mẽ pahwỳr mẽhõ mẽnh mã xwỹnhhta jarênh o pa. Kot nhỹrmã mẽ pahwỳr wrỳk nê mẽ pahto amnhĩptàr o pa hã harênh o pa. Tã kêr ka mẽ kapêr ma nê hã ano htỳx nê hkôt ajamaxpêr tỳx rãhã ho ri apa. Nê Jejus kot mẽ awỳr mẽ rênh xwỹnhjaja ka mẽ kapêr ma. Mẽ kot mẽ amã mẽmoj jarênh o mẽ pa xwỹnhjaja na htem tanhmã mẽ amã Pahihtì Kris jarênh to ho ri mẽ akôt pa. Nê tanhmã kot mẽ panê amnhĩ nhĩpêx to hã harê. Tã kêr ka mẽ kapêr ma nê hã ano htỳx nê kãm ajamaxpêr tỳx rãhã ho ri apa.

³ Nê kwa mẽ inhma. Nhỹrmã Kris akupỹn mẽ pahwỳr wrỳk xwỹj ri koja mẽ kot amnhĩ tomnuj tỳx xwỹnhjaja mẽ awỳr mra. Mẽ hpijaàm kêr o pa xwỹnh jakamã koja mẽ tanhmã mẽ akamã amnhĩ tomnuj to ho pa. Nê mẽ apê Kris kwỳ hã mẽ apumu nê mẽ atã hpêr o pikênh o pa.

⁴ Nê htỳx ri Kris ã mẽ akukja nê mẽ amã:

—Kwa no Krisja? Amnepêm akupỹn wrỳk nê mẽmoj piitã tanhmã hipêx to hã amnhĩ jarênh tã arĩ Tirtūm kot mẽmoj to kator krax rũm mẽmoj amarĩ rãhãã. Ra mẽ panhĩgêttjaja pikaprãr par tã nhũm kormã akupỹn wrỳk kêr nê. Kot mẽ pamã amnhĩ to hêx kênã. Mo kaxyw koja kêr akupỹn mẽ pahwỳr wrỳ?

Kot mẽ pamã amnhĩ to hêx kênã. Anê.

⁵⁻⁶ Nom ã mẽ kot harênh anhỹrja kot anhỹr kêr. Tirtūm kot mẽmoj to kator krax rũm mẽmoj amarĩ rãhã hã mẽ kot harênhja kot anhỹr kêr. Na pre Tirtūm kapêr pix o kaxkwa nê pika ho kato. Nhũm gô hkwỳja kapêr mar xà hkôt pika hã amnhĩ jahkre. Nhũm hpãnhã panhĩ nhĩpêx. Tã no nhũm mẽ kapêr mar kêr kumrêx. Nê mẽ kot amnhĩ tomnuj tỳx mỳrapê na pre Tirtūm gô ho mẽ himex pa. Jao mẽ hwỳr na rax mẽ nhũm mẽ hanhir o mẽ ho hapêx. No nhũm mẽ kot Jejus wrỳk ã hpêr o pikênh xwỹnhhtaja kãm ã mẽ harênh anhỹrja mar prãm kêr. Ra mẽ kot mar tã kãm mar prãm kêr nê arĩ mẽmoj piitã rãhã hã ri harênh o pa.

⁷ Pika nê kaxkwaja arĩ rãhã htã koja Tirtūm nhỹrmã mẽ pahpiitã mẽ pahte tanhmã amnhĩ nhĩpêx to hã mẽ pahpumunh kôt tanhmã mẽ pajarênh to. Nê mẽ kot amnhĩ xà htỳx kamã hamak tũm xà hwỳr mẽ kot amnhĩ tomnuj xwỹnhjê rênh pa. Hãmri nhũm rĩ kormã kaxkwa nê pikaja wa pôr nhũm himõk ã mẽmoj piitã hkaxàr pa nê hapêx.

⁸ Nê amgrà pê 1.000ja mẽ pamã amgrà xohtô rax kumrêx no Tirtūm mã te arĩgro pixire pyræk.

⁹ Tã ra kot mẽ pamã tokyx Jejus akupỹn wrỳk ã harênh tã nhũm kormã wrỳk kêr jakamã nhũm htem tōhã tee

ri hamār o pa nē hamaxpēr o:

—Hêxta waa nē. Tirtūm kot tokyx akupÿn mē pahwÿr Jesus mēnh ã amnhĩ jarēnh tā tokyx mēnh kêt nē.

Anhÿr o harēnh tā no ãm kot anhÿr kêt. Na kormã amnhĩ tā mē kot amnhĩ tomnuj xwÿnhjê jamār o pa. Mē kot amnhĩ tomnuj kaga nē hkôt amnhĩ xunhwÿr prãm xàj kormã amnhĩ tā mē hamã. Kãm mē kot amnhĩ xà htÿx kamã hamak tūm xàta wÿr mēhō ho pixire nē mōr prãm kêt jakamã na kormã amnhĩ tā mē hamã.

¹⁰ Tã koja nhÿrmã mē panhō Pahihtija akupÿn mē pahwÿr wrÿ. Te mē àhkĩnh xwÿnh kot amnhĩ nhĩpêx pyrãk o mē pajaêr pē akupÿn wrÿ. Pu mē pahtÿx ri tanhmã paxàpēnh to ho ri papa nē akupÿn wrÿk ã hkamnhĩx kêt rãhã nhūm mē pajaêr pē akupÿn wrÿ. Hãmri nē ma akupÿm amnhĩ kôt mē pahte hkôt amnhĩ xunhwÿr xwÿnhjê ho àpir par kurê kumrêx. Hãmri nhūm rĩ kormã kaxkwa kaxàr o hkrihkrit tÿx kãm hapêx pa. Nē kanhêti mē myt nē mytwrÿre kaxàr pa. Nē pikaja nē mãânēn kamã mēmoj piitã kaxàr pa.

¹¹⁻¹² Koja nhÿrmã ã mēmoj hapêx par anē. Jakamã kwa kêr pu mē Jesus kutêp tãm ri amnhĩ nhĩpêx rãhã ho ri papa. Nē Tirtūm kapêr kôt pix mã amnhĩ nhĩpêx rãhã nē. Nē kãm hprãm xà hkôt tanhmã kãm amnhĩ nhĩpêx to ho ri papa. Kêr kê Jesus

akupÿn wrÿ nē ã mē pahte amnhĩ nhĩpêx anhÿr ã mē pahpumu. Koja wrÿ nhūm rĩ kormã kaxkwa nē pikaja wa kaxàr pa. Nhūm kuwy mÿri kaxkwa kamã mēmoj harir xwÿnhja xêr nē ôr pa nē hapêx.

¹³ Tã kwār mãmri mēmoj ã amnhĩ nhĩpêx anē. Koja Tirtūm axte mēmoj mex nhĩpêx. Na pre amnhĩ kukamã ja jarēnh o:

Kot paj axte pika nē kaxkwa hō nhĩpêx nhūm mex o mex. Nhūm mē kot amnhĩ kaxyw Jesus mã hamaxpēr nē hkôt amnhĩ xunhwÿr nhūm ixte mē mex ã mē harēnh xwÿnh pixjaja koja mē pika nywja kamã mex nē pa ho pa. Anē.

¹⁴ Jakamã kwa ixkràmnhwÿjjaja. Kêr ka mē Kris kutêp kapêr kôt amnhĩ nhĩpêx mex rãhã ho ri apa. Jao kutêp ajamakêtkati nē axàmnhĩx axpēn kôt apa. Kêr ka mē nhÿrmã amnhĩ wÿr omu nē tee ri amnhĩ kukamã ajamaxpēr kêt nē. Ate tãm amnhĩ nhĩpêx o apa hã amnhĩ pumu nē akĩnh nē amnhĩ wÿr omunh o akuhê.

¹⁵ Nom arĩ Jesus kãm mē pahkwÿjê ho hkra hprãm jakamã na kormã amnhĩ tā mē hamã nē tokyx akupÿn wrÿk kêt nē. Na pre Jesus kôt mē pahtō Pawre Tirtūm nhÿ hã ã mē pamã ja hã kagà anē. Pawreja ixkràmnhwÿ mex na.

¹⁶ Na hte mē pakaxyw kagà nhĩpêx nē kamã mē pahte Je-

jus kutêp tãm amnhĩ nhĩpêx o papa hã mẽ pamã karõ. Na hte tõhã mẽmoj tã kagà pu mẽ kamã harẽ nẽ tee ri pahprĩ hã mar mã no ãm mar mex kêt nẽ. Hãmri nhũm Tĩrtũm kapêr o mẽ hêx o mẽ pa xwỳnhtaja haxwỳja kuma hãmri nẽ amnhĩ krã hkõt hijuk ri tanhmã ho hêx to. Te mẽ kot hprĩ hã mar nẽ harênh pyræk nom hprĩ hã mar kêt nẽ. ã na htem Tĩrtũm kapêr ã kagà piitã ho hêx o pa anẽ. Mỳrapê koja mẽ nhỹrmã amnhĩ xà kamã hamak tỳx kumrêx.

¹⁷Tã e Kris kôt ixkràmnhwỳjaja.

Ra mẽ ate mẽ harênh mar jakamã kwa mẽ okora. Mẽ amnhĩ nẽ mẽ omunh mex nẽ mẽ hkõt amnhĩ nhĩpêx kêt nẽ. Kot kaj mẽ anẽ nẽ Tĩrtũm kôt amnhĩ nhĩpêx mex kêt nẽ.

¹⁸Na ka htem mẽ papytâr xwỳnh Pahĩti Jejus Kris kôt ri amnhĩ nhĩpêx o apa. Tã kêr ka mẽ arĩ hkõt amnhĩ nhĩpêx mex rãhã ho ri apa. Nẽ hkõt amnhĩ xunhwỳr tỳx nẽ. Kêr kê amnhĩ tã mẽ apumu nẽ mẽmoj to mẽ akutã nojarêt nẽ. Krisja mex o mex nẽ hĩhtỳx o hihtỳx. Tã kêr pu mẽ kãm mex o mex ã mãn harênh rãhã ho ri papa.

Tã ãm ja pix. Ixpê Simãw Pêtre na pa ã mẽ amã ja hã kagà nẽ mẽ awỳr mẽnh anẽ.

Wam Juāw Juāw kot Jejus kôt hkwÿjê hwÿr kagà nê mēnh

Juāw na pre kagàja nhîpêx. Na pre kagà hkwÿ nhîpêx rax nê. Na pre määnên Juāw kot tanhmã Jejus kot amnhî nhîpêx to ho pa ã kagà nê Apokarip nê Sikûn Juāw nê Hapuhã Juāw nhûm pre ja pitã Tirtûm nhÿ hã hã kagà.

Juāwja Jejus nhÿ hã hkrajê jahkre ho mẽ pa xwÿnhjê hõ na pre. Nê kêp Xiakre htõ na pre. Tã ra hpigêt tÿx nê kagàja nhîpêx. Urak nê mẽ kot Tirtûm kôt amnhî xunhwÿr xwÿnhjê mã hipêx. Mẽ kot kamã harênh nê mar nê kãm axpên kînh o pa kaxyw. Nê mẽ kot amnhî tomnuj ã amnhî pumunh kôt tanhmã amnhî nhîpêx to hã mẽ kãm karõ nê hã kagà. ã na pre Juāw mẽ kãm mēmoj jarênh nê hã kagà anê nê mẽ hwÿr kumê. Nê mẽ kãm:

Jejus kêp Tirtûm kapêr o amnhîrît xwÿnh ã harênh

Juāw 1.1-4; Eprêw 1.1-4

¹ Pa ixpyrà nê mẽ ate Jejus kôt amnhî xunhwÿr xwÿnhjaja? Xà mẽ amex? E ot pa mẽ amã kagàja nhîpêx nê mẽ awÿr kumê. Ixte mẽ amã Tirtûm kapêr o amnhîrît xwÿnh jarênh kaxyw. Amnepê mã kormã mēmoj amrakati ri nhûm pre ra rãhã ri pa ho pa. ãm kukwak ri pix mã na pu htem

Tirtûm mẽ wa kuri pahtîr tûm nê papa ho papa mã xwÿnh. Tã ÿ hã mẽ ixte kapêr o mẽ ajahkre ho ri mẽ ixpa xwÿnhjaja na pa prem ixpiitã kormã akupÿm kaxkwa hwÿr àpir kêt ri inhno ho omunh o ri hkôt ixpa. Nê mẽ ijamak o kapêr mar o ri hkôt ixpa. Nê mẽ inhîhkra ho hkupênh o ri hkôt ixpa.

² Na pre kaxkwa kamã Hipêêxà hkôt ri pa ho pa htã amnê pika hwÿr mẽ pahwÿr wrÿ. Hãmri nê jar mẽ pakamã kato pa pre mẽ ixkwÿjaja omu. Tã mẽ ixte omunh xà hkôt na pa htem amnhî xõ ri tanhmã mẽ amã harênh to. Koja nhÿrmã akupÿm mẽ pahto mẽ pahtîr pu mẽ kuri pahtîr tûm nê pamex nê papa ho papa.

³ Na pa prem tanhmã kapêr to hã mar o ri hkôt ixpa. Nê kot tanhmã mẽ kãm amnhî nhîpêx to hã omunh o ri hkôt ixpa. Ta kagàja kamã amnhî xõ ri ixprî hã mẽ amã harê nê hã kagà. Mẽ ate ixpyrà nê aprî hã kot tanhmã amnhî nhîpêx to ho pa hã harênh mar kaxyw. Jao mẽ pahpiitã te ixkre tipxi kamã mẽ papa pyràk o amnhî nhîpêx o papa nê axpên kôt pajamaxpêr o ri papa. Jao Mēpanhîpêêxà Maati mẽ Kra Jejus Kris wa hkôt amnhî nhîpêx mex o ri papa.

⁴ Tã pa mẽ amã kagàja nhîpêx nê mẽ awÿr kumê. Mẽ ate kamã harênh nê mar hãmri nê mẽ ixpyrà nê ajamakêtkati nê akînh nê ri apa kaxyw.

*Tirtūm mex o mex ā harēnh
Juāw 8.12; Epes 5.3-21;
Wam Tesarōn 5.5; Eprēw 4.14-
16, 9.11-14*

⁵ Nē Jejus kot tanhmā mē inhmā Tirtūm jarēnh toja kot paj amnhī xō ri mē amā hā kagā. Nā Tirtūm kot amnhī nhīpēxja mex o mex. Aa kot tanhmā amnhī tomnuj to hkēt. Mex o mex jakamā na hte tanhmā mē kot amnhī tomnuj to mā amnhī jagjēnh kēt. Ām kot amnhī to mex o kot amnhī to mex rāhā nē pa ho pa xwýnh na.

⁶ Kot mē pahte amnhī tomnuj kēt ā mē pamā karō jakamā kot puj mē pahpē hkra hā amnhī jarēnh tā amnhī tomnuj pix o ri papa nē ām pahpē hkra hā amnhī jarēnh kaprý nē amnhī to paxēx. Tirtūm krajaja na htem amnhī tomnuj o pa hkēt nē.

⁷ Nom kot puj mē hkōt amnhī nhīpēx nē urāk nē tām ri amnhī nhīpēx o papa. Nē kapēr kōt ri amnhī nhīpēx. Hāmri nē te ixkre tipxi kamā ri Tirtūm mē Kra Jejus Kris wa hkōt axpēn to papa pyrāk o amnhī nhīpēx. Na pre Jejus mē panē ty nē hkamrō axkapī. Jao mē pahte hkōt amnhī xunhwýr xwýnhjaja mē panē mē pahte amnhī tomnuj piitā hpānhā amnhīrer pa. Jakamā ām kukwak ri pix mā na pu htem tām amnhī nhīpēx o ri papa.

*Mē pahpiitā mē pahte
amnhī tomnuj xwýnh ā mē
pajarēnh*

⁸ Nē mē pahte tōhā tanhmā amnhī tomnuj to jakamā kot puj mē aa pahte amnhī tomnuj kēt ā amnhī jarē hāmri nē ā amnhī jarēnh anhýr o paxēx. Tirtūm kot mē pahpiitā mē pahte amnhī tomnuj ā mē pahpumunh xwýnh kēnā.

*Mē pahte amnhī tomnuj nē
tanhmā amnhī nhīpēx to hā
mē pamā karō*

Xiakre 4.9-10

⁹ Nē mē pahpē Tirtūm krajaja na pu htem tanhmā amnhī tomnuj to hāmri nē tee ri ja hā amnhī pumu nē pahkaprī nē. Nē tokyx amnhī to Tirtūm wý. Hāmri nhūm mē pama nē Jejus kukwak ri tanhmā hā mē pahto hkēt nē. Ām amnhī katut kōt tanhmā mē pahte amnhī tomnuj tota rē nē axte kām hamaxpēr kēt nē. Ra kot mē pahtā amnhī jarēnh xā hkōt. Na hte Tirtūm amnhī jarēnh xā hkōt tanhmā amnhī nhīpēx to. Tā ra kot mē pahpē hkrajaja mē pahte amnhī tomnuj piitā amnhī katut kōt rēnh par ā amnhī jarēnh jakamā na pre ā mē panhīpēx anē. Na hte mēmoj tā tanhmā amnhī jarēnh to hāmri nhūm apkati nhūm ihkjē ho kumē nē axtem tanhmā mēmoj jarēnh to hkēt nē.

¹⁰ Ra kot mē pahpiitā mē pahte amnhī tomnuj xwýnh ā mē pajarēnh jakamā kot puj mē pahtō ā mē pajarēnh anhýrja ma nē hkōt paja-maxpēr kēt japēr. Rý kuma nē ām kuma nē pajamaxpēr o:

—Nà ixte tanhmã amnhĩ tomnuj tore hã.

Anhÿr o amnhĩ jarẽ. Hãmri nẽ te ate Tĩrtũm hẽx xwÿnh ã harẽnh pyrãk. Jao amã kapẽr mar prãm kêt ã amnhĩ to amnhĩrĩt.

2

Jejus kęp mẽ paxyr pẽ Tĩrtũm mã kapẽr xwÿnh ã harẽnh

Wam Ximotre 2.5; Eprẽw 9.11-14

¹⁻² E mẽ ate amnhĩ tomnuj o apa hkêt kaxyw na pa ã mẽ amã ixkapẽr nẽ hã kagà anẽ. Mẽ ate kamã harẽnh nẽ mar hãmri nẽ tanhmã amnhĩ tomnuj to hkêt kaxyw. Jejus Kris na pre mẽ pahpiitã mẽ pahte amnhĩ tomnuj pãnhã amnhĩrer kaxyw mẽ panê ty. Jakamã kot puj mẽ pahpê hkrajaja tanhmã amnhĩ tomnuj to nhũm ja hã mẽ pahpumu nẽ te kęp mẽ paxyr pẽ Tĩrtũm mã kapẽr xwÿnh pyrãk o amnhĩ nhĩpêx. Mẽ pakurom aa kot amnhĩ tomnuj kêt jakamã na hte mẽ paxyr pẽ Tĩrtũm mã kapẽr nhũm kuma. Hãmri nẽ kukwak ri pix mã mẽ pahte tanhmã amnhĩ tomnuj to piitã amnhĩ katut kêt rẽnh pa nẽ axte kãm hamaxpẽr kêt nẽ.

Tĩrtũm krajaja kot Tĩrtũm kêt amnhĩ nhĩpêx ã mẽ kãm karõ

³ Nẽ na pu htem Tĩrtũm kêt ri amnhĩ nhĩpêx o papa hã amnhĩ pumunh kêt pahpê hkra hã amnhĩ pumunh mex nẽ.

⁴ Nom koja mẽhõ kęp hkra hã amnhĩ jarẽnh tã hkôt amnhĩ nhĩpêx kêt nẽ ãm kęp hkra hã amnhĩ to hẽx.

⁵ Na htem Tĩrtũm kapẽr kêt amnhĩ nhĩpêx o pa pẽ kãm hkĩnh tÿx ã amnhĩ to amnhĩrĩt. Nẽ kęp hkra hã amnhĩ to amnhĩrĩt mex o pa.

⁶ Jakamã kêt ka mẽ apê Jejus Kris kwÿ hã amnhĩ jarẽnh xwÿnhjaja hkôt pix mã amnhĩ nhĩpêx mex o ri apa.

Mẽ pamã axpẽn kĩnh ã mẽ pamã karõ

Juāw 13.34-35; Wam Juāw 3.14-18

⁷ E Kris kêt ixkrãmnhwÿjaja. Inhmã mẽ akĩnh jakamã na pa ã mẽ amã mẽmoj jarẽnh nẽ hã kagà anẽ. Kot paj mẽ amã mẽmoj nyw jarẽnh kêt nẽ. Ra mẽ ate mẽmoj mar xwÿnhnta kot paj axte mẽ amã harẽ. Mẽ pamã axpẽn kĩnh nẽ tãm axpẽn nhĩpêx o papa hã Tĩrtũm kot mẽ pamã karõta. Ra mẽ ate mar tã kot paj axte mẽ amã harẽ nẽ hã kagà.

⁸ Wam Tĩrtũm kot mẽ pamã axpẽn kĩnh ã mẽ pamã karõja kormã Jejus kot mẽ panê htyk hkêt ri kot mẽ pamã hã karõta na. Tã ra Jejus kãm mẽ pajapê xàj mẽ panê htyk jakamã na pa axte ã mẽ ate axpẽn nhĩpêx anhÿr o apa hã mẽ amã karõ nẽ hã kagà. Mẽ ate Kris pyrã nẽ amã axpẽn kĩnh xàj tanhmã axpẽn kutã anojarêt to ho ri apa kaxyw. Nom kormã mẽ pahte Jejus kêt amnhĩ xunhwÿr kêt ri na pu prem ã axpẽn nhĩpêx anhÿr kêt nẽ. Tã hkôt amnhĩ

xunhwýr hāmri nē ā axpēn to mex o papa anē.

⁹⁻¹¹ Tā koja mēhō kot Jejus kōt amnhī nhīpēx ā amnhī jarēnh tā kām hkwýjē hkīnh kām amnhīx ri mē kutā nojarēt o pa hkēt nē. Hāmri nē kot Jejus kōt amnhī nhīpēx ā amnhī jarēnh ā amnhī to hēx. Jao te htýx ri kamàt kō kamā pa pyrāk. No koja mēhō kām hkwýjē hkīnh kām mē kutā nojarēt o pa nē määnēn Jejus kōt amnhī nhīpēx mex o pa. Jao te hirā kamā ri pa pyrāk. Jakamā tanhmā hkwýjē homnuj to ho pa hkēt nē mē piitā mē ho mex o axpēn pyrāk o pa.

Juāw kot mē piitā ahpýnhā tanhmā mē kām kapēr to

¹²⁻¹⁴ E kot pa ahpýnhā tanhmā mē amā ixkapēr to nē hā kagā. Mē apiitā te mē apē ixkra pyrāk. Na ka prem Jejus kōt amnhī xunhwýr nhūm Tirtūm ja hā mē apumu nē Kra kukwak ri mē ate amnhī tomnuj piitā amnhī katut kōt rēnh pa nē axte kām hamaxpēr kēt nē. Jakamā ra mē ate Tirtūm kēp Mēpanhīpēēxā Maati hā omunh mex.

Nē mē ate Jejus kōt amnhī xunhwýr ā amgrā xohtō xwýnhjaja. Amnepēm amrakati ri Jejus ra rāhā ri pa ho pa xwýnhja kōt mē ate amnhī xunhwýr xwýnhjaja kot paj mē amā tanhmā ixkapēr to nē hā kagā.

Nē mē akwýjaja ham Jejus kōt mē ate amnhī xunhwýr xwýnhjaja ra mē ate Tirtūm

kapēr mā ajamaxpēr rāhā ho ri apa. Jakamā na hte Satanasti mē ate amnhī tomnuj prām xàj tee ri tanhmā mē akrā hto ka mē Jejus nhý hā kutā amnhī to htýx pē hkōt amnhī nhīpēx kēt nē.

Mē kot amnhī tomnuj xwýnhjaja tanhmā kot amnhī nhīpēx to

Matēwre 6.24; Eprēw 11.24-26; Xiakre 4.4

¹⁵ Nē kēr ka mē amā Tirtūm kōt amnhī nhīpēx prām xàj mē kot amnhī tomnuj xwýnhjē hkōt amnhī nhīpēx kēt nē. Nē mē hamaxpēr punuj xwýnhjē hkōt ri amnhī nhīpēx kēt nē. Kot kaj mē hkōt amnhī nhīpēx hāmri nē amā Tirtūm kīnh kēt ā amnhī to amnhīrīt.

¹⁶ Mē kot amnhī tomnuj xwýnhjaja na htem mēmoj punuj mā hamaxpēr nē hkōt tanhmā amnhī tomnuj to. Nē mēmoj pumu nē ra kām ho ō hprām nom Tirtūm pē ja omnuj ā hkamnhīx kēt nē. Rý tanhmā mēhō kot amnhī tomnuj to hā omu nē hkōt kām amnhī nhīpēx prām. Nē tanhmā amnhī to jarkrar to ho ri pa. Ā na hte mē kot amnhī tomnuj xwýnhjaja amnhī nhīpēx anhýr o pa. Mē kot amnhī nhīpēxja Mēpanhīpēēxā Tirtūm kām hprām kēt.

¹⁷ Koja nhýrmā mē kot tanhmā amnhī tomnuj toja piitā hapēx pa. Nē mē hamaxpēr punujja määnēn nhýrmā hapēx pa. Nē mē kot amnhī tomnuj o mē pa

xwýnhjaja koja mẽ amnhĩ xà htýx kamã hamak rãhã ho pa ho pa. No Tĩrtũm kôt mẽ kot amnhĩ nhĩpêx o mẽ pa xwýnhjaja koja mẽ kurom kuri htĩr tũm nẽ mex nẽ hkĩnh nẽ pa ho pa.

Kãm Kris kurê xwýnh maati jarênh

Wam Juāw 4.1-6; Sikũn Juāw 7-11

¹⁸ E Kris kôt ixkwýjaja. Kris akupýn mẽ pahwýr wrýk kukamã koja mẽmoj tanhmã amnhĩ nhĩpêx to. Na pre ra Kris kôt mẽ panhĩõja mẽ pamã ã harênh anẽ nẽ harênh o:

—Koja mẽ panhõ Pahihti Kris akupýn mẽ pahwýr wrýk kaxyw hãmri nhũm kêp Kris ã amnhĩ to hêx xwýnh maati kumrêx nhỹhỹnh kato. Hãmri nẽ hêx rom te Kris pyrã nẽ tanhmã mẽ kãm kapêr to nẽ tanhmã mẽ hipêx to ho pa nhũm rĩ kormã Kris akupýn mẽ pahwýr wrý. Anẽ.

Na pre hkukamã ã harênh anẽ ka mẽ harênh ma. Tã ra mẽ kêp Kris ã amnhĩ to hêx xwýnhjaja ohtô nẽ mra nẽ kãm hkurê xwýnh maatita kukamã tanhmã amnhĩ nhĩpêx to pẽ mẽ kãm amnhĩ to hêx o pa. Jakamã na pa ixprĩ hã mẽ amã tanhmã mẽ harênh to. Koja tokyx kêp Kris ã amnhĩ to hêx xwýnh maatita nhỹhỹnh mẽ pahwýr kato.

¹⁹ Na pre hkwyjaja mẽ pahpê Kris kwýjê hkôt ri pa htã mẽ pahkĩnhã kêp Kris kwý hkêt. Kêp hkwy ronhỹx arĩ mẽ pahkôt Kris kôt amnhĩ

nhĩpêx o pa. Nom axtem nẽ àhpumunh týt pyrã nẽ mẽ pahkaga nẽ htýx tanhmã amnhĩ tomnuj to ho pa. Jao kêp Jejus kwý hkêt ã amnhĩ to amnhĩrĩt.

²⁰ No kêt mẽ pahpê Tĩrtũm krajaja na pre Jejus mẽ pahwýr Karõ rẽ nhũm mẽ pahkarõ mã agjê nẽ mẽ pahkrãm kapêr mex jagjê. Jakamã na pu mẽ mẽ kêp Kris kwý hkêt xwýnhjê rom Tĩrtũm kapêr mar mex nẽ.

²¹ Xà mẽ ate Tĩrtũm kapêr ã kagã pumunh kêt kôt na pa ã mẽ amã ixkapêr nẽ hã kagã anẽ? Nã ra mẽ ate omunh nẽ mar mex kênã. Tã mẽ ate mẽ kot tanhmã Jejus o hêx to xwýnhjê pumunh mex nẽ mẽ harênh mar mex kaxyw na pa ã mẽ awýr kagã nhĩpêx nẽ mênh anẽ. Kêr kê mẽ mẽmo arĩgro hã mẽ awýr agjê nẽ tanhmã mẽ amã Jejus o hêx to ka mẽ aprĩ hã mẽ omunh mex kurê kumrêx.

²² Tanhmã na htem Jejus o hêx to? E kot paj ixprĩ hã mẽ amã tanhmã mẽ harênh to ka mẽ inhma. Nã koja mẽhõ mẽ amã tanhmã harênh to nẽ harênh o:

—Nã Jejus kêp Tĩrtũm Kra hkêt. Tĩrtũm kot mẽ pahwýr mênh kêt tã ka htem atýt kapêr kôt ri amnhĩ nhĩpêx o ri apa. Kwa kêt mẽ ixkapêr kôt mãn ri amnhĩ nhĩpêx o ri apa.

Anhỹr o mẽ amã kapêr ka mẽ ama nẽ kãm Kris mẽ Tĩrtũm wa hkĩnh kêt xwýnh ã omunh kurê kumrêx.

²³ Koja mẽhõ Tĩrtũm Kra Jejus kaga nẽ mãânên Hipêêxã kaga. No koja mẽhõ Tĩrtũm

Kra hkôt amnhĩ xàm nē mǎānēn Hipêêxà hkôt amnhĩ xām.

Mē pahte Kris kaga pymaj tanhmā amnhĩ nhĩpêx to hā mē pamā karō

²⁴ Amnepēm mē ate Jejus kôt amnhĩ xunhwýrta ã na ka prem kêp Tĩrtũm Kra hā Tĩrtũm kot mē pahwýr mēnh xwýnh ã harēnh ma. Tã kêr ka mē arĩ amnhĩ kaxyw hkôt ajamaxpēr nē hkôt pix mǎ amnhĩ nhĩpêx o ri apa. Kot kaj mē anē nē Mēpanhĩpêêxà Maati mē Kra wa hkôt amnhĩ nhĩpêx mex o apa rāhã ty.

²⁵ Hāmri nē wa kuri atĩr tũm nē amex kumrêx nē apa ho apa. Ra Jejus kot ja jarēnh xà hkôt.

²⁶ Na pa ã mē amā ixkapēr nē hā kagà anē. Mē aprĩ hā mē amā Jejus o hêx xwýnhjê kapēr mar nē mē kot mē amā hêx kôt mē omunh mex kaxyw.

²⁷ Tĩrtũm Karō na pre mē akarō mǎ gjêx pa nē mē amā Tĩrtũm kapēr piitã o amnhĩrĩt mex o mē akôt pa. Jakamā mēmo kaxyw kot kaj mē Tĩrtũm kapēr o hêx xwýnhjaja kot tanhmā harēnh toja ma? Ra Tĩrtũm Karō kot mē amā ho amnhĩrĩt o mē ajahkre mex o pa kēnã kot ka kêt mē nhām mē kapēr ma. Na hte Tĩrtũm Karōja mē urà nē Tĩrtũm kapēr ho hêx kêt nē. Ām katàt kôt kot ho amnhĩrĩt mex jakamā kwa kêr ka mē mar tỳx nē hkôt ri amnhĩ nhĩpêx mex rāhã ho ri apa.

Mē pahte tām ri amnhĩ nhĩpêx ã mē pamā karō

Juāw 14.25-26, 15.1-8

²⁸ E Jejus kôt ixkrajaja. Kêr ka mē arĩ Kris kôt amnhĩ nhĩpêx mex rāhã ho ri apa. Kê nhỹrmã akupýn mē pahwýr wryk o tē ka mē amnhĩ wýr omu nē akĩnh nē. Nē akĩnh kām axàmnhĩx kutã mra nē hkaxpa nē amnhĩ kamā amā uma hkêt nē. Rỳ mēmoj tã amnhĩ tã apijaam kêt nē. Ām axàmnhĩx akĩnh nē ma kutã mra.

²⁹ Krisja mex o mex jakamā na pu htem uràk nē amnhĩ to mex o ri papa. Mē pahte amnhĩ to mex o papa xwýnhjaja uràk nē mē pahpê Tĩrtũm kra na pu mē.

3

Tĩrtũm krajê hkukamā tanhmā mē harēnh to

Rômān 8.18; Sikũn Korĩt 3.18; Sikũn Pêtre 3.11-14

¹ Nē Mēpanhĩpêêxà Maati kām mē pajapê htỳx kumrêx jakamā na pre mē pahte hkôt amnhĩ xunhwýr ã mē pahpumunh kôt mē pahpê hkra hā mē pajarē pu mē pahpê hkra nē ri papa. Ja na mē pamā mex o mex. Nom mē kot hkôt amnhĩ xunhwýr kêt xwýnhjaja kot hprĩ hā ja hā mē pahpumunh kêt jakamā na htem mē pahte tām amnhĩ nhĩpêx ã mē pahpumu nē tee ri hamaxpēr.

² E Kris kôt ixkwýjaja. Ra mē pahpê Tĩrtũm kra htã kormā mē pahte amnhĩ kukamā mē pahprĩ hā ja hā amnhĩ pumunh mex kêt.

Koja nh̄ymã Jejus akup̄yn mẽ pahw̄yr wr̄y pu mẽ pano ho tanhmã kute hã omunh mex nẽ. Hãmri nẽ tã te kot amnhĩ nhĩp̄ex pyrãk o amnhĩ nhĩp̄ex mex o papa. Ra mẽ pahte ja mar mex.

³ ã mẽ pahte amnhĩ kukamã pajamaxp̄er anh̄yr o papa xw̄ynhjaja na pu htem kormã amnhĩ w̄yr Jejus kamã pajamak o papa. Pê urãk nẽ mẽmoj punuj mã pajamaxp̄er kêt o papa. Nẽ urãk nẽ tanhmã amnhĩ tomnuj to hkêt nẽ.

Tĩrtũm krajaja kot amnhĩ tomnuj o pa hkêt ã mẽ kãm karõ

⁴ Nẽ mẽ kot amnhĩ tomnuj o mẽ pa xw̄ynhjaja na htem Tĩrtũm kap̄er kw̄ym ri amnhĩ nhĩp̄ex o pa. Tã kot puj mẽ tanhmã amnhĩ tomnuj to hãmri nẽ mẽ urãk nẽ kap̄er kw̄ym ri amnhĩ nhĩp̄ex.

⁵ No Jejus na pre mẽ pahte amnhĩ tomnuj pãnhã amnhĩrer kaxyw mẽ pahw̄yr wr̄y. Aa kot amnhĩ tomnuj kêt jakamã tapxipix kot mẽ pahpãnhã amnhĩrer mã tãm. Ra mẽ pahte ja jarẽnh mar mex.

⁶ Jakamã mẽ pahpê hkwȳjaja na pu htem ri paht̄yx tanhmã amnhĩ tomnuj to ho papa hkêt nẽ. ã mẽ kot amnhĩ nhĩp̄ex anh̄yr xw̄ynhjaja k̄ep hkwȳ hkêt.

⁷ Nom koja mẽhõ Kris pyrã nẽ tãm amnhĩ nhĩp̄ex o pa hãmri nẽ k̄ep Tĩrtũm kraa. Jakamã kwa koja mẽhõ Tĩrtũm kap̄er kw̄ym ri

tanhmã mẽ amã kap̄er to ka mẽ ama nẽ ãm ama.

⁸ Mẽ kot amnhĩ tomnuj o mẽ pa xw̄ynhjaja na htem Satanasti hkôt ã amnhĩ nhĩp̄ex anh̄yr o pa. Satanastija Tĩrtũm kot mẽmoj to kator krax rũm nhũm ã kot amnhĩ tomnuj anh̄yr o pa xw̄ynh na. Tã ã kot amnhĩ nhĩp̄ex anh̄yr o paja o hap̄ex par kaxyw na pre Tĩrtũm Kra Jejusja amnẽ pika hw̄yr wr̄y.

⁹ Nom mẽ papajaja mẽ pahpê Tĩrtũm kra na pu mẽ. Na pre mẽ pahw̄yr amnhĩ Karõ rẽ nhũm mẽ pahkarõ mã gj̄ex pa nẽ mẽ pahkôt pa ho pa. Jakamã tanhmã kot puj wem amnhĩ to nẽ Satanasti pyrã nẽ paht̄yx ri amnhĩ tomnuj o papa? Nà kot puj mẽ ã amnhĩ nhĩp̄ex anh̄yr kêt nẽ.

¹⁰ Koja mẽhõ tãm amnhĩ nhĩp̄ex kêt nẽ hãmri nẽ mããnẽn hkwȳjê kamã ukap̄rĩ hkêt nẽ. Hãmri nẽ ã amnhĩ nhĩp̄ex anh̄yr o k̄ep Tĩrtũm kra hkêt ã amnhĩ to amnhĩr̄it. ãm k̄ep Satanasti hkra hã amnhĩ to amnhĩr̄it kurê kumr̄ex.

Mẽ pamã axp̄en k̄inh o te Jejus kãm mẽ pahk̄inh pyrãk ã mẽ pamã karõ

Matêwre 22.39; Rukre 10.25-37; Juāw 13.31-35

¹¹ Nẽ k̄er ka mẽ ar̄i amã axp̄en k̄inh p̄e tãm axp̄en nhĩp̄ex o ri apa rãhã nẽ. Te amnepê mã mẽ ate Jejus kôt amnhĩ xunhw̄yr ã ar̄igrota ã mẽ kot mẽ amã ja hã karõ pyrã nẽ.

¹² No mẽ ri finat Kaĩ kot amnhĩ nhĩp̄ex pyrãk o amnhĩ

nhīpêx kêt nê. Kêp Satanasti hkra jakamã na pre htõja pī. Kurom kot tãm amnhī nhīpêx ã omu nê kamã gryk nê kupī.

13 Tã koja mẽ kêp Tirtũm kra hkêt xwýnhjaja Kaī pyrà nê kêp mẽ aprãm nõkati nom kêr ka mẽ amnhī tã mẽ omu nê tee ri amnhī kukamã aja-maxpêr kêt nê.

14 Kormã mẽ pahte Jejus kôt amnhī xunhwýr kêt ri na pu prem mẽ uràk nê amnhī tomnuj o papa. Jao mẽ pahpê kuwy hwýr papa mã xwýnh. Tã mẽ pahte Jejus kôt amnhī xunhwýr jakamã ra pahpê Tirtũm mẽ Kra wa kuri pahťir tũm nê papa mã xwýnh. Jakamã na pu htem mẽ kêp hkra hkêt xwýnhjê kurom pamã mẽ piitã mẽ hkĩnh o tanhmã mẽ ho mex to ho papa. Mẽ kãm amnhī kwýjê hkĩnh kêt xwýnhjaja arī mẽ kêp kuwy hwýr mẽ pa mã xwýnh na mẽ. Ra mẽ pahte ja jarênh mar mex.

15 Mẽ kãm mẽ hpar prãm o mẽ pa xwýnhjaja koja nhýrmã Tirtũm mẽ Kra wa kuri hťir tũm nê pa ho pa hkêt nê. Ra mẽ pahte mããnên ja mar mex. Jakamã kwa mẽ amã akwýjê hprãm nõkati ho ri mẽ apa xwýnhjaja. Tirtũm noo mã te ra mẽ ate mẽ hpar pyràk jakamã kot kaj mẽ arī ã amnhī nhīpêx anhýr o ri apa hãmri nê nhýrmã Tirtũm nhõ krī hwýr axàpir kêt nê.

16-18 E ixkwýjaja. Kwa kêr pu mẽ pajakwa pix o pamã axpên kĩnh ã amnhī jarênh kêt nê. Mããnên axpên kutã pano-jarêt o ri papa. Nê tanhmã

axpên to mex to. Tanhmã na pre Jejus kãm mẽ pajapê hã amnhī nhīpêx to? Nã na pre kãm mẽ pamex prãm xàj mẽ panê ty. Kãm amnhī tã ma hkêt kãm mẽ pakamã ukapří xàj mẽ panê ty. Tã kêr pu mẽ uràk nê pahkwýjê kamã paxukapří ho mẽ kutã pano-jarêt rãhã ho papa. Jao mẽ paxàpkur xà hã panhõ pumu nê nhýri pahkwýjê hõ pumu nhũm kêp amrakati. Pu mẽ tee ri ja hã omu hãmri nê kãm mẽ panhõta kwý gõ. Kot pu mẽ ã amnhī nhīpêx anhýr kêt nê hãmri nê pamã Tirtũm kĩnh ã amnhī jarênh kaprý.

19 Nê kot puj mẽ ã axpên to mex o papa anê nê ra pahte Tirtũm kôt amnhī nhīpêx mex ã amnhī to amnhĩrít. Hãmri nê ra paxàmnhĩx kãm tanhmã amnhī jarênh to ho papa. Amnhī kamã pamã uma hkêt nê paxàmnhĩx pajamakêtkati nê kãm tanhmã amnhī jarênh to.

Mẽ paxàmnhĩx amnhī to Tirtũm wýr ã mẽ pamã karõ

20 Nê kot puj mẽ mẽmo arĩgro hã tanhmã amnhī tomnuj to hãmri nê tee ri ja hã amnhī pumu nê amnhī kamã pagryk nê. Na hte Tirtũm tanhmã mẽ pahte amnhī tomnuj to hã mẽ pahpumu nom arī kãm mẽ pajapêê. Mẽ parom àhpumunh o àhpumunh jakamã kot mẽ pahte amnhī tomnuj prãm kêt ã mẽ pah-pumunh mex.

21 Jakamã puj mẽ ã kãm pajamaxpêr anê nê amnhī kamã pamã uma hkêt kãm

paxàmnhĩx tanhmã ri amnhĩ to hwÿr to ho ri papa.

²² Kot puj mẽ hkôt amnhĩ nhĩpêx o papa rãhã nẽ mẽmoj tã kuwÿ. Nẽ kãm hprãm xà hkôt amnhĩ nhĩpêx o papa hã amnhĩ pumunh kôt mẽmoj tã kuwÿ. Hãmri nhũm mẽ pama nẽ tanhmã mẽ pamã mẽmoj to rÿ mẽ pamã mẽmoj gõ.

Te ixkre pixi kamã mẽ pahtipxi pyrãk ã mẽ pamã karõ

²³ Nẽ tanhmã mẽ pahte amnhĩ nhĩpêx to ho papa hã na hte Tirtũm mẽ pamã karõ? Nã mẽ pahte amnhĩ kaxyw Kra Jejus Kris kôt pajamaxpêr nẽ hkôt amnhĩ nhĩpêx o papa hã na hte mẽ pamã karõ. Nẽ kapêr xà hkôt pamã axpên kĩnh o mẽmoj to axpên kutã panojarêt o papa hã na hte mẽ pamã karõ. Na hte ã mẽ pahte amnhĩ nhĩpêx anhÿr ã mẽ pamã karõ anẽ.

²⁴ Jakamã kot puj mẽ kapêr xà hkôt axpên nhĩpêx o papa nẽ te ixkre tipxi kamã mẽ pahte axpên kôt Tirtũm kôt ri papa pyrãk. Ra kot mẽ pahwÿr Karõ rênh nhũm kot mẽ pahkarõ mã gjêx jakamã na hte mẽ pahkôt pa ho pa hã amnhĩ to amnhĩrít.

4

Mẽ kot Kris kapêr jarênh ã amnhĩ to hêx xwÿnhjê jarênh

Wam Korît 12.1-3; Wam Juāw 2.18-26; Sikũn Juāw 7-11

¹⁻³ Nẽ koja mēhõ Tirtũm kapêr o mẽ ajahkre kaxyw mẽ amã tanhmã Jejus Kris

jarênh to nẽ ãm hãmri harẽ nẽ harênh o:

—Na pre Tirtũm Kra Jejus mẽ pahwÿr wrÿ nẽ ĩ ho ĩ ho mẽ pakamã kato. Tirtũm tãm na pre mẽ pahwÿr kumẽ nhũm wrÿ.

Anhÿr o mẽ amã harẽ ka mẽ ama nẽ kapêr kôt ajamaxpêr kurê kumrêx. ãm hãmri na hte Tirtũm Karõ nhÿ ã harênh anẽ. No koja Jejus kêp Tirtũm Kra hkêt ã harẽ ka mẽ ama nẽ ãm ama nẽ hkôt ajamaxpêr kêt nẽ. Kãm Kris kurê xwÿnh maati nhÿ hã kapêr xwÿnhjaja na hte ã harênh anhÿr o pa. Na ka prem ra kãm Kris kurê xwÿnh maatija tokyx hpôx ã harênh ma. Tã na ra ÿ hã kapêr xwÿnhjaja ohtô nẽ pika piitã hkôt mẽ hkôt pa nẽ te Tirtũm Karõ nhÿ hã mẽ kãm kapêr pyrãk o amnhĩ nhĩpêx o pa. Nom ãm amnhĩ to hêx o pa. Jakamã e kwa ixkwÿjaja. Koja mēhõ mẽ awÿr mra nẽ tanhmã mẽ amã Tirtũm kapêr jarênh to ka mẽ aprĩ hã ama nẽ rĩ kormã kêp Tirtũm nhÿ hã kapêr jarênh xwÿnh ã harẽ rÿ kot amnhĩ to hêx xwÿnh ã harẽ.

⁴ Kêt mẽ papajaja jajê rom mẽ pahpê Tirtũm kra na pu mẽ. Nẽ Tirtũm Karõ kot ra mẽ pahkarõ mã gjêx xwÿnhhta hihtÿx o jajê piitã mẽ hakrenh. Jakamã na pu htem ÿ hã mẽ kutã amnhĩ to htÿx o papa nhũm mẽ tee ri tanhmã mẽ pamã Jejus o hêx to kaprÿ. Pu mẽ kuma nẽ ãm mẽ kuma.

⁵ Mẽ kêp Tirtũm kra hkêt jakamã na htem hkôt amnhĩ

nhīpêx kêt nê. Mě kot amnhī nhīpêxja axtem na. Jakamā na htem Tirtūm kapēr kwým ri tanhmā hkra hkêt xwýnhjê mã kapēr to ho pa nhūm mẽ kuma nê kām mẽ mar prām nê.

⁶ Nom mẽ ixte Tirtūm kapēr o mẽ ajahkre xwýnhjaja na pa htem mẽ kurom Tirtūm nhỹ hã ixkatàt kôt ãm hāmri mẽ amā kapēr jarēnh o ri ixpa. Jakamā ka mẽ apê hkra hã mẽ amā mẽ inhmar prām nê. No mẽ kêp hkra hkêt xwýnhjaja kām mẽ inhmar prām kêt.

Na pu htem pahprī hã mẽ kapēr ã mẽ kuma nê rī kormā tanhmā mẽ harēnh to. Tirtūm nhỹ hã kapēr ã mẽ harē rý kām hkurê xwýnh maati nhỹ hã kapēr ã mẽ harē.

Tirtūm kām mẽ pajapê hã tanhmā amnhī nhīpêx to hã harēnh

Juāw 3.16-21; Rōmān 5.5-9, 8.35-37

⁷ E ixkwýjaja. Na hte Tirtūm tanhmā mẽ pahpê hkrajê ho pu mẽ pamā axpēn kīnh nê. Jakamā kêr pu mẽ ã axpēn nhīpêx anhỹr jao axpēn to mex pix nê. Ā Tirtūm kot mẽ panhīpêx anhỹr jakamā kêr pu mẽ pahpê hkrajaja ý hã ã axpēn nhīpêx anhỹr o ri papa.

⁸ Kojā mēhō Tirtūm kīnhã kām mẽ hkwýjê hkīnh kêt hāmri nê mẽ kamā ukapřī hkêt o pa. Hāmri nê kêp Tirtūm kra hkêt ã amnhī to amnhīrīt mex nê.

⁹⁻¹⁰ Tirtūm kām mẽ pajapê htýx kumrêx. Kormā mẽ pamā hkīnh kêt ri nhūm

kumrêx amnhī rom kām mẽ pajapê ho pa. Nê kām mẽ pajapê xāj mẽ pahwýr Kra pyxita mẽ. Mě pahte amnhī tomnuj pānhã kot mẽ panê htyk kaxyw. Mě pahte kukwak ri amnhī nhīpêx nyw o amnhī nhīpêx nê nhỹrmā wa kuri pahťir tūm nê pamex nê papa ho papa kaxyw. Ā na pre Tirtūm mẽ pahwýr Kra mēnh anhỹr o kām mẽ pajapê hã amnhī to amnhīrīt.

¹¹ E ixkwýjaja. Tirtūm kām mẽ pajapê htýx jakamā kwa kêr pu mẽ uràk nê pamā axpēn kīnh o papa. Nê axpēn kamā paxukapřī nê.

¹² Aa mẽ pahťō pahte pano ho Tirtūm pumunh kêt tã na hte mẽ pakamā pa ho pa. Pu mẽ kām mẽ pajapêta pyrà nê ý hã pamā axpēn kīnh o papa.

¹³ Na pre mẽ pahwýr Karō rē nhūm mẽ pahkarō mã agjê pu mẽ ý hã kot amnhī nhīpêx o amnhī nhīpêx o papa.

¹⁴ Nê mẽ ixpê Jejus nhỹ hã mẽ ajahkre xwýnhjaja. Mě ixte kot amnhī nhīpêx nê kot mẽmoj tanhmā ho hã omunh o ri hkôt ixpa jakamā na pa htem ma mẽ piitā mẽ kām harēnh o ri mẽ hkôt ixpa. Nê mẽ kām harēnh o:

–Tirtūm na pre mẽ pahwýr Kraja mẽ. Kot mẽ pahpi-itā mẽ panê htyk kaxyw mẽ pahwýr kumê. Anê.

¹⁵ Mě kot Jejus kêp Tirtūm Kra hã harēnh o pa xwýnhjaja na hte Tirtūm mẽ kamā pa ho pa nhūm htem ý hã ã Kra jarēnh anhỹr o pa.

¹⁶ Na pu mẽ ra pahprī hã Tirtūm kām mẽ pajapê hã

amnhĩ tā omu. Kām mẽ pajapê htỳx kumrêx ã amnhĩ tā omu. Jakamã kot puj mẽ uràk nê y hã pamã mẽ piitã mẽ hkĩnh o papa. Tĩrtũm mẽ mẽ pahtipxi nê ri papa kênã.

Mẽ kãm axpẽn kĩnh xwỳnhjaja kãm Tĩrtũm puma hkêt ã mẽ harênh

¹⁷ Nê kot puj mẽ pamã axpẽn kĩnh o papa nê mãânên Kris kôt amnhĩ nhĩpêx ho papa. Hãmri nhũm nhỹrmã Tĩrtũm kot Kra mẽ wa kuri mẽ htĩr tũm nê mẽ pa ho mẽ pa mã xwỳnhjê nhĩxi jarênh kaxyw pu mẽ tee ri amnhĩ kukamã pajamaxpêr kêt nê. Ra amnhĩ nhĩxi jarênh ma nê pahkĩnh nê.

¹⁸ Nê koja mẽhõ kãm hkwyjê hkĩnh kêt nê tanhmã hõ homnuj to. Hãmri nê kot amnhĩ tā tanhmã ho pymaj kãm uma ho hwỳr mrar kêt nê. No koja kãm hkwyjê hkĩnh nê tanhmã mẽ ho mex to ho pa nê kãm mẽ uma hkêt nê.

¹⁹ Tĩrtũm kumrêx na pre kãm mẽ pajapê nê mẽ pakukamã tanhmã mẽ pahto mex to. Tã pu mẽ ra amnhĩ pyrã nê pamã hkĩnh o papa. Nê pamã mẽ piitã mẽ hkĩnh o papa.

²⁰ Nê koja mẽhõ kãm Tĩrtũm kĩnh ã amnhĩ jarênh tā kãm hkwyjê hõ hprãm nõkati hãmri nê ra kãm Tĩrtũm prãm kêt ã amnhĩ to amnhĩrĩt. Kot kaj mẽ ano ho akwỳjê pumunh o apa xwỳnhhta amã hkĩnh kêê tā tanhmã kot ka we amnhĩ to nê ate ano ho Tĩrtũm pumunh kêêta amã hkĩnh ã amnhĩ jarê? Nà ka ã

amnhĩ jarênh anhỹr o amnhĩ to axêx.

²¹ Na pre Tĩrtũm mẽ pamã kapêr o amnhĩrĩt o:

Kot kaj mẽ amã ixkĩnh hã kot kaj mẽ mãânên amã akwỳjê hkĩnh o mẽ ho mex o ri apa. Anê.

5

Tĩrtũm nhỹ hã mẽ pamã axpẽn kĩnh ã mẽ pamã karõ

¹ Nê Tĩrtũm kot mẽ pahwỳr Jejus mẽnh ã harênhja. Koja mẽhõ kuma nê amnhĩ kaxyw hkôt hamaxpêr nê Jejus kôt amnhĩ xãm hã koja Tĩrtũm ja hã omu nê ho hkra.

Nê koja mẽhõ kãm Tĩrtũm kĩnh hã koja mãânên kãm hkwyjê hkĩnh o pa.

² Ja pyrã nê kot puj mẽ pamã Tĩrtũm kĩnh nê kapêr kôt amnhĩ nhĩpêx. Hãmri nê mãânên pamã krajê piitã mẽ hkĩnh ho papa.

³ Nê kot puj mẽ pamã Tĩrtũm kĩnh nê nhũm kapêrja mẽ pahpê hihtỳx kêt nê. Pu mẽ pamã Tĩrtũm kĩnh ã kapêr kôt amnhĩ nhĩpêx mex o ri papa.

⁴⁻⁵ Na pu prem amnhĩ kaxyw Tĩrtũm Kra Jejus kôt pajamaxpêr nê hkôt amnhĩ xunhwỳ nhũm Tĩrtũm ja hã mẽ pahpumu nê mẽ pahto hkra pu mẽ y hã amnhĩ nhĩpêx nyw o amnhĩ nhĩpêx o papa. No ri tanhmã amnhĩ tomnuj to ho ri papa hkêt nê.

Mẽmoj axkrunêpxi nê kot Jejus kêp Tĩrtũm Kra hã ho amnhĩrĩt

Juāw 1.32-34, 3.36, 5.31, 15.26

⁶ Nē Jejus pix na pre Tirtūm mē pakaxyw ām nhūm kēp Kra hā mē pahwyr wry. Hāmri nhūm Juāw Paxisja pyhti kamā hkrā kumrā. Kēp Tirtūm Kra hā hkrā kumrā. Tā nhūm Tirtūm kapēr kōt ma tanhmā amnhī nhīpēx to ho pa. Nē ri hkwyjē mā kapēr jarēnh o ri mē hkōt pa. Tā nhūm mē kupī nhūm kēp Tirtūm Kra hā pī kahpa hā ajēt nē ty nē hkamrō axkapī. Ā mē panē amnhī nhīpēx anē nhūm Tirtūm Karōja kēp Kra hā mē pamā ho amnhīrīt. Ām hāmri na hte ā tanhmā mēmoj to amnhīrīt to anē. Mēmoj to hēx kēt jakamā na pre Jejus kēp Tirtūm Kra hā mē pamā ho amnhīrīt.

⁷ Nē kēp Tirtūm Kra hā mē pamā mēmoj to axkrunēpxi nē ho amnhīrīt.

⁸ Tirtūm Karō na pre kēp Kra hā mē pamā ho amnhīrīt pu prem kēp Kra hā omu. Nē Juāw Paxis kot hkrā kumrārta ā pu mē määnēn kēp Tirtūm Kra hā kot ho amnhīrītja ā omu. Nē määnēn kēp Tirtūm Kra hā pī kahpa hā jēt nē htyk nē hkamrō pikapīrta ā mē pamā ho amnhīrīt pu mē kēp Kra hā omu. E mē pamā mēmoj to axkrunēpxi nē Jejus kēp Tirtūm Kra hā kot ho amnhīrīt xwýnh na jajaja.

⁹ Nē na pu htem jar pahkwýjaja kot axpēn mar xà hā ixkre kamā mē kapēr ma nē mē hkōt pajamaxpēr. Tā koja Tirtūm tanhmā mē pamā mēmoj to amnhīrīt to pu mē hkōt pajamaxpēr kurē kumrēx. Kēp Tirtūm kēnā kot

pu kēt mē kapēr prā nē hkōt pajamaxpēr kēt. Tām na pre mē pamā Jejus kēp Kra hā ā ho amnhīrīt anē.

¹⁰ Jakamā mē pahte Tirtūm Kra hkōt amnhī xunhwýr xwýnhjaja na pu prem Jejus kēp Kra hā harēnh ma nē hkōt pajamaxpēr kurē kumrēx. No mē kēp hkra hkēt xwýnhjaja na htem Tirtūm kot kēp Kra hā harēnh ma nē ām kuma nē amnhī kaxyw hkōt hamaxpēr kēt nē. Jao te Tirtūm kēp Hipēêxà hā amnhī to hēx pyrāk ā harē.

¹¹ E kot paj ixprī hā mē amā tanhmā ja jarēnh to ka mē inhma. Nà na pre Tirtūm Krata mē pahpiitā panē ty. Jakamā kot puj mē pahte hkōt amnhī xunhwýr xwýnhjaja nhýrmā ty nhūm Tirtūm akupým mē pahto mē pahtír. Pu mē wa kuri pamex nē pahtír tūm nē papa ho papa.

¹² Mē pahpē Jejus kwýjaja kot puj mē ā pahtír tūm nē papa anē. No mē kēp hkwy hkēt xwýnhjaja koja mē nhýrmā ty nē mē pahpyrà nē wa hwýr àpir kēt nē.

¹³ Na ka prem ixpyrà nē amnhī kaxyw Tirtūm Kra hkōt ajamaxpēr nē hkōt amnhī xunhwý. Tā pa ā mē amā kagàja nhīpēx anē. Mē ate kamā harēnh nē mē pahte nhýrmā Tirtūm mē Kra wa hwýr mē paxàpir ā mē pajarēnhja mar nē amnhī kaxyw hkōt ajamaxpēr o ri apa kaxyw nē kapēr prār o ri apa hkēt nē.

*Mē pahte paxàmnhĩx mēmoj
tã Tĩrtũm wỳr ã mē pajarēnh*

Juāw 14.13-14

14 Nē mē pahpê Tĩrtũm kra-
jaja na pu htem paxàmnhĩx
pajamakêtkati nē mēmoj tã
tanhmã hwỳr to ho papa.
Kot puj mē kãm hprãm xà
hkôt mēmoj tã kuwỳ nhũm mē
pama.

15 Na pu htem mēmoj tã
kuwỳ nhũm mē pamar mex
nē mē pahte mēmoj tã hwỳr
xà hkôt tanhmã mē pamã
mēmoj nhõr to rỳ tanhmã
mēmoj to. Ra mē pahte ja mar
mex.

*Tĩrtũm kot tanhmã hkra
hkêt xwỳnhjê nhĩpêx to hã
harēnh*

Rukre 22.31-32

16-17 Nē koja Kris kôt mē an-
hĩõ tanhmã amnhĩ tomnuj to
ka mē atõ tee ri ja hã omu
nē ho Tĩrtũm wỳ. Ho awỳ kē
nē tanhmã kot amnhĩ tom-
nuj tota o hapêx nē ja nē ho
htỳx kē axte ã amnhĩ nhĩpêx
anhỳr kêt nē. Kot puj mē
pahtõ tanhmã amnhĩ tomnuj
to nhũm Tĩrtũm tee ri ja hã mē
pahpumu nhũm ja kêp om-
nuj nē. Tã kot puj mē amnhĩ
tomnujta kaga nhũm ja hã mē
pahpumunh kôt tanhmã hã
mē pahto hkêt nē. ãm mē
kot amnhĩ nhĩpêx pixi koja
ho hamakêtkati hkêt nē. Koja
mēhõ Tĩrtũm kaga ho hkaga
nē aa hkôt amnhĩ xãm kêt nē.
Hãmri nhũm tee ri amnhĩ tã
omu nhũm ja kêp omnuj tỳx
kumrêx. Jakamã koja aa ho
hkra hkêt nē. Nē aa kot hk-
aga ho hamakêtkati hkêt nē
pa ho pa. Jakamã koja hkaga

xwỳnhta nhỹrmã ty nē kuri
htĩr tũm nē pa ho pa hkêt nē.

18 Nē mē pahpê Tĩrtũm
krajaja na pu htem amnhĩ
tomnuj o papa hkêt nē.
Tĩrtũm Kra Jejus kot ja pymaj
mē panê Satanasti pumunh
mex jakamã nhũm tee ri mē
pahte tanhmã amnhĩ tomnuj
to hprãm xàj mē pano kupy-
r kaprỳ ho ri pa. Ra mē pahte
ja mar mex.

19 Mē pahpê Tĩrtũm kra na
pu mē. No mē kêp hkra
hkêt xwỳnhjaja Satanasti kot
amnhĩ tã mē ho htỳx pyrak o
mē hipêx jakamã nhũm htem
tanhmã amnhĩ tomnuj to ho
pa. Mē pahte ja mar mex.

20 Nē määnēn ja mē pahte
mar mex. Na pre Tĩrtũm Kra
mē pahwỳr wrỳ nē mē pamã
tanhmã Tĩrtũm o amnhĩrit
to ho pa. Tapxipix kêp
Mēpahpãm ã mē pamã ho
amnhĩrit. Tã Jejus kukwak ri
mē pahpê Tĩrtũm kra jakamã
kot puj mē nhỹrmã wa kuri
pahtĩr tũm nē pa mex nē papa
ho papa.

21 E Kris kôt ixkwỳjaja. Kêr
ka mē Tĩrtũm kapêr kôt pix
mã mãn ri amnhĩ nhĩpêx o
ri apa rãhã nē. No nhãm
mē kot Tĩrtũm kapêr kwỳm ri
mē amã kapêr o hêx xwỳnhjê
kapêr ma nē ãm mē ama nē
mē hkôt amnhĩ nhĩpêx hkêt
nē.

Tã ãm ja pix. Ixpê Juāw na
pa krĩ piitã hkôt mē amã kaga
nhĩpêx nē kurê.

Sikūn Juāw Juāw kot Jejus kôt hkwỳjê hwỳr wam kagà nê mēnh kôt hō mēnh

Juāw na pre kagàja nhīpêx. Jejus nhỹ hã hkrajê jahkre ho ri pa xwỳnhjê hō na pre. Jakamã na pre hkrī hō kamã Kris kôt htōx mē ò fāmii mã kagàja nhīpêx nê mē hwỳr kumê. Na pre hte Tirtūm kapêr o mē hêx o pa xwỳnhjê hō mē ò krī hwỳr mra nhūm Juāw kràmnhwỳ nita omu nê htỳx kot mē ahkre mex ã hkamnhĩx. Hāmri nê kot Tirtūm kapêr o hkwỳjê jahkre kaxyw amnhĩ nhōrkwỳ hwỳr kuwỳ. Hāmri nhūm Juāw tee ri harēnh ma nê kām kagàja nhīpêx nê kamã kot amnhĩ wỳr hwỳr nê kām kapêr nê hprī hã kām tanhmã mē kot Tirtūm o hêx to ho pa hã tanhmã mē harēnh to. Kot kamã harēnh nê mē harēnh mar hāmri nê mē axkām hamak rom nê ri pa kaxyw. ã na pre Juāwja hkràmnhwỳ ni mē hkwỳjê mã mēmoj jarēnh nê hã kagà nê mē hwỳr mēnh anê. Nê mē kām:

1 Pa Jejus kôt ixtōx. Xà mē amex? E ot pa mē amã kagà nhīpêx nê mē awỳr kumê. Akrajaja nê apê mē hkatorxà mē mē ato ixpimràatã mē awỳr kumê. Ixpê Juāw pigêtre na pa. Inhmã mē akĩnh nom papxipix inhmã mē akĩnh kêt. Mē pahpyrà nê mē kot Tirtūm kôt amnhĩ xunhwỳr

xwỳnhjaja haxwỳja kām mē akĩnh.

² Mē pahte Tirtūm kapêr kôt ri amnhĩ nhīpêx rãhã ho ri papa jakamã na pu htem pamã axpên kĩnh o ri papa.

³ Na pa hte mē pahto Mēpanhīpêêxà maati Tirtūm wỳr o ixpa nê kām:

—Pa Tirtūm. Ot pa mē amnhĩ to awỳ. Akra Jejus Kris mē mē amnhĩ to war awỳ. Kêr ka wa mē ixkamã axukapri nê mē ixkutã war anojarêt rãhã ho ri apa. Nê tanhmã mē ixkrã hto pa mē ixàmnhĩx ijamakêtkati nê ixkĩnh nê mē inhmã axpên kĩnh nê axpên to mex o ri axpên kôt ixpa. Nê tãm ri amnhĩ nhīpêx. Anê.

*Mê pamã axpên kĩnh kām
axpên to mex ã mē pamã karō
Juāw 13.34-35; Wam Juāw
2.7-9, 3.14-18*

⁴ Nê na pa pre akra hkwỳjê pumu nhūm mē inhmã amnhĩ jarê pa mē kuma nê mē y hã ixkĩnh nê. Na xep prem Tirtūm kôt amnhĩ xunhwỳ nê hkôt ri amnhĩ nhīpêx mex o pa. Mē kot Mēpanhīpêêxà Maati Tirtūm kapêr ã kagà hkôt amnhĩ nhīpêx ã inhmã amnhĩ jarê pa mē kuma nê ixkĩnh nê.

⁵⁻⁶ Jakamã na pa ã amã ixkapêr nê hã kagà anê. E kwa Kris kôt ixtōx. Kêr pu mē pamã axpên kĩnh o ri papa hã mēmoj to axpên kutã panojarêt rãhã ho ri papa. ã ixu-jarēnh anhỹrja nyw kêt. Amnepê mã mē ate Jejus kôt amnhĩ xunhwỳr ã arĩgrota ã

na prem ā mẽ amā karō anē. Tā kêr pu mẽ arī pamā axpēn kīnh pē Tirtūm kapēr piitā hkôt amnhī nhīpêx mex o ri papa. Kapēr ā kagà kot ā mẽ pahte amnhī nhīpêx anhÿr ā mẽ pamā karō.

Tirtūm kapēr o mẽ hêx xwÿnhjê jarēnh

Rōmān 16.17-18; Wam Ximotre 5.22; Wam Juāw 2.18-26, 4.1

⁷ Nē mẽ kot Tirtūm kapēr o hêx o ri mẽ pa xwÿnhjaja na mẽ ra ma krī piitā hkôt mẽ kām tanhmā ho hêx to ho pa nē mẽ kām:

—Jesus kêp Tirtūm Kra hkêt ām mẽ panhīō na pre. Na pre Tirtūm mẽ pahwÿr mēnh kêt nē. ām mẽ panhīō rūm na pre kato.

Anhÿr o mẽ kām ho hêx o pa. Kām Kris kurê xwÿnh maatija nhÿ hā na htem ā ri ho hêx o pa anē.

⁸ Jakamā kwa mẽ amnhī nē mẽ omunh mex nē mẽ ama nē ām mẽ ama. Kot kaj mẽ kapēr ma nē mẽ hkôt ajamaxpēr hāmri nē mẽ ixte Tirtūm kapēr o mẽ ajahkreta kaga. Kwa mẽ arī mẽ ate amnhī nhīpêx nyw pix o mǎn amnhī nhīpêx rāhā o ri apa. Nē arī mẽ amā axpēn kīnh kām tanhmā axpēn to ajuta hto rāhā ho ri apa. Kêr kê Tirtūm ja hā mẽ apumu nē nhÿrmā mẽ ato mex nē.

⁹ Nom kot kaj mẽ nhām mẽ kapēr punujja kôt amnhī nhīpêx nē Kris kôt amnhī nhīpêx kêt nē nhūm Tirtūm mẽ akôt pa hkêt nē. Nom kot ka mẽ arī Kris kôt amnhī

nhīpêx mex nē hāmri nhūm Tirtūm mẽ Kra Jesusja wa mẽ akôt ri pa ho pa rāhā nē.

¹⁰ Jakamā koja ā Tirtūm kapēr ā kagà kuhpa hā Jesus o hêx xwÿnhjaja mẽmo arīgro hā mẽ anhō krī hwÿr pōj ka mẽ omu nē amnhī nhōrkwÿ hwÿr mẽ hwÿr kêt nē. Nē tanhmā mẽ kām akapēr to hkêt nē. ām ri mẽ hkàx ā ri mra.

¹¹ No kot kaj mẽ ā mẽ hipêx anhÿr kêt nē mẽ hwÿr mra nē mẽ mar o akuhé hāmri nē te mẽ ate mẽ hkôt amnhī nhīpêx o amnhī nhīpêx pyrāk. Ja pumaj kêr ka mẽ nhÿri mẽ omu nē mẽ htêp kêt kumrêx.

Kagà jatur xà

Hapuhā Juāw 13-15

¹² E Kris kôt ixtōx. Ixkapēr jatur xà na ja. Ixkapēr ā kagàja ām hakotre nom inhmā mẽ amā ixkapēr ry hprām. Jakamā kot paj mẽmo arīgro hā ma mẽ awÿr mō pu mẽ axpēn pumu nē pahkīnh nē. Pa rī kormā mẽ amā ixkapēr jatur xàm kumē ka mẽ aprī hā inhma.

¹³ Nē ota jar Kris kôt atōx krajaja awÿr hpēr mẽ.

E ixpê Juāw pigêtre na pa ā awÿr kagàja nhīpêx nē mēnh anē.

Hapuhã Juãw Juãw kot Jejus kôt hkwỳjê hwỳr kagà nê mênh o axkrut kôt hõ mênh

Juãw na pre mãânên kagàja nhĩpêx. Jejus nhỹ hã hkrajê jahkre ho mẽ pa xwỳnhjê hõ na pre. Tã hkràmnhwỳ Gajore mã kagàja nhĩpêx nê hwỳr kumẽ. Na pre Jejus kwỳjaja ma krĩ piitã hkôt mẽ kãm Jejus kapêr jarênh o ri mẽ hkôt pa. Jao Gajore nhõ krĩ hwỳr pøj nhũm Gajore mẽ hpòx ã mẽ harênh ma nê amnhĩ nhõrkwỳ hwỳr mẽ kuwỳ. Jakamã nhũm pre htem ma õ krĩ hwỳr pa hãmri nê kuri pøj. Nhũm Juãw ã Gajore kot amnhĩ nhĩpêx anhỹr ã harênh ma nê hkĩnh nê hwỳr kagàja nhĩpêx nê kumẽ. Nê kamã kãm mênhõ pê Xotre kot tanhmã amnhĩ tomnuj to ho pa hã harê. ã na pre Juãwja Gajore mã mẽmoj jarênh nê hã kagà nê hwỳr mênh anê. Nê kãm:

1 Pa ixkràmnhwỳ Gajore? Xà amex? E ot pa awỳr kagàja nhĩpêx nê kumẽ. Apê ixkràmnhwỳ mex na ka. Inhmã akĩnh.

2-3 Na pre ra Kris kôt pahtõ hkwỳjaja ixwỳr pøj nê tanhmã inhmã ajarênh to. Na ka xep hte Tĩrtũm kôt amnhĩ nhĩpêx mex rãhã ho ri apa. Pa ajarênh ma nê anhỹ hã ixkĩnh nê. Nê ato Tĩrtũm wỳr o ixpa. Kot ato mex nhũm amex nê ajamakêtkati nê apa ho apa

kaxyw. Nê axà hkêt nê amex nê ri apa kaxyw.

4 Ixte Tĩrtũm kapêr o mẽ ajahkre o ri ixpa jakamã te mẽ apê ixkra pyrãk. Tã pa tanhmã ate mẽ pahkwỳjê nhĩpêx to ho apa hã ajarênh ma nê ixkĩnh nê.

Gajore kot tanhmã Jejus kôt hkwỳjê ho mex to hã harênh

Wam Korĩt 16.10-11

5 E ixkràmnhwỳ. Na ka xep hte Jejus kôt pahtõjê ho mex o ri apa. Aa ate mẽ omunh kêt tã nhũm htem ma anhõ krĩ hwỳr pa ka mẽ omu nê apê Jejus kôt mẽ htõ hã mẽ ho mex nê. ãm hãmri na ka hte ã mẽ hipêx anhỹr o ri apa Gajore.

6 Na pre ra mẽ hkwỳjaja akupỳn ixwỳr pøj nê mẽ ixpê Kris kwỳjê mã amnhĩ tã ajarê. Amã mẽ hkĩnh nê ate tanhmã mẽ ho mex to hã ajarê. Nhũm prem nojarêt ka xep pre mẽ kãm pry hã mẽ apkur xà hã mẽmoj gõ nhũm mẽ inhmã ajarê. Nã ãm hãmri na ka hte ã mẽ ho mex o apa anê. ã ate mẽ hipêx anhỹr o apata ã na hte Tĩrtũm apumu nê hkĩnh nê.

7 Na htem krĩ piitã hkôt mẽ kãm Kris kot tanhmã mẽ panê amnhĩ nhĩpêx to hã harênh kaxyw ma mẽ hwỳr pa. Nom mẽ apkur xà hprãm xàj mẽ kot Kris kôt amnhĩ xunhwỳr kêt xwỳnhjê hwỳr pa hkêt nê.

8 Jakamã kwa kêr pu mẽ papajaja mẽ pahpê Jejus kôt mẽ htõ hã mẽ kãm mẽõ hkwỳ nhõr o papa. Kot puj mẽ ã

mē ho ajuta anē nē te mē pajxwýja mē ĭhkô hā ri mē kām Kris jarēnh o ri papa pyrāk.

Xotre kām Juāw kapēr mar prām kêt ā harēnh

Matéwre 20.25-28, 23.1-12

⁹ Nē ra ixte anhō krī kamā mē apē Kris kwýjē mā kagā nē mēnh nhūm mē ate kamā harēnh. Na xep pre Xotreja kuma nē ām kuma. Kēp mē akrāhtūm prām xāj kām ixkapēr mar prām kêt nē.

¹⁰ Na xep hte tanhmā ixto hēx to ho pa. Nom papxpix ixto hēx kêt nē. Māānēn Kris kôt mē pahtōjaja nhýhýnh krī hō rūm mē awýr pan pōj nhūm xep tanhmā mē amā mē ho hēx to. Nē mē hpōx ā mē omu nom amnhī nhōrkwý hwýr mē hwýr kêt nē. Tā ka mē kurom amnhī nhōrkwý hwýr mē awý nhūm xep tee ri ja hā mē apumu nē mē akamā gryk nē mē hā mē amā akir nē Tirtūm mā amnhī jarēnh xā hā ixkre nē mē ajano. Na xep hte ā amnhī nhīpēx anhýr o pa. Jakamā kot paj nhýrmā ma mē awýr mō hāmri nē mē apiitā mē anoo mā hā kām akir. Tanhmā kot mē ixto hēx to nē tanhmā kot amnhī tomnuj to hā kām akir ka mē apiitā hā inhma.

Mē pahte mē kot amnhī tomnuj xwýnhjē hkôt amnhī nhīpēx kêt ā mē pamā karō

Rukre 6.45; Rōmān 12.9

¹¹ E kwa ixkrāmnhwý. Kēr ka ā Xotre kot amnhī tomnuj o pa anhýrja kôt amnhī nhīpēx kêt nē. Mē kot amnhī tomnuj o mē pa xwýnhjaja

na htem Tirtūm kôt amnhī nhīpēx kêt nē. No kêt mē kot amnhī to mex o ri mē pa xwýnhjaja na mē kēp Tirtūm kra jakamā kēr ka mē ā mē kot amnhī nhīpēx anhýr xwýnhjē kôt pix mā amnhī nhīpēx.

Temētre jarēnh

¹² Nē Temētre na hte tām ri amnhī nhīpēx nē ām hāmri Tirtūm kapēr o mē ahkre mex nē nhūm mē piitā xepēn mā mex ā harē. Pa hte ijaxwýja mē kām mex ā harēnh o ri mē hkôt ixpa ka htem inhma. ām hāmri na pa hte tanhmā harēnh to ho ri ixpa.

Kagā jatur xā

Sikūn Juāw 12-13

¹³ E kagāja kamā na pa ām ja pix jarē nē hā kagā nē awýr kumē Gajore. Na pa kormā harēnh jatur xā mēnh kêt nē.

¹⁴ Nom kot paj tokyx ma awýr mō hāmri nē rī kormā amā hatur xām kumē.

E kē Tirtūm akutā nojarēt rāhā ho pa.

Nē ota jar Kris kôt akrāmnhwýjaja awýr hpēr mē. Nē kēr ka atar Kris kôt ixkrāmnhwýjē mā ijarē.

Tā ām ja pix. Ixpē Juāw pigētre na pa ā awýr kagā nhīpēx nē mēnh anē.

Jutre

Jutre kot Jejus kôt hkwỳjê piitá hwỳr kagà nê mēnh

Jutre na pre kagàja nhĩpêx. Xiakre pyrà nê kêp Jejus tō na pre. Tã kagàja nhĩpêx nê krĩ piitá hkôt Jejus kôt hkwỳjê hwỳr kurê. Na pre mē hkwỳjaja kêp Jejus kwỳ hã amnhĩ jarēnh tã axtem nê tanhmã amnhĩ tomnuj to ho pa. Jakamã nhũm Jutre kagàja kamã Jejus kwỳjê mã hprĩ hã tanhmã mē harēnh to nê mē kot mē hkôt amnhĩ nhĩpêx nê mē kãm kapêr kãm hihtỳx nê. Nê mē kãm:

¹ Pa Jejus kôt ixtō nê ixtōxjaja. Xà mē amex? E ot pa mē amã kagà nhĩpêx nê mē awỳr kurê. Tĩrtũm kot ixpyrà nê amnhĩ kaxyw mē axunhwỳr xwỳnhjê hwỳr. Mēpanhĩpêêxà Maati Tĩrtũm kãm mē pahpiitã mē pajapê jakamã na hte Kra Jejus Kris mē wa mē pahpãnopxar mex rãhã ho pa.

Ixpê Jutre na pa hte Jejus Kris mã tanhmã amnhĩ nhĩpêx to ho ri ixpa. Nê ixpê Xiakre htō na pa.

² Na pa hte mē ato Tĩrtũm wỳr ho ixpa nê kãm:

—Pa Tĩrtũm. Kwa mē kot Akra Jejus kôt amnhĩ xunhwỳr xwỳnhjê pumu nê amã mē hapê hã mē kamã axukaprĩ rãhã ho apa. Kê mē kamã amnhĩ krit nê àmnhĩx hamakêtkati nê ri tanhmã

amnhĩ nhĩpêx to ho pa. Nê mē kãm axpên kĩnh o ri axpên kôt pa. Anê.

Mê kot Tĩrtũm kapêr o hêx xwỳnhjê jarēnh

Wam Ximotre 1.18-20, 6.12

³ E ixkrãmnhwỳjaja. Nà inhmã mē akĩnh. Na pa pre jãã mē amã kagà hkwỳ nhĩpêx kaxyw. Mē pahte Jejus Kris kukwak ri amnhĩ nhĩpêx nyw ã tanhmã mē pajarēnh to nê hã kagà kaxyw tã kormã harēnh kêt nê. Kot paj axtem mēmoj jarê. Na pre Tĩrtũm mē pamã kot amnhĩ nhĩpêx o amnhĩrit pa. Nê kapêr o amnhĩrit pa. Mē pahte mar nê hkôt amnhĩ nhĩpêx kaxyw. Jakamã kêt pu mē kapêr mar tỳx nê amnhĩ krã hi kamã haxàr tỳx nê hã papa. Nom koja mēhō kapêr kuhpa hã tanhmã mē amã kapêr o hêx to ka mē ama nê àm ama.

⁴ Na xep ra kapêr o mē hêx xwỳnhjaja mē akôt pa nê mē apyrà nê Jejus kôt amnhĩ xunhwỳr ã amnhĩ jarê nom amnhĩ to hêx. Ka xep mē aprĩ hã mē hêx ã mē omunh kêt nê mē kêp Jejus kôt mē atō hã mē hkamnhĩx nê atỳx amnhĩ nhōrkwỳ hwỳr mē awỳ. Nom mē kot Tĩrtũm kapêr o hêx pix kaxyw na htem mē akôt pa nê mē amã kapêr o:

—Tĩrtũm kãm mē pajapê htỳx kumrêx nê mē pakutã nojarêt ho pa jakamã kwa kêt pu mē mãmri nhãm mēnijê ho amnhĩkati ho papa. Koja ja hã mē pahpumu nê tanhmã hã mē pahto hkêt nê. Kãm mē pajapê kênã kot kêt hã

tanhmã mẽ pahto. No kêt Jejus Krisja mẽ ate kêp mẽ panhõ Pahihti hã harẽ nom kêp mẽ panhõ patrãw rỳ kêp mẽ panhõ Pahihti hkêt. Anẽ.

Ã Tirtũm kapêr kuhpa hã mẽ amã harẽnh anhỹr o pa. Tirtũm kapêr ã kagã htũm kot amnepê mẽ hkukamã tanhmã mẽ harẽnh to nẽ mẽ harẽnh kot:

Ã mẽ kapêr anhỹr o paja mỳrapê koja mẽ mex kêt nẽ pa. Koja Tirtũm mẽ homnuj tỳx kumrêx.

Anhỹr o kot mẽ harẽnh. Tã pa mẽ amã ixprĩ hã mẽ harẽ nẽ hã kagã. Mẽ ate inhmar nẽ amnhĩ nẽ mẽ omunh mex kaxyw.

Tirtũm kot tanhmã mẽ kot amnhĩ tomnuj xwỳnhjê nhĩpêx to hã harẽnh

Sikũn Pêtre 2.1-17; Sikũn Ximotre 3.1-9

⁵ Nẽ amnepê mã mẽ panhĩgêjtjaja kormã Ejit kamã mẽ pa ri nhũm Tirtũm Ejit nhõ xwỳnhjê rũm mẽ kator pa. Hãmri nhũm mẽ hkwyjaja tanhmã hamaxpêr to nẽ axtem nẽ amnhĩ kaxyw hkôt hamaxpêr kêt nẽ. Nhũm tee ri amnhĩ tã mẽ omu nẽ ã mẽ kot amnhĩ nhĩpêx anhỹr xwỳnhjê nhĩmex pa. Ra mẽ ate mẽ harẽnh mar mex tã pa axte mẽ amã mẽ harẽ.

⁶ Nẽ Tirtũm kapêr o mẽ wrỳk xwỳnh kwỳjaja. Na prem Tirtũm nhỹ hã kapêr o pa htã tanhmã hamaxpêr punuj to nẽ ra kãm ja ho anhỹr prãm nõkati nẽ Tirtũm kaga. Jakamã nhũm mẽ hã amỳnê nhũm mẽ unê nẽ kàx o

mẽ hkaxpre pa. Nẽ nhỹri pika kaxwỳnh kãm kamãt kô htyk kãm mẽ kurẽ nhũm mẽ arĩ kamã hkrĩ ho hkrĩ. Nom koja nhỹrmã Tirtũm kot tanhmã mẽ pahpiitã mẽ pajarẽnh to xà hã arĩgro kato nhũm mẽ rĩ kormã hapôx pa. Hãmri nẽ kot amnhĩ tomnuj mỳrapê ma mẽ kot amnhĩ xà htỳx kamã hamak tũm xàta wỳr ma hapêx.

⁷ Nẽ krĩ pê Sotõ nẽ Komo nhõ xwỳnhjaja na prem haxwỳja kãm Tirtũm kapêr kôt amnhĩ nhĩpêx prãm kêt nẽ. Nẽ krĩja wa hpuhã krĩ hkwy kamã ri mẽ pa xwỳnhjaja haxwỳja mẽ uràk nẽ nẽ kãm kapêr mar prãm kêt nẽ. Na prem amnhĩ tomnuj tỳx rãhã ho pa. Nẽ axtem nẽ axpên pê ri mẽ hprõ ho amnhĩkati ho pa. Nẽ mễmy hkwyjaja ri axtem nẽ axpên to amnhĩkati ho pa. Hãmri nhũm Tirtũm tee ri mẽ kot amnhĩ nhĩpêxja ã omu nẽ mẽ hipy kuwy hpôk kwỳ rẽ nhũm mẽ amnhĩ wỳr omu nẽ kãm ma xàj tee ri hprôt kaprỳ. Nẽ hprôt kaxyw ôrkwỹ rũm hapôj nẽ hxêt pa nẽ hapêx. Na hte ã Tirtũm mẽ kot amnhĩ tomnuj o mẽ pa xwỳnhjê nhĩpêx anẽ. Jakamã koja nhỹrmã kuwy hpôk rãhã xwỳnhhta wỳr mẽ piitã mẽ rẽnh pa nhũm mẽ kamã amnhĩ xà htỳx kamã hamak rãhã ho pa ho pa nẽ aa à hapêx kêt nẽ. Nẽ à htỳx rãhã papa ho pa. Tã mẽ pahte Sotõ mẽ Komo nhõ xwỳnhjê jarẽnh mar nẽ mẽ pahte amnhĩ tomnuj kaga

kurê kumrêx kaxyw na pre Tirtûm ã mẽ pamã mẽ harênh o amnhîrît anê.

Mê hpijaàm kêt xwÿnhjê jarênh

Sikûn Pêtre 2.10

⁸ Nê mẽ kot Tirtûm kapêr o pihkâr xwÿnhjaja na htem ã mẽ kot amnhî nhîpêx anhÿr xwÿnhjê pyrã nê amnhî tomnuj tÿx pix o ri pa. Jakamã na htem tanhmã hpimtir punuj to hãmri nê hkrã hapôj nê hpimtir xà hkôt tanhmã amnhî tomnuj to. Jao hkwÿjê kamã hpijaàm kêt o pa. Rÿ mẽnijê hõ rÿ mẽmyjê hõ nhùm mẽ axpên kãm hpijaàm kêt o pa. Rÿ Tirtûm kapêr o mẽ wrÿk xwÿnhjê ho kapêr punuj nê. Kapêr mã gêt o tanhmã mẽ ho kapêr punuj to. ã na htem hpimtir punuj xà hkôt amnhî tomnuj o pa anê.

⁹ Tirtûm kapêr o mẽ wrÿk xwÿnh krãhtûm Mikewja. Kêp mẽ hkrãhtûm tâ aa mẽ kãm kapêr mã gêt kêt nê. Na pre Mojes ty nhùm Mikew ra ma hwÿr tèn wrÿ. Nê kuri Satanasti pumu hãmri nê Mojes nhî nê tanhmã kãm kapêr to. Nom kapêr mã gêt o kãm kapêr kêt nê. ãm kapêr mã hprî ho kãm kapêr nê kãm:

—Kwa ãm omu kê nõ. Kot kaj tanhmã ho nhùm Tirtûm apumu nê hã tanhmã hã ato. Anê.

¹⁰⁻¹¹ Nom ixte mẽ amã mẽ hpimtir punuj jarênh xwÿnhjaja. Mẽ kot Tirtûm kapêr o pihkâr xwÿnhjaja kot hprî hã Tirtûm kot amnhî nhîpêx ã harênh mar kêt jakamã na htem htÿx ri ho

kapêr o haprÿ ho pa. Te ho mry xoprêja hamaxpêr kêt nê htÿx ri amnhî nhîpêx o pa pyrãk. Nom koja nhÿrmã Tirtûm mẽ homnuj tÿx nê.

Te mẽ kot finat Kaï kot amnhî tõi hpîr xwÿnh kot amnhî nhîpêxta pyrãk. Nê te mẽ kot finat Paraãw kot amnhî nhîpêx pyrã nê kàxpore rûnh prãm xaj Tirtûm kapêr kuhpa hã tanhmã amnhî nhîpêx to ho pa. Nê te mẽ kot finat Kore kot amnhî nhîpêx pyrã nê Tirtûm kot mẽ kaxyw mẽ õ pahi xãm xwÿnhhta kutã amnhî xunhwÿ. Mÿrapê koja mẽ jajê pyrã nê kuwy hpôk rãhã xwÿnhhta wÿr ma hapêx pa.

¹² Na ka htem apê Jejus kwÿ hã axpên wÿr akuprõ. Nê tõi hã mẽ apê hkwÿ hã amã axpên kînh ã axàpkur kaxyw axpên wÿr akuprõ. Nhùm ixte mẽ amã mẽ harênh xwÿnhjaja mẽ akôt agjê nê mẽ akutã apku. Jakamã kwa mẽ o kora mẽ amnhî nê mẽ omunh mex nê. Mẽ hipêx o te mẽ ate mẽ axàpkur xã hã mẽ anhõ kamã kênre pumunh nê hanhir nê rênh pyrã nê amnhî nhîhkô hã mẽ pumu nê amnhî nê hanor kurê kumrêx. Na htem hpijaàm kêt kãm amnhî pix kukamã hamaxpêr pê apkur rûnh o pa.

Te na wrÿk kaxyw htyk rax nê mõi nhùm mẽ kot omunh nê wrÿk ã hkamnhîx tâ nhùm kôk kot nhãm mênh nhùm wrÿk kêeta pyrãk o na htem amnhî nhîpêx. Jao te mẽ kot ãm hãmri mẽ amã Tirtûm kapêr jarênh mex pyrãk tâ mẽ amã ho hêx.

Nē te mē kēp mēmo pī hpār ra ô mā tām tā ām htỳx rā nē aa ô hkēt nhūm mē kot krāhyr nē mēnh nhūm grà parta pyrāk.

¹³ Nē te mē kēp gô xujanār kot amnhī nhīpēx pyrāk. Na hte gô xujanārja hakāx wỳr kapē nē mra nhūm hamrô kỳxpē amgrà kamā arīk nhūm gô awjanā nē ma akupỳm hipôk wỳr mra. Ja pyrāk na htem ma nhỹhỹm mra nē mē kām mēmoj jarē nē nhām mra nē mē kām mēmoj jarē nē ma akupỳm mē kurūm mra. Nhūm mē mar xà hkôt amnhī tomnuj rāhā ho pa.

Nē te mē kot kaxkwa hā kanhēre nhỹhỹm htēm nhūm mē kot nhỹhỹm htēm xà hkôt omunh kēēta pyrāk. Jakamā koja Tirtūm nhỹrmā kamāt kô kamā mē rēnh pa nhūm mē aa hapôx kēt nē.

Mē kot amnhī tomnuj xwỳnhjē hkukamā mē harēnh Apokarip 20.11-15

¹⁴ Nē na pre finat Enokja amnepē mā ā mē kot amnhī tomnuj anhỹr xwỳnhjē hkukamā tanhmā mē harēnh to. Mē kot Tirtūm kapēr o pihkār o ri mē pa xwỳnhjaja nhūm mē hkukamā mē harē. Enokja finat Atāw kanrēhā htāmnhwỳ na pre. Tā ā mē kot amnhī tomnuj anhỹr xwỳnhjē hkukamā mē harēnh o:

Koja nhỹrmā Pahihtija man pika hwỳr akupỳn wrỳ. Kapēr o mē wrỳk xwỳnh sohtô rax mē mē hpimràatā akupỳn wrỳ.

¹⁵ Hāmri nē mē pahpiitā kormā mē pahtūr ri mē pahte tanhmā amnhī nhīpēx to ho papa hā mē pahpumunh xà hkôt tanhmā mē pajarēnh to. Hāmri nē mē kot Tirtūm kapēr o hēx o pa xwỳnhjē pumu nē tanhmā mē harēnh to nē mē harēnh o: “Jajaja na pre mē kām Inhīpēēxā Tirtūm prām kēt nē ri kapēr kwỳm pix mā amnhī nhīpēx o pa. Nē kapēr punuj o pa. Ā na prem amnhī nhīpēx anhỹr rāhā ho pa.” Anhỹr o mē harē nē amnhī nē kuwy hwỳr mē kurē nhūm mē amnhī xà htỳx kām hamak o pa rāhā nē pa ho pa. Anē.

Ā na pre finat Enokja mē hkukamā mē harēnh anē.

¹⁶ Ām hāmri na mē harē. Tā na hte arī mē hkwyjaja ā amnhī nhīpēx anē. Nē hamaxpēr mex kēt nē. Na htem nhām tanhmā mē ho kapēr punuj to pix kukamā hamaxpēr. Nē amnhī krā hkôt htỳx ri tanhmā amnhī tomnuj to ho pa. Nē amnhī to jarkrar rāhā nē. Nē hēx rom mē kēp mēmoj jamỳnh kaxyw tanhmā mē kām hēx to.

¹⁷ E Kris kôt ixkrāmnhwỳjaja. Koja mē ā mē amā Tirtūm kapēr o hēx anhỹr o mē akôt pa ka mē ama nē ām mē ama nē mē kapēr mar kēt nē. ām mē panhō Pahihti Jejus Kris nhỹ hā mē ajahkre o mē pa xwỳnhjaja kot tanhmā mē amā mē harēnh toja mā mān kēt ajamaxpēr tỳx rāhā o ri apa.

¹⁸ Na prem mē amā mē harēnh o:

—Jejus akupÿn wrÿk xwÿj ri koja mēmojaja mē awÿr mran pōj. Nom mē kot Jejus kapēr kwÿm amnhĩ krā hkōt tanhmā amnhĩ nhĩpēx to xwÿnhjaja koja mē. Hāmri nē mē apē Jejus kwÿ hā mē apumu nē mē atā akunha nē mē atā hpēr o axkē nē Tirtūm ā hpēr o axkē nē kapēr ā kagā hā hpēr o axkē. Anē.

19 Ā mē kot amnhĩ nhĩpēx anhÿr xwÿnhjaja mē pahpē Jejus kwÿjaja mē pahte xepēn kutā amnhĩ xunhwÿrja na mē kām hprām. Mē kamā Tirtūm Karō gjēx kēt jakamā mē kām amnhĩ krā hkōt pix mā tanhmā amnhĩ tomnuj to ho pa hprām.

Mē pahte Kris akupÿn wrÿk jamār pē tanhmā amnhĩ nhĩpēx to hā mē pamā karō

Matêwre 24.45-51; Rukre 12.25-40; Karatas 6.1-2; Xiakre 5.19-20; Sikūn Pētre 3.12-15

20 Kwa mē apē Jejus kōt ixtō nē ixtōxjaja kēr ka mē ā mē kot amnhĩ nhĩpēx anhÿr o mē pa xwÿnhjē rom apkati mē amnhĩ kaxyw Jejus pix mā mān ajamaxpēr rāhā ho ri apa. Te mē kot mē hakre hā ra āptār nē amnhĩ krām mē hakre xā jagjēnh tÿxta pyrāk.

Jao Tirtūm kapēr mar tÿx nē hkōt amnhĩ nhĩpēx mex o ri apa.

Nē Karō nhÿ hā amnhĩ to hwÿr rāhā nē.

21 Nē Tirtūm kām mē pajapē hā kām ajamaxpēr rāhā ho ri apa.

Nē Pahihtu Jejus Kris kām mē pajapē hā kām ajamaxpēr tÿx rāhā ho apa.

Koja nhÿrmā kām mē pajapē hā akupÿn mē pahwÿr wrÿ nē tanhmā mē pahto mex to pu mē kuri pahtir tūm nē pahkīnh nē papa ho papa. Tā kēr pu mē arī akupÿn mē pahwÿr wrÿk xā hā arīgro jamār rāhā ho papa.

22 Nē mē pahkwÿjaja kormā mē kot Jejus kōt amnhĩ xunhwÿr tÿx kēt xwÿnhjaja kēr ka mē kamā axukaprī nē aprī hā mē kām Tirtūm kapēr jarēnh o ri mē hkōt apa.

23 Na pre ra mē hkwÿjaja mē kot Tirtūm kapēr o pihkār xwÿnhjē kapēr ma nē mē hkōt amnhĩ nhĩpēx. Jakamā kēr ka mē ja hā mē omu nē te mē ate kuwy hpōk rūnh nē mē hpa hā mē hamÿnh nē nhām mē rēnh pyrāk o mē hipēx. Jao mē kot nhÿrmā Tirtūm kapēr o pihkār xwÿnhjē hkōt kuwy hpōk rūnhhta wÿr pa pymaj mē nē mē kām akapēr kām axihtÿx o ri mē hkōt apa. Kē mē ama nē mē hkaga nē mē hkōt ri amnhĩ nhĩpēx kēt nē.

Nē htÿx ri mē kot amnhĩ tomnuj o mē pa xwÿnhjaja kēr ka mē kamā axukaprī ho ri apa nē mē kamā agryk tokyx anhÿr kēt nē. Xatā mē kām Tirtūm kapēr jarēnh rāhā ho ri mē hkōt apa. Nom kwa mē okora kēr ka mē kot amnhĩ nhĩpēx o amnhĩ nhĩpēx o ri apa hkēt nē. Kwarī ho kwarī.

*Jutre kot Tirtũm mã mex o
mex ã harẽnh*

Wam Pẽtre 1.5-7

²⁴ Nẽ kẽr pu mẽ Tirtũm mã
amnhĩ jarẽnh kaxyw nẽ ã kãm
amnhĩ jarẽnh anẽ nẽ kãm:

—Pa Tirtũm. Nà ãm hãmri
na ka hte amnhĩ kõt mẽ ix-
unhwỳr tỳx nẽ pa mẽ akaga
hkêt nẽ akõt amnhĩ nhĩpêx
rãhã ho ri ixpa. Kot kaj
nhỹrmã amnhĩ wỳr mẽ ixto
apĩ pa mẽ Akra mẽ war akuri
axte tanhmã amnhĩ tomnuj
to hkêt nẽ. Nẽ amnhĩ to mex
pê anhĩrã htỳx rax kãm ixpa.
Jao ixkĩnh tỳx nẽ ixpa ho ixpa.

²⁵ —Apê mẽ inhõ Tirtũm ã
apyxi mex kumrẽx na ka. Na
ka pre Pahihti Jejus Kris kuk-
wak ri mẽ ixpiitã mẽ ixte
amnhĩ tomnuj pê mẽ ixpytã.
Nẽ na ka hte anhĩrã htỳx rax
rãhã ri apa. Nẽ amex o
amex nẽ axihtỳx o axihtỳx nẽ
axàhpumunh o axàhpumunh.
Nẽ apê mẽ inhõ Pahi Maati
hã apyxi mex na ka. Am-
nepê mã kormã mẽmoj kêt ri
ka pre ã amnhĩ nhĩpêx anhỹr
o apa rãhã nẽ. Tã arĩ ã ate
amnhĩ nhĩpêx anhỹr ho apa
ho rãhãã. Nẽ kot kaj apkati
mẽ ã ate amnhĩ nhĩpêx anhỹr
ho rãhãã. ã ate amnhĩ nhĩpêx
anhỹr o apa ho rãhã ho rãhã.
Tã ãm ja pix na hapêx. Anẽ.

E kẽr pu mẽ ã Tirtũm mã
mex o mex ã harẽnh anhỹr o
papa.

Ãm ja pix. Ixpê Jutre na
pa mẽ awỳr kagàja nhĩpêx nẽ
kumẽ.

Apokarip Juāw kot Jejus nhỹ hã mẽmoj kukamã harēnh

Juāw na pre mẽ pamã kagàja nhĩpêx. Juāw Paxis kêt axtem Jejus nhỹ hã hkrajê jahkre ho mẽ pa xwỳnhjê hõ pê Juāw na pre hipêx. Na pre Jejus ã mẽ kãm hkurê xwỳnhjaja unê nê ma gô hipôk pê Patos wỳr kumẽ nhũm kêp prês nê gô hipôk kãm pa ho pa nê aa kurũm kator kêt rãhã ty.

Jakamã kormã htĩr ri nhũm Tĩrtũm kapêr o wrỳk xwỳnhjê hõ gô hipôkja wỳr wrỳ nê kãm mẽmoj kukamã awjarê nhũm kuma nê hkôt mẽmoj pumu. Te hpimtir kãm mẽmoj pumunh pyràk. Hãmri nê omu nê kuma nê amnhĩ xô ri mẽ pamã hã kagà. Na pre mẽmoj to axkrunẽpxi nê hã kagà. Mẽ kot Jejus kutã amnhĩ xunhwỳr xwỳnhjaja kot Jejus ã tanhmã kêp hkwyjê to ho pa nhũm mẽ hkwyjaja pikaprãr ã kagà. Nê Jejus kêp Pahi Maati hã kot nhỹrmã mẽ kot Tĩrtũm kutã amnhĩ xunhwỳr xwỳnh piitã ma mẽ kot amnhĩ xà htỳx kamã hamak tũm xà hwỳr mẽ rēnh par ã kagà. Nê Tĩrtũm kot nhỹrmã hkrajê ho mex kumrêx ã nhũm mãnēn hã kagà. Hãmri nê mẽ pamã hã kagà o:

1-2 E kot paj mẽ amã awjarê nê hã kagà. Ixpê Juāw ixte Tĩrtũm mã tanhmã amnhĩ

anhĩpêx to ho ixpa xwỳnh kot paj mẽmoj jarē nê hã kagà. Na pre Tĩrtũmja Jejus mã mẽmoj kukamã tanhmã ujarēnh to ho ra kãm ho amnhĩrĩt pa. Kot amnhĩ xô ri mẽ pahte hkôt amnhĩ xunhwỳr xwỳnhjê mã harēnh kaxyw. Hãmri nhũm kuma nê kot amnhĩ xô ri inhmã ujarēnh kaxyw man ixwỳr kapêr o wrỳk xwỳnh mẽ nhũm man ixwỳr wrỳ nê ô ri inhmã mẽmoj to amnhĩrĩt pa. Æm hãmri ã inhmã mẽmoj to amnhĩrĩt anê. Tã kot paj amnhĩ xwar mẽ apê Jejus kôt ri mẽ apa xwỳnhjê mã harē nê hã kagà. Mẽ ate mar nê axkãm ajamak rom nê ri apa kaxyw. Nà ixte hã kagà mã xwỳnhja koja tanhmã amnhĩ to nê tokyx mẽ pahwỳr wrỳ.

³ Jakamã kwa kêr ka mẽ aprĩ hã kagàja kamã harē nê ama nê hkôt pix mã amnhĩ nhĩpêx nê mẽ piitã mẽ kãm kamã harēnh o ri mẽ hkôt apa. Kot kaj mẽ ã amnhĩ nhĩpêx anê nhũm Tĩrtũm ja hã mẽ ato mex ka mẽ akĩnh nê apa ho apa. Nê mẽ kot mẽ ax-ujarēnh mar nê hkôt amnhĩ nhĩpêx xwỳnhjaja koja Tĩrtũm ja hã mẽ omu nê mẽ ho mex nê nhũm mẽ apyrã nê hkĩnh nê pa ho pa.

Juāw kot krĩ pê 7 kôt Jejus kwỳjê hwỳr kagà rēnh

⁴ E ixpê Juāw kot paj atar pika pê As kamã krĩ pê 7 pi-itã hkôt mẽ apê Jejus kwỳ hã axpēn wỳr mẽ apikuprõnh xwỳnhjê hwỳr kagà nê kurê ka mẽ kamã harē nê ama.

Na pa hte mẽ ato Tĩrtũm wỳr rāhā ho ri ixpa. Nẽ mẽ ato hwỳr o:

—Pa Tĩrtũm. Kwa kēr ka pika pē As kamā akrajē ho mex nẽ mẽmoj to mẽ kutā anojarēt rāhā ho apa. Kē mẽ hamakētkati nẽ àmnhĩx ri pa ho pa. Ja na inhmā hprām. Anē.

Tĩrtũmja rāhā ho rāhā. Amnepēm kormā mẽmoj kēt ri nhũm pre ra rāhā ho rāhā. Nẽ koja nhỹrmā mẽmoj akupỹm hapêx par tā nhũm Tĩrtũm aa hapêx kēt kumrêx. Koja arĩ rāhā ho rāhā. Na hte kaxkwa kamā kot mẽ pahto amnhĩptār ā hkrĩ xà kamā mẽ papytār rāhā ho hkrĩ.

Nẽ Tĩrtũm Karō te kot Tĩrtũm kot mẽ pahto amnhĩptār xà hā hkrĩ xà kapem kanē maati pixi kamā kwryt pē 7 xām xwỳnhhta pyrāk. Na hte Tĩrtũm nhĩhkō hā hkrĩ ho hkrĩ. Tā kē mẽ ato mex rāhā ho pa.

5 Nẽ Jesusja na pre hte Tĩrtũm kapēr o mẽ ahkre mex o pa nẽ aa hkaga hkēt nẽ. Tā nhũm prem axtem nẽ kupĩ. Hāmri nhũm Tĩrtũm akupỹm ho htĩr. Jesus kumrêx ho htĩr nhũm htĩr o htĩr. Nẽ kēp pika piitā hkôt pahi piitā nhō Pahihti. Kām mẽ pajapê htỳx jakamā na pre mẽ panê ty nẽ hkamrōja te mẽ panê hpikapĩr pyrāk o amnhĩ nhĩpêx. Nẽ htyk o mẽ pahte amnhĩ tomnuj pānhā amnhĩre. Jao te mẽ pahte amnhĩ tomnuj pē mẽ papytār par pyrāk o mẽ panhĩpêx.

6 Nẽ na pre mẽ pahpê patre nẽ mẽ piitā mẽ ho Hipêêxà Tĩrtũm wỳr o papa kaxyw mẽ paxunhwỳ. Nẽ kēp mẽ panhō Pahi Maati hā kām hprām xà hkôt mẽ pahte kām tanhmā amnhĩ nhĩpêx to ho papa kaxyw mẽ paxunhwỳ. Jakamā kwa kēr pu mẽ kām mex o mex nẽ hihtỳx o hihtỳx ā mǎn harēnh rāhā ho papa.

7 Nẽ koja tokyx akupỹn mẽ pahwỳr kakrā kamā wry pu mẽ pahpiitā wryk kām omu. Nhũm mẽ kot hpĩr xwỳnhjaja tee ri amnhĩ wỳr omu. Nẽ pika piitā hkôt ri mẽ pa xwỳnhjaja omu nẽ mẽ kot amnhĩ tomnuj jakamā tee ri amnhĩ kukamā hamaxpēr o kām ma htỳx kumrêx. Hāmri nẽ kām ma xàj mur nẽ htertet o kuhê. Koja nhỹrmā Jesus akupỹn wry nhũm mẽ amnhĩ wỳr omu nẽ ā amnhĩ nhĩpêx anē.

8 Nẽ Tĩrtũm na hihtỳx o hihtỳx nẽ àhpumunh o àhpumunh. Nẽ aa kot mēhō ni rũm kator kēt. Na hte amnhĩ jarēnh o:

—Ixrāhā ixpa xwỳnh na pa. Amnepê mã kormā mẽmoj piitā hkēt ri pa pre ra ixrāhā ri ixpa ho ixpa. Nẽ koja nhỹrmā mẽmoj akupỹm hapêx tā pa arĩ ixrāhā. Anē.

Juāw kot Jesus akupỹm htĩr ā omunh

9 Nẽ ixpê Jesus kôt mẽ atō Juāw na pa hte mẽ apyrà nẽ Jesus kôt amnhĩ nhĩpêx nhũm hte mẽ kām Jesus kurê xwỳnhjaja mẽ apyrà nẽ hā inhĩpêx kati ho pa. Mẽ pahte hkôt ri amnhĩ nhĩpêx o papa

jakamã na htem hã mẽ pah-
tomnuj tỳx rãhã ho pa. Tã
pu htem ỹ hã mẽ kutã amnhĩ
to htỳx nẽ arĩ hkôt amnhĩ
nhĩpêx. Jakamã na pa pre
Tĩrtũm kapêr o mẽ ajahkre
rãhã ho ri mẽ akôt ixpa. Nẽ
Jejus kêp mẽ panhõ Pahihtĩ
hã mẽ amã harê. Mỳrapê
na prem hã ixpynê nẽ man
amnê ixto tẽ nẽ jar gô hipôk
pê Patos kãm inhmẽ pa kamã
ixpê prês nẽ ixpa ho ixpa.

¹⁰ Tã nhũm tômĩk pa Tĩrtũm
mã amnhĩ jarênh o nhỹ.
Hãmri nhũm Karõ tanhmã
ixkrã hto pa te ixpimtir
kãm mẽmoj pumunh pyrã nẽ
amnhĩ katut kôt mẽhõ kapêr
ma. Te kot pifti kakôr tỳx
pyrãk pa kuma.

¹¹ Hãmri nhũm inhmã
kapêr nẽ inhmã:

—Pa Juãw? E kot paj amã
mẽmoj to amnhĩrit ka omu nẽ
akwỳjê mã hã kagã. Nẽ hã
kagã hpa hãmri nẽ ahpỳnhã
krĩ hkwỳ hkôt mẽ kêp ixkwỳ
hã axpẽn wỳr mẽ pikuprõnh
xwỳnhjê hwỳr arê. Mẽ kot
kamã harênh nẽ mar nẽ
axkãm hamak rom nẽ ri pa
kaxyw. Epes wỳr nẽ Emĩnã
hwỳr nẽ Pekamõ hwỳr nẽ
Xijaxir wỳr nẽ Satre hwỳr nẽ
Pirate hwỳr nẽ Raxisej wỳr.
Krĩ pê 7ja piitã hwỳr ixkapêr
ã kagã nẽ mẽ hwỳr arê kê mẽ
apyrã nẽ mẽmoj jarênhja ma.
Anê.

¹² Hãmri pa ixte mẽhõja
pumunh kaxyw ho ijakêx nẽ
kanê hkwỳ pumu. Kanê kêp
7 nẽ piitã ôr o.

¹³ Nẽ kanê nhĩpôk ri mẽhõja
te panhĩ pyrã nẽ pahĩ hã ê

mex kãm xa. êja hpar kôn kôt
hitep nhũm xa. Nẽ pahĩ hã
mẽ hinô hpre xà ho amnhĩ
nhĩnô hpre nẽ xa. Hinô pre
xàja ôr pix o.

¹⁴ Nẽ hkrã hkĩ te kaxat nhĩ
jaka pyrã nẽ hakaajre. Nẽ no
te kuwy hpôk pyrã nẽ hkarỳr
tỳx nẽ.

¹⁵ Nẽ hpar te mẽmo kàx
karỳr tỳx pyrãk. Nẽ kapêr te
gô hprôt tỳx koko pyrãk.

¹⁶ Na pre upôk rũm kanhêti
ho 7 nẽ hamỳ nẽ o xa. Nẽ
hakwa rũm wapo pôm kato
nẽ akutã wa gixre nẽ ajêt. Nẽ
hkuk kamã hirã htỳx kumrêx.
Te myt kot mẽ pano hã harir
nhũm gêk tỳx pyrãk. ã mẽhõja
kot anhỳr.

¹⁷ Pa tee ri tanhmã kute
hã omu nẽ inhmã ma htỳx
kumrêx nẽ umaj tẽm nẽ hpar
pê te ixtyk pyrã nẽ nõ. Hãmri
nhũm ixtã upôk rũm ãhkraja xi
nẽ inhmã kapêr nẽ inhmã:

—Kwa amã ixpuma hkêt nẽ.
Pa na pa. Amnepê mã ko-
rmã mẽmoj kator kêt ri pa pre
raa. Nẽ ixrãhãã. Koja nhỹrmã
mẽmoj akupỳm hapêx pa arĩ
ixrãhã ixpa ho ixpa.

¹⁸ —Na pa pre ty tã akupỳm
ixtĩr. Nẽ ixtĩr o ixtĩr. Kam
ixpumu. Kot paj axte ixtyk
kêt nẽ. Ixpê mẽhtykjê hpãm
jakamã papxipix na pa hte
mẽ htyk ã arĩgro jarê nhũm
mẽ hã ty nẽ ma mẽhtykjê pa-
pxã hwỳr ma pa.

¹⁹ —E kêr ka ate mẽmoj
pumunh xwỳnhhta pumunh
tỳx nẽ akwỳjê mã hã kagã.
Nẽ mẽmoj kormã kot amnhĩ
nhĩpêx kêt nhũm ate omunh
mã xwỳnhhta ka inhỹ hã mẽ

kām hã kagà. Mě kot kamã harēnh nē mar tỳx kaxyw.

²⁰ —Ně kot paj axte ixprĩ hã ate mēmoj pumunh xwỳnhhta jarē ka inhma. Nà kanē pē 7ta te mē kot krĩ hkwȳ pē 7 kamã mē kēp ixkwỳ hã axpēn wỳr mē pikuprōnh xwỳnhjē pyrāk. Nē inhĩhkra kamã kanhēti pē 7ta te kēp inhmã mē kot mē hamãr xwỳnhjē pyrāk. Anē.

2

Epes kamã Jejus kwỳjē hwỳr kagà

¹ Nhũm Jejus arĩ inhmã kapēr nē inhmã:

—E kēr ka krĩ pē Epes kamã ixkwỳjē jamãr xwỳnh wỳr kagà nē amē. Nē kagàja kamã mē kãm ixkapēr jarē nē mē kãm:

Pa Epes kamã ixkapēr mar kaxyw axpēn wỳr apikuprōnh xwỳnhjaja. Ot pa mē awỳr ixpēr mē. Ixpē ixupōk o kanhēti ho 7 nē hamỳnh nē ho ixãm xwỳnhhta na pa. Nē ixpē ôr o kanē pē 7 nhĩpōk ri ixpa xwỳnhhta na pa ã mē awỳr ixpēr mēnh anē.

² Na pa hte tanhmã mē ate amnhĩ nhĩpêx to ho apa hã mē apumunh mex o ixpa. Na ka htem inhmã amnhĩ nhĩpêx mex nē pa ja hã mē apumu. Mě kot ixtã mē anhĩpêx kati htã ka mē kutã amnhĩ to htỳx nē ixkaga hkêt nē. Nē mē kot amnhĩ tomnuj xwỳnhjē hkôt amnhĩ nhĩpêx o ri apa hkêt nē. Nhũm ixte mē awỳr mē rēnh ã amnhĩ to

hêx xwỳnhjaja mē awỳr pan pōj ka mē aprĩ hã mē kot amnhĩ to hêx ã mē omu. Hãmri nē tee ri mē kot amnhĩ nhĩpêx ã mē omu nē amnhĩ nē mē hanor kurē kumrêx. Ām hãmri na ka htem ã mē nhĩpêx anē.

³ Nē mē kãm ixkurē xwỳnhjaja kot tanhmã ixtã mē atomnuj tỳx to htã ka mē kutã amnhĩ to htỳx nē aa ixkaga hkêt nē. Nē ixkôt amnhĩ nhĩpêx mex rãhã ho ri apa. Ām hãmri na ka htem ã amnhĩ nhĩpêx anhỳr o ri apa.

⁴ Ām mēmoj pixi na ixpē omnuj. Amnepē mã kormã mē ate ixkôt amnhĩ xunhwỳr nyw ri na ka prem amã axpēn kĩnh nē axpēn to mex o ri apa. Nē mē amã axpēn tã ma ho te mē amã amnhĩ tã ma pyrāk o axpēn nhĩpêx. Tã tanhmã ajamaxpēr to nē axte ã axpēn nhĩpêx anhỳr kêt nē. Jao te mē amã ixkĩnh kêt pyrāk o amnhĩ nhĩpêx. Pa tee ri ja hã mē apumu nhũm ja inhmã mex kêt nē.

⁵ Kwa mē tokyx ja hã amnhĩ pumu nē akupỳm mē ate ixkôt amnhĩ xunhwỳr nyw ri mē ate axpēn nhĩpêxta o akupỳm axpēn nhĩpêx o apa. Kot kaj mē anhỳr kêt kot paj te mē apê mē anhō kanē hpyr nē kapôt ã mēnh pyrāk o mē anhĩpêx ka mē ri apa nē gaa nē apikaprãr pa. Tã mēhō koja mē amỳr pē mē anhō krĩ kamã mē kãm ijarēnh o pa?

⁶ Nē mē kēp Nikoraw nhō

xwÿnhjaja na ka htem mẽ kot tanhmã amnhĩ tomnuj to hã mẽ omu nẽ ixpyrà nẽ apê ja hprãm nõkati nẽ mẽ hkôt ri amnhĩ nhĩpêx kêt nẽ. Pa ja hã mẽ apumu nẽ ixkĩnh nẽ.

⁷ Tã ixte mẽ amã ixkapêr jatur xà na ja. Kot kaj mẽ amã ixkapêr mar prãm hã kot kaj mẽ ã Tirtũm mẽ wa Ixkarõ nhỹ hã ixte mẽ amã ixkapêr anhỹrja ma nẽ kãm ajamaxpêr tỳx rãhã ho ri apa.

Tirtũm nhõ krĩ kamã mẽmo pĩ hpâr kuhê xwÿnh. Mẽ kot ô hkur nẽ axte htyk kêt nẽ pa ho pa mã xwÿnhta. Kot kaj mẽ ate amnhĩ tomnuj nẽ amnhĩ to htỳx nẽ arĩ inhmã hprãm xà hkôt amnhĩ nhĩpêx rãhã ty pa akupỹm mẽ ato mẽ atĩr nẽ ma pĩ hpârta wỳr mẽ arẽ. Ka mẽ ma hwỳr mra nẽ ô hõ hta nẽ akrẽ nẽ axte atyk kêt kumrêx nẽ apa ho apa.

E ãm ja pix na hapêx.

Anẽ.

—E Juãw. Kêr ka Epes kamã ixkwỳjê jamãr o pa xwÿnhta wỳr ã ixkapêr ã kagà anẽ nẽ mẽ hwỳr amẽ. Anẽ.

Hãmri pa kuma nẽ ô ri mẽ kãm hã kagà hpa.

Emĩnã kamã Jejus kwỳjê hwỳr kagà

⁸ Hãmri nhũm hpãnhã Emĩnã nhõ xwÿnhjê kaxyw inhmã kapêr nẽ inhmã:

—Nẽ hpãnhã Emĩnã kamã ixkwỳjê jamãr xwÿnh wỳr kagà nẽ mẽ hwỳr amẽ. Nẽ mẽ

kãm ixkapêr jarẽ nẽ nẽ mẽ kãm:

Pa Emĩnã kamã ixkapêr mar kaxyw axpên wỳr mẽ apikuprõnh xwÿnhjaja. Ot pa mẽ awỳr ixpêr mẽ. Ixrãhã ho ixrãhã ixpa xwÿnhta na pa. Amnepêm kormã mẽmoj piitã hkêt ri na pa pre ixrãhã nẽ ri ixpa. Koja nhỹrmã mẽmoj akupỹm hapêx pa arĩ ixrãhã ho ixrãhã nẽ ri ixpa. Na pa pre ty no ãm akupỹm ixtĩr o ixtĩr. Tã pa ã mẽ awỳr ixpêr mẽnh anẽ.

⁹ Nà na pa hte mẽ ate tanhmã amnhĩ nhĩpêx to ho apa hã mẽ apumunh rãhã ho ixpa. Na hte mẽ kãm ixkurê xwÿnhjaja ixtã mẽ atomnuj to ka mẽ apê amrakati nẽ ri apa. Nom mẽ ate tãm amnhĩ nhĩpêx jakamã te mẽ apê mẽ hikukrêx rũnh kumrêx xwÿnhjê kot amnhĩ nhĩpêx pyrà nẽ ixkukwak ri akĩnh rãhã ri apa. Na hte mẽ kêp Ijaew ã amnhĩ to hêx xwÿnhjaja mẽ ato kapêr punuj rũnh o pa. Mẽ kot Tirtũm kôt amnhĩ nhĩpêx ã amnhĩ jarênh tã no ãm hkôt amnhĩ nhĩpêx kêt nẽ. ãm Satanasti kôt pix mã na htem amnhĩ nhĩpêx o pa.

¹⁰ Tã mẽ kãm ixkurê xwÿnhjaja kot ixtã mẽ atomnuj tỳx o pa htã kêr ka mẽ amnhĩ tã mẽ omu nẽ tee ri amnhĩ kukamã ajamaxpêr kêt nẽ. Nẽ arĩ mẽ kutã amnhĩ to htỳx nẽ. Koja Satanasti mẽ akwỳjê pynê nẽ mẽ ajagjê. Hãmri nẽ mẽ ate ixkaga hprãm

xàj tanhmã mẽ anhĩpêx kati hto ka mẽ hagjênh xà kamã amnhĩ xà htỳx kamã ajamak o atã arĩgro pê 10. Nom kêr ka mẽ kutã amnhĩ to htỳx nê ixkaga hkêt nê. Mẽ kot mẽ apar mã tã ka mẽ kutã amnhĩ to htỳx nê. Kot kaj mẽ aa ixkaga hkêt nê ixkôt ri amnhĩ nhĩpêx rãhã ty pa akupỳm mẽ ato mẽ atĩr nê ma amnhĩ wỳr mẽ ato api. Hãmri ka mẽ Tĩrtũm mẽ wa ixri amex nê atĩr tũm nê apa ho apa nê axte atyk kêt nê apa.

11 E ixkrajaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêrja anhỹr ma nê kãm ajamaxpêr tỳx rãhã ho ri apa. Kot kaj mẽ ate amnhĩ tomnuj nê amnhĩ to htỳx nê inhmã hprãm xà hkôt pix mã amnhĩ nhĩpêx rãhã ty. Hã kot paj akupỳm mẽ ato mẽ atĩr ka mẽ ma kuwyta wỳr apa hkêt nê.

E. ãm ja pix. Na hapêx.

Anê.

—E Juãw. Kêr ka Emĩnã kamã ã ixkrajê mã ixkapêr ã kaga anê. Anê.

Hãmri pa kuma nê ô ri mẽ kãm hã kaga.

Pekamõ kamã Jejus kwỳjê hwỳr kaga

Sikũn Korĩt 6.14-7.1

12 Nhũm Jejus arĩ inhmã kapêr nê hpãnhã inhmã:

—E hpãnhã Pekamõ kamã ixkrajê jamãr o pa xwỳnhja wỳr kaga nê mẽ hwỳr amê. Nê mẽ kãm ixkapêr jarê nê mẽ kãm:

Pa Pekamõ kamã ixkapêr mar kaxyw axpên wỳr mẽ apikuprõnh xwỳnhjaja. Ot pa mẽ awỳr ixpêr mẽ. Ixpê ijakwa rũm põm wapo akutã wa gix nê kator nê ãm xwỳnhta na pa mẽ awỳr ixpêr mẽ.

13 Na pa hte mẽ anhõ krĩ nhõ xwỳnhjaja kot tanhmã amnhĩ tomnuj to ho pa hã mẽ omunh mex nê. Mẽ kot Satanasti kôt pix mã ri amnhĩ nhĩpêx o pa jakamã mẽ anhõ krĩ te kêp Satanasti nhõ krĩ pyrãk. ãxipas kot mẽ hkôt mẽ kãm ixkapêr o mẽ ahkre ho pa nê aa hkaga hkêt tã nhũm prem axtem nê ixtã kupĩ. Ka mẽ ja hã mẽ omunh tã mẽ umaj ixkaga hkêt nê arĩ ixkôt amnhĩ nhĩpêx rãhã ho ri apa. ãm hãmri na ka htem ã amnhĩ nhĩpêx anê.

14 Mẽmoj pixi na ixpê omnuj. Na hte mẽ akwỳjaja axtem nê Paraãw kapêr kôt amnhĩ nhĩpêx o pa. Na pre Paraãwja Parak mã tanhmã kapêr to nhũm kuma nê amnhĩ xô ri tanhmã mẽ anhĩgêt mã kapêr to ho pa. Nom ixkapêr kôt kêt ixkapêr kuhpa hã tanhmã mẽ kãm kapêr to nê mẽ kãm: “Mẽ mãmrĩ ma sãnti hã mẽ hkĩnh mã xwỳnhjê hkôt mra nê sãnti hã apku nê hã akĩnh. Nê mẽ urak nê axpên pê axpên prõ ho amnhĩkati nê axpên pê ri axpên mjên o amnhĩkati nê mẽ ã ri amnhĩ nhĩpêx anhỹr o ri apa. Ja mex kênã.” Anhỹr o mẽ anhĩgêt mã

kapër o pa nhũm mẽ kuma nẽ mẽ hkõt amnhĩ nhĩpêx. Tã ka mẽ akwỳjaja mẽ uràk nẽ ã amnhĩ nhĩpêx anhỹr o apa. Kwa ja mex kêt.

15 Na hte mẽ akwỳjaja Nikorawjê kapër kôt ixkapër kuhpa hã tanhmã amnhĩ nhĩpêx to ho pa. Ja mãänên mex kêt.

16 Tã ra mẽ akwỳjaja ã amnhĩ tomnuj anhỹr o pa ka mẽ ja hã mẽ omu nẽ ãm mẽ omu nẽ nê tanhmã mẽ kãm akapër to hkêt nẽ. Kwa mẽ ate ã amnhĩ nhĩpêx anhỹr xwỳnhjaja. Kêr ka mẽ tokyx ja kaga nẽ akupỹm ixkõt ri amnhĩ nhĩpêx mex nẽ. Kot kaj mẽ anhỹr kêt kot paj tokyx mẽ awỳr wrỳ nẽ te ijakwa rũm pòm wapo kator xwỳnhta o mẽ hkanhwỳr pyràk o mẽ anhĩpêx. Nom ixkapër xihtỳx pix o tanhmã mẽ anhĩpêx to.

17 E kot kaj mẽ amã ixkapër mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapër anhỹrja ma nẽ kãm ajamaxpêr tỳx rãhã ho ri apa.

Nẽ kot kaj mẽ ate amnhĩ tomnuj nê amnhĩ to htỳx nẽ inhmã hprãm xà hkõt amnhĩ nhĩpêx rãhã ty. Hã kot paj akupỹm mẽ ato mẽ atĩr hãmri nẽ ra pam mẽ amã mẽ anhõ ka mẽ hkur o apa. Te amnepêm Ijaew kapõt ã pa nhũm ixte mẽ hwỳr “manã” anhỹr xwỳnhta rênh nhũm mẽ kot hkur o pata pyràk. Nom ixte mẽ amã mẽ anhõja na hpimxur. ãm papxpix na

pa hte mẽ kãm òr o ixpa.

Nẽ kot paj mẽ atã mẽ anhĩxi nyw rẽ. Jao kên jakare hkwy hã ahpỹnhã mẽ anhĩxi nyw jaxwỳ nẽ mẽ amã kugõ. Ka mẽ hamỳ nẽ kapxpix amnhĩ nhĩxi nyw pumunh o apa.

E ãm ja pix. Na hapêx. Anê.

—E Juãw. Kêr ka Pekamõ kamã ixkrajê hwỳr ã ixkapêr anhỹr ã kaga nẽ mẽ hwỳr amê. Anê.

Hãmri pa kuma nẽ ô ri mẽ kãm hã kaga.

Xijaxir kamã Jejus kwỳjê hwỳr kaga

Jutre 3-23

18 Nhũm Jejus arĩ inhmã kapêr nẽ inhmã:

—E hpãnhã Xijaxir kamã ixkwỳjê jamãr xwỳnh wỳr kaga nẽ amê nẽ mẽ kãm ixkapêr jarê nẽ mẽ kãm:

Pa Xijaxir kamã ixkapêr mar kaxyw mẽ apikuprõnh xwỳnhjaja. E ot pa mẽ awỳr ixpêr mẽ. Ixpê Tĩrtũm Kra na pa. Ixpê inhno te kot kuwy hpòk karỳr tỳx pyràk xwỳnhta na pa. Nẽ ixpê ixpar te kot kàx karỳr tỳx pyràk xwỳnhta na pa mẽ awỳr ixpêr mẽ.

19 Na pa hte mẽ ate amnhĩ nhĩpêx kôt mẽ apumunh mex o ri ixpa. Na ka htem amnhĩ kaxyw inhmã ajamaxpêr pê inhmã amnhĩ to mex o ri apa. Mẽ akwỳ kot ixtã tanhmã mẽ anhĩpêx to htã ka mẽ umaj aa ixkaga hkêt nẽ. Nẽ arĩ amã ixkĩnh tỳx kãm tanhmã amnhĩ nhĩpêx

to ho ri apa. Nē axpēn to mex nē ixkôt pix mǎ amnhī nhīpêx o ri apa. Jao ra ixkôt amnhī nhīpêx mex o wam mē ate ixkôt amnhī nhīpêxta jakre. Nà ja inhmǎ mex kumrêx.

20 ǎm mēmōj pixi na ixpê omnuj. Mē akôt niti ri pa xwýnh Jejawewtita. Kêp Tirtüm nhý hǎ kapêr jarēnh o pa xwýnh ǎ amnhī to hêx xwýnhtita. Na hte ixkapêr kupa hǎ tanhmǎ mē ajahkre hto ka htem ama nē nê tanhmǎ kǎm nē hkêt nē. Na hte mē amǎ: “Xê mē mǎmri ri mē hkuprýjê hwýr mra nē mē ho amnhīkati. Nē axpēn pê mē aprō nē mē amjên o amnhīkati. Nē mē kot sǎnti hǎ mē hkǐnh nē hǎ apkur xwýnhjê hkôt mra nē mē hkôt amnhī nhīpêx. Tirtüm kǎm ja mex kênǎ.” Anhýr o mē amǎ kapêr o pa. Nē inhmǎ ja mex ǎ ijarē nom inhmǎ ja mex kêt. Tǎ ra mē akwýjaja kapêr ma nē hkôt amnhī nhīpêx ka mē ja hǎ mē omunh tǎ amnhī nê nitita janor kêt nē nhǔm arī ri mē amǎ hêx o ri mē akôt pa.

21 Ra kot ǎ amnhī nhīpêx anhýr o mē akôt pa ry rax kumrêx tǎ pa kormǎ ja hǎ tanhmǎ ho hkêt nē kormǎ amnhī tǎ hamǎ. Kot ǎ amnhī nhīpêx anhýr kaga kaxyw na pa kormǎ hamǎ o ri ixpa. No nhǔm aa hkaga hkêt nē.

22 Mýrapê kot paj tokyx tanhmǎ ho nhǔm amnhī xǎ htýx kamǎ hamak o hikwý. Tǎ mē kot kapêr

mar nē hkôt amnhī nhīpêx xwýnhjaja kot amnhī tomnuj ǎ amnhī pumu nē hkaga hkêt hǎ kot paj mǎ mē ho anē nē. Mǎǎnēn tanhmǎ mē homnuj to nhǔm mē nitita pyrǎ nē amnhī xǎ htýx kamǎ hamak o hikwý.

23 Nē nitita kot paj kêp hkrajê nhīmex pa. Ka mē apê ixkrajaja ja hǎ ixpumu nē ixte mē apiitǎ ahpýnhǎ tanhmǎ mē ajamaxpêr to hkôt mē apumunh ǎ ixpumu. Nē ixte ahpýnhǎ mē apiitǎ tanhmǎ mē ate amnhī nhīpêx to ho apa hǎ mē apumunh xǎ hkôt tanhmǎ mē anhīpêx to hǎ ixpumu.

24 Na hte mē akwýjaja akwýjê rom nita kapêr ma nē ǎm kuma nē hkôt amnhī nhīpêx kêt nē. Nē mē kapêrja mē kot kǎm: “Satanasti kapêr pimxur” anhýr xwýnhta kôt nhǔm mē amnhī nhīpêx kêt nē. Na htem ixkôt pix mǎ amnhī nhīpêx mex o ri pa. Tǎ ǎ mē ate ixkôt amnhī nhīpêx anhýr o apa xwýnhjaja kot paj mē amǎ ja pix ǎ karō ka mē inhma.

25 Kêr ka mē arī ixkôt pix mǎ amnhī nhīpêx o ri apa rǎhǎ pa akupýn mē awýr wrý. ǎm ja pix ǎ kot paj mē amǎ karō.

26 Nē kot kaj mē ate amnhī tomnuj nê amnhī to htýx nē arī inhmǎ hprǎm xǎ hkôt amnhī nhīpêx rǎhǎ ty. Hǎmri pa ja hǎ mē apumu nē nhýrmǎ mē ate krī hkwy hkôt mē pa xwýnhjê ho

amnhĩptàr o apa kaxyw mẽ axunhwỳ. Ka mẽ apê mẽ õ pahihiti nẽ inhmã mẽ ho amnhĩptàr o ri apa.

²⁷ Na pre Inhĩpêêxà ixte pika piitã hkõt ri mẽ pa xwỳnhjê ho amnhĩptàr kaxyw ixãm.

Tã kot paj nhỹrmã amnhĩ pyrã nẽ mẽ kaxyw mẽ axunhwỳ ka mẽ inhmã mẽ hamãr o apa.

Nhũm mẽhõ ixkapêr kwỳm ri tanhmã amnhĩ nhĩpêx to ka mẽ ja hã omu nẽ hã tanhmã ho. Te mẽ kot poti punuj mỳnh nẽ mẽnh nẽ hkrakrak pyrãk.

²⁸ Kot paj ã mẽ ate mẽ hipêx anhỹr o apa kaxyw mẽ axunhwỳ. No ãm ja pix kêt. Kot paj te ixte mẽ amã kanhêti hõ nhõr pyrãk o mẽ anhĩpêx. Arĩgro hkõt kanhêti no hpøk rax japõx xwỳnhta kot paj te ixte mẽ amã õr pyrãk ka mẽ ixri atĩr tũm nẽ apa ho apa.

²⁹ E ixkrajaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêr anhỹrja ma nẽ kãm ajamaxpêr tỳx rãhã ho ri apa. Anẽ.

—E Juãw. Kêr ka ã Xijaxir kamã ixkrajê kaxyw ixkapêr ã kagà nẽ mẽ hwỳr mẽnh anẽ. Anẽ.

Hãmri pa kuma nẽ ô ri mẽ kãm hipêx nẽ mẽ hwỳr kumẽ.

3

*Satre kamã Jejus kwỳjê hwỳr kagà
Rukre 12.35-40*

¹ Nhũm Jejus arĩ inhmã kapêr nẽ inhmã:

—E hpãnhã Satre kamã ixkwỳjê jamãr xwỳnh wỳr kagà nẽ mẽ kãm ixkapêr jarê nẽ mẽ kãm:

Pa Satre kamã ixkrajaja. E ot pa mẽ awỳr ixpêr mẽ. Ixpê inhĩhkra ho kanhêti pẽ 7 jamỳnh nẽ xãm xwỳnhta na pa. Nẽ ixpê inhĩhkra ho Tĩrtũm Karõ ãm pyxi htã te kamã kêp 7 jamỳnh nẽ ho ixãm xwỳnhta na pa mẽ amã ixkapêr.

Na pa hte mẽ ate tanhmã ri amnhĩ nhĩpêx to hã mẽ apumunh rãhã ho ixpa. Mẽ piitã kot axpẽn mã mẽ ate ixkõt amnhĩ nhĩpêx ã mẽ ajarênh tã ã mẽ ate amnhĩ nhĩpêx anhỹr kêt. Na ka htem ixkuhpa hã pix mã amnhĩ nhĩpêx o apa. Jakamã te inhmã ra mẽ atyk nẽ mẽ anhĩkwỹ pyrãk.

² Na ka htem ãm akrành mã ixkõt ri amnhĩ nhĩpêx nom Tĩrtũm mẽ wa ixkõt amnhĩ nhĩpêx mex kêt nẽ. Ra Tĩrtũm mẽ wa ixte ja hã mẽ apumunh mex. Mẽ ate kormã wa inhnoo mã tãm ri amnhĩ nhĩpêx kêt jakamã kwa mẽ tokyx ja hã amnhĩ pumu nẽ ate amnhĩ tomnuj mã anhũre nẽ wa ixkõt amnhĩ xunhwỳr tỳx nẽ.

³ Kêr ka mẽ amnepê mã kormã mẽ ate ixkõt amnhĩ nhĩpêx nyw ri mẽ kot ixkapêr o tanhmã mẽ ajahkre htoja mã ajamaxpêr nẽ amnhĩ tomnuj mã anhũre. Nẽ ixkapêr kõt pix mã mãn amnhĩ nhĩpêx

o ri apa. Kot kaj mẽ anhÿr kêt kot paj nhÿrmã mẽ ajaêr pê akupÿn mẽ awÿr wrÿ nê ja hã tanhmã mẽ ato.

⁴ ãm mẽ agrêre nê amã ixkôt amnhĩ nhĩpêx prãm. Jao tãm ri amnhĩ nhĩpêx nê mẽ kot amnhĩ tomnuj xwÿnhjê hkôt amnhĩ nhĩpêx kêt nê. Te mẽ axê jakare kamã apa nê tanhmã amnhĩ pê htyk to hkêt pyræk. Tã kot kaj mẽ nhÿrmã ixri mẽ axê jakare kamã apa ho apa. Ra mẽ ate ja ho anhÿr mã tãm kênã. Ja na Tirtũm kãm hprãm.

⁵ Nê krĩ piitã hkôt mẽ ate amnhĩ tomnuj nê amnhĩ to htÿx nê inhmã hprãm xà hkôt amnhĩ nhĩpêx rãhã atyk xwÿnh piitã kot ka mẽ nhÿrmã Tirtũm mẽ wa ixri amex nê atĩr tũm nê apa ho apa. Ra mẽ hixija Mẽpahpãm Maati nhõ kagàja kamã na. Kamã mẽ atĩr o mẽ atĩr mã xwÿnhjê nhĩxi piitã hã kagà. Kot paj kagàta kamã aa mẽ anhĩxi grành kêt nê. Hãmri nê Inhĩpêêxà mẽ kapêr o mẽ wrÿk xwÿnhjê mã mẽ ajarênh o: “E mẽ jajê pumu. Ixkwÿ na mẽ.” Anhÿr o mẽ kãm mẽ ajarê.

⁶ E ixkwÿjaja. Kot kaj mẽ amã ixkapêr mar prãm hã kot kaj mẽ ã Tirtũm mẽ wa Ixkarõ nhÿ hã ixte mẽ amã ixkapêr anhÿrja ma nê kãm ajamaxpêr tÿx rãhã ho ri apa.

Tã ãm ja pix. Na hapêx. Anê.

—E Juãw. Kêr ka ã Satrejê mã ixkapêr ã kagà nê mẽ hwÿr mẽnh anê. Anê.

Hãmri pa kuma nê ô ri mẽ kãm hã kagà.

Pirate kamã Jejus kwÿjê hwÿr kagà

Wam Tesarõn 2.13-16

⁷ Nhũm Jejus arĩ inhmã kapêr nê inhmã:

—E hpãnhã Pirate kamã ixkwÿjê jamãr xwÿnh hwÿr kagà nhĩpêx nê amê nê mẽ kãm ixkapêr jarê nê mẽ kãm kãm:

Pa Pirate kamã mẽ ate ixkapêr mar kaxyw mẽ apikuprõnh xwÿnhjaja. E ot pa mẽ awÿr ixpêr mẽ. Inhmex o inhmex xwÿnh na pa. Aa ixêx kêt nê ixpa xwÿnh. Amnepê mã na pre mẽhõja pahi Tawi mã òrkwÿ mex ã saf jamãr o pa. Tã pa hte uræk nê Inhĩpêêxà Tirtũm nhõ krĩ hwÿr mẽ gjêx xà hã saf jamÿ nê ho ixpa. ãm papxipix inhõ saf jakamã papxipix na pa hte mẽ ate ixkôt amnhĩ xunhwÿr xwÿnhjaja mẽ agjêx kaxyw mẽ amã kahê xà rê nê ixkra hkêt xwÿnhjê pê kahê. Kot paj mẽ apê ixkrajê mã kahê xà rê ka mẽ hwÿr agjê. Hãmri pa mẽ atã kahê nhũm ixkra hkêt xwÿnhjaja tee ri kãm mẽ akôt gjêx prãm kaprÿ.

⁸ Na pa hte tanhmã mẽ ate amnhĩ nhĩpêx to ho apa hã mẽ apumunh mex o ri ixpa. Mẽ agrêre htã na ka htem ixkapêr kôt amnhĩ nhĩpêx mex nê aa ixkaga hkêt nê. Jakamã kot paj

te ixte mẽ amã Tĩrtũm nhõ hakwakre kahê xà mẽnh pyrak o mẽ anhĩpêx ka mẽ axãmnhĩx ajamakêtkati nẽ ma mẽ kãm Tĩrtũm kapêr o mẽ ahkre ho ri mẽ hkõt apa. Nhũm mẽ hkwỳjaja tee ri ã mẽ ate amnhĩ nhĩpêx anhỹrja nẽ mẽ amã kapêr kaprỳ ka mẽ arĩ ho mẽ ahkre ho ri mẽ hkõt apa.

⁹ Nẽ mẽ anhõ krĩ kamã mẽ akwỳjaja na prem ra Satanasti hkõt amnhĩ xunhwỳ nẽ hêx rom mẽ amã amnhĩ to hêx nẽ mẽ amã: “E mẽ ixpê Ijaew mex jakamã kwa mẽ ixkapêr ma nẽ mẽ ixkõt amnhĩ nhĩpêx.” Anhỹr o mẽ amã karõ htã no ãm mẽ kot Satanasti hkõt amnhĩ nhĩpêx xwỳnh na mẽ. Tã kot paj nhỹrmã tanhmã mẽ homnuj to nhũm mẽ tee ri amnhĩ pumu nẽ akupỹm mẽ awỳr mra nẽ mẽ akutã hkõnkrã ho rôrøk nẽ hkrĩ nẽ mẽ amã: “Nà mẽ kajaja na ka pêr mẽ ixrom Jesus kõt amnhĩ nhĩpêx. Mãn kãm mẽ ajapêê.” Anê.

¹⁰ Mẽ kot ixtã mẽ atomnuj tỳx nhũm mẽ ate amnhĩ xà htỳx kamã ajamak tã aa mẽ umaj ixkaga hkêt nẽ. Nẽ arĩ ixte mẽ amã mẽmoj tã karõ xà hkõt mẽ kutã amnhĩ to htỳx rãhã arĩ ixkõt ri amnhĩ nhĩpêx o apa. Jakamã mẽ kot nhỹrmã mẽ kãm ixkurê xwỳnhjaja pika piitã hkõt tanhmã mẽ homnuj tỳx to nhũm mẽ amnhĩ xà htỳx kamã ama. Tã kot paj mẽ anê mẽ omunh mex nẽ nhũm mẽ tanhmã mẽ ato

hkêt nẽ ka mẽ amex nẽ ri apa ho apa.

¹¹ E kot paj tokyx akupỹn mẽ awỳr wrỳ nẽ mẽ ate ixkõt pix mã amnhĩ nhĩpêx ã mẽ ato mex rax kumrêx, Jakamã kwa mẽ mãmri ã amnhĩ nhĩpêx anhỹr o inhmã hprãm xà hkõt pix mã amnhĩ nhĩpêx rãhã ty. Kot ka mẽ anhỹr kêt kot pa mẽ amã mẽmoj mex nhõr kêt nẽ.

¹² Nẽ kot kaj mẽ kot amnhĩ tomnuj xwỳnhjê kutã amnhĩ to htỳx nẽ inhmã hprãm xà hkõt pix mã amnhĩ nhĩpêx rãhã ty. Hã kot paj amnhĩ kõt mẽ ato mẽ axihtỳx nẽ ka mẽ aa ixkaga hkêt nẽ. Nẽ kot paj nhỹhỹnh mẽ atã mẽ inhĩxi ho axkrunêpxi nẽ haxwỳ. Inhĩpêêxà nhĩxi nẽ inhĩxi nyw nẽ Inhĩpêêxà nhõ krĩ nhĩxija kot paj nhỹhỹnh mẽ atã haxwỳ. Tĩrtũm nhõ krĩ mẽ kot kãm: “Jerujarê nyw” anhỹr xwỳnhta koja nhỹrmã tanhmã amnhĩ to nẽ ra kaxkwa rũm pika wỳr wrỳ.

¹³ E ixkwỳjaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêr anhỹrja ma nẽ kãm ajamxpêr tỳx rãhã ho ri apa.

Tã ãm ja pix. Na ra hapêx. Anê.

—E Juãw. Kêr ka ã Pirate kamã ixkrajê mã ixkapêr ã kagà anê. Anê.

Hãmri pa kuma nẽ ô ri mẽ kãm hã kagà.

Raxisej kamã Jejus kwÿjê hwÿr kagã

14 Nhũm pre Jejus arĩ inhmã kapër nê inhmã:

—E hpãnhã krĩ pê Raxisej kamã ixkrajê jamãr xwÿnh wÿr kagã nhĩpêx nê amê. Nê mē kãm ixkapër jarēnh o:

Pa Raxisej kamã ixkra-
jaja. Ot pa mē awÿr ixpër
mê. Ām hãmri ixkapër o
ixpa nê aa ixêx kêt xwÿnhnta
na pa. Jakamã ãm hãmri na
pa hte Tĩrtũm kapër o mē
ajahkre o ixpa nê aa ja kaga
hkêt nê. Pa na ixpê mēmoj
piitã hpàr krax.

15-16 Na pa hte mē ate
tanhmã amnhĩ nhĩpêx to
ho apa hã mē apumunh
rãhã ho ixpa. Kop apu
mē ate ixkôt amnhĩ nhĩpêx
mex ronhÿx pa ja hã mē
apumu nê ixkĩnh nê. Nom
mē ate ã amnhĩ nhĩpêx
anhÿr kêt. No mãânēn aa
ixkaga hkêt nê. Na ka htem
ri atÿx amnhĩ krã hkôt pix
mã tanhmã amnhĩ nhĩpêx
to ho apa nhũm ja ixpê
omnuj nê. Kot kaj mē arĩ
ã amnhĩ nhĩpêx anhÿr o
apa pa hpãnhã amnhĩ nê
mê akurê. Te mē kot gô
xenh nõkati janhir nê tee
hkakinh nê akupÿm hkapĩr
pyràk.

17 Mē ate inhmã hprãm
xà hkôt amnhĩ nhĩpêx ã
amnhĩ jarēnh tã ã amnhĩ
nhĩpêx anhÿr kêt nê. Nê
ixkapër mar tÿx nê amnhĩ
kaxyw inhmã ajamxpër
mex kêt nê.

18 Kwa mē tokyx ja hã

amnhĩ pumu nê akupÿm
ixkôt amnhĩ xunhwÿr tÿx
nê. Kêr pa ja hã mē apumu
nê amnhĩ katut kôt mē
ate amnhĩ tomnuj rē nê
tanhmã mē akrã hto ka
mê inhnoo mã tãm amnhĩ
nhĩpêx mex o ri apa. Hãmri
pa mē amã tanhmã amnhĩ
to amnhĩrit to ka mē aprĩ
hã ixte amnhĩ nhĩpêx ã
ixpumunh mex nê ixkôt
amnhĩ nhĩpêx mex rãhã o
ri apa.

19 Xà inhmã mē ajapê
hkêt ã na pa ã mē amã
ixkapër anê? Nà inhmã
mē apiitã mē ajapê htÿx
kênã. Nom inhmã mē ajapê
htã ka htem ixkôt amnhĩ
nhĩpêx kêt nê. Na pa tee
ri amnhĩ tã mē apumu nê
ja hã tanhmã mē atomnuj
tÿx to. Tokyx mē ate amnhĩ
tomnuj mã anhÿrer nê
hpãnhã tãm amnhĩ nhĩpêx
kaxyw. Jakamã kwa mē
tokyx ate amnhĩ tomnuj
kaga nê akupÿm amnhĩ
kaxyw inhmã ajamxpër
ho ri apa.

20 Na htem hkwyjê
nhõrkwÿ hwÿr gjêx kaxyw
hakwa krem kãm àkjêr o
kuhê nhũm mē kuma nê
mê kãm anê nhũm mē hwÿr
agjê. Nê mē ixkre hkre
kamã axpēn mã kapër o
hkrĩ rÿ axpēn mã kapër pê
mēmoj to hkõm o hkrĩ. Ja
pyrà nê ot pa mē ajamãr o
ixpa. Mē ate inhmã anhÿr
nhũm ixte mē akôt ixpa ho
ixpa nhũm mē pahte axpēn
to mex o papa kaxyw.

21 Kormã mē kot ixpĩr

kêt ri na pa pre mẽ kot amnhĩ tomnuj xwÿnhjê kutã amnhĩ to htÿx o ixpa. Amnhĩ to htÿx nê ri ixpa kamã ixtyk jakamã nhũm Inhĩpêêxã akupÿm ixto ixtĩr nê akupÿm amnhĩ wÿr ixto api. Hãmri nê amnhĩ nhĩhkô hã mẽ ho amnhĩptãr ã hkrĩ xã kamã inhÿr pa ixkrĩ ho ixkrĩ nê ãhkô hã mẽ piitã mẽ ho amnhĩptãr o ixkrĩ. Tã kot kaj mẽ atõ ixpyrà nê ate amnhĩ tomnuj nê amnhĩ to htÿx nê. Nê inhmã hprãm xã hkôt pix mã amnhĩ nhĩpêx rãhã ty. Hã kot paj amnhĩ pyrà nê wa ixte mẽ ato amnhĩptãr ã ixkrĩ xãja kamã amnhĩ nhĩhkô hã mẽ akrĩ ka mẽ wa inhĩhkô hã wa inhmã mẽ ho amnhĩptãr o akrĩ.

²² E ixkwÿjaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhÿ hã ixte mẽ amã ixkapêr anhÿrja ma nê kãm ajamaxpêr tÿx rãhã ho ri apa.

Tã ãm ja pix. Na hapêx. Anê.

—E Juãw. Kêr ka Raxisej kamã ixkrajê mã ixkapêr ã kagã nê mẽ hwÿr amê. Nê kagãja piitã krĩ hkwy kamã ahpÿnhã ixkwÿjê hwÿr arê kê mẽ kamã harê nê ixkapêr ma. Anê.

Nhũm pre ã Jejus inhmã kapêr anê. Pa kuma nê ô ri mẽ piitã mẽ kãm hã kagã hpa.

4

Tĩrtũm kot mẽ ho amnhĩptãr

ã hkrĩ xã jarênh

¹ Tã pa axte mẽmoj pumu nhũm kaxkwa hwÿr mẽ gjêx xã hã hakwakreja amnhĩ kahê xã mẽ pa omu. Hãmri nhũm axte mēhō kapêr tÿx xwÿnhnta. Te kot pifti kakōr tÿx pyrãk xwÿnhnta axte inhmã kapêr nê inhmã:

—E amnê ixwÿr api pa mẽmoj nhÿrmã kot tanhmã amnhĩ nhĩpêx to hkukamã amã ho amnhĩrĩt ka omu. Anê.

² Hãmri nhũm Tĩrtũm Karõ tanhmã ixto nê ixto api pa kaxkwa kamã mẽmoj pumunh o xa. Tĩrtũm kot mẽ ho amnhĩptãr ã hkrĩ xã maatita pa pre omu. Nhũm kamã mēhōja nhÿ.

³ Kuk kamã hirã htÿx kumrêx. Te mẽmo kēn kamrêk karÿr jaxênh tÿx pyrãk. Nê kot mẽ ho amnhĩptãr ã hkrĩ xã puhã mǎxwÿxti grãgrãreja kãm hipôk nê harir pa omunh o xa.

⁴ Nhũm hkrĩ xã maati puhã mẽ ho amnhĩptãr o hkrĩ xã kêp 24. Kamã mẽ ãptãr tũmjaja hkrĩ. Mẽ piitã ôr o mẽ ahkã htu nê ê jakare nê hkrĩ.

⁵ Nê Tĩrtũm hkrĩ xã maati ja rũm na katõtōk nê hkrakrak nê haxênh japã nê hikwÿ. Nê hkrĩ xã kapem kanê maati pixi kamã kwÿrÿt pē 7ja pōk rãhã ho kuhê. Kanêja te Tĩrtũm Karõ pyrãk.

⁶ Nê hkrĩ xã kapem mẽmo te gō rax pyrãkja hkarÿr jaxênh tÿx kumrêx nê nō. Te ho kãx karÿr jaxênh tÿx pyrà nê hkarÿÿre. Nê hkrĩ xã puhã mẽmoj tĩr nê kuhê pē kwat

kuhê. Nê ôkwa nê katut piitã hkôt no. ãm no xohtô rax kumrêx. Na pre ã mêmoj kêp kwatja no xohtô anê pa omu.

⁷ Wamta te kot mry pê rêãwti pyrãk. Nê hkôt ja te kot môx myti pyrãk. Nê hapu hã hkuk te panhĩ hkuk pyrãk. No hapu hã ja te kot àànHàhti htor kaxyw hara koror pyrãk.

⁸ Nê piitã hara kêp 6. Nê ï piitã kamã no. Nhũm prem Tĩrtũm mã mex o mex ã grer rãhã ho kuhê nê aa pinhkrênh kêt nê. Nê kãm grer o:

Amex o amex Tĩrtũm.
Nê axihtỳx o axihtỳx.

Nê aa ate amnhĩ tomnuj kêt kumrêx.

Amnepê mã kormã mêmoj kêt ri ka ra arãhã ri apa. Tã arĩ arãhã ri apa xwỳnh na ka.

Kot kaj aa ajapêx kêt nê.

ãm hãmri na ka hte mêm ixto mex rãhã ho apa.

Nê amex o amex Tĩrtũm. Anê.
⁹⁻¹⁰ Nhũm prem xatã mêm ho amnhĩptãr hkrĩ xà kamã hkrĩ xwỳnhja mêm kot kãm “Rãhã pa xwỳnh” anhỹr xwỳnhhta mã ã grer anhỹr o kuhê. Kãm mex o mex ã grer pê tanhmã kot mêm ho mex to hã harê. Hãmri nhũm mêm ãptãr tũm pê 24jaja mããnên kutã hkõn krã ho rôrôk nê hipô hpa nê hkrĩ. Nê amnhĩ krã rũm ôr o mêm ahkãja kwry nê hpar pê haxwỳ. Kêp mêm õ Pahi Maati hã hã hpijaãm kaxyw wamtajê pyrã nê mex o mex ã harênh o hkrĩ nê kãm:

¹¹ ãm hãmri na pa htem amex o amex ã ajarê Tĩrtũm
Apê mêm inhõ Pahi Maati na ka.

Nê apê mêm inhõ Tĩrtũm na ka. Na ka pre mêmoj piitã ho akato. Axãhpumunh tỳx nê ajamaxpêr tỳx o mêmoj piitã amã hprãm xà hkôt ho akator pa.

Jakamã na pa htem ã amex o amex ã ajarênh anê. Mêm ixrom axihtỳx mex kumrêx na ka hte apa Tĩrtũm. Anê.

5

Mêm pahte amnhĩ tomnuj pãnhã amnhĩrer xwỳnh jarênh Juãw 1.29; Piripos 2.5-11

¹ Tã pa pre arĩ te kaxkwa kamã mêmoj pumu. Mêm ho amnhĩptãr ã hkrĩ xà maatita kamã hkrĩ xwỳnh nhĩhkra kamã kagà pa omunh o xa. Upôk rũm omu. No ãm axtem kagà kaxkep na pre. Nê akutã hã kagà nê menh ê ho ho htỳx xàja kêp 7.

² Hãmri nhũm Tĩrtũm kapêr o wryk xwỳnh xihitỳx xwỳnhja kapêr tỳx kãm kapêr o:

—E mêm atõ na ate kagà mũj pyr nê ho htỳx xà hpôt mã tãm? Anê.

³ Hãmri nê tee ri mêm piitã mêm hkapi nom nhũm ja kaxyw mêmõ amrakati kumrêx. Kaxkwa kamã amrakati nê pika kamã mããnên amrakati nê pika hkrak ri amrakati. Nhỹri mêmõ kot kagà kaxkepta pyr nê hpôt nê omunh mã tãm xwỳnhja amrakati ho amrakati.

⁴ Nhũm tee ri mêmõ japêr nom mêmõ pumunh kêt nê. Pa tee ri ja hã omu nê ixkaprĩ htỳx nê inhmỳr o xa.

⁵ Hāmri nhūm pahi hōja ix-pumu nē inhmā:

—Kwa amÿr kêt nē. E mēhō mūj pumu. Juta kanrēhā htāmnhwÿ xihitÿx xwÿnhnta. Pahi Tawi kanrēhā htāmnhwÿ te kēp mry pē rēāw xihitÿx pyrāk o hihitÿx xwÿnh mūj pumu. Kot mē kām hkurē xwÿnhjē kutā amnhī to htÿx nē mēmoj punuj piitā ho hapêx kaxyw mā xwÿnh jakamā tapxipix na kot kagāta hpyr nē ho htÿx xā hpôt par mā tām. E ka omu. Anē.

⁶ Hāmri pa kuma nē hwÿr rīt nē Jejusja pumu. Kot mē pahte amnhī tomnuj pānhā amnhīrer xwÿnhnta mē ho amnhīptār o hkrī xā maati kapem xa. Mēmoj htīr pē kwat mē àptār tūm pē 24jē nhīpōk ri xa. Mē kām hkurē xwÿnhjaja kot hpīr nhūm ra akupÿm htīr nē xa. Nom ra axtem nē xa. àhpumunh tÿxja te kot pahi xāhpumunh pyrāk. Nē hpār kēp 7. Nē no määnēn kēp 7. Noja te Tīrtūm Karō pyrā nē kēp pika piitā hkôt pa xwÿnh. Ā Jejusja axtem nē ām anē pa omu.

⁷ Hāmri nhūm mē pahto amnhīptār o hkrī xwÿnhnta wÿr tē nē ĩhkra kamā kēp kagā kaxkepta py.

⁸ Hāmri nhūm mē htīr pē kwat mē mē àptār tūmjaja hpar pē hkōn krā ho rōrōk nē hkrī hpa nē hipō nē hkrī. Piitā wiorāwti jamÿ nē ôr o xijere kamā mēhkuxwa xā jamÿ nē o hkrī. Nhūm Tīrtūm krajaja Tīrtūm mā tanhmā amnhī jarēnh to nhūm mē

mar o hkrī. Te xijere kamā mēhkuxwa xā hpār o hkrī pyrā nē mē kuma.

⁹⁻¹⁰ Jakamā nhūm mē hkōn krā ho hkrī xwÿnhjaja mē pahte amnhī tomnuj pānhā amnhīrer xwÿnhnta kutā kām grer o hkrī. Mē grer nyw o kām gre nē kām:

Na prem apī ka atyk o mē piitā mē kot amnhī tomnuj pānhā amnhīrer pa.

Ahpÿnhā pika piitā hkôt mē urojē piitā hpānhā amnhīrer pa.

Nē ahpÿnhā ri mē kapēr xwÿnh kwÿjē piitā mē hpānhā amnhīrer pa. Atyk o mē kot amnhī tomnuj piitā hpānhā amnhīrer pa.

Jakamā nhūm mē kot akôt amnhī xunhwÿr xwÿnhjaja kēp Tīrtūm kra nē ri pa.

Ka ra mē panhō Tīrtūm mā mē kēp patre kaxyw mē unhwÿ nhūm htem pika piitā hkôt mē ho amnhīptār o pa.

Tā atyk o ate pika piitā hkôt mē hpānhā amnhīrer jakamā kapxipix na ate kagāta pyr nē ho htÿx xā hpôt mā tām. Anē.

¹¹ Hāmri nhūm Tīrtūm kapēr o mē wryk xwÿnhjaja nhÿhÿnh hapōj nē kuhē. Mē ohtō rax o ohtō rax. Ohtō rax o mē pajamaxpēr jakrenh. Hāmri nē Tīrtūm kot mē ho amnhīptār ā hkrī xā maatija wÿr mra nē kām hipōk pa. Nē mēmoj tīr nē kuhē xwÿnhjē mē mē àptār tūmjē mā hipōk pa nē mē

pahte amnhĩ tomnuj pãnhã
amnhĩrer xwÿnh ta mã kapër.

12 Kàx pê kãm kapër nẽ kãm:
Ăm hãmri na pa htem amex
o amex ã inhgrer o
ixkuhê.

Mẽ ixrom axihtÿx o axihtÿx.

Nẽ mẽmoj piitã anhõõ.

Nẽ ate mẽmoj piitã hkukamã
axàhpumunh par.

Nẽ amex o amex jakamã na
pa htem amã amex
pix ã inhgrer o ri ixpa.
Anê.

13 Tã nhũm mẽmoj piitã
Tĩrtũm mẽ Jejus wa kãm wa
mex o wa mex ã harê. Pika
hkôt panhĩ nẽ mry nẽ àk nẽ
mẽmoj piitãã. Nẽ pika hkrak
ri nẽ gô hkrak ri mẽmoj piitãã.
Nẽ mẽ htykjaja. Nhũm mẽ
piitã wa kãm wa mex o wa
mex ã wa harê nẽ wa kãm:

E ate mẽ ixto amnhĩptàr
ã akrĩ xà kamã akrĩ
xwÿnh mẽ kot mẽ ixte
amnhĩ tomnuj pãnhã
amnhĩrer xwÿnh mẽ
war amex o wa amex.

Nẽ war axihtÿx o war axihtÿx.
Nẽ war axàhpumunh o war
axàhpumunh.

Na pa htem ã war ajarênh
anhÿr rãhã ixpa ho
ixpa. Anê.

14 Hãmri nhũm mẽmoj tĩr pê
kwatjaja mẽ kuma nẽ mẽ
kãm:

—Nà ãm hãmri na ka mẽ ã
wa harênh anê.
Wa mex o wa mex kumrêx.
Anê.

Hãmri nhũm mẽ àptàr
tũmjaja Tĩrtũm mẽ Jejus wa
hpar pê hkõn krã ho rôrôk nẽ
hkrĩ hpa nẽ haxwÿja wa kãm
wa mex o wa mex ã wa harê.

6

*Kagà ho htÿx xà pê 7 jarênh
Matêwre 24.3-14; Sikũn
Tesarôn 2.3; Wam Juãw 2.18*

1 Tã pa arĩ kaxkwa kamã
mẽ pahte amnhĩ tomnuj
pãnhã amnhĩrer xwÿnh kot
tanhmã amnhĩ nhĩpêx to hã
omunh o xa. Nhũm kagà
kaxkepta py nẽ wam ho htÿx
xà pô. Hãmri nhũm mẽmo
tĩr pê kwatjê hõja kapër tÿx
kumrêx. Te na katôtôk tÿx
pyràk o mēhõj mã kapër nẽ
kãm:

—E amnẽ mẽ ixwÿr tẽ. Anê.

2 Hãmri nhũm kawar jaka-
jre nhÿhÿnh hwÿr hpôx o tẽ.
Nhũm mēhõja ô kuxê mÿ nẽ
hã nhÿ nẽ tẽ. Hãmri nhũm
nhãm mēhõja hwÿr tẽ nẽ
kãm pahi hã mẽ ahkà htu.
Hãmri nẽ kãm tanhmã kapër
to nhũm kuma nẽ mẽ kot
kãm Tĩrtũm mẽ Jejus wa kurê
xwÿnhjê nhĩmex par kaxyw
hakêx nẽ ma pika hwÿr tēn
wry.

3 Hãmri nhũm mẽ pahte
amnhĩ tomnuj pãnhã
amnhĩrer xwÿnhja wam kagà
ho htÿx xàta kôt axte ja pô.
Hãmri nhũm mẽmoj tĩr pê
kwatjê hõja axtem mēhõj mã
kapër nẽ kãm:

—E amnẽ mẽ ixwÿr tẽ. Anê.

4 Hãmri nhũm kawar
kamrêk mẽ hwÿr hpôx o
tẽ. Nhũm mēhõ hã nhÿ nẽ
tẽ. Nhũm nhãm mēhõja kãm
wapo gõ nẽ ma pika hwÿr
htēm nẽ wryk kaxyw hano.
Kot hwÿr wryk nẽ pikap mẽ
pa xwÿnhjê kurê huk kaxyw.
Mẽ kot axpēn par kaxyw ma
mẽ hwÿr kumê. Hãmri nhũm

kuma nê wapota py nê hakêx nê ma mē hwÿr tēn wrÿ.

⁵ Hāmri nhūm mē pahte amnhī tomnuj pānhā amnhīrer xwÿnhja kagà ho htÿx xà hō pôt. Na pre ra ho axkrut nê hpôt tā hpānhā axte hkôt ja pôt. Hāmri nhūm mēmoj tÿr pē 4jê hōta mēhōj mā kapēr nê kām:

—E amnē mē ixwÿr tē. Anē

Hāmri nhūm kawar tykre mē hwÿr hpôx o tē. Nhūm hā ÿr xwÿnhja mēmoj to peja xà hā parās mÿ nê o tē.

⁶ Hāmri nhūm mē htÿr pē kwatjê rūm mēhōja kām kapēr nê kām:

—E kêr ka ma pika hwÿr mē hwÿr tēn wrÿ nê mē kām myt pyxi kamā mē àpēnh pānhā mē kām mēmoj to hkryre nê anhō parāsta kamā ho peja nê mē kām òr o apa. Nom mē apkur xà hā orti nê wÿhti ka mē kēp tanhmā ho hkêt nê. Anē.

Hāmri nhūm kuma nê hakêx nê ma tēn mē hwÿr wrÿ.

⁷ Tā nhūm mē pahte amnhī tomnuj pānhā amnhīrer xwÿnhja axte kagà ho htÿx xà hō hpôt. Na pre ra ho axkrunēpxi nê hpôt tā hpānhā axte hkôt ja pôt. Hāmri nhūm mēmoj tÿr pē kwat kot hitēp xwÿnhja mēhōj mā kām:

—E amnē mē ixwÿr tē. Anē.

⁸ Hāmri nhūm kawar rārāare mē hwÿr hpôx o tē. Nhūm mēhō hā nhÿ nê tē. Hā ÿr xwÿnh nhÿxi na pre kēp “Mēhtyk” anē. Hāmri nhūm mēhōja kām kapēr nê kām:

—E ma pika hwÿr wrÿ nê tanhmā mē ho kê mē ohtô nê tanhmā amnhī to nê axkaprā. Kê mē hkwÿjaja pijapu kamā axpēn pa nê mē hkwÿjaja prām xāj ty nê mē hkwÿjaja tanhmā à htÿx kute kamā ty. Nê mēmo mry xoprēja mē hkwÿjê pa. E ma mē hwÿr wrÿ nê tanhmā mē ho ho apa. Anē.

Hāmri nhūm kuma nê hakêx nê ma pika hwÿr tēn wrÿ. Hāmri nhūm mē htykjê papxāja tanhmā amnhī to nê te kot hā jêt nê ma hkôt mōr nê pika hwÿr wrÿk pyrāk pa pre arī omunh o xa.

⁹ Hāmri nhūm mē pahte amnhī tomnuj pānhā amnhīrer xwÿnhja axte kagà ho htÿx xà hō hpôt. Na pre ra ho kwat nê hpôt tā hpānhā axte ja pôt. Hāmri nê hpôtja kôt pa ra mē kot Tÿrtūm mā mēmoj nhōr xà hā mēsti pumu. Nê hkrak ri mē hkarōjê pumu. Mē kot hkwÿjê hkôt ri mē kām Tÿrtūm kapēr jarēnh nê Jejus kēp mē ò Pahÿhti hā harēnh o pa nhūm mē kot hā mē hpar xwÿnhjê karōja pa pre mē omu. Nhūm mē mēsti hkrak ri amnhī to Tÿrtūm wÿr o hkrÿ.

¹⁰ Kÿx pē kām kapēr nê kām:

—Ām hāmri amex o amex Pahÿ Maati. Aa ate mēmoj tā tanhmā amnhī to axêx to hkêt kumrêx. Kwa xà kot kaj tokyx pika hkôt mē kot mē inhÿmex xwÿnhjaja tanhmā mē ixtā mē ho nà? Anē.

¹¹ Hāmri nhūm mēhōja mē hwÿr tē nê mē kām mē ê jaka-jre gō nhūm mē hagjê. Hāmri

nhũm mẽ kām:

—E mẽ mamrĩ atar akôkôt o akrĩ. Koja Tĩrtũm kormã tanhmã mẽ kot mẽ atomnuj xwỳnhjê ho hkêt nê. Kê mẽ axte mẽ apyrã nê mẽ akwỳjê nhĩmex mãn. Koja mẽ Tĩrtũm jamaxpêr xà hkôt axte mẽ akwỳjê pa nhũm rĩ kormã mẽ ato hpimràatã tanhmã mẽ atã mẽ hipêx to. Jakamã e mẽ atar kutêp mãmri akôkôt o akrĩ. Anê.

¹² Hãmri nhũm mẽ pahte amnhĩ tomnuj pãnhã amnhĩrer xwỳnhhta axte kagà ho htỳx xà hõ hpôt pa omu. Na pre ra ho 5 nê hpôt tã hpãnhã hkôt axte ja pôt. Hãmri nhũm pika htertet tỳx kumrêx. Nê myyti ahtyk nê mytwrỳre te kêp mẽ hkamrô kamrêk tỳx pyrã nê ajêt.

¹³ Nê kanhêti tanhmã amnhĩ to nê axrê nê pikap rôrôk pa. Te kôk xàpêr tỳx nê kot pàrerekre kormã ràx tã kot kãm hikranh par pyrã nê piitã rênh pa nhũm rôrôk.

¹⁴ Hãmri nhũm kaxkwaja te kagà kaxkep pyrã nê amnhĩ to kaxkep o tê. Nê pika piitã hkôt kên prêk nê hixêt prêk maati piitã te hkrĩ xà rũm hapôx nê mmar nê nhãm hkrĩ pyrãk. Nhũm gô hipôk piitã haxwỳja te hikwỳ xà rũm hapôx nê mmar nê nhãm hikwỳ pyrãk. Pika htertet tỳx nhỹ hã ã mẽmoj amnhĩ nhĩpêx anê.

¹⁵ Hãmri nhũm pika hkôt mẽ piitã tee ri mẽmoj ã amnhĩ nhĩpêx anhỹr ã omu nê kãm ma nê htertet tỳx kumrêx. Mẽ ho amnhĩptâr xwỳnhjaja

nê pôristi krãhtũmjaja nê mẽ kot amnhĩ to rũnh xwỳnhjaja nê mẽ hihtỳx xwỳnhjaja nê mẽ kãm mẽ àpênh xwỳnhjaja nê amnhĩ mã mẽ àpênh xwỳnhjaja. ãm piitã mẽmoj ã kot amnhĩ nhĩpêx anhỹr ã omu nê tee ri amnhĩ kukamã hamaxpêr nê kãm ma ho kãm ma. Hãmri nê hpimxur kaxyw ma kên prêk kre japêr o hprôt nê mra.

¹⁶⁻¹⁷ Hãmri nê amnhĩ to kên prêk wỳ nê kãm:

—Kwa na ra mẽ ixto amnhĩptâr ã hkrĩ xà maati kamã hkrĩ xwỳnh mẽ kot mẽ ixte amnhĩ tomnuj pãnhã amnhĩrer xwỳnhhta wa mẽ ixkamã gryk tỳx kumrêx. Ra wa kot tanhmã mẽ ixtomnuj to xà hã arĩgrota kato. Koja wa mẽ ixtomnuj tỳx nê pa mẽ kutã hkêt nê. Kwa tokyx mẽ inhĩpy arôrôk nê wa kêp mẽ ixto amũxu. Anê.

7

Mẽ kot Tĩrtũm mã hkrajê kagà

Apokarip 9.4

¹ Tã pa arĩ kaxkwa kamã mẽmoj pumu. Nhũm Tĩrtũm kapêr o mẽ wrỳk xwỳnh pé kwatja piitã ahpỳnhã pika nhĩtep xà hkôt kôk jatur xà hã hamỳ nê ho kuhê. Pika piitã hkôt kôk hpinhkrênh par nê àpêr kêt nê gô xujanãr kôt àpêr kêt kaxyw hatur xà hã hamỳ nê ho kuhê. Nê pà piitã hkôt àpêr nê tanhmã pĩ hkwỳ ho pymaj nhũm mẽ ã amnhĩ nhĩpêx anê nê nê hatur xà hã hamỳ nê ho kuhê.

² Na pre ra Tirtûm ja hã mẽ kãm karõ nẽ mẽ kãm:

—E kêr ka mẽ ma pika hwÿr wrÿ nẽ pika nẽ gô xujanãrja tanhmã wa homnu hto. Anẽ.

Hãmri nhũm mẽ kuma nẽ hwÿr wrÿ nẽ kormã nẽ kôk ho htÿx. Hãmri nhũm Tirtûm kapêr o wrÿk xwÿnhjê hõja myt japôx xà rûm mẽ hwÿr hpôx o tẽ. Nẽ ìhkra kamã mẽ kot Tirtûm kra hã mẽ hixi jarênh xà hã kagata py nẽ o tẽ. Hãmri nẽ kàx pê mẽ kot pika mẽ gô xujanãr homnu mã xwÿnhjê mã kapêr nẽ mẽ kãm:

³ —Kwa taxy pa Tirtûm krajê nhõkrã kagà hpa mãn. Kêr ka mẽ omu nẽ mẽ tapxipixjaja tanhmã mẽ ho hkêt nẽ. Anẽ.

⁴⁻⁸ Hãmri nẽ mẽ hkagà pa. Ahpÿnhã Ijaew pigrành xwÿnhjaja mẽ ho ohtô rax kumrêx nẽ tanhmã mẽ hkagà hto. Pa tanhmã mẽ kute hã mẽ harênh ma nhũm xep mẽ ohtô rax kumrêx.

Juta kamã mẽ kêp 12.000.

Nẽ Rupê kamã mẽ kêp 12.000.

Nẽ Gax kamã mẽ kêp 12.000.

Nẽ As kamã mẽ kêp 12.000.

Nẽ Natari kamã mẽ kêp 12.000.

Nẽ Manase kamã mẽ kêp 12.000.

Nẽ Simeãw kamã mẽ kêp 12.000.

Nẽ Rewi kamã mẽ kêp 12.000.

Nẽ Isaka kamã mẽ kêp 12.000.

Nẽ Jepurõ kamã mẽ kêp 12.000.

Nẽ Juje kamã mẽ kêp 12.000.

Nẽ Pëjamĩ kamã mẽ kêp 12.000.

Ã mẽ ohtô rax kot anhÿr. Hãmri nẽ mẽ piitã mẽ pikamÿr par kãm mẽ kêp 144.000. Piitã kêp Apraãw kanrêhã htãmnhwÿ na pre mẽ. Tã ã axpên kaxyw mẽ ohtô rax kumrêx kot anhÿr tã nhũm mẽ hkagà pa.

Tirtûm kra hkwyjê jarênh

Apokarip 14.1-5

⁹ Tã pa axtem mẽmoj pumu. Nhũm mẽ ohtô rax nẽ Tirtûm nhõ krĩ kamã kuhê. Ahpÿnhã ri pika piitã hkôt mẽ urojaja. Nẽ ahpÿnhã ri mẽ kapêr xwÿnhjaja nhũm prem pika piitã kurûm kot mẽ ho amnhÿptar ã hkrĩ xà maatija kamã hkrĩ xwÿnh pê Tirtûm mẽ mẽ pahte amnhĩ tomnuj pãnhã amnhÿrer xwÿnhja wa kutã kuhê. Mẽ ohtô rax kumrêx jakamã pa tee ri mẽ piitã mẽ ho kôta hpar prãm kaprÿ. Nẽ piitã ê jakare kamã kuhê. Nẽ hkĩnh nẽ hkĩnh xàj pô hkwy jamÿ nẽ ho àpêr o kuhê.

¹⁰ Hãmri nẽ kÿx pêê Tirtûm mẽ Jesus wa kãm kapêr nẽ wa kãm:

Hêxta waa nẽ. War amex o war amex Pahi Maati.

Na ka pre Akra Jesus kukwak ri mẽ ixte amnhĩ tomnuj ã tanhmã mẽ ixto hkêt nẽ.

War ajamẽ mẽ ixkamã axukaprĩ rãhã ho apa xwÿnh na ka wa.

Jakamã pa mẽ inhmex nẽ war awÿr api nẽ war akuri inhmex nẽ ija-makêtkati nẽ ixpa ho ixpa.

Ãm hãmri na ka hte wa mẽ
ixto mex rax kumrêx o
apa. War amex o war
amex. Anê.

11 Hãmri nhũm Tĩrtũm kapêr
o mẽ wrỳk xwỳnhjaja Tĩrtũm
krĩ xà mã hipòk nê hkõn krã
ho rôròk nê hkrĩ hpa. Nê
mẽ àptàr tũmjê mẽ mẽ htĩr
nê kuhê xwỳnhjaja mẽ ìhkò hã
kãm hipòk nê wam tajê pyràk
nê hkõn krã ho rôròk nê hkrĩ.
Hãmri nê mẽ ohtò kot Tĩrtũm
mẽ Jesus wa kãm kapêr ã mẽ
kuma hãmri nê Tĩrtũm ã hpi-
jaàm kaxyw hpar pê htu mỳr
pê hikwỳ hpa nê kãm mex o
mex ã harê nê kãm:

12 “Ãm hãmri na mẽ ã
ajarênh anê Tĩrtũm. Amex o
amex.

Na ka hte mẽ ixto mex o apa.
Mẽ ixrom axàhpumunh o
axàhpumunh.

Nê mẽ ixrom axihtỳx o axi-
htỳx.

Jakamã na ka hte mẽ ixpiitã
mẽ ixto mex kumrêx
rãhã ho apa.

Ã ate anhỳr rãhã o rãhã
jakamã na pa htem
amã amex o amex ã
ajarênh rãhã ho ixa.”
Anê.

13 Hãmri pa mẽ omunh o
ixãm rôm nhũm mẽ àptàr
tũmjê hõja ixwỳr tẽ nê mẽ ê
jaka kamã mẽ hkĩnh xàj pò
jamỳnh nê ho kuhê xwỳnhjê
hã ixkukja nê inhmã:

—E mãn ate mẽ ê jakare
kamã mẽ kuhê xwỳnh mũjjê
pumunh nà? Tanhmã na
prem amnhĩ nhípêx to nê
amnê api? Xà ate mẽ omunh?
Anê.

14 Hãmri pa kuma nê kãm:

—Nà ixte mẽ omunh kêt.
Kêt ka na ixrom ate mẽ
omunh. Anê.

Hãmri nhũm inhmã mẽ
harênh o:

—Nà na pre mẽ hkwỳjaja Je-
jus ã mẽ homnuj tỳx kumrêx
nê mẽ kupa. Tã mẽ kêp Je-
jus kwỳ jakamã na pre mẽ
nê mẽ kot amnhĩ tomnuj o
hapêx nê te amnhĩ kamrô ho
mẽ nê mẽ kot amnhĩ tomnuj
piitã kuhõnh par pyràk o mẽ
hipêx. Jakamã nhũm mẽ ê
jaka kamã mex nê hkĩnh tỳx
nê pa.

15 Nê Tĩrtũm kot mẽ pahto
amnhĩptàr ã hkrĩ xà
maati kutã kãm mex o
mex ã harênh rãhã ho
kuhê.

Na hte mẽ ho mex rãhã ho
pa. Mẽ hkôt pa ho
pa jakamã koja mẽmoj
tanhmã kêp mẽ ho
hkêt nê.

16-17 Nê mẽ pahte amnhĩ tom-
nuj pãnhã amnhĩrer
xwỳnh kot Tĩrtũm krĩ
xà maati kamã ãm
xwỳnhhta na hte mẽ
hamãr mex rãhã ho mẽ
hkôt pa.

Te mẽ kot mẽ hkrit jamãr mex
pyràk.

Nê te mẽ kot mẽ hkrit kõm
o pa nhũm htĩr nê pa
pyràk.

Koja mẽ kuri htĩr tũm nê hkôt
pa ho pa.

Nê axte kãm prãm kêt nê.

Nê axte kãm kôr kêt nê.

Nhũm arĩgro htỳxja axte mẽ
hkà ho hxêt kêt nê.

Koja Tĩrtũm te mẽ kot mẽ
hkra no kagô nhĩnhĩnh
par pyràk o mẽ hipêx

nhùm mē axte hkaprī
 nē mÿr o pa hkêt nē.
 Pānhā hkīnh nē mex rāhā kuri
 pa ho pa. Anē.

8

*Kagà kaxkep o htÿx xà kot
 hitep jarēnh*

¹ Tā pa arī kaxkwa
 kamā mēmoj pumu nhùm
 mē pahte amnhī tomnuj
 pānhā amnhīrer xwÿnhja
 kagà kaxkep o htÿx xà kot
 hitepta pôt. Hāmri nhùm
 kaxkwa kamā mēmoj piitā
 hpinhkrēnh pa nhùm mēhō
 kapēr kêt kumrēx. Nē
 hpinhkrēnh par o ra hā
 ahtÿm ry mex nē.

² Hāmri nhùm Tirtÿm kutā
 kapēr o wrÿk xwÿnh pê 7 nē
 mē kuhē xwÿnhjaja. Nhùm
 kapēr o wrÿk xwÿnhjê hōja
 mē hwÿr tē nē mē piitā mē
 kām pifti gō.

³⁻⁴ Hāmri nhùm kapēr o
 wrÿk xwÿnhjê hōja ôr o xijere
 py nē Tirtÿm mā mēhkuxwa xà
 ho xēt xà hā mēs kunīhti hwÿr
 o tē. Mē ho amnhīptār ā hkrī
 xà maati kutā ôr o mēstija wÿr
 o tē nē kuri o xa. Hāmri nhùm
 mē kām kamā mēhkuxwa xà
 hkwy runh rax nē nhùm
 mēsti hā ho xēt o xa. Rôm
 nhùm Tirtÿm krajaja Tirtÿm
 mā tanhmā amnhī jarēnh to.
 Jakamā nhùm mēhkuxwa xà
 xēt kÿm mē mē kot Tirtÿm mā
 amnhī jarēnh xāja mē nhùm
 ahkà nē Tirtÿm kapēr o wrÿk
 xwÿnh nhīhkra kamā xijere
 rÿm Tirtÿm kutā kax mā àpir
 o pa.

⁵ Hāmri nhùm kapēr o wrÿk
 xwÿnhja xijere kamā kuwy

hpôk kwÿ ho nÿt nē ahtar
 mā pika hwÿr kumē nhùm
 ma tē nē pikap tēm nhùm
 pika httertēt tÿx nē kamā
 na katôtök nē haxēnh nē
 hkrakrak.

*Mē kot pifti kakôr ā mē
 harēnh*

⁶ Hāmri nhùm Tirtÿm kapēr
 o wrÿk xwÿnh pê 7 kot pifti
 jamÿnh xwÿnhjaja ra kot pafti
 kakôr mā.

⁷ Jakamā nhùm wamta ô
 pifti kakô nhùm na mē te
 kot jêr krā jakot pyrāk xwÿnh
 mē kuwy te kot mēmo kamrô
 kamrêk pyrāk xwÿnhhta pikap
 rôrôk pa. Nē nhÿhÿnh pika
 hkwy ho rax nē ho kaxàr pa.
 Nē pōti nē akunī hkwy ho rax
 kumrēx nē ho kaxàr pa.

⁸ Hāmri nhùm wam ām
 xwÿnh nhījuk ri ām xwÿnhja
 ô pifti kakô nhùm mēmoj te
 kēn krā hprêk pōk pyrā nē
 kaxkwa rÿm ahtar mā tē nē
 gō xujanār nhīkjê kamā hpôk
 rāhā tēn mrô. Hāmri nhùm
 gō nhīkjê kamā gōja mēmo
 hkamrô hā amnhī jahkre
 hpa.

⁹ Jakamā nhùm gōx kām
 mēmoj htÿr nē ri mrar
 xwÿnhjaja pikaprār pa. Nē
 gōx kām pâr gō krāhkà hā
 pa xwÿnhja haxwÿja gjêx pa.
 Nē pâr kām mē pa xwÿnhjaja
 haxwÿja hagjê nē pikaprār
 pa. No nhùm gō mex kām
 pâr kām mē pa xwÿnhjaja mē
 kurom arī htÿr nē.

¹⁰ Tā nhùm wam ām
 xwÿnhhta wa hijuk ri ām
 xwÿnhja ô pifti kakô. Hāmri
 nhùm kanhēti rax kumrēxja
 axta nē hpôk o ma ahtar mā

tĕn pikap tĕm nĕ pyhti nĕ hino hkwÿ ho ohtô nĕ homnu hpa.

¹¹ Kanhĕti nhĭxi pĕ na pre “mĕmoj xÿ xà” anhÿr jakamã nhŭm tĕm nĕ pyhti nĕ hino hkwÿ ho ohtô nĕ homnu pa. Nhŭm prem hwÿr mra nĕ hkwÿ janhi nĕ ho ixkô nhŭm ÿ nĕ nhŭm mĕ ohtô nĕ ho ixkô nĕ axkaprã.

¹² Hãmri nhŭm hpãnhã Tirtŭm kapĕr o wrÿk xwÿnhjĕ hōja ô pifti kakô. Na pre ra ho axkrunĕpxi nĕ hkakôr tâ hpãnhã ra axte hō ja kakô. Hãmri nhŭm mĕhōja tĕ nĕ myyti kura nhŭm hkwÿ ahtyk nĕ hirã hkĕt nĕ. Nhŭm mytwrÿre nĕ kanhĕti mã ho anĕ nĕ myyti pyrã nĕ hkwÿ ahtyk nĕ hirã hkĕt nĕ harir. Jakamã nhŭm kamãt kãm hirã mex kĕt nĕ. Nĕ arĭgro hã myytija haxwÿja hirã mex kĕt nĕ.

¹³ Hãmri pa kaxkwa kamã àanhãhti pumu nhŭm kÿx pĕ ri htor o pa pĕ tanhmã kapĕr to nĕ kapĕr o:

—Hĕxta waa nĕ. Kormã kot pifti kakôr xwÿnhjaja axkrunĕpxi nĕ kormã hkakôr kĕt nĕ. Koja mĕ tokyx hkakô nhŭm pika hkôt ri mĕ pa xwÿnhjaja amnhĭ xà htÿx kamã hamak tÿx o pa. Na pa tee ri mĕ hkukamã ijamaxpĕr nĕ inhmã mĕ hkaprĭ htÿx nĕ. Hĕxta waa nĕ. Koja mĕ omnuj tÿx kumrĕx. Anĕ.

9

¹ Tã pa axte mĕmoj pumu. Nhŭm Tirtŭm kapĕr o wrÿk xwÿnhjĕ hō ô pifti kakô. Na

prem ra ho kwat nĕ hkakôr tâ hpãnhã axte hōja ja kakô. Hãmri nhŭm kanhĕti hō axta nĕ pikap tĕm kurĕ kumrĕx nhŭm mĕhōja omu nĕ hwÿr tĕ nĕ kãm mĕmoj tâ saf gō. Satanasti jagjĕnh xà hã ahkre xupÿm o htÿx xà hã safja nhŭm kanhĕti mã kugō.

² Hãmri nhŭm kupy nĕ ahkrehtita wÿr o tĕ nĕ kahĕ xà mĕ nhŭm kurŭm kuwy hkŭm hapôx rax nĕ. Nĕ ma kàx mã àpir o pa nĕ myyti hpro hpa nhŭm kamãt kô rax kumrĕx.

³⁻¹¹ Nĕ kuwy hkŭmja rŭm mĕmoj te krit pyrãk xwÿnh kwÿjaja pikap rôrôk nĕ kuhĕ. Te kot krit pyrãk tâ mĕ hkuk te panhĭ hkuk pyrãk. Nĕ mĕ hkrã hkĭ te mĕnijĕ hkrã hkĭ japjĕ pyrãk. Nĕ ôr o mĕ ahkã jagjĕ. Nĕ mĕ wa japjĕ htÿx kumrĕx. Te rêãwti xwa japjĕ pyrãk. Nĕ kàx o mĕ hinô hkã. Nhŭm mĕ htor o hara hkoko htÿx o mra. Te ho kawar xohtô pijapu kaxyw kot mĕ hkjĕnh xà kamã mĕ htur nĕ mĕ hkjĕnh o hprôt nhŭm hkoko htÿx pyrãk. Nĕ mĕ hkamnhwÿr o pa kaxyw mĕ hanhyja te kot makre janhy pyrãk. Ā kriitija kot anhÿr. Nĕ te nhÿhÿm oprĕ kaxyw nojarĕt nĕ mĕ hkrit kawar hã hikukrĕx mex rĕnh pyrãk. Mĕõ pahija ahkre xupÿmta kamã kĕp mĕ hkrãhtŭm. Ijaew kapĕr kãm hixi pĕ “Apatô.” No Gres kapĕr kãm kĕp “Aporiãw.” No mĕ pakapĕr kãm kĕp “mĕ hpar o pa xwÿnh.” Hãmri nhŭm Tirtŭm kriiti mã kapĕr

ně mẽ kãm:

—E kêr ka mẽ ma pika pi-itã hkôt te makre kot amnhĩ nhĩpêx pyrã nê ri mẽ hkôt mẽ hkamnhwÿr o apa. Æ amnhĩ nhĩpêx anhÿr o mẽ atã mytwrÿ pê sĩk. No ãm kêr ka mẽ hpar kumrêx kêt nê. Æm mẽ kot amnhĩ xà htÿx kãm hamak pix kaxyw tanhmã mẽ ho ho apa. Te makre kot mẽ hkamnhwÿr nhũm à htÿx kumrêxta pyrãk. No mẽ ate mẽ hkamnhwÿr nhũm mẽ hkamnhwÿr xàja koja à htÿx o makre kot mẽ hkamnhwÿr jakre. Nom ra mẽ kot Tĩrtũm kra hã mẽ hk-agà xwÿnhjaja kêr ka mẽ omu nê ãm mẽ omu nê tanhmã mẽ ho hkêt nê. Mẽ kêp ixkwÿ na mẽ. Nê põ nê prãt ka mẽ ãm omu nê tanhmã ho hkêt nê. Æm mẽ kot panhĩ nhõkrã kagà hkêt xwÿnh pixjaja ka ã mẽ hipêx anhÿr o ri mẽ hkôt apa. Nom kêr ka mẽ hpar kêt nê. Kê mẽ tee ri amnhĩ xà hã maj kãm tokyx htyk nê hapêx prãm hkaprÿ ho pa. E ma mẽ hwÿr mra nê ã mẽ hipêx anhÿr o ri apa. Anê.

Hãmri nhũm mẽ kuma nê ma mẽ hwÿr mra.

¹² Na ra pika hkôt wam mẽ homnu xà pyxi nê hapêx. No ãm arĩ hamêxkrut.

¹³ Jakamã nhũm Tĩrtũm kapêr o wrÿk xwÿnhjê hõja axte õ pifti kakô. Na prem ra ho sĩk nê hkakôr tã axte hkôt hõja hkakô. Nhũm Tĩrtũm kutã ôr o mêsti rũm mẽhõja tanhmã kapêr to. Mêsti janhà rũm kapêr.

¹⁴ Pifti kakôr xwÿnhhta mã kapêr nê kãm:

—E na ra mẽ kot mẽ hkwÿjê nhĩmex ã arĩgrota kato. Jakamã kêr ka ma pyhti pê Erax wÿr wrÿ nê gô mÿ ri Satanasti mã mẽ àpênh xwÿnh pê kwatja pumu. Na prem ra mẽ hpa hpre nhũm mẽ gô mÿr ri arĩ hkrĩ ho hkrĩ. Ka mẽ omu nê mẽ kãm mẽ hpa hpre xà hpôt pa kê mẽ ma mẽ hkôt ri mẽ hpar o pa. Anê.

¹⁵ Na pre ra Tĩrtũm mẽ kot mẽ hkwÿjê nhĩmex o pa kaxyw mẽ kurê nê gô mÿ ri mẽ unhwÿ nhũm mẽ kormã mẽ hpar xà hã arĩgro jamãr o hkrĩ. Jakamã nhũm ã pifti kakôr xwÿnhhta mã mẽ harênh anê nhũm kuma nê ma tẽ nê mẽ hwÿr wrÿ nê mẽ kãm mẽ hpa hpre xà hpôt pa. Hãmri nhũm mẽ ma pika piitã hkôt ri mẽ hpar o mẽ hkôt pa. Nê mẽ ho ohtô rax kumrêx nê mẽ himex.

¹⁶ Nê ma amnhĩ kôt pôristi ho ohtô rax nê o pa. Pi-itã kawar ã hkrĩ nê mẽ hkôt hprôt nê hkoko ho mra. Mẽ kêp 200.000.000 hã mẽ harê pa mẽ harênh ma. Mẽ ohtô rax o mẽ ohtô rax.

¹⁷ Na pa pre arĩ te xpimtir kãm mẽ omunh pyrãk. Nhũm kawar ã mẽ hkrĩ xwÿnhjaja. Mẽ hinô kàja axtem kàx o. Nê hkamrêkja te kuwy hpòk kamrêk pyrãk. Nê rãrãrja te mẽ hkurôt kane xà pê êsõf rãrãr pyrãk. Nê kakrã htyk. Æ kàx o mẽ hinô hkà kot anhÿr. Nê mẽ hkrit kawarti hkrãja te rêãwti krã pyrãk. Nê mẽ hakwa rũm kuwy hpòk mẽ êsõfti mẽ kuwy hkũm axpên kôt hapòx o pa.

18-19 Nē kawarti jamy axtem te kēp kagā xoprē hkrā pyrāk nhūm mē hamy ho mē hkamnar o mē kupa. Nē mē hakwa rūm kuwy hkūm mē kuwy hpōk mē ēsōfti hapōx xwŷnh̄ta mā mē ho anē nē. Jakamā nhūm kawartijaja mē hkōt ri hamy mē hakwa ho mē hpar o pa nē mē ohtō rax kumrēx nē mē himex.

20-21 Tā nom nhūm arī mē htīr nē ri mē pa xwŷnh̄jaja. Mē kot mē hkwyjē hpar kēt xwŷnh̄jaja hāmri ja hā mē omunh tā arī amnhī tomnuj o pa nē kām urer kēt nē. Arī tanhmā amnhī tomnuj to ho pa. Axpēn pē hprō nē mjēn o amnhīkati nē axpēn pē ahkī. Nē axpēn par o ri pa nē tanhmā axpēn xy hto ho pa. Ā htŷx ri amnhī nhīpēx anhŷr o pa nē kām urer kēt nē. Ām Satanasti hkōt pix mā ri amnhī nhīpēx o pa. Nē amnhīm sānti hkwy nhīpēx. Pī ho hipēx nē kàx o hipēx nē kēn o hipēx. Nē hipēx pa nē amnhī to hwŷr o pa. Nom mo kot mē mar kaxyw sānti jamak kre? Nē kot mē omunh kaxyw mo no? Nē ri mrar nē mē ho utār kaxyw mo hte? Na htem arī ā amnhī to hwŷr kaprŷ anhŷr o pa.

10

Kagā kaxkep grire jarēnh

¹ Tā pa arī mēmoj pumu. Nhūm axte Tīrtūm kapēr o wrŷk xwŷnh̄ xihtŷjē hōja pika hwŷr wrŷk o tē. Nē ēja kakrā ho na pre. Nē hkrā mŷ ri mǎxwŷxti ajēt. Nē hkuk te

myt no kamā hirā htŷx pyrāk. Nē akutā hte kamā te kuwy hpōk pyrāk.

² Nē ĩhkra kamā kagā kaxkep grire ra pipōt nhūm ma o tē nē o wrŷ nē o xa. Nē gō xujanār kām upōk rūm hte xām nē kŷx pē amgrā kamā apke rūm hte xām nē o xa pa ixprī hā omu.

³ Hāmri nhūm kàx pēē amŷra. Te rēāw hkār tŷx pyrāk. Nhūm hpānhā kaxkwa kamā mēhōja kām kapēr. Te na katōtōk o 7 wēs pyrāk pa ixprī hā tanhmā kapēr to hā kuma.

⁴ Hāmri nē ra mē amā ā kagā kaxyw nhūm mē ja nē inhmā kapēr nē inhmā:

—Kwa nā kwarī ja kot kaj hā kagā hkēt nē. Ām ja pix kot kaj akwyjē mā hā kagā hkēt nē. Ām kapxipix mǎn ama nē ri hā apa.

Anhŷr jakamā pa mē amā hā kagā hkēt nē. Ām papxipix kuma nē ri hā ixpa.

⁵ Tā nhūm Tīrtūm kapēr o wrŷk xwŷnh̄ kot gō xujanār kām upōk rūm hte xām nē apke amgrā kamā ām xwŷnh̄ta hāmri Tīrtūm nhŷ hā kapēr kaxyw nē kǎnhmā ĩhkra pē.

⁶⁻⁷ Tīrtūm pē kaxkwa nē pika nē gō xujanār o kator nē kamā kot mēmoj piitā ho kator xwŷnh̄ja. Nē htīr rāhā nē pa ho pa xwŷnh̄ja. Nhūm ŷ hā kapēr nē kapēr o:

—E hāmri. Amnepē mā na pre Tīrtūm ŷ hā mē kām kapēr o ri mē pa xwŷnh̄jē mā tanhmā amnhī kukamā

amnhĩ jarēnh to. Tanhmã kot pika piitã hkôt mẽ pa xwỳnhjê nhĩpêx to hã amnhĩ jarē. Nẽ mẽmo arĩgro hã mẽ kot amnhĩ tomnuj mỳrapê tanhmã kot mẽ hipêx to hã mẽ hkukamã mẽ hã amnhĩ jarē. Tã ra ã mẽ hipêx anhỹr xà hã arĩgro kato. Jakamã koja kapêr o wrỳk xwỳnh kot hitepta ò pifti kakô hãmri nhũm mẽmojja ã amnhĩ nhĩpêx anhỹr kurê kumrêx. ãm hãmri na pa mẽ amã ja jarē. Anẽ.

⁸ Pa mar o ixãm rôm nhũm wam inhmã kapêr xwỳnhhta axte inhmã kapêr nẽ inhmã:

—E ma pika hwỳr wrỳ nẽ gô xujanãr kãm upòk rũm hte xãm nẽ amgrà kamã apke rũm hte xãm xwỳnhhta wỳr tẽ nẽ kêp kagà kaxkep grire pipôt xwỳnhhta py. Anẽ.

⁹ Hãmri pa kuma nẽ ma hwỳr wrỳ nẽ hã kuwỳ nhũm inhmã kugõ nẽ inhmã:

—E mĩ. Apy nẽ akrê. ànhre. Te kot menh xành pyràk. Nom kot kaj akrê nẽ anhõhy xà. Nom mãmri apy nẽ akrê. E mĩ. Anẽ.

¹⁰ Hãmri pa kêp kupy nẽ hkaki nhũm ànhre. Pa hkrêr pa hãmri nẽ inhõhy xà kurê kumrêx.

¹¹ Hãmri nhũm kot inhmã òr xwỳnhhta inhmã:

—Nà ãm hãmri na ka apy nẽ akrê. Jakamã kêr ka ano ho ate mẽmoj piitã omunh xwỳnhja nẽ ajamak o ate mẽmoj mar xwỳnhja nẽ ate tanhmã Tĩrtũm kapêr mar toja ka piitã hã kagà hpa. Hãmri nẽ ate omunh xà hkôt akwỳjê mã piitã harēnh o apa.

Mẽ kot nhỹrmã Tĩrtũm kot tanhmã mẽ piitã mẽ hipêx to hã harēnh mar kaxyw. Ahpỹnhã ri pika piitã hkôt mẽ urojê piitã koja nhỹrmã ã mẽ hipêx anẽ. Ahpỹnhã ri mẽ kapêr xwỳnh piitã. Nẽ mẽ ò pahijaja. ãm mẽ piitã koja nhỹrmã ã mẽ hipêx anẽ. Anẽ.

11

Tĩrtũm nhỹ hã kapêr xwỳnh pijakrut wa harēnh

¹ Tã nhũm mẽhõj inhmã mẽmoj to mĩdi xà hã pĩ ryre gõ nẽ inhmã:

—E ja py nẽ Jerujarê hwỳr wrỳ nẽ kamã Tĩrtũm mã amnhĩ jarēnh xà hã ixkreja o mĩdi. Nẽ ixkre kamã amnepêm mẽ kot amnhĩ tomnuj pãnhã Tĩrtũm mã ôwêhti nhõr xà hã mêtita mã ho anẽ nẽ ho mĩdi. Nẽ ixkre kamã mẽ kot Tĩrtũm mã amnhĩ jarēnh o mẽ hkrĩ xwỳnhjaja ka aprĩ hã mẽ ho kõta.

² —No ixkre kapem pikaja ka ho mĩdi hkêt nẽ. Ra Tĩrtũm kot mẽ kot amnhĩ tomnuj xwỳnhjê mã hkaga jakamã koja mẽ htỳx ri kãm hprãm xà hkôt tanhmã homnu hto ho pa. Nẽ Jerujarê piitã hkôt ri homnu ho paja ã hã amgrà axkrunêpxi nẽ hkôt mytwrỳ kêp 6.

³ —Koja Tĩrtũm ma ÿ hã kapêr xwỳnh ho hamêxkrut nẽ mẽ hwỳr wa kumê nhũm wa ma mẽ hwỳr wrỳ nẽ mẽ kãm Tĩrtũm kapêr jarēnh o ri mẽ hkôt pa. Hãmri nẽ tee ri mẽ kot tanhmã amnhĩ tomnuj to hã mẽ omu nẽ hkaprĩ nẽ. Hãmri nẽ wa

hkaprĩ xàj xak punure kaxò nê haxà nê mẽ kãm Tĩrtũm kapêr jarênh o ri wa pa hã amgrà axkrunêpxi nê hkôt mytwrý kêp 6. Jakamã e. Pija py nê ma mẽ hwýr wrý nê ixkreta o mĩdi. Anê.

⁴ Wa pijakrut wa kot Tĩrtũm nhỹ hã kapêr jarênh o wa pa xwýnhta wa. Na htem wa kot amnhĩ nhĩpêx ã wa harênh ma nê mẽmo pĩ hpàr pê oriwêhti kot tanhmã amnhĩ nhĩpêx toja mã hamaxpêr kurê kumrêx. Nê amnepê m Tĩrtũm nhỹ hã kapêr o pa xwýnh pê Jakaris kot kanê hpòk xãmta mã mãânên hamaxpêr. Oriwêhti xôja htwým rax kumrêx nhũm htem htwým opôj nê ho kanê ho nýt nê hpòk nê kýt pê unhwý nhũm mẽ piitã hirã kamã rĩt mex o ri mra. Nê kanê hpòk mexja te kot Tĩrtũm kapêr pyræk. Nê kanê xãm xàja te kot Tĩrtũm nhỹ hã kapêr jarênh o wa pa xwýnhta wa uræk. Nê oriwêhtija haxwýja te kot wa uræk. Ra Tĩrtũm Karõ kot wa hkarõ mã àr jakamã na hte wa hprĩ hã mẽ kãm Tĩrtũm kapêr jarênh o pa nhũm mẽ kot mar xwýnhjaja te kanê nhĩrã kamã ri rĩt mex nê ri pa pyrà nê hprĩ hã mar týt nê.

⁵ Tã koja mēhō tanhmã wa hipêx to kaxyw wa hwýr tē nhũm wa hakwa rũm kuwy hpòk kato nê kot tanhmã wa ho mã xwýnhta o hxêt o kupĩ.

⁶ Nê koja wa Tĩrtũm xàhpumunh týt xà ho tanhmã ri mẽ hã mẽmoj nhĩpêx to pê mẽ kãm kapêr jarênh o

ri mẽ hkôt pa. Jao tanhmã na hto nhũm mẽ hã wrýk kêt ry nê. Rý tanhmã mẽ kêp gô hto nhũm mẽ hkamrô hã mẽ kêp amnhĩ jahkre. Koja wa ã Tĩrtũm nhỹ hã mẽ kêp mẽmoj nhĩpêx anhýr ho wa pa. Nê xatã wa kãm hprãm xà hkôt tanhmã mẽmoj tomnu hto.

⁷ Nê mẽ kãm kapêr o pa pê ã mẽ hipêx anhýr o wa hã amgrà axkrunêpxi nê hkôt mytwrý kêp 6 nê rĩ kormã ho hapêx. Hãmri nhũm ahkre xupým rũm Satanasti nhõ kôwenatôja kato nê ma wa hwýr tē nê nhýri pry kahti ri wa unê nê wa kupĩ nhũm wa pry kamã ty nê nõ.

⁸ Hãmri nhũm mẽ wa haxàr kêt nê nhũm wa arĩ pry kamã nõ. Krĩ kapem na prem pĩ kahpa hã Jejus nhõ nê kupĩ. Krĩ nhõ xwýnhjaja mẽ kot amnhĩ tomnuj týt xwýnh na mẽ. Te ho amnepê m krĩ pê Sotõ mẽ pika pê Ejit kamã mẽ kot amnhĩ tomnuj xwýnhjê kot amnhĩ nhĩpêx pyræk.

⁹ Jakamã nhũm mẽ kot wa haxàr nê axpên kurê nhũm wa pry kamã arĩ ty nê nõ nhũm mẽ piitã wa hwýr mra nê wa omu. Nê ahpýnhã krĩ piitã hkôt mẽ pa xwýnhjaja tanhmã amnhĩ to nê ja hã wa omu. Ahpýnhã ri pika piitã hkôt mẽ urojaja. Nê ahpýnhã ri mẽ kapêr xwýnh piitã. Hãmri arĩ ahpýnhã mẽ õ krĩ kamã pa htã tanhmã amnhĩ to nê wa htyk ã wa omunh ã hã apkati axkrunêpxi nê hkôt hã myt apha.

¹⁰ Koja mẽ wa htyk ã wa omu hãmri nê hkĩnh nê. Nê

hkĩnh xàj axpẽn mã hkĩnh xà
nhõr o pa. Wa kot kormã htĩr
ri tanhmã mẽ homnuj to ho
ri mẽ hkõt paja mã hamaxpẽn
nẽ wa htyk ã wa omu nẽ
hkĩnh tỳx nẽ.

11 Tã koja wa htyk ã apkati
axkrunẽpxi nẽ hkõt hã myt
ahpa hãmri nhũm Tĩrtũm wa
kamã htyyxà rẽ nẽ akupỹm
wa ho wa htĩr nhũm wa
kànhmã xa nẽ ri mra. Hãmri
nhũm mẽ kot wa omunh
xwỹnhjaja tee ri hã wa omu
nẽ kãm wa uma htỳx kumrẽx.
Ãm kãm wa uma ho kãm wa
uma.

12 Hãmri nhũm kaxkwa
kamã mẽhõja wa kãm kapẽn
nẽ wa kãm:

—E war amnẽ mẽ ixwỳr
war api. Anẽ.

Hãmri nhũm wa kuma nẽ
ma kakrã kamã àpir o mõ.
Nhũm mẽ kãm wa hkurẽ
xwỹnhjaja tee ri wa àpir ã wa
omu.

13 Hãmri nhũm pika htertet
tỳx nẽ. Nẽ krĩ kamã ixkre
ohtõ nẽ grành pa nẽ mẽ hkwỳ
nhĩmex rax nẽ nhũm mẽ ohtõ
rax kumrẽx nẽ axkaprã. Mẽ
kêp 7.000 nẽ pikaprãr pa.
Hãmri nhũm arĩ mẽ htĩr nẽ
ri mẽ pa xwỹnhjaja tee ri mẽ
omu nẽ kãm ma xàj htertet
tỳx nẽ axpẽn mã:

—Kwa Tĩrtũm mãn ã mẽ
panhĩpêx anẽ. Hihtỳx o hi-
htỳx jakamã kaxkwa rũm ã
mẽ panhĩpêx anẽ pu mẽ pah-
piitã pano ho ixkre pigrành ã
omu. Anẽ.

14 E na ra amnhĩ xà htỳx
kamã hamak xàja hamẽxkrut
nẽ hapêx. Tã no ãm arĩ mẽ
kaxyw pyxi nẽ arĩk.

*Mẽ kot pifti kot hitep kakõr
ã harẽn*

*Apokarip 4.8, 5.9-14, 7.9-
12, 14.2-5, 15.3-4, 19.1-2*

15 Tã nhũm Tĩrtũm kapẽn o
wryk xwỹnh kot hitepja õ pifti
kakõ nhũm kaxkwa kamã mẽ
pa xwỹnhjaja kax pẽ kapẽn o:

E ãm hãmri. Na ra Mẽpahpãm
Maati mẽ Jesus Krisja
wa kêp krĩ piitã hkõt
mẽ piitã mẽ õ Pahihti
na wa.

Koja Mẽpahpãm Maati ja kêp
Pahi Maati rãhã nẽ pa
ho pa xwỹnh. Anẽ.

16 Hãmri nhũm mẽ àptar tũm
pẽ 24jaja. Tĩrtũm kot mẽ
pahto amnhĩptar o hkrĩ xà mã
hipõk nẽ mẽ hkrĩ xwỹnhjaja.
Hãmri ã mẽ kapẽn anhỹrja ma
nẽ Tĩrtũm ã hpijaam kaxyw
hpar pẽ rôrõk pa nẽ htu mỳr
pẽ hikwỹ. Hãmri nẽ kãm mex
o mex ã harẽ nẽ kãm:

17 Pa Pahi Maati Tĩrtũm.
Nà ãm hãmri mẽ
ixrom axãhpumunh o
axãhpumunh nẽ axi-
htỳx o axihtỳx.

Amnepẽ mã kormã mẽmoj
kêt ri na ka pre arãhã
apa ho apa.

Tã arĩ arãhã apa ho apa.

Ãm hãmri apẽ mẽ ixpiitã mẽ
ixto amnhĩptar xwỹnh.
Nà ãm hãmri amex o
amex.

18 Kot kaj tokyx mẽ piitã
tanhmã mẽ kot amnhĩ
nhĩpêx to ho pa hã
mẽ omunh xà hkõt
tanhmã mẽ harẽn to.

Nẽ ra mẽ htyk xwỹnhjaja kot
kaj mẽ piitã akupỹm
mẽ ho mẽ htĩr pa nhũm
mẽ pika rũm hapõx pa
nẽ ma mra nẽ arĩ mẽ

htĩr xwỳnhjê nhĩhkô hã
akutã hkrĩ pa.

Ka mẽ piitã mẽ omu nẽ
tanhmã mẽ kot amnhĩ
nhĩpêx to ho pa hã mẽ
omunh hkôt tanhmã
mẽ harênh to.

Mẽ kot amnhĩ tomnuj
xwỳnhjaja kot kaj ma
mẽ kot amnhĩ xà htỳx
kamã hamak o pa
htũm xà hwỳr amnhĩ
nê mẽ arẽ nhũm mẽ ma
hwỳr hapêx. Hãmri nẽ
tee ri amnhĩ kukamã
hamaxpêr nẽ gryk tỳx
kumrêx.

Ka hpãnhã mẽ kot akôt amnhĩ
xunhwỳr nẽ akapêr
kôt amnhĩ nhĩpêx o
mẽ pa xwỳnh piitã mẽ
omu nẽ tanhmã mẽ ho
mex to.

Mẽ kot amnhĩ to rũnh
xwỳnhjaja nẽ mẽ kot
amnhĩ to hkryre
xwỳnhjaja.

Nẽ amnepêm mẽ kot anhỹ
hã mẽ kapêr o mẽ pa
xwỳnhjaja.

Akrajê piitã kot atã hpi-
jaãm xwỳnhjaja kot
kaj kormã mẽ htĩr ri
tanhmã amnhĩ to mex
hã mẽ omunh xà hkôt
tanhmã mẽ ho mex to.

Ã kot kaj tokyx mẽ piitã
ahpỳnhã mẽ omunh
xà hkôt mẽ hipêx anê.
Anê.

¹⁹ Hãmri nhũm kaxkwa kamã
Tĩrtũm nhõrkwỹ hã hakwakre
kahê xà amnhĩ mẽ pa kamã
ôr o mês kunĩhtita pumu. Pu
nhũm na hkatõtök nẽ haxênh
nẽ hkrakrak nẽ na mê te kot
jêr krã hakotre pyrãk xwỳnhja
pikap rôrök rax nẽ. Nẽ pika

htertet tỳx o htertet tỳx pa arĩ
omunh o xa.

12

*Mêhõ ni mẽ kagãmnuti wa
harênh*

¹ Tã pa axte mẽmoj pumu.
Kaxkwa kamã aa mẽ pahte
mẽmoj pumunh kêt xwỳnhja
pa omu. Nhũm mêhõ nija
xê te myt no mã hirã htỳx
pyrãk. Nẽ hpar nhõkwa kamã
mytwrỹre ajêt. Nẽ kanhêti ho
12 o mẽ ahkà tu nẽ o xa.

² Na ra htujarô nẽ hpija-
gri kaxyw õhy xà nẽ amnhĩ
kamnhêr o xa.

³ Tã pa axte mẽmoj pumu.
Aa mẽ pahte mẽmoj ã kot
anhỹr pumunh kêt xwỳnh õja
pa omu. Kagãmnuti nom
ãm axtem hkà kamrêk tỳx
kumrêx. Nẽ rax kumrêx. Nẽ
hkrã kêp 7. Nẽ hkrã piitã
kamã ôr o pahi hã mẽ ahkà
htu nẽ o nô. Nẽ hkrã kamã
pàr kêp 10.

⁴ Tã nhũm hamy ho apêr
o kaxkwa kamã kanhêti ho
ohtô nẽ pikap kurê. Hãmri nẽ
õhy xà nẽ amnhĩ kamnhêr o
ãm xwỳnhhta wỳr tẽ nẽ hkra
kator nhũm kot kêp krêr
kaxyw kutã hamãr o nô.

⁵ Hãmri nhũm hkra kato
nẽ myre. Hihtỳx o hihtỳx ã
kot pika piitã hkôt mẽ piitã
mẽ ho amnhĩptàr mã xwỳnh
na pre. Nhũm kagãmnutija
kot kêp utàr nẽ hkrêr mã tã
nhũm Tĩrtũm kapêr o wrỹk
xwỳnhjê hõja hwỳr wrỹ nẽ
kêp kumỳ nẽ ma Tĩrtũm wỳr
kaxkwa kamã kot mẽ pahto
amnhĩptàr ã hkrĩ xà maatija
wỳr ho api.

6 Hāmri nhūm kagāmnuti tee ri ma kot kēp o mōr ã omu nē hpānhã nita o apkjê nē kot tanhmã ho kaxyw nhūm amnhĩ tã omu nē umaj hprôt nē ma tē nē nhÿri kapôt ã amūxu. Ra Tirtūm kot hkukamã kãm hpimxur xà nhĩpêx xà hwÿr hprôt nē ma tē nē kamã kēp amūxu. Nhūm Tirtūmja nê kagã pumunh mex nhūm kēp hpimxur mex ã amgrã axkrunēpxi nē hkôt hã mytwrÿ kēp 6.

Mē kot kaxkwa kamã mēkarōmnuti kurê kaxàr ã mē harēnh

7 Tã nhūm mē ra kaxkwa kamã kurê kaxàr kaxyw. Kagāmnuti mē hkwyjaja nhūm mē ra Tirtūm kurê kaxàr kaxyw kutã amnhĩ xunhwÿ. Jakamã nhūm Tirtūm kapēr o mē wrÿk xwÿnhjê hkrãhtūm Mikewja ma mē hwÿr amnhĩ kôt hkwyjê o mra nē mē pijapu ho kuhê.

8 Hāmri nhūm kagāmnuti tee mē kutã amnhĩ to htÿx kaprÿ nhūm Tirtūm kapēr o mē wrÿk xwÿnhjaja amnhĩ nē mē ho axtem nē kaxkwa rūm mē kator o mē kator.

9 Satanasti pē kagāmnutita kagã kot ni kator ewa mã hêx xwÿnh na pre. Nē hêx rom tanhmã hêx to ho pa xwÿnh. Jakamã nhūm Mikew mē hkwyjaja hkwyjê mē mē ho hpimràatã amnhĩ nē pikap mē rēnh pa.

10 Hāmri nhūm kaxkwa kamã mēhōja axte kãxpê kapēr nē kapēr o:

E ãm hāmri. Na ra Tirtūm hihtÿx o hihtÿx o mē panê mēmoj punuj

piitã ho hapêx par kumrêx.

Na pre hte Satanasti pē mēkarōmnutija xatã hwÿr mra nē kãm tanhmã Jejus kwÿjê ho kapēr punuj to ho pa.

Tã koja axte mē ho kapēr kêt kumrêx. Ra Tirtūm kot amnhĩ nē kator o kator nhūm ra ma mōr o mōr kēnã.

Koja Tirtūm pika piitã hkôt mē ho amnhĩptãr xwÿnhjê japôx pa nē hpānhã mē kaxyw Kra Krisja xãm nhūm pika piitã hkôt mē ho amnhĩptãr rãhã ho pa.

Nã ãm hāmri. Ja mex o mex.

11 Na pre Jejus kôt mē pahtō nē mē pahtōxjaja mēkarōmnuti kutã amnhĩ to htÿx nē pa. No ãm amnhĩ nhÿ hã ã kutã amnhĩ nhĩpêx anhÿr kêt.

Mē pahte amnhĩ tomnuj pãnhã amnhĩrer xwÿnhhta na pre ty nē hkamrô ho mē kuhō nē mē nē mē kot amnhĩ tomnuj o hapêx.

Jakamã nhūm prem kukwak ri Satanasti kutã amnhĩ to htÿx rãhã pa.

Nhūm mē kot Jejus ã mē himex par kaxyw tã nhūm mē kãm htyk pyma hkêt nē. ãm Jejus kôt arĩ amnhĩ to htÿx nē mē hkôt pa rãhã nē.

Ja o arĩ mē kãm Jejus kot mē panê tanhmã amnhĩ nhĩpêx to hã harēnh o ri mē hkôt pa.

12 Tã Tĩrtũm ra kot mẽ panê mẽmoj punuj o hapêx par jakamã kwa kaxkwa kamã mẽ apa xwýnhjaja kêr ka mẽ akĩnh nê apa.

Nom gô xujanãr kãm nê pika kamã mẽ pa xwýnhjaja hêxta waa nê. Koja mẽ mex kêt nê.

Nê ra Mikew mẽ hkwýjaja kot amnhĩ nê kaxkwa rũm mẽkarõmnuti mẽ hkwýjê kator nê pikap mẽ rênh par jakamã nhũm Satanastija gryk tỳx kumrêx.

Tĩrtũm kot ma mẽ kot amnhĩ xà htỳx kamã hamak o pa tũm xàta wỳr mẽnh xà hã arĩgro hwỳr amgrà grêre nhũm tee ri amnhĩ kukamã hamaxpêr nê gryk tỳx o gryk tỳx. Anê.

13 Hãmri nhũm kagãmnutija mẽ kot amnhĩ nê kaxkwa rũm kator ã amnhĩ pumu nê gryk tỳx nê. Nê gryk xàj ma akupỳm ni kot hkra myre ho pijagri xwýnhta wỳr tẽ nê tanhmã ho kaxyw hkôt ho krihkrit.

¹⁴⁻¹⁶ Hãmri nhũm Tĩrtũm kapêr o mẽ wrỳk xwýnhjê hõja omu nê nija mã àanhãhti jara gô. Kot kagãmnuti pê ho htor nê ma nhỳri hpimxur xà wỳr htêm kaxyw. Nê kormã htor kaxyw nhũm kagãmnuti omu nê kot gô ho hanhir kaxyw hkôt hakwa rũm gô kapĩ nhũm hpikapĩr rax kumrêx. Te pyhti hprôt tỳx pyræk. Hãmri nhũm Tĩrtũm omu nê nija nê tanhmã pika hto nhũm kãm axkê nhũm

gô hprôt nê kamã pikapĩr pa. Jakamã nhũm mex pê àanhãhti jara ho to nê ma kapôt ã pimxur xà hwỳr ma tẽ. Nê kamã pa hã amgrà axkrunêpxi nê hkôt mytwrỳ kêp 6 nhũm prem hamãr mex rãhã ho pa.

¹⁷ Hãmri nhũm kagãmnuti tee ri kãm hpĩr prãm kaprỳ nê gryk tỳx kumrêx. Hãmri nê ma ni hkwýjê hwỳr mõ. Mẽ kot Tĩrtũm mẽ Jesus wa hkôt amnhĩ nhĩpêx o mẽ pa xwýnhjê hwỳr tanhmã mẽ homnuj to kaxyw ma mẽ hwỳr mõ. Hãmri nê tanhmã kot mẽ ho kaxyw gô xujanãr mỳ ri nõ.

13

Satanasti nhõ kôwenatô wa kot gô xujanãr rũm kator ã wa harênh

Sikũn Tesarõn 2.3-5

¹ Tã pa axte mẽmoj pumu. Nhũm gô xujanãr rũm Satanasti nhõ kôwenatôjê hõja te mrymnuti pyrà nê àpir o mõ. Kagãmnuti pyrà nê hkrã kêp 7. Nê uræk nê hpàr kêp 10. Nê hpàr piitã kamã pahi hã mẽ ahkã. Nê ahkã piitã hã axtem tanhmã Tĩrtũm o kapêr punuj to nê tanhmã haprỳ hto hã kagàja hikwỳ.

² Nê hkà te kêp ropkrorti kà pyræk. Nê hakwa te kot rêãwti jakwa pyræk. Nê ìhkra te kot pàati nhĩhkra pyræk. Jakamã na pre kagãmnuti nhỹ hã hihtỳx o kêp pahi hã pika nhõ xwýnhjê ho amnhĩptàr o pa.

³ Nê hkrã hõ te mẽ kot hayr o hpĩr nhũm ra akupỳm htĩr nê arĩ hayr xà wakre rã

nyw pyræk. Jakamã nhũm pika kamã mẽ pa xwýnhjaja amnhĩ jaêr pê omu nẽ kamã no pyma nẽ. Hãmri nẽ hkôt amnhĩ nhĩpêx o pa.

⁴ Hãmri nẽ kagãmnuti kot tanhmã mrymnuti ho nhũm ý hã mẽ ho amnhĩptàr jakamã nhũm mẽ piitã hamẽ wa hã hpijaàm kaxyw wa kãm wa mex o wa mex ã wa harênh o pa. Nẽ mrymnuti hã axpên mã:

—Hêxta waa nẽ. Mẽ pahtõ na mẽ pahte mrymnutita pyrã nẽ ã mẽ pahte amnhĩ nhĩpêx kot anhÿr? Mẽ pahtõ kot pu kutã xa nẽ paxihtÿx o hkurê kapa? Nà amrakati kumrêx. Anẽ.

⁵⁻⁶ Hãmri nhũm Satanasti tanhmã mrymnuti ho nhũm kapêr o ri mẽ hkôt pa nẽ mẽ ho amnhĩptàr o hã amgrã axkrunêpxi nẽ hkôt mytwrÿ kêp 6. No ãm axtem nẽ Tirtũm o kapêr punuj o ri mẽ hkôt pa. Nẽ ri tanhmã haprÿ hto nẽ õ krĩja mex kêt ã harênh o ri mẽ hkôt pa.

⁷ Hãmri nhũm Satanasti ra kot mẽ hkurê kaxàr kaxyw kãm anẽ nhũm axtem nẽ Tirtũm pê hkrajê kutã amnhĩ xãm nẽ mẽ hwÿr hprõt nẽ tanhmã hpijapu hto ho pa nẽ mẽ ho axtem nẽ mẽ ho krihkrit pa nẽ ahpÿnhã ri pika piitã hkôt mẽ uro hkwyjê ho amnhĩptàr o pa. Nẽ ahpÿnhã mẽ kapêr xwýnh piitã mẽ ho amnhĩptã.

⁸ Jakamã nhũm mẽ ohtõ rax kumrêx nẽ mrymnuti hkôt amnhĩ nhĩpêx. Nẽ kutã hkõn krã ho rôrõk nẽ hkrĩ nẽ kãm mex o mex ã harê. No

ãm mẽ piitã hkêt. Kot mẽ pahte amnhĩ tomnuj pãnhã amnhĩrer xwýnh kôt ra mẽ kot amnhĩ xunhwÿr xwýnhjaja tapxipixjaja na prem hkôt amnhĩ xunhwÿr kêt nẽ. Amnepê mã kormã amrakati ri Tirtũm mẽ Jejus wa õ kagã kamã mẽ htũr tũm nẽ mẽ pa mã xwýnh nhĩxi xwýnh pixjaja na prem mrymnuti pumu nẽ hkwyjê rom hprĩ hã kot amnhĩ nhĩpêx ã omunh kurê kumrêx nẽ hkôt amnhĩ nhĩpêx kêt nẽ.

⁹ E ka mẽ atõ axumar kaxyw ajamak kre hã kot kaj ixujarênh piitã ama nẽ kãm ajamaxpêr tÿx rãhã ho apa.

¹⁰ Jakamã kwa Tirtũm kôt ixkwÿjaja. Kwãr mẽ mãmrĩ mẽ apynê nẽ mẽ ajagjê.

Nẽ kwãr mẽ mãmrĩ wapo ho mẽ ajayr o mẽ apa.

Nom kêr ka mẽ umaj ixkaga hkêt nẽ. Ixkaga hkêt o ixkaga hkêt.

Mẽ ãm ixkôt pix mã amnhĩ nhĩpêx o ri apa rãhã ty.

Pika rũm mrymnuti hõ kator ã harênh

Makre 13.22

¹¹ Tã pa mrymnuti hõ pumu. Nom wamta pyrã nẽ gô xujanãr rũm kator kêt axtem pika rũm kato. Nẽ ôwêhti hkrare pyrã nẽ hpàr pijakrutre. Nẽ te ho kagãmnuti kapêr tÿx pyrã nẽ kapêr tÿx kumrêx o pa.

¹² Gô xujanãr rũm mrymnuti xàpir xwýnhhta nhÿ hã pika nhõ xwýnhjê mã kapêr tÿx nẽ mẽ kãm:

—E pika piitã hkôt mẽ apa xwÿnhjaja mẽ inhma. Kêr ka mẽ kot hkrã hõ jayr o hpÿr nhũm akupÿm htÿr xwÿnhhta kôt pix mã amnhĩ nhÿpêx rãhã ho ri apa. Nẽ kãm mex o mex ã harênh rãhã nẽ.

Anhÿr o mẽ kãm kapêr.

¹³ Hãmri nẽ Satanasti nhÿ hã mẽ kãm aa mẽ kot mẽmoj pumunh kêt kwÿ ho anhÿr o pa. Jao kaxkwa rũm tanhmã mẽ kãm kuwy ho wrÿk to nhũm pikap rôrôk nhũm mẽ amnhĩ jaêr pê omu nẽ kamã no pyrna nẽ.

¹⁴ ã ri mẽ noo mã mẽ kãm amnhĩ nhÿpêx anhÿr o ri mẽ hkôt pa. Gô xujanãr rũm mrymnutija noo mã ã hêx rom amnhĩ nhÿpêx anhÿr o mẽ no kupyra o pa nhũm mẽ omu nẽ hkôt amnhĩ nhÿpêx. Hãmri nhũm mẽ kãm mẽmoj tã karõ nẽ mẽ kãm:

—E wam mrymnutita. Mẽ kot hkrã hõ jayr o hpÿr nhũm akupÿm htÿr xwÿnhhta kêr ka mẽ kãm hkarõ nhÿpêx nẽ ho mẽ anhõ sãnti. Kê mẽ piitã hwÿr mra nẽ kutã hkõn krã ho rôrôk nẽ hkrĩ nẽ amnhĩ to kuwy nẽ kãm mex o mex ã harê.

Anhÿr o mẽ kãm hã karõ.

¹⁵ Hãmri nhũm mẽ kuma nẽ mar xà hkôt hipêx nẽ ãm nhũm xa. Hãmri nhũm mrymnuti kot hitepta omu nẽ hwÿr tẽ nẽ tanhmã ho nhũm ra kapêr nẽ mẽ kãm:

—E kêr ka mẽ kot inhmex ã ijarênh kêt xwÿnhjê pynê nẽ mẽ himex pa. Anê.

¹⁶ Hãmri nhũm pika rũm mrymnuti kator xwÿnhhta

haxwÿja mẽ kãm kapêr nẽ mẽ kãm:

—E koja ixkwÿjaja inhÿ hã mẽ apiitã mẽ apê ixkwÿ hã mẽ akagã. Mẽ ate amnhĩ to rũnh xwÿnhjaja nẽ mẽ ate amnhĩ to hkryre xwÿnhjaja. Nẽ amarĩ mẽ kãm mẽ axapênh xwÿnhjaja nẽ amnhĩ mã mẽ axapênh xwÿnhjaja. Nẽ mẽ akãxpore rũnh xwÿnhjaja nẽ mẽ apê amrakati xwÿnhjaja. Kojã mẽ apiitã mẽ akagã hpa. Mẽ akwÿ nhõkrã kagã nẽ mẽ akwÿ xupòk rũm mẽ anhÿhkra katut kagã.

¹⁷ —Gô xujanãr rũm mrymnutita nhÿxi kot paj mẽ atã hipêx. Rÿ hixi hã nũm nhÿpêx. Hãmri ka mẽ axãpkur xã japrôr kaxyw nhÿhÿm mra nhũm mẽ atã hixita pumu nẽ rĩ kormã mẽ amã mẽmoj kwÿ ho wênê ka mẽ amnhÿm haprô nẽ ho axãpkur o ri apa. Nẽ mẽ ate mẽmoj to wênê xwÿnhjaja koja mẽ apê mẽmoj japrôr kaxyw mẽ awÿr mra ka mẽ tee ri nhÿhÿnh mẽ hã hixi japêr hãmri nẽ mẽ kãm mẽmoj to wênê hkêt nẽ. ãm nhÿhÿnh mẽ atã hixi hã kagãta pumunh pix kukwak ri kot kaj mẽ awjaprô rÿ mẽmoj to wênê. Anê.

¹⁸ E kwa kêr ka mẽ ixte mẽmoj pumunh nẽ mẽ amã hã kagãta pumu nẽ ama nẽ kãm ajamaxpêr tÿx o apa. Mrymnutita nhÿxi na kêp nũm. Nũmja kêp 666. E kaj mẽ akrã hi mex xwÿnhjaja kot kaj mẽ aprĩ hã ja mar tÿx kurê kumrêx.

14

*Tirtūm mex ã mẽ grer
Apokarip 7.1-8*

¹ Tã pa axte mẽmoj pumu. Nhũm mẽ pahte amnhĩ tomnuj pãnhã amnhĩrer xwỳnhja hixèt pê Siãwja nhĩmòk ã xa. Nê puhã mẽ ohtò rax kumrêx nê kuhê. Mẽ ohtò ho mẽ ohtò. Piitã kamã mẽ kêp 144.000. Nê piitã òkrã hã mẽ pahte amnhĩ tomnuj pãnhã amnhĩrer xwỳnh mẽ Hipêêxà wa hixi jaxwỳr pa mẽ omu.

² Nhũm mẽ kaxkwa kamã grer o kuhê. Mẽ grerja mex o mex. Te kot gò hpròt tỳx hkoko htỳx pyræk. Nê te na katòtòk tỳx pyræk. Nê te wiorãw môr xwỳnhjaja kot hkakrênh mex pyræk pa mẽ mar o xa.

³ Nê mẽ grer xwỳnhjaja. Jesus puhã mẽ ohtò rax kumrêx nê mẽ kuhê xwỳnhjaja na prem Tirtūm kot mẽ ho amnhĩptàr ã hkrĩ xàta kuri grer o kuhê. Nê mẽmoj tĩr pê kwat xwỳnhjê mẽ mẽ àptàr tũm pê 24jê kuri grer o kuhê. Mẽ grer nyw o gre. Æm mẽ tapxipixjaja mẽ kot mẽ grer nywja mar. Ra mẽ kêp Tirtūm kra hã mẽ kot mẽ òkrã hã Tirtūm mẽ Kra Jesus wa hixi ã kagà nhũm Tirtūm kot ra mrymnuti mẽ hõta wa kêp mẽ utàr nê amnhĩ wỳr mẽ ho àpir xwỳnh na pre mẽ. Æm mẽ tapxipixjaja mẽ grer nywja ma nê wa kãm ho grer o kuhê.

⁴⁻⁵ Na prem tãm amnhĩ nhĩpêx nê Tirtūm kòt amnhĩ nhĩpêx rãhã ho pa. Te mẽ kot amnhĩ prò pix tãnopxar rãhã ho pata pyræk. Nê ri tanhmã

hêx to rỳ tanhmã ri amnhĩ tomnuj to ho pa hkêt nê. Æm tãm ri amnhĩ nhĩpêx mex o pa. Mẽ kêp Tirtūm mẽ mẽ pahte amnhĩ tomnuj pãnhã amnhĩrer xwỳnh kwỳ jakamã na prem mẽ pahte amnhĩ tomnuj pãnhã amnhĩrer xwỳnhhta kòt pix mã amnhĩ nhĩpêx o pa. Jakamã na prem mrymnuti kutã rôròk nê kãm mex o mex ã harênh kêt nê. Tã mẽ kumrêxjaja Tirtūm mẽ Kra wa kuri wa kãm grer o kuhê.

*Tirtūm kapêr o wrỳk xwỳnh
pijakrunêpxi jarênh*

⁶ Tã pa axte Tirtūm kapêr o wrỳk xwỳnhjê hõ pumu nhũm kỳx pê ri htor o pa. Ahpỳnhã ri pika piitã hkòt mẽ uro hkwỳjê hkòt. Na ahpỳnhã ri mẽ kapêr xwỳnhjê piitã mẽ hkòt mẽ kãm Tirtūm kot tanhmã mẽ hipêx to hã harênh kaxyw. Ahpỳnhã mẽ kapêr xwỳnh piitã mẽ kãm harênh o pa. Nê htor o pa pê kỳx pê mẽ kãm kapêr nê mẽ kãm:

⁷ "E na ra Tirtūm mẽ ate amnhĩ tomnuj mỳrapê tanhmã mẽ ato kaxyw. Jakamã kwa mẽ tokyx hã apijaàm kaxyw akõn krã ho aròròk nê akrĩ nê kãm mex o mex ã harê. Kêp mẽmoj piitã ho kator xwỳnh na. Na pre kaxkwa ho kato nê pika ho kato nê gò xujanãr o kato nê hino ho kato nê mẽmoj piitã ho kator pa. Jakamã kwa kêr ka mẽ tapxipix ã mãn apijaàm nê kãm mex o mex hã harênh rãhã ho apa."

Anhỳr o mẽ kãm kapêr.

⁸ Hāmri nhūm hōja wamta kôt tē nē urāk nē k̄yx pē mē kām kapēr o:

—Koja Tirtūm tokyx Papirōn grānh pa. Na hte krī nhō xw̄ynhjaja amnhī tomnuj pix rāhā ho pa. Mē kot amnhī nhīpēx te mē kot kagōx̄yhti ho hkōm nē amnhī mē mē piitā mē kām ōr nē ho mē ho pipānh pyrāk. Na htem mēnijē piitā ho amnhīkati o pa. Nē amnhī kw̄ȳjē pē mē hprō ho amnhīkati. Nē amnhī mē pika piitā hkôt mē pa xw̄ynhjē mā anh̄r o pa. Mē kot mē urāk nē ā amnhī nhīpēx anh̄r o pa kaxyw mē kām anh̄r o pa. Ja m̄rapē na ra Tirtūm kot tanhmā mē ho kaxyw mē hā amnhī jarē. Anē.

⁹ Tā nhūm wa hkôt hōja tē nē wa urāk nē k̄ax pē pika nhō xw̄ynhjē mā kapēr nē mē kām:

—E mē ate mrymnuti kutā akōn krā ho arōrōk nē akrī nē kām mex ā harēnh xw̄ynhjaja. Nē mē ate karō nhīpēx nē kutā akōn krā ho akrī nē kām mex ā harēnh xw̄ynhjaja. Nē mē anhōkrā nē mē anhīhkra hā hixi hā kagā xw̄ynhjaja.

¹⁰⁻¹¹ —Tirtūm na tee ja hā mē apumu nē mē akamā gryk t̄yx kumrēx. Mē ate kapēr kuhpa hā mrymnuti hkôt amnhī xunhw̄yr jakamā nhūm mē akamā gryk t̄yx o mē akamā gryk t̄yx. Jakamā koja kuwy hpōk rāhā ho rāhā xw̄ynhta kamā mē arēnh pa ka mē amnhī xā ht̄yx kamā ajamak rāhā apa ho apa. Koja kuwy hpōkja aa hapēx kēt nē kurūm k̄ax mā hkūm àpir o pa

rāhā nē. Koja ā mē ate amnhī tomnuj o mē apa xw̄ynhjē nhīpēx anē ka mē kamā apa ho apa nē aa kurūm ajapōx kēt nē kamā amnhī xā ht̄yx kām ajamak rāhā apa ho apa. Arīgro hān kamāt kām arī ā amnhī nhīpēx anh̄r rāhā apa ho apa. Mē ate gōj rūm mrymnuti mē hkarō ho sānti wa kutā akōn krā ho arōrōk nē akrī nē wa kām wa mex ā wa harēnhja m̄rapē kot kaj mē ā amnhī nhīpēx anē. Kot mē pahte amnhī tomnuj pānhā amnhīrer xw̄ynh mē Tirtūm kapēr o mē wr̄yk xw̄ynhjē noo mā kot kaj mē ā amnhī nhīpēx anh̄r o apa.

¹² Anh̄r o mē kām kapēr jakamā kwa kēr pu mē pahte Tirtūm kôt amnhī xunhw̄yr xw̄ynhjaja mē hkukamā mē harēnhja ma nē Tirtūm kapēr kôt pix mā amnhī nhīpēx rāhā ho ri papa. Mē kot tanhmā hā mē pahto htā pu mē hkaga hkēt nē amnhī kaxyw Jesus kôt pajamaxpēr t̄yx rāhā nē. Hāmri nē nh̄rmā mē kurom ma ō krī hw̄yr api nē kamā pamex kumrēx nē papa ho papa.

Mē kēp Jesus kw̄ȳ hā mē htyk xw̄ynhjē jarēnh

Wam Tesarōn 4.16

¹³ Tā nhūm kaxkwa kamā mēhōja axte inhmā kapēr nē inhmā:

E Juāw. Kēr ka ā akw̄ȳjē mā mēmoj tā kagā anē nē mē kām hā kagā ho: “E mē ate Tirtūm kôt ri amnhī nhīpēx xw̄ynhjaja. Mē kot Tirtūm ā mē apar nhūm

mē atyk tā koja amnhĩ
tā mē ato mex rax
kumrēx.” Anhÿr o mē
kām hã kagà.

Anhÿr o inhmã kapēr.
Hãmri nhũm Tĩrtũm Karõja
kuma nē kãm:

—Nà ãm hãmri na ka ã mē
harēnh anē. Ra Tĩrtũm kot
amnhĩ tā mē omunh rãhã ho
pa. Mē kot kôt pix mã amnhĩ
nhĩpēx o pa pē mē kãm mē
hkurē xwÿnhjē kutã amnhĩ to
htÿx rãhã htykja nhũm Tĩrtũm
kot amnhĩ tā mē omunh mex.
Koja mē ho mex kumrēx. Mē
kot Jejus ã mē hpar tā koja
mē ho mex rax nē nhũm mē
kuri mex rãhã nē pa ho pa
nhũm mēhõ axte tanhmã mē
ho hkēt nē. Anē.

*Tĩrtũm kot tanhmã mē kãm
hkĩnh xwÿnhjē nhĩpēx to*

14 Tã pa axte mēmoj pumu.
Kaxkwa kamã kakrã jakajre
pumu. Nē kamã mēhõj te
panhĩ pyrã nē nhÿ. Nhũm ôr
o pahi hã mē ahkã htu nē ku-
teere xwagixre py nē o nhÿ.

15 Hãmri nhũm kaxkwa
kamã Tĩrtũm kapēr o mē
wryk xwÿnhjē hõja Tĩrtũm mã
amnhĩ jarēnh xà hã ixkre rũm
kato nē kakrã jaka kamã ÿr
xwÿnhta mã kapēr. Kàx pē
kãm kapēr nē kãm:

—E pika nhõ xwÿnhjaja te
mē hpur kãm mēmo hy ra
hkamrēk nē hikēnh mã mex
pyrãk. Jakamã anhõ kuteere
ata py nē ma mē hkôt tanhmã
ri mē ho ho ri mē hkôt apa. Te
mē kot mēmo hy nhĩkēnh o ri
pa pyrãk o mē hipēx nē ma ho
mē himex o ri apa. Anē.

16 Hãmri nhũm kuma nē
pika piitã mÿri õ kuteere

ho apê nē te mēmo hy jakàr
pyrãk o mē hipēx.

17 Hãmri nhũm axte Tĩrtũm
mã amnhĩ jarēnh xà hã ixkre
rũm kapēr o mē wrykjē hõja
kato. ìhkra kamã kuteere xwa
gixre py nē o xa.

18 Hãmri nhũm axte hõja
ixkre rũm kê hkôt kato nē
hkukamã kator xwÿnhta mã
kapēr. Kàx pē kãm kapēr nē
kãm:

—E na ra Tĩrtũm tanhmã
mē kot amnhĩ tomnuj to hã
tanhmã mē hipēx to kaxyw.
Te mē kēp mē hpur kãm mēmo
xô pē uwa ra hkamrēk nē
rēnh mã tãm pyrãk. Jakamã
ma pika hwÿr mē hwÿr wry
nē mē hkôt ri anhõ kuteere
ho mē himex o ri apa. Anē.

19 Hãmri nhũm kuma nē ma
pika hwÿr wry nē mē hipēx o
te mē kot uwa xô rēnh nē prēs
kãm hkapĩr nē kagô janēnh
pyrã nē mē hkôt ri kuteere
ho mē hpar o pa. Tĩrtũm ra
mē kamã gryk tÿx o mē kamã
gryk tÿx jakamã nhũm ã mē
hkôt mē hipēx anhÿr o ri pa.

20 Jakamã nhũm mē
hkamrô hpikapĩr rax kumrēx
o uwa kagô jakre. Te ho pyhti
hprôt o nõr pyrãk. Jao upÿm
o 2 met nē hkôt ho mēj met.
Nom hprôt xà hkôt ry rax o
ry rax. Ho 300 kirõm. Nhũm ã
mē kamrô hprôt rax anē.

15

Tĩrtũm mex ã mē grer

1 Tã pa axte kaxkwa
kamã mēmoj pumu. Hãmri
nē amnhĩ jaér pē omu nē
tee ri hkukamã ijamaxpēr.
Aa mē pahte mēmoj ã kot

anhÿr pumunh kêt xwÿnh pa pre omu. Nhÿm Tÿrtÿm kapêr o mē wryk xwÿnh pê 7jaja ahpÿnhã pika hkôt mē kot amnhÿ tomnuj xwÿnhjê homnuj kaxyw akuprô nê kuhê. Æm jajê pixjaja koja Tÿrtÿm nhÿ hã axte tanhmã mē homnuj to nê ho anhÿr pa hãmri nhÿm ra ja hapêx o hapêx.

² Jakamã pa axte Tÿrtÿm kapem gô rax pumu. Te kot kàx karÿr jaxênh mē kuwy hpôk o pihkàr pyràk xwÿnhja hprôt o nō. Nhÿm Tÿrtÿm kra hkwyjaja gô mÿ ri ohtô rax kumrêx nê kuhê. Na pre ra mrymnutija tee ri amnhÿ kôt mē rênh mã nê tee ri mē hã amnhÿ nhÿxi hã kagã hprãm kaprÿ nom nhÿm mē hkaga nê Jejus kôt amnhÿ nhÿpêx rãhã ho pa. Nê mrymnuti karô ho sãnti mã mex ã harênh kêt rãhã ty nê kaxkwa hwÿr api. Jakamã nhÿm Tÿrtÿm amnhÿ tã mē omu nê mē kãm wiorãwti hkwy gô nhÿm mē piitã hamÿ nê gô rax mÿ ri ho kuhê.

³ Hãmri nê Tÿrtÿm mã tanhmã amnhÿ to ho pa xwÿnh pê Mojes mē mē pahte amnhÿ tomnuj pãnhã amnhÿrer xwÿnhhta wa kot Tÿrtÿm mã greta nhÿm mē Tÿrtÿm mã ho grer o kuhê nê grer o:

E Pahi Maati Tÿrtÿm. Na pa mē ra inhmex pê awÿr ixàpir pa.

Æm hãmri na ka hte tanhmã amnhÿ nhÿpêx to ho ri apa.

Aa tanhmã axêx to hkêt.

Nê mē ixrom axihtÿx o axihtÿx.

Nê mē ixrom axàhpumunh o axàhpumunh.

Jakamã na ka hte mē inhmã aa mē ixte mēmoj pumunh kêt kwÿ ho anhÿr o apa.

Pika piitã hkôt ahpÿnhã mē ho amnhÿptàr xwÿnhjê nhô Pahi Maati na ka.

Nê ate tãm amnhÿ nhÿpêx xwÿnh na ka.

⁴ Jakamã na htem piitã atã hpijaàm o pa.

Nê amã mē kapêr xàptàr pix o amã kapêr.

Nê amã amex o amex ã ajarênh rãhã nê. Æm hãmri mē ixrom kapxipix amex o amex.

Jakamã koja ahpÿnhã pika piitã hkôt akrajê piitã ate tãm amnhÿ nhÿpêx nê tãm mē piitã tanhmã mē harênh to hã ajarênh ma nê awÿr mra nê akutã hkôn krã ho rôrôk nê hkrÿ nê amã amex o amex ã ajarê. Anê.

Mê homnu xà hã xijere jamÿnh xwÿnh jarênh

⁵ Tã na pa axte mēmoj pumu. Kaxkwa kamã Tÿrtÿm nhôrkwy hã hitom xà piitã amnhÿ kahê xà rē nê kuhê pa omu. Nê ixkre kamã ô hitom mex maati haxwÿja amnhÿ kahê xà mē nê xa.

⁶ Hãmri nhÿm ixkreja rÿm Tÿrtÿm kapêr o mē wryk xwÿnh pê 7jaja hapôj nê kuhê. Mê ê hakajre nê hirã htÿx kumrêx. Nê mē hinô pre xãja ôr pix o. Nê piitã Tÿrtÿm mã tanhmã kot mē homnuj

to xà hã xijere pê 7ta jamýnh kaxyw kuhê.

⁷ Hãmri nhũm mẽmoj tır pê kwatjê ôja mẽ kãm xijere hkwy jamý nê mẽ hwýr o tẽ. Xijere kęp 7 nê piitã ôr o. Nhũm hamý nê Tirtũm kapër o mẽ wrýk xwýnh tajê hwýr o tẽ nê ho mẽ hipêx nhũm mẽ ahpýnhã hamý. Xijere kamã Tirtũm gryk xà jamý nê o kuhê.

⁸ Pu nhũm Tirtũm rũm kuwy hkũm hapôj. Tirtũm mex nê hihtýx xwýnh ta rũm hapôx rax o ixkreta kunor pa nhũm mẽ tee ri hwýr gjêx prãm kaprý.

16

Xijere kamã mẽ homnu xà pê 7 jarênh

¹ Tã pa arĩ mẽmoj pumu nhũm Tirtũm nhõrkwý kamã mẽhõja kapër o wrýk xwýnh pê 7jê mã kàx pê kapër nê mẽ kãm:

—E na pa ra mẽ kot ixkapër kwým ri amnhĩ nhĩpêx xwýnhjê pumu nhũm ixpê ja omnuj týx o ixpê omnuj týx. Jakamã e mẽ anhõ xijereta jamý nê ma pika hwýr mẽ hwýr wrý nê axpên pãnhã mẽ hã xijere kamã mẽ homnu xà kapĩ. E mẽ tokyx ma mẽ hwýr wrý. Anê.

² Hãmri nhũm mẽ kuma nê axpên pãnhã mẽ hwýr wrý. Nhũm wamta kumrêx pika piitã hkôt mẽ homnu xà ta kapĩ. Pu nhũm mẽ kot mrym-nuti mẽ õ sãnti wa kãm mex ã harênh nê amnhĩ tã wa hixi jaxwýr xwýnh piitã hkãnhy

hpa nê à htýx kumrêx nê ri pã.

³ Hãmri nhũm wamta kôt hõja õ xijere py nê gô xujanãr kãm hkapĩr pa nhũm gô te mẽ htykjê kamrô pyrã nê kamã mẽmo mry htyyxã rênh xwýnh piitã pikaprãr pa.

⁴ Tã ra xijere kapĩr xwýnh o axkrut nê õ xijere kapĩ hãmri nhũm hkôt hõta õ xijere py nê hpãnhã gô hkryre piitã hkôt hkapĩr pa. Pyhti nê ri hino piitã hkôt hkapĩr pa nhũm piitã gô xujanãr pyrã nê mẽ hkamrô hã amnhĩ jahkre hpa.

⁵ Hãmri nhũm axtem Tirtũm kapër o mẽ wrýk xwýnhjê hõ kot kãm gô piitã hamãr xwýnh ta ja hã omu nê Tirtũm mã kãm:

Pa amex rãhã apa ho apa xwýnh. Nê arãhã apa ho apa xwýnh.

Nà ãm hãmri na ka ã mẽ kęp gõta nhĩpêx anê.

⁶ Na prem mẽ kot akôt amnhĩ nhĩpêx xwýnhjê mẽ mẽ kãm ri akapër jarênh xwýnhjê hpar o pa nhũm mẽ hkamrô hpikapĩr rax nê.

Tã ka ra mẽ hã mẽ kęp mẽ hkõm xà homnu hpa nhũm mẽ kęp mẽ hkamrô ã amnhĩ jahkre nhũm mẽ tee ri ho hkõm mã. Nà ãm hãmri na ka ã mẽ kęp gô nhĩpêx anê Tirtũm. Anê.

⁷ Hãmri nhũm mẽ kot Tirtũm mã mẽmoj nhõr xà hã mẽsti hpar pê hkrĩ xwýnhjê hõja kuma nê kãm:

Nà ãm hãmri na ã ajarēnh anē
Tĩrtũm.

Ãm hãmri na ka ã akrajē hã
mē hipēx anē.

Ra ate mē hã amnhĩ jarēnh xà
hkôt na ka hte tanhmã
mē hipēx to.

Nà apê mē inhõ Tĩrtũm
Maati na ka. Mē
ixrom axihtyx o axi-
htyx nē axàhpumunh o
axàhpumunh. Anē.

8 Tã ra axkrunēpxi nē õ xi-
jere kapĩ. Jakamã nhũm mē
hpãnhã hõja õ xijere o tē nē
myyti hã hkapĩr pa nhũm hk-
agro htȳx nē pika hkôt mē pa
xwȳnhjē hkà ho hxēt o pa.

9 Kagro htȳx o hkagro htȳx
jakamã mē hkà ho hxēt nhũm
mē kamã hkà kajē hpa. Hãmri
nē tee ri amnhĩ pumu nē
hamaxpēr o:

—Nà Tĩrtũmtija na ã mē pah-
tomnuj tȳx anē. Anē.

Hãmri nē kamã gryk tȳx nē
haprȳ nē tanhmã ho kapēr
punuj to ho pa. Nom mē kot
amnhĩ tomnuj kaga nē kãm
mex o mex ã harēnh kēt nē arĩ
tanhmã amnhĩ tomnuj to ho
pa.

10 Nhũm ra kēp kwat nē
õ xijere kamã mēmojja kapĩ.
Jakamã nhũm ra hpãnhã hõja
õ xijere o tē nē gõj rũm mrym-
nuti kot mē ho amnhĩptār
xà hã hkrĩ xà hã hkapĩr pa.
Jakamã nhũm ra kot mē ho
amnhĩptār xà hã pikaja kamã
kamàt kô htyk par kumrēx.
Hãmri nhũm mrymnuti mē
hkôt mē kot amnhĩ nhĩpēx
xwȳnhjē hã kamàt kô hpa
nhũm mē amnhĩ xà htȳx ã

maj amnhĩ nham o axpēn
kamnhar tȳx kumrēx.

11 Nē ã Tĩrtũm kot mē hipēx
anhȳr ã amnhĩ tã omu nē
kamã gryk tȳx nē tanhmã ho
kapēr punuj to ho pa. No ãm
kot amnhĩ tomnuj xwȳnh ã
amnhĩ pumunh nē kot amnhĩ
tomnuj kaga hkēt nē.

12 Nhũm prem ra kēp sĩk
nē õ xijere kamã mēmoj kapĩ.
Jakamã nhũm hpãnhã hõja õ
xijere kamã mēmojta o tē nē
pyhti pē Erax kamã hkapĩr
pa nhũm gõja grà pa nē te
kēp pry pyrã nē nõ. Jakamã
nhũm myt japõx xà rũm mē
ho amnhĩptār xwȳnhjaja nē
põristijaja hãmri pijapu kaxyw
Jerujarē hwȳr nojarēt nē hã
hwȳr pa.

13 Tã nhũm kagãmnuti mē ÿ
hã mē kãm hēx o pa xwȳnh mē
mrymnutita wa mē hakwa
rũm mēmoj te priti pyrã nē
hapõx o pa. No ãm priti
hkēt mē kēp Satanasti mã mē
àpēnh xwȳnh kwȳy.

14 Jakamã na prem pika
piitã hkôt mē kot aa mēmoj
pumunh kēt kwȳ ho anhȳr o
hēx rom mē no kupyr o mē
hkôt pa. Tã pika piitã hkôt mē
ho amnhĩptār xwȳnhjē mē ho
pikuprõnh kaxyw mē hapēr o
pa. Mē kot Tĩrtũm xihtȳx o
hihtȳx kurē kaxàr kaxyw mē
pijapu xà hã arĩgro kukamã
mē ho pikuprõnh o pa.

*Jejus kot amnhĩ kwȳjē mã
kapēr ã harēnh*

15 Tã nhũm Jejus pika hkôt
hkrajaja arĩ mē htĩr nē pa
xwȳnhjē mã kapēr nē mē
kãm:

E mẽ inhma ixkwỳjaja. Akupỳm ixte mẽ awỳr ixwrỳk xà hã arĩgroja ã kot paj te mẽ àhkĩnh xwỳnh kot amnhĩ nhĩpêx pyrà nẽ mẽ ajaêr pê mẽ awỳr wrỳ. Jakamã kêr ka mẽ amnhĩ wỳr ijamãr rãhã ho apa. Kêr pa akupỳn wrỳ ka mẽ amnhĩ wỳr ixpumu nẽ akĩnh nẽ amnhĩ kamã amã ixpuma hkêt nẽ. Anẽ.

Mẽ kot axpẽn kurê kaxàr kaxyw mẽ pikuprõnh ã mẽ harênh

16 Tã nhũm Satanasti hkwyjaja pika piitã hkôt mẽ ho amnhĩptãr xwỳnhjê ho pikuprõnh pa nẽ mẽ hkurê kaxàr kaxyw ma Ijaew kot kãm “Amaketõ” jarênhja wỳr mra.

17 Hãmri nhũm Tĩrtũm kapêr o mẽ wrỳk xwỳnh pê 7 kot hitepta õ xijere py nẽ kàx mã kamã mẽmoj kapĩr pa. Jakamã nhũm Tĩrtũm nhõrkwỹ kamã mẽ ho amnhĩptãr ã hkrĩ xà rũm Tĩrtũm kàx pê kapêr o:

—E hãmri. Na pa ra mẽ kot amnhĩ tomnuj mỳrapê tanhmã mẽ ho jatur xàm mẽnh kaxyw. Anẽ.

18 Pu nhũm na hkatõtõk nẽ hkrakrak nẽ haxênh nhũm pika htertet tỳx nẽ. Aa mẽ kot pika htertet tỳx kot anhỹr ã omunh kêt kumrêx.

19 Jakamã nhũm Papirõnja kajê axkrunêpxi. Papirõn nhõ xwỳnhjaja kot amnhĩ tomnuj tỳx o paja mỳrapê nhũm Tĩrtũm ã mẽ hipêx anẽ.

Nẽ pika htertet o pika piitã hkôt krĩ grãnh pa.

20 Nhũm gõ hipõk piitã gõja hã axkamur nhũm hapêx pa. Nẽ kên prêk nẽ hkrã hixêt rôrõk nẽ hpigrãnh pa. Pika htertet tỳx kumrêx jakamã ã mẽmoj amnhĩ nhĩpêx anẽ.

21 Nẽ na mẽ pê jêr krã jakootija mẽ piitã mẽ hipy rôrõk. No ãm hkrã hkryre hkêt hkrã rũnh kumrêx. ãm hpỳnh nẽ kamã kêp 40 kir nẽ mẽ hã rôrõk nhũm mẽ tee ri amnhĩ tã ã omu nẽ Tĩrtũm kamã gryk tỳx nẽ haprỳ nẽ ho kapêr punuj nẽ.

17

Tĩrtũm kra hkêt xwỳnhjê jarênh

1 Tã pa pre kê axte mẽmoj pumu. Nhũm kot xijere jamỳnh xwỳnhjê hõja ixwỳr tẽ nẽ inhmã:

—E ma ixkõt tẽ nẽ mẽmoj pumu. Anẽ.

Hãmri pa kuma nẽ ma hkôt tẽ nhũm inhmã:

—Nà ahpỹnhã gõ rax mỳri krĩ nhõ xwỳnhjaja te ho ni hkuprỳ gõ mỳ ri ỹr nẽ kãm mẽmyjê piitã hkĩnh o ỹr xwỳnhhta pyrãk. Na htem uràk nẽ Tĩrtũm kapêr kõt ri amnhĩ nhĩpêx kêt nẽ. ãm htỳx ri tanhmã amnhĩ tomnuj to ho pa. Jakamã koja Tĩrtũm tanhmã mẽ homnuj tỳx to nẽ mẽ ho hapêx.

2 Krĩ piitã hkôt mẽ ho amnhĩptãr xwỳnhjaja na hte ma mẽ õ krĩ hwỳr mra nẽ te mẽ kot mẽ hkuprỳjê ho amnhĩkati pyrãk o amnhĩ nhĩpêx. Nẽ te pipãnh nẽ

htÿx ri amnhĩ nhĩpêx pyràk o amnhĩ nhĩpêx o pa. Nhũm krĩ nhõ xwÿnhjaja mẽ uràk nẽ amnhĩ krã hkôt pix mã tanhmã amnhĩ tomnuj to ho ri pa. E ma ixkôt tẽ nẽ ja hã mẽ omu. Anẽ.

³⁻⁴Hãmri nhũm Tĩrtũm Karõ tanhmã ixto nhũm kapêr o wrÿk xwÿnhja ma kapôt wÿr ixto mõi pa kapôt ã mrym-nuti hkrã kêp 7 nẽ kamã hpàr kêp 10 xwÿnhhta pumu nhũm hkamrêeti nẽ xa. Nẽ ĩ pitã hã tanhmã Tĩrtũm o kapêr punuj to hã kagã. Nhũm katut ã mẽhõ ni kuprÿta nhÿ. Mẽ ho amnhĩptàr xwÿnh ã mẽ ê kakrã htyk nẽ hkamrêk o hkukàr jaxà nẽ hã nhÿ. Nẽ ôr o ôkrexê. Nẽ ôr o hinwÿyÿxê nẽ ĩhkra kamã kàx. ãm ôr pix o hikukrêx. Nẽ kẽn mex karÿr pix o amnhĩ jamrêx. Nẽ ôr o kopti hõ py nẽ hã nhÿ. Kopti kamã ni kuprÿ kot amnhĩ tomnuj xà. ãm kot mẽ kêp mẽ mjên o amnhĩkati ho pa xà pix nhũm kupy nẽ o nhÿ.

⁵Nẽ ôkrã hã amnhĩ nhĩxi hã kagã kot:

Inhĩxi pimxur pẽ PAPIRÕN RAXTI.

Nẽ ixpê mẽ kêp mẽ mjênjê ho amnhĩkati ho mẽ pa xwÿnhjê nã na pa.

Nẽ ixpê mẽ kot axpên prõ ho amnhĩkati o mẽ pa xwÿnhjê nã na pa.

Nẽ ixpê mẽ kot Tĩrtũm nẽ mẽ kãm hêx o ri mẽ pa xwÿnhjê nã na pa.

Nẽ ixpê mẽ kot Tĩrtũm kapêr kôt amnhĩ nhĩpêx o pa hkêt xwÿnhjê nã na pa.

Anhÿr o ôkrã hã amnhĩ nhĩxi hã kagã kot anhÿr.

⁶Nhũm axpã nẽ nhÿ pa omu. No ãm kagôxÿhti ho hpipãnh kêt. Mẽ kot Jejus kôt amnhĩ xunhwÿr nẽ ri mẽ kãm Jejus kêp mẽ ô pahihtĩ hã harênh xwÿnhjê kamnhwÿr o mẽ hpar nhũm mẽ hkamrô pikapĩr xwÿnhjê kamrô ho na pre axpã nẽ nhÿ. Pa ã kot amnhĩ nhĩpêx anhÿr ã omu nẽ tee ri ijamaxpêr.

⁷Hãmri nhũm Tĩrtũm kapêr o wrÿk xwÿnhja inhmã:

—Kwa mon ka ri ja pumu nẽ tee ri ajamaxpêr? E kot paj ixprĩ hã amã harê ka inhma. Niti mẽ hã ÿr xwÿnh pẽ mrymnutita. Krã pẽ 7 nẽ kamã hpàr pẽ 10 xwÿnhhta kot paj ixprĩ hã amã hamẽ wa harê ka wa harênh ma.

⁸—Nà mrymnutija na pre htĩr nẽ ri pa tã ty nẽ ahkre xupÿmti kamã hikwÿ. Nom koja akupÿm htĩr nẽ kurũm kato nhũm mẽ piitã omu nẽ ahpÿnhã tanhmã hamaxpêr to. Amnepêm kormã amrakati ri Tĩrtũm kot ô kagã kamã mẽ htĩr tũm nẽ mẽ pa mã xwÿnhjê nhĩxi jaxwÿr xwÿnhjaja koja kator ã omu nẽ ãm omu nẽ tanhmã hamaxpêr to hkêt nẽ. No mẽ kot Jejus kôt amnhĩ xunhwÿr kêt xwÿnhjaja koja mẽ amnhĩ jaêr pẽ akupÿm kator ã omu nẽ tee ri hkukamã hamaxpêr. Hãmri nẽ axpên mã: “Kwa amnepêm htyk tã ra tanhmã amnhĩ to nẽ akupÿm htĩr nẽ api nẽ mõi.” Anhÿr o axpên mã harê. Hãmri nhũm kato nẽ ma tẽ nhũm Tĩrtũm tã ho

hapêx kumrêx nhũm hapêx o hapêx.

9 —Kwa inhma nê jam aja-maxpêr tỳx nê. Mrymnuti krã pê 7ta te kêp hixêt prêk pê 7 pyrã nê hã ỳr xwỳnh ni kuprỳta te hixêt prêk pê 7ta ã ỳr pyrãk.

10 —Nê mrymnuti hkrã pê 7ja te kêp mê ho amnhĩptàr xwỳnh pê 7 pyrãk. Nhũm mê ho amnhĩptàr xwỳnhjaja te mê kêp 5 nê ra htyk pyrãk nhũm hkôt hõja arĩ mê ho amnhĩptàr o pa. No kot hitepta kormã. Nom koja mê ho amnhĩptàr ry hkêt nê.

11 —Mrymnuti htĩr nê pa htã htyk nê ra akupỳm htĩr nê àpir xwỳnhhta koja hkrã hitepta pãnhã mê ho amnhĩptàr o pa. Jakamã te mê ho amnhĩptàr xwỳnh pê 7jê hõ pyrãk. Koja hkrã pê 7ja mê ho amnhĩptã nê gaa nê htyk mê nhũm hpãnhã mrymnutita hpãnhã mê ho amnhĩptã. Hãmri nhũm rĩ kormã Tĩrtũm tã mê ho hapêx par kumrêx.

12 —Nê ate mrymnuti hkrã kamã pãr pê 10 pumunh xwỳnhhta te mê kêp mê ho amnhĩptàr xwỳnh pê 10 pyrãk. No ãm jaja na kormã mê ho amnhĩptàr kêt nê. Koja mê nhỹrmã anhĩpê mrymnuti nhỹ hã ahpỳnhã ri mê ho amnhĩptàr o pa nom mê ho amnhĩptàr japjê hkêt nê.

13 Koja mê tanhmã ja hã axpên mar to hãmri nê mrymnuti mã anê nhũm mê hpãnhã mê piitã mê ho amnhĩptã.

14 —Nê mê ho amnhĩptàr xwỳnh pê 10jaja koja mê pahte amnhĩ tomnuj pãnhã amnhĩrer xwỳnh kurê kaxàr kaxyw hwỳr mra nê kutã pijapu ho kuhê. No ãm tee ri kãm tanhmã ho hprãm hkaprỳ nhũm mê ho axtem nê amnhĩ tã mê himex pa. Hihtỳx o hihtỳx o kot mê ho hpimràatã mê hakrenh par. Nê kêp pika piitã hkôt mê ho amnhĩptàr xwỳnhjê nhõ Pahihti. Tãm na pre amnhĩ wỳr mê kot hkôt amnhĩ nhĩpêx o mê pa xwỳnhjê wỳ nhũm htem amnhĩ kaxyw hkôt hamaxpêr mex rãhã ho pa.

15 —Nê krĩ pê Papirõn kapem gô xohtô mỳ ri ni kuprỳ hkrĩ xwỳnhhta. Gô xohtôja te kêp ahpỳnhã ri pika piitã hkôt mê uro hkwy pyrãk. Nê te ahpỳnhã ri mê kapêr xwỳnh kwỳ pyrãk.

16 —Nê mrymnuti hpàr pê 10ta kêp mê ho amnhĩptàr xwỳnh pê 10 pyrãk. Jakamã koja mê kãm ni kuprỳta prãm nõkati nê kamã gryk tỳx kumrêx. Hãmri nê hwỳr mra nê kêp hikukrêx piitã utã nê kêp ê hkwrỳnh pa nhũm hkênh mex nê xa. Hãmri nhũm mê kupĩ nê ĩ hkrêr pa nê kuwy kamã hi rê nhũm kaxàr pa nê hapêx.

17 —Na pre pahi pê 10jaja mrymnuti hkôt amnhĩ xunhwỳ nhũm Tĩrtũm ãm ja hã mê omu nê tanhmã nê mê kãm nê hkêt nê. Jakamã koja mê ãm hkôt pix mã amnhĩ nhĩpêx o pa rãhã nhũm Tĩrtũm mê ho hapêx. Nê mê õ krĩ

mě mẽ ho hpimràatã mẽ ho hapêx pa. Hãmri nẽ mẽ ho hapêx o mẽ ho hapêx.

¹⁸ —Nẽ ate mēhõ ni kupry pumunh xwýnhhta te kệp krĩ rax pẽ Papirõn nhõ xwýnhjẽ pyræk. Nẽ mẽ ho amnhĩptår xwýnhja pika piitã hkõt mẽ ho amnhĩptår xwýnhjẽ hkrãhtũm na. Anẽ.

Ã Tĩrtũm kapẽr o mẽ wrýk xwýnhja inhmã mẽ harẽnh anẽ. Pa kuma nẽ ô ri mẽ amã hã kagà. Mẽ ate kamã harẽnh nẽ aprĩ hã mar tỳx kaxyw.

18

Tĩrtũm kot Papirõn grành par ã harẽnh

¹ Tã pa kê axte mẽmoj pumu. Nhũm axte Tĩrtũm kapẽr o mẽ wrýk xwýnhjẽ hõja kaxkwa rũm ahpar mã wrýk o tẽ. Tĩrtũm nhỹ hã hihtỳx nẽ kamã hirã rax kumrẽx o pika piitã hkõt mẽ kãm hirã pa.

² Nẽ ahpar mã tẽn wrý nẽ kàx pẽ kapẽr o:

E koja Papirõnja pigrành pa nẽ hpãnhã kệp Satanasti mã mẽ àpẽn h xwýnhjẽ papxà nẽ kệp nhõnhti papxà. Hãmri nẽ aa kamã mẽmoj mex kêt kumrẽx.

³ Krĩ nhõ xwýnhjaja na htem Tĩrtũm kapẽr kõt amnhĩ nhĩpêx kêt nẽ amnhĩ krã hkõt kãm prãm xã hkõt pix mã tanhmã amnhĩ tomnuj to ho pa. Te mēhõ pipãnh nẽ htỳx ri amnhĩ nhĩpêx o pa pyræk.

Nhũm krĩ piitã hkõt mẽ ho amnhĩptår xwýnhjaja mẽ hwỳr mra nẽ mēnijê ho amnhĩkati ho pa.

Nẽ krĩ nhõ xwýnhjaja mẽmoj pumu nẽ kãm hkĩnh nẽ haprõr kurê kumrẽx o pa nẽ aa uaprõr o hapêx kêt nẽ.

Jakamã na hte krĩ hkwy nhõ xwýnhjaja mẽ hwỳr mẽmoj to pa nẽ xatã mẽ kãm ho wẽnê nẽ mẽ kukwak ri mẽ hikãxpore rũnh nẽ pa.

Anhỹr o kapẽr.

⁴ Hãmri nhũm Tĩrtũm Papirõn kamã hkrajê mã kapẽr nẽ mẽ kãm:

E mẽ tokyx mẽ kot ri htỳx amnhĩ nhĩpêx xwýnhjẽ nhõ krĩta rũm ajapõj ixkrajaja.

Kot kaj mẽ anhỹr kêt nẽ ra mẽ hkõt amnhĩ nhĩpêx pa mẽ ato apimràatã mẽ ate amnhĩ tomnuj ã mẽ atomnuj tỳx nẽ.

⁵ Krĩ nhõ xwýnhjaja na htem amnhĩ tomnuj rũnh o pa.

Mẽ kot amnhĩ tomnuj xà te mẽ kot kẽn katutxõ nhũm hprêk rax o kot kaxkwa kanhwỳr kaxyw pyræk.

Na pa hte ã mẽ kot amnhĩ nhĩpêx anhỹr ã mẽ omunh rãhã ho ri ixpa. Jakamã kwa ixkrajaja mẽ tokyx mẽ kurũm ajapõj.

Anhỹr o hkrajê mã kapẽr. Hãmri nẽ kapẽr o mẽ wrýk xwýnhjẽ mã kãm:

⁶ E kwa mẽ ma mẽ hwỳr wry
nẽ tanhmã ixkrajê hã
mẽ ho.

No âm kêr ka mẽ tanhmã
mẽ ho htỳx o mẽ kot
ra tanhmã ixpê ixkrajê
nhĩpêx tota jakre.

Kê mẽ tanhmã ixpê mẽ ho
grire htã ka mẽ hã
tanhmã mẽ ho htỳx
kumrêx o mẽ kot mẽ
hipêxta jakre.

⁷ Krĩ nhõ xwỳnhjaja na prem
mex mẽ pa.

Nẽ mẽ hikukrêx rũnh nẽ
hkĩnh nẽ pa.

Nẽ tanhmã amnhĩ to jarkrar
to ho ri pa nẽ amnhĩ
jarênh o:

“Ot pa mẽ te pahi ni kot
amnhĩ nhĩpêxta pyrã
nẽ ixkrĩ xã mex pix
kãm ixkrĩ pyrãk.

Nẽ te Tĩrtũm kot amnhĩ
nhĩpêx pyrãk o na pa
htem amnhĩ nhĩpêx o
ri ixpa.

Nẽ mẽ ixkĩnh nẽ mẽ inhmex
rãhã ri ixpa.

Ã mẽ ixte amnhĩ nhĩpêx
anhỹr xwỳnh na pa
mẽ.”

Anhỹr ã amnhĩ to jarkrar o
pa.

Tã kêr ka mẽ tanhmã mẽ
homnuj to kê mẽ
mexta pãnhã omnuj
tỳx nẽ pa.

Nẽ kê mẽ hkaprĩ nẽ amnhĩ xã
htỳx kãm hamak rãhã
nẽ pa ho pa.

⁸ E kê mẽ ã amnhĩ nhĩpêx
anhỹr o pa.

Jakamã koja mẽ arĩgro hpỳnh
kãm mẽ hkwỳjaja
hpikaprãr rũnh nẽ
nhũm arĩ mẽ htĩr

xwỳnhjaja omnuj nẽ
pa.

Nẽ tee ri amnhĩ pumu nẽ
hkaprĩ xã mỳr o pa.

Nẽ amnhĩ xã htỳx kãm hamak
o pa.

Nẽ tee ri amnhĩ nhĩpêx o pa.
Nẽ kãm prãm nẽ pa rãhã ty
nhũm kuwy mẽ ho
hkaxàr pa.

Ixpê Pahi Maati Tĩrtũm kot
paj ixihtỳx kãm ã mẽ
hipêx anẽ. Anẽ.

⁹ Hãmri nhũm krĩ piitã kurũm
mẽ ho amnhĩptãr xwỳnhjaja.
Mẽ kot mẽ hwỳr mrrar nẽ mẽ
hkuprỳjê ho amnhĩkati nẽ mẽ
urãk nẽ mẽmoj pumunh nẽ
haprôr rãhã ho pa xwỳnhjaja
tee ri krĩ kaxàr nẽ kàx mã
kuwy hkũm àpir o paja pumu
nẽ hkaprĩ nẽ mỳr o kuhê.

¹⁰ Nẽ Tĩrtũm kot mẽ ho
hapêx par ã mẽ omu nẽ kãm
ma htỳx kumrêx. Amỳm
mẽ omunh o kuhê nẽ tee ri
amnhĩ kukamã hamaxpêr nẽ
htertet tỳx nẽ. Nẽ mỳr kãm
kapêr o:

Hêxta waa nẽ Papirõn nhõ
xwỳnhjaja.

Mẽ amex nẽ axihtỳx mex nẽ
apa htã nhũm Tĩrtũm
mẽ anhĩmex pa. Hêxta
waa nẽ. Anẽ.

¹¹ Nẽ mẽ hwỳr mrrar nẽ mẽ
kãm mẽmoj to wênê ho mẽ pa
xwỳnhjaja haxwỳja krĩ pumu
nẽ tee ri amnhĩ kukamã
hamaxpêr nẽ hkaprĩ nẽ mỳr
o kuhê. Nhỹri koja mẽ tokyx
axte mẽmoj to wênê? Mẽ kêp
mẽmoj japrôr rũnh xwỳnhjaja
hkaxàr par kumrêx kênã.

¹² Na prem mẽmoj piitã
ho pa nẽ mẽ kãm ho wênê.
Mẽmoj mex piitã. ôr o

mē hkukrêx nē prat o mē
hkukrêx nē kēn jaxēnh ā
kàxpore xohtô. Nē kupêxê
mex. Kakrā htyk nē hkamrêk
nē hkroore nē hā hapjê. Nē
mēmo pī kuxware nē pī htyx
nē kēn jakār nē kàx o ri mēmo
nhīpêxja nhūm prem mē kām
ho wēnê ho pa.

13 Nē mēmo htwým nē mē
hkuxwa xà. Nē mē ō ho
ành xà nē mē ō kuxwa xà nē
xwýgrā nē harôj. Nē môx nē
ôwēhti nē kawar nē kaxyw
kawarti hkjēnh xà hā kar-
rotre. Nē nhýhýnh krī hō
kamā panhī hkwý pynê nē
mē hwýr mē o pa nē mē kām
mē ho wēnê nhūm mē amarī
mē hkôt ri àpēnh rūnh o pa.
Na prem ā mē kām mēmoj to
wēnê anhýr o pa. Tā ra mē
kot mē haprôr xwýnh mē mē
pimràatā hapêx pa.

14 Jakamā nhūm mē tee ri
mē hkukamā hamaxpēr nē te
kot mē kām kapēr pyrā nē mē
kām:

Hêxta waa nē. Mē amā mēmoj
prām nē amnhīm
haprôr xwýnhhta na mē
apê hapêx par kumrêx.

Nē mē akàxpore rūnh nē mē
akukrêx rūnhhta mē
mē apimràatā ajapêx
pa. Kot kaj mē axte
tanhmā amnhī nhīpêx
to ho apa hkêt nē. Anē.

15 Hāmri nē amým ri Tirtūm
kot tanhmā mē hipêx to hā
mē omu nē kām ma xàj mur
nē httert o kuhê.

16 Nē mýr kām kapēr o:

Hêxta waa nē. Na pre htem ê
mex pix jagjê nē ri hā

mra. Kakrā htykre nē
hkamrêkre.

Nē mē hikukrêx mex o amnhī
jamrêx nē ri hā mra.

Nē ôr nē kēn mex ā ohtô
xwýnh o amnhī jamrêx
nē ri hā mra.

17 Tā ra hapêx par kumrêx.
Anē.

Hāmri nhūm gô xujanār kām
pār nhō dôn nē mē kot mē
kām pār o ri mrar xwýnhjaja
nē mē kot kamā tep pynēnh
xà ho tep pynēnh o ri mē pa
xwýnhjaja nē pār kām amarī
mē pa xwýnhjaja hāmri mē
hwýr mra nē wamtajê pyrā
nē tee ri amým ri mē ō krī
pumu nē mýr o kuhê.

18 Nē kurūm kuwy hkūm
xàpir o pa hā omu nē tee ri
mē hkukamā hamaxpēr nē
axpēn mā:

Hêxta waa nē. Krī mūj na pre
mex o mex. Mex o krī
piitā hakrenh par htā
hapêx pa. Anē.

19 Hāmri nē mur nē hkaprī xàj
pika hkwý jamý nē ho amnhī
kamī nē mýr kām kapēr o:

Hêxta waa nē. Krī mūj na pre
rax o rax.

Nhūm pre nhýhýnh pār kām
mēmoj to wēnê ho pa
xwýnhjaja mē hwýr
mēmoj to pa nē mē
kām ho wēnê nē mē
hkukwak ri hikàxpore
rūnh nē ri pa.

Tā hāmri mē hapêx pa. Anē.

20 Hāmri nhūm Tirtūmja
krajê piitā mē kām kapēr nē
mē kām:

E ixpê Tirtūm na pa ā mē
hipêx anē.

Mē kot mē apê ixkrajaja
tanhmā mē atomnuj

to ho paja mÿrapê na
pa mẽ atã ã mẽ hipêx
anê.

Jakamã e kaxkwa kamã
mẽ apê ixri mẽ apa
xwÿnhjaja.

Nê mẽ ate inhÿ hã ri mẽ
kãm ixkapêr jarênh o
mẽ apa xwÿnhjaja.

Nê Jejus nhÿ hã mẽ akapêr
o ri mẽ apa xwÿnhjaja.
Mẽ apiitã mẽ apê ixkra
na ka mẽ.

E mẽ amnhĩ tã ja pumu nê
akĩnh nê axpên mã
apikunhar o akuhê. Pa
na pa mẽ atã ã mẽ ho
ijapêx anê. Anê.

²¹ Tã nhũm kapêr o mẽ wrÿk
xwÿnhjê hõja hihtÿx o kên rax
kumrêxja mÿ nê o tẽ nê gô xu-
janãr kamã kãm gêt nê kumê
nhũm mrõ nê akunok. Hãmri
nhũm kapêr o:

E krĩta koja Tĩrtũm te ho
ixte gôx kãm kên
mênh nhũm mrõr nê
hpikunor pyrãk o
hipêx nhũm hapêx par
kumrêx.

²²⁻²⁴ Na pre hte krĩja kamã mẽ
kot ri mẽ kãm mẽmoj to
wênê xwÿnhjaja amnhĩ
to rũnh o krĩ piitã hkôt
mẽ hakrenh pa.

Nê krĩ nhõ xwÿnhjaja na
prem pika piitã hkôt
hêx rom tanhmã mẽ
no kupyrr to ho ri pa.
Jakamã ra mẽmoj to
wênê xwÿnhjê pyrã nê
mẽ hikukrêx rũnh gryk
ã Tĩrtũm kaga.

No ãm ja pix kêt. Tĩrtũm
krajê mẽ Tĩrtũm nhÿ
hã kapêr o mẽ pa

xwÿnhjaja na prem mẽ
himex rax nê. Hãmri
nhũm krĩ piitã kamã
mẽ pa xwÿnhjaja mẽ
kot mẽ hipêx ã mẽ omu
nê mẽ urãk nê ã mẽ
hipêx anhÿr o pa.

Tã Papirõn nhõ xwÿnhjaja
kot mẽ hipêx anhÿrja
mÿrapê koja Tĩrtũm mẽ
himex par kumrêx.

Jakamã koja mẽ axte hkĩnh nê
hkĩnh xaj ri grer kêt nê.

Nê axte hkĩnh nê grer kãm
hakwa kôr o ri pa kêt
nê.

Nê axte ri wiorãw kakrênh
hkêt nê.

Nê axte ri amnhĩm kawà hyr
o hkrĩ hkêt nê.

Nê axte harõj kahuk o kuhê
hkêt nê.

Nê axte mẽ ôrkwÿ kamã kanê
hpõk kêt nê.

Nê axte axpên mã ri hkrajê
rer o ri pa hkêt nê. Koja
ã mẽmoj kot anhÿr piitã
hapêx pa. Anê.

19

*Mẽ kot Tĩrtũm mex ã mẽ
harênh*

¹ Tã pa kê axte mẽmoj
pumu. Nê kaxkwa kamã mẽ
kapêr ma nhũm mẽ ohtô rax
kumrêx nê tanhmã axpên mã
kapêr to. Nê anhípê kax pê
kapêr tÿx nê kapêr o:

E pu mẽ pahpiitã Tĩrtũm mã
mex o mex ã harê.

Tapxipix na hihtÿx o hihtÿx.

Nê tapxipix na àhpumunh o
àhpumunh.

Nê tapxipix na mex o mex.

Tapxipix na mex o kot mẽmoj
piitã hakrenh par.

Ra kot mẽmoj punuj pê mẽ papytâr par jakamã kęp mẽ papytâr xwýnh ã pixi mex na.

² Na hte amnhĩ jarēnh xà hkôt tanhmã mẽmoj to ho pa.

Ně amnhĩ to hēx kēt nē.

Tã ãm hãmri na ã Papirõn nhõ xwýnhjê nhĩpêx anē.

Na prem mẽ kãm Tĩrtũm kapēr jarēnh o mẽ pa xwýnhjê nhĩmex rax kumrēx.

Ně krĩ piitã hkôt ri pa nē amnhĩ kôt mẽ kurē nhũm mẽ kuma nē mẽ hkôt amnhĩ tomnuj o pa.

Nhũm Tĩrtũm tee ri hã mẽ omu nē ã hkrajê hã mẽ hipêx kati anē. ãm hãmri na ã mẽ hipêx anē.

Anhỹr o axpēn mã harē.

³ Hãmri nē xatã axpēn mã:

Nà ãm hãmri na ã mẽ panhõ Tĩrtũmja mẽ hipêx anē nhũm mẽ kurũm kuwy hkũm kàx mã àpir o pa.

Koja krĩ nhõ xwýnhjaja amnhĩ xà htỳx kamã hamak rãhã ho pa nē aa à htỳx hapêx kēt.

E pu mẽ hã Tĩrtũm mã mex o mex ã harē. Anē.

⁴ Hãmri nhũm mẽ àptâr tũm pê 24 mẽ mẽmoj tĩr pê kwatjaja hãmri Tĩrtũm kot mẽ ho amnhĩptâr ã hkrĩ xà maati kutã rõrõk nē kãm hipõ hpa. Hãmri nē ã mẽ kapēr anhỹr xwýnhjê mã kapēr nē kãm:

Nà ãm hãmri na ka mẽ ã Tĩrtũm mex ã harēnh anē. E pu mẽ pahpiitã

kãm mex o mex ã harē. Anē.

⁵ Hãmri nhũm mẽhõja Tĩrtũm krĩ xà maati kamã kapēr o:

E mẽ axte Tĩrtũm mã mex o mex ã harē.

Mẽ ate Měpahpãm kôt amnhĩ nhĩpêx o mẽ apa xwýnhjaja.

Ně mẽ apê mẽ ho amnhĩptâr xwýnhjaja nē amari ri mẽ apa xwýnhjaja nē mẽ apiitã mẽ ate Tĩrtũm ã apijaam o mẽ apa xwýnhjaja kãm mex o mex ã harē. Anē.

Kot mẽ pahpãnhã amnhĩrer xwýnh mẽ hkwýjê jarēnh

⁶ Tã pa tanhmã mẽ kapēr to hã mẽ kuma nhũm mẽ kàx pê kapēr tỳx nē. Te mẽ ohtõ rax kumrēx kapēr pyræk. Nē te gõ koko htỳx rỳ na katõtõk tỳx pyræk. Hãmri nē mẽ kapēr o:

E na ra Tĩrtũm kęp mẽmoj piitã ho amnhĩptâr xwýnh.

Ně kęp mẽ panhõ Pahi Maati. Ně hihtỳx o hihtỳx nē àhpumunh o àhpumunh.

E pu mẽ kãm mex o mex ã mãn harē.

⁷⁻⁸ Ně hã pahkĩnh nē.

Ně kãm hihtỳx o hihtỳx ã harē.

Te mẽ kot axpēn mã mẽ rer xwýnh kot amnhĩ nhĩpêx pyræk.

Jao mẽ pahte amnhĩ tomnuj pãnhã amnhĩrer xwýnhhta te kęp myja pyræk.

Ně mẽ kot hkôt amnhĩ nhĩpêx xwýnh piitã te mẽ kęp nija pyræk.

Ně te mě kot axpěn mã wa rer
nhũm wa kot axpěn kôt
pa ho pa pyræk o koja
mě amnhĩ nhĩpêx.

Ně te mě kot mjên mã xwýnh
mã ê mex jakare nhõr
nhũm kot hagjênh
pyræk. Ně ê mexja
te mě kot tãm amnhĩ
nhĩpêx xà pyræk. Aně.

9 Hãmri nhũm Tirtũm kapêr o
wrýk xwýnhja inhmã:

—E Juãw. Pa amã mẽmoj
jarê ka mar tỳx nẽ akwýjê mã
hã kagà. Tirtũm kapêr kwý
kot paj amã harê. Kêp Tirtũm
kapêr jakamã ãm hãmri na.
Na hte mẽmoj jarênh o hêx kêt
nẽ. E kapêr ã kagà ho:

Na htem axpěn mã mẽ rer
kaxyw nẽ amnhĩ wýr
hkwýjê wý nhũm mẽ
hwýr mra nẽ wa hã
hkĩnh nẽ apkur mex
nẽ.

Ja pyrà nẽ Tirtũm kot
amnhĩ wýr mẽ hwýr
xwýnhjaja koja mẽ
nhýrmã mẽ pahte
amnhĩ tomnuj pãnhã
amnhĩrer xwýnhhta wýr
api nẽ ã amnhĩ nhĩpêx
aně nẽ hkĩnh nẽ apkur
mex nẽ.

Hãmri nhũm Tirtũm mẽ ho
mex rax kumrêx. Aně.
—E kêr ka ã akwýjê mã ja hã
kagà aně Juãw. Aně.

Hãmri pa kuma nẽ kagà ja
kamã mẽ amã hã kagà.

10 Hãmri nẽ hã kagà hpa
nẽ ra ixte kãm mex o mex ã
harênh kaxyw kutã ixkõn krã
ho tēm nẽ nhỹ nhũm tee ri
amnhĩ tã ixpumu nẽ inhmã:

—Kwa ã ri inhĩpêx anhỹr
kêt nẽ. Apyrà nẽ ixte Jejus
mã tanhmã amnhĩ nhĩpêx to
xwýnh kênã. Jejusja apyrà nẽ
kêp inhõ pahihtti na. Jejus
kapêr na prem hkukamã mẽ
kot Tirtũm nhỹ hã kapêr o mẽ
pa xwýnhjaja hã kagà nẽ mẽ
kãm harênh o pa. Jakamã
kwa pu mẽ Tirtũm pix kutã
mãn pahkõn krã ho parôrök
nẽ pahkrĩ nẽ kãm mex o mex
ã harê. Aně.

*Kawar jaka hã ýr xwýnh
jarênh*

11-16 Tã pa kê axte mẽmoj
pumu. Nhũm kaxkwa axkjê
nhũm kamã kawar jakajre xa
nhũm mēhõja hã nhỹ. Hixi
na pre kêp “Aa kot Tirtũm
kaga hkêt xwýnh.” Aně nẽ
hixi hõ na pre kêp: “Tirtũm
kôt pix mã amnhĩ nhĩpêx o
pa xwýnh.” Aně. ã hixi kot
anhỹr jakamã na hte katãt
kôt ahpýnhã mẽ kot amnhĩ
nhĩpêx ã mẽ omunh xà hkôt
tanhmã mẽ harênh to. Mẽ kot
amnhĩ to mex ã mẽ omunh
xà hkôt tanhmã mẽ hkwýjê
jarênh to nẽ mẽ kot amnhĩ
tomnuj ã mẽ omunh xà hkôt
ahpýnhã tanhmã hkwýjê
jarênh to. Na pre mẽ kot
tanhmã hkwýjê nhĩpêx to
ho pa xwýnhjê kutã amnhĩ
xunhwý nẽ mẽ hã tanhmã
mẽ ho. ã na pre kawar ã ýr
xwýnhja amnhĩ nhĩpêx anhỹr
o pa.

Ně no te kot kuwy hpôk
pyræk jakamã hprĩ hã mẽmoj
piitã omu nhũm mẽmoj kêp
hpimxur kêt nẽ. Ně kêp
pahi hã mẽ ahkã ho ohtõ nẽ

kutu. Nē nhỹhỹnh ĩ hã hixi hõ hã kagà nom ãm tapxipix kot amnhĩ tã amnhĩ nhĩxija pumunh. Na pre ra amnhĩ kamrô ho ê xy hpa nē xa. Nē hixi hõ pê:

TĪRTŪM KAPĒR O AMNHĪRĪT
XWŸNH

Nē ê ryti hã hixi hõ hã kagà. Nē ihkjê hã ãm tãm. Hã kagà jarênh kot:

Ixpê mē ho amnhĩptàr xwŸnh piitã mē õ Pahi Maati na pa.

Nē hakwa rŭm wapo xwa gixre põm katon ajêt. Kot ho tanhmã mē kot Tirtŭm mē wa kutã amnhĩ xunhwŷr xwŸnhjê nhĩpêx to kaxyw. Jakamã ra mē piitã mē ho pikuprõnh pa nē mē hipêx o te mē kot prês kãm uwa xô kagô janênh pyrãk nhŭm mē hkamrô hpikapĩr rax kumrêx. Tirtŭm xihtỳx xwŸnh kot mē kamã gryk tỳx jakamã nhŭm ã kãm mē hipêx anê. Mē kot amnhĩ tomnuj o paja mỳrapê.

Nhŭm õ pôristi piitã uràk nē kawar jakare hã hkrĩ nē hkôt ri pa. Mē ê jaka muxre jagjê nē hã ma hkôt ri pa.

17-18 Tã pa axte Tirtŭm kapêr o mē wrỳk xwŸnh õja pumu nhŭm myyti kutã xa nē kax pê nhônhti mã kapêr nē mē kãm:

—E mē amnê mē ixwŷr wrỳ nē Tirtŭm ã akĩnh nē mē htyk nē mē hikwŷ xwŸnhjê hã atu nē aku. Mē ho amnhĩptàr xwŸnhjaja nē pôristijaja nē mē hkrãhtŭm nē kawar nē kawar ã mē hkrĩ nē ri mrar xwŸnhjaja nē mē kot amnhĩ to rŭnh xwŸnhjaja

nē mē kot amnhĩ to hkryre xwŸnhjaja. Nē mē kãm mē àpênh xwŸnhjaja nē amnhĩ mã ri mē àpênh xwŸnhjaja. ãm mē htyk nē mē hikwŷ xwŸnh mŷj piitã mãmri mē hwŷr wrỳ nē mē hã atu nē mē aku. E mē tokyx nhônhti. Anê.

19 Tã nhŭm mrymnuti nē krĩ piitã hkôt mē õ pahi nē mē õ pôristijaja piitã axpên wŷr akuprõ. Wam kawar jakare hã ŷr nē htêm xwŸnh mē õ pôristijê hwŷr hprõt nē mē hkurê kaxàr kaxyw axpên mar kaxyw akuprõ.

20-21 Hãmri nē mē hwŷr mra nē mē hkurê kapa. No ãm tee ri amnhĩ nhĩpêx nē tee ri kãm tanhmã mē ho hprãm hkapyr nhŭm wam kawar jakare hã ŷr nē htêm xwŸnhhta hakwa rŭm wapo xwagixre kator o mē himex pa. Hãmri nhŭm mē hkwyjê pyràn htyk pa nē hikwŷ. Nhŭm nhônhti mē omu nē mē hwŷr wrỳk o mra nē mē kuku hãmri nē kãm mē hkur kaga nē mē hkaga. No nhŭm mrymnuti nē ŷ hã mē kãm hêx o pa xwŸnhhta wa nhŭm mē axtem nē htĩr rãhã wa unê nē ma wa o tẽ nē êsôf o kuwy maati kamã wa kumê. Hãmri nhŭm wa kamã htĩr tŭm nē hxêt rãhã nē pa ho pa nē aa htyk kêt nē.

20

Mē kot Satanasti hpa hpre hã mē harênh

Wam Korit 15.20-28

1 Tã pa kê axte mēmoj pumu. Nhŭm Tirtŭm kapêr o mē wrỳk xwŸnhjê hõja kaxkwa rŭm wrỳ nē ahkre

xupÿmti hpro xà ho htÿx xà hã safja py nê kàx pytihti ho mē hpre xàja õ py.

²⁻³ Hāmri nē kagāmnuti pē hēx xwÿnh maati Satanastija pynē. Amnepēm Atāw mē Ewa wa kām hēx xwÿnhata pynē nē kàx pyti o hpa hpre nē hte hpre hāmri nē ahkre xupÿmti nhītom xà mē nē kamā kumē. Hāmri nē akupÿm hpro xà ho hpro nē saf o hã ho htÿx. Kot pika piitā hkôt mē kām hēx o pa pymaj ā hipēx anē. Koja tokyx kator kêt ry rax kumrēx. Koja kamā arī hkrī hã amgrà xohtô nē. Hã amgrà pē 1.000 nhūm rī kormā Tirtūm akupÿm kator nhūm kato nē ri pa. Nom pa hkrānre.

⁴ Tã pa mē htyk nē akupÿm mē htīr xwÿnh kwÿjē pumu. Kormā mē htīr ri na prem Tirtūm kapēr kôt pix mā amnhī nhīpēx o pa. Nē Jejus kēp mē õ pahīhti hã harēnh rāhã ho pa. Aa mē kot mrym-nuti kutā hkōnkrā ho rôrōk nē kām mex ā harēnh kêt. Nhūm prem tee mē ôkrā hã nē mē ĩhkra katut ā mrymnuti nhīxi nhīpēx kaxyw nom nhūm prem hkaga kamā hihtÿx nhūm prem kām mē hkurē xwÿnhjaja tee ri ja hã mē omu nē mē mut jakār o mē kupa. Hāmri nhūm Tirtūm akupÿm mē ho mē htīr nē mē kot mē ho amnhīptār ā hkrī xà kamā mē hkrī. Jejus nhīhkô hã mē hkrī hã amgrà pē 1.000 kaxyw.

⁵ Mē kumrēx na pre Tirtūm akupÿm mē ho mē htīr nhūm mē hkwyjaja mē hkīnh ā arī ty

nē hikwÿ hã amgrà pē 1.000 jakre nhūm rī kormā akupÿm mē ho mē htīr.

⁶ Wam akupÿm mē htīr xwÿnhjaja kēp Tirtūm kra jakamā koja mē Tirtūm kra hkêt xwÿnhjē kurom hkīnh nē pa ho pa. Nē mē kurom mē kot amnhī xà htÿx kamā hamak o pa htūm xà wÿr pa hkêt nē. Nē mē kurom Tirtūm mē Kra Jejus Kris wa kuri mex kumrēx nē wa kām tanhmā ri amnhī nhīpēx to ho pa. Nē Jejus nhīhkô hã mē ho amnhīptār o pa hã amgrà pē 1.000.

Tirtūm kot kuwy hwÿr Satanasti mēnh ā harēnh

⁷ Tã koja amgrà pē 1.000 hapēx nhūm rī kormā Tirtūm kapēr o wrÿk xwÿnhja akupÿm ahkre xupÿm wÿr tē nē Satanasti mā kahē xà mē nhūm kato.

⁸ Hāmri nē kē axte pika piitā hkôt tanhmā mē kām hēx to ho ri pa. Gorti nhō xwÿnhjē mā nē Makok nhō xwÿnhjē mā nē krī piitā hkôt Tirtūm nē tanhmā mē kām hēx to ho mē hkôt pa. Hāmri nē mē kot Tirtūm krajē kutā amnhī xunhwÿr nē mē hkurē kaxār kaxyw amnhī kwÿjē ho akuprō nhūm mē ohtô rax kumrēx nē axpēn wÿr akuprō. Te pikahti grà xohtô pyrāk.

⁹ Hāmri nē ma Tirtūm krajē nhīmex par kaxyw mē hwÿr mra nē mē õ krī mā hipōk pa nē kuhē. Mē õ krīja Tirtūm mā mex tã nhūm mē kot kēp grānh par kaxyw ma hwÿr mra. Hāmri nhūm kaxkwa

rũm kuwy hpôkja mẽ haêr pê mẽ hã rôrôk nê mẽ ho hxêr pa.

¹⁰ No mẽ kãm hêx xwÿnh maati Satanastita nhũm Tĩrtũm kapêr o wryk xwÿnhja axte unê nê ma êsôf o kuwy maatita wÿr o tẽ nê kamã kumê. Ra mẽ kot kamã mrymnuti wa kot Tĩrtũm nê mẽ nokupyr o pa xwÿnh wa mẽnh tã wa hkôt Satanasti mã ho anê nê kamã kumê nhũm kamã pa ho pa. Koja mẽ aa kator kêt kumrêx. Nê arĩ kamã amnhĩ xà htÿx kamã hamak rãhã nê pa ho pa.

Tĩrtũm kot ahpÿnhã tanhmã mẽ piitã mẽ harênh to kaxyw

Matêwre 25.31-46; Juãw 5.25-29

¹¹ Tã pa axte mẽmoj pumu nhũm kaxkwa mẽ pikaja wa ra hapêx pa. Pa Tĩrtũm kot tanhmã mẽ piitã mẽ harênh to hã hkrĩ xà raxja pumu. Nhũm hakajre nhũm Tĩrtũm kamã nhÿ.

¹²⁻¹³ Hãmri nhũm ra mẽ htyk nê mẽ hikwÿ xwÿnh piitã akupÿm hapôx pa nê Tĩrtũm kot tanhmã mẽ harênh to hã hkrĩ xàta kutã hkrĩ pa. Mẽ piitãã. Mẽ kot amnhĩ to rũnh xwÿnhjaja nê mẽ kot amnhĩ to hkryre xwÿnhjaja nê mẽ ho amnhĩptar xwÿnhjaja nê gô xujanãr kãm mẽ mrôr nê mẽ htyk xwÿnhjaja. Ra mẽ htyk nhũm mẽ kot mẽ hagjênh xwÿnhjaja piitã mẽ htykjê papxà rũm hapôx pa nê Tĩrtũm kutã ohtô ho ohtô nê hkrĩ. Hãmri nhũm Tĩrtũm ô kagã py nê kamã mẽ piitã mẽ hixi japêr. Kagã kamã ra

mẽ hkukamã mẽ htĩr tũm nê mẽ pa ho mẽ pa mã xwÿnhjê nhĩxi japêr. Nê kagã hõ kamã mẽ htĩr ri tanhmã mẽ kot amnhĩ nhĩpêx to ho pa hã mẽ piitã mẽ hã kagãja. Nhũm kupy nê kamã tanhmã mẽ harênh to nê hkôt hprĩ hã mẽ piitã mẽ omunh pa nê rĩ kormã ahpÿnhã tanhmã mẽ harênh to.

¹⁴⁻¹⁵ Hãmri nê mẽ htĩr tũm nê mẽ pa mã xwÿnhjê nhĩxi hã kagãja kamã tee ri mẽ hkwyjê nhĩxi japêr nhũm kamã amrakati. Jakamã nhũm mẽ ma kuwy maatita wÿr mẽ o mra nê kamã mẽ rênh pa. Te axte mẽ htyk nhũm mẽ kot kuwy kamã mẽ hagjênh pyrãk nhũm mẽ kamã rôrôk nê tee ri amnhĩ xà htÿx kamã hamak rãhã nê pa ho pa nê aa kator kêt kumrêx.

21

Pika mẽ kaxkwa wa nyw jarênh

Sikũn Pêtre 3.8-13

¹ Tã pa axte mẽmoj pumu. Nhũm Tĩrtũm ra pika mẽ kaxkwa nyw wa ho kato. Ra pika nê kaxkwa nê gô xujanãr tũmja hapêx pa nhũm kaxkwa mẽ pika nyw wa ho kato. Nom axte gô xujanãr o kator kêt nê.

² Hãmri nhũm Tĩrtũm nhõ krĩ mex pê Jerujarê nywja tanhmã amnhĩ to nê pika nyw wÿr wryk o mō. Krĩja mex kumrêx. Mex o mex. Te mjên mã xwÿnh ê mex jaxãr nê amnhĩ to muxre nê mjên wÿr htêm pyrã nê pika nyw

wÿr mex kumrëx nê wrÿk o mō.

³ Hāmri nhūm Tīrtūm kot mē ho amnhīptār ā hkrī xà maatija kamā mēhōja kapēr o:

—Nà ām hāmri. Na ra Tīrtūm hkrajê hkôt pa ho pa. Pika nyw kamā mē hkôt pa ho pa nhūm mē tā no ho omu nê hkôt pa ho pa rāhā nê. Nà ām hāmri. Ja mex o mex.

⁴—Koja hkrajaja hkôt pa ho pa nê axte htyk kêt kumrëx. Nhūm Tīrtūm mē nê mē no kagô nhīnhīnh pa nhūm mē axte hkaprī nê mÿr kêt nê. Nê ri axte amnhī xà kamā hamak kêt nê. Nê axte ri tanhmā omnu hto hkêt nê. Ra mē hkaprī nê à nê mÿr o pata hapêx par kumrëx nhūm hpānhā mēmoj nyw pix. Anê.

⁵ Hāmri nhūm Tīrtūm tām tanhmā inhmā kapēr to. Krī xà maati kamā ŷr xwÿnhhta tām inhmā kapēr o:

—E na pa ra akupÿm mēmoj piitā ho nyw pa. Jakamā e Juāw. Ām hāmri na pa ā amnhī kukamā amā mēmoj jarēnh anê. Ixêx kêt. Jakamā kêr ka akwÿjê mā piitā hā kagà hpa. Kê mē kamā harē nê tokyx kuma nê hkôt hamaxpēr rāhā ho pa.

⁶—Ra ixte amnhī kukamā mēmoj mā ijamaxpēr xwÿnhja na pa ra ho anhÿr pa. Ixpê mēmoj piitā ho anhÿr o hkrax xwÿnh nê määnēn ixpê mēmoj piitā ho ijapêx par xwÿnh. Nê ixrāhā ixpa xwÿnh. Amnepê m kormā mēmoj kator kêt ri na pa pre ixrāhā ixpa. Nê ot pa arī ixrāhā ixpa. Tā mē kām kôr

nê kām gô hkwÿ ho hkōm hprām xwÿnhjê pyrā nê mē kām ixpix prām xwÿnhjaja kot paj te mē kām inhō hino rūm gô hkwÿ nhōr nhūm mē kot ho hkōm pyrāk o mē hipêx. Hāmri nhūm mē htīr tūm nê ixri pa ho pa nê axte htyk kêt nê. Kot paj ā mē hipêx mex anê.

⁷—Mē ate tanhmā amnhī tomnuj to nê amnhī to htÿx nê ixkôt pix mā amnhī nhīpêx o mē apa rāhā mē atyk xwÿnhjaja kot paj ā mē anhīpêx mex anê. Ka mē apê ixkra hā amex nê ixkôt ri apa rāhā ho apa. Pa ixpê mē anhō Tīrtūm ā tanhmā mē ato mex to rāhā ho ixpa.

⁸—No mē kot amnhī kaxyw ixkôt hamaxpēr kêt xwÿnhjaja. Nê mē kot amnhī tomnuj xwÿnhjaja nê mē kot ri mē hpar prām xwÿnhjaja. Nê mē kot nhām ri mēnijê ho amnhīkati xwÿnhjaja. Nê wajagajaja. Nê mē kot amnhī to sānti hwÿr o pa xwÿnhjaja. Nê ri mē hêx nhi xwÿnhjaja. Ā mē kot amnhī nhīpêx anhÿr xwÿnh piitā koja mē apê ixkrajê hkīnhā ma kuwy maati wÿr hapêx par kumrëx. Te axte mē htyk pyrāk nom koja mē axte htyk kêt nê. Anê.

Jerujarē nyw jarēnh

Sikūn Korīt 6.16; Karatas 4.26; Eprêw 12.22-24

⁹ Tā nhūm mē kot xijere pē 7 kamā Tīrtūm gryk xà jamÿnh xwÿnhjê hōja hāmri ixwÿr tē nê inhmā:

—E ma ixkôt tē nê mēmoj pumu. Na ra krī nywja pika nyw wÿr wrÿk o mō. Te mjên

mã xwýnh ê mex jaxàr nê amnhĩ to muxre nê mjên wýr htêm pyrà nê mex kumrêx nê kaxkwa rûm pika nyw wýr wrýk o mō. Nê kot ho mjên mã xwýnhhta te mē pahte amnhĩ tomnuj pãnhã amnhĩrer xwýnhhta pyræk. E tokyx tē nē omu. Anē.

¹⁰ Hãmri nhũm Tirtũm Karõ tanhmã ixto pa ma kot inhmã kapēr xwýnhhta kôt tē nhũm ma ixto mō nē kēn krã hprêeti hwýr ixto api nē himōk ã ixãm. Pa Tirtũm nhõ krĩ mex pē Jerujarē nywja pumunh o xa. Nhũm mex o mex. ãm hãmri te mjên mã xwýnh kot ê mex jaxàr nê amnhĩ to muxre nê mjên wýr htêm pyrà nê ahpar mã wrýk o mō pa ixprĩ hã omu.

¹¹ Na pre rax o rax nê mex o mex. Tirtũm kamã pa ho pa jakamã nhũm kamã hirã htýx kumrêx. Te kēn mex ã kàxpore xohtô jaxênh mex týt pyræk.

¹²⁻¹³ Nê krĩ puhã kahêja hprêk rax nê. Nê hwýr mē gjêx xà kēp 12. Na pre myt japôx xà rûm axkrunēpxi. Nê myt gjêx xà rûm haxwýja axkrunēpxi. Nê akutã kahpa hkôt haxwýja axkrunēpxi. Nê ahpýnhã hakwakre hã Tirtũm kapēr o wrýk xwýnhhaja hamãr o kuhê. Nê hakwa kre piitã hã Ijaew pē ahpýnhã mē pikjêr kãm mē kēp 12jaja mē hixi hã kagã.

¹⁴ Nê kahê xunhwýr xà hkukamã kēn pytyrja ahpýnhã kēp 12. Kēn pytyrta ã na mē kot Jesus nhý hã mē ahkre o mē pa xwýnh maati pē 12jê nhixi hikwý.

¹⁵ Tã nhũm kot ixto mōr nê inhmã mēmoj jahkre xwýnhhta ôr o mēmo pĩ py nê kot ho krĩ ho mĩdi kaxyw xa. Nê ho kahê piitã ho mĩdi kaxyw. Nê mē gjêx xàja ho mĩdi kaxyw.

¹⁶⁻¹⁷ Hãmri nê ho mĩdi hpa. Krĩja ry nê kahpa piitã axpēn pyræk. Nê hprêk piitã määnēn axpēn pyræk. Kamã mēmoj piitã ahpýnhã kēp 2.200 kirôm. No puhã kahêja hprêk o 64 met pix nê.

¹⁸ Nê kahêja kēn jaxênh pix o kot amnhĩ nhĩpêx jakamã mex o mex. Nê hkarýr týt kumrêx. Nê kahê hkre kamã krĩ kamã ahpýnhã ri ixkreja ôr pix o kot amnhĩ nhĩpêx. Nê piitã hkarýr týt.

¹⁹⁻²⁰ Nê kahê xunhwýr xà hkukamã kēn pytyrta ahpýnhã ri kēn mex pix o kot amnhĩ nhĩpêx. Piitã mex kumrêx nê hkarýrti.

Wamta kawax pē grãgrãre. Nê hkôt ja kawax pē grãgrã kakrã htyk.

Nê hkôt ja kakrã htyk.

Nê hkôt hõja grãgrã karýr.

Nê hkôt ja hkamrêk pihkãrti.

Nê hkôt ja grãgrã kakrã htyk.

Nê hkôt ja hkamrêk týt kumrêx.

Nê hkôt ja rãrààre.

Nê hkôt ja grãgrã mē pihkãr.

Nê hkôt ja rãràr mē pihkãr.

Nê hkôt ja grãgrã karýyre.

Nê hkôt ja kakrã htyk pihkãr.

ã kēn pytyr mex kot anhýr.

²¹ Nê mē gjêx xà hã hakwakre kahê xà pē 12ja mēmo

kēn jakooti rūnh kumrēx pix o. Nē krī kahti hkôt pry nhīkwỹ xwýnhja âm ôr pix o. Nē hkarýȳre.

22 Pa pre tee ri krī kamā Tirtūm mā amnhī jarēnh xà hā ixkre japêr nhūm amrakati. Mo kaxyw koja mẽ axte ixkreja hwýr mra? Ra Pahi Maati Tirtūm xihtýx xwýnh mẽ mẽ pahte amnhī tomnuj pānhā amnhīrer xwýnhhta ra hkrajê kamā pa ho pa kēnā kot kêt mẽ axte ri ixkreta o presija. Koja mẽ kām wa mex ā wa kām harēnh prām nē nhýri tām wa hwýr mra nē ā wa kām kapêr anē. Te mẽ pahte pahi hwýr pamrar nē kām pakapêrta pyrā nē wa hwýr mra nē wa kām kapêr.

23 Nē koja krīja kamā myyti nē mytwrýre hkêt. Mo kaxyw kot kêt myyti nē mytwrýreja arī ri hirā ho pa? Krī kamā Tirtūm pa ho pa jakamā kamā hirā mex kumrēx. Nē mẽ pahte amnhī tomnuj pānhā amnhīrer xwýnhhta haxwýja kamā pa ho pa. Te kēp kanê hpôk rax kumrēx pyrā nē hirā mex o pa. Kot hirā mex o kot myyti jakrenh. Ā Tirtūm mẽ Kra wa krīja kamā pa ho pa jakamā nhūm mẽ axte myyti ho presija hkêt nē.

24 Koja krī nhō xwýnhjaja hirā mex pix kām ri pa ho pa nē tām ri amnhī nhīpêx o ri pa. Tā koja mẽ ho amnhīptār xwýnhjaja Tirtūm wýr mra nē amnhī rom kām mex o mex ā harē nē kām:

—Na pre mẽ ixkwýjaja mẽ ixpê mẽ ho amnhīptār xwýnh

ā xpēn mā mẽ inhmex nē mẽ ixàhpumunh ā ri xpēn mā mẽ ijarē. Nom mẽ ixrom amex o amex nē axàhpumunh o axàhpumunh. Jakamā âm hāmri na htem amā amex o amex ā ajarē Tirtūm. Anē.

25 Nē krī hwýr hakwakre koja amnhī kahê xà rēnh rāhā kuhê nē aa amnhī kahê hkêt nē. Jar mẽ panhō pika kamā na hte kamāt kaxyw nhūm htem amnhī tā hakwakre kahê hpa. No mo kaxyw koja mẽ axte pika nywja kamā ā amnhī nhīpêx anē? Koja kamāt kêt nē hirā rāhā ho rāhā jakamā nhūm mẽ amnhī tā kahê hkêt rāhā nē pa ho pa.

26 Nē koja mẽ piitā Tirtūm wýr mra nē kām mex o mex ā harē nē kām:

—Pa Tirtūm. Hêxta waa nē. Anhō krīja mex kumrēx. Mex o mex. Nē mẽ ixrom amex o amex nē axihtýx o axihtýx. Nē mẽ ixrom axàhpumunh o axàhpumunh. Âm hāmri na ka ra mẽ ixpê akrajê kamā apa ho apa Tirtūm. Anē.

27 Nē koja mẽmoj punuj krīja wýr gjêx kêt kumrēx. Mẽ hpijaàm kêt xwýnhjaja nē ri mẽ hêx xwýnhjaja hwýr gjêx kêt nē. Âm mẽ pahte amnhī tomnuj pānhā amnhīrer xwýnhhta nhō kagà kamā Tirtūm ri mẽ htír tūm nē mẽ pa mā xwýnhjê nhīxi nhīpêx xwýnh pixjaja koja mẽ hwýr agjê nē kamā pa ho pa.

22

1-2 Tā pa pre axte mẽmoj pumu. Nhūm Tirtūm kapêr o wrýk xwýnhja axte inhmā mẽmoj jahkre. Nhūm

Tirtüm mẽ kot mẽ pahpãnhã amnhĩrer xwýnhja wa kot mẽ ho amnhĩptàr ã hkrĩ xà maati rùm pyhti hprôt. Krĩ kahti hkôt pry pohti nôr xwýnhhta kahti hkôt hprôt o nõ. Pyhti kamã gôja na htem ho ixkô nê htĩr tùm nê pa ho pa. Gô karýy're. Nhùm mẽmo pĩ hpàr muxre xwýnhja akutã hijê nê xa. Pĩ xôja na htem kuwô nê htĩr tùm nê pa ho pa. Na hte apkati mẽ ô rãhã nê kuhê. Nê axtem hôja mẽ piitã mẽ mex nê à hkêt kaxyw na hôja.

³ Amnepêm na pre Tirtüm Atãw mã kapêr nê kãm:

—Ate amnhĩ tomnuj mýrapê kot paj tanhmã pika homnu hto nhùm apê mex kêt nê. Ka kamã apur nê kamã axapênh rũnh o apa rãhã nê rĩ kormã kamã axàpkur o ri apa. Apê jamnuj tã kot kaj mẽ ã amnhĩ nhĩpêx anhỹr o apa rãhã ty. Anê.

Tã ra Tirtüm nhõ krĩ nyw kamã mẽ omnuj xãja amrakati kumrêx. Nê Tirtüm mẽ kot mẽ pahpãnhã amnhĩrer xwýnhhta wa õ krĩ kamã pa ho pa jakamã mẽ pahte kamã mẽ papa xwýnhjaja kot puj mẽ wa kãm tanhmã amnhĩ nhĩpêx to ho ri papa.

⁴ Kot puj mẽ tã pano ho Tirtüm pumunh o papa. Hãmri nhùm te mẽ pahpiitã mẽ panhõkrã hã amnhĩ nhĩxi nhĩpêx pyrãk o mẽ panhĩpêx.

⁵ Nê kot puj mẽ Pahi Maati Tirtüm nhĩrã kamã ri papa nê axte myyti nhĩrã ho presija hkêt nê. Koja kamàt hapêx pa pu mẽ axte kanê ho presija hkêt nê. Nê Jesus

nhĩhkô hã hirã kamã mẽmoj to amnhĩptàr rãhã ho papa.

Jejus tokyx akupÿn wrÿk ã harênh

Apokarip 1.1-3

⁶ Tã nhùm Tirtüm kapêr o mẽ wrÿk xwýnh kot ixto môr xwýnhhta axte inhmã kapêr nê inhmã:

—E nã ãm hãmri na ixte amã mẽmoj piitã harênh xwýnhja. ãm hãmri na. Jakamã kwa kêr ka arĩ hã ano htÿx rãhã ho apa. Amnepêm Tirtümja ÿ hã mẽ kapêr o pa xwýnhjê mã tanhmã kapêr o amnhĩrit to. Kot tanhmã amnhĩ nhĩpêx to hkukamã mẽ kãm ho amnhĩrit nhùm prem kuma nê ô ri ma hkwÿjê mã harênh o ri mẽ hkôt pa. Tã ra mẽ hpãnhã pa mẽ awÿr inhmê. Mẽ ate Tirtüm mã tanhmã amnhĩ to ho apa xwýnhjê mã ixte ja jarênh kaxyw Pahiiti Tirtümja mẽ awÿr inhmê pa wrÿ. Nã koja mẽmoj tokyx ã amnhĩ nhĩpêx anê.

⁷ Na pre Jejus mẽ amã amnhĩ jarênh o: “Kot paj tokyx akupÿm mẽ awÿr wrÿ. Tã mẽ ate ijarênh ã kagã kamã harênh nê mar nê amnhĩ kaxyw hkôt ajamxpêr nê hkôt amnhĩ nhĩpêx xwýnhjaja kot kaj mẽ akĩnh nê ri apa.” Anhỹr o amnhĩ jarê. Anê.

⁸ Nã ixpê Juãw na pa pre ã inhno ho mẽmoj pumunh anê. Hãmri nê omunh pa nê Tirtüm kapêr o wrÿk xwýnh kot inhmã harênh xwýnhhta kutã ixkôn krã ho ixtêm nê inhÿr kaxyw. Nom nhùm

amnhĩ nê inhmã kapêr kãm
hihtýx nê inhmã:

9 —Kwa nà ri ã inhĩpêx
anhÿr kêt nê. ãm Tĩrtũm pix
kutã na pu htem ã amnhĩ
nhĩpêx anê. Apyrà nê ixpê
Jejus kwý kênã. Na pa hte
apyrà nê ÿ hã tanhmã amnhĩ
nhĩpêx to ho ixpa. Nê mẽ
apyrà nê kapêr ã kagà hkôt
pix mã amnhĩ nhĩpêx. Na pu
htem axpên kutã pahkôn krã
ho parôrok kêt nê. ãm Tĩrtũm
pix kutã na pu htem ã amnhĩ
nhĩpêx anê.

10 —E ã ate mẽmoj pumunh
nê mar anhÿr xwýnhja koja
tokyx ã amnhĩ nhĩpêx anê.
Jakamã kwa kêr ka akwýjê pê
ho apimxur kêt nê. Piitã hã
kagà hpa kê mẽ kamã harê nê
kuma nê mẽmoj kot ã amnhĩ
nhĩpêx anhÿr mã xwýnhhta pi-
itã hkukamã harênh ma. Koja
tokyx mẽmoj ã amnhĩ nhĩpêx
anê.

11 —Jakamã kwãr mẽ mãmrĩ
piitã tanhmã kãm amnhĩ
nhĩpêx to ho pa hprãm xà
hkôt amnhĩ nhĩpêx o pa.
Kwãr mẽ mẽ kot amnhĩ
tomnuj xwýnhjaja ã amnhĩ
anhĩpêx anhÿr o pa. Nê kwãr
mê kot tanhmã kapêr punuj
to xwýnhjaja mãmrĩ ã amnhĩ
nhĩpêx anhÿr o pa. Nê kwãr
mê kot tãm amnhĩ nhĩpêx o
ri mẽ pa xwýnhjaja mãmrĩ
Tĩrtũm kôt pix mã ri tãm
amnhĩ nhĩpêx o pa. Anê.

Nhũm pre ã kaxkwa hwÿr
ixto àpir xwýnhhta inhmã
kapêr anê.

12 Hãmri nhũm hpãnhã
Jejus tãm inhmã kapêr nê

inhmã:

—E kot paj tokyx akupÿm
mê awÿr wrÿ. Nê akupÿm
pôj hãmri nê mẽ kot amnhĩ
tomnuj o mẽ pa xwýnhjaja pa
ja mÿrapê ma mẽ kot amnhĩ
xà htýx kamã hamak tũm xàta
wÿr mẽ rênh pa. No mẽ kot
ixkôt amnhĩ nhĩpêx xwýnhjaja
kot paj akupÿn inhõ krĩ hwÿr
amnhĩ kôt mẽ ho api.

13 —Nê ixrãhãã xwýnh na
pa. Amnepê mã kormã
mẽmoj kêt ri na pa pre ra
ixrãhãã. Nê koja nhÿrmã
mẽmoj piitã akupÿm hapêx pa
arĩ ixrãhã nê ixpa ho ixpa.

14 —Nê Tĩrtũm kot mẽ anê
mê ate amnhĩ tomnuj kuhõnh
par xwýnhjaja kot kaj mẽ
amex kumrêx nê apa ho apa.
Nê akĩnh nê ajamakêtkati nê
ri atýx apa ho apa. Te ho
mê kot amnhĩ xê kahõnh nê
mex jagjênh nê ri hã pata
pyràk. Koja Tĩrtũm mẽ amã
anê ka mẽ ajamakêtkati nê
õ krĩ hwÿr agjê nê kamã ri
amex kumrêx nê ri apa ho
apa. Nê kamã mẽmoj pĩ xô mẽ
kot kur nê htĩr tũm nê pa mã
xwýnhhta wÿr mra nê amnhĩm
ô rê nê hkur o ri apa. Ra mẽ
ate Jesus kôt amnhĩ xunhwÿr
jakamã kot kaj mẽ axãmnhĩx
hwÿr mra nê amnhĩm hkwy
rê nê hkur o ri apa. Kot kaj
mê ã amnhĩ nhĩpêx anê.

15 —Nom mẽ kot amnhĩ
tomnuj o mẽ pa xwýnhjaja
koja mẽ akĩnhã inhõ krĩ hwÿr
gjêx kêt nê. Mê kot ri mẽ y ho
mê pa xwýnhjaja. Nê mẽ kot
nhãm ri mênijê ho amnhĩkati
ho mẽ pa xwýnhjaja. Nê
mê kot ri mẽ hpar o mẽ pa

xwÿnhjaja. Nē mẽ kot ri sãnti nhÿpêx o te Tÿrtũm nhÿpêx pyrãk o mẽ pa xwÿnhjaja. Nē mẽ kãm ri hêx prãm o ri mẽ pa xwÿnhjaja. Koja mẽ akÿnhã inhõ krÿ hwÿr pa hkêt nê.

16—E Juãw. Nà ixpê Jejus na pa awÿr ixkapêr o mẽ wrÿk xwÿnhta mẽ. Kot ixkwÿjê kaxyw amã ixkapêr jarênh kaxyw. Ixpê Tawi pãr krax na pa. Te ixpê arÿgro hkôt kanhêti hpôk rax kot arÿgro ho môr ã ho amnhÿrÿt xwÿnhta pyrãk. Anê.

Nhũm pre ã Jejus inhmã kapêr anê.

17 Tÿrtũm Karõ mẽ Jejus kwÿjaja na htem ã Jejus kot amnhÿ jarênh anhÿrja ma nê hkÿnh nê. Nê kãm kapêr o:

—Hêxta waa nê. Kwa amnhÿm anojarêr nê tokyx akupÿn mẽ ixwÿr wrÿ Pahÿhti. Pa mẽ tokyx ã amnhÿ nhÿpêx anhÿr o ri war akôt ixpa. Anê.

Nê mẽ ate ja mar xwÿnhjaja kêr ka mẽ urãk nê ã kãm akapêr anê.

Nê te mẽ amã kôr nê ri mẽ apa pyrãk xwÿnhjaja kêr ka mẽ te Jejus wÿr amrar nê õ gô ho akôm pyrã nê hkôt amnhÿ xunhwÿ. Te Jejus amarÿ mẽ pamã õ gô nhõr pyrãk o mẽ panhÿpêx pu mẽ hkôt amnhÿ xunhwÿ nê ra pahpê pahÿr tũm nê papa mã xwÿnh. Hãmri nê amnhÿ pãnhã tanhmã kãm amnhÿrer to hkêt nê.

Nhÿrmã mẽmoj nyw par ã harênhjatur xà

18 E ixpê Juãw na pa Jejus nhÿ hã mẽ amã mẽmoj

tanhmã kot amnhÿ nhÿpêx to hkukamã ã mẽ amã hã kagã anê. Tã kwa mẽ o kora. Kêr ka mẽ atõ amnhÿ krã hkôt ri ajamaxpêr o te ho ja pyrã nê hijuk ri axte mẽmoj nhÿpêx kêt nê. ãm kwarÿ ho kwarÿ. Kot ka mẽ atõ anê nhũm Tÿrtũm ja hã apumu nê kagãja kamã tanhmã mẽ hipêx kati hto xàta o tanhmã anhÿpêx to ka arÿ amnhÿ pumu.

19 Rÿ ka mẽ atõ kagã kamã harê nê ama nê tanhmã ajamaxpêr to nê ajamaxpêr o:

—Nà ja kot anhÿr kêt. Na mẽ ãm harênh o hêx. Kot paj kuma nê ãm kuma.

Anhÿr o ajamaxpêr japêr. Hãmri nhũm Tÿrtũm amnhÿ tã ama nê kagã mexta kamã kot tanhmã mẽ ho mex toja o ato mex kêt nê. Ka õ krÿ hwÿr axãpir nê mẽmo pÿ xõ mẽ kot hkur nê htÿr tũm nê pa kaxyw mã xwÿnhta ka amnhÿm hõ hyr nê hkrêr kêt nê. Jakamã e kwa mẽ o kora. Kêr ka mẽ kagãta kamã ã mẽmoj kot amnhÿ nhÿpêx anhÿr mã xwÿnhta jarênh ma nê aprÿ hã piitã hkôt ajamaxpêr tÿx rãhã ho ri apa.

20 E Jejus kot inhmã mẽmoj kukamã tanhmã ujarênh to xwÿnhta na pre inhmã amnhÿ jarênh o: “Kot paj tokyx akupÿn mẽ awÿr wrÿ.” Anê. ãm hãmri na pre ã amnhÿ jarênh anê. Koja tokyx akupÿn mẽ pahwÿr wrÿ hãmri nhũm mẽmoj piitã mex o mex.

Jakamã kwa kêr ka amnhÿm anojarêr nê tokyx akupÿn mẽ ixwÿr wrÿ Pahÿhti Jejus.

²¹ Nē ixpyrà nē mẽ apê Tĩrtũm krajaja na pa hte mẽ ato Pahihti Jejus wỳr rãhã ho ri ixpa nē kãm:

—Kwa akwỳjê pumu nē mẽ kutã anojarêr rãhã ho ri apa

Pahihti. Anẽ.

E mẽ ujarẽnhja na hapêx. Ixpê Juãw na pa Jejus kot inhmã tanhmã ujarẽnh toja pa amnhĩ xô ri mẽ amã hã kagà hpa. E na hapêx.